

Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

383a4e22-34cd-505f-9cc2-2f9921e7aa9f

Contents

Matêwre	1
Makre	83
Rukre	130
Juãw	215
Atre	276
Rõmãn	348
Wam Korît	390
Sikũn Korît	428
Karatas	452
Epes	467
Piripos	481
Korosẽ	490
Wam Tesarõn	499
Sikũn Tesarõn	506
Wam Ximotre	510
Sikũn Ximotre	521
Xitre	528
Piremõ	533
Eprêw	535
Xiakre	564
Wam Pêtre	574
Sikũn Pêtre	585
Wam Juãw	591
Sikũn Juãw	600
Hapuhã Juãw	602
Jutre	604
Apokarip	608

Matêwre Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwýnh na pre. Nê kêp Ijaew. Hixi hõ pê na Rewi. Tã na pre mẽ pamã kagàja nhĩpêx nê kamã Jejus kot pika hwýr wrýk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mẽ panhõ pahшти mex o mex ã harê nê hã kagà. ã na pre Matêwre mẽ pamã Jejus jarê nê hã kagà anê.

Apraãw kanrêhã hkra nê htãmnhwýjê nhĩxi

Rukre 3.23-38

¹ Amnepêm Jejus Kris kormã pika hwýr wrýk kêt ri hkukamã higêtjê nhĩxi na jajaja. Wýj ri higêtjê hõ nhĩxi na pre kêp Tawi. Nê Tawi xwýj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mẽ htõjaja.

³ Nê Juta hkra na pre wa kêp Pere nê Jera.

Nê Pere mẽ Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahihti Tawija.

Nê Tawi hkra na pre kêp Sarumãw.

Sarumãw katorxàja Uristi hprõ na pre.

Tã nhũm pre Uristi ty nhũm Tawija

hãmri mýrpê Uristi hprõ ho hprõ nê

kamã hkra. Nhũm wa hkraja kêp

Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti.

Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

¹¹⁻¹² Nê Josis kra na pre kêp Jekonĩs mẽ htõjaja.

Kormã mẽ htĩr ri na pre Papirõn nhõ xwýnhjaja kot mẽ hkurê kaxàr kaxyw mẽ hwýr hprõt nê mẽ unê. Ijaew piitã unênh pa nê ma akupým mẽ õ pyka hwýr mẽ ho hapêx nhũm mẽ hpãnhã Papirõn kamã pa ho pa. Jakamã nhũm Josis mẽ hkra Jekonĩs mẽ htõjaja mẽ hipêêxà pyrã nê Papirõn kamã pa ho pa.

Nê Jekonĩs kra na pre kêp Saraxi.

Nê Saraxi hkra na pre kêp Joropape.

¹³ Nê Joropape hkra na pre kêp Apiux.

Nê Apiux kra na pre kêp Eriakĩ.

Nê Eriakĩ hkra na pre kêp Ajo.

¹⁴ Nê Ajo hkra na pre kêp Satok.

Nê Satok kra na pre kêp Akĩ.

Nê Akĩ hkra na pre kêp Eriux.

¹⁵ Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

¹⁶ Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jejus.

Mẽ kot kãm: “Tĩrtũm kot mẽ pakaxyw ãm xwýnh” anhỹr xwýnhnta na pre.

¹⁷ Nhũm Apraãw kanrêhã axte axpên kanrêhã mẽ àptàr nywjaja Tawija wýr kêp 14. Nê Tawi nhĩrõ pê Papirõn hwýr mẽ hapêx kêt ri axpên kanrêhã mẽ àptàr nywjaja mããnên kêp 14. Nê ra Papirõn kamã mẽ pa nhĩrõ pê axpên kanrêhã Jejus pê Tĩrtũm kot mẽ pakaxyw ãm xwýnhnta wýr mããnên kêp 14. ã na pre Jejus Kris xwýj ri higêtjê nhĩxi anê.

Jejus Kris kator

Rukre 1.26-38, 2.1-7

¹⁸ Tã ã mẽ hixi jarênh kot anhỹr kanrêhã na pre ã Jejus Kris kator anê. Nhũm pre

kormã Jujeja Marir o hprõ kaxyw. Nom kormã ho hprõ hkêt ri nhũm htujarô. Kormã hkukrit tâ nhũm Tirtũm Karõ tanhmã ho nhũm htujarô. ¹⁹Hãmri nhũm Jujeja harênh ma nê tee ri hamaxpêr nê htỳx nhãm mêhõ kot kêp htu hã hkamnhĩx. Juje kot tãm amnhĩ nhĩpêx nê tãm hamaxpêr jakamã tee ri kot ho hprõ hkukamã hamaxpêr. Nê hamaxpêr o:

—Nà pa măn ixte hture hã. Nhãm mêhõ ra kot ã hipêx anhỹr kênã. Nà kot paj ho ixprõ hkêt nê. Nom kot paj ixkwỳjê mã ã kot amnhĩ nhĩpêx anhỹr o amnhĩrit kêt nê. Kot paj anê nhũm mễ kuma nê ho kapêr punuj nhũm amnhĩ kamã hpijaam tỳx nê. Ja pymaj kot paj ixkatat kôt hkaga kurê kumrêx. Nom ixkwỳjê hkàx ã hkaga. Anê.

²⁰Nê ã hamaxpêr anhỹrja o ra gõr nê nõ. Nhũm Tirtũm kapêr o mễ wryk xwỳnhjê hõ hwỳr wry nê hwỳr axàn kuri xa. Hãmri nê kãm:

—Pa Juje? E ot pa awỳr tễ. Kwa tee ri Marir o aprõ hkukamã ajamaxpêr punuj kêt nê. Mãmri ho aprõ. Mêhõ kot apê tanhmã ho hkêt. Tirtũm Karõ na pre ã hipêx anê. Jakamã kwa tee ri ajamaxpêr kêt nê mãmri ho aprõ nê war apa. ²¹Koja hkrare kato nê myre nê hprêk. Hãmri nê mễ kot hkôt amnhĩ xunhwỳr xwỳnhjaja mễ kot amnhĩ tomnuj piitã pê mễ utar pa. Jakamã koja kato ka wa hã hixi mễ nhũm kêp Jejus. Anê.

Nhũm pre ã Tirtũm kapêr o mễ wryk xwỳnhja kãm kapêr anê. Ijaew kapêr kãm Jejus jarênhja te kêp “Tirtũm kêp mễ papytâr xwỳnh” anhỹr pyrâk. Jakamã nhũm Tirtũm kapêr o mễ wryk xwỳnhja Juje ot kãm ã kãm Marir jarênh anê. ²²⁻²³Nom kormã ã kãm kapêr anhỹr xwỳj ri na pre ra Tirtũm nhỹ hã kapêr xwỳnhjê hõja kukamã tanhmã harênh to nê hã kagà. Nê hã kagà ho:

E mễ inhma nê inhmar tỳx nê ho apa. Koja nhỹrmã pyka já kamã mễhõ kormã hkukrit tâ htujarô. Nê hkra kato nê myre. Nhũm mễ omu nê hã hixi mễ nhũm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tirtũm mễ pahkôt pa ho pa” anhỹr jarênhja pyrâk. Jakamã nhũm pre Tirtũm nhỹ hã kapêr xwỳnhja Jejus kukamã ã harênh anê nê hã kagà.

²⁴Jakamã nhũm Tirtũm kapêr o mễ wryk xwỳnhja Juje mã kapêr par mễ nhũm hkrâkato. Hãmri nê kot kãm ujarênh xá hkôt Marir o hprõ. ²⁵Nom kormã tanhmã ho hkêt nê ri o pa rãhã nhũm hkrareja kato. Hãmri nhũm wa hã hixi mễ nhũm kêp Jejus nê mãânênh kêp Emanuew.

2

Kanhêti ho studa xwỳnhjê jarênh

¹Nhũm pre Jejus Perěj kamã kato. Pika pê Jutej kamã. Pahi Eroxo kormã kot Jutej nhõ xwỳnhjê ho amnhĩptâr o pa ri nhũm õ pika kamã kato. Hãmri nhũm Tirtũmja kaxkwa kamã Kra kator jarênh xá hã kanhêti raxta õ nhõ nhũm pika hõ kamã kanhêti ho studa xwỳnhjaja omu. Kanhêti pumu nê hkĩnh nê axpên mã:

—Kwa ga mễ kanhêti raxti mễj pumu. Măn ra Ijaew nhõ pahi nywta kato nhũm kanhêti mễj kêp ho amnhĩrit xá hã ajêt. Kwa pu mễ ma hapêr o mễ nê nhỹri tokyx omu nã.

Anê hãmri nê amnhĩ to pikuprõnh pa nê ma hapêr o pa. Ma myt gjêx xá hwỳr hapêr o pa hã apkati xohtõ nê. Hãmri nê ra Ijaew nhõ pika hwỳr pøj nê krĩ pê Jerujarê hwỳr hapêr o mễ. Pahi Eroxo nhõ krĩja wỳr nhũm mễ hapêr o mễ hãmri nê kamã pøj nê mễ hkrare nywta ã krĩ nhõ xwỳnhjê kukjêr o mễ ²nê mễ kãm:

—Pa? Ot pa mễ apê Ijaew nhõ pahi nywreta pumunh kaxyw mễ. Ham kator xwỳnhja. Mễ inhõ pika kamã na pa prem kaxkwa hkrax rùm kot ho amnhĩrit xá hã kanhêti raxta pumu. Hãmri nê nhỹri pahi nywre pumunh nê kutã mễ ixkõn krã ho ixtêm nê ixkrĩ nê kãm mex o mex ã harênh kaxyw nêtãnh mễ inhõ krĩ rùm hapêr o mễ. Kwa mễ inhmã harê. Nhỹri na? Na pa mễ inhmã omunh prãm tỳx kumrêx.

Anhỹr o hã mễ hkukjêr o mễr jakamã nhũm mễ piitã pahi nywja jarênh ma nê axpên mã harênh o hprõt. ³Nhũm pahi Eroxo jarênh ma nê tee ri amnhĩ kukamã hamaxpêr. Pahi nyw kot mễ ho amnhĩptâr ã hkamnhĩx nhũm já kêp omnuj tỳx nê. Nhũm krĩ nhõ xwỳnhjaja ã hamaxpêr anhỹr ã omu nê tee ri amnhĩ kukamã hamaxpêr o ra kãm ma nê. ⁴Hãmri nhũm pahi Eroxoja

amnhĩ wÿr hkwyjê hã karõ. Mẽ õ pa-tre krãhtũmjaja nẽ Tĩrtũm kapêr tũm o mẽ ahkre ho mẽ pa xwÿnhjaja nhũm amnhĩ wÿr mẽ hã karõ nẽ Tĩrtũm kot nhÿrmã mẽ hwÿr mẽn̄h mã xwÿnh̄ta ã mẽ hkukjêr kaxyw. Nẽ mẽ kãm:

—E Tĩrtũm kot nhÿrmã mẽ pahwÿr mẽn̄h mã xwÿnh̄ta ã na pa mẽ akukjêr kaxyw mẽ ato akuprõ. Kwa mẽ atõ inhmã harê. Koja nhÿrmã kator kaxyw nẽ nhÿri koja we kato? Xà jar mẽ panhõ krĩ kamã nà? Xà nhÿri krĩ hõ kamã? Anẽ.

⁵ Hãmri nhũm mẽ kuma nẽ kãm:

—Nà mẽ panhõ pika pê Jutej kamã koja xep kato. Krĩ pê Perêj kamãã. Na pre Tĩrtũm nhÿ hã kapêr o mẽ pa xwÿnh̄ja ra hkukamã mẽ panhĩgêjtjê mã tanhmã harênh to nẽ hã kagã. Nẽ hã kagã ho:

⁶ Pa Perêj nhõ xwÿnh̄jaja? E mẽ anhõ krĩ grire htã kamã koja nhÿrmã mẽ panhõ Pahi Maatija kato. Koja mẽ pahpê Ijaewjê piitã mẽ pahto amnhĩptàr mex o pa. Jakamã mẽ anhõ krĩ grire htã koja Ijaew piitã axpên mã mex ã harênh o pa.

Ã na pre Tĩrtũm kot mẽ pahwÿr mẽn̄h mã xwÿnh̄ta kukamã mẽ kãm harê nẽ hã kagã anẽ. Anẽ.

⁷ Hãmri nhũm pahi Erox tee ri ã harênh anhÿrja ma hãmri nẽ amnhĩ wÿr mẽ kot hã àhkukjêr o mõi xwÿnh̄jê hã karõ. Nom nhÿri Ijaew kàx ã. Hãmri nhũm mẽ ma hwÿr mra nẽ agjê nhũm mẽ omu nẽ pahi nywta ã mẽ hkukja nẽ mẽ kãm:

—E mẽ aprĩ hã inhmã pahi kator nywta jarê. Tanhmã na pre ra mẽ ate kanhêti pumunh ã mytwrÿ kute? Xà ham na ka prem omu nà amnepê mã? E mẽ aprĩ hã tanhmã inhmã harênh to. Anẽ.

Hãmri nhũm mẽ ihõja kãm:

—Nà na ra hã amgrã axkrut kaxyw. Na pa prem omu hãmri nẽ inhnojarêr nẽ man ixpa ho ixpa ry rax nẽ mẽ awÿr pøj. Anẽ.

⁸ Nhũm mẽ kuma nẽ mẽ kãm:

—Tÿ. Nom jar amrakati. Perêj kamã na xep kato. E mẽ mãmrĩ ma hwÿr mõi nẽ kamã hapêr. Hãmri nẽ nhÿri omu nẽ akupÿn ixwÿr mõi nẽ inhmã harê. Pa ijaxwÿja ma hwÿr mõi nẽ omu nẽ mẽ apyrã nẽ kãm mex o mex ã harê. Ijaxwÿja inhmã omunh prãm tÿx kumrêx. Anẽ.

Nom hêx rom ã ri mẽ kãm kapêr anê. Kot nhÿri harênh mar nẽ hã àmnênh nhũm mẽ kot hpĩr kaxyw nhũm hêx rom ã kãm omunh prãm tÿx ã amnhĩ jarênh anê. ⁹⁻¹⁰ Jakamã nhũm mẽ kuma hãmri nẽ kato nẽ ma Perêj wÿr mõi kurê kumrêx. Hãmri nẽ kormã mẽ õ pika kamã mẽ pa ri kanhêti ho studa xwÿnh̄ta nhũm mẽ axte amnhĩ kukamã omu nẽ hkĩnh nẽ. Nhũm ma Perêj wÿr mẽ hkukamã mõi nhũm mẽ omunh pê ma hkõt pa rãhã hwÿr pøj. Nhũm kanhêtiya pahi nywre nhõrkwy mÿri ajêt. ¹¹ Jakamã nhũm mẽ ma hkõt mra nẽ ixkreja wÿr pøj nẽ kapem xa. Hãmri nẽ mẽ kãm kapêr nẽ mẽ hwÿr agjê nẽ Jejus mẽ katorxãja wa omu. Hãmri nẽ Jejus kutã hkõn krã ho hkrĩ hpa nẽ kãm kapêr nẽ kãm:

—Pa Xugitre. Hêxta waa nẽ. Nà amex o amex. Kot kaj nhÿrmã axaptàr hãmri nẽ apê mẽ inhõ Pahi Maati. Nà ãm hãmri na pa mẽ apumu nẽ ixkĩnh nẽ. Anẽ.

Hãmri nẽ ahpÿnhã kãm hkĩnh xà gõ. Kãm ôr kwÿ gõ nẽ kãm mēhkuxwa xà hkwy gõ nẽ kãm te kot rãmre kuxware pyrãk pê mĩraja nhũm mẽ kãm hkwy gõ. Mẽ hkĩnh xà hã kàxpore xohtõ nhũm prem kãm õr pa. ¹² Hãmri nẽ ra akupÿm Jerujarê kamã pahi Erox wÿr nojarêr. Nhũm kamãt nhũm mẽ gõr nẽ hikwy hãmri nẽ ra amyti. Nhũm Tĩrtũm mẽ hpimtir kãm mẽ kãm kapêr nẽ mẽ kãm:

—Pa? E mẽ inhma. Kêr ka mẽ akupÿm pahi Erox wÿr amrar nẽ kãm mẽ hkrata jarênh kêt nẽ. ãm kwarĩ ho kwarĩ. Nẽ kêr ka mẽ pry hõ hã mãn ma mẽ anhõ pika hwÿr akupÿm apa ho apa.

Anhÿr o mẽ kãm kapêr jakamã nhũm ap-kati nhũm mẽ kãnhmã hkrĩ hãmri nẽ Tĩrtũm kot mẽ kãm hã karõ xà hkõt ma akupÿm mẽ õ pika hwÿr pa kurê kumrêx nẽ akupÿm pahi Erox wÿr mrar kêt nẽ.

Juje mẽ hprõ wa kot Erox pymaj ma Jejus o mõi

Apokarip 12.1-6, 12.13-18

¹³ Tã nhũm kanhêti ho studa xwÿnh̄jaja ma akupÿm hapêx hãmri nhũm Tĩrtũm axte Marir mjên Juje hwÿr kapêr o mẽ wrÿk xwÿnh̄jê hõ mẽ. Nhũm kê axte hpimtir kãm hwÿr wrÿ nẽ kãm kapêr nẽ kãm:

—Pa Juje. E kwa kànhmã nhỹ. Na ra pahi Eroxa aprõ pê hkrata ã amÿnê. Koja tokyx pôristi hkwyjaja mẽ anhõ krĩ hwÿr pøj nê war apê hpĩr kaxyw ri hapêr. Jakamã kwa wa tokyx akato nê ma pika pê Ejit wÿr amõr kurê kumrêx. Nê Ejit kamã apa rãhã pa nhÿrmã akupÿn amnê war amê. E kwa tokyx. Anê.

¹⁴ Hãmri nhũm kuma nê kànhmã nhỹ nê Marir mra nê war amnhĩ to akuprõ nê ra nojarêt. Hãmri nê krĩja pê Jesus o kato nê ma o mõr kurê kumrêx. Wa mõr ryy nê hãmri nê Ejit wÿr pøj nê kamã pa ho pa.

¹⁵⁻²⁰ Rôm nhũm pahi Eroxa tee ri amnhĩ wÿr kanhêti ho studa xwÿnhjê kamã hamak o pa nom nhũm mẽ akupÿm hwÿr mrrar kêt nê. Jakamã nhũm mẽ kamã gryk nê hamaxpêr o:

—Tk. Kwa nà. Na mẽ ãm inhmã hêx nê akupÿn ixwÿr mrrar nê nhÿri inhmã pahi nywta jarênh kêt nê. Nà kwãr mẽ mãmri ã inhĩpêx anê. Mẽ kot ixpê ho hpimxuure kaxyw ã. Nà kot paj mẽ kêp kupĩ nhũm mẽ rĩ amnhĩ pumu. Na xep prem kanhêti kot harênh xàja pumunh ã ra hã amgrà pyxi nê hkôt mytwrÿ kêp 6. Jakamã mãn mẽ hkrata ra hã amgrà axkrut kaxyw. Nà na pa ra ijamaxpêr. Kot paj Perêj kamã mẽ hkra myjaja ra mẽ hã amgrà axkrut xwÿnhjaja nê kormã mẽ hã amgrà axkrut kêt xwÿnh piitã mẽ himex pa. Jao ra mẽ kamã pahi nywta pĩ. Nà ixte hpĩr mã kênã. Koja hprêk nê ixpãnhã Ijaew o amnhĩptàr kêt nê.

Anhÿr o hamaxpêr hãmri nê amnhĩ wÿr õ pôristi hkwyjê hã karõ nê mẽ kãm mẽ hkrajê hã amÿnê nê mẽ kãm:

—E kêr ka mẽ ma Perêj wÿr mra nê kamã mẽ kêp mẽ hkra myrejaja ra mẽ hã amgrà axkrut xwÿnhjê nhĩmex pa. Nê kormã mẽ hã amgrà axkrut kêt xwÿnhjaja mãânê nê mẽ himex par kumrêx. Nê Perêj pu hã ri krĩ hkryre hkôt mãânê ri ajapøj nê ã mẽ himex par anê. Anê.

Hãmri nhũm mẽ kuma nê ma mẽ hwÿr mrrar kurê kumrêx. Hãmri nê Perêj wÿr pøj nê mẽ kêp mẽ hkra myre piitã mẽ himex pa. Jakamã nhũm mẽ katorxà nê mẽ hipêêxàjaja tee ri mẽ hkra htyk xwÿnhjê pumu nê hkaprĩ htÿx nê mÿr rũnh nê. Nom na pre Tĩrtũm nhỹ hã kapêr jarênh o mẽ

pa xwÿnh finat Jeremĩstija ra amnepê m ã mẽ kot amnhĩ nhĩpêx anhÿrja kukamã mẽ panhĩgêjtê mã mẽ harê nê hã kagà. Na pre mẽ kãm Ijaew kurê xwÿnhjê pynênh nê ma mẽ õ pika hwÿr mẽ ho hapêx par kaxyw. Hãmri nhũm mẽ panã Rrakewja te ra kot tee ri ja hã mẽ omunh nê tanhmã amnhĩ nhĩpêx to pyrãk nhũm Jeremĩstija tanhmã Ijaewjê jarênh to nê hã kagà. Nê hã kagà ho:

Amnepê m Perêj kamã na pre mẽ panã Rrakewja hpijagri ho nõrja ã ra htyk kaxyw nê tee ri hkra kator mã xwÿnhhta kukamã hamaxpêr nê mÿr o nõ. Nhũm hkwyjaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra uràk nê tee ri mẽ hkrare ho hamak xàj mÿr o pa. Mẽ kot mẽ kêp utàr nê mẽ himex par jakamã nhũm mẽ tee ri mẽ ho hamak xàj mÿr o pa. Anê.

Nhũm pre finat Jeremĩsja mẽ hkukamã ã mẽ harê nê mẽ hã kagà anê. Tã ra jarãhã mēni piitã Rrakew pyrã nê hkrajê o hamak xàj mÿr o pa.

Wa kot akupÿm wa õ pika hwÿr Jesus o mõr
Juãw 7.41-42

Tã nhũm mytwrÿ grêre nê hapêx nhũm pahi Eroxa ty. Jakamã nhũm kamãt nhũm Jujeja gõr nê nõ. Nê kê õt kãm axte amÿti. Nhũm Tĩrtũm kapêr o mẽ wrÿk xwÿnhja axte hwÿr wrÿ nê kãm:

—Pa Juje? E na ra Marir pê hkra pĩr mã xwÿnhhta ty. Jakamã kwa wa mãmrĩ ma akupÿm mõ. Ma akupÿm mẽ apê Ijaewjê nhõ pika hwÿr axãmnhĩx aprõ mẽ hkrata wa o mõ.

Anhÿr o kãm kapêr. Na pre ra amnepê m Tĩrtũm nhỹ hã kapêr o mẽ pa xwÿnhjê hõja ja kukamã mẽ panhĩgêjtê mã ja jarê nê hã kagà. Nê hã kagà kot: “Ixpê Tĩrtũm kot paj nhÿrmã Ejit rũm ma akupÿm õ pika hwÿr ixkrata wa mẽ kumê.” Anhÿr o kot hkukamã harênh nê hã kagà.

²¹ Jakamã nhũm Tĩrtũm kapêr o mẽ wrÿk xwÿnhja ã Juje mã karõ anê hãmri nhũm kuma nê ma akupÿm wa o mõ. Ma akupÿm mẽ õ pika hwÿr wa o mõ.

²² Tã ra akupÿm hpôx kaxyw htêp o mõi. Hãmri nê pahi Erox kra Akêrawja ra hipêêxà mÿr pê kot Jutej kamã mẽ ho amnhĩptàr hã harênh ma. Hãmri nê tee ri mẽ amnhĩ kukamã hamaxpêr nê kãm mẽ hwÿr wa o mõi puma nê.

Tã nhũm kamàt nhũm Juje ra gõi nê nõ nê kê axte amÿti. Nhũm kê axte Tĩrtũm kapêr o mẽ wrÿk xwÿnhja hwÿr wrÿ nê akupÿm õ pika hkwÿ pê Jutej wÿr mõi nê wa mẽ hkurê nê kãm:

—Pa Juje? E kêr ka Jutej wÿr wa mẽ amõi kêt nê. Pãnhã nhãm mẽ anhõi pika hõi hwÿr mãn mõi nê kamã ri apa.

Anê nhũm kuma nê hpãnhã wa mẽ ma mẽ õ pika hkwÿ pê Garirej wÿr wa mẽ juk nê ma mõi. ²³ Nê kamã põi nê krĩ pê Najare hwÿr mõi nê kamã amnhĩm õrkwÿ nhĩpêx nê kamã wa mẽ pa ho pa. Nhũm pre ra amnepêm Tĩrtũm nhÿ hã kapêr o mẽ pa xwÿnhjê hõja ra ã mẽ kot amnhĩ nhĩpêx anhÿrja kukamã mẽ panhĩgêtjê mã mẽ harê nê hã kagà. Nê hã kagà kot:

Tĩrtũm kot mẽ pahwÿr mênh mã xwÿnhhta koja kêp Najare nhõi xwÿnh. Anê.

3

Juãw Paxis kot Tĩrtũm kapêr jarênh o pa Makre 1.1-6; Rukre 3.1-14; Juãw 1.19-23

¹ Nhũm pre Juãw Paxisja ã amnhĩ nhĩpêx anê. Nê pika pê Jutej kamã mẽ kãm Tĩrtũm kapêr jarênh o pa. No ãm krĩm pa hkêt nê. ãm mẽ hpu hã krĩ pê amÿm ri kapôt ã ri mẽ kãm Tĩrtũm kapêr jarênh o pa. ²⁻³ Tĩrtũm nhÿ hã kapêr o pa xwÿnh finat Ijais ra kot Juãw kukamã mẽ panhĩgêtjê mã tanhmã harênh to nê hã kagà xá hkôt. Na pre hkukamã hã kagà ho:

Koja nhÿrmã mênhõ mõi põi. Kapôt ã mõi põi nê mẽ kãm tanhmã mẽmoj tã karõ hto ho ri pa. Nê mẽ kãm: “Koja Tĩrtũm tokyx mẽ pahwÿr mẽ panhõi Pahihtija mẽ nhũm wrÿ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mênhõ kutêp pry ho mexta pyrã nê amnhĩ nhĩ ho tãm amnhĩ nhĩpêx nê tãm ajamaxpêr mex o ri apa. Kêr ka mẽ Pahihtiti kutêp ã

amnhĩ nhĩpêx anhÿr o ri apa.” Anhÿr o koja mẽ kãm ujarênh o pa. Anê.

Na pre finat Ijaisja Juãw Paxis kukamã ã mẽ kãm harênh anê nê hã kagà. Tã nhũm hã kagà xàja kôt nhũm Juãw Paxisja mõi põi. Hãmri nê Ijais kot hkukamã harênh xà hkôt kapôt ã ri mẽ kãm ujarênh o pa nhũm mẽ kãm mar prãm xwÿnhjaja ma hwÿr mra. Nhũm mẽ kãm kapêr nê mẽ kãm:

—E koja Tĩrtũm tokyx kot mẽ pakaxyw ãm xwÿnhja o amnhĩrĩt. Jakamã kwa mẽ tokyx kutêp amã amnhĩ tomnuj kaga hprãm xaj tãm amnhĩ nhĩpêx o pa.

Anhÿr o Jejus kutêp mẽ kãm kapêr o pa.

⁴ Juãw Paxisja hikãxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm ê nhĩpêx nê hãgê nê hã pa. Nê mẽmo mry hkà ho amnhĩ pre nê ri pa. Nê mẽo mex kur kêt nê ãm krĩt ku nê menh õr o ri pa.

⁵ Jakamã nhũm kapôt ã ri mẽ kãm Tĩrtũm kapêr jarênh o pa nhũm mẽ kot mar kaxyw ma hwÿr mra. Pika pê Jutej kamã ri mẽ pa xwÿnhjaja. Nê Jutej kamã krĩ pê Jerujarê nhõi xwÿnhjaja. Nê pyhti pê Jotãw mÿri mẽ pa xwÿnhjaja. Nhũm prem piitã harênh ma nê kot mar kaxyw ma hwÿr mra. ⁶ Hãmri nê kapêr ma nê Tĩrtũm noo mã mẽ kot amnhĩ tomnuj xwÿnh ã kãm amnhĩ jarê. Mẽ kot amnhĩ tomnuj kaga nê tam amnhĩ nhĩpêx o pa hprãm xaj ã kãm amnhĩ jarênh anê. Nhũm Tĩrtũm kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nê. Jakamã nhũm pre Juãw Paxisja Tĩrtũm mã gõi kãm mẽ hkrã kumrãr pa. Pyhti pê Jotãw kamã mẽ hkrã kumrã.

⁷ Tã nhũm Parijew mẽ Satusew nhõi xwÿnhjaja mããnên mẽ hkôt ma Juãw Paxis wÿr mra. Mẽ urak nê mẽ kêp Ijaew jakamã haxwÿja Juãw Paxis kot mẽ hkrã kumrãr kaxyw ma hwÿr mra. No ãm hkwÿjê hkĩnhã mẽ kot amnhĩ tomnuj kaga hprãm xaj kãm amnhĩ jarênh kêt nê. ãm amnhĩ krã hkôt hkwÿjê hkôt hwÿr mra nê amnhĩ to kuma. Nom nhũm Juãw Paxisja ra hprĩ hã ã mẽ hamaxpêr anhÿrja kôt mẽ omunh mex nê. Jakamã mẽ kãm:

—Tk kwa nã. Kormã mẽ ate amnhĩ tomnuj pix o ri apa kênã. Xà kot paj mẽ ate

amnhî tomnuj o apa rãhã mẽ akrã kumrã nhũm Tirtũm ja hã mẽ apumu nhũm ja kãm mex nẽ? Nã koja já kãm mex kêt nẽ. Koja ja mýrapê nhýrmã tanhmã mẽ atomnuj týt to ka mẽ tee ri umaj apimxur prãm kaprý. ⁸ Na htem amnhî tomnuj kaga nẽ tãm amnhî nhĩpêx nẽ tam axpẽn nhĩpêx. Jakamã e kwa mẽ ã amnhî nhĩpêx o apa anê pa rĩ kormã mẽ akrã kumrã. ⁹ Na ka htem atýt ri ajamaxpêr o: “Mẽ ixpê finat Apraãw kanrêhã htãmnhwý hkwý na pa mẽ. Jakamã koja Tirtũm ja hã mẽ ixpumu hãmri nẽ mẽ ixte amnhî tomnuj o ixpa tã nhũm ja hã tanhmã mẽ ixto hkêt nẽ. Koja mẽ ixto mex nẽ.” Anhýr o atýt ri amnhî kukamã ajamaxpêr. Nom ja kot anhýr kêt. Mẽ apê Apraãw kanrêhã htãmnhwý htã mẽ ate urak nẽ tãm amnhî nhĩpêxre hã. Kot kaj mẽ apê htãmnhwý htã amnhî tomnuj o ri apa hãmri nẽ Tirtũm noo mã te mẽ apê pikap kênre nhĩkwý pix pyrãk. ¹⁰ Na ra Tirtũm mẽ ate amnhî tomnuj mýrapê tanhmã mẽ ato kaxyw. Te ho mẽhõ nhõ mẽmo hpàr ô hkêt nhũm kot tee ri omunh nẽ krãhyr nẽ kuwy kamã mẽnh nẽ ho kaxàr par pyrãk o koja mẽ anhĩpêx. Jao amnhî nẽ kuwy hwýr mẽ arê ka mẽ kamã amnhî xà htýt kamã ajamak rãhã ho ri apa. Anẽ.

Nhũm pre ã Juãw Paxisja Parijew mẽ Satusew nhõ xwýnhjê mã kapêr anê. ¹¹ Hãmri nẽ hpãnhã axte mẽ kot mar kaxyw hwýr mẽ mrrar xwýnhjê mã kapêr nẽ mẽ kãm:

–E ra mẽ ate amnhî tomnuj kaga xwýnhjaja. Na pa Tirtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tirtũm kot mẽ pakaxyw ãm mã xwýnhhta tãm mẽ pahwýr pôj. àhpumunh týt o kot ijakrenh par jakamã na pa hte ãm kukwak ri ixpa nẽ amnhî tã hã ixpijaam o ri ixpa. Koja mẽ awýr Tirtũm Karõ rẽ nhũm mẽ akarõ mã agjê. Ka mẽ ý hã tam amnhî nhĩpêx o ri apa. Nom kormã mẽ kot tãm amnhî nhĩpêx kêt xwýnhjaja koja Tirtũm kot mẽ pahwýr mẽnh xwýnhja ja hã mẽ omu nẽ mẽ hipêx o te kuwy kot mẽmoj to kaxàr par pyrãk o mẽ hipêx.

¹² –Na htem pur kãm harôj nhĩkê nẽ ho grã nẽ hpãnhã kahtwý. Nẽ kahuk pa hãmri nẽ hkapĩ nhũm kôk apê nẽ prýhkã ho htor

pa. Nhũm mẽ hpãnhã hy ho pa nẽ ixkre kamã gôj kãm unhwý. Ja pyrã nẽ koja tokyx Tirtũmja mẽ piitã mẽ kot tanhmã amnhî nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhî nhĩpêx o mẽ pa xwýnhjaja koja ma amnhî wýr mẽ ho api nhũm mẽ kuri mex rãhã nẽ pa ho pa. No mẽ kot amnhî tomnuj rãhã ho mẽ pa xwýnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wýr pa nẽ kamã amnhî xà htýt kamã hamak rãhã nẽ pa ho pa.

Anhýr o mẽ kãm kapêr.

*Juãw Paxis kot Jejus krã kumrãr
Makre 1.9-11; Rukre 3.21-22; Juãw 1.32-34*

¹³ Tã nhũm Jejus pika pê Garirej rũm kato nẽ ma Juãw Paxis wýr mō. Juãw kot pyhti pê Jotãw kamã hkrã kumrãr kaxyw ma hwýr mō. Hãmri nẽ omu nẽ kãm:

–Pa. E ot pa awýr amnhî to tẽ. Ate mẽ kuxwar ixkrã kumrãr kaxyw. Anẽ.

¹⁴ Hãmri nhũm tee ri kuma nẽ kãm:

–Kwa nã. Aa ate amnhî tomnure hã kot pa kêt ri akrã kumrã. Nã ka kot kaj ixkrã kumrã. Anẽ.

¹⁵ Hãmri nhũm kãm:

–Kwa nã. Mãmrĩ ixkrã kumrã Juãw Paxis. Tirtũm kãm ja prãm kênã kot ka kêt ri axtem nẽ ixkaga. Kot puj mẽ Tirtũm kãm hprãm xà hkôt tanhmã amnhî nhĩpêx to ho ri papa. Anẽ.

Hãmri nhũm kuma nẽ kãm:

–Tôe. Nã kot paj akrã kumrã. Anẽ.

¹⁶ Hãmri nẽ pyhti hwýr o wrý nẽ kamã hkrã kumrã. Hãmri nẽ wa akupým api nẽ gô mý ri ãm rãhã nhũm kaxkwa axkjê. Hãmri nhũm kurũm Tirtũm Karõja Jejus wýr te tuuti pyrã nẽ ahpar mã hwýr wrýk o tẽ nẽ ikre hã xa. Nhũm Jejus arĩ amnhî wýr wrýk o htẽm kãm omunh o xa. ¹⁷ Hãmri nhũm Tirtũm kaxkwa rũm kãm kapêr nẽ kãm:

Pa? E apê ixkra mex na ka. ãm hãmri na ka hte ixkanrêhã ã amnhî nhĩpêx mex anẽ. Inhmã ajapê kamã na ka ri apa ho apa. Anẽ.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mããnẽn Eprêw 2.18, 4.15

¹ Tã nhũm Jejus Tĩrtũm Karõ nhỹ hã ma kapõt ã ri pa. Satanasti kot amnhĩ tã kamã hamak kaxyw nhũm ma kapõt ã ri pa. ² Ri pa hã apkati xohtõ nẽ. Ra hã arĩgro pẽ 40. Nẽ kormã apkur kêt jakamã ra kãm prãm tỳx kumrẽx nẽ ri pa. ³ Hãmri nhũm Satanastija nhỹhỹnh hwỳr tẽ nẽ hẽx rom kãm kapẽr nẽ kãm:

—Pa. E kwa mãn ka ra amã prãm tỳx nẽ nã? Nom xep apê Tĩrtũm Kra jakamã apê mẽmoj hihtỳx kêt. Tĩrtũm pyrã nẽ axàhpumunh o axàhpumunh kẽnã. Jakamã kwa kẽn nhĩkwỹ mũj mã anẽ kê amã pãwti hã amnhĩ jahkre ka aku nẽ tokyx ho amnhĩ xihtỳx. E kwa tokyx kãm akapẽr. Anẽ.

⁴ Hãmri nhũm kuma nẽ kãm:

—Tk. Nà kot paj amar xà hkõt ã ri amnhĩ nhĩpêx anhỹr kêt nẽ. Kojã Tĩrtũm kãm inhmã mẽmoj nhõr prãm nẽ inhmã mẽmoj gõ pa rĩ kormã kukrẽ. Kapẽr ã kagã htũm kot ja jarẽnh kot:

Na htem mẽ apkur xà pix kukwak ri htĩr nẽ pa hkõt nẽ. Na htem mããnẽn Tĩrtũm kapẽr ma nẽ hkõt amnhĩ nhĩpêx nẽ htĩr nẽ pa. Anẽ.

—Ã kapẽr ã kagã kamã kot harẽnh kot anhỹr jakamã kot paj akapẽr kõt ri ã amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

⁵ Hãmri nhũm Satanastija tee ri kuma hãmri nẽ hpãnhã ma Jerujarẽ hwỳr o mõ. Nẽ Tĩrtũm mã amnhĩ jarẽnh xà hã ixkre hprẽk nhĩmõk wỳr ho api nẽ kỳxpê hatur xà hã ãm nhũm xa. Hãmri nẽ amnhĩ parpê kẽn rũnh nhĩkwỹ xwỳnhja pumunh o xa nhũm Satanasti kãm:

⁶ —E apê Tĩrtũm Kra jakamã kwa ja rũm ahpar mã ajarĩ nẽ ma tẽ nẽ pikap tẽm. Kojã Anhĩpêxàja apumunh mex nẽ ka tanhmã amnhĩ to hkõt nẽ. Kapẽr ã kagã htũm kot harẽnh kot:

Tĩrtũm kojã kapẽr o wrỳk xwỳnh kwỳjê mã ajarẽ ka ajarĩ nẽ ahpar mã tẽ nhũm mẽ kỳx pẽ amỳ nhũm mẽmoj akà hyr kêt nẽ. Anẽ.

—Ã kapẽr ã kagã htũm kot ajarẽnh anhỹr jakamã e tokyx ajarĩ. Anẽ.

⁷ Hãmri nhũm Jejus kuma nẽ kãm:

—Tk kot paj ri ate inhmã karõ xàja kõt ã amnhĩ nhĩpêx anhỹr kêt nẽ. Kojã Tĩrtũm tãm inhmã ijarĩ hã karõ pa rĩ mar xà hkõt ijarĩ. No kot pa ri amar xà hkõt ijarĩ hkõt nẽ. Tĩrtũm kapẽr ã kagã htũm kot ja jarẽnh kot:

Kêr ka mẽ amnhĩ krã hkõt amnhĩ tã ixkamã ajamak kaxyw inhĩxi jarẽnh kõt tanhmã amnhĩ nhĩpêx to hkõt nẽ. Anẽ.

—Ã kot ja nẽ kapẽr kot anhỹr jakamã kwarĩ ho kwarĩ. Kot paj ri amar xà hkõt ijarĩ hkõt kumrẽx. Tĩrtũm tãm kot inhmã ã ixte amnhĩ nhĩpêx anhỹr ã karõre hã. Anẽ.

⁸ Hãmri nhũm Satanasti tee ri kuma nẽ hpãnhã ma nhỹri kẽn prêeti hwỳr o tẽ nẽ himõk ã axte o xa. Hãmri nẽ kãm pika piitã ahkre hpa. Nẽ mẽ hikukrẽx piitã nhũm kãm ahkre ho xa. Kàxpore nẽ mẽmoj mex piitã nhũm kãm ahkre nhũm Jejus piitã omunh o xa. ⁹ Hãmri nhũm kê Satanasti axte kãm:

—E mãn ka kam ri mẽmoj mex mũj piitã omunh pa. Piitã inhõ na. Nom kot kaj ixkutã tẽm nẽ inhmã inhmex o inhmex ã ijarẽ pa ama nẽ amã piitã õr pa. Ka kam mẽmoj piitã ho anhõ nẽ ho amnhĩptar o apa. Jakamã e kwa tokyx. Anẽ.

¹⁰ Hãmri nhũm kuma nẽ axte kãm kapẽr nẽ kãm:

—Tk kwa ma nhỹhỹm tẽ Satanasti. Kot paj ri amã amex o amex ã ajarẽnh kêt kumrẽx. Tĩrtũm kapẽr ã kagã htũm kot ja nẽ kapẽr kãm hihtỳx kẽnã. Kapẽr kot:

Kêr ka mẽ ixkapẽr pix ma nẽ ixkutã pix mã akõnkrã ho akrĩ nẽ inhmã inhmex o inhmex ã ijarẽ. Kêr ka mẽ ã amnhĩ nhĩpêx anhỹr o ri apa.

—Anhỹr o kot hã karõ jakamã kot paj amã amex o amex ã ajarẽnh kêt kumrẽx. Anẽ.

¹¹ Hãmri nhũm tee ri amnhĩ tã kuma hãmri nẽ ma tẽ. Tee ri kãm kapẽr kaprỳja ã amnhĩ pumu hãmri nẽ hkaga nẽ ma tẽ. Hãmri nhũm Tĩrtũm kapẽr o mẽ wrỳk xwỳnhjaja Jejus wỳr wrỳ nẽ tanhmã ho mex to nẽ kãm õ nhũm kukrẽ nẽ akupỹm hihtỳx.

*Jejus kot Garirej kamã kapẽr o pa
Makre 1.14-15; Rukre 4.14-15*

¹² Tã nhũm Juãw Paxisja mẽmoj tã pahi Eroxo mã akir nhũm amnhĩ tã kuma nẽ gryk xàj haxà nhũm hkrĩ ho hkrĩ. Hãmri nhũm Jejusja harẽnh ma nẽ ma akupỹm Garirej kamã krĩ pẽ Najare hwỳr ma akupỹm tẽ. ¹³ Hãmri nẽ ra pøj nom kamã ri pa hkêt nẽ. Nẽ hpãnhã kurũm kato nẽ ma krĩ pẽ Kapanaũ hwỳr tẽ. Gõ rax pẽ Garirej mýri na pre. Pika hkwỳ pẽ Jepurõ mẽ Natari wa mẽ kamã na pre nhũm Jejus ma hwỳr tẽ. Hãmri nẽ kamã pa. ¹⁴ Nhũm ra amnepẽm Tĩrtũm nhỹ hã kapẽr jarẽnh o mẽ pa xwỳnh finat Ijaisja Jejus kukamã ra mẽ panhĩgêjtẽ mã ã kot amnhĩ nhĩpêx anhỹr ã harẽ nẽ hã kagà. Jejus kot ã mẽ hwỳr mõi anhỹrja kukamã nhũm pre harẽ nẽ hã kagà. ¹⁵ Pika hkwỳ kamã mẽ pa xwỳnhjaja nhũm pre mẽ hkukamã mẽ harẽnh mex nẽ. Nẽ pika pẽ Garirej kamã mẽ pa xwỳnhjaja nhũm pre mããnẽn mẽ hkukamã mẽ harẽ. Nẽ pyhti pẽ Jotãw mẽ gõ xujanãr wa hkaêx kãm pika piitã kamã mẽ pa xwỳnhjaja. Nẽ krĩ pẽ Garirej kamã mẽ kęp Ijaew kêt xwỳnhjaja nhũm pre mããnẽn mẽ harẽ. ã na pre finat Ijaisja mẽ hkukamã Tĩrtũm nhỹ hã mẽ piitã mẽ harẽ nẽ hã kagà anẽ. Jejus kot ma mẽ hwỳr mõi rja kukamã nhũm ra hprĩ hã harẽ nẽ hã kagà. Nẽ hã kagàja o:

¹⁶ E. Kot paj mẽ amã mẽmoj mex jarẽ ka mẽ inhma. Mẽ ate Tĩrtũm pumunh kêt jakamã te mẽ ate kamãt kô kamã ri apa pyrãk. Tã koja Tĩrtũm mẽ amã amnhĩ to amnhĩrit ka mẽ hpãnhã te mẽ ate hirã kamã ri apa pyrãk o amnhĩ nhĩpêx nẽ ra hkôt amnhĩ xunhwỳ.

Anhỹr o mẽ hkukamã mẽ harẽ nẽ hã kagà. ¹⁷ Tã nhũm ra kot hkukamã mẽ kãm ujarẽnh xà hkôt nhũm Jejusja mẽ hwỳr mõi nẽ mẽ kãm Tĩrtũm kapẽr jarẽnh o ri mẽ hkôt pa. Nẽ mẽ kãm tanhmã amnhĩ jarẽnh to ho pa. Nom kormã hprĩ hã mẽ kãm amnhĩ jarẽnh kêt nẽ. Te ho nhãm mẽhõ jarẽnh pyrãk o mẽ kãm amnhĩ jarẽ nẽ mẽ kãm:

—E na ra Tĩrtũmja kot mẽ akaxyw ãm xwỳnhhta mẽ nhũm mẽ awỳr wrỳ. Jakamã kwa mẽ tokyx tee ri ate amnhĩ tomnuj ã amnhĩ pumu nẽ ã ate amnhĩ nhĩpêx anhỹr kaga nẽ hpãnhã Tĩrtũm kôt mãn amnhĩ nhĩpêx o ri apa.

Anhỹr o mẽ kãm kapẽr o pa pẽ mẽ ahkre ho ri mẽ hkôt pa.

Jejus kot amnhĩ wỳr tep pynênh xwỳnhjê hwỳr

Makre 1.16-20; Rukre 5.1-11

¹⁸ Tã nhũm Jejus ma gõ rax pẽ Garirej mýri ri pa nẽ gõx kãm ja wa omu. Simãw Pêtre mẽ htõ Andreja nhũm wa gõx kãm kryhti rẽnh o wa xa. Hãmri nhũm Jejus wa hwỳr tẽ nẽ wa omu nẽ amnhĩ kôt wa kuwỳ nẽ wa kãm:

¹⁹ —Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarẽnh o ri apa. Mẽ kot war amar nẽ ra ixkôt amnhĩ xunhwỳr kaxyw. Anẽ.

²⁰ Hãmri nhũm wa kuma nẽ kryhti re nẽ wa ma hkôt htẽm kurê kumrêx. ²¹ Hãmri nhũm mẽ ma nhãm axte mõi nẽ ra jajê hwỳr kato. Jepetew mẽ hkra Xiakre mẽ Juãwja nhũm wa mẽ hwỳr kato. Nhũm mẽ õ pãr kãm kryhti ho mex o wa mẽ nhỹ. Hãmri nhũm mẽ hwỳr mra nhũm Jejus amnhĩ kôt ja wa kuwỳ nẽ wa kãm:

—Pa Xiakre mẽ Juãw. E wa ma ixkôt mãn wa apa. Anẽ.

²² Hãmri nhũm wa kuma nẽ hipêêxà mã amnhĩ jarẽ nẽ ma hkôt pa ho pa kurê kumrêx.

Jejus kot tanhmã amnhĩ nhĩpêx to Rukre 6.17-19

²³ Tã nhũm Jejus Garirej kamã Ijaew mã Tĩrtũm kapẽr jarẽnh o pa. Na pre hte Tĩrtũm kapẽr o mẽ ahkre xà hã ixkre hwỳr agjê nẽ kamã mẽ kãm Tĩrtũm kapẽr jarẽnh o hkrĩ nẽ mẽ kãm:

—E mẽ tee ri ate amnhĩ tomnuj ã amnhĩ pumu nẽ hpãnhã Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anẽ nhũm ja hã mẽ apumu nẽ mẽ ato hkra kurê kumrêx. Anẽ.

Hãmri nẽ akupỹm mẽ kãm mẽ à xwỳnhjê ho mex. Ahpỹnhã tanhmã mẽ à kute xwỳnhjaja nhũm akupỹm mẽ ho mex o pa.

²⁴ Jakamã nhũm mẽ piitã pikaja kamã ri axpẽn mã harẽnh o hprõt. Nẽ pika pẽ Sir kôt mããnẽn ma ri axpẽn mã harẽnh o hprõt. Nhũm mẽ piitã harẽnh ma nẽ ma hwỳr mẽ à xwỳnhjê ho mra. Ahpỹnhã ri tanhmã mẽ à kute xwỳnhjaja. Mẽ à htỳx xwỳnhjaja. Nẽ mẽ ã kamã mẽ htyk xwỳnhjaja. Nẽ mẽ hkrã

pipãnh xwÿnhjaja. Nê mēkarōmnuti kot Satanasti nhÿ hã tanhmã ri mē ho xwÿnhjaja. Nhÿm prem mē hamÿ nê ma Jejus wÿr mē o mra nhÿm mē omu nê akupÿm mē ho mex pa. ²⁵ Jakamã nhÿm mē ohtô nê ma hkôt pa. Krÿ pê Garirej rÿm nê Tekap rÿm nê Jerujarē rÿm nê pika pê Jutej rÿm. Nê pyhti pê Jotãw nhÿkjê rÿm mē pa xwÿnhjaja. Nhÿm mē ã ohtô nê ma Jejus kôt omunh o pa anē.

5

Jejus kot tanhmã mē ahkre hto

Rukre 6.20-23

¹ Nhÿm Jejus amnhÿ kôt ri mē kot omunh o mē pa xwÿnhjê pumu hãmri nê mē ahkre kaxyw ma tē nê hixêt ã api nê himök ã nhÿ. Hãmri nhÿm mē ma hkôt mra nê pu hã hkrÿ pa. ² Hãmri nhÿm mē ahkre nê mē kãm:

³ E mē inhma. Kot kaj mē atō amnhÿ kaxyw tanhmã Tÿrtÿm mē wa inhmã ajamaxpēr to nê ajamaxpēr o: “Koja Tÿrtÿm inhÿkhô hã pa hkêt pa ixtÿx ri tanhmã amnhÿ tomnuj to ho ri ixpa rãhã ho ri ixpa.” Anhÿr o ajamaxpēr. Hãmri nhÿm Tÿrtÿm ã ajamaxpēr anhÿr ã apumu nhÿm ja kãm mex nê. Hãmri nhÿm apê hkra hã ato mex nê atãnopxar o akôt pa ho pa ka ajamakêtkati nê axãmnhÿx akÿnh nê ri apa.

⁴ Nê kot ka mē atō tanhmã amnhÿ tomnuj to. Hãmri nê tee ri ja hã amnhÿ pumu nê apijaàm nê akaprÿ nê. Nê akaprÿ xàj amÿr o nhÿ. Amÿr rax nê. Hãmri nhÿm Tÿrtÿm ja hã apumu nhÿm ja kãm mex nê. Jakamã nhÿm anê akaprÿ hta nê ato mex nê ka ajamakêtkati nê axãmnhÿx akÿnh nê ri apa.

⁵ Nê kot ka mē atō agryk tokyx anhÿr kêt nê. Nê kritpēm amnhÿ tã amã mē hkaprÿ ho ri apa. Hãmri nhÿm Tÿrtÿm ja hã apumu nhÿm ja kãm mex nê. Hãmri nhÿm ato mex nê ka ajamakêtkati nê axãmnhÿx akÿnh nê ri apa.

⁶ Nê kot ka mē atō amã Tÿrtÿm kãm hprãm xà hkôt amnhÿ nhÿpêx o ri apa hprãm nê. Nhÿm amnhÿ tã apumu nhÿm ja kãm mex nê. Hãmri nhÿm ato mex nê tanhmã akrã hto ka hkôt

pix mã amnhÿ nhÿpêx o ri apa. Jao ajamakêtkati nê axãmnhÿx akÿnh nê ri apa.

⁷ Nê mē kamã mē axukaprÿ ho ri apa xwÿnhjaja na hte Tÿrtÿm ja hã mē apumu nhÿm ja kãm mex nê. Jakamã na hte mē hã mē apyrà nê mē akamã ukaprÿ ho pa. Jao mē ato mex nê ka mē ajamakêtkati nê axãmnhÿx akÿnh nê ri apa.

⁸ Nê kot ka mē atō ã ajamaxpēr anê nê ajamaxpēr o: “Nà kot paj ãm Tÿrtÿm kapēr kôt pix mã ri amnhÿ nhÿpêx o ri ixpa. ãm ja pix na inhmã hprãm.” Anhÿr o ajamaxpēr. Hãmri nhÿm Tÿrtÿm amnhÿ tã mē apumu nê mē ato mex nê. Ka mē ajamakêtkati nê axãmnhÿx akÿnh nê ri apa. Nê nhÿrmã Tÿrtÿm wÿr api nê kuri amex rãhã apa ho apa.

⁹ Nê kot ka mē atō mēhō wa kot axpēn kutã amnhÿ xãm xwÿnhhta axpēn tã wa omu nê wa kot tanhmã axpēn nhÿpêx tota nê tanhmã wa kãm akapēr to nê akupÿm tãm wa ãm. Hãmri nhÿm Tÿrtÿm ja hã apumu nhÿm ja kãm mex nê. Nê apê hkra hã ajarē ka ajamakêtkati nê axãmnhÿx akÿnh nê ri apa.

¹⁰ Nê koja mēhō mē ate Tÿrtÿm kapēr mar xà hkôt amnhÿ nhÿpêx o apa hã mē apumu nê hã tanhmã mē anhÿpêx kati hto. Tã nom koja Tÿrtÿm arÿ mē ato mex nê. Mē apê hkra jakamã mē kot tanhmã mē anhÿpêx hto htã ka mē ajamakêtkati nê axãmnhÿx akÿnh nê ri apa.

¹¹⁻¹² —Kwãr mē mãmri ixtã mē ato kapēr rÿ mē ato hêx rÿ tanhmã ri mē atomnuj to. Kwãr mē mãmri ã mē anhÿpêx anê. Nom kêr ka mē arÿ amnhÿ kaxyw inhmã ajamaxpēr tÿx rãhã pê ajamakêtkati nê axãmnhÿx akÿnh nê ri apa. Kwãr mē mãmri ixtã ã mē anhÿpêx anê nê mē amex kêt ã mē ajarē. Amnepēm na prem ã Tÿrtÿm nhÿ hã kapēr jarēnh xwÿnhjê nhÿpêx anê. Jakamã koja mē uràk nê ã mē anhÿpêx anê. Hãmri nhÿm Tÿrtÿm ja hã mē apumu nê amnhÿm mē amex ã mē ajarē. Hãmri nê nhÿrmã kaxkwa kamã wa inhō krÿ kamã

mê ato mex nê. Jakamã kêr ka mê ã amnhĩ kukamã ajamaxpêr anhÿr pê mãmri akĩnh nê ajamakêtkati nê axãmnhĩx ri apa. Kwãr mê mãmri ã wa ixtã mê anhĩpêx anê. Anê.

Jejus krajaja te kot kaxwa mê kanê hpôk wa uràk

Makre 9.49-50; Rukre 13.34-35

¹³ Nhũm Jêjus arĩ mê kãm kapêr nê mê kãm:

—Nê mê ate ixkôt amnhĩ xunhwÿr xwÿnhjaja te mê ate kaxwa pyrãk. Kaxwaja mê apkur xà ho ành mã mex. No koja mēhō tēn kamã pika hkwÿ mê nê ho ahkã. Hãmri tanhmã kot wem ho nê akupÿm ho mex? Nã koja akupÿm mex kêt nê. ãm mê kot hkapĩr pix kaxyw koja mex. Ja pyrã nê kot ka mê atõ ate inhmã tanhmã amnhĩ nhĩpêx to ho apa hã amnhĩ jarēnh tã gaa nê rĩ amã ixkôt amnhĩ nhĩpêx prãm kêt nê. Hãmri nê ra te apê kaxwa mê pika pihkarta pyrãk. Kwa mê ixujarēnh ma nê kãm ajamaxpêr tÿx rãhã ho ri apa.

¹⁴⁻¹⁶ —Nê te mê ate kanê hpôk pyrãk. Nê te mê ate hixêt prêk nhĩmök ã krĩ xãm pyrãk. Koja krĩja hixêt prêeti nhĩmök ã xa nhũm mê piitã omu. Nê kanêja. Xà na htem kanê hpôk nê poti ho hpro? Nã na htem hpôk nê kÿx pê mēmoj nhĩmök ã unhwÿ nhũm mê piitã mê kãm hirã nhũm mê hirã kamã mēmoj pumunh mex nê. Ja pyrã nê kot kaj mê tãm amnhĩ nhĩpêx o ri apa nhũm mê piitã ja hã mê apumunh kôt ra kaxkwa kamã Tĩrtũm mex ã harēnh o pa. Anê.

Jejus kot tanhmã Mojes kapêr jarēnh to Rukre 16.16-17

¹⁷ Nhũm Jêjus arĩ mê kãm kapêr nê mê kãm:

—Nê amnepê m Mojes kot Tĩrtũm nhÿ hã Ijaewjê mã tanhmã mê kot amnhĩ nhĩpêx to hã mê kãm karõja. Nê amnepê m Tĩrtũm nhÿ hã kapêr jarēnh o mê pa xwÿnhjê kapêrja. Ixte mê kapêr o ijapêx kaxyw na pa pre mê awÿr ixwrÿk kêt nê. Jakamã kwa mê ri ã axpēn mã ijarēnh anhÿr kêt nê. Kêt ixprĩ hã ixte mê amã mê kapêr jarēnh nhũm mê ate mar mex kaxyw na pa pre kaxkwa rũm mê awÿr wrÿ.

¹⁸ —Tĩrtũm kapêr ã kagã htũm kot mēmoj jarēnhja. Koja ujarēnh xà hkôt mēmoj tanhmã amnhĩ to hpar mê nhũm rĩ kormã

kaxkwa mê pika wa hapêx pa nhũm kapêr ã kagãja mãanēn hapêx. Nom nhũm Tĩrtũm kapêr koja mēmojja pyrã nê aa hapêx kêt nê. Koja rãhã ho rãhã nê aa ihkjê ho tanhmã mēnh to hkêt nê. ãm hãmri na pa ã mê amã harēnh anê.

¹⁹ —Nê kot ka mê atõ Tĩrtũm kapêr o pixire nê hirôp xa. Hãmri nê ra amnhĩ pyrã nê anhĩõ mã ja hã amÿnê. Apyrã nê kot hirôp ãm kaxyw ka kãm hã amÿnê. Kot kaj ã amnhĩ nhĩpêx anê hãmri nê apê Tĩrtũm kra hkêt ã amnhĩ to amnhĩrit. Nom kot ka kêt mê tãm amnhĩ nhĩpêx o ri apa. Nê amnhĩ pyrã nê tãm mê kot amnhĩ nhĩpêx kaxyw mê kãm akapêr o ri apa hãmri nhũm Tĩrtũm ja hã apumu nê ato hkra nê ato mex nê.

²⁰ —No Parijew nhõ xwÿnhjaja nê Tĩrtũm kapêr tũm o mê ahkre ho mê pa xwÿnhjaja. Mê kot Tĩrtũm kapêr kôt amnhĩ nhĩpêx mex ã amnhĩ jarēnh tã no ãm hkôt ã amnhĩ nhĩpêx anhÿr kêt nê. Jakamã kot kaj mê hkôt amnhĩ nhĩpêx o ri apa hãmri nê mê uràk nê nhÿrmã Tĩrtũm mê wa inhõ krĩ kamã apa hkêt nê. Anê.

Mê gryk o mê pa xwÿnhjê jarēnh

Rukre 12.58-59; mãanēn Rõmãn 12.19; Epes 4.26; Wam Ximotre 2.8; Xiakre 1.19-20

²¹ Nhũm Jêjus arĩ mê kãm kapêr nê mê kãm:

—Nê amnepê m na prem mê panhĩgêjtê mã Tĩrtũm kapêr kwÿ jarēnh o pa nê mê kãm:

Kêr ka mê axpēn par kêt nê. Kot kaj mê mēhõx pĩ nhũm mê ja mÿrapê atom-nuj nê. Nê ma mê anhõ pahĩhti hwÿr ato tē nhũm mÿrapê tanhmã ato rÿ hkôt apĩ. Anê.

ãm hãmri na prem mê kãm ja jarē. ²² Tã kot paj ixprĩ hã mê amã tanhmã harēnh to ka mê inhma. Kot kaj mê mēmoj tã anhĩõ kamã agryk. Hãmri nhũm Tĩrtũm tee ri ja hã apumu nhũm ja kãm mex kêt nê. Jakamã koja mê anhõ pahĩhti tanhmã ja hã mê ato japêr hã koja ja mex nê. Rÿ kot kaj mê tanhmã mēhõ japrÿ hto. Ho hagrô rÿ ho rop. Mÿrapê kop apu akwÿ kot apynēnh nê anhõ pahĩhti hwÿr ato htēm nê ïhkram ajaxar ronhÿx ja inhmã mex nê. Rÿ kot kaj mê tanhmã anhĩõ mã akapêr punuj to nê kãm: “Tk. Ate ho warēhti hã. Te apê hagrô

pyràk kênã.” Anhÿr o kãm akapêr. Tã kop apu Tirtũm ra ã akapêr anhÿrja mÿrapê mẽ kot amnhĩ xà htÿx kamã hamak tũm xàta wÿr amênh ronhÿx ja inhmã mex nê. Ja pumaj kwa kêr ka mẽ ã axpên mã akapêr anhÿr kêt nê. Kêt mẽ axpên mã tãm akapêr pix o ri axpên kôt apa.

²³ —Nê kêr ka mẽ tanhmã ate anhÿo nhĩpêx hto kamã Tirtũm mã mex o mex ã harênh kêt nê. Kêr ka mẽ kãm amnhĩ jarênh o akrĩ hãmri nê ra mêhõ kot mẽmoj tã akamã gryk xwÿnh mã ajamaxpêr japêr. ²⁴ Hãmri nê akato nê ma hwÿr atêm kurê kumrêx nê wa tãm axpên mã akapêr nê tãm akupÿm axpên xãm. Hãmri nê rĩ kormã ma akupÿm tẽ nê Tirtũm mã amnhĩ jarênh jatur xàm amê nê kãm mex o mex ã harê. Kêr ka mẽ ã amnhĩ nhĩpêx anhÿr o ri apa.

²⁵⁻²⁶ —Na htem tanhmã axpên nhĩpêx to hãmri nê kot tanhmã war axpên to xwÿnhjê hõja ma õ pahi hwÿr tẽ nê kãm tanhmã kot ho xwÿnhhta jarênh kaxyw nojarê. Hãmri nhũm ra kamã gryk xwÿnhhta kot pahi mã harênh kaxyw nojarê ã harênh ma nê tee ri amnhĩ kukamã hamaxpêr nê ma hwÿr tẽ nê wa akupÿm tãm axpên xãm. Na htem ã amnhĩ nhĩpêx anê. Pahi kot wa harênh mar nê tanhmã axpên tã wa ho pymaj na htem ã amnhĩ nhĩpêx anê nê tokyx tãm akupÿm axpên xunhwÿ. No koja mẽ anhÿr kêt nhũm pahija wa harênh ma nê wa kot tanhmã axpên to xwÿnhhta õ jaxà nhũm tee ri kãm kator prãm. Hãmri nê tanhmã amnhĩ to nê ra amnhĩ pãnhã kãm amnhÿrer pa nhũm pahihtija rĩ kormã pôristi mã anê nhũm kãm ure nhũm kato. Ja pyrà nê kêr ka mẽ Tirtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nê hkôt amnhĩ nhĩpêx rãhã ho ri apa. Anê.

Tanhmã mẽ pahte mẽ pahprõjê nhĩpêx to Matêwre 19.3-9; Makre 9.43-47, 10.2-9; mããnê Rukre 16.18

²⁷ Nhũm Jejus arĩ mẽ kãm kapêr nê mẽ kãm:

—Nê na pre finat Mojesja mẽ panhĩgêjtê mã Tirtũm kapêr tũm kwÿ jarê nê mẽ kãm: “Kêr ka mẽ amnhĩ prõ pix tânopxar o ri apa. No mẽ kuhpa hã nhãm mêhõ ho amnhĩkati ho ri apa hkêt nê.” Anê. ãm hãmri na pre mẽ kãm ja hã karõ. ²⁸ Tã kot paj ixprĩ hã mẽ amã tanhmã harênh to ka mẽ inhma.

Kot kaj mẽ nhãm mêhõ pumu nê amã ho amnhĩkati hprãm mã ajamaxpêr. Jao te ra ate ho amnhĩkati pyràk o amnhĩ nhĩpêx. Kormã ate ho amnhĩkati hkêt tã ra hkukamã ajamaxpêr jakamã te ra ate ho amnhĩkati pyràk o amnhĩ nhĩpêx. ²⁹ ã mẽ hamaxpêr punuj anhÿr xwÿnhjaja koja mẽ nhÿrmã ma mẽ kot amnhĩ xà htÿx kamã hamak tũm xàta wÿr ma mra nê kamã pa rãhã ho pa. Jakamã kêr ka mẽ nhãm mêhõ pumu nê amã hkĩnh japêr hãmri nê te ate ano kaxàr nê mênh nê axte ate omunh kêt pyràk o amnhĩ nhĩpêx. Jao hkàx ã rĩt nê ma nhÿhÿm atêm kurê kumrêx.

³⁰ —Nê kot kaj mẽ anhĩhkra ho tanhmã amnhĩ tomnuj to kaxyw. Hãmri nê tee ri ja hã amnhĩ pumu nê te ate amnhĩ nhĩhkra krãhÿr nê mênh pyràk o amnhĩ nhĩpêx nê tanhmã amnhĩ tomnuj to hkêt nê. Mẽ ìhkra ho mẽ kot tanhmã amnhĩ tomnuj to ho mẽ pa xwÿnhjaja koja mẽ nhÿrmã ma mẽ kot amnhĩ xà htÿx kamã hamak tũm xàta wÿr ma mra nê kamã pa rãhã ho pa. Anê.

Mẽ pahte axpên kaga hkêt

³¹ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêjtê mã Tirtũm kapêr tũm kwÿ jarê nê mẽ kãm: “Kot kaj mẽ atõ aprõ kaga kaxyw hãmri nê ate hkaga hã amnhĩ jarênh ã kagà nhĩpêx nê kãm agõ nê rĩ kormã hkaga.” Anê. ãm hãmri na pre ã mẽ kãm Tirtũm kapêr tũm jarênh anê. ³² Tã kot paj ixprĩ hã mẽ amã tanhmã harênh to ka mẽ inhma. Kêr ka mẽ atÿx ri amã hprãm xà hkôt aprõ kaga hkêt nê. Nom koja aprõ akuhpa hã nhãm mêhõ ho amnhĩkati ka harênh ma hãmri nê amã ja hã hkaga hprãm nê mãmri kam nê hkaga. Ja tanhmã kute hkêt. Nom koja ã amnhĩ nhĩpêx anhÿr kêt tã ka amnhĩ krã hkôt hkaga. Hãmri nhũm mêhõ apãnhã ho hprõ nê o pa. Hãmri nê ra kot apê aprõ ho amnhĩkati ho pa pyràk o hipêx. Nê nija haxwÿja. Te arĩ kêp aprõ htã akuhpa hã nhãm myja o amnhĩkati o pa pyràk o amnhĩ nhĩpêx. Anê.

Tãm mẽ pakapêr ã Jejus kot mẽ pamã karõ Xiakre 5.12

³³ Nhũm Jêjus arĩ mẽ kãm kapêr nê mẽ kãm:

—Nê na pre finat Mojes mẽ panhîgêjtê nê pahpãmjê mã Tĩrtũm kapêr tũm jarênh o: “Kêr ka mẽ Tĩrtũm mã mẽmoj to anhÿr ã amnhĩ jarê hãmri nê amnhĩ jarênh xà hkôt kãm tanhmã amnhĩ nhĩpêx to. Nom kêr ka mẽ atÿx ri kãm tanhmã amnhĩ jarênh to ho amnhĩ to axêx kêt nê. ãm akatàt kôt mẽ ate amnhĩ jarênh to xà hkôt kãm tanhmã mẽmoj to.” Anê. ãm hãmri na pre mẽ kãm ja jarê. ³⁴ Tã kot paj ixprĩ hã mẽ amã tanhmã harênh to ka mẽ inhma. Kêr ka mẽhõ mã tanhmã amnhĩ jarênh to. Tĩrtũm mã pix mã amnhĩ jarênh kêt nhãm mẽhõ mã mããnên tanhmã amnhĩ jarênh to. Nê akatàt kôt kãm amnhĩ jarê. Na ka htem mẽ kot mẽ axêx kêt kôt mẽ apumunh kaxyw mẽmoj nhĩxi jarênh kôt amnhĩ jarê. Nom kêr ka mẽ axte ã mẽmo nhĩxi hã amnhĩ jarênh anhÿr kêt nê. Mẽmoj tã amnhĩ jarê nê akatàt kôt amnhĩ jarênh kurê kumrêx. No mẽ kot axêx kêt kôt apumunh kaxyw mẽmoj nhĩxi hkôt amnhĩ jarênh kêt nê. Tanhmãn kaxkwa nhĩxi jarênh kôt mẽmoj tã amnhĩ jarênh kêt nê. Kaxkwa kêp Tĩrtũm krĩ xà maati kênã kot ka kêt mẽ axtem nê atÿx ri amnhĩ kaxyw hixi jarê. ³⁵ Rÿ mẽ kot axêx kêt kôt apumunh kaxyw pika nhĩxi jarênh kêt nê. Pika kêp Tĩrtũm par xãm xà kênã kot ka kêt mẽ atÿx ri amnhĩ kaxyw tanhmã hixi jarênh to. Nê krĩ pê Jerujarêja mããnên kêr ka mẽ ri amnhĩ kaxyw tanhmã hixi jarênh to hkêt nê. Koja nhÿrmã Tĩrtũm mẽ awÿr Jerujarê hwÿr ixpê pah maati hã inhmẽ pa kamã mẽ ato amnhĩptâr o ixkrĩ. Jakamã kêr ka mẽ ri atÿx amnhĩ kaxyw tanhmã hixi jarênh to ho ri apa hkêt nê.

³⁶ —Nê kêr ka mẽ kot axêx kêt kôt apumunh kaxyw mẽ ri tanhmã amnhĩ krã hkĩ jarênh to hkêt nê. Kot kaj mẽ anê nê ãm tanhmã hã harênh to kaprÿ. Xà kot kaj mẽ ajamaxpêr pix o tanhmã amnhĩ krã hkĩ hto? Nà kot kaj mẽ ho anhÿr kêt nê. Jakamã mẽ ri atÿx tanhmã harênh to hkêt nê.

Nê mẽ atÿx ri mẽmo nhĩxi jarênh kôt mẽmoj tã amnhĩ jarênh o apa hkêt nê. ³⁷ ãm akatàt kôt tãm amnhĩ jarênh kurê kumrêx. Jao mẽ kãm: “Tÿ. Nà kot paj ho anê.” Anhÿr o mẽmoj tanhmã ho. Rÿ mẽ kãm: “Nà kot paj ho anhÿr kêt nê.” Anhÿr o mẽmoj

tanhmã ho hkêt nê. ãm akatàt kôt tanhmã mẽmoj tã amnhĩ jarênh to xà hkôt ho anhÿr kurê kumrêx. Mẽ kot Satanasti hkôt amnhĩ nhĩpêx o mẽ pa xwÿnh pixjaja na htem hêx rom mẽmoj nhĩxi jarênh kôt tanhmã amnhĩ jarênh to ho pa. Anê.

Mẽ pahte tanhmã axpên nhĩpêx to hã Jêjus kot mẽ pamã karõ

Rukre 6.27-30, 23.34; mããnên Atre 7.60; Rõmãn 12.14

³⁸ Nhũm Jêjusja arĩ mẽ kãm kapêr nê mẽ kãm:

—Na prem amnepêm mẽ panhîgêjtê mã Tĩrtũm kapêr tũm jarênh o: “Koja mẽhõ apê ano katõk nê hkapa hã koja mẽ anhõ pahija atã mã ho anê nê kêp no kapa. Rÿ koja mẽhõ apê axwa hõ hkwyÿr hã koja atã mã ho anê nê atã kêp wa hõ hkwyÿr.” Anhÿr o mẽ kãm hã karõ. ãm hãmri na prem ã ja jarênh anê. ³⁹ Tã kot paj ixprĩ hã mẽ amã tanhmã ja jarênh to ka mẽ inhma. Koja mẽhõ tanhmã mẽ anhĩpêx to ka mẽ ãm amnhĩ tã omu nê tanhmã amnhĩ tã ho hkêt nê. Koja anhĩnep akura ka ãm omu nê tanhmã amnhĩ tã ho hkêt nê. Te ate kãm ihkjê hpêr nhũm kot ihkjê kamã hkuranh pyrãk o amnhĩ nhĩpêx nhũm ja amã mex nê. No amnhĩ tã tanhmã ho hkêt nê.

⁴⁰ —Nê koja mẽhõ anhĩnõhkã hã awÿr nhũm mẽ anhõ pahija amã anê ka mãmrĩ kãm agõ nê tanhmã hã kãm nê hkêt nê. Te ate hkôt kry pê kãm anhĩnõhkã hpakã ry jagjênh xwÿnhhta nhõr pyrãk o amnhĩ nhĩpêx. Nom kêr ka mẽ kamã agryk kamã kãm õr kêt nê.

⁴¹ —Nê koja mẽhõ ate kãm jênh tur nê hkôt ho amõr ryy kaxyw amã kapêr ka mãmrĩ kãm ho anê. Nê kot amã nhÿri hã karõ xaja wÿr o põj nom kamã kãm õr kêt nê. Kãm ho hakrenh ryy nê rĩ kormã akupÿm kãm agõ.

⁴² —Nê koja mẽhõ õ mẽmoj kêt nê awÿr tẽ nê mẽmoj tã awÿr ka mãmrĩ kãm agõ. Rÿ nhũm awÿr tẽ nê apê mẽmoj to ãpresta kaxyw ka mãmrĩ kãm ho ãpresta. Kêr ka mẽ ã axpên nhĩpêx anhÿr o ri apa. Anê.

Mẽ pamã axpên kĩnh ã Jêjus kot mẽ pamã karõ

Rukre 6.32-36; mããnên Rõmãn 12.14

⁴³ Nhũm Jêjus arĩ mẽ kãm kapêr nê mẽ kãm:

—Ně na prem amnhĩ krã hkôt axtem ně tanhmã mẽ panhĩgêtjê mã mẽmoj jarěnh to ně mẽ kãm: “Kêr ka mẽ amã mẽ akràmnhwỳjê pix kĩnh ně tanhmã mẽ ho mex to. No kêt mẽ kot tanhmã mẽ ato xwỳnhjaja kêr ka mẽ mãmri mẽ kamã axàhkurê ho ri apa.” Anhỹr o mẽ kãm karõ. ⁴⁴ Nom pa kot paj mẽ amã Tĩrtũm kot tanhmã ja hã karõ hto hã harê ka mẽ inhma. Kêr ka mẽ kot tanhmã ri mẽ atomnuj to xwỳnhjaja amnhĩ tã tanhmã mẽ ho hkêt ně. ãm tanhmã mẽ ho mex to pix hkukamã mãn ajamaxpêr. Ně mẽ ho Tĩrtũm wỳr pix kukamã mãn ajamaxpêr. ⁴⁵ Na hte ã kaxkwa kamã Mẽpahpãm Tĩrtũmja amnhĩ nhĩpêx anhỹr o pa. Mẽ kot amnhĩ tomnuj xwỳnhjaja ně mẽ kot amnhĩ to mex xwỳnhjaja nhũm hte mẽ ho hpimràatã mẽ ho mex o axpẽn pyrãk. Jao hamê wa hwỳr na rê ně hamê wa hwỳr myyti rê nhũm hamê wa kãm hirã ho pa. Jakamã kêr ka mẽ urãk ně mẽ piitã tãm mẽ hipêx o axpẽn pyrãk. Mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjê mẽ ho apimràatã mẽ ho mex o axpẽn pyrãk.

⁴⁶ —Ně xat kaj mẽ amã mẽ piitã mẽ ho mex prãm kêt ně ãm mẽ kot mẽ ato mex xwỳnh pixjaja ka mẽ amã mẽ ho mex prãm nhũm Tĩrtũm ja hã mẽ apumu nhũm ja kãm mex ně nà? Nà koja kãm mex kêt ně. Koja mễhõ ato mex kêt tã kêr ka ãm amnhĩ rom ho mex ně. Nhũm Tĩrtũm ja hã apumu ně amnhĩm amex ã ajarê. Mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm mẽ amnhĩ xwar mẽ ho mex. No tãm mẽ kot amnhĩ nhĩpêx xwỳnhjaja na htem mẽ piitã mẽ ho mex o axpẽn pyrãk. Mẽ kot tãm amnhĩ nhĩpêx xwỳnhjaja ně mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpẽn pyrãk.

⁴⁷ —Ně na hte mẽ hkwỳjaja ãm amnhĩ kwỳjê pix mã kapêr mex o pa. Nom mẽ piitã tãm mẽ hipêx kêt ně. Nom kêr ka mẽ ã amnhĩ nhĩpêx anhỹr kêt ně. Kêr ka mẽ kurom mẽ piitã tãm mẽ hipêx o axpẽn pyrãk. Mẽ akwỳjê mẽ mẽ akwỳ hkêt xwỳnhjaja ka mẽ hipêx o axpẽn pyrãk. Ně tãm mẽ kãm akapêr o axpẽn pyrãk. ⁴⁸ Kaxkwa kamã Mẽpahpãm Tĩrtũm pyrãk ně mẽ kot amnhĩ tomnuj xwỳnhjê mẽ mẽ kot

amnhĩ to mex xwỳnhjaja mẽ ho apimràatã mẽ ho mex o axpẽn pyrãk. Na hte ã Tĩrtũmja mẽ panhĩpêx anê. Anê.

6

Mẽ pahte mẽ kêp amrakati xwỳnhjê ho mex rãhã hã mẽ pamã karõ

¹⁻² Nhũm Jejus arĩ mẽ kãm kapêr ně mẽ kãm:

—Ně na htem mẽ piitã hkwỳjê noo mã tanhmã mẽ kêp amrakati xwỳnhjê ho mex to. Nom kãm mẽ hkaprĩ kamã tanhmã mẽ ho mex to hkêt ně. ãm hkwỳjaja kot ja hã mẽ omunh ně mẽ mex ã mẽ harěnh pix kaxyw na htem krĩ hkôt ri mẽ kêp amrakati xwỳnh piitã mẽ ho mex o pa. Ně mẽ pikuprõnh xà hã ixkre kamã kuhê ně tanhmã mẽ ho mex to. Mẽ hkwỳjaja kot ja hã mẽ omunh ně amnhĩm mẽ mex ã mẽ ho jarkrar kaxyw. Jakamã koja nhỹrmã Tĩrtũmja axte ja hã mẽ kãm mẽmoj mex nhõr kêt ně. Ra jar mẽ hkwỳjaja kot ja hã mẽ omunh ně amnhĩm mẽ mex ã mẽ harěnh kênã. Jakamã kwa kêr ka mẽ ho mẽ urãk kêt ně. Ně tanhmã mễhõ ho mex to kaxyw ně akwỳjê no kuhpa hã mẽ hkàx ã tanhmã mẽ ho mex to. No kot kaj mẽ noo mã tanhmã mẽ ho mex to. Mẽ kot hã apumunh ně ato jarkrar kaxyw tanhmã mẽ ho mex to nhũm kaxkwa kamã Mẽpahpãmja ja hã apumu ně mẽ hã tanhmã ato mex to hkêt ně. Koja ãm hã apumu.

³ —Ja pymaj kêr ka mẽ mẽ kêp amrakati xwỳnhjê mã mẽmoj nhõr kaxyw hãmri ně mẽ piitã mẽ no hkàx ã tanhmã mẽ ho mex to. Hãmri ně nhãm ri ja hã mẽ kãm amnhĩ to jarkrar kêt ně. Aprõ mã rỳ akrajê mã rỳ akràmnhwỳ mã hã amnhĩ jarěnh kêt ně. ⁴ Kot kaj mẽ no hkàx ã tanhmã ho mex to no nhũm Tĩrtũm tapxipix apumunh o nhỹ. Hãmri ně ja hã ato mex rax ně ka amex ně apa. Anê.

Tanhmã mẽ pahte Tĩrtũm mã amnhĩ jarěnh to hã mẽ pamã karõ

Rukre 11.1-13, 18.9-14

⁵ Nhũm Jejus arĩ mẽ kãm kapêr ně mẽ kãm:

—Ně mẫãnên ja. Na htem hakwa pix o amnhĩ mex ã amnhĩ jarěnh xwỳnhjaja Tĩrtũm mã amnhĩ jarěnh kaxyw ně mẽ kot

Tirtûm kapêr o mē ahkre xà hã ixkreja wÿr agjê. Nê mē piitã mē noo mã kãm tanhmã amnhĩ jarênh to. Rÿ gáp kuhê nê mē piitã mē noo mã kãm amnhĩ jarê. Tã mēmo kaxyw na htem mē noo mã Tirtûm mã amnhĩ jarê? Nà ãm mē kot ja hã mē omunh nê mē mex ã mē ho jarkrar pix kaxyw. Nê mē harênh o: “E mÿjti pumu. Na hte apkati mē ã Tirtûm mã amnhĩ jarênh anê. Kot amnhĩ to mex xwÿnh mân.” Anhÿr ã harênh kaxyw. Tã ra mē piitã mē kot ja hã omunh nê amnhĩm mex ã ho jarkrar jakamã koja Tirtûm axte ja hã tanhmã ho mex to hkêt nê. Ra pika ja kamã mē kot mē omunh nê mē mex ã mē harênh kênã.⁶ No mē kajaja. Kêr ka mē uràk nê ã amnhĩ nhĩpêx anhÿr kêt nê. ãm Tirtûm mã amnhĩ jarênh kaxyw nê akwÿjê no hkàx ã hitom wÿr agjê nê hitom kãm ahte kãm amnhĩ jarê. Hãmri nhÿm Tirtûm tapxipix ja hã mē apumu. Mē amã amnhĩ to amnhĩrît kêt tã mē apumu. Hãmri nê mē ato mex nê.

⁷—Nê mē kêp Tirtûm kra hkêt xwÿnhjaja na htem sãnti mã amnhĩ jarênh kaxyw nê xatã kãm amnhĩ jarê. Nê xatã kàx péê kãm amnhĩ jarê. Nê hamaxpêr o: “Kot paj xatã sãnti mã amnhĩ jarê nhÿm inhmar japêr.” Anhÿr o hamaxpêr jakamã xatã kãm amnhĩ jarê. No ãm htÿx ã hamaxpêr anhÿr kaprÿ.⁸ Jakamã kwa kêr ka mē ho mē uràk kêt nê. Tirtûm ra kot mē ate mēmoj tã hwÿr xàta ra ja kukamã kot omunh mex kênã kot ka kêt mē xatã hã hwÿr o akuhê.

⁹—Nê kêr ka mē kãm amnhĩ jarênh kaxyw nê amnhĩ krã hkôt tanhmã kãm amnhĩ jarênh to rÿ kãm amnhĩ jarênh o: Pa Mëinhĩpêêxà maati pé kaxkwa kamã ri apa xwÿnh? Amex o amex Tirtûm.

¹⁰ Apê mē ijamâr mex xwÿnh maati na ka. Na hte kaxkwa kamã mē kot ri amã tanhmã amnhĩ nhĩpêx to ho mē pa xwÿnhjaja akôt pix mã amnhĩ nhĩpêx o ri pa. Tã ijaxwÿja inhmã mē uràk nê akôt pix mã amnhĩ nhĩpêx o ri ixpa hprãm.

¹¹ Nê kwa jarãhã mē inhmã mēmoj gô pa mē akukwak ri ho apku.

¹² Na pa hte tãhã amnhĩ tomnuj nê Tirtûm. Nom mē kot tanhmã ixtomnuj to xwÿnhjaja na pa hte ãm mē omu nê

amnhĩ tã tanhmã mē ho hkêt nê. Nê ja ho ijamakêtkati nê axte kãm ijamaxpêr kêt nê. ã ixte amnhĩ nhĩpêx anhÿr jakamã kwa ja hã ixpumu nê ixpyrà nê ixte tanhmã amnhĩ tomnuj to hã ixpumu nê hã tanhmã ixto hkêt nê. ãm ho ajamakêtkati kurê kumrêx nê axte kãm ajamaxpêr kêt nê.

¹³ Nê kot paj nhÿrmã tanhmã amnhĩ tomnuj to kaxyw ka ja hã ixpumu nê ixte ã amnhĩ nhĩpêx anhÿrja nê ixto htÿx nê pa tanhmã amnhĩ tomnuj to hkêt nê. ãm mēmoj punuj pé ixpytâr rãhã ho apa Tirtûm. Tã ãm ja pix na hapêx. Anê.

—E kêr ka mē ã Tirtûm mã amnhĩ jarênh anê. Anê.

¹⁴—Nê koja mēhõ tanhmã anhĩpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Mëpahpãm maati ja hã apumu nê apyrã nê tanhmã ate amnhĩ tomnuj to ho hamakêtkati nê axte kãm hamaxpêr kêt nê. ¹⁵ Nom kot kaj mē ã amnhĩ nhĩpêx anhÿr kêt nê. Nê tanhmã mē kot mē atota ã anohtÿx rãhã ho apa hãmri nhÿm Mëpahpãm maati mē apyrã nê mē ate tanhmã amnhĩ tomnuj to ho hamakêtkati hkêt nê. ãm hã nohtÿx rãhã ho pa ho pa. Anê.

Tanhmã mē pahte Tirtûm mã mex o mex ã harênh to

Rukre 18.11-12

¹⁶ Nhÿm Jejus arĩ mē kãm kapêr nê mē kãm:

—Nê mē kot amnhĩ to jarkrar xwÿnhjaja na htem Tirtûm mã amnhĩ jarênh kaxyw hãmri nê tãhã ho apkur kêt rãhã kãm amnhĩ jarênh jakamã hkuk kaprĩ nê hkwÿjê hkôt pa. Tã mo kaxyw na htem ã mē noo mã amnhĩ nhĩpêx anê? ãm mē apkur kêt rãhã Tirtûm mã amnhĩ jarênh ã mē omunh pix kaxyw. Tã ra jar pika ja kamã mē kot ja hã mē omunh jakamã koja Tirtûm nhÿrmã ja hã tanhmã mē ho mex to hkêt nê. Jakamã kwa kêr ka mē ho mē uràk kêt nê. ¹⁷ Kêr ka mē tãhã Tirtûm mã amnhĩ jarênh rÿy kaxyw axàpkur kaga hãmri nê amnhĩ krã kahõ nê amnhĩ jaxwÿr mux nê akuk kĩnh nê ri akwÿjê hkôt apa. ¹⁸ Hãmri nê nhÿri mē

hkàx ã ahte kãm amnhĩ jarẽ nẽ kãm mex o mex ã harẽ. Kot kaj mẽ ã mẽ hkàx ã amnhĩ nhĩpêx anẽ nhũm mẽ akwỳjaja mẽ axàpkur kaga hã mẽ apumunh kêt nẽ. Nhũm Tĩrtũm pix ja hã mẽ apumu. Hãmri nẽ nhỹrmã ja hã mẽ ato mex nẽ. Anẽ.

Kaxkwa kamã mẽmoj mex

Rukre 12.33-34; mãânẽn Sikũn Ximotre 4.8; Wam Pêtre 1.4; Eprêw 10.34

¹⁹ Nhũm Jejus arĩ mẽ kãm kapêr nẽ mẽ kãm:

—Nẽ mãânẽn ja. Kêr ka mẽ jar pika ja kamã akukrêx rũnh o apa hkêt nẽ. Kêt jar mẽ hikukrêx koja kritpêm mex kêt nẽ. Kot kaj mẽ ho akuprõ nhũm amnhõre apê homnu rỳ paratre apê homnu. Nẽ kàx o mẽ akukrêx nhũm haxwỳja apê omnu rỳ nhũm mẽhõ apê hkwỳ ho ahkĩ. ²⁰ Jakamã kêr ka mẽ akukrêx rũnh o apa hkêt nẽ. Kaxkwa kamã Tĩrtũm kot mẽ akutêp mẽ akukrêx o pikuprõnhja na kêt mex kumrêx o jar mẽ hikukrêx jakrenh par. Jakamã kêr ka mẽ amã nhỹrmã kaxkwa kamã akukrêx mex prãm xàj tãm mẽ piitã tãm mẽ hipêx nẽ mẽ ho mex o ri apa. Nẽ mẽ kamã axukaprĩ nẽ. Nẽ Tĩrtũm kôt ri amnhĩ nhĩpêx mex nẽ. Hãmri nhũm ã mẽ ate amnhĩ nhĩpêx anhỹr ã mẽ apumu nẽ mẽ akutêp mẽ amã mẽmoj mex kwỳ jaxwỳ. Kaxkwa kamã mo amnhõre nẽ mo paratre? Nẽ kamã mo mẽ ahkĩnh xwỳnh? ãm kamã amrakati kumrêx. ²¹ Kot kaj mẽ jar akukrêx rũnh hãmri nẽ ãm tanhmã apê homnu hto pix kukamã ajamxpêr. Nom kot kaj mẽ apê Tĩrtũm kra hã kaxkwa kamã akukrêx mã ajamxpêr rãhã ho ra akĩnh nẽ ri apa.

²² —Nẽ kot kaj mẽ ixkapêr ma nẽ ixkôt amnhĩ nhĩpêx hãmri nẽ tãm amnhĩ nhĩpêx. Nẽ tãm axpên hipêx. Jao te hirã kamã arĩt mex pyrãk o amnhĩ nhĩpêx. ²³ No koja mẽhõ ixkapêr ma nẽ ãm kuma nẽ ixkwỳm ri amnhĩ nhĩpêx o pa. Hãmri nẽ te kamãt kô kamã mẽhõ rĩt mex kêt kot amnhĩ nhĩpêx pyrãk o amnhĩ nhĩpêx. E kêr ka mẽ ã amnhĩ nhĩpêx anhỹr pymaj ixkapêr ma nẽ kãm ajamxpêr tỳx rãhã ho ri apa.

²⁴ —Nẽ kot kaj apyxi nẽ anhõ patrãw hamêxkrut hãmri nẽ arĩgro pyxi hã hamê wa kãm axapênh o amỹkry hkêt nẽ. Kot kaj anẽ nẽ hõ gryk ã ihõ kaga. Ja pyrã nẽ

kot kaj mẽ jar akàxpore nẽ akukrêx pix mã ajamxpêr nẽ amã hapê ho akwỳjê pê ho anhõxỳ ho ri apa. Nẽ gryk ã Tĩrtũm kãm hprãm xà hkôt tanhmã ho mẽ ho mex to hkêt nẽ. Jakamã kwa kêr ka mẽ Tĩrtũm pix mã mãn ajamxpêr rãhã nẽ. Jao akàxpore nẽ akukrêx pix kukamã ajamxpêr o ri apa hkêt nẽ. Anẽ.

Mẽ pahte tee ri amnhĩ kukamã pajamxpêr kêt ã mẽ pamã karõ

Rukre 12.22-31; mãânẽn Piripos 4.6; Wam Pêtre 5.7

²⁵ Nhũm Jejus arĩ mẽ kãm kapêr nẽ mẽ kãm:

—E. Kwa kêr ka mẽ tee ri mẽmoj tã amnhĩ kukamã ajamxpêr kêt nẽ. Tanhmãnh axàpkur xà rỳ axê ka mẽ tee ri hkukamã ajamxpêr kêt nẽ. Mẽmoj piitã hkukamã tee ri ajamxpêr o ri apa hkêt nẽ. Tĩrtũmja àhpumunh tỳx o àhpumunh tỳx xwỳnh na. Na pre àhpumunh tỳx o mẽ anhĩpêx ka mẽ kukwak ri atĩr nẽ apa. Jakamã xà kot mẽ amã mẽ anhõ ho pa kaxyw àhpumunh kêt? Nà ja kaxyw àhpumunh tỳx kênã. Kêp mẽ anhĩpêx xwỳnh jakamã mãânẽn kêp mẽ amã mẽ anhõ xwỳnh. Nẽ kêp mẽ amã mẽ axê nhõr xwỳnh.

²⁶ —Mãn ka htem kuwênhre pumu. Na hte tee ri amnhĩ xàpkur xà hkukamã hamxpêr o hkaprĩ nẽ ri pa hkêt nẽ. Mẽ anhĩpêxà maati tãm na hte kãm õ ho pa. Tã kãm mẽ ajapê htỳx o kot kuwênhre jakrenh jakamã koja urãk nẽ mẽ amã mẽ anhõ rãhã ho pa.

²⁷ —Nẽ xà kot kaj mẽ kritpêm atĩr prãm xàj ja pix kukamã ajamxpêr rãhã nẽ ra ajamxpêr kôt kritpêm atĩr nẽ apa? Nà kot kaj mẽ anhỹr kêt nẽ.

²⁸ —Mãn ka htem akunĩ kamã pixõrã pumu. Na hte tee ri tanhmã kute hkukamã hamxpêr o ra hkaprĩ nẽ harir kêt nẽ. ²⁹ Tã nom muxre nẽ harir ka mẽ omu. Te ho amnepêm pahĩhti Sarumãw xê mex pyrãk nom mex o hakre. ³⁰ Pixõrãreja koja mẽmo arĩgro hã htĩr nẽ mux nẽ harir tã mẽmo arĩgro hã ra grã pa nẽ hapêx. Kêp pixõrã pix nẽ hapêx tokyx anhỹr tã nhũm Tĩrtũm ho mex nẽ nhũm mux nẽ harir. No mẽ kajaja na hte mẽ ato mex o pixõrã ho mexta jakre. Jakamã kwa mẽmo kaxyw kot ka kêt mẽ tee ri amnhĩ xê hkukamã ajamxpêr o

ri akaprî nê apa? Kot kaj mê ã ajamaxpêr anhÿr jao kormã amnhî kaxyw Tîrtûm mã ajamaxpêr tÿx kêt nê.

³¹ —Kwa mê tee ri axàpkur xà hkukamã ajamaxpêr o ri akaprî hkêt nê. Nê tee ri amnhî kukamã tanhmã ajamaxpêr to ho ri akaprî hkêt nê. ³² Mê kot Tîrtûm kôt amnhî xunhwÿr kêt xwÿnhjaja na htem ã ri hamaxpêr anhÿr o pa. Tã nom kêr ka mê ho mê urák kêt nê. Tîrtûm ra kot mê panhõ mêmoj kêt kôt mê pahpumunh mex kênã.

³³ Jakamã kêr ka mê hkôt ri tanhmã amnhî nhîpêx to rãhã ho ri apa. Nê amã ja pix tânopxar prãm. Hãmri nhùm Tîrtûm amnhî tã mê apumu nê apkati mê mê amã mêmoj nhõr o pa.

³⁴ —Jakamã kwa kêr ka mê tee ri amnhî kukamã ajamaxpêr o akaprî nê apa hkêt nê. Tîrtûm kot apkati mê mê pajamãr mex jakamã kêr ka mê jarãhã amnhî kukamã apkati mê ajamaxpêr kêt nê. Kê apkati mãn. ãm jarãhã pix mã mãn mê ate tanhmã amnhî nhîpêx tota kukamã ajamaxpêr. Tîrtûm kot mê pahpumunh mex o pa rãhã kênã. Anê.

7

Mê pahte axpên to pakapêr punuj kêt ã kot mê pamã karõ

Rukre 6.37-38, 6.41-42; mãänên Rõmãn 2.1-3; Wam Korît 4.5; Xiakre 4.11-12

¹ Nhùm Jejus arî mê kãm kapêr nê mê kãm:

—Nê kêr ka mê atÿx ri amnhî krã hkôt tanhmã akwÿjê hõ kot amnhî tomnuj to hã harênh kêt nê. Kot kaj mê ã harênh anê nhùm Tîrtûm ja hã mê apumu nê mê kajaja ã mê ajarênh anê. ² Na hte tanhmã mê pahte axpên nhîpêx to hã mê pahpumunh kôt tanhmã mê panhîpêx to. ³⁻⁵ Jakamã kwa kêr ka mê mêmõ kot tanhmã amnhî tomnuj to hã omu hãmri nê hã kãm kapêr tokyx anhÿr kêt nê. Akumrêx ate tanhmã amnhî tomnuj to hã amnhî pumu nê hkaga hãmri nê rî kormã ate mêmoj tã omunh xwÿnhhta wÿr tẽ nê hã tanhmã kãm akapêr to. Kêr ka mê ã amnhî nhîpêx anhÿr o ri apa.

—Nê xà koja mê akwÿjê hõ tanhmã amnhî tomnuj to grire. Ka ate amnhî tomnuj tÿx o hakrenh tã ã kot amnhî nhîpêx

anhÿr ã omu nê hã kãm akir nhùm amã ja mex nê nà? Nà koja amã ja mex kêt nê. Kot ka akumrêx ate tanhmã amnhî tomnuj tota kaga hãmri nê rî kormã anhîõ tanhmã kot amnhî tomnuj to grireta nê kãm akapêr nhùm ja amã mex nê.

⁶ —Nê xà na htem mê apkur xà mex jamÿ nê rop mã kurê? Nà na htem anhÿr kêt nê. Ja pyrã nê kêr ka mê kot Tîrtûm kaga xwÿnhjê mã kapêr jarênh o ri apa hkêt nê. Anê.

Mê pahte mêmoj to presija hã amnhî to Tîrtûm wÿr

Makre 11.24; Rukre 11.5-13; Juãw 14.13-14; mãänên Wam Tesarõn 5.17; Xiakre 1.5-8, 4.1-3

⁷⁻¹¹ Nhùm Jejus arî mê kãm kapêr nê mê kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhùm krãhyre gre hã awÿ ka axtem nê makre hõ py nê kãm agõ? Nà na ka htem ã mê hipêx anhÿr kêt. Na ka htem kot mêmoj tã mê awÿr xà hkôt kãm mêmoj gõ. Mê ate amnhî tomnuj tã na ka htem akrajê ho mex o ri apa. Tã kaxkwa kamã Tîrtûmja na hte mê ato mex o mê ate mê akrajê ho mex jakrenh. Kãm mê ajapê htÿx kôt na hte mê amã mêmoj mex nhõr o pa. Jakamã kot ka mê mêmoj tã awÿ nhùm mê ama nê mê ate mêmoj tã hwÿr xàta kôt amã kugõ. ãm xatã mê ate hã axàhwÿr o ri apaja nhùm mê amã hprãm xwÿnhhta gõ. ãm mêmoj tã hwÿr rãhã ho ri apa nhùm mê ama nê mê amã mêmoj tanhmã hipêx to. Te ho mêmõ kãm tep xành nê teprênhxã hpyr nê xatã gôx kãm rênh o ãm pyrã nê xatã mêmoj tã awÿ. Hãmri nhùm mê ama nê mê amã hprãm xwÿnhhta gõ. Te tep kanhêr xwÿnhhta jatã kot tep kanhêr pyrãk. Jao mê amã mêmoj prãm xwÿnhhta gõ.

¹² —Nê mê piitã mê kot tãm mê anhîpêxja na mê amã hprãm. Tã kêr ka mê amnhî pyrã nê tãm mê piitã mê hipêx o ri apa. Mê kot tãm mê anhîpêx kêt tã kêr ka mê axãmnhîx mê kêp anhõxÿ hkêt nê tãm mê hipêx. Kot kaj mê ã axpên nhîpêx anê nê finat Mojes mê Tîrtûm nhÿ hã mê kapêr o mê pa xwÿnhjê xujarênh xà hkôt axpên nhîpêx mex o ri apa. Anê.

Pry pijakrut jarênh

Rukre 13.24; mãânên Piripos 3.19-21

¹³⁻¹⁴ Nhũm Jejus arĩ mẽ kãm kapêr nê mẽ kãm:

–Tĩrtũm kapêrja mẽ kêp hihtỳx jakamã na htem ohtô nê hkôt amnhĩ xunhwỳr kêt nê. Na htem ãm hpỳnhre nê hkôt amnhĩ xunhwỳ nê hkôt amnhĩ nhĩpêx. Jakamã te Tĩrtũm nhõ krĩ hwỳr pry grireta ã hpỳnhre nê pa pyræk. No nhũm Satanasti hkôt mẽ kot amnhĩ xunhwỳr xwỳnhjaja na htem Satanasti kôt pix mã tanhmã amnhĩ tomnuj to hprãm. Mẽ kãm mex jakamã nhũm mẽ amnhĩ nhĩpêx o te pry krepak rax ã axpên kôt mẽ ohtô nê pa pyræk o amnhĩ nhĩpêx. Axtem kuwy hwỳr pry krepakja nõi tâ nhũm mẽ htỳx kuwyja wỳr amnhĩ to pa. Jakamã Tĩrtũm kapêrja mẽ apê hihtỳx tâ kêt ka mẽ mãmri hkôt amnhĩ xunhwỳ. Jao Tĩrtũm nhõ krĩ hwỳr pry grireta ã mãn apa. Anê.

Mẽ kot amnhĩ to hêx xwỳnhjê jarênh

Rukre 6.43-44; mãânên Xiakre 3.9-12; Wam Juãw 3.10, 4.4-6

¹⁵ Nhũm Jejus arĩ mẽ kãm kapêr nê mẽ kãm:

–E kwa mẽ o kora. Mẽ akwỳjaja kot kêp Tĩrtũm nhỹ hã kapêr jarênh xwỳnh ã amnhĩ jarênh tâ na htem ja hã amnhĩ to hêx. Nhũm htem kãm mẽ kapêr mar prãm nê. Te mẽ kapêr mex pyræk tâ no nhũm htem ãm mẽ kãm amnhĩ to hêx pix o ri mẽ hkôt pa. Mẽ kot mar nê axtem nê Tĩrtũm kapêr kwỳm tanhmã amnhĩ nhĩpêx to kaxyw nhũm htem hêx rom tanhmã mẽ kãm kapêr to. Jakamã kwa mẽ o kora. Mẽ axkãm ajamak rom nê amnhĩ nê mẽ omunh mex nê. ¹⁶ Kêr ka aprĩ hã mẽ piitã mẽ kot tanhmã amnhĩ nhĩpêx to hã mẽ omu nê rĩ kormã tanhmã mẽ harênh to. Mẽ hamaxpêr punuj xwỳnhjaja kêp Tĩrtũm nhỹ hã kapêr jarênh xwỳnh kêt. No koja mẽ tãm hamaxpêr nê tãm amnhĩ nhĩpêx ka ja hã mẽ omu nê mẽ kêp Tĩrtũm nhỹ hã kapêr jarênh xwỳnh ã mẽ omunh kurê kumrêx. Na htem hprĩ hã mẽ kot tanhmã amnhĩ nhĩpêx to ho pa hã mẽ omu nê rĩ kormã tanhmã mẽ harênh to. ¹⁷ Na htem hamaxpêr punuj hãmri nê hkôt tanhmã amnhĩ tomnuj to. Nom koja mẽhõ hamaxpêr mex nê hãmri nê hkôt tãm amnhĩ nhĩpêx mex o pa. ¹⁸ Na

htem tanhmã hamaxpêr to xà hkôt tanhmã amnhĩ nhĩpêx to ho pa.

¹⁹ –Nê koja mẽhõ õ pĩ hpàr ô hkêt japêr nhũm tee ri omu hãmri nê krãhta nê kuwym kumê. Ja pyrã nê koja mẽhõ tanhmã amnhĩ tomnuj to ho pa nhũm Tĩrtũm tee ri ja hã omu hãmri nê ã kot amnhĩ nhĩpêx anhỹr o paja mỳrapê kuwy hwỳr kumê. ²⁰ Jakamã kot kaj mẽ tanhmã mẽ kot amnhĩ nhĩpêx to ho pa hã akwỳjê pumu nê ra aprĩ hã tanhmã mẽ kute hã mẽ omunh kurê kumrêx. Mẽ kêp Tĩrtũm nhỹ hã kapêr xwỳnh ã mẽ omu rỳ mẽ kêp hkwỳm ri kapêr xwỳnh ã mẽ omu. Anê.

Mẽ kot Tĩrtũm nhõ krĩ hwỳr gjêx mã xwỳnhjê jarênh

Rukre 13.25-27; mãânên Sikũn Korĩt 13.5; Wam Juãw 2.3-6

²¹⁻²³ Nhũm Jejus arĩ mẽ kãm kapêr nê mẽ kãm:

–Nê Inhĩpêxà Tĩrtũm mẽ wa inhõ krĩja wỳr koja mẽ piitã gjêx kêt nê. ãm mẽ kot kapêr kôt amnhĩ nhĩpêx o mẽ pa xwỳnh pixjaja koja mẽ nhỹrmã ma hwỳr agjê. Na hte mẽ hkwỳjaja ixto “Pahiiti” anhỹr ã ijarênh tâ no ãm ixkôt ri amnhĩ nhĩpêx kêt nê. Jakamã koja mẽ nhỹrmã wa inhõ krĩ hwỳr àpir kêt nê. Kot paj nhỹrmã mẽ piitã mẽ htĩr ri tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harênh to. Mẽ mex ã mẽ hkwỳjê jarê nê mẽ kot amnhĩ tomnuj ã mẽ hkwỳjê jarê. Hãmri nhũm mẽ hkwỳ kot ixkôt amnhĩ nhĩpêx o pa hkêt xwỳnhjaja kuwyta wỳr ma pa pymaj tee ri amnhĩ kukamã hamaxpêr hãmri nê tanhmã inhmã amnhĩ jarênh to nê inhmã: “Kwa Jejus. Xà ate ixpumunh kêt? Na pa pre amnepêm ixtĩr ri pikap ixpare ri anhỹ hã aa mẽ kot mẽmoj pumunh kêt kwỳ ho anhỹr rax nê. Nê ixkwỳjê nê mẽkarõmnuti jano nê mẽ kãm akapêr jarênh o ri ixpa. Kwa xà ate ja hã ixpumunh kêt?” Anhỹr o inhmã amnhĩ jarê.

–Nom mẽ htĩr ri ã mẽ kot amnhĩ nhĩpêx anhỹr o pa htã ixkapêr kôt amnhĩ nhĩpêx kêt jakamã kot paj mẽ kuma nê ãm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mẽ apê ixkwỳ hkêt. Mẽ ate ixkôt amnhĩ nhĩpêx o apare hã. ãm mẽ ate amnhĩ tomnuj xwỳnh na ka mẽ. E

mê ma kuwy hwÿr amrar kurê kumrêx.” Anhÿr o kot paj amnhî nê mê hano. Hâmri nhÿm mê kot ixkôt amnhî nhîpêx o mê pa xwÿnh pixjaja ma Tirtûm mê wa inhô krî hwÿr gjêx pa. Anê.

Ixkre pijakrut jarênh

Rukre 6.46-49; mãânên Xiakre 1.22-25; Wam Juâw 2.3-6

²⁴ Nhÿm Jejus arî mê kãm kapêr nê mê kãm:

—E kot paj mê amã awjarê ka mê ixu-jarênh ma. Nà mê kot ixkapêr mar nê hkôt amnhî nhîpêx o mê pa xwÿnhjaja te mê kot ixujarênh ja pyrâk. Mê kot amnhî nhîpêx o te mêhõ kot amnhî kukamã hamaxpêr mex nê aptÿx kãm amnhîm ôrkwÿ nhîpêxja pyrâk. ²⁵ Kojã mêhõ aptÿx kãm amnhîm hipêx nhÿm mêmo arîgro hã na wrÿk rax nê gô htàm rax nê hanhi no nhÿm arî ãm tÿx nê xa. Tã kot kaj mê ixkôt amnhî nhîpêx o ri apa hã kot kaj mê te ixkre ja pyrâk. Jao amex nê ajamakêtkati nê ri apa. Te ho gô htàm kot ixkre janhir nhÿm arî ãm tÿxta pyrâk.

²⁶⁻²⁷ —No mê kot ixkapêr mar nê ãm mar xwÿnhjaja. Te mê kot mêhõ kot amnhî kukamã hamaxpêr mex kêt nê htÿx mör nê gô mÿri gyw rerek kãm amnhîm ôrkwÿ nhîpêx pyrâk. Kojã mêmo arîgro hã ôrkwÿ hã kôk xapêr tÿx nê na wrÿk rax nê. Nê gô htàm nê hanhi nê kêp gràn pa. Jakamã kojã mêhõ ixkôt amnhî nhîpêx kêt nê te kot ã kot amnhî nhîpêx anhÿr xwÿnhhta pyrâk. Jakamã kwa mê ixkapêr mar tÿx nê hkôt amnhî nhîpêx rãhã ho ri apa. Te mêhõ aptÿx kãm ôrkwÿ xãm xwÿnhhta pyrâk. Anê.

²⁸ Nhÿm pre Jejusja ã mê kãm ujarênh ry anê nhÿm mê amnhî jaêr pê kot tanhmã mê ahkre htoja mar o hkrî. ²⁹ Hâmri nê axpên mã harênh o:

—Hêxta waa nê. ãm hãmri na ã mê pamã kapêr anê. àhpumunh tÿx kôt na hte ãm hãmri tanhmã mê pamã ujarênh to. Pêr ãm Tirtûm kapêr tûm o mê ahkre xwÿnhjê kurom àhpumunh tÿx kumrêx. Anê.

8

Kà nhy hkro xapêr o pa xwÿnh jarênh
Makre 1.40-45; Rukre 5.12-16

¹ Tã nhÿm Jejus mê kãm kapêr pa hãmri nê hixêt prêeta rûm akupÿn wrÿ nê ma tẽ nhÿm mê ohtô nê ma hkôt mra. ² Hãmri nhÿm mêhõ my hkà nhy hkro xapêr o pa xwÿnhja omu nê hwÿr tẽ. Hãmri nê kutã hkônkrã ho tẽm nê hipô nê nhÿ nê amnhî to kuwy nê kãm:

—Pa Pahihti. E ot pa awÿr amnhî to tẽ. Akupÿm ate mê ixto mex kaxyw axàhpumunh tÿx jakamã kot ka amã akupÿm ixto mex prãm nê mãmrî ixto mex. Anê.

³ Hãmri nhÿm Jejus kuma nê hkà punuti hã ìhkra xi. Amnhî kamã kahak kêt nê hã ìhkra xi nê kãm:

—Nà kot paj ato mex. E akupÿm akà mex. Anê.

Hãmri nhÿm hkà akupÿm mex kurê kumrêx. ⁴ Hãmri nhÿm Jejus kãm:

—E kêr ka amnhî tã mê kãm tanhmã ijarênh to hkêt rãhã ma patre hwÿr tẽ kê akupÿm akà mex ã apumu. Hãmri ka hpãnhã amnepêm finat Mojes kot mê ate akupÿm amex ã Tirtûm mã tanhmã amnhî nhîpêx to hã karôta ka kãm ho anê. Kê mê piitã akupÿm akà mex ã apumu. Anê.

Pôristi krãhtûm mã àpênh xwÿnh jarênh

Rukre 7.1-10

⁵ Tã nhÿm Jejus ma krî pê Kapanaũ hwÿr mō. Hãmri nê hwÿr pōj nhÿm Rōm nhō xwÿnh pê pôristi krãhtûmja omu nê hwÿr tẽ. Kêp Ijaew kêt tã hwÿr tẽ. Na pre kãm àpênh xwÿnh kêp à htÿx nê nõ nhÿm omu nê tee ri hkukamã hamaxpêr. Hãmri nê Jejus ra ô krî hwÿr hpôx ã omu nê hwÿr tẽ nê kãm harê nê kãm:

⁶ —Pa Jejus? E ot pa awÿr tẽ. Inhmã àpênh xwÿnhja na ixpê à htÿx nê. Ra ì kamã htyk pa nê nõ. O mÿj inhörkwÿ kamã nõ. Anê.

⁷ Nhÿm Jejus kuma nê kãm:

—Tÿ? Tôe. Nà pa ma akôt tẽ nê akupÿm amã ho mex. Anê.

⁸⁻⁹ Hãmri nhÿm tee ri kuma nê kãm:

—Kwa akînhã ixpê Ijaew kêt jakamã ixte amnhî kuk ã ixpijaàm. ãm ja rûm mãn akapêr pix o akupÿm inhmã ho mex nã? Ixpê mê hkrãhtûm na pa hte inhô pôristi mã mêmoj tã karô nhÿm mê inhmar xà hkôt inhmã mêmoj tanhmã ho. Na pa hte mê kãm: “E mê ma mra nê ã amnhî nhîpêx anê.” Anê nhÿm htem inhma nê ma mrar kurê kumrêx. Rÿ pa mê kãm: “E mê amnê

ixwÿr mra nê ã amnhĩ nhĩpêx anê.” Anê nhũm mẽ inhma nê ixwÿr mra. No kêt ixrom axàhpumunh tÿx kôt na ka hte mẽ àja mã akapêr nhũm ama nê mẽ kêp hapôx nê ma mrar kurê kumrêx. Jakamã kwa ãm ja rũm akapêr pix o akupÿm inhmã ho mex nà? Anê.

¹⁰ Hãmri nhũm Jejus amnhĩ jaêr pê kot kãm ã kapêr anhÿrta ma nê hkĩnh nê. Hãmri nê hã hkôt ri mẽ mör xwÿnhjê mã kãm:

—Kwa xà na ka mẽmyja kapêr ma? Mẽ pahkĩnh ã kêp Ijaew kêt tã mẽ arom amnhĩ kaxyw inhmã hamaxpêr tÿx nê. Aa mẽ atõ uràk nê ã amnhĩ kaxyw inhmã ajamaxpêr tÿx anhÿr kêt tã nhũm mẽ arom kãm àpênh xwÿnh kaxyw ã inhmã hamaxpêr tÿx anê.

¹¹ Nà koja nhÿrmã mẽ hkwÿjaja kêp Ijaew kêt tã ohtô nê pika piitã kurũm ma Tirtũm mẽ wa inhõ krĩ hwÿr api nê hwÿr agjê. Nê wa ixkuri wa inhõ krĩ kamã Ijaew pàr krax pê Apraãw nê Ijak nê Jako mẽ pimràatã pa ho pa. Mẽ kêp Ijaew kêt tã mẽ ìhkô hã apkur mex o hkrĩ nhũm Tirtũm mẽ ho mex rax o pa. ¹² No pèr mẽ apê Ijaew kwÿjaja kot kaj mẽ hkôt hwÿr agjêx kêt nê. Tirtũm kãm hwÿr mẽ agjêx prãm tã ka mẽ axtem nê hkaga. Jakamã kot kaj mẽ ma kamàt kô xihtÿx rax wÿr ajapêx nê mẽ kêp awry rax nê mẽ kot amnhĩ xà htÿx kamã hamak tũm xàta kamã apa ho apa. Hãmri nê tee ri mẽ ixwÿr agjêx prãm kaprÿ nê akaprĩ xàj mur nê amnhĩ kamã agrÿk tÿx nê. No ãm tee ri amnhĩ kamã agrÿk kaprÿ. Mẽ ate Tirtũm kapêr kaga nê hkôt amnhĩ xunhwÿr kêt jakamã kot kaj mẽ nhÿrmã ã amnhĩ nhĩpêx anê. Anê.

¹³ Nhũm pre ã Jejusja mẽ kãm kapêr anê. Hãmri nê pòristi krãhtũmta mã kãm:

—E mãmrĩ ma akupÿm tẽ nê amã àpênh xwÿnhta pumu. Ra ate kaxyw inhmã ajamaxpêr tÿx jakamã na pa ra akupÿm amã ho mex. E akupÿm tẽ nê omu.

Anhÿr o kãm kapêr rôm nhũm ra akupÿm kãm mex kurê kumrêx.

*Jejus kot ahpÿnhã mẽ à xwÿnhjê ho mex
Makre 1.29-31; Rukre 4.38-41*

¹⁴ Tã nhũm Jejus ma Simãw Pêtre nhõrkwÿ hwÿr tẽ nê hwÿr axà. Nhũm Simãw Pêtre xupãnhgêx ra à nê hkà kagro htÿx nê nõ. ¹⁵ Hãmri nhũm Jejus hwÿr axà

nê omu nê ìhkra hã kupy nhũm hkà hakry nê akupÿm hihtÿx kurê kumrêx. Jakamã kãnhmã nhÿ nê mẽ kãm mẽõ hã àpênh o ri mra.

¹⁶ Tã nhũm ra awjakry. Ra kamàtre ho mō nhũm mẽ piitã Jejus wÿr mẽ à xwÿnhjê ho mra. Nê mẽkarõmnuti kot mẽ hwÿr gjêx xwÿnhjaja nhũm mẽ hwÿr mẽ o mra. Hãmri nhũm mẽ omu nê akupÿm mẽ piitã mẽ ho mex. Mẽ à xwÿnhjê ho mex nê mẽ hkwÿjê nê mẽkarõmnuti jano. ãm kapêr pix o mẽ nê mẽ hano nhũm mẽ kêp hapôj nê ma hapêx. ¹⁷ Na pre ra Tirtũm nhÿ hã kapêr xwÿnh finat Ijaisja ã amnhĩ nhĩpêx anhÿrja kukamã amnepêm mẽ kãm harênh o:

Tirtũm kot mẽ pahwÿr mēnh mã xwÿnhja koja nhÿrmã wrÿ nê mẽ panê mẽ paxà piitã rēnh pa nê akupÿm mẽ pahto mex pa. Anê.

Na pre ã finat Ijaisja Jejus kukamã harênh anê. Tã nhũm wrÿ nê kot harênh xà hkôt ã amnhĩ nhĩpêx anhÿr o pa.

*Wa kãm Jejus kôt amnhĩ xãm prãm xwÿnh
wa harênh
Rukre 9.57-62*

¹⁸ Tã nhũm Jejus amnhĩ pu hã rīt nê tee ri hwÿr mẽ mrar xwÿnhjê pumu hãmri nê hkôt mẽ pa ho mẽ pa xwÿnhjê mã kãm:

—E ma pu mẽ pàr mã agjê nê ma xarmã mō. Anê.

¹⁹ Hãmri nhũm mẽ nojarêt rôm nhũm Tirtũm kapêr tũm o mẽ ahkre xwÿnhjê hō Jejus wÿr tẽ nê kãm:

—Pa mẽ ijahkre xwÿnh? E pa ma akôt ri ixpa ho ixpa nà. Anê.

²⁰ Hãmri nhũm kuma nê kãm:

—Ko ka mã. Kam nê rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwÿ. Nê kuwēnhre pĩ nhĩmōk ã hikwÿ. No pa ixpê Tirtũm kot mẽ awÿr inhmēnh xwÿnh tã mry hkĩnhã inhõrkwÿ hkêt. Na pa hte amarĩ nhãm krĩ hwÿr ixpa nê nhãm hō hwÿr ixpa. Tã xà kot ka ixpyrà nê ã amnhĩ nhĩpêx anhÿr o ri apa nà? Anê.

²¹ Hãmri nhũm pãnhã hōja hwÿr tẽ. Ra mẽ kot hkôt amnhĩ xunhwÿr xwÿnhjê hōja hwÿr tẽ nê kãm:

—Pa Pahiti. E pa amã amnhĩ jarē ka inhma. Kot paj ma akôt ixpa ho ixpa no ãm kormã. Koja nhÿrmã inhĩpêxà tanhmã

amnhĩ to nê ty măn. Pa haxà hãmri nê rĩ kormã ma akôt ixpa ho ixpa. Anê.

²² Hãmri nhũm kuma nê kãm:

—Kwa nà ri ã ajamaxpêr anhÿr kêt nê. Ma ixkôt apa ho apa kurê kumrêx. Kê mẽmoj inhnê ano kupyr rÿ apê àmnàr kêt nê. Kwâr mẽ htĩr tũm nê mẽ pa hkêt mã xwÿnhjaja măn axwakre kamã amã anhĩpêêxà jamâr o pa nê haxà. Anê.

*Jejus kot kôk o pinhkrênh jarênh
Makre 4.35-41; Rukre 8.22-25*

²³ Tã nhũm mẽ ra xarmã nojarêt nhũm Jejus mẽ hkôt mẽ pa ho mẽ pa xwÿnhjaja pàr wÿr agjê hãmri nê himô raxja ã ma xarmã mō. ²⁴ Hãmri nhũm Jejus ra ôtxwa nê ra gôr nê nō. Puh nhũm naja hkoko ho mō nê kôk xapêr tÿx kumrêx. Nhũm gô kànhmã harĩ nê axpên tak tÿx nê. Xatã axpên tak nê pàr kre kamã axkapĩ nhũm ra àr o mō. Hãmri nhũm mẽ tee ri omu nê kãm ma htÿx kumrêx. Nê tee ri amnhĩ nhĩpêx. No nhũm Jejusja htÿx gôr nê nō. ²⁵ Hãmri nhũm mẽ hwÿr hprôt nê kumra nê kãm:

—Kwa Pahiti. Kot puj mẽ jarãhã pahtyk pa. Kwa tokyx kànhmã nhÿ nê ri tanhmã amnhĩ nhĩpêx to wehe. Anê.

²⁶ Hãmri nhũm hkrākato nê kànhmã nhÿ nê kôk mã kapêr nê kãm:

—E kwa hãmri anhĩkrê. Anê.

Puh nhũm hpinhkrênh pa nhũm gôja tãm nôr kurê kumrêx. Hãmri nhũm Jejusja hkôt mẽ pa ho mẽ pa xwÿnhjê hwÿr apkjê nê mẽ kãm:

—Hêxta waa nê. Kwa pêr ãm kormã te mẽ ate amnhĩ kaxyw Tĩrtũm mẽ wa inhmã ajamaxpêr tÿx kêt pyrāk. Hã na ka mẽ amã ma xaj tee ri amnhĩ kukamã ajamaxpêr. Anê.

²⁷ Hãmri nhũm mẽ amnhĩ jaêr pê ã kot amnhĩ nhĩpêx anhÿrja ã omu nê tee ri hamaxpêr nê axpên pumunh pê omunh o kuhê. Hãmri nê axpên mã:

—Kokÿÿ. Pêr Jejus kêp mẽ panhĩō hkêt. Mẽ pahtō kot pu we te kot amnhĩ nhĩpêx pyrã nê kôk mã pakapêr nhũm hpinhkrênh kurê kumrêx? Nà Jejusja mẽ pakurom àhpumunh tÿx o àhpumunh tÿx. Anê.

*Jejus kot wa nê mẽkarōmnuti janor
Makre 5.1-20; Rukre 8.26-39*

²⁸ Tã nhũm mẽ ra himô rax pê Garirejja ã rê nê pika pê Geras wÿr pōj nê kamã mō. Hãmri nhũm ra mẽhō myja wa hamêxkrut nê mẽ kutã tē. Ra mẽkarōmnuti kot hamē wa hwÿr gjêx xwÿnhja wa. Mẽkarōmnuti xohtō kot tanhmã wa ho jakamã nhũm wa oprê htÿx nê hihtÿx rax nê wa pa. Jakamã nhũm mẽ piitã kãm wa uma nê amnhĩ nê mẽ htykjê jagjênh xà hã kên kre kaêx kãm wa kumē nhũm wa kamã pa ho pa. Jakamã nhũm wa Jejus kutã tē nê amnhĩ wÿr omu hãmri nê amnhĩ nê tanhmã kãm kapêr to. Nom mẽkarōmnuti nhÿ hã àmra kamã kãm kapêr nê kãm:

²⁹ —Pa Tĩrtũm Kra Jejus? Mo kaxyw na ka mẽ ixwÿr tē? Kwa tanhmã mẽ ixtō hkêt nê. Ate tanhmã mẽ ixtomnu hto hã arĩgrota kormã katoore hã. Anê.

³⁰ Nhũm ra krĩ nhō xwÿnhjê hkrit hagrô ohtō nê ri mẽ hpum pa. ³¹ Nhũm mẽkarōmnuti mẽ omu hãmri nê amnhĩ to Jejus wÿ nê kãm:

—Kwa kot ka jahti wa nê mẽ ijapôx japêr nê mẽ kot amnhĩ xà htÿx kamã hamak tũm xata wÿr mẽ ixrênh kêt nê. Hagrô hkwy mÿj wÿr măn mẽ ixrê pa mẽ hpãnhã hwÿr măn hajê nà? Anê.

³² Hãmri nhũm mẽ kuma nê mẽ kãm:

—Tōe mẽ tãm mẽ hwÿr măn mra. Anê.

Hãmri nhũm mẽ kuma nê myta wa kêp hapôj nê hagrô hwÿr mrrar kurê kumrêx nê hpãnhã kãm gjêx pa. Hãmri nhũm hagrôta mẽkarōmnuti pymaj amÿra nê ma hprôt nê himô hã hixêt prêk ã axpum rôrôk nê gôx kãm mrō nê pikaprâr pa. ³³ Hãmri nhũm hagrô jamâr o ri mẽ pa xwÿnhjaja tee ri omu hãmri nê ma akupÿm krĩm hprôt nê mẽ kãm awjarê. Nê myta wa akupÿm tãm hkrã hã harênh o hprôt. ³⁴ Hãmri nhũm krĩ nhō xwÿnhjaja tee ri mẽ hkrit jarênh ma nê ma piitã Jejus wÿr mra nê hkaxpa. Hãmri nê amnhĩ nê kãm:

—E kwa mẽ ma amrar kurê kumrêx. Anê.

Hãmri nhũm mẽ kuma nê awjanã nê ma akupÿm pan rê.

9

ĩ kamã htyk xwÿnh jarênh

Makre 2.1-12; Rukre 5.17-26; Juãw 10.37-38

¹ Nhũm Jejus mẽ hkôt mẽ pa ho mẽ pa xwýnhjaja awjanã nẽ ma akupým pàr wýr mra nẽ gjêx pa nẽ akupým xarmã rê nẽ akupým Jejus nhõ krĩ hwýr mõ. ² Hãmri nẽ hwýr pøj nhũm krĩ nhõ xwýnh kwýjaja mẽ omu nẽ ì kamã htyk xwýnhja mý nẽ Jejus wýr o tẽ. Nõr xà kamã nõr rãhã nhũm mẽ hã hije nẽ kumý nẽ hwýr o tẽ. Hãmri nhũm amnhĩ tã mẽ omu. Ra mẽ kot hkrãmnhwýta kaxyw kãm hamaxpêr týx ã mẽ omu nẽ ì kamã htyk xwýnhhta mã kapêr nẽ kãm:

—Pa? Kwa tee ri amnhĩ kukamã ajamaxpêr kêt nẽ. Na pa ra apê tanhmã ate amnhĩ tomnuj to ho ijapêx pa. Kot paj axte kãm ijamaxpêr kêt nẽ. Anẽ.

³ Hãmri nhũm Tirtũm kapêr tũm o mẽ ahkre xwýnhjaja tee ri ã kot kãm kapêr anhýrja ã kuma nẽ axpên mã:

—Tk. Kwa mẽhõ myti mũj kêp Tirtũm kêt tã te ri kot amnhĩ nhĩpêx pyrãk ã amnhĩ nhĩpêx. Tirtũm pix na kot mẽ nẽ mẽ kot amnhĩ tomnuj o hapêx xwýnh. Anẽ.

⁴ Hãmri nhũm Jejus amnhĩ tã mẽ kuma nẽ mẽ kãm:

—Kwa mẽ ã ajamaxpêr anhýr kêt nẽ. ⁵ Ixte mẽ nẽ mẽ kot amnhĩ tomnuj o ijapêx par ã amnhĩ jarênh tã mẽ ate ja kôt ixpumunh kêt jakamã na ka mẽ ja kaxyw ixkôt ajamaxpêr kêt nẽ. Nom kot paj mẽ anoo mã akupým ì kamã htyk xwýnhhta o mex ka mẽ apiitã hã ixpumu hãmri nẽ ixkôt ajamaxpêr kurê kumrêx. Ixpê Tirtũm kot mẽ awýr inhmên xwýnhhta na pa. Ixte mẽ anê mẽ ate amnhĩ tomnuj rênh kaxyw na pre mẽ awýr inhmê pa mẽ awýr wrý. ⁶ Tã mẽ ate ja hã ixpumunh kaxyw kot paj mẽ anoo mã ja ho mex.

Anhýr o mẽ kãm amnhĩ jarê hãmri nẽ ì kamã htyk xwýnhhta mã kãm:

—E kãnhmã xa nẽ anõr xàta py nẽ ma akupým anhõrkwý hwýr tẽ. Anẽ.

⁷ Puh nhũm kãnhmã ãm kurê kumrêx nẽ nõr xà py nẽ mẽ noo mã kato nẽ ma akupým õrkwý hwýr tẽ. ⁸ Hãmri nhũm mẽ piitã no hapôx rũnh nẽ omunh o kuhê nẽ kamã no pyrna htýx nẽ. Nẽ tee ri omu nẽ axpên mã:

—Kokýy. Kwa aa mẽ pahte ã mẽhõ kot amnhĩ nhĩpêx anhýr ã omunh kêt tã jarãhã ja pumu.

Anhýr o Jejus jarê hãmri nẽ ý hã Tirtũm mã mex o mex ã harê.

Jejus kot amnhĩ kôt Matêwre hwýr Makre 2.13-17; Rukre 5.27-32

⁹ Tã nhũm Jejus mẽ kêp kato nẽ hkôt mẽ pa xwýnhjê mẽ nhũm mẽ ma mõ. Hãmri nẽ pa ixpê Matêwre ixpumu. Ixte Rõm kãm mẽ ho amnhĩptàr xwýnh mã krĩ nhõ xwýnhjê pê kàxpore hkwý jamýnh xwýnh na pa pre. Nom mẽ kot ho tewên kryre htã ixte amnhĩm hkwý ho ixàrik prãm xàj na pa pre hte mẽ kãm ho rũnh nẽ harê. Jakamã nhũm mẽ piitã kãm ixkĩnh kêt nẽ. Tã pa pre mẽ kêp kàxpore jamýnh xà hã ixkre kamã mẽ kêp hamýnh o nhý nhũm Jejus mẽ hkwýjaja ijãnh mra nẽ ixpumu nẽ amnhĩ kôt ixwý nẽ inhmã:

—Pa? E axapênhta kaga nẽ hpãnhã amnẽ mẽ ixkôt mãn tẽ nẽ ixkôt mãn ri apa ho apa. Anẽ.

Hãmri pa kuma nẽ ixapênh kaga nẽ ma hkôt tẽ. Nẽ hpãnhã hkôt ixpa ho ixpa.

¹⁰ Hãmri nẽ mẽmo arĩgro hã amnhĩ nhõrkwý hwýr Jejus nẽ hkôt mẽ pa ho pa xwýnhjaja mẽ ixkrãmnhwý hkwýjê hwý. Nhũm mẽ piitã mra nẽ inhõrkwý hwýr agjê nẽ ixkutã apkur o hkrĩ. Nẽ ixpyrà nẽ Rõm nhõ pahi mã mẽ kêp kàxpore hkwý jamýnh xwýnh kwý haxwýja ixwýr mra nẽ mẽ ixkutã apkur o hkrĩ. ¹¹ Hãmri nhũm Parijew nhõ xwýnhjaja mra nẽ inhõrkwý kapem mẽ ixàpkur ã mẽ ixpumu. Nẽ tee ri mẽ ixkaêx ã Jejus pumu hãmri nẽ hkôt mẽ pa ho mẽ pa xwýnhjê hwýr agjê nẽ mẽ ixtã mẽ kãm akir nẽ mẽ kãm:

—Kwa mẽ kot jajê kutã apkur kêt tã mẽ akrãhtũmja axtem nẽ mẽ kutã apkur o nhý. Kwa nã mẽ kot amnhĩ tomnuj xwýnh kênã. Jejus kot amnhĩ to mex ronhýx mẽ kutã apkur kêt nẽ. Anẽ.

¹² Hãmri nhũm Jejus amnhĩ tã ã mẽ kapêr anhýrja ma nẽ mẽ kãm:

—Tk. Nà ixte tãm mẽ unhwýr kaxyw na pa mẽ kutã ixàpkur o nhý. Xà na hte tõtôja mẽ mex xwýnhjê hwýr mra nẽ mẽ hkane? Nà ãm mẽ à xwýnhjê pix wýr na hte mra nẽ tanhmã mẽ hkane hto. Ra mẽ ate ja pumunh mex. Tã ja pyrà nẽ na pa pre mẽ kot amnhĩ to mex xwýnhjê hwýr ixwryk kêt nẽ. Mẽ kot amnhĩ tomnuj xwýnhjê pix wýr

na pa pre wrÿ. Ixte tãm mẽ unhwÿr kaxyw mẽ hwÿr wrÿ nẽ ã jajê kutã ixàpkur o inhÿr anẽ. ¹³ Ga mẽ ma mra nẽ Tirtũm kapêr ã kagà htũm kot ja jarênhja kamã harê nẽ ama. Harênh kot:

Na ka htem inhmã tanhmã amnhĩ jarênh to kaxyw hãmri nẽ inhmã mẽmoj gõ nẽ tanhmã ixto mex to. Nom kêr ka mẽ ãm ja pix ho anhÿr kêr nẽ. Mẽ mãânên mẽ piitã tanhmã mẽ ho mex to ho ri apa. Anẽ.

–Ã Tirtũm kapêr ã kagà htũm kot ja jarênh kot anhÿr. Tã ja pyrã nẽ na pa pre mẽ kot amnhĩ tomnuj xwÿnhjê hwÿr wrÿ nẽ mẽ kamã ixukaprĩ ho ixpa. Mẽ kot amnhĩ tomnuj kaga nẽ hpãnhã tãm amnhĩ nhĩpêx kaxyw na pa pre ã mẽ hwÿr ixwrÿk anẽ. Tã ka mẽ ri atÿx amnhĩ krã hkôt ã ixto akapêr anẽ. Anẽ.

*Mẽ kot mẽmoj tã Jejus kukjêr
Makre 2.18-20; Rukre 5.33-35*

¹⁴ Tã nhũm Juãw Paxis kôt mẽ pa xwÿnhjaja Jejus wÿr mra nẽ mẽmoj tã hkukja nẽ kãm:

–Pa? E ot pa mẽ awÿr mra. Kwa mẽ inhmã mẽmoj jarê. Na pa htem tõhã Parijew nhõ xwÿnhjê pyrã nẽ ixàpkur kêr kãm Tirtũm mã amnhĩ jarê. Tã nom akôt mẽ pa ho mẽ pa xwÿnhjaja na htem àmnhĩx apkur o pa kamã kãm amnhĩ jarênh o pa. Kwa mo na htem mẽ ixpyrã nẽ tõhã apkur kêr kamã kãm amnhĩ jarênh kêr nẽ? Anẽ.

¹⁵ Hãmri nhũm mẽ kuma nẽ mẽ kãm:

–Nã mo kaxyw kot kêr mẽ apkur kêr rãhã kãm amnhĩ jarê? Mẽ hkaprĩre hã. Mẽ kot ixkôt pa ho pa hã amnhĩ pumunh jakamã na htem hkĩnh nẽ ixkôt pa. Kormã ixte mẽ kamã ixpa kênã kot kêr mẽ apkur kêr rãhã Tirtũm mã tanhmã amnhĩ jarênh to. Xã na htem hkrãmnhwÿ hã hkĩnh kaxyw hã akuprõ nẽ hkaprĩ nẽ apkur kêr o kamãt nẽ mÿr o hkrĩ? Nã na htem anhÿr kêr nẽ. Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkôt mẽ pa ho mẽ pa xwÿnhjaja ixkôt kormã àmnhĩx hkĩnh nẽ apkati mẽ apkur o pa. Nom koja mẽ kãm ixkurê xwÿnhjaja nhÿrmã tanhmã ixto hãmri nhũm mẽ hkaprĩ htÿx nẽ rĩ kormã tõhã apkur kêr rãhã Tirtũm mã amnhĩ jarê. Anẽ.

*Mẽ pahte Jejus kôt amnhĩ nhĩpêx
Makre 2.21-22; Rukre 5.36-39*

¹⁶ Nhũm Jejus mẽ piitã mẽ kãm kapêr nẽ mẽ kãm:

–Mẽ kot amnhĩ tomnuj xwÿnhjaja ra mẽ kot amnhĩ nhĩpêx tũm o amnhĩ pyrãk jakamã na htem tanhmã mẽ kot amnhĩ nhĩpêx nyw tota kaga. ¹⁷ Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêr jakamã na ka htem ixkapêr ma nẽ ãm ama. Kwa mẽ inhma nẽ mẽ ate amnhĩ nhĩpêx tũmja gryk ã ixkaga hkêr nẽ. Anẽ.

*Mẽ hkra htyk nẽ mẽhõ ni kamrô wa
harênh*

Makre 5.21-43; Rukre 8.40-56

¹⁸ Nhũm pre ã Jejus mẽ kãm kapêr anhÿr o xa. Rôm nhũm mẽõ pahitija tẽ nẽ mar o xa. Hãmri nẽ hamaxpêr o:

–Kokÿÿ. Jejusja ãm hãmri kêp pahi maati kumrêx. Hã na ri ã kapêr mex anẽ. E pa hwÿr tẽ nẽ ixkrare ho kuwÿ. Anẽ.

Hãmri nẽ hwÿr tẽ nẽ kutã hkõnkrã ho nhÿ nẽ kãm:

–Pa akupÿm mẽ ixto mex xwÿnh? E ot pa awÿr tẽ. Kwa ma ixkôt tẽ nẽ inhmã ixkra nire pumu nẽ tanhmã inhmã ho kê akupÿm inhmã htĩr. Na ham ixpê ty pa kaxyw amã ijamaxpêr nẽ man awÿr tẽ. Anẽ.

¹⁹ Hãmri nhũm kuma nẽ mẽ kãm:

–Tõe. Nã kot paj ma akôt tẽ. Anẽ.

Hãmri nẽ ma hkôt tẽ. Mẽ ixpê hkôt ixpa ho ixpa xwÿnhjê mẽ pa mẽ ma hkôt mõ. ²⁰⁻²¹ Nhũm mẽhõ ni kamrô rãhã ho pa xwÿnhjaja ma mẽ ixkôt tẽ. Na pre hte hkamrô hkryre rãhã ho pa hã amgrã pê 12 nẽ tee ri kãm amnhĩ mex prãm o pa. Jakamã Jejus jarênh ma nẽ amnhĩ kaxyw kãm hamaxpêr kurê kumrêx nẽ hamaxpêr o:

–Ma pa kop ma hwÿr tẽ nẽ kêp ê nhĩrê pix kupênh tã akupÿm inhmx japêr. Anẽ.

Hãmri nẽ ma mẽ ohtôjê kaêx kôt hwÿr tẽ. Nẽ katut kôt tẽ nẽ kêp ê nhĩrê kupê. ²² Hãmri nhũm Jejus ho hakêx nẽ amnhĩ tã omu nẽ kãm:

–Pa? Kwa tee ri amnhĩ kukamã ajamaxpêr kêr nẽ. Ate amnhĩ kaxyw inhmã ajamaxpêr tÿx jakamã na ka ra akupÿm amex. E mãmrĩ ajamakêtkati nẽ ri apa. Anẽ.

Hāmri nhūm akupŷm mex nē hkīnh tŷx nē ma akupŷm tē. ²³ Hāmri pa mē ma htyk xwŷnh nhīpēêxà hkôt mra nē ōrkwŷ hwŷr agjê nē mē pikuprōnh xwŷnhjê pumu. Nhūm mē ra mē hā htu rax nē. Nē omŷj ri kaprī xàj pifti kakôr o hkrī nē omŷj ri mur. Kàx pē mur nē amnhī tak o hkrī. ²⁴ Hāmri nhūm Jejus mē hwŷr axà nē mē omu. Nē ra kot my hkrata htyk ā omunh tā kuri mē mŷr o mē hkrī xwŷnhjê mā kapēr nē mē kām ām ōt nē nōr ā harē nē mē kām:

—Pa? Kwa mon ka mē ri akaprī nē amŷr o akrī? E mē ma mra. Na wa hkrata wa kēp htyk kêt nē. Na ām gōr nē nō. Anē.

Hāmri nhūm mē kot ra htyk ā omunh mex jakamā kuma nē ām kuma. Nhūm mē hkwyja axtem nē ri axpēn mā hā hpēr o pikēnh o hkrī. ²⁵ Hāmri nhūm kapôt mā mē hano nhūm mē hapôj nē kapôt ā kuhê. Hāmri nhūm Jejusja htyk xwŷnhhta wŷr axà nē hpa hā kupy nē kànhmā ām nhūm akupŷm htīr nē kànhmā ām kurê kumrêx. ²⁶ Hāmri nhūm mē piitā akupŷm htīr kām omu nē ma ri krī piitā hkôt ri mē kām harēnh o hprôt.

*Wa nohkre xwŷnh wa harēnh
Matêwre 20.29-34*

²⁷ Tā nhūm Jejus kato nē ma tē. Pa mē hkôt ixpa ho ixpa xwŷnhjaja ma hkôt mō. Hāmri nhūm wa myja wa hamēxkrut. Hamē wa nohkre xwŷnh wa Jejus jarēnh ma nē hā ajêt nē hkôt rôrôk o mō. Nē xatā amnhī to hwŷr o hkôt rôrôk o mō nē kām:

—Pa Jejus? E Tīrtūm kot mē ixkaxyw axām jakamā kwa wa ixpumu nē wa ixkamā axukaprī kêt wehe. Anē.

²⁸ Hāmri nhūm wa kuma nē wa hkukamā nhŷri ixkrem axà nhūm wa hkôt axà nē xa nhūm wa omu nē wa kām:

—Pa? E xàn ka wa ra amnhī kaxyw inhmā ajamaxpēr tŷx nē nà? Anē.

Hāmri nhūm wa kām:

—Tŷ. Wa ixte amnhī kaxyw amā ijaxpēr tŷx kênā. Anē.

²⁹ Hāmri nhūm wa kuma nē hamē wa no hā ĩhkra xi nē wa kām:

—Tôe. Nà war ate tanhmā amnhī kaxyw inhmā ajamaxpēr to xà hkôt kot paj war anhīpêx. Anē.

³⁰ Hāmri nhūm wa akupŷm rīt mex kurê kumrêx. Hāmri nē akupŷm kato nē ma htēm kaxyw nhūm wa kām:

—E kēr ka wa nhām mē kām ixte war ato mex ā ijarēnh kêt nē. Ām kwarī ho kwarī.

³¹ Anhŷr tā no nhūm wa kuma nē ām kuma nē wa ma tē nē krī pu hā mē piitā mē kām ri war amnhī tā harēnh o mra.

Kapēr kêt xwŷnh jarēnh

³² Tā nhūm Jejus ma axte nhŷhŷm mē ixto mō. Hāmri nhūm mēhō my mēkarōmnuti kot hwŷr àr nē tanhmā ho nhūm kapēr kêt nē pa xwŷnhja nhūm mē Jejus wŷr o tē. ³³ Hāmri nhūm omu nē nē mēkarōmnuti jano nē kām:

—E kēp akato nē ma tē. Anē.

Hāmri nhūm kuma nē kurūm kato nhūm akupŷm kapēr mex kurê kumrêx. Hāmri nhūm mē kot hā omunh xwŷnhjaja tee ri kot mēkarōmnuti janor ā omu nē kamā no puma nē. Nē axpēn mā:

—Kokŷŷ. Aa mē pahte ā mēhō kot anhŷr pumunh kêt kumrêx tā na pu mē jarāhā ja pumu. Anē.

³⁴ Nom nhūm mē hkwy pē Parijew nhō xwŷnhjaja axtem nē hā mē kām kapēr o:

—Tk. Kot amnhī krā hkôt mē hanor kêt kênā. Mēkarōmnuti nhō pahi nhŷ hā kot mē nē mē hanor kênā. Anē.

*Jejus kēp mē pakamā ukaprī xwŷnh
Makre 6.34; Rukre 10.2-3; Juāw 4.35*

³⁵ Tā nhūm Jejusja krī ho ohtô nē hkôt ri mē kām Tīrtūm kapēr jarēnh o pa. Pa mē hkôt ixpa. Na pre hte nhŷri krī hwŷr pōj nē mē kot Tīrtūm kapēr o mē ahkre xà hā ixkre hwŷr mra nē hwŷr agjê nē mē pikuprōnh xwŷnhjê jahkre. Nē mē kām:

—E mē inhma. Tīrtūm kām mē apiitā mē ato hkra hprām. Jakamā kwa mē ate amnhī tomnuj kaga hprām xàj hkôt amnhī xunhwŷ nē kapēr kôt amnhī nhīpêx. Jao amnhī nhīpêx nyw o amnhī nhīpêx o ri apa.

Anhŷr o mē kām kapēr. Hāmri nē ahpŷnhā ri tanhmā mē à kute xwŷnhjê ho mex. Nhūm mē ohtô nē hkôt mar o pa. ³⁶ Hāmri nhūm mē omu nē kām mē hkaprī nē. Na prem tee ri amnhī kukamā hamaxpēr o pa jao ra hkaprī nē. Nhūm Jejus ja hā mē omu nē hamaxpēr o:

—Hêxta waa nē. Na mē mex kêt nē pa. Te mē kēp ôwêhti jamār xwŷnh kêt kot amnhī

nhîpêx pyrâk o htÿx ri pa. Mêhõ koja kãm mē hkaprî nē tanhmã mē ho mex to ho pa? Anē.

Hãmri nē mē kamã ukaprî nē. ³⁷ Hãmri nē mē hã mē ixpê hkôt ixpa ho ixpa xwÿnhjê mã kapêr nē mē inhmã:

—Nà na mē kormã ohtô rax nē Tirtũm kapêr mar kêt nē. No âm kormã mē ate mē kãm kapêr jarênh o apa kaxyw mē agrêre. Te pur rax kãm ra harôj kamrêk par nē âm tâ no âm kaxyw hikênh xwÿnhjaja grêre pyrâk. ³⁸ Jakamã kwa mē ho Tirtũm wÿ kê axte mē kaxyw mē akwÿjê rê kê mē apyrã nē ma mē hkôt ri mē kãm kapêr jarênh o pa. Anē.

10

*Jejus kot mē ho 12 nē mē rênh
Makre 3.13-19; Rukre 6.12-16*

¹⁻⁴ Tã nhũm Jejusja hkôt mē ixpa ho mē ixpa xwÿnhjê ho 12 nē mē ixrê. Mē ixte ma krî piitã hwÿr inhmarr nē ÿ hã mē ahkre nē tanhmã mē à kute xwÿnhjê ho mex o ixpa kaxyw. Nē ÿ hã mē nē mêkarõmnuti janor o ixpa kaxyw nhũm mē ixrê. Na pre mē ixto 12 nē mē ixrê. ã mē inhîxi kot anhÿr.

Pêtre kumrêx na pre kuta. Hixi hõ pê Simãw.

Nē hkôt htõ Andreja ta.

Nē hkôt Jepetew kra Xiakreja ta.

Nē hkôt Xiakre htõ Juãwja ta.

Nē hkôt Firiptija ta.

Nē hkôt Patoromewja ta.

Nē hkôt Tomasja ta.

Nē hkôt pa ixpê Matêwre nhũm pre mē hkôt ixta.

Ixpê pahi nhÿ hã kãm mē kêp ixu-jamÿnh xwÿnh tâ nhũm pre jajê hkôt ixta.

Nē ixkôt Apew kra Xiakre hõja ta.

Nē hkôt Tatewja ta.

Nē hkôt Simãw Jeroxja ta.

Nē hkôt Jut Kariotja ta.

Kormã kot mē kãm Jejus kurê xwÿnhjê nhîhkram õr mã nhũm Jejus kot amnhî kukamã omunh mex tâ mē hkôt amnhî kaxyw kuta.

ã mē ixte ÿ hã mē ahkre o ixpa kaxyw mē ixrênh xwÿnhjê nhîxi kot anhÿr.

*Jejus kot mē kêp 12jê mã mē àpênh ã karõ
Makre 6.7-13; Rukre 9.1-6, 10.1-12,
10.14; mããñên Atre 13.50-51, 18.6*

⁵ Hãmri nhũm Jejus mē ixrênh pa nē ma mē hwÿr mē ixrênh kaxyw tanhmã mē inhmã kapêr to nē mē inhmã:

—E. Kêr ka mē ma mē piitã mē kãm ri ijarênh o apa. No âm kormã mē kêp Ijaew kêt xwÿnhjê nhõ pika hwÿr apa hkêt nē. Rÿ mē kêp Samar nhõ krî hwÿr ka mē apa hkêt nē. ⁶ Âm mē pahpê Ijaew nhõ krî kôt pix mã mãn ri apa. Mē kot tee ri amnhî kukamã hamaxpêr o pa jakamã te mē kêp ôwêhti pikunor nē htÿx ri mex kêt nē pa pyrâk. ⁷ Jakamã kêr ka mē ma mē hwÿr apa nē ã mē hkôt ri mē kãm akapêr o apa anē nē mē kãm: “E kot kaj mē ate amnhî tomnuj kaga nē Tirtũm kôt amnhî xunhwÿ hãmri nhũm amnhî tâ mē apumu nē mē ato hkra. Jakamã e kwa mē tokyx hkôt amnhî xunhwÿ.” Anē. Kêr ka mē ã mē kãm akapêr anhÿr o ri mē hkôt apa. ⁸ Hãmri nē akupÿm mē à xwÿnhjê ho mex o ri apa. Nē mē htyk xwÿnhjaja ka mē akupÿm mē ho htîr o ri apa. Nē mē hkànhy rûnh xwÿnhjaja ka mē akupÿm mē ho mex o ri apa. Nē mē kamã mêkarõmnuti xwÿnhjaja ka mē nē mē hano. E kêr ka mē ã inhÿ hã mē ho mex o ri apa anē. Na pa amarî tanhmã mē ato ka mē inhmã amnhîrer kêt tâ ra mē ate tanhmã mē ho mex to mã tâm. Tã kêr ka mē amnhî xwar amarî ri mē ho mex o ri mē hkôt apa. No ri mē ho mex pãnhã kàxpore hã axàhwÿr kêt nē.

⁹⁻¹⁰ —Nē kêr ka mē ma mē hwÿr apa kaxyw anojarêt hãmri nē amnhî kôt akukrêx rûnh o apa hkêt nē. Âm anhÿ kamã mē hwÿr apa. Nē akàxpore ho rax nē ho apa hkêt nē. Rÿ akawà kamã axê hkwy rÿ aparkà hõ xàr nē ho amõr kêt nē. Rÿ kô hõ py nē ri ho apa hkêt nē. Âm anhõ mrykà pix jamÿ nē ma ho apa. Kêr kê mē ate Tirtũm kapêr o mē ahkre nē mē ho mex xwÿnhjaja mãn amnhî pãnhã mē amã mē axàpkur xà gõ ka mē kutã axàpkur o ri mē hkôt apa.

¹¹ —Nē kêr ka mē nhÿri krî hwÿr ajapôj nē kamã mêhõ kot amnhî to mex xwÿnh japêr. Nē ra omu hãmri nē kuri mãn pøj nē hkôt apikamênh tâmtã kurũm akupÿm ajapôj nē ma nhãm krî hõ hwÿr mra.

12 —Nê kêr ka mē mēhō nhōrkwỹ hwỳr pōj nē mē kām: “E ot pa mē awỳr mō. Nà koja Tĩrtũmja mē ato mex nē.” Anhỳr o mē kām akapēr. 13 Koja mē ama nē amnhĩ wỳr awỳr ka mē amnhĩ tã mē omu nē mē kām: “E koja Tĩrtũm mē ato mex nē ka mē ajamakêtkati nē ri axàmnhĩx apa.” Anhỳr o mē kām akapēr. No koja mē amnhĩ nhōrkwỹ nē mē akurê nhũm Tĩrtũm ja hã mē omu nē mē ho mex kêt nē.

14 —Nê koja nhỹri krĩ hō kamã mē akaga nē akapēr mar kêt japēr. Ka mē tee ri amnhĩ tã mē kamã ama hãmri nē tokyx mē kurũm ajapōj nē ma akupỹm apa. Nē akupỹm anojarêt nē mē noo mã akuhê nē amnhĩ par ã awjagrô kapĩ nē ma apa. Mē kot Tĩrtũm kaga hã amnhĩ pumunh kaxyw ka mē ã mē noo mã amnhĩ nhĩpêx anê. Hãmri nē ma nhỹhỹm hpãnhã apa. 15 Koja nhỹrmã Tĩrtũm mē kot amnhĩ tomnuj mỳrapê tanhmã mē ho. Na pre ã Sotō mē Komo nhō xwỳnhjê nhĩpêx anê. Na prem amnhĩ tomnuj tỳx nē nhũm Tĩrtũm tee ri ja hã mē omu nē tanhmã hã mē homnuj tỳx to. Tã jar mē kām ixkapēr mar prãm kêt nē mē kot ixkaga xwỳnhjaja koja ja hã mē omu nē kot Sotō mē Komo nhō xwỳnhjê nhĩpêx o mē hipêx. No ãm tanhmã mē ho htỳx o mē hakre. Anê.

Nhũm pre Jejus ã mē inhmã mē ixàpênh ã karō anê.

Jejus kot mē kêp 12jê hkukamã mē harênh Makre 13.9-13; Rukre 12.11-12, mãânêh Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

16 Nhũm Jejus arĩ kot mē ixrênh xwỳnhjê mã kapēr nē mē inhmã:

—E kot paj ma mē hwỳr mē arê. Ma mē ate Tĩrtũm kapēr o mē ahkre ho ri mē hkôt apa kaxyw. Jakamã kot kaj mē te ôwêhti kot mry xoprê hwỳr amnhĩ to mrar nhũm kot hkwỳ hpar pyrãk o amnhĩ nhĩpêx. Koja mē hkwỳjaja mē ate mē ahkre ma nhũm ja mē kêp omnuj nē nhũm mē hã tanhmã mē anhĩpêx to. Tã nom kêr ka mē tee ri amnhĩ kukamã ajamaxpêr nē amã mē uma hkêt nē.

17 —E kwa mē o kora. Kêr ka mē ma mē hwỳr mra nē amnhĩ nē mē htãnopxar o ri apa. Koja mē hkwỳjaja mē akapēr ma nē kêp mē aprãm nõkati. Nê mē apynê nē ma

mē utar xwỳnhjê hwỳr mē ato mra nē mē kām tanhmã mē ato hêx to. Hãmri nhũm mē mar xà hkôt mē atak. Tĩrtũm kapēr o mē ahkre xà hã ixkre kamã koja mē ã mē anhĩpêx anê.

18 —Nê koja mē ixtã tanhmã mē ato kaxyw mē apynê nē ma mē ò pahi hwỳr mē ato mra nē tanhmã kãm mē ato hêx to. Nom kwâr mē mamrĩ ã mē anhĩpêx anê. Koja mē ato anê ka mē kutã akrĩ nē mē kãm Tĩrtũm kapēr jarê. Ijaewjê mã nē mē kêp Ijaew kêt xwỳnhjê mã.

19 —Nê koja mē ma mē ò pahi hwỳr mē ato mra nē ã mē anhĩpêx anê nom kêr ka mē tee ri tanhmã mē kãm amnhĩ jarênh to hkukamã ajamaxpêr kêt nê. Koja Tĩrtũm Karō tãm tanhmã mē akrã hto ka mē ô ri mē kãm akapēr mex nê. 20 Nê kot kaj mē amnhĩ krã hkôt ri mē kãm akapêr kêt nê. Tĩrtũm Karō nhỹ hã kot kaj mē ô ri mē kãm tanhmã axujarênh to.

21-22 —Nê koja mē hkwỳjaja ixtã mē akamã gryk nê. Nê mē atã àmnênh pix o pa. Nê mē kot mē apar kaxyw mē akwỳjê hã amỹnê. Koja mē anhĩpêxà hkwỳjaja mē apê mē hkra hã amỹnê. Nhũm mē akra hkwỳjaja mē apê mē hipêxà hã amỹnê. Nhũm mē atō hkwỳjaja mē apê mē htō hã amỹnê. Nhũm mē akatorxajaja mē atã amỹnê. Hãmri nhũm mē apa. No ãm kwâr mē mãmri ã mē anhĩpêx anê. ã mē kot mē anhĩpêx anhỳr tã kêr ka mē tee ri amnhĩ kukamã ajamaxpêr pê ixkaga hkêt nê. Mē ãm amnhĩ to htỳx rãhã ty. Hãmri nē akaxwỳnhja ma Tĩrtũm mē wa inhō krĩ hwỳr axàpir kurê kumrêx nē wa ixkuri akupỹm amex nē atĩr tũm nē apa ho apa.

23 —Nê koja mē nhỹri krĩ hkwỳ kamã ixtã tanhmã mē anhĩpêx hto ka mē mãmri mē kurũm ajapōj nē ma nhỹhỹm krĩ hō hwỳr apa. Nê hpãnhã kamã mē kãm ri ijarênh o mē hkôt apa. Kot kaj mē kormã Ijaewjê nhō krĩ piitã hwỳr apa hkêt ri pa akupỹn mē awỳr wrỳ. Kwa kêr ka mē ixkapêr mã ajamaxpêr tỳx rãhã ri apa.

24-25 —Mê ate ixkôt apa ho apa xwỳnh na ka mē. No pa na ixpê mē ajahkre xwỳnh. Jakamã koja mē kot tanhmã inhĩpêx to ho mãânênh mē anhĩpêx. Koja mē nhỹrmã tanhmã inhĩpêx to nē mã ixkôt mē ato anê nê. Mē pahte amnhĩ nhĩpêxja kot axpên

pyræk. Jakamã koja mẽ ixpê Satanasti hã ijarê nõ mãânên tanhmã mẽ ajarênh punuj to ho pa. Mẽ pahte amnhĩ nhĩpêxja kot axpên pyræk jakamã koja mẽ panhĩpêx o axpên pyræk.

²⁶ —Tã nom kêr ka mẽ tee ri amnhĩ kukamã ajamaxpêr pê amã mẽ uma ho apa hkêt nõ. Na htem piitã axpên pê tanhmã hamaxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mẽ hamaxpêr piitã amnhĩrĩt pa. Nẽ mẽmoj piitã ra hpimxur mex tã koja nhÿrmã amnhĩrĩt par kumrêx.

²⁷ —Nẽ koja nhÿrmã mẽ piitã ixte amnhĩ nhĩpêx kôt ixpumu. Na pa ra mẽ hkàx ã mẽ amã ixujarênh rax nõ. Tã kêr ka mẽ ma mẽ piitã mẽ kãm harênh o ri apa. Nẽ ra ixte mẽ hkàx ã ahte ixte mẽ amã mẽmoj jarênh ta ka mẽ hpãnhã ma mẽ kãm harênh o ri apa kêm mẽ apyrã nõ harênh ma.

²⁸ —E kêr ka mẽ amã mẽ kot tanhmã mẽ ato mã xwÿnhjê puma ho apa hkêt nõ. Mẽ kot mẽ apar mã tã koja mẽ ãm mẽ akrãhkã pix pa nom tanhmã mẽ akaxwÿnh to hkêt nõ. Tĩrtũmja tapxipix na hte mẽ hkrãhkã nõ mẽ hkaxwÿnh mẽ ho pimràatã kot amnhĩ xà htÿx kamã hamak tũm xàta wÿr mẽ rênh pumunh. Tã kot hwÿr mẽ arênh pymaj kêr ka mẽ amã kapêr kwÿm ri tanhmã amnhĩ nhĩpêx to puma ho ri apa.

²⁹⁻³¹ —Nẽ Tĩrtũm kot mẽ pahto hapêx par pumunh tã mãânên kot mẽ pajamãr mex. Mãn ka htem kuwênhre pumu. Na hte Tĩrtũm kuwênhre jamãr mex o pa. Mẽ piitã mẽ kot ãm omunh tã nom nhũm Tĩrtũm mẽ kurom hamãr mex pê mẽ htãnopxar rãhã ho pa. Tã kãm mẽ pajapê htÿx o kot kuwênhre jakrenh jakamã kwa mẽ tee ri amnhĩ kukamã ajamaxpêr o ri akaprĩ nõ apa hkêt nõ. Koja Tĩrtũm mẽ pahtãnopxar rãhã ho pa. Kot mẽ panhĩ piitã omunh par. Nẽ ahpÿnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mẽ uma ho apa? Anẽ.

Mẽ pahte Jejus kôt amnhĩ xunhwÿr rÿ mẽ pahte hkaga jarênh

³² Nhũm Jejus arĩ kot mẽ hwÿr mẽ ixrênh xwÿnhjê mã kapêr nõ mẽ inhmã:

—E kwa mẽ mãmrĩ akwÿjê mã mẽ apê ixkwÿ hã amnhĩ jarênh o ri apa nõ amã mẽ uma xàj tee ri amnhĩ nhĩpêx kêt nõ. Kot kaj mẽ kãm ra ate ixkôt amnhĩ xunhwÿr ã amnhĩ jarê. Pa ja hã mẽ apumu hãmri nõ mẽ apyrã nõ kaxkwa kamã Inhĩpêêxã mã ra ate ixkôt amnhĩ xunhwÿr ã mẽ ajarê. ³³ Nom kot kaj mẽ kot ixtã tanhmã mẽ ato pymaj apê ixkwÿ hã amnhĩ jarênh kêt nõ. Pa ja hã mẽ apumu hãmri nõ nhÿrmã amnhĩ xwar Inhĩpêêxã mã mẽ apê ixkwÿ hkêt ã mẽ ajarê. Jakamã kwa mẽ mãmrĩ mẽ kãm apê ixkwÿ hã amnhĩ jarênh o ri mẽ hkôt apa kêm mẽ ama nõ amnhĩ kaxyw inhmã hamaxpêr japêr. Anẽ.

Mẽ kãm Jejus ã hkwÿjê kurê xwÿnhjaja Makre 8.34-35; Rukre 9.24, mãânên Rukre 12.51-53, 14.26-27; Apokarip 12.11

³⁴ Nhũm Jejus arĩ kot mẽ hwÿr mẽ ixrênh xwÿnhjê mã kapêr nõ mẽ inhmã:

—Ra mẽ awÿr ixwÿrÿk tã koja mẽ piitã ixkukwak ri hamakêtkati nõ àmnhĩx ri pa hkêt nõ. Kormã. Koja mẽ akwÿjaja ixkapêr ma nõ mẽ apyrã nõ amnhĩ kaxyw ixkôt hamaxpêr. Nhũm mẽ akwÿjaja axtem nõ kuma nõ ãm kuma. Hãmri nõ ixtã tanhmã mẽ atomnuj to ho pa ka mẽ amnhĩ xà htÿx kamã ajamak o ri apa.

³⁵ —Koja mẽ akrajaja ixtã mẽ apê mẽ hipêêxã nõ mẽ katorxã kutã amnhĩ xunhwÿ. Nhũm mẽ wÿjjaja ixtã mẽ umregêxjê kutã amnhĩ xunhwÿ.

³⁶ —Koja mẽ ã mẽ akwÿjaja ixtã mẽ akutã amnhĩ xunhwÿr anẽ. Mẽ anhõrkwÿ kamã mẽ akukwak ri pa htã ixtã mẽ akutã amnhĩ xunhwÿ.

³⁷ —Nẽ mẽ amã mẽ anhĩpêêxã nõ mẽ akatorxã japêê. Nẽ mẽ amã mẽ akrajê japêê. Tã nom kot kaj mẽ gryk ã ixkôt amnhĩ nhĩpêx mex o ri apa hkêt hãmri nõ apê ixkwÿ mã tãm kêt. ³⁸ Rÿ nhũm mẽ nhÿrmã ixtã mẽ apar kaxyw ka mẽ tee ri amnhĩ kukamã ajamaxpêr nõ mẽ kot mẽ apar pymaj ixkaga hã kot kaj apê ixkwÿ mã tãm kêt nõ. ³⁹ Koja mẽ nhÿrmã ixpĩ pa mẽ anê ty. Tã mẽ ate ixkôt amnhĩ nhĩpêx o apa xwÿnhjaja. Koja mẽ ixpyrã nõ ixtã mẽ apar mã tã kwa kêr ka mẽ amã atyk pymaj ixkaga hkêt nõ. Kwãr mẽ mãmrĩ tanhmã ixtã mẽ ato. Kot kaj mẽ nhÿrmã Tĩrtũm mẽ

wa ixri axte amnhĩ xà kamã ajamak kêt nê atĩr tũm nê amex rãhã apa ho apa. Nom kot kaj mẽ jar amã amex nê apa hprãm xàj ixkaga hãmri nê nhỹrmã wa ixri atĩr tũm nê apa ho apa hkêt nê. Anê.

Mẽ kot Jejus krajê ho mex xwýnhjê jarênh Matêwre 25.34-40; Makre 9.41; Juãw 13.20

⁴⁰ Nhũm Jejus arĩ kot mẽ hwýr mẽ ixrênh xwýnhjê mã kapêr nê mẽ inhmã:

—E koja mēhō nhỹri mẽ apumu nê mẽ apê ixkra hã tanhmã mẽ ato mex to nê te pa kot ixto mex pyrãk. Nê kot kaj mẽ tanhmã pa ixto mex to nê te Tĩrtũm o mex pyrãk.

⁴¹ —Nê kot ka mẽ nhỹri Tĩrtũm nhỹ hã mẽ kãm kapêr jarênh xwýnhjê hō tanhmã ho mex to nhũm Tĩrtũm hã apumu nê nhỹrmã hã ato mex nê. Rỳ ka mẽ mēhō kot Tĩrtũm kôt amnhĩ nhĩpêx xwýnhjê hō pumu nê tanhmã ho mex to. Nhũm Tĩrtũm hã apumu nê mããnên hã ato mex nê. Te ate mēhō ho mexta pyrã nê mããnên ato mex nê.

⁴² Nhũm mēhō nhỹri mẽ kot ixkôt kormã amnhĩ xãm nyw nê kormã àhpumunh tohtuj anhỹr xwýnhjê hō pumu. Nê kãm kôr ã omu nê hamaxpêr o: “Kwa Jejus kôt ri pa xwýnh mũj kãm kôr. Kormã kot Jejus kôt amnhĩ xãm tỳx kêt tã kêp hkwyỳ. E kot paj kãm gô hkwy kê ho ixkô.” Anê hãmri nê kãm hkwy nhũm ho ixkô. Hãmri nhũm Tĩrtũm hã omu nhũm kot kãm gô pix nhõr nhũm kot ho hkôm tã nhũm ja hã ho mex rax nê. Anê.

Nhũm pre ã Jejus kot mẽ hwýr mẽ ixrênh xwýnhjê mã kapêr ry rax anê. Mẽ ixpê 12jê mã ã kapêr anê.

11

Juãw Paxis kot Jejus jarênh mar

Rukre 7.18-23, 7.5, mããnên Rukre 4.16-21

¹ Tã nhũm Jejus ra kot mẽ hwýr mẽ ixrênh xwýnhjê mã kapêr pa hãmri nê kato nê ma krĩ pu hã krĩ hkwyjê hkôt ri pa. Nê mẽ kãm Tĩrtũm kapêr jarênh o ri mẽ hkôt pa.

² Nhũm Juãw Paxisja arĩ kêp prês nê mẽ hagjênh xà kamã hkrĩ. Nhũm pre hte hkôt mẽ pa ho mẽ pa xwýnhjaja hwýr mra nê kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nê tee ri hkukamã hamaxpêr. Hãmri nê hkôt mẽ

pa xwýnh wa ho axkrut nê wa kuta ³ nê hwýr wa kumê nê wa kãm:

—Kwa wa ma Jejus wýr tẽ nê hkukja nê kãm: “Xà ka na pre Tĩrtũm mẽ ixwýr amê nà? Xà kormã axtem mēhō na pa mẽ ri hamãr o ri ixpa?” Anhỹr o hkukja hãmri nê tanhmã kot amnhĩ jarênh to hã ama nê man akupỹn ixwýr tẽ nê inhmã harê. Anê.

⁴ Hãmri nhũm wa kuma nê ma hwýr tẽ. Nhũm Jejus kormã tanhmã mẽ à kute xwýnhjê ho mex o xa. Mẽ nohkre xwýnhjaja nhũm akupỹm mẽ ho mex. Nê mẽkarõmnuti kot mẽ hwýr gjêx xwýnhjaja nhũm mẽ nê mẽ hanor o ãm rãhã nhũm Juãw kôt wa pa xwýnhta wa hwýr tẽn pøj. Nê kormã mẽ hã omunh o wa xa. Hãmri nê kãm Juãw Paxis kapêr jarê nhũm wa kuma nê wa kãm:

—Tỳ. Nà ãm hãmri na ja hã ijarê. Ixpê mẽ ate ixkamã ajamak o apa xwýnhta na pa. Na ka wa kam ã ixte amnhĩ nhĩpêx anhỹr ã ixpumu. Jakamã wa ma akupỹm tẽ nê aprĩ hã kãm ijarê. ⁵ Na pa hte akupỹm mẽ nohkre xwýnhjê ho mex. Nê mẽ hkànhy xwýnhjaja pa akupỹm mẽ hkà ho mex. Nê mẽ hyk o mẽ pa xwýnhjaja pa akupỹm mẽ hte ho mex. Nê mẽ htyk xwýnhjaja pa akupỹm mẽ ho mẽ htĩr. Nê mẽ kêp amrakati nê ri mẽ pa xwýnhjaja pa mẽ kãm mẽmoj mex jarênh o ri mẽ hkôt ixpa. ã na pa hte mẽ hipêx anhỹr o ri ixpa. Jakamã e wa ma akupỹm Juãw wýr tẽ nê ã kãm ijarênh anê. ⁶ Kê ijarênh ma nê ixkôt hamaxpêr tỳx nê tee ri ixkukamã hamaxpêr kêt nê. Koja ã amnhĩ nhĩpêx anê nê hamakêtkati nê ri pa. E wa tokyx ma akupỹm tẽ nê kãm ã ijarênh anê. Anê.

Jejus kot tanhmã Juãw Paxis jarênh to Rukre 7.24-35

⁷⁻⁹ Nhũm pre ã Jejus Juãw Paxis kôt wa pa ho wa pa xwýnhja wa kãm amnhĩ jarênh anê nê akupỹm hwýr wa kumê nhũm wa ma akupỹm hwýr tẽ. Hãmri nhũm Jejus mẽ kot mar o kuhê xwýnhjê mã tanhmã Juãw Paxisja jarênh to nê mẽ kãm:

—Na ka pre htem kapôt ã Juãw Paxis mar kaxyw ma hwýr mra. Nom ê mex ã omunh kaxyw rỳ hpijaãm kãm tanhmã kapêr to hã mar kaxyw na ka prem hwýr amrar kêt nê. Tĩrtũm nhỹ hã kapêr o pa jakamã na ka prem ate mar kaxyw ma hwýr mra. Tĩrtũm

nhỹ hã ixkukamã ijarēnh o pa xwýnh na. Ixpê Tirtũm kot mē akaxyw ixãm xwýnh ã na hte ijarēnh o pa. Nē hprĩ hã tanhmã mē amã ijarēnh to. Jakamã kapērja mex o kot wam Tirtũm nhỹ hã kapēr jarēnh xwýnhjê kapēr piitã hakrenh par. ¹⁰ Tirtũm kapēr ã kagà htũm kot Juãw kukamã tanhmã harēnh to nē harēnh kot:

Kot paj Ixkra hkukamã ma mē hwýr harēnh xwýnhja mē nhũm ma ri kutêp mē kãm harēnh o pa. Mē kot mar nē kutêp tãm amnhĩ nhĩpêx o pa kaxyw.

—Anhỹr o Tirtũm Juãw Paxis kukamã harē nhũm prem hã kagà. Tã nhũm ixkukamã mē awýr kumē. ¹¹ Juãw Paxisja na mex kumrêx. Na pre hprĩ hã ixkukamã tanhmã ijarēnh to ho pa. Tã nom ixkôt mē pa ho mē pa xwýnhjê hkĩnhã na pre ixkôt pa ho pa hkêt nē. Jakamã ixkôt mē pa ho mē pa xwýnhjaja kot ixkôt hprĩ hã ixkapēr mar o pa jakamã na mē mex o mē kot Juãw Paxisja jakrenh. Anē.

¹²⁻¹³ —Na pre finat Mojes kumrêx mē kãm Tirtũm kapēr kwý hã kagà. Tã nhũm hpãnhã Tirtũm nhỹ hã kapēr jarēnh xwýnhjaja Mojes mýr pê hkwy hã kagà. Nhũm prem kamã harē nē kuma nē hkôt amnhĩ nhĩpêx o pa. Hãmri nhũm Juãw Paxisja mē mýrpê kato nē tãm Tirtũm kapēr o mē ahkre ho ri pa. Tã pa hpãnhã ho mē ajahkre ho ri mē akôt ixpa nhũm mē ohtô nē inhma nē ixkôt amnhĩ xunhwý nē kãm ixkapēr kôt pix mã amnhĩ nhĩpêx o ri pa hprãm nē.

¹⁴ —Amnepêm na pre Tirtũm nhỹ hã kapēr jarēnh xwýnhjaja mēhõja kukamã tanhmã harēnh to ho pa. Nē mē kãm harēnh o: “Koja nhỹrmã mēhõ te Eris kot amnhĩ nhĩpêx pyrãk o amnhĩ nhĩpêx nē mē awýr mō. Nē mē amã Tirtũm kot mē awýr mēnh mã xwýnhja jarēnh o pa ka mē ama.” Anhỹr o mē kãm mēhõ jarē. Tã kot paj mē amã kot hkukamã harēnh xwýnhhta nhĩxi jarē ka mē inhma. Nã Juãw Paxisja kukamã na prem ã harēnh anhỹr o pa.

¹⁵ —E kot pa mē amã mē piitã htýx ri tanhmã mē hamaxpēr to ho mē pa hã mē amã mē harē ka mē harēnh ma. ¹⁶ Te mēhprĩre kot amnhĩ nhĩpêx pyrãk o na htem amnhĩ nhĩpêx. Mēhprĩrejaja na htem mē

õrkwỹ kapem mēmoj to amnhĩkati nē tee ri hkwyjê kot amnhĩ nhĩpêx pumu nē mē kãm:

¹⁷ Kwa na pa mē amã gre htã ka mē ixkutã anhökrepôx kêt nē. Pa mē ja hã mē apumu nē hpãnhã mē amã mē htyk jarē htã ka mē akaprĩ nē amýr kêt nē. Kwa mē ri ã amnhĩ nhĩpêx anhỹr kêt nē. Anē.

—Mēhprĩjaja na htem ã axpēn mã kapēr anē. Tã te mē ate mē urãk. Tirtũm kot mē awýr ý hã kapēr jarēnh xwýnhjê rēnh tã ka mē te mēhprĩre kot amnhĩ nhĩpêx pyrã nē mē ama nē ãm mē ama nē mē hkôt amnhĩ nhĩpêx kêt nē.

¹⁸ —Juãw Paxis na pre mē awýr mō nē ixkĩnhã apkur mex o ri pa hkêt nē. Nē ixkĩnhã ã wĩhti ho hkõm kêt nē. Ka mē ja hã omu nē hkaga nē atýx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nē mēhprĩre kot amnhĩ nhĩpêxta pyrã nē hkôt amnhĩ nhĩpêx kêt nē.

¹⁹ Tã hãmri pa hpãnhã mē awýr mō nē Juãw Paxis rom apkati mē ixãpkur mex o ri mē akôt ixpa. Nē kurom mē akutã wĩhti hkwy ho ixkõm o ri ixpa. Tã ka mē ja hã ixpumu nē atýx ri ixãpkur rũnh nē ixpipãnh o ri ixpa hã ixkamnhĩx nē ã axpēn mã ixto akapēr anē. Nē mē kot amnhĩ tomnuj xwýnhjê hkôt ri ixpa xwýnh ã axpēn mã ijarē. ã na ka htem axpēn mã ijarēnh anē. Jao te mē ate Juãw Paxis nhĩpêx pyrã nē ixkaga nē ixkôt amnhĩ nhĩpêx kêt nē. Na hte ã htýx ri tanhmã mē hamaxpēr to ho mē pa xwýnhjaja amnhĩ nhĩpêx anē. No tãm ri mē hamaxpēr xwýnhjaja na htem ahpýnhã wa ixte amnhĩ nhĩpêx ã wa ixpumu nē axpēn mã wa ijarēnh o: “Nã ahpýnhã wa kot amnhĩ nhĩpêx tã no ãm hamē Tirtũm nhỹ hã kapēr mex o pa. E pu mē wa urãk nē Tirtũm kôt amnhĩ xunhwý.” Anhỹr o axpēn mã wa ijarē. Anē.

Mē kot Tirtũm kôt mē hamaxpēr kêt xwýnhjê jarēnh

Rukre 10.13-15

²⁰ Na pre hte Jejus krĩ piitã hkôt pa nē krĩ nhõ xwýnhjê mã kapēr nē mē kot amnhĩ tomnuj ã mē kãm kapēr. Korajĩ mē Pese nhõ xwýnhjê kumrêx mã kapēr nē mē kãm:

²¹⁻²² —E mē inhma. Amnepêm krĩ pê Sitõ mē Xir wa kamã mē pa xwýnhjaja na prem

tanhmã amnhĩ tomnuj tỳx to ho pa nhũm Tĩrtũm tee ri ja hã mẽ omu nẽ mẽ kot amnhĩ tomnujta ã tanhmã mẽ ho. Tã kwa mẽ o kora Korajĩ mẽ Pesêj nhõ xwỳnhjaja. Ra ixte mẽ amã aa mẽ ate mẽmoj pumunh kêt kwỳ ho anhỳr rax tã ka mẽ omu nẽ ãm omu nẽ amnhĩ tomnuj kaga hkêt nẽ. Arĩ tanhmã amnhĩ tomnuj to ho ri apa. Mỳrapê kot kaj mẽ amex kêt nẽ. Kop apu Sitõ rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỳr o ri ixpa ronhỹx mẽ omu nẽ mẽ arom amnhĩ kaxyw ixkõt hamaxpêr tỳx kurê kumrêx. Nẽ tee ri kot tanhmã kot amnhĩ tomnuj to hã amnhĩ pumu nẽ hkaprĩ nẽ hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwỳ ho anhỳr o ixpa kaprỳ. Ka mẽ ja hã ixpumu nẽ ãm ixpumu nẽ amnhĩ tomnuj kaga hkêt nẽ. Jakamã koja nhỹrmã Tĩrtũm tanhmã mẽ atomnuj tỳx to. Nẽ tanhmã Sitõ mẽ Xir wa kamã mẽ pa xwỳnhjê jarênh to nhũm mẽ kot amnhĩ tomnuj mỳrapê amnhĩ xà htỳx kamã hamak rãhã ho pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx kumrêx. Ka mẽ amnhĩ xà htỳx kamã ajamak rãhã ho ri apa kãm ga. Anẽ.

²³⁻²⁴ Nhũm pre ã Jejus mẽ kãm kapêr anẽ. Nẽ hpãnhã Kapanaũ nhõ xwỳnhjê mã kapêr nẽ mẽ kãm:

—No mẽ apê Kapanaũ nhõ xwỳnhjaja. Kot kaj mẽ ajaxwỳja mẽ uràk nẽ amex kêt nẽ. Ra ixte mẽ amã aa mẽ ate mẽmoj pumunh kêt kwỳ ho anhỳr rax nhũm mẽ ate hã ixpumunh tã amnhĩ tomnuj kaga hkêt tã Tĩrtũm mẽ wa inhõ krĩ hwỳr akrà. No ãm hwỳr akrà kaprỳ. Kot kaj mẽ atõ hwỳr axàpir kêt nẽ. Kop apu Sotõ nhõ xwỳnhjaja mãn kot ã ixte amnhĩ nhĩpêx anhỳr ã ixpumunh ronhỹx mẽ ra kot amnhĩ tomnuj kaga nẽ ixkõt amnhĩ xunhwỳr kurê kumrêx. No mẽ kajaja na ka mẽ ã amnhĩ nhĩpêx anhỳr kêt nẽ. Jakamã kot kaj mẽ nhỹrmã ma kuwy maatita wỳr ajapêx pa kãm ga. Anẽ.

Jejus kot õ Papaj mã amnhĩ jarênh

Rukre 10.21-22

²⁵⁻²⁶ Tã nhũm Jejus Tĩrtũm mã amnhĩ jarê nẽ kãm:

—Pa Papaj? Nà apê mẽ inhõ Pahi Maati na ka. Pikap ri mẽ pa xwỳnhjaja nẽ kaxkwa kamã mẽ pa xwỳnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ to jarkrar xwỳnhjê mã axàhpumunh tỳx o amnhĩrĩt kêt nẽ. ãm mẽ àhpumunh kêt ã mẽ kot amnhĩ jarênh xwỳnhjê pix mã na ka hte axàhpumunh tỳx o amnhĩrĩt nhũm mẽ tapxipixjaja ja hã apumu. Nà ãm hãmri. ãm hãmri na ka hte amã hprãm xà hkõt ã mẽ piitã mẽ hipêx anhỳr o ri apa Papaj. Jakamã mẽ kot amnhĩ to hkryre xwỳnh pixjaja na htem hprĩ hã ate amnhĩ nhĩpêx kõt apumunh o pa. Anẽ.

Nhũm pre ã Jejus Tĩrtũm mã amnhĩ jarênh anẽ. ²⁷ Hãmri nẽ hpãnhã mẽ kot mar o kuhê xwỳnhjê mã kapêr nẽ mẽ kãm:

—Nà na pre ra Inhipeêxaja inhĩhkra kamã mẽmoj piitã hagiênh pa. Ixte kãm ho amnhĩptar o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwỳnhjaja na mẽ kot ja hã ixpumunh kêt. Nẽ papxipix na ixte Inhipeêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anẽ nẽ inhmã hprãm xà hkõt mẽ hkwỳjê mã ho amnhĩrĩt o ri ixpa. Jakamã nhũm mẽ ixpyrà nẽ Inhipeêxà kot tanhmã amnhĩ nhĩpêx to ho pa hkõt omu.

²⁸⁻³⁰ —Nẽ tee ri amnhĩ kukamã mẽ ajamaxpêr o ri apa xwỳnhjaja te mẽ ate mẽmoj pytĩ rax tur nẽ ahte ho apa pyràk. Kwa mẽ ixkõt amnhĩ xunhwỳ nẽ ixte amnhĩ nhĩpêx ã ixpumu. Ixte mẽ akamã ixukaprĩ xwỳnh na pa. Na pa hte mẽ akutã inhnojarêt rãhã ho ixpa. Jakamã kot kaj mẽ ixkõt amnhĩ xunhwỳ pa te ixte mẽ anẽ mẽmoj pytĩ ho ixwryk pyràk o mẽ anhĩpêx nẽ tãm mẽ axunhwỳ ka mẽ tãm ajamaxpêr nẽ tãm amnhĩ nhĩpêx o ri apa. Mo kaxyw koja ixkõt mẽ kot amnhĩ nhĩpêx o pa xwỳnhjaja tee ri amnhĩ kukamã hamaxpêr o pa? Nà na htem ixkamnàr rom hamakêtkati nẽ àmnhix ri pa ho pa. Anẽ.

12

Jejus kêp arĩgromnu hpãm

Makre 2.23-28; Rukre 6.1-5

¹ Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkõt ri mẽ ixpa ho mẽ ixpa xwýnhjê mẽ pa mẽ ma mẽ hpur kõt ri nhỹhỹm ri ixpa. Hãmri nê ra mẽ inhmã prãm nê mẽmo hy te kot harôj pyræk xwýnhja kwýrê nê kugrà nê ma Jejus kõt hkanhar o mō. Mẽ ixpê Ijaew na pa htem axpên pur kãm ã amnhĩ nhĩpêx anhỹr o ixpa. ² Hãmri nhũm mẽ ixkwý pê Parijew nhõ xwýnhjaja kãm mẽmoj tã Jejus o kapêr prãm jakamã ã mẽ ixte amnhĩ nhĩpêx anhỹr ã mẽ ixpumu nê mẽ ixtã Jejus kukjêr kurê kumrêx nê kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ hpur kãm mẽmoj nhĩkênh nê mẽ pahkurê htã nhũm ri akõt mẽ pa ho mẽ pa xwýnhjaja axtem nê ã amnhĩ nhĩpêx anhỹr o ri akõt pa. Mẽmo hyta rê nê akõt hkanhar o pa. Kwa mẽ kãm anê kê mẽ ã amnhĩ nhĩpêx anhỹr kêt nê. Na htem arĩgromnu hã mẽmoj tã àpênh kêt kênã. Anê.

³⁻⁴ Hãmri nhũm mẽ kuma nê hprĩ hã mẽ kãm Tĩrtũm kapêr jarê nê mẽ kãm:

—Tk. Xàn ka htem Tĩrtũm kapêr ã kagà htũm kot pahi Tawi kot tanhmã amnhĩ nhĩpêx tota kamã harênh nê mar kêt nê? Na pre hkõt ri mẽ pa xwýnhjê mẽ nhũm mẽ prãm xàj Tĩrtũm mã amnhĩ jarênh xà hã ixkre hwýr agjê. Hãmri nhũm mẽ õ patre maatija mẽ kãm prãm tỳx ã mẽ omu nê kãm mẽ hkaprĩ nê mẽ kãm mẽmoj gō. Mẽ kot Tĩrtũm noo mã pãwti jaxwýr xwýnhja gō nhũm mẽ kuku. Tĩrtũm kapêr ã kagà htũm kot ja nê mẽ hkurê htã nhũm mẽ kãm prãm tỳx ã mẽ omu nê mẽ kamã ukaprĩ xàj mẽ kãm kugō. Æm mẽ õ patre pix kot ja hkur kaxyw tã nhũm mẽ kãm kugō nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nê. Kot mẽ kamã ukaprĩ nê mẽ kãm õr ã omu nhũm ja kãm mex nê.

⁵ —Mẽ panhõ arĩgromnu htã na hte patre-jaja arĩ hã Tĩrtũm mã amnhĩ jarênh xà hã ixkre kamã àpênh o pa. Tĩrtũm kapêr ã kagà htũm kõt na htem arĩgromnu htã nhũm mẽ arĩ hã apê nhũm Tĩrtũm pê jamnuj kêt nê. Kumã mẽ àpênh xwýnh kênã. ⁶ Æm hãmri na pa mẽ amã ja jarê. Tĩrtũm mã amnhĩ jarênh xà hã ixkreta mex tã nom ixpê Tĩrtũm Kra jakamã inhmex o ixte ixkreta jakrenh.

⁷ Tĩrtũm kapêr ã kagà htũm kot ja harênh kot:

Kêr ka mẽ inhmã amnhĩ jarênh kaxyw nê Æm inhmã mẽmoj nhõr pix pê inhmã amnhĩ jarênh kêt nê. Mẽ mãânên mẽ kamã axukaprĩ o ri apa pê inhmã amnhĩ jarê. Ja na kêt inhmã hprãm.

—Æ harênh kot anhỹr. Tã mẽ ate aprĩ hã ja mar ronhỹx ka mẽ ixkõt mẽ pa xwýnhjê kot mẽmo hy rênh nê hkanhar o mōr ã mẽ omu nê ri tanhmã mẽ ho akapêr to hkêt nê. Æm mẽ kãm prãm ã mẽ omu nê mẽ kamã axukaprĩ nê.

⁸ —Kêt pa na pre Tĩrtũm mẽ akaxyw ixãm nê mẽ awýr inhmê. Jakamã papxpix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karō. Kwa mẽ jajê pumu nê mẽ kamã axukaprĩ kêt wehe. Kwâr mẽ mãmri mẽmo hyta rê nê hkanhar o ixkõt mō. Anê.

ĩhkra grà xwýnh jarênh

Makre 3.1-6; Rukre 6.6-11

⁹ Nhũm pre ã Jejus Parijew nhõ xwýnhjê mã kapêr anê hãmri nê Tĩrtũm kapêr o mẽ ahkre xà hã ixkre hwýr tẽ nê axà. ¹⁰ Nhũm Parijew nhõ xwýnhjaja tanhmã ho kapêr to kaxyw htãnopxar o kuhê. Jakamã nhũm ixkre kamã mēhõ my ĩhkra grà xwýnhja mẽ pikuprõnh xwýnhjê nhĩkhõ hã nhỹ nhũm Parijew nhõ xwýnhjaja omu nê axpên mã:

—Kwa pu mẽ jar pakuhê nê Jejus kot tanhmã amnhĩ nhĩpêx to hã omu. Xà koja arĩgromnu hã mũjti ho mex nà? Koja ho anê nê Tĩrtũm kapêr tũm kuhpa hã amnhĩ nhĩpêx. E pu mẽ kop xa nê hã omu. Anê.

Hãmri nê hã Jejus kukja nê kãm:

—E mẽ inhmã mẽmoj jarê. Xà na htem arĩgromnu hã akupým mẽ ho mex nhũm Tĩrtũm kãm ja mex nê nà? Anê.

¹¹ Hãmri nhũm mẽ hamaxpêr kõt mẽ omunh mex nê mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit ôwêhti ahkrehti kamã tēm ka omu nê Æm omu nê arĩgro mex jamãr pê ho axàpir kêt nê? Nà kot kaj mẽ tee ri omu nê ho axàpir kurê kumrêx. ¹² Arĩgromnu hã mẽ ho mexja ja mex kênã. Tĩrtũm mã mẽ pahpê panhĩja na mẽ pamex o mẽ hkrit jakrenh jakamã kêr pu mẽ tee arĩgromnu htã pu mẽ

hã tanhmã axpên to mex to ho papa. Ja na Tirtüm kãm hprãm.

Anhÿr o mẽ kãm kapër. ¹³ Hãmri nê hpãnhã myta mã:

—E anhĩkra katàt. Anê.

Hãmri nhũm ìhkra katàt nê mex kurê kumrêx. ¹⁴ Hãmri nhũm Parijew nhõ xwÿnhjaja tee ri ja hã omu nê Jejus kamã gryk nê. Arĩgromnu pê sap ã kot ho mex jakamã nhũm mẽ kamã gryk tÿx nê. Hãmri nê ma mra nê hapôj nê hã axpên kukjêr o kuhê nê axpên mã:

—Kwa ã kot amnhĩ nhĩpêx anhÿrja mÿrapê tanhmã kot puj wem ho? ã kapër anhÿrja o te mẽ papamjaja mẽ pahte hkĩnhã mẽ kamã paxukaprĩ kêt pyrãk ã mẽ pajarê. Koja mẽ pahkwÿjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkôt pix mã hamaxpêr. Kwa tanhmã kot puj wem ja nê ho?

Anhÿr o axpên kukjêr o kuhê.

Jejus kêp Tirtüm kot mẽ pahwÿr mênh xwÿnh ã harênh

Makre 3.7-12

¹⁵ Hãmri nhũm Jejus amnhĩ tâ Parijew nhõ xwÿnhjê jamaxpêr kôt mẽ omu hãmri nê mẽ kêp kato nê hpãnhã ma nhÿhÿm krĩ hõ hwÿr ma tẽ. Nhũm mẽ ohtô nê omu nê ma hkôt mra nhũm mẽ omu nê akupÿm mẽ kãm mẽ à xwÿnh piitã ho mex. ¹⁶ Hãmri nê mẽ kãm:

—E na pa akupÿm mẽ ato mex. Nom kêr ka mẽ amnhĩ tâ ixto axãmra ho ri apa hkêt nê. Ixpê Tirtüm Kra hã mẽ kãm ijarênh kêt nê. ãm kwarĩ kumrêx.

Anhÿr o mẽ kãm kapër. ¹⁷ Na pre ra amnepêm Tirtüm nhÿ hã kapër xwÿnh finat Ijaisja Jejus kukamã mẽ kãm tanhmã harênh to nê hã kagà. Te Tirtüm tãm kapër pyrãk o harê nê hã kagà. Nê hã kagà ho:

¹⁸ Ota ixkôt amnhĩ nhĩpêx o pa xwÿnhhta xa. Pa na pa amnhĩ kaxyw ãm. Inhmã hapêê. Na pa hte tanhmã kot amnhĩ nhĩpêx to ho pa hã omu nê ixkĩnh tÿx nê. Kot paj hwÿr amnhĩ karõ mẽ nhũm hwÿr axà nhũm ma ÿ hã pika piitã hkôt mẽ piitã mẽ kãm ijarênh o ri mẽ hkôt pa. Mẽ kot hprĩ hã ixte tanhmã amnhĩ nhĩpêx to nê tanhmã ijamaxpêr to hã ixpumunh kaxyw.

¹⁹ Nom koja ri amnhĩ to àmra o pa hkêt nê. Rÿ kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nê.

²⁰ ãm kapër xukaprĩ pix o koja mẽ hirerek xwÿnhjê mã kapër o pa. Nê mẽ kot tee ri amnhĩ nhĩpêx ã amnhĩ pumunh xwÿnhjê kamã ukaprĩ o pa. Nê mẽ kot htÿx ri amnhĩ nhĩpêx o mẽ pa xwÿnhjê kutã nojarêt rãhã ho pa jakamã nhũm mẽ hpãnhã tãm amnhĩ nhĩpêx o pa. Koja ã amnhĩ nhĩpêx anhÿr o ri mẽ hkôt pa rãhã ra akupÿm mẽmoj piitã tãm haxwÿr pa.

²¹ ã kot amnhĩ nhĩpêx anhÿr o pa jakamã koja pika piitã hkôt mẽ pa xwÿnh kwÿjaja kukwak ri amnhĩ kaxyw Tirtüm kôt hamaxpêr nê hkôt amnhĩ xunhwÿ. Anê.

Na pre ã finat Ijaisja Tirtüm nhÿ hã kormã Jejus wrÿk nê kator kêt ri tanhmã kot amnhĩ nhĩpêx to ho pa hkukamã harênh nê hã kagà anê. Tã nhũm mẽ hwÿr wrÿ nê ã mẽ hkôt amnhĩ nhĩpêx anhÿr o pa.

Jejus mẽ mẽkarõmnuti wa harênh

Makre 3.20-30; Rukre 11.14-23, 11.31-32, 12.10

²² Tã nhũm prem Jejus wÿr mēhõ myja o mõ. Mẽkarõmnuti kot hwÿr àr nê ho nohkre nê ho kapër kêt xwÿnhhta nhũm mẽ hwÿr o mõ. Hãmri nhũm omu nê nê mẽkarõmnuti jano nê akupÿm ho mex kurê kumrêx nhũm akupÿm rĩt mex nê akupÿm kapër mex nê. ²³ Hãmri nhũm mẽ amnhĩ jaêr pê omu nê kamã no puma nê hã axpên kukjêr o:

—Kokÿÿ. Jejus na hte ãm mẽ ho mex o mẽ ho mex o pa. Mãn kêp Tirtüm kot mẽ pahwÿr mênh mã xwÿnhhta na nà? ã na hte ã amnhĩ nhĩpêx anhÿr o pa. Mãn kêp pahi finat Tawi kanrêhã tãmnhwÿta na nà? Anê.

²⁴ Nom nhũm Parijew nhõ xwÿnhjaja ã Jejus kot amnhĩ nhĩpêx anhÿr ã omu nê kêp mẽkarõmnuti hkwy hã hkamnhix. Jakamã mẽ kot hã axpêr kukjêr ã mẽ kuma nê mẽ kãm:

—Tk pêr hinhu nhĩkôoti nhÿ hã na hte mẽ nê amnhĩ kwÿjê japôx o pa. Anê.

Hinhu nhĩkôoti nhĩxi hõ pê Satanasti nhũm prem ã Satanasti nhÿ hã Jejus kot

amnhĩ nhĩpêx ã hkamnhĩx anê. ²⁵ Nhũm ra mẽ hamaxpêr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwȳ hã ixkamnhĩx xw̄ȳnhjaja. Koja pika nhõ xw̄ȳnhjaja axpên kutã amnhĩ xunhw̄ȳ nê axpu hãmri nê angrã nê ma ahp̄ȳnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xw̄ȳnhjaja. Rỳ mẽ kot axpên to hkwȳ xw̄ȳnhjaja mẽmoj tã axpên kãm gryk nê axpên kutã amnhĩ xunhw̄ȳ. Hãmri nê ahp̄ȳnhã awry hã pa nhũm mẽ õ pahija tee ri kãm mẽ hamãr prãm kaprỳ. Mo mẽ hkwȳjaja kot ri mẽ hamãr o pa? No koja pahija tãm amnhĩ nê amnhĩ kw̄ȳjê janor kêt nê. ²⁶ Tã ja pyrã nê ixte Satanasti nhỹ hã tanhmã amnhĩ nhĩpêx to ho ri ixpa ronhỹx pa ri mẽ nê amnhĩ kw̄ȳjê janor kêt nê.

²⁷ —No mẽ akw̄ȳjaja? Xà Satanasti nhỹ hã na htem mẽ nê mẽkarõmnuti japôx o pa? Kêp apu pa ixte ȳ hã mẽ nê amnhĩ kw̄ȳjê japôx ronhỹx mẽ akw̄ȳjaja ixpyrã nê ȳ hã mẽ nê amnhĩ kw̄ȳjê japôx o pa. Nà Tĩrtũm nhỹ hã mẽ ixte mẽ nê mẽ hapôx o ixpa kênã. Jakamã mẽ ate ã ijarênh anhỹrja mex kêt. ²⁸ Tĩrtũm Karõ nhỹ hã ixte mẽ nê mẽ hapôx jakamã kwa mẽ ja hã ixpumu nê ixte mẽ ato amnhĩptãr kaxyw Tĩrtũm kot mẽ aw̄yr inhmênh kôt ixpumu kêt wehe. Pa na ka htem ijamãr o apa.

²⁹ —Satanastija àhpumunh tỳx jakamã na htem tee ri kêp hkôt mẽ kot amnhĩ xunhw̄ȳr xw̄ȳnhjê pytãr kaxyw nhũm mẽ nê mẽ omunh mex nê. Tã nom ixàhpumunh tỳx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

³⁰ —Ra mẽ amã ixkapêr mar prãm tã nom kormã ixkôt amnhĩ xunhw̄ȳr kêt nê. Kwa wem ma amnhĩ to amõr gri nê tokyx ixkôt amnhĩ xunhw̄ȳr kêt wehe. Kot kaj mẽ anhỹr kêt hãmri nê mẽ apê ixkutã amnhĩ xunhw̄ȳr xw̄ȳnh pyrãk o amnhĩ nhĩpêx.

³¹⁻³² —Nê koja mēhõ ixkapêr ma nê kãm ixprãm kêt nhũm Tĩrtũm ixtã omu nom tokyx tanhmã ixtã ho hkôt nê. Koja kormã amnhĩ tã hamã. Karõ kot axte kãm ijarênh o amnhĩrĩt nhũm jatã kot mar nê

kãm ixprãm nê ixkôt amnhĩ xãm prãm xàj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrĩt to htã nhũm mẽ kuma nê ãm kuma nê te mẽ kêp amnhĩ jamak pro pyrãk. Jao ra Karõ hã hpijaãm kêt o amnhĩ nhĩpêx. Mỳrapê koja Tĩrtũm nhỹrmã amnhĩ xwar te kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprỳ. Hãmri nê amnhĩ xà htỳx kamã hamak o pa xàta w̄yr ma pa nê kamã pa rãhã nê pa ho pa. Anê.

Mẽ pajamaxpêr xà hkôt tanhmã ri mẽ pakapêr to

Rukre 6.43-45

³³ Nhũm Jejus arĩ Parijew nhõ xw̄ȳnhjê mã kapêr nê mẽ kãm:

—Nê kot kaj mẽ atõ anhõ mẽmo pãr nhũm amã õ mex nê. Ô rax nê. Ka omu nê akĩnh nê amnhĩm mex ã harê. No koja apê õ hkôt ka tee ri omu nê mex kêt ã harê. Na htem ã amnhĩm mẽmo xõ hpãr pumunh kôt tanhmã kute hã harênh anê. Ja pyrã nê na htem tanhmã mẽ kot amnhĩ nhĩpêx to hã mẽ omunh kôt tanhmã mẽ harênh to. Mẽ kot amnhĩ tomnuj xw̄ȳnh ã mẽ harê rỳ mẽ kot amnhĩ to mex xw̄ȳnh ã mẽ harê.

³⁴⁻³⁵ —Nê koja mēhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htỳx ri tanhmã amnhĩ tomnuj to ho pa. Na htem ahp̄ȳnhã amnhĩ jamaxpêr xà hkôt tanhmã kapêr to ho pa. No mẽ kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkôt nê. Na htem tanhmã hamaxpêr to xà hkôt tanhmã ri kapêr to ho pa. ³⁶⁻³⁷ Koja nhỹrmã Tĩrtũm mẽ piitã tanhmã mẽ kapêr to hã mẽ mar xà hkôt tanhmã mẽ harênh to. Jakamã mẽ akapêr mex o mẽ apa xw̄ȳnhjaja koja mẽ amex ã mẽ ajarê. Nom mẽ atỳx ri akapêr punuj o mẽ apa xw̄ȳnhjaja koja mẽ amex kêt ã mẽ ajarê. Hãmri nê mẽ akapêr punuj o apaja mỳrapê mẽ atomnuj tỳx nê. Anê.

Jejus kot Jõhti jarênh

Makre 8.11-12; Rukre 11.29-32

³⁸ Hãmri nhũm Tĩrtũm kapêr tũm o mẽ ahkre xw̄ȳnh mẽ Parijew nhõ xw̄ȳnh kw̄ȳjaja mẽmoj tã Jejus w̄ȳ nê kãm:

—Kwa Pahihti. Mě inhmã aa mẽ ixte mẽmoj pumunh kêt õ ho anê. Kot paj mẽ omu hãmri nê Tirtũm kot mẽ ixwÿr amênh ã apumunh kurê kumrêx. Jakamã e mẽ inhmã mẽmoj to anê nà. Anê.

³⁹ Hãmri nhũm mẽ kuma nê mẽ kãm:

—Tk. Pêr ãm mẽ ajamaxpêr punuj pix o na ka htem apa. Ixpê Tirtũm kot mẽ awÿr inhmênh xwÿnh tâ mẽ ate ja hã ixpumunh kêt. Nê mẽ ate ja hã axpên mã ijarênh kêt tâ ixte mẽ amã aa mẽmoj pumunh kêt õ ho anhÿr kaxyw hã ixwÿ. Nà pa mẽ amã ho anhÿr kêt nê. Kormã. ãm amnepêp Jõhti kot tanhmã amnhĩ nhĩpêx toja pix kot paj mẽ amã harê.

⁴⁰ —Tirtũm nhÿ hã kapêr xwÿnh Jõhtija amnepêp na pre tep rax kumrêxja htĩr rãhã kukrê. Nhũm õxàhkre kamã htĩr nê hkrĩ hã apkati axkrunêpxi hãmri nê htĩr rãhã õxàhkre rũm kato. Tã ixpê Tirtũm kot mẽ awÿr inhmênh xwÿnh kot paj nhÿrmã kên kre kamã ixtyk nê inhnôr ã apkati axkrunêpxi. Jõhti hkĩnhã ixtyk kumrêx nê inhnôr ã apkati axkrunêpxi hãmri nhũm Tirtũm akupÿm ixto ixtĩr.

⁴¹ —Nê koja nhÿrmã Tirtũm akupÿm mẽ htyk nê mẽ hikwÿ xwÿnh piitã akupÿm mẽ ho htĩr hãmri nhũm mẽ piitã Inhipeêxã mẽ wa ixkutã hkrĩ pa wa tanhmã mẽ harênh to. Tirtũm mẽ wa ixkuri mẽ htĩr tũm nê mẽ pa ho mẽ pa mã xwÿnhjê hã mẽ hkwyjê jarê nê wa ixkuri mẽ pa ho mẽ pa hkêt xwÿnhjê jarê. Mě piitã ã ahpÿnhã mẽ harênh anê. Amarĩ mẽ pa xwÿnhjaja nê mẽ õ pahijaja. Jakamã nhũm Nĩnĩwe nhõ xwÿnhjaja tanhmã wa inhmã mẽ ajarênh to. Jõhti kot mẽ hwÿr môr nê mẽ kãm Tirtũm kapêr jarênh o pa xwÿnhjaja nhũm mẽ tanhmã wa inhmã mẽ ajarênh to nê wa inhmã: “Na pre Jõhtija man mẽ inhõ krĩ hwÿr mō mẽ inhmã akapêr jarênh o ri mẽ ixkôt pa. Pa prem kuma nê mẽ ixte amnhĩ tomnuj kaga nê akôt amnhĩ xunhwÿr kurê kumrêx Tirtũm. No or war akutã mẽ hkrĩ xwÿnh kwÿ ata mẽ na pre Akra Jesus tãm mẽ hwÿr mō mẽ mẽ kãm kapêr o ri mẽ hkôt pa nhũm prem mar tâ mẽ ixkĩnhã mẽ kot amnhĩ tomnuj kaga nê hkôt amnhĩ xunhwÿr kêt nê. Mě ixkurom mẽ kot Akra mar tâ amnhĩ kaxyw kãm hamaxpêr kêt nê.” Anhÿr o koja mẽ wa inhmã mẽ ajarê ka mẽ tee ri mẽ ama

nê ra mẽ amã ma nê. Nom ãm mẽ amã ma kaprÿ.

⁴² —Nê sur kãm mẽ õ pahi nitita koja mẽ hpãnhã tanhmã wa inhmã mẽ ajarênh to nê wa inhmã: “Na pa pre inhmã pahi Sarumãw kot war anhÿ hã àhpumunh tÿx ã harênh ma hãmri nê inhmã mar prãm xaj ma awry hã õ pika hwÿr mō mẽ omu nê kapêr ma. Hãmri nê ma akupÿm inhõ pika hwÿr mō mẽ ixkwÿjê mã àhpumunh tÿx ã harênh o ri ixpa. Tã Akra Jesus na kot àhpumunh tÿx o pahi Sarumãw jakrenh tâ or war akutã mẽ hkrĩ xwÿnh kwÿ ata mẽ. Mě kot kapêr mar tâ ixkĩnhã kãm mar prãm kêt. Na prem kuma nê ãm kuma.” Anhÿr o koja wa inhmã mẽ ajarê. Hãmri nê ja hã mẽ amã akir ka mẽ tee ri mar o akrĩ nê amnhĩ kamã agryk o akrĩ. Nom ãm amnhĩ kamã agryk kaprÿ. Anê.

Mêkarõmnuti kot tanhmã mēhō hto hã harēnh

Rukre 11.24-26

⁴³ Nhũm Jesus arĩ Parijew nhõ xwÿnhjê mẽ Tirtũm kapêr tũm o mẽ ahkre xwÿnhjê mã kapêr nê mẽ kãm:

—Te mẽ ate ixte mēhō nê mẽkarõmnuti japôx xwÿnhhta pyrãk. Nhũm te kêp kator nê ma htēm pyrãk. Nê nhÿri amgrã kamã ri pa pyrãk. Koja ja kêp omnuj nhũm tee ri kamã nhÿri hkôt xà japêr o pa. Nom tee ri hapêr o pa kaprÿ. ⁴⁴ Hãmri nê tanhmã amnhĩ kukamã hamaxpêr to nê hamaxpêr o: “E kot paj ma akupÿm mẽ kot nê ixkator xwÿnhhta wÿr tē nê axà nê kamã mãn ri ixpa.” ⁴⁵ Anhÿr o hamaxpêr hãmri nê ma akupÿm hwÿr tē. Nom kormã akupÿm hwÿr àr kêt ri nhũm kamã amrakati nê ri pa. Jakamã nhũm akupÿm hwÿr axà. Nom ahte hwÿr àr kêt nê. Amnhĩ kôt hkwyjê ho 7 nê hwÿr mẽ ho gjêx pa. Mě kêp 7jaja nê wamta mẽ nhũm mẽ piitã hwÿr gjêx pa. No mẽ kêp 7jaja na omnuj tÿx o kot wamta jakrenh jakamã nhũm mẽ kot hwÿr gjêx xwÿnhhta mẽ ÿ hã ra amnhĩ tomnuj tÿx nê oprê htÿx o pa. Wam pyxire kot hwÿr àrta nhÿ hã nhũm amnhĩ tomnuj o ri pa nom kawax pê oprê. Tã nhũm ra axte hwÿr mẽ ohtô nê gjêxta nhÿ hã hãmri oprê htÿx kumrêx. Ja pyrã nê kot kaj mẽ tokyx ixkôt amnhĩ xunhwÿr kêt nê hãmri nê amnhĩ tomnuj tÿx pix o ri apa. Anê.

Jejus kot tanhmã hkwýjê jarênh to hã harênh

⁴⁶ Nhũm Jejus arĩ mẽ ahkre ho nhỹ. Rôm nhũm katorxà nê htôjaja nhỹhỹnh hwýr môn pøj. Nom kormã hwýr gjêx kêt nê. Mẽ kot hã htu rax jakamã nhũm mẽ tee ri hwýr gjêx kaxyw kormã kapôt ã hã mẽ omunh o kuhê. ⁴⁷ Hãmri nhũm mēhōja kapôt ã mẽ omu nê Jejus mã mẽ harê nê kãm:

—Kwa Pahihti. Ota akatorxà mẽ atōjaja awýr môn pøj nê tee àr kaxyw. O mũj mẽ kapôt ã kuhê. Anê.

⁴⁸⁻⁵⁰ Hãmri nhũm kuma nê kãm:

—Tôe. Nà kot pa ixkato nê mẽ omu. Inhmã mẽ hapêê. Nom kot kaj mẽ atō Tĩrtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtō rý ixkatorxà pyrãk o pu mẽ axpên nhĩpêx o ri papa. Pa inhmã ixkatorxà nê ixtōjê japê pyrã nê mãänên inhmã mẽ ajapê nê. Anê.

13

Mẽmo hy hkre xwýnh jarênh

Matêwre 13.18-23; Makre 4.1-9; Rukre 8.4-8

¹ Hãmri nhũm Jejus mẽ kãm kapêr pa nê ixkre rũm kato nê ma himô rax wýr tẽ nê gô mýri mẽ kãm ujarênh kaxyw nhỹ. Pa mẽ ixpê hkôt mẽ ixpa ho ixpa xwýnhjaja ma hkôt mra. ²⁻³ Hãmri nê gôta wýr pøj nê mýri ixkrĩ. Nhũm mẽ Jejus ã htu rax nê nhũm tee ri mẽ omunh o nhỹ. Hãmri nê hamaxpêr nê kànhmã xa nê tẽ nê pàr krem axà nê pàr kre kamã mütũm awry rũm mẽ ahkre ho nhỹ nhũm mẽ piitã omunh nê mar mex o hkrĩ. Nhũm mẽ kãm ujarênh o mẽ ahkre ho nhỹ. Nom mẽ kãm tãm ujarênh kêt nê. Mẽ kot Tĩrtũm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm harênh o nhỹ nhũm mẽ amgrã kamã kýx pê mar o hkrĩ. Nhũm mẽ kãm:

⁴ —E mẽ inhma. Koja mēhō ma pur mã mō nê pur kãm mẽmo hy ho ukapêr o ri pa. Nom nhũm hy piitã amex kãm rôrôk kêt nê. Koja hkwýja ahpýnhã nhỹri rôrôk. Kwý aptýx kãm rôrôk nhũm kuwênhre omu nê hwýr mra nê hkrêr pa.

⁵ —Nê koja kên kãm hkwý rôrôk nê ra higrôt kutã nojarêr nê higrôt pa. Nom nhũm kamã aptýx nê kêp pika hkryre. ⁶ Jakamã nhũm higrôt nhũm hã myt apha nê arĩgro

htýx mẽ nhũm grã pa. Harê hkryre jakamã grã pa.

⁷ —Nê koja mrônhĩ kamã hkwý rôrôk nê higrôt tã no nhũm utĩja kêp amýtã nhũm ô hkêt nê.

⁸ —No kêt hirã kamã pika mex kãm rôrôk xwýnhja hirã kamã rôrôk jakamã higrôt mex nê piitã ô rũnh nê. Kamã ô hkwý kêp 30 nê kamã hkwý kêp 60 nê kamã hkwý kêp 100. ã mẽ ujarênh kot anhýr. ⁹ Kwa kêr ka mẽ ixujarênhja ma nê kãm ajamaxpêr týx rãhã ho apa. Anê.

Mẽmo kaxyw Jejus kot mẽ ujarênh o mẽ ahkre

Makre 4.10-25; Rukre 8.9-15

¹⁰ Hãmri pa mẽ ixpê Jejus kôt mẽ ixpa ho ixpa xwýnhjaja Jejus kot mẽ kãm ã ujarênh anhýrja ã kuma nê tee ri hkukamã ija-maxpêr. Hãmri nê hã hkukja nê kãm:

—Kwa axujarênhta na pa mẽ ixprĩ hã hkôt mẽmoj pumunh kêt nê. Mon ka hte ãm mẽ ujarênh pix o mẽ ahkre? Anê.

¹¹ Hãmri nhũm mẽ inhmã:

—Tôe. Nà kot paj mẽ amã harê. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tĩrtũm kot ja hã mẽ omunh nê mẽ ho hkra. Ja na pa harê. No mũjjaja mẽ akĩnhã kãm ja mar prãm kêt jakamã na htem ixujarênhja ma nê ãm kuma nê htýx ri pa.

¹² —No kêt mẽ kajaja na ka mẽ ixkôt ri apa ho apa. Nê xatã ixkapêr mar o apa jakamã na ka mẽ aprĩ hã ixkapêr ma. Tã mẽ ate ixkôt amnhĩ nhĩpêx o apa jakamã na pa tanhmã mẽ akrã hto ka mẽ aprĩ hã mar mex o mō. No mẽ kot ixkapêr mar nê ãm mar xwýnhjaja na mẽ akĩnhã inhmar týx kêt nê. Jakamã nhũm Tĩrtũm tanhmã mẽ hkrã hto nhũm mẽ hã no hkêt tokyx anê htýx ri pa.

¹³ “Ixte mẽ kãm aa mẽ kot mẽmoj pumunh kêt kwý ho anhýr rax tã nhũm mẽ omu nê ãm omu. Nê ixte amnhĩ nhĩpêxja nhũm mẽ kãm hkĩnh kêt nê. Nê mẽ kot ixkapêr mar tã ãm inhma nê kãm hprĩ hã inhmar prãm kêt nê.”

—Jakamã na pa hte ã mẽ kãm mẽmoj te ho tãm pyrã nê harê no ãm hã haxwý nê mẽ kãm ixujarênh anê.

14-15 —Na pre ra Tirtûm nhÿ hã kapêr o pa xwÿnh Ijaisja amnepêm mē hkukamã tanhmã mē harēnh to nē hã kagà. Mē kot inhmar nē ãm inhmar xwÿnhjê jarē nē tanhmã mē hkukamã mē harēnh to nē mē harēnh o:

Koja mē ujarēnh mex mar pymaj amnhÿ jamak pro nē amnhÿ no hpro nē hkôt hamaxpêr kêt nē. Jakamã koja mē kãm mē kot amnhÿ nhÿpêx mex prãm kêt nē harēnhja ma nē ãm kuma. Nē omu nē ãm omu. Mē kãm hprãm kêt jakamã koja mē ã amnhÿ nhÿpêx anē. Æ mē kot amnhÿ nhÿpêx anhÿr kêt ronhÿx mē ra Tirtûm kapêr ma nē hkôt amnhÿ xunhwÿ. Hãmri nhÿm amnhÿ tã mē omu nē mē nē mē kot amnhÿ tomnuj rēnh pa. Hãmri nhÿm mē hkôt amnhÿ nhÿpêx mex nē kapêr mar mex o pa. Tã no nhÿm mē Æ amnhÿ nhÿpêx anhÿr kêt nē. Anē.

—Æ Ijaisja mē hkukamã mē harē nē mē hã kagà anē.

16 —No kêt mē kajaja na ka htem ano ho ixte tanhmã amnhÿ nhÿpêx to ho ixpa hã ixpumunh o ixkôt apa. Nē mē ajamak o ixkapêr mar o ri ixkôt apa. 17 Amnepêm mē akukamã pahijaja nē Tirtûm nhÿ hã mē kãm kapêr o ri mē pa xwÿnhjaja na prem kãm ixpumunh prãm tÿx o pa. Nē mē kãm ixkapêr mar prãm tÿx o pa. No ãm mē akÿnhã ixpumunh nē ixkapêr mar kêt rãhã htyk pa. Kormã ixwrÿk nē jar ixkator kêt jakamã na prem arÿ htÿr nē pa ri ixpumunh kêt rãhã ra htyk pa. Æm mē kapxipixjaja na ka mē mÿr pē ixte amnhÿ nhÿpêx ã ixpumunh nē ixkapêr mar o ixkôt apa. Tã mē kurom mē ate ano ho ixpumunh nē ajamak o ixkapêr mar o ixkôt apa jakamã kwa mē ja hã amnhÿ pumu nē tãm amnhÿ nhÿpêx o ri apa pē akÿnh nē ri apa. Anē.

Nhÿm pre Æ Jejus mē ixpê hkôt ixpa ho ixpa xwÿnhjê mã kapêr anē.

*Jejus kot hprÿ hã mēmo hy jarēnh
Makre 4.13-20; Rukre 8.11-15*

18 Hãmri nhÿm Jejus mē ixpê hkôt ixpa ho ixpa xwÿnhjê mã hprÿ hã mē ujarēnhja jarē nē mē inhmã:

—E kot paj ixprÿ hã mē amã mēmo hy ho ukapêr xwÿnh Æ ixujarēnhja jarē ka

mē inhma. Nà mēmo hyta te kêp Tirtûm kapêr pyrãk. Nē ahpÿnhã mēmo hy rôrôk Æ pikata te kêp mē apê panhÿ ahpÿnhã mē ate Tirtûm kapêr mar nē ahpÿnhã hkôt tanhmã amnhÿ nhÿpêx tota pyrãk. 19 Jakamã mē kot mar xwÿnh kwÿjaja te mē kot aptÿx kãm hy rôrôk nhÿm kuwēnh kot hwÿr mrar nē hkrêr par xwÿnhja pyrãk. Jao Tirtûm kapêr ma no nhÿm Satanasti te kuwēnh kot hy krêr parta pyrã nē mē kot mar nē amnhÿ kaxyw hkôt hamaxpêr nē hkôt amnhÿ xunhwÿr pymaj hãmri ra tanhmã kapêrja nē mē hkrã hto. Jakamã nhÿm mē kuma nom ho hamakêtkati tokyx anē nē axte kãm hamaxpêr kêt nē pa.

20 —Nē mē kot mar xwÿnh kwÿjaja te mē kot kēnre kamã hy hkwÿ rôrôk nē higrôt nē grà par tokyx anhÿr xwÿnhja pyrãk. Jao Tirtûm kapêr ma nē hkÿnh nē. Nē kãm mar prãm nē. 21 Tã nhÿm mēhõ Tirtûm nē tanhmã mē kãm kapêr to nhÿm mē kuma nē Tirtûm kaga. Te mēmo hy higrôt nom ra grà par tokyx anhÿrta pyrãk.

22 —Nē mē kot mar xwÿnh kwÿjaja te mrônhi kamã hy hkwÿ rôrôk nē higrôt nhÿm mrônhi kot kêp àmnar xwÿnhja pyrãk. Jao mē kãm Tirtûm kapêr mar prãm tã mãânēn kãm mē hikukrêx rÿnh nē mē hikãxpore rÿnh prãm. Hãmri nē ãm ja pix kukamã hamaxpêr o pa. Nē ja gryk Æ axte Tirtûm kapêr mã hamaxpêr nē hkôt amnhÿ nhÿpêx kêt nē.

23 —Nē mē kot mar xwÿnh kwÿjaja te hirã kamã pika mex kãm hy hkwÿ rôrôk nē higrôt nē ô rÿnhja pyrãk. Jao ixkapêr ma nē amnhÿ krã him hagiēnh tÿx nē. Nē ixkôt ri amnhÿ nhÿpêx mex rãhã ho pa. Jakamã te mēmo hy ô rÿnh nē ô mex pyrãk o amnhÿ nhÿpêx. E Æ ixujarēnhja kot anhÿr. Anē.

Harôj kaàkre jarēnh

Matêwre 13.36-43; Makre 4.26-29

24 Nhÿm Jejus axte mē kot mar o hkrÿ xwÿnhjê mã awjarē nom hprÿ hã mē kãm ujarēnh kêt nē. Axte mē kãm mēmoj tã kuxi nē awjarē nē mē kãm:

—Nà nhÿrmã Tirtûm mē kot kormã htÿr ri tanhmã amnhÿ nhÿpêx to ho pa hã mē omunh xà hkôt ahpÿnhã tanhmã mē harēnh toja te mē ujarēnh ja pyrãk. Koja mēhõ harôj y mex o ukapêr kaxyw ma hpur

mã mō. Hāmri nē hkre hpa nē ma akupým mō. ²⁵ Tã nhũm kamàt nhũm ra gōr nē nō. Hāmri nhũm kãm hkurê xwýnhja ma kēp ihpur wýr tē nē harôj mexta nhĩpy axtem nē kēp harôj kaàkre hkre. Harôj kaàkreja te kot harôj mex pyræk nom mē kot hkur kêt. Tã nhũm kēp harôj y mex nhĩpy hkre hpa hāmri nē ma akupým tē.

²⁶ —Tã nhũm hamē higrôt nē anhĩpê ô.

²⁷ Nhũm kãm mē àpēnh xwýnhjaja tee ri harôj mex kaêx ã harôj kaàkreta pumu nē hpur nhō dōn wýr tē nē kãm harē nē kãm: “Kwa ate harôj mex pix kre htã pēr hkaêx ã harôj kaàkre mãñnēn kato. Kwa tanhmã na pre amnhĩ to nē hkaêx ã kato?” Anē. ²⁸ Hāmri nhũm tee ri mē kuma nē mē kãm: “Nà mēhō kãm ixkurê xwýnh na pre ã inhĩpêx anē.” Anē hāmri nhũm kãm mē àpēnh xwýnhhta kãm: “Kwa xà kot paj mē tokyx ma hwýr mra nē nē harēnh pa nē kurê nà?” Anē. ²⁹ Nhũm mē kãm: “Nà kot kaj mē anē nē harôj mexta mē ho apimràatã ixpê harēnh pa. ³⁰ Kwār mãmrĩ harôj mex mē hpimràatã ô hpa mãn. Ka mē rĩ ma hwýr mra nē harôj kaàkre kumrēx jarēnh pa nē axpēn tã harē ho ê nē ma o mra nē hpòk. Hāmri nē rĩ kormã hpãnhã harôj mex jakà nē ho akuprō nē ô ho mra nē ixkre kamã haxwý.” Anē. ã mē ujarēnh kot anhýr.

Anhýr o mē kãm kapēr.

Jejus te kot mēmo hy hkryre pyræk ã harēnh

Makre 4.30-32; Rukre 13.18-19

³¹⁻³² Hāmri nhũm Jejus arĩ mē kãm amnhĩ tã kuxi nē ujarēnh o nhý. Nē tanhmã mē kãm amnhĩ tã ujarēnh to nē mē kãm:

—Nà Tirtũm kot mē awýr ixte mē ato amnhĩptàr kaxyw inhmēnh ã ijarēnhja. Te ixte mēmo hy pixire nhũm mē kot hkre nhũm higrôt pyræk. Koja gaa nē hprék. Hāmri nē hpa anhgrà nhũm kuwēnhre hwýr mra nē hòptĩ kamã amnhĩm haê nhĩpêx nē kamã hikwý. Tã kot paj nhýrmã mēmo hy jarēnhhta pyræk nē ixpyxi htã pika piitã hkôt mē ho amnhĩptà nē mē omunh mex rãhã ho ixpa. Anē.

Jejus te kot pãwti kaxkrit xà pyræk ã harēnh

Rukre 13.20-21

³³ Nhũm Jejus arĩ mē kãm amnhĩ tã kuxi nē ujarēnh o nhý nē mē kãm:

—E kot pa hpãnhã mē amã tanhmã pãwti kaxkrit xà jarēnh to ka mē inhma. Na hte mēnijaja pãwti nhĩpêx kaxyw hāmri nē kaxkrit xà hkwy ho grire nē kupy nē trik xôm mē ho ahkà. Hāmri nē ho pãwti nhĩpêx. Kaxkrit xàja grire htã pãwti piitã ho kaxkrit mex nē. Tã ja pyræk nē ixpyxi htã koja mē nhýrmã pika piitã hkôt ixkôt amnhĩ nhĩpêx mex o pã.

Anhýr o mē kãm amnhĩ jarē.

Jejus kot mē ujarēnh pix kãm mē ahkre hã harēnh

Makre 4.33-34

³⁴ Na pre ã Jejusja mē ujarēnh o mē ahkre ho pa anē. ãm mē ujarēnh pix o mē ahkre ho pa. Te tãm ujarēnh pyræk no ãm mēmoj tã haxwý rý amnhĩ tã haxwý nē mē kãm tanhmã amnhĩ jarēnh to. ³⁵ ã kot mē ahkre ho pa anhýr kukamã na pre ra amnepēm Tirtũm nhý hã kapēr o mē pa xwýnhjê hōja harē nē hã kagà. Te Jejus tãm tanhmã amnhĩ jarēnh to pyræk o hkukamã harē nē hã kagà nē hã hkagà ho:

Kot paj mē kãm ixujarēnh pix kãm mē ahkre ho ri ixpa. Mēmoj te ho tãm pyræk nē harē nom mēmoj tã haxwý nē tanhmã mē kãm ixujarēnh to. Nē aa mē kot mēmoj mar kêt xwýnh kwý kot paj mē kãm harē kê mē kuma. Anē.

Jejus kot hprĩ hã harôj kaàkre jarēnh

Matêwre 13.24-30, 13.47-50

³⁶ Tã nhũm Jejus mē kãm ujarēnh pa nē mē kure nē ma tēn ixkrem axà. Hāmri pa mē ixpê hkôt ixpa ho ixpa xwýnhjaja ma hkôt mra nē ixkrem agjê. Hāmri nē harôj kaàkre hã ujarēnhhta ã hkukja nē kãm:

—Kwa aprĩ hã mē inhmã harôj kaàkre jarēnhhta jarē nà. Na pa mē kormã ixprĩ hã mar mex kêt nē. Anē.

³⁷ Hāmri nhũm mē inhmã:

—Tõe pa ixprĩ hã mē amã harē. ãm paa. Ixpê Tirtũm kot mē awýr inhmēnh xwýnh te ixte mēmo hy mex o ukapēr xwýnhhta pyræk.

³⁸ Nē purta te kēp pika piitã pyræk.

Nê harôj mexta te ra mẽ ate ixkôt amnhĩ xunhwÿr nê ixkôt amnhĩ nhĩpêx o apa xwÿnhjê pyrâk.

Nê harôj kaàkreta te mẽ kot Satanasti hkôt amnhĩ nhĩpêx o mẽ pa xwÿnhjê pyrâk.

³⁹ Nê kot harôj kaàkre hkre xwÿnhhta te Satanasti pyrâk.

Nê harôj jakâr xà hã arĩgrota te Tĩrtũm kot ahpÿnhã tanhmã mẽ harênh to xà hã arĩgrota pyrâk.

Nê mẽ kot harôj jakâr xwÿnhhjaja te Tĩrtũm kapêr o wrÿk xwÿnhjê pyrâk.

⁴⁰ Mẽ ujarênhja kamã na prem harôj kaàkre kumrêx jarê nê hã hpôk jarê. Ja pyrâ nê koja nhÿrmã Tĩrtũm kot ahpÿnhã tanhmã mẽ harênh to xà hã arĩgrota ã hãmri ã mẽ kot amnhĩ tomnuj o mẽ pa xwÿnhjê nhĩpêx anê.

⁴¹ –Kot paj nhÿrmã kãm mẽ piitã mẽ ho amnhĩptâr kaxyw hãmri nê kapêr o mẽ wrÿk xwÿnhjê mã anê nhũm mẽ ma mran wrÿ nê mẽ kot amnhĩ tomnuj xwÿnhjê pix o akuprô. Nê mẽ kot nhãm mẽ hkwyjê kot mẽ urâk nê tanhmã amnhĩ tomnuj to ho pa kaxyw mẽ kãm anhÿr xwÿnhhjaja nhũm mẽ mãânên mẽ ho akuprô. ⁴² Hãmri nê mẽ ho pikuprônh pa nê te mẽ kot harôj kaàkreta nhĩpêx pyrâ nê kuwy kamã mẽ rênh pa. Hãmri nhũm mẽ kamã amnhĩ xà htÿx kamã hamak rãhã nê pa ho pa. Nê amnhĩ xà htÿx ã maj tee ri mÿr rãhã ho pa. Nê tee ri amnhĩ xà hã maj amnhĩ nham o axpên kamnhar tÿx kaprÿ.

⁴³ –No ixkôt mẽ kot amnhĩ nhĩpêx xwÿnhhjaja koja mẽ mẽ kurom mex kumrêx nê pa. Kot paj mẽ ho mex rax nê nhũm mẽ mex rãhã nê pa ho pa. Tĩrtũm kot kormã pika nyw nhĩpêx mã xwÿnhhta kamã nhũm mẽ mex kumrêx nê pa ho pa. E kêr ka mẽ ixujarênhja ma nê kãm ajamaxpêr tÿx rãhã ho apa. Anê.

*Mẽ hikukrêx mex o hpimxur jarênh
Piripos 3.7*

⁴⁴ Nhũm Jejus arĩ mẽ ixpiitã mẽ inhmã tanhmã ujarênh to. Nom hprĩ hã ujarênh kêt nê. Kê axte mẽmoj tã kuxi nê mẽ inhmã tanhmã ujarênh to nê mẽ inhmã:

–Mẽ ate ixkôt amnhĩ xunhwÿr xwÿnhhjaja te mẽ apê mẽ hikukrêx mex ã pika japrô

xwÿnhhta pyrâk. Koja mēhō mẽ hikukrêx mex jamÿ nê o tē nê nhÿri amnhĩm ho amũxu. Kaxyw kakwÿ nê kamã hagjê nê hity hpa nê ma akupÿm tē. Hãmri nhũm jãã nhũm mēhō tēn kãm kato. Hã pikata kakwÿ nê kãm kato nê omu nê hkĩnh nê. Nê hamaxpêr o: “E pa ma tē nê inhōrkwy kamã ixkukrêx piitã ho wēnê hpa nê hpãnhã kàxpore jamÿ nê ho amnhĩm mẽ hikukrêx mex ã pika japrô nê amnhĩm mẽmoj mexta o ixarĩk pa.” Anhÿr o hamaxpêr nê akupÿm hity hpa nê ma akupÿm tē. Hãmri nê mẽmoj mexta gryk ã õ mẽmoj piitã ho wēnê hpa. Hikukrêx nê ōrkwy nhũm piitã ho wēnê hpa. Hãmri nê hpãnhã kàxpore jamÿ nê ma o tē nê amnhĩm pikata japrô. Hãmri nê ma akupÿm hwÿr tē nê kamã mẽ hikukrêx mexta kwrynh pa nê ho õ kumrêx.

–Tã te mẽ ate mēhō kot ã amnhĩ nhĩpêx anhÿr xwÿnhhta pyrâk. Na ka mẽ urâk nê inhgryk ã amnhĩ tomnuj kaga hpa nê hpãnhã ixkôt amnhĩ nhĩpêx. Te mēhō kot mẽmo mẽ hikukrêx mex gryk ã hikukrêx tũm piitã kaga hpar nê mẽ hikukrêx mex o hpimxur xà hã pikata japrô pyrâk. Anê.

Mēhō kot kēn jaxēnh japrô jarēnh

⁴⁵ Nhũm Jejus arĩ mẽ inhmã awjarê nê mẽ inhmã:

–Nê ja. Na htem kãm hkĩnh nê hamakêtkati nê ri hpa hprãm xàj Tĩrtũm kôt amnhĩ xunhwÿr nê hkôt ri amnhĩ nhĩpêx rãhã ho pa. Te mēhō my kãm kēn jaxēnh mex prãm nê ma ri hapêr o pa xwÿnhhta pyrâk. ⁴⁶ Nê ra nhÿri omu nê ma tē nê prês ã mẽ hkukja. Nhũm mẽ kãm hã ho ohtô nê harê nhũm ma akupÿm tē nê kãm ho õ hprãm xàj hikukrêx piitã ho wēnê hpa. Hãmri nê kàxpore jamÿ nê o tē nê amnhĩm ho haprô. Kēn jaxēnh mexta pix gryk ã hikukrêx piitã ho wēnê hpa nê hpãnhã ho amnhĩm haprô.

–Tã ja pyrâ nê na ka htem amex nê ajamakêtkati nê axamnhix ri apa hprãm xàj ixkôt amnhĩ xunhwÿr nê ixkôt pix mã amnhĩ nhĩpêx o apa. Anê.

Kryhti jarēnh

Matêwre 13.24-30, 13.36-43

⁴⁷⁻⁴⁸ Nhũm Jejus arĩ mẽ inhmã awjarê nê mẽ inhmã:

—E Tirtüm kot nhÿrmã tanhmã mẽ harênh to xà hã arıgro kot paj ixprı hã tanhmã mẽ amã harênh to. Te ho mẽmyjaja kot himô kamã kryhti rênh pyrãk. Koja mẽ gôx kãm kumê nê akupÿm ho api nhÿm kamã tep ohtô nê. Nhÿm omu nê kÿx pê amgrà kamã hkapı nê ahpÿnhã ri tanhmã kamã kute kawrà. Nê kamã mex kawrà nê kawà kamã kugjê nê mẽ kot hkur kêtja nhÿm nhãm kurê. ⁴⁹Ja pyrà nê Tirtüm kot ahpÿnhã ri tanhmã mẽ kot amnhı nhıpêx to hã mẽ omunh xà hkôt tanhmã mẽ hipêx to kaxyw arıgrota ã ã mẽ hipêx anê. Koja kapêr o mẽ wrÿk xwÿnhjaja mẽ kot hkôt amnhı xunhwÿr xwÿnhjê nê mẽ kot amnhı tomnuj o mẽ pa xwÿnhjê kawrà hpa. ⁵⁰Nê te mẽ kot tep mex nê tep punu kawrà nê nhãm rênhta pyrãk o mẽ hipêx nê ma kuwy hwÿr mẽ o mra nê kamã mẽ kurê. Nhÿm mẽ tee ri amnhı xà htÿx ã maj amÿra nê tee ri amnhı nhıpêx kaprÿ. Anê.

Nhÿm pre ã Jejusja axte mẽ ixpê hkôt mẽ ixpa ho mẽ ixpa xwÿnhjê mã ujarênh anê.

⁵¹Hãmri nê mẽ inhmã:

—E xàn ka mẽ atã aprı hã ixujarênhta ma nà?

Anê pa mẽ kãm:

—Tÿ. Nà na pa mẽ atã ixprı hã mar mex nê. Anê.

⁵²Hãmri nhÿm mẽ inhmã:

—Tôe. Nà ãm hãmri. Na ka xep mẽ ra ixte mẽ ahkre nywta mar mex nê. Nê mẽ akwÿjaja mãânên Tirtüm kapêr tÿm mar mex nê. Te mẽ apê mēhō apkur xà rax pyrã nê ma ho mẽ piitã mẽ hipêx o ri mẽ hkôt paja pyrãk. Ja pyrã nê kêr ka mẽ ma mẽ piitã mẽ hkôt Tirtüm mẽ wa ixkapêr o mẽ ahkre ho ri mẽ hkôt apa. Anê.

Najare nhō xwÿnhjaja kot Jejus kaga hã mẽ harênh

Makre 6.1-6; Rukre 4.16-30; Juãw 1.11

⁵³ã Jejus mẽ inhmã ujarênh par anê.

⁵⁴Hãmri nê ma akupÿm Najare hwÿr mō nê Tirtüm kapêr o mẽ ahkre xà hã ixkre hwÿr tē nê axà nê mẽ ahkre ho nhÿ. Nhÿm mẽ amnhı jaêr pê tanhmã kot mẽ ahkre hto hã kuma nê tee ri hkukamã hamaxpêr nê axpên mã:

—Tk. Kwa kêp mẽ panhiō htã tanhmã kot we amnhı to nê ã ahpumunh tÿx kôt mẽ pamã kapêr anê nê ri mẽ kãm aa mẽ

kot mẽmoj pumunh kêt kwÿ ho anhÿr o pa? ⁵⁵⁻⁵⁶Na pre mẽ panoo mã hprêk nhÿm mẽ pahte pahprı hã hkwyjê pumunh. Kêp pi kuprãr xwÿnh Juje mẽ hprō Marir wa hkraa. Nê kêp Xiakre nê Juje nê Simãw nê Jut mẽ htōō. Nê htōxjaja jar mẽ pakamã pa nhÿm mẽ pahte mẽ piitã mẽ omunh mex kênã kot kêt we mẽ kurom ã ahpumunh tÿx anê. Anê.

⁵⁷Hãmri nê kamã gryk nê hkaga. Hãmri nhÿm tee ri amnhı tã mẽ omu nê mẽ kãm:

—Nà Tirtüm nhÿ hã kapêr jarênh o mẽ pa xwÿnhjaja na htem krı hkwy kamã kãm mẽ mar prãm nê. Nom ô krı kamã mẽ kot karãre rÿm hprêk kãm omunh xwÿnhjaja na htem kuma nê ãm kuma. Anê.

⁵⁸Tã mẽ kot amnhı kaxyw hkôt hamaxpêr kêt jakamã nhÿm tee ri mẽ kãm aa mẽ kot mẽmoj pumunh kêt kwÿ ho anhÿr rax prãm. No ãm mẽ kãm mẽmoj to grêre nê ho anê.

14

Mẽ kot Juãw Paxis pır ã mẽ harênh Makre 6.14-29; Rukre 9.7-9

¹Tã nhÿm pika pê Garirej kamã mẽō pahıhti Erox Jejus jarênh ma ²nê tee ri hkukamã hamaxpêr nê hã ô pōristi mã kapêr nê mẽ kãm:

—Kwa pêr Juãw Paxis na nà? Ra ixte hã ixàmnhên nhÿm mẽ kot hpır tã mãn tanhmã amnhı to nê akupÿm htır. Nà pêr tãm kênã. Jakamã na hte aa mẽ kot mẽmoj pumunh kêt kwÿ ho anhÿr o pa. Anê.

³⁻⁵Na pre ra Erox htō pê hprōptàn ho hprō. Tō arı htır tã nhÿm axtem nê kêp utà nê ho hprō. Hãmri nhÿm Juãw Paxisja harênh ma nê hã kãm akir nê kãm:

—Kwa Eroxis kêp atō hprō kênã na ka kêt axtem nê kêp utà nê ho aprō. Kwa ja omnuj tÿx o omnuj tÿx. Anê.

Hãmri nhÿm amnhı tã kuma nê kamã gryk nê kot hpır kaxyw. Tã nom nhÿm Ijaew kot axpên mã kêp Tirtüm nhÿ hã kapêr jarênh xwÿnh ã harênh jakamã nhÿm mẽ umaj hpır kêt nê. ãm ho prês nê haxà nhÿm hkrı ho hkrı.

⁶Tã nhÿm jãã nhÿm Erox kator ã arıgro kato nhÿm mẽ hã akuprō nê hã hkınh. Hãmri nhÿm hprō nyw kra niti mẽ hwÿr axà nê ahte mẽ hipôk ri mẽ kãm gre. Mẽ kot

omunh nê kamã hkurê kaxyw nhũm mē noo mã hpijaam kêt nê mē kãm grer o xa. Hãmri nhũm pahî Eroxo omu nhũm ja kãm mex nê nhũm hkĩnh nê kamã nopyma nê.
⁷ Hãmri nê kãm:

—Nà ãm hãmri na ka ã mē inhmã amnhĩ nhĩpêx anê. Jakamã kwa mãmri mẽmoj tã ixwỳ. Amã mẽmoj prãm xà hkôt hã ixwỳ kot paj amã kugõ. ãm hãmri na pa amã anê. E mẽmoj na amã hprãm? Anê.

⁸ Hãmri nhũm kuma nê kãm:

—Ma Juãw Paxis krã na pa inhmã hprãm. Inhmã hkrã krãhta nê pasiiti kamã axà nê ixwỳr o tẽ nê inhmã agõ. Anê.

Ra katorxà kot kaxyw kãm karõ jakamã nhũm ã hã hwỳr anê. ⁹ Hãmri nhũm Eroxoja tee ri kuma nhũm ja kêp omnuj nê. Nom ra mē pikuprõnh rax xwỳnhjê nhĩpõk ri mē noo mã kot kãm: “E mãmri amã mẽmoj prãm xà hkôt hã ixwỳ pa amã kugõ.” Anhỳr jakamã kãm kot kêp nê hprãm kêt nê. Hãmri nê Juãw Paxis wỳr õ põristi hkwỳrê ¹⁰ nhũm mē ma mē hagiênh xàta wỳr mra nê unê nê mut krãhta. ¹¹ Hãmri nê hkrã mỳ nê pasiiti kamã kuxà nê ma akupỹm nita wỳr o tẽ nê kãm kugõ nhũm kumỳ nê ma katorxà hwỳr o tẽ nê kãm kugõ.

¹² Hãmri nhũm Juãw Paxis kôt mē pa xwỳnhjaja tee ri mē kot hpĩr ã harênh ma nê ma hwỳr mra nê kumỳ nê ma o mõn haxà. Hãmri nê ma Jejus wỳr mra nê kãm harê.

Jejus kot mē ho ohtô nê mē kãm mē õ hã harênh

Makre 6.30-44; Rukre 9.10-17; Juãw 6.1-14

¹³ Hãmri nhũm Jejus Juãw Paxis jarênh ma nê hkaprĩ nê. Nê ma himô nhĩkjê hwỳr kapõt ã mõr kaxyw pàr krem axà nê ma mõ. Pa mē hkôt ixpa ho ixpa xwỳnhjaja ma hkôt mra. Hãmri nhũm krĩ hkwỳ kamã mē pa xwỳnhjaja harênh ma nê ohtô nê ma mē inhĩhkrep pikap mra. Nê ra amnhĩ to wa nê mē inhmõr xàja wỳr põj nê mē ixkutêp hkrĩ. ¹⁴ Jakamã pa mē mõ nê mē hwỳr põj nê mē omu. Hãmri nhũm Jejus mē omu nê kãm mē hkaprĩ nê mē kãm mē à xwỳnhjê ho mex pa.

¹⁵ Tã nhũm ra myt àr kaxyw pa mē hkôt ixpa ho ixpa xwỳnhjaja tee ri mē omu nê Jejus wỳr mra nê kãm:

—Kwa na ra amỹkry htỳx nê. Amnhĩ nê mē hano kê mē ma nhỹri krĩ hkwỳ hwỳr mra nê tokyx amnhĩm mẽmoj japrõ nê kuku. Mo jar mē apkur xà hã mẽõ? Jar akunĩ pix kênã. Anê.

¹⁶ Hãmri nhũm mē inhma nê mē inhmã:

—Nà kot paj mẽ hanor kêt nê. Mē kajaja kot kaj mẽ kãm õ nhũm mẽ apku. Anê.

¹⁷⁻²¹ No nhũm mē ohtô rax kumrêx. Mẽmyjaja kêp 5.000. Nê kaxyw mē hprõ nê mē hkrajaja. Jakamã nhũm Jejus ã mē inhmã kapêr anê pa mẽ tee ri mẽ hkukamã ijamaxpêr nê kãm:

—Kwa nà mẽ panhõja raxti hã. Mẽ panhõ pãwti kêp sĩk pix. Nê kaxyw tep grãja pijakrutre kênã kot kêt mẽ piitã mẽ hipêx. Nà xà kot paj mẽ ma mra nê nhỹri mẽ kãm mẽ mẽmoj japrõ nhũm mẽ kuku? Anê.

Hãmri nhũm mē inhmã:

—Nà pu mẽ kãm mẽmoj japrõr kêt nê. Kot puj mẽ kãm mẽ panhõta o anhgrã. E mẽ kãm anê kê mẽ ahpỹnhã ri hije nê hkrĩ hpa. Anê.

Hãmri pa mẽ kuma nê mẽ kãm anê nhũm mẽ piitã hkrĩ hpa. Hãmri nhũm Jejus pãwti mẽ tepja jamỳ nê kaxkwa hwỳr rĩt nê ho Tĩrtũm wỳ nê kãm:

—Pa Papaj? Nà apê mẽ inhmã mẽ inhõ ho apa xwỳnh jakamã amex o amex. Anê.

Hãmri nê mẽ kãm ho hkry hpa nê hkôt mẽ ixpa ho mẽ ixpa xwỳnhjê mã kugõ pa mẽ õ ri ho mẽ hipêx pa. Nhũm mẽ piitã apkur o hkrĩ. Mẽõja grire htã nhũm Jejus tanhmã mẽ kãm ho rax to nhũm mẽ ohtô rax kumrêx tã piitã kuku nê ho õhy htu hpa nhũm arĩ mẽõ jakrêx prã. Hãmri pa mẽ akupỹm hakrêx o akuprõ nê ho kawà ho 12 nê ho nỳt pa.

Jejus kot gô krãhkà hã ãm nê htẽm ã harênh

Makre 6.45-52; Juãw 6.15-21

²²⁻²³ Tã nhũm Jejus mẽ ixpê hkôt ixpa ho ixpa xwỳnhjê mã anê pa mẽ akupỹm pàr mã agjê nê ma xarmã hkukamã mõ. Hãmri nhũm mẽ kot mar o kuhê xwỳnhjê jano nhũm mẽ ma akupỹm hapêx. Hãmri nhũm Jejus kot Tĩrtũm mã amnhĩ jarênh kaxyw ahte tẽ nê hixêt ã api nê himõk ã kãm amnhĩ jarênh o nhỹ.

Gaa nhũm ra kamàt nhũm arĩ ahte hixêt nhĩmõk ã nhỹ.

²⁴ Rôm pa mẽ pàr kãm mẽ inhmôr xwýnhjaja kormã himô nhĩpôk ri mỗ. Pu nhũm kôk xàpêr tỳx mẽ ixkaxpa. Nê gô axpên tak tỳx nê pa mẽ tee ri rrêm̃ti ho gô rêñh nhĩpêx nê tee ri axpên pumu.

²⁵ Tã nhũm krãhyre kà nhũm Jejus man mẽ ixkôt gô krãhkà hã xan tẽ ²⁶ pa mẽ amnhĩ wỳr omu. No nhũm kormã hirã mex kêt jakamã pa mẽ ixprĩ hã omunh mex kêt nê. Hãmri nê tee ri omu nê mẽkarõ hã hkamnhĩx nê umaj ixàmra rax nê. ²⁷ Hãmri nhũm mẽ inhmã kapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

²⁸ Hãmri nhũm Simãw Pêtre kuma nê kãm: —Kwa xà ka na ka tẽ? Tôe apê mẽ inhõ Pahĩti jakamã kwa amnhĩ wỳr ixwỳ pa apyrã nê gô krãhkà hã xa nê awỳr tẽ nà? Anê.

²⁹ Hãmri nhũm kãm:

—Tôe mamrĩ amnê ixwỳr tẽ. Anê.

Hãmri nhũm kuma nê pàr rũm kato nê hwỳr tẽ. Uràk nê gô krãhkà hã hwỳr tẽ.

³⁰ Hãmri nê kormã htêp o htêm mẽ kôk xàpêrta kamã ama nê tee ri amnhĩ kukamã hamaxpêr pê ra àr o mỗ. Hãmri nê àmra kamã Jejus mã amnhĩ to akir nê kãm:

—Kwa tokyx ixto api Pahĩti. Anê.

³¹ Hãmri nhũm hpa hã kupy nê ho àpir kurê kumrêx nê kãm:

—Kwa pêr ãm kormã ate amnhĩ kaxyw inhmã ajamaxpêr tỳx kêt. Mon ka we ixkamnàr rom mãmri man ixwỳr atêmre hkêt nê? Anê.

³² Hãmri nhũm wa akupỹn mẽ ixwỳr tẽ nê wa axà. Hãmri nhũm kôk katàt kôt pinhkrêñh pa nhũm gô tãm nôr kurê kumrêx. ³³ Hãmri pa mẽ Jejus kot ã amnhĩ nhĩpêx anhỹrja ã omu hãmri nê kãm mex o mex ã harê nê kãm:

—Kwa ãm hãmri na hte amnhĩ pê Tĩrtũm Kra hã amnhĩ jarê. Nà apê Kra kênã. Anê.

Jenêjare kamã Jejus kot akupỹm mẽ ho mex ã harêñh

Makre 6.53-56

³⁴ Tã pa mẽ ra himô hã rê nê Jenêjare hwỳr pôj. ³⁵ Hãmri nê ma kapê hã ri ixpa. Hãmri nhũm pika nhõ xwýnh kwỳjaja Jejus pumu nê mẽ piitã mẽ kãm harêñh o hprôt nê ahpỹnhã hwỳr nhỹhỹnh mẽ à xwýnhjê hã karõ. Nhũm mẽ man mẽ ixwỳr mẽ o mra ³⁶ nê mẽ ho Jejus wỳ nê kãm:

—Pa? Kwa kê mẽ à xwýnhjaja akupỹm mex kaxyw apê axê kupê nà? Anê.

Hãmri nhũm mẽ kãm:

—Tôe. Kwâr mẽ mãmri mran hkupê. Anê.

Hãmri nhũm mẽ kuma nê axpên pãnhã hwỳr mra nê kêp ê pix kupêñh tã ra akupỹm mex nê ma akupỹm mra.

15

Parijew nhõ xwýnh mẽ Tĩrtũm kapêr tũm o mẽ ahkre xwýnhjê jarêñh

Makre 7.1-13

¹ Tã nhũm Parijew nhõ xwýnh mẽ Tĩrtũm kapêr tũm o mẽ ahkre ho mẽ pa xwýnhjaja Jerujarê rũm ma Jejus wỳr mra. Na htem mẽ ixkukamã mẽ inhĩgêjtê pyrà nê apkur kaxyw nê amnhĩ nhĩhkra kuhõnh ryy nê. Amnhĩ nhĩhkra htyk pix kuhõnh nê hkrĩ hkêt nê ãm amnhĩ nhĩhkra kuhõnh japjêe nê. Nê õ prat kuhõnh japjêe nê kormã apkur kaxyw hkrĩ. Tĩrtũm kot ja hã mẽ omunh nê mẽ mex ã mẽ harêñh ã amnhĩ kamnhĩx jakamã na pre ã amnhĩ nhĩpêx anhỹr o pa. Jakamã nhũm mẽ ma Jejus wỳr mra. ² Hãmri nê omu nê kãm:

—Pa Jejus? E kwa mẽ inhmã mẽmoj jarê. Amnepêm mẽ panhĩgêjtaja na prem apkur kaxyw nê amnhĩ nhĩhkra kuhõnh japjê nê rĩ kormã apku. Tã pa htem arĩ ijaxwỳja ã amnhĩ nhĩpêx anê. No akôt mẽ pa ho mẽ pa xwýnhjaja na htem mẽ ixpyrà nê ã amnhĩ nhĩpêx anhỹr kêt nê. Kwa mo na htem amnhĩ nhĩhkra tyk kuhõnh tokyx anê nê hkrĩ nê apku? Anê.

³ Hãmri nhũm mẽ kuma nê mẽ kãm:

—Tk. Na ka htem ãm mẽ panhĩgêjtê hkôt pix mã amnhĩ nhĩpêx o apa no Tĩrtũm kapêr kôt amnhĩ nhĩpêx kêt nê. ⁴ Tĩrtũm na pre mẽmoj tã mẽ pamã karõ ho:

Kêr ka mẽ anhĩpêêxà nê mẽ akatorxà wa hã apijaàm nê mẽ ho ajuta rãhã ho ri apa. Kot kaj mẽ ã amnhĩ nhĩpêx anhỹr kêt nê tanhmã mẽ kãm akapêr punuj to ho ri apa. Hã koja mẽ akwỳjaja ja mỳrapê mẽ apa. Anê.

—Na pre ã Tĩrtũmja mẽ pamã karõ anê.

⁵ No mẽ kajaja na ka htem ã akwỳjê mã karõ anhỹr kêt nê. ãm kapêrja kwỳm na ka htem mẽ kãm karõ nê mẽ kãm:

Kot kaj mẽ mẽmo arĩgro hã akàxpore japêr nom kêr ka mẽ ho tanhmã akatorxà

rÿ anhîpêxà ho ajuta hto kaxyw wa kãm hkwy nhõr kêt nê. Æm ho ate wa ho ajuta hkêt ã wa kãm amnhî jarê hãmri nê Tîrtûm mã amnhî jarênh xà hã ixkre hwÿr o tẽ nê mẽ ixte tanhmã ixkreta ho mex to kaxyw mẽ inhmã agõ. Kot kaj mẽ ã amnhî nhîpêx anê nhũm Tîrtûm ja hã mẽ apumu nhũm ja kãm mex nê. Kêr ka mẽ ã amnhî nhîpêx anhÿr o ri apa.

—Anhÿr o na ka htem mẽ kãm karõ ho ri apa. ⁶ Nom Tîrtûm kapêr tũm kot ã ja jarênh anhÿr kêt. Æm amnhî krã hkôt na ka htem ã mẽ kãm karõ punuj o ri apa anê. Te mẽ akapêrja mex o kot Tîrtûm kapêr jakrenh pyrãk. ⁷ Mẽ ate Tîrtûm kôt amnhî nhîpêx ã amnhî jarênh tã ãm amnhî to axêx nê hkôt amnhî nhîpêx kêt nê. Na pre Tîrtûm amnepêm mẽ akukamã tanhmã mẽ ajarênh to. Nhũm ÿ hã mẽ kãm kapêr jarênh xwÿnh Ijaisja ô ri mẽ kãm mẽ ajarê nê hã kagã. Te Tîrtûm tãm kot mẽ ajarênh pyrãk. ⁸ Na pre mẽ akukamã mẽ ajarênh o: Mẽ kãm ixkĩnh ã mẽ kot amnhî jarênh tã mẽ kãm ixkĩnh kêt. Na htem kãm ixprãm ã amnhî jarênh kaprÿ.

⁹ Mẽ kot ixkuhpa hã amnhî krã hkôt mẽmoj tã hkwyjê mã karõ ho pa jakamã na htem kot ixkôt amnhî nhîpêx o pa hã amnhî jarênh kaprÿ. Anê.

—Na pre ã Ijaisja Tîrtûm nhÿ hã mẽ akukamã mẽ ajarê nê mẽ atã kagã anê. Anê.

Nhũm pre ã Jejus Parijew nhõ xwÿnhjê mẽ Tîrtûm kapêr tũm o mẽ ahkre xwÿnhjê mã kapêr anê.

*Mẽmoj kot mẽ pahtomnu hã harênh
Makre 7.14-23*

¹⁰ Tã nhũm Jejus amnhî wÿr mẽ kot mar o kuhê xwÿnhjê hwÿr nê axte mẽ kãm kapêr nê mẽ kãm:

—E mẽ inhma nê inhmar tÿx nê. ¹¹ Na hte Tîrtûm kapêr tũm o mẽ ahkre xwÿnhjaja amnhî krã hkôt mẽ ate amnhî nhîhkra kuhõnh japjê hã mẽ amã karõ ho pa. Nê amnhî krã hkôt mẽ axàpkur xà hã tanhmã mẽ amã karõ hto ho pa. Tîrtûm kot ja hã mẽ apumunh kôt mẽ amex ã mẽ ajarênh kaxyw ã mẽmoj tã mẽ amã karõ anê. Nom na hte Tîrtûm tanhmã mẽ kot

amnhî nhîhkra kuhõnh to hã mẽ omunh xà hkôt tanhmã mẽ harênh to hkêt nê. Rÿ mẽ axàpkur xà pumunh kôt mẽ mex ã mẽ ajarênh kêt nê. Ja tanhmã kãm kute hkêt. Na hte ã mẽ kot amnhî nhîpêx anhÿr ã mẽ omunh xà hkôt mẽ mex ã mẽ harênh rÿ mẽ mex kêt ã mẽ harênh kêt nê. Na hte mẽmoj kur ã mẽ omu nê ãm mẽ omu nê hã tanhmã mẽ harênh to hkêt nê. Æm mẽ kapêr punuj rÿ mẽ kapêr mex ã mẽ mar kôt pix mã na hte tanhmã mẽ harênh to. Anê.

¹² Nhũm pre ã Jejus mẽ kãm kapêr anê pa mẽ hkôt mẽ ixpa ho mẽ ixpa xwÿnhjaja kuma hãmri nê hwÿr mra nê kãm:

—Kwa na ka ã mẽ kãm akapêr anê nhũm Parijew nhõ xwÿnhjaja tee ri ama nhũm ja mẽ kêp omnuj nê. Anê.

¹³⁻¹⁴ Hãmri nhũm mẽ inhma nê tanhmã mẽ inhmã Parijew nhõ xwÿnhjê jarênh to nê hprî hã mẽ hkukamã mẽ harênh o:

—Tk. Kwãr mãmrî mẽ kêp omnuj. Mẽ kot Tîrtûm kapêr tũm o mẽ ahkre ho pa htã na htem hkôt amnhî nhîpêx kêt. Jakamã te mẽ nohkre xwÿnh kot amnhî nhîpêx pyrãk. Koja mēhõ nohkre htã amnhî kôt nhÿhÿm nohkre hõ ho mõ hãmri nê wa hamẽ pry pumunh kêt nê htÿx mõ hãmri nê nhÿri ahkrehti kamã tēm. Tã Parijew nhõ xwÿnhjaja te kot wam htēm xwÿnhhta pyrãk nhũm mẽ kot mẽ mar xwÿnhjaja te kot wam htēm xwÿnh kôt hõ htēmta pyrãk. Jakamã Parijew nhõ xwÿnhjaja mẽ kot mẽ mar o pa xwÿnhjê mẽ koja mẽ hpimràatã nhÿrmã te ahkrehti kamã rôrôk par pyrãk o amnhî nhîpêx nê mex kêt nê pa ho pa. Koja kaxkwa kamã inhõ Papaj nhÿrmã amnhî nê mẽ hanor pa.

—Inhõ Papaj te kêp mẽmo hy hkre ho pa xwÿnhhta pyrãk. Na htem mẽmo hy hkre nhũm higrõt hapôj nê higrõt mex nê. Hãmri nhũm mẽ hwÿr mra nê omu nê nê mẽmoj nhigrõt punuj jarê nê kurê. Ja pyrã nê koja nhÿrmã inhõ Papaj amnhî nê Parijew nhõ xwÿnhjê janor pa nhũm mẽ mex kêt nê pa ho pa. Jakamã kwa kêr ka mẽ hkôt ri amnhî nhîpêx kêt nê. Anê.

Nhũm pre ã Jejus mẽ ixte hkôt ixpa ho ixpa xwÿnhjê mã hprî hã Parijew nhõ xwÿnhjê hkukamã ã mẽ harênh anê pa mẽ mar o ixkrî. ¹⁵ Hãmri nhũm Simãw Pêtre tee ri Tîrtûm kot mẽ apkur xà hã mẽ omunh xà

hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hãmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hãmri nhũm kuma nê hprĩ hã mẽ inhmã awjarê nê mẽ inhmã:

—Kwa xãn ka mẽ kormã aprĩ hã ja mar kêt nê? ¹⁷ E pa ixprĩ hã mẽ amã harê ka mẽ inhma. Nã na htem mẽmoj ku nhũm hte mẽ hkrã hi hwÿr gjêx kêt nê. Na hte mẽ õhy pix wÿr agjê nê gaa nê nhãm hapôj nê hapêx. Na htem mẽ apkur xãja ku nê ý hã tanhmã amnhĩ tomnu hto hkêt nê. Jakamã na hte Tirtũm ja hã mẽ omunh xà hkôt tanhmã mẽ harênh to hkêt nê. ¹⁸ ãm mẽ hkrã kamã mẽ hamaxpêr punuj pix nhỹ hã mẽ kot tanhmã amnhĩ tomnuj to jakamã na hte Tirtũm mẽ hamaxpêr ã mẽ omunh xà hkôt tanhmã mẽ harênh to. ¹⁹ Kojã mēhõ tanhmã hamaxpêr punuj to nê ra hkôt amnhĩ tomnuj pix o pa. Na htem nhãm mẽ hpar o pa nê mẽ kêp ahkĩ nê amnhĩ to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprõ ho amnhĩkati nê mẽ hkuprÿ hwÿr mra nê mẽ ho amnhĩkati. Nê tanhmã ri axpên tomnuj to ho pa. ²⁰ Mẽ hamaxpêr punuj nhỹ hã na htem ã amnhĩ nhĩpêx anhÿr o pa. No na hte Tirtũm mẽ kot amnhĩ nhĩkra kuhõnh japjê hkêt ã mẽ omunh xà hkôt mẽ kot amnhĩ to mex xwÿnh ã mẽ harênh kêt nê. Ja tanhmã kãm kute hkêt. Anê.

Jejus kot Ijaew kêt xwÿnh ni kamã ukaprĩ hã harênh

Makre 7.24-30

²¹ Tã nhũm Jejus mẽ inhmã kapêr pa hãmri nê mẽ inhmã anê pa mẽ ma hkôt mō. Ma Xir mẽ Sitōja wa pu hã ri ixpa. ²² Nhũm mẽhõ nija omu nê hwÿr tē. Mẽ ixkĩnhã kêp Ijaew kêt tã hwÿr tē. Kanaã nhõ xwÿnh na pre. Tã Jejus wÿr tē nê kãm:

—Ka Pahihti Jejus? Apê Tirtũm kot mẽ ixwÿr amēnh xwÿnh jakamã xê ixujarênh ma nê ixkamã axukaprĩ hkêt wehe. Na mẽkarõmnutija tanhmã ixpê ixkra ho nhũm ixpê omnuj tÿx kumrêx. Anê.

²³ Hãmri nhũm Jejus kuma nê ãm kuma nê kãm tanhmã nê hkêt nê. Jakamã pa mẽ ixpê hkôt ixpa ho ixpa xwÿnhjaja kãm:

—Kwa hano kê ma akupÿm tēē ri. Na ãm ri mẽ pahkôt xatã hkrata jarênh pix o ri pa. Anê.

²⁴ Nom nhũm kot amnhĩ tã kamã hamak kaxyw tanhmã mẽ inhmã hã kapêr to nê mẽ inhmã:

—Nã ãm Ijaewjê pix wÿr na pre Tirtũm inhmē. Te mẽ kêp ôwêhti pikunor pyrak o na htem htÿx ri amnhĩ nhĩpêx o pa. Jakamã ãm mẽ hwÿr pix mã na pre inhmē. Na kormã inhmã tanhmã nhãm mẽ hkwÿjê jarênh to hkêt nê. Anê.

²⁵ Hãmri nhũm nitita tee ri amnhĩ tã kuma nê hwÿr tē nê kutã hkõnkrã ho htem nê nhỹ nê kãm:

—Xê ma we ixkamã axukaprĩ hkêt wehe. Anê.

²⁶ Hãmri nhũm kãm:

—Nã kormã. Na pre Tirtũm mẽ kêp Ijaewjê pix wÿr inhmē. Jakamã na pa kormã nhãm tanhmã mẽ akwÿjê ho mex to hkêt nê. Anê.

²⁷ Hãmri nhũm kãm:

—Ma ãm hãmri na ka akapêr. Nom ixpê Ijaew kêt tã mẽ kuxwar ãm ixto mex grire kêt wehe. Anê.

²⁸ Hãmri nhũm kuma nê kãm:

—Nã ãm hãmri na ka ã akra kaxyw inhmã ajamaxpêr tÿx anê. Jakamã kot paj nê mẽkarõmnutita jano. Kojã axte tanhmã apê ho hkêt kumrêx.

Anhÿr o kãm kapêrja rôm nhũm hkraja akupÿm mex kurê kumrêx.

Jejus kot mẽ à xwÿnhjê ho ohtô nê mẽ ho mex ã harênh

Makre 7.31-37

²⁹ Tã nhũm Jejus mẽ inhmã anê pa mẽ ixrohã krĩa pē ixkato nê ma himô rax pē Garirej wÿr mō. Nê nhÿri gō mÿri hixêt wÿr mō nê hã api nê ixkrĩ. ³⁰ Hãmri nhũm mẽ ohtô nê ma mẽ ixkôt mra. Nê mẽ à xwÿnhjaja nhũm mẽ hamÿ nê Jejus wÿr mẽ o mra. Na prem ohtô rax kumrêx. Ra ri mẽ pa hkêt xwÿnhjaja nê mẽ nohkre xwÿnhjaja nê mẽ hyk o mẽ pa xwÿnhjaja. Nê mẽ kapêr kêt xwÿnhjaja nê ahpÿnhã ri tanhmã mẽ à kute xwÿnhjaja nhũm mẽ hamÿ nê ma Jejus wÿr mẽ o mra nê kutã mẽ haxwÿ. Hãmri nhũm mẽ omu nê ahpÿnhã akupÿm mẽ ho mex pa. ³¹ Jakamã na pre mẽ kapêr kêt xwÿnhjaja akupÿm kapêr mex nê. Nê ri mẽ pa hkêt xwÿnhjaja akupÿm mrrar mex nê.

Ně mẽ hyk o mẽ pa xwỳnhjaja akupỳm tãm ri mra. Ně mẽ nohkre xwỳnhjaja akupỳm rít mex nẽ. ã ahpỳnhã akupỳm mex par anẽ. Hãmri nhũm mẽ kot hwỳr mẽ hamỳnh nẽ Jejus wỳr mẽ o mrar xwỳnhjaja amnhĩ jaêr pẽ akupỳm mẽ mex ã mẽ omu nẽ mẽ kamã no puma nẽ hkĩnh nẽ. Hãmri nẽ Tĩrtũm mã mex o mex ã harẽ nẽ axpẽn mã harẽn h o:

—Nà ãm hãmri mẽ panhõ Tĩrtũmja ãm mex o mex. Anẽ.

Jejus kot mẽ ho 4.000 nẽ mẽ kãm mẽ õ hã harẽn

Makre 8.1-10

³² Tã nhũm Jejus mẽ ixte hkõt ixpa ho ixpa xwỳnhjaja amnhĩ wỳr mẽ ixwỳ nẽ mẽ ixkõt mẽ mrar xwỳnhjê jahkre nẽ mẽ inhmã:

—E. Ka mẽ rĩ kam jajê pumu. Na pa ra inhmã mẽ hkaprĩ nẽ. Na mẽ pahkõt ri pa hã apkati axkrunẽpxi nhũm ra mẽ kệp mẽõja hapêx pa. Kojã mẽ apkur kêt rãhã ma akupỳm mẽ õ krĩ hwỳr pa hãmri nẽ pry hã hirot nẽ rôrøk o pa. Mẽ õ krĩ hwỳr awryy. Anẽ.

³³ Nhũm pre ã mẽ inhmã mẽ harẽn anẽ pa mẽ tee ri kuma hãmri nẽ kãm:

—Kwa nom nhỹri kot pu mẽ kãm mẽmoj japrõ nhũm mẽ tokyx kuku? Ja kapõt pix kẽnã. Nẽ mẽ ohtõ griiã. Anẽ.

³⁴ Hãmri nhũm mẽ inhmã:

—No mẽ panhõ pãwtita? Tanhmã na arĩ kute nẽ hikwỹ? Anẽ.

Hãmri pa mẽ kãm:

—Nà ãm kệp 7 pix. Nẽ kaxyw tep kwỳ no ãm grêre. Kot mẽ ho dare kaxyw ã. Anẽ.

³⁵ Hãmri nhũm mẽ inhma nẽ mẽ ixkõt mẽ mrar xwỳnhjê mã anẽ nhũm mẽ hkri pa.

³⁶ Hãmri nhũm pãwti mẽ tep grêreta jamỳ nẽ ho Tĩrtũm wỳ nẽ kãm:

—Pa Papaj. Nà apê mẽ inhmã mẽ inhõ ho apa xwỳnh jakamã amex o amex. ãm amex kumrêx. Anẽ.

Hãmri nẽ mẽ kãm mẽmojta o hkry hpa nẽ mẽ inhmã kugõ pa mẽ õ ri ho xa nẽ ho mẽ hipêx pa. ³⁷⁻³⁸ Hãmri nhũm mẽ piitã apku nẽ õhy htu hpa. Nhũm prem mẽmyjaja kệp 4.000 nẽ kaxyw mẽnijaja nẽ mẽhprĩjaja. Mẽ ohtõ rax kumrêx tã nhũm Jejus mẽõ ho mẽ hipêx pa. Hãmri pa mẽ hakrêx o akuprõ nẽ ho kawà ho 7 nẽ ho nýt. ³⁹ Hãmri nhũm Jejus ma akupỳm mẽ õ krĩ hwỳr mẽ hano

pa mẽ pàr krem agjê hãmri nẽ ma ijaxwỳja mõ. Ma pika pẽ Makatã hwỳr mõ.

16

Parijew nhõ xwỳnh kwỳ kot aa mẽ kot mẽmoj pumunh kêt õ ho anhỹr ã Jejus wỳr ã mẽ harẽn

¹ Tã pa mẽ ra hwỳr pøj nhũm Parijew mẽ Satusew nhõ xwỳnhjaja Jejus pumu nẽ hwỳr mra. Nẽ hêx rom kot kamã hamak kaxyw hwỳr mra nẽ kãm:

—Pa Jejus? E kwa mẽ inhmã aa mẽ ixte mẽmoj pumunh kêt õ ho anẽ nà? Pa mẽ ate ho anhỹr ã apumu nẽ Tĩrtũm kot mẽ ixwỳr amẽn h ã akõt ijamaxpêr kurê kumrêx. E kwa tokyx. Anẽ.

²⁻³ Hãmri nhũm mẽ kuma nẽ mẽ kãm:

—Tk. Nà kot paj mẽ amã ho anhỹr kêt nẽ. Mẽ ate hã ixpumunh nẽ ixkõt ajamaxpêêre kaxyw ã. Na ka htem kaxkwa kamã kakrã pumu nẽ axpẽn mã na wrỳk ã harẽ. Nẽ kaxkwa mex pumu nẽ axpẽn mã amgrà hã harẽ. Tã ixte tanhmã mẽ amã mẽmoj nhĩpêx to hã ixpumu nom Tĩrtũm kot mẽ awỳr inhmẽn h xwỳnh ã ixkõt ajamaxpêr kêt nẽ. ⁴ ãm mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awỳr inhmẽn h xwỳnh tã ka mẽ ja hã ixkõt ajamaxpêr kêt nẽ. Tã mẽ ate aa mẽmoj pumunh kêt kwỳ ixte mẽ amã ho anhỹr kaxyw ka mẽ inhmã hã karõ. Nà kot paj mẽ amã ho anhỹr kêt nẽ. Kormã. Kot paj ãm nhỹrmã te amnepêm Jõhti kot amnhĩ nhĩpêx pyrãk o amnhĩ nhĩpêx. E ja pix kot paj mẽ amã harẽ. Nom kot paj mẽ amã aa mẽ ate mẽmoj pumunh kêt õ ho anhỹr kêt nẽ. Anẽ.

Nhũm pre ã Jejus mẽ kãm kapêr anẽ hãmri pa mẽ ixrohã mẽ kệp ixkato nẽ ma ixpa.

Jejus kot hkõt mẽ pa xwỳnhjê jahkre hã harẽn

Makre 8.14-21

⁵ Tã pa mẽ Jejus mẽ ixrohã ma mõ nẽ pàr mã agjê nẽ ma xarmã akupỳm rê nẽ hikjê hã mõ. Hãmri nẽ tee ri mẽ ixãpkur xà japêr nẽ axpẽn mã:

—Kwa na pu mẽ panhõ pãwti ho pajamakêtkati nẽ kure. Anẽ.

⁶ Hãmri nhũm Jejus mẽ inhma nẽ tanhmã mẽ inhmã Parijew mẽ Satusew nhõ

xwÿnhjê jarênh to. Nom pãwti hã kuxi nê mē inhmã mē harê nê mē inhmã:

—Kwa mē o kora. Kêr ka mē Parijew mē Satusew nhõ xwÿnhjê mē kêp pãw kaxkrit xà hkwÿ hpyr kêt nê. Anê.

⁷ Hãmri pa mē tee ri kuma nê ixprĩ hã mar mex kêt nê. Nê arĩ kapërta ã axpên kukjêr o hkôt mō nê axpên mã:

—Kwa mē pahte mē panhõ pãwti rer jakamã mãn mē pahte mē õ pãw kaxkrit xà kwÿ hpyr nê mē pahkurê nã? Anê.

⁸ Hãmri nhũm mē inhma nê mē inhmã:

—Hêxta waa nê. Mon ka mē ãm axpên mã mē panhõ pãwti hkêt pix jarênh o mō? Pêr kormã mē ate amnhĩ kaxyw inhmã ajamxpêr tÿx kêt. ⁹ Jãã ixte mē anoo mã pãwti kêp 5 pix tã nhũm ixte ho mē kêp 5.000tajê nhĩpêx par. Nhũm mē kot hkur nê ho õhy htu hpar nhũm mē ate mēõ jakrêx o apikuprõnh par nê ho kawà ho 12 nê ho hipu. ¹⁰ Nê ham pãwti kêp 7 o mē kêp 4.000 nhĩpêx par nhũm mē kot hkur nê ho õhy htu hpar nhũm mē ate mēõ jakrêx o apikuprõnh raxja. ¹¹ Ra ixte mē anoo mã ja ho anhÿr o axkrut tã ka mē ra hã ano hkêt nê arĩ axpên mã mē paxàpkur xà pix jarênh o ixkôt mō. Nà mē paxàpkur xàja na pa harênh kêt nê. Parijew mē Satusew nhõ xwÿnhjê nhõ pãwti kaxkrit xà pix na pa hã kuxi nê mē amã tanhmã harênh to. Anê.

¹² Nhũm pre ã mē inhmã kapêr anê hãmri pa mē atã kuma nê kãm:

—Nà na pa xep mē hãmri tã ama. Xep mē ixte Parijew mē Satusew nhõ xwÿnhjê kapêr kôt amnhĩ nhĩpêx nê na ka mē ixkurê nê ã mē harênh anê. Anê.

Jejus kot amnhĩ tã hkôt mē pa xwÿnhjê kukjêr ã harênh

Makre 8.27-30; Rukre 9.18-21

¹³ Tã pa mē axte Jejus kôt mō nê pika pè Sejarej Piripos kamã kormã mō nhũm Jejus amnhĩ tã mē ixkukja nê mē inhmã:

—E mē inhmã mēmoj jarê. Tanhmã na hte mē akwÿjaja axpên mã ijarênh to wehe? Anê.

¹⁴ Hãmri pa mē kãm:

—Nà na htem ahpÿnhã tanhmã ajarênh to. Na hte kamã mē hkwÿjaja ajarênh o finat Juãw Paxis ã ajarê. Nhũm kamã mē hkwÿjaja ato finat Êris ã ajarê nhũm mē hkwÿjaja tōhã apê Tĩrtũm nhÿ hã akapêr o

apa xwÿnhjê hõ akupÿm atĩr ã ajarê. Nê tōhã finat Jeremĩstija rÿ axtem hõ hã ajarê. ã na htem ahpÿnhã axpên mã ajarênh anê. Anê.

¹⁵ Hãmri nhũm mē inhma nê mē inhmã:

—No mē kajaja? Ixpê mēhõ hã na ka htem axpên mã ijarê? Anê.

¹⁶ Hãmri nhũm Simãw Pêtre kãm:

—Nà apê Tĩrtũm kot mē ixkaxyw axãm nê mē ixwÿr amênh xwÿnh na ka. Nê apê mē ixpiitã mē inhõ Pahi Maati na ka. ã na pa htem axpên mã ajarênh anê. Anê.

¹⁷ Hãmri nhũm kuma nê kãm:

—Nà ãm hãmri na ka ã ijarênh anê Simãw Pêtre. Nom amnhĩ krã hkôt na ka ã ijarênh anhÿr kêt nê. Tĩrtũm tãm kot amã ixto amnhĩrĩt xà hkôt na ka ã ijarênh anê. ¹⁸ Nà akumrêx na ka ã ijarênh anê. Tã koja mē apyrà nê nhÿrmã mē kot ixkôt amnhĩ xunhwÿr xwÿnhjaja ma hkwÿjê mã ja hã ijarênh o ri krĩ piitã hkôt pa. Hãmri nhũm mē hkwÿjaja mē kuma nê mē apyrà nê ixkôt amnhĩ xunhwÿ. Hãmri nhũm mē kêp ixprãm nõkati xwÿnhjaja tee ri tanhmã mē kot ijarênh toja ma nê ã ijarênh anhÿrja nê mē kãm kapêr tã nom ho hkapyr. ã koja ixkôt mē kot amnhĩ xunhwÿr xwÿnhjaja mē kãm ijarênh o pa anê. Jao te mē apê kên nhũm ixte mē ato amnhĩm inhõrkwÿ nhĩpêx pyràk. Tã akumrêx ate ã ijarênh kot anhÿr jakamã kot paj te ixte akumrêx amÿnh nê ato ixtêm nê inhõrkwÿ nhĩpêx kaxyw amnhĩm akumrêx axãm pyràk o anhĩpêx Simãw Pêtre.

¹⁹ —E kêr ka ma inhÿ hã tanhmã mē piitã mē kãm ijarênh to ho ri apa. Mē kot hprĩ hã amar kaxyw. Koja mē hkwÿjaja ama nê amnhĩ kaxyw ixkôt hamaxpêr nê ixkôt amnhĩ xunhwÿ. Ka ja hã mē omu nê mē kãm: “E ra mē ate Jejus kôt amnhĩ xunhwÿr jakamã kot ka mē nhÿrmã ty nê ma kaxkwa hwÿr api nê Tĩrtũm mē wa kuri amex kumrêx nê atĩr tũm nê apa ho apa.” Anhÿr o mē kãm ijarênh o apa. No mē kot akapêr mar nê ãm mar nê ixkôt amnhĩ xunhwÿr kêt xwÿnhjaja ka mē kãm: “No mē kajaja mē ate Jejus kôt amnhĩ xunhwÿr kêt jakamã kot kaj mē nhÿrmã Tĩrtũm mē Krata wa kuri atĩr tũm nê apa ho apa hkêt nê.” Anhÿr o ã inhÿ hã mē kãm akapêr anhÿr o ri mē hkôt apa. Jao te ate kaxkwa hwÿr

saf pyr nê Tirtûm krajê mã kahê xà rênh nê Tirtûm kra hkêt xwýnhjê pê kahê pyræk o amnhĩ nhĩpêx o apa. Anê.

Nhũm pre ã Jejus Simãw Pêtre mã kapêr anê. ²⁰ Hãmri nê hpãnhã mẽ ixpiitã mẽ inhmã kapêr nê mẽ inhmã:

—E. Kwa kêr ka mẽ kormã mẽ piitã mẽ kãm Tirtûm kot mẽ awýr inhmênh ã mẽ kãm ijarênh o ri apa hkêt nê. Kormã. Anê.

Jejus kot amnhĩ kukamã amnhĩ jarênh ã harênh

Makre 8.31-33; Rukre 9.22

²¹ Hãmri nhũm Jejus hprĩ hã amnhĩ kukamã tanhmã mẽ inhmã amnhĩ jarênh to nê mẽ inhmã:

—Nà mẽ kajaja mẽ ate aprĩ hã ixpumunh mex. No mẽ pahkwýjaja kãm hprĩ hã ijarênh mar nê ixpumunh prãm kêt. Ijaew krãhtũmjaja nê Tirtûm kapêr tũm o mẽ ahkre xwýnhjaja nê patre krãhtũmjaja. Mẽ kãm hprĩ hã ixpumunh nê kãm ixkapêr mar prãm kêt jakamã kot paj tokyx ma Jerujarê hwýr mõi nhũm mẽ kamã ixpynê nê ixtak rax nê ixpĩ. Nom kot paj ixtyk ã apkati axkrunêpxi nhũm Tirtûm akupým ixta ixtĩr. Anê.

²² Hãmri nhũm Simãw Pêtre tee ri kot ã mẽ kãm amnhĩ jarênh anhýrja ã kuma nê hwýr tẽ nê hpa hã kupy nê mẽ ixpê ho kato nê mẽ ixkàx ã o xa. Nê ã kot amnhĩ jarênh anhýrja nê kãm kapêr nê kãm:

—Kwa nà Pahihtĩ. Ri ã amnhĩ jarênh anhýr kêt nê. Mo kot kêt mẽ ri axtem nê ã anhĩpêx anê? Anê.

²³ Hãmri nhũm kuma nê hwýr apkjê nê omu nê kãm:

—Tk. Te apê Satanasti kapêr pyræk o na ka ã inhmã akapêr anê. Kot kaj ã akapêr anê hãmri nê ixkôt apa hkêt nê. Tirtûm kãm hprãm xà hkôt na ã mẽ kot inhĩpêx anhýr kaxyw kênã. Tã ka Tirtûm jamaxpêr o ajamaxpêr kêt nê amnhĩ jamaxpêr o ã inhmã akapêr anê. Te apê ixpê axàmnrã xwýnh pyræk o amnhĩ nhĩpêx. Anê.

Jejus krajaja kot tanhmã amnhĩ nhĩpêx to hã mẽ harênh

Makre 8.34-9.1; Rukre 9.23-27; Juãw 12.24-26; mãânên Rômãn 15.1; Wam Korĩt 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhũm pre ã Jejus Simãw Pêtre mã kapêr anê hãmri nê hpãnhã mẽ ixpê hkôt ixpa ho ixpa xwýnh piitã mẽ inhmã kapêr nê mẽ inhmã:

—E kot kaj mẽ ixkôt amnhĩ xunhwýr ã amnhĩ jarê hãmri nê mãânên amnhĩ jarênh o: “Jesús kêp inhõ Pahihtĩ jakamã kot paj kapêr kôt pix mã amnhĩ nhĩpêx rãhã ho ri ixpa. Kwãr ixkwýjaja tanhmã hã inhĩpêx hto.” Anhýr o amnhĩ jarê.

²⁵ —Koja mẽ ixtã mẽ atõx pĩ rý tanhmã mẽ atõ hto ka ty. Tã nom koja akaxwýnh ma ixwýr àpir kurê kumrêx. Hãmri ka ixkuri atĩr tũm nê amex rãhã nê apa ho apa. Nom kot kaj mẽ jar atĩr prãm xàj ixkaga hãmri nê inhõ krĩ hwýr axàpir kêt nê.

²⁶ —Nê koja mõi hikukrêx rax gryk ã Tirtûm kaga. Tã nhýrmã ty hãmri nê amnhĩ kôt hikukrêx õ hpyr nê o mõi kêt nê. Koja tee ri kuwy hwýr mõi pymaj amnhĩ nê hikukrêx rax o amnhĩ pãnhã amnhĩrer prãm kaprý. Tanhmã koja amnhĩ to nê Tirtûm mã amnhĩre nê ma õ krĩ hwýr api? Koja ã amnhĩ nhĩpêx anhýr kêt nê.

²⁷ —Nê ixpê Tirtûm kot mẽ awýr inhmênh xwýnh kot paj nhýrmã kaxkwa rũm akupým mẽ awýr wrý nhũm Tirtûm kapêr o mẽ wrýk xwýnhjaja man ixkôt wrý. Hãmri pa inhõ Papaj nhý hã ixte mẽ piitã tanhmã mẽ kot amnhĩ nhĩpêx to hã mẽ omunh xà hkôt ahpýnhã tanhmã mẽ harênh to. ²⁸ ãm hãmri na pa ã mẽ amã amnhĩ jarênh anê. Kot paj nhýrmã akupým ixte mẽ ato amnhĩptãr kaxyw man mẽ awýr wrý. Tã kot kaj mẽ akwýjaja akupým ixwrýyta kukamã tokyx ixte tanhmã ixte amnhĩ nhĩpêx to hã ixpumu. Anê.

17

Jejus kot hixêt prêk nhĩmõk ã hirã kamã ãm ã harênh

Makre 9.2-13; Rukre 9.28-36; mãânên Sikũn Pêtre 1.16-18

¹ Tã nhũm semãnja hapêx nhũm Jejus ma nhýri hixêt prêk wýr mõi. Nê kaxyw Simãw Pêtre nê Xiakre nê Xiakre htõ Juãwja nhũm ma amnhĩ kôt wa mẽ o mõi. Nhũm wa mẽ mõi nê hixêt prêk ã api nê himõk ã kuhê.

² Hãmri nhũm Jejus xep ra axtem nê xa. Axtem hkuk nhĩrã htýx nê xa. Te myyti nhĩrã htýx pyræk. Nê ê haka htýx kumrêx. ³ Hãmri

nhùm xep ja wa kaxkwa rûm hwÿr wrÿ nê kuri kãm kapêr o xa. Mojes mē Erisja wa nhùm hwÿr wrÿ nê kuri xa. Tirtûm amnepêm amnhî wÿr wa ho àpir tâ wa akupÿn wrÿ nê Jejus mã kapêr o xa. ⁴Hãmri nhùm Jejus kôt mē mör xwÿnhjaja wa mē omu nhùm Simãw Pêtre tanhmã hamaxpêr to nê Jejus wÿr tē nê kãm:

—Kwa Pahihti. Nà ãm hãmri na pu mē amnē mō. Kwa pu mē kritpêm jar axkamē nê tokyx panojarêt kêt nê. Pa mē amã pô nhîrõnh o axkrunēpxi nê hipêx. Amã hõ nhîpêx nê Mojes mã hõ nhîpêx nê Eris mã hõ nhîpêx ka mē kamã akrî. E kwa pa mē amã ho anê nà?

Anhÿr o kãm kapêr. Nom amnhî krã hkôt ã kapêr anê. ⁵Hãmri nê kormã ã kãm kapêr anhÿr rôm nhùm ra kakrã jaka htÿxja wrÿ nê wa mē hkunor pa nhùm wa mē kamã kuhê. Nhùm kakrã kamã Tirtûm mē kãm kapêr nê mē kãm:

—E ota Ixkra xa. Inhmã hapê ho inhmã hapê. E kêr ka mē kapêr mar tÿx rãhã ho ri apa. Anê.

⁶Hãmri nhùm mē tee ri kuma nê kãm ma htÿx nê umaj pikap rôrôk nê htu mÿrpê hikwÿ. ⁷Hãmri nhùm Jejus mē hwÿr tē nê mē hã ïhkra jaxwÿ nê mē kãm:

—E mē kãnhmã akuhê nê amã ma hkêt nê. Anê.

⁸Hãmri nhùm mē kuma nê kãnhmã rît nê Jejus pix pumu nhùm ahte xa nhùm kuri wa ãm xwÿnhhta wa ra ma akupÿm api. ⁹Hãmri nhùm mē kormã akupÿm hixêt nhîmök rûm mē ixwÿr wrÿk o mō nhùm Jejus mē kãm:

—E kêr ka mē ham ate mēmoj pumunh xwÿnhhta kormã nhãm mē kãm harênh kêt nê. Kot paj nhÿrmã ty nê akupÿm ixtîr ka mē rî kormã mē kãm ja hã ijarênh o ri apa. Anê.

¹⁰Hãmri nhùm mē kormã akupÿn mē ixwÿr wrÿk o mō nhùm mē Jejus mã:

—Kwa mē inhmã mēmoj jarê. Na htem Tirtûm kapêr tûm o mē ijahkre xwÿnhjaja mē inhmã: “Eris kumrêx koja Tirtûm mē pahwÿr kumê nhùm Krisja kormã hapu hã wrÿ.” Anê. Na htem ã mē inhmã war ajarênh anê. Tã ka ra wrÿ nom kormã akukamã Erisja wrÿk kêt. Anê.

¹¹Hãmri nhùm mē kãm:

—Nà ãm hãmri na prem ã wa ijarênh anê. Na pre ra ixkukamã te Eris kot amnhî nhîpêx pyrãk xwÿnhhta tē nê ixkutêp mē kãm ijarênh o pa. ¹²Tã nom nhùm mē ja hã omunh kêt nê. Na prem axtem nê kãm hprãm xà hkôt tanhmã hipêx to nê kupî. Tã koja mē nhÿrmã ã hipêx anhÿr pyrãk o inhîpêx. Anê.

¹³Hãmri nhùm mē ra hprî hã kuma nê axpên mã:

—Kwa Juãw Paxis pimràata na ã mē pamã harênh anê. Tapxîpix na pre te Eris kot amnhî nhîpêx pyrãk o amnhî nhîpêx o pa. Tã tãm na mē pamã harê. Anê.

Jejus kot mēhõ hkra nê mēkarõmnuti kator ã harênh

Makre 9.14-29; Rukre 9.37-43

¹⁴Tã nhùm mē ra akupÿm ahpar mã man mē ixwÿr hpôx o mō nhùm mē ohtô rax nê Jejus kutêp kuhê. Hãmri nhùm mēhõ myja mē omu nê mē kutã tē nê mē hkaxpa nê Jejus kutã hkôn krã ho tēm nê nhÿ nê hkra ho kuwÿ nê kãm:

¹⁵—Pa Jejus. Kwa inhmã ixkra kamã axukaprî nê. Na hte mēkarõmnutija xatã tanhmã ixpê ho nhùm hte ÿ hã mra nê rôrôk nê tōhã kuwy kamã rôrôk nê tōhã gôx kãm mran mrõ nê ixpê homnuj tÿx nê. ¹⁶Tã pa akôt mē pa ho mē pa xwÿnhjê hwÿr o tē nom nhùm mē kot inhmã ho mex kaxyw tee ri tanhmã ho hkaprÿ. Kwa xà kot kaj akupÿm inhmã ho mex nà? Anê.

¹⁷Hãmri nhùm kuma nê mē ixte hkôt ixpa ho ixpa xwÿnhjê mã kapêr nê mē inhmã:

—Hêxta waa nê. Ra mē ate ixte Tirtûm nhÿ hã mē ho mex ã ixpumunh o ixkôt apa ryy htã kormã ixpyrà nê ã mē hipêx anhÿr kêt nê. Nà kormã mē kaxyw Tirtûm kôt mē ajamaxpêr tÿx kêt jakamã na ka mē tee mē ho mex kaxyw. Anê.

Hãmri nê myta mã kãm:

—E amnê ixwÿr akrata o tē pa omu. Anê.

¹⁸Hãmri nhùm kuma nê hwÿr o tē nhùm omu nê nê mēkarõmnutija kator nhùm akupÿm mex kurê kumrêx. ¹⁹Hãmri pa mē ixte Jejus kôt ixpa ho ixpa xwÿnhjaja ja hã omu mē hkàx ã amnhî tã hkukja nê kãm:

—Kwa na pa mē axwakre kamã tee ri nê hanor prãm kaprÿ. Kwa mon pa mē apyrã

ně nê hanor nhũm kator nê ma htêm kêt nê? Anê.

²⁰⁻²¹ Hāmri nhũm mē inhmā:

—Nà kormā mē ate mē kaxyw Tirtũm kôt ajamaxpēr tỳx kêt. Nom kot ka mē kaxyw hkôt ajamaxpēr tỳx hāmri nê hkôt amnhĩ nhĩpêx kukwak ri mēmoj tã awỳ nhũm mē ama nê mē ate mēmoj tã axàhwỳr xà hkôt mē amā tanhmā mēmoj nhĩpêx to. Te mē ate pĩ hpār mũj mǎ akapēr nê kām: “Kwa amnhĩ jarê nê ma tē nê gô xujanār kām mǎn mrō.” Anhỳr nhũm kot amar nê amar xà hkôt ã amnhĩ nhĩpêx anhỳr kurê kumrêx pyrāk. Ja pyrā nê kot kaj mē amnhĩ kaxyw Tirtũm kôt ajamaxpēr tỳx kukwak ri mēmoj tã awỳ nhũm mē ama nê mē amā mēmoj tanhmā ho rỳ mē amā mēmoj gō. Anê.

Jejus kot htyk kukamā amnhĩ jarênh ã harênh

Makre 9.30-32; Rukre 9.43-45

²²⁻²³ Tã hāmri pa mē Jejus kôt ma mō nê nhỹri pika pē Garirej kamā kormā ixpa. Hāmri nhũm Jejus axte amnhĩ kukamā mē inhmā tanhmā htyk ã amnhĩ jarênh to nê mē inhmā:

—Nà koja mē tokyx mē kām ixtã amỹnê nhũm mē ixpĩ. Mē kot ixpĩr tã kot paj ixtyk ã apkati axkrunêpxi nhũm Tirtũm akupỹm ixtō ixtĩr. Anê.

Hāmri pa mē tee ri ã kot amnhĩ jarênh anhỹrja ã kuma nê ixkaprĩ htyx kumrêx.

Jejus kot Tirtũm nhõrkwỳ hwỳr àr

Rõmǎn 13.5-7; Wam Korõt 10.32-11.1

²⁴ Tã pa mē Jejus kôt ma mō nê ra Kapanau hwỳr pōj. Hāmri nhũm mē kot Tirtũm mǎ amnhĩ jarênh xà hã ixkre ho mex kaxyw mē kēp kàxpore hkwỳ jamỳnh xwỳnhjaja mē ixpumu nê mē ixwỳr mra nê Simǎw Pêtre mǎ kām:

—Pa. Kwa xà na hte mē ajahkre xwỳnhja mē pahpê hkwỳjê pyrā nê Tirtũm mǎ amnhĩ jarênh xà hã ixkre ho mex kaxyw kàxpore hkwỳ nhõr kêt nê nà? Anê.

²⁵ Hāmri nhũm mē kuma nê mē kām:

—Tỳ kot mē kām òr o pa kênã. Anê.

Hāmri nê ma mē ixkôt tē nê mē ixkôt mēhõ nhõrkwỳ hwỳr axà. Hāmri nê kot Jejus mǎ mē harênh mǎ tã nhũm ra hamaxpēr ã omu nê kumrêx kām kapēr nê kām:

—Kwa inhmā mēmoj jarê Simǎw Pêtre. Xà na hte pahi hkrajaja ò papaj mǎ kàxpore

hkwỳ nhõr o pa nà? Xà na hte ãm hkra hkêt xwỳnh pixjaja kām hkwỳ nhõr o pa? Anê.

²⁶ Hāmri nhũm kuma nê kām:

—Nà mē kēp hkra hkêt xwỳnh pixjaja na hte kām òr o pa. Anê.

Hāmri nhũm Jejus kām:

—Tỳ. Nà ãm hāmri na ka ja jarê. Na hte pahi hkrajaja ò papaj mǎ kàxpore nhõr kêt nê. Mē kēp hkra kênã. Tã ixpê Tirtũm Kra jakamā mo kaxyw kot pa kêt òrkwỳ hwỳr inhgjêx kaxyw kām kàxpore hkwỳ gō?

²⁷ Tã nom kot paj òr kêt nhũm kàxpore hkwỳ jamỳnh xwỳnhjaja tee ri ja hã ixpumu nê axpēn mǎ ixte amnhĩ tomnuj xwỳnh ã ijarê. Jakamā e ma gõnhmā tē nê tep ò kanhê. Hāmri nê ho api nê apy nê hakwa jakjê nê kamā kàxpore htyxre pumu. Nê apy nê man o tē nê pahpãnhã kàxpore jamỳnh xwỳnhhta mǎ agō. Anê.

Nhũm pre ã Jejus Simǎw Pêtre mǎ karõ anê nhũm kuma nê ma hwỳr tē nê kot kām karõ xà hkôt ã amnhĩ nhĩpêx anê.

18

Mē kot amnhĩ to rũnh xwỳnhjê jarênh

Makre 9.33-37; Rukre 9.46-48; mǎãnêñ Piripos 2.3-7; Wam Pêtre 3.4, 5.5-6

¹ Tã mē ixte Jejus kôt ixpa ho ixpa xwỳnhjaja amnhĩ kukamā ijamaxpēr nê amnhĩ tã Jejus kukja nê kām:

—Kwa mē inhmā mēmoj jarê Pahihti. Nhỹrmā mē ixpê pahi nê anhĩhkõ hã mē ho amnhĩptār o ri ixpata ã mē ixtõ kot paj we mē ho amnhĩptār rax o ixkwỳjê jakre? Anê.

² Hāmri nhũm mē inhma nê amnhĩ wỳr mēhprĩre hõ mǎ hpa ho apê nhũm hwỳr tē nê mē ixkuri xa. ³ Hāmri nhũm Jejus omu nê hã mē inhmā:

—E mē inhma. Kêr ka mē apê pahi pyrāk o tanhmā amnhĩ jarênh to ho ri apa hkêt nê. ãm te amarĩ ri mē apa pyrāk o amnhĩ nhĩpêx. Te mēhprĩre kot amnhĩ nhĩpêx pyrāk. Kot kaj mē ã amnhĩ nhĩpêx anhỹr o apa hkêt hāmri nê nhỹrmā inhĩhkõ hã mē ho amnhĩptār kêt nê. ⁴ Jakamā kot kaj mē amā nhỹrmā inhĩhkõ hã mē ho amnhĩptār o apa hprām. Hã kot kaj mē te mēhprĩre kot amnhĩ nhĩpêx pyrā nê amā amnhĩ to rũnh prām kêt nê apa.

⁵ —Nê kêr ka mē apê pahi kot amnhî nhîpêx pyrâk o tanhmâ amnhî jarênh to ho apa hkêt nê. Âm te amarî ri mē apa pyrâk o amnhî nhîpêx. Jao nhÿri mēhprîjê hô pumu nê kamâ axukaprî nê kâm mēmoj tanhmâ ho rÿ kâm mēmoj gô. Hâmri nê te pa ate tanhmâ ixto mex to pyrâk o amnhî nhîpêx. Kot kaj mē ã amnhî nhîpêx anhÿr o apa hâmri nhÿm Tîrtûm ja hã mē apumu nê mē ate amnhî to rÿnh kêt tâ mē ate amnhî to rÿnh xwÿnh ã mē ajarê. E kot kaj mē amâ amnhî to rÿnh prâm hã kot kaj mē ã amnhî nhîpêx anhÿr o ri apa. Anê.

Mê kot amnhî tomnuj xwÿnhjê hkukamâ mē harênh

⁶ Nhÿm Jejus arî mē inhmâ mēhprî jarê nê mē inhmâ:

—Nê mēhprîre na htem amnhî kaxyw ixkôt hamaxpêr o pa. Tã koja mēhō inhnê tanhmâ mē kâm kapêr to. Mē kot tanhmâ amnhî tomnuj to hprâm xaj tanhmâ mē kâm kapêr to ho pa. Hâmri nhÿm mē kuma nê mē kapêr xà hkôt tanhmâ amnhî tomnuj to. Hã koja Tîrtûm ja hã omu hâmri nê kot inhnê tanhmâ kâm kapêr to xwÿnhnta pumu nê homnuj tÿx nê. Te mē kot mēhō pynênh nê mut ã kên pytî hô nhôr nê ma o htêm nê gô xupÿm kâm mēnh pyrâk o hipêx. Te ho ja pyrâk no ãm homnuj tÿx o hakre.

⁷ —Nê koja mēhō inhnê tanhmâ mē kot ixkôt amnhî xunhwÿr xwÿnhjê hô mã kapêr to. Kot tanhmâ amnhî tomnuj to hprâm xaj tanhmâ kâm kapêr to. Rÿ kot ixkaga hprâm xaj tanhmâ kâm kapêr to. Hâmri nhÿm kuma nê mar xà hkôt ixkapêr kwÿm tanhmâ amnhî tomnuj to. Tã koja Tîrtûmja ja hã omu nê mãânên kot inhnê kêt àmnâr xwÿnhnta pumu nê ã inhnê kâm kapêr anhÿrja mÿrapê homnuj tÿx kumrêx.

⁸⁻⁹ —E kwa mē okora. Kot kaj mē anhîhkra ho tanhmâ amnhî tomnuj to rÿ apar o tanhmâ amnhî tomnuj to. Hã kêr ka mē axte ã amnhî nhîpêx anhÿr pymaj te mē ate amnhî pê krâhyr nê mēnh pyrâk o amnhî nhîpêx nê axte ã amnhî tomnuj anhÿr kêt nê. Rÿ ka mē ano ho mēmoj punuj pumu. Hã kêr ka kâm ajamaxpêr pix o apa pymaj te mē ate amnhî pê ano katök nê kaxâr nê mēnh pyrâk o amnhî nhîpêx nê nhâm arît kurê kumrêx. Kêr ka mē ã amnhî nhîpêx

anhÿr o ri apa. Hâmri nê nhÿrmã ty nê ma Tîrtûm nhô krî hwÿr api. No kot ka mē arî akutã ano nê arî akutã apar nê arî akutã anhîhkra rãhã ri apa htã ho amnhî tomnuj o apa. Hâmri nê nhÿrmã ty nê ate amnhî tomnuj mÿrapê ma mē kot amnhî xà htÿx kamâ hamak tÿm xà hwÿr ma mō.

¹⁰⁻¹¹ —Nê kêr ka mē mēhprîrejê kamâ axukaprî rãhã ho apa. Na hte kaxkwa kamâ Tîrtûm kapêr o mē wrÿk xwÿnh kwÿjaja Tîrtûm mã mē hamâr mex o pa. Tã koja mēhō tanhmâ kêt hô hto nhÿm mē hã omu nê ma tē nê Tîrtûm mã harênh kurê kumrêx. Anê.

ôwêhti pikunor jarênh

Rukre 15.3-7

¹² Nhÿm Jejus arî mē inhmâ kapêr nê mē inhmâ:

—E pa mē amâ awjarê ka mē ixujarênh ma. Nã koja mēhō my hkrit ôwêhti xohtô nê. Nê apkati mē ma hamâr o pa. Hâmri nhÿm pyxire nê tanhmâ amnhî to nê kêt akunok. Kwÿ kaga nê ma nhÿhÿm ahte tē nê kêt akunok. Hâmri nhÿm mytita ma akupÿm o môr kaxyw hkwy ho pikuprôn pa hâmri nê tee ri hkwy kaêx ã pikunor xwÿnhnta japêr nom nhÿri omunh kêt nê. Hâmri nê tee ri hkukamâ hamaxpêr nê ma hkwy ho mō nê nhÿri kure. Kutêp apkur kaxyw nhÿri kure hâmri nê ma akupÿm pikunor xwÿnhnta japêr o tē. ¹³ Hâmri nê hapêr rÿy nê nhÿri hwÿr kato nê omu nê hkÿnh nê. Hâmri nê kutu nê ma akupÿm o tē. Na hte pikunor kêt xwÿnhjê nhÿ hã hkÿnh tã pikunor xwÿnhnta mã kato nê hkÿnh tÿx nê. Krit xohtô htã nom ãm kâm ho pixi nê ho hpikunor prâm kêt. ã mē ujarênh kot anhÿr. ¹⁴ Ja pyrã nê Tîrtûm kâm mēhō pyxi nê nhÿrmã ma kuwy wÿr môr prâm kêt kumrêx. Mē piitã mē kot hkôt amnhî xunhwÿrja na kâm hprâm. Anê.

Jejus kôt mē pahtôjê hô kot mē pahtomnuj jarênh

¹⁵ Nhÿm Jejus arî mē inhmâ kapêr nê mē inhmâ:

—Nê ja. Koja ixkôt mē atō rÿ mē atōx tanhmâ atomnuj to. Hã kêr ka ma hwÿr tē nê kot tanhmâ anhîpêx to hã amnhî tã kâm akapêr. Nom kêr ka mē nhâm mēhō mã harênh kêt nê. Âm tanhmâ kot ato xwÿnhnta

pix wÿr tē nē kumē war axpēn mā akapēr nē war axpēn ma. Nhūm ama nē akupÿm tām anhîpêx hā kêr ka akupÿm te ixkôt kêp atō rÿ atōx pyrāk o ka wa axpēn nhîpêx nē axte jam ajamaxpēr kêt nē. ¹⁶ Nom koja ama nē âm ama rÿ tanhmā ato hkêt ā amnhî jarēnh japêr. Hā kêr ka ma akupÿm tē nē akupÿm amnhî kôt Kris kôt atō rÿ atōx o axkrut rÿ mē ho axkrunēpxi nē amnhî kôt hwÿr mē o mra kê mē axpēn tā war ama. Amnepēm Tirtūm kapēr ā kagà htūm kot ja jarēnh o:

Kêr ka mē atō tanhmā axpēn nhîpêx to. Hāmri nē hā axpēn mā akapēr kaxyw nē amnhî kôt akwÿjê ho axkrut rÿ ho axkrunēpxi nē akupÿm hwÿr mē o mra kê mē axpēn tā war ama. Anē.

—Ā Tirtūm kapēr ā kagà htūm kot ja jarēnh kot anhÿr. ¹⁷ Jakamā kêr ka mē amnhî kôt akupÿm kot tanhmā ato xwÿnhhta wÿr mē o mra kê mē atā kuma. Hāmri nhūm arî mē kām kot tanhmā ato hkêt ā amnhî jarē ka tee ri amnhî tā omu nē ikrêsti hwÿr tē nē Kris kwÿ hā mē pikuprōnh xwÿnhjê mā harē. Kê mē ama hāmri nē ja hā axte kot tanhmā ato xwÿnhhta mā kapēr. Nhūm mē mar kêt nē arî kot tanhmā ato hkêt ā amnhî jarē ka mē amnhî nē hanor kurê kumrêx. Hāmri nē te kêp Kris kôt mē atō rÿ mē atōx kêt pyrāk o hipêx.

¹⁸ —Nē koja mēhō ixkôt amnhî xām nē Inhîpêxà Tirtūm kôt ri amnhî nhîpêx o pa. Ka mē ja hā omu nē inhÿ hā tanhmā kām akapēr to nē kām: “E ra ate Jejus kôt amnhî xām jakamā kot kaj nhÿrmā Tirtūm mē wa kuri amex kumrêx nē atîr tūm nē apa ho apa.” Anhÿr o kām akapēr. Nom mē kot ixkôt amnhî xunhwÿr kêt xwÿnhjaja ka mē ā mē kām akapēr anhÿr kêt nē. Ām inhÿ hā mē kām: “No mē kajaja mē ate Jejus kôt amnhî xunhwÿr kêt jakamā kot kaj mē Tirtūm mē Krata wa kuri atîr tūm nē amex nē apa hkêt nē.” Anē. Kêr ka mē inhÿ hā ā ahpÿnhā tanhmā mē kām akapēr to ho apa anē.

¹⁹⁻²⁰ —Nē kot kaj mē Tirtūm mā amnhî jarēnh kaxyw te axkruttre rÿ axkrunēpxire htā axpēn wÿr akuprō nom mē kapxipix-jaja apikuprōnh kêt nē. Kot paj mē akaêx ā mē anhîhkô hā mē amar o xa. Mē ate ano ho ixpumunh kêt tā pa wa mē anhîhkô hā

mē amar o xa. Jakamā kot kaj mē axpēn wÿr akuprō nē mēmoj tā Tirtūm wÿ nhūm kaxkwa kamā ja hā mē ama. Nē mē ate hā axàhwÿr xwÿnhhta nhūm mē amā tanhmā ho. Kêr ka mē ā ixkamnār rom axāmnhîx amnhî to Inhîpêxà hwÿr anē. Anē.

Nhūm pre ā Jejus mē inhmā kapēr anē.

Mē pahte tanhmā axpēn nhîpêx to hā mē pamā karō

Matêwre 6.14-15; Rukre 17.3-4; määnēn Epes 4.32; Korosē 3.13

²¹ Tā nhūm Simāw Pêtre Jejus wÿr tē nē mēmoj tā hkukja nē kām:

—Kwa inhmā mēmoj jarē Pahihtî. Xà koja akôt ixtō rÿ ixtōx tanhmā inhîpêx to pa amnhî tā omu nē âm omu nē amnhî tā tanhmā ho hkêt nē. Nhūm axte tanhmā ixto nē axte tanhmā ixto ho 6 tā pa âm amnhî tā omu nē amnhî tā tanhmā ho hkêt nē. Âm ho ijamakêtkati nē axte kām ijamaxpēr kêt nē. Ā amnhî tā hipêx anhÿr o 7 nhūm ja amā mex nē nà? Anē.

²² Hāmri nhūm kām:

—Nà kot kaj ā amnhî tā hipêx anhÿr o 7 pix kêt nē. Koja mēhō xatā tanhmā ato rāhā nē ka amnhî tā omu nē ajaxwÿja amnhî tā xatā tanhmā ho hkêt nē. Ām amnhî tā omu nē âm omu nē tām hipêx rāhā ho ri apa. Māmri ho anhÿr o apa rāhā nē aa jam anhÿrer kêt nē.

²³ —E kot paj ixprî hā mē amā tanhmā ja jarēnh to ka mē inhma. Tirtūm na hte xatā mē ate tanhmā amnhî tomnuj to hā mē apumu nē mē anē rēnh o pa. Te kot pahi kot ā hkwyjê nhîpêx anhÿr pyrāk. Koja mē ō pahija kām mē àpēnh xwÿnhjaja kot kêp kàxpore ho ïpresta hā mē omunh kaxyw nhÿ. ²⁴ Hāmri nhūm mē hwÿr ja ho tē nē kutā âm. Ra kot kêp hikàxpore ho ïpresta rax xwÿnhja. ²⁵ Tā no âm aa akupÿm kām ōr kêt nē ra kêp ho hapêx pa. Hāmri nhūm pahija tee ri amnhî tā omu nē hkwyjê mā hā amÿnê nē mē kām: “E. Mē ma o tē nē hprō nē hkrajaja nē ōrkwÿ nē hikukrêx mērohā ho wēnê hpa nē hpānhā kàxpore py nē man inhmā o tē. Kot ixpê ixkàxpore ho ïpresta nē akupÿm inhmā ōr kêt mÿrapê.” Anē.

²⁶ —Hāmri nhūm kot ho ïpresta xwÿnhhta tee ri amnhî tā kuma nē kutā hkônkrā ho nhÿ nē amnhî to hwÿr kām hihtÿx nē

kãm: “Kwa nà ri ixto anhÿr kêt nê pahihtî. Ixkamã axukapri nê hkêt wehe. Nà kot paj akupÿm amã kugõ kãm ga.” Anê.

²⁷—Hãmri nhùm amnhĩ tã kuma nê kãm hkapri nê. Hãmri nê kãm: “Tõe. Nà kot paj ã anhîpêx anhÿr kêt nê. Kot paj anhõ kõt kaxõnh pa nê kumê ka mãmri ma ajamakêtkati nê axãmnhix apa.” Anê. ²⁸Nhùm ã kãm kapêr anê nhùm kuma nê hkĩnh nê. Hãmri nê ma tẽ nê kato nê ixkre kapem pôristi hõ pumu. Na pre ra kêp kàxpore hkwȳ ho grire nê ho ìpresta nhùm kato nê omu. Hãmri nê hwÿr tẽ nê amnhĩ kĩnhã õkre hã kumÿ nê kãm: “Kwa tokyx akupÿm ate ixpê kàxpore ho ìpresta pãnhã inhmã agõ.” Anê. ²⁹Hãmri nhùm tee ri amnhĩ tã omu nê ra ham kot pahî kutã amnhĩ nhîpêxta pyrã nê kutã hkõnkrã ho nhÿ nê kãm: “Kwa nà. Kwa ri ixto anhÿr kêt nê. Nà kot paj hpãnhã amã kugõ. Kwa ixkamã axukapri nê hkêt wehe.” ³⁰Anhÿr tã nom nhùm kuma nê ãm kuma nê hã amÿnê. Hã hkwȳjê mã amÿnê nê mã kãm: “E mã ma jahti ho tẽ nê haxà. Koja kot ixpê kàxpore ho ìpresta pãnhã inhmã kugõ nê rĩ kormã kato nê rĩ amnhĩ pumu.” Anê. Hãmri nhùm mã kuma nê ma o tẽ nê haxà.

³¹—Hãmri nhùm hkwȳjaja tee ri mar o kuhê nhùm mã kêp ja omnuj nê nhùm mã pahî hwÿr agjê nê kãm harê. ³²Hãmri nhùm tee ri harênh ma nê kamã gryk tÿx nê akupÿm amnhĩ wÿr hã karõ nhùm akupÿm hwÿr axà nhùm kãm: “Tk. Kwa na ka pre amnhĩ tomnuj tÿx nê. Ate amnhĩ to ixwÿr nhùm inhmã akapri nê ixte anhõ kõt kaxõnh nê mênh tã ³³ka amnhĩ kĩnhã anhîõta kamã axukapri hkêt nê ri ã hipêx anê.” Anê. ³⁴Hãmri nê kamã gryk nê hã õ pôristi mã amÿnê nhùm mã ma o tẽ nê haxà. Mẽ kot mã hagjênh xà hã ixkre kamã apkati mã tanhmã mã kot hipêx to kaxyw nhùm mã kãm hã amÿnê. Tanhmã mã kot hipêx to rãhã nhùm kot akupÿm kàxpore raxta nhõr par nê rĩ kormã kator kaxyw nhùm mã ma o tẽn haxà. ã mã ujarênh kot anhÿr. Anê.

³⁵Nhùm pre ã Jejus mã ixte hkõt ixpa ho ixpa xwÿnhjê mã kapêr anê. Hãmri nê mã inhmã:

—Ja pyrã nê koja ixkõt mã atõ rÿ mã atõx tanhmã mã atomnuj to ka mã amnhĩ tã omu nê ãm omu nê ho ajamakêtkati kurê

kumrêx nê axte kãm ajamaxpêr kêt nê. Te pahî kot mêhõ nhõ kõt kaxõnh par nê axte kãm hamaxpêr kêêta pyrãk. No kot kaj mã ã amnhĩ nhîpêx anhÿr kêt nhùm kaxkwa kamã inhõ Papaj ja hã mã apumu nê te ho pahî tee ri kot amnhĩ tomnuj xwÿnhnta kot amnhĩ nhîpêx ã omunh nê hã àmnênh nhùm mã kot apkati mã tanhmã omnuj tota pyrãk o mã anhîpêx. Anê.

19

Jejus kot mã pahte axpên kaga nê mã pahkurê

Matêwre 5.31-32; Makre 10.1-12; Rukre 16.18; mãânên Wam Korit 7.10-16

¹Tã nhùm Jejus mã inhmã kapêr pa nê mã inhmã anê pa mã ixrohã Garirej rùm ixkato nê pyhti pê Jotãw hã rê nê hpãnhã ihkjê hã ri ixpa. Pika pê Jutej kamã. ²Hãmri nhùm mã ohtõ nê Jejus pumu nê man mã ixwÿr mra nhùm mã omu nê mã kãm akupÿm mã à xwÿnhjê ho mex. ³Hãmri nhùm Parijew nhõ xwÿnh kwÿjaja hwÿr mra. Hêx rom kot kamã hamak nê tanhmã ho kapêr punuj to kaxyw hwÿr mra nê kãm: —Pa? Kwa mã inhmã mẽmoj jarê. Tanhmã na pre amnepêm finat Mojesja mã pahte mã pahprõ kaga hã mã panhîgêjtê mã karõ hto? Xà kot mã pahprõ pahkwÿm ri tanhmã amnhĩ nhîpêx to pu mã hkaga nhùm ja Tirtùm mã mex nê nã? Anê.

⁴Hãmri nhùm mã kãm:

—Nà na ka mã aprĩ hã Mojes kot tanhmã ja jarênh to mar mex kêt nê. Ja kot anhÿr kêt. Amnepêm mẽmoj piitã hkrax kãm na pre Tirtùm my nê nija wa hipêx. Axpên kaxyw wa hipêx. ⁵Hãmri nê wa hkukamã tanhmã wa kot amnhĩ nhîpêx to hã wa harê nê wa harênh o:

Koja mẽmyjaja hprõ kaxyw hãmri nê gryk ã katorxà mã hipêxà wa hkaga nê ãm hprõ kõt pix mã pa ho pa. Te wa tipxi nê ri wa pa pyrãk o amnhĩ nhîpêx. Anê.

—Na pre ã Mojes Tirtùm nhÿ hã mã kãm ja jarênh anê. ⁶Jakamã koja te wa tipxi nê ri wa pa pyrãk o axpên nhîpêx o pa. Tirtùm tãm kot axpên mã wa õr kênã kot kêt wa axtem nê ri htÿx ri hamaxpêr nê axpên kaga. Anê.

⁷Hãmri nhùm mã kuma nê kãm:

—Tỳ. Nom finat Mojes na pre mẽ pakukamã mẽ panhĩgêjtê mã ã ja hã karõ anê nê mẽ kãm:

Kot kaj mẽ aprõ kaga kaxyw hãmri nê ra kêp aprõ hkêtt ã hã kagã nhĩpêx nê kãm agõ nê amnhĩ nê hano kê ma tẽ.

—Anhỹr o na pre mẽ kãm hã karõ. Tã ka na ka mẽ ixte axpên kaga hkêtt ã mẽ inhmã karõ. Anê.

⁸ Hãmri nhũm mẽ kuma nê mẽ kãm:

—Tỳ no ãm mẽ kãm Tĩrtũm kapêr kôtt amnhĩ nhĩpêx prãm kêt jakamã na pre ã mẽ kãm ja jarênh anê. No amnepêmm mẽmoj piitã hkrax kãm na prem ã amnhĩ nhĩpêx anhỹr o pa hkêtt nê. ⁹ Jakamã kêr ka mẽ aprõ kaga hkêtt nê apa. Kot kaj mẽ hkaga nê hpãnhã nhãm mẽhõ ho aprõ nhũm Tĩrtũm noo mã te ate wam aprõ kamã nhãm aprõ nyw o amnhĩkati pyrãk. Tĩrtũm pê ja omnuj tỳx nê. Rỳ koja mẽhõ hprõ kaga ka hpãnhã ho aprõ nhũm Tĩrtũm noo mã te ate wam mjên pê ho amnhĩkati pyrãk. Ja mããnênn Tĩrtũm pê omnuj tỳx nê. Anê.

Nhũm pre ã Parijew nhõ xwỳnhjê mã kapêr anê. ¹⁰ Hãmri pa mẽ ixte hkôtt ixpa ho ixpa xwỳnhjaja ã kapêr anhỹrja ã kuma nê mẽ kãm:

—Xà na hte mẽ mjên ra kãm mẽ hprõ hkĩnh kêt tã hkaga hkêtt nê arĩ hkôtt pa ho pa nhũm hte Tĩrtũm mã ja mex nê nà? Jakamã kwa xà kot paj mẽ nhỹrmã ixprõ kaga pymaj ixprõ hkêtt kumrêx nê ixpa ho ixpa nhũm ja mẽ inhmã mex nê nà? Anê.

¹¹ Hãmri nhũm mẽ inhmã:

—Nà ãm hãmri na ka mẽ ja jarê. No mẽ ate harênhja na mẽ piitã mẽ kãm mex kêt. Koja Tĩrtũm tãm amã aprõ hkêtt ã ajarê ka rĩ aprõ hkêtt nê ahte ajamakêtkati nê ri apa. ¹² Na htem piitã hprõ nê pa hkêtt nê.

Na hte kamã tanhmã mẽ kute xwỳnhjaja kormã hprĩre ri tanhmã kute mỳrapê kãm hprõ hprãm kêt nê pa.

Nê kamã tanhmã mẽ ho mỳrapê nhũm mẽ hkurê hkêtt nê hprõ hkêtt nê pa.

Nê kamã mẽ kãm Tĩrtũm mã tanhmã amnhĩ to ho pa pix prãm xãj kãm hprõ hprãm kêt nê pa.

Tã kot kaj mẽ jajê pyrã nê ã amnhĩ nhĩpêx anhỹr prãm nê rĩ kam nê aprõ hkêtt nê apa. Anê.

Jejus kot amnhĩ nê mẽhprĩjê janor kêt ã harênh

Makre 10.13-16; Rukre 18.15-17

¹³ Tã nhũm Ijaew kwỳjaja Jejus pumu nê hwỳr mẽ hkrarejê jamý nê mẽ o mra. Kot mẽ hã ãhkra jaxwỳr nê mẽ ho Tĩrtũm wỳr kaxyw hwỳr mẽ o mra. Hãmri pa mẽ ixte hkôtt ixpa ho ixpa xwỳnhjaja tee ri mẽ omu nê tanhmã nê mẽ kãm ixkapêr to nê mẽ kãm:

—Tk. Mo kaxyw na ka mẽ Jejus wỳr mẽ o mra? Kormã mẽ ràxre kênã. Kwa mẽ ma akupỳm mẽ o mra nà? Anê.

¹⁴ Hãmri nhũm Jejus mẽ inhma nê mẽ inhmã:

—Kwa nà mẽ ri inhnê mẽhprĩjê kurê hkêtt nê. Kwãr mẽ mãmrĩ ixwỳr mẽ o mra. Anê.

Hãmri nê amnhĩ wỳr mẽ mẽ kãm hpa ho apê nhũm mẽ hwỳr mẽ o mra nhũm mẽ kuri kuhê nhũm mẽ omu nê mẽ hã mẽ inhmã:

—E mẽ jarejê pumu. Na htem hamakêtkati nê hkĩnh nê ri pa. Nê mẽ kãm amnhĩ to rũnh prãm kêt nê. Tã Tĩrtũm kôtt mẽ kot amnhĩ nhĩpêx o mẽ pa xwỳnhjaja te mẽ kot jajê pyrãa nê kãm amnhĩ to rũnh prãm kêt nê pa. Anê.

¹⁵ Hãmri nê mẽ hã ãhkra jaxwỳr nê mẽ ho Tĩrtũm wỳr hãmri nê mẽ inhmã anê pa mẽ ma axte mẽ kurũm mõ.

Kàxpore rũnh xwỳnh jarênh

Makre 10.17-22; Rukre 18.18-23; mããnênn Rõmãn 3.19-20; Wam Ximotre 6.6; Xiakre 2.10

¹⁶ Tã nhũm Ijaew õja Jejus wỳr tẽ nê kãm: —Pa mẽ ijahkre xwỳnh? Kwa inhmã mẽmoj jarê. Tanhmã kot pa nhỹrmã Tĩrtũm ri ixtĩr tũm nê ixpa ho ixpa kaxyw amnhĩ nhĩpêx to wehe? Anê.

¹⁷ Hãmri nhũm kãm:

—Tk. Ra Tĩrtũm kot nhỹrmã mẽ atĩr tũm nê apa kaxyw mẽmoj tã mẽ amã karõ nhũm ate mar mex kênã kot ka kêt ri axte ja hã ixkukja. Nà Tĩrtũmja mex o mex jakamã kot kaj amã kuri atĩr tũm nê apa hprãm hã kot kaj kapêr kôtt amnhĩ nhĩpêx no ri apa. Anê.

¹⁸ Hãmri nhũm kãm:

—No nhỹ kapêr kôtt kot paj amnhĩ nhĩpêx o ri ixpa wehe? Anê.

Hãmri nhũm kãm:

—Na pre mẽ amã mẽmoj tã karõ ho:

Kêr ka mẽ axpên par kêt nê.

Ně nhām mẽ hprõ ho amnhĩkati hkêt nẽ.
Ně mẽ kệp axàhkĩnh kêt nẽ.

Ně tanhmã mẽ ho axêx to hkêt nẽ.

¹⁹ Nẽ anhĩpêêxà mẽ akatorxà wa hã api-
jaàm nẽ wa ho mex pê wa kutã ano-
jarêt o ri apa.

Ně amã akwỳjê hã ma ho te ka amã
amnhĩ tã ma pyræk o mẽ hipêx. Jao tãm
mẽ hipêx o ri apa.

E kot kaj amã nhỹrmã Tĩrtũm kuri atĩr tũm
nẽ apa hprãm hã kêt ka ã amnhĩ nhĩpêx
anhỹr o ri apa. Anẽ.

²⁰ Hãmri nhũm kuma nẽ kãm:

—Ku nhũm. Ra ã ixte amnhĩ nhĩpêx anhỹr
o ri ixpa kênã. Nom te kormã ixtĩr tũm nẽ
ixpa kaxyw ixte tãm kêt pyræk. Kwa axte
inhmã mẽmoj jarẽ nà? Anẽ.

²¹ Hãmri nhũm kãm:

—Nà kormã mẽmoj pyxi nẽ arĩk. Na ka
amã akukrêx rax prãm tỳx o amã Tĩrtũm
prãm jakre. Jakamã ma akupỹm tẽ nẽ
akukrêx rax o wẽnê hpa nẽ hpãnhã kàxpore
jamỳ nẽ ma mẽ kệp amrakati xwỳnhjê mã
õr pa. Hãmri nẽ rĩ akupỹn ixwỳr tẽ nẽ rĩ
ixkôt apa ho apa. Anẽ.

²² Hãmri nhũm kuma nẽ tee ri amnhĩ
kukamã hamaxpêr. Kãm hikukrêx rax japê
nẽ kãm kamã ãhkra karo hprãm kêt nẽ.
Hãmri nẽ tee ri Jejus kot ã kãm hã karõ
anhỹrja ma nhũm ja kệp omnuy nẽ nhũm
ma akupỹm htêm kurê kumrêx. ²³ Hãmri
nhũm Jejus tee ri omu nẽ mẽ inhmã:

—Hêxta waa nẽ. Koja mẽ hikukrêx rũnh
xwỳnhjaja ohtõ nẽ kãm mẽ hikukrêx japê
xà Tĩrtũm mẽ wa ixri htĩr tũm nẽ pa ho
pa hkêt nẽ. Wa ixte amnhĩ nhĩpêxja mẽ
kệp hihtỳx. ²⁴ Mẽ kãm hikukrêx rũnh mã
ãhkra karo hprãm kêt rãhã tee ri kãm Tĩrtũm
kôt amnhĩ nhĩpêx prãm kaprỳ. Te ho mẽhõ
kot menh kagõ hã hkre nẽ kãm kagõ katõk
prãm kêt rãhã kãm guhkrax kãm ãr prãm
kaprỳta pyræk. Anẽ.

Nhũm pre ã Jejus mẽ inhmã kapêr anẽ.

²⁵ Hãmri pa mẽ kuma nẽ tee ri amnhĩ
kukamã ijamaxpêr nẽ kãm:

—Kwa mẽ ixpiitã mẽ inhmã mẽ ixkukrêx
japê kênã. Jakamã xà kot paj mẽ ixpiitã
nhỹrmã war ari ixtĩr tũm nẽ ixpa ho ixpa
hkêt nẽ nà? Anẽ.

²⁶ Hãmri nhũm mẽ inhmã:

—Nà kot kaj mẽ amnhĩ krã hkôt mẽ amã
mẽ akukrêx japêja mã anhũrer kêt nẽ. ãm
Tĩrtũm pix na hte ja kaxyw tanhmã mẽ
akrã hto ka mẽ amã akukrêx japê hkêt nẽ.
Jao ra mẽ apê Tĩrtũm mẽ wa ixri atĩr tũm nẽ
mẽ apa ho mẽ apa mã xwỳnh. Anẽ.

²⁷ Hãmri nhũm Simãw Pêtre kãm:

—Kwa no we mẽ pajaja Pahĩti? Na pa
prem agryk ã mẽmoj piitã hkaga hpa nẽ
akôt ixpa ho ixpa. Jakamã kot paj mẽ
nhỹrmã war ari ixtĩr tũm nẽ ixpa ho ixpa
nà? Anẽ.

²⁸ Hãmri nhũm kuma nẽ mẽ ixpiitã mẽ
inhmã:

—Tỳ. Kot paj nhỹrmã mẽmoj piitã ho nyw
pa hãmri nẽ ixte mẽ ho amnhĩptar o ixkrĩ
xà maati kamã nhỹ nẽ mẽ piitã mẽ kot
tanhmã amnhĩ nhĩpêx to hã mẽ omunh xà
hkôt tanhmã mẽ harênh to. Tã mẽ kajaja
mẽ ate ixkôt apa ho apa xwỳnhjaja kot kaj
mẽ inhmã Ijaew kot amnhĩ nhĩpêx ã mẽ
omunh xà hkôt ahpỹnhã tanhmã inhmã
mẽ harênh to. Mẽ mex ã mẽ harê rỳ mẽ
mex kêt ã mẽ harê. Kot kaj mẽ ã inhmã
mẽ harênh anẽ. ãm hãmri na pa mẽ amã
ixkapêr anẽ.

²⁹ —Nẽ ka mẽ atõ inhmã tanhmã amnhĩ
nhĩpêx to ho apa kaxyw akwỳjê re nẽ ma
inhmã mẽmoj to anhỹr o ri apa. Tanhmã
anhõrkwỹ rỳ atõ rỳ atõx re. Rỳ aprõ nẽ
akrajê re. Rỳ akatorxà mẽ anhĩpêêxà war
are. Rỳ akukrêx piitã rer pa hãmri nẽ ma
mẽ piitã mẽ kãm ixkapêr o mẽ ahkre ho ri
mẽ hkôt apa. Hã kot paj mẽ apumu nẽ mẽ
ato mex rax nẽ. Hãmri ka mẽ ma mẽ hkôt
apa nẽ mẽ kãm ixkapêr jarênh o apa nhũm
mẽ kot mẽ amar xwỳnh kwỳjaja mẽ ama nẽ
kãm mẽ akĩnh nẽ. Nẽ ra mẽ ate akwỳjê rer
par tã mẽ tãmjaja te mẽ apê mẽ hkra rỳ mẽ
htõ rỳ mẽ htõx pyræk o mẽ anhĩpêx nẽ mẽ
ato mex o pa. Hãmri ka mẽ nhỹrmã ty nẽ
ma Tĩrtũm mẽ wa inhõ krĩ hwỳr api nẽ wa
ixkuri amex kumrêx nẽ atĩr tũm nẽ apa ho
apa. ³⁰ Nom kwa kêt ka mẽ amnhĩ tã ja ma
nẽ amnhĩ to rũnh xwỳnh ã amnhĩ kamnhĩx
kêt nẽ. Jar mẽ kot amnhĩ to rũnh ã amnhĩ to
jarkrar xwỳnhjaja koja mẽ nhỹrmã amnhĩ
to hkryre hã amnhĩ pumu. No jar mẽ kot
amnhĩ to hkryre xwỳnh ã amnhĩ jarênh
xwỳnhjaja koja mẽ nhỹrmã amnhĩ to rũnh ã
amnhĩ pumu. Anẽ.

20

Jejus kot nhÿrmã hkrajê ho mex ã harênh Rômãn 9.14-16

¹ Nhÿm Jejus arÿ mẽ ixte hkôt ixpa ho ixpa xwÿnhjê mã awjarê nê mẽ inhmã:

—Nê kot paj nhÿrmã tanhmã mẽ ato mex to. Te ixpê hpur nhô dôn kot amnhÿ nhÿpêx pyrãk o mẽ anhÿpêx. Kojã pur nhô dônja ihpur kãm mẽmo xô ra hkà hpa nhÿm omu hãmri nê kaxyw mẽ àpênh xwÿnhjê japêr kaxyw ma gãm tẽ. Nê gáp xa nê mẽ kãm akir nhÿm mẽ hã akuprô. ² Hãmri nhÿm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axàpênh o amÿkry pa hpãnhã mẽ kot apkati pixi hã mẽ àpênh pãnhã mẽ kãm amnhÿrer xãja kôt mẽ amã amnhÿre.” Anê hãmri nhÿm mẽ kuma nê kãm: “Tôe. Nà kot paj mẽ amã apê.” Anê nhÿm pur wÿr mẽ kurê nhÿm mẽ ma kãm àpênh mã mra.

³ —Tã nhÿm arÿ kÿx mã myt tẽ nhÿm pur nhô dôn akupÿm gãm tẽ nhÿm mẽ hkwyã arÿ kuhê. ⁴ Nhÿm tee ri mẽ omu nê mẽ kãm: “Kwa mon ka mẽ axàpênh kêt nê arÿ akuhê? E. Mẽ ma wamtajê hkôt mra nê inhmã apê pa hpãnhã mẽ amã amnhÿrer mex nê.” Anê. ⁵ Hãmri nhÿm mẽ kuma nê ma mẽ hkôt mra. Tã nhÿm ra myt kaxkwa nhÿpôk ri ajêt nhÿm hpur nhô dônja mã hkwyãjê ho anê nê. Kê axte mẽ hkôt jajê jano nhÿm mẽ ma mẽ hkôt mra. Tã nhÿm ra myt ahpanh grire nhÿm ma akupÿm kêwe gãm tẽ nê mã mẽ ho anê nê axte mẽ hkôt jajê rẽ.

⁶ —Tã nhÿm ra myt grire nhÿm ma akupÿm kêwe gãm tẽ nê jajê pumu nhÿm kê wem arÿ gáp kuhê. Hãmri nhÿm tee ri mẽ omu nê mẽ kãm: “Kwa mon ka mẽ axàpênh kêt nê atÿx gáp akuhê ho akuhê?” Anê. ⁷ Hãmri nhÿm mẽ kãm: “Nà mẽhõ kot mẽ inhmã mẽ ixàpênh ã karõre hã.” Anê. Hãmri nhÿm mẽ kãm: “Tôe. Mẽ ma mẽ hkôt ixpur wÿr mra nê inhmã mãn apê.” Anê hãmri nhÿm mẽ kuma nê ma hkwyãjê hkôt mra.

⁸ —Tã nhÿm ra kamát. Hãmri nhÿm hpur nhô dônja kãm àpênh xwÿnhjê krãhtÿm wÿr tẽ nê kãm: “E. Ma mẽ hwÿr tẽ nê mẽ kãm anê kê mẽ àpênh kaga nê man akôt mra ka inhmã mẽ kãm amnhÿre. Nom kêr ka hapu hã mẽ mör xwÿnhjê kumrêx mã amnhÿre nê wam mẽ mör xwÿnhjê ho hapu nê mẽ kãm amnhÿre.” Anê. Hãmri nhÿm kãm:

“Tôe. Nà kot paj mẽ ho anê.” Anê. ⁹ Hãmri nê ã mẽ kãm amnhÿrer anê. Hapu hã mẽ mrar xwÿnhjê kumrêx mã amnhÿre. Te mẽ kot kwÿhtã àpênh o amÿkry pyrãk o nhÿm hpãnhã mẽ kãm amnhÿre. ¹⁰ Hãmri nhÿm wam mẽ mrar xwÿnhjaja ja hã mẽ omu nê hkÿnh nê. Hãmri nê htÿx hamaxpêr o: “Nà kot paj xep kàxpore jamÿnh rax o mẽ hakre. Ixàpênh rax o ixte mẽ hakrenh kênã.” Anhÿr tã no nhÿm mẽ piitã mẽ kãm amnhÿrer o axpên pyrãk. Ra pur nhô dôn kot kãm hã karõ xà hkôt. ¹¹ Hãmri nhÿm mẽ hamÿ nê tee ri hkre kamã omu nê we ra hpur nhô dônja kamã gryk nê. ¹² Hãmri nê hwÿr mra nê kãm: “Kwa jajaja na mẽ amã àpênh o ore pyxi nê. No kêt mẽ pajaja na pa mẽ kwÿhtã ixàpênh rax o kamát. Arÿgro htÿx kãm ixàpênh o ixãm o ixtã kamát tã ka pêr ãm mẽ inhmã amnhÿrer o axpên pyrãk. Kwa na ka mẽ ixtomnuj nê.” Anê. ¹³ Hãmri nhÿm mẽ kuma nê mẽ kãm: “Tk. Nà na pa mẽ atomnuj kêt nê. Na pa kwÿhtã tanhmã mẽ amã amnhÿrer to xà jarê ka mẽ inhma nhÿm ja mẽ amã mex nê ka mẽ ma hwÿr axàpênh mã mra. ¹⁴ Kwa mẽ akàxpore jamÿ nê ma mra. ãm pa inhmã hprãm xà hkôt na pa ã mẽ amã amnhÿrer anê. ¹⁵ Ixkàxpore jakamã kot paj nhãm inhmã mẽhõ mã òr prãm xà hkôt kãm kugõ. Tã ka mẽ ã mẽ hã ixkamã agryk anê. E mẽ akàxporeja mÿ nê ma mra.” Anê. Nhÿm ã hpur nhô dôn mẽ kãm kapêr anê. ã mẽ ujarênh kot anhÿr. Anê.

¹⁶ Nhÿm pre ã Jejus mẽ inhmã ujarênh anê nê mẽ inhmã:

—Ja pyrã nê wam mẽ ate ixkôt amnhÿ xunhwÿr xwÿnhjaja nê hapu hã mẽ kot kormã ixkôt amnhÿ xunhwÿr mã xwÿnhjaja kot paj nhÿrmã mẽ apiitã mẽ ato mex kumrêx o axpên pyrãk. Anê.

Jejus kot htyk kukamã amnhÿ jarênh Makre 10.32-34; Rukre 18.31-34

¹⁷ Tã nhÿm Jejus mẽ inhmã anê pa mẽ ixrohã ma Jerujarê hwÿr mō. Mẽ ohtôjê hkôt mō. Hãmri nhÿm Jejus mẽ ixpê 12jê mã anê nê mẽ ixkwÿjê hkàx ã mẽ inhmã kapêr kaxyw ahte hapu hã mẽ ixto mō. ¹⁸ Hãmri nê mẽ inhmã amnhÿ kukamã tanhmã amnhÿ jarênh to nê mẽ inhmã:

—E na pu mẽ ra Jerujarẽ hwỳr mō. Kamã koja mẽ pahkwỳjaja inhĩpêx kati nẽ. Koja mẽ patre krãhtũmjê mẽ Mojes kapêr o mẽ ahkre xwỳnhjê nhĩhkram ijaxà nhũm mẽ kot ixpĩr kaxyw ixtã amỳnê. ¹⁹ Koja mẽ kãm ixkurê xwỳnhjaja ixpynê nẽ Rõm nhõ xwỳnhjê nhõ pōristijê hwỳr ixto tẽ nẽ mẽ kãm tanhmã ixto hêx to. Hãmri nhũm mẽ kuma nẽ mẽ mar xà hkôt tanhmã inhĩpêx to. Nhũm mẽ hkwỳjaja ixtã hpêr o axkê nẽ ixtã akunha nhũm mẽ hkwỳjaja ixto kapêr punuj nẽ tanhmã ijapry hto nẽ ixtak. Hãmri nẽ ma ixto tẽ nẽ pĩ kahpa hã inhõ nẽ ixpĩ. ã koja mẽ inhĩpêx anê. Nom kot paj ixtyk ã ixtã apkati axkrunêpxi nhũm Tĩrtũm akupỳm ixto ixtĩr. Anê.

Xiakre mẽ Juãw wa katorxà kot wa ho Jejus wỳr ã harẽnh

Makre 10.35-45; mããnẽn Rõmãn 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêtre 5.3

²⁰ Tã nhũm Jepetew prõja amnhĩ kôt Jejus wỳr hkra Xiakre mẽ Juãwja wa o tẽ. Kot wa ho Jejus wỳr kaxyw hwỳr wa o tẽ. Mẽ ixpyrà nẽ wa kot Jejus kôt pa ho pa xwỳnhjê hõ na pre wa nhũm wa katorxàja Jejus wỳr wa o tẽ. Hãmri nẽ kutã hkõnkrã ho tẽm nẽ nhỹ ²¹ nhũm kãm:

—Pa mo na? Anê.

Hãmri nhũm kãm:

—Ma ixkrata na pa ixte wa ho awỳr kaxyw awỳr wa o tẽ. Xê kot kaj nhỹrmã ate mẽ piitã mẽ ho amnhĩptar kaxyw nhỹ nhũm ixkrata wa akutã anhĩjê nẽ wa kêp anhõ kôwenatô nẽ akutã anhĩjê nẽ wa ato nhỹ. Ja prãm xàj na pa ã wa ho awỳr anê. Anê.

²² Hãmri nhũm kuma nẽ Xiakre mẽ Juãw wa omu nẽ wa kãm:

—Nà na war akatorxàja htỳx ã war ato ixwỳr anê. Koja mẽ tokyx ixpĩ kot paj amnhĩ xà htỳx kãm ijamak kãm ty. Tã xà koja mẽ ixpyrà nẽ ã war anhĩpêx anê ka wa ixpyrà nẽ amnhĩ xà htỳx kamã ajamak rax kãm ty nà? Anê.

Hãmri nhũm wa kãm:

—Tỳ. Nà kot pa wa ijaxwỳja anê nẽ apyrã nẽ amnhĩ xà htỳx kãm ijamak kãm ty. Anê.

²³ Hãmri nhũm wa kãm:

—Nà ãm hãmri na ka wa amnhĩ jarẽ. War ate ixpyrà nẽ ixkôt amnhĩ xà htỳx kãm aja-mak kãm atyk mã kênã. Tã nom war akatorxà kot war ato ixwỳrta ã kot paj tanhmã war amã nẽ hkêt nẽ. Kêt inhõ Papaj tãm koja ixkaxyw mẽhõ japêr nhũm inhĩhkô hã nhỹ. No pa kot paj amnhĩ kaxyw mẽhõ jarẽnh kêt nẽ.

Anhỹr o wa kãm kapêr. ²⁴ Hãmri pa mẽ ixte wa urak nẽ Jejus kôt ixpa ho ixpa xwỳnhjaja wa katorxà kot ã wa ho Jejus wỳr anhỹrja ã kuma nẽ wa kamã inhgryk nẽ. Hãmri nẽ axpên mã ixkapêr o:

—Tk. Nà koja Juãw mẽ Xiakre wa nhỹrmã kêp õ kôwenatô nẽ mẽ pahto amnhĩptar kêt kumrêx. Anê.

²⁵ Nhũm Jejus mẽ inhma nẽ amnhĩ wỳr mẽ ixpiitã mẽ inhma hpa ho apê nẽ mẽ inhma:

—E mẽ amnê ixwỳr axkamẽ pa mẽ amã awjarẽ mãn. Anê.

Hãmri pa mẽ hwỳr axkamẽ nhũm mẽ inhma:

—E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh tỳx jakamã amarĩ ixkre hkre jakry kamã hkrĩ ho hkrĩ nẽ kãm mẽ àpênh xwỳnhjê pix mã mẽmo mẽ àpênh ã karõ. Na htem ã amnhĩ nhĩpêx anhỹr o hkrĩ. Nẽ mẽ kot mex ã harẽnh kaxyw tanhmã mẽ ho mex to ho pa. ²⁶⁻²⁷ Tã no mẽ kajaja. Kêr ka mẽ ho mẽ urak kêt nẽ. ãm te amarĩ ri mẽ apa pyrak o axpên nhĩpêx o ri apa. Nẽ te mẽ apê mẽ kãm axàpênh xwỳnh pyrak o amnhĩ nhĩpêx o ri mẽ hkôt apa. No kêr ka mẽ ho amnhĩptar mã ajamxpêr o ri apa hkêt nẽ. ²⁸ Mẽ ate mẽmoj tã pa ixkutã anojarêt ho apa kaxyw na pa pre mẽ awỳr ixwryk kêt nẽ. Ixte amarĩ mẽmoj to mẽ kamjaja mẽ akutã inhnojarêt o ixpa kaxyw na pa pre mẽ awỳr wrỳ. Nẽ mẽ ate ixkôt amnhĩ xunhwỳr xwỳnhjê nẽ ixtyk kaxyw na pa pre wrỳ. Anê.

Jejus kot no hkre xwỳnh wa ho mex ã harẽnh

Matêwre 9.27-31; Makre 10.46-52; Rukre 18.35-43

²⁹ Tã pa mẽ Jejus kôt kormã Jerujarẽ hwỳr ra Jeriko htêp o mō. Hãmri nẽ kurũm ixkaton mō nhũm mẽ ohtô nẽ mẽ ixkôt

mra. ³⁰ Nhũm pry nhĩhkjê hã no hkre xwýnh wa àhwýr o hkrĩ xwýnhja wa amnhĩ wýr mē inhm̄rar mar o nhỹ. Mē ohtôo nē Jejus kôt mē mrar xwýnhjê mrar ma nē mē kãm:

—Kwa mo na? Mēmoj wýr na ka mē axohtô nē mra? Anē.

Hãmri nhũm mē wa kãm:

—Nà Jejus pē Najare nhõ xwýnhhta kôt na pa mē mra. Anē.

Hãmri nhũm wa mē kuma hãmri nē kàx pē Jejus mã kapēr nē kãm:

—Pa Pahihti? E apē mē inhõ Pahihti mex na ka. Te apē amnepēm anhĩgēt pahihti Tawita pyræk. Jakamã kwa wa ixkamã axukaprĩ nē akupým wa ixto mex. Anē.

³¹ Hãmri nhũm Jejus kôt mē mör xwýnhjaja wa kuma nē wa kãm:

—Tk. Kwa war akapēr kêt nē nhỹ nà. Anē.

Tã no nhũm wa ãm mē kuma nē xatã amnhĩ to kuwý. Kàx pē amnhĩ to kuwý.

³² Hãmri nhũm Jejus wa kuma nē xa nē wa omu nē wa kãm:

—Pa mo na? Tanhmã kot pa wa ato? Anē.

³³ Hãmri nhũm wa kãm:

—Nà akupým wa inhmã wa ixrĩt mex prãm. Anē.

³⁴ Hãmri nhũm kãm wa hkaprĩ nē wa no htok nhũm wa akupým rĩt mex kurê kumrêx. Hãmri nē rĩt mex ã amnhĩ pumu nē hkĩnh tỳx nē ma Jejus kôt hkwýjê hkôt mō.

21

Jejus kot Jerujarê hwýr àr ã harênh

Makre 11.1-11; Rukre 19.28-40; Juãw 12.12-19

¹ Tã nhũm Jejus kormã Jerujarê hwýr kormã mō. Pa mē hkôt mō nē ra Petake hwýr ixàhtêp o mō. Hixêt pē Oriwêhti kahti ri na pre krĩja xa. Jakamã pa mē wa hwýr ixàhtêp o mō nhũm Jejus mē ixte hkôt ixpa ho ixpa xwýnhjê wa ho axkrut nē amnhĩ kukamã wa kumê. ² Nē wa kãm:

—E wa ma krĩ mũj wýr mē ixkukamã wa tē. Nē wa hwýr axà nē nhỹri jumênre mē hkra wa kãm ê nē wa ãm xwýnh wa omu hãmri nē kãm ê xà hpôt nē man akupým amnê hamê wa o tē. ³ Koja mēhõ ja hã war apumu nē hã tanhmã war amã kapēr to ka wa kãm ã ijarênh anē nē kãm: “Nà mē

panhõ Pahihti na hã karõ pa wa hwýr tē.” Anhýr o wa kãm ijarê. Hãmri nhũm war ama nē war amã ör kurê kumrêx. E wa ma hwýr tē. Anē.

⁴ Tĩrtũm kapēr ã kagà htũm ra kot ja kukamã harênh. Na pre ra Tĩrtũm nhỹ hã kapēr xwýnhjê hõ ja jarê nē hã kagà ho:

⁵ Pa Jerujarê nhõ xwýnhjaja. Kwa mē tee ri amnhĩ kukamã ajamaxpēr ho amã ma hkêt nē. Ota mē anhõ pahi nywta ra jumênre hã nhỹ nē mē awýr hpôx o tē. Te kot amnhĩ to grire xwýnh pyræk o amnhĩ nhĩpêx nē tē.

⁶ Anhýr o kot hkukamã harênh jakamã nhũm Jejus amnhĩ kukamã ja wa kumê hãmri nhũm wa ma hwýr htēm kurê kumrêx. ⁷ Nē krĩta wýr pøj nhũm Jejus kot wa kãm harênh xà hkôt nhũm wa jumênreta pumu. Hãmri nē hamê wa kãm ê xà hpôt nē ma Jejus wýr wa o tē. Hãmri nē kaxyw amnhĩ xê hkwý hkwýr nē kãm ho jumênre nywta kô kahty. Nē kãm ho htỳx nē o xa nhũm Jejus hã nhỹ nē hã mō. ⁸ Kormã Jerujarê hwýr hixêt ã àpir o mō. Nhũm mē kot omunh o kuhê xwýnhjaja hkĩnh nē ma hkukamã pry ho mex kaxyw amnhĩ xê hkwýptyr ho mō. Nē pô hkwý jakà nē utyr o mō. ⁹ Nhũm mē hkwýjaja Jejus kukamã mra nhũm mē hkwýjaja hapu hã hkôt mra. Nē piitã kàx pē Tĩrtũm mex o mex ã harênh o hkôt mō nē harênh o:

Ota Tĩrtũm kot mē pahwýr mēnh xwýnhhta ra pøj. ãm hãmri na mē pahwýr wrý. Ja na mex kumrêx. Kêp mē panhõ Pahihti mex na. ãm hãmri na pre Tĩrtũm mē pahwýr kumê. Tĩrtũm mex kumrêx. ãm mex o mex.

Anhýr o Jejus kôt Jerujarê hwýr harênh o mō. Kot mē ho amnhĩptâr kurê kumrêx ã hkamnhĩx jakamã hkĩnh nē hkôt ã harênh anhýr o mō. ¹⁰ Hãmri nhũm krĩ nhõ xwýnhjaja tee ri mē kuma nē axpên mã:

—Kwa mēhõ na we hpôx o mō nhũm mē ã hkôt harênh anhýr o mō? Anē.

¹¹ Hãmri nhũm Jejus kôt mē mrar xwýnhjaja mē kuma nē mē kãm:

—Nà Tĩrtũm nhỹ hã kapēr jarênh xwýnh pē Jejus na. Kêp Garirej kamã krĩ pē Najare nhõ xwýnhhta na. Anē.

Jejus kot Tirtûm nhõrkwÿ hwÿr àr ã harênh Makre 11.15-19; Rukre 19.45-48; Juãw 2.13-22

¹²⁻¹³ Tã hãmri nhũm Jejus Jerujarê wÿr axà nê jumênre rûm wrÿ nê ma Tirtûm mã amnhĩ jarênh xà hã ixkre hwÿr tẽ nê axà. Hãmri nê tee ri mẽ kot tanhmã ixkre kamã amnhĩ nhĩpêx to hã mẽ omunh o xa. Nhũm mẽ axtem nê môx nê ôwêhti nê tuuti ho wênê ho kuhê. Mẽ kot haprôr nê Tirtûm mã amnhĩ jarênh kaxyw kãm hpar nê ôr kaxyw mẽ kãm ho wênê ho kuhê. Nom axtem nê mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nê tee ri mẽ omu nhũm ja kêp omnuy tÿx kumrêx. Hãmri nhũm mẽ hwÿr tẽ nê mẽ kot kàxpore ho pinphanh xwÿnhjê pê mẽ õ mēsti rênh pa. Nê mẽ kot tuuti ho wênê xwÿnhjê pê hkrĩ xà hkujate nê rênh pa. Hãmri nê mẽ kãm:

—Tk. Kwa Tirtûm kapêr ã kagà htũm kot ixkreja jarênh kot:

Inhõrkwÿja ãm mẽ ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhĩ nhĩpêx anê. E kwa mẽ ajapôx tokyx anê. Anê.

Hãmri nê mẽ kator pa nhũm mẽ ma hapêx. ¹⁴ Hãmri nhũm mẽ no hkre xwÿnhjaja nê mẽ hyk o mẽ pa xwÿnhjaja mra nê agjê nê Jejus kutã kuhê nhũm mẽ omu nê akupÿm mẽ ho mex. ¹⁵⁻¹⁶ Hãmri nhũm mẽhprĩ hkwÿjaja hwÿr mra nê kuri kãm mex o mex ã gre nê kãm grer o:

Amex kumrêx Pahihti.

Tirtûm na pre mẽ ixwÿr amê.

Kot kaj te anhĩgêt Tawi pyrà nê mẽ ixto amnhĩptàr o apa.

Anhÿr o kãm grer o kuhê. Hãmri nhũm patre krãhtũm mẽ Tirtûm kapêr tũm o mẽ ahkre ho mẽ pa xwÿnhjaja tee ri ã mẽ grer anhÿr ã mẽ kuma. Nê tee ri Jejus kot mẽ no hkre xwÿnhjê mẽ mẽ hyk o mẽ pa xwÿnhjê ho mex ã omunh o kuhê nê gryk nê Jejus wÿr tẽ nê kãm:

—Kwa na mẽhprĩjaja mẽ grer kãm ã ajarênh anê ka mẽ mar kêt nê? Mẽ grerja mexti hã. Anê.

Hãmri nhũm mẽ kãm:

—Tÿ ixte mẽ mar kênã. Tirtûm kãm hprãm xà hkôt na mẽ ã inhmã inhmex o inhmex ã ixtã grer anê. Tirtûm kapêr ã

kagà htũm kot ã mẽ hkukamã harênh kot anhÿr. Mẽ harênh kot:

Koja mẽhprĩjaja Pahihti mã mex o mex ã grer o kuhê.

Anhÿr o kot mẽ hkukamã harênh kênã. Tã mãn ka mẽ kormã kamã harênh kêt jakamã na ka mẽ ja jarênh mar kêt nê. Kwãr mẽ mãmrĩ ã inhmex ã grer anê.

¹⁷ Anhÿr o mẽ kãm kapêr hãmri nê mẽ inhmã anê pa mẽ ixkreta rûm ijaopj nê ma akupÿm Petãn wÿr mra nê kamã amnhĩm hikra.

Jejus kot mẽmo hpàr mã kapêr ã harênh Makre 11.12-14; mãânên Xiakre 1.6

¹⁸ Tã nhũm kwÿhtã nhũm Jejus kànhmã nhÿ nê mẽ inhmã anê pa mẽ ixrohã ma akupÿm Jerujarê hwÿr mra. Hãmri nê kormã mõ nhũm Jejus pry kahti ri ra kãm prãm nê. ¹⁹ Hãmri nê mẽmo pĩ pê fikêhti jarênhja pumu nê kot ô hkwÿ rênh nê hkrêr kaxyw hwÿr màt. Hãmri nê tee ri ô japêr nhũm ô hkêt nê ãm hô hpix harir. Hãmri nhũm tee ri omu nê kãm:

—E kot kaj axte axô hkêt kumrêx.

Anhÿrja o nhũm grà par kurê kumrêx.

²⁰ Hãmri pa mẽ ixte hkôt ixpa ho ixpa xwÿnhjaja omu nê Jejus mã:

—Kokÿÿ. Kwa tanhmã na we amnhĩ nhĩpêx to nê grà kurê kumrêx? Anê.

²¹ Nhũm mẽ inhmã:

—Nã kot kaj mẽ ixpyrà nê fikêhti kot tanhmã amnhĩ nhĩpêx to kaxyw Tirtûm mã ajamaxpêr tÿx nê nhũm amã hprãm xà hkôt amã tanhmã hipêx to. Nom kêr ka mẽ ajamaxpêr kati ho tee ri hkukamã ajamaxpêr kêt nê. ãm kaxyw Tirtûm kôt ajamaxpêr tÿx nê nhũm mẽ amã tanhmã mẽmoj nhĩpêx to. ãm hãmri na pa mẽ amã ja jarê. No ãm ja pix kêt. Kot kaj mẽ mãânên hixêt mÿj mã akapêr nê kãm: “E anhÿr xàta rûm akato nê ma tẽ nê gô rax kãm mrô.” Anê nhũm amar xà hkôt ã amnhĩ nhĩpêx anê.

²² —Nê kot kaj mẽ mẽmoj tã Tirtûm wÿr nê kaxyw kãm ajamaxpêr tÿx kãm hã awÿ nhũm amã mẽmoj prãm xwÿnhhta gô. Anê.

Mêhõ nhÿ hã Jejus kot mẽ ahkre hã harênh

Makre 11.27-33; Rukre 20.1-8

²³ Nhũm arĩgro hõ hã nhũm Jejus kêwe axte Tirtûm mã amnhĩ jarênh xà hã ixkreja

wÿr axà nê kamã mẽ ahkre ho nhÿ. Mẽ kãm tanhmã mẽ kot amnhĩ nhĩpêx to nê nhÿrmã Tĩrtũm mẽ wa kuri htĩr tũm nê pa kaxyw tanhmã mẽ kãm kapêr to ho nhÿ. Hãmri nhũm Ijaew krãhtũmjê mẽ mẽ õ patre krãhtũmjaja hãmri hwÿr mra nê hêx rom mẽmoj tã hkukja nê kãm:

—Kwa mẽ inhmã amnhĩ jarê. Mẽhõ nhÿ hã na ka hte ã amnhĩ nhĩpêx anhÿr o apa? Na ka hte akupÿm mẽ ho mex o apa nê tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anê nà? Anê.

²⁴ Hãmri nhũm mẽ kãm:

—Nà kot pa ixkumrêx mẽmoj tã mẽ akukja. Ka mẽ inhma nê tanhmã inhmã harênh to pa rĩ kormã mẽ amã amnhĩ jarê. ²⁵⁻²⁶ Finat Juãw Paxis ã kot paj mẽ akukja. Mẽhõ nhÿ hã na pre hte mẽ hkrã kumrãr o pa? Xà amnhĩ krã hkôt nà? Xà Tĩrtũm nhÿ hã? E mẽ atõ inhmã ja jarê. Anê.

Hãmri nhũm mẽ kuma nê tee ri kot tanhmã kutã kãm harênh to hkukamã hamaxpêr pê axpên pumunh o kuhê nê axpên mã:

—Kwa tanhmã kot puj wem kãm ja jarênh to? Or mẽ kot mar o kuhê xwÿnhjaja na htem kêp Tĩrtũm nhÿ hã kapêr jarênh xwÿnh ã harê. Tã kot puj mẽ kãm kot amnhĩ krã hkôt kot mẽ hkrã kumrãr ã harê nhũm mẽ tee ri mẽ pama nê mẽ pakamã gryk tÿx nê. Nê mẽ paxêx rom ã mẽ pahte kãm pakapêr anhÿr ã mẽ pahpumu nê kên o mẽ pahtak o mẽ panhĩmex. No kot puj mẽ kãm Tĩrtũm nhÿ hã kot mẽ hkrã kumrãr ã harê hãmri nhũm mẽ pamã: “Kwa ã kot anhÿr kênã na ka prem kapêr ma nê hkôt ajamaxpêr kêt nê?” Anê. Jakamã kot puj mẽ ja pymaj tanhmã kãm harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê.

Mẽ kot tanhmã Jejus mã nê nhũm kot ta pãnhã tanhmã mẽ kãm nê pymaj nhũm mẽ tee ri kãm tanhmã nê hprãm kaprÿ o kuhê.

²⁷ Hãmri nê kãm:

—Konên. Mẽ ixte mẽhõ nhÿ hã kapêr o pa hã omunhre hã. Anê.

Hãmri nhũm mẽ kuma nê mẽ kãm:

—Tk. Tôe kot pa xep ijaxwÿja mẽ amã tanhmã amnhĩ jarênh to hkêt nê. Ijaxwÿja ixte mẽhõ nhÿ hã ã ixte amnhĩ nhĩpêx

anhÿr o ri ixpa hã amnhĩ pumunhre hã. Anê.

Mẽhõ my mẽ hkra wa pijakrut ã wa harênh

Matêwre 7.21-23; Rukre 7.29-30

²⁸ Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapêr nê mẽmoj tã kuxi nê tanhmã mẽ kãm ujarênh to nê mẽ kãm:

—E pa mẽ amã awjarê ka mẽ inhma. Kojã mẽhõ hkra my hamêxkrut. Hãmri nê hkra kot waja mã tanhmã kapêr to nê kãm: “E kêt ka jarãhã ma tẽ nê inhmã pur kãm apê.” Anê. ²⁹ Hãmri nhũm kuma nê pur mã htêm kaga nê hitôt nê. Tãã no ãm hã ahtũmre nê tanhmã hamaxpêr to hãmri nê ma hwÿr tẽ nê kamã àpênh o xa. ³⁰ Hãmri nhũm wa hipêêxàja hpãnhã hkra kot hapu hwÿr tẽ nê mã kãm kapêr anê nê kãm: “E kêt ka ajaxwÿja atõ hkôt tẽ nê wa inhmã apê.” Anê nhũm kuma nê kãm: “Tôe. Nà kot paj ma tẽ.” Anhÿr tã no ãm hõta kĩnhã htêm kêt nê.

³¹ —Jakamã e. Nhÿ hkra na pre hipêêxà kapêr ma nê hkôt amnhĩ nhĩpêx nê kapêr nhĩrôp ãm kêt nê? Xà kot waja nà? Xà kot haputa? E mẽ atõ tanhmã inhmã wa harênh to. Anê.

Hãmri nhũm mẽ kuma nê kãm:

—Nà kot wata. Kot wata na hitôt tã tanhmã hamaxpêr to nê ma tẽ nê kãm apê. Anê.

Hãmri nhũm mẽ kãm:

—Tÿ ãm hãmri na ka harê. No mẽ kajaja te mẽ ate hkra kot haputa kot amnhĩ nhĩpêx pyrãk. Mẽ ate Tĩrtũm kapêr kôt amnhĩ nhĩpêx o apa hã amnhĩ jarênh tã hkwyòm ri amnhĩ nhĩpêx o apa. Te mẽ ate kot hapu kot hipêêxà mã àpênh ã amnhĩ jarênh tã kãm àpênh kêeta pyrãk. No kêt mẽ kot amnhĩ tomnuj o mẽ pa xwÿnh kwÿjjaja na mẽ arom Tĩrtũm kapêr ma nê hkôt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwÿr pa kaxyw ra tãm nê. ãm hãmri na pa mẽ amã ixkapêr. ³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nê ãm ama nê aa kapêr kôt amnhĩ nhĩpêx kêt nê. Nom mẽ kot amnhĩ tomnuj o mẽ pa xwÿnh kwÿjjaja mẽ arom kuma nê Tĩrtũm kôt amnhĩ nhĩpêx. Ka mẽ ja hã mẽ omu nê

ãm mẽ omu nẽ mẽ urak nẽ ã amnhĩ nhĩpêx anhỹr kêt nẽ. Anẽ.

*Mẽ àpênh punu xwýnhjê jarênh
Makre 12.1-12; Rukre 20.9-18*

³³ Nhũm Jejus arĩ Ijaew krähtũmjê mẽ mẽ õ patre krähtũmjê mã kapêr. Nẽ mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nẽ mẽ kãm awjarê nẽ mẽ kãm:

—Koja mēhõ mẽ kot kãm pur kãm àpênh kaxyw hkwyjê mã karõ nhũm mẽ ma hwýr mra nẽ kamã mẽmo hy hkre nẽ hkre pa. Hãmri nhũm hpur nhõ dõn nhỹhỹm nojarêt nẽ kãm mẽ àpênh xwýnhjê mã tanhmã hpur jarênh to nẽ mẽ kãm: “E or ixpur nõ. Kê kamã mẽmoj kà hpa ka mẽ mãmrĩ kamã axujamýnh pa nẽ ho axkjê. Nẽ ixkutêp inhmã inhõ jaxwý nẽ mãmrĩ anhõ tanhmã ho hprãm xà hkôt tanhmã ho.”

—Anhỹr o mẽ kãm kapêr hãmri nẽ ma nhỹhỹm mõ. ³⁴ Tã nhũm ra pur kãm mẽmoj hkà pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpênh xwýnhjê ho axkrunêpxi nẽ akupým mẽ hwýr mẽ kurê. Mẽ kot mẽ kãm hkwy nhõr nhũm mẽ ma kot kãm o mör kaxyw nhũm ma mẽ hwýr mẽ kurê. ³⁵ Nhũm mẽ ma hwýr mõ. Mõõ nẽ ra hwýr pøj nhũm mẽ amnhĩ wýr mẽ omu nẽ axtem nẽ mẽ homnuj nẽ. Nẽ mẽ unê nẽ ja tak nẽ ja pĩ nẽ hõja nhũm mẽ kên o htak hãmri nẽ amnhĩ nẽ wa hano nhũm wa ma akupým ý kamã mõ. ³⁶ Hãmri nhũm mẽ õ patrãwja tee ri wa omu nẽ hamaxpêr o: “Kwa nà na mẽ ixpê inhmã mẽ àpênh xwýnhjê homnuj týx nẽ. Nà kot paj axte mẽ hwýr mẽ hkwyjê rẽ. Nom hpãnhã mẽ ho ohtõ nẽ mẽ kurê. Kê mẽ ohtõ nẽ mẽ hwýr mõ nẽ tã inhmã inhõ hkwy jamý nẽ man ixwýr o mõ.”

—Anhỹr o hamaxpêr hãmri nẽ mẽ hwýr jajê rẽ nhũm mẽ ma akupým mẽ hwýr mõ. Nhũm mẽ amnhĩ wýr mẽ ohtõ hã nẽ mã mẽ ho anê nẽ mẽ hipêx kati nẽ nhũm mẽ ý kamã ma õ patrãwja wýr akupým mõ. ³⁷ Hãmri nhũm tee ri mẽ omu nẽ hamaxpêr o: “Hêxta waa nẽ. Tanhmã kot paj amnhĩ nhĩpêx to? Nà kot paj pêr mẽ hwýr ixkraja mãn mẽ. Inhmã hapê htýx tã kot paj mẽ hwýr kumê kê ma mẽ hwýr mõ. Hãmri nhũm mẽ kêp ixkra hã omu nẽ tanhmã ixpê

ho hkêt nẽ. Nẽ tã inhmã kãm inhõja kwý gõ.” Anẽ.

—Hãmri nẽ mẽ hwýr kumê nhũm ma mõ. ³⁸ Tã hãmri ra mẽ hwýr hpôx o mõ nhũm mẽ amým amnhĩ wýr omu nẽ kêp hkra hã omu nẽ axtem nẽ hã axpên mã amýnê nẽ axpên mã: “E oněj hpur nhõ dõn krata tẽ. Koja nhỹrmã õ papaj mýr pẽ amnhĩm hpur ã pykata pytà nẽ ho õ. Jakamã kwa pu mẽ hpĩr kurê kumrêx nẽ kêp hpur ho arĩk nẽ ho panhõ. E tokyj pu mẽ kupĩ ri.” Anẽ.

³⁹ —Hãmri nhũm ra tẽ nẽ mẽ hwýr pøj nhũm mẽ unê nẽ hpur nẽ ho kato nẽ mã ho anê nẽ kupĩ. ã mẽ ujarênh kot anhỹr. Anẽ.

⁴⁰ Nhũm pre ã Jejus mẽ kãm ujarênh anẽ. Hãmri nẽ hã mẽ hkukja nẽ mẽ kãm:

—E koja pur nhõ dõnja hkra jarênh ma hãmri nẽ tãm mẽ hwýr mõ hãmri nẽ tanhmã mẽ hipêx to wehe? Anẽ.

⁴¹ Hãmri nhũm mẽ kãm:

—Nà koja ma akupým mẽ hwýr mõ hãmri nẽ mẽ homnuj týx nẽ mẽ himex pa. Hãmri nẽ hpãnhã nhãm hpur ã mẽmojjê rẽ nhũm mẽ tã katat kôt kãm àpênh o pa. Anẽ.

⁴² Hãmri nhũm Jejus mẽ kãm:

—Tý ãm hãmri na ka ã mẽ harênh anẽ. Kot mẽ ho anhỹr mã tãm kênã. Mãn ka prem ra Tĩrtũm kapêr ã kagà htũm kot tanhmã ja jarênh toja ma? Harênh kot:

Mẽ kot kên o amnhĩm òrkwy nhĩpêx kaxyw nẽ kên maati pumu nẽ htýx omnuj ã hkamnhĩx nẽ hkagata. Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx. Tĩrtũm kot kên maati mex ã harênh xwýnhta mẽ pamã mex o mex.

ã Tĩrtũm kapêr ã kagà htũm kot ja jarênh kot anhỹr. ⁴³ Ja pyrã nẽ na pre ra Tĩrtũm amnhĩ kaxyw mẽ apê Ijaew xunhwý. Mẽ apê hkra nẽ hkôt mẽ ate amnhĩ nhĩpêx kaxyw amnhĩ kaxyw mẽ axunhwý. Tã ka mẽ axtem nẽ hkaga. Te mẽ kot kên maati pumunh nẽ mex kêt ã hkamnhĩx nẽ hkagata pyrãk. Jakamã koja mẽ apãnhã Ijaew kêt xwýnh kwýjê xunhwý nhũm mẽ arom hkôt amnhĩ nhĩpêx mex o pa. Jao ra mẽ kêp hkra nẽ. Anẽ.

⁴⁴ Nhũm pre ã Jejus mẽ kãm te kêp kên maati pyrãk o mẽ kãm amnhĩ jarênh anẽ.

Hămri nê axte amnhĩ tã kuxi nê mẽ kãm axte kên jarênh pyræk ã amnhĩ jarê nê mẽ kãm:

—Nà kot kaj mẽ atõ ixkaga hămri nê te mēhõ htỳx htēm nê kên pumunh kêt nê hã hték nê tēm pyræk o amnhĩ nhĩpêx. Jao ixkutã amnhĩ xãm. Rỳ ka tanhmã ajamaxpêr to nê ixkaga nhũm te kên maati kot anhiipy tēm nê axôm par pyræk o anhiipêx ka mẽ amex kêt kumrêx. Anê.

⁴⁵ Nhũm pre ã mẽ kãm ujarênh kãm mẽ harênh anê. Hămri nhũm patre krãhtũmjê mẽ Parijew nhõ xwỳnhjaja tee ri amnhĩ tã kuma ⁴⁶ nhũm ja mẽ kêp omnuj tỳx jakamã nhũm mẽ kãm unênh nê haxàr prãm nê. No mẽ ãm amnhĩ tã kãm mẽ kot mar o kuhê xwỳnhjê puma nê. Mẽ kurom Jejus kêp Tĩrtũm nhỹ hã kapêr xwỳnh ã hkamnhĩx jakamã nhũm mẽ kãm mẽ uma nê. Hămri nê kormã tanhmã ho hkêt nê.

22

Pahi kot hkra hprõ kaxyw hkwỳjê hwỳr ã harênh

Rukre 14.15-24; mããnên Wam Korĩt 6.9-11; Epes 5.5-6; Apokarip 19.7-8

¹⁻² Tã nhũm Jejus axte mẽ kãm awjarê. Ijaew kot Tĩrtũm kaga hã mẽ kãm hã kuxi nê awjarê nê mẽ kãm:

—E pa mẽ amã ahpỳnhã mẽ kot Tĩrtũm kapêr mar nê tanhmã amnhĩ nhĩpêx to xwỳnhjê jarê ka mẽ inhma. Te mẽ kot pahihtĩ kot hkra hprõ kaxyw nhũm kot amnhĩ wỳr hkwỳjê hwỳr nhũm mẽ kot harênh mar nê ahpỳnhã tanhmã amnhĩ nhĩpêx to xwỳnhjaja kot amnhĩ nhĩpêx pyræk. Kojã pahihtija hkra hã hkĩnh nê hã apkur mex kaxyw amnhĩ wỳr hkwỳjê hã karõ. ³ Hămri nhũm kãm mẽ àpênh xwỳnhjaja ra kot amnhĩ wỳr mẽ hã karõ xwỳnhjê hwỳr mra nê mẽ kãm nojarêt nhũm mẽ kuma nê ãm mẽ kuma nê axtem nê mẽ kêp hitõt nê. Hămri nhũm mẽ tee ri mẽ kuma nê akupỹm tẽ nê pahihtĩ mã mẽ harê.

⁴ —Hămri nhũm tee ri amnhĩ tã mẽ harênh ma nê hpãnhã mẽ hwỳr axtem kãm àpênh xwỳnh kwỳjê rẽ nhũm mẽ ma mẽ hwỳr mra nê mẽ kãm: “Pa. E kwa mẽ tokyx. Na ra pahihtĩ mẽ akutêp mẽõ nhĩpêx pa. Na mẽ môx kwỳ hpa nê ho àr mex nê. Nê mẽ akutêp mẽmoj nhĩpêx par jakamã e kwa mẽ

tokyx nà.” Anê. ⁵ ã mẽ kãm kapêr anhỳr tã nhũm mẽ kuma nê ãm mẽ kuma nê ma ahpỳnhã nhỹhỹm mra. Nhũm ja ma àpênh mã mra nhũm ja ma ihpur kãm àpênh mã ma tẽ nhũm ja ma nhỹhỹm mẽmo to wênê ho tẽ. ⁶ Nhũm mẽ hkwỳjaja mẽ kãm ujarênh xwỳnhjê pynê nê mẽ htak o mẽ kupa.

⁷ —Hămri nhũm pahihtija mẽ harênh ma nê àhkurê nê. Hămri nê mẽ hwỳr pòristi hkwỳ rẽ nhũm mẽ ma mẽ hwỳr mra nê mẽ unê nê mẽ kupa nê mẽ õ krĩ hã hpòk pa. ⁸ Hămri nhũm pahihtĩ kãm mẽ àpênh xwỳnh kwỳjê mã kãm: “Kwa ra ixte mẽ kutêp mẽõ mex kwỳ xunhwỳr tã nhũm mẽ ixwỳr mrar kêt nê. Ixtỳx ho mẽ mex ã mẽ hkamnhĩx nê amnhĩ wỳr mẽ hã karõ no mẽ mex kêt. Mẽ kot mẽ ixkutã apkur mã tãm kêt. ⁹ E kwa mẽ ma krĩ hkôt axtem mẽ hkwỳjê japêr o mra. Nê nhỹri mēhõ pumu nê kãm awjarê kê man ixwỳr tẽ nê ixkra hã hkĩnh nê mẽ ixkutã apku. Mẽ ã mẽ kãm axujarênh o amrar anê.” Anê.

¹⁰ —Hămri nhũm mẽ kuma nê ma mẽ hapêr o mra nê mẽ piitã mẽ kãm anhỳr o mra. Nhũm mẽ kuma nê wam tajê rom ma mẽ hkôt mrar kurê kumrêx. Mẽ kot amnhĩ to mex xwỳnhjaja nê mẽ kot amnhĩ tomnuj xwỳnhjaja hămri piitã ma mẽ hkôt mra. Hămri nê ixkreja wỳr mra nê hwỳr gjêx kaxyw nhũm mẽ kãm mẽ ê mex gõ nhũm mẽ hagjê hămri nê kormã mẽ apkur xà hã ixkre hwỳr agjê nê ho nýt pa. ¹¹ Hămri nhũm pahihtija mẽ hwỳr axà nê mẽ piitã mẽ omu. Nhũm ja pixi nê axtem nê hkwỳjê hkĩnhã mẽ kot kãm ê mex nhõrja jaxàr kêt rãhã axà nê apkur o nhỹ. ¹² Hămri nhũm tee ri ja hã omu nê hwỳr tẽ nê kãm: “Pa. Tk. Kwa na htem ixkrem gjêx kaxyw nê mẽ kot mẽ kãm mẽ ê mex nhõr jagjê nê rĩ kormã hwỳr agjê nê apku. Tã mon ka akwỳjê hkĩnhã haxàr kaga? Kwa na htem ã amnhĩ nhĩpêx anhỳr kêt nê.” Anhỳr o kãm kapêr nom nhũm kuma nê ãm kuma nê tanhmã kutã kãm nê hkêt nê. ãm htỳx apkur o nhỹ. ¹³ Jakamã nhũm tee ri omu hămri nê hã mẽ kot kãm àpênh xwỳnhjê mã amỳnê nê mẽ kãm: “E mẽ hwỳr tẽ nê unê nê hpa nê hte hpre nê ma o tẽ nê kamàt kô kamã amê. Kê tee ri mur nê amnhĩ xà htỳx kamã hamak o amnhĩ nham o axpên kamnhar tỳx kaprỳ ho nõ nê rĩ amnhĩ pumu.” Anê.

Hămri nhùm mē kuma nē kām ho anē. Ā mē ujarēnh kot anhÿr. Anē.

¹⁴ Nhùm pre Jejus ā mē kām ujarēnh anē hămri nē mē kām:

—Nà Tirtūm kot pahihtita pyrā nē amnhī wÿr mē ho ohtō nē mē hwÿr tā na hte mē piitā hkôt amnhī xunhwÿr kêt nē. Jakamā na hte ām mē ho grêre nē amnhī wÿr mē ho api. Anē.

Parijew nhō xwÿnh kot Jejus kamā hamak ā mē harēnh

Makre 12.13-17; Rukre 20.20-26; määnēn Rômān 12.1, 13.7

¹⁵⁻¹⁶ Tā nhùm Parijew nhō xwÿnhjaja ā Jejus kot mē kām ujarēnh anhÿrja ma hămri nē kurūm kato nē tanhmā hkukamā axpēn mā hā àmnēnh to. Hămri nē hwÿr mē hkwyjē mē Erox kôt mē pa xwÿnh kwÿjē rē. Hêx rom mē kot mēmoj tā hkukjêr kaxyw hwÿr mē kurē nhùm mē ma hwÿr mra nē omu nē kām:

—Kwa Jejus. Nà ām hămri na ka hte Tirtūm kapēr o mē ahkre mex o ri apa nē mē kamā akahak o apa hkêt nē. Mē kot tanhmā ato kapēr punuj to htā ka aprī hā mē ahkre mex o ri apa. ¹⁷ E kwa mē inhmā mēmoj jarē. Rôm nhō pahihtiti kot mē pahpē ljaew mē pahte kām kàxpore hkwy nhōr ā mē pamā karōta. Kwa xà ja amā mex nà? Xà kot pu mē kām hkwy gō? Nà xà kot pu mē kām ōr kêt nē? E kwa mē inhmā tanhmā ja jarēnh to. Anē.

¹⁸ Nhùm prem ā hêx rom àhkukjêr anhÿr tā no nhùm ra mē hamaxpēr ā mē omu nē mē kām:

—Tk. Kwa mon ka mē ā axêx rom ja hā ixkukjêr anē? ¹⁹⁻²⁰ E mē atō inhmā kàxpore htÿxre hō gō pa omu. Anē.

Hămri nhùm mē kām ja gō nhùm kupy nē kànhmā mē kām kupē nē mē kām:

—E mēhō nhīxi nē mēhō karō na ja hā? Anē.

²¹ Hămri nhùm mē kām:

—Pahi Sesti karō nē hixi na hā. Anē.

Hămri nhùm mē kuma nē mē kām:

—Tÿ. Tô kêr ka mē māmri kām hkwy nhōr o apa. Hā hkarō nē hā hixi. Tām kot hipêx xwÿnh jakamā ō na. No mē kajaja na pre Tirtūm mē anhīpêx nhùm mē apē ō jakamā kwa kêr ka mē kapēr kôt pix mā ri amnhī nhīpêx o ri apa. Anē.

²² Hămri nhùm mē amnhī jaêr pê ā kot kàxpore jarēnh anhÿrja ma nē axte kām tanhmā nē hkêt nē. Hămri nē akryk omu hămri nē ma akupÿm mra.

Akupÿm mē htÿr ā mē harēnh

Makre 12.18-27; Rukre 20.27-40; Juāw 5.21, 6.39-40; määnēn Wam Korit 6.14, 15.12-28; Wam Tesarōn 4.13-18

²³ Tā nhùm Satusew nhō xwÿnh kwÿjaja mē kot akupÿm mē htÿr kêt ā mē hkamnhīx kêt xwÿnhjaja na pre mē. Na pre htem mē htyk nē mē hapêx kumrêx ā mē hkamnhīx jakamā axpēn mā tanhmā Jejus jarēnh to nē axpēn mā:

—E kwa pu mē hwÿr mra nē mēmoj xihtÿx ā hkukja. Kê mē pama nē tee ri tanhmā mē pamā kapēr to hkukamā hamaxpēr kaprÿ. Kê mē piitā ja hā omu nē àhpumunh kêt ā omunh kurē kumrêx. E tokyx pu mē hwÿr.

Anhÿr jakamā Parijew nhō xwÿnhjê pyrā nē hêx rom ma hwÿr mra nē hkukja nē kām:

²⁴ —Pa Jejus? Kwa mē inhmā mēmoj jarē. Na pre finat Mojesja Tirtūm nhÿ hā ā mē panhīgêjtjê mā karō anē. Mē hkra hkêt rāhā mē pa nē mē htyk xwÿnhjaja nhùm mē harēnh o:

Koja mēhō hprō nē kamā hkra hkêt rāhā pan ty. Hā koja hkôt htōja hpānhā hprō ho hprō nē kamā hkra. Hămri nhùm kato nē te kêp htō htyk xwÿnhhta hkra pyrāk. Anē.

Ā na pre Mojesja Tirtūm nhÿ hā mē kām karō anē. ²⁵ Jakamā kwa ga mē ixujarēnh ma. Koja mē kot axpēn to htō xwÿnhjaja kêp 7. Nhùm kot waja hămri hprō nē wa pa nhùm kamā hkra hkêt rāhā ty. Nhùm hkôt htōja hpānhā ho hprō ²⁶ nē wa axpēn to pa. Nhùm määnēn kamā hkra hkêt rāhā ty. Nhùm htō hōta haxwÿja hpānhā tām o hprō nē we wa axpēn to pa grire nhùm haxwÿja kamā hkra hkêt rāhā ty. Hămri nhùm htō hkwyjaja ni pyxi nē axpēn pānhā ho hprō hpa no mēhō kamā hkra hkêt rāhā htyk pa.

²⁷ Hămri nhùm mē hprōta mē hkôt amnhī to hitep nē ty. ²⁸ Tā Tirtūm kot akupÿm nhÿrmā mē ho htÿr ronhÿx nhÿ nhÿx kêp nija mjên kumrêx? Ra piitā kot ho hprō kênā. E mē inhmā ja jarē. Anē.

29-30 Hāmri nhūm Jejus mẽ kuma nẽ mẽ kām:

—Nà kaxkwa kamã mẽ kot amnhĩ nhĩpêxja axtem na. Mẽ htĩr ri mẽ kot Tĩrtũm kõt amnhĩ xunhwȳr xwȳnhjaja na htem ty hāmri nẽ Tĩrtũm nhõ krĩ kamã axte kãm hprõ hprãm kêt nẽ pa. Jakamã hprõ hkêt nẽ pa. Rȳ ni japêr nẽ mjên kêt nẽ pa. Nom ri kãm mjên rȳ hprõ hprãm kêt nẽ pa. Hāmri nẽ Tĩrtũm kapêr o mẽ wrȳk xwȳnhjê pyrã nẽ axte htyk kêt nẽ. Ām htĩr tũm rãhã nẽ pa ho pa. Pêr mẽ ate Tĩrtũm kapêr ã kagã htũm mar mex kêt jakamã na ka mẽ ã ja hã ixkukjêr anê. Tĩrtũm àhpumunh tȳx o àhpumunh tȳx jakamã kumã mẽ ate mẽmoj tã ixkukjêr xwȳnhhta na tanhmã kêp kute hkêt. Ra ja kukamã àhpumunh tȳx kênã.

31-32 —Nom mẽ ate akupȳm mẽ htĩr kêt ã mẽ hkamnhĩxja kot paj ixprĩ hã mẽ amã harê. Amnepêm na pre Tĩrtũm pĩ hpõkja kamã tanhmã Mojes mã kapêr to. Mãn ra mẽ ate mar. Na pre kãm:

Ixpê Apraãw nhõ Tĩrtũm na pa. Nẽ mããnên
ixpê Apraãw kra Ijak mẽ htãmnhwȳ
Jako wa õ Tĩrtũm na pa.

Anhȳr o Mojes mã amnhĩ jarê nhūm kuma nẽ hã kagã. Kêp apu arĩ mẽ htyk rãhã nhȳx pre ã mẽ harênh anhȳr kêt nẽ. Nhȳx pre mẽ harênh o: “Amnepêm Apraãw nẽ hkra nẽ htãmnhwȳ mẽ htĩr ri ixpê mẽ õ Tĩrtũm na pa pre.” Anhȳr o nhȳx pre mẽ harê. Nom na pre ã amnhĩ jarênh anhȳr kêt nẽ. Mẽ pamã te Apraãwja mẽ htyk nẽ mẽ hapêx pyrãk. Nom nhūm prem ra Tĩrtũm ri ra akupȳm htĩr nẽ mex nẽ pa ho pa. Tã ka htem Tĩrtũm kapêr kwȳm ri akupȳm mẽ htĩr kêt ã mẽ harênh o apa.

Anhȳr o Satusew nhõ xwȳnhjê mã kapêr. 33 Hāmri nhūm mẽ kot mar o kuhê xwȳnhjaja amnhĩ jaêr pê kot mẽ ahkreja ma.

Tĩrtũm kapêr maati jarênh

Matêwre 10.37; Makre 12.28-34; Rukre 10.25-28; mããnên Wam Juãw 5.3

34 Tã nhūm Parijew nhõ xwȳnhjaja Satusew nhõ xwȳnhjê jarênh ma. Mẽ kot tee ri kãm hamaxpêr o Jejus jakrenh prãm kaprȳ hã mẽ harênhja ma hāmri nẽ axpên wȳr akuprõ nẽ Jejus wȳr mra. Kot mẽ urãk nẽ hêx rom àhkukjêr nẽ hamaxpêr o hakrenh kaxyw hwȳr mra. 35 Hõja kêp Tĩrtũm kapêr

tũm o mẽ ahkre o mẽ pa xwȳnh jakamã hêx rom kamã hamak kaxyw kãm kapêr nẽ kãm:

36 —Kwa Jejus. Ot pa mẽ awȳr mra. Kwa mẽ inhmã mẽmoj jarê. Na pre Tĩrtũm ahpȳnhã mẽmoj to 10 nẽ hã mẽ pamã karõ. Mẽ pahte hkõt amnhĩ nhĩpêx kaxyw hã mẽ pamã karõ. Tã nhȳ kapêr na mex o kot hkwy jakrenh wehe? Anê.

37 Hāmri nhūm kuma nẽ mẽ kãm:

—Nà kot mẽ pamã hã karõ kot:

Kêr ka mẽ anhĩ piitã ho amã Tĩrtũm kĩnh tȳx o apa. Mẽ amã hkĩnh tȳx o mẽmoj piitã hakrenh par o apa.

38 E Tĩrtũm kot mẽ pamã hã karõ ja na mex o piitã hakrenh par. 39 Nẽ hkõt ja:

Kêr ka mẽ amã akwȳjê hã ma ho te ka amã amnhĩ tã ma pyrãk. Jao ra tãm mẽ hipêx.

40 ã Tĩrtũm kapêr ã kagã htũm kot mẽ pamã hã karõ kot anhȳr. Ā mẽ pahte amnhĩ nhĩpêx anhȳr o papaja na Tĩrtũm kãm hprãm tȳx kumrêx. Kot kaj mẽ ja wa hkõt amnhĩ nhĩpêx rãhã ho ri apa nẽ mããnên ra Tĩrtũm kot mẽ pamã mẽmoj tã karõ xwȳnh piitã hkõt amnhĩ nhĩpêx. Ja na pre Mojes mẽ Tĩrtũm nhȳ hã kapêr xwȳnhjaja amnepêm Tĩrtũm nhȳ hã mẽ panhĩgêjtê mã hã karõ ho pa. Anê.

*Jejus kot amnhĩ tã mẽ hkukjêr ã harênh
Makre 12.35-37; Rukre 20.41-44; mããnên
Rõmãn 1.3-4*

41 Nhūm Parijew nhõ xwȳnhjaja arĩ Jejus mar o kuhê nhūm amnhĩ tã tanhmã mẽ hkukjêr to. Nom te nhãm mẽhõ hã mẽ hkukjêr pyrãk o mẽ hkukja nẽ mẽ kãm:

42 —E mẽ inhmã mẽmoj jarê. Tanhmã na ka htem axpên mã Tĩrtũm kot mẽ akaxyw ãm mã xwȳnhhta jarênh to? Kêp mẽhõ kanrêhã htãmnhwȳ koja wehe? Anê.

Hāmri nhūm mẽ kãm:

—Nã koja kato nẽ kêp pahi finat Tawi kanrêhã htãmnhwȳ koja.

43 Anê nhūm Jejus mẽ kuma nẽ mẽ kãm:

—Tȳ. Ām hāmri na ka mẽ harê. No mo na htem axpên mã kêp pahi Tawi hkanrêhã htãmnhwȳ pix ã harê nẽ mããnên kêp õ pahĩhti hã harênh kêt nẽ? Tawi na pre Tĩrtũm Karõ nhȳ hã tanhmã harênh to nẽ harênh o:

44 Na pre Tirtûm inhô Pahihiti mã ã kapêr anê nê kãm: “E amnê ixwÿr tẽ nê inhîhkô hã nhÿ nê inhmã mẽ ho amnhîptâr o akrî. Kot paj mẽ kot kãm akurê xwÿnh piitã mẽ unênh pa nê awÿr mẽ o mra nê anhîhkram mẽ haxàr pa.” Anhÿr o pre kãm kapêr.

45 ã Tawija Tirtûm kot Kris mã kapêr jarênh nê kêp ô pahi hã kagà anê. Mẽ kajaja na ka htem ãm kêp Tawi tãmnhwÿ pix ã axpên mã harênh o ri apa. No kêt Tawija na pre kêp ô Pahihiti hã harênh o pa. Anê.

46 Hãmri nhùm mẽ kuma nê tee ri kot tanhmã kutã kãm kapêr to hkukamã hamaxpêr nê axte mẽmoj tã hkukjêr kêt nê. Tanhmã kot mẽ amnhî to nê hamaxpêr o hakre? Na prem tee ri kãm hamaxpêr o hakrenh prãm kaprÿ. Jejus mẽmoj piitã hkukamã àhpumunh tÿx o àhpumunh tÿx.

23

Jejus kot tanhmã Parijew nhô xwÿnhjê jarênh to

Makre 12.38-40; Rukre 11.43-46, 20.45-47

1 Tã nhùm Jejus mẽ ixte hkôt ixpa ho ixpa xwÿnhjê mẽ mẽ kot mar o kuhê xwÿnhjê mã kapêr nê mẽ inhmã tanhmã Parijew nhô xwÿnh mẽ Mojes kapêr o mẽ ahkre xwÿnhjê jarênh to nê mẽ inhmã:

2 –Nà Parijew nhô xwÿnh mẽ Tirtûm kapêr tùm o mẽ ahkre xwÿnhjaja na htem hprî hã Tirtûm kapêr ã kagà htùm mar mex nê. 3 Jakamã kêr ka mẽ mar tÿx nê mẽ kot ho mẽ ajahkre kôt amnhî nhîpêx. No mẽ kot amnhî nhîpêxja kêr ka mẽ hkôt amnhî nhîpêx kêt nê. Mẽ kot Tirtûm kapêr tùm o mẽ ajahkre htã hkôt amnhî nhîpêx kêt nê.

4 Te mẽ kot mēhō kot mẽ katut ã mẽ kãm mẽ jênh pytî janhôr tã no ãm mẽ kuxwar hkwÿ htur kêt kot amnhî nhîpêx pyrāk o na htem amnhî nhîpêx o pa. Jao mẽ amã mẽmoj tã karō nê mẽ amã: “E kêr ka mẽ ã amnhî nhîpêx anê nê ã amnhî nhîpêx anê.” Anhÿr pix o mẽ amã kapêr o pa. Nom mẽ tãmjaja amnhî kapêr kôt amnhî nhîpêx kêt nê.

5 –Na htem hkwÿjê kot mẽ omunh nê mẽ kot amnhî to mex ã mẽ harênh kaxyw mẽ noo mã tanhmã amnhî nhîpêx to. Nê mẽ mẽ noo mã mẽ ê mex pix kãm pa. Nê

amnhîm Tirtûm kapêr ã kagà htùm kwÿ hã kagà nê amnhî nhôkrã hã hanhō nê amnhî pa hã hanhō nê hã pa. Mẽ kot hã nohtÿx rãhã hã mẽ hkamnhîx kaxyw nhùm htem ã amnhî nhîpêx anhÿr o pa. Nê mẽ kãm mẽ piitã mẽ kot amnhîm mẽ rÿnh ã mẽ harênh o paja nhùm htem kãm hprãm.

6 –Nê mẽ pahpê Ijaewjê nhô Tirtûm kapêr o mẽ ahkre xà hã ixkre kamã mẽ kot amnhî to rÿnh xwÿnhjê hkrî xà mex pix kamã kãm hkrî hprãm. Nê mẽmoj tã mẽ apkur xà mex ã arîgro hã nhùm htem ma mẽ apkur xà hã ixkre hwÿr akuprō nhùm mẽ kot amnhî to rÿnh xwÿnhjê hkrî xà mex pix kamã kãm hkrî hprãm. 7 Nê nhÿri pry hã mra nhùm mẽ kot mẽ omunh nê mẽ kêp mẽ ahkre xwÿnh maati hã mẽ hã hpiaam kãm tanhmã mẽ kãm kapêr mex toja nhùm htem kãm hprãm. ã na hte Parijew nhô xwÿnh mẽ Tirtûm kapêr tùm o mẽ ajahkre xwÿnhjaja hêx rom mẽ anoo mã amnhî nhîpêx anhÿr o pa.

8-10 –No mẽ kajaja. Kêr ka mẽ ho mẽ urāk kêt nê. Kê mẽ axpên mã mẽ ajarênh o: “Pahi Maati” anhÿr o mẽ ajarênh kêt nê. Rÿ mẽ ajarênh o: “mẽ ijahkre xwÿnh maati” anhÿr o axpên mã mẽ ajarênh hkêt nê. Kêt paxipix na pre Tirtûm mẽ akaxyw ixãm jakamã paxipix na ixpê mẽ anhô Pahi Maati. Nê paxipix na ixpê mẽ ajahkre xwÿnh maati. No mẽ kajaja ixkôt mẽ apê axpên to atōx nê atō na ka mẽ.

–Nê kêr ka mẽ ri axpên jarênh o: “Mêpahpãm” anhÿr kêt nê. Kêt kaxkwa kamã na Mêpahpãmja.

11-12 –Nê kot ka mẽ amnhî to rax prãm xaj tanhmã amnhî to jarkrar to ho apa htã no nhùm akwÿjaja ama nê ãm ama nê akôt hamaxpêr kêt nê. No kot kaj mẽ piitã mẽ kutã tanhmã anojarêt to ho apa nhùm mẽ amnhî tã mẽ apumu nê axpên mã mẽ amex ã mẽ ajarê. Jakamã kot kaj mẽ amã mẽ piitã mẽ kot mẽ amex ã mẽ ajarênh prãm hãmri nê ri mẽ piitã mẽ kãm tanhmã amnhî nhîpêx to pê mẽ kutã anojarêt rãhã ho ri apa. Anê.

Jejus kot mẽ hkwÿjê mã kapêr tÿx ã harênh

Makre 12.40; Rukre 11.39-52, 20.45-47

13-14 Tã nhũm Jejus hpãnhã Parijew nhõ xwýnh mẽ Tĩrtũm kapẽr tũm o mẽ ahkre ho mẽ pa xwýnhjê mã kapẽr. Nẽ mẽ kãm kapẽr kãm hihtýx nẽ mẽ kãm:

—E mẽ apê Parijew nhõ xwýnh mẽ Tĩrtũm kapẽr tũm o mẽ ahkre xwýnhjaja. E mẽ inhma. Kot kaj mẽ amex kêt nẽ. Mẽ apê mẽ no kupyx xwýnh na ka mẽ. Nẽ mẽ amã Tĩrtũm kôt amnhĩ nhĩpêx prãm kêt. Nẽ nhỹrmã atyk nẽ mẽ amã õ krĩ hwýr axàpir prãm kêt. Nẽ akwýjaja kot hwýr àpir pymaj na ka htem akwýjê nẽ tanhmã mẽ kãm axêx to ho apa. Mẽ kot mẽ apyrà nẽ Tĩrtũm kapẽr kwým amnhĩ nhĩpêx prãm xàj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwýr kahêxà kahê htýx pyràk o apa.

15 —Nẽ mẽ akwýjaja kot mẽ akôt amnhĩ xunhwýr nẽ mẽ akôt amnhĩ nhĩpêx prãm xàj na ka htem ma awry hã nhỹhým tanhmã mẽ kãm ri axujarênh to ho ri apa. Jakamã nhũm mēhõ mẽ ama nẽ mẽ akôt amnhĩ xãm hãmri nẽ ra amnhĩ tomnuj týx o mẽ ajakre. Jakamã koja mẽ nhỹrmã mẽ apyrà nẽ ma mẽ kot amnhĩ xà htýx kamã hamak tũm xàta wýr pa. Jakamã kwa mẽ o kora. Kot kaj mẽ amex kêt nẽ.

16 —Hêxta waa nẽ. Mẽ apê Parijew nhõ xwýnhjê mẽ mẽ apê Tĩrtũm kapẽr tũm o mẽ ahkre xwýnhjaja kot kaj mẽ amex kêt kumrêx. Na ka htem mẽ kêp mẽ hikàxpore jamýnh prãm xàj atýx ri tanhmã mẽ ahkre hto ho apa nẽ mẽ kãm: “Kot kaj mẽ ãm hãmri mẽmoj tã amnhĩ jarênh kaxyw hãmri nẽ Tĩrtũm mã amnhĩ jarênh xà hã ixkre nhĩxi jarênh kôt mēhõ mã amnhĩ jarê nhũm ama nẽ hamaxpêr o: ‘Ko. Apu ãm hãmri na inhmã amnhĩ jarê rý ko na apu ãm amnhĩ to hêx.’ Anhýr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwy gõ hãmri nẽ ate mẽ kãm õr xàta jarênh kôt ãm hãmri mẽmoj tã mēhõ mã amnhĩ jarê. Hãmri nhũm ama nẽ hamaxpêr o: ‘Nà ãm hãmri na ã inhmã amnhĩ jarênh anẽ. Kot ixkre ho mex kaxyw kàxpore hkwy nhõr kôt ã amnhĩ jarênh anẽ. Jakamã na amnhĩ to hêx kêt nẽ.’ ” Anhýr o hamaxpêr. Na ka htem ã mẽ ahkre ho apa anẽ. 17 Nom mẽ ate mẽ ahkreta mex kêt. Pêr mẽ ajamaxpêr mexti hã. Tĩrtũm mã amnhĩ jarênh

xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nẽ mẽ kot kãm kàxpore nhõrta mex o ixkre jakrenh ã harê. No mẽ pahte ãm hãmri mẽmoj tã amnhĩ jarênh nẽ aa paxêx kêt rãhã ho papaja na Tĩrtũm kãm hprãm.

18 —Nẽ na ka htem mẽ kêp mẽ hikukrêx jamýnh prãm xàj ã atýx ri mẽ ahkre anẽ nẽ mẽ kãm: “Kot kaj mẽ ãm hãmri mẽmoj tã amnhĩ jarênh kaxyw nẽ Tĩrtũm mã mẽmoj nhõr xà hã mēstija jarênh kôt mēhõ mã tanhmã amnhĩ jarênh to. Hãmri nhũm mẽ ama nẽ hamaxpêr o: ‘Nà ãm hãmri na inhmã amnhĩ jarê rý ko na apu ãm inhmã amnhĩ to hêx.’ Anhýr o hamaxpêr. Nom kot kaj mẽ Tĩrtũm mã mẽmoj nhõr xà hã mēstija ã kãm mẽmoj xi. Hãmri nẽ ra mẽ ate kãm õr xàta jarênh kôt ãm hãmri mẽmoj tã mēhõ mã amnhĩ jarê. Hãmri nhũm ama nẽ hamaxpêr o: ‘Nà ãm hãmri na ã inhmã amnhĩ jarênh anẽ. Kot Tĩrtũm mã mẽmoj nhõr ã amnhĩ jarênh kôt kot amnhĩ jarênh anhýr jakamã na amnhĩ to hêx kêt nẽ.’ Anhýr o hamaxpêr.” Anẽ. Na ka htem ã mẽ ahkre anẽ. 19 Mẽ ajamaxpêr kêt xwýnh na ka mẽ. Tĩrtũm mã mẽmoj nhõr xà hã mēstija na mex o mẽ kot hã kãm mẽmoj nhõrta jakrenh. Tã na ka htem axtem nẽ mẽ kot hã kãm mẽmoj nhõrta mex o mēsti jakrenh ã harê. 20 Nom Tĩrtũm mã mēsti mẽ mẽ kot hã kãm mẽmoj nhõrta te kot axpên pyràk jakamã kot kaj mẽ mēstija jarênh kôt mẽmoj tã amnhĩ jarê nẽ mãânên mẽ ate hã Tĩrtũm mã mẽmoj xirja jarênh kôt amnhĩ jarê. Hamẽ wa kot axpên pyràk jakamã hamẽ wa harênh pẽ amnhĩ to axêx kêt nẽ. Jakamã kêr ka mẽ mẽmoj tã amnhĩ jarênh kaxyw nẽ hamẽ wa harênh kôt ãm hãmri mẽmoj tã amnhĩ jarê nẽ ho axêx kêt nẽ. 21 Tã kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nẽ Tĩrtũm mã amnhĩ jarênh xà hã ixkre hkôt hã amnhĩ jarê nẽ mãânên Tĩrtũm kêp ixkre hpãm kôt hã amnhĩ jarê. Jakamã kêr ka mẽ hamẽ wa harênh pẽ amnhĩ to axêx kêt nẽ.

22 —Nẽ kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nẽ kaxkwa jarênh kôt amnhĩ jarênhja o mãânên kaxyw kaxkwa kamã Tĩrtũm krĩ xà maati hkôt amnhĩ jarê. Nẽ mãânên Tĩrtũm kôt amnhĩ

jarê. Jakamã kwa hamê wa harênh pê amnhî to axêx kêt nê.

²³ —Hêxta waa nê. Mê apê Parijew nhô xwýnh mê mê apê Tirtûm kapêr tûm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Na ka htem Tirtûm kapêr piitã hkôt amnhî nhîpêx kêt nê ãm hkwý kôt pix mã amnhî nhîpêx o ri apa. Na ka htem ãm kapêr o hpýnhre nê hkôt amnhî nhîpêx ã amnhî pumu nê ate amnhî to mex xwýnh ã amnhî jarênh o apa. No Tirtûm kãm hprãm xà piitã hkôt amnhî nhîpêx kêt nê. Mê ate tãm mê hipêx nê mê ho mex nê mê kamã axukapri hã kot mê amã karôja. Nê mê amã Tirtûm kînh ã kapêr kôt amnhî nhîpêx hã karôja ra mê ate mar tã hkôt amnhî nhîpêx kêt nê. Mê ate kapêr piitã hkôt amnhî nhîpêx ronhýx ja mê amã mex o mex. ²⁴ Mê ate ãm kapêr o hpýnh nê hkôt amnhî nhîpêx jakamã te mê ate atýx ri tanhmã axàpkur to ho mê akrî pyrãk. Jao te mê axàpkur xà hã mêõ kamã pure pumunh nê nê hanhir nê rênh tã mãânên kamã kên rax pumunh tã nê hanhir nê rênh kêt rãhã hkur pyrãk. Jao Tirtûm kapêr o hpýnhre nê hkôt amnhî nhîpêx no piitã hkôt amnhî nhîpêx kêt nê. Pêr mê ajamxpêr kêt tã na ka htem atýx mê ahkre ho ri apa.

²⁵ —Hêxta waa nê. Mê apê Parijew nhô xwýnh mê mê apê Tirtûm kapêr tûm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Nã mê apê Parijew nhô xwýnhjaja te mê ate mê kot apkur kaxyw prat kre kuhõnh punuj tã mex ã harênh nê kamã apkur pyrãk o na ka mê. Jao ãm mê akrãhkã rûm pix mã mê amex. Nê mê noo mã te mê amex pyrãk no mê anhõxãhkre kaxwýnh kãm mê ajamxpêrja mex kêt. Mê akapêr prãm nê mê axàhkurê nê mê anhõxýy. ²⁶ Mê ajamxpêr mex kêt kênã. Kwa kêr ka mê tãm ajamxpêr o tãm akwýjê nhîpêx o ri apa. Nê axãmnhîx ri mê kêp amrakati xwýnhjê mã mêmoj nhõr o ri apa. Kot kaj mê ã amnhî nhîpêx anê nhûm Tirtûm ja hã mê apumu nê amnhîm mê amex ã mê ajarê. No na ka htem amã mê amnhî to mex prãm xàj ãm tee ri amnhî kuhõnh japjê kaprý.

²⁷ —Hêxta waa nê. Mê apê Parijew nhô xwýnhjê mê mê apê Tirtûm kapêr tûm o mê ahkre ho mê apa xwýnhjaja kot kaj

mê amex kêt nê. Te mê ate mê htykjê jagjênh xà pyrãk. Na htem mê hagjênh xà ho mex o pa nom kamã mê hi nê ahpunuj pix. ²⁸ Ja pyrã nê ã mê ate amnhî nhîpêx anhýr. Kapôt rûm mê anhîja na mex. Te mê ate mê ho mex o apa pyrãk o na ka htem amnhî nhîpêx nhûm mê ãm akrãhkã pix pumu nom ãm mê akrã hi kaxwýnh kãm mê ajamxpêr punuj rãhã hã mê apumunh kêt nê. Mê ate tanhmã mê no kupyw to pix kukamã ajamxpêr jakamã te mê ate mê htykjê jagjênh xà pyrãk.

²⁹⁻³⁰ —Hêxta waa nê. Mê apê Parijew nhô xwýnh mê mê apê Tirtûm kapêr tûm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Na ka htem ma mê hã pika hwýr apa nê Tirtûm nhý hã kapêr o mê pa xwýnhjê hã pika ho mex. Nê mê kot amnhî to mex xwýnhjê hã pika ho mex. Nê axpên mã mê harênh o: “Hêxta waa nê. Na pre amnepêm mê pakukamã mê panhîgêjtaja Tirtûm nhý hã mê kãm kapêr xwýnhjê homnuj nê mê kupa. No kêt mê papajaja mê kamã ri papa ronhýx pu prem mê urãk nê ã mê hipêx anhýr kêt nê.” Anhýr o axpên mã mê hkapri ho ri apa. ³¹⁻³² Nom ãm amnhî to axêx. Mê ate ã amnhî nhîpêx anhýr o apa kênã. ã mê ate amnhî nhîpêx anhýr jao ra apê mê hkanrêhã mê hkra kumrêx ã amnhî to amnhîrit mex o apa. ³³ Te mê ate kagã xoprê kot mê hkamnhar nê mê homnuj týx pyrãk jakamã koja Tirtûm nhýrmã ma mê kot amnhî xà htýx kamã hamak tûm xàta wýr mê ajano ka mê ma hwýr ajapêx. Hãmri nê tee ri amã ajapôx prãm kaprý nê rî amnhî pumu.

³⁴ —Kot paj nhýrmã ma mê awýr inhý hã ixkapêr jarênh o mê pa xwýnh kwý rê. Nê inhý hã mê àhpumunh xwýnh kwý rê. Nê ixkapêr o mê ahkre xwýnh kwý rê. Nom kot kaj mê ãm mê kapêr ma nê apê mê hprãm nõkati nê tanhmã mê homnuj týx to ho apa. Nê ixpê mê hkwýjê hpar o apa. Jao pî kahpa hã mê hanhõr o mê hkwýjê hpa. Nhûm mê hkwýjaja Tirtûm kapêr o mê ahkre xà hã ixkre kamã mê ahkre ho hkrî ka mê omu nê mê unê nê ixkreja kamã mê htak. Hãmri nhûm mê apymaj nhãm ahpýnhã krî hkwý hwýr hprõt nê mra. ã

kot kaj mẽ inhỹ hã ixkapêr jarênh xwýnhjê nhĩpêx anhỹr o apa. ³⁵⁻³⁶ Na prem ra mẽ himex rax nê. Amnepêm panhĩ kator krax rûm Atãw kra Apewta na pre Tĩrtũm nhỹ hã kapêr o pa nhũm htõja kãm mar prãm kêt nê kupĩ. Tã nhũm Tĩrtũm axte mẽ hwýr y hã kapêr o mẽ pa xwýnh kwýjê rê nhũm prem mã mẽ ho anê nê mẽ hkwýjê nhĩmex. Nhũm pre xatã mẽ hwýr mẽ hkwýjê rê nhũm mẽ xatã mẽ kupa. Apew rûm Parakis kra Jakaris wýr na prem mẽ himex rũnh nê. Hãmri nhũm prem Tĩrtũm mã amnhĩ jarênh xà hã ixkre kamã Jakarisja pĩ. Tã mẽ kajaja mẽ ate mẽ urak nê mẽ amã Tĩrtũm kapêr mar prãm kêt nê mẽ urak nê amã Tĩrtũm nhỹ hã kapêr xwýnhjê nhĩmex prãm nê. ã mẽ ate mẽ anhĩgêjtjê pyrã nê mẽ hipêx anhỹr mýrapê koja Tĩrtũm mẽ apê mẽ hkanrêhã mẽ hkra nê mẽ htãmnhwýjaja mẽ ato hpimràatã tanhmã mẽ ato htýx to ka mẽ amnhĩ xà htýx kamã ajamak rãhã ho ri apa. Anê.

Jejus kãm Jerujarê nhõ xwýnhjê japê htýx ã harênh

Rukre 13.34-35; mããnên Rõmãn 11.25-27

³⁷ Hãmri nhũm Jejus te ra kot Jerujarê nhõ xwýnhjê pumunh nê mẽ kãm kapêr pyrãk o tanhmã kapêr to ho xa. Nê mẽ kãm:

—Hêxta waa nê Jerujarê nhõ xwýnhjaja. Tĩrtũm kot xatã mẽ awýr y hã kapêr jarênh xwýnhjê rênh nhũm mẽ kot mẽ akõt mẽ amã kapêr jarênh o pa htã ka mẽ kapêr mar kêt kumrêx. Nê axtem nê kên o mẽ htak o mẽ himex o apa. ã na ka htem amnhĩ tomnuj o apa anê. Tã nom arĩ inhmã mẽ ajamãr o ri ixpa hprãm. Te ho krãhyre kot nore hpro nê ho hikwý pyrãk o na pa inhmã mẽ anhĩpêx prãm nê. Nom mẽ amã ixprãm nõkati nê mẽ ate ixkaga kumrêx. ³⁸ Mýrapê koja Tĩrtũm mẽ anhõ krĩ jamãr kêt nê. ³⁹ Kot paj tokyx ty nê mẽ apiitã mẽ are nê ma akupým api ka mẽ axte ixpumunh kêt nê. ãm akupýn ixwýr xà hã arĩgrota pix ã koja mẽ akwýjaja mẽ amýrpê krĩ ja kamã ixpõx ã ixpumu. Hãmri nê mẽ akurom ixpumu nê hkĩnh týx nê. Nê tã ixkõt amnhĩ xunhwýr kurê kumrêx. Hãmri nê axpên mã ijarênh o:

Ota Tĩrtũm kot mẽ pahwýr mẽnh xwýnhhta wrý. Nà ãm hãmri na mẽ pahwýr wrý. Ja mex o mex.

Koja mẽ ã axpên mã ijarênh anê. Anê.

24

Jejus kot mẽ pakukamã mẽmoj jarênh Makre 13.1-13; Rukre 21.5-19; mããnên Wam Ximotre 4.1-3; Sikũn Ximotre 3.1-9; Apokarip 6.1-17

¹ Tã nhũm Jejus Tĩrtũm mã amnhĩ jarênh xà hã ixkre rûm kato nê ma tẽ. Pa mẽ ixte hkõt ixpa ho ixpa xwýnhjaja kormã ixkreja pumunh o ixkuhê nê kãm harê nê kãm:

—Kwa Pahihti. Hêxta waa nê. Ixkreja ãm mex kumrêx. Anê.

Hãmri nhũm mẽ inhmã:

² —Tý mex nom koja nhỹrmã mẽ kãm Tĩrtũm kurê xwýnhjaja grãnh pa. Koja arĩ kên õ axkrutre nê axpên mýnh nê nõr kêt nê. Koja piitã anhrã nê ahpýnhã ri hikwý. Anê.

³ Hãmri pa mẽ kuma nê tee ri hkukamã ijamaxpêr. Hãmri nhũm Jejus ma tẽ nê hixêt pê Oriwêhti hã api nê hã nhỹ pa mẽ ma hkõt mra nê mẽ kot ã ixkre nhĩpêx anhỹrta ã hkukja nê kãm:

—Kwa xà ãm hãmri koja mẽ ã ixkreta nhĩpêx anê? Kwa mẽ inhmã aprĩ hã harê. Xà koja mẽ nhỹrmã ho anê nã? Xà koja mẽ tokyx ho anê? Nê akupýn mẽ ixwýr awrýk nhũm mẽmoj piitã hapêxja. Kwa mẽmo koja we wýj ri tanhmã amnhĩ nhĩpêx to wehe? Anê.

⁴ Hãmri nhũm mẽ inhmã hprĩ hã tanhmã mẽmoj kot amnhĩ nhĩpêx to hkukamã ujarênh o nhỹ nê mẽ inhmã:

—Nà nhỹrmã mẽmoj piitã hapêx kaxyw tanhmã amnhĩ nhĩpêx toja kumrêx kot paj mẽ amã harê ka mẽ inhma. Nà koja mẽ ohtõ nê mẽ awýr mra nê hêx rom te pa ixte amnhĩ nhĩpêx pyrãk o amnhĩ nhĩpêx o mẽ akõt pa. ⁵ Nê mẽ amã amnhĩ jarênh o: “E Tĩrtũm na pre mẽ awýr inhmẽ. Ixpê kaxkwa rûm ixwýr xwýnhhta na pa.” Anhỹr o mẽ akõt mẽ amã amnhĩ to hêx o pa. Jao ohtõ nê mẽ nokupyr o pa.

⁶ —Nê koja mẽ nhỹri awry hã axpên par o pa nê mẽ atã axpên par o pa. Nom kêr ka mẽ harênh ma nê ri tokyx mẽmoj piitã hapêx ã hkamnhĩx kêt nê. Kormã mẽmoj

piitã hapêx xà hã arĩgroja kormã. ⁷ Koja mẽmoj piitã hapêx kaxyw nhũm ahpÿnhã ri pika piitã hkôt mẽ pa xwÿnhjaja pika hõ nhõ xwÿnhjê kutã kuhê nê pijapu ho kuhê. Jao ra axpên par o pa. Hãmri nhũm nhÿri pika hkwy htertet tÿx kumrêx. Nê mẽ hpur kãm mẽõja hapêx nhũm mẽ kãm prãm tÿx nê pa. Jakamã nhũm mẽ ohtô nê prãm xaj axkaprã. ⁸ Nom ja kormã mẽmoj hapêx kaxyw krax pix na. Te ho mênijê hõ hpijagri kaxyw nê kormã kawax pê õhy xà pyrãk.

⁹ –Nê koja mẽ piitã ixkôt mẽ akamã gryk nê kãm mẽ akurê htÿx o pa. Nê mẽ awÿr mra nê ixtã mẽ apynê nê mẽ atomnuj tÿx nê mẽ apa. ¹⁰ Jakamã koja mẽ kot ixkôt amnhĩ xunhwÿr xwÿnh kwÿjaja mẽ umaj tee ri amnhĩ kukamã hamaxpêr hãmri nê ixkaga. Nê ixkôt mẽ kãm axpên tã amÿnê nê axpên kãm gryk o pa. ¹¹ Nhũm nhÿri mẽ hkwyjaja Tirtũm nhÿ hã kapêr jarênh xwÿnh ã amnhĩ to hêx o pa. Jao mẽ ohtô nê mẽ nokupyr o pa. ¹² Koja mẽ ã amnhĩ nhĩpêx anhÿrja o ra piitã kãm axpên kamã ukapri hkêr o pa. ¹³ Koja mẽ ã ixtã mẽ atomnuj o pa anê. Tã nom kêr ka mẽ amnhĩ to htÿx nê ixkaga hkêr nê. Mẽ kot mẽ apar tã ka mẽ kaxkwa kamã akupÿm atir kurê kumrêx.

¹⁴ –Nê kot kaj mẽ apê ixkwÿjaja ma krĩ piitã hkôt Tirtũm kapêr o mẽ ahkre ho apa. Mẽ kot amnhĩ tomnuj kaga nê ixkôt amnhĩ xunhwÿr nhũm Tirtũm kot ja hã mẽ omunh nê mẽ ho hkra hã mẽ kãm harênh o ri mẽ piitã mẽ hkôt apa. Kot kaj mẽ piitã mẽ kãm ijarênh pa pa rĩ kormã akupÿn mẽ awÿr wrÿ. Anê.

Mẽ pahtomnuj tÿx xwÿnh maati hã harênh

Makre 13.14-23; Rukre 21.20-24; mããnên Sikũn Tesarõn 2.3-4

¹⁵ Nhũm Jesus arĩ mẽmoj kukamã mẽ inhmã kapêr nê mẽ inhmã:

–Amnepêr Tirtũm nhÿ hã kapêr xwÿnh finat Tãniewja na pre tanhmã mẽ atomnuj tÿx xwÿnh maatija jarênh to. Tã koja nhÿrmã ra kot harênh xà hkôt axtem nê Tirtũm mã amnhĩ jarênh xà hã ixkre hwÿr axà nê Tirtũm xãm xà kamã xa. Ka mẽ ja hã omu hãmri nê mẽ kot krĩ grãnh par ã

hkamnhĩx kurê kumrêx. ¹⁶ Koja ã amnhĩ nhĩpêx anê ka mẽ amÿm amnhĩ wÿr mẽ omu hãmri nê ajapôj nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwÿnhjaja kaj mẽ omu hãmri nê mẽ kot mẽ apar pymaj aprôt nê ma amrar kurê kumrêx. ¹⁷ Rÿ ka mẽ anhõrkwy hkrãmnênh o akrĩ japêr nê amÿm amnhĩ wÿr mẽ omu nê akukrêx wÿr axar nê hõ hpyr mã ajamaxpêr kêr nê. Æm wrÿ nê aprôt nê ma atêm kurê kumrêx. ¹⁸ Rÿ ka mẽ apur kãm axapênh o apa japêr nê amÿm mẽ omu hãmri nê akupÿm anhõrkwy hwÿr axê jamÿnh kaxyw atêm kêr nê. Æm mẽ umaj aprôt nê ma atêm kurê kumrêx.

¹⁹ –No mẽ htujarô nê mẽ hkra karàre xwÿnhjaja koja mẽ kêp mẽmoj omnuj tÿx nê. Tanhmã kot mẽ amnhĩ to nê mẽ umaj hprôt tÿx? Nà pika ja kamã koja mẽ mex kêr o mex kêr. Mẽ kot amnhĩ tomnuj mÿrapê koja Tirtũm tanhmã mẽ homnuj tÿx to.

²⁰ –Nê kwa kêr ka mẽ amnhĩ to Tirtũm wÿr kê ã mẽ kot amnhĩ nhĩpêx anhÿr xà hã arĩgroja na wrÿk pê ã amnhĩ nhĩpêx anhÿr kêr nê. Rÿ mẽ hkôt xà hã arĩgro pê sap ã ã amnhĩ nhĩpêx anhÿr kêr nê.

²¹ –Nê ã mẽ kot amnhĩ nhĩpêx anhÿr ã arĩgroja ã koja mẽ piitã amnhĩ xà htÿx kãm hamak tÿx kumrêx. Amnepêr Tirtũm kot pika ho kator krax rũm amnê mẽ pa xwÿnhjaja kormã aa kot ã amnhĩ xà htÿx kamã hamak anhÿr kêr tã arĩgroja ã koja mẽ amnhĩ xà htÿx kumrêx kamã ama. Hãmri nê axte pika ja kamã ã amnhĩ xà htÿx kumrêx kamã hamak anhÿr kêr nê.

²² Kop apu Tirtũm kot mẽ kot amnhĩ xà htÿx kamã hamak xà hã arĩgro hkwy ho gri hkêr ronhÿx ka mẽ apiitã apikaprar pa. Ja pymaj koja mẽ amã ho gri. Kot ra amnhĩ kaxyw mẽ arênh xwÿnhjê japê xaj mẽ amã ho gri.

²³⁻²⁴ –Tã ã mẽmoj kot amnhĩ nhĩpêx anhÿr jakamã koja mẽmojaja tanhmã mẽ amã ixto hêx to nê mẽ amã: “Ota ra Kris akupÿn wrÿ. Kwa mẽ hwÿr mra nê omu.” Anê. Rÿ mẽ amã: “Krisja krĩ mÿj kamã na raa. Kwa mẽ ma hwÿr mra nê omu.” Anhÿr o mẽ amã ixto hêx o pa. Rÿ mẽ awÿr mra nê mẽ amã amnhĩ to hêx nê mẽ amã: “E. Ot pa ixpê Kris ã mẽ awÿr wrÿ.

Tirtûm na mẽ awÿr inhmẽ pa wrÿ.” Anẽ. Rÿ mẽ amã: “E ixpê Tirtûm nhÿ hã ixkapêr xwÿnh na pa mẽ awÿr mõn pøj.” Anhÿr o mẽ amã amnhĩ to hêx. Hãmri nẽ mẽ anokupyr kaxyw mẽ amã aa mẽ kot mẽmoj pumunh kêt kwÿ ho anhÿr o pa. Tirtûm kot amnhĩ kôt mẽ arênh xwÿnhjaja kãm mẽ ate ja hã mẽ omunh nẽ mẽ gryk ã ixkaga hprãm xaj koja mẽ ã mẽ anoo mã amnhĩ nhÿpêx anhÿr o pa. Nom ãm ã amnhĩ nhÿpêx anhÿr kaprÿ ka mẽ ixkaga hkêt nẽ.

²⁵ —E kwa mẽ inhmar tÿx nẽ. Na pa ra ixprĩ hã ã mẽ kot amnhĩ nhÿpêx anhÿrja kukamã ã mẽ amã mẽmoj jarênh anẽ. Tã kêr ka mẽ amnhĩ nẽ ã mẽ kot amnhĩ to hêx anhÿr o mẽ pa xwÿnhjê pumunh mex o apa nẽ axkãm ajamak rom. ²⁶ Rÿ koja mẽ tanhmã mẽ amã ixto hêx to nẽ mẽ amã: “Ota Tirtûm kot mẽ pahwÿr mẽnh xwÿnhhta kapôt ã mõn pøj. E mẽ tokyx ma hwÿr mra nẽ omu.” Anhÿr o mẽ amã ijarẽ ka mẽ ama nẽ ãm mẽ ama nẽ hwÿr amrar kêt nẽ. Rÿ nhÿm mẽ amã: “Ota hitom kãm xa. E mẽ mamrĩ hwÿr agjê nẽ omu.” Anẽ no ka mẽ ãm mẽ ama nẽ ãm mẽ ama nẽ hwÿr agjêx kêt nẽ. ²⁷ Kot paj nhÿrmã akupÿn mẽ awÿr ixwrÿk kaxyw hãmri nẽ ixpinxur kãm ixwrÿk kêt nẽ. Koja pika piitã hkôt mẽ pa xwÿnhjaja anhÿpê ixwrÿk kãm ixpumu. Te mẽ piitã anhÿpê mẽ kot na haxênh pumunh pyrãk o kot kaj mẽ anhÿpê apiitã ixpumu. ²⁸ Te nhÿri mẽmoj kro nẽ nõr nhÿm nhônhti kot omunh nẽ hã htor nẽ hpinphanh nhÿm mẽ piitã hã omunh pyrãk o kot paj amnhĩ nhÿpêx. Anẽ.

Jejus akupÿn wrÿk xwÿj ri mẽmoj kukamã harênh

Makre 13.24-31; Rukre 21.25-33; mãânẽn Wam Tesarõn 4.16-17

²⁹ Nhÿm Jejus arĩ mẽ ixte hkôt ixpa ho ixpa xwÿnhjê mã kapêr nẽ mẽ inhmã:

—Nẽ kot paj akupÿn mẽ awÿr inhnojarênt nhÿm rĩ Tirtûm kaxkwa kamã tanhmã mẽmoj nhÿpêx to. Kapêr ã kagã htÿm kot tanhmã ja kukamã harênh to nẽ harênh kot:

Koja Tirtûm kaxkwa ho àk nhÿm kanhêti pitã rôrøk pa nhÿm myyti ahtyk nhÿm mytwrÿre urãk nẽ axte hpøk kêt nẽ. Anẽ.

³⁰ Koja ã mẽmoj amnhĩ nhÿpêx anhÿr pa hãmri pa kaxkwa hã mẽ amã mẽmoj nhô. Hãmri nhÿm pika piitã hkôt ri mẽ pa xwÿnhjaja piitã omu nẽ tee ri amnhĩ kukamã hamaxpêr o hkaprĩ nẽ mÿr rax kumrêx. No mẽ kajaja kot kaj mẽ omu hãmri nẽ akupÿn mẽ awÿr ixwrÿk nẽ mẽ ato amnhÿptar mã ajamaxpêr kurê kumrêx. Kot paj kakrã kamã hirã htÿx kãm akupÿn ixihtÿx kãm mẽ awÿr wrÿ. ³¹ Hãmri nẽ Tirtûm kapêr o mẽ wrÿk xwÿnh maati mã anẽ nhÿm pifti kakô hãmri nhÿm hkwÿjaja kuma nẽ ma mẽ awÿr pika piitã hkôt anhgrã nẽ ma mra nẽ inhmã mẽ ato akuprô. Ixte amnhĩ kaxyw mẽ axunhwÿr xwÿnhjê o akuprô nẽ man akupÿn ixwrÿ mẽ ato hapêx. Anẽ.

Jejus kot mẽmoj pàr o ejêp jarênh Makre 13.28-31; Rukre 21.29-33

³² Nhÿm Jejus arĩ mẽ inhmã kapêr nẽ mẽ inhmã:

—E ka mẽ pĩ hpàr mÿj pumu. Na hte mẽmoj mytwrÿ hã rã nhÿm mẽ omu nẽ ô hkukamã hamaxpêr kurê kumrêx. ³³ Ja pyrã nẽ koja ã ixte mẽmoj jarênh anhÿr xwÿnhja amnhĩ nhÿpêx par mẽ ka mẽ omu nẽ akupÿn mẽ awÿr ixwrÿk mã ajamaxpêr kurê kumrêx. Kot paj te ra mẽ anhörkwÿ kapem ixãm pyrãk o amnhĩ nhÿpêx. ³⁴ Nom akupÿn ixwrÿk kêt ri koja ã mẽ kot mẽmoj kot amnhĩ nhÿpêx anhÿr pumunh xwÿnhjaja kormã piitã htyk kêt ri pa akupÿn wrÿ.

³⁵ —Nẽ koja nhÿrmã pika nẽ kaxkwa wa hapêx pa. Tã no ãm ixkapêrja koja wa urãk nẽ aa hapêx kêt nẽ. Koja ãm rãhã ho rãhã. Kot paj aa ihkjê ho tanhmã mẽnh to hkêt nẽ. Anẽ.

Mẽ pahte akupÿn Jejus wrÿk xã hã arÿgro pumunh kêt ã mẽ pajarênh

Makre 13.32-37; Rukre 12.37, 17.26-30, 17.34-36; mãânẽn Wam Tesarõn 5.2

³⁶ Nhÿm Jejus arĩ mẽ inhmã kapêr nẽ mẽ inhmã:

—Nẽ ixte akupÿn mẽ awÿr ixwrÿk xã hã arÿgroja mẽ ate omunh kêt. Nẽ kaxkwa kamã Tirtûm kapêr o mẽ wrÿk xwÿnhjaja haxwÿja kot ja pumunh kêt. Nẽ ijaxwÿja ixpê Tirtûm Kra htã ixte ja hã amnhĩ

pumunh kêt. Æm inhõ Papaj pix na kot ja pumunh.

³⁷ –Nê kot paj nhÿrmã man akupÿn mẽ awÿr wrÿ. Akupÿn mẽ awÿr ixwrÿk xà hã arÿgrota ã koja mẽ htÿx ri amnhÿ tomnuj o pa. Te amnepêm Noehti kormã htÿr ri mẽ pa xwÿnhjaja kot htÿx ri amnhÿ tomnuj o pata pyrãk. ³⁸ Na pre htem amnhÿ kaxyw Tÿrtÿm mã hamaxpêr kêt nê. Æm jar mẽ kot amnhÿ nhÿpêx pix kukamã hamaxpêr kôt pix mã amnhÿ nhÿpêx o pa. Rôm nhÿm Noehtija gô htãm pymaj pãr rax nhÿpêxta mã axà. ³⁹ Nhÿm mẽ ja hã omu nê ãm omu nê tanhmã ri amnhÿ kukamã hamaxpêr to hkêt nê. Hãmri nhÿm naja mẽ haêr pê wrÿ nê wrÿk rax o mẽ hanhir pa. Tã akupÿn ixwrÿk xà hã arÿgroja ã koja mẽ htÿx ri ã amnhÿ nhÿpêx anhÿr o paja o pa mẽ haêr pê naja pyrã nê akupÿn wrÿ.

⁴⁰ –E kot paj mẽ amã nhÿrmã akupÿn ixwrÿk nê tanhmã mẽ anhÿpêx to hã amnhÿ jarê. Te kot ja pyrãk. Koja mẽmyjê hõ wa hamêxkrut nê hpur kãm àpênh o xa. Nhÿm hõja ra ixkôt amnhÿ xãm nhÿm hõja ixkôt amnhÿ xãm kêt japêr. Hãmri pa amnhÿ wÿr ra kot ixkôt amnhÿ xãm xwÿnhnta o api nhÿm kot ixkôt amnhÿ xãm kêt xwÿnhnta hpur kãm ahte arÿ xa. Hãmri nê tee ri hkrãmnhwÿ japêr rÿt o xa. ⁴¹ Rÿ nhÿm mênijê wa hamêxkrut nê harôj kahuk o xa. Nhÿm hõja ra ixkôt amnhÿ xãm nhÿm hõja ixkôt amnhÿ xãm kêt japêr. Hãmri pa amnhÿ wÿr kot ixkôt amnhÿ xãm xwÿnhnta ho api nhÿm kot ixkôt amnhÿ xãm kêt xwÿnhnta tee ri hkrãmnhwÿ japêr rÿt o xa hãmri nê hamaxpêr rax kumrêx. Kot paj nhÿrmã akupÿn wrÿ nê ã mẽ anhÿpêx anê. ⁴² Tã mẽ ate akupÿn ixpôx xà hã arÿgro pumunh kêt jakamã kwa kêr ka mẽ ijamãr rãhã ho ri apa. ⁴³ Na htem htÿx ri nhÿri tanhmã amnhÿ nhÿpêx to ho pa nhÿm mẽ kêp àhkÿnh xwÿnh mẽ ôrkwÿ hwÿr agjê nê mẽ kêp ahkÿ. ⁴⁴ Tã mẽ ate akupÿn ixwrÿk xà hã arÿgro pumunh kêt jakamã kwa kêr ka mẽ ixwakre kamã te mẽ apê mẽ ôrkwÿ nhõ dõn kot amnhÿ nhÿpêx pyrã nê atÿx ri tanhmã amnhÿ tomnuj to ho apa hkêt nê. Ixkutêp axkãm ajamak rom nê ri apa. Jao tãm ixkutêp amnhÿ nhÿpêx rãhã ho ri apa. Anê.

*Mẽ kãm mẽ àpênh mex xwÿnhjê jarênh
Rukre 12.41-48*

⁴⁵ Nhÿm Jejus arÿ mẽ inhmã kapêr nê mẽ inhmã:

–E koja mẽ kãm àpênh mex xwÿnhjê hõ àpênh mex o pa hãmri nhÿm õ patrãw àpênh ã omu hãmri nê ma nhÿhÿm mõi kaxyw nê ïhkram mẽmoj piitã haxàr pa nê kãm: “E kêr ka ixwakre kamã inhmã inhõrkwÿ tãnopxar mex nê. Nê inhmã mẽ àpênh mex xwÿnhjê mã mẽ apkur xà nhõr o apa.” Anhÿr o kãm mẽmoj tã karõ hãmri nê kato nê ma nhÿhÿm mõi. ⁴⁶ Hãmri nhÿm kot kãm àpênh mex xwÿnhjaja wakre kamã kãm àpênh mex o pa. Jakamã nhÿm õ patrãw akupÿn hpôx o mõi nhÿm amnhÿ wÿr harênh ma nê hkÿnh nê. Nê tee ri amnhÿ kukamã hamaxpêr o kãm uma hkêt nê. Kot wakre kamã kutêp kãm àpênh mex jakamã tee ri tanhmã amnhÿ kukamã hamaxpêr to hkêt nê. ⁴⁷ Jakamã nhÿm õ patrãwja akupÿn pøj nê kot kãm àpênh mex ã omu nê hkÿnh nê. Hãmri nê kot kãm õ mẽmoj piitã hamãr o pa kaxyw ïhkram haxàr pa. ⁴⁸ No koja axtem nê wakre kamã kãm àpênh mex kêt japêr. Nê hamaxpêr o: “Tk. Nã koja tokyx akupÿn mõi kêt nê.” Anhÿr o hkãmnhÿx. ⁴⁹ Hãmri nê wakre kamã kãm mẽ àpênh mex xwÿnhjê htak nê pipãnh pix o pa. Nê kãm kagôxÿhti xành xwÿnhjê kôt pix mã pa. ⁵⁰ Hãmri nhÿm õ patrãwja haêr pê akupÿn pøj nê tee ri ja hã omu. ⁵¹ Hãmri nê kamã gryk tÿx nê tanhmã homnuj htÿx to nê kãm mẽ àpênh punuj xwÿnhjê mẽ mẽ ho hpimràatã amnhÿ nê mẽ kator pa. Hãmri nê mẽ kot kapêr kwÿm amnhÿ nhÿpêx mex xwÿnhjê mẽ mẽ ho hpimràatã tanhmã mẽ homnuj to nê amnhÿ nê mẽ kator. Hãmri nhÿm mẽ tee ri amnhÿ kukamã hamaxpêr nê mur nê tee ri amnhÿ nhÿpêx. Tã kêr ka mẽ ixwakre kamã ho mẽ urãk kêt nê. Mẽ kurom ixwakre kamã ixkapêr kôt amnhÿ nhÿpêx mex rãhã ho ri apa. Anê.

25

Kormã mẽ mjên kêt xwÿnhjê ho 10 nê mẽ harênh

Wam Tesarõn 5.1-3

¹ Nhÿm Jejus arÿ mẽ inhmã kapêr nê mẽ inhmã:

—Ně mẽ ate Tirtũm kôt amnhĩ nhĩpêx o mẽ apa xwỳnhjaja kêt ka mẽ akupỳn amnhĩ wỳr ixkãm ajamak rom nẽ ri apa. Nom mẽ kêp Tirtũm prãm nõkati xwỳnhjaja koja mẽ akĩnhã ãm htỳx tanhmã amnhĩ to pix kukamã hamaxpêr o pa. Te kormã mẽ mjên kêt xwỳnhjaja kot amnhĩ nhĩpêxta pyræk. E pa mẽ amã tanhmã mẽ harênh to ka mẽ inhma. Koja kormã mẽ mjên kêt xwỳnh kêp 10jaja ma hkrãmnhwỳ mjên mã xwỳnh kutã pry hã mra. Amnhĩ kôt kanê jamỳ nẽ o mra nẽ kutêp pry nhĩkrep hkrĩ. ²⁻⁴ Nhũm mẽ kêp 5jaja hkwyjê rom amnhĩ kukamã hamaxpêr mex nẽ kanê kaxyw amnhĩ kôt orti hkwy ho mō. No nhũm mẽ kêp 5 nẽ mẽ hkĩnhã ãm htỳx kanê pix jamỳ nẽ o mra. ⁵ Hãmri nẽ mẽ mjên mã xwỳnhja kutêp axpên mã kapêr o hkrĩ. Nhũm tokyx htêm kêt nhũm mẽ kutêp hkrĩ nẽ gaa nẽ ra õtxwa nẽ gaa nẽ hikwỳ nẽ ra õt pa.

⁶ —Tã nhũm kôt ã kamàt hãmri nhũm mjên mã xwỳnhhta hpõx o tẽ. Hãmri nhũm kot hkukamã harênh xwỳnhja mẽ õt o mẽ hikwỳ xwỳnhjê mã amỹra nẽ mẽ kãm: “Kwa mẽ hãmri. Ota mjên mã xwỳnhhta tẽ. Mẽ tokyx kànhmã akrĩ pu mẽ kutã mra.” Anẽ. ⁷ Hãmri nhũm mẽ hkrã hapôj nẽ kanê hpôk. ⁸ Nom nhũm mẽ hkwyjê hkĩnhã õ kanê kaxyw orti ho pa hkêt xwỳnhjaja ra mẽ kêp mẽ kanêja hkaprỳ hpa nhũm mẽ tee ri kot hpôk kaxyw. Hãmri nẽ orti hkwy hã hkwyjê hwỳ nẽ mẽ kãm: “Xê mẽ inhmã orti ho inhõ kanê go.” Anẽ. ⁹ Nom nhũm mẽ kêp nẽ nẽ mẽ kãm: “Ma mẽ inhõ kanê kamã orti grire kênã kot pa kêt mẽ amã ho go. Xê mẽ tokyx ma mra nẽ nhỹri amnhĩm hkwy japrô mê.” Anẽ. ¹⁰ Hãmri nhũm mẽ tee ri mẽ kuma nẽ ma amnhĩm hkwy japrôr mã ma mra.

—Rôm nhũm mjên mã xwỳnhhta mẽ hãnh tẽ nhũm kanê kamã arĩ mẽ orti xwỳnhjaja omu nẽ hã jêt kurê kumrêx. Hãmri nẽ ma hkôt mōn mẽ pikuprõnh xà hã ixkreja wỳr wa hã hkĩnh nẽ apkur kaxyw gjêx pa nhũm mẽ hã kahê. Mẽ gjêx xà hã oreja ra hwỳr hpõx jakamã nhũm mẽ hã kahê.

¹¹ —Tã nhũm ma mẽ kot orti japrôr mã mra xwỳnhjaja hãmri amnhĩ to hapu nẽ mra nẽ tee ri mẽ hã hakwakre kupê nẽ htatak nẽ tee ri mẽ kãm akir nẽ mẽ kãm: “Xê mẽ inhmã kahê xà mẽ pa mẽ awỳr agjê.”

Anẽ. ¹² Hãmri nhũm hprõ mã xwỳnhhta mẽ kuma nẽ mẽ kãm: “Tk. Nà ixte mẽ apumunhre hã kot pa kêt mẽ amã kahê xà mẽ. Kwa mẽ ma akupỳm mra.” Anẽ. ã mẽ ujarênh kot anhỹr. Anẽ.

¹³ Nhũm pre ã Jejus mẽ inhmã ujarênh anẽ. Hãmri nẽ mẽ inhmã:

—E kêt ka mẽ te kot amnhĩ kôt orti hkwy ho mōr xwỳnhjaja kot amnhĩ nhĩpêx pyræk. Mẽ ate akupỳn ixwryk xà hã arĩgro pumunh kêt jakamã kêt ka mẽ apkati mẽ ixkamã ajamak rãhã ho apa. Anẽ.

Mẽ kãm mẽ ãpênh xwỳnhjê jarênh

Rukre 19.11-27

¹⁴ Nhũm Jejus arĩ mẽ inhmã kapêr nẽ mẽ inhmã:

—E kêt ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nẽ. Mẽ ate tanhmã inhmã amnhĩ nhĩpêx to ho apa xà hkôt kot paj mẽ amã amnhĩre. Te mēhõ my kot kãm mẽ ãpênh xwỳnhjê nhĩpêx pyræk. Koja nhỹhỹm nojarêt nẽ kãm mẽ ãpênh xwỳnhjê mã hikukrêx piitã hkaga hpa. Õrkwy nẽ hpur nẽ hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa. ¹⁵ Hãmri nẽ ahpỳnhã mẽ kãm kàxpore hkwy gō. Mẽ kot kutêp kãm tanhmã ho rũnh to kaxyw ahpỳnhã mẽ kãm õr pa. Kot kàxpore pumunh mex xwỳnhja mã nhũm ho 5.000 nẽ kugō. Nẽ kot hkôt kax pè omunh xwỳnhja mã nhũm ho 2.000 nẽ kugō. Nẽ kormã kot omunh tỳx kêt xwỳnhja mã nhũm ãm ho 1.000 pix nẽ kugō. Hãmri nẽ mẽ kãm amnhĩ jarê nẽ ma nhỹhỹm mō. ¹⁶ Hãmri nhũm kot ho 5.000 nẽ hamỳnh xwỳnhja kàxporeta py nẽ ma o mōr kurê kumrêx nẽ tanhmã ho ãpênh to ho mōr kãm ra hipy axte ho 5.000 nẽ kumẽ. ¹⁷ Nhũm kot ho 2.000 nẽ hamỳnh xwỳnhja mãnhnẽn tanhmã ho ãpênh to ho mōr kamã ra hipy axte ho 2.000 nẽ kumẽ. ¹⁸ Nom nhũm kot ho 1.000 pix nẽ hpyr xwỳnhja wa hkĩnh ã axtem nẽ ma o tẽ nẽ kãm kakwỳ nẽ kamã haxà nẽ hity hpa nẽ ma akupỳm tẽ.

¹⁹ —Tã nhũm mẽ õ patrãwja akupỳn mōn pōj nẽ mẽ kãm: “E mẽ amnẽ ixwỳr mra nẽ ixte mẽ amã kàxpore ho ixpigrãnh xwỳnhhta jarê. Tanhmã na ka prem ixkutêp inhmã hipêx to?” Anẽ. ²⁰ Hãmri nhũm kot ho

5.000 nê hpyr xwÿnhhta kumrêx hwÿr tē nê kām: “E ota akàxporeta. Ate inhmā ho 5.000 pix nê ōr tā pa amā ho rax nê amā hipy axte ho 5.000 nê kumē nhūm ho axkamur nê ra ho 10.000. Tā ota.” Anhÿr o kām kapêr hāmri nê kām kugō ²¹ nhūm amnhīm hamÿ nê omu nê hkīnh nê. Hāmri nê kām: “Nā ām hāmri na ka inhmā ho anē. Ixte amā ho 5.000 pix nê ōr tā ka ra inhmā ho rax jakamā kot kaj apē inhmā mē àpēnh xwÿnhjê hkrāhtūm. E amnē ixwÿr axà pu mē apku nê pahkīnh.” Anē.

²² –Hāmri nhūm hpānhā kot ho 2.000 nê hpyr xwÿnhhta hwÿr tē nê ō patrāwta mā kām: “E ota akàxporeta. Ate inhmā ho 2.000 pix nê ōr tā pa amā ho rax nê amā hipy axte ho 2.000 nê kumē. Tā ota.” Anē.

²³ Hāmri nhūm kuma nê amnhīm hamÿ nê omu nê hkīnh nê. Hāmri nê kām: “Nā ām hāmri na ka ā inhmā ho rax anē. Ixte amā ho 2.000 pix nê ōr tā ka inhmā ho rax jakamā kot kaj apē inhmā mē àpēnh xwÿnhjê hkrāhtūm. E amnē ajaxwÿja ixwÿr axà pu mē apku nê pahkīnh.” Anē.

²⁴ –Tā nhūm kot ho 1.000 pix nê hpyr xwÿnhhta hapu hā wa hkôt tē. Hāmri nê ō patrāw mā tanhmā kapêr to nê kām: “Nā ra ixte apumunh tūm. Pêr axàhkurê pix kām na ka hte apa. Nê amā akàxpore ho rax nê anhō ho rax pix kukamā ajamaxpêr o ri apa. Nom mē pajaja mē ixàpēnh rax pix kukwak ri na ka hte akàxpore rax nê apa. ²⁵ Jakamā na pa inhmā apyma nê. Nê akàxporeta py nê ma o tē nê kaxyw kre nê kamā haxà. Tā ka akupÿn mōn pōj pa ajarēnh ma hāmri nê hkapa nê man akupÿn amā o tē. Tā ota anhō 1.000ta.” Anē. ²⁶⁻²⁷ Hāmri nhūm tee ri kuma nê kām: “Tk. Kwa amā ixpyma nê ate ixpumunh mex anhÿr tā na ka ixte amā kàxpore nhōrta pyr nê ma ho atēm. Nê mē kot mē kēp kàxpore jamÿnh o kuhê xà kamā mē kām ōr nhūm mē ixkutēp tanhmā inhmā ho rax to hkēt nê? Pêr ām amā kaga nê ate amnhī tomnu pix o ri apa xwÿnh.” Anē. ²⁸⁻³⁰ Hāmri nê kēp kàxporeta py nê nhām jam kugō nê kām: “E amÿ nê o tē nê kot inhmā ho 10.000 nê ōr xwÿnhhta mā agō. Hāmri nê jahti pynē nê ma o tē nê kamāt kō kamā amē. Apēnh mexti hā. Koja tee amÿra nê amnhī xà htÿx kamā hamak xàj tee ri amnhī nham

o axpēn kamnhar tÿx kaprÿ nê rī amnhī pumu.” Anhÿr o kām kapêr nhūm kuma nê hpa hā kupy nê ma o tē. Hāmri nhūm mē ō patrāwja mē àpēnh xwÿnhjê mā kām: “E mē ate ixwakre kamā mē axàpēnh mex xwÿnhjaja kot paj ā mē ato mex rax anē ka mē akīnh nê. Nom mē kot inhmā mē àpēnh mex kēt xwÿnhjaja kot paj mē kēp mēō mēmojta jamÿ nê nhām mēhōm kugō nhūm hkaprī nê.” Anē. Ā mē ujarēnh kot anhÿr. Anē.

Jejus kot nhÿrmā mē piitā tanhmā mē harēnh to hā harēnh
Matêwre 13.35-43, 13.47-50; määñēn Apokarip 20.11-15

³¹ Nhūm Jejus arī mē inhmā kapêr nê mē inhmā:

–Nê kot paj nhÿrmā akupÿn mē awÿr wrÿ nhūm Tirtūm kapêr o mē wrÿk xwÿnh piitā man ixkôt wrÿ. Kot paj wrÿ nê ixpē pah maati hā ixkrī xà maati kamā inhmex nê nhÿ. ³²⁻³³ Hāmri nê Tirtūm kapêr o mē wrÿk xwÿnhjê mā anē nhūm mē ma krī piitā hkôt mē apiitā mē ato pikuprōnh pa nê akupÿn ixwÿr mē ato hapēx. Pa mē apumu nê tanhmā mē axunhwÿr to. Te ōwēhti jamār o pa xwÿnh kot ōwēhti kaēx ā motre pumunh nê nhām nê motre xunhwÿr parta pyrāk. ³⁴ Hāmri nê ixupōk rūm mē ate ixkôt amnhī xunhwÿr xwÿnhjê mā ixkapêr nê mē amā: “E mē kajaja kot kaj mē amex kumrêx nê ri apa ho apa. Amnepēm kormā mēmoj piitā hkēt ri na pa pre Inhīpēxà mē wa mē akukamā tanhmā ijamaxpêr to nê mē amā mēmoj mex xunhwÿr rūnh nê. ³⁵ Tā ka prem ajapōj hāmri nê ixkôt amnhī xunhwÿ nê tanhmā ixto mex to ho ri apa.

Na pa pre inhmā prām nê ixpa ka prem ixpumu nê ixkamā axukaprī nê inhmā mēmoj gō pa kuku.

Nê na pa pre inhmā kōr nê ixpa ka prem ja hā ixpumu nê inhmā gō pa ho ixkō nê akupÿm ixihtÿx.

Nê aa mē ate ixpumunh kēt tā ka prem nhÿri ixpumu nê amnhī nhōrkwy hwÿr ixwÿ.

³⁶ Nê na pa pre ixē pynajti nê ri ixpa ka prem ja hā ixpumu nê inhmā axē gō pa haxà nê ri hā ixpa.

Ně na pa pre ixà ně inhīkwý ka prem ixwýr mra ně ixkane ně tanhmã ixto mex to pa akupým inhmex.

Nhům prem ijaxà pa mẽ hagjênh xà kamã ixkrī ka prem ixwýr mra ně tanhmã ixto mex to.

Ã mẽ ate ixto mex anhýr o ri apa jakamã nhům inhõ Papajja ixtã mẽ apumu. Tã koja ixtã mẽ ato mex rax ně.” Aně.

³⁷ –Kot paj ã mẽ ate tãm amnhī nhīpêx xwýnhjê mã ixkapêr aně. Hãmri ka mẽ tee ri inhma ně amnhī tã ixkukja ně inhmã: “Kwa xà mẽ pajaja na pa prem ã ato mex aně? Nà mẽ ixte ã anhīpêx anhýr kãm amnhī pumunh kêt tã na ka ã mẽ ijarênh aně. Kwa nhýri na ka pre amã prãm ně apa pa prem apumu ně amã mẽmoj gõ ka aku? Ně nhýri na ka pre amã kôr ně apa pa prem amã gõ hkwy ka ho ixkõ? ³⁸ Ně nhýri na pa prem apumu ně amnhī nhõrkwý hwýr awý? Rý ka pre axê pynajti ně apa pa prem amã inhīnõhkã gõ ka hagjê? ³⁹ Ně nhýri na ka pre axà ně anhīkwý pa prem apumu ně akane? Ně nhýri na prem ajaxà pa mẽ hagjênh xàja wýr mra ně kamã tanhmã ato mex to? Nà mẽ pa hkêt.” Anhýr o amnhī tã ixkukja. ⁴⁰ Hãmri pa mẽ amã: “Nà mẽ kêp amrakati xwýnhjaja na pre htem pa pyrãk. Tã ka prem mẽ kamã axukaprī hã tanhmã mẽ kutã anojarêt to ho ri apa jao te pa tanhmã ixto mex to ho apa pyrãk. ãm hãmri na ka prem ã mẽ ho mex anhýr o ri apa.” Aně. Kot paj ã mẽ ate amnhī to mex xwýnhjê mã ixkapêr aně.

⁴¹ –Hãmri ně hpãnhã apke rům mẽ kot ixkõt amnhī xunhwýr kêt xwýnhjê mã tanhmã ixkapêr to ně mẽ kãm: “No mẽ kajaja kot paj ixupõk rům mẽ unhwýr xwýnhjtajê hkīnhã mẽ ato mex kêt ně. Amnepêm na pre Tirtũmja Satanasti mẽ mẽ kot tanhmã kãm amnhī nhīpêx to ho mẽ pa xwýnhjê mẽ mẽ ho hpimràatã mẽ kaxyw kuwy rax kumrêxja nhīpêx. Mě kot amnhī tomnuj tỳx mýrapê nhýrmã kamã amnhī xà htỳx kamã hamak rãhã ně pa ho pa kaxyw. Tã kot kaj mẽ ajaxwýja ma mẽ hkõt hwýr ajapêx. Mě apê Satanasti hkõt mẽ ate amnhī nhīpêx o apa xwýnh jakamã kot kaj mẽ uràn ma hwýr ajapêx pa. ⁴² Aa mẽ ate tanhmã ixto mex to hkêt. Na ka pre

htem inhmã prãm ně ixpa hã ixpumu nom inhmã mẽmoj nhõr kêt ně. Ně inhmã kôr ně ixpa hã ixpumu nom inhmã gõ hkwy hkêt ně. ⁴³ Ně nhýri ahte ixpa hã ixpumu nom amnhī nhõrkwý hwýr ixwýr kêt ně. Ně ixê pynajre ně ixpa hã ixpumu nom inhmã axê nhõr kêt ně. Ně ixà ně inhīkwý hã ixpumu nom ixkane hkêt ně. Ně mẽ kot ijaxàr nhům arī ixkrī hã ixpumu nom ixwýr amrar ně tanhmã ixto mex to hkêt ně. ã mẽ ate inhīpêx anhýr o apa jakamã e mẽ ma kuwy hwýr apa kurê kumrêx.” Aně. Kot paj ã mẽ kãm ixkapêr aně. ⁴⁴ Hãmri nhům mẽ tee ri inhma ně amnhī tã ixkukja ně inhmã: “Kwa nà ã mẽ ijarênh anhýr kêt ně. Aa mẽ ixte ã anhīpêx anhýre hã. Nhýri na pa prem tanhmã akute hã apumu? Nà aa mẽ ixte nhýri ã ate amnhī nhīpêx anhýr ã apumunhre hã.” Aně.

⁴⁵ –Koja mẽ ã inhmã amnhī tã aprãr anhýr kaprý. Kot paj mẽ kãm: “Nà na ka pre htem mẽ kêp amrakati xwýnhjê pumu ně ãm mẽ omunh o ri apa ně mẽ kamã axukaprī hkêt ně. ã mẽ hipêx anhýr jao te pa ã inhīpêx anhýr pyrãk. Jakamã kwa mẽ tokyx ma kuwy hwýr ajapêx kurê kumrêx.” Aně. Kot paj ã kuwy hwýr mẽ hanor aně. ⁴⁶ Hãmri ně hwýr mẽ rênh pa nhům mẽ ma hwýr hapêx ně kamã amnhī xà htỳx kãm hamak rãhã ně pa ho pa ně aa kator kêt kumrêx. No kêt mẽ ate tãm amnhī nhīpêx o mẽ apa xwýnhjaja kot kaj mẽ kurom ma Tirtũm mẽ wa inhõ krī hwýr api ně kamã amex ně atır tũm ně apa ho pa. Kot paj ã ahpýnhã mẽ apiitã mẽ anhīpêx aně. Aně.

Nhům pre ã Jejus akupýn wrýk ã amnhī kukamã mẽ inhmã ujarênh aně. Hãmri ně mẽ inhmã ujarênh pa.

26

Mě kot Jejus ã ãmnênh ã amnhī jarênh Makre 14.1-2; Rukre 22.1-2; Juãw 11.45-53

¹ Tã nhům Jejus mẽ ixte hkõt ixpa ho ixpa xwýnhjê mã ujarênh pa ně mẽ inhmã:

² –E kot puj mẽ axte pahtã apkati axkrut hãmri nhům arıgro pê Pas kato. Jakamã koja mẽ piitã amnepêm Tirtũm kot Ejit nhõ xwýnhjê pê mẽ pakukamã mẽ panhīgêjtê kator mã hamaxpêr ně hã hkīnh kaxyw

Jerujarê hwÿr akuprô. Kamã koja mẽ ix-pynê nê pĩ kahpa hã inhô nê ixpĩ. Koja mẽ tokyx ã inhĩpêx anê. Anê.

Nhũm pre ã amnhĩ kukamã mẽ inhmã amnhĩ jarênh anê. ³ Rôm nhũm Jerujarê kamã patre krãhtũmjê mẽ Ijaew pigêtjaja patre maati Kajpasja nhõrkwÿ kamã axpên wÿr akuprô. ⁴⁻⁵ Ra mẽ kãm Jejus pĩr prãm tâ mẽ kãm mẽ kot hkôt kapêr mar o pa xwÿnhjê puma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupĩ? Kot puj mẽ pahkĩnh kãm tanhmã ho nhũm mẽ hkĩnh xwÿnhjaja hã mẽ pakamã gryk tÿx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê.

Anhÿr o axpên ma.

*Mêhõ ni kot Jejus krã gregrer ã harênh
Makre 14.3-9; Rukre 7.36-50; Juãw 12.1-8*

⁶ Tã nhũm Jejus kormã krĩ pê Petãn kamã Simãw nhõrkwÿ kamã apkur o nhÿ. Simãwja na pre hkà kro xapêr tÿx o pa nhũm Jejus ra arĩgro hõ hã akupÿm hkà ho mex. Hãmri nê akupÿm õ krĩ hwÿr pøj nê õrkwÿ hwÿr tẽ nê kuri apkur o nhÿ. ⁷ Hãmri nhũm mêhõ nija hpõx ã omu nê hamaxpêr o:

—Ma koja pêr Jejusja pa hã apkati grêre hãmri nê ty. An pa ma hwÿr tẽ nê mêhkuxwa xà ho hkuxwa.

Anê hãmri nê kên jaka ho kàx kãm mêhkuxwa xàja nhũm kumÿ nê ma hwÿr o tẽ. Hãmri nê ho hkrã gregrer nê hã hkapĩr pa nê ho hkuxwa hpa. Mêhkuxwa xà hã kàxpore xohtô rax tâ nhũm ã hã hkapĩr par anê. ⁸ Hãmri pa mẽ ixte Jejus kôt ixpa ho ixpa xwÿnhjaja tee ri ã kot hipêx anhÿr ã omu nê axpên mã:

—Tk. Kwa na hã mêhkuxwa xàta kapĩr pa. ⁹ Kop apu ma kot o htêm nê ho wênê nê hpãnhã kàxpore ho rax kumrêx nê hamÿnh nê ho mẽ kêp amrakati xwÿnhjê nhĩpêx par o nhÿx ja kãm mex nê. Kwa mo na we ã amnhĩ nhĩpêx anhÿr kêt nê? Anê.

¹⁰ Hãmri nhũm Jejus amnhĩ tâ mẽ inhma nê mẽ inhmã:

—Kwa kot ixto mex kaxyw kênã na ka mẽ axtem nê ixtã kãm akir. ¹¹ Mẽ kêp amrakati xwÿnhjaja koja mẽ arĩ mẽ akôt pa rãhã nê. Ka mẽ amã mẽmo arĩgro hã tanhmã mẽ ho

ajuta hto hprãm nê tanhmã mẽ ho ajuta hto nê mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. ¹² Ixtyk nhũm mẽ kot ijaxàr kukamã na ã ixkuxwa anê. ãm hãmri na ã inhĩpêx anê. ¹³ ãm hãmri na pa mẽ amã kot ã inhĩpêx anhÿrja jarê. Koja mẽ krĩ piitã hkôt axpên mã ijarênh ã kagã kamã ijarênh o pa nê kamã nija kot ã inhĩpêx anhÿr kamã harê nê kuma. Anê.

*Jut Kariot kot mẽ kãm Jejus ã àmnênh
Makre 14.10-11; Rukre 22.3-6*

¹⁴ Tã nhũm Jut Kariotja. Kêp mẽ ixpê Jejus kôt ixpa ho ixpa xwÿnh pê 12 hõ htã ra tanhmã hamaxpêr to nê axtem nê Satanasti nhÿ hã ma patre krãhtũmjê hwÿr tẽ nê tanhmã Jejus o mẽ mar to nê mẽ kãm:

¹⁵ —E ot pa mẽ amã Jejus jarênh o tẽ. Xà kot paj mẽ amã hã amÿnê ka mẽ hpãnhã inhmã amnhĩre nà? Anê.

Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre.

Anê hãmri nê kãm kàxpore ho 30 nê õr kurê kumrêx nhũm hamÿ nê hkĩnh nê kato nê ma tẽ. ¹⁶ Hãmri nê mẽ kãm Jejus pynênh kaxyw tânopxar o ri hkôt ri pa. Mẽ kot mar o ri pa xwÿnhjê hkàx ã unênh nê ma mẽ hwÿr o htêm kaxyw.

*Jejus kot hkôt mẽ pa xwÿnhjê kutã apkur
Makre 14.12-21; Rukre 22.7-13; Juãw 13.21-30*

¹⁷ Tã nhũm mẽ hkĩnh pê Pasja kato. Amnepêm kormã Ejit kãm mẽ pa ri na pre mẽ inhĩgêtjaja ôwêhti hkrare hkwÿ hpa nê ho anê nê kuku. Tĩrtũm kot ja hã mẽ omunh nê Ejit nhõ xwÿnhjê nê mẽ kator kaxyw nhũm prem ã amnhĩ nhĩpêx anê. Tã mẽ ixpê mẽ hkanrêhã mẽ htãmnhwÿjaja na pa htem arĩ amgrã mẽ arĩgro pê Pasja ã axpên wÿr akuprô nê jam ijamaxpêr pê mẽ uràk nê ôwêhti hkrare hkwÿ pa nê pãwti kaxkrit kêt kãm kuku. Jakamã pa mẽ ixte Jejus kôt ixpa ho ixpa xwÿnhja wa axkrut nê Jejus wÿr tẽ nê amnhĩ tâ hkukja nê kãm:

—Kwa nhÿri kot paj we wa tẽ nê mẽ akutêp Pas ã mẽ panhõ hã apê? Anê.

¹⁸ Hãmri nhũm wa kãm:

—Nà wa mãmrĩ ma Jerujarêja wÿr wa tẽ. Nê krĩm axà nê mêhõ myti pumunh kurê

kumrêx nê kãm: “E Jejus na wa inhmê pa wa awÿr tẽ. Na awÿr hpêr mênh o: ‘E na pa ra inhnojarêt. Jakamã nhÿri kot paj we ixkôt ri mê pa ho mê pa xwÿnhjê mê Pas ã axpên kutã apku?’ Anhÿr o awÿr hpêr mê.” Anê. E wa ã kãm akapêr anê kê war ama nê war amã ôrkwÿ nhÿmök ã ixkre rax ô jahkre. Kamã ra kaxyw mê paxàpkur xà hã mëmoj piitãã. Ka wa omu hãmri nê mãmri mê ixkutêp kamã mëmoj tã apê. Anê.

¹⁹ Hãmri nhÿm wa kuma nê ma Jerujarê hwÿr tẽ. Nê hwÿr axà hãmri nê ra kot wa kãm mëmoj jarênh xà hkôt mëmoj piitã omu hãmri nê mê ixkutêp mëõ hã àpênh o wa xa.

²⁰ Tã nhÿm kamãt pa mê Jejusja kôt ixkreta wÿr ixpôx pa nê hwÿr agjê nê ixàpkur kaxyw ixkrÿ. Mê ixte Jejus kôt ixpa ho ixpa xwÿnhjê pê 12jaja pa mê ixpiitã Jejus kutã ixàpkur o ixkrÿ. ²¹ Hãmri nhÿm Jejus tanhmã mê inhÿõ jarênh to nê mê inhmã:

—E pa mê amã mëmoj jarê ka mê inhma. Kot kaj mê atõ mê kãm ixkurê xwÿnhjê nhÿhkram ijaxã. Anê.

²² Hãmri pa mê tee ri kuma nê ixkaprÿ htÿx nê. Hãmri nê axpên pãnhã amnhÿ tã hkukja nê kãm:

—Kwa xà pa? Nà pa hkêt. Kot paj ã anhÿpêx anhÿr kêt kumrêx Pahihtì.

Anhÿr o axpên pãnhã kãm amnhÿ tã aprã.

²³ Hãmri nhÿm mê inhmã:

—Nà ãm hãmri na pa mê amã ixkapêr. Mê ate ixkutã guhkrax kãm anhõ pãwti ho mry kagõ nhek o akrÿ xwÿnhjê hõ kot kaj mê kãm ixtã amÿnê. ²⁴ Tÿrtÿm kapêr ã kagà htÿm ra kot ixkukamã harênh xà hkôt koja mê tanhmã ixto rax nê ixpÿ. Nom kot mê kãm ixtã àmnênh mã xwÿnhhta hêxta waa nê. ã kot amnhÿ nhÿpêx anhÿrja mÿrapê koja amnhÿ xà htÿx kãm hamak rax kumrêx. Kop apu aa õ mãmãj nhõxà hkre rÿm kator kêt ronhÿx ja kãm mex nê. Anê.

²⁵ Hãmri nhÿm Jut Kariot kot mê kãm hã àmnênh mã xwÿnhhta hãmri amnhÿ tã kuma nê kãm:

—Kwa xà we pa Jejus? Xà pa kot paj ã anhÿpêx anê? Kwa nà pa hkêt. Anê.

Hãmri nhÿm kãm:

—Tÿ. Ka ã ate inhÿpêx anhÿr mã kênã. Anê.

Jejus kot amnhÿ kamrô pikapÿr kukamã harênh

Makre 14.22-26; Rukre 22.14-23; mãänênh Wam Korÿt 11.23-26

²⁶ Tã nhÿm Jejus pãwti hõ py nê Tÿrtÿm mã harê nê mê inhmã ho hkry nê ho mê inhÿpêx pa nê mê inhmã:

—E na pa ã mê amã pãwti ho hkry nê mê amã ôr anê. Ja pyrã nê koja mê ã inhÿpêx anê nê te ixto hkry hpar pyrãk o inhÿpêx pa amnhÿ xà htÿx kamã ijamak kãm ty. Nom mê anê kot paj ty. E mê mãmri aku.

Anhÿr o mê inhmã amnhÿ jarê pa mê kuma nê kot mê inhmã ho hkry xwÿnhja ku. ²⁷⁻²⁸ Hãmri nhÿm hpãnhã kop py nê mã ho anê nê Tÿrtÿm mã harê nê mê inhmã kugõ nê mê inhmã:

—Mê kot ixpÿr xà hã arÿgroja ã koja ixkamrô axkapÿ. Nom koja mê amarÿ ixpÿr nhÿm amarÿ ixkamrô hpikapÿr kêt nê. ãm paa. Pa kot paj mê anê mê ÿhkram amnhÿ jaxà nhÿm mê ã inhÿpêx anê nê ixpÿ. Koja ixkamrô axkapÿ nhÿm Tÿrtÿm omu nê ixkukwak ri mê ate ixkôt amnhÿ xunhwÿr xwÿnhjê nê mê ate amnhÿ tomnuj piitã te amnhÿ katut kôt rênh par pyrãk o hipêx nê mê ato hkra. Ra amnepêm kot ã amnhÿ jarênh anhÿr xà hkôt. Jakamã e mê ixkamrô pikapÿr mã ajamaxpêr pê wÿhti ho akôm o axpên nhÿpêx. ²⁹ ãm hãmri na pa ã mê amã amnhÿ jarênh anê. Kot paj axte wÿhti ho ixkôm kêt rãhã nhÿm nhÿrmã inhõ Papaj akupÿn mê awÿr inhmê. Hãmri pu mê akupÿn ixwrÿk xà hã arÿgrota ã pahkÿnh rax kumrêx. No ãm axtem tanhmã hã pahkÿnh to. Anê.

Nhÿm pre ã Jejus mê inhmã amnhÿ jarênh anê. Pa mê axpên pãnhã kopta py nê wÿta kwÿ ho ixkõ. ³⁰ Hãmri nê mê ixpiitã ho ixkôm pa nê Tÿrtÿm mã mex ã gre. Hãmri nê ijapôj nê hixêt prêk pê Oriwêhti hwÿr ma mÿa.

Jejus kot Simãw Pêtre mã kapêr ã harênh
Makre 14.27-31; Rukre 22.31-34; Juãw 13.36-38

³¹ Tã nhÿm Jejus tanhmã mê ixte hkôt ixpa ho ixpa xwÿnhjê jarênh to nê mê inhmã:

—E Tÿrtÿm kapêr ã kagà htÿmta kot tanhmã mê akukamã mê ajarênh to nê mê ajarênh kot:

Kot paj ôwêhti jamâr o pa xwÿnhja pĩ hãmri nhũm ôwêhti hpigrành pa nê ma angrà nê ri mra.

Anhÿr o kot mē ajarēnh. Te ho mē apē ôwêhti pyrà nê ã mē ajarēnh anē. Tã kamàt ja kamã koja mē tanhmã inhĩpêx to ka mē ixtã mē omu nê mē umaj ôwêhti pyrà nê apiitã ixkaga hpa nê ma aprôt nê mra. ³² Nê mē kot ixpĩr tã kot paj akupÿm ixtĩr. Hãmri nê ma akupÿm mē akukamã pika pē Garirej wÿr mō. Kamã kot puj mē axte axpēn pumu. Anē.

³³ Hãmri nhũm Simãw Pêtre tee ri tanhmã mē kot amnhĩ nhĩpêx to hkukamã amnhĩ jarēnhja ma nê hkaprĩ nê kãm:

—Tk. Nà kot paj ã amnhĩ nhĩpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rãhã nê. Anē.

³⁴ Hãmri nhũm Jejus kãm:

—Nà ra ixte akukamã ixàhpumunh mex. Koja apkati hkôt krãhyre hkàr kêt ri ka ra mē umaj ate ixkôt apa hkêt ã mē kãm amnhĩ tã axàprãr o axkrunēpxi kãm ga. Kwa jam ajamexpêr tÿx nê. Anē.

³⁵ Hãmri nhũm tee ri kuma nê axte kãm:

—Kwa nà. Mē kot ajaxàr nê apĩr tã kot paj arĩ akôt ri ixpa nhũm mē pahto amÿrà nê tanhmã panhĩpêx to. Nà kot paj aa akaga hkêt nê.

Anhÿr o kãm amnhĩ jarē. Pa mē ijaxwÿja ã kãm amnhĩ jarēnh anē.

*Jejus kot Tĩrtũm mã amnhĩ jarēnh
Makre 14.32-42; Rukre 22.39-46*

³⁶ Tã nhũm Jejus mē inhmã anē pa mē ma nhÿri mē kot kãm “Gesēm” anhÿr xwÿnhja wÿr mra. Hãmri nhũm mē inhmã:

—E mē jar ixkutêp akrĩ. Pa ma mütũm tē nê Tĩrtũm mã amnhĩ jarē mãn. Anē.

³⁷ Hãmri nê mē ixkwÿjê ho axkrunēpxi nê amnhĩ kôt mē kuwÿ. Simãw Pêtre nê Jepetew kra pijakrut pē Xiakre nê Juãwja wa nhũm amnhĩ kôt mē kuwÿ nhũm mē ma hkôt mra. Hãmri nhũm Jejus tee ri mē kot tanhmã hipêx tota kukamã hamexpêr o hkaprĩ nê amnhĩ kamã kahak tÿx nê.

³⁸ Hãmri nê mē kãm:

—Hêxta waa nê. Na pa tee ri amnhĩ xà htÿx kamã ijamakja kukamã ijamexpêr nê amnhĩ kamã ixkahak tÿx o ra ixkaprĩ nê.

Te ixkaprĩ kot ixpĩr o mōr pyràk. Jakamã e mē jar anohtÿx nê ixto Tĩrtũm wÿr o akrĩ kē tanhmã ixto pa mē kot tanhmã ixtoja kutã ixihtÿx nê. Anē.

³⁹ Hãmri nê mē kurũm htēm grire nê Tĩrtũm mã amnhĩ jarēnh kaxyw htu mÿr pē tēm nê pikap nō nê kãm:

—Kwa Papaj. Hêxta waa nê. Inhmã amnhĩ xà htÿx kãm ijamak prãm kêt kumrêx. Na pa tee ri amnhĩ kukamã ijamexpêr nê amnhĩ kamã ixkahak tÿx nê. Jakamã kot kaj amã inhnê ja ho ajapêx prãm nê mãmri inhnê ho ajapêx nhũm mē kãm ixkurê xwÿnhjaja tanhmã ixto hkêt nê. Rÿ ko. Kot kaj amã mē kot tanhmã ixto hprãm kē mē mãmri tanhmã inhĩpêx to. Nom pam inhmã hprãm xà hkôt kêt. Anē.

⁴⁰ Hãmri nê kãnhmã xa nê akupÿm Simãw Pêtreja mē hwÿr tē nê tee ri mē omu nhũm mē ra ôt pa nê hikwÿ. Nhũm mē omu nê Simãw Pêtre mã kãm:

—Kwa Simãw Pêtre. E mē hãmri akrã hapôj. Kwa wem anohtÿx grire ⁴¹ nê ixkutêp amnhĩ to Inhō Papaj wÿr o akrĩ kē mē ixkôt tanhmã mē ato htã ka mē amã mē uma xaj ixkaga hkêt nê arĩ mē kutã amnhĩ to htÿx nê akuhê. ã mē amã mē ate amnhĩ nhĩpêx anhÿr prãm nom kormã mē amã maa.

⁴² Anhÿr o mē kãm kapêr hãmri nê akupÿm tē nê axte Tĩrtũm mã amnhĩ jarē nê kãm:

—Kwa Papaj. Nà inhmã amnhĩ xà htÿx kãm ijamak prãm kêt. Na pa amnhĩ kukamã ijamexpêr nê amnhĩ kamã ixkahak tÿx kumrêx. Jakamã kot kaj amã inhnê ja ho ajapêx prãm nê mãmri inhnê ho ajapêx kē mē kãm ixkurê xwÿnhjaja tanhmã ixto hkêt nê. Nom ko. Kot kaj amã mē kot tanhmã ixto hprãm kē mē mãmri tanhmã inhĩpêx to. Nom pam inhmã ja prãm xà hkôt kêt. Anē.

⁴³ Hãmri nê kãnhmã xa nê Simãw Pêtreja mē hwÿr akupÿm tē. Nê mē omu nhũm kē mē axte gōr nê hikwÿ. Ra mē ôttxwa htÿx nê axte gōr nê hikwÿ. Nhũm Jejus tē nê tee ri mē omunh o xa ⁴⁴ nom axte tanhmã mē kãm nê hkêt nê. Am awjanã nê akupÿm tē nê kē wam kot Tĩrtũm mã amnhĩ jarēnh xà hkôt axte kãm amnhĩ jarē. ⁴⁵⁻⁴⁶ Hãmri nê akupÿm mē hwÿr tē nê mē kãm:

—Kwa xàn ka mẽ arĩ gõr nê anhĩkwỹ? E mẽ tokyx akrã hapõj. Na mẽ ra mẽ kot ixwỳr mrar nê ixpynênh mã. Koja mẽ tokyx ixkutã mẽ kot amnhĩ xunhwỳr xwỳnhjaja mẽ kãm ixtã amỳnê. Ota ra kot ixtã mẽ kãm àmnênh xwỳnhhta tẽ. E mẽ tokyx kànhmã akrĩ pu mẽ kutã mra. Anê.

Mẽ kot Jejus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhũm Jejus mẽ kãm kapêr o ãm rãhã nhũm Jut Kariot pẽ mẽ inhĩõja hwỳr tẽ. Nê amnhĩ kõt mẽ ohtõ nê hwỳr mẽ o tẽ nhũm mẽ wapohti nê kô jamỳ nê hkõt o mra. Patre krãhtũm mẽ Ijaew krãhtũmjaja kot Jejus wỳr mẽ rênh xwỳnhjaja nhũm mẽ man hkõt Jejus wỳr mra. ⁴⁸ Na pre ra Jut Kariot amnhĩ kukamã mẽ kãm amnhĩ jarênh o:

—Kot paj ixkumrêx hwỳr tẽ ka mẽ ixkõt hapu hã mra. Kot paj hwỳr tẽ nê kãm ixkapêr nê kahti hkõt kumỳ. Ka mẽ hã ixpumu nê hwỳr mra nê unênh kurê kumrêx. Ixte kahti hkõt mỳnh xwỳnhhta kot kaj mẽ unê. Anê.

⁴⁹ Hãmri nê Jejus wỳr tẽ nê kãm:

—Pa Jejus? Xàn ka kormã anhõt kêt nê xa?

Anê nê kahti hkõt kumỳ. ⁵⁰ Hãmri nhũm amnhĩ tã omu nê kãm:

—Kwa Jut. Ate tanhmã ixto kaxyw mã xwỳnh jakamã e kam nê mãmri tanhmã ixto. Anê.

Hãmri nhũm Jut kõt mẽ mrar xwỳnhjaja Jut kot kahti hkõt mỳnh ã omu nê hwỳr mra nê unênh kurê kumrêx. ⁵¹ Hãmri nhũm mẽ inhĩõja tee ri ja hã mẽ omu nê õ wapo kapa nê patre maati mã àpênh xwỳnh kot mẽ hkõt htêm xwỳnhhta mã ho apê. Nê kot ho hkrã nhĩpõnh mã tã kuhpaw nê upõk rũm hamak nhĩkjê pix krãhta. ⁵² Hãmri nhũm Jejus omu nê nê kãm kapêr nê kãm:

—Kwa akupỳm awapota hkãm haxà nê amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa. ⁵³ Xà kot paj amnhĩ to Tĩrtũm wỳ nhũm ãm inhma nê tanhmã jajê pẽ ixpytãr to hkêt nê? Nà kot paj amnhĩ to kuwỳ nhũm ixwỳr kapêr o mẽ wrỳk xwỳnhjê rênh kurê kumrêx nhũm mẽ ohtõ rax kumrêx nê wrỳ nê mẽ kêp ixpytã. ⁵⁴ Nom kot paj ã amnhĩ to hwỳr anhỹr kêt nê. Tĩrtũm kapêr ã kagã

htũm kot amnepêm ixkukamã ã mẽ kot inhĩpêx anhỹr ã mẽ harênh jakamã kwãr mẽ mãmri Tĩrtũm kãm hprãm xà hkõt ã inhĩpêx anê. Anê.

⁵⁵ Hãmri nê hpãnhã mẽ kot unênh xwỳnhjê mã kapêr nê mẽ kãm:

—Kwa na pa pre apkati mẽ Tĩrtũm mã amnhĩ jarênh xà hã ixkre kamã mẽ kãm ixujarênh o ixpa. Ka prem tokyx ixpynênh kêt tã jarãhã te ixte amnhĩ tomnuj xwỳnh pyrãk o inhĩpêx nê ixwỳr wapohti nê kô hã akapên nê ixwỳr tẽ. ⁵⁶ Tã nom ra Tĩrtũm kapêr ã kagã htũm kamã Tĩrtũm nhỹ hã mẽ kapêr xwỳnh kot mẽ akukamã mẽ ajarênh nê mẽ atã kagã xà hkõt na ka mẽ ri ã inhĩpêx anê. Anê.

Nhũm pre ã Jejusja amnhĩ tã mẽ kãm kapêr anê. Hãmri pa mẽ ixte hkõt ixpa ho ixpa xwỳnhjaja mẽ omu nê tee ri amnhĩ kukamã ijamaxpêr nê mẽ umaj ixprõt nê anhgrã nê ma inhmrar kurê kumrêx.

Mẽ kot patre maati hwỳr Jejus o mõi ã harênh

Makre 14.53-65; Rukre 22.54-55, 22.63-71; Juãw 18.12-14, 18.19-24

⁵⁷ Nhũm pre Ijaew krãhtũmjê mẽ Tĩrtũm kapêr tũm o mẽ ahkre xwỳnhjaja ra patre maati Kajpas nhõrkwỹ hwỳr akuprõ nê Jejus kutêp hkrĩ. Hãmri nhũm mẽ kot unênh xwỳnhjaja ma mẽ hwỳr o tẽ. ⁵⁸ Hãmri nê mẽ hwỳr ho axà nê hkõt gjêx pa. Nhũm Simãw Pêtre mẽ hkõt hapu hã mẽ htãnopxar o tẽ nê kĩtare hwỳr axà nê põristi nhĩhkõ hã nhỹ. Hãmri nê tee ri Jejus kukamã hamaxpêr o nhỹ nê hamaxpêr o:

—Kwa tanhmã koja mẽ ixpê mẽ inhõ Pahihti nhĩpêx to? E pa jar amỳm tanhmã mẽ kot hipêx to hã mẽ omunh o nhỹ. Anê.

⁵⁹ Hãmri nhũm patre krãhtũmjê mẽ juis-tijaja kãm Jejus pĩr prãm tỳx nê. Jakamã na prem Ijaew wa ho hamêxkrut nê axpên kõt tanhmã mẽ kãm ho hêx to nhũm mẽ kot hã wa mar nê ra hpĩr kaxyw mẽ pikuprõnh xwỳnhjê kapi. ⁶⁰ Jakamã nhũm prem axpên pãnhã mẽ hwỳr mra nê tanhmã ho hêx to. Nom axpên kõt harênh kêt nê. ãm ahpỳnhã tanhmã ri harênh to nom wahõ wa axkrut nê axpên kõt harênh kêt nê. Jakamã nhũm mẽ tee ri hã mẽ kuma.

Tã nhũm ja wa mẽ hwỳr tẽ nẽ axpẽn kôt harẽ nẽ mẽ kãm:

⁶¹ —Nà na pre tanhmã Tirtũm mã amnhĩ jarẽnh xà hã ixkre jarẽnh to nẽ harẽnh o: “Kot paj nhỹrmã inhmã ixkreja grành par prãm nẽ kugrà hãmri nẽ ãm ixtã apkati axkrunẽpxi pix nẽ akupỹm hipêx pa. Ja kaxyw ixàhpumunh tỳx.” Anhỹr o na amnhĩ jarẽ pa wa kuma.

⁶² Anhỹr o mẽ kãm ho hêx. Hãmri nhũm patre maatija wa kuma nẽ kànhmã xa nẽ Jejus mã kapẽr nẽ kãm:

—Kwa xà ãm hãmri na wa ã ajarẽnh anẽ nà? Xàn ka pre ã amnhĩ jarẽnh anẽ? E mẽ inhmã tanhmã amnhĩ jarẽnh to. Anẽ.

⁶³ Nom nhũm amarĩ mẽ kãm xa nẽ mẽ kãm tanhmã nẽ hkêt nẽ. Hãmri nhũm patre maatija tee ri omu nẽ axte kãm kapẽr nẽ kãm:

—Kwa aprĩ hã mẽ inhmã tanhmã amnhĩ jarẽnh to. Tirtũm noo mã amã ixkapẽr jakamã kêr ka akatàt kôt mẽ inhmã amnhĩ jarẽ nẽ amnhĩ to axêx kêt nẽ. Xà apê Tirtũm Kra? Xà ka na pre Tirtũm mẽ ixkaxyw axãm? Kwa akatàt kôt mẽ inhmã amnhĩ jarẽ. Anẽ.

⁶⁴ Hãmri nhũm tã hprĩ hã mẽ kãm amnhĩ jarẽ nẽ mẽ kãm:

—Tỳ. Nà ãm hãmri na ka ã ijarẽnh anẽ. Ixpê Tirtũm kot mẽ akaxyw ixãm xwỳnhhta na pa. Na pre mẽ awỳr inhmẽ pa mẽ awỳr wrỳ. Tã kot paj nhỹrmã axte kaxkwa rũm amnẽ akupỹn kakrà kamã mẽ awỳr wrỳ. Hãmri nẽ Tirtũm xàhpumunh o àhpumunh xwỳnhhta nhĩhkô hã nhỹ hãmri nẽ pam tanhmã mẽ ajarẽnh to ka mẽ amnhĩ tã ixpumu nẽ inhma. Anẽ.

⁶⁵ Hãmri nhũm patre maatija tee ri ã kot amnhĩ jarẽnh anhỹr ã kuma nẽ kamã gryk tỳx nẽ. Hãmri nẽ gryk xàj kệp patre maati hã ê kapa nẽ hkaxôn pa nẽ kumẽ nẽ hkwyjê mã kãm:

—Tk. Kwa mo kaxyw kot puj mẽ axte ri tanhmã kot amnhĩ tomnuj to hã harẽnh xwỳnh õ japêr? Tãm kot amnhĩ pê Tirtũm Kra hã amnhĩ jarẽnh ã amnhĩ to hêx nhũm mẽ pahte mar kênã. ⁶⁶ Jakamã e kwa tanhmã kot puj mẽ hipêx to? Anẽ.

Hãmri nhũm mẽ kãm:

—Nà ã kot amnhĩ jarẽnh anhỹr mỳrapê koja ty. Ra htyk mã tãm kênã. Anẽ.

⁶⁷ Hãmri nẽ tanhmã hipêx kati hto. Mẽ hkwyjaja hkuk kuhtô nẽ ãhkra ho htak nhũm mẽ hkwyjaja ãhkra hpo ho htak nẽ hã hpẽr o axkê nẽ kãm:

⁶⁸ —E apê Tirtũm Kra hã ate amnhĩ jarẽnh jakamã mãn uràk nẽ axàhpumunh tỳx. Jakamã e mẽ kot atak xwỳnhhta nhĩxi jarẽ pa mẽ ama. Anẽ.

Simãw Pêtre kot Jejus kôt pa hkêt ã amnhĩ jarẽnh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rôm nhũm Simãw Pêtre arĩ kĩtare kamã nhỹ. Hãmri nhũm mẽ kãm apênh xwỳnh nitita omu nẽ hprĩ hã omunh kurê kumrêx. Hãmri nẽ kãm:

—Xê pẽr apê Jejus kôt mẽ pa xwỳnhjê hõ na ka. Anẽ.

⁷⁰ Hãmri nhũm tee ri amnhĩ tã kuma nẽ kãm mẽ uma xàj mẽ kãm amnhĩ tã aprã nẽ kãm:

—Tk. Kokỹ. Ixte mễhõ my ata pumunhre hã. Anẽ.

⁷¹ Hãmri nẽ mẽ umaj kànhmã xa nẽ tẽ nẽ kĩtare hwỳr hakwakrem ahte mẽ hkàx ã xa. Tã nhũm hpãnhã hõja omu nẽ hã mẽ kãm:

—Xê ma pẽr ãm hãmri na mẽ harẽ. Kệp Jejus kôt ri mẽ pa xwỳnhjê hõ na pẽr. Anẽ.

⁷² Hãmri nhũm amnhĩ tã kuma nẽ kãm: —Tk. Nà mẽ ri ã amnhĩ krã hkôt ri ixto axêx anhỹr kêt nẽ. Ixte aa mễhõta pumunh kêt kumrêx. Anẽ.

⁷³ Tã nhũm mẽ hkwyjaja hwỳr mra nẽ kãm kapẽr nhũm tanhmã mẽ kãm kapẽr to nhũm mẽ kuma nẽ kãm:

—Kwa pẽr ãm hãmri na mẽ ajarẽ. Apê Jejus kwỳ na ka. War akapẽr kot axpẽn pyràk kênã. Anẽ.

⁷⁴ Hãmri nhũm tee ri mẽ kuma mẽ kãm amnhĩ tã aprãr kãm hihtỳx nẽ mẽ kãm:

—Kwa nà. Na pa Tirtũm noo mã mẽ amã amnhĩ jarẽ. Kot paj amnhĩ to ixêx japêr nhũm inhma nẽ hã tanhmã ixto. Nà uràk ixpê Garirej nhõ xwỳnhre hã. Ixte mễhõ mỳj pumunh kêt kumrêx tã ka mẽ xatã axpẽn kôt ixte hkôt ixpa ho ixpa xwỳnh ã ixkamnhĩx o xa.

Anhỹrja o ra mẽ kãm amnhĩ tã aprãr o axkrunẽpxi nhũm krãhyre hkàr kurê kumrêx. ⁷⁵ Hãmri nhũm Simãw Pêtre kuma nẽ ra Jejus kot hkukamã krãhyre hkàr kêt ri kot hã amnhĩ aprãr o axkrunẽpxi

hã harênhta mã hamaxpêr kurê kumrêx. Hãmri nê kànhmã hakry hpar o tẽ nê hkaprĩ htỳx kumrêx nê kítare pê kato nê tẽ nê awry hã xa nê mỳr rax nê.

27

Mẽ kot pahшти Pirat wỳr Jejus o htẽm ã mẽ harênh

Makre 15.1; Rukre 23.1-2; Juãw 18.28-32

¹ Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpẽn wỳr pikuprõnh pa. Hãmri nê Jejus ã axpẽn mar o hkrĩ nê axpẽn mã:

—Nà kot puj mẽ hã amỳnê kê mẽ kupĩ. Kêp Tĩrtũm Kra hã kot amnhĩ jarênh o amnhĩ to hêx kênã. Anê.

² Hãmri nê mẽo põiştirijê mã anê nhũm mẽ hpa hpre hpa nê ma pahшти Pirat wỳr o tẽ. Pirat kêp Rõi nhõ pahшти nhỹ hã mẽ ixpê Ijaewjê ho amnhĩptàr jakamã nhũm mẽ ma hwỳr o tẽ nê ìhkram haxà.

Jut Kariot kot amnhĩ pĩ ã harênh

Atre 1.15-19

³ Rõi nhũm Jut Kariot tee ri mẽ kot Jejus pĩr kaxyw mẽ harênh ma nê hkaprĩ nê. Ra kot mẽ kãm hã àmnênh tã mẽ kot hpĩr kaxyw ã mẽ harênh ma nê tee ri amnhĩ kukamã hamaxpêr o hkaprĩ htỳx nê. Hãmri nê hamaxpêr o:

—Hêxta waa nê. Mo na pa pre ri axtem nê ã amnhĩ nhĩpêx anê? Nà na pa pre amnhĩ tomnuj tỳx kumrêx. Anê.

Hãmri nê ra mẽ kot kãm kàxpore ho 30 nê òrta jamỳ nê ma akupỳm patre krãhtũmjê mẽ Ijaew pigêtjê hwỳr o tẽ. Hãmri nê mẽ kot Tĩrtũm mã amnhĩ jarênh xà hã ixkreja wỳr mẽ hwỳr axà ⁴ nê nhỹri mẽ omu nê mẽ hwỳr tẽ nê mẽ kãm:

—E ota mẽ akàxporeta. Na pa ã mẽ amã Jejus ã ixàmnênh anhỹrja o amnhĩ tomnuj tỳx nê. Kot tãm amnhĩ nhĩpêx o pa htã pa axtem nê ã mẽ amã hã ixàmnênh anê. Jakamã e mĩ. Mẽ akupỳm akàxporeta jamỳ. Kot paj amnhĩm hamỳnh kêt nê. Anê.

Hãmri nhũm mẽ tee ri kuma nê kãm:

—Kokỹ. Nom ka na ka pre mẽ ixwỳr tẽ nê ho mẽ inhmar kênã. Anê.

⁵⁻⁷ Hãmri nhũm tee ri mẽ kuma hãmri nê pikap kàxpore rênh pa nê ma tẽ nê kato. Hãmri nê hkaprĩ htỳx kumrêx nê hamaxpêr o:

—Kwa tanhmã kot pa we amnhĩ to? Nà kot paj amnhĩ pĩ. Anê.

Hãmri nê krĩ pê kato nê ma mẽ kot pika kakwỳnh nê ho amnhĩm poti nhĩpêx xà hã pika hwỳr tẽ hãmri nê amnhĩ mut mã ê nê ho amnhĩ pĩ. Hãmri nhũm patre krãhtũmjaja harênh ma nê tee ri kot kàxpore rênhta kawrà nê hã axpẽn kukja nê axpẽn mã:

—Kwa tanhmã kot puj wem ja ho? Jut kot mẽ pamã Jejus ã àmnênh nhũm mẽ pahte hpĩr xà hã kàxpore na. Jakamã kot puj mẽ ho Tĩrtũm mã amnhĩ jarênh xà hã ixkre ho mex kêt nê. Finat Mojes kot ja nê mẽ panhĩgêtjê kurê jakamã na htem mẽ hpar xà hã kàxpore ho ixkreta ho mex kêt nê. Jakamã kwa tanhmã kot puj mẽ ho? Anê.

Hãmri nhũm ja mẽ kãm:

—E na pa ra ijamaxpêr. Pu mẽ ho Jut kot amnhĩ pĩr xà hã pikata japrõ hãmri nê kamã jar mẽ kêp mẽ pahkwỳ hkêt htyk xwỳnhjê jagjênh o papa. Anê.

Hãmri nhũm mẽ kuma nhũm ja mẽ kãm mex nê. Jakamã nhũm arĩgro hõ hã nhũm mẽ ma hwỳr mra nê haprõ. ⁸ Hãmri nê hã hixi mẽ nhũm kêp “mẽ hkamrõ pikapĩr xà kamã pika”. Mẽ kot Jejus pĩr xà hã kàxpore ho haprõr jakamã nhũm prem ã hã hixi mênh anê. Nhũm htem arĩ axpẽn mã ã hixi jarênh anhỹr o pa. ⁹⁻¹⁰ Nhũm pre ra amnepêm Tĩrtũm nhỹ hã kapêr o pa xwỳnh finat Jeremĩsti mẽ hkukamã hprĩ hã ja jarê nê hã kagà. Nê hã kagà o:

Koja Ijaew nhõ patrejaja mẽhõ kot mẽ kãm mẽhõ my hã àmnênh pãnhã kãm kàxpore ho 30 nê òr xwỳnhja jamỳ. Hãmri nê ma o tẽ nê nhỹri mẽ kot amnhĩm pika kakwỳnh nê ho poti nhĩpêx o pa xà hã pika hkwỳ japrõ. Ra Tĩrtũm kot inhãm mẽ harênh xà hkõt koja mẽ ã amnhĩ nhĩpêx anê. Anê.

ã finat Jeremĩsti kot Tĩrtũm nhỹ hã mẽ hkukamã mẽ harênh nê hã kagà anhỹr xaja kõt nhũm prem ã amnhĩ nhĩpêx anê.

Pahшти Pirat kot Jejus kukjêr ã harênh

Makre 15.2-5; Rukre 23.3-5; Juãw 18.33-

38

¹¹ Rõi nhũm mẽ pahшти Pirat wỳr Jejus o tẽ nê hwỳr ho axà nê kutã ãm nhũm xa nhũm Piratja omu nê kãm:

—E. Kwa inhmã amnhĩ jarẽ. Xà apê Ijaew nhõ pahi na ka nà? Xà ka na htem amnhĩ wÿr ajamãr o pa? Anẽ.

Hãmri nhũm kãm:

—Tÿ. Nà ãm hãmri na ka ijarẽ. Anẽ.

¹² Hãmri nhũm mẽ hkrãhtũmjê mẽ patre krãhtũmjaja pahihti Pirat mã tanhmã ho kapër punuj to. Nhũm amnhĩ tã mẽ kuma nom tanhmã kãm amnhĩ tã àprãr to hkêt nẽ. ¹³ Jakamã nhũm pahihti Pirat tee ri ja hã omu nẽ kãm:

—Kwa xà na ka ã mẽ kot ato kapër anhÿrja mar kêt nẽ nà?

¹⁴ Anhÿr tã nom nhũm Jejus akryk xa nẽ axte tanhmã kãm nẽ hkêt nẽ. Hãmri nhũm Pirat tee ri kot ã amnhĩ nhĩpêx anhÿr ã omu nẽ hamaxpër o:

—Kokÿÿ. Mẽ kot ho kapër punuj tã nhũm ãm mẽ kuma nẽ te kãm mẽ uma hkêt pyrà nẽ tanhmã inhmã amnhĩ tã àprãr to hkêt nẽ. Anẽ.

Pirat kot Jejus pÿr kaxyw hã àmnênh ã harênh

Makre 15.6-15; Rukre 23.13-26; Juãw 18.39-19.16

¹⁵⁻²¹ Tã nhũm Pirat kormã mẽ kot axpën mar xà hã ixkre kamã ÿr rãhã nhũm hprõja hwÿr hpër mẽ nẽ kãm:

—Xê tanhmã mẽ kãm Jejusja ã axàmnênh to hkêt nẽ. Na pa kamàt ja kamã hkôt amÿti nẽ tee ri hkukamã ijamaxpër. Kot amnhĩ to mex xwÿnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axàmnênh to hkêt nẽ. Kwarĩ. Anẽ.

Hãmri nhũm Piratja kuma nẽ hamaxpër o:

—Nà ixte Ijaew krãhtũmjê pumunh tũm. Ijaew kwÿjaja kãm Jejus kĩnh nhũm mẽ hkrãhtũmjaja kot mẽ hã Jejus kamã gryk nẽ. Jakamã ixte tanhmã mẽ kãm hã ixàmnênh to kaxyw na mẽ ã ixwÿr o htẽm anẽ. Anẽ.

Na htem Pas nhõ arĩgrota hapôx mẽ nhũm pre htem Ijaew o amnhĩptãr xwÿnhja mẽ kãm mẽ hagjênh xà kamã hkrĩ xwÿnhjê ho hpÿnh nẽ mẽ hapôj. Mẽ kãm hprãm xà hkôt nhũm mẽ kãm mẽ hapôj nhũm mẽ akupÿm kapôt ã hamakêtkati nẽ amnhĩx pa. Jakamã nhũm ra mẽ hagjênh xà kamã mēhõ my pē Parapasja hkrĩ. Na pre tanhmã amnhĩ tomnuj to nhũm mẽ mÿrapê unê nẽ haxà. Jakamã nhũm Ijaewjaja mẽ

ho amnhĩptãr xwÿnh Pirat wÿr akuprõ nẽ kuhê nhũm mẽ kãm:

—E kot paj jarãhã mẽ amã mẽ hagjênh xà kamã mẽ hkrĩ xwÿnhjê hõ mã inhũre kê àmnhĩx kato nẽ ri pa. Nhÿ kot paj mẽ amã kãm inhũre? Xà Parapas nà? Xà mẽ akwÿ kot amnhĩm ho mẽ anhõ pahihti Jejus pē Tĩrtũm kot mẽ akaxyw ãm xwÿnhhta kot paj mẽ amã kãm inhũre? Nhÿ wehe? E mẽ inhmã nhÿ jarẽ. Anẽ.

Pirat na pre mẽ inhõ patre krãhtũmjê pumunh mex nẽ. Ijaew kãm Jejus kapër mar prãm tÿx ã nhũm mẽ hã kamã gryk tÿx nẽ hwÿr o mrarja kôt nhũm mẽ omunh mex nẽ. Jakamã ã hã mẽ hkukjêr anẽ. Hãmri nhũm mẽhpigêt mẽ patre krãhtũmjaja kuma hãmri nẽ mẽ pikuprõnh nẽ mẽ kuhê xwÿnhjê mã kãm:

—Kwa mẽ kãm anẽ kê mẽ pamã Parapas mã mãn ure nẽ mãmrĩ Jejus Kris pĩ. E kwa mẽ tokyx kãm anẽ kê Parapas mã ure. Anẽ.

Hãmri nhũm mẽ mẽ kuma nẽ pahihti Pirat mã kãm:

—Nà mẽ inhmã Parapas mã mãn anhũre. Anẽ.

²² Hãmri nhũm tee ri mẽ kuma nẽ mẽ kãm:

—Kwa no mẽ ate Jejus pē Tĩrtũm kot mẽ akaxyw ãm xwÿnh ã harênh xwÿnhhta? Tanhmã kot paj hipêx to? Anẽ.

Hãmri nhũm mẽ kãm:

—Apĩ ri. Tokyx pĩ kahpa hã anhõ kê ty. Anẽ.

²³ Hãmri nhũm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhõ nhũm ty. Anẽ.

Hãmri nhũm mẽ xatã àmra kamã kãm:

—Kwa pĩ kahpa hã mãn anhõ kê ty. Kwa tokyx ã mẽ inhmã hipêx anẽ. Anẽ.

²⁴ Hãmri nhũm tee ri ja nê tanhmã mẽ kãm kapër to no nhũm mẽ mar kêt nẽ. Nhũm tee ri mẽ àmra mar o xa. Hãmri nẽ kãm Jejus pÿr prãm kêt jakamã amnhĩm gô hkwÿ janhi nẽ mẽ piitã mẽ noo mã amnhĩ nhĩhkra kuhõnh o xa. Mẽ kot hã omunh xà hkôt kãm hpĩr prãm kêt ã omunh kaxyw. Hãmri nẽ mẽ kãm:

—E na pa mẽ anoo mã ã amnhĩ nhĩhkra kuhõnh anẽ ka mẽ ja hã ixpumu. Nà inhmã hpĩr prãm kêt. Tanhmã kot amnhĩ tomnuj tore hã. Mẽ kaxipixjaja mẽ amã hpĩr hprãm

jakamã mẽ kam nẽ tanhmã ho. No pa kot paj tanhmã ho hkêt nẽ. ãm kwarĩ ho kwarĩ. Anẽ.

²⁵ Hãmri nhũm mẽ kuma nẽ kãm:

—Tõe. Nà ãm hãmri. Kot paj mẽ pamjaja amnhĩ tã htykja nhõ. Nẽ mẽ ixkra nẽ mẽ ixtàmnhwýjê mẽ amnhĩ to ixpimràatã amnhĩ tã kunhõ. Kê Tĩrtũm kãm tanhmã hã mẽ ixtõ hto hprãm nẽ mamrĩ tanhmã hã mẽ ixtõ hto. Anẽ.

²⁶ Hãmri nhũm mẽ kuma nẽ mẽ kãm hprãm xà hkõt mẽ kãm Jejus ã amýnẽ nẽ mẽ kãm Parapas mã ure. Ra Parapas kot pahi Pirat pê õ pôristi kutã amnhĩ xãm nẽ kęp hõxpĩrja mýrapê nhũm mẽ kot unênh nẽ haxàr tã Ijaew kãm hprãm xà hkõt akupým kãm ure. Hãmri nẽ õ pôristijê mã anẽ nhũm mẽ Jejus tak. Nẽ htak rax nẽ hãmri nhũm Pirat mẽ kãm hã amýnẽ nhũm mẽ kot pĩ kahpa hã nhõr o hpĩr kaxyw ma o tẽ.

Pôristi kot Jejus ã hpẽr o pikẽnh ã harẽnh Makre 15.16-20; Juãw 19.2-3

²⁷ Tã nhũm pôristijaja mẽ kot pĩ kahpa hã Jejus nhõr kaxyw ma o tẽ nẽ pahihiti Pirat nhõrkwý kamã ixkre hõ hwýr ho axà. Nhũm pôristi ohtõ nẽ hwýr akuprõ nẽ hã pẽr o pikẽnh kaxyw axpẽn mã:

—E kwa tokyj pu mẽ kãm pahi xê jaxà ri. Kęp pahi hã kot amnhĩ jarẽnh kênã. Anẽ.

²⁸ Hãmri nẽ kęp ê kapa nẽ hpãnhã kęp pahi hã mẽ ê kamrêk mexja py nẽ kãm haxà. ²⁹ Nẽ kãm pahi hã mẽ ahkã nhĩpêx nẽ hkrãm haxà. Nom axtem akunĩ kamã mẽmo mrõ nhĩ te kot ronh kanêre pyrãk xwýnhja nhũm mẽ hikãx nẽ hkrãm haxà. Nẽ kãm pahi hã kô gõ nhũm kupy nẽ o xa. Hãmri nhũm mẽ ho anhýr pa nẽ kutã hkõn krã ho rôrõk nẽ hkrĩ hpa nẽ hã pẽr o pikẽnh kamã kãm:

—E ãm hãmri. Apê Ijaew nhõ pahi punuti na ka. Anẽ.

³⁰ Hãmri nẽ kãnhmã kuhê nẽ hkuk kuhtõ nẽ kęp kô pytà nẽ xatã ho hkrãx pê htak. Nhũm prem ã pẽr o pikẽnh kãm hipêx anẽ.

³¹ Hãmri nẽ kęp pahi hã ê kapa nẽ akupým kãm ê jaxà nẽ mẽ kot pĩ kahpa hã nhõr kaxyw ho kato nẽ ma o tẽ.

Pôristi kot pĩ kahpa hã Jejus nhõr ã harẽnh Makre 15.22-32; Rukre 23.27-43; Juãw 19.17-25

³² Nhũm pôristijaja Jejus o kato nẽ ma kapõt mã o tẽ. Nẽ kãm pĩ kahpa pytĩja gõ nhũm kumý nẽ mẽ hkõt o hkwy. Nom ra hirok týx nẽ nhũm mẽ tee ri ja hã omu nẽ mẽhõ kot ho ajuta kaxyw mẽ kot omunh xwýnhjê kapi ho xa. Hãmri nẽ Sirẽn nhõ xwýnh Simãw kã htyk pumu nẽ unê nẽ kãm kot Jejus o ajuta kaxyw hã karõ nhũm hwýr tẽ nẽ kęp pĩ kahpata mý nẽ hkõt kãm kumý nẽ o tẽ. ³³ Hãmri nhũm mẽ kên nhixêt te kot mẽ hkrã hi pyrãk xwýnhhta wýr mẽ o pøj. Mẽ kapêr kãm na prem hixêtja jarẽnh o: “Korkot.” No mẽ pakapêr kãm Korkot jarẽnhja kęp “mẽ hkrã hi xà” nhũm mẽ ma hwýr Jejus o pøj. ³⁴ Hãmri nẽ mẽ kot pĩ kahpa hã nhõr kaxyw nhũm à htyx kumrêx kamã hamak pymaj kãm mẽmo mẽ hkanexàja gõ. Wĩhti mẽ mẽmo mry ma xà ho pihkãr nhũm mẽ kãm hkwy gõ. Nom nhũm hkaki nẽ mẽ kot amnhĩ xà htyx kamã hamak kêt xà hã omunh kurê kumrêx nẽ hkaga. Nhũm mẽ tee ri ja hã omu hãmri nẽ kęp ê kapa nẽ kumê nẽ pĩ kahpa hã kuxi nẽ prek o ãhkra nẽ hpar o htyx pa. Hãmri nẽ kãnhmã pĩ jarĩ nẽ ahkre kamã ãm nẽ ho htyx nhũm kýxpê ajêt. ³⁵ Hãmri nhũm pôristi hkwyjaja axpẽn mã ê hkwy ho pigrãnh kaxyw hã kênre ho jõka. ³⁶ Hãmri nẽ ho anhýr pa nẽ pikap Jejus jamãr o hkrĩ.

³⁷ Na htem mẽ hpar kaxyw nẽ tanhmã mẽ kot amnhĩ tomnuj to hã kagã nẽ mẽ mýri pĩ kahpa hã hanhõ. Jakamã na prem tapti hõ py nẽ tanhmã Jejus ã kagã hto nẽ hã kagã ho:

IJA EW NHÕ PAHI NA JA
HIXI PÊ JEJUS

Hãmri nẽ hwýr ho api nẽ mýri kunhõ. ã Jejus kot amnhĩ jarẽnh anhýrja mýrapê na prem kupĩ.

³⁸ Hãmri nhũm mẽ hpãnhã wa àhkĩnh xwýnh wa ho axkrut nẽ mããnên pĩ kahpa hã wa kunhõ. Nẽ akutã ho Jejus nhĩjê nhũm war ajêt.

³⁹ Tã nhũm pry hã mẽ mrar xwýnhjaja Jejus pumu nẽ hã hpẽr o pikẽnh o mra nẽ kãm:

⁴⁰ —Kwa ka na ka pre ate Tĩrtũm mã amnhĩ jarẽnh xà hã ixkre grãnh par nẽ atã apkati axkrunêpxi nẽ akupým hipêx par ã amnhĩ jarẽ. Nẽ apê Tĩrtũm Kra hã amnhĩ

jarê. Nê axàhpumunh o axàhpumunh jakamã e kwa amnhĩ kapa nê wrÿ pa mẽ ja hã apumu. Kwa tokyx. Anê.

⁴¹ Nê patre krãhtũmjê mẽ Tĩrtũm kapêr tũm o mẽ ahkre o mẽ pa xwÿnh mẽ mẽ hkrãhtũmjaja piitã hwÿr mra nê hã hpêr o axkê. ⁴² Nê axpên mã harênh o:

—E jahti na xep pre mẽ kamã ukaprĩ ho pa nê tanhmã mẽ ho ajuta hto ho pa. Tã nom tãm tanhmã amnhĩ to nê wrÿk kêt nê. Kwa pu mẽ arĩ pakuhê nê kot amnhĩ kaxàr nê wrÿk kãm omu. Koja wrÿ pu mẽ omu nê kêp mẽ panhõ pahihti hã hkôt pajamaxpêr kurê kumrêx. E tokyx wrÿ Jejus. Pa mẽ awrÿk kãm apumu. Nà kot kaj awrÿk rax nê. ⁴³ Na hte amnhĩ kaxyw Tĩrtũm mã hamaxpêr o pa. Nê kêp Kra hã amnhĩ jarênh o pa. Jakamã e. Kê Tĩrtũm tãm hwÿr tẽ nê kêp Kra hã akupÿm mẽ pahpê utã. Anê.

⁴⁴ Hãmri nhũm wa kot akutã hijê nê jêt xwÿnhhta wa haxwÿja mẽ mar xà hkôt mã ho kapêr anê.

Jejus tyk ã harênh

Makre 15.33-41; Rukre 23.44-49; Juãw 19.28-30; mããnên Eprêw 10.19-20

⁴⁵ Tã nhũm kaxkwa nhĩpôk ri myt ÿr mẽ nhũm te kamãt pyrãk nhũm kamãt kô rax kumrêx. Jao hã awry mẽ nhũm ra akupÿm myt katêr o mõi. ⁴⁶ Hãmri nhũm Jejus kapêr kãm hihtÿx nê àmra htÿx kãm Tĩrtũm mã kapêr nê kãm:

—Inhõ Tĩrtũm inhõ Tĩrtũm. Kwa mon ka ixkaga? Anê.

Nom kapêr kamã kãm kapêr o:

—Eri Eri. Rãmã sapatani. Anê.

⁴⁷ Hãmri nhũm mẽ kot mar xwÿnhjaja kot Eri jarênh ã kuma nê htÿx ho finat Eris mã kapêr ã hkamnhĩx. ⁴⁸ Nhũm Jejus par pê guhkrax kãm wĩhti punure xa. Jakamã nhũm mẽ ã kapêr anhÿr ã kuma nhũm mēhõ kãm hkaprĩ nê. Hãmri nê mẽmo rerek py nê o tẽ nê kaxyw pĩ rytija py nê ho hkanhwÿ. Nê akupÿn o tẽ nê ho wĩhti nhek nê Jejus kot hkaôr kaxyw kãm kupê. ⁴⁹ Hãmri nhũm hkwÿjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mẽ kop Eris jamã mãn. Koja hwÿr tẽ nê ho wrÿk japêr. Anê.

⁵⁰ Hãmri nhũm kamãt kô mẽ nhũm Jejus ra htyk kaxyw nê axte àmra htÿx nê hãmri nê ty. ⁵¹ Tykja kôt nhũm Tĩrtũm mã amnhĩ jarênh xà hã ixkre kamã hakwakre hã kupêxêja kÿj rũm ahpar mã axkjê nê amnhĩ kahê xà mẽnh kurê kumrêx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mẽnh pyrãk o ã amnhĩ nhĩpêx anê. Nhũm pika htertet tÿx kumrêx o kên rũnh kwÿ ohtô nê hkrakrak pa. ⁵² Hãmri nhũm mẽ htyk ã pika kamã mẽ htykjê nhõrkwy ho ohtô nê mẽ hã axkjê nhũm mẽ hikwy xwÿnhjaja akupÿm htĩr nê hapôj nê kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mẽ ohtô nê akupÿm htĩr nê hapôj nê kuhê. ⁵³ Nom kormã nhÿhÿm mrrar kêt nê. Arĩ mẽ hã pika nhĩpy Jejus akupÿm htĩr ã hamãr o kuhê. Tã nhũm Jejus apkati hõ hã akupÿm htĩr ã arĩgrota ã nhũm mẽ rĩ kormã ma Jerujarê hwÿr mra nê hwÿr agjê nhũm mẽ ohtô nê akupÿm mẽ htĩr ã mẽ omu.

⁵⁴ Nhũm kormã Jejus htyk o mõiarta ã nhũm pōristi krãhtũm mẽ pōristi hkwÿjaja hãmri hparpê hamãr o kuhê nê htyk kãm omu. Nê pika htertet kamã ama nê mẽmoj kot tanhmã amnhĩ nhĩpêx toja pumu nê tee ri hamaxpêr nê kãm ma htÿx kumrêx. Hãmri nê axpên mã:

—Hêxta waa nê. Pêr ãm hãmri na pre htyk xwÿnhhta amnhĩ jarê. Kêp Tĩrtũm Kra kênã. Tã pu mẽ amarĩ pahtÿx kupĩ. Anê.

⁵⁵⁻⁵⁶ Nhũm pre mẽnijaja ohtô nê amÿm Jejus tyk kãm omunh o kuhê. Marir Matarên nê Xiakre mẽ Juje wa katorxà Marir nê Xiakre hõ mẽ Juãw wa katorxàja nhũm mẽ kormã htyk kãm omunh o kuhê. Na prem Garirej rũm hkôt tanhmã ho ajuta hto ho hkôt Jerujarê wÿr mõi.

Mê kot Jejus jaxàr ã harênh

Makre 15.42-47; Rukre 23.50-56; Juãw 19.38-42

⁵⁷ Tã nhũm ra myt grire nhũm krĩ pê Ari-matej rũm hikàxpore rax xwÿnh pê Jujeja tẽ. Nom axtem Juje hõ na pre. Ra kot Jejus kôt amnhĩ xãm jakamã kãm ho wrÿk nê haxàr prãm nê. ⁵⁸ Hãmri nê ma pahi Pirat wÿr tẽ nê ã hã kuwÿ nê kãm:

—E ot pa awÿr tẽ. Kwa inhmã htyk xwÿnhta gõ pa ma o tẽ nẽ haxà nà? Anẽ.

Hãmri nhũm kuma nẽ kãm harẽ nhũm ma o tẽ nẽ haxà. ⁵⁹ Kaxyw kupêxê mex õ py nẽ ho hkupu pa ⁶⁰ nẽ ma o tẽ nẽ õ kẽn kre kamã haxà. Na pre htyk kukamã kẽn kre kakwÿ nhũm mẽ kot kormã kamã mẽhõ jaxàr kêt tã kamã na pre Jejus jaxà. Hãmri nẽ hã kẽn rax õ xãm nẽ ho hitom nẽ ma akupÿm tẽ. ⁶¹ Nhũm Marir Matarẽn mẽ Marir õja wa kẽn kreta kapem omunh o wa nhÿ.

Pôristi kot kẽn kre jamãr o kuhê ã harẽn

⁶² Tã nhũm apkati nhũm mẽ inhõ arĩgromnu pê sap kato. Hãmri nhũm Parijew nhõ xwÿnhjê mẽ patre krãhtũmjaja ma pahi Pirat wÿr mra nẽ kãm:

⁶³ —Kwa pahihti. Nà amnhĩ to hêx o pa xwÿnhta na pre kormã htĩr nẽ pa ri tanhmã amnhĩ jarẽn to ho pa. Nẽ nhÿrmã ty nẽ htyk ã apkati axkrunêpxi pix nẽ akupÿm htĩr ã amnhĩ jarẽ. ⁶⁴ Jakamã kwa hwÿr anhõ pôristi hkwy rê kê mẽ ma hwÿr mra nẽ hamãr mex o apkati axkrunêpxi. Kot ka anhÿr kêt nhũm hkõt mẽ pa ho mẽ pa xwÿnhjaja ma hwÿr mra nẽ ho ahkĩ nẽ ma o mra nẽ nhÿri haxà nẽ mẽ piitã mẽ kãm ra akupÿm htĩr ã harẽn o hêx o pa. Te tãm kot amnhĩ kukamã amnhĩ jarẽn pyrãk. Nom mẽ kot axte ã harẽn anhÿrja koja omnuj tÿx o tãm kot ã amnhĩ jarẽn anhÿrja jakre. Anẽ.

⁶⁵ Hãmri nhũm mẽ kuma nẽ mẽ kãm:

—Tõe. Nà koja mẽ ho anẽ. E mẽ ma hwÿr amnhĩ kõt pôristi hkwy ho mra kê mẽ hakwakre kahê xà jamãr mex o kuhê. Anẽ.

⁶⁶ Hãmri nhũm mẽ kuma nẽ ma hwÿr mra nẽ hakwakre hã kẽn raxta o htÿx pa. Nẽ mẽhõ kot omunh nẽ kahê mẽn pymaj menh ê ho hkukõ. Hãmri nẽ ho anhÿr pa nẽ pôristi mã kãm:

—E Kêr ka mẽ jar kuri hamãr mex o akuhê. Kê mẽhõ tẽ nẽ tanhmã ho hkõt nẽ. Anẽ.

28

Jejus akupÿm htĩr ã harẽn

Makre 16.1-8; Rukre 24.1-12; Juãw 20.1-

10

¹ Tã nhũm apkati nhũm tãmĩk. Hãmri nhũm Marir Matarẽn mẽ Marir õja kwÿhtã kãnhmã nhÿ nẽ ma akupÿm kẽn kreta wÿr

wa tẽ. ² Puh nhũm pika htertet tÿx nẽ nhũm Tĩrtũm kapêr o mẽ wrÿk xwÿnhja kẽn kre wÿr wrÿ nẽ nhãm hakwakre né kẽn raxta mẽ nẽ hã nhÿ. ³ Hirã htÿx kãm nhÿ. Te na jaxênh pyrãk. Nẽ ê haka htÿx kumrêx. ⁴ Nhũm pôristijaja tee ri omu nẽ kãm ma htÿx nẽ htertet nẽ umaj pikap rôrôk pa nẽ te htyk pyrã nẽ hikwÿ. ⁵ Hãmri nhũm wa nita kẽn kre hwÿr pøj nẽ tee ri Tĩrtũm kapêr o mẽ wrÿk xwÿnhta pumu. Nhũm wa kãm:

—Kwa wa amã ma hkõt nẽ. War ate Jejus pumunh kaxyw na ka wa tẽ. Mẽ kot pĩ kahpa hã nhôr xwÿnhta. ⁶ Nom jar amrakati. Na ra akupÿm htĩr nẽ kato nẽ ma tẽ. E wa kam nẽ amnẽ axà nẽ nõr xà kaprÿ pumu. Anẽ.

Hãmri nhũm wa kuma nẽ tee ri kẽn kre kamã Jejus japêr nhũm kamã amrakati. ⁷ Hãmri nhũm Tĩrtũm kapêr o wrÿk xwÿnh wa kãm:

—E wa tokyx ma akupÿm tẽ nẽ hkõt mẽ pa ho mẽ pa xwÿnhjê mã harẽ. Koja ma Jejus mẽ akukamã akupÿm Garirej wÿr mõ. Garirej kamã kot kaj mẽ axte axpẽn pumu. Ra kot mẽ amã amnhĩ jarẽn xà hkõt. E kwa wa tokyx ma akupÿm mẽ hwÿr tẽ. Anẽ.

⁸ Hãmri nhũm wa kuma nẽ ma akupÿm hprõt nẽ htẽm kurê kumrêx. Kãm ma htã hkĩnh nẽ. Nẽ ma Jejus kõt mẽ pa ho mẽ pa xwÿnhjê mã ujarẽn kaxyw ma mẽ hwÿr hprõt nẽ wa tẽ. ⁹ Pu nhũm ra Jejus tãm wa kutã tẽ nẽ wa hkaxpa. Hãmri nẽ wa haêr pê wa kãm kapêr nẽ wa kãm:

—Pa? Nhÿhÿm na ka wa tẽ? Anẽ.

Hãmri nhũm wa omu nẽ hkĩnh tÿx kumrêx nẽ hwÿr hprõt nẽ hpar pê hkõn krã ho tẽm nẽ akutã hpar ã kumÿ nẽ kãm mex o mex ã harẽ nẽ kãm:

—Hêxta gàà nẽ. Ma amex kumrêx. Amex o amex. Anẽ.

¹⁰ Hãmri nhũm wa kãm:

—E war amã ma hkõt nẽ. Mamrĩ ma tẽ nẽ ixkõt mẽ pa ho mẽ pa xwÿnhjê mã ijarê kê mẽ ma Garirej wÿr mra. Kamã kot paj mẽ axte axpẽn pumu. Anẽ.

Pôristi kot kàxpore hprãm xà Jejus o hêx ã harẽn

¹¹ Rôm nhũm pôristi hkwyjaja akupÿm tãm hkrã hãmri nẽ ma kẽn kreta rùm akupÿm krĩm mra. Hãmri nẽ patre krãhtũmjê hwÿr mra nẽ mẽ kãm ujarẽn pa. ¹² Hãmri

nhũm mẽ tee ri mẽ kuma nẽ mễhpigêtjê ho akuprô nẽ mẽ hã axpẽn mar o hkri. Hãmri nẽ axpẽn mar pa nẽ pôristi mã amnhĩrer rax nẽ mẽ kãm:

¹³ –E mẽ amnhĩm kàxpore jamý nẽ ma ri ã mẽ kãm amnhĩ jarẽn anhỹr o apa. Nom kêr ka mẽ kãm amnhĩ to axêx nẽ mẽ kãm: “Na pa prem kẽn kre kapem ixtýx gôr nẽ inhĩkwỹ nhũm Jejus kôt mẽ pa ho mẽ pa xwýnhjaja mra nẽ mẽ ixpê ã ho ahkĩ nẽ ma o mra.” Anhỹr o mẽ kãm amnhĩ to axêx o apa. Mễ ixte kàxpore ho mẽ amã amnhĩrerta pãnhã. ¹⁴ Koja pahĩti Piratja mẽ anhôt ã mẽ ajarẽn ma nẽ hã tanhmã mẽ ato kaxyw hã kot paj mẽ axy pê tanhmã kãm ixkapêr to nhũm tanhmã mẽ ato hkêt nẽ. Jakamã e. Mễ tee ri amnhĩ kukamã ajamxpêr kêt nẽ. Mễ mãmrĩ ma mra nẽ ã mẽ kãm axujarẽn anhỹr o ri apa. Anẽ.

¹⁵ Hãmri nhũm mẽ kuma nẽ mẽ kot amnhĩ to hêxta pãnhã kàxpore jamý nẽ ma mẽ mar xà hkôt mẽ piitã mẽ kãm Jejus kôt mẽ pa xwýnhjê ho hêx o pa. Tã na htem arĩ jarãhã Ijaewjaja ã axpẽn mã mẽ harẽn anhỹr rãhã ho pa.

Jejus kot hkôt mẽ pa ho mẽ pa xwýnhjê mã mẽ àpênh ã karõ

Makre 16.14-18; Rukre 24.36-49; Juãw 20.19-23; Atre 1.6-8

¹⁶ Tã pa mẽ ixte Jejus kôt ixpa ho ixpa xwýnh pê 11jaja hãmri akupým Jejus htĩr ã harẽn ma hãmri nẽ ma Garirej wýr mra. Nhỹri Jejus kot mẽ inhmã mẽmo hixêt prêk jarẽnha wýr.

¹⁷ Nẽ ra hwýr ixpôx o mrar mẽ Jejus pumu. Tã nom nhũm mẽ ixkwýjaja tee ri omu nẽ htýx ho nhãm mễhõ hã hkamnhĩx. No kêt mẽ pajaja na pa prem ixprĩ hã omunh kurê kumrêx nẽ ixkĩnh týt nẽ. Nẽ ixkĩnh nẽ hwýr ixprôt nẽ kãm:

–Pa Jejus? Hêxta waa nẽ. Amex o amex. Anẽ.

¹⁸ Hãmri nhũm mẽ inhmã:

–E na pre Tĩrtũm ã inhmã kapêr anẽ nẽ inhmã: “E kêr ka amnhĩ nhỹ hã mẽmoj piitã tanhmã ho ho apa. Kaxkwa kamã nẽ pika kamã. Mamrĩ nhỹhým amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anẽ. Na pre mẽ akaxyw ã inhmã kapêr anẽ.

¹⁹ –Jakamã e. Kêr ka mẽ ma pika piitã hkôt ri mẽ kãm ijarẽn o ri apa. Kê mẽ ixte mẽ nẽ tanhmã amnhĩ nhĩpêx to hã ijarẽn ma hãmri nẽ ixkôt amnhĩ xunhwý nẽ ixkôt ri amnhĩ nhĩpêx o pa. Nẽ kêr ka mẽ ja hã mẽ omu nẽ Tĩrtũm mẽ wa inhmã mẽ hkrã kumrã. Wa ixkarõ nhỹ hã mẽ hkrã kumrã. Mễ kot wa inhỹ hã pix mã tanhmã amnhĩ nhĩpêx to ho pa kaxyw.

²⁰ –Nẽ mẽ kãm anẽ kê mẽ ixkapêr piitã hkôt amnhĩ nhĩpêx rãhã ho pa. E kêr ka mẽ ma mẽ kãm ã ijarẽn anhỹr o ri mẽ hkôt apa. Kot paj mẽ anhĩkô hã ri ixpa rãhã nhũm nhỹrmã pikaja hapêx o hapêx. Anẽ.

Na pre ã Jejus mẽ inhmã mẽ ixàpênh ã karõ anẽ.

Matêwre kot Jejus jarẽn nẽ hã kagàja ja kôt na hapêx.

Makre Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwỳjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tĩrtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tĩrtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarêt xwỳnh ã harê nê hã kagà. ã Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkrãmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tĩrtũm Kra na. Tãm na pre mẽ pakaxyw ãm nê mẽ pahwỳr kumê. Tã tãm kot mẽ pahwỳr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwỳr wrỳk xwỳj ri na pre Tĩrtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mõi xwỳnh Juãw Paxisja nhũm pre mããnênh hkukamã tanhmã harênh to nê hã kagà. Te Tĩrtũm tãm hamaxpêr pyræk o harê nê harênh o:

E kot paj Ixkra hkukamã ma mẽ hwỳr kot harênh xwỳnhjê hõmê kê ma kutêp mẽ kãm harênh o ri pa. Kê mẽ kuma nê kutêp tãm amnhĩ nhĩpêx mex o pa.

³ Koja kukamã harênh xwỳnhja ma kapôt ã ri hwỳr mẽ mrar xwỳnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Kojã Tĩrtũm tokyx mẽ pahwỳr mẽ panhõ

Pahihti mẽ nhũm wrỳ pu mẽ pah-piitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mêhõ kutêp pry ho mex pyræk o amnhĩ nhĩpêx. Nom pry kumrêx o mex kêt nê. ãm amnhĩ nhĩ ho tãm amnhĩ nhĩpêx nê tãm axpên nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrar mex prãm kaprỳ pyræk. Jakamã kot kaj mẽ Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mẽ kot pry nhĩnur o mex nê ho katat nhũm ra katat mux nê nõi pyræk o amnhĩ nhĩpêx. E kwa kêt ka mẽ ã kutêp amnhĩ nhĩpêx anê.” Anhỳr o koja mẽ kãm harênh o pa. Anê.

Na pre ã Tĩrtũm Juãw Paxis kukamã harênh anê nhũm ã hã kapêr xwỳnh pê Ijaisja mẽ pamã hã kagà.

⁴ Tã ra kot harênh xà hkôt nhũm Juãw Paxisja tẽ. Hãmri nê kapôt ã ri mẽ kãm Tĩrtũm kapêr jarênh o pa nê mẽ kãm:

—Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tĩrtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hãmri nhũm mẽ ohtõ nê kot kapêr mar kaxyw ma nhỹhỹnh hwỳr kapôt mã mra. Pyka pê Jutej rũm nê Jutej kamã krĩ pê Jerujarê rũm nhũm mẽ ohtõ nê hwỳr mra. Hãmri nê nhỹri omu nê kãm:

—E ixte amnhĩ tomnuj kaga hprãm xàj na pa awỳr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nê ixkaprĩ nê. Hãmri nê ra inhma amnhĩ tomnuj kaga nê tãm amnhĩ nhĩpêx prãm nê.

Anhỳr ã amnhĩ jarê. Hãmri nhũm Tĩrtũmja kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj piitã rênh pa nê axte kãm hamaxpêr kêt nê. Jakamã nhũm Juãw Paxis gõi kãm mẽ hkrã kumrã. Pyhti pê Jotãw kamã. ⁶ Juãw Paxisja hikãxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm

ê nhîpêx nê hagiê nê hã pa. Nê mẽmo mry hkà ho amnhî pre nê ri pa. Nê mẽo mex kur kêt nê ãm krit ku nê menh ôr o ri pa. ⁷ Hãmri nê mẽ kãm tanhmã Jesus jarênh to ho pa nê mẽ kãm:

—E mẽ inhma. Koja tokyx Tirtũm kot mẽ pakaxyw ãm xwýnhhta mẽ pahwýr wrý. Ahpumunh týx o kot ijakrenh jakamã na pa hte ãm kukwak ri ixpa nê amnhî tã hã íxpíjaãm rãhã ho ri ixpa. Te ixkrãm ã íxpíjaãm o amnhî nhîpêx pyræk. ⁸ Na pa hte gô pix o Tirtũm mã mẽ akrã kumrãr o ri ixpa. Nom mẽ pahwýr wrýk mã xwýnhja koja mẽ awýr Tirtũm Karõ rê nhũm mẽ akaxwýnh mã agiê. Ka mẽ ý hã tãm ri amnhî nhîpêx rãhã ho ri apa. Anê.

Juãw Paxis kot Jesus krã kumrãr ã harênh Matêwre 3.13-17; Rukre 3.21-22; Juãw 1.32-34

⁹ Tã nhũm Jesusja tãm Juãw Paxis wýr tẽ. Garirej kamã krí pẽ Najare rũm ma hwýr tẽn pøj. Hãmri nhũm Juãwja hkrã hkumrã. Pyhti pẽ Jotãw kamã hkrã kumrã. ¹⁰ Hãmri nê wa gôj rũm api nê mýr ri kaxkwa pumunh o xa. Nhũm kaxkwa axkjê nhũm kurũm Tirtũm Karõ te tuuti pyrã nê Jesus wýr wrýk o tẽ nê íkre hã xa nhũm amnhî tã omunh o xa. ¹¹ Hãmri nhũm Tirtũm kaxkwa rũm kãm kapêr nê kãm:

E apê Ixkra mex na ka. ãm hãmri na ka hte ixkanrêhã amnhî nhîpêx mex o apa. Inhmã ajapê kamã na ka ri apa ho apa. Anê.

Jesus kot Satanasti kaga hã harênh Matêwre 4.1-11; Rukre 4.1-13; mããñên Eprêw 2.18, 4.15

¹² Tã nhũm Tirtũm Karõja ma kapôt mã Jesus o mõ ¹³ nhũm kapôt ã mry xoprê kaêx ã ri mrar o hã arĩgro pẽ 40. Hãmri nhũm Satanasti omu nê ma hwýr tẽ nê ri hkôt pa. Kapôt ã ri hkôt hêx rom tanhmã kãm kapêr to nhũm kot mar nê hkôt amnhî xãm prãm xàj ma hkôt pa. Nom nhũm Jesus hkaga kumrêx nhũm tee ri ho anhýr kaprý nê ma akupým tẽ. Hãmri nhũm Tirtũm kapêr o mẽ wrýk xwýnhjaja Jesus wýr wrý nê tanhmã ho mex to.

Jesus kot Tirtũm mã àpênh krax ã harênh Matêwre 4.12-17; Rukre 4.14-15

¹⁴ Nhũm pre ra mẽ íxpê Ijaew o amnhîptãr xwýnh pẽ Eroxa Juãw Paxis kot mẽmoj tã kãm àkjêr mýrapê nhũm pre ra unê nê haxà. Tã kot haxàr jakãnh pẽ nhũm Jesus ma akupým pyka pẽ Garirej wýr mõ nê kamã mẽ kãm Tirtũm kapêr jarênh o pa. Nê Tirtũm kot mẽ hwýr mẽnh ã amnhî jarênh o pa. Nom te nhãm mẽhõ jarênh pyræk o amnhî jarê ¹⁵ nê mẽ kãm:

—E na Tirtũm kãm mẽ ato hkra hprãm nê. Jakamã na ra kot mẽ awýr ãm xwýnhhta mẽ nhũm mẽ awýr wrý. Kwa mẽ tokyx kapêrja ma nê amnhî kaxyw hkôt ajamaxpêr. Hãmri nê ate amnhî tomnuj kaga nê Tirtũm kôt mãn amnhî nhîpêx o ri apa. Kot kaj mẽ ã amnhî nhîpêx anê nhũm Tirtũm amnhî tã mẽ apumu nê mẽ ato hkra. Anê.

Jesus kot amnhî kôt tep pynênh xwýnh wa hwýr ã harênh

Matêwre 4.18-22; Rukre 5.1-11

¹⁶ Tã nhũm Jesus ma Garirej kamã gô rax pẽ Garirej mýri mõ. Hãmri nê Simãw mẽ htõ Andreja wa hwýr kato nê wa omu. Wa kot tep pynênh xwýnh jakamã na pre wa gôx kãm kryhti rênh o xa nhũm Jesus wa hãnh tẽ nê wa omu. ¹⁷ Hãmri nê amnhî kôt wa kuwý nê wa kãm:

—E war amnê íxkôt tẽ nê íxkôt mãn apa. War apê tep kanhêr rax o ri apa xwýnh tã kêr ka war axápênhta kaga nê hpãnhã íxkôt apa ho apa. Kot paj tanhmã war akrã hto ka wa tep pynênh pãnhã ma ri mẽ hkôt mẽ kãm ixkapêr jarênh o ri apa. Mẽ ohtõ nê mẽ kot war amar nê Tirtũm kôt amnhî xunhwýr kaxyw. Jao kot kaj te war ate tep kanhêr rax nê Tirtũm mã ôr pyræk o amnhî nhîpêx.

Anhýr o wa kãm kapêr. ¹⁸ Hãmri nhũm wa kuma nê kryhti kaga nê ma hkôt pa ho pa kurê kumrêx. ¹⁹ Hãmri nê mẽ gô mýri mõ nê Jepetew kra Xiakre mẽ htõ Juãw wa hwýr kato nê wa omu. Nhũm wa kormã hipêêxã nhĩhkô hã pãr kãm kryhti ho mex o wa nhý nhũm Jesus wa mẽ hwýr kato nê wa omu nê amnhî kôt wa kuwý. ²⁰ Hãmri nhũm wa kuma nê ma hkôt pa ho pa. Pãr kre kamã mẽ kãm àpênh xwýnhjê ri hipêêxã re nê ma Jesus kôt pa ho pa.

Jejus kot mēhō nē mēkarōmnuti janor ā harēnh

Rukre 4.31-37

²¹ Hāmri nhūm Jejus mē hkôt mē pa ho mē pa xwýnhjaja ma krī pē Kapanau hwýr mō hāmri nē hwýr pōj. Hāmri nhūm mē ixpē Ijaewjē nhō arīgromnu pē sap kato nhūm Jejus ma Tirtūm kapēr o mē ahkre xà hā ixkre hwýr tē nē hwýr axà. Hāmri nē kamā mē kot Tirtūm kapēr mar kaxyw axpēn wýr mē pikuprōnh xwýnhjē jahkre ho nhỹ. ²² Nē mē ahkre mex nhūm mē kuma nē tee ri hamaxpēr nē axpēn mā:

—Héxta waa nē. Pēr ām hāmri na ā mē pamā mēmoj jarēnh anē. Tirtūm kapēr tūm o mē ahkre xwýnhjē rom àhpumunh tỳx kôt na hprī hā mē pajahkre mex nē. Anē.

²³ Hāmri nhūm mēhō myja mē hwýr axà. Na pre ra mēkarōmnuti hwýr axà nhūm ý hā amnhī tomnuj o pa. Hāmri nē mē hwýr axà nē Jejus pumu nē kām kapēr. Nom tām kapēr kêt nē. Mēkarōmnuti nhỹ hā kām kapēr. Kàx pē kām kapēr nē kām:

²⁴ —Pa Jejus? Kwa tanhmā mē ixto hkêt nē. Ixte apumunh mex. Apē Najare nhō xwýnh tā māānēn apē Tirtūm kot mē ixwýr amēnh xwýnh maati na ka. Tirtūm rūm na ka pre mē ixwýr wrý. Kwa xà kot kaj mē ixto ajapêx nà? Anē.

²⁵ Hāmri nhūm kām:

—Tk. Kwa anhīkrê nē myta kurūm akator kurê kumrēx. Anē.

²⁶ Hāmri nhūm kuma nē àmra htỳx kām myja o àk tỳx nē kēp kato nē ma tē nhūm akupým mex. ²⁷ Hāmri nhūm mē piitā omu nē kamā no puma nē. Hāmri nē xatā axpēn mā harēnh o pa nē axpēn mā:

—Kokỹỹ. Jejus na pre àhpumunh tỳx kôt mēkarōmnuti jano nhūm kuma nē mē kurūm hapôx kurê kumrēx. Anē.

²⁸ Hāmri nhūm Garirej kamā mē piitā ri axpēn mā harēnh o pa.

Jejus kot akupým Simāw xupānhgêx o mex ā harēnh

Matêwre 8.14-15; Rukre 4.38-39

²⁹ Tā nhūm Jejus Xiakre mē Juāw mērohā Tirtūm kapēr o mē ahkre xà hā ixkre rūm kato nē ma Simāw mē Andre wa ōrkwỹ hwýr mō. ³⁰ Hāmri nē mē hwýr agjê. Nhūm Simāw xupānhgêxja ra à nē hkà kagro htỳx nē nō nhūm Jejus mē hwýr axà nhūm mē

kām harē. ³¹ Hāmri nhūm mē kuma nē hwýr axà nē omu nē hpa hā kupy nē kànhmā ýr nhūm hkà hakry nē akupým mex kurê kumrēx. Hāmri nē kànhmā xa nē tē nē mē kām mēmoj nhĩpêx nhūm mē hkur o hkrī.

Jejus kot akupým mē hkwýjê ho mex ā harēnh

Matêwre 8.16-17; Rukre 4.40-41

³²⁻³³ Tā nhūm myt axà nhūm mē ohtô nē Simāw mē Andre wa ōrkwỹ hwýr mra nē hakwakrem Jejus ā akuprō. Nē amnhī kôt mē à xwýnhjê ho mra. Nē mēkarōmnuti kot mē hwýr gjêx xwýnhjaja nhūm mē hwýr mē o mra. ³⁴ Hāmri nhūm Jejus mē omu nē akupým ahpýnhā mē piitā mē ho mex pa. Nē mēkarōmnutija nhūm mē kurūm mē hapôj. Mēkarōmnuti kot kēp Tirtūm Kra hā omunh tāno nhūm kapēr nē mē hkurê nē mē hano nhūm mē kapēr kêt rāhā mē kurūm hapôj nē ma mra.

Jejus kot Tirtūm mā amnhī jarēnh ā harēnh

Rukre 4.42-44

³⁵ Tā nhūm apkati nhūm kormā myt kator kêt ri nhūm Jejus kànhmā nhỹ nē tē nē kato. Hāmri nē ma kapôt ā ahte nhỹhým tē nē nhỹri Tirtūm mā amnhī jarēnh o nhỹ.

³⁶ Hāmri nhūm Simāw Pêtre mē hkwýjaja hkrā hapôj nē tee ri ixkre kamā hapēr. Hāmri nē hapôj nē ma hpri jakop o mō.

³⁷ Hāmri nē hwýr kato nē omu nē kām:

—Pa. Kwa na mē piitā tee ri ajapēr. Anē.

³⁸ Hāmri nhūm mē kām:

—Tô ma pu mē mō. Nom kot puj mē akupým mē hwýr pamōr kêt nē. Kot puj mē hpānhā nhām krī hkwý hkôt mǎn ri pajapôj. Pa kamā mē kām Tirtūm kapēr jarē mǎn. Ja kaxyw na pre mē awýr inhmē. Krī piitā hkôt mē pa xwýnhjaja kot kapēr mar kaxyw. Anē.

³⁹ Hāmri nē mē ma axte Garirej kamā krī hkwý hkôt pa. Nē krī piitā hkôt Tirtūm kapēr o mē ahkre xà hā ixkre kamā mē kām Tirtūm kapēr jarēnh o pa. Nē mē kurūm mēkarōmnuti japôx o pa.

Jejus kot akupým mēhō hkāmnu ho mex ā harēnh

Matêwre 8.1-4; Rukre 5.12-16

⁴⁰ Tã nhũm mēhō hkà hkro xàpēr tỳx xwỳnhja Jejus wỳr tē. Hãmri nē hã hpijaàm kaxyw kutã hkõnkrã ho tēm nē nhỹ nē kãm:

—Pa Pahihti. E ot pa awỳr amnhĩ to tē. Akupỳm ate mē ixto mex kaxyw axàhpumunh tỳx jakamã kot ka akupỳm amã ixto mex prãm nē mãmri akupỳm ixto mex. Anē.

⁴¹ Hãmri nhũm kuma nē kamã ukapri nē hã ìhkra xi nē kãm:

—Nà kot paj ato mex. E akupỳm akà mex.

⁴² Anhỹrja kôt nhũm akupỳm hkà mex kurê kumrēx. ⁴³⁻⁴⁴ Hãmri nhũm Jejus kãm kapēr kãm hihtỳx nē hano nē kãm:

—E kēr ka amnhĩ tã akwỳjē mã tanhmã ijarēnh to hkēt rãhã ma patre hwỳr tē kē akupỳm akà mex ã apumu. Hãmri ka amnepēm Mojes kot mē ate akupỳm mē amex ã Tirtũm mã tanhmã amnhĩ nhĩpēx to hã karō xwỳnhja ka kãm ho anē. Kē mē piitã akupỳm akà mex ã apumu. Anē.

⁴⁵ Hãmri nhũm kuma nē ma tē. Nom axtem nē ma mē piitã mē kãm amnhĩ jarēnh o ri mra. Jejus kot kãm karō xà kuhpa hã ma mē kãm amnhĩ jarēnh o ri mra. Jakamã nhũm mē kuma nē piitã nhỹhỹnh Jejus wỳr mra. Mē ohtō rax kumrēx nē hwỳr mra nhũm tee ri mē noo mã nhỹri krĩm pa mã. Hãmri nē ãm krĩ pu hã ri pa htã nom nhũm mē arĩ ohtō nē hwỳr mra.

2

Jejus kot akupỳm ì kamã htyk xwỳnh o mex ã harēnh

Matêwre 9.1-8; Rukre 5.17-26; Juãw 10.37-38

¹ Tã nhũm Jejus hã apkati grêre nē hkôt mē pa ho mē pa xwỳnhjē mērohã ma akupỳm Kapanau wỳr mō. Hãmri nē hwỳr pōj nhũm mē piitã nhỹri mēhō nhõrkwỹ kamã hpōx kôt harēnh ma nē hã akuprō.

² Ra hã pikuprõnh rax nē ixkre nhĩtom pa. Nhũm mē hkwỳjaja kapôt ã kuhē nhũm Jejus Tirtũm kapēr o mē ahkre ho nhỹ. ³ Hãmri nhũm mēmyjaja kēp kwat nē ì kamã htyk xwỳnhja mỳ nē Jejus kot ho mex kaxyw hwỳr o tē. ⁴ Hãmri nē tee ri hã mē pikuprõnh rax xwỳnhjē pumu nē nhỹhỹnh kot hwỳr o àr kaxyw tee ri amnhĩ kukamã ho ukapi ho pa. Hãmri nē hamaxpēr nē ixkre nhĩmōk po hwỳr ho api nē himōk kwỹ

grã nē hkôt ì kamã htyk xwỳnhja nōr xà mērohã hkôt Jejus wỳr haxà. ⁵ Hãmri nhũm mē kot kaxyw kãm hamaxpēr tỳx ã mē omu nē ì kamã htyk xwỳnhja mã kapēr nē kãm:

—Pa? Kwa tee ri amnhĩ kukamã ajamaxpēr kēt nē. Na pa ra anē ate amnhĩ tomnuj piitã ho ijapēx. Kot paj axte kãm ijamaxpēr kēt nē. Anē.

⁶ Hãmri nhũm Tirtũm kapēr tũm o mē ahkre xwỳnhjaja tee ri ã kapēr anhỹrja ã kuma nē hamaxpēr o:

⁷ —Tk. Kwa pēr mēhō myti mũj kēp Tirtũm kēt tã te kapēr pyrãk o amnhĩ nhĩpēx nē mē nē mē kot amnhĩ tomnuj o hapēx ã amnhĩ jarē. Tirtũm pix kot mē nē mē kot amnhĩ tomnuj o hapēx kēnã. Anē.

⁸ Nom nhũm Jejus mē hamaxpēr kôt mē omunh mex nē. Mē kot Tirtũm pix kot mē nē mē kot amnhĩ tomnuj rēnh nē akupỳm mē à xwỳnhjē ho mex kôt mē hamaxpērja nhũm mē omunh mex nē mē kãm:

—Kwa mē ã ajamaxpēr anhỹr kēt nē.

⁹ Ixte mē nē mē kot amnhĩ tomnuj o ijapēx par ã amnhĩ jarēnh tã mē ate mē ano ho ja kôt ixpumunh kēt jakamã na ka htem ja hã ixkôt ajamaxpēr kēt nē. Nom kot paj mē anoo mã akupỳm myja o mex. Ka mē ja hã ixpumu hãmri nē ixkôt ajamaxpēr kurê kumrēx. ¹⁰ Ixpē Tirtũm kot mē awỳr inhmēnh xwỳnh na pa. Ixte mē anē mē ate amnhĩ tomnuj rēnh kaxyw na pre mē awỳr inhmē pa wrỳ. Tã mē ate ja kôt ixpumunh kaxyw kot paj mē anoo mã mytija ho mex.

¹¹ Anhỹr o mē kãm kapēr hãmri nē ì kamã htyk xwỳnhja mã kapēr nē kãm:

—E kànhmã xa nē anōr xà mỳ nē ma akupỳm anhõrkwỹ hwỳr tē. Anē.

¹² Hãmri nhũm kuma nē kànhmã ãm kurê kumrēx. Hãmri nē akupỳm mex ã amnhĩ pumu nē hkĩnh tỳx nē nōr xà mỳ nē mē noo mã kato nē ma akupỳm õrkwỹ hwỳr tē. Hãmri nhũm mē kot omunh xwỳnhjaja amnhĩ jaēr pē omu nē no hapōx kaxyw nē hkôt omunh o kuhē nē kamã no puma htỳx nē. Nē tee ri omu nē axpēn mã:

—Hêxta waa nē. Aa mē pahte ã mēhō kot amnhĩ nhĩpēx anhỹr ã omunh kēt kumrēx tã jarãhã ja pumu. Nà Tirtũmja ãm mex o mex. Anē.

*Jejus kot amnhĩ wỳr Rewi hwỳr ã harēnh
Matêwre 9.9-13; Rukre 5.27-32*

¹³ Hāmri nhũm Jejus mẽ ma mra nẽ akupỹm gô rax pê Garirej wỳr mra nẽ gô mỳ ri pa. Hāmri nhũm mẽ piitã omu nẽ hwỳr mra nẽ hã akuprõ nhũm Tĩrtũm kapēr o mẽ ahkre ho nhỹ. ¹⁴ Hāmri nẽ mẽ kure nẽ axte hkõt mẽ pa ho mẽ pa xwỳnhjê mẽrohã ma axte mra nẽ nhỹri Apew kra Rewija pumu. Rõm kãm mẽ õ pahĩti mã amnhĩ kwỳjê pê kàxpore hkwy jamỳnh xwỳnh na pre. Jakamã nhũm àpēnh o nhỹ nhũm Jejus hãnh tẽ nẽ omu nẽ amnhĩ kõt kuwỳ nẽ kãm:

—Pa? E kwa axàpēnhhta kaga nẽ hpānhã amnẽ mẽ ixkõt mǎn ri apa ho apa. Anẽ.

Hāmri nhũm kuma nẽ àpēnh kaga nẽ ma hkõt mō nẽ hkõt pa ho pa.

¹⁵ Hāmri nhũm mẽmo arĩgro hã nhũm Rewi nhõ mẽ apkur xà hã mẽõ rax nẽ. Jakamã nhũm amnhĩ nhõrkwỹ hwỳr hkràmnhwỳjaja nẽ Jejus mẽ hkõt mẽ pa ho mẽ pa xwỳnhjê hwỳ. Hāmri nhũm mẽ ma hkõt mra nẽ õrkwỹ hwỳr agjê nẽ kuri apkur o hkrĩ. Nẽ mǎānēn mẽ kēp Rõm nhõ pahi mã mẽ kēp kàxpore hkwy jamỳnh xwỳnh kwỳ nẽ mẽ ohtõ nẽ mẽ kutã apkur o hkrĩ. ¹⁶ Hāmri nhũm Tĩrtũm kapēr tũm o mẽ ahkre xwỳnh kwỳ pê Parijew nhõ xwỳnhjaja mra nẽ mẽ apkur ã mẽ omu. Nẽ tee ri mẽ hkaêx ã Jejus pumu nẽ hkõt mẽ pa ho mẽ pa xwỳnhjê hwỳr agjê nẽ hã mẽ kãm akir nẽ mẽ kãm:

—Kwa na htem mẽ kot amnhĩ tomnuj xwỳnhjê kutã apkur kêt tã ka mẽ Jejus mẽ apimràatã axtem nẽ mẽ kutã axàpkur o akrĩ. Mẽ ate amnhĩ to mex ronhỹx ka mẽ kutã axàpkur kêt nẽ. Anẽ.

¹⁷ Hāmri nhũm Jejus amnhĩ tã mẽ kapēr ma nẽ mẽ kãm:

—Tk. Ixte tãm mẽ unhwỳr kaxyw ixte mẽ kutã ixàpkur o inhỹr kēnã. Xà na hte tõtõ mẽ mex xwỳnhjê hwỳr mra nẽ mẽ hkane? Nà na hte ãm mẽ à xwỳnhjê pix kane ho pa. Ra mẽ ate ja pumunh mex. Ja pyrã nẽ na pa pre mẽ kot amnhĩ to mex xwỳnhjê hwỳr ixwryk kêt nẽ. ãm mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw mẽ hwỳr wrỳ nẽ jajê kutã ixàpkur o nhỹ. Mẽ ate amnhĩ tomnuj mã anhũrer nẽ hpānhã tãm amnhĩ nhĩpêx o

apa kaxyw na pa pre mẽ awỳr wrỳ nẽ mẽ akamã ixukaprĩ ho ri mẽ akõt ixpa. Tã ka mẽ atỳx ã ixte mẽ kutã ixàpkur anhỹrja ã ixto akapēr anẽ. Anẽ.

Mẽ kot Tĩrtũm mã amnhĩ jarēnh kaxyw mẽõ kaga hã mẽ harēnh

Matêwre 9.14-17; Rukre 5.33-39

¹⁸ Juãw Paxis kõt mẽ pa xwỳnhjê mẽ Parijew nhõ xwỳnhjaja na prem tōhã Tĩrtũm mã amnhĩ jarēnh kaxyw nẽ apkur kêt rãhã kamã kãm amnhĩ jarē. Nom nhũm Jejus kõt mẽ pa ho mẽ pa xwỳnhjaja na prem kãm amnhĩ jarēnh prãm nẽ apkur kãm amnhĩx kãm amnhĩ jarēnh o pa. Jakamã nhũm Ijaew kwỳjaja tee ri ja hã mẽ omu nẽ Jejus wỳr mra nẽ mẽ hã hkukja nẽ kãm:

—Pa? Kwa aprĩ hã mẽ inhmã mẽmoj jarē. Na hte Parijew nhõ xwỳnhjê mẽ Juãw Paxis kõt mẽ pa xwỳnhjaja tōhã Tĩrtũm mã amnhĩ jarēnh kaxyw nẽ apkur kêt rãhã kãm amnhĩ jarē. No akõt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarēnh o pa. Kwa mo na htem mẽ uràk nẽ tōhã apkur kêt rãhã kãm amnhĩ jarēnh kêt nẽ? Anẽ.

¹⁹ Hāmri nhũm Jejus mẽ kãm:

—Tk. Mo kaxyw kot mẽ ã amnhĩ nhĩpêx anẽ? Mẽ hkaprĩ hkêt kēnã. Mẽ kot ixkõt pa ho pa hã amnhĩ pumunh jakamã na htem hkĩnh nẽ pa. Kormã ixte mẽ hkõt ixpa kēnã kot kêt mẽ Tĩrtũm mã kapēr kaxyw nẽ ho apkur kêt kamã kãm amnhĩ jarē. Xà na htem hkràmnhwỳ hã hkĩnh kaxyw hã akuprõ nẽ hkaprĩ nẽ apkur kêt nẽ mỳr o hkrĩ? Nà na htem hã akuprõ nẽ hkĩnh nẽ apkur rũnh nẽ. Ja pyrã nẽ na hte ixkõt mẽ pa ho mẽ pa xwỳnhjaja ixkõt kormã àmnhĩx hkĩnh nẽ apkati mẽ apkur kãm kãm amnhĩ jarēnh o pa. ²⁰ Nom koja mẽ kãm ixkurê xwỳnhjaja nhỹrmã tanhmã ixto hāmri nhũm mẽ rĩ kormã hkaprĩ htỳx kãm ho apkur kêt rãhã Tĩrtũm mã amnhĩ jarē. Anẽ.

Nhũm pre ã Jejus mẽ kãm hkõt ri mẽ pa ho mẽ pa xwỳnhjê jarēnh anẽ hāmri nẽ axte mẽ kãm kapēr nẽ mẽ kãm:

²¹⁻²² —Mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga. Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã

na ka htem inhma nê ãm inhma. Kwa mẽ inhma nê mẽ ate amnhĩ nhĩpêx tũm gryk ã ixkaga hkêt nê. Anê.

Jejus kêp arĩgromnu hpãm ã kot amnhĩ jarênh

Matêwre 12.1-8; Rukre 6.1-5

²³ Tã nhũm mẽ ixpê Ijaew nhõ arĩgromnu pê sap kato nhũm Jejus mẽ hkôt mẽ pa ho mẽ pa xwýnhjaja ma nhỹhỹm mõi. Ma mẽ hpur kahti hkôt nhỹhỹm mõi nhũm hkôt mẽ pa ho mẽ pa xwýnhjaja ra kãm prãm nê. Hãmri nê prãm xaj purta kamã amnhĩm mẽmo hy te kot harój pyræk xwýnhhta kwýr rê nê ma Jejus kôt hkanhar o mõi. Mẽ ixpê Ijaewjaja na pa htem axpên pur kãm ixpa nê ã amnhĩ nhĩpêx anê. ²⁴ Hãmri nhũm Parijew nhõ xwýnhjaja mẽ hkôt mra nê tee ri ja hã mẽ omu nê Jejus wýr mra nê mẽ hã kãm akir nê kãm:

—Kwa jarãhã sap tã akôt mẽ pa ho mẽ pa xwýnhjaja mẽmo hy hkwy rê nê akôt hkanhar o pa. Tĩrtũm kapêr ã kagà htũm kot mẽ panhõ arĩgromnu hã mẽ pahte mẽmoj nhĩkênh nê mẽ pahkurê kênã. Kwa mẽ kãm anê kê mẽ ã amnhĩ nhĩpêx anhýr kêt nê. Anê.

²⁵⁻²⁶ Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarê nê mẽ kãm:

—Kwa xàn ka mẽ kormã Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx to kamã harênh nê mar kêt nê? Kormã Apiatar kêp patre maati ri na pre Tawi hkôt ri mẽ pa xwýnhjê mẽ prãm xaj Tĩrtũm mã amnhĩ jarênh xà hã ixkre hwýr agjê. Hãmri nhũm Apiatar mẽ kãm prãm tỳx ã mẽ omu nê mẽ kamã ukapri nê mẽ kãm mẽmoj gõi. Mẽ kot Tĩrtũm noo mã pãwti jaxwýr xwýnhhta nhũm mẽ kãm kugõi nhũm mẽ kuku. Tĩrtũm kapêr ã kagà htũm kot ja nê mẽ kurê htã nhũm mẽ kãm prãm tỳx ã mẽ omu nê mẽ kamã ukapri xaj mẽ kãm kugõi. Patre pix kot ja hkur kaxyw tã nhũm mẽ kãm kugõi nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nê. Patre kot mẽ kamã ukapri nê mẽ kãm õr nhũm ja hã omu nhũm ja kãm mex nê. Anê.

Hãmri nê mẽ kãm:

²⁷ —Na pre Tĩrtũm panhĩ kumrêx o kato nê kormã mẽ hkõkõt nê Tĩrtũm mã

hamaxpêr o hkrĩ kaxyw arĩgromnu ho kato. No na pre arĩgromnu kumrêx o kato nê hpãnhã kaxyw panhĩ ho kator kêt nê. ²⁸ Tã pa na pre Tĩrtũm mẽ akaxyw ixãm nê mẽ awýr inhmê. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Jakamã kwãr mẽ mãmri mẽmojta rê nê ixkõt hkanhar o mõi. Anê.

3

Jejus kot akupým ãkra grã xwýnh o mex ã harênh

Matêwre 12.9-14; Rukre 6.6-11

¹ Tã nhũm mẽ ixpê Ijaewjê nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkreja wýr tẽ nê axà nê kamã Tĩrtũm kapêr o mẽ ahkre ho nhỹ. Nhũm mẽhõ my ãkra grã xwýnhja mẽ ãkõ hã mar o nhỹ. ² Nhũm Parijew nhõ xwýnhjaja kãm mẽ hkrãhtũmjê mã Jejus o kapêr prãm jakamã htãnopxar o kuhê nê axpên mã:

—E kwa pu mẽ jar pakuhê nê kot tanhmã amnhĩ nhĩpêx to hã omu. Xà koja jarãhã ãkra grã xwýnh mũj o mex nã? Jarãhã arĩgromnu kênã kot kêt kãm ãkra ho mex. Koja ho anê nê ra Tĩrtũm kapêr tũm nhĩrõp xa. E pu mẽ xa nê hã omu. Anê.

³ Hãmri nhũm Jejus ãkra grã xwýnhhta pumu nê kãm:

—Pa? E kãnhmã xa nê amnê ixwýr tẽ. Anê.

Hãmri nhũm kãnhmã xa nê hwýr tẽ nê mẽ piitã mẽ noo mã xa. ⁴ Hãmri nhũm Jejus mẽ kot omunh o hkrĩ xwýnhjê hwýr rĩt nê arĩgromnu hã tanhmã mẽ kot amnhĩ nhĩpêx to hã mẽ hkukja nê mẽ kãm:

—E mẽ inhma. Tanhmã na htem arĩgromnu hã axpên nhĩpêx to wehe? Xà kot ka mẽ arĩgromnu hã axà htỳx nê amex prãm xaj ma mẽhõ hwýr amnhĩ to tẽ nhũm apumu nê apkatim arĩgro mex jamãr pê akane hkêt ka ty nhũm ja amã mex nê? Rỳ nhũm apumu nê tanhmã atomnuj to nê akupým amnhĩ nê ajano nhũm ja amã mex nê? Nã koja ã anhĩpêx anê nhũm ja amã mex kêt nê. E mẽ inhmã mẽmoj jarê. Tanhmã na pre finat Mojesja Tĩrtũm nhỹ hã arĩgromnu hã mẽ pahte axpên nhĩpêx ã mẽ pamã karõ hto? Xà kot puj mẽ hã axpên

kām paxukaprī rỳ hã mẽ pamã axpẽn kurê ho papa? Xà kot puj mẽ hã mẽmoj punuj pẽ mẽ utà rỳ kot puj mẽ ãm arĩgro mex pix ã mẽ utàr kaxyw arĩgro mex jamã? E mẽ atõ inhmã ja jarẽ. Anẽ.

Ra kot hprĩ hã mẽ hamaxpẽr ã mẽ omunh mex nẽ ã hẽx rom mẽ hkukjêr anẽ. Nom nhũm mẽhõ tanhmã kutã kãm nẽ hkêt nẽ. Mẽ ãm piitã akryk mar pẽ omunh o hkrĩ. Mẽ kot tanhmã kãm nẽ nhũm ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ. ⁵ Hãmri nhũm Jejus tee ri mẽ ukaprĩ hkêt ã mẽ omu nẽ hkaprĩ nẽ mẽ kamã gryk nẽ. Hãmri nẽ ìhkra grà xwỳnhja mã kãm:

—Tk. Mẽ kot tanhmã inhmã ujarẽnh tore hã. E anhĩhkra katat. Anẽ.

Hãmri nhũm ìhkra katat nẽ akupỹm mex kurê kumrẽx. ⁶ Hãmri nhũm Parijew nhõ xwỳnhjaja tee ri ã Jejus kapẽr anhỹrja ã kuma nẽ kot sap ã akupỹm myta o mex ã omu nẽ kamã gryk tỳx nẽ. Nẽ hapõj nẽ ma pahi Erox kõt mẽ pa xwỳnhjê hwỳr mra nẽ mẽ kãm harẽ nẽ tanhmã hã axpẽn kukjêr to nẽ axpẽn mã:

—Kwa tanhmã kot puj mẽ ho? Na ã kapẽr anhỹrja o mẽ pahto kapẽr punuj nẽ. Te hkĩnhã mẽ papamjaja mẽ kamã paxukaprĩ hkêt pyrãk ã mẽ pajarẽ. Kojã mẽ pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkõt pix mã hamaxpẽr o pa. Ja pymaj kwa tanhmã kot puj mẽ ho? Anẽ.

Mẽ ohtõ nẽ kot Jejus kapẽr mar kaxyw hwỳr mrar ã mẽ harẽnh

Matêwre 4.23-25; Rukre 6.17-19

⁷⁻⁸ Tã nhũm Jejus mẽ hkõt mẽ pa ho mẽ pa xwỳnhjê mẽrohã ma akupỹm gõ rax wỳr mõ nhũm mẽ ohtõ nẽ omu nẽ ma hkõt mra. Pyka pẽ Garirej mẽ Jutej wa kurũm nẽ krĩ pẽ Jerujarẽ rũm nẽ pyka pẽ Itumêj rũm nẽ pyhti pẽ Jotãw nhĩkjê hã krĩ hkwy rũm nẽ krĩ hkwy pẽ Xir mẽ Sitõ wa pu hã krĩ hkwy rũm ohtõ nẽ ma hwỳr mra. Na prem ra harẽnh ma nẽ nhỹhỹm mõr ã omu nẽ axpẽn mã harẽnh o:

—E kwa tokyj pu mẽ ma hwỳr mẽ à xwỳnhjê o mõ kê akupỹm mẽ ho mex. Anẽ.

Hãmri nẽ hwỳr mẽ o mra nẽ hã pikuprõnh rax nẽ. ⁹⁻¹⁰ Hãmri nhũm Jejus akupỹm mẽ à xwỳnhjê ho mex. Gõ mỳri

xa nẽ tanhmã mẽ ho mex to. Jakamã nhũm mẽ axte ohtõ nẽ hwỳr mra nẽ piitã kot htok nẽ akupỹm mex kaxyw hwỳr axpẽn nhĩgã. Hãmri nhũm tee ri amnhĩ wỳr mẽ omu nẽ hkõt mẽ pa ho mẽ pa xwỳnhjê mã:

—Kwa mẽ ma mra nẽ amnẽ kanõre jêt mũj kjênh o tẽ nẽ jar inhmã anhõ. Kê mẽ ixtã axpẽn nhĩgãnh o ijanênh japêr pa hwỳr axà nẽ amỹm mẽ ho hpỹnh nẽ akupỹm mẽ ho mex. Anẽ.

Hãmri nhũm mẽ kuma nẽ ma mra nẽ kãm ja o tẽ nẽ kunhõ. ¹¹ Na pre mẽkarõmnuti hkwyjã mẽ hkwyjê hwỳr agjê. Jakamã nhũm mẽ Jejus pumu nẽ mẽkarõmnuti nhỹ hã kêp Tĩrtũm Kra hã omunh kurê kumrẽx. Hãmri nẽ hã hpijaãm kaxyw kutã hkõnkrã ho hkrĩ nẽ mẽkarõmnuti nhỹ hã kãm kapẽr nẽ kãm:

—Kwa apê Tĩrtũm Kra na ka. Anẽ.

¹² Hãmri nhũm tee ri amnhĩ tã mẽ kuma. Kãm mẽkarõmnuti ã kot harẽnh anhỹr prãm kêt nẽ. ãm mẽ piitã mẽ kot kapẽr mar nẽ kot amnhĩ nhĩpêx ã omunh pẽ kêp Tĩrtũm Kra hã omunhja na kãm hprãm. Jakamã nhũm mẽkarõmnuti ã harẽnh anẽ nhũm ja nẽ mẽ kãm kapẽr nẽ mẽ kãm:

—Tk kwa nà kêr ka mẽ tanhmã ijarẽnh to hkêt nẽ. Anẽ.

Jejus kot amnhĩ kaxyw mẽ kêp 12 rênh ã harẽnh

Matêwre 10.1-4; Rukre 6.12-16

¹³ Tã nhũm Jejus hkõt mẽ pa ho mẽ pa xwỳnh kwỳjê mã kãm:

—E pu mẽ ma mõ nẽ krãhakỳx mũj ã api. Anẽ.

Hãmri nẽ mẽ ma hwỳr mõ nẽ hã api ¹⁴nhũm Jejus amnhĩ kaxyw mẽ ho 12 nẽ mẽ kurê. Mẽ kot ma ÿ hã Tĩrtũm kapẽr o mẽ ahkre ¹⁵ nẽ ÿ hã mẽ nẽ mẽkarõmnuti janor o pa kaxyw. ¹⁶ ã mẽ hixi kot anhỹr.

Na pre ja kêp Simãw no nhũm Jejus hpãnhã hã hixi hõ mẽ nhũm hpãnhã mããnên kêp Pêtre.

¹⁷ Nẽ hkõt Jepetew kra Xiakre mẽ htõ Juãwja wa kuta.

Hãmri nẽ kot Simãw nhĩpêx pyrã nẽ wa hã hixi hõ mẽ nhũm wa hpãnhã mããnên kêp Poanes. Wa kot amnhĩ prêprêk jakamã nhũm ã wa hã hixi mẽnh anẽ.

¹⁸ Nẽ hõ pẽ Andreja ta.

Ně hkôt Andre htõ Firiptija ta.
 Ně hkôt Patoromewja ta.
 Ně hkôt Matêwreja ta.
 Ně hkôt Tomasja ta.
 Ně hkôt Arpêw kra Xiakreja ta.
 Ně hkôt Tatewja ta.
 Ně hkôt Simãw õja ta.

Simãwja na pre kãm mẽ ixpê Ijaewjê
 nhõ pika pê Ijaew kĩnh tỳx nẽ.
 Jakamã na pre kãm nhãm pika hõ
 nhõ pahi kot mẽ ho amnhĩptâr prãm
 kêt nẽ pa.

¹⁹ Ně hkôt Jut Kariotja ta.

Kormã kot mẽ kãm Jejus kurê xwỳnhjê
 nhĩhkram õr mã nhũm Jejus kot
 amnhĩ kukamã omunh mex tã mẽ
 hkôt amnhĩ kaxyw kuta.

Ã mẽ kot ỳ hã mẽ ahkre o pa kaxyw mẽ rênh
 xwỳnhjê nhĩxi kot anhỹr.

Jejus mẽ mẽkarõmnuti wa harênh

*Matêwre 12.22-32; Rukre 11.14-23, 12.10;
 Juãw 10.19-21*

²⁰ Hãmri nhũm Jejus hkôt mẽ pa ho mẽ
 pa xwỳnh kwỳjê rênh pa nẽ ma amnhĩ kôt
 mẽhõ nhõrkwỹ hwỳr mẽ o mõ. Na prem
 apkur kêt ry rax nẽ ra kãm prãm tỳx nẽ
 nhũm ma mẽ apkur kaxyw amnhĩ kôt mẽ
 o mõ. Hãmri nhũm axte mẽ à xwỳnhjaja mẽ
 omu nẽ Jejus wỳr pikuprõnh rax nhũm mẽ
 tokyx apkur kêt nẽ. ²¹ Hãmri nhũm Jejus
 katorxã nẽ htõjaja tee ri mẽ apkur kêt ã mẽ
 harênh ma nẽ axpên mã:

—Kwa mãn ãm ra tanhmã hkrã amnhĩ
 to nà? Hã na mẽ kot omunh kaxyw hã
 hpikuprõnh rax jakamã nhũm kormã ap-
 kur kêt nẽ. E tokyx pu mẽ ma hwỳr mra nẽ
 omu nẽ mẽ kêp utã nẽ akupỹn amnhĩ kôt o
 mõ. Anẽ.

²² Rôm nhũm Tĩrtũm kapêr tũm o mẽ
 ahkre xwỳnhjaja Jerujarê rũm Jejus wỳr
 mõn pøj. Hãmri nẽ tanhmã ho kapêr punuj
 to. Kêp mẽkarõmnuti hkwy hã hkamnhĩx
 jakamã harênh o:

—Tk pêr hinhu nhĩkõõti nhỹ hã na hte mẽ
 nẽ amnhĩ kwỳjê japõx o pa. Anẽ.

Hinhu nhĩkõõti nhĩxi hõ pê Satanasti
 nhũm prem ỳ hã Jejus kot amnhĩ nhĩpêx o
 pa hã hkamnhĩx. ²³ Hãmri nhũm amnhĩ tã
 mẽ omu nẽ amnhĩ wỳr mẽ kãm hpa ho apê

nẽ mẽ kãm amnhĩ jarẽ. Nom amnhĩ tã kuxi
 nẽ mẽ kãm mẽmoj jarẽ nẽ mẽ kãm:

—Kwa mẽ inhma mẽ ate ixpê Satanasti
 hkwy hã ixkamnhĩx xwỳnhjaja. Xà na hte
 Satanasti mẽ nẽ amnhĩ kwỳjê janor o pa?
 Nà na hte ã amnhĩ nhĩpêx anhỹr kêt nẽ.
²⁴ Na hte pika nhõ xwỳnhjaja axpên kutã
 amnhĩ xunhwỳ nẽ axpu hãmri nẽ angrã
 nẽ ma ahpỹnhã ri pa nẽ amnhĩ krã hkôt ri
 tanhmã amnhĩ to ho ri pa. Jakamã nhũm
 mẽ õ pahija mẽ hamãr o pa hkêt nẽ. ²⁵ Nẽ
 krĩ nhõ xwỳnhjaja haxwỳja. Mẽ kot axpên to
 hkwy xwỳnhjaja koja mẽmoj tã axpên kãm
 gryk nẽ axpên kutã amnhĩ xunhwỳ hãmri
 nẽ angrã nẽ ahpỹnhã pa hãmri nhũm mẽ
 õ pahi tee ri kãm mẽ hamãr o pa hprãm.
 Mo hkwyjaja kot kêt ri mẽ hamãr o pa?
 Nom tãm kot amnhĩ nẽ mẽ hanoore hã. Mẽ
 tãmjaja na prem axpên kãm gryk nẽ angrã
 nẽ ahpỹnhã pa. ²⁶ Tã ja pyrã nẽ ixte Sa-
 tanasti nhỹ hã tanhmã amnhĩ nhĩpêx to ho
 ixpa ronhỹx pa ri mẽ kurũm amnhĩ kwỳjê
 japõx o ri ixpa hkêt nẽ. Mẽkarõmnutijaja kêp
 Satanasti hkwy kênã. Koja Satanasti ixte
 mẽ kurũm mẽ hapõx kaxyw tanhmã inhmã
 nẽ hkêt nẽ. ²⁷ àhpumunh tỳx jakamã na
 hte mẽ kot hkôt amnhĩ xunhwỳr xwỳnhjê
 pumunh tỳx o pa nhũm mẽhõ tee ri kêp
 mẽ utãr kaxyw. Tã ixàhpumunh tỳx o ixte
 hakrenh jakamã ixte kêp mẽ utãrja inhmã
 tanhmã kute hkêt. Na pa hte kêp mẽ utã
 nhũm mẽ hpãnhã ixkôt amnhĩ nhĩpêx o pa
 nhũm Satanasti tee ri mẽ hã ixpumunh o
 pa kaprỹ.

²⁸ —Ãm hãmri na pa mẽ amã ixkapêr. Kot
 kaj mẽ tanhmã amnhĩ tomnuj to ho apa.
 Nẽ amnhĩ tomnuj tỳx kumrêx rãhã ho apa.
 Rỳ tanhmã akapêr punuj to ho apa. Rỳ
 tanhmã Tĩrtũm o akapêr punuj to ho apa.
 Tã tee ri ja hã amnhĩ pumu nẽ akapri nẽ
 ã ate amnhĩ nhĩpêx anhỹrja kaga nẽ Tĩrtũm
 kôt amnhĩ xunhwỳ. Hãmri nhũm amnhĩ
 tã mẽ apumu nẽ amnhĩ katut kôt mẽ ate
 amnhĩ tomnuj nẽ mẽ akapêr punuj rênh
 pa nẽ axte kãm hamaxpêr kêt nẽ. Koja
 ho hapêx par kumrêx. ²⁹ Nom koja Tĩrtũm
 Karõ xatã mẽ amã ixto amnhĩrit tã ka mẽ
 ama nẽ ãm ama nẽ te kêp amnhĩ jamak pro
 pyrãk o amnhĩ nhĩpêx. Jao Tĩrtũm Karõ hã
 apijaãm kêt ã amnhĩ to amnhĩrit. Ja mỳrapê

koja Tirtũm nhỹrmã amnhĩ xwar te mẽ apê amnhĩ jamak pro pyræk o mẽ anhĩpêx ka mẽ tee ri kãm amnhĩ kaprĩ kaprỹ. Hãmri nê mẽ kot amnhĩ xà htỹx kamã hamak o pa htũm xà wỹr ma apa nê kamã apa rãhã apa ho apa. Anê.

³⁰ Mẽ kot Satanasti nhỹ hã mẽ nê mẽkarõmnuti janor o pa hã hkamnhĩx jakamã nhũm pre Jejus ã mẽ kãm kapêr anê.

Jejus katorxà mẽ htõjê jarênh

Matêwre 12.46-50; Rukre 8.19-21; mãânên Eprêw 2.11-12

³¹ Rôm nhũm Jejus katorxà mẽ htõjaja hwỹr mra no ãm kormã hwỹr gjêx kêt nê. Mẽ kot hã htu rax jakamã nhũm mẽ tee ri hwỹr gjêx kaxyw kormã kapôt ã kuhê. Hãmri nê mẽ kot mar o kuhê xwỹnhjê hõ mã kapêr nê kãm:

—Kwa ma tẽn Jejus mã mẽ ijarê kê mẽ ixwỹr kato. Anê.

³² Rôm nhũm ixkre kamã mẽ hkrĩ xwỹnhjaja mẽ omu nê Jejus mã mẽ harê nê kãm:

—Kwa Pahihti. Ota akatorxà mẽ atõjaja awỹr mra nê pøj nê tee ri awỹr gjêx mã nê kormã kapôt ã kuhê nê atã karõ. Anê.

³³⁻³⁵ Hãmri nhũm mẽ kuma nê mẽ kãm:

—Tõe pa ixkato nê mẽ omu. Inhmã mẽ hapêê. Nom kot kaj mẽ atõ Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtõ rỹ ixkatorxà kot amnhĩ nhĩpêx pyræk o pu mẽ axpên nhĩpêx. Pa te inhmã mẽ hapê pyrã nê inhmã mẽ ajapê nê. Anê.

4

Mẽmo hy hkre xwỹnh jarênh

Matêwre 13.1-9; Rukre 8.4-8

¹ Tã nhũm Jejus axte gõ jakàx ã mẽ ahkre ho nhỹ. Hãmri nhũm mẽ axte hã htu rax jakamã nhũm tee ri mẽ omu hãmri nê pàr krem axà nê gõx kãm amỹm mẽ ahkre ho nhỹ. Nhũm mẽ piitã kỹxpê omunh nê mar mex o kuhê. ² Hãmri nhũm mẽ ahkre ho nhỹ. Nom mẽ ujarênh pix kãm mẽ ahkre. Mẽ kot Tirtũm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm hã ujarênh o nhỹ nê mẽ kãm:

³ —E mẽ inhma. Koja mẽhõ ma pur mã mõ nê pur kãm mẽmo hy ho ukapêr o pa

nom nhũm hy piitã amex kãm rôrôk kêt nê. Koja ahpỹnhã rôrôk. ⁴ Koja hkwy aptỹx kãm rôrôk nhũm kuwênhre omu nê hwỹr mra nê hkrêr pa. ⁵⁻⁶ Nê koja kên kãm hkwy rôrôk hãmri nê higrôt kutã nojarêt nê higrôt pa. Nom nhũm kamã aptỹx nê kamã kêp pika hkryre jakamã nhũm higrôt nhũm hã myt apha nê arĩgro htỹx mẽ nhũm grã pa. Harê hkryre jakamã grã pa. ⁷ Nê koja hkwy mrõnhĩ kamã rôrôk nê higrôt tã no nhũm utĩja kêp amỹtã nhũm ô hkêt nê.

⁸ —No koja hirã kamã pika mex kãm hkwy rôrôk. Hãmri nê hirã kamã rôrôk jakamã higrôt mex nê piitã ô rax nê. Kamã ô hkwy kêp 30 nê kamã hkwy kêp 60 nê kamã hkwy kêp 100. ã mẽ ujarênh kot anhỹr. ⁹ Kwa mẽ ama nê kãm ajamaxpêr tỹx rãhã ho ri apa. Anê.

Jejus kot hprĩ hã mẽmo hy jarênh

Matêwre 13.10-23; Rukre 8.9-15

¹⁰ Hãmri nhũm mẽ Jejus xujarênh mar pa nê angrã nê ma akupỹm mra nhũm hkôt mẽ pa ho pa xwỹnh pê 12 mẽ hkwyjaja pix Jejus ri arĩk. Hãmri nê ujarênhã ã hkukja nê kãm:

—Kwa mon ka hte ã mẽ kãm axujarênh anê Pahihti? Na pa mẽ ixprĩ hã amar mex kêt nê. Anê.

¹¹⁻¹² Hãmri nhũm mẽ kãm:

—Nà kot paj ixprĩ hã mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã tanhmã mẽ amã harênh to. Nà mẽ kot amnhĩ tomnu kaga nhũm Tirtũm kot ja hã mẽ omunh xà hkôt mẽ ho hkra hã harênhja na pa hte mẽ kãm harê. No mũjjaja mẽ akĩnhã mẽ kãm mar prãm kêt jakamã na pa hte mẽ kãm mẽmoj tã haxwỹ nê awjarê nhũm mẽ ãm ixujarênh pix ma.

Na htem kuma nê ãm kuma nê htỹx ri hã pa. No kêp apu mẽ kãm hprĩ hã mar prãm ronhỹx mẽ ra hprĩ hã kuma nê Tirtũm kôt amnhĩ xunhwỹ nhũm amnhĩ tã mẽ omu nê mẽ kot amnhĩ tomnuj o hapêx. Nom mẽ kãm mar prãm kêt. Anê.

¹³ Tã mẽ ate aprĩ hã ixujarênhja mar mex kêt jakamã tanhmã kot kaj mẽ amnhĩ to nê ixujarênh piitã ama? E kot paj ixprĩ hã mẽ amã mẽmo hyta jarê ka mẽ inhma.

14 —Nà mẽmo hyta te kęp Tirtũm kapěr pyræk. Nẽ ahpÿnhã rôrøk xà hã pikata te kęp ahpÿnhã mẽ kot Tirtũm kapěr mar xwÿnhjê kot mar nẽ ahpÿnhã tanhmã amnhĩ nhĩpêx to pyræk. 15 Jakamã mẽ kot mar xwÿnh kwÿjaja hte kot aptÿx kãm hkwÿ rôrøk nhũm kuwênh kot hwÿr mrar nẽ hkrêr par xwÿnhhta pyræk. Jakamã na htem Tirtũm kapěr ma nom nhũm Satanasti te kuwênh kot hy hkrêr parta pyræk o mẽ hipêx. Nẽ mẽ kot amnhĩ kaxyw hkôt hamaxpěr nẽ hkôt amnhĩ xunhwÿr pymaj tanhmã nẽ mẽ hkrã hto. Jakamã nhũm mẽ Tirtũm kapěr ma nom ho hamakêtkati tokyx anẽ nẽ axte kãm hamaxpěr kêt nẽ.

16 —Nẽ mẽ kot mar xwÿnh kwÿjaja te kot kênre kamã hkwÿ rôrøk nẽ higrôt nhũm te hã myt apha nhũm grà par tokyx anhÿr xwÿnhhta pyræk. Na htem Tirtũm kapěr ma nẽ hkĩnh nẽ. Nẽ kãm mar prãm nẽ. Te hy higrôt tokyx anhÿrta pyræk. 17 Tã nhũm mēhõ tẽ nẽ Tirtũm nẽ tanhmã mẽ kãm kapěr to nhũm mẽ kuma nẽ hkaga. Rÿ nhũm mẽ Tirtũm ã tanhmã mẽ homnuj to nhũm mẽ tee ri amnhĩ tã mẽ omu nẽ hkaga. Te mẽmo hy higrôt nẽ grà par tokyx anhÿrta pyræk.

18 —Nẽ mẽ kot mar xwÿnh kwÿjaja te kot mrônhi kamã hkwÿ rôrøk nẽ higrôt nhũm mrônhi kot kęp àmnàr xwÿnhhta pyræk. Nẽ mẽ kãm Tirtũm kapěr mar prãm nẽ. 19 Nom mãânên kãm hikukrêx rax nẽ hikàxpore rax prãm jakamã ãm ja pix kukamã hamaxpěr o ri pa. Jao ra gryk ã axte Tirtũm kapěr mã hamaxpěr nẽ hkôt amnhĩ nhĩpêx kêt nẽ. Te mrônhi kot higrôt pẽ àmnàr nhũm ô hkêeta pyræk.

20 —No mẽ kot mar xwÿnh kwÿjaja te hirã kamã pika mex kãm hy hkwÿ rôrøk nẽ higrôt nẽ ô raxta pyræk. Na htem ixkapěr ma nẽ amnhĩ krã him hagjênh tÿx nẽ. Nẽ ixkôt ri amnhĩ nhĩpêx mex rãhã ho ri pa. Te mẽmo hy hkre kamã ô hkwÿja kęp 30 nẽ kamã kęp 60 nẽ kamã kęp 100ta pyrã nẽ Tirtũm kapěr kôt amnhĩ nhĩpêx mex rãhã ho pa. E ã ixujarênhja kot anhÿr. Anẽ.

Kanê hpimxur ã harênh

Rukre 8.16-18, 8.24-25; Matêwre 13.10-15, 25.14-30

21 Nhũm Jejus arĩ hkôt mẽ pa ho pa xwÿnhjê jahkre nẽ mẽ kãm:

—Xà na htem kanê hpøk nẽ poti ho hpro rÿ hitom kãm par krak ri unhwÿ? Nà na htem hpøk hãmri nẽ kÿx pẽ mẽmoj nhĩmøk ã unhwÿ. 22 Ja pyrã nẽ mẽ piitã kot hkwÿjê pẽ tanhmã hamaxpěr punuj to ho hpimxur prãm tã tee ri kot ho hpimxur prãm kaprÿ. Koja nhÿrmã mẽ hamaxpěr piitã amnhĩ to amnhĩrit pa. Nẽ mẽmoj piitã ra hpimxur mex tã koja nhÿrmã amnhĩ to amnhĩrit pa. Te mẽ kot kanê hpøk nẽ kÿx pẽ unhwÿr nhũm amnhĩrit mex pyræk. Ja pyrã nẽ na pa hte Tirtũm kapěr o ri ixpimxur o ixpa hkêt nẽ. Na pa hte ixprĩ hã mẽ amã harênh mex o ixpa. 23 Kwa mẽ ixujarênhja ma nẽ kãm ajamaxpěr tÿx rãhã ho ri apa. Anẽ.

Nhũm pre ã Jejus mẽ kãm kapěr anẽ. 24 Hãmri nẽ mẽ kãm:

—Nẽ kër ka mẽ axpên kãm axukaprĩ ho ri tanhmã axpên to mex to ho ri apa. Kër kê Tirtũm ja hã mẽ apumu nẽ mẽ apyrã nẽ mẽ akamã ukaprĩ pẽ mẽ ato mex o pa. 25 Koja mēhõ inhmã tanhmã amnhĩ nhĩpêx mex to pa ja hã omu nẽ kot inhmã àpênh mexta pãnhã ho mex nẽ. No koja inhmã àpênh mex kêt pa ja hã omu nẽ hã ho mex kêt nẽ.

—Nẽ koja mēhõ kãm ixkapěr mar prãm nom kormã hprĩ hã mar mex kêt tã arĩ mar o pa nẽ gaa nẽ mar tÿx o mõ. No koja kuma nẽ ãm kuma hãmri nẽ gaa nẽ hã no hkêt. Anẽ.

*Pur kãm mẽmo hy hkre xwÿnh jarênh
Matêwre 13.24-30*

26 Nhũm Jejus arĩ hkôt mẽ pa ho mẽ pa xwÿnhjê jahkre ho nhÿ nẽ mẽ kãm:

—E pa mẽ amã tanhmã mẽ kot ixkapěr mar tÿx xwÿnhjê jarênh to ka mẽ inhma. Koja mēhõ ixkapěr mar tÿx nẽ ra hkôt ri amnhĩ nhĩpêx o pa. Hãmri nẽ hamaxpěr nyw o hamaxpěr o pa nẽ amnhĩ nhĩpêx nyw o amnhĩ nhĩpêx o pa. Te mẽ hpur kãm mēhõ kot mẽmo hy hkre xwÿnh kot amnhĩ nhĩpêx pyræk. Na hte hyja kre ho pa. 27 Hãmri nẽ hkre hpa nẽ kamàt mẽ ôt o hikwÿ nẽ arĩgro mẽ mẽmoj tã àpênh o pa. Rãhã nhũm mẽmo hyja arĩ hikwÿ ho hikwÿ hkêt nẽ. Koja amnhĩ nhĩpêx ô ho amnhĩ nhĩpêx nẽ higrôt kato nẽ hprêk. Kre xwÿnh kot tanhmã kot amnhĩ nhĩpêx to hã omunh kêt tã nhũm kãm hprêk.

28 –Na hte hpõm hapõx o pa nẽ higrõt o pyka kahte. Hãmri nẽ hprêk nẽ hô axpõt nẽ gaa nẽ hpãnhã ô. Hãmri nẽ hkamrêk pa nẽ xa. 29 Hãmri nẽ mẽ kot hikênh mã mex nẽ nhũm kot hkre xwýnhhta omu nẽ amnhĩm hamýnh pa. Tã mẽ kot ixkapêr mar mex xwýnhjaja te mẽmo hy ra higrõt kator nẽ hprêk nẽ hô pipõt nẽ ô xwýnhhta pyræk. Nẽ uræk nẽ amnhĩ nhĩpêx õ ho amnhĩ nhĩpêx o pa. Anẽ.

Jejus te kot mẽmo hy pyræk ã kot amnhĩ jarênh

Matêwre 13.31-32; Rukre 13.18-19

30-32 Nhũm Jejus arĩ mẽ ahkre ho nhỹ nẽ mẽ kãm:

–Tĩrtũm kot mẽ awýr ixte mẽ ato amnhĩptàr kaxyw inhmênh ã ijarênhja. Te ixte mẽmo hy pixire pyræk. Koja mẽhõ mẽmo hy hõ pixire nẽ hkre nhũm ra higrõt. Nẽ gaa nẽ hprêk. Hãmri nẽ hpa anhgrà nhũm kuwênhre hwýr mra nẽ hõptĩ kamã amnhĩm haê nhĩpêx. Mẽmo hyta grire htã nhũm hkre nhũm higrõt nẽ ã amnhĩ nhĩpêx anẽ. Tã kot paj nhỹrmã urà nẽ ixpyxi htã kot paj pika piitã hkõt mẽ ho amnhĩptã nẽ mẽ omunh mex rãhã ho ri ixpa. Anẽ.

Ã na pre Jejusja hkõt mẽ pa ho mẽ pa xwýnhjê mã amnhĩ tã kuxi nẽ ujarênh anẽ. 33 Mẽ kãm ujarênh kãm mẽ ahkre ho pa. Te nhãm mẽmoj jarênh pyrã nẽ amnhĩ tã haxwý nẽ harẽ. Mẽ kot tanhmã mar to hã mẽ omunh xà hkõt tanhmã mẽ kãm ujarênh to. 34 Na pre ãm ujarênh pix kãm mẽ kãm kapêr mar prãm kêt xwýnhjê mã amnhĩ jarênh rãhã ho pa. No mẽ kot hkõt pa ho pa xwýnhjê mã nhũm hprĩ hã ujarênh jarẽ nhũm mẽhprĩ hã mar mex nẽ.

Jejus kot kòk o pinhkrênh ã harênh

Matêwre 8.23-27; Rukre 8.22-25

35 Tã nhũm amýkry nhũm Jejus arĩ pàr kre kamã nhỹ. Hãmri nẽ hkõt mẽ pa ho mẽ pa xwýnhjê mã kãm: “E pu mẽ ma xarmã mõ.” 36 Anẽ hãmri nẽ mẽ kot mar o hkrĩ xwýnhjê re nẽ pàr mã agjê nẽ ma xarmã mõ. Garirej rũm kato nẽ ma xarmã pika hõ hwýr mõ. Nhũm pàr kwýja ma mẽ hkõt mõ. 37-38 Nhũm Jejus ra õtxwa nẽ tẽ nẽ pàr kre kamã hkrã japar xà hã hkrã xi nẽ ra õt týx nẽ nõ. Nhũm kòk àpêr týx nẽ nhũm gò kànhmã harĩ nẽ axpên tak. Ra ri xatã axpên

tak nẽ pàr kre kamã axkapĩ nhũm ra mẽ kêp àr o mõ. Hãmri nhũm mẽ tee ri amnhĩ nhĩpêx nẽ tee ri amnhĩ kukamã hamaxpêr nẽ Jejus wýr hprõt nẽ kumra nẽ kãm:

–Kwa kànhmã nhỹ Pahihtĩ. Kot puj mẽ jarãhã pahtyk pa. Anẽ.

39 Hãmri nhũm hkrākato nẽ kànhmã nhỹ nẽ kòk mẽ gòta pumu nẽ wa kãm kapêr o:

–E kwa wa anhĩkrê. Anẽ.

Hãmri nhũm gò mẽ kòk hpinhkrênh kurê kumrêx.

40 Hãmri nhũm Jejus hkõt mẽ pa ho mẽ pa xwýnhjê mã kãm:

–Hêxta waa nẽ. Kormã mẽ ate amnhĩ kaxyw Tĩrtũm mẽ wa inhmã ajamaxpêr týx kêt. Hã na ka mẽ ri amã ma nẽ tee ri amnhĩ kukamã ajamaxpêr. Anẽ.

41 Hãmri nhũm mẽ amnhĩ jaêr pẽ ã kot amnhĩ nhĩpêx anhýr ã omu nẽ tee ri axpên pumunh pẽ omunh o kuhê. Hãmri nẽ axpên mã:

–Kokýỹ. Jejus kêp mẽ panhĩõ hkêt. Mẽ pahtõ kot pu te kot amnhĩ nhĩpêx pyrã nẽ kòk mã pakapêr nhũm anhĩkrê? Nã mẽ pakurom àhpumunh týx o àhpumunh týx. Anẽ.

5

Jejus kot mẽhõ nẽ mẽkarõmnuti janor ã jarênh

Matêwre 8.28-33; Rukre 8.26-34

1 Tã nhũm Jejus mẽ hkõt mẽ pa ho mẽ pa xwýnhjê mẽrohã mõ nẽ xarmã Geras wýr pøj. 2-4 Hãmri nẽ pàr rũm hapøj nhũm mẽhõ myja Jejus pumu nẽ hwýr tẽ. Mẽkarõmnuti kot hwýr àr nhũm ý hã oprê htýx kumrêx. Hãmri nẽ hkwýjê hkàx ã kapõt ã mẽ hã pika kamã ri hkênh nẽ pa ho pa. Nhũm mẽ xatã kàx o hte hpre nẽ hpa hpre htã no nhũm kurê. 5 Nẽ kamát kãm nẽ arĩgro hã àmra htýx o mrrar pẽ kên o amnhĩ tak o mra. Mẽ hã pyka kamã nẽ kapõt ã hixêt ã amnhĩ tak týx rãhã ho mra. 6 Tã amým Jejus pumu nẽ hwýr hprõt nẽ hã hpijaam kaxyw kutã hkõn krã ho tẽm nẽ hparpê nhỹ. 7-8 Hãmri nhũm omu nẽ nẽ mẽkarõmnuti mã kapêr nẽ kãm:

–Kwa kurũm akato nẽ ma tẽ. Anẽ.

Hãmri nhũm kuma nẽ tanhmã myta o nhũm tãm mẽkarõmnuti nhỹ hã Jejus mã kapêr nẽ àmra kamã kãm:

—Pa Tirtũm Kra Jejus? Mo kaxyw na ka ixwyr tẽ? Kwa tanhmã ixto hkõt nẽ nà?

⁹⁻¹⁰ Anẽ nhũm kãm:

—Tanhmã na anhĩxi te? Anẽ.

Nhũm kãm:

—Nà ixpẽ Mẽohtõhti. Mẽkarõmnuti ohtõ nẽ kot ixwyr gjẽx jakamã na htem ã inhĩxi jarẽnh anẽ. Kwa nẽ mẽ ijanor kêt nẽ nà? Anẽ.

¹¹⁻¹² Hãmri nhũm mẽkarõmnuti tãm amnhĩ to kuwyr nẽ kãm:

—Kwa kêr ka jahti nẽ mẽ ijabõx japêr nẽ mẽ kot amnhĩ xà htỹx kamã hamak o mẽ pa htũm xàta wyr mẽ ixrẽnh kêt nẽ. Hagrõ hkwy mũj wyr mãn mẽ ixrẽ pa mẽ hpãnhã hwyr mãn hagjẽ? Anẽ.

¹³ Hãmri nhũm mẽ kãm:

—Tõe. Mẽ tãm hwyr mra. Anẽ.

Hãmri nhũm mẽmyta pẽ hapõx pa nẽ ma hagrõ hwyr mrrar kurẽ kumrẽx nẽ mẽ kãm gjẽx pa nhũm myja akupỹm tãm hkrã. No nhũm hagrõja mẽkarõmnuti pymaj amỹra nẽ axkahkũm nẽ hprõt nẽ himõ hã krã hixêt ã axpum rõrõk nẽ gõx kãm mrõ nẽ hpikaprãr pa. Ohtõ rax kumrẽx. Kêp 2.000 tã hpikaprãr pa. ¹⁴ Hãmri nhũm hagrõ jamãr o ri mẽ pa xwỹnhjaja tee ri ja hã omu nẽ ma mẽ õ patrãw wyr akupỹm mẽ piitã mẽ kãm harẽnh o hprõt nẽ mra. Hãmri nẽ mẽ kãm ujarẽnh pa. ¹⁵⁻¹⁶ Nhũm mẽ tee ri mẽ kuma nẽ ma Jejus wyr mra nẽ hkaxpa nẽ kuri myta pumu. Nhũm ra akupỹm tãm hkrã nẽ ê kamã tãm amnhĩ nhĩpẽx nẽ nhỹ. Nhũm mẽ kot hã omunh xwỹnhjaja mẽ kãm ujarẽnh pa nhũm mẽ kuma nẽ myta pumu hãmri nẽ tee ri amnhĩ kukamã hamaxpêr o kãm Jejus puma nẽ. ¹⁷ Hãmri nẽ amnhĩ nẽ kãm kapêr nẽ kãm:

—Kwa mẽmo kaxyw na ka mẽ ixwyr rẽ? Mẽ ma akupỹm amrar tokyx anẽ. Anẽ.

¹⁸ Hãmri nhũm mẽ kuma nẽ akupỹm pãr wyr agjẽ nhũm akupỹm mex xwỹnhhta tee ri ja hã mẽ omu nẽ mẽ hkõt hkrã. ¹⁹ No nhũm Jejus kãm:

—Nà kot kaj mẽ ixkõt amõr kêt nẽ. Ma akupỹm anhõ krĩ hwyr mãn tẽ nẽ mẽ kãm Tirtũm kot akupỹm ato mex ã amnhĩ jarẽnh o ri mẽ hkõt apa. Anẽ.

²⁰ Hãmri nhũm kuma nẽ ma akupỹm tẽ. Hãmri nẽ õ pyka pẽ Tekap kãm mẽ kãm Jejus kot tanhmã ho mex to hã harẽnh ri mẽ

hkõt pa nhũm mẽ amnhĩ jaêr pẽ kuma nẽ tee ri hkukamã hamaxpêr.

Jejus kot akupỹm mẽhõ ho mex nẽ akupỹm mẽhõ ho htĩr ã harẽnh

Matêwre 9.18-26; Rukre 8.40-56

²¹ Tã nhũm Jejus mẽ hkõt mẽ pa ho pa xwỹnhjẽ mẽrohã akupỹm xarmã mõ nẽ rẽ. Hãmri nẽ pãr nhõ nẽ api nẽ gõ myri kuhẽ nhũm pika nhõ xwỹnhjaja Jejus pumu nẽ hã pikuprõnh rax nẽ. ²²⁻²³ Hãmri nhũm mẽhõ my pẽ Jajtija hwyr tẽ nẽ kutã hkõnkrã ho htẽm nẽ nhỹ. Kêp Tirtũm kapêr o mẽ ahkre xà hã ixkre jamãr xwỹnh maati na pre. Nhũm hkra nija kêp à htỹx nẽ htyk kaxyw nẽ nõ. Kormã nyw. Kormã hã amgrã pẽ 12 pix tã ra kêp htyk kaxyw. Hãmri nhũm Jajtija tee ri hkukamã hamaxpêr nẽ ma Jejus wyr tẽ nẽ hpar pẽ hkõn krã ho tẽm nẽ ho hwyr kãm hihtỹx nẽ kãm:

—Pa akupỹm mẽ ixto mex xwỹnh maati. E awyr na pa tẽ. Na ra ixkra ixpẽ htyk kaxyw. Pa tee ri omu nẽ kaxyw amã ijamaxpêr nẽ awyr tẽ. Jakamã kwa ma ixkõt inhõrkwỹ hwyr tẽ nẽ inhmã omu nẽ hã anhĩhkra xi nẽ akupỹm inhmã ho mex. Anẽ.

²⁴ Hãmri nhũm kuma nẽ ma hkõt tẽ. Nhũm mẽ ohtõ nẽ axpẽn nhĩgãnh nẽ axpẽn kujahêk o wa hkõt mra. ²⁵ Nhũm mẽhõ nija haxwỹja wa hkõt tẽ. Na pre hte hkamrõ hkryre rãhã ho pa hã ra hã amgrã kêp 12. ²⁶ Nẽ tõtõ mã amnhĩrer rax nẽ nhũm mẽ tee ri kot ho mex kaxyw nom xatã hkane kaprỹ. Hãmri nhũm ra hikãxpore kêp hapêx nhũm arĩ ãm rãhã nẽ pa. ²⁷⁻²⁸ Hãmri nẽ tee ri amnhĩ kukamã hamaxpêr nẽ Jejus jarẽnh ma nẽ hamaxpêr o:

—Ma kot paj ma hwyr tẽ nẽ kêp ê pix kupênh tã akupỹm inhmex japêr. Ma kot paj ho anẽ.

Anhỹr o hamaxpêr hãmri nẽ ma mẽ hkõt hwyr htẽm kurẽ kumrẽx. Nhũm mẽ ohtõ raxja kaêx ã mẽ hkõt hwyr tẽ. Hãmri nẽ katut kõt kêp ê nhĩrẽ kupê. ²⁹ ãm ê pix kupênh tã akupỹm mex ã amnhĩ pumunh kurẽ kumrẽx. ³⁰ Hãmri nhũm Jejus kot kêp ê kupênh ã amnhĩ tã omu nẽ hẽx rom xa nẽ mẽ ho hakẽx nẽ amnhĩ tã mẽ kãm kapêr nẽ mẽ kãm:

—Kwa mẽ atõ na ka ri amnhĩ kaxyw inhmã ajamxpër tỳx pè ixpê ixê kupê? Anẽ.

Hãmri nhũm mẽ piitã kuma nẽ tee ri axpèn pumu nẽ kãm amnhĩ tã aprã.
³¹ Hãmri nhũm hkõt mẽ pa ho pa xwỳnhjaja kãm:

—Mẽ kot apê amnàr griã kot ka kêt ri mēhõ kot apê hkupênh xwỳnh ã ri mẽ hkukja. Kwa măn ãm mẽhõ amarĩ apê hkupê. Anẽ.

³² Hãmri nhũm mẽ kãm:

—Nà na amarĩ ixpê hkupênh kêt nẽ. Na amnhĩ kaxyw inhmã hamaxpër tỳx pè ixpê hkupê. Tã na ixàhpumunh tỳx xà ho akupỹm mex. Nom ra ixte mẽhõ kot ixpê hkupênh xwỳnhhta pumunh jakamã na pa ixêx rom ã amnhĩ tã ri mẽ hkukjêr anẽ. E kwa mẽ atõ inhmã amnhĩ jarẽ. Anẽ.

³³ Hãmri nhũm nija kuma nẽ tee ri kêp kot amnhĩ to hpimxur prãm. Hãmri nẽ hpijaàm nẽ hwỳr htertet o tẽ nẽ kutã hkõn krã ho tẽm nẽ nhỹ nẽ kãm amnhĩ jarẽ nẽ kãm:

—Ma pa na pa inhmã inhmex prãm xàj apê axê kupê. Tã na pa akupỹm inhmex. Anẽ.

³⁴ Hãmri nhũm kuma nẽ kãm:

—Tỳ. Nà ate amnhĩ kaxyw inhmã ajamxpër tỳx kõt ã ate amnhĩ nhĩpêx anhỹr jakamã na ka akupỹm amex. Kot kaj axte akamrõ rãhã ho ri apa hkêt nẽ. E mãmri ajamakêtkati nẽ ma akupỹm anhõrkwỹ hwỳr tẽ. Anẽ.

Hãmri nhũm kuma nẽ hkĩnh nẽ ma akupỹm tẽ.

³⁵ Rõm nhũm Jajti mã mẽ àpênh xwỳnhjaja õrkwỹ rũm ma õ patrãw kutã mra nẽ wa hkaxpa nẽ Jajti mã kãm:

—Kwa na ra akra apê ty. Mo kaxyw kot ka kêt amnhĩ kõt Jejus o mõi? Kwãr mãmri ma akupỹm awjanã nẽ tẽ. Anẽ.

³⁶ Hãmri nhũm Jejus mẽ kuma nẽ Jajti mã kãm:

—Kwa tee ri akra hkukamã ajamxpër kêt nẽ. ãm kaxyw inhmã măn ajamxpër tỳx rãhã nẽ. Anẽ.

³⁷⁻⁴⁰ Hãmri nhũm mẽ axte mõi nẽ mẽ õrkwỹ hwỳr pøj nẽ mẽ omu. Nhũm mẽ ra hã hturax nẽ mỳr o hkrĩ. Hãmri nhũm Jejus mẽ hwỳr axà nẽ mẽ omu nẽ kot mẽ hkra htyk kumrêx ã omunh tã mẽ kãm:

—Kwa mẽ hãmri amỳr kêt nẽ. Na nireta htyk kêt nẽ. Na ãm gõr nẽ nõ. Anẽ.

Hãmri nhũm mẽ kot ra htyk ã omunh mex jakamã kuma nẽ ãm kuma nẽ axtem nẽ ri axpèn mã hã hpër o axkê. Hãmri nhũm Jejus mẽ hanor pa nẽ hitom kãm htyk xwỳnh wỳr àr kaxyw nẽ amnhĩ kõt Juãw nẽ Xiakre nẽ Simãw Pêtre nẽ kaxyw htyk xwỳnh katorxà nẽ hipêêxà pix amnhĩ kõt mẽ ho axà. ⁴¹ Hãmri nẽ htyk xwỳnhhta wỳr tẽ nẽ hpa hã kupy nẽ kãm kapër nẽ kãm:

—Pa? E kwa kãnhmã nhỹ. Anẽ.

Nom amnhĩ kapër kãm harẽ nẽ kãm:

—Tarit kũm. Anẽ.

⁴² Hãmri nhũm kãnhmã ỹr kurê kumrêx nẽ kãnhmã xa nẽ ri mra. Na pre ra hprêk nẽ ty. Na ra hã amgrà kêp 12 tã ty nhũm Jejus akupỹm ho htĩr nẽ kãnhmã ỹr nhũm kãnhmã xa nẽ ri mra. ⁴³ Hãmri nhũm kuri omunh xwỳnhjaja amnhĩ jaêr pè omu nẽ kamã no puma nẽ hkĩnh tỳx kumrêx. Hãmri nhũm Jejus katorxà mẽ hipêêxàja wa kãm:

—E măn ra kãm prãm nẽ. Wa tokyx kãm mẽmoj japêr kê kukrê. Nom kêr ka wa inhmex kumrêx. Kêr ka wa akupỹm ixte ho htĩr ã ri mẽ kãm ijarênh o ri apa hkêt nẽ. ãm kwarĩ ho kwarĩ. Anẽ.

6

Najare nhõ xwỳnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

¹ Tã nhũm Jejus ma õ krĩ pè Najare hwỳr ma akupỹm mõi nhũm hkõt mẽ pa ho mẽ pa xwỳnhjaja ma hkõt mõi. ² Hãmri nẽ hwỳr pøj. Nhũm mẽ õ arĩgromnu pè sap kator jakamã nhũm Jejus ma Tĩrtũm kapër o mẽ ahkre xà hã ixkre hwỳr tẽ. Hãmri nẽ kamã mẽ ahkre ho nhỹ nhũm mẽ amnhĩ jaêr pè kapër mex ã kuma nẽ tee ri axpèn pumunh pè hamaxpër o hkrĩ. Jejus kêp mẽ hkwy hã hkamnhĩx nom nhũm mẽ kurom àhpumunh tỳx nẽ kapër mex jakamã nhũm mẽ kuma nẽ tee ri hamaxpër o hkrĩ. Hãmri nẽ axpèn mã:

³ —Kwa kêp mẽ panhĩõ htã tanhmã kot we amnhĩ to nẽ ã àhpumunh tỳx kõt mẽ pamã kapër anẽ nẽ ri mẽ kãm aa mẽ kot mẽmoj pumunh kêt kwỹ ho anhỹr o pa? Mẽ panoo mã na pre hprêk. Kêp pĩ kuprãr

xwÿnh Juje mẽ hprõ Marir wa hkra na. Nẽ htõ Xiakre nẽ Juje nẽ Simãw nẽ Jutja ra mẽ pahte mẽ kệp htõ hã omunh mex. Nẽ htõxjaja jar mẽ pakamã pa nhũm mẽ pahte mẽ omunh mex kênã kot kêt we mẽ kurom ã àhpumunh tÿx anẽ. Anẽ.

Anhÿr o axpẽn mã harẽ. Hãmri nẽ kamã gryk nẽ hkaga ⁴⁻⁶ nhũm tee ri amnhĩ tã mẽ omu nẽ hamaxpěr o:

—Hêxta waa nẽ. Mẽ kãm amnhĩ kaxyw ixkõt hamaxpěr prãm kêt kumrêx. Anẽ.

Hãmri nẽ mẽ kãm:

—Nà Tĩrtũm nhÿ hã kapěr jarẽn h o mẽ pa xwÿnhjaja na htem krĩ hkwÿ kamã kãm mẽ mar prãm nẽ. Nom õ krĩ kamã mẽ kot karàre rũm hprêk o mõi kãm omunh xwÿnhjaja na htem kuma nẽ ãm kuma. Anẽ.

Hãmri nhũm mẽ kot amnhĩ kaxyw hkõt hamaxpěr kêt jakamã nhũm tee ri mẽ kãm aa mẽ kot mẽmoj pumunh kêt kwÿ ho anhÿr rax prãm kaprÿ. Nẽ ãm mẽ à xwÿnhjê ho grêre nẽ mẽ hã ìhkra jaxwÿ nẽ akupÿm mẽ ho mex. Hãmri nẽ mẽ kurũm kato nẽ ma krĩ hkwÿ hkõt ri Tĩrtũm kapěr o mẽ ahkre ho pa.

Jejus kot mẽmoj tã mẽ kệp 12jê mã karõ hã harẽn

Matêwre 10.5-15; Rukre 9.1-6, 10.1-12; mãânên Atre 13.50-51, 18.6

⁷ Tã nhũm Jejus amnhĩ wÿr mẽ kot ÿ hã mẽ ahkre ho pa xwÿnh pẽ 12jê hwÿ. Ra kot amnhĩ kaxyw mẽ rên h xwÿnhhtaja nhũm amnhĩ wÿr mẽ kuwÿ. Hãmri nẽ axpẽn kaxyw mẽ ho axkrut nẽ mẽ kurê nẽ mẽ kãm mẽ àpên h ã karõ nẽ ma mẽ hkwÿjê hwÿr mẽ kurê. Nẽ mẽ kãm:

—E kêt ka mẽ ma mẽ pahkwÿjê hwÿr mra nẽ inhÿ hã Tĩrtũm kapěr jarẽn h o ri mẽ hkõt apa. Nẽ mẽ kurũm mẽkarõmnuti japõx o ri mẽ hkõt apa. ⁸⁻⁹ Nom kêt ka mẽ amnhĩ kõt akukrêx rax nẽ ri apa hkêt nẽ. Nẽ kawà htu nẽ ho ri apa hkêt nẽ. Nẽ amnhĩ kõt axàpkur xà ho ri apa hkêt nẽ. Rÿ akàxpore rax nẽ ri ho apa hkêt nẽ. ãm mẽ anhõ Kamis nẽ mẽ apar kà ho pixire nẽ agjê nẽ ri hã apa. Nẽ mẽ amnhĩ kaxpar xà hã mẽ anhõ kô pix o apa. Mẽ ã anhÿ kamã mẽ hkõt ri apa anẽ.

¹⁰ —Nẽ kêt ka mẽ nhÿri krĩ hõ hwÿr pøj. Nẽ apõx xà kamã mẽhõ nhõrkwÿ kamã hkõt ri apikamên h tãmtã kurũm akupÿm ajapøj nẽ ma hpãnhã nhãm krĩ hõ hwÿr apa. Nom

atÿx ri nhãm mẽ hwÿr amrar nẽ nhãm mẽ hwÿr amrar kêt nẽ.

¹¹ —Nẽ koja mẽ nhÿri mẽ akapěr kaga ka mẽ tee ri amnhĩ tã mẽ kamã ama hãmri nẽ tokyx mẽ kurũm ajapøj nẽ ma apa. Nẽ anojarêt nẽ mẽ noo mã akuhê nẽ amnhĩ par ã awjagrõ kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrã nẽ mẽ hkaga hã omunh kaxyw ka mẽ ã mẽ noo mã amnhĩ nhĩpêx anẽ. Hãmri nẽ hpãnhã ma nhÿhÿm apa.

¹² Anhÿr o mẽ kãm mẽ àpên h ã karõ. Nhũm mẽ kuma nẽ hapøj nẽ ma mẽ hkwÿjê hkõt pa. Ma krĩ piitã hkõt Tĩrtũm kapěr o mẽ ahkre ho ri mẽ hkõt pa nẽ mẽ kãm:

—E kwa mẽ tokyx amã ate amnhĩ tomnuj kaga hprãm xàj Tĩrtũm kõt mãn amnhĩ xunhwÿ. Anẽ.

¹³ Hãmri nẽ mẽ nê mẽkarõmnuti jano. Nẽ akupÿm mẽ à xwÿnhjê ho mex kaxyw mẽmo htwÿm o mẽ hkrã gregrer nẽ Jejus nhÿ hã akupÿm mẽ ho mex.

Mẽ kot Juãw Paxis pĩ ã mẽ harẽn

Matêwre 14.1-12; Rukre 9.7-9

¹⁴ Tã nhũm mẽ piitã Jejus jarẽn h ma nẽ axpẽn mã tanhmã harẽn h to ho pa. Nom ahpÿnhã tanhmã harẽn h to. Na prem kamã harẽn h o:

—Nà Juãw Paxis pimràata na. Pěr akupÿm htĩr jakamã na hte ã mẽ kot aa mẽmoj pumunh kêt kwÿ ho anhÿr o pa. Anẽ.

¹⁵ Nẽ kamã axtem harẽn h o:

—Nà tãm kêt. Pěr finat Eris na. Anẽ.

Nẽ kamã axtem harẽn h o:

—Nà tãm kêt. Pěr Tĩrtũm nhÿ hã kapěr jarẽn h xwÿnhjê hõ na. Te kot amnepê mã mẽ kot Tĩrtũm nhÿ hã tanhmã amnhĩ nhĩpêx to xwÿnhjê kot amnhĩ nhĩpêx pyrãk o kot amnhĩ nhĩpêx kênã.

Anhÿr o ahpÿnhã harẽ. ¹⁶ Hãmri nhũm Ijaew o amnhĩptar xwÿnh pẽ Eroxo ãxipasja mẽ kot ã harẽn h anhÿr ã mẽ kuma nẽ Juãw Paxis mã hamaxpěr kurê kumrêx. Hãmri nẽ mẽ kãm:

—Nà pěr Juãw Paxista na. Ixte mẽ kãm hã ixãmnen h nhũm mẽ kot inhmã mut krãhyr xwÿnhhta mãn ra tanhmã amnhĩ to nẽ akupÿm htĩr. Anẽ.

¹⁷⁻²⁰ Na pre ra pahi Eroxo ãxipasja htõ Pirip pẽ hprõ Eroxis pytà nẽ ho hprõ nhũm hkra

niti mẽ wa hwÿr ahpa. Hãmri nhũm Juãw Paxisja tee ri ja hã pahihtu Erox ãxipasja pumu nẽ hã kãm akir nẽ kãm:

—Tk. Kwa Tĩrtũm kęp ja omnuj. Ra kot ja nẽ mẽ pahkurẽ htã ka axtem nẽ ã amnhĩ nhĩpêx anẽ.

Anhÿr jakamã nhũm hprõ Eroxisja amnhĩ tã kuma nẽ kamã gryk tÿx nẽ. Nẽ kãm hpĩr prãm nẽ. No nhũm pahi Erox ãxipas kãm hpĩr prãm kêt nẽ. Juãw Paxis kot Tĩrtũm kôt amnhĩ nhĩpêx nhũm kot hã omunh mex jakamã kãm hpĩr prãm kêt nẽ. Juãw na pre hte xatã kãm Tĩrtũm kapër jarẽnh o pa. Nhũm pahihtu Erox ãxipasja kormã hprĩ hã mar mex kêt tã hã hpijaàm nẽ kãm mar prãm nẽ. Nom nhũm hprõ kãm hpĩr prãm jakamã nhũm kęp mẽ kãm hã amÿnẽ nhũm mẽ ma o tẽ nẽ haxà nhũm mex nẽ mẽ hagjênh xà kamã hkrĩ ho krĩ.

²¹⁻²⁴ Tã nhũm jãã nhũm pahi Erox ãxipas kator ã arĩgro kato nhũm mẽ piitã hwÿr mra nẽ hã akuprõ nẽ hã hkĩnh nẽ hã apkur o hkrĩ. Õ kôwenatôjaja nẽ hkrãmnhwÿjaja nẽ krĩ hkwÿ kamã mẽõ pahijaja nhũm mẽ ohtõ nẽ hã akuprõ nẽ hã hkĩnh. Hãmri nhũm hprõ Eroxis kra nitija mẽ hwÿr axà nẽ mẽ kãm gre. Mẽ kot omunh nẽ kamã hkurẽ pix kaxyw mẽ noo mã hpijaàm kêt nẽ ã mẽ kãm grer anẽ. Hãmri nhũm pahi Erox omu nhũm ja kãm mex nẽ nhũm mẽ piitã hkĩnh nẽ kamã nopyma nẽ. Nẽ grer kãm hpijaàm kêt nẽ tanhmã mẽ kãm grer to nhũm mẽ omu nẽ kamã no pyma nẽ. Hãmri nhũm pahi Erox ãxipasja kãm:

—Nà ãm hãmri. Na ka mẽ inhmã agrer mex nẽ. Jakamã kwa mãmrĩ mẽmoj tã ixwÿ. Amã mẽmoj prãm xà hkôt inhmã mẽmoj jarẽ pa amã kugõ. ãm hãmri na pa amã amnhĩ jarẽ. Na pa Tĩrtũm noo mã ã amã amnhĩ jarẽnh anẽ. Ka mamrĩ ixkukrêx mex kwÿ hã ixwÿ pu axpẽn mã ho axkjê. E mẽmo na amã hprãm? Anẽ.

Hãmri nhũm kuma nẽ ma katorxà hwÿr tẽ nẽ kãm harẽ nẽ kãm:

—Xê mẽmoj tã kot paj we kuwÿ? Anẽ.

Hãmri nhũm kuma nẽ hamaxpër o:

—Ma ãm hãmri koja mẽ tã jarãhã inhmã Juãw Paxis pĩ. Anẽ.

Hãmri nẽ hkrata mã kãm:

—Ma Juãw Paxis krã hã kot kaj awÿ kẽ mẽ amã kugõ ka man ixwÿr o tẽ. Anẽ.

²⁵ Hãmri nhũm kuma nẽ akupÿm pahi hwÿr axà nẽ kãm:

—Ma Juãw Paxis krã kot kaj inhmã agõ. Pasiiti kamã axà nẽ inhmã agõ pa ma amnhĩm o ixtẽm kurẽ kumrêx. ãm ja pix na inhmã hprãm. Anẽ.

²⁶ Hãmri nhũm tee ri kuma nẽ hkaprĩ nẽ. Nẽ hamaxpër o:

—Hêxta waa nẽ. Inhmã hpĩr prãm kêt. Nom ra ixte ixkutã mẽ hkrĩ xwÿnhjê noo mã inhmã kãm mẽmoj prãm xwÿnh nhõr ã amnhĩ jarẽnh nhũm ixte kãm õr ã amnhĩ jarẽnh nhũm mẽ piitã mẽ kot inhmar jakamã tanhmã kot pa we amnhĩ to nẽ kęp nẽ? Nà pa nẽ hkêt nẽ. Anẽ.

²⁷ Hãmri nẽ õ pôristijê mã kãm:

—E mẽ ma Juãw Paxis wÿr mra nẽ mut krãhta nẽ pasiiti kamã hkrã xà nẽ akupÿn o tẽ nẽ kãm agõ. Anẽ.

Hãmri nhũm mẽ kuma nẽ ma mẽ hagjênh xà hwÿr mra nẽ Juãw wÿr axà hãmri nẽ mut krãhta. ²⁸ Hãmri nẽ pasiiti kamã hkrã xà nẽ akupÿm o tẽ nẽ kot hã hwÿr xwÿnh mã kugõ nhũm kumÿ nẽ ma katorxà hwÿr o tẽ nẽ kãm kugõ.

²⁹ Hãmri nhũm Juãw Paxis kôt mẽ pa ho mẽ pa xwÿnhjaja tee ri harẽnh ma nẽ hkaprĩ htÿx nẽ. Hãmri nẽ pahi Erox ãxipas wÿr mra nẽ ã hã kuwÿ nhũm mẽ kãm kugõ nhũm mẽ kumÿ nẽ ma o mra nẽ kẽn kre kamã haxà.

Jejus kot mẽ ho 5.000 nẽ mẽ kãm õ hã harẽnh

Matêwre 14.13-21; Rukre 9.10-17; Juãw 6.1-14

³⁰ Tã hãmri nhũm mẽ kot Jejus nhÿ hã mẽ ahkre ho mẽ pa xwÿnhjaja akupÿn Jejus wÿr mõn pøj nẽ kãm amnhĩ jarẽ. Tanhmã mẽ kot mẽ ahkre hto ho pa nẽ tanhmã mẽ ho mex to ho pa hã kãm amnhĩ jarẽnh pa.

³¹ Tã nhũm mẽ piitã axpẽn pãnhã kot Jejus mar kaxyw mẽ hwÿr mra nhũm mẽ kormã apkur kêt nẽ. Jakamã nhũm Jejus hkôt mẽ pa ho mẽ pa xwÿnhjê mã:

—E ma pu mẽ awrã kaprÿ hwÿr mõ nẽ nhÿri pahkrĩ nẽ pakõkõt nẽ apku.

³² Anẽ hãmri nhũm mẽ gõx kãm kanõre wÿr agjê nẽ ma ahte xarmã awrã kaprÿ hwÿr mõ. ³³ Nhũm krĩ hkwÿ nhõ xwÿnhjaja

mě omu hāmri nē nhỹhỹm mẽ mōr xà hã mẽ omunh kurê kumrêx. Hāmri nē krĩ hkwỳ rũm ma mẽ ĩhkrep mra nē mẽ kãm amnhĩ to wa nē pōj nē mẽ kutêp hkrĩ. ³⁴ Hāmri nhũm mẽ mō nē mẽ hwỳr pōj nē kre kura nē kanôre nhô. Hāmri nhũm Jejus mẽ hwỳr api nē mẽ omu nē hamaxpêr o:

—Hêxta waa nē. Na mẽ omnu nē pa. Te mẽ kêp ôwêhti jamār xwýnh kêt nē htỳx ri pa xwýnh kot amnhĩ nhĩpêx pyrāk. Mẽhō kot mẽ kamã ukaprĩ nē tanhmã mẽ ho mex to ho pa? Anē.

Hāmri nē mẽ kamã ukaprĩ nē xa nē Tĩrtũm kapêr o mẽ ahkre rax nē.

³⁵⁻³⁶ Tã nhũm myt àr kaxyw nhũm hkôt mẽ kot pa ho pa xwýnhjaja hwỳr mra nē kãm:

—Kwa hāmri na ra amỹkry htỳx nē. Mẽ hano kê mẽ ma nhỹri krĩ hkwỳ hwỳr mra nē tokyx amnhĩm mẽmoj japrô nē kuku nē hikwỹ nē gōr. Mo jar kapôt ã mẽ apkur xà? Anē.

³⁷ Hāmri nhũm mẽ kuma nē mẽ kãm:

—Kwa nà mẽ kamjaja mẽ kãm mẽmoj gō kê mẽ kuku. Anē.

Hāmri nhũm mẽ kuma nē tee ri hamaxpêr nē kãm:

—Kwa mo mẽ kaxyw mẽ pakàxpore rax? Kot pu mẽ pakàxpore ho 200 nē ho mẽ kãm mẽmoj japrôr tã nom nhũm mẽ ãm ho hkryre nē kuku nē ho ôhy htu hkêt nē. Mẽ ohtô rax kumrêx kênã. Anē.

³⁸ Hāmri nhũm mẽ kãm:

—Nà kot puj mẽ kãm mẽmoj japrôr kêt nē. No mẽ panhō pãwtita? Tanhmã na arĩ kute? E mẽ atô tẽ nē omu nē akupỹn tẽ nē inhmã harê. Anē.

Hāmri nhũm ja ma tẽ nē omu nē akupỹn tẽ nē kãm:

—Nà pãwti ãm kêp 5 pix. Nẽ kaxyw tep ãm pijakrutre. Anē.

³⁹ Hāmri nhũm Jejus kuma nē mẽ kãm:

—Tôe. Mẽ kãm anê kê mẽ ahpỹnhã ri hije nē hkrĩ. Anē.

⁴⁰ Hāmri nhũm mẽ piitã ahpỹnhã kêp 50 nē hije nē hkrĩ hpa.

⁴¹ Nhũm Jejus pãwti mẽ tepta jamỳ nē kànhmã kaxkwa hwỳr rĩt nē Tĩrtũm mã kupê nē kãm harê nē kãm:

—Pa Papaj? Nà ka na apê mẽ inhmã mẽ inhô ho apa xwýnh jakamã amex o amex. Anē.

Hāmri nē mẽ kãm ho hkry hpa nē hkôt mẽ pa ho mẽ pa xwýnhjê mã kugô nhũm mẽ ô ri ho mra nē ho mẽ hipêx pa. Pãwti mẽ tepta nhũm mẽ ho mẽ hipêx pa. ⁴²⁻⁴⁴ Nhũm mẽ piitã apkur mex nē. Mẽôja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nē ho ôhy htu hpa. Mẽmyjaja kêp 5.000 nē kaxyw mẽ hprô nē mẽ hkrajaja nhũm mẽôja ho mẽ hipêx pa nhũm arĩ hakrêx prã. Jakamã nhũm Jejus kôt mẽ pa ho mẽ pa xwýnhjaja akupỹm hakrêx o pikuprônh pa nē ho kawà o 12 nē ho nýt.

*Jejus kot gô krãhkà hã htêm ã harênh
Matêwre 14.22-33; Juãw 6.15-21*

⁴⁵⁻⁴⁶ Tã nhũm Jejus hkôt mẽ pa ho mẽ pa xwýnhjê mã kãm:

—E mẽ kanôre mã axà nē ma akupỹm ixkukamã krĩ pê Petsêj wỳr rê. Pa jajê jano hāmri nē ma tẽ nē nhỹri Tĩrtũm mã amnhĩ jarê nē rĩ ma mẽ akôt tẽ. Anē.

Hāmri nhũm mẽ kuma nē kanôre mã gjêx pa nē ma mō nhũm Jejus mẽ kot mar xwýnhjê janor pa nē ma hixêt prêk ã api nē Tĩrtũm mã amnhĩ jarênh o nhỹ.

⁴⁷ Tã nhũm kamàt nhũm arĩ ahte kỳxpê nhỹ. Nhũm hkôt mẽ pa ho mẽ pa xwýnhjaja kormã kanôre kamã mō. ⁴⁸ Hāmri nhũm Jejus amỹm mẽ omu nhũm kôk ra mẽ kutã àpêr tỳx kumrêx nhũm mẽ tee ri amnhĩ nhĩpêx nē tee ri rrêmti ho gô rênh nhĩpêx o hkrĩ.

Tã nhũm ra krãhyre kà nhũm Jejus Tĩrtũm mã amnhĩ jarênh pa nē kànhmã xa nē ma mẽ hkôt tẽ. Nom kanôre kamã htêm kêt nē gô krãhkà hã xa nē mẽ hwỳr hpar o tẽ.

⁴⁹⁻⁵⁰ Hāmri nē mẽ hwỳr kato nē mẽ kamã hamak kaxyw hêx rom kot mẽ hakrenh mã. Nhũm mẽ amnhĩ wỳr omu nē mẽkarô hã hkamnhĩx nē tee ri amnhĩ kukamã hamaxpêr nē umaj htertet nē àmra rax nē. Hāmri nhũm mẽ kãm:

—Tk. Kwa mẽ amã ma hkêt nē. Pa na pa mẽ akôt tẽ. Anē.

⁵¹ Hāmri nē mẽ hwỳr kanôre hkrem axà nhũm kôk xàpêr tỳxta hapêx. Hāmri nhũm mẽ Jejus kamã no pyma nē tee ri hamaxpêr nē axpên mã:

—Kokỹỹ. Tanhmã na we amnhĩ to nē gô krãhkà hã hpar o man mẽ pahkôt tẽ mẽ

pahwÿr àr mẽ nhũm kôk hapêx par kurê kumrêx. Anê.

Hămri nê tee ri kot ã amnhĩ nhĩpêx anhÿrja kukamã hamaxpêr o hkrĩ. ⁵² Kormã mẽ kot hprĩ hã Jejus tanhmã kute hã omunh kêt jakamã. Tĩrtũm pyrã nê àhpumunh o àhpumunh ã omunh mex kêt jakamã tee ri pãwti grêre ho mẽ hipêx par nê gô krãkhã hã htêm nê kôk o pinhkrênh ã omu nê tee ri ã kot amnhĩ nhĩpêx anhÿrja kukamã hamaxpêr.

Kenêjare kamã Jejus kot akupÿm mẽ ho mex ã harênh

Matêwre 14.34-36

⁵³ Tã nhũm mẽ xarmã rê nê krĩ pê Jenêjare hwÿr pøj. Hămri nê kanôre nhô ⁵⁴ nê api nê kuhê nhũm krĩ nhô xwÿnhjaja Jejus pumunh kurê kumrêx nê axpên mã:

—Kwa pêr Jejusta na mỗ. Nà tãm kênã. Anê.

⁵⁵ Hămri nê hkĩnh nê ma kape hã mẽ à xwÿnhjê hkôt mrar kurê kumrêx nê mẽ harir xà rãhã mẽ hamÿ nê akupÿm Jejus wÿr mẽ o mra. Nhÿri hpôx xà kamã omu nê hwÿr mẽ o mra.

⁵⁶ Na pre htem ã Jejus nhĩpêx anê. Jakamã nhũm hte ma nhÿhÿm mra. Krĩ rũnh kôt mra nê krĩ hkryre hkôt mra nhũm mẽ omu nê hwÿr mẽ à xwÿnhjê ho mra nê mẽ ho kuwÿ nê kãm:

—Pa? Kwa kê jajaja akupÿm mex kaxyw apê axê pix kupê nà? Anê.

Hămri nhũm mẽ kãm:

—Tôe. Nà kwãr mẽ mãmrĩ hkupê. Anê.

Hămri nê mẽ kot kêp ê kupênh xwÿnhj piitã akupÿm mex pa.

7

Mẽ higêt hkôt mẽ kot amnhĩ nhĩpêx xwÿnhjê jarênh

Matêwre 5.21-48, 15.1-20

¹⁻⁴ Tã nhũm Mojes kapêr o mẽ ahkre o mẽ pa xwÿnh kwÿjaja Jerujarê rũm Jejus wÿr mỗ. Hămri nê hã akuprô nê hkôt mẽ pa ho mẽ pa xwÿnhjê kot amnhĩ nhĩpêx ã mẽ omunh o kuhê. Ijaew na prem mẽ hkukamã mẽ higêtjê kapêr kôt rĩ tanhmã amnhĩ nhĩpêx to ho pa. Jakamã mẽ uràk nê apkur kaxyw nê xatã amnhĩ nhĩhkra kuhôn h japjê nê rĩ kormã apku. No mẽ amnhĩ nhĩhkra grã pix kuhôn nê hkrĩ nê

apkur kêt nê. Kuhôn h japjê nê kormã hkrĩ nê apku. Tĩrtũm kot ja hã mẽ omunh nê amnhĩm mẽ mex ã mẽ harênh ã amnhĩ kamnhĩx jakamã na prem ã amnhĩ nhĩpêx anhÿr o pa. Nê nhÿri amnhĩm mẽõ hkwy japrô nê akupÿm ôrkwÿ hwÿr o mra nê haxwÿ nê mẽ higêt pyrã nê wÿr japjê rũnh kumrêx nê rĩ kormã apku. Nê mẽ uràk nê poti nê gôj nê papêre hkre kahôn h japjê rũnh nê rĩ kormã kamã ô nhĩpêx. Mẽ higêt pyrã nê ã amnhĩ nhĩpêx anhÿr o pa. Tĩrtũm kot ja hã mẽ omunh nê amnhĩm mẽ mex ã mẽ harênh prãm xaj. Nom nhũm Jejus kôt mẽ pa xwÿnhjaja na prem ã amnhĩ nhĩpêx anhÿr kêt nê. Na prem apkur kaxyw nê katat kôt amnhĩ nhĩhkra kuhô nê àmnhĩx apkur o hkrĩ. Jakamã nhũm Parijew nhô xwÿnh mẽ Tĩrtũm kapêr tũm o mẽ ahkre xwÿnhjaja tee ri ã mẽ kot amnhĩ nhĩpêx anhÿr ã mẽ omu nê mẽ hã Jejus kukja nê kãm:

⁵ —Pa Jejus? Kwa mẽ inhmã mẽmoj jarê. Amnepêm mẽ panhĩgêjtjaja na pre htem apkur kaxyw nê amnhĩ nhĩhkra kuhôn h japjê rũnh kumrêx nê arĩ kormã hkrĩn apku. Jakamã na pa htem mẽ uràk nê ã amnhĩ nhĩpêx anê. No akôt mẽ pa ho mẽ pa xwÿnhjaja na htem ho mẽ ixpyrã kêt nê. Kwa mo na htem ã amnhĩ nhĩpêx anhÿr kêt nê? Anê.

⁶ Hămri nhũm mẽ kuma nê mẽ kãm amnepêm Tĩrtũm nhÿ hã kapêr xwÿnh pê Ijais kapêr jarê nê mẽ kãm:

—Nà ãm hămri na pre finat Ijaisja amnepêm tanhmã mẽ ajarênh to. Te Tĩrtũm tãm kapêr pyrãk o mẽ ajarê nê mẽ ajarênh o:

Mẽ kãm ixkĩnh ã amnhĩ jarênh tã mẽ kãm ixkĩnh kêt. Na htem ãm kãm ixprãm ã amnhĩ jarênh kaprÿ.

⁷ Mẽ kot ixkapêr kuhpa hã amnhĩ krã hkôt mẽmoj tã hkwyjê mã karô ho pa jakamã na htem ãm kot ixkôt amnhĩ nhĩpêx ã amnhĩ jarênh kaprÿ. Anê.

Ã na pre mẽ ajarênh anê. ⁸⁻⁹ ãm hămri na pre mẽ ajarê. Na ka htem mẽ panhĩgêjt kapêr kôt pix mã amnhĩ nhĩpêx o apaja gryk ã ra Tĩrtũm kapêr kaga hpa. Te mẽ akapêr mex o kot Tĩrtũm kapêr jakrenh pyrãk. ¹⁰ Na pre finat Mojes Tĩrtũm nhÿ hã mẽmoj tã mẽ pamã karô ho:

Ker ka mẽ anhĩpêêxà nẽ mẽ akatorxà wa hã apijaàm o ri apa. Jao wa kutã anojarêt rãhã nẽ. Nom kot kaj mẽ ho mex hkêt nẽ tanhmã mẽ kãm akapêr punuj to hãmri nhũm mẽ akwỳjaja ja mỳrapê mẽ apa. Anẽ.

Na pre ã finat Mojesja Tĩrtũm nhỹ hã mẽ pamã karõ anẽ. ¹¹ No mẽ kajaja na ka mẽ axtem nẽ tanhmã akwỳjê mã ja hã karõ hto nẽ mẽ kãm: “Kot kaj mẽ mẽmo arĩgro hã akãxpore hkwỳ nom anhĩpêêxà ho ajuta kaxyw kãm hkwỳ nhõr kêt nẽ. ãm wa kãm ate ho ajuta kêt ã amnhĩ jarẽ hãmri nẽ Tĩrtũm mã amnhĩ jarẽnh xà hã ixkre hwỳr mãn o tẽ nẽ mẽ ixte ixkre ho mex kaxyw mẽ inhmã agõ. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ apumu nhũm ja kãm mex nẽ. E kêr ka mẽ ã amnhĩ nhĩpêx anhỹr o ri apa.” Anhỹr o na ka htem akwỳjê mã karõ. ¹² Jao mẽ kot mẽ hipêêxà nẽ mẽ katorxà ho ajuta nẽ mẽ hkurê. ¹³ Te mẽ amã mẽ panhĩgêt kapêr mex o kot Tĩrtũm kapêr jakrenh pyrãk o na ka htem amnhĩ nhĩpêx. Jao te Tĩrtũm kapêr mex kêt pyrãk o hipêx nẽ mar kêt nẽ apa. ã na ka htem Tĩrtũm kapêr kuhpa hã amnhĩ nhĩpêx anhỹr o ri apa. Anẽ.

Mẽ pajamaxpêr punuj kêt mẽ pahomnu hã harẽnh

Matêwre 15.10-20

¹⁴Tã nhũm Jejus Parijew nhõ xwỳnhjê mẽ hkwỳjê mã kapêr pa hãmri nẽ amnhĩ wỳr ra mẽ kot mar o kuhê xwỳnhjê mã hpa ho apê nẽ mẽ kãm:

—E pa mẽ amã mẽmoj jarẽ ka mẽ inhma nẽ inhmar mex nẽ. ¹⁵⁻¹⁶ Na hte Tĩrtũm kapêr tũm o mẽ ahkre xwỳnhjaja amnhĩ krã hkôt mẽ ate amnhĩ nhĩkra kuhõnh japjê hã mẽ amã karõ ho pa. Nẽ amnhĩ krã hkôt mẽ axãpkur xà hã tanhmã mẽ amã karõ hto ho pa. Mẽ ate ã amnhĩ nhĩpêx anhỹr nhũm Tĩrtũm kot ja hã mẽ apumunh kêt amnhĩm mẽ amex ã mẽ ajarẽnh kaxyw nhũm htem ã mẽmoj tã mẽ amã karõ anẽ. Nom na hte Tĩrtũm tanhmã mẽ panhĩkra kuhõnh to hã mẽ pahpumu nẽ ãm hã mẽ pa hpumu. Nẽ mẽmo mẽ paxãpkur xà hã mẽ pahpumu nẽ ãm hã mẽ pahpumu. Ja kãm tanhmã kute hkêt. Na hte ja hã mẽ omunh xà hkôt amnhĩm mẽ mex ã mẽ harẽnh rỳ mẽ mex

kêt ã mẽ harẽnh kêt nẽ. Rỳ mẽ hakwa ho mẽmoj kur ã mẽ omunh xà hkôt tanhmã mẽ harẽnh to hkêt nẽ. ãm mẽ hakwa ho tanhmã kapêr to pix ã mẽ mar kêt na hte tanhmã mẽ harẽnh to.

Anhỹr o mẽ kãm kapêr. ¹⁷ Hãmri nẽ mẽ kot mar o kuhê xwỳnhjê re nẽ hkôt mẽ pa ho mẽ pa xwỳnhjê mẽ mẽ amnhĩm hikranh xà hã ixkre hwỳr agjê. Hãmri nhũm hkôt mẽ pa ho mẽ pa xwỳnhjaja tee ri Jejus kot tanhmã mẽ hakwa jarẽnh to hã kuma nẽ hã hkukja nẽ kãm:

—Kwa mon ka ri mẽ inhmã ã ja jarẽnh anẽ? Anẽ.

¹⁸ Hãmri nhũm mẽ kãm:

—Kwa xàn ka mẽ kormã aprĩ hã ja mar mex kêt nẽ? E pa ixprĩ hã mẽ amã harẽ ka mẽ inhma. Nà mẽ apkur xà na hte mẽ hkrã hi kamã mẽ hamaxpêr wỳr gjêx kêt nẽ. ¹⁹ Na hte ãm mẽ õhy pix wỳr agjê nẽ gaa nẽ nhãm hapõj nẽ hapêx. Na htem mẽ apkur xà nhỹ hã tanhmã amnhĩ tomnu to hkêt nẽ. Jakamã na hte Tĩrtũm mẽ apkur xà hã mẽ omunh xà hkôt tanhmã mẽ harẽnh to hkêt nẽ. Anẽ.

Nhũm pre ã mẽ kãm kapêr anhỹr o mẽ paxãpkur xà piitã mex ã harẽ. Jakamã na hte Tĩrtũm krajaja ãmnhĩx mẽmoj piitã hkur o pa nẽ kãm mẽmoj kur pyma hkêt nẽ. Jakamã nhũm Jejus ã mẽ kãm kapêr anẽ nẽ mẽ kãm:

²⁰ —Mẽ hkrã hi kamã mẽ hamaxpêr punuj pix nhỹ hã na htem tanhmã amnhĩ tomnuj to. Jakamã na hte Tĩrtũm tanhmã mẽ hamaxpêr to ho pa hã mẽ omunh xà hkôt tanhmã mẽ harẽnh to. Nom mẽ kot mẽmoj kur ã mẽ omunh xà hkôt rỳ mẽ ãkra kuhõnh japjê hã mẽ omunh xà hkôt tanhmã mẽ harẽnh to hkêt nẽ. Ja tanhmã kêp kute hkêt. ²¹⁻²² Nom koja mẽhõ hamaxpêr punuj nẽ ra hkôt tanhmã amnhĩ tomnuj to.

Jao axpên kamã hpijaàm kêt nẽ.

Rỳ mẽhõx pĩ rỳ mẽ kêp ahkĩ.

Rỳ mẽ kêp mẽ hprõ rỳ mẽhkuprỳ ho amnhĩkati.

Rỳ ri axpên pê õxỳ.

Rỳ tanhmã hkwỳjê homnuj to.

Rỳ tanhmã mẽ ho kapêr punuj to.

Rỳ hêx rom mẽ no kupyur o ri pa.

Rỳ mẽmoj tã amnhĩ to jarkrar o pa.

Rỳ axpēn kukrēx pumu nē kām ho ò hprām xàj hã ò xwỳnhhta kamã gryk.

Rỳ htỳx ri tanhmã amnhĩ nhĩpēx to.

Mē hamaxpēr punuj jakamã na htem ã ri amnhĩ nhĩpēx anhỹr o pa. ²³ Tã ã mē kot amnhĩ nhĩpēx anhỹr ã mē omunh xà hkôt na hte Tirtũm mē kot amnhĩ tomnuj xwỳnh hã mē harē. Anē.

Mēhõ kot hkra kaxyw Jejus mã hamaxpēr ã harēnh

Matêwre 5.21-28

²⁴ Tã nhũm Jejus mē hkôt mē pa ho mē pa xwỳnhjaja nhỹhỹm nojarēt hãmri nē krĩ rũm hapôj nē ma krĩ pē Xir pu hã ri pa. Hãmri nhũm Jejus hkwyjê mã:

—E kwa pu mē tokyx ixkre mũj wỳr mō mē kuri pōj nē kamã amnhĩm hikra. Pu mē pahpōx tokyx anē kê krĩ nhõ xwỳnhjaja mē pahpōx ã mē pahpumunh kêt nē.

Anhỹr tã nom nhũm mē piitã mē harēnh ma nē mē hã akuprõ. ²⁵⁻²⁶ Nhũm mēhõ ni haxwỳja Jejus hpōx ã harēnh ma nē ma hwỳr tē. Nom kêp Ijaew kêt axtem Gres nhõ xwỳnh na pre. Pika pē Sir kamã krĩ mē kot kãm “Wēnĩs” anhỹr xwỳnh kamã na pre kato. Nhũm pre mēkarõmnuti kêp hkra ni mã axà. Hãmri nhũm ò mãmãj tee ri omu nē ra Jejus hpōx ã harēnh ma nē ma hwỳr tē. Hãmri nē hwỳr axà nē hparpê hkõnkrã ho htēm nē nhỹ nē kãm:

—Xê Pahihti. Inhmã ixkra nē mēkarõmnuti jano kê ma tē kê akupỹm inhmã mex. Anē.

²⁷ Hãmri nhũm kãm:

—Nà kormã. Na pre Tirtũm taxy kormã Ijaewjê pix wỳr inhmē. Jakamã na pa kormã nhãm mē akwỳjê hõ tanhmã mē ato mex to hkêt nē. Anē.

²⁸ Hãmri nhũm tee ri amnhĩ tã kuma nē kãm:

—Ma ãm hãmri na ka ja jarē. Ixpê Ijaew kêt tã nom mē kuxwar we ixto mex grire kêt wehe. Anē.

²⁹ Hãmri nhũm kãm:

—Nà ãm hãmri na ka ã akra kaxyw inhmã ajamaxpēr tỳx anē. Jakamã kot paj nē mēkarõmnutita jano. Kojaxte tanhmã apê ho hkêt nē. E ma akupỹm hwỳr tē nē omu. Anē.

³⁰ Hãmri nhũm kuma nē ma akupỹm òrkwỹ hwỳr tē nē omu. Nhũm ra mēkarõmnutija kêp kato nē ma tē nhũm

akupỹm tãm hkrã nē hkĩnh nē par kãm hkõkõt o nõ.

Hamak kro nē kapēr krok xwỳnh jarēnh
Matêwre 15.29-31

³¹ Tã nhũm Jejus mē hkôt mē pa ho mē pa xwỳnhjaja krĩ pē Xir rũm hapôj nē akupỹm gô rax pē Garirej wỳr ma mra. Pyka pē Sitõ jakre nē mō nē pyka pē Tekap jakre.

³² Hãmri nē kormã hpōx o mōr rôm nhũm mē amnhĩ wỳr Jejus pumu nē hwỳr mēhõ myja o tē. Kapēr krok nē umar kêt xwỳnhhta nhũm mē wỳr o tē nē kãm:

—Pa? Ot pa mē awỳr ixkrãmnhwỳta o tē. Kwa hã anhĩhkra xi kê akupỹm mē inhmã mex. Anē.

³³ Hãmri nhũm omu nē hpa hã kupy nē mē kêp o kato nē nhỹri mē hkàx ã o xa. Nē akutã hamak kre kupê nē argôx mē nē ho õhto htok. ³⁴ Hãmri nē kaxkwa hwỳr rĩt nē htyk xà mēnh tỳx nē kãm kapēr. Mē pakapēr kãm kãm: “E ajamak katêr nē anhõhto kaxkrit.” Anē. Nom kapēr kãm kãm: “Epata.” Anē. ³⁵ Hãmri nhũm hamak katêr nē õhto kaxkrit kurê kumrēx nē tãm kapēr nē tãm ama. ³⁶⁻³⁷ Hãmri nhũm mē kot omunh xwỳnhjaja amnhĩ jaêr pē Jejus kot ho mex ã omu nē kamã no puma nē. Hãmri nhũm mē kãm:

—Kwa kêr ka mē akwỳjê mã ja hã ijarēnh kêt nē.

Anhỹr tã no nhũm mē kuma nē ãm kuma nē ma mē piitã mē kãm harēnh o ri hprõt nē mē kãm:

—Kwa Jejus na mex o mex. Na hte mē ho mex o pa nhũm mē umar kêt xwỳnhjaja akupỹm tãm ama nhũm mē kapēr kêt xwỳnhjaja akupỹm tãm kapēr. ãm hãmri na hte ã mē hipēx anhỹr o pa. Nà ãm mex o mex. Anē.

8

Jesus kot mē ho 4.000 nē mē kãm mē ò hã harēnh

Matêwre 15.32-39

¹⁻² Tã nhũm arĩgro hõ hã nhũm mē ohto nē nhỹri kapôt ã Jejus ã htu rax nē kot mē ahkre mar o kuhê hã apkati axkrunēpxi. Nhũm mē apkur xà hã mēõja ra mē kêp hapêx. Hãmri nhũm Jejus ja hã mē omu hãmri nē hkôt mē pa ho mē pa xwỳnhjê mã akir nē mē kãm hpa ho apê nē mē kãm:

—E mẽ amnẽ ixwỳr mra nẽ ixkapẽr ma. Anẽ.

Nhũm mẽ hwỳr mra nẽ kuhê nhũm mẽ kãm:

—Kwa na pa inhmã mẽ kot inhmar o kuhê xwỳnhjê kaprĩ nẽ. Na mẽ ra mẽ pahkôt ri pa hã apkati axkrunẽpxi nhũm mẽ apkur xà hã mẽõja mẽ kệp hapêx. ³ Mẽ õ krĩ hwỳr awry jakamã koja mẽ mẽmoj kur kêt rãhã ma akupỹm pa hãmri nẽ pry hã hirot nẽ rôrôk o pa. Hãmri pa inhmã mẽ hkaprĩ nẽ. Anẽ

⁴ Hãmri nhũm mẽ kuma nẽ axte tee ri hamaxpẽr nẽ kãm:

—Kwa nà nhỹhỹnh kot puj kêt mẽ kãm mẽmoj to mra? Jar ãm kapôt pix kênã. Anẽ.

Hãmri nhũm mẽ kãm:

⁵ —Nà tanhmã na mẽ anhõ pãwtija kute? Anẽ.

Nhũm mẽ kãm:

—Ãm kệp 7 pix. Nẽ kaxyw tep kwỳ no ãm grêre. Anẽ.

⁶ Hãmri nhũm mẽ kuma nẽ mẽ kot mar o kuhê xwỳnhjê mã anẽ nhũm mẽ kuma nẽ hkrĩ pa. Hãmri nhũm pãwti jamỳ nẽ ho Tĩrtũm wỳ nẽ kãm:

—Pa Papaj. Nà ka na apê mẽ inhmã mẽ inhõ ho apa xwỳnh. Jakamã amex o amex. ãm amex kumrẽx. Anẽ.

Hãmri nẽ mẽ kãm ho hkry pa nẽ hkôt mẽ pa ho mẽ pa xwỳnhjê mã kugõ nhũm mẽ ho mẽ hipêx pa. ⁷ Nhũm hpãnhã tepta py nẽ mã ho anẽ nẽ ho Tĩrtũm wỳ. Hãmri nẽ hkôt mẽ pa ho mẽ pa xwỳnhjê mã kugõ nhũm mẽ mã ho anẽ nẽ hamỳ nẽ ho mẽ hipêx pa. ⁸⁻⁹ Hãmri nhũm mẽ ohtô rax kumrẽx tã piitã apku nẽ õhy htu pa. Mẽmyjaja kệp 4.000 nẽ kaxyw mẽ hprõjaja nẽ mẽ hkra-jaja. Tã nhũm Jesus mẽ apkur xàja o mẽ hipêx pa. Nhũm hkôt mẽ pa ho mẽ pa xwỳnhjaja hakrẽx o akuprõ nẽ ho kawà ho 7 nẽ ho nỳt. Hãmri nhũm Jesus ma akupỹm mẽ õ krĩ hwỳr mẽ kot mar xwỳnhjê jano nhũm mẽ ma akupỹm hapêx. ¹⁰ Hãmri nhũm Jesus hkôt mẽ pa ho mẽ pa xwỳnhjê mẽ ro hã kanõre hkrem agjê nẽ mẽ hkwỳm ma Tamanut wỳr mõ.

Parijew nhõ xwỳnh kwỳ kot mẽmoj tã Jesus kamã hamak ã mẽ harẽnh

Matêwre 12.38-42, 16.1-4; Rukre 12.54-59

¹¹ Tã nhũm mẽ Tamanut wỳr pøj nhũm Parijew nhõ xwỳnh kwỳjaja Jesus pumu nẽ ma hwỳr mra nẽ mẽmoj tã kuwỳ nẽ kãm:

—Pa. Ot pa mẽ awỳr mra. Kwa mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu nẽ Tĩrtũm kot mẽ ixwỳr amẽnh ã akôt ijamaxpẽr kurê kumrẽx. E tokyx. Anẽ.

Kot tee ri mẽ kãm mẽmoj to anhỹr kaxyw nẽ ho anhỹr kêt nhũm mẽ kot hã omunh nẽ ma hkwỳjê mã ho kapẽr punuj kaxyw nhũm mẽ ã hêx rom kãm kapẽr anẽ.

¹² Nhũm ra kãm mẽ kot amnhĩ kaxyw hkôt hamaxpẽr kêt kãm ã kapẽr anhỹr mar kaga nẽ. Hãmri nẽ tee ri amnhĩ tã mẽ hamaxpẽr ã mẽ omu nẽ htyk xà mẽnh tỳx nẽ mẽ kãm:

—Hêxta waa nẽ. Mẽ ajamaxpẽr punuj pix o na ka htem ri ajamaxpẽr o apa. Ixpê Tĩrtũm kot mẽ awỳr inhmẽnh xwỳnh tã ka mẽ ja hã ixkôt ajamaxpẽr kêt nẽ. Nà mo kaxyw kot pa kêt mẽ amã mẽmoj to anẽ? Kot paj ho anẽ ka mẽ omu nẽ ãm omu nẽ ixkôt ajamaxpẽr kêt nẽ. Nà kot paj mẽ amã mẽmoj to anhỹr kêt nẽ. Anẽ.

¹³ Hãmri nẽ mẽ kure nẽ hkôt mẽ pa ho mẽ pa xwỳnhjê mẽrohã ma mra nẽ akupỹm kanõre hkrem agjê nẽ ma xarmã mõ.

Jesus kôt mẽ pa xwỳnhjaja kot hprĩ hã omunh kêt ã mẽ harẽnh

Matêwre 16.5-12; mããnẽn Makre 6.52

¹⁴ Tã nhũm mẽ kormã kanõre kamã xarmã mõi rôm nhũm Jesus kôt mẽ pa ho mẽ pa xwỳnhjaja tee ri mẽ apkur xà japêr nẽ axpẽn mã:

—Kwa hêxta waa nẽ. Na pu mẽ panhõ pãwti re nẽ amnhĩ kôt o pamõi kêt nẽ. Nẽ ãm pixire nẽ o mõi. Anẽ.

¹⁵ Hãmri nhũm Jesus tee ri mẽ kuma nẽ tanhmã hã mẽ kãm kapẽr to. Nom mẽmoj tã kuxi nẽ mẽ kãm awjarẽ nẽ mẽ kãm:

—Kwa oko kêr ka mẽ amnhĩ nê Parijew nhõ xwỳnh mẽ Pahi Eroxo nhõ pãw kaxkrit xà pumunh mex nẽ. Anẽ.

¹⁶ Hãmri nhũm mẽ kuma nẽ tee ri kapêrja kukamã hamaxpẽr pê hã axpẽn kukjêr o hkrĩ nẽ axpẽn mã:

—Kwa mo na ri ã mẽ pamã pãw kaxkrit xà jarẽnh anẽ? Mãn mẽ panhõ pãwti hkêt ã mẽ pahpumu hã na ri ã harẽnh anẽ nà? Anẽ.

¹⁷ Hāmri nhūm Jejus mẽ kapēr ã mẽ kuma nẽ mẽ kām:

—Kwa mon ka wem ãm xatã axpẽn mã mẽ panhõ pãwti hkêt jarênh pix o mõ? Xàn pa hte mẽ apyrã nẽ tee ri mẽ paxàpkur xà hkêt kukamã ijamaxpēr o ixpa? Nà inhmã ja tanhmã kute hkêt. ¹⁸ Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nẽ mẽ ajamak o ixkapēr mar mex tã aprĩ hã mar tỳx kêt. Kwa wem ixte amnhĩ nhĩpêx mã ajamaxpēr tỳx nẽ. E mẽ inhmã mẽmoj jarẽ. ¹⁹ Jãã ixte mẽ kêp 5.000 mã pãwti kêp 5 nhĩrênhta. Tanhmã na ka prem hakrêx o akuprõ nẽ ho kawà ho nýt to? E mẽ atõ inhmã harẽ. Anẽ

Hāmri nhūm ja kām: “Na pa prem ho kawà ho 12 nẽ ho nýt.” Anẽ. ²⁰ Nhūm kuma nẽ mẽ kām:

—Tỳ na pre hakrêx ã kawà kêp 12. Tã ham ixte mẽ kêp 4.000 mã pãwti kêp 7 nhĩrênhta. Tanhmã na ka prem hakrêx ho akuprõ nẽ ho kawà ho nýt to? Anẽ.

Nhūm ja kām: “Na pa prem ho 7.” Anẽ. ²¹ Hāmri nhūm kuma nẽ mẽ kām:

—Tỳ ra ixte mẽ anoo mã ã ja ho anhỹr o axkrut tã ka mẽ ra hã ano hkêt nẽ arĩ axpẽn mã mẽ panhõ pãwti hkêt pix jarênh o ixkõt mõ. Kormã mẽ ate ixàhpumunh tỳx ã ixpumunh kêt. Anẽ.

Jejus kot akupỹm nohkre xwỳnh o mex ã harênh
Juãw 9.1-7

²² Tã nhūm mẽ ma krĩ pê Pesêj wỳr mõ nẽ ra hwỳr pøj. Hāmri nhūm krĩ nhõ xwỳnh kwỳjaja mẽ omu nẽ Jejus wỳr mẽhõ myja o tẽ. Ra nohkre nẽ rĩt kêt nẽ pa xwỳnhja nhūm mẽ hpa hã kupyn hwỳr o tẽ. Hāmri nẽ ho kuwỳ nẽ kām:

—Pa Pahihti? Ot pa mẽ awỳr ja ho tẽ. Kwa hã anhĩkra xi nẽ akupỹm mẽ inhmã no ho mex. Anẽ.

²³ Hāmri nhūm mẽ kuma nẽ nohkre xwỳnhta pumu nẽ hpa hã kupy nẽ o tẽ nẽ krĩ pê ho kato nẽ nhỹri mẽ hkàx ã o xa. Hāmri nẽ no hã argõx mẽ nẽ hã ìhkra xi nẽ kām:

—E mãn ka mẽmoj pumu nà? Anẽ.

²⁴ Hāmri nhūm kuma nẽ hkrākato nẽ ri rĩt hāmri nẽ kām:

—Tỳ na pa mẽmoj pumu. Nom ixprĩ hã omunh mex kêt nẽ. Te mẽmo pĩ hpàr kwỳ ri mrar pyræk. Anẽ.

²⁵ Hāmri nhūm axte no hã ìhkra xi nhūm tã rĩt mex nẽ. Ri hprĩ hã mẽmoj piitã omunh mex nẽ. ²⁶ Hāmri nhūm Jejus akupỹm òrkwỳ hwỳr kumẽ nẽ kām:

—E kêt ka kape hã ri amrar kêt nẽ. ãm ma ma akupỹm anhòrkwỳ hwỳr atẽm kurẽ kumrêx. Anẽ.

Jejus kot amnhĩ tã hkõt mẽ pa xwỳnhjê kukjêr ã harênh

Matêwre 16.13-20; Rukre 9.18-21

²⁷ Tã hāmri nhūm Jejus ma hkõt mẽ pa ho mẽ pa xwỳnhjê mẽ mẽ ma mõ. Ma krĩ pê Sejarej Piripos pu hã krĩ hkwỳ hkõt mõ. Nẽ kormã pry hã mẽ nhūm Jejus amnhĩ tã hkõt mẽ pa ho mẽ pa xwỳnhjê kukja nẽ mẽ kām:

—Kwa mẽ inhmã mẽmoj jarẽ. Tanhmã na htem ahpỳnhã ri axpẽn mã ijarênh to wehe? Anẽ.

²⁸ Hāmri nhūm mẽ kām:

—Nà na htem ahpỳnhã tanhmã ajarênh to. Na hte kamã mẽ hkwỳjaja axpẽn mã ato finat Juãw Paxis ã ajarẽ. Nẽ kamã mẽ hkwỳjaja ato finat Eris ã ajarẽ nẽ mẽ hkwỳjaja apê Tĩrtũm nhỹ hã kapēr o pa xwỳnh ra htyk xwỳnhjê hõ hã ajarẽ. ã na htem ahpỳnhã axpẽn mã ajarênh anhỹr o pa. Anẽ.

²⁹ Hāmri nhūm mẽ kuma nẽ mẽ kām:

—No we mẽ kajaja? Ixpê mẽhõ hã na ka htem axpẽn mã ijarẽ? Anẽ.

Hāmri nhūm Simãw Pêtre kām:

—Nà mẽ pajaja na pa htem apê Tĩrtũm kot mẽ ixkaxyw axãm nẽ mẽ ixwỳr amênh xwỳnh ã ajarẽ. Nẽ apê mẽ ixpiitã mẽ inhõ Pahi Maati hã ajarẽ. ã na pa htem axpẽn mã ajarênh anẽ. Anẽ.

³⁰ Hāmri nhūm kuma nẽ mẽ kām:

—Nà ãm hāmri na ka htem ã ijarênh anẽ. ã ixte anhỹr. Kwa nom kwa kêt ka mẽ inhma. Kêt ka mẽ kormã ã akwỳjê mã ijarênh anhỹr kêt nẽ. Anẽ.

Jejus kot amnhĩ kukamã amnhĩ jarênh ã harênh

Matêwre 16.21-23; Rukre 9.22

³¹ Tã nhūm Jejus amnhĩ kukamã hkõt mẽ pa ho mẽ pa xwỳnhjê mã tanhmã amnhĩ jarênh to nẽ mẽ kām:

—Nà ra mẽ ate Tirtũm kot mẽ akaxyw ixãm ã ixpumunh mex. No mẽ pahkwỳjaja kãm ja hã ijarẽnh mar nẽ ixpumunh prãm kêt. Ijaew krãhtũmjê mẽ Tirtũm kapẽr tũm o mẽ ahkre o mẽ pa xwỳnhjê mẽ patre krãhtũmjaja na mẽ kãm ja hã ixpumunh prãm kêt. Jakamã koja mẽ nhỹrmã ixpynẽ nẽ ixtak rax nẽ ixpĩ. Nom kot paj ixtyk ã ixtã apkati axkrunẽpxi hãmri nhũm Tirtũm akupỳm ixto ixtĩr. Anẽ.

³² Hãmri nhũm mẽ kot hpĩr ã amnhĩ jarẽnh ma nẽ tee ri hkukamã hamaxpẽr. Hãmri nhũm Simãw Pẽtreja hwỳr tẽ nẽ hkwyjê pẽ ho kato nẽ mẽ hkax ã o xa nẽ kãm:

—Kwa nà Pahihti. Koja Tirtũm anẽ mẽ omunh mex nẽ nhũm mẽ ã anhĩpẽx anhỹr kêt nẽ. Kwa ri ã kapẽr anhỹr kêt nẽ. Anẽ.

³³ Hãmri nhũm kuma nẽ hwỳr apkjê nẽ pu hã hkõt mẽ pa ho mẽ pa xwỳnh piitã omu. Hãmri nẽ mẽ hamak mã Simãw Pẽtre mã kapẽr nẽ kãm:

—Tk. Kwa na ka ã inhmã akapẽr anhỹrja o te Satanasti nhỹ hã akapẽr pyrãk. Tirtũm nhỹ hã na ka ã inhmã akapẽr anhỹr kêt nẽ. Æm jar mẽ kãm Tirtũm kapẽr mar prãm kêt xwỳnhjê jamaxpẽr o na ka ajamaxpẽr nẽ ã inhmã akapẽr anẽ. No Tirtũm jamaxpẽr o ajamaxpẽr kêt nẽ. Anẽ.

Jejus krajaja tanhmã kot amnhĩ nhĩpẽx hto hã mẽ harẽnh

Matẽwre 6.24-28; Rukre 9.23-27; Juãw 12.24-26; mããnẽn Apokarip 2.10, 12.11

³⁴ Tã nhũm Jejus amnhĩ wỳr mẽ kot mar o kuhẽ xwỳnhjê mẽ hkõt mẽ pa ho mẽ pa xwỳnhjê mã anẽ nhũm mẽ hwỳr axkamẽ nẽ kuhẽ. Hãmri nhũm tanhmã mẽ ahkre hto nẽ mẽ kãm:

—E mẽ inhma. Kot kaj mẽ ixkõt amnhĩ xunhwỳr ã amnhĩ jarẽ hã kot kaj mẽ mããnẽn amnhĩ jarẽnh o: “Jejus kęp inhõ Pahihti jakamã kot paj ãm kapẽr kõt pix mã amnhĩ nhĩpẽx rãhã ho ri ixpa. Kwãr ixkwỳjaja tanhmã hã inhĩpẽx to pa arĩ hkõt amnhĩ nhĩpẽx rãhã ho ixpa.” Anhỹr o amnhĩ jarẽ.

³⁵ —Koja mẽ ixtã mẽ atõx pĩ rỳ ixtã tanhmã mẽ ato ka ty. Ate tanhmã ijarẽnh to ho apa hã nhũm mẽ apĩ. Tã nom koja akaxwỳnh ma inhõ krĩ hwỳr àpir kurẽ kumrẽx nẽ kamã atĩr tũm nẽ amex rãhã nẽ

apa ho apa. Nom kot kaj mẽ jar atĩr prãm xaj ixkaga hãmri nẽ hwỳr axàpir kêt nẽ.

³⁶⁻³⁷ —Nẽ koja mẽhõ hikukrẽx gryk ã Tirtũm kaga. Hãmri nẽ nhỹrmã ty nẽ ý kamã kuwy hwỳr ma mõ nẽ amnhĩ kõt kukrẽx õ hpyr nẽ o mõr kêt nẽ. Koja tee ri kuwy hwỳr mõr pymaj amnhĩ nẽ hikukrẽx rax o amnhĩ pãnhã amnhĩrer prãm kaprỳ. Tanhmã koja amnhĩ to nẽ Tirtũm mã amnhĩre nẽ ma õ krĩ hwỳr api? Koja ã amnhĩ nhĩpẽx anhỹr kêt nẽ.

³⁸ —Nẽ koja mẽhõ ixte mẽ ahkre hã inhma nhũm ja kęp omnuj japẽr. Nhũm kot mẽ kãm ixprãm nõkati xwỳnhjê hkõt pa gryk ã ixkaga. Hã kot paj nhỹrmã mẽ ato amnhĩptãr kaxyw akupỳn wrỳ nẽ amnhĩ xwar kot ixkaga xwỳnhhta kaga. Æm hãmri na pa mẽ amã ja hã amnhĩ jarẽ. Kot paj nhỹrmã inhõ Papaj nhỹ hã ixte mẽ ho amnhĩptãr kaxyw akupỳn wrỳ nhũm kapẽr o mẽ wrỳk xwỳnhjaja man ixkõt wrỳ. Pa mẽ wrỳ hãmri nẽ ra mẽ kot ixkaga xwỳnhjaja pa amnhĩ pyrã nẽ amnhĩ xwar mẽ hkaga hpa. Anẽ.

9

¹ Nhũm Jejus arĩ mẽ kãm kapẽr nẽ mẽ kãm:

—Æm hãmri na pa mẽ amã amnhĩ jarẽ. Kot paj nhỹrmã akupỳn ixte mẽ ato amnhĩptãr kaxyw mẽ awỳr wrỳ kãm ga. Tã kot kaj mẽ akwỳjaja kormã atĩr ri ja kukamã tanhmã ixte amnhĩ nhĩpẽx to hã ixpumu. Anẽ.

Jejus hirã htỳx kãm ãm ã harẽnh

Matẽwre 17.1-9; Rukre 9.28-36; mããnẽn Sikũn Pẽtre 1.16-18

² Tã nhũm arĩgro kęp 6 nẽ hapẽx nhũm Jejus ma nhỹri hixêt prẽk wỳr tẽ. Nẽ Simãw Pẽtre nẽ Xiakre nẽ Juãwja nhũm ma amnhĩ kõt wa mẽ o mõ. Nhũm wa mẽ ahte mõ nẽ hixêt prẽk ã api nẽ himõk ã kuhẽ. Hãmri nhũm Jejus axtem nẽ xa. ³ Ra ê haka htỳx kumrẽx nẽ xa. ⁴ Hãmri nhũm ja wa kaxkwa rũm hwỳr wrỳ nẽ kuri kãm kapẽr. Finat Mojes mẽ finat Erisja wa wrỳ nẽ kuri kãm kapẽr o xa. Tirtũm amnepẽm amnhĩ wỳr wa ho àpir tã nhũm wa akupỳn wrỳ nẽ kãm kapẽr. ⁵⁻⁶ Nhũm wa mẽ mex kumrẽx nẽ hirã htỳx kãm kuhẽ nhũm Jejus kõt mẽ mõr xwỳnhjaja wa mẽ omu nẽ mẽ kamã no

pyma nê. Nê tee ri mē kām tanhmā kapēr to hkukamā hamaxpēr. Hāmri nhūm Simāw Pêtre hamaxpēr nê Jejus mā kām:

—Kwa Pahihti. Nà ãm hāmri na pu mē amnē mō. Kwa pu mē kritpēm jar axkamē nê tokyx panojarêr kêt nê. Pa mē amā pô nhĩrõnh o axkrunēpxi nê hipêx. Amā nê Mojes mā nê Eris mā hõ nhĩpêx ka mē kamā akrī. Kwa xat pa mē amā ho anê nà? Anê.

⁷ Hāmri nhūm kakrā jaka htỳx wrỳ nê wa mē hkunor pa nhūm wa mē kamā kuhê. Hāmri nhūm kakrā kamā Tĩrtũm mē kām kapēr nê mē kām:

—Ota Ixkra xa. Inhmā hapê ho inhmā hapê. Kêr ka mē kapēr mar tỳx rāhā ho ri apa. Anê.

⁸ Hāmri nhūm mē kuma nê amnhĩ pu hã rĩt nhūm ãm Jejus pix mē kuri xa nhūm Mojes mē Erisja wa ra ma akupỹm api nhūm mē ãm Jejus pix pumu.

⁹ Hāmri nhūm mē ma akupỹm hkwỳjê hwỳr wrỳk o mō nhūm Jejus mē kām:

—Kwa kêr ka mē ham mē ate mēmoj pumunh xwỳnhhta kormā nhām mē kām harênh kêt nê. Koja mē mēmo arĩgro hã ixpĩ hāmri nhūm Tĩrtũm akupỹm ixto ixtĩr ka mē rĩ kormā mē kām ja hã ijarênh o ri apa.

¹⁰ Anê hāmri nhūm mē kuma nê mē kām harênh kêt nê. ãm axpên mā pix mā harê nê kot akupỹm htĩr ã amnhĩ jarênhja ã axpên kukjêr o pa nê axpên mā:

—Kwa mo na ri ã akupỹm htĩr ã amnhĩ jarênh anê? Tanhmā kot we amnhĩ to nê htyk tã akupỹm htĩr? Anê.

Hāmri nê tee ri hkukamā hamaxpēr o hkôt pa.

Juāw Paxis te kot Eris pyrāk ã harênh

Matêwre 11.13-15, 17.10-13

¹¹ Hāmri nhūm mē kormā ahpar mā wrỳk o mōr mē nhūm Jejus kôt mē mōr xwỳnhjaja mēmoj tã hkukja nê kām:

—Kwa mē inhmā mēmoj jarê. Na hte Tĩrtũm kapēr tũm o mē ahkre xwỳnhjaja mē inhmā: “Eris kumrêx koja Tĩrtũm mē pahwỳr kumê nhūm Krisja hapu hã wrỳ.” Anê. Na htem ã mē inhmā war ajarênh anê. Tã ka na ka ra wrỳ nom nhūm kormā Erisja akukamā wrỳk kêt nê. Anê.

¹²⁻¹³ Hāmri nhūm mē kām:

—Nà ãm hāmri na htem mē amā ã ja jarênh anê. Na pre ra ixkukamā te kot Eris kot amnhĩ nhĩpêx pyrāk xwỳnhhta tē nê ixkutêp mē kām ijarênh o pa. Nom mē kot ixkukamā ijarênh xwỳnh ã omunh kêt jakamā na prem axtem nê kām tanhmā hipêx to hprãm xà hkôt tanhmā hipêx kati hton kupĩ. Tã koja mē ã hipêx anhỹr pyrā nê mā ixto anê nê inhĩpêx kati nê tokyx mē kām ixprãm kêt xwỳnhjaja ixpynê nê ixpĩ pa amnhĩ xà htỳx kamā ijamak kām ty. Tĩrtũm kapēr ã kagà htũm kot wa ijamē wa ixkukamā wa ijarênh xà hkôt. Anê.

Jejus kot mēhõ hkra nê mēkarõmnuti janor ã harênh

Matêwre 17.14-21; Rukre 9.37-43

¹⁴ Hāmri nhūm Jejus nê Simāw Pêtre nê Xiakre nê Juāwja mē akupỹm hkwỳjê hwỳr hpôx o mra nê amnhĩ kukamā hkwỳjê pumu nhūm mē ohtô nê mē hã akuprõ nê mē kām kapēr. Nhūm Tĩrtũm kapēr tũm o mē ahkre ho mē pa xwỳnhjaja mēmoj tã mē hkukjêr o kuhê. ¹⁵ Jakamā nhūm Jejus mē hwỳr hpôx o tē nhūm mē pikuprõnh xwỳnhjaja amnhĩ wỳr omu nê hkĩnh nê. Hāmri nê kutã hprõt nê kām:

—Pa. Nà ãm hāmri na ka akupỹn mē ixwỳr tē. Anê.

¹⁶ Hāmri nhūm mē kām:

—Kwa mēmoj tã na ka mē axpên mā axàkjêr o akuhê? Anê.

¹⁷⁻¹⁸ Hāmri nhūm mēhõ myja kām:

—Nà ixkra hã na pa mē axpên mā ixkapēr. Na pre mēkarõmnuti ixpê hwỳr axà nê tanhmā ixpê ho nhūm kapēr kêt nê pa. Nhūm hte xatã tanhmā ixpê ho nhūm pykap amnhĩ rē nê hakwa jamrô ho hikwỳ. Hāmri nê à htỳx kamā ama nê amnhĩ nham o axpên kamnhar tỳx kumrêx pê htỳx pa nê hikwỳ nê ixpê omnuj tỳx nê. Na hte ã mēkarõmnuti nhỹ hã amnhĩ nhĩpêx anhỹr o pa. Jakamā na pa ate inhmā ho mex kaxyw man o tē nê tee ri ajapêr. Hāmri nê ho akôt mē pa ho mē pa xwỳnhjê hwỳ nhūm mē kot inhmā ho mex kaxyw tee ri tanhmā ho hkaprỳ. Anê.

¹⁹ Hāmri nhūm Jejus kuma nê hkôt mē pa ho mē pa xwỳnhjê mā kām:

—Hêxta waa nê. Ra mē ate Tĩrtũm nhỹ hã ixte mē ho mex ã ixpumunh ryy htã ixpyrā

nê ã amnhĩ nhĩpêx anhỹr kêt nê. Mãn ka mẽ kormã kaxyw Tĩrtũm kôt ajamaxpêr tỳx kêt nê. E amnê ixwỳr akra ho tẽ pa omu. Anê.

²⁰ Hãmri nhũm mẽ hwỳr o tẽ nhũm mẽkarõmnuti Jejus pumu nê tanhmã hkrata o htỳx to nhũm pykap tẽm nê hakwa jamrô nê amnhĩ rẽn h o nõ. ²¹ Nhũm Jejus omu nê hipêêxà mã:

—Kwa tanhmã na ra kot amnhĩ nhĩpêx ã mytwrỳ kute? Anê.

Nhũm kãm:

—Nà hprĩre rũm na hte ã amnhĩ nhĩpêx anhỹr o pa. ²² Na hte mẽkarõmnuti xatã ixpê hpĩr kaxyw kuwy kamã kurê nê gôx kãm kurê. Kwa kot ka ate ho mex kukamã axàhpumunh japêr nê wa ixkamã axukapĩr nê akupỹm inhmã ho mex. Anê.

²³ Hãmri nhũm Jejus kãm:

—Xàn ka tee ri ixte ho mex kaxyw ixkukamã ajamaxpêr? Nà ixte mẽmoj piitã ho anhỹr kaxyw ixàhpumunh tỳx kênã. Kot ka mẽ atõ mẽmoj tã amnhĩ kaxyw ixkôt ajamaxpêr tỳx hã kot paj amã ho anê. Anê.

²⁴ Hãmri nhũm kuma nê kãm hkra mex prãm tỳx xaj kapêr tỳx nê kãm:

—Nà na pa amnhĩ kaxyw akôt ijamaxpêr. Nom kot kaj tanhmã ixkrã hto pa akôt ijamaxpêr tỳx rãhã ho ri ixpa Pahihti. Anê.

²⁵ Rôm nhũm mẽ ohtô rax nê hwỳr kormã mra nhũm Jejus amnhĩ wỳr mẽ omu hãmri nê mẽkarõmnutija mã kapêr kurê kumrêx. Nê kãm kapêr kãm hihtỳx nê kãm:

—Pa mẽkarõmnuti. E apê mẽ ho mẽ kapêr kêt nê mẽ umar kêt o apa xwỳnh ã pa amã ixkapêr ka inhma. Kêr ka mẽ hkrata pê akato nê ma amôr o mỗ nê axte tanhmã ho hkêt nê. Anê.

²⁶ Hãmri nhũm tee ri kot kãm karõja ma nê gryk xaj xatã amỹra nê mẽ hkrata o htỳx kumrêx nhũm htertet tỳx o nõ. Hãmri nhũm kêp kato nê ma tẽ nhũm te htyk pyrã nê nõ nhũm mẽ tee ri omu nê ra htyk ã hkamnhĩx. ²⁷ Hãmri nhũm Jejus hpa hã kupy nê kànhmã ãm nhũm akupỹm mex nê kànhmã xa nê ri mra. Nê tãm kapêr o mra nê umar mex nê.

²⁸ Tã nhũm Jejus hkôt mẽ pa ho mẽ pa xwỳnhjê mẽrohã ma akupỹm amnhĩm hikranh xà hã ixkreja wỳr mra nê hwỳr agjê nê hkrĩ. Hãmri nhũm Jejus kôt mẽ pa

ho mẽ pa xwỳnhjaja amnhĩ tã hkukja nê kãm:

—Kwa mẽ inhmã mẽmoj jarẽ Pahihti. Na pa mẽ tee ri axwakre kamã mẽ hkrata nê mẽkarõmnuti janor kaprỳ. Kwa mon pa mẽ apyrã nê ja ho anhỹr mex kêt nê? Anê.

²⁹ Hãmri nhũm mẽ kãm:

—Nà axtem na mẽkarõmnuti ja. Na htem mẽ nê hanor tokyx anhỹr kêt nê. Na htem ho Tĩrtũm wỳr tỳx nê rĩ kormã hano. Anê.

Jejus kot htyk kukamã amnhĩ jarẽn h

Matêwre 17.22-23; Rukre 9.44-45

³⁰⁻³¹ Tã nhũm Jejus mẽ hkôt ri mẽ pa ho pa xwỳnhjê mẽ krĩa rũm hapôj nê ma nhãm mỗ. Nê ma pyka pê Garirej kahti hkôt mỗ. Nom mẽ piitã mẽ hkàx ã mỗ. Jejus kormã kot amnhĩ tã tanhmã hkôt mẽ pa ho mẽ pa xwỳnhjê jahkre hto ho pa jakamã kãm mẽ hkàx ã mẽ o pa hprãm nê. Hãmri nê amnhĩ kukamã mẽ kãm tanhmã amnhĩ jarẽn h to nê mẽ kãm:

—E kot paj mẽ amã tanhmã amnhĩ jarẽn h to ka mẽ inhma nê inhmar tỳx nê. Koja mẽ kãm ixprãm kêt xwỳnhjaja tokyx mẽ kãm ixtã amỹnê nhũm mẽ ixpĩ. Kot paj ixtyk ã ixtã apkati axkrunêpxi hãmri nhũm Tĩrtũm akupỹm ixto ixtĩr. Kwa kêr ka mẽ ja ma nê hã anohtỳx nê ho apa. Anê.

³² Hãmri nhũm mẽ tee ri ã kot amnhĩ jarẽn h anhỹrja ma nê axpẽn mã:

—Kwa mo na ri ã mẽ pamã amnhĩ jarẽn h anê? Nà kêp mẽ panhõ Pahi Maati hã kot amnhĩ jarẽn h kênã kot kêt mễhõ kupĩ.

Anhỹr o axpẽn mã harẽn h o hkôt mỗ. Hãmri nê ã kot amnhĩ jarẽn h anhỹr mar prãm kêt jakamã hprĩ hã tanhmã hkukjêr to hkêt nê. ãm akryk hkôt mar o mỗ.

Mẽ kot amnhĩ to rũnh xwỳnh jarẽn h

Matêwre 18.1-5; Rukre 9.46-48

³³⁻³⁴ Tã nhũm Jejus mẽ hkôt mẽ pa ho pa xwỳnhjaja kormã ma krĩ pê Kapanaũ hwỳr mỗ nhũm hkôt mẽ pa ho mẽ pa xwỳnh pê 12jaja tanhmã amnhĩ kukamã hamaxpêr to hãmri nê axpẽn mã:

—Kwa mẽ pahtõ kot puj we nhỹrmã pahpê pahi nê mẽ ho amnhĩptàr rax o ri pahkwỳjê jakre?

Anhỹr o axpẽn kukjêr o Jejus kôt mỗ. Nê axpẽn mã: “Nà pa.” Nhũm mẽ hkwyjaja: “Nà kêt pa.” Anhỹr o hkôt mỗ. Hãmri nhũm

Jejus mẽ mar o mō. Hāmri nhũm mẽ mō nẽ nhỹri amnhĩm hikranh xà hã ixkre hwỳr pōj nẽ hwỳr agiê nhũm mẽ kãm:

—Kwa mẽmoj tã na ka mẽ pry hã amnhĩ jarẽnh o mō? Anẽ.

Hāmri nhũm mẽ tee ri kuma nẽ hpijaàm nẽ. Nẽ kãm tanhmã amnhĩ jarẽnh to hkêt nẽ. ³⁵ Jakamã nhũm Jejus nhỹ nẽ mẽ kãm anẽ nhũm mẽ kuri hkrĩ pa nhũm mẽ kot mẽ kãm mẽ ho amnhĩptàr rax prãmta ã mẽ kãm kapẽr nẽ mẽ kãm:

—E mẽ inhma. Ka mẽ atō amã mẽ ho amnhĩptàr rax prãm. Hã kêr ka te apê mẽ piitã mẽ kãm amarĩ axàpênh xwỳnh pyræk o amnhĩ nhĩpêx o mẽ hkôt apa. Jao mẽmoj to mẽ kutã anojarêt rãhã nẽ. Anẽ.

³⁶ Hāmri nẽ amnhĩ wỳr mẽhprĩre hō mã hpa ho apê nhũm hwỳr tẽ nhũm kumỳ nẽ o nhỹ nẽ hã mẽ kãm kapẽr nẽ mẽ kãm:

³⁷ —E mẽ inhma. Kêr ka mẽ apê pahi pyræk o tanhmã amnhĩ jarẽnh to ho ri apa hkêt nẽ. ãm te amarĩ ri mẽ apa pyræk o amnhĩ nhĩpêx o ri apa. Jao nhỹri mẽhprĩre hō pumu nẽ kamã axukapri nẽ kãm mẽmoj tanhmã ho rỳ kãm mẽmoj gō. Hāmri nẽ ã amnhĩ nhĩpêx anhỹr o te pa ate tanhmã ixto mex to pyræk o amnhĩ nhĩpêx. Nẽ kot ka mẽ atō pa tanhmã ixto mex to nẽ te ate Tĩrtũm o mex pyræk o amnhĩ nhĩpêx. E kêr ka mẽ amã amnhĩ to rũnh prãm nẽ ã amnhĩ nhĩpêx anhỹr o ri apa. Anẽ.

³⁸ Hāmri nhũm Juãw nhỹhỹnh tẽn mẽ hwỳr axà nẽ Jejus mã:

—Kwa Pahihti. O mũj mẽhõ kêp mẽ pahkwỳ hkêt tã anhỹ hã mẽ nẽ mẽkarõmnuti janor o pa. Pa mẽ tee ri ja hã omu nẽ kêp mẽ pahkwỳ hkêt jakamã pa mẽ ã kot amnhĩ nhĩpêx anhỹrja nẽ kãm ixkapẽr. Anẽ.

³⁹⁻⁴⁰ Hāmri nhũm kuma nẽ kãm:

—Kwa nà nẽ tanhmã kãm nẽ hkêt nẽ. Koja mẽhõ inhỹ hã aa mẽ kot mẽmoj pumunh kêt kwỳ ho anẽ hāmri nẽ kêp mẽ panhĩõ nẽ ri mẽ pahkwỳm tanhmã mẽ ahkre hto ho pa hkêt nẽ. Ra mẽ pahkôt kot amnhĩ nhĩpêx mã kẽnã. Jakamã kwa mẽ ja nẽ tanhmã kãm nẽ hkêt nẽ. Kwãr mãmrĩ ã amnhĩ nhĩpêx anẽ. Ja mex kẽnã.

⁴¹ —Koja mẽhõ nhỹri mẽ atō amã kôr ã apumu nẽ hamaxpẽr o: “Kwa Jejus kôt ri pa xwỳnh mũj kãm kôr. E pa kãm gō hkwyê kẽ

ho ixkõ.” Anhỹr o hamaxpẽr nẽ apê ixkwỳ hã amã gō hkwyê ka ho ixkõ. Nhũm ãm kot amã gō pix nhõr nhũm ate ho akõm tã nhũm Tĩrtũm atã omu nẽ ho mex rax nẽ. Anẽ.

Mẽ pahte amnhĩ tomnuj pymaj tanhmã amnhĩ nhĩpêx to hã mẽ pajarẽnh Matêwre 18.6-9; Rukre 17.1-2

⁴² Nhũm Jejus arĩ hkôt mẽ pa ho mẽ pa xwỳnhjê mã kapẽr nẽ mẽ kãm:

—Nẽ mẽ kot ixkôt amnhĩ xunhwỳr tohtuj anhỹr xwỳnhjaja. Koja mẽhõ ma mẽ hwỳr tẽ nẽ inhnê mẽ kãm kapẽr. Mẽ kot mẽ mar nẽ tanhmã amnhĩ tomnuj to hprãm xaj hêx rom mẽ kãm kapẽr nhũm mẽ mar xà hkôt tanhmã amnhĩ tomnuj to. Hã koja Tĩrtũm ja hã omu nẽ kot inhnê tanhmã kãm nẽ xwỳnhhta pumu nẽ homnuj tỳx nẽ. Te mẽ kot mẽhõ pynênh nẽ mut ã kẽn pytĩ hõ nhõr nẽ ma o htêm nẽ gō xupỳm rax kãm mẽnh pyræk o hipêx. Te ho ja pyræk no ãm homnuj tỳx o hakre.

⁴³⁻⁴⁷ —E kwa mẽ o kora. Kot kaj mẽ anhĩkra rỳ apar o tanhmã amnhĩ tomnuj to. Hã kêr ka mẽ axte ã amnhĩ nhĩpêx anhỹr pymaj te ate amnhĩ pẽ anhĩkra rỳ apar krãhyr nẽ mẽnh pyræk o amnhĩ nhĩpêx nẽ axte ã amnhĩ tomnuj anhỹr kêt nẽ. Rỳ ka mẽ ano ho mẽmoj punuj pumu. Hāmri nẽ kãm ajamaxpẽr pix o apa pymaj te ate amnhĩ pẽ ano katõk nẽ mẽnh pyræk o amnhĩ nhĩpêx nẽ nhãm arĩt kurê kumrêx. Kêr ka mẽ ã amnhĩ nhĩpêx o apa rãhã nẽ. Hāmri nẽ nhỹrmã ty nẽ ma Tĩrtũm mẽ wa inhõ krĩ hwỳr api. No kot ka mẽ arĩ akutã ano nẽ arĩ akutã apar nẽ arĩ akutã anhĩkra rãhã ri mrar tã tõhã tanhmã ho amnhĩ tomnuj to. Hāmri nẽ nhỹrmã ty nẽ ma mẽ kot amnhĩ xà htỳx kamã hamak tũm xà pẽ kuwy maatita wỳr ma apa.

⁴⁸ Kuwyja kamã na htem mẽ kot amnhĩ tomnuj mỳrapê amnhĩ xà htỳx kamã hamak rãhã ho pa ho pa hāmri nẽ aa hapõx kêt nẽ.

⁴⁹ ã koja mẽ kot amnhĩ tomnuj o mẽ pa xwỳnh piitã amnhĩ nhĩpêx anhỹr rãhã nẽ pa ho pa. ⁵⁰ Jakamã kwa kêr ka mẽ axpên to mex rãhã ho ri apa. Nom axpên kãm agryk nẽ tanhmã axpên nhĩpêx to ho ri apa hkêt nẽ. Anẽ.

Nhũm pre ã Jejus hkôt ri mẽ pa ho mẽ pa xwýnhjê jahkre anẽ.

10

Mẽ pahte axpẽn kaga nê Jejus kot mẽ pahkurê

Matêwre 5.31-32, 19.1-12; Rukre 16.18; mãânẽn Wam Korõt 7.10-16

¹ Tã nhũm Jejus mẽ hkôt mẽ pa ho pa xwýnh mẽrohã ma pyka pê Jutej wýr mỗ. Hãmri nê pyhti pê Jotãw ã rê nê hpãnhã ma xarmã mỗ. Nhũm mẽ axte mẽ hã akuprỗ nhũm kê Jejus axte mẽ ahkre ho xa. ² Hãmri nhũm Parijew nhỗ xwýnh kwýjaja hwýr mra. Mẽ kot hêx rom kamã hamak nê mar nê tanhmã ho kapêr punuj to kaxyw hwýr mra nê kãm:

—Pa. Ot pa mẽ mẽmoj tã akukjêr kaxyw awýr mra. Kwa tanhmã na pre amnepêm finat Mojesja mẽ pahte mẽ pahprỗ kaga hã mẽ panhigêtjê mã karỗ hto? Xà koja mẽ pahprỗ mẽ pakapêr hkwym tanhmã amnhĩ nhĩpêx to pu mẽ mýrapê hkaga nhũm Tirtũm ja hã mẽ pahpumu nhũm ja kãm mex nê nà? Anẽ.

³ Hãmri nhũm mẽ kãm:

—Tanhmã na pre Mojes Tirtũm nhỹ hã ja hã mẽ amã karỗ hto? Anẽ.

⁴ Nhũm mẽ kãm:

—Nà na pre harẽnh o:

Kêr ka mẽ aprỗ kaga kaxyw hãmri nê ate hkaga hã amnhĩ jarẽnh ã kagà nê kãm agỗ nê rĩ kormã hkaga. Anẽ.

Na pre ã mẽ inhmã ja hã karỗ anẽ. Anẽ.

⁵ Hãmri nhũm mẽ kãm:

—Tý nom mẽ kãm Tirtũm kapêr kôt amnhĩ nhĩpêx prãm kêt jakamã na pre ã mẽ kãm ja jarẽnh anẽ. ⁶ Amnepêm mẽmoj piitã hkrax kãm na prem axpẽn kaga hkêt nê. Na pre Tirtũm wam myja nhĩpêx nê hpãnhã kãm hprỗ nhĩpêx. Axpẽn kaxyw wa hipêx. ⁷ Jakamã na hte mẽmyjaja hprỗ kaxyw nê gryk ã katorxà nê hipêxà wa hkaga nê ãm hprỗ kôt pix mã pa ho pa.

⁸ Te wa tipxi nê ri wa pa pyrãk o axpẽn nhĩpêx o pa. ⁹ Tirtũm tãm kot axpẽn mã wa òr kênã kot kêt mẽhỗ wa kot axpẽn kaga kaxyw tanhmã wa hipêx to rý tanhmã wa kãm kapêr to. Anẽ.

Nhũm pre ã Jejus mẽ kãm kapêr anẽ. ¹⁰ Hãmri nê hkôt mẽ pa ho mẽ pa xwýnhjê mẽ akupým ixkrem agjê nhũm mẽ kãm:

—Kwa aprĩ hã mẽ inhmã mẽ kot axpẽn kaga hã mẽ harẽnhta jarẽ pa mẽ ixprĩ hã kuma nà. Anẽ.

Hãmri nhũm mẽ kãm:

¹¹ —Nà kot kaj mẽ aprỗ kaga nê hpãnhã nhãm mẽhỗ ho aprỗ nhũm Tirtũm noo mã te ate wam aprỗ kamã nhãm aprỗ nyw o amnhĩkati pyrãk. Tirtũm pê ja omnuy týx nê. Rý koja mẽhỗ hprỗ kaga ka hpãnhã ho aprỗ nhũm Tirtũm noo mã te ate wam mjên pê ho amnhĩkati pyrãk. Ja mãânẽn Tirtũm pê omnuy týx nê.

¹² —Nê mẽnijaja. Koja mẽhỗ ni ra mjên kaga nê hpãnhã nhãm mẽhỗ ho mjên. Ja mex kêt. Mjên krax kệp mjên kumrêx kênã kot kêt hkaga nê hpãnhã nhãm hõ ho mjên. Koja anẽ nhũm Tirtũm noo mã te kot wam mjên kamã nhãm hõ ho amnhĩkati pyrãk nhũm Tirtũm pê ja omnuy týx nê. Anẽ.

Jejus kot amnhĩ nê mẽhprĩjê janor kêt ã harẽnh

Matêwre 19.13-15; Rukre 18.15-17

¹³ Tã nhũm Ijaew kwýjaja Jejus wýr mẽ hkrarejê jamý nê mẽ o mra. Kot mẽ hã ãhkra jaxwýr nê mẽ ho Tirtũm wýr kaxyw hwýr mẽ o mra. Hãmri nhũm hkôt mẽ pa ho pa xwýnhjaja tee ri ja hã mẽ omu nê mẽ kãm:

—Kwa mo kaxyw na ka mẽ Jejus wýr mẽ o mra? Kormã mẽ rãxre kênã. Mẽ ma akupým mẽ o mra nà? Anẽ.

¹⁴ Hãmri nhũm Jejus ja hã mẽ kuma nê mẽ kãm:

—Kwa nà kwãr mẽ mãmrĩ ixwýr mẽ o mra. Mẽ ri inhnê mẽhprĩjê kurê hkêt nê. Anẽ.

Hãmri nê mẽ kãm hpa ho apê nhũm mẽ hwýr mẽ o mra nhũm mẽ kuri kuhê. Hãmri nhũm mẽ hã hkôt mẽ pa ho mẽ pa xwýnhjê mã kãm:

—E mẽ jarejê pumu. Na htem hamakêtkati nê hkĩnh nê ri pare. Mẽ kãm amnhĩ to rũnh prãm kêt nê ri pare. Tã Tirtũm kôt mẽ kot amnhĩ nhĩpêx o ri mẽ pa xwýnhjaja na htem mẽ urãk nê kãm amnhĩ to rũnh prãm kêt nê ri pa.

¹⁵ —Na hte jarejaja hipêxà nê katorxà wa kapêr ma nê wa hkôt ri amnhĩ nhĩpêx o ri pare. Tã ixpê Tirtũm kot mẽ awýr

inhmēnh xwýnh na pa. Kot ka mẽ amã ixkôt amnhĩ xunhwýr prãm hã kot kaj mẽ jarejê kot amnhĩ nhĩpêx pyræk o amnhĩ nhĩpêx. Jao ixkapêr ma mẽ ixkôt ri amnhĩ nhĩpêx mex o ri apa. Anê.

¹⁶ Hãmri mẽ mēhprĩrejê jamý mẽ mẽ hã ìhkra jaxwý mẽ mẽ ho Tĩrtũm wý mẽ kãm:

—Pa Papaj. E kēr ka jarejê ho mex rãhã mẽ kē mẽ mex mẽ pa. Anê.

Hikàxpore rax xwýnh jarēnh

Matêwre 19.16-22; Rukre 18.18-23; mãñnēn Wam Ximotre 6.6-10; Xiakre 5.1-6

¹⁷ Tã nhũm Jejus mẽ hkôt mẽ pa ho pa xwýnhjaja nhỹri pry hã mō nhũm Ijaew krãhtũmja omu mẽ hwýr tē mẽ mẽmoj tã hkukja mẽ kãm:

—Pa mẽ ijahkre xwýnh maati? E kwa inhmã mẽmoj jarē. Nhỹrmã Tĩrtũm ri ixtĩr tũm mẽ ixpa hprãm xàj mẽmo kot pa we ho anhỹr o ri ixpa? Ate amnhĩ to mex pix o ri apa xwýnh jakamã kwa inhmã tanhmã ja jarēnh to. Anê.

¹⁸ Hãmri nhũm kãm:

—Xà ate ixpê Tĩrtũm kwý hã ixpumunh kôt na ka ixte uræk mẽ amnhĩ to mex xwýnh ã ijarē? Tĩrtũm pix na kot amnhĩ to mex rãhã xwýnh jakamã kot kaj ã ijarēnh anē mẽ ixpê Tĩrtũm Kra hã ijarē. Jao uræk mẽ ixte amnhĩ to mex xwýnh ã ijarē. Nà xàn ka ãm atýx ri amnhĩ krã hkôt ã ijarēnh anē?

¹⁹ —Tĩrtũm mex o mex jakamã kot kaj amã nhỹrmã kuri atĩr tũm mẽ apa hprãm hãmri mẽ ra kot mẽmoj tã mẽ amã karō xà hkôt amnhĩ nhĩpêx o ri apa. Ra ate mar mex kēnã. Na pre mẽ amã:

Kēr ka mẽ axàhkĩnh o ri apa hkêt mẽ.

Nē mẽ hpar kêt mẽ.

Nē tanhmã axêx kêt mẽ.

Nē axêx rom tanhmã mẽ nokupyr to hkêt mẽ.

Nē mẽ kēp mẽ hprō ho amnhĩkati hkêt mẽ.

Nē anhĩpêxà mẽ akatorxà wa hã api-jaàm mẽ wa ho mex pē wa kutã ano- jarêr rãhã ho ri apa.

E kot kaj amã nhỹrmã Tĩrtũm kuri atĩr tũm mẽ apa hprãm hã kot kaj ã amnhĩ nhĩpêx anhỹr o ri apa. Anê.

²⁰ Hãmri nhũm kuma mẽ kãm:

—Kwa ixprĩre ri ra ã ixte amnhĩ nhĩpêx anhỹr o ri ixpa kēnã. Nom te ixtĩr tũm mẽ ixpa kaxyw ixte kormã tãm kêt pyræk. Anê.

²¹ Hãmri nhũm kuma mẽ hprĩ hã omu mẽ kãm hapê mẽ. Hãmri mẽ kãm:

—Nà kormã mẽmoj pyxire mẽ arĩk. Na ka amã akukrêx rax kĩnh tỳx o Tĩrtũm jakre. Jakamã kēr ka ma akupým anhōrkwỹ hwýr tē mẽ akukrêx rax o wēnê hpa. Nē kàxpore jamý hãmri mẽ mẽ mẽ kēp amrakati xwýnhjê mã òr o ri apa. Hãmri mẽ akupýn tē mẽ arĩ ri ixkôt apa ho apa. Anê.

²² Hãmri nhũm kuma mẽ tee ri hikukrêx rax kukamã hamaxpêr. Kãm hapê jakamã kãm kãm ìhkra karo hprãm kêt mẽ. Hãmri mẽ tee ri Jejus kot ã kãm hã karō anhỹrja ma nhũm ja kãm mex kêt nhũm awjanã mẽ hkaprĩ mẽ ma akupým tē. ²³ Hãmri nhũm Jejus tee ri omu mẽ hkôt mẽ pa ho mẽ pa xwýnhjê mã kãm:

—Hêxta waa mẽ. Koja mẽ hikukrêx rũnh xwýnhjaja ohtō mẽ kãm mẽ hikukrêx japê xàj Tĩrtũm mẽ wa ixri htĩr tũm mẽ pa ho pa hkêt mẽ. Wa ixte amnhĩ nhĩpêxja mẽ kēp hihtýx. Anê.

²⁴ Hãmri nhũm mẽ tee ri kapêrja ma nhũm Jejus mẽ hamaxpêr kôt mẽ omunh mex jakamã axte tanhmã mẽ kãm harēnh to mẽ mẽ kãm:

—Nà Tĩrtũm mẽ wa ixte amnhĩ nhĩpêxja na mẽ hikàxpore rũnh xwýnhjaja pē ja hihtýx. ²⁵ Mē kãm hikukrêx rax mã ìhkra karo hprãm kêt rãhã tee kãm Tĩrtũm kôt amnhĩ nhĩpêx prãm kaprý. Te ho mēhō kot menh kagō hã hkre mẽ kãm kagō katōk prãm kêt rãhã kãm guhkrax kãm àr prãm kaprýta pyræk. Anê.

²⁶ Hãmri nhũm mẽ kuma mẽ tee ri amnhĩ kukamã hamaxpêr mẽ kãm:

—Kwa no mẽ ixpiitã mẽ inhmã mẽ ixkukrêx japê kēnã. Jakamã xà kot paj mẽ ixpiitã nhỹrmã war ari ixtĩr tũm mẽ ixpa ho ixpa hkêt mẽ? Anê.

²⁷ Hãmri nhũm mẽ kãm:

—Nà kot kaj mẽ amnhĩ krã hkôt mẽ amã mẽ akukrêx japê mã anhũrer kêt mẽ. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt mẽ. Jao ra mẽ apê Tĩrtũm mẽ wa ixri atĩr tũm mẽ mẽ apa ho mẽ apa mã xwýnh. Anê.

²⁸ Hãmri nhũm Simãw Pêtre kãm:

—Kwa Pahihti na pa prem agryk ã mẽmoj piitã hkaga hpa mẽ akôt ixpa ho ixpa.

Jakamã xà kot paj mẽ nhỹrmã war ari ixtĩr tũm nẽ ixpa ho ixpa kêt nẽ nà? Anẽ.

²⁹ Hãmri nhũm kuma nẽ hkôt mẽ pa ho pa xwỳnh piitã mẽ kãm:

—Nà ka mẽ atõ inhmã tanhmã amnhĩ to ho apa kaxyw akwỳjê re nẽ ma inhmã tanhmã amnhĩ nhĩpêx to ho ri apa. Anhõrkwỹ re rỳ atõ rỳ atõx rỳ aprõ nẽ akrajê re. Rỳ akatorxà nẽ anhĩpêxà wa are. Rỳ akukrêx piitã rer pa hãmri nẽ ma ixkapêr o mẽ piitã mẽ ahkre ho ri mẽ hkôt apa. ³⁰ Hã kot paj amnhĩ tã mẽ apumu nẽ mẽ ato mex rax nẽ. Hãmri ka mẽ ma mẽ kãm ixkapêr jarênh o mẽ hkôt apa nhũm mẽ kot mẽ amar xwỳnh kwỳjaja mẽ ama nẽ kãm mẽ akĩnh nẽ. Nẽ ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyrak o mẽ anhĩpêx. Jao tanhmã mẽ ato mex to ho pa.

—Nẽ koja mẽ kãm ixprãm kêt xwỳnhjaja ixtã tanhmã mẽ atomnuj to hã ka mẽ nhỹrmã ma Tĩrtũm mẽ wa inhõ krĩ hwỳr api nẽ wa ixkuri amex nẽ atĩr tũm nẽ apa ho apa. ³¹ Nom kêr ka mẽ ja hã amnhĩ pumunh kôt amnhĩ to rax xwỳnh ã amnhĩ to jarkrar kêt nẽ. Mẽ kot amnhĩ to rũnh xwỳnh ã amnhĩ jarênh xwỳnhjaja koja mẽ nhỹrmã amnhĩ to rũnh kêt ã amnhĩ pumu. Nẽ mẽ kot amnhĩ to hkryre xwỳnhjaja koja mẽ nhỹrmã amnhĩ to rũnh ã amnhĩ pumu. Anẽ.

Jejus kot amnhĩ kukamã axte amnhĩ jarênh

Matêwre 20.17-19; Rukre 18.31-34

³² Tã nhũm Jejus hkôt ri mẽ pa ho mẽ pa xwỳnhjê mã kapêr pa hãmri nẽ ma Jeru-jarê hwỳr mẽ o mõi. Ra kamã kãm hkurê xwỳnhjaja kot hpĩr ã amnhĩ jarênh tã ma hwỳr mẽ o mõi. Jakamã nhũm mẽ tee ri hkukamã hamaxpêr o hkôt mõi. Nhũm mẽ amarĩ mẽ hkôt mrar xwỳnhjaja haxwỳja kãm ma nẽ. Hãmri nhũm Jejus mẽ kêp 12ta o mõi nẽ hkwỳjê hkàx ã amnhĩ kukamã tanhmã mẽ kãm amnhĩ jarênh to ho mõi nẽ mẽ kãm:

³³ —E na pu mẽ ra Jerujarê hwỳr mõi. Kot puj mẽ hwỳr põi nhũm mẽ kãm ixkurê xwỳnhjaja patre krãhtũmjê mẽ Tĩrtũm kapêr tũm o mẽ ahkre xwỳnhjê nhĩhkram ijaxà. Hãmri nhũm mẽ kãm Tĩrtũm kapêr kôt amnhĩ nhĩpêx prãm kêt xwỳnhjaja ixpĩr

kaxyw mẽ kãm ixtã amỹnê ³⁴ nhũm mẽ mar xà hkôt tanhmã inhĩpêx kati hto. Nẽ mẽ hkwỳjaja ixtã hpêr o axkê nẽ ixtã akunha. Nẽ mẽ hkwỳjaja tanhmã ijapry hto nẽ ixtã argõx rê nẽ ixtak hãmri nẽ ixpĩ. Koja mẽ ã inhĩpêx anẽ. Nom kot paj ixtyk ã ixtã apkati axkrunêpxi nhũm Tĩrtũm akupỹm ixto ixtĩr. Anẽ.

Xiakre mẽ Juãw wa kot amnhĩ to Jejus wỳr ã wa harênh

Matêwre 20.20-28; Rukre 22.24-30; mããnênh Piripos 2.3-8; Wam Pêtre 5.3

³⁵ Tã nhũm Jepetew kra Xiakre mẽ Juãw wa tanhmã hamaxpêr to nẽ Jejus mã kãm:

—Kwa mẽ ijahkre xwỳnh. Pa wa amã mẽmoj jarê ka wa inhmã “y” anẽ nà? Anẽ.

Hãmri nhũm wa kãm:

³⁶ —Ko wa mamrĩ inhmã mẽmoj jarê pa wa ama mãn. Anẽ.

³⁷ Hãmri nhũm wa kãm:

—Nà kot kaj nhỹrmã ate mẽ piitã mẽ ho amnhĩptar kaxyw nhỹ pa wa akutã anhĩjê. Nẽ wa papxipix ixpê anhõ kôwenatõ nẽ akutã anhĩjê nẽ ato nhỹ. Ja na pa wa inhmã hprãm. Anẽ.

³⁸ Hãmri nhũm wa kãm:

—Nà na ka wa ãm atỳx ri ã amnhĩ to ixwỳr anẽ. Koja mẽ tokyx ixpĩ pa amnhĩ xà htỳx kamã ijamak rax nẽ ty. Tã xà koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

³⁹ Hãmri nhũm wa kãm:

—Tỳ. Nà kot pa wa ijaxwỳja anẽ nẽ apyrà nẽ amnhĩ xà htỳx kamã ijamak kãm ty. Anẽ.

Hãmri nhũm wa kãm:

—Nà ãm hãmri na ka wa ja hã amnhĩ jarê. War ate ixpyrà nẽ ixkôt amnhĩ xà htỳx kãm ajamak kãm atyk mã kênã. ⁴⁰ Tã nom war ate amnhĩ to ixwỳrta ã kot paj tanhmã war amã nẽ hkêt nẽ. Inhõ Papaj tãm koja ja kaxyw mēhõ japêr nhũm inhĩhkõ hã nhỹ. No pa kot paj ri ja kaxyw mẽ atõ rênh kêt nẽ. Anẽ.

⁴¹ Hãmri nhũm wa urak nẽ Jejus kôt mẽ pa ho mẽ pa xwỳnh kwỳjaja ã wa kot amnhĩ to hwỳr anhỹr ã wa kuma nẽ wa kamã gryk nẽ. ⁴² Jakamã nhũm Jejus mẽ piitã mẽ ho akuprõ nẽ mẽ kãm:

—E mẽ inhma. Na hte Ijaew kêt xwỳnhjê nhõ pahitijaja ã amnhĩ nhĩpêx anhỹr o

ri pa nê amarĩ hkrĩ xà kamã hkrĩ ho hkrĩ. àhpumunh jakamã amarĩ ixkre kre jakry kamã hkrĩ ho hkrĩ nê kãm mẽ àpênh xwýnhjê pix mã mẽmo mẽ àpênh ã karõ ho hkrĩ. Na htem ã amnhĩ nhĩpêx anê. Nê mẽ kot amnhĩm mex ã harênh prãm xàj tanhmã mẽ ho mex to ho pa. ⁴³⁻⁴⁵ Tã no mẽ kajaja kêr ka mẽ atõ amã amnhĩ to rax prãm hãmri nê ho mẽ kot amnhĩ nhĩpêx pyrãk kêt nê. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axàpênh o apa kaxyw na pa pre mẽ awýr ixwryk kêt nê. ãm pa ixte tanhmã mẽ amã amnhĩ nhĩpêx to ho ixpa kaxyw na pa pre mẽ awýr wrý. Mẽ ate nhýrmã kuwy wýr apa pymaj mẽ anê ixtyk kaxyw na pa pre mẽ awýr wrý. Jakamã kot kaj mẽ atõ amã amnhĩ to rax prãm hã kêr ka ixpyrà nê akwýjê kutã anojarêt rãhã ho ri apa. Hãmri nê inhmã te ate amnhĩ to rax o amnhĩ nhĩpêx pyrãk o amnhĩ nhĩpêx. Anê.

Jejus kot akupým Paximew o mex ã harênh

Matêwre 20.29-34; Rukre 18.35

⁴⁶ Tã nhũm Jejus mẽ hkõt mẽ pa ho mẽ pa xwýnhjaja kormã Jerujarê hwýr mõi ri ra krĩ pê Jeriko hkõt mõi. Hãmri nhũm mẽ ohtõ nê mẽ hã ajêt nê mẽ hkõt mõi. Nhũm mõi myja pry nhĩhkrepy nhỹ. Ximew kra Paximew nohkre xwýnhja pry kamã ahwýr o hkrĩ. ⁴⁷ Hãmri nhũm Jejus mẽ hkwýjaja hwýr htêp o mõi nhũm amnhĩ wýr mẽ kuma nê mẽ kot Jejus nhĩxi jarênh o mõi ã kuma hãmri nê kax pê kãm kapêr nê amnhĩ to kuwy nê kãm:

—Pa Jejus? Nà apê mẽ inhõ Pahihti mex kumrêx na ka. Te apê amnepêm anhgêt pahihti Tawi kot amnhĩ nhĩpêx pyrãk. Jakamã kwa we ixkamã axukaprĩ nê akupým ixto mex kêt wehe. Ixte amnhĩ kaxyw akõt ijamaxpêr xwýnh na pa. Anê.

⁴⁸ Hãmri nhũm Jejus kukamã mẽ mrar xwýnhjaja kuma nê kãm:

—Tk. Kwa akapêr kêt nê nhỹ nà. Anê.

Tã nom nhũm ãm mẽ kuma nê xatã amnhĩ to kuwy. Kýx pê amnhĩ to kuwy nê axte kãm:

—Kwa ixkamã axukaprĩ nê akupým ixto mex Pahihti. Anê.

⁴⁹ Hãmri nhũm Jejus kuma nê xa nê hkõt mẽ pa ho mẽ pa xwýnhjê mã kãm:

—E mẽ atõ hwýr tẽ nê hpa hã apy nê amnê ixwýr o tẽ. Anê.

Hãmri nhũm mẽ kuma nê nohkre xwýnhhta mã kapêr nê kãm:

—E tee ri amnhĩ kukamã ajamaxpêr kêt nê. Na atã karõ. E tokyx kãnhmã xa. Anê.

⁵⁰ Hãmri nhũm mẽ kuma nê hkĩnh týx nê. Nê kãnhmã harĩ nê amnhĩ nê õ kajaati mẽ nê hwýr htêm kurê kumrêx. ⁵¹ Hãmri nhũm Jejus kãm:

—Pa mo na? Tanhmã kot pa ato? Anê.

Hãmri nhũm kãm:

—Nà akupým inhmã ixrĩt mex prãm Pahihti.

⁵² Anê nhũm kãm:

—Tõe. Nà ra ate amnhĩ kaxyw inhmã ajamaxpêr týx jakamã kot kaj akupým arĩt mex kurê kumrêx. E mãmri ma akupým tẽ. Anê.

Nhũm akupým rĩt mex ã amnhĩ pumu nê hkĩnh o hkĩnh. Hãmri nê Jejus ã ajêt nê ma hkõt hkĩnh nê tẽ.

11

Jejus kot Jerujarê hwýr ãr ã harênh

Matêwre 21.1-11; Rukre 10.28-40; Juãw 12.12-19

¹ Tã nhũm Jejus mẽ hkõt mẽ pa ho mẽ pa xwýnhjê mẽ kormã Jerujarê hwýr mõi. Hãmri nê krĩ pê Petake mẽ hõ pê Petãn wýr ahtêp o mõi. Hixêt pê Oriwêhti kahti ri na pre krĩja wa xa. Jakamã nhũm Jejus hkõt mẽ pa ho mẽ pa xwýnh wa ho axkrut nê mẽ amnhĩ kukamã wa kumê ² nê wa kãm:

—E wa ma krĩ mũj wýr mẽ ixkukamã wa tẽ. Hãmri nê hwýr pøj nê nhỹri jumênre nyw mã ê nê ãm xwýnhhta pumu. Kormã mẽ kot hã hkrĩ hkêt kumrêx xwýnhhta. ³ Ka wa omu nê kãm ê xà hpôt nê man akupým ixwýr o tẽ. Koja mõi war apumu nê hã tanhmã war amã kapêr to ka wa ã kãm ijarênh anê nê kãm: “Nà mẽ panhõ Pahihti na hã karõ pa wa hwýr tẽ.” Anhýr o kãm ijarê. E wa ma hwýr tẽ. Anê.

⁴ Hãmri nhũm wa kuma nê ma hwýr htêm kurê kumrêx nê hwýr pøj. Nhũm Jejus kot wa kãm hã karõ xà hkõt jumênre nywreta pumu. ⁵ Hãmri nê kãm ê xà hpôt o xa nhũm kuri mẽ kuhê xwýnhjaja tee ri hã wa omu nê wa kãm:

—Kwa mo kaxyw na ka wa kãm ê xà hpôt o xa? Kwa kot ka wa mẽ ixpê ho ahkĩ nà? Anê.

⁶ Hãmri nhũm wa mẽ kãm:

—Nà mẽ panhõ Pahihti na wa inhmã hã karõ pa wa hwÿr tẽ. Wa ixte ma hwÿr o ixtẽm kaxyw. Anê.

Hãmri nhũm mẽ wa kãm:

—Tÿ? Tõe wa mãmrĩ ma kãm o tẽ. Anê.

⁷ Hãmri nhũm wa ma akupÿm Jejus wÿr o tẽ. Hãmri nẽ kaxyw amnhĩ xê hkwÿ hkwry nẽ kãm ho hkõ kahty hpa nẽ kãm ho htÿx nẽ o xa nhũm Jejus hã nhÿ nẽ mõ. ⁸ Nẽ kormã Jerujarẽ hwÿr hixêt ã àpir o mõ. Nhũm mẽ kot omunh o kuhê xwÿnhjaja hkĩnh nẽ ma hkukamã pry ho mex kaxyw amnhĩ xê hkwÿ hkwry nẽ ho kãm uty. Nhũm mẽ hkwÿjaja nhÿri põ hkwÿ jakà nẽ o mra nẽ hkukamã kãm uty. ⁹⁻¹⁰ Nhũm mẽ hixêt ã api nẽ ahpar mã wrÿk o mõ nhũm mẽ piitã kax pẽ Tirtũm mex o mex ã harẽnh o hkõt mõ. Nhũm mẽ hkwÿjaja kukamã mra nhũm mẽ hkwÿjaja hapu hã mra nhũm prem piitã hkõt Tirtũm mex o mex ã harẽnh o mõ. Nẽ harẽnh o:

E ota Tirtũm kot mẽ pahwÿr mẽnh xwÿnhhta ra põj. Nà ãm hãmri na mẽ pahwÿr wrÿ. Ja mex kumrẽx.

Kẽp mẽ panhõ Pahihti mex na. Koja mẽ panhĩgêt pahi Tawi pyrà nẽ mẽ pahto amnhĩptà nẽ mẽ pahto mex o pa.

Ãm hãmri na Tirtũm mẽ pahwÿr kumẽ.

Tirtũm mex kumrẽx. Ãm mex o mex. Kukwak ri pix mã na pu htem pajamakêtkati nẽ paxãmnhĩx papa rãhã ho papa.

Anhÿr o Jejus kõt harẽnh o mõ. Kot mẽ ho amnhĩptàr kurê kumrẽx ã hkãmnhĩx nẽ hkĩnh nẽ ã hkõt kapẽr anhÿr o mõ. ¹¹ Jao ra Jerujarẽ hwÿr põj nhũm Jejus Tirtũm mã amnhĩ jarẽnh xà hã ixkre hwÿr tẽn axà. Nom nhũm ra amÿkry htÿx jakamã nhũm hwÿr axà nẽ ãm hkre pumunh o xa hãmri nẽ akupÿm kato nẽ hkõt mẽ pa ho mẽ pa xwÿnh pẽ 12jê mẽ nhũm mẽ ma akupÿm Petãn wÿr mra.

Jejus kot pĩ hpàr pẽ fikêhti mã kapẽr ã harẽnh
Matêwre 21.18-22

¹² Tã nhũm apkati nhũm Jejus mẽ hkõt mẽ pa ho pa xwÿnhjê mẽrohã Petãn rũm hapõj nẽ ma akupÿm Jerujarẽ hwÿr mra. Nhũm Jejus ra kãm prãm nẽ mõ. ¹³ Hãmri nẽ amÿm mẽmo pĩ hpàr hõptĩ rax pẽ fikêhti pumu nẽ hamaxpẽr o:

—E pa hwÿr tẽ nẽ ô hkwÿ rê nẽ kuwõ mãn. Anê.

Hãmri nẽ hwÿr tẽ. Nhũm kormã ô kaxyw õ mytwrÿ kator kêt jakamã nhũm ô hkêt nẽ ãm hõ pix nẽ xa. ¹⁴ Hãmri nhũm hwÿr tẽ nẽ tee ri ô japêr nẽ ãm hõ pix pumu. Hãmri nẽ tee ri omu nẽ kãm:

—E kot kaj axte axõ hkêt kumrẽx.

Anhÿr o kãm kapẽr nhũm hkõt mẽ pa ho mẽ pa xwÿnhjaja hã kuma.

Jejus kot Tirtũm nhõrkwÿ hwÿr àr ã harẽnh
Matêwre 21.12-17; Rukre 19.45-46; Juãw 3.13-22

¹⁵⁻¹⁷ Tã nhũm Jejus mẽ hkõt mẽ pa ho mẽ pa xwÿnhjaja Jerujarẽ hwÿr agjê nẽ Tirtũm mã amnhĩ jarẽnh xà hã ixkre hwÿr agjê. Nhũm Jejus tee ri kamã mẽ kuhê xwÿnhjê pumu. Nhũm mẽ ra ixkre kamã axtem nẽ mõx nẽ õwêhti nẽ tuuti ho wênê ho kuhê. Ixkre hwÿr mrar xwÿnhjaja kot haprõr nẽ Tirtũm mã amnhĩ jarẽnh kaxyw kãm hpar nẽ õr kaxyw mẽ kãm ho wênê. Nom axtem nẽ hã ohtõ rax kãm mẽ kãm ho wênê nhũm mẽ hkwÿjaja mẽ kãm mẽ hikãxpore ho anhĩpa. Hãmri nhũm Jejus mẽ hwÿr axà nẽ tee ri mẽ kot ã amnhĩ nhĩpêx anhÿr ã mẽ omu nẽ mẽ kãm akir nẽ mẽ kãm:

—Tk. Kwa Tirtũm kapẽr ã kagà htũm kot õrkwÿ jarẽnh kot:

Inhõrkwÿja ãm pika piitã hkõt mẽ piitã kot inhmã amnhĩ jarẽnh xà hã ixkre pix kaxyw na.

Anhÿr o kot harẽnh tã ka mẽ axtem nẽ kamã ã amnhĩ nhĩpêx anhÿr o akuhê. E kwa mẽ ma mra nẽ ajapõx tokyx anê. Anê.

Nhũm pre ã mẽ kãm kapẽr anhÿr pẽ mẽ ahkre hãmri nẽ ixkreja nẽ mẽ kator pa. ¹⁸ Hãmri nhũm patre krãhtũmjê mẽ Tirtũm kapẽr tũm o mẽ ahkre xwÿnhjaja tee ri ã mẽ hipêx anhÿr ã omu nẽ kapẽr ma nẽ kamã gryk tÿx nẽ. Hãmri nẽ mẽ kot hã àmnênh kaxyw tanhmã axpẽn mar to nẽ axpẽn mã:

—Tk. Kwa na mẽ ohtõ nẽ kãm mar prãm nẽ. Koja mẽ anê nẽ gryk ã mẽ pahkaga nẽ axte mẽ pakapẽr mar kêt nẽ. Kwa pu mẽ

kupī ri. E tanhmā kot puj mẽ ho nẽ kupī? Anẽ.

¹⁹ Tã nhũm myt axà nhũm Jejus mẽ hkõt mẽ pa ho pa xwýnhjaja Jerujarẽ rũm hapõj nẽ ma nhỹri amnhĩm hikranh kaxyw mra.

Mẽ pahte tanhmã mẽmoj tã Tĩrtũm wýr to hã mẽ pamã karõ

Matêwre 6.14-15, 17.20; Makre 11.13; Juãw 14.13; mããnẽn Xiakre 1.6; Wam Juãw 3.22

²⁰ Tã nhũm apkati nhũm Jejus mẽ hkõt mẽ pa ho mẽ pa xwýnhjaja Jerujarẽ hwýr akupým mra. Hãmri nẽ axte pĩ hpår pẽ fikêhtita pumu. Jejus ra kot kãm kapër xwýnhhta pumu nhũm ra grà pa nẽ xa. ²¹ Hãmri nhũm Simãw Pêtre Jejus kot tanhmã pĩ mã kapër toja mã hamaxpër nẽ hã kãm:

—Kwa mẽ ijahkre xwýnh. Ga mẽmoj mũj pumu. Jãã ate fikêhti mã akapër xwýnhhta na grà par kumrêx nẽ xa. Anẽ.

²²⁻²³ Hãmri nhũm kuma nẽ mẽ piitã mẽ kãm:

—Tỳ nà ãm hãmri na pa mẽ amã ixkapër. Kot kaj mẽ mẽmo kaxyw Tĩrtũm mã ajamaxpër tỳx pẽ mẽmoj tã awý nhũm ama nẽ amã hprãm xà hkõt tanhmã amã hipêx to. Ka mẽ amnhĩ kaxyw Tĩrtũm mã ajamaxpër tỳx pẽ hixêt mũj mã akapër nẽ kãm: “E xa nẽ ma tẽ nẽ gõ xujanãr kãm mrõ.” Anhýr o kãm akapër nhũm amar xà hkõt ã amnhĩ nhĩpêx anẽ nẽ tẽn kamã mrõ. ²⁴ Kot kaj mẽ mẽmoj tã Tĩrtũm wý nẽ kaxyw ãm pix mã ajamaxpër tỳx nẽ nhũm amã ho anẽ.

²⁵⁻²⁶ —Nẽ kot kaj mẽ Tĩrtũm mã amnhĩ jarênh kaxyw nẽ ra mẽhõ kot tanhmã ato mã ajamaxpër. Hãmri nẽ ja ho ajamakêtkati kurê kumrêx nẽ axte kãm ajamaxpër kêt nẽ. ãm mẽmoj nyw pix mã ajamaxpër o tãm amnhĩ nhĩpêx o apa. Hãmri nhũm Tĩrtũm kaxkwa rũm ja hã apumu nẽ apyrà nẽ ate tanhmã amnhĩ tomnuj to ho hamakêtkati nẽ axte kãm hamaxpër kêt nẽ. Anẽ.

Mẽhõ kapër kõt Jejus kot mẽ ahkre hã mẽ kot hkukjêr

Matêwre 21.23-27; Rukre 20.1-8

²⁷ Nhũm mẽ akupým Jerujarẽ hwýr agjê nhũm Jejus kê axte Tĩrtũm mã amnhĩ jarênh xà hã ixkre hwýr axà. Nhũm hkõt mẽ pa ho mẽ pa xwýnhjaja hkõt hwýr mra nẽ hkõt

agjê nẽ kormã kamã kuhê. Hãmri nhũm Ijaew krãhtũmjê mẽ mẽ kot Tĩrtũm kapër tũm o mẽ ahkre xwýnh mẽ mẽ õ patre krãhtũmjaja Jejus pumu nẽ hwýr mra nẽ hêx rom tanhmã kãm kapër to. Na pre ra Jejus ixkreja nẽ mẽmoj to wênê xwýnh mẽ kàxpore o mẽ hpinhpanh xwýnhjê jano nhũm mẽ tee ri ja hã omu nẽ kamã gryk tỳx nẽ. Jakamã nhũm akupým mẽ hwýr axà nhũm mẽ axte omu nẽ hwýr mra kurê kumrêx ²⁸ nẽ kãm:

—Kwa mẽ inhmã amnhĩ jarê. Mẽhõ nhỹ hã na ka hte ã amnhĩ nhĩpêx anhýr o ri apa? Mẽhõ na pre mẽ ixwýr amẽ ka pre mõi? Nà xà amnhĩ krã hkõt na ka hte ã amnhĩ nhĩpêx anhýr o ri apahti? E kwa mẽ inhmã amnhĩ jarê. Anẽ.

²⁹ Nhũm Jejus kot tanhmã mẽ hamaxpër to hkõt mẽ omunh mex jakamã mẽ kãm:

—Nà kot pa ixkumrêx mẽmoj tã mẽ akukja. Ka mẽ inhmã harê pa rĩ kormã mẽ amã tanhmã amnhĩ jarênh to. ³⁰ Finat Juãw Paxisja ã kot paj mẽ akukja. Mẽhõ nhỹ hã na pre hte mẽ hkrã kumrãr o pa? Xà amnhĩ krã hkõt nà xà Tĩrtũm nhỹ hã? E mẽ atõ inhmã harê. Anẽ.

³¹⁻³² Hãmri nhũm mẽ kuma nẽ tee ri kot tanhmã kutã kãm harênh to hkukamã hamaxpër nẽ axpên mã:

—Kwa tanhmã kot puj mẽ kãm ja jarênh to? Mẽ kot mar o kuhê xwýnhjaja na htem Juãw Paxis kêp Tĩrtũm nhỹ hã kapër jarênh xwýnh ã axpên mã harênh o pa. Jakamã kot puj mẽ kãm kot amnhĩ krã hkõt mẽ hkrã kumrãr o pa hã harê nhũm mẽ tee ri mẽ pama nẽ mẽ pakamã gryk nẽ. Nẽ mẽ paxêx rom ã kãm mẽ pakapër anhýr ã mẽ pahpumu nẽ kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã mẽ hkrã kumrãr ã harê nhũm mẽ pama nẽ mẽ pamã: “Kwa ã kot anhýr kênã na ka prem kapër mar tã ixkõt amnhĩ xunhwýr kêt nẽ?” Anẽ. Nà kot puj pěr mẽ kãm tanhmã harênh to hkêt nẽ. Kot puj mẽ ãm kãm aa te mẽ pahte ja jarênh mar kêt pyrãk o harê. Anẽ.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ tee ri tanhmã kãm nẽ hprãm kaprý ho kuhê.

³³ Hãmri nẽ Jejus mã kãm:

—Konên. Mě ixte mēhō nhỹ hã kapēr o pa hã omunhre hã. Anē.

Hāmri nhũm mẽ kuma nẽ mẽ kãm:

—Tk. Tõe kot pa xep ijaxwýja mẽ amã tanhmã amnhĩ jarēnh to hkêt nẽ. Ijaxwýja ixte mēhō nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anē.

12

Mě àpēnh punuj xwýnhjê jarēnh

Matêwre 21.33-46; Rukre 20.9-18

¹ Nhũm Jejus arĩ Ijaew krãhtũm mẽ mẽõ patre krãhtũm mẽ Tĩrtũm kapēr tũm o mẽ ahkre xwýnhjê mã kapēr o xa. Nẽ mẽ kãm mẽ kot tanhmã hipêx to hkukamã mẽ kãm tanhmã amnhĩ jarēnh to. No ãm hã kuxi nẽ mẽ kãm awjarē nẽ mẽ kãm:

—Koja mēhō hpur ã hkwýjê mã karõ. Mě kot kamã kãm àpēnh kaxyw mẽ kãm karõ. Hāmri nhũm mẽ ma hwýr mra nẽ kamã mẽmo hy hkre nẽ hkre pa. Hāmri nẽ pu hã kahê hpa nẽ pur kaêx kãm ixkre hprêk nhĩpêx. Mě kot himõk ã mẽ kot kêp àhkĩnh pymaj mẽ hapêr o hkrĩ kaxyw. Hāmri nẽ hipêx pa nhũm mẽõ patrãwja awry hã krĩ hõ hwýr nojarêt nẽ mẽ kãm tanhmã hpur jarēnh to nẽ mẽ kãm: “E or ixpurta nõ. Kê kamã mẽmoj kà hpa ka mẽ mãmrĩ kamã awjamý nẽ ho axkjê. Hāmri nẽ ixkutêp inhõ jaxwý nẽ mãmrĩ anhõ tanhmã ho hprãm xa hkõt tanhmã ho.”

—Anhỹr o mẽ kãm kapēr hāmri nẽ ma mẽõ. ² Tã nhũm ra pur kãm mẽmoj hkà pa. Nhũm hpur nhõ dõn arĩ krĩ hõ kamã hã ujahkre ho pa htã kuri kãm àpēnh xwýnhjê hõja nhũm akupým mẽ hwýr kumẽ. Mě kot kãm õ hkwý nhõr nhũm ma kot kãm o mõi kaxyw ma mẽ hwýr kumẽ nhũm ma akupým mẽ hwýr mẽõ. Mõi nẽ ra mẽ hwýr pøj. ³ Hāmri nhũm mẽ omu nẽ axtem nẽ homnuj nẽ. Nẽ unê nẽ htak nẽ akupým hano nhũm ý kamã ma akupým mẽõ. ⁴ Hāmri nhũm õ patrãwja tee ri omu nẽ hpãnhã ja mẽ nhũm ma mẽ hwýr mẽõ. Mõi nẽ mẽ hwýr pøj. Hāmri nhũm kê wem omu nẽ mã ho anê nẽ. Unê nẽ htak nẽ hkrãx pẽ htak nẽ akupým hano nhũm wamta pyrã nẽ ma akupým ý kamã mẽõ. ⁵ Hāmri nhũm axpên pãnhã kãm mẽ àpēnh xwýnh kwýjê rẽ nhũm mẽ axpên pãnhã ma mẽ hwýr pa. Ma

mẽ hwýr pa nẽ pøj nhũm mẽ te ho wantajê mẽ hipêx pyrã nẽ mẽ hkwýjê pynê nẽ htak rax nẽ mẽ hano nẽ mẽ hkwýjê pa. ⁶ Nhũm mẽ õ patrãw mẽ harēnh ma nẽ tee ri amnhĩ kukamã hamaxpēr nẽ hamaxpēr o: “Hêxta waa nẽ. Tanhmã kot paj we amnhĩ nhĩpêx to nẽ inhõta kwý jamý? Nà kot paj mẽ hwýr ixkraja mẽ. Inhmã hapê htã kot paj mẽ hwýr kumẽ kê ma mẽ hwýr mẽõ. Hāmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ jatã inhmã kãm inhõja kwý gõ nhũm man ixwýr o tẽ. Nà kot paj anê.”

—Anhỹr o hamaxpēr hāmri nẽ ma mẽ hwýr hkraja mẽ nhũm ma mẽ hwýr mẽõ.

⁷ —Tã mẽ hwýr hpõx o mẽ nhũm mẽ amým amnhĩ wýr omu nẽ kêp hkra hã omunh kurê kumrêx nẽ hã axpên mã amýnê nẽ axpên mã: “E. Nà oněj hpur nhõ dõn krata tẽ. Koja nhỹrmã õ papaj mýrpê amnhĩm pur ã pyka pytã nẽ ho õ. Jakamã e pu mẽ kupĩ nẽ kêp hpur ho arĩk nẽ ho panhõ. E kwa tokyj pu mẽ kupĩ ri.” Anē.

⁸ —Rõm nhũm ra mẽ hwýr hpõx o tẽ nẽ ra pøj nhũm mẽ unê nẽ pur nẽ ho kato nẽ ahkã kamã kupĩ. ã mẽ ujarēnh kot anhỹr. Anē.

⁹ Nhũm pre ã Jejus Ijaew krãhtũmjê mã ujarēnh anê. Hāmri nẽ hã tanhmã mẽ hkukjêr to nẽ mẽ kãm:

—E mẽ inhmã mẽmoj jarē. Koja pur nhõ dõnja tee ri mẽ kot hkra hpĩr ã harēnh ma hāmri nẽ tãm mẽ hwýr mẽõ hāmri nẽ tanhmã mẽ hipêx to wehe? Nà koja ma mẽ hwýr mẽõ nẽ mẽ himex pa hāmri nẽ hpãnhã nhãm hpurta ã mẽmojjê rẽ. ¹⁰ Mãn ka prem ra Tĩrtũm kapēr ã kagã htũm kot ja jarēnh ma nã? Harēnh kot:

Na prem kẽn o amnhĩm õrkwý nhĩpêx kaxyw hāmri nẽ kẽn maati pumu nẽ htýx omnuj ã hkamnhĩx nẽ hkaga. Mě kot hkaga htã nom nhũm Tĩrtũm mẽ kurom mex o kot kẽn piitã hakrenh par ã omunh kurê kumrêx.

¹¹ ãm hāmri na pre ã mex ã omunh anê. Anē.

ã Tĩrtũm kapēr ã kagã htũm kot harēnh kot anhỹr. Anē.

¹² Nhũm pre ã Jejus mẽ kãm ujarēnh kãm mẽ harēnh anê nhũm mẽ amnhĩ tã kuma. Tĩrtũm kapēr tũm o mẽ ahkre xwýnh mẽ mẽ õ patre krãhtũm mẽ Ijaew krãhtũmjaja

nhũm mẽ kot mẽ kãm kën maati kaga xwýnhjê jarênh o te mẽ tãm harênh pyrækja ma nhũm ja mẽ kêp omnuj nê. Jakamã nhũm mẽ kãm unênh nê haxàr prãm nê. Nom amnhĩ tã kãm mẽ kot mar o kuhê xwýnhjê puma nê. ¹³ Jakamã na prem ma mra nê hapôj hãmri nê Jejus wýr Parijew nhõ xwýnh mẽ pahi Eroxo kôt mẽ pa xwýnh kwýjê rê. Mẽ kot hêx rom mẽmoj tã hkukjêr nhũm kot mẽ mar nê tanhmã Rõm nhõ xwýnhjê nhõ pahi Sesti kapêr kuhpa hã ri tanhmã mẽ kãm nê nhũm mẽ kot mar kaxyw. ¹⁴ Jakamã nhũm mẽ ma hwýr mra nê hêx rom kãm kapêr nê kãm:

—Kwa Jejus? Nà ãm hãmri na ka hte Tirtũm kapêr o mẽ ahkre mex nê. Na ka hte mẽ kamã akahak o apa hkêt nê. Nê mẽ kot tee ri mẽ kot tanhmã ato kapêr punuj to htã ka hte arĩ aprĩ hã mẽ ahkre mex o ri apa. E kwa mẽ inhmã mẽmoj jarê. Rõm nhõ pahihiti kot mẽ pahpê Ijaew mẽ pahte kãm kãxpore hkwý nhõr ã mẽ pamã karõta. Kwa xà ja amã mex nà? Xà kot pu mẽ kãm kugõ? Xà kot pu mẽ kãm õr kêt nê? E kwa mẽ inhmã harê. Anê.

¹⁵ Nhũm prem ã hêx rom ja hã hkukjêr anhýr tã no nhũm Jejus mẽ hamaxpêr ã mẽ omunh mex mẽ mẽ kãm:

—Tk. Kwa mon ka mẽ axêx rom ja hã ixkukja? E mẽ atõ inhmã kãxpore htýxre hõ gõ pa omu. Anê.

¹⁶ Hãmri nhũm ja kãm ja gõ nhũm kupy nê kãnhmã kupê nê mẽ kãm:

—E mẽhõ nhĩxi nê mẽhõ karõ na hã? Anê. Anê nhũm mẽ kãm:

—Pahi Sesti karõ nê hixi na hã.

¹⁷ Anê nhũm mẽ kãm:

—Tý. Tô kër ka mẽ mãmri kãm hkwý nhõr o apa. Hã hkarõ nê hã hixi. Tãm kot hipêx xwýnh jakamã õ na. No mẽ kajaja na pre Tirtũm mẽ anhĩpêx nhũm mẽ apê õ jakamã kwa kër ka mẽ kapêr kôt pix mã ri amnhĩ nhĩpêx o ri apa. Anê.

Nhũm pre ã mẽ kãm kapêr anê nhũm mẽ piitã mar o kuhê. Nhũm mẽ kot hêx rom hkukjêr xwýnhjaja amnhĩ jaêr pê ã kãxpore jarênh anhýrja ã kuma nê axpên mã:

—Kwa mẽ paxêx rom mẽ pahte hã hkukjêr tã nhũm ãm hãmri mẽ pakutã mẽ pamã harê. Kwa tanhmã kot puj wem hkukjêr to nhũm pahi Sesti kapêr kwým ri mẽ pamã mẽmoj jarê? Anê.

Hãmri nê tee ri tanhmã hkukjêr to hkukamã hamaxpêr o kuhê.

Akupým mẽ htír xwýnhjê jarênh

Matêwre 22.23-33; Rukre 20.27-40; Juãw 6.21, 6.38-40; mããnên Wam Korĩt 6.14, 15.12-28; Wam Tesarõn 4.13-18

¹⁸ Tã nhũm Satusew nhõ xwýnh kwýjaja. Mẽ kot akupým mẽ htír mã hamaxpêr kêt xwýnhjaja na pre mẽ. Tã mẽ kot mẽ htyk nê mẽ hapêx ã mẽ hkamnhĩx jakamã na prem axpên mã Jejus jarênh o:

—E kwa pu mẽ ma hwýr mra nê mẽmoj xihtýx ã hkukja kê mẽ pama nê tee ri tanhmã mẽ pamã kapêr to hkukamã hamaxpêr. Hãmri nhũm mẽ piitã ja hã omu nê àhpumunh kêt ã omunh kurê kumrêx. E tokyx ma pu mẽ hwýr. Anê.

Hãmri nê ma hwýr mra nê Parijew nhõ xwýnhjê pyrã nê hêx rom kãm:

¹⁹ —Pa Jejus? Kwa mẽ inhmã mẽmoj jarê. Na pre finat Mojesja Tirtũm nhỹ hã ã mẽ panhĩgêjtjê mã karõ anê. Mẽ hkra hkêt rãhã mẽ pa nê mẽ htyk xwýnhjaja nhũm mẽ harênh o:

Koja mẽhõ hprõ hãmri nê kamã hkra hkêt rãhã pa nê ty. Hã koja hkôt htõja hpãnhã hprõ o hprõ nê kamã hkra. Hãmri nhũm kato nê te kêp htõ htyk xwýnhhta hkra pyræk. Anê.

Na pre ã Mojes Tirtũm nhỹ hã ja hã mẽ kãm karõ anê. ²⁰ Jakamã kwa ga mẽ ixujarênh ma. Koja mẽmojjaja mẽ kot axpên to htõ xwýnhjaja kêp 7. Nhũm kot waja hprõ. Nê wa pa nhũm myja kormã hprõ kamã hkra hkêt rãhã ty. ²¹ Nhũm hkôt htõ hõta hpãnhã hprõ ho hprõ nê wa axpên to pa. Nhũm haxwýja kamã hkra hkêt rãhã ty. Nhũm hkôt htõ hõta haxwýja ho hprõ nê wa axpên to pa grire nhũm wamta wa uræk nê kamã hkra hkêt rãhã ty. ²² Hãmri nhũm htõ hkwýjaja piitã nija pyxi nê axpên pãnhã ho hprõ nom mẽhõ kamã hkra hkêt rãhã htyk pa. Hãmri nhũm mẽ hprõta mẽ hkôt amnhĩ to hitep nê ty. ²³ Tã Tirtũm kot akupým nhýrmã mẽ ho htír ronhýx nhỹ nhỹx kêp nija mjên kumrêx? Ra piitã kot ho hprõ kênã. E kwa mẽ inhmã ja jarê. Anê.

²⁴ Hãmri nhũm Jejus ã mẽ ujarênh anhýrja ma nê mẽ kãm:

—Tk. Nà mẽ ate Tĩrtũm kapẽr ã kagà htũm mar mex kêt. Nẽ mẽ aprĩ hã tanhmã Tĩrtũm kute hã omunh kêt jakamã na ka mẽ ã atỳx ja hã ixkukjêr anẽ. ²⁵ Kormã mẽ htĩr ri mẽ kot Tĩrtũm kôt amnhĩ xunhwỳr xwỳnhjaja na htem ty hãmri nẽ Tĩrtũm nhõ krĩ kamã axte kãm hprõ hprãm kêt pa. Rỳ ni japêr nẽ kãm mjên prãm kêt nẽ pa. Hãmri nẽ Tĩrtũm kapẽr o mẽ wrỳk xwỳnhjê pyrã nẽ axte htyk kêt nẽ. ãm htĩr tũm rãhã nẽ pa ho pa.

²⁶ —Nom mẽ ate akupỳm mẽ htĩr kêt ã mẽ hkamnhĩxja kot paj ixprĩ hã mẽ amã harẽ. Amnepê m na pre Tĩrtũm pĩ hpòk kamã tanhmã Mojes mã kapẽr to. Mãn ra mẽ ate mar. Na pre kãm:

Ixpê Apraãw nhõ Tĩrtũm na pa. Nẽ mããnẽn
ixpê Apraãw kra Ijak mẽ htãmnhwỳ
Jako wa õ Tĩrtũm na pa.

Anhỹr o Mojes mã amnhĩ jarẽ nhũm kuma nẽ hã kagà. ²⁷ Kêp apu arĩ mẽ htyk rãhã nhỹx pre ã mẽ harênh anhỹr kêt nẽ. Nhỹx pre mẽ harênh o: “Amnepê m Apraãw nẽ hkra nẽ htãmnhwỳ mẽ htĩr ri ixpê mẽ õ Tĩrtũm na pa pre.” Anhỹr o nhỹx pre mẽ harẽ. Nom na pre ã amnhĩ jarênh anhỹr kêt nẽ. Mẽ pamã te Apraãwja mẽ htyk nẽ mẽ hapêx pyrãk. Nom nhũm prem ra Tĩrtũm ri akupỳm htĩr nẽ mex nẽ pa ho pa. Tã ka htem Tĩrtũm kapẽr kwỳm ri akupỳm mẽ htĩr kêt ã mẽ harênh o apa. Anẽ.

Tĩrtũm kapẽr maati jarênh

Matêwre 10.37, 22.34-40; Rukre 10.25-27; mããnẽn Wam Juãw 2.15, 5.3; Apokarip 2.4

²⁸ Tã nhũm Tĩrtũm kapẽr tũm o mẽ ahkre xwỳnhjê hõ mẽ hwỳr tẽ nẽ mẽ kot axpên mã kapẽr ã mẽ omunh o xa. Hãmri nẽ Jejus kot tanhmã Satusew nhõ xwỳnhjê mã kapẽr mex toja ma nẽ kãm:

—Nà ãm hãmri na ka ã mẽ kãm ja jarênh anẽ Pahшти. Kwa inhmã mẽmoj jarẽ. Na pre Tĩrtũm ahpỳnhã mẽmoj to 10 nẽ mẽ pamã hã karõ. Mẽ pahte hkôt amnhĩ nhĩpêx o ri papa kaxyw hã mẽ pamã karõ. Tã nhỹ kapẽr na mex o kot hkwyjê jahkrenh wehe? Anẽ.

²⁹ Hãmri nhũm kãm:

—Nà Tĩrtũm kapẽr xohtô. Kapẽr piitã hkôt mẽ pahte amnhĩ nhĩpêx o papaja na kãm hprãm. No pixi na mẽ pahte hkôt amnhĩ nhĩpêx o papaja nhũm kãm hprãm

tỳx o kot hkwyjê jakrenh. Kapẽr mex maati na ja. Na pre kapẽr o:

E mẽ apê Ijaew nhõ xwỳnhjaja. Ixpê mẽ anhõ Tĩrtũm ã ixpexi mex na pa.

³⁰ Jakamã kêr ka mẽ amã ixkĩnh tỳx o mẽmoj piitã hakrenh pa. Jao mẽ anhĩ piitã ho amã ixkĩnh tỳx kumrêx o ri apa.

³¹ Anhỹr o na pre mẽ pamã karõ. Nẽ hkôt ja:

Kêr ka mẽ nhãm mẽ hipêx o te ka amã amnhĩ tã ma pyrãk o mẽ hipêx o ri apa. Jao tãm mẽ hipêx rãhã ho ri apa. Anẽ.

E ja wa kumrêx na Tĩrtũm kãm mẽ pahte hkôt amnhĩ nhĩpêx o ri papa hprãm tỳx nẽ. Anẽ.

³² Hãmri nhũm kuma nẽ kãm:

—Nà ãm hãmri na ka ja jarẽ Mějiahkre xwỳnh. Tĩrtũm pyxi mex kênã. ³³ Amnepê m na pre htem kãm amnhĩ jarênh kaxyw nẽ kãm mẽmoj gõ nẽ rĩ kormã tanhmã kãm amnhĩ jarênh to. Tã nom kot puj mẽ ã ate harênhta kôt amnhĩ nhĩpêx anhỹr o papa jao mẽ panhĩ piitã pamã Tĩrtũm kĩnh. Nẽ mẽ pamã hkĩnh o mẽmoj piitã hakrenh pa. Nẽ nhãm mẽ hipêx o te mẽ papamjaja pamã amnhĩ tã ma pyrãk o mẽ hipêx. Jao tãm mẽ hipêx rãhã ho ri papa. Kot puj mẽ ã amnhĩ nhĩpêx anẽ nhũm Tĩrtũm kãm ja mex o mẽ pahte kãm mẽmoj nhõrta jakre.

Anhỹr o kãm kapẽr. ³⁴ Hamaxpêr mex pê ã Jejus mã kapẽr anẽ nhũm kuma nẽ kãm:

—Nà ãm hãmri na ka ja jarẽ. Na ka ra mẽ kot Tĩrtũm kôt amnhĩ nhĩpêx o amnhĩ nhĩpêx nyw pumunh mex o mõ. Nà te ate tokyx hkôt amnhĩ xãm kaxyw pyrãk. Anẽ.

Hãmri nhũm mẽ kãm hkurê xwỳnhjaja tee ri wa kot axpên mã kapẽr mar o kuhê nẽ axte kãm mẽmoj tã hkukjêr pyma nẽ. Ra tee ri mẽ kot hêx rom mẽmoj tã hkukjêr kaprỳ jakamã axte tanhmã hkukjêr to hkêt nẽ.

Jejus kêp pahi finat Tawi nhõ Pahшти hã harênh

Matêwre 22.41-46; Rukre 20.41-44; mããnẽn Rômãn 1.3-4

³⁵ Hãmri nhũm Jejus arĩ Tĩrtũm mã amnhĩ jarênh xà hã ixkre kamã amnhĩ tã mẽ ahkre. Nom te nhãm mẽhõ hã mẽ hkukjêr pyrãk amnhĩ tã mẽ hkukja nẽ mẽ kãm:

—E mẽ inhmã mẽmoj jarẽ. Tĩrtũm kapẽr tũm o mẽ ajakre xwỳnhjaja na htem tanhmã

mě amã Tirtũm kot mẽ akaxyw ãm mã xwýnh jarẽnh to nẽ mẽ amã harẽnh o: “Koja kęp pahi finat Tawi kanrẽhã htãmnhwý koja.” Anhỹr o kot mẽ amã harẽ. ãm kęp kanrẽhã htãmnhwý pix ã mẽ amã harẽnh o pa. No na pre pahi Tawija kęp kanrẽhã htãmnhwý hã harẽ nẽ mããnẽn kęp õ pahihiti hã harẽ. Tã nom nhũm Tirtũm kapẽr tũm o mẽ ajahkre xwýnhjaja na htem urã nẽ kęp pahihiti hã mẽ amã harẽnh kêt nẽ. ãm kęp kanrẽhã htãmnhwý pix ã harẽ. Kwa mo na htem Tawi pyrã nẽ kęp õ pahi hã harẽnh kêt nẽ? ³⁶ Na pre Tawi tãm Tirtũm kapẽr tũm kwý hã kagã nẽ tanhmã Tirtũm kot mẽ akaxyw ãm mã xwýnhja jarẽnh to. Tirtũm Karõ nhỹ hã tanhmã harẽnh to. Tirtũm mex ã mẽ grer xãja kwý hã kagã nẽ hã kagã ho: Tirtũm na pre inhõ Pahihiti mã ã kapẽr anẽ nẽ kãm: “E amnẽ ixwýr tẽ nẽ inhĩhkõ hã nhỹ nẽ inhmã mẽ ho amnhĩptãr o akrĩ. Kot paj mẽ kot kãm akurẽ xwýnh piitã mẽ unẽn pa nẽ awýr mẽ o mra nẽ anhĩhkram mẽ haxãr pa.” Anhỹr o pre kãm kapẽr. Anẽ.

³⁷—Na pre ã Tawi Tirtũm kot Kris mã kapẽr jarẽnh nẽ kęp õ pahi hã kagã anẽ. Tã nom Tirtũm kapẽr tũm o mẽ ajahkre xwýnhjaja na htem kęp Tawi htãmnhwý pix ã ri axpẽn mã harẽnh o ri pa. No kêt Tawija na pre kęp õ Pahihiti hã harẽnh o pa. Anẽ.

Nhũm pre ã Jejus mẽ kãm amnhĩ jarẽnh anẽ nhũm mẽ mar o kuhẽ xwýnhjaja kuma nẽ hkĩnh nẽ. Nẽ kãm axte mar prãm nẽ.

³⁸ Hãmri nhũm arĩ mẽ ahkre ho nhỹ nẽ mẽ kãm:

—Kwa mẽ o kora. Kër ka mẽ Tirtũm kapẽr tũm o mẽ ahkre ho mẽ pa xwýnhjẽ kot amnhĩ nhĩpẽx o amnhĩ nhĩpẽx kêt nẽ. Mẽ omu nẽ ãm mẽ omu nẽ mẽ kot amnhĩ nhĩpẽx kõt amnhĩ nhĩpẽx kêt nẽ. Na htem piitã mẽ hã hpjiaãm kaxyw ê mex pix kãm ri pa. Nẽ mẽ kot amnhĩm mẽ rũnh ã mẽ harẽnh nhũm mẽ kot amnhĩ jarẽnh marja na htem kãm hprãm. ³⁹ Nẽ Tirtũm kapẽr o mẽ ahkre xã hã ixkre kamã mẽ kãm amnhĩ to rũnh xwýnhjẽ hkrĩ xã mex pix kamã na mẽ kãm hkrĩ hprãm. Nẽ mẽmoj tã mẽ apkur xã hã arĩgro hã ma hkwýjẽ hkõt mẽ apkur xã hã ixkre hwýr akuprõ nẽ kãm mẽ kot amnhĩ to rũnh xwýnhjẽ hkrĩ xã mex pix kamã hkrĩ hprãm.

⁴⁰—Nẽ mẽ kot mẽ mjên htyk xwýnhjẽ ho mex o pa hã amnhĩ jarẽnh tã amnhĩ to hẽx. Nẽ na htem axtem nẽ mẽ nokupyr kaxyw mẽ hwýr mra nẽ mẽ kãm: “E ot pa awýr ato ajuta kaxyw tẽ. Ra amjên apẽ htyk jakamã kot paj pam amã akukrẽx jamãr o ixpa.” Anẽ hãmri nẽ mẽ kęp mẽ õrkwý pytà nẽ amnhĩm mẽ kęp mẽ hikukrẽx piitã ho hapẽx. Te tãm kot mẽ hipẽx o pa pyrãk nom tãm mẽ hipẽx kêt nẽ. Nẽ te tãm amnhĩ nhĩpẽx pyrã nẽ Tirtũm mã amnhĩ jarẽnh japjẽ ho kuhẽ. Te mẽ kot Tirtũm mã ãm hãmri amnhĩ jarẽnh pyrãk tã hkwýjaja kot ja hã mẽ omunh pix kaxyw nhũm mẽ ã kãm amnhĩ jarẽnh anẽ. Mýrapẽ koja mẽ mex kêt nẽ. Koja Tirtũm tanhmã mẽ hipẽx kati hto. Jakamã kwa kër ka mẽ ã mẽ kot amnhĩ nhĩpẽx anhỹr o mẽ pa xwýnhjẽ kõt amnhĩ nhĩpẽx o ri apa hkêt nẽ. ãm kwarĩ ho kwarĩ. Anẽ.

Kęp mjên htyk xwýnh jarẽnh

Rukre 21.1-4

⁴¹ Nhũm Jejus arĩ Tirtũm mã amnhĩ jarẽnh xã hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwýnhjẽ mã hikãxpore hkwý nhõr o pa. Nhũm mẽ hikãxpore rũnh xwýnhjaja hwýr agjẽ nẽ kãxpore gjẽn xã kamã hkwý ho rax nẽ hagjẽ nẽ ma akupým mra. ⁴² Tã nhũm mẽhõ ni pẽ mjên htyk xwýnhja haxwýja hwýr axã. Kęp amrakati kumrẽx. Nẽ hikãxpore týxre ãm pijakrutre htã kãxpore rũnh xwýnhjẽ hpãnhã ixkreta wýr tẽ. Nẽ kãm Tirtũm kĩnh xãj kãxpore gjẽn xã kamã hamẽ kumẽ hãmri nẽ kato nẽ ma akupým tẽ. ⁴³ Hãmri nhũm Jejus amým ã kot amnhĩ nhĩpẽx anhỹr ã omunh o xa nhũm ja kãm mex nẽ. Hãmri nẽ hkõt mẽ pa ho mẽ pa xwýnhjẽ mã harẽ nẽ mẽ kãm:

—E mãn ka mẽnire htẽm mũj pumu. Na pre mjên kęp ty nhũm kęp amrakati nẽ hikãxpore grire htã amnhĩ pẽ õr pa. Kwýjẽ rom kãm Tirtũm kĩnh xãj amnhĩ pẽ õr pa. Apkur xã hã hikãxpore na. ⁴⁴ Kêt mẽ hkwýjaja na hte hikãxpore hkwý pix o mra nẽ gjẽn xã kamã hagjẽ nom arĩ mẽ hikãxpore rũnh. No nija na mẽ urãk nẽ kãm hikãxpore japẽ hkêt nẽ. Nẽ ho õxý hkêt nẽ ãmnhĩx piitã o tẽ nẽ õr pa. Anẽ.

13

Jejus kot nhÿrmã mẽmoj piitã ho hapêx ã harênh

Matêwre 24.1-14; Rukre 21.5-9, 21.17-19; mãânên Wam Ximotre 4.1; Sikün Ximotre 3.1

¹ Tã hãmri nhũm Jejus kôt mẽ pa ho mẽ pa xwÿnhjaja arĩ Tĩrtũm mã amnhĩ jarênh xà hã ixkre kaxwÿnh pumunh o kuhé nê hã Jejus mã:

—Hêxta waa nê. Ixkreja mex kumrêx Pahihti. Kên rũnh o mẽ kot hipêx jakamã mex o mex. Nê mẽ kot ri Tĩrtũm mã hkĩnh xà nhôr nêj haxwÿja piitã mex kumrêx. Anê.

² Hãmri nhũm mẽ kãm:

—Nà mex tã koja nhÿrmã mẽ kãm Tĩrtũm kurê xwÿnhjaja grành pa. Koja arĩ kên axkrut্রে axpên mÿnh nê nõr kêt kumrêx. Koja piitã angrà nê ahpÿnhã ri hikwÿ.

Anhÿr o mẽ kãm kapêr. ³ Hãmri nê ixkreja rũm kato nê ma tẽ nê hixêt pê Oriwêhti hã api nê hã nhÿ. Tĩrtũm nhôrkwÿ kutã hixêtja nhũm hã api nê hã nhÿ. Hãmri nhũm Simãw Pêtre mẽ Xiakre mẽ Juãw mẽ Andreja ma hkôt mra. Ahte hkôt mra nê mẽ kot Tĩrtũm mã amnhĩ jarênh xà hã ixkre grành par ã hkukja nê kãm:

⁴ —Kwa xà ãm hãmri koja mẽ ã ixkreja nhĩpêx anê? E aprĩ hã mẽ inhmã harê. Xà koja mẽ nhÿrmã kugrà nà xà koja mẽ tokyx ho anê? Kwa mẽmo koja we wÿj ri tanhmã amnhĩ nhĩpêx to? Anê.

⁵⁻⁶ Hãmri nhũm mẽ kãm:

—Nà kot paj mẽ amã harê. Nom nhÿrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkwÿjê hwÿr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê mẽ amã: “E pa na pre Tĩrtũm mẽ awÿr inhmẽ. Ixpê kaxkwa rũm ixwryk xwÿnhhta na pa.” Anhÿr o mẽ akôt mẽ amã amnhĩ to hêx o pa. Nê mẽ amã: “E na pa mẽ ato amnhĩptar kaxyw mẽ awÿr wrÿ.” Anhÿr o mẽ amã amnhĩ jarê. Nom kêr ka mẽ ama nê ãm mẽ ama. Mẽ kot amnhĩ to hêx xwÿnh na mẽ. Kormã akupÿn ixpôx xà hã arĩgroja kormã.

⁷ —Nê koja mẽ nhÿri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj

piitã hapêx ã hkamnhĩx kêt nê. Mẽmoj piitã hapêx xà hã arĩgroja kormã.

⁸ —Nê koja mẽmoj piitã hapêx kaxyw nhũm ahpÿnhã ri pika piitã hkôt mẽ pa xwÿnh piitã pika hõ nhõ xwÿnhjê kutã amnhĩ xunhwÿ nê axpu nê axpên pa.

—Nê koja pika piitã hkôt tanhmã mẽ à kuteja mẽ hamÿ nhũm mẽ amnhĩ xà htÿx kãm hamak o pa. Nhũm nhÿri pika httert tÿx nê. Nê nhÿhÿnh pika hkwy kamã mẽ pa xwÿnhjaja prãm xàj pikaprãr pa. Tã nom kormã mẽ kot amnhĩ xà htÿx kãm hamak xà hkrax pix na ja. Te mênijaja pijagri kaxyw nê kormã ôhy xà hpÿnh pyrãk. Koja mẽmoj piitã hapêx kaxyw nê ã amnhĩ nhĩpêx anê.

⁹ —E pa hpãnhã mẽ kot Tĩrtũm mã amnhĩ jarênh xà hã ixkre grành par xwÿj ri mẽmoj tanhmã kot hkukamã amnhĩ nhĩpêx to hã hã harê. Mẽ ate hã ixkukjêr xwÿnhhta kot paj mẽ amã harê. Nà koja mẽ kãm ixkurê xwÿnhjaja mẽ awÿr mra nê ixtã mẽ apynê nê mẽ atomnuj nê. Nê ma mẽ pikuprõnh xà hã ixkre hwÿr mẽ ato mra nê kamã mẽ kãm mẽ ato kapêr punuj nê nhũm mẽ kuma nê ma mẽ ato mra nê mẽ ajagjê. Mẽ ate ixkôt apa ho apa xwÿnh ã ã mẽ anhĩpêx anê. Nê mẽ ô pahihti hwÿr mẽ ato mra nê mẽ kãm tanhmã mẽ ato kapêr punuj to.

¹⁰ Tã nom kwa kêr ka mẽ kutã akuhê nê mãmrĩ tãm mẽ kãm ijarênh o akuhê. ¹¹ Nom kêr ka mẽ kãm amnhĩ jarênh kukamã tee ri ajamaxpêr o ri amã mẽ uma hkêt nê akuhê. Rÿ mẽ ajamaxpêr o: “Hêxta waa nê. Mẽ kot ixkukjêr ã arĩgrota ã tanhmã kot pa we ri mẽ kãm amnhĩ jarênh to?” Anhÿr o tee ri amnhĩ kukamã ajamaxpêr kêt nê. Koja Tĩrtũm Karõ tanhmã mẽ akrã hto ka mẽ ÿ hã akatãt kôt tanhmã mẽ kãm amnhĩ jarênh to.

¹² —Nê mẽ atõ nê mẽ anhĩpêxà nê mẽ akrajaja koja mẽ ixtã mẽ atã amÿnê nê ma pahi hwÿr mẽ ato mra nê kãm mẽ ajarê nhũm mẽ kuma nê mẽ ajagjê nê mẽ akwÿjê pa. ¹³ Koja mẽ piitã ixkôt mẽ akamã gryk nê ã kãm mẽ akurê ho pa anê. Nom mẽ kot ã mẽ anhĩpêx anhÿr mã tã kêr ka mẽ amnhĩ to htÿx nê ixkaga hkêt nê. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri nê mẽ kurom Tĩrtũm mẽ wa ixri atĩr tũm nê amex rãhã nê apa

ho apa. Mě kot tanhmã mẽ ato htã mẽ apê akupÿm kaxkwa kamã atÿr tÿm nẽ apa mã xwÿnh jakamã kwa tee ri amnhĩ kukamã ajamaxpër o ri apa hkêt nẽ. Anẽ.

Mẽ pahtomnuj tÿx xwÿnh maati hã harẽnh

Matêwre 24.15-28; Rukre 21.20-24; mããnẽn Sikÿn Tesarõn 2.3-4; Apokarip 13.11-17

¹⁴⁻¹⁶ Nhÿm Jejus arĩ mẽ kãm kapër nẽ mẽ kãm:

—Nẽ koja nhÿrmã kot mẽ atomnuj tÿx kumrẽx xwÿnh maatija axtem nẽ Tÿrtÿm mã amnhĩ jarẽnh xà hã ixkreja kamã amnhĩ xãm. Hãmri ka mẽ ja hã omu nẽ mẽ kot krĩ grãnh par mã ajamaxpër kurê kumrẽx. Koja ã amnhĩ nhĩpêx anẽ ka mẽ amÿm amnhĩ wÿr mẽ omu hãmri nẽ ajapøj nẽ ma aprõt nẽ amrar kurê kumrẽx. Mẽ apê jar pika pẽ Jutej kamã mẽ apa xwÿnhjaja mẽ omu hãmri nẽ mẽ kot mẽ apar pymaj ma aprõt nẽ amrar kurê kumrẽx. Hixêt prêk wÿr ajapøj nẽ aprõt nẽ ma mra. Nẽ jar Jerujarẽ nhõ xwÿnhjaja kê mẽ umaj haxwÿja hapøj nẽ ma hprõt nẽ ma mra o mra. Nẽ kapõt ã ri mẽ pa xwÿnhjaja kê mẽ ê jamÿnh kaxyw akupÿm krĩ hwÿr gjêx kêt nẽ. ãm ma mẽ umaj hprõt nẽ mra o mra kurê kumrẽx.

¹⁷ —Nẽ mẽ htujarõ xwÿnhjaja nẽ mẽ hkra karãre xwÿnhjaja. Jajê pẽ koja mẽmoj omnuj tÿx nẽ. Tanhmã kot wem amnhĩ to nẽ hprõt tÿx? Nà pika ja kamã koja mẽ mex kêt nẽ. Mẽ kot amnhĩ tomnuj mÿrapê koja Tÿrtÿm tanhmã mẽ homnuj tÿx to.

¹⁸⁻¹⁹ —Koja ã mẽmoj amnhĩ nhĩpêx anẽ hãmri nhÿm mẽ piitã amnhĩ xà htÿx kãm hamak rÿnh o pa. Tÿrtÿm kot mẽ piitã mẽ ho kator krax rÿm amnẽ mẽ pa xwÿnhjaja na mẽ kormã à htÿx kamã hamak rÿnh kêt nẽ. Kormã amnhĩ xà kamã hamak kryre. No nhÿrmã mẽ hprõt xà hã arĩgrota ã koja mẽ amnhĩ xà htÿx kamã hamak rax kumrẽx.

—Tã akupÿn ixte mẽ awÿr ixwrÿk xà hã arĩgrota ã kot pa mẽmoj punuj o ijapêx pa ka mẽ axte ã mẽmoj kot anhÿr pumunh kêt nẽ. Nom kormã akupÿn ixwrÿk xwÿj ri kot kaj mẽ amnhĩ xà htÿx kamã ajamak o apa. Jakamã kêr ka mẽ ã amnhĩ nhĩpêx anhÿrja kukamã amnhĩ to Tÿrtÿm wÿ nẽ kãm: “Pa

Tÿrtÿm. Kwa kê mẽmoj ã amnhĩ nhĩpêx anhÿr kaxyw hãmri kê amgrã pẽ ã amnhĩ nhĩpêx anẽ. Koja na pẽ ã amnhĩ nhĩpêx anẽ nhÿm omnuj tÿx nẽ.” Anhÿr o amnhĩ to awÿ.

²⁰ —Mẽ hprõt xà hã arĩgrota ã koja Tÿrtÿm kãm mẽ apê hkrajaja mẽ atyk par pymaj mẽ anẽ mẽmo punuta ã arĩgro hkwÿ grã nẽ mẽ akukamã mẽ amã ho grêre. Koja mẽ akamã ukapri xaj ã mẽ anẽ hipêx anẽ.

²¹ —Nẽ koja ã mẽmoj amnhĩ nhĩpêx anhÿr kaxyw hãmri nhÿm mẽ hêx o mẽ pa xwÿnhjaja ma mẽ awÿr mra nẽ hêx rom tanhmã mẽ amã kapër to nẽ mẽ amã: “E ota ra Tÿrtÿm kot mẽ pakaxyw ãm xwÿnhhta pøj. Kwa mẽ tokyx hwÿr mra nẽ omu nẽ hkõt ri apa.” Anhÿr o mẽ amã hêx. Hãmri nhÿm mẽ hkwÿjaja tee ri mẽ kuma nẽ mẽ amã: “Nà tãm kêt. Jar mẽ ixkamã na. E mẽ tokyx amnẽ hwÿr mãn mra nẽ omu.” Anhÿr o mẽ amã hêx o pa. Nom kêr ka mẽ ama nẽ ãm mẽ ama nẽ mẽ hkõt amrar kêt nẽ.

²²⁻²³ —E kwa mẽ inhma. Na pa ra ixprĩ hã mẽmoj kot ã amnhĩ nhĩpêx anhÿrja kukamã mẽ amã tanhmã harẽnh to. Tã kêr ka mẽ axkãm ajamak rom nẽ ri apa. Koja mẽ kot amnhĩ to hêx xwÿnhjaja axpën pãnhã mẽ awÿr mra nẽ mẽ amã kęp Tÿrtÿm kot mẽ akaxyw ãm xwÿnh ã amnhĩ to hêx. Nẽ mẽ hkwÿjaja kęp Tÿrtÿm nhÿ hã kapër jarẽnh xwÿnh ã amnhĩ to hêx. Hãmri nẽ aa mẽ kot mẽmoj pumunh kêt kwÿ ho anhÿr o pa. Te Tÿrtÿm nhÿ hã kot ho anhÿr pyrãk nom hêx rom mẽ apê Tÿrtÿm kot amnhĩm mẽ arẽnh xwÿnhjê nokupyr kaxyw ã amnhĩ nhĩpêx anhÿr o pa. Anẽ.

Akupÿn Jejus wrÿk xà hã arĩgro jarẽnh

Matêwre 24.29-31; Rukre 21.25-28; mããnẽn Sikÿn Pêtre 3.10; Apokarip 1.7, 19.11-16

²⁴⁻²⁵ Nhÿm Jejus arĩ mẽ kãm kapër nẽ mẽ kãm:

—Tã koja mẽ kot amnhĩ xà htÿx kamã hamak xà hã arĩgrota hapêx nhÿm Tÿrtÿm ã mẽmoj nhĩpêx anẽ.

Koja kaxkwa ho àk tÿx nẽ nhÿm myyti ahtyk.

Nhÿm mytwrÿre axte hirã hkêt nẽ.

Nhÿm kanhêti piitã axrê nẽ rôrøk pa.

26 Hāmri pa man akupÿn pika hwÿr wrÿ nhÿm mē piitā ixwrÿk kām ixpumu. Kakrā kamā kot paj ixihtÿx o inhÿrā rax kām akupÿn mē awÿr wrÿ. 27 Hāmri nē ma krÿ piitā hwÿr Tÿrtÿm kapēr o mē wrÿk xwÿnhjē rē nhÿm mē ma mra nē amnepēm ixte amnhÿ kaxyw mē axunhwÿr xwÿnh piitā ho akuprō nē akupÿn ixwrÿ mē ho mra. Anē.

Jejus kot mēmo pÿ hpār ā ejēp jarēnh

28 Nhÿm Jejus arÿ mē kām kapēr nē mē kām:

—E ka mē pÿ hpār mÿj pumu. Na hte mēmo mytwrÿ hā rā nhÿm mē omu nē ô hkukamā hamaxpēr kurē kumrēx. 29 Ja pyrā nē koja mēmoj ā amnhÿ nhÿpēx anhÿr mē ka mē akupÿn mē awÿr ixwrÿk mā ajamaxpēr kurē kumrēx. 30 Koja akupÿn ixpōx kêt ri ā mē kot mēmoj kot amnhÿ nhÿpēx anhÿr pumunh xwÿnhjaja kormā piitā htyk par kêt ri pa akupÿn mē awÿr wrÿ.

31 —Nē koja nhÿrmā pika nē kaxkwa wa hapēx pa. Tā no ām ixkapēr koja wa urāk nē aa hapēx kêt nē. Koja ām rāhā ho rāhā. Kot paj aa ihkjē ho tanhmā mēnh to hkêt nē. Anē.

Mē pahte akupÿn Jejus wrÿk xā hā arÿgro pumunh kêt ā mē pajarēnh

Matēwre 24.36-44; Rukre 12.37-40; māānēn Atre 1.9-11; Wam Tesarōn 5.2; Sikÿn Pêtre 3

32 Nhÿm Jejus arÿ mē kām kapēr nē mē kām:

—Nom akupÿn ixwrÿk xā hā arÿgroja mē ate omunh kêt. Nē kaxkwa kamā Tÿrtÿm kapēr o mē wrÿk xwÿnhjaja kot ja pumunh kêt. Nē pa ixpē Tÿrtÿm Kra htā ijaxwÿja ixte ja hā amnhÿ pumunh kêt. Ām Mēpahpām maatija tapxipix kot ja pumunh.

33 —Tā mē ate akupÿn ixwrÿk xā hā arÿgro pumunh kêt jakamā kwa kêt ka mē axkām ajamak rom nē ri apa. Nē apkati mē amnhÿ wÿr ijapēr arÿt rāhā ho ri apa.

34-35 —E pa tanhmā mē amā akupÿn ixwrÿk xā hā arÿgro jarēnh to ka mē inhma. Koja mēhō nhÿhÿm nojarēt hāmri nē kām mē āpēnh xwÿnhjē mā mē āpēnh ā karō nē ōrkwÿ jamār xwÿnh mā tanhmā kām karō hto. Hāmri nē ōrkwÿ kahē xā jamār xwÿnh mā kām: “E kêt ka ixwakre kamā ijapēr

arÿt rāhā ho ri apa.” Anē hāmri nē ma nhÿhÿm mō. Tā mē kot ijapēr rÿt rāhā ho mē pa xwÿnhjaja te kot ixkre kahē xā jamār xwÿnh kot amnhÿ nhÿpēx pyrāk. Ō patrāwja akupÿn hpōx xā hā arÿgro hā omunh kêt jakamā na hte kahē xā jamār rāhā ho pa. Koja apu axpēr kamāt nhÿm akupÿn hpōx japēr. Rÿ kôt ā kamāt rÿ krāhyre kà nhÿm akupÿn hpōx japēr. Rÿ kwÿhtyk nhÿm akupÿn hpōx japēr. Tā urāk nē mē ate akupÿn ixwrÿk xā hā arÿgro pumunh kêt jakamā kêt ka mē ijamār rāhā ho ri apa. Jao ixkutēp inhmā tanhmā amnhÿ nhÿpēx to rāhā nē. Ra ixte mē amā hā karō xā hkôt. 36 Kop ixkre kahē xā jamār xwÿnhja tee ri ō patrāw kamā ama hāmri nē ra ōtxwa nē htÿx ōt o ŷr rōm nhÿm haēr pē hwÿr hpōx ronhÿx ja kēp mex kêt nē. Ja pyrā nē kêt ka mē ixkutēp ixkôt amnhÿ nhÿpēx rāhā ho ri apa. Nom tee ri amnhÿ wÿr ixkām ama hāmri nē axte inhmā ajamaxpēr kêt pē atÿx ri tanhmā amnhÿ tomnuj to ho apa hkêt nē.

37 —E ixte mē amā mēmoj jarēnhja na pa hte ixkwÿjē piitā mē kām harē. Jakamā kwa kêt ka mē akupÿn ixwrÿk ā ijapēr arÿt rāhā ho ri apa. Anē.

Nhÿm pre ā Jejus amnhÿ kukamā mē kām ujarēnh anē.

14

Mē kot Jejus pÿr kukamā hamaxpēr ā mē harēnh

Matēwre 26.1-5; Rukre 22.1-2; Juāw 11.45-53

1 Tā nhÿm Ijaew hkÿnhā ā arÿgro pē Pas wÿr apkati axkrut. Pas ā na hte mē ixpē Ijaewjaja amnepēm Tÿrtÿm kot pika pē Ejit pē mē inhÿgēt nē mē ixpāmjē kator mā ijamaxpēr kaxyw axpēn wÿr akuprō nē hā ixkÿnh. Na pa htem arÿgroja mā: “Pas” anē. Nē harēnh o: “Mē pahte pāw kaxkrit kêt kur ā arÿgro” anē. 2 Jakamā nhÿm mē inhō patre krāhtÿmjē mē Tÿrtÿm kapēr tÿm o mē ahkre xwÿnhjaja kām Jejus pÿr prām nē. Nom mē kām hkôt kapēr mar o mē pa xwÿnhjē pyma nē. Nē tee ri hā amnhÿ jahkre nē axpēn mā:

—Hêxta waa nē. Tanhmā kot puj wem ho nē kupÿi? Kot puj mē pahkÿnh kām tanhmā ho nhÿm mē hkÿnh xwÿnhjaja hā mē pahpumu nē mē pakamā gryk tÿx nē.

Pu mẽ hã axpu nẽ hã tanhmã axpẽn to. Jakamã kwa pu mẽ kormã tanhmã ho hkết nẽ. Anẽ.

*Mẽhõ ni kot Jejus krã gregrer ã harẽnh
Matêwre 26.6-13; Rukre 7.36-50; Juãw
12.1-8*

³ Rôm nhũm Jejus Simãw nhõrkwy kamã kormã apkur o nhỹ. Krĩ pẽ Petãn kamã. Simãwja na pre hkà kro xapêr tỳx o pa nhũm Jejus akupỹn ho mex. Jakamã akupỹm õ krĩ hwỳr pøj nẽ kutã apkur o nhỹ. Hãmri nhũm mẽhõ nija harẽnh ma nẽ mẽ hkuxwa xà hã kàx õ py nẽ ma hwỳr o tẽ. Nẽ mẽ hwỳr axà nẽ nhỹhỹnh kàx kahte nẽ mẽ hkuxwa xà ho hkrã gregrer pa. ⁴ Hãmri nhũm mẽ apkur o hkrĩ xwỳnhjaja tee ri ã kot amnhĩ nhĩpêx anhỹr ã omu nẽ kamã gryk nẽ. Nẽ axpẽn mã:

—Tk. Kwa nà na hã mẽ hkuxwa xàta kapĩr par kumrẽx. ⁵ Kop apu ma o htẽm nẽ ho wẽnẽ nẽ hpãnhã kàxpore ho rax kumrẽx nẽ hamỹnh nẽ ho mẽ kệp amrakati xwỳnhjê nhĩpêx par nhỹx ja kãm mex nẽ. Mo na ri ã amnhĩ nhĩpêx anhỹr kêt nẽ?

Anẽ nẽ hã kãm akir. ⁶ Hãmri nhũm Jejus mẽ kuma nẽ mẽ kãm:

—Tk. Kwa mẽ kãm axàkjêr kêt nẽ. ãm hãmri na ã inhĩpêx anẽ. ⁷ Mẽ kệp amrakati xwỳnhjaja koja mẽ arĩ mẽ akôt pa rãhã nẽ. Ka mẽ amã mẽmo arĩgro hã mẽ ho ajuta hprãm nẽ tanhmã mẽ ho ajuta hto nẽ mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkết nẽ. Kot paj tokyx mẽ are. ⁸ Ixtyk nhũm mẽ kot ijaxàr kukamã na ã ixkrã gregrer anẽ. ãm hãmri na ã inhĩpêx anẽ. ⁹ ãm hãmri na pa mẽ amã ja jarẽ. Koja mẽ krĩ piitã hkôt axpẽn mã ixte tanhmã mẽ anẽ amnhĩ nhĩpêx to hã ijarẽnh o pa nẽ mããnẽn kot ã inhĩpêx anhỹrja mããnẽn harẽnh o pa. Nhũm mẽ piitã kot tanhmã ixto mex to hã harẽnh ma. Anẽ.

*Jut Kariot kot mẽ kãm Jejus ã àmnẽnh
kaxyw ã harẽnh*

*Matêwre 26.14-16; Rukre 22.3-6; Juãw
13.21-30*

¹⁰ Tã nhũm Jut Kariotja. Jejus kôt mẽ pa ho mẽ pa xwỳnh pẽ 12 hõ na pre. Tã axtem nẽ Satanasti nhỹ hã ma patre krãhtũmjê

hwỳr tẽ nẽ axtem nẽ tanhmã Jejus o mẽ mar to nẽ mẽ kãm:

—E ot pa mẽ amã Jejus jarẽnh o tẽ. Xà kot paj mẽ amã hã amỹnẽ ka mẽ hpãnhã inhmã amnhĩre nà? Anẽ.

¹¹ Hãmri nhũm mẽ kuma nẽ hkĩnh nẽ. Hãmri nẽ kãm:

—Nà kot paj mẽ amã amnhĩre. Anẽ.

Hãmri nhũm mẽ kuma nẽ kato nẽ ma tẽ nẽ Jejus pynẽn kaxyw htãnopxar o hkôt ri pa.

*Jejus kot ý hã kapêr o mẽ pa xwỳnhjê kutã
apkur ã harẽnh*

Matêwre 26.17-19; Rukre 22.7-13

¹² Tã nhũm arĩgro pẽ Pas kato. Amnepêm mẽ inhĩgêtjaja na prem ôwêhti hkrare hkwy pa. Tĩrtũm kot ja hã mẽ omunh nẽ Ejit kãm mẽ kãm mẽ hkurẽ xwỳnhjê nhĩhkra nẽ mẽ kator kaxyw na prem ã amnhĩ nhĩpêx anẽ. Jakamã na pa htem arĩ mẽ ixpẽ mẽ hkanrẽhã mẽ htãmnhwỳjaja Pas ã axpẽn wỳr akuprõ nẽ jam ijamaxpêr pẽ mẽ urak nẽ ôwêhti hkrare hkwy hpa nẽ pãwti kaxkrit kêt kãm kuku.

Jakamã nhũm Jejus kôt mẽ pa ho pa xwỳnh pẽ 12jaja Pas ã mẽ apkur xà hã Jejus kukja nẽ kãm:

—Kwa nhỹri kot paj mẽ akutêp Pas ã mẽ panhõ hã apê? Anẽ.

¹³ Hãmri nhũm mẽ kuma nẽ ja wa ho axkrut nẽ mẽ amnhĩ kukamã wa kumẽ nẽ wa kãm:

—E wa ma Jerujarẽ hwỳr wa tẽ. Nẽ hwỳr axà nẽ mẽhõ myja pumunh kurẽ kumrẽx. Nhũm amnhĩm gõ ru nẽ amnhĩ kre hã poti xãm nẽ o tẽ ka wa omu nẽ hã ajêt nẽ ma õrkwỹ hwỳr hkôt tẽ. ¹⁴ Hãmri nẽ ixkre nhõ dõn pumu nẽ kãm: “E Jejus na wa inhmẽ pa wa awỳr tẽ. Na awỳr pêr mẽnh o: ‘Nhỹri kot paj we ixkôt ri mẽ pa ho pa xwỳnhjê mẽ Pas ã axpẽn kutã apku?’ Anhỹr o na awỳr pêr mẽ.”

¹⁵ —Wa ã kãm akapêr anẽ kê war ama nẽ war amã õrkwỹ nhĩmõk ã ixkre rax õ jahkre. Ra kamã kaxyw mẽ paxàpkur xà hã mẽmoj piitãã. Ka wa omu nẽ mãmĩ kamã mẽ ixkutêp mẽ panhõ hã apê. Anẽ.

¹⁶ Hãmri nhũm wa kuma nẽ ma hwỳr tẽ. Nẽ krĩm axà nẽ ra kot wa kãm mẽmoj jarẽnh xà hkôt mẽmoj piitã omu nẽ mẽ kutêp mẽ kãm mẽõ hã àpênh o wa xa.

Jejus kot mēhō kot mē kām hā àmnēnh ā harēnh

Matêwre 26.20-25; Rukre 22.21-23; Juāw 13.21-30

¹⁷ Tā nhūm kamàtre nhūm Jejus mē hkôt mē pa ho pa xwýnhjaja wa hkôt mō.

¹⁸ Hāmri nē kýxpé ixkreja wýr api nē hwýr agjê nē apkur kaxyw hkrī hpa nē kormā apkur o hkrī nhūm Jejus mē kām:

—E pa mē amā mēmoj jarē ka mē inhma nē amnhī krām haxàr tỳx nē. Kot kaj mē ixkutā axàpkur o akrī xwýnhjê hō mē kām ixkurê xwýnhjê mā ixtā amýnê. Anê.

¹⁹ Hāmri nhūm mē tee ri kuma nē hkaprī htỳx nē. Nē axpēn pānhā amnhī tā hkukja nē kām:

—Kwa xà pa kot paj ā anhīpêx anê? Nà pa hkêt. Anê.

²⁰ Hāmri nhūm mē kām:

—Nà mē apê 12jê hō kot kaj ā inhīpêx anê. Mē ate ixkutā guhkrax kām anhō pāwti ho mry kagō nhek o akrī xwýnhjê hō kot kaj ixtā amýnê. ²¹ Tirtūm kapēr ā kagà htūm kot ixkukamā harēnh xà hkôt koja mē tanhmā ixto rax nē ixpī. Nom kot mē kām ixtā àmnēnh mā xwýnhta hêxta waa nē. Ā kot amnhī nhīpêx anhýrja mýrapê koja amnhī xà htỳx kām hamak rax kumrêx. Kop apu aa ò māmāj nhōxà hkre rūm kator kêt ronhỳx ja kām mex nē.

²² Anê nē kormā mē apkur o hkrī rôm nhūm pāwti hō py nē ho Tirtūm wý. Hāmri nē mē kām ho hkry nē mē piitā mē kām òr pa nē mē kām:

—E na pa mē amā pāwti ho hkry nē mē amā kugō. Ja pyrā nē koja mē ā inhīpêx anê nē te ixto hkry hpar pyrāk o inhīpêx pa amnhī xà htỳx kamā ijamak kām ty. Nom mē anê kot paj ty. E mē māmri aku. Anê.

²³⁻²⁴ Nē hpānhā wīhti hā kop py nē mā ho anê nē Tirtūm mā harē. Hāmri nē mē kām kugō nē mē kām:

—E mē kot ixpīr xà hā arīgrota ā koja ixkamrô axkapī. Nom koja mē amarī ixpīr nhūm amarī hpikapīr kêt nē. Ām paa. Pa kot paj mē anê mē ìhkram amnhī jaxà nhūm mē ā inhīpêx anê. Koja ixkamrô axkapī nhūm Tirtūm omu nē ixkukwak ri mē anê mē ate amnhī tomnuj piitā amnhī katut kôt rēnh pa nē mē ato hkra. Ra amnepēm kot ja hā amnhī jarēnh xà hkôt. Jakamā

e. Mē axpēn pānhā ixkamrô pikapīr mā ajamaxpēr pē ixte mē amā kop kām wīhti nhōrta o akôm o axpēn nhīpêx. Anê.

Nhūm pre ā mē kām amnhī jarēnh anē nhūm mē piitā ho hkôm o axpēn nhīpêx.

²⁵ Hāmri nhūm mē kām:

—Ām hāmri na pa mē amā amnhī jarē. Kot paj axte wīhti ho ixkôm kêt rāhā nhýrmā Inhō Papaj akupýn mē awýr inhmē. Hāmri pu mē rī kormā akupýn ixpôx xà hā arīgrota ā pahkīnh nē. Nom axtem tanhmā hā pahkīnh to. Anê.

²⁶ Nhūm pre ā mē kām kapēr anē hāmri nhūm mē Tirtūm mā mex o mex ā gre hāmri nē hapôx pa nē ma hixêt pē Oriwēhti hwýr mra.

Jejus kot Simāw Pêtre hkukamā tanhmā harēnh to

Matêwre 26.31-35; Rukre 22.31-34; Juāw 13.36-38

²⁷ Tā nhūm Jejus hkôt mē pa ho pa xwýnhjê hkukamā tanhmā mē kām ujarēnh to nē mē kām:

—E mē inhmā. Tirtūm kapēr ā kagà htūm kot ā mē pajarēnh kot anhýr.

Kot paj ôwēhti jamār o pa xwýnhja pī hāmri nhūm ôwēhti hpigrānh pa nē ma angrà nē ri mra.

Anhýr o te ixpê ôwēhti jamār xwýnh nhūm mē apê ôwēhti pyrāk ā mē pajarēnh. Tā kot puj mē ā amnhī nhīpêx anê. ²⁸ Mē kot ixpīr tā koja Tirtūm akupým ixto ixtīr. Pa akupým ixtīr nē ma mē akukamā pika pē Garirej wýr mō. Kamā kot puj mē axte axpēn pumu. Anê.

²⁹ Hāmri nhūm Simāw Pêtre tee ri mē amnhī tā kuma nē kām:

—Kwa nà. Ri ā mē ijarēnh anhýr kêt nē Pahihti. Kot paj akaga hkêt nē. Jajaja koja angrà nē hprôt nē ma mrar japēr no pa kot paj anhýr kêt nē. Anê.

³⁰ Hāmri nhūm kām:

—Nà kot kaj anê Simāw Pêtre. Koja apkati hkôt krāhyre hkàr kêt ri ka ra mē umaj ate ixkôt apa hkêt ā mē kām amnhī tā axàprār o axkrunêpxi kām ga. Kwa jam ajamaxpēr tỳx nē. Anê.

³¹ Hāmri nhūm tee ri amnhī tā kuma kām amnhī tā àprār kām hihtỳx nē kām:

—Tk. Kwa nà. Kot paj ā amnhī nhīpêx anhýr kêt nē. Koja mē tee akôt ixpīr mā tā

no pa ãm aa akaga hkêt kumrêx. Kot paj akôt ixpa ho ixpa rãhã nê. Anê.

Hãmri nhũm hkôt mē pa ho mē pa xwýnh kwýjê piitã ã kãm amnhĩ jarēnh anê.

*Jejus kot Tirtũm mã amnhĩ jarēnh
Matêwre 26.36-46; Rukre 22.39-46*

³² Tã nhũm Jejus ma nhỹri mē kot kãm “Gesēm” anhỹr xwýnhja wýr hkôt mē pa ho pa xwýnhjê ho mō. Hãmri nê mē kãm:

–E mē jar ixkutêp akrĩ. Pa ma mütũm tē nê Tirtũm mã amnhĩ jarē mãn. Anê.

³³ Hãmri nê amnhĩ kôt mē ho axkrunêpxi nê mē o mō. Simãw Pêtre mē Jepetew kra pijakrut pê Xiakre nê Juãwja nhũm amnhĩ kôt mē o mō. ³⁴ Hãmri nê amnhĩ kukamã mē kãm hkurê xwýnhjaja kot tanhmã hipêx tota kukamã hamaxpêr o ra amnhĩ kamã kahak tỳx o ra hkaprĩ nê. Hãmri nê hkôt mē mrar xwýnhjê mã kãm:

–Hêxta waa nê. Na pa tee ri amnhĩ xà htỳx kamã ijamakja kukamã ijamaxpêr nê amnhĩ kamã ixkahak tỳx o ixkaprĩ nê. Te ra ixkaprĩja kot ixpĩr o mōr pyrãk. Jakamã e mē jar anohtỳx nê ixto Tirtũm wýr o akrĩ kê tanhmã ixto pa mē kot tanhmã ixtoja kutã ixihtỳx nê. Anê.

³⁵ Hãmri nê mē kurũm htēm grire nê amnhĩ kamã kahak o Tirtũm mã amnhĩ jarēnh kaxyw htũ mýr pê htēm nê pikap nõ nê kãm:

³⁶ –Kwa Papaj. Hêxta waa nê. Inhmã amnhĩ xà htỳx kãm ijamak prãm kêt kumrêx. Na pa tee ri amnhĩ kukamã ijamaxpêr nê amnhĩ kamã ixkahak tỳx nê. Jakamã kot kaj amã inhnê ja ho ajapêx prãm nê mãmri ho ajapêx nhũm mē kãm ixkurê xwýnhjaja tanhmã ixto hkêt nê. Rỳ ko. Kot kaj amã mē kot tanhmã ixto hprãm kê mē mãmri tanhmã inhĩpêx to. Nom pam inhmã hprãm xà hkôt kêt.

³⁷ Anhỹr o Tirtũm mã amnhĩ jarē hãmri nê kãnhmã xa nê akupỹm Simãw Pêtreja mē hwýr tē nê mē omu nhũm mē ra htỳx gōr nê hikwỹ. Hãmri nhũm tee ri mē omu nê Simãw Pêtre mã kãm:

–Kwa Simãw Pêtre. E mē hãmri akrã hapōj. Kwa wem anohtỳx grire nê ixkutêp amnhĩ to Inhō Papaj wýr o akrĩ ³⁸ kê mē ixkôt tanhmã mē ato htã ka mē amã mē uma xãj ixkaga hkêt nê arĩ mē kutã amnhĩ to htỳx nê akuhê. ã mē amã mē ate amnhĩ

nhĩpêx anhỹr prãm nom kormã mē amã maa. Anê.

³⁹ Hãmri nê akupỹm tē nê axte Tirtũm mã tanhmã amnhĩ jarēnh to.

⁴⁰ Nê akupỹm mē hwýr tē nê mē omu nhũm mē axte ôt pa nê hikwỹ. Nhũm tē nê tee ri mē omu hãmri nê tanhmã mē kãm nê hkêt nê. ãm awjanã nê ma akupỹm tē nê axte Tirtũm mã amnhĩ jarē. ⁴¹⁻⁴² Hãmri nê akupỹm mē hwýr tē nê mē kãm:

–Kwa xàn ka mē arĩ gōr nê anhĩkwỹ? E mē tokyx akrã hapōj. Na mē ra ixwýr mrar nê kot ixpynênh mã. Koja mē tokyx ixkutã mē kot amnhĩ xunhwýr xwýnhjaja mē kãm ixtã amýnê. Ota ra kot ixtã mē kãm àmnênh xwýnhhta tē. E mē tokyx kãnhmã akrĩ pu mē kutã mra. Anê.

*Mē kot Jejus pynênh ã mē harēnh
Matêwre 26.47-56; Rukre 22.47-53; Juãw
18.1-11*

⁴³ Nhũm Jejus kormã mē kãm kapêr o ãm rãhã nhũm Jut Kariotja tē. Mē hkôt mē pa ho mē pa xwýnhjê hō htã nhũm ra amnhĩ kôt mē ohtō nê Jejus wýr mē o tē nhũm mē wapohti nê kō jamý nê hkôt o mra. Patre krãhtũm mē Ijaew krãhtũmjê mē Tirtũm kapêr tũm o mē ahkre xwýnhjaja ra Jut kôt mē kurê nhũm mē man hkôt Jejusja wýr mra. ⁴⁴ Na pre ra Jut Kariotja mē kãm tanhmã amnhĩ jarēnh to nê mē kãm:

–E kot paj nhỹri mē pahte unênh mã xwýnhhta pumu nê hwýr tē nê kahti hkôt kumý nê tanhmã kãm ixkapêr to. Ka mē ixpumu nê hwýr tē nê unê nê ma akupỹm o tē.

Anê hãmri nê ma hwýr mē o tē. ⁴⁵ Nê Jejusja pumu nê hwýr tē nê kãm: “Pa mē ijahkre xwýnh.” Anê hãmri nê kahti hkôt kumý. ⁴⁶ Hãmri nhũm hkôt mē mrar xwýnhjaja omu nê Jejus wýr mra nê unênh kurê kumrêx. ⁴⁷ Hãmri nhũm Jejus kôt mē pa ho mē pa xwýnhjaja tee ri ja hã mē omu nhũm hōja õ wapo kapa nê patre maati mã àpênh xwýnh kot mē hkôt htēm xwýnhhta mã wapo ho apê. Nê kot ho hkrã nhĩpôn mã tã kuhpaw nê upôk rũm hamak nhĩkjê krãhta. ⁴⁸⁻⁴⁹ Hãmri nhũm Jejus amnhĩ tã mē kot unênh xwýnhjê mã kãm:

–Kwa na pa pre apkati mē Tirtũm mã amnhĩ jarēnh xà hã ixkre kamã mē kãm ixujarēnh o ixpa ka prem tokyx ixpynênh

kêt nê. Tã jarãhã te ixte amnhĩ tomnuj xwýnh pyrã nê ixwýr wapohti nê kô hã akapên nê ixwýr atêm rax nê. Nom ra mẽ ate tanhmã ixto kaxyw arıgro kator jakamã mẽ mãmri tanhmã amã ixto hprãm xà hkôt tanhmã ixto. Tĩrtũm kapêr ã kagà htũm kot mẽ akukamã ã mẽ ate inhĩpêx anhýr ã mẽ ajarênh xà hkôt. Anê.

⁵⁰ Hãmri nhũm hkôt mẽ pa ho mẽ pa xwýnhjaja tee ri mẽ kot unênh ã mẽ omu hãmri nê mẽ umaj Jejus kaga nê ma hprôt pa nhũm ahte mẽ kuri xa. ⁵¹⁻⁵² Hãmri nhũm mẽ ma o tẽ. Nhũm kormã mẽhõ nyw xwýnhja tee ri ja hã mẽ omu nê ma Jejus kôt tẽ. Nhũm mẽ amnhĩ kôt omu nê kot unênh kaxyw kahty xà hã kupy nhũm mẽ umaj mẽ ìhkra kamã kahty xàja re nê ma hkênh nê hprôt nê tẽn akunok.

Ijaew nhõ patre maati kot Jejus kukjêr ã harênh

Matêwre 26.57-68; Rukre 22.63-71; Juãw 18.12-14, 18.19-24

⁵³ Tã nhũm mẽ ma mẽ õ patre maati nhõrkwý hwýr Jejus o tẽ. Hãmri nhũm patre krãhtũmjê mẽ Ijaew krãhtũmjê mẽ Tĩrtũm kapêr tũm o mẽ ahkre xwýnhjaja õrkwý hwýr Jejus ã akuprõ. ⁵⁴ Hãmri nhũm Simãw Pêtre mẽ hkôt tẽ nê mẽ hkôt patre maati nhõ kítare hwýr axà nê amým hã mẽ omunh o xa. Nhũm ra pòristijaja kítare kamã amnhĩm kuto nê hã ànhunh o hkrĩ nhũm mẽ hwýr tẽ nê mẽ ìhkô hã ànhunh o nhỹ.

⁵⁵⁻⁵⁶ Rôm nhũm ixkre kamã mẽ pikuprõnh xwýnhjaja tee ri Jejus ã krĩ nhõ xwýnhjê kukja nê mẽ kãm:

–E mẽ atõ na ka pre Jejus kot tanhmã amnhĩ tomnuj to hã omu? Mẽ atõ mẽ inhmã harê pa mẽ ama nê Rôm nhõ xwýnhjê nhĩhkram haxà kê mẽ pamã kupĩ. Anê.

Hãmri nhũm mẽ axpên pãnhã tanhmã harênh to. Tanhmã kot amnhĩ tomnuj to hã harênh to htã nom ri ho hêx jakamã axpên kwým ri tanhmã ri harênh to nhũm mẽ tee ri mẽ kuma nê mẽ kãm:

–Tk. Kwa mẽ axpên kwým ri tanhmã harênh to hkêt nê. Axpên kôt mãn ri tanhmã mẽ inhmã harênh to. Anê.

⁵⁷ Hãmri nhũm mẽ hkwýjaja kãnhmã kuhê nê axpên kôt tanhmã ho hêx to nê mẽ kãm:

⁵⁸ –Nà kot paj mẽ amã tanhmã kot amnhĩ nhĩpêx to hã harê. Na pa prem ã kapêr anhýr ã kuma. Na pre tanhmã Tĩrtũm mã amnhĩ jarênh xà hã ixkreta jarênh to nê harênh o: “Kot paj ixkreja grãnh pa hãmri nê ixtã apkati axkrunêpxi nê akupým hipêx. Nom kot paj amnhĩ nhĩhkra ho hipêx kêt nê.” Anhýr ã ã amnhĩ jarênh anê pa mẽ kuma.

⁵⁹ Anhýr o harênh tã nom axpên kôt harênh kêt nê. Arĩ axpên kwým ri harê. ⁶⁰ Hãmri nhũm mẽõ patre maati tee ri mẽ kot tanhmã ho kapêr toja ma nê mẽ aptàr tũmjê noo mã kãnhmã xa nê Jejus mã kãm:

–E na ka ra mẽ kot ã ajarênh anhýrja ma. Xà kot kaj tanhmã mẽ inhmã amnhĩ tã axaprãr to hkêt nê? Xà ãm hãmri na mẽ ajarê? E kwa mẽ inhmã tanhmã amnhĩ jarênh to. Anê.

⁶¹ No nhũm akryk xa nê tanhmã kãm nê hkêt nê. Hãmri nhũm tee ri ã kot amnhĩ nhĩpêx anhýr ã omu nê axte kãm:

–Kwa mẽ inhmã amnhĩ jarê. Xà apê Tĩrtũm Kra na ka? Xà ka na apê Tĩrtũm kot mẽ ixwýr amênh xwýnh na ka? Anê.

⁶² Hãmri nhũm tã kãm amnhĩ jarê nê kãm:

–Tỳ. Ixpê tãmta na pa. Ra mẽ ate jarãhã tanhmã ijarênh to kaxyw apikuprõnh tã nom kot paj nhỹrmã mẽ kamjaja tanhmã mẽ ajarênh to ka mẽ amnhĩ tã ixpumu. Kot kaj mẽ Tĩrtũm kot mẽ ato amnhĩptàr xà kutã akrĩ hãmri pa hwýr tẽ nê ìhkô hã nhỹ. Kakrã kamã kot paj hwýr tẽ nê ìhkô hã nhỹ hãmri nê ý hã tanhmã mẽ ajarênh to ka mẽ amnhĩ tã ixpumu. Anê.

⁶³⁻⁶⁴ Hãmri nhũm tee ri ã kot amnhĩ jarênh anhýrja ã kuma nê gryk xàj amnhĩ xê kaxô nê mẽ aptàr tũmjê mã kãm:

–Kwa mo kaxyw kot puj mẽ axte ri ho tanhmã kot amnhĩ tomnuj to hã harênh xwýnhjê hõ japêr? Ra tãm kot amnhĩ pê Tĩrtũm Kra hã amnhĩ to hêx nhũm mẽ pahte pajamak o mar kênã. E tanhmã kot puj mẽ ho? Anê.

Hãmri nhũm mẽ kãm:

–Nà kot puj mẽ kupĩ. Ra htyk mã tãm kênã. E kwa tokyx pu mẽ ma Rôm nhõ pahihty hwýr o tẽ kê mẽ pamã hã amýnê kê mẽ kupĩ. Anê.

⁶⁵ Hāmri nhũm mẽ hipêx kati rax nê. Nê hkuk kuhtô nê hpãnhã no hpro nê htak nê kãm:

—E mẽ kot atak xwýnhjê nhĩxi jarê. Apê Tĩrtũm Kra hã ate amnhĩ jarênh jakamã mãn uràk nê axàhpumunh tỳx. Jakamã e mẽ hixi jarê. Anê.

Nhũm prem ã hipêx anê hāmri nê pōristijê nhĩhkram haxà nhũm mẽ htak rax o kuhê.

Simāw Pêtre kot Jejus kôt pa hkêt ã kot amnhĩ jarênh

Matêwre 26.60-75; Rukre 22.54-62; Juāw 18.15-18, 18.25-27

⁶⁶⁻⁶⁷ Rôm nhũm Simāw Pêtre arĩ kĩtare kamã mẽ ìhkô hã ànhunh o nhỹ. Hāmri nhũm mẽō patre maati mã àpênh xwýnh nitita mẽ hwýr kato nê xa. Hāmri nê hirã kamã hprĩ hã Simāw Pêtre pumu nê omunh mex kurê kumrêx nê kãm:

—Xê pêr apê Najare nhõ xwýnh Jejus kôt mẽ pa ho mẽ pa xwýnhjê hõ na ka. Anê.

⁶⁸ Hāmri nhũm tee ri kuma nê ra kãm ma nê. Nê kãm amnhĩ tã aprã nê kãm:

—Tk. Kokỹ. Ixte mēhõ my ata pumunhre hã. Anê.

Hāmri nê kànhmã xa nê ma tẽ nê kĩtare hwýr kahê hkôt ã mẽ hkàx ã ahte xa nhũm krãhyre kà. ⁶⁹ Nê gaa nhũm hpãnhã mẽ kãm àpênh xwýnhjê hõja omu nê hã mẽ kãm:

—Xê ma ãm hāmri na harê. Kôt ri mẽ pa xwýnhjê hõ na pêr. Anê.

⁷⁰ Hāmri nhũm amnhĩ tã kuma nê kãm:

—Tk. Kwa nà. Mẽ ri ã amnhĩ krã hkôt ri ixto axêx anhỹr kêt nê. Aa ixte mēhõ ata pumunh kêt kumrêx. Anê.

Hāmri nhũm mẽ hkwýja gaa nê kê axte hprĩ hã omu nê kãm:

—Kwa ãm hāmri na mẽ ajarê. Apê Jejus hkwý na ka. Ajaxwýja apê Garirej nhõ xwýnh kênã. Anê.

⁷¹ Hāmri nhũm tee ri mẽ kuma nê kãm ma htỳx nê. Hāmri nê mẽ kãm:

—Kwa nà. Na pa Tĩrtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà uràn ixpê Garirej nhõ xwýnhre hã. Ixte mēhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwýnh ã ixkamnhĩx o xa.

Anhỹr o ra mẽ kãm amnhĩ tã aprãr o axkrunêpxi. ⁷² Hāmri nhũm axte krãhyre kà. Jao ra hkàr o axkrut. Hāmri nhũm

Simāw Pêtre kuma nê Jejus kot ra hkukamã ã amnhĩ nhĩpêx anhỹr ã harênhja mã hamaxpêr kurê kumrêx. Krãhyre kormã hkàr o axkrut kêt ri kot mẽ kãm amnhĩ tã aprãr o axkrunêpxi hã harênhja mã hamaxpêr. Hāmri nê ra kànhmã hakry hpar o tẽ nê hkaprĩ htỳx kumrêx. Hāmri nê tee ri amnhĩ kukamã hamaxpêr nê amnhĩ mã:

—Hêxta waa nê. ãm hāmri na pre Jejus ijarê. Tã pa kot ijarênh xà hkôt ã amnhĩ nhĩpêx anê. Kwa mo na pa axtem nê ã mẽ kãm amnhĩ to ixêx anê?

Anê hāmri nê hkaprĩ xaj mýr rax nê.

15

Pirat kot Jejus kukjêr ã harênh

Matêwre 27.1-2, 27.11-14; Rukre 23.1-5; Juāw 18.28-38

¹ Tã nhũm myt kato nhũm mẽ axte Jejus ã axpên wýr akuprõ. Patre krãhtũmjê mẽ Ijaew krãhtũmjê mẽ Tĩrtũm kapêr tũm o mẽ ahkre xwýnhjê mẽ Ijaew nhõ juistijaja nhũm mẽ piitã hã akuprõ. Hāmri nê pōristi mã anê nhũm mẽ Jejus pa hpre nhũm mẽ ma Rôm nhõ xwýnhjê nhõ pahi Pirat wýr o tẽ. Piratja na pre hte Rôm nhõ xwýnhjê nhõ pahi Sesti nhỹ hã Ijaew o amnhĩptar o pa nhũm prem ma hwýr o tẽ. ² Hāmri nê kutã ãm nê tanhmã kãm harênh to nê kãm:

—E ot pa mẽ awýr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwým ri amnhĩ nhĩpêx prãm xaj tanhmã mẽ inhmã hêx to. Nê axtem nê mẽ ixte Sesti mã kàxpore hkwý nhõr kêt ã mẽ inhmã karõ. Nê Tĩrtũm kot mẽ ixkaxyw kêp mẽ inhõ pahi hã ãm ã amnhĩ jarênh o pa. Na hte ã mẽ inhmã amnhĩ to hêx anhỹr o pa. Anê.

Hāmri nhũm Pirat mẽ kuma nê Jejus pumu nê tanhmã hkukjêr to nê kãm:

—E inhmã amnhĩ jarê. Xà ãm hāmri na mẽ ã ajarênh anê nà? Xà apê Ijaew nhõ pahi na ka? Xà ka na htem amnhĩ wýr akãm hamak o pa? Anê.

Hāmri nhũm kãm:

—Tỳ. Nà ãm hāmri na ka ã ijarênh anê. Anê.

³ Hāmri nhũm patre krãhtũmjaja tanhmã kãm ho kapêr to. ⁴ Nhũm mẽ kuma nê axte hkukja nê kãm:

—Kwa na mẽ ã ajarënh anë ka mẽ ama nẽ ãm mẽ ama nẽ inhmã tanhmã amnhĩ tã axàprâr to hkêt nẽ. Anë.

⁵ Nom nhũm Jejus ãm akryk xa nẽ tanhmã axte kãm nẽ hkêt nẽ. Jakamã nhũm Pirat tee ri omunh pê hamaxpër o nhỹ.

Pirat kot Jejus pĩr ã àmnënh ã harënh

Matêwre 27.15-26; Rukre 23.13-25; Juãw 18.39-19.16

⁶ Na pre hte pahi Pirat arĩgro pê Pasja ã Ijaewjaja kãm hprãm xà hkôt mẽ hagjënh xwýnhjê ho hpýnh nẽ mẽ kãm ure. ⁷⁻¹⁰ Jakamã nhũm Ijaew kwýjaja hwýr mra nẽ kãm:

—Pa. Kwa xà kot kaj jarãhã mẽ inhmã mẽ hagjënh xwýnhjê hõ mã anhũre nà? Anë.

Hãmri nhũm mẽ kuma nẽ hamaxpër o:

—E paj Jejus ã mẽ kuma nẽ kãm inhũre. Mẽ piitã mẽ kãm kapër mar prãm nhũm mẽõ patre krãhtũmjaja pix kot mẽ hkôt kamã gryk nẽ ã ixwýr o mrrar anhỹr kënë. Anë.

Hãmri nẽ mẽ kãm:

—Tỳ. Nà kot paj mẽ amã hõm inhũre. Kwa xà kot pa mẽ amã mẽ anhõ “pahihti” jarënhja mã inhũre nà? Anë.

¹¹ Hãmri nhũm patre krãhtũmjaja tee ri kuma nẽ mẽ kãm:

—Kwa mẽ kãm anë kê Parapas mã mãn ure. Anë.

Hãmri nhũm mẽ kuma nẽ Pirat mã kãm:

—Nà Jejus mã anhũrer kêt nẽ. Parapas mã mãn anhũre. Anë.

¹² Hãmri nhũm mẽ kãm:

—No mẽ ate mẽ anhõ pahi hã harënh xwýnhhta? Tanhmã kot paj ho? Anë.

¹³ Hãmri nhũm mẽ àmra kamã kãm hã amýnê nẽ kãm:

—Kwa pĩ kahpa hã anhõ kê ty. Anë.

¹⁴ Hãmri nhũm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa ã hipêx anë.

Anhỹr tã nhũm mẽ xatã anhĩpê kãm kapër kãm hihtýx nẽ kãm:

—Kwa pĩ kahpa hã mãn anhõ kê ty. Tokyx ã mẽ inhmã hipêx anë.

Anhỹr o kuhê. Kàx pê kãm anhỹr o kuhê.

¹⁵ Nhũm tee ri mẽ kuma hãmri nẽ mẽ kãm hprãm xà hkôt mẽ kãm Parapas mã ure. Nẽ pôristi hkwyjê mã Jejus ã amýnê nẽ mẽ kãm:

—Tõe. Mẽ mamrĩ hwýr tẽ nẽ htak hãmri nẽ kapôt ã mẽ hpar xà hã pika hwýr o tẽ nẽ pĩ kahpa hã anhõ. Anë.

Mẽ kot Jejus tak ã mẽ harënh

Matêwre 27.27-32; Juãw 19.2-3

¹⁶ Tã nhũm pôristijaja akupým ixkreja wýr Jejus o axà nẽ amnhĩ wýr hkwyjê hã karõ nhũm mẽ hwýr agjê nẽ Jejus ã akuprõ.

¹⁷ Hãmri nẽ kêp pahi hã hpër o pikënh kaxyw kãm pahi hã mẽ ahkà nhĩpêx nẽ hkrãm haxà. Nom axtem nẽ akunĩ kamã mẽmo mrõ nhĩ te kot ronh kanëre pyræk xwýnhja nhũm mẽ kãm hikãx nẽ hkrãm haxà. Hãmri nẽ kêp ê kapa nẽ pahi hã mẽ ê kamrêk õ py nẽ kãm haxà. ¹⁸ Hãmri nẽ kãm:

—E apê Ijaewjê nhõ pahi na ka. Anë.

¹⁹ Hãmri nẽ xatã axpën pãnhã hwýr mra nẽ pĩ ho hkrãx pê htak nẽ hkuk kuhtõ nẽ hã hpër o pikënh pê hã hpijaam pyrã nẽ kutã hkõn krã ho hkrĩ. ²⁰ Hãmri nẽ kêp pahi xê kapa nẽ akupým kãm ê jaxà nẽ pĩ kahpa hã nhõr kaxyw ma o kato nẽ o tẽ.

²¹ Nom nhũm ra hiro tỳx nẽ nhũm mẽ tee ri omu hãmri nẽ mẽhõ kot ho ajuta kaxyw mẽ kot hkôt omunh o mõr xwýnhjê kapi ho xa. Hãmri nẽ Sirën nhõ xwýnh Simãw hkà htykreja pumu. Aresãn mẽ Rupti wa hipêêxà na pre. Nhũm htýx hamakêtkati nẽ mẽ kutã krĩm tẽ. Hãmri nhũm mẽ haê nẽ unê nẽ kãm Jejus o ajuta kaxyw hã karõ nhũm kãm pĩ kahpaja mý nẽ mẽ hkôt o tẽ.

Mẽ kot pĩ kahpa hã Jejus nhõr ã mẽ harënh

Matêwre 27.33-44; Rukre 23.33-43; Juãw 19.17-27

²² Nhũm mẽ ra kën nhĩxêt te kot mẽ hkrã hi pyræk xwýnhja wýr Jejus o pøj. Mẽ kot kãm “Korkot” anhỹr xwýnhja wýr. Mẽ pakapër kãm na htem Korkotja jarënh o: “Mẽ hkrã hi xà” anë. Jakamã nhũm mẽ ra hwýr o pøj. ²³ Hãmri nẽ kot pĩ kahpa hã nhõr kaxyw wĩhti hkwy ho mẽ mẽmo mẽhkanexà pê mĩra ho ahkà. Kot ho kõm nẽ amnhĩ xà htýx kãm hamak kêt kaxyw hipêx nẽ kãm kugõ nom nhũm hkaga nẽ ho hkõm kêt nẽ. ²⁴⁻²⁶ Hãmri nhũm myt kaxkwa nhĩpøk wýr tẽ nhũm mẽ pĩ kahpata ã Jejus xi nẽ prek o ãhkra ho htýx nẽ hpar o htýx. Nẽ hpãnhã kaxyw kakwý nẽ kãnhmã pĩ kahpa jarĩ nẽ kre kamã ãm nẽ hity hpa. Nhũm

Jejus kÿx pê amnhĩ xà htÿx kumrêx kamã hamak o ajêt. Nhũm pôristi hõja tẽ nẽ tapti hõ py nẽ hã kagã ho:

IJAEWJÊ NHÕ PAHI NA JA

Hãmri nẽ Jejus wÿr ho api nẽ mÿ ri kunhõ. Hãmri nhũm hparpê pôristi hkwÿja axpên mã ê hkwÿ ho hpigrành kaxyw hã kênre ho jõka ho hkrĩ.

²⁷⁻²⁸ Tã nhũm mẽ wa kot amnhĩ tomnuj xwÿnh wa ho axkrut nẽ mã wa ho anẽ nẽ. Nẽ pĩ kahpa hã prek o wa ìhkra ho htÿx nẽ wa hpar o htÿx hãmri nẽ akutã ho Jejus nhĩjê nhũm wa ajêt.

²⁹ Hãmri nhũm mẽ kot omunh mã mrrar xwÿnhjaja Jejus pumu nẽ hã hpêr o pikênh punuj nẽ hkrã ho apê nẽ kãm:

—Kwa na ka pre ate Tĩrtũm mã amnhĩ jarênh xà hã ixkre grành par nẽ atã apkati axkrunêpxi nẽ akupÿm hipêx par ã amnhĩ jarênh o apa. Nẽ axàhpumunh o axàhpumunh ã amnhĩ jarênh o apa. ³⁰ Jakamã e kwa amnhĩ kapa nẽ wrÿ pa mẽ ja hã apumu. E kwa tokyx. Anẽ.

³¹ Nẽ patre krãhtũmjê mẽ Tĩrtũm kapêr tũm o mẽ ahkre xwÿnhjaja piitã hwÿr mra nẽ hã hpêr o pikênh o kuhê. Nẽ axpên mã kapêr o:

—E jahti na xep pre mẽ kamã ukaprĩ ho pa nẽ tanhmã mẽ ho ajuta hto ho pa. Tã tãm tanhmã amnhĩ to nẽ wrÿk kêt nẽ. ³² Kwa pu mẽ arĩ pakuhê nẽ kot amnhĩ kaxàr nẽ wrÿk kãm omu. Kojã wrÿ pu mẽ omu nẽ kêp mẽ panhõ pahшти hã hkôt pajamaxpêr kurê kumrêx. E tokyx wrÿ Jejus pa mẽ awrÿk kãm apumu. Nã kot kaj awrÿk rax nẽ. Anẽ.

Hãmri nhũm akutã wa kot hijê nẽ jêt xwÿnh wa haxwÿja kãm kapêr punuj o ajêt.

Jejus htyk ã harênh

Matêwre 27.45-46; Rukre 23.44-49; Juãw 19.28-30

³³ Tã nhũm ra kaxkwa nhĩpòk ri myt nhÿr mẽ nhũm te kamãt pyrãk. Nhũm kamãt kô rax kumrêx o ra hã awry mẽ nhũm akupÿm myt katêr o mõi. ³⁴ Hãmri nhũm Jejus àmra kamã Tĩrtũm mã kapêr nẽ kãm:

—Inhõ Tĩrtũm inhõ Tĩrtũm. Kwa mon ka ixkaga? Anẽ.

Nom kapêr kãm kapêr o:

—Eri Eri rãmã sapatanĩ. Anẽ.

³⁵ Hãmri nhũm mẽ kot mar o kuhê xwÿnhjaja kot Eri hã harênh ma nẽ htÿx ho finat Eris mã kapêr ã hkamnhĩx. ³⁶ Hãmri nhũm ja hprõt nẽ mẽmo rereeti py nẽ pĩ ho hkanhwÿ nẽ o tẽ nẽ ho wĩhti nhek nẽ Jejus wÿr o tẽ nẽ kot hkaôr kaxyw kãm kupê. Hãmri nẽ hkwÿjê mã kãm:

—E hãmri pu mẽ jar hkàx ã pakuhê nẽ Eris jamã mãn. Kojã kuma nẽ hwÿr tẽ nẽ o wrÿ nã? Anẽ.

³⁷ Nom nhũm Jejus ra htyk kaxyw nẽ àmra htÿx nẽ ty.

³⁸ Hãmri nhũm Tĩrtũm mã amnhĩ jarênh xà hã ixkre kamã hakwakre hã kupêxêja axkjê nẽ amnhĩ kahê xà mẽnh kurê kumrêx. Utĩ rax tã kÿj rũm ahpar mã axkjê nẽ amnhĩ kahê xà mẽ. Te Jejus htyk o mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mẽnh pyrãk o ã amnhĩ kaxônh anẽ. ³⁹ Nhũm pôristi krãhtũmjê hõja Jejus parpê kutã htyk kãm omunh o xa. Hãmri nẽ tee ri omu nẽ hamaxpêr o:

—Hêxta waa nẽ. ãm hãmri na pre hte kêp Tĩrtũm Kra hã amnhĩ jarênh o pa. Tã pa mẽ amarĩ kupĩ. Anẽ.

⁴⁰⁻⁴¹ Rôm nhũm mẽni kwÿjaja amÿm htyk kãm omunh o kuhê. Na pre htem Garirej kamã Jejus mẽ hkôt mẽ pa ho mẽ pa xwÿnhjê mã mẽ apkur xà hã àpênh o mẽ hkôt pa nẽ mẽ hkôt Jerujarê hwÿr mõi. Marir Matarênh nẽ Xiakre mẽ Jojes wa katorxà Marirja. Nẽ Sarome. Nẽ mãânên mẽni hkwÿjaja nhũm mẽ amÿm Jejus htyk kãm omunh o kuhê.

Mẽ kot Jejus jaxàr ã harênh

Matêwre 27.57-61; Rukre 23.50-56; Juãw 19.38-42

⁴² Nhũm prem arĩgro pê sêsta hã Jejus pĩ nhũm ra amÿkry htÿx nẽ. Sap kukamã na pre htem Ijaewjaja amnhĩm apkur xà hã mẽõ nhĩpêx pa nhũm sap kato nhũm mẽmoj to anhÿr kêt nẽ. ⁴³ Jakamã nhũm Juje hõ pê Arimatej nhõ xwÿnhja. Kêp Ijaewjê nhõ juisti hõ na pre. Nhũm mẽ piitã kãm hkĩnh nẽ axpên mã mex o mex ã harênh o pa. Na pre Tĩrtũm kot mẽ pahwÿr Jejus mẽnh kôt hamaxpêr o pa. Tã Jejus htyk ã omu hãmri nẽ hamaxpêr o:

—E pa ma pahi Pirat wÿr tē nē Jejus nhĩ hã kuwÿ. Inhmã uma htã kot paj ma hwÿr tē nē hã kuwÿ kē inhmã kugõ pa ma o tē nē tokyx haxà. Kot paj ho anhÿr tokyx anhÿr kêt nhũm mē panhõ arĩgromnu pē sapja wÿr ra myt axà hãmri pa haxàr kêt nē.

Anhÿr o hamaxpēr nē ma Pirat wÿr tē nē hã kuwÿ. ⁴⁴ Hãmri nhũm amnhĩ jaēr pē ra htyk ã harēnh ma nē amnhĩ wÿr pōristi krãhtũmjē hõ hã karõ nē hã hkukja nē kãm:

—Kwa xà na ra Jejus ty? Anē.

Hãmri nhũm kãm:

—Tÿ na ra ty. Anē.

⁴⁵ Hãmri nhũm kuma nē Juje mã kãm:

—Tõe. Mamrĩ ma o tē nē haxà. Anē.

⁴⁶ Hãmri nhũm kuma nē akupÿm Jejus wÿr tē nē pōristi mã anē nhũm mē kãm ho wrÿ. Nhũm kumÿ nē kupēxē ho hkupu hpa nē o tē nē kēn kre kakwÿnh kãm haxà. Hãmri nē kēn rax o hitom mex nē ma akupÿm krĩm tē. ⁴⁷ Nhũm Marir Matarēn mē Juje katorxà Marir õja wa ma hkõt tē nē kot haxàr kãm omunh o xa. Kot mē hkuxwa xà ho gregrer kêt rãhã haxàr kãm omu.

16

Jejus akupÿm htĩr ã harēnh

Matêwre 28.1-10; Rukre 24.1-12; Juãw 20.1-10

¹⁻² Tã nhũm apkati. Nom nhũm ra mē inhõ arĩgromnu pē sap kator jakamã nhũm mē kormã akupÿm kēnkreta wÿr mrar kêt nē. Hãmri arĩgro mex jamãr pē kòkõt o hkrĩ. Hãmri nhũm axte apkati nhũm tòmĩk nhũm ra mē inhõ arĩgromnu hapēx nhũm Marir Matarēn mē Sarome mē Xiakre katorxà Marirja mē ma akupÿm kēnkreta wÿr mra. Kormã kwÿhtãã. Kormã myt kator o mōr mē nhũm mē kãnhmã hkrĩ hãmri nē mē kot Jejus gregrer kaxyw mē hkuxwa xà hkwy jamÿ nē ma hwÿr o mra. ³ Hãmri nē kormã mōr ri tee ri amnhĩ kukamã hamaxpēr nē axpēn mã:

—Xê gàà nē. Mēhõ koja mē pamã nhãm kēnkre nē hitom raxta xãm pu mē Jejus wÿr agjē nē gregrer? Utĩ rax kumrēx kēnã. Anē.

⁴ Hãmri nē hwÿr pōj nē omu nhũm ra hitom xàja kàx ã nõ nhũm mē tee ri omu. Utĩ rax tã ra kàx ã nõ. ⁵ Hãmri nhũm mē kēnkre hwÿr agjē nē upòk rùm mēhõ nyw pumu. Nhũm ê jakajre kamã nhÿ nhũm

mē amnhĩ jaēr pē omu nē tee ri hamaxpēr. ⁶ Hãmri nhũm mē kãm:

—Kwa mē amã ma hkêt nē. Mē ate Najare nhõ xwÿnh pē Jejus pumunh kaxyw na ka mē mra. Mē kot pĩ kahpa hã nhõr xwÿnhhta. Nom jar amrakati. Na ra Tĩrtũm akupÿm ho htĩr. E mē kam nē amnē agjē nē ano ho nõr xà kaprÿ pumu ⁷ nē tokyx ma akupÿm mra nē hkõt mē pa ho pa xwÿnhjē mã harē. Koja ma Jejus mē akukamã akupÿm Garirej wÿr mō. Garirej kamã kot kaj mē axte axpēn pumu. Ra kot mē amã amnhĩ jarēnh xà hkõt. Kwa mē tokyx ma akupÿm mē hwÿr mra. Nē kwa kē Simãw Pētreja harēnh mar mex nē. Anē.

⁸ Hãmri nhũm mē kuma nē awjanã nē ma akupÿm hprõt. Nē tee ri hamaxpēr nē kãm ma xà htertēt tÿx jakamã kormã nhãm mēhõ mã harēnh kêt nē.

Jejus kot Marir Matarēn wÿr kator ã harēnh

Juãw 20.11-18

⁹ Nhũm semãn nyw mã àr xà hã arĩgro pē tòmĩkja ã nhũm Jejus akupÿm htĩr. Hãmri nē Marir Matarēn kumrēx wÿr kato. Kot nē mēkarõmnuti ho ⁷ nē nē hanor xwÿnhhta kumrēx wÿr kato. ¹⁰ Hãmri nhũm akupÿm htĩr kãm omu nē hkĩnh tÿx kumrēx. Nē ma akupÿm tē nē Jejus krãmnhwÿjē mã harē. Nhũm mē hkaprĩ nē mÿr o hkrĩ nhũm mē hwÿr axà nē mē omu nē mē kãm:

¹¹ —Xê mē amÿr kêt nē. Na ra Jejus akupÿm htĩr nē ham ixwÿr kato pa inhno ho omu. Xê mē hãmri axte amÿr kêt nē.

Anhÿr tã nom nhũm mē htÿx ho amnhĩ krã hkõt kot ri ã harēnh anhÿr ã hkamnhĩx jakamã kuma nē ãm kuma.

Jejus kot hkwyjē hwÿr kator ã harēnh

Rukre 24.13-35

¹² Tã nhũm Jejus axte ja wa hwÿr kato. Kõt mē pa ho pa xwÿnh wa ho axkrut nē wa hwÿr kato. Na pre wa Jerujarē rùm kato nē akupÿm wa õ krĩ hwÿr mōr mē nhũm wa hwÿr kato. Nom axtem tanhmã amnhĩ nhĩpēx to nē wa hwÿr kator jakamã nhũm wa tokyx hprĩ hã kēp Jejus ã omunh kêt nē. ¹³ Tã kēp Jejus ã omu hãmri nē akupÿm Jerujarē hwÿr mō nē hkwyjē mã harēnh kurē kumrēx. Nom nhũm mē wa kuma nē

ãm wa kuma nẽ akupỹm htĩr kõt hamaxpẽr kêt nẽ.

Jejus kot hkwỳjê mã mẽmoj tâ karõ hã harẽnh

Matêwre 28.18-20; Rukre 24.44-49; Juãw 20.19-23; mããnẽn Atre 1.6-8

¹⁴ Tã nhũm Jejus tâ hkõt mẽ pa ho mẽ pa xwỳnh pê 11 wỳr kato nhũm mẽ kamã no pyma nẽ hkĩnh tỳx nẽ omunh o kuhê. Hãmri nhũm mẽ kãm:

—Kwa hêxta waa nẽ. Marir Matarẽn mẽ akwỳta mẽ kot akupỹm ixtĩr kãm ix-pumunh nẽ mẽ amã ijarẽnh tâ ka mẽ ama nẽ ãm mẽ ama. Pẽr ãm mẽ akrã hihtỳx jakamã na ka mẽ ama nẽ mẽ hkõt aja-maxpẽr kêt nẽ. Anẽ.

¹⁵ Hãmri nẽ mẽ kot tanhmã kãm amnhĩ nhĩpêx to ho pa hã mẽ kãm karõ nẽ mẽ kãm:

—E kêr ka mẽ ma krĩ piitã hkõt mẽ kãm ijarẽnh o ri mẽ hkõt apa. Ixte tanhmã mẽ nẽ amnhĩ nhĩpêx toja ka mẽ aprĩ hã mẽ kãm ijarẽnh o ri mẽ hkõt apa. ¹⁶ Nẽ mẽ kot mẽ akapẽr mar nẽ amnhĩ kaxyw ixkõt hamaxpẽr xwỳnhjaja kêr ka mẽ hkrã kumrã nhũm mẽ nhỹrmã Tĩrtũm mẽ wa ixri htĩr tũm nẽ mex rãhã nẽ pa ho pa. No mẽ kot amnhĩ kaxyw ixkõt hamaxpẽr kêt xwỳnhjaja koja Tĩrtũm nhỹrmã amnhĩ nẽ mẽ hano nhũm mẽ ma kuwy hwỳr pa.

¹⁷ —Nẽ amnhĩ kaxyw ixkõt mẽ aja-maxpẽr xwỳnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwỳ ho anẽ nẽ inhỹ hã inhĩxi jarẽnh kõt mẽ nẽ mẽkarõmnuti janor o ri mẽ hkõt apa. Nẽ mẽ ate nhãm mẽ kapẽr mar kêt tâ inhỹ hã ho akapẽr mex o apa. Mẽ ate mar kêt tâ ra ho akapẽr nhũm mẽ kot mẽ kapẽrta mar xwỳnhjaja hprĩ hã mẽ amar mex nẽ. ¹⁸ Nẽ kot kaj mẽ nhỹri atỳx kagã xoprê hõ hpyr tâ no nhũm tanhmã mẽ ato hkêt nẽ. Rỳ atỳx mẽmoj to mẽ hpar xà hkwỳ ho akõm tâ no nhũm tanhmã mẽ ato hkêt nẽ. Nẽ inhỹ hã mẽ à xwỳnhjê hã mẽ anhĩkra jaxwỳ nhũm mẽ akupỹm mex. Kot kaj mẽ amnhĩ kaxyw ixkõt mẽ ajamaxpẽr xwỳnhjaja ã inhỹ hã amnhĩ nhĩpêx anhỹr o ri apa. Anẽ.

Jejus kot akupỹm kaxkwa hwỳr àpir ã harẽnh

Rukre 24.50-53; mããnẽn Atre 1.6-11

¹⁹ Tã nhũm mẽ panhõ Pahihti Jejusja hkõt mẽ pa ho mẽ pa xwỳnhjê mã kapẽr pa hãmri nhũm Tĩrtũm ma akupỹm amnhĩ wỳr kaxkwa hwỳr ho api. Hãmri nhũm kaxkwa kamã Tĩrtũm nhĩhkô hã upôk rũm nhỹ. Kot ãhkô hã mẽmoj piitã ho amnhĩptàr kaxyw hkrĩ ho hkrĩ. ²⁰ Hãmri nhũm hkõt mẽ pa ho pa xwỳnhjaja ma akupỹm àpir kãm omu hãmri nẽ angrã nẽ ma krĩ piitã hkõt mẽ kãm Tĩrtũm kapẽr jarẽnh o pa nhũm Pahihti Jejus mẽ ãhkô hã pa ho pa. Nhũm mẽ ma ã hã hkwỳjê mã aa mẽ kot mẽmoj pumunh kêt kwỳ ho anhỹr o ri mẽ hkõt pa nhũm mẽ ja hã mẽ omu nẽ axpẽn mã mẽ harẽnh o:

—Nã ãm hãmri na mẽ pamã Tĩrtũm kapẽr jarẽnh o pa nẽ ho hêx kêt nẽ. ã hã mẽ kot aa mẽ pahte mẽmoj pumunh kêt kwỳ ho anhỹr o pa kẽnã. Nã ãm hãmri na ã mẽ pamã kapẽr jarẽnh anhỹr o pa. Anẽ.

Ja kõt na Makre kot Jejus jarẽnhja hapêx.

Rukre Rukre tanhmã Jesus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwýnh na pre. Tã amnhĩ kaxyw Jesus kôt hamaxpêr. Na pre kêp tôtô nê mē hkane ho pa. Nê Jesus nhỹ hã kapêr o pa xwýnhjê hõ pê Pawreja kôt pa ho pa. Tã tanhmã hamaxpêr to nê hkràmnhwý Teopre mã kagàja nhĩpêx nê kamã tanhmã Jesus kot amnhĩ nhĩpêx to ho pa hã harê nê hã kagà.

Nê Jesus kêp Tĩrtũm nhỹ hã kapêr o pa xwýnh ã harê. Nê mē pahpyrà nê ã ho ã hã harê. Nê kêp mē pakamã ukapřĩ xwýnh ã harê. Nê kêp mē pahte amnhĩ tomnuj o hapêx xwýnh ã harê. ã na pre Rukreja hkràmnhwý Teopre mã Jesus jarê nê hã kagà anê. Nê mãânên mē pahpiitã mē pakaxyw harê nê hã kagà.

Rukre kot Teopre mã amnhĩ jarênh Atre 1.1-2

¹ Pa pahi Teopre. Xà amex? E ot pa awýr kagà nhĩpêx nê awýr kumê. Ixte amã Jesus jarênh kaxyw. Na prem ra ohtô nê jar mē pahkôt Jesus kot amnhĩ nhĩpêx o pa hã kagà rax nê. ² Jesus nhỹ hã Tĩrtũm kapêr jahkre ho mē pa xwýnhjaja na prem Jesus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mē inhmã harê nê hã kagà nhũm mē ohtô nê mē mar xà hkôt mē urà nê kot tanhmã amnhĩ nhĩpêx to ho pa hã kagà. ³ Tã pa mē harênh ma nê ijamaxpêr o:

—E kot paj ijaxwýja Jesus kot amnhĩ nhĩpêx kwý hã kagà. Nà kot paj ho anê.

Anhýr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar týx nê mē kot amã harênh xwýnhjê hkôt ajamaxpêr týx o apa. ãm hãmri na prem mē amã harê. E kot paj amã hkwy hã kagà. Ixpê akràmnhwý Rukre kot paj ixprĩ hã amã harê nê hã kagà.

Tĩrtũm kapêr o wryk xwýnh kot Juãw Paxis jarênh

⁵ Juãw Paxis nhĩpêxà finat Jakarisja kumrêx kot paj amã harê. Kêp finat Apiasti kanrêhã htàmnhwý jakamã urak nê kêp mē apê Ijaew nhõ patre na pre. Pahihti Eroxa kormã kot mē anhõ pika kamã mē ho amnhĩptar ri nhũm Jakaris kêp patre nê pa. Nê hprõ Ijapew mē wa kêp Parãw kanrêhã htàmnhwý. ⁶ Nê wa hamê na pre Tĩrtũm kôt tãm amnhĩ nhĩpêx o wa pa. ãm Tĩrtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx týx nê.

⁸ Jakamã nhũm Jakaris ma mē kot Tĩrtũm mã amnhĩ jarênh xà hã ixkre hwýr tẽ. Kwýjê pyrà nê kot Tĩrtũm mã tanhmã amnhĩ nhĩpêx to kaxyw ma mē hpãnhã hwýr tẽ nê axà. ⁹⁻¹⁰ Hãmri nê kamã Tĩrtũm mã amnhĩ jarênh pê kãm mē hkuxwaxà ho xêt o xa. Nhũm Ijaew kwýjaja ixkreta wýr akuprõ nê kapem kutêp Tĩrtũm mã amnhĩ jarênh o kuhê. ¹¹ Pu nhũm kaxkwa rũm Tĩrtũm kapêr o mē wryk xwýnhja wry nê Jakaris kutã xa. Mē hkuxwa xà ho xêt xà hã mês kunĩhti xupok rũm xa. ¹² Hãmri nhũm amnhĩ jaêr pê amnhĩ kutã omu nê akryk omunh o xa. ¹³ Hãmri nhũm kãm:

—Pa Jakaris? Kwa tee ri ajamaxpêr o amã ma hkêt nê. Na pre Tĩrtũm ate akra hã hwýr o apa hã ama nê hã apumu. Jakamã koja tanhmã aprõ hkra xà ho ka kamã akra. Nhũm nõ nê rax nê kato nê myre. Ka wa hã hixi mē nhũm kêp Juãw. ¹⁴ Koja kato ka wa omu nê akĩnh týx kumrêx. Nhũm akwýjaja haxwýja ohtô nê war akra jarênh ma nê war anhỹ hã hkĩnh nê. ¹⁵ Koja kormã akra kator kêt ri nhũm Tĩrtũm Karõja hkarõ hwýr axà. Hãmri nhũm kato nê gaa nê hprêk nê Tĩrtũm mã tanhmã amnhĩ nhĩpêx to ho pa. Tĩrtũm kãm hprãm xà hkôt pix mã tanhmã amnhĩ nhĩpêx to ho pa. Nom kêr ka inhmar kumrêx. Kê mēmoj to wĩhti ho hkõm kêt nê pa. Nê kagôxyhti ho hkõm kêt nê pa. ãm kwarĩ ho kwarĩ. ¹⁶ Koja hprêk hãmri nê mē apê Ijaew mã Tĩrtũm kapêr jarênh o mē hkôt pa. Nhũm mē ohtô nê kuma nê kot amnhĩ tomnuj kaga nê Tĩrtũm

kôt amnhĩ xunhwỳ nẽ hkôt amnhĩ nhĩpêx mex o pa.

¹⁷ –Tĩrtũm kot mẽ awỳr mẽ apytàr xwỳnh maati mẽnh mã xwỳnh kukamã koja mẽ kãm harênh o pa. Te Tĩrtũm nhỹ hã kapêr jarênh xwỳnh finat Eris kot amnhĩ nhĩpêx pyràk o koja amnhĩ nhĩpêx. Nẽ uràk nẽ Tĩrtũm Karõ nhỹ hã mẽ amã Tĩrtũm kapêr jarênh o mẽ akôt pa. Jakamã nhũm mẽ akwỳjaja kuma hãmri nẽ amnhĩ tomnuj kaga hpa nẽ Tĩrtũm kôt pix mã amnhĩ nhĩpêx o pa. Nẽ tãm mẽ hkrajê nhĩpêx o pa. Koja mẽ ã akra Juãwja kôt amnhĩ nhĩpêx anẽ. Jao Tĩrtũm kot mẽ awỳr mẽnh mã xwỳnhhta kutêp tãm amnhĩ nhĩpêx o pa. Anẽ.

¹⁸ Nhũm pre ã Tĩrtũm kapêr o wrỳk xwỳnh Jakaris mã hkrata jarênh anẽ. Hãmri nhũm tee ri kuma nẽ kãm:

–Kwa xà we ãm hãmri na ka ã inhmã ixkra jarênh anẽ nà? Ra ixprõ mẽ wa ijamẽ wa ixpigêx tỳx kênã kot pa kêt wa ixkra. Anẽ.

¹⁹ Hãmri nhũm kãm:

–Nà ãm hãmri na pa ã amã harênh anẽ. Ixpê Gapriew na pa ã awỳr ixwrỳk nẽ Tĩrtũm nhỹ hã amã harênh anẽ. Ixte Tĩrtũm nhĩhko hã ixkuhê xwỳnhjê hõ na pa. Tãm na awỳr inhmẽ pa awỳr wrỳ nẽ ã amã akra jarênh anẽ. ²⁰ Tã ate ixkôt ajamaxpêr kêt jakamã kot kaj axte axumar kêt nẽ akapêr kêt rãhã nhũm akra kato. Koja kato ka rĩ kormã akupỳm akapêr nẽ akupỳm ama. Ate ixkôt ajamaxpêr kêt jakamã kot kaj ã amnhĩ nhĩpêx anẽ nẽ rĩ amnhĩ pumu. ãm hãmri na pa ã amã ixkapêr anẽ. Anẽ.

Nhũm pre ã Tĩrtũm kapêr o wrỳk xwỳnhja Jakaris mã kapêr anẽ. Jakamã nhũm tokyx ixkre rũm kator kêt nẽ.

²¹ Hãmri nhũm ixkre kapem mẽ kuhê xwỳnhjaja tee ri kamã ama nẽ axpên mã:

–Tk. Kwa mo na we ri hitom kãm ho anhỹr kãm unê nẽ tokyx kator kêt? Anẽ.

²² Tã nhũm akupỳn mẽ hwỳr kato. Nẽ tee ri kot mẽ kãm kapêr kaxyw no ãm ãhkra pix o ri mẽ kãm tanhmã ujahkre hto. Hãmri nhũm mẽ amnhĩ jaêr pẽ kot ã amnhĩ nhĩpêx anhỹr ã omu nẽ tee ri hkukamã hamaxpêr nẽ axpên mã:

–Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anẽ nà? Anẽ.

²³ Hãmri nhũm Jakaris ixkre kamã mẽmoj tã ãpênh pa hãmri nẽ ma akupỳm òrkwỹ hwỳr tẽ.

²⁴⁻²⁵ Tã nhũm hprõ Ijapewja htujarõ. Hãmri nẽ amnhĩ tujarõ hã amnhĩ pumu nẽ hkĩnh tỳx nẽ. Nẽ hamaxpêr o:

–Hêxta gàa nẽ. Ma ãm hãmri na pa pre ixkra hkêt nẽ amnhĩ kamã ixpijaàm o ri ixpa. Tã ra ixtujarõ. Kot paj wa axte ri amnhĩ kamã ixpijaàm kêt nẽ. Ma ãm hãmri na Tĩrtũm ã wa inhĩpêx anẽ. Na pa wa ixkĩnh tỳx kumrêx. Anẽ.

Nhũm pre ã hamaxpêr anẽ hãmri nẽ arĩ òrkwỹ kamã hkrĩ ho hkrĩ. Aa nhỹhỹm kator nẽ mõi kêt rãhã hã mytwrỳ kêp 5.

Tĩrtũm kapêr o wrỳk xwỳnh kot Marir mã hkra jarênh

Matêwre 1.18-21

²⁶ Tã nhũm Ijapew ra htujarõ hã mytwrỳ kêp 6 nhũm Tĩrtũm axte kapêr o wrỳk xwỳnh pẽ Gapriewja mẽ. Nhỹri Garirej kamã krĩ pẽ Najare hwỳr kumẽ nhũm ma hwỳr wrỳ. ²⁷ Mẽhõ pẽ Marir wỳr wrỳ. Nhũm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrã nẽ kêp pahi finat Tawi kanrêhã htãmnhwỳ na pre. ²⁸ Jakamã nhũm Gapriew Marir wỳr wrỳ nẽ kãm:

–Pa Marir? E ot pa amã Tĩrtũm kapêr jarênh kaxyw awỳr wrỳ. Kot akôt pa ho pa jakamã koja ato mex rax kumrêx. Anẽ.

²⁹ Hãmri nhũm amnhĩ tã kuma nẽ tee ri hamaxpêr nẽ hamaxpêr o:

–Xê mẽmo na we ri ã inhmã kapêr anẽ? Tanhmã koja we Tĩrtũmja ixto mex rax to? Anẽ.

³⁰ Hãmri nhũm Gapriew kãm:

–Kwa tee ri amnhĩ kukamã ajamaxpêr kêt nẽ. Tĩrtũm kãm ajapêê. ³¹ Kot kaj atujarõ nhũm akra kato nẽ myre. Ka hã hixi mẽ nhũm kêp Jejus. ³²⁻³³ Koja Tĩrtũm amã ho mex rax nẽ. Nẽ koja mẽ piitã mẽ kãm kêp amnhĩ Kra hã ho amnhĩrĩt. Nẽ mẽ apê Ijaew o amnhĩptàr kaxyw koja mẽ akaxyw ãm nhũm higêt pahi Tawi pyrã nẽ mẽ ato amnhĩptàr o pa. Mẽ ate amnhĩ wỳr kamã ajamak o apa xwỳnhhta koja. Tĩrtũm kãm hprãm xà hkôt koja mẽ ato amnhĩptàr rãhã ho pa. Anẽ.

³⁴ Nhũm pre ã kãm kapër anë nhũm amnhĩ tã kuma nẽ tee ri amnhĩ kukamã hamaxpër hãmri nẽ kãm:

—Xê gàà nẽ. Tanhmã kot pa kêt we amnhĩ to nẽ ixtujarô? Kormã ixkukrit nẽ mo kormã inhmjên? Mê. Xà Juje kot ixkamã hkra hkukamã na ka ã ri inhmã axujarênh anë? Anë.

³⁵ Hãmri nhũm kãm:

—Nà koja Tĩrtũm Karõ tãm tanhmã ato ka ÿ hã tanhmã amnhĩ to hkêt tã atujarô. Jakamã koja akra kệp Tĩrtũm Kraa. ³⁶⁻³⁷ Na ra haxwýja anã Ijapewja htujarô. Ra hpigêx tỳx nẽ aa hkra hkêt nhũm hkwýjaja kot axpên mã õhy kamã hkra hkêt kumrêx ã harênh o pa htã ra htujarô. Tĩrtũm kot tanhmã mẽ ho nhũm mẽ htujarô tanhmã kệp kute hkêt. Jakamã nhũm tanhmã ho nhũm mjên tãm htu nhũm ra htujarô hã mytwrý kệp 6. Tĩrtũm tãm kot mẽmoj pĩ-itã tanhmã ho kaxyw àhpumunh xihtỳx. Jakamã koja uràk nẽ mã ato anë nẽ ka kormã akukrit tã atujarô. Anë.

³⁸ Nhũm pre ã Gapriew Marir mã kapër anë nhũm amnhĩ tã kuma nẽ kãm:

—Ko. Kê mãmrĩ kãm tanhmã ixto hprãm xà hkôt mãmrĩ tanhmã inhĩpêx to. Inhmã Tĩrtũm kapër kôt amnhĩ nhĩpêx prãm. Kê mãmrĩ kãm tanhmã ixto hprãm xà hkôt tanhmã inhĩpêx to.

Anë nhũm kuma nẽ ma akupỹm api.

*Marir kot Ijapew wỳr mõi ã harênh
Rukre 11.27*

³⁹⁻⁴⁰ Tã nhũm Marir amnhĩ tujarô hã amnhĩ pumu nẽ nã Ijapew wỳr hkrã kurê kumrêx. Hãmri nẽ nojarêt nẽ õ krĩ rũm kato nẽ ma hwỳr mõi. Ma Ijapew papxà hwỳr mõi. Ijapew nhõ krĩa pika pẽ Jutej kamã nhỹri hixêt kamã na pre. Nhũm ma hwỳr mõi hãmri nẽ hwỳr pøj nẽ Ijapew wỳr axà nẽ omu nẽ kãm:

—Ka? Xà wa amex? Anë.

⁴¹ Hãmri nhũm kuma nẽ kãm:

—Ỗ ma wa inhmex na pa wa ixpa.

Anhỹrja kôt nhũm õhy kamã hkraja haxwýja te kot Marir kapër mar nẽ amnhĩ nhĩpêx pyrãk o htu kamã àxõnh tỳx o nõ. Hãmri nhũm Ijapew Tĩrtũm Karõ nhỹ hã tanhmã Marir mã kapër to. ⁴² Kàx pẽ kãm kapër nẽ kãm:

—Xê gàà nẽ. Ra Tĩrtũm kot ato mex jakamã na ka akĩnh rax o mẽ inhni hkwýjê jakrenh pa. Anhõhy kamã akraja koja Tĩrtũm amã ho mex rax nẽ. ⁴³ Xê mon ka ã ixto mex nẽ ixwỳr amõi anë? Apẽ inhõ Pahĩti katorxà htã ixto mex nẽ ã ixwỳr amõi anë. Hêxta gàà nẽ. ãm hãmri na ka ixwỳr mõi Marir. ⁴⁴ Na ka ixwỳr mõi pøj nẽ inhmã akapër hãmri nhũm ixto kamã ixkrare akapër ma nẽ hkĩnh xàj ixto kamã ixkamnãr tỳx o nõ. ⁴⁵ Na ka pre Tĩrtũm kapër o wỳr k wỳnh kot amã kapërja ma nẽ hkôt ajamaxpër tỳx nẽ. Jakamã kot kaj Tĩrtũm nhỹ hã akĩnh nẽ ajamakêtkati nẽ amex nẽ ri apa. Anë.

*Marir kot Tĩrtũm mã mex o mex ã grer ã
harênh*

Rukre 6.20-26

⁴⁶ Hãmri nhũm Marir Ijapew kot ã kãm kapër anhỹrja ma nẽ kãm Tĩrtũm mex o mex ã gre nẽ grer o:

Tĩrtũm na mex o mex.

⁴⁷ Kệp ixkaprĩ xwỳnh na.

Kệp ixkaprĩ xwỳnh jakamã na pa inhmex nẽ ixkĩnh nẽ ri ixpa.

⁴⁸⁻⁴⁹ Ixte amnhĩ to grire nhũm ja hã ixpumu nẽ ixkamã ukaprĩ nẽ ixto mex rax kumrêx.

Jakamã koja mẽ piitã axpên kanrêhã axpên mã ijarênh rãhã ho pa. Tĩrtũm kot tanhmã ixto mex to hã ijarênh rãhã ho pa.

Tĩrtũm na mex o mex nẽ hihtỳx o hihtỳx. Tã na ã inhĩpêx anë.

⁵⁰ Ma na hte ã amnhĩ nhĩpêx anë nẽ axpên kanrêhã mẽ kot hã hpijaam xwỳnhjê pumu nẽ mẽ kutã nojarêt rãhã ho pa.

Nẽ mẽ kamã ukaprĩ rãhã ho pa.

ã na hte mẽ hipêx mex anhỹr o pa.

⁵¹ Nẽ hihtỳx o hihtỳx jakamã na hte mẽ kot amnhĩ to jarkrar o ri mẽ pa xwỳnhjaja tanhmã mẽ ho nhũm mẽ axkaprã.

⁵² Nẽ pahĩti hkwỳ kot kapër mar nẽ ãm mar xwỳnhjaja.

Na hte amnhĩ tã mẽ omu nẽ mẽ àpênh nẽ mẽ hapøj nẽ mẽ hpãnhã mẽ kot amnhĩ to hkryre xwỳnh kwỳ jagjê.

⁵³ Na hte mẽ kãm kapër kôt amnhĩ nhĩpêx prãm xwỳnhjê ho mex o pa nhũm mẽ mex nẽ pa.

No mẽ kãm hprãm kêt xwỳnhjaja nhũm tanhmã mẽ ho mex to hkêt nê.

⁵⁴⁻⁵⁵ ãm hãmri na pre amnepê mã mẽ panhigêt mã amnhĩ jarênh xà hkôt mẽ pahpê Apraãw rũm axpên kanrêhã hkrajaja mẽ pahto mex o pa.

Mẽ pahpê Ijaew mẽ pahte kãm tanhmã amnhĩ nhĩpêx to ho papa nhũm kãm mẽ pajapê xàj mẽ pahto mex rãhã ho pa.

Nê mẽ pakamã ukaprĩ rãhã ho pa. Anê.

Nhũm pre ã Marir Ijapew mã Tĩrtũm mex o mex ã grer anê. ⁵⁶ Hãmri nê ri hkôt pa hã mytwrỳ axkrunêpxi nê ma akupỹm õ krĩ hwỳr mō.

Juãw Paxis kator ã harênh

⁵⁷ Tã nhũm Ijapew hpjagri kaxyw õhy xà nhũm hkrare kato nê myre. ⁵⁸ Hãmri nhũm omu nê hkĩnh tỳx nê. Hãmri nhũm hkwyjaja Tĩrtũm kot wa kamã ukaprĩ hã wa kãm wa hkra myre nhõr ã harênh ma nê wa ý hã hkĩnh nê.

⁵⁹ Tã nhũm wa hkraja ra hã arĩgro pê 8 nhũm mẽ hkwyjaja kot my kwryt kã krãhyr kaxyw hwỳr akuprõ. Tĩrtũm kot mẽ kãm hã karõ xà hkôt nhũm mẽ kot kãm õr ã amnhĩ to amnhĩrit kaxyw ã hipêx anhỹr kaxyw. Na htem ã mẽ kêp Ijaew krajê piitã mẽ hipêx anê. Jakamã nhũm prem ã hipêx anê hãmri nê hpãnã tanhmã kot hã hixi mênh to kaxyw ri hã axpên kukja. Hãmri nê hipêxà hkôt kot hã Jakaris mênh kaxyw. ⁶⁰ Hãmri nhũm katorxà tee ri axpên tã mẽ kuma nê mẽ kãm:

—Ma koja kêp Jakaris kêt nê. Koja kêp Juãw. Anê.

⁶¹ Hãmri nhũm mẽ tee ri kuma nê kãm:

—Kokỹ. Mo jar mẽ pahtõ pê Juãw kot kêt ri kêp Juãw? Jar amrakati kênã kot ka kêt wa ri ã hã hixi rênh anê. Anê.

⁶² Hãmri nê hixi hã hipêxà kukja. Nom nhũm arĩ umar kêt nê kapêr kêt jakamã nhũm mẽ tanhmã ri kãm mẽ ãhkra nhĩpêx to. ⁶³ Hãmri nhũm ãhkra ho kagà hã ahwỳ nhũm mẽ kãm ja gõ nhũm kupy nê hã mẽ kãm hixi nhĩpêx. Nhũm mẽ kupy nê omu hãmri nê hixi pê Juãw kôt omu. Hãmri nê tee ri hixija kukamã hamaxpêr. ⁶⁴ Rôm nhũm Jakaris akupỹm ama nê kapêr mex kurê kumrêx nê Tĩrtũm mã mex o mex ã

harênh o xa. ⁶⁵⁻⁶⁶ Hãmri nhũm mẽ omu nê ma mẽ piitã mẽ kãm wa hkra jarênh o ri axpên kôt hprõt. Pika pê Jutej kamã hixêt kape hã krĩ hkôt nhũm mẽ ri mẽ piitã mẽ kãm harênh o hprõt. Tĩrtũm kot wa hkra kôt tãnopxar o pa nê ho mex ã harênh o hprõt. Hãmri nhũm mẽ kuma nê tee ri hkukamã hamaxpêr nê axpên mã:

—Hêxta waa nê. Tĩrtũm tãm na xep hte jare hkôt ri pa ho pa. Jakamã koja nhỹrmã hprêk hãmri nê tanhmã koja we amnhĩ nhĩpêx to ho pa wehee? Anê.

Jakaris kot Tĩrtũm nhỹ hã kapêr ã harênh

⁶⁷ Hãmri nhũm Jakaris Tĩrtũm Karõ nhỹ hã Tĩrtũm mex o mex ã harênh o xa. Tĩrtũm kot mẽ kêp Ijaew o mex ã harê nê mẽ kãm:

⁶⁸ Hêxta waa nê. Nà Tĩrtũmja mex o mex.

Na pre hte mẽ pahpãmjaja ãm hkôt pix mã amnhĩ nhĩpêx o pa. Jakamã nhũm hte Tĩrtũm mẽ pahpê hkrajê kamã ukaprĩ nê mẽ pahto mex o pa. E kwa pu mẽ kãm mex o mex ã harênh rãhã nê.

⁶⁹ Ra kot mẽ pahwỳr mẽ pahkaprĩ xwỳnh pê mẽ panhõ pahihtĩ mênh mã. Ja kaxyw àhpumunh xihtỳx o hihtỳx jakamã na pre ra mẽ pahwỳr mênh ã amnhĩ jarê.

Koja kêp amnepêm Tĩrtũm mã tanhmã amnhĩ nhĩpêx to ho pa xwỳnh Tawija hkanrêhã htãmnhwỳ.

⁷⁰ Amnepêm Tĩrtũm nhỹ hã kapêr xwỳnhjaja na prem mẽ kãm Tĩrtũm kapêr jarênh o pa nê mẽ kãm:

⁷¹ “Koja Tĩrtũm mẽ panê mẽ kãm mẽ pahkurê xwỳnhjê pumunh mex o pa.” Anê.

⁷² Tĩrtũm ra kot mẽ pahpãmjê mã amnhĩ jarênh xà hkôt kãm mẽ pakamã ukaprĩ rãhã ho pa hprãm.

Koja aa ja ho anhỹr o hamakêtkati hkêt nê.

⁷³⁻⁷⁵ Na pre ra mẽ pahpãm Apraãw mã mẽ pakukamã ã mẽ pahtã amnhĩ jarênh anê nê kãm: “Kot paj mẽ anê mẽ kãm mẽ akurê xwỳnhjê pumunh mex nê mẽ ãhkra nê mẽ ato ixkato. Jakamã kot kaj mẽ amnhĩ kamã amã mẽ uma hkêt nê axãmnhĩx ri ajamakêtkati nê mẽ kamã apa. Nê kot kaj mẽ mãmri axãmnhĩx ri inhmã tanhmã amnhĩ nhĩpêx to ho ri apa

rãhã nê. Nê ixkôt amnhĩ nhĩpêx o ri apa rãhã ty.” Anhÿr o na pre Tĩrtũm mẽ pakukamã mẽ pahtã amnhĩ jarẽ. Anẽ.

Nhũm pre ã Jakaris mẽ kãm Tĩrtũm kapêr jarênh anẽ. Hãmri nê hkrareja mÿ nê o xa nê kãm:

⁷⁶—No ka Xugitre. Kot kaj aprêk hãmri nê apê Tĩrtũm maati nhÿ hã kapêr jarênh o apa xwÿnh. Jakamã kot kaj Pahihti hkukamã mẽ piitã mẽ kãm harênh o ri mẽ hkôt apa. Mẽ kot amar nê kutêp tãm amnhĩ nhĩpêx kaxyw.

⁷⁷—Tĩrtũm kot mẽ nê mẽ kot amnhĩ tom-nuj rênh nê mẽ ho hkra hã harênhja kot kaj mẽ hkôt mẽ kãm harênh o ri apa.

⁷⁸—Na hte Tĩrtũm mẽ pakamã ukaprĩ ho pa nê mẽ pakamã gryk tokyx anhÿr kêt nê. Jakamã koja mẽ pahwÿr mẽ pahkaprĩ xwÿnhja mẽ. Kormã mẽ pahwÿr wrÿk kêt jakamã te mẽ pahte kamãt kô kamã tee ri mẽ paxãhkupênh o ri papa xwÿnh pyrãk.

—Nom koja mẽ pahwÿr wrÿkja o te ra myt kator nê mẽ pamã hirã nê mẽmoj to amnhĩrĩt mex pyrãk o mẽ panhĩpêx. Ja kaxyw koja Tĩrtũm mẽ pahwÿr mẽ pahkaprĩ xwÿnhhta mẽ nhũm man mẽ pahwÿr wrÿ nê mẽ pamã mẽ pahtyk puma xwÿnhjê mã Tĩrtũm kapêr o amnhĩrĩt o pa. Mẽ pahte mar nê ra pajamakêtkati nê paxãmnhĩx ri papa nê pahtyk kaxyw.

⁷⁹—Mẽ kãm mẽ htyk puma xwÿnhjaja te kamãt kô kamã ri pa pyrãk. Tã koja mẽ pahkaprĩ xwÿnhja wrÿ hãmri nê tanhmã mẽ hkrã hto nhũm mẽ te arĩgro hã ri mẽ pa xwÿnh kot amnhĩ nhĩpêx pyrãk o amnhĩ nhĩpêx. Jao hamakêtkati nê axte kãm htyk puma hkêt nê ri pa. Anẽ.

Nhũm pre ã Jakaris Tĩrtũm Karõ nhÿ hã hkrare mã kapêr anẽ.

⁸⁰Tã nhũm Juãwja gaa nê aptãr. Nê Tĩrtũm kôt amnhĩ nhĩpêx o pa. Nom kormã kot ljaew jahkre ho pa hkêt ri kapôt ã ri mẽ puhã pa.

Ã na pre Juãw kator nê amnhĩ nhĩpêx anhÿr o pa anẽ. Na pre kato nê hã mytwrÿ grêre hãmri nhũm Jejusja hkôt kato.

2

Jejus kator ã harênh Matêwre 1.18-25

¹⁻² Na pre ã Jejus kator anẽ. Nhũm pre Rôm nhõ xwÿnhjê nhõ pahi Sesti Akusja õ pika piitã hkôt mẽ ho kôta kaxyw. Aa kot mẽ ho kôta hkêt tã ra kot mẽ ho kôta kaxyw. Kormã pahi Sirên haxwÿja kot pika pê Sir kamã mẽ ho amnhĩptãr ri nhũm pahi Sesti Akus kot mẽ ho kôta kaxyw. Jakamã kãm àpênh xwÿnhjê mã kapêr nê mẽ kãm:

—E kêr ka mẽ ho kôta kaxyw nê mẽ piitã mẽ hixi hã kagã hpa. Anẽ.

³ Hãmri nhũm mẽ piitã ã kot mẽ hipêx anhÿr ã amnhĩ tã harênh ma hãmri nê mẽ kot mẽ hixi hã kagã kaxyw piitã akupÿm papxã hwÿr ma hapêx. ⁴ Nhũm pre Marir mjên Juje haxwÿja ma krĩ pê Perêj wÿr mō. Garirej kamã õ krĩ pê Najare rÿm kato nê ma hwÿr mō. Pika pê Jutej kamã na Perêjja. Kamã na pre Juje nhĩgêt Tawija kato. ⁵ Nhũm Juje kêp kanrêhã htãmnhwÿ jakamã na pre ma akupÿm hwÿr mẽ hkwÿjê hkôt mō. Nê ma amnhĩ kôt kot ho hprõ mã xwÿnh Marir o mō. Arĩ htujarõ rax rãhã nhũm ma amnhĩ kôt o mō. ⁶ Nhũm wa mōõ hãmri nê hwÿr pōj. Nhũm Marir hpijagri xã hã mytwrÿ mã àr jakamã nhũm kamãt nhũm õhy xã. ⁷ Nom nhũm Perêj wÿr mẽ hpôx nyw xwÿnhjaja ra ixkre piitã ho nÿt pa nhũm wa tee ri hpijagri kaxyw amnhĩ to ukapi ho pa. Hãmri nê nhÿri mōx nhõrkwÿ punajre hwÿr axã nhũm Marir kamã hpijagri. Nhũm hkra kato nê myre. Kra kot wa na pre. Hãmri nhũm kumÿ nê kupêxê ho hkupu hpa nê mōx xãpkur xã hã kôsti kaprÿ kamã kuxi nhũm hamakêtkati nê gõr nê nõ.

ôwêhti jamãr xwÿnhjê jarênh

⁸ Rôm nhũm ôwêhti jamãr o mẽ pa xwÿnhjaja kapôt ã ri hkrit ôwêhti jamãr o pa. Nhũm ra kamãt nhũm mẽ hamãr o hkrĩ. ⁹ Pu nhũm kaxkwa rÿm Tĩrtũm kapêr o wrÿk xwÿnhja wrÿ nê mẽ mÿri ajêt. Hãmri nê tanhmã amnhĩ to nê mẽ hpuhã ho hirã rax kumrêx. Nom nhũm Tĩrtũm tãm ã mẽ hipêx anẽ. Hãmri nhũm mẽ tee ri jawÿ Tĩrtũm kapêr o wrÿk xwÿnhja pumu nê kãm ma htÿx nê akryk omunh o hkrĩ. ¹⁰ Hãmri nhũm mẽ kãm:

—Pa? Kwa mẽ amã ixpyma hkêt nê. Ixte mẽ amã mẽmoj mex jarênh kaxyw na pa mẽ awÿr wrÿ. Kot kaj mẽ harênh ma nê akĩnh nê. Nom mẽ kapxipixjaja kaj mẽ akĩnh kêt nê. Koja mẽ piitã ja jarênh ma nê mẽ apyrã nê hkĩnh nê pa. ¹¹ Na ra ham mẽ akamã ukapri xwÿnhhta kato. Pahi Tawi nhõ krĩ mẽ mẽ anhõ krĩ pê Perêj kamã. Kêp mẽ apiitã mẽ anhõ pahihti na. Mẽ ate amnhĩ wÿr kamã ajamak o apa xwÿnh pê Kris na. Tãm na ham kato. ¹² E pa ixpri hã mẽ amã tanhmã harênh to ka mẽ inhma. Na kato nhũm katorxã kupêxê ho kupu hpa nê kôsti kamã kuxi nhũm nõ. Kwa mẽ tokyx ma hwÿr mra nê kêp mẽ anhõ pahihti hã omu. Anê.

¹³ Nhũm pre ã mẽ kãm ujarênh anê. Hãmri nhũm hkwyjaja wamta kôt ohtôo nê mẽ hwÿr wrÿ nê puhã harir. Hãmri nê Tirtũm mã mex o mex ã grer o harir. ¹⁴ Nê hã grer o:

Tirtũm maati na mex o mex.

Jakamã mẽ kãm hprãm xã kôt pix mã amnhĩ nhĩpêx o mẽ pa xwÿnhjaja koja amnhĩ tã mẽ omu nê tanhmã mẽ ho nhũm mẽ hamakêtkati nê amnhix hkĩnh nê pa ho pa.

¹⁵ Anhÿr o grer o harir hãmri nê ma akupÿm kaxkwa hwÿr àpir pa nê akunok. Hãmri nhũm ôwêhti jamãr xwÿnhjaja mẽ kapêr ma nê ma akupÿm àpir ã mẽ omu nê axpên mã:

—E tokyx pu mẽ krĩm nê Tirtũm kot mẽ pamã ho amnhĩrit xwÿnhhta japêr nê tokyx nhÿri omu. Kwa ma pu mẽ tokyx hwÿr nê omu. Anê.

¹⁶ Hãmri nhũm mẽ ma hwÿr mra. Hãmri nê krĩm agjê nê môx nhõrkwy wÿr agjê nê mẽ hkrareta pumu. Nhũm kôsti kamã nõ nhũm mẽ omu nê kuri Marir mẽ Juje wa omu. ¹⁷ Hãmri nê akupÿm hapôj nê ma mẽ piitã mẽ hkôt ri mẽ kãm harênh o pa. Ra Tirtũm kapêr o wrÿk xwÿnh kot mẽ kãm harênh xãja kôt nhũm mẽ ma mẽ kãm harênh o ri mẽ hkôt pa. ¹⁸ Nhũm mẽ amnhĩ jaêr pê mẽ kot harênh ma nê tee ri hkukamã hamaxpêr. ¹⁹ Nom nhũm Marir mẽ kot kãm hkrax rùm tanhmã hkra jarênh to xãta kukamã pix mã hamaxpêr rãhã ho pa.

²⁰ Jakamã nhũm ôwêhti jamãr xwÿnhjaja ma akupÿm hkrit wÿr mra. Tirtũm kapêr

o wrÿk xwÿnh ra kot mẽ kãm ujarênh xã hkôt nhũm mẽ kot Jejus pumunh jakamã ma akupÿm hkĩnh nê Tirtũm mã mex o mex ã harênh pê hã grer o akupÿm mra.

Mẽ kot Jejus ã hixi mẽnh ã harênh

Matêwre 1.21; Rukre 1.31

²¹ Tã nhũm wa hkrareta ra hã arĩgro pê 8 nhũm mẽ hwÿr akuprô nê kãm my kwÿrÿt kã krãhta. Na hte Ijaew mẽ hkra myre piitã ã mẽ hipêx anê. Mẽ piitã mẽ kot Tirtũm mã ôr ã mẽ omunh kaxyw. Jakamã nhũm mẽ kãm ho anê nê hpãnhã hã hixi mẽ. Marir kormã kot ho htujarô hkêt ri Tirtũm kapêr o wrÿk xwÿnh kot hkukamã kãm hixi jarênh xãja kôt nhũm mẽ hã hixi mẽ nhũm hixi kêp Jejus.

Mẽ kot Tirtũm mã Jejus nhõr pyrãk o hipêx

22-24 Tã nhũm Marir hpijagri ho hapêx.

Jakamã nhũm Juje ma krĩ pê Jerujarê hwÿr mẽ kot Tirtũm mã amnhĩ jarênh xã hã ixkre hwÿr amnhĩ kôt o mõ. Na pre ra finat Mojes amnepêm Tirtũm nhÿ hã mẽ hkukamã mẽ hpãmjê mã ja hã karõ. Nê mẽ kãm hã karõ ho:

Koja mẽ aprõ hpijagri. Hãmri nê hpijagri ho hapêx ka mẽ ma Tirtũm mã amnhĩ jarênh xã hã ixkre hwÿr o mra nê hpãnhã Tirtũm mã mẽmoj gõ. Kãm tutre ho gõ rÿ kãm tuuti hõ ho axkrut nê agõ kê patre hamÿ nê kãm kupa. Kot ja hã omunh nê hpijagri xwÿnhhta akupÿm mex ã harênh kaxyw.

Anhÿr o kot mẽ kãm ja hã karõ jakamã nhũm wa ma ã amnhĩ nhĩpêx anhÿr kaxyw hwÿr mõ. Nê amnhĩ kôt Jejus mÿ nê o mõ. Tirtũm kot mẽ kãm ja hã karõ nhũm mẽ kot hã kagã xã hkôt. Na pre ra finat Mojes mẽ kãm ja jarê nê mẽ kãm:

Kot kaj mẽ akra my kot wa hãmri nê te mẽ ate Tirtũm mã ôr kaxyw hipêx pyrãk o hipêx. Kê tãm amnhĩ nhĩpêx o pa nê ÿ hã tanhmã kãm amnhĩ nhĩpêx to ho pa.

Anhÿr jakamã nhũm wa ra Jerujarê hwÿr nojarêr nê amnhĩ kôt Jejus mÿ nê ma amnhĩ kôt o mõ.

Simeãw kot Jejus kukamã harênh

25-26 Rôm nhũm Jerujarê kamã Simeãwja.

Tirtũm Karõ nhÿ hã kot tanhmã amnhĩ to

mex to ho pa xwýnh na pre. Na pre hte Tirtüm kapër kôt pix mã tám amnhĩ nhĩpêx o pa. Jakamã nhũm pre ra Tirtüm Karõ ã kãm kapër anê nê kãm:

—E inhma Simeãw. Kot kaj atĩr rãhã nhĩrmã Tirtüm kot mẽ akaxyw ãm mã xwýnhja ka ano ho omu nê rĩ kormã ty.

Anhĩr o kãm kapër jakamã nhũm kuma nê hkĩnh nê ãm pix kamã hamak o pa. Mẽ kệp Ijaew wýr wryk nê mẽ ho mex mã xwýnhta pix kamã hamak rãhã ho pa. ²⁷ Jakamã nhũm Jejus katorxà mẽ hipêêxà purota wa Tirtüm mã amnhĩ jarênh xà hã ixkreja wýr Jejus o axà nê kormã o xa. Finat Mojes kot mẽ kãm hã karõ xà hkôt. Hãmri nhũm Tirtüm Karõ mẽ hwýr Simeãwja mẽ nhũm ma mẽ hwýr tẽ nê axà. ²⁸ Hãmri nê wa hkrata pumu nê hkĩnh tỳx nê. Hãmri nê wa kệp kumy nê o xa nê hã Tirtüm mã mex o mex ã harê nê kãm:

²⁹⁻³² Pa Pahĩ Maati. E ot pa ixte amã tanhmã amnhĩ nhĩpêx to ho ixpa xwýnh ã amnhĩ jarê.

Nà ãm hãmri na ka pre ã inhmã jare hkukamã harênh anê. Tã ate inhmã harênh xà hkôt pa ra inhno ho omu. Kệp mẽ ixkamã ukaprĩ xwýnh ã omu. Nê kệp ate mẽ ixwýr mẽnh xwýnh ã omu.

Nà koja te arĩgro hã myt hirã nê mẽmoj piitã ho amnhĩrit mex pyrãk o koja mẽ inhĩpêx o pa. Jakamã koja hprêk hãmri nê ma Ijaew kêt xwýnhjê mã apê Tirtüm ã akapër o amnhĩrit o pa nhũm mẽhprĩ hã ajarênh ma. Nê mẽ ixpê Ijaew kot paj mẽ ijaxwýja kuma nê hã ixpijaàm o ri ixpa.

Jakamã kot paj ixãmnhĩx ri tanhmã amnhĩ nhĩpêx to ho ri ixpa nê ixãmnhĩx ty. Ra ixte inhno ho ate inhmã harênh xwýnhta pumunh kênã. Anê.

³³ Nhũm pre ã Simeãw Jejus jarênh anê. Nhũm katorxà mẽ hipêêxà purota wa amnhĩ jaer pê kot ã harênh anhĩrja mar o xa. ³⁴⁻³⁵ Hãmri nhũm Simeãw wa ho Tirtüm wý nê kãm:

—E Tirtüm. Kêr ka ja wa ho mex nê. Wa ho mex o wa ho mex rãhã ho apa. Anê.

Hãmri nê Marir mã kapër nê kãm:

—Nà ãm hãmri na pre Tirtüm mẽ pakaxyw akrata xãm. Mẽ pahpê Ijaew

kaxyw ãm. Jakamã koja hprêk nê ma Tirtüm kapër o mẽ piitã mẽ ahkre ho ri mẽ hkôt pa. Nhũm mẽ kuma hãmri nê ahpyñhã tanhmã hamaxpêr to xà hkôt tanhmã hipêx to. Jakamã nhũm mẽ hkwyjaja kuma nê hkôt amnhĩ xunhwý nê hkôt amnhĩ nhĩpêx o pa. Jao tám hipêx o pa. No nhũm mẽ hkwyjaja kuma nê axtem nê kãm hkĩnh kêt nê. Hãmri nê tanhmã hipêx to. Jakamã kot kaj tee ri ja hã mẽ omu nê akaprĩ htỳx nê. Te mẽ kot wapo ho akanhwýr nê akamã ho kaxkep nhũm apê omnuj tỳx pyrãk o kot kaj amnhĩ kamã ama nê mẽ omu. Anê.

ãnti kot Jejus pumunh ã harênh

Wam Ximotre 5.5

³⁶⁻³⁸ Rôm nhũm mẽhõ ni pê ãntija mẽ hwýr axà nê Jejus pumu. ãntija Panuew kra na pre. Nê Ase hkwy na pre. Ni htã kệp Tirtüm nhỹ hã kapër jarênh o pa xwýnh. Na pre ra mjên no ãm kormã mjên nê pa hã amgrà pê 7 pix nhũm pre kệp ty. Hãmri nhũm axte mjên kêt nê pa rãhã ra hpigêx tỳx nê. Ra hã amgrà pê 84. Na pre hte Tirtüm mã amnhĩ jarênh xà hã ixkre hwýr pa nê kãm amnhĩ jarênh rãhã ho pa. Nê kot kãm amnhĩ jarênh kaxyw nê apkur kêt rãhã kãm amnhĩ jarê. Nê arĩgro hã hwýr pa nê kamãt kãm hwýr pa. ã na pre hte amnhĩ nhĩpêx anhĩr rãhã ho pa anê. Jakamã mẽ hwýr axà nê Jejus pumu nê hkĩnh nê. Hãmri nê hã Tirtüm mã mex o mex ã harê nê kãm:

—Hêxta gàà nê Tirtüm. ãm hãmri na ka mẽ ixwýr Jejus mẽ. Ma amex o amex. Anê.

Hãmri nê Ijaew kot amnhĩ wýr mẽ kamã ukaprĩ xwýnh kamã hamak xwýnhjê mã ra Jejus kator ã harênh o ri mẽ hkôt pa.

Marir mẽ Juje wa kot akupým Najare hwýr mõi ã wa harênh

Matêwre 2.19-23

³⁹ Tã nhũm Marir mẽ Juje wa Tirtüm kapër ã kagà htüm kôt Tirtüm mã amnhĩ jarênh xà hã ixkre kamã tanhmã amnhĩ nhĩpêx to hpa hãmri nê kato nê ma akupým mõi. Ma Garirej kamã õ krĩ pê Najare hwýr wa ma akupým mõi.

⁴⁰ Tã nhũm wa hkrata ra wa kãm hprêkre ho mõi. Nê mex nê àhpumunh tỳx nê. Tirtüm kot tânopxar nê mẽmoj to kutã nojarêt rãhã ho pa jakamã nhũm mex nê hkĩnh nê pa.

Marir mē Juje wa kot tee ri Jejus japêr ã wa harênh

Rukre 4.22

⁴¹ Nhũm pre hte Marir mē Juje wa amgrà mē hkwyjê hkôt ma Jerujarê hwÿr pa. Mē kot arĩgro pē Pas ã hkĩnh kaxyw. Pas ã na hte mē kēp Ijaew amnepēm Tĩrtũm kot pika pē Ejit rũm mē hpãmjê katorja mã hamaxpēr kaxyw axpēn wÿr akuprõ nē hã hkĩnh. Jakamã nhũm wa ma mē hkôt hã hkĩnh kaxyw Jerujarê hwÿr hkwyjê hkôt mō. ⁴² Nhũm ra Jejus hprêk o mō. Ra hã amgrà pē 12 jakamã nhũm wa ma amnhĩ kôt o mō. ⁴³⁻⁴⁴ Tã nhũm mē hkĩnh pa hãmri nē akupÿm nojarêt nhũm Marir mē Juje wa ma hkwyjê hkôt akupÿm mō. Nhũm Jejus Jerujarê kamã ahte arĩk nē akupÿm wa hkôt mōr kêt nē. Nhũm wa htÿx wam ma hkwyjê hkôt htēm ã hkamnhĩx jakamã wa hapēr kêt nē. Hãmri nē wa hapu hã hamakêtkati nē mē hkôt mōr o mōr ã ra hã kamãt. Hãmri nē mē kot amnhĩm hikranh xàja wÿr mē hkôt pōj nē tee ri mē hkaêx ã hkra japêr o ri mra nom omunh kêt nē. ⁴⁵ Jakamã nhũm apkati nhũm wa awjanã nē ma akupÿm Jerujarê hwÿr mō nē kamã hapēr o ri pa. ⁴⁶ Nom tokyx kãm kator kêt nē. Mē hkaêx ã tee ri hapēr o pa hã apkati axkrut. Nē nõ nhũm apkati nhũm wa tã Tĩrtũm mã amnhĩ jarênh xà hã ixkreja wÿr hapēr o mō nē hwÿr axà. Hãmri nē omunh kurê kumrêx. Nhũm arĩ mē kot Tĩrtũm kapēr tũm o mē ahkre xwÿnhjê mar o mē kutã nhÿ. Nē mēmoj tã ri mē hkukja nē tanhmã mē kãm ujarênh to. ⁴⁷ Nhũm mē kot mar xwÿnhjaja tee ri kapēr ã kuma nē àhpumunh tÿx ã omu hãmri nē akryk mar o hkrĩ. ⁴⁸ Hãmri nhũm Marir mē Juje mē hwÿr axà nē mē kuri wa hkraja pumunh kurê kumrêx. Hãmri nhũm katorxàja hwÿr tē nē kãm:

—Xê Jejus. Mon ka axtem nē ã ri amnhĩ nhĩpêx anē nē akupÿm wa ixkôt amōr kêt nē? Na pa wa mō nē mē pahkwÿjê hkôt pōj nē tee ri mē hkaêx ã ajapêr nē tee ri akukamã ijamaxpēr. Anē.

⁴⁹ Hãmri nhũm amnhĩ tã wa kuma nē wa kãm:

—Tÿ. Nom Inhĩpêxà nhōrkwÿ kamã ixarĩk kēnã na ka wa tee ri ixkukamã ajamaxpēr nē ijapêr o ri apa. Anē.

⁵⁰ Hãmri nhũm wa kuma nē ã kot amnhĩ jarênh anhÿrja kukamã tee ri hamaxpēr.

⁵¹ Hãmri nē mē ma akupÿm mō nē Najare hwÿr pōj nē kamã pa. Nhũm pre Jejus wa kapēr kôt ri amnhĩ nhĩpêx rãhã ho pa. Hãmri nhũm katorxàja hkra x rũm mē kot kãm tanhmã hkra kot amnhĩ nhĩpêx to hkukamã harênhja pix kukamã hamaxpēr rãhã ho pa.

⁵² Gaa nhũm Jejus ra àptàr o mō. Nē àhpumunh tÿx nē. Nhũm mē piitã ã kot amnhĩ nhĩpêx anhÿr ã omu nē kãm hkĩnh nē. Nhũm Tĩrtũm haxwÿja kãm hapê nē.

3

Juãw Paxis kot Tĩrtũm kapēr jarênh o pa hã harênh

Matêwre 3.1-10; Makre 1.1-8; Juãw 1.19-28

¹⁻² Tã nhũm kormã pahшти Tipeja mē ho amnhĩptàr o pa. Na pre ra mē ho amnhĩptàr ã amgrà pē 15. Nhũm Põn Piratja pahшти Xipe mã pika pē Ijaew nhõ xwÿnhjê ho amnhĩptà. Nhũm Eroxa kãm pika pē Garirej nhõ xwÿnhjê ho amnhĩptà. Nhũm Erox tō Firipja kãm pika pē Iturej nē hõ pē Takonit wa kamã mē pa xwÿnhjê ho amnhĩptà. Nhũm Risãnja kãm pika pē Apirên kamã mē ho amnhĩptà. Nhũm Anas mē Kajpasja wa kēp Ijaew nhõ patre maati.

Rôm nhũm Jejus mē Jakaris kra Juãwja wa ra hamē anhĩpê àptàr. Jakamã nhũm Tĩrtũm tanhmã Juãw mã kapēr to. Kormã kapôt ã ri pa ri nhũm kãm kapēr nē kãm tanhmã kot amnhĩ nhĩpêx to ho pa hã kãm karõ nē kãm:

—Pa Juãw. E inhma. Kêr ka ma mē kãm ixkapēr jarênh rãhã ho ri apa. Anē.

³ Hãmri nhũm kuma nē ma ri mē kãm kapēr jarênh o pa. Pyhti pē Jotãw mÿri mē piitã mē kãm harênh o ri pa nē hpãnhã ihkjê hã ri mē pa xwÿnhjê mã harênh o ri pa. Nē mē kãm:

—E kwa mē tokyx amã amnhĩ tomnuj kaga hprãm xaj tãm ri amnhĩ nhĩpêx. Kê Tĩrtũm ja hã mē apumu nē mē ané mē ate amnhĩ tomnuj o hapêx pa. Pa mē piitã mē kot mē apê Tĩrtũm kra hã mē apumunh kaxyw mē akrã kumrã.

Anhÿr o mē kãm kapēr o ri pa. ⁴⁻⁵ Na pre ra amnepēm mē hkukamã Tĩrtũm nhÿ

hã kapêr o pa xwýnh Ijais ra Juãw kukamã kot tanhmã amnhĩ nhĩpêx to hã harê nê hã kagà. Nê hã kagà ho:

Koja nhỹrmã mēhō mōn pōj. Kapôt ã mōn pōj nê mē kãm ujarēnh o ri pa. Nê mē kãm ujarēnh o: “E mē inhma. Koja Tĩrtũm tokyx mē pahwỳr mē panhō pahihtĩ mē nhũm wrỳ nhũm mē piitã omu. Jakamã kwa mē tokyx kutêp tãm amnhĩ nhĩpêx o apa. Te ho mē kot mēhō kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nê tãm axpēn nhĩpêx. Pahihtita kutêp. Mē pahte amnhĩ nhĩpêx te kot pry nhĩnur pyrãk nhũm mē tee ri kot kãm hã mrar mex prãm kaprỳ pyrãk. Hinur nê krã hakỳx nê pry juk pyrãk o na mē pahte amnhĩ nhĩpêxja. Jakamã kot kaj mē ate amnhĩ tomnuj kaga nê tãm amnhĩ nhĩpêx. Nê tãm axpēn nhĩpêx. Hãmri nê te mē kot pry nhĩnur o mex nê ho katat nhũm katat muux nê nōr pyrãk o kot kaj mē amnhĩ nhĩpêx. Pahihti nywta kutêp. Kwa kêr ka mē ã amnhĩ nhĩpêx anê.

⁶ Kot kaj mē anê nhũm mē ohtô nê ja hã mē apumu hãmri nê mē apyrã Tĩrtũm kot mē ho hkra kaxyw amnhĩ to kuwỳ.” Anhỹr o mē kãm ujarēnh o pa. Anê.

Nhũm pre ã finat Ijaisja Juãw Paxis kukamã mē kãm ujarēnh anhỹr o pa. ⁷ Jakamã nhũm àptàr nê Ijais kot ra hkukamã harēnh xà hkôt ma Tĩrtũm kapêr o mē ahkre ho pa. Nhũm prem kuma hãmri nê kot mē hkrã kumrãr kaxyw hwỳr amnhĩ to mra. Nhũm mē omu nê tanhmã mē ahkre hto. Nê mē kãm kapêr kãm hihtỳx nê mē kãm:

—Tk. Kwa kormã. Mē ate amnhĩ tomnuj pix o ri apa xwýnh kēnã. Xà kot paj mē ate amnhĩ tomnuj rãhã mē akrã kumrã nhũm Tĩrtũm ja hã mē apumu nhũm ja kãm mex nã? Nã koja ja kãm mex kêt nê. Koja ja mỳrapê nhỹrmã tanhmã mē anhĩpêx to ka mē tee ri umaj apimxur prãm kaprỳ.

⁸ —Na htem amnhĩ tomnuj kaga nê hpãnhã tãm amnhĩ nhĩpêx. Nê tãm ri axpēn nhĩpêx. Jakamã e kwa mē ã amnhĩ nhĩpêx anhỹr o apa. No na ka htem atỳx ri ajamexpêr o: “Mê ixpê finat Apraãw

kanrêhã htãmnhwỳ jakamã koja Tĩrtũm ja hã mē ixpumu hãmri nê mē ixte amnhĩ tomnuj mỳrapê tanhmã mē ixto hkêt nê. Koja ãm mē ixto mex rãhã nê.” Anhỹr o atỳx ri amnhĩ kukamã ajamexpêr o apa. Nom ja kot anhỹr kêt. Mē apê Apraãw kanrêhã htãmnhwỳ htã uràk nê tãm amnhĩ nhĩpêx o apare hã. Kot ka mē apê kanrêhã htãmnhwỳ htã amnhĩ tomnuj o ri apa hãmri nê Tĩrtũm noo mã te mē apê pikap kēne nhĩkwỳ pix pyrãk.

⁹ —Na ra Tĩrtũm kot mē ate amnhĩ tomnuj mỳrapê tanhmã mē ato kaxyw. Koja mē anhĩpêx o te mēhō nhō mēmoj pãr ô hkêt nhũm kot tee ri omunh hãmri nê krãhyr nê kuwy kamã mēnh nê ho xêt par pyrãk o mē anhĩpêx. Jao amnhĩ nê kuwy hwỳr mē arēnh pa ka mē kamã amnhĩ xà htỳx kamã ajamak rãhã ho ri apa. Anê.

Nhũm pre ã Juãw Paxisja mē kãm kapêr anê. ¹⁰ Hãmri nhũm mē kuma nê tee ri amnhĩ kukamã hamaxpêr nê kãm:

—Kwa xô wehe? Xà koja ã mē inhĩpêx anê? Kwa tanhmã kot paj mē kot ã mē inhĩpêx anhỹr pymaj amnhĩ nhĩpêx to wehe? Anê.

¹¹ Hãmri nhũm mē kãm:

—Nã kêr ka mē axpēn kãm axukapri ho ri apa. Nê mē kêp amrakati xwýnhjê mã amnhĩ kutã mēmoj nhōr o ri apa. Nê mē anhĩnôhkã axkrut nê mēhō hinôkã hkêt xwýnhjê mã ho pyxi nê agō nê pyxi nê ho arĩk. Nê mē axãpkur xà ho anhōxỳ ho apa hkêt nê. ãm axãmnhĩx ri mē kêp amrakati xwýnhjê mã amnhĩ kutã mē kãm mēmoj to hkryre nê agō. E kêr ka mē ã axpēn nhĩpêx anhỹr o ri apa. Anê.

¹² Hãmri nhũm Rôm kãm mē õ pahihtĩ mã mē piitã mē kêp kãxpore hkwy jamýnh xwýnhjaja mē uràk nê hwỳr mra. Kot mē uràk nê mē hkrã kumrãr kaxyw hwỳr mra nê kãm:

—No we mē pajaja? Tanhmã kot paj wem amnhĩ nhĩpêx to? Anê.

¹³ Hãmri nhũm mē kãm:

—Nã mē kajaja kêr ka mē Rôm nhō pahĩ kot mē amã mē ate mē kêp kãxpore hkwy jamýnh jarēnh xà hkôt pix mã hamýnh o ri apa. No mē atỳx ri amnhĩ krã hkôt amnhĩm hkwy jamýnh prãm xàj mē kãm hkre kamã

ho rûnh nê mē kām harēnh o ri apa hkêt nê. Anê.

¹⁴ Hāmri nhūm hpānhā pōristi hkwyjaja hwyr mra nê kām:

—Kwa no we mē pajaja? Tanhmā kot paj wem ri amnhī nhīpêx to ho ixpa? Anê.

Hāmri nhūm mē kām:

—Nà kēr ka mē anhō pahihti kot mē axapēnh pānhā mē amā kàxpore nhōrta pix jamý nê ajamakêtkati nê axāmnhīx ri ho amnhīm axujaprōr o ri apa. No mē akwýjaja kām apyma nê mē amā kàxpore nhōr prām xāj ri mē kām tanhmā amnhī pyma hto ho ri apa hkêt nê. E kēr ka mē ā amnhī nhīpêx anhýr o ri apa. Anê.

Juāw Paxis kot tanhmā Jejus jarēnh to hā harēnh

Matêwre 3.11-12; Makre 1.7-8; Juāw 1.19-28; mǎānēn Atre 19.4

¹⁵ Nhūm pre ā Juāw Paxisja mē kām kapēr anê. Nhūm mē kuma nê htýx kēp Tirtūm kot mē pakaxyw ām mā xwýnhhta ā hkamnhīx.

¹⁶ Hāmri nhūm amnhī tā ā mē hamaxpēr anhýr ā mē omu hāmri nê mē kām amnhī tā aprā nê mē kām:

—Nà pa hkêt. Na pa hte ām Tirtūm mā gō pix o mē hkrā kumrār o ri ixpa. No koja tokyx ixpānhā Tirtūm kot mē pakaxyw ām xwýnhhta tām mē pahwýr pōj. āhpumunh týx o kot ijakrenh jakamā na pa hte ām kukwak ri ixpa nê hā xpijaām o ri ixpa. Tirtūm kot mē pakaxyw ām xwýnhhta koja mē awýr Karō rē nhūm mē akaxwýnh mā agjē ka mē ý hā tām ri amnhī nhīpêx rāhā ho ri apa. Nom kormā mē kot tām amnhī nhīpêx hkêt xwýnhjaja koja ja hā mē omu hāmri nê mē hipêx o te kuwy kot mēmoj to kaxār par pyrāk o mē hipêx.

¹⁷ —Na htem pur kām harōj nhīkē nê ho grā nê hpānhā kahtwý. Nē kahuk pa hāmri nê hkapī nhūm kōk apē nē prýhka ho htor nē ho hapêx pa. Nhūm mē hy ho pa nē ixkre kamā gōj kām unhwý. Ja pyrā nē koja tokyx Tirtūm mē piitā mē kot tanhmā amnhī nhīpêx to ho pa hā mē omunh xā hkôt mē ho axkjē. Mē kot tām amnhī nhīpêx o mē pa xwýnhjaja koja ma amnhī wýr mē ho api nhūm mē kuri mex nē hkīnh rāhā nē pa ho pa. No mē kot amnhī tomnuj xwýnhjaja koja mē hkīnhā tanhmā mē hipêx to nhūm

mē ma kuwy raxja wýr pa nē kamā amnhī xā htýx kamā hamak rāhā nē pa ho pa. Anê.

¹⁸ Nhūm pre ā Juāw Paxis Tirtūm kapēr o mē ahkre anhýr o pa.

Juāw Paxis kot Jejus krā kumrār ā harēnh Matêwre 3.13-17; Makre 1.9-11

¹⁹ Tā nhūm Ijaew nhō pahi Eroxo ra htō hprō pē Eroxis pytà nê ho hprō nhūm Juāw Paxisja harēnh ma nē ma hwýr tē nē hā kām akir. No ām ja pix ā kām ākjēr kêt nē. Mǎānēn tanhmā kot amnhī tomnuj týx to ho pa hā kām akir. ²⁰ Nhūm amnhī tā kuma nē kamā gryk týx nē amnhī tā mē kām hā amýnē nhūm prem unē nē haxà. Jao amnhī tomnuj týx nē. ²¹ Nom kormā mē kot haxār kêt ri nhūm Juāw Paxis Ijaew kwýjē krā kumrār o xa. Rōm nhūm Jejusja hāmri tām nhýhýnh hwýr tē nē kot hkrā kumrār kaxyw kām anē nhūm kuma nē hkrā kumrā. Hāmri nhūm Jejus gōj rūm api nē kormā gō mý ri Tirtūm mā amnhī jarēnh o xa. ²² Pu nhūm kaxkwa axkjē nhūm kurūm Tirtūm Karō te tuuti pyrā nē hwýr wrýk o tē nē ikre hā xa. Hāmri nhūm kaxkwa rūm Tirtūm kām kapēr nē kām:

Pa? E apē Ixkra mex na ka. Ām hāmri na ka hte ixkanrēhā amnhī nhīpêx o apa. Inhmā ajapē kamā na ka ri apa ho apa. Anê.

Jejus kukamā higêt nē hpāmjē nhīxi hā harēnh

Matêwre 1.1-17

²³ Tā nhūm Jejus Tirtūm mā kapēr o mē ahkre ho pa hkrax. Na pre ra hā amgrā pē 30 hāmri nē kām ho hkrax.

E kot paj hpānhā amā Jejus kukamā hpāmjē nhīxi jarē Teopre. Ijaewjaja na prem htýx ho Juje kēp Jejus nhīpêxà kumrēx ā hkamnhīx nom kēp hipêxà kumrēx kêt ām kēp hipêxà puro na pre.

Jejus kēp Eri htāmnhwý na pre.

²⁴ Nē Eri kēp Matat kra na pre.

Nē Matat kēp Rewi hkra na pre.

Nē Rewi kēp Mewki hkra na pre.

Nē Mewki kēp Jānaj kra na pre.

Nē Jānaj kēp axtem Juje hō hkra na pre.

²⁵ Nē Juje kēp Matatis kra na pre.

Nē Matatis kēp Amōs kra na pre.

Nē Amōs kēp Naū hkra na pre.

Nē Naū kēp Eri hkra na pre.

Ně Eri kệp Nakai hkra na pre.
²⁶ Ně Nakai kệp Mate hkra na pre.
 Ně Mate kệp axtem Matatis õ hkra na pre.
 Ně Matatis kệp Semeĩ hkra na pre.
 Ně Semeĩ kệp Juje hõ hkra na pre.
 Ně Juje kệp Jotre hkra na pre.
²⁷ Ně Jotre kệp Joanãn kra na pre.
 Ně Joanãn kệp Rej kra na pre.
 Ně Rej kệp Joropape hkra na pre.
 Ně Joropape kệp Saraxi kra na pre.
 Ně Saraxi kệp Neri hkra na pre.
²⁸ Ně Neri kệp axtem Mewki hõ hkra na pre.
 Ně Mewki kệp Axi hkra na pre.
 Ně Axi kệp Kojã hkra na pre.
 Ně Kojã kệp Ematã hkra na pre.
 Ně Ematã kệp Erti hkra na pre.
²⁹ Ně Erti kệp Jojue hkra na pre.
 Ně Jojue kệp Eries kra na pre.
 Ně Eries kệp Jorĩ hkra na pre.
 Ně Jorĩ kệp Matat hkra na pre.
 Ně Matat kệp axtem Rewi hõ hkra na pre.
³⁰ Ně Rewi kệp Simeãw kra na pre.
 Ně Simeãw kệp Juta hkra na pre.
 Ně Juta kệp axtem Juje hõ hkra na pre.
 Ně Juje kệp Janã hkra na pre.
 Ně Janã kệp Eriakĩ hkra na pre.
³¹ Ně Eriakĩ kệp Merea hkra na pre.
 Ně Merea kệp Mena hkra na pre.
 Ně Mena kệp Matata hkra na pre.
 Ně Matata kệp Natã hkra na pre.
 Ně Natã kệp Tawi hkra na pre.
³² Ně Tawi kệp Jese hkra na pre.
 Ně Jese kệp Opex kra na pre.
 Ně Opex kệp Poas kra na pre.
 Ně Poas kệp Sarã hkra na pre.
 Ně Sarã kệp Nasõ hkra na pre.
³³ Ně Nasõ kệp Amĩnatap kra na pre.
 Ně Amĩnatap kệp Amĩ hkra na pre.
 Ně Amĩ kệp Ari hkra na pre.
 Ně Ari kệp Erõ hkra na pre.
 Ně Erõ kệp Pere hkra na pre.
 Ně Pere kệp Juta hkra na pre.
³⁴ Ně Juta kệp Jako hkra na pre.
 Ně Jako kệp Ijak kra na pre.
 Ně Ijak kệp Apraãw kra na pre.
 Ně Apraãw kệp Tera hkra na pre.
 Ně Tera kệp Nako hkra na pre.
³⁵ Ně Nako kệp Jeruk kra na pre.

Ně Jeruk kệp Rakau hkra na pre.
 Ně Rakau kệp Parek kra na pre.
 Ně Parek kệp Epti hkra na pre.
 Ně Epti kệp axtem Sara hõ hkra na pre.
³⁶ Ně Sara kệp Kajnã hkra na pre.
 Ně Kajnã kệp Apaxat kra na pre.
 Ně Apaxat kệp Sěre hkra na pre.
 Ně Sěre kệp Noehti hkra na pre.
 Ně Noehti kệp Ramek kra na pre.
³⁷ Ně Ramek kệp Metujarẽ hkra na pre.
 Ně Metujarẽ kệp Enok kra na pre.
 Ně Enok kệp Jarate hkra na pre.
 Ně Jarate kệp Marerer kra na pre.
 Ně Marerer kệp axtem Kajnã hõ hkra na pre.
 Ně Kajnã kệp Enos kra na pre.
³⁸ Ně Enos kệp Set kra na pre.
 Ně Set kệp Atãw kra na pre.
 Ně Atãw kệp Tĩrtũm kra na pre. Tĩrtũm kot wam my pê Atãwja pika ho hipêx jakamã te kệp hkra pyrãk.
 Å Jejus kukamã hpãmjê nhĩxi kot anhỹr.

4

Satanasti kot amnhĩ tã Jejus kamã hamak ã harẽnh

Matêwre 4.1-11, 16.23; Makre 1.12-13, 8.33; mããnẽn Eprêw 2.18, 4.15

¹ Tã nhũm Jejus pyhti pê Jotãw rũm akupỹm ma mõ. Hãmri nẽ Tĩrtũm Karõ nhỹ hã mẽmoj kutã amnhĩ to htỳx nẽ. Jakamã nhũm nhỹhỹm ma kapõt wỳr o mõ ² nhũm Satanasti omu nẽ ma hwỳr tẽ nẽ ri hkõt pa. Kapõt ã ri hkõt hêx rom tanhmã kãm nẽ ho pa. Kot mar nẽ Tĩrtũm kapêr nhĩrõp ãm prãm xàj ma hkõt tanhmã kãm kapêr to ho pa. Hãmri nẽ hkõt pa o hã arĩgro pê 40 nhũm Jejus kormã apkur kêt o hã arĩgro pê 40 nẽ hapêx nhũm ra kãm prãm tỳx nẽ. ³ Hãmri nhũm Satanasti kãm:

–Kwa mãn ka ra amã prãm tỳx kumrêx nà? Nom xep apê Tĩrtũm Kra jakamã mẽmoj tanhmã apê kute hkêt. Kwa kẽn nhĩkwỹ mũj mã anẽ kê amã pãwti hã amnhĩ jahkre ka aku nẽ tokyx ho amnhĩ xihtỳx. E kwa tokyx kãm anẽ. Anẽ.

⁴ Hãmri nhũm kuma nẽ kãm:

–Tk. Nà kot paj akapêr mar xà hkõt tanhmã amnhĩ nhĩpêx to hkêt nẽ. Kojã Tĩrtũm kãm inhmã mẽmoj nhõr prãm nẽ

inhmã mẽmoj gõ pa arĩ kormã kukrẽ. Kapër ã kagà htùm kot ja jarẽnh kot: Na htem mẽ apkur xà pix kukwak ri htĩr nẽ pa hkêt nẽ. Na htem mãânẽn Tĩrtũm kapër mar xà hkõt tanhmã ri amnhĩ nhĩpêx to ho pa ho htĩr nẽ mex nẽ pa. Anẽ.

Ã kapër ã kagà kot ja jarẽnh kot anhỹr jakamã kot paj amar xà hkõt ã ri amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

⁵ Nhũm pre ã Jejus Satanasti mã kapër anẽ nhũm tee ri kuma hãmri nẽ hpãnhã ma nhỹhỹm o mõi nẽ nhỹri kỳx pẽ mẽmoj prêeti nhĩmõk ã o xa. Hãmri nẽ kãm pika piitã ahkre ho xa. Nẽ kãm mẽ hikukrêx piitã ahkre. Kàxpore nẽ mẽmoj piitã nhũm kãm ahkre hpa nhũm anhĩpê omunh o xa.

⁶ Hãmri nhũm Satanasti kãm:

—E mãn ka kam ri mẽmoj mũj piitã omu. Piitã inhõ na. Inhmã na pre Tĩrtũm piitã õr pa. Kot paj inhmã mẽhõ mã õr prãm nẽ kãm kugõ. ⁷ Tã amã kot paj kugõ. Jakamã e. Kwa tokyx ixkutã tẽm nẽ inhmã inhmex o inhmex ã ijarẽ pa ama nẽ rĩ amã piitã õr pa. E tokyx. Anẽ.

⁸ Hãmri nhũm kuma nẽ kãm:

—Tk. Kot paj amã amex o amex ã ajarẽnh kêt kumrêx. ãm kwarĩ ho kwarĩ. Amexti hã. Tĩrtũm kapër ã kagà htùm kot ja nẽ kapër kãm hihtỳx kẽnã. Kapër kot:

Kêr ka mẽ ixkapër pix ma. Nẽ ixkutã pix mã mãn akõnkrã ho akrĩ nẽ inhmã inhmex o inhmex ã ijarẽnh o ri apa. Kêr ka mẽ ã amnhĩ nhĩpêx anhỹr o ri apa.

Anhỹr o kot harẽnh jakamã kot paj ri amã amex o amex ã ajarẽnh kêt nẽ Satanasti. Anẽ.

⁹ Nhũm pre ã Jejus amnhĩ nẽ kãm kapër anẽ. Hãmri nhũm tee ri kuma nẽ hpãnhã ma krĩ pẽ Jerujarẽ hwỳr o mõi. Nẽ mẽ kot Tĩrtũm mã amnhĩ jarẽnh xà hã ixkre hprêk nhĩmõk wỳr ho api nẽ kỳxpê hatur xà hã ãm nhũm xa. Nhũm amnhĩ parpê kẽn rũnh nhĩkwỹ pumunh o xa. Hãmri nhũm Satanasti kãm:

—E apê Tĩrtũm Kra jakamã kwa ja rũm ahpar mã ajarĩ nẽ ma tẽ nẽ pikap tẽm. Koja Anhĩpêxà apumunh mex nẽ ka tanhmã amnhĩ to hkêt nẽ. ¹⁰⁻¹¹ Kapër ã kagà htùm kot ja jarẽnh kot:

Tĩrtũm koja kapër o wryk xwỳnh mã ajarẽ ka ajarĩ nẽ ahpar mã tẽ nhũm mẽ kỳx pẽ amỳ nhũm mẽmoj akà hyr kêt nẽ.

Ã kapër ã kagà kamã ajarẽnh kot anhỹr jakamã e tokyx ajarĩ nẽ ma tẽn pikap ahto. Anẽ.

¹² Hãmri nhũm kuma nẽ kê axte amnhĩ tã kãm kapër nẽ kãm:

—Tk. Kwa nà. Kot pa ri amar xà hkõt ã amnhĩ nhĩpêx anhỹr kêt nẽ. Koja Tĩrtũm tãm inhmã ijarĩ hã karõ pa rĩ mar xà hkõt ijarĩ no kot pa ri amar xà hkõt ijarĩ hkêt nẽ. Tĩrtũm kapër ã kagà htùm kot ja jarẽnh kot: Kêr ka mẽ amnhĩ krã hkõt amnhĩ tã ixkamã ajamak kaxyw inhĩxi jarẽnh kõt tanhmã amnhĩ nhĩpêx to hkêt nẽ.

Ã ja nẽ kapër kot anhỹr jakamã ãm kwarĩ ho kwarĩ. Kot paj ri amar xà hkõt ã amnhĩ nhĩpêx anhỹr kêt nẽ. Tãm kot inhmã ijarĩ hã karõre hã. Anẽ.

¹³ Nhũm pre ã Jejus Satanasti mã kapër anẽ hãmri nhũm tee ri mẽmoj piitã ho mar kaprỳ hãmri nẽ hkaga nẽ ma nhỹhỹm tẽ. Hãmri nẽ kot nhỹrmã axte hwỳr htẽm nẽ kot mẽmoj punuj o mar kaxyw kormã amnhĩm hamãr o ri pa.

Jejus kot Tĩrtũm kapër o mẽ ahkre ho hkrax ã harẽnh

Matêwre 4.12-17; Makre 4.14-15

¹⁴ Tã nhũm Jejus ma akupỹm Garirej wỳr mõi. Nẽ Tĩrtũm Karõ nhỹ hã ahpumunh tỳx nẽ hkwyjê mã kapër jarẽnh o ri pa. Nhũm mẽ kuma nẽ piitã pikaja kamã axpẽn mã tanhmã harẽnh to. ¹⁵ Na pre hte mẽ kot Tĩrtũm kapër o mẽ ahkre xà hã ixkre hwỳr agjê nẽ kamã mẽ ahkre ho hkrĩ. Nhũm mẽ piitã kuma nẽ kãm mar prãm nẽ. Hãmri nẽ axpẽn mã mex ã harẽnh o ri pa.

Najare kamã mẽ kot Jejus kaga hã mẽ harẽnh

Matêwre 13.53-58; Makre 6.1-6; Juãw 1.11

¹⁶ Tã nhũm Jejus ma akupỹm krĩ kamã àptàr xàja wỳr ma mõi. Najare hwỳr. Hãmri nẽ kamã pøj.

Nhũm Ijaew nhõ arĩgromnu pẽ sap kato nhũm Jejus ma mẽ hkõt Tĩrtũm kapër o mẽ ahkre xà hã ixkre hwỳr tẽ. Hãmri nẽ hwỳr axà nẽ mẽ kuri nhỹ. Hãmri nẽ kamã mẽ kãm Tĩrtũm kapër ã kagà htùm kamã harẽnh kaxyw kànhmã xa ¹⁷ nhũm mẽ omu

nê kãm ja gô. Finat Ijais pê Tirtũm nhỹ hã kapêr xwýnh kot Tirtũm kapêr kwý hã kagàja nhũm mẽ kãm kugô. Hãmri nhũm kupy nê kamã kormã Tirtũm kot tanhmã mẽmoj jarênh to hõ japêr o xa. Nê kãm kato hãmri nê mẽ kãm kamã harê. Nom amnhĩ tã kamã mẽ kãm harênh o xa nê mẽ kãm:

¹⁸ Na pre ra Tirtũm Karôja ixto ixàhpumunh tỳx nê mẽ kêp amrakati xwýnhjê hwýr inhmẽ pa ra mõi. Ixte mẽ kãm mẽmoj mex jarênh o ixpa kaxyw. Nê Satanasti kot amnhĩ kôt mẽ unhwýr xwýnhjê hwýr nhũm pre mãânẽn inhmẽ. Ixte mẽ nê Satanasti japôx o ixpa kaxyw. Nê mẽ kot hprĩ hã Tirtũm kapêr mar kêt xwýnhjê hwýr nhũm pre mãânẽn inhmẽ. Ixprĩ hã ixte mẽ kãm kapêr jarênh o ri mẽ hkôt ixpa kaxyw. Nê mẽ kot amnhĩ tomnuj o mẽ pa xwýnhjê hwýr nhũm pre mãânẽn inhmẽ. Ixte mẽ nê mẽ kot amnhĩ tomnuj rênh pa nhũm mẽ hamakêtkati nê àmnhĩx ri pa kaxyw. Æ na pre Tirtũm jajê piitã hwýr inhmênh anê pa ra man mõi pôi.

¹⁹ Nê amgrà ja kêp Tirtũm kot mẽ ato mex xà hã amgràja nhũm ixte mẽ amã harênh o ixpa kaxyw na pre inhmẽ pa mõi pôi. Anê.

²⁰ Nhũm pre ã Jesus Tirtũm kapêr ã kagà htũm kamã mẽ kãm amnhĩ jarênh anê. Hãmri nê akupỹm mẽ kãm kagàja gô nê ho mẽ ahkre kaxyw akupỹm nhỹ nhũm mẽ piitã omunh pê mar o hkrĩ. ²¹ Hãmri nhũm mẽ kãm tanhmã amnhĩ jarênh to nê mẽ kãm:

—E ra Ijais kot ã ixkukamã ijarênh anhỹr xà hkôt na pa mẽ awýr wrý nê mẽ anoo mã ã amnhĩ nhĩpêx anhỹr o hkrax. Anê.

²² Hãmri nhũm mẽ amnhĩ jaêr pê ã kot amnhĩ jarênh anhỹr ã kuma. Nê tee ri kuma nê axpên pumunh pê hamaxpêr o hkrĩ. Jesus mẽ kurom àhpumunh tỳx nê kapêr mex tã nhũm mẽ ãm kêp amnhĩ kwý pix ã hkamnhĩx kãm hihtỳx nê. Hãmri nê axpên mã:

—Tk. Kwa kêp Juje hkra pix kênã koja we ri ã amnhĩ jarênh anê. Anê.

²³ Hãmri nhũm amnhĩ tã mẽ kuma nê mẽ kãm:

—Nà na ka mẽ ixte amnhĩ jarênh ma nom ixkôt ajamaxpêr kêt nê. Jakamã axpên mã ijarênh o: “Tk. Kêp mẽ pahkaprĩ xwýnh ro nhỹx jar mẽ panhõ krĩ kamã aa mẽ pahte mẽmoj pumunh kêt kwý tanhmã mẽ pamã hipêx to pu mẽ hã omu. Te ra kot krĩ pê Kapanau kamã mẽ kãm mẽmoj kwý ho anhỹrta pyrãk. Pu mẽ omu nê hkôt pajamaxpêr kurê kumrêx.” Anhỹr o ri axpên mã ijarê. ²⁴ Koja nhãm krĩ hõ kamã mêmõ kêp Tirtũm kapêr jarênh xwýnh ã amnhĩ jarê ka mẽ harênh ma nê amã ma hwýr amrar nê mar prãm nê. No kêt jar mẽ panhõ krĩ kamã ixpê mẽ anhĩõ hã ã amnhĩ jarênh anê ka mẽ amã inhmar prãm kêt nê.

²⁵ —Kwa mẽ inhma. Amnepêm kormã finat Eris htĩr ri na pre mẽ hã na wrýk kêt ry rax nê. Jao hã amgrà axkrunêpxi nê hkôt mytwrý pê 6. Nhũm mẽ õ hkêt nê pa. Ra mẽ kêp mẽmoj grà pa nê hapêx nhũm mẽ kãm prãm tỳx kumrêx nê pa. Nhũm mẽ kêp mẽ mjên tyk xwýnhjaja kãm prãm xaj hirot o pa. ²⁶ Tã nom Tirtũm mẽ ho mex kaxyw mẽ hwýr Eris mênh kêt nê. Erisja mẽ uràk nê kêp Ijaew tã nhũm Tirtũm kot mẽ ho ajuta kaxyw mẽ hwýr mênh kêt nê. Mẽ kot amnhĩ kaxyw Tirtũm kôt hamaxpêr kêt jakamã nhũm mẽ hwýr mênh kêt nê. Axtem Ijaew kêt xwýnhjê hõ hwýr na pre kumê. Nhãm Sitõ kamã krĩ pê Sarep kamã mjên htyk xwýnhhta wýr. Tokyx kot tanhmã ho mex to kaxyw. Jakamã nhũm ma hwýr mõi nê tanhmã kãm kapêr to nhũm kuma nê amnhĩ kaxyw Tirtũm kôt hamaxpêr kurê kumrêx.

²⁷ —Nê finat Eriasti haxwýja. Eris pyrã nê kêp Tirtũm nhỹ hã kapêr o pa xwýnh tã amnhĩ kwý pê Ijaew tanhmã mẽ ho ajuta hto hkêt nê. Na prem ohtõ nê hkà nhy nê hkro xàpêr o pa. Jao ra omnuj tỳx nê. Tã nhũm Tirtũm kot akupỹm mẽ ho mex kaxyw mẽ hwýr Eriasti mênh kêt nê. Amnhĩ kaxyw mẽ kot hkôt hamaxpêere hã. Æm Sir nhõ xwýnh Namãja pix na pre Tirtũm Eriasti mã anê nhũm akupỹm ho mex. Kêp Ijaew kêt tã nhũm akupỹm ho mex. Tã ja pyrã nê na pa ãm mẽ kot amnhĩ kaxyw ixkôt hamaxpêr pix xwýnhjê mã tanhmã amnhĩ nhĩpêx to ho ri ixpa. No mẽ ate amnhĩ kaxyw ixkôt ajamaxpêr

kêt xwÿnhjê mã tanhmã ri amnhĩ nhĩpêx to hkêt nê. Anê.

Nhũm pre ã Jejus mẽ kãm amnhĩ jarênh anê.

²⁸ Hãmri nhũm mẽ kuma nê kamã gryk tÿx nê axpên mã hã amÿnê nê axpên mã:

—Tk. Kwa pu mẽ ixkre nê kator nê ma o tẽ nê kupĩ ri. Anê.

²⁹ Hãmri nê kaxyw kànhmã kuhê hpa nê hwÿr hprôt nê unê. Mẽ kot ma o htêm nê hixêt prêk jatur xà hã hkujaêk nhũm ahpar mã tẽn htêm nê htyk kaxyw. Mẽ õ krĩa hixêt prêk nhĩmök ã na pre. Jakamã nhũm prem unê nê hatur xàta wÿr o tẽ. ³⁰ Tã nom nhũm tanhmã amnhĩ nhĩpêx to nê mẽ kêp akunok nê hpãnã nhãm ma tẽ nhũm mẽ tee ri hapêr nom nhÿri omunh kêt nê.

Jejus kot mẽhõ nê mẽkarõmnuti kator ã harênh

Makre 1.21-28

³¹ Tã nhũm Jejus ma akupÿm Garirej kamã krĩ pê Kapanaũ hwÿr mō. Nhũm mẽ õ arĩgromnu pê sap kato nhũm ma mẽ kot Tĩrtũm kapêr o mẽ ahkre xà hã ixkre hwÿr tẽ nê mẽ ahkre ho nhÿ. ³² Hãmri nhũm mẽ kot mar o hkrĩ xwÿnhjaja kuma nê kãm mar prãm nê. Nê axpên mã:

—Hêxta waa nê. ãm hãmri na ã mẽ pamã kapêr anê. Ahpumunh tÿx xà hkôt na hte ãm hãmri mẽ pamã awjarê. Anê.

³³ Nhũm mẽhõ myja mẽ ãhkô hã haxwÿja mar o nhÿ. Mẽkarõmnuti na pre ra hwÿr axà nhũm ÿ hã tanhmã amnhĩ tomnuj to ho pa. Hãmri nê mẽ ãhkô hã Jejus mar o nhÿ nê ra àmra kamã tanhmã kãm kapêr to. Nom nhũm tãm kãm kapêr kêt ãm kamã mẽkarõmnutija kãm kapêr. ³⁴ Nê kãm:

—Pa? Jejus pê Najare nhõ xwÿnh? Nà ate mẽ ixto ajapêx par kaxyw na ka mẽ ixwÿr mō. Ra ixte apumunh mex kênã. Apê Tĩrtũm kot mẽ ixwÿr amênh xwÿnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwÿr mō? Anê.

³⁵ Hãmri nhũm kuma nê mẽkarõmnuti kot kãm ã kapêr anhÿr ã omunh kurê kumrêx. Jakamã kutã kãm kapêr nê kãm:

—Tk. Kwa anhĩkrê nê kêp akato. Anê.

Hãmri nhũm kuma nê myta o pika kura nê kêp kato nê ma tẽ. ãm ho pika kuranh

pix nhũm nō. Hãmri nê akupÿm kànhmã nhÿ nê akupÿm mex. ³⁶ Hãmri nhũm mẽ piitã omu nê kamã no puma nê. Hãmri nê axpên mã:

—Kokÿÿ. Na hte Jejus amnhĩ krã hkôt àhpumunh tÿx xà hkôt mẽkarõmnuti mã kapêr nê mẽ hano nhũm htem kuma nê mẽ kêp hapôx kurê kumrêx. Anê.

³⁷ Hãmri nhũm mẽ mẽõ pika kamã piitã ri axpên mã harênh o pa.

Jejus kot Simãw Pêtre xupãnhgêx o mex ã harênh

Matêwre 8.14-15; Makre 1.29-31

³⁸ Tã nhũm Jejus Tĩrtũm kapêr o mẽ ahkre xàja rũm kato nê ma Simãw Pêtre nhõrkwÿ hwÿr tẽ. Nê mẽ hwÿr axà nhũm Simãw Pêtre omu nê kãm upãnhgêx tanhmã kute hã harê nê kãm:

—Kwa Pahihti. Tẽ nê inhmã ixupãnhgêx pumu. Na hkà kagro htÿx nê amnhĩ to àpêr o nō. Kwa tẽn inhmã omu. Anê.

Hãmri nhũm kãm:

—Tõe. Nà kot paj amã omu. Anê.

³⁹ Hãmri nê hwÿr tẽn kuri xa nê kãm:

—Pa? E kwa akà hakry. Anê.

Hãmri nhũm kuma nê hkà hakry nê akupÿm hihtÿx kurê kumrêx. Hãmri nê kànhmã nhÿ nê mẽ kãm mẽõ hã àpênh o ri mra.

Jejus kot mẽ ho ohtô nê mẽ ho mex ã harênh

Matêwre 8.16-17; Makre 1.32-34

⁴⁰ Tã nhũm ra amÿkry htÿx mẽ nhũm mẽ Jejus wÿr ahpÿnhã ri mẽ ã xwÿnhjê ho mra. Nhũm amnhĩ wÿr mẽ omu hãmri nê mẽ piitã ri mẽ hã ãhkra jaxwÿ nê akupÿm mẽ ho mex pa. ⁴¹ Nhũm ra mẽkarõmnuti mẽ hkwyjê hwÿr agjê nhũm mẽ kurũm mẽ hano nhũm mẽ tee ri amnhĩ tã omu nê mẽ kêp hapôx kurê kumrêx. Hãmri nê mẽ kêp hapôx kaxyw nê àmra kamã kãm kapêr nê kãm:

—Kwa tanhmã kot pa wem amnhĩ nê ato? Hêxta waa nê. Apê Tĩrtũm Kra hã axàhpumunh tÿx kênã.

Anhÿr o kãm kapêr. ãm hãmri na prem ã harênh anê. Kêp Tĩrtũm kot mẽ pakaxyw ãm xwÿnh kênã. No nhũm Ijaew nhõ pahijaja kot mẽ kapêr mar nê kêp mẽkarõmnuti hkwy hã hkamnhix pymaj nhũm Jejus amnhĩ nê mẽ kãm kapêr nê mẽ kãm:

—Kwa mẽ ri ã ijarēnh anhÿr kêt nē.
Anhÿr o mẽ kām kapēr hāmri nē mẽ hano
nhũm mẽ hapôj nē ma mra.

*Mẽmo kaxyw Tirtũm kot mẽ pahwÿr Jejus
mēnh ã harēnh*

Makre 1.35-39

⁴² Tã nhũm apkati nē myt kator grire
nhũm Jejus kot Tirtũm mã amnhĩ jarēnh
kaxyw kànhmã nhÿ nē kato nē ma nhÿhÿm
kapôt mã tē. Hāmri nhũm krĩ nhõ xwÿnhjaja
hkrã hapôj nē tee ri hapēr nē ma hkôt hpri
jakop o mō. Nē nhÿri hwÿr kato nē omu
hāmri nē ma nhÿhÿm mōr nē kurē nē kām:

—Kwa Jejus. Kēr ka tokyx ma nhÿhÿm
amōr kêt nē. Kritpēm mẽ ixkôt axkamē
mãn. Anē.

⁴³ Hāmri nhũm mẽ kuma nē amnhĩ tã mẽ
kām:

—Nà kot paj kritpēm mẽ akôt ixpikamēnh
kêt nē. Kot paj ma krĩ piitã hkôt ri Tirtũm
kapēr o mẽ ahkre ho ri mẽ hkôt ixpa.
Tirtũm kot tanhmã mẽ ho hkra hto hã
harēnhja kot paj mẽ hkôt ri mẽ kām harēnh
o ri ixpa. Ja kaxyw na pre Tirtũm mẽ awÿr
inhmē. Anē.

⁴⁴ Nhũm pre ã mẽ kām amnhĩ jarēnh anē.
Hāmri nē mẽ kēp kato nē ma Ijaew nhõ pika
piitã hkôt Tirtũm kapēr o mẽ ahkre ho ri pa.
Ijaew nhõ Tirtũm kapēr o mẽ ahkre xà hã
ixkre kamã mẽ piitã ho mẽ ahkre ho ri pa.

5

*Jejus kot amnhĩ kôt mẽ hkwÿjê hwÿr ã
harēnh*

Matêwre 4.18-22; Makre 1.16-20

¹ Tã nhũm Jejus ma gō rax pē Jenējare
hwÿr mō. Hāmri nē hwÿr pōj nē gō mÿri
Tirtũm kapēr o mẽ ahkre ho xa nhũm mẽ
ohtō nē pu hã mar o kuhê. Nē kot hpri
hã mar nē hkôt omunh kaxyw hã axpēn
nhĩgãnh o kuhê. ² Hāmri nhũm tee ri amnhĩ
tã mẽ omu nē amnhĩ pu hã hakēx nē rīt
nē gōx kām pàr kaprÿ hamēxkrut nē jētja
wa omu. Nhũm ò dōn wa gōx kām kryhti
kuhōnh o xa. Nhũm pàr hamē hkaprÿ nē
ajēt nhũm Jejus omu. ³ Hāmri nē hwÿr tē nē
hōm axà nē ò dōn pē Simãwja mã anē nhũm
hkôt axà nē kii mẽ kēp pàrja amÿm kunhō
nhũm ajēt. Hāmri nhũm pàr kre rŭm amÿm
mẽ ahkre ho nhÿ nhũm mẽ piitã omu nē
mar mex o kuhê.

⁴ Tã nhũm mẽ ahkre hpa nē Simãw mã
kām:

—E gō xupÿm wÿr anhõ pàr o axkamē
nē axte anhõ kryhti mẽ nē ho amnhĩm tep
kwÿmnē. Anē.

⁵ Hāmri nhũm tee ri kuma nē kām:

—Kwa na pa mẽ ra kamàt kām tee rēnh
o apkati nē ho hōmnēnh kêt tã ka ri inhmã
anē. Nom kot paj amar xà hkôt kop kumē.
Anē.

⁶ Hāmri nē upÿm wÿr pàr o axkamē nē
htõ Andre mẽ wa axte kryhti mẽ. Nē ãm
mēnh tipxi htã ho tep pynēnh rax kumrēx.
Jakamã nhũm kryhtija ra pikaxōnh kaxyw.

⁷ Hāmri nhũm wa tee ri ho anē nē amnhĩ
wÿr pàr ò ho mrar xwÿnhhta wa kām akir.
Jepetew kra Juãw mẽ Xiakreja wa nhũm wa
amnhĩ wÿr wa kām akir nhũm wa hwÿr
pàr ò ho tē hāmri nē mẽ kryhti hã hije nē
pàr wÿr ho api. Hāmri nē pàrta hamē tep
o ho nÿt pa nē hamē ho hipu mex nē. Jao
nhÿx gōnh mã wa axà. ⁸⁻¹⁰ Hāmri nhũm
mẽ amnhĩ jaēr pē tep xohtō raxta pumu nē
kamã no puma nē. Hāmri nhũm Simãwja
Jejus kutã hkōn krã ho tēm nē hipō nē nhÿ
nē hã hpijaàm kamã kām kapēr nē kām:

—Kwa Pahihti. Kii tamũ axkamē. Akĩnhã
ixte amnhĩ tomnuj tÿx xwÿnh na pa. Anē.

Hāmri nhũm kuma nē ãm kuma nē kām:

—Kwa nà tee ri amnhĩ kukamã aja-
maxpēr kêt nē. Kot kaj jarãhã hpãnhã tãm
amnhĩ nhĩpēx o apa. Na ka ra tep pynēnh
rŭnh o apa. Tã kot kaj ja kaga nē hpãnhã
ma ri mẽ hkôt Tirtũm kapēr o mẽ ahkre ho
ri apa. Kojã mẽ ohtō nē ama nē Tirtũm kôt
amnhĩ xunhwÿ nē hkôt amnhĩ nhĩpēx o pa.
Jakamã kot kaj te ate tep pynēnh rŭnh nē
Tirtũm mã òr pyræk o amnhĩ nhĩpēx o apa.
Anē.

Nhũm pre ã Jejus Simãw mã kapēr anē.

¹¹ Hāmri nhũm mẽ gō jakàx ã pàr janhōr tÿx
nē kamã hikukrēx piitã hkaga hpa nē ma
Jejus kôt pa ho pa.

*Jejus kot hkà nhy kro tÿx xwÿnh o mex ã
harēnh*

Matêwre 8.1-4; Makre 1.40-45

¹² Tã nhũm Jejus ma krĩ hō hwÿr mō.
Hāmri nhũm mēhō my hkà nhy hkro htÿx
xwÿnhja omu nē hwÿr tē nē hã hpijaàm
kaxyw kutã hkōnkrã ho nhÿ nē kām:

—Pa Pahihti. E ot pa awÿr amnhĩ to tẽ. Kwa akupÿm ate mẽ ixto mex kaxyw axàhpumunh tÿx jakamã kot ka akupÿm amã ixto mex prãm nẽ mãmrĩ akupÿm ixto mex. Anẽ.

¹³ Hãmri nhũm kuma nẽ hkà punuti hã ìhkra xi. Amnhĩ kamã kahak kêt nẽ hã ìhkra xi nẽ kãm:

—Nà kot paj ato mex. E akupÿm akà mex kurê kumrẽx.

Anhÿrja kôt hãmri nhũm hkàja akupÿm mex pa. ¹⁴ Hãmri nhũm Jejus kãm:

—E kêt ka amnhĩ tã akwÿjê mã tanhmã ijarẽnh to hkêt rãhã ma patre hwÿr tẽ kè akupÿm akà mex ã apumu. Hãmri ka amnepẽm Mojes kot mẽ ate akupÿm amex ã Tirtũm mã tanhmã amnhĩ nhĩpẽx to hã karõta ka kãm ho anẽ. Kè mẽ mẽ piitã akupÿm akà mex ã apumu. Anẽ.

Hãmri nhũm kuma nẽ kãm:

—Tõe. Nà kot paj anẽ. Anẽ.

Hãmri nẽ ma hwÿr htẽm kurê kumrẽx.

¹⁵ Hãmri nhũm mẽ piitã axpẽn mã Jejus jarẽnh o ri hprõt nhũm mẽ kot kapër mar kaxyw ma hwÿr mra. Nẽ mẽ à xwÿnhjaja nhũm kot mẽ ho mex kaxyw nhũm mẽ hwÿr amnhĩ to mra. ¹⁶ Jakamã nhũm pre hte Jejus tõhã mẽ kèp hapøj nẽ ahte ma kapõt ã Tirtũm mã amnhĩ jarẽnh kaxyw mra. Nẽ kãm amnhĩ jarẽnh pa hãmri nẽ ma akupÿm mẽ hwÿr mra.

Jejus kot ì kamã htyk xwÿnh o mex ã harẽnh

Matêwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tirtũm kapër o Ijaew jahkre ho pa. Jakamã nhÿri mẽhõ nhõrkwÿ kamã ho mẽ ahkre ho xa nhũm Parijew nhõ xwÿnhjê mẽ Tirtũm kapër tũm o mẽ ahkre ho mẽ pa xwÿnhjaja kot mar kaxyw ma hwÿr mra. Na pre ra Garirej rũm mẽ hkwyjaja ma hwÿr mra. Nẽ pika pè Jutej rũm mẽ hkwy haxwÿja ma hwÿr mra. Nẽ krĩ pè Jerujarẽ rũm. Á na prem ohtõ nẽ krĩ piitã kurũm kot mar kaxyw hwÿr akuprõ nhũm mẽ ahkre anẽ. Nẽ Tirtũm kot ho àhpumunh tÿx jakamã nhũm ý hã akupÿm mẽ à xwÿnhjê ho mex. ¹⁸ Hãmri nhũm hkwyjaja ì kamã htyk xwÿnh mÿ nẽ Jejus wÿr o tẽ. Nõr xà kamã nõr rãhã nhũm mẽ hã hije nẽ hwÿr o tẽ. Hãmri nẽ tee ri kot hwÿr

ho àr kaxyw ri mẽ hkupu ho pa. ¹⁹ Nom nhũm mẽ ra ixkre ho nÿt rax jakamã nhũm mẽ tee ri amnhĩ kukamã ho ukapi ho ri pa. Hãmri nẽ ra hamaxpër nẽ ixkre nhĩmõk po hwÿr ho api nẽ ixkre nhĩmõk kwÿ grà nẽ hkõt ì kamã htyk xwÿnhta jaxà. Nõr xà kamã nõr rãhã Jejus wÿr haxà nẽ mẽ hipõk ri ho wrÿ nẽ kutã kuxi nhũm nõ. ²⁰ Hãmri nhũm Jejus amnhĩ tã mẽ kot kaxyw kãm hamaxpër tÿx ã mẽ omunh mex nẽ. Hãmri nẽ ì kamã htyk xwÿnhta mã kapër nẽ kãm:

—Pa? E na pa ra anẽ tanhmã ate amnhĩ tomnuj to ho apaja o ijapêx pa. Kot paj axte kãm ijamaxpër kêt nẽ. Anẽ.

²¹ Hãmri nhũm Parijew nhõ xwÿnhjê mẽ Tirtũm kapër tũm o mẽ ahkre ho mẽ pa xwÿnhjaja tee ri kot ã kãm kapër anhÿrja ã kuma nẽ axpẽn mã:

—Tk. Kwa kèp Tirtũm kêt tã te ri kot amnhĩ nhĩpẽx pyræk o ri mẽ nẽ mẽ kot amnhĩ tomnuj o hapêx ã amnhĩ jarẽnh o kuhê. Tirtũm pix na kot mẽ nẽ mẽ kot amnhĩ tomnuj o hapêx xwÿnh kênã. Anẽ.

²² Nhũm mẽ ã axpẽn mã Jejus jarẽnh anẽ nhũm amnhĩ tã mẽ kuma nẽ mẽ hamaxpër kôt mẽ omunh mex nẽ. Jakamã mẽ kãm:

—Kwa mẽ ã ajamaxpër anhÿr kêt nẽ.

²³ Ixte mẽ nẽ mẽ kot amnhĩ tomnuj o ijapêx par ã amnhĩ jarẽnh tã mẽ ate ja kôt ixpumunh kêt jakamã na ka mẽ ixkõt ajamaxpër kêt nẽ. Nom kot paj mẽ anoo mã akupÿm ì kamã htyk xwÿnhta o mex ka mẽ apiitã ja hã ixpumu hãmri nẽ ixkõt ajamaxpër kurê kumrẽx. ²⁴ Ixpê Tirtũm kot mẽ awÿr inhmẽnh xwÿnhta na pa. Ixte mẽ anẽ mẽ ate amnhĩ tomnuj rẽnh kaxyw na pre mẽ awÿr inhmẽ pa mẽ awÿr wrÿ. Tã mẽ ate ja kôt ixpumunh kaxyw kot paj mẽ anoo mã myja o mex. Anẽ.

Hãmri nẽ hpãnhã ì kamã htyk xwÿnhja mã kapër nẽ kãm:

—E kãnhmã xa nẽ anõr xà py nẽ ma akupÿm anhõrkwÿ hwÿr tẽ. Anẽ.

²⁵ Nhũm kãnhmã ãm kurê kumrẽx. Hãmri nẽ amnhĩ pumu nẽ hkĩnh tÿx nẽ nõr xà py nẽ mẽ noo mã kato nẽ akupÿm õrkwÿ hwÿr ma Tirtũm mã mex o mex ã harẽnh o tẽ.

²⁶ Hãmri nhũm mẽ amnhĩ jaer pè omu. Nẽ no hapõx kaxyw hkõt omunh o kuhê nẽ kamã no puma nẽ. Nẽ tee ri omu hãmri nẽ axpẽn mã:

—Kokÿÿ. Aa mẽ pahte ã mẽhõ kot amnhĩ nhĩpêx anhÿr ã omunh kêt tâ na pu mẽ jarãhã ja pumu. Anẽ.

Hãmri nẽ Tĩrtũm mã mex o mex ã harẽnh o kuhẽ.

Jejus kot amnhĩ kõt Rewi hwÿr ã harẽnh Matêwre 9.9-13; Makre 2.15-17; Rukre 15.1-2

²⁷ Tã nhũm Jejus ma hkõt mẽ pa ho mẽ pa xwÿnhjẽ mẽrohã ma nhÿhÿm mõ. Hãmri nẽ nhÿri Rewi pumu. Rewi nhĩxi hõ pẽ na Matêwre. Rõm kãm mẽ õ pahĩti mã amnhĩ kwÿjẽ pẽ kàxpore hkwy jamÿnh xwÿnh na pre. Jakamã nhũm ujamÿnh xã hã ixkre kamã mẽ kęp hkwy jamÿnh o nhÿ nhũm Jejus mẽ hkõt mẽ pa o mẽ pa xwÿnhjaja hãnh mra. Hãmri nhũm Jejus ãpẽnh ã omu nẽ amnhĩ kõt kuwÿ nẽ kãm:

—Pa? E kwa axãpẽnhhta kaga nẽ hpãnhã amnẽ mẽ ixkõt mãn tẽ. Nẽ ixkõt mãn ri apa ho apa. Anẽ.

²⁸ Hãmri nhũm kuma nẽ ãpẽnh kaga hpa nẽ ma hkõt mõ nẽ hkõt pa ho pa.

²⁹ Hãmri nhũm mẽmo arĩgro hã nhũm Rewi nhõ mẽ apkur xã hã mẽõ rax nẽ. Jakamã nhũm amnhĩ nhõrkwy hwÿr hkrãmnhwÿjaja nẽ Jejus mẽ hkõt mẽ pa ho mẽ pa xwÿnhjẽ hwÿ. Mẽ kot kutã apkur kaxyw nhũm amnhĩ kõt mẽ kuwÿ nhũm mẽ ma hkõt mra nẽ õrkwy hwÿr agjẽ nẽ apkur o hkrĩ. Nẽ mẽ kęp Rõm nhõ pahi mã mẽ kęp kàxpore hkwy jamÿnh xwÿnh kwÿjaja nẽ mẽ ohtõ nẽ hwÿr akuprõ nẽ axpẽn kutã apkur o hkrĩ. ³⁰ Hãmri nhũm Parijew nhõ xwÿnhjẽ mẽ Tĩrtũm kapẽr tũm o mẽ ahkre ho mẽ pa xwÿnh kwÿjaja mra nẽ mẽ apkur ã mẽ omu nẽ tee ri mẽ hkaêx ã Jejus pumu hãmri nẽ Jejus kõt mẽ pa ho mẽ pa xwÿnhjẽ hwÿr agjẽ nẽ hã mẽ kãm akir nẽ mẽ kãm:

—Kwa mẽ kot amnhĩ tomnuj ho mẽ pa xwÿnhjẽ kutã mẽ apkur kêt tâ ka mẽ apytãr xwÿnhja mẽ apimràatã axtem nẽ mẽ kutã axãpkur o akrĩ. Kwa mẽ ate amnhĩ to mex ronhÿx ka mẽ kutã axãpkur kêt nẽ. Anẽ.

³¹ Hãmri nhũm Jejus amnhĩ tã mẽ kapẽr ã mẽ kuma nẽ mẽ kãm:

—Tk. Nã ixte tãm mẽ unhwÿr kaxyw na pa mẽ kutã ixãpkur o nhÿ. Xã na hte tõtõja mẽ mex xwÿnhjẽ hwÿr mra nẽ mẽ hkane? Nã ãm mẽ ã xwÿnhjẽ pix wÿr na htem mra. Ra mẽ ate ja pumunh mex kẽnã. Ja pyrã

nẽ na pa pre mẽ kot amnhĩ to mex xwÿnhjẽ hwÿr ixwÿrÿk kêt nẽ. Mẽ kot amnhĩ tomnuj xwÿnhjẽ pix wÿr na pa pre wrÿ. Ixte tãm mẽ unhwÿr kaxyw na pa pre mẽ hwÿr wrÿ nẽ ã jajẽ kutã ixãpkur o inhÿr anẽ. ³² ãm mẽ kot amnhĩ tomnuj xwÿnhjẽ hwÿr na pa pre wrÿ nẽ mẽ kamã ixukaprĩ ho ri ixpa. Mẽ kot amnhĩ tomnuj mã urer nẽ hpãnhã tãm amnhĩ nhĩpêx o pa kaxyw na pa pre mẽ hwÿr wrÿ. Tã ka mẽ atÿx ã ri mẽ ixto akapẽr anẽ. Anẽ.

Mẽ hpãmjaja kot amnhĩ nhĩpêx gryk ã Jejus kaga hã mẽ harẽnh

Matêwre 9.14-17; Makre 2.18-22

³³ Tã nhũm Ijaew kwÿjaja Jejus wÿr mra nẽ kãm:

—Pa? E ot pa mẽ awÿr mra. Kwa aprĩ hã mẽ inhmã mẽmoj jarẽ. Na hte Parijew nhõ xwÿnhjẽ mẽ Juãw kõt mẽ pa xwÿnhjaja tõtã Tĩrtũm mã amnhĩ jarẽnh kaxyw nẽ apkur kêt rãhã kãm amnhĩ jarẽ. No akõt mẽ pa ho mẽ pa xwÿnhjaja na htem ãmnhĩx apkur o pa kamã kãm amnhĩ jarẽ. Kwa mo na htem mẽ urãk nẽ tõtã apkur kêt ri kãm amnhĩ jarẽnh hkêt nẽ? Anẽ.

³⁴ Hãmri nhũm mẽ kuma nẽ mẽ kãm:

—Tk. Nã mo kaxyw koja mẽ apkur kêt rãhã kãm amnhĩ jarẽ? Mẽ hkaprĩ hkêt kẽnã. Mẽ kot ixkõt pa ho pa hã amnhĩ pumunh jakamã hkĩnh nẽ pa. Kormã ixte mẽ kamã ixpa kẽnã kot kêt mẽ Tĩrtũm mã amnhĩ jarẽnh kaxyw nẽ apkur kêt rãhã kãm amnhĩ jarẽ. Xã na htem hkrãmnhwÿ hã hkĩnh kaxyw hã akuprõ nẽ hkaprĩ nẽ apkur kêt nẽ mÿr o hkrĩ? Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkõt mẽ pa ho mẽ pa xwÿnhjaja ixkõt kormã ãmnhĩx ri hkĩnh nẽ apkati mẽ apkur o pa. ³⁵ Nom koja mẽ kãm ixkurẽ xwÿnhjaja nhÿrmã tanhmã ixto hãmri nhũm mẽ rĩ kormã ixtã hkaprĩ htÿx kãm apkur kêt ri tanhmã amnhĩ nhĩpêx to. Anẽ.

³⁶ Nhũm pre ã Jejus mẽ kãm hkõt ri mẽ pa ho mẽ pa xwÿnhjẽ jarẽnh anẽ hãmri nẽ mẽ kãm:

—Nã mẽ kot amnhĩ tomnuj xwÿnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga. ³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã

ka htem inhma nê ãm inhma. Kwa mẽ ixkapêr ma nê mẽ ate amnhĩ nhĩpêx tũm gryk ã ixkaga hkêt nê. Anê.

6

*Jejus kêp arĩgromnu hpãm ã harênh
Matêwre 12.1-8; Makre 2.23-28*

¹ Tã nhũm Ijaew nhõ arĩgromnu pê sapja axte kato. Hãmri nhũm Jejus mẽ hkôt ri mẽ pa ho mẽ pa xwýnhjê mẽ ma mẽ hpur kôt ri nhỹhỹm ri pa. Hãmri nhũm hkôt mẽ pa ho mẽ pa xwýnhjaja ra kãm prãm nê mra hãmri nê prãm xàj mẽmo hy te kot harôj pyræk xwýnhhta kwý rê nê kugrà nê ma Jejus kôt hkanhar o mō. Ijaew kot amnhĩ nhĩpêx xà hkôt. ² Hãmri nhũm Parijew nhõ xwýnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhỹr ã mẽ omu nê mẽ hã Jejus kukjêr kurê kumrêx nê kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwýnhjaja axtem nê mẽmo hyta kwý rê nê akôt hkanhar o mō. Kwa mẽ kãm anê kê mẽ ã amnhĩ nhĩpêx anhỹr kêt nê. Na htem arĩgromnu hã ã amnhĩ nhĩpêx anhỹr kêt nê. Anê.

³⁻⁴ Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarê nê mẽ kãm:

—Kwa xà na ka mẽ Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx tota kamã harênh nê mar kêt nê? Na pre Tawija hkôt ri mẽ pa xwýnhjê mẽ nhũm mẽ prãm xàj Tĩrtũm mã amnhĩ jarênh xà hã ixkre wýr agjê nhũm patre maatija mẽ kãm prãm tỳx ã mẽ omu nê mẽ kãm mẽmoj gō. Mẽ kot Tĩrtũm noo mã pãwti jaxwýr xwýnhhta nhũm mẽ kãm kugō nhũm mẽ kuku. Tĩrtũm kapêr ã kagà htũm kot ja nê mẽ kurê htã nhũm mẽ kãm prãm tỳx ã mẽ omu nê mẽ kamã ukaprĩ xàj mẽ kãm kugō. Patre pix kot ja kur kaxyw tã nhũm mẽ kãm kugō nhũm mẽ kuku. Tã nhũm Tĩrtũm ja hã mẽ omu nhũm ja kêp omnuj kêt nê. Kot mẽ kamã ukaprĩ nê mẽ kãm òr nhũm mẽ hã omu nhũm ja kãm mex nê.

⁵ Tã pa na pre Tĩrtũm mẽ akaxyw ixãm nê mẽ awýr inhmênh jakamã papxipix na pa hte arĩgromnu hã tanhmã mẽ kot amnhĩ

nhĩpêx to hã mẽ kãm karõ ho ri ixpa. Ixpê arĩgromnu hpãm na pa. Anê.

*Jejus kot ìhkra grà xwýnh o mex ã harênh
Matêwre 12.9-14; Makre 3.1-6*

⁶ Tã nhũm Ijaew nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkre hwýr tẽ nê axà nê Tĩrtũm kapêr o mẽ ahkre ho nhỹ. Nhũm mẽhõ myja upôk rũm ìhkra grà xwýnhja mẽ ìhkô hã mar o nhỹ. ⁷ Nhũm Parijew nhõ xwýnhjê mẽ Tĩrtũm kapêr tũm o mẽ ahkre ho mẽ pa xwýnhjaja mẽ kãm mẽ hkrãhtũmjê mã Jejus o kapêr prãm xàj htãnopxar o kuhê. Nê ìhkra grà xwýnhhta pumu nê hã axpên mã:

—Kwa pu mẽ jar pakuhê nê Jejus tanhmã kot amnhĩ nhĩpêx to hã omu. Xà koja jarãhã mũjti ho mex nà? Jarãhã arĩgromnu kênã kot kêt kãm ìhkra ho mex. Koja anê nê Tĩrtũm kapêr kwým ri amnhĩ nhĩpêx. E pu mẽ kop pakuhê nê hã omu. Anê.

⁸ Nhũm Jejus ra kot mẽ hamaxpêr kôt mẽ omunh mex jakamã amnhĩ wýr myta mã hpa ho apê nê kãm:

—Pa? E kãnhmã xa nê amnê ixwýr tẽ. Anê.

Hãmri nhũm kuma nê kãnhmã xa nê hwýr tẽ. ⁹ Hãmri nhũm Jejus amnhĩ pu hã ri mẽ ho hakêx nê mẽ kot mar o hkrĩ xwýnhjê pumu nê mẽ kãm:

—E mẽ inhmã mẽmoj jarê. Tanhmã na htem arĩgromnu hã axpên nhĩpêx to ho pa wehe? Xà kot ka arĩgromnu hã axà htỳx nê nõ hãmri nê amnhĩ mex prãm xàj ma mẽhõ hwýr amnhĩ to tẽ. Hãmri nhũm ãm apumu nê apkatim arĩgro mex jamãr pê akane hkêt ka ty nhũm ja amã mex nê nà? Rỳ nhũm tanhmã atomnuj to nê akupým amnhĩ nê ajano nhũm ja amã mex nê nà? Nà koja ã anhĩpêx anê nhũm ja amã mex kêt nê. Na ka htem ã amnhĩ nhĩpêx anhỹr o apa hkêt nê. E mẽ inhmã mẽmoj jarê. Tanhmã na pre finat Mojesja Tĩrtũm nhỹ hã mẽ pamã arĩgromnu hã mẽ pahte axpên nhĩpêx ã karõ hto? Xà kot puj mẽ axpên kãm paxukaprĩ ho papa nà? Kot puj mẽ pamã axpên kurê ho papa? Xà kot puj mẽ hã mẽmoj punuj pê axpên pytã nà? Xà kot puj mẽ hã axpên pytãr pymaj arĩgro mex jamã? E mẽ atõ inhmã ja jarê. Anê.

Nhũm pre ã mẽ hkukjêr anê. ¹⁰ Mẽ hamaxpêr ã mẽ omunh mex pê ã mẽ hkukjêr anhÿr o xa. Nom nhũm arĩ mẽhõ tanhmã kutã kãm nê hkêr nê. ãm akryk mar pê omunh o hkrĩ. Mẽ kot tanhmã kãm nê nhũm ta pãnhã tanhmã kot mẽ kãm nê pymaj nhũm mẽ tee ri kãm tanhmã nê hprãm nom akryk mar o hkrĩ. Hãmri nhũm Jejus tee ri mẽ omu hãmri nê myta mã kãm: –Tk. Mẽ kot tanhmã inhmã kapêr tore hã. E anhĩhkra katãt. Anê.

Hãmri nhũm ĩhkra katãt nê akupÿm mex kurê kumrêx. ¹¹ Hãmri nhũm mẽ kãm Jejus kurê xwÿnhjaja tee ri ja hã omu nê kamã gryk tÿx nê. Arĩgromnu hã kot ho mex jakamã nhũm mẽ kamã gryk tÿx nê. Nê hã expên kukjêr o kuhê nê expên mã:

–Kwa ã kot amnhĩ nhĩpêx anhÿr mÿrapê tanhmã kot puj wem ho? Na ã kapêr anhÿrja o tanhmã mẽ pahto kapêr punuj to. Te mẽ papamjaja mẽ pahte hkĩnhã pahkwÿjê kamã paxukaprĩ hkêr pyrãk ã mẽ pajarê. Kojã mẽ pahkwÿjaja kuma hãmri nê mẽ pahte amnhĩ nhĩpêx kaga nê amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anê.

Jejus kot amnhĩ kaxyw mẽ ho 12 nê mẽ rênh ã harênh

Matêwre 10.1-4; Makre 3.13-19

¹² Tã nhũm arĩgro hõ hã nhũm Jejus ma kot Tĩrtũm mã amnhĩ jarênh kaxyw ma hixêr prêk wÿr tẽ nê hã api. Hãmri nê kãm amnhĩ jarênh o apkati.

¹³ Tã nhũm kwÿhtã nhũm amnhĩ kôt kot ri mẽ o pa xwÿnhjê hwÿ nê amnhĩ kaxyw mẽ ho 12 nê mẽ kurê. Nê mẽ kãm:

–E mẽ kajaja kot paj ma mẽ pahkwÿjê hwÿr mẽ arê ka mẽ ma inhÿ hã Tĩrtũm kapêr o mẽ ahkre ho ri mẽ hkôt apa. Kot kaj mẽ apê inhÿ hã mẽ ahkre ho apa xwÿnh. Anê.

¹⁴ Kot amnhĩ kaxyw mẽ rênh xwÿnhjê nhĩxi na jajaja:

Simãw kumrêx na pre kuta nê axte hã hixi mẽ nhũm kêp Pêtre.

Nê Simãw Pêtre hkôt htõ Andreja ta.

Nê hkôt Xiakre hta.

Nê hkôt Juãw ta.

Nê hkôt Firiptija ta.

Nê hkôt Patoromew ta.

¹⁵ Nê hkôt Matêwreja ta.

Nê hkôt Tomasja ta.

Nê hkôt Apew kra axtem Xiakre hõja ta.

Nê hkôt Simãw Jeroxja ta.

¹⁶ Nê hkôt Xiakre hõ hkra Jutja ta.

Nê hkôt Jut Kariot ta.

Jut Kariotja na pre kormã kot mẽ kãm Jejus kurê xwÿnhjê nhĩhkram õr mã. Nhũm kot amnhĩ kukamã omunh mex tã mẽ hkôt amnhĩ kaxyw kuta.

Ã mẽ kot Jejus nhÿ hã mẽ ahkre o pa kaxyw mẽ rênh xwÿnhjê nhĩxi kot anhÿr.

Jejus xapênh ã harênh

Matêwre 4.23-25

¹⁷ Tã nhũm Jejus akupÿm ÿ hã mẽ ahkre ho pa xwÿnhjê mẽ hãmri hixêr prêta kurũm wrÿ nê nhÿri hinur kãm kuhê. Hãmri nhũm nhÿhÿnh mẽ kot mar mã xwÿnhjaja hã akuprõ. Kôt mẽ pa ho mẽ pa xwÿnh kwÿjaja nê nhÿhÿnh krĩ hkwÿ rũm mẽ hkwÿjaja. Pika pê Jutej kurũm mẽ hkwÿjaja. Nê krĩ pê Jerujarê kurũm mẽ hkwÿjaja. Nê gô mÿ ri Xir mẽ Sitõja wa kamã mẽ pa xwÿnh kwÿjaja. ãm ahpÿnhã ri nhÿhÿnh krĩ hkwÿ rũm mẽ kot mar mã xwÿnhjaja hã pikuprõnh rax nê. ¹⁸⁻¹⁹ Mẽ kot kapêr mar nhũm kot akupÿm mẽ ho mex kaxyw nhũm prem ma hwÿr amnhĩ to pa. Mẽ hkwÿjaja tanhmã ri à kute. Nhũm mẽ hkwÿjaja mẽkarõmnuti kot mẽ hwÿr gjêx xwÿnhjaja nhũm mẽ piitã ma hwÿr amnhĩ to pa. Na prem ra amnhĩ kaxyw kãm hamaxpêr o:

–E pa ma hwÿr tẽ nê ãm hkupênh pix tã akupÿm inhmex japêr. Anê.

Hãmri nê ma hwÿr mra nhũm mẽ omu nê Tĩrtũm xãhpumunh tÿx o akupÿm mẽ ho mex pa.

Jejus kot hkôt mẽ pa ho mẽ pa xwÿnhjê jahkre hã harênh

Matêwre 5.1-12

²⁰ Tã nhũm Jejus hkôt mẽ pa ho mẽ pa xwÿnhjê jahkre nê mẽ kãm:

E kot kaj mẽ atõ amnhĩ kaxyw tanhmã inhmã ajamaxpêr to nê ajamaxpêr o: “Nã ixkukrêx rax kêt tã na hte Tĩrtũm ixkôt pa ho pa. Kojã ixkôt pa hkêr pa ixtÿx ri tanhmã amnhĩ nhĩpêx to ho ri ixpa rãhã nê. Tĩrtũmja mex kumrêx o kot mẽ hikukrêx

raxta jakrenh par.” Anhÿr o ajamaxpër. Hämri nhÿm Tirtÿm ã ajamaxpër anhÿr ã apumu nhÿm ja kãm mex nê. Hämri nhÿm apê hkra hã ato mex nê atãnopxar o akôt pa ka ajamakêtkati nê akĩnh nê axãmnhĩx ri apa.

21 Nê kot kaj mẽ atõ amã Tirtÿm kãm hprãm xà hkôt tanhmã amnhĩ nhĩpêx to ho ri apa hprãm tÿx nê. Nhÿm amnhĩ tã apumu nhÿm ja kãm mex nê nhÿm ato mex nê. Nê tanhmã ato ka hkôt pix mã amnhĩ to mex o ri apa nê ajamakêtkati nê akĩnh nê axãmnhĩx ri apa.

Nê kot kaj mẽ tanhmã amnhĩ tomnuj to. Hämri nê tee ri ja hã amnhĩ pumu nê ajamaxpër. Nê apijaam nê akaprĩ xàj amÿr o nhÿ. Amÿr rax nê. Hämri nhÿm Tirtÿm ja hã apumu nhÿm ja kãm mex nê. Jakamã nhÿm anê akaprĩ hta nê ato mex nê. Ka ajamakêtkati nê akĩnh nê axãmnhĩx ri apa.

22-23 Nê kwãr mẽ mãmrĩ ixtã tanhmã mẽ ato kapër punuj to nê tanhmã mẽ ato hêx to nê tanhmã ri mẽ atomnuj to ho pa. Kwãr mẽ mãmrĩ ã mẽ anhĩpêx anhÿr o pa. Ka mẽ ãm inhmã pix mã ajamaxpër rãhã ho apa pê ajamakêtkati nê axãmnhĩx ri apa. Kwãr mẽ mãmrĩ ã mẽ anhĩpêx anê nê mẽ amex kêt ã mẽ ajarênh o pa. Amnepêm na pre Tirtÿm nhÿ hã kapër xwÿnhjaja nhÿm prem ã mẽ hipêx anê. Jakamã koja mẽ urak nê ã mẽ anhĩpêx anhÿr o pa. Nhÿm Tirtÿm ja hã mẽ apumu nê amnhĩm mẽ amex ã mẽ ajarê. Hämri nê nhÿrmã kaxkwa kamã wa inhõ krĩ kamã mẽ ato mex rax nê. Ka mẽ akĩnh nê ajamakêtkati nê axãmnhĩx ri apa. Jakamã kwãr mẽ mãmrĩ pika jakamã ã ixtã mẽ anhĩpêx anê. Anê.

Jejus kot arĩ mẽ kot mar xwÿnhjê jahkre hã harênh

Xiakre 5.1-5

24 Nhÿm Jejus nhãm hkôt mẽ pa ho mẽ pa xwÿnhjê nhĩhkô hã mẽ kot Tirtÿm kôt amnhĩ nhĩpêx o pa hkêt xwÿnhjê hwÿr apkjê. Nê mẽ omu nê tanhmã mẽ kãm kapër

to. Mẽ hikukrêx rÿnh xwÿnhjê kumrêx mã kapër nê mẽ kãm:

E kwa mẽ o kora mẽ akukrêx rÿnh xwÿnhjaja. Na ka htem ãm akukrêx rÿnh pix mã ajamaxpër o ri apa nê gryk ã Tirtÿm mã ajamaxpër o apa hkêt nê. Jao mẽ amã kapër mar prãm kêt nê. Nê ãm akukrêx rÿnh mã ajamaxpër pê akĩnh nê ri apikunhar o ri apa. Tã kot ka mẽ nhÿrmã ty hãmri nhÿm akĩnh xàja apê hapêx.

25 Nê mẽ amã Tirtÿm kôt ri amnhĩ nhĩpêx prãm kêt xwÿnhjaja. Kot kaj mẽ nhÿrmã akaprĩ htÿx kãm tee ri amnhĩ to hwÿr kaprÿ kãm ga. Koja mẽ amar kêt nê.

Nê mẽ atÿx ri mẽ ate tanhmã amnhĩ tomnuj to hkukamã ajamaxpër nê apikunhar pê amnhĩ tomnuj o apa xwÿnhjaja. Kot kaj mẽ nhÿrmã ã mẽ ate amnhĩ nhĩpêx anhÿrja mÿrapê mẽ kot amnhĩ xà htÿx kamã hamak o pa htÿm xà hwÿr ma apa. Hämri nê kamã akaprĩ xàj amÿr rãhã ho ri apa. Jakamã kwa mẽ o kora mẽ amã Tirtÿm prãm kêt xwÿnhjaja. Kêr ka mẽ ixkapër ma nê axkãm ajamak rom nê ri apa.

26 Amnepêm mẽ pakukamã mẽ pa xwÿnhjaja na prem Tirtÿm kapër o hkwyjê jahkre ho pa. Nom axtem nê hkwyim ri tanhmã mẽ kãm ho hêx to nhÿm mẽ kuma nhÿm ja mẽ kãm mex nê nhÿm mẽ amnhĩm mẽ mex ã mẽ harê. No ãm mẽ mex kêt. Tã mẽ kajaja. Mẽ kot mẽ urak nê axpên mã mẽ amex ã mẽ ajarênh tã Tirtÿm mã mẽ amex kêt. Jakamã kot kaj mẽ amex kêt nê. Anê.

Mẽ kãm mẽ pahkurê xwÿnhjê jarênh

Matêwre 5.38-48; Rukre 23.34; mããnên Atre 7.60; Rômãn 12.14

27 Hämri nhÿm Jejus hpãnhã mẽ piitã mẽ ahkre nê mẽ kãm:

—E mẽ ate inhmar xwÿnhjaja. Kêr ka mẽ kot mẽ atomnuj xwÿnhjaja amnhĩ tã tanhmã mẽ ho hkêt nê. ãm mẽ ho mex pix o ri apa hkukamã mãn ajamaxpër.

28 —Nê mẽ kot mẽ ato kapër punuj xwÿnhjaja. Kêr ka mẽ amnhĩ xwar amnhĩ tã tanhmã mẽ ho akapër punuj to hkêt nê. ãm

tãm mẽ kãm akapêr pẽ mẽ kãm akapêr mex o ri apa. Nẽ mẽ kot tanhmã ri mẽ ato ho pa xwýnhjaja ka mẽ ho mex pix o ri apa. Nẽ mẽ ho Tirtũm wýr pix kukamã mãn ajamaxpêr.

²⁹ —Nẽ koja mẽhõ anhĩnep akura ka ãm omu nẽ tanhmã amnhĩ tã ho hkêt nẽ. Te ate kãm ihkjẽ pẽr nhũm kot ihkjẽ kamã akuranh pyrãk o amnhĩ nhĩpêx nhũm ja amã mex nẽ. No kêr ka mẽ amnhĩ tã tanhmã mẽ ho hkêt nẽ.

—Nẽ koja mẽhõ apê anhĩnôhkã py ka tanhmã hã kãm nẽ hkêt nẽ. Kwãr mãmrĩ apê kupy. Ka mãânẽn te ate kry pẽ anhĩnôhkã hpakã ry jagjênh xwýnhhta anhĩnôhkã hkôt kãm ôr pyrãk o hipêx. Nom kamã agryk kãm kãm ôr kêt nẽ.

³⁰ —Nẽ koja mẽhõ kêp amrakati kumrêx nẽ awýr tẽ nẽ mẽmoj tã awý. Ka anhõ mẽmoj japêr nẽ mãmrĩ kãm mẽmoj gõ. Kêp anhõxý hkêt kamã kãm mẽmoj gõ. Rý koja mẽhõ apê mẽmoj to ahkĩ ka axãhkurê hkêt nẽ. Nẽ tanhmã hã ho hkêt nẽ. ³¹ Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nẽ tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axãmnhĩx ri anhõxý hkêt nẽ tãm mẽ hipêx o ri apa.

³² —Nom kot kaj mẽ amã mẽ piitã mẽ ho mex o apa hprãm kêt japêr. Nẽ ãm mẽ kot mẽ ato mex xwýnhjẽ pix ka mẽ amã mẽ ho mex prãm. Xã koja Tirtũm ja hã mẽ apumu nhũm ja kãm mex nẽ? Nã koja kãm mex kêt nẽ. Koja mẽhõ mẽ ato mex kêt tã ka mẽ amnhĩ rom ho mex nẽ nhũm Tirtũm ja hã mẽ apumu hãmri nẽ mẽ amex ã mẽ ajarẽ. Mẽ kot amnhĩ tomnuj o mẽ pa xwýnhjaja na htem ãm mẽ kot mẽ ho mex xwýnhjẽ pixjaja nhũm htem amnhĩ xwar mẽ ho mex o pa. No tãm mẽ kot amnhĩ nhĩpêx o mẽ pa xwýnhjaja na htem mẽ piitã mẽ ho mex o pa. Mẽ kot tãm amnhĩ nhĩpêx xwýnhjaja nẽ mẽ kot amnhĩ tomnuj xwýnhjaja nhũm mẽ ho hpimràatã mẽ ho mex o axpên pyrãk o pa.

³³⁻³⁶ —Nẽ mẽ kot amnhĩ tomnuj xwýnhjaja na htem ãm mẽ kot mẽ ho mex xwýnh pixjaja nhũm htem amnhĩ xwar mẽ ho mex o pa. No mẽ kajaja. Kêr ka mẽ mãmrĩ mẽ piitã mẽ kamã axukaprĩ pix nẽ. Jao axãmnhĩx ri mẽ piitã mẽ kãm

mẽmoj nhõr o ri apa. Nhũm Tirtũm ja hã mẽ apumu nẽ ja hã mẽ ato mex nẽ.

—Jakamã kêr ka mẽ amarĩ mẽ kãm akurê xwýnhjẽ ho mex nẽ. Nẽ mẽ kamã axukaprĩ nẽ. Nẽ mẽ piitã mẽ kãm mẽmoj nhõr o ri apa. Kê nhýrmã Tirtũm maati mẽ hã mẽ amã mẽmoj nhõr rax nẽ. Nẽ mẽ ate kot amnhĩ nhĩpêx kôt amnhĩ nhĩpêx xwýnh ã mẽ ajarẽ. Tirtũm na hte mẽ kot amnhĩ tomnuj xwýnhjẽ kamã ukaprĩ ho pa. Jakamã kêr ka mẽ urãk nẽ ã mẽ hipêx anhýr o ri apa. E kêr ka mẽ ã axpên nhĩpêx anhýr rãhã nẽ. Anẽ.

Mẽ pahte axpên to pakapêr punuj kêt ã mẽ pamã karõ

Matêwre 7.1-5; mãânẽn Rõmãn 2.1-3, 14.1; Wam Korõt 4.5; Xiakre 4.11-12

³⁷ Nhũm Jejus arĩ mẽ ahkre nẽ mẽ kãm:

—Nẽ kêr ka mẽ atýx ri amnhĩ krã hkôt tanhmã mẽ kot amnhĩ tomnuj to hã tanhmã axpên jarênh to ho ri apa hkêt nẽ. Kêr kê Tirtũm mẽ apyrã nẽ ã mẽ ajarênh anhýr kêt nẽ.

—Nẽ kêr ka mẽ tanhmã mẽhõ kot ra atomnuj tota mã ajamaxpêr rãhã hkêt nẽ. ãm ho ajamakêtkati tokyx anẽ nẽ axte kãm ajamaxpêr kêt nẽ. Kêr kê Tirtũm ja hã mẽ apumu nẽ mẽ apyrã nẽ axte tanhmã mẽ ate amnhĩ tomnuj to mã hamaxpêr kêt nẽ.

³⁸ —Nẽ kêr ka mẽ axpên kamã axukaprĩ pẽ tanhmã axpên to mex to ho ri apa. Kêr kê Tirtũm ja hã mẽ apumu nẽ mẽ apyrã nẽ mẽ akamã ukaprĩ pẽ tanhmã mẽ ato mex to ho pa. Na hte mẽ pahte axpên kamã paxukaprĩ hã mẽ pahpumunh xã hkôt tanhmã mẽ pakamã ukaprĩ to.

³⁹ —Nom kêr ka mẽ atýx ri tanhmã axpên to akapêr to hkêt nẽ. Mẽ ate aprĩ hã axpên jamaxpêr kôt axpên pumunhre hã. Jakamã kot kaj mẽ atýx ri mẽhõ ho akapêr punuj hãmri nẽ te mẽ nohkre xwýnhjẽ hõ kot mẽmoj pumunh kêt tãã te kot no ho omunh nẽ tanhmã harênh to pyrãk o amnhĩ nhĩpêx. ⁴⁰ Tirtũmja tapxipix na kot mẽ pajamaxpêr kôt mẽ pahpumunh par. Mẽ axãhpumunh týx o mẽ pahte hakrenh kêt jakamã kwa kêr ka mẽ ãm hkôt pix mã amnhĩ nhĩpêx o ri apa. Kot kaj mẽ ã amnhĩ nhĩpêx anẽ hãmri nẽ gaa nẽ urãk nẽ mẽ piitã mẽ kamã axukaprĩ pix o ri apa.

41-42 Jao mēhō kot tanhmã amnhĩ tomnuj to hã omu hãmri nē tanhmã hã kãm nē tokyx anhÿr kêt nē. Akumrēx ate tanhmã amnhĩ tomnuj to hã amnhĩ pumu nē hkaga hãmri nē rĩ kormã mēhōta hwÿr tē nē kot tanhmã amnhĩ tomnuj to hã kãm akapēr to. Anē.

Mē pajamexpēr xà hkôt mē pakapēr ã mē pajarēnh

Matêwre 7.16-20, 12.33-37

43-45 Nhũm Jejus arĩ mē ahkre nē mē kãm:
—Nē koja mēmo pĩ hpār mex nē ô mex nē. Nom koja pār punuj hãmri nē ômnuj nē.

—Nē na htem mēmo xô pumu nē hkôt tanhmã pār kute hã omu. No na htem rārāj pumu nē kēp akunĩ kamã mrônhĩ xô hã hkamnhĩx kêt nē. Na htem mēmo xÿ hpār pumu nē ô xànhre hã hkamnhĩx kêt nē. Ja pyrã nē koja mēhō hamaxpēr punuj nē mãânēn hakwa ho kapēr punuj pix nē. Nē htÿx tanhmã amnhĩ tomnuj to ho ri pa. Nom koja hamaxpēr mex nē hãmri nē mãânēn hakwa ho kapēr mex o pa. Na htem ahpÿnhã amnhĩ jamaxpēr xà hkôt tanhmã hakwa ho kapēr to ho ri pa. Anē.

Ixkre pijakrut jarēnh

Matêwre 7.24-27; mãânēn Xiakre 1.22-25; Wam Juãw 2.3-6

46 Nhũm Jejus arĩ mē hkôt mē pa ho pa xwÿnhjē jahkre ho nhÿ nē mē kãm:

—Nē kot kaj mē ixpē mē anhō pahihiti hã ijarē hã kot kaj mē ixkapēr kôt amnhĩ nhĩpēx rãhã ho ri apa.

47 —E pa mē amã ixprĩ hã mē kot ixkôt amnhĩ nhĩpēx xwÿnhjē kot amnhĩ nhĩpēx jarē ka mē aprĩ hã inhma. 48 Mē kot amnhĩ nhĩpēxja te mēhō hamaxpēr mex pē aptÿx kãm amnhĩm ôrkwÿ nhĩpēx pyrãk. Koja aptÿx kãm ôrkwÿ nhĩpēx nhũm mēmo arĩgro hã na wrÿk rax nē. Nē gô htãm rax nē hanhi nom nhũm arĩ ãm tÿx nē xa. Tã kot kaj mē ixkôt amnhĩ nhĩpēx ã kot kaj mē te ixkre jarēnhja pyrãk. Jao amex nē ajamakêtkati nē ri apa. Te gô htãm kot ixkre janhir tã nhũm ãm tÿxta pyrãk. 49 Nom koja mēhō hamaxpēr mex kêt nē htÿx mō nē gô mÿri gyw rerek kãm amnhĩm ôrkwÿ nhĩpēx. Hãmri nhũm mēmo arĩgro hã na wrÿk rax nē. Nē hã gô htãm rax nē ôrkwÿ janhi nē kēp grãnh pa. Tã koja mēhō ixkôt amnhĩ nhĩpēx kêt nē te ho mēhō kot gô mÿri gyw rerek

kãm ixkre nhĩpēxta pyrãk. Jao mex kêt nē pa. Jakamã kwa mē ixkapēr mar tÿx nē te gô htãm kot ixkre janhir nē grãnh parta pyrãk o amnhĩ nhĩpēx o apa hkêt nē. Anē.

7

Jejus kot mēhō mã ãpēnh xwÿnh o mex ã harēnh

Matêwre 8.5-13

1 Tã nhũm Jejus mē kãm ujarēnh pa hãmri nē ma akupÿm Kapanaũ hwÿr mō. 2 Nē mōō nē ra hwÿr pōj. Nhũm krĩ kamã pôristi krãhtũm mã ãpēnh xwÿnhja à htÿx nē nō. Ra htyk kaxyw nē nō nhũm ô patrãw tee ri omu nē kãm hapê jakamã tee ri hkukamã hamaxpēr o hkaprĩ nē. 3 Hãmri nē Jejus pôx ã harēnh ma nē hwÿr Ijaew pigêt kwÿjē rē nē mē kãm:

—Kwa mē ma Jejus wÿr mra nē kãm ijarē kē tokyx man ixwÿr tē nē inhmã ãpēnh xwÿnhta o mex. Anē.

4-5 Hãmri nhũm mē kuma nē ma hwÿr mra nē omu nē kãm:

—Pa. Na pôristi krãhtũm na awÿr mē inhmē pa mē mra. Mē pahkĩnhã kēp Ijaew kêt tã kãm mē pahkĩnh nē. Tãm na pre mē inhō krĩ kamã mē inhmã Tĩrtũm kapēr o mē ahkre xà hã ixkreja nhĩpēx. Tã na kãm ãpēnh xwÿnhta kēp à htÿx nē nō nhũm apôx hã ajarēnh ma nē man awÿr mē inhmē. Kwa ma hwÿr tē nē kãm ho mex nà? Anē.

6 Hãmri nhũm mē kuma nē mē kãm:

—Tôe. Ma pu mē hwÿr. Anē.

Hãmri nē ma mē hkôt tē. Hãmri nē kormã ôrkwÿ htēp o htēm mē nhũm axte kutã hkrãmnhwÿ hkwÿ rē nhũm mē ma kutã mra. Hãmri nē mra nē mē hkaxpa nē Jejus pumu nē kãm:

—Pa? Kwa na pôristi krãhtũmta ã awÿr karō anē. Na mē inhmã: “E kēr ka mē mra nē nhÿri Jejus kaxpa nē kãm awjarē kē ãm ata rũm kapēr pix o inhmã à xwÿnhta o mex. Kĩnh ã ixpē Ijaew kêt jakamã ixte amnhĩ kuk ã ixpijaàm tÿx. Jakamã kot paj pam hwÿr ixtēm kêt nē. Kwa kãm anē kē ata rũm kapēr pix o inhmã akupÿm ho mex. 7-8 Ixpē mē hkrãhtũm jakamã na pa hte inhō pôristi mã mēmoj tã karō nhũm mē inhmar xà hkôt inhmã mēmoj tanhmã hipēx to. Na pa hte mē kãm: ‘E mē ma mra nē ã amnhĩ nhĩpēx anē.’ Anē nhũm mē

inhma nê ma mrar kurê kumrêx. Rỳ pa mẽ kãm: ‘E mẽ amnê ixwỳr mra nê ã amnhĩ nhĩpêx anê.’ Anê nhũm mẽ inhma nê ixwỳr mra. No kêt Jesus na hte ixrom tanhmã mẽ à kuteja mã kapêr nhũm kuma nê mẽ kêp hapôj nê ma mrar kurê kumrêx. Jakamã koja ata rũm kapêr pix o inhmã ho mex.” Anhỳr o awỳr karõ. Jakamã na pa mẽ akutã mra nê akaxpa nê ã amã kapêr jarênh anê. Anê.

⁹ Hãmri nhũm Jesus amnhĩ jaêr pê mẽ kapêr ma nê hkĩnh nê. Hãmri nê hkôt mẽ kot mar o pa xwỳnhjê mã kãm:

—Kwa xà na ka mẽ ã kot ixwỳr karõ xwỳnh jamaxpêr anhỳrta ã ama? Mẽ pahkĩnhã kêp Ijaew kêt tã mẽ arom amnhĩ kaxyw inhmã hamaxpêr tỳx nê. Aa mẽ atõ urak nê ate amnhĩ kaxyw ã inhmã ajamaxpêr tỳx anhỳr kêt tã nhũm mẽ arom kãm ãpênh xwỳnh kaxyw inhmã hamaxpêr tỳx nê. Anê.

¹⁰ Nhũm pre ã mẽ kãm kapêr anê hãmri nhũm pôristi krãhtũm krãmnhwỳjaja kuma nê awjanã nê ma akupỳm hkrãhtũm nhõrkwỳja wỳr mra. Nhũm ra Jesus kãm ãpênh xwỳnhhta akupỳm ho mex nhũm mex nê ri mra. Hãmri nhũm mẽ akupỳm pôj nê akupỳm mex ã omu.

Jesus kot akupỳm mēhō hkra ho htīr ã harēnh

Juãw 11.1-46

¹¹ Tã nhũm Jesus ma krĩ pê Naĩ hwỳr hkôt mẽ pa ho mẽ pa xwỳnhjê mẽrohã mō nhũm mẽ ohtô nê mẽ hkôt mra. ¹² Nhũm mẽ ra Naĩ hwỳr hpõx o mō. Nê hwỳr agjê. Axpêr kãm agjê nê mō nhũm kêp mjên htyk xwỳnhja mẽ kutã tẽ. Nhũm hkra myja ham kêp ty. Kra pyxi htã kêp ty nhũm mẽ kasãw kamã kuxà nê kumỳ nê kot haxàr kaxyw o mō nhũm katorxà mẽ hkôt mỳr o mō. Nhũm krĩ nhõ xwỳnh kwỳjaja ma hkôt mō. Piitã hkaprĩ nê hkôt mỳr o mō. ¹³ Tã nhũm Jesus mẽ hkwỳja mẽ mō nê mẽ hkaxpa nê katorxà mỳr ã omu nhũm Jesus kãm hkaprĩ nê. Hãmri nê xa nê kãm:

—Pa? Kwa amỳr kêt nê. Anê.

¹⁴ Hãmri nê kasãwta wỳr tẽ nê hã ãhkra xi nhũm mẽ kot mỳnh xwỳnhjaja omu nê amarĩ kãm o xa. Hãmri nhũm htyk xwỳnhhta mã kapêr nê kãm:

—E kwa kãnhmã nhỹ. Anê.

¹⁵ Pu nhũm kãnhmã ãr kurê kumrêx. Nê kapêr o nhỹ. Hãmri nhũm Jesus nita mã kãm:

—E ota akrata. Na akupỳm amã htĩr. Anê.

Hãmri nhũm akupỳm htĩr ã omu nê hkĩnh tỳx kumrêx. ¹⁶ Hãmri nhũm mẽ kot omunh xwỳnhjaja amnhĩ jaêr pê akupỳm hkra htĩr kãm omu nê ã hã haxwỳja hkĩnh nê. Nê Tĩrtũm mã mex o mex ã harê nê axpên mã:

—Kwa ãm hãmri na Tĩrtũm ã mẽ panhĩpêx anê nê mẽ pahwỳr ã hã kapêr jarênh xwỳnhhta mẽ nhũm mẽ pahwỳr mō. Tĩrtũm mẽ pakamã ukaprĩ jakamã na ã mẽ panhĩpêx anê. Nà ãm hãmri na ã mẽ panhĩpêx anê. Anê.

¹⁷ Hãmri nê piitã ma pikaja rũm mẽ kãm harênh o hprõt nhũm mẽ piitã harênh ma.

Juãw Paxis tee ri Jesus kukamã hamaxpêr ã harēnh

Matêwre 11.2-6, 11.22; Rukre 4.16-21

¹⁸ Rôm nhũm Juãw Paxisja kêp prês nê hkrĩ nhũm hte hkôt mẽ pa xwỳnhjaja hwỳr mra nê kãm Jesus kot tanhmã amnhĩ nhĩpêx to ho pa hã harê. Hãmri nhũm harênh ma nê tee ri hkukamã hamaxpêr. Hãmri nê hkôt mẽ pa xwỳnh wa ho axkrut nê wa kuta ¹⁹ nê Jesus wỳr wa kumê nê wa kãm:

—Kwa wa ma hwỳr tẽ nê hkukja. Nê kãm: “Xà ka na pre Tĩrtũm mẽ ixwỳr amê nà? Nà xà kormã axtem hõ na pa mẽ kormã amnhĩ wỳr hamãr o ri ixpa?” Anê. E wa ma hwỳr tẽ nê ã hkukjêr anê nê tanhmã kot amnhĩ jarênh to hã ama hãmri nê man akupỳn tẽ nê inhmã harê. Anê.

²⁰⁻²¹ Hãmri nhũm wa kuma nê ma hwỳr tẽ. Nhũm Jesus kormã mẽ ho mex o xa. Mẽ nohkre xwỳnhjaja nhũm akupỳm mẽ no ho mex. Nê mẽkarõmnuti kot mẽ hwỳr gjêx xwỳnhjaja nhũm mẽ nê mẽ hapõx o ãm rãhã nhũm wa ra hwỳr tẽ nê kormã hã mẽ omunh o xa. Hãmri nê kãm Juãw Paxis kapêr jarê. ²² Hãmri nhũm wa kuma nê wa kãm:

—Tỳ. Nà ãm hãmri na ja hã ijarê. Ixpê mẽ ate ixkamã ajamak o apa xwỳnhhta na pa. Jakamã e. Wa kam nê tanhmã ixte amnhĩ nhĩpêx to hã ixpumu hãmri nê ma akupỳm hwỳr tẽ nê aprĩ hã kãm ijarê. Mẽ nohkre xwỳnhjaja na pa akupỳm mẽ no ho

mex. Nē mẽ hkànhy xwýnhjaja pa akupým mẽ hkà ho mex. Nē mẽ hyk o mẽ pa xwýnhjaja pa akupým mẽ ho mex. Nē mẽ htyk xwýnhjaja pa akupým mẽ ho htír. Nē mẽ kēp amrakati nē ri mẽ pa xwýnhjê mã mẽmoj mex jarēnh o ri ixpa. Na pa hte ã mẽ ho mex o ri mẽ hkôt ixpa anē. Jakamã e kwa wa ma akupým hwýr tē nē ã kãm ijarēnh anē. ²³ Kē ijarēnh ma nē arī amnhī kaxyw ixkôt hamaxpēr týx rāhã nē. Koja ã amnhī nhīpēx anē nē hamakētkati nē ri pa. Nē tee ri ijarēnh kukamã hamaxpēr kēt nē. E wa tokyx ma akupým hwýr tē nē ã kãm ijarēnh anē. Anē.

Jejus kot Juãw Paxis mex ã harēnh
Matêwre 11.7-19

²⁴⁻²⁵ Nhũm pre ã Jejus wa kãm amnhī jarēnh anē nhũm wa kuma nē ma akupým Juãw Paxis wýr tē. Hãmri nhũm Jejus mẽ kot mar o kuhê xwýnhjê mã tanhmã Juãw Paxis jarēnh to nē mẽ kãm:

—Na ka prem kapôt ã mar kaxyw ma hwýr mra. Nom ê mex ã omunh kaxyw rý hpijaam kãm tanhmã kapēr to hã mar kaxyw hwýr amrar kēt nē. ²⁶ Kēp Tirtũm nhỹ hã kapēr xwýnh jakamã na ka prem mar kaxyw ma hwýr mra. Tirtũm nhỹ hã kot ixkukamã ijarēnh o pa xwýnh na. Ixpê Tirtũm kot mẽ akaxyw ixãm xwýnh ã na pre mẽ amã ijarēnh o pa. Nē hprī hã tanhmã mẽ amã ijarēnh to. Jakamã na kapēr mex o kot wam Tirtũm nhỹ hã kapēr jarēnh o mẽ pa xwýnhjê kapēr jakrenh. ²⁷ Tirtũm kapēr ã kagã htũm kot Juãw kukamã tanhmã harēnh to nē harēnh kot:

Kot paj Ixkra hkukamã ma mẽ hwýr harēnh o pa xwýnh mẽ kê ma ri hkukamã mẽ kãm harēnh o ri pa. Kê mẽ kuma nē kutēp tãm amnhī nhīpēx.

Anhýr o Tirtũm Juãw Paxis kukamã harē nhũm mẽ hã kagã. Tã nhũm mẽ awýr kumē. ²⁸ Juãwja mex kumrēx. Na pre hprī hã ixkukamã tanhmã ijarēnh to ho pa. Nom ixkôt mẽ pa ho mẽ pa xwýnhjê hkĩnhã ixkôt pa ho pa hkēt ãm ixkukamã ijarēnh o pa. Jakamã ixkôt mẽ pa ho mẽ pa xwýnhjaja na mex o kot Juãw Paxisja jakrenh. Mẽ kot ixkôt hprī hã inhmar o pa jakamã mẽ mex o kot hakrenh. Anē.

²⁹ Nhũm pre ã Jejus mẽ kãm Juãw Paxis jarēnh anē. Mẽ kot Juãw mar o kuhê xwýnh kwýjaja na pre htem tanhmã amnhī tomnuj to ho pa. Tã Juãw kot mẽ kãm Tirtũm kapēr jarēnh ma nē axpēn mã Tirtũm mex ã harē. Nē axpēn mã:

—Nà ãm hãmri. Tirtũm kapēr na mex kumrēx. Anē.

Hãmri nē amnhī tomnuj kaga nē Tirtũm kôt amnhī xunhwý. Jakamã nhũm Juãw Paxis Tirtũm mã mẽ hkrã kumrã.

³⁰ No nhũm Parijew nhõ xwýnhjê mẽ Tirtũm kapēr tũm o mẽ ahkre ho mẽ pa xwýnhjaja jajê hkĩnhã Juãw Paxis kaga kumrēx. Jakamã nhũm mẽ hkrã kumrãr kēt nē. Mẽ kot Tirtũm kapēr kaga jakamã na pre htem Jejus kapēr ma nē ãm kuma.

³¹ Hãmri nhũm Jejus mẽ kãm:

—E pa mẽ amã mẽ piitã htýx ri hamaxpēr ã tanhmã mẽ harēnh to ka mẽ kot amnhī nhīpēx ã mẽ harēnh ma. ³² Te mẽ kot mẽhprīre kot amnhī nhīpēx pyrãk. Mẽhprīrejaja na htem òrkwý kapem hije nē mẽmoj to amnhīkati ho hkrī. Nē tee ri hkwyjé kot amnhī nhīpēx pumu nē mẽ kãm:

Kwa na pa mẽ amã gre htã ka mẽ ixkutã anhõkrepõx kēt nē. Pa mẽ ja hã mẽ apumu nē hpãnhã mẽ amã mẽ htyk jarē htã ka mẽ akaprī nē amýr kēt nē. Kwa mẽ ri ã amnhī nhīpēx anhýr kēt nē.

Anhýr o axpēn mã kapēr. Tã te mẽ ate mẽ urãk. Tirtũm kot mẽ awýr ý hã kapēr xwýnhjê rēnh tã ka mẽ te mẽhprīre kot amnhī nhīpēxta pyrã nē mẽ ama ãm mẽ ama nē mẽ hkôt amnhī nhīpēx kēt nē.

³³ —Juãw Paxis na pre mẽ awýr mō nē ixpyrà nē apkur mex o ri pa hkēt nē. Nē ixpyrà nē wĩhti ho hkõm kēt nē pa. Tã ka mẽ ja hã omu nē hkaga nē atýx ri Satanasti nhỹ hã kot tanhmã amnhī nhīpēx to ho pa hã hkamnhix nē ri harēnh o ri apa. Hãmri nē mẽhprīre kot amnhī nhīpēx pyrã nē hkôt amnhī nhīpēx kēt nē. ³⁴ Tã pa Juãw pãnhã mẽ awýr mō. Nē kurom apkati mẽ ixàpkur mex o ri ixpa. Nē kurom wĩhti hkwy ho ixkõm o ri ixpa. Ka mẽ ja hã ixpumu nē atýx ri ixàpkur rũnh nē ixpipãnh o ri ixpa hã ixkamnhix nē ã axpēn mã ixto akapēr anhýr o ri apa. Nē mẽ kot amnhī tomnuj

xwÿnhjê hkôt ri ixpa hã axpên mã ijarênh o ri apa. ã na ka htem axpên mã ijarênh anê. Jao te mê ate Juãw Paxis nhîpêx pyrã nê ixkaga nê ixkôt amnhî nhîpêx kêt nê. Na hte ã htÿx ri tanhmã mê hamaxpêr to ho mê pa xwÿnhjaja amnhî nhîpêx anhÿr o ri pa.

³⁵ —No tãm ri mê hamaxpêr o mê pa xwÿnhjaja na htem ahpÿnhã Juãw mê wa ixte amnhî nhîpêx ã wa ixpumu nê axpên mã wa ijarênh o: “Nã ahpÿnhã wa kot amnhî nhîpêx tã wa hamê ãm hãmri Tirtÿm nhÿ hã kapêr jarênh mex o pa. E pu mê wa urãk nê Tirtÿm kôt amnhî xunhwÿ.” Anhÿr o axpên mã wa ijarênh o pa. Anê.

Parijew nhõ xwÿnh pé Simãwre jarênh

Matêwre 26.6-13; Makre 14.3-9; Juãw

12.1-8

³⁶ Tã nhÿm Parijew nhõ xwÿnh pé Simãwreja amnhî nhõrkwy hwÿr Jejus mê hkôt mê pa ho pa xwÿnhjê mê kuwÿ. Mê kot kutã apkur kaxyw amnhî wÿr mê kuwÿ nhÿm mê õrkwy hwÿr mra nê mê hwÿr agjê nê apkur kaxyw hkrî. ³⁷ Hãmri nhÿm mêhõ nija mê hwÿr axà. Na pre hte amnhî tomnuj pix o pa. Hãmri nê Jejus õ krî hwÿr hpõx nê Simãwre nhõrkwy kamã apkur ã harênh ma nê ma hwÿr tẽ. Mê hkuxwaxà hã à py nê ma hwÿr o tẽ. ³⁸ Hãmri nê hwÿr axà nê Jejus pumu nê hwÿr tẽ nê pum xa. Nê tee ri tanhmã kot amnhî tomnuj to ho paja mã hamaxpêr nê hpijaàm nê hkaprî nê mÿr o xa. Hãmri nê Jejus kutã hkõn krã ho tẽm nê nhÿ nê no kagô ho hpar go. Hãmri nê amnhî krã kî ho hpar grã nê kupã hãmri nê hpãnhã mê hkuxwa xà ho kuxwa. Kãm hkînh xà ã hipêx anê. ³⁹ Hãmri nhÿm Simãwre tee ri ja hã omu nê hamaxpêr o:

—Tk. Kwa jahti kot amnhî tomnuj pix o pa xwÿnh tã mê ixwÿr axà nê ã Jejus nhîpêx anê nhÿm amnhî nê hanor kêt nê. Kêp ãm hãmri Tirtÿm nhÿ hã kapêr jarênh o pa xwÿnh ronhÿx ja hã omu nê amnhî nê hanor kurê kumrêx. Anê.

⁴⁰ Hãmri nhÿm Jejus amnhî tã hamaxpêr ã omu nê hêx rom kãm kapêr nê kãm:

—E Simãwre. Pa amã awjarê ka inhma. Anê.

Hãmri nhÿm kãm:

—Tõe. Mex. Mãmri inhmã awjarê pa ama. Anê.

⁴¹ Hãmri nhÿm kãm:

—Nã koja mêhõ my wa hamêxkrut. Nhÿm hõja mêhõ pé kàxpore ho rax kumrêx nê ho ìpresta. Nhÿm hõja ãm kêp ho grire nê ho ìpresta. Hãmri nê wa hamê kàxpore ho hapêx pa. ⁴² Hãmri nê akupÿm kot kêp ho ìpresta xwÿnhhta mã hpãnhã õr kaxyw tee ri amnhî kukamã hamaxpêr. Ra kot ho hapêx par jakamã tee ri amnhî kukamã hamaxpêr. Tã nhÿm kot wa kãm ho ìpresta xwÿnhhta wa hwÿr tẽ nê wa kãm: “Kwa wa tee ri amnhî kukamã ajamaxpêr kêt nê. Na pa ra war ate ixto tewên ã kagãta kaxõnh pa nhÿm ja hapêx. Kot paj axte kãm ijamaxpêr kêt nê. Jakamã wa mãmri ajamakêtkati nê axãmnhîx ri apa.” Anhÿr o wa kãm kapêr. ã mê ujarênh kot anhÿr. Anê.

Nhÿm pre ã Jejus Simãwre mã ujarênh anê. Hãmri nê hã hkukja nê kãm:

—E nhÿ myja koja we kãm ho tewên xwÿnhhta kînh tÿx nê wehe? Anê.

⁴³ Hãmri nhÿm kãm:

—Nã kot kêp ho rax nê ho ìpresta xwÿnhhta koja kãm hkînh tÿx o hõta jakre. Anê.

Hãmri nhÿm kãm:

—Tÿ. Nã ãm hãmri na ka ã harênh anê.

⁴⁴ Tã mãn ka ni kot ã inhîpêx anhÿr xwÿnhhta pumu. Na ka amnhî nhõrkwy hwÿr ixwÿ pa axà nom ka inhmã gô hkwy pa ho amnhî par kuhõnh kêt nê. Tã nhÿm nija arom ã inhîpêx anê nê no kagô ho ixpar kuhõ nê amnhî krã kî ho grã ho nhÿ.

⁴⁵ —Nê anhõrkwy hwÿr ixãrta ã ka ixkahti hkôt inhmÿnh nê ixpãr kêt nê. Tã kêt nija arom xatã ixpar pãr o nhÿ. ⁴⁶ Nê ate orti ho ixkrã gregrer kêt tã nhÿm arom mê hkuxwaxà ho ixpar kuxwa ho nhÿ. Mêhkukwaxà hã kàxpore xohtõ htã nhÿm àmnhîx ho ixpar kuxwa ho nhÿ. ⁴⁷ ãm hãmri na pa amã ja jarê. Nija kot amnhî tomnuj tÿx tã pa ra nê kot amnhî tomnuj o ijapêx pa. Ra kot amnhî tomnuj tÿx xwÿnh ã amnhî pumunh jakamã na amnhî kaxyw inhmã hamaxpêr pé kãm ixkînh nê ã inhîpêx anê. No ka na ka hte urãk nê amnhî tomnuj tÿx o apa htã urãk nê tee ri ja hã amnhî pumunh kêt nê. Tã nita kînhã ate amnhî tomnuj kaga hkêt jakamã na ka ãm amã ixkînh grire. Anê.

Nhÿm pre ã Jejus Simãwre mã kapêr anê.

⁴⁸⁻⁵⁰ Hãmri nê nija mã kapêr nê kãm:

—E kànhmã xa. Ra ate amnhĩ kaxyw inhmã ajamaxpër jakamã na pa ra ate amnhĩ tomnuj piitã amnhĩ katut kôt rēnh pa. Kot paj axte kãm ijamaxpër kêt nē. Jakamã māmri ma ajamakêtkati nē axàmnhĩx anhōrkwy hwyr tē. Anē.

Hāmri nhũm mẽ kot axpēn kutã apkur xwýnhjaja tee ri kot kãm kapër anhýrja ã kuma nhũm ja mẽ kãm mex kêt nē. Jakamã nhũm mẽ ri axpēn mã harēnh o:

—Tk. Kwa mēhõ na hte ri kot Tirtũm kot amnhĩ nhĩpēx pyrãk o amnhĩ nhĩpēx nē mẽ kot amnhĩ tomnuj o hapēx ã amnhĩ jarēnh o we ri pahti? Anē.

8

Mēnijē hkwý kot Jejus kôt pa hã mẽ harēnh

Makre 15.40-41, 16.9

¹ Tã nhũm Jejus ma mẽ piitã mẽ kãm Tirtũm kapër o mẽ ahkre ho ri mẽ hkôt pa. Krĩ rũnh kamã nē krĩ hkryre kamã. Mẽ kot amnhĩ tomnuj kaga nē Tirtũm kôt amnhĩ xunhwýr nhũm kot amnhĩ tã mẽ omunh nē mẽ ho hkra kaxyw nhũm ri mẽ hkôt mẽ kãm harēnh o pa. Nhũm ý hã mẽ ahkre ho mẽ pa xwýnh pê 12jaja ma hkôt ri pa. ² Nē mēni hkwýjaja. Na pre ra Jejus mẽ hkwýjē nē mēkarõmnuti japôj. Nē mẽ hkwýjaja tanhmã mẽ à kute xwýnhjaja nhũm akupým mẽ ho mex. Xwýnhjaja nhũm prem haxwýja ma hkôt ri pa. Hõ pê na pre Marir Matarēn nhũm pre ra Jejus nē mēkarõmnuti ho 7 nē hapôj. ³ Nē Joanã. Joanã mjēn Kujahiti na pre kēp pahiht Erox mã mẽ ãpēnh xwýnhjē krãhtũm. Nē Sujãnre. Nē kaxyw mēnijē ohtõ nē Jejus kôt tanhmã mẽ ho ajuta hto ho mẽ hkôt pa. Jao mẽ hikãxpore ho mẽmoj japrõ nē ho mẽ kãm mẽ õ nhĩpēx o ri mẽ hkôt pa.

Mēmo hy hkre xwýnh

Matêwre 13.1-9; Makre 4.1-9

⁴ Tã nhũm mẽ ra krĩ piitã rũm Jejus wýr akuprõ. Jakamã nhũm mẽ ohtõ raxkumrēx nhũm Jejus mẽ kãm ujarēnh o nhỹ. No ãm hprĩ hã ujarēnh kêt nē. Mẽ kot Tirtũm kapër mar nē tanhmã hkôt amnhĩ nhĩpēx to nhũm hã kuxi nē mẽ kãm hã ujarēnh o nhỹ. ⁵ Nē mẽ kãm:

—E mẽ inhma. Koja mēhõ ma pur mã mõ nē pur kãm mẽmo hy ho ukapêr o ri pa. Nom nhũm piitã amex kãm rôrôk kêt nē. Kwý ahpýnhã nhýri rôrôk. Hāmri nhũm hkwý aptýx kãm rôrôk nhũm kuwēnhre omu nē hwýr mra nē hkrēr pa.

⁶ —Nē kēn kãm hy hkwý rôrôk nē higrôt kutã nojarêt nē higrôt pa. No nhũm kamã aptýx nē kamã kēp pika hkryre jakamã nhũm higrôt nhũm hã myt ahpa nē arĩgro htýx mẽ nhũm grã pa. Kamã kēn nhũm amgo mex kêt jakamã nhũm grã pa.

⁷ —Nē mrõnhĩ kamã rôrôk xwýnhja haxwýja higrôt tã no nhũm utĩ kēp amyta nhũm ô hkêt nē.

⁸ —No hirã kamã pika mex kãm rôrôk xwýnhja. Hāmri hirã kamã rôrôk nē higrôt mex nē piitã ô rax nē. Piitã kamã ô kēp 100. ã mẽ ujarēnh kot anhýr. E kwa mẽ ixujarēnh ma nē kãm ajamaxpër týx rãhã ho ri apa. Anē.

⁹ Nhũm pre ã Jejus mẽ kãm ujarēnh anē. Hāmri nhũm hkôt mẽ pa ho mẽ pa xwýnhjaja kuma nē tee ri hkukamã hamaxpēr nē kãm:

—Kwa na pa mẽ ixprĩ hã axujarēnh kôt mẽmoj pumunh kêt nē. Aprĩ hã mẽ inhmã tanhmã harēnh to pa mẽ ixprĩ hã kuma nã? Anē.

¹⁰ Hāmri nhũm mẽ kãm:

—Tõe. Nã kot paj mẽ amã harē. Tirtũm kãm mẽ ate aprĩ hã mar prãm jakamã kot paj ixprĩ hã mẽ amã harē. Mẽ kot amnhĩ tomnuj kaga nhũm Tirtũm kot ja hã mẽ omunh nē mẽ ho hkra. Ja na pa harē.

—No mũjjaja na mẽ akĩnhã kãm mar prãm nõkati. Jakamã na htem ixujarēnh ma nē ãm kuma nē htýx ri pa. Anē.

Jejus kot prĩ hã mẽmo hy jarēnh

Matêwre 13.18-23; Makre 4.13-20

¹¹ Hāmri nhũm Jejus hkôt mẽ pa ho mẽ pa xwýnhjē mã:

—E kot paj ixprĩ hã mẽ amã mẽmo hy ho ukapêr ã mẽ ujarēnh ta jarē ka mẽ inhma.

—Nã mẽmo hyta te kēp Tirtũm kapër pyrãk. Nē ahpýnhã hy rôrôk ã pikata te kēp ahpýnhã mẽ kot Tirtũm kapër mar xwýnhjē kot amnhĩ nhĩpēx pyrãk. ¹² Mẽ kot mar xwýnh kwýjaja te kot aptýx kãm hy rôrôk nhũm kuwēnh kot hwýr mra nē hkrēr par

xwýnhhta pyræk. Jao Tirtùm kapër ma nhùm Satanastí te kuwênh kot hy hkrêr parta pyrà nê mẽ kot amnhĩ kaxyw Tirtùm kapër kôt hamaxpër nê hkôt amnhĩ xunhwýr py-maj tanhmã nê mẽ hkrã hto. Jakamã nhùm mẽ kapër ma nom ho hamakêtkati tokyx anê nê axte kãm hamaxpër nê hkôt amnhĩ nhĩpêx kêt nê.

¹³ —Nê mẽ kot mar xwýnh kwýjaja te kot kênre kamã hkwý rôrôk nê higrôt nê grà par tokyx anhýr xwýnhhta pyræk. Jao Tirtùm kapër ma nê hkĩnh nê. Nê kãm mar prãm nê. Tã nhùm mēhõ tē nê Tirtùm nê tanhmã kãm kapër to nhùm mẽ kuma nê Tirtùm kaga. Te mẽmo hy higrôt nê grà par tokyx anhýrta pyræk.

¹⁴ —Nê mẽ kot mar xwýnh kwýjaja te kot mrônhi kamã hkwý rôrôk nê higrôt nhùm mrônhi kot kêp àmnar xwýnhhta pyræk. Jao kãm Tirtùm kapër mar prãm nê. No àm mãânên kãm hikukrêx rax nê hikàxpore rax prãm xàj àm ja pix mã hamaxpër o pa. Nê gaa nê ra gryk ã axte Tirtùm kapër mã hamaxpër nê hkôt amnhĩ nhĩpêx kêt nê.

¹⁵ —Nê mẽ kot mar xwýnh kwýjaja te hirã kamã pika mex kãm hy hkwý rôrôk nê higrôt nê ô raxta pyræk. Nê ixkapër ma nê amnhĩ krã him hagiênh týx nê ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyræk. E. ã ixujarênh kot anhýr. Anê.

Kanê mẽ guhkrax wa harênh

Makre 4.21-25

¹⁶ Nhùm Jejus arĩ mẽ kãm ujarênh o nhỹ nê mẽ kãm:

—E mẽ inhma. Xà na htem kanê hpôk hãmri nê guhkrax o hpro rý par krak ri unhwý? Nà na htem ã hipêx anhýr kêt nê. Na htem hpôk nê kýxpê kuhê xà kamã unhwý nhùm hirã mex o kuhê. Nhùm htem ixkrem agjê nê hirã kamã mẽmoj pumunh mex nê. Ja pyrà nê na pa hte mẽ ate inhmar týx kaxyw ixprĩ hã mẽ amã awjarê. ¹⁷ Kormã mẽ ate mẽmoj pumunh nê aprĩ hã mar kêt tã kot kaj mẽ tokyx aprĩ hã omu nê ama. Te mẽmoj kot mẽ apê hpimxur pyræk tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê hpôk kãm aprĩ hã mẽmoj pumunh mexta pyræk. ¹⁸ Jakamã kêr ka mẽ ixkapër mar týx nê

hkôt ajamaxpër rãhã ho ri apa. Jao ixkapër piitã mar týx nê. Nom kot ka mẽ mar týx kêt nê hã ano hkêt pa nê axte kãm ajamaxpër o apa hkêt nê. Anê.

Jejus kot tanhmã katorxà mẽ htôjê jarênh to hã harênh

Matêwre 12.46-50; Makre 3.31-35; mãânên Eprêw 2.11-12

¹⁹ Nhùm Jejus arĩ mẽ ahkre ho nhỹ. Rôm nhùm katorxà nê htôjaja nhỹhýnh hwýr môn pôj. No nhùm mẽ kot mẽ hã htu rax jakamã nhùm mẽ tee ri hwýr gjêx kaxyw nê kormã kapôt ã kuhê. ²⁰ Hãmri nhùm mēhõja mẽ omu nê Jejus mã mẽ harê nê kãm:

—Kwa Pahihti. Ota ra akatorxà mẽ atôjaja awýr pôj nê tee ri awýr gjêx mã. O mũj mẽ kormã kapôt ã kuhê. Anê.

²¹ Hãmri nhùm mẽ kuma nê mẽ kãm:

—Tôe pa ixkato nê mẽ omu. Inhmã mẽ hapêê. Nom kot kaj mẽ atô Tirtùm kapër ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtô rý ixkatorxà kot amnhĩ nhĩpêx pyræk o pu mẽ axpên nhĩpêx. Pa te inhmã mẽ hapê pyrã nê inhmã mẽ ajapê nê. Anê.

Jejus kot kôk mã kapër ã harênh

Matêwre 8.23-27; Makre 4.35-41

²² Tã nhùm apkati hõ hã nhùm Jejus himô rax ã rêr kaxyw nojarêt nê hkôt mẽ pa ho mẽ pa xwýnhjê mã kãm:

—E kot puj mẽ jarãhã ma xarmã mō. Anê.

Hãmri nê mẽ pàr mã gjêx pa nê ma xarmã mō. Garirej rùm kato nê ma xarmã pika hõ hwýr kormã mō. ²³ Nhùm ra Jejus ôtxwa nê pàr kre kamã gôr nê nō. Pu nhùm kôk àpêr týx nê nhùm gô axpên tak týx nê kãnhmã harĩ. Nê pàr kre kamã pikapĩr rax nhùm parta mẽ kãm àr o mō nhùm mẽ tee ri amnhĩ nhĩpêx. No nhùm Jejus arĩ htýx gôr nê nō. ²⁴ Hãmri nhùm mẽ tee ri amnhĩ kukamã hamaxpër nê kumra nê kãm:

—Kwa Pahihti kãnhmã nhỹ. Kot puj mẽ jarãhã pahtyk pa. Anê.

Hãmri nhùm kãnhmã nhỹ nê kôk mã kapër nê kãm:

—E. Kwa hãmri anhĩkrê. Anê.

Hãmri nhùm hpinhkrênh par mẽ nhùm gô tãm nôr kurê kumrêx. ²⁵ Hãmri nhùm Jejus hkwýjê hwýr apkjê nê mẽ kãm:

—Kwa kormã te mẽ ate amnhĩ kaxyw Tĩrtũm mẽ wa inhmã ajamaxpër tỳx kêt pyrãk. Anẽ.

Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu nẽ no hawênh rũnh nẽ tee ri axpên pumunh pê hamaxpër o kuhê nẽ axpên mã:

—Kokỹỹ. Jejus kêp mẽ panhĩõ hkêt. Mẽ pahtõ kot pu we te kot amnhĩ nhĩpêx pyrã nẽ we kôk mã pakapër nhũm we pama anhĩkrê? Nã Jejus mẽ parom àhpumunh tỳx o àhpumunh tỳx. Jakamã na ã anẽ. Anẽ.

Jejus kot mēhõ nê mẽkarõmnuti kator ã harēnh

Matêwre 8.28-34; Makre 5.1-20

²⁶ Tã nhũm mẽ ra himô nhĩhkjê hã krĩ pê Geras wỳr rê. Himô nhĩkjê hã na pre pika pê Garirej. Nẽ Garirej nhĩkjê hã na Gerasja. Jakamã nhũm mẽ ra hwỳr rê. ²⁷⁻²⁹ Hãmri nẽ pàr kre rũm hapôj nẽ api nẽ mra nhũm mẽhõ myja mẽ kutã tẽ. Na pre ra hwỳr mẽkarõmnuti hkwy agjê nhũm mẽ ỹ hã oprê htỳx nẽ hkênh nẽ ri mra. Nẽ òrkwỹ kamã hkrĩ hkêt nẽ. ãm ri kapôt ã pa ho pa. Mẽ htykjê hã pika kamã kên kre kaêx kôt ri pa. Na pre ra krĩ nhõ xwỳnhjaja xatã tee ri unê nẽ hkaxpre. Tee ri kàx o ri hkaxpre htã no nhũm amnhĩ nẽ rênh pa. Nhũm mẽkarõmnutija tanhmã hkrã hto nhũm kapôt pix ã ri mra. Jakamã nhũm Jejus mẽ pàr rũm hapôj nẽ api nhũm mẽ omu nẽ mẽ kutã tẽ nẽ Jejus kaxpa. Nhũm amnhĩ wỳr omu nẽ nê tanhmã mẽkarõmnuti mã kapër to. Hãmri nhũm my xoprêja hwỳr tẽ nẽ kutã hkõn krã ho tẽm nẽ nhỹ. Hãmri nẽ kàxpêê amnhĩ tã kãm kapër. Nom tãm kapër kêt nẽ. Mẽkarõmnuti nhỹ hã kãm kapër nẽ kãm:

—Pa Tĩrtũm Kra Jejus? Kwa mo kaxyw na ka mẽ ixwỳr tẽ? Kwa tanhmã mẽ ixto hkêt nẽ. Anẽ.

³⁰ Hãmri nhũm mẽ kãm:

—Kwa tanhmã na mẽ anhĩxi kute? Anẽ.

Nhũm mẽ kãm:

—Nã mẽ ixpê Mẽohtõhti. Anẽ.

Mẽkarõmnuti ra kot hwỳr ohtõ nẽ gjêx jakamã na prem ã kãm amnhĩ nhĩxi jarênh anẽ. ³¹⁻³² Hãmri nẽ Jejus mã:

—Kwa jahti nê mẽ ijapôj nẽ mẽ kot amnhĩ xà htỳx kamã hamak tũm xà hwỳr mẽ ixrênh kêt nẽ. Hagrô hkwy mũj wỳr mãn

mẽ ixrê pa mẽ hpãnhã hwỳr mãn hagjê nã? Anẽ.

Hagrôja kii mẽ kêp amỳm hixêt ã ri apkur o pa nhũm mẽ ã Jejus mã mẽ hwỳr amnhĩ to hwỳr anẽ. Hãmri nhũm mẽ kãm:

—Tõe. Tô mẽ tãm hwỳr mãn mra. Anẽ.

³³ Hãmri nhũm mẽ kuma nẽ myta pê hapôj nẽ ma hagrôja wỳr mrrar kurê kumrêx nẽ mẽ kãm gjêx pa. Hãmri nhũm myja akupỳm tãm hkrã. No nhũm hagrôja mẽkarõmnuti pymaj amỹra nẽ axkahkũm nẽ hprôt nẽ himô hã krã hixêt ã axpum rôrôk nẽ gôx kãm mrõ nẽ pikaprãr pa. ³⁴ Hãmri nhũm hagrô jamãr xwỳnhjaja tee ri omu hãmri nẽ ma mẽ õ patrãw wỳr akupỳm mẽ piitã mẽ kãm harênh o hprôt nẽ mra. ³⁵⁻³⁶ Nhũm mẽ tee ri mẽ kuma hãmri nẽ ma kot Jejus pumunh mã hwỳr mra nẽ hkaxpa. Nẽ kuri myta pumu nhũm ra akupỳm tãm hkrã nẽ tãm amnhĩ nhĩpêx nẽ ê kamã mex nẽ nhỹ. Nhũm mẽ kot hã omunh xwỳnhjaja mẽ kãm ujarênh pa. Nhũm mẽ kuma nẽ tee ri amnhĩ kukamã hamaxpër o ra kãm ma nẽ. ³⁷⁻³⁹ Hãmri nẽ amnhĩ nê Jejus mã kapër nẽ kãm:

—E kwa mẽ tokyj ma akupỳm amrar kurê kumrêx. Anẽ.

Hãmri nhũm mẽ kuma nẽ awjanã nẽ ma akupỳm pàr wỳr mra nẽ agjê. Nhũm akupỳm mex xwỳnhta mẽ hkôt hkrã nom nhũm Jejus kãm:

—Nã kot kaj mẽ ixkôt amõr kêt nẽ. Ma akupỳm anhõ krĩ hwỳr mãn tẽ nẽ Tĩrtũm kot tanhmã akupỳm ato mex to hã mẽ kãm amnhĩ jarênh o ri mẽ hkôt apa. Anẽ.

Hãmri nhũm kuma nẽ ma akupỳm krĩm tẽ nẽ ri mẽ kãm Jejus kot tanhmã ho mex to hã harênh ri mẽ hkôt pa.

Jejus kot wa ho axkrut nẽ wa ho mex ã harēnh

Matêwre 9.18-26; Makre 5.21-43

⁴⁰ Tã nhũm Jejus mẽ ma akupỳm xarmã mõ nẽ rê nẽ mẽ kutêp mẽ pikuprõnh xwỳnhjê pumu. Nhũm mẽ ra amnhĩ wỳr mẽ omu nẽ mẽ kutêp gô jakàx ã pikuprõnh rax nẽ. Jakamã nhũm mẽ mẽ hwỳr pôj nhũm mẽ amnhĩ wỳr Jejus pumu nẽ hkĩnh nẽ. ⁴¹⁻⁴² Hãmri nhũm Jajti ma hwỳr tẽ. Ijaew nhõ Tĩrtũm kapër o mẽ ahkre xà hã ixkre jamãr xwỳnh na pre. Nhũm pre hkra ni pyxire. Hã amgrã pê 12. Tã ra kêp à htỳx nẽ

htyk kaxyw nê nõ. Hāmri nhũm hipêêxàja tee ri omu hāmri nê Jejus wỳr tẽ nê kutã hkõnkrã ho tẽm nê nhỹ nê ho kuwỳ nê kãm:

—Pa akupỹm mẽ ixto mex xwỳnh maati. E awỳr na pa tẽ. Na ra ixkra ixpê htyk kaxyw. Pa tee ri omu nê kaxyw amã ijamxpêr nê awỳr tẽ. Kwa ma ixkõt inhõrkwỳ hwỳr tẽ nê inhmã omu nê tokyx inhmã ho mex nà? Anẽ.

Hāmri nhũm kuma nê ma hkõt tẽ. Nhũm mẽ ohtô nê wa hkõt pry hã mra nê axpẽn nhĩgã nê axpẽn kujahêk o hkõt mra. ⁴³ Hāmri nhũm mẽhõ nija haxwỳja wa hkõt tẽ. Na pre hte hkamrô hkryre rãhã ho pa hã ra amgrã kêp 12. Nhũm tõtô tee ri kot ho mex kaxyw hkane kaprỳ ho pa. ⁴⁴ Jakamã nhũm tee ri amnhĩ kukamã hamxpêr hāmri nê Jejus jarẽn ma nê ma mẽ hkõt hwỳr htẽm kurê kumrêx. Nom nhũm mẽ ohtô rax nê hkõt mör jakamã nhũm mẽ hkaêx kõt hwỳr tẽ nê hkatut kõt kêp ê nhĩrê kupê. Hāmri nê ãm kêp ê pix kupênh tã akupỹm mex. ⁴⁵ Hāmri nhũm Jejus kot kêp ê kupênh ã amnhĩ tã omunh tã hêx rom mẽ ho hakêx nê mẽ omu nê mẽ kãm:

—Kwa mẽ atõ na ka ri amnhĩ kaxyw inhmã ajamxpêr tỳx pê ixpê ixê kupê? Anẽ.

Hāmri nhũm mẽ piitã tee ri axpẽn pumu nê kãm amnhĩ tã aprã. Hāmri nhũm Simãw Pêtre kãm:

—Mẽ kot apê amnàr griã kot ka kêt ri mẽhõ kot apê hkupênh xwỳnh ã ri mẽ hkukja. Kwa mãn ãm mẽhõ amarĩ apê hkupê. Anẽ.

⁴⁶ Hāmri nhũm kãm:

—Nà mẽhõja amarĩ hkupênh kêt nê. Na amnhĩ kaxyw inhmã hamxpêr tỳx pê ixpê hkupê. Tã ixàhpumunh tỳx xàja kõt na akupỹm mex. Nom ixte mẽhõ kot ixpê hkupênh xwỳnhja pumunh jakamã na pa ixêx rom ã amnhĩ tã ri mẽ hkukjêr anẽ. Kwa mẽ atõ inhmã amnhĩ jarê. Anẽ.

⁴⁷ Hāmri nhũm mẽhõ nita kuma nê tee ri kêp kot amnhĩ to hpimxur prãm kaprỳ. Hāmri nê hpijaàm kãm hwỳr httertet o tẽ nê kutã hkõn krã ho tẽm nê nhỹ nê kãm amnhĩ jarê nê kãm:

—Ma pa na pa inhmã inhmex prãm xàj apê axê kupê. Tã na pa akupỹm inhmex. Anẽ.

⁴⁸ Hāmri nhũm Jejus kuma nê kãm:

—Tõe. Nà ra ate amnhĩ kaxyw inhmã ajamxpêr tỳx kõt ate ã amnhĩ nhĩpêx anhỹr jakamã na ka akupỹm amex. E mãmri ajamakêtkati nê ma akupỹm tẽ. Anẽ.

Hāmri nhũm kuma nê hkĩnh nê ma akupỹm tẽ. ⁴⁹ Rôm nhũm Jajti mã ãpênh xwỳnhjê hõ õrkwỳ rùm ma õ patrãw kutã tẽ nê wa hkaxpa nê Jajti mã kãm:

—Kwa na ra apê akra ty. Jakamã mo kaxyw kot ka kêt amnhĩ kõt hwỳr Jejus o mõi? Kwãr mãmri ma akupỹm tẽ. Anẽ.

⁵⁰ Hāmri nhũm Jejus kuma nê Jajti mã kãm:

—Kwa tee ri akra hkukamã ajamxpêr kêt nê. Kaxyw inhmã mãn ajamxpêr tỳx nê. Koja te ra apê htyk tã koja akupỹm amã htĩr. Anẽ.

⁵¹⁻⁵³ Hāmri nhũm mẽ mõi nê õrkwỳ hwỳr pøj nê hwỳr axà nê mẽ omu nhũm mẽ ra htyk xwỳnhhta ã htu rax nê. Nê omũj ri mur. Hāmri nhũm Jejus mẽ hwỳr axà nê mẽ mỳr ã mẽ omu nê mẽ kãm:

—Kwa mẽ hāmri amỳr kêt nê. Na nireta mẽ apê htyk kêt na ãm gõr nê nõ. Anẽ.

Hāmri nhũm ra mẽ kot htyk ã omunh mex jakamã kuma nê ãm kuma nê axtem nê ri axpẽn mã hã hpêr o axkê. Hāmri nhũm Jejus htyk xwỳnhhta wỳr hitom wỳr àr kaxyw nê amnhĩ kõt Juãw nê Xiakre nê Pêtre nê kaxyw htyk xwỳnh katorxà nê hipêêxàja. Jajê pix na pre amnhĩ kõt mẽ ho agjê. ⁵⁴ Hāmri nê htyk xwỳnhhta wỳr tẽ nê hpa hã kupy nê kãm:

—Pa? Kwa tokyx kãnhmã nhỹ. Anẽ.

⁵⁵ Hāmri nhũm akupỹm htĩr nê kãnhmã ãr kurê kumrêx. Hāmri nhũm Jejus mẽ kãm:

—E kwa mẽ tokyx kãm mẽmoj japêr kê kukrê. Mãn ra kãm prãm nê. Anẽ.

⁵⁶ Hāmri nhũm katorxà mẽ hipêêxà wa amnhĩ jaêr pê akupỹm htĩr kãm omu nê kamã no puma ho hkĩnh tỳx nê. Hāmri nhũm Jejus wa kãm:

—E wa inhma. Kêr ka wa akupỹm ixte war amã ho htĩr ã ri mẽ kãm ijarẽn o ri apa hkêt nê. ãm kwarĩ ho kwarĩ. Anẽ.

9

Jejus kot mẽ ho 12 nẽ ahpÿnhã mẽ rẽnh ã harẽnh

Matêwre 10.1, 10.5-15; Makre 6.7-13; Rukre 10.1-12; mãânên Atre 13.49-50, 18.6

¹⁻² Tã nhũm Jejus hkõt mẽ pa ho mẽ pa xwÿnh pẽ 12jẽ mã kapẽr nẽ mẽ kãm:

—E mẽ amnẽ ixwÿr mra nẽ ixkapẽr ma. Na pa ra mẽ amã ixàhpumunh tÿx xà hkwȳ gõ. Jakamã kêr ka mẽ inhÿ hã ma ri akwÿjẽ hkõt tanhmã mẽ ho mex to ho ri mẽ hkõt apa. Mẽ à xwÿnhjẽ ho mex o ri mẽ hkõt apa. Nẽ mẽ hkwȳjẽ nẽ mẽkarõmnuti japõj. Nẽ mẽ piitã mẽ kãm anẽ kê mẽ tokyx Tĩrtũm kõt amnhĩ xunhwÿ kê mẽ ho hkra. ³ Nom kêr ka mẽ amnhĩ kõt akukrẽx ho ohtõ nẽ ri ho apa hkõt nẽ. Nẽ amnhĩ kaxpar xà hã kô ho apa hkõt nẽ. Nẽ kawà htur nẽ ho apa hkõt nẽ. Nẽ amnhĩ kõt axàpkur xà hã anhõ ho apa hkõt nẽ. Rÿ akàxpore rax nẽ ho apa hkõt nẽ. ãm mẽ anhõ kamĩs ho pixi nẽ haxà nẽ ri hã apa. Nẽ anhÿ kamã ã ri mẽ hkõt apa anẽ. Kê mẽ kot mẽ akapẽr mar xwÿnhjaja tãm mãn mẽ amã mẽ anhõ ho pa.

⁴—Nẽ kêr ka mẽ nhÿri krĩ hõ hwÿr põj nẽ apõx xà kamã mẽhõ nhõrkwÿ kamã hkõt ri apikamẽnh tãmtã kurũm akupÿm ajapõj nẽ ma hpãnhã nhãm krĩ hõ hwÿr apa. Nom atÿx ri nhãm mẽ hwÿr amrar nẽ nhãm mẽ hwÿr amrar kêt nẽ.

⁵—Nẽ koja mẽ nhÿri mẽ akapẽr kaga ka mẽ amnhĩ tã mẽ kamã ama nẽ tokyx mẽ kurũm ajapõj nẽ ma nhãm apa. Nẽ anojarêt nẽ mẽ noo mã akuhẽ nẽ amnhĩ par ã aw-jagrõ kapĩ. Mẽ kot Tĩrtũm kaga hã amnhĩ pumunh nhũm Tĩrtũm kot amnhĩ pyrã nẽ mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpẽx anẽ. Hãmri nẽ ma hpãnhã krĩ hõ hwÿr apa. Anẽ.

⁶ Nhũm pre ã Jejus mẽ kãm mẽ àpẽnh ã karõ anẽ. Nhũm mẽ kuma hãmri nẽ hapõj nẽ ma mẽ hkõt pa. Ma krĩ piitã hkõt akupÿm mẽ à xwÿnhjẽ ho mex nẽ Tĩrtũm kapẽr o tanhmã mẽ ahkre hto ho ri mẽ hkõt pa.

Pahi Erox tee ri kot Jejus kukamã hamaxpẽr ã harẽnh

Matêwre 14.1-12; Makre 6.14-29

⁷⁻⁸ Hãmri nhũm pika pẽ Garirej kamã mẽ piitã Jejus jarẽnh ma nẽ ahpÿnhã ri

tanhmã axpẽn mã harẽnh to. Mẽ hkwȳjaja kêp finat Juãw Paxis akupÿm htĩr ã ri harẽ. Nhũm mẽ hkwȳjaja amnepẽm mẽ hkukamã Tĩrtũm nhÿ hã kapẽr jarẽnh xwÿnhjẽ hõ ra akupÿm htĩr ã harẽ. Nhũm mẽ hkwȳjaja kêp finat Eris ã axpẽn mã harẽ. Jakamã nhũm pahihti Eroxja mẽ kot ahpÿnhã tanhmã ri harẽnh toja ma nẽ tee ri hkukamã hamaxpẽr. ⁹ Nẽ hamaxpẽr o:

—Kwa mẽhõ na hte we ri ã amnhĩ nhĩpẽx anhÿr o pa wehe? Nã finat Juãw Paxis kêt. Ra ixte amnepẽm hã ixamnẽnh nhũm mẽ kot inhmã mut krãhyr nẽ hpĩr kẽnã. Kwa mẽhõ na hte we ri ã amnhĩ nhĩpẽx anẽ?

Anhÿr o hamaxpẽr hãmri nẽ kãm omunh prãm nẽ.

Jejus kot mẽ ho ohtõ nẽ mẽ kãm mẽ õ hã harẽnh

Matêwre 14.13-21; Makre 6.30-44; Juãw 6.1-14

¹⁰ Tã nhũm Jejus nhÿ hã kapẽr o mẽ pa xwÿnhjaja akupÿn hwÿr mran põj nẽ mẽ kot ri tanhmã amnhĩ nhĩpẽx to ho pa hã kãm amnhĩ jarẽ. Hãmri nhũm mẽ kuma nẽ ma krĩ pẽ Pesẽj wÿr kormã mẽ o mõ. ¹¹ Hãmri nhũm krĩ hkwȳ nhõ xwÿnhjaja ra ma mẽ mõr ã mẽ harẽnh ma nẽ ohtõ nẽ ma mẽ hkõt mra nẽ nhÿri mẽ hkõt põj. Nhũm Jejus amnhĩ kõt mẽ omu hãmri nẽ tanhmã mẽ ho mex to ho xa. Kõt mẽ à nẽ mẽ pa xwÿnhjaja nhũm akupÿm mẽ ho mex. Hãmri nẽ Tĩrtũm kapẽr o mẽ ahkre nẽ mẽ kãm:

—E kot kaj mẽ atõ amã amnhĩ tomnuj kaga hprãm xàj Tĩrtũm kõt amnhĩ xãm nhũm amnhĩ tã apumu nẽ ato hkra. Hãmri ka ajamakêtkati nẽ amex nẽ axãmnhĩx ri apa.

Anhÿr o mẽ kãm kapẽr pẽ mẽ ahkre ho xa.

¹² Tã nhũm myt àr kaxyw nhũm Jejus nhÿ hã mẽ ahkre ho mẽ pa xwÿnh pẽ 12jaja hwÿr mra nẽ kãm:

—Kwa na ra kamàt o mõ. Mẽ hano kê mẽ amnhĩ to krĩ hõ japẽr nẽ tokyx amnhĩm mẽmoj japrõ nẽ kuku nẽ hikwÿ nẽ gõr. Mo mẽ panhõ? ãm jar kapõt pix kẽnã. Anẽ.

¹³⁻¹⁴ Hãmri nhũm mẽ kuma nẽ mẽ kãm:

—Kwa ka mẽ kamjaja mẽ kãm mẽmoj gõ kê mẽ kuku. Anẽ.

Nhũm mẽ ohtõ rax nẽ mẽ hkõt mra. Mẽmyjaja kêp 5.000 nẽ kaxyw mẽ hprõ nẽ mẽ hkrajaja. Jakamã nhũm mẽ kêp 12jaja

Jejus kot ã mẽ kãm kapêr anhÿrja ma nê tee ri mẽ hkukamã hamaxpêr nê kãm:

—Kwa nà mo mẽ panhõ rax? Mẽ panhõ pãwti kêp sîk nê kaxyw tep grà axkrut্রে kênã kot kêt we mẽ piitã mẽ hipêx pa. Xà kot paj mẽ ma mra nê nhÿri mẽ kãm mẽ apkur xà japrô nhũm mẽ kuku? Anê.

Hãmri nhũm mẽ kãm:

—Nà pu mẽ kãm mẽmoj japrôr kêt nê. Mẽ panhõta kot puj mẽ kãm ho anhgrà. E mẽ kãm anê kê mẽ ahpÿnhã ri hije nê hkrĩ nê apku. Anê.

¹⁵ Hãmri nhũm mẽ kuma nê mẽ kãm anê nhũm mẽ piitã hkrĩ pa. ¹⁶ Hãmri nhũm Jejus pãwti mẽ tepta jamÿ nê kànhmã kaxkwa hwÿr rît nê kànhmã kupê nê Tirtũm mã harê nê kãm:

—Pa Papaj? Apê mẽ inhmã mẽ inhõ xwÿnh jakamã amex o amex. Anê.

Hãmri nê mẽ kãm ho hkry hpa nê hkôt mẽ pa ho mẽ pa xwÿnhjê mã kugõ nhũm mẽ ô ri ho xa nê ho mẽ hipêx par kumrêx. ¹⁷ Nhũm mẽ piitã apkur mex o hkrĩ. Mẽõja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nê ho õhy htu hpa. Nhũm arĩ mẽõ jakrêx prã nhũm Jejus kôt mẽ pa ho mẽ pa xwÿnhjaja akupÿm hakrêx o pikuprõnh pa nê ho kawà ho 12 nê ho nÿt pa.

Jejus kot amnhĩ tã hkôt mẽ pa xwÿnhjê kujêr ã harênh

Matêwre 16.13-19; Makre 8.27-29

¹⁸ Tã nhũm arĩgro hõ mã nhũm Jejus nhÿri ahte Tirtũm mã amnhĩ jarênh o nhÿ nhũm hkôt ri mẽ pa ho mẽ pa xwÿnhjaja ma hwÿr mra. Hãmri nhũm amnhĩ wÿr mẽ omu nê amnhĩ tã tanhmã mẽ hkukjêr to nê mẽ kãm:

—Kwa mẽ inhmã mẽmoj jarê. Tanhmã na htem ahpÿnhã axpên mã ijarênh to wehe? Anê.

¹⁹ Hãmri nhũm mẽ kãm:

—Nà na htem ahpÿnhã tanhmã ajarênh to. Na hte kamã mẽ hkwyjaja ato finat Juãw Paxis ã ajarê. Nhũm kamã mẽ hkwyjaja ato finat Eris ã ajarê nhũm mẽ hkwyjaja tõhã apê Tirtũm nhÿ mã kapêr jarênh xwÿnhjê hõ ra akupÿm htir ã ajarê. ã na htem ahpÿnhã ajarênh anê. Anê.

²⁰ Hãmri nhũm mẽ kuma nê mẽ kãm:

—No mẽ kajaja? Ixpê mẽhõ mã na ka htem ixkamnhix? Anê.

Hãmri nhũm Simãw Pêtre kãm:

—Nà mẽ pajaja na pa htem apê Tirtũm kot mẽ ixkaxyw axãm nê mẽ ixwÿr amênh xwÿnh ã ajarê. Nê apê mẽ ixpiitã mẽ inhõ Pahi Maati mã ajarê. ã na pa htem ajarênh anê. Anê.

²¹ Hãmri nhũm kuma nê mẽ kãm:

—Tÿ. Nà ãm hãmri na ka htem ã ijarênh anê. ã ixte anhÿr kênã. Nom kêr ka mẽ inhmar kumrêx. Kêr ka mẽ kormã ã akwÿjê mã ijarênh anhÿr o ri apa hkêt nê. Anê.

Jejus kot amnhĩ kukamã amnhĩ jarênh

Matêwre 16.21; Makre 8.31-33

²² Nhũm Jejus arĩ hkôt mẽ pa ho pa xwÿnhjê mã kapêr nê hprĩ mã tanhmã mẽ kãm amnhĩ jarênh to nê mẽ kãm:

—Nà ãm hãmri na Simãw Pêtre ijarê. Mẽ kajaja ra mẽ ate ja mã ixpumunh mex. No mẽ pahkwÿjaja na mẽ akĩnhã mẽ kãm ja mã ijarênh mar nê ja mã ixpumunh prãm kêt. Ijaew pigêjtaja nê Tirtũm kapêr tũm o mẽ ahkre o mẽ pa xwÿnhjaja nê patre krãhtũmjaja mẽ kãm ja mã ixpumunh prãm kêt. Jakamã koja mẽ nhÿrmã ixpynê nê ixtak rax nê. Hãmri nê ixpĩ. Nom kot paj ixytk ã apkati axkrunêpxi nhũm Tirtũm akupÿm ixto ixtir. Anê.

Jejus krajaja tanhmã kot amnhĩ nhÿpêx to mã mẽ harênh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnhê Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhũm pre ã Jejus amnhĩ kukamã hkôt mẽ pa ho mẽ pa xwÿnhjê mã amnhĩ jarênh anê hãmri nê hpãnhã mẽ kot mar o kuhê xwÿnh piitã mẽ kãm kapêr nê mẽ kãm:

—E kot ka mẽ atõ ate ixkôt amnhĩ xãm ã amnhĩ jarê hãmri nê mããnhê ã amnhĩ jarênh anê nê amnhĩ jarênh o: “Jejus kêp inhõ Pahihti jakamã kot paj kapêr kôt pix mã amnhĩ nhÿpêx rãhã ho ri ixpa. Kwãr ixkwÿjaja tanhmã mã inhÿpêx to.” Anhÿr o apkati mẽ ã amnhĩ jarênh anê.

²⁴ —Koja mẽ ixtã mẽ atõx pĩ rÿ tanhmã mẽ atõ hto ka ty. Tã koja akaxwÿnh ma inhõ krĩ mex wÿr àpir kurê kumrêx. Hãmri nê kamã atir tũm nê amex rãhã apa ho apa. Nom kot kaj mẽ jar atir prãm xàj ixkaga hãmri nê hwÿr axàpir kêt nê.

²⁵ —Ně koja mēhō hikukrêx rax gryk ã Tĩrtũm kaga. Hã koja nhỹrmã ty ně ý kamã kuwy hwýr ma mō ně amnhĩ kôt hikukrêx õ hpyr ně o mōr kêt ně. Koja tee ri kuwy hwýr mōr pymaj amnhĩ ně hikukrêx rax o amnhĩ pãnhã amnhĩrer prãm kaprý.

²⁶ —Ně koja mēhō ixte mē ahkre hã inhma nhũm ja kęp omnuj nhũm ixkaga japêr. Hã kot paj nhỹrmã akupýn mē ato amnhĩptãr kaxyw akupýn wrý ně amnhĩ xwar kot ixkaga xwýnhhta kaga. ãm hãmri na pa ã mē amã amnhĩ jarênh anê. Kot paj nhỹrmã man akupýn inhō Papaj nhỹ hã ixte mē ho amnhĩptãr kaxyw akupýn wrý. Nhũm kapêr o mē wrýk xwýnhhjaja man ixkôt wrý. Pa mē wrý hãmri ně mē kot ixkaga xwýnhhjaja pa amnhĩ pyrã ně mē hkaga. ²⁷ ãm hãmri na pa ã mē amã amnhĩ jarênh anê. Kot paj nhỹrmã akupýn ixte mē ato amnhĩptãr kaxyw mē awýr wrý. Tã kot kaj mē akwýjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anê.

Jejus kot kên prêk nhĩmõk ã hirã kamã ãm ã harênh

Matêwre 17.1-8; Makre 9.2-8; mããnêh Sikũn Pêtre 1.16-18

²⁸ Tã nhũm semãnja hapêx nhũm Jejus Simãw Pêtre ně Xiakre ně Juãw wa mē kãm kapêr ně mē kãm:

—E pu mē ma hixêt prêk mũj wýr mō ně hwýr api ně himõk ã Tĩrtũm mã amnhĩ jarê. Anê.

Hãmri ně ma amnhĩ kôt hwýr mē o mō ně hwýr mē ho api. ²⁹⁻³² Hãmri nhũm Jejus Tĩrtũm mã amnhĩ jarênh o xa. Nom nhũm hkôt hixêt wýr mē mōr xwýnhhjaja õtxwa htýx ně ra gõr ně hikwý. Pu nhũm Jejus axtem hkuk ně xa. Ně ê haka htýx ně xa. Hãmri nhũm ja wa kaxkwa rũm wrý ně kuri kãm kapêr o xa. Finat Mojes mē finat Erisja wa kuri kãm kapêr o xa. Na pre ra amnepêm Tĩrtũm amnhĩ wýr wa ho api. Tã nhũm wa ra akupýn wrý ně Jejus mã kapêr o xa. Mē hpimràatã hirã htýx kãm axpên mã kapêr o kuhê. Jejus kormã krĩ pê Jerujarê kapem mē kot hpĩr kêt ri nhũm wa mē axpên mã htyk kukamã harênh o kuhê. Nhũm wa kãm:

—Nã Tĩrtũm jamaxpêr xã hkôt kot kaj ã amnhĩ nhĩpêx anê.

Anhýr o Jejus tyk kukamã kãm hamaxpêr o hihtýx o wa xa.

Rôm nhũm mē õt xwýnhhjaja hkrã hapôj ně tee ri Jejus pumu. Nhũm mex kumrêx ně hirã htýx kãm xa nhũm mē omu ně kuri wa ãm xwýnhhta wa omu. ³³ Hãmri nhũm Mojes mē Eris wa ra akupým nojarêt nhũm Simãw Pêtre tee ri ja hã wa omu ně Jejus mã kãm:

—Kwa Pahihti. Nã ãm hãmri na pu mē amnê mō. Kwa pu mē kritpê m jar axkamê ně tokyx panojarêt kêt ně. Pa mē amã pô nhĩrõnh o axkrunêpxi ně hipêx. Amã hõ nhĩpêx ně Mojes mã hõ nhĩpêx ně Eris mã hõ nhĩpêx ka mē kamã akrĩ. E kwa pa mē amã ho anê nã? Anê.

Nhũm amnhĩ krã hkôt ã kãm kapêr anê.

³⁴ Hãmri ně kormã kãm kapêr rôm nhũm kakrã jaka týxja wrý ně mē hkunor nhũm wa mē kamã kuhê. Hãmri nhũm Simãw Pêtre mē Juãw mē Xiakreja mē tee ri kakrã kot amnhĩ nhĩpêx ã omu ně kãm ma ně. ³⁵ Hãmri nhũm kakrã kamã Tĩrtũm mē kãm kapêr ně mē kãm:

—E ota Ixkra xa. Mē ate kamã ajamak o apa xwýnhhta na. Inhmã hapêê. Kêr ka mē ãm tapxipix kapêr mar týx o ri apa. Anê.

³⁶ Hãmri nhũm mē kuma ně kãnhmã rĩt ně ãm Jejus pix pumu nhũm ahte xa. Nhũm kuri wa ãm xwýnhhta wa ra ma akupým api nhũm mē Jejus pix pumu.

Mē tapxipixjaja na prem ã Jejus kot amnhĩ nhĩpêx anhýr ã omu nom taxy kormã nhãm hkwyjê mã harênh kêt ně. ãm axpên pix mã harênh pê hkukamã hamaxpêr o ri Jejus kôt pa.

Jejus kot mēhō ně mēkarõmnuti janor ã harênh

Matêwre 17.14-21; Makre 9.14-29

³⁷ Tã nhũm apkati nhũm mē ma akupým ahparmã hkwyjê hwýr wrýk o mō. Ně mē hwýr hpõx o mō nhũm mē ra mē kutêp pikuprõnh rax ně kuhê. ³⁸ Hãmri nhũm mēhõ myja amnhĩ wýr mē omu ně mē kutã tē ně mē hkaxpa ně Jejus pumu ně kãm:

—Pa Jejus. Kwa ixkamã axukapřĩ ně inhmã ixkra ho mex. ãm ixpê pyxire.

³⁹ Na hte mēkarõmnuti xatã ixpê tanhmã ho nhũm ý hã amýra ně mra ně rôrõk ně hakwa jamrõ ho hikwý nhũm tokyx kãm urer kêt ně. Nhũm ra ixpê homnuj týx ně.

⁴⁰ Hāmri pa akôt mẽ pa ho mẽ pa xwỳnhjê hwỳr o tẽ nhũm mẽ kot inhmã ho mex kaxyw tee ri tanhmã ho hkapyr. Anẽ.

⁴¹ Hāmri nhũm kuma nẽ hkôt mẽ pa ho pa xwỳnhjê mã kãm:

—Hêxta waa nẽ. Na ka mẽ ra ixte Tĩrtũm nhỹ hã mẽ ho mex ã ixpumunh o ixkôt apa ryy tã kormã ixpyrà nẽ ã mẽ hipêx anhỹr kêt nẽ. Mãn ka mẽ kormã mẽ kaxyw Tĩrtũm kôt ajamaxpêr tỳx kêt nẽ. Anẽ.

Hāmri nẽ myta mã kãm:

—E amnẽ ixwỳr akra ho tẽ pa inhno ho omu. Anẽ.

⁴² Hāmri nhũm hwỳr o tẽ nhũm mẽkarõmnuti axte kêp ho pika kura nhũm amỹra nẽ tẽm nẽ nõ. Hāmri nhũm Jejus omu nẽ nẽ mẽkarõmnuti kator nhũm akupỹm mex nẽ kànhmã nhỹ. Hāmri nhũm akupỹm hipêêxã mã kugõ. ⁴³ Hāmri nhũm mẽ amnhĩ jaêr pẽ Jejus kot ã hipêx anhỹrja ã omu nẽ ri axpẽn mã harẽnh o:

—Kokỹỹ. Hêxta waa nẽ. Pêr ãm Tĩrtũmja ãm àhpumunh o àhpumunh. Anẽ.

*Jejus kot htyk kukamã amnhĩ jarẽnh
Matêwre 17.22-23; Makre 9.30-32*

⁴⁴ Hāmri nhũm Jejus hkôt mẽ pa ho mẽ pa xwỳnhjê mã kãm:

—E kot paj mẽ amã tanhmã amnhĩ jarẽnh to ka mẽ inhmar tỳx nẽ. Na pa pre mẽ ate aa mẽmoj pumunh kêt kwỳ ho anhỹr o ixpa pix kaxyw mẽ awỳr ixwryk kêt nẽ. Kojã mẽ tokyx mẽ kãm ixtã amỹnê nhũm mẽ ixpĩ. E kwa kêr ka mẽ ja ma nẽ hã anohtỳx nẽ ho apa. Anẽ.

⁴⁵ Hāmri nhũm mẽ tee ri kot ã amnhĩ jarẽnh anhỹrja ma nẽ axpẽn mã:

—Kwa mo na pẽr ri ã amnhĩ jarẽnh anẽ? Kêp mẽ panhõ Pahi Maati hã kot amnhĩ jarẽnh kênã kot kêt mẽhõ kupĩ.

Anhỹr o axpẽn mã ri harẽnh o kuhê. Hāmri nẽ mẽ kãm ã kot amnhĩ jarẽnh anhỹrja mar prãm kêt jakamã hprĩ hã tanhmã hã hkukjêr to hkêt nẽ. ãm akryk mar o kuhê.

Mẽ kot amnhĩ to rũnh xwỳnhjê jarẽnh

Matêwre 18.1-5; Makre 9.33-37; Rukre 22.24-27; mããnên Piripos 2.3-9; Wam Pêtre 5.5

⁴⁶ Tã nhũm Jejus kôt mẽ pa ho mẽ pa xwỳnhjaja tanhmã amnhĩ kukamã hamaxpêr to hāmri nẽ axpẽn mã:

—Kwa mẽ pahtõ kot puj we nhỹrmã pahpê pahi nẽ mẽ ho amnhĩptar rax o pahkwỳ jakre? Anẽ.

Hāmri nẽ ja hã axpẽn kukjêr o Jejus kôt mõi nẽ axpẽn mã: “Nà pa.” Nhũm mẽ hkwyja: “Nà kêt pa.” Anhỹr o hkôt mõi. ⁴⁷ Hāmri nhũm Jejus mẽ kuma nẽ mẽ hamaxpêr kôt mẽ omu. Hāmri nẽ xa nẽ amnhĩ wỳr mẽhprĩjê mã hpa ho apê nhũm hwỳr tẽ nẽ kuri xa. ⁴⁸ Hāmri nhũm Jejus hkôt mẽ pa ho pa xwỳnhjê mã tanhmã harẽnh to nẽ mẽ kãm:

—E mẽ inhma. Kêr ka mẽ apê pahi pyràk o tanhmã amnhĩ jarẽnh to ho ri apa hkêt nẽ. ãm te amarĩ ri mẽ apa pyràk o amnhĩ nhĩpêx o ri apa. Jao nhỹri mẽhprĩre hõ pumu nẽ kamã axukapĩ ho kãm mẽmoj tanhmã ho rỳ kãm mẽmoj gõ. Hāmri nẽ te pa ate tanhmã ixto mex to pyràk o amnhĩ nhĩpêx. Nẽ kot ka mẽ atõ pa tanhmã ixto mex to nẽ te ate Tĩrtũm tanhmã ho mex to pyràk o amnhĩ nhĩpêx. Kot kaj mẽ ã amnhĩ nhĩpêx anhỹr o ri apa nhũm Tĩrtũm ja hã mẽ apumu nẽ mẽ ate amnhĩ to rũnh kêt tã nhũm tãm mẽ ate amnhĩ to rũnh xwỳnh ã mẽ ajarẽ. E kot kaj mẽ amã amnhĩ to rũnh prãm nẽ ã amnhĩ nhĩpêx anhỹr o ri apa. Anẽ.

*Mẽhõ kot Jejus nhỹ hã tanhmã amnhĩ
nhĩpêx to hã harẽnh*

Makre 9.38-41

⁴⁹ Hāmri nhũm Jejus kôt mẽ pa ho pa xwỳnhjê hõ pẽ Juãwja nhỹhỹnh hwỳr hpõx o tẽ nẽ kãm:

—Kwa Pahihti. O mũj mẽhõ kêp mẽ pahkwỳ hkêt tã anhĩxi jarẽnh kôt mẽ nẽ mẽkarõmnuti janor o pa. Pa mẽ tee ri kot ã amnhĩ nhĩpêx anhỹr ã omu nẽ nẽ kãm ixkapêr. Kêp mẽ pahkwỳ hkêt kênã kot kêt ã mẽ hanor anhỹr o pa. Anẽ.

⁵⁰ Hāmri nhũm kuma nẽ kãm:

—Kwa nà ja nẽ tanhmã kãm nẽ hkêt nẽ. Kojã mẽhõ mẽ pahkwỳm ri tanhmã mẽ ahkre hto hkêt nẽ hāmri nẽ kêp mẽ panhĩõ. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nẽ tanhmã kãm akapêr to hkêt nẽ. Kwãr mãmrĩ ã

amnhĩ nhĩpêx anhÿr o ri pa. Ja mex kênã. Anẽ.

Samar nhõ xwÿnhjaja kot Jejus kaga hã mẽ harẽnh

Atre 8.14-15

⁵¹ Hãmri nhũm Jejus akupÿm kaxkwa hwÿr àpir kaxyw ra hwÿr apkati grêre ho mõi jakamã nhũm hamaxpêr o:

—E pa ma akupÿm Jerujarẽ hwÿr mõi. Nà kot paj anẽ. Mẽ kot kamã tanhmã ixto mã tã kot paj ma akupÿm mẽ hwÿr mõi. Anẽ.

⁵² Hãmri nẽ amnhĩ kukamã mẽ hkwÿjê rẽ nhũm mẽ ma mẽ hkukamã Samar nhõ krĩ kamã nhÿri mẽ kot amnhĩm hikranh xà japêr o mõi. ⁵³ Nom nhũm Samar nhõ xwÿnhjaja kêp Jerujarẽ nhõ xwÿnhjê hprãm nõkati jakamã Jerujarẽ hwÿr mõi ã mẽ harẽnh ma nẽ amnhĩ nẽ mẽ hkurê. ⁵⁴ Hãmri nhũm mẽ tee ri amnhĩ tã mẽ kuma nẽ awjanã nẽ akupÿm Jejus wÿr mra nẽ kãm mẽ harẽ. Hãmri nhũm Juãw mẽ Xiakre wa mẽ harẽnh ma nẽ mẽ kamã gryk nẽ nẽ Jejus mã:

—Kwa Pahihti. Nà na mẽ axtem nẽ amnhĩ nẽ mẽ pahkurê. Jakamã e kwa pu mẽ kaxkwa rũm mẽ hipy kuwy hpøk kwÿ rẽ kê mẽ hkaxàr pa nà? Anẽ.

⁵⁵ Hãmri nhũm wa kuma nẽ wa kãm:

—Tk. Kwa nà wa ajamaxpêrja mex kêt. Pu mẽ ã ri mẽ hipêx anhÿr kêt nẽ. Kojã Tirtũm kãm ja ho anhÿr prãm nẽ rĩ tãm tanhmã mẽ ho. No mẽ papajaja pu mẽ ri mẽ kamã pagryk xà tanhmã mẽ hipêx to hkêt nẽ. Pu mẽ ã mẽ hipêx anẽ nẽ ra amnhĩ tomnuj tÿx nẽ. Kwa wa ri ã ajamaxpêr anhÿr kêt nẽ. Anẽ.

⁵⁶ Hãmri nẽ mẽ ma Samar rũm hapôj nẽ hpãnhã nhãm krĩ hõ hwÿr pa.

Mẽ hkwÿjaja kãm Jejus kôt pa hprãm ã mẽ harẽnh

Matêwre 8.18-22

⁵⁷ Tã nhũm Jejus mẽ kormã mõi ri nhũm mẽhõja hwÿr tẽ nẽ kãm:

—Pa Jejus? E kot paj ma akôt ixpa ho ixpa. Anẽ.

⁵⁸ Hãmri nhũm kuma nẽ kãm:

—Ko ka mã. Kam nẽ rĩ ma ixkôt ri apa ho apa. Nom kêr ka inhmar kumrêx nẽ rĩ kormã ixkôt apa. Na hte xore pika hkre kamã hikwÿ xà. Nẽ kuwênhre pĩ nhĩmõk ã hikwÿ xà. No pa na Tirtũm kot mẽ awÿr

inhmênh xwÿnh tã jajê hkĩnhã inhõrkwÿ hkêt. Na pa hte ãm nhãm krĩ hõ hwÿr ixpa nẽ nhãm ixpa. Tã xà kot kaj ixpyrà nẽ ã amnhĩ nhĩpêx anhÿr o ri apa nà? Anẽ.

⁵⁹ Nhũm pre ã kãm kapêr anẽ hãmri nẽ nhãm mẽhõja wÿr apkjê nẽ kãm:

—Pa? No ka? Xà kot ka ma ixkôt apa ho apa nà? Anẽ.

Hãmri nhũm kãm:

—Tÿ no ãm kormã. Kojã nhÿrmã inhĩpêxàja tanhmã amnhĩ to nẽ ty mãn. Pa haxà hãmri nẽ rĩ kormã ma akôt ixpa ho ixpa. Anẽ.

⁶⁰ Hãmri nhũm Jejus kuma nẽ kãm:

—Kwa nà ri ã ajamaxpêr anhÿr kêt nẽ. Ma ixkôt apa ho apa kurê kumrêx. Kê mẽmoj ano kupyw rÿ inhnê apê amnàr kêt nẽ. Kwãr mẽ htĩr tũm nẽ mẽ pa hkêt mã xwÿnhjaja mãn axwakre kamã amã anhĩpêxà jamãr o pa nhũm nhÿrmã ty kê mẽ amã haxà. Ka mãmrĩ ma Tirtũm kapêr o mẽ ahkre ho ri mẽ hkôt apa. Kê mẽ ama nẽ mẽ hkwÿjaja hkôt amnhĩ xunhwÿ nhũm mẽ ho hkra. Anẽ.

⁶¹ Nhũm pre ã kãm kapêr anẽ hãmri nhũm nhãm mẽhõ myja haxwÿja hwÿr tẽ nẽ kãm:

—E. Pa kot pa ma akôt ri ixpa ho ixpa. Nom kormã. Pa ma akupÿm tẽ nẽ ixkwÿjê mã amnhĩ jarê nẽ tanhmã amnhĩ to hpa mãn. Hãmri nẽ mẽmo arĩgro hã rĩ kormã ma akôt ixpa ho ixpa. Anẽ.

⁶² Hãmri nhũm tee ri kuma nẽ kãm:

—Kwa nà. Kot kaj ã ajamaxpêr anẽ hãmri nẽ ixkôt apa htã te amnhĩ katut kôt arĩt rãhã ho ri apa pyràk o amnhĩ nhĩpêx. Kwa ã ajamaxpêr anhÿr kêt nẽ ma ixkôt apa kurê kumrêx. Anẽ.

10

*Jejus kot mẽ hwÿr mẽ kêp 72 rênh ã harẽnh
Matêwre 10.1, 10.5-15; Makre 6.7-13;
Rukre 9.1-6, 9.10-11; mãânẽn Atre 13.50-51,
18.6*

¹ Tã nhũm Jejus axte amnhĩ kaxyw mẽ ho 72 nẽ mẽ kurê. Hãmri nẽ mẽ ho axkrut kapên nẽ ma nhÿhÿm krĩ hkwÿ hkôt amnhĩ kukamã mẽ kurê. Mẽ kot mẽ hkôt ri Tirtũm kapêr o mẽ ahkre ho pa kaxyw. ² Hãmri nẽ mẽ kãm:

—Na mẽ ohtô rax nẽ kormã Tirtũm kapêr mar kêt nẽ. No ãm kormã mẽ ate mẽ kãm harẽnh o apa kaxyw mẽ agrêre. Te pur kãm

harôj kamrêk pa nê ãm tâ no ãm kaxyw hikênh xwÿnh grêre pyrâk. Jakamã kwa mẽ ho Tirtũm wÿ kê axte mẽ kaxyw mẽ hkwÿjê rê.

³—E kot paj ma mẽ hwÿr mẽ arê. Ma mẽ hkôt mẽ ate Tirtũm kapêr o mẽ ahkre ho ri apa kaxyw. Jakamã kot kaj mẽ te ate ôwêhti kot mry xoprê hwÿr amnhĩ to mrar nhũm kot hkwÿ hpar pyrâk o amnhĩ nhĩpêx. Koja mẽ hkwÿjaja mẽ ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhiêpêx to. Tã kêr ka mẽ tee ri amnhĩ kukamã ajamxpêr nê amã mẽ uma hkêt nê.

⁴—Nê kêr ka mẽ hwÿr anojarêr nê amnhĩ kôt amrykà rÿ akawà rÿ aparkà hõ ho apa hkêt nê. ãm anhy kamã ma mẽ hwÿr apa. Nê mẽ hwÿr mra nhũm mẽ nhÿri pry hã mẽ atõ kaxpa nê amã kapêr o xa ka wa axpên mã akapêr ry hkêt nê. Anojarêr kãm kãm akapêr krânre nê mẽ hakre nê ma krĩm apa.

⁵—Nê kêr ka mẽ hwÿr pøj nê nhÿri mẽ ôrkwÿ hwÿr agjê nê mẽ kãm: “Xà kot paj mẽ ato Tirtũm wÿ kê mẽ ato mex nê ka mẽ ajamakêtkati nê ri apa?” Anê. ⁶Hãmri nhũm mẽ ama nhũm ja mẽ kãm mex japêr nhũm mẽ hkĩnh nê amã: “ÿ kam nê mãmrĩ mẽ ixto awÿ.” Anê. Hãmri ka mẽ ama nê tanhmã mẽ ho Tirtũm wÿr to. No koja mẽ apê ja kaga ka mẽ ho hwÿr kêr nê.

⁷—Nê kêr ka mẽ nhÿri mẽ ôrkwÿ kamã mẽ hwÿr pøj hãmri nê mẽ hkôt ri apikamênh tãmtã nê akupÿm mẽ kurũm ajapøj nê ma hpãnhã krĩ hõ hwÿr apa. Nê mẽ axãmnhĩx mẽ kuri axàpkur o ri apa. Mëmoj to akõm o ri apa. Ra mẽ ate mẽ ho mex pê mẽ kãm Tirtũm kapêr o mẽ ahkre ho apa kênã. Jakamã kwãr mẽ mãmrĩ amnhĩ pãnhã mẽ amã mẽ axàpkur xà gõ ka mẽ kuri mẽ apku.

⁸—Nê kêr ka mẽ nhÿri mẽ hwÿr pøj nhũm mẽ ato mex nê. Nê mẽ amã mẽmo mẽ apkur xà gõ ka mẽ mãmrĩ axãmnhĩx aku. Aa kormã mẽ ate mẽmojta kur kêr tã mãmrĩ ajamakêtkati nê aku. No tee ri amnhĩ kukamã tanhmã ajamxpêr to hkêt nê.

⁹—Nê kêr ka mẽ ã mẽ kãm akapêr anê nê mẽ kãm: “Tirtũm kãm mẽ ato hkra hprãm. Na hte amnhĩ wÿr mẽ awÿ.” Anê hãmri nê akupÿm mẽ kãm mẽ à xwÿnhjê ho mex. ã

kot kaj mẽ mẽ kãm amnhĩ nhĩpêx anhyr o ri mẽ hkôt apa.

¹⁰—Nê kêr ka mẽ nhÿri mẽ hwÿr pøj nhũm mẽ ãm mẽ apumu nê amnhĩ nhõrkwy hwÿr mẽ awÿr kêr japêr. Hãmri ka mẽ tee ri amnhĩ tã mẽ omu hãmri nê ra ma nhãm apa kaxyw. ¹¹Hãmri nê anojarêr nê mẽ kãm: “E mẽ inhma. Tirtũm kot mẽ pahwÿr mênh xwÿnhnta na mẽ awÿr wa inhmê pa wa mẽ awÿr mõ. Wa ixte Tirtũm kapêr o mẽ ajahkre kaxyw. Kãm mẽ ato hkra hprãm nhũm wa ixte mẽ amã harênh kaxyw na pa pre wa ã mẽ awÿr inhmõr anê. Tã ka mẽ harênh ma nê wa ixkaga. Jakamã kot paj wa jar mẽ anhõ krĩ kamã amnhĩ par kã hã awjagrô kapĩ. Mẽ ate Tirtũm kaga hã amnhĩ pumunh nhũm Tirtũm kot amnhĩ pyrã nê mẽ akaga hã mẽ ate omunh kaxyw kot paj wa mẽ anoo mã ã amnhĩ par kã hã awjagrô kapĩr anê. Kot kaj mẽ nhÿrmã tee ri ã amnhĩ nhĩpêx anhyrja mã ajamxpêr nê akaprĩ htÿx kumrêx kãm ga. ãm hãmri na pa wa mẽ amã ja jarê.” Anhyr o mẽ kãm akapêr nê mẽ kêp ajapøj nê ma hpãnhã nhãm krĩ hõ hwÿr apa kurê kumrêx.

¹²—Koja nhÿrmã Tirtũm mẽ kot amnhĩ tomnuj mÿrapê tanhmã mẽ ho. Na pre ra ã krĩ pê Sotõ nhõ xwÿnhjê nhĩpêx anê. Na prem amnhĩ tomnuj tÿx o pa nhũm Tirtũm tanhmã mẽ kot amnhĩ tomnuj tÿx ã tanhmã mẽ ho. Tã jar mẽ kot kãm ixkapêr mar prãm kêr nê mẽ kot ixkaga xwÿnhjaja. Koja Tirtũm ixtã mẽ omu nê kot Sotõ nhõ xwÿnhjê nhĩpêx pyrâk o mẽ hipêx nom tanhmã mẽ ho htÿx o mẽ hakre.

—E kêr ka mẽ ma krĩ hkwÿ hkôt apa nê ã mẽ kãm akapêr anhyr o ri apa. Anê.

Mẽ kot Tirtũm kôt hamxpêr kêr xwÿnhjê jarênh

Matêwre 11.20-24

¹³⁻¹⁴Tã nhũm Jejus krĩ hkwÿ nhõ xwÿnhjê mã kapêr o xa nê mẽ kot amnhĩ tomnuj ã mẽ kãm akir. Krĩ pê Korajĩ mẽ Pesêj nhõ xwÿnhjê kumrêx mã kapêr nê mẽ kãm:

—E mẽ inhma. Amnepêm krĩ pê Sitõ mẽ Xir wa kamã mẽ pa xwÿnhjaja na prem tanhmã amnhĩ tomnuj tÿx to ho pa nhũm Tirtũm mẽ omu nê hã mẽ homnuj tÿx nê. Tã kwa mẽ o kora Korajĩ mẽ Pesêj wa kamã mẽ apa xwÿnhjaja. Ra ixte mẽ amã mẽ

ate mẽmoj pumunh kêt o anhÿr rax o ixpa htã ka mẽ omu nê arĩ amnhĩ tomnuj o ri apa nê tokyx amnhĩ tomnuj kaga hkêt nê. Jakamã kot kaj mẽ amex kêt nê. Kop apu Sitõ rÿ Xir kamã mãn ixte mẽ kãm aa mẽ kot mẽmoj pumunh kêt kwÿ ho anhÿr o ri ixpa ronhÿx mẽ omu nê mẽ arom amnhĩ kaxyw ixkôt hamaxpêr kurê kumrêx. Nê tee ri tanhmã amnhĩ tomnuj to ho pa hã amnhĩ pumu nê hkaprĩ nê ã amnhĩ nhĩpêx anhÿr kaga hpa. Nô mẽ kajaja na pa tee ri mẽ amã tanhmã amnhĩ nhĩpêx to ho ri ixpa kaprÿ. Ka mẽ ja hã ixpumu nê ãm ixpumu nê amnhĩ tomnuj kaga hkêt nê. Tã koja nhÿrmã Tĩrtũm mẽ piitã mẽ kot amnhĩ tomnuj mÿrapê tanhmã mẽ hipêx to. Hãmri nê tanhmã Sitõ mẽ Xir wa kamã mẽ pa xwÿnhjê jarênh to nhũm mẽ kot amnhĩ tomnuj mÿrapê amnhĩ xà htÿx kamã hamak o ri pa. Nô mẽ kajaja mẽ ate amnhĩ tomnuj tÿx o mẽ hakrenh jakamã koja Tĩrtũm mẽ hkĩnhã mẽ atomnuj tÿx o mẽ atomnuj tÿx. Ka mẽ amnhĩ xà htÿx kamã ajamak rãhã ho ri apa ho apa. Anê.

15 Nhũm pre ã Jejus mẽ kãm kapêr anê. Hãmri nê hpãnhã Kapanaũ nhõ xwÿnhjê mã kapêr nê mẽ kãm:

—No mẽ apê Kapanaũ nhõ xwÿnhjaja. Kot kaj mẽ ajaxwÿja mẽ amex kêt nê. Mẽ ate amnhĩ tomnuj kagare pyrã nê Tĩrtũm nhõ krĩ hwÿr akrã ho apa. Nom kot kaj mẽ atõ hwÿr axãpir kêt nê. Kot kaj mẽ ma kuwy maati hwÿr ajapêx pa kãm ga.

16 Anhÿr o mẽ kãm kapêr hãmri nê hpãnhã hkôt mẽ pa ho mẽ pa xwÿnhjê mã kapêr nê mẽ kãm:

—Kot kaj mẽ Tĩrtũm kapêr o mẽ ahkre ho ri apa nhũm mẽhõ ama nê akapêr kôt amnhĩ nhĩpêx. Hã koja te pa kot ixkôt amnhĩ nhĩpêx pyrãk o amnhĩ nhĩpêx. Nô koja amar kêt nê akaga hãmri nê te pa kot inhmar kêt nê ixkaga pyrãk o amnhĩ nhĩpêx. Jao mãânên Tĩrtũm kaga.

Anê hãmri nhũm mẽ kuma hãmri nê angrã nê axkrut kapên nê ma ahpÿnhã krĩ hkôt angrã.

*Mẽ hkĩnh nê ri mẽ pa xwÿnhjê jarênh
Apokarip 3.5*

17 Tã nhũm mẽ kêp 72jaja krĩ hkwy rũm akupÿn Jejus wÿr pøj. Piitã hkĩnh nê hpôx pa. Hãmri nê kãm:

—Kwa Pahihti. Na pa prem anhÿ hã mẽ nê mẽkarõmnuti japôx rax nê. Na pa prem mẽ nê mẽ hano nhũm mẽ ãm mẽ kurũm hapôx kurê kumrêx. Anê.

18 Hãmri nhũm mẽ kuma nê mẽ kãm:

—Tõe. Ixãhpumunh tÿx o ixte Satanasti jakrenh jakamã na ka htem inhÿ hã mẽ hano nhũm mẽ tee ri mẽ akutã hihtÿx prãm. Hãmri nê te na haxênh prêprêk pyrãk o amnhĩ nhĩpêx nê mẽ kurũm hapôx kurê kumrêx pa ja hã mẽ omu. 19-20 Mẽkarõmnuti te kot kagã xoprê rÿ te kot makre pyrãk. Tã ra ixte mẽ amã ixãhpumunh tÿx xà hkwy nhõr jakamã na ka prem mẽ kãm akapêr nhũm mẽ tee ri akutã tanhmã amnhĩ tÿx to hprãm. Tã koja Satanasti tee ri mẽ ate nhÿrmã Tĩrtũm mẽ wa ixri atĩr tũm nê apa pymaj tanhmã mẽ ano kupyrr to kaprÿ. Ra Tĩrtũm kot õ kagã kamã mẽ atĩr tũm nê mẽ apa kaxyw mẽ anhÿxi hã kagã kênã. Jakamã kwa mẽ jam ajamaxpêr o akĩnh nê ajamakêtkati nê ri apa. Nô kêt mẽkarõmnuti kot mẽ akapêr mar nê mẽ kurũm hapôxta ã mẽ omunh xà hkôt pix mã akĩnh nê ri apa hkêt nê. Anê.

Jejus kĩnh kãm kot Hipêêxã mã amnhĩ jarênh

Matêwre 11.25-27

21 Tã nhũm Tĩrtũm Karõ tanhmã Jejus to nhũm ÿ hã hkĩnh nê xa. Hãmri nê Tĩrtũm mã kapêr nê kãm:

—Pa Papaj? Nã apê mẽ ixpiitã mẽ inhõ Pahi Maati na ka. Pikap ri mẽ pa xwÿnhjaja nê kaxkwa kamã mẽ pa xwÿnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ ãhpumunh tÿx ã mẽ kot amnhĩ jarênh xwÿnhjê mã axãhpumunh tÿx o amnhĩrĩt kêt nê. ãm mẽ ãhpumunh kêt ã mẽ kot amnhĩ jarênh xwÿnhjê pix mã na ka hte ja ho amnhĩrĩt nhũm mẽ tapxipixjaja ja hã apumu. ãm hãmri na ka hte amã hprãm xà hkôt ã mẽ piitã mẽ hipêx anhÿr o ri apa. Jakamã mẽ kot amnhĩ to hkryre xwÿnh pixjaja na htem ate amnhĩ nhĩpêx ã apumunh o pa.

²²—Na ka pre inhĩhkra kamã mẽmoj piitã haxàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xwỳnhjaja na mẽ kot ja hã ixpumunh kêt. Nê mãânên papxipix na ixte ate tanhmã amnhĩ nhĩpêx to hã apumunh par. Jakamã na pa hte ã amnhĩ nhĩpêx anê nê inhmã hprãm xà hkôt mẽ hkwỳjê mã ato amnhĩrit o ri ixpa nhũm mẽ ixpyrà nê ate tanhmã amnhĩ nhĩpêx to ho apa hkôt apumu. Anê.

Jejus kôt mẽ pa xwỳnhjaja kot hkôt omunh o pa hã mẽ harênh

Matêwre 13.16-17

²³⁻²⁴ Nhũm pre Jejus ã Tĩrtũm mã amnhĩ jarênh anê hãmri nê hpãnhã hkôt mẽ pa ho mẽ pa xwỳnhjê mã kapêr nê mẽ kãm:

—E na ka htem ixkôt mẽ ano ho ixte tanhmã amnhĩ nhĩpêx to hã ixpumunh o ri apa. Nê mẽ ajamak o ixkapêr mar o ri ixkôt apa. No amnepêm mẽ akukamã pahijaja nê Tĩrtũm nhỹ hã kapêr jarênh o ri mẽ pa xwỳnhjaja kãm ixpumunh prãm tỳx o pa htã mẽ akĩnhã ixpumunh kêt rãhã htyk pa. Kormã ixwrỳk nê jar ixkator kêt jakamã na prem ixpumunh kêt rãhã ty. Nê mẽ kãm ixkapêr mar prãm tã mẽ akĩnhã ixkapêr mar kêt nê. ãm mẽ kapxipixjaja na ka mẽ mỳr pê ixte amnhĩ nhĩpêx ã ixpumunh nê ixkapêr mar o ixkôt apa. Tã mẽ kurom mẽ ate ano ho ixpumunh nê ajamak o ixkapêr mar jakamã kwa mẽ ja hã amnhĩ pumu nê tãm amnhĩ nhĩpêx o akĩnh nê ri apa. Anê.

Samar nhõ xwỳnh jarênh

Matêwre 22.34-40; Makre 12.28-34; mãânên Wam Juãw 3.17-18

²⁵ Tã nhũm Tĩrtũm kapêr tũm o mẽ ahkre o mẽ pa xwỳnhjaja Jejus wỳr tẽ nê hêx rom kot kamã hamak kaxyw kãm:

—Pa? E kwa inhmã mẽmoj jarê. Tanhmã kot paj we nhỹrmã Tĩrtũm ri ixtĩr tũm nê ixpa kaxyw amnhĩ nhĩpêx to wehe? Anê.

²⁶ Hãmri nhũm kãm:

—Tanhmã na ka hte Tĩrtũm kapêr ã kagà htũm kot mẽ htĩr tũm nê pa hã kagà kamã harênh nê mar to? Anê.

²⁷ Hãmri nhũm kãm:

—Nà harênh kot:

Kêr ka mẽ anhĩ piitã ho amã Tĩrtũm kĩnh o ri apa. Mẽ amã hkĩnh tỳx o mẽmoj piitã hakrenh par o ri apa.

Nê kêr ka mẽ amã mẽ piitã hã ma ho te ka amã amnhĩ tã ma pyràk o mẽ hipêx o ri apa. Jao tãm mẽ hipêx o ri apa. Anê.

Ã Tĩrtũm kapêr ã kagà htũm kamã ja jarênh kot anhỹr. Anê.

²⁸ Hãmri nhũm Jejus kuma nê kãm:

—Tỳ. Nà ãm hãmri na ka harê. Kot kaj ã mẽ hipêx anhỹr o ri apa nê nhỹrmã Tĩrtũm mẽ wa ixri atĩr tũm nê apa ho apa. Anê.

²⁹ Hãmri nhũm kuma nom kãm mẽ piitã mẽ ho mex prãm kêt nê. ãm amnhĩ kwỳ pixjaja nhũm kãm mẽ ho mex o pa hprãm. Jakamã hêx rom kãm:

—Kwa no mẽmojaja kot pa we ri ã mẽ hipêx anhỹr o ri ixpa? Xà mẽ pahkwỳ pê Ijaew pixjaja nà? Anê.

³⁰ Hãmri nhũm kuma nê tanhmã kãm ujarênh to. Nom hã kuxi nê kãm awjarê nê kãm:

—E pa amã awjarê ka inhma. Koja Ijaew nhõ xwỳnhjaja ma Jerujarê rũm Jeriko hwỳr ahpar mã ma mō. Mōõ nhũm ra mẽ ahkĩnh xwỳnhjaja kutã mra. Hãmri nê pry kahti ri hwỳr kato nê unê nê htak rax nê. Nê kêp ê hkwrynh pa nê ma kurũm hprõt nê mra nê akunok nhũm mẽ kot htak o hkà rênh rãhã ra htyk kaxyw nê nõ. ³¹ Hãmri nhũm patreja tẽ nê omu. No ãm omunh o hãnh tẽ nê hkupu nê ma tẽ. Uràk nê kêp Ijaew tã ãm omu nê tanhmã ho ajuta hto hkêt nê hãnh omunh o tẽ nê hkupu nê ma tẽ. ³² Hãmri nhũm patre ho ajuta xwỳnhjaja mãânên tẽ. Nê patre pyrà nê omu nê ãm omu nê hkupu nê ma tẽ. Uràk nê kêp Ijaew tã omu nê ãm omu nê hkupu nê ma tẽ.

³³—Tã nhũm Samar nhõ xwỳnhjaja mãânên mō. Samar nhõ xwỳnhjê mẽ Ijaew na prem kãm axpên kĩnh kêt tã nhũm mō nê omu nê kamã ukapri nê. Kêp Ijaew ã omunh tã tee ri omu nê kamã ukapri nê. ³⁴ Hãmri nê hwỳr tẽ nê omu nê kãm mẽ kot htak o hkà rênh xà kane nê kãm hkupu pa. Hãmri nê kãnhmã ãm nê hkrit jumênre hã kumê nê ma nhỹri mẽ kot amnhĩm hikranh xà hã ixkre hwỳr o mō nê hwỳr o pōj. Hãmri nê omunh mex o apkati. ³⁵ Hãmri nê akupỹm nojarêr nê kàxpore hkwỳ jamỳ nê o tẽ nê

kot mẽ kãm õ xwỳnhja mã kugõ nẽ kãm:
 “E kot paj hãmri ma mõi. Ota ixkàxporeta.
 Kêr ka inhmã à xwỳnhhta tãnopxar mex nẽ.
 Nẽ inhmã omunh mex kê akupỳm mex.
 Koja kàxporeja apê grire hã kot paj nhỹrmã
 akupỳn mõi nẽ axte hkõt amã hkwỳ gõ.”
 Anhỹr o kãm kapêr nẽ ma akupỳm mõi. ã
 mẽ ujarênh kot anhỹr. Anẽ.

³⁶ Nhũm pre ã Jejus kãm ujarênh anẽ.
 Hãmri nẽ kãm:

—E nhỹ na pre kãm mẽ kot htak xwỳnhhta
 kaprĩ ho te tãm kãm amnhĩ tã ma pyræk
 wehe? Anẽ.

Hãmri nhũm Tĩrtũm kapêr tũm o mẽ
 ahkre xwỳnhhta kãm:

—Nà kot kamã ukaprĩ xwỳnhhta na pre
 omu nẽ kamã ukaprĩ nẽ ho mex o te tãm
 kãm amnhĩ tã ma pyræk o hipêx. Anẽ.

³⁷ Hãmri nhũm Jejus kãm:

—Tỳ. Nà ãm hãmri na ka harẽ. Uræk nẽ
 kêp Ijaew kêt tã kamã ukaprĩ nẽ ho mex nẽ.
 Tã kêr ka uræk nẽ ã mẽ piitã mẽ hipêx anhỹr
 o ri apa. Uræk nẽ mẽ kêp akwỳ hkêt tã mẽ
 kamã axukaprĩ ho ri apa. Anẽ.

*Jejus kot Matre mẽ Marir wa hwỳr mõi ã
 harênh*

Rukre 12.29-31

³⁸ Tã nhũm Jejus krĩ rũm kato hãmri nẽ
 hkõt mẽ pa ho mẽ pa xwỳnhjê mẽ mẽ
 ma nhãm krĩ hõ hwỳr mõi. Mõi nẽ hwỳr
 pøj. Hãmri nhũm Matre mẽ omu nẽ amnhĩ
 nhõrkwỳ hwỳr mẽ kuwỳ nhũm mẽ ma hwỳr
 mõi nẽ õrkwỳ hwỳr pøj. ³⁹ Hãmri nhũm Jejus
 mẽ ahkre ho nhỹ nhũm Matre htõx Marirja
 arĩ hpar pê mar o nhỹ. ⁴⁰ Hãmri nhũm
 Matre mẽ hwỳr axà nẽ omu. Nẽ tee ri àpênh
 rax kukamã hamaxpêr nẽ Jejus wỳr tẽ nẽ
 kãm:

—Xê ma Pahihti. Kormã ixàpênh rax tã
 nhũm Marir ixto ajuta hkêt nẽ. ãm akapêr
 pix mar gryk ã ixkõt htêm nẽ ixto ajuta hkêt
 nẽ. Pa ahte mẽ panhõ hã ixàpênh o xa. Xà
 amã ja mex? Xê kãm anẽ kê tokyx ixkõt tẽ
 pa wa hã axkrut nẽ mẽ panhõ hã ixàpênh
 tokyx anẽ. Anẽ.

⁴¹ Hãmri nhũm tee ri kuma nẽ kãm:

—Kwa Matre. Na ka ãm mẽ panhõ pix
 kukamã ri ajamaxpêr nẽ gryk ã tee ri
 amnhĩ nhĩpêx. ⁴² ãm hãmri na Marir kãm
 ixkapêr mar prãm nẽ. Jakamã kot paj ri
 amnhĩ nẽ akõt hanor kêt nẽ. Anẽ.

11

*Mẽ pahte tanhmã Tĩrtũm mã amnhĩ
 jarênh to hã mẽ pamã karõ*

Matêwre 6.9-13, 7.7-11

¹ Tã nhũm apkati hõ hã nhũm Jejus nhỹri
 Tĩrtũm mã amnhĩ jarênh o nhỹ. Nẽ kãm
 amnhĩ jarênh pa nhũm hkõt mẽ pa ho mẽ
 pa xwỳnhjaja kot kãm amnhĩ jarênh ã omu
 nẽ hwỳr mra nẽ kãm:

—Kwa Pahihti. Amnhĩ pyrà nẽ mẽ ixte
 Tĩrtũm mã amnhĩ jarênh kaxyw tanhmã
 mẽ ijahkre hto. Kêr pa mẽ apyrà nẽ
 tanhmã kãm amnhĩ jarênh to ho ri ixpa. Na
 pre finat Juãw Paxisja hkõt mẽ pa ho mẽ
 pa xwỳnhjê mã ja jahkre nhũm mẽ kuma
 nẽ tãm kãm amnhĩ jarê. E kwa mẽ inhmã
 tanhmã ja jahkre hto nà? Anẽ.

² Hãmri nhũm mẽ kãm:

—Tõe. Nà kêr ka mẽ kãm amnhĩ jarênh
 kaxyw nẽ mãmrĩ amnhĩ krã hkõt tanhmã
 kãm amnhĩ jarênh to. Rỳ kãm amnhĩ jarênh
 o:

Pa Mẽinhĩpêxà maati? Nà amex o amex
 Tĩrtũm.

Apê mẽ ijamãr mex xwỳnh maati na ka.

³ Nẽ kwa kêr ka apkati mẽ mẽ inhmã mẽmo
 gõ pa mẽ akukwak ri ho ixàpkur o ri
 ixpa.

⁴ Nẽ na pa hte tõiã amnhĩ tomnuj nẽ
 Tĩrtũm. Nom mẽ kot tanhmã ixtomnuj
 to xwỳnhjaja na pa hte ãm mẽ
 omu nẽ amnhĩ tã tanhmã mẽ ho
 hkêt nẽ. Nẽ ja ho ijamakêtkati kurê
 kumrêx. ã na pa hte amnhĩ nhĩpêx
 anhỹr o ri ixpa.

Jakamã kwa kêr ka ja hã ixpumu nẽ ixpyrà
 nẽ ixte tanhmã amnhĩ tomnuj to hã
 ixpumu nẽ hã tanhmã ixto hkêt nẽ.
 ãm ho ajamakêtkati kurê kumrêx nẽ
 axte kãm ajamaxpêr kêt nẽ.

Nẽ kot paj tanhmã amnhĩ tomnuj to kaxyw
 japêr ka ja hã ixpumu nẽ ixte ã
 amnhĩ nhĩpêx anhỹrja nẽ ixto htỳx
 nẽ pa ja ho anhỹr kêt nẽ.

E ãm ja pix na hapêx. Anẽ.

E kêr ka mẽ ã Tĩrtũm mã amnhĩ jarênh
 anhỹr o ri apa. Anẽ.

Mêpahte amnhĩ to Tĩrtũm wỳr rãhã hã mẽ pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mããnẽn Rõmãn 12.12; Epes 6.18; Wam Tesarõn 5.17-18

⁵⁻⁶ Nhũm Jejus arĩ hkõt mẽ pa ho pa xwỳnhjê jahkre ho nhỹ nẽ mẽ kãm:

—Nẽ ja. Koja mẽ akràmnhwỳjê hõ. Nhũm kõt ã kamàt nhũm nhỹhỹnh awỳr mõn pøj. Ka anhõ mẽmoj kêt hãmri nẽ anhĩjuk ri akràmnhwỳ hwỳr tẽ. Hãmri nhũm ra amnhĩ tã kahê nẽ nõ. Ka tee ri omu hãmri nẽ hakwa krem xa nẽ kãm akapêr nẽ kãm: “Pa ixkràmnhwỳ. Na ka mẽ ra gõr? Kwa kànhmã nhỹ nẽ inhmã anhõ mẽmoj japêr. Na ra ham ixkràmnhwỳta mõn pøj. Nẽ kãm prãm tỳx nẽ mõ nom kaxyw inhõ hkêt. Kwa kànhmã nhỹ nẽ inhmã anhõ mẽmoj japêr nẽ inhmã hkwy pa ma o tẽ kê kukrẽ. ãm inhõ hkêt kumrẽx. ãm hãmri na pa amã amnhĩ jarẽ. Kwa tokyj kànhmã nhỹ nẽ inhmã mẽmoj japêr nã?” Anhỹr o kãm akapêr.
⁷ Hãmri nhũm ama nom kãm kànhmã ỳr prãm kêt nẽ. Nẽ amã: “Tk. Nà ra mẽ ixte amnhĩ tã kahê hpar nẽ inhĩkwỳ kẽnã kot pa kêt kànhmã nhỹ nẽ amã mẽmoj japêr.” Anẽ.
⁸ Ka tee ri ama nẽ xatã kãm: “Kwa ã inhĩpêx anhỹr kêt nẽ ixkràmnhwỳ. Kwa tokyx.” Anhỹr o xa. Nẽ xatã kãm anojarêt o xa. Hãmri nhũm ra kãm amar kaga hãmri nẽ tã kànhmã nhỹ nẽ amã ate ho presija xwỳnhta gõ. No ãm kệp akràmnhwỳ hã ate hã axàhwỳr tipxi hã amã õr kêt nẽ. ãm xatã ate ho presija htỳx xwỳnhja mã hamaxpêr nẽ tã kànhmã nhỹ nẽ amã kugõ. ã mẽ ujarẽnh kot anhỹr.

⁹⁻¹⁰ —Tã kêr ka mẽ ja pyrã nẽ amnhĩ to Tĩrtũm wỳr rãhã ho ri apa nhũm ama nẽ ate mẽmoj tã hwỳrta amã kugõ. ãm xatã ate hã axàhwỳr o ri apa nhũm amã kugõ. ãm mẽmoj to hwỳr rãhã ho ri apa nhũm ama hãmri nẽ amã mẽmoj tanhmã hipêx to. Te ho mễhõ kãm tep xành nẽ gõx kãm xatã tep rẽn h xà rẽn h o ãm pyrã nẽ xatã mẽmoj tã hwỳr o ri apa. Hãmri nhũm ama nẽ amã hprãm xwỳnhta gõ. Te ho tep kanhêr xwỳnhta tã kot tep õ kanhêr pyrãk o anhĩpêx nẽ amã mẽmoj prãm xwỳnhta gõ. Anẽ.

Tĩrtũm kot hkrajê mã mẽmoj mex nhõr ã harẽnh

Makre 7.9-11

¹¹ Nhũm Jejus arĩ hkõt mẽ pa ho mẽ pa xwỳnhjê jahkre nẽ mẽ kãm:

—Nẽ xà koja akra kãm tep xành nẽ hã awỳ ka ama nẽ axtem nẽ kãm kagã xoprê hõ py nẽ agõ? ¹² Rỳ nhũm krãhyre gre hã awỳ ka axtem nẽ kãm makre hõ py nẽ agõ? Nà na ka htem ã akrajê nhĩpêx anhỹr kêt nẽ. Na ka htem mẽ kot mẽmoj tã àhwỳr xà hkõt kãm mẽmoj gõ. ¹³ Mẽ kamjaja mẽ ate amnhĩ tomnuj o ri apa htã ka htem akrajê ho mex o ri apa. Tã kaxkwa kamã Tĩrtũmja na hte mẽ pahto mex o mẽ ate mẽ akrajê ho mexta jakrenh. Kãm mẽ pajapê htỳx kõt na hte mẽ pamã mẽmoj mex nhõr o pa. Nẽ mããnẽn amnhĩ Karõja na hte mẽ pamã kugõ. Jakamã kot kaj mẽ atõ Karõ hã awỳ nhũm ama nẽ awỳr kumẽ nhũm wrỳ nẽ akarõ mã axà. ã na hte Tĩrtũm kãm mẽ pajapê xaj mẽ pamã mẽmoj mex nhõr o pa anẽ. Anẽ.

Jejus mẽ Satanasti wa harẽnh

Matêwre 12.22-32; Makre 3.20-30

¹⁴ Tã nhũm Jejus nhỹri axte mễhõ nẽ mẽkarõmnuti kator. Na pre ra mẽkarõmnuti tanhmã ho nhũm kapêr kêt nẽ pa. Hãmri nhũm Jejus omu nẽ nẽ kator nhũm akupỳm kapêr mex nẽ. Nhũm mẽ piitã amnhĩ jaêr pê omu nẽ no hawênh rũnh nẽ omunh o kuhê. ¹⁵ Nom nhũm mẽ hkwyjaja Jejus kot ã hipêx anhỹr ã omu nẽ htỳx ho kệp mẽkarõmnuti hkwy hã hkamnhĩx nẽ axpên mã harẽnh o:

—Tk pêr hinhu nhĩkõoti nhỹ hã na hte mẽ nẽ amnhĩ kwỳjê japõx o pa. Anẽ.

Hinhu nhĩkõoti nhĩxi hõ pê Satanasti nhũm prem Satanasti nhỹ hã Jejus kot ã amnhĩ nhĩpêx anhỹr o pa hã hkamnhĩx.
¹⁶ Jakamã nhũm mẽ hkwyjaja hwỳr mra nẽ kãm:

—Kwa mẽ inhmã aa mẽ ixte mẽmoj pumunh kêt õ ho anẽ. Pa mẽ omu nẽ ate Tĩrtũm nhỹ hã tanhmã amnhĩ nhĩpêx to ho apa hã apumunh kurê kumrẽx. Anẽ.

Nom hêx rom mẽ kot kamã hamak kaxyw ã kãm kapêr anẽ. ¹⁷ Nhũm ra Jejus mẽ hamaxpêr kõt mẽ omunh mex jakamã mẽ kapêr ma nẽ mẽ kãm:

—Kwa mẽ inhma mẽ ate ixpê Satanasti hkwỳ hã ixkamnhĩx xwỳnhjaja. Koja pika nhõ xwỳnhjaja axpên kutã amnhĩ xunhwỳ nê axpu hãmri nê anhrã nê ma ahpỳnhã ri pa. Hãmri nê amnhĩ krã hkõt ri tanhmã amnhĩ to ho ri pa. Jakamã nhũm mẽ õ pahi mẽ hamãr o pa hkêt nê. Rỳ koja krĩ nhõ xwỳnhjaja. Mẽ kot axpên to hkwỳ xwỳnhjaja mẽmoj tã axpên kãm gryk nê axpên kutã amnhĩ xunhwỳ hãmri nê axpên pê anhrã nê ahpỳnhã pa hãmri nhũm mẽ õ pahi tee ri kãm mẽ hamãr o pa hprãm. Mo õ krĩ kamã mẽ hkwỳ kot ri mẽ hamãr o pa? No na pre mẽ õ pahi tãm amnhĩ nê mẽ hanor kêt nê.

¹⁸ —Tã ja pyrã nê ixte Satanasti nhỹ hã tanhmã amnhĩ nhĩpêx to ho ixpa ronhỹx pa mẽ nê amnhĩ kwỳjê janor o ri ixpa hkêt nê. Nhỹx Satanasti ixte mẽ nê mẽ hanor kaxyw tanhmã inhma nê hkêt nê.

¹⁹ —No kêt mẽ akwỳjaja? Xà Satanasti nhỹ hã na htem mẽ nê mẽ hapôx o pa nã? Kêp apu pa ixte ÿ hã mẽ nê mẽ hapôx ronhỹx mẽ akwỳjaja ixpyrã nê ÿ hã mẽ nê mẽ hapôx o pa. Nã Tĩrtũm nhỹ hã mẽ ixte mẽ nê mẽ hapôx o mẽ ixpa kênã. Jakamã ã mẽ ate ijarênh anhỹr o apaja mex kêt. ²⁰ Tĩrtũm Karõ nhỹ hã ixte mẽ nê mẽ hapôx o ri ixpa kênã. Jakamã kwa mẽ ja hã ixpumu nê Tĩrtũm kot ixte mẽ ato amnhĩptãr kaxyw mẽ awỳr inhmênh kõt ixpumunh kurê kumrêx kêt wehe. Pa na ka htem ixkamã ajamak o apa.

²¹⁻²² —Satanastija àhpumunh tỳx jakamã na htem tee ri kêp mẽ kot hkõt amnhĩ xunhwỳr xwỳnhjê pytãr kaxyw nhũm mẽ nê mẽ omunh mex nê. Nom ixàhpumunh tỳx o ixte Satanasti jakrenh jakamã pa na pa hte kêp mẽ utã nhũm mẽ hpãnhã ixkõt ri amnhĩ nhĩpêx.

²³ —Mẽ amã ixkapêr mar prãm tã na ka mẽ kormã ixkõt amnhĩ xunhwỳr kêt nê. Kwa wem ma amnhĩ to amõr gri nê tokyx ixkõt amnhĩ xunhwỳ kêt wehe. Kot kaj mẽ anhỹr kêt nê hãmri nê te mẽ ate ixkutã amnhĩ xunhwỳr xwỳnh pyrãk o amnhĩ nhĩpêx. ²⁴ Mẽ ate ixkõt amnhĩ xunhwỳr kêt xwỳnhjaja te mẽ ate mēhõ nê mẽkarõmnuti japôx xwỳnh pyrãk. Nhũm te kêp kator nê ma mõi nê nhỹri amgrã kamã ri pa. Nhũm ja kêp omnuj nhũm tee ri kamã nhỹri hkõtõt

xà japêr o pa. Nom tee ri hapêr o pa nê hamaxpêr o: “E kot paj ma akupỹm mẽ kot nê ixkator xwỳnhhta wỳr tẽ nê hwỳr axà nê hkõt mãn ixpa.” Anê. ²⁵ Hãmri nê ma akupỹm hwỳr tẽ. Nom kormã akupỹm hwỳr àr kêt ri nhũm kamã amrakati nê pa. ²⁶ Jakamã nhũm ma akupỹm hwỳr tẽn axà. Nom ahte àr kêt nê. Ra amnhĩ kõt amnhĩ kwỳjê ho 7 nê hwỳr mẽ ho agjê. Nê hwỳr gjêx pa. Mẽ kêp 7jaja nê wamta mẽ nhũm mẽ piitã hwỳr gjêx pa. No mẽ kêp 7jaja omnuj tỳx o kot wamta jakrenh jakamã nhũm mẽ kot hwỳr gjêx xwỳnhhta mẽ ÿ hã amnhĩ tomnuj tỳx o pa. Oprê htỳx nê. Wam pyxire nê kot hwỳr àr nhỹ hã amnhĩ tomnuj o ri pa nom ãm kawax pê oprê. Tã axte hwỳr mẽ ohtõ nê gjêxta nhỹ hã oprê htỳx kumrêx. Ja pyrã nê kot kaj mẽ tokyx ixkõt amnhĩ xunhwỳr kêt nê hãmri nê ãm amnhĩ tomnuj tỳx pix o ri apa. Anê.

Mẽ hkĩnh nê mẽ pa xwỳnhjê jarênh

Rukre 8.19-21

²⁷ Nhũm pre ã Jejus mẽ ahkre anê nhũm mēhõ nija kuma nê kãm:

—Hêxta gàa nê. Mãn akatorxã ã ate amnhĩ nhĩpêx anhỹr o apa hã apumu nê hkĩnh nê. Anê.

²⁸ Hãmri nhũm kãm:

—Tỳ. Nã kot anhỹr kênã. Nom kot ka mẽ atõ Tĩrtũm kapêr ma nê hkõt amnhĩ nhĩpêx hãmri nê akĩnh rax o ixkatorxã kot ixpumunh nê hkĩnhhta jakre. Anê.

Jejus kot tanhmã Jõhti jarênh to

Matêwre 12.38-42; Makre 8.12

²⁹ Tã nhũm mẽ ohtõ nê Jejus ã akuprõ nê mẽmoj tã kuwỳ nê kãm:

—Pa. Kwa mẽ inhma aa mẽ ixte mẽmoj pumunh kêt õ ho anê pa mẽ omu. Anê.

Hãmri nhũm mẽ kuma nê mẽ kãm:

—Tk. Kwa mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awỳr inhmênh xwỳnh tã ka mẽ ja hã ixkõt ajamaxpêr kêt nê. Tã mẽ ate aa mẽmoj pumunh kêt kwỳ ixte mẽ amã ho anhỹr kaxyw hã inhma karõ. Nã kot paj kormã mẽ amã ho anhỹr kêt nê. Kot paj nhỹrmã te amnepêr finat Jõhti kot amnhĩ nhĩpêx pyrãk o amnhĩ nhĩpêx ka mẽ hã ijarênh ma nê kormã ja hã ixpumu. ³⁰ Tĩrtũm nhỹ hã kapêr xwỳnh pê Jõhtija amnepêr na pre tep

rax kukrê. Tã nom nhũm htĩr rãhã õxàhkre rũm kato nhũm mẽ omu nẽ Tĩrtũm kot mẽ hwỳr mẽnh ã omu. Tã kot paj nhỹrmã Jõhti pyrã nẽ tanhmã amnhĩ nhĩpêx to nhũm mẽ ja hã ixpumu nẽ Tĩrtũm kot mẽ awỳr inhmẽnh xwỳnh ã ixpumunh kurê kumrêx.

³¹ —Nẽ koja nhỹrmã Tĩrtũm akupỹm mẽ htyk nẽ mẽ hikwỹ xwỳnh piitã akupỹm mẽ ho htĩr hãmri nhũm mẽ piitã Inhipeexa mẽ wa ixkutã hkrĩ. Pa wa mẽ piitã tanhmã mẽ harẽnh to. Tĩrtũm mẽ wa ixkuri mẽ htĩr tũm nẽ mẽ pa ho mẽ pa mã xwỳnh ã mẽ hkwyjê jarẽ. Nẽ wa ixkuri mẽ pa ho mẽ pa hkêt xwỳnhjê jarẽ. Mẽ piitã ã mẽ harẽnh anẽ. Amarĩ mẽ pa xwỳnhjaja nẽ mẽ õ pahijaja. Hãmri nhũm sur kãm mẽ õ pahi niti Tĩrtũm mã tanhmã amnhĩ jarẽnh to hãmri nẽ hpãnhã tanhmã mẽ ajarẽnh to nẽ kãm mẽ ajarẽnh o: “Na pa pre inhmã pahi Sarumãw kot anhỹ hã àhpumunh tỳx ã harẽnh ma hãmri nẽ inhmã mar prãm xàj ma awry hã õ pika hwỳr ixpa nẽ omu nẽ kapêr ma. Hãmri nẽ ma akupỹm inhõ pika hwỳr ixpa nẽ ixkwỳjê mã àhpumunh tỳx ã harẽnh o ixpa. Tã Akra Jejus na àhpumunh tỳx o pahi Sarumãw jakrenh tã or war akutã mẽ hkrĩ xwỳnh kwỳ mũj na prem kapêr ma no ãm ixkĩnhã kãm mar prãm kêt nẽ. Na prem kuma nẽ ãm kuma.” Anhỹr o wa inhmã mẽ ajarẽ. Hãmri nẽ ja hã mẽ amã akir ka mẽ tee ri mar o akrĩ nẽ amnhĩ kamã agryk o akrĩ.

³² —Hãmri nhũm hpãnhã Nĩnĩwe nhõ xwỳnhjaja wa inhmã tanhmã amnhĩ jarẽnh to. Jõhti kot mẽ hwỳr mõi nẽ mẽ kãm Tĩrtũm kapêr jarẽnh o pa xwỳnhjaja nhũm mẽ tanhmã wa inhmã amnhĩ jarẽnh to. Hãmri nẽ pahi nita pyrã nẽ wa inhmã tanhmã mẽ ajarẽnh to nẽ wa inhmã: “Na pre Jõhti man mẽ inhõ krĩ hwỳr mõi nẽ mẽ inhmã akapêr jarẽnh o ri mẽ ixkõt pa. Pa prem kuma nẽ mẽ ixte amnhĩ tomnuj kaga nẽ akõt amnhĩ xunhwỳr kurê kumrêx Tĩrtũm. Nom or war akutã mẽ hkrĩ xwỳnh kwỳ mũj na pre Akra Jejus tãm mẽ hwỳr mõi nẽ mẽ kãm kapêr o ri mẽ hkõt pa nhũm prem kuma no ãm mẽ ixkĩnhã amnhĩ tomnuj kaga nẽ hkõt amnhĩ xunhwỳr kêt nẽ. Mẽ kot Akra mar tã amnhĩ kaxyw kãm hamaxpêr kêt nẽ.” Anhỹr o koja mẽ wa inhmã mẽ ajarẽ ka mẽ tee ri mẽ ama nẽ amnhĩ kamã agryk tỳx nẽ. Jakamã

e kwa ixte mẽ amã ã ixkapêr anhỹrja ma nẽ kãm ajamaxpêr tỳx rãhã ho ri apa. Anẽ.

Mẽ pajamaxpêr mex te kot kanê hpòk mex pyrãk ã harẽnh

Matêwre 5.15, 6.22-23

³³ Nhũm Jejus arĩ mẽ ahkre ho nhỹ nẽ mẽ kãm:

—Xà na htem kanê hpòk nẽ poti ho hpro? Nà na htem ho anhỹr kêt nẽ. Na htem hpòk nẽ kỳx pẽ mẽmoj nhĩmõk ã unhwỳ nhũm mẽ piitã mẽ kãm hirã mex nhũm htem ixkrem agjê nẽ hirã kamã mẽmoj pumunh mex o mra. ³⁴ Ja pyrã nẽ kot ka mẽ atõ ixkapêr ma nẽ ixkõt amnhĩ nhĩpêx nẽ tãm amnhĩ nhĩpêx o ri apa. Nẽ tãm mẽ hipêx o ri apa. Jao te hirã kamã mẽ rĩt mex xwỳnhjaja kot amnhĩ nhĩpêx pyrãk. Nom koja mẽhõ inhma nẽ ãm inhma nẽ ixkwỳm ri tanhmã amnhĩ nhĩpêx to ho pa. Jao te kamãt kô kamã mẽ rĩt mex kêt xwỳnhjaja kot htỳx amnhĩ nhĩpêx o pa pyrãk o amnhĩ nhĩpêx.

³⁵ —E kêt ka mẽ ã amnhĩ nhĩpêx anhỹr pymaj ixkapêr ma nẽ kãm ajamaxpêr tỳx rãhã ho ri apa. ³⁶ Kot kaj mẽ ixkapêr ma nẽ ixkõt amnhĩ nhĩpêx. Hãmri nẽ te mẽ ate kanê hpòk mex nhĩrã kamã ri apa pyrãk o amnhĩ nhĩpêx. Jao aprĩ hã ixkapêr ma nẽ aprĩ hã ixte tanhmã amnhĩ nhĩpêx to hã ixpumunh mex nẽ. Anẽ.

Jejus kot tanhmã Parijew nhõ xwỳnhjê jarẽnh to

Matêwre 23.25-26

³⁷ Tã nhũm Jejus ra mẽ ahkre pa. Hãmri nhũm Parijew nhõ xwỳnhja hwỳr tẽ nẽ kãm:

—Pa. E kwa ma ixkõt tẽ nẽ mẽ ixkutã apku. Anẽ.

Hãmri nhũm kuma nẽ kãm:

—Tõe. Nà kot paj ma akõt tẽ. Anẽ

Hãmri nẽ ma hkõt tẽ nẽ õrkwỹ hwỳr axà nẽ apkur kaxyw mẽ ãhkõ hã nhỹ. ³⁸ No ãm mẽ hkukamã mẽ hpãmjê pyrã nẽ amnhĩ nhĩhkra kuhõnh ryy hkêt nẽ. ãm amnhĩ nhĩhkra htyk pix kuhõnh tokyx anẽ nẽ nhỹ. Nẽ õ prat kuhõnh ryy hkêt rãhã apkur kaxyw nhỹ. Jakamã nhũm kot amnhĩ kõt hwỳr xwỳnhhta tee ri ja hã omu nẽ hamaxpêr o:

—Tk. Kwa na hte mẽ ixte amnhĩ nhĩpêx kõt amnhĩ nhĩpêx mex kêt nẽ.

³⁹ Anê nhũm Jejus amnhĩ tã hamaxpêr ã omu nê kãm:

—Nà mẽ apê Parijew nhõ xwỳnhjaja te mẽ ate mẽ kot apkur kaxyw prat kre kuhõnh punuj tã mex ã harênh pyræk o amnhĩ nhĩpêx. Nê ãm mẽ akrã hkà rũm pix mã na mẽ amex. Nê mẽ noo mã te mẽ amex pyræk no ãm mẽ anhõxàhkre kaxwỳnh kãm mẽ ajamaxpêr mex kêt. ãm mẽ akapêr prãm. Nê mẽ axàhkurêê. Nê mẽ anhõxyỳ.

⁴⁰ Mẽ ate atỳx ri amnhĩ nhĩpêx o ri mẽ apa xwỳnh kênã. Kwa kêt ka mẽ ãm akrãhkà pix rũm amex nê ri apa hkêt nê. Mẽ mãânên anhõxàhkre kaxwỳnh kãm ajamaxpêr mex o ri apa. Nê tãm mẽ piitã mẽ hipêx o ri apa.

⁴¹ Kêr ka mẽ tãm ajamaxpêr o tãm mẽ hipêx o ri apa. Nê axàmnhĩx ri mẽ kêp amrakati xwỳnhjê mã mẽmoj nhõr o ri apa. Kot kaj mẽ ã amnhĩ nhĩpêx anê hãmri nhũm Tĩrtũm ja hã mẽ apumu nê amnhĩm mẽ amex ã mẽ ajarê. No na ka htem mẽ amã mẽ amnhĩ to mex prãm xàj tee ri amnhĩ kuhõnh japjê kaprỳ. Anê.

Jejus kot Parijew nhõ xwỳnhjaja mex kêt kukamã mẽ harênh

Matêwre 23.4, 23.7, 23.13-24, 23.27-38; Makre 12.38-39

⁴² Nhũm Jejus arĩ Parijew nhõ xwỳnhjê jahkre nê mẽ kãm:

—Kwa mẽ okora Parijew nhõ xwỳnhjaja. Kot kaj mẽ amex kêt nê. Na ka htem Tĩrtũm kapêr piitã hkôt amnhĩ nhĩpêx o apa hkêt nê ãm hkwyỳ kôt pix mã amnhĩ nhĩpêx o ri apa. Nê ãm kapêr o hpỳnhre nê hkôt amnhĩ nhĩpêx hãmri nê hã amnhĩ pumu nê ate amnhĩ to mex xwỳnh ã amnhĩ to jarkrar o ri apa. Nom Tĩrtũm kãm hprãm xà piitã hkôt amnhĩ nhĩpêx hkêt nê. Mẽ ate tãm mẽ piitã mẽ hipêx o ri apa hã kot mẽ amã karõja. Nê mẽ amã Tĩrtũm kĩnh ã kapêr kôt amnhĩ nhĩpêx o ri apa hã karõja mẽ ate mar mex tã hkôt amnhĩ nhĩpêx kêt nê. Mẽ ate kapêr piitã hkôt amnhĩ nhĩpêx ronhỹx ja mẽ amã mex kumrêx.

⁴³ —Kwa mẽ o kora. Mẽ piitã mẽ kot amnhĩm mẽ ate amnhĩ to rũnh xwỳnh ã amnhĩm mẽ ajarênhja na mẽ amã hprãm. Nê mẽ piitã mẽ kot amnhĩm mẽ apê mẽ ahkre mex xwỳnh maati hã mẽ ajarênhja na mẽ amã hprãm.

⁴⁴ —Kwa mẽ o kora. Kot ka mẽ amex kêt nê. Mẽ kot mẽ akapêr mar nê mẽ akôt amnhĩ nhĩpêx xwỳnhjaja te mẽ kot htỳx ri mẽ hã pika nhĩmøk ã ri mẽ pa xwỳnh kot amnhĩ nhĩpêx pyræk. Jao mẽ ate amnhĩ to mex ã amnhĩ kamnhĩx nom mẽ ate amnhĩ to mex kêt. Te mẽ kot pika mex ã hkamnhĩx nê htỳx ri mẽ hã pika nhĩmøk ã ri mẽ pata pyræk o na htem amnhĩ nhĩpêx. Anê.

Nhũm pre ã Jejus Parijew nhõ xwỳnhjê mã mẽ kot amnhĩ nhĩpêx jarênh anê.

Jejus kot Tĩrtũm kapêr tũm o mẽ ahkre xwỳnhjê mã kapêr

Matêwre 23.1-4, 23.13, 23.29-36

⁴⁵ Hãmri nhũm Tĩrtũm kapêr tũm o mẽ ahkre ho pa xwỳnhja kuma nê kànhmã xa nê kãm:

—Kwa na ka ã Parijew nhõ xwỳnhjê jarênh punuj anhỹr jao mãânên ã mẽ paja jarênh anê nà? Mẽ ixte amnhĩ nhĩpêxja ãm tipxi kênã. Anê.

⁴⁶ Hãmri nhũm kãm:

—Tỳ. Mãânên mẽ kajaja. Kwa o kora mẽ apê Tĩrtũm kapêr tũm o mẽ ahkre xwỳnhjaja. Kot kaj mẽ uræk nê amex kêt nê. Na ka htem mẽ kãm mẽmoj tã karõ ho ri apa nê mẽ kãm: “E kêr ka mẽ ã amnhĩ nhĩpêx anê nê ã amnhĩ nhĩpêx anê.” Anhỹr tã no ãm mẽ kajaja amnhĩ kapêrja kôt amnhĩ nhĩpêx kêt nê. Te mẽ ate mẽhõ kot mẽ katut ã mẽ kãm mẽ jênh pytĩ janhõr tã mẽ ho ajuta nê hkwyỳ htur kêeta pyræk o na ka htem amnhĩ nhĩpêx o ri apa.

⁴⁷⁻⁴⁹ —Na pre Tĩrtũm amnepêm mẽ pahpãmjê hkukamã tanhmã mẽ harênh to. àhpumunh tỳx xà hkôt tanhmã mẽ hkukamã mẽ harênh to nê mẽ harênh o: “Kot paj ma mẽ hwỳr inhỹ hã ixkapêr jarênh xwỳnhjê rê. Nom koja mẽ omu nê ãm mẽ omu nê kêp mẽ hprãm nõkati nê tanhmã mẽ hipêx to ho pa. Nê ixpê mẽ hkwyỳjê hpar o pa. ã koja mẽ inhỹ hã ixkapêr jarênh xwỳnhjê nhĩpêx anê.” Anhỹr o mẽ hkukamã mẽ harê. Tã ã mẽ harênh anhỹr xà hkôt nhũm prem ã mẽ hipêx anê nê mẽ hkwyỳjê hpa nê mẽ hkwyỳjê pynê nê mẽ hagjê.

—Amnepêm mẽ akukamã mẽ kot ã mẽ hipêx anhỹr nhũm mẽ ate mẽ ano ho ja hã mẽ omunh kêt tã ka htem arĩ mẽ hã pika ho mex o ri apa. Te mẽ amã mẽ hapê nê mẽ ho

ajamak pyrà nê mẽ hã pika ho mex o ri apa. Nom mẽ amã mẽ hapê hã ho mex hkêt nê. Âm ra mẽ htyk nê hapêx nê mẽ amã Tirtũm kapêr jarênh o pa hkêtja ã na ka htem akĩnh nê ã axêx rom mẽ hã pika ho mex anhÿr o ri apa.

⁵⁰⁻⁵¹ —Na prem Tirtũm nhÿ hã kapêr jarênh o mẽ pa xwÿnhjê nhĩmex rax nê. Amnepêm panhĩ kator krax rũm finat Atãw kra finat Apewja na pre Tirtũm nhÿ hã kapêr o pa nhũm htõ kãm mar prãm kêt nê kupĩ. Tã nhũm Tirtũm axte mẽ hwÿr ÿ hã kapêr jarênh o mẽ pa xwÿnh kwÿjê rê nhũm prem mã mẽ ho anê nê mẽ hkwÿjê nhĩmex. Nhũm pre xatã mẽ hwÿr mẽ hkwÿjê rê nhũm mẽ xatã mẽ kupa. ã Apew rũm finat Jakaris wÿr na prem mẽ himex rax anê. Nê hpãnhã Jakarisja nhũm prem Tirtũm mã amnhĩ jarênh xà hã ixkre kamã kupĩ. Tã ka mẽ ajaxwÿja amã Tirtũm kapêr mar prãm kêt nê mẽ uràk nê amã ÿ hã kapêr jarênh o mẽ pa xwÿnhjê nhĩmex prãm. Tã ã mẽ pahpãmjê mẽ ato hpimràatã mẽ ate mẽ hipêx anhÿrja mÿrapê koja Tirtũm ja hã mẽ apê mẽ hkanrêhã mẽ htãmnhwÿjaja tanhmã mẽ ato htÿx to ka mẽ amnhĩ xà htÿx kamã ajamak o ri apa rãhã nê kãm ga.

⁵² —Jakamã kwa mẽ o kora mẽ apê Tirtũm kapêr tũm o mẽ ahkre xwÿnhjaja. Mẽ ajaxwÿja na ka htem Parijew nhõ xwÿnhjê pyrà nê Tirtũm kapêr o mẽ ahkre ho apa. Nê aprĩ hã mar mex tã no ãm amnhĩ kaxyw hkôt ajamaxpêr nê hkôt amnhĩ nhĩpêx kêt nê. Hãmri nê mẽ kot mẽ amar o pa xwÿnhjê mã atÿx ri tanhmã mẽ ahkre hto nhũm htem mẽ ama nê mẽ apyrà nê amnhĩ kaxyw Tirtũm kôt hamaxpêr nê hkôt amnhĩ nhĩpêx kêt nê. Mẽ kãm hprĩ hã kapêr mar mex prãm tã mẽ amar xà hkôt mẽ ate amnhĩ nhĩpêx pyràk o amnhĩ nhĩpêx o pa. Nom mẽ kajaja na ka htem mẽ kãm mẽ hamaxpêr mex nhõr kêtja mÿrapê nhũm htem ã amnhĩ nhĩpêx anhÿr o pa. Jakamã kwa mẽ o kora kot kaj mẽ amex kêt nê. Anê.

Nhũm pre ã Jejus mẽ kãm kapêr anê. ⁵³⁻⁵⁴ Hãmri nê kato nê ma tẽ. Nhũm Tirtũm kapêr tũm o mẽ ahkre ho mẽ pa xwÿnhjê mẽ Parijew nhõ xwÿnhjaja hãmri kot tanhmã mẽ kãm kapêr toja ma nê kamã gryk tÿx nê. Jakamã ma hkôt mra. Hêx

rom mẽmoj tã hkukjêr o hkôt mra. Nê hã hkukjêr kãm hihtÿx o hkôt mra. Kot tanhmã mẽ kãm ujarênh to nhũm mẽ kot mar nê ra hã àmnênh kaxyw ma hkôt àhkukjêr o mra.

12

Mẽ pahte Tirtũm pẽ mẽ pajamaxpêr punuj o pahpimxur kêt

Matêwre 10.26-33

¹⁻³ Tã nhũm mẽ Jejus ã htu rax kumrêx nê hã axpên nhĩgãnh o kuhê. No nhũm kormã mẽ kãm tanhmã kapêr to hkêt nê. Âm kormã hkôt mẽ pa ho mẽ pa xwÿnhjê kumrêx mã kapêr nê mẽ kãm:

—Mẽ piitã kãm amnhĩ kwÿjê pẽ hamaxpêr punuj o hpimxur hprãm tã koja nhÿrmã mẽ hamaxpêr piitã amnhĩrit pa. Nê mẽmoj piitã ra hpimxur mex tã koja nhÿrmã piitã amnhĩrit pa. Nê mẽ kot kamãt kô kamã hpimxur pẽ mẽmoj jarênh tã koja mẽ piitã nhÿrmã kot mẽmoj jarênhta ma. Nê mẽ kot hitom kãm kawax pẽ axpên mã mẽmoj punuj jarênh tã koja nhÿrmã mẽ piitã mẽmoj jarênhta ma. Jakamã kwa kêr ka mẽ tanhmã Parijew nhõ xwÿnhjaja kot amnhĩ nhĩpêx to ho pa hã mẽ omu nê ãm mẽ omu nê mẽ hkôt amnhĩ nhĩpêx kêt nê. Te mẽ kot tãm amnhĩ nhĩpêx pyràk o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htÿx ri tanhmã amnhĩ to hêx to ho pa. Tã kêr ka mẽ uràk nê ã amnhĩ nhĩpêx anhÿr kêt nê. Anê.

Mẽ pahte pahkwÿjê pumaj Tirtũm kaga hkêt ã mẽ pamã karõ

Matêwre 10.28-31

⁴ Nhũm Jejus arĩ hkôt mẽ pa ho mẽ pa xwÿnhjê mã kapêr nê mẽ kãm:

—E ixkrãmnhwÿjaja. Kêr ka mẽ amã akwÿjê puma rÿ nhãm mẽ hkwÿjê puma ho ri apa hkêt nê. Koja mẽ apar tã ãm mẽ anhĩ pix pa nom tanhmã mẽ akarõ hto hkêt nê. ⁵ Tirtũmja tapxipix na hte mẽ ã nê mẽ hkarõ ho hpimràatã mẽ kot amnhĩ xà htÿx kamã hamak tũm xà hwÿr mẽ kurê. Tã kêr ka mẽ ja pumaj Tirtũm kapêr kwÿm tanhmã ri amnhĩ nhĩpêx to ho apa hkêt nê.

⁶⁻⁷ —Nê Tirtũm kot mẽ pahto hapêx par pumunh tã mãânên kot mẽ pajamãr pumunh mex. Mãn ka htem kuwênhre

pumu. Na hte Tirtūm hamār mex o pa. Mē piitā mē kot ām kuwēnhre pumunh o pa htā nhūm Tirtūm mē kurom hamār mex o pa. Nē htānopxar rāhā ho pa. Nom kām mē pajapē htýx o kuwēnhre jakrenh jakamā kwa mē tee ri amnhī kukamā ajamxpēr o ri akaprī nē apa hkēt nē. Koja Tirtūm mē pahtānopxar rāhā ho pa. Ra kot tanhmā mē pakute hā mē pahpumunh par. Nē ahpýnhā tanhmā mē pahkrā hkī kute hkôt mē pahpumunh par. Tā kot mē pahtānopxar rāhā jakamā mo kaxyw kot kaj kêt mē ri amā mēhō puma ho ri apa?

⁸ —Jakamā kwa mē māmri mē kām mē apē ixkra hā amnhī jarēnh o ri apa nē amā mē uma xāj tee ri amnhī nhīpēx o ri apa hkēt nē. Kot ka mē kām ra mē ate ixkôt amnhī xunhwýr ā amnhī jarē. Pa ja hā mē apumu hāmri nē mē apyrā nē kaxkwa kamā Tirtūm kapēr o mē wryk xwýnhjē mā ra mē ate ixkôt amnhī xunhwýr ā mē ajarē. ⁹ Nom kot ka mē kot ixtā tanhmā mē ato pymaj apē ixkwý hā amnhī jarēnh kêt japēr. Pa ja hā mē apumu hāmri nē nhýrmā amnhī xwar mē kām mē apē ixkwý hkēt ā mē ajarē. Jakamā kwa mē māmri mē kām apē ixkwý hā amnhī jarēnh o ri mē hkôt apa kē mē ama nē tanhmā inhmā hamaxpēr to. ¹⁰ Koja mē ama nē ām ama nē kām ixprām kêt japēr. Hāmri nhūm Tirtūm ixtā mē omu nom tokyx ixtā tanhmā mē ho hkēt nē. Koja kormā amnhī tā mē hamār o pa. Karō kot axte mē kām ijarēnh o amnhīrit nhūm mē hkwýjaja kot mar nē kām ixprām nē ixkôt amnhī xunhwýr kaxyw nhūm kormā amnhī tā mē hamār o pa. Nom koja Karō xatā mē kām ixto amnhīrit tā nhūm mē kuma nē ām kuma nē te mē kot kēp amnhī jamak pro pyrāk o amnhī nhīpēx o pa. Jao Karō hā hpijaām kêt mýrapē koja Tirtūm nhýrmā amnhī xwar te kot mē kēp amnhī jamak pro pyrāk o mē hipēx nhūm mē tee kām amnhī kaprī kaprý. Hāmri nē amnhī xà htýx kamā hamak tūm xàta wýr ma pa nē kamā pa ho pa. Jakamā kwa mē māmri mē kām mē apē ixkra hā amnhī jarēnh o ri mē hkôt apa nē tanhmā mē kām ijarēnh to ho ri apa. ¹¹ Koja mē ama nē kām mē amar prām kêt japēr hāmri nē ixtā mē apynē nē tanhmā mē anhīpēx to kaxyw. Nē Ijaew nhō Tirtūm kapēr o mē

ahkre xà hā ixkre hwýr mē ato mrrar japēr. Rý mē õ pahi hwýr mē ato mrrar nē tanhmā kām mē ato hēx to. Nom kēr ka mē mē kām amnhī jarēnh kaxyw nē tee ri amnhī kukamā ajamxpēr o amā mē uma kêt nē. ¹² Koja Tirtūm Karō ja kaxyw mē amā mē ajamxpēr mex gō hāmri ka mē õ ri mē kām amnhī jarē. Jakamā kwa mē tee ri mē kām amnhī jarēnh kukamā ajamxpēr o ri mē amā mē uma ho apa hkēt nē. Anē.

Mē hikukrêx rûnh pix kukamā hamaxpēr xwýnhjē jarēnh

Wam Ximotre 6.9-10; Xiakre 4.13-17, 5.1-6

¹³ Nhūm Jejus arī mē ahkre o xa nhūm mē mar o kuhé. Rôm nhūm mēhō myja hwýr tē nē kām kapēr nē kām:

—Pa? Kwa ot pa awýr amā mēmoj jarēnh mā tē. Na pre inhīpēxà ty nhūm ixtō ixrom amnhīm õ mēmoj piitā ho àrik pa. Õ pika nē hkrit nē hikukrêx nē ām mēmoj piitā ho àrik par kumrêx. Kwa ma ixkôt tē nē kām anē pa wa amnhīm ho axkjē nà? Anē.

¹⁴ Hāmri nhūm kuma nē kām:

—Tk. Koký. Na pa pre mē amā mē mēmoj to ixpikjēr kaxyw mē awýr ixwryk kêt nē. Anē.

¹⁵ Hāmri nē mē kot mar o kuhé xwýnh piitā mē kām kapēr nē mē kām:

—Kwa kēr ka mē amā anhō mēmoj rûnh prām o ri apa hkēt nē. Na htem mēmoj rûnh kukwak ri Tirtūm wýr apir kêt nē. Mēmojta kēp pika pix nhō xwýnh na.

¹⁶ Anhýr o mē kām kapēr hāmri nē mē kām awjarē. Mē hukukrêx rax ā kuxi nē mē kām awjarē nē mē kām:

—Nà koja mēhō õ mēmoj rax nē. Nē hpur kām õ rax nē. No ām õ jaxwýr xà hā ixkre kēp grire. ¹⁷ Hāmri nhūm tee ri hpur kām õ rax kukamā hamaxpēr nē hamaxpēr o: “Kwa tanhmā kot pa amnhī to nē ja piitā nhýri haxwý wehe? Inhmā amarī mē kēp amrakati xwýnhjē mā hkwý nhōr prām kêt. Kot paj ām amnhīm piitā ir pa nē kritpēm hkur o ixpa. Nom ixpē haxwýr xà hā ixkreja ixpē grire.” Anē.

¹⁸ —Hāmri nē hamaxpēr o: “Nà na pa ra ijamaxpēr. Kot paj ixkre gireta grà nē hpānhā rax õ nhīpēx. Hāmri nē ixpur kām inhōta jamý nē kamā ir pa. Nē ixāpēnh xà

hã ixkukrêx piitã kamã haxwÿr pa. Nà kot paj ho anê.” Anê.

¹⁹ —Hãmri nê ra ixkreja gràn pa nê hpãnhã rax ò nhîpêx. Nê hipêx pa hãmri nê kamã hpur kãm òta xir pa. Nê àpênh xà hã hikukrêx piitã kamã unhwÿ. Hãmri nê omu nê hkînh nê. Nê hamaxpêr o: “Nà hãmri. Kot paj tokyx axte mêmoj tâ ixàpênh kêt nê. Ra inhõ rax kumrêx kênã. Kot paj kritpêh ho ixàpkur mex o ixpa. Nà âm hãmri na pa amnhî kukamã ijamaxpêr mex pê ixkre rax nhîpêx.” Anê. ²⁰ Tã nhũm Tîrtũm tee ri ã kot amnhî nhîpêx anhÿr ã omu nhũm ja kãm mex kêt nê. Hãmri nhũm hã kãm kapêr nê kãm: “Nà na ka atÿx ri anhõ rax mêm akukrêx rax o apikuprõnh kaprÿ. Na ka âm amnhî pix kukamã ajamaxpêr o apa pê ã amnhî nhîpêx anê. Nom kot kaj kamàt ja kamã ty nê anhÿ kamã ma mõi nê amnhî kôt anhõ mêmoj rax ò ho amõr kêt nê. Koja hpãnhã mêmõ amÿr pê ho amnhîptàr pa ka rî amnhî pumu.” Anê. Nhũm ã Tîrtũm kãm kapêr anê. ã mêm ujarênh kot anhÿr.

²¹ —Mêm kot amnhî nhõ nê amnhî kukamã pix mã hamaxpêr o mêm pa xwÿnhjaja na htem myja pyrã nê Tîrtũm mã hamaxpêr o pa hkêt nê. Jakamã koja mêm nhÿrmã ty hãmri nê hkukrêx pix kukamã hamaxpêr nê amnhî mã pix mã hamaxpêr o paja mÿrapê Tîrtũm mêm wa ixri htîr tũm nê mex nê pa ho pa hkêt nê. Mêm kot amnhî nhõ pix kukamã hamaxpêr xwÿnhjaja nê amnhî kukamã pix mã mêm hamaxpêr xwÿnhjaja nê mêm kamã ukapri hkêt xwÿnhjaja mêm ò mêmoj rũnh tâ koja mêm nhÿrmã ty hãmri nê amnhî kôt hõ ho pixi nê o mõi kêt nê. Koja mêm mêmoj piitã rer pa nê ma ÿ kamã ma mõi. Jakamã kwa kêr ka mêm jajê pyrã nê anhõ mêmoj to anhõxÿ ho ri apa hkêt nê. Anê.

Mêm pahte tee ri amnhî kukamã pajamaxpêr kêt ã mêm pamã karõ

Matêwre 6.25-34; mãânên Wam Pêtre 1.3-9

²² Tã nhũm Jejus hpãnhã tanhmã hkôt mêm pa ho mêm pa xwÿnhjê jahkre hto nê mêm kãm:

—Kwa kêr ka mêm tee ri amnhî kukamã ajamaxpêr o ri apa hkêt nê. Amnhî xàpkur xà rÿ axê ka mêm tee ri hkukamã ajamaxpêr kêt nê. Nê mêm âm mêmoj piitã hkukamã tee

ri ajamaxpêr kêt nê. ²³ Tîrtũm àhpumunh tÿx o àhpumunh tÿx xwÿnh na. Na pre àhpumunh tÿx o mêm anhîpêx ka mêm kukwak ri atîr nê apa. Tã xà kot mêm amã mêm anhõ ho pa hkukamã àhpumunh kêt? Nà ja kukamã àhpumunh xihtÿx kênã. Kêp mêm anhîpêx xwÿnh jakamã mãânên kêp mêm amã mêm anhõ ho pa xwÿnh. Nê kêp mêm amã mêm axê nhõr o pa xwÿnh.

²⁴ —Mãn ka htem kuwênhre pumu. Na hte tee ri amnhî xàpkur xà hkukamã hamaxpêr o hkapri nê ri pa hkêt nê. Na hte Tîrtũm tãm kot kãm ò ho pa. Tã kãm mêm pajapê htÿx o kuwênhre jakrenh jakamã koja urak nê mêm pamã mêm panhõ mex o pa rãhã nê. ²⁵⁻²⁶ Jakamã kwa kêr ka mêm mêm arîgro hã axàpkur xà hkryre pumu nê ate amnhî pê hkrêr par nê amã prãm o akapri nê apa hkukamã tee ri ajamaxpêr kêt nê. Âm Tîrtũm kamnàr rom axãmnhîx anhõ hkryreta ku nê akînh kãm tanhmã amnhî nhîpêx to ho ri apa. Xà kot ka anhõ mry grire pumu nê akaprire nhũm ra tanhmã amã amnhî to rax to? Na htem âm tee ri mêm hkukamã hamaxpêr o hkapri nê pa kaprÿ. Jakamã kêr ka mêm ã ri ajamaxpêr anhÿr o akapri nê apa hkêt nê.

²⁷ —Mãn ka htem akunî kamã pixôrãre pumu. Na hte tee ri tanhmã amnhî kute hkukamã hamaxpêr o hkapri nê harir kêt tâ muxre nê harir ka mêm omu. Te ho amnepêh finat pahihti Sarumãw xê mex pyrak nom âm mex o kot hakrenh.

²⁸ —Pixôrãreja arîgro ja hã htîr nê muxre nê harir tâ koja mêm arîgro hã grã pa nê hapêx. Kêp pixôrã pix nê hapêx tokyx anhÿr tâ na hte Tîrtũm ho mex nê nhũm mux nê harir. Nom mêm pajaja na hte mêm pahto mex o pixôrãre ho mexja jakrenh. Jakamã kwa mêm kaxyw kot ka mêm tee ri amnhî xê hkukamã ajamaxpêr o akapri nê apa? Nà kot kaj mêm anê nê amnhî kaxyw Tîrtũm mã ajamaxpêr tÿx kêt nê.

²⁹ —Kwa mêm tee ri amnhî xàpkur xà hkukamã ajamaxpêr rãhã o ri akapri nê apa hkêt nê. Nê mêm tee ri amnhî kukamã tanhmã ajamaxpêr to ho ri akapri nê apa hkêt nê. ³⁰ Mêm kot Tîrtũm kôt amnhî xunhwÿr kêt xwÿnhjaja na htem ã ri hamaxpêr anhÿr o hkapri nê pa. Tã kêr ka mêm ho mêm urak kêt nê. Tîrtũm kot mêm panhõ

mëmoj kêt kôt mẽ pahpumunh mex kênã.
³¹ Jakamã kêt ka mẽ ãm hkôt ri amnhĩ nhĩpêx rãhã nẽ. Nẽ amã ja pix kukamã ajamaxpêr o ri apa hprãm. Hãmri nhũm amnhĩ tã mẽ apumu hãmri nẽ apkati mẽ tãm mẽ amã mẽmoj nhõr o pa. Anẽ.

*Kaxkwa kamã mẽ pakukrêx rax jarênh
 Matêwre 6.19-21; mããnẽn Sikũn Ximotre
 4.8; Eprêw 10.34; Wam Pêtre 1.4*

³² Nhũm Jejus arĩ mẽ kãm kapêr nẽ mẽ kãm:

—E mẽ ate ixkôt amnhĩ xunhwýr xwýnhjaja. Ra Tirtũm kot mẽ ato hkra jakamã kwa mẽ axãmnhĩx hkamnãr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nẽ hkĩnh nẽ. Koja nhỹrmã kaxkwa kamã õ krĩ hwýr mẽ ato api ka mẽ kamã wa ixkuri amex nẽ atĩr tũm nẽ apa ho apa. Ja na mex o kot jar pika ja kôt mẽ õ mẽmoj rũnh nẽ pa xwýnhhta jakrenh. ³³ Jakamã kêt ka mẽ axãmnhĩx ri akukrêx kwý ho wênẽ nẽ hpãnhã kãxpore jamý nẽ mẽ kêp amrakati xwýnhjê mã ho apigrãnh o ri mẽ hkôt apa. Kot kaj mẽ ã amnhĩ nhĩpêx anẽ hãmri nẽ kaxkwa kamã akukrêx rax nẽ. Mo kaxkwa kamã mẽ àhkĩnh xwýnh koja mẽ apê ho ahkĩ? Nẽ kamã mo amnhõre kot mẽ apê homnu? Kaxkwa kamã ja amrakati kumrêx. Jakamã Tirtũm kot mẽ amã mẽ akukrêx nhõr mã xwýnhhta koja aa apê omnuj nẽ hapêx kêt kumrêx. ³⁴ Kot kaj mẽ jar pika ja kamã akukrêx rax hãmri nẽ tanhmã apê omnu hto pix kukamã ajamaxpêr rãhã ho ri apa. Nom kot kaj mẽ apê Tirtũm kra hã kot kaj mẽ jar akukrêx rax kêt tã kaxkwa kamã akukrêx pix kukamã ajamaxpêr rãhã ho ra akĩnh nẽ ri apa. Anẽ.

Mẽ pahte Jejus kutêp tanhmã amnhĩ nhĩpêx to hã mẽ pamã karõ

*Matêwre 24.42-43; Makre 13.32-37;
 Rukre 21.34-36; mããnẽn Wam Tesarõn 5.4-8*

³⁵ Nhũm pre Jejus arĩ mẽ ahkre nẽ mẽ kãm:

—E na pa pre ra mẽ apê ixkôt mẽ apa ho apa xwýnhjê mã tanhmã amnhĩ kukamã amnhĩ jarênh to. Ixtyk nẽ akupým ixtĩr nẽ ma akupým ixàpir hãmri nẽ mẽmo arĩgro hã akupýn mẽ awýr ixwrýkja na pa pre ra mẽ

amã ja hã amnhĩ jarê. Tã kwa kêt ka mẽ ixwakre kamã ixte mẽ amã ã amnhĩ jarênh anhýrja mã ajamaxpêr týt pê ixkôt amnhĩ nhĩpêx rãhã ho ri apa.

³⁶⁻³⁸ —Te mẽ õ patrãw mã mẽ àpênh mex xwýnhjaja kot amnhĩ nhĩpêx pyrãk o amnhĩ nhĩpêx o ri apa. Koja mẽ õ patrãw ma mẽ kot axpên mã wa rer mã xwýnh pumunh mã ma nhỹhým tẽ. Hãmri nhũm kãm mẽ àpênh xwýnhjaja arĩ kutêp õrkwý kamã hkrĩ. Axkãm hamak rom nẽ kutêp hkrĩ. Akupýn htêm nhũm mẽ kot amnhĩ wýr mar nẽ kãm kahê xà mênh tokyx anhýr kaxyw arĩ kutêp õt kêt nẽ hkrĩ. Kôt ã kamãt nhũm akupýn hpõx o htêm rý arĩgro hwýr hpõx o htêm nhũm mẽ kot amnhĩ wýr mar nẽ kãm kahê xà mênh tokyx anhýr kaxyw kutêp õt kêt nẽ hkrĩ. Akupýn hpõx ã omunh hãmri nẽ tokyx apkur kaxyw kãm õ nhĩpêx kaxyw. Kêr kê akupýn pøj nẽ ã mẽ kot amnhĩ nhĩpêx anhýr ã mẽ omu nẽ hkĩnh nẽ. Tã kêt ka mẽ àpênh xwýnhjtã pyrã nẽ ixwakre kamã inhmã ajamaxpêr rãhã ho ri apa. Jao ixkamã ajamak o apa ho ixkôt amnhĩ nhĩpêx mex rãhã nẽ. No kot paj akupýn mẽ awýr wrý hãmri ka mẽ àpênh xwýnhjê pyrã nẽ inhmã mẽmoj nhõr kêt nẽ. Kêt pa kot paj mẽ õ patrãwta kurom mẽ amã mẽmoj mex gõ.

³⁹ —Na htem mẽ kêp àhkĩnh pymaj amnhĩ nhõrkwý jamãr rãhã ho pa. ⁴⁰ Ja pyrã nẽ mẽ ate akupýn ixwrýk xà hã arĩgro pumunh kêt jakamã kêt ka mẽ õrkwý nhõ dõnta pyrã nẽ ixkutêp axkãm ajamak rom rãhã nẽ ri apa. Jao tãm amnhĩ nhĩpêx rãhã nẽ. Anẽ.

Mẽ õ patrãw mã mẽ àpênh mex xwýnhjê jarênh

Matêwre 24.45

⁴¹ Nhũm pre ã Jejus hkôt mẽ pa ho pa xwýnhjê jahkre anẽ. Hãmri nhũm Simãw Pêtre kuma nẽ kãm:

—Kwa Pahihti. Xãn ka mẽ piitã mẽ kãm ã akapêr anẽ nã? Xà ãm mẽ papxpixjê mã? Anẽ.

⁴² Hãmri nhũm kãm:

—Nã ãm ixwakre kamã mẽ ate ixkôt tanhmã inhmã amnhĩ nhĩpêx to ho mẽ apa xwýnh piitã mẽ amã na pa ã ixkapêr anẽ. Koja mẽ àpênh xwýnhjê hõ õ patrãw mã àpênh mex o pa nhũm amnhĩ tã omu nẽ ma nhỹhým mõi kaxyw nẽ ãhkram mẽmoj

piitã haxàr pa. Hãmri nê kãm: “E kêr ka ixwakre kamã inhmã inhôrkwỹ htãnopxa. Nê mē àpênh xwỹnhjê mã õ mex kê mē apkur mex o pa.” Anê. Koja ã kãm mēmoj tâ karõ anê hãmri nê kato nê ma nhỹhỹm mō. ⁴³ Hãmri nhũm kãm àpênh mex xwỹnhhta wakre kamã kãm àpênh mex o pa. Jakamã nhũm õ patrãw akupỹn hpõx o mō nhũm amnhĩ wỳr harênh ma nê hkĩnh nê. Nê mēmoj tâ amnhĩ tâ kamã kahak kêt nê. Rỳ tee ri wakre kamã kãm àpênh punuj ã amnhĩ pumu nê tee amnhĩ kukamã hamaxpêr kêt nê. Kot wakre kamã kutêp àpênh mex jakamã akupỹn hpõx ã harênh ma nê hkĩnh nê.

⁴⁴ —Jakamã nhũm õ patrãwja akupỹn pōj nê kot kãm àpênh mex ã omu nê haxwỹja hkĩnh nê. Hãmri nê kot kãm hamãr o pa kaxyw kãm mēmoj piitã ãhkram haxàr pa. ⁴⁵ Nom koja kãm àpênh xwỹnhhta axtem nê wakre kamã kãm àpênh mex kêt nê. Nê tokyx akupỹn mōr kêt ã hkamnhĩx nê wakre kamã kãm mē àpênh xwỹnhjê hta nê pipãnh pix nê mē kãm gō xành xwỹnhjê kôt pix mã pa japêr. ⁴⁶ Hãmri nhũm õ patrãw haêr pê akupỹn pōj nê tee ri ã amnhĩ nhĩpêx anhỹr ã omu. Hãmri nê gryk tỳx nê tanhmã homnuj to. Hãmri nê kãm mē àpênh punuj xwỹnhjê mē mē ho pimràatã amnhĩ nê mē hanor pa. Tã kêr ka mē ixwakre kamã ho mē urak kêt nê. Mē kurom ixkapêr kôt tãm amnhĩ nhĩpêx mex rãhã ho ri apa.

⁴⁷⁻⁴⁸ —Nê koja mēhō kormã Tĩrtũm kapêr mar kêt nê htỳx ri tanhmã amnhĩ tomnuj to ho pa. Hã koja Tĩrtũm ja hã omu nê nhỹrmã kot amnhĩ tomnuj o pata mỳrapê tanhmã ho nhũm amnhĩ xà htỳx kamã hamak tũm xà kamã pa. Nom akrànhmã amnhĩ xà kamã hamak o pa. Aa kot Tĩrtũm kapêr mar kêt jakamã koja ãm akrànhmã amnhĩ xà kamã hamak o pa. Nom koja mēhō kapêr mar mex tâ ãm kuma nê hkôt amnhĩ nhĩpêx kêt nê. Nê xatã hirôp kuhê nê tanhmã amnhĩ tomnuj to. Hã koja Tĩrtũm tee ri ja hã omu nê nhỹrmã tanhmã homnuj tỳx to. Hãmri nhũm wamtajê pyrã nê amnhĩ xà htỳx kamã hamak tũm xàta kamã pa ho pa nom mē kĩnhã amnhĩ xà htỳx kamã hamak rãhã ho pa. Anê.

Jejus kot nhỹrmã mē kot amnhĩ tomnuj xà

ho hapêx ã harênh

Matêwre 10.34-36

⁴⁹ Nhũm Jejus arĩ hkôt mē pa ho mē pa xwỹnhjê jahkre nê mē kãm:

—Nà ixte mē omnu xà piitã ho ijapêx par nê mē kot tanhmã amnhĩ tomnuj to piitã ho ijapêx par kaxyw na pa pre wrỳ. Tã ra ixte piitã ho ijapêx par o inhmōr ronhỹx ja inhmã mex kumrêx. Nom kormã. ⁵⁰ Kot paj amnhĩ xà htỳx kãm ijamak rax o mē kot amnhĩ tomnuj o ijapêx o hkra. Hãmri nê nhỹrmã ho ijapêx pa. Na pa ra ixtyk kaxyw ixte amnhĩ kà xà kamã ijamak kukamã ijamaxpêr o ra amnhĩ kamã ixkahak nê ri ixpa. Tã kot paj ja ho ijapêx pa nê ixkĩnh tỳx kumrêx. Anê.

Mê kot Jejus ã axpên kutã amnhĩ xunhwỳr ã mē harênh

Matêwre 10.21, 10.34-35

⁵¹ Nhũm Jejus arĩ mē ahkre nê mē kãm:

—Nê ra mē awỳr ixwryk tâ koja mē piitã ixkukwak ri hamakêtkati nê amnhĩx ri pa hkêt nê. Kormã. Koja mē akwỹjaja ixkapêr ma nê mē apyrã nê amnhĩ kaxyw ixkôt hamaxpêr. No nhũm mē akwỹjaja mē akĩnhã kuma nê ãm kuma. Hãmri nê ixtã tanhmã mē anhĩpêx to ka mē ixpyrã nê amnhĩ xà htỳx kamã ajamak o ri apa.

⁵² —Nê koja tanhmãn ixkre pyxi kamã mēmojaja ohtôn pa. Nhũm war axkrutre nê ixkôt amnhĩ xunhwỳ nhũm mē axkrunêpxi nê ixkwỹm ri amnhĩ nhĩpêx nê ixkutã amnhĩ xunhwỳ. ⁵³ Nhũm mē hipêxà hkra my mē wa ixtã axpên kutã amnhĩ xunhwỳ. Nhũm mē katorxà hkra ni mē wa ixtã axpên kutã amnhĩ xunhwỳ. Nhũm mē wỳj umregêx mē wa haxwỹja ixtã axpên kutã amnhĩ xunhwỳ. Koja mē ã ixtã axpên nhĩpêx anhỹr o pa. Anê.

Mê pahte amnhĩ tomnuj kaga nê Tĩrtũm kôt amnhĩ nhĩpêx ã mē pamã karõ

Matêwre 5.25-26, 16.2-4

⁵⁴ Nhũm Jejus hpãnhã mē kot hkôt amnhĩ xunhwỳr kêt xwỹnhjê mã kapêr nê mē kãm:

—Kwa mē inhma mē ate ixkôt amnhĩ xunhwỳr kêt xwỹnhjaja. Na htem kaxkwa kamã na htyk rax pumu nê na wrỳk mã hamaxpêr kurê kumrêx. Hãmri nhũm na wrỳ. ⁵⁵ Nê amgrã pê kôk krihkritja nhũm htem kuma nê arĩgro htỳx mã hamaxpêr

kurê kumrêx. Hāmri nhūm arīgro htỳx nê.
⁵⁶⁻⁵⁷ ã na ka htem aprī hã mēmoj pumunh
 kôt mēmoj kukamã ajamaxpêr mex o ri apa
 anê. Nom nhūm Tirtūmja mē ate tanhmã
 amnhĩ tomnuj to mỳrapê tanhmã mē ato
 kaxyw nhūm mē ate ja hã amnhĩ pumunh
 tã tokyx amnhĩ tomnuj kaga hkêt nê.

⁵⁸⁻⁵⁹ —Na htem tanhmã axpên tomnuj
 to. Hāmri nhūm kot tanhmã war axpên to
 xwỳnhta pahi hwỳr htêm nê kãm tanhmã
 kot ho xwỳnhta jarênh kaxyw. Hāmri nhūm
 kamã gryk xwỳnhta kot pahi mã harênh
 kaxyw ã harênh ma nê hāmri tokyx hwỳr
 tē nê wa tãm akupỳm axpên xãm. Na htem
 ã amnhĩ nhĩpêx anê. Pahi kot ja mar nê
 tanhmã mē ho pymaj na htem ã amnhĩ
 nhĩpêx anê nê tokyx akupỳm tãm axpên
 xunhwỳ. No koja mē ã amnhĩ nhĩpêx
 anhỳr kêt nê nhūm pahija mē harênh ma
 hāmri nê tanhmã kot hō ho xwỳnhta pynê
 nê haxà nhūm tee kãm kator prãm o hkrī
 kaprỳ. Hāmri nê tanhmã amnhĩ to nê
 amnhĩ pãnhã kãm amnhĩ rer pa nhūm pahī
 htija kormã mē kãm anê nhūm mē kãm ure
 nhūm kato. Ja pyrà nê kēr ka mē Tirtūm
 tanhmã kot mē anhĩpêx to pymaj tokyx
 mē ate amnhĩ tomnuj kaga nê hkôt amnhĩ
 nhĩpêx rãhã ho ri apa. Anê.

13

¹ Tã nhūm axtem mē hkwỳjaja Jejus wỳr
 mra nê kãm:

—Pa? Kwa xàn ka ra Garirej nhō xwỳnh
 kwỳjê jarênh ma nà? Na xep prem Jerujarê
 hwỳr mra nê ham mē kot Tirtūm mã amnhĩ
 jarênh xà hã ixkre kamã kãm amnhĩ jarênh
 kaxyw kormã kãm mry hpar o kuhê nhūm
 xep pahīti Piratja mē harênh ma nê mē hã
 amỳnê nhūm mē ma mē hwỳr mra nê mē
 himex pa. Kwa mãn mē kot amnhĩ tomnuj
 tỳx o mē pajakrenh ã na prem mē himex
 nà? Anê.

²⁻³ Hāmri nhūm mē kãm:

—Nà mē kot amnhĩ tomnuj tỳx mỳrapê
 mē kot mē himex kêt. Mē apiitã mē ate
 amnhĩ tomnuj o axpên pyræk kênã. Tã kot
 ka mē amnhĩ tomnuj kaga nê Tirtūm kôt
 amnhĩ xunhwỳr kêt hã kot ka mē nhỹrmã
 ty hāmri nê õ krī hwỳr axàpir kêt nê. ⁴ No
 Jerujarê kamã ixkre prêkja mē kot kãm
 “Siroe” anhỳr xwỳnhta mē ho 18 nê mē hipy

htem nê mē himex par xwỳnhjaja. Xà mē
 kot amnhĩ tomnuj tỳx mỳrapê na prem ty?
 Xà mē kot amnhĩ tomnuj tỳx o Jerujarê
 kamã arī mē htír xwỳnhjê jakrenh? ⁵ Nà
 kot anhỳr kêt. Mē apiitã mē ate amnhĩ
 tomnuj o axpên pyræk. Jakamã kot kaj mē
 ã amnhĩ nhĩpêx anhỳr kaga nê Tirtūm kôt
 amnhĩ nhĩpêx kêt nê hāmri nê mē uræk nê
 nhỹrmã ty hāmri nê Tirtūm nhō krī hwỳr
 axàpir kêt nê. Jakamã kwa mē ixkapêr ma
 nê kãm ajamaxpêr tỳx rãhã ho ri apa. Anê.

*Tirtūm kot mē pakamã gryk tokyx anhỳr
 kêt ã harênh*

Rômãn 2.4; Sikũn Pêtre 3.8-9

⁶ Tã nhūm Jejus kê axte tanhmã mē ahkre
 hto. Nê Tirtūm kot tanhmã mē panhĩpêx to
 hã kuxi nê mē kãm awjarê nê mē kãm:

—Koja hpur nhō dõn mēmo pàr kre nhūm
 ra hprêk mex nê ô mã tãm nê. Tã aa ô hkêt
 ã ra hã amgrà axkrunêpxi. ⁷ Hāmri nhūm
 kot hkre xwỳnhja tee ri omu nê kãm àpênh
 xwỳnh wỳr tē nê kãm: “E kwa ma tē nê
 mēmo pàr mỳj krãhta nê amê. Mexti hã. Ra
 ô hkêt ã amgrà axkrunêpxi kênã. Koja pēr
 aa ô hkêt nê. Mo kaxyw kot kêt ô hkêt tã ô
 mex xwỳnh kaêx ã mē kêp àmnàr o kuhê? E
 hwỳr tē nê krãhta nê amê.” Anê. ⁸⁻⁹ Hāmri
 nhūm tee ri kot kãm hã karõja ma nê kãm:
 “Kwa nà kormã. Pa kop ixãmnhix pàr krax
 ã mēmo japòk kwỳ kapī nê kop hamã mãn.
 Kê axte hã amgrà pyxi nê hapêx nê ô hkêt
 pa kormã krãhta nê kumê. Koja amgrà ja
 kamã amã ô japêr ka omu nê akĩnh nê.”
 Anê. ã mē ujarênh kot anhỳr. Anê.

Nhūm Jejus ã mē kãm ujarênh anê. Mē
 kot amnhĩ tomnuj tỳx o pa htã nhūm Tirtūm
 kot pur nhō dõn mã àpênh xwỳnhta pyrà nê
 mē kamã gryk tokyx anhỳr kêt ã nhūm ã hã
 kuxi nê mē kãm ujarênh anê.

*Jejus kot arīgromnu hã mēhō ho mex ã
 harênh*

Rukre 14.1-6; Juãw 5.16-17

¹⁰ Tã nhūm mē õ arīgromnu pē sap kato
 nhūm Jejus Ijaew pikuprõnh xà hã ixkre
 hwỳr axà nê kamã Tirtūm kapêr o mē ahkre
 ho nhỹ. ¹¹ Nhūm kamã mēhō ni hikôt rãhã
 nê pa xwỳnhja nhỹ. Na pre ra amnepêm
 mēkarõmnuti tanhmã ho nhūm katàt nê ri
 mrrar kêt kumrêx. ãm hikôt rãhã nê ri pa hã
 ra hã amgrà pē 18. ¹²⁻¹³ Hāmri nhūm Jejus

omu nê amnhĩ wÿr kãm hpa ho apê nhũm hwÿr tẽ nhũm hã ìhkra xi nê kãm:

—E na ka ra akupÿm amex.

Anê nhũm akupÿm katàt nê mex kurê kumrêx. Hãmri nê amnhĩ pumu nê hkĩnh tÿx nê Tirtũm mã mex o mex ã harênh o xa. ¹⁴ Nom nhũm mẽ pikuprõnh xà hã ixkre jamãr xwÿnh maatija tee ri ja hã omu hãmri nê Jejus kamã gryk tÿx nê. Mẽ õ arĩgromnu hã akupÿm kot ho mex jakamã nhũm kamã gryk tÿx nê. Hãmri nê mẽ pikuprõnh xwÿnhjê mã kãm:

—Tk. Kwa semãn ã mẽ àpênh xà hã arĩgro xohtõ. Kêp 6. Kot kaj mẽ mãmri tòmĩk nê sikũn nê tês nê kwata nê kĩa nê sêsta ja ã ka mẽ apê rÿ mãmri Jejus wÿr amnhĩ to mra kê akupÿm tanhmã mẽ ato mex to. No sap ã kwari. Sap kêp mẽ pahpê Ijaew nhõ arĩgromnu kênã. Na pu htem hã paxàpênh kêt nê. Jakamã arĩgro ja hã kot akupÿm mẽ ato mexja mex kêt. Anê.

¹⁵ Hãmri nhũm Jejus kuma nê kãm:

—Kwa xà mẽ kajaja na ka htem sap ã axàpênh kêt nê apa? Nà mẽ ate hã axàpênh kênã. Xàn ka htem sap ã akrit kawar nê akrit môx ma mẽ ho apa nê mẽ hkõm kêt nê? Nà na ka htem ma mẽ ho apa nhũm htem ixkõ. Mot ka kêt mẽ ri axtem nê mẽ kot sap ã tanhmã amnhĩ toja nê mẽ kãm akapêr? ¹⁶ Ixte ni ho mex xwÿnhnta mẽ pahpyrà nê kêp finat Apraãw kagrõt nyw õ na. Nhũm pre Satanasti te kot kãm ê nê ri o pa pyrãk o hipêx jakamã nhũm ÿ hã hikõt nê ri paja ã ra hã amgrà kêp 18. Tã pa nê te ixte Satanasti ho ixkrihkrit nê ixte kêp utàr pyrãk o hipêx nê akupÿm ho mex. Mo kot pa kêt ri omu nê ãm omu nê arĩgromnu hã ho mex kêt nê? Nà ixte arĩgro piitã hã akupÿm mẽ ho mex o ixpa xwÿnh kênã. Anê.

¹⁷ Hãmri nhũm mẽ kot kãm kapêr mar prãm kêt xwÿnhjaja kuma nê kamã gryk nê. Te ho mêmprĩjê mã mẽ hamaxpêr nhõr pyrãk o mẽ hipêx pyrãk jakamã nhũm mẽ amnhĩ tã kuma nê kamã gryk nê. No nhũm mẽ kot ra ã amnhĩ nhĩpêx anhÿr o pa hã omunh xwÿnhjaja ja hã omu nê kãm hkĩnh nê.

*Jejus te kot mẽmo hy pyrãk ã harênh
Matêwre 13.31-33; Makre 4.30-32*

¹⁸⁻¹⁹ Nhũm Jejus arĩ mẽ ahkre nê tanhmã mẽ kãm amnhĩ tã ujarênh to nê mẽ kãm:

—Nê Tirtũm kot mẽ awÿr ixte mẽ ato amnhĩptàr kaxyw inhmênh ã ijarênhja. Te ixte mẽmo hy pixire pyrãk. Na htem hkre nhũm higrõt. Nê gaa nê rĩ hprêk. Hãmri nê pa anhgrà nhũm kuwênhre hwÿr mra nê hô pytĩ kamã amnhĩm haê nhĩpêx. Tã kot paj nhÿrmã mẽmo hy jarênhnta pyrã nê ixpaxi htã kot paj pika piitã hkõt mẽ ho amnhĩptã nê mẽ omunh mex rãhã ho ri ixpa. Anê.

Jejus te kot pãwti kaxkrit xà pyrãk ã harênh

Matêwre 13.33-35

²⁰⁻²¹ Nhũm Jejus arĩ mẽ ahkre ho xa. Nom hprĩ hã amnhĩ jarênh kêt nê. ãm amnhĩ tã kuxi nê mẽ kãm awjarê nê mẽ kãm:

—E kot pa hpãnhã tanhmã mẽ amã pãwti kaxkrit xà jarênh to. Koja mênijê hõ ãm hkwy ho grire nê kupy nê kaxyw mẽmo xôm kãm kumê nê ho pihkàr pa nê ho pãwti nhĩpêx. Nhũm kaxkrit xàja grire htã pãwti piitã ho kaxkrit mex nê. Ja pyrã nê kot paj ixpyxi htã koja mẽ nhÿrmã pika piitã hkõt ixkõt amnhĩ nhĩpêx mex o pa. Anê.

Nhũm pre ã Jejus mẽ kãm amnhĩ tã pãw kaxkrit xàja xi nê harênh anê.

Kaxkwa hwÿr hakwa kre kahê xà jarênh

Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pè Jerujarê hwÿr krĩ hkõt ri mẽ ahkre ho mẽ hkõt ri pa.

²³ Hãmri nhũm mêmhõ myja hwÿr tẽ nê mẽmoj tã hkukja nê kãm:

—Pa. Kwa inhmã mẽmoj jarê. Xà koja mẽ ohtõ nê nhÿrmã Tirtũm ri htĩr tũm nê papa ho nà koja mẽ grêre? Anê.

²⁴ Hãmri nhũm kuma nê mẽ kot mar o kuhê xwÿnh piitã kãm:

—Nà mẽ kot Tirtũm kõt amnhĩ xunhwÿr xwÿnhjê pix koja mẽ õ krĩ hwÿr agjê. Wÿr mẽ gjêx xàja ãm pixii nom koja mẽ ohtõ nê kãm hkõt wÿr gjêx prãm kêt nê. Na htem te hwÿr mẽ gjêx xà hõ japêr o pa pyrãk. Nom pa na te ixpê hwÿr mẽ gjêx xà pixita pyrãk. Jakamã kwa kêr ka mẽ tokyx ixkõt amnhĩ xunhwÿr tÿx nê ixkõt ri amnhĩ nhĩpêx o ri apa. Na htem ohtõ nê kãm ixkõt amnhĩ xunhwÿr prãm kêt nê. Ixte amnhĩ nhĩpêxja mẽ kêp hihtÿx jakamã nhũm htem ixkaga.

²⁵ –Tã koja mẽ nhỹrmã ty nẽ tee ri kãm Tĩrtũm wỳr gĩx prãm kaprỳ. Kot paj te mẽ kệp kahê pyræk o mẽ hipêx nhũm mẽ kapôt ã kuhê nẽ tee ri amnhĩ tã ixpumu nẽ inhmã: “Kwa mẽ inhmã kahê xà mẽ pa mẽ awỳr agjê Pahihti.” Anẽ. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurẽ.” Anẽ.

²⁶ –Hãmri nhũm mẽ tee ri inhma nẽ inhmã: “Kwa nà ra ate mẽ ixpumunh mex kênã. Na ka pre mẽ inhõ krĩ kamã mẽ ijahkre ho ri apa nẽ mẽ ixkutã axàpkur o ri apa.” Anẽ. ²⁷ Hãmri pa mẽ kãm: “Tk. Ixte mẽ akutã ixàpkur tã mẽ ate ixkôt amnhĩ xunhwỳre hã. Jakamã e mẽ ma mra. Mẽ ate amnhĩ tomnuj pix o mẽ apa xwỳnh jakamã kot kaj mẽ ixwỳr agjêx kêt nẽ.” Anẽ. Kot paj ã mẽ kãm ixkapêr anẽ.

²⁸ –Hãmri nhũm mẽ amỳm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nẽ ri mẽ inhmex nẽ ixpa hã amỳm mẽ ixpumunh o kuhê. Apraãw nẽ Ijak nẽ Jako nẽ Tĩrtũm kapêr jarênh o mẽ pa xwỳnh piitã nhũm mẽ amỳm mẽ ixkĩnh nẽ mẽ ixàpkur mex ã mẽ ixpumunh o kuhê. Hãmri nẽ tee ri mẽ ixwỳr kãm gĩx prãm kaprỳ nẽ hkaprĩ nẽ mur nẽ amnhĩ krã hkĩ jarê nẽ amnhĩ kà nhê nẽ amnhĩ kamã gryk tỳx nẽ. No ãm tee ri amnhĩ kamã gryk kaprỳ. ã koja mẽ amnhĩ nhĩpêx anẽ. ²⁹ Nom Tĩrtũm kôt mẽ kot amnhĩ xunhwỳr xwỳnhjaja koja mẽ kurom pika piitã kurũm axpên wỳr akuprõ nẽ Tĩrtũm wỳr agjê nẽ kuri hkĩnh nẽ apkur mex o hkrĩ. Mẽ akwỳjaja nẽ pika piitã kurũm hohtô rax nẽ axpên wỳr akuprõ nẽ hwỳr agjê nẽ kuri apkur mex nẽ hkĩnh nẽ pa ho pa.

³⁰ –Mẽ apê Ijaewjaja mẽ amã Ijaew kêt xwỳnhjê hprãm nõkati htã koja mẽ hkwỳjaja mẽ akwỳjê rom Tĩrtũm ri axpên wỳr akuprõ nẽ hkĩnh nẽ axpên kutã apkur mex o hkrĩ. Jakamã kwa kot kaj mẽ uræk nẽ amã Tĩrtũm mẽ wa ixwỳr agjêx prãm hã kot kaj mẽ ixkôt amnhĩ xunhwỳ nẽ ixkapêr kôt amnhĩ nhĩpêx mex o ri apa. Anẽ.

Jejus kãm Jerujarê nhõ xwỳnhjê japê hã harênh

Matêwre 23.37-39

³¹ Hãmri nhũm Parijew nhõ xwỳnh kwỳjaja Jegus wỳr mra nẽ kãm:

–Pa. E ot pa mẽ awỳr mra. Kwa kêr ka ma Jerujarê hwỳr amõr kêt nẽ. Na ra mẽ hkĩnh wỳr pahi Eroxa pôi nẽ kot tanhmã ato kaxyw atã amnhĩ jarê pa mẽ kuma. Jakamã kwa mẽ hwỳr amõr kêt nẽ. Nhãm krĩ hõ hwỳr mãn mõi. Anẽ.

³² Hãmri nhũm mẽ kuma nẽ mẽ kãm:

–Tk. Nà kot pa umaj nhãm krĩ hõ hwỳr inhmõr kêt nẽ. Kot paj ma mẽ hkwỳjê nẽ mẽkarõmnuti japôx pê mẽ hkwỳjê ho mex o ma hwỳr mõi. Pahi Erox kãm mẽ hpar pix prãm. E mẽ mãmri ma akupỳm hwỳr mra nẽ ã kãm ixkapêr jarênh anẽ. No kot paj umaj nhỹhỹm ixprõt nẽ ixtêm nẽ kệp ixpimxur kêt nẽ. Ra ixte õ krĩ hwỳr inhnojarê kênã. Anẽ.

³³ Hãmri nẽ mẽ kot mar xwỳnhjê mã amnhĩ jarê nẽ mẽ kãm:

–Kot paj tanhmã amnhĩ nhĩpêx to ho ri ixpa rãhã Jerujarê hwỳr mõi pôi nẽ kamã ty. Kamã na htem mẽ kot Tĩrtũm nhỹ hã kapêr jarênh xwỳnhjê nhĩmex. Tã hwỳr kot paj mõi. Anẽ.

Nhũm pre ã Jegus mẽ kãm amnhĩ jarênh anẽ. ³⁴ Hãmri nẽ te ra kot Jerujarê nhõ xwỳnhjê pumunh o ãm nẽ mẽ kãm kapêr pyræk o kapêr nẽ mẽ kãm:

–Hêxta waa nẽ mẽ apê Jerujarê nhõ xwỳnhjaja. Tĩrtũmja xatã mẽ awỳr ý hã kapêr jarênh o mẽ pa xwỳnhjê rênh tã ka mẽ kapêr mar kêt nẽ. Nẽ axtem nẽ kên o mẽ htao o mẽ himex o apa. Na ka htem ã amnhĩ tomnuj o apa anẽ. Tã arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwỳ pyræk o na pa inhmã mẽ anhĩpêx prãm tã ka mẽ apê ixprãm nõkati nẽ ixkaga. ³⁵ Mỳrapê koja Tĩrtũm mẽ anhõ krĩ jamãr kêt nẽ. Kot paj tokyx ty nẽ mẽ apiitã mẽ are nẽ ma akupỳm api ka mẽ axte ixpumunh kêt nẽ. ãm akupỳn ixwỳr xà hã arĩgrota pix ã koja mẽ akwỳjaja mẽ amỳr pê krĩ ja hwỳr ixwỳr kãm ixpumu. Hãmri nẽ mẽ akurom ixpumu nẽ hkĩnh tỳx nẽ. Nẽ tã ixkôt amnhĩ xunhwỳ nẽ axpên mã ijarênh o:

E ota Tĩrtũm kot mẽ pahwỳr mẽnh xwỳnhhta pôi. Nà ãm hãmri na mẽ pahwỳr wrỳ. Na mex kumrêx. Anẽ.

14

Jejus kot axte arĩgromnu hã mēhõ ho mex ã harēnh

Rukre 13.10-17

¹ Tã nhũm sap nhũm Jejus ma Parijew nhõ xwýnhjê krãhtũm kutã apkur kaxyw òrkwý hwýr tē. Hãmri nhũm mē wa hã htu rax nē Jejus apkur ã tãnopxar o kuhê. Mē kot amnhĩ nhĩpêx kwým ri tanhmã amnhĩ nhĩpêx to nhũm mē kot hã omunh nē ra hã àmnēnh kaxyw nhũm mē kuri htãnopxar o kuhê. ² Nhũm ixkreja kamã mēhõ my hte hikot xwýnh mē kuri xa. ³ Hãmri nhũm Jejus omu nē hã Parijew nhõ xwýnhjê mē Tĩrtũm kapēr tũm o mē ahkre xwýnhjê kukja nē mē kãm:

—Kwa mē inhmã mēmoj jarē. Jarãhã na mē panhõ arĩgromnu pē sap. Tanhmã na pre finat Mojesja Tĩrtũm nhỹ hã mē pahte sap ã tanhmã amnhĩ nhĩpêx to hã mē pamã karõ hto? Xà kot puj mē akupým mē ho mex nà? Kot puj mē ãm mē omu nē akupým mē ho mex kêt nē? E mē atõ inhmã ja jarē. Anē.

⁴ Hãmri nhũm mē kuma nē tanhmã kutã kãm nē hkêt nē. ãm akryk mar o kuhê. Mē kot tanhmã kãm nē nhũm kot ta pãnhã mē kãm tanhmã nē pymaj nhũm mē akryk mar o kuhê nē tanhmã kutã kãm nē hkêt nē. Hãmri nhũm tee ri mē omu hãmri nē myja ã ìhkra xi nē akupým ho mex. Hãmri nē hano nhũm ma akupým mex nē hkĩnh nē ma tē.

⁵ Hãmri nhũm Jejus mē kãm:

—E mē inhma. Xà koja mē akra sap ã mē apē ahkrehti xupým kãm tēm ka mē ãm omu nē arĩgro mex jamãr pē tokyx ho axàpir kêt nē? Nà kot kaj mē ho axàpir kurê kumrêx. Rý koja akrit môx gyw mã axà xàt ka mē omu nē ãm omu nē arĩgro mex jamãr pē tokyx hkaxàr kêt nē? Nà kot kaj mē hkaxàr kurê kumrêx. Na htem sap ã tanhmã mē ho mex to ho pa. Mē panhõ arĩgromnu htã pu htem hã tanhmã mē ho mex to. Jakamã na pa ã hã myta ho mex kurê kumrêx anē nē ri arĩgro mex jamãr kêt nē. Anē.

⁶ Nhũm pre ã Jejus mē kãm amnhĩ jarēnh anē nhũm mē kuma nom kutã kãm mēmoj jarēnh kêt nē. Ra kot akupým ho mex jakamã nhũm mē tanhmã hã kãm nē hkêt nē kuhê.

Mē pahte amnhĩ to hkryre hã mē pa-jarēnh

Matêwre 23.6-14; Rukre 6.32-36; mãänēn Xiakre 4.10; Wam Pêtre 5.5-6

⁷ Hãmri nhũm mē apkur kaxyw mē hkrĩ xà hã hkrĩ hpa. Nhũm mē hkwýjaja hkwýjê pē amnhĩ to wa nē mē hkrĩ xà mex kãm hkrĩ hpa. Hãmri nhũm Jejus ja hã mē omunh o xa nē axte mē kãm mēmoj jarē. No ãm mēmoj tã kuxi nē mē kãm awjarē nē mē kãm:

⁸ —Nà koja mē axpēn mã mēhõ rer kaxyw nē amnhĩ wýr mē atã karõ. Mē ate kutã axàpkur kaxyw. Hãmri kêr ka mē hwýr mra nē axàpkur kaxyw nē kupĩp kãm akrĩ kurê kumrêx. No kot kaj mē kêp amnhĩ to wa nē mē hkrĩ xà mex pytà nē hã akrĩ nhũm ra kot amnhĩ to rax xwýnhjê hõja hapu hã mē akõt tēn axà. ⁹ Hãmri nhũm ixkre nhõ dõn kot amnhĩ wýr mē awýr xwýnhta mē hkrĩ xà mexta ã mē awý nē mē amã: “Kwa mē atõ kãnhmã xa nē kãm mē hkrĩ xà kaprã.” Anē. Hãmri ka nhãm xa nē kãm anhýr xàta gõ. Hãmri nē apijaàm kãm hpãnhã kupĩp kãm nhỹ. ¹⁰ Ja pymaj kêr ka mē kupĩp kãm akrĩ kurê kumrêx. Kê ixkre nhõ dõnja tee ri ja hã mē apumu nē mē amã: “Tk. Kwa ixkrãmnhwýjaja. Mē kupĩp kãm akrĩ hkêt nē. Kwa mē mra nē jar mē hkrĩ xà mex ã mãn akrĩ.” Anē hãmri nhũm ja mē amã mex nē. Nhũm mē piitã kot mē ato mex ã mē atã omu ka mē ajaxwýja amnhĩ tã omu nē akĩnh nē ajamakêtkati nē akrĩ.

¹¹ —Nē koja mēhõ te amnhĩ to rax o hkwýjê jakrenh pyrãk o amnhĩ nhĩpêx o ri pa hãmri nhũm Tĩrtũm ja hã omu nē tanhmã hã ho. Hãmri nhũm ra amnhĩ to grire hã amnhĩ pumunh o ri pa nē rĩ amnhĩ pumu. Nom koja mēhõ amnhĩ to rax o hkwýjê jakrenh pyrãk o amnhĩ nhĩpêx o ri pa hkêt nhũm Tĩrtũm ja hã omu hãmri nē tãm amnhĩm kot amnhĩ to rax xwýnh ã harē. Anē.

Mē pahte mē kêp amrakati xwýnhjê ho mex ã mē pamã karõ

¹² Nhũm pre ã Jejus mē ahkre anē hãmri nē hpãnhã mē apkur xà hã ixkre nhõ dõnja mã kapēr nē kãm:

—Nà na ka hte amnhĩ wýr akwýjê pix wý. Atõjê hwý nē akrãmnhwýjê hwý. Nē mē hikãxpore rũnh xwýnhjê hwý. Nom nhýrmã

mě kot amnhĩ xwar amnhĩ nhõrkwy hwyr awyr pix kaxyw na ka hte ã amnhĩ wyr mẽ hwyr aně. ¹³ No kět amnhĩ wyr mẽ no kre xwýnhjê mǎn wý. Ně mẽ hyk o mẽ pa xwýnhjê mǎn wý. Ně mẽ hkrã pipãnh puro xwýnhjê mǎn wý. Ně mẽ hpigêx týx xwýnhjê mǎn wý. Ně mẽ hirot ně àpênh kět xwýnhjê mǎn wý. Kêr ka amnhĩ wyr jajê mǎn wý kê mẽ awyr mra ně akutã apku. ¹⁴ Mo mẽ kot amnhĩ xwar awyr kaxyw mẽ õ mẽmoj? Mě kêp amrakati. Tã kot kaj mãmri amnhĩ wyr mẽ awy nhũm Tirtũm mẽ hã apumu hãmri ně nhỹrmã kot akupým mẽ ho htĩr xà hã arĩgrota ã mẽ hã amã mẽmoj mex gõ ně ato mex ně. Hãmri ka akĩnh ně. Aně.

Tirtũm kutã mẽ paxàpkur xà maati jarěnh Matêwre 8.11, 25.1-10, 26.29; mǎññe Apokarip 19.9

¹⁵ Hãmri nhũm mẽ apkur kaxyw hkrĩ pa nhũm Jejus nhĩhkõ hã mẽ apkur o mẽ krĩ xwýnhjê hõja tanhmã Jejus mã kapêr to ně kãm:

—Hêxta waa ně. Kot puj mẽ nhỹrmã Tirtũm nhõ krĩ hwyr api ně kutã paxàpkur o pahkrĩ ně pahkĩnh týx kumrêx. Aně.

¹⁶ Hãmri nhũm kuma ně kê axte mẽ ahkre. Mě kot Tirtũm kutã apkur kaxyw kot amnhĩ wyr mẽ hwyrta ã nhũm mẽ ahkre. No ãm hã kuxi ně tanhmã mẽ kãm ujarěnh to ně mẽ kãm:

—Koja mẽhõ amnhĩ wyr mẽ ho ohtõ ně mẽ kot kutã mẽ apkur mex kaxyw mẽ kuwý. ¹⁷ Hãmri ně mẽ hwyr kãm àpênh xwýnh mẽ ně kãm: “E ma tẽ ně mẽ kãm awjarê kê mẽ tokyx mra pa mẽ apku.” Aně. ¹⁸ Hãmri nhũm kuma ně ma mẽ hwyr mẽ kãm ujarěnh o tẽ. Hãmri ně wamta mã aně nhũm kuma hãmri ně hitõt ně kãm: “Nà kot paj hwyr ixtẽm kět ně. Na pa ham amnhĩm pika hkwý japrõ. Jakamã kot paj ma hwyr tẽ ně ixprĩ hã omu mǎn. Kwa kêr ka kãm ijarê kê ixte tanhmã hã ně xà hkõt ã ixte amnhĩ nhĩpêx anhỹrja mã hamaxpêr kět ně.” Aně.

¹⁹ —Hãmri nhũm kuma ně hpãnhã nhãm ja wyr tẽ ně kãm awjarê nhũm kuma ně haxwýja hitõt ně kãm: “Nà kot paj hwyr ixtẽm kět ně. Na pa ham amnhĩm môx o 10 ně haprõ. Jakamã kot paj ma hwyr tẽ ně ixprĩ hã ri omu mǎn. Kwa kêr ka kãm ijarê kê tee ri tanhmã hamaxpêr to hkět ně. Ixte

tanhmã hã ně xà hkõt ã ixte amnhĩ nhĩpêx anhỹr kět.” Aně.

²⁰ —Hãmri nhũm kuma ně hpãnhã ma ihõta wyr tẽ ně kãm awjarê nhũm kuma ně haxwýja hitõt ně kãm: “Nà kot pa hwyr ixtẽm kět ně. Na pa kormã ham ixprõ. Kormã ixprõ nyw ně inhmã rer prãm kět jakamã kot paj ma hwyr ixtẽm kět ně.” Aně.

²¹ —Hãmri nhũm kãm àpênh xwýnhta tee ri mẽ kuma ně awjanã ně ma akupým tẽ. Kot ma mẽ hwyr mẽnh xwýnhta wyr ma akupým tẽ ně kãm mẽ harê. Hãmri nhũm tee ri mẽ harěnh ma ně mẽ kamã gryk ně. Hãmri ně hpãnhã mẽ kêp amrakati xwýnhjê hwyr kãm àpênh xwýnhta mẽ. Mě hkrã pipãnh puro xwýnhjê hwyr kumẽ. Ně mẽ hpigêx týx xwýnhjê hwyr kumẽ. Ně mẽ hirot ně àpênh hkět xwýnhjê hwyr kumẽ nhũm ma mẽ kãm ujarěnh o tẽ. Hãmri ně amnhĩ kõt mẽ kuwý nhũm mẽ kuma ně wamtajê rom hkõt mrar kurê kumrêx. Hãmri ně agjê ně apkur kaxyw mẽ hkrĩ xà kamã hkrĩ hpa. ²² Hãmri nhũm kãm àpênh xwýnhja õ patrãw wyr tẽ ně kãm mẽ harê ně kãm: “E ate mẽ hã karõ xàta kõt na mẽ ra hkrĩ hpa htã arĩ mẽ hkrĩ xà hkwý hkapyr.” Aně.

²³ —Hãmri nhũm kuma ně kãm: “Hêxta waa ně. Kět ãm mẽ hkrĩ xàta hipu mex ronhỹx pa omu ně ixkĩnh ně. No ãm kormã piitã hipu hkět. Kwa ma krĩ pu hã ri mẽ hapêr o mra. Ně nhỹri mẽ hkwýjê pumu ně mẽ haprõ ně man amnhĩ kõt mẽ o mra kê mẽ hkrĩxà ho hipu hpa. ²⁴ No kět wam ixte amnhĩ wyr mẽ hwyr xwýnhtaja. Mě hitõt xwýnhjaja kot paj axte amnhĩ wyr mẽ hwyr kět ně.” Aně. Æ mẽ ujarěnh kot anhỹr. Na hte ã Tirtũm amnhĩ wyr mẽ piitã mẽ hwyr aně. Aně.

Mě pamã Jejus kĩnh týx ã mẽ pamã karõ Matêwre 10.37-38; Makre 8.34; Rukre 9.23-25; Juãw 12.26

²⁵ Tã nhũm Jejus mẽ õrkwy rũm kato ně kormã Jerujarê hwyr mõ nhũm mẽ hohtõ rax ně hkõt mõ. Hãmri nhũm Jejus xa ně mẽ ho hakêx ně mẽ omu ně mẽ kãm:

²⁶ —E kot ka mẽ atõ amã ixkõt amnhĩ xãm prãm ně ã amnhĩ nhĩpêx aně. Ně amã atõ ně atõx ně anhĩpêxà ně akatorxà japê htýx tã kêr ka amã ixkĩnh týx o wa mẽ hakrenh pa. Ně amã aprõ ně akrajê japê htýx tã

kêr ka amã ixkĩnh tỳx o wa mẽ piitã mẽ hakrenh pa. Nẽ amã ixkĩnh tỳx o amã amnhĩ japê jakre. Kêr ka mẽ atõ ixkõt amnhĩ xãm kaxyw nẽ ã amnhĩ nhĩpêx anê.

²⁷ –Koja mẽ ixpĩ pa mẽ anê ty. Tã mẽ ate ixkõt amnhĩ nhĩpêx o mẽ apa xwỳnhjaja. Koja mẽ ixtã mẽ apar mã tã kêr ka mẽ amã ixkĩnh tỳx o mẽ umaj ixkaga hkêt nẽ. Kwãr mẽ mãmri tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xã kamã ajamak kêt nẽ atĩr tũm nẽ amex rãhã apa ho apa. Nom kot kaj mẽ ixkĩnhã jar pika ja kamã amã amex nẽ apa hprãm xàj ixkaga hãmri nẽ nhỹrmã wa ixri atĩr tũm nẽ apa hkêt nẽ. Anê.

Mẽ pahte amnhĩ kukamã pajamaxpêr mex ã mẽ pamã karõ

²⁸ Nhũm Jejus arĩ mẽ kãm kapêr nẽ mẽ kãm:

–Kwa kêr ka mẽ ixkõt amnhĩ xunhwỳr kaxyw nẽ amnhĩ kukamã ajamaxpêr mex nẽ. Na htem amnhĩm õrkwỹ rũnh nhĩpêx kaxyw hãmri nẽ hkukamã hamaxpêr mex nẽ. Nẽ kaxyw krax mã kuhê xã hkukamã hamaxpêr. Nẽ kaxyw kỳx pê kãm hikwỹ xàja kukamã hamaxpêr. Nẽ õkwaêja kukamã hamaxpêr. Nẽ hã pỏja kukamã hamaxpêr. ã na htem amnhĩm õrkwỹ rũnh nhĩpêx kaxyw hkukamã hamaxpêr mex anê. ²⁹ Nom kot kaj mẽ hkukamã ajamaxpêr mex kêt nẽ ãm kaxyw pĩ ho grêre nẽ hakà. Rỳ ra hã axàpênh rax kurê ra amã ho anhỹr kaga nẽ hkaga hpa nẽ hatur xãm mênh kêt nẽ. Hãmri nhũm mẽ hkwỳjaja hãnh mra nẽ omu nẽ atã hpêr o axkê. ³⁰ Nẽ axpên mã ri ajarênh o: “E ga mẽ ixkre mũj pumu. Na pre hipêx xwỳnhja hkurê kãm kaga nẽ hipêx par kêt nẽ.” Anhỹr o axpên mã ajarê. Ja pyrã nẽ kêr ka mẽ ixkõt amnhĩ xunhwỳr kaxyw nẽ amnhĩ kukamã ajamaxpêr mex nẽ. Nẽ ajamaxpêr o: “Nã mẽ kot Jejus ã tanhmã ixto htỳx tã kot paj hkaga hkêt nẽ. Kot paj hkõt amnhĩ nhĩpêx rãhã ho ri ixpa.” Anhỹr o amnhĩ kukamã ajamaxpêr. Hãmri nẽ rĩ kormã ixkõt amnhĩ xãm. No kot ka mẽ umaj ixkaga hkukamã ajamaxpêr hãmri nẽ ixkõt amnhĩ xãm kêt kurê kumrêx.

³¹ –Nẽ koja krĩ hõ kamã pahшти nhõ pỏristi xohtỏja nẽ. Nẽ kutã nhãm krĩ hõ kamã

pahшти nhõ pỏristija grêre. Tã nhũm wa hpijapu kaxyw nhũm krĩ hõ rũm pahшти nhõ pỏristi xohtỏja mẽ grêreta wỳr mra. Hãmri nhũm kutã krĩ hõ kamã mẽ õ pỏristi grêre nhõ pahi nhỹ nẽ tee ri mẽ amnhĩ kukamã hamaxpêr nẽ hamaxpêr o: “Kwa koja apu krĩ hõ rũm pỏristi xohtỏ raxja nhũm inhõ pỏristi grêreja mẽ axpên kutã kuhê nẽ axpu nhũm mẽ inhnê mẽ himex. Nã inhõ pỏristi grêre kênã.” Anhỹr o hamaxpêr.

³² –Hãmri nẽ pahi hõta wỳr õ kỏwenatỏ mẽ. Kormã krĩ hõ rũm mẽ hohtỏtaja mẽ htêp kêt nhũm mẽ kutã kumê nhũm ma mẽ kutã tẽ. Hãmri nẽ awry hã mẽ hkaxpa nẽ mẽ õ pahшти mã kãm: “E na mẽ inhõ pahшти akutã inhmẽ pa tẽ. Na inhmã: ‘Ma tẽ nẽ mẽ kãm awjarê. Kot puj pêr mẽ papijapu hkêt nẽ. Kwarĩ. Kot puj mẽ tãm axpên xunhwỳ.’ Anhỹr o kapêr nẽ mẽ akutã inhmẽ pa tẽ.” ã mẽ ujarênh kot anhỹr. Ja pyrã nẽ na htem mẽmoj kukamã hamaxpêr mex nẽ rĩ kormã tanhmã amnhĩ nhĩpêx to.

³³ –Tã kêr ka mẽ atõ amã ixkõt amnhĩ xãm prãm hãmri nẽ pahíta pyrã nẽ amnhĩ kukamã ajamaxpêr tỳx nẽ rĩ kormã tanhmã amnhĩ nhĩpêx to. Kêr ka ate inhmã tanhmã amnhĩ nhĩpêx to ho apa kaxyw hãmri nẽ inhgryk ã te ate amã amnhĩ japê hkêt pyrãk o mẽmoj piitã mã anhĩhkra karo pyrãk o amnhĩ nhĩpêx. Hãmri nẽ rĩ kormã ixkõt amnhĩ xãm. ³⁴⁻³⁵ No kot kaj mẽ amnhĩ kukamã ajamaxpêr kêt nẽ atỳx ri ixkõt amnhĩ xunhwỳr japêr. Hãmri nẽ mẽmo arĩgro hã mẽ kot ixtã tanhmã mẽ ato xwỳnhjê pymaj ra ixkaga mã. Hã kot kaj mẽ te mẽ ate kaxwa punu pyrãk o amnhĩ nhĩpêx. Kaxwaja mẽ apkur xã kamã mex. Na htem amnhĩm ho õ xành nẽ kuku. Nom koja mẽhõ kamã pika hkwỹ mẽ nẽ ho ahkã hãmri tanhmã kot mẽ ho nẽ akupỹm ho mex? ãm mẽ kot hkapĩr pix kaxyw koja mex. Ja pyrã nẽ kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nẽ amã ixkõt amnhĩ nhĩpêx prãm nõkati. Hãmri nẽ ra te ate kaxwa punu kapĩr mã tãmta pyrãk. E kwa mẽ mẽmoj tã ixujarênhja ma nẽ mẽ uràk nẽ amnhĩ kukamã ajamaxpêr mex nẽ. Anê.

ôwêhti pikunor jarênh
Matêwre 18.12-14

¹ Tã nhũm mẽ kot pahihiti mã hkwyjê pê kàxpore hkwy jamýnh xwýnhjê mẽ mẽ kot amnhĩ tomnuj xwýnhjaja Jejus kapêr mar kaxyw hwýr mra. ² Hãmri nhũm Parijew nhõ xwýnhjê mẽ mẽ kot Tĩrtũm kapêr tũm o mẽ ahkre xwýnhjaja mẽ hã Jejus pumu. Hãmri nê kê wem axte axpên mã tanhmã ho kapêr punuj to nê axpên mã:

—Tk. Kwa na hte mũjti axtem nê mẽ kot amnhĩ tomnuj xwýnhjaja amnhĩ wýr mẽ kuwý nê tũhã mẽ kutã apku. Kwa mẽ kot amnhĩ tomnuj xwýnh kênã kot kêt mẽ kutã apkur o pa. Anê.

³ Hãmri nhũm Jejus amnhĩ tã mẽ kuma nê tanhmã mẽ kãm kapêr to. Nom hprĩ hã mẽ kãm kapêr kêt nê. Kê âm amnhĩ tã kuxi nê mẽ kãm ôwêhti pikunor jarê nê mẽ kãm:

⁴ —Koja mēhõ õ ôwêhti xohtõ nê. Nê ma nhýri hamãr o pa. Hãmri nhũm pyxire nê hkwy kaga nê ma nhýhým ahte tẽ nê akunok. Hãmri nhũm õ dõnja ma kot akupým piitã o mõi kaxyw hkwy ho pikuprõnh pa hãmri nê tee ri hkwy kaêx ã pikunor xwýnhhta japêr. Hãmri nê ma hkwy ho mõi nê nhýri kure. Kot nhýri kutêp apkur o ri pa kaxyw kure hãmri nê ma akupým pikunor xwýnhhta japêr o tẽ. Hãmri nê hapêr ryy nê nhýri hwýr kato. ⁵ Nê omu nê hkĩnh tỳx nê. Hãmri nê amnhĩ kre hã kumẽ nê ma akupým hkwy hwýr o tẽ. ⁶ Hãmri nê mẽ ãhkõ hã kumẽ nê hkĩnh nê hkrãmnhwýjê ho akuprõ nê õrkwý htã mẽ õrkwý xwýnhjê ho akuprõ nê mẽ kãm: “Kwa na pre ixpê ixkriita õ akunok. Pa pre hapêr kãm ixihýtỳx nê kãm ixkato nê omu nê ixkĩnh nê. Jakamã kwa wem mããnên inhý hã akĩnh.” Anê.

—Ã mẽ ujarênh kot anhýr. ⁷ Ja pyrã nê koja mẽ kot amnhĩ tomnuj tỳx xwýnhjê hõ tee ri amnhĩ pumu nê kot amnhĩ tomnuj kaga nê Tĩrtũm kõt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh tỳx nê. Te ho my kot ôwêhti hpikunor xwýnh mã kator nê hkĩnh tỳxta pyrãk. Na hte Tĩrtũm tãm mẽ kot amnhĩ nhípêx o mẽ pa xwýnhjê pumu nê hkĩnh nê. Tã koja mēhõ kot amnhĩ tomnuj tỳx tã ã amnhĩ nhípêx anhýrja kaga nê Tĩrtũm kõt amnhĩ xãm hãmri nhũm amnhĩ tã omu nê hkĩnh

tỳx nê. Jakamã na pa hte mẽ akurom ã mẽ kot amnhĩ tomnuj xwýnhjê hkõt Tĩrtũm kapêr o mẽ ahkre rãhã ho ri ixpa. Anê.

Nhũm pre ã Jejus mẽ kot tanhmã ho kapêr punuj to xwýnhjê mã amnhĩ jarênh anê.

Kàxpore pikunor jarênh

⁸ Nhũm Jejus arĩ mẽ kãm awjarê nê mẽ kãm:

—Nê ja. Koja mēhõ ni hikàxpore kêp 10. ãpênh o arĩgro pê 10 pãnhã kàxpore kêp 10. Tã ho pyxi nê ho akunok. Hãmri nê tee ri hapêr nê hkaprĩ nê. Hãmri nê kanê hpõk nê hitom kapõnh pê hprĩ hã hapêr o ri pa nê kãm kato. ⁹ Hãmri nê kupy nê hkĩnh nê hkrãmnhwýjê ho akuprõ nê õrkwý htã mẽ õrkwý xwýnhjê ho akuprõ nê mẽ kãm amnhĩ jarê nê mẽ kãm: “Xê na pre ixpê ixkàxpore hõta akunok pa tee ri hapêr tã akupým kãm ixkato nê kupy nê ixkĩnh nê. Jakamã xê wem inhý hã mããnên akĩnh.” ã mẽ ujarênh kot anhýr.

¹⁰ —Ja pyrã nê koja mẽ kot amnhĩ tomnuj xwýnhjê hõ pyxire nê amnhĩ tomnuj kaga nê ixkõt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh nê. Te mēhõ ni kot kàxpore pikunor xwýnh mã kator nê hkĩnhhta pyrãk. Anê.

Mẽ hkra pikunor jarênh

¹¹ Nhũm Jejus arĩ mẽ ahkre ho xa. Tĩrtũm kãm mẽ piitã mẽ hapê htỳx ã mẽ ahkre ho xa. No kê âm hã kuxi nê kê we tanhmã mẽ kãm ujarênh to nê mẽ kãm:

—Nê koja mēhõ hkra my wa axkrut. ¹² Hãmri nhũm kot hapu õ papaj wýr tẽ nê kãm: “E papaj. Ot pa awýr tẽ. Kot kaj nhýrmã ty pa wa amýr pê akukrêx o ixarĩk. Jakamã e kwa tokyx atĩr ri amnhĩ kamã wa inhã ho axkjê pa inhõ ho amnhĩptãr kurê kumrêx nã?” Anê. Hãmri nhũm kuma nê wa kãm hikukrêx o axkjê. Kot wa mã hkwy gõ nê kot hapu mã hkwy gõ. ¹³ Hãmri nhũm kot haputa âm ri hipêêxã hkõt pa hkrãre hãmri nê kot kãm hikukrêx nhõr jamýnh pa nê ma nhýhým o mõi nê ho wênê hpa. Hãmri nê hpãnhã kàxpore jamý nê ma nhýhým mõi. Nhýhým awry hã pika hõ hwýr ma mõi. Mõi hãmri nê krĩ hõ kamã htỳx ri tanhmã amnhĩ tomnuj to ho ri pa. Hãmri nê gaa nê ra mẽ hkuprýjê hã kàxpore ho hapêx pa. Nê

kagôxyhti hã ho hapêx pa. Nê gaa hãmri nê hikàxpore hkêt nê ri pa.

¹⁴ —Rôm nhùm pikaja kamã mẽ hã na wrÿk kêt ry rax nê. Nê gaa nhùm mẽ hpur kãm mẽ kêp mẽ apkur xà hã mẽõja hapêx pa. Jakamã nhùm mẽ hkra kot haputa kêp amrakati nê kãm prãm tÿx nê ri pa. Hãmri nê tee ri amnhĩ kukamã hamaxpêr. ¹⁵ Hãmri nê amnhĩ to krĩ nhõ xwÿnhjê mar o ri pa. Kot mẽ kãm tanhmã àpênh to nê hpãnhã apkur kaxyw. Hãmri nhùm mẽhõ kot kãm hkrit hagrô jamâr kaxyw hã kumê nhùm ma hwÿr tẽ nê kãm hamâr o pa. Nom kot kãm hamâr o pata pãnhã ãm kãm mẽmoj nhõr kryre nhùm arĩ kãm prãm tÿx kumrêx.

¹⁶ Nê tee ri kot hagrô kutã õta kur prãm nê tee ri omunh o pa. ¹⁷ —Nê gaa hãmri nê tanhmã hamaxpêr to. Nê tee ri kot tanhmã amnhĩ tomnuj toja ã amnhĩ pumu nê hamaxpêr o: “Hêxta waa nê. Mãn mũtar inhõ krĩ kamã inhõ papaj mã mẽ àpênh xwÿnhjaja ixrom apkur mex o pa. àpkur mex nê nhùm mẽõ jakrêx prâr rÿnh tã pa jar mẽ hkĩnhã prãm xàj ra ixtyk o mõ. ¹⁸ Nà kot paj ma akupÿm mõ. Hãmri nê inhõ papaj pumu nê ã kãm amnhĩ jarênh anê nê kãm: ‘Kwa Papaj. Na pa pre ixpê akra hã amnhĩ tomnuj tÿx kumrêx nhùm ja apê omnuj nê. Nhùm Tirtũm pê ja omnuj nê. ¹⁹ Jakamã na pa ixpê akra hã amã amnhĩ jarênh ã ixpijaàm nê. Ixte tãm kêt kumrêx. Jakamã kwa xà kot pa amã mẽmoj tã ixàpênh o ri ixpa ka hpãnhã inhmã inhõ pa apku nà?’ Anhÿr o kot pa kãm amnhĩ jarê. Nà kot paj anê.”

²⁰ —Anhÿr o amnhĩ kukamã hamaxpêr hãmri nê ma akupÿm mõ. Mõõ nê ra hpôx o mõ. Nê kormã amÿm mõi ri nhùm õ papaj hwÿr rĩt nê omu nê amnhĩ kra hã omunh kurê kumrêx nê hkĩnh nê ma kutã hprõt nê tẽ. Omu nê kãm hkaprĩ nê. Nê hwÿr hprõt nê hkaxpa nê kahti hkôt kumÿ. ²¹ Hãmri nhùm kãm amnhĩ jarê nê kãm: “Kwa papaj. Na pa pre amnhĩ tomnuj nê nhùm ja apê omnuj nê. Nê Tirtũm pê ja omnuj nê. Jakamã ixte ixpê akra hã amã amnhĩ jarênh ã ixpijaàm. Ixte tãm kêt kumrêx.” Anê. ²² Nom kormã kãm amnhĩ jarênh par kêt ri nhùm hipêêxà kãm mẽ àpênh xwÿnhjê mã akir nê mẽ kãm: “E kwa mẽ atõ ma tẽ

nê kãm ê mex õ py nê akupÿn ixkrata wÿr ho aprõt nê kãm haxà. Nê hpar kà nê ìhkra kamã kàx nê amnê kãm hamÿ nê ho aprõt. ²³ Nê akupÿm aprõt nê mõi kra htwÿm mexta õ pumu nê unê nê apĩ. Nê mẽ ho anê pu mẽ ixkra hã pahkĩnh nê apku. E mẽ amnhĩ prêprêk nê tokyx ã amnhĩ nhĩpêx anê. ²⁴ Na pre ma ixpê mõi o te ixpê htyk pyræk. Tã akupÿn mõ nê ixwÿr põi nê te akupÿm inhmã htĩr pyræk. Jakamã e mẽ tokyj.” Anhÿr jakamã nhùm mẽ hã mõi kra pĩ nê ho anê nê hkĩnh nê hã apkur o hkrĩ.

²⁵ —Rôm nhùm hkra kot wata kormã pur kãm htÿx àpênh o xa. àpênh o ãm tã akupÿn hpôx o tẽ. Hãmri nê amnhĩ kukamã mẽ kot ri mẽmoj tatak nê mẽ grer ma. ²⁶ Hãmri nê tee ri hamaxpêr o tẽ nê òrkwÿ hwÿr põi nê kormã kapem xa nê mẽ hã mẽ àpênh xwÿnhjê hõ kukja nê kãm: “Kwa mẽmoj tã na ka wem ã akĩnh rax anê?” ²⁷ Anê nhùm kãm: “Nà mẽhõ hkêt. Atõ na akupÿn põi nhùm anhĩpêêxà omu nê hkĩnh tÿx nê. Nê mẽ inhmã anê pa mẽ hã mõi kra htwÿm mexja pĩ nê hã ho anê nê hã ixkĩnh nê hkur o ixkrĩ.” Anê. ²⁸ Hãmri nhùm tee ri htõ jarênh ma nê gryk tÿx nê. Hãmri nê gryk xàj kapem hkuk punuj o mẽ omunh o xa nê mẽ hwÿr àr kêt nê. Hãmri nhùm hipêêxàja tee ri omu nê hwÿr kato nê tee ri kot mẽ hwÿr ho àr kaxyw ho anhÿr kaprÿ. ²⁹ Hãmri nhùm kãm: “Tk. Kwa na pa hte amã ixàpênh rÿnh rãhã ho ri ixpa hã ra ixtã amgrà xohtõ nê. Nê aa akapêr nhĩrõp tanhmã ixãm to hkêt. Tã ka hte ixpumunh nê akĩnh nê ixtã mẽmoj tõi pĩr kêt nê. ³⁰ Tã nhùm akra kot haputa apê akukrêx kwÿ jamÿnh pa nê ma o mõ nê axtem nê mẽ hkuprÿjê mã òr par tã akupÿn mõ nê põi. Ka omu nê akĩnh nê hã mõi kra twÿmta pĩ. Nà kot paj mẽ awÿr ixàr kêt nê.” Anê.

—Hãmri nê gryk tÿx nê xa. ³¹ Hãmri nhùm õ papaj tee ri kuma nê kãm: “Kwa nà ri ã akapêr anhÿr kêt nê. Inhmã ajapê kênã. Na ka hte ixkôt apa ho apa rãhã nê. Nê ixkukrêx piitã kêp anhõõ. ³² No atõja na pre te ixpê htyk pyræk tã arĩ htĩr. Nê te pikunor pyræk tã te ra akupÿm kator pyræk jakamã na pa omu nê ixkĩnh nê. Nê inhmã hapê ho te mãânên inhmã ajapê pyræk.” Anê.

—Ã mẽ ujarênh kot anhÿr. Ja pyrã nê

koja mēhō te kot amnhī tomnuj tỳx o ri pa htā amnhī kaxyw Tirtūm mā hamaxpēr nē amnhī to kuwỳ nē hkōt amnhī xām. Hāmri nhūm amnhī tā omu nē hkīnh nē. Nē kām hprām nē. No mē kajaja. Mē apē Parijew nhō xwỳnhjē mē Tirtūm kapēr tūm o mē ahkre xwỳnhjaja. Na ka htem mē kot amnhī tomnuj xwỳnhjaja kot Tirtūm kapēr mar o kuhē hā mē omu nē Tirtūm kīnhā akīnh kēt nē. Nē te hkra kot wata jamaxpēr pyrāk o ajamaxpēr nē tee ri ja hā mē omu nē mē kamā agryk nē. Nē mē amā mē hprām nōkati. Anē.

16

Mē panhōxy nē Jejus kot mē pamā karō

¹ Tā nhūm kē Jejus axte hkōt ri mē pa ho mē pa xwỳnhjē jahkre. No ām mēmoj tā kuxi nē mē kām tanhmā ujarēnh to nē mē kām:

—Nà koja mēhō hikàxpore rax xwỳnhja kām àpēnh xwỳnh mā mēmoj to wēnē ho pa kaxyw ām. No nhūm kām ho mex kēt nē. Axtem nē kēp amarī mē kām mēmoj to fiat par o mō. Hāmri nhūm ra mēhō kot ā amnhī nhīpēx anhỹr ā omu nē ma ò patrāw wỳr tē nē kām harē. ² Hāmri nhūm tee ri harēnh ma nē amnhī wỳr hā karō. Hāmri nhūm hwỳr tē nē axà nhūm kām: “Pa. Kwa xà ām hāmri na mē inhmā ajarē? Kwa nà mon ka ri axtem nē ā ixpē inhō mēmoj nhīpēx anē? E inhmā ate mē kām ho fiat par xwỳnhjē nhīxi hā kagà nē inhmā agō hāmri nē ma tē. Kot ka axte inhmā axàpēnh kēt nē rī amnhī pumu.” Anē.

³ —Hāmri nhūm kuma nē tee ri amnhī kukamā hamaxpēr nē hamaxpēr o: “Hēxta waa nē. Tanhmā kot paj amnhī to? Ixihtỳxre hā kot pa mēhō mā pur ā apē. Nom inhmā amarī ri ixàhwỳr o ri ixpa hprām kēt. Ixte amnhī kuk ā xpijaām.” Anē. ⁴ Hāmri nē tanhmā amnhī kukamā hamaxpēr to nē hamaxpēr o: “Nà kot paj amnhī wỳr ixte mē kām ho fiat xwỳnhjē hā karō. Nē mē kām mē ò kōōta ahpar mā hkamē kē mē ām inhō patrāw mā hkwỳ pix gō. Kēr kē mē amnhī tā ixpumu nē kām ixkīnh nē. Hāmri nē inhō patrāw kot ixkaga hā ixtā harēnh ma nē ixkamā ukapri japēr. Hāmri nē amnhī wỳr ixwỳ pa ahpỳnhā mē kutā

ixàpkur o ri ixpa nhūm prām ixpīr kēt nē. Nà kot paj anē.” Anē.

⁵ Hāmri nē amnhī wỳr mē hā karō nhūm mē hwỳr mra. Nhūm mē omu nē ja mā kām: “E tanhmā na ka pre inhō patrāw pē mēmoj to fiat to? E inhmā harē.” Anē. ⁶ Hāmri nhūm kām: “Na pa pre kēp orti hā à ho 100 nē ho fiat. Ota hā kagàta. Tā pa kormā kām amnhīrer kēt nē.” Anē nhūm kuma nē kām: “Tōe ka inhma. Kot paj amā anhō kōt o gri ka ām kām ho 50 pix nē agō pa ixte anhō kōt ho ijapēx par pyrāk o anhīpēx.” Anē. ⁷ Hāmri nē hpānhā nhām ja mā kām: “No ka. Tanhmā na ka pre kēp mēmoj to fiat to?” Anē nhūm kām: “Na pa pre kēp pāy hā xak o 1.000 nē ho fiat. Tā pa kormā hpānhā kām amnhīrer kēt nē.” Anē nhūm kām: “Tōe. Kot paj hāmri amā anhō kōt o gri ka ām kām ho 800 pix nē agō pa ixte anhō kōt ho ijapēx par pyrāk o anhīpēx.” Anē. Nhūm ā mē hipēx anē. Hāmri nē hamaxpēr o: “E. Na pa mē kām mē ò kōt o hkry pa. Kōja mē amnhī tā kām ixkīnh japēr.” Anē.

⁸ —Hāmri nhūm ò patrāwja ā kot mē hipēx anhỹr ā harēnh ma nē kām: “Tk. Kwa ate pa ixkukamā ajamaxpēr nē inhmā mēmoj to anhỹr mex kēt tā ka amnhī kukamā ajamaxpēr mex pē ā mē hipēx mex anē.” Anē. Ā mē ujarēnh kot anhỹr. Anē.

Nhūm pre ā Jejus mē kām ujarēnh anē. Hāmri nē mē kām:

—Tā ja pyrā nē na hte mē kot Tirtūm kōt amnhī xunhwỳr kēt xwỳnhjaja ām amnhī pix kukamā hamaxpēr mex o pa. Jao amnhī kaxyw pix mā mē piitā tanhmā mē ho mex to ho pa. Mē kot amnhī tā mē omunh nē mē kām mē hkīnh nē amnhī xwar tanhmā mē ho mex to kaxyw nhūm htem ā amnhī nhīpēx anhỹr o pa. Tā mē ate ixkōt amnhī xunhwỳr xwỳnhjaja. Tirtūm kot tanhmā mē ate amnhī kwỳjē ho mex to hā amnhīm mē ajarēnh kaxyw kēr ka mē amnhī mē mē piitā mē hkukamā ajamaxpēr mex nē. Pē tanhmā mē ho mex to ho ri apa. Ā mē ate amnhī nhīpēx anhỹrja na mex. Nom kormā mē ate ā amnhī nhīpēx anhỹr kēt.

⁹ —Hēxta waa nē. Mon ka htem mē urāk nē ā axpēn to mex anhỹr kēt nē? Kwa mē àpēnh xwỳnhhta kot amnhī nhīpēx pyrā nē tanhmā axpēn to mex to o ri apa hkēt wehe.

Jao akukrêx nê akàxpore ho anhôxý hkêt nê. Kêr ka nhÿrmã ty nê Tirtûm wÿr api nhÿm ja hã mẽ ato mex rax nê. Te ho kot ô patrãw mã àpênh xwÿnhhta kot tanhmã mẽ ho mex to xwÿnhjê hwÿr mrar nhÿm mẽ kot amnhÿ xwar tanhmã ho mex tota pyrãk.

¹⁰⁻¹¹ —Na hte Tirtûm tanhmã mẽ pakute hã mẽ pahpumunh mex nê. Koja mẽ amã mẽmoj gô ka mẽ kãm hprãm xà hkôt ho anhôxý hkêt nhÿm ja hã mẽ apumu nê axte mẽ amã mẽmoj gô. Nom hpãnhã mẽ amã ôr rax o wamta jakre nê kugô. Nom kot ka mẽ ri mẽmojta o anhôxý ho ri apa nhÿm tee ri ja hã mẽ apumu nê axte mẽ amã mẽmoj nhôr kêt nê. Koja mẽ amã mẽmoj gô ka mẽ ho anhôxý ho ri apa nhÿm ja kêp homnuj nê.

¹² —Nê kot kaj mẽ jar Tirtûm kot mẽ amã mẽmoj nhôr xwÿnhja ho anhôxý ho ri apa. Hã koja nhÿrmã kaxkwa kamã mẽ amã mẽmoj mex nhôr kêt nê.

¹³ —Nê kot kaj apyxi nê anhô patrãw hamêxkrut nê arÿgro pyxi hã hamê wa kãm axàpênh o amÿkry hkêt nê. Kot kaj anê nê hõ gryk ã hõ kaga. Ja pyrã nê kot kaj mẽ jar pika ja kamã akàxpore nê akukrêx pix kukamã ajamaxpêr o ri apa hã kot kaj mẽ amã hapê htÿx nê mẽ kêp ho anhôxý ho ri apa. Nê akukrêx rax gryk ã Tirtûm kãm hprãm xà hkôt akukrêx o tanhmã axpênh to ajuta hto ho ri apa hkêt nê. Ja pymaj kwa kêr ka mẽ ãm Tirtûm pix mã mãn ajamaxpêr rãhã ho ri apa. Jao te akukrêx nê akàxpore mã axãmnhÿx ri anhÿhkra karo ho ri apa pyrãk. Anê.

Nhÿm pre ã Jejus mẽ ahkre anê. ¹⁴ Hãmri nhÿm Parijew nhô xwÿnhjaja mar o kuhê. Na prem ra mẽ hikàxpore rax gryk ã Jejus kaga. Jakamã ã kot mẽ kãm kàxpore jarênh anhÿrja ma nhÿm ja mẽ kêp omnuj nê nhÿm mẽ hã hpêr o pikênh o kuhê. ¹⁵ Hãmri nhÿm amnhÿ tã mẽ kuma nê mẽ kãm:

—Nà na ka htem te mẽ ate tãm mẽ kot amnhÿ nhÿpêx xwÿnh pyrãk o amnhÿ nhÿpêx nom ri mẽ kãm amnhÿ to axêx o ri apa. No nhÿm Tirtûmja kot tanhmã mẽ ate amnhÿ nhÿpêx to nê tanhmã mẽ ajamaxpêr to hkôt mẽ apumunh par. Nê hprÿ hã mẽ anhôxý hã mẽ apumu. Te mẽ ate tãm amnhÿ nhÿpêx pyrãk nom mẽ anhôxý kamã na ka htem apa. Mẽmoj te mex pyrãk nhÿm htem omu

nê mex ã hkamnhÿx. No nhÿm Tirtûm àhpumunh tÿx xà hkôt hprÿ hã mẽmojta pumu nhÿm kêp omnuj nê. Mẽ akurom omnuj ã omunh kurê kumrêx. Na hte hprÿ hã mẽ ate amnhÿ nhÿpêx ã mẽ apumu. Anê.

Tirtûm kapêr aa hapêx kêt ã harênh

Matêwre 5.17-18

¹⁶ Nhÿm Jejus arÿ mẽ ahkre nê mẽ kãm:

—Nê na pre finat Mojesja kumrêx mẽ kãm Tirtûm kapêr kwÿ hã kagà. Tã nhÿm hpãnhã Tirtûm nhÿ hã kapêr jarênh xwÿnh kwÿjaja mãânênh mẽ kãm hkwÿ hã kagà. Nhÿm prem kuma nê mẽ hkôt amnhÿ nhÿpêx o ri pa. Tã nhÿm finat Juãw Paxisja mẽ hpãnhã kato nê Tirtûm kapêr o mẽ ahkre ho ri pa. Tã pa hpãnhã ho mẽ ajahkre ho ri ixpa nhÿm mẽ ohtô nê ixkôt amnhÿ xunhwÿ nê kãm ixkapêr kôt pix mã amnhÿ nhÿpêx o ri pa hprãm nê.

¹⁷ —Tirtûm kapêr tÿmja mex o mex. Koja aa hapêx kêt nê. Koja nhÿrmã kaxkwa nê pika wa hapêx pa no nhÿm Tirtûm kapêr tÿmja aa hapêx kêt nê. Koja rãhã ho rãhã nê aa ihkjê ho mênh kêt nê. Anê.

Mê pahte axpênh kaga hkêt ã mẽ pamã karô

Matêwre 5.31-32, 19.9-12; Makre 10.2-12

¹⁸ Nhÿm Jejus arÿ mẽ ahkre nê mẽ kãm:

—Nê kêr ka mẽ aprô kaga hkêt nê apa. Kot kaj mẽ hkaga nê hpãnhã nhãm hõ ho aprô nhÿm Tirtûm noo mã te ate wam aprô kamã nhãm ho amnhÿkati pyrãk. Nhÿm ja kêp omnuj nê. Rÿ ka ra mêmô kot hprô kaga xwÿnhhta ka hpãnhã ho aprô. Nhÿm Tirtûm noo mã te ate wam mjên pê ho amnhÿkati pyrãk. Nhÿm Tirtûm pê ja omnuj nê. Anê.

Hikàxpore rax xwÿnh mẽ kêp amrakati xwÿnh wa harênh

Rukre 6.20-26

¹⁹ Nhÿm Jejus arÿ mẽ ahkre kamã mẽ kãm awjarê nê mẽ kãm:

—Koja mêmô kàxpore rax xwÿnh ê mex pix kãm ri pa. Nê apkati mẽ apkur mex o pa. ²⁰ Nhÿm amrakati xwÿnh pê Rajareja hkà nhyre nê arÿ pry kamã àhwÿr o hkrÿ. Nhÿm htem hamÿ nê ma o pa nê hikàxpore rax xwÿnh nhôrkwÿ jakwakrem haxwÿ. ²¹ Nhÿm ô jakrêx kwÿ hkrêr prãm xàj hakwa krem àhwÿr o hkrÿ. Nhÿm rop hwÿr mra nê hkà nhy kunhnwÿnh o kuhê.

22 –Tã nhũm Rajare ty nhũm Tirtũm kapër o mẽ wryk xwỳnhjaja hwỳr wry nẽ ma akupỳm kaxkwa hwỳr hkarõ ho mõ nẽ ho api. Hãmri nhũm kaxkwa kamã mẽ pahpãm Apraãw nhĩhkõ hã hkĩnh nẽ apkur mex o hkrĩ.

–Tã nhũm hikàxpore rax xwỳnhhta mãănẽn hkõt ty. Nhũm hkwỳjaja hã akuprõ nẽ hã mur nẽ ma o tẽ nẽ haxà. 23 Hãmri nhũm hkarõ ma mẽ kot amnhĩ xà htỳx kamã hamak tũm xà pẽ kuwy maatita wỳr ma mõ. Nẽ kamã amnhĩ xà htỳx kãm hamak rãhã ho pa. Hãmri nẽ amnhĩ xà hã maj kànhmã rĩt nẽ kaxkwa kamã Apraãw pumu. Nhũm Rajare ra kuri mex nẽ nhỹ.

24 Hãmri nhũm tee ri wa omu nẽ Apraãw mã akapër nẽ kãm: “Kwa Apraãw. Kwa we ixkamã axukapri nẽ ixwỳr Rajare mẽ kê ixwỳr tẽ nẽ ihkrakrã ho gõ htok nẽ ho inhõhto jakry. Na pa kuwy kamã amnhĩ xà htỳx kãm ijamak tỳx kumrẽx.” Anẽ. 25 Hãmri nhũm kuma nẽ kãm: “Tk. Nà kot pa awỳr mẽnh kêt nẽ. Na ka pre atĩr ri amex nẽ akĩnh nẽ ri apa. No nhũm Rajare akĩnhã hkà nhy rax nẽ amnhĩ xà htỳx kãm hamak rãhã ho ri pa. Tã ra jar inhĩhkõ hã hkĩnh nẽ pa. Ka pre kurom amex nẽ apa htã kot kaj hpãnhã amnhĩ xà htỳx kãm ajamak rãhã ho ri apa. 26 Nẽ pahkaêx kãm ahkapry griã. Jakamã nhỹhỹnh kot kêt awỳr rẽ? Ka ajaxwỳja nhỹhỹnh kot ka kêt mẽ ixwỳr rẽ?” Anẽ.

27 –Nhũm ã kãm kapër anẽ nhũm tee ri kuma nẽ kãm: “Kwa tô ma inhõ krĩ hwỳr mãn amẽ kê ma ixkwỳjê hwỳr wry. 28 O mũj arĩ inhõ krĩ kamã ixtõ kệp 5 nẽ arĩ htĩr nẽ pa. Kê wa mẽ kãm awjarẽ kê mẽ amnẽ kuwy hwỳr pa pymaj tokyx amnhĩ tomnuj kaga nẽ Tirtũm kõt mãn amnhĩ xunhwỳ nẽ hkõt ri amnhĩ nhĩpêx o pa.” Anẽ.

29 –Hãmri nhũm Apraãw kãm: “Nà pa mẽ hwỳr mẽnh kêt nẽ. Ra mẽ kuri Tirtũm kapër jarẽn h xwỳnhjê mẽ Mojes kot Tirtũm kapër ã kagà kẽnã. Kê mẽ kamã harẽ nẽ ja ma nẽ rĩ tãm tanhmã amnhĩ nhĩpêx to.” Anẽ.

30 Hãmri nhũm tee ri kuma nẽ kãm: “Kwa nà. Koja mẽ kagàja mar kêt nẽ. No kêt Rajare na pre ra htyk tã akupỳm htĩr jakamã koja mẽ hwỳr wry nẽ mẽ kãm awjarẽ nhũm mẽ akupỳm htĩr ã omu nẽ kapër ma hãmri nẽ amnhĩ tomnuj kaga kurẽ kumrẽx. Kwa

nà ã ri anhỹr kêt nẽ mẽ hwỳr amẽ hẽxta waa nẽ.” Anẽ.

31 –No nhũm kãm: “Nà koja mẽ Tirtũm kapër ã kagà mar kêt ã koja mẽ mãănẽn Rajare tyk nẽ akupỳm htĩr nẽ mẽ hwỳr wryk nẽ kot mẽ kãm tanhmã ujarẽn h to hã mar kêt nẽ. Jakamã kwarĩ pa mẽ hwỳr mẽnh kêt nẽ. Kot paj ho anẽ nẽ ãm ixte mẽ hwỳr mẽnh kapry pyrãk o amnhĩ nhĩpêx.” Anẽ. ã mẽ ujarẽn h kot anhỹr. Anẽ.

17

Mẽ kot Jejus nẽ mẽ no kupyã ã mẽ harẽn h
Matêwre 18.6; Makre 9.42; mãănẽn
Rõmãn 1.32; Sikũn Pêtre 2.1, 2.18

1-2 Tã nhũm Jejus hkõt mẽ pa ho mẽ pa xwỳnhjê jahkre ho nhỹ nẽ mẽ kãm:

–E kot paj mẽ kot ixkõt amnhĩ xunhwỳr tohtuj anhỹr xwỳnhjê jarẽ ka mẽ inhma. Nà koja mẽhõ mẽ hwỳr tẽ nẽ inhnẽ mẽ kãm kapër. Mẽ kot mẽ mar nẽ amnhĩ tomnuj prãm xaj tanhmã mẽ kãm kapër to. Hãmri nhũm mẽ mar xà hkõt tanhmã amnhĩ tomnuj to. Hã koja Tirtũm ja hã omu nẽ kot inhnẽ tanhmã kãm nẽ xwỳnhhta pumu nẽ ja hã homnuj tỳx nẽ. Te mẽ kot mẽhõ pynẽn h nẽ mut ã kẽn pytĩ hõ nhõr nẽ ma o htẽm nẽ gõ rax kãm mẽnh pyrãk o koja hipêx. Te ho ja pyrãk no ãm homnuj tỳx o ja jakre. Jakamã kwa mẽ ixkapër ma nẽ kãm ajamaxpër tỳx rãhã ho ri apa. Anẽ.

Mẽ pahte amnhĩ tã tanhmã mẽhõ hto
hkõt ã mẽ pamã karõ

Matêwre 18.21; Makre 11.25-26; mãănẽn
Epes 4.32; Korosẽ 3.13

3 Nhũm Jejus arĩ mẽ ahkre nẽ mẽ kãm:

–Nẽ koja ixkõt atõjê hõ tanhmã atomnuj to. Ka amnhĩ tã omu hãmri nẽ ma hwỳr tẽ nẽ ja hã kãm akapër nẽ kãm: “Kwa mon ka axtem nẽ ri ã inhĩpêx anẽ ixtõ? Kwa nà ri ã inhĩpêx anhỹr kêt nẽ.” Anẽ hãmri nhũm amnhĩ tã ama nẽ amã: “Nà na pa tee ri ixte tanhmã atota ã amnhĩ pumu nẽ ixkapri nẽ. Nà kot paj axte ã ri anhĩpêx anhỹr kêt nẽ. Kwa kêr ka axte tanhmã ja mã ajamaxpër to hkõt nẽ. Te ate amnhĩ katut kõt mẽnh pyrãk o hipêx pu akupỳm tãm axpẽn nhĩpêx o papa.” Anẽ. Koja ã amã kapër anẽ ka amnhĩ tã ama hãmri nẽ axte tanhmã kot atoja mã ajamaxpër kêt nẽ.

⁴—Koja arĩgro pyxi hã xatã tanhmã atomnuj to japêr. Hãmri nê xatã tee ri ja hã amnhĩ pumu nê awÿr mra nê xatã amnhĩ tã amã kapêr nê amã: “Pa ot pa awÿr tẽ. Na pa ra ixkaprĩ nê. Kwa ixte ã anhĩpêx anhÿrja pumu nê ãm omu. Kot paj axte hkêt nê.” Anhÿr o xatã amã kapêr. Nê ra axte tanhmã atomnuj to nê kê axte awÿr tẽ nê ã amnhĩ tã amã kapêr anê. Nom kêr ka ama nê kamã agryk kêt nê. ãm xatã kãm: “Nà kot puj anê nê akupÿm tãm axpên nhĩpêx. Kot paj axte tanhmã ate ixtota mã ijamaxpêr kêt nê. Kot puj ja ho pajapêx nê tãm axpên nhĩpêx o akupÿm papa.” Anhÿr o kêr ka mẽ xatã axpên nhĩpêx anhÿr rãhã ho ri apa nê aa jam anhÿrer kêt nê. Anê.

Mẽ pahte mẽmoj tã Tĩrtũm wÿr hã mẽ pajarênh

Matêwre 17.20-21, 21.21-22; Makre 11.23

⁵ Tã nhũm Jejus nhÿ hã mẽ ahkre ho mẽ pa xwÿnhjaja hãmri kãm:

—Kwa Pahihti. Tanhmã mẽ ixto pa mẽ amnhĩ kaxyw Tĩrtũm kôt ijamaxpêr tÿx rãhã ho ri ixpa. Anê.

⁶ Hãmri nhũm mẽ kãm:

—Nà ra mẽ ate amnhĩ kaxyw hkôt ajamaxpêr jakamã na ra amnhĩ tã mẽ apumu. Jakamã mẽ ate hkôt amnhĩ nhĩpêx kukwak ri na ka htem mẽmoj tã awÿ nhũm mẽ ate mẽmoj tã hwÿr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapêr nê kãm: “E amnhĩ jarê nê ma tẽ nê gô xujanãr kãm mãn mrõ.” Anê nhũm kot amar nê amar xà hkôt ã kot amnhĩ nhĩpêx anhÿrta pyrãk. Ja pyrã nê kot kaj mẽ ate Tĩrtũm kôt amnhĩ nhĩpêx o apa kukwak ri mẽmoj tã awÿ nhũm mẽ ama nê mẽ amã mẽmoj tanhmã ho. Rÿ mẽ amã mẽmoj gõ. Anê.

Te mẽ pahpê Tĩrtũm mã paxàpênh xwÿnh pyrãk

⁷ Nhũm Jejus arĩ mẽ ahkre nê mẽ kãm:

—Nê ja. Kot kaj mẽ amã mẽ àpênh xwÿnh kwÿjaja nhũm hõ amã mẽmoj tã àpênh o pa ã ho anhÿr pa. Hãmri tanhmã kot kaj kãm akapêr to wehe? Xà kot kaj kãm: “E hãmri axàpênhta kaga nê tẽ nê nhÿ nê apku.” Anhÿr o kãm akapêr? ⁸ Nà kot kaj kãm anhÿr kêt nê. Kot kaj kãm: “E kwa tokyx tẽ nê hpãnhã inhmã inhõ hã apê. Kot pa

ixàpkur pa ka ixpãnhã nhÿ nê apku.” Anhÿr kãm akapêr. Kêp amã àpênh xwÿnh jakamã ka ã kãm akapêr anê. ⁹ Ja pyrã nê kot puj mẽ Tĩrtũm kot mẽ pamã mẽmoj tã karõ xà hkôt tanhmã kãm amnhĩ nhĩpêx to ho ri papa. Mẽ õ patrãwta pyrã nê kot tanhmã mẽ pamã karõ hto xà hkôt pu mẽ amnhĩ nhĩpêx.

—Xà na htem mẽ õ patrãw mã mẽmoj tã àpênh pa hãmri nê hkwyjê mã amnhĩ to jarkrar o ri pa nê mẽ kãm: “E ka mẽ ixpumu. Na pa hte inhõ patrãw mã ixàpênh mex o mẽ hakre ka mẽ ja hã ixpumu. Hêxta waa nê. Mon pa hte ri axtem ã amnhĩ nhĩpêx anê?” Anhÿr o xà kot kaj mẽ kãm amnhĩ to jarkrar o ri apa? Nà na ka htem ã amnhĩ nhĩpêx anhÿr kêt nê.

¹⁰ —Tã pa hte mẽ õ patrãwta pyrã nê tanhmã mẽ amã mẽmoj tã karõ hto ho ixpa. Jakamã kêr ka mẽ inhma nê ixte mẽ amã mẽmoj tã karõ xà hkôt tanhmã inhmã amnhĩ nhĩpêx to ho ri apa. Hãmri nê hã amnhĩ to jarkrar pê amnhĩ jarênh o: “ãm hãmri na pa ã Jejus mã amnhĩ nhĩpêx anê. Hêxta waa nê. Ixpê Jejus mã tanhmã ixte amnhĩ nhĩpêx to mex xwÿnh na pa.” Anhÿr o amnhĩ to jarkrar kêt nê. Kêt ãm amnhĩ jarênh o: “Nà ixte kãm tanhmã amnhĩ nhĩpêx to ho ixpa xwÿnh pix na pa. Na hte mẽmoj tã inhmã karõ pa kuma nê ÿ hã tanhmã kãm amnhĩ nhĩpêx to.” Anhÿr o amnhĩ jarênh o ri apa. No ri amnhĩ krã hkôt atÿx tanhmã amnhĩ to jarkrar to ho ri apa hkêt nê. Anê.

Jejus kot mẽ ho 10 nê akupÿm mẽ ho mex ã harênh

Matêwre 8.1-4

¹¹ Tã nhũm Jejus arĩ Garirej rũm pika pê Samar hkàx ã Jerujarê hwÿr kormã mõ.

¹² Nê nhÿri krĩ hõ htêp o mõr mẽ nhũm krĩ pu hã ri mẽ pa xwÿnhjaja kêp 10 nê kutã mra. Mẽ hkànhy hkro htÿx xwÿnhjaja kutã mra nê hkaxpa nê amÿm kuhê nê omu.

¹³ Hãmri nê kãm:

—Pa Pahihti. Kwa mẽ ixpumu nê mẽ ixkamã axukaprĩ nê tanhmã mẽ ixto mex to. Anê.

¹⁴ Hãmri nhũm mẽ kãm:

—Tõe. Nà kot paj mẽ ato mex. E mẽ mãmrĩ awjanã nê ma akupÿm mẽ anhõ

patrejê hwÿr mra kê mẽ akupÿm mẽ akà mex ã mẽ apumu. Anẽ.

Hãmri nhũm mẽ kuma nẽ kapër mar xà hkôt awjanã. Kà nhy rãhã awjanã nẽ ma akupÿm patre hwÿr mra. Nẽ kormã akupÿm hwÿr pry hã mrar rãhã piitã hkà mex pa. ¹⁵ Hãmri nhũm ãm pyxi nẽ hkwyjê rom awjanã nẽ akupÿm Jejus wÿr Tirtũm mã mex o mex ã harẽnh o hwÿr tẽ. ¹⁶ Hãmri nẽ Jejus kaxpa nẽ kutã hkõnkrã ho tẽm nẽ nhÿ nẽ amnhĩ tã kãm kot ho mex ã kãm amnhĩ jarẽ. Kwÿjê hkĩnhã kęp Ijaew kêt axtem kęp Samar nhõ xwÿnh tã mẽ kurom akupÿn hwÿr tẽ nẽ kãm mex o mex ã harẽ. ¹⁷⁻¹⁹ Hãmri nhũm amnhĩ tã kuma nẽ kãm:

—No mẽ akwÿjaja? Ixte mẽ ato 10 nẽ mẽ ato mex tã ka ãm kapxipix awjanã nẽ akupÿn ixwÿr tẽ. Akwÿjê hkĩnhã apê Ijaew kêt tã akupÿm amnhĩ mex ã amnhĩ pumu hãmri nẽ mẽ kurom awjanã nẽ Tirtũm mã mex o mex ã harẽnh o ixwÿr tẽ. Hêxta waa nẽ. Mo na hte ixkwÿjaja apyrã nẽ amnhĩ kaxyw ixkôt hamaxpër kêt nẽ? E kãnhmã xa nẽ mãmrĩ ma ajamakêtkati nẽ akĩnh nẽ ma akupÿm tẽ. Anẽ.

Jejus akupÿn wÿr xà hã arĩgro jarẽnh

Matêwre 24.23-24, 24.37-44; Makre 13.32-37; mããnẽn Wam Tesarõn 5.2-8; Sikũn Pêtre 3.3-10

²⁰⁻²¹ Tã nhũm Parijew nhõ xwÿnh kwÿjaja Jejus wÿr mra nẽ omu nẽ kãm:

—Kwa mẽ inhmã mẽmoj jarẽ. Xà koja apu Tirtũm tokyx kot mẽ pahwÿr mẽnh mã xwÿnhhta mẽ nhũm mẽ pahwÿr wrÿ nẽ mẽ pahto amnhĩptâr kurê kumrêx nã kormã? Anẽ.

Hãmri nhũm mẽ kuma nẽ mẽ kãm amnhĩ jarẽ. Te ho nhãm mẽhõ jarẽnh pyrã nẽ mẽ kãm:

—Nã ra kot mẽ ho amnhĩptâr o pa kênã. Nom nhÿri hkrĩ xà kamã mẽ ho amnhĩptâr o hkrĩ hkêt nẽ. Na htem amnhĩ kaxyw hkôt hamaxpër nẽ hkôt amnhĩ xunhwÿ hãmri nhũm kęp mẽ õ pahihtĩ hã mẽ ho amnhĩptâr o pa. Nẽ mẽ kãm mẽ hamaxpër mex gõ nhũm htem hkôt ri hamaxpër mex o pa. Anẽ.

²² Hãmri nẽ hpãnhã hkôt mẽ pa ho mẽ pa xwÿnhjê mã kapër. Mẽ kot nhÿrmã tee ri kamã hamak o pa hã mẽ kãm kapër nẽ mẽ kãm:

—Kot kaj mẽ nhÿrmã tee ri amã tokyx akupÿn ixwÿr nẽ ixte mẽ ato amnhĩptâr prãm xaj tee ri inhmã anojarêt kaprÿ ho ri apa. Nẽ axpën mã ri ijarẽnh o: “Hêxta waa nẽ. Mo na we Pahihti tokyx akupÿn mẽ pahwÿr wÿr kêt nẽ?” Anhÿr o inhmã anojarêt o ri apa pê ixkamã ajamakrãhã ho apa.

²³ —Nẽ koja mẽ ra akupÿn ixwÿr ã tanhmã mẽ amã ixto hêx to ho pa. Nhÿri ixkuhê nhũm mẽ kot ixpumunh ã mẽ amã ixto hêx o pa. Nom kêr ka mẽ ama nẽ ãm mẽ ama. ²⁴ Kot paj nhÿrmã akupÿn mẽ awÿr ixwÿr kaxyw nhũm mẽ pika piitã hkôt akupÿn ixwÿr kãm anhĩpê ixpumu. Te mẽ piitã mẽ kot anhĩpê na jaxênh pumunh pyrãk o kot kaj mẽ apiitã ixpumu. ²⁵ Nom kormã jar pika ja kamã ixpa ri koja mẽ ohtõ nẽ ixkaga pa amnhĩ xà htÿx kamã ijamak kãm ty. Hãmri nẽ mẽmo arĩgro hã ma akupÿm kaxkwa hwÿr api. Hãmri nẽ nhÿrmã akupÿn mẽ awÿr wrÿ.

²⁶ —Nã kot paj nhÿrmã man akupÿn mẽ awÿr wrÿ. Akupÿn ixwÿr xà hã arĩgrota ã koja jar pika ja kamã mẽ pa xwÿnhjaja htÿx ri tanhmã amnhĩ tomnuj to ho pa. Te amnepêm finat Noehti htĩr ri mẽ kot htÿx ri tanhmã amnhĩ tomnuj to ho pa pyrãk o koja mẽ amnhĩ nhĩpêx o pa. ²⁷ Na prem amnhĩ kaxyw Tirtũm mã hamaxpër o pa hkêt nẽ. Nẽ ãm jar pika ja kamã mẽ kot amnhĩ nhĩpêx pix kukamã hamaxpër o ri paja o ãm kôt pix mã tanhmã ri amnhĩ nhĩpêx to ho pa. Rôm nhũm Noehti gô htãm pymaj pâr raxja nhĩpêx nẽ kãm axà. Nhũm prem hã omu nẽ ãm omunh o pa nẽ tanhmã ri amnhĩ kukamã hamaxpër to hkêt nẽ. Tã nhũm nata mẽ haêr pê wrÿ. Hãmri nẽ wÿr rax o ra pika piitã hanhi nhũm mẽ piitã pikaprâr pa.

²⁸ —Akupÿn ixwÿr xà hã arĩgrota ã koja mẽ mããnẽn te amnepêm Sotõ nhõ xwÿnhjaja kot htÿx ri tanhmã amnhĩ tomnuj to pyrãk o amnhĩ nhĩpêx. Finat Rohti kormã htĩr ri mẽ kot htÿx ri tanhmã amnhĩ tomnuj to ho pata pyrãk o koja mẽ amnhĩ nhĩpêx. Na pre hte Sotõ nhõ xwÿnhjaja ãm pika ja kamã mẽ kot amnhĩ nhĩpêx pix kukamã hamaxpër o ri pa. Nẽ ãm kôt pix mã ri amnhĩ nhĩpêx o pa. Nẽ htÿx ri

amnhĩ xàpkur xà pix kukamã hamaxpêr. Nê mẽ hpur kãm ri àpênh pix kukamã hamaxpêr. Nê ri amnhĩ xujaprôr pix kukamã hamaxpêr nê axpên mã mẽmoj to wênê pix kukamã hamaxpêr. Nê amnhĩm òrkwỹ nhĩpêx pix kukamã hamaxpêr. ã na prem pika ja kamã mẽ kot amnhĩ nhĩpêx pix kukamã hamaxpêr o ri pa anhỹrja o amnhĩ kaxyw Tĩrtũm mã hamaxpêr o pa hkêt nê.

²⁹—Tã nhũm Rohti mẽ ò krĩ rũm kator mẽ nhũm Tĩrtũm krĩ nhõ xwỹnhjaja kot amnhĩ tomnuj tỳx o paja mỳrapê mẽ himex pa. Jao kaxkwa rũm mẽ hipy mẽmo hpòk kwỹ rê nhũm mẽ hkaxàr pa. ³⁰Tã akupỹn mẽ awỳr ixwrykja mẽ koja mẽ te Rohti nhõ krĩ kamã mẽ kot amnhĩ nhĩpêx pyrà nê htỳx ri amnhĩ tomnuj pix o pa.

³¹—Nê akupỹn ixwryyta ã ka mẽ anhòrkwỹ nhĩmòk ã hkrãmnhênh o akrĩ japêr nê akupỹn ixwryk kãm ixpumu. Hãmri nê akukrêx wỳr axàr nê hõ hpyr mã ajamaxpêr kêt nê. Rỳ ka mẽ apur kãm axàpênh o akuhê japêr nê akupỹn ixwryk kãm ixpumu. Hãmri nê akupỹm anhòrkwỹ hwỳr atêm mã ajamaxpêr kêt nê. Mo kaxyw kot ka kêt hwỳr têt? Kêt ãm inhmã mẽ ajapê hã akupỹn mẽ awỳr ixwryk mã ajamaxpêr o akĩnh nê ixpumunh o akuhê.

³²—Nê kêr ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tĩrtũm kapêr nhĩròp xa nê amnhĩ katut kôt Sotõta wỳr rĩt hãmri nê ã amnhĩ nhĩpêx anhỹrja mỳrapê htyk kurê kumrêx. Tã kêr ka mẽ ho uràk nê amã akukrêx rax japê xàj ixkôt amõr kaxyw anhĩtõt kêt nê.

³³—Nê kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nê. Nê mẽ akukrêx rax pix kukamã ajamaxpêr kêt nê. Koja nhỹrmã ja piitã mẽ apê hapêx pa. Mẽ ate kãm anhĩhkra karo hpar pyràk o piitã hipêx hãmri nhũm Tĩrtũm ja hã mẽ apumu nê hpãnhã nhỹrmã mẽ amã mẽmoj mex nhõr rax nê.

³⁴—Nê kot paj kamàt kãm akupỹn ixwryk japêr nhũm nhỹri mēhõ ra ixkôt amnhĩ xãm xwỹnh mẽ mēhõ kot ixkôt amnhĩ xãm kêt xwỹnh wa par kãm nõi japêr. Hãmri pa amnhĩ wỳr ra ixkôt kot amnhĩ xãm

xwỹnhta o api nhũm kot ixkôt amnhĩ xãm kêt xwỹnhta arĩ gõi nê nõ. ³⁵Rỳ pa arĩgro hã akupỹn ixwryk japêr nhũm mēnijê hõ wa hamēxkrut nê harõi kahuk o ãm japêr. Hãmri pa ra kot ixkôt amnhĩ xãm xwỹnhja ho api nhũm kot ixkôt amnhĩ xãm kêt xwỹnhja ahte arĩ harõi kahuk o xa. Hãmri nê hamaxpêr mex kêt kumrêx o xa. ³⁶Rỳ koja mẽmyjê hõ wa axkrut nê hpur kãm àpênh o ãm japêr. Pu pa amnhĩ wỳr kot ixkôt amnhĩ xãm xwỹnhta o api nhũm kot ixkôt amnhĩ xãm kêt xwỹnhta pur kãm ahte arĩ apênh o xa. Hãmri nê tee ri hkrãmnhwỳ hkukamã hamaxpêr o xa. Anê.

Nhũm pre ã Jejus hkôt mẽ pa ho mẽ pa xwỹnhjê mã amnhĩ jarênh anê. ³⁷Hãmri nhũm mẽ kuma nê kãm:

—Kwa nhỹri koja mẽmoj ã amnhĩ nhĩpêx anê? Anê.

Hãmri nhũm mẽ kãm:

—Nã koja nhỹri mẽmojja ã amnhĩ nhĩpêx anê ka mẽ omunh kurê kumrêx. Te nhỹri mẽmoj kro nê nõr nhũm nhõnhti kot omunh nê hã htor nê hpinhĩpanh nhũm mẽ kot hã omunh kurê kumrêxta pyràk. Anê.

18

Mẽ pahte Tĩrtũm mã amnhĩ jarênh rãhã ho papa hã mẽ pamã karõ

Rukre 11.5-8; mãânên Wam Tesarõn 5.17

¹Tã nhũm Jejus hkôt mẽ pa ho mẽ pa xwỹnhjê mã mẽmoj tã karõ. Mẽ kot tanhmã Tĩrtũm mã amnhĩ jarênh to hã mẽ kãm karõ. Mẽ kot xatã kãm amnhĩ jarênh o pa nê amnhĩ kaxyw kãm hamaxpêr rãhã ho pa kaxyw. No ãm hã kuxi nê tanhmã mẽ kãm hã ujarênh to nê mẽ kãm:

²—Koja nhỹri krĩ hõ kamã juistija kãm Tĩrtũm prãm nõkati. Nê mãânên kãm amnhĩ kwỳjê hprãm nõkati htã kęp juisti nê tanhmã mẽ kãm kapêr to ho hkrĩ. ³Jakamã nhũm mēhõ ni pē mjên htyk xwỹnh. Nhũm hte mēhõ xatã tanhmã kęp ò mẽmoj to ho pa. Hãmri nhũm tee ri amnhĩ tã omu nê xatã juistita wỳr mra nê kãm harê nê kãm: “Xê gài nê. Na hte pahkwỳjê hõja ixtomnuj rãhã ho pa. Xê ixtã tanhmã kãm akapêr to kê tãm inhĩpêx.” Anê. Nê xatã hwỳr mra nê amnhĩ to kuwỳ nê xatã hwỳr mra nê amnhĩ to kuwỳ. ⁴⁻⁵No nhũm kuma nê ãm kuma. Kãm hkwyjê ho ajuta hprãm kêt

jakamã ãm kuma. Tã nhũm xatã hwÿr mra. Gaa nhũm rĩ kãm mar kaga nẽ. Hãmri nẽ hamaxpër o: “Tk. Hêxta waa nẽ. Jahti na hte xatã ixwÿr mra nẽ tanhmã inhmã amnhĩ jarẽnh to. Nẽ ãm xatã ixwÿr mra. Nã na pa ra inhmã mar kagyk nẽ. E pa tokyx tanhmã nẽ kot tanhmã ho xwÿnhta mã ixkapër to. Inhmã Tĩrtũm puma kamã rÿ inhmã ixkwÿjê kaprĩ kamã pa tanhmã nẽ kãm nẽ hkêt tã kot pa anhÿr kêt nhũm amnhĩ tã inhmã harẽnh pix nẽ pa ra mar kurê ixkrã tãtãk nẽ.” Anhÿr o hamaxpër. Æ mẽ ujarẽnh kot anhÿr.

⁶—Juisti tãm hamaxpër kêt tã nhũm nija xatã hwÿr mra nẽ amnhĩ to hwÿr jakamã nhũm jatã tanhmã ho ajuta hto. ⁷⁻⁸ No kêt Tĩrtũmja. Xàn ka htem mẽmoj tã awÿ nhũm juisti punutita pyrã nẽ mẽ ama nẽ ãm mẽ ama? Nã koja ã amnhĩ nhĩpêx anhÿr kêt nẽ. Kot ka mẽmoj tã kãm amnhĩ jarẽ nhũm ama nẽ tanhmã amã mẽmoj to rÿ tanhmã amã amnhĩ nhĩpêx to. Juistita rom mẽ pakamã ukaprĩ xwÿnh na. Tã kot paj nhÿrmã akupÿn wrÿ nẽ mẽ apumu ka mẽ arĩ amnhĩ kaxyw hkôt ajamaxpër mex pẽ kãm amnhĩ jarẽnh rãhã ho ri apa pa ja hã mẽ apumu nẽ ixkĩnh tÿx nẽ. Ja na inhmã hprãm. Anẽ.

Tanhmã mẽ kot Tĩrtũm mã amnhĩ jarẽnh to hã mẽ harẽnh

Matêwre 6.5-8; mããnẽn Wam Pêtre 5.5-6

⁹ Tã nhũm Jejus mẽ kot amnhĩ to mex o hkwyjê jakrenh ã amnhĩ to jarkrar o ri mẽ pa xwÿnhjê pumu nẽ tanhmã mẽ kãm kapër to. Nom mẽ kot amnhĩ to jarkrarta ã kuxi nẽ mẽ kãm awjarẽ nẽ mẽ kãm:

¹⁰—Koja mẽhõ wa hamëxkrut nẽ Tĩrtũm mã amnhĩ jarẽnh kaxyw wa tẽ. Ja kęp Parijew nhõ xwÿnh nhũm hõja kęp mẽ õ pahĩ mã hkwyjê pẽ kãxpore hkwy jamÿnh xwÿnh. Nhũm wa Tĩrtũm mã amnhĩ jarẽnh xã hã ixkre hwÿr wa tẽn axã. ¹¹⁻¹² Hãmri nhũm Parijew nhõ xwÿnhta kumrêx tẽ nẽ nhÿri mẽ piitã mẽ noo mã Tĩrtũm mã amnhĩ jarẽ. Nẽ amnhĩ to jarkrar pẽ kãm amnhĩ jarẽnh o: “Pa Tĩrtũm. E ra ate ixpumunh mex. Na pa hte amnhĩ to mex pix o ri ixpa. Ra ate ja hã ixpumunh mex. Na pa hte kãxpore hkwy jamÿnh xwÿnh nẽ rom tãm amnhĩ nhĩpêx. Nẽ semãn piitã hã ixãpkur

kêt rãhã amã amnhĩ jarẽnh rãhã ho ixtã apkati axkrut. Nom ja pix kêt. Na pa hte mããnẽn ixãpênh pãnhã kãxpore jamÿ nẽ mẽ kot amã tanhmã amnhĩ nhĩpêx to ho pa xwÿnhjê mã hkwy nhõr o ixpa. Nẽ na pa hte ri ixãhkĩnh o ri ixpa hkêt nẽ. Nẽ nhãm mẽ kęp mẽ hprõ ho amnhĩkati ho ri ixpa hkêt nẽ. Na pa hte mẽ piitã mẽ kurom tãm amnhĩ nhĩpêx ã amnhĩ pumu nẽ ixkĩnh tÿx kumrêx. Hêxta waa nẽ. Mon pa hte ri ã amnhĩ to mex o ixpa anẽ?” Anhÿr o Tĩrtũm mã amnhĩ to jarkrar pẽ kãm amnhĩ jarẽnh o xa.

¹³—Hãmri nhũm hpãnhã mẽ kęp kãxpore hkwy jamÿnh xwÿnhta haxwÿja Tĩrtũm mã amnhĩ jarẽ. No ãm Parijew nhõ xwÿnhta rom ki hkwyjê pẽ awry nẽ ahte hipõ nẽ kãm amnhĩ jarẽ. Nẽ kãm amnhĩ jarẽnh pẽ amnhĩ tak nẽ mur nẽ kãm: “Kwa Tĩrtũm. Na pa hte amnhĩ tomnuj tÿx o ri ixpa. Nẽ ixtÿx ri amã prãm xã kuhpa hã tanhmã amnhĩ nhĩpêx to. Na pa tee ri ja hã amnhĩ pumu nẽ ixkaprĩ htÿx nẽ. Æ inhmã amnhĩ nhĩpêx anhÿr o ri ixpa hprãm kêt tã pa hte ã amnhĩ nhĩpêx anhÿr o ri ixpa. Kwa xã kot ka ixkamã axukaprĩ nẽ amnhĩ katut kôt ixte amnhĩ tomnuj rẽnh pa Tĩrtũm?” Anhÿr o kãm amnhĩ jarẽ.

¹⁴—Hãmri nhũm Tĩrtũm hamẽ wa kot kãm amnhĩ jarẽnh ma no ãm wamta ma nẽ ãm kuma. No kêt hkôt hõja ma hãmri nẽ kot kãm amnhĩ tã àhwÿr xã hkôt amnhĩ katut kôt kot amnhĩ tomnuj rẽnh pa nẽ ho hkra. Jakamã nhũm mex nẽ hkĩnh nẽ pa. Ra tãm hkrã hãmri nẽ hkĩnh nẽ ma htẽm kurê kumrêx. Æ mẽ ujarẽnh kot anhÿr. Æm hãmri na pa mẽ amã ja jarẽ. Koja mẽhõ Parijew nhõ xwÿnhta pyrã nẽ kot amnhĩ to mex xwÿnh ã amnhĩ kamnhix hãmri nẽ Tĩrtũm kot amnhĩ katut kôt kot amnhĩ tomnuj rẽnh kaxyw amnhĩ to hwÿr kêt nẽ. Koja ãm kãm amnhĩ to jarkrar pix nẽ. Jakamã koja Tĩrtũm te kot mar nẽ ãm mar pyrãk o hipêx. No koja mẽhõ kot kãxpore hkwy jamÿnh xwÿnhta pyrã nẽ tee ri tanhmã amnhĩ tomnuj to hã amnhĩ pumu nẽ hkaprĩ nẽ. Hãmri nẽ amnhĩ to Tĩrtũm wÿ nhũm kuma nẽ tanhmã ho mex to. Anẽ.

Jejus kot amnhĩ wÿr mẽhprẽjê hwÿr ã harẽnh

Matêwre 19.13-15; Makre 10.13-16

15 Tã nhũm Jejus mẽ hkôt mẽ pa ho mẽ pa xwýnhjaja arĩ pry hã Jerujarẽ hwýr mō nhũm Ijaew kwýjaja mẽ omu nẽ mẽ hkrare jamý nẽ Jejus wýr mẽ o mra. Kot mẽ hã ìhkra jaxwýr nẽ mẽ ho Tĩrtũm wýr kaxyw. Hãmri nhũm hkôt mẽ pa ho mẽ pa xwýnhjaja tee ri ja hã mẽ omu nẽ nẽ mẽ kãm kapër nẽ mẽ kãm:

—Tk. Kwa mẽ ma akupým mẽ akrata o mra nà? Mo kaxyw na ka mẽ Jejus wýr mẽ o mra? Kormã mẽ ràxre kênã. Anẽ.

16 Hãmri nhũm amnhĩ tã mẽ kuma nẽ mẽ kãm:

—Tk. Kwa nà mẽ ri inhnẽ mẽhprĩjẽ kurẽ hkêt nẽ. Kwãr mẽ mãmri ixwýr mẽ o mra. Anẽ.

Hãmri nẽ amnhĩ wýr mẽ kãm hpa ho apẽ nhũm mẽ hwýr mẽ o mra nhũm mẽ kuri kuhẽ. Hãmri nhũm hkôt mẽ pa ho mẽ pa xwýnhjẽ mã kãm:

—E mẽ jareja mẽ omu. Na htem hamakêtcati nẽ hkĩnh nẽ ri pare. Nẽ kãm amnhĩ to rũnh prãm kêt nẽ ri pa. Tã Tĩrtũm kôt mẽ kot amnhĩ nhĩpêx xwýnhjaja na htem mẽ urak nẽ kãm amnhĩ to rũnh prãm kêt nẽ ri pa.

17 —Jarejaja na htem hipêêxà nẽ katorxà wa kapër ma nẽ wa hkôt ri amnhĩ nhĩpêx mex o ri pa. Tã ixpê Tĩrtũm kot mẽ awýr inhmẽnh xwýnh kot ka mẽ amã ixkôt amnhĩ xunhwýr prãm. Hã kot kaj mẽ te ho jarejẽ kot amnhĩ nhĩpêx pyrak o amnhĩ nhĩpêx. Jao ixkapër ma nẽ ixkôt ri tanhmã amnhĩ nhĩpêx mex to ho ri apa. Anẽ.

Kàxpore rax xwýnh jarẽnh

Matêwre 19.16-30; Makre 10.17-31; mããnnẽn Wam Ximotre 6.6

18 Tã nhũm Ijaew nhõ pahihiti hõja Jejus wýr tẽ nẽ kãm kapër nẽ kãm:

—Pa? Mẽ ijahkre xwýnh maati? Kwa inhmã mẽmoj jarẽ. Tanhmã kot pa we nhỹrmã Tĩrtũm ri ixtĩr tũm nẽ ixpa kaxyw amnhĩ nhĩpêx mex to ho ri ixpa wehe? Anẽ.

19 Hãmri nhũm kãm:

—Xà ate ixpê Tĩrtũm kwý hã ixpumunh kôt na ka ixte urak nẽ amnhĩ to mex xwýnh ã ijarẽ? Tĩrtũm pix na kot amnhĩ to mex rãhã xwýnh jakamã kot kaj ã ijarẽnh anhýr jao ixpê Kra hã ijarẽ. Nẽ urak nẽ ixte amnhĩ to mex xwýnh ã ijarẽ. Nà xàn ka ãm atýx ri amnhĩ krã hkôt ã ijarẽnh anẽ?

20 —Tĩrtũmja mex o mex xwýnh jakamã kot kaj amã nhỹrmã kuri atĩr tũm nẽ apa hprãm hãmri nẽ ra kot mẽmoj tã mẽ amã karõ xà hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpẽn pẽ axàhkĩnh hkêt nẽ.

Nẽ mẽ axpẽn par kêt nẽ.

Nẽ mẽ axpẽn to axêx o ri apa hkêt nẽ.

Nẽ mẽ axpẽn pẽ aprõ ho amnhĩkati hkêt nẽ.

Nẽ mẽ anhĩpêêxà mẽ akatorxà wa hã apijaãm pẽ wa kutã anojarêt pix o ri apa.

E kot kaj amã nhỹrmã Tĩrtũm kuri atĩr tũm nẽ apa hprãm hã kêr ka ã amnhĩ nhĩpêx anhýr o ri apa. Anẽ.

21 Nhũm pre ã Jejus kãm kapër anẽ nhũm kuma nẽ kãm:

—Kwa ixprĩre ri ra ã ixte amnhĩ nhĩpêx anhýr o ri ixpa kênã. Nom ixte ixtĩr tũm nẽ ixpa kaxyw kormã ixte tãm kêt pyrak. Anẽ.

22 Hãmri nhũm Jejus kãm:

—Nà kormã mẽmoj pyxire nẽ arĩk. Na ka amã akukrêx rax japê htýx o Tĩrtũm jakre. Jakamã kêr ka ma akupým tẽ nẽ akukrêx o wẽnẽ hpa nẽ hpãnhã kàxpore jamý hãmri nẽ ma mẽ kêp amrakati xwýnhjẽ mã õr pa. Hãmri nẽ rĩ akupýn ixwýr tẽ nẽ ixkôt apa ho apa. Anẽ.

23 Hãmri nhũm kuma nẽ tee ri amnhĩ kukamã hamaxpër. Kãm kukrêx rax japê nẽ kãm ìhkra karo hprãm kêt nẽ. Jakamã tee ri Jejus kot ã kãm hã karõ anhýrja ma nẽ awjanã nẽ ma akupým tẽ. 24 Hãmri nhũm tee ri ja hã omu nẽ hã mẽ kot mar xwýnhjẽ mã kapër nẽ mẽ kãm:

—Hêxta waa nẽ. Kojã mẽ hikukrêx rũnh xwýnhjaja ohtõ nẽ kãm mẽ hikukrêx japê xàj Tĩrtũm mẽ wa ixri htĩr tũm nẽ pa ho papa hkêt nẽ. Wa ixte amnhĩ nhĩpêxja mẽ kêp hihtýx. 25 Na htem kãm hikukrêx rax mã ìhkra karo hprãm kêt rãhã tee ri kãm Tĩrtũm kôt amnhĩ nhĩpêx prãm kaprý. Te ho mẽhõ kot menh kagõ hã hkre nẽ kãm kagõ katõk prãm kêt rãhã kãm guhkrax kãm àr prãm kaprýta pyrak. Anẽ.

Nhũm pre ã Jejus mẽ kãm kapër anẽ.

26 Hãmri nhũm mẽ kuma nẽ tee ri amnhĩ kukamã hamaxpër nẽ kãm:

—Kwa nom mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ

ixpiitã nhÿrmã war ari ixtÿr tÿm nÿ ixta ho ixta hkÿt nÿ nã? Anÿ.

²⁷ Hãmri nhÿm mÿ kãm:

—Nã kot kaj mÿ amnhÿ krã hkÿt mÿ amã mÿ akukrÿx japÿja mã anhÿrer kÿt nÿ. Tÿrtÿm pix na hte ã mÿ kot amnhÿ nhÿpÿx anhÿr kaxyw tanhmã mÿ hkrã hto nhÿm mÿ kãm mÿ hikukrÿx japÿ htÿx kÿt nÿ. Jao mÿ kÿp Tÿrtÿm mÿ wa ixri htÿr tÿm nÿ mÿ pa ho pa mã xwÿnh. Anÿ.

²⁸ Hãmri nhÿm Simãw Pÿtre kãm:

—Kwa Pahiti no mÿ pajaja? Na pa prem agryk ã mÿmoj piitã hkaga hpa nÿ akÿt ixta ho ixta. Jakamã kot paj mÿ nhÿrmã war ari ixtÿr tÿm nÿ ixta ho ixta nã? Anÿ.

²⁹ Hãmri nhÿm kãm:

—Tÿ. Nã ka mÿ atõ inhmã tanhmã amnhÿ nhÿpÿx to ho apa kaxyw akwÿjÿ re nÿ ma inhmã tanhmã amnhÿ nhÿpÿx to ho ri apa. Anhÿrkwyÿ re rÿ atõ rÿ atõx rÿ aprõ nÿ akrajÿ re. Rÿ akatorxã nÿ anhÿpÿÿxã war are. Rÿ akukrÿx piitã rer pa hãmri nÿ ma ixkapÿr o mÿ piitã mÿ ahkre ho ri mÿ hkÿt apa. ³⁰ Hã kot paj ja hã mÿ apumu nÿ mÿ ato mex rax nÿ. Hãmri ka mÿ ma nhÿhÿm apa nÿ nhÿri mÿ kãm ixkapÿr jarÿnh o ri mÿ hkÿt apa nhÿm mÿ kot mÿ amar xwÿnh kwÿjaja mÿ ama nÿ ra kãm mÿ akÿnh nÿ. Nÿ ra mÿ ate akwÿjÿ rer par tã nhÿm mÿ tãmjaja te mÿ apÿ mÿ hkra rÿ mÿ htõ rÿ mÿ htõx pyrãk o mÿ anhÿpÿx nÿ tanhmã mÿ ato mex to ho pa. Hãmri ka mÿ nhÿrmã ty nÿ ma Tÿrtÿm mÿ wa inhõ krÿ hwÿr api hãmri nÿ wa ixkuri amex kumrÿx nÿ atÿr tÿm nÿ apa ho apa. Anÿ.

Nhÿm pre ã Jejus Simãw Pÿtre mÿ hkwÿjÿ mã kapÿr anÿ.

Jejus kot axte htyk kukamã amnhÿ jarÿnh Matÿwre 20.17-19; Makre 10.32-34

³¹ Tã nhÿm Jejus mÿ kot ÿ hã kapÿr jarÿnh o mÿ pa xwÿnh pÿ 12jaja mÿ hkwÿjÿ pÿ mÿ ho kato. Nÿ nhÿri mÿ hkãx ã mÿ o xa nÿ tanhmã mÿ kãm amnhÿ jarÿnh to nÿ mÿ kãm:

—Amnepÿm Tÿrtÿm nhÿ hã kapÿr jarÿnh xwÿnhjaja na prem ixkukamã tanhmã mÿ kot inhÿpÿx to hã ijarÿ nÿ ixtã kagã. Tã pu mÿ ra Jerujarÿ hwÿr mÿ. Kamã koja mÿ tanhmã ixta rax nÿ. Ra mÿ kot ixkukamã ijarÿnh nÿ ixtã kagã xã hkÿt koja mÿ ixta

anÿ. ³²⁻³³ Koja mÿ kãm ixkurÿ xwÿnhjaja ixpynÿ nÿ Rõm nhõ xwÿnhjÿ nhõ pÿristi hwÿr ixta tÿ nÿ mÿ kãm ixta hÿx nhÿm mÿ kuma nÿ mÿ mar xã hkÿt tanhmã inhÿpÿx to. Nÿ mÿ hkwÿjaja ixtã hpÿr o axkÿ nÿ akunha. Nÿ mÿ hkwÿjaja ixta kapÿr punuj nÿ ijapryÿ nÿ ixtã argõx rÿ nÿ ixtak. Hãmri nÿ ixpi. ã koja mÿ inhÿpÿx anÿ. Nom kot paj ãm ixtyk ã apkati axkrunÿpxi nhÿm Tÿrtÿmjaja akupÿm ixta ixtÿr. Anÿ.

³⁴ Hãmri nhÿm mÿ kuma nÿ tee ri htyk nÿ akupÿm htÿrja kukamã hamaxpÿr no ãm hprÿ hã hkÿt hamaxpÿr kÿt nÿ.

Jejus kot no hkre xwÿnh o mex ã harÿnh Matÿwre 20.29-34; Makre 10.46-52

³⁵ Tã nhÿm Jejus mÿ kormã Jerujarÿ hwÿr Jerikoja tÿp o mÿ. Hãmri nhÿm pry nhÿhkjÿ hã no hkre xwÿnhjaja ãhwÿr o nhÿ. ³⁶ Hãmri nÿ amnhÿ wÿr mÿ mrar ma. Mÿ ohtõ nÿ Jejus kÿt mÿ mrar xwÿnhjÿ mrar ma nÿ mÿ kãm:

—Kwa mÿmo ri? Mÿmoj wÿr na ka mÿ axohtõ nÿ mra? Anÿ.

³⁷ Hãmri nhÿm mÿ kãm:

—Nã Jejus pÿ Najare nhõ xwÿnh kÿt na pa mÿ mÿ. Anÿ.

³⁸ Hãmri nhÿm mÿ kuma nÿ kãx pÿ Jejus mã kapÿr nÿ kãm:

—Pa Jejus? Apÿ mÿ inhõ Pahiti mex na ka. Te apÿ amnepÿm anhÿgÿt pahiti Tawi kot amnhÿ nhÿpÿx pyrãk. Jakamã kwa ixkamã axukaprÿ nÿ akupÿm ixta mex kÿt wehe. Ixte amnhÿ kaxyw akÿt ijamaxpÿr xwÿnhjÿ hõ na pa. Anÿ.

³⁹ Hãmri nhÿm Jejus kukamã mÿ mrar xwÿnhjaja tee ri kuma nÿ kãm:

—Tk. Kwa akapÿr kÿt nÿ nhÿ nã. Anÿ.

Tã no nhÿm ãm mÿ kuma nÿ xatã amnhÿ to hwÿr o nhÿ. Kãx pÿ kãm kapÿr o nhÿ.

⁴⁰ Hãmri nhÿm Jejus kuma nÿ xa nÿ amnhÿ wÿr hã karõ nhÿm mÿ hpa hã kupy nÿ hwÿr o tÿ nhÿm kãm:

⁴¹ —Pa mo na? Tanhmã kot pa ato? Anÿ.

Nhÿm kãm:

—Nã akupÿm inhmã ixrÿt mex prãm. Anÿ.

⁴² Hãmri nhÿm kãm:

—Tõe. Nã ra ate amnhÿ kaxyw inhmã ajamaxpÿr tÿx jakamã kot kaj akupÿm ri rÿt. Anÿ.

⁴³ Hãmri nhÿm akupÿm rÿt mex kurÿ kumrÿx nÿ ja hã amnhÿ pumu nÿ hkÿnh tÿx

ně. Hāmri ně ma Jejus kôt Tirtūm mā mex o mex ā harēnh o mẽ hkôt tě. Hāmri nhūm mẽ kot hā omunh xwýnhjaja haxwýja Tirtūm mā mex o mex ā harēnh o Jejus kôt mō.

19

Jakew kām Jejus pumunh prām ā harēnh Rukre 3.8, 3.12-13

¹ Tā nhūm Jejus arī Jerujarē hwýr mō ně Jeriko hwýr pōj. Hāmri ně krī kahti hkôt pry hā mō. ² Nhūm mẽ ra hkôt htu rax ně hkôt omunh o mō. Jakamā nhūm Jakew pē Rōm nhō pahi mā kwýjē pē kàxpore hkwý jamýnh xwýnhjē krāhtūm xwýnhja. Na pre hikàxpore rax ně. ³ Tā haxwýja kām Jejus pumunh prām ně. Nom ām hakooti ně hprīhti jakamā tee ri kot omunh kaxyw amnhī nhīpēx nhūm mẽ kēp àmnār rax ně. ⁴ Hāmri nhūm ra hamaxpēr ně ma kukamā hprōt ně tě ně nhýri pry mýri pī xām pumu ně hā api ně kutēp ajēt. Hāmri nhūm Jejus mō ně hapa. ⁵ Ně kànhmā rīt ně omu ně kām:

—Pa Jakew. E kwa tokyx tēn wrý pa ma akôt anhōrkwý hwýr tě ně ari amnhīm hikra. Aně.

⁶ Hāmri nhūm kuma ně hkīnh ně. Ně wrýk kurē kumrēx ně ma amnhī kôt ně o tě. ⁷ Hāmri nhūm mẽ kot omunh o kuhē xwýnhjaja tee ri ja hā omu nhūm ja mẽ kēp omnuj ně nhūm mẽ axpēn mā harēnh o:

—Tk. Kwa nà. Jakew kot amnhī tomnuj xwýnh tā nhūm Jejus ma hkôt tě ně kuri pōj. Aně.

⁸ Hāmri nhūm wa ōrkwý hwýr axà ně nhý nhūm Jakew Jejus mā amnhī jarēnh o:

—E. Nà ra ixte pahihiti mā kàxpore jamýnh xwýnhhta na pa pre hte ho prēs jakre ně amnhīm hamýnh rax ně. Tā kot paj akupým mẽ kām ōr pa. Na pa pre hte mẽ hkwýjē pē ho 10 ně hamý. Tā kot paj hipy ho 40 ně kurē ně akupým mẽ kām ho ixpigràn pa. Ā kot paj mẽ hipēx aně. Ně ixkàxpore jakrēx kot paj ho axkjē ně mẽ kēp amrakati xwýnhjē mā ho ixpigràn pa. Aně.

⁹ Hāmri nhūm kuma nhūm ja kām mex ně. Jakamā nhūm kām:

—Nà ām hāmri. Ate pahkukamā panhīgēt Apraāw pyrā ně jarāhā ate amnhī tomnuj kaga jakamā na ra jarāhā anhōrkwý hwýr mẽ mex xà axà. Kojā Tirtūm jarāhā amnhī

katut kôt ate amnhī tomnuj rēnh pa ně axte kām hamaxpēr kēt ně. ¹⁰⁻¹¹ Mě ate amnhī tomnuj xwýnhjē hwýr na pre Tirtūm inhmē pa wrý. Te nhýri mẽ apikunor nhūm ixte mẽ ajapēr o ixpa kaxyw Tirtūm kot mẽ awýr inhmēnh nhūm ixwrýk ně nhýri ixte mẽ ajapēr o ixpa ně mẽ amā ixkator ně ixkīnh ně ma akupým hwýr mẽ ato inhmōrta pyrāk. Aně.

Mě pahte Tirtūm mā tanhmā amnhī nhīpēx to

Matēwre 25.14-30

Hāmri nhūm mẽ ohtō ně Jejus mar o hkôt Jerujarē hwýr mra. Na prem htýx tanhmā kot amnhī nhīpēx to hā hkamnhīx o hkôt mō ně axpēn mā:

—E ma pu mẽ hkôt. Kojā Jerujarē hwýr pōj hāmri ně kēp mẽ pahpē Ijaew nhō pahi ně mẽ pahto amnhīptār kurē kumrēx. E kwa ma pu mẽ hkôt. Aně.

¹² Nhūm Jejus mẽ hamaxpēr kôt mẽ omunh mex ně. Jakamā kot mẽ piitā mẽ ho amnhīptār xà hā arīgro hā mẽ kām amnhī jarēnh kaxyw. Kormā Jerujarē hwýr ahtēp kēt ri mẽ kām amnhī jarēnh kaxyw. Nom hprī hā mẽ kām hā amnhī jarēnh kēt ně. Ām amnhī tā kuxi ně mẽ kām awjarē ně mẽ kām:

—Kojā nhýri krī hō kamā mēhō myja. Kot amnhī to rax o hkwýjē jakrenh xwýnhja. Ně krī hō kamā krī piitā hkôt pahi nhō pahihiti hāmri harēnh ma ně amnhī wýr kuwý. Kot ma hwýr mōr nhūm ō krī kamā ně määnen krī hkwý kamā kēp mẽ ō pahi kaxyw kot ām kaxyw nhūm hwýr nojarēt.

¹³ Hāmri ně amnhī wýr kām mẽ àpēnh xwýnhjē ho 10 ně tanhmā mẽ hā karō hto. Nhūm mẽ hwýr mra nhūm mẽ kām amnhī jarē ně mẽ piitā mẽ kām kàxpore hkwý gō. Ahpýnhā mẽ kām hpýnh ně kugō ně mẽ kām: “E ota ixkàxpore hkwýta. Kot kaj mẽ ixkutēp tanhmā ri inhmā ho rax to. Kēr pa mẽmo arīgro hā akupýn mō kê ra ixahā inhmā ho ohtō ně pa hamý.” Anhýr o mẽ kām kapēr hāmri ně ma mō. ¹⁴ Hāmri nhūm ō krī nhō xwýnhjaja ra kēp mẽ ō pahi kaxyw harēnh ma nhūm ja mẽ kēp omnuj ně. Ně mẽ kām hkīnh kēt jakamā ma krī hō kamā kot mẽ kaxyw ām xwýnhhta wýr hkwý rē nhūm mẽ ma hwýr mra ně hwýr pōj. Hāmri

ně kot mẽ kaxyw ãm mã xwỳnhta pumu nẽ kãm: “Pa. E ot pa mẽ awỳr mra. Kwa na ka xep ra mẽ ixkaxyw mẽ inhĩõja xãm kaxyw. Kwa nà mẽ inhmã jahti hkĩnhti hã. Kwa mẽ ixkaxyw ãm kêt nẽ nà?” Anhỳr o kãm kapẽr.

¹⁵ —Tã no nhũm ãm mẽ kuma nẽ ãm mẽ kuma nhũm mẽ awjanã nẽ mã akupỳm mra. Hãmri nhũm pahija mẽ kaxyw mẽ kãm hkĩnh kêt xwỳnhta xãm nhũm ma akupỳm õ krĩ hwỳr mõ. Mõõ nẽ ra põj hãmri nẽ amnhĩ wỳr kãm mẽ àpênh xwỳnhjê hã karõ nẽ mẽ kãm: “E no ixte mẽ amã kàxpore nhõr xwỳnhta? Tanhmã na ka prem ixkutêp inhmã ho rax to? E mẽ inhmã agõ pa omu.” Anẽ.

¹⁶ —Hãmri nhũm wamta kãm: “Ota akàxpore ate inhmã õr xwỳnhta. Na ka pre inhmã ho pyxi nẽ agõ pa kupy nẽ ho mẽmo hy hkwỳ japrõ nẽ hkre. Nhũm ô pa mẽ kãm ho wẽnê ho ri ixpa nẽ hpãnhã kàxpore jamỳ nẽ hipy amã kurẽ nhũm ra kêp 10. Ota. E amỳ.” Anẽ.

¹⁷ —Hãmri nhũm kuma nẽ hkĩnh nẽ. Hãmri nẽ kãm: “Nà ãm hãmri na ka ã inhmã ho rax anẽ. Ixte amã ho pyxi nẽ õr tã ka pre inhmã hamãr mex nẽ nhũm kànhmã axkamẽ nẽ ra kêp 10. Tã ra ixpê krĩ hkwỳ kamã mẽ õ pahi jakamã kot ka inhmã krĩ ho 10 nẽ inhmã hamãr o ri apa. Jakamã kwa mãmrĩ amnhĩm kàxporeta o arĩk.” Anẽ.

¹⁸ —Hãmri nhũm hpãnhã hõja hwỳr tẽ nẽ kãm: “E ota akàxporeta. Na pa pre ho mẽmo hy hkwỳ japrõ nẽ hkre nhũm ô pa mẽ kãm ho wẽnê nẽ hpãnhã kàxpore jamỳ nẽ hipy amã kurẽ nhũm ra kêp 5. Tã ota. E amỳ.” Anẽ. ¹⁹ Hãmri nhũm kuma nẽ kãm: “Nà ãm hãmri. Hãmri na ka ã inhmã ho rax anẽ. Jakamã kot kaj hpãnhã inhmã krĩ ho 5 nẽ ho amnhĩptàr o apa. E mãmrĩ amnhĩm kàxporeta o arĩk.” Anẽ.

²⁰⁻²¹ —Hãmri nhũm hpãnhã hkõt hõta tẽ. Nom hkwỳjê hkĩnhã õ patrãw mã tanhmã kàxpore ho rax to hkêt nẽ. ãm tanhmã hamaxpêr punuj to nẽ htỳx ri kot kêp ho õxỳ nẽ amnhĩm piitã hamỳnh par nẽ akupỳm kãm hkwỳ nhõr kêt ã hkamnhĩx. Jakamã tanhmã kãm ho rax to hkêt nẽ. ãm hkupu nẽ o tẽ nẽ nhỹri kutêp kuxi. Hãmri nhũm õ patrãw amnhĩ wỳr hã karõ nhũm hwỳr tẽ nẽ amnhĩ nẽ kãm kapẽr punuj nẽ kãm: “Tk. Ota akàxporeta. Ixte amã tanhmã

ho rax tore hã. Ixte amã ho rax ronhỹx ka amnhĩm piitã hamỳnh pa nẽ akupỳn inhmã hkwỳ nhõr kêt nẽ. Rỳ ixte tanhmã apê homnuj to ronhỹx ka hã inhmã akir. Jakamã na pa tanhmã amã ho rax to hkêt nẽ. ãm hkupu nẽ o tẽ nẽ ho amũxu nhũm arĩ akutêp hikwỳ. Tã ota.” Anhỳr o amnhĩ nẽ õ patrãw mã kapẽr punuj nẽ. ²²⁻²³ Hãmri nhũm tee ri amnhĩ tã kuma. Kot amnhĩ to mex xwỳnh nẽ kãm mẽ àpênh xwỳnhjê ho mex o pa xwỳnh tã ã kãm àpênh xwỳnh kot kãm kapẽr anhỳrja ma nẽ amnhĩ tã kamã gryk nẽ. Hãmri nẽ kãm: “Tk. Kwa xà ã ixte amnhĩ nhĩpêx anhỳr? Nà ixte ã amnhĩ nhĩpêx anhỳr kêt. ã ixte amnhĩ nhĩpêx anhỳr nhũm amã ixpuma ronhỹx ka pre amã ixpuma xàj ixkàxporeta py nẽ ixwakre kamã amnhĩ krã hkõt tanhmã inhmã ho rax to. Tã nhỹx pa pre ra akupỳn awỳr tẽ nẽ hamỳ. Nà na ka ã ijarênh anhỳr o axêx nẽ amnhĩ krã hkõt tanhmã inhmã ho rax to hkêt nẽ. Mỳrapê kot paj atomnuj tỳx nẽ ka rĩ amnhĩ pumu. Pêr ãm ajamaxpêr punuj.”

²⁴ —Nhũm pre ã kãm kapẽr anẽ hãmri nẽ mẽ kot mar o kuhê xwỳnhjê mã kãm: “E mẽ atõ kêp kàxpore py nẽ wam kot ho 10 nẽ hamỳnh xwỳnhta mã agõ.” Anẽ. ²⁵ Hãmri nhũm mẽ tee ri kuma nhũm ja mẽ kêp omnuj nhũm mẽ kãm: “Kwa nà ra hikàxpore rax kênã. Ra ate kãm ho 10 nẽ õr kênã.” Anẽ. ²⁶ Hãmri nhũm mẽ kãm: “ỹỹ nom tãã. Mãmrĩ kãm agõ. Koja mẽhõ inhmã àpênh mex pa amnhĩ tã omu nẽ kot inhmã àpênh mexta pãnhã ho mex nẽ. No koja inhmã àpênh mex kêt nẽ pa tee ri ja hã omu nẽ ho mex kêt nẽ. E mãmrĩ kãm agõ.” Anẽ. ²⁷ Hãmri nẽ hpãnhã mẽ kãm: “E hpãnhã mẽ kãm ixprãm nõkati xwỳnhjaja. Ixte mẽ ho amnhĩptàr mã tã mẽ kãm ixprãm nõkati xwỳnhjaja. Mẽ ma mẽ hwỳr mra nẽ mẽ ho akuprõ nẽ akupỳn amnẽ ixwỳr mẽ o mra nẽ inhnoo mã mẽ himex pa.” Anẽ. ã mẽ ujarênh kot anhỳr. Anẽ.

Nhũm pre Jejus ã mẽ kãm ujarênh anẽ. Te tãm kêp patrãwta pyrã nẽ ã amnhĩ jarênh anẽ. Mẽ kot tanhmã amnhĩ nhĩpêx to ho pa hã mẽ omunh xà hkõt tanhmã mẽ hipêx to hã amnhĩ jarẽ.

*Jejus kot Jerujarẽ hwỳr àr ã harênh
Matêwre 12.1-11; Makre 11.1-11; Juãw*

12.12-19

²⁸ Nhũm Jejus kormã Jerujarẽ hwỳr mō. ²⁹ Hãmri nẽ ra Petake mẽ Petãn wa htêp o mō. Hixêt pê Oriwêhti kahti ri na krĩ wa xa. Jakamã nhũm Jejus hkôt mẽ pa ho mẽ pa xwỳnh wa ho axkrut nẽ amnhĩ kukamã wa kumẽ. ³⁰ Nẽ wa kãm:

—E. Wa ma krĩ mũj wỳr mẽ ixkukamã wa tẽ. Nẽ wa hwỳr pøj nẽ nhỹri jumẽnre nyw mã ê nẽ âm ata pumu. Kormã mẽ kot hã hkrĩ hkêt xwỳnhhta. Ka wa omu nẽ kãm ê xà hpôt nẽ man akupỳn ixwỳr o tẽ. ³¹ Nhũm mẽhõ ja hã war apumu nẽ hã tanhmã war amã kapêr to ka wa kãm ã ijarẽnh anẽ nẽ kãm: “Mẽ panhõ Pahihti na hã karõ pa wa hwỳr tẽ.” Anhỹr o wa kãm ijarẽ. E wa ma hwỳr tẽ. Anẽ.

³² Hãmri nhũm wa kuma nẽ ma hwỳr htẽm kurẽ kumrẽx. Nẽ wa krĩm pøj nhũm Jejus kot wa kãm harẽnh xà hkôt jumẽnreta pumu. ³³ Hãmri nẽ kãm ê xà hpôt o xa nhũm õ dõnjaja mra nẽ hã wa omu nẽ wa kãm:

—Tk. Kwa mo kaxyw na ka wa ri mẽ ixpẽ mẽ ixkrit mã ê xà pôt o wa xa? Kwa xà kot kaj wa mẽ ixpẽ ho ahkĩ nà? Anẽ.

³⁴ Hãmri nhũm wa mẽ kãm:

—Nà mẽ panhõ Pahihti na wa inhmã anẽ pa wa tẽ. Wa ixte ma akupỳm kutã ho inhmõr kaxyw. Anẽ.

Hãmri nhũm mẽ wa kuma nẽ wa kãm:

—Tõe. Nà wa mãmri ma kãm o tẽ. Anẽ.

³⁵ Hãmri nhũm wa ma akupỳm Jejus wỳr o tẽ. Hãmri nẽ kaxyw amnhĩ xẽ hkwỳ hopøj nẽ kãm ho hkô kahty nẽ kãm ho htỳx nẽ o xa nhũm hã nhỹ nẽ mō. ³⁶ Kormã Jerujarẽ hwỳr hixêt ã àpir o mō. Nhũm mẽ kot omunh o mrar xwỳnhjaja hkĩnh nẽ ma hkukamã kot pry ho mex kaxyw amnhĩ xẽ hkwỳptyr o mō. ³⁷ Hãmri nhũm mẽ hixêt ã api nẽ kormã ahpar mã wrỳk o mō. Hãmri nhũm Jejus kôt mẽ pa ho pa xwỳnhjaja kàx pê Tĩrtũm mex o mex ã harẽnh o hkôt mō. Ra mẽ kot hkôt pikamẽnh ry nẽ kot mẽ kãm aa mẽmoj pumunh kêt kwỳ ho anhỹr rax ã omunh jakamã hkĩnh nẽ nẽ Tĩrtũm mex o mex ã harẽnh o hkôt mō. ³⁸ Nẽ harẽnh o: E ota Tĩrtũm kot mẽ pahwỳr mẽnh xwỳnhhta na ra pøj.

ãm hãmri na mẽ pahwỳr wrỳ. Na mex kumrẽx.

Kêp mẽ panhõ Pahihti mex na. Âm hãmri na pre Tĩrtũm mẽ pahwỳr kumẽ.

Tĩrtũmja mex kumrẽx. Mex o mex. Kukwak ri pix mã na pu htem pajamakêtkati nẽ paxàmnhĩx ri papa rãhã ho papa.

Anhỹr o Jejus kôt harẽnh o mō. Ra kot mẽ ho amnhĩptar kurẽ kumrẽx ã hkamnhĩx jakamã hkĩnh nẽ hkôt ã kapêr o mõr anẽ.

³⁹ Hãmri nhũm Parijew nhõ xwỳnh kwỳjaja mẽ hkôt mra nẽ tee ri mẽ kuma hãmri nẽ Jejus mã kãm:

—Kwa Jejus. Mẽ kãm anẽ kê mẽ anhĩkrẽ nà? Anẽ.

⁴⁰ Hãmri nhũm mẽ kãm:

—Tk. Nà kot paj mẽ kãm anhỹr kêt nẽ. ã mẽ kapêr anhỹrja na inhmã mar hprãm. Kwãr mẽ mãmri Tĩrtũm mã mex o mex ã harẽnh o ixkôt mō. Kot mẽ anhỹr kêt nhũm ra pikap kẽn nhĩkwỳ xwỳnhja tee ri ja hã mẽ omu hãmri nẽ tãm tanhmã amnhĩ nhĩpêx to nẽ mẽ hpãnhã tãm Tĩrtũm mã mex o mex ã harẽnh o hikwỳ. Jakamã kwãr mẽ mãmri kapêr anẽ. Anẽ.

Jejus tee ri kot Jerujarẽ hkukamã hamaxpêr ã harẽnh

Rukre 23.27-31

⁴¹ Nhũm mẽ kormã Jerujarẽ hwỳr hpõx o mō. Kormã hixêt rũm ahpar mã hwỳr wrỳk o mō. Hãmri nhũm Jejus amỳm amnhĩ hkukamã Jerujarẽ nhõ xwỳnhjê pumunh o mō nẽ mẽ hkukamã hamaxpêr o hkaprĩ nẽ. Hãmri nẽ hkaprĩ xàj mỳr o mō. ⁴² Hãmri nẽ te kot mẽ kuri mẽ omunh o ri pa pê mẽ kãm kapêr pyrak o mẽ kãm kapêr nẽ mẽ kãm:

—Hêxta waa nẽ Jerujarẽ nhõ xwỳnhjaja. Kot kaj mẽ amex kêt nẽ. Mẽ ate amnhĩ kukamã axàhpumunh mex ronhỹx ka mẽ ra mẽ kãm mẽ akurẽ xwỳnhjê pumaj ixkôt amnhĩ xunhwỳr kurẽ kumrẽx nhũm mẽ tee ri tanhmã mẽ ato mã. Ka mẽ ra ixkukwak ri amex nẽ ajamakêtkati nẽ akĩnh nẽ ri apa ho apa. ⁴³⁻⁴⁴ Tĩrtũm tãm kot mẽ awỳr inhmẽnh tã ka mẽ amã ixprãm kêt nẽ. Jakamã koja nhỹrmã mẽ kãm mẽ akurẽ xwỳnhjaja mẽ awỳr mra nẽ mẽ anhõ krĩm hipok pa. Hãmri ka mẽ amnhĩ wỳr mẽ omu nẽ tee ri ajapõx kaxyw nhũm mẽ awỳr agjẽ nẽ mẽ anhĩmex pa nẽ mẽ anhõ krĩja grãnh pa. Nẽ ahpỳnhã ri mẽ anhõrkwỳ grãnh pa. ã koja mẽ mẽmoj piitã grãnh par anẽ. Anẽ.

*Jejus kot Tirtũm nhõrkwỹ hwỳr àr ã harẽnh
Matêwre 21.12-17; Makre 11.15-19; Juãw
2.13-22*

⁴⁵⁻⁴⁶ Tã nhũm Jejus Jerujarẽ hwỳr axà nè jumẽnre rũm wrý hãmri nè ma Tirtũm mã amnhĩ jarẽnh xà hã ixkreja wỳr tẽ. Hãmri nè hwỳr axà nè tee ri kamã mẽ pa xwỳnhjê pumunh o xa. Nhũm mẽ ra axtem nè môx nè ôwêhti nè tuuti ho wẽnê ho kuhê. Mẽ kot haprôr nè Tirtũm mã hpar nè kãm òr pê kãm amnhĩ jarẽnh kaxyw mẽ kãm ho wẽnê ho kuhê. Nẽ axtem nè mẽ kãm hã ohtô rax kãm mẽ kãm ho wẽnê. Hãmri nhũm Jejus mẽ hwỳr axà nè tee ri mẽ omu mẽ kãm akir nè mẽ kãm:

–Tk. Kwa nà. Tirtũm kapër ã kagà htũm kot òrkwỹ jarẽnh kot:

Inhõrkwỹja ãm mẽ ate inhmã amnhĩ jarẽnh xà hã ixkre pix kaxyw na.

Anhỹr o kot harẽnh tã ka mẽ axtem nè kamã ã amnhĩ nhĩpêx anhỹr o apa. E mẽ ajapôj nè ma ajapêx tokyx anẽ.

Anhỹr o mẽ kãm kapër hãmri nè ixkre nè mẽ kator nhũm mẽ ma hapêx pa.

⁴⁷ Tã nhũm Jejus apkati mẽ Tirtũm mã amnhĩ jarẽnh xà hã ixkreja wỳr mra nè kamã mẽ ahkre ho hkrĩ. Hãmri nhũm mẽ ò patre krãhtũm mẽ Tirtũm kapër tũm o mẽ ahkre xwỳnhjê mẽ mẽ kot amnhĩ to rũnh xwỳnhjaja kot mẽ ahkre ma nhũm ja mẽ kêp omnuj nè nhũm mẽ kãm hpĩr prãm nẽ. ⁴⁸ Nom nhũm amarĩ mẽ pa xwỳnhjaja mẽ kurom kãm mar prãm nè akryk mar o kuhê. Jakamã nhũm mẽ tee ri ja hã mẽ omu nè tanhmã mẽ kot hpĩr to hkukamã hã axpên ma.

20

*Mêhõ nhỹ hã Jejus kot mẽ ahkre hã
harẽnh*

Matêwre 21.23-27; Makre 11.27-33

¹ Nhũm arĩgro hõ hã nhũm Jejus kê axte Tirtũm mã amnhĩ jarẽnh xà hã ixkreja wỳr axà nè mẽ ahkre ho nhỹ. Tanhmã mẽ kot amnhĩ nhĩpêx to nè nhỹrmã Tirtũm mẽ wa kuri htĩr tũm nè pa hã mẽ kãm kapër o nhỹ. Hãmri nhũm Ijaew nhõ pahijê mẽ mẽ kot Tirtũm kapër tũm o mẽ ahkre xwỳnhjê mẽ mẽ ò patre krãhtũmjaja hêx rom mar o kuhê. ² Hãmri nè kãm:

–Kwa mẽ inhmã amnhĩ jarẽ. Mêhõ nhỹ hã na ka hte ã amnhĩ nhĩpêx anhỹr o ri apa? Na ka hte akupỹm mẽ ho mex o apa nè tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anẽ nà? Anẽ.

³ Hãmri nhũm mẽ kãm:

–Nà ixkumrêx kot paj mẽmoj tã mẽ akukja. Ka mẽ inhma nè inhmã harẽ pa rĩ kormã tanhmã mẽ amã amnhĩ jarẽnh to.

⁴ Finat Juãw Paxisja ã kot paj mẽ akukja. Mêhõ nhỹ hã na pre mẽ hkrã kumrãr o pa? Xà amnhĩ krã hkôt nà xà Tirtũm nhỹ hã? E mẽ atõ inhmã harẽ. Anẽ.

⁵⁻⁶ Hãmri nhũm mẽ kuma nè tee ri kot tanhmã kutã kãm harẽnh to hkukamã hamaxpêr nè axpên mã:

–Kwa tanhmã kot puj mẽ kãm harẽnh to? Jar mẽ kot mar xwỳnhjaja na htem kêp Tirtũm nhỹ hã kapër jarẽnh o pa xwỳnh ã harẽnh o pa. Tã kot puj mẽ kãm kot amnhĩ krã hkôt mẽ hkrã kumrãr o pa hã harẽ nhũm mẽ tee ri mẽ pama nè mẽ pakamã gryk tỳx nẽ. Nẽ mẽ paxêx rom mẽ pahte kãm pakapêr ã mẽ pahpumunh kurê kumrêx nè kên o mẽ pahtak o mẽ panhĩmex. Nom kot puj mẽ kãm Tirtũm nhỹ hã mẽ hkrã kumrãr ã harẽ nhũm mẽ pamã kapêr o: “ã kot anhỹr kênã na ka prem kapêr ma nè ra ixkôt amnhĩ xunhwỳr kêt nẽ?” Anẽ. Nà kot puj mẽ kãm tanhmã harẽnh to hkêt nẽ. Kot puj mẽ ãm kãm aa te mẽ pahte ja jarẽnh mar kêt pyrãk o harẽ. Anẽ.

Mẽ kot tanhmã kãm nè nhũm kot ta pãnhã tanhmã mẽ kãm nè pymaj nhũm mẽ ãm tee ri kãm tanhmã nè hprãm kaprý o kuhê.

⁷ Hãmri nè kãm:

–Konẽn. Mẽ ixte mêhõ nhỹ hã kapêr o pa hã omunhre hã. Anẽ.

⁸ Hãmri nhũm mẽ kuma nè mẽ kãm:

–Tk. Tôe kot pa xep ijaxwỳja mẽ amã tanhmã amnhĩ jarẽnh to hkêt nẽ. Ijaxwỳja ixte mêhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mẽ àpênh punuj xwỳnhjê jarẽnh

Matêwre 21.33-46; Makre 12.1-12

⁹ Nhũm Jejus arĩ Ijaew nhõ pahijê mã kapêr. Nẽ mẽ kot tanhmã hipêx to hkukamã mẽ kãm tanhmã amnhĩ jarẽnh

to. No ãm amnhĩ tã kuxi nẽ mẽ kãm awjarẽ nẽ mẽ kãm:

—Koja mẽhõ hpur ã hkwỳjê kot kamã kãm àpênh kaxyw mẽ kãm karõ. Hãmri nhũm mẽ ma hwỳr mra nẽ kamã mẽmo hy hkre nẽ hkre pa. Hãmri nhũm ra hpur nhõ dõnja nhỹhỹm nojarêr nẽ kãm mẽ àpênh xwỳnhjê mã tanhmã hpur jarênh to nẽ mẽ kãm: “E or ixpur nõ. Kê kamã mẽmoj hkà hpa ka mẽ mãmrĩ kamã axujamỳnh pa nẽ ho axkjê. Nẽ ixkutêp inhõ jaxwỳ nẽ mãmrĩ mẽ anhõ tanhmã ho hprãm xà hkõt tanhmã ho.” Anẽ.

—Nhũm ã mẽ kãm kapêr anẽ hãmri nẽ ma nhỹhỹm mẽ.

¹⁰ —Tã nhũm ra hkà hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpênh xwỳnhjê hõja nhũm akupỹm mẽ hwỳr kumẽ. Mẽ kot kãm kwỳ nhõr nhũm ma kot kãm o mõr kaxyw ma mẽ hwỳr kumẽ nhũm ma mẽ hwỳr mẽ. Mõõ nẽ mẽ hwỳr pøj nhũm mẽ omu nẽ axtem nẽ unê nẽ htak nẽ akupỹm hano nhũm ma akupỹm ÿ kamã mẽ. ¹¹ Hãmri nẽ pøj nhũm õ patrãwja tee ri omu nẽ hpãnhã ja mẽ nhũm ma mẽ hwỳr mẽ. Mõõ nẽ mẽ hwỳr pøj nhũm kê wem mã ho anẽ nẽ unê nẽ htak nẽ akupỹm hano nhũm wamta pyrã nẽ ma akupỹm ÿ kamã mẽ.

¹² —Hãmri nhũm kê axte hkõt ja mẽ nhũm ma mẽ hwỳr mããnên mẽ. Ma mẽ hwỳr mẽ nẽ pøj nhũm mẽ te ho wamta wa hipêx pyrãk o hipêx nẽ unê nẽ htak rax nẽ amnhĩ nẽ hano nẽ pur nẽ kapõt ã kumẽ. Hãmri nhũm ma akupỹm mããnên ÿ kamã mẽ. ¹³ Nhũm mẽ õ patrãw tee ri mẽ omu nẽ hamaxpêr o: “Hêxta waa nẽ. Tanhmã kot paj amnhĩ nhĩpêx to? Nà kot paj mẽ hwỳr ixkra mãn mẽ. Inhmã hapê htã kot paj mẽ hwỳr kumẽ kê ma mẽ hwỳr mẽ. Hãmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ tã inhmã kãm inhõja kwỳ gõ.” Anhỹr o hamaxpêr hãmri nẽ ma mẽ hwỳr kumẽ nhũm ma mẽ hwỳr mẽ.

¹⁴ —Tã ra mẽ hwỳr hpõx o mẽ nhũm mẽ amỳm amnhĩ wỳr omu nẽ kêp hkra hã omu nẽ hã axpên mã amỳnê nẽ axpên mã: “E oněj hpur nhõ dõn krata tẽ. Koja nhỹrmã õ papaj mỳr pê amnhĩm pur ã pyka pytà nẽ ho õ. Kwa pu mẽ hpĩr kurê kumrêx nẽ

kêp hpurja o panhõ. E tokyj pu mẽ kupĩ ri.” Anẽ.

¹⁵ —Hãmri nhũm tẽ nẽ mẽ hwỳr pøj nhũm mẽ unê nẽ pur nẽ ho kato nẽ ma o tẽ nẽ kupĩ. ã mẽ ujarênh kot anhỹr. Anẽ.

Nhũm pre ã Jejus mẽ kãm ujarênh anẽ nẽ hã tanhmã mẽ hkukjêr to nẽ mẽ kãm:

—E koja hpur nhõ dõnja hkra jarênh ma hãmri nẽ tãm mẽ hwỳr mẽ nẽ tanhmã mẽ hipêx to wehe? ¹⁶ Koja ma mẽ hwỳr mẽ hãmri nẽ mẽ himex pa. Hãmri nẽ hpãnhã hpur ã nhãm mẽmojê rẽ nhũm mẽ tã kãm hamãr mex o pa. Anẽ.

Nhũm pre ã Jejus mẽ kãm ujarênh anẽ hãmri nhũm mẽ kot mar xwỳnhhtaja ujarênh kamã amnhĩ jarênh mar kurê kumrêx. Mẽ kot Tĩrtũm kot mẽ hwỳr rênh xwỳnhjê kapêr mar kêr nhũm mỳrapê mẽ kãm mẽ hkurê xwỳnhhaja kot mẽ kêp mẽ õ pika pytàr nẽ mẽ himex par ã amnhĩ jarênh ma nhũm ja mẽ kêp omnuj tỳx nẽ. Hãmri nẽ hêx rom Jejus mã kãm:

—Tk. Kwa nà nhỹx pre kêr pur nhõ dõnja ã mẽ hipêx anhỹr kêr nẽ. Anẽ.

¹⁷ Hãmri nhũm mẽ kuma nẽ mẽ omunh o xa. Nẽ mẽ omunh pê mẽ no kagãr mã mẽ kãm kapêr nẽ mẽ kãm:

—Nà ã mẽ hipêx anhỹr mã mẽ tãm kênã. Mãn ka prem ra Tĩrtũm kapêr ã kagã htũm kot ja jarênh ma. Harênh kot:

Mẽ kot kên o amnhĩm õrkwỳ nhĩpêx kaxyw nẽ kên maati pumu nẽ htỳx omnuj ã hkamnhĩx nẽ hkaga.

Mẽ kot hkaga htã Tĩrtũm mẽ kurom mex o kot kên piitã hakrenh par ã omunh kurê kumrêx. Anẽ.

Ã Tĩrtũm kapêr ã kagã htũm kot mẽ ajarênh te mẽ kot kên maati punuj ã hkamnhĩx nẽ hkaga xwỳnhjê jarênh pyrãk o ã mẽ ajarênh kot anhỹr. Anẽ.

¹⁸ Nhũm pre ã Jejus mẽ kãm te kêp kên maati pyrãk o mẽ kãm amnhĩ jarênh anẽ. Hãmri nẽ axte amnhĩ tã kuxi nẽ mẽ kãm axte kên jarênhhta pyrã nẽ mẽ kãm:

—Nà kot kaj mẽ atõ ixkaga hãmri nẽ te mẽhõ htỳx htêm nẽ kên pumunh kêr nẽ hã htêk nẽ tẽm pyrãk o amnhĩ nhĩpêx. Jao ixkutã amnhĩ xãm. Rỳ ka tanhmã amnhĩ to nẽ ixkaga nhũm te kên maati hõ htêm nẽ kot anhỹp htêm nẽ axôm par pyrãk o anhĩpêx ka amex kêr nẽ. Anẽ.

¹⁹ Nhũm pre ã Jejus mẽ kãm ujarēnh kãm mẽ harēnh anē. Hãmri nhũm Tĩrtũm kapēr tũm o mẽ ahkre xwỳnhjê mẽ mẽ õ patre krãhtũmjaja kot mẽ kãm kēn jarēnh o te mẽ tãm harēnh pyrãkja ma nhũm ja mẽ kēp omnuj tỳx nē. Jakamã nhũm mẽ kãm Jejus pynēnh nē haxàr prãm nē. Nom amnhĩ tã kãm mẽ kot mar o kuhê xwỳnhjê puma nē.

Mẽ kot hêx rom Jejus kukjêr ã mẽ harēnh Matêwre 22.15-22; Makre 12.13-17; mãänēn Rômãn 12.1, 13.6-7

²⁰ Hãmri nhũm Tĩrtũm kapēr tũm o mẽ ahkre xwỳnhjê mẽ mẽ õ patre krãhtũmjaja Jejus tãnopxar o kuhê. Hãmri nē ra amnhĩ wỳr mẽmy hkwỳ hã karõ nē mẽ kãm:

—E. Mẽ ma Jejus wỳr mra nē te mẽ ate hkõt amnhĩ xunhwỳr kaxyw pyrãk o amnhĩ nhĩpêx nē mẽmoj tã ri hkukja. Mẽmoj tã hkukjêr rax nē. Kêr kê Rôm nhõ pahi Sesti kapēr kwỳm ri tanhmã mẽ amã kapēr to ka mẽ ama nē man akupỳn mra nē mẽ inhmã harēnh kurê kumrêx. Pa mẽ ama nē ma hwỳr mra nē hã unê nē ma Sesti nhỹ hã mẽ pahto amnhĩptàr xwỳnhhta wỳr o tẽ nē ìhkram haxà. Anē.

²¹ Hãmri nhũm mẽ kuma nē mẽ kãm:

—Tõe. Nà kot paj mẽ anē. Anē.

Hãmri nē ma hwỳr mra nē hêx rom kãm kapēr nē kãm:

—Pa Jejus? Nà ãm hãmri na ka hte Tĩrtũm kapēr o mẽ ahkre mex o ri apa. Na ka hte mẽ kamã akahak kêt nē. Nē mẽ kot tee ri tanhmã ato kapēr punuj to htã ka aprĩ hã mẽ ahkre mex o ri apa. ²² Kwa mẽ inhmã mẽmoj jarē. Rôm nhõ pahiti kot mẽ pahte kãm kãxpore hkwỳ nhõr ã mẽ pahpê Ijaew mã karõta. Kwa xà we ja amã mex nà? Xà kot pu mẽ kãm kugõ nà xà kot pu mẽ kãm õr kêt nē? E kwa mẽ inhmã tanhmã harēnh to. Anē.

²³ Nhũm prem ã hêx rom kãm kapēr anhỹr tã nhũm ra mẽ hamaxpêr ã mẽ omu nē mẽ kãm:

²⁴—E mẽ atõ anhõ kãxpore htỳxre japêr nē inhmã hõ gõ pa omu. Anē.

Hãmri nhũm mẽ kãm ja gõ nhũm kupy nē omu nē kãnhmã mẽ kãm kupê nē mẽ kãm:

—E mẽhõ nhĩxi nē mẽhõ karõ na ja hã? Anē.

Hãmri nhũm mẽ kãm:

—Pahi Sesti karõ nē hixi na hã kēnã. Anē.

²⁵ Hãmri nhũm mẽ kuma nē mẽ kãm:

—Tỳ. Tô kêr ka mẽ mãmrĩ kãm hkwỳ nhõr o apa. Hã hkarõ nē hã hixi. Tãm kot hipêx xwỳnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêr ka mẽ kapêr kõt pix mã ri amnhĩ nhĩpêx o ri apa. Anē.

²⁶ Nhũm pre ã Jejus mẽ kãm kapêr anē nhũm mẽ piitã mar o kuhê. Nhũm mẽ kot hêx rom kãm kapêr mã xwỳnhjaja amnhĩ jaêr pê ã kot kãxpore jarēnh anhỹrja ma. Hãmri nē tee ri axte mẽmoj tã hkukjêr nhũm kot pahi Sesti kwỳm ri kot tanhmã harēnh to kaxyw ãm tee ri tanhmã hkukjêr to kaprỳ. Hãmri nē axte tanhmã kãm nē hkêt nē ãm akryk omunh pê mar o kuhê.

Akupỳm mẽ htĩr jarēnh

Matêwre 22.23-33; Makre 12.18-27; Juãw 5.21, 6.39; mãänēn Wam Korĩt 6.14, 15.12-28; Wam Tesarõn 4.13-18; Apokarip 20.4

²⁷ Tã nhũm Satusew nhõ xwỳnh kwỳjaja. Mẽ kot akupỳm mẽ htĩr mã hamaxpêr kêt jakamã mẽ htyk nē mẽ hapêx ã mẽ hkamnhĩx. Jakamã na prem tanhmã axpên mã Jejus jarēnh to nē axpên mã:

—E kwa pu mẽ ma hwỳr mra nē mẽmoj xihtỳx ã hkukja kê mẽ pama nē tee ri tanhmã mẽ pamã harēnh to hkukamã hamaxpêr. Hãmri nhũm mẽ piitã ja hã omu nē ãhpumunh tỳx kêt ã omunh kurê kumrêx. E ma pu mẽ hwỳr.

Anē nē ma hwỳr mra nē Parijew nhõ xwỳnhjê pyrã nē hêx rom ahkukja nē kãm:

²⁸—Pa Jejus? Kwa mẽ inhmã mẽmoj jarē. Na pre finat Mojesja Tĩrtũm nhỹ hã mẽ panhĩgêt mã ã karõ anē. Mẽ hkra hkêt rãhã mẽ pa nē mẽ htyk xwỳnhjaja nhũm mẽ harēnh o:

Koja mẽhõ hprõ nē kormã kamã hkra hkêt rãhã pa nē ty. Hã koja hkõt htõja hpãnhã hprõta o hprõ nē kamã hkra. Hãmri nhũm kato nē te kēp htõ htyk xwỳnhhta hkra pyrãk. Anē.

Na pre ã Mojes mẽ kãm karõ anē. ²⁹ Jakamã kwa ga mẽ ixujarēnh ma. Koja mẽ kot axpên to htõ xwỳnhjaja kēp 7. Nhũm kot waja mẽhõ ho hprõ nē wa pa nhũm kamã hkra hkêt rãhã ty. Nhũm hkõt htõ hõta hpãnhã hprõ ho hprõ ³⁰ nē wa axpên to pa. Nhũm mãänēn ty. Kamã hkra hkêt rãhã ty.

³¹ —Nhũm htõ hõta. Haxwỳja hpãnhã tãm o hprõ nẽ wa axpẽn to pa grire nhũm haxwỳja kamã hkra hkêt rãhã ty. Hãmri nhũm htõ hkwyjaja piitã nija pyxi nẽ axpẽn pãnhã ho hprõ hpa. No ãm mẽhõ kamã hkra hkêt rãhã ra htyk pa. ³² Hãmri nhũm mẽ hprõta mẽ hkõt amnhĩ to hapu nẽ ty. ³³ Tã Tĩrtũm kot akupỹm nhỹrmã mẽ ho htĩr ronhỹx nhỹ nhỹx kęp nija mjẽn kumrẽx? Ra piitã kot ho hprõ kẽnã. E mẽ inhmã ja jarẽ. Anẽ.

³⁴ Hãmri nhũm Jejus mẽ kãm:

—Nà kaxkwa kamã mẽ kot amnhĩ nhĩpẽxja axtem na. Pika ja kamã na htem pa nẽ aptar nhũm mẽ axpẽn mã mẽ kure. Ja mex. ³⁵ No mẽ kot Tĩrtũm kõt amnhĩ xunhwỳr xwỳnhjaja na htem ty hãmri nẽ Tĩrtũm nhõ krĩ kamã kuri axte kãm hprõ hprãm kêt nẽ ri pa. Rỳ ni japẽr nẽ kãm mjẽn prãm kêt nẽ ri pa. ³⁶ Hãmri nẽ Tĩrtũm kapẽr o mẽ wrỳk xwỳnhjẽ pyrã nẽ axte htyk kêt nẽ. ãm htĩr tũm rãhã nẽ pa ho pa. Tĩrtũm ra akupỹm kot mẽ ho htĩr jakamã koja mẽ kęp hkra nẽ kuri htĩr tũm nẽ mex nẽ pa ho pa nẽ axte kãm hprõ rỳ mjẽn prãm kêt nẽ ri pa.

³⁷ —Nom mẽ ate akupỹm mẽ htĩr mã aja-maxpẽr kêt ã harẽnhja kot paj mẽ amã harẽ. Amnepẽm na pre Tĩrtũmja pĩ hpõk kamã Mojes mã kapẽr nẽ kãm:

Ixpẽ Apraãw nhõ Tĩrtũm na pa. Nẽ mããnẽn
ixpẽ Apraãw kra Ijak mẽ htãmnhwỳ
Jako wa õ Tĩrtũm na pa.

Anhỹr o Mojes mã amnhĩ jarẽ nhũm kuma nẽ hã kagã. ³⁸ Kęp apu arĩ mẽ htyk rãhã nhỹx pre ã mẽ harẽnh anhỹr kêt nẽ. Nhỹx pre mẽ harẽnh o: “Amnepẽm Apraãw nẽ hkra nẽ htãmnhwỳ mẽ htĩr ri ixpẽ mẽ õ Tĩrtũm na pa pre.” Anhỹr o nhỹx pre mẽ harẽ. Nom na pre ã amnhĩ jarẽnh anhỹr kêt nẽ. Mẽ pamã te Apraãwja mẽ htyk nẽ mẽ hapẽx pyrãk. Nom nhũm prem ra Tĩrtũm ri akupỹm htĩr nẽ mex nẽ pa ho pa. Tã ka htem Tĩrtũm kapẽr kwỳm ri akupỹm mẽ htĩr kêt ã mẽ harẽnh o pa. Anẽ.

³⁹ Nhũm pre ã Jejus mẽ kãm kapẽr anẽ. Hãmri nhũm Tĩrtũm kapẽr tũm o mẽ ahkre ho mẽ pa xwỳnh kwỳjaja kuma nẽ tee ri axte tanhmã kãm nẽ hprãm kaprỳ nẽ kãm:

—Tỳ. Nà ãm hãmri na ka ã ja jarẽnh anẽ. Anẽ.

⁴⁰ Hãmri nhũm mẽ axte mẽmoj tã hkukjêr kêt nẽ. Tanhmã kot wem amnhĩ to nẽ hamaxpẽr o hakre? Na prem ãm tee ri kãm hamaxpẽr o hakrenh prãm kaprỳ ho kuhê. Jejus kot mẽmoj piitã hkukamã àhpumunh tỳx o àhpumunh tỳx.

Jejus kęp pahi finat Tawi nhõ Pahihti hã kot amnhĩ jarẽnh

Matêwre 22.41-46; Makre 12.35-37; mããnẽn Rõmãn 1.3-4

⁴¹ Tã nhũm Jejus kãnhmã xa nẽ amnhĩ tã tanhmã mẽ kot mar o kuhê xwỳnhjẽ hkukjêr to. Nom te nhãm mẽhõ hã mẽ hkukjêr pyrã nẽ mẽ kãm:

—E kwa mẽ inhmã mẽmoj jarẽ. Tĩrtũm kot mẽ akaxyw ãm mã xwỳnhhta ã na pa mẽ akukja. Mo na htem axpẽn mã kęp finat pahi Tawi kanrẽhã htãmnhwỳ pix ã harẽ nẽ mããnẽn kęp õ pahihti hã harẽnh kêt nẽ?

⁴² Na pre Tawi Tĩrtũm kapẽr kwỳ hã kagã nẽ tanhmã harẽnh to. Tĩrtũm mex ã mẽ grer xàja kwỳ kamã harẽ nẽ hã kagã nẽ hã kagã ho:

Na pre Tĩrtũm inhõ Pahihti mã ã kapẽr anẽ nẽ kãm: “E amnẽ ixwỳr tẽ nẽ inhĩkhõ hã nhỹ nẽ inhmã mẽ ho amnhĩptar o akrĩ.

⁴³ Kot paj mẽ kot kãm akurê xwỳnh piitã mẽ unẽn pa nẽ awỳr mẽ o mra nẽ anhĩhkram mẽ haxar pa.” Anhỹr o pre kãm kapẽr. Anẽ.

⁴⁴ Na pre ã Tawija Tĩrtũm kot Kris mã kapẽr jarẽnh anẽ. Mẽ kajaja na ka htem ãm kęp Tawi kanrẽhã tãmnhwỳ pix ã ri axpẽn mã harẽnh o ri apa. No kêt Tawi na pre kęp õ Pahihti hã harẽnh o pa. Anẽ.

Jejus kot tanhmã Tĩrtũm kapẽr tũm o mẽ ahkre xwỳnhjẽ jarẽnh to

Matêwre 23.1-12; Makre 12.38-40

⁴⁵ Nhũm pre ã Jejus mẽ kãm kapẽr anẽ nhũm mẽ piitã mar o kuhê. Hãmri nhũm hpãnhã hkõt mẽ pa ho mẽ pa xwỳnhjẽ mã kapẽr nẽ mẽ kãm:

—Kwa mẽ o kora. Kêr ka mẽ Tĩrtũm kapẽr tũm o mẽ ahkre xwỳnhjẽ kot amnhĩ nhĩpẽx o amnhĩ nhĩpẽx kêt nẽ. ãm mẽ omu nẽ ãm mẽ omu nẽ mẽ kot amnhĩ nhĩpẽx kõt amnhĩ nhĩpẽx o ri apa hkêt nẽ. ⁴⁶ Na htem mẽ piitã mẽ kot mẽ hã hpijaam kaxyw mẽ ê mex pix kãm ri pa. Nẽ mẽ kãm mẽ piitã mẽ

kot amnhĩm mẽ rũnh xwỳnh ã mẽ harẽnh o mẽ paja na mẽ kãm hprãm. Nẽ mẽ panhõ Tĩrtũm kapẽr o mẽ ahkre xà hã ixkre kamã mẽ kãm amnhĩ to rũnh xwỳnhjê hkrĩ xà mex pix ã na mẽ kãm mẽ hkrĩ hprãm. Nẽ mẽmoj tã mẽ hkĩnh ã arĩgro hã nhũm htem mẽ apkur xà hã ixkre hwỳr akuprõ nẽ mẽ kãm mẽ kot amnhĩ to rũnh xwỳnhjê hkrĩ xà mex pix ã mẽ kãm mẽ hkrĩ hprãm. ã na htem amnhĩ nhĩpêx anhỹr o pa.

⁴⁷—Nẽ mẽ kêp mẽ mjên htyk xwỳnhjê ho ajuta ho pa hã amnhĩ jarẽnh tã ãm amnhĩ to hêx nẽ axtem nẽ mẽ nokupyr pê mẽ kêp mẽ hikukrêx piitã ho hapêx par o pa. Nẽ mẽ kêp mẽ õrkwỹ pytà. Nẽ mẽ hêx rom te tãm mẽ kot amnhĩ nhĩpêx pyrã nẽ Tĩrtũm mã amnhĩ jarẽnh japjêê ho kuhê. Mỳrapê koja mẽ mex kêt nẽ. Koja Tĩrtũm tanhmã ja hã mẽ hipêx to rax nẽ. Jakamã kwa kêr ka mẽ ã mẽ kot amnhĩ nhĩpêx anhỹr xwỳnhjê hkõt amnhĩ nhĩpêx o apa hkêt nẽ. ãm kwarĩ ho kwarĩ. Anẽ.

21

Kêp mjên htyk xwỳnh jarẽnh Makre 12.41-44

¹ Nhũm Jejus kormã Tĩrtũm mã amnhĩ jarẽnh xà hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwỳ nhõr o pa. Jakamã nhũm mẽ hikàxpore rũnh xwỳnhjaja hwỳr agjê nẽ kamã kàxpore gjênh xà kamã hkwỳ gjê nẽ ma akupỹm mra.

² Jakamã nhũm mẽhõ ni pê mjên htyk xwỳnh haxwỳja hwỳr axà. Kêp amrakati kumrêx nẽ hikàxpore tỳxre ãm axkrut্রে htã mẽ hpãnhã hwỳr axà. Nẽ kãm Tĩrtũm kĩnh xàj hamẽ kamã kuxà hãmri nẽ kato nẽ ma akupỹm tẽ. ³⁻⁴ Hãmri nhũm Jejus arĩ omunh o xa. Kot ã amnhĩ nhĩpêx anhỹr ã omunh o xa nhũm ja kãm mex nẽ. Hãmri nẽ hkõt mẽ pa ho pa xwỳnhjê mã harẽ nẽ mẽ kãm:

—E mãn ka mênire htêm mũj pumu. Kêp amrakati nẽ hikàxpore ãm kêp grire htã amnhĩ pê õr pa. Kwỳjê rom kãm Tĩrtũm kĩnh xàj amnhĩ pê õr par kumrêx. Apkur xà hã hikàxpore na. Mẽ hkwỳjaja na htem hikàxpore hkwỳ ho mra nẽ kugjê nom arĩ mẽ hikàxpore rax. No nhũm nire nẽj mẽ kurom kãm hikàxpore japê hkêt nẽ. Nẽ ho

õxỳ hkêt nẽ àmnhĩx piitã Tĩrtũm mã õr pa. Anẽ.

Mẽ kot amnhĩ tomnuj xwỳnhjê hkukamã mẽ harẽnh

Matêwre 24.1-2; Makre 13.1-2

⁵ Tã hãmri nhũm Jejus kõt mẽ pa ho mẽ pa xwỳnhjaja kormã Tĩrtũm mã amnhĩ jarẽnh xà hã ixkre kaxwỳnh pumunh o kuhê nẽ axpên mã harẽ nẽ axpên mã harẽnh o:

—Hêxta waa nẽ. Ixkreja mex kumrêx. Kên rũnh o mẽ kot hipêx jakamã mex o mex. Nẽ mẽ kot ri Tĩrtũm mã hkĩnh xà nhõr nẽj haxwỳja piitã mex. Anẽ.

Hãmri nhũm Jejus mẽ kuma nẽ mẽ kãm:

⁶—Nã mex tã koja nhỹrmã mẽ kãm Tĩrtũm kurê xwỳnhjaja grãnh pa. Koja arĩ kên õ axkrut্রে nẽ axpên mỳnh nẽ nõr kêt nẽ. Koja piitã angrã nẽ ahpỹnhã ri hikwỹ. Anẽ.

⁷ Nhũm pre ã mẽ kot hipêx anhỹrja kukamã mẽ kãm mẽ harẽnh anẽ nhũm mẽ tee ri hkukamã hamaxpêr nẽ kãm:

—Kwa xà koja mẽ ã hipêx anẽ? Kwa mẽ inhmã aprĩ hã mẽ kot ixkre grãnh parta jarẽ. Xà koja mẽ tokyx ho anẽ nã xà kormã? Kwa mẽmo koja wỳj ri tanhmã amnhĩ nhĩpêx to? Anẽ.

⁸ Hãmri nhũm mẽ kãm:

—Nã nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harẽ ka mẽ inhma. Koja mẽ ohtõ nẽ mẽ apê ixkrajê hwỳr mra nẽ hêx rom te pa ixte amnhĩ nhĩpêx pyrãk o amnhĩ nhĩpêx o pa. Nẽ tanhmã mẽ amã amnhĩ jarẽnh to nẽ amnhĩ jarẽnh o: “E mẽ ixpumu. Pa na pre Tĩrtũm mẽ awỳr inhmẽ. Ixpê kaxkwa rũm ixwrỳk xwỳnh na pa.” Anhỹr o mẽ akõt mẽ amã amnhĩ to hêx o pa. Hãmri nẽ mẽ amã: “E ot pa ra mẽ ato amnhĩptar kaxyw mẽ awỳr wrỳ.” Anhỹr o amnhĩ jarẽnh o mẽ akõt pa. Nom kêr ka mẽ ãm mẽ ama nẽ ãm mẽ ama. ãm mẽ kot mẽ amã amnhĩ to hêx o pa kênã. Kormã akupỹn ixpõx xà hã arĩgrota kormã.

⁹—Nẽ koja mẽ nhỹri awry hã axpên par o pa. Nẽ mẽ atãã axpên par o pa. Nom kêr ka mẽ harẽnh ma nẽ ri tee ri tokyx mẽmoj piitã hapêx kukamã ajamaxpêr kêt nẽ. Mẽmoj piitã hapêx xà hã arĩgrota kormã.

¹⁰ Koja mẽmoj piitã hapêx kaxyw nhũm ahpỹnhã ri pika piitã hkõt mẽ pa

xwýnhjaja axpën kutã amnhĩ xun-
hwý nê pijapu nê axpën pa.

11 Nê koja pika piitã hkôt tanhmã ahpýnhã
mê à kute mê hamý nhũm mê amnhĩ
xà htýx kamã hamak o pa.

Nê koja pikaja tertet týt nê.

Nê koja mê nhýri pika hkwý kamã prãm xàj
hpikaprãr pa.

Nê koja kaxkwa kamã mëmoj tanhmã
amnhĩ anhĩpêx to nhũm pika nhõ
xwýnhjaja tee ri omu nê kãm ma htýx
kumrêx nê htertet o kuhê.

Koja mëmoj ã amnhĩ nhĩpêx anê pa rĩ ko-
rmã akupýn mê awýr wrý nhũm mëmoj
piitã hapêx pa. Koja mëmoj ã amnhĩ nhĩpêx
anê.

12 –E Tirtũm mã amnhĩ jarênh xà hã
ixkre grãnh par xwýj ri mëmoj tanhmã
hkukamã kot amnhĩ nhĩpêx to hã mê ate
ixkukjêr xwýnhhta kot paj hpãnhã mê amã
harê ka mê inhma. Koja mê kãm ixkurê
xwýnhjaja mê awýr mra nê ixtã mê apynê
nê tanhmã ixtã mê anhĩpêx to. Nê ma mê
pikuprõnh xà hã ixkreja wýr mê ato mra nê
kamã mê kãm tanhmã mê ato kapêr punuj
to. Nhũm mê kuma hãmri nê ma mê ato
mra nê mê ajagjê. Mê ate ixkôt apa ho
apa jakamã koja mê ã mê anhĩpêx anê. Nê
mê õ pahшти hwýr mê ato mra nê mê kãm
tanhmã mê ato kapêr punuj to. 13 Tã kêr ka
mê kutã akrĩ nê axãmnhĩx mãmrĩ tanhmã
mê kãm ijarênh to ho akrĩ.

14 –Nom kwa kêr ka mê kãm tanhmã
amnhĩ jarênh to hkukamã tee ri ajamaxpêr
o ri mê amã mê uma hkêt nê. Rý mê aja-
maxpêr o: “Hêxta waa nê. Tanhmã koja we
mê kot ixkukjêr ã arĩgrota ã pa we ri mê kãm
ixkapêr to?” Anhýr o tee ri amnhĩ kukamã
ajamaxpêr kêt nê. ãm amnhĩ kaxyw inhmã
pix mã ajamaxpêr týt rãhã nê. 15 Tanhmã
mê kot mê anhĩpêx to hã arĩgrota ã kot paj
tanhmã mê akrã hto ka mê inhý hã tanhmã
mê kãm amnhĩ jarênh to. Hãmri nhũm mê
amnhĩ tã mê ama nê axte tanhmã mê ato
kapêr to hkukamã tee ri hamaxpêr o kuhê.

16 –Nê koja mê anhĩpêxà nê mê aka-
torxà nê mê atõ nê mê akrãmnhwýjaja. Nê
kaxyw krĩ hkôt mê akwýjaja ixtã mê atã
amýnê nê ma mê õ pahi hwýr mê ato
mra nhũm mê ajagjê nê mê akwýjê pa.

17 Koja mê piitã ixtã mê akamã gryk nê

kãm mê akurê nê. 18-19 Nom mê kot ã mê
anhĩpêx anhýr mã tã kêr ka mê amnhĩ to
htýt nê ixkaga hkêt nê. Mê kot mê apar
tã ka mê kaxkwa kamã akupým atĩr kurê
kumrêx. Hãmri nê ã mê kot mê anhĩpêx
anhýr xwýnhjê rom Tirtũm mê wa ixri atĩr
tũm nê amex rãhã apa ho apa. Mê kot
tanhmã mê ato htã mê ate kaxkwa kamã
atĩr tũm nê apa mã xwýnh jakamã kwa kêr
ka mê tee ri amnhĩ kukamã ajamaxpêr o ri
apa hkêt nê.

20 –Koja nhýrmã nhýhýnh pôristi ohtõ nê
mra nê Jerujarê hwýr pøj hãmri nê mê kãm
hipøk pa nê kuhê. Ka mê ja hã mê omu nê
mê kot krĩja grãnh par mã ajamaxpêr kurê
kumrêx. 21 Koja mê ã amnhĩ nhĩpêx anê
ka mê amým amnhĩ wýr mê omu hãmri nê
ajapøj nê ma aprõt nê amrar kurê kumrêx.
Mê apê jar pika pê Jutej kamã mê apa
xwýnhjaja ka mê omu nê mê kot mê apar
pymaj ma aprõt nê amrar kurê kumrêx.
Hixêt prêk wýr ajapøj nê aprõt nê ma mra.

–Nê kê Jerujarê nhõ xwýnhjaja mê umaj
haxwýja hapøj nê ma hprõt nê ma mrar o
mra.

–Nê jar kapõt ã ri mê pa xwýnhjaja kê mê
akupým krĩ hwýr gjêx kêt nê. ãm ma mê
umaj hprõt nê mrar kurê kumrêx.

22 –Mê kot amnhĩ tomnuj mýrapê koja
Tirtũm ã mê hwýr mê kãm mê hkurê
xwýnhjê rênh anê. Kapêr ã kagà htũm ra kot
mê hkukamã ja jarênh kot anhýr. Jakamã
koja mê nhýrmã mê hkukamã mê harênh
xàja kôt ã mê hipêx anê.

23 –No mê htujarõ xwýnhjaja nê mê hkra
karãre xwýnhjaja koja mê kêp mëmoj omnuj
týt nê. Tanhmã kot mê amnhĩ to nê hprõt
týt? Nà pika ja kamã koja mê piitã mex
kêt nê. Mê kot amnhĩ tomnuj mýrapê koja
Tirtũm ã mê hipêx anê. 24 Koja mê nhýhýnh
krĩ hõ rũm mê hwýr mra nê mê unê nê
mê hkamnhwýr o mê kupa. Nê mê hkwýjê
pynê nê ma nhýhým ahpýnhã mê õ pika
hwýr amnhĩ kôt mê o pa nhũm mê kamã
mê hkôt pa ho pa. Koja mê kêp Ijaew
kêt xwýnhjaja Jerujarê o amnhĩptã nê ã mê
hipêx anê. Nê kamã pa ho pa rãhã nhũm
Tirtũm nhýrmã akupým nê mê kator pa. Tã
koja mê nê mê kator parja o pa ra akupýn
mê awýr inhnojãrê. Anê.

Nhũm pre ã Jejus mẽ kãm mẽ kot Jerujarẽ granh par xwỳnhjê hkukamã harẽnh anẽ.

Akupỳn Jejus wrỳk xwỳj ri mẽmoj kot tanhmã amnhĩ nhĩpêx to

Matêwre 24.29-35; Makre 13.24-31; mããnẽn Sikũn Pêtre 3.10; Apokarip 1.7

²⁵ Nhũm Jejus arĩ hkôt mẽ pa ho pa xwỳnhjê mã kapêr nẽ mẽ kãm:

—Nẽ kot paj nhỹrmã akupỳn mẽ awỳr inhnojarêr nhũm kaxkwa kamã kanhêti nẽ myyti nẽ mytwrỳre axtem tanhmã ri amnhĩ nhĩpêx to. Nhũm gô xujanãr haxwỳja hkocho htỳx jao axpẽn tak tỳx nẽ. Hãmri nhũm pika piitã hkôt mẽ pa xwỳnhjaja kuma nẽ omu nẽ nẽ kãm ma htỳx nẽ mur nẽ htertet nẽ tee ri amnhĩ kukamã hamaxpêr.

²⁶ —Nẽ koja Tĩrtũm tanhmã kaxkwa ho àk to nhũm kanhêti piitã pikarêr pa. Hãmri nhũm pika hkôt ri mẽ pa xwỳnhjaja omu nẽ tee ri amnhĩ kukamã hamaxpêr o amnhĩ japrãr pa nẽ hikwỳ. ²⁷⁻²⁸ Koja ã mẽmoj amnhĩ nhĩpêx anẽ ka mẽ ja hã omu nẽ akupỳn mẽ awỳr inhnojarêr mã ajamaxpêr kurê kumrêx. Hãmri nẽ mẽ kot ixkôt amnhĩ xunhwỳr kêt xwỳnhjê rom akĩnh kãm ijapêr arĩt o akuhê.

—Nà kot paj akupỳn mẽ awỳr wrỳ. Kakra kamã hirã htỳx kãm akupỳn ixihitỳx kãm mẽ awỳr wrỳ. Hãmri ka mẽ apiitã pika piitã hkôt ano ho ixpumu. Kot paj ã ixwrỳk anẽ hãmri nẽ mẽmoj punuj piitã pẽ mẽ apytar pa. Jakamã ka mẽ ã mẽmoj kot amnhĩ nhĩpêx anhỹrja ã omu hãmri nẽ tokyx ixkôt axapirta mã ajamaxpêr nẽ akĩnh tỳx nẽ. Anẽ.

²⁹ —E ga mẽ pĩ hpàr mũj pumu. ³⁰ Na hte mẽmo mytwrỳ hã rã nhũm mẽ omu nẽ ô hkukamã hamaxpêr. ³¹ Ja pyrã nẽ koja ã mẽmoj amnhĩ nhĩpêx par anhỹr mẽ ka mẽ omu nẽ akupỳn mẽ awỳr ixwrỳkja mã ajamaxpêr kurê kumrêx. ³² Koja akupỳn ixpôx kêt ri mẽ kot ã mẽmoj kot amnhĩ nhĩpêx anhỹr pumunh xwỳnhjaja kormã piitã htyk kêt ri pa ra akupỳn wrỳ.

³³ —Nẽ koja nhỹrmã pika nẽ kaxkwa wa hapêx pa. Tã no ãm ixkapêr koja wa urak nẽ aa hapêx kêt nẽ. Koja ãm rãhã ho rãhã. Kot paj aa ihkê ho tanhmã mẽnh to hkêt nẽ.

³⁴⁻³⁵ —Nẽ kwa mẽ o kora. Mẽ axkãm ajamak rom. Mẽ kot ixkôt amnhĩ xunhwỳr

kêt xwỳnhjaja na htem kãm tanhmã amnhĩ nhĩpêx to hprãm xà hkôt pix mã tanhmã amnhĩ nhĩpêx to ho ri pa. Jao ãm amnhĩ xàpkur xà nẽ amnhĩ to mex xà nẽ kàxpore pix kukamã hamaxpêr o pa. Nẽ htỳx ri tanhmã amnhĩ tomnuj to ho pa. Nẽ pipãnh kãm tanhmã amnhĩ to ho pa. Tã koja mẽ ã amnhĩ nhĩpêx anhỹr o pa rãhã pa ra mẽ haêr pẽ akupỳn wrỳ nhũm mẽ tee ri ixpumu nẽ kãm ma htỳx kumrêx. Te tutre htỳx ri harôj kajyr o pa nẽ rapuuti hwỳr àr nhũm kot haê nẽ unênh nhũm tee kãm kator prãm pyrãk. Koja mẽ ã amnhĩ nhĩpêx anẽ. Nom kêr ka mẽ ho mẽ urak kêt nẽ. ãm pa inhmã hprãm xà hkôt pix mã tanhmã inhmã amnhĩ nhĩpêx to rãhã ho ri apa.

³⁶ —Tã kêr ka mẽ ã mẽ kot amnhĩ tomnuj o pa anhỹrja kêt amnhĩ nhĩpêx o apa pymaj amnhĩ to Tĩrtũm wỳr rãhã ho apa. Kê tanhmã mẽ ato hihtỳx to ka mẽ ý hã ho mẽ urak kêt nẽ. Kêr pa nhỹrmã akupỳn wrỳ ka mẽ ixpumu nẽ mẽ kurom amnhĩ kamã akahak kêt nẽ akĩnh tỳx nẽ man ixwỳr mra. Anẽ.

Nhũm pre ã Jejus hkôt mẽ pa ho mẽ pa xwỳnhjê jahkre anẽ.

³⁷ Hãmri nẽ apkati mẽ Tĩrtũm mã amnhĩ jarênh xà hã ixkre kamã mẽ pikuprõnh xwỳnhjê jahkre ho hkrĩ. Nhũm kamãt nhũm hkôt mẽ pa ho mẽ pa xwỳnhjê mẽ mẽ krĩ rũm hapôj nẽ ma hixêt prêk pẽ Oriwêhti hwỳr mra nẽ kamã amnhĩm hikra nẽ hikwỳ. ³⁸ Nhũm kwỳhtã nhũm mẽ kãnhmã hkrĩ nẽ ma akupỳm krĩm mra nẽ ixkreja wỳr agjê. Hãmri nhũm mẽ piitã hã akuprõ nẽ kot mẽ ahkre hã mar o hkrĩ.

22

Mẽ kot Jejus ã àmnênh ã mẽ harênh

Matêwre 26.14-16; Makre 14.1-2; Juãw 11.47-57

¹ Tã nhũm Ijaew kĩnhã arĩgro pẽ Pasja àhtêp o mỗ. Pas ã na htem amnepêm Tĩrtũm kot pika pẽ Ejit pẽ mẽ hpãmjê kator mã hamaxpêr kaxyw axpẽn wỳr akuprõ nẽ hã hkĩnh. Na htem arĩgroja jarênh o: “Pas” anhỹr ã harê. Nẽ mããnẽn harênh o: “Mẽ pahte pãw kaxkrit kêt kur ã arĩgro.” Anhỹr o harê. ² Jakamã nhũm mẽ ô patre krãhtũmjê mẽ Tĩrtũm kapêr tũm o mẽ ahkre xwỳnhjaja ra kãm Jejus pĩr prãm nẽ. No mẽ kãm hkôt

mê kot kapêr mar xwÿnhjê pyma nê. Nê tee ri kot tanhmã ho hkukamã hamaxpêr nê axpên mã:

—Hêxta waa nê. Kwa tanhmã kot puj wem ho nê mê kêp kupî? Kot puj mê noo mã tanhmã ho nhũm mê hã mê pakamã gryk tÿx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴Tã nhũm Jut Kariotja. Jejus nhÿ hã mê ahkre ho pa xwÿnh pê 12 hõ na pre. Tã axtem nê tanhmã hamaxpêr to nê Satanasti nhÿ hã ma mê õ patre krãhtũm mê Tirtũm mã amnhĩ jarênh xà hã ixkre jamãr xwÿnh krãhtũmjê hwÿr tẽ. Hãmri nê tanhmã Jejus o mê mar to nê mê kãm:

—E ot pa mê amã Jejus jarênh o tẽ. Xà kot paj mê amã hã amÿné ka mê hpãnhã inhmã amnhĩre nã? Anê.

⁵Hãmri nhũm mê kuma nê hkĩnh nê. Hãmri nê kãm:

—Nà kot paj mê amã amnhĩre.

⁶Hãmri nhũm mê kot kãm amnhĩrer ã harênh ma nê hkĩnh nê mê kãm:

—Tõe. Nà kot paj mê amã ho anê. Anê.

Hãmri nê ma tẽ nê kato. Nê Jejus pynênh kaxyw htãnopxar o ri hkõt pa. Mê kot mar o pa xwÿnhjê hkàx ã nhÿri unênh nê ma mê hwÿr o htêm kaxyw.

Jejus kot ÿ hã mê ahkre xwÿnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷Tã nhũm Pasja kato. Amnepêm Ijaewjê nhĩgêjtaja na prem ôwêhti hkrare hkwÿ hpar o pa. Tirtũm kot ja hã mê omunh nê Ejit kãm mê kãm mê hkurê xwÿnhjê nhĩhkra nê mê kator kaxyw nhũm prem ã amnhĩ nhĩpêx anê. Jakamã na htem arĩ mê kêp mê hkanrêhã mê htãmnhwÿjaja arĩgro pê Pas ã axpên wÿr akuprõ nê mê kãm hamaxpêr pê mê uràk nê ôwêhti hkrare hkwÿ hpa. Hãmri nê pãwti kaxkrit kêt kãm kuku. ⁸Jakamã nhũm Jejus ÿ hã mê ahkre ho mê pa xwÿnhjê wa ho axkrut nê mê amnhĩ kukamã wa kumê. Simãw Pêtre mê Juãwja nhũm wa mê amnhĩ kukamã wa kumê nê wa kãm:

—E wa ma mê ixkukamã tẽ nê mê ixkutêp Pas ã mê panhõ hã apê. Anê.

⁹Hãmri nhũm wa kuma hãmri nê kãm:

—Tõe. Nhÿri kot paj we wa tẽ nê mê akutêp hã apê? Anê.

¹⁰Hãmri nhũm wa kãm:

—Nà wa mãmrĩ ma Jerujarê hwÿr wa tẽ. Nê hwÿr axà nê mêhõ mytita pumunh kurê kumrêx. Nhũm amnhĩm gô ru nê amnhĩ kre hã poti xãm nê o tẽ. Ka wa omu nê hã ajêt nê ma hkõt ôrkwÿ hwÿr tẽ. ¹¹Hãmri nê ixkre nhõ dõn pumu nê kãm: “E jar na pa wa awÿr tẽ. Jejus na wa inhmê pa wa awÿr tẽ. Na awÿr pêr mênh o: ‘Nhÿri kot paj ixkõt ri mê pa ho mê pa xwÿnhjê mê axpên kutã Pas ã apku?’ Anê. Na ã awÿr hpêr mênh anê.” Anê.

¹²—E ã kãm akapêr anê kê war ama nê ra war amã ôrkwÿ nhĩmök ã ixkre rax õ jahkre. Kamã ra kaxyw mê paxàpkur xà hã mêmoj piitãã. Ka wa omu hãmri nê mãmrĩ mê ixkutêp kamã mêmoj tã apê. Anê.

¹³Hãmri nhũm wa kuma nê ma krĩm tẽ. Ma tẽ nê hwÿr axà hãmri nê ra kot wa kãm mêmoj jarênh xà hkõt mêmoj piitã omu hãmri nê mê kutêp mêmõ hã àpênh o wa xa.

¹⁴Tã nhũm myt axà nhũm mê wa hkõt mõi nê ixkreta wÿr àpir pa. Hãmri nê apkur kaxyw hkrĩ hpa nhũm Jejus mê ìhkô hã nhÿ.

¹⁵Hãmri nê mê kãm tanhmã amnhĩ jarênh to nê mê kãm:

—E na pa inhmã Pas ã mê anhĩhkô hã ixàpkur prãm nê. Kormã ixte amnhĩ xà htÿx kãm ijamak xwÿj ri. ¹⁶Kwa mê inhma. Kot paj axte mê akutã Pas ã ixàpkur kêt ry rax nê. Nom koja nhÿrmã Tirtũm akupÿn ixte mê ato amnhĩptar kaxyw inhmê hãmri pu mê rĩ kormã axte arĩgro mex maatija ã pahkĩnh kãm axpên kutã paxàpkur rax nê. Anê.

¹⁷Nhũm ã mê kãm amnhĩ jarênh anê nê hpãnhã wĩhti py nê o xa nê Tirtũm mã harê nê kãm:

—Pa Papaj. Nà ãm hãmri na ka hte mê inhnê mê kãm mê ixkurê xwÿnhjê pumunh mex nê mê ìhkra pê mê ijapôj. Amex o amex. Anê.

Hãmri nê hpãnhã hkõt mê pa ho mê pa xwÿnhjê hõ mã kugõ nê kãm:

—E mĩ. Apy nê mê axpên pãnhã hkwÿ ho ixkõ. ¹⁸ãm hãmri na pa mê amã amnhĩ jarê. Kot paj axte wĩhti ho ixkõm kêt rãhã nhũm nhÿrmã Inhõ Papaj akupÿn mê awÿr inhmê. Hãmri pu mê rĩ kormã akupÿn

ixpôx xà hã arĩgrota ã pahkĩnh rax nẽ. No ãm ra axtem tanhmã hã mẽ pahkĩnh to. Anẽ.

¹⁹ Hãmri nẽ hpãnhã pãwti py nẽ mã ho anẽ nẽ Tĩrtũm mã harẽ. Hãmri nẽ ho hkry hpa nẽ mẽ piitã mẽ kãm òr pa nẽ mẽ kãm:

—E na pa ã pãwti ho hkry nẽ mẽ amã òr anẽ. Koja mẽ ã inhĩpêx anẽ nẽ te mẽ kot ixto hkry hpar pyrãk o inhĩpêx pa amnhĩ xà htỳx kamã ijamak kãm ty. Nom mẽ anẽ kot paj ty. Jakamã kêr ka mẽ ixwakre kamã tũhã axpẽn wỳr akuprũ nẽ ixte mẽ ate amnhĩ tomnuj pãnhã amnhĩrer kaxyw mẽ anẽ ixtykja mã ajamaxpêr pẽ akĩnh nẽ pãwti hkur o akrĩ. E mẽ mãmrĩ axãmnhĩx aku. Anẽ.

Nhũm pre ã mẽ kãm amnhĩ jarẽnh anẽ nhũm mẽ mar pẽ pãwtita hkur o hkrĩ. ²⁰ Hãmri nẽ ra hkur pa. Hãmri nhũm Jejus axte kopta py nẽ mẽ kãm:

—Mẽ kot ixpĩr xà hã arĩgro hã koja ixkamrũ axkapĩ. Nom koja mẽ amarĩ ixpĩr nhũm ixkamrũ amarĩ hpikapĩr kêt nẽ. ãm paa. Pa kot paj mẽ anẽ mẽ ãhkram amnhĩ jaxà nhũm mẽ ã inhĩpêx anẽ. Koja ixkamrũ axkapĩ nhũm Tĩrtũm omu nẽ ixkukwak ri mẽ anẽ mẽ ate amnhĩ tomnuj piitã te amnhĩ katut kôt rẽnh par pyrãk o hipêx nẽ mẽ ato hkra. Amnepêm kot ja hã amnhĩ jarẽnh xà hkõt. Jakamã e mẽ ixkamrũ pikapĩrta mã ajamaxpêr pẽ wĩhti hkwỳ ho ixkũ. Anẽ.

Jejus ã mẽ kãm àmnênh xwỳnh jarẽnh

Matêwre 26.21-25; Makre 14.18-21; Juãw 13.18-19

²¹ Nhũm Jejus arĩ mẽ kãm kapêr nẽ mẽ kãm:

—Nẽ kot mẽ kãm ixtã àmnênh mã xwỳnhnta na jar mẽ pahkaêx ã mẽ pakutã apkur o nhỹ. ²² Tĩrtũm kãm hprãm xà hkõt koja mẽ tanhmã ixto rax nẽ ixpĩ. Nom kot mẽ kãm ixtã àmnênh mã xwỳnhnta hẽxta waa nẽ. ã kot inhĩpêx anhỹrja mỳrapê koja amnhĩ xà htỳx kãm hamak rax kumrẽx. Anẽ.

²³ Nhũm pre ã Jejus mẽ kãm amnhĩ jarẽnh anẽ. Nhũm mẽ kuma nẽ tee ri axpẽn pumunh o hkrĩ. Hãmri nẽ ri axpẽn kukja nẽ axpẽn mã:

—Kwa nã mẽ pahtũ kot pu we ã ri hipêx anẽ? Nã pa hkêt.

Anhỹr o tee ri axpẽn kukjêr o hkrĩ.

Mẽ pamã amnhĩ to rũnh prãm kêt ã mẽ pamã karũ

Matêwre 20.20-28; Makre 10.35-45; mãânên Rõmãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

²⁴ Tã nhũm Jejus nhỹ hã mẽ ahkre ho mẽ pa xwỳnhjaja axpẽn mã tanhmã kapêr to ho hkrĩ nẽ axpẽn mã:

—Kwa mẽ pahtũ kot puj wem nhỹrmã pahpê pahi nẽ mẽ ho amnhĩptar rax o ri papa? Anẽ.

Hãmri nẽ mẽ axpẽn mã: “Nã pa.” Anẽ nẽ nhãnh axpẽn mã: “Nã kêt paa.” Anẽ. Hãmri nhũm mẽ nẽtãnh axpẽn mã: “Nã kêt pa kẽnã.” ²⁵ Anhỹr o axpẽn mã kapêr o hkrĩ. Hãmri nhũm Jejus tee ri axpẽn tã mẽ kuma nhũm mẽ ã hamaxpêr anhỹrja kệp omnuj nẽ nhũm mẽ kãm tanhmã hã kapêr to nẽ mẽ kãm:

—E mẽ inhma. Na hte Ijaew kêt xwỳnhjê nhũ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh tỳx jakamã na htem amarĩ ixkre hkre jakry kamã kãm mẽ àpênh xwỳnhjê mã mẽmo mẽ àpênh ã karũ ho hkrĩ. Na htem ã amnhĩ nhĩpêx anhỹr o pa. Nẽ mẽ kot amnhĩm mex ã harẽnh kaxyw tanhmã mẽ ho mex to ho pa. ²⁶⁻²⁷ Tã kêr ka mẽ ho mẽ urãk kêt nẽ. Kêt ãm te amarĩ ri mẽ apa xwỳnh pyrãk o axpẽn nhĩpêx. Ixpyrà nẽ amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptar rax kukamã ajamaxpêr kêt nẽ. ²⁸ Na prem axpẽn mã ixto hẽx nẽ tanhmã ixto kapêr punuj to htã ka mẽ ama nẽ ãm mẽ ama nẽ arĩ ixkõt ri apa rãhã nẽ. ãm hãmri na ka htem arĩ ixkõt ri apa anẽ. ²⁹⁻³⁰ Kot paj amnhĩ tã mẽ ato mex rax nẽ. Na pre ra Tĩrtũm nhỹrmã ixte mẽ ato amnhĩptar o ixkrĩ kaxyw ixãm. Tã ot pa amnhĩ pyrà nẽ mẽ pahkwỳ Ijaew kaxyw mẽ axunhwỳ ka mẽ nhỹrmã mẽ piitã mẽ ho amnhĩptar o apa. Nẽ mẽ apê ixkrãmnhwỳ hã nhỹrmã ixkutã axãpkur o apa. Anẽ.

Jejus kot Simãw Pêtre mã kapêr ã harẽnh

Matêwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pêtre mã kapêr nẽ kãm:

—Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm nẽ.

Tanhmã kot mẽ akrã hto nhũm mẽ ate mẽ kãm ixkurê xwýnhjê pumaj ixkaga hã kãm mẽ akamã hamak prãm tỳx nẽ. Jakamã ã kot mẽ anhĩpêx anhỹr kaxyw na pre ra amnhĩ to Inhõ Papaj ma nhũm kãm: “Tõe. Kam nẽ mãmri tanhmã mẽ kamã ajamak to.” Anẽ.

³² –Tã ate mẽ umaj ixkaga nẽ axte ate amnhĩ kaxyw inhmã ajamaxpêr kêt pymaj na pa ra ato Inhõ Papaj wỳr kãm ixihtỳx nẽ Simãw Pêtre. Jakamã kêt ka mẽmo arĩgro hã tee ri ixkaga hã amnhĩ pumu hãmri nẽ tokyx tãm akupỳm ixkõt amnhĩ xãm tỳx nẽ. Kêr kê nhỹrmã akwỳjê hõ tanhmã amnhĩ tomnuj to nẽ tee ri amnhĩ kukamã hamaxpêr ka ja hã omu hãmri nẽ kãm ate tanhmã amnhĩ tomnuj tota jarẽ. Kê mẽ ã ate amnhĩ nhĩpêx anhỹr ã ajarênh ma nẽ apyrã nẽ tokyx akupỳm tãm ixkõt amnhĩ xãm tỳx kurê kumrêx. E kêr ka ã akupỳm ixkõt mẽ piitã mẽ hipêx anhỹr o ri apa Simãw Pêtre. Anẽ.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anẽ. ³³ Hãmri nhũm tee ri amnhĩ tã kuma nẽ kãm:

–Kwa nà Pahihti. Kot paj ri akwỳm tanhmã amnhĩ tomnuj to hkêt nẽ. Koja mẽ te ajaxã nẽ apĩ htã kot paj arĩ akõt ri ixpa ho ixpa nhũm mẽ pahto amỹrã nẽ tanhmã pahto. Anẽ.

³⁴ Hãmri nhũm kuma nẽ kãm:

–Nà koja apkati hkõt krãhyre hkàr kêt ri ka ra mẽ umaj ate ixkõt apa hkêt ã mẽ kãm amnhĩ tã axaprãr o axkrunêpxi kãm ga. Anẽ.

*Jejus kot hkwỳjê mã mẽmoj tã karõ
Matêwre 10.5-15; Rukre 9.1-3*

³⁵ Hãmri nhũm Jejus arĩ hkõt mẽ pa ho pa xwýnhjê mã kapêr nẽ mẽ kãm:

–E wam ixte mẽ hwỳr mẽ arênhã ã na ka prem amnhĩ kõt aparkà hkwy ho apa hkêt nẽ. Nẽ kawà jamành nẽ ho apa hkêt nẽ. Nẽ mrykà jamành nẽ amnhĩ kõt ho apa hkêt nẽ. ãm mẽ anhỹ kamã mẽ hwỳr apa hã na pa pre mẽ amã karõ. Tã xàn ka prem ã mẽ hwỳr apa anẽ nhũm mẽ amnhĩ wỳr awỳr kêt nẽ? Nà xà na prem amnhĩ wỳr mẽ awỳ? Anẽ.

Hãmri nhũm mẽ kãm:

–Tỳ na prem amnhĩ wỳr mẽ ixwỳ. Mẽ ixte amnhĩ kõt mẽmoj to ixpa hkêt tã na pa prem amarĩ mẽ kutã ixàpkur mex o ri mẽ hkõt ixpa. Anẽ.

³⁶⁻³⁷ Hãmri nhũm mẽ kãm:

–Tõe. Nà mẽ kot mẽ ato mex tã nom koja mẽ hpãnhã axtem hõ ho mẽ anhĩpêx. Jakamã kêr ka mẽ akupỳm mẽ kãm ijarênh o apa kaxyw anojarêh hãmri nẽ anhõ mrykà rỳ akawà htu nẽ ma amnhĩ kõt ho apa. Nẽ awapo. Kot kaj mẽ awapo hkêt japêr hãmri nẽ apipro xà ho wênê nẽ amnhĩm hõ japrõ nẽ ma amnhĩ kõt ho apa. E kêr ka mẽ ã amnhĩ nhĩpêx anẽ.

–Nẽ Tĩrtũm kapêr ã kagà htũm kot ra ixkukamã tanhmã ijarênh to nẽ kot ijarênh kot:

Koja mẽ hipêx o te mẽ kot amnhĩ tomnuj tỳx xwýnh nhĩpêx pyrãk. Anẽ.

ã mẽ kot inhĩpêx anhỹr kukamã ijarênh kot anhỹr. Tã na mẽ ra ã inhĩpêx anhỹr kaxyw. Anẽ.

³⁸ Nhũm pre ã Jejus mẽ kãm kapêr anẽ nhũm mẽ kuma nẽ kãm:

–Ota mẽ panhõ wapohti hamêxkrut Pahihti. Anẽ.

Hãmri nhũm mẽ kãm:

–Tõe. Nà hãmri. Mẽ amnhĩm axi nẽ ho amnhĩm mẽmoj to anẽ. Anẽ.

*Jejus kot Tĩrtũm mã amnhĩ jarênh
Matêwre 26.36-46; Makre 14.32-42*

³⁹ Tã nhũm Jejus kê axte krĩa rũm kato nẽ hixêt pê Oriwêhti hwỳr tẽ nẽ api nhũm hkõt mẽ pa ho mẽ pa xwýnhjaja ma hkõt mra.

⁴⁰ Hãmri nẽ nhỹri hixêt kahti ri hkrĩ nhũm Jejus mẽ kãm:

–E kwa kêr ka mẽ ixkutêp amnhĩ to Inhõ Papaj wỳr o akrĩ. Kê mẽ ixkõt tanhmã mẽ ato htã ka mẽ amã mẽ uma xàj ixkaga hkêt nẽ. Arĩ mẽ kutã amnhĩ to htỳx nẽ akuhê. Anẽ.

⁴¹ Hãmri nẽ mẽ kurũm htêm greire nẽ Tĩrtũm mã amnhĩ jarênh kaxyw hkõn krã ho tẽm nẽ nhỹ. ⁴² Hãmri nẽ kãm:

–Kwa Papaj. Nà na pa ra amnhĩ xà htỳx kukamã ijamaxpêr nẽ amnhĩ kamã ixkahak tỳx kumrêx. Inhmã amnhĩ xà kamã ijamak prãm kêt o ijamak prãm kêt. Jakamã kot kaj amã inhnê ho ajapêx prãm nẽ mãmri inhnê ho ajapêx nhũm mẽ kãm ixkurê xwýnhjaja tanhmã ixto hkêt nẽ. Rỳ

ko. Kot kaj amã mẽ kot tanhmã ixto hprãm hã kê mẽ mãmrĩ tanhmã inhĩpêx to. Nom pam inhmã hprãm xà hkôt kêt. Anẽ.

Nhũm pre ã Jejus amnhĩ to Hipêêxà Tĩrtũm wýr anẽ. ⁴³ Hãmri nhũm kuma nẽ hwýr kapêr o wryk xwýnhja mẽ nhũm hwýr wry nẽ kuri xa. Hãmri nẽ õxàhkre kaxwýnh kãm tanhmã ho hihtýx to. ⁴⁴ Nhũm kê axte amnhĩ to Hipêêxà hwýr kãm hihtýx nẽ. Tee ri amnhĩ kukamã hamaxpêr pẽ amnhĩ kamã kahak týx kumrêx. Jao hã gô rax nẽ te hkamrô xàhàr pyræk o pikap ahà. ⁴⁵ Hãmri nẽ kànhmã xa nẽ akupým hkôt mẽ pa ho mẽ pa xwýnhjê hwýr tẽ nẽ mẽ omu nhũm mẽ ra ôt pa nẽ hikwý. Mẽ kot tee ri Jejus kot mẽ kãm amnhĩ jarênhja kukamã hamaxpêr o hkaprĩ nẽ ôt pa nẽ hikwý. ⁴⁶ Hãmri nhũm Jejus tẽ nẽ tee ri mẽ omu nẽ mẽ kumra nẽ mẽ kãm:

—Kwa nà. Mẽ ri ã amnhĩ nhĩpêx anhýr kêt nẽ. Kwa mẽ kànhmã akrĩ nẽ amnhĩ to Inhõ Papaj wý kê mẽ ato mẽ axihtýx. Hãmri nhũm mẽ tanhmã ixkôt mẽ ato ka mẽ inhý hã mẽ kutã amnhĩ to htýx nẽ akuhê. Anẽ.

Mẽ kot Jejus pynênh ã mẽ harênh

Matêwre 26.47-56; Makre 14.43-50; Juãw 18.1-11

⁴⁷ Nhũm pre ã Jejus mẽ kãm kapêr anhýr rôm nhũm hkôt pa ho pa xwýnh pẽ Jut Kariotja amnhĩ kôt mẽ kot Jejus pynênh xwýnhjê ho tẽ. Mẽ ho htêm rax nẽ. Hãmri nẽ kot Jejus kahti hkôt mýnh kaxyw hwýr tẽ ⁴⁸ nhũm amnhĩ tã omu nẽ kãm:

—Kwa Jut. Xà mẽ kahti hkôt mẽ hamýnh nẽ mẽ hpãr o na htem mẽ kãm mẽ hã amýnê? Anẽ.

⁴⁹ Hãmri nhũm hkôt mẽ pa ho mẽ pa xwýnhjê hõja tee ri mẽ kot amnhĩ nhĩpêx ã mẽ omu hãmri mẽ õ wapota mã hamaxpêr kurê kumrêx nẽ Jejus mã:

—Kwa Pahihti. Xà kot paj mẽ panhõ wapohti py nẽ ho mẽ panê mẽ hkwy hpa? Anẽ.

⁵⁰ Hãmri nhũm hõta kuma nẽ mẽ kaxyw ja kapa. Nhũm mẽ õ patre maati mã àpênh xwýnhja mẽ hkôt tẽ nhũm omu nẽ kãm wapo ho apê. Nẽ kot ho hkrã nhĩpônã mã tã kuhpaw nẽ ho upòk rùm hamak nhĩkê pix krãhta. ⁵¹ Hãmri nhũm Jejus omu nẽ nẽ kãm kapêr nẽ kãm:

—Kwa nà ri ã amnhĩ nhĩpêx anhýr kêt nẽ. Amarĩ xa. Anẽ.

Hãmri nẽ hamakja py nẽ akupým kãm hamak ã kuxi nẽ ho mex. ⁵²⁻⁵³ Hãmri nẽ mẽ kot unênh mã xwýnhjê mã tanhmã kapêr to. Mẽ õ patre krãhtũmjê mẽ Tĩrtũm mã amnhĩ jarênh xà hã ixkre jamãr xwýnhjê krãhtũm mẽ Ijaew nhõ pahijê mẽ nhũm mẽ ho pimràatã mẽ kãm kapêr nẽ mẽ kãm:

—Kwa na pa pre apkati mẽ Tĩrtũm nhõrkwý kamã mẽ kãm ixkapêr o ixpa ka prem tokyx ixpynênh kêt tã jarãhã te ixte amnhĩ tomnuj xwýnh pyræk o inhĩpêx nẽ ixwýr wapo nẽ kô hã akapên nẽ ixwýr ã atêm rax anẽ. No ãm ra mẽ ate tanhmã ixto kaxyw arĩgro kator kênã. Jakamã kot kaj mẽ mãmrĩ tanhmã amã ixto hprãm xà hkôt mãmrĩ tanhmã ixto. Satanasti nhý hã ã mẽ ate inhĩpêx anhýr mã kênã. Anẽ.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mẽ Jejus pynê nẽ ma o tẽ. Ma mẽ õ patre maati nhõrkwý hwýr o tẽ. Nhũm Simãw Pêtre ma hapu hã mẽ hkôt hã mẽ omunh o tẽ. ⁵⁵ Nhũm mẽ patre maati nhõrkwý hwýr Jejus o axà nẽ hkôt gjêx pa hãmri nhũm Simãw Pêtre kítare hwýr axà nẽ mẽ kuri xa. Nhũm mẽ kítare kamã amnhĩm kuto nẽ hã ànhunh o hkrĩ nhũm ⁵⁶ mẽ ìhkô hã ànhunh o nhý. Hãmri nhũm mẽ kãm àpênh xwýnh niti hirã kamã hprĩ hã omunh kurê kumrêx nẽ mẽ kãm:

—Xê pêr myti ja kêp Jejus kôt mẽ pa ho mẽ pa xwýnhjê hõ na. Anẽ.

⁵⁷ Hãmri nhũm tee ri amnhĩ tã kuma nẽ kãm mẽ uma nẽ mẽ kãm amnhĩ tã aprã nẽ kãm:

—Tk. Koký. Ixte mēhõ my ata pumunhre hã. Anẽ.

⁵⁸ Tã nhũm hpãnhã mēhõ myja kãm:

—Kwa nà. ãm hãmri na ajarê. Apê Jejus kôt ri mẽ pa xwýnhjê hõ na ka.

Anẽ nhũm kuma nẽ kê axte kãm:

—Kwa mẽ ri ã amnhĩ krã hkôt ri ixto axêx anhýr kêt nẽ. ãm ixte aa mēhõta pumunh kêt kumrêx. Anẽ.

⁵⁹ Tã nhũm ja haxwýja axte omu nẽ kãm:

—Kwa ãm hãmri na mẽ ajarê. Apê Jejus kwý hõ na ka. Uræk nẽ te apê Garirej nhõ xwýnh pyræk kênã. Anẽ.

⁶⁰ Hāmri nhūm tee ri kuma nē mẽ kām amnhĩ tā aprār kām hihtỳx nē mẽ kām:

—Tk. Ixpê Garirej nhō xwỳnh kêt. Ām ixte mēhō mūj pumunh kêt kumrēx tā ka mẽ Ām xatā hkôt ixpa ho ixpa xwỳnh ā ixkamnhĩx o akuhê.

Anhỳrja o ra mẽ kām amnhĩ tā aprār o axkrunēpxi mẽ nhūm krāhyre kà. ⁶¹ Hāmri nhūm Jejus arĩ ixkre kamā Ām tā Simāw Pêtre ho hakēx nē omu. Hāmri nhūm amnhĩ tā no pumu nē kot hkukamā kām ā amnhĩ nhĩpēx anhỳr jarēnhja mǎ hamaxpēr kurē kumrēx. Krāhyre hkàr kêt ri kot mẽ kām amnhĩ tā aprār o axkrunēpxi hǎ harēnhja mǎ hamaxpēr nē kànhmǎ hakry hpar o tē nē hkaprĩ htỳx nē. ⁶² Hāmri nē hkaprĩ xàj kītare pē kato nē tē nē awry hǎ xa nē mỳr rax kumrēx.

Mẽ kot Jejus tak ā mẽ harēnh

Matêwre 26.67-68; Makre 14.65

⁶³ Hāmri nhūm mẽ kot Jejus pumunh o kuhê xwỳnhjaja hǎ hpēr o axkē nē htak o kuhê. ⁶⁴ Nē no hpro nē htak nē kām:

—E atak xwỳnh nhĩxi jarē. Apê Tĩrtũm Kra hǎ ate amnhĩ jarēnh jakamā mǎn urāk nē axàhpumunh tỳx. Jakamā e hixi jarē. Anē.

⁶⁵ Hāmri nē xatā haprỳ nē kām kapēr punuj nē.

Mẽ kot mẽ hkrāhtũm wỳr Jejus o htēm ā mẽ harēnh

Matêwre 26.57-68; Makre 14.53-65; Juǎw 18.19-24

⁶⁶ Tǎ nhūm myt kator o mōr mẽ nhūm Ijaew nhō pahijê mẽ patre krāhtũmjê mẽ Tĩrtũm kapēr tũm o mẽ ahkre xwỳnhjaja axpēn wỳr pikuprōnh pa. Hāmri nhūm mẽ ma mẽ hwỳr Jejus o tē. ⁶⁷⁻⁶⁸ Nhūm mẽ omu nē tanhmǎ kot amnhĩ jarēnh to hǎ hkukja nē kām:

—Kwa mẽ inhmǎ amnhĩ jarē. Xà ka na apê Tĩrtũm kot mẽ ixkaxyw axām xwỳnhnta? Xà ka kot kaj Rōm nhō xwỳnhjê pē mẽ ixpytǎ nē mẽ ixto amnhĩptār o apa? Anē.

Hāmri nhūm mẽ kām:

—Nǎ kot paj tanhmǎ mẽ amǎ amnhĩ jarēnh to ka mẽ ixkôt ajamaxpēr kêt nē. Ixte Ām hāmri mẽ amǎ amnhĩ jarēnh tā ka mẽ inhma nē Ām inhma. Nē kot pa amnhĩ xwar mẽmoj tǎ mẽ akukja ka mẽ amnhĩ xwar inhmǎ tanhmǎ harēnh to hkêt nē. Ām mẽ axēx rom mẽ ate ā ixkukjēr anhỳr

kênǎ. ⁶⁹ Tǎ nom kot paj tokyx ma akupỳm Inhĩpēêxà Tĩrtũm wỳr api. Hihtỳx o hihtỳx rǎhǎ nē pa ho pa xwỳnh na. Jakamǎ kot paj hwỳr api nhūm amnhĩ nhĩhkô hǎ inhỳr pa upôk rũm mẽ apiitǎ mẽ ato amnhĩptār o ixkrĩ. Hāmri nē nhỳrmǎ paa tanhmǎ mẽ ajarēnh to. Anē.

⁷⁰ Hāmri nhūm mẽ tee ri kot ā amnhĩ jarēnh anhỳrja ma nē kām:

—Tk. Kwa akatāt kôt mẽ inhmǎ amnhĩ jarē nǎ. Xà apê Tĩrtũm Kra na ka? Anē.

Hāmri nhūm mẽ kām:

—Tỳ ixpê Kra na pa. Anē.

⁷¹ Hāmri nhūm mẽ tee ri ā amnhĩ jarēnh anhỳrja ā kuma nē axpēn mǎ:

—Kwa mo kaxyw kot puj mẽ axte mẽ hkwyjê japēr nhūm mẽ tanhmǎ kot amnhĩ tomnuj to hǎ harē? Tǎm kēp Tĩrtũm Kra hǎ amnhĩ to hēx nhūm mẽ pahte pahpiitǎ mar kênǎ. E kwa tokyx pu mẽ ma Rōm nhō pahihiti hwỳr o tē kē mẽ pamǎ hǎ amỳnē nē mẽ pamǎ kupĩ. Anē.

23

Mẽ kot pahi Pirat wỳr Jejus o htēm ā mẽ harēnh

Matêwre 27.1-2, 27.11-26; Makre 15.1-5; Juǎw 18.28-38

¹ Tǎ nhūm mẽ Jejus o kato nē nhām Pahihiti Pirat wỳr o tē. ² Hāmri nē kutǎ Ām nē tanhmǎ kām ho hēx to nē kām:

—E ot pa mẽ awỳr jahti ho tē. Na hte mẽ inhmǎ hēx rũnh o pa. Mẽ ixte Pahihiti Sesti kapēr kwỳm ri amnhĩ nhĩpēx prām xàj tanhmǎ mẽ inhmǎ mẽmoj tǎ karō hto ho pa. Nē axtem nē mẽ ixte Sesti mǎ kàxpore hkwy nhōr kêt ā mẽ inhmǎ karō. Nē Tĩrtũm kot mẽ pakaxyw kēp mẽ panhō pahi hǎ Ām xwỳnh ā amnhĩ jarē. Ā na hte mẽ inhmǎ amnhĩ to hēx anhỳr o pa. Anē.

³ Hāmri nhūm Pirat mẽ kuma nē Jejus pumu nē kām:

—E kwa inhmǎ amnhĩ jarē. Xà apê Ijaew nhō pahi na ka? Xà ka na htem amnhĩ wỳr akām hamak o pa? Anē.

Hāmri nhūm kām:

—Nǎ Ām hāmri na ka ā ijarēnh anē. Anē.

⁴ Hāmri nhūm Pirat tanhmǎ hkukjēr to nē tee ri kot amnhĩ jarēnh ā kuma hāmri nē patre krāhtũmjê mǎ kām:

—Kwa mẽmo mỳrapê kot pa tanhmã mẽ amã hã ixàmnênh to? Kot tanhmã amnhĩ tomnuj tore hã. Nà kot pa kãm inhũre. Anẽ.

⁵ Hãmri nhũm mẽ tee ri kuma nẽ kot mẽ kãm hã àmnênh prãm xàj hã kãm kapêr kãm hihtỳx nẽ. Nẽ kãm:

—Kwa nà. Na pre hte pika pẽ Jutej kamã tanhmã mẽ kãm hêx to ho pa. Hãmri nhũm mẽ ra hã axpên kutã amnhĩ xunhwỳ nẽ hã pijapu rũnh o pa. Tã mãânên Garirej kamã ã amnhĩ nhĩpêx anhỹr o hkrax nẽ hpãnhã amnẽ mẽ pahwỳr ã amnhĩ nhĩpêx anhỹr kaxyw mõi anẽ. Anẽ.

Mẽ kot Erox wỳr Jejus o htêm ã mẽ harênh Rukre 9.7-9

⁶ Hãmri nhũm Pahi Pirat mẽ kuma nẽ mẽ kãm:

—Kwa xà kêp Garirej nhõ xwỳnh na? Anẽ.

Hãmri nhũm mẽ kãm:

—Tỳ. Kêp Garirej nhõ xwỳnh kênã.

⁷ Anẽ nhũm mẽ kãm:

—Tô mẽ ma pahiti Erox ãxipas wỳr mãn o tẽ. Kêp Garirej nhõ xwỳnhjê nhõ pahi na. Tã ra jar Jerujarẽ kamã ham pøj. No axtem ixpê Jutej kamã mẽ pa xwỳnhjê nhõ pahi jakamã kwa mẽ ma ò pahita wỳr mãn o tẽ kê tãm tanhmã mẽ amã ho. Anẽ.

⁸ Hãmri nhũm mẽ kuma nẽ ma pahi Erox ãxipas wỳr o tẽ. Na pre ra Erox ãxipasja xatã Jejus jarênh ma nẽ kãm omunh prãm nẽ. Kãm aa kot mẽmoj pumunh kêt ò ho anhỹr ã omunh prãm tỳx jakamã nhũm mẽ ma hwỳr o tẽ nhũm omu nẽ hkĩnh nẽ. ⁹ Hãmri nẽ tee ri mẽmoj tã hkukja no nhũm akryk xa nẽ tanhmã kãm nẽ hkêt nẽ. ¹⁰ Hãmri nhũm mẽ ò patre krãhtũmjê mẽ Tĩrtũm kapêr tũm o mẽ ahkre xwỳnhjaja kãm ho kapêr punuj nẽ ho hêx kãm hihtỳx nẽ. ¹¹ Hãmri nhũm pahi Erox ãxipas mẽ kuma hãmri nẽ ò pòristi mẽ wa kãm kapêr punuj nẽ hã hpêr o axkê nẽ tanhmã ri haprỳ to. Hãmri nẽ hã hpêr o pikênh kãm kêp pahi hã mẽ ê mexja py nẽ kãm haxà nẽ akupỹm pahi Pirat wỳr kumẽ.

¹² Na pre Pahi Pirat mẽ Pahi Erox ãxipasja wa kãm axpên kĩnh kêt nẽ. Tã hãmri nhũm Erox ãxipasja tee ri Jejus kot kãm tanhmã amnhĩ jarênh to hã mar prãm xàj tee ri hkukamã hamaxpêr hãmri nẽ Pirat ã hpijaàm kaxyw akupỹm hwỳr kumẽ. Hãmri nhũm amnhĩ tã omu hãmri nẽ wa ra akupỹm kãm axpên kĩnh nẽ. Nẽ akupỹm

axpên mã hpêr o axkê nẽ pikunhar o pa pẽ akupỹm axpên to hkràmnhwỳ.

Pirat kot Jejus pĩr ã àmnênh

Matêwre 27.15-26; Makre 15.6-15; Juãw 18.39-19.16; mãânên Atre 3.13-14

¹³ Tã nhũm Pirat akupỹm amnhĩ wỳr mẽ hã karõ. Ijaew kwỳjaja nẽ mẽ ò pahijaja nẽ mẽ ò patre krãhtũmjaja nhũm akupỹm amnhĩ wỳr mẽ piitã mẽ hã karõ. ¹⁴ Hãmri nhũm mẽ akupỹm hwỳr gjêx pa nẽ kuhê nhũm mẽ kãm:

—E na ka mẽ ixwỳr mytita o tẽ nẽ tanhmã inhmã harênh to. Kot mẽ akwỳjê mã tanhmã hêx to ho pa hã harê. Tã pa ra jar mẽ anoo mã tanhmã hkukjêr to nẽ tee ri kot inhmã tanhmã amnhĩ jarênh to hã kuma. Te kot amnhĩ to mex xwỳnh pyræk. Mẽ ate tanhmã ho akapêr to htã nom kot anhỹr kêt. Kot amnhĩ to mex xwỳnh na.

¹⁵ Pahi Eroxja ra ixpyrà nẽ tee ri tanhmã hkukjêr to nom nhũm tanhmã kãm nẽ hkêt nẽ. Nhũm tee ri ja hã omu nẽ akupỹn ixwỳr kumẽ. Jakamã kwa mẽmo mỳrapê kot paj mẽ amã hã amỳnê nhũm mẽ amã kupĩ? Tanhmã kot amnhĩ tomnuj tore hã. ¹⁶ Kot paj ãm mẽ kãm anẽ kê mẽ htak nẽ kãm ure kê mãmrĩ ma tẽ. Anẽ.

¹⁷ Arĩgro pẽ Pas ã na pre hte mẽ ò pahi mẽ kot mẽ ho prês nhũm mẽ hkrĩ xwỳnhjaja nhũm pre htem mẽ ho hpỳnh nẽ mẽ kãm ure. Jakamã na pre ã mẽ kãm kapêr anẽ nẽ kot Jejus tak nẽ kãm urer mã. ¹⁸⁻¹⁹ Nom nhũm mẽ kuma nhũm ja mẽ kêp omnuj nẽ nhũm mẽ kãm:

—Kwa nà. Apĩ ri. Apĩ nẽ mẽ inhmã Parapas mã mãn anhũre. Anẽ.

Parapas na pre mẽ ò krĩ kamã ò pòristi mẽ pahi Piratja mẽ kutã amnhĩ xãm nẽ kêp ò pòristi hõxpĩ. Mỳrapê na prem ra haxà nhũm hkrĩ ho hkrĩ. Jakamã nhũm mẽ Pirat kot kãm urer kaxyw ã kãm kapêr anẽ. ²⁰ Nom nhũm kãm Jejus mã urer prãm jakamã axte hã mẽ hkukja nẽ mẽ kãm:

—Kwa nom mẽmoj mỳrapê kot paj mẽ kãm hã amỳnê nhũm mẽ amã kupĩ?

²¹ Anhỹr tã nhũm mẽ kuma nẽ ãm kuma. Nẽ xatã kãm:

—Kwa tokyx pĩ kahpa hã anhô kê ty. Anẽ.

²² Hãmri nhũm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt hã kunhõ nhũm ty. Nà kot paj ãm mẽ kãm anê kê mẽ htak nê kãm ure kê ma tẽ. Anẽ.

²³ Hãmri nhũm mẽ xatã hã kãm kapêr kãm hihtýx nê kãm:

—Kwa nà. Pĩ kahpa hã mãn anhõ kê ty.

Anhỹr o ãm xatã kàx pẽ àmra kamã kãm hã amỹnê. ²⁴ Hãmri nhũm Pirat tee ri mẽ kuma hãmri nê tã mẽ kãm hprãm xà hkõt mẽ kãm ã amỹnê. ²⁵ Hãmri nê mẽ kãm Parapas mã ure. Ra kot pahi Pirat pẽ õ pôristi kutã amnhĩ xãm nê kêp hõx pĩr tã nhũm mẽ kãm hprãm xà hkõt akupým kãm ure. Hãmri nê mẽ ìhkram Jejus jaxà. Mẽ kãm hprãm xà hkõt ri mẽ kot tanhmã hipêx to kaxyw.

Mẽ kot pĩ kahpa hã Jejus nhõr ã mẽ harênh

Matêwre 27.31-43; Makre 15.21-32; Juãw 19.17-20, 19.27-31; mããnên Atre 7.59-8.1

²⁶ Tã nhũm pôristijaja Jejus o kato nê ma kapõt mã o tẽ. Nê kãm õ pĩ kahpa gõ nhũm amnhĩ kaxyw kumý nê o tẽ. Nom mẽ kot htak rax kurê nhũm hirot týx nê nhũm mẽ ja hã omu nê mẽhõ kot ho ajuta kaxyw mẽ hkapi ho xa. Hãmri nê Sirên nhõ xwýnh Simãw hkà htyk pumu. Nhũm pre htýx hamakêtkati nê mẽ kutã krĩm tẽ. Hãmri nhũm mẽ haêr pẽ unê nê kãm Jejus o ajuta kaxyw hã karõ nhũm kãm õ pĩ kahpaja mý nê mẽ hkõt o tẽ.

²⁷ Hãmri nhũm mẽ ohtõ nê Jerujarê rũm Jejus kõt mõ. Nhũm mẽni hkwyjaja omu nê kãm hkaprĩ xàj mýr o hkõt mõ. ²⁸ Hãmri nhũm mẽ mýr ã mẽ kuma nê mẽ ho hakêx nê mẽ omu nê mẽ kãm:

—Kwa nà Jerujarê nhõ xwýnhjaja. Mẽ amã ixkaprĩ xàj amýr kêt nê. Kêt mẽ kamjaja amã amnhĩ kaprĩ xàj mãn mur. Nê mẽ akrajê kamã axukaprĩ xàj mãn mur. ²⁹ Koja mẽ nhỹrmã mẽ apê mẽ anhõ krĩ grãnh pa ka mẽ apunuj nê amnhĩ xà htýx kamã ajamak o ri apa. Nê tee ri mẽ akrajê hkukamã tanhmã ajamaxpêr to nê ajamaxpêr o: “Hêxta gàa nê. Na ixkrajaja ixpê amnhĩ xà htýx kãm hamak o pa. Kêp apu mẽ hkra hkêt xwýnhjê pyrã nê ixkra hkêt nê ixpa ro nhỹx inhmã mex nê. Nhỹx pa ixkĩnh nê.” Anhỹr o kot kaj mẽ nhỹrmã ajamaxpêr nom ã ajamaxpêr anhỹr kaprý.

³⁰ —Nê kot kaj mẽ apiitã mẽmo punujta pymaj tee ri amã tokyx atyk nê ajapêx par prãm kaprý nê axpên mã akapêr o: “Hêxta gàa nê. Kot kên prêk mýj mẽ panhĩpy rôrõk nê tokyx mẽ panhĩmex par ronhỹx mẽ pamã ja mex.” Anhỹr tã no ãm tee ri ã ajamaxpêr anhỹr kaprý. ³¹ Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpêx anê. Nom mẽ ate amnhĩ tomnuj mýrapê koja mẽ nhỹrmã tanhmã mẽ ato rax o ã mẽ kot inhĩpêx anhỹrja jakrenh pa. Hêxta waa nê. Na pa mẽ akukamã ijamaxpêr nê ixkaprĩ htýx nê. Anẽ.

³² Tã nhũm mẽ ja wa ho hamêxkrut nê tanhmã wa kot amnhĩ tomnuj toja mýrapê Jejus kõt wa hpĩr kaxyw hkõt mããnên wa o tẽ. ³³ Jakamã nhũm mẽ ra kên nhĩxêt te kot mẽ hkrã hi pyrãk xwýnhhta wýr mẽ o pøj. Mẽ kot kãm “mẽ hkrã hi xà” anhỹr jarênhja wýr mẽ o pøj. Hãmri nê Jejus pẽ ê kapa nê pĩ kahpa hã kuxi nê prek o ìhkra nê hpar o htýx pa. Hãmri nê kànhmã pĩ kahpa xãm nê ho htýx nhũm xa. Hãmri nhũm mẽ hpãnã wa kot amnhĩ tomnuj xwýnhhta mã wa ho anê nê. Nê prek o wa ìhkra nê wa hpar o htýx pa hãmri nê akutã ho Jejus nhĩjê nê wa ãm nhũm wa ajêt. ³⁴ Hãmri nhũm Jejus kýx pẽ amnhĩ xà htýx kumrêx kamã hamak o jêt rãhã mẽ ho Tĩrtũm wý nê kãm:

—Kwa Papaj. ãm ixtã jajê pumu. Mẽ kot mẽmoj mex pumunh kêt jakamã na mẽ ã inhĩpêx anê. Jakamã ãm ixtã mẽ omu nê mẽ kamã axukaprĩ nê. Anẽ.

Hãmri nhũm hparpê pôristi hkwyjaja axpên mã ê hkwy ho pigrãnh kaxyw hã kênre ho jõka ho hkrĩ. ³⁵ Nhũm mẽ ohtõ rax nê Jejus parpê omunh o kuhê. Nhũm mẽ õ pahijaja mẽ noo mã hã hpêr o axkê nê mẽ kãm:

—E jahti na pre te kêp mẽ pakaprĩ xwýnh ã amnhĩ jarênh o ri pa. Nê Tĩrtũm kot mẽ pakaxyw ãm xwýnh ã amnhĩ jarênh o ri pa. Jakamã e kwa pu mẽ xa nê kot amnhĩ kaxàr nê wrýk kãm omu. Anẽ.

³⁶ Nhũm pôristi mããnên tanhmã hã hpêr o pikênh to. Nê hparpê kãm wĩhti punuti jahkre nê kãm:

—Kwa wrý nê mẽ ixkutã ja hkwy ho ixkõ nã. Anẽ.

³⁷ Hãmri nê kãm:

—E apê Ijaew nhõ pahi hã kot kaj amnhĩ kapa nẽ akupÿn wrÿ. Kwa tokyx pa mẽ ja hã apumu. Anẽ.

³⁸ Nhũm pòristija tapti hõ py nẽ tanhmã hã kagà hto. Nẽ hã kagà ho:

IJA EW NHÕ PAHI NA JA

Anhÿr o hã kagà hãmri nẽ Jejus wÿr api nẽ mÿ ri kunhõ.

Wa kot Jejus nhÿjẽ nẽ wa jêt xwÿnh wa harẽnh

Matêwre 27.44; Makre 15.32

³⁹ Hãmri nhũm wa kot ìhkõ hã jêt xwÿnhnta õ haxwÿja kãm kapẽr punuj nẽ kãm:

—Kwa kot kaj apê Tirtũm kot mẽ ixkaxyw axãm xwÿnh hã kot kaj amnhĩ kapa nẽ wrÿ. Nẽ mãânẽn amnhĩ kõt wa ixto wrÿ. Anẽ.

⁴⁰⁻⁴¹ Hãmri nhũm ihõta kuma nẽ hã kãm akir nẽ kãm:

—Tk. Kwa amarĩ ajêt. Xà amã Tirtũm puma hkêt ã na ka ã kęp Krata mã akapẽr anẽ? Nà koja kãm wrÿk prãm nẽ kot wrÿ. No pajamẽ pahte amnhĩ tomnuj mÿrapẽ koja mẽ pahpĩ. No tãm kot tanhmã amnhĩ tomnuj to hkêt tã nhũm mẽ amarĩ ã hipẽx anẽ.

⁴² Anhÿr o kãm kapẽr hãmri nẽ Jejus mã kãm:

—Kwa Jejus. Kêr ka nhÿrmã mẽ ixto amnhĩptã hãmri nẽ inhmã ajamaxpẽr nẽ ixkamã axukapĩ nẽ ixto mex nẽ. Anẽ.

⁴³ Hãmri nhũm kãm:

—Nã kot kaj jarãhã ma ixkõt kaxkwa hwÿr api nẽ hpãnhã ixkuri amex nẽ atĩr tũm nẽ apa ho apa. ãm hãmri na pa ã amã ixkapẽr anẽ. Anẽ.

Jejus tyk ã harẽnh

Matêwre 27.45-56; Makre 15.33-41; Juãw 19.28-30

⁴⁴ Tã nhũm kaxkwa nhĩpõk ri myt nhÿr mẽ nhũm te ra kamãt pyrãk nhũm kamãt kô rax kumrẽx. Nẽ kamãt kô ho ra hã awry nẽ. Ja mẽ nhũm akupÿm myt katêr o mõ.

⁴⁵⁻⁴⁶ Nom nhũm kormã kamãt kôta ã nhũm Jejus ra htyk kaxyw nẽ àmra kamã Tirtũm mã kapẽr nẽ kãm:

—E Papaj. Mãmrĩ ixkarõ ho amnhĩptã.

Anhÿrja kõt hãmri ty. Pu nhũm Tirtũm mã amnhĩ jarẽnã xà hã ixkre kamã hakwakre hã kupẽxêja axkjê nẽ amnhĩ kahê xà mẽnã kurẽ kumrẽx. Utĩ rax tã kõt ã axkjê nẽ amnhĩ kahê xà mẽ. Te Jejus htyk o kot mẽ

pahte hkõt amnhĩ xunhwÿr xwÿnhjẽ mã Tirtũm wÿr pry jakwa kre kahê xà mẽnã pyrãk o ã amnhĩ nhĩpẽx anẽ. ⁴⁷⁻⁴⁹ Hãmri nhũm mẽ piitã mẽmoj ã kot amnhĩ nhĩpẽx anhÿr ã omunh o kuhê xwÿnhjaja. Nẽ kaxyw Jejus krãmnhwÿjaja nhũm mẽ amÿm omunh o kuhê. Nẽ Garirej rũm mẽni kot Jejus kõt mẽ pa ho mẽ pa xwÿnhjaja mãânẽn mẽ kuri amÿm hkaprĩ nẽ omunh o kuhê. Nhũm pòristi krãhtũmjê hõja ã mẽmoj kot amnhĩ nhĩpẽx anhÿr ã omu nẽ tee ri hamaxpẽr o:

—Hêxta waa nẽ. Pêr ãm hãmri na pre hte tãm amnhĩ nhĩpẽx o pa. Tã pa mẽ amarĩ mẽ mar xà hkõt ixtÿx kupĩ. Anẽ.

Nhũm ã hamaxpẽr anhÿrja kõt Tirtũm mã mex o mex ã harẽnã o xa. Nhũm amarĩ mẽ kuhê xwÿnhjaja mãânẽn mẽmoj ã kot amnhĩ nhĩpẽx anhÿrta pumu nẽ tee ri hkukamã hamaxpẽr o ra kãm ma htÿx nẽ. Hãmri nẽ awjanã nẽ ma akupÿm krĩm mrar kurẽ kumrẽx.

Mẽ kot Jejus jaxà ã mẽ harẽnã

Matêwre 27.57-61; Makre 15.42-47; Juãw 19.38-42

⁵⁰⁻⁵¹ Tã nhũm axtem Juje pẽ Arimatej nhõ xwÿnhja. Arimatejja pika pẽ Ijaew kamã na. Nhũm Jujeja kot amnhĩ to mex jakamã Tirtũm kõt amnhĩ nhĩpẽx o pa. Jakamã na pre hkwÿjê rom Tirtũm kot mẽ pahwÿr Jejus mẽnã xwÿnh ã omu nẽ hkõt hamaxpẽr. Kęp Ijaew nhõ pahi hõ htã hkwÿjê hkõt hamaxpẽr kêt nẽ. Jakamã nhũm prem kot Jejus pĩr ã amÿnê nhũm tee ri harẽnã ma nhũm ja kęp omnuj nẽ. ⁵² Jakamã nhũm Jejus ty nhũm Juje ma pahi Pirat wÿr tẽ nẽ ì hã kuwÿ nẽ kãm:

—Pa? E ot pa awÿr tẽ. Kwa inhmã htyk xwÿnhnta gõ pa ma o tẽ nẽ haxà. Anẽ.

⁵³ Hãmri nhũm kuma nẽ kãm kugõ nhũm ma o tẽ nẽ haxà. Kaxyw kupẽxê hõ py nẽ ho hkupu nẽ ma o tẽ nẽ kẽn kre kaprÿ kamã haxà. Mẽ kot kormã kamã mẽnã jaxà kêt nhũm mẽ kamã Jejus jaxà. ⁵⁴ Arĩgro pẽ sêsta hã nhũm prem kupĩ nhũm myt xàr o mõr mẽ nhũm Juje ma o tẽ nẽ haxà. Ijaew kõt xà hã arĩgromnuja wÿr haxà. ⁵⁵ Nhũm Garirej rũm mẽni hkwÿ kot Jejus kõt pa xwÿnhjaja ma hkõt mra nẽ kot haxàr kãm omu. Mẽ hkuxwaxà ho gregrer kêt rãhã haxàr kãm

omu. ⁵⁶ Hāmri nē ma akupỹm krĩm mra nē kaxyw mẽ hkuxwaxà hkwỹ ho anē.

Tā nhũm apkati nhũm mẽ õ arĩgromnu pē sap kator jakamā nhũm mẽ kormā akupỹm hwỹr mrrar kēt nē. Hāmri arĩgro mex jamār pē arĩ hkòkòt o hkrĩ.

24

Jejus akupỹm htĩr jarēnh

Matēwre 28.1-10; Makre 16.1-8; Juāw 20.1-10

¹ Tā nhũm apkati nhũm tòmĩk. Hāmri nhũm mēnijaja kwỹhtā kànhmā hkrĩ nē ma akupỹm kēn kreta wỹr mẽ hkuxwaxà ho mra. ² Hāmri nē hwỹr àhtēp o mra nhũm ra hakwakre kahē xà raxta kahē xà hkàx à xa nhũm mẽ tee ri omu. ³ Hāmri nē kēn kre wỹr agjē nē kamā tee ri Jejus japēr no nhũm kamā amrakati. ⁴ Nhũm mẽ tee ri axpēn pumunh pē hkukamā hamaxpēr.

Hāmri nhũm Tĩrtũm kapēr o wryk xwỹnh wa axkrut nē mẽ haēr pē mẽ hwỹr kato nē wa xa. Wa ê jaka nē hirā htỹx kām wa xa. ⁵ Nhũm mẽ tee ri wa omu nē kām wa uma htỹx nē. Nē wa umaj hkòn krā ho ròròk nē hkrĩ hpa. Nhũm wa mẽ omu nē mẽ kām:

–Kwa mon ka mẽ ri mẽ htykjē kamā ra akupỹm htĩr xwỹnh ta japēr o ri apa?

⁶ Jar amrakati. Na ra akupỹm htĩr. Kormā Garirej kamā pa ri kot mẽ amā amnhĩ jarēnh xà hkòt na ra akupỹm htĩr. Mān ka mẽ arĩ kot à mẽ amā amnhĩ jarēnh anhỹrja à anohtỹx japēr. ⁷ Mē kot unēnh nē pĩ kahpa hā nhòr nhũm htyk nē htyk à apkati axkrunēpxi hāmri nē akupỹm htĩr à kot mẽ amā amnhĩ jarēnh ta mān ka mẽ arĩ hā anohtỹx japēr.

⁸ Anhỹr o mẽ kām kapēr nhũm mẽ kuma hāmri nē ra Jejus kot mẽ kām à amnhĩ jarēnh anhỹrja mã hamaxpēr kurē kumrēx.

⁹ Hāmri nē awjanā nē ma akupỹm krĩm hkĩnh nē mra. Nē hwỹr pòj nē mẽ kot Jejus nhỹ hā mẽ ahkre ho mẽ pa xwỹnhjē mã awjarē. Mē kēp 11 xwỹnh tajē mẽ kaxyw hkwỹjē mã awjarē. ¹⁰ Mēni kot mẽ kām ujarēnh xwỹnh tajē nhĩxi na pre Marir Matarēn nhũm ja kēp Joanā. Nē Xiakre katorxà Marir òta. Nē kaxyw mēni hōja. Jakamā nhũm mẽ ma akupỹm Jejus nhỹ hā mẽ ahkre ho mẽ pa xwỹnhjē hwỹr mra nē mẽ kām awjarē. ¹¹ Nom nhũm mẽ kuma nē

ām mẽ kuma nē htỹx ho amnhĩ krā hkòt mẽ kot ri à harēnh anhỹr à mẽ hkamnhĩx nē am mẽ kuma. ¹² Nhũm Simāw Pētre hamaxpēr hāmri nē kànhmā xa nē ma kēn kreta wỹr hpròt nē htēm kurē kumrēx. Hāmri nē tee ri kēn kre kaprỹ kamunh o xa nē kamā Jejus kupu xà pix pumu nē tee ri hkukamā hamaxpēr hāmri nē ma akupỹm tē.

Jejus kot Emau hwỹr wa mōr xwỹnh wa hwỹr kator à harēnh

Makre 16.12-13

¹³ Tā nhũm ra amỹkry ho mō nhũm Jejus kwỹjē hō wa hamēxkrut nē Jerujarē rũm kato nē ma akupỹm wa õ krĩ pē Emau hwỹr wa mō. Jerujarē rũm Emau hwỹr ahkrānre. ¹⁴ Jakamā nhũm wa hwỹr pry hā axpēn mã tanhmā Jejus jarēnh to ho mō. Kēn kre kamā mẽ kot haxàr nhũm ra ì pikunorja nhũm wa axpēn mã harēnh o wa mō. Nē tee ri hkukamā hamaxpēr o wa mō. ¹⁵ Hāmri nhũm Jejus tām tē nē wa hā ajēt nē wa hkòt tē. ¹⁶ Nom nhũm wa hprĩ hā omunh kēt nē. Tỹx ho nhām mēhō hā hkamnhĩx nē wa arĩ axpēn mã harēnh o wa mō. ¹⁷ Hāmri nhũm Jejus hēx rom wa kām:

–Kwa mēmon ka wa axpēn mã harēnh o wa mō? Anē.

Hāmri nhũm wa hkaprĩ kamā kām harē.

¹⁸ Ihō pē Kropitija kām:

–Kwa xà na ka Jerujarē kamā ri apa htā kamā mẽ kot tanhmā amnhĩ nhĩpēx toja jarēnh mar kēt nē? Kurũm amōr kēnā na ka ri mēmoj mar kēt nē ri apa. Anē.

¹⁹ Hāmri nhũm wa kām:

–Nà amrakati ixte mēmoj maare hā. Kwa mo na wehe? Kwa war aprĩ hā inhmā harē pa kuma. Anē.

Hāmri nhũm wa kām:

–Nà mẽ kot mẽ ixpē tanhmā Jejus pē Najare nhō xwỹnh ta to kēnā. Kēp Tĩrtũm nhỹ hā kapēr jarēnh o pa xwỹnh na pre. Nē Tĩrtũm nhỹ hā tanhmā amnhĩ nhĩpēx to ho pa nhũm prem piitā amnhĩm mex à harē.

²⁰ Tā nhũm mẽ panhō patre krāhtũmjē mẽ mẽ panhō pahijaja axtem nē mẽ kām hā amỹnē. Mē kot pĩ kahpa hā nhòr nhũm htyk kaxyw mẽ kām hā amỹnē. ²¹ Pa prem ixtỹx ho kēp Tĩrtũm kot mẽ pahwỹr mēnh xwỹnh à hkamnhĩx nē kot Rõm nhō xwỹnhjē pē mẽ ixpytār à hkamnhĩx tã nhũm prem mẽ ixpē

kupĩ. Jãã na prem ã hipêx anê nê kupĩ. Na ra htyk ã apkati axkrunêpxi.

²²⁻²³ —Nê jarãhã kwýhtã mēni hkwýjaja ma haxàr xà hã kēn kre hwýr mra nê xep tee kamã hapêr nê omunh kêt nê. Xep ãm Tirtũm kapêr o wrýk xwýnhja wa ho axkrut nê wa omu nhũm wa xa. Nhũm mē kãm ra akupým htír ã harê nhũm mē akupýn mē ixwýr mra nê mē ijaêr pē mē inhmã harê. ²⁴ Hãmri nhũm mē ixkwýjaja ma mē hpãnhã kēn kreta wýr mra nhũm ra mē kot harēnh xà hkôt tee ri kamã hapêr nom nhũm kamã amrakati kumrêx. Anê.

²⁵ Hãmri nhũm Jejus amnhĩ tã wa kuma nê wa kãm tanhmã amnhĩ jarēnh to nê wa kãm:

—Hêxta waa nê. Pêr ãm mē ate mēmoj mã ajamaxpêr tỳx mex kêt kumrêx. Na pre ra Tirtũm nhỹ hã kapêr jarēnh xwýnhjaja Tirtũm kapêr ã kagà htũm kamã ã kot amnhĩ nhĩpêx anhýrja kukamã hprĩ hã harê nê hã kagà. Mē akukamã mē anhĩgêjtê mã harê nê hã kagà. Tã ka mē kormã aprĩ hã mar tỳx kêt nê. ²⁶ Kêt mē anê na Tirtũm kot ãm xwýnhja ty. Tã ra akupým htír nê akupým kaxkwa hwýr àpir kaxyw. Kot mē ato amnhĩptàr kaxyw ra akupým hwýr àpir mã. ²⁷ Amnepêm na pre finat Mojesja tanhmã hkukamã mē anhĩgêjtê mã harēnh to nê hã kagà. Nê hprĩ hã harēnh o pa. Nhũm hpãnhã Tirtũm nhỹ hã kapêr jarēnh o mē pa xwýnhjaja ma anê nê mē kãm harēnh o pa. Anê.

Nhũm pre ã Jejus wa hkôt hprĩ hã wa kãm amnhĩ jarēnh anhýr o tē. Te ho nhãm mēhõ jarēnh pyrãk nom tãm wa kãm amnhĩ jarēnh o wa hkôt tē. No nhũm kormã wa hprĩ hã kēp Jejus ã omunh kêt nê.

²⁸⁻²⁹ Nhũm ã wa kãm amnhĩ jarēnh anhýr o mōr rãhã nhũm mē ra wa õ krĩ hwýr hpõx o mō. Nhũm ra kamãtre nhũm Jejus te kot wa rer nê nhỹhým ma htēm kaxyw pyrãk o amnhĩ nhĩpêx nhũm wa tee ri omu nê kãm:

—Kwa xà kot kaj wa ixre nê ma tē? Ra kamãt o mōr kēnã. Kwa ma wa ixkôt tē nê wa inhõrkwý kamã mãn wa ixri pøj. Anê.

Hãmri nhũm wa kuma nê ma wa hkôt tē. ³⁰ Nê mē wa õrkwý hwýr pøj nê hwýr agjê. Hãmri nê apkur kaxyw hkrĩ nhũm Jejus tãm pãwti py nê Tirtũm mã harê nê hpãnhã ho axkjê nê wa kãm kugõ. ³¹ Hãmri nhũm

wa atã kēp Jejus ã omunh kurê kumrêx. Jao nhũm wa kēp akunok nhũm wa tee ýr xà kamã hapêr nhũm hkaprý mex nê xa. ³² Hãmri nhũm wa tee ri axpēn pumu nê ri hkukamã hamaxpêr nê axpēn mã:

—Hêxta waa nê. Xep tãm na. Tãm na pahkôt mō nê pry hã hprĩ hã pamã Tirtũm kapêr ã kagà jarê pu hkôt pahkĩnh nê mar o mō. Hêxta waa nê. Xep tãm na. Anê.

³³⁻³⁵ Hãmri nê wa kãnhmã xa nê kato nê ujanãr kurê kumrêx. Hãmri nê ma akupým Jerujarê hwýr wa hkwýjê hwýr tē. Nê mē hwýr pøj nê axà. Nhũm Jejus nhỹ hã mē ahkre ho mē pa xwýnh pē 11jaja ra axpēn wýr akuprõ nê hkrĩ. Mē hkwýjê mē axpēn wýr akuprõ nê axpēn mã tanhmã Jejus jarēnh to ho hkrĩ. Hãmri nhũm wa mē hwýr axà nhũm mē wa omu nê wa kãm:

—Kwa na xep ra Jejus akupým htír nê Simãw Pêtre hwýr kato. Anê.

Hãmri nhũm wa mē kuma nê mē kãm:

—Tỳ na akupým htír kēnã. Na pa wa ijaxwýja ham omu. Na pry hã wa ixtã ajêt nê ma wa ixkôt mō nê wa inhõrkwý kamã pøj. Hãmri pa mē ixàpkur kaxyw ixkrĩ nhũm pãwti py nê Tirtũm mã harê nê ho axkjê nê wa inhmã kugõ pa wa ixprĩ hã kēp Jejus ã omunh kurê kumrêx. Ixprĩ hã omunh jao nhũm wa ixpê hapêx. Anê.

Jejus kot hkwýjê piitã hwýr kator ã harēnh

Matêwre 28.16-17; Makre 16.14; Juãw 20.19-23

³⁶ Nhũm mē kormã axpēn mã Jejus jarēnh o hkrĩ rôm nhũm tãm nhỹhýnh mē hwýr axà nê xa. Mē haêr pē mē hwýr nhỹhýnh axà nê mē kãm:

—Pa? Xàn ka mē arĩ akrĩ? Anê.

³⁷ Hãmri nhũm mē amnhĩ jaêr pē omunh jao kãnhmã hakry hpar o mra. Jao hakryk kãm ma htỳx kãm omunh o hkrĩ. ³⁸ Hãmri nhũm mē kãm:

—Kwa mon ka mē amã ixpyma kamã tee ri ixpumunh o akrĩ? Kwa mē ixkarõ hã ixkamnhix nê amã ixpyma hkêt nê. ³⁹ Na pa akupýn inhĩ ho mē awýr ixkato nê xa. Ga mē inhĩhkra kamã prek tatak xãja pumu. Nê ixpar kãm omu. Kwa mē amã ixpyma hkêt nê. E mē mãmrĩ mra nê anhĩhkra ho ixkupê. Kēp apu ixkarõ hpix ronhýx ka mē inhĩ kupēnh kêt nê. Mo mēhkarõja ã? Nà na

pa akupÿm ixtÿr nê inhÿ ho mē awÿr ixkato. Anē.

⁴⁰ Hāmri nē mē kām amnhÿ nhÿhkra hpē nē mē kām amnhÿ par pē. ⁴¹ Tā nom nhÿm mē arÿ akryk omunh o hkrÿ. Mē kot omunh nē hkÿnh tā tee ri omunh o hkrÿ. Hāmri nhÿm tee ri ja hā mē omu nē mē kām:

—E kwa mē inhmā mēmoj japêr pa kukrē. Anē.

⁴² Hāmri nhÿm mē kām tep gôj kām āmta gō ⁴³ nhÿm kupy nē hkur o nhÿ nhÿm mē arÿ hā omunh o hkrÿ. Jao ra akupÿm htÿr ā omunh kurê kumrēx.

Jejus akupÿm nojarêr nē hkwÿjê mā mēmoj tā karō

Matêwre 28.18-20; Makre 16.15-18; mǎānēn Atre 1.6-8

⁴⁴⁻⁴⁵ Hāmri nhÿm Jejus hprÿ hā mē kām Tÿrtÿm kapêr ā kagā htÿm kot hkukamā harēnh ā amnhÿ jarē nē mē kām:

—Nā kormā ixtyk kêt ri na pa pre ixprÿ hā mē amā amnhÿ kukamā amnhÿ jarē. Tÿrtÿm kapêr ā kagā htÿm kot tanhmā mē kot inhÿpêx to hkukamā ijarēnhja. Na pre finat Mojes Tÿrtÿm nhÿ hā ixkukamā tanhmā ijarēnh to. Nē Tÿrtÿm nhÿ hā kapêr jarēnh o mē pa xwÿnhjaja Mojes mÿr pē haxwÿja ixkukamā tanhmā ijarēnh to. Nē Tÿrtÿm mex o mex ā mē grer ā kagā xwÿnhjaja haxwÿja ixkukamā tanhmā ijarēnh to. Jajê piitā na prem Tÿrtÿm kapêr ā kagā htÿm kamā ixkukamā ijarē. ⁴⁶ Nē ijarēnh o:

Tÿrtÿm kot mē pakaxyw ām xwÿnh pē Krisja koja nhÿrmā ty. Nē htyk o apkati axkrunēpxi nē akupÿm htÿr.

Anhÿr o mē kot ijarēnh. Tā pa ramē kot ixkukamā ijarēnh xā hkôt ā mē anē amnhÿ nhÿpêx anē.

⁴⁷ —No ām Tÿrtÿm kapêr ā kagā htÿm kot papxipix ixkukamā ijarēnh kêt. Kamā mǎānēn mē kajaja tanhmā mē akukamā mē ajarēnh kute. Mē apê ixkôt amnhÿ xunhwÿr xwÿnhjaja ixwakre kamā tanhmā mē ate inhmā amnhÿ nhÿpêx to ho apa hkukamā tanhmā mē ajarēnh kute. Nē mē ajarēnh kot:

E mē ate ixkôt amnhÿ xunhwÿr xwÿnhjaja. Kêr ka mē ma pika piitā hkôt mē kām Tÿrtÿm kot mē awÿr mēnh xwÿnhhta jarēnh o ri mē hkôt apa. Mē kot mē amar nē amnhÿ tomnuj kaga nē

Tÿrtÿm kôt amnhÿ xunhwÿr kaxyw. Kêr kê Tÿrtÿm ja hā mē omu nē amnhÿ katut kôt mē kot amnhÿ tomnuj rēnh pa. E kêr ka mē ma krÿ piitā hkôt mē kām ā ja jarēnh anhÿr o ri mē hkôt apa. Krÿ pē Jerujarē kumrēx kām hāmri nē rÿ kormā pu hā krÿ kuhê xwÿnh piitā hkôt ajapôj nē mē kām harēnh o ri apa. Anē.

Ā Tÿrtÿm kapêr ā kagā htÿm kot mē akukamā mē ajarēnh kot anhÿr. ⁴⁸ Tā kêr ka mē ā mē kām tanhmā ijarēnh to ho ri apa anē. ⁴⁹ No ām kormā. Kêr paj ma akupÿm kaxkwa hwÿr api hāmri nē amnhÿ pānhā mē awÿr Tÿrtÿm Karō rē mǎn. Tÿrtÿm kot ixte amnhÿ nhÿpêx ā ijarēnh xā hkôt kot paj amnhÿ pānhā mē awÿr kurē. Tā kêr ka mē kormā krÿ ja kamā kutêp apa. Kêr kê mē awÿr wrÿ nē mē amā agjê ka mē rÿ kormā anhgrā nē ma ŷ hā mē kām ijarēnh o ri mē hkôt apa. Anē.

Jejus kot akupÿm kaxkwa hwÿr àpir ā harēnh

Makre 16.19-20; mǎānēn Atre 1.9-11

⁵⁰ Tā nhÿm Jejus Jerujarē rÿm hkôt mē pa ho pa xwÿnhjê kator nē ma krÿ pē Petān wÿr mē o mō. Nē kormā hwÿr mē o mōr ri nhÿri mē o xa nē kànhmā ðhkra pē nē mē ho Tÿrtÿm wÿ. ⁵¹ ā mē ho hwÿr anhÿrja rôm nhÿm Tÿrtÿm amnhÿ wÿr ho àpir o mō nhÿm mē noo mā ma akupÿm tēn api. ⁵² Hāmri nhÿm mē kām mex o mex ā harēnh pē ma akupÿm àpir kām omunh o kuhê. Nhÿm ma tē nē mē kêp kakrām axā nē mē kêp akunok. Hāmri nhÿm mē awjanā nē ma akupÿm Jerujarē hwÿr hkÿnh nē pa. ⁵³ Hāmri nē apkati mē Tÿrtÿm mā amnhÿ jarēnh xā hā ixkre hwÿr agjê nē kamā Tÿrtÿm mā mex o mex ā harēnh o hkrÿ rāhā nē.

Tā ām ja pix ixkrāmnhwÿ Teopre. Ixpê Rukre na pa awÿr kagāja nhÿpêx nē kamā Jejus kot tanhmā amnhÿ nhÿpêx to hā harē nē hā kagā nē awÿr kumē.

Juāw Juāw kot tanhmã Jejus kot amnhĩ nhĩpêx to ho pa hã kagà

Juāw na pre kagàja nhĩpêx. Na pre määnên Wam Juāw nê Sikũn Juāw nê Hapuhã Juāw nê Apokarip nhĩpêx. Juāw Paxis kêt axtem Juāw õ. Nê Jejus kôt mẽ pa ho mẽ pa xwýnhjê hõ na pre. Nê ý hã mẽ ahkre ho pa xwýnhjê hõ na pre. Nom kormã ã amnhĩ nhĩpêx anhỹr o pa hkêt ri na pre kêp tep kanhêr xwýnh. Nê kêp Jejus kràmnhwý mex na pre. Jakamã na pre kagàja nhĩpêx nê kamã Jejus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jejus kêp Tĩrtũm Kra hã harê nê hã kagà. Nê ãm pix kukwak ri Tĩrtũm wa kuri mẽ pahĩr tũm nê mẽ papa ho mẽ papa hã harê nê hã kagà. ã na pre Juāwja mẽ pamã Jejus jarê nê hã kagà anê.

Jejus te kot Tĩrtũm pyrãk ã harênh

Matêwre 1.23; Juāw 8.12, 8.58, 10.30, 20.28; määnên Atre 10.36; Sikũn Korĩt 4.4; Piriapos 2.6-11; Korosê 1.13-17, 2.9; Xitre 2.13; Eprêw 1.1-4; Wam Juāw 1.1-4, 5.20; Apokarip 1.17-18

¹ Amnepê mã kormã mẽmoj kêt ri nhũm kot Tĩrtũm kapêr o amnhĩrĩt xwýnhja Tĩrtũm kôt pa ho pa. Te kêp urãk nê pa. Wa kot amnhĩ nhĩpêxja ãm tipxi. Nê wa àhpumunh ãm tipxi. Nê wa hkarõ määnên ãm tipxi. ãm wa tipxi rãhã nê pa ho pa. ² Kormã mẽmoj kêt ri na pre Tĩrtũm kapêr o amnhĩrĩt xwýnhja Tĩrtũm kôt ri pa ho pa. ³ Nê Tĩrtũm nhỹ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tĩrtũm nhỹ hã ho kator pa. Kop apu mẽmoj to kator kêt ronhỹx mẽmoj amrakati kumrêx.

⁴ Nê Tĩrtũm o amnhĩrĩt xwýnhja pix kukwak ri na hte mẽmoj piitã htĩr nê pa. Nê ãm pix kukwak ri na htem Tĩrtũm ri htĩr tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj

piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamxpêr nyw o amnhĩrĩt pu mẽ pahprĩ hã mar mex nê. ⁵ Ja kaxyw na pre wrý nê ri mẽ kãm Tĩrtũm kapêr jarênh o ri mẽ hkôt pa. Jao mẽ kot amnhĩ nhĩpêx nyw jarê nhũm mẽ kot amnhĩ tomnuj xwýnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprý.

Juāw Paxis kumrêx kot tanhmã Jejus jarênh to hã harênh

Matêwre 3.1-3; Makre 1.1-4; Rukre 3.2-6

⁶ Tã nhũm kormã Jejus mẽ kãm kapêr o pa hkêt ri nhũm Juāw Paxis kumrêx mõ nê hkukamã Tĩrtũm nhỹ hã mẽ kãm tanhmã harênh to ho pa. ⁷ Mẽ kãm mẽ kot amnhĩ nhĩpêx nyw nhõr xwýnh pê Jejus Kris kukamã mẽ kãm harênh o ri mẽ hkôt pa. Mẽ kot mar nê amnhĩ kaxyw Jejus kôt hamaxpêr kaxyw. ⁸ No Juāw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nê. Na pre ãm kot mẽ kãm õr xwýnhja kukamã mẽ kãm harênh o pa. ⁹ Jakamã na pre hte mẽ kãm harênh o ri pa nê mẽ kãm harênh o:

—E ot pa mẽ amã mēhõ jarênh o ri ixpa. Kot mẽ pamã mẽ pahte amnhĩ nhĩpêx nyw nhõr xwýnhja. Kojã tokyx mẽ pakamã pøj pu mẽ omu. Kojã pøj nê mẽ piitã mẽ kãm Tĩrtũm kapêr jarênh o ri pa. Mẽ pahte pahprĩ hã mar mex kaxyw. Anê.

Tĩrtũm kot mẽ ho hkra hprãm xwýnhjê jarênh

Rõmãn 8.14; Karatas 3.26; Epes 1.5

¹⁰ Tã nhũm Jejus man kot mẽmoj piitã ho kator xwýnhja wýr wrý nê mẽ hkôt ri pa. No nhũm mẽ kot kêp mẽmoj piitã ho kator xwýnh ã omunh kêt jakamã na prem kapêr ma nê ãm kuma nê amnhĩ kaxyw hkôt hamaxpêr kêt nê. ¹¹ Na pre wrý nê mẽ pakamã ĩ ho kato. Kêp mẽ pahpiitã mẽ pahto kator xwýnh tã nhũm mẽ ohtõ nê omu nê ãm omu nê hkôt amnhĩ nhĩpêx kêt nê. ¹² Na prem ãm grêre nê kuma nê amnhĩ kaxyw hkôt hamaxpêr nê hkôt amnhĩ xunhwý. Hãmri nhũm amnhĩ tã mẽ omu nê mẽ kãm:

—E nã ãm hãmri. Ra mẽ ate amnhĩ kaxyw ixkôt ajamaxpêr nê ixkôt amnhĩ xunhwýr

jakamã na ka mẽ ixkukwak ri apê Tirtũm kraa. Anẽ.

¹³ Na htem ã kêp Tirtũm kra hprãm xaj Jejus kôt amnhĩ xunhwÿr anẽ. No na htem mẽ katorxà nhõxà hkre rũm hapôx kôt kêp Tirtũm kra hkêt nẽ. Rÿ amnhĩ krã hkôt tanhmã amnhĩ nhĩpêx to kukwak ri kêp hkra hkêt nẽ. ãm Tirtũm tãm kot mẽ ho hkra pix kukwak ri na htem kêp hkra.

Jejus wrÿk nẽ ã ho kator ã harênh

Matêwre 1.20; mãânên Rômãn 1.2-4; Piri-pos 2.6-7; Eprêw 2.9, 4.15; Wam Juāw 4.2

¹⁴ Jakamã na pre Tirtũm o amnhĩrit xwÿnhhta mẽ pahwÿr wrÿ nẽ mẽ pakamã ã ho kato nẽ mẽ pakamã pa. Kêp Tirtũm Kra hã pixi mex na pre. Nẽ kot amnhĩ nhĩpêxja te Tirtũm kot amnhĩ nhĩpêx pyrãk. Urãk nẽ mex o mex. Nẽ urãk nẽ mẽ pakutã nojarêt xwÿnh. Na pre hte katãt kôt Tirtũm kapêr jarênh o ri mẽ hkôt pa. Pa prem kuma nẽ mex o mex ã omu.

¹⁵ Nhũm Juāw Paxis na pre hkukamã mẽ kãm harênh o ri pa nẽ mẽ kãm:

—E ra ixte mẽ amã harênh o ri ixpa xwÿnhhta na ra pøj. Te pa ixte wa nẽ ixkator pyrãk nom amnepê mã kormã ixkêt ri nhũm htĩr rãhã nẽ pa ho pa. Ham ã ho kator tã kêp Tirtũm Kra jakamã urãk nẽ rãhã ho rãhã hã pa xwÿnh na. Jakamã kot amnhĩ to rax o kot ijakrenh par. Anẽ.

¹⁶ Nẽ kêp mẽ pakutã nojarêt rãhã nẽ pa ho pa xwÿnh jakamã na hte mẽ pahto mex rãhã pu mẽ kukwak ri pamex nẽ ri papa ho papa.

¹⁷ Na pre finat Mojesja mẽ panhĩgêtjê mã Tirtũm kapêr jarênh o ri mẽ hkôt pa nẽ mẽ kãm:

—Na pre Tirtũm mẽ pahte tãm amnhĩ nhĩpêx o papa hã mẽ pamã karõ. Jakamã kot puj mẽ kot mẽ pamã mẽmoj tã karõ xà hkôt ã amnhĩ nhĩpêx anhÿr o papa nẽ ra tãm amnhĩ nhĩpêx o papa. Anẽ.

Nhũm pre Mojesja ã mẽ kãm kapêr o pa anẽ. Hãmri nhũm mẽ kuma no ãm tee ri kãm Tirtũm kôt tãm amnhĩ nhĩpêx o pa hprãm kaprÿ. Jakamã nhũm hpãnhã Jejus Krisja wrÿ nẽ mẽ pamã kapêr õ ho kapêr o pa nẽ mẽ pamã:

—E mẽ ate Tirtũm kôt amnhĩ nhĩpêx o apa hkêt tã nhũm arĩ kãm mẽ ajapê nẽ. Nẽ kãm mẽ ato mex prãm. Jakamã kot kaj mẽ

amnhĩ to awÿ nhũm tanhmã mẽ akrã hto ka mẽ ra tãm ri amnhĩ nhĩpêx o apa. ãm hãmri na pa ã mẽ amã ja jarênh anẽ.

Anhÿr o mẽ pamã Tirtũm kapêr jarênh o pa. Tirtũm kapêr na mex o mex.

¹⁸ Nẽ aa mẽ pahtõ mẽ pahte pano ho Tirtũm pumunh kêt. ãm Kraja pix na kot no ho omunh. Kaxkwa kamã kuri ri pa ho pa jakamã kot omunh mex. Nẽ te kot Hipêxàja pyrãk jakamã na pre wrÿ nẽ hprĩ hã tanhmã kute hã mẽ pamã harênh o pa. Jakamã na pu mẽ ra pahpiitã Tirtũm kot amnhĩ nhĩpêx ã omu nẽ mar mex nẽ.

Juāw Paxis kot mẽ kãm Jejus jarênh o pa hã harênh

Matêwre 3.1-12; Makre 1.1-8; Rukre 3.15-17; mãânên Atre 19.4

¹⁹⁻²⁸ Na pre Juāw Paxis ma hkwyjê hkôt mẽ kãm Jejus jarênh o pa nhũm mẽ hkwyjaja kuma nẽ amnhĩ kaxyw Jejus kôt hamaxpêr nẽ hkôt amnhĩ xunhwÿ. Hãmri nhũm Juāw Paxis ja hã mẽ omu nẽ Tirtũm mã mẽ hkrã kumrã. Pyhti pê Jotãw nhĩkjê hã krĩ pê Petãn tã ri mẽ hkrã kumrãr o pa. Hãmri nhũm krĩ pê Jerujarê kamã Ijaew krãhtũmjaja harênh ma nẽ ma hwÿr hkwyjê rẽ. Mẽ kot tanhmã hkukjêr to nhũm kot mẽ kãm tanhmã amnhĩ jarênh to kaxyw. Jakamã nhũm mẽõ patre hkwyjê mẽ Tirtũm mã amnhĩ jarênh xà hã ixkre kamã mẽ ho ajuta xwÿnh kwÿjê mẽ Parijew nhõ xwÿnh kwÿjê mẽ nhũm mẽ ma hwÿr mra. Juāw Paxis wÿr mra nẽ omu nẽ kãm:

—Pa. E ot pa mẽ awÿr mra. Kwa mẽ inhmã amnhĩ jarê. Apê mẽ atõ na ka we? Xà ka na apê Tirtũm kot mẽ ixkaxyw axãm mã xwÿnhhta na ka nà? Xà ka na pa htem amnhĩ wÿr akamã ijamak o ixpa? Anẽ.

Hãmri nhũm mẽ kuma nẽ mẽ kãm: “Nà pa hkêt.” Anẽ hãmri nhũm mẽ kãm:

—Tõ mãn xep apê amnepê mã Tirtũm nhÿ hã kapêr jarênh xwÿnh pê finat Erisja. Hã na ka tanhmã amnhĩ to nẽ akupÿm atĩr nẽ mẽ ixkôt apa nà? Anẽ.

Hãmri nhũm mẽ kãm:

—Nà ixpê Eris kêt. Anẽ.

Hãmri nhũm mẽ kãm:

—Tõ mãn xep apê finat Mojes kot mẽ kãm harênh o pa xwÿnhhta na ka nà? Anẽ.

Hãmri nhũm mẽ kuma nẽ kê axte mẽ kãm:

—Nà ixpê tãh kêt. Anê.

Hãmri nhũm mẽ tee ri kot ã amnhĩ tã aprãr anhỹrja ma nê kãm:

—Kwa apê jajê hõ hkêt tã na ka hte mẽ hkrã kumrãr o ri apa. Kwa nà akatãt kôt mẽ inhmã amnhĩ jarê. Pa mẽ ama nê ma akupỹm mra nê mẽ kot awỹr mẽ ixrênh xwỹnhjê mã tanhmã ajarênh to. Tanhmã na ka hte mẽ kãm amnhĩ jarênh to ho ri apa? E kwa mẽ inhmã amnhĩ jarê pa mẽ ama. Anê.

Hãmri nhũm tã hprĩ hã mẽ kãm amnhĩ jarê. Amnepê mã mẽ hkukamã Tĩrtũm nhỹ hã kapêr jarênh xwỹnh pê finat Ijais kot hkukamã tanhmã harênh to nê hã kagà xà hkôt nhũm mẽ kãm amnhĩ jarê nê mẽ kãm:

—Tõe. Nà kot paj ixprĩ hã mẽ amã amnhĩ jarê ka mẽ inhma. Amnepê Tĩrtũm kapêr jarênh xwỹnhjê hõ pê finat Ijaisja na pre hte mẽ kãm mēhõ hkukamã harênh o ri pa. Mēhõ kot mẽ panhõ Pahihti hkukamã htēm nê kapôt ã kutêp mẽ kãm harênh o pa xwỹnhhta nhũm pre hkukamã harênh o ri pa. Nê mẽ kãm harênh o:

Koja nhỹrmã mēhõja kapôt ã mōn pōj nê mẽ kãm tanhmã ujarênh to ho ri pa. Nê mẽ kãm ujarênh o: “E mẽ inhma. Koja Tĩrtũm tokyx mẽ pahwỹr mẽ panhõ Pahihti mẽ nhũm wrỹ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te ho mẽ kot mēhõ kutêp pry hõ mex pyrãk o amnhĩ nhĩpêx o ri pa. Jao amnhĩ nhĩ ho tãm amnhĩ nhĩpêx nê tãm axpēn nhĩpêx o ri apa. Pahihtita kutêp.”

—Anhỹr o na pre hte finat Ijaisja kot Pahihti hkukamã harênh o ri pa xwỹnhhta kukamã harênh anê. Tã paa. Pa na pre Ijaisja ã ixkukamã ijarênh anhỹr o pa. Pa na pa hte ã Pahihti kutêp mẽ kãm harênh o ri ixpa anê. Tã ã ixte harênh anhỹr xwỹnhhta na ra mẽ pakamã pa ka mẽ kormã ja hã omunh kêt nê. Kukamã na pa hte mẽ piitã mẽ kot hkôt amnhĩ xunhwỹr ã mẽ omunh kaxyw gô pix o mẽ hkrã kumrãr o ri mẽ hkôt ixpa. Nom na pre ra mẽ pahwỹr Tĩrtũm kot mẽ pakaxyw ãm xwỹnhhta tãm mẽ pahwỹr wrỹ. Ahpumunh tỹx o kot ijakrenh jakamã na pa hte ãm kukwak ri ixpa nê amnhĩ tã hã ixpijaàm o ri ixpa. Anê.

Juãw Paxis kot mẽ kãm Jejus jahkre hã harênh

Matêwre 3.11; Makre 1.10; Rukre 3.22

²⁹ Tã nhũm apkati nhũm Juãw Paxis amnhĩ wỹr Jejus pumu nê mẽ kot mar o kuhê xwỹnhjê mã ãhkra ho ahkre nê mẽ kãm:

—E. Oněj Tĩrtũm kot mẽ pakaxyw ãm xwỹnhhta tẽ. Mẽ pahpê Ijaew na pu htem xatã pahte amnhĩ tomnuj pãnhã amnhĩrer kaxyw Tĩrtũm mã pahkrit ôwêhti hkra nyw kwỹ hpa nê ho amnhĩ pãnhã kãm amnhĩrer o papa. No kêt htēm něj koja nhỹrmã kãm mẽ pahpiitã mẽ pahte amnhĩ tomnuj pãnhã amnhĩrer pa. ³⁰ Na pa pre ra mẽ amã harênh o: “Te pa ixte wa nê ixkator nê ixtĩr nê ixpa pyrãk. Nom amnepê kormã ixkêt ri na pre htĩr rãhã nê pa ho pa. Nê ã ho wrỹk nê jar kator tã kêp Tĩrtũm Kra jakamã urãk nê rãhã nê pa ho pa xwỹnh na. Jakamã kot amnhĩ to rax o kot ijakrenh par.” Anhỹr o pa pre mẽ amã harênh o ri ixpa ka prem inhma.

³¹ —Ixte mẽ amã ã harênh anhỹr tã ijaxwỹja kormã ixte kêp Tĩrtũm Kra hã omunh kêt nê ãm hkukamã Tĩrtũm nhỹ hã mẽ amã ã harênh anhỹr o ri ixpa. Nê hkukamã Tĩrtũm mã mẽ akrã kumrãr o ri ixpa. Tã na pa kêp Tĩrtũm Kra hã omu nê ã mẽ amã ahkre anê ka mẽ omu. Anê.

³²⁻³³ Nhũm pre ã Juãw Paxis mẽ kãm Jejus jahkre anê nê mẽ kãm:

—Nà Tĩrtũm na pre ixte mẽ akrã kumrãr o ixpa kaxyw inhmã hã karõ. Tã na inhmã kot mẽ pakaxyw ãm xwỹnhhta o amnhĩrit nê inhmã harênh o: “Koja nhỹrmã Ixkarõja mēhõ hwỹr wrỹ nê kuri arĩk. Ka ja hã omu nê kêp Ixkra hã omunh kurê kumrêx. Koja amnhĩ xõ ri amnhĩ pyrã nê mẽ kãm Ixkarõ nhõr o pa nhũm mẽ hkarõ mã agjê.” Anhỹr o inhmã harê. Tã na pa ra omu. Na pre Tĩrtũm Karõ kaxkwa rũm te tuuti pyrã nê hwỹr wrỹk o tẽ nê ãkre hã xa. ³⁴ Pa ã kot hipêx anhỹr ã omu nê kêp Tĩrtũm Kra hã omunh kurê kumrêx. Jakamã na pa ã mẽ amã ahkre nê mẽ amã harênh anê. Anê.

Juãw Paxis kôt pa xwỹnh wa kot Jejus kôt pa hã wa harênh

Atre 19.4

³⁵ Tã nhũm apkati nhũm Juãw Paxis axte Jejus pumu. Kot hkôt ri pa ho pa xwỹnh mẽ

wa nhÿri xa nê omunh o xa. ³⁶Nhũm ra mē hãnh tē nhũm Juāw Paxis omu nē hkôt ri pa xwÿnh wa kãm:

—E oněj Tirtũm kot mē pakaxyw ãm xwÿnh ta tē. Něj koja mē pahte amnhĩ tomnuj pãnhã amnhĩre. Anē.

³⁷Hãmri nhũm wa kuma nē omu nē ma hkôt tē nē hã ajēt. ³⁸Nhũm wa omu nē wa kãm: “Pa mo na?” Anē nhũm wa kot kēp mē ahkre xwÿnh ã omunh jakamã kãm:

—Nà wa ixte ma akôt ixtēm nē nhÿri anhõrkwȳ pumunh mã na pa wa akôt tē. Anē.

³⁹Hãmri nhũm wa kãm:

—Tõe. Nà wa kam nē rĩ ma ixkôt tē. Anē.

Hãmri nhũm wa kuma nē ma hkôt wa tē nē õrkwÿ hwÿr pøj nhũm ra amÿkry nhũm wa hkôt axà nē kuri ÿr o kamãt hãmri nē kato nē ma akupÿm tē. ⁴⁰Kôt htēm xwÿnhjê hõta na pre kēp Andre. Simãw Pêtre htõ na pre. Nē kaxyw hõja. Wa kumã na pre Juāw Paxis Jejus jahkre nē harē nhũm wa ma hkôt tē. Tã wa ra akupÿm wa tē. ⁴¹Hãmri nhũm Andreja htõ Simãw wÿr tē nē kãm:

—Kwa na pa wa jarãhã Tirtũm kot mē pakaxyw ãm xwÿnh ta pumu. Ma pu hwÿr ka wa ixwar ano ho omu nã. Anē.

Ijaew kapēr kãm “Tirtũm kot mē pakaxyw ãm xwÿnh” anhÿrja te kot Gres kapēr kãm “Kris” anhÿr jarēnh pyrãk. Ijaew na prem ã Jejus jarēnh anē nē harēnh o: “Tirtũm kot mē pakaxyw ãm xwÿnh.” Anhÿr o harē. ⁴²Jakamã nhũm ã Andreja htõ mã harēnh anē nē ma akupÿm hwÿr o tē. Nē wa hwÿr pøj nhũm wa omu. Wa kēp Juāw kra hã wa omu hãmri nē Simãw mã kapēr nē kãm:

—Pa Simãw. Nà apē Simãw tã kot paj axte atã anhĩxi hõ mē. Kot kaj mããnen apē Septi. Anē.

Mē pakapēr kãm Septija te kēp “kēn” jarēnh pyrãk. No Gres kapēr kãm te kēp “Pêtre” jarēnh pyrãk. No Ijaew kapēr kãm kēp “Septi.” Jakamã nhũm pre Jejus ã Simãw Pêtre hã hixi mēnh anē.

Jejus kot amnhĩ kôt Firipti mē Natãnaew wa hwÿr ã harēnh

⁴³⁻⁴⁴Tã nhũm apkati nhũm ra Jejus pyka pē Garirej wÿr nojarēt nē nhÿri Firipti pumu. Firiptija Andre mē Simãw Pêtre wa urãk nē krĩ pē Pesēj nhõ xwÿnh na pre.

Jakamã nhũm Jejus nhÿri omu nē amnhĩ kôt kuwÿ nē kãm:

—E kwa ma ri ixkôt apa ho apa. Anē.

⁴⁵Hãmri nhũm kuma nē ma tē nē nhÿri Natãnaew pumu nhũm nhÿri pĩ hpàr parpē nhÿ nhũm omu nē kãm:

—Kwa na pa jarãhã finat Mojes kot amnepēm mēhõ hã kagà xwÿnh ta pumu. Tirtũm kot mē pakaxyw ãm xwÿnh ta na. Tirtũm nhÿ hã kapēr jarēnh o mē pa xwÿnhjaja kot hkukamã harēnh nē hã kagà xwÿnh ta. Kēp Najare nhõ xwÿnh nē mããnen kēp finat Juje hkra. E kwa tokyx pu hwÿr ka ixkuxwar ano ho omu. Anē.

⁴⁶Hãmri nhũm tee ri kot tanhmã harēnh toja ma nē kãm:

—Tk. Kokÿ. Najare nhõ xwÿnh piitã kot amnhĩ to mexti hã kot kêt we hõ kēp Tirtũm kot mē pakaxyw ãm xwÿnh. Anē.

Hãmri nhũm kãm:

—Kwa nã ã akapēr anhÿr kêt nē. Ma ixkôt tē nē ixpyrà nē ano ho omu mãn. Nē rĩ ã ri akapēr anē. Anē.

Hãmri nhũm kuma nē ma hkôt tē. ⁴⁷Hãmri nhũm Jejus amnhĩ wÿr wa omu nē kuri mē kuhê xwÿnhjê mã Natãnaew jarēnh kurê kumrēx nē harēnh o:

—E oněj Ijaew õja mē pahwÿr hpõx o tē. ãm hãmri na hte tãm amnhĩ nhĩpēx o pa. Na hte higēt finat Jako kurom hēx rom ri tanhmã mē kãm amnhĩ to hēx to ho pa hkêt nē. Na hte ãm kapēr mex pix o ri kapēr o pa. Anē.

⁴⁸Hãmri nhũm tee ri amnhĩ tã kuma nē kãm:

—Kwa mēhõ na pre ã amã ijarēnh anē? Aa ixte nhÿri apumunh kêt kumrēx tã ka ri ãm hãmri ã ijarēnh anē. Anē.

Hãmri nhũm kãm:

—Nã mēhõ kot tanhmã inhmã ajarēnh to hkêt. ãm pa na pa hte inhno ho apumunh o ixpa. Kormã Firipti kot awÿr htēm nē amã ijarēnh kêt ri pa ra ixprĩ hã inhno ho apumu. Na ka kormã pĩta parpē nhÿ pa apumu. Anē.

⁴⁹Hãmri nhũm tee ri kot hprĩ hã harēnh ã amnhĩ tã kuma nē kãm:

—Kwa mē ijahkre xwÿnh. Pēr ãm hãmri apē Tirtũm Kra kumrēx jakamã na ka ã ijarēnh anē. Xep ka na mē ixte amnhĩ wÿr akãm ijamak o ixpa xwÿnh ta na ka. Nã ka na apē mē ixpē Ijaew nhõ Pahiti. Anē.

⁵⁰ HãMRI nhũM JeJus kuma nẽ kãm:

—Nà ãm hãmri na ka ixte pĩ hpar pẽ apumunh ã ajarẽnhja ma nẽ hkõt pix mã ixpẽ TĩrtũM Kra hã ixpumu. Tã kot kaj ja nhĩrõ pẽ axte mẽmoj mex o kot ja jakrenh pumu. ⁵¹ Koja nhỹrmã kaxkwa axkjẽ nhũM TĩrtũM kapẽr o mẽ wrỹk xwỹnhjaja kurũM axpẽn japa ka mẽ omu. Finat Jako pyrà nẽ mẽ omu. Ixte TĩrtũM kot mẽ akaxyw ixãm xwỹnh wỹr koja mẽ ã wrỹk nẽ amnhĩ nhĩpẽx anẽ ka ja hã mẽ omu. Kwa jam ajamaxpẽr tỹx rãhã ho apa. Anẽ.

2

JeJus kot gõ ho mẽ kãm wĩhti nhĩpẽx ã harẽnh

¹ Tã nhũM apkati axkrut nẽ hapẽx nhũM JeJus arĩ Garirej kamã pa. NhũM krĩ pẽ Kanã kamã axpẽn mã wahõj wa rer kaxyw nhũM JeJus katorxà ma mẽ hwỹr mõ. ² Hãmri nhũM mẽ amnhĩ wỹr JeJus mẽ hkõt ri mẽ ixpa xwỹnhjẽ wỹ pa mẽ ijaxwỹja ma mẽ hwỹr mõ nẽ ra mẽ hwỹr põj. ³ Hãmri nẽ mẽ hkõt wa hã ixkĩnh nẽ apku nẽ wĩhti hkwy ho ixkõm o ixkrĩ. Tã nhũM ra wĩhti mẽ kęp hapẽx nhũM JeJus katorxàja harẽnh ma nẽ JeJus mã harẽ nẽ kãm:

—Xẽ JeJus. Na xep ra mẽ kęp wĩhti hapẽx pa. Xat ka tanhmã mẽ ho ajuta hto mẽ? Anẽ.

⁴ Hãmri nhũM kãm:

—Tõe. Kwa tee ri ajamaxpẽr kêt nẽ. Kot paj tanhmã mẽ kãm ho. Nom kot paj kormã ixpẽ TĩrtũM kot mẽ akaxyw ixãm xwỹnh ã pa kormã amnhĩ to amnhĩrit kêt nẽ. Anẽ.

⁵ Hãmri nhũM katorxà kuma nẽ mẽ kãm mẽ ãpẽn xwỹnhjẽ hwỹr tẽ nẽ mẽ kãm:

—An koja JeJus mẽ awỹr tẽ nẽ tanhmã mẽ amã mẽmoj tã karõ hto ka mẽ ama nẽ kãm ho anhỹr kurẽ kumrẽx. Anẽ.

⁶ NhũM mẽ kuri kẽn o poti kęp 6 nẽ kuhẽ. Piitã umpỹm rũnh kumrẽx. Koja hõ pyxi nẽ nýt nẽ kamã gõ kęp 80 rit nẽ hkwy kamã kęp 100 rit. Ijaew na htem apkur kaxyw nẽ amnhĩ nhĩkra kuhõnh japjẽ rũnh nẽ kormã apku. Nẽ apkur pa nẽ axte amnhĩ nhĩkra kuhõ. ã mẽ kot xatã amnhĩ nhĩkra kuhõnh jakamã nhũM pre htem amnhĩ ri ã poti rũnh kwỹ xunhwỹr anẽ. No nhũM ra hkaprỹ nẽ kuhẽ. ⁷ Hãmri nhũM JeJus tẽ nẽ omu mẽ ãpẽn xwỹnhjẽ mã kãm:

—E mẽ ma mra nẽ gõ ru nẽ ho poti kuhẽ mũj piitã ho nýt pa. Anẽ.

NhũM mẽ kuma nẽ ma mra nẽ ho nýt pa.

⁸ Hãmri nhũM mẽ kãm:

—Nà hãmri. Pãnhã hõ kamã gõ hkwy janhi nẽ o tẽ nẽ mẽ anhõ patrãw mã agõ kẽ hkwy ho ixkõ nẽ kamã ama. Anẽ.

Hãmri nhũM mẽ mar xà hkõt kãm hkwy janhi nẽ hwỹr o tẽ nẽ kãm kugõ. ⁹⁻¹⁰ Nom nhũM gõja arĩ kęp gõ kumrẽx kêt nẽ. JeJus kot tanhmã ho jakamã nhũM ra hpãnhã kęp wĩhti. Jakamã nhũM mẽõ patrãw wỹr hkwy ho tẽ nẽ kãm kugõ nhũM hkaki nẽ kamã ama. Nom JeJus kot gõ ho hipẽx ã omunh kêt nẽ. ãm htỹx ho wĩhti kumrẽx ã hkamnhĩx nẽ mex kumrẽx ã hkaki. Hãmri nẽ amnhĩ wỹr mjẽn nyw xwỹnh mã hpa ho apẽ nhũM hwỹr tẽ nhũM kãm:

—Kwa na htem wĩhti mex o wa nẽ mẽ kãm kugõ hãmri nhũM mẽ hpenh pa nhũM mẽ rĩ kormã hkõt omnu ho hapu nẽ mẽ kãm kugõ. Tã ka pẽr mẽ axtem nẽ wam mẽ kãm omnu nhõr pa hãmri nẽ kormã mex kumrẽxa o hapu nẽ mẽ kãm agõ. Kêt wĩhti ja na mex kumrẽx. ãm mex o mex. Anẽ.

JeJus kot gõ ho hipẽx ã omunh kêt jakamã nhũM ã kãm kapẽr anẽ. ãm mẽ ãpẽn xwỹnh pixjaja na prem ja hã omu. ¹¹ NhũM JeJus kormã mẽ kãm aa mẽ kot mẽmoj pumunh kêt õ ho anhỹr kêt tã krĩ pẽ Kanã kamã ã mẽ kãm amnhĩ nhĩpẽx anhỹr o hkrax. Jao amnhĩ to rax o amnhĩ to rax ã mẽ inhmã amnhĩ to amnhĩrit. Pa mẽ ixpẽ hkõt ri ixpa xwỹnhjaja ã kot amnhĩ nhĩpẽx anhỹr ã omu hãmri nẽ kęp TĩrtũM kot mẽ pakaxyw ãm xwỹnh ã omunh kurẽ kumrẽx.

¹² Tã nhũM JeJus hpãnhã ma krĩ pẽ Kapanau hwỹr mõ. Pa mẽ hkõt ri ixpa xwỹnhjaja nẽ katorxà nẽ htõjaja pa mẽ ma ixpiitã hkõt mõ. Hãmri nẽ hwỹr põj nẽ kamã mẽ hkõt ixpa hã ixtã apkati grẽre nẽ ma hpãnhã krĩ hõ hwỹr ixpa.

JeJus kot TĩrtũM nhõrkwỹ hwỹr ãr ã harẽnh Matêwre 21.12-13; Makre 11.15-19; Rukre 19.45-46

¹³ Tã nhũM ra arĩgro pẽ Pas ahtẽp o mõ. Pasja ã mẽ ixpẽ Ijaew na pa htem amnepẽm TĩrtũM kot pika pẽ Ejit rũm mẽ inhĩgõtjẽ kator mã ijamaxpẽr kaxyw axpẽn wỹr akuprõ nẽ hã ixkĩnh. Jakamã nhũM

Jejus ma hkwyjê hkôt krī pê Jerujarê hwyr mō. Pa mẽ ixpê hkôt ri ixpa xwýnhjaja pa mẽ ma hkôt ixpa. Hāmri nê hwyr pōj ¹⁴ nê Tirtūm mā amnhī jarēnh xà hā ixkre hwyr mra nê ixkre puhā kahêja wyr agjê. Nhūm mẽ kamā axtem nê mẽmoj to wēnê ho kuhê. Mōx o wēnê nê ôwēhti ho wēnê nê tutre ho wēnê ho kuhê. Mẽ kot haprōr nê ho Tirtūm mā hkīnh xà kaxyw mẽ kām ho wēnê. Nê kàxpore ho pinhpanh xwýnhjaja haxwýja mẽ kuri hkrī. ¹⁵ Hāmri pa mẽ Jejus kôt mẽ hwyr agjê nê ja hā mẽ omu hāmri nhūm Jejus pê ja omnuj tỳx nê. Jakamā nhūm tee ri mẽ omu hāmri nê amnhīm mry hkà ho mẽ htak xà nhīpêx nê ho ixkreja nê mẽ piitā mẽ kator pa. Nê mōx nê ôwēhti nê mẽmoj piitā kator pa. Nê kàxpore ho pinhīpanh xwýnhjaja nhūm mẽ kēp mẽ ô mēsti rēnh pa nhūm mẽ hikàxpore pykap rôrōk pa nê anhrà nê hikwý. ¹⁶ Hāmri nhūm Jejus tutre ho wēnê xwýnhjê mã kām:

—Kwa mẽ anhō tutre jamý nê tokyx ma mra. Na htem Inhīpêêxà nhōrkwý kamā mẽmoj to wēnê hkêt nê. Kēp mẽ uaprōr xà hā ixkre hkêt. E kwa mẽ tokyx ma mra. Anê.

Nhūm pre ã mẽ kām kapēr anê nhūm mẽ tee ri kuma hāmri nê ma mrrar kurê kumrêx. ¹⁷ Pa mẽ hkôt mẽ ixpa ho ixpa xwýnhjaja ã kot mẽ hipêx anhýr ã omu hāmri nê ra Tirtūm kapēr ã kagà htūm kot ã amnhī nhīpêx anhýrja kukamā hā kagàta mã ijamaxpēr kurê kumrêx. Kagà kot amnepēm Jejus kukamā te ra ã kapēr anhýr pyrāk o harēnh. Nê harēnh kot:

Na pa hte Tirtūm nhōrkwý ho mex rāhā ho ixpa. Nhūm mẽmoj punuj hwyr axà pa omu nhūm ja inhmā mex kêt nê.

Anhýr o kot hkukamā harēnh jakamā na pa mẽ ã Jejus kot mẽ hipêx anhýrja ã omu hāmri nê ra hkukamā hā kagàta mã ijamaxpēr kurê kumrêx.

Ijaew krāhtūmjaja kot Jejus kukjêr ã mẽ harēnh

¹⁸ Tã nhūm Ijaew krāhtūmjaja tee ri Jejus kot ixkreja nê mẽ kator ã omu hāmri nê hwyr mra nê kām:

—Pa. Kwa mon ka ri ã Tirtūm mã amnhī jarēnh xà hā ixkreja nê mẽ kator anê? Mēhō na we mẽ ixwýr amē ka ý hā ã mẽ hipêx anēhti? Nà xà Tirtūm na

mẽ ixwýr amē? E mẽ inhmā aa mẽ ixte mẽmoj pumunh kêt ô ho anê. Pa mẽ ja hā apumu hāmri nê Tirtūm kot mẽ ixwýr amēnh xwýnh ã apumunh kurê kumrêx. E kwa tokyx mẽ inhmā ho anê. Anê.

¹⁹ Hāmri nhūm mẽ kuma nê mẽ kām amnhī jarē. Nom amnhī tã kuxi nê mẽ kām awjarē nê mẽ kām:

—Nà kot paj aa mẽ ate mẽmoj pumunh kêt ô ho pixi nê mẽ amā ho anê ka mẽ omu. Tirtūm nhōrkwý jaa. Kot kaj mẽ agrà pa ixtā apkati axkrunēpxi nê akupým hipêx ka mẽ ja hā ixpumu.

²⁰⁻²² Anhýr o mẽ kām kapēr. No ãm ixkreja jarēnh kêt nê. Na pre ãm amnhī tã kuxi nê ã mẽ kām kapēr anê. Mẽ kot hpīr nhūm htyk ã apkati axkrunēpxi nê akupým htīr ã mẽ kām ã amnhī jarēnh anê. Te mẽ kot Tirtūm mã amnhī jarēnh xà hā ixkreta grānh nhūm hā apkati axkrunēpxi nê akupým kot hipêx parta pyrāk ã hā kuxi nê ã mẽ kām amnhī jarēnh anê. Jakamā nhūm mēhpri hā mar mex kêt nê. ãm tee ri kuma nê kām:

—Tk. Kwa ixkre ja na prem hipêx kaxyw nê hā amgrà xohtō rax nê hipêx. Hā amgrà pê 46 nê hipêx par kēnā kot ka kêt atā apkati axkrunēpxi pix nê akupým hipêx. Anê.

Mẽ kot hprī hā mar kêt jakamā na prem ã kām kapēr anê. Pa mẽ hkôt mẽ ixpa ho ixpa xwýnhjaja ã mẽ kām kapēr anhýrja ã kuma nê hā inhnohtỳx rāhā ho ri ixpa. Tã nhūm mẽ kot Jejus pīr nhūm hā apkati axkrunēpxi nê akupým htīr nhō arīgrota ã pa mẽ kot ã amnhī jarēnh anhýrja mã ijamaxpēr kurê kumrêx. Nê axpēn mã:

—Hêxta waa nê. Xep ãm hāmri na pre Pahīhti amnhī kukamā ã amnhī jarēnh anê. Mẽ kot hpīr nhūm htyk ã apkati axkrunēpxi nê akupým htīr ã amnhī kukamā amnhī jarēnh mex nê. Te mẽ kot Tirtūm nhōrkwý grānh par nhūm hā apkati axkrunēpxi nê akupým hipêx ã amnhī jarēnh pyrāk. ãm hāmri na pre amnhī kukamā ã amnhī jarēnh anê. Anê.

Jejus kot mẽ pajamaxpēr kôt mẽ pah-pumunh ã harēnh

²³ Tã nhūm Jejus mẽ hkôt mẽ ixpa ho ixpa xwýnhjaja arī Jerujarē kamā ri ixpa ho ixpa.

Nhũm ra arĩgro pê Pasja kato nhũm mẽ piitã hkĩnh kaxyw axpẽn wỳr akuprõ. Nhũm Jejus mẽ kãm aa mẽ kot mẽmoj pumunh kêt kwỳ ho anhỳr o ri mẽ hkõt pa. Nhũm mẽ omu nhũm mẽ hkwỳjaja Tĩrtũm kot mẽ pakaxyw ãm xwỳnh ã hkõt hamaxpěr tã no ãm hkõt hamaxpěr tỳx kêt nẽ. ²⁴ Jakamã nhũm Jejus amnhĩ tã mẽ hamaxpěr ã mẽ omu nẽ hamaxpěr o:

–Nà mẽ kot ixkõt hamaxpěr kryre xwỳnhjaja koja mẽ hã apkati grẽre nẽ ixto hamakêtcati nẽ htỳx ri pa. Anẽ.

²⁵ Jejus kot mẽ pahte pahtỳx ri amnhĩ tomnuj o papa hã mẽ pahpumunh par. Nẽ pahtỳx ri pajamaxpěr punuj o papa hã mẽ pahpumunh par. Jakamã na pre ã mẽ harẽn anẽ.

3

Jejus mẽ Nĩkotẽ wa kot axpẽn mã kapěr ã wa harẽn

Juãw 1.12-13; mããnẽn Wam Pẽtre 1.23

¹ Tã nhũm Parijew nhõ xwỳnhjẽ õ pê Nĩkotẽ. Mããnẽn kệp Ijaew krãhtũmjẽ hõ.

² Jakamã na pre Jejus jarẽn ma nẽ kãm omunh prãm nẽ. Hãmri nẽ hkwỳ pymaj kamàt kãm hwỳr tẽ nẽ omu nẽ kãm:

–Pa mẽ ijahkre xwỳnh. E ot pa awỳr tẽ. Ra mẽ ixte apumunh mex. Tĩrtũm na pre ate mẽ ijahkre ho apa kaxyw mẽ ixwỳr amẽ ka mẽ ixwỳr wrỳ. Mẽhõ koja apyrã nẽ aa mẽ inhã mẽ kot mẽmoj pumunh kêt kwỳ ho anhỳr o pa? Nà amrakati kumrẽx. Kop apu Tĩrtũm kot mẽ ixwỳr amẽn kêt ronhỳx ka ã amnhĩ nhĩpêx anhỳr kêt nẽ. Anẽ.

³ Hãmri nhũm kuma nẽ tanhmã kãm kapěr to. No ãm amnhĩ tã kuxi nẽ kãm awjarẽ nẽ kãm:

–Na htem piitã mẽ katorxã nhõxã hkre rũm hapõj. Tã Tĩrtũm kãm mẽ piitã axte mẽ hapõx prãm. Jakamã kot kaj mẽ akator o axkrut kêt nẽ hãmri nẽ nhỹmã Tĩrtũm ri atĩr tũm nẽ apa ho apa hkêt nẽ. ãm hkrajẽ pix na htem kuri htĩr tũm nẽ pa ho pa. Jakamã kwa jam ajamaxpěr tỳx nẽ ri ho apa. Anẽ.

⁴ Hãmri nhũm Nĩkotẽja kuma nẽ tee ri ã kot kãm kapěr anhỳrja kukamã hamaxpěr nẽ kãm:

–Kwa ra ixaptãr kẽnã kot pa kêt tanhmã amnhĩ to nẽ akupỹm ixkatorxã nhõxã hkre hwỳr axã nẽ axte kurũm ixkato. Anẽ.

⁵⁻⁷ Hãmri nhũm Jejus kãm:

–Nà na hte mẽ hkrarejaja mẽ katorxã nhõxã hkre rũm kagõ hkõt hapõj hãmri nẽ kệp katorxã mẽ hipêxã wa hkwỳy. Jao wa kot amnhĩ nhĩpêx kõt amnhĩ nhĩpêx o pa. Ja pyrã nẽ ka mẽ atõ amã apẽ Tĩrtũm kra hprãm hã kot kaj amnhĩ to awỳ nhũm wa Ixkarõja akarõ mã axã hãmri ka ra apẽ hkraa. Te ra axte akator pyrãk o amnhĩ nhĩpêx. Nẽ te mẽ hkra kot katorxã nẽ hipêxã wa kot amnhĩ nhĩpêx kõt amnhĩ nhĩpêx o pata pyrã nẽ apãm Tĩrtũm kot amnhĩ nhĩpêx kõt amnhĩ nhĩpêx o ri apa. Nom koja Tĩrtũm mẽ wa Ixkarõja akarõ mã àr kêt nẽ ka apẽ hkra hkêt nẽ. Jao te axte akator kêt pyrãk o amnhĩ nhĩpêx. Jakamã na pa amã te ate akator pijakrut o amnhĩ nhĩpêx pyrãk o amã ã ja jarẽn anẽ. Kwa jam ajamaxpěr tỳx rãhã ho ri apa. No ama nẽ tee ri amnhĩ kukamã ajamaxpěr kêt nẽ.

⁸ –E pa ixprĩ hã amã ja jarẽ ka inhma. Na hte kõt kãm nhỹhỹm àpêr prãm xã hkõt àpêr o pa. Pu mẽ kamã ama no ãm pano ho nhỹhỹnh mõi xã hkõt omunh kêt nẽ. Nẽ nhỹhỹm ma mõi xã hkõt omunh kêt nẽ. Ja pyrã nẽ na hte Tĩrtũm mẽ wa Ixkarõja mẽ hkaxwỳnh mã agjẽ nẽ mẽ ho Tĩrtũm kra nom nhũm mẽhprĩ hã kot tanhmã mẽ ho hã amnhĩ tã omunh kêt nẽ. Anẽ.

⁹ Hãmri nhũm Nĩkotẽ ã Jejus kot kãm kapěr anhỳr ã kuma nẽ tee ri hamaxpěr nẽ kãm:

–Kwa na pa ixprĩ hã amar kêt nẽ. Anẽ.

¹⁰ Hãmri nhũm kãm:

–Kwa mon ka hte Tĩrtũm kapěr tũm o Ijaew jahkre ho apa tã aprĩ hã ixkapěr mar kêt nẽ? ¹¹ Ixte mẽmoj pumunh xã hkõt ixte mẽ amã harẽn o ixpa htã ka mẽ apẽ Ijaew krãhtũmjaja mẽ amã ixkapěr mar prãm kêt nẽ. ã mẽ ate anhỳr kumrẽx. Kwa jam ajamaxpěr tỳx nẽ. ¹² Na pa ra Tĩrtũm kot jar tanhmã amnhĩ nhĩpêx to hã harẽn o ixpa htã ka mẽ ãm ama nẽ ixkõt ajamaxpěr kêt nẽ. Jakamã xã kot pa hpãnhã mẽ amã kaxkwa kamã tanhmã kot amnhĩ nhĩpêx to hã harẽ ka mẽ ama nẽ mar tỳx nẽ? Nà kot ka mẽ ama nẽ ãm ama nẽ hkõt ajamaxpěr kêt nẽ. ¹³ Mẽhõ na we ra ma kaxkwa hwỳr

api nē kamā mẽmoj mex pumu nē man akupÿn mẽ awÿr wrÿ nē mẽ amā tanhmā harēnh to? Nà amrakati kumrēx. Ām paxipix ixpē Tirtūm kot mẽ akaxyw ixām xwÿnh na pa pre amnē kurūm mẽ awÿr wrÿ hāmri nē ixprī hā mẽ amā tanhmā harēnh to ho ri ixpa.

¹⁴—Amnepēm finat Mojesja kormā kapôt ā mẽ o pa ri na pre mẽ kām kàx o kagā karōja nhīpēx nē kÿxpē mẽ kām kunhō. Kagā kot mẽ hkamnhar xwÿnhjaja kot hwÿr rīt nē omunh nē akupÿm mex kaxyw mẽ kām kunhō. Tā ixpē Tirtūm kot mẽ akaxyw ixām xwÿnh kot paj nhÿrmā kagā karōta pyrā nē kÿx pē pī kahpa hā ajēt. ¹⁵ Ka mẽ te mẽ kot kagā karō pumunh nē akupÿm mexta pyrā nē amnhī kaxyw inhmā ajamaxpēr nē ixkôt amnhī xunhwÿ hāmri nē nhÿrmā Tirtūm mẽ wa ixri atīr tūm nē amex rāhā nē apa ho apa.

¹⁶—Tirtūm kām pika piitā hkôt mẽ apiitā mẽ ajapē htÿx. Nē mẽ ajapē xāj na pre ixpē Kra hā ixpyxi hā mẽ awÿr inhmē. Ka mẽ atō amnhī kaxyw ixkôt ajamaxpēr nē ixkôt amnhī xām. Hāmri nē nhÿrmā atyk tā nhūm Tirtūm akupÿm ato atīr ka wa ixkuri atīr tūm nē amex rāhā nē apa ho apa. Hāmri nhūm Tirtūm aa amnhī nē nhÿhÿm amēnh kēt kumrēx. ¹⁷ No mẽ ate amnhī tomnuj mÿrapē tanhmā ixte mẽ anhīpēx to kaxyw na pre mẽ awÿr inhmēnh kēt nē. Ām ixkukwak ri mẽ atīr tūm nē mẽ amex rāhā apa ho apa hprām xāj na pre mẽ awÿr inhmē pa mẽ awÿr wrÿ. ¹⁸ Jakamā kot ka mẽ atō amnhī kaxyw ixpē Tirtūm Kra hā ixkôt ajamaxpēr nē ixkôt amnhī xām nhūm Tirtūm ixtā apumu nē ate amnhī tomnuj mÿrapē tanhmā anhīpēx to hkēt nē. No kēt mẽ kot ixkôt amnhī xunhwÿr kēt xwÿnhjaja na Tirtūm ma mẽ kot amnhī xà htÿx kamā hamak tūm xà hwÿr mẽ pa mã xwÿnhjē hā mẽ harē. Mē kot ixkôt amnhī xunhwÿr kēt mÿrapē. Anē.

Mē kot amnhī tomnuj o hpimxur prām kaprÿ ā mẽ harēnh

¹⁹ Nhūm Jejus arī Nīkotē mã kapēr nē kām:

—Na pre Tirtūm amnē pika hwÿr mẽ awÿr inhmē. Mē ate amnhī tomnuj xwÿnh ā amnhī pumunh kaxyw mẽ awÿr inhmē.

Tā nhūm mẽ ohtō nē amnhī tomnuj gryk ā kām kapēr mar prām kēt nē. Jao ixkaga nē kām ixkapēr mar prām kēt nē. ²⁰ Ra ixprī hā ixte mẽ kot tanhmā amnhī tomnuj to ho pa hā mẽ omunh mex jakamā mẽ kām ixkapēr mar prām kēt. Nē ixte mẽ kot tanhmā amnhī tomnuj to ho pa hā mẽ harēnh pymaj ixkôt kām pa hprām hkēt nē. ²¹ No kēt mẽ kot ixkôt amnhī xunhwÿr xwÿnhjaja na mẽ kot amnhī nhīpēx o pa hā hpijaam kēt. Na htem amnhīx ixkôt amnhī nhīpēx o pa. Jakamā koja mẽ piitā ja hā mẽ omu nē Tirtūm kot tanhmā mẽ hkrā hto nhūm mẽ ra kām hkôt pix mã amnhī nhīpēx ho pa hprām ā mẽ omunh kurē kumrēx. Anē.

Nhūm pre ā Jejus Nīkotēja mã kapēr anē.

Juāw Paxis kot Jejus jarēnh o pa hā harēnh Juāw 1.19-28

²² Tā pa mẽ ixpē Jejus kôt ri ixpa ho ixpa xwÿnhjaja Jejus kôt Jerujarē rūm ijaarōj nē pika pē Jutej kwÿ kamā ixpa. Jejus nhÿ hā Tirtūm mã mẽ hkrā kumrār o ri mẽ hkôt ixpa. ²³ Nhūm finat Juāw Paxis haxwÿja mẽ ixpyrā nē mẽ hkrā kumrār o pa. Krī pē Sarī htā krī pē Enō mÿri pyhti rax jakamā nhūm pre htem hwÿr mra nhūm kamā mẽ hkrā kumrā. ²⁴ Kormā mẽ kot haxār kēt ri nhūm kamā mẽ hkrā kumrār o pa.

²⁵ Rôm nhūm Ijaew hōja Juāw Paxis kôt mẽ pa ho mẽ pa xwÿnhjē hwÿr tē nē Juāw Paxis kot mẽ hkrā kumrār ā tanhmā mẽ hkukjēr to nhūm mẽ kuma nē tee ri hā axpēn kukjēr o kuhē. ²⁶ Hāmri nē akupÿm Juāw Paxis wÿr tē nē kām:

—Kwa mẽ ijahkre xwÿnh. Pyhti pē Jotāw nhīkjē hā ate mēhō pumunh nē tanhmā mẽ inhmā harēnh to xwÿnhhta kôt mẽ pa ho mẽ pa xwÿnhjaja na xep htem apyrā nē mẽ hkrā kumrār o pa nhūm xep mẽ ra ohtō nē mẽ pahkaga nē mẽ hkôt pa. Kwa xà ja amā mex nà? Anē.

²⁷ Hāmri nhūm mẽ kuma nē mẽ kām:

—Tÿ ja mex kēnā. Tirtūm kām hprām xà hkôt na htem mẽ hwÿr mra nhūm mẽ ixpānhā mẽ hkrā kumrā. Nà ja mex. ²⁸ Ixpē Tirtūm kot mẽ pakaxyw ām xwÿnh kēt. Na pa pre ra mẽ amā ja hā amnhī jarē ka prem inhma. Ām hkukamā na pre Tirtūm amnē inhmē pa mō nē ā jar ri ixpa anē.

29 –Te ixte mẽ umre kot amnhĩ nhĩpêx pyrãk. Na htem axpên mã mẽ rer kaxyw nhũm mẽ umreja myta wỳr tẽ nẽ hpa hã kupy nẽ ma ni hwỳr o tẽ nẽ axpên mã wa kure. Hãmri nhũm hpãnhã mễhõja axpên tã wa hakre. Nhũm umreja wa kuri hkĩnh nẽ mar o xa. Tã te ixte mẽ umre kot amnhĩ nhĩpêx pyrãk jakamã koja mẽ ma Tĩrtũm kot mẽ pakaxyw ãm xwỳnhta wỳr mra nẽ kapêr ma pa mẽ harênh ma nẽ ixkĩnh nẽ.

30 Na htem mẽ umre hã hkĩnh kêt nẽ. Mjên nyw xwỳnhja ã na htem hkĩnh. Tã ja pyrã nẽ koja mẽ axte ixte mẽ kãm Jejus jarênh mar kaxyw ixwỳr mrar kêt nẽ. ãm hwỳr koja mẽ hpãnhã mra nẽ tãm mar o kuhê. Ja mex kumrêx. 31 Jejus kêp kaxkwa rũm amnẽ mẽ pahwỳr wrỳk xwỳnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwỳnh jakamã Jejus kĩnhã mẽ pahte mẽmoj piitã omunh tohtuj anhỳr. Nẽ pika nhõ xwỳnhjê jamaxpêr pix o pajamaxpêr o ri papa.

32 –Na hte Jejus mẽ kãm kaxkwa kamã kot mẽmoj pumunh xwỳnh kwỳjê jarênh o pa. Nẽ kamã kot mẽmoj mar xwỳnh kwỳ jarênh tã nhũm mẽ ohtô nẽ kuma nẽ ãm kuma. 33 No mẽ kot mar nẽ amnhĩ kaxyw hkôt hamaxpêr xwỳnhjaja na htem kuma nẽ axpên mã harênh o: “Nà ãm hãmri na ã Tĩrtũm kapêr jarênh anẽ. Nà Tĩrtũm kapêr mex kumrêx.” Anhỳr o axpên mã harê.

34 –Tĩrtũm na pre mẽ pahwỳr Jejus mẽ nhũm amnẽ mẽ pahwỳr wrỳ nẽ Tĩrtũm Karõ nhỹ hã mẽ pamã kapêr jarênh o ri mẽ pahkôt pa. 35 Tĩrtũm kãm Krata japê htỳx kumrêx jakamã na pre ãhkram mẽmoj piitã haxàr pa nhũm uràk nẽ hihtỳx o hihtỳx nẽ mẽmoj piitã ho amnhĩptàr o pa. 36 Jakamã mẽ kot amnhĩ kaxyw hkôt hamaxpêr nẽ hkôt amnhĩ xunhwỳr xwỳnhjaja koja mẽ nhỹrmã wa kuri htĩr tũm nẽ mex rãhã nẽ pa ho pa. No mẽ kot hkaga xwỳnhjaja koja mẽ ã amnhĩ nhĩpêx anhỳr kêt nẽ. Koja Tĩrtũm mẽ kot amnhĩ xà htỳx kamã hamak tũm xàta wỳr mẽ rênh pa. Anẽ.

4

1 Tã nhũm Parijew nhõ xwỳnhjaja Jejus jarênh ma. Nẽ hkôt mẽ pa xwỳnhjaja ohtô rax o Juãw Paxis kôt mẽ pa xwỳnhjê

jakrenh ã mẽ harênh ma. Nẽ Jejus kot mẽ hkrã kumrãr rax o Juãw Paxis jakrenh ã harênh ma. 2 Nom Jejus na pre mẽ hkrã kumrãr kêt nẽ. ãm mẽ ixte hkôt ri mẽ ixpa ho mẽ ixpa xwỳnhjaja na pa prem kãm mẽ hkrã kumrãr o ri ixpa. 3 Jakamã nhũm Jejus amnhĩ tã Parijew nhõ xwỳnhjê jarênh ma hãmri nẽ mẽ kêp kato nẽ hpãnhã ma akupỳm Garirej wỳr mỗ pa mẽ ma hkôt ixpa.

Mễhõ ni kot amnhĩ nhĩpêx nyw o amnhĩ nhĩpêx ã harênh

Juãw 7.37-39; mãänẽn Apokarip 22.1, 22.17

4 Tã pa mẽ mỗ nẽ kormã pyka pê Samar mã axà nẽ hkôt ixpa. 5 Hãmri nẽ krĩ pê Sika hwỳr ixpôx o mỗ. Amnepê m finat Jako kot hkra Juje mã pyka nhõr xwỳnh tã krĩa xa pa mẽ ra hwỳr ixpôx o mỗ. 6 Nẽ amnepê m Jako kot gôm kakwỳnhta wỳr pỏj. Nhũm ra kaxkwa nhĩpôk ri myt nhỹr mẽ nhũm Jejus ra mrar ryy kurê hkẽngrà nẽ. Hãmri nẽ gôm kakwỳnh mỳ ri tẽm nẽ hkôkôt o nhỹ. 7-8 Hãmri pa mẽ kure nẽ mẽ ixàpkur xà japrôr kaxyw ma krĩm ijapêx.

Rôm nhũm Samar nhõ xwỳnh nija amnhĩm gô runh mã tẽ nhũm Jejus omu nẽ kãm:

–Kwa inhmã anhõ gôta kwỳ pa ho ixkỗ. Anẽ.

9 Nhũm amnhĩ jaêr pê amnhĩ tã kuma. Ijaew na pre htem Samar nhõ xwỳnhjê kutã apkur rỳ mẽ hkôt ri pa rỳ mẽ ho mjên kêt nẽ. Rỳ mẽ kutã hkôm kêt nẽ. Tã nhũm Jejus ã gô hã nija wỳr anẽ nhũm tee ri amnhĩ tã kuma nẽ kãm:

–Xê pêr apê Ijaew tã axtem nẽ ri gô hã ixwỳ. Xà ate ixpê Samar nhõ xwỳnh ã ixpumunh kêt? Hãn ka ri hã ixwỳ. Anẽ.

10 Hãmri nhũm kuma nẽ kãm amnhĩ jarê. No ãm amnhĩ tã kuxi nẽ kãm kapêr nẽ kãm:

–Nà aprĩ hã ate ixpumunh ro nhỹx ka kam gô hã ixwỳ pa amã hkwỳ. Inhõ gô na axte mã. Tĩrtũm kãm amarĩ mẽ amã ôr prãm. Na htem ho ixkỗ hãmri nẽ mex nẽ htĩr tũm nẽ pa ho pa. Anẽ.

11 Hãmri nhũm tee ri kot ã õ gô jarênh anhỹrja ã kuma nẽ htỳx ho gôm kakwỳnh kamã gô hã hkamnhix nẽ tee ri hkukamã hamaxpêr nẽ kãm:

—Xê tanhmã kot ka kêt amnhĩ to nê inhmã gôta kwý janhi? Mo kaxyw anhõ gô janhir xà? Gôm kakwýnhata upým rax kênã kot ka kêt tanhmã amnhĩ to nê hkwy janhi. Nhýhýnh kot ka anhõ gô jarênh xwýnhata kwý janhi pa ho ixkõ hãmri nê ixtír tùm nê ixpa ho ixpa? ¹² Mẽ inhõ gôm kakwýnhja amnepê mã mẽ panhîgêtt finat Jako nhõ gôm kakwýnh na pre. Jako hkwyjaja na prem hkakwý nhũm kamã gô kato nhũm pre htem hanhi nê ho hkôm o pa. Nê hkra-jaja nê hkrit piitã ho hkôm o pa. Jakamã na pre mẽ ixpê hkanrêhã htãmnhwýjê mã hkaga. Tã xep axtem anhõ gô. Mẽ kot ho hkôm nê htír tùm kaxyw na xep. Jakamã xê xà ate amnhĩ to rax o mẽ panhîgêtt Jako jakrenh mẽ? Anê.

¹³ Hãmri nhũm Jejus kãm:

—Nà mẽ anhõ gôta na htem ho ixkõ nê arĩ kãm kôr o pa. ¹⁴ No ixte amã gô jarênh xwýnhata kot ka hkwy ho ixkõ hãmri nê axte amã kôr kêt kumrêx nê apa. Nhũm te akaxwýnh kãm hinore hprôt pyrãk o ka amnhĩ nhípêx. Hãmri nê te hinore kamã gôja aa grã hkêt pyrã nê aa ajapêx kêt kumrêx. Nhýrmã atyk tã akupým atír nê atír tùm nê amex rãhã apa ho apa. Anê.

¹⁵ Nhũm nija kuma hãmri nê kãm:

—Xôwehe? Xê tô tokyx inhmã anhõ gôta kwý. Pa ho ixkõ nê axte inhmã kôr kêt nê ixpa. Nê axte amnê amnhĩm gô janhir mã inhmrar kêt nê. Xê tokyx inhmã hkwy mẽ? Anê.

Týx gô kumrêx ã hkamnhĩx nê ã hã àhwýr anê. ¹⁶ Hãmri nhũm kãm:

—Tô ma akupým krĩm tẽ nê amjên japrô nê man akupýn ixwýr wa tẽ. Anê.

¹⁷ Hãmri nhũm tee ri kuma nê kãm:

—Ma mo inhmjên? Inhmjên kêt na pa hte ri ixpa. Anê.

Hãmri nhũm kãm:

—Tý. Nà ãm hãmri na ka ã amnhĩ jarênh anê. ¹⁸ Na ka pre ra amjên kêp 5. Nê my mẽ ri war apa xwýnh ata te kêp amjên pyrãk nom kêp amjên kumrêx kêt. Anê.

¹⁹ Hãmri nhũm amnhĩ jaêr pê kot ã kãm kapêr anhýrja ma hãmri nê kãm:

—Xê pêr aprĩ hã ate ixpumunh par pyrãk. Mãn apê Tĩrtũm nhý hã kapêr jarênh o mẽ pa xwýnhjê hõ mãn ka mẽ? ²⁰ Xê inhmã mẽmoj jarê. Nhýhým kot paj wem axpên

kôt mra nê Tĩrtũm mã mex o mex ã harê? Amnepê mã mẽ panhîgêttjaja na prem hixêtt mũj nhĩmök ã api nê hã kãm amnhĩ jarê nê kãm mex o mex ã harê. No mẽ apê Ijaew na ka htem krĩ pê Jerujarê pix kãm mẽ ixte axpên kôt mrar nê ã amnhĩ nhípêx anhýr ã mẽ inhmã karõ. Xà hixêtt nhĩmök ã mẽ ixte kãm amnhĩ jarênhja xà apê omnuj mẽ? Ma xà apê omnuj kêt? Anê.

²¹ Hãmri nhũm Jejus kãm:

—Nà kot kaj mẽ nhýrmã ãm Jerujarê pix kãm rý hixêtt mũj nhĩmök pix ã axpên wýr akuprô nê Tĩrtũm mã amnhĩ jarênh kêt nê. ²² Mẽ apê Samar nhõ xwýnhjaja mẽ ate Tĩrtũm mã mex o mex ã harênh o apa htã aprĩ hã kot amnhĩ nhípêx ã omunh kêt. Nê tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhípêx to nê tanhmã hamaxpêr to hã omunh mex. Mẽ inhĩõ kukwak ri koja Tĩrtũm mẽ kot hkôt amnhĩ xunhwýr xwýnh piitã nê mẽ kot amnhĩ tomnuj rênh pa. ²³ Tã koja mẽ piitã Mëpahpãm Tĩrtũm mã mex o mex ã harênh kaxyw nhýhým pa hkêt nê. Koja mẽ nhýri pa xà kamã mẽ ôpinh xà kaxwýnh kãm ã kãm amnhĩ jarênh anhýr o pa. Ja na Tĩrtũm kãm hprãm. No nhýhým mrar nê nhýri kuhê xà pix kamã kãm amnhĩ jarênhja nhũm kãm hprãm kêt nê.

²⁴ —Nê Tĩrtũmja mẽ pahpyrà nê ã hkêt jakamã na te kaxkwa nê pika piitã hkôt pa ho pa. Jakamã na htem nhýri pa nê ôpinh xà kaxwýnh kãm amnhĩ kaxyw kãm hamaxpêr nê kãm mex o mex ã harê nhũm ra amnhĩ tã mẽ kuma. Æ mẽ kot amnhĩ nhípêx anhýrja na kãm hprãm. Anê.

²⁵ Nhũm pre ã Jejus nija mã kapêr anê nhũm kuma nê kãm:

—Ma koja xep nhýrmã Tĩrtũm kot mẽ pakaxyw ãm mã xwýnh pê Krisja mẽ pahwýr wrý hãmri nê hprĩ hã mẽ pamã mẽmoj piitã ho amnhĩrit pu mẽ kuma. Anê.

²⁶ Hãmri nhũm kãm:

—Kwa nhũm paa. Ixte amã ixkapêr xwýnhja ixpê Kris na pa. Jakamã na pa ixprĩ hã amã ã ixkapêr anê. Anê.

²⁷ Nhũm pre ã kãm amnhĩ jarênh anhýrja rôm pa mẽ ixte hkôt ri mẽ ixpa ho ixpa xwýnhjaja ra ixujaprôr pa nê akupýn hwýr ixpôx o mra. Hãmri nê amnhĩ jaêr pê kot

Samar nhõ xwýnh nita mã kapër ã omu nẽ tee ri hkukamã ijamaxpër nom tanhmã hã hkukjêr to hkêt nẽ. Nija kêp Samar nhõ xwýnh tâ nhũm àmnhĩx kãm kapër o nhỹ. Pa mẽ omu nẽ ãm omu nẽ tanhmã hã kãm nẽ hkêt nẽ. ²⁸ Hãmri nhũm nita gôm kakwýnh mýr ri õ poti re nẽ ma akupým krĩm tẽ nẽ hkwyjê mã awjarẽ. ²⁹ Nẽ mẽ kãm:

—Xê mẽ tokyx ma ixkôt gôm kakwýnh wýr mra nẽ mý ri mẽhõ my mũj pumu. Tĩrtũm kot mẽ pahwýr mẽnh mã xwýnhnta na. Aa kot nhỹri ixpumunh kêt tâ kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nẽ ixpyrà nẽ kapër ã ama. Anẽ.

³⁰ Hãmri nhũm mẽ kuma nẽ ma hkôt Jejus wýr mrrar kurê kumrêx.

³¹ Rôm pa mẽ ixte Jejus kôt ri ixpa ho ixpa xwýnhjaja tee ri mẽ ixàpkur xà ho Jejus ma nẽ kãm:

—E ota mẽ panhõta. Kwa mẽmoj py nẽ aku mãn.

³² Anhỹr tâ nhũm mẽ inhma nẽ tanhmã mẽ inhmã amnhĩ jarênh to. Nom amnhĩ tâ kuxi nẽ amnhĩ jarẽ nẽ mẽ inhmã:

—Nà kormã. Inhõja axtem na. Mẽ ate inhõja pumunh kêt. Anẽ.

³³ Hãmri pa mẽ kuma nẽ tee ri hã axpên kukja nẽ axpên mã:

—Kwa mãn ra mẽhõ mẽ paxwakre kamã kãm mẽmoj to tẽ nhũm kukrê nà? Anẽ.

³⁴ Hãmri nhũm mẽ inhma nẽ mẽ inhmã:

—Nà mẽhõ kot kêt ri inhmã mẽmoj to mra pa kuku? Kot paj kot mẽ awýr inhmênh xwýnhnta mã tanhmã amnhĩ nhĩpêx to hãmri nẽ te ra ixàpkur mex nẽ hã ixihtýx mex pyræk o amnhĩ nhĩpêx. Tã kot paj ã kãm amnhĩ nhĩpêx anhỹr o ri ixpa rãhã ho ijapêx pa. Jao te ixàpkur rax pyræk.

³⁵ Anhỹr o mẽ inhmã amnhĩ jarẽ. Hãmri nẽ ra Samar nhõ xwýnhjaja mẽ ixwýr mrrar ã mẽ omu nẽ mẽ inhmã tanhmã mẽ harênh to nom mẽ hã kuxi nẽ mẽ harẽ nẽ mẽ harênh o:

—Kot kaj mẽ axte mẽ atã mytwrý kêp 4 hãmri nhũm ra mẽ apur kãm mẽ anhõja hamýnh mã tãm nẽ. Nom kormã. E ka mẽ pahwýr mẽ mrrar xwýnh nẽj pumu. Ra mẽ kot amnhĩ kaxyw ixkôt hamaxpër nẽ ixkôt amnhĩ xunhwýr mã tãm jakamã te mẽ apur kãm ra mẽ anhõ jamýnh mã tãm

pyræk. Jakamã ka mẽ atõ ma mẽ hwýr mõ nẽ mẽ kot amnhĩ kaxyw ixkôt hamaxpër nẽ ixkôt amnhĩ xunhwýr kaxyw mẽ kãm ijarẽ. Hãmri nẽ te ate ixpur kãm inhmã inhõ jamýnh xwýnh pyræk o amnhĩ nhĩpêx.

³⁶ —Jakamã koja mẽhõ kumrêx mẽ hwýr tẽ nẽ mẽ kãm Tĩrtũm kapër jarẽ hãmri nẽ te kêp õ pahi mã hpur kãm ahkre ho pa pyræk. Nhũm mẽ kot mar xwýnhjaja kuma nom kormã hprĩ hã mar týx kêt nẽ. Tã kot kaj mẽ atõ wamta kôt mẽ hwýr tẽ nẽ mẽ kot ixkôt amnhĩ xunhwýr kaxyw aprĩ hã mẽ kãm ijarênh o mẽ hkôt apa hãmri nẽ te apê mẽ anhõ pahi mã hpur kãm axujamýnh xwýnh pyræk. Hãmri nhũm mẽ hkwyjaja mẽ ama nẽ ixkôt amnhĩ xunhwýr nẽ ixkôt ri amnhĩ nhĩpêx o pa. Hã koja nhỹrmã mẽ apyrà nẽ Tĩrtũm mẽ wa ixri mex rãhã nẽ hĩr tũm nẽ pa ho pa. Ka mẽ amnhĩ tâ mẽ omu nẽ akĩnh nẽ apa. Te mẽ kot mẽ hpur kãm ahkre xwýnhjaja nẽ mẽ kot hamýnh xwýnhjaja mẽõ rũnh pumunh nẽ hkĩnhnta pyræk.

³⁷ —Na htem tõhã ã mẽ pur kãm mẽ àpênh xwýnhjê jarênh anẽ nẽ mẽ harênh o: “Axtem mẽ ahkre xwýnhjaja nẽ axtem mẽ kot hamýnh xwýnhjaja.” Anẽ. Tã te mẽ ate mẽ ujarênh ja pyræk. ³⁸ Na pa pre ra ma mẽ hwýr mẽ arẽ. Mẽ ate aprĩ hã mẽ kãm ijarênh nhũm mẽ kot mẽ amar nẽ amnhĩ kaxyw ixkôt hamaxpër nẽ ixkôt amnhĩ xunhwýr kaxyw. Nom mẽ kajaja na ka prem akumrêx mẽ hwýr amrar nẽ mẽ kãm ijarênh kêt nẽ. Tĩrtũm kapër jarênh o mẽ pa xwýnhjaja na prem kumrêx mẽ hwýr mra nẽ ixkukamã mẽ kãm ijarênh o ri mẽ hkôt pa. Te mẽ kot hpur kãm ahkre ho pata pyræk. Tã kot kaj mẽ hpãnhã mẽ kot amnhĩ kaxyw ixkôt amnhĩ xunhwýr kaxyw aprĩ hã mẽ kãm ijarênh o apa. Jakamã te mẽ ate mẽ hpur kãm mẽõ jamýnh xwýnh kot amnhĩ nhĩpêxta pyræk. Anẽ.

Mẽ hkwy kot amnhĩ nhĩpêx nyw o amnhĩ nhĩpêx ã mẽ harênh

Sikũn Korĩt 5.17; Wam Juãw 4.14

³⁹ Rôm nhũm Samar nhõ xwýnh kwýjaja nija kot mẽ kãm amnhĩ jarênh ma hãmri nẽ uræk nẽ amnhĩ kaxyw Jejus kôt hamaxpër. Na pre ra amnhĩ tâ tanhmã mẽ kãm Jejus jarênh to nẽ mẽ kãm harênh o:

—Ma aa kot nhÿri ixpumunh kêt tâ ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhÿr jakamã nhũm mẽ kuma nẽ uràk nẽ amnhĩ kaxyw hkôt hamaxpêr kurê kumrêx.

⁴⁰ Hãmri nẽ man mẽ ixwÿr mra nẽ Jejus pumu nẽ amnhĩ wÿr kuwÿ nẽ kãm:

—Pa. E kwa mẽ tokyx anojarêt kêt nẽ. Mẽ ma mẽ ixkôt mẽ inhõ krĩ hwÿr mõi nẽ mẽ ixkôt ri apa grire nẽ arĩ ma mõi. Anẽ.

Hãmri nhũm mẽ kuma nẽ mẽ kãm:

—Tõe. Nà kot paj mẽ anẽ. Anẽ.

Hãmri pa mẽ ma mẽ hkôt mõi nẽ mẽ õ krĩ kamã mẽ hkôt ri ixpa hã apkati axkrut.

⁴¹ Nhũm Jejus mẽ kãm Tirtũm kapêr jarênh o ri mẽ hkôt pa nhũm mẽ axte ohtõ nẽ kuma nẽ nita pyrã nẽ hkôt amnhĩ xunhwÿ.

⁴² Hãmri nẽ nita wÿr mra nẽ kãm:

—E nã ãm hãmri. Akumrêx na ka mẽ inhmã Jejus o amnhĩrĩt. Pa mẽ akôt ma hwÿr mra nẽ mẽ pam omu nẽ kapêr ã kuma. Jao apyrã nẽ amnhĩ kaxyw hkôt ijamaxpêr nẽ hkôt amnhĩ xunhwÿ. Pêr ãm hãmri kêp pyka piitã hkôt mẽ pahte amnhĩ tomnuj pãnhã amnhĩrer mã xwÿnhta na. Anẽ.

Garirej nhõ xwÿnhjaja kot Jejus pumunh ã mẽ harênh

Matêwre 13.57

⁴³ Tã pa mẽ Jejus kôt Samar rũm ixkato nẽ ma pika pê Garirej wÿr mõi. Kamã Jejus nhõ krĩ pê Najare htã pa mẽ hwÿr inhmõr kêt nẽ. ⁴⁴ Na pre ra Jejus mẽ inhmã tanhmã õ krĩ nhõ xwÿnhjê jarênh to nẽ mẽ harênh o:

—Tirtũm nhÿ hã kapêr jarênh o mẽ pa xwÿnhjaja na htem amnhĩ nhõ krĩ kamã mẽ kãm Tirtũm kapêr jarênh o pa nhũm mẽ kuma nẽ ãm kuma. Jakamã kot paj Najare hwÿr inhmõr kêt nẽ. Mẽ kãm ixkapêr mar prãmre hã.

⁴⁵ Anhÿr jakamã na pa prem hwÿr inhmõr kêt nẽ. Pãnhã nhãm krĩ hõ hwÿr mõi nẽ hwÿr pøj hãmri nhũm mẽ amnhĩ wÿr Jejus pumu nẽ hkĩnh nẽ. Na prem ra krĩ pê Jerujarê kamã arĩgro pê Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wÿr omu nẽ hkĩnh nẽ.

Jejus kot mẽhõ hkra ho mex ã harênh

⁴⁶ Tã pa mẽ kormã Garirej kamã ixpa nẽ akupÿm krĩ pê Kanã hwÿr mõi. Kamã na pre Jejus mẽ kãm gõ ho wĩhti nhĩpêx. Jakamã pa mẽ akupÿm mẽ hwÿr mõi. Nhũm mẽõ pahĩ nhõ kôwenatõjê hõ hkra myja kêp à htÿx nẽ nõ. Nom Kanã kamã hkêt axtem krĩ hõ pê Kapanaũ kamã. ⁴⁷ Jakamã nhũm hipêêxãja tee ri hkra pumu hãmri nẽ ra Jejus kot Jutej rũm Kanã hwÿr hpõx ã harênh ma nẽ hkra kaxyw kãm hamaxpêr nẽ ma hwÿr mõi kurê kumrêx. Hãmri nẽ nhÿri omu nẽ hwÿr tẽ nẽ kãm kapêr kãm hihtÿx nẽ kãm:

—Pa. E ot pa awÿr tẽ. Na ra ixkra ixpê htyk kaxyw. Kwa ixkamã axukaprĩ nẽ ma ixkôt mõi nẽ akupÿm inhmã ho mex. Anẽ.

⁴⁸ Hãmri nhũm kuma nẽ kãm:

—Kwa pêr ãm ixte mẽ amã aa mẽ ate mẽmoj pumunh kêt kwÿ ho anhÿr ã ixpumunh kôt pix mã na ka htem amnhĩ kaxyw ixkôt ajamaxpêr. Nom amarĩ amnhĩ kaxyw ixkôt ajamaxpêr kêt nẽ. Anẽ.

⁴⁹ Hãmri nhũm tee ri kuma nẽ kãm:

—Kwa tokyx. Kot kaj tokyx ixkôt amõr kêt koja ixpê ty. Anẽ.

⁵⁰ Hãmri nhũm kãm:

—Nã koja apê htyk kêt nẽ. Ra ixte akupÿm amã ho mex kênã. Mãmri ma akupÿm mõi nẽ tokyx omu. Na ra akupÿm amã mex. Anẽ.

Hãmri nhũm kuma nẽ kaxyw hkôt hamaxpêr kurê kumrêx nẽ ma akupÿm hwÿr mõi. Nẽ mõi o apkati. ⁵¹ Nẽ kormã õ krĩ hwÿr hpõx o mõi ri nhũm ra kãm mẽ ãpênh xwÿnhjaja kutã mra nẽ nhÿri pry hã hkaxpa nẽ kãm:

—Pa. Kwa na ra akra hkà hakry nẽ akupÿm amã mex. Anẽ.

⁵² Hãmri nhũm mẽ kuma nẽ hkĩnh tÿx nẽ. Nẽ mẽ kãm:

—Kwa xõ wehe? Mẽmo ore hã na pre we ra hkà hakry? Anẽ.

Nhũm mẽ kãm:

—Nã jãã na pre kaxkwa nhĩpõk ri myt nhÿ nhũm hkà hakry nẽ akupÿm amã mex kurê kumrêx. Anẽ.

⁵³ Hãmri nhũm mẽ kuma nẽ mẽ kãm:

—Hêxta waa nẽ. Kwa pêr ãm hãmri Jejus kot inhmã akupÿm mex ã harênh xã hã ore kamã na pre akupÿm inhmã mex. Nã ãm hãmri. Anẽ.

Hãmri nẽ amnhĩ kaxyw Jejus kôt hamaxpêr kurê kumrêx. Nhũm õrkwÿ

kamã ri mẽ pa xwýnhjaja uràk nẽ amnhĩ kaxyw hkôt hamaxpêr.

⁵⁴ Nhũm Jejus ã kãm hkra ho mex anẽ. Na pre ra pika pê Garirej kamã mẽ kot mẽmoj pumunh kêt õ ho anhÿr o tipxi nẽ mẽ kãm gô pix o wĩhti nhĩpêx. Tã ra pyka pê Jutej rũm akupÿm mẽ hwÿr mō nẽ ã akupÿm mẽ hkrata o mex anẽ.

5

Jejus kot himô my ri akupÿm mẽhõ ho mex ã harẽnh

Juãw 7.23, 10.30-33

¹ Tã mẽ ixpê Ijaew mẽ ixte Tĩrtũm ã ixkĩnh kaxyw Jerujarẽ hwÿr akuprõ nhũm Jejus haxwÿja ma hwÿr mō. Pa mẽ hkôt mẽ ixpa ho mẽ ixpa xwýnhjaja ma hkôt mō. ² Jerujarẽ kamã na himõja hikwÿ. Nhÿhÿnh mẽ kot krĩ hwÿr õwêhti ho gjêx xà htã hikwÿ. Himõja nhĩxi pê na Petes. Nẽ pu hã mẽ à xwýnhjê nhĩkwÿ xà hã ixkre kêp 5. ³ Piitã kamã na pre hte tanhmã mẽ à kute xwýnhjaja hikwÿ. Mẽ nohkre xwýnhjaja nẽ mẽ hyk o mẽ pa xwýnhjaja nẽ mẽ ã kamã mẽ htyk xwýnhjaja. ãm ahpÿnhã tanhmã mẽ à kute xwýnhjaja ixkre hkwyja kamã akupÿm mex prãm xàj hikwÿ. ⁴ Na pre hte Tĩrtũm kapêr o mẽ wrÿk xwýnhja tõiã himô hwÿr wrÿ nẽ gô xok. Hãmri nhũm mẽ à xwýnhjê hõ kot amnhĩ to wa nẽ kumrêx hwÿr wrÿk nẽ kamã mrõr xwýnhja akupÿm mex. Kwÿjê rom akupÿm mex kurê kumrêx. Jakamã nhũm pre hte mẽ à xwýnhjaja akupÿm mex prãm xàj gô xok jamãr o hikwÿ. ⁵ Jakamã nhũm mẽhõ myja ixkre hõ kamã hikwÿ. Te omnuj nẽ arĩ hikwÿ hã amgrà xohtõ rax nẽ. Ra hã amgrà kêp 38. ⁶ Jakamã nhũm Jejus mẽ hwÿr tẽ nẽ omu. Nẽ hprĩ hã omu nẽ hamaxpêr o:

—Kwa mũj na hte omnuj nẽ ri pa hkêt ã amgrà xohtõ rax nẽ. E pa akupÿm ho mex.

Anhÿr o hamaxpêr hãmri nẽ kãm:

—Pa. E kwa inhmã amnhĩ jarẽ. Xà amã akupÿm amex prãm? Anẽ.

⁷ Hãmri nhũm kuma nẽ kãm:

—Ku nhũm. Inhmã tokyx akupÿm inhmex prãm tÿx kumrêx kênã. No mẽhõ kot tokyx inhmÿ nẽ mẽ kêp ixto wa nẽ ixkumrêx gô xok kamã inhmrõr? Na pa tee ri ixkumrêx hwÿr ixtêm nẽ inhmã inhmrõr

prãm nhũm mẽ xatã ixpê amnhĩ to wa nẽ mra nẽ kamã mrõ. Anẽ.

⁸ Hãmri nhũm Jejus kãm:

—Tÿ? Tõe. E na ka akupÿm amex. E kãnhmã xa nẽ akupÿp py nẽ ma akupÿm anhõrkwÿ hwÿr tẽ. Anẽ.

⁹ Hãmri nhũm kuma nẽ ra akupÿm mex nẽ kãnhmã xa nẽ ri mra. Nẽ hkĩnh tÿx nẽ hikupÿp py nẽ ma akupÿm õrkwÿ hwÿr tẽ. Ijaew nhõ arĩgromnu pê sap ã nhũm Jejus kot akupÿm ho mex ¹⁰ nhũm ma akupÿm pry hã hikupÿp py nẽ o tẽ. Nhũm Ijaew nhõ pahi hkwyja nhÿhÿnh mra nẽ tee ri kot sap ã hpyr nẽ o htêm ã omu nẽ kãm:

—Tk. Kwa mẽ pahpê Ijaew na pu htem mẽ panhõ arĩgromnu hã paxapênh kêt nẽ. Finat Mojes kot ja nẽ mẽ pahkurê htã ka axtem nẽ akupÿpta py nẽ nhÿhÿm o tẽ. Anẽ.

¹¹ Hãmri nhũm mẽ kuma nẽ mẽ kãm:

—Tÿ. Kot anhÿr tã kot ixto mex xwýnhta na ã inhmã kapêr anẽ pa mar xà hkôt kupy nẽ akupÿm inhõrkwÿ hwÿr tẽ. Anẽ.

¹² Hãmri nhũm mẽ tee ri kuma nẽ kãm:

—Kwa mẽhõ na we ã ri amã karõ anẽ? Anẽ.

¹³ Nhũm kormã kot Jejus nhĩxi mar kêt jakamã kot mẽ kãm ahkre kaxyw hakêx nẽ tee ri hkwyjê kaêx ã hapêr rĩt o xa. Nom nhũm mẽ ohtõ nẽ pry hã mrar jakamã nhũm tee ri hapêr nhũm Jejus ra ma nhÿhÿm tẽ.

¹⁴ Tã nhũm hã ahtũmre nhũm Jejus Tĩrtũm mã amnhĩ jarênh xà hã ixkre hwÿr tẽ nẽ axà nẽ kot ho mex xwýnhta pumu nẽ kãm:

—Pa. E na ka ra akupÿm amex. Nom kwa kêr ka axte tanhmã amnhĩ tomnuj to ho ri apa hkêt nẽ. Kot kaj axte ã amnhĩ nhĩpêx anẽ hãmri nẽ apunuj tÿx o wam ate apunujta jakre kãm ga. Anẽ.

¹⁵ Hãmri nhũm kuma nẽ ma tẽ nẽ kato. Nẽ ma mẽ õ pahijê hwÿr tẽ nẽ mẽ kãm:

—E na pa ra kot ixto mex xwýnhta nhĩxi ma. Xep kêp Jejus. Anẽ.

¹⁶ Hãmri nhũm mẽ hixi ma nẽ hã tanhmã axpên mã ho kapêr punuj to. Mẽ õ arĩgromnu hã kot mẽ ho mex o pa jakamã nhũm mẽ axpên jakwa kamã ri hixi ho rê nẽ nhÿri omu nẽ tanhmã hã kãm àkjêr to.

¹⁷ Hãmri nhũm amnhĩ tã mẽ kuma nẽ mẽ kãm:

—Ku nhũm. Inhĩpêxà Tĩrtũm na hte apkati mẽ tanhmã mẽ pahto mex to ho pa.

Jakamā pa hte uràk nē ā mē ho mex rāhā ho ri ixpa anē nē aa mēmo arīgro hā ja ho anhÿr kaga hkēt nē.

¹⁸ Anhÿr o mē kām amnhī jarē nhūm mē kuma nē kamā gryk tÿx nē. Nom mē ō arīgromnu hā kot mē ho mexja pix mÿrapê kamā gryk kêt. Māānēn Tīrtūm kēp hipêêxà hā harēnhja mÿrapê nhūm prem kamā gryk tÿx kumrēx nē axpēn mā:

—Tk. Kwa na ā amnhī jarēnh anhÿr jao te kēp Tīrtūm pyrāk ā amnhī jarē. E kwa pu mē kupī ri. Anē.

Tīrtūm Kra kot Hipêêxà nhÿ hā amnhī nhīpêx ā harēnh

Juāw 14.10-13

¹⁹ Hāmri nhūm Jejus axte mē kēp Ijaew nhō pahijē mā kapēr nē mē kām:

—Na pa hte amnhī krā hkôt tanhmā amnhī nhīpêx to ho ri ixpa hkēt nē. Na pa hte Inhīpêêxà kot tanhmā amnhī nhīpêx to hā omunh xà hkôt uràk nē mē ho mex o ri ixpa. Kwa mē amnhī krā him ja jaxà nē kām ajamaxpēr tÿx nē ho apa.

²⁰ —Inhīpêêxàja kām ijapêê. Na hte inhmā kot tanhmā mē ho mex to piitā ho amnhīrīt. Ixte omunh nē uràk nē ŷ hā tanhmā mē ho mex to ho ri ixpa kaxyw. Jakamā kot paj ām akupÿm mē à xwÿnhjê ho mex pix o ri ixpa hkēt nē. Kot paj māānēn mē kām mēmoj mex o ja jakrenh o anhÿr o ri ixpa ka mē hā ixpumu nē ixkamā ano puma ho apa.

²¹ —Nē Inhīpêêxà kot akupÿm mē htyk xwÿnhjê ho htīr jakamā kot paj uràk nē akupÿm mē htyk xwÿnhjê ho htīr o ri ixpa. Anē.

Mē htīr tūm nē mē pa mā xwÿnhjê jarēnh

Juāw 3.16-17, 3.36, 6.27, 6.40, 6.60, 10.28, 17.2-3; Rōmān 6.23; Karatas 6.8; Xitre 1.2; Wam Juāw 2.25, 5.11-13

²² Nhūm Jejus arī mē kēp Ijaew nhō pahijē mā kapēr nē mē kām:

—Koja nhÿrmā Inhīpêêxàja mē htīr tūm nē mē pa ho mē pa mā xwÿnhjê jarēnh kêt nē. Ja kaxyw na pre pa ixām. ²³ Tā mē piitā mē kot ja hā ixpumunh nē ixtā hpijaām o ri pa kaxyw na pre mē kaxyw ixām. Te mē kot Inhīpêêxà hā hpijaāmta pyrā nē pa ixtā hpijaām o pa kaxyw. Jakamā koja mēhō ixtā hpijaām kêt nē hāmri nē māānēn Inhīpêêxà

hā hpijaām kêt ā amnhī to amnhīrīt. Tām kot mē awÿr inhmēnh kēnā. ²⁴ Jakamā koja mēhō ixkapēr ma nē amnhī kaxyw kot mē awÿr inhmēnh xwÿnhhta kôt hamaxpēr nē ixkôt amnhī xām. Hā koja nhÿrmā htyk tā ma mē kot amnhī xà htÿx kamā hamak o pa htūm xàta wÿr mōr kêt nē. Koja Inhīpêêxà akupÿm ho htīr nhūm wa ixri htīr tūm nē mex kumrēx nē pa ho pa. Jakamā koja mēhō ixkôt amnhī xām hāmri nē ra kēp wa ixri htīr tūm nē pa ho pa mā xwÿnh. Kwa mē jam ajamaxpēr tÿx rāhā ho apa.

²⁵ —No mē kām ixkapēr mar prām kêt xwÿnhjaja kēp Inhīpêêxà mē wa ixri mē htīr tūm nē mē pa mā xwÿnh kêt. Tā ixpê Tīrtūm Kra jakamā koja mē ixkapēr ma nē ixkôt amnhī xunhwÿ. Hā kot paj amnhī tā mē omu nē mē htīr tūm nē mē pa mā xwÿnh ā mē harē nhūm mē àmnhīx ri hkīnh nē pa ho pa. Kwa mē jam ajamaxpēr tÿx rāhā ho apa.

²⁶ —Nē Inhīpêêxà tām kēp mē ho mē htīr xwÿnh. Tā ixpê Kra jakamā na pre amnhī pyrā nē ja kaxyw ixām.

²⁷ —Ra kot mē akaxyw ixām jakamā na pre māānēn ixte tanhmā mē ajarēnh to kaxyw ixām. Wa ixri mē atīr tūm nē apa ho apa mā xwÿnhjê hā mē ajarēnh rÿ wa ixri mē atīr tūm nē apa hkēt mā xwÿnhjê hā mē ajarēnh kaxyw. ²⁸⁻³⁰ Jakamā kot paj nhÿrmā ra mē htyk nē mē hikwÿ xwÿnh piitā mē kām ixkapēr nhūm mē inhma. Koja mē ixkapēr ma hāmri nē akupÿm htīr nē pika rūm hapôx pa. Hāmri nhūm mē kot kormā htīr ri Tīrtūm kapēr kôt amnhī nhīpêx hkēt xwÿnhjaja mē kot amnhī tomnuj mÿrapê ma mē kot amnhī xà htÿx kamā hamak tūm xàta wÿr ma hapêx pa. Nom nhūm mē kot amnhī to mex xwÿnhjaja. Ra mē kot Tīrtūm kôt amnhī nhīpêx jakamā koja mē ma Tīrtūm mē wa ixwÿr api nē wa ixri mex nē hkīnh rāhā htīr tūm nē pa ho pa.

—Kot paj ja kaxyw tanhmā mē apiitā mē ajarēnh to. Nom kot paj amnhī krā hkôt inhmā hprām xà hkôt tanhmā mē ajarēnh to hkēt nē. Kot paj Inhīpêêxà kot mē awÿr inhmēnh xwÿnhhta nhÿ hā àhpumunh tÿx xà hkôt tanhmā mē ajarēnh to. Jao ām hāmri mē ajarē. Kwa mē jam ajamaxpēr tÿx nē.

No ã ixte mẽ amã amnhĩ jarẽnh anhỹrja ma nẽ tee ri ajamaxpẽr kêt nẽ. Anẽ.

Mẽ kot Jejus kęp Tĩrtũm Kra hã harẽnh xwỳnhjẽ jarẽnh

Juãw 8.18; Wam Juãw 5.6-8

³¹ Nhũm Jejus arĩ mẽ kęp Ijaew nhõ pahijẽ mã kapẽr nẽ mẽ kãm:

—E na pa ra tanhmã mẽ amã amnhĩ jarẽnh to. Nom kop ãm papxipix ixte ã amnhĩ jarẽnh anhỹr ronhỹx ka mẽ inhma nẽ ajamaxpẽr o: “Ko. Na apu ãm hãmri ã mẽ inhãm amnhĩ jarẽnh anẽ rỳ apu ãm amnhĩ to hẽx.” Anhỹr o ajamaxpẽr. ³² Nom papxipix na pa hte ã amnhĩ jarẽnh anhỹr kêt nẽ. Inhĩpêêxà haxwỳja na hte ã ijarẽnh anẽ. Nẽ ãm hãmri na hte tanhmã ijarẽnh to ho pa. Tĩrtũmja hẽx kêt. ³³ No mẽ amã pika nhõ xwỳnhjẽ pix kapẽr mar prãm jakamã na ka prem finat Juãw Paxisja wỳr akwỳjẽ rẽ nhũm mẽ ma hwỳr mra nẽ ixtã hkukja nhũm mẽ kãm tanhmã ijarẽnh to. Nẽ hprĩ hã mẽ kãm ijarẽ. ³⁴ No mẽ apê pika nhõ xwỳnhjaja mẽ ate xpẽn mã tanhmã ijarẽnh toja na ixpê tanhmã kute hkêt. Koja mẽhõ tanhmã ixto kapẽr punuj to rỳ tanhmã ijarẽnh mex to pa amnhĩ jarẽnh ma nẽ tee ri amnhĩ kukamã ijamaxpẽr o ixkaprĩ hkêt nẽ. Tã nom Juãw Paxis kapẽrja mẽ amã mex jakamã na pa ã mẽ amã harẽnh anẽ. Ka mẽ ra kot tanhmã ijarẽnh toja ma nẽ amnhĩ kaxyw ixkõt ajamaxpẽr nẽ ixkõt amnhĩ xunhwỳ nẽ nhỹrmã ty nẽ ma mẽ kot amnhĩ xà htỳx kamã hamak tũm xàta wỳr apa hkêt nẽ.

³⁵ —Juãw Paxis na pre te kanê hpòk mex nẽ mẽmoj to amnhĩrĩt mex pyrã nẽ mẽ amã Tĩrtũm kapẽr o amnhĩrĩt mex o pa. Ka prem te maripòtre kot kanê hã htu pyrã nẽ hwỳr akuprõ nẽ mar o akuhê. Nom hkõt ajamaxpẽr tỳx kêt nẽ. ³⁶ Na pre hprĩ hã mẽ amã ijarẽnh o ri pa.

—Tã pa pam mẽ awỳr wrỳ nẽ Inhĩpêêxà nhỹ hã mẽ akamã aa mẽ ate mẽmoj pumunh kêt kwỳ ho anhỹr o ri ixpa. Mẽ ate ja hã ixpumunh nẽ Inhĩpêêxà tãm kot mẽ awỳr inhãmnh kõt ixpumunh kaxyw.

³⁷ —Nẽ Inhĩpêêxàja mããnẽn ixpê Kra hã mẽ amã ixto amnhĩrĩt. Ra mẽ anhõpinh xà kaxwỳnh kãm kot mẽ amã ixto amnhĩrĩt tã ka mẽ ama nẽ ãm ama nẽ ixkõt ajamaxpẽr

kêt nẽ. ³⁸ Mẽ amã mẽ ate hkõt amnhĩ nhĩpêx o apa hprãm kêt. Mẽ ate kapẽr mar tỳx ronhỹx ka mẽ ixkapẽr ma nẽ amnhĩ kaxyw ixkõt ajamaxpẽr kurê kumrẽx. Ixpê Tĩrtũm kot mẽ awỳr inhãmnh xwỳnh kênã.

³⁹ —Nẽ Tĩrtũm kapẽr ã kagà htũm haxwỳja kot tanhmã ijarẽnh to. Ka htem wa ixri atĩr tũm nẽ apa ho apa hprãm xàj kamã harẽnh rãhã ho ri apa. Nẽ kot tanhmã pa ijarẽnh to htã ka mẽ ixkapẽr ma nẽ amnhĩ kaxyw ixkõt ajamaxpẽr kêt nẽ. Anẽ.

Ijaew nhõ pahijaja kot Jejus kaga hã mẽ harẽnh

⁴⁰ Nhũm Jejus arĩ mẽ kęp Ijaew nhõ pahijẽ mã kapẽr nẽ mẽ kãm:

—Nẽ pa na ixte Inhĩpêêxà mẽ wa ixri ixte mẽ ho mẽ htĩr tũm nẽ mẽ pa mã xwỳnh ã mẽ harẽnh tã ka mẽ amnhĩ kaxyw ixkõt ajamaxpẽr kêt nẽ. ⁴¹ Nom mẽ ate inhãmnh ã ijarẽnh kêt tã ja ixpê tanhmã kute hkêt. ãm Inhĩpêêxà pix kot inhãmnh ã ijarẽnhja na inhãmnh hprãm. ⁴² Ra ixte mẽ apumunh mex. Mẽ amã Tĩrtũm kĩnh kêt. ⁴³ Tãm kot mẽ awỳr inhãmnh tã ka mẽ ixpumu nẽ ixkaga nẽ ixkõt amnhĩ nhĩpêx kêt nẽ. Nom koja mẽhõ amnhĩ krã hkõt mẽ awỳr tẽ nẽ tanhmã mẽ ajahkre hto ka mẽ ama nẽ hkõt amnhĩ nhĩpêx kurê kumrẽx.

⁴⁴ —ãm pika nhõ xwỳnh pixjaja kot mẽ amex ã mẽ ajarẽnhja na mẽ amã hprãm. No Tĩrtũm kot amnhĩm mẽ amex ã mẽ ajarẽnhja mẽ amã hprãm ã mẽ ate amnhĩ jarẽnh tã mẽ amã ja prãm kêt. Jakamã na ka htem ixkaga kumrẽx. ⁴⁵⁻⁴⁶ Tã nom kot paj pam nhỹrmã Tĩrtũm mã mẽ apê ixkwỳ hkêt ã mẽ ajarẽnh kêt nẽ. Mo kaxyw kot pa kêt ri ã kãm mẽ ajarẽnh anẽ? Finat Mojes tãm koja ja hã kãm mẽ ajarẽ. Na ka htem tanhmã ajamaxpẽr to nẽ ajamaxpẽr o: “Kot paj finat Mojes kot mẽ inhãmnh tanhmã kapẽr to hkõt amnhĩ nhĩpêx o ri ixpa hãmri nẽ nhỹrmã Tĩrtũm ri ixtĩr tũm nẽ inhãmnh nẽ ixpa ho ixpa.” Anhỹr o ajamaxpẽr nom hkõt amnhĩ nhĩpêx kêt nẽ. Mojes na pre hte pa ijarẽnh o pa. Tã mẽ ate kapẽr kõt amnhĩ nhĩpêx ronhỹx ka mẽ amnhĩ kaxyw ixkõt ajamaxpẽr nẽ ixkõt amnhĩ xunhwỳ. No mẽ ate ixkaga jakamã koja Mojes tãm Tĩrtũm mã mẽ apê ixkwỳ hkêt ã mẽ ajarẽ. ⁴⁷ Mẽ ate Mojes kapẽr

kôt amnhĩ nhĩpêx kêt jakamã kot kaj mẽ mãânên ixkôt amnhĩ nhĩpêx hkêt nê. Anê.

Nhũm pre ã Jejus Ijaew nhõ pahijê mã kapêr anê.

6

Jejus kot mẽ ho 5.000 nê mẽ kãm mẽ õ hã harênh

Matêwre 14.13-21; Makre 6.30-44; Rukre 9.10-17

¹⁻⁴ Tã nhũm ra arĩgro pê Pas ahtêp o mỗ. Pasja ã mẽ ixpê Ijaewjaja na pa htem axpên wỳr akuprõ nê hã ówêhti hkra nyw kwỳ pa nê ì hkur o ixkrĩ. Amnepêm Tĩrtũm kot pika pê Ejit rũm mẽ inhĩgêjtjê kator kaxyw nhũm prem nojarêr nê ã hkwỳ hpar nê ì hkur anê. Tã arĩ mẽ ixpê mẽ hkanrêhã mẽ htàmnhwỳjaja jam ijamaxpêr pê ixkĩnh kaxyw ã amnhĩ nhĩpêx anê. Jakamã nhũm Jejus pàr krem axà nê ma himô pê Garirej ã rêr kaxyw ma xarmã mỗ nê rê. Himôja nhĩxi hõ pê na Tipe nhũm hã xarmã mỗ nê rê. Pa mẽ hkôt ixpa ho ixpa xwỳnhjaja ma hkôt ixpa.

Hãmri nhũm pika nhõ xwỳnh kwỳjaja Jejus ma mỗr kãm omu hãmri nê ma gô kape hã pikap mẽ inhĩhkrep mra. Na pre ra Jejus mẽ kamã mẽ à xwỳnhjê ohtô nê akupỹm mẽ ho mex nhũm mẽ axte omu hãmri nê ma mẽ inhĩhkrep gô mỳ ri hpar o pa.

Tã pa mẽ xarmã rê nê pàr rũm ijapôj nê gô mỳ ri kỳxpê ixkrĩ hpa.

⁵ Hãmri nhũm mẽ inhĩhkrep mẽ mrrar xwỳnhjaja mẽ ixwỳr hpôx o mra nhũm Jejus amnhĩ wỳr mẽ omu nê mẽ inhĩõ pê Firipti mã kapêr nê kãm:

—Kwa Firip. Mẽmoj kot puj mẽ pahwỳr mẽ mỗr nêjjê mã ho anê nhũm mẽ kuku? Tanhmã kot puj mẽ amnhĩ to nê nhỹri mẽ kãm mẽmoj japrô nhũm mẽ kuku? Anê.

⁶ Ra tãm kot tanhmã mẽ kãm õ hto hã amnhĩ pumunh mex tã ã mẽ hã Firipti kamã hamak kaxyw mẽ hã hkukjêr anê.

⁷ Hãmri nhũm kuma nê tee ri mẽ hkukamã hamaxpêr nê kãm:

—Konên. Mẽ ohtô rax kumrêx kênã. Mo mẽ kaxyw mẽ pakàxpore rax? Kot pu mẽ pakàxpore ho 200 nê ho mẽ kãm mẽmoj japrôr tã nhũm mẽ ãm ho hkryre nê kuku nê ho õhy htu hkêt nê. Mẽ ohtô rax o mẽ ohtô rax kênã. Anê.

⁸⁻⁹ Hãmri nhũm mẽ inhĩõja kuma nê Jejus wỳr tẽ nê kãm kapêr. Simãw Pêtre htõ Andreja hwỳr tẽ nê kãm:

—E ota mễhõ hkrata amnhĩ kôt õ hkwỳ ho mỗ. No ãm grire. Na pãwti kêp 5 nê kaxyw õ tep axkrutre. No mẽ ohtô gri ã kot kêt mẽ hipêx pa. Anê.

¹⁰ Hãmri nhũm kuma nê hkôt mẽ ixpa ho mẽ ixpa xwỳnhjê mã kapêr nê mẽ inhmã:

—Tôe. Nà hãmri. E mẽ kãm anê kê mẽ hkrĩ pa. Anê.

Hãmri pa mẽ kãm anê nhũm mẽ pỗ kamã hkrĩ hpa. Na prem ohtô kumrêx. Mẽmyjê pixjaja kêp 5.000. Nê kaxyw mẽ hprõ nê mẽ hkrajaja. Na prem ohtô ho ohtô. Tã piitã hkrĩ pa. ¹¹⁻¹² Hãmri nhũm Jejus mẽhõ hkrata pê õ pãwti jamỳ nê o xa nê Tĩrtũm mã harê nê kãm:

—Pa Papaj. Na ka hte mẽ inhmã mẽ inhõ ho apa. ãm kapxipix amex o amex. Anê.

Hãmri nê mẽ inhmã pãwtija gõ pa mẽ ô ri mẽ hkrĩ xwỳnhjê mã õr o mra nê ho mẽ piitã mẽ hipêx pa. Pãwtija ãm hkryre htã nhũm Jejus tanhmã ho nhũm ra ohtô rax kumrêx. Jakamã pa mẽ ô ri mẽ kãm õr o mra nê ho mẽ piitã mẽ hipêx pa. Nhũm Jejus hpãnhã tep axkrutreta py nê mã ho anê nê Tĩrtũm mã harê hãmri nê amnhĩ xô ri mẽ inhmã kugõ pa mẽ mã ho anê nê. Te ho pãwti nhĩpêx pyrã nê ho mẽ piitã mẽ hipêx. Hãmri pa mẽ ixpiitã apku nê inhõhy htu nhũm arĩ mẽõ jakrêx kwỳ hprã. Hãmri nhũm Jejus mẽ inhmã:

—E kwa mẽ hkôt mra nê mẽõ jakrêx o akuprõ kê omnu hkêt nê. Anê.

¹³ Hãmri pa mẽ kuma nê ho akuprõ nê kawà o 12 nê ho nỳt. Pãwti hkryreja ãm kêp 5 pix tã nhũm Jejus tanhmã ho nhũm rũnh kumrêx. Jakamã pa mẽ hakrêx prãr o kawà ho 12 nê ho nỳt pa. ¹⁴ Hãmri nhũm mẽ inhĩhkrep mẽ mỗr xwỳnhjaja amnhĩ jaêr pê Jejus kot mẽ kãm mẽõ ho rax ã omu nê ri axpên mã harênh o:

—Kokỹỹ. Tãm mãn pre finat Mojesja amnepêm mẽ panhĩgêjtjê mã harênh o ri pa. Tã ra mẽ pahwỳr wrỳ nà? ¹⁵ Kwa pu mẽ kãm pakapêr kãm paxihtỳx nê ma akupỹm amnhĩ kôt o mỗ nê amnhĩ kaxyw ãm kê mẽ pahto amnhĩptàr o pa. Anê.

Hãmri nhũm Jejus amnhĩ tã mẽ kapêr ma nhũm ja kêp omnuj nê. Jakamã nhũm mẽ

kêp kato nê ma hpãnhã ahte nhÿri hixê t ã hwÿr tẽ.

*Jejus kot gô krãhkã hã htẽm ã harẽnh
Matêwre 14.22-27; Makre 6.45-52*

¹⁶ Tã nhÿm ra kamãtre pa mẽ Jejus kô t ri i xpa ho i xpa xwÿnhjaja ma akupÿm himô hwÿr mra. ¹⁷ Nhÿm kormã Jejus mẽ ixwÿr akupÿn htẽm kêt jakamã pa mẽ tee ri kamã ama hãmri nê akupÿm pãr mã axà nê ma akupÿm Kapanaũ hwÿr xarmã ixrêr o mō.

¹⁸ Pu nhÿm ra kôk àpêr tÿx nhÿm gô xatã kãnhmã harĩ nê axpên wÿr mra nê axpên tak tÿx nê. ¹⁹ Pa mẽ kormã gô nhÿpôk ri mō. Nê tee ri rrẽmti ho gô rênh nhÿpêx kaprÿ nom kormã ixrêr kêt nê. Nê kormã inhmôr o ixtã 5 kirôm pix nê. Hãmri nhÿm ra Jejus gô krãhkã hã hpar o mẽ ixkôt tẽ. Pa mẽ ixprĩ hã amnhĩ wÿr omunh mex kêt nê ixtÿx mēkarō hã hkamnhĩx nê mẽ inhmã uma htÿx kumrêx. ²⁰ Tã nhÿm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

²¹ Hãmri pa mẽ kapêr ma nê ixkĩnh nê. Nê amnhĩ wÿr pãr kre hwÿr ho api nhÿm axà pa mẽ xarmã ixrêr kurê kumrêx nê pãr kre rÿm ijapôx pa.

Mẽ kot Jejus japêr mrrar ã mẽ harẽnh

²² Tã nhÿm apkati nhÿm xarpê mẽ kot Jejus wÿr mrrar nhÿm kot mẽ kãm ã xwÿnhjaja tee ri hapêr o pa nê axpên mã:

—Kwa nhÿhÿm mãn pre we tẽẽ? Na pre hkôt ri mẽ pa xwÿnhjaja pix mẽ ã pãr kãm ma akupÿm xarmã mō nom nhÿm Jejusja mẽ hkôt htẽm kêt nê. Nã mãn kormã jar nhÿhÿm ri mrrar jakamã pu mẽ kormã omunh kêt nê. Anê.

²³ Rôm nhÿm Tipe rÿm pãr kwÿja mẽ hwÿr pøj. Jejus kot mẽ apkur xà ho Tirtÿm wÿr nê mẽ kãm ho rax xà hã pikata wÿr nhÿm mōn pøj. ²⁴ Hãmri nhÿm mẽ amnhĩ wÿr omu nê tee ri pãr kãm Jejus mẽ hkôt mẽ i xpa ho mẽ i xpa xwÿnhjê japêr hãmri nê axpên mã:

—E kwa pu mẽ ma mẽ hkôt xarmã mō nê Kapanaũ kamã mẽ hapêr. Anê.

Hãmri nê mẽ kãm amnhĩ jarê nê mẽ ã pãr kwÿ hwÿr agjê nê ma mẽ hkôt xarmã mōn rê. ²⁵ Hãmri nê ra mẽ ixwÿr rê nê mẽ ixkôt

pøj nê mẽ ixkaêx ã Jejus pumu nê hwÿr mra nê kãm:

—Pa mẽ ijahkre xwÿnh. Kwa na pa prem tee ri xarpê ajapêr hãmri nê man akôt mōn rê. Kwa tanhmã na ka pre we amnhĩ to nê man tẽn rê? Anê.

²⁶ Hãmri nhÿm mẽ kãm:

—Nã mēmo kaxyw na ka wem ri ijapêr o ri ixkôt apa? ãm jãã mẽ ate ixkutã axàpkur nê anhôhyhtu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhÿpêx anhÿr ã ixpumu nê ixpê Tirtÿm Kra hã ixkôt ajamaxpêr kêt nê. Kwa mẽ ixpê Kra hã inhmã ajamaxpêr tÿx nê kêt wehe. Anê.

Jejus te kêp kaxkwa rÿm mẽ paxàpkur xà maati pyrãk ã kot amnhĩ jarẽnh

²⁷ Nhÿm Jejus arĩ hwÿr mẽ mrrar xwÿnhjê mã kapêr nê mẽ kãm:

—Kwa kêr ka mẽ ri axàpkur xà pix kukamã ajamaxpêr o ri apa hkêt nê. Na htem mẽ apkur xà kukwak ri Tirtÿm mẽ wa ixri htÿr tÿm nê pa ho pa hkêt nê. No kot kaj mẽ amnhĩ kaxyw pa ixkôt ajamaxpêr nê ixkôt amnhĩ xunhwÿ. Hã kot kaj mẽ ixkukwak ri nhÿrmã atÿr tÿm nê wa ixri amex nê apa ho apa. Te ixpê mẽ kot mẽ apkur xà hkur nê ÿ hã htÿr tÿm nê pa ho pa xwÿnh pyrãk. Ja kaxyw na pre Inhÿpêxà Tirtÿm mẽ awÿr papxipix inhmê pa mẽ awÿr wrÿ. Anê.

²⁸ Hãmri nhÿm mẽ kuma nê kãm:

—Kwa tanhmã kot paj wem amnhĩ nhÿpêx to nhÿm Tirtÿm hã mẽ ixpumu nê mẽ ixto mex nê? Anê.

²⁹ Hãmri nhÿm mẽ kuma nê axte mẽ kãm amnhĩ jarê nê mẽ kãm:

—Nã kot kaj mẽ amnhĩ kaxyw pa Tirtÿm kot mẽ awÿr inhmênh xwÿnh kôt ajamaxpêr hãmri nhÿm ixtã mẽ apumu nê tanhmã mẽ akrã hto ka mẽ ajamakêtkati nê axãmnhĩx akĩnh nê tanhmã amnhĩ nhÿpêx to ho ri apa. Anê.

³⁰ Hãmri nhÿm mẽ kuma nê kãm:

—Tôe. Kwa axte mẽ inhmã aa mẽ ixte mēmoj pumunh kêt ã ho anê. Pa mẽ ja hã apumu nê amnhĩ kaxyw akôt ijamaxpêr kurê kumrêx. E mēmo kot ka mẽ inhmã ho anê? Kwa tokyx mẽ inhmã axte mēmoj tanhmã ho pa mẽ omu. ³¹ Amnepê m finat Mojes pyrã kot kapôt ã mẽ panhÿgêjtê ho pa

ri na pre hte apkati mẽ mẽ kām mẽõ mẽ kot kām “manā” anhỹr xwỳnhhta gõ nhũm pre htem hkur o pa. Tĩrtũm kapẽr ã kagà htũm kot ja jarẽnh kot:

Na pre kaxkwa rũm mẽ hwỳr mẽ apkur xà rẽ nhũm mẽ hkur o pa.

Anhỹr o kot harẽnh. Tã kot kaj Mojes nẽ apkati mẽ mẽ inhmã mẽ inhõ ho ri apa pa mẽ ja hã apumu nẽ rĩ kormã amnhĩ kaxyw akõt ijamaxpẽr japẽr. Anẽ.

³² Hãmri nhũm mẽ kãm:

—Xà Mojes na pre hte mẽ kãm kaxkwa rũm mẽ apkur xà rẽnh o pa? Nà tãm kêt. Inhĩpêêxà na pre hte mẽ hwỳr kurẽ nhũm mẽ hkawrà nẽ kuku nẽ kukwak ri hihtỳx nẽ htĩr nẽ pa. Tã nhũm ra mẽ awỳr hpãnhã pa ixpê Kra hã inhmẽ. Kwa mẽ ixkapẽr ma nẽ amnhĩ krãm haxàr tỳx nẽ. ³³ Na pre Tĩrtũm inhĩpêx o te amnepẽm kot mẽ hwỳr kaxkwa rũm mẽ apkur xà rẽnhhta pyrà nẽ amnẽ pika hwỳr inhmẽ. Jakamã te ixpê kaxkwa rũm mẽ apkur xà maati wryk xwỳnhhta pyràk. Mẽ ate amnhĩ kaxyw ixkõt ajamaxpẽr nẽ ixkõt amnhĩ xunhwỳr hãmri nẽ ixkukwak ri wa ixri atĩr tũm nẽ apa ho apa kaxyw. Anẽ.

³⁴ Nhũm pre ã Jejus mẽ kãm amnhĩ jarẽnh anẽ nhũm mẽ kuma nom hprĩ hã mar mex kêt nẽ. ãm htỳx ho axtem mẽ apkur xà mex pix ã harẽnh ã hkamnhĩx nẽ kãm:

—Kwa tõe mẽ inhmã mẽ apkur xà maatita kwỳ gõ pa mẽ apkati mẽ hkur o ri ixpa. Anẽ.

³⁵ Hãmri nhũm mẽ kuma nẽ amnhĩ tã mẽ kãm:

—Nà mẽ apkur xà kumrẽxja ãm paa. Te ixpê mẽ apkur xà maati pyràk. Jakamã kot kaj mẽ atõ amnhĩ kaxyw ixkõt ajamaxpẽr nẽ ixkõt amnhĩ nhĩpêx o apa hã kot kaj mẽ akĩnh nẽ apa. Te ra axàpkur nẽ anhõhy htũ nẽ akĩnh o ri apa pyràk. Jao amnhĩ tã ixpumu nẽ akĩnh nẽ ajamakêtkati nẽ ri apa.

³⁶ —Ra mẽ ate ixpumunh mex tã kormã amnhĩ kaxyw ixkõt ajamaxpẽr kêt nẽ. Kwa mẽ ixkapẽr ma nẽ amnhĩ krãm haxàr tỳx nẽ. ³⁷ Tĩrtũm kot inhmã mẽ õr mã xwỳnhjaja koja mẽ ixpumu nẽ amnhĩ kaxyw ixkõt hamaxpẽr mex kurẽ kumrẽx. ã mẽ kot amnhĩ nhĩpêx anhỹr xwỳnhjaja kot paj aa amnhĩ nẽ mẽ hanor kêt nẽ.

³⁸ —Nẽ ixte amnhĩ krã hkõt kaxkwa rũm ixwryk nẽ inhmã hprãm xà hkõt tanhmã amnhĩ nhĩpêx to ho ixpa kaxyw na pa pre ixwryk kêt nẽ. Inhĩpêêxà kot mẽ awỳr inhmẽnh jakamã kãm hprãm xà hkõt pix mã na pa hte tanhmã amnhĩ nhĩpêx to ho ri ixpa.

³⁹ —Tã mo na hte Inhĩpêêxà kãm hprãm? Nà kot inhmã mẽ õr mã xwỳnh piitã nhỹrmã wa ixkuri htĩr tũm nẽ mex nẽ pa ho paja na kãm hprãm. Jakamã nhỹrmã akupỹm mẽ htĩr ã arĩgrota ã ixte akupỹm mẽ ho htĩr nhũm ixte ãm pixire nẽ ho ixpikunor kêtja na kãm hprãm.

⁴⁰ —Tã kot ka mẽ atõ ixpê Tĩrtũm Kra hã ixpumu nẽ amnhĩ kaxyw ixkõt ajamaxpẽr nẽ ixkõt amnhĩ xãm. Hã kot kaj nhỹrmã atyk tã pa akupỹm mẽ atĩr xà hã arĩgrota ã akupỹm ato atĩr ka wa ixkuri atĩr tũm nẽ amex nẽ apa ho apa. Ja na Inhĩpêêxàja kãm hprãm. Anẽ.

Nhũm pre ã Jejus mẽ kãm amnhĩ jarẽnh anẽ. ⁴¹ Hãmri nhũm Ijaew nhõ pahijaja mẽ kuri mar o kuhê nẽ tee ri kêp kaxkwa rũm mẽ apkur xà maati pyràk ã amnhĩ jarẽnh ma nhũm ja mẽ kãm mex kêt nhũm mẽ kamã gryk nẽ. ⁴² Jakamã axpẽn mã ri harẽnh o:

—Tk. Kwa mo na ri ã amnhĩ jarẽnh anẽ? Kêp mẽ panhĩõ kênã kot kêt ri kêp kaxkwa nhõ xwỳnh ã amnhĩ jarẽ. Kêp Juje mẽ Marir wa hkra na. Mẽ pahte katorxà mẽ hipêêxà wa omunh mex kênã kot kêt axtem nẽ kêp kaxkwa nhõ xwỳnh ã amnhĩ jarẽ. Anẽ.

⁴³ Hãmri nhũm amnhĩ tã mẽ kuma nẽ mẽ kãm:

—Kwa mẽ ã ijarẽnh anhỹr kêt nẽ. ⁴⁴ Koja Inhĩpêêxà kot mẽ awỳr inhmẽnh xwỳnhhta tanhmã mẽ hkrã hto nhũm mẽ rĩ kormã amnhĩ tã ja hã ixpumu nẽ amnhĩ kaxyw ixkõt hamaxpẽr. Tã ã mẽ kot amnhĩ nhĩpêx anhỹr xwỳnhjaja koja mẽ nhỹrmã htyk tã pa akupỹm mẽ ho mẽ htĩr nhũm mẽ wa ixri htĩr tũm nẽ mex kumrẽx nẽ pa ho pa.

⁴⁵ —Amnepẽm Tĩrtũm kapẽr jarẽnh o mẽ pa xwỳnhjaja na prem ã ja jarẽnh anhỹr o: Koja Tĩrtũm mẽ hkrã kaxwỳnh kãm tanhmã mẽ kãm kapẽr o amnhĩrit to ho pa. Anhỹr o harẽnh. Jakamã mẽ kot Tĩrtũm kapẽr mar nẽ hkõt amnhĩ nhĩpêx xwỳnhjaja

koja mẽ mãänñen amnhĩ kaxyw pa ixkôt hamaxpēr nē ixkôt ri amnhĩ nhĩpêx o pa.

⁴⁶ —Nē mẽ apê pika nhō xwýnhjê hō aa mẽ ate ixkĩnhã ano ho Inhĩpêêxà pumunh kêt. ãm papxipix na ixte omunh. Kurũm na pa pre mẽ awýr wrý. ⁴⁷ Tã kot ka mẽ atō amnhĩ kaxyw ixkôt ajamaxpēr. Hã kot kaj nhỹrmã wa ixkuri atĩr tũm nē amex nē apa ho apa. Kwa mẽ jam ajamaxpēr tỳx nē.

⁴⁸ —Nē ixpê mẽ axàpkurxà maati jakamã pa na ixpê akupỹm mẽ ho mẽ htĩr xwýnh. ⁴⁹ Amnepêm mẽ panhĩgêtjaja kormã kapôt ã mẽ pa ri mẽ kot “manã” anhỹr xwýnhhta kur o ri pata ã na prem kukwak ri htĩr tũm nē pa ho pa hkêt nē. Na prem ri pa nē gaa nē rĩ hpigêt nē htyk pa. ⁵⁰ Axtem kaxkwa rũm mẽ apkur xà maati jarēnh xwýnhhta pix kukwak ri na htem nhỹrmã htyk tã akupỹm htĩr nē wa ixri htĩr tũm nē mex nē pa ho pa. ⁵¹ ãm paa. Pa na htem inhĩ hkwy hkrē hãmri nē wa ixri htĩr tũm nē mex nē pa ho pa. Na pa pre ra amnhĩ grōnh kôt mẽ awýr wrý. Jakamã ka mẽ atō inhĩ hkwy hkrē hãmri nē nhỹrmã atyk tã pa akupỹm ato atĩr ka Tĩrtũm mẽ wa ixri atĩr tũm nē amex nē apa ho apa. Anē.

⁵² Nhũm pre ã Jejus Ijaew mã amnhĩ jarēnh anē. No ãm mẽ kãm amnhĩ tã kuxi nē amnhĩ jarē. Jakamã nhũm mẽ tee ri kuma hãmri nē tanhmã hã axpēn mã kapēr to. Mē kot hprĩ hã mar kêt nē ãm mẽ kot ĩ hkwy hkrērja pix jarēnh mar jakamã tee ri hamaxpēr nē axpēn mã:

—Kwa tanhmã kot kêt we amnhĩ to nē mẽ pamã amnhĩ nhĩ hkwy gō pu mẽ kuku? Anē.

⁵³⁻⁵⁴ Hãmri nhũm amnhĩ tã mẽ kuma nē mẽ kãm:

—Nà mẽ kot inhĩ hkwy hkrēr nē ixkamrō hkwy ho hkōm xwýnh pixjaja koja mẽ nhỹrmã Tĩrtũm mẽ wa ixri htĩr tũm nē pa ho pa. Ixte akupỹm mẽ ho mẽ htĩr xà hã arĩgrota ã kot paj mẽ ho mẽ htĩr nhũm mẽ wa ixri htĩr tũm nē mex nē pa ho pa. No kot kaj mẽ inhĩ hkwy hkrēr kêt nē ixkamrō hkwy ho akōm kêt hãmri nē wa ixri atĩr tũm nē amex nē apa ho apa hkêt nē. Kwa mẽ jam ajamaxpēr tỳx rãhã nē. ⁵⁵ Kêt inhĩja kēp mẽ apkur xà maati na. Nē ixkamrōja kēp mẽ hkōm xà maati na. Jakamã na htem inhĩ hkwy hkrē nē ixkamrō hkwy ho ixkō

nē ra kēp wa ixri mẽ htĩr tũm nē mẽ pa ho mẽ pa mã xwýnh. ⁵⁶ Jakamã kot ka mẽ atō inhĩ hkwy hkrē nē ixkamrō hkwy ho ixkō. Hãmri pa amnhĩ tã apumu nē akarō mã axà ka te apê pa pyrāk o amnhĩ nhĩpêx o apa. ⁵⁷ Inhĩpêêxà kot mẽ awýr inhmēnh xwýnhhta kukwak ri na pa hte ixtĩr tũm nē ixpa ho ixpa. Tã ja pyrà nē kot kaj mẽ inhĩ hkwy hkrē hãmri nē ixkukwak ri wa ixri atĩr tũm nē apa ho apa mã xwýnh.

⁵⁸ —Jakamã na pa ã mẽ amã ixpê kaxkwa rũm mẽ axàpkur xà maati hã amnhĩ jarēnh anē. Amnepêm mẽ panhĩgêtjaja na pre htem kapôt ã mẽōta kur o pa hãmri nē gaa nē hpigêt nē htyk pa. No kêt pa koja mẽ inhĩ hkwy hkrē hãmri nē mẽ kurom wa ixri htĩr tũm nē mex nē pa ho pa. Anē.

⁵⁹ Nhũm pre ã Jejus mẽ kãm amnhĩ jarēnh anē. Kormã Kapanau kamã Tĩrtũm kapēr o mẽ ahkre xà hã ixkre kamã ã mẽ ahkre anhỹr o xa.

Mē ohtō nē mẽ kot Jejus kaga hã mẽ harēnh

Sikũn Korĩt 3.6; Sikũn Pētre 3.16

⁶⁰ Hãmri nhũm mẽ kot Jejus kôt mar o mẽ pa xwýnhjaja ohtō nē ã kapēr anhỹrja ma nē tee ri amnhĩ kukamã hamaxpēr nē hã axpēn mã:

—Tk. Kwa pēr kapērja ãm ri kati. Mēhō koja we kuma nē hkôt hamaxpēr nē hkamrō nē ĩ kur o ri hkôt pa? Nà mẽ piitã mẽ kãm ja mexti hã. Anē.

⁶¹ Hãmri nhũm amnhĩ tã mẽ kuma nē mẽ kãm:

—Kwa xà ixkapērja mẽ apê omnuj? ⁶² Nà kot paj nhỹrmã ma akupỹm kaxkwa hwýr api. Ixpê Tĩrtũm kot mẽ akaxyw ixãm xwýnh ã ma akupỹm hwýr api. Hãmri ka mẽ ã ixte amnhĩ nhĩpêx anhỹr ã ixpumu nē rĩ kormã ixkôt amnhĩ xunhwýr japēr. ⁶³ Na htem mẽmoj kur kukwak ri kēp Tĩrtũm mẽ wa ixri htĩr tũm nē pa ho pa xwýnh kêt nē. Rý amnhĩ krã hkôt tanhmã amnhĩ nhĩpêx to ho kēp wa ixri htĩr tũm nē pa ho pa mã xwýnh kêt nē. Tĩrtũm mẽ wa Ixkarō tãm na hte mẽ hkarō mã agjē nē mẽ ho Tĩrtũm wa ixkuri mẽ htĩr tũm nē mẽ pa ho mẽ pa mã xwýnh. Tã ý hã na pa ã mẽ amã ixkapēr anē. Nom mẽ amã amnhĩ tã kuxi nē amnhĩ jarē. Tã kot kaj mẽ ixkapēr ma nē ixkôt amnhĩ nhĩpêx. Hã kot kaj mẽ nhỹrmã wa

ixri atĩr tũm nẽ amex nẽ apa ho apa. ⁶⁴⁻⁶⁵ No mẽ akwýjaja na ka mẽ ixkapẽr ma nẽ ãm ama nẽ ixkõt ajamaxpẽr kêt nẽ. Jakamã na pa ã mẽ amã ixkapẽr anẽ nẽ mẽ amã: “Koja Inhĩpêxàja tanhmã mẽ akrã hto ka mẽ rĩ kormã amnhĩ tã ixpumu nẽ amnhĩ kaxyw ixkõt ajamaxpẽr.” Anhỹr o mẽ amã ixkapẽr. Anẽ.

Nhũm ã Jejus mẽ kãm kapẽr anẽ. Ra kot mẽ hkukamã mẽ omunh mex. Ra kot amnhĩ kaxyw mẽ kot hkõt hamaxpẽr mã xwýnhjê pumunh nẽ mãânẽn mẽ kamã kot mẽõ pahi nhĩhkram haxàr mã xwýnhja nhũm mãânẽn ra kot amnhĩ kukamã omunh mex. Jakamã nhũm ã mẽ kãm kapẽr anẽ. ⁶⁶ Hãmri nhũm mẽ kot hkõt kapẽr mar o mẽ pa xwýnh kwýjaja tee ri kuma hãmri nẽ hkaga nẽ axte hkõt pa hkêt nẽ. ⁶⁷ Hãmri nhũm tee ri mẽ kot hkaga nẽ ma mẽ mrrar ã mẽ omu nẽ mẽ ixpê hkõt ixpa ho ixpa xwýnh pê 12jê mã kapẽr nẽ mẽ inhmã:

—Pa? No mẽ kajaja. Xà kot kaj mẽ uràk nẽ ixkaga nẽ ma akupým mra nã? Anẽ.

⁶⁸ Hãmri nhũm Simãw Pêtre kãm:

—Nà kot paj mẽ akaga hkêt nẽ. Kapxipix na htem amnhĩ kaxyw akõt hamaxpẽr jao kêp Tĩrtũm mẽ war akuri htĩr tũm nẽ pa ho pa mã xwýnh. ⁶⁹ Ka na pre Tĩrtũm mẽ ixwýr amẽ. Jakamã na pa mẽ amnhĩ kaxyw akõt ijamaxpẽr o ri ixpa. Nà kot paj mẽ aa akaga hkêt nẽ. Anẽ.

⁷⁰ Hãmri nhũm kuma nẽ kãm:

—Nà ixte amnhĩ kaxyw mẽ apê 12jê rênh tã na ka mẽ atõ akwýjê hkĩnhã axtem nẽ Satanasti hkõt amnhĩ xãm. Anẽ.

⁷¹ Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anẽ. Mẽ inhĩ õ na pre. Nẽ kêp Simãw Kariot kra na pre. Tã ra kot mẽ ìhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anẽ.

7

Jejus tøjaja kot mẽ hkĩnh wýr amnhĩ kõt hwýr ã mẽ harênh

Matêwre 10.36, 13.57-58

¹ Tã nhũm Jejus arĩ Garirej kamã ri pa nẽ kormã akupým Jutej wýr mõi kêt nẽ. Jutej kamã Ijaew nhõ pahijaja ra kot hã ãmnhẽn

nhũm mẽ kot hpĩr ã harênh jakamã nhũm mẽ umaj kormã hwýr mõi kêt nẽ.

² Tã mẽ ixpê Ijaew mẽ ixte ixkre hkryre nhĩpêx nẽ hã ixkĩnh ã arĩgroja ra ahtêp o mõi. Mẽ ixkĩnhã ã na pa pre htem ixpiitã Jutej wýr axpên wýr akuprõ nẽ ahpýnhã ri amnhĩm ixkre hkryre nhĩpêx nẽ kamã ixkrĩ. ³ Jakamã nhũm Jejus tøjaja hwýr mra nẽ kãm nojarêt nẽ amnhĩ kõt kuwý nẽ kãm:

—E kwa tokyx pu mẽ pahkwýjê hkõt. Ka mẽ kãm aa mẽ kot mẽmoj pumunh kêt kwý ho anhỹr o ri mẽ hkõt apa kê mẽ kãm akapẽr mar prãm xwýnhjaja ja hã apumu. ⁴ Na ka hte jar te apimxur pyrãk o amnhĩ nhĩpêx. E kwa tokyx ma pu mẽ hkõt. Anẽ.

⁵ Katorxà hkõt mẽ kêp Jejus tõi htã kormã amnhĩ kaxyw hkõt hamaxpẽr kêt jakamã na prem ã kãm kapẽr anẽ. ⁶ Hãmri nhũm mẽ kãm:

—Nà kormã. Kormã ixte mẽ kãm amnhĩ to amnhĩrit xà hã arĩgro kormã kator kêt. Jakamã kot ka mẽ amã mẽ hkõt amrar prãm nẽ mãmrĩ ma mẽ hkõt mra. ⁷ Koja mẽ apumu nẽ kãm mẽ akurê hkêt nẽ. Nẽ mẽ akamã gryk kêt ka mẽ ri tanhmã amnhĩ nhĩpêx to ho mẽ hkõt apa. No pa kot paj mẽ hwýr mõi nẽ mẽ kãm mẽ kot amnhĩ tomnuj o pa hã mẽ harênh o ri mẽ hkõt ixpa nhũm mẽ tee ri amnhĩ tã inhma nẽ ixkamã gryk nẽ. ⁸ Jakamã mẽ mãmrĩ ma mẽ hkõt mõi. Kot paj kormã. Kormã ixte mẽ kãm amnhĩ to amnhĩrit xà hã arĩgroja kormã kator kêt.

⁹ Anẽ nhũm mẽ tee ri kuma hãmri nẽ kure nẽ ma mẽ hkwýjê hkõt Jutej wýr mõi. Nhũm Jejus kormã Garirej kamã ri pa hã apkati grêre. ¹⁰ Hãmri nẽ kormã ma hapu hã mẽ hkõt mõi. Pa mẽ hkõt ri ixpa ho ixpa xwýnhjaja ma hkõt ixpa.

Mẽ kot ahpýnhã tanhmã Jejus jarênh to hã mẽ harênh

Juãw 7.37-44, 9.22, 10.19-21, 12.42-43

¹¹ Rôm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwýnhjê kaêx ã Jejus japêr o ri mra. Nẽ hã axpên kukjêr o mra nẽ axpên mã:

—Kwa nok? Nhỹri mãn we? Anẽ.

¹² Nhũm Ijaew piitã tanhmã axpên mã Jejus jarênh to ho pa. Nẽ kamã mẽ hkwýjaja harênh o:

—Nà kot amnhĩ to mex o pa xwýnh na.

Anhÿr o harënh o pa. Nê kamã mē hkwÿjaja axtem nê harê nê harënh o:

—Tk. Kot mē no kupyrr o pa xwÿnh kênã. Anê.

¹³ Nom mē õ pahi pymaj mē piitã mē nom tanhmã harënh to hkêr nê. Æm axpën mã pix mã tanhmã harënh to ho pa.

Jejus kot mē hkÿnh xwÿnhjê jahkre hã harënh

Makre 3.22; Juãw 5.16

¹⁴ Tã pa mē mē hwÿr pøj. Jejus mē pa mē hkôt ixpa ho ixpa xwÿnhjaja mē hwÿr pøj. Kormã mē hkÿnhja hapêx kêt ri. Hãmri pa mē Jejus kôt Tÿrtÿm mã amnhÿ jarënh xà hã ixkreja wÿr mra nê agjê nhÿm Jejus mē ahkre ho nhÿ. ¹⁵ Hãmri nhÿm mē inhõ pahijaja tee ri kot tanhmã mē ahkre hto hã kuma nê hã axpën kukja nê axpën mã:

—Kwa mē pahkÿnhã kot Tÿrtÿm kapër o istuda hkêr tã ã mē ahkre anê. Anê.

¹⁶ Hãmri nhÿm amnhÿ tã mē kuma nê mē kãm:

—Nà na pa hte amnhÿ krã hkôt tanhmã ri mē ajahkre hto hkêr nê. Æm kot mē awÿr inhmënh xwÿnhhta nhÿ hã na pa hte ã mē ajahkre anhÿr o ri mē akôt ixpa.

¹⁷ Tã kot kaj mē amã Tÿrtÿm kãm hprãm xà hkôt amnhÿ nhÿpêx prãm hã kot kaj mē ixte ÿ hã ixkapër ã ixpumunh kurê kumrêx.

¹⁸ Amnhÿ krã hkôt mē kãm kapër o ri mē pa xwÿnhjaja na htem mē kot mē mar nê mē hã hpijaàm pix kaxyw tanhmã mē kãm kapër to ho ri pa. No kêt pa na mē ate ixkapër mar nê kot mē awÿr inhmënh xwÿnhhta ã apijaàm pix kaxyw na pa hte tanhmã mē amã ixkapër to ho ri ixpa. Jakamã ãm hãmri na pa hte mē amã ixkapër o ri ixpa.

¹⁹ —Finat Mojes na pre mē panhÿgêrtjaja kot tanhmã amnhÿ nhÿpêx to ho pa nhÿm Tÿrtÿm kot mē kãm hã karõ jarënh o ri mē hkôt pa htã ka mē hkôt amnhÿ nhÿpêx kêt nê. Tã ixte hkôt amnhÿ nhÿpêx kêt ã ixto axêx nê mē ate ixpÿr kaxyw ixtã amnhÿ jarënh ri apa. Anê.

²⁰ Hãmri nhÿm mē ã Jejus kot mē kãm kapër anhÿrja ma nê hêx rom kãm:

—Kwa mē ixtõ na pa apÿr mã ka ri ã mē ijarënh anê? Amrakati kênã. Kwa mãn ka akrã axpã nà? Hã na ka ã ri akapër anê. Anê.

²¹ Hãmri nhÿm mē kãm:

—Nà ixte mē pahkôt xà hã arÿgro hã akupÿm mēhõ myta ho mex jakamã na ka prem ja hã ixpumu nhÿm ja mē apê omnuj nê. Nê te ixte mē pahkôt xà hã arÿgro hã ixpijaàm kêt xwÿnh pyrãk ã ijarê. ²² Nom na ka htem ixpyrà nê mē panhõ arÿgromnu hã mēmoj tã axàpênh o ri apa. E pa mē amã mēmoj jarê ka mē inhma. Na pre finat Mojes mē pamã mē pahte mē pahkra myre pê my kwÿrt kà jakàr ã mē pamã karõ. Kukamã higêrtjaja kot kãm ja hã karõ xà hkôt. Jakamã na htem mē hkra myre hapôj nê hã semãn pyxi nê hapêx nhÿm mē kêp mēmy hkwÿrt kà jakà. ²³ Mē pahkôt xà hã arÿgro hã hõ kator tãã nhÿm mē hã semãn pyxi nê mē panhõ arÿgromnu hõ hã kêp my kwÿrt kà hkwÿ krãhta. Mojes kot Tÿrtÿm nhÿ hã ja hã mē pamã karõ xà hkôt. Jao mē panhõ arÿgromnu hã apê. Tã pa pre mē apyrã nê arÿgromnu hã ixàpênh pê akupÿm mēhõ myta ho mex ka mē ja hã ixpumu nê axtem nê ixtÿx ri ixte amnhÿ nhÿpêx o ixpa xwÿnh ã ijarê nê mē ate ixpÿr kaxyw ã amnhÿ jarê. ²⁴ Kwa mē amnhÿ krã hkôt tanhmã mē harënh to ho ri apa hkêr nê. Æm mē kot tanhmã amnhÿ nhÿpêx to ho pa hã mē omu nê ajamaxpër o: “Kwa xà we Tÿrtÿm kãm ja mex nà?” Anhÿr o mãn kêt mē ajamaxpër nê rÿ kormã tanhmã mē harënh to. Anê.

²⁵ Hãmri nhÿm Jerujarê nhõ xwÿnh kwÿjaja ja hã kuma nê tee ri hkukamã hamaxpër. Hãmri nê hã axpën kukja nê axpën mã:

—Kwa xà tãm na mē panhõ pahijaja mē kot hpÿr kaxyw hã amÿnê? ²⁶ Ota jar mē pakamã ri pa htã nhÿm mē ãm omu nê kãm tanhmã nê hkêr nê. Mãn mē ãm hãmri kêp Kris ã hkamnhÿx jakamã kapër ma nê ãm kuma nê kêp Kris ã tanhmã ho hkêr nê. Anê.

²⁷ Hãmri nhÿm mēhõja kuma nê kãm:

—Tk. Nà kêp Tÿrtÿm kot mē pahwÿr mēnh xwÿnhre hã. Kêp Najare nhõ xwÿnh kênã. Mē pahte hipêêxã mē katorxà wa omunh mex. No kêt Tÿrtÿm kot mē pahwÿr mēnh mã xwÿnhhta koja xep mē pahwÿr kato pu mē nhÿhÿnh htêm xà hkôt omunh kêt nê. Anê.

²⁸ Rôm nhÿm Jejus arÿ Tÿrtÿm mã amnhÿ jarënh xà hã ixkreja kamã mē ahkre ho

nhỹ. Jakamã mẽ kot axpẽn mã harẽnh ã amnhĩ tã mẽ kuma nẽ mẽ kãm:

—Xà mẽ ate aprĩ hã ixpumunh nẽ nhỹhỹnh ixtẽm xà hkõt ixpumunh? Nà mẽ ate ja hã ixpumunh kêt. Na pa pre amnhĩ hkrã hkõt mẽ awỳr inhmõr kêt nẽ. Na pre mẽhõ mẽ awỳr inhmẽ. Nom kot mẽ awỳr inhmẽnh xwỳnhja kormã mẽ ate omunh kêt. ²⁹ ãm papxipix na ixte omunh. Kurũm ixwrỳk xwỳnh na pa. Kot mẽ awỳr inhmẽnh nhũm kurũm ixwrỳk jakamã ixte ixprĩ hã omunh par. Anẽ.

³⁰ Hãmri nhũm mẽ hkwỳjaja tee ri ã kot amnhĩ jarẽnh anhỳrja ma nẽ ri axpẽn mã harẽnh o:

—Kwa Tĩrtũm kot mẽ pahwỳr mẽnh ã kot amnhĩ to hẽx kẽnã. E kwa pu mẽ ã kot amnhĩ to hẽx anhỳr ja ã unẽ nẽ haxà nà?

Anhỳr o axpẽn mã hã amỹnẽ. Nom kormã mẽ kot unẽnh nẽ haxàr xà hã arĩgroja kormã kator kêt jakamã nhũm Tĩrtũmja nẽ mẽ omunh mex nẽ nhũm mẽ ãm kãm unẽnh prãm kaprỹ. ³¹ No nhũm mẽ hkwỳja mẽ kurom kuma nẽ kệp Tĩrtũm kot mẽ pakaxyw ãm xwỳnh ã omunh kurẽ kumrẽx nẽ amnhĩ kaxyw hkõt hamaxpẽr. Hãmri nẽ axpẽn mã harẽnh o:

—Kwa mãn kệp Tĩrtũm kot mẽ pahwỳr mẽnh mã xwỳnhhta mãn nà? Mẽ pahtõ kot pu urak nẽ aa mẽ kãm mẽ kot mẽmoj pumunh kêt o anhỳr rax o ri papa? Amrakati kumrẽx. Nà pẽr tãm kẽnã. Anẽ.

Pôristi hkwỳ kot Jejus pynẽnh kaxyw ã mẽ harẽnh

³² Nhũm prem ã axpẽn mã Jejus jarẽnh anhỳr o kuhẽ hãmri nhũm Parijew nhõ xwỳnhjaja hã mẽ kuma. Hãmri nẽ patre krãhtũmjẽ mẽ mẽ ma Jejus wỳr mẽõ pôristi hkwỳ rẽ nẽ mẽ kãm:

—E mẽ ma Jejus wỳr mra nẽ unẽ nẽ man akupỹn o tẽ. Anẽ.

³³ Hãmri nhũm mẽ kuma nẽ ma hwỳr mra nẽ omu nom tokyx unẽnh kêt nẽ. Kormã kapẽr ã mar o kuhẽ. Nhũm Jejus arĩ mẽ kãm kapẽr o xa nẽ mẽ kãm:

—Nà kot paj jar mẽ akõt ri ixpa hã mytwrỹ grẽre hãmri nẽ ma akupỹm kot mẽ awỳr inhmẽnh xwỳnhhta wỳr api. ³⁴ Ka mẽ tee ri jar ijapẽr o ri apa nom nhỹri

ixpumunh kêt nẽ. Nẽ ma inhmõr xàta wỳr kot kaj mẽ atõ ma ixkõt amõr kêt nẽ. Anẽ.

³⁵ Hãmri nhũm mẽ tee ri ã kot amnhĩ jarẽnh anhỳrja ma nẽ axpẽn mã:

—Kwa nhỹhỹm koja we ma mõ pu mẽ hkõt papa hkõt nẽ? Mãn mẽ pahkwỳjaja kot Gresjẽ kamã mẽ pa xwỳnhjẽ hwỳr koja ma mõ nẽ hpãnhã mẽ hkõt mẽ ahkre ho pa nà? Hã na ã mẽ pamã amnhĩ jarẽnh anẽ? ³⁶ Mo na ri mẽ pahte tee ri hapẽr o papa hã mẽ pajarẽ nẽ mẽ pahte hkõt pamrar kêt ã mẽ pajarẽ? Anẽ.

Tĩrtũm Karõ te kệp gõ nyw pyrak ã harẽnh Juãw 4.13-14; Apokarip 22.1, 22.17

³⁷ Tã nhũm ra mẽ hkĩnhja hapẽx kaxyw hitep xà hã arĩgro maatija kato. Jakamã nhũm Jejus kãnhmã xa nẽ kỳxpẽ mẽ hpikuprõnh xwỳnhjẽ mã kapẽr nẽ mẽ kãm:

—E te mẽ amã kôr o apa pyrak xwỳnhjaja. Mẽ amnẽ ixwỳr akuprõ. Kot kaj mẽ amnhĩ kaxyw ixkõt ajamaxpẽr pa tanhmã mẽ ato ka mẽ apẽ Tĩrtũm mẽ wa ixri atĩr tũm nẽ apa ho apa mã xwỳnh.

³⁸ —Kot kaj mẽ ja hã amnhĩ pumu hãmri nẽ ma mẽ kãm ixkapẽr jarẽnh o ri mẽ hkõt apa. Te mẽ kãm kôr nhũm mẽ ate mẽ kãm gõ hkwỳ nhũm mẽ kot ho hkõm pyrak o mẽ hipẽx o ri mẽ hkõt apa. Hãmri nhũm mẽ ama nẽ mẽ apyrà nẽ amnhĩ kaxyw ixkõt hamaxpẽr. Pa ixte tanhmã mẽ atoja pyrà nẽ tanhmã mẽ ho nhũm mẽ apyrà nẽ kệp wa ixri htĩr tũm nẽ pa ho pa mã xwỳnh. Anẽ.

³⁹ Nhũm pre ã Jejus mẽ kãm kapẽr anẽ. No ãm hã kuxi nẽ mẽ kãm kapẽr nẽ hprĩ hã harẽnh kêt nẽ. Tĩrtũm Karõ kot nhỹrmã mẽ kot amnhĩ kaxyw Jejus mã hamaxpẽr xwỳnhjẽ karõ mã gjẽxja nhũm ã mẽ kãm hã kuxi nẽ harẽnh anẽ. No kormã akupỹm kaxkwa hwỳr àpir nẽ mex o mex nẽ hkrĩ hkõt jakamã kormã mẽ hwỳr Karõ rẽnh kêt nẽ.

Mẽ kot ahpỹnhã tanhmã Jejus jarẽnh to hã mẽ harẽnh

Juãw 7.11-13, 7.25, 10.19-21

⁴⁰ Hãmri nhũm mẽ kot Jejus mar o hkrĩ xwỳnhjaja ã kapẽr anhỳrja ã kuma nẽ ahpỹnhã tanhmã harẽnh to nẽ harẽnh o:

—Kwa finat Mojes pyrà nẽ kệp Tĩrtũm nhỹ hã kapẽr jarẽnh o pa xwỳnh na nà? Anẽ.

⁴¹ Nhũm kamã mẽ hkwỳjaja mẽ kãm:

—Nà Tĩrtũm kot mẽ pakaxyw ãm xwỳnhnta na. Anẽ.

Nhũm kamã mẽ hkwỳjaja ja hã mẽ kuma nẽ mẽ kãm:

—Tk. Nà kêp Garirej nhõ xwỳnh kênã kot kêt Tĩrtũm mẽ pakaxyw ãm. ⁴² Tĩrtũm kapêr ã kagà htũm kot kêp Garirej nhõ xwỳnh ã harênh kêt. Kêp Pahi Tawi hkanrêhã hka-grõt nyw jakamã koja uràk nẽ Jutej kamã krĩ pê Perêj kamã kato. Jao koja uràk nẽ kêp Jutej nhõ xwỳnh.

Anhỹr o ri axpên mã harê. Mẽ kot htỳx Jejus pika pê Garirej kamã kator ã hkamnhĩx jakamã ã axpên mã harênh anẽ. Nom pika pê Jutej kamã na pre kato. Krĩ pê Perêj kamã. Tã no nhũm mẽ hkwỳjaja ja hã mar kêt jakamã kêp Tĩrtũm kot mẽ pahwỳr mẽnh xwỳnh kêt ã hkamnhĩx.

⁴³ Jakamã nhũm mẽ ã ahpỳnhã axpên mã harênh anẽ. ⁴⁴ Nhũm mẽ hkwỳjaja ra kot unênh kaxyw tã tokyx unênh kêt nẽ.

*Pôristi kot Jejus pynênh kêt ã mẽ harênh
Matêwre 7.28-29*

⁴⁵ Tã nhũm patre nhõ pôristijaja. Mẽ kot Jejus pynênh mã hwỳr mrar tã hãmri ã kapêr anhỹrja ã kuma nẽ tee ri hamaxpêr nẽ unênh kêt nẽ. Nẽ awjanã nẽ ahte y kamã ma akupỹm patre krãhtũmjê mẽ Parijew nhõ xwỳnhjê hwỳr mra. Hãmri nhũm mẽ omu nẽ mẽ kãm:

—Pa nok? Tanhmã na ka mẽ amnhĩ to nẽ unênh nẽ ho amõr kêt nẽ? Anẽ.

⁴⁶ Hãmri nhũm mẽ kãm:

—Nà na pa mẽ unênh kêt nẽ. Kapêr mex kênã. Te kot mẽ pakapêr pyràk kêt jakamã pa mẽ tee ri kapêr ã kuma nẽ unênh kêt nẽ. Anẽ.

⁴⁷ Hãmri nhũm Parijew nhõ xwỳnhjaja mẽ kuma nẽ mẽ kãm:

—Tk. Kwa mân ka mẽ ra mẽ uràk nẽ tanhmã kot amnhĩ to hêx toja ma nẽ hkõt ajamaxpêr nà? ⁴⁸ Mẽ ixpê Parijew nhõ xwỳnhjaja nẽ mẽ panhõ pahijaja na pa htem hkõt ijamaxpêr kêt nẽ. ⁴⁹ No kêt mẽ kot mar nẽ hkõt hamaxpêr xwỳnhntijaja na htem mẽ ixkĩnhã finat Mojes kapêr mar kêt nẽ. ãm Jejus kapêr pix na htem kuma nẽ hkõt hamaxpêr. Mýrapê koja Tĩrtũm tanhmã mẽ homnuj tỳx to nhũm mẽ rĩ amnhĩ pumu. Anẽ.

*Nĩkotê kot Jejus xyr pê kapêr ã harênh
Juãw 3.1-21*

⁵⁰ Hãmri nhũm Nĩkotêja mẽ mar o xa. Mẽ uràk nẽ kêp Parijew nhõ xwỳnh tã na pre ra kamàt õ hã Jejus wỳr tẽ nẽ kãm kapêr. Jakamã tee ri hã mẽ kapêr ma hãmri nẽ yr pê mẽ kãm kapêr nẽ mẽ kãm:

⁵¹ —Tk. Kwa kormã mẽ pahte pahprĩ hã kapêr mar nẽ tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhỹ hã mẽ panhĩgêjtê mã ja jarênh o:

Kêr ka mẽ aprĩ hã mẽ kapêr ã mẽ ama nẽ mẽ kot amnhĩ nhĩpêx ã mẽ omu nẽ rĩ kormã tanhmã mẽ harênh to.

Anhỹr tã ka mẽ kormã aprĩ hã Jejus kot amnhĩ nhĩpêx ã omunh kêt tã ra kot amnhĩ tomnuj xwỳnh ã harê. Anẽ.

⁵² Hãmri nhũm mẽ tee ri kuma nẽ kãm:

—Tk. Kwa xà we uràk nẽ apê Garirej nhõ xwỳnh hã na ka ã yr pê akapêr anẽ? Xà Tĩrtũm kapêr ã kagà htũm kot Garirej nhõ xwỳnhjê hõ kêp y hã kapêr jarênh o pa xwỳnh ã harênh? Nà ã kot harênh anhỹr kêt. Anẽ.

⁵³ Nhũm mẽ ã Nĩkotê mã kapêr anẽ hãmri nẽ anhrã nẽ Tĩrtũm nhõrkwỹ rũm hapõj nẽ ma akupỹm õrkwỹ hwỳr àhkurê ho mra.

8

*Mêhõ ni kot nhãm mẽ mjên o amnhĩkati hã
harênh
Xiakre 2.10-13*

¹ Tã nhũm Jejus Tĩrtũm nhõrkwỹ kamã mẽ ahkre hpa hãmri nẽ kato nẽ ma hixêt prêk pê Oriwêhti hwỳr tẽ. Hãmri nẽ hã api nẽ nhỹri nõ nẽ ra gõr.

² Tã nhũm apkati nẽ myt kator o mõr mẽ nhũm kãnhmã nhỹ nẽ akupỹm wrỳ nẽ Tĩrtũm mã amnhĩ jarênh xà hã ixkre hwỳr tẽ. No ãm kormã ixkre pu hã kahê hkre kamã nhỹ. Nhũm krĩ nhõ xwỳnhjaja omu nẽ hã htu rax nẽ nhũm tanhmã mẽ ahkre hto ho nhỹ. ³ Hãmri nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja hwỳr mêhõ nija o tẽ. Na ra ham mêhõ pê mjên o amnhĩkati ho nõ nhũm mẽ ja hã omu nẽ unê nẽ hpa hã kupy nẽ ma Jejus wỳr hkjênh o mõ. Hãmri nẽ mẽ kot mar o kuhê xwỳnhjê kutã ãm nhũm xa.

⁴ Hãmri nhũm mẽ Jejus mã:

—E ot pa mẽ awỳr jahti ho tẽ ka omu. Na ham mẽhõ pẽ mjẽn o amnhĩkati ho nõ. Pa mẽ ja hã omu nẽ unẽ nẽ man awỳr o tẽ. ⁵ E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêjtjẽ mã ja jarẽnh o:

Koja mẽnijẽ hõ axtem nẽ nhãm mẽhõ pẽ mjẽn o amnhĩkati ho nõ ka mẽ ja hã omu nẽ apiitã ahpỳnhã kẽn rũnh jamỳ nẽ ho htak o apĩ.

Anhỹr o kot harẽnh. No ka? Tanhmã kot kaj mẽ inhmã ja jarẽnh to? Tanhmã kot paj mẽ hipêx to nhũm amã mex nẽ? E mẽ inhmã tanhmã mẽ ixte hipêx to jarẽ. Anẽ.

⁶ Nhũm mẽ ã hêx rom nija ã Jejus kukjêr anẽ. Kot mẽ kot hpĩr nẽ mẽ kãm kapêr nhũm mẽ kot hã mar nẽ mẽ hkrãhtũmjê hwỳr mõi nẽ kãm kot Mojes kapêr kwỳm ri mẽ ahkre hã harẽnh kaxyw nhũm mẽ hêx rom ã hkukjêr anẽ. Hãmri nhũm mẽ kuma nẽ tanhmã hã mẽ kãm nẽ hkêt nẽ. ãm htỳx hikõt nẽ ãhkrakrã ho pyka kagà ho nhỹ.

⁷ Nhũm mẽ tee ri omu nẽ axte hã hkukja nhũm kãnhmã xa nẽ mẽ kãm:

—Tõe. Nà kot ka mẽ atõ aa tanhmã amnhĩ tomnuj to hkêt kumrêx ã amnhĩ pumu hãmri nẽ kam nẽ rĩ kaxyw kẽn õ py nẽ akumrêx ho hkura. Kê akwỳjaja rĩ kormã akõt hkwỳ jamỳ nẽ ho htak. Anẽ.

⁸ Hãmri nẽ akupỳm hikõt nẽ pyka kagà ho nhỹ. ⁹ Hãmri nhũm mẽ tee ri kapêrja kõt kuma hãmri nẽ mẽ kot mar o kuhê xwỳnhjê rũm anhrã nẽ ma mra. Mẽ piitã mẽ kot amnhĩ tomnuj xwỳnh ã amnhĩ pumunh mex jakamã tee ri ã kot mẽ kãm kapêr anhỹrja ma nẽ anhrã nẽ ma akupỳm hpỳnh nẽ axpẽn kõt mrar o xa. Mẽhpigêt kumrêx nẽ hpãnhã mẽ nywjaja nhũm mẽ hpỳnh nẽ ma axpẽn kõt mrar o ãm kãm hapêx. Nhũm Jejus mẽnija pix wa ahte mẽ kot mar xwỳnhjê kutã wa arĩk. ¹⁰ Hãmri nhũm Jejus kãnhmã xa nẽ nita mã kapêr nẽ kãm:

—Pa? No mẽ kot ato kapêr xwỳnhhta mẽ? Xà na mẽhõ kẽn o akuranh kêt nẽ? Anẽ.

¹¹ Nhũm kãm: “Ma amrakati.” Anẽ nhũm kãm:

—Tõe. Nà kot paj ijaxwỳja tanhmã ato hkêt nẽ. E mamrĩ ma akupỳm anhõrkwỳ hwỳr tẽ. No ãm kêt ka axte ã amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

Jejus kot hprĩ hã amnhĩ jarẽnh

Juāw 1.4; Rõmãn 13.12-14; Epes 5.8-14; Wam Tesarõn 5.5-8

¹² Tã nhũm arĩgro hõ hã nhũm Jejus axte Tĩrtũm nhõrkwỳ hwỳr tẽ nẽ kamã mẽ ahkre ho nhỹ nẽ mẽ kãm:

—Nà te ixpê mẽ piitã mẽ õ kanê pyrãk. Na hte kanêja mẽ kãm hirã mex nẽ nhũm mẽ kamã rĩt mex o pa. Jao kamãt kô kamã ri pa hkêt nẽ. Ja pyrã nẽ na pa hte Tĩrtũm kot amnhĩ nhĩpêx o amnhĩrĩt mex o ri ixpa. Kot ka mẽ atõ amnhĩ kaxyw inhmã ajamaxpêr nẽ ixkõt amnhĩ xãm hãmri nẽ tanhmã amnhĩ tomnuj to ho apa hkêt nẽ. ãm Tĩrtũm kãm hprãm xà kõt pix mã tanhmã ri amnhĩ nhĩpêx to ho ri apa. Jao te ate kanê hpøk nhĩrã kamã arĩt mex pyrã nẽ apê wa ixri atĩr tũm nẽ apa ho apa mã xwỳnh. Anẽ.

¹³ Hãmri nhũm Parijew nhõ xwỳnhjaja tee ri ã kapêr anhỹr ã kuma nẽ kãm:

—Tk. Kapxipix na ka ã amnhĩ jarẽnh anẽ. Mẽhõ kot ã ate amnhĩ jarẽnh anhỹrja kõt kot mẽ inhmã ajarẽnhre hã. Jakamã kot paj mẽ ama nẽ ãm ama. Anẽ.

¹⁴ Hãmri nhũm mẽ kãm:

—Nà mẽhõ kot ã ijarẽnh anhỹr kêt tã no ãm hãmri na pa mẽ amã amnhĩ jarẽ. Ixêx kêt. Mẽ arom ixte nhỹhỹnh ixwryk xà hã amnhĩ pumunh mex. Nẽ mẽ arom ma akupỳm nhỹhỹm ixàpir xà hã amnhĩ pumunh mex. Jakamã ãm hãmri na pa ã mẽ amã amnhĩ jarẽnh anẽ. ¹⁵ Na ka htem amnhĩ krã hkõt tanhmã ri ijarẽnh to. No pa na pa kormã amnhĩ xwar tanhmã mẽ ajarẽnh to hkêt nẽ. ¹⁶ Ixte tanhmã mẽ ajarẽnh to ronhỹx pa ãm hãmri mẽ ajarẽ. Nhỹx pa ãm papxipix amnhĩ krã hkõt tanhmã mẽ ajarẽnh to hkêt nẽ. Nhỹx mããnẽn Inhĩpêêxà pẽ kot mẽ awỳr inhmẽn xwỳnhhta inhĩhkõ hã pa wa ãm hãmri axpẽn kõt tanhmã mẽ ajarẽnh to. Mẽ ate amnhĩ to mex ã mẽ ajarẽ rỳ mẽ ate amnhĩ tomnuj ã mẽ ajarẽ. ¹⁷ Tĩrtũm kapêr ã kagà htũm kot ja jarẽnh kot:

Koja mẽhõ wa hamêxkrut nẽ tanhmã mẽmoj jarẽnh to nẽ ãm axpẽn kõt harẽnh o htipxi. Hã kot kaj mẽ wa ama nẽ ãm hãmri wa kot harẽnh kõt ajamaxpêr kurê kumrêx.

18 Anhÿr o kot harēnh. Tã pa ã amnhĩ jarēnh anē nhũm Inhĩpêêxà kot mẽ awÿr inhmēnh xwÿnhhta mãânēn ã ijarēnh anē. Wa ixpijakrut tã ã wa ixte axpēn kôt amnhĩ jarēnh anhÿr jakamã kwa mẽ ixte tanhmã amnhĩ jarēnh toja ma nē ixkôt ajamaxpēr kêt wehe. Anē.

19 Nhũm pre ã Jejus mẽ kãm kapēr anē. Hãmri nhũm mẽ kuma nē kãm:

—No nhÿri na we anhĩpêêxà ja? Anē.

Hãmri nhũm mẽ kãm:

—Nà mẽ ate Inhĩpêêxà pumunhre hã. Mẽ ate aprĩ hã ixpumunh ronhÿx ka mẽ mãânēn aprĩ hã Inhĩpêêxà pumunh mex kurê kumrēx. Nom mẽ ate ixpumunh mex kêt jakamã na ka mẽ mãânēn omunh mex kêt nē. Anē.

20 Nhũm pre ã Jejus mẽ kãm kapēr anē. Arĩ Tĩrtũm mã amnhĩ jarēnh xà hã ixkreja kamã mẽ ahkre ho xa. Mẽ kot kàxpore gjēnh xà kuri mẽ ahkre ho xa. Nhũm mẽ kãm hkurê xwÿnhjaja tee ri kot tanhmã mẽ ahkre htoja ma nē kãm unēnh nē haxàr prãm nē. Nom kormã mẽ kot ã hipêx anhÿr ã arĩgro kormã kator kêt jakamã nhũm Tĩrtũmja nē mẽ omunh mex nē nhũm mẽ ãm kãm unēnh prãm kaprÿ.

21 Hãmri nhũm Jejus arĩ mẽ kãm kapēr o xa nē mẽ kãm:

—Nà kot paj nhÿrmã mẽ arũm ixkato nē ma akupÿm api. Ka mẽ tee ri ijpapēr nom nhÿri ixpumunh kêt nē. Hãmri nē mẽ ate amnhĩ tomnuj o apa rãhã ty nē mẽ atõ ixwÿr axàpir kêt nē. Anē.

22 Hãmri nhũm Ijaew nhõ pahijaja tee ri ã kapēr anhÿrja ã kuma nē axpēn mã hã hpēr o pikēnh o kuhê nē axpēn mã:

—Kwa mãn ra kot amnhĩ pĩr kaxyw ã na ri hkôt mẽ paxàpir kêt ã mẽ pajarēnh anē nà? Anē.

23 Hãmri nhũm amnhĩ tã mẽ kuma nē mẽ kãm:

—Nà mẽ kajaja mẽ apê pyka nhõ xwÿnh na ka mẽ. No pa na mẽ arom ixpê kaxkwa nhõ xwÿnh jakamã mẽ pajamaxpēr kot axpēn pyræk kêt. 24 Kot kaj mẽ ixpê kaxkwa rũm ixwrÿk xwÿnh ã ixpumu nē amnhĩ kaxyw inhmã ajamaxpēr nē ixkôt amnhĩ xunhwÿr kêt hã kot kaj mẽ ate amnhĩ tomnuj o apa rãhã nhÿrmã atyk o mẽ kamjaja Tĩrtũm mã amnhĩ pãnhã amnhĩre. Anē.

25 Nhũm Jejus ã mẽ inhõ pahijê hkukamã mẽ kot amnhĩ nhĩpêx jarēnh anē nhũm mẽ tee ri amnhĩ tã kuma nē kãm:

—Kwa mẽ atõ na ka we ri ã mẽ inhmã akapēr anē? Anē.

Hãmri nhũm mẽ kãm:

—Nà ra ixte mẽ amã amnhĩ jarēnh kēnã. Xàn ka mẽ kormã aprĩ hã inhmar kêt nē?

26 Kot paj nhÿrmã mẽ amã mẽ ate amnhĩ tomnuj piitã ho amnhĩrit pa. Na pa kot mẽ awÿr inhmēnh xwÿnhhta pix xõ ri tanhmã mẽ amã ixkapēr to ho ri ixpa. ãm hãmri na hte tanhmã mẽmoj jarēnh to. Na hte hēx kêt nē. Anē.

27 Nhũm pre ã Jejus mẽ kãm Hipêêxà kot mẽ hwÿr mēnh ã harēnh anhÿr tã no nhũm mẽ Hipêêxà kēp Tĩrtũm ã hkôt hamaxpēr kêt nē. 28 Jakamã nhũm mẽ kãm:

—Nà koja mẽ nhÿrmã pĩ kahpa hã inhõ ka mẽ rĩ kormã aprĩ hã ixpê Tĩrtũm rũm mẽ awÿr ixwrÿk xwÿnh ã ixpumu. Nē ixte amnhĩ krã hkôt ixkapēr o ri ixpa hkêt ã ixpumu. Nē ãm Inhĩpêêxà xõ ri ixprĩ hã ixkapēr o ri ixpa hã ixpumu. 29 Ixte kãm hprãm xà hkôt pix mã tanhmã ri amnhĩ nhĩpêx to ho ri ixpa jakamã na hte ixtãnopxar mex o ixkôt pa ho pa. Koja aa ixkaga hkêt nē. Anē.

30 Hãmri nhũm mẽ hkwÿja kuma nē hkwÿjê rom kapēr kôt hamaxpēr 31 nhũm amnhĩ tã mẽ omu nē mẽ kãm:

—Nà ãm hãmri na ka mẽ tã ixkôt ajamaxpēr. Tã kēr ka mẽ ixkôt amnhĩ xunhwÿ nē ixkapēr kôt pix mã ri amnhĩ nhĩpêx mex o ri apa. Hãmri pa ja hã mẽ apumu nē mẽ apê ixkwÿ kumrēx ã mẽ ajarē. 32 ãm hãmri na pa hte ã ixkapēr anhÿr o ri ixpa. Tã kot kaj mẽ ixkôt ri amnhĩ nhĩpêx o ri apa hãmri nē aprĩ hã inhmar tÿx nē. Nom na hte kormã mẽmoj kot amnhĩ tã mẽ ato htÿx pyræk o mẽ anhĩpêx ka mẽ tee ri amnhĩ krã hkôt kãm anhÿrer prãm kaprÿ. Tã kot kaj mẽ ixkôt amnhĩ xunhwÿ nē ixkôt ri amnhĩ nhĩpêx hãmri nē Tĩrtũm nhÿ hã tãm amnhĩ nhĩpêx. Jao ÿ hã ate amnhĩ tomnuj mã anhÿre. Anē.

33 Nhũm pre ã Jejus mẽ kãm kapēr anē hãmri nhũm mẽ tee ri kuma nē kãm:

—Kwa mẽ ixpê mẽ pahpàr krax finat Apraãw kanrēhã htãmnhwÿ kēnã. Na pre mẽmoj te kot amnhĩ tã ho htÿx pyræk o

hipêx kêt nê. Jakamã mẽmo kot we mẽ ixpê hkanrêhã htàmnhwỳjê ho htỳx ka we ri ã mẽ ijarênh anê? Nà amrakati kênã. Tã kwa mon ka ã mẽ ijarênh anê? Anê.

³⁴ Hãmri nhũm Jejus hprĩ hã mẽ kãm awjarê nê mẽ kãm:

—Kwa mẽ ixkapêr ma nê amnhĩ krãm haxàr tỳx nê. Nà mẽ kot amnhĩ tomnuj o mẽ pa xwỳnhjaja te mẽ kot amnhĩ tomnuj tãm ri kot amnhĩ tã mẽ ho htỳx pyræk o mẽ hipêx. Jakamã nhũm mẽ urer kêt rãhã nê pa ho pa. Nê ã amnhĩ nhĩpêx anhỹr rãhã ho pa. ³⁵ Jakamã ixkĩnhã mẽ kêp Tĩrtũm kwỳ hkêt. No pa na ixpê Tĩrtũm Kra jakamã mããnên ixpê hkwỳ na pa. ³⁶ Tã mẽ kajaja. Kot kaj mẽ ixpê Tĩrtũm Kra hã ixkôt amnhĩ xunhwỳ hã kot pa tanhmã mẽ ato ka mẽ ixpyrà nê apê wa ixkwỳy. Hãmri nhũm mẽ ate amnhĩ tomnuj te kot mẽ amã urer pyræk o mẽ anhĩpêx ka mẽ ra wa ixkôt amnhĩ nhĩpêx o ri apa. Anê.

Mẽ kêp Tĩrtũm kra hkêt xwỳnhjê jarênh

³⁷ Nhũm Jejus arĩ mẽ kãm kapêr nê mẽ kãm:

—Nà ãm hãmri na ka mẽ apê finat Apraãw kanrêhã htàmnhwỳ hã amnhĩ jarê. Nom mẽ apê hkanrêhã htàmnhwỳ htã uræk nê amnhĩ kaxyw Tĩrtũm kôt ajamaxpêr kêt nê. Jakamã na ka htem ixkapêr ma nê ãm ama nê ixkaga. Nê axtem nê ixpĩr mã. Kop apu Apraãw arĩ mẽ akamã pa ronhỹx ã inhĩpêx anhỹr kêt nê. ³⁸ Na pa hte Inhĩpêxà hkôt pix mã ri amnhĩ nhĩpêx o ri ixpa. No mẽ kajaja axtem nê mẽ ate nhãm mẽ kapêr kôt amnhĩ nhĩpêx jakamã na ka htem ixkĩnhã Inhĩpêxà hkôt amnhĩ nhĩpêx kêt nê. Anê.

³⁹ Hãmri nhũm mẽ tee ri amnhĩ tã kuma nê mẽ kãm:

—Tk. Kwa mon ka ã mẽ ijarênh anê? Mẽ ixte Apraãw kôt amnhĩ nhĩpêx o ri ixpa kênã. Anê.

Hãmri nhũm mẽ kãm:

—Nà. Mẽ ate hkôt ri amnhĩ nhĩpêx o apa ronhỹx ka mẽ uræk nê Inhĩpêxà kapêr kôt amnhĩ nhĩpêx. ⁴⁰ No na ka mẽ ra axtem nê ixpĩr mã. ãm hãmri na pre Tĩrtũm inhãm awjarê pa ô ri tanhmã mẽ amã mẽmoj jarênh to ho ri ixpa htã ka mẽ ra axtem nê ixpĩr mã. Kwa xà na pre Apraãwja ã mẽ hipêx anhỹr o pa? Nà na pre ã mẽ hipêx

anhỹr kêt nê. ⁴¹ Mẽ ate hkôt amnhĩ nhĩpêx xwỳnhta axtem na. Kêp Apraãw kêt. Nê mããnên kêp Tĩrtũm kêt. Anê.

Hãmri nhũm mẽ tee ri kuma nê mẽ kãm:

—Tk. Kwa nà ã mẽ ijarênh anhỹr kêt nê. Mẽ ixte Apraãw kôt amnhĩ nhĩpêx xwỳnh kênã. Tã ka ri axtem nê ã mẽ ijarênh anê. Mẽhõ hkôt kot pa kêt wem ri axtem amnhĩ nhĩpêx o ri ixpa? Anê.

⁴² Hãmri nhũm mẽ kãm:

—Nà mẽ ate Apraãw kôt amnhĩ nhĩpêx ronhỹx ka mẽ ixpumu nê uræk nê amã ixprãm nê. Apraãw kot hkôt amnhĩ nhĩpêx o pa xwỳnhta tãm kot mẽ awỳr inhmên nhũm mẽ awỳr ixwryk kênã. Na pa pre amnhĩ krã hkôt man mẽ awỳr ixwryk kêt nê. Tãm na pre mẽ awỳr inhmê pa wrỳ.

⁴³ Kwa mon ka mẽ aprĩ hã ixkapêr mar mex kêt nê? Nà mẽ amã ixkôt amnhĩ nhĩpêx prãm kêt jakamã na ka mẽ tee ri ixkapêr ma nê aprĩ hã mar mex kêt nê. ⁴⁴ Mẽ ate hkôt amnhĩ nhĩpêx xwỳnhta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwỳnhjê hpãm maati na. Nê kêp mẽ kãm hêx o pa xwỳnhjê pãm maati na. ã kot amnhĩ nhĩpêx kot anhỹr. Nê kãm mẽ kapêr mex mar prãm kêt o pa. Nê ãm hêx pix o pa jakamã kêp mẽ hêx xwỳnhjê pãm. ã kot amnhĩ nhĩpêx anhỹr xwỳnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hãmri ixkapêr o ri ixpa. No mẽ kajaja mẽ apê hêx nhi xwỳnh maati ja hkra jakamã mẽ amã ixkapêr mar prãm kêt. ⁴⁶ Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwỳnh na pa. Nê tãm ixkapêr o ri ixpa xwỳnh tã ka mẽ inhma nê ãm inhma nê ixkôt ajamaxpêr kêt nê. Kwa mon ka mẽ ja hã ixpumunh nê ixkôt ajamaxpêr nê ixkôt amnhĩ xunhwỳr kêt nê? ⁴⁷ Tĩrtũm krajaja na htem kapêr mar tỳx nê hkôt amnhĩ nhĩpêx o pa. No mẽ apê hkra hkêt jakamã mẽ amã kapêr mar prãm kêt. Anê.

Mẽ kot Jejus kêp Satanasti hkwỳ hã harênh

⁴⁸ Hãmri nhũm mẽ ã Jejus kot mẽ harênh anhỹrja ma nê kamã gryk tỳx kumrêx. Hãmri nê mẽ kãm:

—Tk. Kwa ate amnhĩ tomnuj o apa xwỳnhĩ kênã. Ra Satanasti hkwỳ pē mēkarōmnuti tanhmã kot akrã hto jakamã na ka ã mē inhmã akapēr anē. Anē.

⁴⁹ Hãmri nhũm mē kãm:

—Nà mēkarōmnuti kot tanhmã ixto hkêt. Na pa hte Inhĩpêêxã hã ixpijaàm pix o ri ixpa. Tã mē ate ixkĩnhã hã apijaàm kêt jakamã mãânēn pa ixtã apijaàm kêt nē. ⁵⁰ Na pa hte amnhĩ krã hkôt mē piitã mē kot ixtã hpijaàm prãm xàj tanhmã mē kãm ixkapēr to hkêt nē. No mē piitã mē kot ixtã hpijaàm o paja na Inhĩpêêxã kãm hprãm. Tã koja nhỹrmã amnhĩ nē ixtã mē hpijaàm kêt xwỳnhjaja mē kot amnhĩ xà htỳx kamã hamak tũm xàta wỳr mē rēnh pa.

⁵¹ —Nē kot ka mē atō wa ixkapēr ma nē ixkôt amnhĩ nhĩpêx. Hã kot kaj wa ixri atĩr tũm nē apa ho apa. Kwa mē ixkapēr ma nē amnhĩ krãm haxàr tỳx nē. Anē.

Nhũm pre ã Jejus Ijaew nhō pahijê mã kapēr anē. ⁵² Nhũm mē kuma nē kãm:

—Kwa pēr ãm hãmri na ka hte Satanasti nhỹ hã ã mē htĩr tũm nē mē pa ho pa hã mē harēnh anhỹr o ri axêx o ri apa. Finat Apraãw na pre ri paa nē ty. Tã mē kot Tĩrtũm nhỹ hã kapēr jarēnh o mē pa xwỳnhjaja na prem uràk nē ri paa nē mãânēn htyk pa. Tã ka axtem nē mē kot akapēr kôt amnhĩ nhĩpêx o mē pa xwỳnhjaja ari htĩr tũm nē pa ho pa hã mē harē. Nà na ka ãm mē inhmã mē ho axêx o xa. ⁵³ Na pre mē pahpãm Apraãwja kot amnhĩ to rax tã ty nē hapêx. Nhũm mē kot Tĩrtũm nhỹ hã kapēr jarēnh xwỳnhjaja mãânēn mē kot amnhĩ to rũnh tã htyk pa nē hapêx. Mē kot amnhĩ to rũnh tã htyk pa nē hapêx kênã kot kêt mē tanhmã amnhĩ to nē ari htĩr tũm nē pa. ãm mē ixte akapēr mar nē atã ixpijaàm pix prãm xàj na ka ã mē inhmã mē htĩr tũm nē pa hã mē harēnh anē. Nom na ka ã mē harēnh anhỹr kaprỳ. Kot paj mē ri akapēr mar kêt nē. Anē.

⁵⁴ Hãmri nhũm mē kuma nē mē kãm:

—Nà na pa hte amnhĩ krã hkôt mē ate ixtã apijaàm hprãm xàj tanhmã mē amã ixkapēr to hkêt nē. Kot paj anē nē ãm ixtỳx ã amnhĩ nhĩpêx anhỹr kaprỳ. No Inhĩpêêxã tãm kãm mē apiitã mē ate ixtã apijaàm o apaja nhũm kãm hprãm. Mē ate Tĩrtũm kôt amnhĩ nhĩpêx o apa hã amnhĩ

to axêx xwỳnhĩta tãm na kãm mē ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt nē. Na ka htem ixkuk pumu nē axtem nē ixte Satanasti nhỹ hã mē amã ixêx o ri ixpa hã ijarē. ⁵⁵ Mē ate Inhĩpêêxã hkôt amnhĩ nhĩpêx ã amnhĩ jarēnh tã ãm amnhĩ to axêx o ri apa. No pa na pa hte mē arom ãm hãmri hkôt amnhĩ nhĩpêx mex o ri ixpa. ⁵⁶ Amnepêm mē pahpær krax Apraãwja na pre mē awỳr ixwryk kukamã ijarēnh ma nē mē arom inhỹ hã hkĩnh tỳx nē pa. Anē.

Nhũm pre ã Jejus mē kãm amnhĩ jarēnh anē. ⁵⁷ Hãmri nhũm mē kuma nē tee ri kot mē kãm tanhmã Apraãw jarēnh toja ma nē kãm:

—Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nē hapêx kênã kot ka kêt kot akukamã ajarēnh mar nē hkĩnh tỳx ã harē. Xàn ka pre ano ho omu? Kormã akator kêt ri na pre amnepêm htyk nhũm mē haxàr kênã. Nà na ka ãm mē inhmã amnhĩ to axêx. Te amnepêm mē hkukamã apa nē ate mē omunh nē mē harēnh pyræk. Kwa akatàt kôt mē inhmã awjarē. Anē.

Jejus kệp rãhã ho rãhã xwỳnh ã harēnh

⁵⁸ Hãmri nhũm Jejus mē kãm:

—Nà ixêx kêt. ãm hãmri na pa ã mē amã amnhĩ jarēnh anē. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwỳnh jakamã na pa pre hte inhno ho Apraãw pumunh mex o ri ixpa. Kwa mē ixkapēr ma nē amnhĩ krã him haxàr tỳx nē. Anē.

⁵⁹ Hãmri nhũm mē tee ri kot ã amnhĩ jarēnh anhỹrja ã kuma nē kamã gryk tỳx nē. Nē axpēn mã:

—Kwa tanhmã kot we amnhĩ to nē amnepêm rãhã nē pa ho pa xwỳnh ã amnhĩ jarē? Tĩrtũm pix na rãhã ho rãhã pa xwỳnh. Anē.

Hãmri nē kamã gryk xàj kēn rũnh kwỳ kawrà ho ri hprôt nē kot ho htak o hpĩr kaxyw. Nom nhũm ra amnhĩ tã mē omu nē mē kệp akunok nē Tĩrtũm mã amnhĩ jarēnh xà hã ixkreja rũm kato nē ma tē.

9

*Jejus kot no hkre xwỳnh o mex ã harēnh
Makre 8.22-26*

¹ Hāmri nhũm Jejus ma tē pa mē hkôt ri mē ixpa ho mē ixpa xwỳnhjaja ma hkôt mra. Hāmri nē nhỹri no hkre xwỳnh pumu. Katorxà nhōxà hkre rũm na pre no hkre nē kato. Hāmri nē ra hprêk nē hpriy kamã àhwỳr o hkrĩ. ² Tã hāmri pa mē mra nē omu nē hã Jejus kukja nē kãm:

—Kwa mēmoj mỳrapê na pre we myti nēj no hkre nē kato? Xà tãm kot tanhmã amnhĩ tomnuj to mỳrapê nà? Xà katorxà rỳ hipêxà kot amnhĩ tomnuj mỳrapê na pre ã no hkre nē kator anē? Anē.

³ Hāmri nhũm mē inhmã:

—Nà mēhō kot tanhmã amnhĩ tomnuj to mỳrapê no hkre nē kator kêt. Ām Tĩrtũm kot ho mex nhũm mē kot ja hã omunh kaxyw na pre ã no hkren kator anē. Tã kot paj Tĩrtũm nhỹ hã no ho mex ka mē ja hã ixpumu. Na pa hte kormã jar pikap ri ixpa ri Tĩrtũm mã tanhmã amnhĩ nhĩpêx mex to ho ri ixpa. ⁴ Na htem arĩgro hã mēmoj tã apê nhũm kamãt nhũm mē kãm ure nē àpênh kêt nē. Ja pyrã nē na pu htem kormã pahtĩr ri jar pikap ri papa ri Tĩrtũm mã tanhmã amnhĩ nhĩpêx to ho ri papa. Tã kot puj mē nhỹrmã ty hāmri nē axte jar ã amnhĩ nhĩpêx anhỹr kêt nē. Jakamã kwa kêr pu mē ri jar pikap ri papa ri kãm tanhmã amnhĩ nhĩpêx mex to ho ri papa. ⁵ Na pa hte ã kãm amnhĩ nhĩpêx anhỹr jao te kanê hirã mex pyrã nē ixprĩ hã mē kãm Tĩrtũm kot amnhĩ nhĩpêx o amnhĩrĩt mex o ri ixpa. Anē.

⁶ Nhũm pre ã Jejus mē inhmã amnhĩ jarēnh anē. Hāmri nē kot nohkre xwỳnhhta no o mex kaxyw hikôt nē argôx mē nē ho gyw kwỳ nhĩpêx nē kànhmã xa nē ho no kukõ. ⁷ Hāmri nē kãm:

—E ma gô gjênh xà pē Siroe hwỳr tē nē kamã amnhĩ no kuhõ. Anē.

Mē pakapêr kãm Siroeja mē kot kãm: “Nhỹhỹm mēnh xwỳnh” anhỹr jarēnh pyrãk. Tã nhũm Jejus hwỳr kumē nhũm ma hwỳr tē. Hāmri nē kamã amnhĩ no hã gyw kuhõnh pa jao rĩt mex kurê kumrêx. Hāmri nē rĩt mex ã amnhĩ pumu nē hkĩnh tỳx nē ma akupỹm òrkwỹ hwỳr tē. ⁸ Hāmri nhũm òrkwỹ kuri mē òrkwỹ xwỳnhjaja nē mē kot pry kamã ahwỳr o hkrĩ hã omunh

xwỳnhjaja amnhĩ jaêr pē ra rĩt mex ã omu nē tee ri hã axpên kukja nē axpên mã:

—Kwa pēr pry kamã àhwỳr o hkrĩ xwỳnhhta na nà? Anē.

⁹ Hāmri nhũm kamã mē hkwyjaja mē kãm:

—Tỳ. Tãm na. Anē.

Nhũm kamã mē hkwyjaja mē kãm:

—Nà tãm kêt. Axtem mēhō na. Te kot uràk nom tãm kêt. Anē.

Anhỹr o ri axpên mã harē. Tã nhũm tãm mē kãm amnhĩ jarē nē mē kãm:

—Tỳ pa kênã. Pa na pa pre hte inhno hkre nē ri ixpa htã ra ixrĩt mex. Anē.

¹⁰ Hāmri nhũm mē tee ri kuma nē kãm:

—Kwa no tanhmã na ka we amnhĩ to nē ra arĩt mex?

¹¹ Anē nhũm mē kãm:

—Nà mē kot kãm “Jesús” anhỹr xwỳnhhta na ixwỳr tē nē ixkaxyw gyw kwỳ kagõ nē ho inhno kukõ. Hāmri nē mē kot gô mã: “Siroe” anhỹr xwỳnhhta kamã ixte amnhĩ no kuhõnh kaxyw hwỳr inhmã anē pa ma hwỳr tē nē kamã amnhĩ no kuhõ nē ixrĩt mex kurê kumrêx. Anē.

¹² Hāmri nhũm mē kuma nē kãm:

—No nhỹhỹm na ato mex xwỳnhja ma tē? Anē.

Hāmri nhũm mē kãm:

—Konên. Ixte nhỹhỹm htēm xà hkôt omunhre hã. Anē.

¹³ Hāmri nhũm mē kuma nē ma Parijew nhõ xwỳnhjê hwỳr o mō nē mē kãm harē.

¹⁴ Nē mē kãm:

—E ot pa mē awỳr jahti ho tē. Na xep Jejusja jarãhã akupỹm kãm no ho mex. Mē panhõ arĩgromnu htã nhũm hã no ho mex. Anē.

¹⁵ Hāmri nhũm mē tee ri mē kuma nē myta pumu nē kãm:

—E mē inhmã amnhĩ jarē. Tanhmã na ka pre we amnhĩ to nē anohkre nē akrĩ htã ra ano mex nē? Anē.

Hāmri nhũm mē kãm:

—Nà na pre Jejus gyw o inhno kukõ nē inhmã anē pa gô ho amnhĩ no kuhõ nē ixrĩt kurê kumrêx. Anē.

¹⁶ Hāmri nhũm mē kuma nē tee ri Jejus ã axpên kukjêr o kuhê nē axpên mã harēnh o:

—Kwa mē panhõ arĩgromnu hã kot ho mex jakamã kêp Tĩrtũm rũm mē pahwỳr wrỳk xwỳnh kêt. Ām kot amnhĩ tomnuj xwỳnh kênã. Anē.

Nhũm mē hkwyjaja harēnh o:

—Kwa nà. Kot amnhĩ tomnuj xwỳnh ronhỹx àhpumunh tỳx kôt no ho mex kêt nê. Anê.

¹⁷ Hāmri nê hpānhã no mex xwỳnhhta mã kām:

—No ka? Ate kot ano ho mex xwỳnh ã amnhĩ tã harēnh jakamã mēhõ hã na ka hkamnhĩx? Mēhõ na wehe? Anê.

Hāmri nhũm mē kām:

—Konēn. Mãn kēp Tirtũm kapēr jarēnh o ri mē pa xwỳnh mãn. Hã na ã inhno ho mex anê. Anê.

¹⁸ Hāmri nhũm mē tee ri kuma nê axpēn mã:

—Kwa pēr aa nohkre hkêt kēnã. Na pre ãm amnhĩ to hēx o pa. E kwa pu mē amnhĩ wỳr katorxà nê hipēêxà wa hã karõ kê wa man tē nê tanhmã mē pamã harēnh to. Anê.

Hāmri nê wa hã karõ ¹⁹ nhũm wa mē hwỳr tēn axà nhũm mē wa kām:

—Pa. E mē inhmã mēmoj jarē. Xà we wa akrata na ãm ja nà? Xà tãm na ka hte wa nohkre nê kator ã harē? Kwa tanhmã na we amnhĩ to nê ra rīt mex? Anê.

²⁰ Hāmri nhũm wa mē kām:

—Yỹ wa ixkra kēnã. Na pre wa ixpē nohkre nê kato. ²¹ Tã ra tanhmã amnhĩ to nê ra rīt mex. No wa ixte kot ho mex xwỳnhhta pumunh kêt. Kwa mē tãm mãn hkukja nê ama. Ra àptàr kēnã. Kê tãm mãn mē amã tanhmã amnhĩ jarēnh to ka mē ama.

²² Anhỹr o mē kām wa hkrata jarē. No ãm wa kām mē uma nê ã mē kām kapēr anê nê mē kām Jejus nhĩxi jarēnh kêt nê. Na pre Parijew nhõ xwỳnhjaja ra Jejus nê mē kām kapēr nê mē kām:

—Ka mē atõ Tirtũm kot mē pakaxyw Jejus xãm ã harē hāmri nê axte Tirtũm kapēr o mē ahkre xà hã ixkreja wỳr agjêx kêt kumrêx nê rĩ amnhĩ pumu.

²³ Anhỹr o nê mē hkurê jakamã nhũm wa mē umaj ã mē kām hkra jarēnh anê nê kot ho mex xwỳnh nhĩxi jarēnh kêt nê. ²⁴ Hāmri nhũm mē axte amnhĩ wỳr no mex xwỳnhhta ã karõ nê kām:

—Kwa akatàt kôt mē inhmã amnhĩ jarē. Ate kot ano ho mex ã harēnh xwỳnhhta na kot amnhĩ tomnuj pix o pa xwỳnh kēnã kot kêt ano ho mex. Jakamã kwa Tirtũm noo mã akatàt kôt mē inhmã amnhĩ jarē nê axêx kêt nê. Anê.

²⁵ Hāmri nhũm mē kām:

—Ko ixte ja hã omunh kêt. ãm ja pix na ixte omunh. Na pa pre inhno hkre nê ri ixpa htã ra ixrīt mex nê. Anê.

²⁶ Hāmri nhũm mē tee ri kot amnhĩ jarēnhja ã kuma nê kām:

—No tanhmã na we mytita amnhĩ to nê amã ano ho mex? Anê.

²⁷ Hāmri nhũm tee ri axte mē kot hã hkukjêr ã mē kuma nê mē kām:

—Kwa ra ixte mē amã ãm hāmri amnhĩ jarēnh griã. Tã ka mē inhma nê ãm inhma nê arĩ hã ixkukja. Mãn ka mē amã hkôt amnhĩ xunhwỳr prãm hã na ka mē aprĩ hã ixkukja nà? Mē ate kot amnhĩ nhĩpêx ã aprĩ hã harēnh mar nê hkôt amnhĩ xunhwỳr prãm xàj na ka mē aprĩ hã amã harēnh prãm nê. Anê.

²⁸ Hāmri nhũm mē tee ri kuma nê kamã gryk nê. Nê hã kām akir nê kām:

—Tk. Ka na ka hte kapēr kôt amnhĩ nhĩpêx. No kêt mē pajaja na pa htem finat Mojes kapēr kôt pix mã amnhĩ nhĩpêx.

²⁹ Mojes mã na pre hte Tirtũm kapēr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harēnh xwỳnhhta mē ixte omunh kêt. Nê mēhõ nhỹ hã kot tanhmã amnhĩ nhĩpêx to ho pa xwỳnhja mē ixte omunh kêt. Anê.

³⁰ Hāmri nhũm tee ri mē kuma nê mē kām:

—Kwa kot inhmã inhno ho mex nhũm ra ixrīt mex tã ka mē tee ri hkukamã ajamaxpēr nê mēhõ nhỹ hã kot ã amnhĩ nhĩpêx anhỹr o pa hã omunh kêt ã amnhĩ jarē. ³¹ Mē pahte Tirtũm kot amnhĩ nhĩpêx ã omunh mex. Kojã mēhõ kot amnhĩ tomnuj xwỳnh mēmoj tã kuwỳ nhũm kuma nê ãm kuma. No kêt mē kot hkôt ri amnhĩ nhĩpêx xwỳnhjaja. Nê mē kot kām mex o mex ã harēnh xwỳnhjaja na htem mēmoj tã kuwỳ nhũm mē kuma nê mē kām tanhmã mēmoj nhĩpêx to rỳ mē kām mēmoj gō. ³² Tã aa mē pahte mēhõ kot mē no ho mex ã harēnh mar kêt tã nhũm ã Jejus inhmã inhno ho mex anê. ³³ Kēp Tirtũm kwỳ hkêt ronhỹx pre inhno ho mex kêt nê. Anê.

³⁴ Hāmri nhũm mē kuma hāmri nê kām:

—Tk. Kwa pēr ãm akator kôt ate amnhĩ tomnuj o ri apa htã na ka ã mē inhmã akapēr anê. Kwa ixkreja rũm akato nê ma atēm kurê kumrêx.

Anh̄yr o kām kapēr hāmri nē mē amnh̄i nē hano nh̄um kato nē ma tē.

³⁵ Tā nh̄um Jejus ra mē kot amnh̄i nē hanor ā harēnh ma nē ma hapēr o tē nē nh̄yri omu. Hāmri nē amnh̄i tā hkukja nom te nh̄am mēhō hā hkukjēr pyrā nē kām:

—Pa? Xàn ka ra Tirtūm kot mē awȳr mēnh xw̄ynhta amnh̄i kaxyw hkôt ajamaxpēr nà? Anē.

³⁶ Hāmri nh̄um kormā kot no ho omunh kêt jakamā kēp Jejus ā omunh kêt nē. Na pre kormā no hkre nē ām kapēr pix ma. Tā ra akup̄ym rīt mex nom kormā no ho omunh kêt nē. Jakamā nh̄um Jejus hw̄ȳr tē nē ā kām kapēr anē nh̄um omu nē kormā kēp Jejus ā omunh kêt nē kām:

—Tỳ kot kaj inh̄mā ahkre pa omu nē hkôt amnh̄i xām kurē kumrēx. Anē.

³⁷ Hāmri nh̄um kām:

—Kwa paa. Ixte amā ixkapēr xw̄ynhta pa na pa. Anē.

³⁸ Hāmri nh̄um kām:

—Kwa xōwehe Pahihti? Nà kot paj amnh̄i kaxyw akôt pix mā ijamaxpēr nē akôt pix mā amnh̄i nh̄ipēx o ri ixpa. Anē.

Hāmri nē kutā hkōn krā ho tēm nē nh̄y nē kām mex o mex ā harēnh o nh̄y. ³⁹ Hāmri nh̄um Jejus kām:

—Nà ixte mē apiitā tanhmā mē ajarēnh to kaxyw na pa pre kaxkwa rūm man mē awȳr wr̄y. Ahp̄ynhā mē amā ixprām xw̄ynhjē jarēnh nē ahp̄ynhā mē kām ixprām kêt xw̄ynhjē jarēnh kaxyw. Mē kām ixprām kêt xw̄ynhjaja kot hpr̄i hā Tirtūm kapēr mar mex kêt tā na htem ht̄yx ri kot mar mex ā amnh̄i jarēnh o pa. Jakamā te mē nohkre xw̄ynhjaja kot amnh̄i nh̄ipēx pyrāk. Nom koja mē Tirtūm kapēr ma nē ixkôt amnh̄i xunhw̄ȳr japēr. Hāmri nē te ra rīt mex pyrāk o amnh̄i nh̄ipēx. Jao ra hpr̄i hā Tirtūm kapēr mar mex o pa. Anē.

⁴⁰ Nh̄um pre ā Jejus kām kapēr anē. Nh̄um Parijew nh̄o xw̄ynh kw̄ȳjaja kot kuri mar o kuhē xw̄ynhjaja ā kapēr anh̄yr ā kuma nē amnh̄i tā kām:

—Kwa nà. Xà we mē pajaja na ka ā mē inh̄nohkre hā mē ijarēnh anē? Xà mē ixte ixpr̄i hā Tirtūm kapēr mar mex kêt ā na ka mē ijarē nà? Anē.

⁴¹ Hāmri nh̄um mē kām:

—Ȳy kop apu mē ate apr̄i hā kapēr mar mex kêt ā amnh̄i jarēnh ronh̄yx ja mē amā

mex nē. Tā mē ate apr̄i hā mar mex ā amnh̄i to axēx o apa jakamā na ka mē ra amnh̄i tomnuj t̄yx nē. Na hte Tirtūm ja hā mē apumu nē amnh̄im mē ate amnh̄i tomnuj xw̄ynh ā mē ajarē. Anē.

10

ôwēhti jarēnh

Matēwre 9.36, 12.11-12; Rukre 15.3-7

¹ Nh̄um Jejus ar̄i Ijaew mā kapēr nē mē kām:

—E pa mē amā awjarē ka mē inh̄ma nē amnh̄i krā him hax̄ar t̄yx nē ho apa. Mē hkrit ôwēhti kot paj mē amā harē ka mē inh̄ma. Na hte ôwēhti jamār o pa xw̄ynhjaja ôwēhti apkur kaxyw mē o pa hāmri nh̄um kamāt nh̄um akup̄ym kahē hw̄ȳr mē o pa. Kahē jakwakreja ām pixii. Tā koja mēhō kahē xà hkôt hw̄ȳr àr kêt nē axtem nē tē nē nh̄yh̄ynh kahē hā api nē ôwēhti hw̄ȳr àr japēr nh̄um mē omu nē kot hkwȳ ho àhk̄inh ā omunh kurē kumrēx.

² —No ôwēhti jamār o pa xw̄ynhja na hte mē kurom katāt kôt kahē jakwakre rūm ôwēhti hw̄ȳr agjē. ³ Nh̄um kahē xà jamār xw̄ynhja amnh̄i w̄ȳr omu nē kām kahē xà rēnh kurē kumrēx nh̄um axā. Na hte apkati mē ma nh̄yh̄ym apkur kaxyw mē o pa. Nē nojarēt nē mē kām akir. Ahp̄ynhā tanhmā mē hixi kute hā mē omunh xà hkôt mē kām àkjēr o pa. Hāmri nh̄um mē kuma nē hw̄ȳr mra nē hā pikuprōnh pa nh̄um mē ho hapôj nē ma nh̄yh̄ym ri mē apkur kaxyw mē o pa. ⁴ Ma mē apkur kaxyw nh̄yh̄ym mē o pa. Nh̄um ôwēhti ra kot kapēr mar mex jakamā ma àmnh̄ix ri hkôt apkur o pa.

⁵ —Na hte hamār o pa xw̄ynh pix kapēr ma nē hkôt pa nē nh̄am mēhō hkôt ri pa hkêt nē. Kot kapēr mar kêt jakamā tee ri kuma nē umaj axkahkūm nē hpr̄ot nē ma mra. Na hte ôwēhti ā amnh̄i nh̄ipēx anē. Anē.

Jejus te kēp ôwēhti gjēnh xà hā hakwakre pyrāk

⁶ Nh̄um pre ā Jejus mē kām ujarēnh anē. Nē ujarēnhja kamā amnh̄i kw̄ȳjē jarē nē määnēn tām amnh̄i jarē. Nom mē amnh̄i tā kuxi nē mē kām amnh̄i jarēnh o te ho ôwēhti jarēnh pyrāk nh̄um mē tee ri kuma nē mar

mex kêt nê. ⁷ Jakamã nhũm axte mẽ kãm awjarẽ nê mẽ kãm:

—E pa ixprĩ hã mẽ amã ixujarẽnhta jarẽ ka mẽ inhma. Te ixpê ôwêhti jagjênh xà hã hakwakre pyræk. Kwa mẽ ja ma nê amnhĩ krã him haxàr tỳx nê. ⁸ Na pre ra ixkukamã mẽ ohtô nê te ãm hãmri mẽ amã Tĩrtũm kapêr jarênh pyræk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwỳnhhta kot amnhĩ nhĩpêx pyræk. Nom na hte ôwêhtija ãm hamãr xwỳnh pix kapêr ma nê nhãm mẽhõ kapêr mar kêt nê. Ja pyrà nê mẽ kot ixkôt amnhĩ xunhwỳr xwỳnhjaja na htem Tĩrtũm kapêr o hêx o mẽ pa xwỳnhjê ma nê ãm mẽ kuma nê mẽ hkôt amnhĩ nhĩpêx kêt nê. Na htem ãm ixkapêr pix ma nê ixkôt pix mã amnhĩ nhĩpêx o pa.

⁹⁻¹⁰ —Te ixpê ôwêhti gjênh xà hã hakwakre pyræk. Na hte ôwêhti mẽmoj punuj pymaj kahê hwỳr agjê nê kamã mex nê kuhê. Nê kurũm hapôj nê ma apkur o pa. Ja pyrà nê mẽ kot ixkôt amnhĩ xunhwỳr xwỳnhjaja koja mẽ ixkukwak ri hkĩnh nê mex nê hamakêtkati nê pa ho pa. Nê nhỹrmã Tĩrtũm mẽ wa ixri htĩr tũm nê pa ho pa. Ja kaxyw na pa pre man mẽ awỳr pika hwỳr wrỳ.

—No ôwêhti ho àhkĩnh xwỳnhjaja na htem amnhĩm ho ahkĩ nê kupa nê ma amnhĩm o pa. Tã mẽ kot Tĩrtũm kapêr o hêx o mẽ pa xwỳnhjaja te mẽ kot jajaja kot amnhĩ nhĩpêx pyræk. Anê.

*Jejus te kêp ôwêhti jamãr xwỳnh pyræk
Eprêw 13.20; Apokarip 7.17*

¹¹ —Nê ôwêhti jamãr mex xwỳnhja koja nhỹri mẽhõ kêp ôwêhti hõxpĩr kaxyw hwỳr htẽm ã omu nê wa hã axpu. Nhũm ho àhkĩnh mã xwỳnhhta ôwêhti jamãr xwỳnh pĩ nhũm ôwêhti nê ty. Tã ixkwỳjaja hamakêtkati nê mex nê pa kaxyw na pa pre amnhĩ grõnh kôt mẽ hwỳr wrỳ. Jakamã kot paj te ôwêhti jamãr xwỳnh kot amnhĩ nhĩpêx pyræk o amnhĩ nhĩpêx.

¹²⁻¹³ —Nê na htem tõhã ôwêhti jamãr xwỳnh nhỹhỹm pa kaxyw nê mẽhõ mã amnhĩre nhũm wakre kamã kãm hkrit jamãr o pa. Kàxpore pix prãm xàj kãm hamãr o pa. Jakamã koja nhỹhỹnh mry xoprê ra hwỳr kato nhũm amnhĩ wỳr omu nê umaj ôwêhti re nê ma hprõt nê tẽ. Kãm

ôwêhti japê hkêt ãm kãm htĩr pix prãm xàj ôwêhti mã hamaxpêr kêt nê rer pa nê ma tẽ. Nhũm mry xoprêta ôwêhti hwỳr hprõt nê hkwy pynê nhũm hkwy umaj axkahkũm nê hprõt nê ma mra. No kêt pa na te ixte ôwêhti mã hamaxpêr kêt nê kot rer nê ma hprõt nê htẽm xwỳnhhta pyræk kêt. Kot paj aa ixkwỳjê rer kêt nê. Kot paj mẽ hkôt ixpa ho ixpa rãhã nê.

¹⁴⁻¹⁵ —Te ixte ôwêhti jamãr xwỳnh mex pyræk jakamã na pa hte uræk nê ahpỳnhã mẽ kot ixkôt amnhĩ xunhwỳr xwỳnhjê pumunh mex o ri mẽ hkôt ixpa. Te mẽ kêp ixkrit ôwêhti pyræk nhũm te ixpê mẽ hamãr mex o ri mẽ hkôt ixpa nê aa mẽ rer kêt xwỳnhhta pyræk.

—Nê mẽ kot ixkôt amnhĩ xunhwỳr xwỳnhjaja ra mẽ ixte amnhĩ nhĩpêx kôt axpên pumunh mex. Nê mẽ inhmã axpên japêê. Te Inhipeêxã mẽ wa inhmã axpên japê pyræk. Tã kot paj nhỹrmã mẽ nê tanhmã amnhĩ nhĩpêx to.

¹⁶ —Mẽ kot ixkôt amnhĩ xunhwỳr xwỳnhjaja piitã kêp Ijaew pix kêt. Koja Ijaew kêt xwỳnh kwỳjaja mããnên ixkapêr ma nê ixkôt amnhĩ xunhwỳ nê ixkôt amnhĩ nhĩpêx. Jao ra te kêp ixkrit ôwêhti pyræk. Tã kot paj mẽ ho ixpimràa tã mẽ ho tipxi nê mẽ hamãr o ri mẽ hkôt ixpa.

¹⁷ —Nê mẽ kot ixkôt amnhĩ nhĩpêx o mẽ pa xwỳnhjaja mẽ mex kaxyw na pa pre amnhĩ grõnh kôt mẽ hwỳr wrỳ. Jakamã kot paj nhỹrmã mẽ nê ty. Tã inhmã mẽ nê ixtyk puma hkêt jakamã na Inhipeêxã kãm ijapêê. Koja akupỹm ixto ixtĩr. ¹⁸ Kop apu inhmã mẽ nê ixtyk prãm kêt ronhỹx mẽ kãm ixkurê xwỳnhjaja tee ri kãm ixpĩr prãm kaprỳ. Nom ixte mẽ kot ixkôt amnhĩ nhĩpêx xwỳnhjê nê amnhĩ grõnh kôt mẽ hwỳr ixwryk kênã. Jakamã kot paj arĩ mẽ kãm amnhĩ grõnh kôt amnhĩ gõ nê arĩ mẽ kãm xa nhũm mẽ ixpĩ. Nom kot paj akupỹm ixtĩr. Mẽhõ koja tanhmã ixto nê ixpĩr o ixpĩ? Nà koja mẽhõ ixpĩr o ixpĩr kêt nê. Inhipeêxã nhỹ hã kot paj nhỹrmã ã amnhĩ nhĩpêx anê nê akupỹm ixtĩr. Anê.

Nhũm pre ã Jejus mẽ kãm amnhĩ jarênh anê. ¹⁹ Hãmri nhũm Ijaew tee ri ã kot amnhĩ jarênh anhỹr ã kuma nê kê axte axpên

kwým ri tanhmã harënh to ho kuhê. ²⁰ Nê kamã mẽ hkwýjaja harënh o:

—Tk. Kwa mẽ mar kêt nê. Satanasti nhỹ hã na hte htýx ri ã mẽ pamã amnhĩ jarënh anhỹr o pa. Anê.

²¹ Hãmri nhũm mẽ hkwýjaja mẽ kuma nê mẽ kãm:

—Nà kot anhỹr kêt. Xà na htem Satanasti nhỹ hã ã kapër mex anê nê ã mẽ no hkre xwýnhjê ho mex anê? Nà kot anhỹr kêt. Satanastija ukaprire hã. Anê.

Ijaew nhõ pahijaja kot Jejus kaga hã mẽ harënh

Juaw 5.18, 8.59

²² Tã nhũm ra amgrà hapêx pa mẽ ixpê Ijaew akupým krĩ pê Jerujarê kamã axpên wýr akuprõ. Axte mẽ ixte mẽ ixkĩnh kaxyw axpên wýr akuprõ. Amnepêm mẽ inhĩgêtjaja kot akupým Tirtũm mã amnhĩ jarënh xã hã ixkre ho mex pa nê ho Tirtũm wýr mã hamaxpêr nê hã ixkĩnh ã arĩgroja ã pa mẽ hwýr akuprõ. ²³ Hãmri nhũm Jejus ma mẽ ixkõt Tirtũm mã amnhĩ jarënh xã hã ixkreta wýr tẽ no ãm hwýr àr kêt nê. ãm ixkre hpu hã kahê xã kape hã ri pa. Mẽ kot kãm: “Pahi finat Sarumãw pa xã” anhỹr xwýnhhta kamã ri pa. ²⁴ Hãmri nhũm kê ra mẽ inhõ pahijaja omu nê hã akuprõ nê hêx rom kãm kapër nê kãm:

—Kwa tokyx aprĩ hã mẽ inhmã amnhĩ jarê. Xà apê Tirtũm Kra na ka nà? Xà ka na pre Tirtũm mẽ ixkaxyw axãm? Kwa aprĩ hã mẽ inhmã amnhĩ jarê pa mẽ ama. Mon ka hte aprĩ hã mẽ inhmã amnhĩ jarënh kêt nê? Na pa mẽ tee ri ate amnhĩ nhĩpêx ã apumu nê akukamã ijamaxpêr rũnh kumrêx o ri ixpa. Xã ãm hãmri apê Tirtũm kot mẽ ixkaxyw axãm xwýnhhta na ka? Anê.

²⁵ Hãmri nhũm mẽ kãm:

—Tk. Ra ixte mẽ amã amnhĩ jarënh xohtô htã ka mẽ inhma nê ãm inhma. Na pa hte xatã Inhĩpêxã nhỹ hã mẽ amã mẽ ate aa mẽmoj pumunh kêt kwý ho anhỹr o ri ixpa ka mẽ ja hã ixpumu nê ãm ixpumu nê ixkõt ajamaxpêr kêt nê. ²⁶ Mẽ apê ixkwý hkêt jakamã na ka mẽ ixkõt ajamaxpêr kêt nê. Te mẽ apê ixkrit ôwêhti pyrãk kêt. ²⁷ Ixkwýjaja na te ho ôwêhti kot hamãr xwýnh kapër mar nê hkõt ri pata pyrã nê ixkapêr ma nê ixkõt amnhĩ nhĩpêx o pa.

Ixpê mẽ õ pahihtĩ hã mẽ kot ixpumunh mex jakamã na htem ixkõt amnhĩ nhĩpêx mex o pa. Ixte ja hã mẽ omunh mex nê.

²⁸ Kojã mẽ nhỹrmã htyk tã no ãm ixkukwak ri akupým htĩr hãmri nê Tirtũm mẽ wa ixri htĩr tũm nê pa ho pa nê aa hapêx kêt nhũm mẽhõ ixpê mẽ utàr kêt nê. Te inhĩhkra hpo nhĩpõk ri mẽ hkrĩ nhũm te mẽ hã inhĩhkra pikamýr pyrãk nhũm mẽmoj tee ri ixpê tanhmã mẽ ho hprãm kaprý. ²⁹⁻³⁰ Inhĩpêxã tãm kot inhmã mẽ õr kênã. Hihtýx o kot mẽ piitã mẽ hakrenh par jakamã kojã mẽ inhĩhkra po nhĩpõk ri hkrĩ nê mãänên Inhĩpêxã nhĩhkra hpo nhĩpõk ri hkrĩ. Te ixpê Inhĩpêxã Tirtũm pyrãk jakamã mẽhõ kot wa ixpê wa inhĩhkra rũm mẽ utã? Nà amrakati kumrêx.

Anhỹr o mẽ kãm amnhĩ jarê. ³¹ Hãmri nhũm mẽ te kêp Tirtũm pyrãk ã amnhĩ jarënh ã kuma nê kamã gryk týx nê. Hãmri nê kot kên o htak kaxyw ra kaxyw hkwý kawrà ho ri hprõt. ³² Hãmri nhũm amnhĩ tã mẽ omu nê mẽ kãm:

—Kwa ra ixte Inhĩpêxã nhỹ hã mẽ amã aa mẽ ate mẽmoj pumunh kêt kwý ho anhỹr rax o ixpa. Jao tanhmã mẽ ho mex to pix o ri ixpa. Tã ka mẽ axtem nê ã inhĩpêx anhỹr kaxyw. Anê.

³³ Hãmri nhũm mẽ kãm:

—Nã ã ate amnhĩ nhĩpêx anhỹr ja mýrapê hkêt. Kêt apê mẽ inhĩõ htã ri axtem nê te apê Tirtũm pyrãk ã amnhĩ jarënhja mýrapê na pa mẽ kên o atak kaxyw. Na pu htem ã amnhĩ jarënh anhỹr o papa hkêt nê. Anê

³⁴ Hãmri nhũm mẽ kãm:

—No ãm hãmri ixte ã amnhĩ jarënh anhỹr kênã. Tanhmã na Tirtũm kapêr ã kaga htũm kot ja jarënh to wehe? Na pre Tirtũm Ijaew nhõ pahijê mã kapêr nê mẽ kãm:

E mẽ ate inhỹ hã mẽ ho amnhĩptàr jakamã te mẽ apê pa ixpê Tirtũm pyrãk.

Anhỹr o kot mẽ harënh. ³⁵ ãm hãmri na Tirtũm kapêrja. Tãm kot ã mẽ harënh kot anhỹr. Mẽ kot ý hã mẽ kãm kapêr jakamã te mẽ kêp urãk ã mẽ harënh anhỹr kênã.

³⁶ Tã tãm kot ã mẽ harënh anhỹr tã hpãnhã mẽ akaxyw pa ixpê Kra hã ixãm nê mẽ awýr inhmên nhũm ixwryk nê ixpê Kra hã amnhĩ jarënh tã ka mẽ ja hã inhma nê ãm inhma nê ixkõt ajamaxpêr kêt nê. Kwa mon ka mẽ ja hã ixpumunh nê ixkõt

ajamaxpēr kêt nê? ³⁷ Kot paj Inhîpêêxà mẽ wa ixàhpumunh kôt mẽ amã aa mẽ ate mẽmoj pumunh kêt kwỳ ho anhỳr kêt ka mẽ ja hã ixpumu nê mẽ rĩ kam nê mãmri ixkôt ajamaxpēr kêt nê. ³⁸ Mẽ amã ixkapēr mar prãm kêt tã kwa ixte Tĩrtũm pyrà nê aa mẽ ate mẽmoj pumunh kêt kwỳ ho anhỳr ã ixpumu nê Inhîpêêxà mẽ wa ixte amnhĩ nhĩpêx tipxi hkôt ajamaxpēr. Anê.

³⁹ Hãmri nhũm mẽ kuma nhũm ja mẽ kêp omnuj tỳx nê. Te kot Tĩrtũm pyràk ã amnhĩ jarênhja nhũm mẽ kêp omnuj nê. Jakamã nhũm mẽ ra kot unênh nê ixkre rũm ho kator nê kapôt ã mẽnh nê kên ho htak kaxyw nhũm kê axte mẽ kêp akunok nê ma nhỹhỹm tẽ.

Jejus kot Jotãw nhĩhkjê hã ri pa hã harênh

⁴⁰ Tã nhũm Jejus ma tẽ nê pyhti pê Jotãw ã rê. Pa mẽ hkôt ri ixpa ho ixpa xwỳnhjaja ma hkôt mō. Finat Juāw Paxis kot Tĩrtũm mã wam mẽ hkrã kumrãr o pa xàta wỳr.

⁴¹ Hãmri nhũm mẽ ohtô nê mẽ ixwỳr mra nê Jejus kapēr ma nê kot tanhmã amnhĩ nhĩpêx to hã omunh o kuhê. Hãmri nê hã tanhmã axpên mã kapēr to nê axpên mã:

—Kwa ãm hãmri na pre finat Juāw Paxisja mẽ pamã Jejus jarênh o pa. Aa kot mẽ pamã mẽ pahte mẽmoj pumunh kêt kwỳ ho anhỳr kêt tã ãm xatã hkukamã mẽ pamã harênh o pa. Kêp Tĩrtũm Kra hã Juāw rom hihtỳx o hihtỳx ã harênh o pa. Nê Tĩrtũm kot mẽ pakaxyw ãm xwỳnh ã nhũm mẽ pamã harênh o pa. Nã ãm hãmri na pre ã mẽ pamã harênh anê. Anê.

⁴² Hãmri nhũm mẽ ohtô nê amnhĩ kaxyw Jejus kôt hamaxpēr nê hkôt amnhĩ xunhwỳ.

11

*Rajare htyk jarênh
Juāw 5.21-29, 6.40*

¹ Rôm nhũm krĩ pê Petãn kamã mēhō my pê Rajareja ra à htỳx nê nō. Na pre htōx wa hamêxkrut. Hō kêp Matre nhũm hō kêp Marir. ² Marir na pre kormã arĩgro hō hã kot Jejus o mex kaxyw mẽ hkuxwaxà ho hkuxwa nê amnhĩ kí ho hpar pōnh kaxyw. Nom kormã. Jakamã nhũm wa hkamyja wa kêp à htỳx nê nō. ³ Hãmri nhũm wa tee ri hkukamã hamaxpēr nê ma krĩ hō hwỳr

Jejus wỳr mēhō mẽ nhũm ma hwỳr tẽ. Nê hwỳr pōj nê omu nê kãm:

—Pa Pahihti. E ot pa awỳr tẽ. Na ra amã akràmnhwỳ japê htỳx xwỳnhnta à htỳx nê nō nhũm htōx wa tee ri hkukamã hamaxpēr nê awỳr inhmẽ pa tẽ. Kwa tokyx pu ma hwỳr tẽ ka akupỹm wa kãm ho mex nà? Anê.

⁴ Hãmri nhũm kuma nê kãm:

—Nã à htỳx nê nōr tã koja akupỹm mex. Mẽ kot akupỹm mex ã harênh mar hãmri nê Tĩrtũm mẽ wa ixtã hpijaam nê wa ixihtỳx o wa ixihtỳx ã wa ixpumunh kaxyw na ã à htỳx nê nōr anê. Nê pa ixpê Tĩrtũm Kra hã akupỹm ho mex ã ixpumunh nê ixkôt hamaxpēr kaxyw na ã à htỳx nê nōr anê. Anê.

⁵ Na pre Jejus kãm Rajare mẽ htōx wa mẽ hapê nê. ⁶ Tã à htỳx ã harênh ma nê hwỳr mōr tokyx anhỳr kêt nê. Pa mẽ arĩ amnhĩm hikranh xà kamã ri ixpaja o ixtã axte apkati axkrut. ⁷ Hãmri nhũm rĩ kormã hwỳr nojarêt nê mẽ inhmã:

—E ma pu mẽ jarãhã akupỹm Jutej kamã Rajare hwỳr mō nê omu. Anê.

⁸ Hãmri pa mẽ tee ri ja hã kuma nê kãm:

—Kwa ham mẽ panhō pahijaja kot kên o atak o apĩr mã tã ka ra akupỹm mẽ hwỳr akra. Kwa pu mẽ hwỳr pamōr kêt nê nà? Anê.

⁹ Hãmri nhũm mẽ inhmã:

—Nã koja mẽ kormã tanhmã ixto hkêt nê. Kormã ixte Tĩrtũm mã tanhmã amnhĩ nhĩpêx to jatur xãm mẽnhre hã. Te ixte kormã arĩgro hã ixrĩt mex nê ixpa pyrà nê kormã Tĩrtũm kot mẽmoj tã inhmã karō xà hkôt pix mã tanhmã amnhĩ nhĩpêx to ho ri ixpa. ¹⁰ Tã kot paj hatur xãm kumẽ nhũm te myt àr nhũm ra kamãt kô pyràk nhũm mẽ rĩ kormã tanhmã ixto nê ixpĩ. Jakamã e ma pu mẽ hwỳr. Koja mẽ tokyx tanhmã ixto hkêt nê. Anê.

¹¹ Hãmri nê mẽ inhmã Rajare jarênh o:

—Na mẽ pahkràmnhwỳ Rajareta ra gōr nê nō. Tã kot puj mẽ ma hwỳr mō pa kumra. Anê.

¹²⁻¹³ Ra htyk ã omunh tã ã mẽ inhmã harênh anê. Pa mẽ kuma nê ixtỳx ho ãm òt nê nōr ã hkamnhĩx nê kãm:

—Kwa mãn ra akupỹm amnhĩ kãm hamak o mōr jakamã na ra amnhĩ krit nê

gõr nê nõ. Kwa pu mẽ awjanã nê hwỳr pamõr kêt nê nà? Anê.

¹⁴ Hãmri nhũm mẽ inhma nê hprĩ hã mẽ inhmã harê nê mẽ inhmã:

—Nà na pre ty. ¹⁵ Nom kormã à nê hikwỳta ã na pa hwỳr inhmõr kêt nê. Tã kot paj ma hwỳr mõi nê hã mẽ amã ixàhpumunh tỳx ã amnhĩ to amnhĩrĩt. Ka mẽ ja hã ixpumu nê amnhĩ kaxyw ixkõt ajamaxpêr tỳx o ri apa. ã mẽ ate amnhĩ nhĩpêx anhỳr kaxyw na pa kormã à nê nõr ã hwỳr inhmõr kêt nê. E ma pu mẽ hwỳr. Anê.

¹⁶ Hãmri nhũm mẽ inhĩõ pê Tomas pihpohti tee ri ã kapêr anhỳrja ã kuma nê mẽ inhmã:

—Tõe ma pu mẽ hkõt. Kê mẽ mamrĩ hkõt mẽ pahto hpimràatã mẽ panhĩmex pa ri. Anê.

¹⁷ Tã pa mẽ ma hkõt mẽ hwỳr mõi nê ra Rajare nhõ krĩ hwỳr ixpõx o mõi hãmri nê harênh ma. Ra htyk nhũm mẽ kot haxàr ã arĩgro pê kwat ã harênh ma. ¹⁸⁻¹⁹ Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarê rũm ma wa hwỳr mra. Mẽ kot wa kãm kapêr nhũm tokyx akupỳm tãm wa hkrã kaxyw nhũm mẽ wa hwỳr mra. Wa õ krĩ pê Petãnja Jerujarê hwỳr ãm 3 kirõm pix jakamã nhũm mẽ ma wa hwỳr mra nê wa kuri wa kãm kapêr o hkrĩ. ²⁰ Rõm nhũm Matre Jejus hpõx o mõi ã harênh ma nê kànhmã xa nê man mẽ ixkutã tẽ. No nhũm Marir arĩ mỳr o nhỹ nê hkõt htẽm kêt nê. ²¹ Hãmri nhũm Matre mẽ ixkutã tẽ nê mẽ ixkaxpa nê Jejus pumu nê mỳr kamã kãm kapêr nê kãm:

—Hêxta gàa nê Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhỹx pre htyk kêt nê. Xê mon ka pre we tokyx mẽ ixwỳr atẽmre hkêt nê? ²² Tã na pa arĩ akõt ijamaxpêr tỳx nê. Kot kaj mẽmoj tã tanhmã Tĩrtũm wỳr to nhũm ama nê tanhmã amã mẽmoj to. Ra ixte ja hã apumunh mex kênã. Anê.

²³ Hãmri nhũm Jejus kuma nê kãm:

—Kwa tee ri ajamaxpêr nê akaprĩ hkêt nê. Koja akamy akupỳm war amã htĩr kãm ga. Anê.

²⁴ Hãmri nhũm kuma nê kãm:

—Ma koja anê. Nhỹrmã Tĩrtũm kot mẽ piitã akupỳm mẽ ho htĩr xà hã arĩgrota ã koja akupỳm htĩr. Anê.

Kamy akupỳm htĩr ã harênh mar tã Jejus kot akupỳm ho htĩr tokyx anhỳr ã hkamnhĩx kêt nê ã kãm kapêr anê.

²⁵⁻²⁶ Jakamã nhũm kãm:

—Nà pa na ixpê akupỳm mẽ ho mẽ htĩr xwỳnh. Jakamã mẽ kot amnhĩ kaxyw ixkõt hamaxpêr nê ixkõt amnhĩ xunhwỳr xwỳnhjaja koja mẽ htyk tã koja mẽ hkarõ Tĩrtũm mẽ wa ixri htĩr tũm nê mex nê pa ho pa. Xà ate ja kaxyw ixkõt ajamaxpêr tỳx nà? Anê.

²⁷ Hãmri nhũm Matre kuma nê kãm:

—Xê nhũm. Apê Tĩrtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anê.

Hãmri nhũm Jejus kãm:

—Nà ãm hãmri na ka ã ijarênh anê. E ma akupỳm tẽ nê atõx mã anê kê tokyx man ixwỳr tẽ pa omu. Anê.

²⁸ Hãmri nhũm kuma nê ma akupỳm tẽ. Hãmri nê Marir wỳr axà nê kãm Jejus jarê. Kõt mẽ hkrĩ xwỳnhjê hkàx ã kãm harê nê kãm:

—An xê hãmri amỳr kêt nê. Na ra mẽ pajahkre xwỳnhhta hpõx o mõi nê mũtar nhỹ nê atã karõ. Anê.

²⁹ Hãmri nhũm kuma nê kànhmã xa nê ma mẽ ixwỳr htẽm kurê kumrêx. ³⁰ Hãmri pa mẽ kormã krĩm ixpõx kêt nê. Arĩ Matreja Jejus wỳr htẽm xà kamã arĩ ixkrĩ.

³¹ Jakamã nhũm Matre ma tẽ nê Marir mã Jejus jarê nhũm kato nê man mẽ ixwỳr tẽ. Hãmri nhũm Jerujarê rũm wa hwỳr mẽ mrar xwỳnhjaja omu nê htỳx kot hkamy hã pika pumunh nê mỳr kaxyw htẽm ã hkamnhĩx nê man hkõt mra. ³² Hãmri nhũm Marir mẽ hkukamã mẽ ixwỳr tẽ nê Jejus pumu nê hpar pê tẽm nê kãm kapêr pê hipõ nê mỳr o nhỹ. Nê kãm:

—Hêxta gàa nê Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhỹx pre htyk kêt nê. Hõ mon ka pre we tokyx man mẽ ixwỳr atẽmre hkêt nê? Anê.

³³ Hãmri nhũm Jejus kuma nê mỳr ã omu. Nê hkõt mẽ mrar xwỳnhjaja mẽ mỳr ã mẽ omu nê kãm mẽ hkaprĩ nê. ³⁴ Hãmri nê mẽ kãm:

—Nhỹri na ka prem haxà? E mẽ hwỳr ixto tẽ pa omu. Anẽ.

Hãmri nhũm mẽ kuma nẽ ma hã pyka hwỳr mẽ ixto mō ³⁵ nhũm Jejus mẽ uràk nẽ hwỳr mỳr o tẽ ³⁶ nhũm mẽ ja hã omu nẽ axpẽn mã:

—Kwa mǎn kǎm hapê htỳx. Hã na ho ama nẽ hwỳr mỳr o tẽ. Anẽ.

³⁷ Nom nhũm mẽ hkwỳjaja axtem nẽ mẽ kǎm:

—Tk. Ra kot no hkre xwỳnhta o mex tǎ mo na we tokyx man kormǎ htĩr ri hwỳr htẽm nẽ omunh nẽ akupỹm ho mex kêt nẽ? Anẽ.

Jejus kot akupỹm Rajare ho htĩr ã harẽnh

³⁸ Tǎ pa mẽ ra kẽn kre kamǎ mẽ kot Rajare jaxàr xàta wỳr ixpôx o mō nhũm Jejus hkaprĩ nẽ hwỳr tẽ nẽ omu. Nhũm prem ra kẽn rax o hitom ³⁹ nhũm omu nẽ mẽ kǎm:

—E mẽ akwỳjaja nhãm inhmǎ nê kahê xà mẽ. Anẽ.

Hãmri nhũm Matre kuma nẽ tee ri hamaxpěr nẽ kǎm:

—Xê ma Jejus. Mẽ ri ã anhỹr kêt nẽ. Ra htyk ã arĩgro kệp 4 kẽnǎ. Mǎn ra hkatøk nẽ hkro htỳx kumrẽx. Anẽ.

⁴⁰ Hãmri nhũm kuma nẽ kǎm:

—Kwa ri ã ajamaxpěr anhỹr kêt nẽ Matre. Na pa ra amǎ ixkapěr nẽ amǎ ixkapěr o: “Kot kaj amnhĩ kaxyw ixkôt ajamaxpěr tỳx nẽ. Hã kot kaj Tĩrtũm mẽ wa ixihtỳx o wa ixihtỳx xàja pumu.” Anhỹr o amǎ ixkapěr. Jakamǎ kwa ja kaxyw Tĩrtũm mẽ wa ixkôt mǎn ajamaxpěr tỳx nẽ hkêt wehe. Anẽ.

Hãmri nhũm kuma nẽ kǎm:

—Ma ãm hãmri na ka inhmǎ akapěr. Ma kot paj kaxyw war amǎ ijamaxpěr tỳx nẽ. Anẽ.

⁴¹ Rôm nhũm mẽ kǎm nhãm kẽn jakwa kre kahê xà mẽ. Hãmri nhũm Jejus Tĩrtũm mã amnhĩ jarẽnh kaxyw kànhmǎ kaxkwa hwỳr rĩt nẽ kǎm:

—Pa Papaj. Nà na pa hte tanhmǎ mẽmoj tǎ awỳr to ka inhma nẽ tanhmǎ inhmǎ mẽmoj nhĩpêx to. Amex o amex Papaj. ⁴² Na ka hte ã inhmǎ amnhĩ nhĩpêx anẽ. Tǎ pa jajê noo mã ã amǎ ixkapěr anẽ. Ate inhmar nẽ tanhmǎ Rajare hto nhũm mẽ kot ja hã ixpumunh nẽ ixte anhỹ hã pix mã tanhmǎ amnhĩ nhĩpêx to ho ri ixpa hã ixpumunh

kaxyw. Nẽ ka ate mẽ hwỳr inhmẽnh ã apumunh kaxyw. Anẽ.

⁴³ Nhũm pre ã Tĩrtũm mã kapěr anẽ. Hãmri nẽ kỳx pê Rajare mã kapěr nẽ kǎm:

—Pa Rajare. Kwa tokyx kànhmǎ nhỹ nẽ amnẽ mẽ ixwỳr tẽ nẽ akato. Anẽ.

⁴⁴ Puh nhũm akupỹm htĩr nẽ hkupu xà rǎhǎ tẽ nẽ mẽ ixwỳr kato nẽ xa. Arĩ hkuk nẽ ìhkra nẽ hpar kupu rǎhǎ mẽ ixwỳr kato nẽ xa. Hãmri nhũm Jejus mẽ kǎm:

—Kwa mẽ atõ nê kupu xà hpôt kê ma akupỹm òrkwỹ hwỳr tẽ. Anẽ.

⁴⁵ Hãmri nhũm mẽ kot Marir mẽ Matre wa hwỳr mrar xwỳnh kwỳjaja ã Jejus kot Rajare nhĩpêx anhỹr ã omu nẽ amnhĩ kaxyw hkôt hamaxpěr nẽ hkôt amnhĩ xunhwỳr kurê kumrẽx. ⁴⁶ Nom nhũm mẽ hkwỳjaja axtem nẽ omu nhũm ja mẽ kệp omnuj nẽ. Jakamǎ nhũm mẽ ma Parijew nhõ xwỳnhjê hwỳr mra nẽ mẽ kǎm harẽ.

Mẽ kot Jejus pĩr ã amnhĩ grõnh

Matêwre 26.1-5; Makre 14.1-2; Rukre 22.1-2

⁴⁷ Hãmri nhũm Parijew nhõ xwỳnhjaja tee ri Jejus kot akupỹm Rajare ho htĩr ã harẽnh ma hãmri nẽ patre krãhtũmjê mẽ amnhĩ wỳr mẽ inhõ juisti ho akuprõ nẽ axpẽn mã Jejus o kapěr punuj pê hã axpẽn mar o hkrĩ. Hãmri nhũm mẽhõ mẽ kǎm:

—Kwa tanhmǎ kot puj mẽ ho? Na ra mẽ kǎm mẽmoj pumunh kêt kwỳ ho anhỹr rax o pa. ⁴⁸ Kot puj mẽ ãm omu nẽ tanhmǎ ho hkêt nhũm mẽ pahkwỳjaja kot ã amnhĩ nhĩpêx anhỹr ã omu nẽ htỳx ãm hãmri ã kot amnhĩ nhĩpêx anhỹr ã hkamnhĩx. Hãmri nẽ amnhĩ kaxyw hkôt hamaxpěr nẽ hkôt amnhĩ xunhwỳ. Jao ra amnhĩ kaxyw kệp mẽ ò pahihtĩ hã ãm. Kojã mẽ ã amnhĩ nhĩpêx anẽ nhũm Rôm kamǎ pahihtija mẽ kot kator nẽ hpǎnhǎ Jejus xǎm ã harẽnh ma. Hãmri nẽ gryk xàj mẽ pahwỳr ò pòristi hkwỳ rẽ nhũm mẽ pahwỳr mra nẽ mẽ panhĩmex pa nẽ Tĩrtũm nhõrkwỹ grǎnh pa. Kwa tanhmǎ kot puj wem tokyx amnhĩ nê ho? Anẽ.

⁴⁹ Hãmri nhũm Kajpas mẽ kǎm kapěr. Kajpasja na pre amgràja kamǎ kệp mẽõ patre nhõ pahi maati. Jakamǎ mẽ kǎm:

—Nà na pa ra ijamaxpěr. Kwa mẽ inhma. ⁵⁰ Nà kot puj mẽ hpĩr tokyx anẽ kê tapxipix

ty pu mẽ arĩ mỳrpê pahpiitã pajamakêtkati nê ri papa. Anê.

⁵¹ Nhũm pre ã mẽ kãm kapêr anê. Nom amnhĩ krã hkôt ã mẽ kãm kapêr anhỹr kêt nê. Arĩ kêp mẽõ patre krãhtũmjê nhõ pahi maati jakamã Tĩrtũm nhỹ hã Jejus kot Ijaew nê tykja kukamã ã harênh anê. Nom ja hã amnhĩ pumunh kêt nê. ⁵² Na pre Jejus mẽ ixpê Ijaew pix nê htyk kêt nê. Krĩ piitã hkôt Tĩrtũm krajê nê na pre ty. Mẽ piitã mẽ kot axpên to hkwy nê ri axpên to pa kaxyw na pre mẽ nê ty. ⁵³ Hãmri nhũm ã Kajpas mẽ kãm kapêr anê nhũm mẽ inhõ pahijaja kuma nhũm ja mẽ kãm mex nê. Jakamã nhũm mẽ kot tanhmã Jejus ã àmnênh to nhũm mẽ kot mẽ kãm tanhmã hpĩr to kaxyw ã axpên mar anhỹr o pa. ⁵⁴ Jakamã nhũm Jejus axte mẽ noo mã ri pa hkêt nê. Hãmri ma krĩ pê Epraĩ hwỳr ma mẽ. Pa mẽ hkôt ixpa ho ixpa xwỳnhjaja ma hkôt ixpa. Epraĩja kapôt ã krĩ na pre. Jakamã pa mẽ ma hwỳr mẽ hãmri nê kamã ri ixpa.

⁵⁵ Tã nhũm arĩgro pê Pasja ra ahtêp o mẽ. Amnepêm finat Mojes kot Ejit rũm mẽ panhĩgêjtê kator mã hamaxpêr kaxyw na pa pre htem hã ixkĩnh kaxyw Pas ã Jerujarê hwỳr akuprõ. Na pa pre htem hwỳr pøj nê kamã Tĩrtũm noo mã mẽ inhmex kaxyw tanhmã amnhĩ nhĩpêx to.

⁵⁶⁻⁵⁷ Jakamã nhũm ra Ijaew ohtô nê ma Jerujarê hwỳr pa. Nê kãm Jejus pumunh prãm xàj Tĩrtũm mã amnhĩ jarênh xà hã ixkre wỳr mra nê hwỳr agjê nê kamã hapêr nê axpên mã:

—Kwa nok? Xà koja mẽ hpakĩnh wỳr mör kêt nê nà? Anê.

Nhũm Parijew nhõ xwỳnhjê mẽ mẽ inhõ patre krãhtũmjaja haxwỳja hapêr o kuhê. Nom mẽ kot axtem nê unê nê haxàr kaxyw. Jakamã mẽ kãm hã karõ nê mẽ kãm:

—E kêr ka mẽ nhỹri Jejus pumu nê man mẽ ixwỳr mra nê mẽ inhmã harênh kurê kumrêx. Anê.

12

Marir kot Jejus kuxwa hã harênh Matêwre 26.6-13; Makre 14.3-9; Rukre 7.36-50

¹ Tã nhũm ra Pas wỳr apkati grêre. Ra hwỳr apkati kêp 6. Jakamã pa mẽ ma

akupỹm krĩ pê Petãn wỳr Jejus kôt mẽ. Jejus kot akupỹm Rajare ho htĩr xwỳnhta mẽ õ krĩ hwỳr pa mẽ akupỹm mẽ nê Rajare nhõrkwỹ hwỳr pøj nê mẽ hwỳr agjê. ² Hãmri nhũm mẽ Jejus pumu nê hkĩnh nê. Nê mẽ inhmã mẽmoj mex nhĩpêx pa mẽ ixàpkur o ixkrĩ. Nhũm Rajare haxwỳja mẽ ixkutã apkur o nhỹ. Nhũm htõx Matre mẽ inhmã mẽõ ho pa nê mêtei hã unhwỳr o xa. ³ Hãmri nhũm wa htõx Marir Jejus kukamã tanhmã hamaxpêr to nê hamaxpêr o:

—Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anê.

Hãmri nê kàx rax kãm mẽ hkuxwaxàja py nê o tẽ. Ra rit kahti hkôt hitep xà nhũm kupy nê hwỳr o tẽ. Mẽ kot mẽmo htwỳm o mẽ hkuxwaxà mex nhĩpêxja na pre hã kàxpore xohtô rax kumrêx. Jakamã nhũm kupy nê Jejus wỳr o tẽ nê hpar ã hkapĩr pa nê amnhĩ krã hkĩ ho hpar grà ho nhỹ nhũm ra ixkre kuxwa htỳx kumrêx. ⁴ Hãmri nhũm mẽ inhĩõ pê Jut Kariotja. Kot kormã mẽ ìhkram Jejus nhõr mã xwỳnhta tee ri ã kot amnhĩ nhĩpêx anhỹr ã omu nhũm ja kêp omnuj nê ⁵ nhũm mẽ inhmã:

—Tk. Kwa pêr mẽ hkuxwaxà hã kàxpore xohtô rax kumrêx tã nhũm ri axtem nê Jejus par ã hkapĩr pa. Mo na ma o htêm nê ho wênê nê hpãnhã kàxpore ho rax nê hpyr nê ho mẽ kêp amrakati xwỳnhjê nhĩpêx kêt nê? Kot ho wênê ronhỹx hpãnhã kàxpore ho rax kumrêx nê kupy nê ho mẽmoj japrôr rax o rax. Tã axtem nê amarĩ Jejus par ã hkapĩr pa. Anê.

⁶ Te kãm mẽ kêp amrakati xwỳnhjê japê pyrak tã kãm mẽ hapê hkêt. ãm hêx rom ã kapêr anê. Na pre hte mẽ inhmã mẽ ixkàxpore jamỳ nê mẽ ixkôt mẽ inhmã hamãr o pa. Nom tõhã axtem nê mẽ ixpê hkwy ho ahkĩ nê ho amnhĩm mẽmoj japrô. Jakamã Marir kot mẽ hkuxwaxà ho hapêx par ã omu nê tee ri hpãnhã kàxpore rax mã hamaxpêr nê kamã gryk nê ã mẽ inhmã kapêr anê. ⁷ Hãmri nhũm Jejus amnhĩ tã hamaxpêr ã omu nê kãm:

—Tk. Kwa tanhmã kãm akapêr to hkêt nê. Ixtyk nhũm mẽ kot ixkuxwa hkukamã na ã inhĩpêx anê. ⁸ Na hte mẽ kêp amrakati xwỳnhjaja mẽ akôt pa rãhã nê. Ka mẽ amã mẽmo arĩgro hã tanhmã mẽ ho ajuta hto

hprām nē rī mē ho ajuta nē mē kām mēmoj gō. No kêt pa kot paj ri mē akôt ixpa ka mē ixto mex ry ho apa hkêt nē. Kot paj tokyx mē apiitā mē are. Jakamā ām hāmri na ā inhīpêx anē. Anē.

Patre krāhtūmjaja kot Rajare hā àmnēnh ā harēnh

⁹ Rôm nhūm Jerujarē nhō xwýnhjaja ra Jejus Petān wýr hpôx ā harēnh ma nē kot omunh mā ma hwýr mra. No ām tapxipix pumunh mā hwýr mrar kêt nē. Māānēn kot akupým ho htír xwýnhhta pumunh mā nhūm mē ma hwýr mra. ¹⁰⁻¹¹ Na pre ra Ijaew ohtō nē Jejus kot akupým Rajare ho htír ā harēnh ma hāmri nē mē inhō patre kaga nē Jejus kôt amnhī xunhwý. Jakamā nhūm patre krāhtūmjaja tee ri ja hā mē omu nē axpēn mā:

—Nà kot puj mē Jejus pix pír kêt nē. Kot puj mē māānēn hkôt Rajare pī hāmri nhūm wa hixi hamē mē kēp hapêx japêr. Anē.

Jejus kot Jerujarē hwýr àr ā harēnh

Matêwre 21.1-11; Makre 11.1-11; Rukre 19.28-40

¹² Tā nhūm apkati nhūm Ijaew Jerujarē kamā mē hkīnhja kryx nē Jejus ra mē hwýr àhtêp o mōr ā harēnh ma. ¹³ Hāmri nē axpēn mā:

—Kwa ma pu mē mō nē pô hkwy jakà nē kutā ho mra. Anē.

Hāmri nē hkwy jakà nē hamý nē ma kutā ho mra. Hāmri nē ra hkaxpa nē omu nē hkīnh nē. Nē kām:

Pa. Nà ām hāmri na ka mē ixwýr mō. Tirtūm na pre mē ixwýr amē ka ā amōr anē.

Tirtūmja mex o mex. Ām hāmri na pre mē ixwýr amē.

Kot kaj mē inhō pahi hpānhā mē ixto amnhīptār o ri apa. Anē.

¹⁴ Hāmri nhūm Jejus nhýri jumēnre pumu nē hwýr tē nē hā nhý nhūm mē pimràatā ma akupým Jerujarē hwýr mō. Tirtūm kapêr ā kaga htūm ra kot ja jarēnh kot:

¹⁵ Pa Jerujarē nhō xwýnhjaja. Kwa mē tee ri amnhī kukamā ajamaxpêr ho amā ma hkêt nē.

Ota mē anhō pahi nyw ra mē awýr jumēnre hā nhý nē hpôx o tē. Anē.

¹⁶ No Jejus kôt mē ixpa ho mē ixpa xwýnhjaja pa mē ā kot amnhī nhīpêx

anhýrja ā omu nē tee ri hkukamā ija-maxpêr nē axpēn mā:

—Kwa mo na ri ā amnhī nhīpêx anē nē jumēnre hā nhý nē mē hkôt mō? Anē.

Tā nhūm arīgro hō hā ty nē akupým kaxkwa hwýr api pa prem hā omu hāmri nē kormā Tirtūm kapêr ā kaga htūm kot hkukamā ā harēnh kot anhýrja mā ija-maxpêr kurê kumrêx. Hāmri nē axpēn mā harēnh o:

—Kwa ām hāmri na Tirtūm kapêr ā kaga htūm kot ra ā Kraja jumēnre hā ýr nē mē hkôt mōr ā hkukamā kot harēnh anhýrta. Anē.

¹⁷ Hāmri nhūm Jejus kot Rajare mā kapêr pē akupým ho htír ā omunh xwýnhjaja arī nhām mē hkwyjê mā ujarēnh o pa. ¹⁸ Nhūm mē kuma nē ma Jejus wýr omunh mā mra. ¹⁹ Hāmri nhūm Parijew nhō xwýnhjaja tee ri ja hā mē omu nē axpēn mā:

—Kwa na pu mē tee ri Jejus nē mē kām pakapêr kapry nhūm mē pamar kêt nē ra piitā hkôt amnhī nhīpêx o pa. Kwa nà. Anē.

Ijaew kêt xwýnhjê jarēnh

²⁰ Tā nhūm ra Gres kwýjaja Ijaew kôt hkīnh kaxyw ma Jerujarē hwýr mē hkôt mra nē mē ĩhkô hā Tirtūm mā mex o mex ā harēnh o hkôt mra. ²¹ Jakamā nhūm mē nhýri mē inhīō pē Firipti pumu nē hwýr mra. Firipti kēp pyka pē Garirej kamā krī pē Pesêj nhō xwýnh nhūm Gres nhō xwýnhjaja omu nē hwýr mra nē kām:

—Pa. Kwa na pa mē inhmā Jejus pumunh prām nē. Tanhmā kot pa wem amnhī to nē omu nē kām ixkapêr? Anē.

²² Hāmri nhūm mē kuma nē ma Andre hwýr mē o mra nē kām mē harē. Hāmri nē wa ma Jejus wýr mē o mra nē kām mē harē nē kām:

—Pa Pahihti. Ota Gres nhō xwýnhjaja kām apumunh prām nē awýr mō. Mē pahkīnhā mē kēp Ijaew kêt tā mē kām apumunh prām nē. Anē.

Jejus kot amnhī kukamā amnhī jarēnh

Matêwre 16.24-28; māānēn Apokarip 2.10, 12.11

²³ Hāmri nhūm Jejus mē omu nē mē kām tanhmā amnhī jarēnh to. Kot mē ohtō nē mē nē htyk nhūm mē kukwak ri Tirtūm wa kuri htír tūm nē pa ho pa hā mē kām amnhī jarē nē mē kām:

—Nà na ra ixtyk ã arĩgro hwȳr apkati grēre. Ixpē Tĩrtũm kot mē akaxyw ixām xwȳnh jakamã kot paj mē apiitã mē anē ty hãmri nē akupȳm ixtĩr nē ma kaxkwa hwȳr akupȳm api. ²⁴Mē axohtô nē nhȳrmã Tĩrtũm mē wa ixri atĩr tũm nē apa ho apa kaxyw kot paj ã amnhĩ nhĩpēx anē. Kwa mē ã ixte amnhĩ jarēnh anhȳrja ma nē mē amnhĩ krãm haxàr tȳx nē ri hã apa. Te ixte mēmo hy kot amnhĩ nhĩpēx pyrãk. Na htem pikap hagjē nhũm te htyk pyrã nē pika kaxwȳnh kãm hikwȳ. Tã gaa nē higrõt nē hprēk nē ô. Nē ô rax kumrēx. Hyja pyxire nē hikwȳ htã kamã ô rax kumrēx. Nom koja mē hkre hkēt nē nhũm ô hkēt nē. Na hte ã mēmo hyja amnhĩ nhĩpēx anē. Ja pyrã nē kot paj mē anē ixtyk kēt nē te mē kot mēmo hy hkre hkēt nhũm hprēk nē ô hkēeta pyrãk ka mē ixkukwak ri Tĩrtũm mē wa ixri atĩr tũm nē apa hkēt nē. Jakamã kot paj mē anē ty nhũm mē ijaxà. Hãmri pa akupȳm ixtĩr ka mē axohtô nē ixkukwak ri wa ixri atĩr tũm nē apa ho apa.

²⁵—Nē koja mē ixpĩ pa mē anē ty. Tã mē ate ixkõt amnhĩ nhĩpēx o apa xwȳnhjaja. Koja mē ixtã mē apar mã tã kwa kêr ka mē atyk pymaj ixkaga hkēt nē. Kwãr mē mãmri tanhmã ixtã mē ato ka mē nhȳrmã Tĩrtũm mē wa ixri axte amnhĩ xà kamã ajamak kēt kumrēx nē atĩr tũm nē amex nē apa ho apa. No kot kaj mē ixkĩnhã jar amã amex pix prãm hãmri nē nhȳrmã wa ixri atĩr tũm nē apa hkēt nē. ²⁶Kot kaj mē ã ixkõt amnhĩ nhĩpēx anhȳr o ri apa hãmri nhũm mē kot inhĩpēx pyrãk o mē anhĩpēx. Hãmri ka mē nhȳrmã ma ixkõt kaxkwa hwȳr api nē kamã ixri atĩr tũm nē apa ho apa. Hãmri nhũm Inhĩpēxà ixtã mē apumu nē mē ato mex kumrēx. Anē.

*Tĩrtũm kot Jesus mã kapēr ã harēnh
Matēwre 3.17, 17.5*

²⁷Tã nhũm Jesus tee ri amnhĩ kukamã htyk mã hamaxpēr nē hkaprĩ htȳx nē. Nē hkõt mē ixpa ho mē ixpa xwȳnhjē mã amnhĩ jarē nē mē inhmã:

—Hēxta waa nē. Na pa tee ri amnhĩ kukamã ijamaxpēr. Nē tee ri amnhĩ xà htȳx kamã ijamak kukamã ijamaxpēr pē ra amnhĩ kamã ixkahak nē. Nom ixte

pika piitã hkõt mē kot ixkõt amnhĩ xunhwȳr xwȳnhjē nē ixtyk kaxyw ixwryk kēnã. Jakamã kot paj Inhĩpēxà kot mē kêp ixpytãr kaxyw tanhmã amnhĩ to hwȳr to hkēt nē. Anē.

²⁸Hãmri nē hpãnhã Hipēxà mã kapēr nē kãm:

—Pa Papaj. ãm mēmoj pixi na inhmã hprãm. Kē mē piitã ixkukwak ri amex o amex ã apumu. Ja na kēt inhmã hprãm tȳx kumrēx.

Anhȳr o Tĩrtũm mã amnhĩ jarē. Hãmri nhũm kuma nē kaxkwa rũm kãm kapēr. Kȳxpē kãm kapēr nē kãm:

—Nà na pa pre ra ã mē kãm amnhĩ to amnhĩrit anē nhũm mē ja hã ixpumu. Tã kot paj axte akukwak ri amnhĩ to amnhĩrit nhũm mē piitã axte inhmex o inhmex ã ixpumu. Anē.

²⁹Nhũm pre ã Tĩrtũm Jesus mã kapēr anē. Hãmri nhũm mē kot mē ixkuri mar o kuhē xwȳnhjaja kuma no ãm hprĩ hã kot kãm tanhmã kapēr toja mar mex kēt nē. Nē htȳx ho ãm mēmoj tã hkamnhĩx. Jakamã nhũm mē hkwȳjaja axpēn mã:

—Kwa mo na wehe? Na mãn katõtök nà? Anē.

Nhũm mē hkwȳjaja mē kãm:

—Nà na katõtök kēt. Tĩrtũm kapēr o wryk xwȳnh mãn tanhmã kãm kapēr to. Anē.

³⁰Hãmri nhũm Jesus mē kãm:

—Nà Tĩrtũm tãm na inhmã kapēr. Nom pa ixte mar kaxyw inhmã kapēr kēt nē. Mē kajaja mē ate ixtã mar kaxyw na kȳx pē ã inhmã kapēr anē. Anē.

Hãmri nē mē kãm:

³¹—E hãmri. Kot paj tokyx mē apiitã mē ate amnhĩ tomnuj pãnhã amnhĩrer kaxyw tanhmã amnhĩ nhĩpēx to. Jao mããnhēn Satanasti pē hihtȳx xà ho ijapēx. ³²Koja mē pĩ kahpa hã inhô pa kȳxpē ajēt. Tĩrtũm kot mē awȳr inhmēnh tã nhũm mē ã inhĩpēx anē pa ty. Jakamã koja pika piitã hkõt mē ohtô nē ixkõt amnhĩ xunhwȳ nē amnhĩ kaxyw inhmã hamaxpēr rãhã ho pa. Anē.

³³Mē ixte tanhmã htyk to hã harēnh mar kaxyw nhũm pre ã mē inhmã amnhĩ jarēnh anē. ³⁴Hãmri nhũm mē kot mē ixkuri mar o kuhē xwȳnhjaja tee ri kot htyk ã amnhĩ jarēnhja ma nē kãm:

—Kwa mẽ ixte amnhĩ wỳr kamã ijamak o ixpa xwỳnhja htĩr tũm nẽ pa ho pa xwỳnh na. Tĩrtũm kapẽr ã kagà htũm kot ã harẽnh kot anhỹr tã ka ã ri mẽ kot apĩr nhũm atyk ã amnhĩ jarẽnh anẽ. Ate Tĩrtũm kot mẽ ixwỳr amẽnh xwỳnh ã amnhĩ jarẽnh tã ã ri atyk ã amnhĩ jarẽnh anẽ. Kwa xà apê mẽ ixte amnhĩ wỳr kamã ijamak o ixpa xwỳnh kêt? Anẽ.

³⁵ Hãmri nhũm mẽ kuma nẽ amnhĩ tã mẽ kãm:

—Tỳ ixpê tãm kênã. Tã kot paj tokyx mẽ are. Jakamã kêr ka mẽ ixte arĩ mẽ akamã ixpa ri ixkôt amnhĩ xunhwỳ nẽ amnhĩ kaxyw ixkôt ajamxpẽr o ri apa. Te ixpê kanê hpòk pyrãk jakamã na pa hte mẽ kãm Tĩrtũm kapẽr o mẽ ahkre o ri ixpa. Nom kot paj kritpêm mẽ akôt ixpa ry hkêt nẽ. Jakamã kwa kêr ka mẽ tokyx te mẽ kot kanê hpòk nhĩrã kamã ri mẽ pa xwỳnh kot amnhĩ nhĩpêx pyrã nẽ Tĩrtũm kôt amnhĩ nhĩpêx o ri apa. Kormã mẽ akôt ixpa ri. Kot paj tokyx ma mỗ nhũm te ra kamàt kô pyrãk. Na hte kamàt kô kamã mẽ pa xwỳnhjaja tee ri rĩt mex mã nom rĩt mex kêt nẽ. Nẽ mẽmoj pumunh mex kêt nẽ.

³⁶ Jakamã kwa mẽ tokyx ixte arĩ mẽ akamã ixpa ri amnhĩ kaxyw inhmã ajamxpẽr nẽ ixkôt amnhĩ xunhwỳ. Te ixpê kanê hpòk nhũm kamã mẽ arĩt mex pyrãk. Jao ixpyrà nẽ te mẽ apê kanê hpòk nhĩrã mex pyrãk o amnhĩ nhĩpêx. Nẽ ixpyrà nẽ tãm ri amnhĩ nhĩpêx o apa. Anẽ.

Nhũm pre ã mẽ kãm kapẽr anẽ hãmri pa mẽ kêt ixkato nẽ ma nhãm mỗ.

Mẽ hkwỳjaja kot Jejus kôt hamaxpẽr kêt ã mẽ harẽnh

³⁷ Na pre hte Jejus mẽ noo mã mẽ kot aa mẽmoj pumunh kêt kwỳ ho anhỹr rax o pa. Tã nom nhũm mẽ ohtô nẽ mã omu nẽ ãm mã omu nẽ kêt Tĩrtũm kot mẽ pahwỳr mẽnh xwỳnh ã hkôt hamaxpẽr kêt nẽ. ³⁸ Nom ra mẽ hkukamã Tĩrtũm nhỹ mã kapẽr jarẽnh o pa xwỳnh pẽ finat Ijaisja mẽ hkukamã ja mã mẽ harẽ nẽ mã kagà. Nẽ mã kagàja o:

Pa Pahi Maati. Nã ra ixte mẽ kãm ajarẽnh o ixpa ryy htã no nhũm mẽ inhma nẽ ãm inhma.

Nẽ mẽ kot axihtỳx o axihtỳx ã ajarẽnh mar tã no ãm ajarẽnh ma nẽ amnhĩ kaxyw akôt hamaxpẽr kêt nẽ. Anẽ.

³⁹ Mẽ kãm Tĩrtũm kapẽr mar prãm kêt jakamã na prem mããnẽn Jejus kêt Tĩrtũm kot mẽ pahwỳr mẽnh xwỳnh hkôt hamaxpẽr kêt nẽ. Nhũm pre finat Ijaisja axte mẽ hkukamã ja mã mẽ harẽ nẽ mẽ mã kagà. Nẽ mã kagà ho:

⁴⁰ Na pre Tĩrtũmja tanhmã amnhĩ nẽ mẽ hkrã hto nhũm mẽ hkôt hamaxpẽr kêt nẽ.

Ra mẽ kot hihtỳx o hihtỳx ã omunh tã omu nẽ ãm omu.

Nẽ mẽ kot kapẽr mar tã amnhĩ tomnuj kaga hkêt nẽ.

Nẽ Tĩrtũm kot mẽ nẽ mẽ kot amnhĩ tomnuj o hapêx prãm xàj hkôt amnhĩ xunhwỳr kêt nẽ. Anẽ.

⁴¹ Kormã Jejus mẽ hwỳr wrỳk kêt ri nhũm finat Ijaisja hpimtir kãm kot amnhĩ to rax kumrẽx ã omu nẽ hkukamã ã harẽnh nẽ mã kagà anẽ.

⁴² Hãmri nhũm Ijaew krãhtũm kwỳjaja hkwỳjê rom amnhĩ kaxyw Jejus kôt hamaxpẽr nẽ hkôt amnhĩ xunhwỳ. Tã Parijew nhõ xwỳnhjaja kot ã mẽ kot amnhĩ nhĩpêx anhỹr ã mẽ harẽnh mar pymaj ja mã amnhĩ to amnhĩrĩt kêt nẽ. Mẽ kot Tĩrtũm kapẽr o mẽ ahkre xà mã ixkreja nẽ mẽ kator pymaj nhũm mẽ kãm amnhĩ to amnhĩrĩt kêt nẽ. ⁴³ Na prem hamaxpẽr o:

—Nã kot paj ja mã amnhĩ to amnhĩrĩt nhũm mẽ amnhĩ nẽ ixtomnuj nẽ. Hãmri nẽ amnhĩ pyrã nẽ axpẽn mã inhmex ã ijarẽnh kêt nẽ.

Anhỹr o mẽ umaj amnhĩ kukamã hamaxpẽr o pa. Nom Tĩrtũm tãm kot amnhĩm mẽ mex ã mẽ harẽnhja nhũm mẽ hkukamã hamaxpẽr kêt nẽ.

Jejus kot Hipêxà nhỹ mã kapẽr ã harẽnh

⁴⁴ Nhũm Jejus axte mẽ kãm kapẽr nẽ kỳx pẽ kapẽr nẽ mẽ kãm:

—Nã koja mẽhõ amnhĩ kaxyw ixkôt hamaxpẽr hãmri nẽ ixkôt pix mã hamaxpẽr kêt nẽ. Mããnẽn amnhĩ kaxyw kot mẽ awỳr inhmẽn xwỳnhja kôt hamaxpẽr. ⁴⁵ Wa ixte amnhĩ nhĩpêxja te tipxi pyrãk jakamã koja mẽ tanhmã ixte amnhĩ nhĩpêx to mã ixpumu nẽ te kot Tĩrtũm kot amnhĩ nhĩpêx ã omunh pyrãk.

⁴⁶ —Nẽ te ixpê kanê hpòk nhũm inhĩrã kamã mẽ apa pyrãk kaxyw na pre Inhĩpêxà mẽ awỳr inhmẽ pa mẽ awỳr wrỳ.

Ixte kapēr o mẽ ajahkre ho ri mẽ akôt ixpa kaxyw. Jakamã koja mẽhõ amnhĩ kaxyw ixkôt hamaxpēr nẽ ixkôt amnhĩ xãm hãmri nẽ te kanê hpôk nhĩrã kamã rĩt mex o pa pyrãk o amnhĩ nhĩpêx. Jao amnhĩ nhĩpêx nyw o amnhĩ nhĩpêx o pa. ⁴⁷⁻⁴⁸ No mẽ kot ixkapēr mar nẽ ãm mar xwýnhjaja te mãânẽn Inhĩpêêxã kapēr mar nẽ ãm mar pyrãk. Mýrapê koja mẽ nhýrmã ma kuwy hwýr pa nẽ mẽ kot amnhĩ tomnuj mýrapê kamã pa ho pa. Tã no ã mẽ ate amnhĩ nhĩpêx anhýr o ri mẽ apa kaxyw na pa pre mẽ awýr ixwryk kêt nẽ. Ixte mẽ ate amnhĩ tomnuj pãnhã amnhĩrer par kaxyw na pa pre mẽ awýr wrý.

⁴⁹ —Nẽ na pa hte amnhĩ krã hkôt tanhmã ri mẽ amã ixkapēr to ho ri ixpa hkêt nẽ. ãm kot mẽ awýr inhmẽnh xwýnhja nhý hã na pa hte tanhmã mẽ amã ixkapēr to ho ri mẽ akôt ixpa. ⁵⁰ Tã mẽ kot Tĩrtũm kapēr mar nẽ amnhĩ kaxyw hkôt hamaxpēr xwýnhjaja koja mẽ nhýrmã wa ixri htĩr tũm nẽ mex nẽ pa ho pa. Jakamã na pa hte tanhmã kot inhmã karõ hto xà hkôt pix mã tanhmã mẽ amã ixkapēr to ho ri ixpa. Anẽ.

13

Jejus kot hkwýjê hpar kuhõnh ã harẽn Rukre 22.24-27

¹ Tã nhũm ra Pas ã mẽ ixkĩnhhta ahtêp. Pas ã na hte mẽ ixpê Ijaewjaja axpẽn wýr akuprõ nẽ hã ôwêhti hkra nyw pa nẽ ho anẽ nẽ hkur o ixkrĩ. Amnepêm Tĩrtũm kot pika pê Ejit rũm mẽ inhĩgêxjê kator kaxyw nhũm mẽ nojarêt nẽ ã hkwý hpar nẽ ho anhýr nẽ hkwý hkurta pyrãk. Na prem nojarêt nẽ mẽ hkra my kot wa mẽ kêp htyk pumaj ôwêhti hkra nyw kwý hpa nẽ ho anẽ nẽ ĩ hku. Jakamã nhũm arĩ mẽ ixpê mẽ hkanrêhã mẽ htãmnhwýjaja ã mẽ kot amnhĩ nhĩpêx anhýrja mã ijamaxpēr nẽ hã ixkĩnh kaxyw mẽ urãk nẽ hkwý hpa nẽ kuku. Jakamã nhũm ra Pas ahtêp nhũm Jejus amnhĩ kukamã tanhmã hamaxpēr to kurê kumrêx. Ra ma akupým Hipêêxã hwýr àpir xà hã arĩgro hwýr apkati grêre. Jakamã nhũm akupým nojarêt ã amnhĩ pumu nẽ kãm mẽ pahte hkôt amnhĩ xunhwýr xwýnhjê japê jakamã kãm mẽ pajapê rãhã mẽ panê htyk mã. ² Tã nhũm myt axà

pa mẽ Pas ã ixàpkur o ixkrĩ. Nhũm Simãw Kariot kra Jut Kariotja mãânẽn mẽ ixkutã apkur o nhý. Kêp mẽ ixkwý htã nhũm pre Satanasti tanhmã hkrã hto nhũm ra axtem nẽ kot mẽ kãm Jejus kurê xwýnhjê nhĩhkram haxàr kaxyw.

³⁻⁴ Tã pa mẽ kormã axpẽn kutã ixàpkur kaxyw ixkrĩ hpa nhũm Jejus kãnhmã xa nẽ hinòkà kapa nẽ toajti py nẽ ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pê tanhmã ri mẽ inhnoo mã amnhĩ nhĩpêx to ho pa hkêt. Kêp mẽ inhõ pahi htã te kêp mẽ inhmã àpênh xwýnh pyrãk o amnhĩ nhĩpêx o pa. ⁵ Jakamã toajti py nẽ ho amnhĩ krax pre nẽ pasiiti hõ py nẽ kamã gô hkwý ru nẽ ho mẽ ixpar kuhõ nẽ toajti o mẽ ixpar grã ho mõ. ⁶ ã mẽ inhĩpêx anhýr o mõ. Pê ra hpãnhã Simãw Pêtre hpar kuhõnh kaxyw nhũm tee ri amnhĩ tã omu nẽ kãm:

—Tk. Kwa apê inhmã axàpênh xwýnh kêt kênã kot ka kêt ri axtem nẽ ixpar kuhõ Pahihti. Apê mẽ inhõ Pahi kênã kot ka kêt ã mẽ inhĩpêx anẽ. Anẽ.

⁷ Hãmri nhũm kãm:

—Kwa nà. Kormã ate ja hã amnhĩ tã ixpumunh mex kêt. Nom kot kaj nhýrmã aprĩ hã amnhĩ tã ixpumu. Anẽ.

⁸ Hãmri nhũm kãm:

—Nà nom kot kaj ãm ixpar kuhõnh kêt nẽ. Kwarĩ. Anẽ.

Hãmri nhũm Jejus kãm:

—Tõe. Kot paj apar kuhõnh kêt nẽ ka te apê ixkwý hkêt pyrãk. Anẽ.

⁹ Hãmri nhũm tee ri kuma nẽ kãm:

—Tõe mamrĩ ixpar kuhõ. Nom ixpar pix kuhõnh kêt nẽ. Mãânẽn inhĩhkra kuhõ nẽ ixkuk kuhõ. Inhmã ixte apyrãk prãm tỳx kumrêx kênã. Anẽ.

¹⁰ Hãmri nhũm Jejus kãm:

—Nà amýkry hkôt mẽ wýr xwýnhjaja na htem mex nẽ axte wýr kêt rãhã hikwý. Na htem ãm amnhĩ par pix kuhõ nẽ hikwý. Ja pyrã nẽ Tĩrtũm kot mẽ anê mẽ ate amnhĩ tomnuj ho hapêx par xwýnhjaja te amýkry hwýr mẽ axwýr nẽ amex pyrãk. Ka mẽ te mẽ kot amnhĩ par pix kuhõnhhta pyrã nẽ axte tanhmã amnhĩ tomnuj to hãmri nẽ Tĩrtũm mã amnhĩ jarênh kurê kumrêx kênã amnhĩ katut kôt ate amnhĩ tomnujta mẽ nẽ ho hapêx. Na pre ra mẽ anê mẽ ate

amnhĩ tomnuj o hapêx. No ãm mẽ apiitã hkêt. Ota arĩ mẽ anhĩõja pyxire nẽ arĩ amnhĩ tomnuj rãhã ri pa. Jakamã te wýr kêt nẽ arĩ grã htyk rax kãm ri pa pyræk. Anẽ.

¹¹ Nhũm pre ã Jejus mẽ inhmã kapêr anẽ. Ra kot hprĩ hã mẽ kot kãm hkurê xwýnhjê mã òr mã xwýnhja pumunh jakamã te wýr kêt nẽ arĩ grã htyk rax kãm ri pa pyræk ã ã harênh anẽ.

¹² Tã mẽ ixpar kuhõnh pa nẽ akupým hinòkà py nẽ haxà nẽ nhỹ hãmri nẽ mẽ inhmã:

—E mẽmo kaxyw na pa we ã mẽ apar kuhõnh anẽ? Kot paj ixprĩ hã mẽ amã amnhĩ jarê ka mẽ inhma. ¹³⁻¹⁴ Na ka htem ixto “mẽ ijahkre xwýnh” nẽ ixto “pahihti” anhỹr o ijarênh o ri apa. ãm hãmri na ka htem ã axpên mã ijarênh anẽ. Ixpê mẽ ajahkre xwýnh nẽ mãânên ixpê mẽ anhõ pahihiti htã inhmã mẽ ate tanhmã axpên nhĩpêx to ho apa hprãm xàj na pa ã mẽ apar kuhõnh anẽ. Tã kêr ka mẽ ixpyrà nẽ tanhmã axpên to mex to ho ri apa. ¹⁵ Jao amnhĩ kuxwar axpên to mex pẽ mẽmoj to axpên kutã anojarêt rãhã ho ri apa. ¹⁶ Kwa mẽ ixkapêr ma nẽ kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwýnh pyræk. Nẽ te ixte mẽmoj tã mẽ amã karõ nhũm mẽ ate inhmar nẽ inhmã tanhmã mẽmoj nhĩpêx to pyræk. Tã te ixpê mẽ anhõ patrãw pyræk tã pa ã mẽ apar kuhõnh anẽ. Ka mẽ amnhĩ tã ixpumu hãmri nẽ amnhĩ xwar tanhmã axpên to ajuta hto ho ri apa. No ri axpên pumu nẽ ajamxpêr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhỹr o ajamxpêr o ri apa hkêt nẽ.

¹⁷ —E na pa ã mẽ amã ixujarênh anẽ. Kot kaj mẽ inhma nẽ ixujarênh kôt ã axpên nhĩpêx anhỹr o ri apa. Hã kot kaj mẽ akĩnh nẽ ri apa. Anẽ.

Jejus kot amnhĩ tã hã àmnênh xwýnh o amnhĩrĩt ã harênh

Matêwre 26.20-25; Makre 14.17-21; Rukre 22.21-23

¹⁸ Nhũm Jejus arĩ mẽ inhmã kapêr nẽ mẽ inhmã:

—Kot kaj mẽ apiitã mẽ akĩnh nẽ apa hkêt nẽ. Ixte mẽ arênh xwýnhjaja mẽ apiitã mẽ apumunh mex. Jakamã na pa Tirtũm kot mẽ apiitã mẽ ate amnhĩ tomnuj o hapêx par kêt ã mẽ anhĩõja jarê. Tirtũm kapêr ã kagà htũm kot harênh kot:

Ixkutã apkur o ýr xwýnhjê hõ koja axtem nẽ mẽ kot kãm ixkurê xwýnhjê nhĩhkram ijaxà. Kêp ixkôt pa ho pa xwýnh tã koja axtem nẽ ã inhĩpêx anẽ.

Anhỹr o kot harênh. Tã koja tokyx ã inhĩpêx anẽ. ¹⁹ Nom kormã kot ã inhĩpêx anhỹr kêt ri na pa hkukamã mẽ amã harê. Jakamã koja ã inhĩpêx anẽ ka mẽ ja hã ixpumu nẽ ra ixte amnhĩ kukamã mẽ amã amnhĩ jarênhhta mã ajamxpêr nẽ ixpê Tirtũm rũm mẽ awýr ixwryk xwýnh kôt ajamxpêr tỳx kurê kumrêx.

²⁰ —Kwa mẽ ixkapêr ma nẽ amnhĩ krã kamã kãm ajamxpêr tỳx o ri apa. Koja mẽhõ ixte mẽ hwýr mẽ arênh xwýnhjê hã tanhmã mẽ ato mex to. Hãmri nẽ te pa kot tanhmã ixto mex to pyræk. Nẽ koja mẽhõ tanhmã pa ixto mex to nẽ mãânên te kot mẽ awýr inhmênh xwýnhhta tanhmã ho mex to pyræk. Anẽ.

²¹ Nhũm pre ã Jejus mẽ inhmã kapêr anẽ. Hãmri nẽ tee ri amnhĩ kukamã hamxpêr nẽ hkaprĩ nẽ mẽ inhmã:

—Hêxta waa nẽ. Nà kot kaj mẽ atõ mẽ kot kãm ixkurê xwýnhjê nhĩhkram ijaxà. Kwa mẽ amnhĩ krã kamã ixkapêrja mã ajamxpêr tỳx nẽ. Anẽ.

²² Hãmri pa mẽ amnhĩ tã kuma nẽ tee ri axpên pumunh o ixkrĩ. ²³ Ixpê Juāw na pa pre ixpê Jejus kràmnhwý mex ã ìhkõ hã ixàpkur o inhỹr ²⁴ nhũm Simāw Pêtreja ixpumu nẽ inhmã nomgõr nẽ kawax pẽ inhmã:

—Kwa mẽ pahtõ nhĩxi hã hkukja nà? Anẽ.

²⁵ Hãmri pa kuma nẽ Jejus mã kãm:

—Kwa Pahihti. Mẽ ixtõ koja we ã anhĩpêx anẽ? Anẽ.

²⁶ Hãmri nhũm mẽ inhmã:

—Nà kot paj pãwti hõ py nẽ guhkrax kãm ho mry kagô nhek nẽ kot mẽ ìhkram ijaxàr mã xwýnhhta mã kugõ ka mẽ hkôt omu. Anẽ.

Hãmri nẽ kupy nẽ ho mry kagô nhek nẽ Simāw Kariot kra Jut Kariotja mã kugõ nhũm kupy. ²⁷ Pyrja kôt nhũm Satanasti

tanhmã hkrã hto. Hãmri nhũm Jejus te kot kãm amnhĩ to nojarêt pyrãk o amnhĩ tã kãm kapër nẽ kãm:

—E kwa tokyx nã. Anẽ.

²⁸⁻³⁰ Hãmri nhũm kuma nẽ kato nẽ ma kamãt kô kamã htẽm kurê kumrẽx. Hãmri pa mẽ ixàpkur o ixkrĩ xwýnhjaja Jejus kot ã kãm kapër anhÿrja ã kuma nẽ tee ri hkukamã ijamaxpër. Hãmri nẽ kot ma mẽ hkĩnh ã mẽõ hkwy japrôr kaxyw ma htẽm ã hkamnhĩx. Nhũm mẽ ixkwýjaja axtem Jejus kot mẽ kêp amrakati xwýnhjê mã mẽmoj nhõr ã kãm karõ nhũm ma mẽ hwÿr htẽm ã hkamnhĩx. Kêp mẽ inhmã mẽ ixkãxpore jamãr o pa xwýnh jakamã pa mẽ ã ixtÿx mẽmoj tã hkamnhĩx anẽ.

Jejus akupÿm nojarêt nẽ mẽ kãm mẽmoj tã karõ hã harẽnh

Matêwre 22.39-40; mãânẽn Wam Juãw 3.11-24

³¹⁻³² Hãmri nhũm Jejus mẽ inhmã:

—Nã kot kaj mẽ tokyx mẽmoj pumu nẽ Tĩrtũm mã mex o mex ã harẽ nẽ ijaxwýja inhmã inhmex o inhmex ã ijarẽ. Kot kaj mẽ tokyx mẽmojta pumu kãm ga.

³³ —Te mẽ apê ixkra pyrãk tã kot paj arĩ ri mẽ akôt ixpa grire hãmri nẽ ma akupÿm api. Kot kaj mẽ tee ri jar ijapêr o ri apa nom nhÿri ixpumunh kêt nẽ. Nẽ kormã tokyx ma ixkôt apa hkêt nẽ.

³⁴ —E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpẽn kĩnh o ri apa. Te pa inhmã mẽ ajapê pyrãk o axpẽn nhĩpêx rãhã ho ri apa. ³⁵ Kot kaj mẽ ã amnhĩ nhĩpêx anẽ nhũm mẽ akwýjaja ja hã mẽ apumu nẽ mẽ apê ixkwý hã mẽ apumunh kurê kumrẽx. Anẽ.

Simãw Pêtre kot Jejus ã amnhĩ to hêx kukamã harẽnh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ã kot mẽ ixrer nẽ ma nhÿhÿm mõi ã amnhĩ jarẽnh anẽ hãmri nhũm Simãw Pêtre tee ri kot amnhĩ jarẽnh ma mẽ kãm:

—Kwa Pahihti. Nhÿhÿm kot kaj kêt mõi pa mẽ akôt ixpa hkêt nẽ? Anẽ.

Hãmri nhũm kãm:

—Nã ma inhmõi xãta wÿr kot kaj mẽ kormã ma ixkôt apa hkêt nẽ. Nom kot kaj mẽ nhÿrmã ma ixkôt apa. Anẽ.

³⁷ Hãmri nhũm Simãw Pêtre kãm:

—Kwa mo kot pa mẽ omu nẽ tokyx ma akôt inhmrar kêt nẽ? Inhmã akôt ixtyk puma hkêt kênã. Kwãr mẽ mãmrĩ atã ixpĩ. Inhmã ajapê htÿx kumrẽx kênã. Anẽ.

³⁸ Hãmri nhũm Jejus kãm:

—Xã ãm hãmri na ka ã inhmã amnhĩ jarẽnh anẽ Simãw Pêtre? Xã amã ixkôt atyk puma hkêt? Kwa o kora. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã amnhĩ tã axãprãr o axkrunẽpxi kãm ga. Kwa amnhĩ krã kamã ixkapërja mã ajamaxpër tÿx nẽ. Anẽ.

14

Jejus kot Tĩrtũm nhõ krĩ jarẽnh Eprêw 11.16

¹ Nhũm Jejus arĩ mẽ inhmã kapër nẽ mẽ inhmã:

—Kwa ã ixte mẽ amã amnhĩ jarẽnh anhÿrja ma nẽ tee ri amnhĩ kukamã ajamaxpër nẽ akaprĩ hkêt nẽ. Arĩ amnhĩ kaxyw Tĩrtũm mẽ wa inhmã ajamaxpër tÿx rãhã ho ri apa. ² Inhĩpêxã nhõ krĩ kamã ixkre xohtõ. ãm hãmri na pa ã mẽ amã harẽnh anẽ. Tã kot paj ma akupÿm hwÿr api nẽ mẽ akutêp mã amã mẽ anhõrkwy ho mex. ³ Hãmri nẽ ho mex pa nẽ rĩ man akupÿn mẽ awÿr wrÿ. Hãmri nẽ ma akupÿm amnhĩ kôt mẽ ato ixãpir pa ka mẽ Tĩrtũm mẽ wa ixkôt apa rãhã apa ho apa. Jakamã kwa mẽ ri akaprĩ nẽ apa hkêt nẽ. Anẽ.

Jejus te kêp Tĩrtũm wÿr pry pyrãk Epes 2.18

⁴ —Nẽ ma nhÿhÿm inhmõi xãta ra mẽ ate harẽnh mar mex. Nẽ hwÿr pryja mãânẽn mẽ ate harẽnh mar mex. Anẽ.

⁵ Hãmri nhũm Tomas tee ri kuma nẽ kãm:

—Kwa mẽ ixte nhÿhÿm amõi xãta pumunhre hã kot pa kêt mẽ hwÿr pryja pumu. Anẽ.

⁶ Hãmri nhũm kãm:

—Kwa paa. Te ixpê Inhĩpêxã hwÿr pry pyrãk. Na htem amnhĩ kaxyw inhmã hamaxpër nẽ ixkôt amnhĩ xunhwý hãmri nẽ nhÿrmã ixkukwak ri pix mã ma Inhĩpêxã mẽ wa inhõ krĩ hwÿr api.

Ixkukwak ri pix mā na htem hprī hā Tīrtūm kapēr ma. Nē ixkukwak ri pix mā na htem wa ixri htīr tūm nē pa ho pa. ⁷ Kot kaj mē aprī hā ixpumu nē mǎānēn te aprī hā Inhīpēêxà pumunh pyrāk. Tā ra mē ate tanhmā ixte amnhī nhīpêx to hā ixpumunh mex jakamā mǎānēn te ra mē ate Inhīpēêxà kot amnhī nhīpêx ā omunh mex pyrāk. Anē.

Jejus mē Tīrtūm wa kot amnhī nhīpêx tipxi hā wa harēnh

Juāw 1.1, 10.30; Piripos 2.6; Korosē 2.9

⁸ Nhūm Jejus ā mē inhmā kapēr anē nhūm Firipti kuma nē kām:

—Kwa nom mē inhmā inhno ho Anhīpēêxà pumunh prām. Kot pa mē omu nē ixkīnh tỳx kumrēx. Anē.

⁹ Hāmri nhūm Jejus kām:

—Kwa na pa pre ra mē akôt ri ixpa ryy nē. Ka mē aprī hā ixpumunh mex nē. Kēt ra mē kot ixpumunh mex xwýnhjaja te mē kot mǎānēn Inhīpēêxàja no ho omunh mex pyrāk. ¹⁰ Wa ixte amnhī nhīpêxja ām tipxi. Xà ate kormā amnhī krā hī mā ixkapēr jaxàr tỳx kēt? Inhīpēêxà mē wa ixte amnhī nhīpêxja ām tipxi. Nē kot axpēn pyrāk. Jakamā na pa hte amnhī krā hkôt ri tanhmā amnhī nhīpêx to ho ri ixpa hkēt nē. Ām Inhīpēêxà nhỹ hā na pa hte ri tanhmā mē amā ixkapēr to ho ri ixpa. Nē hihtỳx xà ho tanhmā amnhī nhīpêx to ho ri ixpa. Ka mē ja hā ixpumu nē te ano ho Inhīpēêxà pumunh pyrāk. ¹¹ Kwa mē ixkapēr ma nē hkôt ajamaxpēr tỳx nē. Inhīpēêxà mē wa ixte amnhī nhīpêxja ām tipxi. Nē kot axpēn pyrāk. Rỳ ka mē tee ri ja kukamā ajamaxpēr japēr hāmri nē ixte aa mē ate mēmoj pumunh kēt kwỳ ho anhỹr ā mǎn ixpumu nē ja hā wa ixte amnhī nhīpêx tipxi kôt ajamaxpēr.

¹² —Kwa mē ixkapēr ma nē amnhī krā kamā amnhī krām haxàr tỳx nē. Mē ate amnhī kaxyw ixkôt ajamaxpēr xwýnhjaja kot kaj mē ixte tanhmā amnhī nhīpêx to ho ixpa hā ixpumu nē ixkôt ā amnhī nhīpêx anhỹr o ri apa. Kot paj akupỹm Inhīpēêxà hwỳr api nē kuri ixpa ho ixpa. Ka mē ixwakre kamā ixihỳx xà ho tanhmā mē akwỳjē mā amnhī nhīpêx to ho ri apa.

¹³ —Nē kot kaj mē apē ixkwỳ hā tanhmā mēmoj tā ixwỳr to pa mē ama nē mē amā tanhmā mēmoj nhīpêx to. Mē kot omunh nē Inhīpēêxà mex o mex ā omunh kurē kumrēx kaxyw. ¹⁴ Nà kot kaj mē apē ixkwỳ hā mēmoj tā ixwỳ pa mē ama nē mē amā tanhmā mēmoj to. Anē.

Jejus kot mē pahwỳr Tīrtūm mē wa Karō rēnh ā kot amnhī jarēnh

Juāw 7.37-39, 16.7-17; Atre 2.1-4; mǎānēn Rōmān 5.5; Wam Korīt 12.7-11; Epes 3.16; Wam Juāw 2.27

¹⁵ Nhūm Jejus arī mē inhmā kapēr nē mē inhmā:

—Nà kot kaj mē amā ixkīnh hā kot kaj mē ixkapēr kôt pix mā ri amnhī nhīpêx rāhā ho ri apa.

¹⁶ —Kot paj akupỹm kaxkwa hwỳr api hāmri nē mē ato Inhīpēêxà wỳ nhūm inhma nē mē awỳr kot mē ato ajuta xwýnh maatita rē nhūm man mē awỳr wrỳ nē mē akaxwýnh mā agjê. Hāmri nē mē akôt tanhmā mē ato ajuta hto ho pa rāhā ho pa. ¹⁷ Wa Ixkarō koja mē awỳr kurē nhūm mē amā agjê. Hāmri nē hprī hā mē amā Tīrtūm kapēr o amnhīrit o mē akôt pa ka mē aprī hā mar mex nē. No mē kēp Tīrtūm kra hkēt xwýnhjaja koja hprī hā wa Ixkarō jarēnh mar kēt nē. Mē kot wa ixkôt amnhī xunhwỳr kēt jakamā koja mē hkarō mā gjêx kēt nē. Ām mē ate ixkôt amnhī nhīpêx o apa xwýnhjê pix wỳr koja wrỳ nē mē awỳr agjê nē mē akamā pa ho pa.

¹⁸ —Nē ixte mē arer nē ma inhmōr mā tā kot kaj mē te mē hā awrāre pyrā nē ahte atỳx ri apa pyrāk kēt nē. Kot paj te pa akupỹn mē awỳr ixwryk pyrā nē mē awỳr wa Ixkarō rē nhūm mē akām agjê nē mē akamā pa ho pa.

¹⁹ —Nē koja tokyx mē kot amnhī kaxyw Tīrtūm mā hamaxpēr kēt xwýnhjaja axte ixpumunh kēt nē. No mē papajaja kot puj mē tokyx axte nhỹri axpēn pumu.

—Nē kot paj akupỹm ixtīr hāmri nē ixtīr tūm nē ixpa ho ixpa ka mē ixkukwak ri ajaxwỳja nhỹrmā Tīrtūm mē wa ixri atīr tūm nē apa ho apa.

²⁰ —Tā koja wa Ixkarō mē awỳr wrỳ nē mē akarō mā agjê ka mē aprī hā Tīrtūm mē wa ixte amnhī nhīpêx ā wa ixpumunh mex

kurê kumrêx. Te wa ixte amnhĩ nhĩpêx tipxi pyrâk o ka mẽ hã wa ixpumu. Nê mãânên mẽ papajaja te ra mẽ pahtipxi nê ri mẽ papa pyrâk ka mẽ hã amnhĩ pumunh mex kurê kumrêx.

²¹—Nê mẽ kãm ixkĩnh xwỳnhjaja na htem ixkapêr ma nê hkôt amnhĩ nhĩpêx o pa. Jakamã nhũm Tĩrtũm ixtã mẽ omu nê kãm mẽ hapê htỳx nê. Pa mãânên amnhĩ tã mẽ omu nê inhmã mẽ hapê htỳx nê. Jakamã kot paj mẽ kãm amnhĩ to amnhĩrĩt nhũm te mẽ kot no ho ixpumunh pyrâk. Anê.

Nhũm pre ã Jejus hkôt mẽ ixpa ho mẽ ixpa xwỳnhjê mã amnhĩ jarênh anê.

²² Hãmri nhũm Jutre hõja. Jut Kariot kêt axtem Jutre hõja Jejus axte kot mẽ inhmã pix mã kot amnhĩ to amnhĩrĩt ã harênhja ma nê kãm:

—Kwa aprĩ hã mẽ inhmã mẽmoj jarê mẽ ijahkre xwỳnh. Mon ka mẽ kêp akwỳ hkêt xwỳnhjê mã axte amnhĩ to amnhĩrĩt kêt ã amnhĩ jarê? Nê ãm mẽ papxipix mã amnhĩ to amnhĩrĩt ã amnhĩ jarê? Anê.

²³ Hãmri nhũm kãm:

—Nà mẽ amã ixkĩnh xwỳnhjaja na ka htem ixkapêr ma nê hkôt amnhĩ nhĩpêx. Nhũm Inhĩpêêxà ja hã mẽ apumu nê ixtã kãm mẽ ajapê htỳx nê. Hãmri pa wa mẽ akôt ixpa ho ixpa. Jao mẽ amã amnhĩ to amnhĩrĩt mex o ixpa. ²⁴ Na pa hte amnhĩ krã hkôt ri mẽ kãm ixkapêr o ixpa hkêt nê. ãm Inhĩpêêxà nhỹ hã na pa hte mẽ kãm ixkapêr o ri ixpa. Kot mẽ awỳr inhmênh xwỳnhhta nhỹ hã. Tã nhũm mẽ kãm inhmar prãm kêt jakamã na pa hte wa mẽ kãm mẽ apyrà nê amnhĩ to amnhĩrĩt o ixpa hkêt nê.

²⁵ —E na pa kormã ixte mẽ akôt ri ixpa ri ã mẽ amã amnhĩ jarênh anê. ²⁶ Tã koja Inhĩpêêxà ixpãnhã mẽ awỳr wa Ixkarõ rê. Ixte hã mẽ amã ixàhwỳr xà hkôt. Hãmri nhũm man mẽ awỳr wrỳ nê mẽ akaxwỳnh mã agjê nê mẽ akôt ri tanhmã mẽ ato ajuta hto ho pa. Nê ra ixte ã mẽ amã ixkapêr anhỹrja koja hprĩ hã mẽ amã ho amnhĩrĩt mex nê. Ka mẽ amnhĩ krã kamã kãm ajamaxpêr nê hã ano htỳx nê ho apa. Anê.

Jejus kêp mẽ pajamakêtkati nhõr xwỳnh Rõmãn 5.1; Karatas 5.22; Piripos 4.7; Koro-sõ 3.15

²⁷ Nhũm Jejus arĩ mẽ inhmã kapêr nê mẽ inhmã:

—Nê mẽ kêp ixkwỳ hkêt xwỳnhjaja na htem tee ri amnhĩ kukamã hamaxpêr o ri pa. Jao hkaprĩ nê pa. No pa na pa hte mẽ kurom ijamakêtkati nê ixkĩnh nê ri ixpa ho ixpa. Tã kot paj tanhmã mẽ ato ka mẽ ixpyrà nê ajamakêtkati nê axãmnhĩx akĩnh nê ri apa. Jakamã kwa mẽ ixte amnhĩ jarênh ma nê tee ri amnhĩ kukamã ajamaxpêr o amã ma ho ri apa hkêt nê.

²⁸ —Na pa pre ra mẽ amã ma ixàpir nê nhỹrmã man akupỹn mẽ awỳr ixwrỳk ã mẽ amã amnhĩ jarê. Tã na pa ra ma akupỹm Inhĩpêêxà hwỳr ixàpir mã. Kot amnhĩ to rax o kot ijakrenh. Kot paj akupỹm hwỳr api nê kuri inhmex nê ixpa ho ixpa. Tã ka mẽ amã ixkĩnh hã kot kaj mẽ ma akupỹm hwỳr ixàpir ã ijarênh ma nê inhỹ hã akĩnh nê.

²⁹ —Kormã ma akupỹm ixàpir kêt ri na pa ã mẽ amã amnhĩ kukamã amnhĩ jarênh anê. Kêr pa mẽmo arĩgro hã ma akupỹm api ka mẽ ja hã ixpumu nê ajamaxpêr o: “Nà ãm hãmri na pre mẽ inhmã amnhĩ kukamã akupỹm Hipêêxà hwỳr àpir ã amnhĩ jarê.” Anhỹr o ajamaxpêr. Jao ixkôt ajamaxpêr tỳx rãhã ho ri apa.

³⁰ —Kot paj tokyx axte tanhmã mẽ amã ixkapêr to hkêt nê. Mẽ kêp ixkwỳ hkêt xwỳnhjê nhõ pahшти Satanastija na ra kot tanhmã ixto kaxyw. Nom koja tee ri tanhmã kãm ixto hprãm kaprỳ. Kurom ixihtỳx o ixihtỳx o ixte hakrenh par jakamã koja tanhmã ixto hkêt nê. ³¹ Kwãr kãm tanhmã ixto hprãm xà hkôt tanhmã ixto pa omu. Inhmã Inhĩpêêxà hkôt ixte amnhĩ nhĩpêx prãm jakamã kot paj jahti mã arĩ xa nhũm te tanhmã kot ixto pyrâk o inhĩpêx nom tanhmã ixto hkêt nê. Mẽ ate inhmã Inhĩpêêxà japê htỳx ã ixpumunh kaxyw kot paj ã mẽ anoo mã amnhĩ nhĩpêx anê. Nê mẽ ate ixte kãm tanhmã amnhĩ nhĩpêx to ho ri ixpa rãhã mẽ kot ixpĩr ã ixpumunh kaxyw. E hãmri. Ma pu mẽ mõ nê amnhĩ to Tĩrtũm wỳ. Anê.

Nhũm pre ã Jejus hkôt mẽ ixpa ho mẽ ixpa xwỳnhjê mã kapêr anê. Pa mẽ kuma nê kãnhmã ixkuhê nê inhnojarê nhũm axte mẽ inhmã awjarê.

15

*Jejus te kēp mēmo krô pyrāk
Karatas 2.20; Wam Juāw 2.28*

¹ Nhūm Jejus arī mē inhmā kapēr nē mē inhmā:

—Nà te ixpê mēmo pī pē “uwa” anhÿr xwÿnhhta kahkô maati pyrāk. Nē Inhîpêêxàja te kot uwa hkre nē hamār o pa xwÿnhhta pyrāk. ² Nē mē kot ixkôt amnhî xunhwÿr xwÿnhjaja te mē kot uwa kahkô rûm krô pyrāk. Na hte mē hkwÿjaja htÿx ri kēp ixkwÿ hā amnhî jarēnh ā amnhî to hêx. Jao te kot krôja rā htā ô hkêt pyrāk. Kojā rā htā ô hkêt nē nhūm kot hamār xwÿnhja tee ri omu nē kahkô nē krāhta nē kumē. No koja ô mex nē nhūm omu nē hkînh nē. Hāmri nē rā nē ô rax kaxyw tanhmā ho mex to. Tā na hte Tîrtûm uwa krô jamār xwÿnhhta pyrā nē ā mē ate ixkôt amnhî xunhwÿr xwÿnhjê nhîpêx anē. ³ No mē kajaja na ka prem mē kot ixkwÿ hā amnhî to hêx xwÿnhjê rom ixkapēr mar tÿx nē. Nē amnhî kaxyw inhmā ajamaxpēr nē ixkôt amnhî nhîpêx mex o apa. Jao te mē ate krô rā nē ô rûnh pyrāk o amnhî nhîpêx.

⁴ —Na hte krôja amnhî krā hkôt ô hkêt nē. Ām kahkô pix kukwak ri na hte rā nē ô. Ja pyrā nē kot kaj mē ixkukwak ri pix mā inhmā hprām xà hkôt ri tanhmā amnhî nhîpêx to ho apa. Jakamā kwa kêr ka mē ixkapēr pix măn mar o apa pa mē akôt ixpa ho ixpa. ⁵ Te ixpê kahkô nhūm te mē apê krô pyrāk jakamā kot kaj mē inhmā hprām xà hkôt tanhmā amnhî nhîpêx to ho ri apa nē te krô rā nē ô rûnh pyrāk o amnhî nhîpêx. No kot kaj mē amnhî krā hkôt ri amnhî nhîpêx o ri apa nē te krô grā nē ô hkêt pyrāk o amnhî nhîpêx.

⁶ Na hte uwa krô nhō dōnja nhÿri hā krô grā pumu hāmri nē kahkô nē hakà nē ma o mra nē kuwy kamā kurē nē ho hxêt pa. Ja pyrā nē mē kot htÿx ri ixkôt amnhî xunhwÿr ā amnhî jarēnh xwÿnhjaja koja mē nhÿrmā amnhî xà htÿx kamā hamak rāhā ho pa.

⁷ —Tā no mē kajaja. Kêr ka mē ixkapēr kôt pix mā amnhî nhîpêx rāhā ho ri apa. Te mē pahtipxi nē ri papa pyrāk o amnhî nhîpêx. Hāmri nē māmri amā hprām xà hkôt mēmoj tā Tîrtûm wÿnhūm ama nē amā

mēmoj tā ate hwÿr xàta kôt kugō. ⁸ Kot kaj mē Inhîpêêxà mē wa ixkapēr kôt amnhî nhîpêx o ri apa nhūm mē piitā ja hā mē apumu nē hamaxpēr o: “Hêxta waa nē. Jajaja na htem Tîrtûm kot amnhî nhîpêx o amnhî nhîpêx o pa. Măn Tîrtûmja mex o mex.” Anhÿr o hamaxpēr.

⁹ —Nē na pa hte Inhîpêêxà kām ijapê pyrāk o inhmā mē ajapê nē. Tā kêr ka mē amarī inhmā mē ajapê hā ri ixkôt amnhî nhîpêx mex o apa. ¹⁰ Na pa hte ām Inhîpêêxà kapēr kôt pix mā ri amnhî nhîpêx o ri ixpa. Jakamā na pa hte kām ijapê hā ixkînh nē ri ixpa. Tā kêr ka mē ixpyrā nē ixkapēr kôt pix mā tanhmā amnhî nhîpêx to ho ri apa. Nē ixpyrā nē inhmā mē ajapê hā amnhî pumu nē akînh nē ri apa.

¹¹ —E na pa ā mē amā ixkapēr anē. Mē ate inhmar nē ixpyrā nē axāmnhîx ajamakêtkati nē akînh nē ri apa kaxyw. Tā kêr ka mē ā amnhî nhîpêx anē nē te pa ixte ā amnhî nhîpêx anhÿr pyrāk. Anē.

Jejus kot mē pamā axpēn kînh tÿx ā mē pamā karō

¹² Nhūm Jejus arī mē inhmā kapēr nē mē inhmā:

—E kêr ka mē te inhmā mē ajapê pyrāk o mē amā axpēn japê ho mē amā axpēn kînh o ri apa. Jao axpēn to mex o ri axpēn kôt apa. ¹³ Kojā mēhō kām hkrāmnhwÿ japê htÿx nē nhūm ra mēhō mēmo mÿrapê kot kēp hpîr mā nhūm tee ri hā omu nē nē kām amnhî mē nhūm kupî. Hāmri nhūm mē ja hā omu nē kām hkrāmnhwÿ japê htÿx ā nē htyk ā axpēn mā harē.

¹⁴⁻¹⁵ —E kot paj axte mē apê inhmā mē axapēnh xwÿnh ā mē ajarēnh kêt nē. Na hte mē ô patrāwjaja hprî hā kām mē apēnh xwÿnhjê mā amnhî jarēnh kêt nē. Na htem ām mē apēnh pix ā mē kurē. Nom mē kajaja mē ate ixkapēr mar nē hkôt pix mā amnhî nhîpêx jakamā kot paj hpānhā mē apê ixkrāmnhwÿ hā mē ajarē. Na htem axpēn to hkrāmnhwÿ nē ma nhÿhÿm pa kaxyw nē tanhmā amnhî kukamā hkrāmnhwÿ mā amnhî jarēnh to. Tā mē apê ixkrāmnhwÿ jakamā na pa hte ā amnhî kukamā mē amā amnhî jarēnh anē. Nom ja pix jarēnh kêt nē. Na pa hte määnēnh Inhîpêêxà xō ri mē amā mēmoj piitā ho amnhîrit o mē akôt ixpa.

16 —Ně mẽ kajaja na ka prem ixpê mẽ akràmnhwỳ kaxyw ixãm kêt nẽ. Pa na pa pre amnhĩ kaxyw inhmã mẽ aprãm. Ixkapêr kôt pix mã ri mẽ ate tanhmã amnhĩ nhĩpêx to ho apa kaxyw. Te uwa krô ô rũnh nẽ aa grà hkêêta pyræk. Jakamã kot kaj mẽ mẽmoj tã Inhĩpêêxà wỳ nhũm mẽ ama nẽ mẽ ate mẽmoj tã hwỳr xà hkôt amã kugõ.

17 —E. Kwa kêt ka mẽ amã axpên kĩnh nẽ tanhmã axpên to ajuta hto ho axpên mã mẽmoj kutã anojarêt pix o mãn kêt ri apa. Nà ja na kêt inhmã hprãm. Anẽ.

Mẽ kot Jejus kwỳjê kamã gryk xwỳnhjê jarênh

Matêwre 10.22; mãânẽn Juãw 7.7, 17.14; Wam Juãw 3.13

18 —Ně koja ixkwỳ hkêt xwỳnhjaja kãm mẽ aprãm nõkati. Tã kêt ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. Ixkumrêx na prem kãm ixprãm nõkati. Tã koja mẽ mã ixtã mẽ ato anẽ nẽ kãm mẽ aprãm kêt nẽ. 19 Mẽ apê mẽ hkwỳ ronhỹx mẽ amnhĩ tã mẽ apumu nẽ kãm mẽ ajapê nẽ. Nom apê mẽ hkwỳ hkêt. Ra ixte amnhĩ kaxyw mẽ arênh jakamã na htem tee ixtã mẽ apumu nẽ kãm mẽ akĩnh kêt o kãm mẽ akurê nẽ. 20 Koja mẽ ixtã hpijaàm kêt nẽ nẽ mãânẽn mẽ atã hpijaàm kêt nẽ. Nẽ mẽ anhĩpêx o te mẽ kot pa ixpê mẽ anhõ patrãw nhĩpêx pyræk. Ka mẽ ixpyrà nẽ amnhĩ xà htỳx kãm ajamak o ri apa. Na pa pre ra mẽ amã ja jarẽ. Nom koja mẽ akwỳjaja jajê rom te ra mẽ kot ixkapêr mar nẽ hkôt amnhĩ nhĩpêxta pyrà nẽ mãânẽn mẽ akapêr ma nẽ hkôt amnhĩ nhĩpêx o pa. Kwa kêt ka mẽ ixkapêrja mã mãn ajamaxpêr tỳx rãhã ho ri apa.

21 —Koja mẽ ixtã tanhmã mẽ anhĩpêx to. Mẽ kot Tĩrtũm kapêr kôt amnhĩ nhĩpêx kêt jakamã koja mẽ ã ixtã mẽ anhĩpêx anẽ. Tĩrtũm kot mẽ awỳr inhmênh kôt hamaxpêr kêt nẽ ã mẽ anhĩpêx anẽ. 22 Ixwryk nẽ mẽ kãm Tĩrtũm kapêr jarênh o ri ixpa htã nhũm mẽ inhma nẽ ãm inhma nẽ ixkôt amnhĩ nhĩpêx kêt nẽ. Jakamã koja mẽ kot amnhĩ tomnuj xwỳnh ã amnhĩ to hpimxur kêt nẽ.

23 —Ně koja mẽhõ kêp ixprãm nõkati nẽ mãânẽn te kêp Inhĩpêêxà prãm nõkati pyræk. 24 Na pa pre mẽ piitã mẽ hkôt aa mẽ kot mẽmoj pumunh kêt kwỳ ho anhỹr o ri

mẽ hkôt ixpa nhũm mẽ hã ixpumu. ãm paxipix na pa pre ã amnhĩ nhĩpêx anhỹr o ri mẽ hkôt ixpa nhũm mẽ hã ixpumu. Kêp ãm mẽ kot ja hã ixpumunh kêt ronhỹx prem axpên mã ijarênh o: “Tk. Mẽ pahte mẽhõja nhỹhỹnh mẽ pahwỳr hpôx ã omunhre hã kot puj kêt mẽ ri hã pahpijaàm o ri papa.” Anhỹr o nhỹx prem axpên mã ijarẽ. Tã ra mẽ kot ja hã ixpumunh mex tã axtem nẽ Inhĩpêêxà mẽ wa mẽ kãm wa ixkurê nẽ. Jao mẽ kot amnhĩ tomnuj xwỳnh ã amnhĩ to hpimxur kêt nẽ. 25 No Tĩrtũm kapêr ã kagà htũm kot mẽ hkukamã mẽ harênh nẽ mẽ hã kagà nẽ kot mẽ hã kagà kot:

Mẽmo tanhmã kute mỳrapê na htem kãm ixkurê? Nà ãm amarĩ na htem kãm ixkurê ho pa. Anẽ.

Tã ã ixtã kagà kot anhỹr xà hkôt na htem ã kãm ixkurê anẽ. Jakamã koja mẽ mãânẽn ixtã kãm mẽ akurê nẽ. Nom kêt ka mẽ arĩ mẽ kãm ixkapêr jarênh o ri mẽ hkôt apa nẽ tee ri amnhĩ kukamã ajamaxpêr kêt nẽ.

26 —Ně tokyx ma akupỹm Inhĩpêêxà hwỳr ixàpir mã tã kot paj hwỳr pøj nẽ aa mẽ ato ijamakêtkati hkêt nẽ. Kot paj amnhĩ pãnhã mẽ awỳr wa Ixkarõ rẽ. Mẽ kot kãm: “Mẽ kutã nojarêt xwỳnh maati” anhỹr xwỳnhhta kot paj mẽ awỳr kurê nhũm ixpãnhã mẽ awỳr wrỳ nẽ mẽ amã agjê nẽ hprĩ hã mẽ amã Tĩrtũm mẽ wa ixto amnhĩrĩt o ri mẽ akôt pa. 27 Kot kaj mẽ ama hãmri nẽ ma mẽ piitã mẽ hkôt ri mẽ kãm ixkapêr jarênh o ri apa. Na pa pre ra mẽ kãm Tĩrtũm kapêr jarênh ryy ho mẽ hkôt ri ixpa ka mẽ ixkôt ri inhmar o apa ry nẽ. Jakamã kêt ka mẽ ixwakre kamã arĩ mẽ kãm ixkapêr jarênh o ri mẽ hkôt ri apa. Anẽ.

16

1 Nhũm Jejus arĩ mẽ inhmã kapêr nẽ mẽ inhmã:

—Ně mẽ kot nhỹrmã ixtã tanhmã mẽ anhĩpêx to nhũm mẽ ate tee ri amnhĩ kukamã ajamaxpêr nẽ mẽ umaj ixkaga py-maj na pa hte ã mẽ amã ixprĩ hã mẽmoj jarênh ry anẽ. 2 Kot kaj mẽ kãm ixkapêr jarênh o ri apa nhũm mẽ hkwỳjaja tee ri mẽ ama nhũm ja mẽ kêp omnuj nẽ. Nhũm mẽ Tĩrtũm kapêr o mẽ ahkre xà hã ixkreja rũm amnhĩ nẽ mẽ ajano nẽ mẽ akwỳjê hpar o pa. Hãmri nẽ hamaxpêr o: “E pu mẽ

axte mẽ hkwỳjê pynê nê mẽ kupa. Tĩrtũm kãm ja mex kênã.” Anhỹr o htỳx hamaxpêr o pa. ³ Mẽ kot hprĩ hã Inhĩpêêxà mẽ wa ixkapêr mar mex kêt nê ã htỳx wa inhmã ja mex ã wa ijarênh anê. ⁴ Nom mẽ ate ixkôt amnhĩ xunhwỳrta krax kãm na pa pre ã mẽ amã mẽ harênh anhỹr kêt nê. Arĩ mẽ akôt ixpa kênã. Kot ka mẽ ixkôt apa rãhã amã mẽ uma hkêt nê. Tã pa ra akupỹm inhnojarêr nê ã mẽ amã mẽ harênh anê. Jakamã koja mẽ nhỹrmã ã mẽ anhĩpêx anê ka mẽ amnhĩ tã mẽ omu nê ra ixte mẽ akukamã ã mẽ harênh anhỹrja mã ajamaxpêr kurê kumrêx nê tee ri amnhĩ kukamã ajamaxpêr kêt nê. E kwa ixkapêrja mãn mẽ amnhĩ krã him haxàr tỳx nê ri hã apa. Anê.

Jejus mẽ Tĩrtũm wa hkarõ jarênh

⁵⁻⁶ Nhũm Jejus arĩ mẽ inhmã kapêr nê mẽ inhmã:

—E na pa ra kot mẽ awỳr inhmênh xwỳnhta wỳr ra akupỹm inhnojarêr ka mẽ ixte amnhĩ jarênh ã inhma nê akaprĩ nê. Nê tee ri amnhĩ kukamã ajamaxpêr tã mẽ atõ aprĩ hã ma inhmõr xà ã ixkukjêr kêt nê. Rỳ inhmã: “Kwa mo kaxyw kot kaj kêt mẽ ixre nê ma akupỹm mõi? Xà we ja amã mex?” Anhỹr o mẽ atõ ixkukjêr kêt nê. ⁷ Kêt ma akupỹm ixàpirja mẽ amã mex kumrêx. Kop ãm akupỹm ixàpir kêt ronhỹx mẽ amã mẽmoj kutã nojarêr xwỳnhta ixpãnhã mẽ awỳr wrỳk kêt nê. Tã kot paj ma akupỹm api nê amnhĩ pãnhã mẽ awỳr kurê. Jakamã kwa mẽ ja ma nê tãm ajamaxpêr o ri apa. ⁸ Koja ixpãnhã mẽ awỳr wrỳ hãmri nê mẽ kêp ixkwỳ hkêt xwỳnhjê mã mẽmoj to axkrunêpxi nê ho amnhĩrĩt. Koja mẽ kãm mẽ kot tanhmã amnhĩ tomnuj to xà ho amnhĩrĩt. Nê mããnênh mẽ kãm tanhmã mẽ kot amnhĩ to mex to xà ho amnhĩrĩt. Nê mããnênh Tĩrtũm kot nhỹrmã mẽ kot amnhĩ tomnuj mỳrapê tanhmã mẽ homnuj to xàta nhũm mããnênh mẽ kãm ho amnhĩrĩt. Koja mẽ kãm ja piitã ho amnhĩrĩt.

⁹ —Jakamã koja mẽ ja kukamã tanhmã hamaxpêr to nê hamaxpêr o: “Kwa kot paj xep amnhĩ tomnuj kaga nê amnhĩ kaxyw Tĩrtũm Kra Jejus mã ijamaxpêr nê hkôt amnhĩ xãm kêt nhũm Tĩrtũm nhỹrmã ixte amnhĩ tomnuj mỳrapê tanhmã ixto. ¹⁰ Na

kot paj hkôt amnhĩ xãm hãmri nê ra uràk nê Tĩrtũm kapêr kôt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tĩrtũm amnhĩ wỳr ho api pa mẽ axte jar nhỹri omunh kêt nê. ¹¹ Na xep Tĩrtũm nhỹrmã kot ma kuwy hwỳr mẽ kêp Jejus kwỳ hkêt xwỳnhjê nhõ pahi maatija mẽnh ã ra amnhĩ kukamã hã amnhĩ jarê. Jakamã kwa arĩ ixpê hkwỳ jakamã kot paj tokyx Jejus kôt amnhĩ xãm kêt nhũm hkôt kuwy hwỳr inhmê.” Anhỹr o hamaxpêr. Koja ã wa Ixkarõja mẽ kêp ixkwỳ hkêt xwỳnhjê mã mẽmoj to amnhĩrĩt mex anê.

¹² —Nê na pa kormã mẽ amã mẽmoj piitã ho amnhĩrĩt kêt nê. Kormã mẽ ate aprĩ hã mẽmoj pumunh nê mar mã tãm kêt. ¹³ Tã koja ixpãnhã wa Ixkarõ mẽ awỳr wrỳ nê mẽ akarõ mã agjê hãmri nê hprĩ hã mẽ amã Tĩrtũm kot amnhĩ nhĩpêx o amnhĩrĩt o mẽ akôt pa ho pa. Nom koja amnhĩ krã hkôt tanhmã mẽ amã ho amnhĩrĩt to hkêt nê. Koja ãm Tĩrtũm pix xõ ri mẽ amã ho amnhĩrĩt o mẽ akôt pa. Jao hprĩ hã mẽ amã ixkôt mẽ ate amnhĩ nhĩpêx nyw o mẽ amã amnhĩrĩt o mẽ akôt pa. ã koja hprĩ hã ra ixte mẽ amã ixujarênh xà hkôt axte mẽ amã mẽmoj to amnhĩrĩt mex o pa anê.

¹⁴ —Nê koja hprĩ hã mẽ amã pa ixto amnhĩrĩt o pa. Jao mẽ amã inhmex o inhmex ã ixto amnhĩrĩt o mẽ akôt pa. ¹⁵ Inhĩpêêxà mẽ wa ixkapêrja ãm htipxi. Tã koja wa Ixkarõ ixkapêr xõ ri ã mẽ amã mẽmoj to amnhĩrĩt anê. Jao ra wa ijamê wa ixkapêr o amnhĩrĩt mex o pa. Koja ã wa mẽ apê ixkwỳ hã mẽ ato mex o pa anê. Anê.

Mẽ kot akupỹm Jejus tĩr ã omunh ã mẽ harênh

¹⁶ Nhũm Jejus arĩ mẽ inhmã kapêr nê mẽ inhmã:

—Nê kot paj tokyx mẽ ano pê akunok ka mẽ axte amnhĩ kaêx ã ixpumunh kêt nê. Nom kwa kêr ka mẽ tee ri ixkapêrja kukamã ajamaxpêr kêt nê. Kot paj ixtã apkati grêre ka mẽ axte ixpumu. Anê.

¹⁷⁻¹⁸ Nhũm pre ã Jejus hkôt mẽ ixpa ho mẽ ixpa xwỳnhjê mã kapêr anê. Pa mẽ tee ri ã kapêr anhỹr ã kuma nê axpênh mã:

—Kwa mo na ri ã amnhĩ jarênh anê? Nê tokyx mẽ pano pê pikunor tã hã apkati grêre nhũm axte mẽ pahte omunh ã amnhĩ

jarē nē akupỹm Hipêêxà hwỳr àpir ã amnhĩ jarē. Pēr kapērja ãm ri katii. Anē.

¹⁹ Nhũm amnhĩ tã mẽ inhma nē mẽ inhmã:

—Kwa xà na ka mẽ kormã aprĩ hã ixkapēr ã inhmar kêt nē? ²⁰ Kot paj ty nhũm mẽ kêp ixkwỳ hkêt xwỳnhjaja ijarēnh ma nē hkĩnh nē. No mẽ kajaja kot kaj mẽ akaprĩ nē amỳr o apa. Nē gaa nē akupỹm akĩnh nē. Kwa mẽ ixkapērja ma nē kãm ajamaxpēr tỳx o apa. ²¹ Te mẽ ate mẽ hpijagri xwỳnh kot amnhĩ nhĩpêx pyràk. Na htem õhy xà nē gaa nē ra õhy xà htỳx nē. Nē hkĩnh kêt nē tee ri amnhĩ nhĩpêx o hikwỹ. Tã gaa nē hpijagri nhũm hkrare kato nhũm omu nē akupỹm hkĩnh nē axte õhy xà htỳx mã hamaxpēr kêt nē. ²² Tã ã mẽ ate amnhĩ nhĩpêx anhỳr kaxyw. Kot kaj mẽ akĩnh kêt nē ri apa. Tã kot paj akupỹm tokyx ixtĩr nē axte mẽ awỳr ixkato ka mẽ ixpumu nē akĩnh nē. Hãmri nē akĩnh rãhã ri apa ho apa. Nhũm mēhõ mẽ apumu nē tee ri tanhmã mẽ akĩnh nē mẽ ato kaprỳ ka mẽ arĩ akĩnh rãhã ri apa ho apa.

²³ —Nē ixte akupỹm kaxkwa hwỳr ixàpir nē amnhĩ pãnhã mẽ awỳr wa Ixkarõ rēnh nhũm mẽ awỳr wrỳk nē hprĩ hã mẽ amã mẽmoj piitã ho amnhĩrit jakamã kot kaj mẽ axte amã mẽmoj tã ixkukjēr prãm kêt nē. Anē.

Jejus kwỳjaja kot àmnhĩx mẽmoj tã Tĩrtũm wỳr

Matêwre 18.19-20; Juāw 14.13-14

Nhũm Jesus arĩ mẽ inhma kapēr nē mẽ inhmã:

—E kwa mẽ ã ixkapēr anhỳrja ma nē amnhĩ krã kamã kãm ajamaxpēr tỳx nē ho apa. Kot kaj mẽ apê ixkwỳ hã mẽmoj tã Inhĩpêêxà wỳ nhũm mẽ ama nē mẽ ate hã axàhwỳr xà hkôt mẽ amã mẽmoj tanhmã ho rỳ mẽ amã mẽmoj gõ. ²⁴ Na ka mẽ kormã apê ixkwỳ hã mẽmoj tã axàhwỳr kêt nē. Tã kêr ka mẽ amã mẽmoj tã hwỳr prãm nē mãmri mẽmoj tã hwỳr o apa. Kê mẽ ama hãmri nē tanhmã mẽ amã mẽmoj nhĩpêx to ka mẽ amnhĩ tã omu nē akĩnh nē.

²⁵ —Nē na pa pre mẽ amã mẽmoj jarēnh kaxyw nē mẽmoj tã haxwỳ nē mẽ amã ixujarēnh rax nē. Nom kot paj axte ã mẽ amã ri ixujarēnh anhỳr kêt nē. Kot paj tã ixprĩ hã mẽ amã tanhmã Inhĩpêêxà jarēnh

to ka mẽ aprĩ hã mar mex kurê kumrêx. ²⁶ Hãmri nē mẽ kamjaja mẽ apê ixkwỳ hã tanhmã amnhĩ to hwỳr to ho apa. Jakamã mo kaxyw kot pa kêt axte tanhmã mẽ ato hwỳr to? Kot kaj mẽ kamjaja amnhĩ to hwỳr jakamã arĩ ixte mẽ ato hwỳr kaxyw ixto presija hkêt nē.

²⁷ —Na ka mẽ ra amã ijapê nē. Nē ixte Inhĩpêêxà rũm mẽ awỳr ixwrỳk ã ixpumu. Jakamã nhũm Inhĩpêêxàja ixtã mãânēn kãm mẽ ajapê nē. Tã kot kaj mẽ kamjaja mẽmoj tã amnhĩ to hwỳr o apa nhũm mẽ ama nē kãm mẽ ajapê htỳx kãm mẽ amã mẽmoj gõ.

²⁸ —Na pa pre Inhĩpêêxà rũm amnē mẽ awỳr wrỳ. Hãmri nē kãm hprãm xà hkôt tanhmã amnhĩ nhĩpêx to hpar o mō nē ra akupỹm hwỳr inhnojarêt kaxyw. Anē.

Nhũm pre ã Jesus mẽ inhma amnhĩ jarēnh anē. ²⁹ Pa mẽ tã ixprĩ hã mar mex nē. Hãmri nē kãm:

—Tỳ. Nà na pa mẽ tã ixprĩ hã ate amnhĩ jarēnh ma. Ka amnhĩ tã haxwỳr nē axujarēnh kêt jakamã pa mẽ tã ixprĩ hã amar mex nē. ³⁰ Pēr ãm ate mẽmoj piitã omunh par xwỳnh na ka. Jakamã ate mẽ ijamaxpēr piitã hkôt aprĩ hã mẽ ixpumunh par kumrêx kēnã kot ka tanhmã mẽ ijamaxpēr to hã mẽ ixkukja. ãm hãmri na ka Tĩrtũm rũm awrỳk ã amnhĩ jarē. Anē.

³¹ Hãmri nhũm mẽ inhma nē mẽ inhma:

—Xà ãm hãmri na ka mẽ ixkôt ajamaxpēr tỳx nē? ³² Kwa mẽ o kora. Kot kaj mẽ tokyx mẽ umaj ixre nē anhrã nē ma ahpỳnhã mẽ anhõ krĩ hwỳr mra. Mẽ kot ixkôt tanhmã mẽ anhĩmex to pymaj kot kaj mẽ ã amnhĩ nhĩpêx anē kãm ga. Kot paj ahte mẽ kãm ixãm pyràk o amnhĩ nhĩpêx nom ahte ixãm kêt nē. Inhĩpêêxà aa kot ixrere hã.

³³ —E ixkukwak ri mẽ ajamakêtkati nē axàmnhĩx mẽ apa kaxyw na pa ã mẽ amã ixkapēr anē. Nom mẽ kêp ixkwỳ hkêt xwỳnhjaja koja nhỹrmã ixtã mẽ atomnuy tỳx o pa. Tã kêr ka mẽ amã mẽ uma nē tee ri amnhĩ kukamã ajamaxpēr o ri apa hkêt nē. Nhỹrmã ixte mẽmoj punuj piitã ho ijapêx par ã arĩgrota ã kot paj mẽ atã mẽ ho ijapêx par kumrêx. Anē.

17

*Jejus kot amnhĩ to Tĩrtũm wỳr ă harēnh
Rõmăn 8.34; Eprêw 7.25*

¹ Tă nhũm Jejus mẽ inhmă kapēr pa nē hpānhă kaxkwa hwỳr rīt nē Tĩrtũm mă amnhĩ jarē nē kām:

“Pa Papaj. E na pa ra amă hprām xà hkôt tanhmă amă amnhĩ nhĩpêx to hpar o mō nē akupỹm awỳr inhnojarêt kaxyw. Jakamă kot kaj ixpê Akra hă ma akupỹm amnhĩ wỳr ixto api. Mẽ kot ja hă ixpumunh nē amă amex o amex ă ajarēnh o pa kaxyw. ² Na ra pyka piită hkôt ri mẽ pa xwỳnh kwỳjaja amnhĩ kaxyw ixkôt hamaxpēr nē ixkôt amnhĩ xunhwỳ nom ka na ka pre inhmă mẽ agō. Ixte mẽ htĩr tũm nē mẽ pa mă xwỳnh ă mẽ harēnh kaxyw. Jakamă koja mẽ nhỹrmă ixkukwak ri pakuri htĩr tũm nē pa ho pa. ³ Na mẽ ra ixkapēr mar mex nē. Nē ixpê Jejus Kris pē ate mẽ hwỳr inhmēnh xwỳnhja kôt hamaxpēr mex nē. Nē apê Tĩrtũm ă ăm apyxi mex ă măănēn akôt hamaxpēr mex nē. Nē amex o amex ă akôt hamaxpēr nē kām akĩnh nē. Jakamă koja mẽ nhỹrmă pakuri htĩr tũm nē pa ho pa. Nà koja mẽ anē.

⁴ Amnepêm amnē pyka ja hwỳr inhnojarêt nhũm ate tanhmă ixte amnhĩ nhĩpêx to hă inhmă karōta na pa ra hatur xàm mēnh kaxyw. Na pa xată mẽ kām akapēr jarēnh o ri mẽ hkôt ixpa. Jao ra mẽ kām apê Pahi Maati hă apixi mex ă ajarē nē amex o amex nē axăhpumunh o axăhpumunh ă mẽ kām ajarēnh o ri ixpa. ⁵ Jakamă e Papaj. Kêr ka tokyx ixpê akra hă ma akupỹm amnhĩ wỳr ixto api. Pa akupỹm awỳr pōj nē te amnepêm akuri ixpaja pyră nē axte akuri ixpa ho ixpa.” Anē.

Jejus kot hkwỳjê ho Tĩrtũm wỳr ă harēnh
Nhũm Jejus arĩ Tĩrtũm mă kapēr nē kām:

⁶ “E Papaj. Nà ra ate pyka hkôt inhmă mẽ őr xwỳnhjaja na pa ra mẽ kām akapēr jarēnh ryy ho ri mẽ hkôt ixpa nhũm mẽ akapēr kôt pix mă amnhĩ nhĩpêx o pa. ⁷ Tă ixte anhỹ hă tanhmă amnhĩ nhĩpêx to ho ri ixpaja ra mẽ kot ja hă ixpumunh mex. ⁸ Na pa pre hte axô ri mẽ ahkre ho ri ixpa nhũm mẽ amnhĩ kaxyw ixkôt

hamaxpēr mex nē. Nē ate mẽ hwỳr inhmēnh nhũm mẽ hwỳr ixwrỳkja ă mẽ kot ixpumunh mex.

⁹⁻¹⁰ Tă ot pa mẽ ho awỳr o xa. Nom na pa mẽ kêp ixkwỳ hkêt xwỳnhjê ho awỳr kêt nē. Ăm ate inhmă mẽ őr xwỳnhjê pix o na pa awỳ. Mẽ kêp akra jakamă măănēn mẽ kêp ixkraa. Jakamă na htem pamă pamex o pamex ă pajarēnh o ri pa.

¹¹ Axihtỳx o axihtỳx jakamă na ka pre amnhĩ xwar inhmă axihtỳx xà hkwỳ gō pa te ixte axihtỳx pyrăk. Tă na pa ra akupỹm awỳr inhnojarêt kaxyw. Kot paj jar pyka hkôt ri ixpa ry hkêt nē. Nom ixkwỳjaja koja mẽ arĩ kamă pa jakamă kwa Papaj. Kêr ka inhmă mẽ omunh mex nē kê mẽ inhỹ hă tām ri amnhĩ nhĩpêx o pa. Nē pahpyră nē te ixkre tipxi kamă mẽ htipxi nē mẽ pa pyrăk o xepên kôt pa.

¹² Kormă mẽ kamă ixpata ă ate inhmă axihtỳx xà hkwỳ nhōrta o pa mẽ htănopxar mex o ri mẽ hkôt ixpa. Jakamă nhũm mẽ ri ixkôt amnhĩ nhĩpêx o pa. Ăm Jut Kariot pix koja mẽ hkĩnhă tanhmă amnhĩ tomnuj to nē hapêx. No ăm ra akapēr ă kagă kot hkukamă ă kot amnhĩ nhĩpêx anhỹr ă harēnh xăja kôt koja ă amnhĩ nhĩpêx anē nē hapêx.

¹³ Tă na pa ra akupỹm awỳr inhnojarêt kaxyw jakamă na pa ixte tokyx mẽ rer mă xwỳnhjê ho awỳr o xa. Kormă mẽ hkôt ri ixpa ri. Mẽ kot inhmar nē ixpyră nē hkĩnh nē hamakêtkati nē ri pa kaxyw.

¹⁴ Na pa pre ra mẽ kām akapēr jarēnh ry nē nhũm mẽ ixpyră nē akôt pix mă amnhĩ nhĩpêx o ri pa. Jakamă nhũm hte mẽ kêp ixkwỳ hkêt xwỳnhjaja tee ri ja hă mẽ omu nē axtem nē kām mẽ hkurê nē. Nom mẽ kêp mẽ hkwỳ hkêt jakamă na htem ă mẽ kamă gryk anē.

¹⁵ Tă na pa ă mẽ ho awỳr anhỹr o xa. Nom mẽ kot amnhĩ tomnuj xwỳnhjê hkàx ă mẽ pa kaxyw na pa mẽ ho awỳr kêt nē. Koja mẽ arĩ mẽ hkôt ri pa. Nom mẽ urăk nē amnhĩ tomnuj o pa pumaj na pa ă mẽ ho awỳr anē. ¹⁶ Mẽ kêp mẽ hkwỳ hkêt. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyrăk jakamă kê mẽ amarĩ mẽ hkôt pa htă mẽ

kot amnhĩ nhĩpêx kôt amnhĩ nhĩpêx o pa hkêt nê. ãm pahkôt pix mã amnhĩ nhĩpêx o pa. ¹⁷ Akapêr pix na mex o mex jakamã koja mẽ hkôt amnhĩ nhĩpêx o pa nê gaa nê te pahte amnhĩ nhĩpêx pyrãk o amnhĩ nhĩpêx.

¹⁸ Na ka pre amnê mẽ hwÿr inhmẽ pa pre ixte mẽ kãm akapêr jarênh o ri ixpa kaxyw mẽ hwÿr wrÿ. Nê amnhĩ pyrã nê mẽ kot akapêr jarênh o mẽ hkôt pa kaxyw pa mẽ kurê nê ma mẽ hwÿr mẽ kurê. ¹⁹ Inhmã mẽ hapê jakamã kot paj amnhĩ grônh kôt nhãm mẽ kot axpên mã ri inhgrônh o pa xwÿnhjê mã amnhĩ gô. Amã hprãm xà hkôt. Ixkwÿjaja kot ja hã ixpumunh nê ixpyrà nê amã hprãm xà hkôt pix mã tanhmã amnhĩ nhĩpêx to ho pa kaxyw.” Anê.

Jejus kot hkrajê piitã ho Tirtũm wÿr

²⁰ Nhũm Jejus arĩ Tirtũm mã amnhĩ jarê nê kãm:

“Tã na pa ã jajê ho awÿr anê Papaj. Nom ixkôt mẽ pa ho mẽ pa xwÿnhjê pix o na pa awÿr kêt nê. Mãänên mẽ ô ri nhÿrmã mẽ kot ixkôt amnhĩ xunhwÿr mã xwÿnhjaja na pa mẽ ho ixpimràa tã mẽ ho awÿ. ²¹ Kê mẽ pahpyrà nê te hamaxpêr tipxi pyrã nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Koja mẽ ã amnhĩ nhĩpêx anhÿr o pa nhũm mẽ kêp pahkwÿ hkêt xwÿnhjaja pahtã mẽ omu nê ate mẽ hwÿr inhmênh ã apumunh kurê kumrêx.

²² Nê koja mẽ ixkukwak ri panhÿ hã te pahpyrà nê hamaxpêr tipxi nê ri pa pyrãk o amnhĩ nhĩpêx o pa. ²³ Na pa htem te ixkre tipxi kamã mẽ ixtipxi pyrãk o axpên nhĩpêx o ri ixpa. Te pahte axpên nhĩpêxta pyrãk. Tã koja mẽ ixwakre kamã ã axpên nhĩpêx anhÿr o pa nhũm mẽ kêp pahkwÿ hkêt xwÿnhjaja ja hã mẽ omu nê hamaxpêr o: ‘Nà pêr ãm hãmri na pre Tirtũm tãm mẽ pahwÿr Jejus mẽ. Kãm hapê htÿx tã mẽ pahwÿr kumê nhũm wrÿ nê amnhĩ xwar kãm hkwyjê japê nê.’ Anhÿr o koja axpên mã pajarênh o pa.

²⁴ Amnepêm amrakati ri pa pre amã ijapê hã ri ixpa. Tã ot pa jajê ho awÿ. Ka na ka pre inhmã mẽ agô. Tã ma awÿr inhmôr mã xàta wÿr na pa inhmã mẽ àpir

prãm nê. Koja mẽ nhÿrmã ma pahwÿr api pu mẽ pahpiitã pahpimràatã pamã axpên japê hã ri papa ho papa.

²⁵ E Papaj. Amex o amex tã mẽ kêp ixkwÿ hkêt xwÿnhjaja na kormã ate mẽ hwÿr inhmênh xwÿnh ã ixkôt hamaxpêr kêt nê. Nom mẽ kot ixkôt amnhĩ xunhwÿr xwÿnhjaja na mẽ kurom ja hã ixkôt hamaxpêr mex nê.

²⁶ Na pa ra ixprĩ hã mẽ kãm akapêr o amnhĩrit o ri ixpa. Tã kot paj axte mẽ kãm akapêr kwÿ jarê. Amã ijapêta pyrã nê mẽ kãm axpên kÿnh ã axpên to pa kaxyw na pa mẽ kãm hã karô. Kot paj inhĩ hã mẽ hkôt ixpa hkêt tã koja Pahkarôja mẽ hwÿr wrÿ nê mẽ hkarô mã agjê nê te pa mẽ hkôt ixpa pyrãk o mẽ hipêx. Ja na pa inhmã hprãm. Tã koja anê. Jakamã na pa ã mẽ ho awÿr anê. Tã ãm ja pix Papaj.” Anê.

Nhũm pre ã Jejus ô Papaj mã mẽ inhnoo mã amnhĩ jarênh anê pa mẽ ixpiitã hã kuma.

18

Mẽ kot Jejus pynênh ã mẽ harênh

Matêwre 26.47-56; Makre 14.43-50; Rukre 22.47-53

¹ Tã nhũm Jejus mẽ ixto Hipêêxà hwÿr pa. Hãmri nê ixkreja rũm ma tẽ nê Jerujarê rũm kato nê ma gô pê Kirô hwÿr tẽ pa mẽ hkôt ixpa ho ixpa xwÿnhjaja ma hkôt mra. Nê gô hã rê nê hikjê hã mẽ kot mêmô pĩ hkô hkre xwÿnhja wÿr mra nê parpê ixkrĩ hpa. ² Na pre hte Jejus xatã hwÿr amnhĩ kôt mẽ ixto pa ho kuhê. Jakamã nhũm Jut Kariot kot mẽ kãm ôr mã xwÿnhhta ra kot hwÿr mẽ ixpa ho ixkuhê xàta pumunh mex. ³ Jakamã pa mẽ hwÿr pôj nê ixkrĩ hpa nhũm mẽ mẽ ixwÿr mra. Jut Kariot mẽ pôristijaja. Rôm nhô xwÿnhjê nhô pôristijê mẽ patre nhô pôristijaja nhũm mẽ mẽ ixwÿr Jut Kariot kôt mra. Ijaew nhô pahijê nhÿ hã mẽ ixwÿr mra. Piitã wapohti jamÿ nê pô hpôk nê kanê jamÿ nê mẽ ixwÿr hpôk o kato. ⁴⁻⁵ Hãmri nhũm Jejus amnhĩ wÿr mẽ omu nê kànhmã xa nê ma mẽ kutã tẽ. Jut Kariot kot mẽ kãm ôr kaxyw nhũm amnhĩ tã omunh mex jakamã amnhĩ wÿr mẽ omu nê ma mẽ kutã tẽ. Hãmri nê mẽ hkaxpa nê mẽ omunh o xa nhũm Jut Kariot mẽ kuri xa nhũm Jejus mẽ omu nê mẽ kãm:

—Pa. Měmoj japêr na ka mẽ pô hpòk o ri apa? Aně.

Hāmri nhũm mẽ kām:

—Nà Jejus pè Najare nhõ xwýnh japêr o na pa mẽ ri ixpa. Aně.

Hāmri nhũm mẽ kām:

—Tỳ ot pa xa. Pa na ixpè Jejus. Aně.

⁶ Hāmri nhũm mẽ kuma nẽ tee ri axpẽn pumu nẽ umaj katẽ ho axkamẽ nẽ kuhê. Nom katẽ ho pikamẽnh o ra rôròk pa nẽ hikwỹ. ⁷ Hāmri nẽ kànhmã kuhê hpa nhũm Jejus axte mẽ kām:

—Kwa mẽ inhmã amnhĩ jarẽ. Mẽhõ japêr o na ka mẽ apa? Aně.

Hāmri nhũm mẽ kām:

—Jejus pè Najare nhõ xwýnhhta japêr o na mẽ ri ixpa kênã. Aně.

⁸ Hāmri nhũm mẽ kām:

—Kwa ra ixte mẽ amã amnhĩ jarẽnh kênã. Paa. Ijapêr o na ka mẽ ri apa. Jakamã kwa kêr ka mẽ ixkòt ri mẽ pa xwýnhhtaja tanhmã mẽ ho hkêt nẽ. Kê mẽ māmri anhrà nẽ ma mra.

⁹ Anhỹr o mẽ inhnê mẽ kām kapêr. Na pre ra ham Hipêêxà mã mẽ ixtã kām amnhĩ jarẽ nẽ kām:

—Kormã mẽ kamã ixpa ri ate inhmã ixihtỳx xà nhõrta o na pa mẽ htãnopxar mex o ri mẽ hkòt ixpa.

Anhỹr o mẽ ixtã kām amnhĩ jarẽnh jakamã nhũm ã mẽ inhnê mẽ kot unênh mã xwýnhjê mã kapêr aně.

Simãw Pêtre kot mẽhõ pè hamak krãhyr ã harẽnh

Matêwre 26.51-54; Makre 14.47; Rukre 22.49-51

¹⁰ Hāmri nhũm Simãw Pêtre tee ri Jejus ã mẽ omu hāmri nẽ õ wapo kapa nẽ jam ho apê nẽ ho hamak nhĩkjê krãhta. Mawti jamak krãhta. Mawtija mẽõ patre mã apênh xwýnhjê hõ na pre nhũm Simãw Pêtre hamak krãhta. ¹¹ Hāmri nhũm Jejus ja hã omu nẽ nẽ kām kapêr nẽ kām:

—Tk. Kwa nà amarĩ xa nẽ akupỹm awapota hkàm haxà. Ixte mẽ anê amnhĩ xà htỳx kamã ijamak kaxyw na pa pre Inhĩpêêxà rùm amnẽ mẽ awýr pika hwýr wrý. Kêt inhmã kām hprãm xà hkòt pix mã na inhmã tanhmã amnhĩ nhĩpêx to ho ixpa hprãm. Jakamã kwār mẽ māmri tanhmã

kãm ixto hprãm xà hkòt māmri tanhmã ixto. Aně.

Mẽ kot Anas wýr Jejus o htẽm ã mẽ harẽnh
Matêwre 26.57-58; Makre 14.53-54; Rukre 22.54

¹² Tã nhũm pòristi mẽ mẽ hkrãhtũm nẽ mẽõ patre nhõ pòristijaja Jejus pynê nẽ hpa hpre hpa ¹³ nẽ ma Anas wýr o tẽ. Anasja Kajpas piinhõ na pre. Nhũm Kajpas kormã amgràja ã Anas pyrà nẽ kêp mẽõ patre maati. ¹⁴ Jakamã na pre ra Ijaew nhõ pahijê mã Jejus jarẽnh o:

—Nà kot puj mẽ Jejus pĩr tokyx aně. Kê tapxipix ty pu mẽ arĩ mýrpê pahpiitã paja-makêtkati nẽ ri papa. Aně.

Jakamã nhũm mẽ Jejus pynê nẽ kormã ma patre maati hwýr o tẽ.

Simãw Pêtre kot Jejus kòt pa hkêt ã kot amnhĩ jarẽnh

Matêwre 26.69-75; Makre 14.66-72; Rukre 22.54-62

¹⁵ Hāmri pa ixpè Juāw mẽ ixkràmnhwý Simãw Pêtre mẽ pa wa ma mẽ hkòt wa tẽ. Nhũm mẽ ra mẽ inhõ patre maati nhõrkwỹ hwýr Jejus o axà. Nhũm patre maati kot ixpumunh jakamã nhũm kām àpênh xwýnhja ixpumu nẽ inhmã aně pa mẽ hkòt axà. ¹⁶ Nom nhũm Simãw Pêtre arĩ kapòt ã hakwa krem xa. Hāmri pa omu nẽ akupỹm hwýr tẽ nẽ mẽhõ niti kot hakwa kre jamār o ãm xwýnhja mã aně nhũm kām kahê xà mẽ nhũm mẽ ixkòt axà. ¹⁷ Hāmri nhũm nita hprĩ hã omu nẽ kām:

—Xêê. Pêr apê mẽ kot unênh nẽ o mōr mũj kòt ri mẽ pa xwýnhjê hõ na ka mẽ? Aně.

Hāmri nhũm kuma nẽ kām:

—Tk. Nà ixte mẽhõ myti ata pumunhre hã. Aně.

¹⁸ Hāmri nhũm ra kòt ã kamàt nẽ ra kryy nẽ nhũm mẽ àpênh xwýnh kwý mẽ mẽõ patre nhõ pòristi hkwyjaja amnhĩm kuto nẽ hã ànhunh o kuhê. Nhũm Simãw Pêtre mẽ omu nẽ mẽ hwýr tẽ nẽ mẽ ìhkò hã ànhunh o xa.

Patre maati kot Jejus kujjêr ã harẽnh
Matêwre 26.59-66; Makre 14.55-64; Rukre 22.66-71

¹⁹ Rôm nhũm Anasja hêx rom tanhmã Jejus kujjêr to nẽ kām:

—E kwa inhmã amnhĩ jarẽ. Tanhmã na ka hte we akôt mẽ pa ho mẽ pa xwýnhjê jahkre hto ho apa wehe? Anẽ.

²⁰ Hãmri nhũm amnhĩ tã kãm:

—Nà na pa hte mẽ piitã mẽ noo mã ri mẽ kãm ixkapër o ixpa. Tĩrtũm kapër o mẽ ahkre xà hã ixkre kamã nẽ Tĩrtũm mã amnhĩ jarẽnh xà hã ixkre kamã pa hte mẽ piitã mẽ noo mã ri mẽ kãm tanhmã ixkapër to ho ri ixpa. Na pa hte nhỹri ixpimxur pê ri mẽ kãm tanhmã ixkapër to ho ri ixpa hkêt nẽ. ²¹ Tã ka ixtã mẽ kot inhmar o kuhê xwýnhjaja tanhmã ixtã mẽ hkukjêr to hkêt nẽ. Âm papxipix ri ixkukja. Kwa ixtã mẽ hkukja kê mẽ kot tanhmã ixkapër mar to xà hkôt tanhmã amã ijarẽnh to nà? Anẽ.

²² Hãmri nhũm patre nhõ pòristi hõja kuma nẽ hwýr tẽ nẽ kãm:

—Tk. Kwa na htem ã patre maati mã kapër anhỹr kêt nẽ. Na htem hã hpijaàm o kãm kapër. Tã na ka axtem nẽ ri ã kãm akapër anẽ. Anẽ.

Hãmri nẽ hinep hkura.

²³ Hãmri nhũm Jejus amnhĩ tã omu nẽ kãm:

—Kwa kot pa tanhmã mẽ amã amnhĩ to ixêx to ka mẽ hã inhma nẽ rĩ kormã tanhmã axpên mã ixto akapër to rý hã ixtak. Nom âm hãmri ixte mẽ amã amnhĩ jarẽnh tã ka axtem nẽ ri inhĩnep ixtak. Anẽ.

²⁴ Hãmri nhũm Anas tanhmã mar to hpa hãmri nẽ umre Kajpas wýr kumẽ. Na pre Kajpasja kormã hitom kãm ri tanhmã amnhĩ nhĩpêx to ho nhỹ nhũm Anas mẽ kãm anẽ nhũm mẽ kuma nẽ hwýr Jejus o tẽ nẽ ho axà. Arĩ hpa hpre rãhã hwýr o tẽ nẽ ho axà nhũm xa nẽ kãm amnhĩ jarẽ.

Simãw Pêtre kot axte Jejus kôt pa hkêt ã amnhĩ tã aprãr ã harẽnh

Matêwre 26.71-75; Makre 14.69-72; Rukre 22.58-62

²⁵ Nhũm Simãw Pêtre arĩ mẽ ãhkô hã ànhunh o xa nhũm mēhõja kãm kapër nẽ kãm:

—Kwa pēr apê Jejus kôt ri mẽ pa xwýnhjê hõ na ka. Anẽ.

Hãmri nhũm kuma nẽ kãm:

—Tk. Koký ixte mēhõ nēj pumunhre hã. Anẽ.

²⁶ Hãmri nhũm hpãnhã mēõ patre maati mã àpênh xwýnhja mãânên omu. Simãw Pêtre kot kêt hamak krãhyr xwýnhhta kwý

na pre. Jakamã nhũm hprĩ hã omunh mex kurê kumrêx nẽ kãm:

—Kwa nà ka na ka mũtar pĩ hkôta kamã mẽ ãhkô hã xa pa apumu. Anẽ.

²⁷ Hãmri nhũm tee ri kuma nẽ axte mẽ kãm amnhĩ tã aprãr kãm hihtýx nẽ. Jao ra mẽ kãm amnhĩ tã aprãr o axkrunêpxija mẽ nhũm krãhyre hkàr kurê kumrêx. Ra Jejus kot hkukamã harẽnh xà hkôt kêt hwýr hkêt ã amnhĩ tã aprãr o axkrunêpxi.

Jejus kot Pirat mã amnhĩ jarẽnh

Matêwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hãmri nhũm mẽ ixpê Ijaew hkrãhtũmjaja ra Kajpas rũm Jejus o kato nẽ ma Pirat wýr o tẽ. Piratja na pre te Rõmjê nhõ pahĩ pê Sesti mã mẽ ixpê Ijaew jamãr o pa nhũm mẽ ma hwýr o tẽ. Nhũm ra myt kator grire nhũm mẽ hwýr o tẽ nẽ òrkwý kapem o xa. Pirat kêt Ijaew kêt jakamã nhũm mẽ òrkwý hwýr gjêx kêt nẽ kapôt ã kuhê. Na hte Ijaew kormã Pas ã hkĩnh hãmri nẽ nhãm mẽ kêt Ijaew kêt xwýnhjê nhõrkwý hwýr gjêx kêt nẽ. Koja mẽ hwýr agjê nẽ amnhĩ tomnu nẽ Pas ã apkur kêt nẽ. Jakamã nhũm mẽ Pirat wýr Jejus o tẽ no âm hwýr o àr kêt nẽ. Âm ixkre kapem o xa. ²⁹ Hãmri nhũm Pirat mẽ hwýr kato nẽ omu nẽ hã mẽ hkukja nẽ mẽ kãm:

—Kwa tanhmã na we amnhĩ tomnuj to ka mẽ ixwýr o tẽ? Anẽ.

³⁰ Hãmri nhũm mẽ kãm:

—Nà kot amnhĩ tomnuj o pa xwýnh kênã. Jakamã na pa mẽ awýr o tẽ. Ate tanhmã kot amnhĩ tomnuj to hã harẽnh mar nẽ mýrapê tanhmã ho kaxyw. Anẽ.

³¹ Hãmri nhũm mẽ kuma nẽ mẽ kãm:

—Tk. Kwa mẽ kamjaja ma amnhĩ kôt o tẽ nẽ amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anẽ.

Hãmri nhũm mẽ tee ri kuma nẽ kãm:

—Kwa amnepêm mẽ ixpê Ijaewjaja na pa pre htem kên o mẽ kot amnhĩ tomnuj xwýnhjê tak o mẽ kupa. Tã na ra Rõm nhõ pahĩhtija mẽ pamjaja mẽ ixte mẽ hpar nê mẽ ixkurê. Tapxipix kãm mẽ hpar ã àmnênh prãm. Jakamã kot kaj ý hã mẽ inhmã tanhmã hã axàmnênh to kê mẽ kupĩ. Ra ja kaxyw mẽ kot mẽ ixkaxyw axãm kênã. Anẽ.

³² Rõm nhõ xwýnhjaja na htem mẽ kot amnhĩ tomnuj xwýnhjê hpar kaxyw nê pĩ kahpa hã mẽ hanhõ nê mẽ kupa. Nhũm Jejus amnhĩ kukamã tanhmã mẽ kot hpĩr to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harê. Jakamã nhũm pre ã Ijaew Pirat kot mẽ kãm hpĩr prãm xà ã kãm kapêr kãm xihtỳx anê.

³³ Hãmri nhũm mẽ kuma nê akupỹm òrkwỹ hwỳr axà nê amnhĩ wỳr Jejus ã karõ nhũm hwỳr axà nhũm kãm:

—E kwa inhmã amnhĩ jarê. Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anê.

³⁴⁻³⁶ Hãmri nhũm kãm:

—Tỳ ãm hãmri na ka ã ijarênh anê. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anê? Xà na pre mẽhõ ixte mẽ anhõ pahi Sesti kutã ixãm ã amã ijarê ka ama nê tee ri ixkukamã ajamaxpêr? Nà xà ãm hãmri amã Tĩrtũm kot Ijaew wỳr inhmênh ã ixpumunh prãm? Mo kaxyw na ka ã ixkukjêr anê? Anê.

Hãmri nhũm tee ri kuma nê kãm:

—Tk. Mo kot pa kêt ri axtem nê Tĩrtũm kot Ijaew wỳr amênh ã akukja? Mẽ apyrã nê ixpê Ijaew kêt kênã. Mẽ kot ixwỳr ato htêm xwýnhjaja na mẽ ã ate amnhĩ jarênh anhỳr ã ajarênh anê. Nà mẽ akwỳjê mẽ mẽ anhõ patre krãhtũmjaja na mẽ ã inhmã ajarênh anê. Jakamã e aprĩ hã inhmã amnhĩ jarê. Tanhmã na ka we amnhĩ tomnuj to nhũm mẽ ixwỳr ato tễ? Anê.

Hãmri nhũm kuma nê kê axte kãm:

—Nà ixpê pyka ja kamã mẽ õ pahi hkêt. Kop ãm ixpê pyka ja kôt mẽ õ pahi ronhỹx ra ixkôt ri mẽ pa xwýnhjaja tanhmã ixtã mẽ ato. Nom jar ixpê mẽ õ pahi hkêt. ãm axtem ixpê mẽ õ pahi na pa. ãm hãmri na pa ã amã amnhĩ jarênh anê. Anê.

³⁷ Nhũm ã kãm amnhĩ jarênh anê hãmri nhũm tee ri kuma nê kãm:

—Xà apê mẽ õ pahi hõ na ka? Anê.

Hãmri nhũm kãm:

—Tỳ. Nà ãm hãmri na ka ã ijarênh anê. Na pa pre amnê pikaja wỳr wrỳ nê jar mẽ akamã ixkato nê mẽ akamã ixãptãr. Ixte tanhmã mẽ kãm ixkapêr to ho ri ixpa kaxyw na pa pre wrỳ nê mẽ akamã ixpa nê ãm hãmri mẽ kãm ixkapêr o ri ixpa. Na

pa hte tãm ixkapêr o ri ixpa. Tã mẽ kot ixkapêr mar nê ixkôt ri amnhĩ nhĩpêx o mẽ pa xwýnhjaja na htem ixpê mẽ õ pahihti hã ijarênh o pa. Anê.

³⁸ Hãmri nhũm Pirat kot tãm kãm kapêr ã amnhĩ jarênhja ã kuma nê kãm:

—Tk. Aa ixte pika ja kamã mẽhõ pumunh nhũm tãm kapêr o pare hã. Anê.

Hãmri nê kapêr ã kuma nê tee ri hkukamã hamaxpêr. Hãmri nê akupỹm Ijaew wỳr ho kato nê mẽ kutã o xa nê mẽ kãm:

—Kwa tanhmã kot amnhĩ tomnuj tore hã.

³⁹ E mẽ inhma. Na pa hte amgrã mẽ arĩgro pê Pas kãm mẽ amã mẽ hagiênh xà rũm mẽ akwỳjê ho hpỹnh nê mẽ hapôj nhũm mẽ hamakêtkati nê amnhĩx ri pa. Ka mẽ ja hã omu nê Pas ã akĩnh nê. Jakamã e. Pa mẽ amã mẽ anhõ “pahihti” jarênhja mã inhũre. E na pa ra kãm inhũre. Anê.

⁴⁰ Hãmri nhũm mẽ tee ri ã kapêr anhỳr ã kuma nhũm ja mẽ kêp omnuy tỳx nê. Nhũm mẽ hã kàx pê gryk kamã kãm kapêr kãm hihtỳx nê kãm:

—Tk. Kwa nà kãm anhũrer kêt nê. Kêt Parapas mã mãn anhũre. Anê.

Parapasja na pre hte tanhmã amnhĩ tomnuj tỳx to ho ri pa nhũm prem mỳrapê unê nê haxà. Tã nhũm mẽ axtem nê Pirat kot kãm urer prãm xà Jejus kaga.

19

Mẽ kot Jejus tak ã mẽ harênh

Matêwre 27.27-31; Makre 15.16-21; Rukre 23.20-25

¹ Tã nhũm Pirat akupỹm òrkwỹ hwỳr Jejus o axà nê õ pòristijê mã hã amỹnê nhũm mẽ hwỳr mra nê htak o kuhê. ² Hãmri nê kêp pahi hã hpêr o pikênh kaxyw kãm pahi hã mẽ ahkà nhĩpêx nê hkrãm haxà. Nom axtem mẽmo mrônhi te kot ronh kanêre pyrãk xwýnhja nhũm mẽ hikãx nê hkrãm haxà. Nê kêp pahi hã mẽ ê kamrêk py nê kãm haxà. ³ Hãmri nê xatã hwỳr mra nê hinep htak nê hã hpêr o pikênh o xa nê kãm:

—E apê Ijaew nhõ pahi punuti na ka. Anê.

⁴ Hãmri nhũm Piratja akupỹm Ijaew wỳr kato nê mẽ kãm:

—E koja inhõ pòristi akupỹm mẽ awỳr ho kato ka mẽ omu. Na pa tee ri kot tanhmã

amnhĩ tomnuj to hã hkukja. Për tanhmã kot amnhĩ tomnuj to hkêt kênã. Anê.

⁵ Hãmri nhũm Jejus kato nê arĩ pahi hã àhkà tu nê ê kamrêkjaxà nê o xa nhũm Pirat mẽ kãm:

—E kwa mẽ omu nê kamã axukaprĩ hkêt wehe. Anê.

⁶ Hãmri nhũm patre krãhtũmjê mẽ mẽõ pôristijaja tee ri ja hã kuma nhũm ja mẽ kêp omnuj nê. Hãmri nê hã kãm kapër kãm hihtỳx nê kãm:

—Tk. Kwa nà pĩ kahpa hã mãn anhô. Kê pĩ kahpa hã mãn ajêt nê ty. Anê.

Hãmri nhũm tee ri hã mẽ kuma nê mẽ kãm:

—Nà mẽ kam nê ma amnhĩm o tẽ nê mẽ kam amnhĩm ho anê. No pa kot paj ho anhỹr kêt nê. Mo mỳrapê kot pa kêt hã amỹnê nhũm mẽ kupĩ? Nà kwarĩ kot pa ho anhỹr kêt nê. Anê.

⁷ Hãmri nhũm mẽ tee ri kuma nê kãm:

—Kwa kêp Tĩrtũm Kra hã amnhĩ jarênh kênã. Mẽ inhĩgêtjaja na prem ã mẽ ixte amnhĩ jarênh anhỹrja nê mẽ inhmã kapër pa htem ã amnhĩ jarênh anhỹr kêt nê. Koja mẽhõ ã ri amnhĩ jarênh anê nhũm mẽ ja mỳrapê kupĩ. Anê.

⁸ Hãmri nhũm Pirat tee ri Jejus kêp Tĩrtũm Kra hã amnhĩ jarênhja ma nê kãm uma nê kãm tanhmã ho hprãm kêt nê. ⁹ Hãmri nê akupỹm òrkwy hwỳr ho axà nê axte hkukja nê kãm:

—Kwa aprĩ hã inhmã amnhĩ jarê. Nhỹhỹnh na ka pre mẽ ixwỳr mō? Anê.

Nom nhũm axte tanhmã kãm nê hkêt nê. ãm arĩ akryk mar o xa. ¹⁰ Nhũm tee ri omu hãmri nê kãm:

—Kwa xà ate ixpumunh kêt? Inhỹ hã na htem mẽ kupa nê inhỹ hã akupỹm mẽ hapôj. Tã ka pẽr aprĩ hã inhmã tanhmã amnhĩ jarênh to hkêt nê ri akryk akuhê. Anê.

¹¹ Hãmri nhũm Jejus kãm:

—Nom Tĩrtũm nhỹ hã pix mã na ka hte ã amnhĩ nhĩpêx anê. Kêp ãm Tĩrtũm kãm ja prãm kêt ronhỹx ka tee ri tanhmã amã ixto hprãm hkapyrỹ. Tãm kot mẽ ixkaxyw axãm kênã. Tã mẽ kot awỳr inhmẽnh nê ri ixtyk ã ijarênh xwỳnh pẽ Ijaew nhõ pahijaja. Ra mẽ kot ixkaga jakamã na mẽ ã amã ijarênh anê. Jakamã mẽ kot amnhĩ tomnuj tỳx o ajakrenh. Anê.

¹² Hãmri nhũm Piratja tee ri ã kapër anhỹr ã kuma nê kot kãm urer prãm nê. Hãmri nê akupỹm Ijaew wỳr kato nê hã mẽ kãm kapër nhũm mẽ tee ri kot kãm urer kaxyw ã amnhĩ jarênhja ma nê kãm ja prãm kêt kumrêx. Jakamã kaxpê nê kãm kapër nê kãm:

—Kwa nà ra kêp mẽ inhõ pahi hã kot amnhĩ to hêx kênã. Kot mẽhõ ã ri amnhĩ jarênh anê nhũm Rõm kamã mẽ panhõ pahi Sestija ja hã harênh ma nê kamã gryk tỳx nê. Tã kot kaj kãm anhũre nhũm ajarênh ma nê akamã gryk nê. Anê.

¹³ Hãmri nhũm tee ri mẽ kuma hãmri nê ma pahi kot tanhmã mẽ harênh to xà hã kên pota wỳr ma tẽ nê hã nhỹ. Mẽ ixpê Ijaew kapër kãm mẽ ixte kãm: “Kapata” jarênh xwỳnhta wỳr kot tanhmã Jejus jarênh to kaxyw ma hwỳr tẽ nê hã nhỹ nhũm mẽ hwỳr o tẽ.

¹⁴ Hãmri nhũm ra arĩgro pẽ sêsta. Mẽ ixpê Ijaewjaja mẽ ixte Pas ã amnhĩ tomnuj mỳrapê mry hkwỳ hpar nê Tĩrtũm kôt pix mã amnhĩ nhĩpêx ã amnhĩ jarênh xà hã arĩgroja kato. Jakamã nhũm kaxkwa nhĩpôk ri myt nhỹ nhũm Piratja mẽ kot Jejus kator ã harênh prãm xàj arĩ mẽ kãm ho mẽ õ pahi hã harê nê mẽ kãm:

—E ota mẽ anhõ Pahihtita. Anê.

¹⁵ Hãmri nhũm mẽ tee ri ã harênh anhỹrja ã kuma nê kãm:

—Kwa apĩ ri. Ma o tẽ nê pĩ kahpa hã anhô kê tokyx ty.

Anê nhũm tee ri mẽ kuma nê mẽ kãm:

—Kwa nà. Kêp mẽ anhõ pahi kênã kot paj kêt ri axtem nê mẽ apê kupĩ. Anê.

Hãmri nhũm mẽ kãm:

—Nà kêp mẽ inhõ pahi hkêt. Pahi Sesti pix na kêp mẽ inhõ pahi. Anê.

Mẽ kãm Sesti hkĩnh kêt tã ã kãm Jejus htyk prãm xàj ri harênh anê. ¹⁶ Hãmri nhũm Pirat tee ri ja hã mẽ kuma nê tã Jejus ã pôristi mã karõ nê mẽ kãm:

—E mẽ mãmri ma o tẽ nê pĩ kahpa hã anhõ kê ty. Anê.

Hãmri nhũm mẽ kuma nê ma o tẽ.

Mẽ kot pĩ kahpa hã Jejus nhõr ã mẽ harênh

Matêwre 27.32-44; Makre 15.21-32; Rukre 23.26-43

¹⁷ Hãmri nhũm pôristija Jejus mã õ pĩ kahpa gõ nhũm kutu nê ma mẽ hkôt hkjênh

o mō. Nhūm mẽ krī rŭm ho kato nē ma hixēt prêk wŷr o tē. Hixēt prêkja mẽ kot harēnh o: “Korkot” anē. No mẽ ixpê Ijaewjê kapêr kām na pa pre htem harēnh o “Mẽ hkrā hi xà” anhŷr xwŷnh ta wŷr nhūm mẽ ma o tē nē hā ho api. ¹⁸ Hāmri nē pikap pī kahpa xi nē hā Jejus xi nhūm hā nō nhūm mẽ prek o ĩhkra ho htŷx nē hpar o htŷx. Hāmri nē kaxyw hkakwŷ nē hkakwŷnh pa nē kamā pī kahpata xām nē hity hpa nhūm Jejus kŷx pē ajêt. Hāmri nhūm mẽ määnēn wa ho hamēxkrut nē pī kahpa hā wa kunhō nhūm wa kuri ajêt. Wa kot tanhmā amnhī tomnuj to xwŷnhja wa ho akutā Jejus nhjê nhūm wa urāk nē kŷxpê ajêt.

¹⁹ Hāmri nhūm Piratja ò pōristi mã anē nhūm mẽ tap ò py nē hā tanhmā kagà hto nē kagà ho:

IJA EW NHŌ PAHI JEJUS NA JA
KÊP NAJARE NHŌ XWŷNH

²⁰ Nom mẽ ixpê Ijaew kapêr pix kām hā kagà hkêt nē. Määnēn Gresjê kapêr kām nē Raxijê kapêr kām nhūm mẽ määnēn hā kagà nē Jejus mŷri kunhō. Hāmri nhūm Ijaew kwŷjaja Jerujarē rŭm hwŷr mra nē mẽ kot ã hā kagà nhjêpêx anhŷrta pumu nē kamā harē. Jerujarēja hixēt prêta wŷr jawŷ jakamā nhūm mẽ kurŭm ohtô nē hwŷr mra nē omunh o kuhê. ²¹ Hāmri nhūm patre hkrāhtŭmjaja tee ri ã Jejus jarēnh anhŷr ã kagàta pumu nhūm ja mẽ kêp omnuj nē. Jakamā nhūm mẽ ma Pirat wŷr mra nē kām:

—Kwa mon ka ri hā mẽ kām anē nhūm mẽ axtem nē ã ri kagà nhjêpêx anē? Kwa nà kêp mẽ inhō pahi hkêt. Ām htŷx ri kot ã kot amnhī jarēnh anhŷr o pa kēnā. Kwa hā kagàja o anhjpa nē hpānhā hā kagà ho: “Kêp Ijaew nhō pahi hā kot amnhī to hêx xwŷnh.” Anhŷr o hpānhā hā hipêx nē anhō nà? Anē.

²² Hāmri nhūm mẽ kuma nē mẽ kām:

—Tk. Nà pa ho ixpinhpanh kêt nē. Ra ixte hā kagà hpar kēnā. Anē.

Pōristijaja kot axpēn mã Jejus xê ho pi-grành

Matêwre 27.35-36, 27.55-56; Makre 15.24; Rukre 23.34

²³ Hāmri nhūm pōristijaja kot axpēn mã Jejus xê o pigrành kaxyw amnhī tã haxwŷr o tē. Mẽ kêp 4 no nhūm Jejus xê kêp 5

jakamā nhūm mẽ amnhī kôt ho 4 nē haxwŷr nhūm pyxi nē hprā. ê rytita. Na pre hipêx muxre. Nhŷhŷnh hkayr xà pumunh kêt kumrêx. ²⁴ Jakamā nhūm mẽ omu nē kām hkŷnh nē. Hāmri nhūm hō kot amnhim hpyr nē ho arĭk kaxyw nhūm mẽ hā kēnre ho jōka. Na pre ra Tirtŭm kapêr ã kagà htŭm kot mẽ hkukamā ja hā mẽ harēnh nē mẽ harēnh kot:

Na prem axpēn mã ixê o anhgrà nē hā kēnre ho jōka ho hkrī.

Anhŷr o kot mẽ hkukamā mẽ harēnh. Tã nhūm mẽ ra hkôt ã amnhī nhjêpêx anhŷr o hkrī.

Jejus kot Juāw nhjêkram katorxà jaxàr ã harēnh

²⁵ Nhūm Jejus par pē katorxà xa. Nē htōx nē Kropti hprō Marir nē Marir Matarēn mẽ nhūm mẽ Jejus katorxà nhjêkô hā Jejus pumunh o kuhê. Nhūm amnhī tã mẽ omu ²⁶ nē mẽ kuri pa ixpê Juāw pumu. Hāmri nē kêp ixkrāmnhwŷ mex ã ixtā katorxà mã kapêr nē kām:

—E ota Juāwta. Koja ixpānhā te kêp akra pyrāk o anhjêpêx nē tanhmā ato ajuta hto ho pa. Anē.

²⁷ Hāmri nē hpānhā pa inhmā kapêr nē inhmā:

—E Juāw. Kêr ka te kêp akatorxà pyrāk o inhmā hipêx mex o ri apa.

Anhŷr jakamā pa kuma nē kot inhmā hā karō xà hkôt inhōrkwŷ hwŷr haxà nē amnhī kôt ri ho ixpa.

Jejus htyk ã harēnh
Matêwre 27.45-56; Makre 15.33-41; Rukre 23.44-49

²⁸ Tã nhūm Jejus ra amnhī pumu hāmri nē hamaxpêr o:

—Nà Inhjêpêxà kot mẽmoj tã inhmā karōta na pa ra kām ho anhŷr o hitep xà xir kaxyw. Anē.

Hāmri nē kām kôr ã amnhī jarē. Nom ra hkukamā Tirtŭm kapêr ã kagà htŭm kot htyk kaxyw nē kām kôr kukamā harēnh jakamā nhūm ã amnhī jarēnh anē nē kapêr o:

Nà na pa ra inhmā kôr nē. Anē.

²⁹ Nhūm hpar pē guhkrax kām wĭhti punureta ãm jakamā nhūm mẽ ã kot amnhī jarēnh anhŷrja ma nē kaxyw mẽmo rerek py nē o tē nē kaxyw pī ryti hō py nē ho

hkanhwỳ. Nē akupÿn o tē nē ho wĩhti mā haxà nē kām kupē. ³⁰ Nhũm hkaô nē hkaôr pa hāmri nē kapēr o:

E nà hāmri na pa ra mē piitā mē kot amnhĩ tomnuj pānhā amnhĩrer pa. Jao ra Inhĩpêxà kām hprām xà hkôt kām tanhmā amnhĩ nhĩpêx to jatur xàm kumē.

Anhÿr o amnhĩ jarēnhja kôt ahpar mā hkrā nē ty.

Mē kot kô xwa ho Jejus kamnhwỳr ã harēnh

Wam Juāw 5.6-8

³¹ Nhũm ra sēsta nhũm apkati nhũm mē inhō arīgromnu pē sap kaxyw. Sapja ã na hte mē ixpê Ijaew mē ixkĩnh pē Pas ã ixkĩnh rũnh o ixpa. Nhũm mē kām sap ã arĩ mē htyk nē mē harir xwỳnhjê pumunh prām kêt jakamā nhũm Ijaew krāhtũmjaja ma Pirat wỳr mra nē kām:

—Kwa pôristi mā anē kê mē tokyx mē hte hi kukē kê mē htyk tokyx anē. Kê mē tokyx mē o wrỳ nē ma mē o mra nē mē hagjê. Kormā sap kêt ri. Anē.

³² Hāmri nhũm mē kuma nē ò pôristijê mā anē nhũm mē ma mē hwỳr mra nē akutā wa kot Jejus nhĩjê nē jêt xwỳnhhta wa kumrêx wa hte hi hkwỳr. ³³ Hāmri nē hpānhā Jejus wỳr tē nē omu nhũm ra htyk mex nē ajêt nhũm mē ja hā omu nē kêp hte hi hkwỳnh kêt nē. ³⁴ Nhũm pôristi hōja kô xwa py nē ho ihkjê rũm hkanhwỳ nhũm hkamrô mē ĩ kagô ahkà nē hprôt nhũm mē hkwỳja omunh o kuhê. ³⁵ Nē ixpê Juāw na pa pre ijaxwỳja mē ĩhkô hā xa nē ja hā omunh jakamā pa ã mē amā hā kagà anē. Ām hāmri na pa mē amā harē nē hā kagà. Mē ate kamā harēnh nē harēnh mar nē hkôt ajamaxpēr kaxyw. ³⁶ Na pre ra Tĩrtũm kapēr ã kagà htũm kamā ra hkukamā tanhmā kot mē pahwỳr mēnh xwỳnhhta jarēnh to nē hā kagà. Nē hā kagà kot:

Koja mē nhỹhỹnh hi hkwỳnh kêt nē. Anē. Tã nhũm mē ra hā kagàja kôt ã hipêx anē nē kêp hi hkwỳnh kêt nē. ³⁷ Nē Tĩrtũm kapēr ã kagà htũmja määnēn ja hā harēnh kot:

Mē kot hpĩr nē hkanhwỳr xwỳnhja koja mē hpar pē omunh o kuhê. Anē.

Tĩrtũm kapēr ã kagà htũm kamā ã Jejus tyk kukamā harēnh kot anhÿr.

Mē kot Jejus jaxàr ã mē harēnh

Matêwre 27.57-61; Makre 15.42-47; Rukre 23.50-56

³⁸ Tã nhũm Juje pē Arimatej nhō xwỳnhja Jejus ra htyk ã omu nē ma Pirat wỳr tē nē hā kām kapēr. Kot ma o mōr nē tokyx haxàr kaxyw. Na pre ra Jejus kôt amnhĩ xām nom Ijaew krāhtũmjê pymaj mē kām amnhĩ to amnhĩrīt kêt nē. Jakamā nhũm ma Pirat wỳr tē nē hā kām kapēr nē kām:

—Pa e ot pa awỳr tē. Ixte mēmoj tã amā ixkapēr kaxyw. Kot kaj apu inhmā “ỳ” anhÿr japēr. Kwa xà kot pa ma Jejus o mō nē haxà? Anē.

Hāmri nhũm kuma nē kām: “Nà māmri ho anē.” Anē hāmri nhũm ma hwỳr tē nē ho wrỳ nē kumỳ nē ma haxàr mā o mō.

³⁹ Nhũm Nĩkotêja ma hkôt tē. Amnepê mā kot kamāt kām Jejus wỳr htēm nē wa axpēn mā kapēr o ỳr xwỳnhhta. Jakamā ma Juje hkôt tē. Nē amnhĩ kôt mē hkuxwa xà hkwỳ ho mō. Ām ho mōr rax kumrêx. Ho 34 kir nē kutu nē o mō. Mē hkuxwa xàja na pre mē kot mēmo kuxwa xà mā “mĩra” nē “aroe” anhÿr jarēnhja nhũm kaxyw hkwỳ jakà nē ho ahkà nē ho mē hkuxwa xà nhĩpêx. Hāmri nē kutu nē ma Juje kot Jejus jaxàr nhũm kot ho hkuxwa kaxyw hkôt o mō. ⁴⁰ Hāmri nhũm wa ho kupêxê kukōnh pa nē ho Jejus kupu. Mē ixpê Ijaew mē ixte mē htykjê jagjēnh kaxyw ã mē hipêx anhÿr xà hkôt nhũm wa ã hipêx anē nē haxà. ⁴¹ Nhũm ra mē kot pĩ kahpa hā nhôr xà tã mē kot mēmo pĩ ho pa nē hkre xwỳnh kwỳ kuhê. Nē kamā kēn kre nyw. Kormā mē kot kamā mē htykjê hō jaxàr kêt xwỳnhhta. ⁴² Jakamā nhũm wa omu nē axpēn mā:

—E kwa pu hwỳr Jejus o tē nē kamā mǎn tokyx haxà. Kêr pu kormā sap kêt ri ra tanhmā amnhĩ to hpa. Anē.

Hāmri nē hwỳr kumỳ nē o tē nē kamā haxà nē hā hitom pa hāmri nē ma akupÿm krĩm wa tē.

20

Jejus akupÿm htĩr ã harēnh

Matêwre 28.1-10; Makre 16.1-8; Rukre 24.1-12

1 Tã nhũm sap tẽ nẽ hapêx nẽ hpãnhã semãn nyw krax xà pẽ tòmĩk. Hãmri nhũm Marir Matarẽn kwýhtã kànhmã nhỹ. Kormã myt kator kêt ri kànhmã nhỹ nẽ ma kẽn kreta wýr tẽ. Nẽ hwýr pøj nẽ tee ri hitom xà hã kẽn rax pumu. Nhũm ra nhãm hakwa kre kuhpa hã ri hikwý nhũm omu nẽ tee ri hkukamã hamaxpêr pẽ omunh o xa. 2 Hãmri nẽ awjanã nẽ ma akupým hprõt nẽ nhỹri Simãw Pêtre nẽ pa ixpê Jejus kràmnhwý mex ã wa ixpumu nẽ hkaprĩ kamã wa inhmã harẽ nẽ wa inhmã:

—Xê na pẽr mẽ pahpê mẽ panhõ Pahihti kapa nẽ nhỹhým ma o tẽ. Xê nhỹhým mãn pre wem o tẽ? Anẽ.

3 Hãmri pa wa kuma nẽ hwýr ixprõt kurê kumrêx. 4 Hãmri pa Simãw Pêtre mã wa nẽ ixkumrêx hwýr pøj. 5 Nom kormã kẽn kre hwýr ixâr kêt ri kormã hakwa krem inhĩkõt nẽ kaxwýnh kãm nõi xà kamã Jejus japêr ixrĩt o xa. Nhũm kupêxê nhĩrê pix nõ pa omu. 6 Hãmri nhũm Simãw Pêtre ixkõt tẽ nẽ ixrom krem àr kurê kumrêx nẽ kupêxê nhĩrêta pumu. 7 Nẽ hkrã kupu xà pumu nhũm axtem hkrã muxre nẽ ahte nõ. 8 Hãmri pa hkõt axà nẽ nõi xà kaprý pumu nẽ ijamaxpêr o:

—Hêxta waa nẽ. Nà mãn akupým htĩr. Hã na nõi xà hkaprý mex nẽ. Nà mãn akupým htĩr kãm ga. Anẽ.

9 Ra Tĩrtũm kapêr ã kagà htũm kot ja kukamã akupým htĩr ã harênh tã pa wa kormã ixprĩ hã ja hã omunh kêt nẽ. Tã kẽn kre kaprý pumu nẽ kãm ijamaxpêr kurê kumrêx. 10 Hãmri nẽ wa ixkato nẽ awjanã nẽ ma akupým wa ixkwýjê hwýr wa tẽ.

Jejus kot Marir Matarẽn wýr kator ã harênh

Makre 16.9-11

11 No nhũm Marir Matarẽnja arĩ kẽn kre kapem hkaprĩ nẽ mýr o xa. Nẽ mýr pẽ hikõt nẽ kẽn kre kamu 12 nẽ kamã Tĩrtũm kapêr o wrýk xwýnh wa ho axkrut nẽ wa omu. Nhũm wa ê jakajre kamã wa nhỹ. Nhũm hõja hkrãm nhỹ nhũm hõja htem nhỹ. 13 Hãmri nẽ wa Marir Matarẽn mã kapêr nẽ kãm:

—Kwa mon ka ri omu nẽ amýr o xa? Anẽ.
Nhũm kãm:

—Xê nhũm. Na prem ma nhỹhým mẽ ixpê mẽ inhõ Pahihtija mý nẽ ma o tẽ nẽ hpãnhã nhỹri kuxi. Anẽ.

14 Rôm nhũm Jejus tãm tẽ nẽ hkatut kõt xa nhũm Marir Matarẽn ho hakêx nẽ omu nom hprĩ hã omunh kêt nẽ. Omu nẽ htýx ho axtem mẽhõ hã hkamnhĩx. 15 Hãmri nhũm kãm:

—Kwa mon ka ri amýr o xa? Mẽhõ na ka ri hapêr arĩt pẽ amýr o xa? Anẽ.

Hãmri nhũm kuma nẽ htýx ho pĩ hkre jamãr xwýnh ã hkamnhĩx nẽ kãm:

—Xê xà ka na ka mẽ ixpê mẽ inhõ Pahihti ho ahkĩ nẽ ma o tẽ nẽ nhỹri axi mê? Xê ka japêr nẽ akatàt kõt inhmã harẽ. Nhỹri inhmã nõi xà jarẽ pa ma hwýr tẽ nẽ kumý nẽ man akupým o tẽ nẽ akupým kẽn kre kamã kuxi. Anẽ.

16 Hãmri nhũm Jejus kãm hixi jarẽ nẽ kãm:

—Kwa Marir Matarẽn. Amnẽ ixpumu nẽ arĩ ã akapêr anẽ nà. Anẽ.

Hãmri nhũm jatã hprĩ hã kuma nẽ ho hakêx nẽ amnhĩ jaêr pẽ hprĩ hã omu nẽ kãm:

—Xê Pahihti. Xep ka na ka. Hêxta gàu nẽ. Anẽ.

Nom mẽ ixpê Ijaew kapêr kãm Pahita jarênh o: “Raponĩ” anẽ. Nhũm ã kãm kapêr anẽ hãmri nẽ axte ma nhỹhým kêp htêm pymaj hpa hã kupy. 17 Hãmri nhũm kãm:

—Kwa inhmã anhũre. Na pa kormã ma akupým Inhĩpêêxà hwýr ixàpir kêt nẽ. E tokyx ma akupým tẽ nẽ ixtõ nẽ ixtõxjê mã ijarẽ. Na ka prem apê ixkràmnhwý pix tã ra mẽ apê ixtõ nẽ ixtõx na ka mẽ. Jakamã ma akupým mẽ hwýr tẽ nẽ mẽ kãm ijarẽ. Nẽ mẽ kãm: “Na Jejus mẽ awýr pẽr mẽnh o: ‘Kot paj tokyx ma akupým Inhĩpêêxà Tĩrtũm wýr api. Nom kêp pa Inhĩpêêxà pix kêt mãânên kêp mẽ Anhĩpêêxà na. Nẽ mãânên kêp mẽ anhõ Tĩrtũm na.’ Anhýr o mẽ awýr pẽr mẽ.” Anẽ. E ma akupým mẽ hwýr tẽ nẽ tokyx ã mẽ kãm ijarênh anẽ. Anẽ.

18 Hãmri nhũm kuma nẽ ma akupým mẽ ixwýr tẽ nẽ mẽ inhmã awjarẽ nẽ mẽ inhmã:

—Xê na pa ham mẽ panhõ Pahihtita pumu. Na akupým mẽ pamã htĩr. Anẽ.

Hãmri nẽ mẽ inhmã kot tanhmã kãm kapêr to hã harẽ pa mẽ kuma nẽ tee ri hkukamã ijamaxpêr.

*Jejus kot hkwỳjê hwỳr kator ã harênh
Rukre 24.36-43*

¹⁹ Tã nhũm tòmĩk nê kamàt pa mẽ Jejus kôt ixpa ho ixpa xwỳnhjaja axpên wỳr akuprô hãmri nê Ijaew krãhtũmjê pymaj hakwakre kahê hpa nê axpên mã ixkapêr o ixkrĩ. Nhũm Jejus mẽ ijaêr pê nhỹhỹnh mẽ ixwỳr axà nê mẽ ixkuri xa nê mẽ inhmã:

—Pa. Xà kormã mẽ anhõt kêt? Anê.

²⁰ Hãmri nê mẽ inhmã amnhĩ nhĩhkra kamã prek tatak xà jahkre nê hakỳx kôt mẽ kot hkanhwỳr xàja nhũm mẽ inhmã hahkre. Pa mẽ akupỹm htĩr kãm omu nê ixkĩnh tỳx kumrêx. ²¹ Hãmri nhũm mẽ inhmã:

—E kwa kêr ka mẽ tee ri amnhĩ kukamã ajamaxpêr o amã ma ho ri apa hkêt nê. Na pre Inhĩpêxàja mẽ awỳr inhmẽ pa pre wrỳ. Tã kot paj amnhĩ pyrã nê mẽ piitã mẽ hwỳr mẽ arê. Anê.

²² Hãmri nê mẽ ixkaxyw htyyxà mẽ nê mẽ inhmã Tĩrtũm mẽ wa Karõ jarê nê mẽ inhmã:

—E koja Tĩrtũm mẽ wa Ixkarõja wrỳ nê mẽ akarõ mã gjêx pa. ²³ Ka mẽ ỹ hã ma mẽ piitã mẽ hwỳr apa nê mẽ kãm Tĩrtũm kapêr jarênh o ri mẽ hkôt apa. Nê nhỹri mēhõ pumu nê inhỹ hã kãm: “Kot kaj Tĩrtũm kôt amnhĩ xãm nhũm amnhĩ tã apumu nê anê ate amnhĩ tomnuj rênh pa.” Anê. Ka mẽ ã kãm akapêr anê nhũm mẽ ama nê hkôt amnhĩ xãm nhũm Tĩrtũm amnhĩ tã omu nê nê kot amnhĩ tomnuj rênh pa. Nom koja mẽ ama nê ãm mẽ ama nê hkôt amnhĩ xãm kêt japêr ka mẽ inhỹ hã kãm: “Nà kot kaj Tĩrtũm kôt amnhĩ xãm kêt nê nhũm anê ate amnhĩ tomnuj rênh kêt nê.” Anhỹr o kãm akapêr nhũm Tĩrtũm ho anê nê nê rênh kêt nê. E kêr ka mẽ ã inhỹ hã amnhĩ nhĩpêx anhỹr o ri apa. Anê.

Nhũm pre ã Jejus mẽ inhmã kapêr anê hãmri nê kato nê ma nhỹhỹm tẽ.

*Jejus kot Tomas mã kapêr ã harênh
Matêwre 28.17*

²⁴ No nhũm mẽ inhĩõ pê Tomas pihpõtita kormã mẽ ixkĩnhã akupỹm Jejus htĩr kãm omunh kêt nê. Na pre ma kape hã tẽ nhũm wakre kamã mẽ ixwỳr axà nê mẽ inhmã kapêr hãmri nê ma nhỹhỹm tẽ. Jakamã nhũm Tomas akupỹn mẽ ixwỳr tẽ nê axà pa mẽ kãm harê nhũm tee ri mẽ

inhma nê mẽ ixkôt hamaxpêr kêt nê. ²⁵ Nê mẽ inhmã:

—Nà kot pa ãhkra kamã prek tatak xà pumu nê kamã inhĩhkra hkrã jaxà. Nê hakỳx kôt hkanhwỳr xàta pa mã ho anê nê omu nê kamã inhĩhkra hkrã jaxà nê rĩ kormã akupỹm htĩr kôt ijamaxpêr. Anê.

²⁶ Tã nhũm semãn pyxi nê hapêx pa mẽ axte axpên wỳr akuprô nê axte Ijaew krãhtũmjê pymaj amnhĩ tã kahê htỳx nê ixkrĩ. Nhũm Tomas tã mẽ ixkuri nhỹ. Hãmri nhũm Jejus axte nhỹhỹnh mẽ ixwỳr axà nê mẽ inhmã:

—Pa. Na ka mẽ rĩ akrĩ. Anê.

²⁷ Hãmri nê Tomas pumu nê hwỳr tẽ nê kãm ãhkra pẽ nê kãm:

—E ota inhĩhkra kamã prek tatak xàta. Mãmri kamã anhĩhkra hkrã jaxà. Nê hpãnhã ijakỳx kôt mẽ kot ixkanhwỳr xà kamã mã ho anê nê haxà nê akupỹm ixtĩr kôt ixpumunh kurê kumrêx. Anê.

²⁸ Hãmri nhũm kuma nê kãm:

—Nà pêr ãm hãmri apê inhõ Pahihtĩ Tĩrtũm na ka. Anê.

²⁹ Hãmri nhũm kãm:

—Tỳ. ãm ano ho ixpumunh kôt pix mã na ka ixkôt ajamaxpêr. Tã no ãm koja mẽ nhỹrmã mẽ amỳr pê mẽ pa xwỳnhjaja mẽ akĩnhã mẽ no ho ixpumunh kêt tã akupỹm ixtĩr ã ijarênh mar pix tã ixkôt hamaxpêr. Ja na mex kumrêx. Anê.

*Juāw kot tanhmã amnhĩ jarênh to hã
harênh*

Rômãn 15.4; Wam Juāw 5.13

³⁰ Na pre Jejus kormã mẽ ixto pa ri mẽ inhnoo mã mẽmoj tanhmã hipêx to rax nê nom kot paj kagàja kamã piitã hã kagà hpar kêt nê. ³¹ ãm hkwỳ pix na pa mẽ amã hã kagà. Mẽ ate mẽ ixpyrà nê omunh nê kêt Tĩrtũm Kra hã kot mẽ pakaxyw ãm xwỳnh ã omunh nê hkôt amnhĩ xunhwỳr kaxyw na pa ã mẽ amã harênh nê hã kagà anê. Tã kot kaj mẽ amnhĩ kaxyw hkôt ajamaxpêr nê hkôt amnhĩ xunhwỳ hãmri nê nhỹrmã atyk tã nhũm akupỹm mẽ ato mẽ atĩr ka mẽ ixpyrà nê kuri amex nê atĩr tũm nê apa ho apa. Tã pa ã mẽ amã mẽmoj piitã harênh nê hã kagà anê.

21

*Jejus kot hkwyjê hwyr kator ã harênh
Matêwre 26.32, 28.7, 28.10*

¹ Tã nhũm Jejus axte hkôt mẽ ixpa ho mẽ ixpa xwýnh kwýjê hwyr kato. Himô pê Tipeja mýri. ² Pa mẽ ixpê 7 nê axpên wýr akuprô. Na pre Simãw Pêtre nê Tomas pihpohti nê Natãnaew. Natãnaewja Garirej kamã krĩ pê Kanã nhô xwýnh na pre. Nê wa pa wa ixpê Jepetew krata wa nê wa inhĩo wa pijakruuta wa. Pa prem wa mẽ nhýri axpên wýr akuprô. ³ Hãmri nhũm Simãw Pêtre mẽ inhmã:

—E pa jarãhã ma tep wýr tẽ nê hkwymnê. Anê.

Pa mẽ kuma nê kãm:

—Tôe. Nà pa mẽ ijaxwýja ma akôt mō. Anê.

Hãmri nê mẽ ma himô rax pê Tipeja wýr mō nê kanôre mã agjê nê gôx kãm kryhti rênh o ixkuhê. Nom tee ri ho tep ômnênh kaxyw rênh o ixkuhê nê hōmnênh kêt nê ixtã apkati nhũm tep amrakati kumrêx.

⁴ Tã nhũm myt kato nhũm Jejus gô mýri xa. Pa mẽ ixpiitã omu no ãm ixprĩ hã kêp Jejus ã omunh kêt nê. Tã no nhũm tãm xa. ⁵ Hãmri nê mẽ inhmã kapêr nê mẽ inhmã:

—Pa. E mãn ka mẽ ra tep kwymnênh rax nê nà? Anê.

Hãmri pa mẽ kãm:

—Tk. Nà mo tep? Amrakati kumrêx kênã. Anê.

⁶ Hãmri nhũm mẽ inhmã;

—Xô wehe? Tôe. Axte mẽ axupôk rũm kryhti mẽ nê omu. Anê.

Hãmri pa mẽ mar xà hkôt ho anê nê kumê. Hãmri nhũm kamã tep hipu rax kumrêx nhũm utĩ rax nê. Pa mẽ tee ri ixte ho ixàpir kaxyw ri hkukjê. ⁷ Hãmri pa kêp Jejus ã omunh kurê kumrêx nê Simãw Pêtre mã kãm:

—Kwa pêr mẽ panhō Pahihtita na. Anê.

Hãmri nhũm inhma nê hkĩnh týx nê akupým hinôkã jaxà nê gôx kãm mrô nê ma hwýr ho nana ho tẽ. ⁸ Hãmri pa mẽ hkôt kanôre kamã kryhti kjênh o mō. Ra amgrã hwýr amgrire. Wýr 100 met pix jakamã pa mẽ hwýr ixpôx tokyx anê. ⁹ Nê pàr o hkre kura nê kuxi nê ijapôx pa nê Jejus wýr ixprôt nê mra. Nhũm ra mẽ ixkutêp kuto nê par nhĩpêx nê nhýhýnh tep kwý par kãm

haxwý nê ho àr o nhý. Nê kaxyw pãwti nê amnhĩ ri haxwý nê o nhý. ¹⁰ Hãmri nê mẽ ixpumu nê mẽ inhmã:

—E mẽ amnê anhō tep o mra pu mẽ hkuxôt nê kuku. Anê.

¹¹ Hãmri nhũm Simãw Pêtre akupým pàr wýr tẽ nê kryhti ho htýx xà hpôt nê amgrã hwýr hkjênh o mō. Kamã tep rũnh pix. Nê ohtô nê. Kamã kêp 153 nê hikwý htã nhũm nhýhýnh kryhti hkwy pikaxônh kêt nê. ¹² Hãmri nhũm Jejus mẽ inhmã:

—E kwa mẽ tokyx mra pu mẽ apku. Anê.

Hãmri pa mẽ kuma nê hwýr mra nê ixkrĩ pa. Hãmri nê tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhýr ã omu nê kêp mẽ inhō Pahihtiti hkôt omunh kurê kumrêx jakamã hixi hã hkukjêr kêt nê. ãm akryk omunh o ixkrĩ. ¹³ Hãmri nhũm mẽ inhmã pãwti ho hkry pa. Nê hpãnhã tep jamý nê mã ho anê nê ho hkry pa nê ho mẽ inhĩpêx pa pa mẽ ixàpkur o ixkrĩ.

¹⁴ Nhũm Jejus akupým htĩr kãm ra ahpýnhã mẽ ixwýr hapôx o axkrunêpxi.

*Jejus kot akupým tãm Simãw Pêtre xãm
Atre 20.28-31; Wam Pêtre 5.1-4*

¹⁵ Tã pa mẽ ra ixàpkur pa nê kãnhmã ixkuhê nê gô mý ri mra. Hãmri nhũm Jejus Juāw hkra Simãw Pêtre mã tanhmã kapêr to. Nom ixpê Juāw nhũm kêp ixkra hkêt axtem Juāw ô hkra na pre. Jakamã nhũm Jejus kãm kapêr nê kãm:

—Kwa Simãw. Xà we amã ijapê ho ate pika hkôt mẽmoj piitã hakrenh par nà? Anê.

Hãmri nhũm kuma nê kãm:

—Tý inhmã ajapê htýx kênã Pahihtiti. Ra ate ja hã amnhĩ tã ixpumunh mex. Inhmã ajapêê. Anê.

Hãmri nhũm kuma nê kãm:

—Tôe. Nà kêr ka inhmã mẽ kot ixkôt amnhĩ xunhwýr xwýnhjê jahkre mex o ri mẽ hkôt apa. Te ho ôwêhti hkrare jamãr xwýnh kot hamãr mex o ri hkôt pata pyrãk. Anê.

Hãmri nhũm kãm:

—Tôe. Nà kot paj amã mẽ ho anê. Anê.

¹⁶ Tã nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarẽ. Xà we amã ijapêê nà? Anẽ.

Hãmri nhũm kãm:

—Tỳ. Ra ate inhmã ajapê hã ixpumunh kênã. Anẽ.

Hãmri nhũm kê axte kãm:

—Tõe. Kêr ka inhmã mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamãr xwýnh kot ôwêhti jamãr mex o hkôt pa xwýnh kot amnhĩ nhĩpêx pyrãk. Anẽ.

Hãmri nhũm kãm:

—Nà kot paj amã mẽ ahkre mex o ri mẽ hkôt ixpa. Anẽ.

¹⁷ Tã hãmri nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarẽ? Xà we amã ijapê htyx kumrêx nà? Anẽ.

Hãmri nhũm tee ri amnhĩ tã kuma nẽ hkaprĩ nẽ. Ra kot amnhĩ tã hkukjêr o axkrunêpxi jakamã nhũm hkaprĩ nẽ tee ri hamaxpêr. Hãmri nẽ kãm:

—Kwa Pahihti. Ate mẽmoj piitã omunh par. Nẽ ate inhmã ajapê htyx ã ixpumunh par kênã. Anẽ.

Hãmri nhũm kê axte kãm:

—Tõe. Kêr ka inhmã mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamãr xwýnh kot hamãr mex o ri pata pyrãk. Anẽ.

Hãmri nhũm kãm:

—Nà kot paj amã mẽ ho anẽ Pahihti. Anẽ.

Simãw Pêtre tanhmã htyk to hkukamã harênh

¹⁸ Nhũm Jejus arĩ Simãw Pêtre mã kapêr nẽ kãm tanhmã htyk to hkukamã harênh to nẽ kãm:

—Kwa ixkapêr ma nẽ amnhĩ krã him haxàr tỳx nẽ hã apa Simãw Pêtre. Nà kormã anyw ri na ka pre hte ma nhỹhỹm apa kaxyw nẽ anojarêh hãmri nẽ anhĩnôhkã mex jagjê nẽ ma nhỹhỹm amã apa hprãm xà hkôt ri apa. Tã kot kaj apigêh nhũm mẽ apynê nẽ akahti hpre nẽ apa hpre nẽ ma nhỹhỹm ato mō ka mẽ kãm amnhĩ gō nẽ amnhĩ nẽ tanhmã mẽ kãm nẽ hkêh nẽ. Amã mẽ hkôt amōr prãm kêt tã mãmrĩ mẽ kãm amnhĩ gō kê mẽ ma nhỹhỹm ato mō. ¹⁹ Tã kêr ka arĩ ixkôt amnhĩ xãm tỳx nẽ atĩr prãm xàj mẽ umaj axte ixkaga hkêh nẽ. Hãmri nhũm mẽ apĩ nẽ tanhmã atyk to hã apumu

nẽ amã Tĩrtũm kĩnh ã apumunh mex kurê kumrêx. Hãmri nẽ atã Pahi Maati Tĩrtũm mex o mex ã harẽ. Anẽ.

Nhũm pre ã Jejus Simãw Pêtre tyk kukamã kãm ujarênh anẽ. Hãmri nẽ kãm:

—E kêr ka ixte amnhĩ to htyx nẽ amarĩ mẽ kãm ixãm nhũm mẽ kot ixpĩrja pyrã nẽ ã amnhĩ nhĩpêx anẽ. Anẽ.

Hãmri nhũm kuma nẽ kãm:

—Tõe. Nà kot paj hãmri tã ã amnhĩ nhĩpêx anẽ Pahihti. Anẽ.

Juãw tyk kukamã tanhmã harênh to hkêh ã harênh

²⁰ Nhũm pre ã Jejus Simãw Pêtre mã tanhmã htyk to hkukamã harênh anẽ. Hãmri nhũm kuma nẽ ixpê Juãw ã ixto hakêx nẽ ixpê Jejus krãmnhwý mex ã ixpumu. Kormã Jejus htyk kêt ri kamãt kãm mẽ ixàpkur o ixkrĩta ã na pa pre ãhkô hã ixàpkur o nhỹ nẽ kot mẽ kãm òr mã xwýnhhta nhĩxi hã hkukja. ²¹ Jakamã nhũm Simãw Pêtre ixto hakêx nẽ ixpumu nẽ ixtã Jejus kukja nẽ kãm:

—Kwa no pêr pahkôt mōr mũj? Tanhmã koja we htyk to? Anẽ.

Hãmri nhũm kãm:

²² —Nà kot paj amã tanhmã htyk to hkukamã harênh hkêh nẽ. Kot pa inhmã arĩ kritpêm pa rãhã pa akupýn ixwrýk prãm nhũm arĩ pa nẽ htyk kêt rãhã pa akupýn wrý. Kêr ka ri htyk kukamã tee ri tanhmã ajamaxpêr to hkêh nẽ. ãm ixkôt pix mã ate amnhĩ nhĩpêx tỳx pix kukamã mãn ajamaxpêr o ri apa.

²³ Anhýr o kãm ijarênh jakamã nhũm mẽ ixkwýjaja kot ã ijarênh anhýrja ã kuma ma nẽ htyx nhỹrmã ixtyk kêt ã ixkamnhĩx. Nẽ gaa nẽ rĩ piitã axpên mã ã ijarênh anhýr o pa. Nom na pre ã ijarênh anhýr kêt nẽ. Na kêt pre ijarênh o:

—Kot pa inhmã arĩ ri kritpêm pa rãhã pa akupýn ixwrýk prãm nhũm arĩ pa nẽ htyk kêt rãhã pa akupýn wrý.

Anhýr o ijarê. Nom ãm hãmri ixtyk kêt rãhã nhũm akupýn wrýk ã ijarênh kêt nẽ.

Juãw kot Jejus kot tanhmã amnhĩ to hã kagã hpar kêt ã kot amnhĩ jarênh

Juãw 20.30-31

²⁴ E na pa mẽ amã Jejus kot tanhmã amnhĩ nhĩpêx to ho pa hã harẽ nẽ hã kagã.

Ixpê hkôt ri ixpa ho ixpa xwýnhjê hõ na pa ãm hãmri ã hã kagà anê. Ka mẽ kamã harê nê ama nê ãm hãmri ixte kagà nhĩpêx kôt ixpumunh mex kurê kumrêx. ²⁵ No na pre Jejus ãm ja pix o anhỹr o pa hkêt nê. Na pa ãm mẽ amã hkwý pix jarê nê hã kagà. Na pre tanhmã ri mẽmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhỹx hã kagãja katutxô rax kumrêx. Jao te ra kaxkwa htêp o mõr pyrãk.

Tã ãm ja pix. Na hapêx.

Atre

Jejus nhÿ hã mē ahkre ho mē pa xwÿnhjaja kot tanhmã amnhÿ nhÿpêx to ho pa hã mē harênh

Rukre na pre kagàja nhÿpêx. Na pre kèp tâtô nē hkwÿjê kane ho pa. Nē Jejus nhÿ hã mē ahkre ho pa xwÿnhjaja pē Pawre kôt pa ho pa. Hãmri nē hamaxpêr nē hkràmnhwÿ Teopre mã kagàja nhÿpêx nē hwÿr kumē. Nē kagàja kamã Jejus nhÿ hã mē ahkre ho mē pa xwÿnhjaja kot Jejus mÿr pē tanhmã amnhÿ nhÿpêx to ho pa hã mē harê.

Nē Ijaew nhô patrejaja nē mē hkwÿ pē Parijew nhô xwÿnhjaja nē mē hkwÿ pē Satusew nhô xwÿnhjaja kot Tÿrtüm kapêr ã kagà htüm kamã harênh nē mar nē hkôt amnhÿ nhÿpêx tã Tÿrtüm Kra Jejus kôt amnhÿ nhÿpêx kêt ã mē harê. Mē kot kèp Tÿrtüm Kra hkêt ã hkamnhÿx jakamã na prem kãm mē kot hkôt amnhÿ xunhwÿr xwÿnhjê kurê nē. Tã nhÿm Simãw Pêtre mē Pawre mē Jejus nhÿ hã mē ahkre ho mē pa xwÿnhjaja mē urak nē kèp Ijaew tã mē kurom Jejus hkôt amnhÿ xunhwÿr nhÿm mē tee ri ja hã mē omu mē kamã gryk tÿx nē tanhmã mē hipêx to ho pa. Tã nom nhÿm mē tee ri amnhÿ kukamã hamaxpêr nē Jejus kaga hkêt nē. Mē kot mē hipêx kati htã na prem arÿ Tÿrtüm Karô nhÿ hã mē piitã mē kãm tanhmã Jejus kot mē panê amnhÿ nhÿpêx to hã harênh o pa. Kam nē kapit 1 kamã wesik 8 japêr nē kamã harê. Hãmri nhÿm Rukre ã mē kot amnhÿ nhÿpêx anhÿrja piitã hã kagà nē Teopre hwÿr kumē. Nē kãm mē harênh o:

Tÿrtüm Karô jarênh

Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awÿr kagà nhÿpêx nē kumē. Nà wam ixte awÿr kagà nhÿpêx nē mēnhta kamã na pa pre amã Jejus kot tanhmã amnhÿ nhÿpêx to hã harê nē hã kagà. Kot tanhmã amnhÿ nhÿpêx to ho pa nē tanhmã mē ahkre hto ho paja krax rüm pa pre piitã hã kagà hpa nē awÿr kumē. ²⁻⁴ Kormã akupÿm kaxkwa

hwÿr àpir xwÿj ri na pre ÿ hã mē ahkre ho pa kaxyw hkôt mē pa xwÿnhjaja kupÿ nhÿm amnhÿ xà htÿx kãm hamak rax kãm ty. Hãmri nhÿm Tÿrtüm akupÿm ho htÿr. Nom nhÿm ma akupÿm kaxkwa hwÿr àpir kurê kumrêx kêt nē. Na pre xatã mē kot ÿ hã mē ahkre ho mē pa xwÿnhjaja maatijê hwÿr hapôj nhÿm mē akupÿm htÿr kãm omu. Na pre hte nhÿri mē hwÿr hapôj nē tanhmã mē ahkre hto nē mē kãm:

—Na pre Tÿrtüm mē ato hkra nē tãm mē ate amnhÿ nhÿpêx o apa kaxyw mē axunhwÿ.

Anhÿr o mē ahkre hã arÿgro ho 40. Hãmri nē kormã mē kamã pa ri axte tanhmã mē kãm kapêr to. Tÿrtüm Karô nhÿ hã mē kãm kapêr nē mē kãm:

—E kêt ka mē krÿ ja kamã ri apa nē tokyx ma nhÿhÿm apa hkêt nē. Kê Inhÿpêxà Tÿrtüm mē awÿr amnhÿ Karô rē mân. Ra ixte mē amã harênh xà hkôt koja mē awÿr kurê nhÿm mē awÿr wrÿ nē mē akarô mã agjê ka mē rÿ kormã anhgrà nē ma nhÿhÿm krÿ hkôt ri mē kãm kapêr jarênh o ri mē hkôt apa.

⁵ —Juãw Paxis na pre hte Tÿrtüm mã gôx kãm mē hkrã kumrãr o pa. Tã koja Tÿrtüm tokyx mē awÿr amnhÿ Karô rē. Kot ixpãnhã amnhÿ kaxyw mē ato mē amã ma hkêt kaxyw mē awÿr kurê. Koja hã apkati grêre nhÿm mē awÿr kurê nhÿm ixpãnhã mē awÿr wrÿ nē mē amã agjê nē mē akamã mē akôt pa ho pa. Ka mē rÿ kormã Jerujarê rüm ajapôj nē ma mē kãm Tÿrtüm kapêr jarênh o ri mē hkôt apa. Anê.

*Jejus akupÿm kaxkwa hwÿr àpir ã harênh
Makre 16.19; Rukre 24.50*

⁶ Tã nhÿm mē axte akuprô. Jejus nē ÿ hã mē ahkre ho mē pa xwÿnhjaja nhÿm mē hixêt pē Oriwêhti nhÿmök ã axte axpên wÿr akuprô. Hãmri nhÿm mē amnhÿ tã Jejus kukja nē kãm:

—Kwa Pahihti mē inhmã mēmoj jarê. Xà kot kaj tokyx apê Tÿrtüm kot mē ixwÿr amênh xwÿnhjê ã amnhÿ jarê nē Rôm nhô xwÿnhjê nē mē pahpê Ijaew kator nã? Hãmri pa mē pamjaja amnhÿ to amnhÿptar o ri ixpa. Anê.

⁷ Hãmri nhÿm mē kãm:

—Nà Inhîpêêxà pix na ã mẽmoj kot anhÿrja kukamã àhpumunh. Tapxipix na kot mẽmoj tanhmã ho hã arîgro nê mẽmoj tanhmã ho hã mytwrÿ pumunh mex. No mẽ kajaja mo kaxyw kot ka mẽ amnhî katorta kukamã amnhî jarênh ma? ⁸ Nà kot paj ãm mẽ amã mẽmoj to pyxire nê hkukamã harê. Koja Tîrtûm tokyx mẽ awÿr amnhî Karô rê nhûm ixpãnhã kot mẽ ato amnhîptâr kaxyw mẽ akarô mã agjê. Hãmri ka mẽ ma pyka piitã hkôt anhgrã nê ma mẽ kãm ixkapêr jarênh o ri mẽ hkôt apa. Jar Jerujarê kamã nê pika pê Jutej kôt nê nhãm pika pê Samar kamã nê pika piitã hkôt mẽ kãm ijarênh o ri mẽ hkôt apa. Æ mẽ ate amnhî nhîpêx anhÿr pix kukamã kot paj mẽ amã harê. Anê.

⁹ Nhûm pre ã Jejus mẽ kãm kapêr anê hãmri nê mẽ kêp kãnhmã àpir o tẽ nê mẽ noo mã ma kaxkwa hwÿr àpir o tẽ nê kakrãm axà nê mẽ kêp akunok. ¹⁰ Hãmri nhûm mẽ tee ri hapêr o kuhê rãhã nhûm mēhō myja wa axkrut nê mẽ hwÿr wrÿ nê mẽ kutã wa xa. Wa ê hakaj nê wa xa. ¹¹ Hãmri nê mẽ kãm:

—Pa Garirej nhō xwÿnhjaja? Kwa mo kaxyw na ka mẽ tee ri kaxkwa pumunh o akuhê? Tîrtûm na akupÿm amnhî wÿr Kra Jejus o api ka mẽ àpir kãm omu. E mẽ tee ri hkukamã ajamaxpêr kêt nê. Koja nhÿrmã man akupÿn mẽ awÿr wrÿ. Te mẽ arûm kaxkwa hwÿr àpirja pyrã nê akupÿn mẽ awÿr wrÿ ka mẽ omu. Anê.

Akupÿm Jerujarê hwÿr mẽ mrar ã mẽ harênh

Rukre 24.52

¹² Tã nhûm Jejus nhÿ hã mẽ ahkre ho mẽ pa xwÿnh maatijaja wa kuma nê awjanã nê ma akupÿm krîm mra. Hixêt pê Oriwêhti rûm ma akupÿm Jerujarê hwÿr mra. Wÿr jawÿ nhûm mẽ akupÿm hpôx tokyx anê.

¹³ Hãmri nê akupÿm kÿx pê ixkreja wÿr api nê agjê. Na pre

Simãw Pêtre nê

Juãw nê

Xiakre nê

Andrehti nê

Firipti nê

Tomas nê

Patoromew nê

Matêwre nê

Xiakre hō pê Apew kraja nê

Simãw Jerox nê

Jut pê Xiakre hkraja.

Mê piitã Jejus nhÿ hã mẽ ahkre ho mẽ pa xwÿnh maatijaja na pre mẽ. ¹⁴ Nê mãânênh mẽ hkôt mẽ hkwyjaja. Jejus katorxã Marir nê Jejus tōjaja nê Jejus kot tanhmã mẽni ho mex to xwÿnh kwÿjaja nhûm prem kÿx pê ixkreja wÿr Jejus nhÿ hã mẽ ahkre ho mẽ pa xwÿnh maatijê hkôt gjêx pa. Hãmri nê xatã axpên wÿr akuprô nê Tîrtûm mã amnhî jarênh o hkrî.

Tîrtûm kot Jut Kariot pãnhã mēhō xãm ã harênh

Matêwre 27.3-10; Juãw 15.27

¹⁵⁻¹⁹ Tã nhûm mẽ kot Jejus kôt amnhî xunhwÿr xwÿnhjaja ra kêp 120. Jakamã nhûm mẽmo arîgro hã axpên wÿr akuprô nê hkrî. Nhûm Simãw Pêtre kãnhmã xa nê tanhmã mẽ kãm Jut Kariot jarênh to nê mẽ kãm:

—E Jejus kôt ixtō nê ixtōxjaja. Pa mẽ amã tanhmã finat Jut Kariot jarênh to ka mẽ inhma. Na pre axtem nê mẽ pahkwÿjê mã Jejus ã amÿnê nê hpãnhã kãxpore hkwy jamÿ nê o tẽ nê ho amnhîm pyka hkwy japrô. Tã tanhmã amnhî to nê nhÿri ô pyka kamã tēm nê amnhî tu katôk nê hkrêx kato nê ty nê hkamrô ho ô pyka xy hpa. Jakamã nhûm Jerujarê nhō xwÿnhjaja harênh ma nê pykaja ã hixi mẽ nhûm kêp “pyka kamrôhti.” No mẽ pahpê Ijaew kapêr kãm kêp “Ajetãm.” Amnepêm na pre Tîrtûm Karô finat Tawi mã Jut Kariot kukamã tanhmã harênh to. Kormã kator nê kot tanhmã amnhî to hkêt tã nhûm ra hkukamã omu nê Tawi mã harê. Kot axtem nê mẽ kãm Jejus ã àmnênhja nhûm hkukamã omu nê Tawi mã harê nhûm kuma nê ô ri hã kagã. Tã nhûm kot hkukamã hã kagã hkôt nhûm ã Jejus nhîpêx anê. Jut Kariotja mẽ panhîō na pre. Na pre Jejus mẽ pahpyrà nê amnhîm kuta. Mẽ pahpyrà nê ÿ hã kapêr jarênh o pa kaxyw. Tã nhûm axtem nê ã hipêx anê.

²⁰ Nom na pre Tawi kot Tîrtûm mex ã grer ã kagã kot ra hkukamã tanhmã harênh to. Kagã hkwy pê Sam kamã kot harênh kot:

Kot amnhî tomnuj xwÿnhhta nhōrkwy koja hkapyrn kuhê ho kuhê nhûm mēhōj

mÿr p  kam  pa hk t kumr x. Koj
 m ar  hkapr n kuh  ho kuh .

Nom kot Jejus m  tanhm  amnh  nh p x to
ho paja k  m h  mÿr p  ho amnh pt 
n  hp nh  Jejus nh  h  m  ahkre ho
pa. An .

  T rt m kap r   kag  ht m kot Jut Kariot
kukam  har nh kot anh r. ²¹ Jakam  e
ixkw jaja. Kot puj m  hp nh  m  at  x m
ka Jut mÿr p  m  pahp  Jejus nh  h  m 
ahkre ho ixpa xw nhj  hk t Jejus akup m
ht r   har nh o apa. ²² E m  at  na ka pre
m  ixpyr n finat Ju w Paxis kot Jejus hkr 
kumr r   omu? N  Jejus kot ri tanhm 
amnh  nh p x to ho pa x  hkrax r m ka m 
ixk t ri omunh o ri apa? N  htyk k m omu
n  akup m ht r k m omu n  ma akup m
kaxkwa hw r  pir k m omu? E m  at 
na ka pre m  ixpyr n   kot amnh  nh p x
anh r   omunh par o ri hk t apa?   m 
ate kot amnh  nh p x anh r   omunh o apa
xw nhj  h  kot paj m  ata ka Jut Kariot mÿr
p  m  ixpyr n ma m  k m Jejus akup m
ht r   har nh o ri apa. An .

²³ Nh m pre   Sim w P tre m  k m kap r
an . H mri nh m m  kuma n  axp n
pumunh o hkr  h mri n  Maxitre m  Ju-
jere wa k m hamaxp r. Jujere na pre hixi
axkrun pxi. Na pre k p Jujere n  k p Pas-
apas n  k p Just . ²⁴⁻²⁵ H mri nh m m  wa
h  T rt m kukja n  k m:

—Pa T rt m? N  na pre finat Jut Kari-
otja Jejus kaga n  ty n  kot amnh  tomnuj
mÿrap  ma m  kot amnh  x  ht x kam 
hamak t m x ta w r ma m . T  ot pa
m  ixte m h  kot mÿr p  m  ixpyr  n 
Jejus nh  h  m  ahkre ho pa kaxyw m h 
h  akukj r kaxyw akupr . Ate m  ixpiit 
tanhm  m  ixte amnh  nh p x to ho ixpa
h  m  ixpumunh par T rt m. Ate m  ija-
maxp r k t m  ixpumunh par n  m  ixte
tanhm  amnh  nh p x to h  m  ixpumunh
par. Jakam  e. Ota Maxitre m  Jujereja
wa nh . Nh  kot kaj amnh m ata? Kot paj
m  k n pijakrutja   wa hixi xi n  ho  k
n  h  py. H mri ka am  hpr m xw nhhta
ta. K r pa m  k n pumunh k t r h  h  py
n  h  hixi pumu n  am  hpr m xw nh k t
omunh kur  kumr x. An .

²⁶ Nh m prem   T rt m m  kap r an 
h mri n  k nja o axkamur n  ho  k n 
omunh k t r h  ja py n  omu nh m h 
Maxitre nh xi n . Jakam  nh m Jejus nh 
h  m  ahkre ho m  pa xw nh maatijaja
amnh  k t kum  nh m m  akup m k p 12.

2

*T rt m Kar  kot m  hw r wr k   har nh
Rukre 24.49; Atre 4.31, 8.15, 10.44, 19.2*

¹ T  nh m m  hk nh p  P tekos kato nh m
m  kot Jejus k t amnh  xunhw r xw nhjaja
nh ri axp n w r akupr  n  h  hk nh.
P tekosja   na pre hte Ijaew m  hpur k m
m o r nh   hk nh kaxyw axp n w r akupr 
n  h  hk nh. Jakam  nh m m  kot Jejus k t
amnh  xunhw r xw nhjaja haxw ja axp n
w r akupr . ² H mri n  kaxkwa kam 
m moj ma. Nh m m moj te k k x p r t x
krihkrit pyr k o m  hw r wr k o m  n  m 
pikupr nh x  h  ixkreja w r ax  nh m m 
piit  kuma. ³ H mri nh m m moj te kuwy
jakrax pyr kja ahp nh  m  hw r angr 
n  m  hkr  nh m k   hikw . ⁴⁻¹³ T rt m
Kar  na pre. T m m  hw r wr k jakam 
  ri m  hip x an . H mri n  kot m  ho
amnh pt r kaxyw m  hkar m gj x pa nh m
m    h  tanhm  kap r to ho kuh . Nom
m  kap r o kap r k t n . Axtem m  kap r
kw  ho kap r. T rt m Kar  kot tanhm  m 
ho jakam  nh m m  axtem m  kap r kw 
ho kap r. Jao ahp nh  m  kap r kw  ho
T rt m m  mex o mex   har . Na pre Ijaew
kw jaja ahp nh  pyka h  kam  ri m  hk t
pa n  m  kap r ma n  ho kap r o pa. T 
akup m Jerujar  hw r pan p j n  kam  ri
pa ho pa. H mri n  m mojta ma n  ma Jejus
kw j  hw r hpr t n  ahp nh  m  kap r
  m  kuma n  tee ri m  omunh o kuh .
Amnh  ja r p  m  kuma n  tanhm  axp n
m  m  har nh to ho:

—Kok y . Garirej nh  xw nhjaja kot m 
pakap r mar k t t  ra tanhm  amnh  to n 
ahp nh  ri m  pakap r o kap r. Ahp nh 
m  pakap r n  ahp nh  m  panh  pyka
ht  nh m m    ri m  pakap r o kap r an .

Na pika p  Pat
n  Met
n  Er w
n  M sopot m
n  Jutej

nē Kapatos
 nē Pōt
 nē As
 nē Prik
 nē Pāpir
 nē Ejit
 nē Sirēn wỳr Ripja
 nē krī pê Rōm
 nē gō hipōk pê Kret
 nē Arap.

Nē mē pahkwỳjaja mē pahpê Ijaew
 kumrēx
 nē mē pahkwỳjaja amarī ri amnhī to
 Ijaew.

Ām ahpỳnhā mē panhō pyka nē ahpỳnhā ri
 mē pakapēr.

—Tā pu mē ahpỳnhā mē pakapēr kām mē
 kapēr ma. Tirtūm mex ā mē kot axpēn mā
 harēnhja pu mē hā mē mar mex nē. Anē.

Nhūm prem ā axpēn mā mē harēnh anē
 nē tee ri mē omunh o kuhê. Amnhī jaēr
 pê amnhī kapēr kām mē kapēr ma nē tee ri
 hamaxpēr nē axpēn mā:

—Kokỹỹ. Tanhmā mām pre wem amnhī
 to nē ra mē pakapēr ma nē mē pakapēr o
 kapēr? Anē.

Nhūm mē hkwỳjaja axtem nē ri mē hā
 hpēr o axkē nē axpēn mā:

—Tk. Ām mē pipānh ā ā ri mē kot amnhī
 nhīpēx anhỹr kēnā. Anē.

Simāw Pētre kot mē kām ujarēnh
Atre 3.12-26

¹⁴ Hāmri nhūm Simāw Pētre ā mē kapēr
 anhỹrja ma hāmri nē kỳx pê mē kām kapēr
 nē mē kām:

—E Jerujarē nhō xwỳnhjaja nē mē apē
 ixkwỳ Ijaew. Pa mē amā mēmoj jarē ka mē
 inhma nē inhmar tỳx nē. ¹⁵ Na ka mē atỳx
 ri mē ixpipānh ā mē ixkamnhīx. Mē ixkrā
 pipānh kêt. Kormā myt kaxkwa nhīpōk wỳr
 htēm kēnā. Na hte Ijaew kwỳhtā kagōxỳhti
 ho hkōm kêt nē. ¹⁶ Ja na pre Tirtūm am-
 nepē mā ā mē ixte amnhī nhīpēx anhỹrja
 kukamā mē ijarē nhūm ỹ hā kapēr o pa
 xwỳnh finat Joew mē ixkukamā hā kagā.
 Nē hā kagā ho:

¹⁷ Koja nhỹrmā mēmoj piitā hapēx kaxyw
 pa mē piitā mē hwỳr Ixkarō rē nhūm
 ma mē hwỳr wrỳ nē mē hkarō mā
 agjê. Hāmri nhūm mē hkanrēhā mē
 hkra xàptàr nywjaja ma mē kām

ixkapēr jarēnh o ri mē hkôt pa. Koja
 mē hpimtir kām amnhī kukamā
 mēmoj pumu. Nē mēhpigētjaja
 haxwỳja. Kot paj mē hpimtir kām
 tanhmā mē kām ixkapēr to.

¹⁸ Nē kot paj mē kot ixkôt ri tanhmā amnhī
 nhīpēx to ho mē pa xwỳnhjê hwỳr
 Ixkarō rē nhūm mē ỹ hā ma mē kām
 tanhmā ixkapēr jarēnh to ho ri mē
 hkôt pa.

¹⁹ Kot paj kaxkwa kamā nē pyka kamā aa
 mē kot mēmoj pumunh kêt kwỳ ho
 anē nhūm mē amnhī jaēr pê omu.
 Jao nhỹri mē hkamrô pumu nē kuwy
 pumu nē kuwy hkūm pumu hāmri
 nē tee ri amnhī kukamā hamaxpēr.

²⁰ Nē koja myyti ahtyk nhūm mytwrỳre
 haxwỳja te mry kamrô pyrāk. Pahi-
 hti Jejus akupỹn hpōx xà hā arīgro
 xwỳj ri koja mēmoj ā amnhī nhīpēx
 anē. Akupỹn hpōx xà hā arīgro koja
 mex kumrēx.

²¹ Tā koja mēhō mēmoj kot ā amnhī nhīpēx
 anhỹr ā omu nē amnhī kaxyw
 inhmā hamaxpēr nē amnhī to ixwỳ
 pa kuma nē ho ixkra nē mēmoj
 punujta pê utà. Anē.

Na pre ā Tirtūm kapēr anē nhūm finat
 Joewja mē pamā hā kagā. ²² E pa mē amā
 tanhmā Jejus jarēnh to ka mē inhma. Nā
 Najare nhō xwỳnh na pre. Mē pahte Tirtūm
 nhỹ hā kot tanhmā amnhī nhīpēx to ho
 pa hā omunh kaxyw na pre Tirtūm mē
 pahwỳr kumē nhūm ỹ hā mē panoo mā
 tanhmā amnhī nhīpēx to ho pa. Nē aa mē
 pahte mēmoj pumunh kêt kwỳ ho anhỹr o
 pa pu prem hā omu.

²³ —Tā ka prem tanhmā kaxyw aja-
 maxpēr punuj to nē apī. Tirtūm ra kot
 amnepē mā ja kukamā ja hā mē apumunh
 mex tã mē pahwỳr kumē ka mē axtem nē
 apī. Jao mē kot htỳx ri amnhī nhīpēx o
 mē pa xwỳnhjê mā agō nhūm mē kupī. Pī
 kahpa hā kunhō nhūm ty. No ām mē kajaja
 na ka prem mē kām hā amỹnē nhūm mē
 ā mē amā hprām xà hkôt hipēx anē nē mē
 amā kupī.

²⁴ —Tā nhūm Tirtūm akupỹm ho htīr
 nhūm akupỹm htīr o htīr nhūm mē htykja
 tee ri kot amnhī kôt mēnh prām kaprỳ.

²⁵ Amnepê m na pre finat Tawija Jejus akupÿm htîr kukamã harê. Te Jejus tãm kapêr pyrãk o kapêr nê kapêr o:

Na hte Pahi Maati ixkôt pa ho pa rãhã nê. Kot inhîhkô hã ixtãnopxar o pa jakamã kot paj inhmã ma hkê t nê ri ixãmnhîx ijamakêtkati nê ri ixpa.

²⁶⁻²⁷ Pa Tîrtûm? Nà kot paj nhÿrmã ixytk tã arî amnhî wÿr akãm ama. Kot kaj mê htykjê kamã ixkarô rer kêt nê. Ixte akapêr kôt amnhî nhîpêx mex o ri ixpa jakamã koja inhî kormã omnu nê hkro hkê t ri ka akupÿm ixto ixtîr. Jakamã na pa inhmã ixytk pyma hkê t nê ixkînh nê ijamakêtkati nê ri ixpa. Nê amnhî kînh jarênh rãhã ho ri ixpa.

²⁸ Na ka pre akupÿm ixto ixtîr ã amnhî jarê pa ixtîr tûm nê ixpa ho ixpa kaxyw. Tã ate ixkôt ri apa rãhã jakamã pa ixkînh nê ri ixpa. Anê.

²⁹ ã na pre mê panhîgê t finat Pahi Tawija Jejus htyk nê akupÿm htîr kukamã harênh anê. No tãm amnhî jarênh kêt nê. Tawija na pre ty nhûm mê haxã nhûm htem arî haxãr xã hã pika ho mex o pa. Tã tãm ã kot amnhî jarênh anhÿr ro nhÿx akupÿm htîr nhûm mê arî haxãr xã kaprÿ ho mex o pa hkê t nê. ³⁰ Pahi Tawi kêp Tîrtûm nhÿ hã kapêr jarênh o pa xwÿnh jakamã nhûm Tîrtûm kãm hkanrêhã htãmnhwÿ Jejusja kukamã harê nê kãm:

Koja nhÿrmã akanrêhã atãmnhwÿjê hõ amÿr pê apyrã nê mê ho amnhîptâr o pa. ãm hãmri na pa amã ja jarê. Anê.

³¹ Nhûm pre ã Tîrtûm Tawi mã mê pakaxyw ãm mã xwÿnh ta jarênh anê nhûm kuma. Nê mar tÿx jakamã hkukamã htyk nê akupÿm htîr ã harê nê hã kagã. Nê hã kagã ho:

Koja Tîrtûm mê htykjê kamã hkarô rer kêt nê nhûm aa ï omnu nê hkro kêt. Anê.

ã na pre finat Tawija Jejus Kris kukamã harê nê hã kagã anê. ³² Kot harênh xwÿnh Jejusja tãm na pre Tîrtûm akupÿm ho htîr pa mê pamjaja akupÿm htîr kãm omu. Hãmri nê mê ixte omunh xã hkôt ã mê amã harênh anê. Anê.

Nhûm pre ã Simãw Pêtre mê kãm Jejus jarênh anê. Hãmri nê mê kãm:

³³ —Na pre Tîrtûm akupÿm amnhî wÿr Kra Jejus o api. Hãmri nê kãm anê nhûm

îhkô hã mêmoj piitã ho amnhîptâr o hkrî. Hãmri nhûm Tîrtûm kot kãm amnhî jarênh xã hkôt kãm amnhî Karô gô. Tã nhûm ra amnhî pyrã nê mê ixwÿr kurê nhûm jarãhã mê ixwÿr te kuwy jakrax pyrã nê mê ixwÿr wÿr nê mê ixkarô hwÿr gjêx pa. Hãmri pa mê ÿ hã ahpÿnhã mê akapêr o ixkapêr ka mê inhma. Tã mê akwÿjaja axtem nê mê xpipãnh ã mê ixkamnhîx. ³⁴ No finat Tawija na pre tãm kaxkwa hwÿr àpir ã amnhî jarênh kêt nê. Jejus kot ï ho kaxkwa hwÿr àpirja na pre harê nê harênh o:

Na pre Tîrtûm inhô Pahihti mã kapêr nê kãm:

³⁵ “E jar inhîhkô hã nhÿ.

Pa amã mê kãm akurê xwÿnhjê gô ka mê ho amnhîptâr o akrî.” Anê.

ã na pre finat Tawija Tîrtûm kapêr jarênh anê. Nom tãm ï rãhã kaxkwa hwÿr àpir ã amnhî jarênh kêt nê. Pahihti Jejus na pre ã hã harênh anê. ³⁶ Jakamã kwa ixkwÿ Ijaew. Mê inhma nê inhmar tÿx nê. Mê ate Jejus ã axãmnhênh nhûm mê kot mê amã pî kahpa hã hpîr xwÿnh ta. Tãm na pre Tîrtûmja kêp mê panhô Pahihti kaxyw ãm. Nê kêp mê papytâr xwÿnh kaxyw mê pakaxyw ãm. Anê.

³⁷ Nhûm pre ã Simãw Pêtre mê kãm ujarênh anhÿr o xa. Hãmri nhûm mê tee ri ujarênhja ma nê hkaprî nê. Nê tee ri amnhî kukamã hamaxpêr nê hamaxpêr o:

—Hêxta waa nê. Pêr ãm hãmri na pre Jejus mê pamã amnhî jarênh tã pu prem amnhî kaxyw hkôt pajamaxpêr kêt nê axtem nê kupî. Anê.

Hãmri nê amnhî tã mê hkukja nê Simãw Pêtre mã:

—Kwa ã kot anhÿr jakamã tanhmã kot paj mê amnhî nhîpêx to? Anê.

³⁸ Hãmri nhûm mê kãm:

—Nã kêr ka mê tee ri ate amnhî tomnuj mã ajamaxpêr nê akaprî nê. Hãmri nê Jejus Kris kôt amnhî xunhwÿ. Pa mê ja hã mê apumu nê Jejus nhÿ hã mê akrã kumrã. Hãmri nhûm Tîrtûm ja hã mê apumu nê te amnhî katut kôt mê ate amnhî tomnuj piitã rênh par pyrã nê axte kãm hamaxpêr kêt nê. Hãmri nê mê ixkuxwar mê awÿr amnhî Karô rê. ³⁹ Kãm mê awÿr rênh prãm. Mê amã nê mê akanrêhã mê akra nê mê atãmnhwÿjê mã nê mê kot kormã Tîrtûm

kapër mar kêt xwýnhjê mã. ãm mẽ kot amnhĩ to hwýr xwýnh piitã nhũm kãm mẽ hwýr rênh prãm. Anẽ.

⁴⁰ Nhũm pre ã Simãw Pêtre mẽ kãm ujarênh anẽ. Mẽ kãm kapër xihtýx o kapër ry nẽ. Hãmri nẽ mẽ kãm:

—Koja nhỹrmã Tĩrtũm mẽ kot tanhmã amnhĩ tomnuj to ho mẽ pa xwýnhjaja tanhmã mẽ homnuj týx to. Jakamã kwa mẽ tokyx mẽ ate amnhĩ tomnuj kaga kê tanhmã mẽ ato hkêt nẽ. Anẽ.

⁴¹ Hãmri nhũm mẽ hkwýjaja kapër mar týx nẽ amnhĩ kaxyw Jejus kôt hamaxpër nẽ hkôt amnhĩ xunhwý. Mẽ ohtô rax nẽ hkôt amnhĩ xunhwý. Mẽ kêp 3.000 nẽ hkôt amnhĩ xunhwý. Hãmri nhũm mẽ kot Jejus nhỹ hã kapër jarênh o mẽ pa xwýnhjaja mẽ hkrã kumrãr pa. Mẽ kêp Jejus kwý hã amnhĩ to amnhĩrit kaxyw mẽ hkrã kumrãr pa. ⁴² Hãmri nhũm mẽ ra mẽ kot Jejus kôt amnhĩ nhĩpêx xwýnhjê hkôt amnhĩ nhĩpêx o pa nhũm Jejus nhỹ hã mẽ ahkre xwýnh maatijaja apkati mẽ Jejus kapër o mẽ ahkre nhũm mẽ mar týx nẽ ra Jejus kôt amnhĩ nhĩpêx mex o mỗ. Nẽ gaa nẽ hkôt amnhĩ nhĩpêx mex o pa. Mẽ kãm kapër mar prãm týx jakamã na pre htem axpên wýr akuprõ nẽ axpên kutã apku nẽ Tĩrtũm mã amnhĩ jarênh o hkrĩ. Nẽ mẽ kãm axpên to mex pix prãm o axpên kôt pa ho pa.

Jejus kwý kot tanhmã amnhĩ nhĩpêx to hã mẽ harênh

Atre 4.32-35

⁴³ Tã nhũm Jejus nhỹ hã mẽ ahkre ho mẽ pa xwýnh maatijaja xatã Tĩrtũm nhỹ hã aa mẽ kot mẽmoj pumunh kêt kwý ho anhýr o ri krĩ nhõ xwýnhjê hkôt pa nhũm mẽ piitã ja hã mẽ omu. Amnhĩ jaer pê mẽ omu nẽ mẽ kamã no puma ho tee ri tanhmã Tĩrtũm mã hamaxpër to. ⁴⁴ Nhũm mẽ kot Jejus kôt amnhĩ xunhwýr xwýnh piitã mẽmoj to axpên kutã nojarêt o pa. Jao axpên pê ri mẽmoj to õxy hkêt nẽ pa. ⁴⁵ Jakamã nhũm mẽhõ kêp amrakati nhũm mẽ ja hã omu hãmri nẽ õ pyka hkwý ho wênê rý mẽ hikukrêx kwý ho wênê nẽ kàxpore jamý nẽ ma o mra nẽ mẽ kãm kugõ. Na pre hte ã mẽ kot Jejus kôt amnhĩ xunhwýr xwýnhjaja axpên nhĩpêx anhýr o pa. ⁴⁶ Hãmri nẽ apkati mẽ Tĩrtũm mã amnhĩ jarênh xà hã

ixkre hwýr mra nẽ kãm mex o mex ã harẽ. Nẽ hamakêtkati nẽ àmnhĩx ri hkĩnh kãm axpên nhõrkwy hkôt ri apkur o pa. ⁴⁷ Pê Tĩrtũm mã mex o mex ã harênh o ri axpên kôt pa. ã mẽ kot amnhĩ nhĩpêx anhýr o pa jakamã nhũm krĩ nhõ xwýnh piitã kãm mẽ hkĩnh nẽ. Nẽ mẽ hkwýjaja apkati mẽ mẽ hwýr mra nẽ mẽ hkôt axkamẽ nẽ mẽ urak nẽ Jejus kôt amnhĩ xunhwý nhũm Tĩrtũm ja hã mẽ omu nẽ mẽ ho hkra. Jakamã nhũm mẽ ra ohtô rax kumrêx o mỗ.

3

Te grã xwýnh jarênh

Juãw 14.12-14; Atre 14.8-10

¹ Tã nhũm apkati hõ hã nhũm Simãw Pêtre mẽ Juãw wa ma Tĩrtũm mã amnhĩ jarênh xà hã ixkre hwýr wa tẽ. Na pre hte myt àhpanh grire nhũm mẽ piitã kot Tĩrtũm mã amnhĩ jarênh kaxyw hwýr mra. Jakamã nhũm Simãw Pêtre mẽ Juãw wa haxwýja ma hwýr wa mra. ² Nhũm mẽhõja hakwakrem hkrĩ. Katorxà nhõxà hkre rũm hte grã nẽ kator xwýnhnta. Nẽ arĩ hkrĩ ho hkrĩ nẽ aa kànhmã ãm nẽ ri pa hkêt nẽ. Nhũm hte hkrãmnhwýjaja apkati mẽ hamý nẽ ma o pa nẽ Tĩrtũm mã amnhĩ jarênh xà hã ixkre jakwakrem hkrĩ nhũm mẽ hwýr o hkrĩ. Hakwakreja mẽ kot kãm: “Mẽ gjêx xà mex” anhýr xwýnhnta kapem hwýr mẽ mrar xwýnhjê hwýr o hkrĩ. ³ Tã nhũm Simãw Pêtre mẽ Juãw wa tẽ nẽ ixkreja wýr wa àr o tẽ nhũm hte grã xwýnhnta wa omu nẽ kàxpore hã wa kuwý ⁴ nhũm Simãw Pêtre omu nẽ kãm:

—E amnẽ wa ixpumu. Anẽ.

⁵ Hãmri nhũm kuma nẽ htýx ho wa kot kãm kàxpore hkwý nhõr ã wa hkamnhĩx nẽ wa omu ⁶ nhũm Simãw Pêtre kãm:

—Nã ixkàxpore hkêt. Nom kot paj Jejus Kris xàhpumunh xà ho tanhmã anhĩpêx to. E pa Jejus Kris pê Najare nhõ xwýnhnta nhỹ hã amã ixkapër jakamã tokyx kànhmã xa nẽ ri mra. Anẽ.

⁷ Hãmri nẽ upôk rũm hpa hã kupy nẽ kànhmã ãm nhũm hte mex nẽ kànhmã xa nẽ amnhĩ te karo ho ri mra. ⁸ Hãmri nẽ hte mex ã amnhĩ pumu nẽ hkĩnh týx nẽ. Nẽ hkĩnh xaj ma wa hkôt harĩ ho tẽ nẽ wa hkôt ixkrem axà. Tĩrtũm mã mex o mex ã harênh pê harĩ ho wa hkôt tẽn axà. ⁹ Hãmri nhũm

mê piitã amnhĩ jaêr pê akupÿm mex ã omu nê kamã no puma nê. ¹⁰ Nê axpên mã:

—Kokÿÿ müjti na pre hte mê gjêx xà mex kamã mê hwÿr rãhã ho hkrĩ htã nhũm Tĩrtũm tanhmã ho nhũm kãnhmã xa nê ri mrar mex kurê kumrêx. Hêxta waa nê. Anê.

*Simãw Pêtre kot mê kãm ujarênh
Rukre 24.46-47; Atre 2.14-36*

¹¹ Hãmri nhũm hte mex xwÿnhja Simãw Pêtre mê Juãw wa hkôt ixkre hwÿr axà nê wa kuri xa. Nhũm mê piitã amnhĩ jaêr pê harênh ma nê hwÿr hprôt nê agjê nê omu. Mê kot ixkre nhĩkjê jarênh o: “Pahi Sarumãw nhõ” anhÿr xwÿnh jarênhja wÿr nhũm mê hprôt nê hte mex xwÿnhja kamã no puma ho kuhê. Nê kuri Simãw Pêtre mê Juãw wa omu nê axpên mã wa harênh o:

—Hêxta waa nê. Tanhmã na we wa amnhĩ to nê akupÿm kãm hte ho mex nhũm ri mra?

Anê nê wa kamã no puma nê. ¹² Hãmri nhũm Simãw Pêtre mê kuma nê mê kãm:

—Pa ixkwÿjaja. Kwa mêmõ na ka mê ri mê ixkamã ano puma ho akuhê? Xà wa ixãhpumunh tÿx xà ho na pa wa ho mex? Nã ja kot anhÿr kêt. Rÿ xà wa ixte Tĩrtũm kôt amnhĩ nhĩpêx mex o ixpaja o na pa wa ho mex? Nã mãânên ja kot anhÿr kêt. ¹³⁻¹⁷ Mê ate omunh xwÿnhja Jejus tãm kot ho mex kênã. Kot amnhĩ kaxyw kãm hamaxpêr tÿx jakamã nhũm akupÿm ho mex ka mê omu.

—Finat Apraãw nê Ijak nê Jako mê hkwyjaja kot hkôt amnhĩ nhĩpêx o pa xwÿnh pê Tĩrtũmja. Tãm na pre akupÿm Kra Jejus o htĩr nê mex o mex ã harê. Mê ate hã axãmnhênh nhũm mê kot hpĩr xwÿnhja. Pahihti Pirat kot kãm urer kaxyw tã ka mê nê kãm akapêr kãm axihtÿx nê. Nom Jejus tãm kot amnhĩ nhĩpêx o pa xwÿnh na pre. Na pre hte amnhĩ nhĩpêx mex rãhã ho pa htã ka mê axtem nê hkaga. Nhũm pahihti Pirat mê ate kot kãm urer kêt ã axihtÿx nhũm kãm urer kêt nê õ pôristi mã kugõ nhũm mê amã kupĩ. Mê kajaja mê amã hprãm xà hkôt mê amã kupĩ. Tĩrtũm kot mê pahwÿr mênh tã ka mê axtem nê apĩ.

—Nom mê ate kêp Tĩrtũm Kra hã omunh kêt jakamã na ka prem ã hipêx anê. Mê kot mê ato amnhĩptar xwÿnhjê mê na ka prem amarĩ apĩ. Na prem mê axãmnhênh xà hkôt

mê amã pĩ kahpa hã kunhõ nê ã hpĩr anê. Kêp akupÿm mê pahto mê pahtr xwÿnh tã ka prem axtem nê apĩ. No nhũm Tĩrtũm akupÿm ho htĩr pa prem akupÿm htĩr kãm omu.

¹⁸ —Amnepêp Tĩrtũm nhÿ hã kapêr jarênh o mê pa xwÿnhjaja na prem Tĩrtũm kot mê pakaxyw ãm xwÿnhja kukamã tanhmã harênh to nê hã kagã nê mê kãm harênh o pa. Kot amnhĩ xà htÿx kãm hamak kãm htykja kukamã nhũm pre htem harênh o pa. Tã ã Tĩrtũm kot kukamã harênh anhÿr xãja kôt ka mê ã hipêx anê nê apĩ.

¹⁹ —Jakamã kwa mê tee ri mê ate amnhĩ tomnuj ã amnhĩ pumu nê tokyx hkaga. Hãmri nê amnhĩ to Tĩrtũm wÿ kê mê anê mê ate amnhĩ tomnuj piitã amnhĩ katut kôt rênh pa. ²⁰ Hãmri nê mê ato mex nê ka mê kukwak ri akĩnh nê ajamakêtkati nê axãmnhix ri apa. Kojã nhÿrmã akupÿn mê pahwÿr Jejus mê. Ra kot mê pakaxyw ãm kênã.

²¹ —Nom koja tokyx akupÿn wrÿk kêt nê. Kojã kormã kaxkwa kamã pa rãhã nhũm Tĩrtũm akupÿm kot mêmõj piitã ho mex par mê nhũm rĩ kormã akupÿn mê pahwÿr wrÿ. Amnepêp Tĩrtũm nhÿ hã kapêr jarênh o pa xwÿnhjaja kot ja kukamã harênh nê hã kagã xà hkôt.

²² —Na pre finat Mojes haxwÿja Tĩrtũm nhÿ hã mê pahpãmjê mã tanhmã ja jarênh to nê harênh o:

Kojã nhÿrmã mê panhõ Pahi Maati Tĩrtũmja te kot ra mê akaxyw pa ixãmja pyrã nê axte mê panhĩõ xãm. Mê panhĩõ koja. Kojã nhÿrmã inhmÿr pê mõn pøj nê mê amã Tĩrtũm kapêr jarênh o pa. Ka mê kapêr ma nê mar tÿx nê kapêr kôt amnhĩ nhĩpêx o ri apa.

²³ Kojã mêmõ kuma nê ãm kuma nê hkôt amnhĩ nhĩpêx kêt nê nhũm Tĩrtũm tee ri ja hã omu nê kêp hkra hkêt ã harênh kurê kumrêx. Anê.

²⁴ ã na pre finat Mojesja mê kãm Jejus kukamã ujarênh anê. No ãm tapxipix na pre ã harênh anhÿr kêt nê. Tĩrtũm nhÿ hã mê kapêr o mê pa xwÿnh piitã na prem ã mê kãm harênh anhÿr o pa. Kot harênh o pa xwÿnh kot wa finat Sãmuewja nê hkôt mê hkwyjê piitã ã Jejus kukamã hkwyjê mã harênh anhÿr o pa.

25 –Tã mẽ pahpê mẽ hkamrô hkwy na pu mẽ. Mẽ pahpê mẽ hkanrêhã mẽ htàmnhwỳ. Mẽ pakaxyw na pre Tĩrtũm ã mẽ kãm kapêr anê. Nê Kraja kukamã finat Apraãw mã kãm:

Koja nhỹrmã akanrêhã atàmnhwỳjê hõ pyka piitã hkôt mẽ piitã mẽ ho mex o pa nhũm mẽ kukwak ri mex kumrêx nê ri pa. Anê.

26 ã kot Kra hkukamã harênh anhỹr tã mẽ pakumrêxjê hwỳr na pre kumẽ. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpê Ijaew kumrêxjê hwỳr kumẽ. Anê.

Nhũm pre ã Simãw Pêtreja hte grà xwỳnh pumunh o mẽ kuhê xwỳnhjê mã ujarênh anê.

4

Simãw Pêtre mẽ Juãw wa kot mẽ àptàr tũmjê mã kapêr ã wa harênh

Rukre 21.12-13

1-4 Nhũm Simãw Pêtre mẽ Juãw wa arĩ mẽ kãm Tĩrtũm kapêr jarênh o wa xa nê mẽ kãm:

–Nà na pre Jejus ty nhũm Tĩrtũm akupỹm ho htĩr. Tã kot akupỹm ho htĩr jakamã koja nhỹrmã uràk nê akupỹm mẽ htyk xwỳnh piitã mẽ ho htĩr pa. Anê.

Hãmri nhũm mẽ kot wa mar o kuhê xwỳnh kwỳjaja wa kuma nê wa hkôt hamaxpêr nê wa urà nê Jejus kôt amnhĩ xunhwỳ. Jakamã nhũm ra mẽ kot Jejus kôt amnhĩ xunhwỳr xwỳnhjaja ohtô rax kumrêx. Ra mẽ kêp 5.000.

Hãmri nhũm axtem mẽ hkwyjaja wa hwỳr mra nê wa mar o kuhê. Mẽ õ patre nhõ pòristi krãhtũm mẽ Satusew nhõ xwỳnh kwỳjê mẽ nhũm mẽ ma Simãw Pêtre mẽ Juãw wa hwỳr mra nê tee ri wa kot mẽ ahkre hã wa mar o kuhê. Nê mẽ kãm akupỹm mẽ htĩr jarênhja ma nê wa kamã gryk nê. Satusew nhõ xwỳnhjaja na pre htem akupỹm mẽ htĩr kôt hamaxpêr kêt jakamã nhũm wa akupỹm mẽ htĩr jarênh nê mẽ tee ri wa kuma nê hamaxpêr punuj nê wa kamã gryk kato. Hãmri nê wa hã amỹnê nhũm mẽ wa unê nê ma wa o tẽ nê mẽ hagjênh xà kamã wa haxà. Ra myt grire nhũm mẽ wa haxà. Wa kot mẽ

hagjênh xà kamã hã apkati nhũm rĩ kormã mẽ kot ujarênh ã tanhmã wa ho kaxyw.

5-6 Tã nhũm apkati nhũm mẽ ohtô nê wa ujarênh ã wa mar kaxyw Jerujarê kamã axpên wỳr akuprô. Ijaew pigêtjaja nê mẽ àptàr tũm kwỳjaja. Nê mẽ kot finat Mojes kapêr o mẽ ahkre ho mẽ pa xwỳnhjaja. Nê mẽ õ patre maati Anas mẽ hkwyjaja. Nê Ijaew nhõ juisti Kajpas mẽ Juãw õ mẽ Aresãnja. Nhũm mẽ kot Simãw Pêtre mẽ Juãw wa mar kaxyw axpên wỳr akuprô. 7 Hãmri nê wa hã karô nhũm pòristi wa hwỳr tẽ nê wa haprô nê ma mẽ hwỳr wa o tẽ nê wa ho axà nê mẽ kutã wa ỹr nhũm wa nhỹ. Hãmri nhũm mẽ wa omu nê wa kãm:

–E mẽ inhmã amnhĩ jarê. Mẽhõ xàhpumunh xà ho na ka pre wa hte grà xwỳnhhta ho mex? Mẽhõ na pre hwỳr war amê ka wa ho mex? Anê.

8 Hãmri nhũm Simãw Pêtre mẽ kãm awjarê. Tĩrtũm Karô kot kãm hamaxpêr o hihtỳx jakamã nhũm ỹ hã Ijaew pigêtjê mẽ mẽ àptàr tũmjê mã awjarê nê mẽ kãm:

9 –Tõe mẽhõ kot ho mex xwỳnhja ã mẽ ate wa ixkukjêr 10 jakamã kot paj mẽ amã harê ka mẽ ixte harênhja ma. Wa ixpyrà nê mẽ apê Ijaew kêr ka mẽ wa ixkapêr mar tỳx nê. Jejus Kris pê Najare nhõ xwỳnhhta. Mẽ ate hpĩr nhũm Tĩrtũm kot akupỹm ho htĩr xwỳnhhta. Tãm na pre àhpumunh tỳx o akupỹm hte grà xwỳnhhta o mex. ỹ hã ixte kaxyw kãm ixkapêr nhũm tãm akupỹm ho mex. 11 Tĩrtũm kot mex o mex ã harênh nê mẽ pakaxyw ãm tã ka prem axtem nê hkaga. Nom Tĩrtũm kapêr ã kagà htũm kot ra mẽ akukamã ã mẽ ate amnhĩ nhĩpêx anhỹr ã mẽ ajarênh nê mẽ ajarênh kot:

Mẽ kot kên o amnhĩm òrkwỹ nhĩpêx kaxyw nê nhỹri kên maati pumu nê htỳx omnuj ã hkamnhĩx nê hkaga. Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx.

Anhỹr o kot mẽ ajarênh. Te mẽ ate kên maati kaga xwỳnh ã mẽ ajarênh pyràk. Tã ka mẽ ã mẽ kot mẽ akukamã mẽ ajarênh anhỹrja kôt te mẽ ate kên maati kaga pyrà nê Jejus kaga nê apĩ. Tĩrtũm kot amnhĩm mex o mex ã omunh nê harênh tã ka prem axtem nê hkaga. 12 Tapxipix na hte mẽ panê mẽ pahte amnhĩ tomnuj rê. Mẽhõ

koja uràk nê àhpumunh tỳx o mẽ panê kurê? Mèhõ koja ahpỳnhã pyka piitã hkôt uràk nê ã mẽ panhĩpêx mex anê? Nà ãm amrakati kumrêx. ãm Jejus pix. Tapxipix na pre Tirtũm ja kaxyw ãm jakamã tapxipix na kêp mẽ pahkaprĩ xwỳnh maati. Anê.

¹³ Nhũm pre ã Simãw Pêtreja mẽ kãm kapêr anê. Hãmri nhũm mẽ amnhĩ jaêr pê kuma nê axpên mã:

—Kwa wa kãm mẽ pahpyma wa hã hkwy jêt kêt kumrêx. Te ri wa htỳx ri wa pa pyràk tã wa hamaxpêr tỳx kumrêx. Mãn wa kêp Jejus kôt mẽ pa ho mẽ pa xwỳnh kwỳ jakamã na wa ã kapêr anê nà? Anê.

¹⁴ Hãmri nê tee ri kot tanhmã mẽmoj tã wa kãm àkjêr to hkukamã hamaxpêr. No nhũm hte grà xwỳnh ra kot mẽ hwỳr àr nê Simãw Pêtre wa kuri mex nê ãm nhũm mẽ kot no ho omunh jakamã wa kãm àkjêr kêt nê. ¹⁵ Hãmri nê wa kãm anê nhũm wa mẽ kêp kato nê kapôt ã xa nhũm mẽ tanhmã wa kãm nê kaxyw wa hã axpên ma nê axpên mã:

¹⁶ —Kwa tanhmã kot puj mẽ wa ho? Ra jar Jerujarê kamã mẽ piitã mẽ kot akupỳm hte grà xwỳnh ta mex ã wa omunh kênã kot puj kêt mẽ kãm wa kot ho mex hkêt ã wa harê. ¹⁷ Tã mẽ kot harênh o hprôt pymaj kot puj mẽ axte Jejus jarênh o pa nê wa hkurê. Kê hte grà xwỳnh jarênhja ãm jar mẽ pakamã hapêx. Nà kot puj mẽ ã wa kãm karõ anê. Anê.

¹⁸ Nhũm mẽ wa hã axpên mar pa hãmri nê akupỳn wa hã karõ nhũm wa akupỳn mẽ hwỳr axà nhũm mẽ wa kãm:

—E Simãw Pêtre mẽ Juãw wa. Wa mãmrĩ ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nê. ãm kwarĩ ho kwarĩ. Anê.

¹⁹ Hãmri nhũm wa tee ri mẽ kuma nê mẽ kãm:

—Nà Tirtũm tãm kot ja hã wa inhmã karõ kênã kot pa kêt wa mẽ akapêr ma nê harênh o ixpa hkêt nê. ²⁰ Na pa pre wa Jejus kôt ri ixpa nê xatã kot tanhmã amnhĩ nhĩpêx to hã omunh o hkôt ixpa. Nê xatã tanhmã mẽ ahkre hto hã mar o hkôt ixpa. Nê akupỳm htĩr kãm omu. Jakamã tanhmã kot pa wa amnhĩ to nê mẽ kãm ja jarênh kêt nê? Nà

kot pa wa mẽ akapêr mar xa hkôt ã amnhĩ nhĩpêx anhỳr hkêt nê. Anê.

²¹⁻²² Hãmri nhũm mẽ kuma nê tee ri mẽ kot tanhmã wa ho kaxyw. Te grà xwỳnh ta hte grà nê hkrĩ ho hã amgrà pê 40 tã ra akupỳm mex nhũm mẽ piitã ja hã omu nê hã axpên mã Tirtũm mex o mex ã harênh o ri pa. Jakamã nhũm mẽ utàr xwỳnhjaja mẽ kuma nê kãm mẽ uma nê. Hãmri nê mẽ umaj tanhmã Simãw Pêtre mẽ Juãw wa ho hkêt nê. ãm axte wa kot Jejus jarênh o pa nê wa kãm kapêr kãm hihtỳx nê wa hano nhũm wa ma tẽ.

Mẽ kot amnhĩ to Tirtũm wỳr ã mẽ harênh Matêwre 18.19-20

²³ Tã nhũm Simãw Pêtre mẽ Juãw wa ma akupỳm Jejus kôt htõ nê htõxjê hwỳr wa tẽ nê mẽ kãm amnhĩ jarê. Nê patre krãhtũmjê mẽ mẽ àptàr tũmjaja kot Jejus kapêr jarênh nê wa hkurê kamã hihtỳxja nhũm amnhĩ tã mẽ kãm mẽ harê. ²⁴ Hãmri nhũm mẽ wa kuma nê amnhĩ to Tirtũm wỳr kurê kumrêx nê kãm:

—Pa Pahi Maati? Nà mẽmoj piitã ho akator xwỳnh ta na ka. Na ka pre kaxkwa ho akato nê pyka ho akato nê gô xujanãr o akato. Hãmri nê kamã mẽmoj piitã ho akator pa. ²⁵⁻²⁶ Amnepêr na pre mẽ inhĩgêt Tawija amã tanhmã amnhĩ nhĩpêx to ho pa. Nê Akarõ nhỹ hã akapêr kwỳ jarê nê hã kagà. Nê kagàja kamã mẽ kot Pahihti Jejus kutã amnhĩ xunhwỳr xwỳnhjê jarê nê mẽ hã kagà. Mẽ hkukamã mẽ hã kagà nê mẽ hã kagà ho:

Mẽmo mỳrapê na prem Ijaew kêt xwỳnhjaja Tirtũm kutã amnhĩ xunhwỳ?

Nê Ijaew haxwỳja. Mẽmo mỳrapê na prem htỳx ri hamaxpêr o ri pa?

Nê pyka piitã hkôt pahijaja na prem Pahi Maati kutã amnhĩ xunhwỳr pa.

Nê kot mẽ pakaxyw ãm xwỳnh Jejus Krisja nhũm mẽ mãânên kutã amnhĩ xunhwỳr pa.

Nê mẽ kot hpĩr kaxyw mẽ kãm hã amỳnê.

Kwa mẽmo mỳrapê na prem axtem nê ã amnhĩ nhĩpêx anê? Anê.

ã na pre finat Tawija Akarõ nhỹ hã mẽ harê nê hã kagà anê Tirtũm. ²⁷ ãm hãmri na pre mẽ hkukamã mẽ hã kagà. Ra mẽ kot ã amnhĩ nhĩpêx anhỳr kênã. Krĩ ja kamã na prem ã amnhĩ nhĩpêx anhỳr kaxyw axpên

wÿr akuprõ. Pahi Erox nê pahi Põn Pirat nê mẽ ixkwÿjaja nê mẽ kêp Ijaew kêt xwÿnhjaja axpên wÿr akuprõ nê Akra Jejus kutã amnhĩ xunhwÿ nê mẽ kot hpĩr kaxyw hã amÿnê. Kot tãm amnhĩ nhĩpêx o pa nhũm ate mẽ ixkaxyw ãm xwÿnhja nhũm mẽ axtem nê kutã amnhĩ xunhwÿ.

²⁸—Nom amnepêm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhÿr ã mẽ omu. Mẽ kot tanhmã apê Akra Jejus to nê hpĩrta kukamã ka pre hã mẽ omu. Tã mẽ ixwÿr amê nhũm prem kupĩ. No ãm ajamaxpêr xà hkôt.

²⁹—Tã ka mẽ omu. Na mẽ Jejus ã mẽ ixkamã gryk tÿx nê tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwÿnhjaja ka tanhmã mẽ ixkrã hto pa mẽ inhmã mẽ uma hkêt nê mẽ hkôt ixpa ho ixpa. Mẽ kot tanhmã mẽ ixto hã mẽ ixkagrõnh tã pa mẽ inhmã mẽ uma hkêt nê ixãmnhĩx ri ixkĩnh nê ri ixpa. Nê anhÿ hã mẽ kutã amnhĩ to htÿx nê arĩ mẽ kãm akapêr jarênh o ri mẽ hkôt ixpa. Mẽ kot Jejus ã tanhmã mẽ ixto htãã.

³⁰—Akra Jejus mex o mex jakamã kot paj mẽ àhpumunh tÿx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwÿnhjaja akupÿm mẽ o mex. Nê mẽ kot aa mẽmoj pumunh kêt kwÿ ho anê. Kê mẽ omu nê axàhpumunh o axàhpumunh ã apumunh mex kurê kumrêx. E ãm ja pix na ra hapêx. Anê.

³¹ Nhũm prem ã amnhĩ to Tĩrtũm wÿr anê. Puh nhũm ixkreja mẽ kãm htertet tÿx nê nhũm Tĩrtũm Karõ axte tanhmã mẽ hkrã hto nhũm mẽ ÿ hã kãm mẽ uma hkêt nê. ãm amnhĩ to htÿx nê mẽ kãm Tĩrtũm kapêr jarênh rãhã ho ri mẽ hkôt pa.

Jejus kwÿjaja tanhmã kot axpên nhĩpêx to hã mẽ harênh

Atre 2.42-47

³²⁻³³ Nhũm Jejus nhÿ hã mẽ ahkre ho mẽ pa xwÿnh maatijaja. Na pre Tĩrtũmja mẽ ho mẽ kãm ma hkêt jakamã nhũm pre htem akupÿm Jejus htĩr kôt mẽ kãm harênh o ri mẽ hkôt pa. Nhũm Tĩrtũm mẽ kot Jejus kôt amnhĩ xunhwÿr xwÿnh piitã mẽ kutã nojarêt rãhã ho pa nhũm mẽ ra ohtô rax nê. Nê mẽ kãm axpên to mex pix prãm o ri axpên kôt pa. Mẽ ohtô htã te mẽ tipxi pyrãk.

Nê axpên pê mẽmoj to õxÿ hkêt nê. Na pre htem axpên mã mẽ hikukrêx nê mẽ apkur xà jarênh o: “Inhõ pix kêt mẽ pahpiitã mẽ panhõ na.” Anhÿr o ri mẽmoj tã axpên kutã nojarêt o ri pa. No kêt axpên mã mẽmoj jarênh o: “Tk. Nà ãm inhõ pix na.” Anhÿr o harênh kêt nê. ³⁴⁻³⁵ Na pre htem tõhã õ ixkre hõ ho wênê. Rÿ õ pyka hkwÿ ho wênê nê kàxpore jamÿ nê ma o mra nê Jejus nhÿ hã mẽ ahkre ho mẽ pa xwÿnhjê mã kugõ nhũm mẽ hamÿ nê mẽ kêp amrakati xwÿnhjê mã ho anhgrã. Hãmri nhũm mẽ amnhĩm hamÿ nê ho amnhĩm awjaprõ. Jakamã na pre hte mẽ hkwÿjaja kãm prãm nê ri pa rÿ ê hkêt nê ri pa hkêt nê.

³⁶⁻³⁷ Jujere na pre ã amnhĩ nhĩpêx anê nê mẽ kaxyw õ pika hkwÿ ho wênê. Hãmri nê kàxpore py nê o tẽ nê Jejus nhÿ hã mẽ ahkre xwÿnh maatijê mã kugõ. Jujereja Ijaew nhõ patre ho ajuta xwÿnh na pre. Gõ hipõk pê Sipre kamã na pre kato. Kêp Jujere htã no nhũm Jejus nhÿ hã mẽ ahkre ho mẽ pa xwÿnhjaja na prem kãm: “Panãpe” Anê. Mẽ kapêr kãm Panãpeja te kêp “mẽ hamaxpêr o mẽ hihtÿx o pa xwÿnh” anhÿr pyrãk. Jakamã nhũm õ pika hkwÿ ho wênê nê kàxpore py nê o tẽ nê Jejus nhÿ hã mẽ ahkre xwÿnhjê mã kugõ nhũm mẽ kupy nê mẽ kêp amrakati xwÿnhjê mã ho anhgrã.

5

Ananĩs mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

¹ Tã nhũm Ananĩs mẽ hprõ Sapire wa Jujere jarênh ma nê urãk nê õ pyka hkwÿ ho wênê. ² Hãmri nê kàxpore py. Nom na pre wa ra hã axpên ma. Jakamã nhũm Ananĩs Jujere kĩnhã kàxpore hkwÿ pix py nê o tẽ nê Jejus nhÿ hã mẽ ahkre xwÿnh maatijê mã kugõ. Nom katãt kôt mẽ kãm õr ã amnhĩ jarênh kêt nê. Kot kàxpore ho pikjêr nê amnhĩm hkwÿ ho àrĩk ã amnhĩ jarênh kêt nê. ãm mẽ kãm amnhĩ jarênh o hêx. Te piitã õr par pyrãk o amnhĩ nhĩpêx nê mẽ kãm:

—E ota ixkàxporeta. Na pa wa inhõ pika hkwÿ ho wênê nê kàxpore hpy nê hpãnhã Jujere pyrã nê man mẽ awÿr piitã o tẽ. Anê.

³ Hāmri nhūm Simāw Pêtre ra ã kot amnhĩ nhĩpêx anhÿr ã omu hāmri nê kām:

—Tk. Kwa mon ka axtem nê Satanasti kapêr ma nê hkôt amnhĩ nhĩpêx nê te akàxpore piitã òr pyràk ã amnhĩ to axêx anê? Te ate piitã òr pyràk tã no ãm hkwÿ pix gō. Hêxta waa nê. Na ka axtem nê Tirtūm Karō mā akàxpore nhōr par o axêx.

⁴ Anhō pyka kênã. Nê hpānhã kàxporeja anhō kênã. Kot kaj amã tanhmã ho hprãm xà hkôt māmri tanhmã ho. Amã piitã ho axarĩk prãm nê māmri piitã ho arĩk. Rÿ amã hkwÿ hpix nhōr prãm nê māmri hkwÿ pix gō. No ri ate òr par pyràk o amnhĩ to axêx kêt nê. Te ate mē inhmã pix mā axêx pyràk nom mē inhmã pix mā hkêt. Na ka määnên te Tirtūm mā axêx pyràk. Anê.

⁵⁻⁶ Nhūm pre ã Simāw Pêtre Ananĩs mā kapêr anê nhūm kuma nê pykap tēm nê htyk kurê kumrêx. Hāmri nhūm mē aptar nywjaja hwÿr tē nê kupêxê ho hkupu nê kumÿ nê ma o tē nê haxà. Hāmri nhūm mē kot ã kot amnhĩ nhĩpêx anhÿr ã harēnh mar xwÿnhjaja tee ri harēnh ma nê kām ma htÿx nê.

⁷ Tã nhūm ra hã ahtūm nê. Ra hã 3 ore nê hapêx nhūm Ananĩs prō Sapireja htÿx hamakêtkati nê mē hwÿr tē nê axà. Kormã mjên htyk ã harēnh mar kêt nê hamakêtkati nê hkĩnh nê mē hwÿr tē nê axà. ⁸ Hāmri nhūm Simāw Pêtre omu nê hêx rom hkukja nê kām:

—Pa? E kwa inhmã mēmoj jarē. Tanhmã na prem war anhō pykaja pānhã war amã amnhĩrer to? Xà ãm hāmri na amjên mē inhmã harē nà? Anê.

Hāmri nhūm kuma nê mjên pyrà nê kām ho hêx nê kām:

—ÿÿ. ãm hāmri kot amã harēnh kênã. Anê.

⁹ Hāmri nhūm Simāw Pêtre tee ri kuma nê kām:

—Tk. Hêxta waa nê. Kwa mon ka war ajamē war akàxpore ho te Tirtūm mā axêx pyràk? Mãn ka wa ajamaxpêr o: “Koja Tirtūm ja hã wa ixpumu nê ãm hã wa ixpumu nê tanhmã hã wa ixto hkêt nê.” Anhÿr o mãn ka wa ajamaxpêr nà? Nom na ka wa ãm kām axêx kaprÿ. Onêj ra mē kot amjên jaxàr xwÿnhjaja akupÿn hpôx o mra. Koja mē anhĩpêx o te hipêx pyrà nê määnên ato tē nê ajaxà ka rĩ amnhĩ pumu.

¹⁰ Anê nhūm kuma nê mjên pyrà nê pykap tēm nê htyk kurê kumrêx. Hāmri nhūm mē kot mjên jaxàr xwÿnhjaja mra nê mē hwÿr agjê nê omu nhūm ra htyk mex nê nō nhūm mē kumÿ nê ma o tē nê mjên nhĩhkô hã haxà. ¹¹ Hāmri nhūm mē piitã wa harēnh ma nê kām ma htÿx nê. Mē kot Jejus kôt amnhĩ xunhwÿr xwÿnhjê mē amarĩ ri mē pa xwÿnhjaja nhūm mē tee ri wa hkukamã hamaxpêr o kām ma htÿx kumrêx.

Mē kot aa mēmoj pumunh kêt kwÿ ho anhÿr ã mē harēnh

Makre 16.17-20; Atre 19.11-12

¹²⁻¹⁴ Na pre hte Jejus kôt mē kot amnhĩ xunhwÿr xwÿnhjaja xatã Tirtūm mā amnhĩ jarēnh xà hã ixkre hwÿr akuprō. Mē kot ixkre nhĩkjê mā: “Pahi Sarumāw nhō” anhÿr xwÿnh jarēnhja wÿr nhūm pre htem akuprō. Nhūm mē piitã kām mē hkĩnh nê mē ohtō nê mē hkôt akuprō nê mē uràk nê Jejus kôt amnhĩ xunhwÿ. Mēnijaja nê mēmyjaja. No nhūm mē hkwÿja Ananĩs mē Sapire wa kot amnhĩ nhĩpêxja mā hamaxpêr nê kām mē hkôt mrrar pyma nê. Kām mē hkĩnh tã kām mē hkôt mrrar pyma nê.

Nhūm pre hte Jejus nhÿ hã mē ahkre ho mē pa xwÿnhjaja aa mē kot mēmoj pumunh kêt kwÿ ho anhÿr o ri mē piitã mē hkôt pa. ¹⁵ Jakamã nhūm pre htem mē à xwÿnhjê jamÿ nê ma mē hwÿr mē o mra nê Simāw Pêtre kutêp pry kamã mē haxwÿ nê mē kām:

—E mē jar anhĩkwÿ. Kê Simāw Pêtre ja kôt mē ajānh tē nê mē akupênh o akupÿm mē ato mex rÿ nhūm hkarō pix mē atã harir ka mē akupÿm amex japêr.

Anhÿr o mē kām kapêr hāmri nhūm mē kupip kām kutêp hikwÿ. ¹⁶ Nê Jerujarē pu hã krĩ hkwÿ kamã. Mē à xwÿnhjaja nê mēkarōmnuti kot tanhmã mē ho xwÿnhjaja nhūm pre htem mē hamÿ nê ma mē ihkrep mē o mra nhūm mē piitã akupÿm mex pa.

Mē kot Jejus kwÿjê jagjênh ã mē harēnh

Rukre 21.12-15; Juāw 15.26-27; Atre 4.1-22

¹⁷ Tã nhūm mē ò patre maati mē hkrāmnhwÿ Satusew nhō xwÿnhjaja tee ri

akupÿm mẽ mex ã mẽ harënh ma nẽ axpẽn mã:

—Tk. Kwa na mẽ ra ohtô nẽ Jejus gryk ã mẽ pahte mẽ ahkre kaga nẽ ãm hkôt pix mã ri amnhĩ nhĩpêx o pa. Anẽ.

Hãmri nẽ Jejus nhỹ hã mẽ ahkre maati xwÿnhjê kamã gryk nẽ ra tanhmã mẽ ho kaxyw. ¹⁸Hãmri mẽ unê nẽ mẽ hagjê nhũm mẽ hagjênh xà kamã hkrĩ hpa.

¹⁹Tã nhũm kamàt nhũm Tĩrtũm kapêr o mẽ wrÿk xwÿnhja ma mẽ hagjênh xà hwÿr mẽ hwÿr wrÿ nẽ mẽ hwÿr axà nẽ mẽ kãm hakwakre kahê xà mẽ nẽ mẽ kator pa. Hãmri nẽ mẽ kãm:

²⁰—E mẽ ma akupÿm Tĩrtũm mã amnhĩ jarënh xà hã ixkre hwÿr mra nẽ axte mẽ kãm awjarê. Tanhmã mẽ kot amnhĩ nhĩpêx to nẽ Jejus kôt amnhĩ nhĩpêx nyw o amnhĩ nhĩpêx ã mẽ kãm hã karô kê mẽ ama. Anẽ.

²¹Hãmri nhũm mẽ kuma nẽ ma akupÿm hwÿr hapêx kurê kumrêx. Nhũm myt kator o mör mẽ nhũm mẽ hwÿr agjê nẽ mẽ kãm Tĩrtũm kapêr jarënh o kuhê.

Tã nhũm mẽõ patre maati mẽ hkôt ri mẽ pa xwÿnhjaja amnhĩ wÿr mẽ àptâr tũm xwÿnhjê hwÿ nhũm mẽ piitã axpẽn wÿr pikuprõnh pa. Hãmri nẽ htÿx arĩ Jejus kwÿjaja mẽ hagjênh xà kamã mẽ hkrĩ hã mẽ hkamnhĩx nẽ amnhĩ wÿr mẽ hã karô.

²²Nhũm pōristijaja ma kot mẽ haprōr kaxyw mẽ hagjênh xà hã ixkre hwÿr mra nẽ tee ri kamã mẽ hapêr nhũm mẽ kamã amrakati. Hãmri nhũm mẽ akupÿm mẽ pikuprõnh xwÿnhjê hwÿr hprōt nẽ mẽ kãm:

²³—Nà na pōristi hkwyjaja arĩ hakwakrem ixkre jamār mex nhũm hakwakre arĩ kahê htÿx nẽ xa. Tã pa mẽ hwÿr agjê nẽ tee ri hkre kamã mẽ hapêr nhũm mẽ kamã amrakati kumrêx. Anẽ.

²⁴Hãmri nhũm mẽ kuma nẽ tee ri hamaxpêr. ²⁵Rôm nhũm ja mẽ hwÿr tẽn axàn mẽ kãm:

—Kwa jãã mẽ ate mẽ hagjênh xwÿnhjaja na mẽ axte Tĩrtũm mã amnhĩ jarënh xà hã ixkre kamã mẽ ahkre ho kuhê pa ham mẽ omu nẽ mẽ kurũm tẽ. Anẽ.

²⁶Hãmri nhũm patre nhõ pōristi krāhtũmja kuma nẽ mẽ hwÿr pōristi hkwy rē nhũm mẽ ma mẽ hwÿr mra nẽ mẽ hwÿr agjê nẽ kê axte mẽ unê nẽ akupÿm mẽ o mra. Nom tanhmã mẽ ho hkêt nẽ. Mẽ kot

hkôt ri mẽ pikamēnh xwÿnhjê pymaj mẽ ho mex nẽ mẽ o mō. Nẽ mẽ hã axpẽn mã:

—Nà kot puj mẽ tanhmã mẽ ho nhũm mẽ ja hã mẽ pahpumu nẽ kẽn o mẽ pahkapê nẽ tanhmã amnhĩ to nẽ hã mẽ panhĩmex. Anẽ.

²⁷Hãmri nẽ mẽ ho mex nẽ akupÿm mẽ o mōn mẽ hwÿr mẽ ho agjê nẽ mẽ pikuprõnh xwÿnhjê kutã mẽ hkrĩ. Hãmri nhũm mẽõ patre maati ja mẽ kãm:

²⁸—Kwa ra mẽ ixte Jejus kapêr jarënh nẽ mẽ akurê htã ka xep mẽ ãm mẽ inhma nẽ arĩ mẽ kãm harënh o ri apa. Nẽ jar Jerujarê kamã mẽ piitã mẽ kãm harê. Nẽ mẽ pajaja mẽ ixte Jejus pĩr ã ka mẽ ri mẽ kãm mẽ ijarënh o apa. Anẽ.

²⁹Hãmri nhũm Simāw Pêtre mẽ kuma nẽ mẽ amnhĩ tã mẽ kãm kapêr nẽ mẽ kãm:

—Tÿ kot kaj mẽ Tĩrtũm kapêr kuhpa hã mẽ inhmã mẽmoj tã karô pa mẽ ama nẽ ãm mẽ ama nẽ ãm Tĩrtũm kapêr pix ma nẽ hkôt ri amnhĩ nhĩpêx. ³⁰Amnepêm mẽ panhĩgêtjaja na prem Tĩrtũm kôt pix mã amnhĩ nhĩpêx o pa. Tã ka prem axtem nẽ kêp mẽ kãm Kra Jejus ã amÿnê nhũm mẽ pĩ kahpa hã kunhó nẽ kupĩ. Nom nhũm Tĩrtũm akupÿm ho htĩr ³¹nẽ kêp mẽ panhõ Pahihti hã harê. Nẽ kêp mẽ pahkaprĩ xwÿnh mex ã harê. Hãmri nẽ ra amnhĩ ri ÿr nhũm ìhkô hã mẽmoj piitã ho amnhĩptâr o hkrĩ. Nhũm kãm: “Koja Ijaew mẽ kot amnhĩ tomnuj kaga nẽ akôt amnhĩ xunhwÿ pa ja hã mẽ omu nẽ amnhĩ katut kôt mẽ kot amnhĩ tomnuj rēnh pa nẽ mẽ ho ixkra.” Anẽ. ³²Tã mẽ pajaja mẽ ixte Jejus htyk nẽ akupÿm htĩr ã omunh mex jakamã na pa hte Tĩrtũm Karô nhỹ hã ã mẽ amã harënh anẽ. Karōja na pre Tĩrtũm mẽ ixte hkôt amnhĩ nhĩpêx xwÿnhjê hwÿr kurê nhũm mẽ ixwÿr wrÿ nẽ mẽ ixkarô mã agjê. Tã ÿ hã na pa htem ri ã harënh anhÿr o ri mẽ akôt ixpa. Anẽ.

³³Hãmri nhũm mẽ kuma nẽ mẽ kamã gryk tÿx nẽ. Nẽ mẽ kãm mẽ himex prãm nẽ mẽ kãm mẽ hã amÿnê. ³⁴Hãmri nhũm Kamariewtija tee ri ja hã mẽ omu hãmri nẽ kãnhmã xa nẽ Jejus nhỹ hã mẽ ahkre xwÿnh maati jê xyr pẽ hkwyjê mã kapêr. Parijew nhõ xwÿnh na pre. Nẽ kêp Tĩrtũm kapêr ã kaga htũm o mẽ ahkre ho pa xwÿnhjê hõ na pre. Nhũm mẽ piitã kãm hkĩnh nẽ.

Jakamã nhũm kànhmã xa nẽ pôristi mã anẽ nhũm mẽ amnhĩ nẽ Jejus nhỹ hã mẽ ahkre ho mẽ pa xwỳnhjê kator nhũm mẽ kapôt ã kuhê. ³⁵ Hãmri nhũm Kamariewtija mẽ nẽ tanhmã mẽ kãm kapêr to nẽ mẽ kãm:

—E ixkwỳjaja. Kwa kêr pu mẽ tanhmã mẽ ho hkukamã pajamaxpêr mex nẽ. ³⁶ Mãn arĩ mẽ ate finat Tetastija jarênh ã anohtỳx nẽ ho apa japêr. Mytwrỳ hõ hã na pre mẽ kãm amnhĩ to rax ã amnhĩ jarênh o pa. Hãmri nhũm hkôt ri mẽ pa xwỳnhjaja ohtô nẽ. Mẽ kêp 400. Tã nhũm prem mẽ kêp Tetasti pĩ nhũm hkôt ri mẽ pa xwỳnhjaja axpên pẽ angrã nẽ ma hapêx.

³⁷ —Tã nhũm mẽ kot mẽ piitã mẽ ho kôta xà hã arĩgroja ã nhũm Garirej nhõ xwỳnh pẽ finat Jut haxwỳja hkôt mẽ pa xwỳnhjaja ohtô nẽ. Tã nhũm mẽ mãânên mẽ kêp kupĩ nhũm hkôt ri mẽ pa xwỳnhjaja haxwỳja axpên pẽ angrã nẽ ma hapêx.

³⁸ —Jakamã kwa pu mẽ tanhmã jajê ho hkêt nẽ. Pu mẽ ãm mẽ omu. Koja mẽ amnhĩ krã hkôt ã ujarênh anhỹr o pa japêr hã koja Tetasti mẽ Jut wa hkôt pa xwỳnhjê pyrã nẽ tokyx axpên pẽ angrã nhũm Jejus jarênh o paja hapêx o hapêx. ³⁹ Nom koja mẽ ãm hãmri Tirtũm nhỹ hã ã mẽ ahkre ho pa anhỹr japêr hã kot puj mẽ tee ri ja ho pajapêx mã. Jakamã kwari. Kot puj mẽ tanhmã mẽ ho nẽ te mẽ pahte Tirtũm kutã amnhĩ xunhwỳr pyrãk. Anẽ.

Nhũm pre ã Kamariewti Jejus nhỹ hã mẽ ahkre ho mẽ pa xwỳnh maatijê xyr pẽ hkwỳjê mã kapêr anẽ. ⁴⁰ Hãmri nhũm mẽ kuma nẽ kãm:

—Tỳ nã ãm hãmri na ka ã akapêr anẽ. Kot puj xep mẽ tanhmã mẽ ho hkêt nẽ. Anẽ.

Hãmri nẽ akupỹn mẽ hã karõ nhũm mẽ akupỹn mẽ hwỳr agjê. Hãmri nhũm mẽ pôristi mã mẽ hã amỹnê nhũm mẽ htak. Hãmri nhũm mẽ ãptãr tũmrejaja mẽ kãm:

—E mẽ mãmrĩ ma akupỹm mra. Nom kêr ka mẽ axte mẽ kãm Jejus kapêr jarênh o ri apa hkêt kumrêx. Anẽ.

⁴¹ Hãmri nhũm mẽ kãm ure nhũm mẽ ma mra. Kĩnh nẽ ma mra nẽ axpên mã:

—Nã kwãr mẽ Jejus ã mẽ pahtak nẽ tanhmã hã mẽ pahto. Kwãr mẽ mãmrĩ ã hã mẽ pahto anẽ. Kot pu mẽ hkaga hkêt nẽ. Ra Tirtũm kot ja hã mẽ pahpumunh mex kênã.

Anhỹr o axpên mã kapêr o axpên jamaxpêr o hihtỳx mex o pa.

⁴² Hãmri nẽ arĩ apkati mẽ hkwỳjê mã Jejus kapêr jarênh o mẽ ahkre ho mẽ hkôt pa. Tirtũm mã amnhĩ jarênh xà hã ixkre kamã nẽ nhãm mẽ òrkwỳ kamã ri mẽ ahkre ho pa. Tirtũm kot mẽ pakaxyw Jejus xãm ã mẽ kãm harênh o ri mẽ hkôt pa.

6

Mẽ kêp mẽ mjên htyk xwỳnhjê jarênh Wam Ximotre 3.8-9

¹ Tã nhũm mẽ kot Jejus kôt amnhĩ xunhwỳr xwỳnhjaja ohtô rax kumrêx o mō. Mẽ piitã kêp Ijaew no nhũm mẽ hkwỳjaja axtem Gres kapêr o kapêr nhũm mẽ hkwỳjaja Ijaew kapêr o kapêr. Na pre hte Ijaew kapêr o kapêr xwỳnhjaja apkati mẽ mẽ kêp mẽ mjên htyk xwỳnhjê mã mẽõ ho pa. No ãm mẽ piitã mẽ hipêx o axpên pyrãk kêt jakamã nhũm Gres kapêr o mẽ kapêr xwỳnhjaja tee ri ã mẽ kot amnhĩ nhĩpêx anhỹr ã mẽ omu nẽ mẽ kamã gryk nẽ. Hãmri nẽ mẽ kãm:

—Kwa na ka htem amnhĩ kamã mẽ kêp mẽ mjên htyk xwỳnhjê mã mẽõ ho rũnh nẽ agõ. No mẽ ixkamã jajê mã na ka htem ãm ho hkryre nẽ agõ. Kwa mẽ ri ã mẽ hipêx anhỹr kêt nẽ. Mẽ hipêx o axpên pyrãk nã. Anẽ.

² Hãmri nhũm Jejus nhỹ hã mẽ ahkre xwỳnh maatijaja mẽ hã mẽ kapêr ma hãmri nẽ mẽ piitã mẽ ho akuprõ nẽ mẽ kãm:

—Kwa kêr ka mẽ ja hã axpên mã axàkjêr kêt nẽ. E pu mẽ kot mẽ kêp mẽ mjên htyk xwỳnhjê mã ò ho pa kaxyw mẽ akwỳjê rê. No mẽ pajaja kot paj ja ho anhỹr o ri ixpa hkêt nẽ. Kot pa mẽ anẽ nẽ Jejus kapêr o ri mẽ ajahkre hkêt nẽ nhũm ja mex kêt nẽ. Jakamã mẽ atõ kot kaj mẽ akatãt kôt mẽ kãm mẽ ò ho apa? ³ E mẽ amnhĩ kamã mẽ ho 7 nẽ mẽ arê pu mẽ kêp mẽ mjên tyk xwỳnhjê mã ò ho pa kaxyw mẽ unhwỳ.

Tãm mẽ hamaxpêr xwỳnhjaja.

Nẽ mẽ ate axpên mã mẽ mex ã mẽ harênh xwỳnhjaja.

Nẽ Tirtũm Karõ nhỹ hã mẽ kot amnhĩ nhĩpêx o mẽ pa xwỳnhjaja.

Ã mẽ kot amnhĩ nhĩpêx anhỹr xwỳnhjaja ka mẽ ho 7 nẽ arê pu mẽ kaxyw mẽ unhwỳ.

⁴ Nom mẽ pajaja kot paj mẽ akôt arĩ mẽ amã Tĩrtũm kapẽr jarẽnh o ri mẽ ajahkre pix tânopxar o ri ixpa. Anẽ.

⁵ Hãmri nhũm mẽ kuma nhũm ja mẽ kãm mex nẽ. Nhũm mẽ ma mra nẽ axpẽn mã hkwyjê nhĩxi jarẽ hãmri nẽ mẽ ho 7 nẽ mẽ kurê. ã mẽ hixi kot anhỹr.

Estewãw. Estewãwja na pre Jejus kôt amnhĩ nhĩpêx mex o pa. Tĩrtũm Karõ kaxwỹnh mã àr nẽ ho amnhĩptar jakamã nhũm pre hte tãm ri amnhĩ nhĩpêx o pa.

Nẽ kaxyw Firipti

nẽ Prokot

nẽ Nĩkanõ

nẽ Timã

nẽ Parmẽnti

nẽ Nĩkoraw. Nĩkorawja krĩ pẽ ãxiok nhõ xwỹnh na pre. Kêp Ijaew kêt tã kãm Tĩrtũm kĩnh o pa. Tã ra mããnẽn Kra Jejus kôt amnhĩ xãm.

⁶ Jakamã nhũm mẽ mẽ kêp 7tajê rê nẽ Jejus nhỹ hã mẽ ahkre xwỹnh maatijê hwỹr mẽ o mra. Hãmri nhũm mẽ omu nẽ mẽ àpênh ã mẽ unhwỹr kaxyw mẽ hã ãhkra jaxwỹ nẽ mẽ ho Tĩrtũm wỳ. Hãmri nhũm mẽ kêp mẽ mjên htyk xwỹnhjê mã mẽ õ ho pa nẽ mẽ piitã mẽ hipêx o axpẽn pyræk.

⁷ Tã nhũm mẽ ra ohtõ rax nẽ Tĩrtũm kapẽr ma nẽ hkôt amnhĩ nhĩpêx o pa. Jakamã nhũm Jerujarẽ kamã mẽ kot Jejus kôt amnhĩ xunhwỹr xwỹnhjaja ra ohtõ rax kumrêx. Nẽ mẽ õ patre hkwy haxwỹja ohtõ nẽ mẽ uræk nẽ amnhĩ kaxyw hkôt hamaxpẽr nẽ hkôt amnhĩ xunhwỹ.

Mẽ kot Estewãw pynênh ã mẽ harênh

Rukre 21.14-15

⁸ Tã nhũm Estewãwja. Kot mẽ kêp mẽ mjên htyk xwỹnhjê mã mẽ õ ho pa xwỹnhjê hõja. Tĩrtũm kot kutã nojarêt mex jakamã na pre hte ã hã àhpumunh tỳx o aa mẽmoj pumunh kêt kwỳ ho anhỹr o ri mẽ hkôt pa.

⁹ Hãmri nhũm Ijaew kwỹjaja tee ri ja hã omu nhũm ja mẽ kêp omnuj tỳx nẽ nhũm mẽ hã kãm akir. Uræk nẽ mẽ kêp Ijaew nẽ Jerujarẽ kamã ri mẽ hkôt pa htã ahpỹnhã mẽ õ pyka. Mẽ kot kãm “Ripetat” xwỹnh kwỳ na pre mẽ. Nẽ ahpỹnhã mẽ õ krĩ.

Mẽ hkwyjaja kêp Sirên nhõ xwỹnh.

Nẽ mẽ hkwyjaja kêp Aresãn nhõ xwỹnh.

Nẽ mẽ hkwyjaja kêp Siris nhõ xwỹnh.

Nẽ mẽ hkwyjaja kêp As nhõ xwỹnh.

Ahpỹnhã mẽõ pika nẽ mẽ õ krĩ htã na prem Jerujarẽ kamã ri axpẽn kôt pa ho pa. Tã Estewãw kot ã amnhĩ nhĩpêx anhỹr o pa hã omu nhũm ja mẽ kêp omnuj tỳx nẽ nhũm mẽ hã kãm akir. ¹⁰ No nhũm Tĩrtũm Karõ nhỹ hã hamaxpẽr tỳx o mẽ kãm kapẽr nhũm mẽ kuma nẽ tee ri kutã tanhmã kãm nẽ hprãm kaprỳ. ¹¹ Hãmri nẽ ma mra nẽ tanhmã ho hêx to kaxyw amnhĩ kwỹjê rê nẽ mẽ kãm hã amỹnê nẽ mẽ kãm:

—E kêr ka mẽ krĩ nhõ xwỹnhjê mã Estewãw o axêx nẽ tanhmã mẽ kãm ho akapẽr punuj to ho ri mẽ hkôt apa. Kê mẽ ama nẽ kamã gryk kato. Kot kaj mẽ ã amnhĩ nhĩpêx anẽ pa mẽ hpãnhã mẽ amã amnhĩre. Anẽ.

Hãmri nhũm mẽ kuma nẽ ma mra nẽ hapõj nẽ ma krĩ nhõ xwỹnhjê mã tanhmã ho hêx to ho ri mẽ hkôt pa nẽ mẽ kãm:

—E mẽ amnê akuprõ nẽ mẽ inhma. Kwa kêr ka mẽ Estewãwti kapẽr mar kêt nẽ. Na hte finat Mojes mẽ Tĩrtũm wa ho kapẽr punuj pix o ri pa. Pa mẽ ra kot wa ho kapẽr punuj ã kuma. Anẽ.

¹² Hãmri nhũm mẽ kuma. Krĩ nhõ xwỹnhjê mẽ nẽ mẽ àptar tũmrejê mẽ Tĩrtũm kapẽr tũm o mẽ ahkre ho mẽ pa xwỹnhjaja nhũm mẽ tee ri mẽ kot Estewãw o hêxja ma nẽ kamã gryk nẽ. Hãmri nẽ ma hwỹr mra nẽ unê nẽ ma mẽ õ juisti hwỹr o tẽ. ¹³ Hãmri nhũm mẽ kãm ho hêx xwỹnhjaja mẽ hkôt mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tĩrtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tĩrtũm mã amnhĩ jarẽnh xà hã ixkreja nhũm tanhmã ho hêx to pa mẽ kuma. ¹⁴ Na hte mẽ kãm: “Koja nhỹrmã Jejus pẽ Najare nhõ xwỹnh Tĩrtũm mã amnhĩ jarẽnh xà hã ixkreja grành pa kãm ga.” Anhỹr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nẽ mẽ pahkurê pa prem kuma. Anẽ.

¹⁵ Nhũm prem ã mẽõ juisti mã Estewãw o hêx anẽ. Hãmri nhũm mẽ kuma nẽ Estewãw wỹr rĩt nẽ hkuk pumu nhũm te kot Tĩrtũm kapẽr o mẽ wrỳk xwỹnhjê kuk nhĩrã rax pyrã nẽ xa nhũm mẽ tee ri omu nẽ kamã no pyma nẽ.

7

Estewāw kot juistijē mā ujarēnh

¹ Hāmri nhūm mē ō patre maatija Estewāw mā kapēr nē kām:

—E mē inhmā amnhī jarē. Xà ām hāmri na mē ri ā ajarēnh anē nà? Anē.

² Hāmri nhūm kuma nē mē piitā mē kām kapēr. Mē kām kapēr ryy nē mē kām:

—Tōe kot paj mē amā mē panhīgēt finat Apraāw tanhmā harēnh to ka mē inhma. Amnepēm na pre Tirtūm maatija Apraāw wūr kato. Kormā pyka pē Mēsopotām kamā pa ri. Kormā kot ma krī pē Arā hwūr mōr kêt ri nhūm hwūr kato nē kām: ³ “E kêt ka mē anhō krī pē akato nē akwỳjê re nē ma mō. Kot paj ma nhỹhỹm hpānhā pyka hō hwūr mē ato mō.” Anē.

⁴ —Hāmri nhūm kuma nē amnhī to akuprō nē ma mō. Ō pyka pē Katej pē kato nē ma krī pē Arā hwūr mō nē hpānhā kamā pa. Tā nhūm hipêêxà Terahti kêt ty nhūm Tirtūm amnē jar mē panhō pyka hwūr kumē. Jar mē papapxà hwūr kumē.

⁵ —Nom nhūm kormā kām pykaja nhōr kêt nē. Kormā kām hkwỳ ho grire nē ōr kêt nē. Na pre ām kām:

E kot paj nhỹrmā amā pykaja gō. Amā nē akanrēhā akra nē atāmnhwỳjê mā kugō ka mē kamā ri apa ho apa.

Anhỹr o kām mē panhō pika pē Kanaāja jarē. Apraāw kormā hkra hkêt ri nhūm ā kām kapēr anē. ⁶ Hāmri nē kām:

Koja akanrēhā atāmnhwỳjaja nhỹrmā ma nhỹhỹm pyka hō hwūr pa nē hpānhā kamā pa. Mē ō pyka kamā pa hkêt tā nhām pyka hō kamā pa hāmri nē pika nhō xwỳnhjê mā àpēnh rūnh o pa nhūm pyka nhō xwỳnhjaja mē hipêx kati rūnh o pa. Nē mē àpēnh ā mē kām amnhīrer kêt nē. Ām mē homnuj o pa hā amgrà xohtō rax kumrēx. Nhūm mē hā amgrà pē 400.

⁷ Nom kot paj mē hā mē homnuj tỳx nē. Akanrēhā atāmnhwỳjê hā mē homnuj tỳx nē nhūm mē rī kormā mē kurūm kato nē man akupỹn pa nē jar pōj. Hāmri nē jar inhmā inhmex o inhmex ā ijarēnh rāhā ho pa. Anē.

⁸ Hāmri nē kām:

E pu axpēn ma. Koja ka nē akanrēhā akra nē atāmnhwỳjaja ka mē ixkôt ri amnhī nhĩpêx o apa hā kot paj mē ato ixkra. Tā koja ja amā mex japêr hā kêt ka mē amnhī my kwỳt kà hkwỳ jakà. Nē koja mē akrajaja hapôj nē my ka mē mā mē ho anē nē mē kêt mēmy kwỳt kà hkwỳ jakà. Mē piitā mē kot mē apê ixkra hā mē apumunh kaxyw kot kaj mē ā amnhī nhĩpêx anē.

Anhỹr o Apraāw mā kapēr nhūm kuma nē mar xà hkôt hkra Ijak my kwỳt kà hkwỳ krāhta. Kormā hkaràre ri. Kormā hā arīgro pē 8 pix ri nhūm kêt hkwỳ krāhta.

—Tā nhūm Ijak hprêk nē hprō nē hkra. Hāmri nē mā hkra Jako ho anē nē. Nhūm Jako hprêk nē mā hkra pē 12jê ho anē nē mē piitā mēmy kwỳt kà hkwỳ jakà pa. Ā na pre mē pahpàr kraxjaja amnhī nhĩpêx anhỹr o pa.

⁹ —Jako hkrajê hō na pre kêt Juje. Nhūm Juje htōjaja hipêêxà hkôt kamā gryk nē axtem nē mē urojê mā ho wēnē nhūm mē kêt haprō nē ma pyka pē Ejit wūr o mō. Amarī Ejit nhō xwỳnhjê mā àpēnh o pa kaxyw. Tā no nhūm Tirtūm arī tănopxar rāhā ho hkôt pa. ¹⁰ Hāmri nē Ejit kām mē kot homnuj xwỳnhjê nhĩhkra rūm hkapa nē tanhmā hkrā hto nhūm àhpumunh tỳx nē hamaxpêr mex nē. Jakamā nhūm Ejit nhō xwỳnhjê nhō pahi Paraohtija omu nē kām hkĩnh nē. Kot tām amnhī nhĩpêx nē àhpumunh tỳx kôt omu nē kām hkĩnh nē. Hāmri nē amnhī ri kumē nhūm ĩhkô hā àpēnh o pa. Kām ōrkwỹ pumu nē Ejit nhō xwỳnhjê ho amnhĩptàr o pa.

¹¹ —Rôm nhūm mē hpur kām mēmoj nhĩgrōt mex kêt nē nhūm mē kêt mē apkur xà hā mē ōja ra ri mē kêt kryre. Ejit kamā nē jar Kanaā kamā nhūm mē apkur xà hā mē ōja mē kêt hapêx par o mō. Nhūm mē piitā prām xàj ra hiire nē kām prām tỳx o pa nhūm mē panhīgêtjaja hāmri prām xàj tee ri amnhī xàpkur xà hā mēmoj japêr.

¹² —Tā nhūm Jakoja Ejit kām arī mē apkur xà hā mē ō rax ā harēnh ma nē ma hwūr hkra hkwỳjê rē. Mē panhīgêtjaja nhūm ma mē hwūr mē kurē nhūm mē ma mē hwūr mra. Hāmri nē mē hwūr pōj nē mē kêt

mëmo hy hkwý japrô nê ma akupÿm o mra. Wam më môrta ã më kêp mëmo japrô nê ma akupÿm o mra.

¹³ –Tã nhũm më kêp mëmo hy japrô xwÿnhja hapêx nhũm më axte akupÿm më hwÿr mra. Hãmri nhũm më htô Juje më kãm amnhĩ to amnhĩrĩt nê kêp më htô hã më kãm amnhĩ jarê. Më kot ra htyk ã hkamnhĩx tã nhũm më kãm amnhĩ jarê. Hãmri nhũm Paraohiti më kêp Juje htô hã më harênh ma.

¹⁴ –Tã nhũm Juje amnhĩ wÿr hipêêxã Jako më htãmnhwÿjaja më hã karô nhũm më piitã ma Ejit wÿr hapêx. Më kêp 75 nê ma Ejit kamã Juje hwÿr hapêx hãmri nê kamã pa ho pa.

¹⁵ –Ã kot anhÿr jakamã nhũm Jakoja ma Ejit wÿr mô nê hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nê gaa nê htyk pa. ¹⁶ Hãmri nhũm më hkanrêhã më hkrajaja më hamÿ nê ma akupÿm Kanaã hwÿr krĩ pê Sikê hwÿr më o pa nê kamã më hagjê. Na pre më hkukamã finat Apraãw kot Amôr krajê pê kênkre japrô nê kamã hprô jaxã. Jakamã nhũm prem mÿr pê ma hwÿr më o pa nê kamã më hagjê hãmri nê ma akupÿm Ejit wÿr pa.

¹⁷ –Tã gaa nê rĩ ohtô rax kumrêx o mô. Më panhigêjtaja ohtô rax kumrêx o mô. Hãmri nhũm Tirtũm kot Apraãw mã më õ pyka jarênh xwÿnhja nhũm kot më kãm õr kaxyw. ¹⁸ No nhũm Ejit nhô pahi kot Juje ho mex xwÿnhja na pre ra ty nhũm axtem hpãnhã hõja më ho amnhĩptãr o pa. Nê aa Juje jarênh mar kêt nê. Kormã pahi xàr nyw kêt ri htyk jakamã nhũm mÿr pê harênh mar kêt nê. ¹⁹ Hãmri nê hkwÿjê homnuj o pa. Tanhmã më panhigêjtê nhĩpêx to ho pa. Nê më kãm më hkra my hapôx xwÿnhjê hã amÿnê. Më hapôx nhũm më kot pikap më rênh nhũm më htyk kaxyw nhũm më kãm më hã amÿnê.

²⁰ –Rôm nhũm finat Mojesja kato. Nê mexre. Hãmri nhũm katorxã Ejit nhô xwÿnhjê kot kêp hpĩr pymaj õrkwÿ kamã ri më kêp ho hpimxur o pa hã mytwrÿ axkrunêpxi.

²¹ –Tã nhũm ra htÿxre nhũm katorxã më hipêêxã wa tee ri hkukamã hamaxpêr

hãmri nê më kot wa kêp hpĩr pymaj kumÿ nê ma o tẽ nê kaxyw à nhĩpêx nê nhÿri gô nhĩpôk ri pô kamã ho amũxu. Tã nhũm Paraohiti hkra nija ra gôx mã wÿr mã tẽ nê ra omu hãmri nê amnhĩm kumÿ nê ma o tẽ nê ho hkra. ²² Jakamã nhũm Mojes Ejit nhô xwÿnhjê kamã hprêk. Hãmri nê më àhpumunh xã hã kagã pumunh pa. Nê hihtÿx nê më kãm kapêr kãm hihtÿx mex o pa.

²³ –Tã hãmri ra hã amgrã pê 40 nê hapêx nhũm Mojes hamaxpêr nê ra kãm amnhĩ kwÿ pê Ijaewjê pumunh prãm nê ma më hwÿr tẽ. ²⁴⁻²⁵ Hãmri nê htêm kôt ja wa omu. Nhũm Ejit nhô xwÿnhja Ijaewja homnuj o xa nhũm Mojes tẽn tee ri hã omu nê hamaxpêr o: “E pa ma wa hwÿr tẽ nê ixkwÿ mÿj ã Ejit nhô xwÿnhja pi kê ixkwÿjaja hã ixpumu nê Tirtũm kot më hwÿr inhmênh ã ixpumu. Ixte Ejit nhô xwÿnhjê nê më kator kaxyw më ja hã ixpumunh kurê kumrêx.”

–Anhÿr o hamaxpêr hãmri nê wa hwÿr tẽ nê amnhĩõja nê Ejit nhô xwÿnh pi. Tã no nhũm hkwÿjaja kot hpĩr ã harênh mar tã tanhmã amnhĩ kaxyw kãm hamaxpêr to hkêt nê. ²⁶ Nhũm apkati nhũm mêmõja war axkrut nê axte pijapu ho wa xa. Hamê wa kêp Ijaew. Jakamã nhũm Mojes akupÿm më hwÿr tẽ nê tee ri axpên tã wa omu nhũm ja kêp omnuj nê. Hãmri nhũm wa hwÿr tẽ nê axpên nê wa kãm kapêr nê wa kãm: “Pa? Kwa war ajamê war apê Ijaew kênã na ka wa ri axtem nê ã axpên nhĩpêx anê.” Anê. ²⁷ Hãmri nhũm kot amnhĩ kaxyw hkryx xwÿnhja kuma nê nhãm amnhĩ nê hkujate nê kãm: “Tk. Kwa xã apê më inhõ pahi hã na ka ã wa inhmã akapêr anê? Nã apê më inhõ pahi hkêt kênã. ²⁸ Kot kaj inhĩpêx o te ate Ejit nhô xwÿnhja nhĩpêx pyrã nê wa ixtõ hpĩr kêt nê.” Anê.

²⁹ –Hãmri nhũm tee ri kuma nê ra kãm ma nê Ejit rùm kator kurê kumrêx nê ma pyka pê Mijiã hwÿr mô nê kamã hpãnhã pa. Kamã hprô nê hkra. Nhũm hkra myja wa hamêxkrut.

³⁰ –Tã nhũm Mijiã kamã pa hã axte hã amgrã pê 40. Hãmri nê mëmo arĩgro hã kapôt ã krã hakÿx pê Sinai kape hã ri pa nhũm Tirtũm kãm kapêr. Nom nhũm Mojes omunh kêt nê. ãm utĩ kaok kamã kuwy

hpôk pix pumu. ³¹ Amnhĩ jaêr pê ã kot amnhĩ nhĩpêx anhÿr ã omu hãmri nê amnhĩ tâ hprĩ hã omunh kaxyw hwÿr tẽ nhũm Tĩrtũm kãm:

³² Pa Mojes? E ixpê Tĩrtũm na pa. Ixpê akukamã anhĩgêť Apraãw nhõ Tĩrtũm na pa. Nê ixpê Apraãw kra Ijak mẽ htãmnhwÿ Jako wa õ Tĩrtũm na pa. Anê.

Hãmri nhũm tee ri kuma nê kãm ma xàj htertet tÿx nê. Hãmri nê umaj axte pĩ hpôkja wÿr rĩt kêt nê. ãm nhãm hkrã nê rĩt o xa.

³³ Hãmri nhũm Tĩrtũm kãm:

E kwa ixpê Tĩrtũm maati hã ixtã apijaãm ã aparkã kapa nê apar kênh nê xa.

³⁴ Na pa ra ixkra Ijaewjaja Ejit kãm mẽ omu. Na ra Ejit nhõ xwÿnhjaja ixpê mẽ homnuj tÿx kumrêx rãhã ho pa nhũm mẽ amnhĩ xà hã maj tee ri amnhĩ nhĩpêx. Pa ja hã mẽ omu nê inhmã mẽ hkaprĩ nê. Jakamã kot paj Ejit nhõ xwÿnhjê nhĩhkra rũm mẽ kator pa. E ka kot paj mẽ hwÿr amê ka ma akupÿm mẽ hwÿr mō nê mẽ kurũm mẽ kator.

Anhÿr o kãm mẽ kaxyw karõ. ³⁵ Ra Ijaew kot Mojes hkaga tâ nhũm mẽ kaxyw ãm nê ma akupÿm kot mẽ hwÿr mênh kaxyw. Na prem ra omu nê hkaga. Te mẽ ate Jejus kagaja pyrã nê hkaga. Jakamã nhũm pijapu xwÿnhhta tee ri amnhĩ tâ omu nê kamã gryk nê amnhĩ nê kãm kapêr nê kãm: “Tk. Kwa xà apê mẽ inhõ pahi hã na ka ã wa inhmã akapêr anê? Nã apê mẽ inhõ pahi kêt.” Anhÿr tâ nhũm Tĩrtũm mẽ kaxyw tãm xãm. Kot mẽ ho amnhĩptar nê Ejit nhõ xwÿnhjê rũm mẽ kator kaxyw. Ja kaxyw na pre pĩ hpôk kamã kãm kapêr nê mẽ kaxyw ãm.

³⁶ —Jakamã nhũm Mojes ma akupÿm Ejit wÿr mō nê mẽ kurũm hkwyjê kator nê ma mẽ o pa. Na pre mẽ ho mex nê Tĩrtũm nhÿ hã mẽ kãm aa mẽ kot mẽmoj pumunh kêt kwÿ ho anhÿr o ri mẽ o pa. Ejit kamã nê mããnên mẽ kot gô xujanãr mã: “Gô kamrêk” anhÿr xwÿnhhta kamã. Nê kapôt ã mẽ kãm ã amnhĩ nhĩpêx anhÿr o mẽ o pa. Nê kapôt ã ri mẽ o pa ho ra hã amgrã pê 40.

³⁷ —Tã tãm na pre mẽ panhĩgêťjê mã mẽhõ hkukamã mẽ kãm tanhmã harênh to nê mẽ kãm harênh o: “Koja Tĩrtũm nhÿrmã

te ra mẽ akaxyw pa ixãm pyrã nê inhmÿr pê mẽ panhĩõ xãm. ÿ hã mẽ amã kapêr jarênh o pa kaxyw nhũm nhÿrmã mẽ akaxyw ãm ka mẽ omu.”

—Anhÿr o ã Jejus kukamã harênh anê.

³⁸ Na pre Mojes kapôt ã mẽ panhĩgêťjê ho pa nhũm mẽ krã hakÿx pê Sinaija wÿr pa. Mẽ panhĩgêťjaja hãmri hwÿr pa nhũm Tĩrtũm kapêr o mẽ wryk xwÿnhja mẽ kaxyw Mojes mã kapêr nhũm ô ri mẽ kãm awjarê nê hã kagã. Mẽ kot mar nê hkôt amnhĩ nhĩpêx nyw o amnhĩ nhĩpêx o pa kaxyw nhũm mẽ kãm Tĩrtũm kapêr jarênh o pa. Nê mẽ pajaxwÿja. Mẽ pahte hkôt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagã. ³⁹ Tã no nhũm mẽ panhĩgêťjaja Mojes ma nê ãm kuma nê hkaga kumrêx nê akupÿm Ejit wÿr hkrã. ⁴⁰ Jakamã nhũm Mojes kormã nhÿri mẽ kaxyw Tĩrtũm mã kapêr o ãm rôm nhũm mẽ wakre kamã htõ Arãw wÿr mra nê kãm: “Kwa Mojes ra kot tanhmã amnhĩ to kênã. Kot Ejit rũm mẽ pakator nê mẽ pahto mōr tâ ra nhÿri arĩk nê tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kê tãm ma akupÿm Ejit wÿr mẽ pahto pa.” Anê.

⁴¹ —Hãmri nhũm mẽ kuma nê mẽ kãm kax o mōx krare karõ ho sãnti nhĩpêx nê mẽ kãm ãm. Hãmri nhũm mẽ axtem nê te ho Tĩrtũm nhĩpêx pyrãk o hipêx nê kãm ôwêhti hkwy pa nê kãm haxwÿ nê hã apku. Hãmri nê ã amnhĩ nhĩpêx anhÿr ã amnhĩ pumu nê hkĩnh nê. ⁴² Hãmri nhũm Tĩrtũm tee ri ja hã mẽ omu nhũm ja kêp omnuj tÿx nê nhũm mẽ hkaga hpa. Jakamã nhũm prem amnhĩ krã hkôt ri myyti nê mytwÿre nê kanhêti karõ nhĩpêx nê te mẽ kot Tĩrtũm nhĩpêx pyrãk o hipêx o pa. Hãmri nê amnhĩ kaxyw kumã pix mã hamaxpêr o pa hã amgrã xohtõ nê. Tã nhũm Tĩrtũm nhÿ hã kapêr jarênh o mẽ pa xwÿnhjaja tanhmã mẽ kãm kapêr to nê mẽ hã kagã. Te Tĩrtũm tãm mẽ kãm kapêr pyrãk o mẽ kãm kapêr nê hã kagã kot:

Pa mẽ apê Ijaewjaja? E mẽ inhma. Amnepêm mẽ ate kapôt ã ri mẽ apa hã amgrã pê 40ta ã. Xà we inhmã na ka prem akrit kwÿ hpar o apa?

⁴³ Nã inhmã hkêt. Na ka prem axtem nê ri amnhĩ krã hkôt amnhĩm mẽmo

karō nhîpêx nê hipêx o te mẽ ate pa inhîpêx pyrāk. Pê kām akrit kwý hpar nê òr o ri apa.

Mẽ anhō mẽmo karō nhîpêxta mẽ ate amnhîm hã hixi pê Mõrok mẽnh xwýnhja ka pre htem à kamã amnhî kôt ho apa.

Nê amnhîm kanhêti karō nhîpêx nê hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harênh o ri apa.

Tã ã mẽ ate amnhî nhîpêx anhÿrja mÿrapê kot paj pãnhã nhÿhÿm mẽ arê.

Koja mẽ akutã amnhî xunhwÿr xwýnhjaja mẽ apynê nê ma pyka pê Papirõn rũm hamũ mẽ ato hapêx ka mẽ amarĩ mẽ kãm axapênh rũnh o ri apa kãm ga. Anê.

Ã na pre Tirtũm mẽ panhîgêjtê mã kapêr anê nhũm ÿ hã kapêr jarênh o pa xwýnhja mẽ kãm hã kagà.

⁴⁴ –Tã nhũm mẽ panhîgêjtaja kormã kapôt ã ri pa ri amnhî kôt mry kà ho ixkre ho pa. Tirtũm mã kapêr xà hã ixkreja nhũm prem amnhî kôt ri o pa. Mẽ kot kãm “Tirtũm nhõrkwÿ kaàkre” anhÿr xwýnhja. Tirtũm kot mẽ kãm hã karō xà hkôt nhũm mẽ hipêx nê amnhî kôt ri o pa. Na pre Tirtũm hprĩ hã Mojes mã tanhmã kot hipêx to hã karō nhũm mẽ hkôt hipêx nê amnhî kôt ri o pa.

⁴⁵ –Tã nhũm Mojes ty nhũm hpãnhã Jójueja amnhî kôt mẽ o pa. Ma Tirtũm kot mẽ kãm pyka mex nhõrta wÿr Mojes mÿr pê mẽ o pa. Hãmri nê hwÿr mẽ o pøj nhũm Tirtũm mẽ nê mẽ kot ra kamã mẽ pa ho mẽ pa xwýnhjê japøj nhũm mẽ pãnhã kamã pa ho pa. Nê amnhî kôt Tirtũm nhõrkwÿ kaàkreta o pa. Rãhã nhũm finat Tawija mẽ hpãnhã mẽ ho amnhiptã. ⁴⁶ Na pre Tirtũm Tawi kot tanhmã amnhî nhîpêx to ho pa hã omu nê kãm hapê nê. Jakamã nhũm Tawi kãm kapêr nê kãm: “Pa Tirtũm? Kwa xà kot paj amã ixkre mex ò nhîpêx nà? Mẽ ixpê Ijaewjaja mẽ ixte kamã amã amex o amex ã ajarênh o ixkrĩ kaxyw pa hipêx. Xà kot paj amã hipêx?” Anhÿr tã no nhũm Tirtũm kormã kãm ja prãm kêt nê. ⁴⁷ Jakamã nhũm Tawi hkra Sarumãwja hipêexà mÿr pê hpãnhã kêp mẽ ò pahi nê kãm hipêx. ⁴⁸ Nom xà na hte Tirtũm maatija mẽ pahte kãm panhîhkra ho ixkre nhîpêx

xwýnh kamã hkrĩ? Nà kaxkwa kamã na hkrĩ xà. Na pre ra Tirtũm nhÿ hã kapêr jarênh o pa xwýnhja Tirtũm kot tanhmã mẽ pajamãr to ho pa hã kagà nê hã kagà ho:

⁴⁹ Na pa hte kaxkwa rũm pyka hkôt mẽ piitã mẽ hamãr mex o ixkrĩ.

Tã tanhmã kot paj amnhî to nê mẽ ìhkra ho mẽ kot inhmã ixkre nhîpêxta wÿr axà nê kamã ixpa ho ixpa?

⁵⁰ Nà ixte mẽmoj piitã ho ixkator xwýnh kênã kot pa kêt ã amnhî nhîpêx anê. Anê.

Nhũm pre ã Tirtũm amnhî tã mẽ kãm kapêr anê nhũm ÿ hã kapêr jarênh xwýnhja ò ri mẽ pamã hã kagà.

⁵¹ –E kwa mẽ inhma ixkwÿjaja. Mẽ akrã hihtÿx kumrêx jakamã mẽ amã Tirtũm kapêr mar prãm kêt. Na ka htem mẽ panhîgêjtê pyrã nê amnhî nê Tirtũm Karō kaga nê kapêr mar kêt nê. ⁵² Na pre hte Tirtũm nhÿ hã kapêr o mẽ pa xwýnhjaja mẽ panhîgêjtê hwÿr mra nê mẽ kãm kapêr jarênh o ri mẽ hkôt pa. Tã nhũm mẽ hkaga nê mẽ hipêx kati ho pa. Na pre htem Jejus wrÿk kukamã mẽ kãm: “E koja nhÿrmã kot Tirtũm kapêr mar nê hkôt amnhî nhîpêx mex rãhã xwýnh maatija mẽ pahwÿr wrÿ.” Anhÿr o mẽ kãm harênh o pa. Tã no nhũm mẽ kãm ja mar prãm kêt jakamã axtem nê hã mẽ hpar o pa. Mẽ kot mẽ kãm Jejus jarênh o mẽ pa xwýnhjê hpar o pa. Tã nhũm tãm mẽ pahwÿr wrÿ ka mẽ omu nê mẽ kot amnhî nhîpêxta pyrã nê hã amÿnê nhũm prem mẽ amã kupĩ.

⁵³ –Tirtũm kapêr o mẽ wrÿk xwýnhjaja kot Tirtũm nhÿ hã tanhmã mẽ pahte amnhî nhîpêx to ho papa hã mẽ pamã karō nhũm mẽ ate mar tã mẽ apê hprãm nõkati. Nê ama nê ãm ama nê hkôt amnhî nhîpêx o ri apa hkêt nê. Anê.

*Mẽ kot Estewãw pÿr ã mẽ harênh
Rukre 21.16-19, 23.34; Atre 22.20*

⁵⁴ Hãmri nhũm juistijaja tee ri Estewãw xujarênh ma nê kamã gryk tÿx nê kãm kapêr punuj nê. ⁵⁵ Nom nhũm Tirtũm Karōja tanhmã hkrã hto nhũm kãm mẽ uma hkêt nê. Hãmri nê kãnhmã rît nê kaxkwa pumunh o xa nê kamã Tirtũm rũm hirã rax pumu. Nhũm Jejus Tirtũm nhîhkô hã xa nhũm omu nê hkĩnh nê mẽ kãm:

⁵⁶—Kokÿÿ. Na kaxkwa axkjê nhũm kamã Tĩrtũm nhỹ pa omu. Nhũm kuri kot mẽ pahwỳr mẽnh xwỳnh Jejusja xa. Hêxta waa nê. Nà na pa jarãhã wa omu nê ixkĩnh tỳx kumrêx. Anê.

⁵⁷ Hãmri nhũm mẽ kuma nê kamã gryk tỳx nê. Hãmri nê kãm mar prãm kêt nê kêp amnhĩ jamak pro. Hãmri nê gryk xaj àmra htỳx nê hwỳr hprõt ⁵⁸ nê unê nê krĩ pê ho kato nê ma o tẽ nê nhỹri o xa. Hãmri nê kên o htak o hpĩr kaxyw amnhĩ nhĩnòkà hkwrỳ nê mẽhõ my pê Sawti mã kugõ nhũm mẽ kãm hamỳ. Hãmri nhũm mẽ kên rũnh kwỳ jamỳ nê o mra nê Estewãw wỳr rênh prêprêk o kuhê. Nê ho ì kamã htak nê hkrãx pê htak. ⁵⁹ Hãmri nhũm ra htyk kaxyw nê Jejus mã amnhĩ jarê nê kãm:

—Pa Pahihti Jejus? E koja ixkarõ awỳr api ka ixto amnhĩptà. Anê.

⁶⁰ Hãmri nê hkõn krã ho tẽm nê nhỹ nê axte kãm amnhĩ jarê nê mẽ kot hpĩr xwỳnhjê nê kãm kapêr nê kãm:

—Kwa Pahihti. Mẽ kot ixpĩr tã kwa tanhmã ixtã mẽ ho hkêt nê.

Anhỹr o mẽ nê Jejus mã kapêrja kôt ra ty.

8

Mẽ kot Estewãwjaxar ã mẽ harênh *Atre 22.4, 26.9-11*

¹⁻² Hãmri nhũm mẽ kot Jejus kôt amnhĩ nhĩpêx xwỳnhjaja Estewãw wỳr mra nê htyk kãm omu nê hkaprĩ nê. Nê mur nê kumỳ nê ma o mõi nê haxà. Nom nhũm Sawtija mẽ kot hpĩr ã omu nhũm ja kãm mex nê.

Sawti kot Jejus kwỳjê nhĩpêx kati ho pa hã
harênh

Atre 1.8

Tã nhũm Jerujarê kamã Ijaewjaja mẽ kot Jejus kôt amnhĩ xunhwỳr xwỳnhjê homnuj tỳx o pa. Hãmri nhũm mẽ tee ri amnhĩ kukamã hamaxpêr nê mẽ hkwyjaja mẽ umaj hapôj nê ma pika hkwy hkôt hpigrành pa. Mẽ hkwyjaja Jutej wỳr ma pa nhũm mẽ hkwyjaja Samar hwỳr ma pa. ã na prem mẽ umaj nhỹhỹm hpigrành par anê. ãm Jejus nhỹ hã mẽ ahkre xwỳnh maati pixjaja na prem Jerujarê kamã arĩk nê nhỹhỹm mõi kêt nê. Simãw Pêtre nê Juãw nê Xiakre nê Andre nê Firipti nê Patomew nê Matêwre nê Makre nê Tomas

nê Xiakre hõja nê Simãw õ nê Maxitreja. ãm jajaja pix na prem arĩk.

³ Nhũm Sawti haxwỳja Jejus kôt mẽ kot amnhĩ xunhwỳr xwỳnhjê homnuj o pa. Mẽ kot Jejus kaga hprãm xaj tanhmã mẽ hipêx to ho pa. Na pre hte mẽ òrkwỹ hwỳr agjê nê mẽ unê. Mẽmyjê pynê nê mẽnijê pynê nê ma mẽ o mra nê mẽ hagjênh xà kamã mẽ hagjê. Mẽ urak nê kêp Ijaew tã ã mẽ hipêx anhỹr o pa.

⁴ Tã nhũm mẽ umaj Jerujarê rũm pika hõ hwỳr mẽ hpigrành xwỳnhhtaja amarĩ pika hkwy hkôt ri pa hkêt nê. Na prem ma mẽ piitã mẽ kãm Jejus kapêr jarênh o ri mẽ hkôt pa. Kêp Tĩrtũm kot mẽ pakaxyw ãm xwỳnh ã harênh rãhã ho ri mẽ hkôt pa.

Wajaga kot amnhĩ tã Firipti mar ã
harênh
Juãw 2.23-24

⁵⁻¹² Tã nhũm Firipti haxwỳja ma mõi. Ma krĩ pê Samar hwỳr mõi nê kamã mẽ kãm Tĩrtũm kot mẽ pakaxyw ãm xwỳnhhtaja jarênh o pa. Samar kamã na pre wajaga Simãwti ri Samar nhõ xwỳnhjê hkôt mẽ no kupyrrãhã ho ri mẽ hkôt pa. Nê àhpumunh tỳx ã amnhĩ to jarkrar o ri pa. Jakamã nhũm mẽ kot amnhĩ nhĩpêx ã omu nê kamã no pyma nê. Nê htỳx ho ãm hãmri kot amnhĩ jarênh ã hkamnhĩx. Jakamã nhũm pre mẽ kãm tanhmã ri amnhĩ to hêx to ho pa pê mẽ no kupyrrãhã ho ri pa nhũm mẽ amnhĩ jaêr pê omu. Mẽ kot amnhĩ to hkryre xwỳnhjaja nê mẽ kot amnhĩ to rũnh xwỳnhjaja nhũm mẽ amnhĩ jaêr pê kot tanhmã amnhĩ nhĩpêx to hã omunh o hkôt pa. Nê ri axpên mã harênh o:

—Kokÿÿ. Wajagaja àhpumunh tỳx kumrêx. Tĩrtũm nhỹ hã mãn te ã amnhĩ nhĩpêx anhỹr o pa nã? Mãn pre Tĩrtũm kãm àhpumunh xà hkwy gõ nhũm ÿ hã ã amnhĩ nhĩpêx anhỹr o pa. Anê.

Hãmri nê hkôt hamaxpêr o ri hkôt amnhĩ nhĩpêx o pa.

Tã nhũm Firipti mẽ õ krĩ hwỳr mõi nê mẽ kãm Jejus Kris jarênh o ri mẽ hkôt pa nê mẽ kãm:

—Jesús kêp Tĩrtũm kot mẽ pahwỳr mẽnh xwỳnh jakamã kot kaj mẽ amnhĩ kaxyw hkôt ajamaxpêr nê hkôt amnhĩ xunhwỳ

nhũm Tirtũm hã mẽ apumu nẽ mẽ ato hkra. Anẽ.

Hãmri nẽ Tirtũm nhỹ hã akupỹm tanhmã mẽ kute xwýnhjê ho mex to ho pa. Mẽ ì kamã mẽ htyk xwýnhjaja nẽ mẽ hyk o mẽ pa xwýnhjaja nhũm mẽ ohtô nẽ akupỹm mẽ ho mex o pa. Nẽ mẽ hkwýjê nẽ mẽkarõmnuti hkwý jano nhũm mẽ àmra htýx o mẽ hkaga nẽ ma mẽ kurũm hapôx nẽ mra. Æ Firiptija Jejus nhỹ hã mẽ ho mex o pa anẽ nhũm mẽ piitã ja hã omu nẽ kapër ma nẽ hkĩnh nẽ. Nẽ kapër mar týt nẽ hkôt hamaxpër. Jao wajaga Simãwti kaga nẽ hpãnhã amnhĩ kaxyw Jejus kôt pix mã hamaxpër nẽ hkôt amnhĩ xunhwý. Hãmri nhũm Firipti ja hã mẽ omu nẽ mẽ hkrã kumrã. Mẽmyjaja nẽ mẽnijaja nẽ mẽ piitã mẽ hkrã kumrã. Ra mẽ kot Jejus kôt amnhĩ xunhwýr ã mẽ piitã mẽ kãm amnhĩ to amnhĩrĩt kaxyw nhũm mẽ hkrã kumrãr pa.

¹³ Hãmri nhũm wajaga Simãwti haxwýja Jejus kapër ma nẽ mẽ uràk nẽ amnhĩ kaxyw hkôt hamaxpër nẽ hkôt amnhĩ xãm nhũm Firipti hkrã kumrã. Hãmri nhũm hkĩnh nẽ Firipti hkôt ri pa. Nẽ aa mẽ kot mẽmoj pumunh kêt kwý ho anhýr o ri pa hã omu nẽ kamã no pyrna ho hkôt ri pa. Nẽ kot Tirtũm nhỹ hã akupỹm mẽ ho mex ã omu nẽ tee ri hamaxpër.

¹⁴ Tã hãmri nhũm Jerujarẽ kamã Jejus nhỹ hã mẽ ahkre xwýnh maatijaja Samar nhõ xwýnhjê jarẽnh ma. Ra mẽ kot Tirtũm kapër kôt amnhĩ nhĩpêx ã mẽ harẽnh ma nẽ hkĩnh nẽ. Hãmri nẽ ma mẽ hwýr Simãw Pêtre mẽ Juãw wa kumẽ. ¹⁵⁻¹⁷ Hãmri nhũm wa ma mẽ hwýr wa mõi nẽ pøj. Hãmri nhũm Firipti wa omu nẽ wa kãm krĩ nhõ xwýnhjê jarẽ nẽ wa kãm:

–Nà na pa pre mẽ kãm Jejus kapër jarẽ nhũm mẽ inhma nẽ hkôt amnhĩ xunhwý. Jakamã pa pre mẽ hkrã kumrã. Nom na kormã Tirtũm Karõja mẽ hkarõ mã gjêx kêt nẽ. Anẽ.

Hãmri nhũm wa mẽ harẽnh ma nẽ mẽ himõk ã wa ìhkra jaxwýr o ri mẽ hkôt mra. Ja kôt nhũm Tirtũm Karõ mẽ hwýr wrý nẽ mẽ hkarõ mã gjêx pa. ¹⁸⁻¹⁹ Hãmri nhũm wajaga Simãwja mẽ amnhĩ tã wa omunh o xa nẽ hamaxpër o:

–Kokýy. Kwa wa kot mẽ hã ìhkra jaxwýrja kôt na hte Tirtũm Karõ mẽ hkarõ

mã agjê. Hêxta waa nẽ. Inhmã ã mẽ hipêx anhýr o ri ixpa hprãm týt. E pa ixkàxpore hkwý jamý nẽ o tẽ nẽ wa kãm kugõ kẽ wa tanhmã ixto pa wa uràk nẽ ã mẽ hipêx anhýr o ri ixpa. Nà kot paj anẽ. Anẽ.

Hãmri nẽ wa hwýr tẽ nẽ wa kãm:

–E ota ixkàxporeta. Kwa amnhĩm apy nẽ hpãnhã tanhmã ixto pa war apyrã nẽ mẽ hã inhĩhkra jaxwýr o ri mẽ hkôt ixpa kẽ Tirtũm Karõja mẽ hkarõ mã agjê. Inhmã ja ho anhýr prãm týt. Anẽ.

²⁰⁻²³ Hãmri nhũm wa tee ri ã kapër anhýrja ã omu nhũm Pêtre kãm:

–Tk. Kwa ajamaxpërja mex kêt. Xà na htem kàxpore ho Tirtũm mã amnhĩrer pê ý hã mẽ ho hwýr o pa nhũm Karõ mẽ hwýr agjê? Nà na htem kàxpore ho Tirtũm Karõ japrõr kêt nẽ. Kot kaj wa ixpyrã nẽ ã mẽ hipêx anhýr kêt nẽ. Ajamaxpërja mexre hã. Kormã ate Tirtũm kôt amnhĩ xãm týt kêt jakamã na ka atýt ã ri ajamaxpër anẽ.

–Na ka ã wa ixte Tirtũm nhỹ hã mẽ hipêx anhýr ã wa ixpumu nẽ amã wa ixpyrã nẽ ã mẽ hipêx anhýr o ri apa hprãm xà aja-maxpër punuj nẽ. Nhũm ajamaxpër punuj te kot apa hã apyr ka tee ate kệp amnhĩ kjênh pyrãk. Kwa tokyx ajamaxpër punuj ã amnhĩ pumu nẽ akaprĩ nẽ tokyx hkaga. Hãmri nẽ amnhĩ to Tirtũm wý kẽ amnhĩ katut kôt ajamaxpër punujja mẽ ka axte ã ajamaxpër anhýr kêt nẽ. Æ mẽ hamaxpër punuj anhýr xwýnhjaja koja mẽ nhỹrmã ma kuwy hwýr pa. Anẽ.

²⁴ Hãmri nhũm tee ri amnhĩ tã kuma nẽ hkaprĩ nẽ wa kãm:

–Kwa xà wehe? Tô tokyx ixto Tirtũm wý kẽ ã ijamaxpër anhýrja mýrapê hwýr inhmẽnh kêt nẽ. Anẽ.

²⁵ Tã nhũm Simãw Pêtre mẽ Juãw wa Samar nhõ xwýnhjê mã Pahĩti Jejus kapër jarẽnh pê ho mẽ ahkre hãmri nẽ ma akupỹm Jerujarẽ hwýr mõi. Ma pyka pê Samar hkôt mẽ kãm Jejus kapër jarẽnh o ma akupỹm mõi.

Firipti mẽ Exiop nhõ xwýnh wa harẽnh Ijais 53.7-8

²⁶ Hãmri nhũm Firipti arĩ Samar kamã arĩk. Hãmri nhũm Tirtũm kapër o mẽ wrýk xwýnhja hwýr wrý nẽ kãm:

—Pa? E ot pa awÿr wrÿ nê tẽ. Nà kêr ka tokyx akato nê ma mõi nê Jerujarê rûm kànhmã Kas wÿr pry kahpêr ta nê hã juk nê ma hã mõi. Kapôt ã pry nôrta kahpêr ta nê hã mõi. E kwa tokyj.

Anhÿr o kãm kapêr hãmri nê ma akupÿm tẽ nê kaxkwa hwÿr api. ²⁷ Hãmri nhũm Firipti kuma nê kato nê ma hwÿr mör kurê kumrêx. Mõi hãmri nê pryja kahpêr ta nê hã mõi.

Hãmri nhũm ra mõi myja mõi. Exiop nhõ xwÿnh na pre. Exiop kamã mõi pahi na pre niti. Hixi pê na pre Kátatre. Nhũm pry hã mör xwÿnhja kêp kãm kàxpore jamär o pa xwÿnh. Exiop kamã te kêp mõi õ kôwenatô pyræk. Tã kot Tirtũm mã mex o mex ã harênh kaxyw ma Jerujarê hwÿr mõi.

²⁸ Hãmri nê akupÿm Exiop wÿr kormã mõi. Õ pàr kãm nhÿ nê Tirtũm kapêr ã kagà htũm kamã kapêr o mõi. Tirtũm nhÿ hã kapêr o pa xwÿnh pê Ijais kot Tirtũm kapêr ã kagà htũmja nhũm kamã kapêr o mõi. ²⁹ Hãmri nhũm Tirtũm Karõ Firipti mã harê nê kãm:

—E mõi mÿj wÿr aprõt nê tẽ nê hã ajêt nê ma hkõt tẽ. Anê.

³⁰ Hãmri nhũm kuma nê ma hwÿr hprõt nê hã ajêt nê kot kagà kamã kapêr ã kuma. Ijais kot Tirtũm kapêr ã kagà htũm kamã kapêr ã kuma nê kãm:

—Pa? Mãn ka aprĩ hã ate kamã akapêr xwÿnhhta ma nà? Anê.

³¹ Hãmri nhũm kãm:

—Nà ixte maare hã. Mõi kot hprĩ hã inhmã harê pa ixprĩ hã kuma? Xàt ka ixwÿr api nê ixri nhÿ nê aprĩ hã inhmã harênh o ixkõt mõi nà? Anê.

Hãmri nhũm kuma nê hwÿr api nê ìhkõ hã nhÿ nê kagàta pumunh o nhÿ. ³² Nhũm hã kagà kot:

Na htem ôwêhti par kaxyw nhũm amarĩ mõi kãm akryk kuhê.

Nê mõi kot kêp hkĩ jakàr kaxyw nhũm ma anê nê amarĩ mõi kãm akryk kuhê.

Tã na pre mõiõja ôwêhti kot amnhĩ nhĩpêx pyræk o amnhĩ nhĩpêx.

Jakamã nhũm mõi kot tanhmã hipêx to htã no nhũm arĩ mõi kãm akryk xa. Amnhĩ nê tanhmã mõi kãm kapêr punuj to hkêt nê. ãm arĩ mõi kãm xa.

³³ Na prem homnuy tÿx nê ri hipêx kati rax nê.

Aa kot tanhmã amnhĩ tomnuy to hkêt kumrêx tã nhũm mõi ã hipêx anê nhũm mõiõ yr pê tanhmã nê mõi kãm kapêr to hkêt nhũm prem kupĩ.

Nhũm amnhĩ kanrêhã hkra hkêt rãhã ty. Jakamã kot puj mõi hkrajê nhĩxi mar kêt nê. Kra hkêt rãhã htyk kênã. Anê.

³⁴ Nhũm pre ã Exiop nhõ xwÿnh Tirtũm kapêr ã kagà htũm kamã harênh anê. Hãmri nê tee ri ã kot mõiõ jarênh anhÿrja kukamã hamaxpêr nê hã Firipti kukja nê kãm:

—Kwa aprĩ hã inhmã mõiõja jarê. Mõiõ na prem ã hipêx rax anê? Xà kot kagà xwÿnhhta na prem ã hipêx anê nà xà nhãm mõiõ na prem ã hipêx anê? E kwa aprĩ hã inhmã harê pa ã mõi kot hipêx anhÿr xwÿnh kõt omu. Anê.

³⁵ Hãmri nhũm kãm:

—Tõe kot paj amã harê. Nà Jejus na prem ã hipêx anê nhũm prem hã kagà. Anê.

Hãmri nê hprĩ hã kãm kot kamã harênh xwÿnhhta jarê. Jejus kot tanhmã mõi panê amnhĩ nhĩpêx toja nhũm hprĩ hã kãm harênh o hkõt mõi.

³⁶ Hãmri nhũm wa kormã mõi nê pry htã himõ hãnh mõi nhũm Exiop nhõ xwÿnh omu nê Firipti mã kãm:

—E mÿj gõ mÿj nõ. Xà kot kaj kamã ixkrã kumrã nà? Anê.

³⁷ Nhũm kãm:

—Nà kot kaj amnhĩ kaxyw Jejus Kris kõt ajamaxpêr nê hkõt amnhĩ xãm hã kot paj akrã kumrãr kurê kumrêx. Anê.

Hãmri nhũm kãm:

—Tÿ. Kêp Tirtũm Kra kênã kot paj kêt amnhĩ kaxyw hkõt ijamaxpêr kêt. Anê.

³⁸ Hãmri nê pàr o mrrar xwÿnh mã anê nhũm pàr o nõ nhũm wa kato nê himõ hwÿr wrÿ nhũm Firipti hkrã kumrã. Kot Jejus kõt amnhĩ xãm ã hkrã kumrã. ³⁹ Hãmri nê wa akupÿm api nhũm Tirtũm Karõ Firipti mÿ nê ma nhÿhÿm o mõi nhũm Exiop nhõ xwÿnhja axte omunh kêt nê. Hãmri nê ma akupÿm papxà hwÿr mõi. Ra kot Jejus kõt amnhĩ xãm jakamã hkĩnh nê ma akupÿm mõi.

⁴⁰ Rôm nhũm Firipti krĩ pê Ajõt kamã pøj. Tirtũm Karõ kot Exiop nhõ xwÿnh pê kator nê tanhmã ho nê Ajõt wÿr o mõi hãmri nê kamã kumê. Hãmri nhũm mõi kãm Jejus kot tanhmã mõi panê amnhĩ nhĩpêx to hã harênh pê ma krĩ hõ hwÿr mõi kãm ujarênh

anhÿr o pa rãhã krĩ pẽ Sejarej wÿr mō nẽ pōj.

9

*Sawti kot Jejus kōt amnhĩ xãm ã harẽnh
Atre 22.6-11, 26.12-18*

¹ Rōm nhũm Sawtija xatã Jerujarẽ kamã Pahihtĩ Jejus kōt mẽ kot amnhĩ xunhwÿr xwÿnhjaja tanhmã mẽ homnuj tÿx to ho ri mẽ hkōt pa. Kãm mẽ himex par prãm jakamã na pre hte ã amnhĩ nhĩpẽx anhÿr pix o pa. Tã ra hamaxpẽr nẽ ma patre maati hwÿr tẽ nẽ mẽ hã amnhĩ jarẽ nẽ kãm:

² —E ot pa awÿr tẽ. Kwa inhmã kagã nhĩpẽx pa kupy nẽ ma krĩ pẽ Tamas kãm mẽ pahpẽ Ijaew xãptãr tũmrejẽ hwÿr o mō nẽ mẽ kãm kugõ. Kẽ mẽ kamã harẽ nẽ omu hãmri nẽ hkōt inhĩhkra kamã Jejus kōt mẽ kot amnhĩ nhĩpẽx xwÿnhjẽ jagjẽ. Mẽnijaja nẽ mẽmyjaja. Hãmri pa mẽ unẽ nẽ man akupÿn awÿr mẽ o mō ka mẽ omu nẽ kam tanhmã mẽ hipẽx to. Anẽ.

Hãmri nhũm kuma nhũm ja kãm mex nẽ. Hãmri nhũm kãm kagã nhĩpẽx nẽ kugõ nhũm kupy nẽ hkōt mẽ pa xwÿnhjẽ mẽ ro hã ma Tamas wÿr mẽ hwÿr mōr kurẽ kumrẽx.

³ Mōõ mẽ ra hpõx o mōr mẽ nhũm puh kaxkwa rũm hirã rax kumrẽx wrÿ nẽ hã ajẽt nhũm hipõk ri xa. ⁴ Hãmri nẽ tee ri omu nẽ kãm ma xaj pykap tẽm nẽ akryk nõ. Hãmri nhũm kaxkwa rũm mẽhõ kãm kapẽr nẽ kãm:

—Pa Sawti? Hẽxta waa nẽ. Kwa mon ka hte ixtomnuj tÿx o ri apa? Anẽ.

⁵ Hãmri nhũm amnhĩ jaer pẽ kuma nẽ kãm:

—Kwa mẽ atõ na ka ã inhmã akapẽr anẽ pahihtĩ? Anẽ.

Hãmri nhũm kãm:

—Kwa nhũm ixpẽ Jejus ixte amã ixkapẽr kẽnã. Pa na ka hte ixpẽ ixkōt mẽ kot amnhĩ xunhwÿr xwÿnhjẽ nhĩpẽx kati ho apa. Jao te pa ate ixtomnuj tÿx pyrãk. ⁶ Nom kot kaj axte ã amnhĩ nhĩpẽx anhÿr kêt kumrẽx. E kãnhmã xa nẽ mãmrĩ ma krĩ hwÿr tẽ. Kot kaj hwÿr pōj nhũm mẽhõ awÿr tẽ nẽ mẽmoj tã amã karõ ka ama nẽ hkōt amnhĩ nhĩpẽx. Anẽ.

⁷ Nhũm pre ã Jejus Sawti mã kapẽr anẽ. Nhũm hkōt mẽ pa xwÿnhjaja mẽmoja ma

no ãm hprĩ mar nẽ mẽmoj pumunh kêt nẽ. Hãmri nẽ tee ri hamaxpẽr nẽ kãm ma xaj akryk kapẽr kêt kumrẽx nẽ kuhẽ. ⁸ Hãmri nhũm Sawti kãnhmã xa nom rĩt kêt nẽ tee ri rĩt mã nhũm mẽ hpa hã kupy nẽ ma krĩm o mō. ⁹ Nẽ Tamas wÿr o pōj nẽ nhÿri mẽhõ nhõrkwÿ hwÿr ho axã nhũm kamã nohkre nẽ arĩ hkrĩ. Tee ri amnhĩ kukamã hamaxpẽr o hkrĩ. Nẽ apkur kêt nẽ hkõm kêt o ra hã apkati axkrunẽpxi.

¹⁰ Tamas kamã na pre mẽhõ my pẽ Ananĩsja pa. Kot Jejus kōt amnhĩ xunhwÿr xwÿnhjẽ hõ na pre. Jakamã nhũm Jejus hwÿr kato nẽ kãm kapẽr. Te hpimtir kãm hwÿr kator nẽ kãm kapẽr pyrã nẽ kãm:

—Pa Ananĩs? Anẽ.

Nhũm kãm:

—ÿ? Ot pa xa. Mo na Pahihtĩ? Anẽ.

¹¹ Nhũm Jejus kãm:

—E kær ka akato nẽ ma mẽ kot kãm: “Pry katãt” anhÿr xwÿnhta wÿr tẽ. Hãmri nẽ kamã Jut nhõrkwÿ japær. Kamã na Tas nhõ xwÿnh pẽ Sawtija hkrĩ. Na no hkre nẽ inhmã amnhĩ jarẽnh o hkrĩ. Ka hwÿr axã nẽ omu. ¹² Ate hwÿr atẽm nẽ inhÿ hã hã anhĩhkra xir nhũm akupÿm rĩt mex kaxyw na ato amÿti. Jakamã e ma hwÿr tẽ nẽ ã hipẽx anẽ. Anẽ.

¹³ Hãmri nhũm Ananĩs tee ri kuma nẽ kãm Sawti puma ho amnhĩ kamã kahak nẽ. Hãmri nẽ kãm:

—Kwa nã Pahihtĩ. Tãm na xep hte Jerujarẽ kamã mẽ kot amnhĩ kaxyw akōt mẽ hamaxpẽr xwÿnhjẽ nhĩpẽx kati ho pa. Pa ra mẽ hã harẽnh ma. ¹⁴ Tã na xep ra jar Tamas wÿr pōj. Patre krãhtũm kapẽr nhÿ hã kot mẽ ixpẽ akōt amnhĩ xunhwÿr xwÿnhjẽ pynẽnh nẽ ma akupÿm hwÿr mẽ ixto mōr kaxyw. Tãn ka ri hwÿr ijano. Kwa nã ri ixto anhÿr kêt nẽ Pahihtĩ. Anẽ.

¹⁵ Nhũm Jejus kãm:

—Nã mamrĩ ma hwÿr tẽ. Ra ixte amnhĩ kaxyw ãm kẽnã. Jakamã koja ã mẽ anhĩpẽx anhÿrta hpãnhã ma mẽ piitã mẽ kãm ixkapẽr jarẽnh o pa. Mẽ apẽ Ijaew mã nẽ mẽ anhõ pahi hkwÿjẽ mã nẽ mẽ kęp Ijaew kêt xwÿnhjẽ mã. Koja mẽ piitã mẽ kãm ixkapẽr jarẽnh mex o ri mẽ hkōt pa. ¹⁶ Koja mẽ ixtã homnuj tÿx nẽ nhũm amnhĩ xã htÿx kamã hamak o pa. Nom kot paj ixprĩ hã mẽ kot tanhmã ixtã hipẽx to hkukamã kãm

ixujarēnh pa nhūm amnhī kukamā amnhī jarēnh ma. E tokyx māmrī ma axāmnhīx hwýr tē. Anē.

¹⁷ Hāmri nhūm kuma nē kato nē ma Sawti hwýr htēm kurē kumrēx. Hāmri nē ixkre hwýr axà nē omu nē hkrā hā ĩhkra xi nē kām:

—Pa Jejus kôt ixtō Sawti? E na Pahihti Jejus awýr inhmē pa awýr tē. Pry kahti ri kot awýr kator xwýnhta. Tā akupým arīt nhūm Tirtūm Karō kot akarō mā àr kaxyw na awýr inhmē pa tē. Anē.

¹⁸ Hāmri nhūm mēmoj te tep kà pyrākja Sawti no rūm hapôj nē rôrôk nhūm akupým rīt mex kurē kumrēx. Hāmri nē kànhmā xa nhūm Ananīs hkrā kumrā. Ra amnhī kaxyw Jejus kôt hamaxpēr ā hkrā kumrā.

¹⁹ Hāmri nhūm nhý nē apku nē akupým hihtýx.

Sawti kot Tamas kamā Jejus kapēr jarēnh Sikūn Korīt 11.22-23

Nhūm Sawti Tamas kām mē kot Jejus kôt amnhī xunhwýr xwýnhjê hkôt amnhī xām nē mē hkôt ri pa nē tokyx ma akupým mōr kêt nē. ²⁰ Kormā mē hkôt ri pa nē Ijaew nhō Tirtūm kapēr o mē ahkre xà hā ixkre hwýr mra nē kamā mē kām Jejus kapēr jarē. Kêp Tirtūm Kra hā harēnh o kuhê. ²¹ Hāmri nhūm mē amnhī jaēr pē ā harēnh anhýrja ma nē tee ri hamaxpēr nē xepēn mā:

—Kokýŷ. Kwa tām na xep pre Jerujarē kamā amnhī kaxyw Jejus kôt mē kot amnhī xunhwýr xwýnhjê homnuj týx o pa. Tā xep jar kot mē hkwýjê pynēnh nē ma mē o mōr nē Jerujarē kamā patre krāhtūmjê mā mē ōr kaxyw na pre man mē pahwýr mō. Tā ra tanhmā hamaxpēr to nē axtem nē mē pamā Jejus kapēr jarēnh o mē pajahkre ho pa. Anē.

²² Hāmri nhūm Sawti arī Tamas kām Ijaew mā tanhmā Jejus jarēnh to kamā hihtýx o mē hkôt pa nē mē kām:

—Nà Jejus Krisja na pre Tirtūm mē pakaxyw ām nē mē pahwýr kumē. Ām hāmri na pa mē amā ja jarē. Anē.

Hāmri nhūm mē kuma nē tee ri kutā tanhmā kapēr to hkukamā hamaxpēr.

²³ Tā ra hā apkati xohtō nē nhūm Tamas kām Ijaew kwýjaja kot Sawti pīr kaxyw hā xepēn ma. ²⁴ Hāmri nhūm mēhōja hā ama nē Sawti hwýr tē nē kām mē harē nē kām:

—Kwa Sawti kêr ka axkām ajamak rom. Na mē pahkwýjaja atā amýnê. Na mē ra krī puhā kahê xà hā hakwakre piitā hamār ho kuhê. Kot kaj nhýhým akato nhūm mē apumu nē apyné nē apī. Anē.

²⁵ Jakamā nhūm kamāt nhūm Sawti hkôt ri mē pa xwýnhjaja kawà rax ō mý nē hwýr o tē nē kām ām nhūm hwýr axà nē nhý. Hāmri nhūm mē hkagrī nē kēn o krī puhā kahêja nhīrô pē ho wrý nhūm mē kêp kato nē ma mō.

Sawti kot Jejus kwýjê hkôt pikamēnh ā harēnh

Karatas 1.15-24

²⁶ Tā nhūm Sawti krī pē Tamas rūm kato nē ma akupým Jerujarē hwýr mō hāmri nē hwýr pōj. Hāmri nē mē kot Jejus kôt amnhī xunhwýr xwýnhjê hkôt amnhī jarēnh kaxyw mē hwýr tē. Hāmri nhūm mē tee ri amnhī wýr omu nē kot Jejus kôt amnhī xām ā amnhī to hêx ā hkamnhīx hāmri nē amnhī kamā kahak o amnhī nē hkurê nē mē piitā kām uma nē. ²⁷ Ām Panāpe pix ām hāmri kot Jejus kôt amnhī xām kôt hamaxpēr. Hāmri nē ma hwýr tē nē haprô nē ma Jejus nhý hā mē ahkre xwýnh maatijê hwýr o tē nē yr pē mē kām kapēr nē mē kām:

—Kwa ām hāmri na Sawti amnhī jarē. Na ra mē pahpyrà nē Jejus kôt amnhī xām. Na xep pre Tamas wýr pry hā kormā mō nhūm xep Pahihti Jejus hwýr kato nē kaxkwa rūm kām kapēr nhūm kuma nē hkôt amnhī xām. Jakamā nhūm xep ra axtem kot amnhī nhīpêx nyw o Tamas nhō xwýnhjê mā Jejus kapēr jarēnh o ri mē hkôt pa. Ra amnhī kamā kām mē uma hkêt nē àmnhīx ri mē kām harēnh o ri mē hkôt pa. Anē.

²⁸ Hāmri nhūm mē kuma nē amnhī kôt Sawti mē nhūm mē hkôt ri pa. Hāmri nē Jerujarē kamā mē piitā mē kām Jejus kapēr jarēnh o pa. Kām Jejus kôt amnhī xunhwýr kêt xwýnhjê pýma hkêt nē àmnhīx ri mē kām kapēr jarēnh o ri mē hkôt pa.

²⁹ Nē Ijaew kwý pē Gresjê kapēr o mē kapēr xwýnhjê mā nhūm xatā mē kām Jejus jarēnh o ri mē hkôt pa. Kêp Tirtūm kot mē pakaxyw ām xwýnh ā harēnh rāhā ho ri mē hkôt pa. No nhūm mē kām mar prām kêt nē ra kot Jejus ā hpīr mā. ³⁰ Hāmri nhūm mē kot Jejus kôt amnhī xunhwýr xwýnh

kwýjaja mẽ harēnh ma nē mẽ kēp ho kato nē ma krī pē Sejarej wýr o mō. Hāmri nē kurūm ma akupým ō krī pē Tas wýr kumē nhūm ma akupým mō.

³¹ Tã ra Sawti kot Jejus kôt amnhĩ xãm jakamã nhūm mẽ kãm mẽ hkurê xwýnhjaja axte Jejus ã tanhmã hkwýjê hto hkêt nhūm mẽ piitã hamakêtkati nē àmnhĩx ri pa. Pika pē Jutej kamã nē Garirej kamã nē Samar kamã nhūm mẽ piitã hamakêtkati nē àmnhĩx ri pa. Hāmri nē Tirtūm mã mex o mex ã harēnh o ri pa. Nhūm Tirtūm Karō tanhmã mẽ hkrã hto nhūm mẽ ra kapēr kôt amnhĩ nhĩpêx mex o mō. Hāmri nhūm mẽ ohtô rax nē mẽ uràk nē Jejus kôt amnhĩ xunhwý nē hkwýjê hkôt axkamē.

*Enejti akupým mex ã harēnh
Atre 3.1-10*

³² Tã nhūm Simãw Pêtreja ma mẽ kot Jejus kôt amnhĩ xunhwýr xwýnhjê mã Tirtūm kapēr jarēnh o mẽ ahkre kaxyw ma krī piitã hkôt pa. Jakamã krī pē Rit wýr mō ³³ nē hwýr pōj nē kamã Enejti pumu. Nhūm ĩ kamã htyk pa nē kupĭp kãm hikwý rãhã hã amgrã pē 8. ³⁴ Hāmri nhūm Simãw Pêtre omu nē Jejus nhỹ hã kãm kapēr nē kãm:

–Pa Enejti? E na Jejus Kris akupým ato mex. Jakamã e kãnhmã xa nē akupĭpta py. Anē.

Hāmri nhūm akupým mex nē kãnhmã xa nē amnhĩ pumu nē hkĩnh o hkĩnh. ³⁵ Hāmri nhūm krĭja kamã nē krī hō pē Sarō kamã mẽ piitã harēnh ma nē mẽ kot amnhĩ tomnuj kaga hpa nē hpãnhã Jejus kôt amnhĩ xunhwý nē hkôt amnhĩ nhĩpêx o pa.

*Tapitre akupým htĭr ã harēnh
Rukre 8.49-56; Atre 20.7-12*

³⁶ Nhūm Tapitreja krī pē Jope kamã na pre pa. Gres kapēr kãm hixi pē Nokre. Mẽ kapēr kãm Nokreja te kēp “karã” anhỹr jarēnh pyrãk. Na pre ra Tapitre pē Nokreja Jejus kôt amnhĩ xãm nē mẽ piitã mẽ ho mex o ri mẽ hkôt pa. Nē mẽ kēp amrakati xwýnhjê kamã ukapĭri ho ri mẽmoj to mẽ kutã nojarêt o ri mẽ hkôt pa. ³⁷ Tã ra à htýx nē hāmri ty. Hāmri nhūm mẽ tee ri omu nē hkapĭri nē mýr rax nē. Nē kumý nē kuhō hāmri nē kormã haxàr kêt ri kýx pē ixkre kamã kuxi nē kuri mýr o hkrĭ.

³⁸ Nhūm Simãw Pêtre kormã krī hō pē Rit kamã ri pa. Rit rūm Jope hwýr jawý jakamã nhūm Jope kamã mẽ kot Jejus kôt amnhĩ xunhwýr xwýnhjaja Simãw Pêtre jarēnh ma hāmri nē hwýr ja wa ho hamēxkrut nē wa kumē. Nhūm wa ma hwýr tē nē hwýr pōj nē omu nē kãm:

–Pa? E jar na pa wa awýr tē. Na Jejus kôt mẽ pahtōx Tapitre ham mẽ pahpê ty. Kwa tokyx kormã mẽ kot haxàr kêt ri ma wa ixkôt hwýr tēn omu nã? Anē.

³⁹ Hāmri nhūm wa kuma nē ma wa hkôt htēm kurê kumrêx. Hāmri nē Jope hwýr pōj nē mẽ hwýr tē nhūm mẽ kýx pē htyk nē nōr xwýnhja wýr ho api nhūm hwýr axà. Nhūm kuri mẽ kēp mẽ mjên htyk xwýnhjaja hkapĭri nē mýr o hkrĭ. Hāmri nhūm Simãw Pêtre mẽ hwýr axà nhūm mẽ omu nē kãm Tapitre kormã htĭr ri kot tanhmã mẽ ho mex to hã harē. Nē mẽ ê hkwý jamý nē kãm kupê nē kãm:

–Ga ja pumu. Tyk xwýnhta na pre mẽ inhmã hkay nē kugō. Na pre hte mẽ ixto mex o pa. Tã mẽ ixpê ty. Hêxta gãa nē. Na pa mẽ ixkapĭri htýx kumrêx. Anē.

⁴⁰ Hāmri nhūm mẽ kuma nē mẽ kator pa hāmri nē htyk xwýnhta ri hkōn krã ho nhỹ nē ho Tirtūm wý. Hāmri nē htyk xwýnhta mã kapēr nē kãm:

–Pa Tapitre? E kwa kãnhmã nhỹ. Anē.

Pu nhūm no amra nē Simãw Pêtre pumu nē kãnhmã nhỹ. ⁴¹ Hāmri nhūm hpa hã kupy nē kãnhmã ãm nē kapôt ã mẽ kuhê xwýnhjê mã anē nhūm mẽ akupým wa hwýr agjê nhūm mẽ kãm:

–E ota. Na Tirtūm akupým mẽ amã ho htĭr. Anē.

Hāmri nhūm mẽ amnhĩ jaêr pē omu nē hkĩnh týx nē. ⁴² Hāmri nhūm Jope kamã mẽ piitã harēnh ma nē mẽ ohtô nē amnhĩ kaxyw Jejus kôt hamaxpēr nē hkôt amnhĩ xunhwý. ⁴³ Hāmri nhūm Simãw Pêtre Jope kamã ri pa hã apkati xohtô nē tokyx mẽ kurūm kato nē ma krī hō hwýr mōr kêt nē. Na pre mry kã ho mẽmoj nhĩpêx o pa xwýnh pē Simãw ri pōj nē kuri pa hã apkati xohtô nē.

10

*Konēre kot Simãw Pêtre hã karō hã harēnh
Rukre 7.1-10*

¹ Tã nhũm Ijaew kêt xwýnh Konëre. Kêp Rômjê nhõ pôristi krãhtũm na pre. Ô pôristija pika pê Itar nhõ xwýnh na pre mẽ nhũm Konëre kêp mẽ hkrãhtũm. Krĩ pê Sejarej kamã. ² Konëreja kot amnhĩ to mex o pa xwýnh na pre. Kêp Ijaew kêt tã na pre hte ôrkwý kamã hkwýjê mẽ Tĩrtũm ã hpĩaãm nê kãm mex o mex ã harênh o pa. Apkati mẽ kãm amnhĩ jarê. Nê mẽ kêp amrakati xwýnhjê mã kãxpore hkwý nhõr o pa. ³ Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrã nê kaxkwa kamã Tĩrtũm kapêr o wrýk xwýnh pumu. Nhũm hwýr wrý nê tanhmã kãm kapêr to nê kãm:

—Pa Konëre? Anê.

⁴ Nhũm tee ri omu nê kãm ma htýx kumrêx. Hãmri nê kãm:

—Mo na? Anê.

Hãmri nhũm kãm:

—Nà ate amnhĩ to Tĩrtũm wýr o apaja nhũm ra amnhĩ tã ama nhũm ja kãm mex nê. Nê ate mẽ kêp amrakati xwýnhjê mã kãxpore hkwý nhõr o apaja nhũm ja mããnênh kãm mex nê.

⁵ —Jakamã e inhma. Kêr ka ma Jope hwýr amã mẽ àpênh xwýnh kwý rê kê mẽ ma hwýr mra nê kamã mẽhõ pê Simãw Pêtre japrõ nê man akupýn awýr o mõi. ⁶ Simãw kot mry kã ho mẽmoj nhĩpêx o pa xwýnhhta nhõrkwý kamã na hte pa. Ôrkwýja gõ mý ri na. E hwýr mẽ arê kê mẽ ma hwýr mõi nê haprõ nê man awýr o mõi kê amã mẽmoj mex jarê ka ama. Anê.

⁷ Nhũm pre ã Tĩrtũm kapêr o wrýk xwýnhja Konëre mã kapêr anê hãmri nê kato nê ma akupým api. Hãmri nhũm kot mar xà hkõt jajê rê nê Simãw Pêtre hwýr mẽ kurê. Kãm àpênh xwýnhjê ho hamêxkrut nê kaxyw õ pôristi hõ. Pôristija na pre hte Konëre pyrã nê Tĩrtũm ã hpĩaãm o pa. ⁸ Jakamã nhũm mẽ kurê nê mẽ kãm kapêr hãmri nê ma Jope hwýr Simãw Pêtre hwýr mẽ kurê nhũm mẽ kato nê ma hwýr mõi. ⁹ Hãmri nhũm apkati nhũm kaxkwa nhĩpõk ri myt nhỹ nhũm mẽ hwýr hpõx o mõi.

Simãw Pêtre tanhmã hpimtir to hã harênh Atre 11.5; Karatas 2.11-21

Rôm nhũm Simãw Pêtre kot Tĩrtũm mã amnhĩ jarênh kaxyw ixkre nhĩmõk ã api

nê himõk po hã kãm amnhĩ jarênh o nhỹ. ¹⁰ Hãmri nê ra kãm prãm nê nom nhũm mẽ kormã kãm õ hã àpênh jakamã nhũm arĩ ixkre nhĩmõk ã Tĩrtũm mã amnhĩ jarê.

Hãmri nê Konëre pyrã nê te hpimtir kãm kot mẽmoj pumunh pyrã nê mẽmoj pumu nhũm Tĩrtũm Konëre hkukamã tanhmã kãm mẽmoj to amnhĩrit to. No ãm hã kuxi nê kãm harênh jakamã nhũm Simãw Pêtre te hpimtir kãm kot mẽmoj pumunh pyrã nê mẽmoj pumu. ¹¹ Nhũm kaxkwa katêr nhũm kurũm mẽmoj te kot mẽ hpiipro xà pyrãk xwýnhja pyka hwýr wrýk o mõi. Nê hatur xà piitã axpên tã akuprõ nê ajêt nê wrýk o mõi nhũm omu. ¹² Mẽ hpiipro xàta kamã mẽmo mry piitã hikwý. Mẽmo mry hpar o ri pa xwýnhjaja nê htu mýr pê ri pa xwýnhjaja nê mẽmo ãk kýx pê htor o ri mrrar xwýnh piitã mẽ hpiipro xàja kamã hikwý nhũm omu.

¹³ Hãmri nhũm Tĩrtũm kãm:

—Pa Simãw Pêtre? Mãn ka ra amã prãm nê nà? E kãnhmã xa nê axãmnhĩx mãmrĩ mryta õ kapi nê api nê ho anê nê aku. Piitã mẽ ate hkur mã mex. Anê.

¹⁴ Hãmri nhũm tee ri kuma nê kãm:

—Kwa nà Pahi Maati. Mẽ ixpê Ijaew mẽ ixte mry piitã hkur kêt. ãm hkwý pix na pa htem kuku. No mry jaja aa mẽ ixte hõ hkwý hkrêr kêt. Anê.

¹⁵ Hãmri nhũm Tĩrtũm kãm:

—Nà kot anhýr tã kot paj pam amã mẽmoj jarê ka kamã anhõkre kahak kêt nê. Mãmrĩ amnhĩm hõ kapi nê api nê ho anê nê axãmnhĩx hkwý hkre. Anê.

¹⁶ Nhũm pre ã kãm mry hã karõ anhýr o axkrunêpxi. Simãw Pêtre kot mãmrĩ Ijaew kêt xwýnhjê hkõt pa nê àmnhĩx ri mẽ kutã apkur nhũm Tĩrtũm kãm ja mex nhũm kot hã amnhĩ pumunh kaxyw nhũm ã kãm harênh anhýr o axkrunêpxi. Hãmri nhũm mẽ hpiipro xàja ma akupým kaxkwa hwýr àpir o mõi nê akunok. ¹⁷ Hãmri nhũm Pêtre te hkrãkator pyrãk jao tee ri hpimtir kukamã hamaxpêr o nhỹ nê hamaxpêr o:

—Kwa mo kaxyw na Tĩrtũm ã inhã ja hã karõ anê? Anê.

Rôm nhũm Konëre kot hwýr mẽ rênh xwýnhjaja ra hwýr hpõx o mõi. Ijaew kêt xwýnhhtaja Simãw nhõrkwý hã mẽ hkukjêr o mõi nê hwýr pøj nê hakwakrem kuhê.

¹⁸ Hãmri nê ôrkwý nhõ xwýnhjê mã kãm:

—Pa na ka mẽ arĩ akrĩ? E Simãw Pêtre hwÿr na pa mẽ mỗ. Xà jar na hte pa nà? Anẽ.

Hãmri nhũm mẽ kãm: —Tỳ. Omũj kÿx pẽ ixkre nhĩmỗk ã na nhỹ. Anẽ.

¹⁹ Nhũm Simãw Pêtre arĩ kot mẽmoj pumunhta kukamã hamaxpêr o nhỹ nhũm Tĩrtũm Karõ kãm mẽ hpôx xwÿnhjê jarẽ nẽ kãm:

—E Simãw Pêtre. Ota Ijaew kêt xwÿnhjaja axkrunẽpxi nẽ ajapêr o mỗ nẽ ra anhõrkwÿ hwÿr pøj. ²⁰ Mẽ hwÿr wrÿ nẽ mẽ kot amã mẽmoj jarẽnh ma nẽ mãmri axãmnhĩx ma mẽ hkôt mỗ. Tanhmã ajamaxpêr to hkêt nẽ. Pa na pa awÿr mẽ kumẽ nhũm mẽ mỗ. Anẽ.

²¹ Hãmri nhũm kuma nẽ mẽ hwÿr wrÿ nẽ mẽ omu nẽ mẽ kãm:

—Pa? Xà pa na ka mẽ ijapêr o mỗ? E ot pa xa. Kam nẽ mẽ inhmã mẽmoj jarẽ pa mẽ ama. Mẽmo kaxyw na ka mẽ ixwÿr mỗ? Anẽ.

²² Hãmri nhũm mẽ kãm:

—Nà mẽ inhõ patrãw Konẽre na awÿr mẽ inhmẽ pa mẽ mỗ. Na hte tãm amnhĩ nhĩpêx o pa. Nẽ Tĩrtũm ã hpijaàm nẽ kãm mex o mex ã harẽnh o pa. Nhũm mẽ inhõ krĩ kamã Ijaew kãm hkĩnh nẽ. Tã na Tĩrtũm kapêr o wrÿk xwÿnhjaja ham hwÿr wrÿ nẽ kãm ajarẽ. Kot amnhĩ wÿr atã karõ nhũm ate hwÿr amõr nẽ kãm axujarẽnh kaxyw kãm ajarẽnh jakamã nhũm mẽ ixte ajaprõr kaxyw awÿr mẽ inhmẽ pa mẽ man awÿr mỗ. Anẽ.

²³ Hãmri nhũm mẽ kuma nẽ mẽ kãm:

—Tõe nà na pa mẽ ama. E mẽ agjê nẽ akrĩ nẽ jar mẽ ixri nõ kê apkati pu mẽ rĩ ma akupÿm mỗ. Anẽ.

Hãmri nhũm mẽ kuma nẽ mẽ hwÿr agjê.

Tã nhũm apkati nhũm mẽ akupÿm nojarêt nhũm Simãw Pêtre ma mẽ hkôt mỗ. Nhũm Jope kamã mẽ kot Jesus kôt amnhĩ xunhwÿr xwÿnh kwÿjaja ma mẽ hkôt mỗ. Nhũm mẽ mõr o kamãt.

²⁴ Hãmri nhũm apkati nhũm mẽ Sejarej wÿr hpôx o mỗ. Nhũm ra Konẽre mẽ kutêp amnhĩ wÿr hkwÿjê ho akuprõ nhũm mẽ Simãw Pêtre kutêp õrkwÿ kamã akuprõ nẽ hkrĩ. ²⁵ Hãmri nhũm mẽ hwÿr pøj nẽ mẽ hwÿr àr kaxyw nhũm Konẽre amnhĩ wÿr omu nẽ kànhmã xa nẽ kutã tẽ nẽ hpar pẽ hkõnkrã ho tẽm nẽ nhỹ. ²⁶ Hãmri nhũm tee

ri ja hã omu nẽ pa hã kupy nẽ kànhmã ãm nẽ kãm:

—Kwa kànhmã xa. Ixpê Tĩrtũm kêt tã ka ri ã inhĩpêx anẽ. Anẽ.

²⁷ Hãmri nẽ hkôt õrkwÿ hwÿr axà nẽ kutêp mẽ pikuprõnh xwÿnhjê pumu nẽ mẽ kãm:

²⁸ —Pa na ka mẽ arĩ akrĩ? E mãn ra mẽ ate mẽ ixpê Ijaew kot amnhĩ nhĩpêx ã mẽ ixpumunh mex. Na pa htem mẽ apê axtem nhõ xwÿnhjê hkôt ri ixpa hkêt nẽ. Nẽ mẽ anhõrkwÿ hwÿr inhgjêx kêt nẽ. Tã ham Tĩrtũm inhmã mẽ ixte ã amnhĩ nhĩpêx anhÿr o ixpaja nẽ ixkurê nẽ inhmã: “Kot paj pam mẽ hkwÿjaja mex ã mẽ harẽ ka mẽ kamã anhõkre kahak kêt nẽ.”

²⁹ —Anhÿr jakamã ka xep pre ixtã karõ pa inhĩtõt kêt nẽ man mẽ awÿr inhmõr kurê kumrêx. E mẽ inhmã mẽmoj jarẽ pa mẽ ama. Mẽmo kaxyw na ka mẽ ixtã karõ? Anẽ.

³⁰ Hãmri nhũm Konẽre kãm:

—Nà jãã na pa pre jar inhõrkwÿ kamã Tĩrtũm mã amnhĩ jarẽnh o nhỹ. Ra myt xàpanh grire pa kãm amnhĩ jarẽ. Hãmri nhũm Tĩrtũm kapêr o wrÿk xwÿnh ixwÿr wrÿ nẽ hirã rax kãm xa. ³¹ Hãmri nẽ inhmã: “Pa Konẽre? E na hte Tĩrtũm ate kãm amnhĩ jarẽnhhta mar o hkrĩ. Nẽ ate mẽ kêp amrakati xwÿnhjê ho mex o apaja nhũm hã apumu.

³² Jakamã e ma Jope hwÿr amã mẽ àpênh xwÿnh kwÿ rê kê mẽ ma hwÿr mỗ nẽ kamã Simãw Pêtre japrõ nẽ man akupÿn awÿr o mỗ. Mry kà ho mẽmoj nhĩpêx o pa xwÿnh Simãw nhõrkwÿ kamã na hte pa. Õrkwÿja gõ mÿ ri na.” Anẽ.

³³ —Ã kot inhmã kapêr anhÿr jakamã na pa kuma hãmri nẽ awÿr jajê rẽnh kurê kumrêx. Tã ka mẽ hkôt man mẽ ixwÿr mỗ nẽ ã apôx anẽ. ãm hãmri na ka mẽ hkôt mỗ. Mẽ apê Ijaew kot amnhĩ nhĩpêx kuhpa hã amnhĩ nhĩpêx nẽ axãmnhĩx man mẽ ixwÿr mỗ. Tã ot pa mẽ Tĩrtũm noo mã ixkrĩ. Kam nẽ mãmri ÿ hã mẽ inhmã mẽmoj jarẽ pa mẽ ama. Anẽ.

Simãw Pêtre kot Konẽre mã ujarẽnh

³⁴ Hãmri nhũm Simãw Pêtre Konẽre kot kãm amnhĩ jarẽnhja ma nẽ mẽ kãm awjarê nẽ mẽ kãm:

—Nà ãm hãmri na Tĩrtũm mẽ akukamã tanhmã inhmã kapêr to. Xep kãm mẽ ixpê

Ijaew pix japê hkêt. Kãm mẽ pahpiitã mẽ pajapê nê mẽ panhîpêx o axpên pyrâk. ³⁵ Koja ahpÿnhã pyka piitã hkôt mēhō mẽ ixpyrà nê kēp Ijaew kêt tãã hkôt amnhî xãm nê hã hpijaam pē kãm mex o mex ã harē nê tãm amnhî nhîpêx. Hãmri nhũm Tirtũm ja hã omu nhũm ja kãm mex nê.

³⁶ —Na pre ra mẽ ixpê Ijaew mã tanhmã Kra Jejus Kris jarēnh to. Jejus kot mẽ panê htyk kukwak ri na hte mẽ ixte hkôt amnhî xunhwÿr xwÿnhjê ho hkra. Tã ra mãânēn ã mẽ apê Ijaew kêt xwÿnhjê mã ã amnhî jarēnh anē nê Jejus htyk kukwak ri mẽ ate mẽ ixpyrà nê hkôt amnhî xunhwÿr xwÿnhjê ho hkra. Jakamã Jejus Krisja kēp mẽ pahpiitã mẽ panhō Pahihti.

³⁷⁻³⁸ —Mãn ka prem ra harēnh ma. Mẽ ixpê Ijaew nhō pika pē Jutej kumrêx kãm na pre Juãw Paxisja Jejus kukamã mẽ kãm harē nê mẽ hkrã kumrãr o pa. Mẽ piitã mẽ kot amnhî tomnuj kaga nê Tirtũm kôt amnhî xunhwÿr ã mẽ omunh xà hkôt mẽ hkrã kumrã. Jejusja krî pē Najare kamã na pre hprêk. Tã hwÿr na pre Tirtũm amnhî Karō mẽ nhũm wrÿ nê hkarō mã axà nê hkôt pa ho pa. Jakamã nhũm àhpumunh o àhpumunh nê ma krî piitã hkôt tanhmã mẽ ho mex to ho ri mẽ hkôt pa. Pika pē Garirej kumrêx kamã mẽ piitã ri mẽ kãm Tirtũm kapêr jarēnh o pa. Nê mẽkarōmnuti kot Satanasti nhÿ hã tanhmã mẽ ho xwÿnhjaja nhũm mẽ nê mẽkarōmnuti japôx o pa. ã na pre Tirtũm nhÿ hã amnhî nhîpêx anhÿr o pa.

³⁹ —Tã Jejus nhÿ hã hkrajê jahkre ho mẽ ixpa xwÿnhjaja na pa prem kot ri tanhmã amnhî to ho pa hã omunh par o ri hkôt ixpa. Mẽ ixpê Ijaew nhō pyka kamã nê mẽ inhō krî pē Jerujarē kamã kot ri tanhmã amnhî nhîpêx to ho paja pa prem piitã omunh o hkôt ri ixpa. Tã nhũm prem axtem nê mẽ ixpê pî kahpa hã kunhō nê kupî. ⁴⁰ Hãmri nhũm htyk o apkati axkrunēpxi nhũm Tirtũm akupÿm hō htîr nê akupÿm mẽ ixwÿr kumē pa prem akupÿm htîr kãm omu. ⁴¹ No nhũm mẽ piitã akupÿm htîr kãm omunh kêt nê. ãm mẽ ixwÿr pix na pre kato nê mẽ ixkutã apku pa mẽ papxipixjaja akupÿm htîr ã omu. Hãmri nhũm Tirtũm mẽ ixte ma mẽ piitã mẽ kãm

akupÿm htîr ã harēnh o ri ixpa kaxyw mẽ ixrê. ⁴²⁻⁴³ Amnepēm Tirtũm nhÿ hã kapêr jarēnh o mẽ pa xwÿnhjaja na prem Jejus kukamã tanhmã hã kagà hto nê mẽ kãm harēnh o pa. Nê mẽ kãm:

Koja nhÿrmã mēhōja man mẽ pahwÿr wrÿ nê mẽ panê tanhmã amnhî nhîpêx to. Ka mẽ atō amnhî kaxyw hkôt ajamaxpêr nê hkôt amnhî xãm hã koja Tirtũm ja hã apumu nê mēhō kot tanhmã mẽ panê amnhî nhîpêx to xwÿnhhta kukwak ri amnhî katut kôt ate amnhî tomnuj rēnh pa nê axte kãm hamaxpêr kêt nê. Anē.

Na pre Tirtũm nhÿ hã kapêr jarēnh o mẽ pa xwÿnhjaja Jejus kukamã ã harēnh nê hã kagà anē. Tã koja Jejus nhÿrmã akupÿn wrÿ hãmri nê mẽ htyk xwÿnhjê nê arî mẽ htîr xwÿnhjê mẽ pahto pimràatã tanhmã mẽ pajarēnh to. Mẽ pahte tanhmã amnhî nhîpêx to ho papa hã mẽ pahpumunh kôt tanhmã mẽ pajarēnh to. Hãmri nê Tirtũm mẽ wa kuri mẽ pahtîr tũm nê mẽ papa ho papa mã xwÿnhjê jarē nê mãânēn wa kuri mẽ htîr tũm kêt xwÿnhjê jarē. Mẽ pahpiitã tanhmã mẽ pajarēnh to kaxyw na pre Tirtũm mẽ pakaxyw Jejus xãm. Tã ã kot mẽ pajarēnh anhÿrja kukamã na pre mẽ ixte mẽ amã tanhmã harēnh to ho ixpa kaxyw mẽ awÿr mẽ ixrê. Mẽ ate kapêr mar nê tokyx Jejus kôt amnhî xunhwÿr kaxyw. Anē.

⁴⁴ Nhũm Simãw Pêtre ã mẽ kãm ujarēnh anhÿr rôm nhũm Tirtũm mẽ kot mar o hkrî xwÿnhjê hwÿr amnhî Karō rē nhũm mẽ hwÿr wrÿ nê mẽ hkarō mã gjêx pa. ⁴⁵⁻⁴⁶ Hãmri nhũm mẽ Tirtũm mã mex o mex ã harēnh o hkrî. No ãm mẽ kapêr kãm harēnh kêt nê. Mẽ kapêr kwÿ hō ho kãm mex o mex ã harē. Aa mẽ kot mẽ kapêr mar kêt tã ra ho kapêr mex nê. Jakamã nhũm Jope rũm mẽ kot Simãw Pêtre hkôt mẽ mōr xwÿnhjaja. Ijaew kwÿ kot ra Jejus kôt amnhî xunhwÿr xwÿnhjaja amnhî jaer pēja hã mẽ omu nê axpên mã:

—Hêxta waa nê. Mẽ kēp Ijaew kêt tã nhũm Tirtũm kot mẽ panhîpêx pahpyrà nê mẽ hwÿr amnhî Karō rē nhũm mẽ hwÿr wrÿ nê mẽ kãm agjê. Nà ãm hãmri na mẽ pahpyrà nê ã mẽ hipêx anē. Anē.

Hāmri nhūm Simāw Pêtre mẽ kuma nẽ mẽ kãm:

⁴⁷ —Kwa pu mẽ hkrã kumrãr kurẽ kumrẽx. Ra Tĩrtũm Karõ kot mẽ pahpyrà nẽ mẽ hkarõ mã gjẽx kẽnã kot kêt mẽhõ mẽ nẽ tanhmã mẽ pahpẽ àmnàr to. Ra mẽ kot mẽ pahpyrà nẽ Jejus kõt amnhĩ xunhwỳr kẽnã. Anẽ.

⁴⁸ Hāmri nẽ Konẽre mẽ hkwỳjẽ mã kãm:

—E kot paj mẽ ate Jejus Kris kõt amnhĩ xunhwỳr ã mẽ akrã kumrã. Anẽ.

Hāmri nẽ mẽ hkrã kumrãr pa nhūm mẽ Simāw Pêtre mã kãm:

—Kwa kormã anojarêt kêt nẽ. Kritpẽm ri mẽ ixkõt ri apa hã atã apkati grẽre nẽ kormã ma akupỹm mõi. Anẽ.

Hāmri nhūm mẽ kuma nẽ mẽ hkõt ri pa hã apkati grẽre hāmri nẽ nojarêt nẽ ma akupỹm mõi.

11

Simāw Pêtre kot hkwỳjẽ mã Konẽre jarẽnh Atre 10.1-48

¹⁻² Hāmri nhūm Simāw Pêtre ma akupỹm mõi. Jutej kamã krĩ pẽ Jerujarẽ wỳr ma akupỹm mõi hāmri nẽ pøj. Hāmri nhūm Jutej kamã Jejus nhỹ hã mẽ ahkre xwỳnh maatijẽ mẽ mẽ kot Jejus kõt amnhĩ xunhwỳr xwỳnhjaja Ijaew kêt xwỳnhjẽ jarẽnh ma. Konẽre mẽ hkwỳ kot mẽ uràk nẽ Jejus kõt amnhĩ xunhwỳr ã mẽ harẽnh ma. Jakamã nhūm Simāw Pêtre akupỹm mẽ hwỳr pøj nhūm mẽ omu nẽ mẽ hã àhkukjẽr kurẽ kumrẽx. Hāmri nhūm mẽ hkwỳjaja mẽ hã kãm akir nẽ kãm:

³ —Kwa mẽ pahpẽ Ijaew pyrà nẽ mẽ kot amnhĩ my kwỳr kà jakàr kêt tã ka mẽmo hwỳr mẽ hwỳr mõi mẽ kuri pøj nẽ mẽ kutã apku. Anẽ.

⁴ Hāmri nhūm Pêtre tee ri mẽ kuma hāmri nẽ hprĩ hã mẽ kãm amnhĩ jarẽ. Nẽ tanhmã Tĩrtũm kot kãm Ijaew kêt xwỳnhjẽ jarẽnh to hã mẽ kãm harẽ nẽ mẽ kãm:

⁵ —Kwa mẽ ã ri ajamaxpẽr anhỹr kêt nẽ. E pa mẽ amã amnhĩ jarẽ ka mẽ inhma mãn. Nà na pa pre jãã Jope kamã Tĩrtũm mã amnhĩ jarẽnh o nhỹ nẽ te ixpimtir kãm mẽmoj pumunh pyràk. Nhūm mẽmojja te mẽ hpiro xà pyrà nẽ kaxkwa rũm ixwỳr wrỳk o mõi pa ixprĩ hã omu. ⁶ Nhūm kamã mry piitãã. Mry xoprẽ nẽ mry xuwapõ nẽ

mry hpar o ri pa xwỳnhjaja nẽ mry htu mỳr pẽ ri pa xwỳnhjaja nẽ àk. Nẽ mẽ pahte hkur xwỳnhjaja nẽ mẽ pahte hkur kêt xwỳnhjaja.

⁷ Kamã mry piitã pa omu. Hāmri nhūm Tĩrtũm inhmã: “Pa Simāw Pêtre? Mãn ka ra amã prãm nẽ nà? E kãnhmã xa nẽ axãmnhĩx mãmrĩ mryta õ kapi nẽ apĩ nẽ ho anẽ nẽ aku. Piitã mẽ ate hkur mã mex.” Anẽ.

⁸ —Pa tee ri kuma nẽ kãm: “Kwa Pahi Maati. Mẽ ixpẽ Ijaewjaja mẽ ixte mryja piitã hkur kêt. ãm hkwỳ hpix na pa htem kuku. No ja hkwỳ aa mẽ ixte hõ hkwỳ hkrẽr kêt.” Anẽ. ⁹ Nhūm inhmã: “Nà nom kot anhỹr tãã. Kot paj pam amã mẽmoj jarẽ ka kamã anhõkre kahak kêt nẽ. Jakamã e mãmrĩ amnhĩm hõ kapi nẽ apĩ nẽ ho anẽ nẽ axãmnhĩx hkwỳ hkrẽ.” Anẽ.

¹⁰ —Na pre ã Ijaew kêt xwỳnhjẽ hwỳr inhmõr kukamã inhmã karõ ho axkrunẽpxi anẽ. Nom hã kuxi nẽ inhmã mẽ pahte mry kur kêta jarẽ. Hāmri nhūm mẽ hpiro xaja ma akupỹm kaxkwa hwỳr api nẽ kakrãm axà nẽ akunok. ¹¹ Hāmri nhūm Ijaew kêt xwỳnhjaja mẽ ixwỳr axkrunẽpxi nẽ mra nẽ pøj. Konẽreja Sejarej rũm ixwỳr mẽ rẽnh xwỳnhjaja nhūm mẽ mra nẽ ixwỳr pøj. ¹² Hāmri nhūm Tĩrtũm Karõ ma mẽ hkõt inhmẽ. Mẽ kęp Ijaew kêt tã nhūm ixãmnhĩx ma mẽ hkõt ixpa kaxyw mẽ hkõt inhmẽ pa ma mẽ hkõt mõi. Nhūm Jope kamã mẽ kot Jejus kõt amnhĩ xunhwỳr xwỳnh kwỳjaja kęp 6ja ma mẽ ixkõt mõi. Pa mẽ mõi nẽ Sejarej kamã Konẽreja wỳr pøj. ¹³ Hāmri nhūm mẽ ixpumu nẽ mẽ inhmã amnhĩ jarẽ. Tĩrtũm kapẽr o wrỳk xwỳnh kot hwỳr wrỳk nẽ õrkwỹ hwỳr àr nẽ tanhmã kãm kapẽr toja nhūm inhmã harẽ. Na xep pre kãm: “E kêt ka ma Jope hwỳr amã mẽ àpẽnh xwỳnh kwỳjẽ rẽ kẽ mẽ ma hwỳr mõi. Hāmri nẽ kamã Simāw Pêtre japrõ nẽ man akupỹn awỳr o mõi kẽ tanhmã mẽ amã ujarẽnh to. ¹⁴ Koja mẽ amã tanhmã mẽ apẽ Tĩrtũm kra hprãm xaj tanhmã mẽ ate amnhĩ nhĩpẽx to hã mẽ amã karõ ka mẽ ama nẽ mar tỳx nẽ hkõt amnhĩ nhĩpẽx. Ka mẽ anhõrkwỹ kamã akwỳjẽ mẽ apimràatã ama nẽ mar tỳx nẽ. Hāmri nẽ kot mẽ amã hã karõ xà hkõt amnhĩ nhĩpẽx nhūm Jejus mẽ ate amnhĩ tomnuj pẽ mẽ apytàr pa.” Anẽ.

—Na xep pre ã Tĩrtũm kapẽr o wrỳk xwỳnhja kãm ijarẽnh anẽ. Jakamã nhūm

ixwÿr jajê rē pa ma mẽ hkôt mō. ¹⁵ Hāmri nē kormã mẽ kãm tanhmã Jejus jarēnh to. Tanhmã kot mẽ panê amnhĩ nhĩpêx to hã harē. Nē kormã mẽ kãm ixujarēnh o ixãm rôm nhũm Tĩrtũm Karō te wam kot mẽ panhĩpêxta pyrã nē mẽ hwÿr wrÿ nē mẽ hkarō mã gjêx pa. ¹⁶ Pa ja hã mẽ omu nē Pahihiti Jejus kot akupÿm kaxkwa hwÿr nojarêť nē tanhmã mẽ pamã kapêr tota mã ijamaxpêr kurê kumrêx. Na pre mẽ pamã: “Finat Juãw Paxis na pre hte gô ho mẽ hkrã kumrãr o pa. Tã koja Tĩrtũm ta hpãnhã mẽ awÿr amnhĩ Karō rē nhũm mẽ akarō mã agjê.” Anê.

—Ă na pre Pahihiti Jejus akupÿm nojarêť nē mẽ pamã kapêr anê. Jakamã pa ã kot mẽ hipêx anhÿr ã mẽ omu nē ã kapêr anhÿrja mã ijamaxpêr kurê kumrêx. ¹⁷ Na pu prem Pahihiti Jejus Kris kôt amnhĩ xunhwÿ nhũm Tĩrtũm ja hã mẽ pahpumu nē mẽ pahwÿr amnhĩ Karō rē. Tã te kot mẽ panhĩpêxta pyrã nē mããnen Ijaew kêt xwÿnhjtajê hwÿr kurê nhũm mẽ hkarō mã agjê. Mẽ kêp Ijaew kêt tã nhũm mẽ pahpyrã nē mẽ hwÿr kurê nhũm mẽ hkarō mã agjê. Tĩrtũm tãm kot amnhĩ krã hkôt mẽ hwÿr rēnh kēnã kot pa kêt mẽ nē tanhmã kêp ixãmnr to. Anê.

¹⁸ Nhũm pre ã Simãw Pêtre mẽ kãm amnhĩ jarēnh anê nhũm mẽ kuma nē tãm hamaxpêr nē hkĩnh nē. Nē axte mẽ hã tanhmã kãm nē hkêt nē. Ăm mẽ hã Tĩrtũm mã mex o mex ã harē. Hāmri nē axpēn mã:

—Nà ãm hāmri. Mẽ kêp Ijaew kêt tã na prem Jejus kôt amnhĩ xunhwÿ nhũm Tĩrtũm kot mẽ panhĩpêxta pyrã nē amnhĩ katut kôt mẽ kot amnhĩ tomnuj rēnh pa. Nhÿrmã wa hkuri mẽ pahpyrã nē htĩr tũm nē pa ho pa kaxyw nhũm ã mẽ hipêx anê. Nà ãm hāmri na ã kot mẽ panhĩpêx pyrã nē mẽ hipêx anê. Anê.

Ăxiok kamã Jejus kwÿ jarēnh

Atre 4.36-37

¹⁹ Tã ra mẽ kot kēn o Estewãw kapêr o hpĩr xwÿj ri mẽ kot ã hipêx anhÿrta pyrã nē mẽ kot Jejus kôt amnhĩ xunhwÿr xwÿnhjtaja omnuj tÿx o pa. Jakamã nhũm mẽ hkwyjaja mẽ umaj ma ahpÿnhã krĩ hkwy hkôt pi-grãnh pa. Wēnĩs wÿr nē Sipre hwÿr nē Ăxiok hwÿr nhũm mẽ ma ahpÿnhã krĩ hkwy hkôt angrã nē kamã pa ho pa. Nē mẽ kãm

tanhmã Pahihiti Jejus kot mẽ panê amnhĩ nhĩpêx to hã harēnh o ri mẽ hkôt pa. No ãm kormã Ijaew pix mã harēnh o pa.

²⁰ Tã hāmri nhũm mẽ hkwyjaja Sipre mẽ Sirēn rũm Ăxiok hwÿr pan pôj. Hāmri nē kamã mẽ kêp Ijaew kêt xwÿnhjtê mã Pahihiti Jejus kot amnhĩ nhĩpêx jarēnh o pa. Ă mẽ kot amnhĩ nhĩpêx anhÿr jakamã na mẽ ra ahpÿnhã ri mẽ kãm harēnh o ri pa. Ijaew mã nē mããnen Ijaew kêt xwÿnhjtê mã ²¹ nhũm mẽ ma mẽ hkôt ri Pahihiti Jejus nhÿ hã mẽ kãm kapêr jarēnh o ri mẽ hkôt pa. Hāmri nhũm mẽ ohtô nē amnhĩ nhĩpêx tũm kaga hpa nē hpãnhã amnhĩ kaxyw Jejus kôt hamaxpêr nē hkôt amnhĩ xunhwÿ.

²² Hāmri nhũm Jerujarē kamã Jejus kwÿjaja mẽ harēnh ma nē mẽ hwÿr Panãpe mẽ. Ăxiok hwÿr mẽ hwÿr kumē. Ma mẽ hwÿr mōr nē Jejus kôt mẽ hamaxpêr o hihtÿx kaxyw. ²³ Hāmri nhũm ma mẽ hwÿr mō nē mẽ hwÿr pôj nē mẽ omu. Tĩrtũm kot mẽ ho mex ã mẽ omu hāmri nē mẽ ÿ hã hkĩnh nē. Nē mẽ kãm:

—Nà ãm hāmri na ka mẽ ra Jejus kôt amnhĩ xunhwÿ nē hkôt amnhĩ nhĩpêx mex o ri apa. Tã kêt ka mẽ ãm kapêr kôt pix mã ri amnhĩ nhĩpêx rãhã ho ri apa nē aa hkaga hkêt nē. Anê.

²⁴ Panãpeja na pre tãm amnhĩ nhĩpêx o pa. Nē amnhĩ kaxyw Jejus kôt pix mã hamaxpêr mex o pa. Nē Tĩrtũm Karō hkôt amnhĩ nhĩpêx rãhã jakamã na pre hte ÿ hã mẽ kãm Pahihiti Jejus kot mẽ panê tanhmã amnhĩ nhĩpêx to hã harēnh o ri mẽ hkôt pa. Hāmri nhũm mẽ kuma nē ohtô nē Jejus kôt amnhĩ xunhwÿ.

²⁵ Tã nhũm Panãpe Ăxiok rũm kato nē kot Sawti japrôr kaxyw ma krĩ pē Tas hwÿr mō. ²⁶ Hāmri nē hwÿr pôj nē Sawti pumu nē haprô nē ma akupÿm amnhĩ kôt Ăxiok hwÿr o mō. Hāmri nē kamã mẽ kot Jejus kôt amnhĩ xunhwÿr xwÿnhjtê hkôt wa ri pa hã amgrã pyxi nē hapêx. Nē mẽ ho ohtô nē ri mẽ kãm Jejus kapêr o mẽ ahkre ho ri mẽ hkôt pa. Jakamã nhũm krĩ nhõ xwÿnhjtaja mẽ kot Jejus kôt amnhĩ nhĩpêx xwÿnhjtê pumu nē mẽ hã mẽ hixi rē nē mẽ harēnh o: “Kris tō nē htōxjaja” anhÿr o mẽ harē. Ăxiok kumrêx kãm na prem ã mẽ kot Jejus kôt amnhĩ xunhwÿr xwÿnhjtê jarēnh

anê. Jakamã nhũm mẽ piitã ã mẽ harênh anhÿr o pa.

²⁷ Tã nhũm Panãpe mẽ Sawti wa kormã ãxiok kamã paja rôm nhũm Tirtũm nhÿ hã kapêr jarênh xwÿnh kwÿjaja mẽ hwÿr mran pôj. Jerujarê rũm mẽ hwÿr mran pôj.

²⁸ Hãmri nhũm mẽ piitã mẽ kot mẽ kapêr mar kaxyw mẽ hwÿr akuprô. Jakamã nhũm hõ pê Akapôja kãnhmã xa nê tanhmã mẽ kãm ujarênh to. Tirtũm Karô nhÿ hã mẽmoj kukamã mẽ kãm awjarê nê mẽ kãm:

—Kwa okora kêr ka mẽ axkãm ajamak rom. Koja tokyx pika piitã hkôt mẽ apkur xà hã mẽôja mẽ kêp hkryre nê mẽ piitã mẽ hipêx kêt nê. Anê.

Tã nhũm gaa nê ujarênh xàja kôt mẽmoj ã amnhÿ nhÿpêx anê. Kormã Pahihti Krawti kot mẽ ho amnhÿptâr ri nhũm mẽmoj ã amnhÿ nhÿpêx anê. No nhũm kormã ã amnhÿ nhÿpêx anhÿr kêt ri nhũm Akapôja kukamã ã mẽ kãm ujarênh anê. ²⁹ Hãmri nhũm mẽ kuma nê tee ri Jutej kamã Jesus kôt mẽ hkwÿjê hkukamã hamaxpêr nê axpên mã:

—E kwa pu mẽ Jutej kamã Jesus kôt mẽ pahtô nê pahtôxjê mã pahkãxpore hkwÿ gõ kê mẽ ho amnhÿm awjaprô nê hkur o pa. Anê.

Hãmri nê mẽ kaxyw kãxpore hkwÿ ho akuprô. Nhũm mẽ hikãxpore hkryre xwÿnhjaja ãm mẽ kãm ho hkryre nê kugô nhũm mẽ hikãxpore rũnh xwÿnhja mẽ kãm ho rũnh nê kugô. ³⁰ Jakamã nhũm mẽ ho hpikuprônh pa nê Panãpe mẽ Sawti wa kot mẽ hwÿr o môr nê mẽ kãm ôr kaxyw wa kãm kugô. Hãmri nhũm wa hamÿ nê ma Jutej kamã Jerujarê hwÿr mẽ hwÿr o mō. Hãmri nê hwÿr pôj nê mẽ kot Jesus kapêr o mẽ ahkre xwÿnhjê mã kugô. Hãmri nhũm mẽ kãm Jesus kôt mẽ htô nê htôxjê mã o anhgrã nhũm mẽ hamÿ nê hkÿnh nê ho amnhÿm awjaprô.

12

Mê kot Simãw Pêtre pynênh nê haxàr ã mẽ harênh

Matêwre 18.19-20

¹ Tã nhũm mẽ ô pahi Eroxa ô pôristi mã Kris kwÿjê hã amÿnê nhũm mẽ mẽ hipêx kati nê nhũm mẽ amnhÿ xà htÿx kamã hamak o pa. ² Juãw tō Xiakreja nhũm mẽ

pahi Erox nhÿ hã unê nê hkanhwÿr o kupi. ³ Hãmri nhũm Ijaew kãm ja mex jakamã nhũm pahi Erox hpãnhã mẽ kãm Simãw Pêtre hã amÿnê nhũm unê nê haxà. Mẽ kot pãwti kaxkrit kêt kur ã mẽ hkÿnh xà hã arÿgro pê Pasja ã nhũm prem unê. ⁴ Na pre Erox Simãw Pêtre hkukamã hamaxpêr o:

—Nà koja mẽ hkÿnh hapêx pa Ijaew nom kupi nhũm rÿ amnhÿ pumu. Anê.

Hãmri nhũm pôristi kot Simãw Pêtre jamãr xwÿnhjaja kêp 16. Nhũm mẽ axpên pãnhã kêp 4 kapên nê hamãr rãhã ho kuhê. ⁵ Nhũm arÿ mẽ hãgÿnh xà kamã hkrÿ ho hkrÿ. Hãmri nhũm Kris kôt htô nê htôxjaja harênh ma nê tee ri hkukamã hamaxpêr hãmri nê axpên wÿr akuprô nê ho Tirtũm wÿr rãhã ho hkrÿ.

Tirtũm kapêr o wrÿk xwÿnh kot Simãw Pêtre kator ã harênh

⁶ Tã nhũm ra mẽ hkÿnh hapêx nhũm kamãt. Hãmri nhũm pahi Erox kot tanhmã Simãw Pêtre ho xà hã arÿgroja wÿr nhũm kamãt nhũm pôristijaja arÿ mẽ hãgÿnh xà kamã hamãr mex o kuhê. Nhũm kuri wa hamêxkrut nê akutã hijê nê hamãr o nō. Kãx o akutã kãm ê nê wa ho nō nhũm wa hkaêx kãm htÿx gôr nê nō. Nhũm ja wa hakwa krem mãânên hamãr o xa. ⁷ Puh nhũm Tirtũm kapêr o wrÿk xwÿnhjê hõja mẽ hwÿr axà nê wrÿhtak rax kãm xa. Hãmri nê Simãw Pêtre grêk nê kumra nê kãm:

—Pa Simãw Pêtre? E kwa tokyj kãnhmã xa pu mō. Anê.

Hãmri nhũm hkrãkato nê omu nê kãnhmã ãm kurê kumrêx nhũm kaxprexà hã kãxja axrê nê pykap rôrôk nê hikwÿ. No nhũm kuri pôristi wa nôr xwÿnhhta wa mar kêt nê. Wa arÿ ôt tÿx nê nō. ⁸ Hãmri nhũm Tirtũm kapêr o wrÿk xwÿnhja Simãw Pêtre mã:

—E tokyx anhō kamÿs jaxà nê amnê ixkôt tē pu pakato nê ma tē. Anê.

⁹ Hãmri nhũm kamÿs nê hparkà jaxà nê ma hkôt tē. No ãm kormã amnhÿ pumunh mex kêt nê. Te hpimtir kãm ã kot amnhÿ nhÿpêx anhÿr pyrãk ã amnhÿ kamnhÿx.

¹⁰ Hãmri nhũm wa hakwakrem pôristi wa kot hamãr o wa ãm xwÿnhja hãnh wa tē nê wa hakre nê hpãnhã ihõja wa hãnh wa tē no nhũm mẽ ôt tÿx nê hkrÿ nê wa omunh kêt nê. Nhũm wa hakwakre nhÿtep xà hkôt wa tēn kato nê hpãnhã krÿ nê kahê xà hã

hakwakreja wÿr wa tẽ. Hãmri nhũm tãm wa kãm amnhĩ kahê xà mẽ nhũm wa kato nẽ pry hã tẽ. Ja kôt nhũm Tĩrtũm kapẽr o wrÿk xwÿnhja akunok nhũm Simãw Pẽtre axte omunh kêt nẽ. ¹¹ Hãmri nẽ hprĩ hã amnhĩ pumunh kurê kumrẽx nẽ hamaxpẽr o:

—Kwa te ixpimtir kãm ã ixte amnhĩ nhĩpẽx anhÿr pyræk tã xep ixpimtir kêt. Tĩrtũm na ixwÿr kapẽr o wrÿk xwÿnhja mẽ nhũm ixwÿr wrÿ nẽ mẽ kęp ixkator. Pahi Erox ra kot ixpĩr nhũm ixkwÿ Ijaew kãm ja prãm tã nhũm mẽ kęp ixkator. Nà ãm hãmri na Tĩrtũm ã mẽ kęp ixkator anẽ. Anẽ.

¹² Hãmri nẽ Marir nhõrkwÿ hwÿr htẽm kurê kumrẽx. Juãw Makre katorxà Marirja nhũm õrkwÿ hwÿr tẽ nhũm mẽ ra kamã hpikuprõnh rax nẽ ho Tĩrtũm wÿr o hkrĩ nhũm tãm mẽ hwÿr tẽ. ¹³ Hãmri nẽ kormã kapõt ã hakwa krem mẽ kãm kahê xà tatak o xa nhũm ixkre kamã mẽ kãm àpẽnh xwÿnh Rotreja kuma nẽ hwÿr tẽ. ¹⁴ Hãmri nhũm kãm kapẽr nhũm amnhĩ jaer pê kuma nẽ hkĩnh nẽ. Nẽ kormã kãm kahê xà mẽnh kêt ri ma akupÿm tẽ nẽ mẽ kot ho Tĩrtũm wÿr xwÿnhjê hwÿr axà nẽ mẽ kãm:

—Xê pẽr Simãw Pẽtre na tẽ nẽ kapõt ã hakwakrem xa nẽ inhmã kapẽr.

¹⁵ Hãmri nhũm mẽ tee ri kuma nẽ kãm:

—Kwa arĩ mẽ hagjẽnh xà kamã hkrĩ kẽnã. Mãn ka tanhmã amnhĩ krã amnhĩ to hã na ka ri atÿx ã akapẽr anẽ. Anẽ.

Hãmri nhũm mẽ kãm:

—Ma tanhmã kot pa kêt ri ixkrã amnhĩ to? ãm hãmri na pa mẽ amã harẽ. Mẽ kam nẽ mra nẽ omu. Anẽ.

Nom nhũm mẽ kuma nẽ ãm kuma nẽ kãm:

—Nà tãm kêt. Kaxkwa rũm Tĩrtũm mã hamãr o pa xwÿnh mãm amã kapẽr nom tãm kêt. Anẽ.

¹⁶ Rõm nhũm Simãw Pẽtre arĩ hakwakre tatak o xa. Hãmri nhũm mẽ jatã hwÿr mra nẽ kãm kahê xà mẽ nẽ amnhĩ jaer pê omu nẽ hkĩnh nẽ. ¹⁷ Hãmri nhũm kãnhmã mẽ kãm ãhkra hpẽ nẽ mẽ ho hpinhkrẽnh pa nẽ mẽ kãm:

—Nà Tĩrtũm na ixwÿr kapẽr o wrÿk xwÿnhja mẽ nhũm ixwÿr wrÿ nẽ põristi pê ixkator. Anẽ.

Hãmri nẽ mẽ kãm:

—E kêt ka mẽ Xiakre nẽ Jejus kôt mẽ pahõt nẽ pahõtjê mã ijarẽ kêt mẽ ijarẽnh

mar kurê kumrẽx. Nom kot paj ixkato nẽ ma krĩ hõ hwÿr mõ. Anẽ.

Hãmri nẽ mẽ kęp kato nẽ ma mõ.

¹⁸ Tã nhũm apkati nhũm põristi kot hamãr o hkrĩ xwÿnhjaja hkrã hapõj nẽ tee hapẽr nẽ nhÿri omunh kêt nẽ. Hãmri nẽ tee ri amnhĩ kukamã hamaxpẽr o kãm ma htÿx kumrẽx nẽ axpẽn mã:

—Kwa tanhmã na pre we amnhĩ to nẽ mẽ pahpê akunok? Tanhmã koja we pahi Erox hã mẽ pahkukja pu mẽ harẽnh to? Anẽ.

¹⁹ Hãmri nhũm pahi Erox hpikunor ã harẽnh ma nẽ axtem põristi hkwyjê mã anẽ nhũm mẽ mra nẽ tee ri mẽ hagjẽnh xà kamã hapẽr nom nhÿri omunh kêt nẽ. Hãmri nhũm Erox mẽ kot hamãr xwÿnhjê kamã gryk tÿx kumrẽx nẽ amnhĩ wÿr mẽ hã karõ nẽ mẽ kãm:

—Kwa nok? Mẽ ate hamãr rãhã ho akuhê hã ixte mẽ amã karõ htã nhũm tanhmã amnhĩ to nẽ akunok. Nà kot paj mẽ anhĩmex ka mẽ rĩ amnhĩ pumu. Anẽ.

Hãmri nhũm mẽ tee ri kãm amnhĩ tã àprãr kaprÿ nhũm mẽ hã amÿnê nhũm mẽ ho kator nẽ ma mẽ o mra nẽ mẽ himex. Hãmri nhũm pahi Erox Jutej rũm kato nẽ ma Sejarej wÿr mõ nẽ hpãnhã kamã pa ho pa.

Pahi Erox tanhmã htyk to hã harẽnh

Wam Pẽtre 1.24-25

²⁰ Krĩ pê Xir mẽ Sito wa kamã mẽ pa xwÿnhjaja na pre htem pahi Erox nhõ pyka hwÿr pa nẽ mẽ kęp amnhĩm apkur xà hã mẽõ japrõr o pa. Tã nhũm Erox kot mẽmoj mÿrapê mẽ kamã gryk jakamã nhũm mẽ tee ri mẽ kęp ujaarõr kaxyw mẽ hwÿr mra nom nhũm mẽ kãm mẽmoj kwÿ ho wẽnê hkêt nẽ. Hãmri nhũm mẽ tee ri amnhĩ kukamã hamaxpẽr nẽ pahi Erox nhõ kõwenatõ Pratõja wÿr mra nẽ kãm:

—E awÿr na pa mẽ mra. Kwa mẽ ixyr pê pahi Erox mã tanhmã akapẽr to kê ama nẽ mẽ ixkamã gryk kêt nẽ. Pa mẽ axte mẽ awÿr mra nẽ mẽ apê mẽmoj kwÿ japrõr o ri ixpa. Anẽ.

²¹ Hãmri nhũm mẽ kuma nẽ hwÿr tẽ nẽ mẽ yr pê tanhmã kãm kapẽr to nhũm kuma hãmri nẽ kot tanhmã mẽ kãm kapẽr to kaxyw mẽ kãm arĩgro hta.

Tã nhũm ra kot arĩgro hyr xwÿnhhta kato nhũm Erox kęp pahi hã ê mex jaxà nẽ tẽ

ně kęp pahi hã mẽ hkrĩ xà kamã nhỹ nẽ tanhmã mẽ kãm kapěr to. ²² Mẽ kãm kapěr ryy nẽ. Hãmri nhũm mẽ kuma nẽ hêx rom kãm mex o mex ã harẽ. Nẽ kýt pêu axpẽn mã harẽ nẽ harênh o:

—Kwa pahi Erox kęp mẽ panhĩo hkết. Pěr kaxkwa rũm Mẽpahpãm na pre mẽ pahwỳr wrỳ nẽ ã mẽ pamã kapěr mex anẽ. Anẽ.

Hãmri nẽ te kęp Tĩrtũm pyræk o hipêx nẽ kãm mex o mex ã harẽ. Nom hêx rom ã harênh anẽ. Kot mẽ mar nẽ kãm mẽ hkĩnh nẽ akupỹm mẽ kãm mẽmoj to wênê hprãm xàj nhũm mẽ hêx rom ã axpẽn mã mex ã harênh anẽ. ²³ Hãmri nhũm mẽ kuma nhũm ja kãm mex nẽ nhũm hkĩnh nẽ mẽ mar o nhỹ nẽ kęp Tĩrtũm pyræk ã harênhja nẽ tanhmã mẽ kãm nẽ hkết nẽ. Jakamã nhũm tee ri amnhĩ tã omu nẽ hwỳr kapěr o wrỳk xwỳnhjê hõ mẽ nhũm hwỳr wrỳ nẽ tanhmã ho nhũm ôhy kamã kutõj rax nẽ htyk tokyx anẽ.

Panãpe mẽ Sawti wa akupỹm ãxiok hwỳr mõi ã wa harênh
Atre 11.27-30

²⁴ Tã nhũm mẽ ra ohtô nẽ Tĩrtũm Kra Jejus kot tanhmã mẽ panê amnhĩ nhĩpêx to hã harênh ma nẽ hkôt amnhĩ xunhwỳ.

²⁵ Hãmri nhũm Panãpe mẽ Sawti wa ra Kris kôt htõ nẽ htõxjê mã kàxporeta jamý nẽ ma Jerujarê hwỳr o mõi nẽ mẽ kãm kugõ. Hãmri nẽ ma akupỹm ãxiok hwỳr nojarêt nẽ war amnhĩ kôt Juãw Makre o mõi. Hãmri nẽ mẽ ma mõi nẽ akupỹm mẽ hwỳr pøj.

13

Tĩrtũm kot Panãpe mẽ Sawti wa hyr
Atre 9.15-16; Rõmãn 1.1

¹ ãxiok kamã Kris kôt mẽ kot axpẽn to htõjaja kot Tĩrtũm nhỹ hã kapěr o mẽ ahkre ho pa xwỳnhjê nhĩxi ã kot anhỹr. Na pre Panãpe nẽ Sawti nẽ Simeãw kã htykre nẽ Rusti pẽ Sirên nhõ xwỳnh nẽ pahi Erox kràmnhwỳ Mãnahêja. ² Jakamã nhũm prem mẽmo arĩgro hã axpẽn wỳr akuprõ nẽ Tĩrtũm mã mex o mex ã harênh kaxyw apkur kêt rãhã kãm amnhĩ jarênh o hkrĩ. Hãmri nhũm Tĩrtũm Karõ mẽ kãm tanhmã kapěr o amnhĩrit to nẽ mẽ kãm:

—E kêt ka mẽ Panãpe mẽ Sawti war ata nẽ wa kot inhmã tanhmã amnhĩ nhĩpêx to ho pa kaxyw wa ãm. Anẽ.

³ Hãmri nhũm mẽ kuma nẽ wa hyr kurê kumrêx nẽ wa himõk ã mẽ ìhkra jaxwỳ nẽ wa ho Tĩrtũm wỳ. Hãmri nẽ wa kot Tĩrtũm mã tanhmã amnhĩ nhĩpêx to ho pa kaxyw wa kumẽ nhũm wa ma mõi.

Wajaga kot Jejus nẽ hkràmnhwỳ kurê hã harênh

Atre 8.9-24

⁴⁻⁵ Tã nhũm Tĩrtũm Karõ krĩ pẽ Serêw wỳr Panãpe mẽ Sawti wa kumẽ nhũm wa ma hwỳr mõi. Nẽ amnhĩ kôt Juãw Makre ho mõi. Kot tanhmã wa ho ajuta hto ho wa hkôt pa kaxyw. Hãmri nẽ wa mẽ mõi nẽ Serêw wỳr pøj nẽ pàr krem axà nẽ ma gõ hipòk pẽ Sipre hwỳr mõi. Hãmri nẽ gõ hipòk ã krĩ pẽ Saramĩn wỳr pøj nẽ Ijaew nhõ Tĩrtũm kapěr o mẽ ahkre xà hã ixkre hwỳr tẽ nẽ kamã Jejus kot mẽ panê tanhmã amnhĩ nhĩpêx to hã mẽ kãm harênh o wa xa.

⁶⁻⁸ Tã nhũm mẽ krĩa rũm kato nẽ hpãnhã gõ hipòk kôt mõi nẽ hatur xà kamã krĩ pẽ Papos wỳr pøj. Hãmri nẽ kamã wajaga Pajejus pumu. Gresjê kapěr kãm hixi pẽ Erĩm. Erĩm haxwỳja kęp Ijaew. Na pre hte hêx rom te kęp Tĩrtũm nhỹ hã kapěr jarênh o pa xwỳnh pyræk o amnhĩ nhĩpêx nẽ ma mẽ kãm ujarênh o ri mẽ hkôt pa. No ãm mẽ kãm amnhĩ to hêx o pa. Gõ hipòkja ã pahi Sejupaw hkràmnhwỳ na pre. Pahi Sejupawja àhpumunh tỳx jakamã na pre Panãpe mẽ Sawti wa harênh ma nẽ kãm wa kapěr mar prãm nẽ wa kot kãm Tĩrtũm kapěr jarênh kaxyw amnhĩ wỳr wa kuwỳ. Nom nhũm hkràmnhwỳ wajaga Erĩmja kãm wa hkĩnh kêt nẽ wa nẽ kãm kapěr kãm hihtỳx nẽ kãm:

—Kwa nà wa kapěr mar kêt nẽ. Kot kaj war ama nẽ wa uræk nẽ amnhĩ kaxyw Jejus kôt ajamxpěr nẽ hkôt amnhĩ xãm. Kwarĩ wa kapěr mar kêt nẽ. Anẽ.

⁹ Hãmri nhũm Sawti ra axtem pãnhã hixi. Ra hpãnhã kęp Pawre. Nhũm Tĩrtũm Karõ ra hkarõ mã àr jakamã nhũm ÿ hã wajagata pumu nẽ wa nẽ hkràmnhwỳ mã kapěr ã kãm akir nẽ kãm:

¹⁰ —Tk. Kwa pěr apê Satanasti hkwy hã na ka ã wa inhnê kãm akapěr anẽ. Na ka hte mẽmoj punuj pix kukamã ajamxpěr nẽ mẽmoj mex nẽ mẽ no kupy o apa. Tĩrtũm kapěr mex kumrêx tã ka axtem nẽ nẽ mẽ hkurê ho ri apa. ¹¹ ã ate amnhĩ

nhîpêx anhÿrja mÿrapê koja Tîrtûm tanhmã ato ka ano hkre nê arît kêt o atã apkati sohtô nê kãm ga. Anê.

Hãmri nhùm no hkre kurê kumrêx nê tee ri rît kaxyw no pikrar pÿnh o xa nom mêmôj pumunh kêt nê. Hãmri nê mêmô kot hpa hã hpyr nê ôrkwÿ hwÿr ho môr kaxyw ri amnhî pu hã mêm hapêr pênh o xa. ¹² Hãmri nhùm hkràmnhwÿ pahihtija tee ri ja hã omu nê amnhî kaxyw Jejus kôt hamaxpêr nê hkôt amnhî xãm kurê kumrêx. Hãmri nê Pawre mêm Panãpe wa kot tanhmã Tîrtûm kapêr jarênh to hã wa kuma nê hamaxpêr o:

—Hêxta waa nê. Aa ixte ã mêmô kapêr kot anhÿr mar kêt tã pa jarãhã kuma. Nà ãm hãmri na Jejus jarênhja. Anê.

Pawre mêm Panãpe ãxiok ô hwÿr wa môr ã wa harênh

Atre 15.38

¹³ Tã nhùm Pawre mêm Panãpe mêm Juãw Makre wa mêm krî pêm Papos rûm kato nê hpãnhã ma pyka hõ hwÿr môm. Pàr kãm ma pyka pêm Pãpir wÿr môm nê kamã krî pêm Perke hwÿr pôm. Hãmri nhùm Juãw Makre tanhmã hamaxpêr to nê tee ri axte wa hkôt môr kukamã hamaxpêr hãmri nê wa hkaga nê awjanã nê ma akupÿm Jerujarê hwÿr ahte môm. ¹⁴ Jakamã nhùm Pawre mêm Panãpe wa ahte Perke rûm kato nê hamû pika pêm Pisit kãm krî pêm ãxiok wÿr môm nê hwÿr pôm. Nhùm Ijaew nhõ arîgromnu pêm sap kato nhùm wa Tîrtûm kapêr o mêm ahkre xã hã ixkre hwÿr wa tẽ nê hwÿr axã nê nhÿ. ¹⁵ Hãmri nhùm mêmô mêm kãm Tîrtûm kapêr ã kagã htùm kwÿ kamã harênh o xa. Mojes mêm Tîrtûm nhÿ hã kapêr o mêm pa xwÿnh kot kapêr ã kagã hkwÿ kamã nhùm mêm kãm kamã harênh o xa. Hãmri nê kamã harênh pa nhùm mêm ahkre xwÿnhjaja Pawreja wa omu nê wa hwÿr mêmô mêm nhùm wa hwÿr tẽ nê wa kãm:

—E na mêm ijahkre xwÿnhjaja war ate mêm inhmã axujarênh prãm nê mãmri mêm inhmã mêmôj jarênh kaxyw nhùm mêm war atã anê. Anê.

¹⁶ Hãmri nhùm wa kuma nhùm Pawre kãnhmã xa nê mêm hpinhkrênh kaxyw mêm kãm kãnhmã ìhkra nhùm mêm omu nê hpinhkrênh pa nhùm mêm kãm awjarê. Amnhî kwÿ pêm Ijaewjê mêm mêm kêm Ijaew kêt xwÿnhjê kãm Tîrtûm kînh xwÿnhjê mã

nhùm mêm kãm awjarê. Nê mêm kãm kapêr rÿy nê. Tîrtûm kot tanhmã mêm hkukamã Ijaew nhîgêt nê pãmjê nhîpêx to hã mêm kãm awjarê nê mêm kãm:

—E kot paj mêm amã awjarê ka mêm inhma. ¹⁷ Nã mêm ixpêm Ijaew nhõ Tîrtûmjaja amnepêm na pre mêm ixpêm Ijaew pãmjê rê. Kormã Ejit kãm mêm pa ri nhùm amnhî kaxyw mêm kurê nê mêm ho ohtô rax kumrêx. Hãmri nê mêm kaxyw hihtÿx jakamã Ejit rûm mêm kator pa. ¹⁸ Hãmri nê mêm ho mex rÿy ho mêm hkôt pa. Mêm kot kapôt ã ri pa hã amgrã pêm 40 kamã mêm kot htÿx ri tanhmã amnhî nhîpêx to ho pa htã nhùm mêm kamã ukapri rÿy ho mêm hkôt pa. ¹⁹⁻²⁰ Na pre mêm kãm pyka pêm Kanaã kamã mêm pa xwÿnhjê nhîmex pa. Kanaã kamã mêm pa xwÿnhjaja ahpÿnhã axpên kaxyw mêmô krî pêm 7ja nhùm mêm kãm mêm ho hapêx pa. Hãmri nê hpãnhã mêm inhîgêtjê mã pykaja o hpigrãnh pa. Mêm ixpêm Ijaew nhîgêtjê mã ho hpigrãnh pa nhùm mêm kamã pa hã amgrã xohtô nê. Hã amgrã pêm 450. Tã nhùm Tîrtûm hpãnhã mêm kãm juisti hkwÿ rê nê mêm kaxyw mêm unhwÿ nhùm mêm ho pa. Tã nhùm hpãnhã Sãmuew mêm ho amnhîptã nê mêm o pa. Kêm Tîrtûm nhÿ hã kapêr jarênh o pa xwÿnhjê hõ nhùm Tîrtûm mêm kaxyw ãm.

²¹ —Tã nhùm mêm ixpãmjaja axpên ma nê ra te krî hkwÿ kamã mêm urak nê mêmô pahi kot Sãmuew pãnhã mêm ho amnhîptãr o pa hprãm xã amnhî to Tîrtûm wÿ nê kãm: “Pa Tîrtûm. Kwa mêm ixkaxyw pahi hõ xãm kê mêm ixto amnhîptãr o pa nã. Ja na mêm inhmã hprãm tÿx kumrêx.”

—Anhÿr o amnhî to hwÿr jakamã nhùm mêm kuma nê mêm kaxyw Sawti xãm. Kisti hkra na pre. Nê mêm inhîgêt Pêjamî kanrêhã htãmnhwÿ na pre. Hãmri nhùm Tîrtûm mêm kaxyw ãm nhùm kêm mêmô pahi nê mêm ho amnhîptãr o pa hã amgrã pêm 40. ²² Tã nhùm Tîrtûm kator nê hpãnhã mêm kaxyw Tawi xãm. Hãmri nê harênh o: “Nã Jese hkra Tawija na hte inhmã hprãm xã hkôt amnhî nhîpêx mex o pa.” Anê.

²³ —Tã Jejus kêm Tawi hkanrêhã htãmnhwÿ na pre. Kukamã na pre Tîrtûm mêm ixpêm Ijaew nhîgêtjê mã harê nê harênh o: “Koja nhÿrmã Tawi hkanrêhã htãmnhwÿjê hõ mêm ate amnhî tomnuj pêm

mê apytà.” Anhÿr o hkukamã mê kãm harê. ²⁴ No nhùm kormã Jejus kot mê ixpê Ijaewjê mã amnhĩ to amnhĩrĩt kêt ri nhùm Juãw Paxis kumrêx hkukamã mê ixwÿr mō nê mê inhmã Tĩrtũm kapêr jarênh o ri mê ixkôt pa. Nê mê ixte amnhĩ tomnuj kaga nê hpãnhã tãm amnhĩ nhĩpêx o ixpa hã mê ixpumunh kôt mê ixkrã kumrãr ã mê inhmã karō ho pa.

²⁵ –Tã mê kãm kapêr o pa ryy nê ra hatur xãm mênh kaxyw nê amnhĩ tã tanhmã mê inhmã kapêr to nê mê inhmã: “Na ka mê ixpumu nê atÿx Tĩrtũm kot mê akaxyw pa ixãm ã ixkamnhĩx nom pa hkêt. Kot mê pakaxyw ãm mã xwÿnhhta kukamã na pa pre mō. Tãm kot amnhĩ to rax o ijakrenh. Nê kot amnhĩ to mex o kot ijakrenh. Jakamã na pa hte ãm kukwak ri ixpa nê amnhĩ tã hã ixpijaãm o ixpa.” Anê.

–Na pre ã Juãw Paxisja mê inhmã Jejus jarênh anhÿr o pa.

²⁶ –Tã kwa mê inhma mê apê Apraãw kanrêhã htãmnhwÿjaja nê mê apê Ijaew kêt xwÿnh kãm Tĩrtũm kĩnh xwÿnhjaja. E mê apiitã ixkapêr ma nê kãm ajamaxpêr tÿx rãhã ho ri apa. Nà mê pahpiitã mê pakaxyw na Tĩrtũm kapêrja. Kot mê pahte amnhĩ tomnuj pê mê papytãr ã amnhĩ jarênhja mê ixpê Ijaew pix kaxyw kêt. Mê pahpiitã mê pakaxyw na. Mê pahpiitã mê pahte ja mar nê hkôt amnhĩ nhĩpêxja na Tĩrtũm kãm hprãm. ²⁷ Nom Jerujarê nhō xwÿnhjê mê mê ãptãr tũmrejaja na prem Jejus kêp Tĩrtũm kot mê pakaxyw ãm xwÿnh ã harênh mar tã hkôt hamaxpêr kêt nê. Na pre htem mê inhō arĩgromnu pê sap ã akuprō nê axpên mã Tĩrtũm kapêr ã kagà htũm kamã ujarênh o hkrĩ. Kagàja kamã Tĩrtũm nhÿ hã mê kapêr o mê pa xwÿnhjaja kot hprĩ hã Jejus jarênh nê hã kagà nhùm mê kot mar tã hprĩ hã mar tÿx kêt nê. Jakamã na prem axtem nê mê kãm hã amÿnê. Tĩrtũm nhÿ hã kapêr jarênh xwÿnhjaja kot mê hkukamã mê harênh xaja kôt nhùm mê kot hpĩr kaxyw mê kãm hã amÿnê.

²⁸⁻²⁹ Kot tanhmã amnhĩ tomnuj to hkêt tã nhùm mê amarĩ hã pahi Pirat wÿ. Kot mê kãm hã ãmnênh nhùm ò pōristijaja kot hpĩr kaxyw nhùm mê hã kuwÿ nhùm mê kãm

kupĩ. Ra Tĩrtũm kapêr ã kagà htũm kot mê hkukamã mê harênh xà hkôt. Hãmri nhùm mê kot hkôt pa ho pa xwÿnhjaja pĩ kahpa nê ho wrÿ nê ma o tẽ nê kên kre kamã haxà. ³⁰ Tã nhùm Tĩrtũm akupÿm ho htĩr ³¹ nhùm xatã hkôt mê pa ho pa xwÿnhjê hwÿr hapôj. Kormã htyk kêt ri ra Garirej rũm Jerujarê hwÿr hkôt mê pa ho mê pa xwÿnhjê hwÿr xatã mê hwÿr hapôx o pa. Jao hã arĩgro xohtô nê nhùm prem piitã omu. Tã mê tãmjaja na htem mê ixpê Ijaew mã harênh o pa.

³²⁻³³ –Amnepêem Tĩrtũm na pre mê ixpê Ijaew nhĩgêjtê mã tanhmã Kra Jejus jarênh to. Kormã mê pahwÿr wrÿk kêt ri tanhmã mê kãm harênh to. Jakamã ra kot hkukamã harênh xà hkôt nhùm pre mê pahwÿr wrÿ nê tanhmã mê panê amnhĩ nhĩpêx to. Tã mê ate harênh mar kaxyw na pa wa man mê awÿr mō. Amnepêem finat Tawi na pre Tĩrtũm kapêr kwÿ hã kagà. Tĩrtũm mex ã mê grer xà pê Sam 2ja kamã hã kagà. Te Tĩrtũm tãm Jejus mã kapêr pyrãk o hã kagà nê hã kagà ho:

Apê Ixkra na ka.

Tã mê piitã mê kot apê Ixkra hã apumunh kurê kumrêx kaxyw na pa jarãhã mê kãm ato amnhĩrĩt. Anê.

Nhùm pre ã Tĩrtũm Jejus mã kapêr anê nhùm Tawi ô ri mê pamã hã kagà.

³⁴ –Amnepêem na pre Tĩrtũm tanhmã Kra Jejus kukamã harênh to. Mê kot hpĩr nhùm kot akupÿm ho htĩr kukamã hã amnhĩ jarê. ĩ hkro pymaj kot mê htykjê pê hkaxàr nê akupÿm ho htĩr ã nhùm hkukamã hã amnhĩ jarê. Te Kraja mã amnhĩ jarênh pyrã nê amnhĩ jarênh o:

E kot paj ato mex rax nê. Ixte Tawi mã amnhĩ jarênh xà hkôt.

Anhÿr o hkukamã harênh xà hkôt akupÿm ho htĩr nhùm axte htyk kêt ã harê.

³⁵ –Nê kagàja nhãm hô hō kot tanhmã Jejus jarênh kute. Te Jejus tãm Tĩrtũm mã kapêr pyrã nê harênh o:

Ixpê Akra hã ixte akapêr kôt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nê. Anê.

Tĩrtũm kapêr ã kagà htũm kot ã Jejus jarênh kot anhÿr. ³⁶ Nom ã Tawi jarênh anhÿr kêt nê. Tawi na pre Tĩrtũm kapêr kôt amnhĩ

nhîpêx mex o pa hāmri nē ty nhūm prem mē panhîgêjtê nhîhkô hā haxà hāmri nhūm ĩ hkro nē hapêx.

³⁷ —Tā no Jejusja Tirtūm kot akupÿm ho htîr jakamā nhūm Tawi pyràn ĩ hkro nē hapêx kêt nē.

³⁸ —E mē inhmar tÿx nē ixkwÿjaja. Kra Jejus pix kukwak na hte Tirtūm amnhî katut kôt mē pahte amnhî tomnuj rē. ³⁹ Jakamā kot kaj mē ām Mojes kapêr kôt pix mā ri amnhî nhîpêx nhūm Tirtūm tee ri ja hā mē apumu nē amnhî katut kôt mē ate amnhî tomnuj rēnh kêt nē. Jejusja tapxipix na pre htyk o Tirtūm mā mē pahte amnhî tomnuj piitā hpānhā amnhîrer pa. ⁴⁰⁻⁴¹ Amnepêm na pre Tirtūm kapêr nhÿ hā kapêr xwÿnhjê hōja mē kām Tirtūm kapêr jarē nē hā kagà. Te Tirtūm tām mē kot kapêr ā hpêr o pikēnh xwÿnhjê mā kapêr pyrā nē mē kām:

E kot paj aa mē ate mēmoj pumunh kêt ò ho anē.

Nhūm mēhō mē amā harē ka mē harēnh ma nē ām ama.

Nhūm mē kot omunh mex xwÿnhjê hō kot hprî hā mē amā harēnh tā ka mē ām ama nē hkôt ajamaxpêr kêt nē.

Hāmri nē tee ri tanhmā kām ajamaxpêr to ho ri apa. Anē.

Ā Tirtūm mē kām kapêr anhÿr jakamā kwa mē o kora. Apu mē kajaja na pre ā mē ajarēnh anē rÿ ko. Anē.

⁴² Nhūm pre ā Pawre mē kām ujarēnh ryy anē. Hāmri nē Panāpe mē wa ixkreta rūm kator kaxyw nhūm mē kot mar o hkrî xwÿnhjaja tee ri ma wa mōr ā wa omu nē ma wa hkôt mra nē wa kām:

—Kwa war axujarēnhja na mex kumrêx. Mē inhmā axte mar prām. Xà koja axte sap kato ka wa akupÿn mē ixwÿr wa tē nē axte mē inhmā awjarē? Anē.

Hāmri nhūm wa mē kām:

—Tôe. Nà kot paj war anē. Anē.

⁴³ Hāmri nē wa ma tē nhūm mē hkwÿja ma wa hkôt mra. Ijaew kwÿjaja nē Ijaew kêt xwÿnh kām Tirtūm kînh xwÿnhjaja nhūm mē ma wa hkôt mra. Hāmri nhūm wa pry hā mē kām kapêr o mō. Tirtūm kot mē kutā nojarêt rāhā ho pa nhūm mē kot amnhî tā omunh nē hkôt amnhî nhîpêx tÿx rāhā ho pa nē hkaga hkêt ā mē kām kapêr o mō.

⁴⁴ Tā nhūm axte sap nhūm krî nhō xwÿnh piitā axte Tirtūm kapêr mar kaxyw ixkre wÿr akuprō. Ijaewjaja nē Ijaew kêt xwÿnhjaja. ⁴⁵ Hāmri nhūm Ijaew kwÿjaja tee ri mē amnhî wÿr Ijaew kêt xwÿnhjê pumu nē mē hā Pawre mē Panāpe wa kamā gryk nē. Mē kām Ijaew kêt xwÿnhjaja kot Tirtūm kapêr mar prām kêt jakamā mē hā wa kamā gryk nē. Hāmri nē Pawre kapêr ma nē xatā kām kapêr punuj nē kām:

—Tk. Kwa na ka Tirtūm kapêr jarēnh o axêx. Ja kot anhÿr kêt. Anē.

⁴⁶ Nom nhūm wa kām mē uma hkêt nē. Wa ām Tirtūm Karō nhÿ hā amnhî to htÿx nē wa mē kām kapêr. Nē amnhî tā tanhmā mē kām kapêr to nē mē kām:

—Nà wa ixpyrà nē mē apê Ijaew jakamā na pa mē akumrêxjê mā Tirtūm kot mē pakaxyw Jejus xām ā harē. Tā ka mē ama nē ām ama nē te mē ate hkaga pyrā nē ā wa inhmā akapêr anē nē wa ixte kapêr o ixêx ā wa ijarē. Pêr ām mē ate mē amā Tirtūm mē Kra wa kuri mē atîr tūm nē mē apa hprām kêt. Jakamā kot paj wa mē apê ixkato nē hpānhā ma Ijaew kêt xwÿnhjê mā Jejus kapêr jarēnh o ri mē hkôt ixpa. ⁴⁷ Tirtūm kapêr ā kagà htūm ā kot mē ixte amnhî nhîpêx anhÿrja kukamā mē ijarē nē mē ijarēnh o:

Mē ate Ijaew kêt xwÿnhjê mā ixkapêr jarēnh o ri apa kaxyw na pa pre mē kaxyw mē arê.

Jakamā koja pyka piitā hkôt mē pa xwÿnhjaja ohtô nē mē akapêr ma nē ixkra hkôt amnhî xunhwÿ.

Koja mē ā amnhî nhîpêx anē pa ja hā mē omu nē mē ho ixkra. Anē.

Tirtūm kot ā ja kukamā mē ijarēnh anhÿr jakamā kot paj wa mē apê ixkato nē mē apānhā ma Ijaew kêt xwÿnhjê mā Tirtūm kapêr jarēnh o ri mē hkôt ixpa. Anē.

⁴⁸ Hāmri nhūm Ijaew kêt xwÿnhjaja amnhî tā wa kapêrja ma nē hkînh nē Tirtūm kapêr mex o mex ā harē. Hāmri nhūm ra Tirtūm kot nhÿrmā amnhî ri mē htîr tūm nē mē pa ho mē pa kaxyw mē rēnh xwÿnhjaja amnhî kaxyw Pahiti Jejus kôt hamaxpêr nē hkôt amnhî xunhwÿ.

⁴⁹ Tā nhūm pika pé āxiok kamā mē piitā Tirtūm kapêr jarēnh ma. ⁵⁰ Nom nhūm Ijaew xaptàr tūmrejaja kām Pawre mē

Panāpe wa hkīnh kêt jakamā na prem krī hkôt mē kot amnhī to rūnh xwýnhjê mā wa ho kapēr punuj o pa. Mē ō pahi mē mēni kot amnhī to rūnh xwýnhjaja nhūm mē kām tanhmā wa ho kapēr to nhūm mē kuma nē mē hkôt hamaxpēr. Mēnijaja kām Tirtūm prām tā amnhī kaxyw Jejus kôt hamaxpēr kêt jakamā tanhmā mē kot Pawre mē Panāpe wa ho hêx toja ma nē hkôt hamaxpēr nē wa kamā gryk nē. Jakamā nhūm mē ohtô nē tanhmā wa hipêx to nē amnhī nē wa hano. ⁵¹ Hāmri nhūm wa mē kēp kato nē xa nē mē kot Tirtūm kapēr kaga hā amnhī pumunh kaxyw mē noo mā wa hparkà kapa nē nē awjagrô kapī nē ma wa tē. Hāmri nē ma krī pē Ikôn wýr hpānhā wa mō. ⁵² Hāmri nhūm āxiok kamā mē kot Jejus kôt amnhī xunhwýr xwýnhjaja hkīnh nē ri pa. Tirtūm Karō kot mē hkarō mā gjêx jakamā nhūm mē hkīnh nē ri pa ho pa.

14

Pawre mē Panāpe wa kot Ikôn wýr mōr ā wa harēnh

Matêwre 10.34-35

¹ Hāmri nhūm Pawre mē Panāpeja wa āxiok rūm kato nē hpānhā ma krī pē Ikôn wýr wa mō. Hāmri nē hwýr pōj nē Ijaew nhō Tirtūm kapēr o mē ahkre xà hā ixkre hwýr wa tē nē kamā mē kām Jejus jarēnh o nhý. Mē kām harēnh kām hihtýx jakamā nhūm mē hkwýjaja wa kuma nē amnhī kaxyw hkôt hamaxpēr nē hkôt amnhī xunhwý. Ijaew kwýjaja nē mē kēp Ijaew kêt xwýnh kwýjaja nhūm mē ohtô nē Jejus kôt amnhī xunhwý.

² Tā nhūm mē hkwýjaja kām Jejus jarēnh mar prām kêt nē. Hāmri nē kato nē ma Ijaew kêt xwýnh kwýjê hwýr mra nē tanhmā mē kām Pawre mē Panāpe wa ho hêx to nē wa ho kapēr punuj nē nhūm mē mar xà hkôt wa kamā gryk nē. ³ Nom nhūm wa tokyx kator nē ma mōr kêt nē arī Tirtūm Karō nhý hā amnhī to htýx nē mē kām Tirtūm kapēr jarēnh o ri mē hkôt pa. Nē kēp mē kutā nojarêt xwýnh ā harēnh o pa. Nē ý hā mē kām aa mē kot mēmoj pumunh kêt kwý ho anhýr o ri mē hkôt pa. Jakamā nhūm mē hkwýjaja ja hā wa omu nē wa kapēr ma nē hamaxpēr o:

—Kwa ām hāmri na wa Tirtūm kēp mē pakamā ukaprī xwýnh ā harē. Pēr ý hā wa kot ā amnhī nhīpêx anhýr o pa kēnā. Anē.

⁴ Hāmri nhūm Ijaew kêt xwýnh kwýjaja wa hkôt hamaxpēr nē wa hkôt amnhī xunhwý. No nhūm mē hkwýjaja wa hkôt hamaxpēr kêt nē. Ra mē kot Ijaew kwý kot tanhmā wa ho kapēr punuj toja ma nē mē hkôt hamaxpēr jakamā nhūm krī nhō xwýnhjaja axpēn kwým ri tanhmā wa hkôt hamaxpēr to ho pa. Jao axpēn kwým ri wa hkôt hamaxpēr o pa.

⁵ Tā nhūm wa hkôt hamaxpēr kêt xwýnhjaja axpēn wýr akuprō nē wa hā amýnē. Ijaew kwýjaja nē Ijaew kêt xwýnh kwýjaja nē mē ō pahijaja nhūm mē kot kēn o wa htak o wa hpīr kaxyw wa hā amýnē.

⁶ Hāmri nhūm wa amnhī tā ama nē mē kēp kato nē hpānhā ma pika hō hwýr mō. Ma Rikôn kām krī hkwý hwýr hpānhā mō. Risti wýr nē Tepe wýr nē pu hā krī hkwý hwýr wa mō. ⁷ Wa mō nē pōj nē ma mē kām Jejus kot tanhmā mē panē amnhī nhīpêx to hā harēnh o ri mē hkôt pa.

Te grà xwýnh jarēnh

Atre 3.1-10

⁸ Nhūm Risti kamā mēhō my hte grà nē hkrī xwýnhja. Katorxà nhōxà kre rūm hte grà nē kator jakamā ri pa hkêt nē arī hkrī xà kamā hkrī ho hkrī. ⁹ Jakamā nhūm Pawre mē kām ujarēnh o xa nhūm kuri mar o nhý. Hāmri nē hamaxpēr o:

—Nà pēr Tirtūm àhpumunh o àhpumunh. Mān kot ixto mex kaxyw àhpumunh týx. Nà koja ixto mex. Anē.

Hāmri nhūm Pawre ā hamaxpēr anhýr ā omu ¹⁰ nē kàx pē kām kapēr nē kām:

—E kwa kànhmā xa. Anē.

Hāmri nhūm kuma nē kànhmā ām kurē kumrêx nē ri mra. Nē amnhī te kamā hamak o ri mra nē hkīnh týx kumrêx.

¹¹ Hāmri nhūm kuri mē kuhê xwýnhjaja Pawre kot ā hipêx anhýrja ā omu nē htýx wa kēp kaxkwa kamā mēhpām ā wa hkamnhīx nē hkīnh nē axpēn mā:

—Kwa pēr mēpahpām na wa. Mēpahpām Jupti mē Mēkurtija na wa panhī hā amnhī jahkre nē mē pahwýr wrý. Nà ām hāmri na wa mē pahwýr wrý. Anē.

Nom mẽ kapër pè Rikaôn o axpën mã kapër jakamã nhũm Pawre mẽ Panãpe wa mẽ mar kêt nê. Wa kot mẽ kapër mar kêt jakamã ã mẽ kot wa harênh anhÿrja mar kêt nê htÿx wa xa. ¹² Nhũm mẽ ã wa kêp mẽhpãm ã wa harênh anê nê hkĩnh tÿx nê. Panãpeja nhũm prem kêp mẽ hpãm Jupti hã hkamnhĩx no Pawreja nhũm prem kêp mẽhpãm Mëkurti hã hkamnhĩx. Pawreja Mëkurti pyrã nê kapër japjê rũnh jakamã nhũm mẽ kêp hã hkamnhĩx. ¹³ Na prem krĩ htã mẽhpãm Juptija mã amnhĩ jarênh xã hã ixkre nhĩpêx nê hkarõ nhĩpêx. Hãmri nê hwÿr akuprõ nê kãm mex o mex ã harê nê amnhĩ to hwÿr o pa. Jakamã nhũm Jupti nhõ patrejaja Pawre mẽ Panãpe wa kêp mẽhpãm ã wa harênh ma hãmri nê wa hã hkwyjê mã kãm:

—Kwa pu mẽ wa kãm môx kwÿ hpa nê pixõrã hkwy rê. Hãmri nê wa kãm wa mex o wa mex ã wa harê nê wa kêp mẽpahpãm ã amnhĩ to wa kuwÿ. Wa kêp mẽpahpãm kênã. Anê.

Hãmri nê ra ã wa hipêx anhÿr kaxyw ¹⁴ nhũm wa tee ri mẽ kot amnhĩ nhĩpêx ã mẽ omu nhũm ja wa kêp omnuj tÿx nê. Jakamã nhũm wa amnhĩ pè hinõkã kaxõnh pa nê mẽ kutã hprõt nê ã mẽ kot wa hipêx anhÿrja nê mẽ kãm kapër kãm hihtÿx nê. ¹⁵ Nê mẽ kãm:

—Kwa mẽ ri ã wa inhĩpêx anhÿr kêt nê. Wa ixpê mẽapãm kêt kênã kot ka kêt mẽ ã wa inhĩpêx anê. Nom mẽapãmja na ka htem ãm amnhĩ to hwÿr kaprÿ nê kãm mex o mex ã harênh kaprÿ o ri apa. Tã mẽ ate ã amnhĩ nhĩpêx anhÿr kaga nê hpãnhã Tĩrtũm kõt amnhĩ xunhwÿr nê amnhĩ to pix wÿr o apa kaxyw na pa pre wa mẽ awÿr mõ nê pøj. Tĩrtũmja mẽ ate mẽ apãm jarênhta rom htĩr o htĩr. Na pre mẽmoj piitã ho kato. Kaxkwa ho kato nê pyka ho kato nê gõ xujanãr o kato. Nê kamã ri mẽmoj piitã ho kator pa.

¹⁶ —Amnepêm mẽ pa xwÿnhjaja na pre htem amnhĩ krã hkõt pix mã tanhmã ri amnhĩ nhĩpêx to ho pa nhũm Tĩrtũm ja hã mẽ omu nê ãm mẽ omu nê tanhmã mẽ ho hkêt nê. ¹⁷ Mẽ pahte amnhĩ tã omunh kaxyw na hte amarĩ tanhmã mẽ pahto mex to ho pa. Na hte mẽ pahwÿr na rê nhũm mẽ pahpur go mex nê. Nhũm mẽ pamã tanhmã mẽ pahpur kãm mẽmo hyja

to nhũm ra mẽ pamã ô rũnh nê. Pu htem hamÿ nê ho paxãpkur mex nê pahkĩnh nê ri papa. Tĩrtũm pix kukwak ri na pu htem ã amnhĩ nhĩpêx anhÿr o ri papa. Anê.

¹⁸ Nhũm pre ã Pawre mẽ kot wa kãm môx parja nê mẽ kãm kapër kãm hihtÿx anê. No nhũm mẽ kuma nê ãm kuma nê wa kãm mry hkwy hpar kaxyw wa hã hihtÿx nê. Jakamã kritpêm nhÿx prem wa kãm hkwy pa. Tã tanhmã hamaxpër to nê hkaga nê wa kãm hpar kêt nê.

*Mẽ kot Pawre pÿr ã àmnênh ã mẽ harênh
Sikũn Ximotre 3.10-11*

¹⁹ Tã nhũm Ijaew kwÿjaja mẽ hwÿr mran pøj. Krĩ pè ãxiok mẽ Ikõn rũm ma mẽ hwÿr mran pøj nê mẽ kãm Pawre ho hêx o mẽ hkõt pa nhũm mẽ kuma nê axtem nê Pawre kamã gryk kato. Hãmri nê mẽ kot hpĩr kaxyw kên runh kwÿ jamÿ nê ho htak prêprêk o kuhê. Hãmri nhũm amnhĩ xã htÿx kamã ama nê tẽm nê akryk nõ nhũm mẽ omu nê htÿx ho ra htyk ã hkamnhĩx. Hãmri nê hwÿr tẽ nê hpa hã kupy nê ma hkjênh o mõ nê krĩ pum kumê nê ma akupÿm mra. ²⁰ Hãmri nhũm Jejus kõt mẽ kot axpën to htõjaja tee ri ã mẽ kot hipêx anhÿr ã omu nê hkaprĩ htÿx nê hwÿr hprõt nê omu nê mÿr o kuhê. Hãmri nhũm te htyk pyrã nê nõr tã Jejus nhÿ hã akupÿm hihtÿx mex nê kãnhmã nhÿ hãmri nê ma akupÿm mẽ hkõt krĩm tẽ.

Tã nhũm apkati nhũm Panãpe mẽ wa krĩja rũm kato nê ma wa mõ. Pãnhã ma krĩ pè Tepe hwÿr wa mõ.

*Pawre mẽ Panãpe akupÿm ãxiok wÿr wa
mõr ã wa harênh*

²¹⁻²² Tã nhũm wa ma Tepe hwÿr mõ nê pøj. Hãmri nê kamã mẽ kãm Jejus tanhmã kot mẽ panê amnhĩ nhĩpêx to hã harênh o ri mẽ hkõt wa pa nhũm mẽ wa kuma nê ohtõ nê Jejus kõt amnhĩ xunhwÿr.

Tã nhũm wa kato nê awjanã nê ma akupÿm pika pè Pisit wÿr wa mõ. Nê kamã krĩ hkwy hkõt ri ra mẽ kot Jejus kõt amnhĩ xunhwÿr xwÿnhjê jahkre ho ri mẽ hkõt pa. Krĩ pè Risti nê Ikõn nê ãxiokja kõt. Nê mẽ ahkre kamã Jejus kõt mẽ ho mẽ hihtÿx o wa pa nê mẽ kãm:

—E ra mẽ ate Jejus kõt amnhĩ xunhwÿr jakamã koja mẽ kãm Jejus kurê xwÿnhjaja

tee ri ja hã mẽ apumu nẽ hã tanhmã mẽ anhĩpêx to. Tã kêr ka mẽ ãm amnhĩ tã mẽ omu nẽ ãm mẽ omu nẽ Jejus kaga hkêt nẽ. Nẽ arĩ hkôt amnhĩ nhĩpêx mex o ri apa rãhã nhỹrmã ma õ krĩ hwýr api nẽ Tĩrtũm wa kuri amex kumrêx nẽ atĩr tũm nẽ apa ho apa. Anẽ.

²³ Hãmri nẽ ahpỹnhã krĩ piitã hkôt ri mẽ kot pastô nhỹ hã mẽ ahkre kaxyw mẽ hkwyjê rê nẽ mẽ kaxyw mẽ unhwý nẽ mẽ ho Tĩrtũm wý. ãpkur kêt rãhã mẽ ho kuwý nẽ kãm:

—Pa Tĩrtũm? E jajê pumu. Mẽ kot krĩ ja kamã pastô nhỹ hã akrajê jahkre ho pa kaxyw na pa wa mẽ unhwý. Jakamã e kêr ka mẽ kutã anojarêt rãhã ho ri mẽ hkôt apa. Anẽ.

Hãmri nẽ wa mẽ kêp kato nẽ ma hpãnhã nhỹhỹm wa mẽ. ²⁴ Pyka pê Pisit kamã mẽ nẽ hpãnhã nhãm pyka pê Pãpir kôt mẽ. Wa ma mẽ kãm tanhmã Jejus kapêr jarênh to ho mẽ hkôt mẽ. ²⁵ Hãmri nẽ krĩ pê Perke hwýr wa pøj nẽ kamã mẽ kãm Jejus kot tanhmã amnhĩ nhĩpêx to hã harẽ hãmri nẽ mẽ kurũm kato nẽ axte mẽ. Pãnhã ma krĩ pê Atari hwýr wa mẽ. ²⁶ Hãmri nẽ hwýr pøj nẽ hpãnhã kurũm akupỹm ãxiok wýr wa mẽ. Pàr rax kãm ma akupỹm mẽ. Æxiokja kamã na pre wa nojarêt nhũm Jejus kôt wa htõ nẽ wa htõxjaja wa ho Tĩrtũm wý nẽ ma krĩ hkwy hwýr wa kumẽ. Wa kot ma mẽ hkôt tanhmã Jejus kot mẽ panê amnhĩ nhĩpêx to hã harênh o wa pa kaxyw wa kumẽ. Jakamã nhũm wa ra ja ho anhỹr pa nẽ akupỹm mẽ hwýr wa mẽ. ²⁷ Hãmri nẽ wa akupỹm pøj nẽ Jejus kôt mẽ kot axpên to htõ nẽ htõxjê ho akuprõ nẽ mẽ kãm amnhĩ jarê nẽ mẽ kãm:

—Nà ãm hãmri na pa wa ra ixkãhkĩnh pê akupỹn mẽ awýr pøj. Na pre Tĩrtũm wa ixkutã nojarêt rãhã ho wa inhĩhkõ hã pa. Jakamã pa pre wa ma ý hã Ijaew kêt xwýnhjê mã Jejus jarênh o ixpa nhũm mẽ hkwyjaja wa inhma nẽ hkôt amnhĩ xunhwý.

²⁸ Anhỹr o wa mẽ kãm kapêr hãmri nẽ wa tokyx ma nhỹhỹm krĩ hõ hwýr axte mõi kêt nẽ. War arĩ ãxiok kamã Jejus kôt wa htõ nẽ htõxjê hkôt ri pa.

15

Jerujarẽ kamã Jejus kwý hpikuprõnh ã mẽ harênh

Matêwre 23.1-4; Karatas 2.1-5, 5.1-16

¹ Tã hãmri nhũm Ijaew kwýjaja ãxiok wýr Jejus kwý pê Ijaew kêt xwýnhjê hwýr mõi pøj. Pika pê Jutej rũm mẽ hwýr pøj nẽ tanhmã mẽ ahkre hto ho pa. Nom axtem nẽ Tĩrtũm kapêr kuhpa hã mẽ ahkre nẽ mẽ kãm:

—Kot ka mẽ amã Jejus kôt amnhĩ xunhwýr prãm hãmri nẽ mẽ ixpyrà nẽ finat Mojes kot mẽ pamã karõ xã hkôt amnhĩ my kwrýt kã kwý jakã nẽ ri kormã hkôt amnhĩ xunhwý. Kot kaj mẽ ã amnhĩ nhĩpêx anhỹr kêt nẽ nhũm Tĩrtũm tee ri ja hã mẽ apumu nẽ amnhĩ katut kôt mẽ ate amnhĩ tomnuj rênh nẽ mẽ ato hkra hkêt nẽ. Anẽ.

² Hãmri nhũm Pawre mẽ Panãpe tee ri mẽ kapêr anhỹrja ma nhũm wa kêp ja omnuj týx nẽ. Hãmri nhũm wa mẽ kãm:

—Tk. Kwa kot anhỹr kêt. Na hte Tĩrtũm mẽ pahte amnhĩ my kwrýt kã jakãr ã mẽ pahpumunh kôt mẽ pahto hkra hkêt nẽ. Anẽ.

Hãmri nẽ tee ri mẽ kapêrja nẽ mẽ kãm kapêr no nhũm mẽ ãm wa kuma nẽ wa hkôt hamaxpêr kêt nẽ. Nẽ arĩ ã mẽ ahkre anhỹr o mẽ hkôt pa. Jakamã nhũm mẽ ja hã axpên mã kapêr rax nẽ. Hãmri nhũm Jejus kwý pê Ijaew kêt xwýnhjaja amnhĩ mã Pawre mẽ Panãpe wa hkukja nẽ wa kãm:

—Kwa xã kot paj mẽ apyrã nẽ amnhĩ my kwrýt kã jakã nhũm Tĩrtũm kãm ja mex nẽ nã? Kwa wa ma akupỹm Jerujarẽ hwýr mẽ ja hã Jejus nhỹ hã mẽ ahkre xwýnh maatijê mẽ mẽ kot Jejus kwý jahkre xwýnhjê kukja nẽ hã mẽ ama. Nẽ ota mẽ ixkwýjaja koja ma war akôt mra. Kê mẽ tanhmã mẽ amã ja jarênh to ka mẽ ama nẽ man akupỹn mẽ ixwýr mra nẽ tanhmã mẽ inhã mẽ kapêr jarênh to. Anẽ.

Hãmri nhũm wa mẽ kãm: “Tõe. Nà kot paj mẽ anẽ.” Anẽ. ³ Hãmri nẽ wa mẽ ma Jerujarẽ hwýr mẽ. Ma pyka pê Wênĩs mẽ Samar hkôt ma hwýr mẽ. Hãmri nẽ nhỹri Jejus kôt mẽ htõ nẽ htõxjê pumu nẽ mẽ kãm Ijaew kêt xwýnhjê jarê. Mẽ hkwyjaja mẽ urak nẽ Jejus kôt amnhĩ xunhwýr ã mẽ harênh o mẽ. Hãmri nhũm mẽ harênh ma nẽ mẽ ý hã hkĩnh nẽ. ⁴ Hãmri nhũm

mê ra Jerujarê hwÿr Jejus kôt mê htôjê hwÿr môn pôj. Hâmri nê mê ahkre xwÿnhjê mê Jejus nhÿ hã mê ahkre xwÿnh maatijê pumu nhÿm mê haxwÿja amnhÿ wÿr mê omu nê hkÿnh nê. Nê tanhmã mê ho mex to nê mê kãm kapêr mex nê. Hâmri nhÿm Pawre mê Panãpe wa mê kãm amnhÿ jarê. Tÿrtÿm kot wa ïhkô hã wa hkôt pa nhÿm wa ÿ hã kot Ijaew kêt xwÿnhjê mã kapêr o pa nhÿm mê hkwÿja kot wa mar nê Jejus kôt amnhÿ xunhwÿr ã nhÿm wa mê kãm amnhÿ jarê. ⁵ Nhÿm Jejus kwÿjê kamã mê kêp Parijew nhô xwÿnh kwÿjjaja. Mê kêp Parijew tã hkwÿjê rom Jejus kôt amnhÿ xunhwÿ. Jakamã nhÿm mê tee ri Pawre mê Panãpe wa kot Ijaew kêt xwÿnhjê jarênh ma nê kãnhmã kuhê nê wa kãm:

—Kwa kê mê pahpyrà nê amnhÿ my kwÿrÿt kà jakà nê finat Mojes kot Tÿrtÿm nhÿ hã mê pamã mëmoj tã karô hkôt amnhÿ nhÿpêx o pa. No kot mê ã amnhÿ nhÿpêx anhÿr kêt nhÿm ja mê pahpê omnuj nê. Anê.

⁶ Hâmri nhÿm Jejus nhÿ hã mê ahkre xwÿnh maatijê mê mê hkwÿjê jahkre xwÿnhjaja mê kuma nê hapôj nê nhÿri akuprô. Ijaew kêt xwÿnh kot Jejus kôt amnhÿ xunhwÿr xwÿnhjaja kot tanhmã amnhÿ nhÿpêx to hã axpên mar kaxyw nhÿri akuprô. ⁷ Hâmri nê mê hã axpên mar ryy nê. Hâmri nhÿm Simãw Pêtre tã kãnhmã xa nê mê kãm:

—Nà na pre Tÿrtÿm mê pahkapi nê Ijaew kêt xwÿnhjê kaxyw pa ixta. Ixte mê kãm Jejus kot tanhmã mê panê amnhÿ nhÿpêx to hã harênh o ri mê hkôt ixpa nhÿm mê kot inhmar nê hkôt amnhÿ xunhwÿr kaxyw nhÿm mê kaxyw ixta. Ra mê ate ja hã ixpumunh mex. ⁸⁻⁹ Tÿrtÿm kot tanhmã ri mê pakute hkôt mê pahpumunh par jakamã te kot ra mê panhÿpêxta pyrà nê mãânên Ijaew kêt xwÿnhjê nhÿpêx. Mê kot mê pahpyrà nê amnhÿ kaxyw Jejus kôt hamaxpêr jakamã nhÿm Tÿrtÿm te ra mê panhÿpêx pyrà nê amnhÿ katut kôt mê kot amnhÿ tomnuj rê nê mê ho hkra. Hâmri nê mê hwÿr amnhÿ Karô rê nhÿm mê hkarô mã agjê. Tÿrtÿm tãm kot amnhÿm mê rênh kênã.

¹⁰ —Tã xà mê pahpê Ijaew na pu htem wam Tÿrtÿm kot finat Mojes mã kapêr kôt amnhÿ nhÿpêx mex o papa? Nà na pu

htem hkôt amnhÿ nhÿpêx mex kêt nê. Nê mê panhÿgêjtaja na xep prem haxwÿja hkôt amnhÿ nhÿpêx mex o pa hkêt nê. Mê pahpiitã mê pahpê hihtÿx kênã. Tã Ijaew kêt xwÿnhjaja kot hkôt amnhÿ nhÿpêx o pa hã ka mê ra mê kãm karô kaxyw. Kwa kot kaj mê anê nhÿm Tÿrtÿm tee ri ja hã mê apumu nhÿm ja kêp omnuj nê. Kãm ja prãm kêt. ¹¹ Kwa mê ã mê kãm hã karô anhÿr kêt nê. Mê panhô pahihtÿ Jejus na hte mê pahpiitã mê pakutã nojarêt o axpên pyràk. Jakamã Ijaew kêt xwÿnhjaja nê mê pahpê Ijaewjaja kot puj mê amnhÿ kaxyw hkôt pajamaxpêr nê hkôt amnhÿ xunhwÿ. Hâmri nhÿm Tÿrtÿm ja hã mê pahpumu nê mê panhÿpêx o axpên pyrà nê Jejus kukwak ri amnhÿ katut kôt mê pahte amnhÿ tomnuj rê nê mê pahto hkra. No na hte mê pahte amnhÿ my kwÿrÿt kà jakà rÿ finat Mojes kapêr kôt amnhÿ nhÿpêx ã mê pahpumunh kôt mê pahto hkra hkêt nê. Anê.

¹² Nhÿm pre ã Simãw Pêtre mê kãm kapêr anê. Hâmri nhÿm hpãnhã Panãpe mê Pawreja mê kãm amnhÿ jarê. Tÿrtÿm kot tanhmã wa ho nhÿm wa kot Ijaew kêt xwÿnhjê hwÿr wa mör ã amnhÿ jarê. Nê Tÿrtÿm nhÿ hã mê kãm aa mê kot mëmoj pumunh kêt kwÿ ho anhÿr o ri mê hkôt pa hã mê kãm amnhÿ jarê nhÿm mê piitã akryk wa mar o hkrÿ nê wa ujarênhhta hkukamã hamaxpêr. ¹³ Hâmri nhÿm Simãw Pêtre mê Panãpe wa mê kãm ujarênh pa hãmri nhÿm Xiakre wa hpãnhã kãnhmã xa nê mê kãm kãnhmã ïhkra pê nê mê kãm:

¹⁴ —E pa ijaxwÿja mê amã ixkapêr ka mê inhma. Nà na pu mê ra Simãw Pêtre kapêr ma. Tÿrtÿm kot wam amnhÿ kaxyw Ijaew kêt xwÿnh kwÿjê rênh ã mê harênhja pu mê ra kuma. ¹⁵ ãm hãmri na ã mê harênh anê. Annepêp Tÿrtÿm kapêr nhÿ hã mê kapêr o mê pa xwÿnhjaja na prem ra ja kukamã Tÿrtÿm kot tanhmã mê hipêx to hã amnhÿ jarênh kukamã hã kagà. Te ho tãm kot kãm kapêr pyrà nê hã kagà ho:

¹⁶ Annepêp finat Tawija na pre hte inhmã amnhÿ kwÿjê ho amnhÿptàr o pa.

Mê kêp Ijaewjaja nhÿm pre inhmã mê ho amnhÿptàr o pa.

Hâmri nhÿm mê gaa nê axpên pê angrà nê ahpÿnhã ri pa.

Tã ixpê Tĩrtũm kot paj nhỹrmã ma mẽ hwỳr wrỹnẽ axte mẽ ho akuprõ nẽ tãm mẽ unhwỳr pa.

17 Jakamã Ijaewjê kukwak ri koja Ijaew kêt xwỳnh kwỳjaja mããnẽn ixkõt amnhĩ xunhwỳ.

Pa te ixte Ijaewjê nhĩpêx pyrã nẽ mẽ ho ixkra.

18 ã mẽ hkukamã ijamaxpêr anhỹr xà hkõt.

19 Anhỹr o mẽ harênh jakamã nhũm ra mẽ hkwỳjaja mẽ higêt kot amnhĩ nhĩpêx kaga hpa nẽ hpãnhã Tĩrtũm kõt amnhĩ xunhwỳ. Jakamã kwa kêr pu mẽ axte ja nhĩjuk ri mẽ kãm mẽmoj tã karõ hkêt nẽ. Ja pix na mex.

20 ãm ja pix kot puj mẽ kãm hã karõ nẽ hã kagã nẽ mẽ hwỳr kumẽ:

Mẽ kot sãnti hã mẽ õ hkur nê kot puj mẽ hkurê.

Nẽ mẽ kot mẽmo mry hpar nẽ hkamrõ runh kêt rãhã hkur nê mẽ hkurê.

Nẽ mẽ kot mẽmo mry kamrõ kur nẽ mããnẽn mẽ hkurê.

Nẽ mẽmyjaja kot amnhĩ prõ pix tãnopxar ã mẽ kãm karõ.

Nẽ mẽnijaja haxwỳja kot amnhĩ mjên pix tãnopxar ã mẽ kãm karõ.

—ãm ja pix kot puj mẽ kãm hã kagã nẽ mẽ kãm hã karõ. 21 Mẽ panhĩgêtjê mã finat Mojes kot ã mẽ kãm karõ anhỹrja na htem arĩ krĩ piitã hkõt ã mẽ kãm hã karõ anẽ. Mẽ panhõ arĩgromnu pẽ sap ã na htem arĩ ri Tĩrtũm kapêr o mẽ ahkre xà hã ixkre kamã ã mẽ kãm hã karõ anẽ. Anẽ.

Mẽ kot Ijaew kêt xwỳnhjê hwỳr kagã mẽnh ã mẽ harênh

Karatas 5.1

22 Hãmri nhũm mẽ Xiakre kapêr mar o hkrĩ. Jejus nhỹ hã mẽ ahkre ho mẽ pa xwỳnh maatijaja nẽ mẽ kot hkwỳjê jahkre xwỳnhjaja nẽ Kris kwỳjê piitã Xiakre kapêr ma nhũm ja mẽ kãm mex nẽ. Jakamã nhũm mẽ axpẽn mã:

—Tõe. Nã ãm hãmri na Xiakre ã Ijaew kêt xwỳnhjê jarênh anẽ. Nã ja mex. Pu mẽ ã ãxiok nhõ xwỳnhjê mã ja hã kagã anẽ hãmri nẽ mẽ hwỳr kumẽ. Koja Pawre mẽ Panãpeja wa kupy nẽ ma akupỹm mẽ hwỳr o mẽ nẽ mẽ kãm kugõ. E mẽ pahtõ kot puj mẽ ma wa hkõt mẽ hwỳr mẽ? Anẽ.

Hãmri nhũm mẽ kuma nẽ Siras mẽ Jut Pasapas wa kuta. Jejus kõt mẽ kot axpẽn

to htõ nẽ htõxjaja kot axpẽn mã hamẽ wa kot amnhĩ to mex xwỳnh ã wa harênh jakamã nhũm mẽ ma Pawre mẽ Panãpe wa hkõt mõi kaxyw wa kuta. 23 Hãmri nẽ ãxiok kamã Kris kwỳ pẽ Ijaew kêt xwỳnhjê kaxyw kagã nhĩpêx nẽ kamã ã mẽ kãm kapêr anẽ nẽ mẽ kãm:

Pa? ãxiok mẽ Sir mẽ Siris kamã Ijaew kêt xwỳnhjaja? Xà mẽ amex? Mẽ ixpê Jejus kõt mẽ atõjaja na pa mẽ awỳr kagãja nhĩpêx nẽ mẽ awỳr kumẽ. Mẽ ixpê Jejus kõt mẽ kot amnhĩ xunhwỳr xwỳnhjê jahkre ho ixpa xwỳnhjaja nẽ Jejus nhỹ hã mẽ ahkre ho mẽ pa xwỳnh maatijaja pa mẽ awỳr kumẽ.

24 Na xep ra ja rũm mẽ ixkwỳjaja ma mẽ awỳr mẽ nẽ mẽmoj tã tanhmã mẽ amã karõ hto. Mẽ ate amnhĩ my kwryt kã jakar nẽ amnepêm mẽ inhĩgêt Mojes kapêr kõt amnhĩ nhĩpêx o apa hã mẽ amã karõ. Ka xep mẽ tee ri ja kukamã ajamaxpêr. No mẽ pajaja na pa prem mẽ awỳr mẽ rênh kêt nẽ. ãm amnhĩ krã hkõt na prem mẽ awỳr mẽ nẽ ã mẽ amã ja hã karõ anẽ.

25 Tã pa tee ri mẽ harênh ma nhũm ja mẽ ixpê omnuj tỳx nẽ. Jakamã na pa mẽ jar akuprõ nẽ mẽ akaxyw mẽ inhĩõja wa kuta. Wa kot ma Panãpe mẽ Pawre wa hkõt mẽ awỳr wa mõi nẽ mẽ amã mẽ ixkapêr jarênh kaxyw. Panãpe mẽ Pawreja mẽ inhmã wa hapê htỳx. 26 Na hte mẽ amã Pahihti Jejus Kris kapêr jarênh o pa kaxyw wa amnhĩ grõnh kõt mẽ amã harênh o pa.

27 Tã pa mẽ akupỹm mẽ awỳr wa kumẽ nẽ wa hkõt mẽ pahtõ Jut mẽ Siras wa kumẽ. Mẽ ixte mẽ amã kagã kamã mẽ ixkapêrja nhũm wa kot hprĩ hã mẽ amã harênh kaxyw pa mẽ wa hkõt mẽ awỳr wa kumẽ.

28-29 E ja pix nê kot paj mẽ akurê:

Kêr ka mẽ sãnti hã mẽ õ hkur kêt nẽ.

Nẽ mẽmo mry kamrõ kur kêt nẽ. Jo mẽmo mry pa nẽ hkamrõ runh kêt rãhã hkur kêt nẽ. Kamrõ runh pa nẽ rĩ kormã tanhmã ho nẽ aku.

Nẽ kêr ka mẽ amyjaja amnhĩ prõ pix tãnopxar o apa.

Nẽ mẽ anijaja ajaxwỳja amnhĩ mjên pix tãnopxar o apa.

E ãm ja pix kot paj mẽ amã hã karõ. Tĩrtũm Karõ kãm ja mex. Nẽ mẽ inhmã mããnẽn ja mex. Kot kaj mẽ ã amnhĩ nhĩpêx anhỹr o ri apa nẽ amex nẽ apa.

Tã ãm ja pix. Mẽ ixpê Jejus kwỳjê jahkre xwỳnhjê mẽ Jejus nhỹ hã mẽ ahkre xwỳnh maatijê mẽ pa mẽ mẽ awỳr kagàja nhĩpêx nẽ kumẽ. E kêr ka mẽ amex nẽ akĩnh nẽ ri axpẽn kõt apa. ãm ja pix na hapêx. Anẽ.

Nhũm prem ã kagà kamã mẽ kãm mẽmoj tã karõ anẽ. ³⁰ Hãmri nẽ Jut wa mẽ kãm kugõ nẽ ma ãxiok wỳr wa mẽ kumẽ nhũm wa mẽ ma akupỹm hwỳr o mẽ. Jut nẽ Siras nẽ Pawre nẽ Panãpeja nhũm wa mẽ ma akupỹm mẽ hwỳr o mẽ mẽ. Mõõ hãmri nẽ mẽ hwỳr pøj. Hãmri nẽ Jejus kwỳjê ho akuprõ nẽ mẽ kãm kagàja gõ ³¹ nhũm mẽ kupy nẽ kamã harẽ nẽ kuma. Kamã mẽ kot mẽ kãm mẽmoj tã karõ kamã harẽ nẽ kuma nẽ y hã hkĩnh nẽ akupỹm tãm hamaxpêr.

³² Jut mẽ Siras wa kêp Tĩrtũm nhỹ hã kapêr o pa xwỳnh na pre wa. Jakamã na prem mẽ hwỳr mõn pøj hãmri mẽ kãm tanhmã ujarẽn to ho pa. Mẽ kot Jejus kõt pix mã hamaxpêr o pa kaxyw mẽ kãm ujarẽn o pa nẽ mẽ kãm:

—E kêr ka mẽ mãmrĩ Jejus kõt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

³³ Hãmri nẽ mẽ hkõt ri pa hã apkati xohtõ nẽ. Hãmri nẽ wa akupỹm Jerujarẽ hwỳr nojarêt nẽ mẽ kãm amnhĩ jarẽ nhũm mẽ wa kuma nẽ wa kãm:

—Tõe. Nà wa mãmrĩ ma akupỹm mẽ. Kojã Tĩrtũm war apumunh mex nẽ ka wa ma akupỹm amex nẽ akà hkĩnh pẽ akwỳjê hwỳr akato. Anẽ.

³⁴ Hãmri nhũm wa nojarêt tã nhũm Siras tanhmã hamaxpêr to nẽ hitõt nẽ mẽ kuri arĩk nhũm Jut Pasapas pix ma akupỹm hkwỳjê kot mẽ hwỳr wa mẽnh xwỳnhjê hwỳr mẽ.

³⁵ Hãmri nhũm Pawre mẽ Panãpe wa Siras pyrã nẽ kormã ãxiok kamã pa. Hãmri nẽ Jejus kõt mẽ htõ hkwỳjê mẽ pimràatã mẽ ahkre ho pa. Tĩrtũm kapêr o mẽ hkõt mẽ ahkre ho pa.

Pawre mẽ Panãpe wa kot axpẽn pẽ pikjêr ã wa harẽn

Atre 13.13; Korosẽ 4.10

³⁶ Hãmri nhũm Pawre mẽ Panãpe war arĩ mẽ hkõt ri pa hã apkati xohtõ nẽ. Tã nhũm Pawre hamaxpêr nẽ Panãpe mã:

—Kwa ma pu ma akupỹm ra pahte krĩ hkwy hkõt mẽ kãm Jejus jarẽn o papa xwỳnhjê hkõt akupỹm mẽ. Pu ma mẽ hwỳr mẽ nẽ Jejus kõt pahtõ nẽ pahtõxjê kot tanhmã ri amnhĩ nhĩpêx to hã mẽ omu. Anẽ.

³⁷ Hãmri nhũm kuma nẽ kãm:

—Tõe. Nà pu ma mẽ. Nom kêr pu ma amnhĩ kõt Juãw Makre ho mẽ kẽ axte pahto ajuta ho pahkõt mẽ. Anẽ.

³⁸ Hãmri nhũm Pawre tee ri kuma nhũm ja kêp omnuj nẽ nhũm kãm:

—Tk. Kwa na pre pahkõt pa htã Pãpir kamã tanhmã hamaxpêr to nẽ pahkaga nẽ ma akupỹm Jerujarẽ hwỳr mẽ. Jakamã kwarĩ koja axte pahkõt mõi kêt nẽ. Anẽ.

³⁹ Hãmri nhũm Panãpe tee ri hã hihtỳx no nhũm kêp hkaga kumrêx. Jakamã nhũm wa ja hã axpẽn pẽ axkjê nẽ ma ahpỳnhã mẽ. Nhũm Panãpe amnhĩ kõt Juãw Makre ho mẽ nẽ wa ma pàr kãm gõ hipòk pẽ Sipre hwỳr wa mẽ. ⁴⁰ Nhũm Pawre axtem amnhĩ kõt Siras wỳ nẽ ma wa mẽ. Hãmri nẽ wa nojarêt nhũm Jejus kõt wa htõjaja wa ho Tĩrtũm wỳ nẽ kãm:

—Pa Tĩrtũm. E koja Pawre mẽ Siras wa ma krĩ hkwy hkõt mẽ kãm akapêr jarẽn o ri wa pa. Jakamã kêr ka wa htãnopxar o ri wa hkõt apa. Anẽ.

Hãmri nhũm wa kato nẽ ma krĩ hkõt ri Jejus kapêr o mẽ ahkre ho wa pa. ⁴¹ Wa ma pyka pẽ Sir mẽ Siris kõt Jejus kõt mẽ htõ nẽ mẽ htõxjê pumunh nẽ Jejus kõt mẽ ho mẽ hihtỳx o wa pa kaxyw.

16

Ximotre kot Pawre mẽ Siras wa hkõt ri pa hã harẽn

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mẽ Siras wa ma akupỹm krĩ pẽ Tepe hwỳr wa mẽ nẽ hwỳr pøj nẽ hpãnhã kurũm ma Risti hwỳr mẽ. Hãmri nẽ wa hwỳr pøj nẽ kamã Ximotre pumu. Ximotre na pre ra katorxã pyrã nẽ

Jejus kôt amnhĩ xãm nhũm mẽ kot Jejus kôt axpẽn to htõ xwýnhjaja kãm hapê nê. Nê kot Jejus kapêr kôt amnhĩ nhĩpêx mex o pa hã axpẽn mã harê.

Krĩ pê Risti mẽ Ikõn kamã nhũm prem ã axpẽn mã Ximotre jarênh anhÿr o pa. Jakamã nhũm Pawre mẽ Siras wa mõi nê mẽ hwÿr pøj nê Ximotre kot amnhĩ nhĩpêx ã omu nhũm Pawre kãm war amnhĩ kôt o mõi prãm nê. Nom Ximotre hkamrõ pihkàr na pre. Katorxà kêp Ijaew nhũm hipêêxà kêp Gres jakamã nhũm ã Ximotre hkamrõ pihkàr anê. Nhũm Ijaew kot katorxà hkôt kêp Ijaew ã omunh jakamã nhũm Pawre hamaxpêr nê mẽ kaxyw kêp my kwÿt kà krãhta nê arĩ kormã mẽ hwÿr amnhĩ kôt o mõi. ⁴ Hãmri nê mẽ ma krĩ hkwȳ hkôt mõi. Mõi nê Ijaew kêt xwýnhjaja ra kot amnhĩ kaxyw Jejus kôt hamaxpêr xwýnhjê jahkre ho mẽ hkôt pa. Ra Jerujarê kãm mẽ kot Jejus kwÿjê jahkre ho pa xwýnhjê mẽ Jejus nhÿ hã mẽ ahkre xwýnh maatijaja mẽ kot mẽ kãm mẽmoj tã karõta nhũm mẽ ma mẽ kãm harênh o ri mẽ hkôt pa. ⁵ Hãmri nhũm mẽ kuma nê ra Jejus kôt amnhĩ nhĩpêx mex o mõi. Hãmri nhũm apkati mẽ krĩ nhõ xwýnh kwÿjaja mẽ urak nê Jejus kôt amnhĩ xunhwÿ. Jakamã nhũm mẽ ra ohtõ rax o mõi.

*Pawre tanhmã hpimtir to hã harênh
Rõmãn 15.18-21*

⁶ Tã nhũm Pawre mẽ Siras mẽ Ximotre mẽ ma pyka pê As wÿr nojarê. Mẽ kot mẽ kãm tanhmã Jejus jarênh to ho pa kaxyw mẽ hwÿr nojarê tã nhũm Tirtũm Karõ kormã mẽ nê mẽ hkurê. Jakamã nhũm mẽ hpãnhã ma pyka hkwȳ pê Prik mẽ Karatas wa hkôt pa. Ixpê Rukre na pa pre mẽ hã ajêt nê ma mẽ hkôt ixpa ho ixpa. ⁷ Hãmri nê mẽ pyka pê Mĩs ã mõi nê hpãnhã ma Pitĩn wÿr inhmõi mã tã no nhũm Tirtũm Karõ axte kê mẽ nê mẽ ixkurê. ⁸ Jakamã pa mẽ arĩ Mĩs jakàr ã mõi nê gõ xujanãr mÿ ri krĩ pê Tôx wÿr pøj.

⁹ Tã nhũm kamàt pa mẽ ixpiitã gõr nê inhĩkwÿ nhũm Pawre tanhmã hpimtir to. Nhũm xep pika pê Masetõn nhõ xwýnhja mẽ amnhĩ wÿr hwÿr kãm hihtÿx o xa nhũm hprĩ hã omu nê kapêr ma. Nhũm xep pre kãm:

—Pa Pawre? Kwa amnê Masetõn wÿr mẽ ixwÿr mõi nê tanhmã mẽ ijahkre hto. Anê.

¹⁰ Hãmri nhũm Pawre hkrãkato nê mẽ inhmã hpimtir jarê. Pa mẽ kuma nê axpẽn mã:

—Tõ kwa tokyx pu mẽ hwÿr. Tirtũm kot mẽ hwÿr mẽ parênh kênã. E pu mẽ ma mẽ hwÿr mõi nê mẽ kãm Jejus jarênh o mẽ ahkre. Anê.

Hãmri nê amnhĩ to akuprõ nê mẽ hwÿr inhnojarê kurê kumrêx.

*Ritre kot Jejus kôt amnhĩ xãm ã harênh
Piripos 1.1*

¹¹ Hãmri pa mẽ ma Masetõn wÿr mõi. Tôx rũm ma pãr kãm hwÿr mõi. Hãmri nê gõ nhĩpøk pê Samõtas wÿr pøj nhũm mẽ hã pãr nhõ. Hãmri nhũm apkati pa mẽ axte mõi nê Masetõn kamã krĩ pê Nêap wÿr pøj. ¹² Hãmri nê pãr rũm ijapøj nê hpãnhã kurũm hamũ krĩ pê Piripos wÿr ixpar o mõi. Piriposja Masetõn kamã krĩ maati na. Rõm nhõ xwýnhjaja na prem ho kato. Jakamã pa prem ma hwÿr mõi nê pøj nê tokyx axte kurũm nhÿhÿm inhmõi kêt nê. ¹³ Hãmri nhũm sap kato pa mẽ axpẽn mã:

—Kwa pyhti mÿri mãn hte Ijaewjaja axpẽn wÿr akuprõ nê Tirtũm mã amnhĩ jarênh o hkrĩ nã. E kwa pu mẽ hwÿr nê gõ mÿri mẽ hapêr o ri papa. Anê.

Hãmri nê ma hwÿr mra nê mẽ hapêr o ri ixpa nhũm ãm mẽni pixjaja axpẽn wÿr akuprõ. Pa mẽ omu nê mẽ kuri ixkrĩ nê mẽ kãm Jejus kapêr jarênh o mẽ ahkre o ixkrĩ. ¹⁴ Nhũm mẽ kot mẽ inhmã o hkrĩ xwýnhjê hõ pê Ritreja. Krĩ pê Xijaxir nhõ xwýnh na pre. Nê kêp kupêxê mex o wênê xwýnh. Na pre hte kãm Tirtũm prãm o pa. Jakamã nhũm Pawre kot mẽ ahkre ho ÿrja rôm nhũm Pahihti Jejus tanhmã Ritre hkrã hto nhũm hprĩ hã Pawre kapêr mar tÿx nê. ¹⁵ Hãmri nê amnhĩ kaxyw Jejus kôt hamaxpêr nê hkôt amnhĩ xãm kurê kumrêx. Örkwÿ kamã hkwȳjê mẽ nhũm mẽ hkôt amnhĩ xunhwÿr pa. Jakamã pa mẽ kêp Jejus kwÿ hã mẽ hkrã kumrã. Mẽ piitã mẽ kot mẽ kêp Tirtũm kra hã mẽ omunh kaxyw. Hãmri nhũm Ritre amnhĩ kôt mẽ ixwÿ nê mẽ inhmã:

—An kot kaj mẽ ixte Jejus kôt amnhĩ xãm tỳx ã ixpumu hã kot kaj mẽ ma ixkôt mỗ nễ hpãnhã inhõrkwỹ kamã pỏj nễ apa. Anễ.
Pa mẽ kuma nễ ma hkôt mỗ.

Mễ kot Pawre mẽ Siras wa haxà ã mẽ harễnh

Makre 1.23-26, 1.34

¹⁶ Tã nhũm arĩgro hõ hã pa mẽ Tĩrtũm mã amnhĩ jarễnh kaxyw axte pyhti mỳri mẽ pikuprõnh xàja wỳr mỗ. Hãmri nễ pry kamã mẽ kãm àpẻnh xwỳnh nija pumu. Ra mẽkarõmnuti kot tanhmã hkrã hto nhũm ỹ hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã ujarễnh to ho pa. Jakamã nhũm õ patrãwjaja kukwak ri ujamỳnh rũnh pẻ hkhĩnh nễ pa. ¹⁷ Jakamã pa mẽ mỗ nhũm nija mẽ ixpumu nễ mẽ ixtã ajẻt nễ ma mẽ ixkôt mỗ. Hãmri nễ mẽ kãm mẽ ijarễnh o mẽ ixkôt mỗ nễ mẽ kãm:

—Xẻ mẽ mran jajẻ pumu. Na htem Tĩrtũm maati mã tanhmã amnhĩ nhĩpẻx mex to ho pa. Tĩrtũm kot mẽ ate amnhĩ tomnuj pẻ tanhmã mẽ apytàr to hã mẽ amã ujarễnh kaxyw na mẽ awỳr mra. Anễ.

¹⁸ Nễ ãm xatã mẽ kãm mẽ ijarễnh o mẽ ixkôt paja o ra hã apkati xohtỏ nễ. Tã nhũm Pawre ra kãm mar kaga nễ nễ mẽkarõmnuti mã kapẻr nễ kãm:

—Tk. Kwa kẻp akato nễ ma tẻ. Pa Jejus Kris nhỹ hã amã ixkapẻr ka inhma nễ kẻp akato nễ ma atẻm kurẻ kumrẻx. Anễ.

Hãmri nhũm kuma nễ kẻp kato nhũm akupỳm tãm hkrã. ¹⁹ Jakamã nhũm õ patrãwjaja tee ri ja hã omu nễ gryk tỳx nễ axpẻn mã:

—Kwa ra mẽkarõmnutijaja kẻp kator jakamã koja axte mẽmoj kukamã tanhmã ujarễnh to hkẻt nễ. Pu mẽ kukwak ri axte paxujamỳnh kẻt nễ. Anễ.

Hãmri nễ Pawre mẽ Siras wa kamã gryk tỳx nễ. Hãmri nễ wa unẻ nễ ma mẽ kot axpẻn mar xà hã ixkre hwỳr wa hkjẻnh o tẻ ²⁰ nễ mẽ kot mẽ ho amnhĩptàr xwỳnhjẻ mã tanhmã wa ho hẻx to nễ mẽ kãm:

—Kwa mẽ amnẻ Ijaewja wa omu. Na hte wa mẽ panhỏ krĩ kamã hẻx pix o pa nhũm mẽ tee ri wa kapẻr ma nễ wa kamã gryk tỳx nễ. ²¹ Mẻ ixte amnhĩ nhĩpẻx te kot axpẻn pyràk kẻt tã nhũm wa mẽ kot amnhĩ nhĩpẻx o mẽ pajahkre kaxyw nhỹhỳnh mẽ pahwỳr

mỗ. Nom mẽ pahpẻ Rõm nhỏ xwỳnhjaja axtem mẽ pahte amnhĩ nhĩpẻx kẻnã kot pu kẻt wa kuma nễ wa kapẻr kôt amnhĩ nhĩpẻx. Anễ.

²² Hãmri nhũm mẽ kuma nễ piitã wa kamã gryk tỳx nễ. Hãmri nhũm mẽ ho amnhĩptàr xwỳnhjaja wa kẻp wa ê kaxỏnh o hkapa nễ wa hã mẽ õ pỏristi mã amỳnẻ nễ mẽ kãm:

—E mẽ ma wa o tẻ nễ mẽ htak xà ho wa htak. Anễ.

²³ Hãmri nhũm mẽ kuma nễ ma wa o tẻ nễ wa htak rax nễ. Hãmri nễ wa haxà nễ mẽ hagjẻnh xà jamãr xwỳnh mã kãm:

—E kẻr ka ja wa omunh mex nễ kẻ wa kator kẻt nễ. Anễ.

²⁴ Hãmri nhũm mẽ kuma nễ wa o tẻ nễ ixkre jatur xà kamã wa haxà nễ wa kator pymaj hamẻ wa htem pĩ jaxà nễ ho htỳx nhũm wa arĩ hte tỳx nễ nhỹ.

²⁵ Tã nhũm kamàt. Nễ kôt ã kamàt nhũm wa Tĩrtũm mã amnhĩ jarẻ nễ mex o mex ã wa grer o wa nhỹ nhũm wa uràk nễ mẽ hagjẻnh xwỳnhjaja wa mar o hkrĩ.

²⁶ Puh nhũm pyka mẽ kãm htertet tỳx nễ nhũm mẽ hã ixkreja amnhĩ to àpẻr tỳx nễ amnhĩ kahẻ xà rẻnh pa. Nhũm mẽ hagjẻnh xwỳnhjẻ kaxpre xà piitã mẽ nẻ pirẻnh pa. ²⁷ Hãmri nhũm mẽ hamãr o kuhẻ xwỳnhja pika tertet kamã ama nễ hkrãkato. Hãmri nễ mẽ hã ixkre jakwakre kahẻ xà rẻnh parja pumu nễ mẽ hagjẻnh xwỳnhjaja hapỏx par ã mẽ hkamnhĩx nễ tee ri amnhĩ kukamã hamaxpẻr. Hãmri nễ pahỉ kot mẽ hã hpĩr pymaj õ wapo kapa nễ ra tãm kot ho amnhĩ pĩr kaxyw. ²⁸ Hãmri nhũm Pawre tee ri ja hã omu nễ kàx pẻ kãm amỳra nễ kãm:

—Kwa amnhĩ pĩr kẻt nễ. Ot pa mẽ arĩ ixpiitã ixkuhẻ. Na pa mẽ ixtỏ ixkator nễ ixprỏt kẻt nễ. Anễ.

²⁹ Hãmri nhũm kuma nễ kanẻ hã ahwỳ nễ kuwy nễ mẽ hwỳr axà nễ mẽ piitã mẽ omu. Hãmri nễ Pawre mẽ Sirasja wa omu nễ wa hwỳr kãm ma ho htertet o tẻ. Hãmri nễ wa hã hpijaàm kaxyw wa kutã tẻm nễ hkỏnkrã ho nhỹ. ³⁰ Hãmri nễ kànhmã xa nễ wa ho kato nễ ixkre kapem wa o xa nễ wa kãm:

—Kwa tanhmã kot pa amnhĩ nhĩpẻx to kẻ Tĩrtũm war apyrà nễ ixte amnhĩ tomnuj pẻ ixpytã? Anễ.

³¹ Hãmri nhũm wa kãm:

—Nà kot kaj amnhĩ kaxyw Jejus Kris kôt ajamxpër nê hkôt amnhĩ xãm nhũm Tĩrtũm ja hã apumu nê amnhĩ katut kôt ate amnhĩ tomnuj piitã rênh pa. Nhũm anhõrkwỹ kamã akwỹjaja apyrã nê Jejus kôt amnhĩ xunhwỹ nhũm ã mẽ hipêx anê. Anê.

³² Hãmri nê wa ma hkôt õrkwỹ hwỹr tẽ nê hprĩ hã mẽ kãm Tĩrtũm kapër jarẽ nhũm mẽ wa mar o hkrĩ. ³³ Hãmri nhũm mẽ hagjênh xã jamãr xwỹnhja wa kãm wa htak xã kuhõ. Kormã kamãt kô hkwỹ kamã wa kãm kuhõ nê hkane. Hãmri nhũm wa mẽ kot Jejus kôt amnhĩ xunhwỹr par ã mẽ omu nê mẽ hkrã kumrã. Mẽ hamãr xwỹnh mẽ hkwỹjê mẽ hkrã kumrãr pa. ³⁴ Hãmri nhũm mẽ kot amnhĩ kaxyw Tĩrtũm kôt hamaxpër jakamã piitã hkĩnh nê. Hãmri nhũm mẽ hamãr xwỹnhja õrkwỹ hwỹr Pawre mẽ Siras wa o tẽ nê wa kãm õ nhũm wa apku nhũm ma akupỹm mẽ hagjênh xã hwỹr wa o tẽ nê akupỹm wa haxã.

Mẽ kot Pawre mẽ Siras wa kãm urer ã mẽ harênh

Atre 22.25-29

³⁵ Hãmri nhũm apkati nhũm krĩ pytãr xwỹnhjaja mẽ õ pòristi mã anê nhũm mẽ hagjênh jamãr xwỹnh wỹr tẽ nê kãm:

—E na mẽ papytãr xwỹnhjaja ate Pawre mẽ Siras wa kãm anhũrer nhũm wa mãmrĩ ma akupỹm htẽm kaxyw hã karõ. Anê.

³⁶ Hãmri nhũm mẽ kuma nê wa hwỹr axã nê wa kãm:

—E na krĩ pytãr xwỹnhjaja ixte war akator kaxyw war atã inhmã karõ. Jakamã e wa mãmrĩ axãmnhĩx ma mõ. Anê.

³⁷ Hãmri nhũm Pawre kãm:

—Nà wa ixte tanhmã amnhĩ tomnuj to hkêt tã nhũm mẽ kot wa ixpynênh nê wa ixtak. Wa ijaxwỹja wa ixpê Rõm nhõ xwỹnh tã nhũm prem axtem nê mẽ piitã mẽ noo mã wa ixtak nê wa ijaxã. Mẽ kot amarĩ Rõm nhõ xwỹnh tak nê mẽ hagjênh kêt tã nhũm mẽ ã mẽ noo mã ã wa inhĩpêx anê. Kormã wa ixte tanhmã amnhĩ tã ixãprãr to hkêt tã nhũm mẽ ã wa inhĩpêx anê. Jakamã kwarĩ kot kaj mẽ no hkãx ã wa ixkator kêt nê. Kê mẽ kot wa ijaxãr xwỹnhjaja tãm man mra nê wa ixkator pa war arĩ ma mõ. Anê.

³⁸ Hãmri nhũm pòristija kuma nê ma akupỹm mẽ hwỹr mra nê mẽ kãm wa kapër jarẽ. Hãmri nhũm mẽ tee ri mẽ uràn wa kêt

Rõm nhõ xwỹnh ã wa harênh ma nê kãm ma htỹx nê. ³⁹ Hãmri nê ma wa hwỹr tẽ nê wa hwỹr axã nê wa kãm:

—Pa? E mãmrĩ war akato nê axãmnhĩx ma mõ. Na pa prem war anhĩpêx kati rax nê. Tã kêt ka wa axte ja mã ajamxpër hkêt nê. Kê ja ãm jar mẽ pakamã hapêx. Anê.

Hãmri nê wa kator nê wa kãm:

—E kwa wa mẽ inhõ krĩ pẽ akato nê ma nhỹhỹm mõ. Anê.

⁴⁰ Hãmri nhũm wa kuma nê kato nê ma akupỹm Ritre nhõrkwỹ hwỹr wa tẽ. Hãmri nê Jejus kôt wa mẽ htõjê pumu nê wa mẽ kãm amnhĩ jarẽ nê mẽ kãm:

—E kot paj hãmri wa mã mõ. Nom kêt ka mẽ arĩ Jejus Kris kôt amnhĩ nhĩpêx mex rãhã ho ri apa nê aa hkaga hkêt nê. Anê.

Hãmri nê wa mẽ kurũm kato nê ma krĩ hõ hwỹr wa mõ.

17

Tesarõn kamã mẽ kot wa kamã gryk ã mẽ harênh

Wam Tesarõn 1.1, 2.13-14

¹⁻² Tã nhũm Pawre mẽ Sirasja wa ma krĩ hkwỹ hkôt pa. Piripos rũm ma Apiporip mẽ Apõrõn kôt wa mõ hãmri nê ra Tesarõn wỹr wa pøj. Na pre hte Pawre nhỹri pøj nê Ijaew nhõ Tĩrtũm kapër o mẽ ahkre xã hã ixkre hwỹr agjê nê kamã mẽ kãm Jejus kapër jarênh o kuhê. Jakamã nhũm wa mõ nê Tesarõn wỹr pøj nê ixkre hwỹr mẽ hwỹr tẽ nê mẽ kãm ujarênh o xa. Nê mẽ kãm ujarênh o hã arĩgromnu pẽ sap o axkrunêpxi. ³ Nê hprĩ hã mẽ kãm tanhmã Tĩrtũm kapër jarênh to nê mẽ kãm:

—Nà Tĩrtũm kapër ã kaga htũm kot mẽ pakaxyw ãm xwỹnh jarênh. Amnhĩ xã htỹx kamã hamak kãm htyk hãmri nê akupỹm htĩr ã nhũm kot hkukamã harênh. Tã na pre Jejusja ã amnhĩ nhĩpêx anê. Tãm kêt Krisja. Tĩrtũm kot mẽ pakaxyw ãm xwỹnhna. Anê.

⁴ Hãmri nhũm mẽ hkwỹja kuma nê wa hkôt hamaxpër nê wa urãk nê Jejus kôt amnhĩ xunhwỹ. Ijaew kwỹjê nê Ijaew kêt xwỹnh kwỹjaja nê mẽni kot amnhĩ to rũnh xwỹnh kwỹjaja nhũm mẽ ohtõ nê amnhĩ kaxyw Jejus kôt hamaxpër nê hkôt amnhĩ xunhwỹ. ⁵ Tã nhũm Ijaew kwỹjaja tee ri hkwỹ kot wa hkôt amnhĩ xunhwỹr ã mẽ

omu nê mē hã Pawre mē Siras wa kamã gryk tÿx nê. Hãmri nê ma mra nê wa kaxyw mē kot amnhĩ tomnuj tÿx xwÿnh kwÿjê ho akuprô nê mē kãm wa hã amÿnê. Jakamã nhũm mē ma kapêr punuj pê wa hapêr o ri mra nhũm mē piitã mē omu nê mē kuma. Hãmri nhũm mē wa hapêr o ra Jasãw nhõrkwÿ hwÿr mra. Nê mē kot Pawre mē Siras pynênh nê ma mē utãr xwÿnhjê hwÿr wa o htêm kaxyw mē kêp kahê xà mē nê mē hwÿr agjê. ⁶ Hãmri nê tee ri õrkwÿ kamã wa hapêr nhũm wa kamã amrakati. Jakamã nhũm mē Jasãw mē kot Jejus kôt axpên to htô xwÿnh kwÿjê pynê nê ma mē kot mē ho amnhĩptãr xwÿnhjê hwÿr mē o mra. Hãmri nê mē kãm tanhmã Pawre mē Siras wa ho hêx to. ãm kapêr punuj kãm kãx pê mē kãm wa harê nê mē kãm:

–Kwa na hte Pawre mē Siras wa pyka piitã hkôt mē kãm ri mēmoj to hêx o pa. Tã wa ra mē panhõ krĩ hwÿr pøj nê jar mē pamã ri tanhmã hêx to ho ri mē pahkôt pa. ⁷ Jasãw nhõrkwÿ kamã na pre wa pøj nhũm amnhĩ wÿr wa kuwÿ. Na hte wa hkôt mē hamaxpêr xwÿnhjaja pahihiti Sesti kapêr kwÿm ri kuhpa hã kapêr o pa nê axtem nê mēõ pahi pê “Jejus” anhÿr xwÿnhja kapêr kôt amnhĩ nhĩpêx o pa. Anê.

⁸ Hãmri nhũm mē kot mē ho amnhĩptãr xwÿnhjê mē krĩ nhõ xwÿnhjaja mē kuma nê gryk tÿx kumrêx. ⁹ Hãmri nê Jasãw mã kãm:

–E kot paj mē apê mē akãxpore hkwÿ jamÿ. Ka mē ajapøj nê ma mē panê Pawre mē Siras wa hano nhũm wa kato nê ma mō pa rĩ akupÿm mē amã kugõ. Anê.

Hãmri nê mē kêp mē hikãxpore hkwÿ jamÿ.

Pawre mē Siras kot Perej wÿr mōr ã wa harênh

¹⁰ Tã nhũm ra kamãt nhũm mē kot Jejus kôt axpên to htõjaja hãmri Pawre mē Sirasja wa ma krĩ pê Perej wÿr wa kumê. Hãmri nhũm wa kato nê ma hwÿr mō nê hwÿr pøj. Hãmri nê Ijaew nhõ Tirtũm kapêr o mē ahkre xà hã ixkre hwÿr htêm kurê kumrêx nê wa axà. ¹¹ Perej kamã Ijaew na pre te mē kot Tesarõn kamã Ijaew pyrãk kêt nê. Mē kurom mē kãm Tirtũm kapêr mar prãm nê. Jakamã nhũm pre Pawre mē Siras Tirtũm kapêr o mē ahkre ho pa. Apkati mē mē ahkre mex o pa nhũm mē wa kuma

nê hkĩnh nê. Nê Tirtũm kapêr ã kagã htũm kamã wa kot mē ahkreta japêr nê kamã omu nê axpên mã wa harênh o:

–Nã ãm hãmri na wa ã Tirtũm kapêr o mē pajahkre anê. Tirtũm kapêr ã kagã htũm hkôt na hte wa mē pajahkre. Anê.

¹² Hãmri nê ohtô nê Jejus kôt amnhĩ xunhwÿ. Ijaew kwÿ nê Ijaew kêt xwÿnh kwÿ nê mēni kot amnhĩ to rũnh xwÿnhjaja nhũm mē ohtô nê Jejus kôt amnhĩ xunhwÿ.

¹³ Tã nhũm Tesarõn kãm Ijaewjaja Pawre jarênh ma. Kot Perej nhõ xwÿnhjê mã Tirtũm kapêr jarênh o pa hã harênh ma. Hãmri nê ma mē hwÿr mra nê mē kãm tanhmã ho hêx to nhũm krĩ nhõ xwÿnhjaja mē kuma nê ra Pawre kamã gryk tÿx nê.

¹⁴ Jakamã nhũm Jejus kôt mē htõjaja mē harênh ma nê mē umaj Pawre kator nê ma gô xujanãr wÿr o mō. No nhũm Siras mē Ximotre wa Perej kamã mē kuri arĩk.

¹⁵ Hãmri nhũm mē hkwÿjaja ma Pawre o mō. Ma krĩ pê Atenas wÿr o mō. Hãmri nê hwÿr o pøj nê kamã kure. Hãmri nê ra akupÿm Perej wÿr nojarêt nhũm Pawre mē kãm:

–E kêr ka mē ma akupÿm mō nê Siras mē Ximotre wa kãm ijarê kê war amnhĩm nojarêt nê tokyx man ixkôt wa mō. Anê.

Pawre kot Atenas nhõ xwÿnhjê mã kapêr ã harênh

Rõmãn 1.18-20

¹⁶ Tã nhũm Pawreja kormã Atenas kamã pa. Siras mē Ximotre wa kamã hamak o ri kormã kamã mē kot amnhĩ nhĩpêx ã mē omunh o pa. Na pre Atenas nhõ xwÿnhjaja sãnti ho ohtô rax nê mē õ krĩ kamã unhwÿ nhũm Pawre ri omunh o ri kuhê ho pa. Na pre htem ahpÿnhã mēmo karõ nhĩpêxja o te Tirtũm nhĩpêx pyrã nê kutã hkõn krã ho rôrõk nê hkrĩ nê kãm mex o mex ã harênh o pa. Hãmri nhũm Pawre tee ri ja hã mē omunh o ri mē hkôt pa nê hkaprĩ nê.

¹⁷ Hãmri nê ma amnhĩ kwÿjê nhõ Tirtũm kapêr o mē ahkre xà hã ixkre hwÿr pa nê kamã mē ahkre ho kuhê. Ijaewjê mē Ijaew kêt xwÿnh kot Tirtũm ã hpijaãm xwÿnhjê mã nhũm Tirtũm kapêr jarênh o kuhê. Nê apkati mē mē kot mēmoj to wênê xà hwÿr mra nê mē ujaarõr xwÿnhjê mã Tirtũm kapêr jarênh o kuhê. ¹⁸ Hãmri nhũm mē

mar o pa. Atenas nhõ xwýnhjaja na prem axpën kôt amnhĩ nhĩpêx o pa hkêt nê. Mẽ hkwýjaja kêp Epikure hkôt amnhĩ nhĩpêx xwýnh. Nê mẽ hkwýjaja axtem kêp Etok kôt amnhĩ nhĩpêx xwýnh. Hãmri nhũm Pawre mẽ kãm Jesus kot tanhmã mẽ panê amnhĩ nhĩpêx to hã harênh o pa nê akupým htĩr ã harênh o pa. Hãmri nhũm mẽ tee ri kuma nê hã axpën kukjêr o kuhê nê axpën mã:

—Tk. Kwa mo na hte myti ata harênh o pa? Anê.

Nhũm mẽ hkwýja mẽ kãm:

—Ko. Axtem mẽpahpãm õ na hte tanhmã harênh to. Anê.

¹⁹⁻²¹ Atenas nhõ xwýnhjê mẽ axtem krĩ hõ nhõ xwýnhjaja na prem kãm mẽ ujarênh nyw mar prãm nê. Jakamã nhũm prem mẽmojarênh nyw ma hãmri nê ãm axpën mã harênh pix o ri pa. Tã ra Pawre xujarênh nyw ma nê ma amnhĩ kôt mẽ kot axpën mar xà hã ixkre hwýr o tẽ. Ixkre pẽ Areopja wýr nhũm prem amnhĩ kôt o tẽ nê kãm:

—E kwa aprĩ hã mẽ inhmã ate mẽmojarênh nywta jarẽ pa mẽ ama. Mẽ inhmã mar prãm. Anê.

²² Hãmri nhũm mẽ kuma nê mẽ kãm ujarênh o xa. Mẽ kot axpën mar xà hã ixkre kamã Atenas nhõ xwýnhjê mã awjarẽ nê mẽ kãm:

—E nã na ka htem anhõ mẽmo karõ nhĩpêx xohtõta ã apijaàm pẽ kãm amnhĩ jagrer o ri apa. Pa hte ja hã mẽ apumunh o mẽ akôt ixpa. ²³ Na pa ra mẽ anhõ sãnti piitã hkôt omunh o ri ixpa nê o mũj hõ kuhê xà kaprýja wýr ixkato. Nhũm himõk ã mẽmo karõ nhĩpêx amrakati nom à hã kagà kot:

MËPAHPÃM PUMUNH KÊT KUHÊ XÀ NA JA
 ã mẽ ate hã kagà kot anhýr. Mẽ ate omunh kêt tã ka htem arĩ hã apijaàm o ri apa. No pa na ixte mẽhõja jarênh mar mex. Tã kot paj mẽ amã harẽ ka mẽ inhma.

²⁴ —Mẽpahpãm mẽ ate omunh kêt ã amnhĩ jarênhta Tĩrtũm na. Tãm na pre pyka ho kato nê kamã mẽmojarênh ho kator pa. Gõ ho kato nê mry ho kato nê panhĩ ho kato. ãm mẽmojarênh ho kator par kumrêx. Na hte pika kamã nê kaxkwa kamã mẽmojarênh ho amnhĩptàr mex rãhã ho pa. Jakamã mẽmojarênh kot puj mẽ

jar kãm õrkwý nhĩpêx? Tãm kêp mẽmojarênh ho kator xwýnh jakamã kot mẽmojarênh to presija hkêt. ²⁵ Kêp mẽmojarênh ho kator piitã hpãm jakamã mẽmojarênh ho kator piitã õ na. Jakamã tanhmã kot pu wem amnhĩ to nê kãm mẽmojarênh gõ? Tãm kot mẽmojarênh ho kator nê ho htĩr nê kot mẽmojarênh ho kator õr kênã kot puj kêt mẽ amnhĩ pyrà nê kãm mẽmojarênh gõ. ²⁶ Na pre mẽ pahkukamã ahpýnhã mẽ pahpiitã mẽ papapxà jarẽ nê mẽ pakator hã arĩgro jarẽ. Na pre mẽ pahpãm kot wa Atãwja nhĩpêx. Jakamã nhũm Atãw kêp mẽ pahpiitã mẽ pahpàr krax.

²⁷ —Tã mẽmojarênh kaxyw na pre ã Tĩrtũm mẽ panhĩpêx mex anê? Nã ãm mẽ pahte amnhĩ kaxyw hkôt pajamaxpêr nê hkôt amnhĩ xunhwýr kaxyw na pre mẽ panhĩpêx. Ja mẽ pahpê hihtýx kêt. Kojã mẽhõ kãm Tĩrtũm prãm nhũm amnhĩ tã omunh kurê kumrêx.

²⁸ —Nê Tĩrtũm pix kukwak ri na pu htem pahpãm nê tanhmã amnhĩ nhĩpêx to ho ri papa. Mẽ akwý kot kagà jahkre xwýnhja na pre ja hã kagà nê hã kagà ho: “Mẽ pahpê mẽpahpãm kra na pu htem papa.” Anê. ã hã kagà kot anhýr.

²⁹ —Tã ka prem amnhĩ mẽmojarênh karõ nhĩpêx. õr o hkwý nhĩpêx nê prat o hkwý nhĩpêx nê kên o hkwý nhĩpêx. Hãmri nê hipêx pa nê ho mẽpahpãm ã harẽ nê ri hã apijaàm o apa. No mẽ ãm amnhĩ krã hkôt mẽ ate hipêx. Tĩrtũm te kot ja pyràk kêt.

³⁰ —Amnepêm mẽ pa xwýnhjaja na prem mẽ apyrã nê ã mẽmojarênh nhĩpêx anhýr o pa nhũm Tĩrtũm ja hã mẽ omu nê ãm mẽ omu nê hã tanhmã mẽ hipêx to hkêt nê. Kormã mẽ kot kapêr mar kêt jakamã nhũm pre ja hã mẽ omu nê ãm mẽ omu. Tã na ra mẽ pahte mẽmojarênh karõ nhĩpêx o mẽpahpãm nê mẽ pamã kapêr. Mẽ pahte hpãnhã amnhĩ kaxyw ãm kôt pix mã pajamaxpêr o papaja na kãm hprãm. ³¹ Kojã nhýrmã tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Nê amnhĩ ri mẽ htĩr tũm nê mẽ pa ho pa xwýnhjê jarẽ nê amnhĩ ri mẽ pa hkêt xwýnhjê jarẽ. Na pre ra ã mẽ harênh anhýr kaxyw arĩgro hta. Arĩgrota ã kot hprĩ hã kãm tanhmã mẽ pajarênh to kaxyw na pre ra Jesusja xãm. Kaxyw na pre akupým ho

htír. Nē akupým ho htír jao kot nhỹrmã kãm tanhmã mẽ pajarēnh to xwýnh ã ho amnhĩrĩt. Anē.

³² Nhũm pre ã Pawre mẽ kãm Tĩrtũm kapēr jarēnh anē nhũm mẽ mar o kuhê. Kot mẽ kãm Jejus tyk nē akupým htír ã harē nhũm mẽ mar o kuhê. Nhũm mẽ hkwyjaja kuma nē ãm kuma nē axtem nē ri hã akunha. Nom nhũm mẽ hkwyjaja mẽ kurom mar tỳx nē Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarē pa mẽ ixprĩ hã mar mex nē. Anē.

³³ Hãmri nhũm Pawre akupým nhỹri hpõx xà hã ixkre hwýr ma tē. ³⁴ Hãmri nhũm Xiõnĩs pē Areop kãm mẽ kãm kapēr xwýnh nē mēhõ ni pē Tãmaris nē mẽ hkwyjaja kapēr mar tỳx nē amnhĩ kaxyw Jejus kõt hamaxpēr nē hkõt amnhĩ xunhwý. Hãmri nē Pawre kõt pa.

18

Pawre Korĩt wýr mõi ã harēnh Wam Korĩt 1.1-3

¹ Tã nhũm Pawre krĩ pē Atenas rũm kato nē ma krĩ pē Korĩt wýr mõi nē pøj. ² Hãmri nē nhỹri Akirti pumu. Haxwýja kēp Ijaew. Krĩ pē Põt kamã na pre kato. Tã ma pyka pē Itar wýr mõi nē Itar kamã krĩ pē Rõm kamã hpãnhã pa. Pa ho pa htã nhũm mẽ õ pahшти Krawti tanhmã hamaxpēr to hãmri nē mẽ amnhĩ nē Ijaew piitã mẽ hanor pa. Jakamã nhũm Akirti kato nē hprõ Prisire mẽ wa ma Korĩt wýr mõi. Hãmri nē hwýr pøj nē kamã pa ho pa. Jakamã nhũm Pawre Korĩt wýr pøj nē wa omu ³ nē wa kuri pøj nē wa hkõt ri pa. Nē Siras mẽ Ximotre wa kamã hamak pē wa ãhkõ hã ãpēnh o pa. Wa uràk nē kupēxē pytĩ ho ixkre nhĩpēx nē ho wēnē ho ri wa hkõt pa. ⁴ Hãmri nhũm sap kato nhũm ma Tĩrtũm kapēr o mẽ ahkre xà hã ixkre hwýr pa nē kamã mẽ kãm Tĩrtũm kapēr jarēnh o hkrĩ. Ijaew mẽ Ijaew kēt xwýnhjē mã nhũm mẽ kãm ujarēnh o hkrĩ. Nē mẽ kãm Jejus kot mẽ panē tanhmã amnhĩ nhĩpēx to hã harē.

⁵ Tã nhũm Siras mẽ Ximotre wa ma Masetõn rũm Pawre wýr mõi nē pøj. Jakamã nhũm Pawre axte ixkre nhĩpēx ã ãpēnh kēt nē. Pãnhã apkati mẽ Ijaewjē jahkre ho pa. Mẽ kãm tanhmã Jejus jarēnh to ho ri mẽ

hkõt pa. Kēp Tĩrtũm kot mẽ pakaxyw ãm xwýnh ã harēnh o ri mẽ hkõt pa. Xatã mẽ kãm ujarēnh o pa. ⁶ Nom nhũm mẽ kãm mar prãm kēt nē kamã gryk kato nē kãm kapēr punuj nē. Nhũm Pawre tee ri amnhĩ tã mẽ kuma nē mẽ kãm:

—E ixte mẽ amã Jejus kot mẽ panē tanhmã amnhĩ nhĩpēx to hã harēnh tã ka mẽ amã mar prãm kēt nē. Nà mẽ kam nē mẽ mãmrĩ ate amnhĩ tomnuj kãm ty nē arĩ kam amnhĩ pumu no ãm amnhĩ tã tanhmã inhmã nē hkēt nē. Ra mẽ ate Tĩrtũm kapēr kaga kēnã. Nà kot paj mẽ akaga nē ma hpãnhã Ijaew kēt xwýnhjē hkõt ri mẽ kãm ja jarēnh o ri ixpa. Anē.

Hãmri nē kãnhmã xa nē hinõkà kapa nē ho apē. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpēx anē. ⁷ Hãmri nē ixkre rũm kato nē hijuk ri Ijaew kēt xwýnh pē Xijutre nhõrkwy hwýr tē nē hpãnhã Xijutre hkõt pa ho pa. Xijutre kēp Ijaew kēt tã amnhĩ kaxyw Tĩrtũm mã hamaxpēr rãhã ho pa.

⁸ Tã nhũm Ijaew õ pē Kriptija hkwyjē rom amnhĩ kaxyw Pahihti Jejus kõt hamaxpēr nē hkõt amnhĩ xãm. Kēp Ijaew nhõ Tĩrtũm kapēr o mẽ ahkre xà hã ixkre kamã mẽ ahkre xwýnh na pre. Jakamã õrkwy kamã hkwyjē mẽ mẽ hpimràatã Pahihti Jejus kõt amnhĩ xunhwýr pa. Nē krĩja kamã ra Ijaew kēt xwýnh ohtõ nē Kripti pyrà nē amnhĩ kaxyw Jejus kõt hamaxpēr nē hkõt amnhĩ xunhwý. Jakamã nhũm Pawre mẽ kēp Jejus kwý hã mẽ piitã mẽ hkrã kumrà.

⁹ Tã nhũm kamàt nhũm Pawre gõr nē nõ nē amýti nhũm kēwe Pahihti Jejus axte hwýr kato nē kãm kapēr nē kãm:

—Pa Pawre? E kwa kēr ka mãmrĩ axãmnhix ri atar mẽ kãm ijarēnh rãhã ho ri apa nē amnhĩ kamã akahak o ri mẽ hkõt apa hkēt nē. ¹⁰ Kot paj atãnopxa nhũm mēhõ tanhmã ato hkēt nē. Krĩ ja kamã koja mẽ ohtõ nē ixkõt amnhĩ xunhwý. Anē.

¹¹ Nhũm pre ã Pahihti Jejus Pawre hpimtir kãm kãm kapēr anē. Jakamã nhũm Korĩt kãm arĩ ri mẽ hkõt pa ryy nē. Arĩ mẽ hkõt pa hã amgrà pyxi nē hkõt mytwrý kēp 6. Jao Tĩrtũm kapēr o mẽ ahkre ho ri mẽ hkõt pa.

12 Tã nhũm Korĩt nhõ xwỳnhjê nhõ pika pê Gres kamã mẽ ho amnhĩptàr xwỳnh nyw Gartija. Korĩt kãm pa jakamã nhũm Ijaew xàptàr tũmrejaja Pawre pynê nê ma hwỳr o tẽ nê kãm tanhmã ho hêx to. 13 Jakamã nhũm Ijaew pikuprõnh xà hã ixkre kamã mẽ kãm kapêr xwỳnh Sostenesja Garti mã Pawre o hêx nê kãm:

—Kwa jahti na hte mẽ ixpê Ijaew kot amnhĩ nhĩpêx kwỳm ri mẽ ahkre ho pa. Jao mẽ ixte axtem nê tanhmã Tĩrtũm kôt ri amnhĩ nhĩpêx to ho ri ixpa kaxyw mẽ inhmã karõ ho pa. Nom mẽ ixte amnhĩ nhĩpêx kuhpa hã mẽ inhmã karõ. Anẽ.

14 Hãmri nhũm ra Pawre kot Garti mã amnhĩ jarênh mã tã nhũm Garti amnhĩ to wa nê hã mẽ kãm kapêr nê mẽ kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harênh ronhỹx pa arĩ mẽ ama nê tanhmã mẽ amã hipêx to. 15 No xep ãm kot mẽ axàptàr tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nê mẽ ate mẽ ahkre kuhpa hã kot ri mẽ ahkreja pix mỳrapê na ka mẽ kamã agryk nê ã inhmã ho akapêr anẽ. Nà kot paj ja hã tanhmã ho hkêt nê. Ka mẽ kam nê amnhĩ krã hkôt tanhmã ho hprãm xà hkôt tanhmã ho. Anẽ.

16 Hãmri nê amnhĩ nê mẽ hano. 17 Hãmri nhũm mẽ tee ri kuma nê ra Sostenes kamã gryk nê. Kot Garti mã tanhmã Pawre jarênh to htã nhũm kuma nê ãm mar jakamã nhũm mẽ hã Sostenes kamã gryk. Hãmri nê unê nê Garti noo mã htak o xa. Nê htak rax nê. Nom nhũm hã mẽ omu nê ãm mẽ omu nê nê tanhmã mẽ kãm nê hkêt nê.

Pawre kot akupỹm ãxiok wỳr mõi ã harênh

18 Tã nhũm Pawre arĩ Korĩt kamã mẽ hkôt pa nê gaa nê nojarêt nê Jejus kôt htõjê mã amnhĩ jarê nê mẽ kãm:

—E kot paj ma akupỹm pika pê Sir wỳr mõi. Anẽ.

Hãmri nê mẽ kêp kato nê ma hwỳr mõi. Nê ma amnhĩ kôt Akirti mẽ hprõ Prisireja wa o mõi. Mõi nê krĩ pê Sênkrej wỳr põi. Nhũm Pawre amnhĩ kukamã mẽmoj tã tanhmã Tĩrtũm mã amnhĩ jarênh to nê amnhĩ jarênh xà hkôt amnhĩ krã hkênh pa. Ijaew kot amnhĩ nhĩpêx xà hkôt ã amnhĩ nhĩpêx anẽ. Hãmri nê mẽ pàr wỳr agjê nê Sênkrej rũm kato nê ma Sir wỳr mõi.

19-21 Mõi nê krĩ pê Epes wỳr põi. Hãmri nhũm Pawre mẽ hkwỳjaja pàr rũm hapõi nê krĩ hwỳr agjê nê Ijaew nhõ Tĩrtũm kapêr o mẽ ahkre xà hã ixkre hwỳr mra nê hwỳr agjê nhũm Pawre mẽ kãm Tĩrtũm kapêr jarênh o nhỹ. Hãmri nhũm mẽ kuma nê kãm mar prãm nê. Nê kãm:

—Kwa anojarêt kêt nê. Kritpêm mẽ ixkôt ri apa ryre nê Tĩrtũm kapêr o mẽ ijahkre. Mẽ inhmã ja mar prãm.

Anhỹr tã no nhũm mẽ kãm:

—Nà kot paj ma mõi. Nom koja Tĩrtũm nhỹrmã akupỹn mẽ awỳr inhmẽ pa man akupỹn mẽ awỳr mõi nê axte kapêr o mẽ ajahkre. Anẽ.

Hãmri nê ma mõi. Ma Epes rũm pàr kãm mõi. Nom nhũm Akirti mẽ Prisireja wa Epes kamã arĩk nê hpãnhã kamã pa ho pa.

22 Tã nhũm Pawre krĩ pê Sejarej wỳr põi. Hãmri nê hpãnhã kurũm ma akupỹm Jerujarê hwỳr mõi. Kot Jejus kôt htõjê pumunh mã ma mẽ hwỳr mõi. Hãmri nê mẽ hwỳr põi nê mẽ omu nê tanhmã mẽ kãm amnhĩ jarênh to nê mẽ kêp kato nê ma akupỹm ãxiok wỳr mõi. 23 Hãmri nê hwỳr põi nê kamã mẽ hkôt ri pa ryy nê mẽ kurũm kato nê hpãnhã ma akupỹm pyka pê Prik mẽ Karatas wa hwỳr mõi. Nê kamã mẽ kot Jejus kôt amnhĩ xunhwỳr xwỳnhjê jahkre ho pa. Mẽ kot Jejus kôt amnhĩ nhĩpêx tỳx rãhã ho pa kaxyw mẽ hkôt mẽ ahkre mex o ri mẽ hkôt pa.

*Apor kot Epes kãm Tĩrtũm kapêr jarênh
Epes 1.1-2; Wam Korĩt 3.6-9*

24 Tã nhũm Epes wỳr Ijaew õ pê Aporja mõi nê hwỳr põi. Krĩ pê Aresãn kamã na pre kato. Na pre hte amnhĩ kaxyw Tĩrtũm kôt pix mã hamaxpêr nê kapêr ã kagà htũm mar tỳx nê. Jakamã mẽ kãm harênh mex o pa nhũm mẽ piitã kãm mar prãm nê. 25 Nom kormã Jejus jarênh jatur xà mar kêt jakamã ãm mẽ kãm hkrax pix jarênh o pa. Juãw Paxis kot tanhmã mẽ ahkre htoja nhũm mar tỳx nê. Nê tanhmã kot mẽ hkrã kumrãr to ho paja nhũm mããnên mar tỳx nê. Jakamã na pre hte mẽ kãm ja pix jarênh o pa. No Jejus kêp Tĩrtũm kot mẽ pahwỳr mẽnh xwỳnh ã harênhja nhũm kormã mar kêt nê. Tã Epes wỳr mõi nê põi. 26 Hãmri nê Ijaew nhõ Tĩrtũm kapêr o mẽ ahkre xà hã

ixkre hwÿr axà nê kamã mẽ kãm ujarênh o nhÿ. Amnhĩ kamã kahak kêt nê àmnhĩx ri mẽ kãm ujarênh mex nê. Hãmri nhũm Prisire mẽ Akirti wa kot mẽ kãm ujarênh ã kuma nê war axpên mã:

—Kwa mãn kormã Jejus jarênh piitã mar kêt. E pu amnhĩ kôt panhõrkwÿ hwÿr o tẽ nê pahprĩ hã kãm harênh jatur xàm kumẽ kê hprĩ hã mar pa. Anê.

Hãmri nê war amnhĩ kôt kuwÿ nê hprĩ hã kãm ujarênh jatur xàm kumẽ nhũm hprĩ hã harênh piitã mar tÿx nê.

²⁷ Tã ra pyka pê Gres wÿr nojarêr nê Jejus kôt htõjê mã amnhĩ jarê nhũm mẽ kuma nhũm ja mẽ kãm mex nê. Hãmri nê Gres kamã Jejus kôt mẽ htõjê mã kagà nhĩpêx. Apor kot mẽ hwÿr amnhĩ kôt o mõi nê mẽ kãm õr nhũm mẽ kot omunh nê kamã harênh nê ho mex kaxyw mẽ kãm hipêx. Hãmri nê hipêx pa nê kãm kugõ nhũm kupy nê mẽ kurũm kato nê ma mẽ hwÿr mõi. Hãmri nê mẽ hwÿr pøj. Gres nhõ xwÿnh kwÿjaja na prem ra Jejus kôt amnhĩ xunhwÿ. Tĩrtũm kot mẽ kutã nojarêr jakamã nhũm mẽ ra hkõt amnhĩ xunhwÿ. Jakamã nhũm Apor mẽ hwÿr pøj hãmri nê mẽ ìhkõ hã tanhmã mẽ ho ajuta hto ho pa. ²⁸ Nê xatã Ijaew mã tanhmã Jejus jarênh to kamã hihtÿx o mẽ hkõt pa nê mẽ kãm:

—Nà Jejusja tãm na pre Tĩrtũm mẽ pakaxyw ãm. Tĩrtũm kapêr ã kagà htũm kamã ã harênh kot anhÿr. Anê.

19

Pawre akupÿm Epes wÿr mõi ã harênh Rukre 3.15-16

¹ Tã nhũm Apor kormã Korĩt kãm pa ri nhũm Pawre ma akupÿm Epes wÿr mõi. Ma krãhakÿx kôt akupÿm hwÿr mõi. Hãmri nê hwÿr pøj nê mẽ kot Jejus kôt amnhĩ nhĩpêx o mẽ pa xwÿnhjê pumu. Nhũm mẽ kormã Jejus jarênh jatur xà mar kêt nê. ² Jakamã nhũm Pawre mẽ hwÿr mõi nê mẽ omu nê Tĩrtũm Karõ hã mẽ hkukja nê mẽ kãm:

—Kwa mẽ ate Jejus kôt amnhĩ xunhwÿr xà hã arĩgrota ã xà na pre Tĩrtũm Karõ mẽ akarõ mã agjê? Anê.

Hãmri nhũm mẽ kuma nê kãm:

—Nà mẽ ixte Tĩrtũm Karõ jarênh mar kêt. Anê.

³ Hãmri nhũm mẽ kãm:

—No mẽmoj kôt na prem mẽ akrã kumrã? Anê.

Nhũm mẽ kãm:

—Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anê.

⁴ Hãmri nhũm Pawre mẽ kãm:

—Nà Juãw Paxis na pre Ijaew mã kapêr o: “Kot kaj mẽ mẽ ate amnhĩ tomnuj kaga nê hpãnhã tãm amnhĩ nhĩpêx pa hã mẽ akrã kumrã.” Anhÿr o mẽ kãm kapêr o pa. Nê mẽ kãm Jejus jarênh o: “Koja tokyx mõi ixkõt hapu hã mẽ pahwÿr kato nê tanhmã amnhĩ nhĩpêx to ho pa. Ka mẽ omu nê amnhĩ kaxyw hkõt ajamaxpêr nê hkõt amnhĩ xunhwÿ.” Anê. Tã Jejusja na pre ã mẽ kãm harênh anhÿr o pa. Anê.

⁵ Nhũm pre ã Pawre mẽ kãm Juãw Paxis mẽ Jejus wa harênh anê nê hpãnhã Jejus nhÿ hã mẽ hkrã kumrã. ⁶ Hãmri nê hpãnhã mẽ hã ìhkra jaxwÿ nhũm Tĩrtũm Karõ mẽ hwÿr wrÿ nê mẽ hkarõ mã gjêx pa. Hãmri nhũm mẽ ÿ hã ahpÿnhã axtem mẽ kapêr kwÿ ho kapêr nê ÿ hã Tĩrtũm mex o mex ã harênh o kuhê. ⁷ ã mẽ kot amnhĩ nhĩpêx anhÿr xwÿnhjaja kêp 12.

⁸ Tã nhũm Pawre Epes kãm Ijaew nhõ Tĩrtũm kapêr o mẽ ahkre xà hã ixkre hwÿr mrar ã mytwrÿ axkrunêpxi. Amnhĩ kamã kahak kêt nê hprĩ hã Ijaew mã hprĩ hã Jejus jarê nê mẽ kãm:

—E pa mẽ amã Jejus jarê ka mẽ inhma. Nà Tĩrtũm kot mẽ pahwÿr mênh xwÿnhhta na. Nê mẽ pahte kamã pajamak o papa xwÿnhhta na. Jakamã kot ka mẽ amnhĩ kaxyw hkõt ajamaxpêr nê hkõt amnhĩ xunhwÿ nhũm Tĩrtũm ja hã mẽ apumu nê mẽ ato hkra. Anê.

Hãmri nhũm mẽ hkwyjaja kuma nê hkõt hamaxpêr kurê kumrêx. ⁹ Nom nhũm mẽ hkwyjaja kuma nê ãm kuma nê Jejus o kapêr punuj nê. Mẽ piitã mẽ noo mã kuhê nê ho kapêr punuj tÿx nê. Nhũm Pawre tee ri ja mẽ omu hãmri nê mẽ kurũm kato. Mẽ pikuprõnh xà hã ixkreta rũm kato nê hpãnhã nhãm mẽ kot kãm “Xirãn kot mẽ ahkre xà hã ixkre” anhÿr xwÿnhja wÿr hpãnhã mõi. Nê amnhĩ kôt mẽ kot Jejus kôt amnhĩ xunhwÿr xwÿnhjê ho pa nê hpãnhã ixkreta kamã mẽ ahkre ho pa. Apkati mẽ hwÿr mra nê mẽ ahkre. ¹⁰ Jao hã amgrã axkrut. Jakamã nhũm pyka pê As kamã

mě piitã Pahihti Jejus jarënh ma. Ijaew nê Ijaew kêt xwýnhjaja nhùm mẽ piitã harënh ma.

Wajaga hkwý jarënh

¹¹ Tã nhùm Pawre Tirtùm nhý hã mẽ kãm aa mẽ kot mẽmoj pumunh kêt kwý ho anhýr o ri mẽ hkôt pa. ¹² Jakamã nhùm pre htem hwýr mra nê kêp ê hkwý jamý nê ma mẽ à xwýnhjê hwýr o mra nê mẽ hã haxwý nhùm mẽ akupým mex. Nê mẽkarõmnuti kot tanhmã mẽ ho ho pa xwýnhjê hã nhùm prem mãânën mẽ hã ê kwý jaxwý nhùm mẽkarõmnutija mẽ kurùm hapôj nê ma mrrar kurê kumrêx nhùm mẽ akupým tãm hkrã.

¹³⁻¹⁴ Tã nhùm mẽõ patre maati Sewahtija hkra my kêp 7 nê piitã kêp wajaga. Hãmri nê mẽ kãm Pawre pyrã nê mẽ nê mẽkarõmnuti japôx o pa hprãm nê. Jakamã kormã Jejus kôt amnhĩ xunhwýr kêt tã mẽ kot ý hã Pawre pyrã nê mẽhõ nê hkwý janor kaxyw nê kãm:

—E Pawre kot Jejus jarënh o ri pa xwýnhta nhý hã kot paj amã ixkapêr. Jakamã e kwa tokyx myta rùm akato nê ma tẽ. Anẽ.

¹⁵ Hãmri nhùm mẽkarõmnutija mẽ kuma nê ãm mẽ kuma nê mẽ kãm:

—Tk. Mẽ apê Jejus mẽ Pawre wa hkwý hkêt tã mẽ nê ã mẽ inhmã akapêr anhýr o apa. Nà Jejus mẽ hkwý pixjaja na htem Tirtùm nhý hã mẽ kêp mẽ ijapôx o pa. Mẽ apê mẽ hkwý hkêt kênã. Nà pa ixkatoore kaxyw ã. Anẽ.

¹⁶ Hãmri nhùm mẽkarõmnuti kot tanhmã ho xwýnhta mẽkarõmnuti nhý hã wajagajê pynê nê mẽ htak rax o kêp mẽ ê kaxónh pa nhùm mẽ tee ri amnhĩ nhĩpêx. Hãmri nê hkênh nê òrkwý rùm hapôj nê ma umaj hprôt nê mra. ¹⁷ Hãmri nhùm Epes kamã mẽ piitã ã kot mẽ hipêx anhýr ã mẽ harënh ma nê tee ri hamaxpêr nê kãm ma nê. Ijaew nê Ijaew kêt xwýnhjaja nhùm mẽ piitã tee ri kãm hamaxpêr o pa. Nê Pahihti Jejus mã mex o mex ã harê. ¹⁸ Jakamã nhùm mẽ kot Jejus kôt amnhĩ xunhwýr nyw xwýnhjaja piitã tanhmã amnhĩ jarënh to. Nê mẽ hkwýjaja amnhĩ jarënh o:

—Nà kormã ixte Jejus kôt amnhĩ xãm kêt ri na pa pre ã amnhĩ tomnuj anhýr o ri

ixpa. Tã Jejus kôt amnhĩ xãm hãmri nê axte ã amnhĩ nhĩpêx anhýr kêt nê. Anẽ.

Nhùm mẽ hkwýjaja kêp wajaga htã mẽ urak nê Jejus kôt amnhĩ xunhwý hãmri nê amnhĩ jarënh o:

—Nà ijaxwýja kormã Jejus kôt amnhĩ xãm kêt ri na pa pre hte nê mẽ no kupyw nê mẽ y pix o ri mẽ hkôt ixpa. Tã Jejus kôt amnhĩ xãm hãmri nê axte ã amnhĩ nhĩpêx anhýr kêt nê. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anẽ.

¹⁹ Hãmri mẽ õ wajaga xàhpumunh xà hã kagà jamý nê ma o mra nê kaxyw kuto nê kamã rënh pa nê mẽ piitã mẽ noo mã ho xêt pa. Wajaga xàhpumunh xà hã kagàja ã kàxpore xohtô rax kumrêx tã nhùm mẽ Jejus gryk ã hamý nê o mra nê ho hxêt pa nhùm hapêx. ²⁰ Hãmri nhùm krĩ nhõ xwýnhjaja ã mẽ kot amnhĩ nhĩpêx anhýr ã mẽ omu nê ohtô rax nê mẽ urak nê Jejus kôt amnhĩ xunhwý.

Pawre kot Rõm wýr hkrã hã harënh

Rõmã 1.13-15, 15.22-29

²¹ Tã nhùm Pawre ra akupým Jerujarê hwýr nojarêt nê hamaxpêr o:

—E kot paj ixkato nê hpãnhã ma Masetõn mẽ Gres wa hkôt ma akupým Jerujarê hwýr mõ. Ma mẽ kot Jejus kôt amnhĩ xunhwýr xwýnhjê pumunh o mẽ hkôt mõ. Hãmri nê Jerujarê hwýr pôj nê kamã tanhmã amnhĩ to hpa hãmri nê hpãnhã ma Rõm wýr mõ. Anẽ.

²² Hãmri nê hkôt ho ajuta ho wa pa xwýnh Ximotre mẽ Eras wa kãm amnhĩ jarê nê wa kãm:

—E kêt ka wa ma ixkukamã Masetõn wýr wa mõ. Kot paj kormã jar As kamã ixpa grire hãmri nê ma war akôt mõ pu mẽ hamũ ma Jerujarê hwýr mõ. Anẽ.

Hãmri nhùm wa kuma nê kato nê ma hkukamã Masetõn wýr mõ.

Mẽ kot sãnti hã Pawre mã àkjêr ã mẽ harënh

Sikũn Korõt 1.8-9

²³ Rõm nhùm Epes nhõ xwýnhjaja tee ri Pawre kot tanhmã Pahihti Jejus jarënh to hã kuma nhùm ja mẽ kêp omnuj nê. Nhùm mẽ Jejus ã kamã gryk týx nê. ²⁴ Na prem amnhĩ kaxyw Tirtùm kôt hamaxpêr kêt nê. Na prem axtem sãnti ho mẽ hpãm nê amnhĩ

to hwÿr pê hã hpijaàm nê kãm mex o mex ã harênh o pa. Mẽ õ sãntija ni Xiãre na pre. Nhũm mẽ kãm ixkre nhĩpêx nê kamã hkarõ nhĩpêx xãm. Hãmri nê hwÿr akuprõ nê hã hkĩnh nê hkarõ hã hpijaàm nê kãm mex o mex ã harê. Nhũm pre hte Temêtja Xiãre nhõrkwÿ karõ hkryre hkwÿ nhĩpêx nê mẽ kãm ho wênê ho pa. Prat o hipêx nê ho wênê ho pa. Jao ra hã mẽ àpênh xwÿnhjê mẽ nhũm mẽ kot haprõr xwÿnhjê kukwak ri kàxpore jamÿnh rũnh o pa.

²⁵ —Jakamã nhũm Pawre mẽ hwÿr mõ nê pøj nê mẽ kãm Mẽpahpãm Tirtũm jarênh o ri mẽ hkõt pa nhũm Temêt tee ri kuma nhũm ja kêp omnuj nê. Hãmri nhũm hamaxpêr nê mẽ kot urak nê Xiãre nhõrkwÿ karõ hkryre nhĩpêx nê ho wênê ho pa xwÿnhjê ho akuprõ nê mẽ kãm:

—E kwa mẽ inhma. Na pu htem mẽpanã Xiãre nhõrkwÿ karõ hkryre pãnhã kàxpore jamÿnh rũnh o papa. ²⁶ Tã mãn ka mẽ ra ham hpõx xwÿnh Pawreja pumu nê kapêr ma. Na hte jar mẽ panhõ krĩ kamã nê As piitã hkõt mẽ kãm mẽpanã Xiãre karõ nê mẽ kãm kapêr o pa. Xep mẽ pahte mẽ hkarõ nhĩpêxja kêp mẽpanã kumrêx kêt ã mẽ kãm harênh o pa nhũm xep mẽ ohtõ nê kuma nê ra hkõt hamaxpêr.

²⁷ —Kwa ja mex kêt. Koja mẽ kapêr ma nê hkõt amnhĩ nhĩpêx hãmri nê axte mẽ pahte ixkre karõ hkryre nhĩpêx xwÿnhhta japrõr kêt nê. Hãmri nê mẽ paxàpênh o kapêr punuj nê. No ãm ja pix omnuj kêt. Koja mẽpanã Xiãre mã amnhĩ jarênh xà hã ixkreja kaga hpa. Nê haxwÿja karõja kaga. Mẽ piitã kãm hapê kênã. As kamã nê pyka piitã hkõt mẽ piitã kãm hapê nê hwÿr mra nê amnhĩ to hwÿr o pa. Kêp mẽpanã mex kumrêx tã koja mẽ Pawre kapêr gryk ã hkaga hpa nê axte kãm hamaxpêr kêt nê. Hãmri pu mẽ axte mẽ kukwak ri pakàxpore rax nê papa hkêt nê. Kwa tanhmã kot puj mẽ amnhĩ nhĩpêx to? Anê.

²⁸ Hãmri nhũm mẽ tee ri ã kapêr anhÿr ã kuma nê Pawre kamã gryk tÿx kumrêx. Nê gryk xaj kàx pêê kapêr nê xatã kapêr tÿx kãm kapêr punuj nê. Nê kapêr o:

—Xiãre na mex kumrêx. Kêp mẽ pahpê Epes nhõ xwÿnhjê nã maati na.

Anhÿr o kàxpêê kapêr o kuhê. ²⁹ Hãmri nhũm krĩ nhõ xwÿnh piitã mẽ kuma nê mẽ hwÿr hprõt nê haxwÿja gryk nê kàxpêê mẽ hkõt ã harênh anhÿr o kuhê. Hãmri nê gryk xaj Pawre hkõt ri wa pa xwÿnhja wa unê nê ma mẽ kot axpên mar xà hã ixkre hwÿr wa hkjênh o tẽ. Masetõn nhõ xwÿnh wa kêp Gajore mẽ Aristakja nhũm mẽ wa unê. ³⁰ Hãmri nhũm Pawre mẽ kot wa unênh ã mẽ omu nê tee ri wa hkukamã hamaxpêr nê mẽ hkõt hprõt nê mẽ kãm tanhmã kapêr to kaxyw nom nhũm mẽ kot Jejus kõt amnhĩ xunhwÿr xwÿnhjaja ja nê kãm kapêr kãm hihtÿx nê. ³¹ Hãmri nhũm As kamã mẽ kot mẽ ho amnhĩptar xwÿnh kwÿjaja ã mẽ kot amnhĩ nhĩpêx anhÿr ã mẽ omu nê Pawre hwÿr hpêr mẽ. Mẽ kãm hkĩnh jakamã kot mẽ hkõt htêm nhũm mẽ kot hpír pymaj hwÿr hpêr mẽ nê mẽ hkõt htêm nê hkurê kamã hihtÿx nê.

³² Rôm nhũm mẽ piitã mẽ kot axpên mar xà hã ixkre hwÿr pikuprõnh pa nê kàx pê kapêr punuj o kuhê. Nom axpên kõt kapêr kêt nê. ãm axpên kwÿm ri kàx pê tanhmã kapêr punuj to ho. Nhũm mẽ hkwÿjaja hprĩ hã mẽ mar kêt tã amarĩ amnhĩ krã hkõt kàx pê kapêr punuj nê. ³³ Nhũm Ijaew kwÿjaja tee ri ja hã mẽ omu nê axpên mã:

—Tk. Kwa okora. Koja mẽ nã Xiãre hã gryk hãmri nê tanhmã mẽ pahpê Ijaew to nã? Anê.

Hãmri nê hamaxpêr nê mẽ hwÿr amnhĩõ pê Aresãnja mẽ nê kãm:

—Kwa ma mẽ hwÿr tẽ nê mẽ kãm tanhmã mẽ pahtã axaprãr to. Pawre kêp mẽ pahkwÿ htã tãm na mẽ kãm mẽ gryk jaxà. No mẽ papajaja na pu mẽ kãm mẽ gryk jaxàr kêt nê. Anê.

Hãmri nhũm mẽ kuma nê mẽ hwÿr tẽ nê xa nê tee ri kot mẽ ho hpinhkrênh kaxyw kãnhmã mẽ kãm ìhkra pêr kaprÿ. ³⁴ Nhũm mẽ omu nom hpinhkrênh kêt nê arĩ kàx pêê kapêr punuj ã 2 or. Nê kàx pê kapêr o:

—Mẽpanã Xiãreja mex o mex. Kêp mẽ pahpê Epes nhõ xwÿnhjê nã mex na. Anê.

³⁵ Tã nhũm mẽ õ pahĩ nhõ kôwenatõ jatã tanhmã Epes nhõ xwÿnhjê ho hpinhkrênh to hãmri nê ja nê mẽ kãm kapêr nê mẽ kãm:

—Kwa mẽ anhĩkrê. Mẽ piitã kot Xiãre mex o mex ã omunh kênã. Nê mẽ pahpê kãm amnhĩ jarênh xà hã ixkre jamãr xwÿnh

ã mẽ kot mẽ pahpumunh mex. Nẽ kaxkwa rũm karõ kot mẽ pahwỳr tẽm nhũm mẽ pahpê hamãr o papa xwỳnh ã nhũm mẽ kot mẽ pahpumunh mex. ³⁶ Jakamã mẽhõ kot kêt we mẽ pahpê hamãr xwỳnh kêt ã mẽ pajarẽ? Ra mẽ piitã mẽ kot ja hã mẽ pahpumunh jakamã kwa mẽ anhĩkrê nẽ ri ã akapêr anhỳr kêt nẽ. ³⁷ No mẽ ate wa unênh nẽ amnhĩ kôt wa ho atẽm xwỳnhhta wa. Wa kot tanhmã mẽpanã Xiãre ho kapêr punuj to rỳ kêp õ ixkre kamã àhkĩnh kêt tã ka mẽ amarĩ wa unê nẽ amnẽ amnhĩ kôt wa o tẽ.

³⁸ –Kwa kê Temêt mẽ hkwỳjaja kãm tanhmã wa ho kapêr to hprãm nẽ ma pahihiti hwỳr wa o tẽ nẽ kumã mãn tanhmã wa ho kapêr to. Mẽmoj tã axpẽn mã mẽ kapêr xà hã arĩgrota ãã. ³⁹ Rỳ ka mẽ amã mẽmoj jarênh prãm nẽ arĩgroja ã mãn rĩ kormã mẽmoj jarẽ. ⁴⁰ No jarãhã mẽ ate amnhĩ nhĩpêxja te mẽ ate pahihiti kutã amnhĩ xunhwỳr nẽ ho akapêr punuj pyræk. Koja Rõm nhõ xwỳnhjê nhõ pahĩ mẽ ajarênh ma hãmri nẽ mẽ ate kamã agryk ã amnhĩ kamnhĩx. Hãmri nẽ mẽ atã ixkukja pa tanhmã kãm mẽ ajarênh to? Mẽhõ nhỹ hã na ka mẽ ã apikuprõnh nẽ amnhĩ nhĩpêx anẽ? Nà amnhĩ krã hkôt na ka mẽ akuprõ nẽ ã amnhĩ nhĩpêx anẽ. Anẽ.

⁴¹ Hãmri nẽ mẽ kãm kapêr pa nẽ mẽ hano nhũm mẽ angrã nẽ ma akupỹm òrkwỳ hwỳr hapêx.

20

Pawre ma Masetõn mẽ Gres wa hwỳr mõi ã harênh

¹ Hãmri nhũm Pawre ra nojarêt. Jerujarẽ hwỳr mõi mã nom kormã pika pẽ Masetõn kumrêx wỳr mõi nẽ kurũm ma akupỹm Jerujarẽ hwỳr mõi mã. Hãmri nẽ nojarêt nẽ mẽ kot Jejus kôt amnhĩ xunhwỳr xwỳnhjê ho akuprõ nẽ mẽ kãm amnhĩ jarẽ nẽ mẽ kãm:

–E kot paj ma mõi. Nom kêr ka mẽ arĩ ixwakre kamã Tĩrtũm kapêr kôt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

Hãmri nẽ mẽ kãm:

–E mẽ mãmrĩ ixwa kre kamã axãmnhĩx ajamakêtkati nẽ ri apa. Anẽ.

Hãmri nẽ kato nẽ ma Masetõn wỳr mõi. ² Nẽ hwỳr pøj nẽ kamã krĩ hkwỳ hkôt mõi

nẽ nhỹri mẽ kot Jejus kôt amnhĩ xunhwỳr xwỳnhjê pumu nẽ Tĩrtũm kapêr o mẽ ahkre. Mẽ kot hkôt amnhĩ nhĩpêx mex nẽ kãm hprãm xà hkôt pix mã amnhĩ nhĩpêx kaxyw mẽ kãm kapêr o ri mẽ hkôt pa. Hãmri nẽ kato nẽ ma mõi nẽ pyka pẽ Gres wỳr pøj. ³ Nẽ kamã mẽ hkôt pa hã mytwrỳ axkrunêpxi hãmri nẽ akupỹm pyka pẽ Sir wỳr nojarêt. Nẽ ma pàr kãm hwỳr mõi kaxyw nẽ amnhĩ tã Sir kamã Ijaew kwỳ kot tanhmã harênh to hã amnhĩ jarênh ma. Na prem ra hã axpẽn mã amỹnê nẽ axpẽn mã:

–E koja amnẽ mẽ pahwỳr mõi pu mẽ nhỹri omu nẽ hpĩr kurê kumrêx. Anẽ.

Hãmri nhũm Pawre amnhĩ tã mẽ kapêr ma nẽ pàr kaga nẽ mẽ hwỳr mõi kêt nẽ. Hãmri nẽ awjanã nẽ Jerujarẽ hwỳr Masetõn kamã pa. ⁴ Nhũm Jejus kôt htõ hkwỳjaja ma hkôt mõi. ã mẽ hixi kot anhỳr.

Perej nhõ xwỳnh Sopatõja. Piro hkra na pre.

Nẽ Tesarõn nhõ xwỳnh Aristak mẽ Sikũn wa.

Nẽ Tepe nhõ xwỳnh Gajoreja.

Nẽ As nhõ xwỳnh Xikitre mẽ Torow wa.

Nẽ Ximotreja.

Jajaja na prem ma Pawre hkôt Jerujarẽ hwỳr mõi. ⁵ Nẽ pa ixpê Rukre ixte mẽ amã ja jarênh nẽ hã kagã xwỳnhja na pa axte Pawre hã ajêt nẽ hkôt mõi. Jakamã nhũm jajaja piitã ma wa ixkukamã Tôx wỳr mõi nẽ kamã wa ixkãm hamak o pa.

⁶ Tã pa wa ma krĩ pẽ Piripos rũm ixkato nẽ pàr kãm ma mẽ hkôt mõi. Arĩgro pẽ Pas jakãnh mẽ ma mẽ hkôt mõi.

Tã wa ixtã arĩgro pẽ 5 nẽ mẽ hkôt Tôx wỳr pøj nẽ kamã mẽ omu nẽ mẽ hkôt ixpa hã ixtã ù semãn.

Pawre kot akupỹm Exik o htĩr ã harênh Juãw 5.21; Atre 9.36-43

⁷ Tã nhũm sap nẽ kamãt pa mẽ kot Jejus kôt amnhĩ xunhwỳr xwỳnhjê hkôt akuprõ nẽ axpẽn kutã apku nhũm Pawre mẽ kãm kapêr. Ra apkati hkôt mẽ inhnojarêt kaxyw jakamã nhũm mẽ kãm Tĩrtũm kapêr jarênh ryy nẽ. Ra kôt ã kamãt nhũm arĩ mẽ kãm harênh o nhỹ. ⁸⁻⁹ Ixkre hprêk axpẽn nhĩpy axkrunêpxi nhĩtep xà kamã na pa prem akuprõ nẽ mar o ixkrĩ. Ixkreja kamã kanê ohtõ nẽ hpòk o harir. Jakamã nhũm

Pawre arĩ mẽ kãm ujarẽnh o nhỹ nhũm mẽhõ xàptàr nyw Exikja ra òtxwa htỳx nẽ mẽ ixkuri òt o nhỹ. Janere hã òt o nhỹ. Tã ra gõr nẽ janere pẽ kato nẽ ahparmã tẽ nẽ pykap tẽm. Pa mẽ tee ri omu nẽ ahparmã hwỳr ixprõt nẽ wrỳn nẽ omu nhũm htyk mex nẽ nõ. Kỳj rũm ahpar mã htẽm ryy jakamã htyk mex nẽ nõ. Hãmri nhũm hkwyjaja tee ri omu nẽ hkaprĩ htỳx nẽ kumỳ nẽ mỳr o hkrĩ. ¹⁰ Hãmri nhũm Pawre mẽ ixkõt wrỳ nẽ hwỳr tẽ nẽ htyk ã omu nẽ kumỳ nẽ mẽ kãm:

—E mẽ amỳr kêt nẽ. Ra htyk tã koja Tĩrtũm akupỹm mẽ pamã ho htĩr.

Anhỹrja kõt nhũm akupỹm htĩr. ¹¹⁻¹² Hãmri nhũm mẽ akupỹm htĩr ã omu nẽ hkĩnh tỳx kumrẽx. Hãmri pa mẽ akupỹm kỳx pẽ ixkre hwỳr api nhũm Pawre mẽ inhmã pãwti hkwy nhĩrẽ nẽ mẽ inhmã kugõ pa mẽ Jejus kot mẽ panê htyk mã ijamaxpẽr pẽ kuku. Hãmri nhũm Pawre axte mẽ kãm kapẽr o ỹr rãhã nhũm myt kato pa mẽ kẽp anhrã nẽ ma ixpa.

Pawre Mĩrêt wỳr mõi ã harẽnh

¹³ Hãmri pa mẽ inhnojarêt nhũm Pawre mẽ ixte hkõt mẽ inhmõi xwỳnhjẽ mã:

—E kër ka mẽ ma pàr kãm ixkukamã mõi. Kot paj ahte ma kỳx pẽ mẽ akõt ixpar o Asõt wỳr mõi. Hãmri nẽ hwỳr pøj nẽ mẽ anhõ pàr mã axà pu mẽ ma pahpimràatã ma hamũ mõi. Anẽ.

¹⁴ Hãmri pa mẽ kuma nẽ ma mõi nẽ mẽmo arĩgro hã Asõt kamã axpẽn wỳr pøj. Hãmri nhũm Pawre mẽ ixkõt pàr wỳr axà pa mẽ ma krĩ pẽ Mĩtirẽnh wỳr mõi. ¹⁵ Nẽ hwỳr pøj nẽ kurũm kormã mõi nhũm apkati pa mẽ gõ hipõk pẽ Kiw jakrenh o mõi. Nẽ hakre nẽ mõi nhũm apkati pa mẽ gõ hipõk pẽ Sãm wỳr pøj nẽ hã pàr nhõ. Hãmri nhũm apkati pa mẽ axte mõi nẽ Mĩrêt wỳr pøj. ¹⁶ Nom nhũm ra Pawre nojarêt nẽ. Kãm tokyx As rũm kator nẽ Jerujarẽ hwỳr mõi nẽ tokyx hpõx prãm nẽ. Kãm mẽ hkĩnh pẽ Pẽtekos xwỳj ri hwỳr hpõx prãm jakamã nojarêt tỳx pa mẽ Epes wỳr inhmõi kêt nẽ.

Pawre kot Epes kamã Kris kwỳjẽ mã amnhĩ jarẽnh

¹⁷ Tã pa mẽ Mĩrêt wỳr pøj nhũm Pawre amnhĩ wỳr Epes wỳr Jejus kwỳ jahkre ho mẽ pa xwỳnhjẽ hã karõ. ¹⁸ Hãmri nhũm mẽ

man mẽ ixwỳr mõi nhũm Pawre mẽ omu nẽ mẽ kãm amnhĩ jarẽ nẽ mẽ kãm:

—Nà ixte mẽ amã amnhĩ jarẽnh kaxyw na pa mẽ atã karõ. Ra mẽ ate tanhmã ixte amnhĩ nhĩpẽx to hã ixpumunh mex. Wam mẽ awỳr As wỳr ixpõxta ã ka prem aprĩ hã ixpumunh mex nẽ. ¹⁹ Na pa pre mẽ akõt ri mẽ amã tanhmã amnhĩ nhĩpẽx to ho ri ixpa. Te ixpẽ mẽ amã ixapẽnh xwỳnh pyrãk. Nẽ Pahihti Jejus mã tanhmã amnhĩ nhĩpẽx to ho ri mẽ akõt ixpa. Nẽ ixkwỳ Ijaew kwỳ kot Jejus kapẽr kaga hã mẽ omu nẽ ixkaprĩ nẽ inhmỳr o ixpa. Nhũm prem Jejus ã ixtomnuj pa amnhĩ xà htỳx kamã ijamak o ri mẽ hkõt ixpa. ²⁰ Nom arĩ ri Tĩrtũm kapẽr o mẽ ajahkre ho ri mẽ akõt ixpa rãhã nẽ aa hkaga hkêt nẽ. Mẽ anhõrkwy kamã nẽ mẽ ahkre xà hã ixkre kamã. Mẽ ate tãm amnhĩ nhĩpẽx prãm xàj pa pre ã mẽ ajahkre mex anhỹr rãhã ho ri mẽ akõt ixpa.

²¹ —Nẽ mẽ ixpẽ Ijaewjẽ mẽ mẽ apẽ Ijaew kêt xwỳnhjẽ mẽ pa pre mẽ ajahkre ho axpẽn pyrãk. Mẽ apiitã mẽ ate amnhĩ tomnuj kaga nẽ hpãnhã Tĩrtũm kõt amnhĩ nhĩpẽx kaxyw. Nẽ amnhĩ kaxyw mẽ panhõ Pahihti Jejus Kris kõt ajamaxpẽr kaxyw na pa pre mẽ akõt ri mẽ ajahkre rãhã ho ri ixpa.

²² —Tã ra Tĩrtũm Karõ kot akupỹm Jerujarẽ hwỳr inhmẽnh jakamã pa kormã hwỳr mõi. Kot paj hwỳr pøj nhũm krĩ nhõ xwỳnhjaja Jejus ã ixtomnuj nẽ nom tanhmã mẽ kot ixtoja kukamã ixte ixprĩ hã ixàhpumunh kêt. ²³ Ja pix na ixte omunh. Na pa hte nhỹri pøj nhũm htem Jejus ã ixpynẽ nẽ mẽ hagjẽnh xà kamã ijagjẽ nẽ tanhmã inhĩpẽx to. Tĩrtũm Karõ na pre ra ã mẽ kot inhĩpẽx anhỹrja kukamã inhmã mẽ harẽ. Jakamã ixte amnhĩ kukamã amnhĩ tã ixàhpumunh mex. Kot paj xep akupỹm Jerujarẽ hwỳr pøj nhũm mẽ ixpumu nẽ Jejus ã tanhmã inhĩpẽx to. ²⁴ Tã no pa amnhĩ kamã ixkahak kêt o inhmã mẽ uma hkêt nẽ. Koja mẽ kãm ixpĩr prãm nẽ mãmri ixpĩ. Inhmã ixtyk pyma hkêt. ãm mẽmoj pixi na inhmã hprãm. Ra Pahihti Jejus kot mẽmoj tã inhmã karõ xàja na inhmã kormã ixtĩr ri hatur xàm mẽnh prãm. Tĩrtũm kãm mẽ pajapẽ hã kot mẽ pahto mex prãm xàj mẽ pahwỳr Kra Jejus mẽnh nhũm mẽ panẽ

tanhmã amnhĩ nhĩpêx to hã harênhja na inhmã mẽ piitã mẽ kãm harênh jatur xàm mênh prãm.

25 —Tã e ixkràmnhwỳjaja. Na pa pre mẽ akôt mẽ ajahkre rãhã ho ri ixpa. Mẽ ate Jejus kôt amnhĩ nhĩpêx mex rãhã ho ri apa kaxyw. Tã kot puj pēr mẽ axte axpên pumunh kêt nê.

26-27 —Na pa pre ra mẽ amã Tĩrtũm kapēr piitã harênh pa. Mẽ ate mar tỳx nê hkôt pix mã amnhĩ nhĩpêx o apa kaxyw. Jakamã koja mẽ anhõ krĩ nhõ xwỳnhjê hõ amnhĩ kaxyw Jejus kôt hamaxpēr prãm kêt nê rĩ tãm. Kwãr mãmri kot amnhĩ tomnuj kamã ty nê arĩ tãm amnhĩ pumu no ãm kê amnhĩ tã tanhmã inhmã nê hkêt nê.

28 —E mẽ ate Kris kwỳ jahkre ho apa xwỳnhjaja. Kêr ka mẽ amnhĩ pumunh mex o ri apa. Nê mẽ kot Jejus kôt amnhĩ xunhwỳr xwỳnhjê jamãr mex o ri apa. Ja kaxyw na pre Tĩrtũm Karõ mẽ kaxyw mẽ axunhwỳ. Tĩrtũm Kra Jejus kot htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamãr xwỳnh kot ôwêhti jamãr mex o ri pata pyrãk.

29 —Kot paj ma mõ nhũm mẽmojjaja ixpãnhã mẽ awỳr pøj nê mẽ ate Jejus kaga hprãm xàj tanhmã mẽ amã hêx to ho ri mẽ akôt pa. 30 Nê mẽ akwỳjaja mẽ urã nê tanhmã hamaxpēr punuj to nê mẽ ate Jejus kaga hprãm xàj hêx rom tanhmã mẽ amã kapēr to ho ri mẽ akôt pa. 31 Jakamã kwa mẽ o kora. Kêr ka mẽ axkãm ajamak rom nê ri apa. Kê jajaja nhỹrmã ã mẽ amã kapēr anê ka mẽ ama nê mẽ hkôt ajamaxpēr kêt nê. Mẽ ate mẽ mar nê mẽ hkôt ajamaxpēr pymaj na pa pre mẽ akôt ri mẽ ajahkre ho ri ixpa hã ixtã amgrã axkrunêpxi. Arĩgro hã nê kamãt kãm mẽ ajahkre rũnh o ri ixpa. Nê mẽ ate mẽ amã mẽ hêx xwỳnhjê hkôt amnhĩ xunhwỳr pymaj mẽ ajahkre pê te inhmỳr pyrãk o ri mẽ akôt ixpa.

32 —E kot paj Tĩrtũm nhĩhkram mẽ ajagjênh pa. Koja mẽ atãnopxar o ri mẽ akôt pa nê mẽ akutã nojarêt rãhã ho pa. Hãmri ka mẽ ãm hkôt pix mã amnhĩ nhĩpêx. Jao Jejus kaga hkêt nê. Hãmri nhũm nhỹrmã

Tĩrtũm mẽ pahpê hkrajê piitã tanhmã mẽ pahto mex to.

33 —Na pa pre mẽ akôt ixpa ry htã no ãm aa mẽmoj tã mẽ awỳr kêt nê. Mẽ axê hkwy hã mẽ awỳ rỳ mẽ akàxpore hã mẽ awỳr o ri ixpa hkêt nê. 34 Na pa pre amnhĩ pa kukwak ri amnhĩm ixujaprôr pê ixàpkur o ri mẽ akôt ixpa. Nê ixkôt mẽ pa xwỳnhjê mã ixujaprôr o ri ixpa. Ra mẽ ate ja hã ixpumunh mex.

35 —Tã mẽmo kaxyw na pa pre ã mẽ akôt amnhĩ nhĩpêx anhỹr o ri ixpa? Nà mẽ ate ja hã ixpumunh nê ixpyrà nê ã amnhĩ nhĩpêx anhỹr o ri apa kaxyw. Nê ixpyrà nê tanhmã mẽ kute xwỳnhjê ho ajuta hto ho ri mẽ apa kaxyw. Na pre Pahiiti Jejus ja jarênh o: “Koja mēhõ amã mẽmoj gõ ka amnhĩm apy nê akĩnh nê. Nom kot kaj kam nhãm mēhõ mã mẽmoj gõ hãmri nê akĩnh tỳx o ate mēhõ mã mẽmoj nhõrta jakre.” Anê.

36 Na pre ã Pawre mẽ kãm ujarênh anhỹr pa hãmri pa mẽ ra inhnojarêt. Hãmri nhũm mẽ piitã hkõnkrã ho hkrĩ pa nhũm Pawre mẽ ho Tĩrtũm wỳ. 37-38 Hãmri nhũm mẽ piitã kãm Pawre hkĩnh tỳx jakamã mỳr rax o kuhê. Tee ri kot axte mẽ kot axpên pumunh kêt ã mẽ kãm amnhĩ jarênhja ma nê hkaprĩ htỳx nê. Nê hkaprĩ xàj kahti hkôt hamỳ nê mur. Hãmri nê ma Jerujarê hwỳr hkujaêk kaxyw mẽ ixkôt pãr wỳr hkaprĩ nê mẽ ixkôt mỳr o mõ.

21

Pawre kot Jerujarê hwỳr hpôx ã harênh

1 Tã pa mẽ gô mỳri Jejus kôt mẽ ixtõjê re nê pãr krem agjê nê axte mõ. Ma gô hipòk pê Kosti hwỳr ixkatat kôt mõ nê hã ajêt. Hãmri nhũm apkati pa mẽ axte hamũ mõ nê hpãnhã gô hipòk pê Roxti hwỳr mõ nê hwỳr pøj nê hã pãr xi. Hãmri nê hpãnhã axte krĩ pê Patar wỳr mõ. 2 Hãmri nê hwỳr pøj nê pãr rũm ijapøj nê pãr õ pumu. Nhũm ra pyka pê Wẽnĩs wỳr nojarêt pa mẽ hwỳr agjê nê ma kamã axte mõ. 3 Mõõ nê amỳm amnhĩ kukamã gô hipòk pê Sipre pumu. Hãmri nê upòk rũm hakrenh mã mõ nê pyka pê Sir wỳr mõ nê kamã Xir hwỳr pøj nê hã pãr nhõ. Pãr pãm kot krĩ kamã pãr kukrêx rer kaxyw pa mẽ kormã hã ajêt nê tokyx axte nhãm inhmõr kêt nê. 4 Hãmri pa

mê kutêp api nê krî kamã mê kot Jejus kôt axpên to htõ nê htõx xwýnhjê japêr o mõi. Hãmri nê nhÿri mê omu nê mê hkôt ri ixpa ho ixtã ù semãn. Nhũm prem Tirtũm Karõ nhÿ hã Pawre mã kapêr nê kãm:

—Kwa Pawre mê inhma. Kot ka Jerujarê hwÿr pøj nhũm xep mê kãm akurê xwýnhjaja tanhmã anhÿpêx to. Tirtũm Karõ na ã akukamã mê inhmã ajarênh anê. Jakamã kwa hwÿr amõr kêt nê. Na pa mê tee ri akukamã ijamaxpêr. Anê.

⁵ Hãmri nhũm amnhĩ tã mê kuma nê ãm mê kuma nê Jerujarê wÿr hkrã kamã hihtÿx nê. Jakamã nhũm semãn hapêx pa mê axte inhnojarê. Axte Jerujarê hwÿr kormã inhmõr kaxyw inhnojarê. Nhũm Jejus kôt mê ixtõjaja mê kot mê ixkujaêk kaxyw piitã pàr wÿr mê ixkôt mõi. Mê hprõ nê mê hkrajê mê nhũm mê pimràatã mê ixkôt mõi. Hãmri pa mê pàr wÿr pøj nê gõi mÿ ri ixpiitã ixkõnkrã ho ixkrĩ hpa nê amnhĩ to Tirtũm wÿ. ⁶ Hãmri nê mê kãm amnhĩ jarênh pa nê mê noo mã pàr krem agjê nê ma axte mõi nhũm mê awjanã nê ma akupÿm õrkwÿ hwÿr hapêx. Hãmri pa mê kurũm kormã ma Jerujarê hwÿr mõi. ⁷ Mõi nê krĩ pê Poremax wÿr pøj nê hã ajê. Hãmri nê pàr rũm ijapøj nê axte krĩ kamã Jejus kôt mê ixtõ nê mê ixtõxjê japêr o mõi nê nhÿri mê omu nê mê kuri amnhĩm hikra.

⁸ Tã nhũm apkati pa mê axte mõi. Pãnhã ma krĩ pê Sejarêj wÿr mõi. Hãmri nê hwÿr pøj nê Firipti kuri pøj. Firiptija kormã nyw ri mê kot Jerujarê kamã mê mjên htyk xwýnhjê mã mê apkur xã nhõr ho pa kaxyw mê ho ⁷ nê mê unhwÿr xwýnhjtajê hõ na pre. Tã hpãnhã kêp Tirtũm kapêr jarênh o pa xwýnh. ⁹ Nhũm hkra nijaja kêp kwat. Piitã mjên kêt nê hkukrit rãhã pa. Mê kêp Tirtũm nhÿ hã kapêr o mê pa xwýnh na pre mê. Jakamã pa mê mê kuri pøj. ¹⁰ Hãmri nê mê hkôt ri ixpa hã ixtã apkati grêre nhũm Akapõ Jutej rũm man mê ixwÿr mõi pøj. Kêp Tirtũm nhÿ hã kapêr jarênh o pa xwýnh na pre. ¹¹ Hãmri nê mê ixwÿr pøj nê Pawre pumu nê hkukamã kot tanhmã harênh to kaxyw hwÿr tẽn kêp hprexã kapa nê ho amnhĩ te hpre nê ho amnhĩ pa hpre nê xa. Hãmri nê mê inhnoo mã Tirtũm Karõ nhÿ hã mê kot tanhmã hipêx to hkukamã kãm awjarê nê kãm:

—E kot kaj Jerujarê hwÿr pøj nhũm Ijaew xaptãr tũmjaja apumu nê ã anhÿpêx anê nê apa hpre nê ate hpre hãmri nê Ijaew kêt xwýnhjê nhÿhkram ajaxã. Koja mê ã anhÿpêx anê. Anê.

¹² Hãmri pa mê tee ri ã ujarênh anhÿrja ma nê Pawre kamã ixkahak tÿx nê ixkaprĩ nê inhmÿr o ixkrĩ. Nê xatã kot mê hwÿr mõi nê kãm ixkapêr kãm ixihtÿx nê kãm:

—Kwa mê ixkapêr ma Pawre. Mê hwÿr amõr kêt o mê hwÿr amõr kêt. Anê.

¹³ Hãmri nhũm mê inhmã:

—Tk. Kwa mê amÿr kêt nê. Na pa mê apumu nê ixkaprĩ nê. Nã kot paj ma mê hwÿr mõi. Kwãr mê mãmrĩ Pahшти Jejus ã tanhmã ixto rÿ hã ixpĩ. Ixte amnhĩ kamã ixkahak kêt. Anê.

¹⁴ Hãmri pa mê tee ri mê hwÿr mõi nê hkurê kaprÿ nê kãm:

—Tõe. Nã kam nê Tirtũm kãm hprãm xã hkôt mãmrĩ mê hwÿr mõi rÿ mê hwÿr amõr kêt nê. Anê.

¹⁵ Tã pa mê ra inhnojarê nê amnhĩ to ixpikuprõnh pa nê ma Pawre hkôt Jerujarê hwÿr tã ma mõi. ¹⁶ Hãmri nhũm Sejarêj kamã Jejus kôt mê ixtõ hkwyjaja ma mê ixkôt mõi. Pa mê mõi nê Jerujarê hwÿr pøj. Hãmri nhũm mê ixkôt mê mõi xwýnhjaja mê ixto mõi nê Mênasõ nhõrkwy hwÿr mê ixto pøj. Mênasõja Sipre kamã na pre kato. Tã hpãnhã Jerujarê hwÿr ahpa nê kamã ri pa ho pa. Na pre ra Jejus kôt amnhĩ xãm ã hã amgrã xohtõ nê. Tã pa mê kuri pøj.

Pawre mê Xiakre wa harênh

Atre 15.3-21; Wam Korĩt 9.19-22, 10.32-33

¹⁷ Tã pa mê Jerujarê hwÿr pøj nhũm Jejus kôt mê ixtõjaja mê ixpumu nê hkĩnh nê.

¹⁸ Hãmri nhũm apkati pa mê ma Pawre hkôt Xiakre hwÿr mõi. Nhũm mê kot Tirtũm kapêr o mê ahkre xwýnh piitã ra kuri akuprõ nê mê ixkutêp hkrĩ. ¹⁹ Jakamã nhũm Pawre mê hwÿr axã nê mê kãm tanhmã amnhĩ nhÿpêx to ho pa hã amnhĩ jarê nê mê kãm:

—Pa na ka mê rĩ akrĩ. E ot pa axte mê apumunh mã mõi. Ixte mê amã amnhĩ jarênh ã amnhĩ jarênh kaxyw. Nã na pa pre ma Ijaew kêt xwýnhjê hkôt ixpa nê mê kãm Jejus kot mê panê tanhmã amnhĩ nhÿpêx to jarênh o ri mê hkôt ixpa. Nhũm Tirtũm

inhĩhkô hã ixkutã nojarêr mex jakamã nhũm prem inhma nê ohtô rax nê mẽ pahpyrà nê Jejus kôt amnhĩ xunhwỳ. Anẽ.

20-25 Hãmri nhũm mẽ Ijaew kêt xwỳnh kwỳjaja kot Jejus kôt amnhĩ xunhwỳr ã mẽ harẽnh ma nê mẽ ỹ hã hkĩnh nê mẽ hã Tĩrtũm mã mex o mex ã harẽ. Hãmri nê Pawre mã kãm:

—Nà na pa prem ra mẽ harẽnh ma. Hãmri nê mẽ kãm kagà nhĩpêx nê mẽmoj tã mẽ kãm karô nê mẽ hwỳr kumẽ. Mẽ kot omunh nê kamã harẽnh nê hkôt amnhĩ nhĩpêx o pa kaxyw.

Na pa prem kagàja kamã mẽ kot sãnti nhõ hkur nê mẽ hkurê.

Nẽ mry kamrô hkur nê mẽ hkurê.

Nẽ mẽmo mry hpar nê hkamrô runh kêt rãhã hkur nê mẽ hkurê.

Nẽ mẽ kot amnhĩ prô pix tãnopxar kaxyw mẽ kãm hã karô.

Nẽ mẽnijaja kot amnhĩ mjên pix tãnopxar kaxyw mẽ kãm hã karô.

Nẽ nhãm mẽ kot axpẽn to amnhĩkati nê mẽ hkurê.

Ã na pa prem ja hã kagà nê mẽ hwỳr mẽnh anẽ. Jakamã e mẽ inhma. Na ra mẽ pahpê Ijaew kwỳjaja ohtô rax kumrêx nê mẽ pahpyrà nê Jejus kôt amnhĩ xunhwỳ. Mãn ka pre mẽ harẽnh ma. Na htem Jejus kôt amnhĩ nhĩpêx o pa jao mããnên Tĩrtũm nhỹ hã Mojes kapêr kôt amnhĩ nhĩpêx mex o pa. Tã nhỹri mẽ kot tanhmã ato hêx to hã ajarẽnh ma. Na ka xep hte Ijaew kêt xwỳnhjê nhõ krĩ kamã pôj hãmri nê mẽ õ krĩ kamã Ijaew kwỳjê pumu nê mẽmoj nê tanhmã mẽ kãm akapêr to ho ri apa. Nom Ijaew kêt xwỳnhjê mã ka xep hte ã mẽmoj nê akapêr anhỹr kêt nê. ãm Ijaew mã pix mã ka xep hte mẽ kot finat Mojes kapêr kôt amnhĩ nhĩpêx nê mẽ hkurê ho ri apa. Nẽ mẽ panhĩgêt kot amnhĩ nhĩpêx kuhpa hã mẽ kot mẽ hkra my kwryt kà jakar nê ka xep hte mẽ hkurê ho ri apa. Nẽ mẽ kot mẽ panhĩgêt kôt amnhĩ nhĩpêx nê ka xep hte mããnên mẽ hkurê ho ri apa. Mẽ kêt Ijaew tã ka xep pre hte ã mẽmoj nê mẽ hkurê anhỹr ho ri apa. Na prem jar ã Ijaewjê mã ato hêx o pa anẽ nhũm mẽ kuma nê mẽ hkôt hamaxpêr kurê kumrêx. Jao ra ate mẽ pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx.

—Tã ra mẽ kot apôx ã ajarẽnh mar jakamã tanhmã kot kaj we mẽ kãm amnhĩ tã axaprãr to? Nẽ tanhmã kot kaj we mẽ noo mã amnhĩ nhĩpêx to kêt mẽ arĩ mẽ pahte amnhĩ nhĩpêx kôt ate amnhĩ nhĩpêx o apa hã apumu? E na pa mẽ ra ijamaxpêr. Kot ka ã amnhĩ nhĩpêx anẽ. Na ra jar mẽ pahkwỳjaja kêt kwat nê Tĩrtũm mã tanhmã amnhĩ jarẽnh to jatur xãm mẽnh kaxyw amnhĩ krã hkênh mã. Jakamã e kêt ka ma mẽ hkôt tẽ nê mẽ urak nê amnhĩ krã hkênh nê kam nê mẽ ate amnhĩ krã kênhta pãnhã amnhĩre. Kot kaj ã mẽ hkôt amnhĩ nhĩpêx anẽ hãmri nhũm mẽ pahkwỳjaja arĩ mẽ pahte amnhĩ nhĩpêx o ate amnhĩ nhĩpêx o apa hã apumu nê mẽ kot ato hêx ã apumunh kurê kumrêx. Nẽ arĩ ate finat Mojes kapêr kôt amnhĩ nhĩpêx o ri apa hã apumu. Anẽ.

26 Hãmri nhũm Pawre mẽ kuma nê mẽ kãm:

—Tõe. Nà ãm hãmri na ka mẽ inhmã awjarê. Nà kot paj ã amnhĩ nhĩpêx anẽ. Anẽ.

Jakamã nhũm apkati nhũm ma mẽ kêt 4tajê o mō nê mẽ mex kaxyw tanhmã amnhĩ nhĩpêx to. Hãmri nê Tĩrtũm mã amnhĩ jarẽnh xã hã ixkre hwỳr mra nê agjê nê mẽ õ patre mã mẽ amnhĩ jarẽ nê kãm:

—E ot pa mẽ awỳr mra. Na pa prem ra mẽmoj tã tanhmã Tĩrtũm mã amnhĩ jarẽnh to. Tã kot paj mẽ axte ixtã ù semãn hãmri nê hatur xãm mẽnh kaxyw akupỹn awỳr mra nê amã mẽmoj gō ka mẽ inhmã Tĩrtũm mã agō nê hkôt kãm mẽ ijarê. Nẽ pa kot paj mẽ ixpiitã hpãnhã amã amnhĩre. Anẽ.

Mẽ kot Pawre pynênh ã mẽ harẽnh

Atre 24.12

27 Tã nhũm semãnja hapêx kaxyw nhũm pika pê As rũm Ijaew kwỳjaja ma mra nê Tĩrtũm mã amnhĩ jarẽnh xã hã ixkre hwỳr agjê. Hãmri nê kamã Pawre pumu nê kamã gryk tỳx nê hwỳr hprôt nê unê nê tanhmã hkwyjê mã ho hêx to nê ho kapêr punuj nê. Nẽ mẽ kãm:

28 —E mẽ amnẽ mra nê jahti pumu. Na hte krĩ piitã hkôt ri mẽ pahkwỳjê mã tanhmã ri hêx to ho pa. Tĩrtũm nhỹ hã finat Mojes kapêr nhũm mẽ kãm ho kapêr punuj o pa. Nẽ mẽ pahte Tĩrtũm mã amnhĩ jarẽnh xã hã ixkreja nhũm hte mããnên tanhmã mẽ

kām ho kapër punuj to. Mě pahpyrà nē kēp Ijaew tã mẽ pahpê hkwỳ ho kapër o pa. Tã ra axtem nē amnhĩ kôt Tĩrtũm nhõ ixkre hwỳr Ijaew kêt xwỳnh kwỳjê ho agjê. Mě kot hwỳr gjêx kêt kumrêx tã nhũm axtem nē amnhĩ kôt mẽ ho agjê. Anê.

²⁹ Na pre krĩja kamã Ijaew kêt xwỳnh Topĩja Pawre hkôt pa nhũm mẽ omu. Kêp Epes nhõ xwỳnh nhũm mẽ kot pry ã Pawre hkôt pa hã omu. Tã hã ahtũm nē Tĩrtũm mã amnhĩ jarênh xà hã ixkre kamã Pawre pumu nē htỳx amnhĩ kôt Topĩ ho àr ã hkamnhĩx nē ã mẽ kãm harênh anê. ³⁰ Hãmri nhũm mẽ kuma nē Pawre kamã gryk tỳx nê. Nê hwỳr hprôt nē unê nē ixkre rũm ho kato nē kēp hakwa kre kahê. ³¹⁻³² Hãmri nē ma o tẽ nē htak rax nê. Ra mẽ kot htak o hprĩ mã tã nhũm mẽhõja pôristi krãhtũm wỳr hprôt nē kãm awjarê nē kãm:

—Kwa o mũj mẽ ra kot axpên nhĩmex kaxyw pijapu ho kuhê. Anê.

Hãmri nhũm tee ri kuma nē pôristi hkwỳjê mã anê nē mẽ ma mẽ hwỳr hprôt kurê kumrêx. Nhũm mẽ arĩ Pawre htak tã amnhĩ wỳr mẽ omu nē mẽ umaj kãm ure.

³³ Hãmri nhũm pôristi krãhtũm Pawre hã amỹnê nhũm pôristijaja unê nē kàx o mẽ hkaxprexà ho axkrut nē ho hkaxpre pa. Hãmri nhũm mẽ hkrãhtũm Pawre hã mẽ hkukja nē mẽ kãm:

—Kwa mẽ atõ inhmã jahti jarê. Tanhmã na hixi te? Tanhmã na we amnhĩ tomnuj to hã na ka mẽ ã hipêx anê? Anê.

³⁴ Hãmri nhũm mẽ kuma nē piitã anhĩpê kàxpê kãm tanhmã harênh to. Nom axpên kwỳm tanhmã ri kãm harênh to. Hãmri nhũm tee ri hprĩ hã kot mẽ mar kaxyw hãmri nē pôristi mã anê nhũm mẽ kēp Pawre ho kato nē ma mẽ àpênh xà hã ixkre hwỳr o tẽ. ³⁵⁻³⁶ Hãmri nhũm Ijaew kwỳ ohtõ nē pry hã axpên nhĩgãnh o hkôt mra. Nê gryk xàj kapër punuj tỳx o mẽ hkôt mō nē kàx pē pôristi mã kapër nē mẽ kãm:

—Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anê.

Jakamã nhũm pôristija tee ri mẽ kuma hãmri nē mẽ kot tanhmã ho pymaj kumỳ nē kỳx pē mẽ kēp kupê nē o mō. Jao ixkreja wỳr mẽ àpir xà hã ho àpir o mō. ³⁷ Nê kot ho

àr kaxyw tã nhũm Pawre mẽ hkrãhtũm mã kãm:

—E pa amã mẽmoj jarê ka inhma. Anê.

Mě kapër o kãm kapër hãmri nhũm amnhĩ jaêr pē kuma nē kãm:

—Kwa xà na ka mẽ ixpyrà nē Gresjê kapër o akapër? ³⁸ Na pa ixtỳx apê Ejit nhõ xwỳnh pē mẽ hpar o apa xwỳnhhta ã akamnhĩx. Ham na pre mẽ inhõ pahihtu kutã amnhĩ xãm nē kot hkurê kaxàr kaxyw mẽ ho ajuta xwỳnhjê ho 4.000 nē mẽ hkurê nē ma kapôt ã mẽ o pa. Nom tãm na xep Gresjê kapër o kapër kêt nē. Anê.

³⁹ Hãmri nhũm Pawre kãm:

—Nà ixpê Ejit nhõ xwỳnhhta kêt. Ixpê Ijaew na pa. Pyka pē Siris kamã krĩ rax pē Tas kamã na pa pre ixkato. E xà kot paj ixkôt mẽ mōr xwỳnh nēj mã ixkapër nà? Anê.

⁴⁰ Hãmri nhũm kãm:

—Tõe. Kam nē mãmri tanhmã mẽ kãm akapër to. Anê.

Hãmri nhũm mẽ àpir xàta ã kỳx pē mẽ mỳri xa nē kànhmã mẽ kãm ìhkra pē nhũm mẽ omu nē hpinkrênh pa nhũm mẽ kãm amnhĩ jarê.

22

Pawre kot kãm hkurê xwỳnhjê mã amnhĩ jarênh

Atre 9.1-19, 26.1-23

¹⁻² Nhũm Pawre amnhĩ kwỳ Ijaew kapër o mẽ kãm kapër nē mẽ kãm:

—E ixkwỳjaja. Pa mẽ amã amnhĩ jarê ka mẽ inhma. Anê.

Hãmri nhũm kot mẽ kapër o kapër ma nē hpinkrênh pa nē akryk mar o kuhê nhũm mẽ kãm:

³ —Nà ixpê mẽ anhĩõ na pa. Ijaxwỳja ixpê Ijaew. Pyka pē Siris kamã krĩ pē Tas kamã na pa pre ixkato no ãm jar Jerujarê kamã na pa pre ixaptàr. Kamariew na pre hte ijahkre ho pa. Finat Mojes kot Tĩrtũm nhỹ hã mẽ panhĩgêjtjê mã kapërja nhũm pre hprĩ hã ho ijahkre ho pa. Na pa pre mẽ apyrà nē inhmã Tĩrtũm kôt amnhĩ nhĩpêx prãm nê.

⁴ —Jakamã na pa pre mẽ pahkwỳ kot Jejus kôt amnhĩ xunhwỳr xwỳnhjê japêr o ixpa nē nhỹri mẽ kãm ixkato nē mẽ unê. Mẽmyjê pynê nē mẽnijê pynê. Hãmri nē mẽ

kot mẽ hpar kaxyw mẽ haghênh o ri ixpa. ⁵ Na pa pre ã mẽ hipêx o ri ixpa anê. Mẽ panhõ patre maati nê mẽ àptâr tũmrejaja ra mẽ kot ja hã ixpumunh mex. Mẽ tãmjaja na prem krĩ pẽ Tamas kãm mẽ pahkwýjê kaxyw kagà nhĩpêx nê inhmã kugõ pa kupy nê ma mẽ hwýr o mõ. Ixte mẽ õ krĩ kamã Jejus kwýjê pynênh par nê man akupýn Jerujarê hwýr mẽ ho inhmõr nhũm mẽ kot tanhmã mẽ ho kaxyw.

⁶ –Tã ra myt ahpã pa mẽ hwýr ixàhtêp o mõ. Puh nhũm kaxkwa rũm hirã rax kumrêxja ixwýr wrý nê ixtã ajêt pa hipõk ri xa. ⁷ Hãmri nê umaj pykap tẽm nhũm mẽhõ kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj tỳx o ri apa?” Anê. ⁸ Hãmri pa kãm: “Kwa mẽ atõ na ka ri ã inhmã akapêr anê pahihiti?” Anê nhũm inhmã: “Ixpê Najare nhõ xwýnh Jejus. Pa na ka hte ixpê ixkõt mẽ kot amnhĩ xunhwýr xwýnhjê homnuj tỳx o ri apa. Jao te pa ixtomnuj pyrãk.”

⁹ –Anhýr o inhmã kapêr nhũm ixkõt mẽ pa xwýnhjaja kuma no ãm hprĩ hã mar mex kêt nê. ãm hirã raxta pix pumu. ¹⁰ Tã pa kãm: “No tanhmã kot pa we amnhĩ to Pahihiti?” Anê nhũm inhmã: “E kãnhmã xa nê mãmrĩ ma Tamas wýr mõ. Kot kaj hwýr pøj nhũm mẽhõ awýr tẽ nê mẽmoj tã amã karõ ka ama nê hkõt amnhĩ nhĩpêx.” Anê.

¹¹ –Nhũm pre ã inhmã kapêr anê. Hãmri pa hirã rax pumunh o ixãm kurê ra inhno hkre nê ixrĩt kêt nhũm ixkõt mẽ pa xwýnhjaja ixpa hã ixpy nê ma Tamas wýr ixto mõ nê ixto pøj.

¹² –Tã nhũm Tamas nhõ xwýnh pẽ ãnãnísti ixwýr tẽ. Na pre hte Tĩrtũm kapêr ã kagà htũm kõt amnhĩ nhĩpêx mex nhũm Tamas kamã Ijaew piitã kãm hkĩnh nê axpẽn mã mex ã harê. ¹³ Jakamã nhũm ixwýr tẽ nê inhmã: “Pa Jejus kõt ixtõ Sawti? E akupým rĩt.” Anhýrja kõt pa akupým ixrĩt mex kurê kumrêx nê omu. ¹⁴ Hãmri nhũm inhmã: “Nã mẽ panhĩgêjtjê nhõ Tĩrtũm na amnhĩ kaxyw ata. Ate kapêr mar nê hkõt tanhmã amnhĩ nhĩpêx to ho apa kaxyw. Nê ate kaxkwa kamã Kra mex pumunh nê kapêr mar kaxyw. Tã ka xep ham hirã rax kamã omu nê kapêr ma. ¹⁵ Jakamã kêr ka ma mẽ piitã mẽ kãm ate omunh xwýnhja

jarênh o ari mẽ hkõt apa. Nê mẽ kãm kapêr jarênh o mẽ ahkre ho ri apa. ¹⁶ E tokyx kãnhmã xa nê Jejus mã amnhĩ jarê nê hkõt amnhĩ xãm kê anê ate amnhĩ tomnuj rênh pa. Hãmri pa apê hkwý hã akrã kumrã ka ma mẽ kãm kapêr jarênh o ri apa.” Anê.

–Nhũm pre ã ãnãnísti inhmã kapêr anê.

¹⁷ –Tã pa man akupýn jar Jerujarê hwýr mẽ awýr mõ. Hãmri nê jar Tĩrtũm mã amnhĩ jarênh xã hã ixkre kamã kãm amnhĩ jarênh o ixãm rôm axte mẽmoj pumu.

¹⁸ Nhũm Jejus axte ixwýr kato nê xa nê inhmã kapêr nê inhmã: “E inhma. Jerujarê nhõ xwýnhjaja kãm ixkapêr mar prãm kêt jakamã kot kaj mẽ kãm ixkapêr jarê nhũm mẽ amar kêt nê. Jakamã kwa tokyx akato nê hpãnhã ma nhýhým mõ.” Anê.

–Hãmri pa tee ri ã kapêr anhýrja ã kuma nê kãm: ¹⁹ “Kwa nã koja mẽ inhma Pahihiti. Ra mẽ kot ixte amnhĩ nhĩpêx ã ixpumunh mex. Ixte amnhĩ nhĩpêx tũmta kõt mẽ kot ixpumunh mex. Na pa pre hte krĩ piitã hkõt mra nê Tĩrtũm kapêr o mẽ ahkre xã hã ixkre kamã mẽ kot akõt amnhĩ kaxyw hamaxpêr xwýnhjê pynê nê mẽ htak nê mẽ haghênh xã kamã mẽ haghê nhũm mẽ kot ja hã ixpumunh mex. ²⁰ Nhũm mẽ kot akapêr jarênh o pa xwýnh Estewãw pĩrta pa pre hã mẽ omu nhũm ja inhmã mex pa mẽ kãm mẽ hinõkã jamýnh o hã mẽ omunh o xa. Na pa pre ã amnhĩ nhĩpêx anhýr o ri ixpa. Tã hpãnhã akõt amnhĩ xãm hãmri nê akõt amnhĩ nhĩpêx o ri ixpa. Jakamã koja mẽ ixte amnhĩ nhĩpêx nyw ã ijarênh ma nê kãm ixkapêr mar prãm nê.” Anê.

²¹ –Pa pre ã Jejus mã amnhĩ jarênh anê nhũm inhmã: “Nã. Kêr ka mãmrĩ krĩja rũm akato nê ma nhýhým mõ. Kot paj hpãnhã ma Ijaew kêt xwýnhjê hwýr amê ka hpãnhã ma mẽ hwýr mõ nê mẽ hkõt mẽ kãm ixkapêr jarênh o ri apa.” Anê.

²² Nhũm pre Pawre ã amnhĩ hkwýjê mã amnhĩ jarênh anê nhũm mẽ arĩ mar o kuhê rãhã Ijaew kêt xwýnhjê jarênh ma nê kamã gryk tỳx nê. Ijaew kêt xwýnhjaja kot mẽ urãk nê Tĩrtũm kapêr marja nhũm mẽ kãm hprãm kêt jakamã nhũm Pawre ã mẽ harênh anê nhũm mẽ kuma nê kamã gryk tỳx kumrêx. Nê gryk xãj kapêr punuj nê kapêr o:

—Kwa mẽ māmri apĩhti ri. Ām hpĩr mã htām̄ti kēnā. Anē.

²³ Hāmri nē gryk xàj amnhĩ nhĩnòkà hk-wr̄y nē ho apē nē pyka jam̄y nē kànhmā ri ho ahkapē.

Pawre kot pōristi krāhtūm mã amnhĩ jarēnh

Atre 16.35-39

²⁴ Hāmri nhūm pōristi krāhtūmja tee ri ā mẽ kot amnhĩ nhĩpēx anh̄ȳr ā mẽ omu nē mẽ kapēr ma nē pōristijē mã kapēr nē mẽ kām:

—Kwa tanhmā na we jahti amnhĩ tomnuj to nhūm mẽ ā kamā gryk t̄yx anē? E mẽ tokyx ixkre hw̄ȳr ho axà nē mẽ htak xà ho htak kê mẽ pamā tanhmā amnhĩ jarēnh to. Anē.

²⁵ Hāmri nhūm mẽ kuma nē ho axà nē htak kaxyw kormā hpre ho xa. Hāmri nhūm pōristi krāhtūm nhō kōwenatōja mẽ hkôt axà nē hā mẽ omunh o xa nhūm Pawre omu nē amnhĩ tã kām kapēr nē kām:

—Kwa kormā ixte tanhmā mẽ amā amnhĩ jarēnh to hkēt tã ka mẽ ixtak kaxyw. Ixpē Ijaew tã mãānēn ixpē Rōm nhō xw̄ynh nhĩpēx anē? Anē.

²⁶ Hāmri nhūm tee ri ā amnhĩ jarēnh anh̄ȳrja ā kuma nē pōristi krāhtūmja w̄ȳr hpr̄ot nē kām:

—Kwa taxy pu mẽ tanhmā ho hkēt nē. Xep kēp Rōm nhō xw̄ynh kēnā. Anē.

²⁷ Hāmri nhūm tee ri kuma nē Pawre hw̄ȳr axà nē kām:

—Kwa xà ām hāmri na ka amnhĩ jarē? Xà apē Rōm nhō xw̄ynh na ka? Anē.

Hāmri nhūm kām:

—T̄y. Ām hāmri ixte mẽ amā amnhĩ jarēnh kēnā. Ixpē Rōm nhō xw̄ynh na pa. Anē.

²⁸ Hāmri nhūm kām:

—Kwa pa na pa pre amnhĩ to Rōm nhō xw̄ynh prām xàj amnhĩ pānhā mẽ kām amnh̄irer rax nē. Anē.

Nhūm Pawre kām:

—T̄y nom pa na pa pre amnhĩ pānhā mẽ kām amnh̄irer kēt nē. Inh̄ipēxà hkôt ixpē Rōm nhō xw̄ynh na pa. Anē.

²⁹ Hāmri nhūm mẽ kuma nē tee ri hamaxpēr o kām ma nē. Nē kām ma ho hkaga kurē kumrēx. Nhūm mẽ hkrāhtūm nhō pahija mãānēn kām ma nē. Kēp Rōm

nhō xw̄ynh tã nhūm mẽ axtem nē kot unēnh nē kàx o hkaxpreja mã hamaxpēr nē kām ma nē. Na htem ā Rōm nhō xw̄ynh nhĩpēx anh̄ȳr kēt nē. Na htem tanhmā mẽ hkukjēr to nē hpr̄i hā mẽ kuma nē r̄i kormā tanhmā mẽ hipēx to.

Pawre kot Ijaew xàpt̄ar tūmrejē mã amnhĩ jarēnh

Matêwre 23.27-28

³⁰ Tã nhūm apkati nhūm pōristi krāhtūmja Ijaew kw̄ȳ ho akuprō. Mēō patre maati nē patre krāhtūmjaja nē mẽ àpt̄ar tūmrejaja nhūm kot mẽ kām tanhmā Pawre jarēnh to kaxyw mẽ ho hpikuprōnh pa. Hāmri nē Pawre pē hkaxpre xà rē nē ma mẽ hw̄ȳr o tē nē mẽ kutã ȳr.

23

¹ Hāmri nhūm mẽ omu nē mẽ kām amnhĩ jarē nē mẽ kām:

—E ixkw̄ȳjaja. Pa mẽ amā amnhĩ jarē ka mẽ inhma. Na pa hte T̄irtūm nom tām amnhĩ nhĩpēx o ixpa nē mẽ pahpē Ijaew mẽ pahte amnhĩ nhĩpēx kw̄ym ri tanhmā amnhĩ nhĩpēx to hkēt nē. Anē.

² Hāmri nhūm mẽ ò patre maati ānān̄isti kuma nē kamā gryk nē. Axtem ānān̄isti hō na pre. Hāmri nē ā Pawre kot amnhĩ jarēnh anh̄ȳrja ā kuma nē kamā gryk nē. Hāmri nē mẽ kot mar o kuhē xw̄ynh nhĩpēx mã kām:

—Kwa mẽ atō hakwap hkurahti ri. Tām kot amnhĩ nhĩpēxti hā. Na ām mẽ pamā amnhĩ to hēx o xa. Anē.

³ Hāmri nhūm Pawre kuma nē hw̄ȳr r̄it nē omu nē kām:

—Nā ka koja T̄irtūm akura kām ga. Te ate finat Mojes kot ȳ hā kapēr kôt amnhĩ nhĩpēx pyrāk tã ri axtem nē ri mẽ kot ijakwap ixkuranh kaxyw ri mẽ kām ixtã am̄ȳnē. Anē.

⁴ Hāmri nhūm kuri mẽ kuhē xw̄ynhja tee ri ā kām kapēr anh̄ȳrja ā kuma nē kām:

—Kwa kēp patre maati kēnā kot ka kēt ri ā kām akapēr anē. Anē.

⁵ Hāmri nhūm amnhĩ jaēr pē ja hā kuma nē kām:

—Kwa ixte ja hā omunh kēt jakamā na pa ā ixt̄yx kām ixkapēr anē. Ixte kēp patre maati hā omunh ronh̄yx pa ā kām ixkapēr anh̄ȳr kēt nē. T̄irtūm kapēr ā kagà htūm kot ja nē mẽ pamā kapēr kēnā. Mē pahte

tanhmã mẽ panhõ pahi ho pakapêr punuj to nê mẽ pamã kapêr. Tã pa ãm ixtỳx ã kãm ixkapêr anê. Anê.

6-8 Hãmri nê hprĩ hã mẽ kot mar o hkrĩ xwỳnhjê pumu. Nhũm mẽ kamã Satusew nhõ xwỳnh kwỳ nê Parijew nhõ xwỳnh kwỳ. Satusew mẽ Parijew nhõ xwỳnhjaja na htem axpên kwỳm ri tanhmã mẽ htykjê jarênh to. Satusew nhõ xwỳnhjaja na htem mẽ htyk nê mẽ hkarõ mẽ ro hã mẽ hapêx o mẽ hapêx ã mẽ hkamnhĩx. Nê Tĩrtũm kapêr o mẽ wrỳk xwỳnh kêt ã mẽ harênh o pa. No Parijewjaja na hte mẽ kurom mẽ htyk nê akupỳm mẽ htĩr ã mẽ hkamnhĩx nê Tĩrtũm kapêr o mẽ wrỳk xwỳnh ã mẽ hkamnhĩx. Nhũm Pawre kot ja hã mẽ omunh jakamã tanhmã hamaxpêr to hãmri nê mẽ kãm kapêr. Na pre Parijew nhõ xwỳnhjê pyrã nê mẽ htyk nê akupỳm mẽ htĩr kôt hamaxpêr nê Tĩrtũm kapêr o mẽ wrỳk xwỳnh kôt hamaxpêr. Jakamã mẽ omu nê kax pê mẽ kãm kapêr nê mẽ kãm:

—Nà ijaxwỳja ixpê Parijew nhõ xwỳnh. Nhũm inhĩpêêxà haxwỳja kêp Parijew nhõ xwỳnh. Jakamã na pa hte mẽ apê Parijew nhõ xwỳnhjê pyrã nê mẽ htyk nê akupỳm mẽ htĩr kôt ijamaxpêr. Tã ãm ja pix mỳrapê na ka mẽ ixpynê nê ã inhĩpêx anê. Anê.

Hãmri nhũm Parijew mẽ Satusew nhõ xwỳnhjaja kuma nê ja hã axpên kãm gryk nê. Nê hã axpên mã akir. 9 Hãmri nê ra axpên mã àkjêr rax nê. Hãmri nhũm Parijew kwỳ pê Mojes kapêr o mẽ ahkre ho mẽ pa xwỳnhjaja kãnhmã kuhê nê mẽ kãm Pawre hã àprãr kãm hihtỳx nê mẽ kãm:

—Kwa pêr tanhmã kot amnhĩ tomnuj tore hã. Mãn ãm hpimtir kãm na pre ã ri kaxkwa kamã mẽmoj mar anê. Rỳ apu Tĩrtũm kapêr o wrỳk xwỳnh kãm tanhmã kapêr to nhũm pre Tamas wỳr pry kamã mar o xa rỳ ko. Anê.

10 Hãmri nhũm Satusew nhõ xwỳnhjaja tee ri Tĩrtũm kapêr o mẽ wrỳk xwỳnh kot kãm kapêr ã harênhja ma nê hã axpên mã àkjêr rax nê. Hãmri nhũm pôristi krãhtũmja tee ri mẽ kot axpên mã àkjêr ã mẽ omu hãmri nê pôristi mã kãm:

—Kwa mẽ Pawre hwỳr tẽ nê mẽ kêp utã nê ma akupỳm o tẽ nê haxã. Kot ka mẽ ho anhỹr kêt nhũm mẽ tanhmã hamaxpêr to

nê gryk xàj axpên nhĩhkra kamã hkaxôn pa. Anê.

Hãmri nhũm mẽ kuma nê hwỳr tẽ nê mẽ kêp utã nê akupỳm o tẽ nê ixkre hwỳr ho axã.

Jejus kot Pawre jamaxpêr o hihtỳx ã harênh

Atre 18.9-10

11 Tã nhũm kamãt nhũm Jejus tãm Pawre hwỳr kato nê kãm:

—Pa Pawre? Kwa tee ri amnhĩ kukamã ajamaxpêr o amnhĩ kamã akahak kêt nê. Kot kaj te ra ate jar Jerujarê kamã mẽ kãm ijarênhta pyrã nê ma krĩ pê Rôm wỳr mō nê krĩ nhõ xwỳnhjê mã ijarê. Anê.

Mẽ kot Pawre hã àmnênh ã mẽ harênh

Sikũn Ximotre 4.18

12-13 Tã nhũm apkati nhũm Ijaew kwỳjaja axpên wỳr akuprõ. Memyjaja kêp 40 nê axte hkôt mẽ hkwỳjaja axpên wỳr akuprõ. Mẽ kot Pawre pĩr kaxyw hã axpên mar kaxyw hã akuprõ nê hã axpên mã amỳnê nê axpên mã:

—Tôe. Nà kot puj mẽ hpĩr kaxyw amnhĩ jagri htỳx o paxàpkur kêt rãhã kupĩ nê rĩ kormã apku nê ixkõ. Nà kot puj mẽ ho anê. Ra Tĩrtũm noo mã mẽ pahte ja hã amnhĩ jarênh kênã. Anê.

14 Hãmri nê mẽ ma mẽ õ patre krãhtũmjê mẽ mẽ àptãr tũmrejê hwỳr mra nê mẽ kãm hã amnhĩ jarê nê mẽ kãm:

—Ot pa mẽ amã amnhĩ jarênh mã mra. Nà kot paj mẽ tã Pawre pĩ. Kot paj mẽ kormã hpĩr kêt ri ixàpkur kêt rãhã kupĩ. Ra mẽ ixte Tĩrtũm noo mã ja hã amnhĩ jarênh xà hkôt. 15 Jakamã e mẽ inhma. Kêr ka mẽ axêx rom pôristi krãhtũm mã anê kê apkati kê man mẽ awỳr Pawre ho tẽ. Te mẽ ate aprĩ hã hkukjêr kaxyw pyrãk o kãm axêx. Kojã mẽ kormã mẽ awỳr ho hpõx kêt ri pa mẽ unên kupĩ. Anê.

16 Hãmri nhũm Pawre tãmnhwỳ mẽ kot ã hã amnhĩ jarênh anhỹrja ma hãmri nê ma pôristi xapênh xã hã ixkrej wỳr Pawre hwỳr hprõt nê kãm mẽ harê. 17 Hãmri nhũm kuma nê amnhĩ wỳr pôristi krãhtũm nhỹ hã mẽ hamãr xwỳnh ã karõ nê kãm:

—Kwa ma mẽ akrãhtũm wỳr ixtãmnhwỳta o tẽ kê kãm mẽmoj jarê nã? Anê.

18 Hãmri nhũm kuma nê ma hwỳr o tẽ nê kãm:

—E Pawre na inhmã anê pa awÿr htãmnhwÿ ho tẽ. Kot tanhmã amã ujarênh to kaxyw. Anê.

¹⁹ Hãmri nhũm omu nê hpa hã kupy nê o tẽ nê ahte mẽ hkàx ã o xa nê kãm:

—E mãmri inhmã mẽmoj jarê pa ama. Mẽmo na ka te inhmã harênh kaxyw? Anê.

²⁰⁻²¹ Hãmri nhũm kãm:

—Nà Ijaew xaptâr tũmrejaja na mẽ kot inhĩgêt Pawre pĩr kaxyw hã amnhĩ jarê pa amã harênh o tẽ. Koja xep mẽ hã awÿ. Xep apkati nhũm ate ma mẽ hwÿr mẽ hkukjêr xà hã ixkre hwÿr ho amõr nhũm mẽ kot hprĩ hã kot amnhĩ nhĩpêx ã hkukjêr kaxyw. Nom koja mẽ ãm amã amnhĩ to hêx. Koja xep mẽ kêp 40 nê pry kamã kutêp amũxu nê kuhê. Na mẽ ra hã axpên mar pa nê axpên mã: “Kot puj mẽ paxàpkur kêt rãhã Pawre pĩ nê rĩ kormã apku nê ixkõ.” Anhÿr o amnhĩ jarê pa mẽ kuma. Jakamã na mẽ kormã ate mẽ hwÿr mẽnh kaxyw akãm ama. Kwa mẽ hwÿr ho amõr kêt nê. Anê.

²² Hãmri nhũm kuma nê kãm:

—Tõe. Nà na pa ra ama. Mãmri ma akupÿm tẽ. Nom kêr ka inhmar kumrêx. Kêr ka nhãm mẽhõ mã ja jarênh kêt kumrêx. ãm kwarĩ ho kwarĩ. Anê.

Hãmri nhũm kuma nê kato nê ma akupÿm tẽ.

Mẽ kot Ijaew pymaj nhÿhÿm Pawre mẽnh ã mẽ harênh

²³⁻²⁴ Tã nhũm pôristi krãhtũmja amnhĩ wÿr ÿ hã pôristi jamãr o mẽ pa xwÿnh wa ho hamêxkrut nê wa hã karõ nê wa kãm:

—E wa inhma. Koja kôt ã kamãt ka wa ma krĩ pê Sejarej wÿr Pawre ho mõ kê hkã hkĩnh pê pahшти Peris wÿr pøj.

Nê amnhĩ kôt pôristi ho 200 nê o mõ.

Nê kê mẽ kêp 70 nê kawar ã hkrĩ nê mẽ akôt mõ.

Nê kê mẽ kêp 200 nê wapo jamÿ nê mẽ akôt o mõ.

Kê mẽ ã ohtõ rax anê.

Nê Pawre kot kawar ã ÿr nê mõr kaxyw ka mẽ kãm hõ ho mõ.

E kêr ka mẽ ã axohtõ nê hkôt amõr anê kê hkã hkĩnh pê pahшти Peris wÿr pøj. Anê.

²⁵ Hãmri nê pahшти Peris mã kagã nhĩpêx nê kamã kãm Pawre jarê nê kãm:

²⁶ Pa pahшти Peris? Xà amex? Ixpê Kraw Risas na pa awÿr kagã mẽ.

²⁷ E ot pa awÿr Ijaew pê Pawre mẽ. Na pre hkwyja kot hpĩr kaxyw unênh tã pa mãânên kêp Rõm nhõ xwÿnh ã harênh ma hãmri nê hwÿr inhõ pôristi rê nhũm mẽ hwÿr hprõt nê mẽ kêp utã. ²⁸ Hãmri nê Ijaew xaptâr tũmrejê hwÿr o tẽ. Mẽ kot inhmã tanhmã kot amnhĩ tomnuj to hã harênh kaxyw. ²⁹ Tanhmã kot amnhĩ tomnuj to nhũm mẽ kot haxãr rÿ hpĩr ronhÿx ja mex nê. No xep ãm kot mẽ higêtjê kot amnhĩ nhĩpêx kôt amnhĩ nhĩpêx kêt pix mÿrapê na mẽ kamã gryk.

³⁰ Tã pa mẽ kot hpĩr kaxyw hã mẽ harênh ma nê mẽ umaj awÿr kumê. Hãmri nê kamã mẽ gryk xwÿnhjê mã ajarê. Jakamã koja mẽ mẽmo arĩgro hã awÿr pøj nê tanhmã kot amnhĩ nhĩpêx to hã amã harê ka kam ja hã mẽ ama nê tanhmã ho.

Tã ãm ja pix na pa amã harê. Ixpê Kraw Risas na pa awÿr kagãja mẽ. Tã mãn ka arĩ ixte amã harênhja ma. Anê.

³¹ Tã nhũm kamãt nhũm mẽ hkrãhtũm kot mẽ kãm karõ xà hkôt nhũm pôristijaja ma Pawre o mõ. Hãmri nê krĩ pê ãxipãt wÿr pøj nê kamã amnhĩm hikra.

³² Nhũm apkati nhũm mẽ kot mẽ hkôt pykap mõr xwÿnhjaja mẽ õ pahшти kot mẽ kãm hã karõ xà hkôt awjanã nê ma akupÿm mõ nhũm kawar ã mẽ mõr xwÿnh pixjaja ma Pawre ho mõ. ³³ Hãmri nê mõ nê Sejarej wÿr pøj nê pahшти Peris nhĩhkram Pawre jaxã nê kãm kagãja gõ nê awjanã nê ma akupÿm hapêx. ³⁴ Hãmri nhũm Perisa kagãja py nê omu. Nê omunh pa nê Pawre mã kãm:

—E inhmã amnhĩ jarê. Tanhmã na anhõ pyka hixi te? Anê.

Nhũm kãm:

—Kêp Siris. Anê.

³⁵ Nhũm kãm:

—Tõe. Kê mẽ kot ato kapêr xwÿnhjaja pøj pa kormã ixprĩ hã mẽ kot tanhmã ajarênh to ma mãn. Anê.

Hãmri nê õ pôristi mã anê nhũm mẽ ma Pawre o tẽ. Ma pahшти Erox htyk xwÿnh nhõrkwÿ hwÿr o tẽ nê kamã haxã nhũm hkrĩ ho hkrĩ.

24

Ijaew kot tanhmã Pawre ho kapër punuj to hã mẽ harënh

Rukre 21.12-13; Atre 25.7

¹ Tã nhũm arıgro kęp 5 nẽ hapêx nhũm Ijaew kwýjaja Sejarej wýr pøj. Mẽ õ pa-tre maati ânãñisti nẽ Tetur nẽ kaxyw mẽ àptàr tũmrejaja nhũm mẽ ma hwýr mō nẽ pøj. Tetur kęp axiwokat ã mẽ yr pẽ kapër xwýnh jakamã nhũm mẽ kot tanhmã Pawre o kapër punuj to kaxyw pahi Peris wýr amnhĩ kôt o mō. ² Hãmri nhũm mẽ amnhĩ wýr Pawre hã karõ nhũm pōristi haprõ nẽ mẽ hwýr o tẽn ho axà. Hãmri nhũm Teturja pahihti Peris mã Pawre kot tanhmã amnhĩ tomnuj to hã harẽ nẽ kãm:

—E pahihti inhma. Nà na ka hte tãm mẽ inhĩpêx nẽ mẽ ixto mex o apa. Jakamã nhũm hte nhãm pika hkwý nhõ xwýnhjaja mẽ ixkurê kaxàr kaxyw mẽ ixwýr hprõt kêt nẽ. Pa htem ixpiitã akukwak ri ija-makêtkati nẽ ixãmnhĩx inhmex nẽ ixpa. ³ Nẽ mẽ ixkĩnh rãhã ho ixpa. Hêxta waa nẽ. Mẽ ixpiitã inhãmã akĩnh. ⁴ E kot paj amã awjarẽ ka inhma. Kot paj ixujarënh o hakotre ka inhma nẽ tokyx ma akupým tẽ. ⁵ Nà Pawre na hte amnhĩ tomnuj pix o pa. Kęp Jesus pẽ Najare nhõ xwýnhhta kôt amnhĩ nhĩpêx o mẽ pa xwýnhjê nhõ pahi na. Jakamã na hte pyka piitã hkôt mẽ ixpê Ijaew tanhmã axpẽn kaxyw mẽ ixkryx to ho pa. ⁶ Jãã na pre Tirtũm mã amnhĩ jarënh xà hã ixkre hwýr amnhĩ kôt mẽ kęp Ijaew kêt xwýnh kwýjê ho agjê nẽ mẽ ixpê ixkreja omnu kaxyw mã tã pa mẽ omu nẽ unê. ⁷ Tã nhũm pōristi krãhtũm Risasja mẽ ixpê utà ⁸ nẽ awýr mẽ ixte tanhmã amã harënh to xwýnhjê rẽ. Tã ot pa mẽ ixkrĩ. Nẽ ota Pawre nhỹ. Kam kot amnhĩ nhĩpêx ã hkukja kê tanhmã amã amnhĩ jarënh to ka ama nẽ ixte amã harënh xà hkôt tanhmã mar to. Anẽ.

⁹ Hãmri nhũm Ijaew hkwý haxwýja kãm:

—Nà ãm hãmri na ã amã harënh anẽ pahihti. Anẽ.

Pawre kot pahihti mã amnhĩ jarënh

Rukre 21.14-19

¹⁰ Hãmri nhũm pahihti Peris Pawre mã anẽ nhũm kot kãm amnhĩ tã aprãr kaxyw kãnhmã xa nẽ kãm:

—Nà na ka ra inhõ pyka kamã mẽ ixto amnhĩptàr mex o atã amgrà xohtõ nẽ pahihti. Jakamã na pa pre ate ixkapër mar kaxyw ã ajarënh ma nẽ ixkĩnh nẽ.

¹¹ —E kot paj amã amnhĩ jarẽ ka inhma. Ham na pa pre Jerujarẽ hwýr mō nẽ pøj. Na pa hwýr ixpõx ã ixtã arıgro pẽ 12 pix. Kam nẽ ixtã ixkwýjê kukja nẽ mẽ ama. Ixte Tirtũm mã amnhĩ jarënh xà hã ixkre kamã Tirtũm mã mex o mex ã harënh kaxyw na pa pre hwýr mō. ¹² No na pa pre nhỹri axpẽn kaxyw tanhmã ri mẽ hkryx to hkêt nẽ. Nẽ mẽ ixte Tirtũm mã amnhĩ jarënh xà hã ixkre kamã rý kapër o mẽ ahkre xà hã ixkre kamã rý nhỹri pry kamã tanhmã axpẽn kaxyw ri mẽ hkryx to hkêt nẽ. ãm amrakati ho amrakati. ¹³ Mẽ kot ã ri ijarënh anhýrja amrakati kumrêx. Mẽhõ kot ã ixte amnhĩ nhĩpêx anhýr ã ixpumunh kêt tã na htem amnhĩ krã hkôt amã ijarënh o hêx. ¹⁴ Na htem mẽ ixte Jesus kôt amnhĩ nhĩpêx xwýnhjaja mẽ ixte amnhĩ nhĩpêx mex kêt ã mẽ ijarẽ nom kot anhýr kêt. ãm mẽ inhĩgêjtjê nhõ Tirtũm kapër nywja kôt na pa hte amnhĩ nhĩpêx mex o ri ixpa rãhã nẽ. Nhũm ixkwýjaja htýx axtem kapër õ hkôt ixte amnhĩ nhĩpêx o ixpa hã ixkamnhĩx no ãm kapër õ hkêt. Ijaxwýja na pa hte mẽ urak nẽ finat Mojes kapër ã kagà mar o ixpa. Nẽ Tirtũm nhỹ hã mẽ kapër o mẽ pa xwýnh kot kapër ã kagàja pa hte mẽ urak nẽ hkôt amnhĩ nhĩpêx mex o ri ixpa. ¹⁵ Nẽ mẽ urak nẽ Tirtũm kot nhỹrmã akupým mẽ ho htír kôt pa hte ijaxwýja ijamaxpër týx nẽ. Mẽ htyk xwýnh piitãã. Mẽ kot amnhĩ to mex xwýnhjê mẽ mẽ kot amnhĩ tomnuj xwýnhjê mẽ mẽ ho hpimràatã akupým mẽ ho htírja kôt pa hte mẽ urak nẽ ijamaxpër týx o ri ixpa. ¹⁶ Jakamã na pa hte tãm amnhĩ nhĩpêx rãhã nẽ. Tirtũm noo mã nẽ mẽ piitã mẽ noo mã tãm ri amnhĩ nhĩpêx mex rãhã nẽ.

¹⁷ —Tã na pa pre pyka hkwý hkôt ri ixpa hã ixtã amgrà xohtõ nẽ. Hãmri nẽ ma akupým Jerujarẽ hwýr ixkwýjê hwýr mō. Amarĩ ixte mẽ kãm kàxpore hkwý nhõr kaxyw pa akupým mẽ hwýr mō. Nẽ mããnẽn Tirtũm mã mẽmoj nhõr kaxyw. ¹⁸ Hãmri nẽ mẽ ixte amnhĩ nhĩpêx xà hkôt pa mẽ amnhĩ to mex pa nẽ ma tẽn Tirtũm

mã amnhĩ jarēnh xà hã ixkre hwÿr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkēt nē. Rÿ tanhmã ixkapēr punuj to hkēt nē. Na pa prem ãm inhgrēre nē akryk ixkuhē nhũm mẽ ixpumu. ¹⁹Pika pê As rũm Ijaew kwÿjaja na prem ixkre kamã ixpumu. Nar mẽ tãmjaja mãn awÿr mra nē tanhmã amã ijarēnh to.

²⁰—Nē jar mẽ kot ixto kapēr xwÿnhjaja. Na pa pre mẽ àptār tũmrejē mã amnhĩ jarēnh pa nhũm mẽ inhma nē tanhmã inhmã nē hkēt nē. Kam nē ja hã mẽ hkukja nē mẽ ama. ²¹Rÿ ko. Koja apu mẽ amã ãm ja pix ã ijarēnh japēr. Na pa pre mẽ kãm ixkapēr nē mẽ kãm: “Na pa hte mẽ htyk nē akupÿm mẽ htĩr kôt ijamaxpēr tÿx nē. Tã ja pix mÿrapê na ka prem ixpynê nē ã inhĩpêx anē.” Anhÿr o mẽ kãm ixujarēnh jakamã nhũm apu mẽ hkwÿjaja kēp ja omnuj nē. Jakamã koja apu mẽ amã ja hã ijarēnh japēr. Nom ja pix jarē. Anē.

Ã na pre Pawreja pahi Peris mã amnhĩ jarēnh anē.

Peris mẽ hprō wa kot Pawre mar ã wa harēnh

²²Tã nhũm pahihti Peris kot mẽ kot Jejus kôt amnhĩ xunhwÿr xwÿnhjê kot amnhĩ nhĩpêx ã mẽ omunh mex jakamã hãmri Pawre mar pa nē ho kapēr xwÿnhjê mã kãm:

—Nà hãmri. Na pa ra mẽ ama. E mẽ mamrĩ ma mra. Kê pôristi krãhtũm Risasja mō nē pōj pa wa ixprĩ hã mẽ ate tanhmã harēnh toja ma nē rĩ kormã tanhmã Pawre jarēnh to. Anē.

²³Hãmri nē hpãnhã pôristi pytār xwÿnh mã Pawre jarē nē kãm:

—E mẽ ma akupÿm ixkre hwÿr o tē nē kamã hamār o apa. No ãm kwār mãmrĩ àmnhĩx ri ixkre kamã tanhmã amnhĩ to ho ri pa. Nē kê hkrãmnhwÿjaja mãmrĩ hwÿr mẽmoj to mra kê kuku. Anē.

Hãmri nhũm mẽ kuma nē ma o tē nē akupÿm ixkre hwÿr ho axà nhũm kamã pa ho pa.

²⁴Tã ra hã apkati grēre nhũm Peris mẽ hprō wa ma Pawre hwÿr tē. Prō haxwÿja kēp Ijaew. Hixi pê na pre Turujire. Jakamã nhũm wa ma Pawre nhõrkwÿ hwÿr wa tē.

Nhũm Peris Pawre hã karō nhũm kato nē wa hwÿr tē nē wa kãm awjarē. Tanhmã wa kot amnhĩ to nē amnhĩ kaxyw Jejus Kris kôt hamaxpēr nē hkôt amnhĩ xãm prãm xàj hprĩ hã wa kãm harē. ²⁵Nē wa kãm:

—Nà na htem Jejus Kris kôt amnhĩ nhĩpêx nē tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhÿr kēt nē. Nē arĩ Jejus kot amnhĩ nhĩpêx kôt amnhĩ nhĩpêx o pa. Koja Tĩrtũm nhÿrmã mẽ pahpiitã mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarēnh to. Mẽ pahte tãm amnhĩ nhĩpêx xwÿnh ã mẽ pajarē rÿ mẽ pahte amnhĩ tomnuj xwÿnh ã mẽ pajarē. Anē.

Nhũm pre ã Pawre Peris mẽ Turujire wa kãm kapēr anē. Hãmri nhũm Peris tee ri ujarēnhja ma nē kãm ma nē. Kot amnhĩ tomnuj o pa xwÿnh ã amnhĩ pumu nē ã kãm kapēr anhÿrja mar puma nē. Hãmri nē Pawre mã kãm:

—E hãmri. Nà na pa wa ra ama. Mamrĩ ma akupÿm tēn axà. Kot paj mẽmo arĩgro hã mẽmoj to anhÿr kēt nē axte amnhĩ wÿr atã karō ka axte tanhmã wa inhmã axujarēnh to. Anē.

²⁶Nē htÿx hamaxpēr o:

—Nà kot paj mẽmo arĩgro hã axte amnhĩ wÿr hã karō kê ixwÿr tē nē ixte kator prãm xàj inhmã amnhĩrer japēr. Anē.

Hãmri nē xatã amnhĩ wÿr hã karō htã no nhũm aa kot kator kaxyw tanhmã kãm nē hkēt nē.

²⁷Tã nhũm amgrà axkrut nē hapêx nhũm Pos Pesti pahi Peristi hpãnhã kēp mẽ õ pahi nē mẽ ho amnhĩptã. Jakamã nhũm Peris akupÿm õ krĩ hwÿr nojarêt nē Pawre mã ãhkra karo hkēt rãhã ma mō. Na pre hamaxpēr o:

—Nà kot paj Pawre kator nhũm Ijaew ja hã ijarēnh ma nē ixkamã gryk nē. Nà kwār mẽ hãgÿnh xà hã ixkre kamã hkrĩ ho hkrĩ. Kot paj kator kēt nē. Anē.

Hãmri nē kãm ãhkra karo hkēt rãhã ma akupÿm õ krĩ hwÿr mō. Jakamã nhũm Pawre arĩ ixkre kamã kēp prēs nē hkrĩ ho hkrĩ.

25

Pawre Rõm wÿr hkrã ã harēnh

¹ Tã nhũm pahi nyw Pos Pesti krĩ pẽ Sejarej wỳr mõn pøj. Hãmri nẽ kamã ri pa hã apkati axkrunẽpxi pix nẽ ma Jerujarẽ hwỳr mõ. ² Hãmri nẽ hwỳr pøj nhũm Ijaew kwỳjaja omu nẽ hwỳr mra nẽ kãm Pawre ho kapẽr nẽ hã hwỳr kurẽ kumrẽx. Mẽõ patre krãhtũmjẽ mẽ Ijaew xàptàr tũmrejaja nhũm mẽ hwỳr mra nẽ kãm:

³ –Pa pahihiti? E ot pa mẽ awỳr mra. Kwa xà kot ka Pawre hã karõ kê man awỳr mõ ka jar kot tanhmã amnhĩ tomnuj to hã hkukja nẽ ama? Anẽ.

No ãm hẽx rom ã hã kãm kapẽr anẽ. Kot hã karõ nhũm mẽ kot pry hã hpĩr kaxyw nhũm mẽ hẽx rom ã kãm kapẽr anẽ. ⁴ Hãmri nhũm mẽ kuma nẽ mẽ kãm:

–Tk. Kwa ra Sejarej kamã kẽp prẽs nẽ hkrĩ kẽnã kot pa kêt amnhĩ wỳr hã karõ. Kot pa tokyx ma akupỹm hwỳr mõ. ⁵ Jakamã kêr ka mẽ axàptàr tũmjaja ma ixkõt mra. Hãmri nẽ Sejarej kamã inhmã tanhmã kot amnhĩ tomnuj to hã harẽnh to pa mẽ ama nẽ rĩ kormã tanhmã harẽnh to. Anẽ.

⁶ Hãmri nẽ mẽ kamã pa hã apkati grẽre nẽ ma akupỹm Sejarej wỳr mõ. Hãmri nẽ hwỳr pøj nhũm apkati nhũm mẽ hkukjẽr xà hã ixkre hwỳr tẽ nẽ mẽ kot mẽ mar xà hã mẽ hkrĩ xà kamã nhỹ nẽ amnhĩ wỳr Pawre hã karõ. ⁷ Nhũm mẽ hwỳr o tẽ nẽ ỳr nhũm hkwy kot Jerujarẽ rũm mẽ mõr xwỳnhjaja kãm hipõk nẽ pahi Pos Pesti mã tanhmã ho kapẽr to nẽ ho kapẽr punuj tỳx nẽ. Kot tanhmã amnhĩ tomnuj to ho pa hã ho kapẽr o kuhẽ. Nom mẽ kot ã kot amnhĩ nhĩpẽx anhỹr ã omunh kêt tã ãm amnhĩ hkrã hkõt ri tanhmã ho hẽx to. ⁸ Jakamã nhũm Pawre tee ri amnhĩ tã mẽ kot ho hẽxja ma nẽ kãnhmã xa nẽ Pos Pesti mã amnhĩ tã aprã nẽ mẽ kãm:

–Nà aa ixte ã amnhĩ nhĩpẽx anhỹr kêt. Na pa finat Mojes kot Tĩrtũm nhỹ hã kapẽr nhĩrõp ixãm nẽ hkwy m ri tanhmã amnhĩ nhĩpẽx to hkêt nẽ. Nẽ mẽ ixte Tĩrtũm mã amnhĩ jarẽnh xà hã ixkre kamã ri tanhmã ixtỳx ri amnhĩ nhĩpẽx to hkêt. Nẽ pahihiti Sesti kapẽrja pa pre hirõp ixãm nẽ tanhmã amnhĩ tomnuj to hkêt nẽ. Aa ixte ã amnhĩ nhĩpẽx anhỹr kêt kumrẽx. Anẽ.

⁹ Hãmri nhũm Pos Pesti kuma nẽ tanhmã hkukamã hamaxpẽr to nẽ hamaxpẽr o:

–Kwa nhỹ krĩ kamã kot pa we Pawre kot inhmã tanhmã amnhĩ jarẽnh toja ma nhũm Ijaew ja hã kãm ixkĩnh japêr? Nà mẽõ krĩ pẽ Jerujarẽ hwỳr kot paj akupỹm mẽ hwỳr o mõ nẽ kamã mãn hkukja nẽ kuma. Nà ja na mex. Nà kot paj anẽ. Anẽ.

Hãmri nẽ Pawre mã kãm:

–E xà kot puj ma akupỹm Jerujarẽ hwỳr mõ pa kamã axte mẽ kot ajarẽnh ma nẽ tanhmã ajarẽnh to nà? Anẽ.

¹⁰ Hãmri nhũm kãm:

–Nà jar ixte pahihiti Sesti nhỹ hã mẽ kot mẽ hkukjẽr xà hã ixkre kamã inhỹr nẽ amnhĩ jarẽnh kẽnã. Jar na htem mẽ hkukja nẽ tanhmã ri mẽ mar to. Na pa pre tanhmã ixkwỳjẽ ho hkêt nẽ. Mẽmo kaxyw kot pa akupỹm mẽ hwỳr mõ nẽ axte mẽ kãm amnhĩ jarẽ? ¹¹ Kop apu pa tanhmã ixte amnhĩ tomnuj to ronhỹx mẽ mãmrĩ ja hã ixpĩ pa mẽ kẽp tanhmã ri amnhĩ to hkêt nẽ. Nom mẽ kot ixto hẽx pix o ã ijarẽnh anhỹr kẽnã. Jakamã mẽmo mỳrapẽ kot kaj mẽ ìhkram ijaxà? E Rõm kãm pahi maati Sesti hwỳr mãn inhmẽ pa kumã mãn amnhĩ jarẽ. Anẽ.

Pahi Sesti kẽp pyka piitã hkõt mẽ ho amnhĩptàr xwỳnh maati jakamã nhũm Pawre kot mar kaxyw hwỳr hkrã. ¹² Hãmri nhũm Pos Pesti kuma nẽ ma tẽ nẽ hã õ kõwenatõjẽ ma. Hãmri nẽ hã axpẽn mar pa nẽ akupỹm hwỳr tẽ nẽ kãm:

–Tõe. Nà kot paj pahi maati Sesti wỳr amẽ. Ra hwỳr akrã kẽnã. Anẽ.

Pos Pesti kot Akrip mã Pawre jarẽnh

¹³ Tã nhũm apkati grẽre nẽ hapẽx nhũm pahi hõ pẽ Akripja ma Pos Pesti hwỳr mõ. Tõx Perẽnĩs mẽ wa mõ. ¹⁴ Hãmri nẽ wa hwỳr pøj nẽ kuri wa pa hã apkati grẽre nhũm Pos Pesti wa kãm Pawre jarẽ nẽ wa kãm:

–E pa war amã mẽhõ jarẽ. Na pre pahi Perisja mẽ hãgjẽnh xà kamã mẽhõ jaxà nẽ kormã kator kêt ri nhũm mẽ àpẽn nẽ kator pa hpãnhã àpẽn o amnhĩptã. ¹⁵ Tã ra ma Jerujarẽ hwỳr mõ nhũm Ijaew nhõ patre krãhtũmjẽ mẽ mẽ àptàr tũmrejaja inhmã ho kapẽr punuj rax nẽ. Nẽ ixte mẽ kãm hpĩr kaxyw inhmã hã àmnẽn kãm hihtỳx nẽ. ¹⁶ Nom pa mẽ kẽp ja kaga nẽ mẽ kãm: “Nà mẽ ixpẽ Rõm nhõ xwỳnhjaja na pa htem ã mẽ hipẽx anhỹr kêt nẽ. Na pa htem mẽ kot

ho kapêr xwÿnh noo mã tanhmã hkukjêr to nhũm tanhmã amnhĩ tã àprâr to pa htem kuma nê rĩ kormã tanhmã mẽ ho. No na pa htem kormã mẽ kot tanhmã amnhĩ jarênh to hkêt ri tanhmã mẽ ho hkêt nê.” Anê.

¹⁷ —Jakamã nhũm prem kaxyw Sejarej wÿr pøj nhũm apkati pa hã mẽ hkukjêr kurê kumrêx. Nê mẽ kot mẽ hkukjêr xà hã mẽ hkrĩ xà kamã nhÿ nê ixte hkukjêr kaxyw amnhĩ wÿr Pawre hã karõ. ¹⁸ Na pa pre ijamaxpêr o: “Mãn pre tanhmã amnhĩ tomnuj tÿx to hã na mẽ inhmã harênh kaxyw.” ¹⁹ Anhÿr ã hkamnhĩx tã te kot amnhĩ to mex xwÿnh pyræk. ãm kot mẽ hkôt amnhĩ nhĩpêx kêt pix ã nhũm mẽ inhmã harê. Nê kaxyw mẽhõ htyk xwÿnh jarê. Mẽ kot kãm “Jejus” anhÿr xwÿnhja na xep hte mẽ kãm akupÿm htĩr ã harênh o pa. ãm ja pix na prem inhmã harê. ²⁰ Pa tee ri ixte nhÿri ixprĩ hã tanhmã mẽ kot harênh to hã mẽ mar kaxyw hkukamã ijamaxpêr. Hãmri nê hã Pawre kukja nê kãm: “Xà kot puj ma akupÿm Jerujarê hwÿr mõi pa axte akwÿ kot tanhmã ajarênh to ma nê rĩ kormã tanhmã ajarênh to nà?” ²¹ Anhÿr tã no nhũm akupÿm Jerujarê hwÿr mõi kaga kumrêx nê amnhĩm Rõm kãm pahi maati Sesti jarê. Ixte ma hwÿr mẽnh nhũm kot kãm amnhĩ jarênh nhũm kot mar nê tãm tanhmã harênh to kaxyw. Jakamã pa kormã ixte hwÿr mẽnh kaxyw amnhĩ xa hã akupÿm mẽ hagjênh xà kamã haxà nhũm arĩ hkrĩ ho hkrĩ. Anê.

²² Hãmri nhũm Akrip kuma nê kãm:

—Xôwehe? Kwa na pa inhmã tanhmã kapêr to mar prãm nê. Anê.

Hãmri nhũm kãm:

—Tõe. Nà kê apkati pa hã karõ ka tanhmã kapêr mar to. Anê.

²³ Jakamã nhũm apkati nhũm Akrip mẽ htõx Perênĩs wa pahi hã mẽ ê mex jagjê nê ma mẽ hkukjêr xà hã ixkre hwÿr wa tẽ. Pôristi krãhtũm kwÿjê mẽ Sejarej kamã mẽ kot amnhĩ to rũnh xwÿnh kwÿjê mẽ nhũm mẽ hwÿr akuprõ. Nhũm mẽ piitã Akrip mẽ htõx wa kêp pahi hã wa ê mex ã wa omu nê wa kamã no puma nê. Hãmri nhũm Pos Pesti Pawre hã karõ nhũm mẽ haprõ nê ma mẽ hwÿr o tẽ. ²⁴ Hãmri nhũm Pos Pesti omu

nê Akrip mẽ htõx mẽ mẽ kot mar o hkrĩ xwÿnhjê mã kãm:

—E pahihti Akrip mẽ mẽ apikuprõnh xwÿnhjaja. Ota Pawre xa. Jerujarê kamã nê jar Sejarej kamã na pre hkwÿjaja inhmã ho kapêr rax nê. Hãmri nê ixte hpĩr kaxyw inhmã hã àmnênh kãm hihtÿx nê. ²⁵ Nom mẽmoj mÿrapê kot pa kêt kupi? Tã nhũm amnhĩm pahi maati Sesti jarê pa ma hwÿr mẽnh kaxyw. ²⁶⁻²⁷ Nom na htem amarĩ pahi maati Sesti hwÿr mẽ rênh kêt nê. Na htem kãm mẽ kot tanhmã amnhĩ tomnuj to hã kagà nê hwÿr kagà mẽ ro hã mẽ kurê. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyræk. Jakamã na pa mẽ awÿr o tẽ. Mẽ ate kapêr mar nê kot tanhmã amnhĩ tomnuj to hã inhmã harênh nhũm ixte hã kagà nê pahi Sesti hwÿr mẽnh kaxyw. Jakamã e mẽ kam nê hkukja nê ama nê tanhmã mar to. Anê.

26

Pawre kot pahihti Akrip mã amnhĩ jarênh

Atre 8.3, 9.1-19, 22.1-21

¹ Hãmri nhũm Akrip Pos Pesti kot tanhmã Pawre jarênh toja ma nê Pawre mã kãm:

—E mãmri mẽ inhmã amnhĩ jarê pa mẽ ama. Anê.

Hãmri nhũm kuma nê kãm amnhĩ jarênh kaxyw kãnhmã kãm ìhkra pẽ nê kãm:

²⁻³ —Hêxta waa nê. Nà na pa amã amnhĩ jarênh kaxyw nê ixkĩnh nê pahi Akrip. Ra ate mẽ ixpê Ijaew kot amnhĩ nhĩpêx ã mẽ ixpumunh mex. Nê mẽ ixte tanhmã amnhĩ nhĩpêx to hã mẽ ixte axpên kukjêrta ate hã mẽ ixpumunh mex. Jakamã na pa amã amnhĩ jarênh kaxyw nê ixkĩnh nê. E tokyx anojarêt kêt nê inhma. Pa amã ixujarênh jatur xàm kumê ka aprĩ hã inhma. ⁴ Nà ixkwÿjaja ra mẽ kot ixte amnhĩ nhĩpêx ã ixpumunh mex. Ixprĩre rũm ixpapxà kamã nê mãânên Jerujarê kamã ixte tanhmã amnhĩ nhĩpêx to ho ixpaja mẽ kot hã ixpumunh mex. ⁵ Ixpê mẽ hkwÿ pẽ Parijew nhõ xwÿnh kwÿjê hã mẽ kot ixpumunh. Koja mẽ apu ja hã amã ijarênh japêr rÿ ko. Mẽ ixpê Parijew nhõ xwÿnhjaja na pa htem anpêpêm finat Mojes kot Tĩrtũm nhÿ hã mẽ

inhîgêjtjê mã mẽmoj tâ karô xà hkôt amnhî nhîpêx mex o ixkwýjê jakre.

6 –Amnepê m na pre Tirtûm mẽ inhîgêjtjê mã tanhmã amnhî jarênh to. Kot nhÿrmã mẽ piitã akupÿm mẽ ho htîr ã amnhî jarê. Tã ixte ja kôt ijamaxpêr pix mÿrapê na prem kot hã amã ixto kapêr kaxyw awÿr ixto mō. 7 Mẽ ixpê Ijaew nhîgêjtjê piitã na prem Tirtûm kapêr kôt hamaxpêr o ri pa. Kot nhÿrmã akupÿm mẽ ho htîr ã amnhî jarênh kôt hamaxpêr tÿx o pa. Amnepê m finat Jako mẽ hkra pê 12jaja na prem hkôt hamaxpêr. Nê ixpê mẽ hkanrêhã mẽ htãmnhwÿ na pa hte ijaxwÿja ja kôt ijamaxpêr tÿx rãhã ho ri ixpa. Tã ãm mẽmoj pixi mÿrapê na ixkwÿjaja ã amã ixto kapêr punuj anê. 8 Mẽ kot ixpyrà nê ja kôt hamaxpêr ã amnhî jarênh tâ nhÿm pre Tirtûm akupÿm Kra Jejus o htîr nom nhÿm mẽ ixkînhã ja kôt hamaxpêr kêt. Nom Tirtûm kêp akupÿm mẽ pahto pahÿr xwÿnh kênã.

9 –Amnepê m kormã Jejus kôt ijamaxpêr kêt ri na pa pre ijaxwÿja mẽ urak nê akupÿm htîr kôt ijamaxpêr kêt nê. Nê ixtÿx ijamaxpêr o: “Kot paj Jejus pê Najare nhô xwÿnh kôt mẽ kot amnhî xunhwÿr xwÿnhjê nhîpêx kati ho ixpa nhÿm Tirtûm ja hã ixpumu nhÿm ja kãm mex nê.”

10 –Anhÿr jakamã pa pre hte tanhmã mẽ homnuj tÿx to ho ri ixpa. Jao Jerujarê kamã mẽ inhô patre krãhtÿmjê nhÿ hã mẽ unê nê mẽ hagiênh xà kamã mẽ hagiênh o ixpa nhÿm mẽ kot mẽ himex kaxyw mẽ hã inhã amnhî jarê nhÿm ja inhã mex nê. Pa mẽ harênh ma nê ixkînh nê. 11 Pa pre hte xatã tanhmã mẽ hipêx to nê mẽ kot Jejus kaga hprãm xàj mẽ hipêx kati rÿnh nê. Tirtûm kapêr o mẽ ahkre xà hã ixkre piitã kamã pa pre hte ã mẽ hipêx anê. Nê mẽ kamã inhgryk tÿx jakamã ma krî hkwÿ hkôt mẽ hapêr o ri ixpa. ã na pa pre mẽ hipêx anhÿr o ri ixpa.

12 –Tã axte ixte mẽ hkwÿjê pynênh nê mẽ hagiênh kaxyw ma Tamas wÿr mō. Mẽ inhô patre krãhtÿmjê nhÿ hã ma mẽ hwÿr mō. 13 Hãmri nhÿm ra kaxkwa nhîpôk ri myt nhÿ pa kormã pry hã inhmôr ri kaxkwa rÿm mẽmo nhîrãja pumu. Nhÿm hirã htÿx o myt jakre nê ixtã ajêt pa ixkôt ri mẽ pa

xwÿnhjê mẽ hipôk ri ixkuhê. 14 Hãmri nê mẽ inhã ma xàj pykap ixrôrôk pa nhÿm kaxkwa rÿm mẽhōj inhã kapêr. Mẽ ixpê Ijaew kapêr o kapêr nê inhã: “Pa Sawti? Hêxta waa nê. Kwa mon ka hte axtem nê ixtomnuj tÿx o ri apa? Nom na ka tee ri ã amnhî nhîpêx anhÿr kaprÿ.” Anê. 15 Hãmri pa tee ri kuma nê kãm: “Kwa mẽ atō na ka ã inhã akapêr anê?” Anê.

–Hãmri nhÿm inhã: “Ixpê Jejus na pa amã ixkapêr. Pa na ka hte ixpê ixkôt mẽ kot amnhî xunhwÿr xwÿnhjê homnuj tÿx o apa ho te pa ixtomnuj tÿx pyrak. 16 E kãnhã xa. Ate inhã tanhmã amnhî nhîpêx to ho apa kaxyw na pa amã amnhî to amnhîrît. Jarãhã ate ixpumunh xà hkôt ate mẽ kãm ma ijarênh nê mẽ kãm ixkapêr jarênh o mẽ ahkre ho ri mẽ hkôt apa kaxyw na pa amnhî kaxyw ata. Kot paj nhÿrmã axte awÿr ixkato nê tanhmã amã ixkapêr to ka inhã nê ma mẽ kãm ixkapêr jarênh o ri mẽ hkôt apa. Ja kaxyw na pa amnhîm ata.” Anhÿr o inhã kapêr. 17 Hãmri nê inhã: “E kot paj Ijaew mẽ Ijaew kêt xwÿnhjê hwÿr amê nê anê mẽ omunh mex nê nhÿm mẽhō apîr kêt nê. 18 Kêr ka ma mẽ hkôt mẽ kãm ixkapêr jarênh o ri apa kê mẽhprî hã kuma. Mẽ kot amnhî tomnuj kaga nê amnhî kaxyw ixkôt hamaxpêr nê ixkôt amnhî xunhwÿr kaxyw. Hãmri nhÿm Tirtûm ja hã mẽ omu nê ixkukwak ri amnhî katut kôt mẽ kot amnhî tomnuj piitã rênh pa nê axte kãm hamaxpêr kêt nê. Hãmri nê mẽ ho hkra. Kojã mẽ ã amnhî nhîpêx anê hãmri nê axte Satanasti nhÿ hã tanhmã amnhî nhîpêx to hkêt nê. Pãnhã Tirtûm kôt pix mã amnhî nhîpêx o pa.” Anê.

19 –ã na pre Pahihti Jejus inhã kapêr anê. Tã kot kaxkwa rÿm inhã ixapênh jarênh ã karôja pa pre mar tÿx nê hkôt amnhî nhîpêx rãhã ho ri ixpa pahi Akrip. 20 Jakamã na pa pre ma mẽ hkôt mẽ kãm kapêr jarênh o ri ixpa. Tamas kumrêx hwÿr nê hpãnhã Jerujarê hwÿr nê hpãnhã pika pê Jutej piitã hkôt Ijaew mã kapêr jarênh o ri ixpa. Tã hpãnhã Ijaew kêt xwÿnhjê mã harê. Na pa hte mẽ kãm ixkapêr o: “Kwa mẽ ate amnhî tomnuj kaga nê hpãnhã Tirtûm kôt amnhî xunhwÿ. Hãmri nê hkôt pix mã amnhî nhîpêx o ri apa. Mẽ piitã

mê kot apê hkwy hã mê apumunh kaxyw.” Anê.

²¹—Ăm ja pix mÿrapê na pre ixkwÿjaja ixpynê. Tÿrtÿm mã amnhÿ jarênh xà hã ixkre kamã ixpynê nê ra mê kot ixpÿr kaxyw. ²²⁻²³ Nom na hte Tÿrtÿm ixtãnopxa nê ixto ixihtÿx mex rãhã ho pa pa arÿ mê kãm harênh o ri ixpa. Mê kot amnhÿ to rÿnh xwÿnhjê mã nê mê kêp amrakati xwÿnhjê mã nê mê piitã mê kãm harênh o ri ixpa. Finat Mojes mê Tÿrtÿm nhÿ hã kapêr jarênh o mê pa xwÿnhjaja kot ra hkukamã tanhmã harênh to xà hkôt pa hte mê kãm harênh o ri ixpa. Nê mê kãm: “Tÿrtÿm kot mê pakaxyw ãm xwÿnhta na pre amnhÿ xà htÿx kamã hamak kãm ty. Tã nhÿm Tÿrtÿm akupÿm ho htÿr. Kumrêx na pre akupÿm ho htÿr jakamã kumrêx na pre tanhmã mê kãm kapêr to ho ri mê hkôt pa. Mê kot amnhÿ kaxyw hkôt hamaxpêr nê hkôt amnhÿ xunhwÿr xwÿnh piitã uràk nê nhÿrmã Tÿrtÿm mê wa ò krÿ kamã htÿr tÿm nê pa ho pa hprãm xàj mê harênh o pa. Mê ixpê Ijaew nê mãânên mê apê Ijaew kêt xwÿnhjaja nhÿm pre ã mê pajarênh anê.” Anhÿr o pa hte mê kãm harênh o ri mê hkôt ixpa pahi Akrip. Anê.

²⁴ Nhÿm Pawre kormã kot mê kãm amnhÿ jarênh par kêt ri nhÿm Pos Pesti tee ri tanhmã Jejus jarênh to hã kuma nê kàx pè kãm kapêr nê kãm:

—Kwa na ka akrã axpã nà? Pêr ate kagã pumunh tÿx kurê akrã pipãnh pyràk o ri atÿx ã ri mê inhmã axujarênh anê. Anê.

²⁵ Hãmri nhÿm kãm:

—Nà ixkrã pipãnh kêt. Ăm hãmri na pa mê amã awjarê. ²⁶ Jerujarê kamã na prem Jejus pÿ nhÿm mê piitã omu. Tã nhÿm akupÿm htÿr hãmri nê hpimxur pè ri pa hkêt nê. Na pre mê ohtô nê akupÿm htÿr kãm omu. Pahi Akrip ra kot ja mar mex jakamã na pa ixãmnhÿx ã mê amã harênh anê.

²⁷ Anhÿr o kãm kapêr hãmri nê pahi Akrip wÿr rÿt nê kãm:

—Kwa pahi Akrip. Xà Tÿrtÿm nhÿ hã kapêr jarênh o mê pa xwÿnhjaja kot Jejus kukamã tanhmã harênh toja kôt na ka hte ajamaxpêr? Nà ra hkôt ajamaxpêr kênã. Ra ixte ajamaxpêr kôt apumunh mex. Anê.

²⁸ Hãmri nhÿm tee ri kuma nê kãm:

—Tk. Kwa xà kot kaj ã inhmã akapêr anê pa ama nê apyrã nê amnhÿ kaxyw Jejus kôt

ijamaxpêr? Nà na ka ixte ã ate Jejus jarênh anhÿrja kôt ijamaxpêr ã ixkamnhÿx kaprÿ. Anê.

²⁹ Hãmri nhÿm Pawre kãm:

—Ko. Kot kaj ixpyrà nê amnhÿ kaxyw hkôt ajamaxpêr pa ixkÿnh nê. Nom kaxipix kêt. Mê apiitã mê ate inhmar o akrÿ xwÿnhjaja mãânên. Mê ate mê ixpyrà nê Jejus kôt amnhÿ xunhwÿr na inhmã hprãm. Ăm ixpyrà nê mê apê prês pix na inhmã hprãm kêt. Anê.

³⁰ Hãmri nhÿm pahi Akrip nê htôx Perênÿs nê pahi Pox Pesti nê mê hkôt mê môr xwÿnhjaja kãnhmã kuhê nê ma mrar kaxyw. ³¹ Nê nojarêr nê Pawre hã axpên mã:

—Kwa tanhmã kot amnhÿ tomnuj to hkêt kênã kot kêt mê haxà rÿ kupÿ. Anê.

³² Hãmri nhÿm Akripja Pos Pesti mã kãm:

—Kwa kop apu kot amnhÿ kaxyw pahi maati Sesti hwÿr hkrã hkêt ronhÿx pu mê ra kator. Anê.

27

Mê kot Rôm wÿr Pawre mênh ã mê harênh Atre 23.11, 25.12

¹ Tã nhÿm mê pyka pè Itar wÿr pahi maati Sesti hwÿr Pawre mênh kaxyw. Itar kamã mê ò krÿ maati na pre kêp Rôm. Jakamã nhÿm Pawre mê mê kot mê hagjênh xà kamã mê hkrÿ xwÿnh mê ho hpimràatã ma mê o mra nê pôristi krãhtÿm Jurti nhÿhkram mê haxàr pa. Kot ma Rôm wÿr mê o môr kaxyw. Jurtija kêp Itar kamã mê ò pahi maati hã pôristi krãhtÿm nhÿm prem ma mê kãm mê o môr kaxyw ÿhkram mê hagjênh pa. Ixpê Rukre na pa pre inhmã Pawre hkôt inhmôr prãm nê mê hã ajêt nê mê hkôt mō.

² Tã pa mê ra inhnojarêr nhÿm Aristak haxwÿja ma mê ixkôt mō. Pyka pè Masetôn nhō xwÿnh na pre. Ò krÿ pè na pre Tesarôn. Jakamã nhÿm ma wa ixkôt mō. Hãmri nhÿm pãrja nojarêr. Atamÿx rÿm pãr nhÿm ra As wÿr nojarêr pa mê hwÿr inhgjêx pa nê ma kamã mō. ³ Hãmri nhÿm apkati pa mê krÿ pè Sito hwÿr pōj nê hã pãr xi. Nhÿm pôristi krãhtÿm Jurtija Pawre ho mex jakamã pa mê Sito hwÿr pōj nhÿm Pawre mã anê pa mê ixkato nê ma ixkrãmnhwÿjê

hwÿr mra nē mē kutā apku nē ma akupÿm pàr wÿr mra.

⁴ Tā pa mē axte mō. Nom nhūm kōk mē ixkutā àpêr tÿx jakamā pa mē umaj juk nē gō hipōk kupu ho mō. Gō hipōk pē Sipreja pa mē upōk rŭm ma hkupu ho mō nhūm mē inhnē kōk pē àmnàr mex nē. ⁵ Hāmri pa mē mōō nē pyka pē Siris mē Pāpir wa hakrenh o mō nē pyka pē Ris kamā Mira hwÿr pōj nē hā pàr xi nē ijapōx pa. ⁶ Hāmri nhūm pōristi krāhtŭmja Aresānrir rŭm pàr pumu nhūm ra Itar wÿr nojarêt. Pa mē hwÿr inhgjêx kurê kumrêx hāmri nē ma kamā axte mō. ⁷ Hāmri nhūm pàrja kōk kutā tee ri mōr prēprêk kaxyw nē àm amnhīm hprī nē mōr ā apkati xohtō nē pa mē tokyx ixpōx kêt nē. Tā Sito hwÿr ixàhtêp o mō nom nhūm kōk mē ixkutā hihtÿx rax kumrêx. Jakamā pa mē juk nē gō hipōk pē Kret jatur xà jahpa nē ma kape hā mō nhūm mē inhnē kōk pē àmnàr mex nē. Hāmri pa mē ma Sarmōn jakrenh o mō ⁸ nhūm pàr kōk kutā amnhīm hprī nē kape hā mō. Pa mē mō nē jatā Rasej tã pàr nhīkwÿ xà mex wÿr pōj nē kamā pàr xi. ⁹ Nom pàr kot amnhīm hprī nē mōr jakamā nhūm ra kōk xàpêr tÿx nē kamā kry htÿx ā mytwrÿ mē ixtã kato. Mytwrÿja ā mē kot kōk xàpêr tÿx pymaj nhÿhÿm pàr kām mrrar kêt. Jakamā nhūm Pawre tokyx mē inhmōr nē pàr nhō xwÿnhjê mã kapêr kām hihtÿx nē mē kām:

¹⁰ —Kwa pu mē jar kōk xàpêr tÿx jamār o ri papa nà. Kê kōk mē kry htÿxja hapêx pu mē rī kormā axte mō. Kot puj mē anhÿr kêt nē kōk xàpêr tÿx kām mō nhūm nhÿri pàrja mē pahpê axà nhūm gō mē apê mē akukrêx o hapêx pa. Pu mē pajaxwÿja axkaprã.

¹¹ Anhÿr o mē kām kapêr tã no nhūm mē kuma nē àm kuma. Pàr pām mē pàr o mrrar xwÿnh wa nojarêt tÿx nē kapêr ma nē àm kuma. Nhūm pōristi krāhtŭm wa nojarêt ā wa kuma nē haxwÿja Pawre mar kêt nē. ¹² Nhūm mē kot pàr nhīkwÿ xà mex jarênhja mē kot mex ā harênh tã mē kêp omnuj nē. Hā na wrÿk nē kōk xàpêr tÿx nhūm mē kêp omnuj tÿx nē. Jakamā nhūm mē piitã Pawre rom ra nojarêt nē. Mē kām tokyx krī pē Wēnīs wÿr hpōx prām jakamā nojarêt tÿx nē. Gō hipōk pē Kret kamā na Wēnīsja.

Nē kamā kōk xàpêr tÿx kêt jakamā nhūm mē hwÿr nojarêt nē axpēn mã:

—E kwa pu mē tokyx Wēnīs wÿr mō nē kamā mãn kōk xàpêr tÿx japêx jamār o papa. Anē.

Hāmri nē piitã hwÿr nojarêt.

Kōk kot pàr o àpêr tÿx ā harênh

¹³ Tā nhūm kahpa hkôt kōk xàpêrja katàt kôt kawax pē apê nhūm mē kamā ama nē axpēn mã:

—E hāmri. Tokyx pu mē mō. Anē.

Jakamā pa mē pàr o htÿx xà ho api nē axte mō. Ma gō hipōk pē Kret jakàr ā mō. ¹⁴ Puh nhūm na wrÿ nē kōk àpêr tÿx kumrêx. Mē kot kām “kōk xàpêr tÿx maati” anhÿr xwÿnhja gō hipōk rŭm mē ixto àpêr tÿx kumrêx o mō. ¹⁵ Hāmri nē mē ixkutā àpêr tÿx nhūm pàr tee ri kutā hkarôt. Pa mē kormā Wēnīs wÿr ixpōx kêt ri ra ho awjanā nhūm amnhī krã hkôt kōk kôt mō. ¹⁶⁻¹⁷ Hāmri nē mō nē gō hipōk pē Krawti jahpa nē hakàr ā mō nhūm mē inhnē kōk pē amÿtã nhūm amnhīm hprī nē kawax pē apê. Hāmri pa mē pàr krare kot mē ixkôt mōr xwÿnhja pa mē kumÿ nē pàr rax kām kumê. Ra kamā gō rax tã pa mē ixkarôt tÿx nē nē hkapīr pa nē ho api nē pàr rax kām kumê nē ho htÿx. Hāmri nē hpānhã kōk xàpêr tÿx pymaj pàr rax kaxpre hpa. Hāmri nē kōk kot pykahti grã maati pē Sirteja wÿr pàr mēnh nhūm kot amnhī to pykahti xãm o htēm pymaj nhūm mē kot ho mrrar xà hã kupêxê rax o wrÿ nhūm pàr amnhī krã hkôt ma kōk kôt mō.

¹⁸ Tā nhūm apkati nhūm kōk arī mē ixpê pàr o àpêr tÿx nē arī na wrÿk rax rãhã nē. Jakamā pa mē pàr àr pymaj nē mē hikukrêx kwÿ gōx kām rēnh pa. Kaxkritre nē àr kêt kaxyw.

¹⁹ Tā nhūm apkati pa mē hpānhã pàr kre kamā ri nē hikukrêx kwÿ ré nē gōx kām kurê. ²⁰ Nhūm kōk arī àpêr tÿx kumrêx ā apkati xohtō nē. Nē na wrÿk rax rãhã jakamā pa mē kanhêti pumunh kêt nē myt pumunh kêt o mē ixtã apkati xohtō rax kumrêx. Hāmri nē tee ri ahkapi nē tee ri amnhī kukamã ijamaxpêr. Nē ixtyk par pix kukamã ijamaxpêr o ixkaprī nē ixkrī.

²¹ Hāmri nē mē inhmã ma xàj ixàpkur kêt rÿy nē. Hāmri nhūm Pawre tee ri ja hã mē

ixpumu nē pār nhõ xwýnh wa kãm kapēr nē wa kãm:

—Kwa na pa pre tee ri Kret kãm man mē pamōr nē war amā ixkapēr. Kop apu mūtar mãn mē kuri arī ri mē hkõt mē papa ronhýx pu mē pajamakêtkati nē paxàmnhīx ri papa. Tã nhýx pu mē ri mē hikukrêxja gôx kãm rēnh par kêt nē. ²² Nom kwa kêt ka mē tee ri amnhī kukamã ajamaxpēr kêt nē. Kot puj mē pahtõ pahtyk kêt nē. Ām pārja pix koja axà nē hapêx. ²³ Ixpê Tirtüm krajê hõ na pa. Na pa hte kãm tanhmã amnhī nhīpêx to ho ri ixpa. Jakamã na pre kamàt ja kamã ixwýr kapēr o wrýk xwýnhjê hõ mē nhūm ixwýr wrý nē inhmã awjarê ²⁴ nē inhmã: “Pa Pawre? Kwa tee ri amnhī kukamã ajamaxpēr o amã ma hkêt nē. Kot kaj akà hkĩnh pê ma Itar kamã Rõm wýr mō nē pøj nē pahi maati Sesti pumu nē kãm amnhī jarê. Jakamã koja Tirtüm akõt mē mōr xwýnh piitã omunh mex nē ka mē atõ tanhmã amnhī to hkêt nē.” Anē.

²⁵ —Ā kot inhmã kapēr anhýr jakamã kwa mē amnhī to htýx nē tee ri amnhī kukamã ajamaxpēr kêt nē. Tirtüm kapēr o wrýk xwýnh kot inhmã ujarēnh xà hkõt koja Tirtüm ã mē panhīpêx anē. Ixte ja hã omunh mex kēnã. ²⁶ Koja xep kôkja nhýri gô hipôk ã pār krakrak pa. Nom mē papajaja kot puj mē pahkà hkĩnh pê hwýr pahpôx pa. Anē.

²⁷ Tã pa mē mōõ nē ã inhmōr anhýrja ã ixtã semãn axkrut nē ra gô rax pê Ariax kõt axà. Kamàt kãm hkõt axà nhūm kôkja arī pār o apēr týx rãhã ho mō. Hãmri nhūm kõt ã kamàt nhūm pār o mrar xwýnhja ra pār kot pykahti grã htêp ã hkamnhīx. ²⁸ Jakamã nhūm mē gô xupým pumunh xà ho gô pumu nhūm upým kêp 36 met. Hãmri nhūm hã ahtümre nē axte omu nhūm ra hpãnhã kêp 27 met pix. Jao ra pār kot gô kokwe htêp o mōr ã omu. ²⁹ Hãmri nē kot kēn kuranh nē hã pikrakrak pymaj katē rüm ho htýx xà ho 4 nē gôx kãm kurē nhūm arī ajêt. Hãmri nhūm mē tokyx kãm arīgro hprãm o arīgro mã nojarêt o hkrī. ³⁰ Hãmri nhūm pār kãm mē ãpēnh xwýnhjaja tanhmã hamaxpēr to nē hêx rom pār krare ho wrýk o tē. Mē kot mē ixrer nē ahte xarmã mōr nē rēr nē tokyx gô hipôk wýr hpôx kaxyw. No ãm hêx rom te mē kot axte pār krã rüm ho htýx xà

hõ mēnh kaxyw pyrãk o amnhī nhīpêx nē kaxyw ho wrýk o tē. ³¹ Nom nhūm Pawre mē hamaxpēr ã mē omu hãmri nē pōristi mē mē hkrãhtüm mã mē harē nē mē kãm:

—Kwa koja mūjjaja mē pare nē ahte pār krare kamã xarmã mōn rē ka mē apikaprãr pa kãm ga. Anē.

³² Hãmri nhūm mē tee ri kuma nē mē hwýr hprõt nē mē kêp pār krare pê hkaxpre xà jakà nhūm gôx kãm tēm nē ma gô hkõt hkaprýn mō.

³³ Tã hãmri nhūm ra myt kator o mō nhūm Pawre akupým mē piitã mē ho mē hamaxpēr o hihtýx kaxyw mē kãm:

—Kwa na ka mē tee ri amnhī kukamã ajamaxpēr o akaprī nē axàpkur kêt o atã semãn axkrut. ³⁴ E pu mē mēmoj krē nē ho amnhī xihtýx. Kot puj mē pahtõ pahtyk kêt nē. Ām hãmri na pa mē amã ixkapēr. Anē.

³⁵ Hãmri nē mēmoj py nē mē noo mã Tirtüm mã harē nē hkur o xa ³⁶ nhūm mē ja hã omunh xà hkõt akupým tãm hamaxpēr o mō. Hãmri nē amnhīm mēõ hkwy jamý nē kumē kuku. ³⁷ Pār kãm mē inhmōr xwýnhjaja na pa prem ixpê 276. ³⁸ Tã pa mē ra ixàpkur pa. Hãmri nē pār kaxkrit kaxyw mē apkur xà hã mēmoj y jakrêxja gôx kãm hkapīr pa.

Pār mē kêp pikrakrak ã harēnh

³⁹ Tã nhūm ra myt kator mex nē nhūm mē amnhī kukamã gô hipôk pumu nē axpēn mã:

—Kwa nhý pika na mūj wehe? Anē.

Hãmri nē nhýri hakàx ã amnhīm nōr xà mex pumu nē hwýr pār o mōr kaxyw hã axpēn ma. ⁴⁰ Hãmri nē kaxyw pār o htýx xà jakà nhūm axrē nē gôx kãm rōrôk pa. Nē pī ho pār o juk xà nhõ xê xàja nhūm mē mããñēn krãhta. Hãmri nē akupým mrar xà hã kupêxê nhõ nhūm kôk ho hikot nē ma gô jakàx wýr o mō. ⁴¹ Nom nhūm pār kormã hakàx pê awry hã mōr ri amnhī to kokwe kura nē pyka nhīmôk ã nō nhūm mē tee ri kot hkaxàr nē akupým gô xupým mã mēnh kaxyw. Nom nhūm gô kot pār nhīxô htak týx kurē nhūm mē ixpê pikrakrak par o mō.

⁴² Jakamã nhūm pōristijaja tee ri omu hãmri nē ra mē kêp prêsje nhīmex kaxyw. Mē kot gôx kãm rōrôk nē gô hipôk wýr hpa ho nana nē mē kêp pikunor pymaj kot mē himex

kaxyw. ⁴³ Nom nhũm mẽ hkrãhtũmja kãm Pawre pĩr prãm kêt jakamã ja nê mẽ hkurê nê mẽ inhmã:

—E mẽ ate apa ho gô rênh mex xwýnhjaja. Akumrêx mra nê mrõ nê ho nana ho mra nê rê. ⁴⁴ No mẽ ate apa ho nana punuj xwýnhjaja kêr ka mẽ tapti rý pàr kukrêx õ mý nê hã ajêt nê hã ma mõn rê. Anê.

Hãmri pa mẽ ã amnhĩ nhĩpêx anê nê ixpiitã ixkã hkĩnh pê ixrêr pa.

28

Gô hipôk pê Maw kamã mẽ pa hã mẽ harênh

Makre 16.17-18

¹ Tã pa mẽ ixpiitã ixkã hkĩnh pê ixrêr pa. Nhũm gô hipôk ã mẽ pa xwýnhjaja mẽ inhmã gô hipôk nhĩxi jarê nhũm xep kêp Maw. ² Nhũm Maw nhõ xwýnhjaja mẽ ixto mex nê. Nhũm axte na wrýk rax nê nhũm kry htýx kumrêx nhũm mẽ ixkamã ukaprĩ nê mẽ inhmã kuto nê mẽ inhmã kapêr mex nê. ³ Hãmri nhũm Pawre kuwy kaxyw ri pĩ kawrà ho mra nê kuwy hwýr o tẽ nê hã haxwýr o xa. Hãmri nhũm kagã xoprê õ wênên xihýtýxja kuwy kagro pymaj pĩ rũm kato nê ìhkra hã kunha nê hã àpêr o ajêt. ⁴⁻⁵ Hãmri nhũm Pawre omu nê amnhĩ nê ho apê nê kuwy kamã kumê nhũm kamã tẽm nê xêt pa. Hãmri nhũm gô hipôk nhõ xwýnhjaja tee ri ja hã omu nê axpẽn mã:

—Kwa ga mẽmyti mũj pumu. Mãn kêp mẽ hpar o pa xwýnh na. Hã na kagã õ wênên xihýtýxta kunha. Nà koja ty nê rĩ amnhĩ pumu. Ra hkã hkĩnh pê gô rũm mẽ pahwýr rêr tã koja tã ty kãm ga. Anê.

⁶ Hãmri nhũm mẽ tee ri kot tanhmã amnhĩ to hã hkamnhĩx nê hamãr o kuhê. à htýx nê ìhkra hikot rý htyk kurê kumrêx ã hkamnhĩx tã nhũm tanhmã amnhĩ kamã hamak to hkêt nê. Âm htýx ri hkĩnh nê kapêr nê hpikunhar o ri mra. Hãmri nhũm mẽ tee ri omu nê axpẽn mã:

—Kwa tanhmã kot amnhĩ tore hã. Kêp mẽ hpar o pa xwýnh kêt. Mãn kêp kaxkwa kamã mẽpahpãmjê hõ nà? Hã na kagã kunha nhũm tanhĩ to hkêt nê. Anê.

⁷ Nhũm gô hipôk ã mẽ õ pahĩti pê Pup-tija. Òrkwý hã jawý jakamã nhũm amnhĩ kôt mẽ ixwý pa mẽ ma hkôt mõ nê kuri hkôt ixpa ho ixtã apkati axkrunêpxi nhũm

mẽ ixto mex nê. ⁸ Nhũm ra Pupti nhĩpêêxà kêp à nê nõ. Kà kagro htýx nê haôk. Hãmri nhũm Pawre hwýr tẽ nê omu nê hã ìhkra xi nê ho Tĩrtũm wý nhũm akupým ho mex kurê kumrêx. ⁹ Hãmri nhũm gô hipôk nhõ xwýnhja harênh ma nê Pawre hwýr mẽ à xwýnh piitã o mra nhũm mẽ omu nê Tĩrtũm nhỹ hã akupým mẽ ho mex pa. ¹⁰⁻¹¹ Hãmri nhũm gô hipôk nhõ xwýnhjaja mẽ ixto mex rax nê.

Pawre axte Rõm wýr nojarêt ã harênh Rõmãn 1.10-12, 15.30-32

Tã pa mẽ gô hipôta kamã ixpa hã mytwrý axkrunêpxi. Hãmri nhũm kôk xàpêr týtýxta hapêx pa mẽ axte inhnojarêt nê ma mõ. Pàr õ kamã hpãnhã mõ. Aresãnrir rũm pàrja pa mẽ hpãnhã kamã mõ. Mẽ kot kãm “sãnti pihpo” anhýr xwýnhhta kamã. Na pre gô hipôk kamã haxwýja kôk xàpêr týtýx hapêx jamãr xa hã hikwý htã ra axte nojarêt. Hãmri nhũm gô hipôk nhõ xwýnhja ma mẽ inhmõr xà hã mẽ inhmã mẽ ixàpkur xà hkwy nhõr rax nê. Hãmri pa mẽ pàr wýr inhgjêx pa nê ma kamã mõ. ¹² Mõõ nê Sirakus wýr pøj nê hã pàr xi. Hãmri nê krĩja kamã mẽ ixtã apkati axkrunêpxi nê axte mõ. ¹³ Mõõ hãmri nê Rekre hwýr pøj nê hã pàr xi. Hãmri nê kamã mẽ ixtã apkati. Nhũm ra kahpa hkôt kôkja kawax pê àpêr mex jakamã pa mẽ ma hkôt mõ. Nê mẽ ixtã apkati axkrut nê Potew wýr pøj nê hã pàr xi. ¹⁴ Hãmri nê pàr rũm ijarpøj nê krĩ kamã Jesus kôt mẽ ixtõ nê htõx kwýjê pumu nhũm mẽ amnhĩ wýr mẽ ixwý. Pa mẽ ma mẽ hkôt mra nê mẽ hkôt ri ixpa hã ixtã ù semãn. Hãmri nê ma Rõm wýr hpãnhã ixpar o mõ. ¹⁵ Hãmri nê kormã amým inhmõr ri nhũm Rõm kãm Jesus kôt mẽ ixtõ nê ixtõxjaja mẽ ijarênh ma nê man mẽ ixkutã mra. Ma krĩ pê Prasxi Apja mẽ “Wên Pijakrunêpxi” anhýr xwýnh jarênhja wa hwýr mẽ ixkutã mra. Hãmri pa mẽ axpẽn kaxpa nhũm Pawre mẽ omu nê hkĩnh nê. Nê mẽ hã Tĩrtũm mã amnhĩ jarê nê kãm:

—Pa Tĩrtũm? Nà âm hãmri na ka mẽ ixkutã jajê rê. Na pa mẽ omu nê ixkĩnh nê. Nà amex o amex Tĩrtũm. Anê.

¹⁶ Hãmri pa mẽ ma mẽ hkôt Rõm wýr mõ nê pøj. Jatã Itar kãm Rõm wýr pøj. Hãmri nhũm pôristi krãhtũm Pawre mã:

—E kot paj mẽ haghênh xà kamã ajaxàr kêt nê. Kot kaj amã nhÿri ixkre kamã apa hprãm nê mamrĩ kamã apa. Nom koja pôristi hõ akôt pa ho pa.

Anhÿr jakamã nhÿm nhÿri ixkre kamã pahihtu Sesti kot mar kaxyw kamã hamak o pa.

Pawre kot Rõm kamã tanhmã amnhĩ nhĩpêx to hã harênh

Atre 17.5-6

¹⁷ Tã nhÿm Pawre Rõm kamã hã apkati axkrunêpxi nê amnhĩ wÿr Ijaew xàptàr tùmrejê hwÿ nhÿm mẽ hã akuprõ nhÿm mẽ kãm amnhĩ jarê nê mẽ kãm:

—E ixkwÿjaja. Pa mẽ amã amnhĩ jarê ka mẽ inhma. Nà na pa pre mẽ panhĩgêjtjê kapêr nhĩrôp tanhmã ixãm to hkêt nê rÿ ixte tanhmã mẽ pahkwÿjê hõ hto hkêt tã nhÿm mẽ pahkwÿjaja amarĩ ixpynê. Jeru-jarê kamã ixpynê nê Rõm nhõ xwÿnhjê nhĩhkram ijaxà. ¹⁸ Hãmri nhÿm mẽ ixte amnhĩ nhĩpêx ã ixkukja nê tee ri mẽ kot mẽmoj mÿrapê ixpĩr kaxyw tanhmã ixkukjêr to kaprÿ. Jakamã nhÿm mẽ kãm ixkator prãm nê. ¹⁹ Nom nhÿm mẽ pahkwÿjaja kãm ja mex kêt jakamã pa pre jar pahĩ maati Sesti kot ixte kãm amnhĩ jarênh ã inhmar kaxyw amnhĩm harê nê man hwÿr mō. Kot paj tanhmã kãm mẽ pahkwÿjê ho ixkapêr punuj to hkêt nê. ãm ixte amnhĩ tã tanhmã mar to hpix kaxyw na pa hwÿr mō.

²⁰ —Tã pa amnhĩ wÿr mẽ awÿ. Ixte mẽ amã amnhĩ jarênh kaxyw. Mẽ pahkaprĩ xwÿnhnta. Mẽ pahte kormã kamã pajamak o papa xwÿnh Jejusta. ãm ixte amnhĩ kaxyw hkôt ijamaxpêr pix mÿrapê na prem ã kàx o ixkaxpre anê. Anê.

²¹ Hãmri nhÿm mẽ kuma nê kãm:

—Nà jar tanhmã ajarênh kute hkêt. Na pre Jutej kamã mẽ pahkwÿjaja tanhmã ajarênh to hã kagà nê mẽ ixwÿr mẽnh kêt nê. Nê ham mẽ kurÿm mẽ hpôx xwÿnhjaja na prem tanhmã mẽ inhmã ajarênh to hkêt nê. ²² No na xep hte pyka piitã hkôt mẽ kãm mẽ ate Jejus kôt amnhĩ xunhwÿr xwÿnhjê kurê nê. Na pa pre mẽ ajarênh ma nê mẽ inhmã axujarênh mar prãm nê. Anê.

²³ Hãmri nhÿm mẽ kot mar kaxyw arĩgro hta.

Tã nhÿm mẽ kot arĩgro hyr kato nhÿm mẽ Pawre nhõrkwÿ hwÿr pikuprõnh rax nê nhÿm mẽ kãm awjarê. Mẽ kãm ujarênh ry nê. Nê ho kamàt. Nê mẽ kãm:

—Nà mẽ pahte amnhĩ wÿr kamã pajamak o papa xwÿnh Jejusta. Kot kaj mẽ atõ amnhĩ kaxyw hkôt ajamaxpêr nê hkôt amnhĩ xãm nhÿm Tĩrtÿm ja hã apumu nê ato hkra. Anê.

Nhÿm pre ã mẽ kãm kapêr anê. Nê finat Mojes kot Tĩrtÿm nhÿ hã Jejus kukamã tanhmã hã kagà htoja nhÿm mẽ kãm harê. Nê Tĩrtÿm nhÿ hã kapêr jarênh o mẽ pa xwÿnhjaja kot tanhmã hã kagà htoja nhÿm mẽ kãm harê. ²⁴ Hãmri nhÿm mẽ hkwÿjaja kuma nê hkôt hamaxpêr nê amnhĩ kaxyw Jejus kôt hamaxpêr nê hkôt amnhĩ xunhwÿ. No nhÿm mẽ hkwÿjaja kuma nê ãm kuma nê kãm axte mar prãm kêt nê.

²⁵⁻²⁹ Jakamã kãnhmã kuhê nê nojarêr nhÿm Pawre mẽ kãm:

—Nà amnepêr na pre Tĩrtÿm finat Ijaisti mã tanhmã kapêr to. ÿ hã kot mẽ panhĩgêjtjê mã tanhmã kapêr jarênh to kaxyw. Tĩrtÿm Karõ nhÿ hã kot mẽ kãm kapêr nê tanhmã mẽ harênh to kaxyw. Te Tĩrtÿm tãm mẽ kãm kapêr pyrãk mẽ kãm kapêr. Nê ãm hãmri tanhmã mẽ pahkwÿjê jarênh to. Na pre mẽ kãm:

E Ijaisti. Kêr ka ma akwÿjê hkôt ri mẽ kãm tanhmã ixkapêr jarênh to ho ri apa.

Nê mẽ kãm: “Kot kaj mẽ ajamak o axumar tÿx tã aprĩ hã ixkapêr mar kêt nê.

Nê mẽ ano ho arĩt tÿx tã aprĩ hã ixte amnhĩ nhĩpêx ã ixpumunh kêt nê.

Mẽ amã ixkapêr mar prãm kêt jakamã te mẽ ate mar pymaj amnhĩ jamak pro pyrãk o amnhĩ nhĩpêx o ri apa.

Nê mẽ amã ixte amnhĩ nhĩpêx ã ixpumunh prãm kêt jakamã te mẽ ate ixte amnhĩ nhĩpêx ã ixpumunh pymaj te mẽ anomnhõt pyrãk o amnhĩ nhĩpêx o ri apa.

Jao amnhĩ kaxyw ixkôt ajamaxpêr kêt nê.

Kop mẽ amã ixkapêr mar prãm ronhÿx ka mẽ aprĩ hã inhmar tÿx nê.

Nê aprĩ hã ixte amnhĩ nhĩpêx ã ixpumunh mex nê.

Jao amnhĩ tomnuj kaga hpa nê ixkôt amnhĩ xunhwÿ.

Pa ja hã mẽ apumu nê mẽ ato mex nê.

Tã ka mẽ ã amnhĩ nhĩpêx anhỹr kêt nẽ.”
 Anhỹr o kêr ka mẽ kãm ixkapêr
 jarênh o ri mẽ hkôt apa Ijaisti. Anẽ.

Na pre ã Tĩrtũm mẽ panhĩgêjtjê kaxyw
 Ijaisti mã kapêr anẽ nhũm ô ri mẽ kãm
 ujarênh o pa nẽ mẽ pamã hã kagà. Jakamã
 kwa mẽ okora. Kêr ka mẽ jajê pyrà
 nẽ ã amnhĩ nhĩpêx anhỹr hkêt nẽ. Kwa
 mẽ inhma nẽ inhmar tỳx nẽ. Ijaew kêt
 xwỳnhjaja kot kapêr marja na ra Tĩrtũm
 kãm hprãm nẽ. Jakamã koja mẽ hwỳr mẽ
 kot kapêr jarênh o mẽ pa xwỳnh kwỳjê rẽ
 nhũm mẽ hkôt mẽ kãm ujarênh o pa nhũm
 mẽ kuma nẽ mẽ akurom kãm mar prãm nẽ.
 Anẽ.

Hãmri nhũm mẽ kuma nẽ hapôx pa nẽ ma
 akupỹm axpên mã tanhmã kapêr jarênh to
 ho mra. ³⁰ Hãmri nhũm pahĩ maati Sesti
 tokyx amnhĩ wỳr Pawre hwỳ nẽ tanhmã
 mar to hkêt nhũm ôrkwỹ kamã kêp prês
 nẽ pa ho hã amgrà axkrut. Nẽ tãm ôrkwỹ
 pãnhã mẽ kãm amnhĩre. Nhũm pre krĩ
 nhõ xwỳnhjaja ohtô nẽ hwỳr mra nhũm
 amnhĩ wỳr mẽ omu nẽ hkĩnh nẽ. ³¹ Na
 pre hte amnhĩ wỳr mẽ kuwỳ nẽ mẽ kãm
 Tĩrtũm kapêr jarênh o hkrĩ. Mẽ kot Tĩrtũm
 Kra Pahĩti Jejus Kris kôt amnhĩ xunhwỳr
 nhũm Tĩrtũm kot ja hã mẽ omunh nẽ amnhĩ
 katut kôt mẽ kot amnhĩ tomnuj rênh par
 nẽ mẽ ho hkra hã mẽ kãm ujarênh o hkrĩ.
 Nẽ mẽ kot hkôt amnhĩ xunhwỳr xwỳnhjê
 jahkre. Tanhmã mẽ kot Jejus kôt amnhĩ
 nhĩpêx mex to ho pa hã mẽ kãm karõ ho
 hkrĩ. Hãmri nhũm mẽhõ ja nẽ tanhmã kãm
 kapêr to hkêt nẽ.

Tã ãm ja pix Teopre. Ixpê Rukre na pa
 awỳr kagàja nhĩpêx nẽ kumẽ. Nẽ kamã amã
 tanhmã mẽ pahkwỳjê jarênh to. Tã ãm ja
 pix na hapêx.

Rômân Pawre kot Rôm kâm Jejus kôt hkwýjê hwýr kagà nê mēnh

Kagà ja na pre Pawre hipêx. Kêp Jejus nhỹ hã mē ahkre ho pa xwýnh na pre. Na pre hte mry kà ho ixkre nhĩpêx nê mē kãm ho wēnê ho mē hkôt pa pê mē piitã mē kãm Tĩrtũm kapêr jarēnh o pa. Tã krĩ pê Rôm kamã mē kot Jejus kôt amnhĩ xunhwýr xwýnhjê hwýr kagàja nhĩpêx nê mē hwýr kumê. Kormã ma mē hwýr mōr nê mē omunh kêt ri.

Nê Jejus kêp Tĩrtũm mã tanhmã mē pajarēnh to xwýnh ã nhũm pre mē kãm harē nê hã kagà. Jejus kot mē pahte amnhĩ tomnuj pãnhã mē panê htyk jakamã na hte Tĩrtũm mē pahte hkôt amnhĩ xunhwýr ã mē pahpumu nê Jejus kukwak ri mē pahte amnhĩ to mex xwýnh ã mē pajarê.

Nê Tĩrtũm Karō nhỹ hã mē kot amnhĩ nhĩpêx nyw nê hamaxpêr nyw o pa hã nhũm Pawre mē kãm karō nê hã kagà. ã na pre mē kãm mēmoj jarē nê hã kagà anê. Nê hã kagà ho:

¹ Pa Rôm nhõ xwýnhjaja? Xà mē amex? E ot pa mē awýr kagà nhĩpêx nê kumê. Tĩrtũm na pre mē akaxyw ixãm. Ixte mē amã Jejus kot tanhmã mē panê amnhĩ nhĩpêx to hã harēnh o ri ixpa kaxyw. Na pre ixpê Pawre hã ixpumu nê ixãm. Jakamã na pa ã mē awýr kagà nhĩpêx nê mēnh anê. Ixte Jejus nhỹ hã mē ahkre ho ri ixpa xwýnh na pa. Na pa hte kãm tanhmã amnhĩ nhĩpêx to ho ri ixpa. Tã ã mē awýr kagà nhĩpêx nê mēnh anê.

² Amnepê m na pre Tĩrtũm nhỹ hã kapêr jarēnh o ri mē pa xwýnhjaja mē pakukamã mē panhĩgêjtjê mã Jejus kukamã tanhmã harēnh to ho ri pa. Nê mē kãm kapêr jarēnh o mē hkôt pa nê mē kãm:

—Koja nhỹrmã Tĩrtũm mē pahpiitã mē panê tanhmã kot amnhĩ nhĩpêx to mã xwýnh mē nhũm mē hpiitã hprĩ hã harēnh ma nê omu. Anê.

Nhũm prem ã Jejus kukamã mē kãm harēnh anhỹr o ri mē hkôt pa. Tĩrtũm kapêr ã kagà htũm kamã harēnh xà hkôt

tanhmã mē kãm harēnh to. ³ Tĩrtũm Kra Jejus Krisja na pre mē kãm harēnh o ri mē hkôt pa. Mē panhõ Pahihti na. Kêp Tĩrtũm Kra htã na pre mē pahpyrà nê ĩ ho amnhĩ nhĩpêx nê wrý nê katorxà nhõxà hkre rũm kato. Jakamã kêp Tĩrtũm Kra pix kêt mãânēn katorxà hkôt kêp higêt Tawi hkanrêhã htãmnhwý.

⁴ Kêp Tĩrtũm Kra htã nhũm prem axtem nê tanhmã hamaxpêr to nê kupĩ. Nom nhũm Tĩrtũm kêp amnhĩ Kra hã akupým ho htĩr. Jakamã na pu htem harēnh ma nê kãm pajamaxpêr o:

—Jesús kêp Tĩrtũm Kraa. Mē kot kêp hpĩr tã nhũm akupým ho htĩr. Jakamã nhũm Tĩrtũm pyrà nê hihtýx o hihtýx. Anê.

⁵ Tã ã Tĩrtũm kot Kra nhĩpêx anhỹrja ri na mãânēn pa ixto mex nê mē akaxyw ixãm. Jakamã na pa hte ma krĩ piitã hkôt mē kãm tanhmã Jejus Kris jarēnh to ho ri mē hkôt ixpa. Ijaew mã nê Ijaew kêt xwýnhjê mã. Mē kot harēnh mar nê amnhĩ kaxyw kãm hamaxpêr nê kapêr kôt pix mã amnhĩ nhĩpêx mex kaxyw. ⁶⁻⁷ Nê mē apê Rôm nhõ xwýnhjaja. Na ka prem Jejus kôt amnhĩ xunhwý nhũm Tĩrtũm ja hã mē apumu nê mē ato hkra nê mē apê Jejus mē wa hkwý hã mē ajarê. Mē ate hkôt amnhĩ nhĩpêx kaxyw nhũm pre ã mē ajarēnh anê.

Tã ot pa kagà nhĩpêx nê mē awýr mēnh kaxyw. Tĩrtũm kot mē ato hkra xwýnhjê hwýr. Tĩrtũm kãm mē ajapêê.

Na pa hte mē ato mē panhĩpêxà maati Tĩrtũm mē Pahihti Jejus Kris wa hwýr rãhã ri ixpa. Nê mē ato wa hwýr o:

—Kwa kêr ka wa Rôm kamã war akrajê pumunh mex nê mē kutã anojarêt rãhã nê. Kê mē hamakêtkati nê àmnhĩx ri tanhmã amnhĩ nhĩpêx to ho ri pa. Anê.

*Pawre kot Rôm nhõ xwýnhjê pumunh
prãm ã amnhĩ jarēnh*

Atre 28.15-16; Rômân 15.22-29

⁸ Nê na ka prem amnhĩ kaxyw Jejus Kris mã ajamaxpêr nê hkôt amnhĩ xunhwý nhũm krĩ piitã hkôt mē pa xwýnhjaja mē ajarēnh ma. Nê mē ate amnhĩ nhĩpêx nyw ã mē ajarēnh ma nê axpēn mã tanhmã mē ajarēnh to ho pa. Nê mē ajarēnh o:

—Kwa na xep Rôm kãm mē hkwýjaja amnhĩ kaxyw Jejus mã hamaxpêr týx nê.

Ně hkôt amnhĩ nhĩpêx mex rãhã ho ri pa. Aně.

Pa ã mẽ kot mẽ ajarēnh anhỹrja ma ně ixkĩnh tỳx ně. Ně Tĩrtũm mã mẽ anhỹ hã ixkĩnh ã amnhĩ jarēnh o ri ixpa. ⁹ Na pa hte mẽ ato hwỳr rãhã ho ri ixpa. Ně nhỹri mẽ kãm Tĩrtũm Kra Jejus kapēr jarēnh o ri ixpa ně mẽ amã ijamaxpēr ně mẽ ato kuwỳ. Ně tanhmã Tĩrtũm mã amnhĩ nhĩpêx to ho ixpa pē mẽ amã ijamaxpēr ně mẽ ato kuwỳ. Tĩrtũm kot ja hã ixpumunh mex. ¹⁰ Na pa hte tanhmã kãm amnhĩ jarēnh to kaxyw ně mẽ akaxyw amnhĩ to kuma ně kãm:

—Pa Tĩrtũm? Na pa ra inhmã ma Rõm wỳr inhmõr ně kamã akôt ixkwỳjê pumunh prãm tỳx kumrêx. Xà kot ka tokyx mẽ hwỳr inhmẽ nà? Aně.

¹¹ Na pa ra inhmã mẽ awỳr inhmõr prãm tỳx ně. Na pre Tĩrtũm Karõ tanhmã ixkrã hto pa ý hã kapēr ã kagà mar tỳx ně. Ně hkôt mẽmoj mex pumunh rax ně. Tã ra inhmã ma mẽ awỳr inhmõr ně amnhĩ xô ri mẽ amã harēnh prãm ně. Mě ate inhmar ně aprĩ hã Jejus Kris kôt amnhĩ xunhwỳr tỳx ně hkôt amnhĩ nhĩpêx mex rãhã ho ri apa kaxyw. ¹² Kot paj nhỹrmã ma mẽ awỳr mō. Ně mẽ awỳr pōj pu mẽ axpēn pumu ně pahkĩnh ně. Mě pahte amnhĩ kaxyw Jejus Kris mã pajamaxpēr mex o papa hã axpēn pumu ně pahkĩnh ně. Ně mẽ pahpiitã hkôt amnhĩ nhĩpêx mex o ri papa.

¹³ E ixkwỳjaja. Xatã ixte mẽ awỳr ixkrã htã nhũm mẽmoj xatã tanhmã ixpê àmtàr to pa kormã jar ixpa. Nom kot paj nhỹrmã ma mẽ awỳr mō. Mě ate ja hã inhmar kaxyw na pa ã Tĩrtũm noo mã mẽ amã amnhĩ jarēnh aně. Na pa pre krĩ hkwỳ kamã mẽ apē Ijaew kêt xwỳnh kwỳjê hwỳr ixpa. Ně mẽ kãm Jejus kot mẽ panē tanhmã amnhĩ nhĩpêx to hã harēnh o ri mẽ hkôt ixpa. Nhũm mẽ hkwỳjaja inhma ně hkôt amnhĩ xunhwỳ. Ja kaxyw na pa inhmã ma mẽ anhõ krĩ hwỳr inhmõr prãm ně. Mě akwỳjaja kot ixkapēr mar ně mẽ apyrà ně Jejus kôt amnhĩ xunhwỳr kaxyw. ¹⁴ Na pre ra Tĩrtũm ixte kapēr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwỳnhjê kaxyw. Mě kãm ma ho mẽ pa xwỳnhjê mẽ mẽ kãm ma hkêt o mẽ pa xwỳnhjê mã. Ně mẽ kot kagà pumunh xwỳnhjê mẽ mẽ kot kagà pumunh

kêt xwỳnhjê mã. Mě piitã mẽ kaxyw na pre ixãm. Ixte mẽ kãm Jejus kot tanhmã mẽ panē amnhĩ nhĩpêx to hã harēnh o ri mẽ hkôt ixpa kaxyw. ¹⁵ Jakamã na pa ra inhmã mẽ apē Rõm nhõ xwỳnhjê hwỳr inhmõr prãm ně. Ixte mẽ anhõ krĩ kamã mẽ piitã mẽ kãm ja jarēnh o ri ixpa nhũm mẽ kot inhmar ně mẽ pahpyrà ně Jejus kôt amnhĩ xunhwỳr kaxyw.

*Jejus kot mẽ panē htyk ã harēnh
Sikũn Ximotre 1.6-12*

¹⁶ Ně Jejus kot mẽ panē htyk ã harēnhja ãm hãmri na. Harēnhja mex o mex. Na htem kuma ně kãm hamaxpēr ně amnhĩ kaxyw hkôt hamaxpēr ně hkôt amnhĩ xunhwỳ. Hãmri nhũm Tĩrtũm ja hã mẽ omu ně mẽ nē mẽ kot amnhĩ tomnuj o hapêx pa ně mẽ ho hkra. Nom mẽ ixpê Ijaew nhõ xwỳnhjê pix kêt. Mãânēn mẽ apē Ijaew kêt xwỳnhjaja nhũm kãm mẽ pajapê ho axpēn pyràk. Jakamã na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu ně mẽ pahto hkra. Ja kaxyw àhpumunh tỳx o àhpumunh tỳx. ¹⁷ ãm mẽ kot amnhĩ kaxyw Jejus mã hamaxpēr xwỳnh pixjaja na hte mẽ ho hkra. Kapēr ã kagà htũm kot tanhmã ja jarēnh to ně harēnh kot:

Na hte Tĩrtũm mẽ kot amnhĩ kaxyw Kra mã hamaxpēr ã mẽ omunh xà hkôt mẽ ho hkra nhũm mẽ amnhĩ kaxyw kãm hamaxpēr rãhã ho pa. Jao ra ô ri tãm amnhĩ nhĩpêx o pa. Aně.

*Mě pahpiitã mẽ pahte amnhĩ tomnuj
xwỳnh ã mẽ pajarēnh*

Atre 14.15, 17.22-29; Apokarip 9.20-21

¹⁸ Ně mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harēnh to. Na htem Tĩrtũm kapēr ma nom amnhĩ tomnuj gryk ã ãm kuma. Ně mẽ hkwỳjaja kot kapēr mar pymaj kapēr õ ho mẽ kēp àmnàr rãhã ho ri pa nhũm Tĩrtũm ja hã mẽ omu nhũm ja kēp omnuj ně. ¹⁹⁻²⁰ Te mẽ kot Tĩrtũm kot amnhĩ nhĩpêx ã omunh kêt pyràk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrit mex. Pu mẽ pano ho omunh kêt tã no ãm kot amnhĩ nhĩpêx kôt ra kēp Tĩrtũm ã omunh mex ně. Ně kēp mẽmoj piitã ho kator xwỳnh

ã omunh mex nê. Nê mex o mex ã omu nê hihtÿx o hihtÿx hã omu. Tîrtÿm kot amnhî nhîpêx kot amnhîrît mex nhÿm mē kot omunh mex tã hkôt amnhî xunhwÿr kêt nê. Nê axtem nê hamaxpêr o:

–Tk. Tîrtÿm kot inhmã amnhî to amnhîrîtrea hã kot pa kêt ri hkôt amnhî nhîpêx. Kot pa inhno ho omu nê rî kormã hkôt amnhî nhîpêx japêr. Anê.

Ra mē kot amnhî nhîpêx ã omunh mex tã ri ã hamaxpêr anê. Jakamã nhÿm Tîrtÿm tee ri ja hã mē omu nhÿm ja kêp omnuj tÿx nê. ²¹ Mē kot amnhî nhîpêx ã omunh mex tã amnhî kaxyw tanhmã kãm hamaxpêr hto hkêt. Rÿ arî hamaxpêr japêr nê kãm:

–Nà Tîrtÿm. Æm hãmri amex kumrêx. Æm amex o amex. Apê Tîrtÿm ã Æm apixi mex kumrêx na ka. Æm hãmri na ka hte mē ixto mex o apa.

Anhÿr o amnhî kaxyw kãm kapêr kêt nê. Nê Æm htÿx tanhmã hamaxpêr punuj to pix o ri pa. Te kamàt kô kamã ri mē pa xwÿnhjê kot amnhî nhîpêx pyrã nê mēmoj mex pumunh kêt nê.

²² Mē kot àhpumunh tÿx ã amnhî to jarkrar o ri pa htã no Æm te mē hkrã kanhîn kêt nê mē hamaxpêr kêt pyrãk o amnhî nhîpêx. ²³ Jakamã na htem amnhîm mēmo karô nhîpêx. Mēmo htyk mã xwÿnhjê hõ karô nhîpêx. Tanhmãn panhî karô rÿ mēmo mry karô rÿ mēmo kuwênh karô. Rÿ mēmo kagã karô nhîpêx. Hãmri nê ho õ sãnti nê te ri ho Tîrtÿm nhîpêx pyrãk o hipêx. Jao hpar pê hkõn krã ho rôrôk nê amnhî to kuwÿ nê kãm amnhî jagrer pê kãm mex o mex ã harê. Tîrtÿmja sãnti rom htîr o htîr tã nhÿm mē axtem nê sãnti gryk ã hkaga nê ã amnhî nhîpêx o pa anê.

²⁴ Jakamã nhÿm tee ri ã mē kot amnhî nhîpêx anhÿr ã mē omu nê amnhî pyrã nê mē hkaga nê Æm mē omu. Jakamã nhÿm mē Æm amnhî krã hkôt tanhmã ri amnhî tomnuj to ho pa. Nê axpên kãm ri tanhmã hpijaàm kêt to. Æ na htem htÿx ri amnhî tomnuj anhÿr o pa.

²⁵ Tîrtÿm kapêrja Æm hãmri htã nhÿm mē axtem nê te amnhî pum rênh pyrãk o hipêx nê kãm hamaxpêr kêt nê. Nê hpãnhã ri mē hêx xwÿnhjê kapêr pix ma nhÿm ja te mē kãm mex pyrãk. Na htem ã amnhî nhîpêx anê hãmri nê axtem nê Tîrtÿm kot

mēmoj nhîpêx pix parpê rôrôk nê amnhîm mex o mex ã harê. Nom kot hipêx xwÿnh Tîrtÿm parpê mãn ã amnhî nhîpêx anhÿr kêt nê. Nom kot mēmoj nhîpêx xwÿnhhta mex o mex jakamã koja mē kot hkôt amnhî nhîpêx xwÿnhjaja jajê rom kãm mex o mex ã harênh tÿm rãhã ho ri pa. ²⁶ No mē kot amnhî tomnuj xwÿnhjaja na hte Tîrtÿm amnhî pyrã nê mē hkaga nhÿm mē htÿx amnhî krã hkôt ri tanhmã amnhî tomnuj to ho ri pa. Jao mēni hkwyjaja axtem nê axpên gryk ã mjên kaga nê axpên nhîõ ho mjên. ²⁷ Nhÿm mēmy hkwyjaja mãânên axtem nê amnhî kwÿjê my gryk ã hprô kaga nê axpên nhîõ ho hprô. Na htem ã axpên kamã hpijaàm kêt o pa anê. Mÿrapê koja mē à pix kãm amnhî xà htÿx kamã hamak o pa. ²⁸ Na htem amnhî tomnuj gryk ã Tîrtÿm mã hamaxpêr kêt nhÿm tee ri amnhî tã mē omu nê hamaxpêr o:

–Mē kãm amnhî tomnuj pix prãm jakamã kwâr mē mãmrî ã amnhî nhîpêx anê. Kot paj axte ja nê tanhmã mē kãm ixkapêr to hkêt nê. Anê.

Jakamã nhÿm mē arî htÿx ri amnhî krã hkôt tanhmã amnhî tomnuj to ho ri pa rãhã nê.

²⁹ Hãmri nê mēmoj punuj pix mã hamaxpêr.

Nê kãm amnhî mex pix prãm mã hamaxpêr.

Nê kãm axpên tomnuj pix prãm.

Nê mēmoj tã axpên kãm gryk pix prãm.

Nê mē kãm axpên par pix prãm.

Nê mēmoj tã ri kãm axpên mã àkjêr prãm.

Nê mēmoj tã kãm axpên mã hêx prãm.

Nê kãm axpên kaxyw tanhmã hamaxpêr punuj to pix prãm.

Nê kãm tanhmã axpên to kapêr punuj to pix prãm.

³⁰ Nê kãm mēmoj tã axpên to hêx pix prãm.

Nê kãm Tîrtÿm prãm kêt o ri pa.

Nê mēmoj tã axpên mã àkjêr o ri pa.

Nê mēmoj tã amnhî to jarkrar rãhã ho ri pa.

Nê tanhmã amnhî tomnuj to pix kukamã hamaxpêr. Nhÿm mē katorxà nê mē hipêêxã tee ri ja nê tanhmã mē kãm kapêr to no nhÿm mē mar kêt kumrêx.

³¹ Ā mẽ kot amnhĩ nhĩpêx anhÿr o ri mẽ pa xwÿnhjaja na hte Tĩrtũm kãm mẽmoj mex nhũm mẽ kêp omnuj nẽ nhũm Tĩrtũm kêp mẽmoj omnuj nhũm mẽ kãm mex nẽ. Nẽ axpẽn mã mẽmoj tanhmã ho hã amnhĩ jarẽnh tã ho anhÿr kêt nẽ. Nẽ axpẽn kãm ukaprĩ ho ri pa hkêt nẽ. ³² Tĩrtũm kapêr ã kagà htũm kot tanhmã mẽ hkukamã mẽ harẽnh to nẽ mẽ harẽnh kot:

Ā mẽ kot amnhĩ nhĩpêx anhÿr o ri mẽ pa xwÿnhjaja koja mẽ nhÿrmã ty hãmri nẽ amnhĩ xà htÿx kamã hamak rãhã ho ri pa ho pa. Anẽ.

Nhũm mẽ kot amnhĩ tã ja mar tÿx tã aa amnhĩ tomnuj kaga hkêt nẽ. Arĩ ã amnhĩ nhĩpêx anhÿr o pa rãhã nẽ. Nhũm mẽ hkwyjaja mẽ kot amnhĩ tomnuj ã mẽ omu nẽ mẽ urak nẽ ã amnhĩ nhĩpêx anhÿr o ri mẽ hkôt pa nhũm mẽ amnhĩ pyrã nẽ mẽ omu nẽ hkĩnh nẽ. Na htem ã amnhĩ nhĩpêx anhÿrja gryk ã Tĩrtũm kaga nhũm tee ri amnhĩ tã mẽ omu nẽ amnhĩ pyrã nẽ mẽ hkaga nẽ ãm mẽ omu. Jakamã nhũm mẽ amnhĩ tomnuj tÿx pix rãhã ho pa.

2

Mẽ kot amnhĩ tomnuj xwÿnhjê hkukamã mẽ harẽnh

Matêwre 7.1-5; Sikũn Tesarõn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Nẽ kot ka mẽ atõ ã mẽ kot amnhĩ tomnuj anhÿr xwÿnhjê kot amnhĩ nhĩpêx ã mẽ harẽnh ma nẽ ã ajamaxpêr anẽ nẽ ajamaxpêr o:

–Tk. Mẽ kot amnhĩ tomnuj pix o ri pa xwÿnh kênã. No pa na ã ixte amnhĩ nhĩpêx anhÿr o ri ixpa hkêt. Mẽ kurom ixte tãm amnhĩ nhĩpêx o ri ixpa xwÿnh na pa.

Anhÿr o amnhĩ jarẽ. Kwa nà mẽ ã ajamaxpêr anhÿr kêt nẽ. Mẽ pajaxwÿja na pu htem tõhã mẽ urak nẽ tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harẽnh anẽ nẽ te ka ate amnhĩ jarẽnh pyrãk. ² Tĩrtũm kapêr ã kagà htũm kot mẽ kot amnhĩ tomnuj o ri mẽ pa xwÿnhjê jarẽnh kot:

Mẽ kot amnhĩ tomnuj mÿrapê koja mẽ nhÿrmã amnhĩ xà htÿx kamã hamak rãhã ho ri pa. Anẽ.

Ām hãmri ã mẽ harẽnh kot anhÿr. ³ Mãn ka mẽ atõ tanhmã amnhĩ kukamã ajamaxpêr to nẽ ajamaxpêr o:

–Nà koja Tĩrtũm nhÿrmã amnhĩ nẽ kuwy hwÿr mẽ kot amnhĩ tomnuj xwÿnhjê rẽ. No pa koja hwÿr inhmẽnh kêt nẽ. Anẽ.

Kwa mẽ ã ajamaxpêr anhÿr kêt nẽ. Kot ka mẽ ã amnhĩ kukamã ajamaxpêr anhÿr tã tõhã mẽ urak nẽ tanhmã amnhĩ tomnuj to. Jakamã koja Tĩrtũm mẽ urak nẽ hã tanhmã mẽ ato. ⁴ Kot kaj mẽ atõ tanhmã amnhĩ tomnuj to hãmri nẽ ãm ja hã amnhĩ pumu nẽ ajamaxpêr o:

–Ixte amnhĩ tomnuj xwÿnh tã na hte Tĩrtũm ja hã ixpumu nẽ ãm ixpumu nẽ hã tanhmã ixto hkêt nẽ. Kêp mẽ ixkamã ukaprĩ xwÿnh jakamã na hte gryk tokyx anhÿr kêt nẽ. Jakamã kot paj arĩ tanhmã amnhĩ tomnuj to ho ri ixpa nẽ aa jam inhÿrer kêt nẽ. Tĩrtũm kot ja hã tanhmã ixtore kaxyw hã.

Anhÿr o ajamaxpêr. No ãm ja kot anhÿr kêt. Na hte Tĩrtũm kormã amnhĩ tã mẽ pajamã. Mẽ pahte amnhĩ tomnuj kaga nẽ hpãnhã hkôt amnhĩ xunhwÿr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nẽ.

⁵ Mẽ akrã hihtÿx jakamã mẽ amã hkôt amnhĩ xunhwÿr prãm kêt. Na ka htem tanhmã amnhĩ tomnuj to pix kukamã ajamaxpêr o ri apa. Nẽ gaa nẽ ra anhÿr kumrêx. Nhũm Tĩrtũm tee ri ja hã mẽ apumu nhũm ja kêp omnuj tÿx o mõ. Jakamã koja nhÿrmã tanhmã mẽ ajarẽnh to nẽ gryk tÿx kãm tanhmã mẽ atomnuj tÿx to. Ām hãmri na hte mẽ pahte amnhĩ nhĩpêx ã mẽ pahpumunh xà hkôt ahpÿnhã tanhmã mẽ panhĩpêx to.

⁶ Koja nhÿrmã mẽ pahpiitã kormã mẽ pahpũr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwÿnhjaja nhũm mẽ ho mex nẽ. Nẽ mẽ kot amnhĩ tomnuj o ri mẽ pa xwÿnhjaja nhũm mẽ homnuj nẽ. Koja nhÿrmã mẽ pahpiitã mẽ pahto hpimràatã ã mẽ panhĩpêx anẽ. ⁷ Mẽ kot hkôt tãm ri amnhĩ nhĩpêx o pa pẽ kãm Tĩrtũm kot amnhĩm mẽ mex ã mẽ harẽnh prãm xwÿnhjaja koja nhÿrmã amnhĩm mẽ mex ã mẽ harẽ. Hãmri nhũm mẽ kuri htĩr

tùm nê hkînh nê mex kumrêx nê pa ho pa. ⁸ Nom mẽ kot amnhî mã pix mã ri hamaxpêr o ri mẽ pa xwýnhjaja. Nê mẽ kot tanhmã amnhî tomnuj to gryk ã Tirtùm kapêr kaga xwýnhjaja koja kãm mẽ hkînh kêt nê tanhmã mẽ homnuj tỳx to. ⁹ Mẽ kot amnhî tomnuj xwýnh piitã koja mẽ nhỹrmã amnhî xà htỳx kamã hamak rãhã nê pa ho pa. Ijaew kumrêxjaja nê hpãnhã Ijaew kêt xwýnhjaja nhũm mẽ amnhî xà htỳx kamã hamak rãhã nê pa ho pa. Mẽ kot amnhî tomnuj tỳx o paja mỳrapê.

¹⁰ No kêt tãm mẽ kot amnhî nhĩpêx xwýnhjaja koja Tirtùm mẽ ho mex rax rãhã ho pa ho pa. Nê amnhĩm mẽ kot amnhî to mex xwýnhjê hã mẽ harê. Nê tanhmã mẽ ho mex to nhũm mẽ kamã amnhî krit nê pa ho pa. Hamakêtkati nê hkînh nê àmnhĩx ri pa ho pa. Ijaew kwỳ kumrêxjaja nê mããnên Ijaew kêt xwýnh kwỳjaja nhũm mẽ mex nê hamakêtkati nê hkînh nê àmnhĩx ri pa ho pa. ¹¹ Koja Tirtùm nhỹrmã ahpýnhã mẽ pahte amnhî nhĩpêx ã mẽ pahpumunh xà hkôt tanhmã mẽ pajarênh to pê tanhmã mẽ panhĩpêx to. Mẽ ixpê Ijaewjaja nê mẽ apê Ijaew kêt xwýnhjaja nhũm ã mẽ pahpiitã mẽ panhĩpêx anê.

¹² Amnepê m na pre finat Mojes mã tanhmã kapêr to nhũm kuma nê ô ri hã kagà hpa. Mẽ ixpê Ijaew ri na kapêr ã kagàja. Ra mẽ ixte mar tỳx jakamã koja mẽ ixtô ra kapêr mar tỳx tã hkôt amnhî nhĩpêx kêt hãmri nhũm Tirtùm tee ri amnhî tã omu nê ã amnhî nhĩpêx anhỹrja mỳrapê nhỹrmã ma mẽ kot amnhî xà htỳx kamã hamak tùm xàta wỳr kumê. Kot kapêr mar tỳx tã hkôt amnhî nhĩpêx kêt mỳrapê nhũm ã hipêx anê. No kêt mẽ apê Ijaew kêt xwýnhjaja mẽ ixkĩnhã mẽ ari Tirtùm kapêr ã kagà hkêt jakamã koja mẽ ate kapêr nhĩrôp mẽ akuhê hã mẽ apumunh kôt tanhmã mẽ anhĩpêx to hkêt nê. Koja hpãnhã mẽ ate tanhmã amnhî tomnuj to ho apa mỳrapê mẽ kot amnhî xà htỳx kamã hamak o pa tùm xàta wỳr mẽ arê.

¹³ Na hte mẽ kot kapêr mar ã mẽ omunh xà hkôt amnhĩm mẽ kot amnhî to mex xwýnh ã mẽ harênh kêt nê. ãm mẽ kot kapêr kôt amnhî nhĩpêx ã mẽ omunh xà hkôt pix mã na hte amnhĩm mẽ kot amnhî

to mex xwýnh ã mẽ harê. ¹⁴ No mẽ hkwyjaja kormã kot kapêr mar kêt tã te ra mẽ kot mar mex pyræk o amnhî nhĩpêx. Jao amnhî krã hkôt tãm ri amnhî nhĩpêx kurê kumrêx. Te kot Ijaew pyrà nê Tirtùm kapêr mar tỳx nê hkôt amnhî nhĩpêx o ri pata pyræk. ¹⁵ Na htem amnhî krã hkôt tanhmã amnhî nhĩpêx mex to. Te Tirtùm kapêr kot mẽ hkrãm gjêx pyræk o amnhî nhĩpêx o pa. Jakamã tee ri tanhmã amnhî tomnuj to hã amnhî pumu nê hkaprĩ nê. Nê tãm amnhî nhĩpêx ã amnhî pumu nê hkînh nê.

¹⁶ Tã koja nhỹrmã Tirtùm Jejus Kris mã anê nhũm kuma hãmri nê mẽ piitã kormã mẽ htĩr ri tanhmã mẽ kot amnhî nhĩpêx to hã mẽ omunh xà hkôt tanhmã mẽ harênh to. Nê mẽ hamaxpêr kôt mẽ omunh mex xà hkôt tanhmã mẽ harênh to. Mẽ papa-jaja mẽ pahte axpên jamaxpêr kôt axpên pumunh kêt tã Jejus kot mẽ pajamaxpêr kôt mẽ pahpumunh par.

Tã na pa hte mẽ kãm Jejus kot tanhmã amnhî nhĩpêx to hã harênh o ixpa pê ã mẽ kãm ixujarênh anhỹr o ri ixpa.

*Pawre kot hkwyjê mã kapêr
Rômân 3.19-20*

¹⁷ Nê ixpyrà nê mẽ apê Ijaew kwỳjaja na ka mẽ axtem nê Ijaew kêt xwýnhjê mã tanhmã amnhî to jarkrar o ri apa nê mẽ kãm:

—Nà mẽ ixpê Ijaew ri Tirtùm kapêr ã kagà jakamã ãm mẽ papxipixjaja na hte Tirtùm amnhĩm mẽ inhmex ã mẽ ijarê. Nê ãm mẽ papxipixjaja na hte mẽ ixto hkra. ¹⁸ Nê mẽ papxipixjaja na mẽ ixte Tirtùm kãm hprãm xà hkôt mẽmoj pumunh par nê mẽ kot amnhî to mex xà pumunh par nê mẽ kot amnhî tomnuj xà pumunh par. Mẽ apê Ijaew kêt xwýnhjê rom mẽ ixte mẽmoj piitã omunh par kumrêx. Anê.

¹⁹⁻²⁰ Nê amnhî jarênh o:

—Nà te mẽ ixpê mẽ nohkre xwýnhjê pa hã mẽ hamýnh nê ri mẽ ho ixpa xwýnh pyræk. Jakamã Ijaew kêt xwýnh pê htỳx ri mẽ pa xwýnhjaja na pa htem mẽ kãm Tirtùm kapêr tùm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kênã.

21 Anhÿr ã amnhĩ jarēnh nē mẽ ate kapēr o mẽ ahkre ho apa htã hkôt amnhĩ nhĩpēx kêt nē.

Nē mẽ ate mẽ kot axpēn pē àhkĩnh nē mẽ hkurē htã no ãm mẽ kamjaja axpēn pē axàhkĩnh o ri apa.

22 Nē mẽ amã sãnti hkĩnh kêt ã amnhĩ jarēnh tã axtem nē hwÿr agjē nē hpar pē kàxpore nhĩkwÿ xwÿnh o axàhkĩnh o ri apa.

Nē mẽ kot axpēn prō ho amnhĩkati nē mẽ hkurē ho apa htã mẽ kamjaja ã ri amnhĩ nhĩpēx anhÿr o ri apa.

23 Nē mẽ ate Tĩrtũm kapēr ã kagà mex o mex ã harēnh tã hkôt amnhĩ nhĩpēx hkêt nē. Jakamã nhũm mẽ akwÿjaja ja hã mẽ apumu nē mẽ apyrà nē Tĩrtũm ã hpijaam kêt o pa.

24 Tĩrtũm kapēr ã kagà htũm kot tanhmã mẽ ate amnhĩ nhĩpēx ã mẽ ajarēnh to nē mẽ ajarēnh kot:

Mē kēp Ijaew kêt xwÿnhjaja na htem Ijaew kot htÿx ri amnhĩ nhĩpēx o ri mẽ pa hã mẽ omu nē mẽ ÿ hã tanhmã Tĩrtũm o kapēr punuj to ho ri pa. Anē.

25 Mē pahpē Ijaew na pu htem mẽ pahkrajaja mẽ hapōx kôt kormã mẽ hkryre ri pu htem mẽ kēp mẽmy kwryt kà jakà. Finat Mojes kot Tĩrtũm nhÿ hã mẽ panhĩgētjē mã hã karō xà hkôt na pu htem ã mẽ hipēx anē. Mē pahte Tĩrtũm mã mẽ pahkrajē nhōr ã amnhĩ to amnhĩrĩt kaxyw. Jakamã na pu htem arĩ Mojes kapēr kôt ã mẽ hipēx anē nhũm Tĩrtũm kãm ja mex nē. Nom kot pu mẽ kapēr kwÿm ri tanhmã amnhĩ nhĩpēx to ho papa nhũm ja kēp omnuy tÿx nē hãmri pu mẽ tee ri mẽ pahkrajē my kwryt kà jakàr kapry. Na hte Tĩrtũm ã mẽ pahkrajē nhĩpēx anhÿr ã mẽ pahpumunh kôt amnhĩm mẽ pamex ã mẽ pajarēnh kêt nē. Nom mẽ pahte kapēr kôt amnhĩ nhĩpēx mex o papa pē mẽmy kwryt kà jakàrja nhũm kãm mex nē. 26 Ijaew kêt xwÿnhjaja kot ã mẽ hkrajē nhĩpēx anhÿr kêt tã ra mẽ hkwyjaja Tĩrtũm kapēr ma nē hkôt amnhĩ nhĩpēx o ri pa. Jao te mẽ kot amnhĩ my kwryt kà jakàr pyràk o amnhĩ nhĩpēx. Jakamã nhũm Tĩrtũm ja hã mẽ omu nē mẽ kãm:

—Nà ãm hãmri. Mē ate amnhĩ my kwryt kà jakàr kêt tã mẽ apē ixkra na ka mẽ. Anē.

27 Mē kot amnhĩ jakàr kêt tã Tĩrtũm kapēr kôt amnhĩ nhĩpēx mex o ri pa nhũm amnhĩ tã mẽ omu nē mẽ arom amnhĩm mẽ kot amnhĩ to mex xwÿnh ã mẽ harē. Mē kot amnhĩ jakàr kêt tã.

No mẽ kajaja mẽ ate Tĩrtũm nhÿ hã Mojes kapēr ã kagà mar tÿx tã hkôt amnhĩ nhĩpēx kêt nē. Ja mÿrapē koja ja hã mẽ apumu nē Ijaew kêt xwÿnhjē kĩnhã mẽ ate amnhĩ tomnuj xwÿnh ã mẽ ajarē. Ra mẽ ate amnhĩ jakàr tã mẽ ate amnhĩ tomnuj xwÿnh ã mẽ ajarē.

28 Nē kot ka mẽ atō tanhmã amnhĩ to jarkrar to nē amnhĩ jarēnh o:

—Nà ixpē Ijaew jakamã na hte Tĩrtũm mẽ kot inhmy kwryt kà krãhyr kôt ixto kraa. Anē.

Nom xà na hte Tĩrtũm ã mẽ pahte amnhĩ nhĩpēx anhÿr ã mẽ pahpumunh kôt mẽ pahto hkra? Nà kot anhÿr kêt. Na htem ãm htÿx ã amnhĩ to jarkrar anhÿr kapry ho pa.

29 Nē Tĩrtũm Karō kot mẽ hkarō mã gjēx xwÿnhjaja kēp Tĩrtũm kra jakamã na htem Tĩrtũm kãm hprãm xà hkôt amnhĩ nhĩpēx. Nom ri amnhĩ krã hkôt tanhmã amnhĩ nhĩpēx to ho pa hkêt nē. Rÿ htÿx hamaxpēr o:

—Nà kot paj Mojes kapēr ã kagà hkôt amnhĩ nhĩpēx nhũm Tĩrtũm ja hã ixpumu nē amnhĩm inhmex ã ijarē nē ixto hkra.

Anhÿr o hamaxpēr kêt nē. Na htem hamaxpēr o:

—Nà ra Tĩrtũm Karō kot ixkarōm àr jakamã ixpē hkra nhũm amnhĩm inhmex ã ijarē. Jakamã kot paj ãm kôt pix mã ri amnhĩ nhĩpēx o ri ixpa rãhã ty. Kwãr mãmrĩ ixkwÿjaja amnhĩm inhmex kêt ã ijarē. Anē.

Kēr ka mẽ ã ajamaxpēr anhÿr o ri pa. Æ mẽ hamaxpēr anhÿr na mex o mex.

3

1 Nē mãn ka mẽ ra tee ri tanhmã amnhĩ kukamã ajamaxpēr to nē ajamaxpēr o:

—Kwa mo kaxyw na pa ixpē Ijaew? Mon pa pre we ixpē Ijaew kêt nē? Mē kēp Ijaew kêt xwÿnhjaja kot amnhĩ jakàr kêt tã nhũm Tĩrtũm mẽ pahpyrà nē mẽ ho hkra. Anē.

Kwa mẽ ã ri ajamaxpēr anhÿr kêt nē.

2 Mē pahpē Ijaew na pre Tĩrtũm Ijaew kêt xwÿnhjē rom mẽ pahto mex rax nē. Na pre amnepē mã mẽ panhĩgēt mã tanhmã

kapêr to. Mě pahpiitã mẽ pahte mar nê hkôt amnhĩ nhĩpêx kaxyw. Nom Ijaew kêt xwýnhjê nhĩgêť mã ã kapêr anhýr kêt nê. Æm mẽ pahpê Ijaew nhĩgêť pix mã kapêr. Jakamã mẽ pahpê Ijaew mã ja mex kumrêx. ³ Nom kot kaj mẽ atõ ja ma nê ajamaxpêr o:

—Nà Tĩrtũm kot mẽ ixto mex mã mẽ ixtã amnhĩ jarênh tã no nhũm xep mẽ inhĩgêť kwýjaja hkôt amnhĩ nhĩpêx kêt nê. Na xep prem kapêr kwým ri amnhĩ tomnuj o pa. Jakamã ko. Koja Tĩrtũm mẽ ixpê mẽ hkanrêhã mẽ htãmnhwýjaja tanhmã mẽ ixto mex to japêr ko. Anê.

⁴ Kwa mẽ ri ã ajamaxpêr anhýr kêt nê. Tĩrtũm na hte mẽ pahpiitã mẽ pakurom mẽmoj tã amnhĩ jarênh o hêx kêt nê. Tã ra kot tanhmã mẽ pahtã amnhĩ jarênh to xà hkôt koja ã mẽ pahto mex anê. Kapêr ã kagã htũm kot mẽhõ tanhmã Tĩrtũm mã kapêr to nê harênh kot:

Pa Tĩrtũm. Nà ãm kapxipix na ka hte mẽmoj tã amnhĩ jarênh xà hkôt amnhĩ nhĩpêx o ri apa.

Jakamã na htem ãm axpên mã axêx ã akapêr ã ajarênh kaprý. Anhýr o harê.

⁵ No kot ka mẽ atõ atýx ajamaxpêr nê ajamaxpêr o:

—Xà koja Tĩrtũm tanhmã mẽ ixte amnhĩ tomnuj to hã mẽ ixpumu nê gryk? Nà koja gryk kêt nê. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nê ixrom Tĩrtũm tapxipix kot amnhĩ to mex o pa xwýnh ã harênh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tĩrtũm pix mã mãn kot tãm amnhĩ nhĩpêx xwýnh ã harê. Hãmri nhũm Tĩrtũm amnhĩ tã ixpumu nê tanhmã ixto hkêt nê. Koja tanhmã ixto japêr hãmri nê ixpyrà nê amnhĩ tomnuj nê. Anê.

Kot kaj mẽ ã ajamaxpêr anê nê ãm amnhĩ krã hkôt ã ajamaxpêr anhýr kaprý. Nom ã ajamaxpêr anhýrja Tĩrtũm jamaxpêr kôt kêt. ⁶ Kwa mẽ ri ã ajamaxpêr punuj anhýr kêt nê. Tĩrtũm kot mẽ pahpyrà nê aa kot amnhĩ tomnujre hã. Kop ãm mẽ pahpyrà nê tanhmã kot amnhĩ tomnuj to ronhýx tanhmã kot we amnhĩ to nê mẽ pahte amnhĩ tomnuj xwýnh ã mẽ pajarê? Nhýx

mě pahpyrà nê ã amnhĩ jarênh anê. Nà ã mẽ ajamaxpêr anhýrja mex kêt.

⁷⁻⁸ E pa ixprĩ hã mẽ amã ja jarê ka mẽ inhma. Kot kaj mẽ atõ amnhĩ kukamã ajamaxpêr o:

—E kot paj mãmrĩ ri mẽmoj tã ixêx o ri ixpa kê mẽ ixêx nhi hã ixpumu nê ixrom Tĩrtũm pix mã mãn kot amnhĩ to mex ã harê. Nê ãm pix mã mãn hêx kêt xwýnh ã harê. Hãmri nhũm Tĩrtũm amnhĩ tã ixpumu nê mẽ ã mẽ kot harênh anhýrja ma nhũm ja kãm mex nê nhũm hkĩnh nê. Jakamã ixêx o ri ixpaja ã tanhmã ixto hkêt nê. Ra mẽ kot ixrom tãm kot amnhĩ nhĩpêx o pa xwýnh ã harênh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer kêt nê. Kê kê mẽ ja hã ixpumu nê ixrom Tĩrtũm tapxipix kot amnhĩ to mex xwýnh ã harê.

Anhýr o ajamaxpêr nom mẽ ajamaxpêrja kot anhýr kêt. Na hte akwýjaja pa ixpê Pawre ixêx o ixpa hã ri axpên mã ijarê no na pa hte ixêx o ri ixpa hkêt nê. Æ mẽ ajamaxpêr anhýr o ri apa xwýnhjaja koja Tĩrtũm mẽ atomnuj týx nê kãm ga.

Mě mẽ pahte amnhĩ tomnuj xwýnh ã mẽ pajarênh

Wam Korĩť 6.9; Karatas 3.22; Xitre 3.3

⁹ Tã tanhmã kot puj mẽ pahpê Ijaew amnhĩ jarênh to? Xà kot pu mẽ pahte amnhĩ to mex o Ijaew kêt xwýnhjê jakrenh ã amnhĩ jarê? Nà mẽ pahte ã amnhĩ nhĩpêx anhýyre hã. Mě pahpê Ijaew nê Ijaew kêt xwýnhjaja. Mě pahpiitã mẽ pahte amnhĩ tomnuj o axpên pyràk. Na pa pre ra mẽ amã ja jarê. ¹⁰ Tĩrtũm kapêr ã kagã htũm kot ja jarênh kot:

Mêhõ na we aa kot amnhĩ tomnuj kêt kumrêx nê pa?

¹¹ Nê mẽhõ na we kot mẽmoj mex piitã omunh par?

Nê mẽhõ na kãm Tĩrtũm prãm?

¹² Nà amrakati kumrêx. Na mẽ ra piitã hkaga hpa.

Nê kapêr kwým ri tanhmã amnhĩ tomnuj to ho pa.

Æm mẽhõ pyxire nê amnhĩ to mex o ri pa hkêt kumrêx.

¹³ Na htem kapêr punuj pix o ri pa.

Jakamā Tīrtūm noo mā mẽ kot amnhī nhīpêxja te kot mẽmoj tyk nē hkro punuj pyrāk.

Na htem âm ri hêx pix kukamā ri hamaxpēr o pa. Tanhmā mẽ hêx to xàja te kêp kagā xoprê nhō wenēn xihtýx pyrāk.

¹⁴ Nē na htem mẽ piitā mẽmoj nhīxi ho ri axpēn mā mẽ hixi jarēnh o pa. Nē ri tanhmā axpēn japrý hto ho pa.

¹⁵ Nē tanhmā kapēr mā gêt kām mẽ kām kapēr to.

¹⁶ Nē tanhmā mẽ hkwýjê homnuj to. Jakamā nhūm mẽ piitā ri hkaprī nē mex kêt nē pa.

¹⁷ Nhūm htem âm axpēn mā mẽ gryk xà pix o kapēr o pa.

¹⁸ Nē Tīrtūm ā hpijaàm kêt o pa. Na htem kapēr ma nē âm kuma nē kām hkīnh kêt o pa.

Ā na htem amnhī nhīpêx anhýr rāhā ho pa. Anē.

Ā Tīrtūm kapēr ā kagā htūm kot mẽ pajarēnh anhýr. ¹⁹ Mē pahpê Ijaew ra mẽ pahte ja jarēnh mar týx. Tīrtūm kapēr ā kagā htūm kwý na. Na hte ā mẽ kot amnhī tomnuj xwýnhjê jarēnh anē. Nē määnēn mẽ papajaja. Mē pahpê Ijaew na hte ā mẽ pajarēnh anē. No âm mẽ papapxipix hkêt. Krī piitā hkôt ri mẽ pa xwýnhjaja nhūm ā mẽ harēnh kot anhýr. Ijaew kêt xwýnhjaja nē mẽ pahpê Ijaew. Mē pahpiitā mẽ pahte amnhī tomnuj xwýnh jakamā mẽmo kaxyw kot pu mẽ pahte amnhī tomnuj kêt ā ri amnhī to jarkrar o papa? Kot puj mẽ ā amnhī jarēnh anhýr kaprý. Jakamā koja Tīrtūm mẽ pahpiitā mẽ pahte amnhī tomnuj mýrapê tanhmā mẽ panhīpêx to. ²⁰ Mē pahtō koja mẽ pahte kapēr kôt pix mā amnhī nhīpêx o papa hā mẽ pajarē? Nē mẽ pahtō mā koja mẽ pamā kapēr nē mẽ pamā:

—Nà na ka hte akatàt kôt ixkapēr kôt pix mā amnhī nhīpêx mex nē. Âm hāmri na ka hte ā amnhī nhīpêx anhýr o pa.

Anhýr o mẽ pahtō mā kot we ā kapēr anē? Nà aa kot mẽ pahtō mā kapēr anhýr kêt. Na pu htem âm kapēr ma nē tee ri amnhī kukamā pajamaxpēr. Mē pahte amnhī tomnuj ā amnhī pumunh kaxyw na pre mẽ pamā kapēr ā kagā htūmja gō. Mē pahtō mẽ pahte kapēr ā kagā hkôt amnhī

nhīpêx mex o papa hkêt kênā kot kêt ri amnhīm mẽ pahte amnhī to mex xwýnh ā mẽ pajarē.

Tanhmā Tīrtūm kot mẽ pahto hkra to hā harēnh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nē na hte Tīrtūm mẽ pahte kapēr kôt amnhī nhīpêx ā mẽ pahpumunh kôt amnhīm mẽ pahte amnhī to mex xwýnh ā mẽ pajarēnh kêt nē. Jakamā mēhō kukwak ri koja we ā mẽ pajarēnh anē? Nà nhām mēhō kot tām amnhī nhīpêx rāhā ho pa hā omunh pix kukwak ri koja ā mẽ pajarēnh anē. Tā mēhō kukwak ri kot ā mẽ pajarēnh anhýr xwýnhhta na pre ra mẽ pamā ho amnhīrīt. Amnepēm Tīrtūm kapēr ā kagā htūm kamā na pre mēhō hkukamā tanhmā harēnh to. Nē Tīrtūm nhý hā mẽ kapēr jarēnh o pa xwýnhjaja haxwýja kukamā tanhmā harēnh to ho pa.

²² Jejus Krisja na prem hkukamā harēnh o pa. Tām na pu htem hkôt amnhī xunhwý nē amnhī kaxyw kām pajamaxpēr rāhā ho papa nhūm Tīrtūm ja pix ā mẽ pahpumunh kôt amnhīm mẽ pahte amnhī to mex xwýnh ā mẽ pajarē. Mē kot Jejus kôt amnhī xunhwýr xwýnh piitāā. Mē ixpê Ijaew nē mẽ apê Ijaew kêt xwýnhjaja. Mē pahpiitā mẽ pahte axpēn pyrāk jakamā kot puj mẽ pahtō Jejus kôt amnhī xām nhūm Tīrtūm Kra Jejus kot amnhī to mex pix o pa kukwak ri mẽ pahpumu nē amnhīm pajarēnh o:

—Nà âm hāmri. Ra kot ixkra Jejus kôt amnhī xām jakamā ra inhmā te Jejus kot amnhī nhīpêx pyrā nē amnhī to mex o pa. Anē.

²³ No mẽ pahtō na mẽ pahte Tīrtūm mẽ Jejus wa urāk nē amnhī nhīpêx mex rāhā ho ri papa? Nà amrakati kumrêx. Mē pahpiitā mẽ pahte amnhī tomnuj xwýnh kênā. ²⁴ Tā Tīrtūm kot mẽmoj tā mẽ pakutā nojarêt rāhā jakamā na hte Jejus Kris kukwak ri amarī amnhīm mẽ pahte amnhī to mex xwýnh ā mẽ pajarēnh o pa. Mē pahte Jejus kôt amnhī xunhwýr xwýnh piitāā nhūm ā mẽ pajarēnh anē. Ra Jejus kot htyk o mẽ pahte amnhī tomnuj piitā hpānhā amnhīrer par jakamā na hte Tīrtūm Jejus kukwak ri amarī mẽ pahte

amnhî to mex xwÿnhjê hã mẽ pajarê. Te mẽ pahte amnhî tomnuj kêt kumrêx pyrâk mẽ pajarê. ²⁵⁻²⁶ Na pre mẽ pahwÿr Jejus mẽ nhũm mẽ pahwÿr wrÿ nê mẽ panê ty nê htyk o mẽ pahte amnhî tomnuj piitã hpãnhã amnhîrer pa. Jakamã kot pu mẽ pahtõ amnhî kaxyw hkôt pajamexpêr nhũm Tirtũm ja hã mẽ pahpumu nê Kra kukwak ri amnhî katut kôt mẽ pahte amnhî tomnuj piitã rênh pa. Jao te aa mẽ pahte amnhî tomnuj kêt kumrêx pyrâk ã mẽ pahpumu.

No kêt amnepêm kormã Jejus wrÿk nê mẽ panê htyk kêt ri mẽ pa xwÿnhjaja. Tanhmã na pre Tirtũm mẽ kot hkôt amnhî xunhwÿr xwÿnhjê nhîpêx to? Kormã Jejus mẽ panê htyk kêt ri mẽ pa xwÿnhjaja tanhmã na pre mẽ hipêx to? Nà na pre mẽ hkwyjaja amnhî kaxyw Tirtũm kôt hamaxpêr nê hkôt amnhî xunhwÿ nhũm amnhî tã mẽ omu nê amnhîm mẽ harênh o:

—Nà ãm hãmri. Koja nhÿrmã Ixkra ma mẽ hwÿr wrÿ nê mẽ nê ty nê htyk o mẽ kot amnhî tomnuj pãnhã amnhîrer pa. Jakamã koja mẽ tãmjaja amnhî tomnuj pãnhã amnhîrer kêt nê. Anê.

Tã nhũm Jejus tãm mẽ pahwÿr wrÿ nê mẽ pahpiitã mẽ panê ty. Jakamã nhũm Tirtũm ra mẽ pahte hkôt amnhî xunhwÿr xwÿnhjaja Kra kukwak ri amnhî katut kôt mẽ pahte amnhî tomnuj piitã rênh pa. No na hte amarî ã mẽ panhîpêx anhÿr kêt nê. ãm Jejus tyk pix kukwak ri na hte ã mẽ panhîpêx anê. ãm hãmri na hte ã mẽ panhîpêx mex anê. Na hte tãm mẽ panhîpêx rãhã ho pa. ²⁷ Jakamã kot puj mẽ ã pajamaxpêr anê nê pajamaxpêr o:

—Nà na pa hte amnhî to mex rãhã o ri ixpa. Amnhî to mex o mẽ piitã mẽ hakrenh pa.

Anhÿr o pajamaxpêr kêt nê. Koja mēhõ ã hamaxpêr anê nê ãm amnhî jarênh o hêx. Na hte Tirtũm mẽ pahte amnhî to mex ã mẽ pahpumunh kôt amnhîm mẽ pahte amnhî to mex xwÿnh ã mẽ pajarênh kêt nê. Mẽ pahte amnhî to mex rãhãre hã. Nom na pu htem amnhî kaxyw Jejus mã pajamaxpêr nê hkôt amnhî xunhwÿ nhũm ja hã mẽ pahpumu nê rî kormã amnhîm mẽ pamex ã mẽ pajarê.

²⁸ E pa axte tanhmã mẽ amã ja jarênh to ka mẽ aprî hã inhma. Mẽmoj pumunh kôt na hte Tirtũm mẽ pahte amnhî to mex xwÿnh ã mẽ pajarênh wehe? Xà mẽ pahte kapêr tũm kôt amnhî nhîpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarênh anhÿr kêt nê. Mẽ pahte hkôt amnhî nhîpêx rãhã ho papare hã. ãm mẽ pahte amnhî kaxyw Kra Jejus kôt pajamaxpêr nê hkôt amnhî xunhwÿr ã mẽ pahpumunh kôt pix mã na hte mẽ pahte amnhî to mex xwÿnh ã mẽ pajarê. Ja pix ã mẽ pahpumunh kôt na hte ã mẽ pajarênh anê.

²⁹ Nê xà Tirtũm kêp mẽ ixpê Ijaew pix nhõ Tirtũm pix na? Nà kêp mẽ ixpix nhõ Tirtũm kêt. Kêp mẽ ixpê Ijaew nhõ Tirtũm nê mãânên kêp mẽ apê Ijaew kêt xwÿnhjê nhõ Tirtũm.

³⁰ Nê Tirtũm ãm pyxi mex. Axtem hõ kêt. Na hte mẽ pahpiitã mẽ panhîpêx o axpên pyrâk. Jakamã na hte mẽ kot amnhî kaxyw Jejus kôt hamaxpêr o mẽ pa xwÿnhjê pumu nê mẽ kot amnhî to mex xwÿnh ã mẽ harê. Mẽ ixpê Ijaew nê mãânên mẽ apê Ijaew kêt xwÿnhjaja.

³¹ Tã koja mēhõ htÿx hamaxpêr o:

—Nà ixte amnhî kaxyw Jejus kôt ijamaxpêr mex o ixpa nhũm Tirtũm kot amnhîm inh mex ã ijarênh jakamã kot paj axte kapêr kôt amnhî nhîpêx kêt nê. Kot paj ãm amnhî krã hkôt amnhî nhîpêx o ri ixpa. Ra Tirtũm kot ixto hkra kênã.

Anhÿr o ajamaxpêr japêr. Kwa mẽ ã ri ajamaxpêr anhÿr kêt nê. Na htem amnhî kaxyw Jejus kôt hamaxpêr hãmri nê kãm hkôt amnhî nhîpêx prãm rãhã nê pa ho pa.

4

Apraãw kot amnhî kaxyw Tirtũm kôt hamaxpêr

Karatas 3.6-18; Xiakre 2.23

¹ Nê mẽ panhîgêt finat Apraãwja kêp mẽ pahpê Ijaew pâr krax. Tã mẽmoj tã na pre Tirtũm omu nê kot amnhî to mex xwÿnh ã harê? ² Xà kot kãm tanhmã amnhî nhîpêx to hã karõ xà hkôt amnhî nhîpêx mex ã omunh xà hkôt nhũm pre ã harênh anê? Nà ja kôt kêt. Kop apu ja kôt ã kot harênh anhÿr

ronhÿx Apraãw amnhĩ tã omu nẽ Tĩrtũm mã amnhĩ to jarkrar nẽ kãm:

—Pa Tĩrtũm? E mãn ka ixpumu. Na pa hte akapër kôt amnhĩ nhĩpêx mex o ri ixpa.

Anhÿr o nhÿx pre kãm amnhĩ to jarkrar. No na pre tanhmã kãm amnhĩ to jarkrar to hkêt nẽ. ³ Tã mẽmoj tã omunh xà hkôt na pre Tĩrtũm amnhĩm mex ã harê? Nà Tĩrtũm kapër ã kagà htũm kot tanhmã Apraãw jarênh to kot:

Na pre Apraãw amnhĩ kaxyw Tĩrtũm kôt hamaxpër nẽ hkôt amnhĩ xãm nhũm amnhĩ tã omu nẽ amnhĩm mex ã harê. Anẽ.

⁴ Mẽ õ patrãwjaja na htem kãm mẽ àpênh xwÿnhjaja àpênh mex ã mẽ omunh xà hkôt mẽ kãm amnhĩre. ⁵ No Tĩrtũm na hte ã mẽ panhĩpêx anhÿr kêt nẽ. Na hte mẽ pahte tãm amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwÿnh ã mẽ pajarênh kêt nẽ. ãm mẽ pahte amnhĩ kaxyw Kra Jesus kôt pajamaxpër nẽ hkôt amnhĩ xunhwÿr ã mẽ pahpumunh kôt pix mã na hte amnhĩm ã mẽ pajarênh anẽ. Ra mẽ pahte amnhĩ tomnuj o ri papa htã hpãnhã amnhĩ kaxyw Jesus kôt pajamaxpër xwÿnh pixjaja na hte ã mẽ pajarênh anẽ.

⁶ Jakamã na hte mẽ pamã amnhĩ jarênh o:

—Ixte mẽ amex ã mẽ ajarênh tã no ãm mẽ ate amnhĩ to mex kôt mẽ apumunh kôt na pa ã mẽ ajarênh anhÿr kêt nẽ. ãm mẽ ate amnhĩ kaxyw Ixkra mẽ wa ixkôt ajamaxpër nẽ wa ixkôt amnhĩ xunhwÿr ã mẽ apumunh kôt na pa hte ã mẽ ajarênh anẽ. Anẽ.

Pu mẽ ã kot pamã kapër anhÿr ã amnhĩ tã kuma nẽ pahkĩnh nẽ. Pahi finat Tawi na pre haxwÿja ja jarênh o:

⁷ Na hte Tĩrtũm amnhĩ katut kôt mẽ pahte amnhĩ tomnuj piitã rênh pa nẽ axte kãm hamaxpër kêt nẽ.

Jakamã pu mẽ ja hã amnhĩ pumu nẽ pahkĩnh nẽ.

⁸ Nẽ amnhĩ kukamã pajamaxpër o: “Hêxta waa nẽ. Na pa pre amnhĩ tomnuj o ixpa nẽ tee ri ja hã amnhĩ pumu nẽ ixkaprĩ nẽ.

Hãmri nẽ amnhĩ to Tĩrtũm wÿ nhũm inhma nẽ ixte amnhĩ tomnuj o hapêx pa nẽ axte kãm hamaxpër kêt nẽ.

Nà ãm hãmri. Ja mex kumrêx.” Anẽ.

⁹ Tã mẽ kot ja hã amnhĩ pumunh nẽ hkĩnh xwÿnhjaja mẽmojaja na mẽ? Xà mẽ kot amnhĩ my kwÿrýt kà jakàr xwÿnh pix kwÿjaja na pre pahi Tawija ã mẽ harênh anẽ nà? Nà mẽ tapxipixjaja kêt. Mãânên mẽ kot amnhĩ jakàr kêt xwÿnh kwÿjaja. Tanhmã na pre ra Tĩrtũm kapër ã kagà htũm kot finat Apraãw jarênh to? Na pre harênh o:

Na pre Apraãw amnhĩ kaxyw Tĩrtũm kôt hamaxpër nẽ hkôt amnhĩ xãm nhũm amnhĩ tã omu nẽ amnhĩm mex ã harê. Anẽ.

¹⁰ Xà Apraãw ra kot amnhĩ my kwÿrýt kà krãhyr nhĩrô pê na pre Tĩrtũm amnhĩm mex ã harê? Nà kormã kot amnhĩ krãhyr kêt ri na pre ã harênh anẽ. ¹¹ Kormã kot amnhĩ krãhyr kêt ri kãm kapër nẽ kãm:

—E ate amnhĩ kaxyw inhma ajamaxpër nẽ ixkôt amnhĩ xãm ã ixte apumunh kôt na pa amnhĩm amex ã ajarê.

Anhÿr o kãm kapër hãmri nẽ rĩ kormã kãm tanhmã amnhĩ krãhyr to hã kãm karõ nhũm kuma nẽ mar xà hkôt amnhĩ my kwÿrýt kà hkwÿ krãhta. Kot Tĩrtũm mã amnhĩ nhõr ã amnhĩ to amnhĩrít kaxyw ã amnhĩ nhĩpêx anẽ.

Nom kormã amnhĩ krãhyr kêt ri na pre Tĩrtũm amnhĩm mex ã harê. Tã Ijaew kêt xwÿnhjaja kot amnhĩ jakàr kêt tã mẽ hkwÿjaja Apraãw pyrã nẽ amnhĩ kaxyw Tĩrtũm mã hamaxpër nẽ kãm amnhĩ nhõr jakamã Apraãw te kêp mẽ hpàr krax maati pyrãk. ¹² Nẽ mãânên mẽ pahpê Ijaew. Kot puj mẽ pahtõ amnhĩ kaxyw Tĩrtũm kôt pajamaxpër nhũm amnhĩ tã mẽ pahpumu nẽ mẽ pamex ã mẽ pajarê. No ãm mẽ pahte amnhĩ jakàr ã mẽ pahpumunh kôt ã mẽ pajarênh anhÿr kêt nẽ. ãm Apraãw pyrã nẽ amnhĩ kaxyw Tĩrtũm kôt pajamaxpër pix ã mẽ pahpumunh kôt na hte mẽ pamex ã mẽ pajarê. Kormã Apraãw kot amnhĩ my kwÿrýt kà krãhyr kêt ri ra kot amnhĩ kaxyw Tĩrtũm mã hamaxpër jakamã kêp mẽ pahpê Ijaew mẽ pahte urãk nẽ amnhĩ kaxyw Tĩrtũm mã pajamaxpër xwÿnhjê

hpàr krax maati. Ijaew kêt xwýnhjê pyrà nê kêp mē pahpàr krax maati.

Tirtûm kot Apraãw mã mēmoj mex jarēnh Karatas 3.22

¹³ Amnepê m na pre Tirtûm Apraãw mã tanhmã kapêr to nê kãm:

—E koja nhÿrmã akanrêhã akra nê atàmnhwýjaja amÿrpê apyrà nê krî piitã hkôt mē kêp mē õ pahi. Anê.

Tã tanhmã Apraãw kot amnhĩ nhĩpêx to hã omunh xà hkôt na pre ã kãm kapêr anê? Xà kot kãm tanhmã amnhĩ nhĩpêx to hã karõ nhũm kot hkôt amnhĩ nhĩpêx mex ã omunh xà hkôt na pre hkĩnh nê ã kãm kapêr anê? Nà kot anhÿr kêt. Mē pahtõ kot pu we Tirtûm kapêr xà hkôt pix mã amnhĩ nhĩpêx mex rãhã ho ri papa? Mē pahpê hihtÿx kênã. ãm kot amnhĩ kaxyw Tirtûm kôt hamaxpêr nhũm kot amnhĩ tã omunh nê amnhĩm mex ã harēnh kôt pix mã na pre ã kãm kapêr anê. ¹⁴ Kop apu kot kãm tanhmã kapêr to nê kãm:

—E Apraãw. Kot kaj ixkapêr piitã ama nê hkôt amnhĩ nhĩpêx mex rãhã ho ri apa. Hã koja nhÿrmã akanrêhã akra nê atàmnhwýjaja kêp krî piitã hkôt mēõ pahihtì.

Anhÿr o kãm kapêr ronhÿx ãm kãm ã kapêr anhÿr kaprÿ. Apraãw aa kot kapêr piitã hkôt amnhĩ nhĩpêx mex o pare hã. Kop apu ã kãm kapêr anhÿr ronhÿx pre kuma nê tee ri amnhĩ kukamã hamaxpêr nê hamaxpêr o:

—Kwa nã. Ra ixte Tirtûm kôt amnhĩ xãm tã tanhmã kot pa amnhĩ to nê kapêr piitã hkôt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhÿr o ixpa hprãm kaprÿ. Jakamã koja nhÿrmã ixkanrêhã ixkra nê ixtàmnhwýjaja kêp mē õ pahi hkêt nê pa. Hêxta waa nê. ¹⁵ Koja Tirtûm ixte kapêr kwÿm ri tanhmã ixte amnhĩ tomnuj to hã ixpumu nê tanhmã ixtomnuj to. No mēhõ kot we kapêr piitã hkôt amnhĩ nhĩpêx mex rãhã ho pa? Nà amrakati kumrêx.

Anhÿr o nhÿx pre hamaxpêr. ¹⁶ No na pre Tirtûm ã kãm kapêr anhÿr kêt nê. Ra kot hprĩ hã mē pahte amnhĩ nhĩpêx ã mē pahpumunh mex kênã. Na pre ãm kãm:

—E ate amnhĩ kaxyw ixkôt ajamaxpêr nê ixkôt amnhĩ xãm jakamã kot paj amarĩ ato mex nê. Anê.

Tirtûm na hte mēmoj tã amnhĩ jarēnh o amnhĩ to hêx kêt nê. Na hte mēmoj tã amnhĩ jarēnh xà hkôt tanhmã mēmoj nhĩpêx to ho ri pa. Jakamã koja mē pahte Apraãw pyrà nê amnhĩ kaxyw hkôt paja-maxpêr xwýnh piitã mē pahto mex nê.

Nê xà na pre ã mē pamã kapêr anê nê mē pamã:

—E kot kaj mē ixkapêr kôt pix mã ri amnhĩ nhĩpêx o ri apa hã kot paj mē ato mex rax nê.

Anhÿr o mē pamã kapêr? Nà na pre ã mē pamã kapêr anhÿr kêt nê. Na pre mē pamã:

—Kot kaj mē finat Apraãw pyrà nê amnhĩ kaxyw ixkôt ajamaxpêr nê ixkôt amnhĩ xunhwÿ hã kot paj mē ato mex nê.

Anhÿr o mē pamã kapêr. Tã Apraãw kumrêx kot mē pakukamã amnhĩ kaxyw hkôt hamaxpêr jakamã te kêp mē pahpiitã mē pahte uràk nê ã amnhĩ nhĩpêx anhÿr xwýnhjê pàr krax maati pyræk.

¹⁷ Amnepê m na pre Tirtûm tanhmã Apraãw mã kapêr to. Kot tanhmã kãm kapêr toja Tirtûm kapêr ã kagà htùm kamã na. Na pre kãm:

Kot kaj apê ahpÿnhã ri mē urojê hpàr krax. Anê.

Kormã Apraãw kra hkêt tã nhũm hkra hkukamã ã kãm kapêr anê. Hãmri nhũm kuma nê hkôt hamaxpêr kurê kumrêx nê hamaxpêr o:

—Hêxta waa nê. Ra ixprõ mē wa ijamē wa ixpigêt tÿx nê wa ixkra hkêt kumrêx. Kot paj wa tanhmã amnhĩ to nê tokÿx ty. Tã ra Tirtûm kot ixkra nê ixtàmnhwÿjê hkukamã ã inhmã mē harēnh anhÿr kênã. Jakamã kot pa xep wa ixpigêt tÿx tã tanhmã amnhĩ to nê ixkra. Nà kot pa xep wa anê. Nê koja ixkraja tanhmã amnhĩ to nê ixpê htyk japêr tã koja Tirtûm akupÿm inhmã ho htĩr. Nà koja inhmã ho anê. Ra kot inhmã ixkra nê ixkanrêhã ixtàmnhwÿ xohtõ jarēnh kênã. Anê.

¹⁸⁻¹⁹ Na pre ra hpigêt tÿx nê. Ra hã amgrà pē 100 nê hkurē kêt nê pa. Nhũm hprõ mãânēn hpigêx tÿx nê. Nê õhy kamã hkra hkêt kumrêx. Kormã wa hkra hkêt tã nhũm

Tîrtûm Apraãw mã hkra nê htàmnhwý xohtô hã harê. Nê kêp mẽ urojê xohtôjê pàr krax ã kãm harê. Hãmri nhùm kuma nê amnhĩ kaxyw hkôt hamaxpêr tỳx kurê kumrêx. ²⁰ Nê ã amnhĩ nhĩpêx anhỹr rãhã ho pa. Na pre war amnhĩ kra hã amnhĩ jarênh ma nê tee ri amnhĩ kukamã hamaxpêr kêt nê. ãm Tîrtûm tãm kot wa kãm wa hkra jarênh pix mã hamaxpêr pê amnhĩ kaxyw kãm hamaxpêr tỳx o ri wa pa. Nê hamaxpêr o:

—Nà ra wa ixpigêt tỳx kumrêx tã koja xep Tîrtûm wa inhmã wa ixkra hõ gõ. Nà koja wa inhmã kugõ. Hêxta waa nê. ãm hãmri Tîrtûmja mex o mex. ²¹ Nà kot wa inhmã wa ixkra jarênh xà hkôt koja wa inhmã kugõ. Ja kaxyw àhpumunh o àhpumunh. Tîrtûmja hêx kêt. Anê.

²² Hãmri nhùm Tîrtûm ã hamaxpêr anhỹr ã omu nê amnhĩm mex ã harê. Nê kot kãm amnhĩ jarênh xà hkôt wa kãm wa hkraja gõ.

²³ Nom na pre amnhĩm Apraãwja pix mex ã harênh kêt nê. ²⁴ Kot puj mẽ pahtõ uràk nê amnhĩ kaxyw hkôt pajamaxpêr nhùm amnhĩ tã mẽ pahpumu nê ra kot Apraãw jarênh ta pyrã nê amnhĩm mẽ pamex ã mẽ pajarê. Na pre mẽ panhõ Pahiiti Jejus ty nhùm Tîrtûm akupỹm ho htĩr. Tã mẽ papajaja na pu prem amnhĩ kaxyw Jejus kôt pajamaxpêr nhùm Tîrtûm ja hã mẽ pahpumunh kôt mẽ pahte amnhĩ to mex xwýnh ã mẽ pajarê. ²⁵ Na pre mẽ pahwýr Kra Jejus mẽ nhùm mẽ pahwýr wrý. Tã nhùm mẽ axtem nê kupĩ nom nhùm amarĩ htyk kêt nê. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tîrtûm mẽ pahwýr kumê. Jakamã nhùm prem kupĩ nhùm akupỹm ho htĩr. Tã mẽmo kaxyw na pre Tîrtûm ã mẽ pahwýr Kraja mẽnh nhùm mẽ panê htyk anê nhùm akupỹm ho htĩr? ãm kot kukwak ri amnhĩm mẽ pahte amnhĩ kaxyw hkôt pajamaxpêr xwýnhjaja mẽ pahte amnhĩ to mex xwýnh ã mẽ pajarênh pix kaxyw.

5

*Tîrtûm kot mẽ pahto hkwy hã harênh
Matêwre 5.12; Sikũn Korõt 4.8, 5.18-21;
Xiakre 1.2-4; Wam Pêtre 4.12, 5.9*

¹ Nê na pu prem amnhĩ tomnuj o ri papa nhùm Tîrtûm ja hã mẽ pahpumu nhùm ja kêp omnuj nê. Jakamã nhùm Jejus amnhĩ grõnh kôt wrý nê mẽ panê ty. Nhùm Tîrtûm htykja kukwak ri mẽ pahto hkwy. Mẽ pahte amnhĩ kaxyw hkôt pajamaxpêr nê hkôt amnhĩ xunhwýr ã mẽ pahpumu hãmri nê ã mẽ panhĩpêx anê pu mẽ ra pahpê hkwy hã papa. ² Na pre Jejus Tîrtûm mã mẽ pajarênh o:

—E jajê pumu. Na mẽ ra amnhĩ kaxyw pamã hamaxpêr nê pahkôt amnhĩ xunhwý. Anê.

Hãmri nhùm kuma nê mẽ pahto mex nê mẽ pakutã nojarêt rãhã ho pa. Tã kot puj mẽ pahpê hkrajaja nhỹrmã pano ho Tîrtûm mex o mex xwýnhja pumu. Jakamã na pu htem amnhĩ kukamã ã pajamaxpêr anhỹr o pahkĩnh nê papa nê pajamaxpêr o:

—Hêxta waa nê. Kot paj nhỹrmã inhno ho Tîrtûm mex o mex ã omu nê kuri ixpa ho ixpa. Nà ãm hãmri. Inhmã omunh prãm tỳx kumrêx. Anê.

³⁻⁴ Nê na htem Jejus ã mẽ pahtomnuj nê pu mẽ pahpunuj nê ri papa. Pamex kêt nê tã tee ri amnhĩ kukamã pajamaxpêr o ri pahkaprĩ nê papa hkêt nê. Kwãr mẽ mãmri ã mẽ panhĩpêx anê. Pu mẽ pahpunuj kurê Jejus kôt amnhĩ xunhwýr tỳx o kormã mõ. Nê mẽ umaj hkaga hkêt nê. Arĩ amnhĩ wýr kamã pajamak o papa. Jao amnhĩ kaxyw kumã pix mã kãm pajamaxpêr tỳx rãhã pahkĩnh nê ri papa.

Kot puj mẽ ã amnhĩ nhĩpêx anhỹr o ri papa nhùm Tîrtûm ja hã mẽ pahpumu nhùm ja kãm mex nê. Hãmri nhùm ja kaxyw tanhmã mẽ pahto paxihtỳx to pu mẽ pahpunuj tã hkôt pajamaxpêr tỳx rãhã nê.

⁵ Nê ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpêr kaprý hkêt nê. Ra kot mẽ pamã amnhĩ Karõ nhõr nhùm kot mẽ pahkarõ mã gjêx kênã kot pu kêt mẽ ri tee ri amnhĩ kaxyw kãm pajamaxpêr kaprý. Na hte Karõja mẽ pahkarõ kamã mẽ pamã Tîrtûm kapêr jarênh o amnhĩrĩt nê kãm mẽ pajapê htỳx ã harênh o amnhĩrĩt rãhã nê.

⁶ Amnepê mã na pre mẽ piitã amnhĩ tomnuj o ri pa nê tee ri kãm amnhĩ to mex rãhã hprãm kaprý. Mẽhõ kot we ja kaxyw

tanhmã mẽ hkrã hto? Jakamã nhũm Tĩrtũm ja hã mẽ omu hãmri nẽ mẽ kaxyw Kra Jejus mã kãm:

–E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwỳr wrỳ. Ixte mẽ nẽ atyk kaxyw agrõnh kõt mẽ hwỳr amẽnh jakamã kot kaj wrỳ nẽ mẽ kãm ixkapẽr jarẽnh o ri mẽ hkõt apa. Rãhã nhũm mẽ hkwỳjaja apĩ ka mẽ piitã mẽ nẽ ty. Anẽ.

Hãmri nhũm kuma nẽ kãm:

–Tõe. Nà kot paj amã hprãm xà hkõt ã amnhĩ nhĩpẽx anẽ. Anẽ.

Hãmri nẽ man amnhĩ grõnh kõt mẽ pahwỳr wrỳ. ⁷⁻⁸ Xà koja mẽhõ kãm axpẽn japẽ xà axpẽn nẽ ty nà? Xà kot mẽhõ tãm kot amnhĩ nhĩpẽx xwỳnh tã nhũm mẽ kot hpĩr kaxyw nhũm hkrãmnhwỳja kãm hapẽ nẽ. Nẽ nẽ amnhĩ grõnh kõt mẽ kãm xa nhũm mẽ kupĩ nhũm nẽ ty? Nà kot apu nẽ htyk japẽr ko. No mẽ papajaja. Na pu htem mẽhõ hkrãmnhwỳta kĩnhã arĩ amnhĩ tomnuj rãhã ho ri papa htã nhũm Tĩrtũmja arĩ kãm mẽ pajapẽ nẽ. Nẽ kãm mẽ pajapẽ xà mẽ pahwỳr Kris mẽ nhũm mẽ panẽ ty. Arĩ mẽ pahte amnhĩ tomnuj rãhã ho papa tãã. Na pre ã Tĩrtũmja kãm mẽ pajapẽ hã ã mẽ pahwỳr mẽn anẽ. ⁹ Na pre ty nhũm hkamrõ hkwỳ axkapĩ nhũm Tĩrtũm ja hã omunh xà hkõt tãm amnhĩm mẽ paxunhwỳ. Tã Jejus kukwak ri koja ma mẽ kot amnhĩ xà htỳx kamã hamak tũm xàta wỳr mẽ parẽnh kêt nẽ. Mẽ pahpẽ hkwỳ kẽnã kot kêt hwỳr mẽ parẽ.

¹⁰ Nom kormã mẽ pahpẽ hkwỳ hkêt ri na pu prem te ra kutã amnhĩ xunhwỳr pyrãk o amnhĩ nhĩpẽx. Tã nhũm Kra mẽ panẽ ty pu mẽ hkõt amnhĩ xunhwỳ. Jakamã nhũm Tĩrtũm Jejus tyk kukwak ri mẽ pahto hkwỳ. Nẽ ra akupỹm Kra ho htĩr jakamã kot puj mẽ pahte hkõt amnhĩ xunhwỳr xwỳnhjaja nhỹrmã wa uràk nẽ wa kuri pahtĩr tũm nẽ pamex kumrẽx nẽ papa ho papa.

¹¹ Nẽ mẽ pahpẽ kuwy rax wỳr mẽ papa mã xwỳnh kêt jakamã na pu htem pahkĩnh nẽ pajamakêtkati nẽ ri papa. Nom ja pix ã na pu htem ã amnhĩ nhĩpẽx anhỹr kêt nẽ. Mẽ pahpẽ Tĩrtũm krãmnhwỳ jakamã na pu htem mããnẽn pahkĩnh nẽ ri papa. Pahihti Jejus Kris kot mẽ panẽ htyk ã omunh xà hkõt na pre Tĩrtũm mẽ pahte hkõt amnhĩ

xunhwỳr xwỳnhjẽ ho hkwỳ jakamã na pu htem pahkĩnh nẽ pajamakêtkati nẽ ri papa.

*Atãw mẽ Kris wa harẽnh
Wam Korĩt 15.20-22, 45-49*

¹²⁻¹³ Nẽ amnepẽm na pre Tĩrtũm finat Mojes mã tanhmã kapẽr to. Hãmri nhũm kuma nẽ Ijaew kot tanhmã amnhĩ nhĩpẽx to ho pa kaxyw mẽ kãm mẽmojta ã karõ nẽ mẽ kãm hã hkagã. Mẽ kot kamã harẽnh nẽ mar nẽ Tĩrtũm kõt amnhĩ nhĩpẽx kaxyw. Hãmri nhũm mẽ tee ri ã kot mẽ kãm mẽmoj tã karõja ma nẽ tanhmã axpẽn mã kapẽr to nẽ axpẽn mã:

–Kwa na pu htem ã amnhĩ nhĩpẽx anhỹr kêt nẽ. Na pu htem ãm amnhĩ tomnuj tỳx kumrẽx o ri papa nẽ amnhĩ to mex kêt kumrẽx. Anẽ.

ãm hãmri na prem ã amnhĩ jarẽnh anẽ. Mẽ pahpiitã mẽ pahte amnhĩ tomnuj xwỳnh kẽnã. My kot wa pẽ finat Atãwja kumrẽx na pre tanhmã mẽ pahte amnhĩ tomnuj to ho hkraax. Mỳrapẽ na pre htĩr tũm nẽ ri pa ho pa hkêt nẽ. Na pre ri pa nẽ gaa nẽ rĩ hpigêt tỳx nẽ ty. Tã mỳr pẽ ri mẽ papa xwỳnhjaja na pu htem uràk nẽ tanhmã amnhĩ tomnuj to ho ri papa. Mỳrapẽ na pu htem ri papa nẽ gaa nẽ Atãw pyrã nẽ pahtyk pa. Tĩrtũm kot mẽ pahtã Atãw mã kapẽr xà hkõt. ¹⁴⁻¹⁹ Jakamã na prem kormã Mojes kator xwỳj ri pika piitã hkõt ri pa nẽ gaa nẽ haxwỳja htyk pa. Mẽ kot amnhĩ tomnuj mỳrapẽ ty. Atãw pyrã nẽ Tĩrtũm kot mẽmo xõ nẽ hkurẽ xwỳnhhta krẽr kêt tã uràk nẽ tanhmã amnhĩ tomnuj to ho ri pa. Hãmri nẽ mỳrapẽ ty.

Na pre ã Atãwja mẽ pahpiitã mẽ pamã Tĩrtũm kapẽr nhĩrõp ãm nẽ amnhĩ tomnuj o hkraax anẽ nẽ mẽmo xõta krẽ. Jao te mẽ pahpiitã mẽ pahte uràk nẽ kumẽ hkur pyrãk o mẽ panhĩpẽx. Mỳrapẽ nhũm htem arĩ pika piitã hkõt hapõj nẽ kormã hprĩre htã ra Atãw pyrã nẽ tanhmã amnhĩ tomnuj to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xà hkõt mẽ pakukamã hamaxpẽr o:

–Nà koja mẽ Atãw pyrã nẽ amnhĩ tomnuj o ri pa. Mỳrapẽ kot paj ma mẽ kot amnhĩ xà htỳx kamã hamak tũm xàta wỳr mẽ rẽn pa. Anẽ.

Tã Jejus Kris mẽ Atãw wa harênhja kot axpên pyrâk jakamã na hte Atãw kanrêhã hkra nê htãmnhwýjaja Atãw kot amnhĩ nhĩpêx kôt amnhĩ nhĩpêx o ri pa rãhã nê. Urâk nê amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwýr xwýnhjaja Jejus kôt amnhĩ nhĩpêx rãhã ho ri pa. Te mẽ kêp hkanrêhã hkra nê htãmnhwýjê pyrã nê urâk nê tãm amnhĩ nhĩpêx. Na htem ã ahpýnhã amnhĩ nhĩpêx anhýr o ri pa. Na pre Jejus mẽ pahte amnhĩ tomnuj pãnhã amnhĩrer par kaxyw mẽ panê ty. Jakamã mẽ pahte hkôt amnhĩ xunhwýr xwýnhjaja na hte Tĩrtũm ja hã mẽ pahpumunh kôt mẽ pahto hkra. Kot puj mẽ nhýrmã pahtyk tã nhũm akupým mẽ pahto mẽ pahtĩr pu mẽ wa kuri pahtĩr tũm nê papa ho papa.

Atãw kot Tĩrtũm kapêr nhĩrôp ãm jakamã na hte Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarê. Nom nhũm Jejus Atãw rom kot Tĩrtũm kapêr mar nê hkôt amnhĩ nhĩpêx rãhã jakamã na hte Tĩrtũm mẽ pahte hkôt amnhĩ xunhwýr xwýnhjaja amnhĩm mẽ pahte amnhĩ to mex xwýnh ã mẽ pajarê.

Nhũm Atãw kot Jejus kĩnhã Tĩrtũm kapêr nhĩrôp ãm mýrapê na hte mýr pê mẽ pa xwýnhjaja ohtô nê pa nê gaa nê Atãw pyrã nê htyk pa. Hãmri nê kormã htĩr ri amnhĩ to mex o pa hkêt mýrapê ma mẽ kot amnhĩ xã htýx kamã hamak tũm xãta wýr ma hapêx. Tã nhũm Tĩrtũmja mex o mex jakamã na hte Jejus Kris mẽ wa mẽ pakamã ukaprĩ nê. Jakamã na pre mẽ pahwýr Jejus mẽ nhũm mẽ pahwýr wrý hãmri nê htyk o mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhýr kukwak ri mẽ pahte hkôt amnhĩ xunhwýr xwýnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarê. Tã nhũm Jejus mẽ pakamã ukaprĩ nê mẽ panê ty nhũm Tĩrtũm ja hã omunh xã hkôt ra mẽ pahte amnhĩ kaxyw hkôt pajamaxpêr xwýnhjaja te mẽ pahte aa tanhmã amnhĩ tomnuj to hkêt pyrâk o mẽ panhĩpêx. Na hte amarĩ ã mẽ panhĩpêx anê.

Nê Atãw kot amnhĩ tomnuj mýrapê na

htem piitã ri pa nê tanhmã amnhĩ to nê ty rý ri pa nê gaa nê wejre nê ty. No na pre Jejus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwýr xwýnhjê kutã nojarêt rãhã nê mẽ pakukamã hamaxpêr o:

—Nã mẽ kot Ixkra hkôt amnhĩ xunhwýr xwýnhjaja na pa mẽ omunh pa. Tã kot paj Ixkrata kukwak ri tãm mẽ unhwýnhũm mẽ nhýrmã wa ixri mex nê htĩr tũm nê pa ho pa. Anê.

²⁰⁻²¹ Nê na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. Hãmri nê mẽ kot kapêr mar nê hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma nê amnhĩ xô ri mẽ kãm hã kagã nê mẽ kãm harênh o ri mẽ hkôt pa. No nhũm prem kapêr ma nê ãm kuma nê hkwým pix mã ri tanhmã amnhĩ tomnuj to ho pa. Nê pika piitã hkôt ja arĩ rãhãã. Ja mýrapê koja mẽ nhýrmã ty nê ma mẽ kot amnhĩ xã htýx kamã hamak tũm xãta wýr ma pa. Nom Tĩrtũm arĩ kãm pika piitã hkôt mẽ papa xwýnhjê japê nê. Mẽ pahte amnhĩ tomnuj o papa tã nhũm kãm mẽ pahto mex prãm nê. Jakamã na pre mẽ pahwýr Kra Jejus Kris mẽ nhũm mẽ pahwýr wrý. Mẽ panê htyk o kot mẽ pahte amnhĩ tomnuj pãnhã amnhĩrer kaxyw. Tã kukwak ri kot puj mẽ pahte amnhĩ kaxyw hkôt pajamaxpêr xwýnhjaja nhýrmã Tĩrtũm mẽ wa kuri pahtĩr tũm nê pa mex nê papa ho papa.

6

Mẽ kot mẽ pahkrã kumrãr ã mẽ harênh Sikũn Korĩt 5.17; Karatas 2.19-20, 5.24, 6.14; Epes 4.17-24; Korosê 3.1-11; Wam Pêtre 4.1-6

¹ Nê mẽ pahte arĩ tũhã tanhmã amnhĩ tomnuj to htã nhũm Tĩrtũm arĩ kãm mẽ pajapê nê. Nê arĩ mẽ pakutã nojarêt rãhã nê. Jakamã xã kot kaj mẽ atõ ã harênh anhýrja ma nê atýx ri ã ajamaxpêr anê nê ajamaxpêr o:

—Nã Tĩrtũm kãm ijapê nê kot ixkutã nojarêt rãhã ho ri pa jakamã mo kaxyw kot pa

Jejus kôt amnhĩ nhĩpêx o ri ixpa? Nà kot paj ho anhÿr kêt nê. Anê.

Ka ã mẽ atõ atÿx ri ajamaxpêr anhÿr japêr. Kwa xà ajamaxpêrja mex? Nà mex kêt. ² Æ ajamaxpêr anhÿrja mẽ hamaxpêr mex xà hkôt kêt. Ra mẽ pahte Jesus kôt amnhĩ xunhwÿr nê mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyræk. Jakamã kot puj mẽ arĩ tanhmã amnhĩ tomnuj to ho ri papa hkêt nê. ³ Mẽmo kaxyw na htem Tĩrtũm mã mẽ pahkrã kumrã? Nà mẽ pahte ra Jesus kôt amnhĩ xunhwÿr ã amnhĩ to amnhĩrĩt kaxyw. Te Jesus htyk nhũm mẽ pahte amnhĩ tomnujja haxwÿja hkôt htyk nê hapêx par pyræk o amnhĩrĩt kaxyw. Jakamã na pu htem pajamaxpêr o:

—Nà kot paj axte tanhmã amnhĩ tomnuj to ho ri ixpa hkêt nê. Anê.

⁴ Na htem Tĩrtũm mã gôx kãm mẽ pahkrã kumrã nhũm mẽ pahte amnhĩ nhĩpêx tũmja te mẽ kot Jesus kôt haxwÿja haxàr pyræk. Hãmri nhũm mẽ akupÿm mẽ pahto api. Te Tĩrtũm hihtÿx o hihtÿx o kot akupÿm Kra Jesus ho htĩr pyræk. Te mẽ pahtÿk tã nhũm akupÿm kot mẽ pahto mẽ pahĩr pyræk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw. ⁵ Nhũm mẽ pahte amnhĩ nhĩpêx tũmja te Jesus kôt htyk nê hapêx par pyræk. Nê mẽ pahte amnhĩ nhĩpêx nywja te Jesus akupÿm htĩr pyræk o amnhĩ nhĩpêx.

⁶ Amnepêm na pu pre htem amnhĩ tomnuj rãhã ho ri papa. Te mẽ kãm mẽ àpênh xwÿnhjaja kot mẽ õ patrãw mã àpênh rãhãta pyræk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nê ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamaxpêr punujja te pĩ kahpa hã Jesus kôt harir nê htyk nê hapêx par pyræk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nê mẽ pajamaxpêr nyw pix o pajamaxpêr papa kaxyw. ⁷ Na hte mẽ htyk xwÿnhjaja axte tanhmã amnhĩ tomnuj to hkêt nê. Tã kêr pu mẽ uræk nê axte ã amnhĩ nhĩpêx anhÿr kêt nê. ⁸ Na pu prem Jesus kot mẽ panê htyk ã harênh ma nê pajamaxpêr o:

—Nà ra Jesus kot mẽ panê htyk jakamã kot paj ixte amnhĩ nhĩpêx tũm kaga hpa nê hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nê axte tanhmã ixte amnhĩ tomnuj to ho ri ixpa hkêt pyræk. Jao amnhĩ nhĩpêx nyw pix o amnhĩ nhĩpêx o ri ixpa. Anê.

⁹ Nê Jesus htyk nhũm Tĩrtũm akupÿm ho htĩr jakamã koja axte htyk kêt nê. Ra mẽ pahte ja mar mex. ¹⁰ Na pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupÿm htĩr o htĩr nê kaxkwa kamã Tĩrtũm mã tanhmã amnhĩ nhĩpêx to ho ri pa. ¹¹ Tã mẽ papajaja kot puj mẽ ã kot amnhĩ nhĩpêx anhÿrja ma nê ã pajamaxpêr anê nê pajamaxpêr o:

—Nà ãm hãmri. Te ixte Jesus pyrã nê ra ixtyk pyræk jakamã kot paj axte amnhĩ tomnuj o ri ixpa hkêt nê. Te ixte Jesus pyrã nê akupÿm ixtĩr nê ãm Tĩrtũm kôt pix mã amnhĩ nhĩpêx o ri ixpata pyræk o kot paj hpãnhã amnhĩ nhĩpêx o ri ixpa. Anê.

¹² Jakamã kot ka mẽ atõ nhÿrmã tanhmã amnhĩ kukamã ajamaxpêr punuj to japêr hãmri nê ajamaxpêr o:

—Nà inhmã ã amnhĩ tomnuj anhÿr prãm nê. Omnuj tã kot paj ho anê. Nà ixte ho anhÿr mã kênã.

Anhÿr o ajamaxpêr japêr tã kwa mẽ ã ajamaxpêr anhÿr kêt nê.

¹³ Kêt Tĩrtũm mã mãn amnhĩ gõ nê hkôt amnhĩ nhĩpêx o ri apa. Hãmri nê amnhĩ krã kamã mẽmoj mex pix mã ajamaxpêr nê tãm akapêr. Nê mẽ kot amnhĩ to mex xwÿnhjê kôt pix mã mãn ri apa.

Na ka pre htem akapêr punuj nê.

Nê ajamaxpêr punuj nê.

Nê mẽ kot amnhĩ tomnuj o mẽ pa xwÿnhjê hkôt ri apa.

Nê kagôxÿhti japrô nê ho akôm o ri mẽ hkôt apa.

Tã ra hpãnhã Tĩrtũm mã amnhĩ gõ nê axte ã amnhĩ nhĩpêx anhÿr kêt nê.

¹⁴ Amnepêm na pu prem tanhmã mẽ pahte amnhĩ nhĩpêx to ho papa hkukamã pajamaxpêr nê pajamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa nê amnhĩ to mex o ri ixpa nhũm Tĩrtũm ja hã ixpumu nê amnhĩm inhmex ã ijarê. Nà kot paj anê.

Anhÿr tâ no âm tee ri mẽ pamã hkôt amnhĩ nhĩpêx o ri papa hprãm kaprÿ nê arĩ ri kapêr kwÿm tanhmã amnhĩ nhĩpêx to ho ri papa. Tã ra hpãnhã axtem pajamexpêr o:

—Nà Tĩrtũm kot ixkutã nojarêt rãhã ho pa xwÿnh. Tã ra ixte hkôt amnhĩ xãm jakamã koja tanhmã ixto pa hkôt amnhĩ nhĩpêx mex o ri ixpa. Nà koja ixto anê.

Anhÿr jakamã ra amnhĩ kaxyw kãm pajamexpêr tÿx o mẽmoj punuj kutã amnhĩ to htÿx nê.

Mẽ pahte Tĩrtũm mã tanhmã amnhĩ nhĩpêx to hã mẽ pajarênh

Juãw 8.34

¹⁵ Tã ã kot anhÿr jakamã tanhmã kot puj wem pajamexpêr to? Xà kot pu mẽ ã pajamexpêr anê nê pajamexpêr o:

—Nà na hte Tĩrtũmja ixte kapêr kôt amnhĩ nhĩpêx o ixpa hã ixpumunh kôt amnhĩm inhmex ã ijarênh kêt nê. Âm kêp ixkutã nojarêt rãhã nê amarĩ amnhĩm inhmex ã ijarênh xwÿnh jakamã kot paj arĩ amnhĩ tomnuj rãhã nê aa ja kaga hkêt nê.

Anhÿr o kot puj mẽ pajamexpêr? Nà kot puj mẽ ã pajamexpêr anhÿr kêt nê. Æ mẽ pajamexpêr anhÿrja mex kêt. ¹⁶ Koja mẽhõ nhÿri kot amnhĩ tomnuj tÿx xwÿnhjê hõ pumu nê kãm amnhĩ jarênh japêr nê kãm:

—E inhma. Kot paj âm akôt pix mã tanhmã amnhĩ nhĩpêx to ho ri ixpa. Jakamã e inhmã mẽmoj tã karõ pa ama nê amã tanhmã ho ho ri ixpa.

Anhÿr o kãm kapêr japêr. Hãmri nê ã amnhĩ nhĩpêx anhÿr tâ amnhĩ tomnuj pix o ri pa. Tã ã mẽ kot amnhĩ nhĩpêx anhÿr o mẽ pa xwÿnhjaja koja nhÿrmã ty hãmri mẽ kot amnhĩ xà htÿx kamã hamak tũm xàta wÿr ma hapêx.

No koja mẽhõ Tĩrtũm mã amnhĩ jarênh nê kãm:

—Pa Tĩrtũm. E kot paj âm akapêr kôt pix mã ri amnhĩ nhĩpêx o ri ixpa.

Anhÿr o kãm amnhĩ jarê nê hkôt amnhĩ nhĩpêx mex o pa. Nê tãm amnhĩ nhĩpêx o ri pa. Hãmri nê nhÿrmã ty nê ma õ krĩ hwÿr api nê Jejus mẽ Tĩrtũm wa kuri htĩr tũm nê mex rãhã nê pa ho pa.

¹⁷ Tã mẽ kajaja na ka xep prem tee ri mẽ amã mẽ ate amnhĩ tomnuj mã anhÿrer prãm tã nhũm te tãm kot amnhĩ tã mẽ

ato htÿx pyræk o mẽ anhĩpêx ka mẽ tee ri kãm anhÿrer prãm kaprÿ. Tã nhũm Tĩrtũm tanhmã mẽ akrã hto ka mẽ kapêr ma nê amnhĩ kaxyw hkôt ajamexpêr tÿx nê âm hkôt pix mã amnhĩ nhĩpêx. Pa ja hã mẽ ajarênh ma nê mẽ anhÿ hã ixkĩnh nê. Nê Tĩrtũm mã ixte mẽ ajarênh mar nê mẽ anhÿ hã ixkĩnh ã amnhĩ jarê. ¹⁸ Na pre Tĩrtũm tanhmã mẽ akrã hto ka mẽ amnhĩ tomnuj mã anhÿrer pa nê hpãnhã hkôt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarênh to. Te ixte ixkrajê jahkre pyræk o kot paj mẽ amã awjarê. Nà amnepêm na ka prem ajamexpêr punuj kôt amnhĩ tomnuj o ri apa. Nê gaa nê ra amnhĩ tomnuj pix kukamã ajamexpêr. Tã kêt ka mẽ arĩ ã amnhĩ nhĩpêx anhÿr kêt nê. Pãnhã tãm ri ajamexpêr o ri apa. Jao gaa nê ra Tĩrtũm kãm hprãm xà hkôt tãm amnhĩ nhĩpêx mex nê. ²⁰ Na ka prem tee ri amã amnhĩ tomnuj mã anhÿrer prãm kaprÿ. Te tãm kot amnhĩ tã mẽ ato htÿx nê amnhĩ kôt mẽ ato pa pyræk o mẽ anhĩpêx. ²¹ Xàn ka prem ã amnhĩ tomnuj anhÿr o apa nê akĩnh nê ajamakêtkati nê ri apa? Nà na ka prem akĩnh nê apa hkêt nê. Tã na ka prem Jejus kôt amnhĩ xunhwÿ nê tee ri ate tanhmã amnhĩ tomnuj to hã amnhĩ pumu nê akaprĩ nê apijaàm nê. Æ mẽ kot amnhĩ tomnuj anhÿr o pa xwÿnhjaja na htem ja mÿrapê ty nê ma mẽ kot amnhĩ xà htÿx kamã hamak tũm xàta wÿr pa. ²² No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htÿx nê amnhĩ kôt mẽ ato pa pyræk ka mẽ ra âm hkôt pix mã amnhĩ nhĩpêx mex o ri apa. Nê hpãnhã amã kapêr kôt pix mã amnhĩ nhĩpêx mex prãm. Nê hkôt pix mã amnhĩ nhĩpêx hprãm. Jakamã kot kaj mẽ nhÿrmã kuri amex kumrêx nê atĩr tũm nê ri apa ho apa.

²³ Na hte mẽ kãm àpênh o ri mẽ pa xwÿnhjaja mẽ kãm mẽmoj tã apê nê àpênh pa nê hpãnhã amnhĩrer xà jamÿ. Ja pyrã nê koja mẽ kot amnhĩ tomnuj xwÿnhjaja nhÿrmã ty hãmri nê ma mẽ kot amnhĩ xà htÿx kamã hamak tũm xàta wÿr ma pa.

No mẽ pahte amnhĩ kaxyw Jejus Kris kôt pajamexpêr xwÿnhjaja na hte Tĩrtũm ja hã

mê pahpumu nê mê pajarênh o:

—Nà âm hāmri. Jajaja koja nhỹrmã Ixkra mê wa Ixkuri mex kumrêx nê htĩr tũm nê pa ho pa. Hêxta waa nê. Nà âm hāmri koja mê anê. Anê.

Xà tãm mê pahte amnhĩ nhĩpêx ã mê pahpumunh kôt na hte ã mê pajarênh anê? Nà âm mê pahte Kra Jejus Kris kôt amnhĩ xunhwýr ã mê pahpumunh kôt pix mã na hte ã mê pajarênh anê.

7

Mê pahte amnhĩ tomnuj kot axte amnhĩ tã mê pahto htýx kêt ã harênh

Rômân 8.2, 10.4; Karatas 4.1; Epes 2.2; Korosê 3.7

¹ E Jejus kôt ixkwýjaja. Nà Tĩrtũm kot mê pakaxyw tanhmã Mojes mã kapêr tota na ka mê ra mar týt nê. Na pu htem kormã pahĩr ri hkôt amnhĩ nhĩpêx o ri papa. Tã ty hāmri nê axte hkôt amnhĩ nhĩpêx kêt nê. Ra mê ate ja mar týt. E pa mê amã ja hã ejêp jarê ka mê inhma. ² Nà finat Mojes kot Tĩrtũm nhỹ hã mēnijaja kot tanhmã amnhĩ nhĩpêx to ho pa hã mê kãm karōja. Koja mēhō ho mjên hāmri nê âm kôt pix mã ri pa ho pa nê aa hkaga hkêt nê. No koja nhỹrmã mjên kēp ty nhũm ahte ri pa. Hāmri nê kãm axte mēhō ho mjên prãm nê māmri axte mēhō ho mjên. Ja tanhmã kute hkêt. ³ Nom koja wam mjên arĩ htĩr japêr nhũm hprō tanhmã hamaxpêr to nê hkaga nê hpãnhã nhãm mēhō ho mjên. Hã koja Tĩrtũm pē ja homnuj nê. Nom koja mjên ra kēp ty nhũm mýrpê axte kãm mēhō ho mjên prãm nê māmri ho mjên. Ja na Tĩrtũm pē homnuj kêt. Ra wam mjênja htyk kēnã. ã Tĩrtũm kot Mojes mã mê pakaxyw mēmoj tã karō kot anhýr.

⁴ Tã ja pyrã nê na pu prem amnepêp pajamaxpêr o:

—Ixte Tĩrtũm kapêr kôt pix mã amnhĩ nhĩpêx o ri ixpa jakamã nhũm Tĩrtũm ja hã ixpumu nê amnhĩm inhmex ã ijarê. Anê.

Tã pu mê ra tanhmã pajamaxpêr to nê hpãnhã pajamaxpêr ò ho pajamaxpêr o:

—Nà na xep hte Tĩrtũm mê ixte kapêr kôt amnhĩ nhĩpêx ã mê ixpumunh kôt amnhĩm mê inhmex xwýnh ã mê ijarênh kêt nê. Mê ixte hkôt amnhĩ nhĩpêx mex o ri ixpare hã. Kêt âm Kris kot mê inhnê htyk nhũm mê

ixte amnhĩ kaxyw hkôt ijamaxpêr nê hkôt amnhĩ xunhwýr pix ã mê ixpumunh kôt na hte mê inhmex ã mê ijarê. Âm ja pix ã mê ixpumunh kôt na hte mê ixto hkra nê mê ixkutã nojarêt o pa. Kra Jejus pix kukwak ri na hte ã mê inhĩpêx anhýr o pa. Anê.

ã mê pajamaxpêr nyw kot anhýr. Jakamã te mê pahte mēhō kot mjên nyw xwýnh gryk ã axte mjên htyk xwýnh mã hamaxpêr kēeta pyrãk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nê Tĩrtũm noo mã tãm ri amnhĩ nhĩpêx. Nê axte mê pahte amnhĩ tomnuj kukamã tanhmã pajamaxpêr to hkêt nê.

⁵ Nê amnepê mã mê pahte amnhĩ krã hkôt tanhmã mê pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mê pahte Tĩrtũm kapêr mar týt tã kuma nê âm kuma nê ri papa nê ri hkôt amnhĩ nhĩpêx kêt nê. Mýrapê nhũm Tĩrtũm tee ri ja hã mê pahpumu nê mê pahtyk nê ma mê kot amnhĩ xã htýx kamã hamak tũm xã hwýr papa mã xwýnhjê hã mê pajarê.

⁶ Nê amnepêp na pu pre htem ã pajamaxpêr anhýr o:

—Nà kot paj Tĩrtũm kapêr kôt pix mã amnhĩ nhĩpêx o ri ixpa nhũm amnhĩ tã ixpumu nê ixte amnhĩ tomnuj kêt xwýnh ã ijarê.

Anhýr o pajamaxpêr no âm tee ri ã pajamaxpêr anhýr kaprý. Nê arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyrãk o amnhĩ nhĩpêx nê hpãnhã Karō nhỹ hã tãm amnhĩ nhĩpêx. Jao ra tee ri mê pamã Tĩrtũm kapêr kôt amnhĩ nhĩpêx prãm kaprý hkêt nê. Ra Tĩrtũm Karō nhỹ hã amnhĩ nhĩpêx nyw o amnhĩ nhĩpêx mex o ri papa.

Tĩrtũm kapêr ã kagã htũm kot tanhmã mê pajarênh to

Rômân 3.20, 5.20; Karatas 3.23-24

⁷ Tã Tĩrtũm mê pahte kapêr kôt ri amnhĩ nhĩpêx ã mê pahpumunh kôt amnhĩm mê pamex ã mê pajarênh kêt jakamã mēmo kaxyw na kapêr ã kagã htũmja? Nà mê pahte mar nê pahprĩ hã Tĩrtũm noo mã mê kot amnhĩ tomnuj xã jarênh mar nê omunh mex kaxyw na. Na hte mê pahkwýjê kukrêx kĩnh o pamã ho panhō hprãm nê mê

pamā karō. Ā kot mēmoj punuj piitā nē mē pamā karō kot anhÿr. Tā mē pahte ja mar kêt ronhÿx pu mē Tirtūm kēp ja homnuj ā harēnh mar kêt nē. ⁸ Tā ra mē pahte harēnh mar nē kēp ja homnuj ā harēnh ma. Mē pamā axpēn kukrēx kīnh o ho pamā panhō hprāmja määnēn kēp ja homnuj ā harēnh mar tā nom aa hkaga hkēt nē arī pamā axpēn kukrēx kīnh o pamā ho panhō hprām tÿx rāhā ho ri papa. Kop ām Tirtūm kapēr kêt ronhÿx pu mē kot amnhī tomnuj xāja aa mar kêt kumrēx nhūm te mē pamā amrakati pyrāk. ⁹ Amnepē mā ixte Tirtūm kapēr mar kêt ri na pa pre ixtÿx ri amnhī kukamā ijamaxpēr o ri ixpa nē ijamaxpēr o:

—E kot paj nhÿrmā Tirtūm ri ixtīr tūm nē inhmex nē ixpa ho ixpa.

Anhÿr tā hpānhā pamā axpēn kukrēx kīnh o ho pamā panhō hprām nē kapērta ma nē ja hā amnhī pumunh kurē kumrēx. Hāmri nē tee ri amnhī kukamā ijamaxpēr nē ijamaxpēr o:

—Hēxta waa nē. Nā ā ixte amnhī nhīpēx anhÿr o ixpa jakamā kot paj nhÿrmā ty nhūm Tirtūm akupÿm ixto ixtīr pa kuri ixtīr tūm nē ixpa ho ixpa hkēt nē. Hēxta waa nē. Ixte amnhī tomnuj xwÿnh na pa. Kot paj nhÿrmā ty nhūm Tirtūm ma mē kot amnhī xā htÿx kamā hamak tūm xāta wÿr amnhī nē inhmē. Anē.

Hāmri nē ixkaprī nē tee ri amnhī kukamā ijamaxpēr o ri ixpa. ¹⁰ Tā hpānhā axtem ijamaxpēr o:

—Nā kot paj Tirtūm kapēr kôt pix mā mǎn ri amnhī nhīpēx o ri ixpa hāmri nē nhÿrmā ixtyk tā hwÿr api nē kuri ixtīr tūm nē inhmex nē ixpa ho ixpa. Nā kot paj anē.

Anhÿr ā ijamaxpēr tā no ām tee ri inhmā hkôt amnhī nhīpēx o ixpa hprām kaprÿ. Na pa pre xatā kapēr nhīrōp ixkuhē nē tee ri ja hā amnhī pumu nē ijamaxpēr o:

—Kwa tanhmā kot pa amnhī nhīpēx to nē ām Tirtūm kôt pix mā ri amnhī nhīpēx? Na pa hte tee ri inhmā ā amnhī nhīpēx anhÿr prām tÿx kaprÿ. Ām ixte amnhī tomnuj pix o ri ixpa xwÿnh jakamā ām hāmri koja amnhī nē kuwyta wÿr inhmē. Nā koja ixto anē. Hēxta waa nē. Tanhmā kot paj we ja nē kām ixkapēr to? Anē.

¹¹ No mēhō koja Tirtūm kapēr kôt amnhī nhīpēx mex o ri pa? Na pu htem pahpiitā tee ri pamā ho anhÿr prām kaprÿ. Mē pahpē hihtÿx kumrēx jakamā na pa pre ixtÿx ixte Tirtūm kuri ixtīr tūm nē ri ixpa hā amnhī kukamā amnhī jarēnh kaprÿ. Ām xatā kapēr nhīrōp ixkuhē nē amnhī tomnuj pix o ri ixpaja mÿrapē koja mē kot amnhī xā htÿx kamā hamak tūm xāta wÿr amnhī nē inhmē. ¹² Kot anhÿr tā tanhmā kot paj mē Tirtūm kapēr ā kagā htūmta jarēnh to? Nā kot mē pamā mē pahte amnhī nhīpēx ā karōta mex kumrēx. Mex o mex. ¹³ Mex kumrēx tā na htem kuma nē tee ri kām hkôt amnhī nhīpēx hprām kaprÿ. Jao nhÿrmā ty nē ma kuwy hwÿr pa. Kêt pa na pa pre ra mar nē omunh mex tā hkôt amnhī nhīpēx mex kêt nē. Jao ra ixte amnhī tomnuj xwÿnh ā amnhī pumu. Na pa pre tee ri inhmā hkôt amnhī nhīpēx o ri ixpa hprām tā no ām xatā kapēr nhīrōp ixkuhē nē hkwÿm ri amnhī nhīpēx rāhā ho ri ixpa. Tā ra tee ri ja hā amnhī pumu nē amnhī kukamā ijamaxpēr o:

—Nā na pa hte ām tee ri inhmā Tirtūm kôt amnhī nhīpēx prām kaprÿ no ām ho anhÿr kêt nē. Ām ixte amnhī tomnuj pix o ixpa xwÿnh na pa. Ja mÿrapē koja Tirtūm amnhī nē ma kuwy hwÿr inhmē. Nā koja ixto anē. Anē.

Mē pahte mē pamā amnhī tomnuj kaga hprām kaprÿ hā mē pajarēnh

Karatas 5.17

¹⁴ Nē Tirtūm kapēr ā kagā htūmta Tirtūm kapēr na. Nē Tirtūm kīnhā ām inhī pix na pa ri ixpa jakamā tanhmā kot pa amnhī to nē kapēr kôt ri amnhī nhīpēx mex o ri ixpa?

¹⁵ Inhmā tām ixte amnhī nhīpēx prām tā no ām amnhī tomnuj pix o ri ixpa. Mēmoj ixpē omnuj tā pa hte ra hkôt tanhmā amnhī tomnuj to ho ri ixpa. Hāmri nē ja hā amnhī pumu nē tee ri amnhī kukamā ijamaxpēr o:

—Hēxta waa nē. Mon pa hte axtem nē ā amnhī nhīpēx anhÿr o ri ixpa? Mēmoj ixpē omnuj nhūm inhmā ho anhÿr prām kêt tā ra ho anē. Nhūm mēmoj mex nhūm inhmā ho anhÿr prām tā ho anhÿr kêt nē. Mon pa hte axtem nē ā amnhī nhīpēx anhÿr o ri ixpa? Anē.

¹⁶ Æ ixte amnhĩ nhĩpêx anhÿr o ri ixpa htã ra Tĩrtũm kapêr mexta ma hãmri nê ra ijamaxpêr o:

—Nà Tĩrtũm kapêrja mex kumrêx tã pa tee ri inhmã hkôt amnhĩ nhĩpêx mex hprãm kaprÿ ho ri ixpa. Hêxta waa nê. Anê.

¹⁷ Inhmã amnhĩ tomnuj prãm kêt tã arĩ ixkaxwÿnh kãm ijamaxpêr punuj nhÿ hã ã amnhĩ nhĩpêx anhÿr o ri ixpa. ¹⁸ Nê inhmã tãm amnhĩ nhĩpêx prãm tã no ãm tee ri ã inhmã amnhĩ nhĩpêx anhÿr prãm kaprÿ. Tanhmã kot pa amnhĩ to nê tãm amnhĩ nhĩpêx o ri ixpa? Na pa tee ri inhmã ja ho anhÿr prãm kaprÿ. Ixte amnhĩ tomnuj xwÿnh na pa. Nê aa ixte amnhĩ to mex kêt kumrêx xwÿnh. ¹⁹ Inhmã mêmoj mex kôt pix mã amnhĩ nhĩpêx prãm tã no ãm ã amnhĩ nhĩpêx anhÿr kêt nê. Nê ãm hkwÿm ri tanhmã amnhĩ tomnuj to ho ri ixpa. Mêmoj ixpê omnuj tã pa hkôt amnhĩ nhĩpêx o ri ixpa. ²⁰ Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mêmoj ixpê omnuj pa inhmã ho anhÿr prãm kêt tã ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri ixpa. ²¹ Nê mêmoj mex nhũm inhmã hkôt amnhĩ nhĩpêx prãm tã ra hkwÿm ri amnhĩ nhĩpêx. Æ ixte amnhĩ nhĩpêx anhÿr xwÿnh na pa. ²² Nê inhmã Tĩrtũm kapêr mar nê hkôt ri amnhĩ nhĩpêx prãm tã ²³ nom ixte amnhĩ tomnuj xwÿnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa.

Anhÿr tã no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwÿnh jakamã na pa hte ã amnhĩ nhĩpêx anhÿr rãhã ho ri ixpa nê tee ri inhmã amnhĩ tomnuj kaga hprãm kaprÿ. ²⁴ Hêxta waa nê. Na pa ixkaprĩ htÿx nê ri ixpa. Æ ixte amnhĩ nhĩpêx anhÿr o ri ixpaja mÿrapê kot paj nhÿrmã ty nê ma mē kot amnhĩ xà htÿx kamã hamak tũm xàta wÿr ma mō. Mēhō kot tanhmã ixkrã hto pa ã amnhĩ nhĩpêx anhÿrja kaga? ²⁵ Nà mē panhō Pahihti Jejus Kĩsja pix. Tãm koja ixte amnhĩ tomnuj kutã tanhmã ixto

ixihtÿx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri ixpa nê Tĩrtũm mã kãm:

—Pa Tĩrtũm. Nà ãm hãmri amex o amex. Anê.

Tã ra ixte Jejus Kris kôt amnhĩ xãm jakamã koja tãm tanhmã ixto ixihtÿx to pa rĩ kormã Tĩrtũm kapêr kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. Æ ixte anhÿr xwÿnh na pa.

8

Tĩrtũm Karō kot mē pahto tãm mē pahte amnhĩ nhĩpêx xwÿnh ã harēnh

Karatas 5.16-26

¹ Nê Jejus Kris kēp mēmoj punuj kutã mē pahto mē paxihtÿx xwÿnh jakamã mē pahte hkôt amnhĩ xunhwÿr xwÿnhjaja na pu htem ÿ hã amnhĩ tomnuj o ri papa hkêt nê. Jao mē pahte kuwy hwÿr papa mã xwÿnh kêt. ² Te ra mē pahtyk nhũm Tĩrtũm kot akupÿm mē pahto mē pahtĩr pyrãk jakamã nhũm Karōja mē pahkarō mã agjê pu mē ÿ hã tãm amnhĩ nhĩpêx o ri papa. Te tãm kot amnhĩ nhĩpêx pyrãk o amnhĩ nhĩpêx nhũm Karō mēmoj punuj piitã kutã mē pahto mē paxihtÿx. Kēp mē pajamaxpêr punuj kutã mē pahto mē paxihtÿx xwÿnh jakamã kot puj mē nhÿrmã mē kot amnhĩ xà htÿx kamã hamak tũm xàta wÿr papa hkêt nê.

³ Nom kormã mē pahte Jejus kôt amnhĩ xunhwÿr kêt ri na pu prem tee ri pamã Tĩrtũm kapêr piitã hkôt amnhĩ nhĩpêx prãm kaprÿ nhũm mē pahpê hihtÿx kumrêx. Jakamã tanhmã koja Tĩrtũm amnhĩ to nê amnhĩ mã mē pamex xwÿnh ã mē pajarē? Na pre tee ri amnhĩ tã mē pajamã hãmri nê mē pahwÿr Kraja mē nhũm man mē pahwÿr wrÿ nê mē pahpyrà nê ĩ ho mē pakamã kato. Nom mē parom aa tanhmã amnhĩ tomnuj to hkêt kumrêx nê ri pa. Tã mē kot hpĩr tã nhũm amarĩ htyk kêt nê. Na pre htyk o mē pahte amnhĩ tomnuj piitã hpãnhã amnhĩrer pa. Jakamã tãm kēp mē pajamaxpêr punuj kutã mē pahto paxihtÿx xwÿnh. Na pu htem hkôt amnhĩ xunhwÿ hãmri nê kukwak ri amnhĩ tomnuj o ri papa hkêt nê. ⁴ Pãnhã Tĩrtũm kot amnhĩ

nhīpêx kôt amnhī nhīpêx o ri papa nē axte mē pahte amnhī nhīpêx tūm kôt amnhī nhīpêx kêt nē. Hāmri hpānhā Tīrtūm Karō kot amnhī nhīpêx kôt pix mā amnhī nhīpêx. Nē hamaxpēr kôt pix mā pajamaxpēr. Ja kaxyw na pre Tīrtūm mē pahwūr Kraja mē nhūm wrý nē mē pahpiitā mē panē ty.

⁵ Nē mē kot amnhī krā hkôt tanhmā amnhī nhīpêx to ho ri mē pa xwýnhjaja na htem htýx ri tanhmā hamaxpēr to xà hkôt amnhī nhīpêx o ri pa. No kêt Tīrtūm Karō kot mē pahkarō mā gjêx xwýnhjaja na pu htem mē kurom te Jejus jamaxpēr pyrāk o pajamaxpēr o papa.

⁶ Nē mē kot amnhī krā hkôt amnhī nhīpêx xwýnhjaja koja mē nhýrmā ty nē ma kuwy hwūr pa nē kamā pa ho pa. No mē pahte Tīrtūm Karō hkôt amnhī nhīpêx xwýnhjaja kot puj mē pajamaxpēr nyw o pajamaxpēr nē amnhī nhīpêx nyw o amnhī nhīpêx. Jao paxāmnhīx ri pajamakêtkati nē ri papa. Nē nhýrmā ty hāmri nē Tīrtūm mē Jejus wa kuri akupým pahtír tūm nē pamex kumrêx nē papa ho papa.

⁷ Nē mē kot amnhī krā hkôt ri amnhī nhīpêx xwýnhjaja kām Tīrtūm kīnh kêt. Nē kām kapēr mar prām kêt jakamā tanhmā kot mē amnhī to nē hkôt amnhī nhīpêx?

⁸ Koja mēhō amnhī krā hkôt kām hprām xà hkôt pix mā amnhī nhīpêx hāmri nhūm Tīrtūm tee ri ja hā omu nē hkīnh kêt nē.

⁹ No mē papajaja na pu htem mē urāk nē ā amnhī nhīpêx anhýr kêt nē. Ra Tīrtūm Karō kot mē pahkarō mā gjêx jakamā na pu htem hkôt pix mā amnhī nhīpêx hprām. No koja Tīrtūm Karō mēhō kaxwýnh mā àr kêt nē nhūm kēp hkra hkêt nē.

¹⁰⁻¹¹ Tā mē papajaja. Mē pahte amnhī tomnuj mýrapê koja mē pakrāhkàja nhýrmā ty. No nhūm Tīrtūm ra kot amnhīm mē pahte amnhī to mex xwýnh ā mē pajarēnh nhūm Kris Karō kot mē pahkarō mā gjêx jakamā koja mē pahkarōja htyk kêt nē. Mē pakrāhkà pix koja ty nhūm mē pahkarōja ma kaxkwa hwūr àpir kurê kumrêx. Tā nhūm nhýrmā Tīrtūm akupým mē pakrāhkà ho htír nē akupým mē pahkarōja mē pakrāhkām hagjē pu mē wa kuri pahtír tūm nē papa ho papa. ¹² Jakamā e kwa ixkwýjaja. Kēr pu mē axte ri mē pajamaxpēr tūm kôt amnhī nhīpêx o ri

papa hkêt nē. ¹³ Kot puj mē arī ā amnhī nhīpêx anhýr o ri papa hāmri nē nhýrmā ty nē ma mē kot amnhī xà htýx kamā hamak tūm xàta wūr papa. Jakamā kēr pu mē mēmo arīgro hā pamā tanhmā amnhī tomnuj to hprām hāmri nē amnhī kukamā pajamaxpēr o:

—Nà inhmā ā amnhī nhīpêx anhýr prām tā kot paj Tīrtūm Karō nhý hā ja kutā amnhī to htýx nē ho anhýr kêt nē. Anē.

Kot puj mē ā pajamaxpēr anē hāmri nē nhýrmā kuwy wūr papa hkêt nē. Pānhā Tīrtūm mē Jejus wa kuri pamex nē pahtír tūm nē ri papa ho papa. ¹⁴ Mē kot Tīrtūm Karō hkôt amnhī nhīpêx xwýnhjaja kēp Tīrtūm kraa.

¹⁵ Nom amnepēm kormā mē pahte hkôt amnhī xunhwūr kêt ri. Nē kormā mē pamā kapēr mar prām kêt ri nhūm kot amnhī tā mē pahpumunh nē tanhmā mē pahto pumaj na pu prem pamā uma ho ri papa. Tā hkôt amnhī xunhwý nhūm Karōja mē pahkarō mā gjêx jakamā na pu htem ra pamā uma hkêt nē ri papa. Karō kot mē pahpē Tīrtūm kra hā mē pajarēnh jakamā pu mē amnhī kamā kot tanhmā mē panhīpêx to puma hkêt nē ri papa. Nē paxāmnhīx pajamakêtkati nē kām amnhī jarē nē kām amnhī jarēnh o:

—Pa Inhīpêxà maati? Ot pa ixpē akra hā amā amnhī jarēnh kaxyw amnhī kaxyw amā ijamaxpēr. Anē.

Jao ra mē pamā uma hkêt nē ri papa. ¹⁶ Karō kot mē pahkarō mā gjêx nhūm mē pahte amnhī tā omunh jakamā na pu htem pajamaxpēr o:

—Nà Tīrtūm Karō kot ixkarō mā àr jakamā ixpē hkra na pa. Anē.

Nhýrmā mēmoj piitā akupým mex par ā harēnh

Sikūn Korūt 4.16-18; Korosē 3.4; Wam Pētre 4.13

¹⁷ Nē mē kām Tīrtūm prām kêt xwýnhjaja na htem te mē kot Tīrtūm Kra Jejus nhīpêx pyrāk o mē panhīpêx pu mē pahpunuj nē ri papa. Nom kot puj mē nhýrmā Tīrtūm mex o mex xwýnhja kuri pamex kumrêx nē papa. Mē pahpē hkra jakamā kot puj mē Kra Jejus pyrā nē ō krī kamā kuri pamex kumrêx nē ri papa ho papa. ¹⁸ Jar Jejus ā mē pahpunuj nē ri papa htā kot puj mē

nhÿrmã kuri pamex kumrêx nê papa ho papa. Hãmri nê mẽ pamex o pamex ã amnhĩ pumu nê jar pika ja kamã tanhmã mẽ pahpunuj toja mã axte pajamexpêr kêt kumrêx.

¹⁹ Nê pika hkôt Tirtũm kot mẽmoj ho kator xwÿnhjaja na htem Tirtũm kot mẽ pahto mex par jatur xãm mẽnh ã arĩgro jamãr rãhã ho pa. àk nê mry nê pĩ nê gô nê mẽmoj piitã mẽ pajamãr o pa. Te kot mẽ pakukamã hamaxpêr o:

—Kwa mẽmo arĩgro hã koja Tirtũm hkrajê piitã ho amnhĩrit nê mẽ ho mex par jatur xãm kumê pu mẽ ja hã mẽ omu? Hêxta waa nê. Inhmã tokyx ja hã mẽ omunh prãm tÿx. Koja tokyx ã mẽ hipêx anê pa ixkĩnh tÿx kumrêx.

Anhÿr o hamaxpêr pyrãk. ²⁰ Mẽmo kaxyw na hte mryja ã mẽ pakukamã hamaxpêr anê? Nà amnepê mã Tirtũm kot mẽmoj piitã ho katorta ã nhũm pre piitã mex o mex. Pĩ nê mry nê gô. Mẽmoj piitã mex kumrêx rãhã nê. Aa grã nê htyk kêt kumrêx. Tã Atãw kot amnhĩ tomnuj mÿrapê nhũm ra ÿ hã mẽmoj piitã homnu par jakamã na hte mẽmoj hÿr nê pa nê gaa nê ty nê hapêx. Nê mẽ pahpur kãm ahkagrôt punuj hapôj. Atãw kot amnhĩ tomnuj mÿrapê nhũm Tirtũm kapêr xà hkôt ã mẽmoj omnu hpar anê. ²¹ Nom koja arĩ rãhã ho rãhã hkêt nê. Koja nhÿrmã Tirtũm akupÿm mẽmoj piitã ho mex pa nhũm mex o mex nê axte grã rÿ axte htyk nê hapêx kêt nê. Nê axte omnu nê hikwÿ hkêt nê. Koja mẽ pahpyrà nê mex o mex. Jakamã na htem Tirtũm kot mẽ pahto mex par jatur xãm mẽnh xà hã arĩgro jamãr rãhã ho pa. ²² Te mẽhõ ni hpijagri kaxyw õhy xà htÿx nê tokyx kãm hpijagri hprãm xàj àmra ho nõr pyrãk o amnhĩ nhĩpêx pê mẽ pahto mex jatur xãm mẽnh ã arĩgrota jamãr o pa.

²³ Nê mẽ papajaja na pu htem tanhmã pahpunuj to nê jajê pyrã nê te amnhĩ kamnhêr o ri papa pyrãk. Rÿ tanhmã paxà kute nê ri papa. Rÿ pamã prãm nê paxàà nê ri papa. Nê tanhmã mẽ pahpunuj to nê ri papa. Jao te pĩ nê gô nê mryja pyrã nê amnhĩ tã Tirtũm kot mẽ pahto mex par jatur xãm mẽnh ã arĩgro jamãr rãhã ho ri papa.

Na pre Tirtũm mẽ pahwÿr Karõ rê nhũm mẽ pahkarõ mã agjê nê mẽ pakukamã Tirtũm tanhmã kot mẽ pahto mex to hã mẽ pamã ho amnhĩrit nê mẽ pamã ho amnhĩrit o:

—Koja nhÿrmã Tirtũm mẽ ato mex par jatur xãm kumê nê mẽ piitã mẽ kãm mẽ apê hkra hã mẽ ato amnhĩrit. Hãmri nê mẽ amã mẽ anhi nyw gô ka mẽ axte axà nê ri apa nê atyk kêt nê. Hãmri nê Tirtũm ri amex kumrêx nê ri apa ho apa. Nà kot kaj mẽ nhÿrmã ã amnhĩ nhĩpêx anê. Anê.

À Tirtũm Karõ kot mẽ pakukamã mẽ pajarênh anhÿr jakamã na pu htem amnhĩ tã kot mẽ pahto mex jatur xãm mẽnh pix jamãr o ri papa. ²⁴ Nom na kormã ã mẽ pahto mex anhÿr kêt nê. Kormã mẽ pamã mẽ panhi nyw nhõr kêt nê. Nom ra kot mẽ pahto hkra jakamã pu mẽ ja hã amnhĩ pumu nê pajamaxpêr o:

—Nà ra Tirtũm kot ixto hkra jakamã koja nhÿrmã mãânên inhmã inhĩ nyw gô. Nà koja inhmã kugô.

²⁵ Anhÿr o pajamaxpêr tã kormã. Na pu htem kormã amnhĩ tã hamãr rãhã ho ri papa nê aa hkaga hkêt nê papa.

Mẽ pahte Tirtũm Karõ nhÿ hã Tirtũm mã amnhĩ jarênh

²⁶ Nê na pu htem Tirtũm mã amnhĩ jarênh kaxyw nhũm hte Karõja mẽ pahto ajuta pu mẽ ÿ hã pakatàt kôt kãm tanhmã amnhĩ jarênh to. No kot puj mẽ amnhĩ krã hkôt kãm amnhĩ jarênh mex kêt nê. Na pu htem ja kaxyw tee ri amnhĩ kukamã pajamaxpêr o:

—Kwa tanhmã kot pa Tirtũm mã amnhĩ jarênh to? Tanhmã kot pa mẽmoj tã ixàhwÿr to rÿ amnhĩ to hwÿr to? Nà kot paj amnhĩ krã hkôt ja ho anhÿr mex kêt nê. Hêxta waa nê. Anê.

No nhũm Tirtũm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ÿ hã kãm amnhĩ jarênh mex nê pakatàt kôt mẽmoj tã kuwÿ. Te Karõja tanhmã mẽ pakute hã mẽ pahpumunh nê mẽ pakamã ukaprĩ xàj tãm mẽ pahto hwÿr pyrãk.

²⁷ Jakamã pu mẽ ÿ hã tanhmã Tirtũm mã amnhĩ jarênh to nhũm mẽ pamar kurê kumrêx. Ra kot mẽ pajamaxpêr kôt mẽ pahpumunh par kênã. Nhũm ra Karõ kot

mê pahkarô mâ gjêx jakamã na pu htem kãm hprãm xà hkôt kãm amnhĩ jarê nê tanhmã amnhĩ to paxàhwÿr to.

Tĩrtũm kot mê pamã mêmoj piitã ho mex ã harênh

Rômân 8.37; Piripos 1.12; Wam Pêtre 5.10

²⁸ Nê mê pamã Tĩrtũm kĩnh xwÿnhjaja. Tĩrtũm kot mê pahto hkra xwÿnhjaja. Koja mêmoj mê pakamã tanhmã amnhĩ to htã kêr pu mê ãm ja hã amnhĩ pumu nê tee ri amnhĩ kukamã pajamaxpêr kêt nê. Koja te mê pahpê omnuj pyrãk tã koja nhÿrmã hpãnhã mê pamã mex nê. Koja Tĩrtũm nhÿrmã tanhmã mê pamã mêmojta o mex to. ²⁹ Amnepê mâ mêmoj piitã hkêt ri na pre Tĩrtũm mê pakukamã tanhmã mê pajarênh to nê mê pajarênh o:

—E kot paj nhÿrmã mê kot Ixkra Jejus kôt amnhĩ xunhwÿr xwÿnhjê ho ixkra jakamã nhũm mê Jejus pyrã nê kêp ixkraa. Nê urãk nê ixkapêr kôt amnhĩ nhĩpêx o pa. Jao pa ra ixkra xohtô nê. Nà ja na inhmã hprãm. Anê.

³⁰ Tã pu htem pajapôj nê ri papa. Hãmri nê kapêr ma nê amnhĩ kaxyw Kra Jejus kôt pajamaxpêr nê hkôt amnhĩ xunhwÿ. Hãmri nhũm Tĩrtũm ja hã mê pahpumu nê pahto hkra nê amnhĩm mê pamex xwÿnh ã mê pajarê nê mê pahto mex nê. Nê te ho Kra Jejus nhĩpêx pyrãk o mê panhĩpêx. Jao nhÿrmã wa kuri mê pahpũm nê papa ho papa mã xwÿnh ã mê pajarê.

Mêhõ kot Tĩrtũm pê aa mê papytãr kêt ã harênh

Rômân 5.1

³¹ Tã ã Tĩrtũm kãm mê pajapê nê mê pahto mex kot anhÿr. Æ kot mê panhĩpêx mex anhÿr jakamã ra mê pahkôt pa ho pa rãhãã. Jakamã mêhõ koja ïhkra pê mê pahpytã? Nê mêhõ koja tanhmã ri kêp mê pahto? Nà koja kêp mê papytãr rÿ tanhmã kêp mê pahto hkêt nê. ³² Tĩrtũm kãm Kra Jejus japê htÿx tã na pre mê pahpê nê hkêt nê mê pahwÿr kumê. Te kot mê pamã ôr pyrãk o hipêx nhũm mê pahwÿr wrÿ nê mê panê ty. Tã ra Tĩrtũm kot mê pamã ôr jakamã koja mãânên kãm mê pahte Kra hkôt amnhĩ xunhwÿr xwÿnhjê japê nê mê pahto mex rãhã ho ri pa. Nà koja ã mê pahto mex anê.

³³ Jakamã mêhõ koja kãm mê pahte amnhĩ tomnuj xwÿnh ã mê pajarê? Ra tãm kot mê pahto hkra nê mê pahte amnhĩ to mex xwÿnh ã mê pajarênh kênã kot kêt mêhõ kãm tanhmã mê pahto kapêr punuj to nhũm mê kuma. Koja mê tee ri kãm tanhmã mê pahto kapêr to kaprÿ. ³⁴ Na pre ra Jejus Kris mê pahte amnhĩ tomnuj pãnhã amnhĩrer kaxyw mê panê ty nhũm Tĩrtũm akupÿm ho htũr. Hãmri nhũm ma akupÿm kaxkwa hwÿr api nê Pahi Maati krĩ xà kamã Tĩrtũm nhĩhkô hã hkrĩ ho hkrĩ. Nê Tĩrtũm mã mê pakutã nojarêt rãhã ho kuri hkrĩ ho hkrĩ. Jakamã mêhõ koja kêp mê kot amnhĩ xà htÿx kamã hamak tũm xàta wÿr mê pajano? Nà amrakati kumrêx.

³⁵ Nê Krisja kaxkwa kamã Tĩrtũm nhĩhkô hã hkrĩ ho hkrĩ htã mãânên jar mê pahkôt pa ho pa. Kãm mê pajapê htÿx jakamã kot puj mê tanhmã pahpunuj to htã nhũm arĩ kãm mê pajapê nê mê pahkôt pa ho pa.

Rÿ nhũm mê kot hkôt amnhĩ xunhwÿr kêt xwÿnhjaja tanhmã hã mê pahto htã nhũm arĩ kãm mê pajapê kamã mê pahkôt pa ho pa.

Rÿ mê pamã prãm nê ri papa. Rÿ mê paxê hkêt nê pamã kry nê ri papa htã nhũm arĩ kãm mê pajapê kamã mê pahkôt pa ho pa.

Rÿ ra mê kot hã mê panhĩmex kaxyw rÿ hã mê pahpar kumrêx. Tã nhũm arĩ kãm mê pajapê kamã mê pahkôt pa ho pa rãhã nê.

Kãm mê pajapê kamã mê pahkôt pa ho pa rãhã jakamã pu mê tee ri amnhĩ kukamã pajamaxpêr kêt nê. Æm hkôt paxãmnhĩx ri pajamakêtkati nê ri papa ho papa. ³⁶ Tĩrtũm kapêr ã kagà htũm te mê papajaja mê pahte kãm tanhmã amnhĩ jarênh to pyrã nê mê pajarênh kot:

Pa Tĩrtũm. Na htem atã mê ixtomnuj tÿx o pa.

Nê ra mê kot mê inhĩmex kaxyw.

Nê mê inhĩpêx o te mê kot ôwêhti ho môr nê hpar kaxyw tanhmã hipêx to pyrãk.

Jakamã na pa mê ra ixtyk kaxyw.

Anhÿr o kot mê pajarênh. ³⁷ Tã kwãr mê ã mê panhĩpêx anê. Arĩ Kris kãm mê pajapê kamã mê pahkôt pa ho pa rãhã jakamã mê kot tanhmã mê pahto htã pu mê arĩ

amnhî kaxyw kãm pajamexpër tÿx rãhã ho ri papa. Nhũm arĩ mẽ kutã mẽ pahto paxihtÿx pu mẽ arĩ mẽ kãm pakuhê.

³⁸ Měmoj koja tanhmã mẽ pahto nhũm Tirtũm tee ri ja hã mẽ pahpumu nẽ kãm mẽ pajapê hkêt nẽ? Nà amrakati kumrêx. Koja mēhõ rÿ mẽmoj mẽ pahpê àmnàr kêt nẽ. Na hte jar pika ja kamã Kris kãm mẽ pajapê kamã mẽ pahkôt pa ho pa. Nẽ kot puj mẽ nhÿrmã ty nhũm arĩ kãm mẽ pajapê kamã mẽ pahkôt pa ho pa rãhã nẽ. Jakamã koja mẽkarõ rÿ mẽkarõmnuti rÿ jar pika ja kamã mẽ kãm Tirtũm prãm kêt xwÿnhjaja mẽ pahpê àmnàr kêt nẽ. Rÿ mẽmoj tanhmã kute. Rÿ kormã hapu hã mẽmoj tanhmã kute. Koja mẽmoj piitã tee ri tanhmã kęp mẽ pahto htã nhũm Kris arĩ kãm mẽ pajapê kamã mẽ pahkôt pa ho pa rãhã nẽ nhũm mẽmoj tee ri mẽ pahpê àmnàr kaprÿ. ³⁹ Nẽ koja kÿj rũm mẽmoj wrÿ nẽ tanhmã kęp mẽ pahto japêr. Rÿ pyka rũm mẽmoj kato nẽ tanhmã kęp mẽ pahto japêr. Rÿ kuwy rÿ kôk xàpêr tÿx tanhmã kęp mẽ pahto. Tã nhũm mẽ panhõ Pahihti Jejus Kris arĩ kãm mẽ pajapê kamã mẽ pahkôt pa ho pa rãhã nẽ. Te Tirtũm kãm mẽ pajapê pyrãk o kãm mẽ pajapê htÿx kãm mẽ pahkôt pa ho pa rãhã jakamã nhũm mẽmoj tee ri mẽ pahpê àmnàr kaprÿ.

9

Ijaew jarênh

Atre 3.25; Rômân 3.1-2

¹⁻² Nẽ na pa tee ri ixkwÿ Ijaew kot tanhmã amnhî nhĩpêx to ho pahã mẽ omu nẽ ixkaprĩ nẽ. Ixpyrà nẽ mẽ kęp Ijaew tã ixkĩnhã amnhî kaxyw Kris kôt hamaxpêr kêt jakamã nhũm Kris tee ri kãm mẽ hamakêtkati nẽ àmnhĩx ri mẽ pa hprãm kaprÿ. Pa tee ri mẽ hkukamã ijamaxpêr nẽ ixkaprĩ nẽ ri ixpa. Nẽ aa ixkaprĩ ixpê kator kêt kumrêx. Mẽ kot inhmã mẽ hkĩnh kêt ã amnhî tã ijarênh tã inhmã mẽ hkĩnh kênã. ãm hãmri na pa ã amnhî jarênh anẽ. Tirtũm Karõ kot ja hã ixpumunh mex nẽ inhmã:

—Nà ãm hãmri na ka amã mẽ hkĩnh ã amnhî jarê. Anẽ.

³ Mẽ kęp ixkwÿ na mẽ. Mẽ ixpàr kraxja ãm pixi mex. Tã nhũm mẽ ixkĩnhã amnhî kaxyw Kris kôt hamaxpêr kêt jakamã

kop ãm Tirtũm kot mẽ nẽ kuwy hwÿr pa inhmênh ronhÿx ja inhmã mex. Nhÿx pa kãm:

—Kwa Tirtũm. Amnhî nẽ kuwy hwÿr ixkwÿjê rênh kêt nẽ. Inhmã mẽ hapê htÿx kumrêx. Mẽ hpãnhã pa mãn mẽ nẽ hwÿr inhmê nã.

Anhÿr o nhÿx pa kãm ixkapêr. Nom kot paj amnhî to ã ixàhwÿr anhÿr kaprÿ. Tirtũm kot mẽ kamã ukaprĩ htã no nhũm mẽ amnhî kaxyw Kris mã hamaxpêr kêt jakamã tanhmã koja amnhî to nẽ mẽ hpãnhã pa mẽ nẽ kuwy wÿr inhmê nhũm mẽ ixrom kuri htĩr tũm nẽ pa ho pa? Mẽ kot hkôt amnhî xunhwÿÿre hã. ⁴ Mẽ ixpê Ijaew nhĩgêjtaja na pre Tirtũm amnepê mã mẽ ho mex rax nẽ. Nẽ kãm mẽ ho hkra hprãm nẽ. Nhũm prem tanhmã kot amnhî nhĩpêx mex to hã no ho omunh o pa. Nẽ hirã htÿx kãm ri pa hã omu nhũm mẽ kãm:

—E kot kaj mẽ ixkapêr ma nẽ ixkôt amnhî nhĩpêx o ri apa. Hã kot paj mẽ akôt ixpa ho ixpa nẽ mẽ ato mex nẽ ka mẽ axpên kanrêhã axàmnàr rax nẽ. Hãmri pa mẽ amã pika mex gõ ka mẽ kamã ajamakêtkati nẽ axàmnhĩx ri apa ho apa.

Anhÿr o mẽ kãm kapêr. Hãmri nẽ mẽ kaxyw Mojes mã tanhmã kapêr to nẽ mẽ kaxyw kãm mẽmoj piitã hã karõ. Mẽ kot tanhmã amnhî tomnuj to hãmri nẽ tee ri ja hã amnhî pumunh nẽ tanhmã amnhî to Tirtũm wÿr to nhũm kot mẽ mar nẽ mẽ nẽ ja ho hapêx par kaxyw. Finat Mojes kot amnhî xõ ri mẽ kãm ujarênh nhũm mẽ kot mar nẽ hkôt amnhî nhĩpêx mex o ri pa kaxyw. ⁵ Mẽ ixkukamã mẽ ixpãmjaja. Apraãw nẽ Ijak nẽ Jako kanrêhã mẽ hkra nẽ mẽ htàmnhwÿjaja na pre mẽ. Mẽ hwÿr na pre Tirtũmjaja Kra Jejus Kris mẽ nhũm mẽ hwÿr wrÿ nẽ mẽ kamã ï ho ï ho kator jakamã haxwÿja kęp Ijaew na pre. Kęp Měpahpãm nẽ mex o mex nẽ hihtÿx o hihtÿx tã Ijaew wÿr wrÿ nẽ mẽ kamã kato. Hãmri nhũm Ijaew kêt xwÿnhjaja harênh ma nẽ tee ri hamaxpêr nẽ hamaxpêr o:

—Hêxta waa nẽ. Kęp ãm Jejus mẽ papa kamã mãn kator ronhÿx mẽ pamã mex kumrêx. Anẽ.

⁶ No nhũm kormã Ijaew hwÿr wrÿk kêt ri nhũm Tirtũm ra kot mẽ ho hkra kaxyw mẽ hã amnhî jarê nhũm mẽ hkwyja kãm ja

prãm kêt nê hkaga. Tã xà na pre Tĩrtũm kot mẽ ho hkra hã amnhĩ jarênh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarê nê hã amnhĩ to hêx. Jakamã na pre mẽ hkwýjaja hkwýjê rom hkaga hkêt nê nhũm amnhĩ tã mẽ omu nê mẽ ho hkra. Nom mẽ piitã mẽ ho hkra hkêt nê. Mẽ hkwýjaja kot hkaga jakamã nhũm ãm mẽ hkwýjê pix o hkra.

⁷Nê finat Apraãwja na pre hkanrêhã hkra nê htãmnhwý xohtô nê. Tã xà na pre Tĩrtũm htãmnhwý piitã mẽ ho hkra hã amnhĩ jarê? Nà mẽ piitã ã mẽ harênh anhýr kêt nê. ãm mẽ hkwýjê pix na pre mẽ ho hkra hã mẽ harê. Apraãw kra Ijak kôt hkanrêhã htãmnhwý pixjaja nhũm kot mẽ ho hkra hã mẽ harê.

⁸⁻⁹Nê Apraãw kormã hprô kamã hkra hkêt ri na pre kãm àpênh xwýnh kamã hkra nhũm kato nê myre nê hixi pê Ismael. Nom kêp Apraãw prô kumrêx kamã hkra hkêt. Prô kuprý kamã hkra na pre. Tã nhũm Tĩrtũm kãm hkra kumrêx kukamã harê nê kãm:

—E kot paj ma tẽ hãmri nê mẽmo arĩgro hã akupýn awýr tẽ nhũm ra aprô hpijagri nhũm war akra myre. Anê.

Tã nhũm hprô Saraja htujarô. Nê gaa nê hpijagri nhũm hkraja myre. Hixi pê Ijak. Kêp Apraãw prô kamã hkra jakamã Tĩrtũm nom kêp Apraãw kra kumrêx. Jakamã hkra Ijak kanrêhã htãmnhwýjaja na pre Tĩrtũm kot mẽ ho hkra hã mẽ harê. Ra kot Apraãw mã ja hã amnhĩ jarênh xà hkôt.

¹⁰Tã nhũm Ijakja hprêk nê Repek o hprô. Nê gaa nê ra haxwýja wa hkra nhũm hkraja wa ahpo nê kato nê wa hamẽ my. Kot wa pê Ejau nhũm kot hapu pê Jako. ¹¹⁻¹²Nom nhũm kormã wa kator kêt ri nhũm Tĩrtũm wa hkukamã tanhmã wa harênh to. àhpumunh xà hkôt wa katorxã mã wa harê nê kãm:

—E kot paj amã war akra wa hkukamã tanhmã wa harênh to ka inhma. Nà koja wa kato nê gaa nê hprêk hãmri nhũm kot haputa amnhĩ to rax o kot wa jakre. Anê.

Kot wata koja kot hapu kĩnhã amnhĩ to grire nê ri pa nhũm ã wa hkukamã wa harênh anê. Kãm wa kot tanhmã amnhĩ nhĩpêx to hprãm xà hkôt ã wa harênh anê. Kormã wa kot tanhmã amnhĩ tomnuj to rý

tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harênh anê. ¹³Tĩrtũm kapêr ã kagà htũm kot wa harênh nê wa hã kagà kot:

Ejau rom Jako kanrêhã hkra nê htãmnhwý pixjaja na pre Tĩrtũm amnhĩm mẽ ho hkra. Anê.

¹⁴Mãn ka mẽ Tĩrtũm kot ã wa harênh anhýrja ma nê ajamaxpêr o:

—Tk. Kwa ja mexti hã. Mo na pre hamẽ wa hkanrêhã wa hkra nê wa htãmnhwý piitã ho hkra hkêt nê? Anê.

Kwa mẽ ã ajamaxpêr anhýr kêt nê. Tĩrtũm na hte kãm hprãm xà hkôt tanhmã mẽ panhĩpêx to ho pa pu mẽ kot tanhmã mẽ panhĩpêx to hã omu nê ãm omu nê amnhĩ tã tanhmã kãm nê hkêt nê. ¹⁵Na pre finat Mojes mã amnhĩ jarênh o:

Inhmã hprãm xà hkôt na pa hte mẽ omu nê tanhmã mẽ kamã ixukaprĩ hto ho ri ixpa.

Nê inhmã hprãm xà hkôt na pa hte ahpýnhã tanhmã mẽ hipêx to ho ri ixpa.

Anhýr o kãm amnhĩ jarê. ¹⁶Nom tanhmã mẽ pahte amnhĩ nhĩpêx to hã mẽ pahpumunh kôt na hte mẽ pakamã ukaprĩ hkêt nê. ãm tãm kãm hprãm xà hkôt na hte tanhmã mẽ pakamã ukaprĩ hto ho pa. ¹⁷Amnepê mã Ejit kãm mẽ õ pahihtĩ Paraohti hwýr na pre Mojes mẽ nhũm ma hwýr mō nê kãm tanhmã Tĩrtũm kapêr jarênh to nê kãm:

—E Tĩrtũm na awýr inhmẽ pa mō. Tãm na pre apê Ejit nhõ xwýnhjê nhõ pahi kaxyw axãm. Akrã hihtýx tã nhũm mẽ kaxyw axãm. Tã ra xatã àhpumunh týx o tanhmã anhĩpêx to. Krĩ piitã hkôt ri mẽ pa xwýnhjaja kot atã harênh mar nê àhpumunh o àhpumunh ã omunh kaxyw. Tã ixte amã ja jarênh kaxyw na pre awýr inhmẽ pa man awýr mō. Anê.

¹⁸Ã na hte Tĩrtũm kãm hprãm xà hkôt tanhmã mẽ panhĩpêx anhýr to ho pa. Jao mẽ hkwýjê kamã ukaprĩ ho pa. No mẽ hkwýjaja nhũm tee ri mẽ hkrã hihtýx ã mẽ omu nê ãm mẽ omu nhũm mẽ amnhĩ krã hkôt ri tanhmã amnhĩ tomnuj to ho ri pa.

Tĩrtũm kêp mẽ pakamã ukaprĩ xwýnh ã harênh

19 Nê kot kaj mẽ atõ Tĩrtũm kot ã mẽ hipêx anhÿrja ã harênh ma nê tanhmã hã ixkukjêr to nê inhmã:

—Kwa na xep hte Tĩrtũm ahpÿnhã tanhmã mẽ hipêx to. Nê mẽ hkwÿjê kamã ukaprĩ ho pa nê mẽ hkwÿjaja mẽ hkrã hihtÿx ã mẽ omu nê ãm mẽ omu nê mẽ kamã ukaprĩ hkêr nê. Jakamã kwa mo na hte mẽ kot amnhĩ tomnuj xwÿnh ã mẽ harê? Tãm kot ã mẽ hipêx anhÿr kênã kot kêt mẽ kot amnhĩ tomnuj xwÿnh ã mẽ harê.

Anhÿr o ajamaxpêr japêr. 20 Kwa mẽ ri ã atÿx Tĩrtũm jarênh anhÿr kêt nê. E pa mẽ amã ejêp jarê ka mẽ inhma. Xà kot mēhõ gyw kwÿ ho amnhĩm poti nhĩpêx nhũm tee ri amnhĩ tã omu nê amnhĩ tã tanhmã kãm kapêr to nê kãm: “Tk. Kwa mon ka ri ã inhĩpêx anê?” Anhÿr o amnhĩ tã kãm kapêr? Nà koja kãm tanhmã nê hkêr nê. 21 Hipêx xwÿnh kãm hprãm xà hkôt kot ã hipêx anhÿr kênã kot kêt amnhĩ tã kãm akir. Koja amnhĩm gyw kwÿ kakwÿ nê ho poti ho axkrut nê hipêx. Nê hõ ho muxre. Ho mex kumrêx nhũm xa. Nhũm ihõja mã ho anê nê hipêx no ãm wamta kĩnhã ho hanhãjti nhũm omnajti nê xa. No ãm tãm kot hamê wa hipêx prãm xà hkôt wa hipêx kênã.

22 Tã na hte ã Tĩrtũm mẽ panhĩpêx anê. Te poti pynajre pyrã nê mẽ pahkwÿjê nhĩpêx nhũm mẽ kãm kapêr mar prãm kêt nê htÿx ri tanhmã amnhĩ tomnuj to ho ri pa. Hãmri nhũm amnhĩ tã mẽ omu nê te amnhĩ nê mẽ rênh kaxyw pyrãk o mẽ hipêx no ãm kormã hamaxpêr o:

—Nà kot paj nhÿrmã mẽ kot amnhĩ tomnuj mÿrapê mẽ ho ijapêx pa nhũm mẽ piitã ja hã ixpumu nê inhmã ixãhpumunh o ixãhpumunh ã ijarê. Nê inhmã mẽmoj punuj piitã hkĩnh kêt kumrêx ã axpên mã ijarê. Anê.

23 Nom na hte jajê rom mẽ pahkwÿjê nhĩpêx o te poti mexta nhĩpêx pyrã nê amnhĩ kaxyw mẽ paxunhwÿ nê mẽ pahto hkra kaxyw. Nê mẽ pajarênh o:

—Nà koja mẽ amnhĩ kaxyw Ixkra Jejus mã hamaxpêr nê hkôt amnhĩ xunhwÿ pa ja hã mẽ omu nê mẽ kamã ixukaprĩ ho ri ixpa. Nê mẽ ho mex pê mẽ kutã inhnojarêr rãhã ho ri ixpa. Hãmri nhũm mẽ nhÿrmã Ixkra mẽ wa ixri htĩr tũm nê mex nê pa

ho pa. Kot paj ã mẽ ho mex anê nhũm mẽ amnhĩ tã ixpumu nê inhmã inhmex o inhmex ã ijarênh o pa. Anê.

À na hte Tĩrtũm ahpÿnhã mẽ pahpiitã mẽ panhĩpêx anê.

24 Nê na hte mẽ ixpê Ijaew pix o hkra hkêr nê. Na hte mãânên mẽ apê Ijaew kêt xwÿnhjê ho hkra. 25 Amnepê mã mẽ kãm kapêr jarênh o ri mẽ pa xwÿnhjê hõ pê finat Ojejja na pre te Tĩrtũm tãm kot Ijaew kêt xwÿnhjê jarênh pyrã nê mẽ harênh o:

Amnepêm na pa pre mẽ ho ixkra hkêr tã kot paj mẽ hkwÿjê ho ixkra.

Na pa pre mẽ kamã ixukaprĩ hkêr tã pa ra inhmã mẽ hapê nê.

26 Nê ixte mẽ kêp ixkra hkêr ã mẽ harênh tã kot paj ra mẽ kêp ixkra hã mẽ harê.

Ixpê mẽõ Tĩrtũm kot paj ã mẽ harênh anê. Anê.

27 Hãmri nhũm finat Ijais Ojej pãnhã tanhmã Ijaew jarênh to. Ijaisja Tĩrtũm nhÿ hã kapêr jarênh o ri pa xwÿnhjê hõ na pre. Jakamã nhũm Tĩrtũm kãm tanhmã mẽ ijarênh to nhũm kuma nê ô ri mẽ ixkukamã mẽ inhĩgêxjê mã ujarênh o pa nê hã kagã. Nê hã kagã ho:

Ijaew na mẽ ohtô rax kumrêx.

Te gô xujanãr mÿri pykahti grã hkryre xotô pyrãk.

Tã koja mẽ piitã ixkôt amnhĩ xunhwÿr kêt nê.

Koja mẽ ãm grêre nê amnhĩ kaxyw inhmã hamaxpêr nê ixkôt amnhĩ xunhwÿ.

Jakamã mẽ tapxipixjaja koja hkwÿjê rom nhÿrmã inhõ krĩ hwÿr api.

28 No mẽ kot amnhĩ kaxyw inhmã mẽ hamaxpêr kêt xwÿnhjaja kot paj tokyx tanhmã mẽ harênh to.

Mê kot amnhĩ tomnuj mÿrapê tanhmã mẽ harênh to nhũm mẽ ma mẽ kot amnhĩ xà htÿx kamã hamak tũm xàta wÿr ma pa.

Nà kot paj tokyx ã mẽ hipêx anê.

Anhÿr o mẽ harê. 29 Nom nhũm kormã ã mẽ harênh anhÿr kêt ri nhũm ra wam tanhmã mẽ harênh to nê mẽ harênh o:

Amnepêm Sotô mẽ Komo kamã mẽ pa xwÿnhjaja na prem amnhĩ tomnuj tÿx rãhã ho ri pa.

Mÿrapê nhũm Tĩrtũm xãhpumunh o ãhpumunh xwÿnhja tee ri ja hã mẽ

omu hãmri nê kaxkwa rûm mẽ õ krĩ
wa hipy mẽmoj pôôta rê.

Nhũm mẽ hã rôrôk nê mẽ ho hkaxàr pa
nhũm mẽ hapêx.

Tã na pu htem mẽ uràk nê amnhĩ tomnuj o
ri papa.

Jakamã kop ãm Tĩrtũm kot mẽ pahkwỳjê
kamã ukaprĩ kêt ronhỹx pu mẽ ra
mẽ uràk nê pahpiitã pajapêx pa.
Anê.

*Ijaew kwỳ kot Jejus kôt amnhĩ xunhwỳr
kêt ã mẽ harênh*
Rômân 10.1-4

³⁰ Nê Ijaew kêt xwỳnhjaja na prem Ijaew
pyrà nê kãm Tĩrtũm prãm kêt tã Jejus
jarênh ma nê Ijaew rom amnhĩ kaxyw hkôt
hamaxpêr nê hkôt amnhĩ xunhwỳ. Hãmri
nhũm Tĩrtũm ja hã mẽ omu nê mẽ ho hkra
nê mẽ kot amnhĩ to mex xwỳnhjê hã mẽ
harê. ³¹⁻³² Hãmri nhũm Ijaew tee ri mẽ kot
Jejus kôt amnhĩ xunhwỳr ã mẽ omu nhũm
ja mẽ kãm mex kêt nê. Hãmri nhũm mẽ
hamaxpêr o:

—Tk. Kwa ra mẽ ixte finat Mojes kapêr
kôt amnhĩ nhĩpêx mex o ri mẽ ixpa xwỳnh
jakamã koja Tĩrtũm ja hã mẽ ixpumu nê mẽ
ixte amnhĩ to mex xwỳnhjê hã mẽ ijarê nê
mẽ inhnê mẽ ixte amnhĩ tomnuj rênh pa.
No kot paj mẽ Ijaew kêt xwỳnhjê pyrà nê
Jejus kôt amnhĩ xunhwỳr kêt nê. ãm kwarĩ
ho kwarĩ.

Anhỹr ã amnhĩ jarê. No ãm ã mẽ
hamaxpêr anhỹrja mex kêt. Na prem htỳx
Tĩrtũm noo mã kot amnhĩ to mex ã amnhĩ
jarênh kaprỳ nê arĩ ri tanhmã amnhĩ tom-
nuj to ho ri pa. Te pry kamã kên nôr nhũm
mẽ kot nhãm nê mẽnh kaxyw hkamnâr nê
ho amnhĩ par krã hi kukênh pyràk o na
htem amnhĩ nhĩpêx. Jao amnhĩ krã hkôt
tanhmã amnhĩ nhĩpêx to ho pa hprãm xàj te
Jejus kapêrja nhãm amnhĩ nê rênh pyràk o
hipêx. Jakamã koja mẽ Tĩrtũm nhõ krĩ hwỳr
àpir kêt nê. ³³ Tĩrtũm kapêr ã kagà htũm kot
ja jarênh kot:

E mẽ inhma. Kot paj nhỹrmã Ijaewjê hwỳr
mêhõ mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ
kuma nê ãm kuma.

Te pry kamã kên nôr nhũm mẽ kot nhãm
pry nê mẽnh kaxyw hkamnâr nê ho

amnhĩ par krã hi kukênh pyràk o
koja mẽ amnhĩ nhĩpêx.

No te mẽ kot nhãm pry nê mẽnh kaxyw
hkamnâr kêt pyràk xwỳnhjaja koja
mẽ kurom nhỹrmã ma Tĩrtũm nhõ
krĩ hwỳr api.

Hãmri nê hkĩnh nê pa ho pa. Anê.
Nom kên kumrêx jarênh kêt nê. Na prem
Jejus ã kuxi nê ã harênh anê. Ijaew te
mẽ kot kên nhĩpêx pyràk o Jejus nhĩpêx nê
amnhĩ kaxyw hkôt hamaxpêr kêt nê axtem
nê hkaga nê ãm kamã gryk pix o ri pata ã
nhũm mẽ harê. No mẽ kot amnhĩ kaxyw
hkôt hamaxpêr ronhỹx Jejus te kên kot mẽ
kêp ãmnâr pyràk kêt nê. Jakamã ã mẽ
harênh kot anhỹr.

10

¹ Hêxta waa nê. Ijaxwỳja ixpê Ijaew.
Mê kêp ixkwỳ jakamã kêp apu mẽ kot
amnhĩ kaxyw Jejus mã hamaxpêr nê hkôt
amnhĩ xunhwỳr ronhỹx pa ixkĩnh tỳx
kumrêx. Inhmã mẽ kêp Tĩrtũm kra hprãm
tỳx kumrêx kênã. Inhmã ja prãm xàj na pa
hte mẽ ho Tĩrtũm wỳr rãhã ho ri ixpa. ² Ra
ixte mẽ omunh mex. Mẽ kãm Tĩrtũm mã
tanhmã amnhĩ nhĩpêx to hprãm tã no ãm
mẽ kot hprĩ hã kapêr mar kêt. Jakamã na
htem tee ri tanhmã kãm amnhĩ nhĩpêx to
ho ri pa hprãm kaprỳ. ³ Nhũm pre Tĩrtũm
tee ri amnhĩ tã mẽ omu nê hamaxpêr o:

—Koja mêhõ amnhĩ kaxyw Ixkra Kris kôt
hamaxpêr nê hkôt amnhĩ xãm pa ja hã omu
nê kot amnhĩ to mex xwỳnh ã harê nê ho
ixkra kurê kumrêx. Nom na hte Ijaew ohtô
nê ã amnhĩ nhĩpêx anhỹr kêt nê.

Anhỹr o mẽ harê. ãm hãmri na ã
mẽ harênh anê. Na htem ãm axtem nê
hamaxpêr o:

—Tk. Kot paj amnhĩ kaxyw Kris kôt ija-
maxpêr nê hkôt amnhĩ xãm kêt nê. Kot
paj ãm pam amnhĩ krã hkôt tãm ri amnhĩ
nhĩpêx o ri ixpa. Mẽ ixpê Ijaewjê mẽ ixte
amnhĩ nhĩpêx xà hkôt. Hãmri nhũm Tĩrtũm
ja hã ixpumu nê amnhĩm inhmex ã ijarê.
Nom kot paj Kris kôt amnhĩ xãm kêt nê. ãm
kwarĩ ho kwarĩ.

Anhỹr ã amnhĩ jarê. ⁴ Nom na htem ãm
htỳx ri amnhĩ krã hkôt amnhĩ to mex o pa
hã amnhĩ kamnhĩx kaprỳ. Koja mẽ tee ri
kãm finat Mojes kapêr kôt amnhĩ nhĩpêx o

ri pa hprâm kaprÿ. Jejus tapxipix na pre tãm amnhĩ nhĩpêx mex rãhã ho pa. Na pre Tĩrtũm kapêr kôt amnhĩ nhĩpêx mex o ri pa nê aa kapêr ô nhĩrôp ãm nê hkwÿm ri tanhmã amnhĩ tomnuj to hkêt nê. Kot amnhĩ tomnuj kêt xwÿnh ã ãm pixi mex na. Jakamã tapxipix kukwak ri na hte Tĩrtũm amnhĩm mẽ pahte amnhĩ to mex xwÿnh ã mẽ pajarê.

Tĩrtũm kãm mẽ pahpiitã mẽ pahto hkra hprãm ã harênh

⁵ Nê amnepêm na pre finat Mojes Tĩrtũm nhÿ hã Ijaew mã tanhmã ujarênh to nê hã kagã. Nê mẽ kãm ujarênh o:

—E kot kaj mẽ atõ Tĩrtũm nhÿ hã ixu-jarênh ma nê hkôt amnhĩ nhĩpêx mex o ri apa nê hkwÿm ri tanhmã amnhĩ nhĩpêx to hkêt nê. Hã koja Tĩrtũm hã apumu nê amnhĩm ate amnhĩ to mex xwÿnh ã ajarê ka nhÿrmã kuri atĩr tũm nê amex nê apa ho apa. Anê.

⁶ ã mẽ kãm kapêr anhÿr tã mẽ pahte Mojes kapêr xã hkôt amnhĩ nhĩpêx o papaja na mẽ pahpê hihtÿx kumrêx. Tĩrtũm kapêr tũm na. Kapêr ã kagã kamã kot mẽ pamã mẽ pahte tanhmã amnhĩ nhĩpêx to hã karõja ohtõ rax kumrêx jakamã pu mẽ tee ri pamã piitã hkôt amnhĩ nhĩpêx prãm kaprÿ. Nhũm Tĩrtũm tee ri amnhĩ tã mẽ pajamã hãmri nê mẽ pahwÿr Kra Jejus mẽ. Jakamã na pu htem amnhĩ kaxyw hkôt pajamaxpêr nê hkôt amnhĩ xunhwÿ nhũm Tĩrtũm hã mẽ pahpumu nê kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwÿr mênh nhũm mẽ kot hpĩr nhũm akupÿm ho htĩr jakamã na pu htem harênhja ma nê pajamaxpêr o:

—Nà na xep pre Jejus ixto ixpê Tĩrtũm kra. Anê.

Nom xã na hte Tĩrtũmja ã mẽ pamã kapêr anê nê mẽ pamã:

—E kot kaj mẽ ma kaxkwa hwÿr api nê Kris japrõ nê man amnhĩ kôt akupÿn o wrÿ pa ja hã mẽ apumu nê mẽ ato ixkra.

Anhÿr o mẽ pamã kapêr? Nà na hte ã mẽ pamã kapêr anhÿr kêt nê. Tanhmã kot puj mẽ amnhĩ to nê ã amnhĩ nhĩpêx anê?
⁷ Rÿ xã na hte ã mẽ pamã kapêr anê nê mẽ pamã:

—E na pre Krisja ty. Jakamã mẽ kam nê ma hwÿr mra nê akupÿm amnhĩm ho htĩr. Hãmri pa ja hã mẽ apumu nê mẽ ato ixkra.

Anhÿr o mẽ pamã kapêr? Nà na hte ã mẽ pamã kapêr anhÿr kêt nê. Tanhmã kot pu mẽ amnhĩ to nê akupÿm ho htĩr? Ja pyrã nê na hte Tĩrtũm mẽ pamã mẽmoj tã karõ pu mẽ kãm ho anhÿr nhũm ja hã mẽ pahpumunh kôt mẽ pahto hkra hkêt nê. ⁸ ãm mẽ pahte amnhĩ kaxyw Jejus kôt pajamaxpêr nê hkôt amnhĩ xunhwÿr ã mẽ pahpumunh kôt pix mã na hte mẽ pahto hkra. Hãmri nê mẽ pahwÿr Karõ rê nhũm mẽ pahkarõ mã gjêx jakamã mẽ pahte Tĩrtũm kãm hprãm xã hkôt amnhĩ nhĩpêx o papaja na mẽ pahpê hihtÿx kêt. Te kapêr ra mẽ pahkrã hi kaxwÿnh kãm hikwÿ pyrãk o pu mẽ piitã mẽ kãm harênh o ri mẽ hkôt papa. Jakamã na pa hte mẽ piitã mẽ kot amnhĩ kaxyw Jejus kôt hamaxpêr kaxyw tanhmã mẽ kãm harênh to ho ri mẽ hkôt ixpa nê mẽ kãm:

⁹ —Kot ka mẽ atõ Jejus kêp anhõ Pahihti hã harê nê Tĩrtũm kot akupÿm ho htĩr kôt ajamaxpêr. Hã koja Tĩrtũm ja hã apumu nê anê ate amnhĩ tomnuj o hapêx nê ato hkra. ãm ja pix ã mẽ pahpumunh kôt na hte mẽ pahto hkra. Anê.

¹⁰ Nê na pu htem mẽ pahkrãhi kaxwÿnh kãm amnhĩ kaxyw Jejus mã pajamaxpêr. Nê mẽ pajakwa ho kêp mẽ panhõ Pahihti hã harê. Hãmri nhũm Tĩrtũm ja hã mẽ pahpumu nê amnhĩm mẽ pahte amnhĩ to mex xwÿnh ã mẽ pajarê nê mẽ pahto hkra. ¹¹⁻¹³ Tã mẽ pahte amnhĩ kaxyw Jejus kôt pajamaxpêr nê hkôt amnhĩ xunhwÿr xwÿnhjaja kot puj mẽ pahkĩnh nê papa ho papa. Mẽ pahpiitãã. Ijaew nê Ijaew kêt xwÿnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjê hõ rÿ Ijaew kêt xwÿnhjê hõ amnhĩ to kuwÿ nhũm kuma nê ho hkra. Kapêr ã kagã htũm kot ja jarênh kot:

Mẽ kãm kêp Tĩrtũm kra hprãm xwÿnhjaja koja mẽ amnhĩ to Tĩrtũm wÿ nhũm mẽ kuma nê Jejus kot mẽ nê htyk kukwak ri mẽ nê mẽ kot amnhĩ tomnuj o hapêx nê mẽ ho hkra nhũm mẽ hkĩnh nê pa. Anê.

14-15 Xà na htem kormã amnhĩ kaxyw Kris mã hamaxpêr kêt rãhã amnhĩ to Tĩrtũm wỳ nhũm mẽ kuma nẽ mẽ ho hkra? Nà tanhmã kot wem amnhĩ to nẽ amnhĩ kaxyw kãm hamaxpêr kêt rãhã amnhĩ to kuwỳ? Na hte Tĩrtũm ma mẽ hwỳr mẽ hkwyjê rẽ nhũm mẽ ma mẽ hwỳr mra nẽ Tĩrtũm kapêr o mẽ ahkre ho ri mẽ hkôt pa. Nhũm mẽ hkwyjaja mẽ kuma nẽ amnhĩ kaxyw Jesus kôt hamaxpêr nẽ amnhĩ to Tĩrtũm wỳ. Kapêr ã kagà htũm kot ja jarẽnh kot:

Koja mẽmoj mex jarẽnh xwỳnhjaja ma mẽ hwỳr mra.

Nẽ mẽ hwỳr hpôx o mỗ nhũm mẽ amỳm amnhĩ wỳr mẽ omu nẽ hkĩnh nẽ. Anẽ.

16 Tã ra mẽ piitã kot kapêr mar tã piitã amnhĩ kaxyw hkôt hamaxpêr kêt nẽ. Jakamã nhũm finat Ijais tee ri ja hã mẽ omu nẽ Tĩrtũm mã mẽ harẽnh o:

Pa Pahi Maati. Kwa ra mẽ kot akapêr mar tỳx tã akôt amnhĩ nhĩpêx kêt nẽ. Mẽ kãm akapêr kôt amnhĩ nhĩpêx o pa hprãm kêt. Na htem ãm grêre nẽ akôt amnhĩ xunhwỳ nẽ akôt amnhĩ nhĩpêx o ri pa. Anẽ.

17 Kot anhỳr tã ãm mẽ kot Kris kapêr jarẽnh mar kôt pix mã na htem amnhĩ kaxyw hkôt hamaxpêr. Koja mẽ harẽnh mar kêt tã tanhmã koja wem amnhĩ to nẽ amnhĩ kaxyw hkôt hamaxpêr nẽ hkôt amnhĩ xunhwỳ? 18 Mãn ka mẽ atõ atỳx ã ajamaxpêr anhỳr o:

—Ko mãn Ijaew kormã Jesus kot mẽ panê tanhmã amnhĩ nhĩpêx to hã harẽnh mar kêt jakamã na mẽ kormã hkôt amnhĩ xunhwỳr kêt nẽ.

Anhỳr o ajamaxpêr. Nom ja kot anhỳr kêt. Ijaew piitã ra mẽ kot harẽnh mar kênã. Tĩrtũm kapêr ã kagà htũm kot ja hã mẽ harẽnh kot:

Na prem ma mẽ piitã mẽ kãm ja jarẽnh o ri mẽ hkôt pa nhũm mẽ piitã kuma. Anẽ.

19 Tã mãn ka prem ra ja ma nẽ atỳx ajamaxpêr o:

—Kot anhỳr tã no mãn kormã hprĩ hã Jesus jarẽnh mar kêt jakamã mẽ hkôt amnhĩ xunhwỳr kêt nẽ. Anẽ.

Nom ja haxwỳja kot anhỳr kêt. Ra mẽ kot hprĩ hã harẽnh mar mex tã kuma nẽ ãm

kuma nẽ amnhĩ kaxyw kãm hamaxpêr kêt nẽ. No mẽ apê Ijaew kêt xwỳnh kwỳjaja na ka mẽ kurom harẽnh ma nẽ amnhĩ kaxyw hkôt ajamaxpêr nẽ hkôt amnhĩ xunhwỳr kurê kumrêx. Hãmri nhũm Ijaew tee ri ja hã mẽ apumu nẽ mẽ akamã gryk tỳx nẽ. Nom ra Tĩrtũm kot ã mẽ hkukamã mẽ kot amnhĩ nhĩpêx anhỳr ã mẽ omunh nẽ mẽ harẽnh kot anhỳr kênã. Na pre finat Mojes mẽ kãm tanhmã hã kagà hto. Te Tĩrtũm tãm kot mẽ hã kagà pyrã nẽ kapêr ã kagà htũm kamã kot mẽ harẽnh kot:

Mẽ ate mẽ kamã mẽ akahak o apa xwỳnhjaja.

Mẽ kot htỳx ri amnhĩ nhĩpêx o mẽ pa hã mẽ ate mẽ harẽnh tã no kot paj mẽ arom amnhĩm mẽ kot amnhĩ to mex xwỳnhjê hã mẽ harẽ.

Kot kaj mẽ tee ri ja hã mẽ omu nẽ mẽ kamã agryk tỳx kumrêx.

Nẽ mãânẽn pa ixte mẽ ho mex ã ixpumu nẽ mẽ hã ixkamã agryk nẽ. Anẽ.

20 Nẽ finat Ijais na pre haxwỳja ã mẽ harẽnh anẽ. Na pre kãm amnhĩ kwỳpê Ijaew pyma hkêt nẽ xatã Tĩrtũm nhỹ hã tanhmã mẽ kãm Ijaew kêt xwỳnhjê jarẽnh to ho pa. Te Tĩrtũm tãm kot mẽ harẽnh pyrãk o mẽ kãm: Nà Ijaew kêt xwỳnhjaja kot Tĩrtũm japêr kêt tã koja tãm mẽ kãm amnhĩ to amnhĩrĩt nhũm mẽ hkôt amnhĩ xunhwỳ.

Mẽ kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrĩt. Anẽ.

21 ã Ijaew kêt xwỳnhjê jarẽnh kot anhỳr. Nẽ axte mã tanhmã Ijaewjê jarẽnh to kot:

Te mẽ katorxà kot tanhmã hkrajê ho mex to kaxyw tee ri amnhĩ wỳr mẽ kãm àkjêr pyrãk o na hte Tĩrtũm Ijaewjê nhĩpêx o pa.

Jao tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nẽ ãm kuma nẽ hkôt amnhĩ nhĩpêx kêt nẽ. Anẽ.

11

Tĩrtũm kot Ijaew kamã ukapri hã harẽnh Matêwre 13.10-17

¹Tã ra Ijaew kot Tĩrtũm kaga jakamã mãn ka mẽ atõ mẽ harẽnh ma nẽ ajamaxpêr o:

—Mân pre Tirtûm tee ri amnhî tâ mẽ omu nê amnhî pyrâ nê mẽ hkaga.

Anhÿr o ajamaxpêr. Nom na pre mẽ hkaga hkêt nê. Ijaxwÿja ixpê Ijaew na pa. Mẽ urâk nê ixpê Ijaew pâr krax pê finat Apraâw kanrêhâ htâmnhwÿ Pêjamî kanrêhâ hõ na pa. Tâ xâ na pre Tirtûm ixkaga? Nâ kot ixkaga hkêt. ² Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhî jarê. Tâ nhûm amgrà xohtô nê hapêx nhûm mẽ hapôj hãmri nê Tirtûm kôt amnhî nhîpêx o pa hkêt nê. Hãmri nhûm finat Erisja tee ri mẽ kot amnhî nhîpêx ã mẽ omunh o pa nê Tirtûm mã tanhmã mẽ harênh to nê mẽ hã kagã. Nê hã kagã ho:

³ Kwa Tirtûm. Mẽ ixte amã amnhî jarênh xâ hã mēsti hkwy na prem ra hkrakrak pa. Nê anhÿ hã akapêr jarênh o ri mẽ pa xwÿnh kwÿ nhîmex rax nê. ãm papxipix na pa arî ixtîr nê ri ixpa nom nhûm mẽ ra kot ixpîr kaxyw ixtã amnhî jarê. Anê.

⁴ Tã tanhmã na Tirtûm kutã kãm kapêr to? Na pre kãm:

Nâ kapxipix na ka arî atîr kêt nê. Arî mẽ ohtô nê apyrã nê amnhî kaxyw ixkôt hamaxpêr. Mẽ ohtô. Arî mẽ kêp 7.000 nê akwÿjê rom ri sãnti Paaw kutã hkônkrã ho hkrî nê kãm mex ã harênh kêt nê. Anê.

⁵ Tã arî ã jarãhã mẽ kot ã amnhî nhîpêx anhÿr kênã. Tirtûm kãm Ijaew japê jakamã mẽ kamã ukapriî. Jakamã nhûm ra mẽ hkwyjaja mẽ pahpyrã nê amnhî kaxyw Kris kôt hamaxpêr nhûm Tirtûm mẽ ho hkra.

⁶ Nom mẽ kot amnhî to mex ã mẽ omunh xâ hkôt mẽ ho hkra hkêt nê. Amarî kãm mẽ hapê htûm xâ hkôt na hte mẽ ho hkra. Kop apu mẽ kot amnhî to mex ã mẽ omunh xâ hkôt kot mẽ ho hkra ronhÿx amarî mẽ ho hkra hkêt nê. Nhÿx mẽ kot tanhmã amnhî nhîpêx to ho pa hã mẽ omunh xâ hkôt pix mã mẽ ho hkra.

⁷ Ijaew piitã Tirtûm kot amnhîm mẽ mex ã mẽ harênh prãm tâ no ãm mẽ grêre nê hamaxpêr xâ hkôt Jejus kôt amnhî xunhwÿ. Na htem ohtô rax nê kapêr ma nê ãm kuma nê tee ri kot amnhîm mẽ mex ã mẽ harênh prãm xâj amnhî krã hkôt tanhmã amnhî nhîpêx to ho ri pa. Nom ra mẽ kot

Jejus kaga jakamã ã amnhî nhîpêx anhÿr kaprÿ. Mẽ kot hkaga jakamã te ri mẽ hamak kro nê Tirtûm kapêr mar kêt pyrã nê pa. ⁸ Tirtûm kapêr ã kagã htûm kot mẽ harênh kot:

Tirtûm na hte mẽ kãm kapêr mar prãm kêt xwÿnhjê pumu nê ãm mẽ omu nhûm htem htÿx ri pa ho pa. Nê Tirtûm mã hamaxpêr kêt o ri pa. Mẽ kot kapêr mar tâ hprî hã mar tÿx kêt nê. Nê mẽ kot kapêr ã kagã kamã harênh tâ hprî hã mar tÿx kêt nê. Jakamã na htem amnhî kaxyw hkôt hamaxpêr kêt o pa.

Tã na htem arî jarãhã ã amnhî nhîpêx anhÿr o ri pa. Te mẽ nohkre nê mẽ hamak kro xwÿnh kot amnhî nhîpêx pyrãk. Anê.

⁹ Nê amnepêm na pre pahi finat Tawija amnhî kwÿ Ijaew jarênh o:

Na htem htÿx ri hkînh kãm apkur o pa.

Te tutre kãm prãm nê kot rapuuti hwÿr àr nê tee ri kãm kator prãm kaprÿ pyrãk.

Ja pyrã nê mẽ kot Tirtûm kapêr mar kêt mÿrapê koja Tirtûm tanhmã mẽ ho nhûm mẽ tee ri kãm mex prãm kaprÿ.

¹⁰ Te mẽ nohkre xwÿnhjaja tee ri mẽ hpa nhîpêx o pa pyrãk.

Nê omnuj nê à nê ho gjêx o ri pa pyrãk o amnhî nhîpêx o ri pa.

Anhÿr o mẽ harê. ¹¹ Tã arî Ijaew Jejus kaga nê kãm kapêr mar prãm kêt jakamã xâ na Tirtûm tee ri ja hã mẽ omu nê mẽ hkaga kumrêx? Nâ kot mẽ hkaga hkêt. ãm mẽ tãmjaja kêp Jejus prãm nôkati jakamã nhûm tee ri ja hã mẽ omu nê mẽ hpãnhã Ijaew kêt xwÿnhjê mã amnhî to amnhîrit nê mẽ hkwyjê ho hkra. Jakamã koja Ijaew kwÿjaja ja hã mẽ omu nê tee ri hamaxpêr nê hamaxpêr o:

—Kwa na xep Ijaew kêt xwÿnh kwÿjaja Jejus kôt amnhî xunhwÿ nhûm Tirtûm ja hã mẽ omu nê mẽ ho hkra. Kwa mon pu prem axtem nê ri Jejus kaga? E pu mẽ kuxwar amnhî kaxyw hkôt mân pajamaxpêr nê hkôt amnhî xunhwÿ kê Tirtûm ja hã mẽ pahpumu nê Ijaew kêt xwÿnhjê pyrã nê mẽ

pahto hkra. Hâmri nê amnhî mã mẽ pahte amnhî to mex xwýnh ã mẽ pajarẽ. Anẽ.

Ã Ijaewjaja hamaxpêr anhÿr kaxyw na pre Tirtũm Ijaew kêt xwýnhjê mã amnhî to amnhîrît. ¹² Hâmri nhũm mẽ amnhî tâ omu nê hkĩnh nê pa. No nhũm Ijaew kwýjaja. Mẽ kãm Jejus prãm nõkati ho mẽ pa xwýnhjaja mẽ hkĩnhã hkaprĩ nê pa. Tã koja mẽ nhÿrmã amnhî kaprĩ hã amnhî pumu nê amnhî kĩnh kêt ã amnhî pumu hãmri nê Tirtũm kôt amnhî xunhwýr nê amnhî kaxyw Kra Jejus Kris mã hamaxpêr japêr. Koja mẽ ã amnhî nhĩpêx anê hãmri nê Ijaew kêt xwýnhjê pyrã nê hkĩnh nê ri pa. Hãmri nhũm Tirtũm ja hã mẽ omu nê Ijaew kêt xwýnhjê mẽ mẽ ho hpimràatã mẽ ho mex rax nê nhũm mẽ hkĩnh nê hamakêtkati nê pa ho pa.

Tirtũm kot Ijaew kêt xwýnhjê ho hkra hã harênh

¹³ E kot paj hpãnhã mẽ apê Ijaew kêt xwýnhjê mã ixkapêr nê mẽ atã kagã. Na pre Jejus ma mẽ awýr inhmẽ. ÿ hã ixte mẽ ajahkre ho ri mẽ akôt ixpa kaxyw. Pa pre ma krĩ hkwy kamã mẽ akwýjê hwýr mõi nê ixkĩnh kãm mẽ kãm kapêr jarênh o ri mẽ hkôt ixpa. Nhũm mẽ hkwyjaja inhma nê amnhî kaxyw Jejus kôt hamaxpêr nê hkôt amnhî xunhwý. ¹⁴ Tã koja apu ixkwýjaja mẽ harênh mar japêr. Ijaew tee ri mẽ apê Ijaew kêt xwýnhjê jarênhja ma hãmri nê ra amnhî kamã gryk japêr. Jao mẽ apyrã nê Jejus kôt amnhî xunhwý nê nhÿrmã kuri htĩr tũm nê mex nê pa ho pa. ¹⁵ Kormã mẽ kot amnhî kaxyw kãm hamaxpêr kêt jakamã na pre Tirtũm hpãnhã mẽ apê Ijaew kêt xwýnhjê mã amnhî to amnhîrît. Ka mẽ ra krĩ piitã hkôt axohtô nê hkôt amnhî xunhwý nê hkôt amnhî nhĩpêx mex o ri apa. Tã koja Ijaewjaja nhÿrmã amnhî kaxyw Tirtũm mã hamaxpêr nê mẽ apyrã nê Jejus kôt amnhî xunhwýr japêr. Hãmri nê te mēhõ hkra kêp htyk nhũm hkaprĩ htã nhũm hkraja tanhmã amnhî to nê akupým kãm htĩr nhũm kot omunh nê hkĩnh tÿx kumrêxta pyrãk o amnhî nhĩpêx. Jao Tirtũm mẽ kot hkôt amnhî xunhwýr ã mẽ omu nê hkĩnh nê. Pu mẽ pahpimràatã urãk nê pahkĩnh nê ri papa.

¹⁶ E pa mẽ amã mẽ ujarênhja ã ejêp kwý jarẽ. Koja mẽmo pĩ hpàr jarê mex nê hã koja pàr mex nê xa. Ja pyrã nê Ijaew pàr krax finat Apraãwja kumrêx na pre amnhî kaxyw Tirtũm mã hamaxpêr nhũm ho hkra. Jakamã koja nhÿrmã hkanrêhã htãmnhwýjaja urãk nê amnhî kaxyw kãm hamaxpêr nhũm mã mẽ ho anê nê mãänen mẽ ho hkra nhũm mẽ mex nê pa. Te kot mẽmo pĩ hpàr jarê mexja nhÿ hã pàr mexta pyrãk.

¹⁷ Nê na htem akunĩ kamã mẽmo pĩ hpa jakã nê hamý nê ma amnhî kôt o mra. Nê ixkre kapem ra mẽ kot mẽmo pĩ hkreja hpa jakàr nê rênh xwýnh xwakre kamã wam pĩ hpa jakàr xwýnhnta nhô nê axpên tâ hkaxpre nê gaa nê axpên jamýnh mex nê grã hkêt nê. Nê arĩ htĩr mex nê. Te kêp hpa kumrêx pyrãk. Tã Ijaew kwý kot amnhî kaxyw Jejus kôt hamaxpêr xwýnhjaja te mẽ kêp ixkre kapem pĩ hpãrta pyrãk. No mẽ hkwyjaja mẽ kot Jejus kaga xwýnhjaja te mẽ kêp mẽ kot kêp hpa jakàr nê rênhta pyrãk. Jakamã nhũm Tirtũm te mẽ kot pàr pé hpa jakàr nê rênhta pyrãk o mẽ hipêx nê mẽ hkaga. Nê axtem te mẽ kot mẽmoj pàr pa jakàr nê hpãnhã kamã axtem pĩ hpa janhôr nê hã hkaxpreta pyrãk o mẽ apê Ijaew kêt xwýnhjê nhĩpêx nê mẽ amã amnhî to amnhîrît. Ka mẽ ra amnhî kaxyw Jejus mã ajamaxpêr nê hkôt amnhî xunhwý nhũm Tirtũm mẽ ato mex nê.

¹⁸ Tã kêr ka mẽ arĩ Ijaew o mex o ri apa. Tanhmã ri mẽ hipêx to mã ajamaxpêr to hkêt nê. Rý ajamaxpêr o:

—Nã ãm hãmri na Tirtũm mẽ hkaga nê ãm kãm mẽ papxipixjê japê.

Anhÿr o ajamaxpêr kêt nê. Ijaew te ixkre kapem pĩ hpàr mexta pyrãk. No mẽ kajaja te mẽ ate akunĩ rũm pĩ hpa kot ixkre kapem pàr mex pix kukwak ri htĩr nê hã harirta pyrãk. Kêt akunĩ rũm pĩ hpa jakàr kukwak ri na hte ixkre kapem pãrta htĩr nê kuhê hkêt nê. Kop apu pãrta mex kêt ronhÿx ra akunĩ rũm hpaja grã pa. Ja pyrã nê Ijaew kukwak ri kot kaj mẽ nhÿrmã Tirtũm ri atĩr tũm nê apa ho apa. Jakamã kwa kêr ka mẽ ate amnhî to rũnh o mẽ hakrenh ã amnhî to jarkrar kêt nê. ¹⁹ Mãn ka mẽ atõ ajamaxpêr o:

—Ra Tirtûm kot Ijaew kaga nê hpânhã mē pajaja mē ixto hkra jakamã mân kãm mē ijapê ho mē hakre. Ra mē hpânhã mē ixto hkra kênã. Anê.

²⁰ Nà âm hãmri na pre Tirtûm Ijaew kwý kaga. Mē kot Jejus kôt amnhĩ xunhwýr kêt mýrapê na pre te mēmo pĩ hpa jakàr nê rênhta pyræk o mē hipêx. Ka mē ra mē kurom amnhĩ kaxyw hkôt ajamaxpêr jakamã nhũm Tirtûm te kot akunĩ kamã pĩ hpa jakàr nê ho htêm nê ixkre kapem pĩ hpàr mex ã hanhôr nê hã hkaxpre pyræk o mē anhĩpêx. Nom kwa kêr ka mē ja hã amnhĩ pumu nê ri hã Ijaewjê mã amnhĩ to jarkrar kêt nê. Âm amnhĩ to mex nê Tirtûm kapêr kôt amnhĩ nhĩpêx mex o ri apa. No kot kaj mē ã amnhĩ nhĩpêx anhýr kêt nhũm amnhĩ tã mē apumu nê ra kot Ijaew kwý nhĩpêxta pyrã nê tanhmã mē ato nê mē akaga.

²¹ ã Ijaew jarênh kot anhýr. Te mē kêp pàr mex pyræk. Tã nhũm mē kot Jejus kôt amnhĩ xunhwýr kêt jakamã nhũm Tirtûm te kot pĩ hpa jakàr nê rênhta pyræk o mē hipêx nê mē homnuj nê. Kot kaj mē uræk nê ã amnhĩ nhĩpêx anê nhũm mã mē ato anê nê. ²² Ijaew kot Jejus kôt amnhĩ xunhwýr kêt jakamã nhũm Tirtûm mē hpânhã mē apê Ijaew kêt xwýnhjê mã amnhĩ to amnhĩrît. Tã ka mē Ijaew rom amã Jejus prãm nhũm Tirtûm ja hã mē apumu nê amnhĩ pyrã nê kãm mē aprãm nê mē akamã ukapri rãhã nê pa ho pa. Tã kwa mē okora. Kêr ka mē hkôt pix mã amnhĩ nhĩpêx o ri apa rãhã ty. Kot kaj mē hkaga nhũm amnhĩ tã mē apumu nê te Ijaew kot hkaga xwýnhjê nhĩpêx pyræk o mē anhĩpêx nê mē akaga.

²³ Koja Ijaew nhýrmã Jejus kôt amnhĩ xunhwýr japêr nhũm Tirtûm ja hã mē omu nê mē ho hkra. Te mē kot pàr pa jakàr nê rênh nhũm grã par xwýnh nhũm kot akupým amnhĩm hamýnh nê ixkre kapem pàr wýr o htêm nê akupým hã hanhôr nê hã hkaxpre ho htýx nhũm kukwak ri akupým htírta pyræk. Ja kêp tanhmã kute hkêt. Kot ã hipêx anhýr kaxyw àhpumunh týx. ²⁴ Mē apê Ijaew kêt xwýnhjaja te mē ate akunĩ kamã pĩ hpa jakàr nê ixkre kapem pàr ã hanhôr nê hã kaxpreta pyræk. Jao Jejus

kôt amnhĩ xunhwý nhũm mē ato hkra kurê kumrêx. No Ijaew te mē kêp ixkre kapem pàrta pyræk jakamã Tirtûm kot akupým hanhôrta tanhmã kêp kute hkêt. Kêp Tirtûm kênã kot tanhmã kêp kute. Jakamã koja mē hkôt amnhĩ xunhwý nhũm amnhĩ tã mē omu nê mē ho hkra kurê kumrêx.

Tirtûm kot mē piitã mē kamã ukapri hã harênh

Matêwre 23.37-39; Rukre 21.24; Juãw 10.16

²⁵ E kot paj mē amã mēmoj to amnhĩrît ka mē inhma. Nà na pa ra mē amã Ijaew krã xihtýx xwýnhjê jarê ka mē harênh ma. Ra mē kot Jejus kaga hã mē harênhja. Tã koja mē ã amnhĩ nhĩpêx anhýr o pa rãhã hkêt nê. Na hte Tirtûm kormã amnhĩ tã mē apê Ijaew kêt xwýnhjê jamãr o pa. Amnepêm na pre amnhĩ kaxyw mē akukamã tanhmã mē akwýjê jarênh to. Tã kot kaj mē kot tanhmã mē ajarênh to xwýnh piitã Jejus kôt amnhĩ xunhwýr pa nhũm rĩ Ijaew amnhĩ to hapu nê kormã hkôt amnhĩ xunhwý. ã mē kot amnhĩ nhĩpêx anhýr kaxyw. Jakamã kwa kêr ka mē ri ja hã amnhĩ to jarkrar o ri mē hkôt apa hkêt nê. Mē pahpyrà nê mē kot Jejus kôt amnhĩ xunhwýr mã xwýnh kênã. ²⁶ Koja Tirtûm nhýrmã Ijaew piitã ho hkra. Kapêr ã kagã htûm kot mē harênh kot:

Nhýrmã kot mē ate amnhĩ tomnuj pê mē apytàr mã xwýnhja Ijaew ò koja.

Jako hkanrêhã htãmnhwýjê hõ koja.

Koja nhýrmã wrý nê mē ate amnhĩ tomnuj pê mē apytã nê mē ate amnhĩ tomnuj o hapêx pa. Anê.

Anhýr o kot harênh. ²⁷ Nê mãânên ja:

Kot paj mē nê mē kot amnhĩ tomnuj o ijapêx pa.

Amnepê mã ixte mē hkukamã mē hã amnhĩ jarênh xã hkôt. Anê.

²⁸ Nom arĩ mē kãm Jejus mar prãm kêt jakamã te mē kot kutã amnhĩ xunhwýr pyræk o amnhĩ nhĩpêx. Tã ã mē kot amnhĩ nhĩpêx anhýrja ri ka mē kamjaja mē hpânhã mē apê Tirtûm kra. Nom nhũm Tirtûm arĩ kãm mē hapêê. Na pre amnepê mã kot tanhmã mē ho mex to hkukamã tanhmã mē hã amnhĩ jarênh to. Mē hpàr kraxjê mã tanhmã mē hã amnhĩ jarênh to. Finat Apraãw mē Ijak mē Jakoja mã

mê hkanrêhã mê htàmnhwỳjê hã tanhmã amnhĩ jarênh to.

²⁹ Na hte Tĩrtũm mẽmoj tã tanhmã amnhĩ jarênh to nê ãm hãmri hã amnhĩ jarê nê amnhĩ jarênh xà hkôt tanhmã hipêx to. No na hte mẽmoj tã amnhĩ jarênh tã gaa nê ho hamakêtkati hkêt nê. Rỳ hpãnhã axtem tanhmã hipêx to hkêt nê. Na hte mẽmoj tã amnhĩ jarênh xà hkôt tanhmã hipêx to. Tã ra amnepê mã kot Ijaew o mex ã amnhĩ jarênh jakamã koja nhỹrmã mê ho mex rax nê ã mê hipêx anhỹrja o hamakêtkati hkêt nê.

³⁰ No mẽ kajaja mẽ apê Ijaew kêt xwỳnhjaja. Amnepêm na ka prem ajaxwỳja Tĩrtũm kôt amnhĩ nhĩpêx kêt nê. Tã nhũm mẽ akamã ukapřĩ nê kãm mẽ ajapê nê. Ka mẽ ra harênh ma nê hkôt amnhĩ xunhwỳ nê hkôt amnhĩ nhĩpêx mex nê. No ãm Ijaew kukwak ri. Mẽ kot kapêr kôt amnhĩ nhĩpêx o pa hkêt jakamã nhũm Tĩrtũm mẽ hpãnhã nhãm mẽ amã amnhĩ to amnhĩrĩt nê mẽ ato mex rax nê. Jakamã te Ijaew kukwak ri mẽ amex nê ri mẽ apa pyrãk. ³¹ Tã koja nhỹrmã kot mẽ anhĩpêxta pyrã nê Ijaew ho hkra. Nê mẽ apyrã nê mẽ kamã ukapřĩ nê. Mẽ kot mẽ apyrã nê amnhĩ kaxyw Kra hkôt hamaxpêr xwỳnhjaja nhũm mẽ apyrã nê mẽ ho hkra nê mẽ ho mex nê. ³² Mẽ apê Ijaew kêt xwỳnhjaja nê mẽ ixpê Ijaew mẽ pahte axpên pyrãk. Na pu htem pahpiitã Tĩrtũm kapêr piitã hkôt amnhĩ nhĩpêx rãhã ho ri papa hkêt nê. Tã kot puj mẽ tee ri ja hã amnhĩ pumu nê amnhĩ to kuwỳ nhũm mẽ pama nê amarĩ mẽ pakamã ukapřĩ nê mẽ pahto mex nê.

*Pawre kot Tĩrtũm mex o mex ã harênh
Epes 3.20; Korosê 1.16; Wam Korĩt 2.9,
2.16*

³³ Tĩrtũmja àhpumunh tỳx o àhpumunh tỳx. Nê ukapřĩ ho ukapřĩ nê mex o mex. Mẽ pahtõ na pu urãk nê ã amnhĩ nhĩpêx anhỹr o papa? Nà amrakati kumrêx. Nê mẽ pahtõ na pahte Tĩrtũm jamaxpêr kôt omunh? Nà mẽ pahte hamaxpêr kôt omunh kêt.

³⁴ Kapêr ã kagã htũm kot ja jarênh kot: Mẽ pahte Tĩrtũm jamaxpêr kôt omunh kêt. Nê kot pu mẽ pahtõ mẽmoj tã hakre hkêt nê. Mẽ parom àhpumunh o àhpumunh xwỳnh kênã.

³⁵ Nê mẽ pahtõ kot puj we kãm pakapêr nê kãm: “Kwa Tĩrtũm. Ra ixte amã mẽmoj nhõrta pãnhã kwa amnhĩ xwar inhmã mẽmoj gõ.” Anê.

Nà mẽmoj piitã õ kênã kot puj kêt ri ã kãm mẽmoj nhõr ã amnhĩ jarênh anê. Anê.

³⁶ Tãm na pre amnhĩ kaxyw mẽmoj piitã ho kator pa. Nê ãm pix kukwak ri na mẽmoj piitã htĩr nê pa. Jakamã kwa pu mẽ kãm mex o mex ã mãn harênh rãhã ho ri papa.

12

Mẽ pahte Tĩrtũm mã amnhĩ nhõr ã mẽ pajarênh

Wam Korĩt 6.20; Epes 4.1; Piripos 4.8-9; Korosê 1.10; Wam Tesarõn 4.1-3; Wam Pêtre 2.11

¹ Kwa Jejus kôt ixkwỳjaja. Tĩrtũm na hte mẽ pahto mex nê mẽ pakamã ukapřĩ rãhã jakamã na pa ã mẽ amã ixkapêr anê. Kwa mẽ tokyx kãm amnhĩ jarê nê kãm amnhĩ gõ. Te mẽ ate kãm hkĩnh xà nhõr pyrãk o amnhĩ nhĩpêx nê kãm amnhĩ gõ. Jao mẽ amã kapêr kôt pix mã amnhĩ nhĩpêx o ri apa hprãm ã kãm amnhĩ jarê. Nê kãm hprãm xà hkôt pix mã tanhmã amã amnhĩ nhĩpêx to ho ri apa hprãm ã kãm amnhĩ jarê. Kot kaj mẽ ã kãm amnhĩ jarênh anê nhũm amnhĩ tã mẽ ama nê hkĩnh nê. ã mẽ pahte kãm amnhĩ jarênh anhỹrja na kãm mar prãm.

² Nê kêr ka mẽ kãm Tĩrtũm prãm kêt xwỳnhjaja kot amnhĩ nhĩpêx o ri amnhĩ nhĩpêx o ri apa hkêt nê. Nê mẽ amnhĩ to Tĩrtũm mãn wỳ kê mẽ amã mẽ ajamaxpêr mex jagjê. Koja mẽ ama nê mẽ amã hagjê ka mẽ ra aprĩ hã hamaxpêr xà hkôt mẽ pahte amnhĩ to mex xà pumunh mex nê. Na pu htem hkôt amnhĩ nhĩpêx o ri papa nhũm amnhĩ tã mẽ pahpumu nê hkĩnh nê. Pu mẽ pajaxwỳja ý hã pahkĩnh nê ri papa.

Kris kwỳjaja kot tanhmã axpên nhĩpêx to hã mẽ kãm karõ

Rômân 12.1-11; Epes 4.11-16; Wam Pêtre 4.10-11

³ Nê na pre Tĩrtũm ixto mex nê. Nê mẽ akaxyw ixãm. Ixte mẽ amã Kra Jejus kot tanhmã mẽ panê amnhĩ nhĩpêx to hã harênh o ri mẽ akôt ixpa kaxyw. Tã na pa ã kagãja kamã mẽ amã harênh anê.

Jakamã kwa kêr ka mẽ amnhĩ to jarkrar o ri mẽ kãm apa hkêt nê. ãm kwarĩ ho kwarĩ. Rỳ atỳx ri ajamexpêr o:

—Nà pa na ixte amnhĩ to mex o ixte ixkwỳjê piitã mẽ hakrenh par.

Anhỹr ã amnhĩ to jarkrar o ri mẽ hkôt apa hkêt nê. Kêt mẽ ãm amnhĩ jarênh o:

—Na pa pre amnhĩ kaxyw Jejus kôt ijamxpêr nhũm Tĩrtũm ixpumu nê ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nê. Anê.

⁴ E pa mẽ amã mẽmoj jarê ka mẽ inhma. Nà mẽ panhĩja pyxi htã kamã mẽmoj xoh-tôô. Na kamã mẽ pano nê mẽ pajakwa. Nê kamã mẽ pajamak nê mẽ pahte. Na pu htem mẽ pano ho rĩt nê mẽ pajakwa ho pakapêr. Nê mẽ pajamak o ri ama nê mẽ pahte ho ri mra. ⁵ Ja pyrã nê Kris kôt mẽ pahte amnhĩ xunhwỳr xwỳnhja ãm pyxi tã hkôt mẽ pahte amnhĩ xunhwỳr xwỳnhjaja mẽ paxohtôô. Jakamã na pu htem ahpỳnhã tanhmã axpên to mex to ho ri papa. Jao Kris kôt axpên to pahtô nê pahtôx o papa.

⁶ Tĩrtũm na hte mẽ pahpê hkwỳ hã ahpỳnhã mẽ pamã tanhmã mẽmoj tã karô to nê kaxyw mẽ pahto mẽ paxihtỳx. Tã kêr pu mẽ ra kot mẽ pamã mẽmoj tã karô xà hkôt kãm amnhĩ nhĩpêx rãhã ho ri papa. Jakamã koja mēhō ate Tĩrtũm kapêr jarênh o ri apa kaxyw axãm nê amã anê ka Tĩrtũm kamnâr rom mẽ kãm kapêr jarênh mex o ri mẽ hkôt apa.

⁷ Rỳ ate akwỳjê mã tanhmã axapênh to ho ri apa kaxyw axãm ka mẽ kãm axapênh mex o ri mẽ hkôt apa.

Rỳ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rỳ ate Tĩrtũm kapêr o ri Jejus kôt mẽ akwỳjê jamxpêr o hihtỳx o ri apa kaxyw axãm ka mẽ kãm kapêr jarênh pê mẽ ho mẽ hihtỳx mex o ri mẽ hkôt apa.

Rỳ ka mẽ atō akukrêx rax japêr nê ate mẽ kêp amrakati xwỳnhjê mã mẽmoj nhõr o ri apa kaxyw axãm ka axãmnhĩx ri mẽ kãm mẽmoj nhõr o ri mẽ hkôt apa.

Rỳ ate akwỳjê ho amnhĩptâr kaxyw axãm ka mẽ ho amnhĩptâr mex o ri apa.

Rỳ ate tanhmã mẽ akwỳjê ho mex to nê mẽmoj to mẽ kutã anojarêt o ri apa kaxyw axãm ka akĩnh kãm ã mẽ hipêx anhỹr rãhã ho ri apa nê tanhmã akapêr punuj to hkukamã ri ajamxpêr o ri mẽ hkôt apa hkêt nê.

⁹ Nê kêr ka mẽ apiitã amã axpên kĩnh kãm axpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mẽ kot amnhĩ tomnuj xà piitã hkaga hpa nê hpãnhã mẽ kot amnhĩ to mex xà pix pyr tỳx nê hkôt amnhĩ nhĩpêx rãhã ho ri apa. ¹⁰ Nê mẽ apê Kris kwỳ hã amã axpên kĩnh kãm tãm axpên nhĩpêx o ri apa. Nê mẽ akwỳjaja mẽ kot amnhĩ to mex xwỳnh ã mẽ harênh o ri mẽ hkôt apa. No mẽ ri atỳx ajamxpêr o:

—Nà koja mēhō ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỹr o ajamxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

¹¹ Nê kêr ka mẽ Tĩrtũm mã mẽmoj to anhỹr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nê. ¹² Nê mẽ nhỹrmã Tĩrtũm kot kaxkwa kamã mẽ ato mex rax kukamã ajamxpêr nê akĩnh rãhã kãm mẽmoj to anhỹr o ri apa.

Nê kêr ka mẽ tanhmã amnhĩ to rỳ nhũm mēhō tanhmã mẽ ato ka mẽ akaprĩ nê ri apa htã no ãm tee ri amnhĩ kukamã ajamxpêr o Tĩrtũm kaga hkêt nê. Arĩ amnhĩ to hwỳr rãhã ho ri apa. ¹³ Nê koja Kris kôt atōjê hõ kêp amrakati ka mẽ ja hã omu nê anhō mẽmoj japêr nê māmri kãm hkwỳ gō. Nê amnhĩ wỳr awỳ nê tanhmã ho mex to.

¹⁴ Nê mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nê agryk nê wajaga kot tanhmã amã ho kaxyw hwỳr atēm nê kãm tanhmã hã axãmnhênh to hkêt nê. Kêt ãm ho Tĩrtũm pix wỳ nê kãm:

—Pa mẽ ijamâr mex xwỳnh maati. Nà na ixkwỳjê hōja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhÿr o măn mẽ ho awÿ.

¹⁵ Nễ koja akwÿjê hõ mẽmoj tă hkĩnh nễ. Ka omu nễ uràk nễ ÿ hã akĩnh nễ. No koja mẽmoj tă hkaprĩ nễ mÿr o nhÿ ka omu nễ ra uràk nễ ÿ hã akaprĩ nễ.

¹⁶ Nễ kêr ka mẽ piitã mẽ hipêx o axpên pyràk o ri apa. Te mẽ ate amnhĩ to rax o akwÿjê jakrenh o te mẽmoj kamã akahak o amnhĩ nhĩpêx pyràk kêt nễ. Nễ axàhpumunh tÿx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nễ.

¹⁷ Nễ koja mẽhõ tanhmã ato htã ka ãm amnhĩ tă omu nễ tanhmã amnhĩ tă ho hkêt nễ. Nễ mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nễ kêr ka mẽ tãm ri axpên mã akapêr rãhã ho ri apa.

Nễ kot kaj akràmnhwÿ mẽ wa tanhmã axpên nhĩpêx to. Hãmri ka wa akupÿm tãm axpên xãm kaxyw kãm akapêr tă nhũm ama nễ ãm ama nễ akaga. Ka ãm amnhĩ tă omu nễ kamã agryk kêt nễ. Koja Tĩrtũm tãm tanhmã atã ho. Kapêr ã kagã htũm kot ja jarênh kot:

Kêr ka mẽ amnhĩ tă tanhmã kot ato xwÿnh to hkêt nễ. Pa kot paj mẽ atã tanhmã ho. Anễ.

Nễ harênh kot:

²⁰ Kêr ka mẽ amã mẽ kãm mẽ akurê xwÿnhjê o mex pix o ri apa.

Kê mẽ kãm prãm ka ja hã mẽ omu nễ mẽ kamã axukaprĩ nễ mẽ kãm mẽmoj kwÿ gô kê mẽ kuku.

Rÿ nhũm mẽ kãm kôr ka mẽ kãm gô hkwy kê mẽ ho ixkô.

Kot kaj mẽ ã amnhĩ tă mẽ hipêx mex anễ nhũm mẽ tee ri amnhĩ tă mẽ apumu nễ amnhĩ kamã hpijaàm jao mẽ atã amnhĩ kamã gryk nễ. Anễ.

²¹ Nom kot kaj mẽ amnhĩ tă tanhmã mẽ homnuj to hãmri nễ ajaxwÿja uràk nễ amnhĩ tomnuj nễ. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tă mẽ apumu nễ mẽ apyrã nễ tãm mẽ anhĩpêx japêr.

E kêr ka mẽ ã axpên nhĩpêx o ri apa anễ.

13

Mễ pahto amnhĩptàr xwÿnhjê jarênh Matêwre 22.21; Xitre 3.1; Wam Pêtre 2.13-

17

¹ Nễ kêr ka mẽ kot mẽ ato amnhĩptàr xwÿnhjê kapêr ma nễ kapêr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwÿr kênã. Mễ kot mẽ pahto amnhĩptàr o pa kaxyw na hte mẽ unhwÿ. ² Jakamã koja mẽhõ mẽ kapêr ma nễ ãm kuma nễ hkôt amnhĩ nhĩpêx kêt nễ hãmri nễ te kot Tĩrtũm kapêr mar nễ ãm mar pyràk o amnhĩ nhĩpêx. Hãmri nhũm Tĩrtũm tee ri ja hã omu nễ nhÿrmã tanhmã hã ho.

³ Xà na hte tãm mẽ kot amnhĩ nhĩpêx xwÿnhjaja kãm mẽ kot mẽ ho amnhĩptàr xwÿnhjê puma ho pa? Nà na htem kãm mẽ uma hkêt kãm ri pa. ãm mẽ kot amnhĩ tomnuj xwÿnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptàr xwÿnhjê puma hprãm kêt xwÿnhjaja kêr ka mẽ kapêr ma nễ hkôt amnhĩ nhĩpêx kê amnhĩ tă mẽ apumu nễ hkĩnh nễ. Nễ amnhĩm mẽ ate amnhĩ to mex xwÿnh ã mẽ ajarê. ⁴ Tĩrtũm nhÿ hã mẽ panhõ pahi kot mẽ pahto amnhĩptàr jakamã na htem mẽ kãm mẽ pahto mex prãm nễ. Nễ kot pu mẽ pahtõ axtem nễ tanhmã amnhĩ tomnuj to hãmri nhũm tee ri ja hã pajarênh ma nễ tanhmã hã mẽ pahto. ãm hãmri na hte ã mẽ pahto amnhĩptàr xwÿnhjaja mẽ panhĩpêx anễ. Tĩrtũm kãm hprãm xà hkôt. ⁵ Jakamã kwa mẽ kapêr ma nễ hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nễ. Mãănên ã amnhĩ kukamã ajamaxpêr anễ nễ ajamaxpêr o:

—Nà Tĩrtũm kot mẽ ixkaxyw unhwÿr jakamã na pa hte kapêr ma nễ hkôt amnhĩ nhĩpêx mex o ri ixpa.

Anhÿr o ajamaxpêr.

⁶ Nễ mẽ pahto amnhĩptàr xwÿnhjaja kot Tĩrtũm nhÿ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mễ pahpiitã axpên kaxyw kãm kàxpore ho hkryre nễ kugô. Tanhmã kot ho mẽ pamã mẽmoj to mex to kaxyw. ⁷ Jakamã kêr ka mẽ hã apijaàm o ri apa kamã mãmri mẽ kãm kàxpore hkwy ho hkryre nễ òr o ri apa. Mễ kot hã àhwÿr xà hkôt.

Mê pahte tanhmã axpên nhîpêx to hã mê pamã karõ

Matêwre 22.39-40; Karatas 5.13-15; Wam Juãw 3.11-24

⁸Nê kêr ka mêhõ ho tewên japêr nê tokyx kãm amnhîre. Nê mê amã axpên kînh o aa ho ajamakêtkati hkêt nê. Jao mêmoj to axpên kutã anojarêt rãhã ho ri apa. Kot kaj mê ã axpên nhîpêx anê nê Tirtûm kapêr piitã hkôt amnhî nhîpêx mex o ri apa.

⁹Amnepê mã na pre finat Mojesja Tirtûm nhỹ hã Ijaew mã mêmoj tã karõ nê mê kãm: Kêr ka mê aprõ pix tânopxa nê nhãm mênijê hõ kamã ri akurê ho apijaàm kêt o apa hkêt nê.

Nê mê anijaja mê amjên pix tânopxa nê nhãm ri mêmjê hõ kamã akurê ho apijaàm kêt o ri apa hkêt nê.

Nê mê ri axpên par kêt nê.

Nê mê ri axpên pê axàhkînh o ri apa hkêt nê.

Nê mê amã ri axpên kukrêx kînh o ri amã ho anhõ hprãm o ri apa hkêt nê. Anê.

Nê mãânên ja:

Kêr ka mê nhãm mê axpên nhîpêx o te ka amã amnhî tã ma pyrãk. Jao tãm axpên nhîpêx o ri apa. Anê.

Ã kot mê kãm hã karõ kot anhỹr. Kot puj mê ã pamã pahkwýjê kînh anê nê mãânên wam finat Mojes kot mêmoj tã mê panhîgêjtê mã karõ hkôt amnhî nhîpêx o ri papa rãhã nê. Jao axpên par kêt nê. Nê axpên pê paxàhkînh kêt nê. Nê axpên kutã panojarêt rãhã nê. ¹⁰Koja mêhõ kãm amnhî tã ma pyrãk o hkwýjê nhîpêx nê mê ho mex pix o pa. Jakamã kot kaj mê amã ri axpên kînh nê mêmoj to axpên kutã anojarêt pix nê. Jao Tirtûm kapêr piitã hkôt amnhî nhîpêx mex o ri apa.

¹¹Amnepê mã mê pahte amnhî kaxyw Jejus kôt pajamaxpêr xà hã arîgrota ã na pre kormã akupýn mê pahwýr hpôx xà hã arîgro kormã hwýr awry rax nê. Tã ra hwýr ahtêp o mõi. Kojã tokyx akupýn mê pahwýr wrý nê ma akupým kaxkwa hwýr mê pahto api. Jakamã kwa kêr pu mê arĩ hamãr rãhã ho ri apa. Jao tanhmã amnhî tomnuj to kaxyw nê pajamaxpêr o:

—Kwa koja Jejus tanhmã amnhî to nê jarãhã akupýn wrýk japêr. Tã kot pa ri ã

amnhî nhîpêx anê nhũm wrý nê tee ri ja hã ixpumu pa amnhî kamã ixpijaàm týx nê. Nà kot paj ã amnhî tomnuj anhỹr kêt nê. Anê.

Hãmri nê Jejus kamã ajamak pê kutêp Tirtûm kapêr kôt pix mã ri amnhî nhîpêx mex rãhã ho ri papa.

¹²Na pu htem kamãt kãm gõr nê arîgro jamãr pê kamã pajamak o panhîkwý. Arîgro te kêp Jejus akupýn wrýk pyrãk. Jakamã kwa pu mê kamã pajamak pê kãm panojarêt rãhã ho ri papa nê amnhî nê tanhmã mê omnu xà kute pumunh mex o ri papa. Te ho pôristi kot amnhî nê mê kot kãm mê hkurê xwýnhjê pumunh mex pyrãk o Jejus kutêp tãm amnhî nhîpêx o ri papa. Na pre tanhmã mê pahkrã hto pu mê ý hã tãm ri amnhî nhîpêx. Tã kêr pu mê arĩ ã amnhî nhîpêx anhỹr o ri papa nê te mê pahte arîgro hã mê pa xwýnhjê kot amnhî nhîpêx pyrãk o amnhî nhîpêx.

¹³Kot puj mê ã amnhî nhîpêx anê nê mê piitã mê noo mã tee ri tanhmã mê pahte amnhî tomnuj to mã pajamaxpêr kêt nê. Jao amnhî kamã pahpijaàm nê ri papa hkêt nê. Nê pajamakêtkati nê paxãmnhîx ri papa. Te ho hirã kamã ri mê pa xwýnhjê kot amnhî nhîpêx pyrã nê ãm ri paxãmnhîx tãm amnhî nhîpêx o ri papa.

Nê mê pahprõ pix tânopxar o ri papa.

Nê mê pahpipãnh nê ri papijapu ho ri papa hkêt nê.

Nê mêmoj tã axpên mã paxàkjêr hkêt nê.

Nê mêmoj tã axpên kãm pagryk kêt nê.

¹⁴Nom kot puj mê axtem nê ã amnhî tomnuj anê nê mê pahte amnhî nhîpêx tùm kôt pix mã amnhî nhîpêx. Tã kêr pu mê ã amnhî nhîpêx anhỹr pumaj hpãnhã amnhî to Pahihti Jejus Kris wý nê kãm:

—Pa Jejus. Nà kormã jar apa ri na ka pre mê kot tanhmã amnhî tomnuj to kutã axihtýx o axihtýx nê aa tanhmã amnhî tomnuj to hkêt nê. Tã inhmã apyrã nê ixte amnhî tomnuj kutã ixihtýx o ixihtýx o ixpa hprãm. Anê.

Jao mê pajamaxpêr tùmja te ra kot amnhî tã mê pahto htýx kêt pyrãk o pu mê amnhî nhîpêx o ri papa.

14

Mě pahte Kris kôt pahkwỳjê mã paxàkjêr kêt ã mẽ pamã karõ

Matêwre 7.1-5; Rômân 2.1; Wam Korît 10.23-33; Xiakre 4.11

¹ Nê koja mēhõ kormã Jejus kôt amnhĩ xãm nyw ri kormã hkôt hamaxpêr tohtuj anê. Hãmri nê htỳx tanhmã hamaxpêr to nê mẽmoj mex kaga. Ka mẽ ja hã omu nê ãm omu nê hã tanhmã kãm nê hkêt nê. Kwãr mãmrĩ ã amnhĩ nhĩpêx anê. Koja gaa nê rĩ hprĩ hã Tĩrtũm kapêr mar tỳx nê hãmri nê hkôt mẽmojta pumunh mex nê. ² Jakamã koja Jejus kôt akwỳjê hõ mẽ apkur xà piitã hkur pymaj tanhmã hõ kute hã harê nê hkaga nê hamaxpêr o:

—Nà kot pa ja hkur kêt nê. Kot pa apu kuku nê hkur o amnhĩ tomnuj nê. Anê.

Kwãr mãmrĩ ã hamaxpêr anê nê hkur kêt nê. Nom mẽ pahte Jejus kôt amnhĩ xunhwỳr tỳx xwỳnhjaja na pu htem paxàmnhĩx Jejus kamnàr rom mẽmoj piitã kuku. Nom mẽ pahkĩnhã ham mẽ kot hkôt amnhĩ xunhwỳr xwỳnhjaja kormã kapêr piitã mar kêt jakamã kwãr mẽ mãmrĩ anê nê mẽmoj kur kêt nê. ³ Nom kêr ka mẽ ri tanhmã hã mẽ kãm akapêr to hkêt nê. Rỳ mẽ kãm:

—Kwa mẽ ixpyrà nê mẽmoj piitã aku.

Anhỳr o mẽ kãm akapêr kêt nê. Ano ho ãm hã mẽ omu.

Nê mẽ ate mẽmoj piitã hkur kêt xwỳnhjaja kêr ka mẽ ajaxwỳja mẽ ixte mẽmoj piitã hkur ã tanhmã mẽ inhmã axàkjêr to hkêt nê. Mẽ ixte mẽmoj piitã hkur o ixpa hã mẽ ixpumu nê ãm hã mẽ ixpumu nê hã tanhmã mẽ inhmã axàkjêr to hkêt nê. Rỳ hã mẽ inhmã:

—Kwa nà kot kaj mẽ ja kur o amnhĩ tomnuj nê.

Anhỳr o hã mẽ inhmã akapêr kêt nê. Ano ho ãm ja hã mẽ ixpumu. Mẽ pahte ahpỳnhã tanhmã paxàpkur to htã Tĩrtũm kot mẽ pahte Kra Jejus kôt amnhĩ xunhwỳr xwỳnh piitã mẽ pahto hkra kênã. ⁴ Jakamã kwa mẽmoj tã tanhmã axpên mã axàkjêr to ho ri apa hkêt nê. Koja Kris kôt atõjê hõ axtem tanhmã hamaxpêr to ka mẽ tee ri ja hã omu nê tanhmã hã kãm nê hkêt nê. Rỳ ajamaxpêr o:

—Tk. Na hte ã ri amnhĩ nhĩpêx anhỳr o pa. Ja omnuj. Pa na pa hte ã amnhĩ nhĩpêx anhỳr kêt nê.

Anhỳr o ri axpên kukamã ajamaxpêr hkêt nê. Mẽ pahpê Tĩrtũm kêt kênã kot pu kêt mẽ ã ri axpên kukamã pajamaxpêr anê. Tĩrtũm pix na hte tanhmã mẽ pajarênh to xwỳnh. àhpumunh o àhpumunh xwỳnh jakamã koja tanhmã mẽ hkrã hto nhũm mẽ rĩ kormã tãm hamaxpêr pê àmnhĩx ri tanhmã amnhĩ nhĩpêx to ho pa.

⁵ Nê koja Jejus kôt atõjê hõ mẽmo arĩgromnu jarê nê hã àpênh kêt nê. Ka mẽ apê hkwỳjaja tee ri ja hã omu nê ajamaxpêr o:

—Nà arĩgro piitã mẽ pamã mex kênã. Kot paj mãmrĩ arĩgro piitã hã apê.

Anhỳr o ajamaxpêr japêr. Nom kêr ka mẽ ja hã axpên mã tanhmã axàkjêr to hkêt nê. Na pu htem ahpỳnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxàkjêr to ho ri papa hkêt nê. ⁶ Kêt mẽ kot arĩgromnu jarênh xwỳnhjê mẽ mẽ pahte arĩgro piitã mex ã harênh xwỳnhjaja mẽ pahpiitã mẽ pahpê Tĩrtũm kraa. Jakamã mẽ pahpiitã na pu htem pajamaxpêr o:

—Na pa hte Tĩrtũm kãm hprãm xà hkôt ã amnhĩ nhĩpêx anhỳr o ri ixpa. Anê.

Nê mẽ pahte mẽmoj piitã hkur xwỳnhjaja nê mẽ kot mẽmoj kwỳ hkur kêt xwỳnh piitã mẽ pahpê Tĩrtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tĩrtũm mã amnhĩ jarê nê kãm:

—Pa mẽ ijamãr mex xwỳnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tĩrtũm.

Anhỳr o kãm amnhĩ jarê. Hãmri nê kormã hkamnàr rom paxàmnhĩx ri tanhmã mẽõ kuteta ku. ⁷⁻⁸ Mẽ pahpê Tĩrtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahpêr ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt. ⁹ Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ

Pahihti nē mẽ panê ty. Hāmri nē akupÿm htîr. Kêp mẽ panhō Pahihti hã akupÿm htîr. Kêp mẽ pahte hkôt amnhî xunhwÿr xwÿnhjê nhō Pahihti kaxyw. Jakamã kêp ra mẽ pahkwÿ htyk xwÿnhjê nhō Pahihti nē mãânēn kêp arî mẽ pahÿr xwÿnhjê nhō Pahihti. ¹⁰ No mẽ papajaja mẽ pahpê Kris kôt mẽ pahkwÿjê nhō pahi hkêt jakamã kêr mẽ Kris kôt akwÿjê hō tanhmã amnhî nhîpêx to hã omu hāmri nē tanhmã ho akapêr to hkêt nê. Rÿ ajamaxpêr o:

—Kwa na ã amnhî nhîpêx anê. Inhmã ja mex kêt.

Anhÿr o ajamaxpêr kêt nê. Koja nhÿrmã Tîrtûm tãm mẽ pahpiitã tanhmã mẽ pahte amnhî nhîpêx to hã mẽ pahpumunh xà hkôt tanhmã mẽ pajarēnh to. Nom kêr pu mẽ papajaja amnhî hkrã hkôt ã axpēn jarēnh anhÿr kêt nê. ¹¹⁻¹² Kot puj mẽ nhÿrmã pahpiitã Tîrtûm kutã pahkrî nê kãm tanhmã amnhî jarēnh to. Kormã mẽ pahÿr ri tanhmã mẽ pahte amnhî nhîpêx to ho papa hã kãm pahprî hã amnhî jarē. Kê mẽ pama nê tanhmã mẽ pajarēnh to. Kapêr ã kagà htûm kot mẽ pakukamã mẽ pajarēnh kot:

Koja nhÿrmã mẽ piitã ixpê mẽ õ pahi hã ixkutã hkôn krã ho rôrôk nê hkrî nê inhmã inhmex o inhmex ã ijarē.

Nê mẽ piitã ixpê Tîrtûm ã ixpyxi mex ã ijarē. Æm hāmri na pa ã mẽ hkukamã mẽ harēnh anê. Anê.

Mẽ pahte Kris kôt pahkwÿjê ho mex ã mẽ pamã karõ

Wam Korî 8.9-13

¹³ Nê kwa kêr ka mẽ akwÿ kot Jejus kôt amnhî xunhwÿr tohtuj anhÿr xwÿnhjaja tanhmã mẽ kot amnhî nhîpêx to ho pa hã mẽ omu nê ja nê tanhmã mẽ kãm akapêr to hkêt nê. Æm mẽ noo mã tãm ri amnhî nhîpêx rãhã ho ri apa. Mẽ kot ja hã mẽ apumunh nê mẽ akôt amnhî nhîpêx kaxyw. No kot ka mẽ kot tanhmã amnhî nhîpêx toja ã kãm akapêr nhûm ama nê tee ri amnhî kukamã hamaxpêr nê hkaprî nê.

¹⁴ E kot pa hpãnhã mẽ paxàpkur xà hã tanhmã mẽ panhō jarēnh to. Ixte Pahihti Jejus jamaxpêr xà hkôt tanhmã ijamaxpêr to ho ri ixpa jakamã kot paj ixkatat kôt mẽ amã tanhmã mẽ panhō jarēnh to nê Æm

hāmri harê. Nà mẽ paxàpkur xàja Æm pixi nê omnu hkêt. Piitã mex o mex. Nom koja mēhō tee ri mẽmo mẽ apkur xà hō pumu nê hamaxpêr o:

—Nà kot paj ja hkur kêt nê. Kot paj apu kuku nê ho amnhî tomnuj nê. Anê.

Hāmri nê hkur kêt nê. Tã kwār mãmrî ã hamaxpêr anê nê hkur kêt nê. Nom na Æm amnhî krã hkôt Tîrtûm kêp ja omnuj ã hkamnhîx. Kêp omnuj kêt. Ra kot mẽmo mẽ paxàpkur xà piitã mex ã harēnh. ¹⁵ Tã kot kaj mẽ kot mẽmoj kur kêt xwÿnhÿta py nê o tē nê kot hkaga xwÿnh noo mã hkur o xa nhûm apumu nê tee ri hamaxpêr nê hkaprî nê. Jakamã kot ka mẽ ã noo mã amnhî nhîpêx anhÿrja o ho mex kêt nê. Kwa mẽ ã ri axpēn nhîpêx anhÿr hkêt nê. Kot ka mẽ ã axpēn nhîpêx anê nê te amnhî pix kukamã ajamaxpêr pyrãk o amnhî nhîpêx. Jao akwÿjê ho mex kukamã ajamaxpêr kêt nê. Kris kãm mẽ hapê htÿx kôt mẽ kot amnhî tomnuj pãnhã amnhîrer kaxyw ra nê htyk kēnã kot ka kêt mẽ axtem nê ri ã mẽ noo mã mẽ kot mẽmoj kur kēta kur anê. Rÿ koja apu tee ri kot mẽmoj kur kēta kur ã mẽ apumu nê tanhmã amnhî tomnuj to. Jao Kris kaga japêr. Jakamã kwa mẽ ã mẽ noo mã mẽmojta kur kêt nê. ¹⁶ Mẽmo mẽ apkur xàja mex tã nhûm mẽ akwÿjê hō kãm mex kêt japêr ka mẽ noo mã hkur kêt nê. Nê tanhmã hã kãm nê hkêt nê. Kot kaj mẽ anê nhûm Kris kra hkêt xwÿnhjaja tee ri ja hã mẽ apumu nê tanhmã axpēn mã mẽ apê Kris kwÿjê ho kapêr punuj to. ¹⁷ Mẽ pahpê Tîrtûm krajaja na pu htem paxàpkur xà nê pahkôm xà pix kukamã pajamaxpêr o ri papa hkêt nê. Na pu htem amnhî mẽ pahkwÿjê mex kukamã pajamaxpêr. Nê mẽ pahte tãm amnhî nhîpêx kukamã pajamaxpêr. Nê tãm axpēn nhîpêx kukamã pajamaxpêr. Kot puj mẽ ã amnhî nhîpêx anê nhûm Tîrtûm Karõ ja hã mẽ pahpumu nê mẽ pahto mẽ pahkînh nê. Pu mẽ pahkînh nê pajamakêtkati nê ri axpēn kôt papa. ¹⁸ Tã kot puj mẽ ã Kris mã tanhmã amnhî nhîpêx to ho ri papa anê nhûm Tîrtûm ja hã mẽ pahpumu nhûm ja kãm mex nê. Nê Kris kôt mẽ pahkwÿjê mã haxwÿja ja mex nê.

¹⁹ Jakamã kêr pu mẽ tãm axpēn mã pakapêr o ri papa. Nê pajamakêtkati nê

axpên kôt ri pajapôj. Nê Kris kôt tanhmã
axpên to paxihtÿx to ho ri papa. ²⁰ No kot
ka mẽ axàpkur xà gryk ã akwÿ hkukamã
ajamaxpêr kêt nê atÿx ri mēhō noo mã
mēmoj kur japêr. Kêp omnuj tâ ka mẽ ãm
amnhĩ pix kukamã ajamaxpêr nê noo mã
hkur japêr. Hãmri nhũm ja hã mẽ apumu
nê ra kot Tirtũm kaga mã. Ra kêp hkra
jakamã kwa mẽ noo mã mẽ kot mēmoj
punuj ã harēnh xwÿnhhta kur kêt nê. Nom
mẽ paxàpkur xàja piitã mex. Tirtũm kot
mẽ pamã òr jakamã piitã mẽ panhōō. Tã
koja akwÿjê hō Tirtũm kêp mēmoj omnuj
ã hkamnhĩx tâ ka mẽ noo mã aku nê ho
amnhĩ tomnuj nê. ²¹ Kêr pu mẽ pahkwÿjaja
tanhmã kot amnhĩ tomnuj to pymaj pu mẽ
pahte amnhĩ nhĩpêx kukamã pajamaxpêr
mex o papa. Mēmo mẽō nê mēmo kagō pē
wĩhtija. Tirtũm kot mẽ pamã mēmoj piitã òr
tã no nhũm mẽ pahkwÿjaja kêp ja omnuj nê
pu mẽ noo mã hkur rÿ ho pahkôm kêt nê.
Mēmo mry nê mēmo wĩhti pu mẽ noo mã
hkur rÿ ho pahkôm kêt nê.

²² Nê kêr ka mẽ atō mēmoj krêr kaxyw nê
hkukamã ajamaxpêr o:

—Nà kot paj ja krê. Tirtũm kãm ja mex
kênã. Anê.

Hãmri nê mãmrĩ Tirtũm kamnàr rom
axàmnhĩx akrê. Kãm ja mex kênã kot ka kêt
ri tee ri hkrêr kaxyw hkukamã ajamaxpêr
nê hkaga. ²³ No kot kaj mẽ atō mēmoj
to anhÿr kaxyw nê tee ri amnhĩ kukamã
ajamaxpêr nê ajamaxpêr o:

—Ko kot paj apu ja ho anê nhũm Tirtũm
hã ixpumu nhũm ja kêp omnuj nê rÿ ko.
Anê.

Hãmri nê tee ri amnhĩ kukamã aja-
maxpêr. Tã ra ã amnhĩ nhĩpêx anê nê akrê
rÿ mēmoj to anê. Hãmri nhũm Tirtũm tee ri
ã ate amnhĩ nhĩpêx anhÿr ã apumu nhũm
ja kêp omnuj nê. Ate hkamnàr rom mēmoj
to anhÿr kêt nê amarĩ amnhĩ krã hkôt ho
anhÿr jakamã ho amnhĩ tomnuj nê.

15

*Mẽ pahte amnhĩ pix kukamã paja-
maxpêr kêt ã mẽ pamã karō*

*Makre 10.45; Wam Korĩt 10.24; Piripos
2.3-5*

¹ Nê kêr pu mẽ pahte ra Jejus kôt amnhĩ
xunhwÿr tÿx xwÿnhjaja amnhĩ kôt kormã

mẽ kot Jejus kôt amnhĩ xunhwÿr totuj
janhÿr xwÿnhjê jamãr mex nê. Jao mẽ
kamã pagryk tokyx anhÿr kêt nê. ãm mẽ
kutã panojarêr pix o papa. Jao ra amnhĩ
pix kukamã pajamaxpêr kêt nê. ² Mãñnēn
amnhĩ mẽ Kris kôt mẽ pahkwÿjê hkukamã
mãn mẽ pajamaxpêr. Jao mẽ kot tãm
amnhĩ nhĩpêx kaxyw mẽ ho mex o ri papa.

³ Kris na pre jar pa ri amnhĩ pix kukamã
hamaxpêr kêt nê. Na pre mãñnēn ò Papaj
kukamã hamaxpêr. Jakamã Tirtũm kapêr ã
kagã htũm kot kãm kapêr jarēnh kot:

Pa Papaj. Na hte mẽ pahkurê xwÿnhjaja
ixto kapêr punuj nê. Nom mãñnēn ã
ato kapêr o pa anê. Anê.

⁴ Mẽ pakaxyw na Tirtũm kapêr ã kagàja.
Mẽ pahte kamã harēnh nê mar nê amnhĩ
kaxyw hkôt pajamaxpêr tÿx o ri papa
kaxyw. Jakamã na pu htem tanhmã pah-
punuj to htã kapêr kwÿ ma nê pahkĩnh
nê. Jao tee ri amnhĩ kukamã pajamaxpêr
o ri pahkaprĩ hkêt nê. ãm nhÿrmã Tirtũm
kot mẽ pahto mex kukamã pajamaxpêr o
akupÿm paxihtÿx nê pahkĩnh nê ri papa.
Mẽ pahkĩnh nê ri papa kaxyw na Tirtũm
kapêr ã kagàja. ⁵⁻⁶ Na pu htem Tirtũm
kamnàr rom pahkĩnh nê. Nê axpên kamã
paxukaprĩ ho ri papa. Jakamã na pa hte
tanhmã mẽ ato Tirtũm wÿr to nê kãm:

—Pa Tirtũm. Apê mẽ ijamãr xwÿnh maati
na ka. Nê apê mẽ inhō Pahihti Jejus
Kris nhō Papaj na ka. Nà xep ra Rôm
nhō xwÿnh kwÿjaja kãm akapêr kôt amnhĩ
nhĩpêx prãm jakamã kwa tanhmã mẽ hkrã
ho mex to kê mẽ hamakêtkati nê ajamaxpêr
kôt hamaxpêr rãhã ho ri akôt pa. Hãmri
nhũm mẽ amnhĩ tã apumu nê piitã amex
o amex ã ajarê.

Anhÿr o pa hte mẽ ato kuwÿ.

Ijaew kêt xwÿnhjê jarēnh

Atre 10.34; Rômân 9.24; Karatas 3.28

⁷ Nê kwa kêr ka mẽ amã axpên tã ma ho ri
apa. Te ho Kris kãm mẽ pahã mata pyrãk.
Jao axpên to mex pix o apa. Kot kaj mẽ ã
axpên nhĩpêx anê nhũm mẽ piitã axpên tã
mẽ apumu nê mẽ anhÿ hã Tirtũm mã mex
o mex ã harê.

⁸ Amnepêm Tirtũm Ijaew mã tanhmã
Kris jarēnh to. Kormã pika hwÿr wrÿk kêt

ri nhũm hkukamã nhỹrmã mẽ hwýr wrýk nẽ mẽ kamã kator ã harẽ.

Tã nhũm mẽ hwýr wrý nẽ mẽ kamã kato. Ijaew hkanrêhã htãmnhwýjê kamã kato nẽ mẽ ho mex o ri mẽ hkôt pa. Mẽ kot amnhĩ tã omunh nẽ ã hamaxpêr anhỹr kaxyw. Nẽ hamaxpêr o:

—Amnepêr Tĩrtũm kot mẽ panhĩgêr mã hkukamã harênh xà hkôt na mẽ ixwýr Kraja mẽ nhũm wrý nẽ mẽ ixto mex o ri pa. Nã ãm hãmri na pre mẽ ixwýr kumẽ.

Anhỹr o hamaxpêr kaxyw. ⁹ Nẽ mẽ apê Ijaew kêt xwýnhjaja mẽ ajaxwýja mẽ ate tanhmã kot amnhĩ nhĩpêx to hã harênh mar nẽ Tĩrtũm mã mex o mex ã harênh kaxyw. Nẽ Tĩrtũm kot mẽ akamã ukapĩ hã mẽ ate amnhĩ tã omunh nẽ mex o mex ã harênh kaxyw na pre wrý. Tĩrtũm kapêr ã kagà htũm kot tanhmã mẽ ixpê Ijaew jarênh to nẽ mãânên tanhmã mẽ apê Ijaew kêt xwýnhjê jarênh to nẽ mẽ pajarênh kot: Kot paj Ijaew kêt xwýnhjê jamak mã amã amex ã ajarênh o ri mẽ hkôt ixpa.

Nẽ amex ã inhgrer o ri mẽ hkôt ixpa. Anẽ.

¹⁰ Nẽ ja:

Kwa mẽ apê Ijaew kêt xwýnh mẽ mẽ apê Ijaew. Kêr ka mẽ apiitã Tĩrtũm nhỹ hã akĩnh nẽ ri apa. Anẽ.

¹¹ Nẽ mãânên ja:

E kêr ka mẽ apê Ijaew kêt xwýnhjaja nẽ krĩ piitã hkôt mẽ apa xwýnhjaja mẽ apiitã Tĩrtũm mã mex o mex ã harênh o ri apa.

Anhỹr o kot harênh. ¹² Nẽ Tĩrtũm nhỹ hã kapêr o pa xwýnh finat Ijais haxwýja Ijaew mã Jejus jarênh o:

Koja nhỹrmã Jese kanrêhã htãmnhwýjê hõja mẽ pahwýr kato.

Hãmri nẽ mẽ pahpê Ijaew mẽ Ijaew kêt xwýnhjê ho amnhĩptàr o pa.

Jakamã nhũm mẽ amnhĩ kaxyw hkôt hamaxpêr o pa. Anẽ.

¹³ Nẽ na pa hte tanhmã mẽ ato Tĩrtũm wýr to ho ri ixpa nẽ kãm:

—Pa Tĩrtũm. Kwa kêr ka Rôm nhõ xwýnhjê ho mex kê mẽ amnhĩ kaxyw Akra hkôt hamaxpêr mex o ri pa. Jao hkôt hkĩnh nẽ hamakêtkati nẽ ri axpên to pa. Nẽ kê Akarõ mẽ ho mẽ hihtýx o pa kê mẽ amnhĩ kaxyw amã mãn hamaxpêr týx rãhã ho ri pa. Anẽ.

Pawre kot hprĩ hã amnhĩ jarênh

Sikũn Pêtre 1.12-13

¹⁴ E Kris kôt ixkwýjaja. Nã ra ixte mẽ ajarênh mar mex. Na ka xep htem amnhĩ to mex o ri apa. Nẽ mẽmoj to axpên kutã anojarêr rãhã ho ri apa. Nẽ mẽ kot tanhmã Tĩrtũm kapêr kôt amnhĩ nhĩpêx to xàja ka mẽ omunh mex nẽ ho axpên jahkre ho ri apa. ¹⁵ Tã ot pa kagà ja kamã mẽ amã ixujarênh kãm ixihtýx nẽ. Tĩrtũm nhỹ hã. Ra mẽ ate mẽmoj mar mex tã pa axte mẽ amã harẽ. Mẽ ate mar týx nẽ hã anohtýx kaxyw. Nã ã ixte amnhĩ nhĩpêx anhỹr kaxyw na pre Tĩrtũm mẽ akaxyw ixãm. ¹⁶ Ixte Jejus Kris mã mẽ apê Ijaew kêt xwýnhjê mã kapêr jarênh o ri mẽ akôt ixpa kaxyw. Nẽ mẽ ato hwýr o ri ixpa kaxyw. Tã pa hte krĩ hkwy kamã ã mẽ akwýjê mã harênh anhỹr o ri mẽ hkôt ixpa. Nẽ Jejus jarênhja pa hte mẽ hkôt mẽ kãm harênh o ri ixpa. Mẽ kot mar nẽ hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mẽ kãm mẽ hamaxpêr nyw jagjê nhũm Tĩrtũm hã mẽ omu nhũm ja kãm mex nẽ nhũm hkĩnh nẽ hamaxpêr o:

—Nã ãm hãmri. Koja mẽ nhỹrmã wa ixri htĩr tũm nẽ mex nẽ pa ho pa. Anẽ.

¹⁷ Tã na pa ixte Jejus Kris nhỹ hã Tĩrtũm mã tanhmã amnhĩ nhĩpêx to ho ixpa hã amnhĩ pumu nẽ ixkĩnh nẽ. ¹⁸⁻¹⁹ Na pa hte ý hã mẽ apê Ijaew kêt xwýnhjê mã Tĩrtũm kapêr jarênh o ri mẽ akôt ixpa. Nẽ mẽ anoo mã tanhmã ri Kris kot mẽ amã amnhĩ nhĩpêx to hã harẽ. Nẽ mẽ amã aa mẽ kot mẽmoj pumunh kêt kwý ho anhỹr o ri mẽ akôt ixpa. Tĩrtũm Karõ nhỹ hã. Nhũm hte mẽ akwýjaja amnhĩ jaêr pê omu nẽ kamã no puma nẽ. Hãmri nẽ mẽ pahpyrà nẽ Jejus kôt amnhĩ xunhwý. Nom pa hte ã amnhĩ nhĩpêx anhỹr ã amnhĩ pumu nẽ ri hã amnhĩ to jarkrar kêt nẽ. ãm ixte Kris pix nhỹ hã mẽ kãm ixkapêr ã mẽ kãm amnhĩ jarênh o ri mẽ hkôt ixpa. Tã pa ra Jerujarê rũm Irir wýr krĩ piitã hkôt mẽ kãm Kris kapêr jarê. Tĩrtũm Karõ kot tanhmã ixto hihtýx to jakamã pa mẽ piitã mẽ kãm harênh mex nẽ. ²⁰ Na pa hte mẽ hwýr inhnojarêr nẽ ã ijamaxpêr anẽ nẽ ijamaxpêr o:

—Kormã mẽ kot Kris jarênh mar kêt xwýnhjê hwýr kot paj mõ. Nom ra mẽ

kot harênh mar xwÿnhjê nhõ krî hwÿr inhmôrja inhmã prãm kêt. Anê.

²¹ Tîrtûm kapêr ã kagà htûm kot kapêr mar kêt xwÿnhjê jarênh kot:

Kormã mẽ kot Tîrtûm kapêr mar kêt xwÿnhjaja koja mẽ kuma nê hprî hã mar tÿx nê. Anê.

Pawre kot Rôm wÿr hkrà hã amnhî jarênh Rômân 1.8-15

²² Hêxta waa nê. Inhmã mẽ apumunh prãm tÿx nê Rôm kãm Jejus kôt ixkwÿjaja. Na pa hte xatã mẽ awÿr ixkrà nom kormã mẽ awÿr inhmôr kêt nê. Kormã ixte krî hkwÿ kamã mẽ kãm Kris jarênh o ri ixpa jakamã kormã mẽ awÿr inhmôr kêt nê.

²³ Na pa ra xatã mẽ awÿr ixkrà hã ixtã amgrà xohtô nê. Tã ra jar mẽ kãm Kris kot mẽ panê tanhmã amnhî nhîpêx toja jarênh pa. ²⁴ Jakamã kot paj tokyx ma mẽ awÿr mō. Hãmri nê mẽ awÿr pōj pu mẽ axpên pumu nê pahkînh nê axpên mã pakapêr o papa. Pa mẽ akôt ri ixpa tãmtã hamũ pyka pê Espãnhã wÿr ma mō. Nê kot paj inhnojarêr ka mẽ ixto Tîrtûm wÿ nê inhmã ixàpkur xà hkwÿ gō pa ma mẽ hwÿr pry hã hkur o mō.

²⁵⁻²⁶ No na pa kormã mẽ awÿr inhnojarêr kêt nê. Kot paj ja rûm awjanã nê akupÿm Jerujarê hwÿr mō. Kamã Kris kôt mẽ pahkwÿjaja kêp amrakati nê ri pa nhũm pika pê Gres mẽ Masetôn kamã Kris kôt mẽ pahkwÿjaja mẽ harênh ma nê mẽ kãm kàxpore hkwÿ ho akuprō nê mẽ kaxyw inhmã kugō. Tã kot paj ma mẽ hwÿr o mō nê mẽ kãm kure nê rî kormã ma mẽ awÿr mō. ²⁷ Jerujarê kamã Kris kôt mẽ pahkwÿjaja Ijaew na mẽ. Mẽ kumrêx na prem Kris kôt amnhî xunhwÿ. Hãmri nhũm mẽ hkwÿjaja ma mẽ apê Ijaew kêt xwÿnhjê mã kapêr jarênh o ri mẽ akwÿ hkôt pa. Hãmri nhũm pika pê Gres kamã mẽ pa xwÿnhjaja mẽ kapêr ma nê mẽ urak nê Kris kôt amnhî xunhwÿr kurê kumrêx. Jakamã amnhî xwar kãm nhãm krî hõ kamã Kris kôt mẽ pahkwÿjê ho mex prãm nê. Hãmri mẽ kãm kàxpore hkwÿ ho akuprō nê mẽ kaxyw inhmã kugō.

²⁸⁻²⁹ Tã kot paj ma Jerujarê hwÿr mẽ kãm o mō nê mẽ kãm kure hãmri nê awjanã nê rî kormã ma Rôm wÿr mẽ awÿr mō. Hãmri

nê mẽ awÿr pōj pu mẽ axpên pumu nê pahkînh nê. Nê axpên mã Jejus Kris mex o mex ã harê nê kãm tanhmã amnhî jarênh to ho papa. Jao pahkînh nê papa. Tã pa hpãnhã hamũ ma Espãnhã wÿr mō.

³⁰ Nê na pu prem Jejus Kris o panhõ Pahîhti. Jao te mẽ pahpê hkôt axpên to pahtō nê pahtōx pyrak o axpên nhîpêx. Nê Karō nhÿ hã pamã axpên kînh nê. Jakamã kwa Jejus kôt ixkwÿjaja. Kêr ka mẽ ixpê mẽ atō hã ixto Tîrtûm wÿr kãm axihtÿx nê. ³¹ Kêr pa ma pyka pê Jutej kamã Jerujarê kamã Kris kôt mẽ pahkwÿjê hwÿr mō nê mẽ kãm kàxporeta gō nhũm mẽ omu nê Ijaew kêt xwÿnhjê kot mẽ kãm ôr ã mẽ omunh tã tee ri hamaxpêr kêt nê. Âm hkînh kãm mãmri àmnhîx hamÿ nê ho amnhîm awjaprō.

Nê kêr ka mẽ ixto awÿ kê inhnê mẽ kêp mẽ pahkwÿ hkêt xwÿnhjê pumunh mex nê.

³² E kêr ka mẽ ã ixto Tîrtûm wÿr anê. Kê ixte ma Jerujarê rûm ma Rôm wÿr pâr kãm inhmôrta ã kê ixpumunh mex nê. Pa inhmex pê mẽ kurûm ma mẽ awÿr mōn pōj pu mẽ tokyx axpên pumu nê pahkînh nê. Pa mẽ ate tanhmã amnhî nhîpêx to ho ri apa hã mẽ apumunh o mẽ akôt ri ixpa nê ixkînh nê. ³³ Tã âm ja pix. Kê Tîrtûm mẽ akôt pa ho pa. Tãm na hte tanhmã mẽ pahto pu mẽ ÿ hã pajamakêtkati paxàmnhîx ri pahkînh nê ri papa.

16

Pawre kot ahpÿnhã hkràmnhwÿjê mã kapêr

¹ Ku nê mãânên ja. Ot pa mẽ awÿr Kris kôt pahtōx Pepreja mẽ awÿr kumê. Na hte krî pê Sênkrej kamã Kris kôt mẽ pahkwÿjê tanhmã mẽ ho mex to ho ri mẽ hkôt pa. ² Nê mãânên pa na hte tanhmã ixto mex to. Tã kê mẽmo arîgro hã mẽ awÿr pōj ka mẽ kêp Kris kôt mẽ pahtōx ã omu nê ho mex nê tanhmã ho ajuta hto.

³ Nê kêr ka mẽ atar Kris kôt ixkràmnhwÿjê mã ijarê. Na pa hte mẽ kãm ijamaxpêr rãhã ho ri ixpa. Nê Akirti mẽ hprō Prisireta ka mẽ wa kãm ijarê. Na pre hte wa inhîkhô hã Jejus Kris mã tanhmã amnhî nhîpêx mex to ho wa pa. ⁴ Jao wa amnhî grôn hôt mẽ kãm ixkurê xwÿnhjê pê ixpytã. Pa amnhî tã wa omu nê inhmã wa hkînh nê. No âm

papxipix inhmā wa hkīnh kêt nē. Na pre Ijaew kêt xwýnh kwý pē Kris kwýjaja ixtā wa harēnh ma nē haxwýja kām wa hkīnh nē.

⁵ Nē na hte Kris kwýjaja wa ōrkwý kamā axpēn wýr akuprō. Mē kot Tirtūm mā amnhī jarēnh nē kapēr ā kagà hkwý mar kaxyw axpēn wýr akuprō. Tā kēr ka mē mē kām ijarē.

Nē Kris kôt mē pahtō Epēnre mā ijarē. Kēp ixkrāmnhwý mex na. Inhmā hkīnh. Kumrēx na pre jar pika pē As kamā amnhī kaxyw Kris kôt hamaxpēr nē hkôt amnhī xām.

⁶ Nē Kris kôt mē pahtōx Marir ka mē kām ijarē. Na xep hte tanhmā mē ato mex to rūnh o pa.

⁷ Nē Kris kôt mē pahtō ārōhti mē Jūhti wa kām ijarē. Ixpyrà nē wa kēp Ijaew na wa. Kormā ixte Kris kôt amnhī xām kêt ri na pre wa kumrēx hkôt amnhī xām. Na hte Jesus nhý hā mē ahkre ho mē pa xwýnhjaja wa kot Kris kapēr jarēnh mex ā wa harē. Tā ā amnhī nhīpēx anhýrja mýrapē na pre mē hkwýjaja wa unē nē wa haxà pa prem ixpimràatā ixpē prēs nē mē hagjēnh xà kamā ixkrī.

⁸ Nē Kris kôt mē pahtō āpritre mā ka mē ijarē. Kēp Kris kôt ixkrāmnhwý mex na.

⁹ Nē Kris kôt mē pahtō Upānre mā ijarē. Na hte ixpyrà nē Kris mā tanhmā amnhī nhīpēx to ho ri pa.

Nē Kris kôt mē pahtō Etaki mē ijarē. Kēp ixkrāmnhwý mex na.

¹⁰ Nē Kris kôt mē pahtō Apes ka mē kām ijarē. Na prem ra Kris ā hipēx punuj nē no nhūm mē kutā amnhī to htýx nē Kris kaga hkêt nē.

Nē Aristopti nhōrkwý kamā hkwýjē mā ijarē.

¹¹ Nē Kris kôt mē pahtō Erojāwti mā ijarē. Ixpyrà nē kēp Ijaew na.

Nē Nasisti nhōrkwý kamā Kris kwýjaja ka mē kām ijarē.

¹² Nē Kris kôt mē pahtōx Xiripēre mē Xiripos wa kām ijarē. Wa kēp Pahihti Jesus mā tanhmā amnhī nhīpēx mex to xwýnh na wa.

Nē Kris kôt mē pahtōx Pesixti mā ijarē. Haxwýja kēp ixkrāmnhwý na. Na hte Pahihti Jesus mā tanhmā amnhī nhīpēx mex to ho ri pa.

¹³ Nē Kris kôt mē pahtō Rupti mā ijarē. Na hte Kris kôt amnhī nhīpēx mex o ri pa. Nē katorxà mā ijarē. Na pre te ixpē hkra nhīpēx pyrāk o inhīpēx.

¹⁴ Nē Kris kôt mē pahtō Asīnre mā nē Prekōxti nē Emes nē Patopas nē Emas mē. Jajē piitā mē pahkwý kot mē hwýr pikuprōnh xwýnhjē mē mē ho apimràatā mē kām ijarē.

¹⁵ Nē Kris kôt mē pahtō Pirorti mā nē mē pahtōx Juure mē Nērew wa nē htōxja nē mē pahtō Orīpti wa mē kām ijarē. Nē mē pahkwý kot mē hwýr pikuprōnh xwýnhjē mē mē ho apimràatā mē kām ijarē.

E kēr ka mē jajē piitā mē kām ijarē. Na pa hte mē kām ijamaxpēr rāhā ho ri ixpa.

¹⁶ Nom mē tapxipixjaja kêt. Ā mē apiitā mā na pa hte ijamaxpēr rāhā ho ixpa.

Nē ota jar Kris kwýjaja mē awýr hpēr mē.

¹⁷ Kwa ixkrāmnhwýjaja. Na ka mē ra aprī hā Tirtūm kapēr mar týx nē. Tā kēr ka mē amnhī nē mē kot Tirtūm kapēr o hēx xwýnhjē pumunh mex o apa. Mē kām axpēn nē mē ato hpigrānh par prām. Nē mē ate Kris kaga nē hpānhā mē kot amnhī nhīpēx o amnhī nhīpēxja mē kām hprām jakamā kwa mē amnhī nē mē omunh mex nē axkām ajamak rom. ¹⁸ Na htem ā amnhī nhīpēx anhýr o Pahihti Kris mā tanhmā amnhī nhīpēx to ho pa hkêt nē. Ām amnhī hkrā hkôt tanhmā ri hkwýjē jahkre hto ho pa. Kot mē no kupyw kaxyw tanhmā mē kām hēx to ho ri mē hkôt pa. Te mē ahkre mex pyrāk tā mē ahkre mex kêt nē. Jakamā nhūm htýx ri mē pa xwýnhjaja mē kot mē ahkreja ma nhūm te mē kām mex pyrāk. Jakamā kwa mē okora mē amnhī nē mē omunh mex nē. ¹⁹ Na ka htem mē kurom Kris kôt amnhī nhīpēx mex nē nhūm xep mē piitā mē apumu nē axpēn mā ja hā mē ajarēnh o ri pa. Pa mē ajarēnh ma nē ixkīnh nē. Tā kēr ka mē arī ajamaxpēr mex rāhā ho ri ajamaxpēr o apa. Nē amnhī nhīpēx mex rāhā nē. No tanhmā ajamaxpēr punuj to ho ri amnhī tomnuj o ri apa hkêt nē.

Ā mẽ ate amnhĩ nhĩpêx anhÿrja na inhmã hprãm.

²⁰ Nẽ na hte Satanasti mẽ hkwyjaja mẽ ate Jejus kaga hprãm xaj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêr nẽ. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nẽ hpĩr pyrãk o mẽ hipêx. Jakamã ã mẽ kot mẽ anhĩpêx anhÿr tã koja Tĩrtũm mẽ amã mẽ ajamakêtkati xaja gõ. Tapxipix na kot mẽ pajamakêtkati xã nhõr kaxyw àhpumunh tÿx.

Nẽ na pa hte mẽ ato Pahihti Jejus wÿ nẽ kãm:

—Pa Pahihti. Kwa kêr ka Rõm kãm akwÿjê pumu nẽ mẽ ho mex nẽ mẽmoj to mẽ kutã anojarêt rãhã ho ri apa. Anẽ.

²¹ Nẽ ota mẽ pahtõ Ximotreja mẽ awÿr hpêr mẽ. Na hte inhĩhkõ hã Kris mã tanhmã amnhĩ nhĩpêx to ho ri pa. Nẽ ixtõ Rusti mẽ Jasãwti mẽ Sosipa wa mẽ haxwÿja mẽ awÿr hpêr mẽ.

²² Nẽ kot inhmã ixkapêr ã kagã xwÿnh Testi haxwÿja mẽ awÿr hpêr mẽ. Kêp Kris kôt mẽ pahtõ na. ²³ Nẽ Kris kôt mẽ pahtõ Gajre haxwÿja mẽ awÿr hpêr mẽ. Őrkwÿ kamã na hte Kris kwÿjaja axpên wÿr akuprõ nẽ kamã Tĩrtũm mã amnhĩ jarẽ nẽ kapêr ã kagã kamã harẽ nẽ mar o hkrĩ. Őrkwÿ kamã na pa pre pøj.

Nẽ mẽ pahtõ Eras haxwÿja mẽ awÿr pêr mẽ. Na hte jar krĩ ja kamã Rõm nhõ pahihiti mã õ kãxpore jamãr pê ho mẽmoj to anhÿr o pa.

Nẽ Kris kôt pahtõ Kwatre haxwÿja mẽ awÿr hpêr mẽ. E jajaja piitã na mẽ awÿr hpêr rẽ.

²⁴ E kê Pahihti Jejus Krisja mẽ akutã nojarêt rãhã ho pa.

*Pawre kot Tĩrtũm mex o mex ã harênh
Epes 1.3, 3.20-21; Wam Ximotre 1.17;
Eprêw 13.20; Jutre 24-25*

²⁵ Nẽ kwa kêr pu mẽ Tĩrtũm mã mex ã harênh rãhã ho ri papa.

Nẽ ixte mẽ amã Jejus Kris jarênhhta ã ka prem ama nẽ hkôt amnhĩ xunhwÿ. Tã koja mẽ ato mẽ axihtÿx ka mẽ hkôt axihtÿx kãm hkôt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêr

xwÿnhjê ho hkra kaxyw hã amnhĩ jarênh kêr nẽ. Kormã ja ho hpimxur ryy nẽ. ²⁶ Tã ã mẽ anhĩpêx anhÿrja o amnhĩrĩt nẽ ÿ hã mẽ kapêr jarênh o ri pa xwÿnhjê mã kapêr nẽ mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagã kê mẽ pyka piitã hkôt kamã harẽ nẽ kuma. Nom kê Ijaew pixjaja mar kêr nẽ. Kê pika piitã hkôt kamã harẽ nẽ kuma. Panhĩ nẽ kupê nẽ kupê hkã htykre nẽ mẽ hkã haka nẽ mẽ hkã kamrêkjaja. Kê mẽ piitã Jejus jarênh ma nẽ amnhĩ kaxyw hkôt hamaxpêr nẽ hkôt amnhĩ xunhwÿ. Hãmri nẽ hkôt amnhĩ nhĩpêx mex o ri pa. Anẽ.

Nhũm pre ã mẽ pakaxyw mẽ kãm kapêr anẽ nhũm prem kuma nẽ hã kagã.

²⁷ Nã Tĩrtũmja tapxipix na àhpumunh tÿx xwÿnh ã ãm pyxi mex. Nẽ tapxipix kêp mẽ pahpiitã Mẽpahpãm. Tã kêr pu mẽ Jejus Kris kot mẽ panê htyk ã omunh xã hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awÿr ixpêr mẽnh anẽ. Na hapêx.

Wam Korīt Pawre kot Korīt kām Jejus kôt hkwỳjê hwỳr kagà nê mēnh

Pawre na pre kagàja nhīpêx. Jejus nhỹ hã kapêr jarênh o pa xwỳnhjê hô na pre. Na pre hipêx nê ma krī pê Korīt kām Jejus krajê hwỳr kumê. Nê kagàja kamã mē kām tanhmã mēmoj tã karõ hto. Na pre mē kot àhpumunh tỳx ã amnhĩ to jarkrar o pa nê mē kām kapêr. Nê tanhmã amnhĩ tomnuj to nê mē kām kapêr. Nê mē hprõ nê mē mjên xwỳnhjaja tanhmã wa kot axpên nhīpêx to hã mē kām karõ. Nê mē kot Tĩrtũm mã mex o mex ã harênh kaxyw axpên wỳr mē pikuprõnh nê tanhmã amnhĩ nhīpêx to hã nhũm mē kām karõ. ã na pre Pawre mē kām mēmoj tã karõ nê hã kagà anê. Nê mē kām:

¹ Pa Korīt kām Jejus kôt ixkwỳjaja. Xà mē amex? Ot pa mē awỳr kagàja nhīpêx nê kumê. Ixpê Pawre na pa Kris kôt mē pahõt Sostenes mē wa awỳr ixpêr mē. Tã kagàja nhīpêx nê mē awỳr kumê. Tĩrtũm na pre ixte Jejus Kris nhỹ hã mē ajahkre ho ri ixpa kaxyw ixãm. ² Tã ot pa mē awỳr kagà nhīpêx nê mēnh mã. Korīt kām ixpyrà nê mē apê Tĩrtũm krajê hwỳr.

Tĩrtũm kot amnhĩ kaxyw mē axunhwỳr jakamã na ka prem amnhĩ tomnuj kaga nê Kris kôt amnhĩ xunhwỳ nê hkôt amnhĩ nhīpêx mex o ri apa. Krī piitã hkôt mē kot amnhĩ to Jejus Kris wỳr o mē pa xwỳnhjê pyrà nê. Mē panhõ Pahihti Jejus Krisja ãm pixi mex na.

³ Nê Tĩrtũm kêp Mēpahpãm maati nê Jejus Kris kêp mē panhõ Pahihti jakamã na pa hte mē ato wa hwỳr rãhã o ri ixpa nê mē ato wa hwỳr o:

—Kwa Tĩrtũm mē Jejus wa. Kêr ka wa Korīt nhõ xwỳnhjê kutã anojarêt rãhã ho wa ri apa. Nê mē ho mex rãhã nê. Kê mē amnhĩ tã war apumunh kôt ri hamakêtkati nê hkĩnh nê àmnhĩx tanhmã ri amnhĩ nhīpêx to ho ri pa. Anê.

*Tĩrtũm kot Jejus Kris kukwak ri mē pahto
mex ã harênh
Sikũn Pêtre 1.2; Wam Tesarõn 5.23-24*

⁴ Nê mē ate amnhĩ kaxyw Jejus Kris kôt ajamaxpêr o ri apa jakamã na hte Tĩrtũm mē ato mex nê. Tã pa hte kãm amnhĩ jarênh kaxyw nê kãm mē ajarênh o:

—Pa Tĩrtũm. ãm hãmri na ka pre Korīt nhõ xwỳnh kwỳjê ho akra. Nà ja mex o mex. Anê.

⁵ Nê ra mē ate Kris kôt amnhĩ xunhwỳr jakamã na ka mē ra amex kumrêx nê ri apa. Nê aprĩ hã Kris kot amnhĩ nhīpêx pumunh mex nê aprĩ hã akwỳjê mã harênh o ri mē hkôt apa. ⁶ Na pa pre mē awỳr mō nê mē amã Kris kot amnhĩ nhīpêx ã harênh o ri mē akôt ixpa. Ka prem inhma nê hkôt amnhĩ xunhwỳr tỳx kurê kumrêx. ⁷ Jakamã nhũm Tĩrtũm mē ate kãm tanhmã amnhĩ nhīpêx to ho apa kaxyw mē ato mē axihtỳx. Nê kaxyw mē amã mē ate axpên to mex xà piitã mē amã kugõ. Mē ate Jejus kot akupỳn mē pahwỳr wrỳk jamãr pê hapêr arĩt o apa pê tanhmã kãm axpên nhīpêx to ho apa kaxyw. ⁸ Koja Tĩrtũm tanhmã mē akrã hto ka mē hkôt pix mã ri amnhĩ nhīpêx rãhã nhũm Pahihti Jejus Krisja akupỳn mē pahwỳr wrỳ. Hãmri nê mē ate amnhĩ nhīpêx ã mē apumu nê mē ajarênh o:

—Nà ãm hãmri na hte jajaja amnhĩ to mex pix o ri pa. Anê.

⁹ Nê koja Tĩrtũm ra kot amnhĩ jarênh xà hkôt mē ato mex nê. Ra kot mē ate Pahihti Jejus Kris kôt apa kaxyw amnhĩm mē axunhwỳr jakamã koja ra kot amnhĩ jarênh xà hkôt mē ato mex rãhã nê.

*Mê pahte mēmoj tã axpên pê pahpigràn
kêt ã mē pamã karõ*

Rõmãn 15.5-6; Sikũn Korīt 13.11; Epes 4.1-6; Piripos 2.1-4; Wam Pêtre 3.8

¹⁰⁻¹¹ E Kris kôt ixkwỳjaja. Na ka xep htem mēmoj tã axpên mã axàkjêr pix o ri apa nhũm pre Krojre hkwỳjaja amnê ixwỳr pøj nê inhma mē ajarê. Kwa nà mē ã amnhĩ nhīpêx anhỹr kêt nê. Kêr ka mē axpên kôt ri amnhĩ nhīpêx rãhã ho ri apa. Nê axpên kôt ri ajamaxpêr rãhã nê. Te ixkre tipxi kamã mē ri apa pyràk o mãn kêt mē axpên nhīpêx o ri axpên kôt apa. Nê mē axpên kutã anojarêt rãhã ho ri apa. No mēmoj tã axpên mã axàkjêr pê axpên pê apigràn kêt

ně. Na pa Pahiti Jejus Kris nhỹ hã mẽ amã ã ja hã karõ aně.

¹² Ně na ka xep htem ahpỹnhã ri mẽ apê mẽ ixkwỳ hã amnhĩ jarěnh o ri apa. Jao mẽ akwỳjaja pa ixkõt ri amnhĩ nhĩpêx xwỳnh ã amnhĩ jarě. Ně mẽ akwỳjaja axtem Apor kõt ri amnhĩ nhĩpêx xwỳnh ã amnhĩ jarě. Ně mẽ akwỳjaja axtem Simãw Pêtre hkõt amnhĩ nhĩpêx xwỳnh ã amnhĩ jarě. Ně mẽ akwỳjaja axtem Kris kõt amnhĩ nhĩpêx o ri apa xwỳnh ã amnhĩ jarě. ã na ka xep htem ahpỹnhã amnhĩ jarěnh anhỹr o ri pa.

¹³ Kwa nã ka mẽ ã ahpỹnhã amnhĩ jarěnh aně nẽ te mẽ ate Kris o apigrãnh pyrãk o hipêx. Kwa mon ka hte mẽ akwỳjaja apê ixkwỳ hã amnhĩ jarě? Xà pa na pa pre pĩ kahpa hã ajêt nẽ mẽ aně ty? Nã Kris pix na pre mẽ panê hã ajêt nẽ ty. Xà mẽ apê pa ixkwỳ hã amnhĩ jarěnh kaxyw na prem mẽ akrã kumrã? Nã mẽ apê Kris kwỳ hã amnhĩ jarěnh kaxyw na prem ã mẽ anhĩpêx aně. Mẽ kot ja hã mẽ apumunh xwỳnhjaja kot mẽ apê Kris kwỳ hã mẽ apumunh kaxyw. Tã na ka xep htem axtem nẽ ã ri ahpỹnhã mẽ kãm amnhĩ jarěnh anhỹr o ri apa.

¹⁴⁻¹⁵ Kop ãm ixte amnhĩ kõt mẽ axunhwỳr prãm ronhỹx pa mẽ ato mẽ axohtõ nẽ mẽ akrã kumrã nẽ mẽ amã: “E ra mẽ apê ixkwỳ na ka mẽ.” Aně. Nom na pa pre ã mẽ amã ixkapêr anhỹr kêt nẽ. ãm hãmri na pa pre ãm mẽ ato grêre nẽ mẽ akrã kumrã. ãm Kripti mẽ Gajre wa pix. ¹⁶ Ku nẽ xep mããnhẽ Estepti nẽ kaxyw mẽ hkwỳjaja. ãm jajê pixjaja. Nom ko apu axte mẽ hkwỳ ko. Ixte mẽ hkrã kumrãr xwỳnhjê mã ijamaxpêr tỳx kêt. ¹⁷ Na pre Kris ixte mẽ hkrã kumrãr o ri ixpa kaxyw ixãm kêt nẽ. ãm ixte mẽ kãm kapêr jarěnh o ri mẽ hkõt ixpa pix kaxyw na pre ixãm.

Ně na pa hte amnhĩ krã hkõt ri ixujarěnh o ri mẽ akõt ixpa hkõt nẽ. Kot pa ã amnhĩ nhĩpêx aně nhũm mẽ ixkapêr mex ã inhma nẽ pa ixkõt amnhĩ xunhwỳ. Ja pymaj na pa hte amnhĩ krã hkõt ri tanhmã ixujarěnh to ho ri ixpa hkõt nẽ. Na pa hte ãm ixprĩ hã Kris kot tanhmã mẽ panê amnhĩ nhĩpêx to hã harěnh o ri mẽ hkõt ixpa. Mẽ pahpiitã mẽ panê htyk ã harěnhja pa hte mẽ kãm harě. Mẽ kot hprĩ hã mar nẽ hkõt amnhĩ xunhwỳr kaxyw. Jao amnhĩ krãm

mẽ ujarěnh mexta jagjênh nẽ hã no htỳx kaxyw. Pa ja hã mẽ omu nẽ ixkĩnh nẽ ijamaxpêr o:

—Na htem ixkapêr ma nẽ Jejus kõt amnhĩ xunhwỳr kurê kumrêx. Nã ãm hãmri na pa hte mẽ kãm ixkapêr kaprỳ ho ri ixpa hkõt nẽ. Aně.

¹⁸ No kêt mẽ pahte Tirtũm kot mẽ pahto hkra xwỳnhjaja ra mẽ pahte Kris pĩ kahpa hã mẽ panê htyk ã harěnh mar nẽ pahkĩnh nẽ papa xwỳnh na pu mẽ. Jakamã na pu htem pajamaxpêr o:

—Nã ãm hãmri na Tirtũm Kraja htyk kukwak ri mẽ ixto mex nẽ mẽ ixto hkra. Mẽ ujarěnhja mex kumrêx. Aně.

No kêt mẽ kêp hkra hkõt xwỳnhjaja na htem tee ri Kris tyk ã harěnh ma nẽ hamaxpêr o:

—Tk. Tanhmã kot kêt we amnhĩ to nẽ mẽ panê ty? ãm amarĩ mẽ kot amnhĩ krã hkõt pĩ kahpa hã nhôr nẽ hpĩr kênã. Aně.

*Tirtũm kra hkõt xwỳnhjê jarěnh
Matêwre 11.25-26; Wam Korit 3.19*

¹⁹ Nẽ Tirtũm kapêr ã kagã htũm kot mẽ kêp hkra hkõt xwỳnhjê jarěnh kot:

Mẽ kot htỳx ri àhpumunh tỳx ã amnhĩ to jarkrar o pa htã kot paj mẽ kêp ja ho ijapêx pa nhũm mẽ ã amnhĩ jarěnh anhỹr kaprỳ. Aně.

²⁰ Jakamã mẽ àhpumunh tỳx ã mẽ kot amnhĩ to jarkrar xwỳnhjaja nẽ mẽ kot Mojes kapêr o mẽ ahkre ho ri mẽ pa xwỳnhjaja nẽ mẽ kapêr rũnh xwỳnhjaja. Mẽ kot Tirtũm Kra hkõt amnhĩ xunhwỳr kêt jakamã te mẽ àhpumunh kêt pyrãk. Tirtũm kra hkõt xwỳnhjaja kot mẽ àhpumunh tỳx ã mẽ harěnh tã no ãm Tirtũm noo mã te mẽ àhpumunh kêt pyrãk. Nẽ te htỳx ri mẽ kot amnhĩ nhĩpêx o pa pyrãk. ²¹ Tirtũm àhpumunh o àhpumunh jakamã na pre ra mẽ hkukamã hamaxpêr o:

—Nã kot paj mẽ àhpumunh tỳx ã mẽ omunh xà hkõt mẽ ho ixkra hkõt nẽ. ãm mẽ kot ixkra Jejus kot mẽ nẽ htyk ã harěnh mar nẽ amnhĩ kaxyw hkõt hamaxpêr pix ã mẽ omunh xà hkõt kot paj mẽ ho ixkra. Aně.

²²⁻²⁴ No Ijaewjaja kãm amnhĩ krã hkõt pix mã amnhĩ nhĩpêx prãm jakamã na pa hte mẽ ixpê Jejus kwỳjaja mẽ hwỳr mra nẽ mẽ kãm Kris kapêr jarěnh o ri ixpa nhũm

mē inhma nē ãm mē inhma. Nē te mē kot mē inhmar kêt pyrã nē mē inhmã:

–Tk. Nà kot paj mē tokyx axujarēnh kôt amnhĩ nhĩpêx kêt nē. Kot kaj mē inhmã mē ixte aa mēmoj pumunh kêt õ ho anē pa mē ja hã apumu nē axihtỳx ã apumu nē rĩ kormã hkôt amnhĩ nhĩpêx.

Anhỳr o inhmã kapêr. Tã no pa mē kãm ã amnhĩ nhĩpêx anhỳr kêt nē. ãm Kris kot mē panê pĩ kahpa hã htykja pix pa htem mē kãm harēnh o ri ixpa. Ja kamã nhũm mē hkwỳjaja mē inhma nē ãm mē inhma nē Kris xihỳx kêt ã ãm amarĩ htyk ã harē. No mē hkwỳjaja. Tĩrtũm kot amnhĩ kaxyw mē unhwỳr xwỳnhjaja na htem mē kurom mē inhma nē ra mē inhmar tỳx kurê kumrêx. Nē mē inhmã kapêr o:

–Nà ãm hãmri na Krisja Tĩrtũm pyrã nē hihtỳx o hihtỳx. ãm hãmri na ka ã harēnh anē. Anē.

No Ijaew kêt xwỳnhjaja na Ijaew pyrã nē kãm amnhĩ krã hkôt amnhĩ nhĩpêx o pa hprãm kêt nē. Nē mē kãm mē àhpumunh tỳx pix prãm o pa. Jakamã na pa htem mē kãm Kris kapêr jarēnh o ri mē hkôt ixpa nhũm mē hkwỳjaja mē inhma nē Ijaew kwỳjê pyrã nē ãm mē inhma nē mē inhmã:

–Tk. Nà na ka htem ãm ri axêx o ri apa. Kot pa mē akapêr mar kêt nē. Kot paj mē axàhpumunh tỳx ã mē apumu nē rĩ kormã mē ama nē mē akôt amnhĩ nhĩpêx.

Anhỳr tã pa mē ãm arĩ Kris kot mē panê htykja pix pa mē kãm harēnh o ri mē hkôt ixpa. Nhũm mē hkwỳjaja mē inhma nē mē inhmã:

–Nà mē axàhpumunh kêt jakamã na ka htem atỳx ri ã ja jarēnh anē.

Anhỳr tã no nhũm mē hkwỳjaja. Tĩrtũm kot amnhĩ kaxyw mē unhwỳr xwỳnhjaja na htem mē inhma nē mē inhmã kapêr o:

–Nà ãm hãmri na ka mē ã Krisja jarēnh anē. Tĩrtũm pyrã nē àhpumunh o àhpumunh kênã. Anē.

²⁵ Tĩrtũm mē Jesus wa mē pakurom àhpumunh o àhpumunh nē hihtỳx o hihtỳx.

Tĩrtũm mē parom hihtỳx o hihtỳx ã harēnh Matêwre 11.25; Sikũn Korit 12.7-10; Xikre 2.5

²⁶ E Kris kôt ixtõ nē ixtõxjaja. Amnepê mã Tĩrtũm kot amnhĩm mē axunhwỳrta ã tanhmã na ka prem amnhĩ nhĩpêx to ho ri

apa? Nà na ka prem axohtõ nē jar mē noo mã axàhpumunh kêt nē ri apa. Nē mē apê pahi hkêt nē ri apa. Mē axohtõ nē amnhĩ to hkryre nē ri apa. ²⁷ Tã nhũm Tĩrtũm amnhĩ kôt mē ate amnhĩ to hkryre xwỳnhjê xunhwỳ. Koja nhỹrmã kot tanhmã mē pahpiitã mē pajarēnh to xà hã arĩgrota kato hãmri nhũm mē àhpumunh tỳx ã amnhĩ to jarkrar xwỳnhjaja Tĩrtũm kot mē kurom mē pahto hkra hã mē pahpumu hãmri nē tee ri amnhĩ kukamã hamaxpêr nē amnhĩ kamã hpijaam tỳx nē. Nē mē hihtỳx ã amnhĩ to jarkrar xwỳnhjaja haxwỳja. Nhũm Tĩrtũm kot mē kurom mē pahto hkra hã mē pahpumu nē tee ri amnhĩ kukamã hamaxpêr nē amnhĩ kamã hpijaam tỳx nē.

²⁸ Na hte Tĩrtũm amnhĩ kaxyw mē kot amnhĩ to hkryre xwỳnhjê xunhwỳ. Nē mē kot mē kamã kahak o pa xwỳnhjê xunhwỳ. Jar pyka ja kamã mē hkwỳ kot mē hkaga htã nhũm Tĩrtũm amnhĩ mã mē unhwỳ. Mēmo kaxyw na hte ã amnhĩm mē unhwỳr anē? Nà mē kot nhỹrmã tee ri mē àhpumunh tỳx ã amnhĩ jarēnh xwỳnhjê pumunh nē axpên mã mē harēnh o:

–Kwa mē pahte mē àhpumunh tỳx ã mē harēnh tã nhũm Tĩrtũm mē pahpyrà nē amnhĩ kaxyw mē unhwỳr kêt nē. Nà te mē àhpumunh kêt pyrãk.

Anhỳr o axpên mã mē harēnh kaxyw na pre Tĩrtũm amnhĩm mē kot amnhĩ to hkryre xwỳnhjê xunhwỳ. ²⁹ Jakamã kot puj mē nhỹrmã Tĩrtũm mã amnhĩ to jarkrar pē tanhmã kãm amnhĩ jarēnh to hkêt nē. Rỳ kãm:

–Kwa ga ixpumu Tĩrtũm. Na pa hte ã amnhĩ nhĩpêx anē nē ã amnhĩ nhĩpêx anē. Kwa ja hã ixpumu nē ixto akra nà?

Anhỳr o amnhĩ to hwỳr kêt nē. ³⁰ ãm Jesus pix kukwak ri na hte Tĩrtũm mē pahto hkra. Tãm na pre Tĩrtũm noo mã amnhĩm mē paxunhwỳ. Mē pahte uràk nē pahpê hkra kaxyw. Jakamã na pu htem ãm pix kukwak ri amnhĩ nhĩpêx mex o ri papa. Nhũm mē pamã àhpumunh tỳx xà hkwỳ gõ. Tã ra kot mē pahte amnhĩ tomnuj pē mē papytãr jakamã kot puj mē nhỹrmã pahtyk tã no ãm akupỹm pahťir nē Tĩrtũm mē wa kuri pahťir tũm nē pamex kumrêx nē papa ho papa. ³¹ Tã ã Jesus kot mē panhĩpêx kot

anhÿr jakamã Tirtûm kapêr ã kagà htûm kot ja jarênh kot:

Kot ka mẽ amã mẽmoj tâ jarkrar prãm nom kêr ka mẽ kamjaja amnhĩ to jarkrar kêt nê. Mẽ panhõ Pahihti ra kot mẽ panê tanhmã amnhĩ nhĩpêx toja pix ã tanhmã ho jarkrar to ho ri apa. Anê.

2

Pawre kot tanhmã Kris jarênh to hã harênh

Sikûn Korît 4.1-7; Wam Pêtre 3.15

¹⁻² E Kris kôt ixtõ nê ixtõxjaja. Amnepê mã ixte mẽ awÿr inhmõrta ã na pa pre inhnojarêr nê ijamaxpêr o:

–Kot paj ma mẽ hwÿr mō nê mẽ kãm Kris kapêr jarê. Kot amnhĩ grõnh kôt mẽ inhnê htykja pa mẽ kãm harê. ãm ja pix jarênh o ri mẽ hkôt ixpa. Nom kot paj mẽ kapêr japjê xwÿnhjê pyrã nê mẽ kãm ixkapêr japjê hkêt nê. Rÿ mẽ urak nê te ixãhpumunh tÿx o ri ixkapêr japjê pyrãk o ri mẽ kãm ixkapêr japjê hkêt nê. Kot paj ãm ixkatat kôt ri mẽ kãm tanhmã Jejus jarênh to pix o ri mẽ hkôt ixpa.

Anhÿr o mẽ akukamã ijamaxpêr. Hãmri nê ma mẽ awÿr mō nê mẽ awÿr pōj nê mẽ amã Jejus kot mẽ panê htyk nê akupÿm htĩrja pix jarênh rãhã ho ri ixpa. ³ Na pa pre tee ri amnhĩ kukamã ijamaxpêr nê ijamaxpêr o:

–Hêxta waa nê. Tanhmã kot pa we mẽ kãm Tirtûm kapêr jarênh to nhũm mẽ inhmar tÿx nê hkôt amnhĩ xunhwÿr kurê kumrêx wehe? Kot paj amnhĩ krã hkôt mẽ kãm harênh kêt nê. Ja kaxyw ijamaxpêr tÿx kêt kênã. Kot paj amnhĩ krã hkôt mẽ kãm harê nhũm mẽ ãm inhma nê hkôt amnhĩ xunhwÿr kêt nê. Nã kot paj Tirtûm nhÿ hã mẽ kãm tanhmã ixkapêr to kê tãm tanhmã mẽ hkrã hto kê mẽ inhma nê hkôt amnhĩ xunhwÿr japêr.

Anhÿr o ijamaxpêr. ⁴ Nê mẽ ate inhmar kaxyw na pa pre ixêx rom tanhmã mẽ ano kupyw to ho ri ixpa hkêt nê. Rÿ mẽ pajaja mẽ ixãhpumunh xà hkôt tanhmã mẽ amã ixkapêr to hkêt nê. Na pa pre ãm Tirtûm Karõ nhÿ hã mẽ amã awjarê. Mẽ ate mar nê hihtÿx o hihtÿx ã omunh kaxyw. ⁵ Jakamã na ka prem Tirtûm xihtÿx

ã omu nê amnhĩ kaxyw hkôt ajamaxpêr kurê kumrêx. No pa ixãhpumunh tÿx ã ixpumunh kôt ixkôt ajamaxpêr kêt nê. Na ka prem ixkapêr ma nê ajamaxpêr o:

–Nã Tirtûm na mẽ parom ãhpumunh o ãhpumunh nê hihtÿx o hihtÿx.

Anhÿr o ajamaxpêr kôt ajamaxpêr kurê kumrêx.

Tirtûm Karõ kot mẽ pamã ãhpumunh xà nhõr ã harênh

Matêwre 7.6; Juãw 14.22, 16.13-15; Xiakre 3.13-18

⁶ Nê na hte Tirtûm kra hkwyjaja Tirtûm kot amnhĩ nhĩpêx ã omunh mex. Nê hamaxpêr ã omunh mex. Jakamã na pa hte mẽ ahkre japjê ho mẽ hkôt ixpa. Nom jar pika ja kamã mẽ pajamaxpêr tÿx xà ho mẽ ahkre hkêt nê. Rÿ pika piitã hkôt mẽ utar xwÿnhjê jamaxpêr tÿx xà ho ri mẽ ahkre ho ri ixpa hkêt nê. Koja nhÿrmã mẽ ãhpumunh xaja mẽ kêp hapêx pa. ⁷ Jakamã na pa hte ãm Tirtûm xãhpumunh xà pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tirtûm amnhĩ kukamã amnhĩ jarênh o:

–Mẽ kot amnhĩ kaxyw Ixkra hkôt mẽ hamaxpêr o mẽ pa xwÿnhjaja kot paj mẽ ho ixkra nhũm mẽ mex kumrêx nê pa ho pa.

Anhÿr o mẽ harê. Nom mẽ kot hkôt amnhĩ xunhwÿr kêt xwÿnhjaja nhũm kormã mẽ kãm ja ho amnhĩrît kêt nê. Tã ja na pa hte ra mẽ kãm harênh rãhã ho ri mẽ hkôt ixpa nhũm mẽ Tirtûm kãm mẽ pahto hkra hprãm hã harênh ma. ⁸ Nom pika piitã hkôt mẽ ho amnhĩptar xwÿnhjaja na mẽ kormã ja mar kêt nê. Kêp apu mẽ kot mar ronhÿx prem pĩ kahpa hã mẽ panhõ Pahihti nhõr nê hpĩr kêt nê. Mex o mex tâ nhũm prem axtem nê ã hipêx anê. ⁹ Mẽ kot mẽmoj mex pumunh kêt tã Tirtûm kapêr ã kagà htûm kot mẽmoj mex jarênh kot:

Na pre Tirtûm mẽ kãm hkĩnh xwÿnhjê kutêp mẽmoj mex kwÿ jaxwÿ nhũm mex o mex nê mẽ ahã hikwÿ.

Aa mẽhõ kot mẽmoj mex o mexja pumunh kêt.

Nê aa mẽhõ kot ã mẽmoj kot anhÿr pumunh kêt.

Nê aa ã mẽmoj mex kot anhÿr kukamã hamaxpêr kêt.

Tã nhũm Tĩrtũm mẽ kutêp hkwy jaxwỳ.
 Anhỹr o kot harênh tã no nhũm mẽ kot
 hkôt amnhĩ xunhwỳr kêt xwỳnhjaja ã kapêr
 anhỹrja mar kêt nê. ¹⁰ Mẽ pamã na pre
 Tĩrtũm ja ho amnhĩrĩt. Na pre ra mẽ pamã
 Karõ gõ nhũm mẽ pamã gjêx o mẽ pamã
 mẽmoj to amnhĩrĩt mex nê. Tĩrtũm Karõja
 àhpumunh tỳx o àhpumunh tỳx. Nê kot hprĩ
 hã Tĩrtũm jamaxpêr pumunh par. ¹¹ No
 mẽ papajaja na pu htem axpên jamaxpêr
 kôt axpên pumunh kêt nê. Na pu htem
 papam amnhĩ jamaxpêr ã amnhĩ pumu. Ja
 pyrã nê Tĩrtũm Karõ pix na hte Tĩrtũm ja-
 maxpêr pumunh. ¹² No mẽ pahpê hkrajaja
 na hte mẽ pahkarõja pix mẽ pakamã pa
 hkêt nê. Na hte mãânên Tĩrtũm Karõja mẽ
 pakamã pa nê mẽ pamã tanhmã mẽmoj to
 amnhĩrĩt to ho mẽ pahkôt pa. Nê Tĩrtũm kot
 mẽ pakutêp mẽmoj mex jaxwỳrja nhũm ja
 kukamã mẽ pamã harênh o amnhĩrĩt.

¹³ Jakamã na pa htem amnhĩ krã hkôt ri
 mẽ kãm ixujarênh kêt nê. ãm Tĩrtũm Karõ
 nhỹ hã na pa hte ixprĩ hã mẽ kãm kapêr
 jarênh o ri mẽ hkôt ixpa. Ra Tĩrtũm Karõ kot
 mẽ amã gjêx xwỳnhjê mã pa ý hã ixkapêr.
¹⁴ No mẽ kãm Tĩrtũm Karõ kapêr mar prãm
 kêt xwỳnhjaja na htem Tĩrtũm kot amnhĩ
 nhĩpêx pumu nê hprĩ hã omunh kêt nê. Mẽ
 kãm kapêr mar prãm kêt jakamã na htem ri
 kot tanhmã mẽ pahto mex to hã harênh ma
 nê hamaxpêr o:

—Tk. Kwa mo kaxyw na htem ri ã Tĩrtũm
 jarênh anê? Tanhmã kot we amnhĩ to nê
 mẽ pahto mex? Nã kot anhỹr kêt. Anê.

¹⁵ Nom mẽ pahpê Tĩrtũm kra hkwy hã mẽ
 pahte Karõ kapêr mar mex xwỳnhjaja na pu
 hte mẽ kurom Tĩrtũm kot amnhĩ nhĩpêx ã
 omunh mex nê. Nê Karõ xô ri mar mex nê
 nhũm mẽ kot Karõ kapêr mar kêt xwỳnhjaja
 tee ri ã mẽ pahte amnhĩ nhĩpêx anhỹr ã mẽ
 pahpumu. Nom hprĩ hã mẽ pahte Tĩrtũm
 kôt amnhĩ nhĩpêx pumunh kêt nê. ¹⁶ Tĩrtũm
 kapêr ã kagã htũm kot ja jarênh kot:

Mêhõ na kot Tĩrtũm jamaxpêr pumunh?

Nê mêhõ na pre we kãm hamaxpêr gõ?

Nã amrakati kumrêx. Tapxipix na
 àhpumunh tỳx o àhpumunh tỳx. Anê.

Tã mẽ papajaja mẽ pahte Tĩrtũm Karõ
 kapêr mar tỳx xwỳnhjaja na pu htem Kris xô
 ri pahprĩ hã hamaxpêr kôt omunh mex nê.

3

*Mẽ kot Tĩrtũm mã tanhmã amnhĩ nhĩpêx
 to xwỳnhjê jarênh*

*Wam Korît 14.20; Karatas 5.16-21; Epes
 4.14; Eprêw 5.11*

¹ E Kris kôt ixtõ nê ixtõxjaja. Pa mẽ
 amã mẽmoj jarê ka mẽ inhma nê kãm aja-
 maxpêr. Nã amnepê mã kormã mẽ ate
 Kris kôt amnhĩ nhĩpêx tohtuj anhỹrta ã
 tanhmã na ka prem amnhĩ nhĩpêx to ho
 ri apa wehe? Na ka prem arĩ ajamaxpêr
 tũm kôt pix mã amnhĩ nhĩpêx. Kormã mẽ
 ate Tĩrtũm Karõ hkôt amnhĩ nhĩpêx mex
 kêt jakamã na ka pre htem mēhprĩre kot
 amnhĩ nhĩpêx pyrãk o amnhĩ nhĩpêx. Nê
 mẽ urak nê kormã mẽmoj piitã omunh kêt
 nê. Jakamã na pa pre mẽ amã ixujarênh
 kaxyw nê te mẽ ate kormã Tĩrtũm kapêr
 mar kêt xwỳnhjê pyrãk o mẽ anhĩpêx nê mẽ
 amã tanhmã ixujarênh to. ² Mẽ hkaràre na
 htem mẽ hkà kagô pix kaô nê kormã mẽ
 apkur xà mex kur kêt nê. Ja pyrã nê na pa
 pre te ixte mẽ ato hpijaôr pyrã nê mẽ amã
 Tĩrtũm kapêr piitã harênh par kurê kumrêx
 kêt nê. ãm mẽ amã hkwy pix jarê ka prem
 ama nê Jejus kôt amnhĩ xunhwỳ. Tã na pa
 hte arĩ mẽ amã hkwy pix jarênh o ri ixpa nê
 kormã piitã ho mẽ ajahkre jatur xàm mēnh
 kêt nê. ³ Na ka htem arĩ te mẽ apê Kris kwỳ
 hkêt pyrãk o amnhĩ nhĩpêx o apa. Nê mẽmoj
 kôt axpên kãm agryk axpên mã axàkjêr o
 apa. ã amnhĩ nhĩpêx anhỹr jao arĩ mẽ ate
 amnhĩ nhĩpêx tũm kôt amnhĩ nhĩpêx rãhã
 nê.

⁴ Na hte mẽ akwỳjaja amnhĩ jarênh o:
 “Ixpê Pawre hkwy na pa.” Anê. Nê mẽ
 akwỳjaja amnhĩ jarênh o: “Pa na ixpê Apor
 kwỳ na pa.” Anê. Kwa na ka htem ã amnhĩ
 jarênh anhỹr o te mẽ apê Kris kwỳ hkêt
 pyrãk. ⁵ Apor mẽ pa ãm wa ixte Tĩrtũm
 kapêr o mẽ ajahkre xwỳnh pix na pa wa.
 Wa ixpê mẽ anhõ pahihtĩ hkêt kēnã kot
 ka kêt mẽ axtem nê mẽ apê ahpỹnhã wa
 ixkwỳ hã amnhĩ jarê. Na pa pre wa mẽ
 amã Tĩrtũm kapêr jarênh o ri mẽ akôt ixpa
 ka prem wa inhma nê amnhĩ kaxyw hkôt
 ajamaxpêr tỳx nê. Nê hkôt amnhĩ xunhwỳr
 kêt nê. Na pa wa ãm Tĩrtũm kapêr o mẽ
 ajahkre nom amnhĩ kôt mẽ axunhwỳr kêt nê.

6-9 E pa ixprĩ hã mẽ amã war amnhĩ jarẽ ka mẽ inhma. Te wa ixpê Tirtũm pur kãm wa ixapênh xwýnh pyræk no mẽ kajaja te mẽ apê hpur pyræk. Na htem hpur karê nhũm hirã nhũm mẽ kamã ahkre ho pa. Ja pyrã nẽ na pa pre ixkumrêx mẽ awýr ixpa nẽ mẽ amã Tirtũm kapêr jarênh o ri mẽ akôt ixpa. Te mẽ kot pur kãm ahkre ho ri pata pyræk. Tã nhũm Apor ixpãnhã ma mẽ awýr pa nẽ te mẽ kot pur karêta pyræk o mẽ anhĩpêx nẽ mẽ amã Tirtũm kapêr o mẽ ajahkre mex o ri pa. Xà na hte pur karêr xwýnhja rý kamã ahkre xwýnhja tãm tanhmã mẽmo hy hto nhũm ra higrôt nẽ hprêk nẽ ô? Nà na htem ãm ahkre hpa nhũm arĩ hikwý. Nhũm Tirtũm tãm tanhmã hyta to nhũm higrôt nẽ hprêk nẽ ô. Ja pyrã nẽ na hte Tirtũm mẽ ho hkra nẽ tanhmã mẽ ho nhũm mẽ amnhĩ kaxyw hkôt hamaxpêr týx nẽ hkôt amnhĩ nhĩpêx mex o pa. Nom mẽ kãm harênh o pa xwýnhhta kôt amnhĩ xunhwýr kêt nẽ.

Nẽ na hte pur karêr xwýnh rý kamã ahkre xwýnhja tãm tanhmã hyta to nẽ ho htĩr kêt nẽ. Tirtũm pix na hte tanhmã ho nhũm higrôt. Ja pyrã nẽ na pa hte Tirtũm kapêr o mẽ ajahkre o ri mẽ akôt ixpa nom pa tanhmã mẽ ato ka mẽ apê Tirtũm kra nẽ ri apa hkêt nẽ. Tanhmã kot pa mẽ ato ka mẽ apê hkra? Tapxipix na kot mẽ pahto hkra kaxyw àhpumunh. Nẽ tapxipix na hte tanhmã mẽ pahkrã hto pu mẽ kãm hprãm xà hkôt amnhĩ nhĩpêx mex o ri papa.

Nẽ pur karêr xwýnh mẽ pur kãm ahkre xwýnhja wa. Hamẽ wa àpênh mex jakamã koja hamẽ wa kot pur kãm àpênh pãnhã amnhĩm ujamýnh rax nẽ. Ja pyrã nẽ kot paj mẽ ixte Tirtũm kapêr o mẽ ajahkre ho ri mẽ akôt ixpa xwýnhjaja nhũm Tirtũm nhỹrmã mẽ ixapênh pãnhã mẽ inhmã amnhĩrer mex nẽ.

Nẽ te mẽ ate Tirtũm nhõ ixkre pyræk. 10 Nẽ pa te ixpê Tirtũm mã ixkre hã ixapênh xwýnh pyræk jakamã na pre Tirtũm mẽ akaxyw tanhmã ixto pa mẽ amã tanhmã kot amnhĩ nhĩpêx to hã harênh o ri mẽ akôt ixpa. Te ixte õ ixkre kaxyw ãm xà maati xãm pyræk o mẽ anhĩpêx. Jao mẽ amã kapêr jarênh o ri mẽ akôt ixpa. Mẽ ate amnhĩ kaxyw hkôt ajamaxpêr nẽ hkôt amnhĩ xunhwýr kaxyw. Tã na ka prem

hkôt amnhĩ xunhwý nhũm ixpãnhã Tirtũm kapêr o mẽ ahkre ho mẽ pa xwýnh kwýjaja mẽ awýr mra nẽ mẽ amã kapêr jarênh jatur xãm kurê. Nẽ hprĩ hã ho mẽ ajahkre ho ri mẽ akôt pa. Te ho mẽ kot ixkre krax nhĩpêx pyræk o mẽ anhĩpêx.

Nẽ kwa mẽ ate mẽ ahkre o mẽ apa xwýnhjaja kêr ka mẽ akatát kôt mẽ ahkre mex rãhã ho ri mẽ hkôt apa.

11 Nẽ Jejus Kris tapxipix na pu htem hkôt amnhĩ xunhwý nhũm mẽ panê mẽ pahte amnhĩ tomnuj o hapêx. Jakamã te kêp kýxpê ixkre nhĩmõk ã nõr xà maatita pyræk.

12 Nẽ na htem tõhã ixkre nhĩpêx kaxyw nẽ pĩ htýx jakà nẽ ho hipêx nhũm kritpêm mẽ kãm mex ry nẽ kuhê. No na htem tõhã nojarêt kãm ixkre hã apê nẽ pĩ rerek o hipêx nhũm mẽ kãm mex ry hkêt nẽ. Koja rôr nhyre hwýr mra nẽ mẽ kêp hapôk nẽ homnu. Ja pyrã nẽ na hte Tirtũm kapêr o mẽ ahkre ho ri mẽ pa xwýnh kwýjaja te mẽ kot katát kôt pĩ htýx o ixkre nhĩpêxta pyrã nẽ katát kôt mẽ ahkre ho ri mẽ hkôt pa. No nhũm mẽ hkwyjaja axtem nẽ te mẽ kot pĩ rerek o ixkre nhĩpêxta pyræk o amnhĩ nhĩpêx nẽ htýx ri Tirtũm kapêr kwým ri tanhmã mẽ ahkre hto ho pa. Jao hkwyým ri amnhĩ nhĩpêx rãhã ho ri pa.

13 Nẽ koja mẽhõ pĩ htýx pix o amnhĩm òrkwy nhĩpêx hãmri nhũm mẽmo arĩgro hã tanhmã amnhĩ to nẽ kêp pôr. No ãm hã pôja pix xêt pa nhũm kãm hikwý xà nẽ òkwa êja arĩ piitã mex nhũm ixkre hpãm axte hã pô janhôr o nyw. No koja pĩ rerek o hipêx nhũm mẽmo arĩgro hã kêp pôr hãmri nẽ piitã kêp kaxàr pa. Ja pyrã nẽ koja nhỹrmã Krisja akupýn mẽ pahwýr wrý hãmri nẽ mẽ pahte kãm tanhmã amnhĩ nhĩpêx to ho papaja piitã hã mẽ pahpumunh kôt tanhmã mẽ pajarênh to. Koja mẽ pahkwýjaja mẽ pahte mẽ kot pĩ htýx o ixkre nhĩpêxta pyrã nẽ Tirtũm mã mẽ pahte amnhĩ nhĩpêx mex o mẽ papa xwýnhjê xapênh pumu nẽ mẽ pahte amnhĩ to mex xwýnh ã mẽ pajarê. Hãmri nẽ hpãnhã mẽ kot pĩ rerek o ixkre nhĩpêxta pyrã nẽ mẽ kot kãm amnhĩ nhĩpêx mex kêt xwýnhjê pumu nẽ mẽ kot amnhĩ to mex kêt xwýnh hã mẽ harê.

14 Nẽ pĩ htýxja na hte tanhmã amnhĩ to nẽ hpôr no ãm arĩ mex nẽ kuhê nhũm

mê piitã arĩ mex ã omu. Ja pyrã nê koja Krisja mê kot kãm tanhmã amnhĩ nhĩpêx mex to ho mê pa xwýnhjê pumu nê mê kot tanhmã kãm amnhĩ nhĩpêx to hpãnhã mê kãm amnhĩre nhũm mê piitã mê kot amnhĩ to mex ã mê omu. ¹⁵ No pĩ rerekja na hte pôr nê kaxàr pa. Ja pyrã nê mê kot Kris mã amnhĩ nhĩpêx mex hkêt xwýnhjaja koja Tirtũm mê kãm amnhĩrer kêt nê. Nom arĩ mê kêp hkra jakamã koja mê arĩ kuri htĩr tũm nê pa. No ãm mê kot Tirtũm mã amnhĩ nhĩpêx mex kêt jakamã koja mê hkwyjê hkĩnh ã amnhĩm mẽmoj mex kwý jamýnh kêt nê. Te mẽhõ nhõrkwyjê kêp hpõr nhũm mê hkukrêx kwý jamýnh kêt nê ý kamã kurũm hapõx pyrãk.

¹⁶⁻¹⁷ E pa mê amã mẽmoj jarê. Ra mê ate mar tã mãn ka mê ra tanhmã amnhĩ to nê hã ano hkêt rý ko. Nà te mê pahpê Tirtũm nhõrkwyjê pyrãk. Tirtũm nhõrkwyjã õ na. Tã mê pahpê hkra nhũm Karõ kot mê pakaxwýnh mã gjêx jakamã te mê pahpê õrkwyjê pyrãk. Jakamã mê kot kapêr kwým ri mê ajahkre o ri mê pa xwýnhjaja te mê kot Tirtũm nhõrkwyjê grãnh xwýnh pyrãk. Koja mê nhỹrmã amnhĩ xà htýx kamã hamak o pa.

Mê pahte amnhĩ to jarkrar kêt ã mê pamã karõ

Wam Korit 1.10-25

¹⁸ Nê kot kaj mê atõ axàhpumunh týx o amnhĩ to jarkrar o ri apa japêr. Kwa mê jam anhũre nê axte ri ã amnhĩ nhĩpêx anhỹr kêt nê. Nê te mê ate amnhĩ nê axàhpumunh týx xàja nhãm rênh par pyrãk o amnhĩ nhĩpêx. Mê paxàhpumunh xàja pika kamã mê àhpumunh pix jakamã kêr ka mê te amnhĩ nê nhãm rênh pyrã nê hpãnhã Tirtũm xàhpumunh xà hkõt pix mã amnhĩ nhĩpêx o ri apa. ¹⁹ No pika kamã mê àhpumunh xwýnhjaja Tirtũm noo mã te mê hkrã pipãnh nê htýx ri pata pyrãk. Tirtũm kapêr ã kagà htũm kot mê harênh kot:

Pika ja kamã mê àhpumunh týx ã mê kot amnhĩ to jarkrar xwýnhjaja Tirtũm noo mã te mê kot amnhĩ to hêx o pa pyrãk. Anê.

²⁰ Nê mããnên mẽ harênh kot:

Mê kot amnhĩ xàhpumunh týx ã amnhĩ to jarkrar o ri mê pa xwýnhjaja na hte

Tirtũm mê omu nê mê kot ã amnhĩ jarênh anhỹr kaprý hã mẽ harê. Anê.

²¹⁻²² Jakamã kwa kêt ka mê axte mê apê ixkwý rý mê apê Apor kwý hã amnhĩ jarênh o ri apa hkêt nê. Mê apê wa ixkwý hkêt kênã. Nê mê apê nhãm mẽhõ hkwyjê hkêt. Mê pahpiitã mê pahpê Kris kwý na pu mê.

Nê kot puj mê nhỹrmã pahtyk tã akupým pahťir nê Tirtũm mê Jesus wa kuri pamex nê pahťir tũm nê ri papa. Jakamã kwa mẽ tee ri amnhĩ kukamã ajamaxpêr kêt nê.

Nê jarãhã mẽmoj piitã mê panhõ. Nê kormã mẽmoj kot amnhĩrit kêt xwýnhjaja haxwýja mẽ panhõ na. ãm mẽmoj piitã mẽ panhõ jakamã te mê pahpê mẽmoj piitã mẽõ pahi pyrãk. ²³ No mẽ papajaja axtem Kris kêp mẽ panhõ Pahihti. Nê Tirtũm kêp Kris nhõ Pahihti.

4

Tirtũm pix kot tanhmã mẽ pajarênh to xwýnh ã harênh

Eprêw 13.17

¹ Nê mẽ pajaja mẽ ixpê mẽ anhõ pahi hkêt. ãm mẽ ixte Kris mã tanhmã amnhĩ nhĩpêx to ho ixpa xwýnh pix jakamã Tirtũm kormã kapêr kwý ho amnhĩrit kêtja na pa htem mẽ amã ho amnhĩrit o ri mẽ akõt ixpa. Ja kaxyw na pre mẽ ixunhwý. ² Na pre Kris tanhmã mẽ inhmã kapêr to nê mẽ inhmã:

—E kêt ka mẽ ixkapêr pix o mãn mẽ ahkre ho ri mẽ hkõt apa. Anê.

³⁻⁴ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kõt tanhmã ijarênh to. Ixte kãm amnhĩ nhĩpêx mex ã ijarê rý ixte kãm amnhĩ nhĩpêx mex kêt ã ijarê. ãm tapxipix koja tanhmã ijarênh to. No koja nhãm mẽhõ rý mê atõ ã ijarênh anê pa ama nê ãm ama. Rý papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nê ãm ixtýx kãm ã amnhĩ nhĩpêx anhỹr ã amnhĩ jarênh kaprý. Pahihti Kris pix kot hprĩ hã mẽ pahte amnhĩ nhĩpêx kõt pahpumunh jakamã tapxipix koja tanhmã mẽ pajarênh to.

⁵ Jakamã kwa kêt ka mê ri mẽ kot Tirtũm mã tanhmã amnhĩ nhĩpêx to hã mẽ omunh xà hkõt tanhmã mẽ harênh to hkêt nê.

Koja nhÿrmã Pahihti Krisja akupÿn mẽ pahwÿr wrÿ nẽ rĩ tãm tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nẽ mẽ kot hpimxur pẽ tanhmã amnhĩ tomnuj to ho mẽ pa xwÿnhjaja nhũm mẽ piitã mẽ noo mã mẽ kãm ja ho amnhĩrĩt nhũm mẽ ja hã mẽ omu. Nẽ mẽ pahpiitã mẽ pajamaxpêr xà ho amnhĩrĩt nhũm mẽ piitã hprĩ hã ja hã axpên pumu. Hãmri nhũm Tĩrtũm rĩ kormã mẽ pahte kãm tanhmã amnhĩ nhĩpêx mex to ho pa xwÿnhjê jarẽ.

⁶ E Jejus kôt ixkwÿjaja. Nà na pa ã mẽ amã Apor mẽ wa amnhĩ jarênh anẽ. Mẽ ate inhmar nẽ Tĩrtũm kapêr ã kagà hkôt tanhmã wa ijarênh to kaxyw. Kot kaj mẽ ã amnhĩ nhĩpêx anẽ hãmri nẽ ahpÿnhã tanhmã mẽ ixte Kris kapêr jarênh xwÿnhjê jarênh to hkêt nẽ. Nẽ axpên mã mẽ ijarênh o:

—Nà tãm kot Kris kapêr jarênh mex o kot hkwÿjê jakrenh jakamã kot paj hkôt pix mã mãn ri ixpa.

Anhÿr o axpên mã mẽ ixtõ jarênh kêt nẽ. Kot kaj mẽ ã mẽ ixtõ jarênh anẽ nẽ te mẽ ixto jarkrar pyræk o amnhĩ nhĩpêx. ⁷ Kwa mẽhõ na pre mẽ amã tanhmã ri mẽ ijarênh to ka mẽ mar xà hkôt ã mẽ ijarênh anẽ? Nẽ mẽ ixkapêr mex ã mẽ ixkwÿjê jarẽ nẽ mẽ ixkapêr mex kêt ã mẽ ixkwÿjê jarẽ. Nà na ka mẽ ãm amnhĩ krã hkôt ã mẽ ijarênh anẽ nom Kris xàhpumunh xà ho ã mẽ ijarênh anhÿr kêt nẽ. ãm mẽ ixte Tĩrtũm kapêr o mẽ ajahkre xwÿnhjaja na pa prem mẽ amã mẽmoj jarẽ ka mẽ ama nẽ mẽ inhÿ hã hkôt axàhpumunh mex nẽ. No amnhĩ krã hkôt mẽ axàhpumunh kêt kênã kot ka kêt mẽ ã ahpÿnhã tanhmã mẽ ixto jarkrar anhÿr to ho ri apa.

⁸ Te mẽ ate Apor mẽ wa ixrom Tĩrtũm kapêr mar par nẽ hkôt amnhĩ nhĩpêx mex pyræk. Te wa ixrom mẽ ate Jejus nhĩhkõ hã mẽ ho amnhĩptàr pyræk. Hêxta waa nẽ. Kop apu ãm hãmri mẽ ate ìhkõ hã mẽ ho amnhĩptàr ronhÿx pa ijaxwÿja mẽ apyrà nẽ ã amnhĩ nhĩpêx anẽ. Hãmri nẽ ixkĩnh tÿx kumrêx. ⁹ Nom ja kot anhÿr kêt.

*Jejus nhÿ hã mẽ ahkre xwÿnhjê jarênh
Sikũn Korit 4.8-10; Eprêw 12.1*

Nẽ mẽ ixpê Jejus nhÿ hã mẽ ajahkre ho mẽ ixpa xwÿnhjaja te Tĩrtũmja axtem tanhmã mẽ inhĩpêx to pyræk pa mẽ inhmex kêt nẽ ixpa. Te mẽ ixte gyw kãm amnhĩ rênh nhũm mẽ kot mẽ ixkamã òkre kahak pyræk o na htem mẽ inhĩpêx. Jakamã na hte mẽ hkwÿjaja mẽ ixpumu nẽ mẽ ixkapêr ma nẽ ãm mẽ inhma nẽ axpên mã mẽ ijarênh o:

—Tk. Kot mẽ ahkreja mexti hã. Kwa pu mẽ himex ri.

Anhÿr jakamã te ra mẽ ixtyk nẽ mẽ inhĩkwÿ nhũm mẽ piitã mẽ ixtã htu nẽ mẽ ixpumunh nẽ ma pa pyræk o amnhĩ nhĩpêx. Jakamã na htem mẽ ixte mẽ ahkre ma nẽ ãm kuma nẽ ma pa. Nom Tĩrtũm kapêr o mẽ wrÿk xwÿnhjaja na htem ja hã mẽ pahpumu nẽ axpên mã mẽ pajarênh o:

—Kwa mẽ kot Jejus ã mẽ hipêx kati htã nhũm mẽ arĩ hkôt amnhĩ nhĩpêx mex nẽ aa hkaga hkêt nẽ. Hêxta waa nẽ. Nà ãm hãmri na htem ã amnhĩ nhĩpêx anhÿr o pa. Anẽ.

¹⁰ Na hte mẽ kot mẽ ixkapêr mar xwÿnh kwÿjaja kãm mẽ ixkĩnh kêt nẽ tanhmã mẽ ixto kapêr punuj to. No mẽ kajaja nhũm mẽ ã mẽ ato kapêr anhÿr kêt nẽ. Na htem mẽ ixkrã pipãnh ã mẽ ijarẽ no mẽ kajaja nhũm mẽ Kris nhÿ hã mẽ axàhpumunh tÿx ã mẽ ajarẽ. Nẽ mẽ ixte Tĩrtũm kapêr kôt amnhĩ nhĩpêx mex kêt ã mẽ ijarẽ no mẽ kajaja na htem Tĩrtũm kôt mẽ ate amnhĩ nhĩpêx mex ã mẽ ajarẽ. Nẽ mẽ kot mẽ ixkamã òkre kahak tÿx tã mẽ akamã òkre kahak kêt nẽ mẽ kãm mẽ akapêr mar prãm nẽ. ¹¹ Na pa htem arĩ Kris ã ixpunuj nẽ ixpa. Nẽ mẽ inhmã prãm nẽ mẽ inhmã kôr nẽ ri ixpa. Nẽ mẽ ixê pikaxõnhre nẽ ri ixpa. Nhũm htem Kris ã mẽ ixtak rũnh nẽ. Pa mẽ inhõrkwÿ hkêt nẽ nhãm ri ixpa nẽ nhãm ri ixpa. Na pa htem arĩ ã amnhĩ nhĩpêx anhÿr o ri ixpa. ¹²⁻¹³ Nẽ ixàpkur xà kaxyw ixàpên rũnh o ri ixpa. Nhũm hte mẽ kãm Jejus prãm kêt xwÿnhjaja mẽ ijapry ho pa htã pa mẽ amnhĩ kurom mẽ kãm ixkapêr mex nẽ mẽ kãm:

—E kê Tĩrtũm mẽ ato mex nẽ ka mẽ amex nẽ apa. Anẽ.

Nẽ mẽ kot mẽ inhĩpêx kati htã pa htem mẽ kutã amnhĩ to htÿx nẽ arĩ mẽ hkôt ixpa. Na htem te mẽ kot ahpunuj nhĩpêx pyræk o mẽ inhĩpêx nẽ mẽ ixwÿr mrrar kêt nẽ. ã na

htem mẽ ixte Jejus nhỹ hã mẽ ahkre o mẽ
ixpa xwỳnhjê nhĩpêx anẽ.

*Pawre te kêp mẽ hpãm pyræk ã kot amnhĩ
jarênh*

Wam Tesarôn 2.11-12

¹⁴⁻¹⁵ E Kris kôt ixkwỳjaja. Na pa ã mẽ amã
kagà nẽ mẽnh anẽ. Nom mẽ ate inhmar
nẽ amnhĩ kamã apijaàm kaxyw kêt. Inhmã
mẽ ajapê jakamã na pa ã mẽ amã ixkapêr
nẽ hã kagà nẽ mẽnh anẽ. Na mẽ ra ohtô
nẽ xipãnhã mẽ awỳr pa nẽ mẽ amã Tirtũm
kapêr o mẽ ajahkre. Nom ixkumrêx na pa
pre mẽ amã kapêr jarê ka prem inhma nẽ
Kris hkôt amnhĩ xunhwỳ nẽ amnhĩ kaxyw
hkôt ajamaxpêr tỳx nẽ. Jakamã paxipix te
ixpê mẽ apãm nhũm te mẽ apê ixkra pyræk.
¹⁶ Jakamã kwa mẽ ixte amnhĩ nhĩpêx kôt
ixpumu nẽ ixkôt mãn kêt mẽ amnhĩ nhĩpêx
o ri apa. ¹⁷ ã mẽ ate amnhĩ nhĩpêx anhỹr
kaxyw na pa pre ijamaxpêr nẽ ma mẽ awỳr
Ximotre mẽ. Haxwỳja Kris kôt te kêp ixkra
pyræk. Nẽ inhmã hapêê. Na hte jar Kris mã
tanhmã amnhĩ nhĩpêx mex to ho pa. Tã pa
pre mẽ awỳr kumẽ. Koja ma mẽ awỳr mỗ
nẽ pỏj nẽ mẽ amã Kris kapêr jarênh o ri mẽ
akôt pa. Nẽ mẽ amã tanhmã ijarênh to nẽ
mẽ amã:

–Nà Pawre na hte Jejus Kris jamaxpêr
kôt hamaxpêr o pa. Nẽ kot amnhĩ nhĩpêx
kôt amnhĩ nhĩpêx o pa. Nẽ krĩ piitã hkôt
mẽ kot uræk nẽ ã amnhĩ nhĩpêx o pa anhỹr
kaxyw mẽ ahkre mex o pa. Anẽ.

¹⁸ Nẽ na xep mẽ akwỳjaja te ra àhpumunh
tỳx pyræk nẽ tanhmã ijarênh to nẽ ijarênh o:

–Pawreja akupỳn mẽ pahwỳr mỗr ã
amnhĩ jarênh tã koja akupỳn mỗr kêt nẽ
kãm ga. ãm kapêr kati xwỳnh na.

¹⁹ Anhỹr ã ijarênh tã koja Tirtũm kãm
tokyx ma mẽ awỳr inhmỗr prãm hã kot
pa ma mẽ awỳr inhmỗr kurê kumrêx.
Hãmri nẽ pỏj nẽ ixprĩ hã ã mẽ kot ixto
kapêr anhỹr xwỳnhhtajê pumu. Nẽ mẽhỗ
kot ã mẽ kãm ijarênh anhỹr xwỳnhhta ã
ahkukja. ²⁰ Tirtũm krajaja na htem hkôt
pix mã amnhĩ nhĩpêx jakamã na htem hkôt
tanhmã amnhĩ nhĩpêx to hã mẽ omu nẽ rĩ
kormã kêp hkra hã mẽ harê. Tã kot paj
nhỹrmã mẽ awỳr pỏj nẽ ã ixto kapêr anhỹr
xwỳnhjê pumu nẽ ixprĩ hã mẽ kot amnhĩ
nhĩpêx ã mẽ omu nẽ rĩ kormã tanhmã mẽ

harênh to. Jao Tirtũm nhỹ hã mẽ kot mẽ
ajahkre hã mẽ omu rỳ amnhĩ krã hkôt mẽ
kot mẽ ajahkre hã mẽ omu nẽ rĩ kormã
tanhmã mẽ harênh to. ²¹ Jakamã kwa mẽ
tokyx ixkutêp tãm amnhĩ nhĩpêx o ri apa.
Kêr pa mỗ nẽ mẽ awỳr pỏj nẽ mẽ ate tãm
amnhĩ nhĩpêx ã mẽ apumu nẽ ixkĩnh nẽ. Nẽ
mẽmoj tã mẽ amã ixàkjêr kêt nẽ. Nẽ mẽ amã
ixkapêr mex pix o ri mẽ amã ixkapêr. Te
mẽ hipêêxà kot hkrajê mã kapêr mex pyræk
o mẽ amã ixkapêr mex nẽ. Hãmri pu mẽ
axpênh pumu nẽ pahkĩnh nẽ.

5

*Mêhỗ kot tanhmã amnhĩ tomnuj to hã
harênh*

Sikũn Korit 2.5-11

¹ Nẽ kwa na pa pre tee ri mẽ anhĩõja
jarênh ma nẽ ixkaprĩ htỳx nẽ. Na xep hte
amnhĩ tomnuj tỳx pê nã puro hã hpijaàm
kêt o pa. Kwa mẽ pahpê Kris kwỳjaja mẽ
pahte ã amnhĩ nhĩpêx anhỹr kêt nhũm mẽ
kot Kris kôt amnhĩ xunhwỳr kêt xwỳnhjaja
haxwỳja ã amnhĩ nhĩpêx anhỹr kêt tã nhũm
ra mẽ anhĩõja kot Kris kôt amnhĩ xãm tã
ã amnhĩ nhĩpêx anẽ. Kwa ja omnuj tỳx
kumrêx. ² Na xep ri ã amnhĩ nhĩpêx anhỹr
o pa ka mẽ ja hã omu nẽ ãm omu nẽ nẽ
tanhmã kãm nẽ hkêt nẽ. Amarĩ hã omunh o
ri hkôt apa. Mẽ ate Tirtũm kôt axàhpumunh
tỳx ã amnhĩ jarênh tã no ãm ja hã omu
nẽ ãm hã omu nẽ nẽ tanhmã kãm nẽ hkêt
nẽ. Kwa nà. Mẽ tee ri kot ã amnhĩ nhĩpêx
anhỹrja ã omu nẽ akaprĩ nẽ hkêt wehe. Nẽ
mẽ tokyx amnhĩ nẽ hano kê mẽ akôt Tirtũm
mã amnhĩ jarênh xà hã ixkre hwỳr axte
mrar kêt nẽ.

³⁻⁵ Ixte mẽ apê awry htã ã kot amnhĩ
nhĩpêx anhỹr ã harênh ma nẽ hkukamã
tanhmã ijamaxpêr to. Nà ra ixte mẽ awỳr
ixpỏx ronhỹx pa mẽ ato akuprỗ. Pahihti
Jejus nhỹ hã mẽ ato akuprỗ nẽ mẽ amã
kot amnhĩ tomnuj xwỳnhhta jarê nẽ mẽ anê
hanor kurê kumrêx. Jakamã e kêr ka mẽ
mãmri ã amnhĩ nẽ hipêx anẽ. Mẽ panhỗ
Pahihti Jejus nhỹ hã amnhĩ nẽ hano nẽ te
Satanasti mã rer pyræk kê tee ri ja hã amnhĩ
pumu nẽ tokyx kãm urer japêr. Hãmri nẽ
akupỳm tãm amnhĩ nhĩpêx. Kê nhỹrmã
Pahihti akupỳn mẽ pahwỳr wrỳ nhũm ma
mẽ pahkôt õ krĩ hwỳr api.

⁶ Mē ate Tirtūm kapēr jarēnh mar mex ã amnhĩ jarēnh tã kormã amnhĩ nē ã kot amnhĩ nhĩpēx anhỹr xwýnhhta janor kêt nē. Kwa mē tokyx amnhĩ nē hano. Na htem pāwti nhĩpēx kaxyw nē kamã kot ho hikot xà ho hkryre nē kamã kurē nē gaa nē rĩ ho piitã hikot pa. Ja pyrã nē kot ka mē amnhĩ nē kot amnhĩ tomnuj xwýnhhta janor kêt nē hāmri nē gaa nē ra urak nē apiitã ã amnhĩ nhĩpēx anhỹr o ri apa.

⁷ Kwa mē tokyx amnhĩ nē hano. Kēr ka mē arĩ amnhĩ to mex pix o ri axpēn kôt apa nē tãm ri amnhĩ nhĩpēx o ri axpēn kôt apa. Na pre ra Jejus Kris mē pahte amnhĩ to mex o papa kaxyw mē panē ty. Mē pahpiitã mē panē ty. ⁸ Jakamã na pu htem ãm amnhĩ to mex pix o ri papa. Nē tãm amnhĩ nhĩpēx o ri papa. Jao tanhmã amnhĩ tomnuj to ho ri papa hkêt nē.

⁹ Nē wam ixte mē awýr kagã nē mēnhhta kamã na pa pre mē amã:

—Kēr ka mē nhãm mē kot mēnijē kamã hpijaàm kêt o mē pa xwýnhjê hkôt ri apa hkêt nē. ãm ri mē hkàx ã apa.

Anhỹr o mē amã hã karõ. ¹⁰⁻¹¹ Nom na pa pre mē piitã ã mē nē mē akurē anhỹr kêt nē. ãm mē kēp Kris kwý hã amnhĩ jarēnh tã ã ri amnhĩ tomnuj anhỹr xwýnh pixjaja na pa pre mē nē mē akurē. Koja mēhõ kēp Kris kôt mē pahtõ rý mē pahtõx ã amnhĩ jarēnh tã mē kamã hpijaàm kêt o ri pa ka mē ja hã omu nē hkôt ri apa hkêt kurē kumrēx.

Nē mē kãm nhãm mē hkukrêx kĩnh o kãm ho õ hprãm o ri mē pa xwýnhjaja.

Nē sãnti kutã hkõn krã ho rôrõk nē hkrĩ nē kãm mex ã harēnh o ri mē pa xwýnhjaja.

Nē mē kot axpēn to kapēr punuj o ri mē pa xwýnhjaja.

Nē mē pipãnh o ri mē pa xwýnhjaja.

Nē axpēn pē ri mē àhkĩnh o mē pa xwýnhjaja.

Koja mēhõ kēp Kris kwý hã amnhĩ jarēnh tã ã amnhĩ nhĩpēx anhỹr o ri pa ka mē ja hã mē omu nē hkôt ri apa hkêt kumrēx. Nē mē kutã axàpkur kêt nē. ãm mē hkàx ã ri mra.

No mē kēp Kris kwý hkêt xwýnhjê nē na pa pre ã mē akurē anhỹr kêt nē. Mē piitã ã mē kot amnhĩ nhĩpēx anhỹr o pa kēnã. Na htem axpēn kãm hpijaàm kêt o ri pa.

Nē mē kãm axpēn kukrêx kĩnh o kãm ho õ hprãm o ri pa.

Nē sãnti kutã hkõn krã ho rôrõk nē hkrĩ nē kãm amnhĩ jagrer pē amnhĩ to hwýr o pa.

Nē mē axpēn pē àhkĩnh pix o pa.

Kris kwý hkêt xwýnhjaja na htem ã amnhĩ nhĩpēx anhỹr o pa. Tã tanhmã kot ka wem amnhĩ to nē mē hkàx ã ri apa? Mē piitã ã mē kot amnhĩ nhĩpēx anhỹr kēnã. Kot puj mē nhỹrmã Tirtūm nhõ krĩ mex wýr api nē rĩ kormã mē hkàx ã ri papa.

¹²⁻¹³ Nē mē kēp Kris kwý hkêt xwýnhjaja na pa hte mē kot amnhĩ tomnuj ã mē omu nē ãm mē omu nē tanhmã hã mē kãm nē hkêt nē. Tirtūm tãm koja nhỹrmã ja hã tanhmã mē hipēx to. No koja Kris kôt mē pahtõ rý mē pahtõxjê hõ tanhmã amnhĩ tomnuj to ho pa pu mē pahtõ ja hã omu nē nē tanhmã kãm pakapēr to kurē kumrēx. Tirtūm kapēr ã kagã htũm kot ja jarēnh kot: Kēr ka mē amnhĩ nē Kris kôt akwýjê hõ kot tanhmã amnhĩ tomnuj to ho pa xwýnhjê jano. ã harēnh kot anhỹr.

6

Mē pahte Kris kwýjê ho pakapēr kêt

Matêwre 5.38-40

¹ Nē na ka xep htem Kris kôt atõ rý atõxjê hõ mē ka wa tanhmã axpēn tomnuj to nē axtem nē juisti hwýr axpēn to mra. Mē apyrã nē kēp Kris kwý hkêt tã ka htem ma hwýr amnhĩ to mra nhũm war axpēn tã war ama nē tanhmã war ajarēnh to. Kwa mon ka htem axtem nē ã Kris kwý hkêt xwýnhjê hwýr mē amnhĩ to amrar anē? Kêt mē Kris kôt anhĩõ hwýr mãn kêt mē amnhĩ to mra nē kumã mãn amnhĩ jarē kē axpēn tã war ama nē axpēn tã tanhmã war amã kapēr to.

² Ra mē ate ja mar tỳx tã hkôt amnhĩ nhĩpēx kêt nē. Mēmoj ãm grire htã ka wa tokyx akupým hã tãm axpēn xãm kêt nē. Rý Kris kôt war atõjê hõ hwýr wa amnhĩ to atēm nhũm akupým tãm axpēn tã war axãm kêt nē. ãm axtem nē mē kēp Kris kôt mē atõ hkêt xwýnhjê hwýr amnhĩ to mra. Kwa mē ã amnhĩ nhĩpēx anhỹr kêt nē. Mē pahpē Kris kwýjaja kot puj mē nhỹrmã Kris nhĩkhõ hã mē kēp hkwy hkêt xwýnhjê

tanhmã mẽ harēnh to. ³ Nē Tirtũm kapēr o mẽ wryk xwýnhjaja kot puj mẽ mãânēnh nhỹrmã tanhmã mẽ harēnh to ho pahkrĩ. Jakamã kwa mãmrĩ ã mẽ pahte amnhĩ nhĩpêx anhỹrja kukamã akupỹm tanhmã axpēn xunhwýr to ho apa. Měmoj tã mẽ atõjê hõ wa kot tanhmã axpēn to hã wa omu nē tokyx akupỹm axpēn tã wa kãm akapēr kê wa tokyx akupỹm tãm axpēn nhĩpêx. Æ mẽ kot axpēn nhĩpêx anhỹr o paja na kêt mex. ⁴ No na ka xep htem arĩ Kris kôt mẽ akwý hkêt xwýnhjê hwýr axpēn to mra nē mẽ kãm amnhĩ jarē. Kwa mẽ ri ã amnhĩ nhĩpêx anhỹr kêt nē. ⁵ Mě tokyx tee ri ja hã amnhĩ pumu nē amnhĩ kamã apijaàm kêt wehe. Xà mẽ akamã Kris kôt mẽ atõjê hõ pixire nē kot tãm akupỹm mẽ axunhwýr kaxyw amrakati kumrêx? ⁶ Na ka xep htem mẽmoj tã axpu. Kris kôt mẽ atõjê hõ mẽ mẽmoj tã axpu nē ra mẽ kēp Kris kwý hkêt xwýnhjê hwýr amnhĩ to mra. Kot tãm akupỹm mẽ unhwýr xwýnhjê hwýr amnhĩ to mra.

⁷ Mě apijapu ho apa jakamã na ka mẽ amnhĩ tomnuj tỳx nē. Hãmri nē te mẽ apē Kris kwý hkêt xwýnh pyrã nē mẽ hwýr amnhĩ to mra. Kwa kwār Kris kôt anhĩõ mãmrĩ apē ahkĩ rý tanhmã anhĩpêx to. Ka mẽ ãm amnhĩ tã omu kê tapxipix tanhmã amnhĩ tomnuj to. ⁸ Ja mex tã mẽ ate ã amnhĩ nhĩpêx anhỹr kêt. Na ka htem axpēn pē ahkĩ. Mě ate Kris kôt axpēn to atõ nē atõx tã axtem nē ã axpēn nhĩpêx anē. Te mẽ apijaàm kêt pyrãk o amnhĩ nhĩpêx o ri apa. ⁹⁻¹⁰ Mě kot tanhmã amnhĩ tomnuj to xwýnhjaja koja mẽ nhỹrmã ma Tirtũm nhõ krĩ mex wýr àpir kêt nē. Ra mẽ ate ja jarēnh mar tỳx.

Měmyjê hõ kot nhãm mēnijê hõ ho amnhĩ kati xwýnhjaja.

Nē mēnijê hõ kot nhãm mẽmyjê hõ ho amnhĩ kati xwýnhjaja.

Nē mēnijaja axtem nē mẽ kot amnhĩõ ho mjên o ri mẽ pa xwýnhjaja.

Nē mẽmyjaja haxwýja axtem nē amnhĩõ ho hprõ ho ri mẽ pa xwýnhjaja.

Nē mẽ àhkĩnh o ri mẽ pa xwýnhjaja.

Nē mẽ kãm nhãm mẽ hkukrêx kĩnh o kãm ho õ hprãm o ri mẽ pa xwýnhjaja.

Nē ri mẽ pipãnh o mẽ pa xwýnhjaja.

Nē ri axpēn to kapēr punuj o mẽ pa xwýnhjaja.

Nē mẽ kot amnhĩ to sãnti hwýr o mẽ pa xwýnhjaja.

Æ mẽ kot amnhĩ nhĩpêx anhỹr xwýnh piitã koja mẽ Tirtũm nhõ krĩ hwýr àpir kêt nē.

¹¹ Kormã mẽ ate Kris kôt amnhĩ xunhwýr kêt ri na ka pre mẽ akwýjaja ã amnhĩ nhĩpêx anhỹr o ri apa. Tã amnhĩ kaxyw Jejus kôt ajamaxpēr nē hkôt amnhĩ xunhwý. Hãmri nhũm Tirtũm Karõ mẽ Pahihtija Jejus Krisja wa mẽ anē mẽ ate amnhĩ tomnuj piitã rēnh pa nē mẽ apē Tirtũm kra hã mẽ axunhwý nē amnhĩm mẽ ate amnhĩ to mex xwýnh ã mẽ ajarē.

Mě pahte tãm amnhĩ nhĩpêx o papa hã mẽ pamã karõ

Matêwre 5.27; Rõmãn 12.1-2; Epes 5.3; Korosẽ 3.5; Wam Tesarõn 4.1-8

¹² Nē na ka hte mẽ akwýjaja amnhĩ jarēnh o:

—Nà na pa hte pa inhmã tanhmã amnhĩ nhĩpêx to hprãm xà hkôt amnhĩ krã hkôt amnhĩ nhĩpêx o ri ixpa. Anē.

Mě ate ã amnhĩ jarēnh anhỹr tã no ãm mẽ ate amnhĩ jarēnhja mex kêt. Měmoj piitã mẽ pamã mex kêt. Na pu htem pamã hprãm xà hkôt mẽmoj to anē nē gaa nē ra ho amnhĩ pyrã nē ho anhỹr pix o papa. Nē gaa nē kãm panhũrer kêt kumrêx. Jao ra pahpipãnh pix o ri papa. Rý paxêx pix o ri papa. Rý paxàhkĩnh pix o ri papa. Jakamã kêr pu mẽ pamã tanhmã amnhĩ nhĩpêx to hprãm xà hkôt tanhmã amnhĩ nhĩpêx to ho papa hkêt nē. Æm amnhĩ mẽ amnhĩ kaxyw Jejus mã pajamaxpēr pix nē.

¹³ Nē na htem amnhĩ jarēnh o:

—Nà kot paj inhmã prãm nē mãmrĩ mẽmoj ku. Nē inhmã nhãm mēhõ kamã ix-pijaàm kêt prãm nē mãmrĩ ã amnhĩ nhĩpêx anē. Ja tanhmã inhmã kute hkêt. Anē.

Tã koja nhỹrmã Tirtũm mẽ panhĩja o hapêx pa. Na pre mẽ pahte nhãm mẽ kamã pahpijaàm kêt o papa kaxyw mẽ panhĩpêx kêt nē. Æm mẽ pahte mẽ panhĩpêx xwýnh maatija mã tanhmã amnhĩ nhĩpêx mex to ho papa pix kaxyw na pre mẽ panhĩpêx.

¹⁴ Nē na pre Pahihtija ty nhũm Tirtũm akupỹm ho htĩr. Ja pyrã nē kot puj mẽ nhỹrmã mẽ pajaxwýja ty nhũm akupỹm mẽ

pahto mẽ pahtír. Ja kaxyw tapxipix pix na àhpumunh tỳx o àhpumunh tỳx. ¹⁵ Na pu htem Kris kôt amnhĩ xunhwỳr kôt pahpê hkwỳ nê te pahpê ì pyràk. Jakamã kwa mẽ ja hã anohtỳx nê axte nhãm mẽ hkuprỳjê hwỳr amrar nê mẽ ho amnhĩkati hkêt nê. Tirtũm kêp ja omnuj. Te mẽ pahte Kris nhĩ pyràk jakamã kot kaj mẽ ã amnhĩ nhĩpêx anhỳr jao te Kris tãm kot ã amnhĩ nhĩpêx anhỳr o pa pyràk. Kwa ja mex kêt. Xà kot we Krisja ã amnhĩ nhĩpêx anê? Nà koja ã amnhĩ nhĩpêx anhỳr kêt nê. ¹⁶ Tirtũm kapêr ã kagà htũm kot ja jarênh kot:

Kot ka mẽ atõ mênijê hõ ho aprõ nhũm kêp aprõ kumrêx. Hãmri nê te ra war atipxi pyràk o axpên nhĩpêx. Anê.

Ã kot aprõ mẽ wa ajarênh anhỳr jakamã kwa kêt ka mẽ atỳx ri nhãm mẽ hkuprỳjê hwỳr apa hkêt nê. Kot kaj mẽ ã amnhĩ nhĩpêx anê nê Tirtũm noo mã te ate aprõ kuhpa hã hkuprỳta o aprõ pyràk. Te wam aprõta kuhpa hã war atipxi pyràk. ¹⁷ Na pu htem Pahihti Jejus Kris kôt amnhĩ xunhwỳ nhũm amnhĩ tã mẽ pahpumu nê mẽ pamã Karõ gõ nhũm mẽ pamã agjê. Pu mẽ ra Karõja kôt te ra Jejus mẽ wa pahtipxi nê ri papa pyràk o axpên nhĩpêx. Jao Kris jamaxpêr mẽ mẽ pajamaxpêrja te wa kot axpên pyràk. Nê Kris kot amnhĩ nhĩpêx mẽ mẽ pahte amnhĩ nhĩpêxja te kot axpên pyràk.

¹⁸ Jakamã kwa kêt ka mẽ amnhĩ prõ pix tãnopxar o ri apa. Nê mẽ anijaja amjên pix tãnopxar o ri apa. No mẽ nhãm mẽmyjê ho amnhĩkati ho ri apa hkêt nê. Nê mẽ amyjaja nhãm mênijê ho amnhĩkati ho ri apa hkêt nê. Kot ka mẽ nhãm mẽmoj tanhmã omnuj kute ho anê no ãm amnhĩ nhĩ homnu hkêt nê. Nom kot kaj mẽ nhãm mênijê ho amnhĩkati rỳ nhãm mẽmyjê ho amnhĩkati hãmri nê ra amnhĩ nhĩ homnu hpa. ¹⁹ Mẽ panhĩ kamã na hte Tirtũm Karõ agjê nê kamã hkrĩ. Tirtũm na pre mẽ pahwỳr kurê nhũm mẽ pahkarõ mã agjê pu mẽ te mẽ pahpê òrkwỳ pyràk. Jakamã na pu htem amnhĩ krã hkôt pahtỳx ri mẽmoj tanhmã ho ho papa hkêt nê. ãm Tirtũm jamaxpêr xà hkôt pix mã na pu htem tanhmã mẽmoj nhĩpêx to ho papa. ²⁰ Na pre ra Jejus mẽ pahte amnhĩ tomnuj pãnhã amnhĩr

kaxyw mẽ pahpiitã mẽ panê ty. Te htyk o amnhĩm mẽ pajaprõr pyràk o mẽ panhĩpêx. Jakamã kwa kêt pu mẽ ãm hkôt pix mã mãn ri amnhĩ nhĩpêx rãhã ho ri papa. Kê mẽ pahkwỳjaja ja hã mẽ pahpumunh kôt Tirtũm mã mex o mex ã harênh o ri pa.

7

Mẽ mjên mẽ mẽ hprõ wa kot axpên to mex ã mẽ pamã karõ

Epes 5.22; Korosê 3.18; Eprêw 13.4

¹ Nê ota mẽ ate ixwỳr kagà nê mênhta na pre ixwỳr pøj pa omu. Nê kamã mẽ ate mẽ aprõ hã ixkukjêr xwỳnhta pa kamã harê nê omu. Tã kot paj mẽ amã tanhmã harênh to ka mẽ inhma.

Nà kot ka mẽ amyjê hõ amã aprõ hkêt nê ahte ri apa hprãm nê kam nê aprõ hkêt apa. Ja tanhmã kute hkêt. Nom kêt ka mẽ hkuprỳjê ho presija ho ri apa hkêt nê. ² Na htem tõhã kãm hprõ hprãm kêt nê ri pa nê gaa nê mẽ hkuprỳjê hõ pumu rỳ mẽ kêp mẽ hprõjê hõ pumu nê kamã hpijaàm kêt o ri pa. Ja pymaj kêt ka mẽ amyjaja mãmrĩ aprõ nê mẽ anijaja mãmrĩ amjên.

³ Nê mẽ anijaja. Koja mẽ amjên akamã hkurê ka mẽ mãmrĩ kãm amnhĩ gõ kê mẽ anĩ. Nê mẽ amyjaja mãânên. Koja mẽ aprõ mẽ akamã hkurê ka mẽ mãmrĩ mẽ anĩ. ⁴ ãm ka amã tanhmã amnhĩ nhĩpêx to hprãm xà hkôt pix mã amnhĩ nhĩpêx kêt nê. Mãânên amã aprõ kot kãm tanhmã amnhĩ nhĩpêx to hprãm xà hkôt mãânên hkôt kãm amnhĩ nhĩpêx.

⁵ Nê kot kaj mẽ mẽmo arĩgro hã amã Tirtũm mã amnhĩ jarênh ryy hprãm japêr. Hãmri nê aprõ mã:

—E kot puj jarãhã axpên to amnhĩkati hkêt nê. Kot puj ãm Tirtũm pix mã amnhĩ jarênh o amỹkry. Anê.

Hãmri nê mãmrĩ ã amnhĩ nhĩpêx anê. No kwa kêt ka mẽ ãm ja ho anhỳr o apkati pixi nê kãm anhũre. Nhũm jãã ka mẽ amã axpên to amnhĩkati hprãm nê mãmrĩ tanhmã axpên nhĩpêx to. No kot kaj mẽ ã amnhĩ nhĩpêx anhỳr kêt o hã atã apkati xohtõ nê gaa nê ra akurê xàj axtem nê Satanasti jamaxpêr o ajamaxpêr. Jao nhãm mẽhõ ni hwỳr mra nê aprõ kuhpa hã kamã akurê ho kamã apijaàm kêt. Rỳ nhũm

mënijaja nhâm mëmyjê hõ hwÿr mra nê mjên kuhpa hã kamã hkurê ho war axpën kamã hpijaàm kêt.

⁶ E më ate ja hã ixkukjêr jakamã na pa ã ixprî hã më amã ja jarênh anê. Ka më akwÿjaja amã aprõ hprãm nê mãmri aprõ nê ri apa. Nê më akwÿjaja amã aprõ hprãm kêt nê mãmri aprõ hkêt nê ri apa. Nom kot pa paa më amã më aprõ hã ixamnênh kêt nê. Ka më kam amnhî krã hkôt ajamaxpêr xà hkôt tanhmã amnhî nhîpêx to. ⁷ Na pa hte ixprõ hkêt nê ri ixpa nom inhmã ja mex pa hte ahte ixpa.

Më mjên kêt nê më hprõ kêt xwÿnhjê jarênh

Nê kormã më aprõ hkêt xwÿnhjaja. Ka më ixpyrà nê aprõ hkêt nê ri apa ronhÿx inhmã ja mex nê. Na hte mëmy hkwÿjaja hprõ kêt nê ri pa nhũm Tirtũm ja hã më omu nê tanhmã më ho nhũm më mex nê ri pa nê mënijê kamã hkurê ho më kamã hpijaàm kêt o ri pa hkêt nê. No na hte më hkwÿjaja hprõ hkêt nê ri pa nê gaa nê ra hkurê xaj mënijê kamã hpijaàm kêt. ã më ate amnhî nhîpêx anhÿr pymaj kêt ka më amã aprõ hprãm nê mãmri aprõ. Tirtũm mã ja mex kênã.

⁸ E më aprõ hkêt nê më amjên kêt xwÿnhjaja. Nê ra më apê më aprõ htyk rÿ më amjên htyk xwÿnhjaja. Pa më amã mëmoj jarê. Nà kot kaj më ixpyrà nê më aprõ hkêt nê ri apa rÿ më amjên kêt nê ri apa nhũm ja inhmã mex nê. ⁹ No kot ka më atõ ra akurê japêr nê mãmri aprõ rÿ mãmri amjên. Ja mãânênh tanhmã kute hkêt.

Më pahte axpën kaga hkêt ã më pamã karõ

Matêwre 5.31, 19.3-9; Makre 10.2

¹⁰ E kot paj hpãnhã ra më ate axpën to amjên nê axpën to aprõ xwÿnhjê mã ixkapêr. Nom kot paj amnhî krã hkôt tanhmã ixkapêr to hkêt nê. Pahihti Jejus Kris kapêr xà hkôt kot paj më amã ixkapêr. Jakamã e kêt ka më anijaja më amjên kaga hkêt nê. ¹¹ Nom kot kaj më tanhmã ajamaxpêr to nê hkaga japêr hãmri nê ahte ri apa nê axte nhâm mëhõ ho amjên kêt nê. Rÿ tee ri amnhî kukamã ajamaxpêr nê mãmri akupÿm amjênta wÿr tẽ nê akupÿm hkôt ri

apa. No kêt ka më axte nhâm mëhõ ho amjên kêt nê.

Nê ra më amyjaja kêt ka më ajaxwÿja ã amnhî nhîpêx anê nê më aprõ kaga hkêt nê. E kêt ka më ã amnhî nhîpêx anhÿr o ri apa.

¹² Nê më ate ixwÿr kagã mënh kamã axpën tã ixkukjêrta kot paj hpãnhã më amã harê. Na Pahihti Jejusja ja hã tanhmã inhmã nê hkêt nê. ãm amnhî krã hkôt kot paj më amã tanhmã harênh to ka më inhma.

Ka më amyjê hõ ra Kris kôt amnhî xãm nom nhũm aprõ kormã hkôt amnhî xãm kêt japêr. Nom koja kãm arî ri akôt pa hprãm ka hkaga hkêt nê. Kê arî ri akôt pa.

¹³ Nê më anijaja. Ka më ajaxwÿja ra apê Kris kwÿ hã ri apa nhũm amjên kêp hkwÿ hkêt tã arî ri akôt pa hprãm nê arî ri akôt pa ka hkaga hkêt nê. ¹⁴ Kêp Kris kwÿ hkêt tã koja akôt Kris kwÿjê hkôt ri pa. Rÿ më aprõ kêp Kris kwÿ hkêt tã koja akôt Kris kwÿjê hkôt ri pa. Jao Tirtũm kapêr mar o pa nê gaa nê apyrã nê hkôt amnhî xãm japêr. Nê më akra kêp Kris kwÿ hkêt xwÿnhjaja haxwÿja më akôt Kris kwÿjê hkôt ri pa nê Tirtũm kapêr mar o pa nê gaa nê akôt Jejus kôt amnhî xunhwÿr japêr.

¹⁵ Nom koja aprõ kêp Kris kwÿ hkêt ã kãm akaga hprãm nê rî tãm mãmri akaga. Rÿ amjên kêp Kris kwÿ hkêt ã kãm akaga hprãm nê rî tãm mãmri akaga. Kêt ka më kot akaga nê tee ri kãm tanhmã akapêr to hkêt nê. Kwâr mãmri akaga ka ahte ajamakêtkati nê axamnhi x ri apa. Më pajamakêtkati nê më pamex nê ri papaja na Tirtũm kãm hprãm.

¹⁶ No koja amjên kêp Kris kwÿ hkêt tã kãm më akaga hprãm kêt nê ka më hkaga hkêt nê. Rÿ aprõ kêp Kris kwÿ hkêt tã ka më kam hkaga hkêt nê. Koja arî ate amnhî nhîpêx ã apumunh o ri akôt pa nê gaa nê rî apyrã nê Kris kôt amnhî xãm japêr. ¹⁷ Jakamã kot ka më aprõ rÿ amjên ra Kris kôt ahte amnhî xãm. Hãmri nê wa arî ri axpën kôt ri apa ho apa. Na pa hte krî piitã hkôt Jejus kôt më pahkwÿjê mã ã ixujarênh anhÿr o ri ixpa. Tã kêt ka më ã amnhî nhîpêx anhÿr o ri apa.

Kris kôt amnhî xunhwÿr kêt ri tanhmã më pakute hã më pajarênh

18 Ja pyrà nē kot kaj mē ra amy kwryt kà jakàr japêr. Tã ra Kris kôt amnhĩ xãm nē arĩ arãhã ri apa. Rỳ amnhĩ jakàr kêt rãhã hkôt amnhĩ xãm japêr nē arĩ arãhã ri apa. Mo kaxyw kot ka kêt amnhĩ jakà? 19 Tirtũm na hte mē pahte amnhĩ my kwryt kà jakàr ã mē pahpumunh kôt tanhmã mē pajarēnh to hkêt nē. Rỳ mē pahte amnhĩ jakàr kêt ã mē pahpumunh kôt mãânēn tanhmã mē pajarēnh to hkêt nē. ãm mē pahte hkôt amnhĩ nhĩpêx pix ã mē pahpumunh kôt na hte tanhmã mē pajarēnh to. 20 Jakamã kêr pu mē pahte Kris kôt amnhĩ xunhwyr kêt ri tanhmã mē pakuteja arĩ rãhã ri papa. 21 Ka mē akwýjaja ate nhãm mē kãm mē axàpênh o apa htã Jejus kôt amnhĩ xunhwý. Tã kêr ka mē mãmrĩ mē kãm axàpênh o ri apa. Nom koja anhõ patrãwja amnhĩ nē mē ajano ka mē mãmrĩ ma mra nē amnhĩ mã tanhmã axàpênh to ho ri apa.

22 Nē koja mēhõ Kris kôt amnhĩ xãm. Tanhmãn kēp mē õ patrãw rỳ kot mē kãm mē àpênh xwýnhjê hõ. Tã Kris kôt amnhĩ xãm hãmri nē arĩ amnhĩ nhĩpêx tũm kôt ri amnhĩ nhĩpêx o pa hkêt nē. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nē. Te kot õ patrãw punuj kaga nē hpãnhã õ patrãw mex kapêr kôt amnhĩ nhĩpêx pix o pa pyrãk.

23 Na pre Jejus mē pahte amnhĩ tomnuj piitã hpãnhã amnhĩrer kaxyw mē panē ty. Te htyk o kot amnhĩm mē pajaprõr pyrãk o mē panhĩpêx. Jakamã kwa kêr ka mē jar mē anhõ patrãw kôt pix mã amnhĩ nhĩpêx o ri apa hkêt nē. Mē mãânēn Tirtũm kapêr kôt amnhĩ nhĩpêx o ri apa. 24 Jakamã kêr pu mē pahte Kris kôt amnhĩ xunhwyr kêt ri tanhmã mē pakuteta pu mē arĩ rãhã ri hã papa.

Ra mē pahte amnhĩ jakà rỳ mē pahte amnhĩ jakàr kêt.

Rỳ ra mē pahte nhãm mēhõ mã paxàpênh o papa rỳ amnhĩ mã paxàpênh o papa.

Rỳ ra mē pahprõ nē ri papa rỳ mē pahprõ hkêt nē ri papa.

Pu mē pahte Kris kôt amnhĩ xunhwyr kêt ri tanhmã mē pakuteta ãm arĩ rãhã hã ri papa. Jao Tirtũm kãm hprãm xà kôt pix mã amnhĩ nhĩpêx o ri papa.

Mē hprõ nē mē mjên kêt xwýnhjê jarēnh

Matêwre 19.10-12

25 Nē mē ate ixwyr kagà mēnhta kamã na ka mē mãânēn kormã mē hprõ hkêt xwýnhjê hã ixkukja. Tã kot paj mē amã tanhmã mē harēnh to. Nom Pahihti Jejus Kris na pre ja hã tanhmã inhmã nē hkêt nē. ãm pa kot paj ãm amnhĩ krã hkôt tanhmã hã mē amã ixkapêr to. Na pre Pahihti mē akaxyw tanhmã ixkrã hto pa hte ý hã tanhmã mē amã mēmoj tã karõ hto ho ri ixpa. Jakamã e mē inhma nē inhmar tỳx nē.

26-27 Nà ra mē kãm mē pahkurê xwýnhjaja Kris ã mē pahptomnuj o pa jakamã koja ixpyrà nē mē hprõ hkêt rãhã mē pa xwýnhjaja ahte ri pa nhũm ja mex nē. Nhũm mē umaj amnhĩ pix tânopxar o ri pa. Nē mē aprõ xwýnhjaja kêr ka mē kãm mē pahkurê xwýnhjê pymaj mē aprõ kaga hkêt nē. ãm pix tânopxar o ri apa.

28 Tã kot ka mē atõ amã aprõ hprãm nē mãmrĩ aprõ. Ja mãânēn tanhmã ixpê kute hkêt. Nē mē anijaja mē amã amjên prãm nē mãmrĩ amjên. Ja tanhmã ixpê kute hkêt. Nom kot ka mē akwýjê pyrã nē aprõ rỳ amjên. Nē gaa nē akra. Hãmri nē tanhmã mēmoj kute kamã ka tee ri wa mē amnhĩ kukamã ri ajamxpêr o ri apa. Ja pymaj na pa hte mē amjên kêt nē mē aprõ hkêt ã mē amã awjarê.

29 Nē Kris tokyx akupýn mē pahwyr wrýk kaxyw jakamã kwa ra mē aprõ nē apa xwýnhjaja. Kêr ka mē amnhĩ prõ nē amnhĩ kra pix kukamã ajamxpêr o ri apa hkêt nē. Te ho mē hprõ hkêt nē mē pa xwýnhjaja kot amnhĩ nhĩpêx pyrã nē Kris kutêp kumrêx mã ajamxpêr pê tanhmã amnhĩ nhĩpêx to ho apa nē arĩ kormã aprõ nē akrajê ho hapu nē tanhmã mē kutã anojarêt to ho apa.

30 Kris kot tokyx akupýn mē pahwyr wrýk jakamã kwa mē ri amýr o ri mē apa xwýnhjaja. Kêr ka mē kutêp tee ri amnhĩ kaprĩ pix mã ajamxpêr o akaprĩ nē ri apa hkêt nē. Nē mē akĩnh nē ri apikunhar o ri mē apa xwýnhjaja kêr ka mē Kris kutêp amnhĩ kĩnh xà pix mã ajamxpêr o ri apa hkêt nē. Nē ri mē axujaprõr o ri mē apa xwýnhjaja kêr ka mē Kris kutêp tanhmã axujaprõr to pix kukamã ri ajamxpêr kêt nē.

³¹ Nē mē apē mē ate mēmoj to wēnē ho ri mē apa xwýnhjaja Kris kutêp âm ri mē akukrêx pix kukamã ajamxpêr kêt nē. Koja mē panhō pika piitã hkôt mē pakukrêxja nē mēmoj piitã arī rãhã hkêt nē. ³² Jakamã kot kaj mē akukrêx pix kukamã ajamxpêr nē amnhĩ pix kukamã ajamxpêr nhũm ja apē omnuj nē. Kris kwý pē mē hprō hkêt xwýnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao âm pix kutã tanhmã nojarêt to rãhã ho ri pa. ³³ No kêt ra mē hprō nē mē pa xwýnhjaja na htem hprō pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa. ³⁴ Mē kãm Tirtũm kapêr kôt amnhĩ nhĩpêx prãm tã no âm mãänēn kãm hprō kapêr mar nē hkôt kãm tanhmã amnhĩ nhĩpêx to ho ri pa hprãm.

Nē mēnijaja kot Jejus kôt amnhĩ nhĩpêx nē kormã mē mjên kêt xwýnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nē âm pix mã hamxpêr o pa. Nē âm hkôt pix mã amnhĩ nhĩpêx o pa. No ra mē mjên nē mē pa xwýnhjaja na htem arī ri mē hikukrêx tânopxar o pa. Nē mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nē Jejus kãm prãm xà hkôt pix mã amnhĩ nhĩpêx o pa?

³⁵ E ixte mē ato ajuta kaxyw na pa ã mē amã ixkapêr anē. Jakamã na pa mē ate mēhō ho aprō nē mē akurê hkêt nē. Âm mē ate Tirtũm kapêr kôt pix mã amnhĩ nhĩpêx o apa hã na pa mē amã karō. Mē ate kumã pix mã ajamxpêr o ri apa pix kaxyw. Nē kumã pix mã tanhmã ri amnhĩ nhĩpêx to ho apa kaxyw na pa mē amã tanhmã mēmoj tã karō hto.

Mē kot mē hprō mã xwýnhjê jarēnh

³⁶ E kot paj hpãnhã mē ate mēhō ho aprō mã xwýnhjê mã ixkapêr ka mē ixkapêr ma. Nà kot kaj mē atō ate ho aprō mã xwýnhjê kukamã ajamxpêr o:

—Nà kot paj ho ixprō hkêt nē. Inhmã hkĩnh tỳx tã kot paj ho ixprō hkêt nē. Kot paj âm ixprō hkêt nē ahte ri ixpa. Anē.

Hãmri nē ahte ri apa. Tã ra tee amnhĩ kurê kamã ama nē ajamxpêr o:

—Hêxta waa nē. Mon pa pre ho ixprō hkêt nē ahte ri ixpa? Anē.

Hãmri nē mãmrĩ ma hwýr tē nē kãm amnhĩ jarē nē ho aprō. Ra ate aprō hkêt nē ahte ri apa hã amnhĩ jarēnh tã no âm mãmrĩ ho aprō. Ja tanhmã kute hkêt kēnã. ³⁷ Nom kot kaj ho aprō hkêt ã amnhĩ jarē nē mãänēn akurê hkêt nē ri apa. Hãmri nē mãmrĩ ho aprō hkêt nē ri ahte ri apa. Ja mãänēn tanhmã kute hkêt. ³⁸ Kot ka ho aprō nē war amex nē apa. Rý kot ka ho aprō kêt nē mãänēn amex kumrêx nē ri apa. Ja na mex o ate mēhō ho aprō nē ho apata jakrenh.

Mē kêp mē mjên tyk xwýnhjê jarēnh

³⁹ E kot paj hpãnhã mē apē mē amjên tyk xwýnhjê mã ixkapêr. Nà koja amjên arī htĩr ri ka âm hkôt pix mã axkamē nē hkaga hkêt nē. No koja nhýrmã apē ty hãmri ka tee ri amnhĩ kukamã ajamxpêr hãmri nē amã axte amjên prãm nē mãmrĩ axte amjên. Nom kwa kêr ka mē amnhĩ pyrã nē Kris kôt akwýjê hō pix o amjên. No mamrĩ nhãm mēhō ho amjên kêt nē. ⁴⁰ No kot ka mē axte amjên kêt nē ahte ri apa hãmri nē axãmnhĩx ri ajamakêtkati nē apa. No na pa âm amnhĩ krã hkôt mē amã ã ja jarēnh anē. Mãn Tirtũm Karō mã mãänēn ja mex nē.

8

Sãnti hã mē apkur xà jarēnh

Römãn 14.13-23; Wam Korit 10.14-22, 13.2; Karatas 5.13; Wam Pêtre 4.8; Wam Juãw 3.18

¹ Nē mē ate ixwýr kagã mēnhãta kamã na ka prem mãänēn sãnti hã mē apkur xà hã ixkukja. Tã kot paj mē amã tanhmã ja jarēnh to ka mē inhãma.

Nà na hte Kris kôt pahkwý hkêt xwýnhjaja mēmo karō ho sãnti nhĩpêx mã mēo hkwy nhĩpêx nē hwýr o mra. Hãmri nē hpar pē haxwý nē kutã hkõn krã ho rôrõk nē hkrĩ nē kãm mex o mex ã harē nē kãm amnhĩ jagrer pē amnhĩ to kuwý. Hãmri nē kãm amnhĩ jagrer pa nē akupým amnhĩm mēõta jamý nē ma o mra nē hkwyjê mã ho wēnē. Na htem ã amnhĩ nhĩpêx anhýr o pa. Tã na ka prem kagãta kamã mē ate mē kêp mēo japrõr nē hkur ã ixkukja. Nà ra mē ate sãnti pumunh mex. Âm mē kot ãhkra pix o

hipêx ã omunh mex jakamã na pu htem hã pamã mẽ apkur xàta hkur prãm nẽ mãmri paxàmnhix ri kuku. Ja tanhmã Tirtùm pê kute hkêt. Ra mẽ pahte ja pumunh mex. Tã nom kwa kêr pu mẽ ja hã Kris kôt mẽ pahkwýjê mã amnhĩ to jarkrar o ri papa hkêt nẽ. Nẽ ja hã mẽ kurom paxàhpumunh tỳx ã mẽ kãm amnhĩ to jarkrar hkêt nẽ. Kot pu mẽ ã amnhĩ nhĩpêx anhÿr o mẽ hamaxpêr o hihtỳx hkêt nẽ. Kêr pu mẽ ãm mẽ kamã paxukapri pê tanhmã mẽ ho mex to ho papa. Nẽ Kris kôt mẽ hamaxpêr o hihtỳx o papa. ã mẽ pa hte amnhĩ nhĩpêxja na Tirtùm kãm hprãm. ² No koja mẽhõ mẽmoj pumunh tỳx ã amnhĩ to jarkrar o ri pa nẽ ãm tee ri ã amnhĩ jarênh anhÿr kaprÿ. ³ No koja mẽhõ àhpumunh tỳx kêt tã kãm Tirtùm kĩnh nhũm amnhĩ tã omu nẽ kãm hapê nẽ ho hkra. Kêt ja na mex o mex.

⁴ E kot paj ixpri hã mẽ amã tanhmã sãnti hã mẽ apkur xàta jarênh to ka mẽ inhma. Nã Mẽpahpãmja pixii. Axtem hõ hkêt. Nom mẽ kot sãnti nhĩpêxta ãm mẽ kot ìhkra o hipêx jakamã htir kêt. Ra mẽ pahte ja jarênh mar tỳx nẽ omunh mex. ⁵ Na htem ohtõ nẽ ri sãnti kệp Mẽpahpãm ã hkamnhix o pa. Kaxkwa kamã mẽmo karõ nhĩpêxja nẽ pika kamã mẽmo karõ nhĩpêxja nhũm htem kệp Mẽpahpãm ã harênh ho pa. Nom ja kot anhÿr kêt. ⁶ Mẽpahpãmja ãm pixi ho pixi mex. Mẽ panhõ Tirtùmja. Tãm na pre mẽmoj piitã ho kator pa. Jakamã na pu htem kapêr kôt pix mã amnhĩ nhĩpêx o ri papa.

Nẽ mẽ panhõ Pahihti haxwÿja pixii. Pahihti Jejus Krisja. Na pre Tirtùm nhĩhkõ hã mẽmoj piitã ho kator pa. Na pu htem ja hã omunh xà hkôt ri pamex nẽ ri papa. Ra mẽ pahte ja jarênh mar tỳx nẽ omunh mex. Jakamã na pu htem paxàmnhix ri mẽmoj piitã hkur o papa. Tirtùm kot mẽmoj piitã ho kator par kênã. ⁷ Tã no ãm ham mẽ kot Kris kôt amnhĩ xunhwÿr xwÿnhjaja na htem mẽ pahkĩnhã kãm sãnti hã mẽ apkur xà hkur puma nẽ. Ham mẽ kot sãnti kaga nẽ amnhĩ kaxyw Kris kôt amnhĩ xunhwÿr jakamã kormã Tirtùm kôt amnhĩ nhĩpêx tohtuj anẽ. Jakamã na htem tee ri sãnti hã mẽ apkur xàja pumu nẽ hamaxpêr o:

—Nã kot paj ja kur kêt nẽ. Kot paj anẽ

nhũm apu Tirtùmja pê ja omnuj nẽ. Anẽ.

⁸ Nom na kêt hte Tirtùm mẽ paxàpkur xà hã mẽ pahpumunh kôt mẽ pahte amnhĩ to mex xwÿnh ã mẽ pajarênh kêt nẽ. Kot puj mẽ mẽmoj ku rÿ mẽmoj kur kêt nẽ nhũm ja hã mẽ pahpumunh kôt tanhmã mẽ pamex ã pajarênh to hkêt nẽ. Jakamã na pu htem mãmri paxàmnhix ri mẽmoj tã mẽ apkur xà hkur o papa nẽ tanhmã amnhĩ to hkêt nẽ. ⁹⁻¹⁰ Nom kwa mẽ okora. Kêr ka mẽ sãnti mã amnhĩ jarênh xà hã ixkre hwÿr agjêx nẽ kamã axàpkur hkêt nẽ. Kot kaj mẽ atõ ã amnhĩ nhĩpêx anẽ nhũm mẽhõ kormã kot Kris kôt amnhĩ xãm tohtuj anhÿr xwÿnhja ja hã mẽ apumu nẽ tee ri hamaxpêr. Axàhpumunh tỳx ã ate amnhĩ jarênh tã sãnti nhõrkwÿ kamã axàpkur o nhÿ nhũm ja hã apumu nẽ tanhmã amnhĩ nhĩpêx to wehe? Koja ja kệp omnuj tã apyrã nẽ tẽ nẽ axà nẽ mẽ kutã apku. Hãmri nẽ apkur pa nẽ tee ri amnhĩ kukamã hamaxpêr o:

—Hêxta waa nẽ. Kwa mon pa axtem nẽ ri ã mẽmoja kur anẽ? Nã na pa anẽ nẽ ra amnhĩ tomnuj tỳx nẽ. Anẽ.

Hãmri nẽ hkaprĩ nẽ pa. ¹¹ Ate axàhpumunh tỳx ã amnhĩ jarênh tã amnhĩ kôt atõja mex kukamã ajamaxpêr kêt nẽ. Kris ra mÿrapê htyk tã nhũm ã ate sãnti hã mẽõ hkur ã apumu nẽ tee ri hamaxpêr o Jejus hkôt amnhĩ nhĩpêx mex kêt nẽ. ¹² Kormã kot Kris kôt amnhĩ xãm tỳx kêt tã tee ri ja hã mẽ apumu nẽ hamaxpêr mex kêt nẽ. Jakamã ka Kris noo mã amnhĩ tomnuj nẽ. ¹³ Tã ã ixte Kris kôt ixkwÿjê nhĩpêx anhÿr pymaj koja ixtõjê hõ kãm mẽmoj kur puma nẽ. Nẽ htỳx ho Tirtùm kệp omnuj ã hkamnhix. Pa ja hã omu nẽ ijaxwÿja axte hkur kêt nẽ. Ixte mex ã omunh tã no ãm kot tee ri ja hã ixpumunh nẽ hamaxpêr o:

—Kwa Tirtùm kệp ja mex kêt tã nhũm Pawreja ri kuku. Jakamã kot paj ijaxwÿja urak nẽ kuku. Omnuj tãã.

Anhÿr o hamaxpêr pymaj kot paj urak nẽ mẽmota kur kêt nẽ. Na pa hte ã Kris kôt ixtõjê mex kukamã ri ijamaxpêr anhÿr o ixpa.

9

Pawre kot amarî Tîrtûm kapêr o mē ahkre hā amnhî jarênh

Atre 9.1-18, 20.33-35; Sikûn Korît 11.7-9

¹ Nê ixte Jejus nhÿ hā mē ahkre ho mē pa xwÿnhjê hō jakamā na pa hte Tîrtûm kapêr o mē ajahkre ho ri ixpa. Na pa pre inhno ho mē panhō Pahikti Jejus pumu nê mē amā harênh o ri mē akôt ixpa ka prem inhma nê hkôt amnhî xunhwÿ. ² Mē hkwÿjaja kot axpên mā ixpê Jejus nhÿ hā mē ahkre xwÿnh kêt ã ijarênh tā mē kajaja mē ate ja hā ixpumunh mex. Ixte mē amā mē ujarênh mexja jarênh nhÿm mē ate mar nê hkôt amnhî xunhwÿrja kukwak ri na ka mē apê Jejus kwÿÿ. ³ Jakamā koja mē atā ixto kapêr japêr kot paj ã mē kām mē ajarênh anê. ⁴ Nê ixte Jejus nhÿ hā kapêr jahkre o ixpa xwÿnh jakamā kot paj inhma Kris kwÿjê kutā amarî ixàpkur prām nê māmri mē kutā apku. Ja tanhmā kute hkêt tā kot paj ã amnhî nhîpêx anhÿr kêt nê. Kot paj ixàpkur kaxyw nê amnhî pānhā amnhîre nê rî kormā apku. Na pa hte ã amnhî nhîpêx anhÿr o ri mē akôt ixpa. ⁵ Rÿ kot pa ixkwÿjê pyrā nê inhma Kris kôt ixkwÿjê hō ho ixprō hprām nê māmri ho ixprō. Nê wa ma krî piitā hkôt Kris kwÿjê kukwak ri ixàpkur o ixpa hprām nê wa māmri ã amnhî nhîpêx anhÿr o ixpa. Ja mex kēnā. Na hte ã Simāw Pêtre mē Jejus tō kot hapujaja amnhî nhîpêx anhÿr o pa nhÿm ja tanhmā kēp kute hkêt. No ãm mē hkînhā ixprō hkêt na pa hte ri ixpa.

⁶ Nê ixkwÿjaja na htem apkur xà hpānhā àpênh o pa hkêt nê. Na htem Jejus nhÿ hā kapêr jarênh o ri pa nhÿm hte Jejus kwÿjaja mē kām mē apkur xà gō nhÿm mē amarî hkur o pa. Tā no pa na pa hte Panāpe mē wa ã amnhî nhîpêx anhÿr kêt nê. Na pa hte wa mry kà ho ixkre nhîpêx nê mē kām ho wēnê nê hpānhā amnhîm awjaprō. Na pa hte wa ã amnhî pa kukwak ri ixujaprōr nê ho ixàpkur o ri ixpa anê.

⁷ Mē kām pur kām harôj jamÿnh o mē pa xwÿnhjaja na htem amarî hkwÿ jamÿ nê ho apkur o pa. Nê motre jamār o mē pa xwÿnhjaja haxwÿja amarî hkà kagô janê nê ho hkôm o pa. Nê pôristijaja na hte mē ò pahija mē àpênh pānhā mē kām amnhîrer o

pa. Jajê piitā na htem mē àpênh pānhā mē kām amnhîrer o pa. Ja pyrā nê te ixpê mē amā ixàpênh o ixpa xwÿnh pyrāk jakamā ixte mē ajahkreta pānhā kot ka mē inhma inhō ho apa nhÿm ja määnēn mex nê. ⁸ No ãm papxipix na pa hte ja mex ã harênh kêt nê. Tîrtûm kapêr ã kagà htûm haxwÿja kot ja mex ã harênh. ⁹ Kamā na pre finat Mojesja Tîrtûm nhÿ hā harênh kot:

Koja akrit amā àpênh o pa ka omu nê ho mex nê. Kām ò mex nê.

Anhÿr o kot harênh. Xà na pre Tîrtûmja ãm mē pahkrit pix kukamā ukapri nê ã harênh anê nà? Nà kot anhÿr kêt. ¹⁰ Määnēn mē pahpê panhî kaxyw na pre ã ja jarênh anê. Mē pahte mē hpur kām paxàhkre xwÿnhjaja nê mē pahte kamā paxujamÿnh o papa xwÿnhjaja. Jajê kaxyw mē pahte pur kukwak ri amarî paxàpkur o ri papa kaxyw ã pre ã ja jarênh anê. ¹¹ Tā ja pyrā nê na pa hte mē awÿr mō nê mē amā Tîrtûm kapêr jarênh o ri mē akôt ixpa. Nê mē akôt ho mē ajahkre ho ri ixpa ka htem inhma ixàpênhta pānhā amnhîrer kêt nê. Ixkwÿjaja kot Tîrtûm kapêr o mē ajahkre hpānhā mē ate mē kām amnhîrer tā pa inhma amnhîrer kêt nê. Na pa pre mē ajahkreta pānhā mēmoj tā mē awÿr kêt nê. ãm nhām ixàpênh òta kukwak ri na pa hte ixàpkur o ri ixpa.

¹² Nê na hte mē ixkwÿjaja mē awÿr mra nê Tîrtûm kapêr o mē ajahkre o ri mē akôt pa. Hāmri nê hpānhā mē apkur xà hā mē awÿ ka mē kām mēmoj gō. No kêt pa na pa hte mē urāk nê ixàpkur xà hā mē awÿr kêt nê. Kot pa apu hā mē awÿ ka mē tanhmā ixto akapêr to nê axpên mā ijarênh o:

—Pêr ãm mē pahte kām amnhîrer pix kaxyw na hte Pawre mē pahwÿr mra nê mē pamā Jejus Kris kot tanhmā mē panê amnhî nhîpêx to hā harênh o pa. Pêr ãm apkur xà pix prām xàj ã kot mē pamā ujarênh anhÿr o pa. Jakamā kot puj mē kuma nê ãm kuma.

Anhÿr o axpên mā ijarênh pymaj na pa hte mē ajahkre hpānhā mēmoj tā mē awÿr kêt nê. Na pa hte ãm mry kà ho ixkre nhîpêx nê ho wēnê nê ja pix kukwak ri ixàpkur o ri ixpa. Nê amarî ri mē ajahkre ho ri mē akôt ixpa.

13 Nē Tirtūm mā amnhī jarēnh xà hā ixkre kamā mẽ àpēnh xwýnhjaja na htem hwýr mẽ mrar xwýnhjaja mẽ àpēnh pānhā mẽ kām amnhīre. Nē mẽ kot mẽ kām Tirtūm mā mẽmoj nhōr o kuhē xwýnhjaja na htem mǎānēn mẽ àpēnh pānhā mẽ kām amnhīre. 14 Nē Pahihti Krisja na pre ja hā mẽ pakukamā pahtā karō kot:

–Kēr ka mẽ kot tanhmā mẽ amā ijarēnh to ho ri mẽ pa xwýnhjē mǎ amnhīrer o ri apa. Anē.

15 Tā no na pa hte aa mẽmoj tā ixàhwýr kēt nē. Nē mẽ ate inhmā amnhīrer kaxyw pa mẽ amā ja jarēnh kēt nē. Aa ixte mẽmoj tā mẽ awýr kēt. Kot paj apu anē nē ixpijaam nē. Rý kot pa apu anē nē mẽ akukwak ri ixàpkur o ri ixpa hāmri nhūm mẽ akwýjaja ja hā ixpumu nē hā ijarēnh o:

–Tk. Na hte amarī mẽ pajahkre o ri pa hkēt nē. Ām mẽ apkur xà pix prām xàj na hte ā mẽ pajahkre ho pa anē. Anē.

Jakamā na pa hte mẽmoj tā mẽ awýr kēt nē. 16 Ixte mẽ amā mẽ ujarēnh mexja jarēnh o ri ixpa htā na pa hte ja hā amnhī to jarkrar o ri ixpa hkēt nē. Pahihti Jejus na pre ja hā inhmā karō pa hte kām ho anhýr o ri ixpa. Kot paj kām ho anhýr kēt nē ixpunuj nē ri ixpa. 17 Kēp ām amnhī krā hkôt mǎn tanhmā mẽ amā ixujarēnh to ho mẽ akôt ri ixpa ronhýx pa hpānhā ixàmnhīx kàxpore hā mẽ awý. No ām ā ixte amnhī nhīpēx anhýr kēt. Tirtūm tām kot inhmā ja hā karō jakamā na pa hte amarī ixàmnhīx ri mẽ amā kapēr jarēnh o mẽ ajahkre ho ri mẽ akôt ixpa nē mẽmoj tā ixàhwýr o ri ixpa hkēt nē. 18 Ixte amarī ri mẽ amā mẽ ujarēnh mexta jarēnh o ri ixpaja na inhmā hprām. Ja na inhmā mex. Na pa hte ā amnhī nhīpēx anhýr o ri ixpa nhūm ja inhmā mex pa ixkīnh nē ri ixpa. Jakamā na pa hte hpānhā ixàhwýr kēt nē. Nē inhmā mẽmoj prām o ri ixpa hkēt nē. 19 Nē nhām mẽ kām tanhmā ixàpēnh to ho ixpa hkēt tā pa hte mẽ piitā tanhmā mẽ kām amnhī nhīpēx to ho ri ixpa. Pē mẽ kām Jejus kapēr jarēnh o ri ixpa. Jakamā na mẽ ra ohtō nē ixujarēnh ma nē amnhī kaxyw Jejus kôt hamaxpēr nē hkôt amnhī xunhwý.

Pawre kot tām mẽ piitā mẽ hipēx o pa hā amnhī jarēnh

Wam Korit 10.33

20 Nē na pa hte Ijaewjē hwýr ixpa nē mẽ kot amnhī nhīpēx kôt amnhī nhīpēx o ri mẽ hkôt ixpa. Ixte mẽ kurom Tirtūm kot finat Mojes mā mẽmoj tā karō hkôt amnhī nhīpēx o ixpa hkēt tā mẽ hkôt ri ixpa nē mẽ urāk nē hkôt amnhī nhīpēx o ri ixpa. Mē kot ja hā ixpumunh nē ixte mẽ kām Jejus jarēnh mar nē ixpyrà nē amnhī kaxyw hkôt hamaxpēr kaxyw.

21 Tā pa hpānhā mẽ kēp Ijaew kēt xwýnhjē hwýr ixpa nē mẽ kot amnhī nhīpēx kôt amnhī nhīpēx o ri mẽ hkôt ixpa. Mē kot ja hā ixpumunh nē ixkapēr mar nē ixpyrà nē amnhī kaxyw Jejus kôt hamaxpēr kaxyw. Tirtūm mẽ Kris wa hamaxpēr xà hkôt na pa hte ahpýnhā mẽ kot amnhī nhīpēx xwýnhjē hwýr mra nē ā amnhī nhīpēx anhýr o ri mẽ hkôt ixpa.

22 Nē na pa hte kormā mẽ kot Kris kôt amnhī xunhwýr tohtuj anhýr xwýnhjē hkôt ri ixpa nē te ixte ho mẽ urāk nē kormā hkôt amnhī xām nyw pyrāk o amnhī nhīpēx o ri mẽ hkôt ixpa. Mē kot ja hā ixpumunh nē ixkapēr mar nē hkôt amnhī nhīpēx mex kaxyw. Ā na pa hte mẽ piitā mẽ hkôt ri ixpa nē mẽ hkôt amnhī nhīpēx o ri ixpa anē. Mē kot ja hā ixpumunh nē inhmā nē ixpyrà nē Kris kôt amnhī nhīpēx tỳx kaxyw. 23 Mē kot mẽ ujarēnh mex mar kaxyw na pa hte mẽ piitā mẽ hkôt ā amnhī nhīpēx anhýr o ri ixpa. Tirtūm kot mẽ ho hkra nē mẽ ho mex kaxyw. Nē mǎānēn pa kot mẽ hā ixto mex kaxyw.

Pawre kot htỳx ri amnhī nhīpēx kēt ā kot amnhī jarēnh

Sikūn Ximotre 4.7; Eprêw 12.1-3

24 Mē hprôt xwýnhjaja na htem hprôt tỳx no nhūm mēhō pixi nē wam hkwyjé re nē wam tēn pōj nhūm htem ja hā omu nē kām mẽ hkīnhxà gō. Ja pyrā nē kēr ka mẽ apiitā tām amnhī nhīpēx mex rāhā ho ri apa kē Tirtūm mẽ apumu nē nhýrmā ja pānhā mẽ amā mẽmoj mex gō.

25 Nē mẽ hprôt xwýnhjaja na htem mẽ hkīnhxà hpyr prām xàj mẽ hprôt xà hā arīgro hwýr apkati mẽ hprôt o kuhē. Prôt tỳx prām xàj. Tā mẽ hprôt xà hā arīgrota ā

nhũm hkwýjê pê amnhĩ to wa nẽ amnhĩm hkĩnhxà py. Nom koja hkĩnhxàja kritpêm kãm mex ry hkêt nẽ. Koja gaa nẽ hapêx tokyx anẽ. Tã nom kot puj mẽ Tirtũm kapêr kôt amnhĩ nhĩpêx mex o ri papa. Nẽ mẽ hprôt xwýnhjê kot hkĩnhxà hpyr prãm xàj apkati mẽ hprôt o kuhêta pyrà nẽ apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nẽ nhỹrmã mẽ pamã hkĩnhxà mex õ gõ. No ãm jar hkĩnhxà kurom koja aa mẽ pahpê hapêx kêt nẽ. Koja mẽ pamã mex rãhã ho rãhã.

²⁶ Nẽ na hte mẽ hprôt xwýnhjaja htýx ri tanhmã hprôt to ho pa hkêt nẽ. Na htem hkwýjê pê amnhĩ to wa kaxyw hprôt nẽ nhỹri mẽ àhuk xàta pix pumunh pê hwýr hprôt nẽ mra hãmri nẽ kamã ahtwý. Nẽ kamã àhuk pix kukamã hamaxpêr o hprôt týx nẽ mra. Ja pyrà nẽ na pa hte apkati mẽ Tirtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw.

Nẽ mẽ pijapu mex xwýnhjaja na htem htýx ri nhỹhýnh axpên tak kêt nẽ. Na htem nhỹhýnh kot mẽ htao o mẽ rênh xà pix kamã mẽ htao o mẽ rênh kukamã hamaxpêr pê kamã mẽ htao. Ja pyrà nẽ na pa hte ixtýx ri tanhmã amnhĩ nhĩpêx to ho ri ixpa hkêt nẽ. Na pa hte Tirtũm mã ijamaxpêr pê tanhmã amnhĩ nhĩpêx to rãhã ho ixpa. Kot nhỹrmã inhmã mẽmoj mex nhõr kaxyw. ²⁷ No na pa hte ixtýx ri amnhĩ jamaxpêr xà hkôt tanhmã amnhĩ nhĩpêx to ho ri ixpa hkêt nẽ. Kot pa ã amnhĩ nhĩpêx anẽ nẽ ixte mẽ kãm Jesus kapêr jarênh o ri ixpa htã ãm ri ixtýx ri ã amnhĩ nhĩpêx anhýr kaprý nhũm Tirtũmja tee ri ja hã ixpumu nẽ inhmã mẽmoj mex nhõr kêt nẽ.

10

Ijaew kot amnhĩ nhĩpêx

Rõmãn 15.4; Eprêw 3.8-11; Jutre 5

¹ E Kris kôt ixkwýjaja. Kot paj mẽ amã amnepê mã mẽ ixpê Ijaew hkukamã mẽ inhĩgêjtaja tanhmã mẽ harênh to ka mẽ inhma. Mẽ kot pahi finat Mojes kôt ri mẽ pa xwýnhjaja kot paj mẽ amã harê. Mẽ pahte mẽ uràk nẽ pahtýx ri amnhĩ nhĩpêx

pymaj kot paj mẽ amã tanhmã mẽ harênh to ka mẽ inhma. Mãn ka mẽ arĩ mẽ harênh ã anohtýx japêr. Na prem piitã pika pê Ejit kamã pa htã kurũm kator pa. Hãmri nẽ ma kapôt ã kakrã pumunh o hkôt pa ho pa. Pry hkêt jakamã nhũm pre Tirtũm tanhmã kakrã hto nhũm ma mẽ hkukamã pa nhũm mẽ omu nẽ hkôt pa. Hãmri nẽ ra gõ xujanãr mẽ kot kãm: “Gõ kamrêk” anhýr xwýnhja wýr pøj nẽ tee ri rêr prãm xàj amnhĩ kukamã hamaxpêr. Hãmri nhũm Tirtũm mẽ kãm hkôt ã ho amgrã nhũm mẽ hkôt mex pê rêr pa nẽ axte kakrã hkôt pa ho pa. ² Finat Mojes kot mẽ o pa jakamã nhũm prem kêp hkwý hã amnhĩ jarê nẽ kãm amnhĩ jarênh o:

—Nà kot paj mẽ akapêr ma nẽ akôt ri amnhĩ nhĩpêx o ixpa. Anẽ.

Te mẽ pahpê Kris kwý hã amnhĩ jarênh kaxyw mẽ kot gõx kãm mẽ pahkrã kumrãr nhũm mẽ pahte Kris mã amnhĩ jarênh ta pyràk. ³ Na prem kapôt ã ri pa nhũm Tirtũm tãm kaxkwa rũm mẽ hwýr mẽ apkur xà rẽ nhũm mẽ hkawrà nẽ ho apkur o pa. ⁴ Tã ra kôr xàj hiroto nhũm Tirtũm tanhmã mẽ kãm kên prêkja to nhũm kurũm mẽ kãm gõ axkapĩnhũm mẽ ho ixkõ nẽ akupým hihtýx. ã Krisja mẽ hkôt mẽ ho mẽ hihtýx o pa anẽ. Mẽ kot no ho omunh kêt tã nhũm mẽ hkôt mẽ ho mẽ hihtýx o pa.

⁵ Tã no nhũm mẽ ohtô nẽ Tirtũm kôt amnhĩ nhĩpêx kêt nẽ. Kot mẽ ho mex kumrêx tã nhũm mẽ ãm amnhĩ tã omu nẽ ãm omu nẽ kapêr kôt amnhĩ nhĩpêx kêt nẽ. ãm kapêr kwým ri tanhmã amnhĩ tomnuj to ho pa nhũm tee ri amnhĩ tã mẽ omu nẽ tanhmã mẽ ho nhũm mẽ hkwýja hpikaprãr pa. Hãmri nhũm arĩ mẽ htír xwýnhjaja kapôt ã mẽ hagiênh pa nẽ axte ma pa.

⁶ Jakamã kwa kêr pu mẽ kot ã amnhĩ nhĩpêx anhýr ã mẽ harênh ma nẽ hã pano htýx nẽ ho papa hãmri nẽ ho mẽ uràk kêt nẽ. Mẽ uràk nẽ pahtýx ri tanhmã amnhĩ nhĩpêx to ho ri papa hkêt nẽ.

⁷ Nẽ na pre mẽ hkwýjaja sãnti kutã hkõn krã ho rôrôk nẽ hkrĩ nẽ kãm amnhĩ jagrer pê amnhĩ to kuwý. Tirtũm kapêr ã kagã htũm kot mẽ kot amnhĩ nhĩpêx anhýr ã mẽ harênh kot:

Na prem sãnti kutã apkur o hkrĩ nẽ kãm amnhĩ jagrer o hkrĩ nẽ gaa nẽ pipãnh

pix o pa. Jao axpên kamã hpijaàm kêt o pa.

Anhÿr jakamã kwa kêr pu mẽ ã mẽ kot amnhĩ nhĩpêx anhÿrja ã pano htÿx nê ho mẽ uràk hkêt nê.

⁸ Nê na pre mẽ hkwÿjaja htÿx ri mjên nê hprô kuhpa hã nhãm ri mẽ kamã hpijaàm kêt o pa. Mÿrapê nhũm arĩgro pixi hã mẽ ohtô rax kumrêx nê axkaprã. Mẽ kêp 23.000 nê pikaprãr pa. Tã ã Tĩrtũm kot mẽ panhĩpêx anhÿr pymaj kêr pu mẽ ja hã pano htÿx nê ho mẽ uràk kêt nê. Æm kwarĩ ho kwarĩ.

⁹ Nê na pre mẽ hkwÿjaja axtem nê htÿx ri tanhmã axpên mã Tĩrtũm jarênh to nê harênh o:

—Nà Tĩrtũmja gryk tokyx anhÿr kêt jakamã kwa pu mẽ ã amnhĩ tomnuj anhÿr o papa. Koja mẽ pahpumu nê tanhmã mẽ pahto hkêt nê.

Anhÿr tã nhũm tee ri ja hã mẽ kuma nê mẽ omu nhũm ja kãm mex kêt nê nhũm mẽ hwÿr kagã xoprê nhõ wenên xihtÿx kwÿ rê nhũm mẽ hwÿr mra nê mẽ hkamnhar o mẽ hkwÿjê pa. Tã ã kot mẽ panhĩpêx anhÿr pymaj kwa kêr pu mẽ ja hã pano htÿx nê mẽ uràk nê amnhĩ tã Tĩrtũm kamã pajamak o papa hkêt nê. Kwarĩ ho kwarĩ.

¹⁰ Nê na pre mẽ hkwÿjaja axtem nê Tĩrtũm o kapêr punuj nê nhũm tee ri amnhĩ tã mẽ kuma nê mẽ hwÿr kapêr o wrÿk xwÿnh mẽ nhũm ma mẽ hwÿr wrÿ nê ÿ hã mẽ hkwÿjê nhĩmex. Tã ã kot mẽ panhĩpêx anhÿr pymaj kwa kêr pu mẽ ja hã pano htÿx nê ho mẽ uràk nê Tĩrtũm o pakapêr punuj kêt nê.

¹¹ Na pre mẽ ixpê Ijaew nhĩgêjtaja ã htÿx ri amnhĩ nhĩpêx o pa anê. Tĩrtũm kapêr ã kagã htũm kot ã mẽ kot amnhĩ nhĩpêx anhÿr piitã harênh par. Mẽ panhõ ejêp kaxyw. Mẽ pahte kamã harênh nê mẽ harênh mar tÿx nê mẽ uràk nê ã amnhĩ nhĩpêx anhÿr kêt kaxyw. Ra Jesus akupÿn mẽ pahwÿr wrÿk xà hã arĩgro hkukamã grêre jakamã kwa kêr pu mẽ kutêp mẽ kurom kapêr kôt pix mã ri amnhĩ nhĩpêx mex rãhã ho ri papa.

Mẽ pahte mẽmoj punuj nê amnhĩ to htÿx ã mẽ pamã karõ

Matêwre 4.1, 6.9-13; Wam Korî 1.8; Sikũn Pêtre 2.9; Jutre 24

¹² Tã kêr ka mẽ ã Ijaew kot amnhĩ nhĩpêx anhÿr ã mẽ harênhja ma nê ã ajamaxpêr anhÿr kêt nê. Rÿ mẽ ajamaxpêr o:

—Nà mẽmoj piitã kutã ixihtÿx kênã kot pa hkêt mẽ uràk nê ã amnhĩ nhĩpêx anhÿr o ri ixpa.

Anhÿr o mẽ ajamaxpêr kêt nê. Kot kaj mẽ ã amnhĩ jarênh anê nê ra mẽ uràk nê tanhmã amnhĩ tomnuj to.

¹³ Nê na prem kapôt ã pare ri omnuj nê ri pa. Nhũm mẽkarõmnuti tanhmã mẽ hkrã hto nhũm mẽ tanhmã amnhĩ tomnuj to ho pa. Ja pyrã nê na hte arĩ mẽ pahte amnhĩ tomnuj hprãm xaj tanhmã mẽ pahkrã hto ho pa. Mẽ pahpiitã ã mẽ pahto anhÿr o ri mẽ pahkôt pa. Nom nhũm Tĩrtũm ra kot mẽ pamã amnhĩ jarênh xà hkôt mẽ panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamaxpêr nhũm ja hã mẽ pahpumu nê mẽ panê mẽkarõmnuti mã kapêr. Nê kutã mẽ pahto paxihtÿx nê pu mẽ ÿ hã amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

Mẽ kot sãnti mã mẽmoj nhõr xwÿnhjê jarênh

Wam Korî 8.1-13; Karatas 4.8; Apokarip 9.20

¹⁴ Jakamã e Kris kôt ixkwÿjaja. Kêr ka mẽ amnhĩ kaxyw sãnti hkôt ajamaxpêr o ri apa hkêt nê. Nê amnhĩ to hwÿr kêt nê. Æm kwarĩ ho kwarĩ.

¹⁵ E mẽ axàhpumunh tÿx ã amnhĩ jarênh jakamã kot paj mẽ amã mẽmoj jarê ka mẽ aprĩ hã inhmar tÿx japêr. ¹⁶ Nà na pu htem tõiã Jesus kot mẽ panê htyk mã pajamaxpêr kaxyw axpên wÿr akuprô. Hãmri nê mẽmo kagô hkwÿ ru nê Tĩrtũm mã mex ã harê nê mẽmoj o pahkôm pê Jesus kot mẽ panê hkamrô pikapĩr mã pajamaxpêr. Nê hpãnhã pãwti hõ py nê axpên mã ho hkry nê mẽ kot Kris pĩr nê ï kamã hkamnhwÿr nhũm mẽ panê htykja mã pajamaxpêr pê kuku. ¹⁷ Pãwtita ãm pixire htã pu htem axpên mã ho hkry nê pahpiitã kuku. Mẽ pahpê Kris kwÿ hã mẽ pahte

amnhĩ jarēnh nhũm mẽ pahkwỳ kot ja hã mẽ pahpumunh kaxyw. Te mẽ pahtipxi nē ri mẽ papa pyrāk nē pāwti pixire htā pu mẽ pahpiitā kuku.

¹⁸ E kot paj hpānhã mẽ amã amnepē mã Ijaew kot tanhmã amnhĩ nhĩpêx to jarē ka mẽ inhma. Na pre htem Tĩrtũm mã mex ã harēnh nē kãm amnhĩ nhõr ã kot amnhĩ tã mẽ omunh kaxyw nhũm prem tanhmã amnhĩ nhĩpêx to. Jao kãm mẽ apkur xà hkwỳ gõ nē kãm mex o mex ã harē. Hãmri nē amnhĩ mã mẽmojta kwỳ xà nē hkur o hkrĩ. Jao ra Tĩrtũm mã mex o mex ã harē nē kãm kēp hkra hã amnhĩ jarē.

¹⁹ Nom mẽ kot sãnti mã mẽmoj nhõr xwỳnhjaja na htem kãm mẽmo mẽ apkur xà hkwỳ gõ nom ãm kãm õr kaprỳ. Tanhmã kot we amnhĩ to nē amnhĩ tã mẽ omu? Mo rĩt kaxyw no? ãm mẽ ĩhkra ho mẽ kot amnhĩm hipêx kēnã. Jakamã na htem ãm kãm mẽ apkur xà hkwỳ nhõr kaprỳ. ²⁰ Mẽ kot sãnti mã mẽmoj nhõr xwỳnhjaja na htem Tĩrtũm mã õr kêt nē. Mēkarõmnuti mã na htem kugõ. Jakamã kot kaj mẽ urāk nē sãnti mã mẽmoj gõ nē apē mēkarõmnuti hkwỳ hã amnhĩ to amnhĩrit nē apē hkwỳ hã ri apa. Jakamã mẽ ate sãnti mã mẽmoj nhõrta na inhmã hprãm kêt kumrēx. ²¹ Kot kaj mẽ panhõ Pahihti Jejus kot mẽ panē htyk ã mẽmoj kagõ hkwỳ ho ixkõ hãmri nē ma mra nē hpānhã sãnti pē mēkarõmnuti hã mẽmoj to ixkõ. Hãmri nhũm Tĩrtũmja tee ri ja hã mẽ apumu nhũm ja kēp omnuj tỳx nē. Rỳ ka mẽ Pahihti Jejus kot mẽ panē htyk ã pāwti hkwỳ hku nē hpānhã ma mra nē sãnti pē mēkarõmnuti hã mẽmoj hku. Hãmri nhũm Tĩrtũm kēp ja omnuj tỳx nē. Mẽ pahte ã amnhĩ nhĩpêx anhỹrja na axpēn kuhpa hã. ²² Jakamã kot ka mẽ ã amnhĩ nhĩpêx anē nē te ra mẽ amã mēkarõmnuti hkĩnh nē mãnēn amã Tĩrtũm kĩnh pyrāk o amnhĩ nhĩpêx. Nē te Tĩrtũm kurom mẽ kajaja mẽ axàhpumunh tỳx pyrāk o amnhĩ nhĩpêx. Nhũm tee ri amnhĩ tã mẽ apumu nē mẽ akamã gryk tỳx nē. Kwa mẽ okora. Koja Tĩrtũm akamã gryk ka amex kêt kumrēx.

Mẽ pamã Kris kôt mẽ pahkwỳjê hkĩnh pē mẽ ho mex ã mẽ pamã karõ

Matêwre 20.28; Rõmãn 14.1-15.7; Piripos

2.1-4

²³ Nē na htem tõhã amnhĩ jarēnh o:

—Nà kot pa inhmã mẽmoj to anhỹr prãm nē ixãmnhĩx ã amnhĩ nhĩpêx anhỹr o ri ixa. Anē.

Tã no ãm mẽmoj piitã mẽ pamã mex kêt. Na htem kãm mẽmoj to anhỹr prãm xà hkôt mẽmoj piitã tanhmã ho ho ri pa nē tanhmã amnhĩ tomnuj to. Hãmri nhũm mẽ hkwỳjaja ja hã mẽ omu nē mẽ urāk nē tanhmã ri amnhĩ tomnuj to. Jao Kris kôt amnhĩ xunhwỳr tỳx kêt nē. ²⁴ Jakamã kwa kēr pu mẽ amnhĩ pix kukamã pajamxpēr pē tanhmã amnhĩ nhĩpêx to ho papa hkêt nē. Mãnēn amnhĩ kwỳjê hkukamã pajamxpēr pē tanhmã mẽ ho mex to ho ri papa pē tãm ri amnhĩ nhĩpêx o papa.

²⁵ Nē kot kaj mẽ amnhĩ xàpkur xà japrõr kaxyw ma nhỹhỹm mra nē mãmrĩ axãmnhĩx ri amã mẽmoj prãm xà hkôt mẽmoj japrõ. Nom kēr ka mẽ axujaprõrja kēp sãnti xàpkur xà hã mẽ hkukjēr kêt nē. ãm axãmnhĩx ri mẽ kēp mẽmoj japrõr o ri apa. ²⁶ Tĩrtũm kapēr ã kagã htũm kot ja jarēnh kot:

Pika piitã hkôt mẽmoj piitã kēp Tĩrtũm nhõ na. Anē.

Jakamã mẽ mãmrĩ axãmnhĩx ri mẽmoj piitã haprõ nē mẽmoj piitã hkur o apa.

²⁷ Tã koja mẽ kēp Kris kwỳ hkêt xwỳnhjê hõ ate kutã axàpkur kaxyw amnhĩ wỳr awỳ ka amã hwỳr amõr prãm nē mãmrĩ ma hwỳr mõ. Nhũm mẽmoj to amã anhõ ka axãmnhĩx ri mãmrĩ aku. No ri tee ri amnhĩ kukamã ajamxpēr nē tanhmã hã hkukjēr to hkêt nē. Rỳ kãm:

—Kwa xà we mryja sãnti hã mẽ apkur xà na nà?

Anhỹr o hã mẽ hkukjēr kêt nē. ãm mãmrĩ axãmnhĩx hkur o akrĩ. ²⁸⁻²⁹ Nom koja Kris kôt mẽ kot amnhĩ xãm tohtuj anhỹr xwỳnhjê hõ mẽ awỳr axà nē tee ri ja hã apumu nē amã:

—Kwa sãnti hã mẽ apkur xà na ka ri mẽ kutã hkur o akrĩ.

Anhỹr o amã kapēr ka ama nē hkaga kurē kumrēx nē hkur kêt nē. Amã mex tã Kris kôt atõja kēp omnuj jakamã ka hkaga nē hkur kêt nē. No kot ka ãm ama nē arĩ hkur o anhỹr japēr. Kot amã harēnh xwỳnhta kēp omnuj tã ka arĩ noo mã hkur japēr. Nhũm ja hã apumu nē tee ri Tĩrtũm kapēr kukamã tanhmã hamxpēr

to. Hāmri nē apyrà nē kuku nē gaa nē tee ri amnhĩ kukamã hamaxpēr nē amnhĩ mã:

—Hêxta waa nē. Sânti nhōja mex kêt tâ pa ri kuku. Kwa na pa pēr hkurja o amnhĩ tomnuj nē. Hêxta waa nē. Anē.

Hāmri nē tee ri amnhĩ kukamã hamaxpēr o hkaprĩ nē. Ā kot amnhĩ nhĩpêx anhÿr pymaj koja mēhō ã mēmo mē apkur xà nē amã kapēr anē ka ama nē hkaga kurê kumrêx. Jao amnhĩ pix kukamã ajamaxpēr kêt nē. Mãânēn Kris kôt atō nē atōxjê mex kukamã ajamaxpēr. Nom koja amã kêp sânti hã mē apkur xà hã harê ka ama nē ã ajamaxpēr anhÿr japêr nē ajamaxpēr o:

—Nà kêp omnuj tâ kot paj mamrĩ kuku. Ja inhmã mex kênã. ³⁰ Ra ixte Tirtũm mã harênh nē ixamnhĩx hkur o inhÿr kênã kot kêt ã nē inhmã kapēr anē. Anē.

Kwa mē ã ajamaxpēr anhÿr kêt. Kot kaj mē ã ajamaxpēr anē hāmri nē Kris kôt atō rÿ atōx mex kukamã ajamaxpēr kêt nē.

³¹ Jakamã kêr ka mē tãm tanhmã amnhĩ nhĩpêx to ho ri apa. Nē axapênh mex nē. Kêr kê mē piitã ja hã mē apumu nē mē apumunh kôt amnhĩm Tirtũm mex ã harê.

³² Nē kêr ka mē piitã mē noo mã tãm ri amnhĩ nhĩpêx o apa. Ijaew noo mã nē Ijaew kêt xwÿnhjê noo mã. Nē Jejus kwÿjê noo mã. Mē piitã mē noo mã tãm ri amnhĩ nhĩpêx rãhã ho ri apa. Mē kot tee ri mēmoj tâ mē apumunh nē hpijaàm pymaj ka mē tãm ri mē piitã mē noo mã tanhmã amnhĩ nhĩpêx mex to ho ri apa. ³³ Na pa hte ã amnhĩ nhĩpêx anhÿr o ri ixpa. No na pa hte pa amnhĩ pix kukamã ijamaxpēr kêt nē. Mē piitã mē mex kukamã na pa hte ijamaxpēr o ri ixpa. Pê tanhmã amnhĩ nhĩpêx to ho ri ixpa. Mē kot ja hã ixpumunh nē ixpyrà nē Jejus kôt amnhĩ xunhwÿr nē ãm kôt pix mã ri amnhĩ nhĩpêx o pa kaxyw.

11

¹ Na pre hte Kris ã ã amnhĩ nhĩpêx anē nē mē piitã mē mex kukamã hamaxpēr rãhã ho ri pa. Tã na pa hte uràk nē ã amnhĩ nhĩpêx anē. Jakamã kwa kêr ka mē ixpyrà nē ã amnhĩ nhĩpêx anhÿr o mãn ri apa.

Mēnijaja mē mjên ã hpijaàm ã mē kãm karō
Epes 5.22; Wam Pêtre 3.1-6

² Nē na ka xep htem arĩ ra ixte tanhmã mē amã ixkapêr toja mã ajamaxpēr tÿx o ri apa. Na pa pre Kris kôt mē pahtō nē mē pahtōxjaja xepên wÿr pikuprōnh nē tanhmã amnhĩ nhĩpêx to hã mē amã karō ka prem inhma nē mē uràk nē ã amnhĩ nhĩpêx anē. Ām hāmri na ka htem ã amnhĩ nhĩpêx anhÿr o apa. Ja na inhmã mex.

³ Na pa pre krĩ hō kamã mēnijaja kot amnhĩ krã hpro hã mē amã mē harê. Ka prem inhma nhũm mē akwÿjaja kãm ja mex nē nhũm mē akwÿjaja tee ri ja kukamã ajamaxpēr. No mēmo kaxyw na hte mēnijaja amnhĩ krã hpro? E kot paj ixprĩ hã mē amã ja jarê ka mē inhma. Nà Tirtũm kêp Kris jamãr xwÿnh nhũm Kris kêp Tirtũm mã mē inhmyjê jamãr xwÿnh. No mē anijaja mē amjên kêp Kris mã mē ajamãr xwÿnh. Na hte mēnijaja ohtō nē ra mē mjên ã amnhĩ to amnhĩrĩt kaxyw amnhĩ krã hpro nē ri pa. No mē inhmyjaja na pa htem ã amnhĩ nhĩpêx anhÿr kêt nē. Na pa htem amarĩ ixkrã hkênh nē ixpa. ⁴ Jakamã na pa htem Tirtũm kapêr mar xà hã ixkre hwÿr xepên wÿr akuprō nē Tirtũm nhÿ hã mē anijê mã kapêr jarênh o ixkuhê. Rÿ Tirtũm mã tanhmã mē pajarênh to. No ãm amnhĩ krã hpro hkêt rãhã kãm mē ajahkre rÿ kãm mē pajarê. Kot pa mē amnhĩ krã hpro nē te mē apê ixprōjaja mē apê mē ijamãr xwÿnh ã mē ajarênh pyrãk. Jao te mē ixte mē ijamãr xwÿnh Kris ã ixpijaàm kêt pyrãk o amnhĩ nhĩpêx. ⁵ No mē anijaja mē ixte Kris mã mē ajamãr xwÿnh jakamã na ka htem Tirtũm nhÿ hã mē inhmã kapêr jarênh rÿ kãm mē pajarênh kaxyw nē amnhĩ krã hpro. Mē ixte Kris mã mē ajamãr xwÿnhjê hã apijaàm kaxyw ã amnhĩ nhĩpêx anē nē mē amnhĩ krã hpro. Kot ka mē ã amnhĩ nhĩpêx anhÿr kêt nē te mē ate mē ixtã apijaàm kêt pyrãk o amnhĩ nhĩpêx nhũm mē amjên tee ri ja hã apumu nē hpijaàm nē. Te ate amnhĩ krã hkênh nē ri apa nhũm tee ri apumunh nē hpijaàm pyrãk. ⁶ Kot kaj mē amnhĩ krã hkênh nē ri apa nē amnhĩ kamã apijaàm nē ri apa. Mē anijaja na ka htem akrã hkĩ japjê nē kamã amex nē ri apa. No kot ka mē amnhĩm akrã hkênh nē apunuj nē amnhĩ kamã apijaàm nē ri apa. Jakamã kêr ka mē Tirtũm mã amnhĩ jarênh kaxyw

nē amnhī krā hpro. Nom kot ka mē amjên ã apijaàm kêt nē ri apa hprām japêr nē mamrī amnhīm akrā hkênh nē ri amnhī kuk ã apijaàm kêt nē ri apa.

⁷ No mē inhmyjaja na pa htem amnhī krā hpro hkêt nē. Te mē ixpê Tirtūm pyrāk nhūm mē anijaja te mē apê Tirtūm kra pyrāk o na pu htem axpên nhīpêx. Tirtūm krajaja na htem mēmoj tā Tirtūm mā karō hkêt nē. Ja pyrā nē mē anijaja na ka htem mē inhmyjê mā mēmoj tā karō kamā axihtỳx o apa hkêt nē. Na ka htem mē ixtā apijaàm kām mēmoj tā mē ixwỳ.

⁸ Amnepê mā Tirtūm kot mēmoj to kator krax rūm na pre myja kumrêx nhīpêx hāmri nē kêp ôkwa i hō kapa nē ho kām hprō nhīpêx. No na pre nija kumrêx nhīpêx nē ôkwa i ho kām mjên nhīpêx kêt nē. ⁹ Myja mā na pre hprō nhīpêx. No nija mā mjên nhīpêx kêt nē. ¹⁰ Jakamā kêr ka mē anijaja amjên ã apijaàm ã amnhī to amnhīrīt kaxyw hāmri nē mē inhmā Tirtūm nhỹ hā tanhmā akapêr jarênh to kaxyw rỳ kām amnhī jarênh kaxyw hāmri nē amnhī krā hpro nē akuhê. Hāmri nhūm Tirtūm kapêr o mē wrỳk xwỳnhjaja ja hā mē apumu nē hkīnh nē tee ri mē akukamā hamaxpêr kêt nē.

¹¹⁻¹² Nē wam ni kator xwỳnhhta na pre myja rūm kato. Tā na pa htem jarāhā mē inhmyjaja hpānhā mē anijê rūm ijapôj. Tirtūm jamaxpêr xà hkôt. Tām na pre ã mē pahte amnhī nhīpêx anhỹr kaxyw ã mē panhīpêx anê. Tā mē ixpê Pahihti Kris kwỳ hā mē inhmyjaja nē mē anijaja na pu htem ri ahte papa hkêt nē. Na pu htem axpên kutā pamā axpên hkīnh o papa nē mēmoj to axpên kutā panojarêt o ri papa. Nē axpên to presija ho papa. Na hte mē anijaja mē amjên o presija ho apa. Nē mē amyjaja na ka htem mē aprō ho presija ho apa. Tā kêr ka mē anijaja mē amjên ã apijaàm o ri hkôt apa. ¹³ Jakamā kwa mē kot amnhī krā hproja kukamā ajamaxpêr tỳx nē. Xà mē anhō krī kamā mēnijaja mē mjên ã hpijaàm ã amnhī to amnhīrīt kaxyw amnhī krā hpro nà? Koja mē ja kaxyw ã amnhī nhīpêx anhỹr japêr kê mē rī mē anoo mā Tirtūm mā amnhī jarênh kaxyw nē kupê xê hkwy ho amnhī krā hprō nē rī kām amnhī jarê. Nom koja mē ã amnhī

nhīpêx anhỹr kêt nhūm mēmyjaja tee ri ja hā mē omunh nē ho kapêr hkêt japêr hāmri kê mē rī amnhī krā hpro hkêt nē ri pa.

¹⁴ Mē kot mē pahte amnhī nhīpêx ã mē pahpumunh nē hkīnh kaxyw na pu htem tanhmā amnhī nhīpêx to ho ri papa. Na htem mē pahkrā hkī jarênh o: “Koja mēmyjaja hkrā hkī japjê nē ri pa nē ra kamā omnajti.” Anhỹr jakamā na pa htem amnhī krā hkênh nē ri ixpa. ¹⁵ No mē anijaja na htem mē ajarênh o: “Mēnijaja na htem hkrā hkī japjê nē ri pa nē kamā muxti.” Anhỹr jakamā na ka htem akrā hkī japjê nē ri apa. Mē akī te kêp mē akrā hpro xà pyrāk. Na ka htem ã amnhī nhīpêx anhỹr o apa.

¹⁶ E na pa ra mē amā krī hkwy kamā Kris kwỳ nijaja kot mjên ã hpijaàm ã amnhī to amnhīrīt kaxyw tanhmā amnhī nhīpêx to hā mē harê. Tā koja mēhō nija tee ri ja ma nhūm ja kêp omnuj japêr. Nhūm amnhī jarênh o:

—Kêt. Kot paj tanhmā inhmā amnhī nhīpêx to hprām xà hkôt tanhmā ri amnhī nhīpêx to ho ri ixpa. Koja inhmjên ja hā ixpumu nē hpijaàm nē rī tām.

Anhỹr ã amnhī jarê ka mē tee ri ã kot amnhī jarênh anhỹrja ã ama nē kām:

—Kwa nà ã ri ajamaxpêr anhỹr kêt nē. Na hte Kris kwỳjaja ã hamaxpêr anhỹr kêt nē. Anê.

Jejus tyk mā mē pajamaxpêr pé tanhmā mē pahte amnhī to hā mē pajarênh

Matêwre 26.26-30; Makre 14.22-26; Rukre 22.19-20

¹⁷ Nē na ka xep htem Tirtūm mā amnhī jarênh xà hā ixkre hwỳr axpên wỳr akuprō nē kamā amnhī to mex kêt nē. Na ka htem tanhmā amnhī tomnuj to pa tee ri mē ajarênh ma nē ixkaprī nē. Nē amnhīm mē amex ã mē ajarênh kêt nē. ¹⁸ Na ka xep htem axpên wỳr akuprō nē mēmoj tā axpên mā akir nē axpên pé anhgrà. Nē ahpỳnhā mēmoj mā ajamaxpêr jao ra mē amā axpên kīnh kêt nē. Na pa tee ri ã mē ajarênh anhỹrja ma nē ixkaprī htỳx nē. ¹⁹ Xà na hte Tirtūm ahpỳnhā tanhmā mē pahte amnhī anhīpêx to hā mē pahpumunh kôt kām mē pajapê hkêt ã amnhī jarê? Nà na hte ã amnhī nhīpêx anhỹr kêt nē. Kām mē pajapê ho axpên pyrāk kênā.

²⁰ Nê na hte Kris kwÿjê piitã tõhã axpên wÿr akuprõ nê Jejus tyk mã hamaxpêr kaxyw pãwti hkwÿ hku. Tã mẽ kajaja na ka xep htem ja kaxyw axpên wÿr akuprõ nom axtem nê Jejus tyk mã ajamaxpêr pê axàpkur kêt nê. ãm mẽ axàpkur pix kukamã ajamaxpêr nê axtem nê axàpkur rÿnh o akrî. ²¹ Jao amnhî pix kukamã ajamaxpêr. Mẽ akwÿjaja wam mrrar nê hpõx nê mẽ apkur xà hã mẽ hkrî xwÿnhjaja na xep htem hkwÿjê rom mẽõta pinh pa. Nê wĩhtija nhÿm mẽ mãânên hpenh pa nê axtem nê ho axpã. Jakamã nhÿm mẽ akwÿjaja kot amnhî to hapu nê hpõx xwÿnhjaja mẽmojta ã hprãr pa. ²² Kwa mon ka mẽ amã hprãm nê anhõrkwÿ kamã axàpkur kêt nê? Mẽ kot Tĩrtũm mã amnhî jarênh xà hã ixkre kamã na htem apkur rÿnh hkêt nê. Ka mẽ ã amnhî nhĩpêx anê nhÿm mẽõ hkêt xwÿnhjaja amnhî to hapu nê mra nê mẽõ hã prã nê amnhî kamã hpijaàm nê. Kwa xà kot pa ã mẽ ate amnhî nhĩpêx anhÿr ã mẽ ajarênh ma nê ixkĩnh nê mẽ ate amnhî nhĩpêx mex ã mẽ ajarê? Nà kot paj ã mẽ ajarênh anhÿr kêt nê.

²³ Pahihti Jejus na pre ja hã tanhmã inhmã kapêr to nê inhmã:

—Kêr ka mẽ tõhã axpên wÿr akuprõ nê axàpkur pê ixtyk mã mãn mẽ ajamaxpêr pê ã amnhî nhĩpêx anê nê ã amnhî nhĩpêx anê. Anê.

Jakamã kot paj ixprî hã amnhî xõ ri mẽ amã kot tanhmã inhmã kapêr tota jarê ka mẽ inhma. Nà Jejus kormã htyk kêt ri Jut Kariot ra kot põristi mã hã ãmnênh kaxyw nhÿm kamãt nhÿm Jejus mẽ ÿ hã mẽ ahkre xwÿnhjê mẽ apkur kaxyw hkrî hpa. Hãmri nhÿm Jejus pãwti hõ py nê o xa ²⁴ nê Tĩrtũm mã harê nê kãm:

—Pa Papaj. Nã ãm hãmri na ka hte mẽ inhmã mẽ inhõ mex o apa. Anê.

Nê hpãnhã pãwja o hkry pa nê ho mẽ kot ÿ hã mẽ ahkre ho mẽ pa xwÿnhjê nhĩpêx pa nê mẽ kãm:

—E na pa ã pãwti ho hkry nê mẽ amã õr anê. Koja mẽ ã inhĩpêx anê nê te mẽ kot ixto hkry hpar pyrãk o inhĩpêx pa amnhî xà htÿx kamã ijamak kãm ty. Nom mẽ anê kot paj ty. Jakamã e kêr ka mẽ ixwakre kamã tõhã axpên wÿr akuprõ nê ixte mẽ ate amnhî tomnuj pãnhã amnhĩrer kaxyw

mẽ anê ixtyk mã ajamaxpêr pê akĩnh nê pãwta kur o akrî. E mẽ mãmri axãmnhĩx aku. Anê.

²⁵ Hãmri nê hpãnhã kop kãm wĩhtita py nê o xa nê mẽ kãm:

—E kop kãm wĩhtija te kêp Tĩrtũm kot mẽ atã amnhî jarênh nyw xà jarênh pyrãk. Ixtyk kukwak ri koja mẽ ato hkra. Kot paj ty nhÿm ixkamrõ mẽ anê axkapĩ. Jakamã e. Mẽ kopja kamã wĩhti ho akõm o axpên nhĩpêx. Nê ho akõm pê ixte mẽ anê ixtyk mã ajamaxpêr. Anê.

²⁶ Tã ã kot amnhî jarênh anhÿr jakamã na pu htem axpên wÿr akuprõ nê pãwti hkwÿ hku nê mẽmo kagõ hkwÿ o ixkõ. Nê ho pahkõm pê axpên mã Jejus tyk jarênh o pahkrî. Tã kêr pu mẽ arî ã amnhî nhĩpêx anhÿr o ri papa rãhã nhÿm Jejus akupÿn mẽ pahwÿr wrÿ. ²⁷ Jakamã kot kaj mẽ tõhã mẽmo arĩgro hã kot mẽ panê htykja mã ajamaxpêr kaxyw axpên wÿr akuprõ. Hãmri nhÿm mẽ anhĩõ mẽ awÿr axà nê nhÿ. Nom axtem nê Jejus tyk mã hamaxpêr kêt japêr. Nê htÿx pãwti kur o nhÿ. Nê hkõt amarĩ mẽmo kagõ ho hkõm o nhÿ. Koja ã htyk mã hamaxpêr kêt rãhã amnhî nhĩpêx anê nê te Jejus o kapêr pyrãk o amnhî nhĩpêx. Te ho kapêr o:

—Nà Jejus amarĩ htyk nhÿm hkamrõ amarĩ hpikapĩr kênã. Na pre mẽ panê htyk kêt nê.

Anhÿr o ho kapêr pyrãk. ²⁸ Jakamã kwa kêr ka mẽ ate pãwta kur kaxyw nê taxy kormã tanhmã ate amnhî nhĩpêx to mã ajamaxpêr nê ajamaxpêr o:

—Kwa mãn pa Tĩrtũm kapêr kõt amnhî nhĩpêx mex rãhã ho ri ixpa nã?

Anhÿr o mãn ajamaxpêr. Hãmri nê ate hkõt amnhî nhĩpêx mex ã amnhî pumu nê amarĩ axãmnhĩx aku. No kot ka mẽ kormã mẽmoj punuj kaga hkêt nê arî ri ho anhÿr o pa hãmri nê kãm ajamaxpêr nê hkur kêt nê. Rÿ tanhmã tee ri tanhmã ate amnhî tomnuj tota mã ajamaxpêr nê akaprî nê. Hãmri nê tokyx Tĩrtũm mã amnhî jarê nê amnhî to mex prãm xàj amnhî to awÿ hãmri nê arî kormã axãmnhĩx pãwtita ku. ²⁹ Koja mẽhõ mẽ akõt axà nê mẽmoj kukamã hamaxpêr pê htÿx pãwti nhĩrênhta õ py hkur o nhÿ. Hãmri nhÿm Tĩrtũm tee ri ja hã omu nê hã tanhmã ho. ³⁰ Na ka mẽ ra axohtõ

nê ã amnhî nhîpêx anê nê atÿx ri mêmoj kukamã ajamaxpêr pê pãwta ku. Jejus kot mêm panê htykja mã ajamaxpêr kêt pê atÿx tanhmã ajamaxpêr to pê hkwÿ hkur o akrî. Mÿrapê na ka mêm ra ja hã axà nê ri apa. Nê mêm akwÿjaja ra htyk rax nê. ³¹ Nom kot ka mêm axpên wÿr akuprô hãmri nê akupÿm tãm axpên kôt ajamaxpêr nê axpên kôt amnhî nhîpêx nê rî kormã pãwtita ku. Hãmri nhùm Tîrtùm ja hã mêm apumu nê tanhmã mêm ato hkêt nê. ³² Na hte mêm pahte tanhmã amnhî tomnuj to hã mêm pahpumu nê hã tanhmã mêm pahto. Mêm pahte ja hã amnhî pumunh nê axte ã amnhî nhîpêx anhÿr kêt kaxyw na hte ã mêm pahpê hkrajê nhîpêx anê. Jakamã kot puj mêm nhÿrmã mêm kêp hkra hkêt xwÿnhjê hkôt kuwyta wÿr ma papa hkêt nê. ³³ Jakamã e Kris kôt ixtô nê ixtôxjaja. Kêr ka mêm axte Pahihti Jejus tyk mã ajamaxpêr kaxyw axpên wÿr akuprô. Hãmri nê ra axpên wÿr apikuprôn h pa hã axpên pumu nê rî kormã pãwti hkwÿ hku nê hkur pê Jejus kot mêm panê htyk mã ajamaxpêr o akrî. ³⁴ Nê ka mêm atô ra amã prãm japêr nê anhörkwÿ kamã apku nê rî kormã mêm hkôt tê. Jao ra anhôhy htu nê ajamakêtkati nê akwÿjê jamâr o nhÿ. Kê mêm hpôx pa ka mêm atipxi nê Pahihti Jejus tyk mã ajamaxpêr pê hkur o akrî. Hãmri nhùm Tîrtùm ja hã mêm apumu nê hkînh nê tanhmã mêm ato hkêt nê.

Na ka prem mêm ate inhmã kagà nê mênhta kamã mêmoj tâ ixkukjêr rax nê. Tã na pa ra kagà ja kamã mêm amã hkwÿ jarênh rax nê. Nom kot paj piitã harênh par kêt nê. Kot paj ãm mêm amã hkwÿ pix jarê. Hãmri nê nhÿrmã ma mêm awÿr mô nê mêm apumu nê kormã axte mêm amã harênh jatur xàm kumê.

12

Mêm kot Tîrtùm kapêr o hêx xwÿnhjê jarênh Rômãn 12.6-8; Wam Korît 14.29; Wam Pêtre 4.10-11; Wam Juãw 4.1-2

¹ Nê kot paj hpãnhã mêm amã tanhmã Tîrtùm Karô jarênh to ka mêm inhma. Tanhmã kot mêm pahkrã hto nhùm mêm pahte ahpÿnhã tanhmã kãm amnhî nhîpêx to ho papaja kot paj mêm amã harê. ² Amnepê mã kormã mêm ate Kris kôt amnhî xunhwÿr kêt

ri na ka prem sãnti hkôt ri amnhî nhîpêx o ri apa. Kapêr kêt tâ ka prem hkôt ri amnhî nhîpêx rãhã ho ri apa. Te kot mêm ano kupyr pyrãk ka mêm kãm mex o mex ã harênh o ri apa. Nê kãm amnhî jagrer pê amnhî to hwÿr o ri apa. ã na ka prem amnhî nhîpêx anhÿr o ri apa. ³ Tã ra hpãnhã Tîrtùm kôt amnhî xunhwÿ.

Na htem ohtô nê Tîrtùm nhÿ hã kapêr jarênh o pa hã amnhî jarênh tâ no ãm mêm hkwÿjaja ja hã amnhî to hêx. Tã kot paj ixprî hã mêm amã tanhmã mêm harênh to. Koja mêmhõ mêm kãm Tîrtùm nhÿ hã kapêr jarênh o pa hã amnhî jarê hã koja Jejus o kapêr punuj o pa hkêt nê. Koja harênh o:

—Jesús kêp mêm panhõ Pahihti jakamã kwa pu mêm hkôt amnhî xunhwÿ nê hkôt amnhî nhîpêx o ri papa.

Anhÿr o harê. Koja mêmhõ ã mêm amã kapêr anê ka mêm ama nê mêm kot Tîrtùm nhÿ hã kapêr jarênh o pa xwÿnh ã omunh kurê kumrêx. No koja mêm amã ã kapêr anhÿr kêt nê ka mêm ama nê Tîrtùm kapêr o hêx o pa hã omunh kurê kumrêx.

Tîrtùm Karô kãm mêm pahte axpên to mex prãm ã harênh

Rômãn 12.6; Epes 4.7; Wam Pêtre 4.10

⁴ Nê ahpÿnhã kot tanhmã mêm panhîpêx to xwÿnhja ãm pixii. Kêp Tîrtùm Karô. Na hte mêm pahkarô mã agjê nê ahpÿnhã tanhmã mêm pahte axpên to mex kaxyw tanhmã mêm panhîpêx to. Kot tanhmã mêm panhîpêx to xãja ohtô. Mêm pahte ahpÿnhã ri tanhmã kãm amnhî nhîpêx to nê tanhmã axpên to mex to ho ri papa kaxyw na. Tîrtùm Karô na hte ja kaxyw tanhmã mêm pahkrã hto.

⁵ Nê mêm pahte kãm tanhmã amnhî nhîpêx to ho papa xwÿnhja haxwÿja ãm pixii. Kêp Pahihti Jejus. Tã na pu htem ahpÿnhã kãm tanhmã amnhî nhîpêx to ho ri papa.

⁶ Nê kot mêm pahto ajuta nhùm mêm pahte ahpÿnhã tanhmã axpên to mex to ho papa xwÿnhja haxwÿja ãm pyxii. Kêp Tîrtùm. Na pu htem ahpÿnhã tanhmã hkôt axpên xunhwÿr tÿx to kaxyw tanhmã axpên to mex to ho papa.

⁷ Nê Karôja na hte ahpÿnhã tanhmã axpên kaxyw mêm panhîpêx to pu mêm axpên to ajuta mex o ri papa.

- ⁸ Jakamã na pu hte mẽ pahkwỳjaja Tĩrtũm Karõ nhỹ hã ma mẽ pahkwỳjê mã Tĩrtũm kapêr jarênh o ri mẽ hkõt papa. Nẽ mẽ pahkwỳjaja ma ý hã paxàhpumunh mex pê ma ri kapêr o mẽ ahkre ho mẽ hkõt papa.
- ⁹ Nẽ mẽ pahkwỳjaja Karõ nhỹ hã Tĩrtũm kot tanhmã mẽ pahto ajuta hto kaxyw hkõt pajamaxpêr tỳx nẽ. Nẽ mẽ pahkwỳjaja akupỹm mẽ à xwỳnhjê ho mex o papa nhũm mẽ akupỹm mex nẽ pa.
- ¹⁰ Nẽ mẽ pahkwỳjaja aa mẽ kot mẽmoj pumunh kêt kwỳ ho anhỹr o ri mẽ hkõt papa. Nẽ mẽ pahkwỳjaja Tĩrtũm kapêr mar tỳx nẽ ô ri mẽ kãm harênh o mẽ hkõt ri papa. Nẽ mẽ pahkwỳjaja Tĩrtũm Karõ nhỹ hã tanhmã mẽ kot amnhĩ nhĩpêx to hã mẽ omunh o papa. Rỳ pahprĩ hã mẽkarõmnuti nhỹ hã mẽ kot amnhĩ nhĩpêx ã mẽ omunh o papa. Nẽ mẽ pahkwỳjaja nhãm mẽ kapêr mar kêt tã ra mẽ kapêr o pakapêr. Nẽ mẽ pahkwỳjaja mẽ kapêr o pakapêrja ma nẽ mẽ kot mar kêt xwỳnhjê mã harê. Kormã aa pahte mar kêt tã ra pahprĩ hã mar mex nẽ mẽ kãm harê.
- ¹¹ ã na hte Tĩrtũm Karõ kãm hprãm xà hkõt tanhmã mẽ panhĩpêx to pu mẽ ahpỹnhã ý hã ã axpên nhĩpêx anhỹr o ri axpên kõt papa.

Te mẽ pahpê Kris nhĩ pyræk ã mẽ pajarênh Rõmãn 12.3-8; Epes 1.22-23, 4.11-16; Koro-sõ 3.15

¹² E pa hpãnhã mẽ amã mẽ panhĩ kamã tanhmã mẽmoj jarênh to ka mẽ inhma nẽ hã anohtỳx nẽ. Mẽ panhĩja ãm pixi htã no ãm kamã mẽmoj xohtõ. Kamã mẽ pahte nẽ kamã mẽ pahpa nẽ kamã mẽ pajakwa. Nẽ mẽ panhĩnhu nẽ mẽ pano. ã mẽ panhĩ kamã mẽmoj xohtõ kot anhỹr. Ja pyrã nẽ Kris nhĩja ãm pixi htã te mẽ pahpê ì kamã mẽmoj xohtõta pyræk. Mẽ pahkwỳjaja te mẽ pahpê hte pyræk. Nẽ mẽ pahkwỳjaja te mẽ pahpê ìhkra pyræk. Nẽ mẽ pahkwỳjaja te mẽ pahpê no pyræk.

¹³ Mẽ pahpê Kris kwỳjaja axpên kaxyw mẽ paxohtõ. Mẽ ixpê Ijaewjaja nẽ mẽ apê

Ijaew kêt xwỳnhjaja. Nẽ amarĩ ri mẽ kãm mẽ axàpênh o mẽ apa xwỳnhjaja nẽ amnhĩ mã ri mẽ axàpênh o mẽ apa xwỳnhjaja. ã ahpỹnhã mẽ paxohtõ kot anhỹr tã nhũm Tĩrtũm Karõ te mẽ pahpê Kris nhĩ pixi pyræk o mẽ panhĩpêx. Nhũm Krisja mẽ pahpiitã mẽ pamã Karõ gõ nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

¹⁴ Nẽ mẽ panhĩja pixi tã kamã tanhmã mẽ pakute xàja ohtõ. Tã Kris nhĩja te kot mẽ panhĩja pyræk. Uræk nẽ kamã mẽ paxohtõ. Jakamã na pu htem ahpỹnhã tanhmã kãm amnhĩ nhĩpêx to ho ri papa. Karõ kot tanhmã amnhĩ kaxyw mẽ panhĩpêx to xà hkõt.

¹⁵ Nẽ kop ãm mẽ pahparja kapêr ronhỹx tee ri mẽ panhĩhkra pumu nẽ amnhĩ mã:

—Hêxta waa nẽ. Kêp ãm ixpê mẽ ìhkra ronhỹx pa inhmex nẽ ijarir. No ãm ixpê mẽ hpar pix jakamã pêr ãm mẽ hkĩnhã ixpê mẽ hkwy hkêt ãm ixpê mẽ hatur xà pix na pa.

Anhỹr o amnhĩ jarênh japêr. Nom ja kot anhỹr kêt. Axtem nhỹhỹm kot mẽ pahto pa kaxyw na mẽ pahparja. Nẽ axtem mẽmoj tã mẽ paxàpênh rỳ mẽmoj jamỳnh kaxyw na mẽ panhĩhkraja. Na pu htem hamê wa ho presija rãhã ho papa. Ja pyrã nẽ kot puj mẽ pahkwỳjê hõ mẽ parom Tĩrtũm Karõ nhỹ hã mẽmoj tã àpênh tỳx ã omu nẽ hkĩnhã mẽ pahte amnhĩ to warê hkêt ã amnhĩ jarênh o papa hkêt nẽ.

¹⁶ Nẽ mẽ pajamakja kapêr ronhỹx kapêr o:

—Hêxta waa nẽ. Kêp apu ixpê mẽ no ronhỹx pa inhmex nẽ ijarir. No ãm ixpê mẽ umar xà pix jakamã pêr ãm ixte ho warê hkêt kumrêx.

Anhỹr o amnhĩ jarênh japêr. Nom ja kot anhỹr kêt. Hamê wa mex kênã. Axtem ho mẽ paxumar kaxyw na mẽ pajamakja. Nẽ axtem ho mẽ parit kaxyw na mẽ panoja.

¹⁷ Kêp ãm mẽ pano pix ronhỹx pu mẽ parit pix nẽ paxumar kêt nẽ ri papa. Rỳ kêp ãm pajamak pix ronhỹx pu mẽ paxumar pix nẽ parit kêt nẽ mẽ paxupãr kêt nẽ ri papa.

¹⁸ Mẽ panhĩja pixi htã kamã hikukrêx xohtõ. Na pre Tĩrtũm amnhĩ krã hkõt kamã mẽmoj piitã hipêx nẽ hanhõ. ¹⁹ Kêp ãm mẽ panhĩja kamã ãm mẽmoj pixi ronhỹx pu mẽ pamex kêt nẽ papa. ²⁰ Tã no ãm kot anhỹr

kêt. Mě panhija ãm pixi htã kamã hikukrêx sohtôô. ²¹ Jakamã na hte mẽ panoja amnhĩ nê mẽ panhĩkra mã kãm:

–Tk kwa ma tẽ. Ixte ato presijare hã.

Anhỹr o kãm kapër kêt nẽ. Rỳ mẽ pahkrãja amnhĩ nê mẽ pahpar mã kãm:

–Tk kwa ma tẽ. Na pa ato presija hkêt nẽ.

Anhỹr o kãm kapër kêt nẽ. Ja pyrã nẽ kot puj mẽ nhỹri Kris kôt panhĩõ pumu nẽ pamex o pahte hakrenh ã amnhĩ jarẽnh kêt nẽ. ²² Nẽ mẽ panhĩ kamã mẽmoj kwỳ te hirerek pyrãk tã no pu mẽ arĩ pamã hapê nẽ. Ja pyrã nẽ kêt pu mẽ kormã mẽ kot Kris kôt amnhĩ xunhwỳr tohtuj anhỹr xwỳnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

²³⁻²⁴ Nẽ na pu htem mẽ panhĩ kamã mẽ pakukrêx kwỳ hã pahpijaãm nẽ hpro nẽ ri ho papa. Nẽ hkwy hã pahpijaãm kêt nẽ hpro hkêt nẽ ho ri papa. Nẽ hkwy mẽ pahpê omnajti htã pu mẽ ho mex nẽ ri ho papa. Tirtũm kot ã mẽ panhĩpêx anhỹr jakamã na pu htem mẽ pakamã mẽ pakukrêx kwỳ mẽ pahpê omnajti htã pu mẽ ho mex nẽ ri ho papa. Ja pyrã nẽ kêt pu mẽ Tirtũm kôt mẽ pahtõ nẽ mẽ pahtõx piitã ho mex o ri papa. Nẽ tãm mẽ hipêx. Mẽ pahkwỳjaja muxre nẽ mẽ pahkwỳjaja omnajti htãã. Tanhmã mẽ kute htã pu mẽ kêt mẽ Jesus kôt mẽ pahtõ nẽ mẽ pahtõx ã mẽ ho mex o ri papa.

²⁵ Nẽ na hte mẽ panhĩ kamã mẽ pahpar nẽ mẽ panhĩkra nẽ piitã axpẽn kôt ãpẽn mex o pa. No na hte mẽ pahparja nhỹhỹm ma mra nhũm ihõja hkwy m nhỹhỹm ma mra kêt nẽ. Na hte wa axpẽn kôt ãpẽn mex o pa. Ja pyrã nẽ kêt pu mẽ pahpê Tirtũm krajaja axpẽn kôt amnhĩ nhĩpêx rãhã ho ri papa. Nẽ axpẽn to mex rãhã ho ri papa. No ri axpẽn kwỳm ri tanhmã amnhĩ nhĩpêx to ho ri papa hkêt nẽ.

²⁶ Na pu htem tõhã nhỹhỹnh panhĩ kamã paxã nẽ ri papa. Pahkrã tãtãk rỳ pakatut gêk. Jao te mẽ panhĩ piitã kamã mẽ paxã pyrãk. Nẽ nhỹhỹnh akupỹm pamex nẽ te panhĩ piitã hkôt akupỹm pamex pyrãk. Ja pyrã nẽ koja Kris kôt panhĩõ nhỹhỹnh ã nẽ ri pa. Rỳ tanhmã amnhĩ to nẽ ra hkaprĩ nẽ ri pa pu mẽ ja hã omu nẽ ã hã pahkaprĩ nẽ

papa. No koja mẽmoj tã hkĩnh nẽ pa pu mẽ ja hã omu nẽ ã hã pahkĩnh nẽ papa.

Te mẽ pahpê Kris nhĩ pixi pyrãk ã mẽ pa jarẽnh

²⁷ Nẽ mẽ pahpê Kris kwỳjaja te mẽ pahpê Kris nhĩ pixi pyrãk. Ahpỹnhã mẽ pahte tanhmã amnhĩ nhĩpêx to ho papa htã mẽ pahpê Kris kwỳ jakamã te mẽ pahpê ã pixi pyrãk.

²⁸ Nẽ mẽ pahte Kris kôt tanhmã pahkwỳjê ho ajuta hto ho papa kaxyw na pre Kris ahpỹnhã tanhmã mẽ paxunhwỳr to.

Mẽ pahkwỳjaja mẽ pahte ã hã nhãm mẽ kãm kapër jarẽnh o papa kaxyw mẽ paxunhwỳ.

Nẽ mẽ pahkwỳjaja mẽ pahte ã hã tanhmã kapër jarẽnh to ho ri papa kaxyw mẽ paxunhwỳ.

Nẽ mẽ pahkwỳjaja Tirtũm kapër jarẽnh o mẽ ahkre ho ri mẽ papa kaxyw mẽ paxunhwỳ.

Nẽ mẽ pahkwỳjaja mẽ pahte aa mẽ kot mẽmoj pumunh kêt kwỳ ho anhỹr o ri papa kaxyw mẽ pa xunhwỳ.

Nẽ mẽ pahkwỳjaja akupỹm mẽ ã xwỳnhjê ho mex o mẽ papa kaxyw mẽ pa xunhwỳ.

Nẽ mẽ pahkwỳjaja mẽ kapër o mẽ hihtỳx o mẽ papa kaxyw mẽ pa xunhwỳ.

Nẽ mẽ pahkwỳjaja mẽ pahte tanhmã mẽ ho ajuta ho ho ri papa kaxyw mẽ pa xunhwỳ.

Nẽ mẽ pahkwỳjaja nhãm mẽ kapër õ ho mẽ pakapër o mẽ papa kaxyw mẽ pa xunhwỳ.

Ã na pre ahpỹnhã mẽ pahpê hkwyjê piitã mẽ paxunhwỳr anẽ. ²⁹ No na pu htem pahpiitã axpẽn kôt Tirtũm kapër o mẽ ahkre ho ri papa hkêt nẽ.

Nẽ mẽ pahpiitã ã hã tanhmã pakapër to ho ri papa hkêt nẽ.

Nẽ mẽ pahpiitã kapër jarẽnh o ri papa hkêt nẽ.

Nẽ mẽ pahpiitã aa mẽ kot mẽmoj pumunh kêt kwỳ ho anhỹr o ri papa hkêt nẽ.

³⁰ Nẽ mẽ pahpiitã akupỹm mẽ ã xwỳnhjê ho mex o ri papa hkêt nẽ.

Nẽ mẽ pahpiitã mẽ kapër õ ho ri pakapër o ri papa hkêt nẽ.

Ně mẽ pahpiitã ri mẽ kapērja ma ně pakapēr kãm pahkwýjê mã harēnh o ri papa hkêt ně.

Na pu htem ahpýnhã tanhmã Kris kôt mẽ pahkwýjê ho ajuta hto ho ri papa. ³¹ Tã kêr pu mẽ pahpiitã pamã axpēn kīnh pē tanhmã axpēn to mex to ho ri papa. Ja na mex o kot mẽmoj piitã hakrenh par. E kot paj ixprī hã tanhmã mẽ amã ja jarēnh to ka mẽ inhma.

13

Mě pahte axpēn kamã paxukaprī ho papa hã mẽ pamã karō

Juãw 13.31-35; Karatas 5.13-15; Korosē 3.12-14

¹ Kot pa ma mẽ piitã ahpýnhã mẽ kapēr kãm mẽ kãm Tirtũm kapēr jarēnh o ri ixpa japēr. Ām mẽ piitã mẽ kapēr o ixkapēr mex o mẽ kãm harēnh o ri ixpa japēr. Ně Tirtũm kapēr o mẽ wrýk xwýnhjê kapēr o mẽ ahkre ho ri ixkwýjê hkôt ixpa japēr. Tã inhã mẽ hkīnh kêt kãm ixte mẽ ahkre ho ri ixpa ronhýx mẽ inhma ně ãm inhma. Nhũm ixkapērja te ixte rat tatak pyrãk o pa tee ri Tirtũm kapēr o mẽ ahkre kaprý ho ri mẽ hkôt ixpa nhũm Tirtũm tee ri inhã mẽ hkīnh kêt ã ixpumu ně inhã:

—Nã amã mẽ hkīnh kêt jakamã na ka tee ri ixkapēr o mẽ ahkre kaprý. Aně.

² Rý kot paj Tirtũm xãhpumunh týx o mẽ kãm kapēr pimxur kwý jarēnh o ri ixpa japēr. Rý Tirtũm mẽ kurom inhã mẽmoj to amnhĩrit pa omu ně mẽ kãm harēnh o ri ixpa japēr. Rý pa Tirtũm kot amnhĩ nhĩpêx piitã omunh par japēr. Rý ixte amnhĩ kaxyw hkôt ijamaxpēr týx kôt ý hã kēn krã hprêk õ mã ixkapēr nhũm kot inhmar ně inhmar xã hkôt nhãm pikamēnh japēr. Tã inhã ixkwýjê hkīnh kêt kãm ã amnhĩ nhĩpêx aně nhũm Tirtũm tee ri ja hã ixpumu ně inhã:

—Nã amã mẽ hkīnh kêt jakamã te axãhpumunh týx kêt kumrêx pyrãk. Na ka tee ri ã mẽ kãm ixkapēr jarēnh anhýr o ri apa kaprý. Aně.

³ Rý pa mẽ kêp amrakati xwýnhjê mã ixkukrêx nhõr par japēr. Rý Kris ã mẽ kãm amnhĩ grõnh kôt mẽ kãm xa nhũm mẽ hã ixpır japēr. Tã inhã mẽ hkīnh kêt kãm ã

amnhĩ nhĩpêx aně nhũm Tirtũm tee ri ja hã ixpumu ně inhã:

—Nã ã ate mẽ kãm amnhĩ nhĩpêx anhýr o ri apa htã amã mẽ hkīnh kêt jakamã na ka tee ri ã mẽ kãm amnhĩ nhĩpêx anhýr kaprý. Aně.

⁴ Kot puj mẽ pamã axpēn kīnh hã kot puj mẽ kritpēm mẽ piitã mẽ kãm pahprī ho papa.

Ja o axpēn kãm pagryk tokyx anhýr kêt ně.

Ně pamã axpēn to mex pix prãm.

Ně mẽmoj tã axpēn kamã pagryk kurē kumrêx kêt ně.

Ně mẽmoj tã amnhĩ to jarkrar o ri papa hkêt ně.

Kot puj mẽ pamã axpēn kīnh hã kot puj mẽ ã amnhĩ nhĩpêx anhýr o ri papa hkêt ně.

⁵ Ně kot puj mẽ axpēn kamã paxukaprī ho papa hã kot puj mẽ tãm axpēn nhĩpêx rãhã ho papa. Ja o amnhĩ pix kukamã pajamaxpēr o ri papa hkêt ně. Ně mẽ pagryk tokyx anhýr kêt ně. Rý axpēn kãm pagryk tokyx anhýr hkêt ně. Rý koja mēhõ tanhmã mẽ panhĩpêx kati hto pu mẽ ãm amnhĩ tã omu ně axte kot tanhmã mẽ panhĩpêx tota mã pajamaxpēr kêt ně.

⁶ Ně kot puj mẽ pamã axpēn kīnh o papa hã kot puj mẽ tee ri mēhõ kot tanhmã amnhĩ tomnuj to hã omu ně pahkaprī ně. Rý tanhmã kot amnhĩ to mex to hã omu ně pahkīnh ně.

⁷ Ně kot puj mẽ pamã axpēn kīnh o papa hã kot puj mẽ arĩ Tirtũm kot mẽ pahto mex par jatur xã mēnh xã hã arĩgro jamãr rãhã ho ri papa. Ně mẽ kot Kris ã tanhmã mẽ pahto htã pu mẽ tee ri amnhĩ kukamã tanhmã pajamaxpēr to hkêt ně. Ām mẽ kutã amnhĩ to htýx ně mẽ kãm pakuhē ně arĩ amnhĩ kaxyw Tirtũm mã pajamaxpēr týx rãhã ně.

⁸ Ně kot puj mẽ pamã axpēn kīnh o papa hãmri ně aa mẽ pahte ã amnhĩ nhĩpêx anhýrja mã panhũrer kêt ně. Ně arĩ mẽ pamã axpēn kīnh rãhã ho papa ho papa. Jar pika ja kamã mẽ pahte Tirtũm nhý hã mẽ kãm kapēr jarēnh o ri papa htã kot puj mẽ nhýrmã ma õ krĩ hwýr api hãmri ně kuri axte ã kãm amnhĩ nhĩpêx anhýr kêt ně. Mo kaxyw kot puj mẽ axte ri mēhõ mã kapēr jarē? Kot puj mẽ õ krĩ hwýr api ně ra mẽ pahpiitã paxãhpumunh o axpēn pyrãk.

Ně na pu htem tōhã mẽ kapěr õ ho pakapěr o ri papa. Nom kot puj mẽ nhỹrmã Tĩrtũm nhõ krĩ hwỳr api hãmri nẽ kuri axte nhãm ri mẽ kapěr o pakapěr kêt nẽ.

Ně na pu htem jar mẽ pahkwỳjaja mẽ paxàhpumunh mex kõt Tĩrtũm kapěr jarẽnh o ri papa. Tã kot puj mẽ nhỹrmã õ krĩ hwỳr api hãmri nẽ axte ã amnhĩ nhĩpêx anhỹr kêt nẽ. ãm mẽ pamã axpẽn kĩnh pixja kot puj mẽ arĩ õ krĩ kamã mẽ pamã axpẽn kĩnh tũm rãhã papa ho papa. ⁹Jar mẽ pahpiitã mẽ paxàhpumunh tohtuj anhỹr o pakapěr jakamã na pu htem kormã Tĩrtũm kapěr jarẽnh tohtuj anhỹr o ri papa. ¹⁰Tã kot puj mẽ nhỹrmã õ krĩ hwỳr api nẽ kuri paxàhpumunh jatur xàm mẽnh pa. Jakamã nhũm jar mẽ paxàhpumunh tohtuj anhỹr xwỳnhhta mẽ pahpê hapêx.

¹¹E pa mẽ amã ja hã ejêp jarẽ ka mẽ inhma. Nà amnepê mã ixprĩre ri na pa pre ixtỳx ri mẽhprĩjê kot amnhĩ nhĩpêx o amnhĩ nhĩpêx nẽ mẽ hamaxpěr o ijamaxpěr. Nẽ mẽ kapěr mex kêt o ixkapěr o ri ixpa. Tã ra ixaptàr hãmri nẽ mẽ aptàrjê jamaxpěr o ijamaxpěr o ri ixpa. Te ra mẽ pahte kaxkwa kamã mẽ paxàhpumunh jatur xàm mẽnh parta pyràk mẽ aptàrjê jamaxpěr o ijamaxpěr o ri ixpa.

¹²Ja pyrà nẽ na pu htem kormã Tĩrtũm kot amnhĩ nhĩpêx ã omunh tohtuj anhỹr. Te mẽ pahte amnhĩ pumunh xà pynajre kamã pahprĩ hã amnhĩ pumunh mex kêeta pyràk. Nom kot puj mẽ nhỹrmã õ krĩ hwỳr api hãmri nẽ pahprĩ hã paxàhpumunh jatur xàm kumê. Te Tĩrtũm kot hprĩ hã tanhmã mẽ pakute hã mẽ pahpumunh parja pyràk.

¹³E arĩ mẽ pahte Tĩrtũm kõt amnhĩ nhĩpêx o papa xàja na axkrunêpxi. Mẽ pahte hkõt amnhĩ nhĩpêx o papa rãhã ho papa kaxyw. Wamta na ja: Kêr pu mẽ arĩ amnhĩ kaxyw Tĩrtũm mã pajamaxpěr mex rãhã ho ri papa. Nẽ hkõt ja: Kêr pu mẽ arĩ Tĩrtũm kot mẽ pahto mex par jatur xàm mẽnh xà hã arĩgro jamãr rãhã ho papa. Nẽ hkõt ja: Kêr pu mẽ arĩ pamã axpẽn kĩnh pẽ tanhmã axpẽn to mex to rãhã ho papa. Ja na mex o kot wamta wa hakrenh. E kêr pu mẽ ã amnhĩ nhĩpêx anhỹr rãhã ho ri papa.

14

Tĩrtũm Karõ kot mẽ pahto mẽ paxihtỳx ã harẽnh

Wam Korît 12.7-11, 12.27-31

¹E kêr ka mẽ arĩ amã axpẽn kĩnh pẽ axpẽn to mex rãhã ho ri apa nẽ aa jam anhũrer nẽ ho ajamakêtkati hkêt nẽ. Nẽ amnhĩ to Tĩrtũm Karõ mãn amnhĩ to awỳ kẽ mẽ amã tanhmã mẽ ajamaxpěr to ka mẽ ahpỳnhã tanhmã axpẽn to mex to ho ri axpẽn kõt apa. Nẽ kêr ka mẽ ã ajamaxpěr anẽ nẽ ajamaxpěr o:

–Inhmã mẽ hkĩnh o ri ixpa hprãm tỳx. Nẽ Tĩrtũm Karõ kot tanhmã ixto nhũm ixte ahpỳnhã tanhmã mẽ ho ajuta hto ho ixpaja pa mããnẽn inhmã ho anhỹr prãm. Nẽ kot tanhmã ijakwa hto nhũm ixte ahpỳnhã mẽ kapěr õ ho ixkapěrja pa mããnẽn inhmã ho anhỹr hprãm. No kêt ixte Tĩrtũm nhỹ hã mẽ kãm kapěr jarẽnhja na inhmã ho anhỹr prãm tỳx kumrêx. Anẽ.

²⁻⁴Mẽ pakamã mẽ kapěr õ ho Tĩrtũm mã kapěr xwỳnhjaja na htem Tĩrtũm Karõ nhỹ hã ãm kumã pix mã kapěr õta o kãm kapěr nhũm tapxipix mẽ kuma. No mẽ papajaja na pu htem tee ri mar o pahkrĩ nom mar kêt nẽ. ãm kapěr xwỳnhhta pix koja mẽ pakurom amnhĩ ma. Nom koja mẽ pakapěr kãm Tĩrtũm mã amnhĩ jarẽ pu mẽ mar mex nẽ. Nhũm mẽ pakapěr kãm Tĩrtũm nhỹ hã mẽ pamã kapěr jarẽ pu mẽ pahprĩ hã kuma. Jao mẽ pamã kapěr kõt amnhĩ nhĩpêx prãm nẽ. Nẽ mẽmoj tã pahkaprĩ nẽ ri papa htã mẽ kuma nẽ amnhĩ kaxwỳnh kãm amnhĩ to paxihtỳx.

⁵Mẽ apiitã mẽ ate nhãm mẽ kapěr õ ho Tĩrtũm mã amnhĩ jarẽnhja na mex. Nom mẽ ate mẽ akapěr o mẽ akwỳjê mã Tĩrtũm kapěr jarẽnh o ri mẽ apaja na mex o wamta jakre. Kot ka mẽ nhãm mẽ kapěr õ ho Tĩrtũm mã amnhĩ jarẽ nhũm mẽ akwỳjaja mẽ amar kêt jakamã ka mẽ ã akapěr anhỹrja o Kris kõt mẽ ho mẽ hamaxpěr o hihtỳx kêt nẽ. ãm kapxipix amnhĩ ma. Rỳ koja kapěr õja mar mex xwỳnhjê hõ amar japêr nẽ mẽ akapěr kãm akwỳjê mã harẽ. Hã koja ja mex nẽ. Nom kot kaj mẽ apiitã ma mẽ kapěr kãm mẽ kãm Tĩrtũm kapěr jarẽnh o ri apa nhũm mẽ piitã hprĩ hã amar mex nẽ. Nẽ amar xà hkõt Tĩrtũm kapěr

kôt amnhĩ nhĩpêx mex nê. ⁶ Jakamã e Kris kôt ixtõ nê ixtõxjaja. Kot paj apu nhĩrmã ma mẽ awỳr mō hāmri nê nhām mẽ kapêr õ ho mẽ amã ixkapêr japêr ka mẽ inhmar kêt nê. Nom kot paj mẽ akapêr o mẽ amã ixkapêr ka mẽ apiitã aprĩ hã inhmar mex nê. Pa Tĩrtũm nhỹ hã mẽ amã mẽmoj jarẽ rỳ tanhmã kot amnhĩ nhĩpêx toja pa mẽ amã harẽ. Rỳ Karõ nhỹ hã mẽ amã mẽmoj jarẽnh o ã mẽ amã Tĩrtũm kapêr jarẽnh anê ka mẽ aprĩ hã inhmar mex nê. ⁷ Nom mẽ kapêr õ ho mẽ kapêr o mẽ akôt ri mẽ pa xwỳnhjaja te mẽhõ kot htỳx ri wiorãwti kakrênh xwỳnh pyrãk. Koja htỳx ri hkakrênh o xa nhũm mẽ tee ri kot grer mar mã. Rỳ nhũm mẽhõ htỳx ri pifti kakôr o xa nhũm mẽ tee ri mẽmo mẽ grer mar mã.

⁸ Pôristijaja na htem amarĩ ri tanhmã amnhĩ nhĩpêx to ho pa nhũm mẽ hkrãhtũmjja mẽ kãm pifti kakô nhũm mẽ kuma nê mẽ pijapu mã hamaxpêr kurê kumrêx nê hwỳr hprôt. Nom koja kawax pê hkakô rỳ htỳx ri tanhmã hkakôr to nhũm mẽ kuma nê ãm kuma. ⁹ Ja pyrã nê kot kaj mẽ kapêr õ ho akwỳjê mã akapêr nhũm mẽ ama nê ãm mẽ ama. Ka te ãm mẽ kãm ajakwa momok pyrãk o axãm o amnhĩ nhĩpêx.

¹⁰ Nê ahpỳnhã mẽ pakapêr xohtôô. Na htem ahpỳnhã mẽ kapêr o amnhĩ kwỳjê mã kapêr nê axpên mar mex nê. ¹¹ Nom koja mẽhõ nhỹhỹnh pika hõ rũm ixwỳr mō nê mẽ kapêr o inhãm kapêr pa mar kêt nê. Nê amnhĩ xwar kutã ixkapêr o kãm ixkapêr nhũm ixpyrã nê inhmar kêt nê. ¹² Jakamã kot kaj mẽ amã Tĩrtũm Karõ xihỳx xã ho amã tanhmã kãm amnhĩ nhĩpêx to ho apa hprãm hã kot kaj mẽ amnhĩ to awỳ nê kãm:

—Kwa amnhĩ kôt ijamaxpêr o axihỳx Tĩrtũm. Pa anhỹ hã ixkapêr o ma Kris kôt ixkwỳjê ho mẽ hamaxpêr o ixihỳx o ri mẽ hkôt ixpa. Kê mẽ akapêr ma nê Kris kôt amnhĩ xunhwỳr tỳx nê. Nê hkôt amnhĩ nhĩpêx mex o ri pa. Anê.

¹³ Nê kêr ka mẽ nhãm mẽ kapêr õ ho Tĩrtũm mã amnhĩ jarẽnh xwỳnhjaja amnhĩ to Tĩrtũm Karõ wỳ nê kãm:

—Ixte mẽ kapêr õ ho ixkapêr tã ixte amnhĩ mar kêt. Jakamã kwa tanhmã ixto ijamaxpêr mex to pa amnhĩ mar mex nê

ixkapêr kãm ixprĩ hã Kris kôt ixkwỳjê mã ja jarẽ kê mẽ inhmar tỳx nê. Anê.

¹⁴ Nom kot paj nhãm mẽ kapêr õ ho Tĩrtũm mã mex ã harẽnh tã amnhĩ mar kêt nê. Te ixpimtir kãm ixkarõ pix kapêr pyrãk. No kot paj pam amnhĩ krã hkôt ixkapêr o kãm mex ã harẽ hãmri nê ra amnhĩ mar mex nê. ¹⁵ Nã ja na inhãm mex jakamã kot paj nhãm mẽ kapêr õ ho Tĩrtũm mã mex ã harẽ nê kãm gre. Nê mããnên ijamaxpêr xã hkôt ixkapêr o mããnên kãm mex ã harẽ nê kãm gre. Nã ja na inhãm mex. ¹⁶ Nom kot paj mẽ ma mẽ kot Tĩrtũm kapêr mar xã hã ixkre hwỳr mra nê kamã Tĩrtũm mã mex ã harẽ. Tã pa nhãm mẽ kapêr õ ho kãm ixkapêr japêr. Ka mẽ ate inhmar o akrĩ xwỳnhjaja tee ri inhma. Jakamã tee ri inhma nê ixkôt Tĩrtũm mã akapêr kêt nê. Rỳ kãm:

—Nã ãm hãmri na ã amex ã ajarẽnh anê Tĩrtũm.

Anhỹr o kãm akapêr kêt nê. Mẽ ate inhmaare hã kot ka mẽ ã kãm akapêr anê. Jakamã kot paj ri mẽ akamã mẽ kapêr õ ho ixkapêr kêt nê. ãm mẽ akapêr pix o mẽ anom Tĩrtũm mã mex ã harẽ. ¹⁷ Kot paj mẽ kapêr õ ho Tĩrtũm mã mex o mex ã harẽnh mex tã ka mẽ mẽmo mẽ kapêrja aprĩ hã mar kêt jakamã inhmar pê Tĩrtũm kôt amnhĩ xunhwỳr tỳx kêt nê.

¹⁸ Na pa hte tōhã mẽ arom nhãm mẽ kapêr õ ho Tĩrtũm mã amnhĩ jarẽ. Nom nhỹri ahte nhỹ nê ã kãm amnhĩ jarẽnh anê. ãm hãmri na pre Tĩrtũm ja kaxyw tanhmã ixto pa hte ã amnhĩ nhĩpêx anhỹr o ri ixpa.

¹⁹ Tã na pu htem Tĩrtũm mã mex o mex ã harẽnh kaxyw nê ma mẽ kot kãm amnhĩ jarẽnh xã hã ixkreta wỳr axpên wỳr mra pa mẽ pikuprõnh xwỳnhjê kapêr o mẽ kãm ixkapêr. Nom kot paj nhãm mẽ kapêr õ ho mẽ kãm ixkapêr ry rax kumrêx tã no nhũm mẽ inhmar kêt nê. Nom kot paj mẽ kapêr o ãm ixkapêr krãre htã no nhũm mẽ inhmar mex kurê kumrêx. Ja na inhãm mex. ²⁰ Kwa mẽ ixkapêr ma nê mar tỳx nê. Nê mẽhprĩrejê jamaxpêr o ajamaxpêr kêt nê. ãm Kris kôt mẽ àptàr tũmjê jamaxpêr o mãn kêt mẽ ajamaxpêr o ri apa. ãm mẽmoj pixire hkôt kot kaj mẽ ãm hãmri te mẽhprĩjê jamaxpêr pyrãk o ajamaxpêr. Mẽhprĩjaja na

hitem mẽmoj punuj kukamã hamaxpêr kêt nê. Na hitem âm htỳx pa. Tã kêr ka mẽ urak nê mẽmoj punuj kukamã ajamaxpêr o ri apa hkêt nê.

²¹ Amnepêm na pre Tirtũm tanhmã ljaewjê mã kapêr to. Mẽ kapêr o mẽ kãm kapêr tã no nhũm mẽ kuma nê âm kuma. Jakamã nhũm tee ri ja hã mẽ omu nê amnhĩ tã tanhmã mẽ harênh to. Tanhmã mẽ harênh toja Tirtũm kapêr ã kagã htũm kamã na. Kot mẽ harênh kot:

E kot paj ma mẽ hwỳr axtem pika hõ rũm pòristi hkwy rê kê mẽ ma mẽ hwỳr mra nê mẽ unê. Hãmri nê amnhĩ kapêr o mẽ kãm kapêr nhũm mẽ tee ri mẽ kuma no âm hkôt mẽmoj pumunh kêt nê.

Koja mẽ ã mẽ hipêx anhỳr tã nhũm mẽ arĩ kãm ixkapêr mar nê amnhĩ kaxyw ixkôt hamaxpêr prãm kêt nê. Anê.

Tirtũm kapêr ã kagã htũm kot ã mẽ harênh kot anhỳr. ²² Jakamã kot kaj mẽ Tirtũm mã amnhĩ jarênh xà hã ixkre hwỳr akuprõ nê mẽ kapêr õ ho Tirtũm mã amnhĩ jarênh japêr. Nhũm Kris kôt amnhĩ xunhwỳr kêt xwỳnhjaja mẽ akôt agjê nê hkrĩ nê tee ri mẽ akapêr ma nê Kris kôt amnhĩ xunhwỳr kêt nê. Tanhmã kot mẽ amnhĩ to nê hkôt amnhĩ xunhwỳ? Mẽ kot akapêrta maare hã. No kot ka mẽ akapêr o Tirtũm nhỹ hã mẽ kãm akapêr nhũm mẽhprĩ hã amar mex nê. Jao tanhmã hamaxpêr to nê mẽ apyrà nê Kris kôt amnhĩ xunhwỳr japêr. ²³ Nom kot ka mẽ apiitã nhãm mẽ kapêr õ ho Tirtũm mã mex ã harê nhũm amarĩ ri mẽ pa xwỳnhjaja mẽ awỳr agjê nê mẽ akapêr ã mẽ ama nê hã mẽ apumu. Hãmri nê tee ri hamaxpêr nê mẽ akrã pipãnh ã axpên mã mẽ ajarê. ²⁴ Nom koja mẽ awỳr agjê ka mẽ akatãt kôt mẽ amnhĩ kapêr o Tirtũm kapêr jarênh o akuhê nhũm mẽhprĩ hã mẽ amar mex nê. Hãmri nê amnhĩ kapêr o akapêr ma nê hamaxpêr o:

—Hêxta waa nê. Xep ixte amnhĩ tomnuj xwỳnh na pa. Nà âm hãmri na mẽ Tirtũm kapêr jarê. Nà âm hãmri na kêt ja. Anê.

²⁵ Hãmri nê mẽ amã tanhmã kot amnhĩ tomnuj to hã amnhĩ jarênh pa hãmri nê hkaga nê Jejus kôt amnhĩ xunhwỳ. Nê hkõnkrã ho htêm nê hkrĩ nê Tirtũm mã mex o mex ã harê. Hãmri nê mẽ amã:

—Nà âm hãmri na hte Tirtũm mẽ akamã pa ho pa. Anê.

Tirtũm nhõrkwỳ kamã mẽ pahte tanhmã amnhĩ nhĩpêx to hã mẽ pamã karõ
Atre 2.42, 5.12-13; Eprêw 10.25

²⁶ E Jejus kôt ixkwỳjaja. Kot paj hpãnhã axtem mẽ amã mẽmoj tã karõ. Mẽ kot Tirtũm mã amnhĩ jarênh xà hã ixkre kamã tanhmã mẽ ate amnhĩ nhĩpêx to hã karõ ka mẽ inhma.

Nà kêr ka mẽ axpên wỳr akuprõ nê akrĩ ka mẽ atõ amã Tirtũm mã mex ã harênh ã mẽ grer o agrer prãm hãmri nê mãmrĩ kãm ho gre. Hãmri nê agrer pa kê apãnhã mẽhõ kãnhmã xa nê Tirtũm kapêr kwỳ ho mẽ ajahkre. Nê ho anhỳr pa nhũm hpãnhã mẽhõ kãnhmã xa nê Tirtũm kot tanhmã ho mex to hã mẽ amã amnhĩ jarê. Nê amnhĩ jarênh pa hãmri nhũm mẽhõ nhãm mẽ kapêr õ ho mẽ amã ujarênh japêr. Hãmri nê ujarênh pa kê mẽhõ hpãnhã mẽ akapêr o hprĩ hã mẽ amã kapêrta jarê.

E kêr ka mẽ axpên wỳr akuprõ nê Kris kôt axpên to axihtỳx kaxyw ã axpên pãnhã amnhĩ nhĩpêx anê.

²⁷ Nê ka mẽ atõ amã nhãm mẽ kapêr õ ho mẽ kãm akapêr prãm japêr. Nom kêr ka mẽ axohtõ nê ã mẽ kãm amnhĩ nhĩpêx anhỳr kêt nê. Âm mẽ atõ wa axkrutre rỳ axkrunêpxire nê mẽ kapêr õ ho mẽ kãm akapêr. Hãmri nê axpên pãnhã akapêr pa kê mẽhõ kot hprĩ hã mẽ kapêr õta mar japêr nê mẽ apãnhã xa nê mẽ akapêr o mẽ kãm harê kê mẽhprĩ hã mar mex nê. ²⁸ Nom koja ja kaxyw mẽhõ amrakati japêr ka mẽ kapêr õ ho akapêr kêt nê. Âm kapxipix nhỹri ahte Tirtũm mã akapêr.

²⁹ Nê kê Tirtũm nhỹ hã kapêr jarênh xwỳnhjê hõ wa axkrut rỳ axkrunêpxi nê mẽ ajahkre ka mẽ aprĩ hã mar o akrĩ. Hãmri nê mar pa nê tanhmã mẽ harênh to. Âm hãmri Tirtũm nhỹ hã kapêr ã mẽ harê rỳ ho hêx ã mẽ harê.

³⁰ Nê koja mẽhõ Tirtũm nhỹ hã mẽmoj jarênh o xa. Rôm nhũm Tirtũm mẽ kaxyw mẽ atõ mã ajamaxpêr kwỳ gõ. Ka kapêr o âm xwỳnhta mã kãnhmã anhĩkra pẽ kê apumu nê anhĩkrê. Hãmri ka hpãnhã xa nê mẽ kãm tanhmã ajamaxpêr tota jarê.

³¹ Nom kêr ka mẽ anhĩpê mẽ kãm akapêr

hkêt nê. ãm axpên pãnhã Tirtûm kapêr o axpên jahkre nê ho axpên jamaxpêr o axihtÿx. Ja mex. ³²⁻³⁴ Nom kêr ka mê axpên wÿr akuprô nê apiitã anhîpê atÿx ri akapêr kêr nê. Ja na Tirtûm kêp hprãm nõkati. Mê ate axpên pãnhã axpên mã akapêrja na kãm hprãm. Jakamã kê mê kot Tirtûm nhÿ hã mê kapêr jarênh o pa xwÿnhjaja taxy axpên jahkre hã axpên jamã. Nhÿm mēhō kumrêx kapêr pa hãmri ka hpãnhã mê kãm akapêr.

Nê kê mēnijaja amarî mê ahkreja mar o hkrî. Ijaew kot amnhî nhîpêx xà hkôt. Jakamã kwa mê anijaja. Kêr ka mê amarî akryk mê mar o akrî nê axpên mã akapêr o akrî hkêt nê. ³⁵ No kot kaj mê tee ri mēmoj ma nê mar mex kêr japêr tã hã axpên kukjêr kêr nê. ãm akryk arî mar o akrî. Hãmri nê akupÿm anhōrkwy hwÿr tē nê rî kormã hã amjên kukja. Nom kot ka mê apikuprōnh xà hã ixkre kamã axpên mã akapêr o akrî nhÿm mê amjênjaja tee ri ja hã mê apumu nê hpijaàm nê.

³⁶ E na pa ã Tirtûm mã amnhî jarênh xà hã ixkre kamã tanhmã mê pahte amnhî nhîpêx to hã mê amã karō anê. Tã te mê apê ja mex kêr pyrãk. Kwa mon ka wem ja ma nhÿm mê apê omnuj nê? Xà mê ate Tirtûm kapêr mar mex o ijakrenh kôt na ka mê ã ajamaxpêr anê? Xà na pre Tirtûm mê akumrêx mã kapêr? Hã na ka mê ã ajamaxpêr anê? Rÿ xà mê kapxipix mã na pre kapêr? Hã na ka mê ixkapêr ma nhÿm mê apê omnuj nê? Nà ixkumrêx na pa pre mê awÿr inhmōr nê mê amã Tirtûm kapêr jarênh kēnã kot ka kêr mê axtem nê ã ajamaxpêr anê. ³⁷ Kot kaj mê atō ã ajamaxpêr anhÿr japêr nê ajamaxpêr o:

—Nà na pre Tirtûm tanhmã inhmã kapêr to pa ô ri mê kãm ixujarênh mex o ri ixpa.

Anhÿr o ajamaxpêr. Rÿ ajamaxpêr o:

—Nà na pre Tirtûm Karō mê kaxyw tanhmã ixto pa ÿ hã tanhmã mê ho mex to ho ri ixpa.

Anhÿr o ajamaxpêr. Kot kaj mê ã ajamaxpêr anê hãmri nê mãânēn pa ã ixte amnhî nhîpêx anhÿr ã ixpumunh mex kurê kumrêx. Amnhî pyrã nê ixte Tirtûm nhÿ hã mê kãm ixkapêr xwÿnh ã ixpumunh nê hã ijarênh kurê kumrêx. ³⁸ Nom koja ja hã ijarênh kêr ka mê ja hã omu hãmri nê

tanhmã kot mê amã kapêr toja ma nê ãm ama.

³⁹ E Kris kôt ixtō nê ixtōxjaja. Kêr ka mê amnhî to Tirtûm Karō wÿr kê ma mê ate mê kãm Tirtûm kapêr jarênh o ri apa kaxyw mê ato mê axihtÿx.

Nê koja mēhō kãm nhãm mê kapêr ô ho kapêr prãm ka mê ja nê kãm akapêr kêr nê. Kwār māmri ã amnhî nhîpêx anê. ⁴⁰ Nom kêr ka mê ate Tirtûm mã amnhî jarênh xà hã ixkre kamã axpên pãnhã axpên mã akapêr nom anhîpê kãm akapêr hkêt nê.

15

Kris akupÿm htîr kumrêx ã harênh

Atre 2.23-36, 10.39-41; Wam Korît 6.14

¹ E Kris kôt ixkwÿjaja. Kot paj axte mê amã Jejus kot mê panê tanhmã amnhî nhîpêx to hã harê ka mê inhma. Na pa pre ra mê amã ja jarê ka mê ama nê hkôt amnhî xunhwÿ. Nê hkôt amnhî nhîpêx mex o ri apa. ² Na pa pre mê amã harê ka mê amnhî kaxyw kãm ajamaxpêr tÿx nê nhÿm Tirtûm mê ato hkra. Tã ka htem arî kapêr kôt amnhî nhîpêx mex o ri apa. Koja mēhō kot Tirtûm kapêr mar tã amnhî kaxyw hkôt hamaxpêr kêr nê nhÿm Tirtûm tee ri amnhî tã omu nê ho hkra hkêt nê.

³ Na pa pre amnhî krã hkôt mê amã tanhmã Kris jarênh to hkêt nê. Ixte kapêr mar xà hkôt na pa hte amnhî xô ri mê amã tanhmã harênh to ho ri ixpa. Jejus jarênhja na mex o kot mê ujarênh piitã hakrenh par kumrêx. Tã tãm kot paj mê amã harê. Na pre Krisja mê pahte amnhî tomnuj pãnhã amnhîrer kaxyw mê panê ty. Tirtûm kapêr ã kagã htÿm kot hkukamã harênh xà hkôt.

⁴ Hãmri nhÿm mê kēn kre kamã haxà nhÿm kamã nõr o apkati. Nê axte hã apkati. Hãmri nhÿm Tirtûm akupÿm ho htîr. Kapêr ã kagã htÿm kot hkukamã harênh xà hkôt.

⁵ Tã nhÿm Simãw Pêtre kumrêx akupÿm htîr ã omu nhÿm hpãnhã Jejus nhÿ hã mê ahkre ho mê pa xwÿnh maatijaja haxwÿja omu.

⁶ Hãmri nhÿm mê kot hkôt mê pa xwÿnh pê 500 jakrenh xwÿnh piitã anhîpê haxwÿja akupÿm htîr kãm omu. Na pre ra mê hkwÿjaja ty nhÿm mê hkwÿjaja arî htîr nê pa. ⁷ Jakamã nhÿm prem ra akupÿm htîr kãm omu. Hãmri nhÿm hpãnhã Xiakreja omu. Nhÿm hpãnhã ÿ hã mê ahkre o mê pa

xwÿnh piitã omu. Akupÿm htÿr kãm omu. ⁸ Tã pa na pa pre ijaxwÿja amnhÿ to hapu nÿ akupÿm htÿr kãm omu. Te ixpê mÿ hkra kot hapu pyrã nÿ amnhÿ to hapu nÿ omu. Na pre kaxkwa kamã inhmã kapÿr o xa pa ixprÿ hã omu. ⁹ No mÿ kot ixpyrã nÿ Kris nhÿ hã mÿ ahkre ho mÿ pa xwÿnh maati hkwyÿjaja na mÿ mex o kot ijakrenh. Na pa pre hte mÿ hkÿnhã amnhÿ tomnuj tÿx nÿ. Jao Kris pÿ hkrajê homnuj tÿx o ri ixpa. Tã hkôt amnhÿ xãm hãmri nÿ tee ri ã amnhÿ nhÿpÿx anhÿr ã amnhÿ pumu nÿ amnhÿ kamã xpijaãm tÿx nÿ. Jakamã na pa hte Kris nhÿ hã kapÿr jarÿnh o ixpa hã amnhÿ pumu nÿ ixte hkôt amnhÿ xãm kêt ri tanhmã ixte amnhÿ nhÿpÿx toja mã ijamaxpÿr nÿ xpijaãm nÿ. ¹⁰ Na pa pre amnhÿ tomnuj tÿx o ixpa htã nhÿm Tÿrtÿm arÿ kãm ijapê nÿ. Nÿ ixkamã ukapÿrÿ nÿ. Pa pre hkôt amnhÿ xãm nhÿm ixto hkra pa ra kãm tanhmã amnhÿ nhÿpÿx to mex rãhã ho ixpa. Jakamã na hte tee ri amnhÿ tã ixpumu nÿ tanhmã hamaxpÿr to hkêt nÿ. Rÿ hamaxpÿr o:

—Hêxta waa nÿ. Inhmã Pawre japê nÿ ixte ho mex tã nhÿm ixkôt amnhÿ nhÿpÿx kêt kumrÿx.

Anhÿr o tee ri hamaxpÿr kêt nÿ. Na pa hte kãm tanhmã amnhÿ nhÿpÿx to ho ixpa rÿnh o ÿ hã mÿ kapÿr o pa xwÿnh kwÿjê jakre ho ixpa. Nom amnhÿ krã hkôt mÿ ahkre hkêt nÿ. Ja kaxyw na pre Tÿrtÿmja ixto ixihtÿx pa ÿ hã kãm tanhmã amnhÿ nhÿpÿx to ho ri ixpa nhÿm ja hã ixpumu nÿ hkÿnh nÿ.

¹¹ Nÿ Jejus jarÿnhja ãm pixii. Axtem hõ hkêt. Nÿ ÿ hã mÿ ahkre ho mÿ pa xwÿnhjê kapÿrja nÿ pa ixte mÿ amã harÿnhja kot xpÿn pyrãk. Harÿnh tipxi. Kris kot mÿ pahte amnhÿ tomnuj mÿrapê mÿ panê htyk nhÿm Tÿrtÿm kot akupÿm ho htÿr ã wa harÿnhja na pa hte pix jarÿnh o ri mÿ akôt ixpa. Ka prem inhma nÿ amnhÿ kaxyw hkôt ajamaxpÿr tÿx nÿ.

Tÿrtÿm kot akupÿm mÿ pahto mÿ pahtÿr ã harÿnh

Rukre 20.37

¹² Nÿ kwa ra ixte mÿ amã Kris htyk nÿ akupÿm htÿr ã harÿnh tã ka xep mÿ akwÿjaja axtem nÿ mÿ htyk nÿ akupÿm mÿ htÿr kêt

ã mÿ hkamnhÿx o ri apa. ¹³ Kwa mÿ ajamaxpÿrja mex kêt. Kêp apu ãm hãmri mÿ ate ã mÿ harÿnh anhÿr ronhÿx pre Kris haxwÿja akupÿm htÿr kêt nÿ. Nhÿx pre htyk o ty.

¹⁴ Nÿ kêp apu Kris akupÿm htÿr kêt ronhÿx pa mÿ ãm mÿ amã kapÿr jarÿnh o ixpa kapÿrÿ. Ka mÿ ajaxwÿja amnhÿ kaxyw hkôt ajamaxpÿr kapÿrÿ.

¹⁵ Nÿ kêp ãm akupÿm mÿ htÿr kêt ronhÿx pa mÿ ixte mÿ amã Tÿrtÿm kapÿr jarÿnh o ri ixpa xwÿnhjaja mÿ amã ho ixêx o ri ixpa. Na pa htem mÿ amã Tÿrtÿm ra kot akupÿm Jejus o htÿr ã harÿnh o mÿ akôt ixpa. Tã kêp apu akupÿm mÿ htÿr kêt ronhÿx pa mÿ ãm mÿ amã harÿnh o ixêx.

¹⁶ Nÿ kêp apu akupÿm mÿ htÿr kêt ronhÿx pre Kris haxwÿja akupÿm htÿr kêt nÿ. Nhÿx pre ãm amarÿ tyn hapêx.

¹⁷ Nÿ Kris amarÿ htyk nÿ hapêx ronhÿx kot pu mÿ ri amnhÿ kaxyw hkôt pajamaxpÿr nÿ hkôt amnhÿ xunhwÿr kapÿrÿ.

Nÿ Kris amarÿ htyk nÿ hapêx ronhÿx pre Tÿrtÿm Jejus kukwak ri mÿ panê mÿ pahte amnhÿ tomnuj o hapêx kêt nÿ. Nhÿx pu mÿ pahpiitã nhÿrmã ma kuwy hwÿr pajapêx pa.

¹⁸ Nÿ kêp apu Kris htyk nÿ hapêx ronhÿx ra mÿ kot amnhÿ kaxyw hkôt hamaxpÿr tã ra htyk xwÿnhjaja ma mÿ kot amnhÿ tomnuj mÿrapê kuwyta wÿr hapêx.

¹⁹ Nÿ kêp apu Kris htyk kumrÿx nÿ hapêx ronhÿx pu mÿ kormã pahtyk kêt xwÿnhjaja tee ri amnhÿ wÿr kamã pajamak o ri papa kapÿrÿ. Nÿ pahpê hkra hã amnhÿ jarÿnh kapÿrÿ. Jao pahkapÿrÿ htÿx o mÿmoj piitã hakrenh par kumrÿx nÿ ri papa.

Kris kumrÿx akupÿm htÿr ã harÿnh

Atre 26.23; Sikÿn Korit 4.14; Piripos 3.10-11; Wam Tesarôn 4.15-18; Apokariþ 20.1-15

²⁰ Nã mÿ htyk nÿ nhÿrmã akupÿm mÿ htÿr kêt ã mÿ harÿnhja kot anhÿr kêt. Ra Tÿrtÿm kot akupÿm Kris o htÿr jakamã koja mããnÿn hkra htyk xwÿnhjaja nhÿm mÿ piitã Jejus pyrã nÿ nhÿrmã akupÿm mÿ ho htÿr pa. Jakamã na pu htem Kris akupÿm

htīrja mā pajamaxpēr nē amnhī kukamā pajamaxpēr o:

—Nà ra Tīrtūm kot akupỹm Jejus o htīr jakamā koja uràk nē nhỹrmā akupỹm mẽ pahte hkôt amnhī xunhwỳr xwỳnh piitā mẽ pahto mẽ pahtīr. Nà koja ã mẽ panhĩpêx anê. Ja kaxyw àhpumunh tỳx kumrêx xwỳnh kênã. Anê.

²¹ Nē amnepêm na pre Tīrtūm my kot waja nhĩpêx. Hāmri nhũm kot tanhmā amnhī tomnuj to ho ra mẽ htykja o hkrax. Tã nhũm wamta kôt my hõta wamta rom amnhī to mex o mẽ htyk tã akupỹm mẽ ho htīr o hkrax. ²²⁻²³ Tã mẽ pahpê wam my pê Atãw kanrêhã tàmnhwỳ jakamā kot puj mẽ uràk nē nhỹrmã ty. No ãm mããnên mẽ pahpê Kris kraa. Kris kumrêx na pre akupỹm htīr. Tã koja nhỹrmã akupỹn mẽ pahwỳr wrỳ hāmri nhũm Tīrtūmja kot hipêx pyrã nē akupỹm mẽ pahto mẽ pahtīr. Mẽ pahte hkôt amnhī xunhwỳr ã mẽ pahpumunh kôt akupỹm mẽ pahto mẽ pahtīr pa. No ãm kormã.

Kris nhỹrmã kot mẽ htyk o hapêx ã harênh Juãw 11.25; Rõmãn 6.23; Wam Korīt 15.54; Sikũn Ximotre 1.10; Eprêw 2.14; Apokarip 20.14

²⁴⁻²⁸ Nē koja Kris arĩ mẽ ho amnhĩptār rãhã nhũm Tīrtūm mẽ kot kutã amnhī xunhwỳr xwỳnhjê pê mẽ hihtỳx xà ho hapêx pa. Kapêr ã kagã htũm kot ja jarênh kot:

Koja nhỹrmã Tīrtūm Kris kot kãm mẽ ho amnhĩptār kaxyw ãm. Anê.

Jakamã Jejus tapxipix koja mẽ ho amnhĩptār o pa. Koja Tīrtūm pix mẽ ho amnhĩptār kêt nê. Nom koja pahi hkwyjê hõ axte nhãm mẽ ho amnhĩptār kêt kumrêx.

Tã mẽ kot mẽkarõmnuti hkôt kãm tanhmã amnhī to ho mẽ pa xwỳnhjaja koja Tīrtūm ma amnhī nê kuwy hwỳr mẽ rênh pa. Nē mẽhtykja o hapêx nhũm mẽhõ axte htyk kêt kumrêx. Jakamã koja Jejus Kris mẽmoj punuj piitã ho hapêx nê Mẽpahpãm Tīrtūm nhĩhkram akupỹm mẽmoj piitã haxàr pa. Tīrtūm jamaxpêr xà hkôt ã mẽmoj to anhỹr par anê hāmri nê ìhkram mẽmoj jaxàr pa. Nē mããnên tãm kãm amnhī gõ. Jakamã nhũm Tīrtūm tapxipix mẽmoj piitã ho amnhĩptār pa.

Mẽ htyk xwỳnhjê jarênh

²⁹ Nē na hte mẽ pahkwỳjaja kormã kêp Tīrtūm kra hkêt tã Jejus kôt mẽ kot amnhī xunhwỳr nē mẽ htyk xwỳnhjê mã hamaxpêr o pa. Hāmri nē mẽ kãm nhỹrmã axte mẽ omunh prãm xàj mẽ uràk nē Jejus kôt amnhī xunhwỳ nhũm mẽ hkrã kumrã. Tã akupỹm mẽ htīr kêt ronhỹx mẽ ãm ã pajamaxpêr anhỹr kaprỳ. ³⁰ Nē paa. Na pa hte ma mẽ kãm Tīrtūm kapêr jarênh o ri mẽ hkôt ixpa. Nhũm mẽ hkwyjaja ja hã inhma nê ixkamã gryk nê ixtã amỳnê pa mẽ mỳrapê ixpunuj nê ri ixpa. No ãm amnhī to htỳx nê arĩ ri mẽ kãm Kris kapêr jarênh o ri mẽ hkôt ixpa. Tã kêp ãm nhỹrmã akupỹm ixtīr mã kêt ronhỹx pa tee ri ã amnhī nhĩpêx anhỹr o ri ixpa kaprỳ. ³¹ Na htem apkati mẽ ixtã tanhmã ãmnênh to ho ri pa. ãm hāmri na pa mẽ amã ã mẽ harênh anê. Nom na pa hte tee ri amnhī kukamã ijamaxpêr o ri ixkaprĩ nê ixpa hkêt nê. Mẽ kot ixpĩr mã tã pa hte mẽ ate Pahihti Jejus Kris kôt amnhī nhĩpêx mex ã mẽ apumunh kôt ixkĩnh nê ri ixpa. Nhũm te ixkamã mẽmoj kêt pyrãk pa hte ri ixpa. ³² Na pa hte jar Epes kamã mẽ oprê xwỳnhjê kutã amnhī to htỳx pê mẽ kãm Jejus kapêr jarênh o ri mẽ hkôt ixpa nhũm mẽ kãm mar prãm kêt jakamã hã ixtomnuj tỳx nê. No nhỹrmã ixytk nê akupỹm ixtīr mã kêt ronhỹx pa mẽ kêp Kris kwỳ hkêt xwỳnhjê jamaxpêr o ijamaxpêr nê mẽ uràk nê ijamaxpêr o:

Ixte ixytk ã arĩgro pumunh kêt jakamã kot paj mãmrĩ mẽmoj piitã hkur o ri ixpa.

Nê mãmrĩ mẽmoj piitã ho ixkõm o ri ixpa.

Nê mãmrĩ mẽmoj piitã ri tanhmã ho ho ri ixpa.

Ixytk nê axte ixte ã amnhī nhĩpêx anhỹr o ixpare kaxyw ã.

Anhỹr o nhỹx pa ijamaxpêr o ixpa. Kêp ãm Tīrtūm kot akupỹm mẽ pahto mẽ pahtīr mã kêt ronhỹx pu mẽ ã mẽ kêp Kris kwỳ hkêt xwỳnhjê jamaxpêr anhỹrja kôt pajamaxpêr pix o ri papa. No ãm ja kot anhỹr kêt.

³³ Na htem mẽmoj jarênh o:

—Mẽ kot htỳx ri amnhī tomnuj xwỳnhjê hkôt ri mẽ pa xwỳnhjaja koja mẽ gaa nê mẽ kot amnhī nhĩpêx kôt amnhī nhĩpêx o ri pa. Anê.

Ăm hămri na ă mẽ harĕnh anhÿrja. Jakamă kwa mẽ okora. Kĕr ka mẽ ă amnhĭ nĕ mẽ kot amnhĭ nhĭpĕx anhÿr o mẽ pa xwÿnhjĕ pumunh mex o ri apa. ³⁴ Kwa mẽ tokyx mẽ ate tanhmă amnhĭ tomnuj to hă amnhĭ pumu nĕ axte ă amnhĭ nhĭpĕx anhÿr kĕt nĕ. Nĕ mẽ ate Tĭrtŭm kot akupÿm mẽ ho htĭr kĕt ă harĕnh xwÿnhjaja. Te mẽ ate Tĭrtŭm kot amnhĭ nhĭpĕx ă omunh kĕt pyrăk. Tă mẽ ate tokyx ja hă amnhĭ pumunh nĕ amnhĭ kamă apijaam kaxyw na pa ă mẽ amă ixkapĕr anĕ.

Mĕ panhĭ nyw jarĕnh

Rukre 20.34-36; Rŏmăn 8.10-11; Sikŭn Korit 5.1; Piripos 3.20-21

³⁵ Nĕ măn ka mẽ atŏ akupÿm mẽ htĭr ă mẽ harĕnh ma nĕ tee ri mẽ hkukamă ajamaxpĕr nĕ hă ri tanhmă axpĕn kukjĕr to nĕ axpĕn mă:

—Kwa tanhmă koja we Tĭrtŭm akupÿm hkra htyk xwÿnhjĕ ho htĭr to? Ra mẽ htyk nĕ mẽ ĭ katŏk nĕ hapĕx par mă kĕnă. Tanhmă kot wem amnhĭ to nĕ akupÿm htĭr? Nĕ tanhmă koja we mẽ ĭ nywja kute wehe? Anĕ.

³⁶ Nă na ka mẽ atÿx ri ă ajamaxpĕr anĕ nĕ tee ri mẽ hkukamă ajamaxpĕr. E kot paj ixprĭ hă ja hă ejĕp jarĕ ka mẽ inhma. Nă na htem mĕmo y hkre. Te mẽ kot mẽ htyk jaxăr pyrăk o hipĕx nĕ hkre nhŭm hikwÿ nĕ gaa nĕ higrŏt hapŏj. Nom te kĕp mĕmo yta pyrăk kĕt. ³⁷ Ăm hy pix na htem hkre. No higrŏt kre hkĕt nĕ. Rÿ tanhmăn păr nywja kre hkĕt nĕ. Ăm hy pix na htem hkre. Tă nhŭm higrŏt hapŏj nĕ hprĕk nĕ gaa nĕ ô. ³⁸ Tĭrtŭm na hte hamaxpĕr xă hkŏt tanhmă ho nhŭm higrŏt hapŏj nĕ hprĕk nĕ ô. Tă ja pyră nĕ kot puj mẽ Tĭrtŭm jamaxpĕr xă hkŏt pahtyk tă koja akupÿm mẽ pahto mẽ pahtĭr nĕ mẽ pamă mẽ panhĭ nyw gŏ.

³⁹ Nĕ mĕmo hy piită te kot axpĕn pyrăk kĕt. Ahpÿnhă na. Ja pyră nĕ ahpÿnhă ri mĕmoj piită ĭ. Na axtem mẽ panhĭ nĕ axtem mry nhĭ nĕ axtem àk nhĭ nĕ axtem tep nhĭ. Mĕmoj piită ahpÿnhă ri ĭ.

⁴⁰⁻⁴¹ Nĕ kaxkwa kamă haxwÿja mĕmoj piită ahpÿnhă no ăm muxre. Myytija mex. Nĕ mytwrÿreja axte mă no ăm haxwÿja mex. Nĕ kanhĕti haxwÿja mex. Haxwÿja axte

mă. Kamă hkwy hpŏk kryre nĕ kamă hkwy hpŏk rŭnhti no ăm piită mex.

Nĕ jar pika ja kamă haxwÿja mĕmoj piită mex. No ăm te kot kaxkwa kamă mĕmoj jarir xwÿnhja mex pyrăk kĕt. Axtem na raa.

⁴² Tă koja mẽ panhĭ nywja haxwÿja axte mă. Te kot panhĭ htŭm pyrăk kĕt. Na htem ty nhŭm mẽ ma mẽ o mra nĕ mẽ hagjĕ. Nhŭm mẽ hikwÿ nĕ gaa nĕ ĭ rerek nĕ hapĕx. Tă koja Tĭrtŭm akupÿm tanhmă mẽ pahto mẽ pahtĭr to pu mẽ hpănhă pamex kumrĕx. Hămri nĕ axte mă mẽ panhĭ nyw mex o mex jakamă koja axte htyk nĕ ĭ rerek kĕt nĕ.

⁴³ Na htem ty nhŭm mẽ hagjĕ nhŭm htyk xwÿnhja tanhmă amnhĭ to hkĕt nĕ amarĭ hikwÿ. Omnuj nĕ ĭ nhenhek nĕ hikwÿ. Tă koja Tĭrtŭm akupÿm mẽ ho mẽ htĭr nĕ mẽ kăm mẽ ĭ nyw gŏ nhŭm mẽ hpănhă mex kumrĕx nĕ hihtÿx nĕ Tĭrtŭm nhŏ krĭ kamă pa ho pa.

⁴⁴ Mĕ htyk nhŭm mẽ kot mẽ hagjĕnh xwÿnhjaja na htem arĭ ĭ htŭm ă hikwÿ. Ăm jar pika ja pix kăm ri mẽ papa kaxyw na mẽ panhĭ htŭmja. No mẽ panhĭ nywja axtem Tĭrtŭm nhŏ krĭ kamă ri mẽ papa kaxyw jakamă koja mẽ panhĭ nywja axte mă. Tĭrtŭm Karŏ koja mẽ pamă kugŏ.

Mĕ panhĭ nyw te kot Kris nhĭ pyrăk ă harĕnh

Rukre 20.34-36

⁴⁵⁻⁴⁶ Nĕ Tĭrtŭm kapĕr ă kaga htŭm kot Atăw jarĕnh kot:

Na pre Tĭrtŭm my kot wa Atăwja nhĭpĕx. Jakamă Atăw kĕp pika nhŏ xwÿnh na pre. Anĕ.

Ă Atăw jarĕnh kot anhÿr. Ja pyră nĕ na pu htem pakatorxă nhŏhy rŭm pajapŏj nĕ Atăw pyră nĕ pahpĕ pika nhŏ xwÿnh. Tă nhŭm Atăwja pa nĕ gaa nĕ hpigĕt nĕ ty. Jakamă kot puj mẽ urăk nĕ papa nĕ gaa nĕ ty. Nom nhŭm Krisja Atăw kurom kĕp akupÿm mẽ ho mẽ htĭr xwÿnh jakamă kot puj mẽ pahpĕ hkwyjaja Atăw pyră nĕ nhÿrmă mẽ pahtyk tă nhŭm Kris akupÿm mẽ pahto mẽ pahtĭr. Hămri nhŭm Tĭrtŭm Karŏ mẽ pamă mẽ panhĭ nyw gŏ pu mẽ axte pahtyk kĕt nĕ. Pănhă axte mă mẽ pahpĕ kaxkwa nhŏ xwÿnh.

⁴⁷ Nĕ Atăw na pre Tĭrtŭm pika ho hipĕx nĕ ho htĭr nhŭm ri pa. Nom Kris na pre Atăw

rom kaxkwa rŭm mē pahwŷr wrŷ. ⁴⁸ Tã mē pahpê pika nhõ xwŷnhjaja te mē pahpê Tirtŭm kot wam my nhŷpêx xwŷnhhta pyrãk. No mē pahte kaxkwa hwŷr ma papa mã xwŷnhjaja te mē pahte kaxkwa rŭm my kot mē pahwŷr wrŷk xwŷnh Krista pyrãk. ⁴⁹ Tã kormã mē pahpê pika nhõ xwŷnh jakamã te mē pahpê my pika ho hipêx xwŷnhhta nhŷ pyrãk. Nom kot puj mē nhŷrmã ty hãmri nē hpãnhã te pahpê kaxkwa rŭm my kot mē pahwŷr wrŷk xwŷnhhta nhŷ pyrãk.

Axte mē pahtyk kêt kumrêx ã mē pajarênh

Juãw 11.25; Sikŭn Korit 5.4; Wam Tesarõn 4.13-18

⁵⁰ Nē kot puj mē panhŷ htŭm rãhã Tirtŭm nhõ krŷ hwŷr paxãpir kêt nē. Panhŷ htŭm na hte ty nē rerek nē hapêx. Jakamã koja Tirtŭm Karõ mē pamã mē panhŷ nyw gõ pu mē rŷ kormã ma õ krŷ hwŷr pajapêx pa nē kamã papa ho papa.

⁵¹⁻⁵² E mē inhma. Na pre kormã Tirtŭm mē amã mēmoj to amnhŷrŷt kêt tã ra inhmã ho amnhŷrŷt. Jakamã kot paj ŷ hã mē amã harê ka mē inhma. Nã kot puj mē pahpiitã mē pahtyk kêt nē. Koja nhŷrmã Tirtŭm kapêr o mē wrŷk xwŷnhjê hõja mē pamã pifti kakõ. Mē pajaêr pê hkakõ. Hãmri nhŷm Tirtŭm kra ra mē htyk nē mē hikwŷ xwŷnhjaja akupŷm ŷ nyw o htŷr kurê kumrêx. Nē kormã mē pahtyk kêt xwŷnhjaja kot pu mē mē pahtyk kêt ri mē urãk nē panhŷ nyw kurê kumrêx. Hãmri pu mē pahpiitã pahtŷr o pahtŷr tŭm nē papa.

⁵³ Koja Tirtŭm mē panhŷpêx o te mē pahte paxê htŭm o papinhŷpanh nē hpãnhã paxê nyw jagjênh pyrãk. Jao mē panhŷ htŭm o hapêx nē hpãnhã mē pamã mē panhŷ nyw gõ pu mē axte pahtyk kêt kumrêx nē ri papa ho papa. ⁵⁴ Tirtŭm kapêr ã kagã htŭm kot ja jarênh kot:

Na ra Tirtŭmja mēhtyk ho hapêx pa. Anê. Te ra kot ho hapêx par pyrãk o ã harênh kot anhŷr. No ãm kormã. Jakamã kot puj mē nhŷrmã panhŷ nyw nē ri papa nē mē pahtõ axte pahtyk kêt kumrêx. ⁵⁵ Mē pahtykja te mē kot makre par nhŷm axte kot mē hkamnhwŷr kêtja pyrãk. Urã nē koja Tirtŭm akupŷm mē pahto mē pahtŷr pu mē axte pahtyk kêt nē. Nē axte ri

pamã ma hkêt nē papa. Nē axte paxã hkêt nē. ⁵⁶ Tirtŭm kapêr ã kagã htŭmja ã mē pakukamã mē pajarênh kot anhŷr. Mē pahte amnhŷ tomnuj xwŷnh jakamã kot puj mē nhŷrmã ty. ⁵⁷ Nom nhŷm Tirtŭm àhpumunh tŷx o àhpumunh tŷx jakamã na hte Pahihti Jejus Kris kukwak ri mē pahte hkõt amnhŷ xunhwŷr xwŷnhjê nē mē pahte amnhŷ tomnuj rênh pa. Pu mē nhŷrmã mē pahtyk tã nhŷm akupŷm mē pahto pahtŷr.

Mē pahte Jejus mã tanhmã amnhŷ nhŷpêx mex to hã mē pamã karõ

Karatas 6.9; Korosê 1.10

⁵⁸ Jakamã e kwa Jejus kõt ixkwŷjaja. Kêr ka mē arŷ Pahihti Jejus kõt mãn amnhŷ xunhwŷr tŷx rãhã ho ri apa. Nē kapêr kõt pix mã ri amnhŷ nhŷpêx rãhã nē kãm tanhmã amnhŷ nhŷpêx mex to ho ri apa. Kot kaj mē ã amnhŷ nhŷpêx anê hãmri nē kãm tanhmã amnhŷ nhŷpêx to kaprŷ ho ri apa hkêt nē. ãm hãmri kãm mēmoj to anhŷr mex rãhã ho ri apa.

16

Mē kêp amrakati xwŷnhjê jarênh

Atre 11.27-30; Rõmãn 15.25-27; Sikŭn Korit 8.1-24, 9.1-5; Wam Ximotre 6.18

¹ Nē na pa pre krŷ pê Karatas kamã tanhmã Jerujarê kamã Kris kwŷjê jarênh to. Ijaew kwŷ kot mē pahpyrà nē Jejus kõt amnhŷ xunhwŷr ã mē harê nē mē kêp amrakati hã mē harê hãmri nē mē kãm:

—E. Kwa kêr ka mē kãm mē akãxpore hkwy ho akuprõ nē ma mē hwŷr amê.

Anhŷr o mē kãm ixkapêr. Jakamã kwa kêr ka mē urãk nē mē kaxyw mē kãm kãxpore hkwy ho akuprõ. ² Mē panhõ arŷgromnu pê sap ã hkwy ho akuprõ. Kot kaj mē akãxpore rax japêr nē mē kaxyw hkwy ho rax nē axi. Nom kot kaj akãxpore grire japêr nē mē kaxyw mē kãm ho grire nē agõ. Kêr pa mēmo arŷgro hã ma mē awŷr mõ ka mē ra mē kaxyw ho apikuprõnh rax nē.

³ Nē ma mē kot mē kãm ho mõr mã xwŷnhjaja ka mē ixkutêp mē akwŷjê rê. Kêr pa pøj nē mē omu hãmri nē mē kaxyw kagã nhŷpêx nē kamã mē harê. Nē mē kãm kugõ nhŷm mē ma Jerujarê hwŷr kãxpore mē ro hã amnhŷ kõt o mõ nē mē kãm kugõ. Mē kot kamã harênh nē mar hãmri nē mē kamjaja

mě ate mě kaxyw mě rênh ã mě ajarênh ma.
⁴Rÿ kot ka mě amã mě hkôt inhmênh prãm
 nê mãmri mẽ hkôt inhmê pa ma mẽ hkôt
 mō.

*Pawre kot amnhĩ kukamã amnhĩ jarênh
 Atre 19.21-22*

⁵Nom kot paj tokyx mẽ awÿr inhmōr kêt
 nê. Kot paj ja rûm ixkato nê hpãnhã ma
 pika pê Masetōn wÿr mō. Hãmri nê mẽ
 hkôt ixpa grire nê ma kormã mẽ awÿr Korit
 wÿr mō. ⁶Hãmri nê pōj nê mẽ akôt ri ixpa
 ryy nê. Nê ixtã amgrã pixi nê hapêx nê rĩ
 kormã ma axte nhãm krĩ hō hwÿr mō. Nê
 inhnojarêt ka mẽ ixto Tirtũm wÿ nê inhmã
 ixàpkur xà hkwÿ gō pa ma mẽ hwÿr pry
 hã hkur o mō. ⁷No ixte mẽ awÿr ixpōx
 nê tokyx mẽ akurũm ixkator nê hpãnhã
 ma nhãm krĩ hō hwÿr inhmōrja na inhmã
 hprãm kêt. Jakamã koja Tirtũm kãm ja mex
 pa arĩ ri mẽ akôt ri ixpa hã ixtã mytwrÿ
 xohtō nê tokyx ma nhãm inhmōr kêt nê.
⁸Kot paj kormã jar Epes kamã ri ixpa rãhã
 nhũm mẽ hkĩnh pê Pêtekos kato nê hapêx
 pa rĩ kormã ma Masetōn wÿr mō. ⁹Na pa
 hte jar kormã mẽ kãm Jejus kapêr jarênh o
 ri mẽ hkôt ixpa nhũm mẽ ohtō nê inhmar
 o pa. Mẽ kãm mar prãm. Tã no nhũm mẽ
 hkwÿjaja ohtō nê mẽ kêp ja omnuj nê nhũm
 mẽ hã ixkamã gryk nê ixtomnu o pa.

*Mẽ kot Ximotre ho mex ã mẽ harênh
 Hapuhã Juãw 5*

¹⁰Nê kwa koja Ximotre mẽmo arĩgro hã
 mẽ awÿr pōj ka mẽ omu nê ho mex nê.
 Nê mẽ amnhĩ nhōrkwy hwÿr awÿ kê mẽ
 akutã apkur o pa. Na hte ixpyrà nê Pahihti
 Jejus mã tanhmã amnhĩ nhĩpêx to mex o
 pa. ¹¹Kormã mẽ pahkĩnhã nyw tã kêt ka
 mẽ tee ri ja hã omu nê ri axpên mã tanhmã
 harênh to hkêt nê. Mẽ ãm akapêr mex pix
 o kãm akapêr. Nê koja akupÿn nojarêt ka
 mẽ pry hã kãm apkur xà hkwÿ gō kê mex
 pê man akupÿn ixwÿr mō pa tokyx omu.
 Kot paj jar mẽ pahkwÿjê mẽ akupÿn hpōx
 kamã ijamak o ixpa.

¹²Nê na pa hte xatã jar mẽ pahtō Aporja
 ma mẽ awÿr mōr kaxyw mẽ awÿr hano.
 Kot jar mẽ pahtō hkwÿjê mẽ ma mẽ awÿr
 mōr kaxyw. Nom kormã. Koja xep mẽ jar
 tanhmã amnhĩ to hpa nê rĩ kormã ma mẽ
 awÿr mō.

*Kagà jatur xà kamã Pawre kot mẽmoj tã
 karō*

*Epes 6.10-12; Sikũn Ximotre 1.7; Wam
 Pêtre 5.8-9*

¹³E kwa kêt ka mẽ arĩ amnhĩ wÿr Jejus
 kamã ajamak rãhã ho ri apa. Nê hamãr pê
 kutêp tãm amnhĩ nhĩpêx o ri apa. Nê amnhĩ
 kaxyw hkôt ajamexpêr tÿx rãhã nê.

¹⁴Nê mẽ amã axpên kĩnh pê tanhmã
 axpên to mex to.

¹⁵Mãn ka mẽ ra Estepti mẽ hkwÿjê jarênh
 ma. Mẽ hkumrêxjaja na prem pika pê Gres
 kamã Kris kôt amnhĩ xunhwÿ. Tã xep mẽ
 ra Kris kôt hkwÿjê ho mex o ri mẽ hkôt
 pa. ¹⁶Kêt ka mẽ ã mẽ kot amnhĩ nhĩpêx
 anhÿr xwÿnhjê kapêr ma nê hkôt ri amnhĩ
 nhĩpêx o ri apa. Mẽ kot Kris mã mẽ ajamãr
 xwÿnh piitã kêt ka mẽ kapêr ma nê mẽ hkôt
 ri amnhĩ nhĩpêx mex nê.

¹⁷Nê ota Estepti nê Akajkre nê Putuna-
 treta na mẽ ra jar pōj. Pa mẽ Sostenes mẽ
 wa mẽ omu nê wa ixkĩnh nê. Te ixte mẽ
 apumunh nê ixkĩnh tÿxta pyrãk. ¹⁸Na xep
 prem ma mẽ awÿr mō nê tanhmã mẽ amã
 kapêr to ka prem mẽ ama nê akĩnh nê. Tã
 mẽ ra amnê ixwÿr mō nê tanhmã inhmã
 kapêr mex to pa mẽ kuma nê ijaxwÿja
 ixkĩnh nê. Kwa kêt pu mẽ ã mẽ kot mẽ
 panhĩpêx anhÿr xwÿnhjê ho mex o papa.

¹⁹⁻²⁰Nê ota jar pika pê As kamã Kris
 kôt mẽ pahkwÿjaja piitã mẽ awÿr hpêr
 mẽ. Nê Akir mẽ hprō Prisireja wa. Nê
 wa òrkwy kamã mẽ kot Tirtũm mã amnhĩ
 jarênh kaxyw mẽ pikuprōnh xwÿnh piitã
 mẽ awÿr hpêr mẽ.

Nê kêt ka mẽ nhÿri axpên pumu nê mẽ
 apê Kris kôt mẽ ate axpên to atō nê atōx ã
 axpên mã akapêr mex nê akĩnh nê.

²¹E kot paj kagà jatur xà kamã inhĩkra
 ho mẽ amã amnhĩ nhĩxi nhĩpêx ka mẽ omu.
 Koja inhmã ixkapêr ã kagà xwÿnhhta ja hã
 kagà hkêt nê. Pa kot paj hipêx. Ixpê Pawre
 na pa ã amnhĩ nhĩxi nhĩpêx anê ka mẽ omu.

²²Nê kwa kêt ka mẽ arĩ amã Pahihti Jejus
 kĩnh o ri apa. Koja mēhō kãm hkĩnh kêt hã
 koja Tirtũm ja hã homnuj tÿx kumrêx.

E “maranat.” Mẽ pakapêr kãm na htem
 maranat jarênh o: “Kwa tokyx akupÿn mẽ
 ixwÿr wrÿ Pahihti.” Anê.

²³E kê Pahihti Jejus Krisja mẽ ato mex
 nê mẽ akutã nojarêt rãhã ho pa. ²⁴Ixpyrà

ně mẽ apê Jejus Kris kwỳ jakamã na pa hte
inhmã mẽ akĩnh ně.

Tã ãm ja pix. Ixpê Pawre na pa ã mẽ awỳr
kagà nhĩpêx ně mẽnh aně.

Sikūn Korīt
Pawre wam Korīt kām Jejus
kôt hkwỳjê hwỳr kagà nē
mēnh kôt kagà hō mēnh

Pawre na pre kagàja nhīpêx. Kêp mry hkà ho ixkre nhīpêx nē ho wēnê ho pa xwỳnh na pre. Tā hpānhā kêp Jejus nhỹ hā hkrajê jahkre ho pa xwỳnh. Jakamā na pre kagàja nhīpêx nē Korīt kām mē kot Jejus kôt amnhĩ xunhwỳr xwỳnhjê hwỳr kumē. Na pre ra mē hwỳr wamta nhīpêx nē kumē. Wam kagà nhīxi pē Wam Korīt. Tā axte hkôt ja nhīpêx nē mē hwỳr mēnh jakamā kagà nhīxi pē Sikūn Korīt.

Na pre Korīt kām Jejus kôt mē htōjê hō axtem nē nā puro kamā hpijaàm kêt o pa nhũm Pawre tee ri harēnh ma nē mē hwỳr wam kagàta mē nē kamā tanhmā mē kot hipêx to hā mē kām karō. Tā kagà ja kamā axte tanhmā hā mē kām karō hto.

Na pre ra Korīt wỳr mē kêp Kris nhỹ hā mē ahkre hā amnhĩ to hêx xwỳnhjaja mē hwỳr pōj nē tanhmā mē kām kapêr jarēnh to ho mē hkôt pa. Nē tanhmā mē kām Pawre ho hêx to. Jakamā nhũm kagàja kamā tanhmā mē kām amnhĩ tā aprār to nē kām mē hkĩnh tỳx ā amnhĩ jarē. Ā na pre Pawre mē kām mēmoj jarēnh nē hā kagà anē. Nē mē kām hā kagà ho:

¹ Pa Korīt kām Tirtūm krajaja. Xà mē apiitā mē amex na ka mē apa? E ot pa mē awỳr kagà nhīpêx nē kumē. Mē amā nē mē anhō pika pē Gres kamā Tirtūm krajê mē mē ato ixpimràatā mē awỳr hipêx nē kumē. Ixpê Pawre na pa hte Tirtūm jamaxpêr xà hkôt ma Jejus Kris nhỹ hā krī piitā hkôt hkrajê jahkre ho ri ixpa. Tā Kris kôt mē pahtō Ximotre mē wa mē awỳr hipêx nē kumē.

² E kê Mēpahpām Tirtūm mē Pahihti Jejus Kris wa mē ato mex rāhā ho pa. Nē mēmoj to mē akutā nojarêt rāhā ho pa. Ka mē wa kukwak ri ajamakêtkati nē amex nē ri akĩnh nē apa ho apa.

Pawre kām amnhĩ xà htỳx kamā hamak pyma hkêt ā harēnh

Rōmān 1.11-12; Korosē 1.11; Sikūn Tesarōn 2.16

³⁻⁴ Nā Tirtūm kêp mē panhō Pahihti Jejus Kris nhīpêxà na. Nē kêp Mēpahpām maati jakamā na hte mē pakamā ukapri nē tanhmā mē pahto mex to ho pa. Kot puj mē mēmoj tā tanhmā amnhĩ to nē pahkapri nē ri papa nhũm ja hā mē pahpumu hāmri nē hamaxpêr pix o akupỳm mē pahto mē paxihtỳx. Mēmo kaxyw na hte ā mē pahto mex anē? Nā mē pahte amnhĩ tā omunh nē amnhĩ pyrāk mē hkapri nē ri mē pa xwỳnhjê jamaxpêr o hihtỳx o mē hkôt papa kaxyw. Ja kaxyw na hte mē pajamaxpêr o hihtỳx. Jakamā kwa pu mē kām mex o mex ā mān harēnh rāhā ho pa.

⁵ Na htem tōhā ixto Kris nhīpêx pyrā nē tanhmā ixto pa amnhĩ xà htỳx kamā ijamak o ri ixpa. Tā nhũm Tirtūm inhīpêx o te Kris nhīpêx pyrā nē hamaxpêr pix o tanhmā ixkrā hto pa mē kutā amnhĩ to htỳx nē arī mē hkôt ixpa. ⁶⁻⁷ Na pa hte mē amā Kris kapêr jarēnh o ixpa. Mē ate inhmar nē hkôt amnhĩ nhīpêx kaxyw. Jakamā na hte mē kām Tirtūm kapêr mar prām kêt xwỳnhjaja tōhā mē atā ixtomnuj nē pa amnhĩ xà htỳx kamā ijamak o ri ixpa. Tā kwār mē māmri ā inhīpêx anē. Mē ate Jejus kôt amnhĩ xunhwỳr tỳxja na inhmā hprām. Na htem tanhmā Kris ā inhīpêx to nhũm Tirtūm mē hā ixpumu nē tanhmā ixkrā hto pa inhmā amnhĩ xà htỳx kamā ijamak pyma hkêt nē ixpa. Nē arī mē hkôt mē kām kapêr jarēnh rāhā ho ri ixpa. Na hte Tirtūm amarī ā inhīpêx anhỳr kêt nē. Mē ate ā kot inhīpêx anhỳr ā ixpumunh nē ixpyrā nē amnhĩ kaxyw kām ajamaxpêr tỳx kaxyw na hte ā inhīpêx anē. Mē ate ja hā ixpumunh nē ā ajamaxpêr anhỳr kaxyw nē mē ajamaxpêr o:

—Nā kot pa nhỹrmā Pawre pyrā nē tōhā mē mỳrapê amnhĩ xà htỳx kamā ijamak o ixpa. Hāmri nhũm Tirtūm ja hā ixpumu nē te ho Pawre nhīpêx pyrā nē tanhmā ixto pa inhmā amnhĩ xà htỳx kamā ijamak pyma hkêt nē ixpa. Nā koja ā inhīpêx anē.

Anhỳr o mē ajamaxpêr kaxyw na hte Tirtūm mē kutā ixto ixihtỳx. Mē ate ja hā ixpumunh nē akupỳm tām ajamaxpêr

pê Karõ nhỹ hã amnhĩ to axihtỳx kaxyw. Jakamã na pa tee ri mẽ akukamã ijamaxpêr kêt nê.

Tĩrtũm kêp mẽ papytâr xwỳnh ã harênh

⁸ E Kris kôt ixkwỳjaja. Kot paj ixprĩ hã mẽ amã tanhmã amnhĩ jarênh to ka mẽ inhma. Na pa pre ma pika pê As wỳr mỗ nê mẽ kãm Jejus kapêr jarênh o ri mẽ hkôt ixpa. Hãmri nhũm mẽ hkwỳjaja ja hã ixtomnuj tỳx nê pa amnhĩ xà htỳx kamã ijamak pê mẽ hkôt ixpa. Kironhỳx pa pre mẽ kamã ty. ⁹ Na pa pre tee ri amnhĩ kukamã ijamaxpêr o:

—Koja pêr mẽ ixpĩ. Tanhmã kot pa we amnhĩ to nê tokyx mẽ kêp amnhĩ pytã? Kot paj tee ri inhma mẽ kêp amnhĩptâr prãm. Tĩrtũm pix na ja kaxyw mẽ kutã àhpumunh tỳx. Rỳ nhũm mẽ kot ixpĩr tã nhũm kot akupỳm ixto ixtĩr kaxyw tapxipix na àhpumunh tỳx. Nà kot paj amnhĩ kaxyw tapxipix mã mãn ijamaxpêr o ri ixpa nhũm amnhĩ tã ixpumu nê hkĩnh nê. ã ixte amnhĩ nhĩpêx anhỹr o ixpaja na kãm hprãm. Anê.

¹⁰ Tã nhũm pre ã inhĩpêx anê nê xatã mẽ kêp ixpytâr o ixkôt pa. Koja ã mẽ kêp inhĩpêx anhỹr rãhã ho pa. Nà ã kot inhĩpêx anhỹr mã kênã.

¹¹ Nom kwa kêr ka mẽ apiitã arĩ ixto Tĩrtũm wỳr rãhã ho ri apa kê mẽ ama nê mẽ kãm ixkurê xwỳnhjê kutã ixto ixihtỳx rãhã ho pa. Nê ixto mex rãhã nê. Hãmri nhũm mẽ ohtô nê kot mẽ kêp tanhmã ixpytâr to hã ixtã omu nê ixtã kãm mex o mex ã harê.

Pawre kot mẽ kãm amnhĩ tã aprãr ã harênh

Wam Korīt 2.1-5

¹² Nê na xep pre atar Kris kôt mẽ pahkwỳjaja tanhmã ixto kapêr punuj to nê Jejus kot mẽ awỳr inhmênh kêt ã mẽ amã ixto hêx. Nê ijakwa nhĩkjê ho inhma mẽ akĩnh nê ijakwa nhĩkjê ho mẽ ato ixkapêr punuj ã ijarênh o ri pa. Nom ixte ã amnhĩ nhĩpêx anhỹr kêt. Aa ixte tanhmã mẽ ano kupyw to hkêt. ãm hãmri na pa mẽ amã amnhĩ jarê nê tãm mẽ amã ixkapêr o ri ixpa nê tãm ri mẽ anhĩpêx o ri ixpa. No ijamaxpêr tũm kôt tanhmã mẽ anhĩpêx to hkêt nê. ãm Tĩrtũm kot mẽmoj to mẽ pakutã nojarêr ã omunh xà hkôt pix mã na pa hte ỹ hã mẽ ato mex o ri ixpa. Ijamaxpêr nyw

o. Na pa hte Tĩrtũm pyrã nê mẽ piitã mẽ ho mex nê. No mẽ kajaja ixpyrãn mẽ apê hkra jakamã na pa hte mẽ ato mex kumrêx o ri ixpa. ¹³ Na pa hte mẽ amã kagã hkwỳ nhĩpêx nê ixprĩ hã mẽ amã tanhmã mẽmoj jarênh to. Mẽ ate kamã harênh nê mar mex kurê kumrêx kaxyw. No na pa hte mẽ amã tanhmã ixêx to rỳ tanhmã mẽ ano kupyw to hkêt nê. ¹⁴ ã ixte amnhĩ nhĩpêx anhỹr o ri ixpa htã kormã mẽ apiitã ja hã ixpumunh mex kêt nê. Nê Jejus kot mẽ awỳr inhmênh ã ixpumunh mex kêt nê. Jakamã na hte mẽ akwỳjaja ixto akapêr punuj o pa. Tã kot kaj mẽ nhỹrmã ãm hãmri Jejus kot mẽ awỳr inhmênh ã axpên mã ijarê pa mẽ ama nê ixkĩnh nê. Hãmri nhũm nhỹrmã mẽ panhõ Pahihti Jejus mẽ pahwỳr akupỳn wrỳ pa kãm mẽ ajarê nê kãm:

—E Pahihti. Jajê mã na pa pre akapêr jarênh o ixpa nhũm mẽ inhma nê akôt amnhĩ xunhwỳr kurê kumrêx nê tãm amnhĩ nhĩpêx mex o pa.

Anhỹr o kãm mẽ ajarê. Hãmri nê ã mẽ ate amnhĩ nhĩpêx anhỹr ã mẽ apumunh kôt ixkĩnh nê. Ka mẽ ajaxwỳja akĩnh pê tanhmã kãm ijarênh to ho akuhê.

Pawre hêx kêt ã kot amnhĩ jarênh

Wam Korīt 16.5-6

¹⁵⁻¹⁶ Nê na pa pre ra mẽ awỳr ixkrã. Ixte ma mẽ awỳr inhmôr nhũm mẽ ate ixpumunh nê akĩnh ã mẽ akamnhĩx nê mẽ awỳr ixkrã nê ijamaxpêr o:

—Nà ma Masetõn wỳr inhmôr xwỳj ri kot paj ma Korīt kumrêx wỳr mỗ. Hãmri nê Kris kôt ixkwỳjê pumu nê rĩ kormã hamũ Masetõn wỳr mỗ. Nê mẽ kamã ri ixpa tãmtã awjanã nê akupỳn Korīt wỳr mỗ nê axte mẽ omu. Jao Tĩrtũm kapêr o mẽ ahkre ho axkrut nhũm mẽ amnhĩ tã ixpumu nê hkĩnh nê. Hãmri pa akupỳm Jutej wỳr inhnojarêr nhũm mẽ pry hã ixàpkur xà hã inhma mẽmoj kwỳ nhõr japêr.

Anhỹr o ijamaxpêr. ¹⁷ Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wỳr ixkãm ama nê axpên mã ijarênh o:

—Kwa Pawre kot ra mẽ pahwỳr nojarêr ã amnhĩ jarênh tã amnhĩm nojarêr kêt kumrêx. Mãn pre ãm mẽ pamã amnhĩ to

hêx nà? Ra kot mẽ pamã amnhĩ jarēnh tã tokyx hpôx kêtne hã. Anẽ.

¹⁸ Kwa mẽ ri ã inhmã ajamaxpēr anhÿr kêt nẽ. Na pa pre mẽ amã ixêx kêt nẽ. Na pa hte Tĩrtũm noo mã ãm hãmri mẽmoj jarēnh o ri ixpa nẽ mẽ amã mẽmoj jarēnh o ixêx kêt nẽ. Nà ãm hãmri na pa pre ma mẽ awÿr inhmōr ã amnhĩ jarẽ.

¹⁹ Na pa pre ra Ximotre mẽ Siras mẽ wa mẽ amã Jejus Kris jarēnh o ri mẽ akôt ixpa. Jejus kêp Tĩrtũm Kra hã harẽ nẽ kot amnhĩ nhĩpêx te kot Tĩrtũm kot amnhĩ nhĩpêx pyrãk ã harēnh o ri ixpa. Jejus haxwÿja amnhĩ to hêx kêt. Kot mẽmoj tã amnhĩ jarēnh xà hkôt na hte ãm hãmri tanhmã amnhĩ nhĩpêx to. Tã ã kot amnhĩ nhĩpêx anhÿrja kôt na pa inhmã ixte amnhĩ nhĩpêx o ixpa hprãm nẽ. ²⁰ Ra Tĩrtũm Jejus Kris kukwak ri kot mẽ pahto mex ã amnhĩ jarēnh jakamã na pu htem axpēn mã harēnh o:

—Koja Tĩrtũm Jejus kukwak ri mẽ pahto mex rax nẽ. Ra kot mẽ pahtã amnhĩ jarēnh xà hkôt. Nà Tĩrtũm mex o mex. Anẽ.

Tĩrtũm kot mẽ pa hwÿr Karō rēnh ã harēnh Rōmãn 8.14; Epes 1.13

²¹ Nà Tĩrtũmja mex o mex. Kot mẽ pahpê hkra kaxyw amnhĩm mẽ paxunhwÿr jakamã na hte tanhmã mẽ pahkrã hto pu mẽ Kris kôt amnhĩ nhĩpêx mex o papa.

²² Na pu htem Kris kôt amnhĩ xunhwÿ nhũm Tĩrtũm ja hã mẽ pahpumu nẽ mẽ pahwÿr Karō rē nhũm mẽ pahwÿr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagà hto nhũm mẽ kot kêp ò dõn ã omunhta pyrãk. Tã koja Tĩrtũm Karō mẽ pakamã hkrĩ pu mẽ ja hã amnhĩ pumunh kôt Tĩrtũm kot nhÿrmã mẽ pahto mex rax ã amnhĩ tã omunh kurê kumrêx. Ra kot mẽ pahto mex tã koja nhÿrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjêr prãm kêt ã kot amnhĩ jarēnh

Wam Korīt 4.21; Sikūn Korīt 10.1-2

²³ E Kris kôt ixtõ nẽ ixtõxjaja. Kot paj kormã ma mẽ awÿr inhmōr kêt ri ixprĩ hã mẽ amã tanhmã amnhĩ jarēnh to ka mẽ ixte amnhĩ jarēnh ma. Tĩrtũm tãm mẽ arom kot

ijamaxpēr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarēnh to ka mẽ inhma.

Na pa pre ra mẽ awÿr inhnojarêt tã no ãm tee ri amnhĩ kukamã ijamaxpēr nẽ ijamaxpēr o:

—Nà kot paj taxy kormã ma mẽ hwÿr inhmōr kêt nẽ. Kot paj tokyx mẽ hwÿr mōn pøj nẽ kot amnhĩ tomnuj xwÿnhnta ã mẽ kãm akir nẽ nẽ tanhmã mẽ kãm ixkapēr to. Hãmri nhũm mẽ amnhĩ tã inhma nẽ hkaprĩ nẽ tee ri amnhĩ kukamã hamaxpēr. ã mẽ kot amnhĩ nhĩpêx anhÿr pymaj kot paj kormã mẽ hwÿr inhmōr kêt nẽ.

Anhÿr o ijamaxpēr. ²⁴ Inhmã ma mẽ awÿr inhmōr nẽ tanhmã mẽ ate amnhĩ nhĩpêx to hã axte mẽ amã karō kamã ixihtÿx prãm kêt. Mẽ akwÿjê rom ra mẽ ate Kris hkôt amnhĩ xunhwÿr tÿx kēnã. Tã mẽ ate hkôt amnhĩ nhĩpêx mex o akĩnh nẽ apaja na inhmã hprãm.

2

¹ Na pa pre ma mẽ awÿr mō nẽ mẽmoj tã mẽ amã akir nẽ nẽ tanhmã mẽ amã ixkapēr to ka prem inhma nẽ akaprĩ nẽ ri apa. Tã inhmã akupÿm mẽ awÿr inhmōr nẽ axte mẽ amã ixàkjêr prãm kêt jakamã na pa kormã mẽ awÿr inhmōr kêt nẽ. ² Kot kaj mẽ akĩnh nẽ apa pa ijaxwÿja ixkĩnh nẽ ixpa. No kot paj ma mẽ awÿr mō nẽ mẽmoj tã mẽ amã akir ka mẽ tee ri inhma nẽ akaprĩ nẽ. Pa mẽ apumu nẽ ijaxwÿja ixkaprĩ nẽ.

³ Ja pymaj na pa pre wam ixte mẽ awÿr kagà mēnhnta kamã mẽmoj nẽ tanhmã mẽ amã ixàkjêr to. Mẽ ate kamã harēnh nẽ mar nẽ tokyx kormã mẽ awÿr inhmōr xwÿj ri tanhmã mẽ ate amnhĩ tomnuj tota kaga nẽ tãm amnhĩ nhĩpêx kaxyw. Kêr pa mẽmo arĩgro hã ma mẽ awÿr mōn pøj nẽ mẽ ate tãm amnhĩ nhĩpêx o apa hã mẽ apumu nẽ ixkaprĩ hkêt nẽ ixkĩnh nẽ. Ka mẽ ajaxwÿja ixpumu nẽ akĩnh nẽ. ⁴ Jakamã na pa pre ã mẽ amã kagàta nhĩpêx nẽ mẽ awÿr mēnh anẽ. Nẽ kamã mẽmojta nẽ tanhmã mẽ amã ixàkjêr to. Na pa pre ixkaprĩ htÿx nẽ tee ri mẽ akukamã ijamaxpēr o inhmÿr rax pē mẽ amã mẽmojta ã kagà. No ãm mẽ akaprĩ kaxyw na pa pre mẽ amã hipêx kêt nẽ. ãm mẽ ate kamã harēnh nẽ inhmar nẽ ajamaxpēr o:

—Hêxta waa nê. Nà Pawre na kām mē pahkīnh tỳx kumrēx. Hã na pre mē pahte tanhmã amnhĩ tomnuj to hã mē pajarēnh ma nê tee ri mē pakukamã hamaxpēr pē kagàja kamã hã mē pamã akir nê mē pahwỳr kumē. Nà kām mē pahkīnh tỳx kām na ã mē pamã kapēr kām hihtỳx anē.

Anhỳr o ajamaxpēr kaxyw na pa pre hipêx nê mē awỳr kumē.

Mē kot axte amnhĩ tomnuj mã hamaxpēr kêt ã mē kām karō

Rukre 17.3-4; Wam Korīt 5.1-13; Karatas 6.1-2

⁵⁻⁹ Nê wam kagàta kamã na pa pre mē amã mē akwỳjê hō kot nã kaàkre kamã hpijaàm kêeta pa mē amã tanhmã hã karō hto. Ra mē ate harēnh mar tã nê kām akapēr kêt nê. Tã mē ate inhmar nê nê tanhmã kām akapēr to nê amnhĩ nê hanor kaxyw na pa pre mē awỳr kagàja mē. Hãmri nê ijamaxpēr o:

—Ko. Koja mē ixkapēr mar xà hkôt amnhĩ nê hanor japēr. Anē.

Tã ka xep prem kamã harē nê ama nê tee ri ja hã amnhĩ pumu nê akaprĩ nê. Nê ixpyrà nê apijaàm nê. Hãmri nê ijamaxpēr xà hkôt amnhĩ nê hanor kām axihtỳx nê. Âm hãmri na ka prem ã hipêx anē. Nhũm xep tee ri ja hã amnhĩ pumu nê hkaprĩ nê hkaprĩ xàj ri mỳr o pa. Jao ra ã amnhĩ nhĩpêx anhỳrta kaga nê akupỳm tãm amnhĩ nhĩpêx. Tã ra ã kot amnhĩ nhĩpêx anhỳr jakamã kwa mē tokyx akupỳm amnhĩ wỳr awỳ kê axte mē awỳr mra nê mē akôt pa. Ra kot amnhĩ tomnujta kaga jakamã kêr ka mē axte kām ajamaxpēr kêt nê. Akupỳm tãm kām akapēr kêt tokyx akupỳm tãm hamaxpēr nê hkīnh nê pa. Kot kaj mē tokyx ã hipêx anhỳr kêt nê nhũm tee ri amnhĩ kukamã hamaxpēr nê hkaprĩ nê pa. Ja pymaj kwa mē amã hkīnh ã kām amnhĩ jarē nê akupỳm tãm kām akapēr pē tãm hipêx o ri apa. Kê amnhĩ tã mē apumu nê akupỳm hkīnh nê tãm hamaxpēr. ¹⁰ E kêr ka mē axte kot tanhmã amnhĩ tomnuj tota mã ajamaxpēr kêt nê. Kwarĩ ho kwarĩ. Kot kaj mē ã hipêx anē pa ijaxwỳja ma hipêx anē. No pa na pre tanhmã ixtomnuj to hkêt nê. Âm Jejus kapēr kwỳm na pre ri ã amnhĩ nhĩpêx anē. Tã ra kot amnhĩ

tomnujta kaga jakamã kot paj Jejus nhỹ hã akupỳm tãm hipêx nê kot amnhĩ tomnujta o ijamakêtkati tokyx anê nê axte kām ijamaxpēr kêt nê. Mē apiitã mē amex nê ri mē apa kaxyw. Jakamã kêr ka mē ajaxwỳja mē amex nê apa kaxyw ã amnhĩ nhĩpêx anê nê axte kām ajamaxpēr kêt nê. ¹¹ Kwa mē tokyx ja ho ajamakêtkati. Kê Satanasti tee ri ja hã mē apumu nê mē amã mē ate tanhmã amnhĩ tomnuj to hprãm xàj tee ri tanhmã ri mē ato ho pa kaprỳ. Kêr pu mē Satanasti kot amnhĩ nhĩpêx kôt amnhĩ nhĩpêx o ri papa hkêt nê. Ra mē pahte Tĩrtũm kapēr kuhpa hã tanhmã kot amnhĩ nhĩpêx to ho pa hã omunh mex kênã.

Pawre kot Xitre japēr o pa hã harēnh

¹² Nê na pa pre ja rũm ixkato nê ma Tôx wỳr mō. Ixte mē kām Kris jarēnh o mē hkôt ixpa kaxyw ma mē hwỳr mō. Nhũm Pahihti Kris ixkukamã tanhmã mē hkrã hto jakamã pa pre mē hwỳr pōj nhũm mē piitã kām ixujarēnh mar prãm nê. Pa pre mē kām Tĩrtũm kapēr jarēnh ryy ho mē hkôt ixpa. ¹³ Na pa pre Xitre ra mē hwỳr ixkukamã hpôx ã hkamnhĩx tã nhỹri omunh kêt nê. Hãmri nê ijamaxpēr o:

—Hêxta waa nê. Inhmã Korīt kām Jejus kwỳjê jarēnh mar prãm. Na pa tee ri mē hkukamã ijamaxpēr o ixpa. Nom kormã Xitre mē kurũm akupỳn hpôx kêt. Mãn kormã Masetõn kamã pa.

Anhỳr o ijamaxpēr hãmri nê mē kām amnhĩ jarē nê ixkato nê ma Masetõn wỳr krĩ hkwỳ hkôt hapēr o mō. Tã ra hwỳr ixkato nê omu.

Te mē pahpê mēhkuxwa xà pyræk ã mē pajarēnh

Epēs 5.2; Piripos 4.18

¹⁴⁻¹⁶ Nà Tĩrtũmja mex o mex. Na hte mē pahto mex rãhã ho pa. Nê mē kot mē panē àmnàr xwỳnhjaja nhũm hte tanhmã mē ho pu mē ma paxàmnhĩx ri mē hkôt mē kām Kris kapēr jarēnh o ri papa. Te mē pahte mē hkuxwa xà ho ri mē hkuxwa ho papa pyræk. Mē pahte Kris kôt amnhĩ nhĩpêx jakamã Tĩrtũm mã te mē pahkuxware nê ri mē papa pyræk. Nê te mē kām Kris jarēnh o ri papa pē te mē hkuxwa xà ho mē hkuxwa ho ri mē hkôt papa pyræk. Nhũm hte mē hkwỳjaja mē pama nê kām

mar prām nē. Nē mē paxujarēnhja haxwýja te kot mē hkuxwa xà kuxwa mex nhūm htem hpār nē kām ho amnhī kuxwa hprām pyrāk. Jao kām mē pamar prām nē Kris kōt amnhī xunhwý. No nhūm mē hkwýjaja axtem nē mē kēp mē pamar prām nōkati. Mē kumā Tīrtūm kapērja te kēp wenēn kuxý htýx nhūm mē kot hpār nē htyk pymaj amým kuhê pyrāk. Jao kapēr kaga nē kēp amým amnhī xunhwý.

Nē na pu htem amnhī krā hkōt mē kām Kris kapēr jarēnh o ri papa hkēt nē. Ām Tīrtūm nhý hā pix mā tanhmā harēnh to ho papa.

Pawre kot katāt kōt Tīrtūm kapēr o mē ahkre hā harēnh

¹⁷ Na hte mē kot mē kēp Kris nhý hā mē ahkre hā amnhī to hēx xwýnhjaja te Tīrtūm kapēr o wēnē pyrāk o mē hkōt pa. Jao kàxpore hprām xàj amnhī krā hkōt tanhmā mē kām harēnh to nhūm htem mē kuma nē hpānhā tanhmā mē kām amnhīrer to. Nom pa na pa hte ā amnhī nhīpēx anhýr kēt nē. Nē mē urāk nē amnhī krā hkōt Tīrtūm kapēr jahkre ho ixpa hkēt nē. Tīrtūm kot mē akaxyw ixām jakamā na pa hte ixkatāt kōt Kris nhý hā amarī mē amā kapēr jarēnh o ri mē akōt ixpa. No mē urāk nē kàxpore prām xàj mē amā harēnh kēt nē. Tīrtūm kot ja hā ixpumunh mex.

3

¹ Mē kēp Kris nhý hā mē ahkre hā amnhī to hēx xwýnhjaja na htem nhýhým nojarēt nē mē kot mar xwýnhjē mā:

—E kot paj ma nhām krī hō hwýr mō nē Tīrtūm kapēr o mē ahkre. Jakamā kwa mē kaxyw inhmā kagā nhīpēx nē kamā ixte Tīrtūm kapēr o mē ajahkre mex xwýnh ā ijarē nē hā kagā. Hāmri nē inhmā agō pa ma amnhī kōt o mō nē mē kot inhmar mā xwýnhjē mā kugō kē mē kamā harē nē ijarēnh ma nē kām ixkapēr mar prām nē.

Anhýr o na htem amnhī to mē hwýr o pa. No pa na inhmā ā amnhī nhīpēx anhýr prām kēt. Inhmā nhām mē kām amnhī to jarkrar prām kēt. Mē ate ja hā ixpumunh mex. Ra mē piitā mē kot ixkatāt kōt ixte Tīrtūm kapēr jarēnh mex ā ixpumunh mex jakamā mo kaxyw kot pa ri amnhī kōt kagā jamý nē ho ixpa? Nà kot pa amnhī kōt

hō ho inhmōr kaxyw hā ixàhwýr kēt nē. ²⁻³ Mē kajaja te mē apē inhō kagā pyrāk. Na ka prem ixte mē ajahkre ma nē Jejus kōt amnhī xunhwýr kurē kumrēx. Hāmri nhūm Tīrtūm mē amā amnhī Karō rē nhūm mē amā agjē ka mē ý hā amnhī nhīpēx nyw o amnhī nhīpēx o apa. Hāmri nhūm mē akwýjaja amnhī jaēr pē mē ate amnhī nhīpēx nyw ā mē apumu nē mē atā axpēn mā ijarēnh o:

—Hēxta waa nē. Pēr ām hāmri na pre Kris mē hwýr Pawre mē. Na pre ma mē hwýr mō nē mē kām Tīrtūm kapēr o mē ahkre nhūm mē kuma nē amnhī tomnuj kaga hpa nē hpānhā Tīrtūm kapēr kōt amnhī nhīpēx nē tām ri amnhī nhīpēx o pa. Ām hāmri na hte Pawre mē ahkre mex o pa. Hēxta waa nē.

Anhýr o mē atā ijarēnh jakamā mo kaxyw kot pa kagā hkwý jamý nē amnhī kōt ho ixpa? Nà mē kajaja te mē apē inhō kagā pyrāk.

⁴ Na pa pre Jejus kōt amnhī xām nhūm Tīrtūm ja hā ixpumu nē tanhmā inhmā kapēr o amnhīrit to nē inhmā:

—E Pawre. Kēr ka ma mē kām ixkapēr jarēnh o ri mē hkōt apa.

Anhýr jakamā na pa hte Tīrtūm kamnār rom ā amnhī nhīpēx anhýr o ri mē hkōt ixpa. ⁵ Nom amnhī krā hkōt mē ahkre hkēt nē. Tanhmā kot pa we amnhī to nē amnhī krā hkōt mē kām kapēr o mē ahkre mex nē? Nà Tīrtūm pix na hte ja kaxyw tanhmā ixkrā hto pa ô ri mē ahkre ho ri ixpa.

Tīrtūm kapēr nyw jarēnh

⁶ Nē Tīrtūm na hte tanhmā ixkrā hto pa Karō nhý hā mē piitā mē kām kapēr nyw jarēnh o ri ixpa. Amnepēm Tīrtūm kot Ijaew mā mēmoj tā karō xwýnhhta. Mojes kot kapēr tūm jarēnh o pa xwýnhhta mex tā no nhūm mē tee ri hkōt kām amnhī nhīpēx prām o pa. Nē xatā kamā harē nē omunh tā tee ri kot hkōt kām amnhī nhīpēx prām. Tā mē kot hkōt amnhī nhīpēx kēt mýrapē na prem pikaprār pan hapēx. No kēt Tīrtūm kapēr nywja. Jejus jarēnhja. Na hte Tīrtūm Karō tanhmā mē pahkrā hto pu mē Jejus kōt amnhī nhīpēx o ri papa. Jao mē pahpē pahťir tūm nē papa mā xwýnh. No na hte

nhâm mê hkwýjaja kãm harênhja mar prãm kêt nê amnhî jarênh o:

—Nà kot paj amnhî krã hkôt ã amnhî nhîpêx anê nê ã amnhî nhîpêx anê nhùm Tîrtûm ja hã ixpumu nê ixtîr tûm nê ixpa mã xwýnh ã ijarê.

Anhÿr tâ no ãm ã amnhî jarênh anhÿr kaprÿ. Tîrtûm Karõ nhÿ hã mê kot amnhî to mex o mê pa xwýnh pixjaja koja mê htîr tûm nê pa ho pa.

⁷ Nê Tîrtûm kapêr tûmta na pre Mojes mê kãm harênh kaxyw nhùm mêmoj tanhmã amnhî nhîpêx to rax kumrêx. Naja hkrakrak nê haxênh nê kamã kamât kô htyk. Hãmri nhùm Tîrtûm mê kot hkôt amnhî nhîpêx kaxyw kên po hã mê kãm mêmoj tâ karõ nhùm Mojes kumÿ nê mê hwÿr o wrÿ nê mê kãm kamã harê. Tîrtûm kot hirã htÿx kamã kãm kapêr nhùm kuri mar o ãm jakamã uràk nê ÿ hã hkuk nhîrã htÿx kumrêx nê mê kãm kapêr jarênh o xa. Jakamã nhùm mê tee ri kot hprî hã omunh mex kaxyw no ãm nom gêk tÿx nê. Tã gaa nhùm hkuk kãm hirãja amnhîm hprî nê hapêx o mõi. Na pre ã Tîrtûm Ijaewjê mã kapêr tûm nhõr anê. Hãmri nhùm Mojesja ô ri mê kãm kamã harê nê harênh pa hãmri nê mê kãm:

—E kêr ka mê Tîrtûm kapêr mar tÿx nê hkôt amnhî nhîpêx mex rãhã ho ri apa. Kêr ka mê nhÿrmã atyk tâ kê akupÿm mê ato mê atîr ka mê õ krî kamã kuri atîr tûm nê amex nê apa ho apa. Anê.

Hãmri nhùm mê kuma nê kãm:

—Tõe. Nà kot paj mê hkôt pix mã ri amnhî nhîpêx mex rãhã ho ri ixpa.

Anhÿr ã amnhî jarênh tâ no ãm hkôt amnhî nhîpêx kêt nê nhùm Mojes tee ri mê kot amnhî nhîpêx ã mê omu nê mê kãm:

—Nà mê ate Tîrtûm kapêr kôt amnhî nhîpêx kêt jakamã kot kaj mê nhÿrmã ty nê Tîrtûm pê awry rax kumrêx nê ri apa. Anê.

⁸ Tã na hte Tîrtûm jarãhã axtem tanhmã mê pamã kapêr to. Pãnhã kapêr nyw o kapêr nê mê pamã:

—Kot kaj mê Ixkra Jejus kôt amnhî xunhwÿ pa hã mê apumu nê mê ato ixkra. Hãmri nhùm Ixkarõ mê amã agjê. Anê.

Kapêr ja na mex kumrêx o kot kapêr tûm jakrenh. ⁹ Kapêr tûmja mex tâ nhùm htem hkôt amnhî nhîpêx kêt nê. Jakamã na htem

ty nê Tîrtûm pê awry rax ã ri pa. No kapêr nywja na tûmta rom mex o mex. Na hte Tîrtûm mê pamã kapêr nywja jarênh o:

—Kot paj tanhmã mê akrã hto ka mê amnhî to mex pix o ri apa. Jao ixkôt ri amnhî nhîpêx mex o ri apa. Anê.

¹⁰ Nê kapêr tûmja te kot kanê hpòk kryre pyrãk. No kapêr nywja mex o kot tûm jakrenh jakamã te kot mêmo hpòk rûnh o kanê hpòk kryre jakrenh pyrãk. Jakamã nhùm mê kot hirã rax kãm ri mrar gryk ã hpòk grire nhîrã kamã mrar kêt pyrãk.

¹¹ Tîrtûm kapêr tûm te kot Mojes kuk pyrãk. Na pre kamã hirã rax tâ gaa nê amnhîm hprî nê kamã hirã hapêx o mõi. Nê gaa nê hapêx. No kêt Tîrtûm kapêr nywja te kot Tîrtûm nhîrã htÿx rãhã ho rãhãta pyrãk. Koja uràk nê aa hapêx kêt kumrêx.

Ijaewjê jarênh

Rõmãn 11.7-10

¹² Nê Tîrtûm kapêr nywja mex o mex jakamã na pa hte ixãmnhîx mê kãm harênh o ri ixpa. ¹³ Te ixte Mojes kot amnhî nhîpêx pyrãk kêt. Na pre hte Mojes ixkînhã ãmnhîx Ijaewjê mã Tîrtûm kapêr jarênh o ri pa hkêt nê. Mê kot hkuk kãm hirãta ra hapêx o mõi ã omunh nhùm hpîjaam pymaj na pre kupêxê puroore ho amnhî kuk pro nê ri mê hkôt pa. ¹⁴ Jakamã nhùm prem hprî hã hkuk kãm hirã pumunh mex kêt nê. Nê Tîrtûm kapêr ã kagà htûmja nhùm prem mãânên hprî hã mar mex kêt nê. Mê hkrã hihtÿx jakamã te mê kot amnhî jamak pro nê mêmoj mar mex kêt pyrãk jakamã mê kot mar tâ hprî hã mar kêt nê. Nê hkôt ri amnhî nhîpêx mex kêt nê. No mê kot Kris kôt amnhî xunhwÿr xwýnhjaja na hte Tîrtûm amnhî tâ mê omu nê te mê nê mê hamak hpro xãta rênh par nê rênh pyrãk o mê hipêx nhùm mēhprî hã kapêr mar tÿx nê.

¹⁵ Tã na hte Ijaewjaja arî jarãhã Mojes kot Tîrtûm kapêr ã kagà htûm kamã harênh o pa. Nom arî mê hkrã hihtÿx jakamã te mê kot amnhî jamak pro nê kamã harênh o pa pyrãk o amnhî nhîpêx jakamã kormã hprî hã mar kêt nê. ¹⁶ Tã koja mê hkwýjaja Pahihti Jejus Kris kôt amnhî xunhwÿ nhùm amnhî tâ omu nê te kot mê hamak nê hpro xã hpyr nê mēnh pyrãk o mê hipêx nhùm

mêhprî hã kapêr nyw mar tỳx nê. ¹⁷ Pahihti mẽ Karõja wa htipxi jakamã na hte mẽ pakamã agjê nê hprî hã mẽ pamã kapêr o amnhîrît o pa. ¹⁸ Ra mẽ pahte Pahihti Kris kôt amnhî xunhwỳr jakamã te mẽ pahte mẽ kot amnhî jamak pro xwỳnh kot amnhî nhîpêx pyræk kêt. Nhũm Pahihti Karõja tanhmã mẽ panhîpêx to pu mẽ ra hkôt amnhî nhîpêx mex o mõ. Jakamã na htem mẽ pahte amnhî nhîpêx nyw pumunh kôt Tirtũm kot tãm amnhî nhîpêx ã omunh kurê kumrêx. Kormã mẽ pahte hkôt amnhî nhîpêx mex kumrêx kêt tã ra hkôt amnhî nhîpêx mex o mõ. Jao te tãm kot amnhî nhîpêx pyræk o amnhî nhîpêx o mõ.

4

Jejus kapêr te kêp kanê pyræk ã harênh

Wam Korît 2.1-5; Sikün Korît 1.12; Wam Tesarôn 2.1

¹ Nê na pre Tirtũm ixto mex nê tanhmã kãm ixàpênh to hã inhmã karõ. Ixte ma mẽ kãm kapêr jarênh o ri mẽ hkôt ixpa kaxyw. Jakamã na pa hte ixàmnhîx mẽ hkôt mẽ kãm harênh o ri ixpa. ² Nhũm mẽ hkwỳjaja axtem nê ixêx o ri ixpa hã ijarênh tã ixte ã amnhî nhîpêx anhỳr kêt. Na pa hte amnhî tomnuj o ri ixpa hkêt nê. Mẽ hkwỳjaja kot mẽ no kupyw kaxyw mẽ kãm Tirtũm kapêr o hêx o pa htã pa na pa hte ã amnhî nhîpêx anhỳr kêt nê. Ixprî hã mẽ kãm harênh o ixpaja na inhmã hprãm jakamã na pa hte ixkatàt kôt harênh o ri mẽ hkôt ixpa. Mẽ piitã mẽ kot ixêx kêt kôt ixpumunh mex kaxyw. Tirtũm kot ixêx kêt kôt ixpumunh mex. ³ No nhỹrmã mẽ htyk nê ma kuwy hwỳr mẽ pa mã xwỳnh pixjaja na htem hprî hã ixkapêr mar mex kêt nê. ⁴⁻⁶ Satanasti tãm kêp mẽ hpãm. Kêp mẽ kãm Tirtũm kapêr mar prãm kêt xwỳnh piitã mẽ hpãm. Jakamã na pa hte mẽ kãm tanhmã Jejus jarênh to. Kêp Tirtũm Kra hã harê nê te kot Tirtũm kot amnhî nhîpêx pyræk ã harênh o ri ixpa. Hãmri nhũm Satanasti tee ri ja hã ixpumu nhũm ja kêp omnuj nê. Jakamã nhũm tanhmã Tirtũm nê mẽ hkrã hto nê te mẽ hamak pro pyræk o mẽ hipêx. Mẽ kot hprî hã Jejus jarênh mar nê hkôt amnhî xunhwỳr pymaj nhũm ã nê mẽ hipêx anê. Jejus jarênh te kêp kanê hpòk mex pyræk jakamã mẽ kot mar kêt xwỳnhjaja te kamàt

kô kamã ri mẽ pa pyræk. No nhũm Satanasti tãm kot nê mẽ no kupyw jakamã nhũm htem ã ri kamàt kô kamã mẽ pa pyræk o amnhî nhîpêx anê.

Amnepê mã kormã mẽmoj kêt ri nhũm kamàt kô pix. Tã nhũm Tirtũm tanhmã kapêr to nê kapêr o:

—E kê hirã kato. Anê.

Hãmri nhũm ra kapêr xà hkôt hirã kator kurê kumrêx. Tã ja pyrã nê na pa pre kamàt kô kamã ixtỳx ri ixpa pyræk nhũm Tirtũm te kot inhmã kanê hpòk nhũm hirã pyræk o inhîpêx pa mex o mex ã omunh kurê kumrêx. Hãmri nê Jejus Kris kot amnhî nhîpêx ã omu nê te Tirtũm kot amnhî nhîpêx ã omunh pyræk. Wa kot amnhî nhîpêx te kot axpên pyræk.

Nê na pa hte pam tanhmã amnhî jarênh to ho ri ixpa hkêt nê. ãm Jejus Krisja pix na pa hte harê. Tapxipix na kêp mẽ panhõ Pahihti. Jakamã hkĩnhã te ixpê mẽ amã ixàpênh xwỳnh pyræk o na pa hte mẽ amã kapêr jarênh o ri mẽ akôt ixpa.

Pawre te kêp poti grære nhîpêx pyræk ã harênh

Wam Korît 2.4-5; Sikün Korît 11.23, 12.9

⁷ Nê Tirtũm ixrom hihtỳx o hihtỳx. No pa na hkĩnhã ixihtỳx kêt. Te ixpê poti grære nhîpêx pyræk jakamã na pa hte Tirtũm xihtỳx xwỳnh pix nhỹ hã mẽ kãm kapêr jarênh o ri mẽ hkôt ixpa. Nhũm htem inhma nê ãm hãmri ixte ý hã ixkapêr ã ixpumunh kurê kumrêx. No pa ixte amnhî krã hkôt ixkapêr ã ijarênh kêt nê.

⁸ Na pa hte mẽ hkôt mẽ kãm Jejus jarênh o ri ixpa nhũm mẽ hkwỳja tõiã inhma nê ja hã inhîpêx kati nê pa amnhî xà htỳx kamã ama. Nom nhũm Tirtũm mẽ kutã tanhmã ixkrã hto pa inhmã amnhî xà kamã ijamak puma hkêt nê arĩ mẽ kãm kapêr jarênh o ri mẽ hkôt ixpa. Nê amnhî kaxyw Jejus kôt pix mã ijamaxpêr tỳx rãhã pè tee ri amnhî kukamã ijamaxpêr o ri ixpa hkêt nê.

⁹ Nê mẽ kãm ixkurê xwỳnhjaja ohtõ. Na htem xatã Jejus ã tanhmã ixtomnuj to htã pa kormã ixtyk kêt nê. Na pa hte Tirtũm kamnàr rom arĩ mẽ hkôt ixpa nhũm Tirtũm ixkôt pa ho pa. ¹⁰ Na htem Jejus pyrã nê ixpĩr kaxyw tanhmã inhîpêx to. No ãm ko. Koja mẽ nhỹrmã ixpĩ rỳ ko. Ixte amnhî

kukamā ixàhpumunh kêt. Kot paj ãm arĩ ixtĩr ri mẽ kãm Jejus jarēnh o ri mẽ hkôt ixpa. Kêr kê mẽ hkwyjaja ixkapēr ma nē axpēn mã tanhmã Jejus jarēnh to nē harēnh o:

—Nà pēr ãm hãmri na pre Jejus akupỹm htĩr nē tanhmã hkwyjê ho mex to. Æm hãmri na hte Pawre ja hã harē. Anē.

¹¹ Mẽ kot Jejus ã ixpĩr mã tã pa arĩ mẽ kãm akupỹm htĩr ã harē. Tĩrtũm na hte ja kaxyw tanhmã ixkrã hto pa arĩ mẽ kãm harēnh o ri mẽ hkôt ixpa. ¹² Na pa pre ra mẽ amã harē ka prem inhma nē Jejus kôt amnhĩ xunhwyr kurê kumrēx nē amnhĩ nhĩpēx nyw o amnhĩ nhĩpēx o ri apa. Jakamã ixpyrà nē mẽ apē atĩr tũm nē apa mã xwỹnh. Nhũm htem piitã mẽ ate Jejus kôt amnhĩ xunhwyr ã mẽ apumu. Tã nhũm mẽ kot Jejus ã ixpĩr kaxyw. Nom kwār mẽ mãmri xpi. Ja inhma tanhmã kute hkêt. Mẽ kot ixpĩr mã tã kot paj arĩ Jejus kapēr jarēnh o ri ixpa rãhã ty. Ra mẽ kot ixkapēr mar nē Jejus kôt amnhĩ xunhwyr xwỹnhjaja mẽ pahpyrà nē kēp htĩr tũm nē pa ho pa mã xwỹnh kēnã. ¹³ Jakamã kwār mẽ mãmri xpi. Na pa hte arĩ amnhĩ kaxyw Tĩrtũm kôt ijamaxpēr mex rãhã nē. Amnepê mã na pre Pahi finat Tawija tanhmã Tĩrtũm kapēr jarēnh to nē harēnh o:

Æm hãmri na Tĩrtũm kapērja. Hêx kêt jakamã na pa hte mẽ kãm harēnh rãhã ho ri ixpa. Anē.

Tã pa hte Tawi pyrà nē mẽ piitã mẽ kãm Tĩrtũm kapēr jarēnh o ri ixpa. Tĩrtũm kot mẽ pamã tanhmã mẽmoj to hêx to hkêt. ¹⁴ Ra kot amnhĩ jarēnh xà hkôt akupỹm Pahihti Jejus o htĩr jakamã kot puj mẽ nhỹrmã uràk nē ty nhũm akupỹm mẽ pahto mẽ pahtĩr nē ma war amnhĩ wyr mẽ pahto api.

¹⁵ Amnepēm na pa pre ma mẽ awyr mō nē mẽ akôt mẽ amã Tĩrtũm kapēr jarēnh o ri ixpa. Ka prem inhma nē Jejus kôt amnhĩ xunhwyr nē ixpyrà nē Tĩrtũm mã mex o mex ã harē. Jakamã kwār mẽ mãmri Jejus ã tanhmã inhĩpēx to. Kojã mẽ gaa nē rĩ mẽ hkwyjaja mẽ pahpyrà nē Jejus kôt amnhĩ xunhwyr nē Tĩrtũm mã mex o mex ã harē.

Pawre tee ri amnhĩ kukamã hamaxpēr kêt ã kot amnhĩ jarēnh

Rōmãn 8.17; Sikūn Korīt 1.7; Wam Pêtre

1.3-9, 4.12-16, 5.10

¹⁶ Jakamã na pa tee ri amnhĩ kukamã ijamaxpēr o ixkaprĩ nē ixpa hkêt nē. Mẽ kot Jejus ã tanhmã ixtomnuj to htãã pa hte ixãmnhĩx kapēr jarēnh o ri ixpa. Ra ixpigêt nē ixirerek o inhmōr tã inhōpinh xà kaxwỹnh kãm ijamaxpēr o Jejus kôt amnhĩ nhĩpēx mex o mō. ¹⁷ Mẽ kãm ixkurê xwỹnhjaja na htem Jejus ã inhĩpēx kati htã ã inhĩpēx anhỹr japjê hkêt nē. Nom kot paj nhỹrmã ty nhũm Jejus akupỹm ixto ixtĩr pa Tĩrtũm mẽ wa kuri inhmex kumrēx nē ixpa ho ixpa. Mẽ kot ixtomnujja na mẽ ho apkati grêre no kot paj nhỹrmã Tĩrtũm mẽ Krata wa kuri inhmex kumrēx nē ixtĩr tũm nē ri ixpa ho ixpa. Jao rãhã ho rãhã.

¹⁸ Jakamã na pa tee ri mẽ kot tanhmã ixtomnuj tota kukamã ijamaxpēr o ri ixpa hkêt nē. Ja koja tokyx hapēx. Na pa hte ãm nhỹrmã Tĩrtũm nhõ krĩ kamã inhmex nē ixkĩnh rãhã ri ixpaja pix kukamã ijamaxpēr o ri ixpa.

5

Mẽ panhĩ nyw jarēnh

Piripos 3.21; Sikūn Pêtre 1.13-14

¹ Nē mẽ panhĩja te kot tyrti hō ho ixkre pyràk. Na htem tyrti hō ho ixkre nhĩpēx nhũm gaa nē hapēx. Tã mẽ panhĩja na hte uràk nē hapēx tokyx anē. Na pu htem ri papa nē gaa nē pawej nē ty. Tã nhũm Tĩrtũm hpãnhã mẽ pahpê hkrajê mã mẽ panhĩ nyw gō pu mẽ kuri õ krĩ kamã pamex kumrēx nē pahtĩr tũm nē papa ho papa. ²⁻³ Na pu htem jar pahpunuj nē papa. Nē mẽ paxà nhi nē mẽ pahkaprĩ nē. Mẽ panhĩ htũmja te kot mẽ paxê htũm pyràk jakamã na pu htem ty nē te paxê htũm kwrynh nē hpãnhã nyw jagjēnh pyràk o amnhĩ nhĩpēx. Tã na pu htem amnhĩ kukamã panhĩ nywja mã pajamaxpēr o ri papa. Kot pu mẽ kaxkwa kamã pahkarõ pix nē ri papa hkêt nē. Mẽ panhĩ nyw ã kot puj mẽ ri papa ho papa.

⁴ Nē na pu htem jar pahpunuj nē pamex kêt nē ri papa. Nē tokyx mẽ pahtyk nē panhĩ htũm o pajapēx nē hpãnhã panhĩ nyw ã mẽ papa hprãm. Tã koja Jejus tokyx akupỹn wrỹk japēr pu mẽ pahtyk kêt rãhã tokyx panhĩ nywta o panhĩ nyw. Nom

koja tokyx akupÿn wrÿk kêt japêr pu mē nhÿrmã ty nhÿm Tÿrtÿm akupÿm mē pahto mē pahtÿr nē mē pamã mē panhÿ nyw gō pu mē ho panhÿ nyw. ⁵⁻⁶ Na pre ra Tÿrtÿm mē panhÿ nyw kukamã hamaxpêr nē mē pahtã tanhmã amnhÿ jarēnh to. Nē mē pahwÿr Karō rē nhÿm mē pahkarō mã agjê pu mē ja hã amnhÿ pumu nē pahkÿnh nē pajamaxpêr o:

—Nà ra Tÿrtÿm kot ixwÿr amnhÿ Karō mēnh nhÿm ixkarō mã àr jakamã koja mãânēn nhÿrmã inhmã inhÿ nyw gō. Kormã inhÿ htÿm kamã ixpa nē Pahihti Jejus mē wa ò krÿ kamã ixpa hkêt tã koja nhÿrmã inhmã inhÿ nywja gō pa inhÿ nyw o wa kuri ixpa ho ixpa. Nà koja ã inhÿpêx anē.

Anhÿr o pajamaxpêr pē pahkÿnh nē papa.

⁷ Nē mē pahte jar pano ho nhÿri Jejus pumunh kêt tã no ãm panhōpinh xà kaxwÿnh kãm kãm pajamaxpêr mex nē. ⁸ Jakamã na pu mē tee ri amnhÿ kukamã pajamaxpêr o papa hkêt nē. Na pu htem ãm tokyx mē pahtyk nē ma Pahihti Jejus nhō krÿ hwÿr paxàpir jamãr o papa. Ò krÿja kēp mē papaxã kumrêx jakamã na pu htem ma hwÿr paxàpir pix kukamã pajamaxpêr rãhã nē. ⁹ No ãm mē pamã ja pix prãm kêt. Na pu htem mãânēn pamã Jejus mã hprãm xà hkôt nhÿri tanhmã kãm amnhÿ nhÿpêx to ho ri papa hprãm o papa. Jar mē panhÿ htÿm rãhã rÿ mÿtar kuri ò krÿ mex kãm mē panhÿ nyw ã tanhmã kãm amnhÿ nhÿpêx to ho ri papaja na mē pamã hprãm.

¹⁰ Nē na hte Krisja jar mē pahte tanhmã amnhÿ nhÿpêx to hã mē pahpumunh o hkrÿ. Mē pahte tãm amnhÿ nhÿpêxja nē mē pahte amnhÿ tomnujja nhÿm hte hã mē pahpumunh rãhã ho hkrÿ. Tã koja nhÿrmã kot mē pahte tanhmã amnhÿ nhÿpêx to hã mē pahpumunh kôt tanhmã mē panhÿpêx to. Mē pahte tãm amnhÿ nhÿpêx o ri papa xwÿnhjaja koja ra mē panê htyk kukwak ri mē pahto mex nē. No mē kot amnhÿ tomnuj o mē pa xwÿnhjaja koja mē homnuj tÿx nē. Jakamã na pa inhmã kãm hprãm xà hkôt pix mã amnhÿ nhÿpêx o ixpa hprãm nē.

Mē pajamaxpêr nyw jarēnh

Rōmãn 6.4-6; Sikûn Korîť 4.2; Epes 4.22-24; Korosê 3.9-10

¹¹ Nē Tÿrtÿm kot hprÿ hã mē pahpumunh rãhã ho hkrÿ jakamã inhmã kãm hprãm xà hkôt pix mã amnhÿ nhÿpêx o ri ixpa hprãm. Mãn ka mē ra ja hã ixpumunh mex nē rÿ ko. Mē piitã mē kot hkôt amnhÿ xunhwÿr prãm xàj na pa hte mē kãm kapêr jarēnh o ri ixpa. ¹² Nom ixte ja hã amnhÿ to jarkrar o ri ixpa hkêt. ãm mē ate inhmar nē mē kēp Kris nhÿ hã mē ahkre hã amnhÿ to hēx xwÿnhjê mã tanhmã ijarēnh to kaxyw na pa ã mē amã amnhÿ jarēnh anē. Mē kot Tÿrtÿm kapêr jahkre mex kumrêx ã amnhÿ to jarkrar tã na htem hkôt amnhÿ nhÿpêx kêt nē. Tã mē ate aprÿ hã ixte Tÿrtÿm kapêr kôt amnhÿ nhÿpêx mex ã ixpumunh nē tanhmã mē kãm ijarēnh to kaxyw na pa ã te ixte amnhÿ to jarkrar pyrãk o mē amã amnhÿ jarēnh anē. ¹³⁻¹⁴ Mē kot ixkrã pipãnh ã ijarēnh tã Tÿrtÿm na mē akaxyw ixãm pa hte mē amã kapêr jarēnh o ri mē akôt ixpa. Ixkrã pipãnh kêt. Ixte Tÿrtÿm kãm hprãm xà hkôt tanhmã amnhÿ nhÿpêx to xwÿnh na pa. Tã mēmo kaxyw na pa hte ã kapêr jarēnh rÿnh anhÿr o ri mē akôt ixpa? Nà inhmã mē akÿnh kēnã. Mē ate Tÿrtÿm kôt tãm amnhÿ nhÿpêx prãm xàj na pa hte ã mē amã kapêr jarēnh anhÿr rãhã nē. Kris na pre tanhmã ixto pa inhmã mē akÿnh nē. Te tãm kãm mē ajapê pyrãk. Na pre Kris amnhÿ grōnh kôt mē pahpiitã mē nē ty. Tÿrtÿm kot mē pahte amnhÿ tomnuj mÿrapê tanhmã mē pahto pymaj nhÿm mē pahpiitã mē panê ty. Jakamã te mē pahpiitã Jejus kôt mē pahtyk pyrãk o na pu htem amnhÿ nhÿpêx. Jao te mē pahte amnhÿ nhÿpêx tÿmja mē pahpê hapêx par pyrãk o pu mē amnhÿ nhÿpêx nyw o amnhÿ nhÿpêx o ri papa. ¹⁵ Mē pajamaxpêr nyw o tãm mē pahte amnhÿ nhÿpêx o papa kaxyw na pre Jejus mē panê ty. Jakamã na pu htem axte amnhÿ pix kukamã ri pamã mēmoj prãm o ri papa hkêt nē. Na pu htem mãânēn Tÿrtÿm kãm hprãm xà hkôt tanhmã kãm amnhÿ nhÿpêx to ho ri papa. Ja kaxyw na pre Tÿrtÿm akupÿm Kris o htÿr pu mē kukwak ri pajamaxpêr nyw o amnhÿ nhÿpêx o papa. ¹⁶ Jao mē piitã mē hkrã hkà hã mē omunh xà hkôt pix mã tanhmã mē harēnh to hkêt nē. Mē kot amnhÿ tomnuj ã mē harēnh rÿ mē kot amnhÿ to mex ã mē harēnh kêt nē. Amnepê

mã na pa pre ã Kris jarēnh anē nē harēnh o:

—Nà Krisja na hte mẽ pahte amnhĩ nhĩpêx kôt amnhĩ nhĩpêx kêt nē. Ām ri kot mẽ pahte amnhĩ nhĩpêx kwým ri amnhĩ nhĩpêx jakamã kot amnhĩ tomnuj tỳx xwýnh na.

Anhỹr ã harēnh o ixpa. Tã axte ã harēnh anhỹr hkêt nē. Kot amnhĩ tomnuj xwýnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

Mẽ pahpê Tirtũm kràmnhwỳ hã mẽ pa-jarēnh

Rômãn 5.1, 5.10; Epes 6.20; Korosẽ 1.20

¹⁷ Nē koja mēhõ Kris kôt amnhĩ xãm nhũm kot amnhĩ nhĩpêx tũmja kęp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nē hamaxpēr nyw pix o hamaxpēr. ¹⁸ Tirtũm na hte tanhmã mẽ pahto pu mẽ ã amnhĩ nhĩpêx anhỹr o ri papa. Na pu prem pamã hkurê htã nhũm Kris kukwak ri mẽ pahte hkôt amnhĩ nhĩpêx xwýnhjê ho hkràmnhwỳ. Hãmri nē tanhmã mẽ pahte amnhĩ nhĩpêx to hã mẽ pamã karõ nē mẽ pamã:

—E kēr ka mẽ ma krĩ piitã hkôt ri mẽ kãm ixkapēr jarēnh o ri apa kê mẽ ama nē mẽ apyrã nē Kris kôt amnhĩ xunhwỳ. Pa ja hã mẽ omu nē ixte mẽ anhĩpêx pyrã nē mẽ ho ixkràmnhwỳ. Anē.

¹⁹ Jakamã na pa hte ma mẽ kãm kapēr jarēnh o ri mẽ hkôt ixpa nē mẽ kãm:

—E pa mẽ amã mẽmoj mex jarē ka mẽ inhma. Nà na pre Krisja mẽ pahte amnhĩ tomnuj mýrapê mẽ panê ty. Nē htyk o Tirtũm mã mẽ pahpãnhã amnhĩrer par kumrêx. Jakamã na ra Tirtũmja Kris kukwak ri kãm mẽ pahpiitã mẽ pahto hkràmnhwỳ prãm. Koja kukwak ri mẽ pahte amnhĩ tomnuj piitã ho hamakêtkati nē axte kãm hamaxpēr kêt kumrêx. Kãm mẽ pahto hkràmnhwỳ hprãm jakamã koja ã mẽ panhĩpêx anē. Jakamã e kwa mẽ tokyx Kris kôt amnhĩ xunhwỳ kê Tirtũm kot inhĩpêx pyrã nē mẽ ato hkra nē mẽ ato hkràmnhwỳ.

Anhỹr o mẽ kãm harēnh o ri mẽ hkôt ixpa. ²⁰ Kris kot mẽ apiitã mẽ awýr inhmēnh jakamã na pa hte ý hã mẽ amã kapēr jarēnh o ri mẽ akôt ixpa nē mẽ amã:

—E Tirtũm kãm mẽ ajapê jakamã na mẽ awýr inhmē pa mō. Jakamã kwa mẽ tokyx amnhĩ tomnuj kaga nē hkôt amnhĩ xunhwỳ. Kê amnhĩ tã mẽ apumu nē mẽ ato hkràmnhwỳ. Anē.

²¹ Krisja aa kot tanhmã amnhĩ tomnuj to hkêt kumrêx tã nhũm pre Tirtũmja te mẽ kot amnhĩ tomnuj tỳx kumrêx xwýnh pyrãk o hipêx. Tã mẽmo kaxyw na pre ã hipêx anē? Nà mẽ panê kēnã. Mẽ pahte hkôt amnhĩ xunhwýr nhũm kot mẽ panhĩpêx o te aa mẽ pahte amnhĩ tomnuj kêt kumrêx xwýnh pyrãk o mẽ panhĩpêx kaxyw na pre ã mẽ panê Krata nhĩpêx anē.

6

¹ Tã kot ã Kra nhĩpêx anhỹr jakamã kwa mẽ ixkapēr ma nē mar tỳx nē. No mẽ ama nē ãm mar kêt nē. Tirtũm kãm mẽ pajapê htỳx jakamã mẽ pakutã nojarêt rãhã ho pa. Kumã na pa hte ã mẽ amã kapēr jarēnh anhỹr o ri mẽ akôt ixpa. ² Amnepê mã na pre Ijaew mã kapēr nē mẽ kãm:

Na ka prem amex kêt nē ri apa nē amnhĩ to ixwỳ pa pre mẽ ama nē mẽmojta pē mẽ apytã nē mẽ ato mex nē. Anē.

Jakamã kwa mẽ inhma. Tirtũm kãm mẽ ate amnhĩ tomnuj pē mẽ apytãr prãm tỳx jakamã kwa mẽ tokyx amnhĩ to awý kê ã kęp mẽ apytãr anē.

Mẽ kot Kris ã tanhmã Pawre nhĩpêx to hã mẽ harēnh

Sikūn Korīt 4.7, 11.23-33; Korosẽ 1.10

³⁻⁴ Nē mẽ kot Tirtũm kapēr mar nē hã ixtomnuj tã pa hte amnhĩ katut kôt mẽ kot tanhmã ixtomnuj toja rē nē ho ijamakêtkati tokyx anē. Nē arĩ mẽ kãm kapēr jarēnh rãhã ho ri mẽ hkôt ixpa. Mẽ kot mar nē ãm mar nē hkaga pymaj na pa hte ã amnhĩ nhĩpêx anhỹr rãhã nē. Mẽ kot ja hã inhĩpêx punuj tã pa arĩ mẽ kãm harēnh o ri mẽ hkôt ixpa. ⁵ Mẽ kot Kris ã ixtak nē ijagjēnh nē tanhmã ixto kaxyw ixtã htũ htã pa hte mẽ kutã amnhĩ to htỳx nē ixkuhê. Na pa pre hte Tirtũm mã mẽ kãm kapēr jarēnh rax nē. Jao tōhã inhõt kêt nē inhõttxwa ho ri mẽ hkôt ixpa. Nē tōhã inhmã prãm tỳx nē ri ixpa. Tã no ãm arĩ mẽ kãm kapēr jarēnh rãhã nē. ⁶ Inhmã tanhmã ixte amnhĩ tomnuj to hprãm kêt. Inhmã Tirtũm kot amnhĩ

nhīpêx kôt pix mā amnhī nhīpêx prām. Nē inhmā inhgryk tokyx anhÿr prām kêt. Ām inhmā mē piitā mē hkīnh kām mē ho mex pix prām. Ā na pa hte Tirtūm Karō nhÿ hā amnhī nhīpêx anhÿr o ri mē hkôt ixpa. Mē kot ja hā ixpumunh nē ra Tirtūm kapêr ma nē hkôt amnhī xunhwÿr kaxyw. ⁷ Na pa hte ixkatāt kôt mē kām ixkapêr mex pix nē. Tirtūm xihtÿx xwÿnhja nhÿ hā ri mē kām kapêr jarēnh jao tām amnhī nhīpêx nē tām ri ijamaxpêr o ri mē hkôt ixpa. Jakamā na htem ja hā ixpumu nē ixte Tirtūm kapêr jarēnh ma nē hkôt amnhī xunhwÿ. ⁸ Na hte mē hkwÿjaja kām ixkīnh nē nhūm mē hkwÿjaja axtem kām ixkurê nē. Nē mē hkwÿjaja amnhīm inhmex ā ijarē nhūm mē hkwÿjaja axtem axpēn mā tanhmā ixto kapêr punuj to. Mē kot ixêx nhi hā ijarēnh tā pa hte ixkatāt kôt mē kām ixkapêr o ri ixpa. Nom kwār mē māmri tanhmā ri ixto kapêr to. Ja tanhmā inhmā kute hkêt. ⁹ Na hte mē hkwÿjaja ixkamā ôkre kahak nē pika piitā hkôt axpēn mā tanhmā ijarēnh to ho pa. Mē kām ixpīr prām tā no pa arī ixtīr nē ixpa. Mē kot Jejus ā ixtomnuj tÿx tā kormā ixpīr kêt nē pa ri ixtīr nē ixpa. ¹⁰ Ixte Kris ā amnhī xā htÿx kamā ijamak o ri ixpa htā arī ixkīnh nē ixpa. Nē ixkàxpore hkêt tā nhūm mē ohtō nē ixte mē kām Jejus kapêr jarēnh kukwak ri mex nē pa. Nē ixkukrêx rax kêt tā nhūm Tirtūm ixto mex nē pa inhmex nē ixpa. Tā kot paj nhÿrmā ô krī kamā kuri inhmex kumrêx nē ixtīr tūm nē ixpa ho ixpa. Jakamā na pa hte arī mē kām Jejus kapêr jarēnh o ri mē hkôt ixpa. ¹¹ E Korīt kām ixkràmnhwÿjaja. Na pa ixprī hā mē amā amnhī nhīpêx jarēnh par kumrêx. ¹² Inhmā mē akīnh tÿx tā te mē amā ixkīnh kêt pyrāk. ¹³ Kwa te mē ate ixto mē akatut nē akuhê pyrāk o inhīpêx kêt nē. Amnhī pyrā nē amā ixkīnh nē hkêt wehe. Te mē apê ixkra pyrāk o na pa ā mē amā ixkapêr anē.

Te mē pahpê Tirtūm nhōrkwÿ pyrāk ā mē pajarēnh

Wam Korīt 10.20-22, 15.33; Epes 5.3-14; Sikūn Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nē kêt ka mē kot Kris kôt amnhī xunhwÿr kêt xwÿnhjê mē mē mēmoj tā tanhmā

axpēn mar to hkêt nē. Rÿ mēhō ho amjên rÿ mēhō ho aprō hkêt nē. Ahpÿnhā mē pajamaxpêr kēnā. Tanhmā kot we mē hamaxpêr nyw xwÿnhjaja nē mē hamaxpêr tūm xwÿnhjaja amnhī to nē axpēn kôt hamaxpêr nē ri axpēn kôt pa? Nà koja mē ā amnhī nhīpêx anhÿr kêt nē. Ahpÿnhā mē pajamaxpêr. Na hte hirā htÿxja kamāt kô mē pihkār kêt nē. ¹⁵ Xā na hte Kris mē Satanasti wa axpēn kôt hamaxpêr? Nà wa kot axpēn kôt hamaxpêr kêt. Ahpÿnhā wa hamaxpêr nē ahpÿnhā wa kot amnhī nhīpêx. Nē ahpÿnhā hirā nē ahpÿnhā kamāt kô. Nē mē pahpê Kris kwÿjaja nē mē kēp hkwÿ hkêt xwÿnhjaja ahpÿnhā mē pajamaxpêr nē ahpÿnhā mē pahte amnhī nhīpêx. ¹⁶ Na pu htem Tirtūm mā amnhī jarēnh xā hā ixkre kamā sānti xunhwÿr nē amnhī to hwÿr pē kām mex o mex ā harēnh kêt nē. Axtem na sāntija. Mē panhō Tirtūmja sānti rom htīr tūm rāhā nē pa ho pa xwÿnh. Nē mē papajaja te mē pahpê Tirtūm nhōrkwÿ pyrāk. Kapêr ā kagā htūm kot ja jarēnh kot:

Ixkrajaja te kēp inhōrkwÿ nhūm ixpê ô dōn pyrāk. Te ixpê inhōrkwÿ kamā ixpa xwÿnh pyrāk jakamā kot paj ixkrajê kamā ri ixpa ho ixpa. Ixpê Mēhpām na pa. Anē.

¹⁷⁻¹⁸ ā Tirtūm xihtÿx xwÿnhja kot amnhī jarēnh anhÿr jakamā na hte mē kot amnhī tomnuj xwÿnhjê nē mē pahkurê ho:

Kêt ka mē hkôt ri apa hkêt nē. Kwarī ho kwarī.

Nē mē hkôt ri amnhī nhīpêx o apa hkêt nē. Kot kaj mē ixkapêr ma nē ixkôt amnhī nhīpêx hā kot paj amnhī wÿr mē awÿ nē mē ato ixkra.

Nē pa kot paj ixpê Mēapām maati. Anē.

7

¹ Tā ā Tirtūm kot mē pahto hkra nē mē pahkôt pa ho pa hā amnhī jarēnh kot anhÿr jakamā kwa ixkràmnhwÿjaja. Kêt pu mē kapêr ma nē tanhmā amnhī tomnuj to hkêt nē. Nē mēmoj punuj kukamā pajamaxpêr kêt nē. Nē ām kapêr kôt pix mā amnhī nhīpêx mex rāhā nē.

Pawre kot Korīt nhō xwÿnhjê nhÿ hā hkīnh ā harēnh

² Nē kwa Kris kôt ixtō nē ixtōxjaja. Kêr ka mē tee ri amnhī tā tanhmā inhmā ajamaxpēr to hkêt nē. Na pa pre tanhmā mē atō hto hkêt nē. Rỳ tanhmā mē atō hto ka mē ja hā ixpumu nē ixkôt tanhmā amnhī tomnuj to hkêt nē. Rỳ pa pre ixêx rom tanhmā mē anokupyr to ho ri ixpa hkêt nē. Kwa mē amā ixkīnh nē tokyx ixkôt ajamaxpēr kêt wehe. ³ Mē ate inhmar nē amnhī tā apijaàm kaxyw na pa ā mē amā ixkapēr anhÿr kêt nē. Inhmā mē akīnh kēnā. Na pa pre inhmā mē akīnh ā amnhī jarēnh rax nē. Inhmā ri mē akôt ixpa rāhā ho ixpa hprām. Rỳ ka mē nhÿrmā apiitā apikaprar par japēr pa inhmā mē akôt ixtyk prām nē. ⁴ Na pa hte ra mē amā ijamaxpēr pē ixkīnh nē ixpa. Nà kot kaj mē ixkapēr ma nē Jejus kôt amnhī nhīpêx mex nē. Tā kêr ka mē ā amnhī nhīpêx anhÿr rāhā nē. Na pa hte jar ra amnhī xà htÿx kamā ijamak o ri ixpa htā no ām mē amā ijamaxpēr nē ixkīnh nē.

⁵ Nē na pa pre amnē Masetōn wÿr kormā Xitre japēr o mō. Hāmri nē Masetōnja wÿr pōj nē hapēr pē mē kām Jejus kapēr jarēnh o ri mē hkôt ixpa. Hāmri nhūm mē kām ixkurē xwÿnhjaja Kris ā inhīpêx punuj nē hā inhmā àkjêr pix o pa. Hāmri nē ma Masetōn kamā krī piitā hkôt ri mē kām ixto kapēr punuj nē pa amnhī tā mē mar o ri mē hkôt ixpa. Nē mē kajaja mē ate Kris kaga nē nhām mē hamaxpēr kôt amnhī nhīpêx pymaj na pa pre tee ri mē akukamā ijamaxpēr o ri mē hkôt ixkaprī nē ixpa. ⁶ Tā Tirtūm kēp mē hkaprī xwÿnhjē pumunh nē akupÿm mē ho mē hkīnh xwÿnh jakamā na pre ixkaprī hā ixpumu nē ixwÿr Xitre mē. Pa pre omu nē akupÿm ixkīnh nē tām ijamaxpēr. ⁷ No ām Xitre pumunh kôt pix mā ixkīnh kêt. Na pre ixwÿr pōj nē tanhmā inhmā mē ajarēnh to nē mē ate tanhmā ho mex to hā mē ajarē. Nē mē amā ixpumunh prām tÿx ā mē ajarē. Nē Kris kôt mē atōta hpijaàm kêt o pa nhūm ixte kagā kamā hā mē amā ixàkjêr nhūm mē ate ja hā omunh nē ra amnhī kamā apijaàm o akaprī htÿx ā mē ajarē. Nhūm Tirtūm kot inhnē mē kām ixkurē xwÿnhjē pumunh mex kaxyw mē ate ixto hwÿr ā mē ajarē. Na pre ā inhmā mē ajarēnh anē pa kuma nē mē anhÿ hā

ixkīnh tÿx kumrêx.

⁸⁻⁹ Nē wam ixte mē amā kagāta nhīpêx kêt ri na pa pre tee ri mē ate amnhī nhīpêx ā mē ajarēnh ma nē mē akaxyw hipêx. Nē kamā mē ate hpijaàm kêt xwÿnhhta kot tanhmā amnhī nhīpêx to hā omunh nē ām omunh o arī hkôt apa hā kagāta kamā mē amā akir hāmri nē Xitre mā kugō nhūm kupy nē ma mē awÿr o mō. Tā ka xep prem kamā harē nē ama nē amnhī kamā apijaàm nē. Nē akaprī nē ajamaxpēr o:

—Hêxta waa nē. Ām hāmri na Pawre ā mē ijarēnh anē. Na pa mē ā amnhī nhīpêx anē nē amnhī tomnuj tÿx nē. Anē.

Tā nhūm Xitre akupÿn ixwÿr pōj nē inhmā mē ajarē. Pa mē ajarēnh ma nē tee ri ijamaxpēr nē ijamaxpēr o:

—Hêxta waa nē. Mon pa pre axtem nē ā ri mē kām ixàkjêr anē? Nà na xep prem kagāta kamā harē nē kuma nē hkaprī htÿx nē. Anē.

Tā ām hāmri na pa pre ā mē akaxyw hipêx nē mēmojta ā mē amā ixàkjêr anē. Na ka xep prem kamā harē nē ama nē tee ri ajamaxpēr o ra akaprī nē. Nom Tirtūm kām hprām xà hkôt na ka prem ja hā amnhī pumu nē ā akaprī anē. Tā xep ra akupÿm tām amnhī nhīpêx nē akupÿm Tirtūm kôt amnhī nhīpêx mex nē. Jao akupÿm akīnh nē ri apa. Jakamā ām hāmri na pa pre mē awÿr wam kagāta mēnh nē mēmoj tā ā mē amā ixàkjêr anē.

¹⁰ Koja Tirtūm krajê hō tanhmā amnhī tomnuj to. Hāmri nē tee ri ja hā amnhī pumu nē amnhī kamā hpijaàm nē akupÿm Tirtūm kôt tām amnhī nhīpêx. Hāmri nē akupÿm mex nē tām hamaxpēr pē hkīnh nē ri pa. Nē axte tee ri amnhī kukamā hamaxpēr hkêt nē. Ja na Tirtūm kām hprām. Tā koja mē kēp hkra hkêt xwÿnhjē pyrā nē tanhmā amnhī tomnuj to nē ra hpijaàm japēr. Nom hkwyjaja kot ja hā omunh pix mÿrapē hpijaàm nē arī Tirtūm kôt amnhī nhīpêx kêt japēr. Hā koja nhÿrmā ty nē Tirtūm kra kot akupÿm hkôt tām amnhī nhīpêx xwÿnhjē kīnhā Tirtūm pē awry rax kumrêx nē ri pa.

¹¹ Mē pahte Tirtūm kapēr kwÿm ri tanhmā amnhī nhīpêx to hā tee ri amnhī pumunh nē amnhī kamā hpijaàm nē

akupÿm tām amnhĩ nhĩpêxja na Tĩrtũm kām hprām. Tā na ka xep ā amnhĩ nhĩpêx anē. Wam ixte mē awÿr kagà mēnhta na ka xep prem kamā tanhmā ixte nā puro kamā hpijaàm kêt xwÿnhhta ā mē amā ixàkjêr tota kamā akapêr nē ama. Hāmri nē tee ri mē ate kormā kot amnhĩ tomnuj ā kām axàkjêr kêt ā amnhĩ kukamā ajamaxpêr nē amnhĩ kamā apijaàm nē. Nom Tĩrtũm kām hprām xà hkôt. Mē ate jam ajamaxpêr pê amnhĩ kamā apijaàmja na kām hprām. Tā ka mē hpijaàm xwÿnhhta kamā agryk nē kām akapêr o:

–Kwa mē pahpê Jejus kwÿjaja mē pahte ā amnhĩ nhĩpêx anhÿr kêt tā ka ā amnhĩ nhĩpêx anē. Nā na ka amnhĩ tomnuj tÿx kumrêx. Kot kaj ā amnhĩ nhĩpêx anē pa mē hā apumu nē gaa nē apyrà nē ā amnhĩ tomnuj anē. Kwa ja kaga nē axte ā amnhĩ nhĩpêx anhÿr kêt nē. Nē akupÿm Tĩrtũm kôt amnhĩ xām tÿx nē hkôt amnhĩ nhĩpêx rāhā ho ri apa. Anē.

Hāmri nhũm krĩ nhõ xwÿnhjaja ja hā mē ajarēnh ma nē mē apê jamnuj ā mē apumunh kurê kumrêx. Ām hāmri na ka prem ā kām akapêr anē.

¹² Nē ixte mē awÿr kagà nē mēnhta kamā na pa pre nā puro kamā hpijaàm kêt xwÿnhhta mā tanhmā ixàkjêr to hkêt nē. Rÿ nā purota mā tanhmā ixàkjêr to hkêt nē. Na pa pre mē apê Kris kwÿjê hwÿr kagà nhĩpêx nē kamā tanhmā mē amā hpijaàm xwÿnhhta ā karõ hto. Mē ate kamā harēnh hāmri nē inhÿ hā amnhĩ nē hanor nhũm Korīt nhõ xwÿnh piitā kot ā mē ate amnhĩ nhĩpêx anhÿr ā mē apumunh kaxyw. Nē mē ate Tĩrtũm nom ā hipêx anhÿr jao mē amā ixkĩnh pê ixkapêr kôt ā hipêx anhÿr ā amnhĩ pumunh kaxyw.

¹³ Tā nhũm Xitre ixwÿr pøj nē tanhmā inhmā mē ajarēnh to. Na xep pre mē awÿr nojarêt nē tee ri amnhĩ kukamā hamaxpêr. Mē ate kagàta kamā harēnh nē ijarēnh mar nē kamā agryk pymaj tee ri amnhĩ kukamā hamaxpêr. Tā ma mē awÿr mōn pøj nē mā amā kugõ. Ka xep prem kamā harē nē ama nē hkôt amnhĩ nhĩpêx kurê kumrêx nhũm mē ate amnhĩ nhĩpêx ā mē apumu nē hkĩnh nē. Hāmri nē tām hamaxpêr. Tā ra akupÿn ixwÿr mō nē inhmā mē ajarē pa mē ajarēnh

ma nē ijaxwÿja ixkĩnh nē. ¹⁴ Na pre kormā mē awÿr nojarêt pa kām tanhmā mē amex ā mē ajarēnh to. Tā nhũm xep ma mē awÿr mōn pøj nē mē apumu nē hamaxpêr o:

–Nā pēr ām hāmri na pre Pawre inhmā mē mex ā harē. Mē mex kēnā. Anē.

¹⁵ Tā nhũm pre mē arũm kato nē ra man akupÿn ixwÿr mōn pøj nē inhmā mē ajarēnh o:

–Na pa pre ma mē hwÿr mō nē mē kām ixkapêr o ri mē hkôt ixpa nhũm mē ixkapêr ma nē ixkôt amnhĩ nhĩpêx kurê kumrêx nē ixto mex nē. Kormā ixte mē hwÿr inhmōr kêt tā mē harēnh ma nē inhmā mē hkĩnh nē. Tā pa ma mē hwÿr mō nhũm mē ixto mex rax nē pa ra inhmā mē hkĩnh tÿx kumrêx. Anē.

¹⁶ Ā inhmā mē ajarēnh anē pa mē ajarēnh ma nē ixkĩnh tÿx nē. Ām hāmri na ka htem mēmoj tā amnhĩ jarēnh xà hkôt tanhmā amnhĩ nhĩpêx to ho apa.

8

Mē kot Kris kôt mē hkwÿjê pê õxÿ hkêt ā mē kām karõ

Atre 11.27-30; Rõmān 15.25-27; Wam Korīt 16.1-4

¹ E Kris kôt ixkwÿjaja. Kot paj hpānhā mē amā jar Masetõn kamā tanhmā Jejus kwÿjaja kot amnhĩ nhĩpêx to hā mē harē ka mē harēnh ma. Na hte Tĩrtũm mē kutā nojarêt nhũm mē mex nē pa. ² Mē hkwÿjaja kot Kris ā mē hipêx kati nhũm mē kot amnhĩ xà htÿx kām hamak o pa htā hkĩnh nē hamakêtkati nē ri pa. Nē mē hkàxpore hkryre htā ho õxÿ hkêt nē pa. Na htem àmnhix ri mē kēp amrakati xwÿnhjê mā hkwÿ nhõr o pa.

³⁻⁴ Tā na prem Jerujarē kamā Kris kôt mē pahkwÿjê jarēnh ma. Mē kēp amrakati hā mē harēnh ma nē kām mē hkaprĩ nē. Nē mē kām mē hwÿr mēmoj rēnh nē mē ho ajuta hprām nē. No ām pa ixte mē kām hā karõ xà hkôt kêt. Mē tāmjaja mē hamaxpêr xà hkôt na prem ā hamaxpêr anē nē mē kaxyw kàxpore ho pikuprõnh rax nē. Hāmri nē inhmā kugõ nē inhmā:

–Kwa na pa prem Jerujarē kamā Kris kôt mē pahkwÿjê jarēnh ma nē mē inhmā mē hkaprĩ nē mē kām mē ixkàxpore hkwÿ ho akuprõ. Jakamā e amÿ nē ma mē hwÿr o

mō nē mē kām agō kē mē tokyx ho amnhīm awjaprō nē kuku. Anē.

⁵ Pa mē kuma nē ixtỳx ho ãm kàxpore grire hã hkamnhĩx nē ijamaxpēr o:

—Kwa mo mē hikàxpore rax koja mē ri ho akuprō nē mē kām kugō? ãm mē hikàxpore hkryre kēnã.

Anhỹr o ijamaxpēr tã no nhũm mē kaxyw ho rax nē ho akuprō. Mē hikàxpore hkryre htã mē kām òr rax nē. Hãmri nē inhmã amnhĩ jarēnh o:

—Na pa mē ra Pahihti Jejus Kris mã amnhĩ gō. Mē ixte tanhmã kām amnhĩ nhĩpêx to ho ri ixpa kaxyw. Jakamã e tanhmã mē inhmã mēmoj tã karō hto. Kot pa mē ama nē akapēr kôt amnhĩ nhĩpêx. Ja na pa mē inhmã hprãm nhũm Tĩrtũm haxwỳja kām ja prãm. Anē.

⁶ Na pa pre ã mē kot amnhĩ nhĩpêx anhỹr ã mē omu nē mē apê Korīt nhõ xwỳnhjê mã ijamaxpēr kurê kumrêx. Hãmri nē Xitre mã mē ajarē. Na pre mē awỳr mō nē mē amã Jerujarē nhõ xwỳnhjê jarē. Mē ate mē kām kàxpore hkwỳ ho apikuprōnh kaxyw. Tã pa pre jam ijamaxpēr nē ra akupỹm mē awỳr mēnh mã nē kām:

—Kwa ma akupỹm Korīt wỳr mō nē mē kām anē kē mē ra kot amnhĩ jarēnh xà hkôt Jerujarē nhõ xwỳnhjê kaxyw kàxpore hkwỳ ho akuprō nē tokyx mē hwỳr kumē. Ra mē kām Kris kôt mē hkwỳjê hkĩnh ã amnhĩ jarēnh kēnã. E kwa tokyj. Anē.

⁷ Na ka htem amnhĩ to mex o ri apa. Nē amnhĩ kaxyw Kris hkôt ajamaxpēr tỳx nē. Nē ma mē kām Tĩrtũm kapēr jarēnh mex o ri mē hkôt apa. Nē mē ajamaxpēr mex nē. Nē mē piitã mē ho mex o ri apa. Nē mē amã ixkĩnh o ri apa. Jakamã kwa kēr ka mē axàmnhĩx mē kēp amrakati xwỳnhjê mã mē akàxpore hkwỳ nhõr o apa. Jao mē amã Tĩrtũm kĩnh tỳx ã amnhĩ to amnhĩrīt.

⁸ Ixte ã mē amã ja hã karō anhỹr tã hã mē atã ixihtỳx kêt nē. ãm mē kamã axukapri hkôt mē ate mē kām axàmnhõr o apa kaxyw na pa ã mē amã ixkapēr anē. Masetõn kamã mē pahkwỳjaja kot amnhĩ nhĩpêxta pyrã nē. ⁹ Ra mē ate Jejus Kris kām mē pajapê hã kot tanhmã amnhĩ nhĩpêx to hã mar mex. Amnepêm na pre kaxkwa kamã mex kumrêx nē ri pa ho pa nhũm

mēmoj piitã kēp ò htã nhũm rer pa nē mē pahwỳr wrỳ nē mē pakamã kēp amrakati nē ri pa. Hikàxpore hkêt nē ri pa. Tã mēmo kaxyw na pre ã mēmoj mex piitã rer par nē mē pahwỳr wrỳk anē? ãm kot mē pahto mex pix kaxyw. Kot mē pahto mex nhũm mē pahte kukwak ri mē paxàmnhĩx ri mē pajamakêtkati nē mē papa kaxyw na pre ã amnhĩ nhĩpêx anē. Mē pahte nhỹrmã urak nē kaxkwa kamã pamex kumrêx nē ri papa ho papa kaxyw.

¹⁰ E kwa kēr ka mē tokyx kàxpore hkwỳ ho apikuprōnh pa nē Jerujarē nhõ xwỳnhjê hwỳr amē. Mē akumrêxjaja na ka prem ham amgrã hapêxta kamã ra mē kaxyw ho apikuprōnhja krax. Mē amã mē ho mex prãm xàj ham ho hkrax tã no ãm kormã hatur xàm mēnh nē mē hwỳr mēnh kêt nē.

¹¹ Kwa mē tokyx ja ho ajapêx nã. Na ka prem ate ho anhỹr krax ã akĩnh pē kàxpore hkwỳ ho apikuprōnh o apa. Tã kēr ka mē arĩ akĩnh rãhã ho apikuprōnh par jatur xàm amē. No mē ri atỳx tanhmã ajamaxpēr to hkêt nē. Rỳ mē ajamaxpēr o:

—Nã kormã. Kot paj nhỹrmã ixkàxpore rax nē rĩ kormã mē hwỳr hkwỳ mē.

Anhỹr o mē ri ajamaxpēr hkêt nē. Mē ate tanhmã akàxpore hkre kamã kute hã omunh xà hkôt mē kām hkwỳ pix gō. ¹² Kēr ka mē axàmnhĩx akĩnh kām mē kām ho akuprō. Ate amnhĩ kàxpore pumunh xà hkôt. Ka mē akàxpore rax nē mē kām ho rax nē agō. Rỳ mē akàxpore grire nē mē kām ho grire nē agō. Ja na kêt mex. ¹³ No mē ate mē kām òr par nhũm mē arom mē hikàxpore rax nē ri paja mex kêt. ¹⁴ Nom ra mē akàxpore rũnh jakamã kwa mē amnhĩ kutã mē kām hkwỳ ho hkryre nē ho akuprō kē mē apyrã nē hikàxpore nē ri pa. Kēr ka mē nhỹrmã tanhmã amnhĩ to nē axà nē nhũm akàxpore apê hapêx nhũm mē ajarēnh ma nē amnhĩ kuxwar mē ato ajuta nē mē amã hkwỳ ho akuprō nē mē awỳr kumē. Ka mē akàxpore ho axpēn pyrã nē ri apa. ¹⁵ Amnepêm Tĩrtũm kot kaxkwa rũm Ijaewjê hwỳr mēõ rēnh nhũm mē kot apkati mē amnhĩm hkawrà nē ho apkur o pata ã na pre Tĩrtũm kapēr ã kagã htũmja ã mē harēnh anē nē mē harēnh kot:

Na pre mẽ hkra xohtô xwýnhjaja mẽ apkur xà hkawrà rûnh nẽ. Nẽ gôj kãm unhwý nẽ kuku nẽ piitã ho ôhy htu. Nhũm mẽ hkra grêre xwýnhjaja haxwýja hkwý kawrà no ãm ho hkryre nẽ hkawrà. Nẽ gôj kãm unhwý nẽ kuku nẽ haxwýja ho ôhy htu hpa. Na pre htem apkati mẽ ã amnhĩ nhĩpêx anhýr o pa. Anẽ.

Ja pyrã nẽ kêr ka mẽ akàxpore ho axpên pyrãk o ri ho apa.

Xitre mẽ hkràmnhwýjê jarênh

¹⁶ Nẽ Xitre na pre ixpyrà nẽ kãm mẽ ato ajuta hprãm nẽ. Na pre inhmã mẽ atã amnhĩ jarê pa pre kuma nhũm ja inhmã mex nẽ pa ixkĩnh nẽ. Nẽ ijamaxpêr o:

—Nà ãm hãmri na Tĩrtũm tanhmã Xitre hkrã hto nhũm ã hamaxpêr mex anẽ. Anẽ.

¹⁷ Tã pa ma akupým mẽ awýr mör ã hkukja nhũm inhma nẽ hkĩnh nẽ mẽ awýr nojarêt kurê kumrêx. Nom kormã ixte kãm mẽ ajarênh kêr ri nhũm tãm amnhĩ kukamã hamaxpêr nẽ mẽ awýr hkrã. ¹⁸ Tã na ra nojarêt kaxyw. Kot paj ma hkôt Kris kôt mẽ pahtôjê hõ mẽ kê ma hkôt mō. Kôt ixte mēnh xwýnhta na hte mẽ kãm Tĩrtũm kapêr jarênh mex nẽ nhũm htem amnhĩm mex ã harê. ¹⁹ Na pre jar Jejus kwýjaja kot ma ixkôt Jerujarê hwýr kàxpore hkwý ho mör kaxyw nhũm prem amnhĩm mẽ kurê. Tã koja Xitre mẽ wa mẽ awýr mōn pōj ka mẽ kãm kàxporeta gō nhũm man akupýn o mō pa wa rĩ kormã ma Jerujarê hwýr mẽ kãm o mō. Mẽ kot hamýnh nẽ mẽ pamã mẽ hkĩnh ã kot amnhĩ tã mẽ pahpumunh kaxyw. Nẽ Tĩrtũm mã mex o mex ã harênh kaxyw. ²⁰⁻²¹ Nom kàxpore rax nhũm ixte mẽ hwýr o inhmör nhũm mẽ kot hã ixkamnhĩx pymaj kot paj ma amnhĩ kôt Kris kôt mẽ pahtōta o mō. Ixte Xitre hkôt mẽ awýr mēnh xwýnhta pa ma amnhĩ kôt o mō. Nom ixàhkĩnh o ixpare hã. Tĩrtũm kot ja kôt ixpumunh mex tã kot paj ma amnhĩ kôt o mō.

²² Nẽ ot pa ma Xitre wa hkôt axte mẽ awýr ja mẽ. Kêr kê mẽ axkrunêpxi nẽ ma ixkukamã mẽ awýr mō. Ixte wa hkôt mēnh xwýnhta ixte kot amnhĩ nhĩpêx ã omunh mex. Na hte kãm mẽ piitã mẽ ho ajuta ho pa hprãm nẽ. Tã mẽ ajarênh ma nẽ inhmã mẽ ajarênh o:

—Nà koja mẽ Jerujarê nhõ xwýnhjê mã kàxpore nhõr rax nẽ kãm ga. Mẽ kot amnhĩ to mex kēnã. Anẽ.

Jakamã ra mẽ awýr hkrã. Tã koja ma Xitre wa hkôt mō nẽ mẽ ato ajuta ka mẽ tokyx kàxpore ho apikuprõnh pa.

²³ Nẽ koja mēhõ tanhmã Xitre hã mẽ akukjêr to ka mẽ kêp ixkràmnhwý mex ã harê. Nẽ kot inhĩhkô hã mẽ ho ajuta mex o pa hã harê. Na pre ra jar Kris kwýjaja mẽ akaxyw kuta nẽ ma mẽ awýr kumê. Jakamã koja ma mẽ awýr mō nhũm Kris kôt mẽ pahtôjê hõ wa pijakrutja wa ma hkôt mō. Na hte wa haxwýja Kris kôt amnhĩ nhĩpêx mex o pa. ²⁴ Koja mẽ awýr pōj ka mẽ omu nẽ mẽ ho mex nẽ. Nẽ mẽ amã mẽ hkĩnh nẽ. Kê krĩ piitã hkôt Kris kôt mẽ pahkwýjê piitã mẽ hã mẽ ajarênh ma nẽ axpên mã mẽ amex ã mẽ ajarê. Nẽ mẽ ajarênh o:

—Pêr ãm hãmri na pre Pawreja mẽ pamã Korîit kãm mẽ pahkwýjê jarê. Na xep pre Xitre mẽ hkwýta ma mẽ hwýr mō nhũm mẽ ho mex rax nẽ. Ra Pawre kot mẽ pamã mẽ harênh xà hkôt. Anẽ.

9

Mẽ kot kàxpore ho pikuprõnh ã mẽ harênh

¹⁻² Kwa ixkràmnhwýjaja. Kot paj Jerujarê nhõ xwýnhjê kaxyw mẽ atã ixihtýx kêr nẽ. Ra mẽ amã mẽ ho ajuta hprãm jakamã na pa pre Masetõn kamã Kris kôt mẽ pahkwýjê mã mẽ ajarênh o:

—Pika pê Gres kamã Kris kôt mẽ pahkwýjaja na prem ham amgrã hapêxta kamã Jerujarê kamã mẽ pahkwýjê jarênh ma nẽ kãm mẽ ho ajuta hprãm. Anẽ.

Hãmri nhũm mẽ ajarênh ma nẽ mẽ apyrã nẽ kãm tanhmã mẽ ho ajuta hto hprãm. ³⁻⁴ Tã ot pa mẽ awýr Xitre mẽ hõta wa mẽ ho ixpimràatã wa mẽ kumê. Mẽ kot kàxpore hã mẽ akukjêr kaxyw. Kêr pa mytwrý hõ hã ma Masetõn nhõ xwýnh kwýjê mẽ mẽ awýr mō nẽ ra ixte mẽ kãm kàxpore hkwý ho mẽ apikuprõnh ã mẽ ajarênh kôt mẽ ate ho apikuprõnh rax ã mẽ apumu nẽ ixkĩnh nẽ. Nom kot pa mō nẽ tee ri hapêr nẽ te ixte Masetõn nhõ xwýnhjê mã mẽ ato ixêx pyrã nẽ ixpijaàm nẽ. Ka mẽ ajaxwýja amnhĩ kamã apijaàm nẽ. ⁵ ã mẽ pahte

amnhī nhīpêx anhÿr pymaj na pa ã mẽ amã kagàja nhīpêx nē Xitre mã òr nē ma amnhī kukamã mẽ awÿr mēnh anē. Nē hkôt wa mōr mã xwÿnhhta mẽ ho ixpimrààtã amnhī kukamã wa mẽ kumē. Tã kê mẽ awÿr pōj nē mẽ amã kagàja gō ka mẽ kamã harē nē ama nē tokyx kàxpore ho apikuprōnh jatur xàm amē. Kêr pa mẽ hapu hã mẽ awÿr mō ka mẽ ra mẽ ixkutêp ho apikuprōnh pa nē mẽ kãm agō nē ajamakêtkati nē apa. No pa ixte mẽ amã mẽ ate ho apikuprōnh kaxyw mẽ atã ixihtÿx kêt. ⁶ Na htem piitã ã hamaxpêr anhÿr o pa nē hamaxpêr o:

—Kot ka apur rax nē kamã anhō rax nē. Nom kot ka apur grire nē kamã anhō grire.

Anhÿr o hamaxpêr jakamã kêr ka mẽ apitã ajamakêtkati nē Jerujarē nhō xwÿnhjê mã kàxpore nhōr mex nē. Kêr ka mẽ ho apikuprōnh pa nhūm rax nē. Te mēhō ihpur rax nē kamã ò raxta pyrāk. Kê Tirtūm ã mẽ ate amnhī nhīpêx anhÿr ã mẽ apumu nē nhÿrmã mẽ ato mex nē. ⁷ Nom kêr ka mẽ anhōxÿ kamã mẽ kãm òr kêt nē. Mē pahte pahkīnh kãm panhōxÿ hkêt kãm mẽ kêp amrakati xwÿnhjê mã mẽmoj nhōr o papaja na Tirtūm kãm hprãm. ⁸⁻⁹ Koja mẽ hã mẽ apumu hãmri nē amnhīm mẽ amex ã mẽ ajarēnh rãhã ho pa. Mē kãm Tirtūm kīnh xwÿnhjaja na htem àmnhīx ri mẽ kêp amrakati xwÿnhjê mã mẽmoj nhōr o pa. Te Tirtūm kot amnhī nhīpêx pyrāk. Na hte àmnhīx ri mẽ pamã mẽmoj nhōr o pa. Mē pahwÿr na rē nhūm wrÿ. Nhūm mẽ pamã mẽ paxàpkur xà nhōr o pa. Nē tanhmã mẽ pahto pu mẽ paxà hkêt nē pajamakêtkati nē paxàpēnh o papa. Nē pamex nē ri papa. Panhō rūnh nē ri papa. Jakamã kwa pu mẽ urāk nē paxàmnhīx ri mẽ kêp amrakati xwÿnhjê mã mẽmoj nhōr o papa.

¹⁰ E pa ixprī hã mẽ amã ja jarē ka mẽ inhma. Nà na hte ã Tirtūm mẽ pamã mẽ paxàpkur xà nhōr o pa anē. Kot kaj apur kãm ahkre nhūm tanhmã amã mẽmo hyta nhīpêx to nhūm amã hapôx mex nē amã ô rūnh nē ka anhō rax nē. Nē hkwy ho axàpkur o apa nē axte hkwy hkre. Tã kêr ka mẽ ã Tirtūm kot mẽ ato mex anhÿr ã amnhī pumu hãmri nē urāk nē axàmnhīx ri mẽ kêp amrakati xwÿnhjê mã axàmnhōr pē mẽ ho mex o ri apa. Nhūm Tirtūm

mē hã mẽ apumu nē mẽ amã mẽmoj nhōr rãhã nē. Ka mẽ amnhī pyrã nē mẽ kêp amrakati xwÿnhjê mã hkwy nhōr o apa.

¹¹ Koja Tirtūm mẽ ato mex rax nē ka mẽ anhō mẽmoj rax nē. Ja o amnhī xwar mẽ kêp amrakati xwÿnhjê kaxyw kàxpore hkwy jaxwÿ. Kêr pa mẽ amã hkwy jamÿ nē ma Tirtūm kôt mẽ pahkwÿjê mã o mō nē mẽ kãm kugō kê mẽ omu nē hkīnh nē. Nē mẽ atã Tirtūm mã mex o mex ã harē.

¹² Hãmri nē mẽ akukwak ri mex nē ri pa. Nē axpēn mã Tirtūm mex o mex ã harēnh o ri pa. ¹³ Koja mẽ amnhī tã mẽ apumu nē hkīnh nē. Hãmri nē Tirtūm mã amnhī tã tanhmã mẽ ajarēnh to nē kãm:

—Pa Tirtūm. Nà ãm hãmri na pre Korīt kãm akôt mẽ ixkwÿjaja amnhī jarē. Na htem akôt pix mã amnhī nhīpêx mex o ri pa. Jao mẽ ixpê òxÿ hkêt nē mẽ inhmã kàxpore hkwy nhōr rax nē. àmnhīx ri hamakêtkati nē mẽ inhmã hkwy nhōr rax nē. No ãm mẽ papxipix na htem ã mẽ inhīpêx anhÿr kêt nē. Na htem mẽ kêp amrakati xwÿnh piitã ã mẽ hipêx anhÿr o pa. ãm hãmri na ka pre tanhmã mẽ hkrã hto nhūm mẽ anhÿ hã ã amnhī nhīpêx anhÿr o pa. Amex o amex Tirtūm. Anē.

¹⁴ Hãmri nē mẽ ato hwÿr o:

—Pa Tirtūm. ãm hãmri na hte Korīt nhō xwÿnhjaja amnhī pyrã nē mẽmoj to mẽ ixkutã nojarêt o pa. Jakamã aa mẽ ixte amnhī tã mẽ inhno ho mẽ omunh kêt tã mẽ inhmã mẽ hkīnh nē. Kwa kêr ka mẽ ixtã mẽmoj to mẽ kutã anojarêt rãhã ho apa Tirtūm.

Anhÿr o mẽ ato kuwÿ. ¹⁵ Tirtūmja mex o mex. Nom na hte mẽ pahto mex pē mẽ pamã kàxpore nhōr kêt nē. Kra Jesusja na pre mẽ pamã kugō. Kãm mẽ pajapê ho mẽ pahwÿr kumē nhūm mẽ pahwÿr wrÿ nē mẽ pahpiitã mẽ pahte amnhī tomnuj pãnhã amnhīrer kaxyw mẽ panē ty. Ja na mex o kot mẽ pamã kàxpore nhōr jakrenh. Mēhō koja urāk nē ã mẽ panē htyk anē? Nà amrakati ho amrakati. ãm Jesus pix na pre ã amnhī nhīpêx anē.

10

*Pawre kêp Tirtūm Karō nhÿ hã kapêr xwÿnh ã harēnh
Epes 6.10-20; Wam Tesarōn 5.8*

¹ E Kris kôt ixkwỳjaja. Nà ixpê Pawre kot paj mẽ akwỳ kot tanhmã ixto kapêr to xwỳnhjê mã amnhĩ jarê ka mẽ apiitã inhma. Nà na hte Kris mẽ pakamã gryk tokyx anhỹr kêt nê. Na hte mẽ pahto mex japjê nê. Tã inhmã uràk nê ã mẽ anhĩpêx anhỹr prãm nê. No na hte mẽ akwỳjaja axpên mã tanhmã ixto kapêr punuj to nê ri axpên mã:

—Pawre na hte nhỹri krĩ kamã pa nê mẽ pamã kagà nhĩpêx nê mẽ pahwỳr kurê nê kamã mẽmoj tã mẽ pamã kapêr kãm hihtỳx nê hã mẽ pamã akir. Tã amnê mẽ pahwỳr mỗ hãmri nê te kãm mẽ pahpyma pyràk o mẽ pamã kapêr o pa.

Anhỹr o ijarê. ² Nom inhmã mẽ awỳr inhmôr nê mẽmoj tã mẽ amã ixàkjêr prãm kêt tã kot paj nhỹrmã mẽ awỳr mỗ ka mẽ tanhmã amnhĩ tomnuj to ho apa japêr. Pa ja hã mẽ apumu nê hã mẽ amã akir kãm ga. ³ Na pa htem jar pika ja kamã Tĩrtũm kwỳ hkêt xwỳnhjê kaêx ã ri ixpa nom mẽ uràk nê amnhĩ krã hkôt tanhmã amnhĩ nhĩpêx to ho ixpa hkêt nê. Nê mẽ uràk nê amnhĩ krã hkôt tanhmã ijamaxpêr to ho ixpa hkêt nê. Na pa htem Tĩrtũm Karô nhỹ hã àhpumunh xà ho amnhĩ nhĩpêx o ri ixpa. ⁴ Nê Tĩrtũm xàhpumunh tỳx xà ho mẽ kãm kapêr jarênh o ri ixpa. Mẽ kot mar nê hkôt amnhĩ nhĩpêx kaxyw. Nê àhpumunh tỳx o na pa htem mẽ kot Tĩrtũm kôt amnhĩ xunhwỳr pymaj mẽ kêp àmnàr xwỳnhjaja tanhmã mẽ nê mẽ ho. ⁵ Na htem htỳx ri tanhmã Tĩrtũm nê hkwỳjê mã kapêr to ho pa. Amnhĩ kaxyw hkôt mẽ hamaxpêr kêt kaxyw tanhmã nê mẽ kãm kapêr to. Na pa htem ja hã mẽ omu nê Tĩrtũm xàhpumunh tỳx xà ho tanhmã mẽ kãm ixkapêr to nhũm mẽ tee ri inhma nê axte mẽ kêp àmnàr kêt nê. Pa mẽ kãm Tĩrtũm kapêr jarê nhũm mẽ ohtô nê kuma nê Kris kôt amnhĩ xunhwỳ nê hkôt amnhĩ nhĩpêx o pa. ⁶ Tã mẽ kajaja kot kaj mẽ Tĩrtũm kôt amnhĩ nhĩpêx mex tã mẽ atô ra kapêr nhĩrôp xa nê tanhmã amnhĩ tomnuj to. Pa ja hã apumu rỳ hã ajarênh ma nê hã amã akir. ⁷ Mẽ ate Tĩrtũm kot mẽ awỳr inhmênh kêt ã axpên mã ijarênh tã kot kaj mẽ atô ãm hãmri apê Kris kwỳ hã amnhĩ pumu nê ra mãânênh pa ixpê hkwỳ hã ixpumunh kurê kumrêx.

Mẽ apyrà nê ixpê hkwỳ kênã. ⁸ Na pa pre ma mẽ awỳr mỗ nê tanhmã mẽ amã amnhĩ jarênh to nê mẽ amã:

—Tĩrtũm na pre mẽ awỳr inhmê pa mỗ. Ixte ý hã mẽ amã kapêr jarênh o ri mẽ akôt ixpa kaxyw. Anê.

Tã pa hte arĩ ã amnhĩ jarênh anhỹr o ri ixpa. ãm hãmri na pre Tĩrtũm mẽ awỳr inhmê pa hte ãm hãmri mẽ amã kapêr jarênh o ri mẽ akôt ixpa. Na pa hte Tĩrtũm nhỹ hã mẽ amã ixkapêr nê kapêr o ixêx o amnhĩ to jarkrar kêt nê. Ixte tanhmã mẽ atomnuj to ho ri ixpa kaxyw na pre Tĩrtũm mẽ awỳr inhmênh kêt. Mẽ amã ixkapêr mex nhũm mẽ ate inhmar nê Kris kapêr kôt amnhĩ nhĩpêx mex o apa kaxyw na pre mẽ awỳr inhmê. ⁹ E kwa Kris kôt ixkwỳjaja. Na pa hte mẽ amã ixpuma kaxyw mẽ awỳr kagà rênh kêt nê. Mẽ ate kamã harênh nê tee ri amnhĩ kukamã ajamaxpêr o amnhĩ kamã amã ma kaxyw kêt. ¹⁰ Mẽ akamã mẽ kãm ixkĩnh kêt xwỳnhjaja na htem ijarênh o:

—Pawre na hte awry hã pa nê mẽ pahwỳr kagà rênh nê kamã te kêp pahi ho amnhĩ nhĩpêx pyrà nê mẽmoj tã mẽ pamã kapêr kãm hihtỳx nê. Tã mẽ pahwỳr pôj hãmri nê kapêr kaxyw nom kapêr kãm hihtỳx o kapêr kêt nê. Jakamã mo kaxyw kot puj mẽ hwỳr mra nê kapêr ma?

Anhỹr o ijarê. ¹¹ Nom ã ixte anhỹr kêt. Kwa mẽ inhma. Kot paj nhỹrmã ma mẽ awỳr mỗ hãmri nê te kagà ja kamã mẽ amã ixkapêr pyràk o mẽ amã ixkapêr nê ixkapêr xihtỳx o mẽ amã ixkapêr kãm ga.

¹² Na hte mẽ akwỳjaja kot amnhĩ to mex o mẽ ajakrenh ã amnhĩ to jarkrar o ri pa. No ãm amnhĩ krã hkôt pix mã na htem ã ri amnhĩ jarênh anê. Na hte Tĩrtũm ã mẽ harênh anhỹr kêt nê. ¹³ Tã inhmã mẽ uràk nê ã amnhĩ jarênh anhỹr prãm kêt. ãm ixte Tĩrtũm kot tanhmã inhmã karô hto xà hkôt amnhĩ nhĩpêx o ixpaja na inhmã hprãm. Tã mẽ kajaja mẽ awỳr na pre inhmê. ¹⁴ Ra kot mẽ awỳr inhmênh jakamã ixkumrêx na pa pre mẽ awỳr mỗ nê mẽ akôt ri mẽ amã tanhmã Kris jarênh to ho ri ixpa. Tĩrtũm kãm nhỹhỹm ixpa hprãm xà pix wỳr na inhmã ixpa hprãm.

¹⁵ No kêt mẽ kot amnhĩ krã hkôt htỳx ri Tĩrtũm kapêr jahkre o mẽ pa xwỳnhjaja na

htem nh̄yri krī kamā mẽ kot Kris kôt amnhĩ xunhw̄yr ã mẽ harēnh ma nē mẽ hã amnhĩ to jarkrar o ri pa. Te tãm kot mẽ hw̄yr mōr nē mẽ kãm ujarēnh nh̄um mẽ kot mẽ mar xà hkôt Kris kôt amnhĩ xunhw̄yr pyrāk. Nē mẽ hã amnhĩ to jarkrar o:

—E na pa pre ma mẽ hw̄yr mō nē mẽ kãm Tĩrtūm kapēr jarē nh̄um mẽ inhma nē hkôt amnhĩ xunhw̄yr kurē kumrēx. Ixkukwak ri na prem ã amnhĩ nh̄ipēx anē. Anē.

Nom ã amnhĩ nh̄ipēx anh̄yrja ã amnhĩ to hēx. No pa na pa hte ho mẽ urāk kêt nē. Koja Tĩrtūm ma nh̄yri krī hw̄yr ixkw̄yĵē hō mẽ nh̄um ma hw̄yr mō nē mẽ kãm Kris kapēr jarē. Hãmri nh̄um mẽ kuma nē Kris kôt amnhĩ xunhw̄y. Pa mẽ harēnh ma nē mẽ ŷ hã ixkĩnh nē nom pa ixkukwak ri mẽ kot hkôt amnhĩ xunhw̄yr ã amnhĩ to jarkrar kêt nē. Ixte mẽ hw̄yr ixpa nē mẽ kãm ixujarēnhre hã kot pa hkêt mẽ hã amnhĩ to jarkrar. Ām Tĩrtūm kãm nh̄yh̄ym ixpa hprãm xà pix w̄yr na pa hte ixpa nē mẽ kãm kapēr jarē. Jakamā kot kaj mẽ nh̄yrmā Kris kôt amnhĩ nh̄ipēx mex o ri apa pa ja hã mẽ apumu nē mẽ are nē hpãnhã ma krī hō hw̄yr Kris kot mẽ hw̄yr inhmēnh xà hō hw̄yr mō. Ka mẽ ja hã ixto Tĩrtūm w̄yr o apa. ¹⁶ Kot paj mẽ anhō krī kamā mẽ piitã mẽ kãm Jejus kapēr jarēnh pa hãmri nē hpãnhã ma krī hkwȳ hkôt ijapōx o ri ixpa nē kamā mẽ kãm harēnh o ri mẽ hkôt ixpa. Kormā aa mẽ kot mar kêt kumrēx xw̄yñhĵē mā harēnh o ri mẽ hkôt ixpa. Na pa hte ã mẽ hw̄yr ixpa nē mẽ kãm ixujarēnh anē. Jakamā nh̄um mẽ ja hã ixpumu nē mẽ kot Tĩrtūm kapēr mar xw̄yñhĵē pix w̄yr ixpa hã ijarēnh kêt nē.

¹⁷ Nē Tĩrtūm kapēr ã kagã htūm kot mẽmōj tã mẽ kot amnhĩ to jarkrar ã harēnh kot:

Kēr ka mẽ kamjaja amnhĩ mex ã amnhĩ to jarkrar kêt nē. Ām Tĩrtūm pix mā mǎn mex o mex ã harēnh o ri ho jarkrar o ri apa. Anē.

¹⁸ Kot pu mẽ Tĩrtūm noo mā amnhĩ to mex ã amnhĩ to jarkrar nē ãm amnhĩ to jarkrar kapr̄y. Nom koja Tĩrtūm tãm ja hã mẽ pahto jarkrar nē ãm hãmri mẽ pahte amnhĩ to mex xw̄yñh ã pahto jarkrar.

11

Jejus kot mẽ hw̄yr mẽ rēnh ã amnhĩ to hēx xw̄yñhĵē jarēnh

Matēwre 7.15; Rōmān 16.17; Karatas 1.6-9; Korosē 2.8; Sikūn Pētre 2.1

¹ E kot paj te mẽ hkrã pipãnh xw̄yñh kot ht̄yx ri amnhĩ jarēnh pyrāk o tanhmã mẽ amã amnhĩ to jarkrar to. Kwa mẽ inhma nē ixkamã agryk kêt nē. No mẽ ixkapēr kumrēx mǎn ma. ² Inhmã mẽ akĩnh. Te ho Mēpahpãm Tĩrtūm kãm mẽ akĩnh ta pyrāk. Te mẽ apē mẽhō kukrit kãm my hkĩnh nē kot ho mjēn prãm xw̄yñh ta pyrāk. Kãm mẽmyĵē piitã mẽ hkĩnh kêt ãm kãm pix kĩnh. Ja pyrã nē kēr ka mẽ amã Kris kĩnh o nhām amã mẽ hkĩnh xw̄yñhĵē jakre. Te ho mẽhō ni kot kãm myta pix kĩnh nē kãm ho mjēn prãm xw̄yñh ta pyrāk. Ja na pa inhmã hprãm. ³ Ra mẽ amã Kris kĩnh t̄yx o apa nē hkôt amnhĩ nh̄ipēx mex o ri apa htã nh̄um mẽ kot amnhĩ krã hkôt ht̄yx ri Tĩrtūm kapēr jahkre ho mẽ pa xw̄yñhĵaja tee ri ja hã mẽ ajarēnh ma nē axpēn mǎ mẽ ajarēnh o:

—Kwa nà ja mex kêt. Koja mẽ Pawre kapēr ma nē ãm kuma nh̄um ja mex nē. No mẽ pahkôt mẽ kot amnhĩ nh̄ipēxja na mẽ pamã mex. Ja na kêt mẽ pamã mex o mex. Anē.

Hãmri nē ra kot Kris nē tanhmã mẽ amã hēx to kaxyw. Te amnepē mā kagã kot mẽ panã kot wa pē Ewa mā hēx nh̄um kot mar nē hkôt amnhĩ nh̄ipēxta pyrāk. ⁴ Na pa pre ra mẽ aw̄yr mō nē mẽ amã tanhmã Jejus jarēnh to. Nē tanhmã mẽ amã Tĩrtūm Karō jarēnh to. Nē tanhmã wa kot mẽ pahto hkra hto hã mẽ amã wa harē ka prem inhma nē mar t̄yx nē. Tã nh̄um ra mẽ kot ht̄yx ri Tĩrtūm kapēr jahkre xw̄yñhĵaja ixpãnhã mẽ aw̄yr mō nē Jejus kapēr kw̄ym ri tanhmã mẽ amã ujarēnh to nē mẽ amã harēnh o hēx rãhã ho pa. Nē Tĩrtūm Karōja nh̄um mẽ amã tanhmã ho hēx to. Nē ixte mẽ amã Tĩrtūm kapēr jarēnh kw̄ym ri ixpãnhã tanhmã mẽ amã harēnh to ho pa. Na ka prem mẽ ama nē ãm hãmri harēnh ã hkamnh̄ix. Kwa kēr ka mẽ ri mẽ ujarēnh piitã mar nē hkôt amnhĩ nh̄ipēx kêt nē. Mē kot Jejus jarēnh tã no ãm katat kôt harēnh kêt nē. Ām ri ho hēx o pa. Ka htem ama nē ãm hãmri harēnh ã hkamnh̄ix nē mẽ amã mẽ mar prãm nē. Mē kot mẽ amã harēnh o hēx o pa

htā ka mē ama nē ra mē hkôt amnhī nhīpêx kaxyw. Kwa mē ri ā amnhī nhīpêx anhÿr hkêt nē. ⁵ Kris kot mē awÿr mē rēnh ā mē kot amnhī jarēnh tā amnhī to hêx. Ka prem ama nē ām hāmri mē kot mē amā harēnh ā mē hkamnhīx. Nom na pre Krisja mē awÿr mē rēnh kêt nē. Kêt pa na pre mē awÿr inhmē. ⁶ Mē hkīnhā ixkapēr kror pyrāk tā no ām ixte Tirtūm kapēr mar tÿx. Nē kot amnhī nhīpêxja na ixte omunh par. Ra mē ate ja hā ixpumunh mex.

⁷ Na pa pre mē akôt ri mē amā Jejus jarēnh o ri ixpa no ām hpānhā mēmoj tā mē awÿr o ri ixpa hkêt nē. Xà amarī ixte mē amā harēnh nē hpānhā mēmoj tā mē awÿr kêtja mē apê omnuj? ⁸⁻⁹ Kormā ixte mē amā Tirtūm kapēr jarēnh o ri ixpata ā na pa pre hte tōhā kàxpore ho presija no ām aa hā mē awÿr kêt nē. Jar Masetōn kamā Kris kôt mē pahkwÿjaja na prem ixwÿr hkwy rēnh o pa pa ho ixàpkur xà japrôr o ri mē akôt ixpa. Mē kumā ixte Tirtūm kapēr jarēnh o ri ixpa hkêt tā pa hte mē kukwak ri mē akôt ho ixàpkur o ri ixpa. Tā kot paj arī ā mē akôt ixpa nē ā amnhī nhīpêx anē nē mēmoj tā mē awÿr o ri ixpa hkêt nē. ¹⁰ Ja inhmā mex. Jakamā kot paj amarī mē anhō pika pē Gres kām ā mē amā Tirtūm kapēr jarēnh o ixpa anē nē mēmoj tā mē awÿr kêt nē. Ām hāmri na pa ā mē amā amnhī jarēnh anē. Kris pyrā nē ixêx kêt kēnā. ¹¹ Xà we inhmā mē akīnh kêt kôt na pa hte ā mē amā Tirtūm kapēr jarēnh pānhā mē awÿr kêt anē? Nā inhmā mē akīnh jakamā na pa hte kapēr jarēnh pānhā mē awÿr o ri ixpa hkêt nē. Inhmā mē akīnh tÿx kēnā. Tirtūm kot ja hā ixpumunh mex. ¹² No mē kot amnhī krā hkôt htÿx ri Tirtūm kapēr jahkre xwÿnhjaja na htem mē ajahkre hpānhā kàxpore hā mē awÿr pix o pa. Nē mē amā tanhmā amnhī to hêx to nē mē amā:

—Nā mē ixte Pawre kot amnhī nhīpêx pyrāk. Mē ixte amnhī nhīpêxja kot axpēn pyrāk.

Anhÿr o mē amā amnhī to hêx. Nom ixte ho mē urāk kêt kumrêx. Mē ixte amnhī nhīpêx kot axpēn pyrāk ronhÿx pa mē urāk nē kàxpore hā mē awÿr o ri ixpa. Nom ixte ā amnhī nhīpêx anhÿr kêt. Kot paj aa ā amnhī nhīpêx anhÿr o ixpa hkêt nē. ¹³ Ā

mē kot amnhī nhīpêx anhÿr xwÿnhjaja na pre Tirtūm mē awÿr mē rēnh kêt nē. Mē kot Kris nhÿ hā mē ahkre xwÿnh ā amnhī jarēnh tā ām amnhī to hêx. ¹⁴ Mē ō pahi Satanastija te mēmoj mex jarēnh pyrāk tā no ām na hte mē pano kupyr pē mē pamā tanhmā hêx to ho mē pahkôt pa. Te kot mēmoj mex ā ām hāmri kot harēnh pyrāk tā no ām ho hêx. ¹⁵ Tā hkôt mē kot amnhī nhīpêx xwÿnhjaja na htem urāk nē te tām mē kot amnhī nhīpêx xwÿnhjê pyrā nē mē pahwÿr mra nē tanhmā mē pamā hêx to. Satanasti pyrā nē mē pano kupyr kaxyw tanhmā mē pamā hêx to. Nom koja Tirtūm nhÿrmā mē pahtā mē homnuj tÿx kumrêx nhūm mē rī amnhī pumu.

Tanhmā mē kot Kris ā Pawre nhīpêx to ā mē harēnh
Atre 9.23-25

¹⁶ E kot paj axte te ixtÿx ri amnhī to jarkrar pyrāk o mē amā tanhmā amnhī jarēnh to ka mē inhma nē ixkamā agryk kêt nē. ¹⁷ Pahihti Kris nhÿ hā kot paj mē amā amnhī jarēnh kêt ām amnhī krā hkôt kot paj mē amā amnhī jarē. ¹⁸ Na htem ohtō nē mē ate mē hā apijaam kaxyw tanhmā mē amā amnhī to jarkrar to ho pa. Tā kot paj mē urāk nē amnhī krā hkôt mē amā amnhī to jarkrar ka mē inhma. ¹⁹ Mē ate amnhī xàhpumunh tÿx ā amnhī jarēnh tā ka htem htÿx ri mē kot amnhī to jarkrar o ri mē pa xwÿnhjê kapēr ma nē mē hkôt ajamxpēr nē mē hkôt amnhī nhīpêx kuré kumrêx. ²⁰ Mē kot Kris nhÿ hā mē ahkre hā amnhī to hêx xwÿnhjaja mē pakurom mē kot amnhī to rax xwÿnh ā amnhī jarēnh jakamā na htem mēmoj tā mē amā karō ho pa.

Nē mē kām hprām xà hkôt nhÿhÿm mē arē nē nhÿhÿm mē arē.

Nē mē apa pix kukwak ri apkur o pa.

Nē mēmoj tā mē ajakwap mē atak o pa.

Ā mē kot mē anhīpêx anhÿr tā ka te mē ate atūm kêt pyrā nē atÿx ri mē kapēr ma nē mē hkôt amnhī nhīpêx o ri apa. ²¹ Tā ixte mē urāk nē ā mē anhīpêx anhÿr kêt tā kot paj mē urāk nē mē amā tanhmā amnhī to jarkrar to ka mē inhmar japēr. Te ixtÿx ri amnhī jarēnh pyrāk o kot paj mē amā amnhī jarē nom ām hāmri mē amā amnhī jarē. ²² Mē kot Jejus nhÿ hā mē ahkre hā

amnhî to mē hêx xwÿnhjaja na htem mē amā tanhmā amnhî to jarkrar to nē mē amā:

—E mē inhma. Mē ixpê Ijaew na pa mē. Mē arom mē ixpê finat Apraaw kanrêhā htāmnhwÿ jakamā kwa mē ixkapêr ma nē mē ixkôt amnhî nhîpêx. Anē.

Nom ijaxwÿja ixpê Ijaew tā pa hte mē urak nē ja hā amnhî to jarkrar hkêt nē. ²³ Nē mē kot Kris kapêr jarênh mex o pa hā amnhî jarênh tā pa na pa hte harênh mex o mē hakre. Te ixkrā pipānh pyrāk o ā mē amā amnhî jarênh anhÿr tãã.

E pa mē amā tanhmā amnhî jarênh to ka mē inhma. Nā na pre Kris ā mē kām ixkurê xwÿnhjaja mē kot amnhî to jarkrar xwÿnhjê hkînhā Kris ā ixpynênh nē ijagjênh xohtô nē. Nē mē hkînhā tōhā ixtak rûnh kumrêx. Pa mē hkînhā xatā mē kot tanhmā ixto hā kritpêr ronhÿx pa pre ty. ²⁴ Na pre Ijaew krāhtûmjaja Kris ā ixkatut kām ixtak rûnh nē. Nē ixtak xāja pî hā mry kà janhôr o ixtak. Nē ixtak kaxyw nē ixtak xà jatur xà kamā kàx xwa gixre janhô nē ho ixtak rûnh o ixkatut kà rê. Ixtak o 39 hāmri nē rî kormā mē kot ixpîr pymaj inhma ure. Na pre htem nhÿri ixpynê nē ā inhîpêx anē. Na prem ā inhîpêx anhÿr o 5 wês.

²⁵ Nē na prem ra mē kot ixpîr kaxyw nē kên rûnh kwÿ jamÿ nē ho ixtak o kuhê. Nē Rôm nhô xwÿnhjaja haxwÿja pî ho ixtak rax kumrêx. Ā inhîpêx anhÿr o axkrunêpxi.

Nē na pa pre hte gô xujanār kām nhÿhÿm Jejus jarênh o ri ixpa kaxyw pâr kām mē hwÿr ixpa nhûm pârja tanhmā amnhî to nē agjê. Kritpêr nhÿx pre hte gôja ixpî. Pa pre ā amnhî nhîpêx anhÿr o axkrut. Tã arîgro hō hā kê axte pâr ô mā axà nē ma axte krî hō hwÿr mō. Nhûm kê pârta axte mē ixpê axà nhûm gôja nhÿx kê axte ixpî. Pa pâr jakā hā kumÿ nē hā ijêr o amÿkry. Nē ho apkati. Tã nhûm nhÿhÿnh pâr ôja mō nhûm kamā mē mōr xwÿnhjaja ixpumu nē ixwÿr pâr o mō nē amnhî wÿr ixto api nē ma amnhî kôt ixto mō.

²⁶ Na pa pre amnhî xà htÿx kamā ijamak o ri ā mē kām Kris kapêr jarênh o ri ixpa anē. Kironhÿx pre gô tāmja ixpî. Nhûm mē àhkînh nhî xwÿnhjaja kironhÿx prem määnên ixpî. Nē Ijaew nē Ijaew kêt xwÿnhjaja tōhā tanhmā ixtomnuj to ho pa.

Pa pre krî hkwy hwÿr ixpa rÿ kapôt ā ixpa nhûm mē ixtā amÿnê. Pa pre gô xujanār kām pâr kām ri ixpa nē nhÿx kamā ty. Nhûm mē kêp Kris kwÿ hā amnhî to hêx xwÿnhjaja haxwÿja tanhmā ixtomnuj to pa mē ÿ hā amnhî xà htÿx kamā ijamak o ri ixpa. Ā na prem Kris ā inhîpêx anhÿr o pa.

²⁷ Nē na pa Jejus kapêr jarênh o ri ixpa kurê ixkêngrà nē ri ixpa. Nē tōhā inhôt kêt ā ixtā apkati. Nē tōhā inhma prām nē inhma kôr nē ri ixpa. Nē tōhā ixê mex kêt nē inhma kry nē ri ixpa. ²⁸ Na pa hte Kris kapêr jarênh o ri ixpa pē ā amnhî nhîpêx anē. Nom ja pix kêt. Na pa hte krî piitā hkôt Kris kwÿjê hkukamā tee ri ijamaxpêr nē ijamaxpêr o:

—Hêxta waa nē. Mân mē arî Kris kôt amnhî nhîpêx mex japêr rÿ ko. Mân mē ra kapêr kwÿm ri tanhmā amnhî tomnuj to rÿ ra hkaga.

Anhÿr o ijamaxpêr o ixpa.

²⁹ Nē na hte mēhō Tîrtûm kapêr nhîrôp xa nē tanhmā amnhî tomnuj to pa tee ri omu nē ixkaprî htÿx kumrêx. Koja mēhō tanhmā Tîrtûm nē mēhō mā kapêr to nhûm kuma nē Tîrtûm kôt amnhî nhîpêx kêt pa tee ri ja hā omu nē nē kêp àmnâr xwÿnhhta kamā inhgryk tÿx kumrêx.

³⁰ E Kris kôt ixkwÿjaja. Na pa ā mē amā amnhî jarênh anē. Te ixte amnhî to ijarkrar pyrāk no âm mē ate ixirerek xwÿnh ā ixpumunh pix kaxyw. ³¹ Ām hāmri na pa ā mē amā amnhî jarênh anē. Ixêx kêt. Pahihti Jejus nhîpêxà Tîrtûm kot ja hā ixpumunh mex. Tîrtûmja mex o mex. Koja mex o mex tûm nē pa rāhā ho pa. Tām kot ixirerek ā ixpumunh mex. ³² Kormā krî pē Tamas kām ixpare ri na pre mē ô pahi Arêtja mē kām ixtā amÿnê nhûm pôristijaja krî hpu hā kahê xà nhô hakwakre piitā kām hipôk pa nē ixkām hamak o kuhê. Pa tee inhma nhÿhÿnh ixkator nē ma mē umaj ixprôt nē ixtêm prām nē ixirerek xwÿnh ā amnhî pumunh kurê kumrêx. ³³ Tã nhûm Kris kôt mē pahkwÿjaja hamaxpêr nē kawà rax mÿ nē o tē nē inhma âm pa hwÿr axà nē kamā nhÿ. Hāmri nhûm mē pâr nhôr o kahê nhîrô pē ixto wrÿ pa ixkato nē mē kêp amûxu nē amnhîm ixprî nē ma tē nē mē kêp

akunok. Ā na pre Tirtūm ixirerek xwýnh ā inh mā ixtō amnhīrīt anē.

12

Tirtūm kot Pawre mā mēmoj to amnhīrīt ā harēnh

¹ E Kris kōt ixkwýjaja. Nā inh mā amnhī to jarkrar hprām kēt tā kot paj tanhmā mē amā amnhī jarēnh to ka mē inh mā nē hā ixtā apijaām japēr. Na hte Tirtūm tōhā inhōt kām ixkarō mā tanhmā kapēr to. ²⁻³ Amnepē mā amgrā hō hā na pre tanhmā ixkrā hto nē ō krī hwýr amnhī wýr ixtō api. Na pre ra hā amgrā pē 14 ān. Apu inhī rāhā ixtō api rý apu ām ixkarō pix o api rý ko. Ixte ja hā amnhī pumunh mex kēt. Tirtūm pix kot ja hā ixpumunh. ⁴ Na pre ixtō api pa pōj nē ō krī kamā axtem tanhmā mē kapēr to hā mē kuma. Na prem mēmoj mex kumrēx jarē pa kuma nē ixkīnh nē. Nē inh mā mar prām nē. Hāmri nē ijamaxpēr o:

—Hēxta waa nē. Mēmoj jarēnhja mex kumrēx. Nā kot paj akupým wrý nē ixkwýjē mā harē kē mē ixpyrā nē kuma. Nā kot paj anē.

Anhýr tā nhūm Tirtūm Karō ja nē ixkurē nē inh mā:

—Nā kēr ka mē kām ja jarēnh kēt nē. Ām kapxipix kot kaj ama nē ri hā apa.

⁵ Anhýr jakamā pa pre paxipix mē arom mēmojja pumu nē kuma nom kot paj ri hā amnhī to jarkrar kēt nē. Kot paj ām Jejus pix tanhmā harēnh to ho ri ixtō. Jao ixrom mex o mex ā harē. Nē ixrom hihtýx o hihtýx nē àhpumunh o àhpumunh ā harēnh o ri ixtō.

⁶ Nē ixte Tirtūm nhō krī hwýr ixàpirja ām hāmri ixte hā amnhī jarēnh tā kot paj ja hā amnhī to jarkrar o ri ixtō hkēt nē. Mē ate ja hā inhmar kōt inh mex ā ijarēnhja na inh mā hprām kēt. Nom kot ka mē ixte tām amnhī nhīpēx ā ixpumu nē tām ixkapēr ā inh mā hāmri nē rī kormā inh mā inh mex ā ijarē. Ā mē ate amnhī nhīpēx anhýrja na inh mā hprām. ⁷ Na pre Tirtūm inhōt kām inh mā mēmoj mex kwý jarēnh rax nē. Hāmri nē hpānhā inh mā:

—E na ka akwýjē rom inhō krī hwýr api nē mē kurom mēmoj mex pumunh rax nē. Tā ate ja hā amnhī pumunh nē ma mē kām

hā amnhī to jarkrar o ri apa pymaj kot paj Satanasti mā anē nhūm inh mā nē tanhmā atomnuj to ho pa. Nom ijamaxpēr xā hkōt koja ā anhīpēx anē.

Anhýr jakamā nhūm tanhmā inhīpēx to pa inh mex kēt nē ixtō. Te mrōnhī rax nhýhýnh kot ixkamnhwýr nhūm inh mā tee ri hkaxār prām kaprý nē ý hā ho inh gēx rāhā nē ixtō pyrāk. ⁸ Tā pa tee ri ja hā amnhī pumu nē amnhī to Jejus wý nē kām:

—Kwa Pahiiti. Na pa ra mēmojta nhý hā ixpunuj nē ixirerek nē ixtō. Kwa inh nē ata pa akupým ixihýtýx nē ijamakētkati nē ri ixtō nā?

Anhýr o amnhī to hwýr o axkrunēpxi. ⁹ Hāmri nhūm inh mā:

—Nā kot paj anē hyr kēt nē. Kot paj ām akutā inhnojarēt rāhā ho ri akōt ixtō. Ka axirerek nē apa htā ixihýtýx xwýnh ā ixpumunh kōt ixkamnār rom tanhmā inhý hā amnhī nhīpēx to ho ri apa. Anē.

Ā inh mā kapēr anhýr jakamā na pa ixpunuj nē ri inhīrot nē ixtō htā ixrom hihtýx xwýnhā nhý hā ixkīnh nē ixtō. Nē kurom ixirerek xwýnh pix ā amnhī to jarkrar o ri ixtō. ¹⁰ Jakamā kot paj Kris ā ixpunuj nē ri ixtō htā ixkīnh nē ijamakētkati nē ri ixtō. Kwār mē māmri hā tanhmā ixtō kapēr to nē tanhmā hā inhīpēx to pa amnhī xā htýx kamā ijamak o ri ixtō. Nē ixpē amrakati nē inhīrot nē ri ixtō htā Kris nhý hā tanhmā kām amnhī nhīpēx mex to rāhā ho ri ixtō.

Pawre kot tee ri mē hkukamā hamaxpēr ā harēnh

¹¹ Tā mēmo kaxyw na pa ā mē amā amnhī jarēnh anē? Nā mē ate ixtā apijaām kēt jakamā na pa ā mē amā amnhī jarēnh anē. Mē kēp Kris nhý hā mē ajahkre xwýnh ā amnhī to hēx xwýnhjaja na ka htem ixrom kot amnhī to rūnh xwýnh ā mē harē nē mē hā apijaām o ri apa. Nom ixte amnhī to grire xwýnh tā mē kot amnhī to rūnh o ijakrenh kēt. ¹² Na pa pre mē akamā ri ixtō nē Tirtūm nhý hā aa mē ate mēmoj pumunh kēt kwý ho anhýr rax o ri mē akōt ixtō. Nē ý hā akupým mē à xwýnhjē ho mex. Nē mē nohkre xwýnhjē no ho mex. Na pa pre hte ā mē amā mēmoj nhīpēx anhýr o ri mē akōt ixtō. Amnhī xā htýx kamā ijamak o ri ixtō htā Tirtūm xihtýx xā ho amnhī to htýx

nē ã mē amā mẽmoj to anhÿr o ri mẽ akôt ixpa. Mē ate omunh nē Tirtūm àhpumunh tÿx ã omunh kurê kumrêx kaxyw. Nē xipê Kris nhÿ hã mē ajahkre hã xipumunh kurê kumrêx kaxyw na pa pre ã mẽ amā amnhĩ nhĩpêx anhÿr o ri mẽ akôt ixpa. ¹³ Xàn pa pre nhãm krĩ hkwÿ kamã Kris kôt mẽ pahkwÿjê ho mex tã mẽ kajaja tanhmã mẽ ato mex to hkêt nē? Nà na pa pre hte mẽ anhĩpêx o axpên pyræk. Æm mẽmoj pixire na pa pre mẽ uræk nē mẽ awÿr kêt nē. Nhãm krĩ hkwÿ kamã ixpata ã na pa pre mẽmoj to presija nhũm prem inhmã òr o pa. Tã pa pre mẽ mō nē mẽ akôt ixpa nē mẽmoj to presija htã hã mẽ awÿr kêt nē. Kwa mẽ ã ixte amnhĩ jarênh anhÿrja ma nē ixkamã agryk kêt nē.

¹⁴ Tã ot pa ra akupÿm mẽ awÿr inhnojarêt kaxyw. Na pa pre ra mẽ awÿr inhmōr o axkrut. Tã ra axte mẽ awÿr inhnojarêt kaxyw. Kot paj mẽ awÿr mō nē mẽ akôt ixpa nom te wam ixtēmta pyrà nē mẽmoj tã ri mẽ awÿr kêt nē. Æm mẽ amā ixkĩnh pix na inhmã hprãm. Mē apiitã te mẽ apê ixkra pyræk. Na hte mẽ hkrarejaja mẽ katorxà nē mẽ hipêêxà mã ujaarōr o pa hkêt nē. Mē hipêêxà nē mẽ katorxà na hte hkrare mã kot mẽmoj to presija xà hkôt kãm haprōr o pa nom mẽmoj tã hwÿr kêt nē. Ja pyrà nē kot paj mẽ apê ixkra pyræk ã mẽmoj tã mẽ awÿr kêt nē. ¹⁵ Kot kaj mẽ mẽmoj to presija japêr nē inhmã harê pa ixàmnhĩx ixkĩnh kãm mẽ amā ixkàxpore piitã òr par pyræk o amnhĩ nhĩpêx. Nē mẽ amā tanhmã amnhĩ nhĩpêx to ho ixpa rãhã ixykja na inhmã hprãm. Inhmã mẽ akĩnh tÿx kumrêx tã mẽ kajaja mẽ amā ixkĩnhja mẽ atã hkwÿ jêt kêt kumrêx. ¹⁶ Ixte amnhĩ mã mẽmoj tã mẽ awÿr kêt tã na hte mẽ akwÿjaja ixêx rom ixte nhãm mẽ kêp amrakati xwÿnhjê mã kàxpore hã mẽ awÿr o ixpa hã ixkamnhĩx.

¹⁷ Kwa tanhmã na pa pre ri mẽ ano kupyrt to? Xà ja kaxyw na pa pre mẽ awÿr ixkràmnhwÿta wa kumê? ¹⁸ Na pa pre Xitre hã ixihtÿx nē mẽ awÿr kumê. Nē Kris kôt mẽ pahtōja pa Xitre hkôt kumê nhũm wa ma mẽ awÿr mō. Tã xà na pre Xitre tanhmã mẽ ano kupyrt to? Nà na pre ã mẽ anhĩpêx anhÿr kêt nē. Tã wa ixte amnhĩ nhĩpêx nē wa ijamaxpêrja kot axpên pyræk. Nà na pa

hte uræk nē mẽ ano kupyrt o ri ixpa hkêt nē. ¹⁹ Mãn ka mẽ axpên mã mẽ ijarênh o:

—Nà Pawre mẽ hkwÿjaja mẽ kãm amnhĩ to rũnh xwÿnh prãm jakamã na ã Pawre kagàja kamã mẽ pamã amnhĩ tã àprār anē.

Anhÿr o mẽ ijarênh japêr nom mẽ inhmã amnhĩ tã tanhmã ixàprār to hprãm kêt. Æm mẽ inhmã mẽ akĩnh nē mẽ ato mex prãm jakamã na pa htem tanhmã mẽ amā amnhĩ nhĩpêx to ho ri ixpa. Na pa Tirtūm noo mã Kris nhÿ hã ã mẽ amā mẽ amnhĩ jarênh anē.

²⁰ Tã kot paj jatã ma mẽ awÿr mō ka mẽ akwÿjaja tanhmã amnhĩ tomnuj to japêr.

Mẽmoj tã axpên mã axàkjêr o apa.

Rÿ mẽmoj tã axpên kãm agryk.

Rÿ axpên kãm agryk tokyx anhÿr o apa.

Rÿ axpên pē anhōxÿ.

Rÿ axpên to akapêr punuj o apa.

Rÿ mẽ ajakwa kamã nhãm mẽ hixi ho rêr o ri apa.

Rÿ amnhĩ to rũnh prãm xàj anhmã amnhĩ nhĩpêx to ho apa.

Kot kaj mẽ ã amnhĩ nhĩpêx anhÿr o ri apa pa ja hã mẽ apumu nē ixkaprĩ htÿx kumrêx ka mẽ tee ri amnhĩ tã xipumu. ²¹ Xà kot paj mẽ awÿr mō nē mẽ apumu ka mẽ akwÿjaja arĩ mẽ aprō kuhpa hã nhãm mēnijê ho amnhĩkati ho ri apa? Rÿ arĩ tanhmã ajamaxpêr punuj to ho apa? Rÿ atÿx ri apijaàm kêt o apa? Kot ka mẽ arĩ ã amnhĩ nhĩpêx anē pa ja hã mẽ apumu nē ixkaprĩ xàj inhmÿr rax nē. Nē mẽ anhÿ hã Tirtūm noo mã ixpijaàm tÿx kumrêx.

13

Pawre kot tanhmã amnhĩ kukamã mẽ kãm karō hto

¹ Tirtūm kapêr ã kagà htũm tanhmã mẽ kot amnhĩ tomnuj to xwÿnhjê jarênh kot:

Koja mēhō tanhmã amnhĩ tomnuj to nhũm mēhō pyxi nē ã amnhĩ nhĩpêx anhÿr ã omu nē awÿr tē nē amā harê ka mẽ ama nē ãm ama nē hkôt ajamaxpêr kêt nē. No koja mẽmojaja axkrut rÿ axkrunêpxi nē hã omu nē awÿr mra nē axpên kôt amā harê ka mẽ ama nē mẽ hkôt ajamaxpêr kurê kumrêx. Anē.

Tã ra mẽ awÿr inhmōr o axkrut tã kot paj akupÿm mẽ awÿr mō nē mẽ apumu. ² Hapu

hã mẽ awỳr inhmōrta ã na pa pre mẽ akwỳ kot tanhmã amnhĩ tomnuj to hã mẽ omu nẽ hã mẽ kãm akir nẽ mẽ kãm:

–Kot kaj mẽ amnhĩ tomnuj kaga nẽ tãm amnhĩ nhĩpêx kêt kot paj nhỹrmã akupỳn mẽ awỳr mō nẽ ã mẽ ate amnhĩ nhĩpêx anhỹr ã mẽ apumu nẽ hã mẽ atomnuj tỳx kumrêx kãm ga. Anẽ.

Jakamã kot paj mẽ ma mẽ awỳr mō nhũm mẽ akwỳjaja arĩ mẽ ate amnhĩ tomnuj o apa hã inhmã mẽ ajarẽ pa mẽ atã mẽ kuma nẽ tanhmã mẽ ato htỳx nẽ. ³ Kot kaj mẽ ja hã ixpumu nẽ aprĩ hã ixte Kris nhỹ hã ixkapêr xwỳnh ã ixpumunh tỳx kurê kumrêx. Kris ixrom hihtỳx o hihtỳx. Na pre ra mẽ ate amnhĩ tomnuj o apata mỳrapê tanhmã mẽ anhĩpêx to. Tã kot kaj mẽ kormã ã ate amnhĩ nhĩpêx anhỹrja kaga hkêt hã koja tee ri ja hã mẽ apumu nẽ mẽ anhĩpêx kati nẽ. ⁴ Amnepêm na pre Krisja te hihtỳx kêt pyrã nẽ ãm arĩ mẽ kãm xa nhũm mẽ unẽ nẽ pĩ kahpa ã kunhō nẽ kupĩ. Tã nhũm Tĩrtũmja àhpumunh tỳx o akupỳm ho htĩr nhũm akupỳm htĩr o htĩr nẽ Tĩrtũm nhỹ hã hihtỳx o hihtỳx ã amnhĩ to amnhĩrĩt. Ja pyrã nẽ wam mẽ awỳr inhmōrta ã na pa pre hte mẽ akamã te Kris kormã htyk kêt ri hihtỳx kêeta pyrã nẽ mẽ akôt ixpa. Tã kot paj ma akupỳm mẽ awỳr mō hãmri nẽ te Kris ra akupỳm htĩr nẽ hihtỳx o hihtỳxta pyrã nẽ Tĩrtũm xihtỳx xà ho tanhmã mẽ kot amnhĩ tomnuj xwỳnhjê nhĩpêx to. Hãmri nhũm mẽ amnhĩ tã ixpumu nẽ Tĩrtũm nhỹ hã ijamaxpêr tỳx ã ixpumunh kurê kumrêx.

⁵ Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kôt ajamaxpêr o ri apa nà? Kot kaj mẽ apê hkwỳ hã koja mẽ akaxwỳnh kãm mẽ akamã hkrĩ rãhã nẽ. Nom koja mẽ akaxwỳnh kãm mẽ akamã hkrĩ hkêt ka mẽ ãm apê hkwỳ hã amnhĩ jarẽnh kaprỳ. ⁶ No pa na ixte ja hã amnhĩ pumunh mex. Ixpê Jejus kwỳ na pa. Ra ixkamã hkrĩ nẽ ixkôt pa ho pa jakamã ixpê hkwỳ na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwỳ hã amnhĩ jarẽnh kaprỳ hkêt nẽ.

⁷ Nẽ na pa hte mẽ ato tanhmã Tĩrtũm wỳr to ho ri ixpa nẽ mẽ ato hwỳr o:

–Pa Tĩrtũm. Kwa tanhmã Korīt nhõ xwỳnhjê hkrã hto kê mẽ tanhmã amnhĩ tomnuj to ho pa hkêt nẽ.

Anhỹr o mẽ ato kuwỳ. Mẽmo kaxyw na pa hte ã mẽ ato hwỳr anẽ? Ixte mẽ ajahkre mex ã amnhĩ to amnhĩrĩt kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhỹr o ri apa hãmri nhũm axtem mēhō mẽ awỳr mōn pōj nẽ tanhmã mẽ amã mẽ ijarẽnh to nẽ mẽ ijarẽnh o:

–Kwa Pawre mẽ hkwỳjaja na htem Tĩrtũm kapêr kwỳm ri Korīt nhõ xwỳnhjê jahkre ho pa.

Anhỹr tã pa amnhĩ tã mẽ kuma nẽ ãm mẽ kuma. ⁸ Na pa hte Tĩrtũm kapêr kutã amnhĩ xunhwỳr kêt nẽ. Na pa hte ãm mẽ ate hkôt amnhĩ nhĩpêx o ri apa hã mẽ amã karō kamã ixihtỳx rãhã ho ri mẽ akôt ixpa. ⁹ Jakamã kot kaj mẽ hkôt amnhĩ nhĩpêx mex o apa pa ja hã mẽ apumu nẽ ixkĩnh nẽ. Mẽ kot axpẽn mã ixirerek ã ijarẽnh o pa htãã. ã mẽ ate amnhĩ nhĩpêx anhỹr o apa kaxyw na pa hte mẽ ato Tĩrtũm wỳr o ri ixpa nẽ kãm:

–Pa Tĩrtũm. Kwa tanhmã Korīt nhõ xwỳnhjê hkrã hto kê mẽ kot amnhĩ tomnuj kaga hpa nẽ hpãnhã akapêr kôt pix mã mãn amnhĩ nhĩpêx rãhã nẽ. Anẽ.

¹⁰ Tã pa kormã mẽ awỳr inhmōr xwỳj ri ã amnhĩ kukamã kagã nhĩpêx nẽ mēnh anẽ. Mẽ ate kamã harẽnh nẽ mar nẽ tokyx akupỳm tãm amnhĩ nhĩpêx kaxyw. Kot pa mẽ awỳr mō nẽ Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêr anhỹr prãm kêt. ãm y hã kapêr o mẽ ajahkre mex nhũm mẽ ate inhmar nẽ hkôt amnhĩ nhĩpêx rãhã ho apaja na inhmã hprãm.

¹¹ E Kris kôt ixkwỳjaja. ãm ja pix. Kwa kêr ka mẽ ixkapêr mar tỳx nẽ hkôt amnhĩ nhĩpêx mex nẽ. Nẽ Tĩrtũm kôt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpẽn kôt ajamakêtkati nẽ akĩnh nẽ axãmnhĩx ri apa. Kot kaj mẽ ã amnhĩ nhĩpêx anhỹr o apa nhũm Tĩrtũm mẽ akôt pa ho pa. Kãm mẽ pajapê htỳx kumrêx. Kêp mẽ pamã mẽ pahkĩnh nẽ mẽ pajamakêtkati jagjênh xwỳnh.

12-14 Nē ota jar Kris kôt mē pahkwỳjaja pa mē ixpimràatā mē awỳr ixpēr mē. Mē ixpiitā mē inhmā mē akīnh tỳx jakamā na pa mē awỳr ixpēr mē.

Nē kê Pahihti Jejus Kris mēmoj to mē akutā nojarêt rāhā ho pa. Nhũm Tirtũm arĩ kām mē ajapê rāhā ho pa. Nhũm Karõ tanhmā mē akrā hto ka mē axpēn to mex pix kukamā mǎn ajamaxpēr o apa.

Tā e ixkwỳjaja. Ām ja pix. Ixpê Pawre na pa mē awỳr kagàja nhĩpêx nē ã mēnh anē.

Karatas Pawre kot Karatas kamã Jejus kôt hkwyjê hwÿr kagã nê mēnh

Pawre na pre kagãja nhîpêx nê pika pē Karatas kamã Kris kwÿjê hwÿr kumē. Na pre ra Ijaew kwÿjaja mē hwÿr mra nê Tirtūm kapēr kwÿm ri mē ahkre ho pa nê mē kām:

—Kot kaj mē amnhî kaxyw Jejus Kris kôt ajamaxpēr hāmri nê määnēn mē ixpē Ijaew nhîgēt kot amnhî nhîpêx kôt amnhî nhîpêx. Kê Tirtūm ja hã mē apumu nê mē ato hkra. Anē.

Nom ã mē kapēr anhÿrja kot anhÿr kêt. Mē pahte amnhî kaxyw Jejus Kris kôt pajamaxpēr nê hkôt amnhî xunhwÿr pix ã mē pahpumunh kôt na hte Tirtūm mē pahto hkra. Tã nhūm prem ã mē kām ho hêx anhÿr o pa nhūm Pawre tee ri ã mē kapēr anhÿrja ã mē harēnh ma nhūm ja kēp omnuij nê. Jakamã nhūm Karatas nhõ xwÿnhjê mã kagãja nhîpêx nê mē hwÿr kumē. Nê kamã hprî hã Tirtūm kot mē ho hkra kaxyw tanhmã amnhî nhîpêx to hã mē kām harē nê hã kagã. Nê mē kām:

¹⁻² Pa Karatas nhõ xwÿnhjaja? Xà mē amex? Ixpē Pawre na pa mē awÿr ixpēr mē nê mēmoj tã mē amã karõ.

Mēpahpãm Tirtūm mē Jejus Kris na pre wa mē akaxyw ixãm. Ixte wa ÿ hã ma ri mē akôt mē ajahkre o ri ixpa kaxyw. Na pre Jejus ty nhūm Tirtūm akupÿm ho htîr. Hāmri nhūm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtūm mē Jejus Kris na pre wa ixãm. Jakamã na pa ã mē awÿr kagã nhîpêx nê mēnh anē. Mē apē Tirtūm krajê hwÿr.

Nê ota jar krî ja kamã ixpyrà nê Kris kôt mē pahkwÿjaja mē awÿr hpēr mē.

³ E kê Mēpahpãm Tirtūm mē Pahihti Jejus Kris wa mēmoj to mē akutã nojarêt rãhã ho pa. Nê mē ato mex rãhã nê. Ka mē wa ÿ hã akînh nê ajamakêtkati nê axàmnhîx ri apa.

⁴ Nà na pre Krisja amnhî grõnh kôt mē pahwÿr wrÿ nê mē panê ty. Mē pahte amnhî tomnuj pãnhã amnhîrer kaxyw mē panê ty. Mēpahpãm Tirtūm kãm hprãm xà

hkôt. Tã mēmo kaxyw na pre ã mē panê amnhî nhîpêx anē? Nà pika ja kamã mē kot amnhî nhîpêxja omnuij tÿx jakamã nhūm amnhî grõnh kôt te mē kot amnhî tomnuj pē mē papytâr pyræk o mē panhîpêx nê ã mē panê htyk anē. ⁵ Jakamã kwa kêr pu mē Tirtūm mã mex o mex ã mãn harēnh o ri papa. Nà kot puj mē ã amnhî nhîpêx anhÿr rãhã ho ri papa.

Mē ujarēnh pixi ãm hāmri hã harēnh

Rõmãn 16.17; Sikũn Korît 11.3-4; Epes 4.14; Korosē 2.8; Sikũn Pêtre 2.1-3

⁶ Kwa ixkràmnhwÿjaja. Na pa pre mē ate tanhmã amnhî nhîpêx to hã mē ajarēnh ma nê ixkaprî nê tee ri mē akukamã ijamaxpēr. Na pre Tirtūmja Kris kukwak ri mē ato mex nê. Nê mē ate hkôt amnhî nhîpêx o apa hprãm xàj te kot amnhî wÿr mē awÿr pyræk o mē anhîpêx ka mē hkôt amnhî xunhwÿ. Tã xep tanhmã mē ajamaxpēr to nê ra hkaga kaxyw. Ra axtem mē ujarēnh õja ma nê gryk ã Tirtūm kaga kaxyw. Pa tee ri mē ajarēnh ma nê ixkaprî nê. Kwa mon ka mē axtem nê ri ã amnhî nhîpêx anhÿr mã? ⁷ Jejus jarēnh pix na ãm hāmri. Mo mē ujarēnh mex õ kot ka kêt mē ama nê hkôt amnhî nhîpêx? Nà amrakati kumrêx. Æ mē amã ujarēnh anhÿr xwÿnhjaja na htem Kris kapēr o pihkâr rûnh kumrêx o pa nê katât kôt harēnh kêt nê. Ka xep mē ama nê ajamaxpēr kati rûnh nê.

⁸ Na pa pre ma mē awÿr mō nê ãm hāmri mē amã Jejus kot tanhmã mē panê amnhî nhîpêx to hã harē ka prem inhma. Tã koja mēhõ mē awÿr mō nê mē amã nhãm mē ujarēnh õ jarē nhūm Tirtūm ja hã omu nê nhÿrmã ma mē kot amnhî xà htÿx kamã hamak tūm xà hwÿr kumē nhūm ma hwÿr mō nê aa kator kêt nê. Mē pahtõ rÿ Tirtūm kapēr o wrÿk xwÿnhjê hõ koja ã amnhî nhîpêx anē nhūm ja hã omu nê ma kuwy pē himõta wÿr amnhî nê kumē. ⁹ E kot paj axte mē amã ja jarē ka mē aprî hã inhma. Koja mēhõ mē awÿr mō nê mē ate hkôt amnhî xunhwÿr xwÿnhhta kwÿm ri tanhmã mē amã ujarēnh to. Hã koja Tirtūm omu nê nhÿrmã ma mē kot amnhî xà htÿx kamã hamak tūm xà hwÿr kumē nhūm ma hwÿr mō nê kamã pa ho pa nê aa kator kêt kumrêx.

Tirtüm pix kãm Pawre hkĩnh hprãm ã kot jarẽnh

Juãw 5.44; Atre 26.9-20; Karatas 2.6

¹⁰ Nẽ koja mẽmojaja ixkapër ma nẽ kãm mar prãm kêt o kãm ixkĩnh kêt japêr nẽ mãmrĩ kãm ixkĩnh kêt. Tirtüm kãm ixkĩnhja pix na inhmã hprãm. Kop apu mẽ piitã kãm ixkĩnhja mãn inhmã hprãm ronhỹx pa Kris nhỹ hã kapër jarẽnh o ri ixpa hkêt nẽ.

Tirtüm kot Pawre mã Kra Jesus o amnhĩrĩt ã harẽnh

Sikũn Korĩt 1.12; Wam Tesarõn 2.4

¹¹⁻¹² E Jesus kôt ixkrãmnhwýjaja. Nã ixte mẽ ujarẽnh mex jarẽnh o ixpaja na pre jar pika ja kamã mẽhõ amnhĩ krã hkôt inhmã harẽnh rý inhmã ahkre hkêt nẽ. Jesus Kris tãm na pre ixwýr kato nẽ inhmã ho amnhĩrĩt. Jakamã mex o kot pika jakamã mẽ ujarẽnh piitã hakrenh par. ¹³⁻¹⁵ E kot paj ixprĩ hã mẽ amã tanhmã amnhĩ jarẽnh to ka mẽ inhma. Tanhmã Tirtüm kot amnhĩ kaxyw ixãm to hã pa mẽ amã amnhĩ jarẽ. Nã na pre kormã ixkêt ri ixkukamã hamaxpër nẽ amnhĩm ixta nẽ amnhĩ kaxyw ixãm nẽ kot ixto mex ã ixtã amnhĩ jarẽ. Tã pa pre ixkato nẽ gaa nẽ ixãptar nom kormã Jesus Kris kôt amnhĩ xãm kêt nẽ. Na pa pre axtem nẽ inhmã mẽ ixpê Ijaew kot amnhĩ nhĩpêx kôt pix mã amnhĩ nhĩpêx o ri ixpa hprãm nẽ. Nhũm pre ixpyrà nẽ arĩ mẽ nywjaja haxwýja kãm mẽ hkôt pix mã ri amnhĩ nhĩpêx o pa hprãm nẽ. No inhmã mẽ hkôt amnhĩ nhĩpêx mex o mẽ hakrenh par prãm jakamã na pa pre mẽ inhĩgêt kôt amnhĩ nhĩpêx mex kumrêx o ri ixpa. Mẽ kapër piitãã hkôt amnhĩ nhĩpêx mex nẽ. Tã ã amnhĩ nhĩpêx anhỹr o ixpa kaprý. Na pa pre axtem nẽ mẽ kot Tirtüm Kra Jesus Kris kôt amnhĩ xunhwýr xwýnhjê nhĩpêx kati ho ri mẽ hkôt ixpa nẽ inhmã mẽ himex prãm týx kumrêx. ã na pa pre amnhĩ nhĩpêx anhỹr o ri ixpa. Ra mẽ ate ja hã ixpumunh mex.

¹⁶⁻¹⁷ Tã pa pre ma Tamas wýr mõi. Kamã tanhmã Kris kwýjê nhĩpêx to kaxyw ma mẽ hwýr mõi. Hãmri nẽ kormã mẽ hwýr ixãhtêp o inhmõr mẽ nhũm Tirtüm tanhmã ixto nẽ inhmã Kra Jesus o amnhĩrĩt pa jatã omu. Kêp Tirtüm Kra hã pa ixprĩ hã omu. Nhũm inhmã kapër nẽ ixte kãm tanhmã amnhĩ

nhĩpêx to ho ri ixpa kaxyw ixãpênh ã inhmã karõ nẽ Ijaew kêt xwýnhjê hwýr inhmẽ. Ixkwý Ijaew wýr inhmẽnh kêt nẽ. Na pre inhmã:

—E kêr ka ma Ijaew kêt xwýnhjê hkôt ri mẽ kãm ixkapër jarẽnh o ri apa.

Anhỹr jakamã pa pre kuma nẽ hkôt amnhĩ xãm kurê kumrêx nẽ ã amnhĩ nhĩpêx anhỹr o ri ixpa. Jao tanhmã ixte kêp hkwyjê nhĩpêx tota kaga nẽ ma pyka pê Arap wýr mõi. Nom tanhmã amnhĩ tã Jesus kwýjê kukjêr to hkêt nẽ. Nẽ Jerujarê hwýr inhmõr nẽ Jesus nhỹ hã mẽ ahkre xwýnh maatijaja tanhmã amnhĩ tã mẽ kukjêr to hkêt nẽ. ãm Tirtüm kot inhmã hã karõ xã hkôt ma Arap wýr mõi nẽ kamã kapôt ã ri ixpa. Kamã na pre Tirtümja inhmã Jesus Kris kot tanhmã amnhĩ nhĩpêx to ho amnhĩrĩt o pa. Hãmri nẽ inhmã kapër pa amnhĩ tã kuma hãmri nẽ ma akupým Tamas wýr mõi.

¹⁸ Tã nhũm ra amgrã axkrunêpxi nẽ hapêx pa Tamas rũm ixkato nẽ ma Jerujarê hwýr Simãw Pêtre hwýr mõi. Hãmri nẽ kuri pøj nẽ hkôt ixpikamẽnh ã ixtã semãn axkrut. ¹⁹ Nom mẽ kot Jesus nhỹ hã hkwyjê jahkre ho mẽ pa xwýnh maati hkwyjê hõ pumunh kêt kumrêx. ãm Simãw Pêtre mẽ Pahihti Jesus tõi Xiakreja pix wa omu. ²⁰ ãm hãmri na pa ã amnhĩ jarẽnh anẽ. Tirtüm kot ja hã ixpumunh mex. ²¹ Tã pa pre mẽ kurũm ixkato nẽ hpãnhã ma pika hkwyjê hkôt ijapõx o mẽ hkôt ixpa. Ma pika pê Sir mẽ Sirisja wa hwýr mõi.

Mẽ kot amnhĩ jaêr pê Pawre kot amnhĩ nhĩpêx nyw ã omunh ã mẽ harẽnh

²² Nom Jutej kamã Kris kwýjaja na prem kormã ixpumunh kêt nẽ. ãm Simãw Pêtre mẽ Xiakre pix na pre wa ixpumu. ²³ Na pre ra mẽ hkwyjaja tanhmã hkwyjê kot axpên mã ijarẽnh toja ma. Na prem ijarẽnh o:

—Kwa Jesus ã mẽ panhĩpêx kati htýx o pa xwýnhãta na pre tanhmã hamaxpër to nẽ hpãnhã mẽ kãm Jesus kapër jarẽnh o ri mẽ hkôt pa. Mẽ kot amnhĩ kaxyw hkôt hamaxpër kaxyw. Ra kot Jesus nẽ mẽ pahkurê htã hpãnhã mẽ kãm kapër jarẽnh o ri mẽ hkôt pa. Anẽ.

²⁴Hāmri nhūm Kris kwỳjaja amnhĩ jaêr pè jarēnh ma nē inhỹ hã hkĩnh nē. Nē ixtã Tĩrtũm mã mex o mex ã harē.

2

Pawre kot Kris kwỳ hkrãhtũmjê mã amnhĩjarēnh

Atre 15.1-11

¹⁻²Tã nhūm amgrà pè 14 nē hapêx nhūm Tĩrtũm akupỹm Jerujarē hwỳr inhmē pa ma akupỹm mō. Panãpe nē Xitre mē pa mē mō nē mē hwỳr pōj. Hāmri nē Kris kwỳ hkrãhtũmjê hwỳr mra nē mē kãm amnhĩ jarē. Mē tapxipixjê mã amnhĩ jarē nē ixte Ijaew kêt xwỳnhjê mã Jejus kapêr jarēnh o ixpa hã amnhĩ jarē. Na pa pre ra amnhĩ kukamã ijamaxpêr o:

—Koonēn. Kot pa apu mē kãm amnhĩ jarē nhūm mē inhma nē ixte Tĩrtũm kapêr kwỳm ri mē ahkre ho ixpa hã ixkamnhĩx rỳ hã inhmã akir. Na pa hte Ijaew kêt xwỳnhjê mã Kris jarēnh o ixpa no ãm mē ixpê Ijaew pyrã nē finat Mojes kapêr kêt mē kot amnhĩ my kwỳrýt kà jakàr ã mē kãm karō hkêt nē. ãm mē kot Kris kêt amnhĩ xunhwỳr pix kaxyw na pa hte mē kãm hã karō ho ixpa. Tã kot paj Kris kêt mē ixkrãhtũmjê mã ja hã amnhĩ jarē nhūm mē inhma nē tanhmã hamaxpêr to nhūm ja mē kêp omnuj japêr nhūm mē tanhmã amnhĩ to nē ixte Kris kapêr jarēnh o ixpaja nē ixkurê. Jakamã nhūm ra ixte mē kãm Kris kapêr jarēnh o ixpa nhūm mē kot inhmar xwỳnhjaja ijarēnh ma nē tee amnhĩ kukamã hamaxpêr o ra hkaprĩ nē pa.

Anhỹr o ijamaxpêr. ³Tã na prem ixte amnhĩ jarēnhja ma nē ja nē tanhmã inhmã nē hkêt nē. Pa mē kãm amnhĩ jarēnh pa nhūm mē inhma nhūm Ijaew kêt xwỳnhjaja kot amnhĩ jakàr kêtja nhūm mē kãm mex nē. Mē kêp tanhmã kute hkêt nē. Nhūm Ijaew kêt xwỳnh Xitre ixkôt pa nhūm mē kot omunh tã kot mē ixpyrà nē amnhĩ my kwỳrýt kà krãhyr ã kãm karō hkêt nē.

⁴Tã nhūm mē kêp Jejus kwỳ hã amnhĩ jarēnh o hêx xwỳnhjaja mē ixtã akuprō. Nom hêx rom mē ixte Kris kêt amnhĩ nhĩpêx ã mē ixpumunh pix kaxyw. Hāmri nē ixkapêr ma nē Xitre hã inhmã akir nē inhmã:

—Kwa na pre Xitre Jejus kêt pix mã amnhĩ xãm nom finat Mojes kot mē pahpê Ijaew kot amnhĩ nhĩpêx ã karō hkôt amnhĩ nhĩpêx kêt nē. Kwa ja mex kêt. Na htem Jejus kêt amnhĩ xunhwỳ nē mãänēn finat Mojes kapêr kêt amnhĩ nhĩpêx. Jakamã kwa kãm anē kêt amnhĩ my kwỳrýt kà krãhta. Finat Mojes kot mē panhĩgêjtjê mã hã karō xà hkôt.

⁵Anhỹr tã pa prem mē kuma nē ãm mē kuma. Kot pa ri mē kãm ja hã karō hkêt nē. ãm Jejus kapêr kêt pix mã kot puj mē amnhĩ nhĩpêx o papa nē finat Mojes kapêr mē Jejus kapêr o papihkàr kêt nē. Kot puj mē anhỹr o Jejus kapêr o ahkà nhūm ja mex kêt nē. Jejus kapêr kãm mo mē kot mēmy kwỳrýt kà jakàr ã mē kãm karō? Amrakati. Jakamã na pa pre ãm mē pano kupyw o mē pa xwỳnhtajê kapêr ma nē ãm mē kuma.

⁶Tã pa pre ra Ijaew kwỳ pè Jejus kêt ixkwỳ hkrãhtũmjê mã amnhĩ jarēnh pa. Tanhmã ixte Ijaew kêt xwỳnhjê mã Jejus kapêr jarēnh to hã mē kãm amnhĩ jarē nhūm mē inhma nhūm ja mē kãm mex nē. Jakamã Ijaew kêt xwỳnhjaja kot mē ixpê Ijaew pyrã nē finat Mojes kapêr kêt amnhĩ nhĩpêxja nhūm mē tanhmã mē kaxyw inhmã hã karō hto hkêt nē. Tĩrtũm na hte mē kêp mē hkrãhtũm ã mē omunh xà hkôt mē hkwỳjê rom tanhmã mē ho mex to hkêt nē. Na hte mē pahpiitã mē panhĩpêx o axpên pyrãk. Jakamã na pa hte ijaxwỳja Jejus kêt mē ixkrãhtũmjaja kot amnhĩ to rax o ijakrenh ã tanhmã ijamaxpêr to hkêt nē. ⁷Na pa pre mē kãm amnhĩ jarēnh pa nhūm mē inhma nē axpên mã:

—Nà ãm hāmri na pre Tĩrtũm ahpỹnhã Pawre mē Simãw Pêtre wa kãm wa àpênh ã karō nē Ijaewjê hwỳr Simãw Pêtre mē nē axtem Ijaew kêt xwỳnhjê hwỳr Pawre mē. Wa kot ahpỹnhã mē hkôt mē kãm Jejus kapêr jarēnh o ri pa kaxyw. Nà ãm hāmri na hte wa ã amnhĩ nhĩpêx anhỹr o pa. Nà ja mex. Anē.

⁸Ra Tĩrtũm kot Ijaew wỳr Simãw Pêtre mēnh tã hpãnhã Ijaew kêt xwỳnhjê kaxyw pa ixãm. ŷ hã wa ixte mē kãm Jejus kapêr jarēnh o ri mē hkôt wa ixpa kaxyw. ⁹Jakamã nhūm mē ixkrãhtũm Xiakre mē Simãw Pêtre mē Juãwja ixte mē kãm amnhĩ

jarēnh ma nē hkīnh nē. Tīrtūm kot ixto mex nē Ijaew kêt xwýnhjê hwýr inhmēnh ā ixte amnhī jarēnhja ma nē hkīnh nē. Hāmri nē Panāpe mē wa inhmā kapēr nē wa inhmā:

—Nà ām hāmri. Kot puj xep mē anē. Ka mē Panāpe wa kot kaj wa ma Ijaew kêt xwýnhjê hkôt mē kām Jejus kapēr jarēnh o ri apa. No mē pajaja kot paj mē axtem mē pahkwý Ijaew kôt harēnh o ri ixpa. Ā kot puj mē ahpýnhā mē hwýr papa anē.¹⁰ Nom kêr ka wa inhmar kumrēx. Kêr ka wa mē ixpyrà nē Kris kôt mē pahkwýjê pē amrakati xwýnhjê ho mex o ri apa. Mēmoj to mē kutā anojarēt rāhā ho ri apa.

Anhýr o wa inhmā kapēr pa wa mē kuma nē mē kām:

—Tôe. Nà kot paj wa anē. Ra ā wa ixte amnhī nhīpêx anhýr kaxyw kênā. Anē.

Pawre kot Simāw Pêtre mā àkjêr ā harēnh Atre 10; Rōmān 3.21-31, 6.1-14

¹¹⁻¹⁴ Tā nhūm Simāw Pêtreja man mē ixwýr krī pē āxiok wýr mō. Nē jar mē ixkôt ri pa. Ixpyrà nē kēp Ijaew tā Kris kôt Ijaew kêt xwýnhjê hkôt pa nē mē kutā apkur o pa. Ixpyrà nē amnhīx ri mē kutā apkur o ri mē hkôt pa. Ijaew kêt xwýnhjaja kot amnhī my kwýrýt kà jakàr kêt jakamā na pa htem mē kutā ixàpkur kêt nē. Tā ra mē ixte Kris kôt amnhī xunhwýr jakamā ja mē ixpê tanhmā kute hkêt. Na pa htem ixàmnhīx mē hkôt ixpa nē mē kutā apku. Ra mē ixte Kris kôt amnhī xunhwýr kênā kot pa hkêt ri mē hkôt ixpa hkêt. Na pa htem ixàmnhīx mē hkôt tanhmā amnhī nhīpêx to ho ri ixpa.

Tā nhūm Xiakre kot mē ixwýr mē rēnh xwýnhjaja haxwýja mē ixwýr mō. Mē ixpyrà nē mē kēp Ijaew tā mē ixpyrà nē Kris kôt amnhī xunhwý. Jakamā ra mō nē mē ixwýr pōj. Hāmri nhūm Simāw Pêtre mē omu nē mē umaj axte Ijaew kêt xwýnhjê kutā apkur kêt nē. Axtem nē ōja py nē o tē nē mē hkàx ā ahte apkur o nhý. Hāmri nhūm ra mē ixri Ijaew kwý pē Kris kôt mē pahkwýjaja ja hā omu nē piitā uràk nē ā amnhī nhīpêx anē nē Simāw Pêtre ri Ijaew kêt xwýnhjê hkàx ā apkur o hkrī. Nhūm ixkôt pa xwýnh Panāpeja haxwýja ja hā mē omu nē mē uràk nē ā amnhī nhīpêx anē nē mē hkàx ā apku. Hāmri pa tee ri ja hā

mē omu nhūm ja inhmā mex kêt nē. Na prem ā amnhī nhīpêx anhýr o Tīrtūm kapēr ā kagà htūm kamā mē ujarēnh mex kwým ri amnhī nhīpêx. Jakamā pa ā mē kot amnhī nhīpêx anhýrja nē Simāw Pêtre mā ixkapēr. Mē piitā mē noo mā xa nē ā kot amnhī nhīpêx anhýrja nē kām ixkapēr nē kām:

—Tk. Kwa nà Simāw Pêtre. Ri ā amnhī nhīpêx anhýr kêt nē. Pahpê Ijaew tā kormā pahkwýjaja hpôx kêt ri ka hte ixpyrà nē axàmnhīx Ijaew kêt xwýnhjê kutā axàpkur o ri apa. Tā amnhī wýr mē pahkwýjê pumu nē axtem nē mē hkàx ā axàpkur o akrī. Kwa nà na ka ā amnhī nhīpêx anē nē ra axtem amnhī nhīpêx. Te ate mē kām akapēr nē mē kām: “Kot kaj mē ixpyrà nē amnhī my kwýrýt kà jakà pa rī mē akôt ri ixpa nē mē akutā ixàpkur o ixpa.” Anhýr pyrāk. Kwa ja mex kêt.

¹⁵ —Mē pahpê Ijaew na pu htem mē kēp Ijaew kêt xwýnhjê jarēnh o: “Mē kot mē pahte amnhī nhīpêx kôt amnhī nhīpêx kêt xwýnhjaja.” Anē. ¹⁶ Tā mē pahpê Ijaew tā na hte Tīrtūmja mē pahte mē panhīgêt kot amnhī nhīpêx kôt mē pahte amnhī nhīpêx ā mē pahpumunh kôt mē pahto hkra hkêt nē. Ra mē pahte ja pumunh mex. Ām mē pahte amnhī kaxyw Jejus Kris kôt pajamxpēr ā mē pahpumunh kôt pix mā na hte mē pahto hkra. Kot pu mē amnhī kaxyw hkôt pajamxpēr nhūm ja hā mē pahpumunh kôt pix mā mē pahto hkra.

¹⁷ —Mē pahpê Kris kwý jakamā na hte Tīrtūm amnhīm mē pamex ā mē pajarē nē mē pahte amnhī tomnuj xwýnh kêt ā mē pajarē. Jakamā na pu htem paxàmnhīx ri Ijaew kêt xwýnhjê kot Kris kôt amnhī xunhwýr xwýnhjê hkôt ri papa ho papa. Ra Tīrtūm kot mē pahpyrà nē amnhīm mē mex ā mē harēnh kênā. Tā koja mēhō kormā ja mar kêt nē tanhmā hā mē pajarēnh to nē mē pajarēnh o: “Tk. Ra mē kot amnhī kaxyw Kris kôt hamaxpēr tā axtem nē Ijaew kêt xwýnhjê hkôt ri pa. Jakamā arī mē kot amnhī tomnuj xwýnh kênā.” Anhýr o mē pajarēnh japēr. Nom ām mē pahte amnhī tomnuj xwýnh ā mē pajarēnh kaprý. Na pu htem Kris kôt amnhī nhīpêx nē ra tām amnhī nhīpêx mex o papa. ¹⁸ No kot pu mē hkôt ri amnhī nhīpêx o papa

htã tanhmã pajamxpër to nê pahte amnhĩ nhĩpêx tũm o awjanã hãmri nê amnhĩ tomnuj tỳx kumrêx.

19 –Tã tanhmã kot puj wem amnhĩ to nê mẽ panhĩgêt kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamxpër o: “Kot paj ã amnhĩ nhĩpêx anê nê ã amnhĩ nhĩpêx anê nhũm Tĩrtũm ja hã ixpumu nê amnhĩm inhmex ã ijarê.” Anhỹr o pajamxpër. Hãmri nê finat Mojes kot mẽ panhĩgêjtjê mã kapër piitã hkôt ri mnhi nhĩpêx o papa nom tũhã hkwỳm ri tanhmã amnhĩ tomnuj to. Jakamã nhũm Tĩrtũm ja hã mẽ pahpumunh kôt mẽ pamex ã mẽ pajarênh kêt nê. Kapër ã kagã htũm kot ã ja jarênh kot anhỹr. Nom kot puj mẽ amnhĩ kaxyw Kris kôt pajamxpër nhũm ja hã mẽ pahpumunh kôt amnhĩm mẽ pamex ã mẽ pajarê. Hãmri pu mẽ Tĩrtũm kôt amnhĩ nhĩpêx o ri papa nê axte mẽ pahpê Ijaew nhĩgêjtjê kot amnhĩ nhĩpêx kôt amnhĩ nhĩpêx hkêt nê. Te ra mẽ pahtyk nê axte hkôt amnhĩ nhĩpêx kêt pyrã nê pãnhã Tĩrtũm kapër kôt pix mã ri amnhĩ nhĩpêx o ri papa.

20 –Nê na prem pĩ kahpa hã Kris nhô nê kupĩ nhũm mẽ pahte amnhĩ tomnuj te ãhkô hã jêt nê haxwỳja htyk pyrãk. Jakamã na pu htem amnhĩ tomnuj kaga nê Kris kôt amnhĩ xunhwỳ nhũm Karõ mẽ pahkarõm agjê pu mẽ te Jesus Kris kot amnhĩ nhĩpêx pyrãk o amnhĩ nhĩpêx o papa. Jao hpãnhã mẽ pahte amnhĩ nhĩpêx nyw pix o amnhĩ nhĩpêx o ri papa. Kris kãm hprãm xã hkôt pix mã tanhmã ri amnhĩ nhĩpêx to ho papa. Kris kêp Tĩrtũm Kra htã kãm mẽ pajapê kamã mẽ panê htyk jakamã na pu htem amnhĩ kaxyw kôt pix mã pajamxpër rãhã ho papa.

21 –Ãm hãmri na pre Tĩrtũm mẽ pahto mex kumrêx nê mẽ pahwỳr Krisja mẽ nhũm mẽ pahwỳr wrỳ nê mẽ panê ty. Tã na pa pre kapërja ma nê mar tỳx nê hã ri ixpa nê ho ijamakêtkati hkêt nê. Tã kop apu Tĩrtũm kot mẽ pahte mẽ panhĩgêjtjê kot amnhĩ nhĩpêx o amnhĩ nhĩpêx ã mẽ pahpumunh kôt mẽ pamex ã mẽ pajarênh ronhỹx pre Krisja ãm mẽ panê htyk kaprỳ. Mo kaxyw nhỹx pre mẽ panê ty? Anê.

Ã na pa Simãw Pêtre mã ixkapër anê nhũm mẽ piitã apkur pê hã inhmar o hkrĩ.

3

Mẽ pahte amnhĩ krã hkôt pahpê Tĩrtũm kra hkêt ã mẽ pajarênh

Karatas 5.16-23; Epes 2.8; Piripos 3.9; Sikũn Ximotre 1.9; Xitre 3.4-7

1 Kwa Karatas nhõ xwỳnhjaja. Te ri mẽ ajamxpër kêt kumrêx pyrãk. Amnepê mã mẽ awỳr inhmõrta ã na pa pre mẽ amã tanhmã Kris htykja jarênh to. Pĩ kahpa hã mẽ panê htyk ã harê ka mẽ aprĩ hã inhma. Tã nhũm Tĩrtũm kapër jarênh o mẽ hêx xwỳnhjaja ixpãnhã mẽ awỳr mra nê tanhmã mẽ amã ujarênh to ka mẽ ama nê mẽ ajamxpër o apihkàr rax nê. Jao axte Kris tyk mã ajamxpër kêt nê. 2 E mẽ inhmã mẽmoj jarê. Mẽmoj tã mẽ apumunh kôt na pre Tĩrtũm mẽ awỳr amnhĩ Karõ rê nhũm mẽ awỳr agjê? Xã mẽ anhĩgêt kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt? Nã na pre ja hã mẽ apumunh kôt mẽ awỳr rênh kêt nê. Na ka prem Kris jarênh ma nê amnhĩ kaxyw hkôt ajamxpër nhũm ja hã mẽ apumunh kôt mẽ awỳr kurê nhũm mẽ awỳr agjê.

3 Na pu htem amnhĩ krã hkôt tanhmã amnhĩ nhĩpêx to ho pahpê Tĩrtũm kra hkêt nê. Tĩrtũm Karõ pix kukwak ri na pu htem pahpê hkra. Tã ka mẽ axtem nê ajamxpër o:

–Nã Tĩrtũm ra kot ixto hkra jakamã kot paj arĩ ri mẽ inhĩgêt kot amnhĩ nhĩpêx kôt amnhĩ nhĩpêx o ixpa rãhã nê inhmex kumrêx nê ri ixpa. Anê.

Kwa ã mẽ ajamxpër anhỹrja mex kêt. 4 Mẽ akwỳ kot Kris ã mẽ atomnuj tã ka mẽ amnhĩ xã htỳx kamã ajamak o ri apa htã Kris kaga hkêt nê. Tã ra axtem nê mẽ kapër o mẽ hêx xwỳnhjê jamaxpër kôt ajamxpër o te Kris ã amnhĩ xã kamã ajamak kaprỳ pyrãk. Kwa nã mẽ ri mẽ hkôt ajamxpër kêt nê. 5 Na pre Tĩrtũm mẽ awỳr amnhĩ Karõ rê nhũm mẽ awỳr agjê nê mẽ amã aa mẽ ate mẽmoj pumunh kêt kwỳ ho anhỹr o ri mẽ akamã pa ho pa. Xã mẽ anhĩgêt kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt na pre ã mẽ amã amnhĩ nhĩpêx anê? Nã ja kôt kêt. Ãm mẽ ate

Kris kapër mar nê amnhî kaxyw hkôt ajamaxpër ã mē apumunh kôt pix mã na pre ã mē amã amnhî nhîpêx anê.

Tirtûm kot amnhî tâ finat Apraãw pumunh kôt mex ã harênh

Rômãn 4.1-25; Xiakre 2.23

⁶ Nê mē ixpê Ijaew pâr krax finat Apraãw na pre amnhî kaxyw Tirtûm kôt hamaxpër nhûm amnhî tâ omu nê kãm:

Nà ate amnhî kaxyw inhmã ajamaxpër tỳx jakamã na pa amnhîm amex ã ajarê.

Amex kumrêx Apraãw.

⁷ Anhÿr o kãm kapër jakamã mē pahte urak nê amnhî kaxyw hkôt pajamaxpër xwÿnhjaja te mē pahpê Apraãw tãmnhwÿ pyrak.

⁸ Nê mē apê Ijaew kêt xwÿnhjaja. Na hte Tirtûm mē pahto hpimrãk tâ mē pahte amnhî kaxyw kãm pajamaxpër ã mē pahpumunh kôt amnhîm mē pamex ã mē pajarê nê mē pahto hkra. Amnepêm na pre Apraãw mã kapër nê kãm:

E ate amnhî kaxyw ixkôt ajamaxpër jakamã kot paj akukwak ri pyka piitã hkôt mē piitã mē ho mex nê.

Anhÿr o kãm kapër jao mããnên mē apê Ijaew kêt xwÿnhjê jarê. ⁹ Jakamã mē pahte Apraãw pyrã nê amnhî kaxyw Tirtûm kôt pajamaxpër xwÿnhjaja kot puj mē pahpiitã urak nê pamex kumrêx nê papa ho papa.

Tanhmã Tirtûm kot mē panê pĩ kahpa hã jêt xwÿnh nhîpêx to hã harênh

Rômãn 4.14, 7.10; Wam Korĩt 15.56

¹⁰ Nê koja mēhõ hamaxpër o:

—E kot paj finat Mojes kapër kôt ri amnhî nhîpêx o ri ixpa nhûm Tirtûm ja hã ixpumu nê amnhîm inhmex ã ijarê nê ixto hkra. Anê.

No ãm ja kot anhÿr kêt. Tirtûm kapër ã kagã htûm kot ja jarênh kot:

Ixte amnhîm mē mex ã mē harênh kaxyw mē kot Mojes kapër kôt amnhî nhîpêx xwÿnhjaja koja mē ãm mēmoj pixire nê hirõp kuhê. Rÿ mēmoj pixire nê hkôt amnhî nhîpêx kêt pa ja hã mē omu nê hã mē homnuj tỳx kumrêx.

Anhÿr jakamã tanhmã kot pu mē amnhî to nê Mojes kapër piitã hkôt amnhî nhîpêx nê aa ho pixi nê hirõp pakuhe hkêt? Nà kot puj mē ho anhÿr kêt nê. Kot puj mē tee ri pamã

ja ho anhÿr prãm kaprÿ. Jakamã Tirtûm kot amnhîm mē mex ã mē harênh kaxyw mē kot ã amnhî nhîpêx anhÿr mã xwÿnhjaja koja mē mex kêt nê.

¹¹ Na hte Tirtûm mē kot finat Mojes kapër kôt amnhî nhîpêx o mē pa hã mē omunh xã hkôt mē mex ã mē harênh kêt nê. ãm mē kot amnhî kaxyw hkôt hamaxpër xwÿnh pixjaja na hte ã mē harênh anê. Kapër ã kagã htûm kot mē harênh kot:

Mē kot amnhî kaxyw ixkôt hamaxpër xwÿnhjaja na pa hte mē mex ã mē harênh o ixpa. Mē tapxipixjaja koja mē nhÿrmã Ixkra mē wa ixri mex kumrêx nê htir tûm nê pa ho pa. Anê.

¹² Nom na htem amnhî kaxyw Tirtûm mã hamaxpër pê finat Mojes kapër kôt amnhî nhîpêx o pa hkêt nê. Mojes kapër ã kagã kot ja jarênh kot:

Mē kot ixkapër piitã hkôt amnhî nhîpêx mex o mē pa xwÿnh pixjaja koja mē htir tûm nê pa ho pa. Anê.

¹³ Tã kot pu mē ãm kapër o pixire nê hirõp pakuhe hãmri nê mÿrapê pahtr tûm nê papa hkêt nê. Nê hpãnhã mē kot amnhî xã htÿx kamã hamak tûm xãta hwÿr ma papa. Ja pymaj na pre Krisja ĩ ho mē pahwÿr wrÿ nê mē pahte amnhî tomnuj mÿrapê mē panê ty. Tirtûm kot mē pahte amnhî tomnuj mÿrapê tanhmã mē pahto pymaj ã mē panê htyk anê. Jakamã nhûm Tirtûm mē pahte amnhî tomnuj ã mē pahpumunh kôt mē pakuha hã Kraja homnuj nê. Kapër ã kagã htûm kot ja jarênh kot:

Pĩ kahpa hã jêt xwÿnhhta na pre Tirtûm homnuj tỳx kumrêx. Anê.

Mē kot amnhî kaxyw Kris kôt mē hamaxpër xwÿnhjê jarênh

¹⁴ Tã ã Jesus Kris kot mē panê amnhî nhîpêx anhÿr kukwak ri na pre Tirtûm kot Apraãw nhîpêx pyrã nê mē ixpê Ijaew pix o mex kêt nê. Mããnên mē apê Ijaew kêt xwÿnhjê ho mex nê. Jakamã koja mēhõ. Ijaew õ rÿ Ijaew kêt xwÿnhjê hõ amnhî kaxyw Kris kôt hamaxpër nhûm Tirtûm hã omu nê ho hkra nê hwÿr Karõ mē nhûm kãm axã.

Tirtüm kot finat Mojes kukamã mē pahto mex ã harēnh

Rõmãn 3.19-20, 5.20-21, 11.32; Eprêw 6.13-18

¹⁵ E ixkràmnhwýjaja. Kot paj ixprĩ hã mē amã ja jarē ka mē inhma. Nà koja mēhõ wa hamēxkrut nē mēmoj tã axpēn ma. Pika hã war axpēn ma rý mēmoj tã war axpēn ma. Hãmri nē wa hã axpēn mar pa nhũm ja ãm hãmri nē ãm rãhãã. Koja nhãm mēhõ tē nē axtem tanhmã harēnh to hkêt nē. ¹⁶ Ja pyrã nē na hte ã Tirtüm mēmoj tã amnhĩ jarēnh anē. Na hte mēmoj jarē nhũm arĩ rãhãã. Na hte jarãhã mēmoj jarē nhũm jãã nhũm axtem hijuk ri mēmoj jarēnh kêt nē. Na hte ãm kapēr pýnh nē. Tã na pre Apraãw mã hkanrēhã htãmnhwýjê hõ kukwak ri Apraãw o mex ã amnhĩ jarē. Tãmnhwý piitã kukwak ri ho mex ã amnhĩ jarēnh kêt nē. ãm kanrēhã htãmnhwý Krisja pix kukwak ri ã Apraãw o mex ã kãm amnhĩ jarēnh anē.

¹⁷ E kot paj hpãnhã axtem tanhmã mē amã harēnh to. Na hte Tirtüm kot mēmoj tã amnhĩ jarēnh xà hkôt tanhmã mēmoj to ho pa rãhã nē. ã na pre finat Apraãw mã kot ho mex ã amnhĩ jarēnh anē. Tã ra hã amgrã pē 430 nē hapêx nhũm hpãnhã finat Mojes mã kapēr. Kot mar nē amnhĩ xõ ri Ijaew mã harēnh o ri mē hkôt pa kaxyw. Tã no nhũm ra kot Apraãw mã mēmoj jarēnh ta arĩ hã no htýx rãhã nē aa ho hamakêtkati hkêt nē. Nē kot Mojes mã tanhmã kapēr toja nē Apraãw mã tanhmã kapēr toja nhũm hamē wa ho hamakêtkati hkêt nē. Nhũm wa hamē arĩ rãhã ho rãhã. ¹⁸ Tã mē ano kupyw o ri mē pa xwýnhjaja na htem htýx tanhmã mē amã harēnh to nē mē amã harēnh o:

—Kwa kot puj mē Mojes kapēr kôt amnhĩ nhĩpêx o papa hkêt nē nhũm Tirtüm tee ri ja hã mē pahpumu nē mē pahto mex kêt nē. Anē.

Nom ja kot anhýr kêt. Kop apu ã kot anhýr ronhýx Tirtüm ra wam kot tanhmã Apraãw mã kapēr tota ra ho hamakêtkati. Nom na hte arĩ kãm hamaxpēr rãhã nē ho pigrãnh nē ho hapêx kêt nē. Na pre Apraãw mã kãm:

Kot kaj amnhĩ kaxyw ixkôt ajamaxpēr hã kot paj ato mex kumrêx. Anē.

Tã kot ho mex ã amnhĩ jarēnh ja arĩ rãhãã. Na hte arĩ mē kot amnhĩ kaxyw hkôt

hamaxpēr xwýnhjê ho mex nē. Nom mē kot Mojes kapēr kôt amnhĩ nhĩpêx o pa hã mē omunh xà hkôt mē ho mex kêt nē. ãm mē kot amnhĩ kaxyw hkôt hamaxpēr xwýnh pixjaja na hte mē ho mex.

Mo kaxyw na Mojes kapēr ã kagà?

Rõmãn 3.20, 5.20, 7.7

¹⁹⁻²⁰ Tã mo kaxyw na Mojes kapēr ã kagàja? Nà mē pahte tanhmã amnhĩ tomnuj to ho papa hã amnhĩ pumunh nhũm Tirtüm kot ã mē pahte amnhĩ nhĩpêx anhýrja nē mē pahkurê kaxyw. Na pre Mojes Tirtüm nhý hã mēmoj nē mē pahkurê. Mē pahte axpēn pē paxãhkĩnh nē mē pahkurê. Nē mē pahte axpēn mã paxêx o ri papa nē mē pahkurê. ã mēmoj nē mē pahkurê anē. Mē pahprĩ hã kapēr mar nē tãm amnhĩ nhĩpêx o papa kaxyw. Ja kaxyw na pre Tirtüm Ijaew kaxyw Mojes mã kapēr gõ. Na pre kaxkwa rũm kapēr o wrýk xwýnhjaja kumrêx kãm harē nhũm kuma nē Ijaew mã hã kagà. Jakamã na htem harēnh o: “Mojes kapēr” anhýr o harē.

Tã Apraãw kanrēhã htãmnhwý Krisja kormã kator kêt ri nhũm Ijaew Mojes kapēr ma nē hkôt ri amnhĩ nhĩpêx o pa. Tã nhũm Krisja kator o Mojes kapēr o hapêx. Ra Tirtüm kot Kris kukamã ho mex ã amnhĩ jarēnh xà hã arĩgrota kator mē nhũm Mojes kapēr hapêx.

No na pre Tirtüm Ijaew mã ujarēnh kaxyw tãm mē kãm ujarēnh kêt nē. Kapēr o wrýk xwýnhjê mã na pre harē nhũm mē amnhĩ xõ ri Mojes mã mē kaxyw kãm awjarē. Kot mē ô ri mē kãm harēnh kaxyw. No Apraãw mã na pre Tirtüm tãm kapēr. Na pre hwýr kapēr o wrýk xwýnhjê hõ mēnh kêt nē. Tãm kot kãm kapēr jakamã kapērja na mex o Ijaew kaxyw Mojes mã kapēr jakrenh.

²¹ Nē na pre Tirtüm tanhmã mē pamã kapēr o amnhĩrit to nē mē pamã:

—E kot paj amnhĩ kaxyw ixkôt mē ajamaxpēr ã mē apumunh kôt pix mã mē amex ã mē ajarē.

Anhýr o mē pamã kapēr. Tã xà na pre kapērja nhĩjuk ri axte amnhĩ jarē nē amnhĩ jarēnh o:

—E kot paj mẽ ate Mojes kapër kôt amnhĩ nhĩpêx mex o apa hã mẽ apumunh kôt mẽ amex ã mẽ ajarê.

Anhÿr o mẽ pamã kapër? Xà na hte mẽmoj jarê nhũm jãã nhũm ra hijuk ri axtem mẽmoj jarê? Nà Tĩrtũm kapër ãm hpÿnh kênã. Kop ãm mẽ pahte Mojes kapër kôt amnhĩ nhĩpêx o papa hã mẽ pahpumunh kôt mẽ pamex ã mẽ pajarênh ronhÿx mẽ pamã:

—Ãm ja pix ã mẽ apumunh kôt kot paj mẽ amex ã mẽ ajarê. Anê.

²² Nom na pre ã kapër anhÿr kêt nê. Kapër ã kagà htũm kot ja jarênh o: Mẽ apiitã mẽ ate amnhĩ tomnuj o mẽ apa xwÿnh na ka mẽ.

Anhÿr jakamã tanhmã kot puj mẽ amnhĩ to nê Mojes kapër kôt amnhĩ nhĩpêx mex o papa? Mẽ pahpiitã mẽ pahte amnhĩ tomnuj xwÿnh kênã. Mẽ pahte kapër piitã hkôt amnhĩ nhĩpêx kêt jakamã koja Tĩrtũm ja hã mẽ pahpumunh kôt mẽ pamex ã mẽ pajarênh kêt nê. Koja ãm mẽ pamã kapër o:

—Kot kaj mẽ amnhĩ kaxyw Jejus Kris mã ajamaxpêr pa ja hã mẽ apumunh kôt mẽ amex ã mẽ ajarê nê mẽ ato ixkra nê mẽ ato mex o ri ixpa. Anê.

Mojes kapër te kêp Kris xwÿj ri mẽ hamãr xwÿnh pyrãk ã harênh

Rômãn 10.4; Karatas 4.1

²³ Nê kormã Kris kot mẽ pahwÿr wrÿk nê mẽ panê htyk xwÿj ri na pre Ijaew Mojes kapër ma nê hkôt amnhĩ nhĩpêx o ri pa. Nhũm kapêrja te kot amnhĩm mẽ unênh nhũm mẽ kot hkôt pix mã amnhĩ nhĩpêx o ri pa pyrãk. Na prem Tĩrtũm kot mẽ mex ã mẽ harênh prãm xaj ãm pix ma nê hkôt amnhĩ nhĩpêx o pa. Nom kapêr piitã hkôt amnhĩ nhĩpêx mex kêt nê. ²⁴ Te mẽhprĩre nhũm Mojes kapêr te kêp mẽ hamãr xwÿnh pyrãk. Mẽhprĩ jamãr xwÿnhjaja na htem mẽhprĩjê pumu nê tãm mẽ kot amnhĩ nhĩpêx kaxyw tanhmã mẽ ahkre hto ho mẽ hkôt pa. Ja pyrã nê na pre Ijaew tãm amnhĩ nhĩpêx o pa kaxyw Mojes kapêr ma nê hkôt amnhĩ nhĩpêx o ri pa. Jejus Kris kutêp ã amnhĩ nhĩpêx anhÿr o ri pa. Tã nhũm Jejus tãm kaxkwa rũm wrÿ pa mẽ ixkwÿ pixjaja mẽ ixkwÿjê rom amnhĩ kaxyw hkôt ijamaxpêr.

Hãmri nhũm Tĩrtũm ja hã mẽ ixpumunh kôt mẽ inhmex ã mẽ ijarênh kurê kumrêx.

Jejus kukwak ri mẽ pahpê Tĩrtũm kra ã mẽ pajarênh

Juãw 1.12; Rômãn 8.14; Epes 1.5

²⁵⁻²⁶ Tã ra mẽ ixte amnhĩ kaxyw Kris kôt ijamaxpêr jakamã na pre Tĩrtũm mẽ ixto hkra pa mẽ ra te ixpê hkra xaptàr pyrãk o amnhĩ nhĩpêx nê kapêr kôt amnhĩ nhĩpêx mex o ri ixpa. Jao Mojes kapêr kaga. Te mẽhprĩre ra mẽ ahkre kamã mẽ aptàr nê kot mẽ ahkre xwÿnh kaga pyrãk. Hãmri pa mẽ ixpê Tĩrtũm kra xaptàrjaja hãmri axte Mojes kapêr kôt amnhĩ nhĩpêx hkêt nê.

²⁷ Tã mẽ kajaja na ka pre mẽ ixpyrà nê amnhĩ kaxyw Kris kôt ajamaxpêr nhũm mẽ akwÿ kot mẽ apê Jejus kwÿ hã mẽ apumunh kaxyw nhũm mẽ akrã kumrã. Hãmri ka mẽ Jejus kot amnhĩ nhĩpêx kôt pix mã amnhĩ nhĩpêx o ri apa. ²⁸ Tã ra mẽ pahpê Jejus Kris kôt amnhĩ xunhwÿr xwÿnh jakamã na hte Tĩrtũm ahpÿnhã ri tanhmã mẽ pakute hkôt mẽ pahpumunh kêt nê. Mẽ pahpê Ijaew rÿ mẽ pahpê Ijaew kêt xwÿnhjaja. Rÿ mẽ pahpê nhãm mẽ kãm paxapênh xwÿnh rÿ amnhĩ mã mẽ paxapênh xwÿnh nhũm hte ja hã mẽ pahpumunh kôt tanhmã mẽ pajarênh to hkêt nê. Rÿ mẽ anijê hkôt rÿ mẽ inhmyjê hkôt mẽ pahpumunh kôt tanhmã mẽ pajarênh to kêt nê. ãm mẽ pahte Jejus Kris kôt amnhĩ xunhwÿr ã mẽ pahpumunh kôt pix mã na hte ã mẽ pahpumunh o pa anê.

²⁹ Nê na pre Tĩrtũm Apraãw mã hkanrêhã htãmnhwÿ Jejus Kris o mex ã amnhĩ jarê. Tã Kris kêp mẽ panhõ Pahihti jakamã pu mẽ Tĩrtũm noo mã urãk nê te mẽ pahpê Apraãw tãmnhwÿ pyrãk. Jakamã koja Apraãw nhĩpêxta pyrã nê mẽ pahto mex rax nê.

4

Mojes kapêr te axte mẽ pahpynênh kêt pyrãk ã harênh

Rômãn 7.1, 8.14-17; Karatas 3.23

¹ E kot paj axte mẽ amã tanhmã mẽhprĩjê jarênh to ka mẽ inhma. Koja mẽhõ ra hkra mã mẽmo hikukrêx nhõr kaxyw. Hikukrêx nê õ pika. Õ mẽmoj piitã õr kaxyw. No nhũm hkraja kormã hprĩre nê hamaxpêr mex kêt jakamã nhũm kormã hprêk jamãr

o pa. Nhũm hkraja arĩ te kãm àpênh o pa xwýnh kot amnhĩ nhĩpêx pyrà nê amnhĩ krã hkôt ri amnhĩ nhĩpêx o pa hkêt nê. Kormã hipêêxà kapêr kôt ri amnhĩ nhĩpêx o pa. Nhũm hipêêxàja kot kãm õ mẽmoj piitã òr kaxyw no ãm kormã hprêk jamã.² Tã kormã hkraja hprĩre ri nhũm hipêêxà tanhmã amnhĩ to nê ty. Nom nhũm hkraja mýr pê kormã õ mẽmoj o amnhĩptàr kêt nê. Kormã hprĩre jakamã nhũm hipêêxà mýr pê kot kãm hamãr o pa xwýnhja kormã kãm hamãr o pa. Tã nhũm hipêêxà kot kãm amgrà jarênh xwýnhhta kato nhũm tãm mẽmoj piitã ho amnhĩptã. Ra àptàr mex nê hamaxpêr mex nê amnhĩm ho amnhĩptàr pa.³ Tã Ijaew na prem ã amnhĩ nhĩpêx anê. Amnepêm kormã mẽ kot Mojes kapêr kôt ri amnhĩ nhĩpêx o pata ã na prem te mẽhprĩre hamaxpêr kêeta pyrãk. Te kormã mẽ àptàr kêt pyrã nê jar pika ja kamã mẽ kot amnhĩ nhĩpêx tũm kôt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm mẽ unênh nê mẽ kãm ê pyrãk o mẽ hipêx nhũm mẽ hkôt pix mã amnhĩ nhĩpêx o ri pa.⁴ Tã nhũm Tĩrtũm kot Kra hkukamã mẽ pahwýr mẽnh xà hã arĩgrota kato hãmri nhũm mẽ pahwýr kumê nhũm mẽ pahwýr wrý nê mẽ pahpyrà nê mẽhõ nhõhy rũm kato. Nê mẽ pahpyrà nê gaa nê hprêk nê mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa.⁵ Jao te kot Mojes kapêr pê mẽ papytãr pyrãk o mẽ panhĩpêx pu mẽ hpãnhã pahpê Tĩrtũm kra kaxyw.⁶ Tã mẽ ixpê Ijaew kwýjaja nê mẽ apê Ijaew kêt xwýnh kwýjaja ra mẽ pahpê Tĩrtũm kra jakamã na pre mẽ pahwýr Kra Jejus Karõja rê nhũm mẽ pamã agjê. Hãmri nê mẽ pamã kapêr o:

—Ra mẽ apê Tĩrtũm kra jakamã kêr ka mẽ kãm amnhĩ jarênh kaxyw nê kãm: “Pa Papaj” anê. Kêr ka mẽ ã kãm akapêr anê. Anê.

⁷ Jakamã na pu mẽ ra te pahpê mẽ kãm paxàpênh xwýnh pyrãk kêt nê. Ra mẽ pahpê Tĩrtũm kra jakamã na hte mẽ panhĩpêx o te Kra Jejus nhĩpêx pyrã nê mẽ pahto mex nê.

Mojes kapêr kôt mẽ kot amnhĩ nhĩpêx xwýnhjê jarênh

Sikũn Korõt 11.3-4; Korosê 2.16-19; Eprêw

6.1; Wam Pêtre 1.14

⁸ Nê amnepê mã kormã mẽ ate amnhĩ kaxyw Jejus kôt ajamexpêr kêt ri na ka prem Tĩrtũm jarênh mar kêt nê. ãm atýx ri sãnti mã mex ã harê nê kãm amnhĩ jagrer o ri apa. Nê amã mẽmoj kĩnh nê amã hprãm xaj tanhmã amnhĩ to hwýr to ho ri apa. Te mẽ kãm mẽ àpênh o mẽ pa xwýnhjaja kot amnhĩ nhĩpêx pyrã nê sãnti mã tanhmã amnhĩ nhĩpêx to ho ri apa. Nom sãntija kêp Tĩrtũm kêt.

⁹ Tã ka prem Tĩrtũm jarênh ma nê hkôt amnhĩ xunhwý nhũm amnhĩ tã mẽ apumu. Tã tãm kot amnhĩ kaxyw mẽ paxunhwýr jakamã kwa mon ka mẽ ra axtem nê akupým sãnti hkôt amnhĩ nhĩpêx kaxyw? Nà mẽ ajamexpêrja mex kêt. Sãnti nhĩpêxta tanhmã koja amnhĩ to nê mẽ ato ajuta? ãm mẽ kot ìhkra ho hipêx pix jakamã hihtýxti hã. Amarĩ kuhê xà kamã kuhê ho kuhê xwýnh kênã. Tã te kot akupým amnhĩ kôt mẽ arênh kaxyw pyrãk o mẽ anhĩpêx ka mẽ ra axtem nê akupým hkôt amnhĩ nhĩpêx kaxyw. Kwa nà mẽ ã ri amnhĩ nhĩpêx anhýr kêt nê.

¹⁰ Nê na ka htem amnhĩ kukamã ajamaxpêr o:

—Na pre hte Ijaewjaja Mojes kapêr xà hkôt arĩgro hkwy hã axtem tanhmã amnhĩ nhĩpêx to nê mẽmo mytwrý hã tanhmã amnhĩ nhĩpêx to nê mẽmo amgrà hã tanhmã amnhĩ nhĩpêx to. Tã kot paj mẽ urãk nê ã amnhĩ nhĩpêx anhýr o ixpa. Kê Tĩrtũm ja hã ixpumu nê inhmex ã ijarê. Anê.

Kwa mẽ ã ajamexpêr anhýr kêt nê. Mon ka htem axtem nê ri ã ajamexpêr anê? Na hte Tĩrtũm ã mẽ pahte amnhĩ nhĩpêx anhýr ã mẽ pahpumunh kôt mẽ pamex ã mẽ pajarênh kêt nê.¹¹ Na pa ja hã mẽ ajarênh ma nê tee ri mẽ akukamã ijamaxpêr. Te ixte Tĩrtũm kapêr o mẽ ajahkre kaprý ho ri ixpa pyrãk.

Karatas nhõ xwýnhjaja kot Pawre ho mex ã mẽ harênh

Wam Korõt 9.21-23

¹² Kwa ixkrãmnhwýjaja. Ixpê Ijaew tã te ixpê Ijaew kêt pyrãk o amnhĩ nhĩpêx o ri mẽ apê Ijaew kêt xwýnhjê hkôt ri ixpa. Jao Kris kapêr gryk ã mẽ inhĩgêjtaja kot amnhĩ nhĩpêx kaga nê axte hkôt amnhĩ nhĩpêx kêt

nē. Tā kwa mē ixpyrà nē ã amnhĩ nhĩpêx anē. Wem ma amnhĩ to amõr gri kêt wehe. Wam ixte mē awÿr inhmõrta ã na pa pre mē amã Tirtũm kapêr jarênh o ri mē akõt ixpa ka prem inhma nhũm ja mē amã mex nē ka mē ja hã tanhmã ixto hkêt nē. ¹³ Na pa pre ixàà nē mē awÿr mõ nhũm ixàja ixto htÿx nē pa tokyx ixkator nē ma akupÿm mē arũm inhmõr kêt nē arĩ mē amã Tirtũm kapêr jarênh o ixpa. ¹⁴ Kormã ixà nē tanhmã ixkute htã ka prem ja hã ixpumu nē ixto mex nē ixkamã anhõkre kahak kêt nē. Na ka prem te ixto Jesus Kris nhĩpêx pyrãk o inhĩpêx. Nē te ixto Tirtũm kapêr o wrÿk xwÿnh nhĩpêx pyrãk o inhĩpêx. ¹⁵ Jao mē amã ixkĩnh nē ã inhĩpêx anē nē mē amã ixto mex pix prãm. Nē nhÿri ixpumu nē ixkamã axukapri nē inhmã akapêr o:

—Hêxta waa nē. Anopxàà. Inhmã amnhĩ no kaxàr nē amã õr prãm nom tanhmã kot pa mē amnhĩ to nē hkapa nē amã kugõ? Anē.

Nē mē amã inhmã mēmoj mex pix nhõr prãm. Tã ra tanhmã ajamaxpêr to nē axtem nē te mē amã ixkĩnh kêt pyrãk o inhĩpêx.

Mē no kupyx xwÿnhjaja kot mē hamaxpêr o pihkàr ã mē harênh

¹⁶ Nē na pa pre ãm hãmri mē amã Tirtũm kapêr jarênh o ri mē akõt ixpa. Nom ra mē amã mar prãm kêt jakamã na ka mē axtem nē inhĩpêx o te ixte mē akutã amnhĩ xãm pyrãk. ¹⁷ Mē amã Tirtũm kapêr o mē hêx xwÿnhjaja te mē kãm mē akĩnh pyrãk o mē anhĩpêx no ãm mē kãm akĩnh kêt. Na htem mē amex kaxyw tanhmã mē amã kapêr to hkêt nē. ãm mē ate mē mar nē mē gryk ã ixkaga nē mē hkõt ri amnhĩ nhĩpêx o apa pix prãm xàj na htem mē akõt tanhmã mē amã hêx to ho pa. ¹⁸ Pa mē harênh ma hãmri nē mē kamã inhgryk o ã mē amã mē harênh anhÿr kêt nē. Kojã mēhõ mē awÿr mra nē ixwakre kamã rÿ inhnoo mã mē amã mēmoj mex jarê nhũm ja inhmã mex nē. No nhũm mē amã mē hêx xwÿnhjaja axtem nē mē ajamaxpêr o pihkàr pix kaxyw na htem mē awÿr mrrar nē mē amã ã ujarênh o pa anē.

Pawre kot tee ri mē hkukamã hamaxpêr ã harênh

¹⁹ Te mē apê ixkra pyrãk jakamã na pa hte mē ate amnhĩ nhĩpêx ã mē apumu nē tee ri ijamaxpêr nē ixkapri htÿx nē. Te nhÿhÿnh ixà htÿx nē ixte amnhĩ xà htÿx kamã ijamak o ri ixpaja pyrãk. Rÿ te mē hpijagri ho mē hikwÿ xwÿnh õhy xà htÿxta pyrãk. Mē ate Kris kõt amnhĩ nhĩpêx mex o apa hprãm xàj na pa hte ã amnhĩ nhĩpêx anhÿr o ri ixpa. ²⁰ Hêxta waa nē. Kop apu ra mē awÿr ixpõx nē mē akõt ixpa ronhÿx pa ixkĩnh tÿx kumrêx. Nhÿx pa ra ixpri hã mē amã ixkapêr ka mē inhma. Nē amnhĩ tã inhmã mē akĩnh tÿx ã mē akamã inhgryk kêt ã ixpumunh kurê kumrêx. No kagã pix kãm ixkapêrja ka mē kamã harê nom apri hã inhmar mex kêt nē. Na pa tee ri mē akukamã ijamaxpêr o ixkapri htÿx nē ixpa.

Mojes kapêr kõt mē kot amnhĩ nhĩpêx xwÿnhjê jarênh

Eprêw 12.18-29

²¹ Kwa mē amã arĩ Mojes kapêr kõt amnhĩ nhĩpêx o ri mē apa hprãm xwÿnhjaja. Mãn ka mē kormã apri hã Mojes kapêr piitã mar par kêt jakamã na ka mē amã hkõt amnhĩ nhĩpêx prãm. E pa ixpri hã mē amã tanhmã harênh to ka mē inhma. ²² Nã Tirtũm kapêr ã kagã htũm kot finat Apraãw jarênhja. Na pre hkra myja wa hamëxkrut. Prõ Sara kamã ja nē kot amnhĩm haprõr nhũm ri kãm àpênh o pa xwÿnh Aga kamã ja. ²³ Kãm àpênh xwÿnh kamã ja na pre mē pahpiitã mē pahpyrà nē amarĩ kato. No hprõ Sara kamã ja. Sara na pre ra hpigêx tÿx nē. Ra hkamrõ hkêt ryy nē pa htã nhũm Tirtũm kot wa hkra hkukamã wa kãm ujarênh xà hkõt nhũm Apraãwja htu nhũm wa hkrata kato. Tirtũm kot hkukamã wa kãm harênh xà hkõt nhũm kamã hkra nhũm kato.

²⁴⁻²⁵ Tã wa nita ã wa harênh kot anhÿr. Na pre Tirtũm mēmoj jarê. Te ho wa urãk o wa harê no ãm hã kuxi nē ã wa harênh anē. Jakamã ni wa harênhja te kot Tirtũm kapêr pijakruuta pyrãk. Wam ni Agata te kot hixêt prêk pê Sinai nhĩmõk ã Tirtũm kot Mojes mã kapêrta pyrãk. Hixêtja pika pê Arap kamã na pre. Jakamã nhũm Tirtũm Ijaew kaxyw Mojes mã kapêr nhũm kuma nē amnhĩ xõ ri mē kãm hã kagã. Tã na hte arĩ jarãhã mē hkwyjaja hamaxpêr o:

—E kot paj mẽ panhìgêť finat Mojes kapêť kôt amnhĩ nhĩpêx o ri ixpa nhũm Tĩrtũm ja hã ixpumu nê amnhĩm inhmex ã ijarê nê ixto hkra.

Anhỹr o hamaxpêť no ãm ã hamaxpêť anhỹr kaprỹ. Æ mẽ hamaxpêť anhỹr xwỹnhjaja te mẽ kêp Apraãw mã àpênh xwỹnh Aga hkrata pyrãk. Nê krĩ pê Jeru-jarê kêp Ijaew nhõ krĩ jakamã haxwỹja te kêp Agata pyrãk. Nhũm krĩ nhõ xwỹnhjaja haxwỹja te mẽ kêp Aga hkrata pyrãk. Na htem htỹx Tĩrtũm kot mẽ omunh nê mẽ ho hkra hprãm xaj Mojes kapêť kôt amnhĩ nhĩpêx o pa hã amnhĩ jarênh kaprỹ. Jakamã haxwỹja te mẽ kêp mẽ kãm mẽ àpênh o pa xwỹnh pyrãk.

Jejus kôt mẽ kot amnhĩ kaxyw hamaxpêť xwỹnhjê jarênh

²⁶ Nê hapu hã Tĩrtũm kapêťta. Apraãw prõ kumrêx Saraja te kêp kaxkwa kamã Jerujarê oja pyrãk. Krĩ ja kamã mẽ pa mã xwỹnhjaja te mẽ kêp mẽ kãm mẽ àpênh xwỹnhjê pyrãk kêt. Ra mẽ kot amnhĩ kaxyw Kris mã hamaxpêť nê hkôt amnhĩ xunhwỹr jakamã na htem hamaxpêť o:

—Ixte amnhĩ kaxyw Kris mã ijamaxpêť nê hkôt amnhĩ xãm jakamã na Tĩrtũm ixpumu nê amnhĩm inhmex ã ijarê nê ixto hkra. Anê.

Æm hãmri na mẽ ã wamtajê rom hamaxpêť anê. Tã ã mẽ hamaxpêť anhỹr xwỹnhjaja te mẽ kêp Sara hkra pyrãk.

²⁷ Tĩrtũm kapêť ã kagà htũm kot ja jarênh kot:

E kormã akra hkêt nê apa htã kêt ka mãmrĩ akĩnh nê ri apa.

Nê kormã apijagri hkêt tã kêt ka akĩnh tỹx nê ri apa.

Kormã amjên kot akamã hkra hkêt nê te kot akaga pyrãk tã kot kaj akra nê akanrêhã atãmnhwỹ xohtõ rax nê.

Mê ohtõ rax o ra amjên kot nhãm hprõ hõ kamã hkrata jakre. Anê.

Æ kapêť kot anhỹr o mẽ kot amnhĩ kaxyw Kris kôt hamaxpêť xwỹnhjê hkukamã mẽ ohtõ hã mẽ harê.

²⁸ E ixkrãmnhwỹjaja. Te mẽ apê Ijak kanrêhã htãmnhwỹ pyrãk. Kojã mēhõ amnhĩ kaxyw Kris kôt hamaxpêť hãmri nê te kêp Apraãw mẽ hprõ Sara wa hkra Ijak

kanrêhã htãmnhwỹ pyrãk. Na pre Tĩrtũm amnepê mã kormã Ijak kator kêt ri ra hkukamã hamaxpêť nê Apraãw mã harê. Nê mẽ papajaja nhũm Tĩrtũm Ijak pyrã nê mẽ pakukamã mẽ pamã hamaxpêť nê amnhĩm mẽ paxunhwỹr ã amnhĩ jarê. Tã ra mẽ ate amnhĩ kaxyw Kris kôt ajamaxpêť jakamã te mẽ apê Ijak kanrêhã htãmnhwỹ pyrãk.

²⁹ Nhũm Apraãw kot Aga kamã hkra Ismaewja na pre hprõ kumrêx kamã hkrata pumu nê kãm hkĩnh kêt nê kamã gryk pix o pa. Nê tanhmã hipêx to pê ri haprỹ ho ri hkôt pa. Tã mẽ kot amnhĩ krã hkôt amnhĩ to Tĩrtũm kra hprãm xwỹnhjaja na htem ã mẽ pahte Kris kôt amnhĩ xunhwỹr xwỹnhjê nhĩpêx anhỹr o pa. Na htem Tĩrtũm kot mẽ pahto hkra hã mẽ pahpumu nê Ismaew kot Ijak nhĩpêx pyrã nê mẽ pakamã gryk pix o pa. Nê tanhmã mẽ pahptomnuj to pê mẽ pahto kapêť o ri pa. ³⁰ Tã no ãm kwãr mẽ mãmrĩ ã mẽ panhĩpêx anê. Kojã mẽ pahpyrã nê nhỹrmã Tĩrtũm nhõ krĩ hwỹr àpir kêt nê. Tĩrtũm kapêť ã kagà htũm kot mẽ harênh kot:

Na pre Tĩrtũm Apraãw mã kapêť nê kãm: “E kêt ka amnhĩ nê ate haprõr nhũm kot amã àpênh o ri pa xwỹnh mẽ hkrata wa hano. Kojã hkrata amỹr pê amnhĩm mẽmoj to arĩk kêt nê.

Ate aprõ kumrêx kamã akrata pix kojã hõja rom amỹr pê mẽmoj piitã ho amnhĩptar pa.” Anê.

³¹ Tã te mẽ pahpê àpênh xwỹnh kamã hkrata pyrãk kêt. Te mẽ pahpê Apraãw prõ kumrêx kamã hkrata pyrãk. Te Tĩrtũm kot Ijak kukamã hamaxpêť pyrãk o na pre mẽ pakukamã hamaxpêť.

5

¹ Nê Kris kot mẽ pahte amnhĩ nhĩpêx tũm pê mẽ papytãr jakamã kwa ixkrãmnhwỹjaja. Kêt ka mẽ arĩ ate amnhĩ nhĩpêx tũm kôt amnhĩ nhĩpêx kêt nê. Ra Kris kot ja pê mẽ papytãr nhũm mẽ paxãmnhĩx ri papa kênã.

Mê pahpê Tĩrtũm kra hprãm xaj tanhmã mẽ pahte amnhĩ nhĩpêx to Juãw 8.32, 8.36; Korosê 2.20

² E mẽ inhma. Kot kaj mẽ atõ Tĩrtũm kot ato hkra hprãm xàj amnhĩ my kwryt kà krãhta hã kot kaj mẽ ãm amarĩ ã amnhĩ nhĩpêx anhỹr kaprỹ. Na hte Tĩrtũm ja hã mẽ omu mẽ ãm hã mẽ omu. Kot kaj ã amnhĩ nhĩpêx anẽ nhũm Krisja ãm ate amnhĩ tomnuj mỳrapê anẽ htyk kaprỹ pyræk o amnhĩ nhĩpêx. ³ Hãmri nhũm Tĩrtũm tee ri ja hã mẽ apumu mẽ te kot ã mẽ amã kapêr anhỹr pyrã mẽ mẽ amã kapêr o:

—E ra amã apê Kris kwỳ hprãm xàj amnhĩ my kwryt kà krãhyr jakamã kot kaj mãânẽn Mojes kapêr piitã hkôt amnhĩ nhĩpêx o ri apa.

Anhỹr o mẽ amã kapêr pyræk.

⁴ Nom kot kaj mẽ atõ amnhĩ kukamã ajamaxpêr o:

—Nà kot paj Mojes kapêr piitã hkôt amnhĩ nhĩpêx o ri ixpa nhũm Tĩrtũm ja hã ixpumu mẽ inhmex ã ijarẽ mẽ ixto hkra kãm ga. Anẽ.

No ãm ja kot anhỹr kêt. Na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra hkêt nẽ. Jakamã kot kaj mẽ ã amnhĩ nhĩpêx anẽ nẽ te ate Kris kutã amnhĩ xãm pyræk nhũm Tĩrtũm ato mex kêt nẽ. ⁵ Nom kot ka mẽ axtem ajamaxpêr o:

—Ra ixte amnhĩ kaxyw Kris kôt ijamaxpêr mẽ hkôt amnhĩ xãm jakamã koja Tĩrtũm hã ixpumu mẽ inhmex ã ijarẽ. Karõ ra kot ã inhmã ja ho amnhĩrĩt anhỹr kênã.

Anhỹr o ajamaxpêr. ãm hãmri ã mẽ ajamaxpêr anhỹrja. ⁶ Jakamã mẽ pahpê Kris kôt amnhĩ xunhwỳr xwỳnhjê kamã ra mẽ kot amnhĩ my kwryt kà jakàr xwỳnhjaja nhũm mẽ pahkwỳjaja ã amnhĩ nhĩpêx anhỹr kêt nẽ. Tã nhũm Tĩrtũm ja hã mẽ pahpumu nhũm ja tanhmã kêp kute hkêt. Na hte mẽ pahte amnhĩ my kwryt kà jakàr ã mẽ pahpumu mẽ ãm hã mẽ pahpumu. No kot pu mẽ Jesus Kris kôt amnhĩ nhĩpêx mex o ri papa. Nẽ amnhĩ kaxyw hkôt pajamaxpêr tỳx o ri papa. Nẽ mẽ pamã axpên kĩnh pẽ tãm ri axpên nhĩpêx o ri papa. Ja na kêt Tĩrtũm kãm hprãm.

⁷ Ra mẽ ate Kris kôt amnhĩ nhĩpêx mex o ri apa htã nhũm mẽ hêx xwỳnhjaja mẽ awỳr mra mẽ tee ri ã mẽ ate amnhĩ nhĩpêx anhỹr ã mẽ apumu mẽ tanhmã mẽ amã

Tĩrtũm kapêr o hêx to. Ka mẽ ama mẽ axte Tĩrtũm kôt amnhĩ nhĩpêx mex hkêt nẽ. ⁸ No ãm ã mẽ kot mẽ amã mẽ ujarênh anhỹr xwỳnhjaja na pre Tĩrtũm mẽ awỳr mẽ rênh kêt nẽ. Tĩrtũm kot amnhĩ wỳr mẽ awỳr xwỳnh kênã kot kêt axtem mẽ mẽ awỳr kapêr o mẽ amã hêx o mẽ pa xwỳnhjê rẽ.

⁹ Nẽ koja mẽhõ pixi mẽ tanhmã amnhĩ tomnuj to nhũm mẽ piitã ja hã omu mẽ uræk mẽ kãm tanhmã amnhĩ tomnuj to hprãm. ¹⁰ No kêt mẽ apê Kris kwỳ na ka mẽ. Ixte ja hã mẽ apumunh mex. Kot kaj mẽ axte ixkapêr ma mẽ akupỳm Kris kôt amnhĩ nhĩpêx mex o ri apa. Nà kot kaj mẽ ã amnhĩ nhĩpêx anẽ mẽ axte mẽ kot mẽ apê àmnàr xwỳnhjê kapêr mar mẽ mẽ hkôt amnhĩ nhĩpêx kêt nẽ. Kõja Kris mẽ atã mẽ homnuj tỳx kumrêx nhũm mẽ rĩ amnhĩ pumu.

Pawre kot mẽ kot amnhĩ jakàr ã mẽ kãm karõ hkêt ã harênh

¹¹ Nẽ na hte Tĩrtũm kapêr o mẽ hêx xwỳnhjaja tanhmã mẽ amã ixto hêx to ho pa. Ixte mẽ kãm Tĩrtũm kot mẽ ho hkra kaxyw mẽ kot amnhĩ my kwryt kà jakàr ã mẽ kãm karõ hã ixto ri hêx o pa. Nom ixte anhỹr kêt ixkràmnhwỳjaja. Kop apu ixte mẽ kãm ja hã karõ ho ixpa ronhỹx Ijaew krãhtũmjaja ja hã ijarênh ma nhũm ja mẽ kãm mex mẽ nhũm mẽ axte Kris ã tanhmã inhĩpêx to hkêt nẽ. Nom ixte ja hã mẽ kãm karõ hkêt. ãm ixte mẽ kãm Kris kot mẽ panê pĩkahpa hã htykjarênh pix mỳrapê na htem ixkamã gryk mẽ.

¹² Hêxta waa mẽ. Mẽ kot mẽ amã hêx o pa pẽ mẽ ajamaxpêr o pihkàr xwỳnhjaja kop mẽ ãm mẽ anhõ krĩ rũm hapôx mẽ ma nhỹhỹm hapêx ronhỹx pa ixkĩnh tỳx kumrêx.

Mẽ pahte axpên to mex o papa hã mẽ pamã karõ

Wam Korĩt 13; Eprêw 13.3, 13.16; Wam Pêtre 1.22; Wam Juãw 3.11

¹³⁻¹⁴ Kwa ixkràmnhwỳjaja. Nà na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kôt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhỹr pẽ mẽ papytãr jakamã kêt ka mẽ amnhĩ tã ja ma mẽ axte atỳx ri amã hprãm xà hkôt tanhmã amnhĩ nhĩpêx to ho ri apa

hkêt nê. Mě ãm amã axpên kĩnh pix o ri axpên kôt apa. Nê nhãm mẽ hipêx o te ka amã amnhĩ tã ma pyræk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx anê nê te mẽ ate wam Tĩrtũm kapêr piitã hkôt amnhĩ nhĩpêx pyræk. ¹⁵ No kot kaj mẽ axtem nê axpên kãm axoprê ho ri apa hãmri nê te ra mẽ ate axpên to ajapêx par o amõr pyræk o amnhĩ nhĩpêx. Te mry xoprê kot axpên par o pata pyræk. Kwa mẽ ã amnhĩ nhĩpêx anhÿr hkêt nê. Mě ãm axpên to mex pix nê mẽ axpên kãm axukapřĩ ho ri axpên kôt apa.

*Mě pahte amnhĩ nhĩpêx nyw jarênh
Matêwre 26.41; Rõmãn 8.1-11*

¹⁶ Nê kwa kër ka mẽ amnhĩ to Tĩrtũm Karõ wÿ kê mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt nê. ãm mẽ ate amnhĩ nhĩpêx nyw kôt pix mã mãn amnhĩ nhĩpêx o ri apa. ¹⁷ Tĩrtũm Karõ kot amnhĩ nhĩpêxja nê mẽ pahte amnhĩ nhĩpêx tũmja wa kot axpên pyræk kêt. Te wa kot axpên kutã amnhĩ xãm nê wa pijapu pyræk. Jakamã kot puj mẽ pahte amnhĩ nhĩpêx tũm o amnhĩ nhĩpêx nê Tĩrtũm Karõ mã hprãm xà hkôt amnhĩ nhĩpêx hkêt nê. ¹⁸ No kot puj mẽ Tĩrtũm Karõ hkôt amnhĩ nhĩpêx nê ra jar pika ja kamã mẽ kot amnhĩ nhĩpêx kôt ri amnhĩ nhĩpêx kêt nê. Ra axtem mẽ pahte amnhĩ nhĩpêx nyw o amnhĩ nhĩpêx. ¹⁹ Jar mẽ kot amnhĩ nhĩpêx tũmta mex kêt. Ra mẽ piitã mẽ kot ja pumunh mex.

Na htem htÿx ri hkwÿjê kamã hpijaàm kêt o pa.

Jao mẽmyjaja hprõ kuhpa hã nhãm mênijê ho amnhĩkati.

Nhũm mẽ hprõjaja mẽ mjên kuhpa hã nhãm mẽmyjê ho amnhĩkati.

Nê mẽmy hkwÿjaja axtem nê mẽmyjê hkwÿ ho amnhĩkati.

Nê mẽni hkwÿ haxwÿja axtem nê mênijê hkwÿ ho amnhĩkati.

²⁰ Nê mẽ kãm mẽmoj mẽ hikukrêx japê htÿx o kãm Tĩrtũm kĩnh jakre.

Nê mẽmoj kaxyw ma wajaga hwÿr amnhĩ to pa.

Nê hkwÿjê kamã oprê ho ri pa.

Nê mẽmoj tã axpên kãm gryk pix nê.

Nê mẽmoj to axpên pê õxÿ nê.

Nê mẽmo mÿrapê axpên pê anhrã nê amÿm ahpÿnhã ri pa.

²¹ Nê mẽmoj tã axpên kamnhĩx rãhã ho ri pa.

Nê axpã nê mẽ grer kãm ri axpên kãm hpijaàm kêt o ri pa.

ã na htem mẽ kot amnhĩ nhĩpêx tũm kôt amnhĩ nhĩpêx o ri mẽ pa xwÿnhjaja amnhĩ nhĩpêx anê. ã mẽ kot amnhĩ nhĩpêx anhÿr xwÿnhjaja koja mẽ Tĩrtũm nhõ krĩ hwÿr gjêx kêt nê. Ra ixte mẽ amã ja jarênh tã pa axte mẽ amã harê. Mě ate hã ano htÿx rãhã ho ri apa kaxyw. ²² No mẽ kot amnhĩ nhĩpêx nywja axtem na.

Tĩrtũm Karõ hkôt mẽ kot amnhĩ nhĩpêx nyw o amnhĩ nhĩpêx xwÿnhjaja na htem axtem kãm axpên kĩnh nê.

Nê hkĩnh nê ri hamakêtkati nê ãmnhĩx ri axpên kôt pa.

Nê gryk tokyx anhÿr hkêt nê. ãm axpên to mex pix o ri axpên kôt pa.

Nê tãm axpên nhĩpêx.

Nê kot mẽmoj tã amnhĩ jarênh xà hkôt tanhmã mẽmoj to.

²³ Nê axpên mã kapêr mã hprĩ ho ri axpên mã kapêr.

Nê mẽmoj punuj piitã nê amnhĩ to htÿx o ri pa.

ã na hte mẽ kot Tĩrtũm Karõ hkôt amnhĩ nhĩpêx o mẽ pa xwÿnhjaja Karõ nhÿ hã amnhĩ nhĩpêx nyw o amnhĩ nhĩpêx anhÿr o pa. Jao mããnên Mojes kapêr kwÿm ri amnhĩ nhĩpêx hkêt nê. Jakamã koja mēhõ mẽ pahte amnhĩ nhĩpêx nyw nê tanhmã mẽ pahkurê hto hkêt nê. ²⁴ Tã mẽ pahpê Jejus Kris kwÿ jakamã na pu mẽ pahte amnhĩ nhĩpêx tũmja nhĩpêx o te mẽ pahte amnhĩ nê hpĩr pyrã nê axte hkôt amnhĩ nhĩpêx kêt nê.

*Tĩrtũm Karõ hkôt mẽ pahte amnhĩ nhĩpêx
ã mẽ pamã karõ*

Epes 4.23-24; Korosê 3.10

²⁵ Tã ra Tĩrtũm Karõ kot mẽ pahto hkra jakamã kwa kër pu mẽ ãm kôt pix mã amnhĩ nhĩpêx nyw o amnhĩ nhĩpêx o ri papa. ²⁶ Kot puj mẽ ã amnhĩ nhĩpêx anê hãmri nê mẽmoj tã mẽ pahkwÿjê mã amnhĩ to jarkrar o ri papa hkêt nê. Kot puj mẽ ã amnhĩ nhĩpêx anê nhũm mẽ pakamã gryk

ně. Jakamã kêr pu mẽ ã amnhĩ nhĩpêx anhỹr o ri papa hkêt nẽ.

6

Mẽ pahte tanhmã axpên to ajuta hto hã mẽ pamã karõ

Matêwre 18.15-17; Rukre 17.3-4; Sikũn Tesarõn 3.14-15; Xiakre 5.19-20

¹⁻³ Kwa ixkrãmnhwýjaja. Mẽ apê Tĩrtũm Karõ hkôt amnhĩ nhĩpêx o ri mẽ apa xwýnhjaja. Kojã Kris kôt akwýjê hõ tanhmã amnhĩ tomnuj to ka mẽ ja hã omu nẽ ã amnhĩ nhĩpêx anhỹrja nê kãm akapêr. Nom kêr ka mẽ kamã agryk kamã kãm tanhmã nẽ hkêt nẽ. ãm kãm akapêr mã aprĩ ho kãm akapêr nẽ akupým tãm ãm. Nom kwa kêr ka mẽ amnhĩ pumunh mex nẽ uràk nẽ ã amnhĩ tomnuj anhỹr kêt nẽ.

Kot ka mẽ atõ ã kot amnhĩ nhĩpêx anhỹr ã omu nẽ ãm omu nẽ nê tanhmã kãm akapêr to hkêt nẽ. Nẽ ajamaxpêr o:

–Tk. Kwãr mãmrĩ ã amnhĩ nhĩpêx anẽ. Pa ja nê tanhmã kãm ixkapêr to hkêt nẽ. Kurom ixte amnhĩ nhĩpêx mex o ri ixpa kênã.

Anhỹr o ajamaxpêr japêr. Kwa mẽ ã ajamaxpêr anhỹr kêt nẽ. Kot kaj mẽ ã ajamaxpêr anẽ nẽ nê kãm akapêr kêt nẽ hãmri nẽ te ate amnhĩ to mex ã amnhĩ jarênh kaprý pyrãk.

Nẽ kêr ka mẽ axpên to ajuta mex o ri axpên kôt apa. Jao Kris kôt amnhĩ nhĩpêx mex nẽ.

⁴⁻⁵ Nẽ na htem piitã amnhĩm àpênh pix tãnopxar o pa. Jakamã kêr ka mẽ amnhĩ tãnopxar pê tãm amnhĩ nhĩpêx rãhã ho ri apa. Hãmri nẽ ja hã amnhĩ pumu nẽ akĩnh nẽ. Nom kwa kêr ka mẽ ate amnhĩ nhĩpêx mex o akwýjê jakrenh ã mẽ kãm amnhĩ to jarkrar o ri apa hkêt nẽ.

⁶ Nẽ kêr ka mẽ kot Tĩrtũm kapêr o mẽ ajahkre xwýnhjê ho mex nẽ mẽ kãm mẽmoj nhõr o ri apa.

⁷ Kojã Tĩrtũm nhỹrmã mẽ pahtĩr ri mẽ pahte amnhĩ nhĩpêx ã mẽ pahpumunh kôt tanhmã mẽ pajarênh to. Hãmri pu mẽ tee ri amnhĩ kukamã pajamaxpêr nom amnhĩ nê tanhmã kãm paxêx to hkêt nẽ. Kojã mẽhõ kãm amnhĩ to hêx nẽ te tãm kot amnhĩ mã hêx pyrãk nom kot puj mẽ Tĩrtũm mã amnhĩ nê tanhmã paxêx to hkêt

nẽ. ⁸ Jakamã kot kaj mẽ amnhĩ krã hkôt tanhmã ri amnhĩ nhĩpêx to rãhã ho apa hãmri nẽ nhỹrmã ty nẽ Tĩrtũm pê awry rax ã ri apa. Nom kot kaj mẽ Tĩrtũm Karõ mã hprãm xà hkôt pix mã amnhĩ nhĩpêx nẽ nhỹrmã ty nhũm Tĩrtũm akupým ato atĩr ka kuri amex nẽ ajamakêtkati atĩr tũm nẽ ri apa ho apa.

Mẽ pahte axpên to mex rãhã hã mẽ pamã karõ

Atre 20.35; Wam Korĩt 15.58; Xitre 3.14; Eprêw 13.3, 13.16; Xiakre 1.27

⁹ Jakamã kwa kêr ka mẽ arĩ tãm ri amnhĩ nhĩpêx nẽ tãm axpên nhĩpêx o ri axpên kôt apa nẽ jam anhũrer kêt nẽ. Mẽ ã amnhĩ nhĩpêx o ri apa anhỹr rãhã ty nhũm Tĩrtũm nhỹrmã ja hã mẽ ato mex rax nẽ. ¹⁰ Tã kêr pu mẽ arĩ Kris kôt pahtõjê ho mex rãhã ho ri papa. Nom mẽ tapxipixjê ho mex kêt nẽ. Pu mẽ mẽ piitã mẽ ho mex o axpên pyrãk.

¹¹ E ixte mẽ amã kagà nhĩpêx nẽ mẽnh nhũm mẽ ate ja hã ixpumunh kaxyw kot paj pam kagà jatur xà hã inhĩhkra ho inhĩxi nhĩpêx ka mẽ ixte inhĩxi hã kagà rũnhtita pumu.

Jejus kot mẽ panê htyk ã Pawre kãm harênh prãm ã harênh

Wam Korĩt 1.22-24, 2.1-2

¹² Nẽ mẽ amã Tĩrtũm kapêr o mẽ hêx xwýnhjaja na htem hamaxpêr o:

–Nã kot paj Karatas nhõ xwýnhjê mã Kris pĩ kahpa hã htyk ã harênh o ri ixpa hkêt nẽ. Kot pa anẽ nhũm mẽ ixpê Ijaew kwýjaja ja hã inhma nẽ hã tanhmã inhĩpêx to. Ja pymaj kot paj mẽ kãm tanhmã harênh to hkêt nẽ. Kot paj ãm mẽ kot amnhĩ my kwrýt kà jakàr pix ã mẽ kãm karõ kê mẽ ixkapêr xà hkôt ã amnhĩ nhĩpêx anẽ. Pa hã mẽ omu nẽ ma ixkwýjê mã mẽ hã amnhĩ to jarkrar o ri ixpa. Anẽ.

¹³ Te mẽ kot finat Mojes kapêr kôt ri amnhĩ nhĩpêx pyrãk tã no na htem ã amnhĩ nhĩpêx anhỹr kêt nẽ. Ra mẽ kot amnhĩ jakàr tã no ãm Mojes kapêr piitã hkôt amnhĩ nhĩpêx hkêt nẽ. ãm hkwy hêx kôt pix mã amnhĩ nhĩpêx o pa. Nom kot kaj mẽ ama nẽ mẽ uràk nẽ amnhĩ jakà nhũm mẽ ja hã mẽ apumu nẽ hkĩnh nẽ. Nẽ ma ri mẽ hkwyjê mã mẽ atã amnhĩ to jarkrar o ri pa nẽ mẽ kãm:

—E Karatas nhõ xwýnhjaja na pa prem mẽ kot amnhĩ my kwryt kà jakàr ã mẽ kãm karõ nhũm mẽ inhma nẽ mẽ pahpyrà nẽ ã amnhĩ nhĩpêx anẽ. Anẽ.

¹⁴ No pa na pa hte ã mẽ kãm mẽmoj tã karõ anhÿr o ri ixpa hkêt nẽ. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nẽ htykja pix na pa hte mẽ kãm harẽ. Ra kot inhnẽ htyk jakamã te pa ixte kuri ijêt nẽ ixtyk pyræk. Jakamã ra jar pika ja kamã mẽ kot amnhĩ nhĩpêxja te ixpê htyk nẽ hapêx pyræk pa axte hkõt amnhĩ nhĩpêx kêt pyræk.

¹⁵ No mẽ kot amnhĩ my kwryt kà jakàr xwýnhjaja nẽ mẽ kot amnhĩ jakàr kêt xwýnhjaja na hte Tĩrtũm ja hã mẽ omu nẽ ãm mẽ omu. ãm mẽ pahte amnhĩ nhĩpêx nyw o amnhĩ nhĩpêx o ri papaja pix na kãm hprãm. ¹⁶ Kot kaj mẽ ã amnhĩ nhĩpêx anhÿr o ri apa nẽ apê Tĩrtũm kra mex nhũm mẽ ato mex rax nẽ. Nẽ mẽmoj to mẽ akutã nojarêt rãhã nẽ. Ka mẽ axãmnhĩx ajamakêtkati nẽ ri apa ho apa.

¹⁷ Nẽ na prem Kris ã ixtak rax nẽ nhũm ixkatut ã ixtak xà arĩ rãhã nẽ pa hte hã ixpa. Ixte Jejus Kris mã tanhmã amnhĩ nhĩpêx to xwýnh ã ixto amnhĩrĩt xà na. Jakamã kê mẽhõ axte Jejus kot mẽ awÿr inhmẽnh ã tee ri ixpumu nẽ tanhmã hã ixkukjêr to hkêt nẽ.

¹⁸ E ixkrãmnhwÿjaja. Kê Pahihti Jejus Kris mẽmoj to mẽ akutã nojarêt nẽ mẽ ato mex rãhã ho pa. Nà koja mẽ ato anẽ.

ãm ja pix na hapêx. Ixpê Pawre na pa ã mẽ amã kagà nhĩpêx nẽ mẽ awÿr mẽnh anẽ.

Epes

Pawre kot Epes kãm Jejus kôt hkwỳjê hwỳr kagà nê mẽnh

Pawre na pre kagàja nhĩpêx. Jejus nhỹ hã hkrajê jahkre o pa xwỳnhjê hõ na pre. Jakamã na pre krĩ pê Epes kãm Kris kwỳjê hwỳr hipêx nê kumê. Epes nhõ xwỳnhjaja Ijaew kêt xwỳnh na pre mẽ. Nhũm pre ra Pawre ma mẽ hwỳr mõi mẽ mẽ kãm Tĩrtũm kapêr jarênh o ri mẽ hkôt pa nhũm mẽ hkwỳjaja kuma nê Jejus kôt amnhĩ xunhwỳ.

Na pre hte Pawre ma krĩ piitã hkôt ri Tĩrtũm kapêr jarênh o ri mẽ hkôt pa. Hãmri nhũm mẽ hkwỳjaja Jejus ã unê nê krĩ pê Rõm wỳr kumê nê kamã haxà nhũm arĩ hkrĩ ho hkrĩ. Nom amarĩ hkrĩ hkêt nê. Na pre hte mẽ kot hwỳr mrar xwỳnhjê mã Tĩrtũm kapêr jarê. Nê krĩ hkwỳ hkôt Jejus kôt hkwỳjê mã kagà nhĩpêx nê mẽ hwỳr kurê. Jakamã na pre Epes kamã hkwỳjê hwỳr kagàja nhĩpêx nê mẽ hwỳr kumê.

Nê kagàja kamã hprĩ hã mẽ kot Jejus kôt amnhĩ xunhwỳr xwỳnhjê kot tanhmã amnhĩ nhĩpêx to ho pa hã mẽ kãm karõ. Ra mẽ kot hkôt amnhĩ xunhwỳr jakamã te mẽ htipxi nê ri mẽ pa xwỳnh kot amnhĩ nhĩpêx pyrãk o amnhĩ nhĩpêx o pa hã mẽ kãm hã karõ. Nê jar pika hkôt te mẽ kêp Kris nhĩ pyrã nê pa hã mẽ harê. ã na pre Pawre mẽ kãm mẽmoj jarê nê hã kagà anê nê mẽ kãm:

¹ Pa Epes kãm Kris kôt ixkwỳjaja. Xà mẽ amex na ka mẽ apa? E ot pa mẽ awỳr kagà nhĩpêx nê kumê. Ixpê Pawre na pa hipêx nê mẽ awỳr kumê. Ixpê Jejus Kris nhỹ hã mẽ ahkre ho mẽ ixpa xwỳnh na pa. Tĩrtũm kãm hprãm xà hkôt. Tã pa ã mẽ awỳr kagà nhĩpêx nê mẽ awỳr mẽnh anê. Mẽ apê Tĩrtũm krajê hwỳr. Na ka xep htem Jejus Kris kôt amnhĩ nhĩpêx mex o ri apa. ãm hãmri na ka htem ã amnhĩ nhĩpêx anê.

² E kê Mẽpahpãm Tĩrtũm mẽ Pahihti Jejus Kris wa mẽ ato mex nê mẽmoj to mẽ akutã nojarêr rãhã ho pa. Ka mẽ wa ý hã axãmnhĩx ajamakêtkati nê akĩnh pê tanhmã amnhĩ nhĩpêx to ho ri apa.

Tĩrtũm kot mẽ pakukamã amnhĩm mẽ parênh ã harênh

Rõmãn 8.28-30; Wam Korĩt 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³ Na hte mẽ panhõ Pahihti Jejus Kris nhĩpêxà Tĩrtũmja mẽ pahto mex rãhã ho pa. Mẽ pahpê Kra Kris kwỳ hã mẽ pahpumunh kôt tanhmã mẽ pahto mex to ho pa. Ra wa Karõja mẽ pahkarõ mã gjêx jakamã te ra mẽ pahte kaxkwa kamã wa kuri mẽ pamex nê mẽ papa pyrãk. Tã ra mẽ pahte jar pika ja kamã paxãmnhĩx pajamakêtkati mẽ pamex nê ri papa jakamã kwa kêr pu mẽ amnhĩm ãm mex o mex ã harênh rãhã nê.

⁴⁻⁵ Amnepê mã kormã mẽmoj kêt ri na pre Tĩrtũm mẽ pakukamã amnhĩm mẽ parê. Kris kukwak ri amnhĩm mẽ parê. Tã mẽmo kaxyw na pre ã mẽ pakukamã mẽ parênh anê? ãm mẽ pahte kapêr kôt pix mã amnhĩ nhĩpêx o ri papa kaxyw. Jao tãm kot amnhĩ nhĩpêx pyrã nê noo mã tãm amnhĩ nhĩpêx o ri papa. Kãm mẽ pajapê jakamã na pre mẽ pakukamã tanhmã hamaxpêr to nê hamaxpêr o:

—Nà Ixkra Jejus Kris koja nhỹrmã ma mẽ hwỳr wrỳ nê mẽ nê ty. Tã mẽ kot mẽ nê htyk ã harênh mar nê amnhĩ kaxyw hkôt hamaxpêr xwỳnhjaja kot paj mẽ ho ixkra. Nà kot paj ã mẽ hipêx anê. Anê.

⁶ No mẽ papajaja tanhmã mẽ pahte amnhĩ nhĩpêx mex to hã mẽ pahpumunh kôt na pre ã mẽ pahto hkra hã mẽ pajarênh anhỹr kêt nê. ãm Kra Kris pix kukwak ri na pre ã mẽ pajarênh anê. Kãm Kra japê jakamã na hte mẽmoj to mẽ pahpê hkwỳ hã mẽ pakutã nojarêr rãhã ho pa. Jakamã na pu htem amnhĩ tã kãm mex o mex ã harênh o papa.

⁷⁻⁸ Na pre Krisja mẽ panê htyk o Tĩrtũm mã mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhỹr ã omunh xà hkôt mẽ pahte hkôt amnhĩ xunhwỳr xwỳnhjê nê mẽ pahte amnhĩ tomnuj rênh pa. Koja aa tanhmã hã mẽ pahto hkêt nê. Pu mẽ axte amnhĩ amnhĩ tomnuj o papa hkêt nê. Hêxta waa nê. Kãm mẽ pajapê htyx kumrêx jakamã na pre ã mẽ pahto mex rax anê. ãm mex o mex nê àhpumunh o àhpumunh.

9-10 Amnepê m na pre hamaxpêr o:

—Nà na pa ra kaxkwa ho ixkato nê kamã mêmoj piitã ho ixkato. Nê pika ho ixkato nê kamã mêmoj piitã ho ixkato. Tã koja nhÿrmã Ixkra Kris mêmoj piitã ho amnhÿptâr o pa. Kaxkwa kamã nê pika piitã hkôt mêmoj piitã ho amnhÿptã nê tapxipix inhÿ hã kêp mêmõ Pahihtî. Koja ã amnhÿ nhÿpêx anhÿr xà hã arÿgro kato nhÿm ã amnhÿ nhÿpêx o pa anê. Nà ja na inhmã hprãm. Anê.

Ã Tÿrtÿm amnhÿ kukamã hamaxpêr anhÿrja kôt na pre Kris kêp mêmõ panhõ Pahihtî hã harê. Tã nhÿrmã mêmõ pahto amnhÿptâr kaxyw koja mêmõ pakaxyw ãm. Amnepê m ri mêmõ pa xwÿnhjê mã kot kormã ja ho amnhÿrît kêt tã ra jarãhã mêmõ pamã ho amnhÿrît.

¹¹ Kris kukwak ri na pre amnhÿm mêmõ parê. Ra kot mêmõ pakukamã mêmõ pahtã amnhÿ jarênh xà hkôt. ¹² Tã mêmõ ixpê Ijaew kwÿ kumrêx mêmõ ixte Kris kôt amnhÿ xunhwÿr jakamã koja mêmõ piitã mêmõ inhÿ hã Tÿrtÿm mã mex o mex ã harênh o ri pa.

¹³ Nê mêmõ kajaja na ka prem mêmõ ixpyrà nê Tÿrtÿm kapêr ma nê ajaxwÿja hkôt amnhÿ xunhwÿ. ãm hãmri na Tÿrtÿm kapêrja. Tã ka prem ama nê hkôt amnhÿ xunhwÿ. Hãmri nhÿm amnhÿ tã mêmõ apumu nê kot inhÿpêx pyrà nê mêmõ anê mêmõ ate amnhÿ tomnuj piitã rênh pa nê mêmõ ato hkra. Hãmri nê mêmõ awÿr Karõ rê nhÿm mêmõ awÿr wrÿ nê mêmõ akarõ mã agjê nê mêmõ akamã pa ho pa. Kris kukwak ri na pre mêmõ awÿr kurê. Amnepê mã na pre mêmõ pakukamã hamaxpêr o:

—Koja mêmõ Ixkra hkôt amnhÿ xunhwÿ pa ja hã mêmõ omu nê mêmõ ho ixkra nê mêmõ hwÿr Ixkarõ rê. Hãmri nhÿm mêmõ hkarõ mã agjê nê mêmõ kamã hkrÿ ho hkrÿ.

¹⁴ Anhÿr jakamã na pre mêmõ pahwÿr kurê nhÿm mêmõ pahwÿr wrÿ nê mêmõ pahwÿr agjê nê mêmõ pakamã hkrÿ ho hkrÿ. Pu mêmõ ja hã amnhÿ pumu nê pajamaxpêr o:

—Nà ra Tÿrtÿm kot ixwÿr Karõ mênh jakamã na ixkarõ hwÿr axà nê kamã hkrÿ ho hkrÿ. Tã koja ra kot mêmõ ixtã amnhÿ jarênh xà hkôt ja hã ixto mex nê. Ra kot ixto hkra kênã. Jakamã koja nhÿrmã ma amnhÿ wÿr ixto api pa kuri inhmex kumrêx nê ixpa ho ixpa. Hãmri nê kukwak ri axte

tanhmã amnhÿ tomnuj to ho ri ixpa hkêt nê. Anê.

Jakamã koja mêmõ piitã ã kot mêmõ ho mex anhÿr ã amnhÿ tã kamã ama nê amnhÿ tã omu nê kãm mex o mex ã harênh rãhã ho pa.

Pawre kot Epes nhõ xwÿnhjê ho Tÿrtÿm wÿr ã harênh

Piripos 1.9; Korosê 1.9-12; Wam Tesarõn 5.23; Sikÿn Tesarõn 1.11, 2.16; Eprêw 13.20

¹⁵ Nê na ka xep htem amnhÿ kaxyw Kris kôt ajamaxpêr tÿx pê amã Tÿrtÿm krajê piitã mêmõ hkÿnh o mêmõ ho mex o apa. Na pa pre mêmõ ajarênh ma nê ixkÿnh tÿx nê. ¹⁶⁻¹⁸ Nê xatã mêmõ ato Tÿrtÿm wÿr o ri ixpa nê mêmõ ato hwÿr o:

—Pa Mêmõnhÿpêxã maati Tÿrtÿm. Nà amex o amex. Ka na ka pre mêmõ ixwÿr mêmõ inhõ Pahihtî Jejus Krisja mêmõ nhÿm mêmõ ixwÿr wrÿ nê hprÿ hã mêmõ inhmã ate tanhmã amnhÿ nhÿpêx to ho apa hã ato amnhÿrît. Tã Epes kãm akrajaja na xep htem akôt pix mã ri amnhÿ nhÿpêx rãhã ho ri pa. ãm hãmri na htem ã amnhÿ nhÿpêx anê.

—Nê kwa Tÿrtÿm. Kê Akarõ tanhmã mêmõ hkrã hto kê mêmõhprÿ hã akapêr mar tÿx rãhã ho pa. Jao ra ate mêmõ ixkukamã mêmõ ixtã tanhmã mêmõ ixto mex to hã amnhÿ jarênhja kê mêmõ kãm hamaxpêr tÿx rãhã ho pa. Nê ate nhÿrmã mêmõ ixpê akrajaja mêmõ ixpiitã tanhmã mêmõ ixto mex to jarênhja kê mêmõ kãm hamaxpêr tÿx pê hkÿnh rãhã ho pa ho pa.

¹⁹⁻²⁰ —Nê kê mêmõ axãhpumunh o axãhpumunh ã ate akupÿm Akra Kris o htÿr ã apumunh mex nê Tÿrtÿm. Na ka pre axãhpumunh xà ho akupÿm ho htÿr nê ma akupÿm anhõ krÿ hwÿr ho api nê amnhÿ nhÿhkõ hã ÿr nhÿm arÿ hkrÿ ho hkrÿ. Apyrà nê kot mêmõ ixto amnhÿptâr kaxyw. ã axãhpumunh xà htÿx kot anhÿr. Tã kê akrajê piitã ja hã apumu nê axãhpumunh tÿx o ate tanhmã mêmõ ixto ajuta hto ho apa hã apumu.

Anhÿr o na pa hte mêmõ ato hwÿr o ri ixpa.

²¹ Nê Krisja ãhpumunh tÿx o mêmõkarõmnuti piitã hakrenh. Nê hihtÿx o mêmõ hakrenh jakamã krÿ nhõ xwÿnhjê mã te mêmõ ãhpumunh tÿx kêt pyràk o na htem htÿx ri amnhÿ nhÿpêx o pa pyràk. Nê Krisja hihtÿx o pika piitã hkôt pahi piitã mêmõ hakrenh

par kumrêx. Nê hihtýx o kot pika piitã hkôt mêmoj piitã mē hakrenh par. Jakamã mēhõ koja we tanhmã kot amnhĩ nhĩpêx to hã kãm karõ rý kãm hamaxpêr gõ? Nã amrakati kumrêx. Ra kot ã amnhĩ nhĩpêx anhýr rãhã nê pa ho pa xwýnh kênã. Nê hihtýx o hihtýx rãhã nê pa ho pa xwýnh. Nê àhpumunh o àhpumunh rãhã nê pa ho pa xwýnh. Nê hihtýx o kot jar pika ja kôt mē pajakrenh par nê hihtýx o Tirtüm nhõ krĩ kamã mē mêmoj piitã hakrenh par. Tã koja mêmoj piitã ho amnhĩptàr rãhã htĩr tùm nê pa ho pa.

Kris te kêp mē pahkrã pyrãk ã harênh
Rômãn 12.4; Wam Korĩt 12.12; Epes 4.16;
Korosê 3.25

²² Na pre Tirtümja Kra Kris nhĩhkram mêmoj piitã haxàr pa. ý hã kot nhýrmã ho amnhĩptàr o pa kaxyw. Jakamã kot mē pahto amnhĩptàr xwýnh ã kêp mē panhõ Pahihti. Nê te kêp mē pahkrã pyrãk. Nê mē papajaja te mē pahpê ì pyrãk jakamã na pu htem hkôt ri amnhĩ nhĩpêx o papa. ²³ Na hte mē panhĩja mē pahkrã kamã mē pajamaxpêr xà hkôt tanhmã amnhĩ nhĩpêx to. Ja pyrã nê na pu htem mē pahkrã pyrãk xwýnh Krisja kapêr ma nê hkôt tanhmã ri amnhĩ nhĩpêx to ho ri papa.

Koja mēhõ ãm hkrã pix nê ì hkêt nê pa hãmri nê mex kêt nê. Na htem hkrã nê mããnên ì nê pa nê mex nê. Ja pyrã nê na hte Kris mē pahte hkôt amnhĩ nhĩpêx o papa hã mē pahpumu nê hkĩnh nê mex nê pa. Pu mē pajaxwýja hkôt ri amnhĩ nhĩpêx ã amnhĩ pumu nê pahkĩnh nê pamex nê papa ho papa.

2

Tanhmã Tirtüm kot mē pahto hkra hto ã harênh

Wam Korĩt 6.11; Xitre 2.11-3.7

¹ Nê amnepê mã na pu pre htem Tirtüm kàx ã tanhmã amnhĩ tomnuj to ho ri papa. ² Nê jar mē kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nê mēkarõmnuti nhõ pahi Satanasti kapêr kôt pix mã ri amnhĩ nhĩpêx rãhã nê. Na pre hte tanhmã mē pahkôt mē pahto ho pa. Mē pahte tanhmã amnhĩ tomnuj to kaxyw mē pamã mē pajamaxpêr punuj

jagjê. Pu mē amnhĩ tã omunh kêt tã ý hã amnhĩ tomnuj o papa. Satanastija kêp mē kot Tirtüm kapêr kwým ri amnhĩ nhĩpêx o mē pa xwýnhjê nhõ pahihti na. Tã pu pre htem pahtýx ri hkôt amnhĩ nhĩpêx pix o ri papa. ³ Mē pahpiitã tanhmã amnhĩ tomnuj to hprãm xà hkôt pix mã tanhmã amnhĩ nhĩpêx to. Nê mêmoj punuj kukamã pajamaxpêr nê ra hkôt ã amnhĩ tomnuj anê. Æ na pu prem mnĩ nhĩpêx anê nhũm Tirtüm ja hã mē pahpumu nhũm ja kãm mex kêt nê. Jakamã nhũm tee ri mē pakukamã hamaxpêr nê hamaxpêr o:

—Hêxta waa nê. Na htem ixkapêr kwým ri tanhmã amnhĩ tomnuj to rãhã ho pa. Æ mē kot amnhĩ nhĩpêx anhýr o mē pa xwýnhjaja koja mē nhýrmã ixri htĩr tùm nê mex nê pa ho pa hkêt nê. Ixkĩnhã mē kot amnhĩ tomnuj xwýnh jakamã tanhmã kot mē amnhĩ to nê ixri htĩr tùm nê pa ho pa? Nã mē kot amnhĩ tomnuj mýrapê koja mē nhýrmã ma amnhĩ xà htýx kamã hamak tùm xàta wýr ma hapêx pa. Nã koja mē anê. Hêxta waa nê. Inhmã ma hwýr mē pa prãm kêt tã ra ma hwýr mē pa kaxyw.

Anhýr o hamaxpêr. ⁴⁻⁵ Nê amnepêm ko-rmã mē pahte amnhĩ tomnuj o papata ã te mē pahte amnhĩ xà htýx kamã pajamak tùm xà hwýr pryta ã mē papa pyrãk. Nom Tirtüm kãm mē pajapê nê mē pakamã ukaprĩ jakamã na pre mē pahto mex rax nê. Nê akupým Kris o htĩrja ri te ra mē pahte amnhĩ xà htýx kamã pajamak tùm xà hwýr pryta nê mē pahto ujanãr pyrãk o mē panhĩpêx. Mē pakamã ukaprĩ nê kãm mē pajapê ho ã mē panhĩpêx anê. Amarĩ ã mē panhĩpêx anê nê mē panê mē pahte amnhĩ tomnuj rênh pa. Jakamã kot puj mē pahte Kra hkôt amnhĩ xunhwýr xwýnhjaja nhýrmã amnhĩ xà htýx kamã mē hamak tùm xàta wýr papa hkêt nê. ⁶ Ra Tirtüm akupým Jejus Kris o htĩr jakamã te ra Jejus kôt akupým mē pahpê hkwyjê ho mē pahtĩr pyrãk. Jakamã te ra õ krĩ kamã ìhkõ hã mē pamex kumrêx nê pahkrĩ pyrãk. ⁷ Mēmo kaxyw na pre Tirtüm kãm mē pajapê hkôt ã mē pahwýr Jejus Kris mēnh nhũm mē panê htyk anê? Nã kãm mē pajapê htýx ã mē pahte pahprĩ hã amnhĩ tã omunh kaxyw na pre ã mē pahwýr mēnh anê. Tã kot puj

mě nhÿrmã kaxkwa kamã hwÿr pôj nhÿm
mě pamã amnhÿ jarēnh o:

—E mẽ amnē ixpumu. Inhmã mẽ ajapē
htÿx jakamã na pa pre mẽ akamã ixukapri
xàj ma mẽ awÿr Ixkra Jejus Krisja mẽ nhÿm
amnhi grōnh kôt mẽ awÿr wrÿ nē mẽ anē
ty. Inhmã mẽ ajapē htÿx jakamã na pa pre
ã mẽ awÿr mēnh nhÿm mẽ anē htyk anē.
Inhmã mẽ apē ixkrajē japē xàj na pa pre ã
mē ato mex rax anē.

Anhÿr o mẽ pamã kapēr hāmri nē mẽ
pahto mex rāhã ho pa. ⁸⁻⁹ Xà na pu prem
pahpē hkra hprām xàj amnhÿ krã hkôt mẽ
papamjaja kām tanhmã amnhÿ to mex to
nē kām:

—E kwa Tirtūm. Na pa ã amnhÿ to mex
anē nē ã amnhÿ to mex anē. Jakamã kwa
ja hã ixpumu nē ixto akra nà?

Anhÿr o na pu prem amnhÿ to kuwÿ?
Nà na pu prem ã amnhÿ to hwÿr anhÿr
kēt nē. Na pu prem amnhÿ kaxyw hkôt
pajamaxpēr nē hkôt amnhÿ xunhwÿ nhÿm
ja pix ã mẽ pahpumunh kôt mẽ panē mẽ
pahte amnhÿ tomnuj rē nē mẽ pahto hkra.
Kām mẽ pajapē nē mẽmoj to mẽ pakutã
nojarēt rāhã ho pa jakamã na hte ã mẽ
panhÿpēx mex anē. Jakamã na pu htem
amnhi tã omu nē pajamaxpēr o:

—Nà na xep hte Tirtūmja mẽ pahte
tanhmã amnhÿ nhÿpēx to ho papa hã
mē pahpumunh kôt mẽ pahto hkra hkēt
nē. Ām mẽ pahte amnhÿ kaxyw kām
pajamaxpēr ã mẽ pahpumunh kôt pix mã
na hte mẽ pahto hkra. Anē.

¹⁰ Nē Tirtūm tapxipix na hte tanhmã mẽ
pahto pu mẽ amnhÿ to mex rāhã ho papa.
Nom kormã kot mẽ pahto hkra hkēt ri na
pu prem ã amnhÿ nhÿpēx anhÿr kēt nē. Tã
Jejus Kris kôt amnhÿ xunhwÿ nhÿm Tirtūm
ja hã mẽ pahpumu nē mẽ pamã mẽ pahte
amnhi nhÿpēx nyw jagjē pu mẽ ŷ hã tām
amnhi nhÿpēx o ri papa. Amnepēm tanhmã
kot mẽ pakukamã hamaxpēr to xà hkôt. No
na hte tanhmã mẽ pahte amnhÿ krã hkôt
amnhi nhÿpēx to hã mẽ pahpumunh kôt mẽ
pahto hkra hkēt nē.

*Tirtūm krajaja te kot axpēn to htō nē htōx
pyrāk*
Karatas 3.28; Korosē 1.21-23

¹¹ E mẽ apē Ijaew kēt xwÿnhjaja. Na ka
htem mẽ akatorxà nhōhy rūm ajapōj hāmri
nē mẽ ixpē Ijaew pyrã nē amnhÿ my kwÿt
kà jakàr kēt nē. Jakamã na pre ixkwÿjaja
mē akurom amnhÿ jakàr ã amnhÿ to jarkrar
o ri pa nē amnhÿ jarēnh o:

—Ra mẽ ixte amnhÿ my kwÿt kà jakàr
ã mẽ ixpumunh kôt na hte Tirtūm mẽ ixto
hkra. Tã Ijaew kēt xwÿnhjaja kot mẽ ixkÿnhã
amnhi jakàr kēt jakamã mẽ kēp hkra hkēt.
Nē mãānēn mẽ kēp mẽ pahkwÿ hkēt.

Anhÿr o mẽ ajarēnh o pa. ¹² Ām hāmri na
prem mẽ apē mẽ ixkwÿ hkēt ã mẽ ajarē.
Na pa prem mẽ akurom amnhÿ my kwÿt
kà jakà nē mẽ akurom Kris kamã ijamak
o ri ixpa. Jakamã nhÿm Tirtūm kot mẽ
ixto mex ã amnhÿ jarē pa mẽ mẽ apyrã
nē tee ri amnhÿ kukamã ijamaxpēr o ri
ixpa hkēt nē. Nē mẽ akurom amnhÿ kaxyw
Tirtūm mã ijamaxpēr. Nà Ām hāmri na
prem mẽ apē mẽ ixkwÿ hkēt ã mẽ ajarē.

¹³ Te Tirtūm kàx ã ri mẽ apa pyrāk tã ka
mē arÿ ã amnhÿ nhÿpēx anhÿr kēt nē. Jejus
Kris kot mẽ panē htyk nhÿm mẽ ate hkôt
amnhi xunhwÿr jakamã ra mẽ apē hkwyÿ.
Jao arÿ hkàx ã ri apa hkēt nē. Te mẽ ixpē
Ijaew kwÿ pyrã nē hpānhã kuri ra ri apa
pyrāk. ¹⁴ Jakamã na pu htem Kris kukwak
ri ra axpēn nhÿpēx nyw o axpēn nhÿpēx
o ri papa. Mē ixpē Ijaewjaja nē mẽ apē
Ijaew kēt xwÿnhjaja na pu htem te ra ixkre
tipxi kamã ri papa pyrāk. Nom amnepēm
na pu prem ã axpēn nhÿpēx anhÿr kēt nē.
Mē pahte amnhÿ nhÿpēx tūmja ahpÿnhã na
pre. Na pu prem pamã axpēn kurē nē
axpēn kàx ã ri papa. Nē nhÿri axpēn pumu
nē te pahte axpēn pumunh kēt pyrã nē
nhām parÿt o ri mra. Tã nhÿm Kris mẽ
panē htyk o mẽ pahte amnhÿ tomnuj piitã
hpānhã amnhÿrer pa. Mē ixpē Ijaew nē
mē apē Ijaew kēt xwÿnhjaja. Nē htyk o
te ra kot mẽ pahte axpēn nhōrkwyÿ hwÿr
axpēn wÿr o papa pyrāk. Jao mẽ pamã
axpēn kurē ho hapēx nē hpānhã tām axpēn
kaxyw mẽ paxunhwÿ pu mẽ hpānhã axpēn
to mex rāhã ho ri papa. ¹⁵ Amnepēm Mojes
kot Tirtūm nhÿ hã mẽ ixpē Ijaew mẽ ixte
tanhmã amnhÿ nhÿpēx to ho ixpa hã karōja.
Na pa prem mẽ apē Ijaew kēt xwÿnhjaja
mē ate Tirtūm kôt amnhÿ nhÿpēx kēt ã mẽ

apumu nê mē akamã inhgryk nê. Nê axpên mã mē ajarênh o:

—Nà mē pahkĩnhã mē kot Mojes kapêr kôt amnhĩ nhĩpêx kêt jakamã koja Tĩrtũm mē ho hkra hkêt nê.

Anhỹr tã nhũm Kris mē pahwỳr wrỳ nê mē pahpiitã mē panê htyk o mē pahte hkôt amnhĩ xunhwỳr ã mē pahpumunh kôt pix mã mē pahto Tĩrtũm kra. Jakamã pa mē axte mē ate Mojes kapêr kôt amnhĩ nhĩpêx kêt ã mē apumunh kôt mē apê Tĩrtũm kra hkêt ã mē ajarênh kêt nê. Hãmri nê mē ixpê Ijaew nê mē apê Ijaew kêt xwỳnhjaja pu mē axte axpên kãm pagryk o ri papa hkêt nê. Ra te ixkre tipxi kamã mē pahte axpên kôt ri papa pyrãk.

¹⁶ Kris na pre pĩ kahpa hã mē panê htyk o ã mē panhĩpêx anê nê mē pahte axpên kôt amnhĩ nhĩpêx o papa kaxyw mē paxunhwỳ. Nom Tĩrtũm jamaxpêr xà hkôt ã mē panhĩpêx anê. Jakamã na pu htem arĩ pamã axpên kurê ho papa hkêt nê. ¹⁷ Na pre Kris mē pahwỳr wrỳ nê ã mē panhĩpêx anê. Mē apê Ijaew kêt xwỳnhjaja mē ate kormã Tĩrtũm kapêr mar kêt xwỳnhjaja nê mããnên mē ixpê Ijaew mē ixte kapêr mar mex xwỳnhjaja nhũm pre akupỹm tãm mē pahte axpên kôt amnhĩ nhĩpêx o papa kaxyw mē paxunhwỳ. ¹⁸ Hãmri nhũm Tĩrtũm mē pahwỳr amnhĩ Karõ rê nhũm mē pahkarõ mã agjê. Kris kukwak ri pix mã mē pahwỳr kurê pu mē ý hã paxãmnhĩx ri kãm tanhmã amnhĩ jarênh to ho ri papa. ¹⁹ Hãmri nê te mē pahpê nhãm axpên kaxyw mē urojê pyrã nê axpên kàx ã ri papa hkêt nê.

Te mē pahpê Tĩrtũm nhõrkwỹ pyrãk ã mē pajarênh

Wam Korĩt 3.16; Sikũn Korĩt 6.16; Wam Pêtre 2.5

²⁰ Nê mē pahpê Jejus kwỳ jakamã te mē pahte ixkre tipxikamã ri papa pyrãk. Nê te mē pahpê ixkre nhĩpêx mex pyrãk. Nê Kris te kêp ixkre hkrax mã kuhê xà nê kỳxpê kãm nõr xà maatija pyrãk. Nê mē kot Jejus nhỹ hã mē ahkre xwỳnhjaja nê mē kot Tĩrtũm nhỹ hã kapêr o ri mē pa xwỳnhjaja te mē kêp ixkre nhõkwa êja pyrãk. Nê mē papajaja te mē pahpê ixkre nhĩmõk ã põja pyrãk. ²¹ Ixkre mã kuhê xà nê kỳxpê

kãm nõr xà maati kukwak ri pix mã na hte õkwa ê nê hã põja kỳxpê mex nê axpên tã harir. Ja pyrã nê ãm Kris kukwak ri pix mã na pu htem te ixkre tipxi kamã ri papa pyrãk o axpên nhĩpêx mex o ri papa. Te mē pahpê mē kot ixkre rax kumrêx nhĩpêx o mõr nhũm muxre nê ãm xwỳnhta pyrãk.

²² Na htem amnhĩm õrkwỹ nhĩpêx nê hipêx pa nê hwỳr agjê nê kamã pa ho pa. Ja pyrã nê na hte Tĩrtũm Karõja mē pahpê hkrajê karõ mã agjê nê mē pakamã pa ho pa. Te mē pahpê Tĩrtũm nhõrkwỹ pyrãk. Mē ixpê Ijaew nê mē apê Ijaew kêt xwỳnhjaja Tĩrtũm mã te mē pahpê õrkwỹ pyrãk.

3

Pawre kot Ijaew kêt xwỳnhjê mã mẽmoj to amnhĩrĩt ã harênh

Rõmãn 15.14-21; Korosê 1.24-29

¹ Tã te mē pahpê Tĩrtũm nhõrkwỹ pyrãk jakamã na pa hte jar mē hagjênh xà kamã mē ato hwỳr rãhã ho ixkrĩ. Na pa pre hte ma mē apê Ijaew kêt xwỳnhjê hwỳr ixpa nê ixprĩ hã mē amã Jejus kapêr jarênh o ri mē akôt ixpa. Mỳrapê na prem ixpynê nê ijaxà pa arĩ jar ixkrĩ ho ixkrĩ. Nom arĩ amnhĩ kaxyw Tĩrtũm mã ijamaxpêr tỳx pê mē ato hwỳr rãhã ho ixkrĩ. ² Na pre kãm ijapê hã mē apê Ijaew kêt xwỳnhjê kaxyw ixãm. Ma ixte ri mē akôt ixpa nê mē amã kapêr jarênh o ri mē akôt ixpa kaxyw. Ra mē ate ja hã ijarênh mar mex. ³ Na pre mē pahto hpimràatã tanhmã mē pahto mex to hã inhmã amnhĩ to amnhĩrĩt pa pre omu. Mē kajaja nê mē pajaja. Pika piitã hkôt mē piitã tanhmã mē ho mex to. Na pre kormã kot mẽhõ mã ja jarênh kêt tã inhmã ho amnhĩrĩt pa pre omu. Tã kagà ja kamã kot paj mē amã hkwy ho grêre nê ho amnhĩrĩt nê mē amã hã kagà ka mē ixpyrã nê kamã harê nê ama. ⁴ Jao aprĩ hã mar mex nê. ⁵ Amnepêm mē pahkêt ri mē pa xwỳnhjê mã Tĩrtũm kot ja ho amnhĩrĩt kêt tã nhũm Karõ mē ixkwỳjê kumrêx mã ho amnhĩrĩt. ý hã kapêr o ri mē pa xwỳnh mē mē ixpê Jejus nhỹ hã mē ajahkre o mē ixpa xwỳnhjê kumrêx mã ho amnhĩrĩt. Mē ixte kãm tanhmã amnhĩ nhĩpêx to ho ixpa xwỳnhjê mã ho amnhĩrĩt pa prem omu. ⁶ Na pre mē inhmã tanhmã mē ato amnhĩrĩt to pa

prem ja hã mẽ apumu nẽ mẽ akukamã ijamaxpêr o:

—Nà ãm hãmri koja xep Ijaew kêt xwýnhjaja mẽ ixpê Ijaew pyrà nẽ Tĩrtũm kapêr ma nẽ Jejus Kris kôt amnhĩ xunhwý nhũm Tĩrtũm ã mẽ kot amnhĩ nhĩpêx anhỹr ã mẽ omu nẽ mẽ ixpyrà nẽ mẽ ho hkra nẽ mẽ ho mex o pa. Anẽ.

⁷ Tã nhũm Tĩrtũmja mẽ awýr inhmẽ. Ixte mẽ amã ja jarênh o ri mẽ akôt ixpa nhũm tokyx mẽ ate mar kaxyw. Na pre ixto mex nẽ kãm hprãm xà hkôt mẽ akaxyw ixãm nẽ ixte ý hã kãm tanhmã amnhĩ nhĩpêx to ho ixpa kaxyw ixto ixihýtýx nẽ mẽ awýr inhmẽ. ⁸ Tã mo kaxyw na pre mẽ akaxyw ixãm? Te ixte ja kaxyw inhmex kêt pyræk. Ixkwýjaja ja kaxyw mex o kot ijakrenh tã nhũm pre ixpumu nẽ tanhmã hamaxpêr to nẽ mẽ akaxyw ixãm nẽ mẽ awýr inhmẽ. Ixte mẽ amã mẽmoj mex kumrêx jarênh o ri mẽ akôt ixpa kaxyw. Na pre inhmã:

—Kêr ka ma Ijaew kêt xwýnhjê hwýr mō nẽ mẽ kãm Jejus Kris kapêr jarênh o ri mẽ hkôt apa. Nẽ mẽ kãm: “Kot kaj mẽ Jejus Kris kôt amnhĩ xunhwý hãmri nẽ kukwak ri amex nẽ apa.” Anẽ. ⁹ Koja mẽ apê Ijaew kwýjê pyrà nẽ amnhĩ kaxyw Ixkra Kris kôt hamaxpêr nẽ hkôt amnhĩ xunhwý pa hã mẽ omu nẽ mẽ ho ixkra. Kormã aa ixte mẽ kãm ja hã amnhĩ to amnhĩrĩt kêt tã pa akumrêx mã harê. E ma mẽ hkôt ri mẽ kãm ã ijarênh anhỹr o ri apa kê mẽ ijarênh ma.

Anhỹr o mẽ pahto kator xwýnh maatija inhmã kapêr. ¹⁰ Tã mẽmo kaxyw na hte mẽ pahto hpimràatã mẽ pahto hkra? Nà kaxkwa kamã kapêr o mẽ wrýk xwýnh pytâr xwýnhjaja nẽ mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpên mã tanhmã Tĩrtũm jarênh to kaxyw. Nẽ harênh o:

—Kokýý. Tĩrtũm àhpumunh týtýx o àhpumunh týtýx jakamã na hte tanhmã mẽ hipêx to nhũm mẽ tãm amnhĩ nhĩpêx mex o pa. Nà Tĩrtũm àhpumunh o àhpumunh nẽ hihtýtýx o hihtýtýx. Anẽ.

Koja mẽ ate amnhĩ to mex o apa hã mẽ apumu nẽ ã axpên mã Tĩrtũm jarênh anẽ.

¹¹ Amnepêm kormã mẽmoj kêt ri na pre Tĩrtũm mẽ pakukamã mẽ pahtã tanhmã amnhĩ jarênh to hãmri nẽ Jejus kukwak ri ã mẽ panhĩpêx anẽ. Jao mẽ piitã mẽ kãm

àhpumunh o àhpumunh ã amnhĩ to amnhĩrĩt. ¹² Tã pu mẽ ra Jejus kukwak ri amnhĩ kamã pamã Tĩrtũm pyma hkêt nẽ. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxàmnhĩx ri kãm amnhĩ jarênh rãhã ho ri papa. Te ra pahte hwýr paxàpir nẽ pano ho omunh nẽ kãm pakapêr o pakuhê pyræk. ¹³ Jakamã kwa kêr ka mẽ kot mẽ atã tanhmã ixtomnuj to hã ijarênhja ma nẽ tee ri ixkukamã ajamaxpêr hkêt nẽ. Kwãr mẽ mãmrĩ tanhmã inhĩpêx to. ãm ixte mẽ amã amnhĩ jarênh ma nẽ axpên mã ijarênh o:

—Hêxta waa nẽ. Mãn Pawre kãm mẽ pajapê hã na pre amnhĩ grõnh kôt mẽ pamek kaxyw mẽ pahwýr mra nẽ mẽ pamã Tĩrtũm kapêr jarênh o pa. Mẽ kot ja hã tanhmã hipêx kati hto htã nhũm jam urer kêt nẽ. Anẽ.

Kris kãm mẽ pajapê kamã tanhmã mẽ panê amnhĩ nhĩpêx to

Juãw 3.16; Wam Juãw 3.1

¹⁴ Nẽ na pa hte mẽ ato Mẽpanhĩpêêxà maati hwýr kãm ixihýtýx o ixpa. ¹⁵ Kêp mẽ pahte hkôt amnhĩ xunhwýr xwýnhjê nhõ Pahi Maati mex kumrêx na. Kra hkwyjaja ra kaxkwa kamã kuri htĩr tũm nẽ pa ho pa nẽ arĩ pyka ja kamã mẽ pahpê hkwyjaja kormã jar papa. Nom te mẽ pahpiitã mẽ pahte ixkre tipxi kamã Tĩrtũm kôt ri papa pyræk. ¹⁶ Jakamã na pa hte mẽ ato hwýr o:

—Pa Tĩrtũm. Nà amex o amex. E ot pa Epes nhõ xwýnhjê ho awýr o ixkrĩ. Kwa kê Akarõ mẽ kãm axàhpumunh xà hkwy gō kê mẽ akôt ri amnhĩ nhĩpêx rãhã ho pa.

¹⁷ —Nẽ kê mẽ amnhĩ kaxyw Kris kôt hamaxpêr týtýx o pa. Te mẽmo pĩ hpâr jarê kot pika kaxwýnh kãm pimãnh nẽ pika jamýnh týtýta pyræk. Nhũm kôk xàpêr týtýtã tee kot kãm mênh prãmta pyræk. Kê mẽ pĩ hpâr jarê kot pika jamýnh pyrà nẽ kãm axpên kĩnh o pa. Jao mẽmoj to axpên kutã nojarêt rãhã ho pa.

¹⁸⁻¹⁹ —Nẽ kê krĩ piitã hkôt mẽ akrajê pyrã nẽ amnhĩ tã Kris kãm mẽ hapê htýtýx o mẽ hapê htýtýx ã amnhĩ pumu. Jao uræk nẽ mẽ kãm axpên kĩnh týtýx o pa. Nẽ kê mẽ ate amnhĩ nhĩpêx pix o amnhĩ nhĩpêx rãhã ho pa. Nẽ ajamaxpêr pix o hamaxpêr rãhã

ho pa. Jao te mẽmo pĩ hpàrta pyrà nẽ akõt hihtỳx nẽ. Anẽ.

²⁰ Kot puj mẽ ã amnhĩ to Tĩrtũm wỳr anẽ nhũm mẽ pama nẽ ra àhpumunh tỳx xà ho ã mẽ panhĩpêx anẽ. Ra kot mẽ pakamã pa ho pa kênã. ²¹ ã Tĩrtũm Jejus Kris kukwak ri mẽ pahpê hkrajê nhĩpêx anhỳr jakamã kwa pu mẽ pahpê hkra xwỳnhjaja kêt pu mẽ kãm mex o mex ã harênh rãhã ho papa. Nà kot puj mẽ ã kãm anhỳr o papa.

4

Te ixkre tipxi kamã axpẽn kõt ri mẽ papa pyræk

Rõmãn 15.5; Piripos 2.1-4; Korosẽ 3.12-17; Wam Pêtre 3.8

¹ Nẽ ra mẽ kot Kris ã ijaxàr nhũm ixkrĩ htã pa ã inhmã mẽ akĩnh xàj mẽ amã ixkapêr nẽ hã kagà anhỳr o ixkrĩ. Kwa kêt ka mẽ Tĩrtũm kot amnhĩ nhĩpêx kõt amnhĩ nhĩpêx mex rãhã ho ri apa. Ja kaxyw na pre amnhĩ kõt mẽ awỳ ka prem hkõt amnhĩ xunhwỳ.

² Nẽ kêt ka mẽ amã amnhĩ to rax o akwỳjê jakrenh prãm o ri apa hkêt nẽ. Nẽ mẽ agryk tokyx anhỳr kêt nẽ. ãm axpẽn kãm axukapĩ pix o mãn ri axpẽn kõt apa. Kê mẽhõ tee tanhmã ri mẽ ato htã ka mẽ kamã agryk tokyx anhỳr kêt nẽ. ãm mẽ amã ri axpẽn hkĩnh pix o mãn ri axpẽn kõt apa. ³ Ra Tĩrtũm Karõ kot mẽ pahkarõ mã gjêx par jakamã te mẽ pahte ixkre tipxi kamã axpẽn kõt ri mẽ papa pyræk. Jakamã kêt ka mẽ axpẽn to mex pix kukamã mãn kêt ajamaxpêr o ri axpẽn kõt apa. Nẽ tãm axpẽn nhĩpêx. Jao ajamakêtkati nẽ axãmnhĩx ri axpẽn kõt ri apa ho apa. ⁴ Te mẽ pahte ixkre tipxi kamã ri axpẽn kõt papa pyræk jakamã mẽ pahpiitã mẽ pahkarõ kamã Tĩrtũm Karõja hkrĩ ho hkrĩ. Jakamã kot puj mẽ nhỹrmã ma õ krĩ hwỳr api nẽ kamã mẽ pamex rãhã papa ho papa.

⁵ Nẽ mẽ panhõ Pahihtija ãm pixii. Na pu prem pahpiitã amnhĩ kaxyw hkõt pajamaxpêr jao ra mẽ pahpê hkraa. Tã mẽ pahpê Kris kwỳ hã amnhĩ to amnhĩrit kaxyw na prem Tĩrtũm mã mẽ pahkrã kumrã. ã mẽ panhĩpêx anhỳr o axpẽn pyræk o mẽ panhĩpêx o pa anẽ.

⁶ Nẽ Tĩrtũm haxwỳja ãm pixii. Kêp mẽ pahpiitã mẽ panhĩpêxà maati na. Na hte mẽ pahpê hkrajê mã àhpumunh xà hkwy gõ pu mẽ ý hã kãm tanhmã amnhĩ nhĩpêx to ho papa. Nhũm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpẽn kõt papa pyræk.

Kris kot ahpỳnhã tanhmã mẽ pahto mex to hã harênh

Rõmãn 12.3-8; Wam Korĩt 12.1-12; Wam Pêtre 4.10-11

⁷⁻⁸ Nẽ Tĩrtũm kapêr ã kagà htũm kot Kris jarênh kot:

Na pre mẽ kot kutã amnhĩ xunhwỳr xwỳnhjê pytãr pa nẽ ma akupỳm kaxkwa hwỳr api.

Tã arĩ jar pika hkõt mẽ pahpê hkwyjê mã tanhmã mẽ pahto paxihtỳx to ho pa. Na hte Krisja tanhmã mẽ pahte ahpỳnhã kãm amnhĩ nhĩpêx to ho papa kaxyw tanhmã mẽ pahto paxàhpumunh to. Kãm hprãm xà hkõt. ⁹ Tĩrtũm kapêr ã kagà htũm kot akupỳm kaxkwa hwỳr àpir ã harênh. ãm tapxipix na pre ã pika hwỳr wrỳk nẽ akupỳm kaxkwa hwỳr àpir anẽ. Na pre ty nhũm mẽ haxà. Hãmri nhũm akupỳm htĩr nẽ kato nẽ ma akupỳm api. Tapxipix na pre ã amnhĩ nhĩpêx anẽ. ¹⁰ Tã akupỳm kaxkwa hwỳr àpir xwỳnhta na hte kaxkwa kamã nẽ pika hkõt amnhĩm mẽmoj piitã tanhmã ho ho hkrĩ. ¹¹ Na pre ahpỳnhã tanhmã mẽ pahto mex to. Ahpỳnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwỳ.

Nẽ mẽ pahkwỳjaja mẽ pahte krĩ piitã hwỳr pamrar nẽ ý hã hkrajê mã kapêr jarênh o papa kaxyw mẽ paxunhwỳ.

Nẽ mẽ pahkwỳjaja mẽ pahte krĩ pixi kamã Tĩrtũm nhỹ hã hkrajê jahkre ho ri mẽ hkõt papa kaxyw mẽ paxunhwỳ.

Nẽ mẽ pahkwỳjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nẽ Jejus kõt amnhĩ xunhwỳr ã mẽ kãm harênh o papa kaxyw mẽ paxunhwỳ.

Nẽ mẽ pahkwỳjaja mẽ pahpê pastõ kaxyw mẽ paxunhwỳ.

Nẽ mẽ pahkwỳjaja mẽ pahte mẽ kãm Tĩrtũm kapêr ã kagà jarênh o mẽ ahkre ho papa kaxyw mẽ paxunhwỳ.

¹² ã kot puj mẽ pahpiitã ahpÿnhã Kris mã tanhmã amnhĩ nhĩpêx to ho ri papa anẽ. Kot puj mẽ ã mẽ hipêx anhÿr o ri papa nhũm mẽ pamar tÿx nẽ. Nẽ gaa nẽ mẽ pahpyrà nẽ Tĩrtũm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa. ¹³ Nẽ gaa nẽ mẽ pahpiitã mẽ pahpê Tĩrtũm kra hã Jejus kot amnhĩ nhĩpêx kôt omunh mex nẽ. Nẽ amnhĩ kaxyw hkôt pajamaxpêr tÿx nẽ. Jao te ra hkôt mẽ paxaptãr mex pyrãk. Nẽ te kot amnhĩ nhĩpêx pyrãk o amnhĩ nhĩpêx.

¹⁴ Mẽhprĩrejaja na htem nhãm hamaxpêr nẽ nhãm hamaxpêr o pa. Te kôk xapêr nẽ nhãm mẽmoj to mrar nẽ nhãm mẽmoj to mrar pyrãk. Nom kêr pu mẽ ho mẽ urãk kêt nẽ. ãm Kris kôt pix mã pajamaxpêr tÿx o papa. Jakamã nhũm mẽ tee ri mẽ pahte hkwyãm ri tanhmã amnhĩ tomnuj to hprãm xãj tanhmã mẽ pahto kaprÿ. Nom kêr pu mẽ mẽ mar kêt nẽ. ãm pakatãt kôt mẽ aptãr kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtÿx o papa. ¹⁵ Tãm axpên mã pakapêr nẽ pamã axpên kĩnh o axpên mã paxêx kêt nẽ. Kwa kêr pu mẽ ã amnhĩ nhĩpêx anhÿr o mãn papa. Jao te mẽ pahkrã Kris kot amnhĩ nhĩpêx pyrãk o amnhĩ nhĩpêx mex o mõ.

¹⁶ Nẽ mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamaxpêr xã hkôt axpên kôt ahpÿnhã tanhmã axpên to ajuta hto. Te ixkre pixi kamã mẽ pahte axpên kôt tanhmã axpên to ajuta hto ho ri papa pyrãk.

Kris kôt mẽ pahte amnhĩ nhĩpêx nyw ã mẽ pamã karõ

Korosẽ 3.5-11; Wam Pêtre 4.7

¹⁷ E kot paj Pahшти nhÿ hã mẽ amã mẽmoj jarẽ nẽ nẽ mẽ amã ixkapêr kãm ixihtÿx nẽ ka mẽ inhma. Nã kêr ka mẽ axte mẽ kêp Tĩrtũm kra hkêt xwÿnhjê kot amnhĩ nhĩpêx o amnhĩ nhĩpêx o ri apa hkêt nẽ. Na htem htÿx ri tanhmã hamaxpêr punuj to ho ri amnhĩ tomnuj o pa. ¹⁸ Jao Tĩrtũm mã hamaxpêr kêt nẽ pa. Kãm hamaxpêr prãm kêt kumrêx nẽ pa. Te mẽ kot omunh nẽ nhãm hkrã pyrãk o amnhĩ nhĩpêx. Rÿ te mẽhõ wa kot axpên kãm gryk kãm axpên nhĩpêx pyrãk o hipêx. Jao te kamãt kô kamã ri pa pyrã nẽ Tĩrtũm kot amnhĩ

nhĩpêx pumunh kêt nẽ pa. Jakamã koja mẽ nhÿrmã kuri htĩr tũm nẽ pa hkêt nẽ. ¹⁹ Na htem tanhmã amnhĩ tomnuj to htã amnhĩ kamã hpijaãm kêt nẽ pa. Nẽ axpên kamã hpijaãm kêt rãhã ho pa. ãm amnhĩ pix kukamã hamaxpêr nẽ tanhmã amnhĩ tomnuj to ho ri pa. ²⁰⁻²¹ Nom Jejus Krisja ã kot amnhĩ nhĩpêx anhÿr kêt. Mẽ kurom tãm kot amnhĩ nhĩpêx mex o pa xwÿnh nẽ tãm kapêr o pa xwÿnh na. Na pa pre ma mẽ awÿr mõ nẽ ixprĩ hã mẽ amã ja hã harẽ ka prem inhma nẽ inhmar tÿx nẽ. ²² Na pa pre mẽ amã:

—Kwa mẽ ri axte amnhĩ nhĩpêx tũm kôt amnhĩ nhĩpêx o ri apa hkêt nẽ. Ja na omnuj tÿx. Na ka prem ã amnhĩ nhĩpêx anẽ nẽ ajamaxpêr punuj pix o ri apa. Jao amnhĩ tomnuj rãhã nẽ. Tã kêr ka mẽ amnhĩ nẽ awry hã mẽnh pyrã nẽ axte ã amnhĩ tomnuj anhÿr o ri apa hkêt nẽ.

²³ —Nẽ kêr ka mẽ axte mẽ ajamaxpêr tũm nẽ mẽ ate amnhĩ nhĩpêx tũm kôt ri amnhĩ nhĩpêx kêt nẽ. Nẽ mẽ ajamaxpêr nyw nẽ mẽ ate amnhĩ nhĩpêx nyw kôt pix mã ri amnhĩ nhĩpêx o ri apa. Te mẽ kot mẽ ê htũm kwrynh nẽ rênh nẽ hpãnhã nyw jagjêx nẽ ri hã pata pyrã nẽ ãm amnhĩ nhĩpêx nyw kôt pix mã amnhĩ nhĩpêx o ri apa. ²⁴ Mẽ ajamaxpêr nyw nẽ mẽ ate amnhĩ nhĩpêx nywja axtem na. Te Tĩrtũm jamaxpêr nẽ kot amnhĩ nhĩpêxta pyrãk. Jakamã kwa kêr ka mẽ kãm hprãm xã hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nẽ kapêr kôt ri amnhĩ nhĩpêx. Anẽ.

Na pa pre ã mẽ amã ixkapêr anẽ. Tã kêr ka mẽ arĩ ixkapêr kôt pix mã amnhĩ nhĩpêx. ²⁵ Mẽ pahpê Kris nhĩ jakamã te pahte ixkre htipxi kamã axpên kôt amnhĩ nhĩpêx pyrãk jakamã kwa mẽ axte axpên mã mẽmoj to axêx kêt nẽ. Nẽ amarĩ axpên xô ri axpên mã mẽmoj to axêx kêt nẽ. ãm tãm axpên mã mẽmoj jarênh o ri apa.

²⁶ Nẽ kot kaj mẽ mẽmoj tã agryk japêr. Rÿ mẽhõ kamã agryk rÿ amarĩ agryk japêr. Tã kêr ka ho ajapêx tokyx anẽ agryk japjê hkêt nẽ. Kêr kê kormã kamãt kêt ri ka akupÿm tãm akrã nhũm ja amã mex nẽ. ²⁷ Nom kot ka mẽ arĩ kamã agryk o ri apa nhũm mẽkarõmnuti nhõ pahi Satanastija ja hã mẽ

apumu nê te mē ate amnhĩ tomnujta ã mē apynênh pyræk o mē anhĩpêx. Ka mē ra hkôt tanhmã amnhĩ tomnuj to. Ja pymaj kêr ka mē agryk japjê hkêt nê. Satanasti kãm hprãm xà hkôt ã amnhĩ nhĩpêx anhÿr kêt nê.

²⁸ Nê mē axàhkĩnh o mē apa xwÿnhjaja kêr ka mē axte mē kêp axàhkĩnh hkêt nê. Mēmoj tã apê nê hpãnhã kàxpore jamÿ nê ho amnhĩm awjaprô. Nê mē kêp amrakati xwÿnhjê mã mēmoj japrô o ri apa. Kêr ka mē ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhÿr o ri apa.

²⁹ Nê kêr ka mē amã axpên kĩnh kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. ãm axpên mã akapêr mã aprĩ ho axpên mã akapêr. Nê mē amã axpên kĩnh nê mē amã axpên to mex pix prãm xàj tãm axpên mã ri akapêr o ri apa.

³⁰ Tĩrtũm na pre mē pahwÿr amnhĩ Karô rē nhũm mē pahpê hkra hã mē pahkarô mã agjê nê mē pakamã hkrĩ ho hkrĩ. Koja mē pakamã hkrĩ ho hkrĩ rãhã nhũm nhÿrmã Tĩrtũm amnhĩ wÿr mē pahto api pu mē kuri pahtĩr tũm nê papa ho papa. Jakamã kwa kêr ka mē tanhmã amnhĩ tomnuj to ho amnhĩ kamã Tĩrtũm Karô mã hkaprĩ jagjênh kêt nê. Nê kãm hpijaàm jagjênh kêt nê. Koja mē pahte amnhĩ tomnuj ã mē pahpumu nê mē pahkaga hkêt tã tee ri ja hã mē pahpumu nê hkaprĩ nê. Jakamã kêr pu mē ãm kãm hprãm xà hkôt pix mã tanhmã ri amnhĩ nhĩpêx to ho ri papa.

³¹ Nê kêr ka mē axte ri axàhkurê ho ri apa hkêt nê. Nê agryk kãm axpên mã tanhmã akapêr punuj to hkêt nê. Rÿ axpên japrÿ ho ri apa hkêt nê. Nê atÿx ri axpên tã apêr o apikênh kêt nê. Nê ri axpên tã mē kãm axàmnênh kêt nê. ³² Kêt mē ãm axpên to mex pix nê axpên kãm axukaprĩ ho ri apa. Nhũm mēhõ tanhmã mē ato ka mē ãm amnhĩ tã omu nê tanhmã ho hkêt nê tanhmã kot atoja ho ajamakêtkati kurê kumrêx. Tĩrtũm na pre Kris kukwak ri mē pahte amnhĩ tomnuj grãnh pa nê axte kãm hamaxpêr kêt nê. Tã kêr ka mē uræk nê mēhõ kot tanhmã atomnuj tota tokyx ho ajamakêtkati nê axte kãm ajamaxpêr kêt nê.

5

¹ Nê koja mēhõ kãm hkra japê nhũm amnhĩ tã omu nê hkĩnh nê. Hãmri nê nhÿrmã hkra nê amnhĩ pyrà nê kãm hapê nê. Ja pyrà nê Tĩrtũm kãm mē pahpê hkwyjê japê jakamã kêr pu mē amnhĩ pyrà nê pamã pahkwÿjê hkĩnh tÿx o papa. ² Kris haxwÿja kãm mē pajapê jakamã na pre htyk o mē panê mē pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpêr kêt nê ã mē panê amnhĩ nhĩpêx anê. Tã ã kãm mē pajapê anhÿr jakamã nhũm Tĩrtũm ja hã omu nhũm ja kãm mex nê. Te ho mē hkuxwa xà mex kuxwa pyræk. Jakamã kêr pu mē amnhĩ tã omu nê uræk nê pamã axpên kĩnh o axpên to mex o mãn ri papa.

Mê pahte amnhĩ tomnuj kaga hã kot mē pamã karô

Sikũn Korĩt 6.14-7.1; Korosê 3.16-17; Wam Juãw 1.5-10, 2.15

³ Nê mē pahpê Tĩrtũm kra jakamã kêr pu mē pahprô pix tãnopxar o ri papa nê nhãm mēnijê hõ kamã pahpijaàm kêt o ri papa hkêt nê.

Nê kêr pu mē amnhĩ pix kukamã pajamaxpêr kêt nê. ãm ja ho anhÿr hkêt kumrêx. Mē pahpê Tĩrtũm kra kênã kot pu kêt axtem nê ã amnhĩ nhĩpêx anhÿr o ri papa. Tĩrtũm krajaja na htem ã amnhĩ nhĩpêx anhÿr kêt nê.

⁴ Nê mãânên mē pakapêrja. Kêr pu mē ri tanhmã axpên mã pakapêr punuj to hkêt nê. Nê ri axpên japrÿ hkêt nê. Nê amnhĩ krã hkôt pahtÿx ri tanhmã pakapêr to hkêt nê. ãm tãm axpên mã pakapêr mex nê axpên mã Tĩrtũm mex o mex ã harênh o ri papa.

⁵ Nê Tĩrtũm kapêr kôt amnhĩ nhĩpêx kêt xwÿnhjaja nê axpên kãm mē hpijaàm kêt xwÿnhjaja nê amnhĩ pix kukamã mē hamaxpêr o pa xwÿnhjaja. ã mē kot amnhĩ nhĩpêx anhÿr xwÿnhjaja kêp Tĩrtũm mē Kris wa hkra hkêt. Na htem ã amnhĩ nhĩpêx anhÿrja gryk ã wa kãm hamaxpêr kêt nê.

⁶ Nê koja nhÿrmã mēhõ mē awÿr mō nê mē ate tanhmã amnhĩ tomnuj to prãm xàj hêx rom amã kapêr nê mē amã:

—Kwa mon ka hte mē ixpyrà nê ã amnhĩ nhĩpêx anhÿr kêt nê? Ja mex kênã. Anê.

Koja ã mē amã kapēr anē ka mē ama nē ãm ama. Æ mē kot amnhĩ nhĩpêx anhÿr xwÿnhjaja koja Tĩrtũm nhÿrmã ja hã mē homnuj tÿx kumrêx. ⁷ Jakamã kwa kêr ka mē ate ho mē kot amnhĩ nhĩpêx pyrãk pymaj mē hkôt ri apa hkêt nē. Kwarĩ ho kwarĩ.

Mē pahte amnhĩ nhĩpêx nyw jarênh

Juãw 1.4, 3.19, 8.12, 12.35; Rõmãn 13.12; Wam Tesarõn 5.5; Wam Juãw 1.5

⁸ Amnepêm kormã mē ate Tĩrtũm kôt amnhĩ xunhwÿr kêr ri na ka prem te kamãt kô kamã ri apa pyrã nē atÿx ri tanhmã amnhĩ tomnuj to ho ri apa. Tã ra Jejus kôt amnhĩ xunhwÿ hãmri nē te hirã kamã mē apa xwÿnh pyrãk. Jakamã kwa kêr ka mē hpãnhã Tĩrtũm kãm hprãm xà hkôt pix mã mãn ri amnhĩ nhĩpêx o apa. Ra mē apê hirã kamã mē apa xwÿnh kênã. ⁹ Kot kaj mē ã amnhĩ nhĩpêx anē nē tãm amnhĩ nhĩpêx mex nē tãm akapêr o apa. ¹⁰ Jao Tĩrtũm kãm hprãm xà hkôt pix mã amnhĩ nhĩpêx o ri apa ¹¹⁻¹² nē te kamãt kô kamã ri mē pa xwÿnhjaja kot amnhĩ nhĩpêx pyrãk o amnhĩ nhĩpêx kêr nē. Æ mē kot amnhĩ nhĩpêx anhÿr xwÿnhjaja na htem hpimxur pê tanhmã amnhĩ tomnuj tÿx to ho pa. Nom kot paj ixprĩ hã mē amã tanhmã mē kot amnhĩ tomnuj to hã mē harênh kêr nē. Kot pa mē amã harê nē xpijaãm tÿx nē. Ixte harênh mã xwÿnhja omnuju. Tã kêr ka mē urãk nē ã amnhĩ nhĩpêx anhÿr kêr nē. Æm mē noo mã tãm ri amnhĩ nhĩpêx o ri apa. ¹³ Mē kot ja hã mē apumunh nē tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr. ¹⁴ Te mē kot kanê hpøk rax kãm mēmoj piitã omunh mexta pyrãk. Tĩrtũm kapêr ã kagã htũm kot ja jarênh kot:

Mē amã Tĩrtũm prãm kêr xwÿnhjaja te ra mē atyk nē mē anhĩkwÿ pyrãk.
Nē te kamãt kô kamã mē anhõt nē mē anhĩkwÿ pyrãk.

Jakamã kwa te mē akrã hapôx nē kãnhmã mē akrĩ pyrãk o amnhĩ nhĩpêx nē Tĩrtũm kôt amnhĩ xunhwÿ.

Kê Kris tanhmã mē akrã hto ka mē te myt kato nhũm mē ate arĩgro hã ri apa pyrãk o amnhĩ nhĩpêx. Anē.

Tĩrtũm krajaja kot tanhmã amnhĩ nhĩpêx to hã mē kãm karõ

Korosê 4.5; Sikũn Ximotre 4.2

¹⁵ Nē kwa kêr ka mē amnhĩ pumunh mex o ri apa. Nē mē ri htÿx ri mē kot amnhĩ nhĩpêx xwÿnhjê hkôt amnhĩ nhĩpêx kêr nē. Nē ãm amnhĩ to mex pix o ri apa. ¹⁶ Na htem ra Kris ã mē pahtomnuj o pa pu mē pamex kêr nē ri papa. Tã nom kêr pu mē apkati mē arĩ Tĩrtũm mã tanhmã amnhĩ nhĩpêx to ho papa mã panhũrer kêr nē.

¹⁷ Nē ãm Tĩrtũm pix mã amnhĩ jarênh o ri papa nē kãm:

–Pa Tĩrtũm. Inhmã akôt pix mã amnhĩ nhĩpêx prãm jakamã kwa ixte amã mēmoj to anhÿr kaxyw ixkrãm ijamaxpêr mex jagjê nē ho amnhĩrit mex pa tanhmã amã amnhĩ nhĩpêx to ho ri ixpa.

Anhÿr o amnhĩ to kuwÿ. Nom kêr pu mē pahtÿx ri pajamaxpêr kôt tanhmã kãm amnhĩ nhĩpêx to hkêt nē.

¹⁸ Nē kêr pu mē ri pahpipãnh o papa hkêt nē. Kwarĩ ho kwarĩ. Kot puj mē ã amnhĩ nhĩpêx anē nē te kagôxÿhti kot amnhĩ tã mē pahkaxpre pyrãk o mē panhĩpêx pu mē tee ri pamã hkaga hprãm kaprÿ. Te kot amnhĩm mē pahto arĩk pyrãk o mē panhĩpêx nhũm ja mex kêr nē. Na htem pipãnh kãm hamaxpêr mex kêr nē ãm htÿx ri tanhmã amnhĩ nhĩpêx to ho pa. Tã kêr pu mē ã amnhĩ nhĩpêx anhÿr hkêt nē ãm Tĩrtũm Karõ pix hkôt mãn ri amnhĩ nhĩpêx o ri papa.

¹⁹ Nē kêr pu mē axpên wÿr akuprõ nē pahkĩnh kãm Tĩrtũm mã mex o mex ã harênh pê ho pagrer o pahkrĩ. ²⁰ Nē mē pamex nē ri papa rÿ pahpunuj nē ri papa htã arĩ kãm mex o mex ã harênh rãhã ho ri papa. Kêp Mēpanhĩpêxã maati jakamã mē pahpê Pahiht Jejus Kris kwÿ hã pu mē kãm mex ã harênh rãhã ho papa nē aa ho pajamakêtkati hkêt nē.

²¹ Nē kêr ka mē Kris ã apijaãm rãhã o ri apa. Jao axpên kôt ajamaxpêr nē axpên kôt ri amnhĩ nhĩpêx mex o ri apa.

Tanhmã mē hprõ nē mē mjên kot axpên nhĩpêx to hã mē kãm karõ

Wam Korĩt 11.3; Korosê 3.18-19; Wam Pêtre 3.1-7

²² Nē kēr ka mē anijaja mē amjēn ā api-jaam o ri apa. Nē mē hamaxpēr mex ā mē omu nē mē hkôt ri amnhī nhīpêx o ri apa. Te mē ate Pahihti Kris kapēr kôt amnhī nhīpêx o ri apata pyrāk. ²³ Kris kēp mē pakamā ukaprī xwýnh nē kēp mē papytār xwýnh jakamā te kēp mē pahpiitā mē pahkrā pyrāk. Nē mē papajaja te mē pahpê ĩ pyrāk. Jakamā na pu htem pahpê ĩja te mē pahkrā kot tanhmā hamaxpēr to xā hkôt amnhī nhīpêx o papaja pyrāk. Ja pyrā nē kēr ka mē anijaja mē amjēn jamaxpēr mex ā mē omu nē mē hkôt amnhī nhīpêx mex nē. ²⁴ Mē pahpê Kris kwý jakamā na pu htem hkôt amnhī nhīpêx mex o ri papa. Ja pyrā nē kēr ka mē amjēn kôt amnhī nhīpêx mex o ri apa.

²⁵ Nē mē amyjaja. Kēr ka mē amā aprō hā ma ho ri apa. Te ho Kris kot mē pahtā ma ho pata pyrāk. Na pre kām mē pajapê xāj amnhī grōnh kôt mē pahwýr wrý nē mē panē ty. Tā kēr ka mē urāk nē ā amā aprō hā ma ho apa anē. ²⁶ Na pre Kris kām mē pajapê xāj mē pahte amnhī tomnuj pē mē pahpytā. Te mēhō my kām mēhō ni hkīnh nē mēmoj punuj pē utār nē ho hprōta pyrāk. Nhūm te mē kot axpēn mā wa rer kaxyw nhūm nija ma gōx mā htēm nē wýr nē amnhī to mex nhūm mē kot axpēn kaxyw wa ho mexta pyrāk. Hāmri nē te ra axpēn mā wa rer nhūm wa kot axpēn kôt pa ho pata pyrāk.

Ja pyrā nē na pre Jejus kām mē pajapê nē kām amnhī kuri mē papa ho mē papa hprām xāj mē pahwýr wrý nē mē pahte amnhī tomnuj pē mē pahpytā nē mē pamā Tirtūm kapēr jarēnh o pa. Tā mē pahpê hkrajaja na pu htem kapēr ma nē hkôt amnhī nhīpêx o papa ho amnhī tomnuj kaga. Te gōx kām mē paxwýr nē mē pahte amnhī nē amnhī grā htyk kuhōnh par pyrāk. Jao Tirtūm kapēr kôt pix mā amnhī nhīpêx o ri papa. Te ra paxwýr nē amnhī nē tanhmā mē pahte amnhī tomnuj to grānh par pyrāk. Nē te mjēn mā xwýnh wýr nē amnhī to mex pyrāk.

²⁷ ā mē pahte amnhī nhīpêx anhýr jakamā te mē pamex nē ri papa pyrāk. Hāmri nhūm Krisja ja hā mē pahpumu nē kām mē pajapê htýx nē. Jakamā koja

nhýrmā akupýn wrý nē ma akupým amnhī kôt mē pahto api pu mē kuri pa htír tūm nē papa ho papa.

²⁸ Nē xā mē amyjaja mē amā amnhī japêê? Nā mē amā amnhī japê ho na ka htem amā amnhī tā ma ho apa. Tā kēr ka mē aprō nhīpêx o te ka amā amnhī tā mata pyrāk. Jao tām mē hipêx o ri apa. Te war apixire nē war apa pyrāk o wa axpēn nhīpêx. Kot kaj mē tanhmā hipêx to nē te ate amnhī nhī tanhmā hipêx to pyrāk. ²⁹⁻³⁰ Na htem amnhī nhī ho mex pix o pa nē kamā gryk kēt nē. Nē kām prām nē apku. Nē kām kōr nē ixkō. Nē nhýhýnh à nē amnhī kane. Na pu htem ā amnhī to mex o ri papa anē. Ja pyrā nē te mē pahpê Kris nhī pyrāk jakamā na hte mē pahto mex o pa. Te mē pamā mē papa mē pahte amnhī nhī hā mata pyrāk. ³¹ Tirtūm kapēr ā kagà htūm kot ja jarēnh kot:

Koja mēmyjê hō hprō kaxyw hāmri nē hipêêxà nē katorxà wa ōrkwý kaga nē ām hprō kôt pix mā hpānhā ri pa ho pa. Te wa tipxi nē ri pa pyrāk o wa axpēn nhīpêx o pa. Anē.

³² Na pre Tirtūm ā ja jarēnh anē. Kapērja mex tā amnepê mā mē pa xwýnhjaja na prem hprī hā mar týtýx kēt nē. Na prem htýx mē mjēn kot tanhmā mē hprō nhīpêx to pix ā hkamnhix no ām ja pix kēt. Māānēn te mē pahpê Kris nhī pyrā nē tām mē pahte amnhī nhīpêx nē axpēn nhīpêx o papa hā ā mē pajarēnh kot anhýr. Te ixkre tipxi kamā mē pahte Kris kôt mē papa pyrāk o ā mē pajarēnh anē.

³³ Jakamā kwa kēr ka mē amyjaja mē amā mē aprō japê ho ri apa. Te ka amā amnhī tā ma pyrāk o mē hipêx. Jao tām mē hipêx. Nē mē anijaja kēr ka mē ajaxwýja mē amjēn ā apijaam o ri apa.

6

Mē hkrajaja kot tanhmā hipêêxà nē katorxà nhīpêx to hā mē kām karō

Korosē 3.20-21

¹ Nē mē apē mē hkrajaja kēr ka mē anhīpêêxà nē mē akatorxà wa kapēr ma nē hā ano htýx nē wa hkôt ri amnhī nhīpêx rāhā ho ri apa. Mē amā Pahihti Kris kôt amnhī nhīpêx prām xāj ā amnhī nhīpêx

anhÿr o ri apa. Kot kaj mẽ ã amnhĩ nhĩpêx anhÿrja o amnhĩ nhĩpêx mex o ri apa. 2-3 Tĩrtũm kapêr ã kagã htũm kot ja jarênh kot:

Kêr ka mẽ anhĩpêxã nê mẽ akatorxã wa kapêr ma nê wa hkôt ri amnhĩ nhĩpêx. Kot kaj mẽ ã amnhĩ nhĩpêx anê nê amex nê kritpê m atĩr nê ri apa ry nê.

Anhÿr jakamã kot kaj mẽ amã kritpê m atĩr nê ri apa hprãm hã kêr ka mẽ ã amnhĩ nhĩpêx anhÿr o ri apa. Kormã mẽ aprĩre htã ã amnhĩ nhĩpêx anê. E kêr ka mẽ ã mẽ anhĩpêxã nê mẽ akatorxã nhĩpêx anhÿr o ri apa.

⁴ Nê mẽ apê mẽ hipêxã nê mẽ katorxã kêr ka mẽ akrajê gryk kaxyw mẽ kãm apêr o apikênh hkêt nê. Tãm mẽ kãm akapêr nê Pahihti Jejus kapêr o mẽ ahkre ho ri apa. E kêr ka mẽ ã akrajê nhĩpêx anhÿr o ri apa.

Mẽ pahte mẽ panhõ patrãw kapêr kôt amnhĩ nhĩpêx ã mẽ pamã karõ

Korosê 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nê mẽ ate mẽ kãm mẽ axapênh o mẽ apa xwÿnhjaja kêr ka mẽ anhõ patrãw kapêr ma nê hkôt amnhĩ nhĩpêx mex o ri apa. Te mẽ ate Kris kapêr mar nê hkôt amnhĩ nhĩpêx pyrãk. Jao mẽ hã apijaãm rãhã nê. ⁶ Nom kêr ka mẽ ãm mẽ noo mã pix mã ri mẽ kãm axapênh mex kêt nê. Mããnê n mẽ wa kre kamã mẽ kãm axapênh mex rãhã nê. Ja na Tĩrtũm kãm hprãm. Mẽ apê Tĩrtũm Kra Kris mã tanhmã amnhĩ nhĩpêx to ho apa xwÿnh jakamã kêr ka mẽ anhõ patrãw mã axapênh mex o ri apa. ⁷ Nê mẽ akĩnh kãm mẽ kãm axapênh mex nê. Te mẽ ate Pahihti mã akĩnh kãm tanhmã kãm amnhĩ nhĩpêx to pyrã nê mẽ kãm tãm amnhĩ nhĩpêx pê axapênh mex o ri apa. ⁸ Kot puj mẽ amnhĩ kaxyw Tĩrtũm mã pajamaxpêr pê pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nê nhÿrmã ja hã mẽ pahto mex rax nê. Mẽ pahpê hkrajê piitãã. Mẽ pahte mẽ kãm paxapênh xwÿnhjaja nê amnhĩ mã mẽ paxapênh xwÿnhjaja nhũm nhÿrmã mẽ pahpiitã mẽ pahte tãm amnhĩ nhĩpêx xwÿnhjê ho mex rax nê.

Mẽõ patrãwjaja kot tanhmã kãm mẽ ãpênh xwÿnhjê nhĩpêx to

Korosê 4.1

⁹ Nê mẽ apê mẽ õ patrãwjaja kêr ka mẽ amã mẽ ãpênh xwÿnhjê ho mex nê mẽ ãpênh ã mẽ kãm axãkjêr o ri apa hkêt nê. Tãm mẽ hipêx. Kaxkwa kamã mẽ panhõ Pahi Maatija mããnê n kêp mẽ õ Pahi Maati jakamã ã mẽ hipêx mex anhÿr o apa. Tãm na kãm mẽ pahpiitã mẽ pajapê ho axpê n pyrãk. E kêr ka mẽ ã mẽ hipêx anhÿr o ri apa.

Tanhmã mẽ pahte Satanasti kutã amnhĩ to htÿx to hã mẽ pamã karõ

Rõmãn 16.20; Sikũn Korĩt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htÿx to jarê ka mẽ inhma. Kêr ka mẽ Pahihti nhÿ hã kutã amnhĩ to htÿx rãhã nê apa. Ate tanhmã amnhĩ tomnuj to hprãm xãj tanhmã kot ato htã ka Tĩrtũm xihtÿx o anhõpinh xã kaxwÿnh kãm kutã amnhĩ to htÿx nê. Rÿ koja ate mẽmoj mex o anhÿr nê tanhmã ato ka mẽ amnhĩ tã hamaxpêr ã omu nê ãm omu nê arĩ Tĩrtũm xihtÿx nhÿ hã tãm ajamaxpêr mex rãhã ho ri apa. ¹¹ Na hte põristijaja pijapu kaxyw hãmri nê amnhĩ nê kãx o mẽ ê jagjê nhũm mẽ tee ri kãm mẽ hkamnhwÿr prãm hkapyrÿ. Tã ja pyrã nê koja Satanasti mẽ ate kapêr kôt tanhmã amnhĩ nhĩpêx to hprãm xãj tanhmã mẽ ato ka mẽ amnhĩ tã hamaxpêr ã omu hãmri nê Tĩrtũm xihtÿx nhÿ hã kutã amnhĩ to htÿx nê. Jao mẽ ate amnhĩ nhĩpêx nyw pix o amnhĩ nhĩpêx nê mẽ ajamaxpêr nyw pix o ajamaxpêr. Kot kaj mẽ ã amnhĩ nhĩpêx anê nhũm Satanasti tee ri tanhmã kãm mẽ ato hprãm hkapyrÿ.

¹² Mẽ pahpê Tĩrtũm kra jakamã mẽ kot mẽ pakutã amnhĩ xunhwÿr xwÿnh maati-jaja axtem na mẽ. Mẽ kêp mẽkarõmnuti jakamã mẽ pahkĩnhã mẽ ĩ hkêt. ãm mẽ hkarõ kaxkrit pix na mẽ. Na htem kôk kôt tanhmã amnhĩ tomnuj tÿx to ho pa. Nê mẽ hihtÿx. Na htem arĩ jar pika ja kamã mẽ kêp Tĩrtũm kra hkêt xwÿnhjê ho amnhĩptã nhũm htem mẽ hkôt ri htÿx tanhmã ri amnhĩ tomnuj tÿx to ho pa. Nom amnhĩ tã mẽ omunh kêt nê. ¹³ Jakamã kwa kêr ka

mê Tirtûm kot mê akarõ mã amnhĩ Karõ jagjênh xwýnhhta kôt pix mã amnhĩ nhĩpêx o apa. Jao mê ate amnhĩ nhĩpêx nyw kôt pix mã mãn ri mê amnhĩ nhĩpêx. Kêr kê mẽkarõmnuti tee ri kãm tanhmã mê ato hprãm kaprý ka mê arĩ Tirtûm Karõ xihtýx nhỹ hã kutã amnhĩ to htýx rãhã ho apa.

¹⁴ Jakamã kwa kêr ka mê axkãm ajamak rom nê te ho sôrdat kot pijapu kaxyw ê jagjênh pyrãk o amnhĩ nhĩpêx. Na htem amnhĩ nê môx kã ho mê ê jagjê nê mẽ hpre xà ho amnhĩ pre hpa. Nê hipy kàx o mẽ hinô kã jagjê. Hãmri nê rĩ kormã ma mẽ kãm mẽ hkurê xwýnhjê kutã mra nê axpu. No mẽ kajaja kêr ka mẽ kurom amnhĩ krãm Tirtûm kapêr jaxàr týx nê hkôt pix mã ri ajamaxpêr rãhã ho ri apa. Nê hkôt ri amnhĩ nhĩpêx mex nê. Jao te sôrdat pijapu kaxyw kot amnhĩ nhĩpêxta pyrãk.

¹⁵ Na hte sôrdatjaja hpar kã jagjê nê aa hopôx kêt nê. ãm rãhã gôr nê hikwý. Jao ra mẽ kutã pijapu kaxyw amnhĩ grõnh rãhã gôr nê hikwý. Tã kêr ka mẽ ma mẽ kãm Jejus kot tanhmã mẽ panê amnhĩ nhĩpêx to hã harênh o apa kaxyw nê sôrdat pyrã nê amnhĩ grõnh kôt ma mẽ hwýr apa nê amnhĩ kamã akahak kêt nê.

¹⁶ Nê sôrdatjaja na htem amnhĩ nê amnàr xà hã kàx po jamý nê ho kuhê nhũm mẽ tee ri kãm mẽ hkamnhwýr prãm kaprý. Ja pyrã nê koja Satanasti tanhmã mẽ ato ka mẽ Tirtûm kêp mẽ anhõ pahi hã hihtýx o kot Satanasti jakrenhja mã ajamaxpêr kurê kumrêx nê ãm hkôt pix mã amnhĩ nhĩpêx. Na hte Satanasti te kot mẽ pahwýr krur rênh pyrãk o mẽ panhĩpêx. Jao xatã mẽ pahte Tirtûm kaga hprãm xàj tanhmã mẽ pahto. Nê mẽ pahte Tirtûm mã tanhmã amnhĩ nhĩpêx to pymaj xatã tanhmã mẽ pahto kaprý. Pu mẽ amnhĩ tã omu hãmri nê Tirtûm Karõ xihtýx nhỹ hã Tirtûm kôt pix mã amnhĩ nhĩpêx.

¹⁷ Nê na hte sôrdatjaja kàx o mẽ hkrãjapap jagjê nê pijapu kaxyw mẽ kutã mra nhũm mẽ tee ri mẽ hkrã jayr prãm kaprý. Ja pyrã nê kêr ka mẽ amnhĩ kaxyw Tirtûm kôt pix mã ajamaxpêr rãhã ho ri apa. Nê ra kot mẽ ato hkra mã ajamaxpêr rãhã nê. Kê Satanasti tee ri kãm mẽ akrã kamã mẽ amã mẽ ajamaxpêr punuj jagjênh prãm hkaprý.

Nê sôrdatjaja na htem mẽ kutã wapo jamý nê ho kuhê. Nom mẽ papajaja mẽ panhõ wapoja na axtem kêp Tirtûm kapêr. Na hte Tirtûm Karõ mẽ pahkrã kamã kapêr o amnhĩrit pu htem pix mã pajamaxpêr o papa nhũm Satanasti tee ri kãm mẽ pahkrãm mẽ pajamaxpêr punuj jagjênh prãm kaprý. Te mẽ papijapu nhũm mẽ pahte amnhĩ nê ho pakrihkrit pyrãk o hipêx.

¹⁸ ã Satanasti pê mẽ pahte amnhĩ nê amnhĩ nhĩpêx kot anhýr. Jakamã kêr pu mẽ amnhĩ to Tirtûm pix wýr o ri papa kê Satanasti kutã mẽ pahto paxihtýx pu mẽ hkôt tanhmã amnhĩ tomnuj to hkêt nê.

Nê kêr pu mẽ mẽmoj to anhýr kaxyw nê ra Tirtûm Karõ nhỹ hã amnhĩ to Tirtûm wý. Nê kãm amnhĩ jarênh rãhã ho papa nê aa ja ho pajamakêtkati hkêt nê. Nê Tirtûm krajê piitã mẽ ho hwýr rãhã ho ri papa.

¹⁹ Nê kwa kêr ka mẽ mãânên ixto Tirtûm wýr rãhã nê. Kot tanhmã ixto nhũm ixãmnhix ixte mẽ kãm kapêr jarênh mex o ri mẽ hkôt ixpa kaxyw. Mẽ kot ja hã tanhmã ixto htã pa arĩ ixãmnhix mẽ kãm harênh mex o ri mẽ hkôt ixpa. Nê ixprĩ hã mẽ kãm Jejus kot tanhmã mẽ panê amnhĩ nhĩpêx to hã harê. Kormã mẽ kot hprĩ hã ja mar mex kêt. ²⁰ Tã ixte mẽ kãm ja jarênh kaxyw na pre Tirtûm mẽ hwýr inhmê nhũm prem hã ijaxà pa arĩ mẽ hagjênh xà kamã ixkrĩ ho ixkrĩ. Jakamã kwa mẽ ixto Tirtûm wý kê tanhmã ixto ixihtýx to pa arĩ mẽ kãm kapêr jarênh o ixkrĩ. Ja na Tirtûm kãm hprãm nê ijaxwýja inhmã ja prãm.

*Kagà jatur xà
Korosê 4.7-8*

²¹ Nê ot pa mẽ awýr Xikitre mẽ. Kot paj mẽ amã kagàja nhĩpêx pa nê kãm kugõ nhũm kupy nê ma mẽ awýr o mō. Hãmri nê mẽ awýr o pōj nê mẽ amã kugõ nê mẽ amã tanhmã ijarênh to ka mẽ ijarênh ma nê akĩnh nê. Xikitre na hte Pahihti mã tanhmã amnhĩ nhĩpêx mex to o pa. Kris kôt mẽ pahtõ na. Nê inhmã hapêê. ²² Tã ot pa mẽ awýr kumê. Kê mẽ awýr pōj nê mẽ amã ijarê ka mẽ kam ama nê akupým tãm akrã nê tee ri ixkukamã ajamaxpêr kêt nê. ²³ E ixkrãmnhwýjaja. Kê Mëpahpãm Tirtûm mẽ Pahihti Jejus Krisja wa tanhmã mẽ akrã

hto ka mẽ ajamakêtkati nẽ axàmnhĩx ri apa.
Nẽ mẽ amã axpẽn kĩnh o ri axpẽn kôt apa.
Nẽ mẽ apiitã wa hkôt ajamaxpêr mex o ri
apa. ²⁴ E mẽ amã mẽ panhõ Pahihti Jejus
Kris kĩnh rãhã ho apa xwỳnhjaja. Kê Tĩrtũm
mẽ ato mex nẽ mẽmoj to mẽ akutã nojarêr
rãhã ho pa.

Tã ãm ja pix na hapêx. Ixpê Pawre na pa
mẽ awỳr kagàja nhĩpêx nẽ kumẽ.

Piripos

Pawre kot Piripos kamã Jejus kôt hkwýjê hwýr kagà nê mênh

Pawre na pre kagàja nhîpêx. Jejus nhÿ hã mē ahkre o mē pa xwýnhjê hõ na pre. Na pre Jejus ã mē kãm hkurê xwýnhjaja unê nê ma krî pê Rõm wýr kumê nê kamã haxà nhũm mē hãgênh xà kamã hkrî ho hkrî. Tã nhũm arî hkrî rãhã Piripos kamã Jejus kôt hkwýjê hwýr kagàja nhîpêx nê kumê. Na prem Pawre jarênh ma nê kãm ukaprî nê. Jakamã axpên kaxyw kàxpore hkwý ho akuprõ nê hwýr kumê. Hãmri nhũm omu nê hkînh nê amnhî tã kagàja nhîpêx nê kamã mē kãm amnhî jarê nê mē hwýr kumê. Kot amnhî xà htýx kamã hamak o hkrî htã arî hwýr mē mrar xwýnhjê mã Tirtũm kapêr jarênh rãhã ho hkrî hã amnhî jarê. Nê kãm Jejus kot amnhî nhîpêx kôt pix mã amnhî nhîpêx o pa hprãm ã amnhî jarê. Nê kãm Jejus jamaxpêr kôt pix mã hamaxpêr prãm ã amnhî jarê. ã na pre Pawre kagàja kamã mē kãm amnhî jarênh anê. Nê mē kãm:

1 Pa Piripos kamã Jejus Kris kôt ixkwýjaja. Xà mē amex na ka mē apa? E ixpê Pawre na pa mē amã kagàja nhîpêx nê kamã mē amã amnhî jarê nê mē awýr kumê. Nhũm Ximotre haxwýja kãm ja mex nê. Wa ixpê Jejus mã tanhmã amnhî nhîpêx to ho wa ixpa xwýnh jakamã na pa wa mē awýr hipêx nê kumê. Mē ate Tirtũm kapêr o mē ajahkre xwýnhjê hwýr nê mē kãm mē ate tanhmã amnhî to xwýnhjê hwýr nê mē ate mē mar o akrî xwýnhjê hwýr. Mē apê Kris kôt wa ixtõ nê wa ixtõxjê ho ixpimràatã mē awýr hipêx nê kumê. ² E kê Mēpanhîpêxã maati Tirtũm mē Pahihti Jejus Kris wa mēmoj to mē akutã nojarêr rãhã nê ka mē axãmnhîx ri ajamakêtkati nê ri apa ho apa.

*Pawre kot Piripos nhõ xwýnhjê ho Tirtũm
wýr ã harênh*
Epes 1.15-19; Korosê 1.9-12

³ Na pa hte xatã mē amã ijamaxpêr o ixkrî nê mē panhõ Tirtũm kot tanhmã mē ato mex toja pa kãm ijamaxpêr nê ixkînh nê ixkrî. ⁴ Nê Tirtũm mã mē ajarênh nê mē ato kuwý. Ixkînh kãm mē ato kuwý.

⁵ Wam ixte mē awýr inhmõrta ã na pa pre mē amã Jejus kot mē panê tanhmã amnhî nhîpêx to hã harênh o ri mē akôt ixpa. Ka prem inhma nê hkôt amnhî xunhwýr týx nê hkôt amnhî nhîpêx o ri apa. Jakamã inhmã axpên kaxyw ri kàxpore hkwý nhõr o apa. Te ham mē ate ixwýr mēnhãta pyræk pa pre mē akukwak ri amnhîm ho ixujaprõr o ri ixpa pê nhãm ri mē kãm Jejus jarênh o ri mē hkôt ixpa. Na pa hte arî jam ijamaxpêr rãhã ho ixkînh nê ixkrî. Nê Tirtũm mã mē ate ixto mex ã kãm mē ajarênh o ixkrî.

⁶ Nê na pa pre ma mē awýr mõ nê mē amã Jejus jarê ka prem inhma nê hkôt amnhî xunhwý nhũm Tirtũm ja hã mē apumunh mex nê. Hãmri nê mē ate hkôt amnhî to htýx kaxyw tanhmã mē ato mē axihtýx to. Tã koja arî mē ato mē axihtýx rãhã nhũm Jejus Kris nhÿrmã akupýn mē pahwýr wrý. Koja ã mē ato mex anê. ⁷ Na hte tanhmã ixto mex tota pyrã nê tanhmã mē ato mex to ho pa nê mē akutã nojarêr rãhã ho pa.

Nê kormã mē kot ijaxàr kêt ri pa pre ma mē piitã mē kãm Jejus jarênh o ri ixpa. Nê ãm hãmri mē kãm harê. Mē kot mar nê hkôt amnhî xunhwýr týx kaxyw pa pre mē hkôt harênh rãhã ho ri ixpa. Ka prem ja kaxyw inhmã kàxpore hkwý gõ pa pre ho amnhîm ixujaprõr pê mē hkôt ri mē kãm harênh o ri ixpa. Tã nhũm prem jar Rõm kamã ijaxà pa arî ixkrî htã ka mē axte ixwýr hkwý mē. Jakamã na pa hte mē amã ijamaxpêr rãhã ho ixkrî nê inhmã mē akînh týx nê. ⁸ Te Jejus Kris kãm mē ajapê htýx pyræk. Tirtũm kot ja hã ixpumunh mex.

⁹⁻¹⁰ Na pa hte mē ato kuwý nê kãm:

—Pa Tirtũm. E Piripos nhõ xwýnhjê pumu. Na mē ra kãm axpên kînh o axpên kôt pa. Kwa tanhmã mē hipêx to kê mē arî kãm axpên kînh týx pix nê. Jao axpên to mex rãhã ho pa. Nê tanhmã mē hkrã hto kê mē amnhî krãm akapêr jaxàr týx nê. Jao tãm amnhî nhîpêx mex nê hamaxpêr mex o ri pa. Nom kormã mē kot ja pumunh tohtuj

anhÿr. Tã kêr ka tanhmã mẽ ho kê mẽ ã amnhĩ nhĩpêx anhÿr rãhã Jejus Kris akupÿn mẽ ixwÿr wrÿ.

Anhÿr pa hte mẽ ato hwÿr o ixpa. ¹¹ Nã koja Jejus Kris mẽ akaxwÿnh kãm mẽ ato mẽ axihtÿx ka mẽ ÿ hã axihtÿx pê tãm ri amnhĩ nhĩpêx nẽ tãm axpên nhĩpêx o ri axpên kôt apa. Nhũm mẽ piitã ja hã mẽ apumu nẽ axpên mã Tĩrtũm mex o mex ã harẽ.

Pawre kãm Kris kôt amnhĩ nhĩpêx prãm ã harẽnh

Atre 28.30-31; Epes 6.19-20; Sikũn Ximotre 2.9

¹² E Kris kôt ixtõ nẽ ixtõxjaja. Kot paj mẽ amã tanhmã amnhĩ jarẽnh to ka mẽ inhma. Na prem ra Jejus ã ixtomnuj tÿx nẽ hã ijaxà pa amnhĩ xà htÿx kamã ijamak o ixkrĩ. Nom mẽ kot ã inhĩpêx anhÿr tã pa hte arĩ ixkrĩ xà kamã mẽ kãm Jejus jarẽnh o ixkrĩ. Jakamã na mẽ ra ohtõ nẽ tanhmã kot mẽ panê amnhĩ nhĩpêx to hã harẽnh ma. ¹³ Põristi kot inhĩhkõ hã ixtãnopxar xwÿnhjê mẽ ixwÿr mẽ mrar xwÿnh piitã ixte Kris kapêr jahkre ho ixpa pix ã mẽ kot ijaxà ã ijarẽnh ma. ¹⁴ Nẽ jar Kris kôt mẽ pahtõ nẽ mẽ pahtõxjaja haxwÿja ijarẽnh ma nẽ ohtõ nẽ ixpyrà nẽ Kris nhÿ hã amnhĩ to htÿx nẽ arĩ hkwÿjê mã kapêr jarẽnh rãhã ho pa. Ixpyrà nẽ kãm mẽ uma hkêt nẽ mẽ kutã amnhĩ to htÿx pê mẽ kãm harẽnh rãhã ho pa.

¹⁵⁻¹⁸ Nẽ na pre mẽ hkwÿjaja ixte mẽ amã Kris jarẽnh o ixpa hã ijarẽnh ma nẽ hã ixkamã gryk nẽ axtem hamaxpêr nẽ ixwakre kamã gryk kãm mẽ kãm Kris kapêr jarẽnh o pa. Na htem hamaxpêr o:

—E kot paj ma Pawre kot ra mẽ hwÿr mõi xwÿnhjê hwÿr mõi nẽ kot ra mẽ kãm Jejus kapêr jarẽnh nhĩpy axte mẽ kãm harẽnh o ri mẽ hkôt ixpa. Hãmri nhũm mẽ inhma nẽ inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarẽnh ma nẽ hkaprĩ nẽ rĩ amnhĩ pumu. Nã kot paj anẽ.

Anhÿr o hamaxpêr tã pa mẽ harẽnh ma nẽ ixkaprĩ hkêt nẽ. Mẽ kot mẽ amã hprĩ hã Kris kapêr jarẽnh kênã kot pa kêt tee ri mẽ harẽnh ma nẽ ixkaprĩ. Kwãr mẽ mãmrĩ ri ixkamã gryk kãm kapêr jarẽnh o ri pa. Pa mẽ harẽnh ma nẽ ixkĩnh nẽ. Nom

na hte mẽ hkwÿjaja jajê rom kãm ixkĩnh kãm mẽ kãm Kris kapêr jarẽnh o pa. Nẽ tãm hamaxpêr pê mẽ kãm harẽnh o pa. Ra mẽ kot ixpumunh mex jakamã nhũm Tĩrtũm kot jar mẽ hwÿr inhmẽnh nhũm ixte ãm hãmri mẽ kãm kapêr mex jarẽnh o ri ixkrĩ hã ixpumunh mex. Jakamã kwãr mẽ mãmrĩ tanhmã inhmã hamaxpêr to xà hkôt mẽ ujarẽnh mexja jarẽnh o pa. Mẽ kãm ixkĩnh kãm harẽ rÿ ixkamã gryk kãm ri harẽnh o pa. ãm hãmri Kris kapêr jarẽnh o pa jakamã pa mẽ harẽnh ma nẽ ixkĩnh nẽ.

¹⁹ Nẽ ra mẽ ate ixto Tĩrtũm wÿr o apa jakamã koja Karõja ixkaxyw tanhmã jar Rõm kamã pahiti nhĩpêx to nhũm tokyx ixkator japêr. Pa ixãmnhix ijamakêtkati nẽ ri ma mẽ akôt ixpa. ²⁰ Nom inhmã Jejus kãm hprãm xà hkôt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh nẽ arĩ kãm tanhmã amnhĩ nhĩpêx to ho ri ixpa. Nom koja mẽ tanhmã hamaxpêr to nẽ ixpĩ pa mẽ kutã mẽ kãm amnhĩ to htÿx nẽ ixãm rãhã nhũm mẽ ixpĩ pa ijamakêtkati nẽ ty. Kê mẽ ja hã ixpumu nẽ ixtã Kris mex o mex ã harẽ. ãm Jejus kãm hprãm xà hkôt pix mã na inhmã amnhĩ nhĩpêx prãm. ²¹ Tã kot paj tanhmã amnhĩ to nẽ arĩ ixtĩr japêr hã kot paj ãm kôt pix mã amnhĩ nhĩpêx rãhã ho ixpa. Nom koja mẽ tanhmã hamaxpêr to nẽ hã ixpĩ pa ty nhũm Tĩrtũm ma kaxkwa hwÿr ixkarõ ho àpir kurê kumrêx. Pa Tĩrtũm mẽ Krata wa kuri inhmex o inhmex nẽ wa kuri ixpa ho ixpa. ²²⁻²³ Tã nhÿ na we inhmã mex o hõ jakrenh wehe? Na pa tee ri amnhĩ kukamã ijamaxpêr. Inhmã tokyx ixtyk nẽ Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nẽ arĩ mẽ kãm Jejus kot tanhmã mẽ panê amnhĩ nhĩpêx to hã harẽnh rãhã ho ri ixpa. Ko. Ja mããnên inhmã mex. ²⁴ No mẽ amã na arĩ ixtĩr nẽ ixpaja mẽ amã hprãm ²⁵ jakamã kot paj pêr tokyx ixtyk kêt nẽ. Kot paj arĩ ri mẽ amã Kris kôt mẽ ato mẽ axihtÿx o ri mẽ akôt ixpa. Jao ãm ho hkrãre ka mẽ ra amnhĩ kaxyw kãm ajamaxpêr nẽ hkôt amnhĩ xunhwÿr tÿx nẽ. Jao akĩnh nẽ apa. ²⁶ Tã kot paj nhÿrmã akupÿm ixtĩr rãhã mẽ awÿr mõi ka mẽ ixpumu nẽ akĩnh nẽ. Jejus Kris kot akupÿm ixkator ã akĩnh nẽ. Hãmri

nē ixtā Jejus mā mex o mex ā harē.

Mē pahte Jejus ā pahpunuj tā mē pahte amnhī to ht̄yx ā mē pamā karō

Rukre 6.22; Sikūn Korīt 2.14-16; Xiakre 1.12; Jutre 3

²⁷ Jakamā e kêr ka mē Jejus Kris kapēr kôt pix mā amnhī nh̄pêx. Nē axpēn kôt axpēn to axiht̄yx pē mē kām Jejus kot tanhmā mē panē amnhī nh̄pêx to hā harēnh o ri apa kê mē ama nē mē pahpyrà nē hkôt amnhī xunhw̄y. E kêr ka mē ā amnhī nh̄pêx anh̄yr o ri apa. Kêr pa nh̄ymā mē hagjēnh xàja rūm ixkator japêr nē nh̄yri ja hā mē ajarēnh ma r̄y ma mē anhō kr̄i hw̄yr mō nē ja hā mē apumu nē ixkīnh nē. ²⁸ Nom kwa kêr ka mē amā mē kot Kris ā tanhmā mē ato xw̄ynh̄jē puma hkêt nē. Mē kot tanhmā mē anh̄pêx kati hto ht̄a kêr ka mē kutā amnhī to ht̄yx nē mē hkôt apa. Kêr kê mē amnhī tā mē apumu nē tee ri hamaxpēr hāmri nē axpēn mā:

—Kwa mē pahte Kris ā tanhmā mē hipêx to ht̄a na htem amnhī to ht̄yx nē ar̄i mē pamā harēnh o ri pa. Pēr mē kām mē pahpuma hkêt. Mān hte Tirtūm tanhmā mē ho nh̄um mē ŷ hā kām mē pahpuma hkêt nā? Kwa tanhmā kot puj mē ho nh̄um mē Jejus kapēr jarēnh o pata kaga? Nā kot puj mē ām tee ri hā tanhmā mē ho kapr̄y. Mān ām hāmri na htem nh̄ymā Tirtūm kuri ht̄ir tūm nē pa ho pa hā amnhī jarēnh o pa nā? Anē.

Koja mē ā mē ajarēnh anē. Tirtūm kot mē ato mē axiht̄yx ā mē apumunh kôt. ²⁹ Na pre tanhmā mē ato ka mē Kris kôt amnhī xunhw̄y. Tā mē kot tanhmā hā mē anh̄pêx to ht̄a na hte Tirtūm mē kutā tanhmā mē ato ka mē ŷ hā amnhī to ht̄yx nē apa. ³⁰ Ijaxw̄yja na pa hte amnhī xà ht̄yx kamā ijamak o ixkr̄i. Na pre htem Jejus ā ixtomnuj o pa ka prem ja hā ijarēnh ma nē hā ixpumu. Tā ota kê mē ra axte tanhmā hā inh̄pêx to. Pa kê amnhī xà ht̄yx kām ijamak o ixkr̄i ka mē ijarēnh ma. Tā xep mē ixpyrà nē Kris ā amnhī xà ht̄yx kamā ajamak o apa. Nom kwa kêr ka mē tee ri amnhī kukamā ajamaxpēr o akapr̄i nē apa hkêt nē.

2

Jejus kām mē pajapê xàj tanhmā kot amnhī nh̄pêx to hā harēnh

Rômān 15.5-6; Epes 4.1-6; Piripos 2.18

¹ Nē ra mē pahte Jejus kôt amnhī xunhw̄yr jakamā pu mē tee ri amnhī kukamā pajamaxpēr o pahkapr̄i nē ri papa hkêt nē. Ām kām mē pajapêja mā pajamaxpēr rāhā ho pahkīnh nē pajamakêtkati nē ri papa. Nh̄um Karō mē pahkarō mā agjē nē mē pahto mex nē mēmoj to mē pakutā nojarêt o ri mē pakamā pa. ² Tā kêr ka mē axpēn mar mex nē mēmoj tā axpēn mā axàkjêr o ri apa hkêt nē. Te ri ixkre pixi kamā mē atixpi nē axpēn kôt amnhī nh̄pêx pyrāk. Nē Tirtūm kām hprām xà hkôt pix mā ajamaxpēr o ri apa. Nē mē amā axpēn kīnh o ri apa. Kot kaj mē ā amnhī nh̄pêx anē pa ja hā mē apumu r̄y hā mē ajarēnh ma nē ixkīnh t̄yx kumr̄ex.

³ Nē kwa kêr ka mē axpēn pumu nē ā ajamaxpēr anh̄yr kêt nē. Mē ajamaxpēr o:

—Tk. Kot pa ri tanhmā jahti ho ajuta hto ho ixpa hkêt nē. Ixte amnhī to rax o hakrenh kēnā kot pa hkêt ri ho ajuta. Kê tām mān tanhmā ixto ajuta hto.

Anh̄yr o ajamaxpēr kêt nē. Kêt nh̄yri mēhō pumu nh̄um tanhmā kute ka hā omu nē ajamaxpēr o:

—Hêxta waa nē. Kwa tanhmā kot pa we ho ajuta htoo?

Anh̄yr o ajamaxpēr hāmri nē ajamaxpēr xà hkôt tanhmā ho ajuta hto.

⁴ Jao Jejus pyrā nē mēmoj to axpēn kutā anojarêt o ri apa. No ri amnhī pix kukamā ajamaxpēr o apa hkêt nē. ⁵ Kêr pu mē te Jejus tanhmā hamaxpēr toja pyrāk o pajamaxpēr o ri papa.

⁶ Kêp Tirtūm Kra kumr̄ex jakamā te urāk tā xà na pre ja hā amnhī pumu nē amnhī pix kukamā ā hamaxpēr anē nē hamaxpēr o:

Te ixte Tirtūm pyrāk jakamā mēmoj piitā inhō na. Jakamā kot paj jar kaxkwa kamā inhmex nē ixkīnh nē ixpa ho ixpa nē aa rer nē nh̄yh̄ym inhmōr kêt kumr̄ex. Anh̄yr o na pre hamaxpēr? Nā na pre ā hamaxpēr anh̄yr kêt nē.

⁷⁻⁸ Kām mē pajapê xàj na pre kaxkwa kamā mēmoj mex piitā rer pa nē man mē

pahwÿr wrÿ nē mē pahpyrà nē ĩ ho katorxà nhõhy rÿm kato.

Kêp mē panhõ Pahihtĩ htã te kêp mē panhĩõ nē te kot amnhĩ to grĩre pyrãk o amnhĩ nhĩpêx o ri pa.

Nē Tĩrtũm kãm hprãm xà hkõt pix mã amnhĩ nhĩpêx o pa.

Nē ãm kõt pix mã amnhĩ nhĩpêx o pa rãhã nhũm prem kupĩ nhũm arĩ mē kãm xa nē tanhmã amnhĩ tã mēhõ hto hkõt nē.

Na prem hipêx kati nē. Te kêp mē kot amnhĩ tomnuj tÿx xwÿnhjê nhĩpêx pyrãk o hipêx nē pĩ kahpa hã kunhõ nē kupĩ.

Tã no nhũm mē kêp tanhmã amnhĩmnuj to hkõt nē arĩ mē kãm xa. Mē panê na pre ã amnhĩ nhĩpêx anê.

⁹ Hãmri nhũm Tĩrtũm ã kot amnhĩ nhĩpêx anhÿr ã omu nē akupÿm ho htĩr nē akupÿm amnhĩ wÿr ho api.

Nē mex o mex ã harê.

Nē kot nhÿrmã mē pahpiitã mē pahto amnhĩptãr kaxyw mē pakaxyw ãm.

¹⁰ Jakamã kot puj mē nhÿrmã pahpiitã Jejus kutã pahkõnkrã ho rôrõk nē pahkrĩ hpa nē kax pêê kãm mex o mex ã harê.

Mē pahpiitãã. Kaxkwa kamã mē pa xwÿnhjaja nē pika piitã hkõt mē papa xwÿnhjaja.

Nē mē htyk xwÿnh piitã koja mē akupÿn htĩr pu mē pahpimràatã Jejus kutã pahkõnkrã ho parõrõk nē pahkrĩ hpa nē kãm mex o mex ã harê.

¹¹ Nē kãm:

Pa Pahihtĩ Jejus. Nã ãm hãmri na apê mē inhõ Pahi Maati hã apyxi mex na ka.

Jakamã mē ixtõ kot paj mēmoj tã tanhmã amã karõ hto? Nã kot paj mē ixtõ ã amnhĩ nhĩpêx anhÿr kêt nē. Anê.

Kot puj mē nhÿrmã ã Jejus mã pakapêr anê. Jao mããnên Tĩrtũm hihtÿx o hihtÿx nē àhpumunh o àhpumunh ã omu. Nē mex o mex ã omu.

Te mē pahpê kanhêti pyrãk ã mē pajarênh Matêwre 5.14-16

¹²⁻¹³ Tã kwa ixkrãmnhwÿjaja. Inhmã mē akĩnh. Kwa kêr ka mē arĩ Tĩrtũm kõt amnhĩ nhĩpêx mex rãhã nē. Te ixte mē akamã ixpare ri mē ate amnhĩ nhĩpêx mexta pyrãk

o ixwakre kamã amnhĩ nhĩpêx mex o ri apa. Na pre ra Tĩrtũm mē panê mē pahte amnhĩ tomnuj rē nē tanhmã mē pahto pu mē ÿ hã kapêr kõt amnhĩ nhĩpêx o ri papa. Jakamã kwa kêr pu mē axte tanhmã amnhĩ tomnuj to ho papa hkõt nē. Nē mē pahte Tĩrtũm kapêr kwÿm ri amnhĩ nhĩpêx pymaj ãm hkõt pix mã amnhĩ nhĩpêx o ri papa.

¹⁴ Nē kêr ka mē mēmoj to anhÿr kaxyw nē agryk kãm tanhmã ri ho hkõt nē. Nē mēmoj tã axapênh kaxyw nē ri hã axpên mã akapêr kati kamã ho anhÿr kêt nē. ¹⁵⁻¹⁶ Mē kot amnhĩ tomnuj xwÿnhjaja na htem ã amnhĩ nhĩpêx anhÿr o pa. No kêt mē kajaja. Mē ate mē hkõt apa htã kêr ka mē hkõt amnhĩ nhĩpêx kêt nē. Mē kurom mē apê Tĩrtũm kra jakamã kêr ka mē hkõt pix mã amnhĩ nhĩpêx o ri apa. Nē tanhmã amnhĩ tomnuj to rÿ tanhmã ajamaxpêr punuj to hkõt nē. Mē kot amnhĩ tomnuj xwÿnhjaja te ri kamãt kô kamã ri mē kêp àhkĩnh o ri mē pa xwÿnhjê kot amnhĩ nhĩpêx pyrãk. Tã kot kaj mē hkõt tãm ri amnhĩ nhĩpêx o apa nē te ate kanhêtiija kamãt kô kamã hirã ho harir pyrãk o amnhĩ nhĩpêx. Jao mē kãm Tĩrtũm kapêr jarênh o ri mē hkõt apa. Mē kot amar nē apyrã nē nhÿrmã kuri htĩr tũm nē pa ho pa kaxyw. Kot kaj mē ã amnhĩ nhĩpêx anê nhũm nhÿrmã Jejus Kris akupÿn mē pahwÿr wrÿk ã arĩgrota ã pa mē apumu nē ixkĩnh nē. Nē ixkĩnh kãm Jejus mã mē ajarê nē kãm mē ajarênh o:

—Kwa Pahihtĩ. E jajê pumu. Na pa pre mē kãm akapêr jarênh o ri mē hkõt ixpa nhũm mē inhmar tÿx nē nē akapêr kõt amnhĩ nhĩpêx o ri pa. Jakamã na pa pre mē kãm akapêr jarênh kaprÿ hkõt nē.

Anhÿr o kãm mē ajarê. ¹⁷ Na pa pre mē akõt mē amã Tĩrtũm kapêr jarênh o ri ixpa ka prem inhma nē hkõt amnhĩ xunhwÿ. Jakamã te ixte Tĩrtũm mã mē ato ixkĩnh xà nē kãm mē anhõr pyrãk.

Nē koja jar Rõm nhõ pahihtija tanhmã ixto hkõt japêr. Rÿ tanhmã ixto. Nom kwãr mē mãmrĩ tanhmã kãm ixto hprãm xà hkõt tanhmã ixto rÿ ixpĩ. Koja mē ã ixte mē anhĩpêx anhÿr ã ixpĩ pa ixkĩnh nē. Nē tanhmã ijamaxpêr to hkõt kãm ty. Jakamã na pa ra ã mē kot inhĩpêx anhÿrja kukamã mē amã amnhĩ kĩnh ã amnhĩ jarê ka mē

inhma. ¹⁸ Tã kêr ka mẽ ixpyrà nẽ ajaxwỳja ixtã akĩnh nẽ apa.

Ximotre mẽ Eparoxit wa harẽnh

¹⁹ Nẽ koja Pahihti Jejus kãm ja prãm hã kot paj ma mẽ awỳr Ximotre mẽ nhũm ma mẽ awỳr mō nẽ ri mẽ akõt pa nẽ tanhmã mẽ ate amnhĩ nhĩpêx to hã mẽ apumu. Hãmri nẽ man akupỳn ixwỳr mō nẽ inhmã mẽ ajarẽ pa mẽ ajarẽnh ma nẽ ixkĩnh nẽ tee ri mẽ akukamã ijamaxpêr o ixkrĩ hkêt nẽ. ãm tãm mẽ akukamã ijamaxpêr o ixkrĩ. ²⁰ Ximotre tapxipix na ixpyrà nẽ kãm mẽ akĩnh nẽ kãm mẽ ato ajuta hprãm. Na hte mẽ ajarẽnh rãhã ho pa. ²¹ Nom jar mẽ piitã Ximotre kĩnhã amnhĩ mex pix kukamã hamaxpêr o pa nẽ kãm Jejus Kris kõt tanhmã amnhĩ nhĩpêx to ho pa hprãm kêt nẽ.

²² Ximotre te kêp ixkra pyrãk. Na hte ixkõt pa nẽ ixpyrà nẽ Jejus mã tanhmã amnhĩ nhĩpêx mex to ho pa. Pa pre wa ijamẽ mẽ kãm mẽ ujarẽnh mex jarẽnh o wa ri mẽ hkõt ixpa. ²³ Tã koja mẽ tanhmã ixtã xypên mar to. Apu mẽ kot ixpĩr ã amnhĩ jarẽ rỳ ixkator ã amnhĩ jarẽ. Pa tanhmã amnhĩ tã mẽ mar to nẽ rĩ kormã ma mẽ awỳr Ximotre mẽ kê ma mẽ awỳr mō nẽ mẽ amã tanhmã ijarẽnh to.

²⁴ Nẽ koja Pahihti Jejus kãm ja mex pa ijaxwỳja ma mẽ awỳr mō pu mẽ axte xypên pumu.

²⁵ Nẽ kot paj tokyx ma akupỳm mẽ awỳr Kris kõt mẽ pahtõ Eparoxit mẽ. Na ka prem kãm kàxpore gō nhũm man ixwỳr o mō nẽ inhmã kugō. Hãmri nẽ jar inhmã àpênh rax nẽ ixpyrà nẽ mẽ ujarẽnh mexja jarẽnh o pa. ²⁶⁻²⁷ Tã ra à htỳx nẽ. Kironhỳx pre mẽ pahpê ty. Tã nhũm Tĩrtũm omu nẽ kamã ukapĩrĩ nẽ. Nẽ mãânên pa ixkamã ukapĩrĩ nẽ. Nẽ tee ri ixte à htỳx ã omunh nẽ ixkapĩrĩ htỳx pymaj akupỳm inhmã ho mex nhũm ra akupỳm mex nẽ ri pa. Hãmri nẽ kãm mẽ apumunh prãm nẽ. Mẽ ate à htỳx ã harẽnh mar nẽ akapĩrĩ hã mẽ ajarẽnh ma nẽ tee ri mẽ akukamã hamaxpêr. ²⁸ Jakamã inhmã akupỳm tokyx mẽ awỳr mẽnh prãm. Tã koja mẽmo arĩgro hã mẽ awỳr pōj ka mẽ omu nẽ akĩnh nẽ tãm ajamaxpêr. Pa ijaxwỳja jar ixkĩnh nẽ tãm ijamaxpêr. ²⁹⁻³⁰ Na ka prem ixwỳr amẽ nhũm man ixwỳr mō nẽ

jar ixri mẽ kãm Kris kapêr jarẽnh o ri mẽ hkõt pa rãhã nhỳx hã ty nom kot amnhĩ kamã kahak kêt. Jakamã kê akupỳm mẽ awỳr pōj ka mẽ omu nẽ akĩnh nẽ. Nẽ kahti hkõt amỳ nẽ ho mex nẽ. Kêp Kris kõt mẽ pahtõ mex kênã. ã na htem Kris mã mẽ kot tanhmã amnhĩ nhĩpêx to ho mẽ pa xwỳnhjê nhĩpêx mex anhỳr o pa.

3

Mẽmoj tã mẽ pahpumunh kõt Tĩrtũm kot tãm mẽ paxunhwỳr ã harẽnh

Piripos 2.18, 4.4

¹ E Kris kõt ixtõ nẽ ixtõxjaja. Kris kêp mẽ panhõ Pahihti jakamã kwa mẽ jam ajamaxpêr nẽ akĩnh rãhã ho ri apa.

Na pa ra mẽ amã mẽmoj jarẽnh rax nẽ. Nẽ hã kagà rax tã kormã inhmã ja ho anhỳr kaga hkêt nẽ. Kot paj axte mẽ amã hkwy hã kagà. Mẽ ate hã ano htỳx nẽ ho apa kaxyw. ² Jakamã e kwa mẽ okora. Kêr ka mẽ amnhĩ nẽ mẽ kot Tĩrtũm kapêr o hêx xwỳnhjê pumunh mex o ri apa. Na htem tanhmã mẽ amã kapêr ho pa nẽ mẽ amã:

—Kot kaj mẽ ixpê Ijaewjê pyrã nẽ amnhĩ my kwryt kà jakã hãmri nẽ apê Tĩrtũm kra. Anẽ.

³ Nom ja kot anhỳr kêt. Mẽ pahte amnhĩ jakar kõt mẽ pahpê Tĩrtũm kra hkêt. ã kot anhỳr ronhỳx pu mẽ amnhĩ krã hkõt tanhmã amnhĩ nhĩpêx to ho pahpê hkra. Nom ja kot anhỳr kêt. Mẽ ate amnhĩ jakar kêt tã mẽ ixpyrà nẽ amnhĩ kaxyw Jejus Kris mã ajamaxpêr jakamã mẽ ixpyrà nẽ mẽ apê Tĩrtũm kra na ka mẽ. Na ka htem mẽ ixpyrà nẽ Karõ nhỹ hã kãm mex o mex ã harẽnh o ri apa nẽ mẽ ixpyrà nẽ Jejus kukwak ri akĩnh nẽ ri apa. Nom na pu htem pahpê hkra kaxyw amnhĩ jakar kêt nẽ. ⁴ Kop ãm amnhĩ krã hkõt mẽ pahte amnhĩ to Tĩrtũm kra ronhỳx pa ra amnepêm amnhĩ to hkra nẽ ri ixpa. Na pa pre ixpê hkra hprãm xaj amnhĩ krã hkõt tanhmã ri amnhĩ nhĩpêx to rax o ixpa nom ã amnhĩ nhĩpêx anhỳr kaprỳ. E pa ja hã mẽ amã amnhĩ jarẽ ka mẽ ijarẽnh ma.

⁵ Na pa pre ixkato nẽ kormã ixtã semãn pixire nhũm mẽ ixpê Ijaew ã inhmy kwryt kà krãhta. Nom pa ã mẽ kot inhĩpêx anhỳr kõt ixpê Tĩrtũm kra hkêt nẽ. Nẽ inhĩpêxà

hkôt ixpê finat Pějãmĩ kanrēhã htàmnhwỳ jakamã ixpê Ijaew mex na pa. Nē Ijaew kapēr o ixkapēr o ri ixpa. Nom ja kôt ixpê Tĩrtũm kra hkêt. Nē mãânēn ixpê Parijew nhõ xwỳnh jakamã na pa pre Tĩrtũm kot finat Mojes mã mẽ pakaxyw mẽmoj tã karõ kôt pix mã amnhĩ nhĩpêx o ixpa hprãm. ⁶ Jao tee ri mẽ kot Jejus kôt amnhĩ nhĩpêx xwỳnhjê pumu nē mẽ homnuj tỳx o ri ixpa. Na pa pre ijamaxpēr o: “Nà mũjjaja na htem mẽ ixkwỳm ri amnhĩ nhĩpêx o pa.” Anē nē mẽ hipêx kati ho ri ixpa. Nē ijamaxpēr o: “Ra ixte finat Mojes kot Tĩrtũm nhỹ hã kapēr piitã hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixpa hkêt nē.” Anē.

⁷ ã na pa pre ixpê Tĩrtũm kra hprãm xàj amnhĩ nhĩpêx anhỹr o ixpa. Tã nom ãm ã amnhĩ nhĩpêx anhỹr hkaprỳ. Na htem ã ri amnhĩ nhĩpêx anhỹr kôt kêp Tĩrtũm kra hkêt nē. Tã pa hpãnhã amnhĩ kaxyw Kris kôt ijamaxpēr nhũm ixto hkra kurê kumrêx.

⁸ Ra ixte Jejus Kris kôt amnhĩ xãm jakamã Jejus kêp inhõ Pahihti pa inhmã kapēr kôt pix mã amnhĩ nhĩpêx o ri prãm. No hkra x rũm ixte amnhĩ nhĩpêx tũmja na pa ra Jejus gryk ã hkaga hpa. Te ixte mẽmoj punuj pyr nē amnhĩ katut kôt mēnh nē axte kãm ijamaxpēr kêt pyrãk. Jao amnhĩ kaxyw Jejus kôt pix mã ijamaxpēr o ri ixpa. ⁹ Nom kormã ã ijamaxpēr anhỹr kêt ri na pa pre ixtỳx ri ijamaxpēr o:

—Nà ixte Mojes kot Tĩrtũm nhỹ hã kapēr kôt amnhĩ nhĩpêx o ixpa jakamã koja Tĩrtũm ja hã ixpumu nē ixto hkra.

Anhỹr tã nom ja kot anhỹr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tĩrtũm ãm ja hã mẽ omu nē ãm hã mẽ omu nē mẽ ho hkra hkêt nē. Nom koja mẽ Kris kôt amnhĩ xunhwỳ nhũm ja hã mẽ omu nē mẽ ho hkra kurê kumrêx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nē inhmex ã ijarê. ¹⁰ Hãmri pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupỳm htĩr nē hihtỳx nē àhpumunh tỳx o tanhmã amnhĩ nhĩpêx to ho pa. Tã ijaxwỳja inhmã uràn ã amnhĩ nhĩpêx anhỹr prãm. Nē inhmã uràk nē

amnhĩ xà htỳx kutã amnhĩ to htỳx nē ixpa hprãm. Mẽ kot hã ixpĩr mã tã pa uràk nē Tĩrtũm kapēr kaga hkêt nē ãm kôt pix mã amnhĩ nhĩpêx o ri ixpa rãhã uràk nē hã ty. Ja na inhmã ho anhỹr prãm. ¹¹ Kê Tĩrtũm kot hipêxta pyrã nē akupỳm ixto ixtĩr pa wa kuri ixtĩr tũm nē ixpa ho ixpa. ¹² Inhmã Kris kôt pix mã amnhĩ nhĩpêx o ixpa hprãm tỳx kumrêx. Kormã ixte hkôt amnhĩ nhĩpêx o inhmõr nē kormã hatur xàm mēnh kêt tã inhmã tokyx hatur xàm mēnh prãm. Na pa ã inhmã amnhĩ nhĩpêx anhỹr prãm tỳx kumrêx.

Nē na pa hte ixte amnhĩ tomnuj kêt ã amnhĩ to jarkrar o ri ixpa hkêt nē. Na pa hte arĩ tũhã tanhmã amnhĩ tomnuj to nom inhmã ã amnhĩ nhĩpêx anhỹr prãm kêt. Nē na pa kormã ixprĩ hã Kris kot amnhĩ nhĩpêx mar o inhmõr nē hatur xàm mēnh kêt tã inhmã hkôt amnhĩ nhĩpêx o inhmõr nē tokyx hatur xàm mēnh prãm. Ja kaxyw na pre Jejus Kris amnhĩ kaxyw ixta. ¹³ Na pa hte mẽ akurom papxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nē. Nom ra ixte tanhmã amnhĩ tomnuj to ho ixpata pa axte kãm ijamaxpēr kêt nē. Te amnhĩ katut kôt ixte rēnh par pyrãk o hipêx nē axte kãm ijamaxpēr kêt nē. Nē Jejus kãm hprãm xà hkôt pix mã amnhĩ nhĩpêx prãm xàj amnhĩ kaxyw kãm ijamaxpēr o ri ixpa.

¹⁴ Koja nhỹrmã Tĩrtũm ixpê Kris kwỳ hã amnhĩ wỳr ixwỳ nē inhmã:

—E amnē ixwỳr api Pawre. Kot kaj jarãhã amnē mẽ ixwỳr api.

Anhỹr o nhỹrmã inhmã kapēr jakamã na pa hte amnhĩ tã ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mō. Nà kot paj gaa nē hkôt pix mã amnhĩ nhĩpêx mex o ri ixpa. ¹⁵ Kwa kêt pu mẽ pahpiitã ã pajamaxpēr anē. Jao amnhĩ wỳr hamãr pê hkôt pix mã amnhĩ nhĩpêx o ri papa. Mẽ pahpiitã mẽ pahpê Kris kwỳ kēnã. Nom kot ka mẽ atõ ja kaxyw tee ri amnhĩ kukamã ajamaxpēr nē ajamaxpēr o:

—Nà tanhmã kot paj we amnhĩ to nē Jejus kôt amnhĩ nhĩpêx mex rãhã o ri ixpa? Ja kaxyw ixàhpumunh tỳxre hã. Anē.

Hãmri nē ã ajamaxpēr anhỹr o apaja apê hihtỳx japêr. Hã koja Tĩrtũm hprĩ

hã tanhmã amã ja kukamã harënh to nê kaxyw ato axihtÿx ka ixpyrà nê hkôt pix mã ri amnhĩ nhĩpêx o apa. ¹⁶ Jakamã kêr pu mẽ ãm Tĩrtũm kãm hprãm xà hkôt pix mã tanhmã kãm amnhĩ nhĩpêx to ho papa. Ra mẽ pahte hkôt amnhĩ nhĩpêx o papa xàja kôt pix mã arĩ amnhĩ nhĩpêx rãhã ho papa.

¹⁷ E Kris kôt ixtõ nê ixtõxjaja. Na pa ra mẽ anoo mã Jejus kôt tãm ri amnhĩ nhĩpêx o ri ixpa. Tã kêr ka mẽ ja hã ixpumu nê ixpyrà nê hkôt amnhĩ nhĩpêx o ri apa. Hãmri nê nhÿri mẽ kot ixpyrà nê ã amnhĩ nhĩpêx anhÿr xwÿnhjê hõ pumu nê uràk nê ã amnhĩ nhĩpêx anê. ¹⁸⁻¹⁹ Jejus kot mẽ pamã mẽ pahte amnhĩ tomnuj mÿrapê pĩ kahpa hã mẽ panê htykja nhũm mẽ ra ohtõ nê hprĩ hã mar tã hkôt amnhĩ xunhwÿr kêt nê. Mẽ kãm ã kot amnhĩ nhĩpêx anhÿrja ã mar prãm nõkati. Jakamã te mẽ kãm Jejus kurê xwÿnh pyræk. Na htem hã hpijaàm kêt kãm tanhmã ri amnhĩ tomnuj to ho pa. Nê kãm amnhĩ mex pix prãm. Nê tanhmã amnhĩ tomnuj to nê ja hã amnhĩ pumu nê hkĩnh nê. Nom tee ri ja hã amnhĩ pumu nê hkaprĩ nê ri pa hkêt nê. Tã ã mẽ kot amnhĩ nhĩpêx anhÿr jakamã koja mẽ nhÿrmã ma mẽ kot amnhĩ xà htÿx kamã hamak o pa tũm xàta wÿr hapêx. Nà koja mẽ ã amnhĩ nhĩpêx anê. Ra ixte mẽ amã ja hã mẽ harënh rax tã pa axte mẽ amã mẽ harê. Inhmã mẽ hkaprĩ hkôt na pa hte xatã mẽ amã ja hã mẽ harê. ²⁰ Kêt mẽ papajaja mẽ kurom mẽ pahpê kaxkwa nhõ xwÿnh nom kormã. Koja nhÿrmã Jejus Kris akupÿn mẽ pahwÿr kaxkwa rũm wrÿ. Mẽ papytår xwÿnh maati Pahihtija akupÿn wrÿ hãmri nê ma akupÿm amnhĩ kôt mẽ pahto api. Jakamã na pu htem arĩ pahkĩnh pẽ amnhĩ wÿr kamã pajamak rãhã ho ri papa. ²¹ Na pu htem jar pyka ja kamã Jejus kĩnhã paxirerek nê pahpunuj nê ri papa. Nom koja nhÿrmã akupÿn mẽ pahwÿr wrÿ hãmri nê amnhĩ pyrã nê mẽ pamã mẽ panhĩ nyw gõ pu mẽ uràk nê paxihtÿx kãm pahtĩr tũm nê papa ho papa. Æ kot mẽ panhĩpêx anhÿr kaxyw àhpumunh o àhpumunh. Tã koja àhpumunh tÿx kãm mẽmoj piitã ho amnhĩptår pa. Pu mẽ pahpiitã hkôt amnhĩ nhĩpêx mex rãhã ho ri papa.

4

*Pawre kot mẽmoj tã mẽ kãm karõ
Epes 4.3; Piripos 2.2; Korosẽ 3.15*

¹ E Kris kôt ixtõ nê ixtõxjaja. Inhmã mẽ ajapêê. Na pa hte mẽ ato ijamak o ixkrĩ nê mẽ amã ijamaxpêr nê ixkĩnh nê. Nê jar mẽ pahkwÿjê mã mẽ ajarënh o ri ixkrĩ. E kwa kêr ka mẽ arĩ Pahihti kapêr kôt pix mã mãn amnhĩ nhĩpêx mex rãhã ho ri apa.

² Nê wa ka Ewox mẽ Sïxika wa. Na ka xep hte wa mẽmoj tã axpên kamã agryk rãhã ho ri apa. Kwa wa ã amnhĩ nhĩpêx anhÿrja mã anhÿre nê tãm axpên nhĩpêx. Pahihti Kris kôt war ate axpên to war atõx kênã kot ka kêt wa axtem nê mẽmoj tã axpên kamã agryk o ri apa.

³ Nê ka Xikitre. Apê ixkràmnhwÿ mex jakamã kêr ka axpên tã wa nita wa kãm akapêr kãm axihtÿx nê kê war ama nê akupÿm tãm axpên nhĩpêx. Na pre wa ra Kremën mẽ hkwÿjê mẽ hpimràatã ixpyrà nê Jejus kot tanhmã mẽ panê amnhĩ nhĩpêx to hã harënh o ri pa. Tĩrtũm nhõ kagã kamã mẽ hixi piitã hikwÿ. Mẽ pahtĩr tũm nê mẽ papa mã xwÿnhjaja ra Tĩrtũm nhõ kagã kamã mẽ panhĩxi jaxwÿr par.

⁴ Nê kêr ka mẽ apê Pahihti hkwy hã akĩnh nê ri apa. Mẽ ate ã amnhĩ nhĩpêx anhÿr o apaja na pa inhmã hprãm tÿx jakamã kot pajaxte mẽ amã harê. Kwa kêr ka mẽ akĩnh nê ri axpên kôt apa.

⁵ Pahihti Jejus ra akupÿn mẽ pahwÿr nojarêt jakamã kêr ka mẽ kutêp mẽ piitã ri mẽ ho mex o ri mẽ hkôt apa.

⁶ Nê kêr ka mẽ tee ri amnhĩ kukamã ajamaxpêr o ri apa hkêt nê. Arĩ amnhĩ to Tĩrtũm wÿr rãhã nê. Kot ka mẽ mẽmo arĩgro hã apê amrakati japêr nê tee ri ja hã amnhĩ pumu nê amnhĩ to awÿ kê mẽ ama nê mẽ amã mẽmoj gõ. Rÿ mẽ ate mẽmoj tã hwÿr xwÿnhhta tanhmã mẽ amã hipêx to ka mẽ amnhĩ tã omu nê kãm:

—Nà ãm hãmri na ka ã inhĩpêx anê nê inhmã ja gõ Tĩrtũm. Amex o amex.

Anhÿr o kãm amnhĩ jarê. ⁷ Kot kaj mẽ ã amnhĩ to hwÿr anhÿr o ri apa nhũm tanhmã mẽ akrã hto ka mẽ mẽ apê Jejus Kris kwÿ hã ajamakêtkati nê axãmnhĩx ri apa. Hãmri nê mẽmoj tã tee ri amnhĩ kukamã ajamaxpêr o ri akaprĩ nê apa hkêt

nē. Ām akīnh rāhā ri apa. Tīrtūm kot tanhmā mẽ pahto nhūm mẽ pajamakêtkati nē ri mẽ papaja mẽ pahte amnhī tā omunh kêt. Ām tapxipix kot ā mẽ panhīpêx anhÿr kukamā àhpumunh tÿx.

⁸ E Kris kôt ixtō nē ixtōxjaja. Nà ixkapêr ā kagà jatur xà na ja. Kwa kêr ka mẽ ixujarênh mar tÿx nē hkôt amnhī nhīpêx o apa.

Nē kêt ka mẽ axàpênh mex pix kukamā ri ajamaxpêr o apa.

Nē mẽmoj mex pix kukamā ri ajamaxpêr. Nē axpên mã akapêr mex pix kukamā ri ajamaxpêr.

Nē akatàt kôt akapêr xàptàr pix o axpên mã akapêr hkukamā ri ajamaxpêr o ri apa.

Nē tām ri amnhī nhīpêx hkukamā mǎn ajamaxpêr o ri apa.

Nē mẽ piitā ri mẽ ho mex o apa hkukamā ajamaxpêr.

Nē mẽ akapêr mex pix kukamā mǎn ajamaxpêr o ri apa.

E kêt ka mẽ ā amnhī nhīpêx anhÿrja kukamā ajamaxpêr rāhā ho ri apa.

⁹ Nē mẽ akôt ixpare ri na pa pre Kris kôt amnhī to mex pix nē tām ixkapêr o ri ixpa. Tā kêt ka mẽ ixpyrà nē ā amnhī nhīpêx anē. Koja Tīrtūm ja hā mẽ apumu nē mẽ akôt ri pa ho pa. Kêp mẽ pamā mẽ paxàmnhīx pajamakêtkati xà nhōr xwÿnh na.

Mẽ kot Pawre hwÿr mẽmoj mẽnh nhūm kot omunh nē hkīnh ā harênh

Sikūn Korīt 11.7-9; Piripos 1.5

¹⁰ Nē amnepêr na ka prem xatā tanhmā ixtō mex to ho ri apa. Tā axte ā inhīpêx anhÿr prām nom mẽ apê awry nē ixpa jakamā ka xep prem tee ri tanhmā ixtō mex to hkukamā ajamaxpêr kaprÿ. Tā jar mẽ kot ijaxàr ā ijarênh ma nē ixwÿr Eparoxit mẽ nhūm man ixwÿr mō nē inhmā kàxporeta gō. Mẽ amā ijapê hā ixwÿr amē pa omu nē ixkīnh tÿx nē. Nē ixkīnh kām Tīrtūm mã mẽ ajarē. Ām hāmri na ka prem ixwÿr amē.

¹¹⁻¹² Nē na pa hte tanhmā ixkute htā arī ixkīnh nē ijamakêtkati nē ri ixpa. Jakamā kot pa mẽmo arīgro hā ixpê amrakati nē inhmā prām japêr tā no ām tee ri amnhī kukamā ijamaxpêr o ri ixkaprī hkêt nē.

Arī ixkīnh rāhā ixàmnhīx ri ixpa. Rÿ pa inhō mẽmoj rax japêr nē mãānēn ixkīnh nē ixàmnhīx ri ixpa. Na pa pre tōhā inhō rax nē ixpa. Nē tōhā inhō hkêt nē ixpa. Tā arī ixkīnh rāhā nē ixpa ho ixpa. ¹³ Na hte Kris mẽmoj piitā hkukamā ixtō ixihtÿx pa ÿ hā mẽmoj kutā ixihtÿx nē ixpa. Jao mẽmo arīgro hā inhmā prām tÿx nē ri ixpa htā ÿ hā kutā ixihtÿx nē ixàmnhīx ri ixpa. ¹⁴ Tā jar ixpunuj nē ixkrī ka mẽ ijarênh ma nē ixwÿr kàxpore hkwy rē. Ām hāmri na ka prem ixwÿr arē. ¹⁵ Amnepêr na pa pre mẽ anhō pika pē Masetōn rūm ixkato nē mẽ piitā mẽ kām Jesus kot tanhmā mẽ panē amnhī nhīpêx to hā harênh o ri ixpa ka mẽ xatā ixwÿr kàxpore hkwy rē pa ho amnhīm ixujaprōr o ri mẽ hkôt ixpa. Mẽ apê Piripos kamā Kris kôt ixtō nē ixtōx pixjaja na ka prem ā inhīpêx anē. Krī hkwy kamā Kris kôt mẽ pahkwÿjaja na mẽ akīnhā ā inhīpêx anhÿr kêt nē. Ām mẽ kapxipix na ka pre ā ixtō mex anē. ¹⁶ Tesarōn kamā ixpare ri na pa pre ixpê amrakati kumrêx nē ri mẽ hkôt ixpa ka mẽ xatā ixwÿr kàxpore hkwy rē pa pre ho amnhīm ixujaprōr rāhā ho ri mẽ hkôt ixpa. ¹⁷ Nom mẽ ate ixwÿr hkwy rēnh kaxyw mẽ akamā ijamak o ri ixpa hkêt nē. Rÿ ijamaxpêr o:

—Ko. Koja Piripos nhō xwÿnhjaja ijarênh ma nē kām ixkaprī nē ixwÿr kàxpore hkwy rēnh japêr.

Anhÿr o mẽ akukamā ijamaxpêr kêt nē. Nom ra mẽ ate ixwÿr hkwy rēnh jakamā koja Tīrtūm ja hā mẽ apumu nē mẽ ato mex nē. Ā mẽ pahte axpên kutā panojarêr anhÿrja na kām hprām.

¹⁸ Tā nhūm Eparoxitja ham mẽ arūm kato nē man ixwÿr mō nē inhmā kàxporeta gō. Kwa na ka mẽ inhmā òr rax nē. Koja tokyx ixpê hapêx kêt pa kritpêr ho ixàpkur o ixkrī. Tā ot pa ho kōta nē tanhmā hkre kamā kute pumunh xà hkôt hā kagà nē mẽ awÿr kumē. Nà mẽ ate ixwÿr axàmnhōrta na Tīrtūm omu nē ixtā mẽ apumu nhūm ja kām mex kumrêx. Te mẽ kot mẽ hkuxwaxà hpār nhūm mẽ kām mexta pyrāk nhūm ja kām mex nē. ¹⁹ Nà koja Tīrtūm mẽ apê Jesus Kris kwÿ hā mẽ amā mẽ ate mẽmoj to presija xà nhōr rāhā ho pa. Mẽmoj piitā kēp ò kēnā.

²⁰ E kêr pu mẽ Měpanhĩpêêxà maati Tĩrtũm mã mex o mex ã harẽnh rãhã o papa. Ja na inhmã hprãm.

²¹⁻²² Nẽ ot pa mẽ jar ixpiitã mẽ apê Jejus Kris kôt mẽ ixkwỳjê hwỳr kagàja kamã mẽ ixpěr mẽ. Mẽ ixpyrà nẽ mẽ apê Tĩrtũm kra hã. Pa nẽ Kris kôt mẽ pahtõ nẽ mẽ pahtõxjaja. Nẽ Rõm nhõ pahi mã mẽ àpênh xwỳnh kot Kris kôt amnhĩ xunhwỳr xwỳnhjaja mããnẽn. ãm jar mẽ ixpê Tĩrtũm krajê piitã pa mẽ awỳr ixpěr mẽ.

²³ E kê Pahihti Jejus Kris mẽmoj to mẽ akutã nojarêt rãhã nẽ. Jao mẽ ato mex o pa.

Tã ãm ja pix. Ixpê Pawre na pa mẽ awỳr kagàja nhĩpêx nẽ kumẽ.

Korosē Pawre kot Koros kamā Jejus kôt hkwỳjê hwỳr kagà nē mēnh

Pawre na pre kagàja nhīpêx. Jejus nhỹ hã hkrajê jahkre o mē pa xwỳnhjê hõ na pre. Tã nhũm mē kêp Jejus kra hkêt xwỳnh kwỳjaja Jejus ã unê nē haxà nhũm arĩ hkrĩ ho hkrĩ. Hãmri nē krĩ pē Koros kamā Jejus krajê mã kagà nhīpêx nē mē hwỳr kumē. Koros kamā Jejus kwỳjê kamā Ijaew kwỳ nē kamā Ijaew kêt xwỳnh kwỳ nhũm Pawre mē ho hpimràatã mē hwỳr kumē. Kormã mē hwỳr mōr nē mē omunh kêt tãã. Nē kagàja kamā mē kot tanhmã Jejus o hêx to ho pa xwỳnhjê jarēnh to. Jejus kêp Tĩrtũm Kra hkêt ã mē kot ho hêx xwỳnhjê jarē nē mē nē mē kãm kapêr. Mē kot mē hkôt amnhĩ nhīpêx kêt kaxyw mē kãm kapêr nē hã kagà nē mē hwỳr kumē nē mē kãm:

¹ Pa Koros kamā Kris kôt ixkwỳjaja. Xà mē amex na ka mē apa? Ixpê Pawre na pa mē awỳr kagàja nhīpêx nē mē awỳr kumē. Kris kôt mē pahtõ Ximotre mē wa kumē. Ixte Jejus Kris nhỹ hã mē ahkre ho mē ixpa xwỳnhjê hõ na pa. Tĩrtũm kãm hprãm xà hkôt. ² Tã pa mē awỳr kagà nhīpêx nē kumē. Mē apê Kris kôt mē ixtõ nē ixtõx na ka mē. Na ka xep htem Kris kapêr kôt amnhĩ nhīpêx mex o ri apa. E kê Tĩrtũm mē apê hkra hã mē akutã nojarêt rãhã nē. Ka mē amex nē ajamakêtkati nē axàmnhĩx ri tanhmã amnhĩ nhīpêx ho ri apa.

*Koros nhõ xwỳnh kwỳjaja kot Jejus kôt
amnhĩ xunhwỳr ã mē harēnh*

Wam Tesarõn 1.2-5

³⁻⁴ Na pa ra Ximotre mē wa mē ajarēnh ma. Mē ate amnhĩ kaxyw Jejus Kris kôt ajamaxpêr tỳx nē hkôt amnhĩ nhīpêx mex o apa hã mē ajarēnhja ma. Nē mē kot Tĩrtũm kôt amnhĩ xunhwỳr xwỳnh piitã mē amã mē hkĩnh ã mē ho mex o apa hã mē ajarēnhja ma nē wa ixkĩnh nē. Jakamã na pa wa Pahihti Jejus Nhīpêexà Tĩrtũm mã amnhĩ jarēnh kaxyw nē kãm mē anhỹ hã wa ixkĩnh ã amnhĩ jarē. ⁵ Na pre Epas ma mē awỳr mō nē mē amã Jejus kot tanhmã

mē panê amnhĩ nhīpêx to hã harēnh o mē akôt pa. ãm hãmri kot mē amã harēnhja. Tã ka xep prem ama nē amnhĩ kaxyw hkôt ajamaxpêr nē hkôt amnhĩ xunhwỳ. Hãmri nē amnhĩ wỳr Jejus jamãr o ri apa. Kojã nhỹrmã akupỹn mē pahwỳr wrỳ nē amnhĩ pyrã nē ma akupỹm kaxkwa hwỳr mē pahto api nē mē pahto mex kumrêx o mē pahkôt pa ho pa. Tã ka xep htem amnhĩ kaxyw hkôt ajamaxpêr tỳx nē ã kot amnhĩ nhīpêx anhỹr kutêp amnhĩ wỳr kamã ajamak rãhã nē. Nē mē amã mē kot Tĩrtũm kôt amnhĩ xunhwỳr xwỳnhjê hkĩnh tỳx nē.

⁶ Na hte Tĩrtũm ãm hãmri mē pahto mex pix rãhã ho pa. Nē mēmoj to mē pakutã nojarêt rãhã nē. Tã wam mē ate harēnh marta ã ka mē hkôt amnhĩ xunhwỳr kurê kumrêx nē ri kapêr kôt axpên kôt amnhĩ nhīpêx mex pix o ri apa. Jao hkôt pix mã amnhĩ nhīpêx mex nē. Tã na hte pika piitã hkôt ri mē pa xwỳnh kwỳjaja mē apyrã nē Jejus jarēnh ma nē hkôt amnhĩ xunhwỳ. Nē mē apyrã nē axtem hkôt pix mã amnhĩ nhīpêx nē kapêr kôt amnhĩ nhīpêx mex o ri pa.

⁷ Nē mē awỳr mōrta ã na pre Epasja mē amã Tĩrtũm kapêr jarēnh o ri mē akôt pa ka prem ama nē amnhĩ kaxyw hkôt ajamaxpêr nē hkôt amnhĩ xunhwỳ. Epasja wa ixpyrã nē kot Kris mã tanhmã amnhĩ nhīpêx to ho pa xwỳnh. Nē wa inhmã hapêê. Na pre katat kôt mē amã Tĩrtũm kapêr jarēnh pa. Kot mēmoj to mē pakutã nojarêt rãhã hã harēnh o ri mē akôt pa. ⁸ Tã man akupỹn wa ixwỳr mōn pōj nē wa inhmã tanhmã mē ajarēnh to. Tĩrtũm Karõ nhỹ hã mē amã Kris kôt atõ nē atõx piitã mē hkĩnh o ri apa hã mē ajarē. Pa wa mē ajarēnh ma nē wa ixkĩnh tỳx kumrêx.

*Pawre mē Ximotre wa kot Koros kãm
hkwỳjê ho Tĩrtũm wỳr ã wa harēnh*

*Epes 1.15-23, 3.14-21; Piriapos 1.9; Wam
Tesarõn 5.23-24; Sikũn Tesarõn 1.11, 2.16*

⁹ Nē na pre Epas akupỹn wa ixwỳr pōj nē wa inhmã tanhmã mē ajarēnh to. Mē ate amnhĩ kaxyw Jejus kôt ajamaxpêr o apa nē mē amã Kris kôt akwỳjê piitã mē hkĩnh o ri apaja nhũm wa inhmã mē ajarē. Pa wa mē ajarēnh ma nē mē ato Tĩrtũm wỳr rãhã o jar

mê haghênh xà kamã ixkrĩ. Nê arĩ mẽ ato hwÿr rãhã ho ixkrĩ. Nê mẽ ato hwÿr o:

—Pa Tĩrtũm. Ot pa Ximotre mẽ wa Korosê nhõ xwÿnhjê ho awÿr kaxyw amã mẽ harê. Kwa tanhmã mẽ hamaxpêr to kê mẽ amã hprãm xà hkôt pix mã amã tanhmã amnhĩ nhĩpêx to ho pa. Nê Akarõ nhÿ hã hprĩ hã akapêr ma nê ãm hkôt pix mã tanhmã amnhĩ nhĩpêx to ho pa. Anê.

¹⁰ Na pa hte wa ã mẽ ato Tĩrtũm wÿr anhÿr rãhã ho ixkrĩ. Kot kaj mẽ ã amnhĩ nhĩpêx anhÿr o ri apa nê Jejus kot amnhĩ nhĩpêx o amnhĩ nhĩpêx mex o ri apa. Nê aprĩ hã Tĩrtũm kot amnhĩ nhĩpêx ã omunh mex o mõi. Jao mẽmoj to axpên kutã anojarêt pix o ri apa hprãm. Hãmri nhũm Tĩrtũm ja hã mẽ apumu nê hkĩnh nê. ¹¹ Tĩrtũmja mẽ pakurom mẽmoj piitã kaxyw àhpumunh o àhpumunh. Nê mẽmoj piitã kaxyw hihtÿx o hihtÿx. Jakamã na pa hte wa mẽ ato hwÿr o:

—Pa Tĩrtũm. Kwa tanhmã Koros nhõ xwÿnhjê ho kê mẽ axihtÿx nhÿ hã mẽmoj punuj kutã amnhĩ to htÿx nê. Mẽ kot Jejus ã tanhmã mẽ ho nhũm mẽ kot amnhĩ xà kamã hamak tã kê mẽ tee ri amnhĩ kukamã hamaxpêr o hkaprĩ nê ri pa hkêt nê. ãm anhÿ hã mẽ hkurê xwÿnhjê kutã amnhĩ to htÿx nê hkĩnh kãm ri pa ho pa. Anê.

Na pa hte wa ã mẽ ato hwÿr anê.

¹² Na pre ra Tĩrtũm amnhĩ ri mẽ pakutêp mẽmoj mex kwÿ jaxwÿ. Mẽ pahpê hkrajê mã haxwÿ. Tã ka mẽ ÿ hã tãm amnhĩ nhĩpêx o apa jao mẽ ate mẽmoj mex jamÿnh mã tãm. Õ krĩ nhĩrã rax kumrêx kamãã. Jakamã kwa mẽ kot Jejus ã tanhmã mẽ pahto htã kêr pu mẽ arĩ Tĩrtũm mã mex o mex ã harênh rãhã ho ri papa.

¹³ Nê Satanasti kêp kamãt kõi kamã mẽ kot amnhĩ tomnuj ho mẽ pa xwÿnhjê pãm. Tãm na hte mẽ ho amnhĩptãr o pa nê hkôt na pu prem amnhĩ nhĩpêx o papa rãhã nhũm Tĩrtũm tee ri ja hã mẽ pahpumu. Hãmri nê kãm kêp mẽ papytãr prãm xàj mẽ pahwÿr Kra japê htÿx kumrêx xwÿnhja mẽ. Nhũm mẽ pahwÿr wrÿ nê mẽ panê htyk o mẽ pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwÿ nhũm Tĩrtũm hã mẽ pahpumu nê mẽ panê mẽ pahte amnhĩ tomnuj o hapêx pa. Te kot amnhĩ katut kõi rênh par pyrãk. Jao

Satanasti pê mẽ pahpytã nhũm hpãnhã Jejusja tãm kêp mẽ pahto amnhĩptãr o pa xwÿnh.

¹⁴ Ra htyk o mẽ pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwÿ nhũm mẽ pahte amnhĩ tomnuj o hapêx pu mẽ axte Satanasti hkôt ri amnhĩ nhĩpêx kêt nê. ãm Jejus kõi pix mã amnhĩ nhĩpêx o ri papa.

Kris mẽ Tĩrtũm wa kot amnhĩ nhĩpêx te wa kot axpên pyrãk ã harênh

Juãw 1.1-5; Korosê 2.9; Eprêw 1.1-14

¹⁵ Nê Krisja te kot Tĩrtũm pyrãk. Mẽ pahte pano ho Tĩrtũm pumunh kêt tã Kra Kris kot amnhĩ nhĩpêx ã harênh mar kõi mããnen Tĩrtũm kot amnhĩ nhĩpêx ã omunh mex nê. Amnepê mã kormã mẽmoj kêt ri nhũm Jejus pa ho pa rãhã nê. Jakamã kot amnhĩ to rax o Tĩrtũm kot mẽmoj to katorja piitã hakrenh par kumrêx. ¹⁶ Na pre hipêêxã Tĩrtũm nhÿ hã mẽmoj piitã ho kator pa. Kaxkwa kamã nê pika hkôt mẽmoj piitã ho kator pa. Nê kaxkwa kamã mẽ pahte pano ho mẽmoj pumunh par xwÿnhjaja nhũm pre ho kato. Nê kamã mẽ pahte pano ho mẽmoj pumunh kêt xwÿnhjaja nhũm pre mããnen ho kato. Nê kapêr o wrÿk xwÿnhjaja nê mẽ hkrãhtũmjaja nhũm pre mẽ ho kato. Nê pika kamã mẽ ho amnhĩptãr xwÿnhjaja nhũm pre mẽ piitã mẽ ho kator pa. Kãm hprãm xà hkôt Tĩrtũm nhÿ hã mẽmoj piitã ho kator pa.

¹⁷ Tã na hte arĩ kaxkwa kamã nê pika hkôt mẽmoj piitã hamãr rãhã ho pa. Kêp apu kot hamãr kêt ronhÿx mẽmoj piitã akupÿm hapêx pa.

¹⁸ Nê tãm na hte mẽ pahpê hkrajê ho amnhĩptãr o pa. Te kêp mẽ pahkrã nhũm te mẽ pahpê ï pyrãk jakamã na pu htem kapêr kõi pix mã amnhĩ nhĩpêx o papa. Kumrêx na pre akupÿm htĩr o htĩr jakamã kot amnhĩ to rax o mẽmoj piitã hakrenh par.

¹⁹ Nê na pre Tĩrtũm ã hamaxpêr anê nê hamaxpêr o: “Nã Ixkra mẽ wa ixte amnhĩ nhĩpêxja te kot axpên pyrãk. Nê wa ixihtÿx mããnen te kot axpên pyrãk. Nê wa inhmex xà mẽ wa ixãhpumunhja te kot axpên pyrãk. ã wa ixte amnhĩ nhĩpêx kot anhÿr. Wa ixte amnhĩ nhĩpêxja na mex kumrêx.” Anê.

²⁰ Tã Jejus kot pĩ kahpa hã mẽ panê tyk nê hkamrô pikapĩr kukwak ri na hte Tĩrtũm mẽ kot hkôt amnhĩ xunhwỳr xwỳnh piitã mẽ ho hkra nhũm mẽ hamakêtkati nê àmnhĩx pa ho pa. Kaxkwa kamã nê pika piitã hkôt mẽ kot Jejus kôt amnhĩ xunhwỳr xwỳnhjaja na htem ã amnhĩ nhĩpêx mex anhỳr o pa. ã Jejus kot mẽ panê htyk anhỳr jakamã kot amnhĩ to rax o kot mẽmoj piitã hakrenh par.

Jejus kêp tãm mẽ paxunhwỳr xwỳnh ã harênh

²¹ Nê mẽ papajaja na pu prem pamã Tĩrtũm prãm kêt o ri papa. Te hkàx ã ri papa pyrã nê kutã amnhĩ xunhwỳ nê pajamxpêr punuj nê tanhmã amnhĩ tomnuj to pix o ri papa. ²² Tã Jejus kôt amnhĩ xunhwỳ nhũm amnhĩ tã mẽ pahpumu. Hãmri nê ra mẽ panê htyk jakamã amnhĩ tã mẽ pahpumu nê Tĩrtũm noo mã tãm mẽ paxunhwỳ. Te aa mẽ pahte tanhmã amnhĩ tomnuj to hkêt pyrãk o mẽ panhĩpêx nê tãm mẽ paxunhwỳ. Pu mẽ arĩ pahpê Tĩrtũm kutã amnhĩ xunhwỳr xwỳnh kêt nê hpãnhã pahpê hkrãmnhwỳy. ²³ Na pre Tĩrtũm mẽ pahte amnhĩ kaxyw Kra Kris kôt pajamxpêr nê hkôt amnhĩ xunhwỳr ã mẽ pahpumunh kôt ã mẽ pahto mex anê. Tã kêr pu mẽ arĩ hkôt amnhĩ nhĩpêx o ri papa nê aa hkaga hkêt nê. Mẽ kot Kris ã tanhmã mẽ pahto htã pu mẽ arĩ hkôt amnhĩ nhĩpêx mex rãhã ho ri papa.

Kormã mẽ kot jar ijaxàr kêt ri na pa pre hte mẽ kãm ã harênh anhỳr o ri mẽ hkôt ixpa. Tã ka prem Jejus jarênh ma nê hkôt amnhĩ xunhwỳr kurê kumrêx. Nhũm krĩ piitã hkôt ri mẽ pa xwỳnh kwỳjaja mẽ apyrã nê harênh ma nê hkôt amnhĩ xunhwỳ nê hkôt amnhĩ nhĩpêx o pa.

Pawre kêp Ijaew kêt xwỳnhjê mã Jejus jarênh xwỳnh ã harênh

Epes 3.1-13

²⁴ Nê ixte mẽ amã Kris kot tanhmã mẽ panê amnhĩ nhĩpêx to hã harênh o ixpaja ã na prem tanhmã ixto htỳx nê pa amnhĩ xà htỳx kãm ijamak o ri ixpa. Tã arĩ Tĩrtũm kãm hprãm xà hkôt ã amnhĩ nhĩpêx anhỳr jakamã na pa ixkĩnh nê jar ixkrĩ. Ixte Kris kwỳjê kaxyw amnhĩ xà kamã ijamak tỳx o ixkrĩ. Te mẽ apê Kris nhĩ pyrãk xwỳnhjê

mãã. Tã pa te ixpê Kris kot amnhĩ nhĩpêx pyrãk o mẽ akaxyw amnhĩ xà htỳx kãm ijamak o ixkrĩ.

²⁵ Na pre Tĩrtũm mẽ apê Ijaew kêt xwỳnhjê kaxyw ixãm. Ixte mẽ amã kapêr piitã harênh par nhũm mẽ ate mar nê hkôt amnhĩ nhĩpêx mex o ri apa kaxyw.

²⁶ Na pre kormã mẽhõ mẽ awỳr mör nê mẽ amã harênh kêt nê. Tã ra Tĩrtũm kãm mẽ ate mar prãm nê. Kãm mẽ apê Ijaew kêt xwỳnhjê mẽ mẽ pahpê Ijaew xwỳnhjê japê o axpên pyrãk. Nom na pre amnepêm ri mẽ pa xwỳnhjê mã kormã ja hã amnhĩ to amnhĩrit kêt nê. Tã ra jarãhã mẽ pahpê Kris kwỳjê mã ja ho amnhĩrit. Mãânên kãm mẽ apê Ijaew kêt xwỳnhjê japê hã amnhĩ to amnhĩrit. ²⁷ Mẽ apê Ijaew kêt tã na ka prem Kris kôt amnhĩ xunhwỳ nhũm Tĩrtũm Karõ mẽ akarõ mã agjê nê mẽ akamã pa ho pa. Ka mẽ ra hkôt amnhĩ nhĩpêx jakamã kot kaj mẽ ixpyrà nê nhỹrmã kuri atĩr tũm nê amex rãhã ho apa ho apa. Ja na mex kumrêx. Tã ja na Tĩrtũm kãm mẽ ate mar prãm nê mẽ akaxyw ixãm. ²⁸ Jakamã na pa pre Ximotre mẽ wa mẽ apiitã mẽ amã Kris kot mẽ panê tanhmã amnhĩ nhĩpêx to hã harênh kãm ixihỳx o ri mẽ akôt ixpa. Nê kapêr o mẽ ajahkre ho ri mẽ akôt wa ixpa. Nê jar mẽ haghênh xà kamã krĩ piitã hwỳr kagã nhĩpêx nê mẽ hwỳr kurê. Mẽ kot kamã harênh nê mar nê amnhĩ tomnuj kaga nê hpãnhã Kris kôt amnhĩ xunhwỳr nê ãm kôt pix mã amnhĩ nhĩpêx o pa kaxyw. Kêr pa nhỹrmã kãm mẽ ate inhmar nê hkôt amnhĩ xunhwỳr xwỳnhjê jahkre nê kãm:

—E Pahihti. Ota akwỳjaja. Na htem akôt amnhĩ nhĩpêx mex rãhã ho ri pa. Anê.

²⁹ ã ixte kãm mẽ piitã mẽ harênh anhỳrja na inhmã hprãm. Ja kaxyw na pre Jejus ixto ixihỳx. Jakamã na pa hte Tĩrtũm nhỹ hã tanhmã kapêr o mẽ ahkre hto ho ri mẽ hkôt ixpa. Jao mẽ ho Tĩrtũm wỳr o ri ixpa nê mẽ kãm kagã nhĩpêx nê mẽ hwỳr kurê nê kamã kapêr o mẽ ahkre o ri ixpa.

2

Pawre kot Jejus kapêr o Koros nhõ xwỳnhjê o hihtỳx ã harênh
Epes 3.14-19; Piripos 1.9

¹ E kot paj mẽ amã tanhmã amnhĩ jarênh to ka mẽ inhma. Na pa hte mẽ ato Tĩrtũm wỳr rãhã ho ixkrĩ. Mẽ kajaja nẽ krĩ pẽ Ratisej kamã Jejus kõt mẽ pahkwỳjaja. Korãmã ixte mẽ apumunh kêt tã pa hte mẽ ato Tĩrtũm wỳr kãm ixihỳx ãhã ho ixkrĩ. ² Mẽmo kaxyw na pa hte ã mẽ ato hwỳr anẽ? Nẽ mẽmo kaxyw na pa hte mẽ amã kagã nhĩpêx nẽ mẽ awỳr kurẽ? Nã ãm mẽ ate kamã harênh nẽ mar nẽ Jejus kapêr kõt axpẽn to axihỳx o ri apa kaxyw. Nẽ mẽ amã axpẽn kĩnh o ri apa kaxyw. Pẽ te mẽ ate ixkre tipxi kamã axpẽn kõt amnhĩ nhĩpêx o ri apa pyrãk. Jao aprĩ hã Tĩrtũm kot amnhĩ nhĩpêx pumunh mex nẽ amnhĩ kaxyw hkõt ajamaxpêr tỳx nẽ. Kot kaj mẽ ã amnhĩ nhĩpêx anẽ nẽ Kris kot amnhĩ nhĩpêxta pumunh pa. Na pre Tĩrtũm tokyx mẽ kãm Kris o amnhĩrĩt kêt tã ra mẽ pamã ho amnhĩrĩt. ³ Tĩrtũm kot amnhĩ nhĩpêx nẽ kapêrja na pu htem Kris nhỹ hã pahprĩ hã omunh nẽ mar mex nẽ. ⁴ Jakamã koja mẽmojaja mẽ awỳr mra hãmri nẽ hêx rom Tĩrtũm kapêr kwỳm ri tanhmã mẽ amã mẽmoj jarênh to. Te mẽ ãhpumunh tỳx pyrãk o mẽ amã harẽ no ãm mẽ ãhpumunh kêt. Ka mẽ ama nẽ ãm mẽ ama nẽ Kris kaga hkêt nẽ.

⁵ Nẽ kormã arĩ Jejus ã ijaxàr nẽ ixkrĩ nẽ kormã mẽ akõt ixpa hkêt tã ot pa hte mẽ amã ijamaxpêr rãhã ho ixkrĩ. Nẽ ra tanhmã mẽ ajarênh mar to. Na ka xep htem Kris kõt amnhĩ nhĩpêx tỳx o ri apa. Te ahkrô pẽ kukryt mut kuxêti kot pĩ kupu htỳxta pyrãk. Nẽ ka xep htem arĩ amnhĩ kaxyw Kris mã ajamaxpêr tỳx o ri apa. Pa mẽ ajarênh ma nẽ ixkĩnh tỳx nẽ.

⁶ Na ka prem Pahihti Jejus Kris kõt amnhĩ xunhwỳr pa. Tã kêt ka mẽ arĩ hkõt amnhĩ nhĩpêx mex rãhã ho apa. Kêp mẽ panhõ Pahihti kênã. ⁷ Jakamã mẽ ãm kõt pix mã amnhĩ xunhwỳr tỳx nẽ aa hkaga hkêt nẽ. Te mẽmo pĩ hpàr jarêja pika kaxwỳnh kãm pimành nẽ kot pika jamỳnh tỳxta pyrãk. Nhũm kôk xàpêr tỳx tã tee kot mẽnh kaxyw pyrãk. Tã kêt ka mẽ pĩ hparta pyrã nẽ hkõt amnhĩ xunhwỳr tỳx nẽ hkõt amnhĩ nhĩpêx mex o ri apa. Ra Epas kot mẽ ajahkre ho pa xà hkõt. Nẽ amnhĩ krãm Kris kapêr jaxàr tỳx nẽ aa ho ajamakêtkati hkêt nẽ. Pẽ akĩnh

kãm Tĩrtũm mã mex o mex ã harênh rãhã ho ri apa.

⁸ Nẽ kwa kêt ka mẽ kot hêx rom mẽ amã tanhmã kapêr to ho mẽ pa xwỳnhjaja ka mẽ amnhĩ nẽ mẽ omunh mex nẽ. Nẽ mẽ kapêr mar hkêt nẽ. Mẽ ate Kris kaga hprãm xàj na htem tanhmã mẽ amã hêx to ho ri mẽ akõt pa. Te amnepêm mẽ kot Tĩrtũm kapêr kwỳm ri tanhmã mẽ ahkre hto xwỳnhjê pyrãk. Hinhu hikôoti kapêr kõt na htem tanhmã mẽ amã hêx to nom Kris nhỹ hã mẽ amã kapêr kêt nẽ. Jakamã kwa mẽ amnhĩ nẽ mẽ omunh mex nẽ.

⁹ Nẽ Kris mẽ Tĩrtũm wa kot amnhĩ nhĩpêx kot axpẽn pyrãk. Nẽ wa hamaxpêr kot axpẽn pyrãk. ¹⁰ Tã kêt pu mẽ pajaxwỳja wa hamaxpêr o pajamaxpêr nẽ wa kot amnhĩ nhĩpêx o amnhĩ nhĩpêx. Jakamã kwa mẽ kot Tĩrtũm kapêr kwỳm ri tanhmã mẽ kapêr to xwỳnhjê kot amnhĩ nhĩpêx o amnhĩ nhĩpêx kêt nẽ. Nẽ mẽ kapêr ma nẽ ãm mẽ ama. Kris na hihtỳx o hihtỳx o kot mẽkarõmnuti nhõ pahi piitã mẽ hakrenh par. Nẽ hihtỳx o hihtỳx o kot Tĩrtũm kapêr o mẽ wryk xwỳnhjê piitã mẽ hakrenh par. Nẽ ãhpumunh o ãhpumunh o kot mẽmoj piitã hakrenh par jakamã kêt ka mẽ kapêr kõt pix ma nẽ hkõt pix mã ri amnhĩ nhĩpêx o ri apa.

Mẽ pahte amnhĩ nhĩpêx nyw jarênh Rômãn 6.3; Karatas 5.24

¹¹ Nẽ na hte ixkwỳ Ijaewjaja mẽ hkra nhỹrmã hprêk nẽ Tĩrtũm kõt amnhĩ nhĩpêx ã mẽ harênh kaxyw mẽ kêp mẽmy kwryt kà jakà. Tã mẽ kajaja. Mẽ apê Ijaew kêt xwỳnhjaja na pre Kris mẽ anhĩpêx o te mẽ kot amnhĩ jakarta pyrãk. Jao te kot mẽ anê mẽ ate amnhĩ nhĩpêx tũm jakàr par pyrãk o mẽ anhĩpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nẽ mẽ ate Jejus kapêr kõt amnhĩ nhĩpêx ã mẽ apumunh kurê kumrêx. ¹² Tã na pu htem jarãhã mẽ pahte Tĩrtũm kõt amnhĩ nhĩpêx o papa hã amnhĩ jarênh kaxyw amnhĩ jakàr kêt nẽ. Na pu htem hpãnhã amnhĩ kaxyw Tĩrtũm xihtỳx o hihtỳx xwỳnhja kõt pajamaxpêr. Kot mẽ panê pahte amnhĩ tomnuj rênh par kõt pajamaxpêr hãmri nhũm mẽ gôx kãm mẽ pahkrã kumrã. Te mẽ pahte gôx kãm mẽ pahte amnhĩ nhĩpêx tũm

rer par pyrâk o amnhî nhîpêx. Te Jejus htyk nhûm mẽ kot haxâr nhûm nôr nhûm mẽ pahte amnhî tomnujja ãhkô hã nôr mẽ hapêx par pyrâk. Tã pu htem ra gôj rûm pahkrã hapôj. Te Tirtûm kot akupÿm Kris o htîr pyrâk. Jao ra mẽ pahte Kris kôt amnhî nhîpêx nyw o amnhî nhîpêx o papa hkrax ã amnhî to amnhîrît. ¹³ Amnepêm kormã mẽ pahte Jejus kôt amnhî xunhwÿr kêt ri na pu prem ri amnhî tomnuj to mẽ tanhmã pajamaxpêr punuj to ho ri papa. Tirtûm noo mã te ra mẽ pahtyk pyrâk. Tã Tirtûm te akupÿm Kris kôt mẽ pahto pahtîr pyrâk o mẽ panhîpêx mẽ mẽ panê mẽ pahte amnhî tomnuj piitã ho hapêx mẽ axte kãm hamaxpêr kêt kumrêx. ¹⁴ Te mẽ pahte tanhmã amnhî tomnuj to ho papa nhûm Tirtûm kot ja hã mẽ pahpumunh mẽ mẽ pahte amnhî tomnuj piitã hã kagà hpar pyrâk. Nê kot kagàja pyr mẽ Kris nhîhkô hã pîkahpa hã nhôr pyrâk. Jao te kot mẽ pahte amnhî tomnuj ã kagàta hkaxôn timer mẽ rên timer par pyrâk o hipêx. ¹⁵ Hãmri nhûm Krisja pîkahpa hã htykja o mẽkarômnuti mẽ mẽ ô pahi Satanasti wa mẽ ho hirerek pa. Jao hihtÿx o kot mẽ hakrenh par ã amnhî to amnhîrît. Te mẽ kot kutã amnhî xunhwÿr xwÿnh piitã mẽ noo mã mẽ ho krihkrit par mẽ ma akupÿm ô krî hwÿr hkînh mẽ grer o môrta pyrâk.

¹⁶ Nê koja mẽmojaja mẽ awÿr mra mẽ tee ri mẽ ate mẽmoj kur o akrî hã mẽ apumu mẽ mẽ amã:

—Kwa na hte Tirtûm kôt mẽ kot amnhî xunhwÿr xwÿnhjaja ja kur kêt mẽ. Nê ja ho hkôm kêt mẽ. Nê mẽ panhõ arîgromnu pê sap ã ri mẽmoj tã àpên timer kêt mẽ. Nê mytwrÿ nyw ã mẽmoj tã àpên timer kêt mẽ. Na htem ã Tirtûm ã hkînh o pa anê. Tã ã mẽ ate mẽ ixkôt amnhî nhîpêx anhÿr kêt jakamã mã mẽ apê Tirtûm kra hkêt nã. Anê.

Tã nom kêr ka mẽ kapêr ma mẽ ãm ama. ¹⁷ Amnepêm kormã mẽ pahte Kris kôt amnhî xunhwÿr kêt ri na pu prem ã amnhî nhîpêx anhÿr o papa. Tã Jejus kôt amnhî xunhwÿr hãmri mẽ axte ã amnhî nhîpêx anhÿr kêt mẽ. Pãnhã kapêr pix ma mẽ hkôt pix mã amnhî nhîpêx o ri papa.

Mê pahte mẽ kot Tirtûm kapêr o mẽ hêx xwÿnhjê mar kêt ã mẽ pamã karõ

¹⁸ Nê koja mẽmojaja mẽ awÿr mra mẽ hêx rom tanhmã mẽ amã amnhî jarên timer to mẽ mẽ amã:

—Na pre Tirtûm ãm mẽ papxipix mẽ inhmã amnhî to amnhîrît. Jakamã kwa mẽ ixkapêr ma. Kot kaj mẽ inhmar kêt mẽ hãmri mẽ mẽ amex kêt mẽ apa.

Anhÿr o mẽ amã kapêr japêr ka mẽ ama mẽ ãm mẽ ma. Rÿ nhûm mẽ amã:

—Tirtûm mẽ parom kot amnhî to rax o kot mẽ pahpiitã mẽ pajakrenh par jakamã kwa mẽ tanhmã amnhî to hwÿr to hkêt mẽ. Kot ka mẽ anê nhûm mẽ ama mẽ mẽ akamã gryk mẽ. No kêt mẽ amnhî to kapêr o wrÿk xwÿnhjê mãn wÿ. Koja mẽ ama mẽ mẽ akamã gryk kêt mẽ tanhmã mẽ amã mẽmoj nhîpêx to. Anê.

Koja mẽ ã mẽ amã kapêr anê ka mẽ ama mẽ ãm mẽ ama. Te ho mẽ àhpumunh tÿx kãm mẽ kot ã mẽ amã kapêr anhÿr pyrâk no ãm mẽ kapêrja mex kêt. Na htem amnhî krã hkôt te amnhî to rax pyrâk o ã mẽ amã kapêr jao mẽ hamaxpêr tûm o hamaxpêr o ri pa. No mẽ apyrã mẽ mẽ hamaxpêr nyw o hamaxpêr kêt mẽ. ¹⁹ ãm mẽ kot Tirtûm kapêr kwÿm ri mẽ ahkre jakamã mẽ kêp Jejus kwÿ hkêt. No mẽ papajaja mẽ pahpê Jejus kwÿ na pu mẽ. Nhûm Jejus kêp mẽ panhõ Pahihti jakamã na hte tanhmã mẽ pahto paxihtÿx to pu htem kukwak ri tanhmã axpên to ajuta hto ho ri papa. Nê hkôt axpên to paxihtÿx o ri papa. Mê pahpiitã mẽ pahte hkôt amnhî nhîpêx mex o ri papa kaxyw. Tirtûm kãm hprãm xà hkôt.

Mê pahte amnhî krã hkôt tãm amnhî nhîpêx kêt ã mẽ pajarên timer

Karatas 3.1-5, 5.1-9; Epes 2.8; Piripos 3.9

²⁰⁻²¹ Nê wam mẽ pahte amnhî nhîpêx tûm mẽ mẽ pajamaxpêr tûmta te kot Kris kôt htyk mẽ mẽ pahpê hapêx par pyrâk jakamã na pu htem arî hkôt amnhî nhîpêx kêt mẽ. Nê mẽkarômnuti hkôt amnhî nhîpêx kêt mẽ. Tã no nhûm xep ra mẽhõja mẽ awÿr mẽ mẽ hêx rom mẽmoj mẽ tanhmã mẽ amã kapêr to mẽ mẽ amã:

—Kwa mẽ ja jamÿnh kêt mẽ. Nê ja hkur kêt mẽ. Nê ja kupên timer kêt mẽ.

Anhÿr o mẽmoj mẽ mẽ akurê ho pa. Xep mẽ ã mẽmoj mẽ mẽ akurê anê ka xep mẽ ama mẽ mẽ hkôt amnhî nhîpêx. Kwa nã

mon ka mẽ ri axtem nê mẽ hkôt amnhĩ nhĩpêx? ²² Tĩrtũm kot mẽmojja nê tanhmã mẽ pahkurê htore hã. ãm mẽ kot amnhĩ krã hkôt mẽmoj nê mẽ akurê ka mẽ ama nê mẽ hkôt amnhĩ nhĩpêx. Mẽmoj kur nê mẽ akurê xwỳnhnta na htem kuku nhũm hapêx kurê kumrêx. Mo koja we Tĩrtũm omu nhũm kêp omnuj? Nà ja kot anhỹr kêt kênã. Mẽ ãm amnhĩ krã hkôt mẽ kot ja nê mẽ akurê. ²³ Tã ã mẽmoj nê mẽ akurê anhỹr xwỳnhjaja na ka htem nhỹri mẽ omu nê mẽ kapêr ma nê atỳx ajamaxpêr o:

—Nà te Tĩrtũm kôt amnhĩ nhĩpêx mex o pa pyrãk. Te mẽ àhpumunh tỳx pyrãk o ã mẽ ìnhmã mẽmoj jarênh anê. Anê.

No ãm mẽ kot mẽmoj jarênhja kot anhỹr kêt. ã mẽ kot amnhĩ nhĩpêx anhỹr xwỳnhjaja kêp Tĩrtũm kra hkêt. Na htem ãm amnhĩ krã hkôt mẽmoj nê mẽ akurê ho pa. Nê hã amnhĩ to jarkrar o ri pa. Mẽ ate ja hã mẽ mar nê mẽ kot amnhĩ to rũnh ã mẽ hkamnhĩx kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No ãm ri ã amnhĩ nhĩpêx anhỹr kaprỳ. Nê ãm htỳx Tĩrtũm kapêr o mẽ wrỳk xwỳnhjê hwỳr kaprỳ ho pa.

3

Mẽ pajamaxpêr nyw nê mẽ pahte amnhĩ nhĩpêx nyw jarênh

Rômãn 6.4-11

¹ Nê na pre Tĩrtũm akupỹm Kris o htĩr nhũm mẽ pahte hkôt amnhĩ xunhwỳr jakamã te Tĩrtũm kot Kris nhĩpêx pyrã nê akupỹm mẽ pahto mẽ pahtĩr pyrãk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra kaxkwa hwỳr paxàpir nê kamã ri papa pyrãk o amnhĩ nhĩpêx. Jao pajamaxpêr nyw pix o pajamaxpêr nê pahte amnhĩ nhĩpêx nyw pix o amnhĩ nhĩpêx o ri papa. Te Kris kot amnhĩ nhĩpêx pyrãk. Na pre akupỹm kaxkwa hwỳr api nê Tĩrtũm nhĩhkô hã mẽ ho amnhĩptar xà kamã hkrĩ ho hkrĩ.

²⁻³ Nê ra mẽ pahte Kris kôt amnhĩ xunhwỳr jakamã te jar pika hkôt pajapêx par nê Tĩrtũm wa kuri kaxkwa kamã pamex nê papa ho papa pyrãk. Jakamã kwa kêr pu mẽ pahte amnhĩ nhĩpêx nyw mã mãn

pajamaxpêr rãhã ho papa. Nê axte mẽ pahte amnhĩ nhĩpêx tũm mã pajamaxpêr kêt nê.

⁴ Kris kêp akupỹm mẽ pahto mẽ pahtĩr xwỳnh. Koja nhỹrmã akupỹn mẽ pahwỳr wrỳ hãmri nhũm Tĩrtũm te ho mex raxta pyrãk o mẽ panhĩpêx nê mẽ pahto mex rax kumrêx.

Mẽ pahte akupỹm amnhĩ nhĩpêx tũm o paxujanãr kêt ã mẽ pamã karô

Epes 4.17-5.2

⁵ Jakamã kwa kêr ka mẽ axte ate amnhĩ nhĩpêx tũm kôt amnhĩ nhĩpêx kêt nê. Te ra mẽ apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rỳ axpên prô ho amnhĩkati hkêt nê.

Nê nhãm ri mẽmyjê hõ rỳ mênijê hõ ho amnhĩkati hkêt nê.

Nê mẽ amã tanhmã amnhĩ tomnuj to hprãm kêt nê.

Nê mẽ amã akukrêx rax prãm kêt nê. Kot ka mẽ ã amnhĩ nhĩpêx anê nê gaa nê akukrêx rax gryk ã axte Tĩrtũm mã ajamaxpêr kêt nê.

⁶ ã mẽ kot amnhĩ nhĩpêx anhỹr xwỳnhjaja Tĩrtũm kãm mẽ hprãm kêt. Koja nhỹrmã tanhmã ja hã mẽ homnuj tỳx to.

⁷ Amnepêm kormã mẽ ate Kris kôt amnhĩ xunhwỳr kêt ri na ka prem ã amnhĩ nhĩpêx anhỹr o ri apa. ⁸⁻⁹ Tã kêr ka mẽ axte ã amnhĩ nhĩpêx anhỹr kêt nê.

Nê mẽ ri axpên kãm agryk o ano hkà karôt o axpên pumunh kêt nê.

Nê mẽ axpên kamã axàhkurê hkêt nê. Ri tanhmã axpên tomnuj to ho apa hkêt nê.

Rỳ axpên jakwa kamã mẽmoj ma nê ri axpên xô ri tanhmã ri axpên mã ho axêx to ho ri apa hkêt nê.

Nê mẽ akapêr mã agêt o ri mẽ kãm akapêr kêt nê.

Nê mẽ ri mẽmoj to axpên mã axêx hkêt nê.

ã mẽ ate amnhĩ nhĩpêx anhỹr tũmta ra mẽ apê hapêx par kênã.

Mẽ pahte amnhĩ nhĩpêx nyw kôt amnhĩ nhĩpêx ã mẽ pamã karô

Rômãn 12.2; Epes 4.23; Wam Pêtre 2.11

10 Nê na ka mẽ ra mẽ ate amnhĩ nhĩpêx nyw o amnhĩ nhĩpêx o ri apa. Jao ra mẽ pahto kator xwýnh maatija kôt amnhĩ nhĩpêx mex o mō. Kot kaj mẽ gaa nê rĩ hkôt amnhĩ nhĩpêx mex kumrêx o ri apa. Kãm hprãm xà hkôt.

11 Nê mẽ pahpê Kris kwýjaja ahpýnhã na pu mẽ. Na mẽ pakamã Ijaew nê Ijaew kêt xwýnhjaja. Nê mẽ pakamã panhĩ nê kupê. Nê mẽ kãm àpênh xwýnhjaja nê mẽ kot amnhĩ mã ri àpênh xwýnhjaja. ãm ahpýnhã mẽ pahpê Kris kwýjaja mẽ pahte anhýr tã na hte Tĩrtũm tanhmã mẽ pakute hkôt mẽ pahpumunh kêt nê. Na hte mẽ panhĩpêx o axpên pyrã nê mẽ pahpiitã mẽ pakamã pa ho pa pu htem pahpimràatã hkôt ri amnhĩ nhĩpêx o papa.

12 Nê Tĩrtũm kãm mẽ pajapê nê kãm mẽ pajapê xàj mẽ pakukamã amnhĩm mẽ parê. Mẽ pahte kãm tanhmã amnhĩ nhĩpêx to ho ri papa kaxyw mẽ pakukamã mẽ parê.

Jakamã kêr ka mẽ axpên kamã axukapri ho ri axpên kôt apa.

Nê axpên to mex pix o ri axpên kôt apa.

Nê mẽ amã amnhĩ to rax o axpên jakrenh prãm kêt nê.

Nê mẽ ãm amnhĩ pix kukamã ri ajamaxpêr kêt nê. Amnhĩ mẽ nhãm mẽ hkukamã ajamaxpêr o ri apa.

Nê mẽ ri agryk tokyx anhýr kêt nê.

13 Nê koja mēhō tanhmã mẽ ato ka mẽ amnhĩ tã omu nê tanhmã amnhĩ tã ho hkêt nê. ãm ja ho ajamakêtkati kurê kumrêx nê axte kãm ajamaxpêr o ri apa hkêt nê. Ra Jejus kot mẽ panê mẽ pahte amnhĩ tomnuj piitã rênh par kênã kot pu kêt mẽ amnhĩ tã tanhmã mēhō hto. Tã kêr ka mẽ axpên to mex o ri apa nê amnhĩ tã tanhmã axpên to ho ri apa hkêt nê.

14 E kêr ka mẽ ã axpên nhĩpêx anhýr o ri apa. No ãm ja pix kêt. Nê mẽ mãânên amã axpên kĩnh pê axpên kutã anojarêt rãhã nê. Kot kaj mẽ ã amnhĩ nhĩpêx anê nê mãânên ra ixte mẽmoj tã mẽ amã karōta ka mẽ ho anhýr mex kurê kumrêx. Mẽ pamã axpên kĩnhja na mex kumrêx o kot mẽmoj piitã hakrenh par.

15 Nê kêr ka mẽ Kris kukwak ri anhōxàhkre kaxwýnh kãm akĩnh nê aja-

makêtkati nê tãm ri axpên nhĩpêx o ri axpên kôt apa. Te ixkre tipxi kamã mẽ ate axpên kôt ri amnhĩ nhĩpêx pyrãk. ã mẽ pahte amnhĩ nhĩpêx anhýr o papa kaxyw na pre Tĩrtũm amnhĩ wýr mẽ pahwý. Mẽ pahte hkôt amnhĩ xunhwýr kaxyw.

Nê kêr ka mẽ Tĩrtũm mã amnhĩ jarênh kaxyw nê kãm Kra Jejus ã akĩnh ã amnhĩ jarênh o ri apa.

Mẽ pahte Tĩrtũm mã mex ã pagrer ã mẽ pamã karō

Epes 5.19

16 Nê kêr ka mẽ Kris kapêr piitã hkôt amnhĩ nhĩpêx mex nê. Nê kapêr o axpên jahkre mex o ri axpên kôt apa. Tĩrtũm kot amnhĩ nhĩpêx o axpên jahkre ho ri axpên kôt apa. Nê kãm agrer o ri apa. Kãm mex o mex ã agrer o ri axpên kôt apa. Nê kãm kukwak ri akĩnh ã amnhĩ jarênh o kãm gre.

17 Nê kêr ka mẽ Mẽpahpãm Tĩrtũm mã amnhĩ jarênh o:

—Pa Tĩrtũm. Nà ãm hãmri na ka pre mẽ ixwýr Akra Jejus mẽ nhũm mẽ ixwýr wrý nê mẽ inhné ty.

Anhýr o kãm amnhĩ jarê. Hãmri nê ãm Pahihti Jejus kot amnhĩ nhĩpêx kôt pix mã tanhmã ri amnhĩ nhĩpêx to rý ãm kôt pix mã tanhmã akapêr to ho ri apa.

Tanhmã mẽ pahte axpên nhĩpêx to hã mẽ pamã karō

Epes 5.22-6.9

18 Nê mẽ anijaja. Tĩrtũm kot myja kumrêx nhĩpêx nê hkôt kãm hprō nhĩpêx jakamã kêr ka mẽ amjên ã apijaàm o apa. Nê mẽ hamaxpêr mex ã mẽ omu nê mẽ hkôt ri amnhĩ nhĩpêx mex nê. ã mẽ ate amnhĩ nhĩpêxja na Tĩrtũm kãm hprãm.

19 Nê mẽ amyjaja kêr ka mẽ amã mẽ aprō japê nê. Te amã amnhĩ tã ma pyrãk o mẽ hipêx o ri apa. Jao tanhmã mẽ homnuj to hkêt nê.

20 Nê mẽ apê mẽ hkrajaja kêr ka mẽ anhĩpêxà nê akatorxà wa hã apijaàm nê wa kapêr ma nê wa hkôt ri amnhĩ nhĩpêx. ã mẽ ate amnhĩ nhĩpêx anhýrja na Tĩrtũm kãm hprãm. Koja ã mẽ ate amnhĩ nhĩpêx anhýr ã mẽ apumu nê hkĩnh nê.

21 Nê kêr ka mẽ apê mẽ hipêxà nê mẽ katorxà mẽ akra gryk kaxyw mẽ kãm apêr

o apikênh kêt nê. Kot kaj mê ã mê hipêx anê nhũm mê tee ri amnhĩ tâ mê ama nê hkaprĩ nê.

²² Nê mê ate mê kãm tanhmã amnhĩ nhĩpêx to ho ri mê apa xwýnhjaja kêr ka mê anhõ patrãw kapêr ma nê hkôt amnhĩ nhĩpêx. Nê mê noo mã mê kãm tanhmã amnhĩ nhĩpêx mex to nê mãânên mê wa kre kamã mê kãm tanhmã amnhĩ nhĩpêx mex to. Nom mê kot axàpênh ã apumunh nê hã kãm akĩnh pix kaxyw axàpênh mex kêt nê. Mãânên mê amã Pahihti Kris kĩnh ã akatãt kôt mê kãm mêmoj tâ axàpênh mex nê. Mê noo mã nê mãânên mê wakre kamã. ²³ Nê mê akĩnh kãm mê kãm axàpênh mex o ri apa. Te mê ate Pahihti mã akĩnh kãm tanhmã kãm amnhĩ nhĩpêx to pyrã nê tãm amnhĩ nhĩpêx o tãm mê kãm axàpênh mex o ri apa. ²⁴ Te mê anhõ patrãw pix mã axàpênh pyrãk nom kumã pix mã hkêt. Mãânên mê panhõ Pahihti Krisja mã. Jakamã kot kaj mê ã amnhĩ kaxyw Tĩrtũm mã ajamaxpêr pê akĩnh kãm anhõ patrãw mã mêmoj tâ apê nhũm Pahihtija ja hã mê apumu nê nhỹrmã mê ato mex rax nê. ²⁵ E kêr ka mê ã mê anhõ patrãw mã axàpênh mex o ri apa anê. No kot kaj mê kapêr kwým amnhĩ krã hkôt ri tanhmã amnhĩ nhĩpêx to nhũm Tĩrtũm tee ri ja hã mê apumu hãmri nê nhỹrmã tanhmã hã mê anhĩpêx to. Na hte ã mê kot amnhĩ tomnuj xwýnhjê piitã mê hipêx anê nê mê hipêx o axpên pyrãk. Jakamã kwa kêr ka mê anhõ patrãw mã axàpênh mex rãhã ho ri apa.

4

¹ Nê mê apê mê õ patrãw kêr ka mê kot mê amã mê àpênh xwýnhjê ho mex nê tanhmã mê homnuj to hkêt nê. Mê urãk nê kaxkwa kamã mê anhõ Patrãw maatija hkrĩ. Kot mê pahte tanhmã amnhĩ nhĩpêx to nê tanhmã mê pajamaxpêr to hã mê pahpumunh rãhã jakamã kêr ka mê noo mã mê ho mex rãhã ho ri apa.

E kêr ka mê apiitã ã axpên to mex anhỹr o ri apa.

Mê pahte Tĩrtũm mã amnhĩ jarênh rãhã hã mê pamã karõ

Matêwre 7.7; Rukre 11.1-8; Atre 1.14; Epes 6.18

² Nê kêr ka mê xatã Tĩrtũm mã amnhĩ jarênh rãhã ho ri apa. Nê tanhmã mêhõ kot amnhĩ nhĩpêx to hã harênh ma nê ho Tĩrtũm wý. Nê mê ate kãm amnhĩ jarênh kamã kãm mex o mex ã harê. ³⁻⁴ Nê mãânên ixto awý kê mê tokyx ixkator japêr. Pa ixãmnhĩx mê kot kormã Kris jarênh mar kêt xwýnhjê mã harênh o ri mê hkôt ixpa. ã ixte amnhĩ nhĩpêx anhỹrta ã na prem ixpynê nê ijaxã pa kormã jar ixkrĩ. Jakamã kwa mê mãmrĩ ja hã ixto Tĩrtũm wýr o apa.

Mê pahte apkati mê mê pahkwýjê mã Jejus jarênh ã mê pamã karõ

Epes 5.16

⁵ Nê kêr ka mê kêp Kris kwý hkêt xwýnhjê hkôt nhỹhým ri apa nê tãm ri Tĩrtũm kapêr kôt amnhĩ nhĩpêx o mê hkôt ri apa.

⁶ Nê kê mêhõ awýr tẽ nê tanhmã Jejus ã akukjêr to ka amã hkĩnh ã aprĩ hã kãm awjarê. Ahpýnhã tanhmã mê kot hã akukjêr to xà hkôt tanhmã mê kãm harênh to kê mêhprĩ hã mar mex nê.

Pawre kot Koros wýr Xikitre mê Ones wa mênh ã harênh

Epes 6.21-22

⁷⁻⁸ Nê ot pa mê awýr mê pahtõ Xikitre mênh mã. Kot ma mê awýr ixte mê amã ixkapêr ã kagã nhĩpêx o mõi kaxyw. Na hte ixkôt Tĩrtũm mã amnhĩ nhĩpêx o ri pa. Inhmã hapêê. Tã kot paj mê awýr kumê kê ma mê awýr mõi nê hprĩ hã mê amã ijarê. Mê ate ijarênh mar nê tãm ajamaxpêr nê akĩnh kaxyw. ⁹ Mê akwý Onesti hkôt koja ma mê awýr mõi. Mãânên Kris kôt kêp mê pahtõ hã mê pamã hapê xwýnh na. Na hte Tĩrtũm kapêr kôt amnhĩ nhĩpêx mex rãhã ho ri pa. Tã Xikitre mê koja wa ma mê awýr mõi. Hãmri nê mê awýr pøj nê jar tanhmã mê ixte amnhĩ nhĩpêx to hã mê ijarê ka mê ama.

Kris kôt mê hkwy kot mê hwýr hpêr mênh ã mê harênh

¹⁰ Nê ota Aristakja ixpyrà nê kêp prês nê hkrĩ. Tã mê awýr hpêr mê. Nê Panãpe htõ Juãw Makreja mãânên mê awýr hpêr mê. Na pa pre ra mê amã Juãw Makre jarê. Tã koja mêmemo arĩgro hã akupýn mê awýr mõi japêr ka mê omu nê ho mex nê.

¹¹ Nê Jejus Justija mãânên mê awýr hpêr mê. Jajaja mê ixpyrà nê kêp Ijaew. Tã

mê tapxipixjaja na htem ixpyrà nê mê ixpê Ijaew kwýjê rom mê kãm Tirtũm kapêr nyw o mê ahkre ho ri mê hkôt pa. Tirtũm kot Kra Kris kôt mê kot amnhĩ xunhwýr xwýnhjê ho hkra hã harênh nywja na htem mê kãm harênh o ri mê hkôt pa. Pa ja hã mê omu nê ixkĩnh nê. ¹² Nê mê anhĩõ Epasja mãânên mê awýr hpêr mê. Na hte Jejus Kris mã tanhmã amnhĩ nhĩpêx mex to ho pa. Nê mê ato Tirtũm wýr rãhã ho pa nê mê ato hwýr o:

—Pa Tirtũm. E kwa tanhmã Koros kamã akrajê ho kê mê akôt amnhĩ xunhwýr týx nê. Nê amã hprãm xà hkôt pix mã amnhĩ nhĩpêx o ri pa. Nê amnhĩ kaxyw Kris kôt pix mã hamaxpêr týx rãhã nê. Anê.

¹³ ãm hãmri na hte mê ato hwýr o pa. Nom mê kapxipix o hwýr kêt nê. Mãânên krĩ pê Ratisej kamã nê krĩ pê Jerop kamã Kris kôt mê pahkwýjê ho hwýr o ri pa. Mê ate Tirtũm kôt amnhĩ nhĩpêx mex o apa kaxyw. Ixte ja hã omunh mex.

¹⁴ Nê jar mê pahõt tõtô Rukre mê Têmtija wa mãânên mê awýr hpêr mê. Tõtô Rukreja kêp ixkrãmnhwý mex na.

¹⁵ Nê kêr ka mê krĩ pê Ratisej kamã Kris kôt mê pahkwýjê mã ijarê. Nê Nĩpare mã nê òrkwý hwýr mê pikuprõnh nê Tirtũm mã mex o mex ã harênh o mê hkrĩ xwýnhjê mã mãânên ijarê.

¹⁶ Nê e kêr ka mê ixte mê awýr kagà mênhja kamã harênh pa nê hpãnhã krĩ pê Ratisej kamã Kris kôt mê pahkwýjê hwýr amê kê mê apyrà nê kamã harê nê piitã kuma. Nê mê kãm anê kê ra ixte mê hwýr kagà mênh xwýnhta kê mê amã kugõ ka mê kuxwar kamã harê nê ama.

¹⁷ Nê kêr ka mê Akip mã ijarê kê ra Tirtũm kot kãm mêmoj tã karõ xwýnhta kê ho anhýr jatur xãm kumê. Kêp hkra hã kê tãm kãm àpênh jatur xãm kumê.

¹⁸ Tã ãm ja pix. E paj pam amnhĩ nhĩkra ho hatur xà hã kagà. Mê ate ixte mêmoj tã kagà pumunh nê hkôt inhmã ajamaxpêr kaxyw. Nê ixte mê awýr mênh ã ijarênh mar kaxyw. Kwa kêr ka mê arĩ ixpê prês ã ixto Tirtũm wýr rãhã ho ri apa.

E kê Tirtũmja mêmoj to mê akutã nojarêt nê mê ato mex nê ka mê amex nê aja-makêtkati nê apa ho apa. Tã ãm ja pix. Ixpê

Pawre na pa mê awýr kagàja nhĩpêx nê ã mê awýr mênh anê.

Wam Tesarõn Pawre kot Tesarõn kamã Jejus kõt hkwýjê hwýr kagà nê mẽnh

Pawre na pre kagàja nhĩpêx. Kêp Jejus nhỹ hã mẽ ahkre ho pa xwýnhjê hõ na pre. Jakamã na pre kagàja nhĩpêx nê ma krĩ pê Tesarõn kamã Jejus kõt hkwýjê hwýr kumê. Tesarõn kamã Jejus ã kãm mẽ hkurê xwýnhjaja na prem Jejus ã mẽ homnuj o pa nhũm mẽ amnhĩ xà htýx kamã hamak o pa. Hãmri nhũm Pawre mẽ harênh ma nê kagàja nhĩpêx nê mẽ hwýr kumê. Kot mẽ kãm mẽ hamaxpêr o hihtýx kaxyw mẽ kot arĩ Jejus kõt amnhĩ nhĩpêx mex o pa nê aa hkaga hkêť ã mẽ kãm karõ. Nê nhỹrmã Jejus akupýn kaxkwa rũm mẽ pahpê hkwýjê hwýr wrýk nê ma akupým amnhĩ kõt mẽ pahto àpirja nhũm mẽ kãm harê. Æ na pre mẽ kãm mẽmoj jarê nê hã kagà anê nê mẽ kãm:

¹ Pa mẽ apê Tesarõn kamã Jejus kwý hã axpên wýr mẽ apikuprõnh xwýnhjaja? Xà mẽ amex na ka mẽ apa? Ixpê Pawre na pa mẽ awýr kagàja nhĩpêx nê mẽ awýr kumê. Siras mẽ Ximotre mẽ pa mẽ awýr kumê. Mẽ pahpê Mẽpanhĩpêxà maati Tĩrtũm mẽ Pahihti Jejus Kris wa hkwý jakamã na pa htem mẽ ato Tĩrtũm wýr rãhã ho ri ixpa. Kot mẽ akutã nojarêť rãhã nhũm mẽ ajamakêtkati nê axãmnhĩx mẽ apa kaxyw.

²⁻³ Nà mẽmoj kêt. Na pa htem mẽ amã ijamaxpêr nê mẽ anhỹ hã ixkĩnh nê ixpa hãmri nê mẽ awýr kagàja mẽ. Na pa htem mẽ ato Tĩrtũm wýr rãhã ho ri ixpa nê kãm mẽ ajarênh o:

—Pa Tĩrtũm. E mãn ka Tesarõn kamã akrajê pumu. Æm hãmri na ka pre tanhmã mẽ hkrã hto nhũm mẽ akõt amnhĩ nhĩpêx mex o pa. Na htem amnhĩ kaxyw akõt hamaxpêr týx nê. Jao mẽ piitã mẽ kamã ukapri kamã tanhmã mẽ ho ajuta hto ho pa. Nhũm mẽ kãm mẽ ixkurê xwýnhjaja Pahihti Jejus Kris ã tanhmã mẽ ho ho pa htã nhũm mẽ tee ri amnhĩ kukamã hamaxpêr o hkapri nê Jejus mẽ war akaga hkêť nê. Arĩ war anhỹ hã amnhĩ to htýx nê Pahihti

Jejus kutêp tanhmã kãm amnhĩ nhĩpêx to ho pa. Æm hãmri na htem ã amnhĩ nhĩpêx anê Tĩrtũm. Na pa htem mẽ kot ã amnhĩ nhĩpêx anhỹrja mã ijamaxpêr nê ixkĩnh nê.

Anhỹr o pa htem mẽ ato kuwý. ⁴ E Kris kõt ixkwýjaja. Nà Tĩrtũm kãm mẽ ajapê jakamã na pre amnhĩm mẽ arê. Kot mẽ ato hkra nhũm nhỹrmã kuri mẽ amex nê atĩr tũm nê apa ho apa kaxyw. Ra mẽ ixte ja hã mẽ ajarênh mar mex.

Mẽ piitã mẽ kot Tesarõn nhõ xwýnhjê jarênh mar ã mẽ harênh

⁵ Nê na pa prem ma mẽ awýr mõ nê mẽ amã Jejus jarênh o mẽ akõt ixpa. Kot mẽ panê tanhmã amnhĩ nhĩpêx to hã harênh o ri mẽ akõt ixpa. Nom pa mẽ amnhĩ krã hkõt mẽ amã ixujarênh kêt nê. Æm Tĩrtũm Karõ nhỹ hã na pa prem hihtýx xà ho tanhmã mẽ amã ixkapêr to ka prem mẽ inhma nê mẽ ixkõt ajamaxpêr kurê kumrêx. Na pa prem tãm amnhĩ nhĩpêx o ri ixpa ka mẽ ja hã mẽ ixpumunh o ri mẽ ixkõt apa. ⁶ Tã Jejus kõt amnhĩ xunhwý nê hkõt amnhĩ nhĩpêx mex nê. Nê mẽ ixkõt amnhĩ nhĩpêx mex nê. Mẽ kot Jejus ã tanhmã mẽ ato htã ka htem Tĩrtũm Karõ nhỹ hã akĩnh nê hkõt amnhĩ nhĩpêx mex rãhã ho ri apa. ⁷ Tã nhũm pika pê Masetõn mẽ Gres wa kamã Jejus kõt mẽ pahkwýjaja ã mẽ ate amnhĩ nhĩpêx anhỹr ã mẽ ajarênh ma nê mẽ apyrà nê ã amnhĩ nhĩpêx anhỹr o pa. ⁸ Na ka prem tanhmã Jejus kot mẽ panê amnhĩ nhĩpêx to hã harênh o ri mẽ hkõt apa nhũm mẽ piitã mẽ akapêr ma. Nom mẽ tapxipixjaja mar kêt nê. Na mẽ ra ohtõ nê mẽ ajarênh ma nê mẽ apyrà nê ma mẽ kãm Jejus jarênh o pa. Ra mẽ ate Jejus kõt amnhĩ xunhwýr ã amnhĩ jarênh o ri apa nhũm mẽ piitã kot mẽ amar jakamã mẽ pajaja na pa htem mẽ kãm ã mẽ ajarênh anhỹr kêt nê. Mo kaxyw? Ra mẽ kot mẽ ajarênh mar mex kênã. ⁹ Na pa htem nhỹri krĩ hõ hwýr pøj nhũm mẽ ixpumu nê ra mẽ tãmjaja mẽ inhma mẽ ajarênh kurê kumrêx. Nê mẽ ajarênh o:

—Kwa Tesarõn kamã Kris kõt mẽ pahkwýjaja na xep kãm mẽ akĩnh nê. Amnepêm na pre htem amnhĩm sãnti nhĩpêx nê kêp mẽhpãm ã harê nê amnhĩ to hwýr o pa. Tã ka xep prem ma mẽ hwýr mõ nê mẽ kãm Tĩrtũm kapêr jarê nhũm

mē ama nē Tirtūmja sānti rom ām hāmri hā omunh kurê kumrēx. Hāmri nē gryk ā sānti kaga hpa nē Tirtūm kōt amnhī xunhwý nē hkōt pix mā amnhī nhīpēx mex o pa. ¹⁰ Nē amnhī wýr Tirtūm Kra kamā hamak rāhā ho ri pa. Anē.

Ām hāmri na ka htem amnhī wýr kamā hamak rāhā ho apa. Na pre ty nhūm Hipēêxà Tirtūm akupým ho htír. Tā koja nhýmā akupýn mē pahwýr kumē nhūm akupýn mē pahwýr wrý. Hāmri pu mē ām pix kukwak ri mē kot amnhī xà htýx kām hamak o pa htūm xàta wýr papa hkēt nē.

2

Pawre kot amnhī jarēnh

Sikūn Korīt 1.12, 4.1-6

¹⁻² Nē kormā mē awýr mē inhmōr kēt ri na pa prem kormā Piripos nhō xwýnhjē mā Tirtūm kapēr jarēnh o ri mē hkōt ixpa. Nom nhūm mē hkwyjaja kām mē inhmar prām kēt nē. Na prem Jejus ā mē inhmā kapēr punuj nē mē inhīpēx kati pa prem amnhī xà htýx kamā ijamak o mē hkōt ixpa. Na ka prem ja hā mē ijarēnh ma. Ā mē kot mē inhīpēx anhýr tā pa mē tee ri amnhī kukamā ijamaxpēr pē Tirtūm kapēr jarēnh kaga hkēt nē. Na pa prem arī mē kām Jejus kot tanhmā mē panē amnhī nhīpēx to hā harēnh o ri mē hkōt ixpa. Tā mē awýr inhnojarēt nē Tirtūm nhý hā amnhī to htýx nē ma mē awýr mō. Hāmri nē mē amā tanhmā Jejus jarēnh to ho ri ixpa. Ka prem mē inhma hāmri nē axohtō nē hkōt amnhī xunhwý. ³ Nom pa prem ixēx rom tanhmā mē amā ixkapēr to hkēt nē. Rý mē inhmā mēmoj prām xāj mē ano kupy r pē mē amā ixkapēr kēt nē. ⁴ Rý mē ate mē ixkapēr mar nē mē inhmex ā mē ijarēnh kaxyw pa tanhmā mē amā ixkapēr to hkēt nē. Ām Tirtūm kot mē inhmar nē tapxipix mē inhmex ā mē ijarēnh pix prām xāj na pa prem mē amā kapēr jarēnh o ri mē akōt ixpa. Tirtūm tapxipix na hte tanhmā mē pakute hkōt mē pahpumunh rāhā ho pa. Tām na pre mē ixte kapēr jarēnh o ri ixpa kaxyw mē ixunhwý.

⁵ Xàn pa prem mē ijakwa nhīkjē ho mē ate tām amnhī nhīpēx ā mē ajarē hāmri nē mē ijakwa nhīkjē ho mē ato ixkapēr punuj

nē? Nà na pa prem ā amnhī nhīpēx anhýr kēt nē. Nà pa prem ixkatàt kōt mē ate amnhī nhīpēx ā mē apumunh kōt tanhmā mē ajarēnh to ho ri ixpa.

Nē xà mē ate mē ixkapēr mar nē akīnh nē hpānhā mē inhmā amnhīrer kaxyw na pa prem mē awýr mō nē mē amā Jejus kapēr o mē ajahkre? Nà na pa prem kàxpore prām xāj mē amā ixkapēr kēt nē. Tirtūm kot ja kōt mē ixpumunh mex.

⁶ Rý xà mē ate mē inhmex ā mē ixto jarkrar kaxyw na pa prem mē awýr mō? Nà määnēn ja kaxyw kēt. Ā mē ate mē ijarēnh anhýr prām xāj na pa htem Tirtūm kapēr o mē ajahkre ho ri ixpa hkēt nē.

⁷ Rý xàn pa pre mē awýr mō nē mē amā amnhī jarēnh o:

—E mē ixte Jejus nhý hā ixkapēr o ixpa xwýnh jakamā kot paj mē amā tanhmā ixkapēr to ka mē inhma nē hpānhā mē inhmā amnhīre.

Anhýr o mē amā ixkapēr? Nà na pa pre ā mē amā ixkapēr anhýr kēt nē. Na pa prem te mē katorxà kot hkrajē nhīpēx pyrāk o mē anhīpēx nē amarī mē ajahkre ho ixpa nē mēmoj tā mē awýr kēt nē.

⁸ Mē inhmā mē akīnh jakamā na pa prem mē amā ixprī hā Tirtūm kapēr piitā harēnh par o mē akōt ixpa nē mē kot ja hā tanhmā mē ixto pymaj tee ri amnhī kukamā ijamaxpēr o ri ixkaprī hkēt nē. Ām ixàmnhīx ri tanhmā Jejus kot mē panē amnhī nhīpēx to hā harēnh o mē akōt ixpa. ⁹ Mē apē mē ixkwý jakamā na pa prem tanhmā mē amā ixkapēr to hpānhā mē ixàpkur xà rý mēmoj tā mē awýr kēt nē. Na pa prem mē pamjaja mēmoj tā ixàpēnh pē mē amā ixkapēr o ri ixpa. Nē ixàpēnh rūnh kumrēx. Arīgro hā nē kamàt kām. Mān arī mē ate ā mē ixte amnhī nhīpēx anhýrja ā anohtýx japēr ko. ¹⁰ Na pa prem tām amnhī nhīpēx o mē akōt ixpa. Tirtūm kām hprām xà hkōt. Jao tanhmā amnhī to mex to rāhā ho ri ixpa ka prem amnhī tā mē ixpumu. Nhūm Tirtūm haxwýja ja hā mē ixpumu. ¹¹ Na pa pre mē apē mē ixkra pyrāk mē anhīpēx o ri mē akōt ixpa. ¹² Jao mē amā ixkapēr mex nē. Nē mē akaprī nē apa xwýnhjaja pa prem akupým mē ajamaxpēr o mē axihtýx hāmri nē mē apiitā mē amā ixkapēr nē mē amā:

—Kwa kêr ka mẽ Tĩrtũm kôt amnhĩ nhĩpêx mex rãhã ho ri apa nê aa hkaga hkêt nê. Anê.

Tĩrtũm tãm na pre amnhĩ wỳr mẽ pahwỳ pu prem hkôt amnhĩ xunhwỳ. Tã koja nhỹrmã amnhĩ wỳr mẽ pahto api pu mẽ Kra Jejus kukwak ri wa kuri pamek kumrêx nê ri papa ho papa. Jakamã kwa kêr ka mẽ hkôt amnhĩ nhĩpêx mex rãhã ho ri apa.

Jejus kwỳjaja kãm Jejus kôt amnhĩ xunhwỳr hkêt xwỳnhjê pyma hkêt

Atre 17.1-9

¹³ Nê ma mẽ awỳr mẽ inhmōrta ã na pa prem mẽ amã Tĩrtũm kapêr jarênh o ri mẽ akôt ixpa ka prem mẽ inhma nê mẽ ixte amnhĩ krã hkôt mẽ ixkapêr ã mẽ ixkamnhĩx kêt nê. Na ka prem ãm hãmri mẽ ixte Tĩrtũm kapêr jarênh ã mẽ ixpumunh kurê kumrêx nê amnhĩ kaxyw hkôt ajamaxpêr nê Jejus mẽ Hipêêxã wa hkôt amnhĩ xunhwỳ. Jakamã na pa hte mẽ amã ijamaxpêr nê mẽ anhy hã ixkĩnh nê. Hãmri nê Tĩrtũm mã mẽ anhy hã ixkĩnh jarênh o ri ixpa. Nã na ka htem arĩ Tĩrtũm kapêr kôt amnhĩ nhĩpêx mex nê. ¹⁴ Nhũm hte mẽ akwỳjaja tee ri ja hã mẽ apumu nê Jejus ã mẽ atomnuj nê. Nom mẽ kapxipixjaja ã mẽ anhy pêx anhyr kêt nê. Jutej kamã Ijaew kwỳjaja na prem mẽ apyrã nê Jejus kôt amnhĩ xunhwỳ nhũm mẽ hkwỳjaja tee ri ja hã mẽ omu nê hã mẽ hipêx kati ho pa.

¹⁵ Amnepêm Ijaew na prem Tĩrtũm nhỹ hã mẽ kãm kapêr o mẽ pa xwỳnhjê homnuj nê mẽ hkwỳjê hpar o pa. Hãmri nhũm hpãnhã mẽ hkanrêhã mẽ htãmnhwỳjaja mẽ urak nê Pahihti Jejusja pĩ. Tã jarãhã mããnên ã Jejus ã mẽ panhĩpêx anê nhũm Tĩrtũm tee ri mẽ pahtã mẽ omu nhũm ja kêp omnuj tỳx kumrêx nhũm mẽ pahtã mẽ kamã gryk nê.

Na hte mẽ apê Ijaew kêt xwỳnhjê ho hkra nhũm Ijaew kãm ja prãm kêt ¹⁶ jakamã na htem mẽ akwỳ kot Tĩrtũm kôt amnhĩ xunhwỳr pymaj mẽ anê mẽ ixkurê nê mẽ inhmã:

—Kwa Ijaew kêt xwỳnhjê mã Tĩrtũm kapêr jarênh kêt nê. Ja mex kêt. Anê.

Mê ate Jejus kôt amnhĩ xunhwỳr nê nhỹrmã Tĩrtũm wa kuri atĩr tũm nê apaja mẽ kãm hprãm kêt jakamã na htem ã mẽ anê àmnar o pa anhyrja o amnhĩ tomnuj nê.

Mê kot amnhĩ tomnuj tỳx o mẽ pa xwỳnh jakamã na Tĩrtũm mẽ kamã gryk nê. Koja nhỹrmã mẽ kot amnhĩ xà htỳx kamã hamak tũm xà hwỳr mẽ rênh pa.

Pawre akupỳm Tesarōn nhõ xwỳnhjê hwỳr hkrã hã harênh

Atre 17.10-13

¹⁷ Nê ma mẽ awỳr mẽ inhmōr tã mẽ anho krĩ kamã mẽ kêp Kris kwỳ hkêt xwỳnhjaja na pre mẽ ixpumu nê mẽ anê mẽ ijano pa prem ijapôj nê hpãnhã ma nhỹhỹm krĩ hõ hwỳr ixpa. Nom arĩ mẽ amã ijamaxpêr rãhã nê mẽ ato ijamak o ri ixpa nê xatã akupỳm mẽ awỳr ixkrã. ¹⁸ Na pa prem inhmã akupỳm mẽ awỳr inhmōr prãm tỳx nê. Ixpê Pawre na pa pre xatã mẽ awỳr ixkrã htã nhũm Satanasti tanhmã mẽ anê ixpê amnar to pa kormã mẽ awỳr inhmōr kêt nê. ãm tee ri inhmōr prãm kaprỳ. ¹⁹⁻²⁰ Mẽ inhmã mẽ akĩnh tỳx. Mẽ ate Tĩrtũm kôt amnhĩ nhĩpêx mex jakamã koja nhỹrmã Pahihti Jejus akupỳn mẽ pahwỳr wrỳ pa mẽ akuri xa nê kãm mẽ ajarênh o:

—Pa Pahihti. E Tesarōn nhõ xwỳnhjê pumu. Na ka pre mẽ hwỳr inhmẽ pa mẽ hwỳr mō nê mẽ kãm ajarê nhũm prem inhma nê amnhĩ kaxyw akôt hamaxpêr tỳx nê akôt amnhĩ xunhwỳ. Tã na htem akôt tãm amnhĩ nhĩpêx rãhã ho pa.

Anhyr o kãm mẽ ajarê nê mẽ anhy hã ixkĩnh tỳx kumrêx.

3

Pawre kot Tesarōn wỳr Ximotre mẽnh ã harênh

Atre 17.14-15, 18.5

¹⁻⁵ Nê kormã mẽ akôt ixpa ri na pa pre Kris kwỳ hkêt xwỳnhjaja kot Kris ã tanhmã mẽ atomnuj to hkukamã mẽ amã mẽ harê ka prem mẽ inhma. Na htem ã Kris ã mẽ pahkurê xwỳnhjaja mẽ panhĩpêx anhyr o pa. Tã nhũm prem ã mẽ anhy pêx anê pa mẽ ajarênh ma nê tee ri mẽ akukamã ijamaxpêr nê axpên mã mẽ ajarênh o:

—Hêxta waa nê. Kwa mẽ kot Jejus ã tanhmã mẽ homnuj toja mỳrapê mãn mẽ tee ri amnhĩ kukamã hamaxpêr nê Jejus kaga rỳ ko. Mãn ra Satanasti tanhmã mẽ kãm Jejus o hêx to nhũm mẽ kuma nê tanhmã hamaxpêr to nê hkaga. Kwa mãn

pu prem ãm mẽ kãm Tĩrtũm kapẽr jarẽnh kaprỳ nà? Anẽ.

Hãmri nẽ tee ri mẽ akukamã ijamaxpẽr nẽ mẽ awỳr Ximotre mẽnh kaxyw nẽ kãm:

—Mãn ra Tesarõn nhõ xwỳnhjaja Jejus ã tanhmã mẽ homnuj to nhũm mẽ amnhĩ xà htỳx kamã hamak o ra tee ri amnhĩ kukamã hamaxpẽr. Kwa ma mẽ hwỳr mõ nẽ ja hã mẽ omu. Hãmri nẽ mẽ kot Kris kõt amnhĩ xunhwỳr tỳx kaxyw mẽ hamaxpẽr o axihtỳx. Hãmri nẽ akupỳn wa ixwỳr mõ nẽ wa inhmã tanhmã mẽ harẽnh to. Kot paj Siras mẽ wa akutẽp jar Atenas kamã wa arĩk. Anẽ.

Hãmri nẽ mẽ awỳr kumẽ. Ximotre na hte Siras mẽ wa inhĩhkõ hã mẽ kãm Tĩrtũm kapẽr jarẽnh o pa. Nẽ Kris kot tanhmã mẽ panẽ amnhĩ nhĩpẽx toja nhũm wa inhĩhkõ hã mẽ kãm harẽnh o pa. Tã pa pre mẽ awỳr kumẽ nhũm ma mẽ awỳr mõ pa Siras mẽ wa Atenas kamã kutẽp arĩk.

Ximotre akupỳn mõi nẽ Pawre mã mẽ harẽnh

⁶ Tã nhũm ra ham akupỳn mẽ arũm wa ixwỳr mõ nẽ wa inhmã tanhmã mẽ ajarẽnh to pa wa mẽ ajarẽnh ma nẽ ixkĩnh nẽ. Na ka xep htem arĩ amnhĩ kaxyw Kris kõt ajamaxpẽr tỳx rãhã nẽ. Jao mẽ amã mẽ piitã mẽ hkĩnh nẽ tanhmã mẽ ho mex to ho ri apa. Nẽ arĩ mẽ inhmã ajamaxpẽr nẽ ixpyrà nẽ mẽ amã mẽ ixpumunh prãm o ri apa. ⁷ Nà ãm hãmri na ka htem ã amnhĩ nhĩpẽx anẽ. Na pa wa ra jar ixpunuj nẽ ixpa nẽ Kris ã amnhĩ xà htỳx kamã ijamak tã mẽ ajarẽnh ma nẽ tãm ijamaxpẽr. ⁸ Tesarõn nhõ xwỳnhjaja kot Kris ã tanhmã mẽ anhĩpẽx to htã ka mẽ arĩ hkõt amnhĩ xunhwỳr tỳx rãhã nẽ. Pa wa mẽ ajarẽnh ma nẽ mẽ anhỹ hã ixkĩnh pẽ tanhmã Pahihti Jejus mã amnhĩ nhĩpẽx to ho ri ixpa. ⁹ Nà na pa hte wa mẽ anhỹ hã ixkĩnh nẽ. Nẽ xatã Tĩrtũm mã mẽ ajarẽ nẽ kãm:

—Pa Tĩrtũm. Nà ãm hãmri na ka pre amnhĩ kõt Tesarõn kãm akwỳjẽ xunhwỳr tỳx nẽ nhũm htem akõt amnhĩ nhĩpẽx mex rãhã ho pa. ãm hãmri na ka hte ã mẽ hipẽx anẽ. Na pa hte mẽ kot amnhĩ nhĩpẽx mã ijamaxpẽr o ri ixpa nẽ ixkĩnh nẽ.

Anhỹr o kãm mẽ ajarẽ. ¹⁰⁻¹¹ Nom kãm ja pix jarẽnh kêt nẽ. Na pa hte wa

mããnẽn arĩgro hã nẽ kamàt kãm amnhĩ to Mẽpanhĩpẽxà Tĩrtũm mẽ Pahihti Jejus Kris wa hwỳr kãm ixihtỳx rãhã ho ixpa nẽ wa kãm:

—Kwa Tĩrtũm mẽ Jejus wa. Na pa wa ra inhmã Tesarõn wỳr inhmõi nẽ mẽ pahkwỳjẽ pumunh prãm tỳx nẽ. Kormã mẽ kot akapẽr jatur xà mar kêt. Tã wa inhmã akupỳm mẽ hwỳr wa inhmõi nẽ mẽ kãm akapẽr jatur xàm mẽnh prãm. Mẽ kot mar nẽ akõt amnhĩ nhĩpẽx mex o pa kaxyw. Kwa xàt ka wa akupỳm mẽ hwỳr wa inhmẽ nà? Anẽ.

Na pa hte wa ã amnhĩ to wa hwỳr rãhã ho ixpa anẽ. Tã koja wa akupỳm mẽ awỳr wa inhmẽ pa wa ma mẽ awỳr inhmõi kurẽ kumrẽx. ¹² Koja Tĩrtũm tanhmã mẽ akrã hto ka mẽ amã axpẽn kĩnh pẽ tanhmã axpẽn to ajuta hto ho ri apa. Nẽ mẽ amã akwỳjẽ hã ma ho te mẽ kam amã amnhĩ tã ma pyræk o ri apa. ã kot kaj mẽ apiitã axpẽn nhĩpẽx anẽ. Te wa inhmã mẽ akĩnh pẽ tanhmã mẽ ato mex to pyræk. ¹³ Koja Tĩrtũm ja kaxyw tanhmã mẽ akrã hto ka mẽ tãm ajamaxpẽr mex nẽ. Kêr kê Jejus nhỹrmã akupỳn wrỳ. Mẽ kot hkõt amnhĩ xunhwỳr xwỳnhjẽ mẽ ro hã akupỳn wrỳ. Hãmri ka mẽ Mẽpanhĩpẽxà Tĩrtũm kutã amnhĩ kukamã ajamaxpẽr nẽ tãm mẽ ate amnhĩ nhĩpẽx ã amnhĩ pumunh kõt akĩnh nẽ apikunhar o kuri akuhẽ. No ri tee ri amnhĩ kamã ajamaxpẽr nẽ ajakwamnajre nẽ akuhẽ hkêt nẽ.

4

Tĩrtũm kãm mẽmoj prãm ã harẽnh Rõmãn 13.11-14; Epes 5.3-14

¹ E Jejus kõt ixkwỳjaja. Na pa prem ma mẽ awỳr mõ nẽ Tĩrtũm kapẽr o mẽ ajahkre ho ri mẽ akõt ixpa. Mẽ ate mar nẽ Tĩrtũm kãm hprãm xà hkõt tanhmã amnhĩ nhĩpẽx to kaxyw. Ka prem mẽ inhma nẽ hkõt amnhĩ nhĩpẽx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhỹ hã axte mẽmoj tã mẽ amã karõ. Jakamã kwa kêr ka mẽ arĩ Tĩrtũm kapẽr kõt pix mã ri amnhĩ nhĩpẽx mex nẽ ÿ hã amnhĩ to htỳx pẽ ã amnhĩ nhĩpẽx anhỹr o ri apa. ² Na pa prem ra Jejus nhỹ hã mẽ amã mẽmoj tã karõ. Mẽ ate hkõt amnhĩ nhĩpẽx prãm

xàj mẽ amã hã karõ ka prem mẽ inhma. ³ Nà mẽ pahte tãm amnhĩ nhĩpêx o papaja na Tirtũm kãm hprãm. No kêt mẽ pahtýx ri nhãm mēnijê ho amnhĩkati o papaja na kãm hprãm kêt. ⁴ Jakamã kwa kêt ka mẽ amyjaja aprõ pix tânopxar o ri apa. No mẽ ri nhãm mēnijê ho amnhĩkati ho ri apa hkêt nê. Nê mẽ anijaja kêt ka mẽ amjên pix tânopxar o ri apa. No mẽ ri nhãm mēmyjê ho amnhĩkati ho ri apa hkêt nê. ⁵ Jejus kwý hkêt xwýnhjaja kot htýx ri kãm hprãm xã hkôt mēnijê hwýr mrrar nê mẽ ho amnhĩkati htã kêt ka mẽ ho mẽ uràk kêt nê. Kwarĩ ho kwarĩ. ⁶ ã mẽ kot amnhĩ nhĩpêx anhýr xwýnhjaja koja Tirtũm nhýrmã mẽ homnuj týx kumrêx. Na pa prem ra mẽ amã ja jarê ka prem mẽ inhma. Jakamã kwa kêt ka mẽ ã amnhĩ nhĩpêx anhýr o ri apa hkêt nê. ⁷ Xà na pre Tirtũm ã mẽ pahte amnhĩ nhĩpêx anhýr kaxyw amnhĩ wýr mẽ pahwý nê mẽ pahto hkra? Nà ja kaxyw na pre mẽ pahto hkra hkêt nê. Æm mẽ pahte tãm amnhĩ nhĩpêx o ri papa kaxyw nê tãm ri axpên nhĩpêx o ri papa kaxyw na pre mẽ pahto hkra. ⁸ Jakamã kot kaj mẽ atõ ja hã mẽ inhma nê ãm mẽ inhma nê arĩ ã amnhĩ nhĩpêx anê. Hãmri nê mẽ pajaja mẽ ixkapêr nhĩrõp axãm kêt nê. Tirtũm kapêr nhĩrõp kot kaj xa. Nê mãânên kot mẽ pahwýr Karõ mēnh xwýnhja kapêr nhĩrõp kot kaj xa.

⁹ Nê mẽ amã axpên kĩnh pê axpên to mex o apa hprãm xàj na pre Tirtũm tanhmã mẽ amã kapêr o amnhĩrit to ka htem ã axpên nhĩpêx anhýr o ri apa. Jakamã kot paj mẽ axte ja hã tanhmã mẽ amã nê hkêt nê. ¹⁰ Na ka mẽ ra amã axpên kĩnh pê te mẽ kam amã amnhĩ tã ma pyràk o axpên nhĩpêx o ri apa. Nê pika pê Masetõn kamã Kris kôt mẽ akwýjaja ka mẽ mãânên amã mẽ hkĩnh pê ã mẽ hipêx anê. Tã kêt ka mẽ arĩ ã amnhĩ nhĩpêx anhýr rãhã nê. ¹¹ Kot kaj mẽ ã amnhĩ nhĩpêx anê hãmri nê ajamakêtkati nê axãmnhix axápênh pix tânopxar o ri apa. Jao mẽ hakwa kamã nhãm tanhmã mẽ hixi jarênh to ho ri apa hkêt nê. Nê ãm amnhĩ pix tânopxar o ri apa. Nê amnhĩ pa kukwak ri axàpkur kaxyw amnhĩm axápênh mex o ri apa. Na pa prem ra ã ja hã mẽ amã karõ anê. ¹² Kot kaj mẽ ã amnhĩ nhĩpêx anê hãmri nê amã prãm xàj axàhwýr o ri apa

hkêt nê. Nhũm Kris kwý hkêt xwýnhjaja mẽ ate amnhĩ nhĩpêx ã mẽ apumu nê axpên mã mẽ ate tãm amnhĩ nhĩpêx xwýnhjê hã mẽ ajarênh kurê kumrêx.

Kris kwý htyk xwýnhjê jarênh

Matêwre 24.29-31; Wam Korĩt 15.51-58

¹³ E Kris kôt ixkwýjaja. Na ka xep mẽ tee ri Kris kôt akwý htyk xwýnhjê hkukamã ajamaxpêr. Jakamã kot paj ixprĩ hã tanhmã mẽ amã mẽ harênh to ka mẽ inhma. Nà Kris kwý hkêt xwýnhjaja na htem ty nhũm mẽ hkwýjaja tee ri mẽ hkukamã hamaxpêr o hkaprĩ nê. Mẽ htyk nê ma Jejus wýr àpir kêt jakamã na htem mẽ mýr pê hkaprĩ htýx nê pa. No mẽ papajaja na pu htem ho mẽ uràk kêt nê. ¹⁴ Jejus na pre ty nhũm Tirtũm akupým ho htĩr. Tã ra ã kot hipêx anhýr jakamã koja nhýrmã Jejus akupýn wrý nê mẽ kot hkôt amnhĩ xunhwýr nê htyk xwýnhjê karõ nhũm man amnhĩ kôt kaxkwa rũm mẽ o wrý. Na pu htem ã ja kôt pajamaxpêr anê. ¹⁵⁻¹⁶ Na pre Pahihti Jejus inhmã hkôt mẽ pahkwý htyk xwýnhjê jarênh o:

—Kot paj nhýrmã akupýn mẽ awýr wrý ka mẽ ate ixkôt amnhĩ nhĩpêx xwýnh piitã ma ixkutã axàpir o mõi. Nom kot kaj mẽ arĩ atĩr nê apa xwýnhjaja akumrêx axàpir kêt nê. Kormã. Koja Tirtũm kapêr o mẽ wrýk xwýnh krãhtũmja Tirtũm mã pifti kakõ. Kakõr týx pa ixkwý htyk nê hikwý xwýnhjê mã ixkapêr nê ixãmra kamã mẽ kumra. Nhũm mẽ hkarõ akupýn mẽ hwýr wrý nê mẽ kãm gjêx pa. Hãmri nhũm mẽ akupým htĩr nê kãnhmã hkrĩ hpa nê ma kumrêx ixkutã àpir o mõi. ¹⁷ Hãmri ka mẽ ate ixkôt amnhĩ xunhwýr xwýnh arĩ mẽ atĩr nê apa xwýnhjaja ka mẽ hã ajêt nê mẽ atipxi nê ma ixkutã axàpir o mõi pu mẽ kakrã kamã axpên kaxpa. Hãmri nê mẽ pahpimràatã ma kaxkwam api nê inhõ krĩ hwýr pøj. Kaj mẽ Tirtũm mẽ wa ixkuri amex kumrêx nê atĩr tũm nê apa ho apa. Anê.

¹⁸ ã Pahihti Jejus inhmã mẽ pakukamã mẽ pajarênh anê. Jakamã kwa kêt ka mẽ tee ri mẽ pahkwý htyk xwýnhjê hkukamã ajamaxpêr hkêt nê. Æ ixujarênh anhýrta ã anohtýx pê axpên jamaxpêr o axihtýx o ri axpên kôt apa.

5

Mê pahte akupÿn Jejus wrÿk xà hã arÿgro pumunh kêt ã harênh

Matêwre 24.32-25.13; Wam Pêtre 3.8-13

1-2 Nê mê pahte Jejus akupÿm wrÿk xà hã arÿgro pumunh kêt jakamã kot paj mê amã tanhmã hã kagà hto hkêt nê. Koja nhÿrmã akupÿn mê pahwÿr nojarêt hãmri nê te kot mê ahkÿnh xwÿnh kot amnhÿ nhÿpêx pyrã nê mê pajaêr pê mê pahwÿr wrÿ. ³ Jakamã koja kormã wrÿk kêt ri nhÿm Kris kwÿ hkêt xwÿnh kot amnhÿ wÿr kamã hamak kêt xwÿnhjaja hãmri mex nê pa hã amnhÿ pumu nê hkÿnh nê pa. Nê axpên mã kapêr o:

—Nà koja Tÿrtÿm tanhmã mê pahto hkêt nê. Arÿ mê pamex nê ri mê papa kênã. Nà kot puj mê paxàmnhÿx ri pajamakêtkati nê ri papa ho papa.

Anhÿr o axpên mã kapêr rôm nhÿm puh Jejus mê haêr pê akupÿn wrÿ. Hãmri nê ma mê kot amnhÿ xà htÿx kamã hamak o pa htÿm xà hwÿr mê rênh pa nhÿm mê tee ri kêp hpimxur prãm kaprÿ. Te mê htujarô xwÿnh kot amnhÿ nhÿpêx pyrãk. Na htem mex nê pa htã hpijagri kaxyw ôhy xà htÿx kumrêx nê tee ri kãm ôhy xà hkêt prãm kaprÿ ho hikwÿ. ⁴ Nom mê kajaja kot kaj mê urã nê amnhÿ jaêr pê akupÿm wrÿk kãm omu nê tee ri amnhÿ kukamã ajamxpêr o akaprÿ hkêt nê. ⁵ Mê pahpê Jejus kwÿ jakamã na pu htem kapêr kôt ri tãm amnhÿ nhÿpêx o ri papa. Jao te mê pahte mê kêp Jejus kwÿ hkêt xwÿnhjê kot amnhÿ nhÿpêx pyrãk kêt. ⁶ Na htem mê pahkÿnhã akupÿn wrÿk kukamã hamaxpêr kêt nê. Te htÿx ri mê ôt rãhã ho hikwÿ pyrãk. Nom mê papajaja na pu htem akupÿn wrÿk kamã pajamak o papa pê kãm tanhmã amnhÿ nhÿpêx mex to rãhã ho ri papa. ⁷ Te kot ja pyrãk. Na htem kamãt kãm gôr nê mêmoj mã hamaxpêr kêt nê htÿx hikwÿ. Nê mê hkwyjaja kamãt kãm axpã nê htÿx ri tanhmã amnhÿ tomnuj to ho pa. Jao hamaxpêr mex kêt nê. Tã mê kêp Jejus kwÿ hkêt xwÿnhjaja hte mê urãk nê htÿx ri tanhmã amnhÿ tomnuj to ho pa nê akupÿn Jejus wrÿk mã hamaxpêr kêt nê. ⁸ No kêt mê papajaja. Mê pahte hkôt amnhÿ xunhwÿr xwÿnhjaja. Kêr pu mê ho mê urãk kêt nê. Satanasti kãm mê pahte amnhÿ

tomnuj prãm tã mê pahte kãm hprãm xà hkôt amnhÿ nhÿpêx pymaj kêr pu mê mêmoj punuj pê amnhÿ to htÿx rãhã ho ri papa.

Nê amnhÿ kaxyw Jejus kôt pajamxpêr tÿx rãhã nê.

Nê mê pamã mê piitã mê hkÿnh pê mê kutã panojarêt rãhã ho ri papa.

Nê nhÿrmã Tÿrtÿm mê hkra Jejus wa kuri pahtÿr tÿm nê papa ho papa hkukamã mân pajamxpêr rãhã o ri papa.

Kot puj mê ã amnhÿ nhÿpêx anê hãmri nhÿm Satanasti tee ri mê pahte amnhÿ tomnuj prãm xàj mê pahkrãm pajamxpêr punuj jagjênh kaprÿ.

⁹ Xà na pre Tÿrtÿm mê pakamã gryk kãm mê kot amnhÿ xà htÿx kamã hamak tÿm xà hwÿr mê pajanor kaxyw mê parê? Nà na pre ja kaxyw mê parênh kêt nê. ãm Pahihti Jejus Kris kukwak ri kot amnhÿ katut kôt mê pahte amnhÿ tomnuj rênh par nê mê pahto hkra kaxyw na pre mê parê.

¹⁰ Tã mêmoj kaxyw na pre Krisja mê panê ty? Nà nhÿrmã Tÿrtÿm mê wa kuri mê pamex kumrêx nê pahtÿr tÿm nê papa ho papa hprãm xàj na pre mê panê ty. Jakamã koja nhÿrmã akupÿm amnhÿ kôt ma mê pahto àpir kaxyw akupÿn mê pahwÿr wrÿ pu mê amnhÿ kaxyw hkôt pajamxpêr xwÿnh piitã ma hkôt kaxkwa hwÿr api hãmri nê Tÿrtÿm wa kuri pamex nê pahtÿr tÿm nê papa ho papa. Kormã mê pahtÿr ri mê papa xwÿnhjaja nê ra mê htyk nê hikwÿ xwÿnhjaja nhÿm akupÿm mê ho htÿr. Hãmri nê mê pahto hpimràatã amnhÿ kôt mê pahto àpir pa. Mê pahte hkôt amnhÿ xunhwÿr xwÿnh piitã koja Jejus nhÿrmã akupÿn wrÿ nê ã mê panhÿpêx mex anê.

¹¹ Tã ã kot anhÿr jakamã kwa kêr ka mê jam ajamxpêr o apa pê axpên jamxpêr o hihtÿx o ri axpên kôt apa. Nê Jejus kôt axpên jamxpêr o hihtÿx o ri axpên kôt apa. Ra ã mê ate axpên nhÿpêx anhÿr tã kêr ka mê arÿ ho anhÿr rãhã ho ri apa nê aa hkaga hkêt nê.

Tÿrtÿm kapêr o mê pajahkre xwÿnhjê jarênh

Karatas 6.6; Wam Ximotre 5.17-19

¹² Nê kwa Kris kôt ixkwÿjaja. Na hte mê kot Tÿrtÿm kapêr o mê ajahkre xwÿnhjaja mê ajahkre mex pê Tÿrtÿm mã mê ajamãr

mex o pa. Na htem ã mẽ anhîpêx mex anhÿr rãhã ho ri mẽ akõt pa. Tã kwa kêr ka mẽ amnhî tã mẽ omu mẽ mẽ kapêr mar tÿx nê. ¹³ Nê mẽ hã apijaàm pê tanhmã mẽ ho mex to ho apa.

Nê kwa kêr ka mẽ tãm axpên nhîpêx nê axàmnhîx ri ajamakêtkati nê axpên kôt ri apa ho apa.

Mẽ pahte tanhmã Kris kôt mẽ pahkwÿjê nhîpêx to hã mẽ pamã karõ

Epes 4.1-6

¹⁴ Nê koja Kris kôt mẽ anhîõ kãm kaga nê pa ka mẽ ja hã omu mẽ kãm anê kê ã amnhî nhîpêx anhÿr kêt nê. Kê hpãnhã amnhî xàpkur xà kaxyw àpênh o pa.

Nê mẽ kãm ma ho mẽ pa xwÿnhjaja ka mẽ kãm mẽ hamaxpêr o axihtÿx o ri mẽ hkõt apa.

Nê kormã amnhî kaxyw Jesus kôt mẽ hamaxpêr tohtuj anhÿr xwÿnhjaja ka mẽ tanhmã Jesus kôt mẽ ho mẽ axihtÿx to kê mẽ hkõt amnhî nhîpêx mex o pa.

E kêr ka mẽ ã mẽ axpên nhîpêx anhÿr o ri apa nê axpên kamã agryk tokyx anhÿr kêt nê.

¹⁵ Nê koja mẽhõ tanhmã atomnuj to ka mẽ ãm omu mẽ amnhî tã tanhmã ho hkõt nê. ãm ho mex o ri apa. Nê mẽ piitã tanhmã mẽ ho mex to hpix kukamã ajamaxpêr rãhã nê.

¹⁶ ã mẽ pahte amnhî nhîpêx anhÿr o papaja na Tirtũm kãm hprãm.

Mẽ pahpê hkra hã pahkĩnh rãhã papaja na kãm hprãm.

¹⁷ Nê mẽ pahte Tirtũm mã amnhî jarênh rãhã ho papaja na mããnên kãm hprãm.

¹⁸ Nê tanhmã mẽ pakute htã arĩ Tirtũm mã mex o mex ã harênh o papaja na mããnên kãm hprãm. Mẽ pahkĩnh nê papa kamã kãm mex o mex ã harê. Rÿ mẽ pahpunuj nê papa htã arĩ kãm mex o mex ã harê. Rÿ nhũm mẽhõ tanhmã mẽ panhîpêx to htã pu mẽ arĩ kãm mex o mex ã harê.

ã mẽ pahte amnhî nhîpêx anhÿr o papaja na Tirtũm kãm hprãm.

Mẽ pahte tanhmã Tirtũm Karõ nhîpêx to hã mẽ pamã karõ

¹⁹ Nê koja Tirtũm Karõ mẽ amã mẽmoj tã tanhmã kapêr o amnhîrît to ka mẽ ama

nê hkõt amnhî nhîpêx kurê kumrêx. Rÿ mẽhõ mã tanhmã akapêr to kurê kumrêx. No kêr ka mẽ ama nê ãm ama nê atÿx ri hã apa hkêt nê. ²⁰ Rÿ nhũm mẽhõ Tirtũm Karõ nhÿ hã tanhmã mẽ amã kapêr to ka mẽ ama nê agryk nê tanhmã ho akapêr punuj to hkêt nê. ²¹ Koja Tirtũm kapêr kôt tanhmã mẽ amã mẽmoj jarênh to nê ãm hãmri Tirtũm Karõ nhÿ hã harênh ã amnhî jarê. Ka mẽ ama nê hkõt amnhî nhîpêx. ²² No koja Tirtũm kapêr kwÿm ri tanhmã mẽmoj jarênh to hãmri nê Tirtũm Karõ nhÿ hã ja jarênh kêt nê. ãm amnhî krã hkõt harê. Ka mẽ tee ri ama nê amnhî krã kamã kapêr xir tÿx kêt nê. Jao hkõt amnhî nhîpêx kêt nê.

Tanhmã Pawre kot mẽ ho Tirtũm wÿr to hã harênh

Wam Tesarõn 3.3, 16

²³ Nê na pa hte mẽ ato Tirtũm wÿr o ri ixpa nê kãm:

—Pa Tirtũm. Nà ate mẽ inhmã mẽ ijamakêtkati xà nhõr jakamã na pa htem anhÿ hã ixàmnhîx ijamakêtkati nê ri ixpa. Jakamã kwa kêr ka tanhmã Tesarõn kamã akwÿjê ho kê mẽ amnhî to mex rãhã ri pa. Jao tãm amnhî nhîpêx nê tãm ri hamaxpêr rãhã nhũm Pahihti Jesus Kris akupÿn mẽ ixwÿr wrÿ.

Anhÿr o mẽ ato kuwÿ. ²⁴ Tã koja ã mẽ anhîpêx anê. Ra kot amnhî jarênh xà hkõt. ã mẽ anhîpêx anhÿr kaxyw na pre amnhîm mẽ arê.

Kagà jatur xà

²⁵ E Kris kôt ixkwÿjaja. Kwa kêr ka mẽ amnhî xwar ixto Tirtũm wÿr o apa.

²⁶ Nê kêr ka mẽ atar Kris kôt mẽ pahkwÿjê piitã mẽ kãm mẽ ijarê.

²⁷⁻²⁸ Nê kê Pahihti Jesus Kris mẽ akutã nojarêr rãhã ho pa. Ixte Pahihti nhÿ hã ã mẽ amã ixkapêr nê hã kagà anhÿr jakamã kêr ka mẽ atar Kris kwÿjê piitã mẽ kãm kamã harê kê mẽ piitã ixkapêr ma.

Tã ãm ja pix na hapêx. Ixpê Pawre na pa ã mẽ amã kagà nhîpêx nê mẽ awÿr mẽnh anê.

Sikūn Tesarōn
Pawre kot Tesarōn kamā
Jejus kōt kwỳjê hwỳr wam
kagà nē mēnh kōt hō kagà nē
mēnh

Pawre na pre kagàja nhìpêx nē ma Tesarōn kamā Jejus kōt hkwỳjê hwỳr kumē. Na pre hte Tesarōn kamā mē kām Jejus ā mē hkurê xwỳnhjaja Jejus ā tanhmā mē homnuj to nhūm mē amnhī xà htỳx kamā hamak o pa. Hāmri nhūm Pawre mē harēnh ma nē kagàja nhìpêx nē mē hwỳr kumē. Nē kamā mē kām mē hamaxpēr o hihtỳx. Nē mē kot arī Tirtūm kōt amnhī nhìpêx mex o pa nē hamaxpēr kōt hamaxpēr o pa hā mē kām karō. Nē nhỹrmā Jejus akupỳn kaxkwa rūm mē pahpê hkrajê hwỳr wrỳk nē pika ho hapêx par ā mē kām harē. Ā na pre Pawre mē kām kagàja kamā mē kām ujarēnh anē. Nē mē kām:

¹ Pa Tesarōn nhō xwỳnh kot Tirtūm kapēr mar kaxyw axpēn wỳr mē apikuprōnh xwỳnhjaja? Xà mē amex na ka mē apa? Ixpê Pawre na pa axte mē awỳr kagà nhìpêx nē kumē. Siras mē Ximotre mē pa mē awỳr kumē. Nà mē pahpê Mēpanhìpêêxà maati Tirtūm mē Kra Jejus Kris kwỳ na pu mē. ² Jakamā na pa htem mē ato wa hwỳr rāhā ho ri ixpa. Wa kot mē akutā nojarêr rāhā ka mē ajamakêtkati nē apa kaxyw. Nē mēmoj to mē akutā wa nojarêr rāhā ho pa kaxyw.

Tirtūm kot nhỹrmā hkrajê nhìpêx kati xwỳnhjê homnuj tỳx ā harēnh

Wam Pêtre 4.12-19

³ Nē na ka htem amnhī kaxyw Tirtūm mā ajamaxpēr tỳx mex o ri apa. Nē axpēn kutā anojarêr rāhā nē. Na pa htem ā mē ate amnhī nhìpêx anhỹrja mā ijamaxpēr nē mē anhỹ hā ixkīnh nē Tirtūm mā mē anhỹ hā ixkīnh ā amnhī jarē. ⁴ Nē nhỹhỹm ixpa nē nhỹri krīm agjê nē kamā Tirtūm kōt mē pahkwỳjê mā mē ato amỹra nē mē kām:

—E pa mē amā Tesarōn kamā Kris kwỳjê jarē ka mē inhma. Nà mē ō krī kamā mē hkwỳjaja na htem Kris ā mē hipêx kati ho pa nhūm htem amnhī xà htỳx kamā hamak pē mex kêt nē pa. Tā nom tee ri amnhī

kukamā hamaxpēr o Jejus kaga hkêt nē. Na htem arī hkôt amnhī nhìpêx mex rāhā ho pa. Anē.

⁵ ā mē ate mē kutā amnhī nhìpêx anhỹr o apaja na hte Tirtūm hā mē apumu nē hkīnh nē pa. Nē mē akukamā hamaxpēr o:

—Mē kot Ixkra Jejus ā tanhmā mē hipêx to ho pa htā ām hāmri na htem mē kutā amnhī to htỳx o pa nē mē umaj wa ixkaga hkêt nē. Na htem ā amnhī nhìpêx anē nē mē kēp ixkra hā amnhī to amnhīrīt mex nē. Nà koja mē nhỹrmā wa ixri mex kumrēx nē htīr tūm nē pa ho pa.

Anhỹr o hamaxpēr. ⁶ Nē mē kot Kris ā mē anhìpêx punuj xwỳnhjaja koja Tirtūm nhỹrmā mē atā mē homnuj tỳx nē nhūm mē amnhī xà htỳx kamā hamak rāhā ho pa. Ām hāmri koja ā mē atā mē hipêx anē. ⁷⁻¹⁰ Koja Pahihti Jejusja nhỹrmā man akupỳn pika hwỳr hirā htỳx kām wrỳ nhūm Tirtūm kapēr o mē wrỳk xwỳnh xihtỳx xwỳnhjaja man hkôt wrỳ. Koja mē wrỳ hāmri nē mē kot amnhī tomnuj xwỳnhjê homnuj tỳx kumrēx. Jao ma mē kot amnhī xà htỳx kamā hamak tūm xàta wỳr mē rēnh pa nhūm mē kamā htīr tūm nē amnhī xà htỳx kamā hamak rāhā ho pa ho pa. Koja ā Pahihtija amnhī nē mē kot hkôt amnhī xunhwỳr kêt xwỳnhjê rēnh anē nhūm mē pahkīnhā Tirtūm mē Krata wa kuri mex nē pa hkêt nē. Nē mē pahkīnh ā wa mex o wa mex nē wa hihtỳx o wa hihtỳx ā wa omunh kêt nē. Koja Pahihti Jejus nhỹrmā akupỳn wrỳ nē ā mē panē mē hipêx anē. Koja wrỳ pu mē amnhī kaxyw hkôt pajamaxpēr xwỳnhjaja amnhī wỳr omu nē pahkīnh nē. Hāmri nē amnhī nhī nyw ā amnhī pumu nē kām:

—Hêxta waa nē. Amex o amex Pahihti. Na ka pre mē inhnē ty hāmri nē mē inhmā mē inhī nyw gō. Kot paj mē Tirtūm mē war ari inhmex kumrēx nē ixtīr tūm nē ixpa ho ixpa. Ām hāmri na ka ā mē ixto mex anē. Nà amex kumrēx o amex kumrēx Pahihti. Anē.

Ā kot puj mē pahpê hkwỳjaja amnhī tā kām mex o mex ā harēnh anē. Ra mē ate mē ixkapēr mar nē hkôt amnhī xunhwỳr jakamā kot kaj mē ixpyrà nē ā kām mex o mex ā harēnh anē.

Pawre kot Tesarôn nhô xwÿnhjê ho Tirtûm wÿr ã harênh

¹¹⁻¹² Nê na pa htem mê ato Tirtûm wÿr rãhã ho ixpa nê kãm:

—Pa Tirtûm? E Tesarôn kãm akrajaja na pa mê ho awÿ. Na ka hte Akra Pahihti Jejus Kris mê wa mê ho mex rax o apa. Jao amnhîm mê arê nhûm mê ra kãm amnhî to mex prãm nê. Na htem amnhî kaxyw Jejus mã hamaxpêr rãhã pê mëmoj to axpên kutã nojarêto o pa. Jakamã kwa tanhmã mê hkrã hto kê mê akôt ã amnhî nhîpêx anhÿr rãhã ho pa. Kêr ka mê kot akôt amnhî nhîpêx o pa hã mê omu nê akînh nê mê kãm mê mex ã mê harê. Nhûm mê ate tanhmã mê ho mex to hã amnhî tã apumu hãmri nê mê amnhî pyrã nê amã amex o amex ã ajarênh rãhã ho pa. Anê.

2

Kot amnhî tomnuj tÿx kumrêx xwÿnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nê koja nhÿrmã mê panhõ Pahihti Jejus Kris akupÿn wrÿ pu mê ma kutã api nê kakrã kamã hkaxpa. Jakamã kwa Jejus kôt ixkwÿjaja. ² Koja mëhõ mê awÿr mō nê mê amã Jejus ra akupÿn wrÿk ã harênh japêr. Rÿ tanhmã mê amã Jejus hpôx xà hã arîgro jarênh o hêx to nê mê amã:

—Kwa na ra Jejus akupÿn nojarêto. Koja tokyx akupÿn mê pahwÿr wrÿ. Semã ja kamã rÿ kō. Apu hō hã koja apu wrÿ rÿ ko.

Anhÿr o harê. Nê Tirtûm Karō nhÿ hã ã kot mê amã harênh anhÿr ã amnhî jarê rÿ nhãm mëhõ kot ã kãm harênh anhÿr ã harê. Rÿ pa ixte harênh nê hã kagã hã ijarê. Nom kwa kêr ka mê kapêr ma nê ãm ama nê hkôt ajamaxpêr kêt nê. Rÿ ama nê tee ri amnhî kukamã ajamaxpêr kêt nê. Koja mëhõ ã mê amã Jejus tokyx wrÿk ã harênh anê nê ãm amnhî krã hkôt ã harênh anhÿr o hêx. Nom Tirtûm Karō nhÿ hã rÿ pa inhÿ hã rÿ nhãm Kris kôt mê panhõ nhÿ hã ã harênh anhÿr kêt nê. ³⁻⁴ Jakamã kêr ka mê ãm mê kot harênh o hêxja ma nê hkôt ajamaxpêr kêt nê. Kormã Pahihti Jejusja akupÿn nojarêto kêt. E kot paj ixprî hã mê amã ja jarê ka mê inhma. Nà kormã

Pahihti akupÿn nojarêto kêt ri koja mê ohtô rax kumrêx nê Tirtûm kutã amnhî xunhwÿ nê kãm hkurê ho pa. Nê amnhî tomnuj tÿx o pa. Hãmri nhûm ra kot amnhî tomnuj tÿx kumrêx xwÿnh maati amnhî to amnhîrît. Nom na pre ra Tirtûm tanhmã kot hipêx to hkukamã hã amnhî jarê. Koja xep gaa nê ma mê kot amnhî xà htÿx kamã hamak tûm xàta wÿr kumê nhûm kamã amnhî xà htÿx kamã hamak o pa rãhã nê pa ho pa.

Tã nom kormã Pahihtija akupÿn wrÿk nê ma hwÿr mënh kêt ri koja mê piitã omu nê kêp Mêhpãm maati pixi hã harênh kaxyw mê kêp mê ô sãnti piitã hkrakrak pa. Nê mê kot mëmo karō ho amnhî pãm ã harênh xwÿnhja nhûm piitã hkrakrak pa. Hãmri nê axtem nê Tirtûm mã amnhî jarênh xà hã ixkre jatur xà kamã hitom wÿr axà nê kamã nhÿ nê hêx rom mê piitã mê kãm kêp Tirtûm ã amnhî to hêx nê mê kãm:

—E mê amnê ixpumu. Ixpê mê anhõ Tirtûm na pa. Pa kot kaj mê inhmã inhmex o inhmex ã ijarê. No kêr ka mê anhõ sãnti ho apãm o apa hkêt nê. Kwarî ho kwarî. ãm paxipix ixpê Mëapãm maati nê paxipix ixpê mê anhõ Tirtûm.

Anhÿr o amnhî to hêx. ⁵ Na pa pre arî mê akôt ixpa ri ã mê amã harênh anê. Mãn arî mê ate ja hã anohtÿx rÿ ko. ⁶ Nom kormã ã kot amnhî nhîpêx anhÿr xà hã arîgrota kormã kator kêt. Mëhõ kormã kot kêp àmnar jakamã nhûm kormã kator kêt nê. Ra mê ate kêp àmnar xwÿnhja jarênh mar. Tã koja hpôx xà hã arîgro kato nhûm kêp àmnar xwÿnhja kãm pry kaprã nhûm rî kormã mō. ⁷ Nom na hte ra hpimxur pê Tirtûm nê mê piitã mê hkurê ho pa. Mê kot Tirtûm kôt amnhî xunhwÿr pymaj tanhmã nê mê ho ho pa. Nom kormã kêp àmnar xwÿnhja kêp àmnar jakamã nhûm hte mê noo mã tanhmã mê ho hkêt nê. Tã koja Tirtûm nhÿrmã kêp àmnar xwÿnhja mã anê nhûm kuma nê kãm ure nhûm rî kormã amnhî to amnhîrît nê mê piitã mê noo mã mō nê Tirtûm nê tanhmã mê kãm hêx to ho pa. ⁸⁻¹² Koja kato nê Satanasti mê wa mê piitã tanhmã mê nokupyr to ho ri mê hkôt pa. Nê hêx rom mê kãm aa mê kot mëmoj pumunh kêt kwÿ ho anhÿr o ri pa. Koja wa hêx rom te Tirtûm kot amnhî nhîpêx pyrãk o ã amnhî nhîpêx anê. Hãmri

nhūm mē kot Jejus kōt amnhī xunhwȳr kēt xwȳnhjaja ja hā wa omu nē wa hkōt hamaxpēr kurē kumrēx. Nē ām hāmri wa kapēr ā wa hkamnhīx. Kop apu ra mē kot Tirtūm kapēr mar nē hkōt amnhī xunhwȳr ronhȳx ra Tirtūm amnhī tā mē omu nē mē ho hkra. Nom koja mē kām kapēr mar prām kēt nē. Ām wa kot amnhī to hēx o wa pa xwȳnhhta kōt pix mā koja mē kām amnhī nhīpēx prām.

Ja mȳrapē koja Tirtūm tee ri ja hā mē omu hāmri nē mē nē wa kot amnhī tomnuj tȳx xwȳnhhta wa omunh kēt nhūm wa tanhmā mē kām amnhī nhīpēx to nhūm mē wa omu nē wa hkōt hamaxpēr kurē kumrēx. Hāmri nē wa gryk ā Tirtūm kaga jakamā nhūm nhȳrmā mē kot amnhī xā htȳx kamā hamak tūm xāja wȳr mē rēnh pa.

Koja Satanasti mē kot amnhī tomnuj tȳx kumrēx xwȳnh maatita ā hēx rom tanhmā mē no kupyw to anhȳr o pa rāhā nhūm Pahihti Jejusja hirā rax kām akupȳn mē pahwȳr wrȳ. Hāmri nē kot amnhī tomnuj tȳx kumrēx xwȳnh maatita ā amȳnē nhūm mē kām hpīr kurē kumrēx nhūm hapēx. Koja ā amnhī nhīpēx anē.

Tirtūm kot tanhmā mē pahto mex to hā harēnh

Rōmān 8.28-30; Wam Tesarōn 2.13, 5.23-24

¹³ Nē amnepēm kormā mēmoj kēt ri na pre Tirtūm amnhīm mē arē. Mē ate kapēr mar nē hkōt amnhī xunhwȳr nhūm kot mē ato hkra kaxyw mē arē. Kām mē ajapēē. Na pre mē awȳr amnhī Karō rē nhūm mē akarō mā agjē nē tanhmā mē ajamaxpēr to ka mē ŷ hā tām amnhī nhīpēx rāhā ho ri apa. Na pa htem ja hā mē amā ijamaxpēr nē mē anhȳ hā ixkīnh kām Tirtūm mā mē ajarēnh o ri ixpa. ¹⁴ Na pre mē awȳr mē ixrē. Mē ixte mē awȳr ixpa nē mē amā tanhmā Jejus kot mē panē amnhī nhīpēx to hā harēnh o ixpa kaxyw. Mē ate mē inhmar nē Jejus kōt amnhī xunhwȳr nhūm Tirtūm kot Pahihti Jejus Kris o mex pyrā nē tanhmā mē ato mex to kaxyw. ¹⁵ Jakamā kwa kēr ka mē ra mē ixte wam mē awȳr kagā mēnhhta kamā harē nē mar tȳx nē. Nē mē akōt mē ixpa ri tanhmā mē ixte mē ajahkre htoja mā ajamaxpēr mex nē hā

ano htȳx nē hkōt amnhī nhīpēx rāhā ho ri apa. Jao Jejus kōt amnhī nhīpēx mex o ri apa Kris kōt ixkwȳjaja.

¹⁶ Mēpanhīpēēxā maati mē Pahihti Jejus Kris wa kām mē pajapē htȳx kumrēx. Na hte wa tanhmā mē pajamaxpēr o hihtȳx to ho pa pu mē wa ŷ hā tām pajamaxpēr o ri papa. Nē wa ŷ hā nhȳrmā wa kuri pamex nē pahȳr tūm nē papa hkukamā pajamaxpēr kaprȳ ho papa hkēt nē. ¹⁷ Na pa htem mē ato wa hwȳr o ixpa nē wa kām:

—Pa Tirtūm mē Jejus wa? Kwa kēr ka wa tanhmā Tesarōn kamā akrajē mā mē hamaxpēr o hihtȳx to kē mē war anhȳ hā tām amnhī nhīpēx nē tām hamaxpēr. Jao kapēr mex rāhā nē pa ho pa. Anē.

3

Tanhmā mē pahte axpēn to Tirtūm wȳr to hā kot mē pamā karō

Korosē 4.2-4

¹ Nē kwa Kris kōt mē ixtō nē ixtōxjaja. Kēr ka mē amnhī xwar mē ixto Tirtūm wȳr rāhā ho ri apa. Mē ixte krī piitā hkōt mē kām Jejus jarēnh o ri mē hkōt ixpa nhūm mē kot mē inhmar nē amnhī kaxyw Jejus kōt hamaxpēr kaxyw. Jao mē apyrā nē hkōt amnhī nhīpēx mex o pa kaxyw. ² Nom koja mē piitā ā amnhī nhīpēx anhȳr kēt nē. Mē hkwyjaja kām Jejus jarēnh mar prām kēt jakamā kwa mē ixto Tirtūm wȳr kē mē inhnē mē omunh mex nē nhūm mē Jejus ā tanhmā mē ixto hkēt nē.

³ Nē koja Pahihti tanhmā mē akrā hto ka mē ajamaxpēr mex nē ŷ hā hkōt amnhī xunhwȳr tȳx o ri apa. Jakamā nhūm Satanasti mē ate amnhī tomnuj hprām xāj tee ri tanhmā mē anhīpēx to kaprȳ nhūm Pahihti mē anē omunh mex nē. Ra kot mē atā amnhī jarēnh xā hkōt. ⁴ Koja ā mē anē hipēx anē ka mē ŷ hā tanhmā mē ixte mēmoj tā mē amā karō xā hkōt amnhī nhīpēx mex o ri apa. ⁵ Tā kē Pahihti tanhmā mē akrā hto ka mē Tirtūm pyrā nē mē piitā mē kamā axukaprī ho ri apa. Nē Pahihti Kris pyrā nē mēmoj punuj kutā amnhī to htȳx nē. Jao hkōt amnhī nhīpēx mex rāhā ho ri apa.

Mē kām kaga xwýnhjê jarēnh
Wam Korīt 4.12; Epes 4.28; Wam Tesarōn
4.9-12

⁶ E kot paj hpānhā Kris kōt mē pahkwý kām kaga xwýnhjê jarē ka mē inhma. Pahihti Jejus nhý hā kot paj mē amā tanhmā mē harēnh to. Nà koja mē akwýjaja kām kaga nē amnhīm mēmoj tā àpēnh kēt japēr. Nē mē ixte mē axàpēnh mex o apa hā mē amā karōja kuhpa hā amnhīm mēmoj tā àpēnh kēt japēr. Kōja mē ā amnhī nhīpēx anē ka mē ja hā mē omu hāmri nē mē hkōt ri apa hkēt nē. ⁷⁻⁸ Xà mē pajaja na pa prem ma mē awýr mō nē mē akōt inhmā kaga nē mēmoj tā ixàpēnh kēt nē ri ixpa? Nà na pa prem mē apa kukwak ri ixàpkur pymaj ixàpēnh rūnh nē amnhī pa pix kukwak ri ixàpkur o ri ixpa. Na ka prem mē inhma mēmo mē apkur xà ho mra pa prem amarī amnhīm hamýnh nē hkur kēt nē. Na pa prem hpānhā mē amā amnhīre nē kormā kuku. Tā kēr ka mē ā amnhī nhīpēx anhýr o ri axpēn kōt apa nē amnhī pa pix kukwak ri apku. Nē mē amā kaga hā nhām akwýjê hpa kukwak ri axàpkur o ri apa kēt nē. ⁹ Na pa prem amnhī pa pix kukwak ri ixàpkur o ri mē akōt ixpa. Mē ate ja hā mē ixpumunh nē mē ixpyrà nē ā amnhī nhīpēx anhýr kaxyw. Nom mē ixte Jejus mā tanhmā mē ajahkre hto nhūm mē ate mē inhmar nē hpānhā mē inhma mē ixàpkur xà nhōrja Jejus mā tanhmā kute hkēt tā pa prem ā amnhī nhīpēx anhýr kēt nē. Mē ate ja hā mē ixpumunh nē mē ixpyrà nē ā amnhī nhīpēx anhýr kaxyw na pa prem amnhī pa pix kukwak ri ixàpkur o ri mē akōt ixpa. ¹⁰ Na pa prem mē amā ja hā karō ho:

—Koja mēhō kām kaga nē àpēnh kēt nē ka mē ja hā omu nē kām ō hkēt nē. Kwār māmri apkur kēt nē kām prām nē ri pa nē amnhī pumu. Anē.

¹¹ Tā xep ra mē akwýjaja ā amnhī nhīpēx anē nē kām kaga nē àpēnh kēt nē amarī ri pa. Nē xep htýx ri axpēn jakwa kamā nhām mē hixi ho rēr o ri pa. ¹² Kwa mē inhma Jejus kōt ixkwýjaja. Kot paj Pahihti Jejus nhý hā mē amā mē kot ā amnhī nhīpēx xwýnhjê jarē ka mē inhma nē mē inhmar týx nē. Kēr ka mē kām kaga xwýnhjê mā anē kē mē jam ure nē hpānhā àpēnh mex o pa.

Jao mē apyrà nē amnhī pa kukwak ri apkur o pa. Kēr ka mē ā mē kām ixkapēr jarēnh anē.

¹³ Nē kwa kēr ka mē axpēn to mex o apata kaga hkēt nē.

¹⁴ E na pa mē ā Tirtūm nhý hā mēmoj tā mē amā karō nē hā kagà anē. Tā koja mēhō kamā harē nē kuma nē ām kuma nē hkōt amnhī nhīpēx kēt ka mē ja hā omu nē hkōt ri apa hkēt nē. Tokyx kot ja hā amnhī pumunh nē amnhī tā hpijaàm kaxyw. ¹⁵ Nom arī Kris kōt kēp mē akwý jakamā kēr ka mē arī kēp mē atō rý atōx ā tām hipēx nē kām akapēr mex o ri apa. Nom te ho kēp mē akwý hkēt pyrāk o kām akapēr kēt nē.

Tanhmā Pawre kot mē ho Jejus wýr to hā harēnh

¹⁶⁻¹⁸ Nē na pa hte mē ato Pahihti Jejus wýr rāhā ho ixpa. Kot mē pamā mē pajamakētkati xà nhōr jakamā na pa htem mē ato kuwý nē kām:

—Pa Pahihti? Kwa kēr ka Tesarōn kamā akwýjê pumu nē mēmoj to mē kutā anojarēt rāhā ho ri mē hkōt apa. Kē mē hamakētkati nē àmnhīx pa ho pa. Anē.

Tā ām ja pix. Ixpē Pawre na pa kagà jatur xà kamā inhīhkra ho amnhī nhīxi nhīpēx. Na hte kagà nhīpēx xwýnh inhma ixkapēr ā kagà. Nē hā kagà hpa pa hpānhā hatur xà kamā pam inhīxi nhīpēx. Tā na hapēx.

Wam Ximotre Pawre kot Ximotre hwÿr kagà nê mēnh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tîrtûm kapêr o Jejus kôt hkwyjê jahkre ho pa. Hãmri nhÿm Pawre krî hõ kamã pa nê kagàja nhîpêx nê hwÿr kumê. Nê kamã kãm mēmoj tã karõ. Na pre ra Epes kamã mē hkwyjaja Tîrtûm kapêr o hêx o mē ahkre ho pa nhÿm Pawre mē harênh ma nê kagàja kamã Ximotre mã tanhmã mē harênh to. Nê kot Tîrtûm kapêr o Jejus kwÿjê jahkre mex xwÿnhjê xunhwÿr kaxyw kãm karõ. Nê Tîrtûm kãm hprãm xà hkôt pix mã mē ahkre ho pa hã kãm karõ nê hwÿr kagà nê kumê. Nê kãm:

¹ Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã mē ahkre ho ixpa kaxyw na pre Mēpapytâr xwÿnh Tîrtûm mē Jejus Kris wa ixta nê ixãm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkôt Jejus kôt amnhî xãm jakamã te apê ixkra pyrãk Ximotre. Jakamã na pa hte ato Mēpanhîpêêxã maati Tîrtûm mē panhõ Pahihti Jejus Kris wa hwÿr o ixpa nê ato wa hwÿr o:

—Pa Tîrtûm mē Pahihti wa. E Ximotre ho na pa war awÿr kaxyw. Kwa kêr ka wa kamã axukaprî nê kutã war anojarêr rãhã ho wa ri apa. Kot kaj wa ã ho mex anê nhÿm war anhÿ hã hamakêtkati nê amnhîx pa ho pa.

Anhÿr o na pa hte war ato kuwÿ

Tîrtûm kapêr o mē ahkre xwÿnhjê jarênh Rômãn 16.17; Wam Ximotre 6.3; Sikûn Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetõn wÿr panojarêr nê tee ri Epes kamã Tîrtûm kapêr ho hêx o mē ahkre xwÿnhjê kapêr ma. Jakamã na pa pre amã:

—E Ximotre kêr ka Masetõn wÿr ixkôt amõr kêt nê. ãm jar Epes kamã arîk nê ixwakre kamã Tîrtûm kapêr o mē hêx

xwÿnhjê mã akapêr nê ã mē hêx anhÿrja nê mē hkurê ho ri mē hkôt apa.

Anhÿr o amã harê hãmri nê Epes kamã are nê ma Masetõn wÿr ahte mõ. ⁴ Mē hêx xwÿnhjaja amnepê mē panhîgêjtaja kot tanhmã amnhî nhîpêx to nê tanhmã ujarênh toja nhÿm htem mē kãm harênh pix o pa. Nê mē hixi piitã harênh o pa. Na htem ã amnhî krã hkôt hkwyjê mã ujarênh anhÿr o pa. Jao axpên kwÿm ri mē ahkre nê mē hã axpên mã àkjêr o pa. ã mē kot amnhî nhîpêx anhÿr jao Tîrtûm nhÿ hã kãm hprãm xà hkôt mē ahkre hkêt nê. Koja mēhõ Tîrtûm nhÿ hã kapêr o mē ahkre hãmri nê amnhî kaxyw kãm hamaxpêr tÿx pê tanhmã mē ahkre hto. Nom ixte amã mē harênh xwÿnhjaja Tîrtûm nhÿ hã mē ahkre hkêt jakamã na pa pre inhnojarêr nê ã amã mē harênh anê nê mē kuri Epes kamã are.

⁵ Tã kêr ka arî mē ahkre ho ri mē hkôt apa Ximotre. Nê Kris kôt mē pahkwÿjê mã anê kê mē amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê mē kãm anê kê mē te kãm amnhî tã ma pyrãk o nhãm kãm mē hã ma ho pa. ⁶ Ixte amã mē hêx xwÿnh jarênh xwÿnhjaja na htem ã mē ahkre anhÿr kêt nê. Na htem htÿx ri amnhî krã hkôt tanhmã mē ahkre hto. ⁷ Tîrtûm kot finat Mojes mã mēmoj tã karõja mē kot mar tÿx ã amnhî kamnhîx nê ho mē ahkre hprãm tã no ãm hprî hã mar kêt nê htÿx ri ho mē ahkre ho pa. ⁸ Tîrtûm kot Mojes mã mēmoj tã karõja mex. Mē kot mar nê hkôt amnhî nhîpêx o pa kaxyw na pre. ⁹ No na pre mē kot tãm amnhî nhîpêx xwÿnhjê mã ã hã karõ anhÿr kêt nê. ãm mē kot amnhî tomnuj xwÿnhjê mã na pre hã karõ.

Mē kot mē õ pahi kapêr mar kêt xwÿnhjê mã.

Nê mē kot Tîrtûm kapêr nhîrõp kuhê ho mē pa xwÿnhjê mã.

Nê Tîrtûm ã mē hpîjaãm kêt xwÿnhjê mã. Nê mē kot mē hipêêxã nê mē katorxã hpar xwÿnhjê mã.

¹⁰ Nê mē hprõ kuhpa hã nhãm mēnijê ho amnhîkati xwÿnhjê mã.

Nê mē mjên kuhpa hã nhãm mēmyjê ho amnhîkati xwÿnhjê mã.

Ně mēmyjaja kot mēnijê kuhpa hã kãm amnhĩ kwỳ myjê hkĩnh nē mē ho amnhĩkati xwỳnhjê mã.

Ně mēnijaja kot mēmyjê kuhpa hã kãm amnhĩ kwỳ nijê hkĩnh nē mē ho amnhĩkati xwỳnhjê mã.

Ně mē kot mēmoj to àhkĩnh nē nhãm mē kãm ho wēnê o mē pa xwỳnhjê mã.

Ně ri mē hêx o mē pa xwỳnhjê mã.

Ã mē kot Tĩrtũm kapēr kwỳm ri amnhĩ nhĩpêx anhỹr o mē pa xwỳnh piitã mē kaxyw na pre Mojes mã mēmojta ã karõ. Mē kãm Jejus prãm kêt xwỳnhjê mã. Mē kot mar nē tãm amnhĩ nhĩpêx kaxyw. ¹¹ Tã pa na pa hte Pahihti kot tanhmã mē panê amnhĩ nhĩpêx to hã harēnh o ri mē hkõt ixpa. Ja kaxyw na pre Tĩrtũm ixãm. Tĩrtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harēnh

Atre 26.9-18

¹² Ně Pahihti Jejus Kris na hte ixto mex rãhã ho pa. Na hte tanhmã ixto pa ý hã mē piitã mē kãm tanhmã kot mē panê amnhĩ nhĩpêx to hã harēnh o ri mē hkõt ixpa. Na pre ixte ã amnhĩ nhĩpêx anhỹrja kukamã inhmã ixàpēnh ã karõ nē inhmã:

—E ate amnhĩ kaxyw ixkõt ajamaxpēr mex jakamã kēr ka ma mē piitã mē hkõt ri mē kãm ixkapēr jarēnh o ri apa. Anē.

¹³ Nom amnepēm na pa pre hkõt ijamaxpēr kêt nē. ãm axtem nē haprỳ rũnh nē ho ixkapēr punuj o ri ixpa. Ně hkwỳjê ho ixkrihkrit nē mē haprỳ nē mē htak. Nom kormã amnhĩ kaxyw Kris kõt ijamaxpēr kêt jakamã ixtỳx ã mē hipêx anhỹr o ixpa nhũm Pahihti ja hã ixpumu nē ixkamã ukapřĩ nē mē hã tanhmã ixto hkêt nē. ¹⁴ Ně kãm ijapê xàj mēmoj to ixkutã nojarêt rãhã ho pa nē tanhmã ixkrã hto pa ra amnhĩ kaxyw hkõt ijamaxpēr nē hkõt amnhĩ xãm. Hãmri nē kukwak ri ra inhmã hkwỳjê hkĩnh nē hpãnhã mē ho mex o ri mē hkõt ixpa.

¹⁵ Ně Jejus Kris ra wrỳk nē mē pahte amnhĩ tomnuj piitã hpãnhã amnhĩrer kaxyw mē panê htyk ã harēnhja na pa hte harēnh o ri ixpa. ã kot amnhĩ nhĩpêx anhỹrja na mex o mex. Kê mē piitã kuma nē hã nohtỳx rãhã ho pa.

Kormã ixte hkõt amnhĩ xãm kêt ri na pa pre amnhĩ tomnuj tỳx kumrêx o mē piitã mē hakrenh ¹⁶ nhũm Tĩrtũm ixpumu nē ixkamã ukapřĩ nē. Hãmri nē amnhĩ kaxyw ixãm. Mē piitã mē kot ja hã ixpumunh nē axpēn mã ã ijarēnh anhỹr kaxyw. Ně ijarēnh o:

—Kwa Pawre na pre amnhĩ tomnuj tỳx kumrêx o pa nhũm Jejus Kris ja hã omu nē kamã gryk tokyx anhỹr kêt nē. Na pre tanhmã hkrã hto nhũm ra tãm amnhĩ nhĩpêx o pa. Kwa pu mē urak nē amnhĩ kaxyw Jejus kõt pajamaxpēr nē hkõt amnhĩ xunhwỳ. Kēr pu mē Pawre pyrã nē nhỹrmã Tĩrtũm mē Kraja wa kuri pamex nē pahťĩr tũm nē papa ho papa.

Anhỹr o axpēn mã ijarēnh nē ixpyrà nē Jejus kõt amnhĩ xunhwỳr kaxyw na pre Tĩrtũm ã ixto mex anē. ¹⁷ Jakamã na pa hte kãm amnhĩ jarēnh kaxyw nē kãm:

—Pa Tĩrtũm? Nà kapxipix apê Pahi Maati. Ně arãhã ho arãhã nē amex o amex. Mē ixte inhno ho aa apumunh kêt tã kapxipix apê Měinhĩpêxà maati. Tã koja nhỹrmã mē piitã ã amã amex o amex ã ajarēnh anhỹr o pa. Anē.

Ximotre kot tanhmã Epes nhõ xwỳnhjê jahkre hto hã kãm karõ

Wam Korõt 5.1-5

¹⁸ Ně te apê ixkra pyrak Ximotre. Tã kot paj mēmoj tã amã karõ ka inhma nē inhmar tỳx nē. Nà Pahihti Jejus mã ate tanhmã amnhĩ nhĩpêx to ho apa kaxyw na pa prem axãm nhũm Tĩrtũm nhỹ hã kapēr o mē pa xwỳnhjaja axàpēnh kukamã amã kapēr nē amã:

—E ate ma mē kãm Pahihti Jejus jarēnh o apa kaxyw Tĩrtũm kot axãm jakamã kēr ka ã amnhĩ nhĩpêx anhỹr o ri mē hkõt apa. Anē.

Tã kot paj ijaxwỳja kagàja kamã amã ixkapēr nē mēmoj tã amã karõ. Ka mar tỳx nē hkõt amnhĩ nhĩpêx mex pē Tĩrtũm mã amnhĩ nhĩpêx mex o ri apa. Jao apřĩ hã mē kãm tanhmã Jejus jarēnh to ho ri mē hkõt apa. ¹⁹ Ně amnhĩ kaxyw Jejus mã ajamaxpēr mex nē. Ně mēmoj punuj pumu nē amã ho anhỹr prãm tã Jejus nhỹ hã nē amnhĩ to htỳx nē ho anhỹr kêt nē. Jao tãm amnhĩ nhĩpêx ã amnhĩ pumunh

mex o ri apa. Nom kot kaj ja nê amnhĩ to htỳx kêt nê tanhmã amnhĩ tomnuj to hãmri nê te ate Pahihti Jejus kaga pyræk. Na pre pahkwỳjaja ã amnhĩ nhĩpêx anhỳr o hkaga nê axte kãm hamaxpêr kêt nê. ²⁰ Imênew mẽ Aresãnja na pre wa ã amnhĩ nhĩpêx anê nê tanhmã Tĩrtũm o kapêr punuj to. Mỳrapê na pa pre Satanasti nhĩhkram wa haxã. Kot tanhmã wa ho nhũm wa kot tee ri amnhĩ tomnujta ã amnhĩ pumunh nê tokyx tãm amnhĩ nhĩpêx nê axte ã amnhĩ nhĩpêx anhỳr kêt kaxyw.

2

Tanhmã mẽ pahte Tĩrtũm mã amnhĩ jarênh to hã mẽ pamã karõ

Rukre 11.2-4; Atre 10.34-35; Epes 6.18

¹ E kot paj hpãnhã tanhmã mẽ pahte Tĩrtũm mã amnhĩ jarênh to hã amã karõ Ximotre. Ka inhma nê ixô ri ho mẽ pahkwỳjê jahkre ho ri mẽ hkôt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tĩrtũm wỳr ho ri pa. Nê kãm mẽ harê nê mẽ kaxyw mẽmoj tã axàhwỳr o ri apa. Kêr kê ama nê tanhmã mẽ ho mex to. Kê mẽ amnhĩ tã omu nê ã kãm kapêr anê nê kãm:

—Pa Tĩrtũm? Nà ãm hãmri na ka ã mẽ ixto mex anê. Amex o amex. Anê.

² Nê mẽ kãm anê kê mẽ õ pahi nê mẽ ho amnhĩptàr xwỳnh piitã mẽ ho ahwỳr o pa ho:

—Pa Tĩrtũm? Kwa kêr ka mẽ inhõ pahi mẽ mẽ kot mẽ ixto amnhĩptàr xwỳnh piitã tanhmã mẽ ho kê mẽ ixto mex o pa. Kêr pa mẽ ijamakêtkati nê ixãmnhĩx ixpa pê amã tanhmã amnhĩ nhĩpêx to ho ri ixpa. Nê ixãmnhĩx mẽ hkôt tãm amnhĩ nhĩpêx. Anê.

³ Kot puj mẽ ã mẽ ho mẽ papytàr xwỳnh Tĩrtũmja wỳr o papa anê nhũm mẽ pama nhũm ja kãm mex nê.

E kêr ka ã mẽ kãm ja hã karõ anê Ximotre.

Tĩrtũm kãm mẽmoj prãm ã harênh

Sikũn Pêtre 3.9

⁴ Nê mẽ piitã mẽ kot kapêr mar nê amnhĩ kaxyw Jejus kôt hamaxpêr nê hkôt amnhĩ xunhwỳrja na Tĩrtũm kãm hprãm.

⁵ Ja kaxyw na pre mẽ pahwỳr Kra Jejus mẽ nhũm man mẽ pahwỳr wrỳ. Tĩrtũmja tapxipix na kêp Mẽpahpãm. Nê Kra Jejusja

tapxipix na kot Tĩrtũm mã tãm mẽ paxunhwỳr mã xwỳnh. Ja kaxyw na pre amnhĩ grõnh kôt wrỳ mẽ pahpyrà nê ã ho ã nê kato.

⁶ Hãmri nê gaa nê àptàr hãmri nê mẽ pahpiitã mẽ panê ty. Jao Tĩrtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhỳr ã harênh mar nê tokyx hkôt amnhĩ xunhwỳrja na Tĩrtũm kãm hprãm.

⁷ Ja kaxyw na pre ixãm. Ixte Ijaew kêt xwỳnhjê mã Tĩrtũm kapêr jarênh o ri mẽ hkôt ixpa kaxyw. Nê Jejus nhỹ hã tanhmã mẽ kãm ixkapêr to ho ri ixpa kaxyw. Nê tanhmã kot mẽ panê amnhĩ nhĩpêx to hã harênh kaxyw. ãm hãmri na pa ã amnhĩ jarênh anê. Ixêx kêt. Na pa hte Ijaew kêt xwỳnhjê hkôt ixpa nê ã mẽ kãm ixkapêr anê nê mẽ kãm:

—E mẽ ate Tĩrtũm Kra Jejus kôt amnhĩ xunhwỳrja na Tĩrtũm kãm hprãm. Jakamã kwa mẽ tokyx amnhĩ kaxyw hkôt aja-maxpêr nê hkôt amnhĩ xunhwỳ. Anê.

Ikrêsti kamã tanhmã mẽ pahte amnhĩ nhĩpêx to hã mẽ pamã karõ

⁸ Nê kot kaj mẽ tõiã Tĩrtũm kapêr mar kaxyw axpên wỳr akuprõ. Hãmri nê Tĩrtũm mã amnhĩ jarê nom kêr ka mẽ mẽmoj tã axpên kamã agryk kamã kãm amnhĩ jarênh kêt nê. Rỳ mẽmoj tã axpên mã axàkjêr kamã kãm amnhĩ jarênh kêt nê. ãm tãm mẽ ajamaxpêr pix o kãm amnhĩ jarê. Nê tãm amnhĩ nhĩpêx kamã kãm amnhĩ jarê. Ja na inhma hprãm. Tã kêr ka ã Epes nhõ xwỳnhjê mã ja hã akarõ anê Ximotre.

Mênijaja kot tanhmã amnhĩ nhĩpêx to kaxyw mẽ hã kãm karõ

Wam Korõt 14.34; Epes 5.22; Xitre 2.3; Wam Pêtre 3.1-7

⁹ Nê kot paj hpãnhã Kris kôt mẽ pahpõtõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nà mẽmyjaja kot mẽ omunh nê kãm mẽ hkĩnh prãm xàj kê mẽ htỳx ri mẽ noo mã tanhmã amnhĩ nhĩpêx to hkêt nê. Nê ja prãm xàj tanhmã ê jagjênh to hkêt nê rỳ tanhmã ri mmar to hkêt nê. Rỳ mẽ kãm mẽ hkĩnh prãm xàj òkrexê mex jagjênh rỳ mẽ ãhkra kamã kax mex jagjênh nê ri hã mẽ hkôt pa kêt nê. Rỳ ja kaxyw tanhmã ri amnhĩ kĩ jaxwỳr

to nê ri hã mẽ hkôt pa kêt nê. Rỳ mẽ ê mex jagjê nê mẽ noo mã htỳx ri hpijaàm kêt o pa hkêt nê. Kê mẽmyjaja kãm mẽ hkĩnh prãm xàj ã htỳx ri amnhĩ nhĩpêx anhỹr o pa hkêt nê. ¹⁰ Mẽ kãm anê kê mẽ kãm Tĩrtũm mãn kĩnh xàj mẽ piitã mẽ kutã mẽmoj to nojarêr o pa.

¹¹ Nê mẽ kãm anê kê mẽ Tĩrtũm kapêr mar kaxyw mẽ pikuprõnh xà hwỳr agjê nê akryk Tĩrtũm kapêr mar o hkrĩ nê htỳx ri axpên mã kapêr o hkrĩ kêt nê.

¹² Nê kê mẽ ikrêsti kamã Tĩrtũm kapêr o mẽmyjê jahkre hkêt nê. Rỳ kamã mẽmoj tã tanhmã mẽ kãm karõ hto hkêt nê. ãm akryk Tĩrtũm kapêr mar o hkrĩ. ¹³ Mẽmo mỳrapê koja mẽ ã amnhĩ nhĩpêx anê? Nà na pre Tĩrtũm my kot wa finat Atãwja kumrêx nhĩpêx nê kormã hprõ Ewa o hapu nê hipêx. ¹⁴ Nê Atãwja na pre kagã kapêr mar nê hkôt amnhĩ nhĩpêx kêt nê. Prõ na pre mar xà hkôt Tĩrtũm kapêr nhĩrõp xa nê tanhmã amnhĩ tomnuj to. ¹⁵ Mỳrapê na htem mẽnijaja hpijagri ho hikwỹ nhũm mẽ hkrajaja à htỳx kãm hapõj. Tã nom koja mẽ Jesus kôt amnhĩ xunhwỳ nê ã ixte mẽ kaxyw amã mẽmoj tã karõ xà hkôt amnhĩ nhĩpêx hãmri nê nhỹrmã mex kumrêx nê htĩr tũm nê pa ho pa. E kêr ka ã mẽnijê mã mẽmoj tã karõ anê Ximotre.

3

Pastô kot tanhmã amnhĩ nhĩpêx to kaxyw mẽ hã kãm karõ

Xitre 1.5-9

¹ E kot paj hpãnhã tanhmã pastô jarênh to. Koja mẽhõ kãm kêp Kris kwỳjê nhõ pastô nê Tĩrtũm kapêr o mẽ ahkre hprãm nê ãm hãmri ã hamaxpêr anê. Ja mex. ² Jakamã koja mẽhõ kãm kêp pastô hprãm hãmri nê ã amnhĩ nhĩpêx anhỹr o apa.

Koja mẽ piitã mẽ noo mã tãm ri amnhĩ nhĩpêx.

Nê hprõ pix tãnopxar o pa.

Nê mẽmoj punuj kutã amnhĩ to htỳx nê.

Nê tãm hamaxpêr.

Nê àmnhĩx amnhĩ wỳr mẽ piitã mẽ kuwỳ.

Nê Tĩrtũm kapêr o mẽ ahkre mex nê.

³ No kê mẽ kagõxỳhti japrõr nê ho pipãnh o pa hkêt nê.

Nê àhkurê ho pa hkêt nê.

Nê mẽ piitã mẽ kamã ukaprĩ ho ri mẽ hkôt pa. Jao mẽ kutã nojarêr rãhã ho pa.

Nê amnhĩm kàxpore rax o pikuprõnh prãm xàj tanhmã amnhĩ nhĩpêx to hkêt nê.

⁴⁻⁵ Nê hkrajê jahkre mex o pa nhũm mẽ kapêr ma nê hkôt amnhĩ nhĩpêx. Nê hã hpijaàm kãm tãm amnhĩ nhĩpêx.

Koja mẽ hkrajê jahkre mex kêt nê hãmri nê mããnen Kris kwỳjê jahkre mex kêt nê. Jakamã nhũm hkrajê mẽ Kris kwỳjaja tãm amnhĩ nhĩpêx kêt nê.

⁶⁻⁷ Nê kê mẽ kot Jesus kôt amnhĩ xunhwỳr kêt xwỳnhjê noo mã tãm amnhĩ nhĩpêx rãhã ho pa.

Mẽ kot ja hã mẽ omunh nê mẽ hã hpijaàm o pa kaxyw. Nom koja mẽ tanhmã amnhĩ tomnuj to nhũm mẽ tee ri ja hã mẽ omu nê mẽ ho kapêr punuj nê. Satanasti kãm hprãm xà hkôt.

Nê kê mẽ kot Kris kôt amnhĩ xunhwỳr nyw xwỳnhjaja kêp pastô hkêt nê.

Koja mẽ kêp pastô hãmri nê mẽmo arĩgro hã tanhmã hamaxpêr to nê amnhĩ to rax prãm xàj tanhmã amnhĩ to jarkrar to ho pa. Hãmri nhũm Tĩrtũm tee ri ja hã omu nê te kot Satanasti nhĩpêx pyrãk o hipêx nê tanhmã homnuj to. Ja pymaj kê mẽ kot Kris kôt amnhĩ xunhwỳr nyw xwỳnhjaja kêp pastô hkêt nê.

E pastô na hte ã amnhĩ nhĩpêx anhỹr o pa kamã Jesus kwỳjê jahkre nê tanhmã mẽ ho ajuta hto ho mẽ hkôt pa Ximotre.

Mẽ kot Kris kôt hkwỳjê ho ajuta xwỳnhjê kaxyw mẽ hã kãm karõ

Atre 6.1

⁸ Nê kot paj hpãnhã amã mẽ kot Kris kôt hkwỳjê ho ajuta xwỳnhjê jarê ka inhma Ximotre. Nà koja mẽhõ kãm Kris kôt hkwỳjê ho ajuta hprãm hã koja ã amnhĩ nhĩpêx anhỹr o pa.

Koja mẽ htỳx ri mẽmoj tã mẽ kãm hpêr o pikênh o pa hkêt nê.

Nê tanhmã mẽmoj to hêx to ho pa hkêt nê.

Nê kagõxỳhti japrõr nê ho pipãnh o pa hkêt nê.

Ně amnhĩm kàxpore ho pikuprõnh ně ho rax prãm xàj tanhmã amnhĩ nhĩpêx to hkêt ně.

⁹Ně kě Tĩrtũm kapêr piitã hkôt hamaxpêr o pa. Ra Tĩrtũm kot mẽ pamã kapêr piitã ho amnhĩrit jakamã koja Kris kôt hkwyjê ho ajuta xwýnhjaja kapêr piitã hkôt hamaxpêr pê hkôt amnhĩ nhĩpêx mex rãhã ho pa.

¹⁰⁻¹³Ně kě mẽ amnhĩ prõ pix tãnopxar o pa.

Ně pastô pyrã ně mẽ hkrajê jahkre mex nhũm mẽ hkôt ri amnhĩ nhĩpêx mex o pa.

Ně kě mẽ hprõjaja mjên pyrã ně mẽ piitã mẽ noo mã tãm ri amnhĩ nhĩpêx.

Ně hkwyjê ho kapêr rý mẽ axpên jakwa kamã ri axpên mã mẽ hixi ho rér o pa hkêt ně.

Ně mjên pyrã ně mẽmoj punuj kutã amnhĩ to htýx o ri pa. Ně amnhĩ to mex rãhã ně.

E koja mēhõ kãm Kris kwýjê ho ajuta ho pa hprãm hã koja ã amnhĩ nhĩpêx anhýr o pa. Nom kêr ka mẽ kot mẽ ho ajuta kaxyw mẽ unhwýr tokyx anhýr kêt ně Ximotre. Taxy mẽ kamã ama ně aprĩ hã mẽ kot ri tanhmã amnhĩ nhĩpêx to hã mẽ omu mãn. Hãmri nhũm mẽ piitã mẽ mex ã mẽ harê ka mẽ hã mẽ ama ně rĩ kormã mẽ kot mẽ ho ajuta ho pa kaxyw mẽ unhwý. Hãmri nhũm mẽ amnhĩ tã omu ně axpên mã mẽ mex ã harê. Ně amnhĩ kaxyw Jejus Kris mã hamaxpêr mex o pa hã mẽ omu ně mẽ hã hpijaãm o pa.

Pawre kot Ximotre mã amnhĩ jarênh

¹⁴Ně inhmã awýr inhmõr ně apumunh prãm Ximotre. Nom kot pa amnhĩ kukamã ã mẽmoj tã amã karõ ně hã kagã anê. ¹⁵Kêr pa tokyx awýr inhmõr kêt japêr ka ixte amã mẽmoj ã kagãta kamã harê ně ixkutêp ho mẽ ahkre ho ri apa. Mẽ kot mar ně hprĩ hã mẽ õ pastô ně mẽ kot mẽ ho ajuta ho mẽ pa xwýnhjaja kot tanhmã amnhĩ nhĩpêx to hã mẽ harênh mar kaxyw.

Mẽ pahpê Kris kwýjaja mẽ pahpê Tĩrtũm kra jakamã na pu htem kapêr kôt ri amnhĩ nhĩpêx ně pakatãt kôt mẽ piitã mẽ kãm pakapêr o papa. Jao tanhmã mẽ kãm Jejus Kris jarênh to ho ri papa.

Pawre kot Jejus mex o mex ã mẽ grer jarênh

¹⁶Ně Jejusja mex o mex. Amnepêm kormã mẽ pahte harênh mar kêt tã pu prem harênh ma hãmri ně mex o mex ã pagrer o papa. Ně pagrer o:

Kris kêp Měpahpãm tã na pre mẽ pahwýr wrý ně mẽ pahpyrà ně ĩ ho ĩ ně kato. Nhũm pre Tĩrtũm Karõja mex o mex ã harê. Nhũm Tĩrtũm kapêr o mẽ wrýk xwýnhjaja omunh o pa.

Nhũm ahpýnhã pika piitã hwýr tanhmã kot mẽ panê amnhĩ nhĩpêx to hã harênhja anhrã.

Nhũm hte mẽ hkwyjaja harênh ma ně amnhĩ kaxyw hkôt hamaxpêr ně hkôt amnhĩ xunhwý.

Tã nhũm pika kamã àpênh jatur xãm kumê nhũm Tĩrtũm akupým amnhĩ wýr ho api.

Na pu htem ã Jejus mex o mex ã pagrer anê.

4

Mẽ kot Tĩrtũm kapêr kwým ri tanhmã Kris kwýjê jahkre hto xwýnhjê jarênh

Matêwre 24.4-13; Korosê 2.16-19; Sikũn Ximotre 3.1-9; Sikũn Pêtre 2.1-3; Jutre 3-16

¹Ně nhýrmã Jejus akupýn mẽ pahwýr wrýk kaxyw koja pika nhõ xwýnh kwýjaja ma hkwyjê mã tanhmã Tĩrtũm kapêr o hêx to ho pa. Na pre Tĩrtũm Karõ hprĩ hã mẽ hkukamã tanhmã mẽ harênh to. Koja xep Satanasti hkwyjaja Jejus kwýjê hwýr mra ně hêx rom tanhmã mẽ kãm kapêr to. Satanasti nhý hã mẽ kãm hêx o pa nhũm mẽ hkwyjaja mẽ kuma ně mẽ hkôt hamaxpêr ně Jejus kaga. ã koja mẽ Jejus akupýn mẽ pahwýr wrýk kukamã amnhĩ nhĩpêx anê.

²Ně Satanasti nhý hã mẽ kãm mẽmoj to hêx xwýnhjaja ãm Satanasti pix mar o pa jakamã koja mẽ hamaxpêr mex kêt ně. Koja mẽ mẽmoj punuj pumu ně htýx mex ã hkamnhix. ³Tã koja mẽ Tĩrtũm kapêr kwým ri ã Jejus kwýjê mã hêx ho pa anê ně mẽ kãm:

—Kwa kêr ka mẽ axpên mã ri mẽ rer o apa hkêt ně. Tĩrtũm kãm ja prãm kêt. ãm ahte ri mẽ papaja na kãm hprãm. Anê.

Ně mẽ kot mẽmoj mex kur ã mẽ omu ně nê mẽ kãm kapêr ně mẽ kãm:

—Kwa na htem ata hkur kêt nê. Tirtûm pê omnuj kênã kot ka kêt ri aku.

Anhÿr o koja mẽ kãm kapêr o pa. ⁴ Nom Tirtûm na pre mẽ pamã mẽ apkur xà piitã ho kato. Mẽ paxãmnhĩx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tirtûm mã harê hãmri nê paxãmnhĩx kuku. ⁵ Tirtûm kot mẽ paxãpkur xà piitã mex ã harênh jakamã na pu htem kãm harênh pê paxãmnhĩx piitã hkur o papa.

*Pawre kot mẽmoj tã Ximotre mã karõ
Sikûn Ximotre 1.6-14; Xitre 2.1-8*

⁶ E Ximotre. Ixte mẽmoj tã amã karõta kêt ka ho Kris kôt pahkwÿjê jahkre mex o ri mẽ hkôt apa. Kot kaj ã mẽ ahkre anhÿr jao ra Jejus Kris mã axãpênh mex nê. Na ka pre harênh ma nê hkôt amnhĩ xãm hãmri nê hkôt amnhĩ nhĩpêx mex nê. Tã kêt ka arĩ hkôt amnhĩ nhĩpêx mex rãhã kê mẽ piitã ja hã apumu.

⁷ Nê mẽ ujarênhja kot paj tanhmã amã hã karõ hto. Mẽ panhĩgêt xujarênh kamã mo Tirtûm jarênh? Amrakati kumrêx. Jakamã kêt ka mẽ hkôt ajamxpêr o ri apa hkêt nê. ãm Tirtûm kapêr kôt pix mã ajamxpêr tÿx rãhã ho ri apa. Tirtûm kapêrja ãm hãmri na.

⁸ Nê na htem amnhĩ karo hprãm xaj tanhmã amnhĩ karo hto ho pa. Ja mex. Tanhmã kute hkêt. Na htem tanhmã amnhĩ karo hto nê gaa nê ra hkarore nê pa. No kêt mẽ kot Tirtûm kapêr kôt ri amnhĩ nhĩpêx o paja na mex o mẽ hkarota jakre. Na htem Tirtûm kapêr kôt ri amnhĩ nhĩpêx hãmri nê mex nê hkĩnh nê pa ho pa. Hãmri nê nhÿrmã kaxkwa kamã Tirtûm mẽ Kra Jejus wa kuri mex nê htĩr tũm nê pa ho pa. Ja na mex o mex. ⁹ ãm hãmri ixte amã ja jarênh jakamã kwa kêt ka ja hã anohtÿx nê ri ho apa Ximotre.

¹⁰ Nê Tirtûmja rãhã ho rãhã. Tã na pu pre amnhĩ kaxyw Kra Jejus kôt pajamxpêr nê hkôt amnhĩ xãm nhũm Tirtûm pahto hkra. Kãm mẽ piitã mẽ ho hkra hprãm jakamã na htem pahpyrà nê amnhĩ kaxyw Kra hkôt hamxpêr nê hkôt amnhĩ xunhwÿ nhũm amnhĩ tã mẽ omunh xà hkôt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panê amnhĩ nhĩpêx to hã

harênh rãhã o ri mẽ hkôt papa. Jao Tirtûm mã paxãpênh mex nê.

¹¹ E kêt ka ã ja ho pahkwÿjê jahkre anhÿr ho ri mẽ hkôt apa. Mẽ kot amar nê akapêr kôt amnhĩ nhĩpêx mex ho pa kaxyw.

¹² Nê kormã anyw tã kêt ka mẽ piitã mẽ noo mã tãm ri akapêr nê tãm amnhĩ nhĩpêx o apa. Mẽ kot Jejus ã tanhmã ato htã arĩ amnhĩ kaxyw kãm ajamxpêr tÿx nê. Nê mẽ piitã mẽ kutã anojarêr nê ajamxpêr mex pix o ri apa. Kot kaj kormã anyw tã ã mẽ noo mã amnhĩ nhĩpêx anê nhũm mẽ hã apumu nê kãm akapêr mar prãm nê. Anyw ã apumunh tã kãm akapêr mar prãm nê.

¹³ Nê kêt ka mẽ ate Tirtûm kapêr mar kaxyw xpênh wÿr akuprõ ka arĩ ixkutêp mẽ kãm Tirtûm kapêr tũm ã kagã kamã akapêr rãhã ho apa. Nê aprĩ hã tanhmã ho mẽ ahkre hto nê ho mẽ ahkre mex nê Ximotre.

¹⁴⁻¹⁵ E kêt ka ã amnhĩ nhĩpêx anhÿr o ri mẽ hkôt apa nê amã ho anhÿr kaga hkêt nê. Mẽ piitã mẽ kot ate Jejus mã amnhĩ nhĩpêx mex o amõr ã apumunh kaxyw. Kormã ate mẽ kãm Jejus jarênh o apa hkêt ri na pre pastõ nhÿ hã mẽ kapêr xwÿnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nê anhĩmõk ã mẽ ãhkra jaxwÿ nê axãpênh kukamã tanhmã ajarênh to nê ato Tirtûm wÿ. Hãmri nhũm ate mẽ kãm kapêr jarênh o ri apa kaxyw amã ajamxpêr o hihtÿx. Tã kêt ka ÿ hã ã kãm amnhĩ nhĩpêx anhÿr rãhã ho ri apa.

¹⁶ Nê kwa kêt ka amnhĩ pumunh mex nê Ximotre. Jao tãm ri amnhĩ nhĩpêx nê akatãt kôt Tirtûm kapêr o mẽ ahkre ho ri mẽ hkôt apa. Kot kaj ã amnhĩ nhĩpêx anê hãmri nhũm mẽ ama nê apyrã nê Jejus kôt amnhĩ xunhwÿ. Hãmri nê pahpyrà nê nhÿrmã Tirtûm wa kuri htĩr tũm nê pa ho pa.

5

*Tanhmã mẽ pahte Kris kôt mẽ pahkwÿjê
nhĩpêx to kaxyw mẽ pamã karõ*

Sikûn Ximotre 2.24-25

¹⁻² E kot paj hpãnhã Kris kôt pahkwÿjê hõ kot tanhmã amnhĩ tomnuj to nhũm ate tanhmã ja nê kãm akapêr to hã amã karõ.

Nã koja mẽhõ tanhmã ri amnhĩ tomnuj to ka harênh ma hãmri nê ma hwÿr tẽ nê ja

nê tanhmã kãm akapêr to. Nom kêr ka kãm akapêr mã agêt kêt nê.

Koja mēwejjê ô tanhmã amnhĩ tomnuj to ka te kêp anhĩpêxà rỳ akatorxà pyræk o kãm akapêr. Jao hã apijaàm o tanhmã kãm akapêr to.

Rỳ koja apyrà nê mē nywjê hõ tanhmã amnhĩ tomnuj to ka te kêp atõ pyræk o kãm akapêr.

Rỳ mēnijê nyw ô amnhĩ tomnuj japêr ka te kêp atõx pyræk o kãm akapêr. Jao hã apijaàm o kot amnhĩ tomnujja nê tanhmã kãm akapêr to.

E kêr ka mē kot amnhĩ tomnuj nê ã mē pahkwýjê mã akapêr anhỹr o apa Ximotre.

*Mê kêp mē mjên htyk xwýnhjê jarênh
Xiakre 1.27*

³ Nê kot paj hpãnhã Kris kôt pahkwý pê mē mjên htyk xwýnhjê jarê. Nà koja mēhõ nija hkra hkêt nê htãmnhwý hkêt nê pa nhũm mjên kêp ty ka mē apê Kris kôt hkwyjaja ja hã omu nê mēmoj to kutã anojarêt rãhã ho ri apa. ⁴ Nom koja ra hkra rỳ ra htãmnhwý japêr kê mē tãmjaja tanhmã ho ajuta hto ho pa. Kãm ô nê kãm mēmoj nhõr o pa. Kormã mēhprĩre ri na pre mē ô wôwô nê mē katorxà nê mē hipêxà mē hamãr mex pê mē kãm ô ho pa. Tã ra mē àptàr jakamã kê mē amnhĩ pyrà nê mē hamãr mex pê mēmoj to mē kutã nojarêt rãhã ho pa. Ja na Tĩrtũm kãm hprãm. ã mē kot hkwyjê kamã ukaprĩ ho pa jakamã te mē kot Tĩrtũm mã àpênh pyræk.

⁵ No koja mēhõ ni ra wejre nê ahte ri pa. Nê hkra nê htãmnhwý hkêt nê ri pa. Tã kê ja hã amnhĩ pumu nê Tĩrtũm kamnàr rom amnhĩ to hwýr o pa. Nê mē piitã mē ho hwýr o pa. Jao tãm hamaxpêr. Ka mē apê Kris kôt hkwyjaja ja hã omu hãmri nê mē kam nê tanhmã kutã anojarêt to ho ri apa.

⁶ No koja mē ã amnhĩ nhĩpêx anhỹr kêt nê. Nê htýx ri mē grer wýr mra nê hpijaàm kêt o ri mra ka mē ja hã mē omu nê mē ho ajuta hkêt nê. Na htem ã amnhĩ nhĩpêx anhỹr o pa nê arĩ htĩr tã te ra htyk nê híkwý pyræk.

⁷ E kêr ka ã ja hã Kris kôt pahkwýjê mã karõ anê. Kê mē ama nê ã mē mjên htyk xwýnhjê nhĩpêx anhỹr o pa. ⁸ Nom koja mēhõ amnhĩ kwýjê ho mex kêt japêr. Nê ôrkwý kamã hprõ nê hkrajaja nê hipêxà

nê katorxà nhũm mē kãm mē apkur xà nhõr kêt japêr. Koja mē ã amnhĩ nhĩpêx anhỹr jao Jejus kaga nê te mē kot hkôt amnhĩ xunhwýr kêt xwýnhjaja kot amnhĩ nhĩpêx pyræk o amnhĩ nhĩpêx nom amnhĩ tomnuj týx o mē hakre.

⁹ Nê mē mjên htyk nê mē hkra nê mē htãmnhwý hkêt xwýnhjaja kêr ka mē tanhmã mē ho ajuta hto kaxyw hãmri nê mē hixi piitã hã kagà. Nom kwa kêr ka aprĩ hã tanhmã mē amnhĩ nhĩpêx to hã mē omu nê rĩ kormã mē hixi hã kagà.

Koja mēhõ kormã mjên htĩr ri tãm hipêx nê nhãm mēmyjê ho amnhĩkati hkêt nê.

Nê ra hã amgrà pê 60 rỳ ra hã 60 jakre.

¹⁰⁻¹¹ Nê tãm mē piitã mē hipêx o pa.

Nê hkrajaja kormã htĩr ri nhũm mē hamãr mex nê mē ahkre mex o pa.

Nê nhãm krĩ hõ nhõ xwýnhjaja ô krĩ hwýr pøj nhũm mē omu nê amnhĩ nhõrkwy hwýr mē kuwý.

Nê mē kêp amrakati xwýnhjê ho mex o pa.

Koja mē ã amnhĩ nhĩpêx anê ka ja hã mē omu nê rĩ kormã mē ho ajuta kaxyw mē hixi hã kagà. Nom mē hixi hã kagà kaxyw nê mēmoj tã mē hkukja nê mē kãm:

—E kot kaj ã amnhĩ nhĩpêx anhỹr o apa hã inhmã amnhĩ jarê pa ama nê rĩ kormã anhĩxi hã kagà.

Kot kaj axte amjên kêt nê.

Nê tanhmã Kris kôt akwýjê ho mex to ho ri apa.

Nhũm mēhõ mēmo myrapê hkaprĩ nê pa ka ja hã omu nê tanhmã ho ajuta hto.

E kot kaj ã amnhĩ nhĩpêx anhỹr o apa hã amnhĩ jarê pa ama nê anhĩxi hã kagà. Hãmri nhũm Kris kôt akwýjaja amã axàpkur xà nhõr o pa. Anê.

ã mē kãm akapêr anê nhũm mē ama nê amã:

—Ý. Ma kot paj ã amnhĩ nhĩpêx anê.

Anhỹr ã amnhĩ jarê ka mē ama nê mē hixi hã kagà. No kormã mē hã amgrà pê 60 kêt xwýnhjaja kêr ka kormã mē hixi hã kagà hkêt nê. Koja mē tanhmã mē kot amnhĩ nhĩpêx to ho pa hã mē kãm karõja ma nê wam tajê pyrà nê amã:

—Ý. Ma kot paj ã amnhĩ nhĩpêx anê. Na pa Jejus Kris noo mã ã amnhĩ jarênh anê.

Anhÿr ã amnhĩ jarēnh tã gaa nē ra hkurē hapōj nē ra kot amnhĩ jarēnh ta kwÿm ri tanhmã amnhĩ nhĩpēx to nē axte mjēn.
¹² Ra amnhĩ jarēnh o:

—Ma kot paj ãm Jejus mã pix mã tanhmã amnhĩ nhĩpēx to ho ri ixpa nē axte inhmjēn kêt nē.

Anhÿr tã tanhmã hamaxpēr to nē kot amnhĩ jarēnh kwÿm ri axte mjēn. Jao te Jejus mã amnhĩ to hēx pyrāk nhūm Tĩrtūm pē jamnuj. Ja pymaj kēr ka mē kormã mē hã amgrã pē 60 kêt xwÿnhjē nhĩxi hã kagã hkēt nē. Kormã mē hã amgrã pē 60 kêt xwÿnhjaja arĩ mē hkĩnh tÿx ¹³ jakamã kot kaj mē kãm mē apkur xà nhōr o apa nhūm mē ja hã amnhĩ tã mē apumu nē axte amnhĩm àpēnh kêt nē. ãm kãm kaga nē htÿx ri nhãm mē hwÿr mra nē nhãm mē hwÿr mra. Nē amnhĩ pumunh mex kêt nē htÿx ri axpēn jakwa kamã ri mē hixi ho rēr o pa. Nē nhÿri mēmoj pumu rÿ tanhmã mēmoj jarēnh mar to hãmri nē ma htÿx ri hkwÿjē mã harēnh o mra. Koja mē ã amnhĩ nhĩpēx anhÿr o pa hãmri nhūm mē kēp Kris kwÿ hket xwÿnhjaja ja hã mē omu nē mē hkôt mē pahpē Kris kôt pahkwÿjē ho kapēr punuj nē. ¹⁴ ã mē kot amnhĩ nhĩpēx anhÿr o pa pymaj kēr ka kormã mē nyw xwÿnhjē mã anē kē mē mãmri axte mjēn nē o pa. Hãmri nē hkra nē hkrajē jamār o pa. Ja na inhmã hprãm. Koja mē ã amnhĩ nhĩpēx anē hãmri nhūm mē kēp Kris kôt pahkwÿ hket xwÿnhjaja mē hkôt tanhmã mē pahto kapēr punuj to hkēt nē. ¹⁵ Mãn ka ra Kris kôt pahkwÿjē nyw pē mē mjēn htyk xwÿnh kwÿjaja tanhmã amnhĩ tomnuj to hã mē harēnh ma. Na prem Jejus kaga nē Satanasti hkôt amnhĩ nhĩpēx o pa.

¹⁶ E kēr ka mē ã Kris kwÿ pē mjēn htyk xwÿnhjē nhĩpēx o apa anē Ximotre. Nom koja mē akwÿ kamã mēhō nhō wōwō mjēn rÿ katorxã mjēn kēp ty kē tãm kãm õ ho pa. Kēr kē Kris kôt pahkwÿjaja ãm mē kēp mē mjēn htyk xwÿnh pē mē hkra nē mē htãmnhwÿ hket nē ahte ri mē pa xwÿnh pixjaja tanhmã mē ho ajuta hto ho pa.

Mē pahpē Kris kôt pahkwÿjē hkrãhtūm kaxyw mē pahtã kãm karõ

Atre 14.23; Wam Korĩt 9.7-14; Karatas 6.6; Wam Tesarõn 5.12; Wam Pētre 5.1-4

¹⁷⁻¹⁸ Nē kot paj hpãnhã amã Kris kôt mē pahkrãhtūmjē jarē. Tĩrtūm kapēr ã kagã htūm kot mē harēnh kot:

Kēr ka Tĩrtūm kapēr o mē ajahkre xwÿnhjaja mē ahkre pãnhã mē kãm amnhĩre. Anē.

Nē mããnēn mē harēnh ã kuxi nē mē harēnh o:

Koja akrit amã àpēnh o pa ka ho mex nē kãm õ mex o apa. Anē.

ã ja jarēnh kot anhÿr jakamã koja Kris kôt mē akrãhtūmja Kris mã tanhmã mē ato mex to ho pa ka mē amnhĩ tã kãm amnhĩrer mex o ri apa. Kot Tĩrtūm kapēr o mē ajahkre mex jakamã ka mē amnhĩ tã kãm amnhĩrer mex nē.

¹⁹ Nē koja mēhō pixi nē mē awÿr tē nē amã Kris kôt mē akrãhtūm kot tanhmã amnhĩ tomnuj to hã harēnh to ka ama nē ãm ama. Nom koja wa hamēxkrut rÿ mē axkrunēpxi nē mē awÿr mra nē axpēn kôt tanhmã harēnh to ka mē ama nē ãm hãmri mē kot tanhmã kot amnhĩ tomnuj tota kôt ajamaxpēr. ²⁰ Hãmri nē Kris kwÿjē piitã mē noo mã kot amnhĩ tomnuj xwÿnh ta mã tanhmã kot amnhĩ tomnuj to nē kãm akapēr kē axte ã amnhĩ nhĩpēx anhÿr kêt nē. Mē piitã mē kot hã amar nē nhÿrmã tanhmã amnhĩ tomnuj to nhūm ate urāk nē hã tanhmã mē kãm axàkjēr to pymaj tanhmã amnhĩ tomnuj to hkēt nē.

²¹ E Tĩrtūm noo mã na pa ã amã mē kaxyw mēmoj tã karõ anē Ximotre. Nē Jejus Kris mē Tĩrtūm kapēr o mē wrÿk xwÿnhjē noo mã pa ã amã karõ anē. Jakamã kēr ka inhmar tÿx nē hkôt amnhĩ nhĩpēx o ri apa. Jao mē piitã mē hipēx o axpēn pyrāk. Nom kēr ka akrãmnhwÿ kot tanhmã amnhĩ tomnuj to hã omu nē axtem nē ãm omu nē ajamaxpēr o:

—Nã kēp ixkrãmnhwÿ kēnã kot paj kêt ja nē tanhmã kãm ixkapēr to. Pa ho anhÿr kêt nē.

Anhÿr o ajamaxpēr kêt nē. Mē piitã mē hipēx o axpēn pyrāk.

²² Nē kēr ka anojarēt kãm mē kot Tĩrtūm mã tanhmã amnhĩ nhĩpēx to ho mē pa kaxyw mē unhwÿr kêt nē. Aprĩ hã tanhmã mē kot amnhĩ nhĩpēx ã hã mē omu nē mē hkapi nē rĩ kormã mē unhwÿ rÿ tee ri mēmoj tã mē omu nē mē hkaga.

Ně koja mēhō tanhmā amnhī tomnuj to ka ja hā omu rý harēnh ma hāmri nē urāk nē ā amnhī nhīpēx anhýr kēt nē. Arī Tirtūm kōt amnhī nhīpēx pē tām ri amnhī nhīpēx pix o apa. ²³⁻²⁵ Na htem tōhā tanhmā amnhī tomnuj to nhūm mēhō ja hā mē omu nē mē harēnh kurē kumrēx. Kris kōt mē hkrāhtūm kormā kot tanhmā hā kām nē hkēt ri nhūm mē ja hā mē omu nē tanhmā mē harēnh to. Nom na htem tōhā hpimxur pē tanhmā amnhī tomnuj to nhūm Tirtūm pix ja hā mē omu. Tā koja nhýrmā mē piitā mē kām ja ho amnhīrīt nhūm mē piitā harēnh ma nē hkōt omu.

Ně mē kot amnhī to mex xwýnhjaja haxwýja. Na htem tōhā mē noo mā tanhmā mēhō ho mex to nhūm hkwýjaja ja hā omu nē axpēn mā mex ā mē harē. Ně tōhā hpimxur pē tanhmā mēhō ho mex to nhūm mēhō ja hā omunh kēt nē. Ām Tirtūm pix ā kot amnhī nhīpēx anhýr ā omu. Tā koja nhýrmā mē piitā mē kām ja ho amnhīrīt nhūm mē piitā harēnh ma nē hkōt omu.

Ně kwa Ximotre. Axà nē anhōhymnuj nē ri apa jakamā kwa kêr ka gō pix o akōm o apa hkēt nē. Māānēn wīhti hkwý ho ixkō kêr ka anhōhy mex japēr.

6

Mē kām mē àpēnh xwýnhjē kaxyw mē hā kām karō

Epes 6.5-9; Korosē 3.22-4.1; Xitre 2.9-10; Wam Pētre 2.18-25

¹ E kot paj mē akwýjaja mē kām mē àpēnh o mē pa xwýnhjē kaxyw mēmoj tā amā karō. Mē kām anē kê mē ō patrāw ā hpijaàm o ri pa. Jao mē kapēr ma nē hkōt kām àpēnh mex nē. Koja mē ā amnhī nhīpēx anē nhūm amnhī tā mē omu nē hamaxpēr o:

—Kwa pēr Tirtūm kapēr na mex kumrēx. Inhmā àpēnh xwýnhja na hte hkōt amnhī nhīpēx pē amnhī to mex o pa. Pēr ām hāmri na hte Pawre ho mē ahkre ho pa.

Anhýr o hamaxpēr. ² Ně koja mē ō patrāw ra Kris kōt amnhī xām japēr ka kām mē àpēnh xwýnhjē mā anē kê Kris kōt mē kēp mē htō hā mē kām àpēnh mex o ri pa. Nom kê mē urāk nē kēp Kris kōt hkwý hā mē omu nē hamaxpēr o:

—Nà Kris kōt ixtō kēnā kot paj kēt ri kapēr kōt amnhī nhīpēx nē kām ixàpēnh mex o ri ixpa.

Anhýr o hamaxpēr kēt nē. Kē kēp Kris kōt htō hā kām ho mex prām xàj kām àpēnh mex o pa.

E kêr ka mē kām mē àpēnh o mē pa xwýnhjē mā ā tanhmā mē àpēnh to ho pa hā karō anē Ximotre.

Tirtūm kapēr kwým ri mē ahkre xwýnhjē jarēnh

Rukre 12.13-21; Xiakre 5.1-6

³ Ně na hte Kris kwý hkēt xwýnh kwýjaja Kris kwýjē mā Tirtūm kapēr o hēx o pa. Ně htýx ri Jejus kapēr kwým ri tanhmā harēnh to ho pa. Ām hāmri na Tirtūm mē Pahшти Jejus Kris wa kapēr tā nhūm htem htýx ri tanhmā ho hēx to ho ri mē hkōt pa.

⁴ Mē kot amnhī to rūnh xwýnh ā amnhī to jarkrar tā mē àhpumunh týx kēt. Na htem tanhmā Tirtūm kapēr kute hā axpēn mā akir nē mēmoj tā axpēn kām gryk o pa. Ně axpēn mā kapēr punuj nē mēmoj tā axpēn kamnhīx o pa. ⁵ Ně hamaxpēr mex kēt jakamā mēmoj tā axpēn mā àkjēr pix o pa. Na htem ā amnhī nhīpēx anhýr o Tirtūm kapēr mar týx kēt nē. Hāmri nē htýx ri hamaxpēr nē hamaxpēr o:

—Kot paj Tirtūm kapēr o mē ahkre ho ixpa nhūm mē inhma nē inhmā amnhīrer mex nē pa ixkàxpore rax nē ri ixpa. Nà kot paj ā amnhī nhīpēx anhýr o ri ixpa. Ja inhmā mex.

Anhýrja o kām hikàxpore rūnh prām o amnhī to amnhīrīt o pa.

Kàxpore jarēnh

⁶⁻⁸ E kot paj hpānhā amā tanhmā kàxpore jarēnh to ka inhma Ximotre. Xà na pu htem pakatorxà nhōhy rūm pajapōj nē amnhī kōt kàxpore hkwý jamý nē ho pajapōj? Nà na pu htem pahkēnh nē panhý kamā pajapōj. Tā kot puj mē ja pyrā nē nhýrmā ty nē mā ho anē nē panhý kamā ma papa. Jakamā kêr pu mē kormā pika ja kamā pahťir nē papa ri paxàpkur xà nē mē paxé pix tånopxar pē pahkīnh nē ri papa. Pakàxpore rūnh kēt tā na pu htem Tirtūm kamnār rom pahkīnh nē pajamakētkati nē papa. Jao pajamaxpēr o:

—Nà ixkàxpore rax kêt nê ixkukrêx rax kêt tã na hte Jejus ixkôt pa ho pa nê mẽmoj to ixkutã nojarêt rãhã ho pa. Jakamã ixkàxpore rax kêt tã ixkĩnh nê ijamakêtkati nê ixãmnhĩx ixpa.

Anhÿr o pajamaxpêr o papa.

⁹⁻¹⁰ Mẽ kot amnhĩm kàxpore o pikuprõnh rũnh xwÿnhjaja na htem kàxpore pix kukamã hamaxpêr o pa nê gaa nê kàxpore rũnh gryk ã amnhĩ tomnuj o pa. Na pre mẽ pahkwÿjaja kàxpore rũnh prãm xà Jejus kaga. Tã ra mẽ hikàxpore rũnh tã hkĩnh nê hamakêtkati nê pa hkêt nê. Na htem omnuj nê hkaprĩ nê pa. ã na htem mẽ hikàxpore rũnh xwÿnh kwÿjaja amnhĩ nhĩpêx anhÿr o pa. Jao kàxpore pix kukamã hamaxpêr nê gaa nê ra gryk ã mẽ kot amnhĩ to mex xà kaga hpa nê htÿx ri tanhmã amnhĩ tomnuj to ho pa. Nê tanhmã hkwyjê nhĩpêx punuj to. Te tutre kot harôj xành ã htÿx rapuuti hwÿr gjêx nê tee ri kãm kator prãm kaprÿ pyrãk. ã mẽ kot amnhĩ nhĩpêx anhÿr o pa jakamã koja nhÿrmã Tirtũm ma mẽ kot amnhĩ xà htÿx kamã hamak tũm xà hwÿr mẽ kurẽ.

*Pawre kot Ximotre mã mẽmoj tã karõ
Korosẽ 4.17; Wam Ximotre 4.14; Sikũn
Ximotre 2.1-7*

¹¹ Nê kwa Ximotre kêt ka mẽ uràk nê kàxpore rax prãm xà amnhĩ tomnuj o apa hkêt nê. Ate Tirtũm mã tanhmã amnhĩ nhĩpêx to ho apa xwÿnh jakamã kêt ka kãm hprãm xà hkôt pix mã amnhĩ nhĩpêx o ri apa. Jao Tirtũm pyrã nê ate amnhĩ jarênh xà hkôt amnhĩ nhĩpêx o ri apa. Nê amã Kris kôt akwÿjê hkĩnh pê mẽmoj to mẽ kutã anojarêt o ri apa. Nê Kris kôt mẽ hkwy hkêt xwÿnhjaja kot Kris ã tanhmã ato htã ka arĩ hkôt amnhĩ nhĩpêx mex nê mẽ piitã mẽ ho mex o ri mẽ hkôt apa. ¹² Na ka pre Kris kôt mẽ pahkwÿjê noo mã tanhmã amnhĩ jarênh to. Tirtũm kot amnhĩ wÿr awÿr nhũm ate Jejus kôt amnhĩ xãm nê amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mẽ piitã ja hã ama. Jakamã kwa kêt ka arĩ Jejus kôt amnhĩ nhĩpêx mex rãhã ho ri apa. Hãmri nê nhÿrmã Tirtũm mẽ Kra wa kuri amex kumrêx nê atĩr tũm nê apa ho apa.

¹³⁻¹⁴ E na pa mẽmoj tã amã karõ rax ka piitã kamã harê nê mar pa. Tã kêt ka inhmã ja hã tanhmã amnhĩ jarênh to. Mẽmoj piitã ho htĩr xwÿnh Tirtũm mẽ Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nê àmnhĩx kot Pahi Põn Pirat mã amnhĩ jarênh xwÿnhnta noo mã amnhĩ jarê nê inhmã amnhĩ jarênh o:

—Nà kot paj ate mẽmoj tã inhmã karõ piitã hkôt amnhĩ nhĩpêx rãhã nhũm Pahihti Jejus Kris akupÿn mẽ pahwÿr wrÿ. ãm hãmri na pa ã amã amnhĩ jarênh anê Pawre.

Anhÿr o inhmã amnhĩ jarê.

Tirtũm mex o mex ã mẽ grer

¹⁵ Nê koja Tirtũm akupÿn mẽ pahwÿr Jejus mẽnh xà hã arĩgro jarê hãmri nhũm kot harênh xàta wÿr pøj nhũm akupÿn mẽ pahwÿr kumẽ. Tirtũmja mex o mex. Tapxipix kêt mẽmoj piitã ho amnhĩptar xwÿnh maati. Nê kêt jar mẽ ho amnhĩptar xwÿnh piitã mẽ õ Pahi Maati.

¹⁶ Nê tapxipix na rãhã ho rãhã nê mex o mex jakamã puhã hirã rax kumrêx. Tã hkĩnhã mẽ pahte amnhĩ tomnuj xwÿnh jakamã kot puj mẽ puhã hirã raxja kutã hkêt nê. Jao hwÿr mẽ pamrar kêt nê.

Nê aa mẽhõ kot no ho Tirtũm pumunh kêt tã kwa kêt pu mẽ pahpiitã kãm mex o mex nê hihtÿx o hihtÿx ã harênh rãhã ho papa.

Axe mẽ hikàxpore rũnh xwÿnhjê jarênh

Rukre 16.9

¹⁷ Nê kêt ka Kris kwÿjê kamã mẽ hikàxpore rũnh xwÿnhjê mã anê kê mẽ kot amnhĩ to rũnh kôt amnhĩ to àmra ho pa hkêt nê. Nê amnhĩ kaxyw mẽ hikàxpore rũnh kôt hamaxpêr o pa hkêt nê. Kàxpore na hte hapêx tokyx anê. Mẽ kãm anê kê mẽ hpãnhã amnhĩ kaxyw Tirtũm kôt mãn hamaxpêr tÿx rãhã ho pa. Na hte àmnhĩx tanhmã mẽ pahto mex to ho pa nê mẽ pahpê õxÿ hkêt nê. Jao mẽ pahwÿr na rẽ nhũm mẽ pahpur go mex nê pu mẽ kamã panhõ rũnh o papa. Nê mẽ pamã myyti ho hirã pu mẽ kukwak ri parĩt mex pê mẽmoj tã paxapênh o papa. ã Tirtũm kot mẽ pahto mex kot anhÿr pu mẽ kukwak ri

pahkĩnh nẽ pajamakêtkati nẽ ri papa. Tã kêr ka mẽ hikàxpore rũnh xwýnhjê mã anẽ kê mẽ amnhĩ kaxyw kumã pix mã mãn hamaxpêr rãhã ho pa. ¹⁸ Nẽ mẽ kãm anẽ kê mẽ hikàxpore ho hkwyjê pê õxý hkêt nẽ ho tanhmã mẽ ho mex to ho pa. Nẽ àmnhĩx ho tanhmã mẽ kêp amrakati xwýnhjê ho ajuta hto ho pa. ¹⁹ Koja mẽ ã amnhĩ nhĩpêx anẽ nhũm Tĩrtũm ja hã mẽ omu nẽ hkĩnh nẽ õ krĩ kamã mẽ kutêp mẽ kãm mẽmoj mex o akuprõ. Jakamã nhũm mẽ kormã jar htĩr nẽ pa ri mex nẽ pa nẽ mããnẽnh nhỹrmã kaxkwa kamã mex kumrêx o jar pika ja kamã mex nẽ pata jakre. E kêr ka ã mẽ hikàxpore rũnh xwýnhjê mã ja hã karõ anẽ Ximotre.

Pawre kot Ximotre mã mẽmoj tã karõ jatur xà

Korosẽ 4.17; Wam Ximotre 6.14; Sikũn Ximotre 1.13, 4.5

²⁰ Nẽ ra Tĩrtũm kot ate kapêr o mẽ ahkre ho apa kaxyw axãm jakamã kêr ka tãm amnhĩ nhĩpêx pê mẽ ahkre mex rãhã ho ri apa. Jao Tĩrtũm kapêr o hêx o ri mẽ ahkre xwýnhjê hkôt apa hkêt nẽ. Na htem mẽ kuma nẽ mẽ kapêr mex ã mẽ hkamnhĩx nom mẽ kapêr mex kêt. Jakamã kwa kêr ka mẽ kot tanhmã mẽ ahkre hto hã mẽ ama nẽ ãm mẽ ama. ²¹ Na pre ra mẽ pahkwýjaja mẽ kuma nẽ mẽ kapêr gryk ã Jejus kaga.

E ãm ja pix. Kê Tĩrtũm mẽ apiitã mẽ akutã nojarêt rãhã ho pa. Ixpê Pawre na pa ã amã ixkapêr ã kagà anẽ.

Sikūn Ximotre Pawre kot Ximotre hwÿr wam kagà nē mēnh kōt hō mēnh

Pawre na pre kagàja nhîpêx. Na pre Jejus kwÿ hkêt xwÿnhjaja Jejus ã unê nē krî pē Rôm kamã haxà nhūm arî hkrî ho hkrî. Tã ra mē kot hpîr kaxyw nhūm Ximotre mã kagàja nhîpêx nē hwÿr kumē. Na pre Ximotre Pawre hkôt pa ho pa hã mytwrÿ xohtô nē. Tã hpãnhã krî pē Epes kamã arîk nē Tirtūm kapêr o Jejus kōt hkwyjê jahkre ho ri mē hkôt pa. Jakamã nhūm Pawre kagàja nhîpêx nē kamã kãm mēmoj tã karō nē hwÿr kumē. Nē nhÿrmã mē kot Pawre pyrã nē Jejus ã hpîr mã htã tee ri amnhî kukamã hamaxpêr kêt ã kãm karō.

Nē mē hkwyjaja kêp Tirtūm kra hã amnhî jarēnh tã nhūm Pawre Tirtūm kãm hprãm xà kuhpa hã mē kot tanhmã amnhî nhîpêx to ho pa hã Ximotre mã mē harē. Kot mē harēnh mar nē Jejus kwÿjê nē mē omunh mex o pa kaxyw. Nē Ximotre kot Tirtūm kãm hprãm xà kot pix mã amnhî nhîpêx o pa hã kãm karō. ã na pre Pawreja Ximotre mã mēmoj tã karō kamã hihtÿx nē hã kagà nē hwÿr mēnh anē. Nē kãm:

¹ Pa Ximotre? Xà amex? Ixpê Pawre na pa amã ixkapêr nē hã kagà nē awÿr kumē. Ixpê Jejus nhÿ hã hkwyjê jahkre ho ixpa xwÿnh na pa. Tirtūm na pre ja kaxyw ixãm. Tirtūm Kra Jejus Krisja kot puj mē pahpê hkwyjaja nhÿrmã kukwak ri pamex kumrêx nē pahpêr tūm nē ri papa ho papa.

*Pawre kot Ximotre ho Tirtūm mē Jejus wa
hwÿr ã harēnh
Atre 16.1-2*

²⁻³ Te apê ixkra pyrãk Ximotre. Jakamã na pa hte ato Mēpanhîpêxà maati Tirtūm mē Pahiti Jejus Kris wa hwÿr rãhã ho ri ixpa. Na pa hte mē pakukamã mē panhîgêt pyrã nē tãm ijamaxpêr o ixpa pē Tirtūm mã tanhmã amnhî nhîpêx to ho ri ixpa. Jakamã na pa hte ato Kra Jejus mē wa hwÿr rãhã ho ri ixpa. Arîgro hã nē kamãt kãm amã ijamaxpêr nē ato wa kuwÿ nē wa kãm:

—Pa Tirtūm mē Pahiti wa. E ixte ixkra puro Ximotre ho war awÿr kaxyw war amã ijamaxpêr. Na ka hte wa ho mex nhūm war akôt amnhî nhîpêx mex o pa. Te õ wôwô mē katorxà wa kot amnhî nhîpêx pyrãk. Na pa hte kot amnhî nhîpêx o paja mã ijamaxpêr nē ÿ hã ixkînh nē. War ate kamã axukaprî ho ri apa kaxyw na pa ho war awÿ. War ate kutã war anojarêt rãhã ho ri war apa nhūm hamakêtkati nē àmnhîx ri pa ho pa kaxyw. Anē.

Pawre kot Ximotre nhÿ hã hkînh ã harēnh

⁴ Nē na ka pre hte ixkôt ixto ajuta ho ri ixkôt apa htã pa pre nhÿhÿm inhnojarêt nē axtem axapênh õ hã amã karō hãmri nē Epes kamã are nē ma mō. Ka amã ijapê xaj tee ri ma inhmōr ã ixpumu nē amÿr rax nē. Na pa hte arî ja hã inhnohtÿx nē ri ho ixpa Ximotre. Jao ra ato ama nē. Tã kot puj nhÿrmã axte axpên pumu nē pahkînh tÿx nē.

⁵ Nē na pa hte akatorxà Enître mē anhō wôwôre Rojti wa kãm ijamaxpêr rãhã ho ri ixpa. Na pre wa kumrêx amnhî kaxyw Jejus kōt hamaxpêr nē hkôt amnhî xãm. Tã ka wa hkanrêhã wa urak nē ã amnhî nhîpêx anē. Ixte ja hã apumunh mex. ⁶ Na pa pre ate tanhmã Jejus mã amnhî nhîpêx to ho ri apa kaxyw axãm kaxyw anhîmōk ã inhîhkra xi nē ato Tirtūm wÿ. Kot tanhmã akrã hto nhūm ate Karō nhÿ hã tanhmã amnhî nhîpêx to ho apa kaxyw. Tã kêt ka arî ã kãm amnhî nhîpêx anhÿr rãhã ho ri apa. ⁷ Na pu htem Tirtūm Karō nhÿ hã pamã ma ho papa hkêt nē. Na pu htem ÿ hã pamã mē piitã mē hkînh pē paxãmnhîx tanhmã mē ho ajuta hto ho papa. Nē ÿ hã kapêr o mē ahkre htÿx o ri mē hkôt papa. Nē mēmoj punuj kutã amnhî to htÿx rãhã nē. Jao amnhî to mex pix nē.

⁸ Jakamã kwa kêt ka amã mē kãm Jejus jarēnh o apa pymaj tee ri amnhî kukamã ajamaxpêr kêt nē. Nē mē kot Jejus ã ijaxàr nhūm arî ixkrî hã ijarēnh ma nē mē kot ixkuxwar ajaxàr pymaj mē kãm Tirtūm kapêr o mē ahkre hkukamã tee ri ajamaxpêr kêt nē. Mē kot ã anhîpêx anhÿr mã tã kêt ka amnhî kamã akahak kêt nē. ãm Tirtūm nhÿ hã hihtÿx xà ho amnhî to htÿx nē ixpyrà nē ma mē kãm Jejus kot mē panê tanhmã amnhî nhîpêx to hã harēnh

to rāhā ho ri mē hkôt apa. Mē kot tanhmā hā anhīpêx to htāā. ⁹ Na pu htem Jejus kôt amnhī xunhwý nhūm Tirtūm ja hā mē pahpumu nē Jejus kukwak ri amnhī katut kôt mē pahte amnhī tomnuj piitā rēnh pa nē mē pahto hkra. Hāmri nē mē pahte hkôt pix mā amnhī nhīpêx o papa kaxyw mē paxunhwý. Ām Jejus pix kukwak ri na hte mē pahto hkra nē ā mēmoj to mē pakutā nojarēt rāhā ho pa anē. No na hte mē pahte amnhī to mex ā mē pahpumunh kôt mē pahto hkra hkēt nē. Amnepēm kormā mēmoj piitā hkēt ri na pre mē pakukamā hamaxpēr o:

—Koja mē nhýrmā Ixkra Jejus Kris kôt amnhī xunhwý pa ja hā mē omu nē Ixkra kukwak ri mē ho mex nē. Anē.

¹⁰ Tā kormā mē pahte amnhī tā ā kot mē pajarēnh anhýrja mar kêt jakamā na pre Jejus mē pahwýr wrý nē tanhmā mē pahto mex to. Na pre ty nhūm Tirtūm akupým ho htír. Jakamā na pu htem ra amnhī kaxyw hkôt pajamaxpēr nē hkôt amnhī xunhwý hāmri nē nhýrmā mē pahtyk tā nhūm Tirtūm kot Kra Jejus nhīpêx pyrā nē akupým mē pahto mē pahtír pu mē Jejus kukwak ri wa kuri pamex nē pahtír tūm nē papa ho papa. Jakamā na pu htem mē pamā pahtyk puma ho papa hkēt nē.

¹¹ Amnepēm na pre Tirtūm ixām nē tanhmā inhmā ixàpēnh ā karō hto nē inhmā:

—E Pawre kêt ka Jejus nhý hā ma hkwyjê jahkre ho ri mē hkôt apa. Nē ixkapēr o mē ahkre mex nē. Kêt ka ā amnhī nhīpêx anhýr rāhā ho ri mē hkôt apa. Anē.

¹² Tā ā kot inhmā kapēr anhýr nhūm ixte kapēr kôt amnhī nhīpêx o ixpaja myrapê na htem Jejus ā tanhmā inhīpêx kati hto ho pa. Pa hte ixpunuj nē amnhī xà htýx kamā ijamak o ri Jejus mā tanhmā amnhī nhīpêx to ho ri mē hkôt ixpa. Tā nom tee ri ja hā amnhī pumu nē amnhī kamā ixpijaàm nē ixkaprī hkēt nē. Ixte amnhī kaxyw hkôt ijamaxpēr xwýnhja na ixte tanhmā kot amnhī nhīpêx to hā omunh mex jakamā kot paj ty nhūm mē arī inhmýr pē Tirtūm kapēr mar o pa. Mē kot ja hā ixpír tā koja mē apē Kris kôt ixkwýjaja inhmýr pē arī mē kām harēnh o apa. Koja mē ā axpēn mýr

pē amnhī nhīpêx anhýr o pa rāhā nhūm Pahihti Jejus akupýn mē pahwýr wrý.

¹³ Kwa Ximotre. Ra ixte amā mēmoj tā karō rax jakamā kêt ka mar týx nē hkôt amnhī nhīpêx rāhā o ri apa. Jao Jejus Kris nhý hā mē piitā mē noo mā amnhī kaxyw kām ajamaxpēr týx rāhā nē. Nē mē piitā mē ho mex o ri apa. ¹⁴ Ate mē kām tanhmā Jejus jarēnh to hō ri apaja ām hāmri na. Tā koja mēhō htýx ri tanhmā ho kapēr punuj to rý axtem nē tanhmā harēnh to ka ja hā ama nē nē kām akapēr kām axihtýx nē. Tirtūm Karō ra kot akarō hwýr àr jakamā kêt ka ý hā ā Jejus jarēnhja jamār mex o ri apa anē.

Pawre kot tanhmā amnhī jarēnh to

Sikūn Ximotre 4.16-18

¹⁵ Nē mán ka pre ra pika pē As kamā Kris kwý kot ixkaga hā mē harēnh ma. Na pre Pijerti mē Emosti mē mē ohtō nē tanhmā hamaxpēr to nē ixto ajuta hkēt nē. ¹⁶⁻¹⁸ ām Onēsipti pix na pre mē kurom ijarēnh ma nē man ixwýr Rōm wýr mō nē ijapēr o ri mē hkôt mra nē ixwýr kato. Hāmri nē xatā ixwýr mra nē tanhmā ixto mex to. Jao akupým ijamaxpēr o hihtýx. Ixpē prēs nē ixkrī htā kēp ixkrāmnhwý hā amnhī jarēnh ā hpijaàm kêt nē. Nē amnepēm kormā krī pé Epes kamā ixpa ri na pre määnēn tanhmā ixto mex to ho pa. Tā ā kot inhīpêx mex anhýr o pa jakamā na pa hte ho Pahihti Jejus wý nē kām:

—Pa Pahihti? Onēsipti o na pa awý. Kot ixto mex rāhā ho pa jakamā kwa kêt ka ixtā omu nē kutā anojarēt rāhā ho apa. Nē ōrkwý kamā hkwyjaja määnēn tanhmā mē ho mex to. Hāmri nē nhýrmā akupýn mē ixwýr wrý nē ixtā kamā axukaprī hā tanhmā ho mex to. Anē.

2

Mē pahte Jejus kôt amnhī nhīpêx pix prām ā mē pamā karō

Wam Ximotre 6.11-16

¹ E Ximotre. Jejus Kris kot mēmoj to mē pakutā nojarēt rāhā jakamā kwa kêt ka ý hā amnhī to htýx nē kām tanhmā amnhī nhīpêx to ho apa hā amnhī kamā akahak o ri apa hkēt nē. ² Ra ate pa tanhmā Tirtūm kapēr o mē ahkre htoja mar jakamā kêt ka

amnhĩ xô ri ã Jejus kôt mẽ pahkwỳjê jahkre ho apa anẽ. Mẽ kot amar nẽ pahpyràn axpẽn xô ri ho axpẽn jahkre ho pa kaxyw.

³⁻⁴ Sôdat na htem mẽ hkrãhtũm kãm prãm xà hkôt tanhmã amnhĩ nhĩpêx to. Jao tanhmã kute htã kapêr ma nẽ hkôt amnhĩ nhĩpêx. Tanhmãn à rỳ kãm prãm rỳ tanhmã omnuj to htã kutã amnhĩ to htỳx nẽ mẽ hkrãhtũm kôt amnhĩ nhĩpêx. Na htem amnhĩ xàpênh kukamã tee ri hamaxpêr o pa hkêt nẽ. ãm mẽ hkrãhtũm kapêr kôt pix mã amnhĩ nhĩpêx o pa hprãm. Tã kêr ka mẽ uràk nẽ Pahihiti Jejus kôt amnhĩ nhĩpêx rãhã ho ri apa hprãm. Mẽ kot hã tanhmã atomnuj to htãã.

⁵ Nẽ mẽ hprôt tỳx xwỳnhjaja na htem hkwyjê pẽ amnhĩ to wa hprãm xàj ãm ja pix kukamã hamaxpêr. Hãmri nẽ hprôt tỳx prãm xàj mẽmoj kot mẽ ho hirerek kêt nẽ amnhĩ jagri htỳx nẽ. Hãmri nẽ hprôt tỳx o hkwyjê jakre nẽ amnhĩ to wa nẽ pøj nẽ kot amnhĩ to wa hã mẽmoj to kãnja. Tã kêr ka mẽ uràk nẽ amã Pahihiti Jejus kot amnhĩ nhĩpêx kôt pix mã amã amnhĩ nhĩpêx prãm.

⁶ Nẽ pur kãm mẽ àpênh xwỳnhjaja na htem mẽ hpur kãm àpênh pix tãnopxar o pa nẽ àpênh rũnh nẽ. Kãm kaga hkêt kãm àpênh o pa. Tã àpênh rũnhja kukwak ri ihpur kãm õ rũnh nẽ ho apkur mex o pa. Nòm koja mẽ kãm kaga nẽ àpênh mex kêt nẽ hãmri nẽ õ grire nẽ apkur mex kêt nẽ. Tã kêr ka pur kãm mẽ àpênh rũnh xwỳnhjê pyrà nẽ Pahihiti Jejus mã amnhĩ nhĩpêx mex o apa. Nẽ mẽ uràk nẽ amã kaga hkêt kãm axàpênh pix tãnopxar o ri apa.

⁷ E na pa ã ajahkre anẽ Ximotre. Tã kêr ka ixte ajahkreja ma nẽ kãm ajamaxpêr rãhã nẽ. Koja Pahihiti tanhmã akrã hto ka aprĩ hã mar tỳx nẽ.

⁸ Nẽ kêr ka Pahihiti Jejus Kris mã ajamaxpêr rãhã ho ri apa. Na pre katorxà hkôt kệp Pahĩ finat Tawĩ kanrêhã htãmnhwỳ hã mẽ pahpyrà nẽ ì ho ì nẽ kato nẽ panhõ pika kamã pa ho pa. Tã nhũm prem kupĩ nhũm amnhĩ xà htỳx kamã hamak kãm ty. Hãmri nhũm Tĩrtũm akupỹm ho htĩr nhũm akupỹm htĩr o htĩr. ã na pre hte harênh anhỹr rãhã ho ri mẽ hkôt ixpa. ⁹ Mỳrapê na prem ijaxà pa arĩ jar ixkrĩ ho ixkrĩ. Na htem ixte amnhĩ tomnuj xwỳnh pyràk o

inhĩpêx nẽ axte ixte Jejus kapêr jarênh o ixpa pymaj ijaxà. Tã ã mẽ kot inhĩpêx anhỹr tã na hte Kris kôt pahtõjaja arĩ ixpãnhã mẽ kãm harênh o ri pa. Koja mẽ tee ri kãm Jejus jarênh o hapêx prãm kaprỳ. ¹⁰ Jakamã kwãr mẽ mãmri ã inhĩpêx anẽ. Koja mẽ arĩ Jejus kot tanhmã mẽ panê amnhĩ nhĩpêx toja mar o pa nhũm mẽ hkwyjaja hkôt amnhĩ xunhwỳ nẽ nhỹrmã pahpyrà nẽ kệp Jejus Kris kwỳ hã Tĩrtũm mẽ wa kuri mex nẽ htĩr tũm nẽ pa ho pa.

Kris kwỳ kot tanhmã amnhĩ tã grer to hã mẽ harênh

¹¹ Na pu htem mẽ pahpê Kris kwỳ hã ã amnhĩ tã pagrer anẽ:

Mẽ kot Kris ã mẽ panhĩmex tã kot puj mẽ akupỹm pahtĩr nẽ kuri pamex nẽ pahtĩr tũm nẽ papa ho papa.

¹² Mẽ kot tanhmã Kris ã mẽ pahtomnuj to htã kot puj mẽ arĩ hkôt amnhĩ nhĩpêx o papa rãhã ty nẽ nhỹrmã ìhkô hã mẽ ho amnhĩptàr o papa.

Nom kot puj mẽ amnhĩ kamã pakahak pẽ mẽ pahpê Jejus kwỳ hkêt ã amnhĩ jarê hã koja Jejus amnhĩ xwar mẽ pahpê hkwyjê hkêt ã mẽ pajarê.

¹³ Nẽ mẽ pahte amnhĩ kaxyw Jejus kôt pajamaxpêr kêt tã tanhmã amnhĩ jarênh to xà hkôt tanhmã amnhĩ nhĩpêx to. Aa kot mẽmoj tã amnhĩ jarênh kuhpa hã ri tanhmã amnhĩ nhĩpêx to hkêt. Anẽ.

Mẽ kot Tĩrtũm kapêr o mẽ ahkre mex xwỳnhjê jarênh

Wam Pêtre 3.15-16

¹⁴ E Ximotre. Ixte ã mẽmoj tã amã karõ anhỹrja kêr ka ho mẽ ahkre rãhã ho ri mẽ hkôt apa. Kê mẽ ama nẽ kãm hamaxpêr rãhã nẽ.

Nẽ mẽ kãm anẽ kê mẽ Tĩrtũm kapêr o mẽ ahkre mex o ri pa nẽ kapêr ã tanhmã axpẽn mã àkjêr to hkêt nẽ. Koja mẽ hã axpẽn mã akir hãmri nẽ amnhĩ to mex kêt nẽ. Hãmri nhũm mẽ kot mẽ kapêr mar xwỳnhjaja ja hã mẽ omu nẽ tee ri Tĩrtũm kapêr kukamã hamaxpêr nẽ hkôt amnhĩ nhĩpêx mex kêt nẽ.

¹⁵ Nẽ na htem mẽ kãm mẽ àpênh mex xwỳnhjaja mẽ õ patrãw kapêr ma nẽ hkôt mẽmoj tã àpênh mex nẽ. Nhũm õ patrãwja hwỳr mra nẽ àpênh ã omu. Hãmri nhũm

amnhī wỳr omu nē àmnhīx noo mǎ apê. Kām àpênh mex jakamǎ amnhī kamǎ kām uma hkêt nē. Ja pyrǎ nē kêr ka Tirtūm noo mǎ kām amnhī nhīpêx mex rǎhǎ nē aprī hǎ kapêr o mē ahkre mex o ri mē hkôt apa. Kê ã ate amnhī nhīpêx anhỳr ã apumu nē anhỳ hǎ hkīnh nē. Ka àpênh xwỳnhhta pyrǎ nē amnhī kamǎ amǎ uma hkêt nē noo mǎ kām amnhī nhīpêx mex o ri apa.

¹⁶ No mē kot Tirtūm kapêr o hêx o mē pa xwỳnhjaja kêr ka mē hkôt ri apa hkêt nē. Nē mē kapêr mar nē ri mē hkôt axām hkêt nē. Na htem mē kapêr ma nē mē hkôt amnhī nhīpêx o pa nē kām Tirtūm kapêr mar prām kêt nē. Nē gaa nē te kêp mar pumaj amnhī jamak pro pyrǎk o amnhī nhīpêx. ¹⁷ Týx ri tanhmǎ mē ahkre hto xǎja te kot mē hkànhy aa mex kêt nē ra omnuj týx o mōrja pyrǎk. Jao mē kot mē kapêr mar o mē pa xwỳnhjaja mē mar pê ra mē hkôt amnhī tomnuj týx o mō. Na hte ra Imēnew mē Pijertija wa ã htýx ri amnhī krǎ hkôt mē ahkre anhỳr o pa. ¹⁸ Nē Tirtūm o hêx o mē hkôt pa nē nhỳrmǎ akupỳm mē pahto mē pahtīr kêt ã harênh o pa. Hāmri nhūm mē amnhī tǎ wa kuma nē tee ri amnhī kukamǎ hamaxpêr pê Jejus kaga nē axte amnhī kaxyw hkôt hamaxpêr kêt nē. Nom wa kapêrja kot anhỳr kêt. ¹⁹ Kêt Tirtūm kapêrja ãm hāmri na. Kot mēmoj to hêx kêt jakamǎ na pu htem amnhī kaxyw hkôt pajamaxpêr kaprỳ hkêt nē. Kapêr ã kagà htūm kot tanhmǎ mē pahpê hkrajê jarênh to nē harênh kot:

Tirtūm na kot hkrajê piitǎ omunh mex rǎhǎ ho pa xwỳnh.

Anhỳr o mē pajarênh. Nē mē pamǎ mēmoj tǎ karō kot:

Kê mē kot Jejus kôt amnhī xunhwỳr xwỳnhjaja amnhī tomnuj o pa hkêt nē. Anē.

Tirtūm krajaja te kêp prat mex pyrǎk ã mē harênh

²⁰ Nē mē hikàxpore rūnh xwỳnhjaja mē õ xijere nē mē õ prat xohtôô. Prat kwỳ muxre nē hkwỳ omnajre. Prat pynajre na htem māmri kamǎ apku no prat muxreja ãm mēmoj mex pix kaxyw na htem mēsti hǎ haxwỳ nē kamǎ apku. Kasamêt ã rỳ mē hkra krǎ hkênh ã mē hkīnh nhūm htem mēsti hǎ haxwỳ nē kamǎ apku. ²¹ Tǎ mē kot

Tirtūm kapêr o hêx o mē pa xwỳnhjê hkôt hamaxpêr kêt nē mē hkôt amnhī tomnuj kêt xwỳnhjaja te mē kot prat muxre pyrǎk. Na htem tām amnhī nhīpêx nē tanhmǎ hamaxpêr punuj to ho pa hkêt nē. Hāmri nhūm Tirtūm ja hǎ mē omu nē mē ý hǎ hkīnh nē. Hāmri nē te mē kot prat muxre jaxwỳr nē kamǎ apkur pyrǎ nē mē kot kām tanhmǎ amnhī nhīpêx to ho pa kaxyw mē unhwỳ.

Mē pahte tām amnhī nhīpêx ã mē pamǎ karō

²² Nē mē àptār nyw jamaxpêr punujja kêr ka te ate hamỳnh nē amnhī katut kôt rênh par pyrǎk o hipêx Ximotre. Jao axte ho ajamaxpêr o ri apa hkêt nē. Nom mē hamaxpêr mexja kêr ka hamỳ nē amnhī krǎ him hagjê nē ho ajamaxpêr rǎhǎ ho ri apa. Jao tām amnhī nhīpêx nē amnhī kaxyw Tirtūm kôt ajamaxpêr rǎhǎ nē. Nē amǎ mē kêp Kris kôt akwỳjê hkīnh pê tanhmǎ mē ho ajuta hto ho ri mē hkôt apa. Jao mēmoj to mē kutǎ anojarêt rǎhǎ nē. Na hte ã Pahihti Jejus kôt amnhī nhīpêx xwỳnhjaja amnhī nhīpêx anhỳr o pa.

²³ Nē kêr ka mē kot htýx ri amnhī krǎ hkôt mē ahkre ho mē pa xwỳnhjê hkôt apa hkêt nē. Te ate mē kêp awry hǎ ri apa pyrǎ nē mē kapêr ma nē ãm ama. Na htem mē kapêr mar o pa nē ra hǎ axpên mǎ tanhmǎ àkjêr to ho pa. Jakamǎ kwarī mē hkôt ri apa hkêt nē. ²⁴ Mē pahte Tirtūm mǎ amnhī nhīpêx o papa xwỳnhjaja na pu htem mē kurom mēmoj tǎ axpên mǎ paxàkjêr o ri papa hkêt nē. Na pu htem ãm mē piitǎ mē kamǎ paxukaprī pê mē ho mex nē mē kamǎ pagryk tokyx anhỳr kêt nē. Nē Tirtūm kapêr o mē ahkre mex nē. Na hte ã mē pahte Tirtūm mǎ tanhmǎ amnhī nhīpêx to xwỳnhjaja amnhī nhīpêx o papa anē.

²⁵⁻²⁶ Jakamǎ koja mēhō ate Tirtūm kapêr o mē ahkreja ma nē tanhmǎ ho amǎ kapêr to ka ama nē amnhī tǎ tanhmǎ kām akapêr punuj to hkêt nē. ãm kamǎ axukaprī ho tanhmǎ hǎ kām akapêr mex to. Na hte Satanasti te kot amnhīm mē unênh pyrǎk o mē hipêx nē tanhmǎ mē kām Tirtūm kapêr o hêx to nhūm mē kuma nē hkôt hamaxpêr nē kapêr kôt amnhī nhīpêx. Tǎ kot kaj mē kamǎ axukaprī ho mē kām akapêr mex nē

nhūm Tirtūm tanhmā mẽ hkrā hto nhūm mẽ ama nē hkôt amnhī xunhwȳr japêr. Te Tirtūm kot Satanasti pē amnhīm mẽ utār pyrāk. Jakamā nhūm mẽ hpānhā Tirtūm kapêr mex ā harē nē harēnh o:

—Nà pēr ām hāmri na Tirtūm kapêrja. Ām mex o mex. Anē.

3

Jejus akupȳn wrȳk kukamā mẽ kot amnhī tomnuj xwȳnhjē jarēnh

Matêwre 24.4-13; Korosē 2.16-19; Wam Ximotre 4.1-5; Sikūn Pêtre 2.1-3; Jutre 3-16

¹ Nē Jejus akupȳn mẽ pahwȳr wrȳk xwȳj ri mẽ kot tanhmā amnhī nhīpêx toja kot paj hpānhā ixprī hā amā harē ka inhmar tȳx nē Ximotre. Koja Jejus akupȳn mẽ pahwȳr nojarêt pu mẽ pahpê hkwȳjaja pahpunuj nē papa. ² Nē Kris kwȳ hkêt xwȳnhjaja koja mẽ amnhī pix kukamā hamaxpêr o pa.

Ja o hikāxpore rax o pikuprōnh pix kukamā hamaxpêr pē hkwȳjê pē ôxȳ htȳx o pa.

Nē mẽmoj tã amnhī to jarkrar o pa.

Nē tanhmā hkwȳjê japrȳ hto ho pa.

Nē mẽ hipêêxà nē mẽ katorxà hā hpijaàm kêt o pa.

Nē Tirtūm ā hpijaàm kêt o pa.

Nhūm mẽhō tanhmā mẽ ho mex to nhūm mẽ amnhī tã mẽ omu nē ām mẽ omu nē amnhī tã tanhmā mẽ kām nē hkêt nē. Rȳ mẽ kām: “Nà ām hāmri na ka ā ixto mex anē. Nà ja mex.” Anhȳr o mẽ kām kapêr kêt nē.

³ Mē ukaprī hkêt jakamā koja mẽhō tanhmā mẽ homnuj to nhūm amnhī tã mẽ omu nē kamā gryk kurê kumrêx nē aa gryk o hapêx kêt nē.

Nē amnhī tã tanhmā hkwȳjê ho hêx to ho pa.

Nē htȳx ri kām hprām xà hkôt tanhmā amnhī tomnuj to.

Nē oprê ho pijapu pix kukamā hamaxpêr.

Nē axtem nē kām mẽmoj mex pumunh prām rȳ mẽmoj mex mar prām kêt nē.

⁴ Nē mẽhō ho hkrāmnhwȳ htã axtem nē mẽ kām mẽ hkurê xwȳnhjê nhīhkram haxà.

Nē hamaxpêr mex kêt o tanhmā amnhī tomnuj to rāhā ho ri pa.

Nē amnhī to rūnh o mẽ piitã mẽ hakrenh par ā amnhī to jarkrar o ri pa.

Nē amnhī krā hkôt kām amnhī nhīpêx prām xà hkôt amnhī nhīpêx o pa nē kām Tirtūm kām prām xà hkôt amnhī nhīpêx prām kêt nē.

⁵ Hāmri nē mẽ kêp hkra hā amnhī jarēnh o pa htã aa hkôt amnhī nhīpêx kêt. Ā Tirtūm kra hkêt xwȳnhjaja amnhī nhīpêx kot anhȳr jakamā kwa kêr ka ā mẽ hkôt apa hkêt nē Ximotre.

⁶⁻⁷ Na htem hêx rom hkwȳjê nhōrkwȳ hwȳr agjê nē kamā tanhmā mēnijê mã hêx to. Mē kot mẽ mar nē tanhmā amnhī tomnuj to hāmri nē ja hā amnhī pumu nē tee ri amnhī kukamā hamaxpêr kaxyw. Nē mẽ kām mẽ kapêr nyw mar prām tã nhām mẽ kapêr ma nē nhām mẽ kapêr mar nē aa Tirtūm kapêr mar nē amnhī kaxyw hkôt hamaxpêr kêt nē. Jakamā nhūm mẽ kot amnhī tomnuj xwȳnhjaja hêx rom mẽ hwȳr mra nē mẽ ōrkwȳ hwȳr agjê nē tanhmā mẽ kām mẽmoj to hêx to. ⁸ Te kot amnepêm finat Jānre mẽ finat Jāmtija wa kot amnhī nhīpêxta pyrāk. Na pre finat Mojestija Tirtūm nhȳ hā tanhmā mẽ ahkre hto ho pa nhūm Jānre mẽ Jāmti wa kām mar prām kêt nē. Nē tanhmā ja nē hkwȳjê mã kapêr to ho pa. Tã ā mẽ kot amnhī tomnuj anhȳr o mẽ pa xwȳnhjaja na htem wa urāk nē kām Tirtūm kapêr mar prām kêt nē kapêr nē tanhmā hkwȳjê mã kapêr to ho pa. Nhūm mẽ hamaxpêr mex kêt jakamā ām mẽmoj punuj pix kukamā hamaxpêr nē mẽ kuma nē amnhī kaxyw Jejus kôt hamaxpêr kêt nē. ⁹ Tã nom koja mẽ hkwȳjaja tokyx hprī hā mẽ kot mẽmoj to hêx ā mẽ omu hāmri nē axte mẽ hkôt hamaxpêr kêt nē nhūm mẽ rī amnhī pumu. Te amnepêm mẽ kot hprī hā Jānre mẽ Jāmti wa kot tanhmā amnhī tomnuj to hā wa omunhta pyrāk.

Mē pahte Jejus ā pahpunuj tã hkaga hkêt ā mẽ pamā karō

Atre 13.50-14.7, 14.19-22

¹⁰ E Ximotre. Ate ixkôt apa rȳy jakamā ra ate tanhmā ixte amnhī nhīpêx ho ixpa hā ixpumunh mex.

Ixte tanhmā Tirtūm kapêr o mẽ ahkre hto ho ixpaja.

Nē inhmā mẽmoj to anhȳr prām xwȳnhja.

Nē ixte amnhī kaxyw Kris kôt ija-maxpērja.

Nē inhgryk tokyx anhÿr kêtja.

Nē ixte tanhmā Kris kôt ixkwÿjê ho mex to ho ri ixpaja.

Nē ixpunuj nē ixpa htā arī Kris kôt amnhī nhīpêx mex o ixpaja.

Ā ixte amnhī nhīpêx anhÿr o ixpaja ate xpumunh mex.

¹¹ Na pa pre krī pē āxiok nē Ikōn nē Ristija kamā mē kām Jejus jarēnh o ixpa nhūm mē hkwyjaja Jejus ā tanhmā inhīpêx to pa amnhī xā htÿx kamā ijamak o ri mē hkôt ixpa. Tā nhūm Pahihti Kris xatā mē kēp ixpytā pa ixtīr pē mē ĩhkra rūm ijapôx o ixpa. ¹² Na hte Kris kwÿ hkêt xwÿnhjaja mē pahte Kris kôt amnhī nhīpêx o papa hā mē pahomnuj o pa.

¹³ Nē mē kot Tīrtūm kapēr o hêx o mē pa xwÿnhjaja koja arī mē kēp Kris kwÿ hā amnhī to hêx pē mē nokupyr. Nē mē kām Tīrtūm kapēr o hêx o pa. Jao ra mē tāmjaja amnhī nokupyr o pa nē amnhī tomnuj tÿx kumrêx.

Pawre kot tanhmā Tīrtūm kapēr ā kagà jarēnh to

Rōmān 15.4; Sikūn Pêtre 1.19-21

¹⁴⁻¹⁵ No ka Ximotre. Amnepēm aprīre rūm na pa pre mē ixohtō nē Tīrtūm kapēr o ajahkre ho ixpa. Akatorxā nē anhō wōwōre nē pa nē Kris kwÿjaja pa prem ho ajahkre rāhā ho akôt ixpa ka mē inhmar tÿx nē amnhī kaxyw Jejus kôt ajamaxpēr. Jakamā kwa kēr ka arī hkôt ajamaxpēr mex rāhā ho ri apa. Tīrtūm kapērja na htem mar pē amnhī kaxyw Jejus Kris kôt hamaxpēr nē hkôt amnhī xunhwÿ nhūm Tīrtūm ja hā mē omunh xā hkôt mē ho hkra. ¹⁶ Tīrtūm kapēr ā kagàja Tīrtūm kapēr na. Na htem ho mē ahkre ho pa. Koja mēhō hkwȳm ri tanhmā amnhī tomnuj to nē kapēr ma nē tee ri amnhī tomnujja kukamā hamaxpēr o ra hkaprī nē. Rÿ tanhmā amnhī tomnuj to htā kapēr ā kagà kamā kapēr nē Tīrtūm kot ā kot amnhī tomnuj anhÿrja nē mē pamā kapēr ā harēnh ma nē amnhī tomnujta kaga kurē kumrêx. Rÿ kamā kapēr nē Tīrtūm kot tanhmā mē pahte amnhī to mex to hā mē pamā karō kamā harē nē kuma. Hāmri nē ŷ hā hkôt amnhī nhīpêx mex rāhā

nē. Ā na hte Tīrtūm kapēr kagàja mē kot mar nē hkôt amnhī nhīpêx xwÿnhjê ho mex anē. ¹⁷ Na hte mē kot Tīrtūm mā amnhī nhīpêx o mē pa xwÿnhjaja kamā harē nē hkôt amnhī nhīpêx mex pē mē piitā mē ho mex nē ho mē ahkre mex rāhā ho pa.

4

Pawre kot mēmoj tā Ximotre mā karō Korosē 4.5-6

¹ Nē koja nhÿrmā Jejus Krisja akupÿn mē pahwÿr wrÿ hāmri nē mē pahpiitā tanhmā mē pajarēnh to. Ra mē htyk xwÿnhjaja nē arī mē pahÿr xwÿnhjaja nhūm tanhmā mē pahte amnhī nhīpêx to ho papa hā mē pahpumunh kôt tanhmā mē pajarēnh to. Jao Tīrtūm mē wa kuri mē pahÿr tūm nē papa ho papa hā mē pajarē rÿ wa kuri pahÿr tūm nē papa hkêt ā mē pajarē. Jakamā kwa Ximotre kot paj Tīrtūm mē Jejus Krisja wa noo mā mēmoj tā amā karō ka inhmar tÿx nē. ²⁻⁴ Koja nhÿrmā mē kēp Tīrtūm kra hkêt xwÿnhjaja axte kām Tīrtūm kapēr mar prām kêt nē nhām mē kapēr pix mar prām o ri pa. Jao amnhī kukamā hamaxpēr o:

—Nā inhmā Tīrtūm kapēr mar prām kêt. Kot mēmoj piitā nē mē hkurē kēnā. Kot paj hpānhā mēhō kot mēmoj nē mē hkurē hkêt xwÿnhjê kapēr pix mar o ri ixpa. Nā kot paj anē. Ja na inhmā hprām. Nom kot paj axte Tīrtūm kapēr mar kêt nē.

Anhÿr jao kapēr kaga nē hpānhā htÿx ri nhām mē ujarēnh pix ma nē hkôt hamaxpēr. Koja mē ā amnhī nhīpêx anhÿr o pa. Jakamā kwa kēr ka arī mē kām Jejus kot tanhmā mē panē amnhī nhīpêx to hā harēnh rāhā ho ri mē hkôt apa Ximotre. Mē kām mar prām kêt tā māmri ri mē kām harē. Nē nhÿri mēhō pumu nē kām harē. Mē kām mar prām xwÿnhjê mā harē nē mē kām mar prām kêt xwÿnhjaja ka māānēn mē kām harē. Nhūm mēhō tanhmā amnhī tomnuj to ka hā omu nē tanhmā nē kām akapēr to kē hkaga tokyx anē nē akupÿm tām amnhī nhīpêx. Rÿ nhūm mēhō tām amnhī nhīpêx o pa ka ja hā omu nē hā kām akapēr nē kām:

—Ām hāmri na ka hte Tīrtūm kôt amnhī nhīpêx mex nē. Anē.

Hāmri nē anojarēt kêt kām mē kām Tīrtūm kapēr o mē ahkre rāhā ho ri apa.

⁵ Nē tām ri amnhī nhīpêx rāhā nē. Mē kot Jejus ā tanhmā anhīpêx to htā kēr ka ŷ hā amnhī to htỳx nē arī mē kām kapêr jarēnh o ri mē hkôt apa. Jao Tirtūm mā amnhī nhīpêx mex rāhā nē. Kēr ka ā mē hkôt amnhī nhīpêx anhỹr o ri apa Ximotre.

Pawre kot ra htyk kaxyw ā amnhī jarēnh Atre 20.17-35

⁶ Nē mē kot ixpīr xā hā arīgroja ra hwỳr ahtêp o mō. Kot paj pēr tokyx ty. Amnepēm na prem Tirtūm mā mēmoj nhōr kaxyw nē mē hkōm xā kamā mēmo kagōja py nē mē kot Tirtūm mā mēmoj nhōr xā hā mēstija ā hkapīr pa nhūm hapêx. Tā te ixpê mē hkōm xā kamā mēmo kagō pikapīrta pyrāk. Kot paj tokyx ty nē jar ijarêx. ⁷ Na pa ra Pahihti Jejus mā amnhī nhīpêx mex o ri ixa. Mē kot tanhmā hā ixtomnuj to htā pa hkaga hkêt nē arī hkôt amnhī nhīpêx mex rāhā ra ixyk kaxyw. ⁸ Ixte Pahihti kām hprām xā hkôt amnhī nhīpêx mex o ri ixa jakamā koja amnhī tā tanhmā ixto mex to. Nom papxpix ixto mex kêt nē. Na hte ām hāmri tām mē pahpiitā mē panhīpêx. Jakamā nhỹrmā kot mē piitā tanhmā mē harēnh to xā hā arīgrota ā koja mē pahkīnh pē mē pahte amnhī wỳr kamā pajamak o papa xwỳnh piitā mē pamā mā mēmoj mex gō.

Pawre kot amnhī wỳr Ximotre hwỳr

⁹ Kwa na pa ra ato ijamak tỳx nē Ximotre. Kwa kēr ka amnhīm anojarêt nē tokyx tanhmā amnhī to hpa nē man ixwỳr mō.

¹⁰ Na pre ra Kresēx ma Karatas wỳr mō nhūm Xitre ma pika pē Tawmas wỳr mō. Nhūm Tēmti ra tanhmā hamaxpēr to nē àpēnh gryk ā ixkaga nē ma akupỹm Tesarōn wỳr mō. ¹¹ ām Rukre pix na arī ixkôt pa jakamā kēr ka anojarêt hāmri nē ahte amōr kêt nē. Makre mā anē kê man akôt ixwỳr mō nē tanhmā ixto ajuta hto ho pa.

¹² Nē Xikitre na pa pre ra Epes wỳr kumē.

¹³ Nē Torôt kām Kapti nhōrkwȳ kamā ixte kry pē inhō kamīs pa hkà ryti rer jakamā kēr ka anojarêt nē inhmā apy nē man inhmā o mō. Nē inhō kagàta ka määnēn inhmā amỳ nē o mō. Nē mēmo mry kà hā ixte mēmoj tā kagàta ka määnēn apy nē

mān inhmā o mō. E kēr ka anojarêt nē ixkukrêxja jamỳ nē ixwỳr ho mō.

Tanhmā Aresānti kot Pawre nhīpêx to hā harēnh

¹⁴⁻¹⁵ Nē na pre kàx o mēmoj nhīpêx xwỳnh Aresāntija ixtomnuj nē. Pa pre mē kām Tirtūm kapêr o mē ahkre ho ri mē hkôt ixa nhūm tee ri inhma nē kām mar prām kêt nē. Hāmri nē ixkutā amnhī xām nē inhīpêx kati nē. Nom koja Pahihti Jejus ixtā tanhmā ho. Kwa kēr ka amnhī nē omunh mex nē Ximotre.

Pahihti Jejus kot Pawre mā hamaxpēr o hihtỳx ā harēnh

¹⁶ Nē pahi kot mē mar xā hā ixkre kamā wam ixte mē kām amnhī jarēnh ta ā na pre mēhō ixyr pē mē kām tanhmā ijarēnh to hkêt nē. Na prem piitā mē umaj ixkaga hpa. Nom kwār mē māmri ā amnhī nhīpêx anē. Tirtūm kot ixtā tanhmā mē hoja na inhmā hprām kêt. ¹⁷ ām Pahihti Jejusja pix na pre mē kurom ixkaga hkêt nē. Na pre ixto ixihtỳx nē pa ŷ hā mē kām tanhmā mē panē kot amnhī nhīpêx to hā harēnh pa. Nhūm Ijaew kêt xwỳnh kot inhmar o hkrī xwỳnhjaja ixujarēnh mar o hkrī nhūm Tirtūm inhnē tanhmā mē ho nhūm mē ixpīr kêt nē. ¹⁸ Koja Pahihti mē kutā ixto ixihtỳx rāhā nē mēmo arīgro hā amnhī wỳr ixto api. Pa Tirtūm mē wa kuri inhmex kumrêx nē ixtīr tūm nē ixa ho ixa. Pahihti mex o mex jakamā kēr pu mē kām mex o mex ā harēnh rāhā ho papa nē aa jam panhūrer kêt nē.

Pawre kot tanhmā hkrāmnhwỳjê jarēnh to

¹⁹ Nē kēr ka Prisire mē mjên Akir wa kām ijarē. Nē Onēsipti hprō nē hkrajaja ka määnēn mē kām ijarē. ²⁰ No Eras kormā Korīt kām pa. Nē Toropti na pre à nē pa Mīrêt kām kure nhūm ixkôt mōr kêt nē.

²¹ Kwa kēr ka amnhīm anojarêt nē amgrà pē man tokyx ixwỳr mō Ximotre.

Nē ota Epti mē Prutēhti mē Rīnre mē Krawreja awỳr hpēr mē. Nē jar Kris kôt pahkwỳjê piitā awỳr hpēr mē.

²² E kê Pahihti Jejus ato mex rāhā nē mē apiitā mē akutā nojarêt rāhā ho pa.

Tā ām ja pix. Ixpê Pawre na pa awỳr kagàja nhīpêx nē kumē.

Xitre Pawre kot Xitre hwÿr kagà nē mēnh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nhÿm pre Xitre Pawre hkôt pa hã mytwrÿ xohtô nē. Tã kêp Jejus kôt hkwyjê nhõ pastô kaxyw gô hipôk pê Kret ã arîk nē Tirtÿm kapêr o mē ahkre ho mē hkôt pa. Jakamã nhÿm Pawre kãm kagàja nhîpêx nē kamã kãm mēmoj tã karô. Tirtÿm kapêr o mē hêx xwÿnhjaja tanhmã kot ja nē mē hkurê to hã kãm karô. Nē mē kot Tirtÿm kapêr o mē ahkre mex pix xwÿnhjaja Jejus kwÿjê kaxyw kot mē rēnh ã kãm karô. Nē Jejus kwÿjaja kot axpēn to mex o pa hã kot mē kãm karô kaxyw kagàja kamã mē kaxyw kãm hã kagà. Æ na pre Pawre Xitre mã mēmoj tã karô nē hã kagà nē hwÿr mēnh anē. Nē kãm:

¹ Pa Xitre? Xà amex? Ixpê Pawre na pa awÿr kagà nhîpêx nē kumê. Na pa hte Tirtÿm mã tanhmã amnhî nhîpêx to ho ixpa. Nē ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nē mē kot hprî hã mar kaxyw Tirtÿm kapêr o mē ahkre mex nē. ² Mē kot inhmar nē nhÿrmã htyk nē ma Tirtÿm mē Jejus wa hwÿr àpir nē wa kuri htîr tÿm nē pa ho pa hã amnhî kukamã hamaxpêr kaxyw. Amnepēm na pre Tirtÿm ã mē pahpê hkrajê hkukamã mē pajarēnh anē. Nē ãm hãmri ã mē pajarēnh anē. Na hte mēmoj tã amnhî to hêx kêt nē. ³ Tã ra mē pakukamã mē pamã mēmoj to amnhîrît nē inhmã kapêr o:

—E Pawre kêr ka ma mē hpiitã mē hkôt ri apa nē mē kãm ixkapêr jarê nē mē kãm: “Kot kaj mē amnhî kaxyw Tirtÿm Kra hkôt ajamxpêr nē hkôt amnhî xunhwÿ nhÿm Tirtÿm ja hã mē apumu nē mē ato hkra. Ka mē nhÿrmã atyk tã nhÿm amnhî wÿr mē ato api ka mē wa kuri amex kumrêx nē atîr tÿm nē apa ho apa.” Anhÿr o mē kãm ixkapêr jarēnh o ri mē hkôt apa Pawre.

⁴ Anhÿr o inhmã kapêr tã pa ã amã ixkapêr nē hã kagà anē Xitre. Pajamē

pahte amnhî kaxyw Jejus kôt pajamxpêr nē hkôt amnhî xãm jakamã te apê ixkra pyrâk. Jakamã na pa hte ato Mēpanhîpêxà maati Tirtÿm mē mē papytâr xwÿnh Jejus Krisja wa hwÿr rãhã ho ri ixpa nē wa kãm:

—Pa Tirtÿm mē Pahihti wa. Nà Xitre ho na pa wa awÿ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nē àmnhîx pa ho pa. Anē.

*Kris kwÿ hkrãhtÿmjaja kot tanhmã amnhî
nhîpêx to kaxyw mē hã kãm karô*

Wam Ximotre 3.1-13

⁵ Nē na pa pre Kret rÿm inhnojarêt hãmri nē amã axàpēnh ã karô nē Kret kãm are nē man mō. Na pa pre amã:

—E kêr ka jar arîk nē mē kãm ixkapêr jarēnh jatur xãm mēnh o mē hkôt apa. Nē Kris kôt pahkwÿjê mã mē hkrãhtÿmjê xunhwÿ. Kret kãm krî piitã hkôt. Na pa pre ixprî hã tanhmã amã mē harēnh to. Tã kêr ka ate inhmar xà hkôt mē hkwyjê kapi nē mē unhwÿ. Koja mē ã amnhî nhîpêx anhÿr o pa ka ja hã mē omu nē mē unhwÿ.

⁶ Koja mē tãm amnhî nhîpêx o pa nhÿm mē piitã axpēn mã mē mex ã mē harê. Nē mē hprô pix tânopxar o pa nē kuhpa hã nhãm mēnijê ho amnhîkati hkêt nē. Nē kê mē hkrajaja hipêxà pyrâ nē amnhî kaxyw Jejus kôt hamaxpêr o pa. Jao hipêxà nē katorxà wa kapêr ma nē wa hkôt amnhî nhîpêx. No ri htÿx ri amnhî tomnuj o pa hkêt nē.

Anhÿr o na pa pre mē hã amã karô. ⁷ Jejus kôt pahkwÿjê hkrãhtÿmjaja kot Tirtÿm nhÿ hã hkrajê mã kapêr mex o pa jakamã na htem tãm amnhî nhîpêx o pa.

Nē amnhî pix kukamã hamaxpêr o pa hkêt nē.

Nē gryk tokyx anhÿr kêt nē.

Nē kagôxÿhti japrôr nē ho pipãnh o pa hkêt nē.

Nē oprê ho pa hkêt nē.

Nē kàxpore rÿnh prãm xàj hêx rom tanhmã amnhî nhîpêx to hkêt nē.

Na htem ã amnhî nhîpêx anhÿr hkêt nē.

⁸ Æm àmnhîx amnhî nhõrkwy hwÿr mē hwÿr o pa.

Nē mē piitã mē kutã nojarêt rãhã nē.

Nē tãm hamaxpêr nē tãm mē piitã mē hipêx o pa.

Ně amnhĩ tomnuj pymaj amnhĩ to htỳx pê Tĩrtũm kôt amnhĩ nhĩpêx mex rãhã ho pa.

⁹ Ně mẽ kot Tĩrtũm kapêr mar tỳx jakamã kê mẽ arĩ hã nohtỳx nẽ mar tỳx xà hkôt amnhĩ xô ri ho hkwỳjê jahkre mex o pa.

Ně ho mẽ piitã mẽ hamaxpêr o hihtỳx o pa.

Nhũm mễhõ Tĩrtũm kapêr kwỳm ri tanhmã ujarẽnh to nhũm hã kuma nẽ hprĩ hã kãm tanhmã harẽnh to kê mar mex nẽ.

E Xitre. Na hte ã Jejus kwỳjê hkrãhtũmjaja amnhĩ nhĩpêx anhỹr o pa. Jakamã kêr ka aprĩ hã Kret kãm Jejus kôt pahkwỳjê kapi nẽ mẽ kot tanhmã amnhĩ nhĩpêx to ho pa hã mẽ omu. Nhũm mễhõ ã amnhĩ nhĩpêx anẽ ka ja hã omu hãmri nẽ kêp Jejus kwỳjê hkrãhtũm kaxyw ãm.

Kret nhõ xwỳnhjaja kot tanhmã amnhĩ tomnuj to hã mẽ harẽnh

Xitre 3.9-11

¹⁰ Nẽ atar Kret kãm na hte mẽ ohtô nẽ kãm mẽ ô pahi kapêr mar prãm kêt nẽ htỳx ri tanhmã Kris kwỳjê mã kapêr to ho pa. Na hte Ijaew kwỳjaja ã amnhĩ nhĩpêx anhỹr o pa. Jao Ijaew kêt xwỳnh kot Jejus kôt amnhĩ xunhwỳr xwỳnhjê mã kãm:

—Kwa mẽ ixpyrà nẽ mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

¹¹ Anhỹr o mẽ kãm kapêr jakamã kwa kêr ka ã mẽ kapêr anhỹrja nẽ mẽ kãm akapêr kãm axihtỳx nẽ. Na htem hpijaam kêt o hikàxpore hprãm xà ã mẽ kãm kapêr anhỹr o pa. Jao mẽ hamaxpêr o ahkà nhũm mẽ kuma nẽ tee ri hamaxpêr. ¹² Na pre ra mẽ hkwỳjê hõ tanhmã mẽ harẽnh to. Mẽ ahkre xwỳnhjê hõja mẽ harẽnh o:

—Kret nhõ xwỳnhjaja na htem hêx pix o pa. Nẽ oprê nẽ kãm kaga nẽ apkur xà pix kukamã hamaxpêr o pa. Anẽ.

¹³ ãm hãmri ã mẽ harẽnh kot anhỹr. ã mẽ kot amnhĩ nhĩpêx anhỹr jakamã kwa mẽ kot amnhĩ nhĩpêxja nẽ mẽ kãm akapêr kãm axihtỳx o ri mẽ hkôt apa Xitre. Kê mẽ ã amnhĩ nhĩpêx anhỹr kêt nẽ. Nẽ mẽ kãm anẽ kê mẽ amnhĩ kaxyw Tĩrtũm kôt mãn hamaxpêr tỳx nẽ. ¹⁴ Nẽ kê mẽ axte Ijaewjê xujarẽnh nẽ mẽ kot amnhĩ nhĩpêx

kôt amnhĩ nhĩpêx kêt nẽ. ã mẽ kot amnhĩ nhĩpêx o pa hã mẽ kãm karõ xwỳnhjaja na prem Tĩrtũm kapêr kaga hpa. ¹⁵ Mẽ kot Jejus kôt amnhĩ xunhwỳr xwỳnhjaja tãm mẽ hamaxpêr o pa jakamã na htem Tĩrtũm kot mẽmoj piitã ho kator xwỳnh pumu nẽ piitã mex ã harẽ. No mẽ kêp Jejus kwỳ hket xwỳnhjaja na htem hamaxpêr punuj pix o pa. Nẽ mẽmoj mex pumu nẽ mex kêt ã harẽ. Mex tã nhũm mex kêt ã harẽnh o pa. ¹⁶ Nẽ mẽ kêp Tĩrtũm kra hã amnhĩ jarẽnh tã amnhĩ tomnuj pix o pa. Jao kêp hkra hã amnhĩ jarẽnh o hêx nẽ kapêr kwỳm ri amnhĩ nhĩpêx pix o pa. Nhũm Tĩrtũm tee ri ja hã mẽ omu nẽ kãm mẽ hkĩnh kêt nẽ. Tĩrtũm mã mẽ kot amnhĩ to mex kwỳ mẽ hã jêt kêt kumrêx.

2

¹ E Xitre kot paj tanhmã ate mẽ ahkre hto hã amã karõ ka inhma nẽ amnhĩ xô ri mẽ kãm hã karõ ho ri apa.

Měmy wejjaja kot tanhmã amnhĩ nhĩpêx to kaxyw mẽ hã kãm karõ

² Nẽ kêr ka mẽmy wejjê mã anẽ kê mẽ amnhĩ to àptar mex nẽ pa.

Nẽ pipãnh nẽ ri pa hkêt nẽ.

Ně mẽ gryk kaxyw htỳx ri hkwỳjê hã hpêr o pikẽnh kêt nẽ.

Kê mẽ tãm hamaxpêr nẽ tãm amnhĩ nhĩpêx o pa.

Ně amnhĩ kaxyw Jejus kôt hamaxpêr tỳx rãhã nẽ.

Nhũm mẽ hkwỳjaja kot mẽmoj tã tanhmã mẽ homnuj to htã kê mẽ arĩ tãm amnhĩ nhĩpêx o pa nẽ amnhĩ tã tanhmã mẽ ho hkêt nẽ.

E kêr ka ã mẽmy wejjê mã ja hã akarõ anẽ.

Měni wejjaja kot tanhmã amnhĩ nhĩpêx to kaxyw mẽ hã kãm karõ

Wam Korĩt 14.34-35; Wam Ximotre 2.9-15, 3.11; Wam Pêtre 3.1-6

³⁻⁴ Nẽ mẽni wejjê mã anẽ kê mẽ kãm Jejus kĩnh xà tãm ri amnhĩ nhĩpêx o pa.

Jao axpẽn jakwa kamã nhãm mẽ hixi ho rêr o pa hkêt nẽ.

Ně kagôxýhti ho pipãnh o pa hkêt nẽ.

Ně mẽ kãm anẽ kê mẽni xàptar nywjê jahkre mex o pa. Mẽ kot mẽ mar nẽ mẽ urak nẽ tãm amnhĩ nhĩpêx kaxyw.

Jao mẽ kãm mẽ mjên nẽ mẽ hkrajê japê
hã mẽ kãm mẽmoj to anhÿr o mẽ kutã
nojarêr rãhã ho pa.

Kêr ka ã mẽni wejê mã akapêr anê.

*Mẽnì xàptàr nywjaja kot tanhmã amnhĩ
nhĩpêx to kaxyw mẽ hã kãm karõ*

⁵ Nẽ mẽni xàptàr nywjê mã anê kê mẽ tãm
hamaxpêr pê tãm amnhĩ nhĩpêx o pa.

Nẽ mẽ òrkwÿ kamã àpênh mex o pa.

Nẽ mẽ mjên kapêr ma nẽ hkôt amnhĩ
nhĩpêx.

E. ã mẽni xàptàr nywjê mã karõ anê. Koja
mẽ ã amnhĩ nhĩpêx anhÿr o pa hãmri nhũm
mẽ piitã mẽ kot amnhĩ nhĩpêx ã mẽ omu nẽ
mẽ harênh o:

—Tirtũm kapêrja mex kumrêx. Mẽ kot
hkôt amnhĩ nhĩpêx o mẽ pa xwÿnhjaja na
htem tãm amnhĩ nhĩpêx mex o pa. Anê.

*Mẽmy xàptàr nywjaja kot tanhmã amnhĩ
nhĩpêx to kaxyw mẽ hã kãm karõ*

*Wam Ximotre 4.12; Sikũn Ximotre 2.22;
Wam Pêtre 5.5*

⁶ Nẽ kêr ka mẽmy xàptàr nywjê mã anê kê
mẽ mẽmoj punuj pê amnhĩ to htÿx o pa. Mẽ
hamaxpêr punuj nẽ mẽ kot tanhmã amnhĩ
tomnuj to pê amnhĩ to htÿx o pa.

⁷ Nẽ kêr ka ajaxwÿja tãm amnhĩ nhĩpêx
rãhã ho ri mẽ hkôt apa Xitre. Mẽ kot ja
hã apumunh nẽ akôt amnhĩ nhĩpêx o pa
kaxyw. Nom kêr ka tanhmã mẽ ahkre hto
hkwÿm ri tanhmã amnhĩ nhĩpêx to hkêt nẽ.
ãm Tirtũm ã apijaàm o akatàt kôt mẽ kãm
kapêr o mẽ ahkre pê tãm amnhĩ nhĩpêx o ri
apa.

⁸ Nẽ kêr ka tãm akapêr rãhã ho ri apa.
Kêr kê mẽ kãm mẽ pahkurê xwÿnhjaja ja
hã ama nẽ amnhĩ kamã hpijaàm hãmri nẽ
apê Kris kwÿ hã tanhmã ato kapêr punuj
to hkêt japêr.

*Mẽ kãm mẽ àpênh xwÿnhjaja kot tanhmã
amnhĩ nhĩpêx to kaxyw mẽ hã kãm karõ*

*Epes 6.5-8; Korosê 3.22-25; Wam Xi-
motre 6.1-2; Wam Pêtre 2.18-25*

⁹ Nẽ kêr ka mẽ kãm mẽ àpênh o mẽ pa
xwÿnhjê mã anê kê mẽ ò patrãw kãm hprãm
xà hkôt amnhĩ nhĩpêx o pa.

Jao mẽ kapêr ma nẽ hkôt amnhĩ nhĩpêx
mex nẽ.

Nẽ amnhĩ tã tanhmã mẽ kãm kapêr
punuj to hkêt nẽ.

¹⁰ Nẽ kê mẽ kêp mẽmoj to àhkĩnh kêt nẽ.

Nẽ tãm mẽ hipêx rãhã nẽ.

Nẽ kãm hkukrêx jamãr mex o pa.

Koja mẽ ã amnhĩ nhĩpêx anhÿr o pa nhũm
mẽ ò patrãw amnhĩ tã mẽ omu nẽ mẽ ÿ hã
hkĩnh nẽ pa. Hãmri nẽ hamaxpêr o:

—Hêxta waa nẽ. Inhmã àpênh xwÿnhhta na
hte inhmã àpênh mex o pa. Na hte ixkukrêx
nẽ ixkrit jamãr mex nẽ ixpê mẽmoj to
àhkĩnh kêt nẽ. Nà mẽ kot Tirtũm kapêr kôt
amnhĩ nhĩpêx o mẽ pa xwÿnhjaja na htem
tãm amnhĩ nhĩpêx o pa. Pêr Tirtũm kapêr
ãm hãmri na. ãm mex o mex. Anê.

E Xitre kêr ka mẽ kãm mẽ àpênh xwÿnhjê
mã ã mẽ kot amnhĩ nhĩpêx anhÿr ã karõ.

*Tanhmã Jesus kãm mẽ pajapê xàj amnhĩ
nhĩpêx to hã harênh*

Epes 2.8-10; Wam Tesarõn 1.9-10

¹¹ Nẽ Tirtũm kot mẽmoj to mẽ pakutã
nojarêr rãhã ho pa jakamã na hte mẽ pahte
Kra hkôt amnhĩ xunhwÿr xwÿnhjê ho hkra
pu mẽ nhÿrmã wa kuri pahtür tũm nẽ papa
ho papa. ¹² Na hte ã mẽ pamã kapêr o
amnhĩrít anê nẽ mẽ pamã:

—E kêr ka mẽ apê ixkra hã tãm amnhĩ
nhĩpêx rãhã ho ri apa nẽ axte tanhmã
amnhĩ tomnuj to nẽ tanhmã ajamaxpêr
punuj to hkêt nẽ. Mẽ ate amnhĩ tomnuj
pê amnhĩ to htÿx nẽ ixkapêr kôt pix mã ri
amnhĩ nhĩpêx rãhã nẽ. Anê.

¹³ Na pu htem ã amnhĩ nhĩpêx anhÿr o
papa jao pahkĩnh nẽ mẽ papytãr xwÿnh
Jesus Kris jamãr o papa. Koja nhÿrmã mẽ
panhõ Tirtũm xihtÿx xwÿnhja akupÿn mẽ
pahwÿr kumê pu mẽ mex o mex ã omu.

¹⁴ Na pre Jesus amnhĩ grõnh kôt mẽ
pahwÿr wrÿ nẽ mẽ pahpiitã mẽ pahte
amnhĩ tomnuj pãnhã amnhĩrer kaxyw htyk
o Tirtũm mã amnhĩrer pa. Mẽmo kaxyw na
pre ã mẽ panê amnhĩ nhĩpêx anê? Nà mẽ
pahpê hkwÿja na kãm hprãm. Nẽ mẽ pahte
tãm ri Tirtũm kapêr kôt amnhĩ nhĩpêx o
papaja na kãm hprãm. Nẽ mẽ pahte urak nẽ
mẽ piitã mẽ kutã panojarêr rãhã ho papaja
na kãm hprãm. Jakamã na pre ã mẽ panê
amnhĩ nhĩpêx anê.

¹⁵ E Xitre. Ixte mẽmoj tã amã karõja kêr
ka ho Kris kwÿjê jahkre mex o apa kê mẽ
ama nẽ kapêr kôt amnhĩ nhĩpêx o pa. Nhũm
mêhõ tanhmã amnhĩ tomnuj to ka hã omu

ně Tirtũm nhỹ hã tanhmã nê kãm akapěr to kê axte hkêt nẽ. Tã mãn ka inhma. Kêr ka ã Kris kwỳjê jahkre mex o apa anẽ.

3

Tanhmã Kris kwỳ kot amnhĩ nhĩpêx to hã mẽ kãm karõ

Rõmãn 13.1-10; Epes 2.1-10

¹ Nẽ kêr ka Kris kôt akwỳjê mã anẽ kê mẽ ho amnhĩptàr xwỳnhjê kapěr ma nẽ mẽ hkôt amnhĩ nhĩpêx o pa. Nẽ mẽmoj to mẽ kutã nojarêt rãhã ho pa.

² Nẽ mẽ kãm anẽ kê mẽ tanhmã hkwỳjê mã kapěr punuj to ho pa hkêt nẽ. Rỳ mẽmoj tã mẽ kãm àkjêr kêt nẽ. Kê mẽ tãm mẽ hipêx nẽ mẽ kamã ukaprĩ pê mẽ ho mex rãhã ho pa. Na hte ã Kris kwỳjaja axpẽn nhĩpêx o pa anẽ. ³ Kormã mẽ pahte hkôt amnhĩ xunhwỳr kêt ri na pu prem ã amnhĩ nhĩpêx anhỹr kêt nẽ. Na pu prem Tirtũm mã pajamaxpěr kêt nẽ kapěr kôt ri amnhĩ nhĩpêx hkêt nẽ. Nẽ amnhĩ tomnuj pix kukamã pajamaxpěr o ri papa. Nẽ amnhĩ pix kukamã pajamaxpěr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nẽ axpẽn tomnuj nẽ. Nẽ axpẽn kãm pagryk rãhã ho papa. ã mẽ pahte amnhĩ nhĩpêx anhỹr ho papa jakamã nhũm pre mẽ piitã kãm mẽ pahkĩnh kêt nẽ. Pu mẽ pajaxwỳja pamã mẽ hkĩnh kêt nẽ.

Tanhmã Tirtũm kot mẽ pahto mex to hã harẽnh

Rõmãn 5.6-8; Epes 2.4-10

⁴ Tã pu prem Tirtũm kệp mẽ papytãr xwỳnh ã harẽnh ma. Kot tanhmã mẽ panẽ amnhĩ nhĩpêx to hã harẽnh ma nẽ mex o mex nẽ mẽ pakamã ukaprĩ hã harẽnh ma. ⁵⁻⁶ Hãmri nẽ amnhĩ kaxyw hkôt pajamaxpěr nẽ hkôt amnhĩ xunhwỳ nhũm amnhĩ tã mẽ pahpumu nẽ mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt nẽ. Mẽ pahte tanhmã amnhĩ to mex tore hã. Na pre mẽ pakamã ukaprĩ nẽ ã mẽ papytãr anẽ. Tã tanhmã na pre mẽ papytãr to wehe? Nã na pre Jesus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrãk o mẽ panhĩpêx. Hãmri nẽ mẽ pahwỳr amnhĩ Karõ rẽ nhũm mẽ

pahwỳr agjê nẽ mẽ pamã mẽ pahte amnhĩ nhĩpêx nyw gõ. ã na pre Tirtũm Jesus Kris kot mẽ panẽ htyk kukwak ri mẽ pahto mex rax anẽ hãmri nẽ mẽ pahwỳr amnhĩ Karõ rẽnh anẽ. ⁷ Tã mẽmo kaxyw na pre ã mẽ pahto mex anẽ? Nã kãm mẽ pajapê jakamã na pre ã mẽ panhĩpêx anẽ. Mẽ pahte amnhĩ tomnuj xwỳnh tã kãm mẽ pajapê htỳx nẽ kãm tanhmã mẽ pahto hprãm kêt nẽ. Nẽ mẽ pahwỳr Kra Jesus mẽ nhũm wrỳ nẽ mẽ pahte amnhĩ tomnuj pãnhã mẽ panẽ ty. Jakamã mẽ pahte amnhĩ kaxyw hkôt pajamaxpěr nẽ hkôt amnhĩ xunhwỳr xwỳnhjaja Jesus kukwak ri mẽ pahpê Tirtũm kraa. ã na pre Jesus mẽ pahto mex anẽ. Jakamã kot puj mẽ nhỹrmã Tirtũm mẽ wa kuri pahtĩr tũm nẽ pamex nẽ papa ho papa. Koja wa nhỹrmã ã mẽ pahto mex anẽ.

⁸ ãm hãmri na pa amã ã ja jarẽnh anẽ Xitre. Jakamã kwa kêr ka inhma nẽ inhmar tỳx nẽ. Nẽ ho amnhĩ kaxyw Tirtũm kôt mẽ hamaxpěr xwỳnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

⁹ Nẽ mẽ kot htỳx ri mẽmoj tã axpẽn mã àkjêr o mẽ pa xwỳnhjaja kêr ka mẽ hkôt apa hkêt nẽ. Nẽ mẽ hkukamã mẽ higêt kôt apa hkêt nẽ. Rỳ finat Mojes kot Tirtũm nhỹ hã kapěr ã axpẽn mã mẽ àkjêr xwỳnhjê hkôt apa hkêt nẽ. Na htem ã ri axpẽn mã àkjêr anhỹr o pa nẽ tãm amnhĩ nhĩpêx kêt nẽ.

¹⁰ Nẽ koja mẽ akwỳjê hõ amnhĩ krã hkôt tanhmã hkwỳjê mã kapěr to nhũm mẽ kuma nẽ hã axpẽn mã akir nẽ axpẽn pẽ pikjêr kaxyw. Ka ja hã omu nẽ ã kapěr anhỹrja nẽ kãm akapěr kê axte hkêt nẽ. Hãmri nhũm ama nẽ ãm ama nẽ arĩ ã mẽ kãm kapěr anhỹr japêr ka axte nẽ kãm akapěr. Tã ra ate nẽ kãm akapěr o axkrut tã nhũm arĩ ã kapěr anhỹr o axkrunẽpxi japêr ka ja hã omu hãmri nẽ mẽ amnhĩ nẽ hano kê axte mẽ apê Kris kwỳjê hkôt ri pa hkêt nẽ. ¹¹ ã mẽ kot amnhĩ nhĩpêx anhỹr o mẽ pa xwỳnhjaja na mẽ ra Jesus wỳr pry kaga nẽ htỳx ri tanhmã amnhĩ tomnuj to ho pa. Nẽ ã amnhĩ nhĩpêx anhỹr o pa jao kệp Kris kwỳ hkêt ã amnhĩ to amnhĩrĩt.

Pawre kot kagà jatur xà kamã tanhmã Xitre mã kapěr to

¹² Nê kot paj tokyx ma Nĩkop wỳr mō. Kêr pa tokyx hwỳr pōj nê amgrà pê krĩ nhō xwỳnhjê hkôt ixpa. Jakamã kot paj tokyx ma awỳr Atēmti rỳ Xikitre mẽ. Kê mō nê awỳr pōj ka tokyx tanhmã amnhĩ to hpa nê man ixwỳr mō pu mẽ Nĩkop kamã axpẽn pumu.

¹³ Nê ota mẽ akuri Apor mẽ axiwôkat Jēntija. Kojã wa mẽmo arĩgro hã ma krĩ hō hwỳr nojarêt ka wa kãm mẽ apkur xà hkwỳ gō kê wa ma ÿ kamã mōr kêt nê.

¹⁴ Nê kêr ka Kris kwỳjê mã anê kê mẽ arĩ òrkwỳ pix kãm hkrĩ ho hkrĩ hkêt nê. Kê mẽ tanhmã axpẽn to mex to ho axpẽn kôt pa. Nhũm mẽhō kêp amrakati kê mẽ tanhmã ho ajuta hto. Mẽ kãm anê kê mẽ ã axpẽn nhĩpêx anhỳr o pa.

¹⁵ Nê ota jar Kris kôt pahkwỳjê piitã awỳr hpêr mẽ Xitre. Nê kêr ka atar Kris kôt mẽ pahkràmnhwỳjê mã mẽ ijarê.

E ãm ja pix. Kê Pahihti Jejus mẽ akutã nojarêt rãhã ho pa. Ixpê Pawre na pa amã ã ixkapêr nê hã kagà nê awỳr mẽnh anê.

Piremõ Pawre kot Piremõ hwÿr kagà nē mēnh

Pawre na pre kagàja nhîpêx nē hkràmnhwÿ Piremõ hwÿr kumē. Na pre Piremõja amnhîm kām àpênh xwÿnh Onesti japrô. Kàxpore ho haprô nhûm amarî kām àpênh o pa. Tã tanhmã hamaxpêr to nē hkaga nē ma umaj krî hõ hwÿr hprôt nē tēn amûxu nē kamã pa ho pa. Hãmri nē Pawre pumu nē kām amnhî jarē. Pawre arî kēp prēs nē hkrî ho hkrî nhûm Onesti omu nē kām amnhî jarē. Hãmri nhûm Pawre kām Jejus jarē nhûm kuma nē hkôt amnhî xãm kurê kumrêx. Hãmri nhûm Pawre ja hã omu nē hkràmnhwÿ Piremõ mã kagà nhîpêx nē kamã Onesti xyr pē kām kapêr. Hãmri nē hipêx pa nē Onesti mã kugõ nē ma akupÿm õ patrãw Piremõ wÿr kumē nhûm ma mō. Nhûm Pawre kagàja kamã kām kapêr nē kām:

¹ Pa ixkràmnhwÿ Piremõ? Xà amex? Ixpê Pawre na pa awÿr kagà nhîpêx nē kumē. Apê Kris kôt ixtõ hã inhmã akînh. Na ka hte ixpyrà nē Kris mã tanhmã amnhî nhîpêx to ho apa. Ta ot pa awÿr kagàja kamã ixpêr mē. ² Amã nē anhõrkwÿ kamã Tîrtûm kapêr mar kaxyw mē kēp Jejus kwÿ hã mē pikuprõnh xwÿnhjê hwÿr. Nē Kris kôt pahtõx Apti mē Akip wa hwÿr kumē. Akipja na hte mē pahpyrà nē Pahihti Jejus mã tanhmã amnhî nhîpêx to ho pa.

³ Na pa hte mē ato Mēpanhîpêêxà maati Tîrtûm mē Pahihti Jejus Kris wa hwÿr rãhã ho ri ixpa. Kot mēmoj to mē akutã nojarêt rãhã nhûm wa ÿ hã mē ajamakêtkati nē axàmnhîx apa ho apa kaxyw.

Pawre kot Piremõ nhÿ hã hkînh ã harênh

⁴⁻⁵ Na pa pre ajarênh ma Piremõ. Na htem xatã tanhmã inhmã ajarênh to nē ajarênh o:

—Hêxta waa nē. Piremõ na hte amnhî kaxyw Pahihti Jejus Kris kôt hamaxpêr tÿx nē kām mē ixpê Kris kôt hkwyjê piitã hkînh pē tanhmã mē ixto mex to ho ri mē ixkôt pa.

Anhÿr o inhmã ajarê pa mē kuma nē anhÿ hã ixkînh nē ato Tîrtûm wÿr rãhã ho ixpa nē ato hwÿr o:

—Pa Tîrtûm. Na xep hte Piremõ kām akînh tÿx nē akwyjê ho mex rãhã ho pa. ãm hãmri na hte ã mē hipêx anhÿr o pa. ⁶ Na xep mē piitã mē kām tanhmã Jejus kot mē inhnê amnhî nhîpêx to hã harênh o ri mē hkôt pa. Jakamã kêr ka tanhmã mē kot mar xwÿnhjê hkrã hto kē mēhprî hã mar tÿx nē Kris kot tanhmã mē ho mex to hã amnhî tã omu.

Anhÿr o ato kuwÿ. ⁷ Ate Kris kwÿjê ho mex o apa jakamã te ate pa ixto mex pyrãk Piremõ. Na htem anhÿ hã hkînh nē pa. Pa ijaxwÿja ajarênh ma nē anhÿ hã ixkînh tÿx nē jar mē hagjênh xà kamã ixkrî.

*Piremõ kot Onesti kamã ukapri hã
Pawre kot kām karõ
Rõmãn 15.7; Epes 4.31*

⁸ Nã ixte amã mēmoj jarênhja tanhmã kute hkêt. Kot paj ãm amã mēmoj jarê nē hã awÿ. Nom kot paj Kris nhÿ hã amã tanhmã hã karõ hto hkêt nē. ⁹ Kot paj ãm pahte xepên to pahkràmnhwÿ hã hã awÿ. Ra ixwej tÿx nē Kris ã arî mē hagjênh xà kamã ixkrî htã mēmoj tã awÿ ka inhma nē inhmã ho anhÿr japêr ko.

¹⁰ E amã àpênh xwÿnh Onestija na ixte amã harênh kaxyw. Na pre man ixwÿr mō. Ixpê prēs nē ixkrî nhûm ixwÿr mō. Pa omu nē kām Jejus jarē nhûm inhma nē pahpyrà nē amnhî kaxyw hkôt hamaxpêr nē hkôt amnhî xãm. Jakamã te kēp ixkra pyrãk. Hãmri nē ixto ajuta mex o pa. ¹¹ Xep kormã Jejus kôt amnhî xãm kêt ri na pre amã àpênh mex kêt nē. Nē kām kaga nē htÿx ri tanhmã àpênh to ho pa. Tã ra Jejus kôt amnhî xãm hãmri nē katat kôt inhmã àpênh mex o pa. Nē ixto ajuta mex nē. Koja akupÿm amã apê hãmri nē amã àpênh mex nē.

¹² Jakamã ot pa akupÿm awÿr kumē ixkràmnhwÿ. Nom inhmã hapê jakamã koja ma akupÿm mō pa ho ama nē. Tã kot paj akupÿm awÿr kumē. ¹³ Kot jar ixri arîk nē apãnhã tanhmã ixto ajuta hto ho paja na inhmã hprãm. ¹⁴ Jakamã kot kaj amã akupÿn ixwÿr mēnh prãm nē mãmri ixwÿr amē. Nom ixte ja pumunh kêt. Kam nē amã hprãm xà hkôt tanhmã kām akapêr to.

Kām anē kē akuri arīk nē amā àpēnh o pa rỳ akupỹn ixwỳr amē. ¹⁵ Nom konēn. Mãn akupỹm awỳr mōr nē kēp Kris kôt akwỳ hã amā àpēnh mex kaxyw na pre Tĩrtũm ixwỳr kumē nhũm ixwỳr mō nē ixri Jejus kôt amnhĩ xãm nē ixri pa hã mytwrỳ hkwy hapēx pa akupỹm awỳr kumē. ¹⁶ Nom ra kēp amā àpēnh xwỳnh pix kēt mãnēn kēp Kris kôt atōō. Jakamã kot kaj wa atar axpēn kôt Pahihti Jejus kôt tãm amnhĩ nhĩpēx o ri apa. Nom mãnēn kēp ixkràmnhwỳ mex ã inhmã hapēê. ¹⁷ Jakamã kot kaj ixpē Kris kôt akràmnhwỳ hã ijarē hã kot kaj mãnēn inhmã ho mex o apa.

¹⁸ Nē wam amā àpēnh o pata ã mãn pre apē mẽmoj to ahkĩ rỳ akàxpore hkwy ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kàxpore jarēnh to pa amã amnhĩre. ¹⁹ Ixpē Pawre kot paj tanhmã kot ato tewēn toja pãnhã amã amnhĩre. E pa amnhĩ nhĩhkra ho ã amã amnhĩ jarēnh ã kagà anē. Nom ajaxwỳja na ka tanhmã ixto tewēn to Piremō. Na pa pre amã Jejus kot mẽ panē htyk ã harē ka pre inhmar xà hkôt hkôt amnhĩ xãm. Jao ixpyrà nē atĩr tũm nē apa ho apa mã xwỳnhnta pãnhã te ate ixto tewēn pyrāk.

²⁰ E kwa ixkràmnhwỳ. Ixpyrà nē apē Kris kwỳ jakamã kêr ka ixkamã axukapĩ hã inhmã Onesti ho mex nē. Kêr pa ja hã ajarēnh ma nē ixkĩnh nē tãm ijamaxpêr. ²¹ Nà ra ixte apumunh mex kēnã. Kot kaj ixte hã awỳrta kôt hipēx. Ja kaxyw na pa amã kagàja nhĩpēx nē awỳr kumē. Nom kot kaj ãm ja pix ho anhỳr kēt nē. Kot kaj ixte hã awỳrja kôt amnhĩ krã hkôt tanhmã ho mex to. Nà kot kaj ho anē.

Pawre kãm Piremō hwỳr mōr nē omunh prãm ã harēnh

²² Nē Tĩrtũm kot mẽ awỳr inhmēnh kaxyw mẽ ate ixto hwỳr o apa jakamã koja apu tokyx ma mẽ awỳr inhmē. Jakamã kwa kêr ka ixkutēp tanhmã mẽmoj to mex to. Kêr pa mẽmo arĩgro hã mōn awỳr pōj ka ra ixkutēp tanhmã amnhĩ to hpa nē ãm ixpix kãm ajamak o apa.

²³ Nē ota Epasja awỳr hpêr mẽ. Na hte ixpyrà nē Jejus Kris ã mẽ hagjēnh xà kamã kēp prēs nē hkrĩ ho hkrĩ. ²⁴ Nē Makre nē Aristak nē Tēmti nē Rukre mẽ awỳr hpêr

mē. Na htem ixpyrà nē Kris mã tanhmã amnhĩ nhĩpēx to ho pa nom ixrom mẽ kēp prēs kēt.

²⁵ E kē Pahihti Jejus Krisja akutã nojarêt rãhã ho pa. Ta ãm ja pix. Ixpē Pawre na pa amã kagà nē awỳr kumē.

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarênh rax nê tanhmã Jejus jarênh to.

Nê mẽ hkwÿjaja hkwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanâr prãm xaj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tĩrtũm nhõrkwÿ kaàkre hã kagà hto. Nê kaxkwa kamã òrkwÿ mexja nhũm tanhmã hã kagà hto nê mex o òrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepêm Tĩrtũm na pre mẽ panhĩgêtjê hwÿr ÿ hã kapêr jarênh o ri mẽ pa xwÿnhjê rē nhũm mẽ xatã mẽ kãm kapêr jarênh o ri mẽ hkôt pa. Ahpÿnhã tanhmã mẽ kãm kapêr to ho amnhĩrīt o mẽ hkôt pa. Nhũm Tĩrtũm xatã mẽ hkanrēhã mẽ hkra nê mẽ htãmnhwÿjê hwÿr mẽ hkwÿjê rē nhũm mẽ kãm kapêr jarênh o ri mẽ hkôt pa. Nom mẽ kãm kapêr piitã harēnh kurê kumrēx kêt nê. Na prem ãm hkwÿ pix jarē. Tã nhũm hpãnhã mẽ hkwÿjaja wamtajê mÿr pê mẽ hwÿr mra nê axte mẽ kãm hkwÿ jarēnh o ri pa. Jao ra mẽ kãm harēnh jatur xàm mēnh o mō. ²⁻³ Tã nhũm Tĩrtũm Kraja mẽ pahwÿr wrÿ nê mẽ pamã kapêr jarēnh jatur xàm

kumê. Kêp Tĩrtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mãânēn tipxi. Jakamã mẽ pahte pano ho Tĩrtũm pumunh kêt tã Jejus pumunh pê te mẽ pahte Tĩrtũm pumunh pyrãk. Uràk nê kot amnhĩ to rax o mẽ pahpiitã mẽ pajakrenh par. Amnepêm kormã mẽmoj kêt ri nhũm Jejus Tĩrtũm kukwak ri mẽmoj piitã ho kator pa. Tã koja Tĩrtũm nhÿrmã kãm mẽmoj piitã òr pa. Kaxkwa kamã mẽmoj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhĩ tomnuj piitã hpãnhã amnhĩrer par kaxyw mẽ panê ty. Hãmri akupÿm htĩr hãmri nê ma akupÿm kaxkwa hwÿr api. Tĩrtũm xihtÿx o hihtÿx xwÿnhja wÿr akupÿm api. Nê ò krĩ kamã upòk rũm pahi maati hkrĩ xà hã kuri hkrĩ ho hkrĩ. Nê ìhkô hã mẽ pahto amnhĩptàr rãhã ho hkrĩ.

Jejus mẽ Tĩrtũm kapêr o mẽ wrÿk xwÿnhjê jarēnh

⁴⁻⁵ Nê Jejus kot amnhĩ to rax o Tĩrtũm kapêr o mẽ wrÿk xwÿnhjê jakrenh jakamã na pre ã Tĩrtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wrÿk xwÿnhjê jakre.

Mê kot inhmã tanhmã amnhĩ nhĩpêx to ho mẽ pa xwÿnh na mẽ.

No mẽ kurom apê Ixkra kumrēx jakamã amex o ate mẽmoj piitã hakrenh par.

Nê apê pika nhõ xwÿnhjê hwÿr ixte amēnh mã xwÿnh na ka. Nà apê Ixkra kumrēx.

Kot paj jarãhã ixpê anhĩpêêxã hã mẽ piitã mẽ kãm amnhĩ to amnhĩrīt. Pa na ixpê anhĩpêêxã.

Anhÿr o Kra Jejus mã kapêr. Na pre kapêr o mẽ wrÿk xwÿnhjê mã ã kapêr anhÿr kêt nê. Jejus mã pix mã ã kapêr anê.

⁶ Nê koja nhÿrmã akupÿn mẽ pahwÿr Kra mēnh kaxyw hãmri nê kapêr o mẽ wrÿk xwÿnhjê mã kãm:

E ota Ixkrata. Ixkra kumrēx na. Kot amnhĩ to rax o mẽ piitã mẽ hakrenh par.

Jakamã kêr ka mẽ apiitã kutã aròròk nê kãm mex o mex ã harê.

Anhÿr o mẽ kãm kapêr. ⁷ Nê kapêr o mẽ wryk xwÿnhjê na pre axtem tanhmã mẽ harênh to nê mẽ harênh o:

Ixkapêr o mẽ wryk xwÿnhjaja na pa hte nhÿhÿm mẽ kurê nhÿm htem inhmar xà hkôt ma nhÿhÿm mra nê inhmã tanhmã amnhĩ nhĩpêx to.

Te ixte ma nhÿhÿm kôk nê kuwyja mênh nhÿm ixkapêr kôt nhÿhÿm môrja pyrâk.

Anhÿr o mẽ harê. ⁸ No ã Krata jarênh anhÿr kêt nê. Na pre tanhmã kãm kapêr to nê amnhĩ pyrã nê kêp Tirtÿm ã harê nê kãm:

Pa Tirtÿm? E ka kot kaj mẽ ho amnhĩptâr rãhã ho akrĩ. Nê akatãt kôt mẽ ho amnhĩptã.

⁹ Koja mẽ tãm amnhĩ nhĩpêx ka ja hã mẽ omu nhÿm ja amã mex nê.

No koja mẽ tanhmã amnhĩ tomnuj to ka ja hã mẽ omu nhÿm ja apê omnuj nê. Mẽ kot tanhmã amnhĩ tomnuj to ho paja na omnuj tÿx.

Tã ate inhmã hprãm xà hkôt amnhĩ nhĩpêx jakamã na pa mẽ kaxyw axãm ka akĩnh kãm mẽ ho amnhĩptã.

Ixpê anhõ Tirtÿm na pa ã amã ixkapêr anê. Anê.

¹⁰ Hãmri nê kãm:

Pa Pahihti. Nã amnepêm kormã mẽmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhĩ nhĩpêx anê.

¹¹ Tã nom koja nhÿrmã hamê wa hapêx pa. ãm kaxipix kot kaj kurom arĩ arãhãã nê aa ajapêx kêt nê.

Kaxkwa nê pika koja wa nhÿrmã te ixkre hã pô htÿm kot amnhĩ nhĩpêx pyrâk.

¹² Kot kaj wa hipêx o te mẽ kot ixkre nê pô htÿm mã hikranh par nê hpãnhã hã nyw janhõr pyrâk.

Jao pika nê kaxkwa htÿm o ajapêx pa nê hpãnhã nyw nhĩpêx. Kaxkwa nyw nhĩpêx nê pika nyw nhĩpêx.

Nom kot kaj pika nê kaxkwa tÿmta pyrã nê aa awej nê axirerek kêt nê.

Kot kaj arĩ anyw nê axihtÿx rãhã apa ho apa nê aa ajapêx kêt nê. Arãhã atĩr tÿm nê apa ho apa xwÿnh na ka.

¹³ E jar inhĩhkô hã nhÿ nê inhmã mẽ ho amnhĩptâr o akrĩ.

Kot paj mẽ kãm akurê xwÿnhjê pynênh pa nê man awÿr mẽ o mra nê anhĩhkram mẽ haxàr pa. Anê.

ã na pre Tirtÿmja Kra Jejus mã kapêr anê. No kapêr o mẽ wryk xwÿnhjê mã ã kapêr anhÿr kêt nê.

¹⁴ E kot paj hpãnhã ixprĩ hã mẽ amã Tirtÿm kapêr o mẽ wryk xwÿnhjê jarê ka mẽ inhma. Tirtÿm mã na htem tanhmã amnhĩ nhĩpêx to ho pa. Na hte nhÿrmã kuri mẽ htĩr tÿm nê mẽ pa mã xwÿnhjê hwÿr mẽ kurê nhÿm mẽ ma mẽ hwÿr wry nê tanhmã mẽ ho ajuta hto ho pa. Na htem ã amnhĩ nhĩpêx anhÿr o pa.

2

Mẽ pahte Jejus kaga hkêt ã mẽ pamã karõ

¹ Tã ã Tirtÿmja Kra kot amnhĩ to rax o kapêr o mẽ wryk xwÿnhjê jakrenh ã harênh kot anhÿr jakamã kwa kêr pu mẽ kapêr mar tÿx rãhã nê hkôt pix mã amnhĩ nhĩpêx o papa. Kot pu mẽ ho anhÿr kêt hãmri nê gaa nê hkaga. ² Na pre Tirtÿm kapêr o mẽ wryk xwÿnhjaja amnepê mã mẽ panhĩgêjtê hwÿr wry nê Tirtÿm nhÿ hã mẽ kot tanhmã amnhĩ nhĩpêx to ho pa hã mẽ kãm karõ nê ma akupÿm api. Nê katãt kôt ri mẽ kãm Tirtÿm kapêr jarênh o pa. Hãmri nhÿm mẽ kot hkôt amnhĩ nhĩpêx nê mar mex xwÿnhjaja nhÿm mẽmoj mẽ kãm mex nê. No nhÿm mẽ kot mar nê ãm mar xwÿnhjaja koja mẽmoj mẽ kêp omnuj nê. ³ Koja nhÿrmã mẽmoj mẽ kêp omnuj tÿx kumrêx nhÿm mẽ tee ri amnhĩ tã omu nê tee ri kêp amnhĩptâr prãm kaprÿ nê mex kêt nê pa. Nom mẽ kot Tirtÿm kapêr mar tÿx xwÿnhjaja koja mẽmoj mẽ kãm mex o mex. Koja Tirtÿm amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nhÿm mẽ kuri htĩr tÿm nê mex rãhã nê pa ho pa. Na pre Pahihti Jejus mẽ kot kapêr mar o kuhê xwÿnhjê kumrêx mã ã ja jarênh anê nê mẽ kãm:

—Nã kot kaj mẽ amnhĩ kaxyw inhmã aja-maxpêr nhÿm Tirtÿm ixtã mẽ apumu nê mẽ anê mẽ ate amnhĩ tomnuj piitã ho hapêx pa nê axte kãm hamaxpêr kêt nê. Anê.

Hãmri nhÿm mẽ kot kapêr mar nê hkôt mẽ pa ho mẽ pa nê xwÿnhjaja mar tÿx nê

amnhĩ xô ri mẽ pamã harênh o ri pa. Nê mẽ pamã:

—Nà ãm hãmri. Nà ã ja jarênh kot anhÿr. Anê.

⁴ Hãmri nê mẽ pamã aa mẽ pahte mẽmoj pumunh kêt kwÿ ho anhÿr o ri mẽ pahkôt pa. Tĩrtũm Karõ kot ja kaxyw mẽ ho mẽ àhpumunh tÿx jakamã nhũm mẽ ÿ hã ahpÿnhã tanhmã mẽ pamã amnhĩ nhĩpêx to ho pa. Mẽ pahte ja hã mẽ omunh nê kamã pano pyma kaxyw. Nê ã mẽ pajamaxpêr anê nê pajamaxpêr o:

—Nà ãm hãmri na mẽ pamã ã Jejus jarênh anê nê ÿ hã ã amnhĩ nhĩpêx anhÿr o pa.

Anhÿr o pajamaxpêr kaxyw na prem ã mẽ pahkôt amnhĩ nhĩpêx anhÿr o pa.

Mẽ pahpê Jejus tõ nê htõx ã mẽ pajarênh Juãw 1.14; Rõmãn 8.3-4; Piriapos 2.5-11; Korosê 2.9; Wam Juãw 4.2

⁵ Nê na pre Tĩrtũm amnhĩ kukamã tanhmã amnhĩ jarênh to nê nhÿrmã kot akupÿm mẽmoj piitã ho nyw nê tãm mẽmoj piitã ho amnhĩptar o pa hã amnhĩ jarê. No na pre kapêr o mẽ wrÿk xwÿnhjê mã ã mẽ kot amnhĩ nhĩpêx anhÿr ã mẽ kãm karõ hkêt nê. Kojã jajaja mẽ pahto amnhĩptar o pa hkêt nê. ⁶ Tĩrtũm kapêr ã kagã htũm kot ja jarênh kot:

Kwa Tĩrtũm. Nà ãm hãmri na ka hte pika ja kamã ri mẽ ixpa xwÿnhjê jamãr mex rãhã ho apa.

Akĩnhã amarĩ ri mẽ ixpa xwÿnh tã amã mẽ ijapêê.

Nê mẽ ixkutã anojarêr rãhã ho apa.

⁷ Na ka hte tanhmã mẽ inhĩpêx to pa mẽ te mẽ ixpê akapêr o mẽ wrÿk xwÿnhjê pyrãk.

Jao mẽ urãk nê akukwak ri mẽ inhmex nê ixpa ho ixpa.

Mẽ urãn mẽ ixàhpumunh nê ixihitÿx kêt tã mẽ inhmex nê ixpa.

⁸ Na ka pre ra ate mẽmoj to akator xwÿnh piitã mẽ inhĩhkram haxã.

Nà ãm hãmri na ka pre ã mẽ inhĩpêx anê Tĩrtũm. Amex o amex. Anê.

Na pre ra mẽmoj piitã mẽ panhĩhkram haxã. Pika nê kaxkwa nê kapêr o mẽ wrÿk xwÿnhjaja nê mẽkarõmnuti nê kot mẽmoj piitã hipêxja nhũm mẽ panhĩhkram haxãr pa. Mẽ pahte ìhkô hã ho amnhĩptar o

papa kaxyw. No na pu mẽ kormã piitã ho amnhĩptar kêt nê. ⁹ No kêt Jejusja na Tĩrtũm mẽ pakurom ìhkram mẽmoj piitã haxãr par kumrêx. Kormã pika ja kamã ri pare ri na pre tanhmã amnhĩ nhĩpêx to nê Tĩrtũm kapêr o mẽ wrÿk xwÿnhjê hkĩnhã te amnhĩ to grire pyrã nê amnhĩ xà htÿx kamã hamak kãm ty. Tĩrtũm kãm mẽ pahto mex prãm xàj ã mẽ pahpiitã mẽ panê htyk anê. Tã nhũm Tĩrtũm akupÿm ho htĩr nê akupÿm amnhĩ wÿr ho api nê kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anê nhũm Tĩrtũm ja hã omu nê kukwak ri mẽ pahto mex nê.

¹⁰ Nê Tĩrtũm kot mẽmoj piitã ho kator jakamã mẽmoj piitã õ na. Na pre mẽ pakukamã hamaxpêr o:

—Inhmã ixkra xohtõ hprãm. Kot paj nhÿrmã man amnhĩ wÿr mẽ ho api kê mẽ ixri mex rãhã nê pa ho pa. Nà kot paj ã mẽ hipêx anê. Nê Ixkra Jejus kojã kêp mẽ õ Pahihti. Kojã mẽ urãk nê mẽmoj punuj pumunh o pa hãmri nê à htÿx kamã hamak o kêp mẽ õ Pahihti mã tãm. Anê.

¹¹ Na hte Jejus mẽ panê mẽ pahte amnhĩ tomnuj rê nê hpãnhã mẽ pamã mẽ pahte amnhĩ nhĩpêx nyw jagjê nhũm Tĩrtũm ja hã mẽ pahpumunh kôt mẽ pahto hkra. Kêp Jejus Nhĩpêxã nê kêp Mẽpanhĩpêxã maati jakamã nhũm Jejusja mẽ pahpê htõ nê mẽ pahpê htõx ã mẽ pajarê nê mẽ panhÿ hã hkĩnh nê.

¹² Tĩrtũm kapêr ã kagã htũm ã mẽ pajarênh kot anhÿr. Kamã Jejusja Mẽpanhĩpêxã maati mã mẽ pajarênh kot: Kojã ixtõ nê ixtõxjaja akapêr mar kaxyw axpên wÿr akuprõ pa ma mẽ hkôt mra nê mẽ kãm akapêr jarê nê mẽ ìhkô hã amex ã gre. Anê.

¹³ Hãmri nê kãm:

Kot paj amnhĩ kaxyw akôt pix mã ijamaxpêr mex o ri ixpa. Anê.

Hãmri nê hpãnhã kãm:

Ot pa akrajê hkôt ri ixpa ho ixpa.

Ka na ka pre mẽ kêp ixtõ nê ixtõx kaxyw inhmã mẽ agõ.

Kojã mẽ ixpyrã nê amnhĩ kaxyw amã hamaxpêr rãhã ho pa Tĩrtũm. Anê.

¹⁴ Nê mẽ pahpê pika nhõ xwÿnhjaja na pu htem ãm ri panhĩ pix ã papa. Nê panhĩ kamã pahkamrõ hã ri papa. Jakamã na pre

Jejus kot mē panē htyk kaxyw mē pahwÿr wrÿ nē mē pahpyrà nē ĩ ho mē pakamã kato. Tã mēmo kaxyw na pre ĩ ho ĩ nē mē pahkôt pa? Nã ĩ ho htyk o Satanasti pē hihtÿx xà ho hapêx par kaxyw na pre ã amnhĩ nhĩpêx anē. Satanasti kēp mē kot amnhĩ tomnuj xwÿnhjê hpãm nē kēp mē htyk xwÿnhjê hpãm. ¹⁵ Jakamã na hte kot mē pahtã ĩhkra pikamÿr pyrãk o mē panhĩpêx pu mē ŷ hã pamã pahtyk pyma nē ri papa. Tã ra Jejus kot mē pahwÿr wrÿk nē te kēp mē papytãr pyrãk o mē panhĩpêx jakamã pu mē tee ri pahtyk kukamã pajamaxpêr o ri pamã ma ho papa hkêt nē.

¹⁶ Nē Tĩrtũm kapêr o mē wrÿk xwÿnhjê ho mex kaxyw na pre Jejus pika hwÿr wrÿk kêt nē. Mē panhĩgêt finat Apraãw pyrã nē mē panhĩ ho panhĩ xwÿnhjê ho mex kaxyw na pre wrÿ. ¹⁷ Ijaew nhõ patrejaja na pre htem mē kot amnhĩ tomnuj mÿrapê mē hpãnhã Tĩrtũm mã mry hwÿ pa nē hkamrõ kapĩ nē mē ho Tĩrtũm wÿ. Kot hã mē omunh nē mē mex ã mē harênh kaxyw. Tã nhũm Jejus wrÿ nē mēmo mryta pyrã nē ã mē panē hkamrõ pikapĩr anē. Kaxyw na pre mē pahtõ maatija mē pahwÿr ĩ ho ĩ nē wrÿ nē mē pahpyrà nē ni nhõhy rũm kato. Jao kēp mē pahto Tĩrtũm wÿr xwÿnh maati. Na pre Tĩrtũm kãm hprãm xà hkôt mē panē mē pahte amnhĩ tomnuj pãnhã amnhĩrer pa. Tã kot mē pahpyrà nē mēmoj punuj pumunh nē amnhĩ xà htÿx kamã hamak o pa jakamã kēp mē pakamã ukapĩr xwÿnh ã pixi mex na. ¹⁸ Kormã htyk kêt ri na pre mē pahpyrà nē omnuj nē ri pa. Nhũm mēkarõmnuti nhõ pahi kot tanhmã amnhĩ tomnuj to hprãm xàj tee ri hkôt kãm ahkrox o pa hkaprÿ nhũm hkôt amnhĩ nhĩpêx kêt nē amnhĩ nē ho axtem nē. Jakamã koja Satanastija urãk nē tanhmã mē panhĩpêx to nhũm Jejus mē pahtã omu nē amnhĩ pyrã nē tanhmã kēp mē panhĩpêx to pu mē ŷ hã kutã amnhĩ to htÿx nē papa.

3

Jejus kot amnhĩ to rax o Mojes jakrenh ã harênh

Juãw 1.17-18

¹ E ixkrãmnhwÿjaja. Ra Tĩrtũm kot mē pahte kapêr mar nē tãm amnhĩ nhĩpêx

o ri papa kaxyw mē pahto hkra jakamã kwa kêr ka mē Jejus kot tanhmã mē pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mē pahwÿr kumē nhũm mē pahwÿr wrÿ nē Tĩrtũm kapêr o mē pajahkre ho ri mē pahkôt pa. Nē te kēp mē panhõ patre pyrã nē mē pahto Tĩrtũm wÿr o pa. ² Na pre Tĩrtũm finat Mojes kwÿ kaxyw Mojesja xãm nhũm kãm hprãm xà hkôt tanhmã mē hipêx to ho pa. Tã nhũm hpãnhã mē pakaxyw Kra Jejusja xãm nhũm Mojes pyrã nē Tĩrtũm kãm hprãm xà hkôt pix mã tanhmã mē panhĩpêx to ho pa. Hamē na pre wa Tĩrtũm jamaxpêr xà hkôt tanhmã kãm mē panhĩpêx to ho pa.

³ Koja mēhõ amnhĩm ixkre mex nhĩpêx nē hipêx pa nhũm hkwyjaja hwÿr mra nē omu nē mex kumrêx ã harê. Nom kot hipêx xwÿnhhta ãhpumunh xà hkôt hipêx jakamã tãm na mex o kot ixkreta jakrenh. Ja pyrã nē finat Mojes kot amnhĩ to rax tã nhũm Jejus kot amnhĩ to rax o kot hakrenh. Mojes te kēp ixkre nhĩpêxta pyrãk no Jejus te kēp ixkre nhĩpêx xwÿnhhta pyrãk jakamã kot amnhĩ to rax o kot Mojes jakrenh.

⁴ Nē mē kot ahpÿnhã amnhĩ krã hkôt tanhmã ixkre nhĩpêx to jakamã kot hipêx xwÿnhhta na mex o ixkreja jakrenh. Tã ja pyrã nē Tĩrtũm kot mēmoj piitã ho kator jakamã kot amnhĩ to rax o kot mēmoj piitã ho kator xwÿnh jakrenh par.

⁵ Nē finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nē ma kãm hkwyjê piitã hkôt mē kãm kapêr jarênh o ri pa. Tĩrtũm tanhmã kot mē kãm kapêr tota kukamã nhũm mē kãm harênh o mē hkôt pa. No ãm Tĩrtũm mã tanhmã amnhĩ nhĩpêx to ho hpa xwÿnh pix na pre.

⁶ Nē Kris haxwÿja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kēp Tĩrtũm Kra kumrêx jakamã kurom kēp mē panhõ Pahihti kumrêx. Tã kwa kêr pu mē kãm hprãm xà hkôt pix mã tanhmã kãm amnhĩ nhĩpêx to ho ri papa. Mē kot hã tanhmã mē panhĩpêx to htã pu mē ŷ hã mē kutã amnhĩ to htÿx nē papa nē pajamaxpêr o:

—Nã ixpunuj nē ixpa htã kot paj ixpunuj rãhã ixpa ho ixpa hkêt nē. Koja nhÿrmã

Tirtûm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nà ja inhmã hprãm tÿx kumrêx.

Anhÿr o amnhĩ kukamã pajamaxpêr o papa.

Mê pahte Tirtûm kaga hkêt ã mê pamã karõ

Wam Korît 10.1-11; Jutre 5

⁷⁻⁸ Amnepêm na pre mēhōja tanhmã Tirtûm Karõ nhÿ hã kapêr to nê kapêr o: E kêr ka mê Tirtûm kapêr mar tÿx o apa.

No ama nê ãm ama nê ri hã apa hkêt nê. Rÿ kapêr pê akrã hihtÿx o apa hkêt nê.

Mê akukamã mê anhîgêtjaja na prem ã amnhĩ nhîpêx anê nê Tirtûm kapêr pê hkrã hihtÿx o pa. Kapôt ã Mojes kôt mê pata ã na prem kãm Tirtûm kapêr mar prãm kêt nê. Nê tee ri amnhĩ kukamã hamaxpêr nê akupÿm Ejit wÿr hkrã nê axpên mã: “Kwa na pu mê ra pahpunuj tÿx nê papa nhÿm Tirtûm ãm ja hã mê pahpumu nê tanhmã mê pahto mex to hkêt nê. Mãn ra mê pahkaga nà? E kwa pu mê awjanã nê ma akupÿm Ejit wÿr mãn papa.” Anê.

⁹⁻¹⁰ Na prem ã axpên mã kapêr anhÿr o ri pa hã amgrã pê 40.

Tirtûm xatã kot tanhmã mê ho mex to nhÿm mê kot amnhĩ tã omunh tã ãm omu nê htÿx ri amnhĩ hkrã hkôt pa.

Nhÿm tee ri amnhĩ tã mê omu nê mê kamã gryk nê.

Hãmri nê hamaxpêr o: “Nà pêr mê hamaxpêr kot mê hã hkwy jêt kêt kumrêx. Te mê hamak kre hkêt pyrã nê ixkapêr mar kêt nê.” Anhÿr o hamaxpêr.

¹¹ Hãmri nê mê kãm: “E mê inhma. ã mê ate amnhĩ nhîpêx anhÿrja mÿrapê kot kaj mê ma ixte mê amã pika mex nhôr mã xwÿnhta wÿr apa hkêt nê.” Anhÿr o mê kãm kapêr. Anê.

ã mēhōja Tirtûm Karõ nhÿ hã te Tirtûm tãm kot mê kãm kapêr pyrãk o mê harēnh anê.

¹² Jakamã kwa mê okora ixkrãmnhwÿjaja. Kêr ka mê amnhĩ to mex o apa. Tirtûm kêp Mēpahpãm ã pixi mex tã kot kaj mê tanhmã ajamaxpêr punuj to rÿ amnhĩ kaxyw hkôt ajamaxpêr kêt hãmri nê te ate amnhĩ katut kôt ãm pyrãk o hipêx nê hkaga. Kwa mê ã

amnhĩ nhîpêx anhÿr kêt nê. ¹³ Kêt mê Kris kôt axpên to axihtÿx o ri apa. Nê apkati mê ã axpên nhîpêx anhÿr rãhã nê. Kot kaj mê anhÿr kêt hãmri nê mê amã Tirtûm kapêr mar prãm kêt ã amnhĩ to amnhîrît. Jao tanhmã amnhĩ tomnuj to ho ri apa nê atÿx ajamaxpêr o: —Nà ixte ã amnhĩ tomnuj anhÿr tã nhÿm Tirtûm ja hã ixpumu nê ãm hã ixpumu.

Anhÿr o ajamaxpêr japêr. Rÿ mê ajamaxpêr o:

—Nà na pa hte ã amnhĩ tomnuj anê nhÿm Tirtûm ja hã ixpumu nhÿm ja kãm mex nê.

Anhÿr o ajamaxpêr japêr. ¹⁴ Kwa mê ri ã ajamaxpêr anhÿr kêt nê. Amnepê mã mê pahte Kris kôt amnhĩ xunhwÿr nhÿm kot mê pahto hkrata ã na pu prem amnhĩ kaxyw hkôt pajamaxpêr o papa. Tã kêr pu mê arĩ ã amnhĩ nhîpêx anhÿr tÿx o papa rãhã ty. ¹⁵ Tirtûm kapêr ã kagã htÿm kot ja jarēnh kot:

E kêr ka mê Tirtûm kapêr ma nê mar tÿx nê.

No ama nê ãm mar nê ri hã apa hkêt nê.

Rÿ mê kot hkaga xwÿnhjê pyrã nê kêp akrã hihtÿx kêt nê. Anê.

¹⁶ Mê panhîgêtjaja na prem Mojes kôt pika pê Ejit rÿm kato nê hkînh nê ma kapôt ã kormã pika mex wÿr pa. Nom Tirtûm kapêr mar nê hkôt amnhĩ nhîpêx rãhã hkêt nê. Na prem kuma nê hkôt amnhĩ nhîpêx o hã apkati grêre htã ra mēmoj nhÿ hã omnuj nê pa hã amnhĩ pumu nê tee ri amnhĩ kukamã hamaxpêr. ¹⁷ Jao xatã kapêr nhîrôp kuhê nê amnhĩ hkrã hkôt pix mã amnhĩ nhîpêx o pa ho ra hã amgrã pê 40. Hãmri nhÿm tee ri amnhĩ tã mê omu nhÿm ja kêp omnuj nê. Jakamã nhÿm mê piitã kapôt ã ri pa nê gaa nê pikaprãr pa. ¹⁸ Mê kot kapêr mar kêt jakamã nhÿm mê kãm:

—Nà ã mê ate amnhĩ nhîpêx anhÿr o ri apaja mÿrapê kot kaj mê ixte mê amã mê amex nhôr mã xwÿnhta wÿr apa hkêt nê. Anê.

¹⁹ Tã mê kot amnhĩ kaxyw Tirtûm kôt hamaxpêr o pa hkêt jakamã na prem pika mexta wÿr hpôx kêt rãhã pikaprãr pa. Nhÿm mê hkra nê mê htãmnhwÿjê pixjaja na prem mê mÿr pê hwÿr pøj nê kamã pa.

4

Mê pahte Tirtûm kukwak ri pajamakêtkati nê ri papa hã mê pajarênh

¹ Mê pahte Tirtûm kukwak ri pajamakêtkati nê ri papa ho papaja Tirtûm kãm hprãm jakamã kwa kêr pu mê amnhî pumunh mex o papa. Nê wam mê panhîgêt rom Tirtûm kapêr mar tỳx nê hkôt mân kêt ri amnhî nhîpêx mex rãhã nê. Kêr pu mê kurom mê pajamak kãm amnhî krit xà hã pika mexta wỳr pôj. ² Mê kot mê pahpyrà nê Tirtûm kapêr mar mex tã na htem amnhî kaxyw hkôt hamaxpêr kêt nê. Te mê kot mar kêt pyræk. ³ ãm mê kot amnhî kaxyw Kris mã hamaxpêr xwỳnh pixjaja na htem kukwak ri hamakêtkati nê ri pa ho pa. Amnepê mã mêmoy piitã hkêt ri na pre Tirtûm mêmoy piitã ho kator pa hãmri nhũm apkati nhũm axte mêmoy tã àpênh kêt nê. ãm õ krĩ kamã arĩ hamakêtkati nê hkòkòt o hkrĩ. Tã mê pahte uræk nê pajamakêtkati nê papa ho papaja na kãm hprãm. No wam ri mê pa xwỳnhjaja mê kot amnhî tomnuj mỳrapê na pre Tirtûm mê kot urà nê hamakêtkati nê paja nê mê hkurê. Kapêr ã kagà htũm kot harênh kot: Na pre Tirtûm tee ri amnhî tã mê kot hipêx ã mê omu nhũm ja kêp omnuj nê. Hãmri nhũm mê kãm: “Nà kot kaj mê ixkukwak ri axàmnhîx ajamakêtkati nê apa hkêt nê.” Anê.

⁴ Nê kot harênh kot:

Na pre Tirtûm àpênh ã arĩgro kêp 6 hãmri nhũm arĩgro pê 7ta ã nhũm axte mêmoy tã àpênh kêt nê. Na pre arĩ hkòkòt o nhỹ.

Arĩgro pê 7 ã arĩ hamakêtkati nê hkòkòt o nhỹ. Anê.

⁵ Nê mê kot kapêr mar nê ãm mar xwỳnhjê jarênh kot:

Kot kaj mê aa ixkukwak ri axàmnhîx nê ajamakêtkati nê apa hkêt nê. Anê.

⁶ Mê panhîgêjtaja kot amnhî kaxyw Tirtûm kôt hamaxpêr kêt jakamã na prem hamakêtkati nê ri pa hkêt nê. Tã mê papajaja na Tirtûm arĩ kãm mê paxàmnhîx nê pajamakêtkati nê papa hprãm. ⁷ Amnepêm Ijaew Tirtûm kôt hamaxpêr kêt jakamã na prem kapôt ã pikaprâr pa. Hãmri nhũm amgrà xohtô nê hapêx nhũm Tirtûm

mê hkanrêhã mê htàmnhwỳjê hõ pê finat Tawija mã kapêr nhũm kuma nê mê pamã tanhmã kapêr tota ã kagà nê hã kagà kot:

Kwa kêr ka ixkapêr ma nê mar tỳx nê.

No mê anhîgêjtjê pyrà nê akrã hihtỳx ho inhma nê ãm inhmar kêt nê. Anê.

Na pa pre ra mê amã ã ja jarênh anê.

⁸ Na pre finat Jojueja finat Mojes mỳr pê ma pika pê Kanaã hwỳr mê hkanrêhã mê hkrajê o pa nê hwỳr mê o pôj. Tã nhũm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhî nhîpêx anhỳr ronhỳx Tirtûm axte mê kãm mê hamakêtkati nê mê hamak kãm amnhî krit nê mê pata hkukamã harênh kêt nê.

⁹ Nom mê pahte kukwak ri pajamakêtkati nê pajamak kãm amnhî krit nê ri papa ho papaja na Tirtûm arĩ kãm hprãm. ¹⁰ Na pre arĩgro pê 6ja ã mêmoy piitã ho kator pa nhũm apkati nhũm hamakêtkati nê hkòkòt o nhỹ. Tã kot puj mê pahpê hkrajaja amnhî to kuwỳ nhũm tanhmã mê pahkrã hto pu mê kukwak ri uræk nê paxàmnhîx nê pajamakêtkati nê papa ho papa. Te Tirtûm àpênh pa nhũm apkati nhũm hamakêtkati nê hkòkòt o yrta pyræk. ¹¹ Jakamã kwa kêr pu mê amnhî to kuwỳ kê ã mê panhîpêx anê pu mê uræk nê ã amnhî nhîpêx anhỳr rãhã ho papa. Nom kot pu mê pahkwỳ Ijaewjê pyrà nê kapêr kwỳm amnhî nhîpêx o papa hãmri nê mê urà nê paxàmnhîx pajamakêtkati nê papa hkêt nê.

Tirtûm kapêr te kot wapo xwa gix pyræk ã harênh

¹² Nê Tirtûm kapêrja te ì ho tanhmã kot mêmoy to kaxyw hihtỳx pyræk. Nê te wapo xwa gix pyræk. Koja mêmõ õ wapo xwa mex nê ho mêmoy jakàr mex nê. Ho mry hi jakàr mex pê kaxwỳnh kãm hi kanhĩn o amnhîrĩt. Ja pyrà nê na hte Tirtûm kapêr mê pajamaxpêr o amnhîrĩt nê mex ã harê rỳ omnuj ã harê.

¹³ Nê na htem Tirtûm pê mêmoy to pimxur kêt nê. Na hte hprĩ hã mêmoy piitã omunh pa. Nê mê pajamaxpêr kôt mê pahpumunh pa. Na pu htem ã kot mêmoy piitã omunh par anhỳr xwỳnhja noo mã tanhmã amnhî nhîpêx to rãhã ho papa.

Jejus kêp mē panhō patre maati hã harēnh

Eprêw 10.19-25; Wam Juãw 2.1-2

¹⁴ Nē Ijaew nhō patrejaja na pre htem Tirtūm mā amnhī jarēnh xà hã ixkre hwýr agjê nē kamā mē ho Tirtūm wýr o pa. Ja pyrà nē na pre ra Jejus Tirtūm nhō krī hwýr api nē kamā mē pahto hwýr o hkrī. Kêp Kra kumrêx jakamã kêp mē pahto Tirtūm wýr xwýnh maati. Jakamã kwa kêr pu mē amnhī kaxyw hkôt pajamaxpêr týt rãhã ho papa. ¹⁵ Satanasti na pre te kot mē panhīpêx pyrãk o Jejus nhīpêx. Nē tee ri kot tanhmã kãm kapêr to nhūm kot mar nē tanhmã amnhī tomnuj to hprãm xà ãm ri kãm ahkrox kaprýt nhūm kutã amnhī to htýt nē hkôt amnhī nhīpêx kêt nē. Tã kot Satanasti kot amnhī nhīpêx ã omunh mex jakamã na hte kêp mē pahtãnopxar mex o pa. Kot mē paxirerek kôt mē pahpumunh mex. ¹⁶ Jakamã kwa kêr pu mē amnhī tã kamã pahpijaãm kêt kãm paxãmnhīx ri amnhī to hwýr o papa. Kêp mē pakutã nojarêt xwýnh nē kêp mē pakamã ukaprī xwýnh jakamã kêr pu mē tee ri mēmoj tã amnhī pumu nē amnhī to hwýr kurê kumrêx. Hãmri nē ý hã paxãmnhīx nē pajamakêtkati nē ri papa.

5

¹ Nē mē panhō patre maati Jejusja Tirtūm na pre mē pakaxyw ãm. Kêp mē pahkwý hã mē pakaxyw ãm nhūm hte mē pahto Tirtūm wýr o pa. Nē kãm mē pahkính xà nhōr o pa. Kot ja hã mē pahpumunh nē mē pahte kapêr kwým tanhmã amnhī nhīpêx to ho papa hã mē pakamã gryk o hapêx tokyx anhýr kaxyw.

² Mē panhīgêjtaja na pre htem mē ò patre maati hwýr mra nē kãm tanhmã amnhī tomnuj to hã amnhī jarē nhūm mē kuma nē mē kamã ukaprī nē. Mē urà nē kormã kot Tirtūm kôt amnhī nhīpêx totuj anhýr jakamã na pre mē kot tanhmã amnhī jarēnh toja ma nē mē kamã ukaprī nē.

³ Hãmri nē mē hpãnhã Tirtūm mã mēmoj gō nē mããnēn amnhī pãnhã kãm mēmoj gō. Mē urak nē kot amnhī tomnuj o paja mýrapê amnhī pãnhã kãm mēmoj gō. ⁴ No na pre hte patrejaja amnhī krã hkôt kêp patre maati kaxyw amnhī xunhwýr kêt nē. Tirtūm kot

mē kaxyw mē unhwýr jakamã na pre mē kaxyw finat Arãwja xãm nhūm kêp mē ò patre maati hã mē ho Tirtūm wýr o pa.

⁵ Nē Kris haxwýja kêp mē panhō pahi maati hã tãm kot amnhī xãm kêt. Tirtūm na pre mē pakaxyw ãm nē tanhmã kãm kapêr to nē kãm:

Nà apê Ixkra na ka.

Kot paj jarãhã ixpê Anhīpêêxã hã mē kãm amnhī jarē. Anê.

⁶ Nē hpãnhã kãm:

Kot kaj Mekijetek pyrã nē apê patre maati hã mē ho ixwýr rãhã ho ri apa. Anê.

⁷ Jejus kormã pika ja kamã pa ri na pre amnhī to Tirtūm wýr rãhã ho pa. Tõhã hkaprī nē tee ri mēmoj tã amnhī pumu nē amnhī to kuwý. Nē tee ri mē kot hpírta kukamã hamaxpêr nē mýr kãm amnhī to kuwý. Kop apu Tirtūm kãm mē kot kêp hpír prãm kêt ronhýx pre tanhmã nē mē kãm hkurê xwýnhjê ho nhūm mē hpír kêt nē. Jakamã nhūm pre ã amnhī to hwýr anê. No ãm Tirtūm kãm prãm xà hkôt kãm amnhī nhīpêx prãm jakamã nhūm kuma no ãm tanhmã nē mē ho hkêt nhūm prem kupī. ⁸ Kêp Tirtūm Kra kumrêx tã amnhī xà htýt kãm hamak kãm ty. Jao Tirtūm kãm hprãm xà hkôt amnhī nhīpêx ã amnhī pumunh mex nē. ⁹ Na pre amnhī xà htýt kãm hamak o amnhī mex o amnhī mex ã mē kãm amnhī to amnhírít. Jakamã na hte mē kot kapêr kôt ri amnhī nhīpêx o mē pa xwýnhjê mã mē kot amnhī nhīpêx nyw jagjê nē nhýrmã Tirtūm mē wa kuri mē htír tūm nē mē pa mã xwýnhjê hã mē harê.

¹⁰ Jakamã na pre Tirtūm Mekijetek pyrã nē kêp patre maati kaxyw ãm.

Mē pahte Kris kaga nē mē pahkurê

Wam Korít 3.1-2, 13.11, 14.20; Epes 4.11-16

¹¹ Nē Jejus kêp mē pahto Tirtūm wýr xwýnh maati hã harēnhja inhmã ixprī hã mē amã harēnh par prãm tã ka mē kormã inhmar týt kêt nē. Pa tee ri ixprī hã mē amã harēnh kaprýt. Te mē amã mar prãm kêt o amör pyrãk. ¹² Amnepê mã mē ate Kris kôt amnhī xunhwýr nē kapêr mar týt tã kormã nhãm amnhī xô ri ho amnhī kwýjê jahkre ho ri apa hkêt nē. Te mē ate hã ano hkêt pyrãk jakamã na pa hte

arĩ mẽ amã kapêr kot amnhĩrĩt mex xwýnh kwý ho mẽ ajahkre ho pa. No kot amnhĩrĩt mex kêt xwýnh o mẽ ajahkre hkêt nê. Te mẽ hkaràre kot amnhĩ nhĩpêx pyrãk o na ka htem amnhĩ nhĩpêx o apa. Na hte mẽ hkaràre mẽõ mex kur kêt nê. ãm kormã katorxã hkã pix kaõ. Ja pyrã nê ãm Tĩrtũm kapêr kot amnhĩrĩt mex xwýnhhta pix na ka mẽ mar tỳx o apa nom kapêr kot amnhĩrĩt mex kêt xwýnhja ka mẽ mar mex kêt nê.

¹³ Nê mẽ hkaràre kormã Tĩrtũm kapêr mar kêt jakamã na htem kormã mẽmoj mex nê mẽmoj punuj pumunh kêt nê. Tã te mẽ ate mẽ kot amnhĩ nhĩpêx pyrãk.

¹⁴ Mẽ kot Tĩrtũm kapêr mar mex xwýnhjaja na htem hprĩ hã kapêr piitã mar tỳx nê. Kot amnhĩrĩt mex xwýnhhta mar tỳx nê mããnên kot amnhĩrĩt mex kêt xwýnhja nhũm mẽhprĩ hã piitã mar tỳx nê. Te ho mẽ àptãr kot mẽõ mex kur o pata pyrãk. Jao ra mẽ àptãr jamaxpêr o hamaxpêr o ri pa nê hamaxpêr o:

—Kot paj tãm amnhĩ nhĩpêx o ri ixpa nhũm ja inhmã mex nê. Nom kot paj axtem tanhmã amnhĩ tomnuj to nhũm ja ixpê omnuj nê. Jakamã kot paj tãm amnhĩ nhĩpêx pix o ri ixpa nhũm Tĩrtũm mã ja mex nê. Anê.

6

¹⁻² Na pu prem ra Tĩrtũm kapêr kot amnhĩrĩt mex xwýnhhta kwý ma. Tãm na ja: Kris kot mẽ panê tanhmã amnhĩ nhĩpêx to hã harênhja.

Nê mẽ pahte amnhĩ tomnuj kaga hã kot mẽ pamã karõja.

Nê amnhĩ kaxyw Tĩrtũm kôt mẽ pajamaxpêr ã mẽ pamã karõja.

Nê mẽ pahpê Tĩrtũm kra hã amnhĩ to amnhĩrĩt kaxyw mẽ kot mẽ pahkrã kumrãr ã pamã karõja.

Nê mẽ pahte Tĩrtũm mã tanhmã amnhĩ nhĩpêx to ho papa hkukamã mẽ kot mẽ pahkrã hã ãhkra jaxwýr nê mẽ pahto Tĩrtũm wýr ã mẽ pamã karõja.

Nê mẽ pahtyk nê akupým mẽ pahfir ã mẽ pajarênhja.

Nê Tĩrtũm kot nhỹrmã mẽ kot amnhĩ xã htỳx kãm hamak tũm xã hwýr mẽ kêp hkra hkêt xwýnhjê janorja.

Mẽmojja piitã pu mẽ ra harênh mar tỳx nê. Prĩ hã kot amnhĩrĩt mex. Tã kwa kêr pu mẽ hpãnhã hijuk ri kot amnhĩrĩt mex kêt xwýnh kwý ma. Jao mẽ pahpê Tĩrtũm kra xãptãr mex nê ri papa. ³ Jakamã kwa kêr pu mẽ kot amnhĩrĩt mex xwýnh kumrêx kwý ma nê hpãnhã hijuk ri kot amnhĩrĩt mex kêt xwýnh kwý ma. Nê axpên mã harênh rãhã ho ri papa. Nã koja Tĩrtũm kãm ja prãm pu mẽ ã amnhĩ nhĩpêx anhýr rãhã o ri papa.

⁴⁻⁶ Na pre ra mẽ pahkwýjaja Kris kaga nê htỳx ri amnhĩ nhĩpêx o pa. Mẽ kot kapêr mar tỳx tã axtem nê hkaga jakamã koja mẽ axte kapêr mar kêt nê. Ra mẽ kãm mar prãm kêt. Kot puj mẽ tee ri axte mẽ kãm harênh o papa kaprý. Na prem hprĩ hã kuma. Tĩrtũm kãm mẽ ho hkra hprãm ã harênhja nhũm prem hprĩ hã kuma nê kãm mar prãm nê hkôt amnhĩ xunhwý. Hãmri nhũm Tĩrtũm Karõ te mẽ panhĩpêx pyrã nê mẽ hkarõ mã agjê nê mẽ kot amnhĩ to mex o pa kaxyw tanhmã mẽ hkrã hto nhũm prem ý hã tanhmã kãm amnhĩ nhĩpêx to ho pa. Nê kãm Tĩrtũm kapêr mar prãm nê. Nê axpên mã mex o mex ã harênh o pa. Nê aa mẽ kot mẽmoj pumunh kêt kwý pumu nê axpên mã harênh o:

—Nã Krisja ãm hãmri àhpumunh tỳx o àhpumunh tỳx. Koja nhỹrmã akupýn mẽ pahwýr wrý nê axte mẽ pamã àhpumunh tỳx o amnhĩrĩt pu mẽ omu.

Anhýr o kapêr tã tanhmã hamaxpêr to nê hkaga. Jakamã te mẽ kot axte Tĩrtũm pê Krata pĩ hã nhôr nê hpĩr pyrãk. Nê te mẽ piitã mẽ noo mã tanhmã haprý hto nê tanhmã kãm kapêr punuj to pyrãk. Jakamã kot pu mẽ tee ri akupým tãm mẽ unhwýr prãm kaprý.

⁷ Na hte Tĩrtũm mẽ pahto mex rãhã ho pa. Jao mẽ pamã mẽ pahpur ã na rê pu mẽ kamã panhõ rũnh nê. Jakamã mẽ kot amnhĩ kaxyw Kris kôt hamaxpêr nê hkôt amnhĩ xunhwýr prãm xwýnhjaja te mẽ hpur mex nê kamã mẽmoj ô rũnh pyrãk. Nê urãk nê amnhĩ to mex o pa.

⁸ Nom koja mẽ hpur kãm mẽmoj nhĩgrõt mex kêt japêr. Kamã mrõnhĩ nê kahpare nê mẽmoj punuj pix hapõj nhũm mẽ tee ri omu nê hkaga kurê kumrêx. Tã mẽ kot Kris kaga xwýnhjaja te pur punuj kot amnhĩ

nhîpêxta pyrâk nhũm Tîrtũm te kêp pur nhõ dõn pyrâk. Jao tee ri amnhĩ tâ mẽ kot amnhĩ nhîpêx ã mẽ omu nẽ mẽ hkaga kurê kumrêx nẽ ma mẽ kot amnhĩ xà htýx kãm hamak tũm xà pê kuwyta wýr mẽ rênh pa.

⁹ E ixkràmnhwýjaja. Inhmã mẽ akĩnh jakamã na pa ã mẽ amã mẽ kot Kris kaga xwýnhjê jarênh anê. Nom te mẽ ate mẽ urâk kêt. Kris kôt mẽ ate amnhĩ xunhwýr xwýnh mex na ka mẽ. Ra mẽ ate hkôt amnhĩ xunhwýr týx jakamã te mẽ apê pur mexta pyrâk. ¹⁰ Na ka htem Kris kôt mẽ akwýjê ho mex o ri apa. Te mẽ amã amnhĩ tâ ma pyrâk o axpên nhîpêx o ri apa nhũm Tîrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ panhîpêx o pa jakamã koja tanhmã mẽ ate axpên nhîpêx mex tota ã tanhmã mẽ ato mex to.

¹¹ Tã kêr ka mẽ arĩ ã axpên nhîpêx anhýr o ri apa rãhã ty kê nhýrmã ja hã mẽ ato mex nê. ã mẽ ate amnhĩ nhîpêx anhýr o apaja na inhmã hprãm týx kumrêx. ¹² Kot kaj mẽ ã amnhĩ nhîpêx anê hãmri nẽ amã kaga nẽ apa hkêt nê. Nẽ amnhĩ nhîpêx o te Tîrtũm kra hkwý htyk xwýnhjaja kormã htír ri kot amnhĩ nhîpêxta pyrâk. Na prem amnhĩ kaxyw Tîrtũm mã hamaxpêr týx rãhã ho pa. Kot mẽ ho mex ã mẽ hã amnhĩ jarênhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tîrtũm ra kot mẽ hã amnhĩ jarênh xà hkôt mẽ ho mex nê. Tã kêr ka mẽ urâk nê ã amnhĩ nhîpêx anhýr o ri apa rãhã ty. ¹³⁻¹⁵ ã na pre finat Apraãwja amnhĩ nhîpêx anê. Kormã hkra hkêt tã nhũm Tîrtũm kãm hkra nẽ kanrêhã htàmnhwýjê hkukamã tanhmã mẽ harênh to nẽ kãm:

—Pa Apraãw. E inhma. Kot paj aprõ mẽ war ato mex nê. Kot kaj war akra hãmri nẽ gaa nhũm akanrêhã war atàmnhwýjaja ohtô rax kumrêx. ãm hãmri na pa ã mẽ hkukamã amã mẽ harênh anê. Kot paj amã amnhĩ jarênh xà hkôt ã anhîpêx anê. Ixpê mẽ anhîpêx xwýnh na pa ã amã amnhĩ jarênh anê. Anê.

Tã ã kãm wa hkra jarênh anhýr tã nhũm wa tokyx hkra hkêt nê. Nom tee ri ja hã amnhĩ pumu nẽ Tîrtũm kot wa kãm hêx ã hkamnhix kêt nê. ãm hkamnàr rom ã hamaxpêr anê nẽ hamaxpêr o:

—Nà kot paj wa nhýrmã ixkra. Tîrtũm tãm kot wa inhmã wa ixkra jarênh kênã. Anê.

Tã nhũm amgrà xohtô rax kumrêx nẽ hapêx nhũm wa hkra. Nhũm axte amgrà hkwý hapêx nhũm wa hkanrêhã htàmnhwý hkwý. Ra Tîrtũm kot mẽ hkukamã Apraãw mã mẽ harênh xà hkôt. Tîrtũmja hihtýx o hihtýx nẽ àhpumunh o àhpumunh jakamã na pre amnhĩ jarênh xà hkôt ã wa kãm wa hkra nẽ wa htàmnhwýjê nhõr anê. Kot ra wa kãm hã amnhĩ jarênh xà hkôt. No ri nhãm mēhõ nhixi jarênh kôt wa kãm wa hkra jarênh kêt nê. Mēhõ kot we hihtýx o hihtýx o Tîrtũm jakre nhũm we ri hixi jarênh kôt ã wa kãm mẽ harênh anê? Amrakati kumrêx. Jakamã na pre wa kãm amnhĩ jarênh o:

—Nà ixàhpumunh xà hkôt na pa ã war amã war akra jarênh anê. Anê.

¹⁶ No pika ja kamã na htem ã amnhĩ jarênh anhýr kêt nê. Na htem mēhõ mã tanhmã mẽmoj tã amnhĩ jarênh to kaxyw nẽ mēhõ hihtýx o kot hakrenh xwýnh nhixi jarênh kôt amnhĩ jarê. Nẽ amnhĩ jarênh o:

—Nà ixte jahti noo mã ã amã amnhĩ jarênh anhýr jakamã ãm hãmri na pa ã amnhĩ jarênh anê. Anê.

Kot hã amnhĩ to hêx nhũm hihtýx o kot hakrenh xwýnhhta kot hã harênh mar nê hã tanhmã homnuj to pymaj na htem ã mẽ hixi jarênh kôt mẽmoj tã amnhĩ jarênh anê. Hãmri nẽ kot tanhmã hã ho pymaj ra kot amnhĩ jarênh xà hkôt tanhmã mẽmoj nhîpêx to. ¹⁷ Nom Tîrtũm na hte urâk nẽ nhãm mēhõ nhixi jarênh kôt ri mẽmoj tã amnhĩ jarênh kêt nê. Na hte tãm amnhĩ jarênh xà hkôt mẽmoj to anê nẽ aa hã amnhĩ to hêx kêt nê. Na pre mẽ pahpê hkrajê mã kãm:

—Kot paj nhýrmã mẽ ato mex rax nê. ãm hãmri na pa mẽ amã amnhĩ jarê. Ixte amnhĩ pumunh xà hkôt na pa ã mẽ amã amnhĩ jarênh anê. Anê.

Mẽ pahte ãm hãmri kot amnhĩ jarênhja mar nẽ amnhĩ to hêx kêt ã omunh kurê kumrêx kaxyw. Koja Tîrtũm mẽmoj tã ã amnhĩ jarênh anê hãmri nẽ hijuk ri axtem hpãnhã tanhmã amnhĩ jarênh to hkêt nê. ¹⁸ Jakamã koja nhýrmã mã amnhĩ wýr mẽ

pahto àpir ã amnhĩ jarẽ hãmri nẽ ãm hãmri amnhĩ jarẽ nẽ amnhĩ jarẽnh o:

—Nà ãm hãmri ixte amnhĩ pumunh xà hkôt na pa mẽ amã ja hã amnhĩ jarẽ. Anẽ.

Koja ã amnhĩ jarẽnh anẽ hãmri nẽ hijuk ri axte hpãnhã tanhmã mẽmoj jarẽnh to hkêt nẽ. Ra kot ã amnhĩ jarẽnh anhÿrja koja arĩ rãhã nẽ. Jakamã e kwa kêr ka mẽ tee ri amnhĩ kukamã ajamexpêr o ri apa hkêt nẽ. Ra mẽ pamex nẽ ri papa kaxyw Tĩrtũm kôt amnhĩ xunhwÿr jakamã kêr pu mẽ arĩ kot mẽ pahto mex rax xà hã arĩgrota jamãr rãhã ho ri papa.

¹⁹ Na hte kanôre ho htÿx xàja kanôre ho htÿx nhũm ma gô hkôt pa hkêt nẽ. Ja pyrã nẽ kot puj mẽ Tĩrtũm kot mẽ pahto mex xà kamã pajamak o papa hãmri nẽ hkaga hkêt nẽ.

Amnepê mã na pre hte mẽ panhõ patre maatija Tĩrtũm mã amnhĩ jarẽnh xà hã ixkre hwÿr agjê nẽ hkôt ã kupêxê ho hitom maati hwÿr agjê nẽ kamã mẽ ho Tĩrtũm wÿr o kuhê. Tã nhũm Jejus akupÿm kaxkwa hwÿr api nẽ Tĩrtũm ri hkrĩ hãmri nẽ patre maatita pãnhã tãm mẽ pahto hwÿr o hkrĩ. ²⁰ Na pre ra mẽ pakukamã kaxkwa hwÿr api nẽ kamã pa ho pa nẽ finat Mekijetekja pyrã nẽ kêp mẽ panhõ patre maati. Tã koja mẽ pahto Tĩrtũm wÿr rãhã nẽ pa ho pa.

7

Patre Mekijetek jarẽnh

¹⁻³ E kot paj ixprĩ hã mẽ amã tanhmã finat Mekijetekja jarẽnh to ka mẽ inhma. Krĩ pẽ Sarẽ kamã na pre kêp mẽ õ pahi nẽ mãânẽn kêp mẽõ patre. Sarẽja mẽ pakapêr kãm kêp: “Mẽ hamakêtkati nẽ ri mẽ pa xwÿnhjê nhõ krĩ.” Jakamã Mekijetekja mẽ pakapêr kãm kêp: “Mẽ hamakêtkati nẽ ri mẽ pa xwÿnhjê nhõ pahi.” Nẽ mãânẽn kêp: “Pahi kot tãm amnhĩ nhĩpêx o pa xwÿnh.” Nẽ Mekijetek nhĩpêxã nẽ katorxã nẽ higêt nhĩxija mẽ pahte harẽnh mar kêt. Nẽ kator ã arĩgro nẽ htyk ã arĩgroja mãânẽn mẽ pahte harẽnh mar kêt. Tĩrtũm kapêr ã kagã htũm kot tanhmã ja jarẽnh to hkêt. ãm Jejus pyrã nẽ kêp patre hã mẽ ho Tĩrtũm wÿr rãhã ho pa xwÿnh pix ã kot harẽnh. ãm ja pix na mẽ pahte harẽnh mar. Nẽ kot amnhĩ to rax xwÿnh jakamã na pre Apraãw nhÿri omu

nẽ hã hpijaàm kaxyw kãm hikukrêx kwÿ gõ. Na pre hkwyjê mẽ ra mẽ urojê kutã amnhĩ xunhwÿ nẽ pijapu nẽ mẽ kêp mẽ õ pahi ho 4 nẽ mẽ himex. Nẽ mẽ kêp mẽ hikukrêx kwÿptã nẽ hamÿ nẽ ma õ krĩ hwÿr o mõ. Nẽ kormã pry hã mör ri Mekijetek kaxpa nhũm amnhĩ wÿr omu nẽ kãm:

—Pa Apraãw? E kê Tĩrtũm ato mex nẽ ka amex nẽ apa. Anẽ.

Nhũm amnhĩ tã kuma nẽ hkĩnh nẽ. Hãmri nẽ kãm mẽ hikukrêx kwÿptãr xwÿnhhta hkwy gõ nhũm hamÿ nẽ ma amnhĩm o mõ. ⁴ Na pre Apraãw kot amnhĩ to rax ã omu nẽ kãm mẽmojta kwÿ gõ. Kêp mẽ pahpê Ijaew pãr krax jakamã mãânẽn kot amnhĩ to rax tã Mekijetekja urak nẽ kot amnhĩ to rax ã omu nẽ kãm mẽmota kwÿ gõ. ⁵ Finat Mojes kot Ijaew mã Tĩrtũm kapêr jarẽnh xà hkôt kãm kugõ. Na pre mẽ kãm:

—Mẽ akwy pẽ finat Rewi hkanrêhã htãmnhwÿjaja kêp mẽ anhõ patre jakamã kêr ka mẽ kãm mẽ akukrêx kwÿ nhõr o ri apa. Kot kaj mẽ akrit kêp 10 nẽ kãm ho pixi nẽ agõ. Nẽ mẽ akàxpore kêp 10 nẽ kãm hõ gõ. Kêr ka mẽ ã mẽ kãm mẽ akukrêx nẽ mẽ akrit kwÿ nhõr o apa anẽ. Nẽ kêr ka mẽ kãm mẽmoj mex pix gõ. Mẽ kêp mẽ akwy na mẽ. Mẽ apiitã mẽ apê Apraãw kanrêhã htãmnhwÿ jakamã kêr ka mẽ ã mẽ hipêx anhÿr o apa. Anẽ.

⁶ Tã Mekijetekja kêp Rewi hkwy hkêt tã nhũm Apraãw amarĩ ã hipêx anẽ nẽ kãm pahi htyk xwÿnhjê kukrêxta kwÿ gõ. Jao hikukrêxta kamã mẽmoj kêp 10 nhũm omu nẽ kamã kãm ho hpÿnh nẽ kugõ. Na pre ã kãm mẽmoj nhõr anẽ. Hãmri nhũm amnhĩm hamÿ nẽ kãm:

—Nà ãm hãmri koja Tĩrtũm ato mex rax nẽ. Anẽ.

Ra Tĩrtũm kot Apraãw kanrêhã kãm htãmnhwÿ ho ohtõ nẽ mẽ hkukamã mẽ harẽnh jakamã nhũm Mekijetekja ã kãm Tĩrtũm kot ho mex ã harẽnh anẽ. ⁷ Mẽ kot amnhĩ to rũnh o mẽ hakrenh xwÿnh pixjaja Tĩrtũm kot mẽ ho mex kaxyw mẽ ho àhwÿr o pa jakamã na pre Apraãw o Tĩrtũm wÿ. Jao kot amnhĩ to rax o kot hakrenh ã amnhĩ to amnhĩrit. ⁸ Hãmri nẽ Rewi hkanrêhã htãmnhwÿ kot amnhĩ nhĩpêx pyrã nẽ Apraãw o Tĩrtũm wÿ nẽ kêp mẽmojta jamÿ. Mẽ urak nẽ mẽmoj kamã

kêp 10ja rûm ho hpÿnh nê amnhîm hamÿ. Nom kot amnhî to rax o Rewi hkanrêhã htàmnhwÿjê jakrenh. Tîrtûm kapêr ã kagà htûm kot Rewi hkanrêhã htàmnhwÿjê htyk par ã mē harēnh tã tanhmã Mekijetek htyk ã harēnh to hkêt jakamã kot amnhî to rax o kot Rewi hkwÿjê jakrenh.

9-10 Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htàmnhwÿ mã xwÿnh. Jakamã nhûm Apraãwja Mekijetek mã mē hikukrêxta kwÿ nhôr jao te Rewi mã ôr pyrãk. Tã nhûm amgrà xohtô nê hapêx nhûm Rewi hkanrêhã htàmnhwÿjaja hapôj nê kêp mē ô patre nê ri pa. Jao Mekijetek pyrã nê mē kêp mē hikukrêx kwÿ jamÿnh o ri pa.

11 Nê finat Mojes na pre Ijaewjê mã tanhmã Rewi hkanrêhã htàmnhwÿjê jarēnh to. Kormã mē hapôx kêt ri nhûm hkwÿjê mã tanhmã mē harēnh to. Mē kêp patre hã mē harē. Tã nhûm mē hapôj nê hprêk nê mē ho Tîrtûm wÿr o ri mē hkôt pa. Nom mē kot tãm amnhî nhîpêx o pa kaxyw na prem tanhmã mē hkrã hto hkêt nê. Tanhmã kot mē amnhî to nê ã mē hipêx anê? Jakamã nhûm Tîrtûm mē hpãnhã mē pahwÿr kÿj rûm mēhõja mē nhûm mē pahwÿr wrÿ. Nom kêp Rewi hkanrêhã htàmnhwÿ hkêt. Nê mãânên kêp Rewi hpãm Arãw kanrêhã htàmnhwÿ hkêt. Axtem te Mekijetek kot amnhî nhîpêx pyrãk xwÿnh na pre. Jejus Krisja. Tãm na pre mē pahwÿr wrÿ hãmri nê tanhmã mē pahkrã hto pu mē ÿ hã tãm amnhî nhîpêx o papa. 12 No Mojes kapêr kot Rewi hkanrêhã htàmnhwÿ pixjaja kêp mē ho Tîrtûm wÿr xwÿnh ã mē harēnh. Tã nhûm Krisja mē pahwÿr wrÿ nê mē hpãnhã kêp mē pahto àhwÿr o pa xwÿnh. Jakamã na pu htem axte Mojes kapêr kôt amnhî nhîpêx kêt nê. Pãnhã Jejus kapêr kôt pix mã amnhî nhîpêx o papa.

13-14 Nê Jejus kêp Rewi hkanrêhã htàmnhwÿ hkêt. Katorxà hkôt kêp Apraãw tàmnhwÿ Juta hkanrêhã htàmnhwÿ na pre. Ra mē pahte ja mar mex. Aa Juta hkanrêhã htàmnhwÿjaja kêp patre hkêt. Na pre Tîrtûm jajê mã mē kot mēmoj nhôr xã hã mēsti kunihitita ã kãm mēmoj nhôr nê hkwÿjê ho hwÿr ã mē kãm karõ hkêt nê. ãm Apraãw

tàmnhwÿ Rewi hkanrêhã htàmnhwÿjê mã pix mã na pre ã mē kãm ja hã karõ anê. Tã nhûm Jejus wrÿ nê mē hpãnhã mē pahto hwÿr o pa. Mē urãk nê kêp Rewi hkanrêhã htàmnhwÿ hkêt axtem kêp Juta hkanrêhã htàmnhwÿ htã Rewi hkwÿjê hpãnhã mē pahto Tîrtûm wÿr o pa.

Mekijetek pyrã nê mē pahto Tîrtûm wÿr xwÿnh jarēnh

15-19 Nê Ijaewja na prem Mojes kapêr mar tÿx nê hkôt amnhî nhîpêx tã aa amnhî to mex kêt nhûm Tîrtûm tee ri ja hã mē omu nê hamaxpêr o:

—Nã Rewi hkanrêhã htàmnhwÿjaja kêp mē ô patre nê mē ho ixwÿr o pa htã nhûm mē arÿ htÿx ri amnhî tomnuj pix o pa. Jakamã koja mē axte ri mē ho ixwÿr o pa hkêt nê. Anê.

Hãmri nê mē pakaxyw mē pahto àhwÿr xwÿnhja ta nê ãm. Kra Jejusja nhûm kuta nê ãm. Tãm na hte Rewi hkwÿjê rom tanhmã mē pahkrã hto pu mē kukwak ri tãm amnhî nhîpêx nê Tîrtûm kôt amnhî nhîpêx mex nê. Jao nhÿrmã ma mē pahte Tîrtûm nhõ krÿ hwÿr paxàpirja jamãr o papa.

Jejus na hte Mekijetek pyrã nê kêp mē panhõ patre maati nê mē pahto Tîrtûm wÿr rãhã ho pa. Kêp Rewi hkanrêhã htàmnhwÿ hkêt tã Tîrtûm pyrã nê kêp htîr tûm nê pa ho pa xwÿnh jakamã na pre Tîrtûmja mē pakaxyw kuta nê mē pahwÿr kumê. Kapêr ã kagà htûm kot harēnh kot:

Kot kaj Mekijetek pyrã nê mē ho ixwÿr rãhã ho ri apa. Anê.

20-21 No Rewi hkwÿjê mã na pre ã kapêr anhÿr kêt nê. ãm Jejus pix mã ã kapêr anê nê kãm:

E kot kaj apê mē ho ixwÿr rãhã o apa xwÿnh. Kot paj nhÿrmã apãnhã axtem mēhõ xãm kêt nê. ãm kapxpix kot kaj mē ho ixwÿr o apa rãhã ho rãhã. ãm hãmri na pa amã ã ixkapêr anê. Ixpê Pahi Maati hã ã ajarēnh anê.

22 Anhÿr jao Jejus kot amnhî to rax o Rewi hkwÿjê jakrenh par ã ho amnhîrît. Mē kot Ijaew mã Tîrtûm kapêr jarēnh nhûm mē kot mar nom hkôt amnhî nhîpêx kêt jakamã nhûm Tîrtûm mē hpãnhã Jejus xãm. Tapxpix na hte tanhmã mē pahkrã hto pu mē

tãm amnhĩ nhĩpêx mex o ri papa. ²³ Rewi hkwýjaja na prem axpên mýr pê kêp mēō patre nē ri pa htã htyk pa nē hapêx. ²⁴ Nom Jejusja htĩr tũm nē pa ho pa xwýnh jakamã koja mē uràk nē aa hapêx kêt. Koja mē pahto Tĩrtũm wýr rãhã ho pa nē aa jam urer kêt nē. ²⁵ ã Jejus kot amnhĩ nhĩpêx anhýr jakamã te kêp Tĩrtũm wýr mē panhō pry pyràk. Na pu htem hkôt amnhĩ xunhwý nhũm mē panê mē pahte amnhĩ tomnuj piitã rēnh pa nē mē pahpê Tĩrtũm kra hã mē pajarē.

²⁶ Nē ãm hãmri kêp mē pahto Tĩrtũm wýr xwýnh maati mex na. Mē pakurom tãm kot amnhĩ nhĩpêx mex o pa nē aa kot tanhmã amnhĩ tomnuj to hkêt. Tã ra Tĩrtũm kot amnhĩ wýr ho àpir jakamã nhũm ra kuri mē pahto hwýr rãhã ho pa. ²⁷ Nē kot amnhĩ to rax o wam mēō patre maati jê jakrenh. Wamtaja na prem hkwýjê pyrã nē amnhĩ tomnuj o pa. Jakamã na prem apkati mē amnhĩ tomnuj pãnhã Tĩrtũm mã mēmoj gō nē kãm amnhĩ jarē nē amnhĩ to kuwý. Hãmri nē rĩ kormã kot nhãm mē hwýr mē mrrar xwýnhjê mã mē ho anē nē mē hpãnhã Tĩrtũm mã mēmoj nhõr pê mē ho kuwý. No kêt Jejusja wam patre maati rom aa kot amnhĩ tomnuj kêt jakamã na pre hte mē uràk nē amnhĩ tomnuj pãnhã Tĩrtũm mã mēmoj nhõr o pa hkêt nē. ãm mē papajaja na pre mē pahte amnhĩ tomnuj pãnhã htyk o kãm amnhĩre. ãm htyk tipxi htã mē pahpiitã mē pahpãnhã amnhĩrer pa. Jakamã koja axte ã amnhĩ nhĩpêx anhýr kêt nē. Mo kaxyw kot kêt axte mē panê ty?

²⁸ Mojes kapêr kôt na pre Ijaew amnhĩm Rewi hkwýjê xunhwý nhũm mē kêp mē õ patre nē ri pa. Tã no nhũm mē uràk nē arĩ amnhĩ tomnuj o pa nhũm Tĩrtũm tee ri mē omu nē mē hpãnhã mē pakaxyw Krata xãm nē kãm:

—Nà kapxipix mē kurom ate tãm amnhĩ nhĩpêx o apa jakamã kapxipix kot kaj mē hpãnhã mē ho ixwýr o apa rãhã ho rãhã. Anē.

8

Jejus kêp mē pahto Tĩrtũm wýr xwýnh maati hã harēnh
Rukre 22.20; Sikũn Korõt 3.6-11

¹ E kot paj axtem tanhmã mē amã mē pahto Tĩrtũm wýr xwýnh maati jarēnh to ka mē inhma. Na hte kaxkwa kamã Tĩrtũm nhĩhkô hã hkrĩ. ãhkô hã kêp Pahi Maati hã hkrĩ xà hã upòk rũm hkrĩ ho hkrĩ.

² Wam patre maati jaja na prem Tĩrtũm nhõrkwý kaàkre wýr mra nē kamã hitom maati kamã mē ho Tĩrtũm wýr o pa. Nom nhũm Jejus na hte mē kurom kaxkwa kamã Tĩrtũm nhõrkwý mex kãm mē pahto àhwýr o hkrĩ. Õrkwý kaàkreja na prem ãhkra ho hipêx nom kaxkwa kamã òrkwý mexja na pre mēhõ ãhkra ho hipêx kêt nē. Tĩrtũm na pre tanhmã hipêx to nhũm kamã Jejusja mē pahto hwýr o hkrĩ.

³ Nē mē pahpê Ijaew nhõ patre maati jaja na prem mē ho hwýr kaxyw nē mē kot amnhĩ tomnuj pãnhã Tĩrtũm mã mēmoj nhõr kôt mē ho kuwý. No Kris na hte ã amnhĩ nhĩpêx anhýr kêt nē. Ra htyk o kot kãm amnhĩ nhĩ nhõr jakamã na hte wam patre maati pyrã nē xatã kãm mēmoj nhõr kêt nē.

⁴ Tã na hte arĩ Ijaew Mojes kapêr kôt amnhĩm Rewi hkwý kêp mē õ patre kaxyw mē unhwý nhũm mē ho Tĩrtũm wýr o pa. No Jejus kêp Rewi hkanrēhã htãmnhwý hkêt. Katorxà hkôt kêp Juta hkanrēhã htãmnhwý jakamã kop apu arĩ jar pika ja kamã htĩr nē pa ronhýx Ijaew nhõ patre pyrã nē kêp mē ho Tĩrtũm wýr o pa xwýnh kêt. ãm Rewi hkanrēhã htãmnhwý pixjaja na htem mē kaxyw kãm mēmoj gō nē hkôt mē ho kuwý. ⁵ Jar na htem arĩ ã amnhĩ nhĩpêx anhýr o pa nom kaxkwa kamã na htem ã amnhĩ nhĩpêx anhýr hkêt nē.

Nē jar Tĩrtũm nhõrkwý kaàkreja te kot kaxkwa kamã òrkwý mexta pyrãk. Na pre Mojes òrkwý kaàkre nhĩpêx kaxyw nhũm Tĩrtũm tanhmã kãm hã karõ hto nē kãm:

—E jãã hixêt prék nhĩmòk ã axãmta ã na pa pre amã ãxkreta kukamã ãxpri hã tanhmã mē ate hipêx to hã amã karõ. Tã kêt ka ã hipêx anē. Anē.

Hãmri nhũm kuma nē kot kãm hã karõ xà hkôt hipêx. Hãmri nhũm mē õ patre maati ãxkreja kamã mē ho Tĩrtũm wýr o pa. Na prem ã amnhĩ nhĩpêx anhýr o pa.

⁶ Tã nhũm ra Tĩrtũm axtem mē hpãnhã mē pakaxyw Kris xãm nhũm hte mē pahto hwýr mex o wamtajê jakre. Na hte kaxkwa

kamã mẽ pahpiitã mẽ pahpumunh mex rãhã ho hkrĩ nẽ wamtajê rom tanhmã mẽ pahkrã hto pu mẽ tãm amnhĩ nhĩpêx o ri papa. Tĩrtũm kot finat Mojes mã kapêrja mex nẽ nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mẽ pahtyk tã akupỹm pahĩr nẽ nhỹrmã Tĩrtũm mẽ Jejus wa kuri pamex nẽ pahĩr tũm nẽ papa ho papa nẽ axte pahtyk kêt nẽ. ⁷ Kêp apu Tĩrtũm kot Mojes mã kapêr kôt mẽ kot tãm amnhĩ nhĩpêx o pa ronhỹx pre Tĩrtũm axte kapêr nyw ã kagà hkêt nẽ. ⁸ Nom wam kapêr tũmta na pre mẽ mar tỳx htã arĩ amnhĩ tomnuj rãhã ho pa nhũm tee ri ja hã mẽ omu nẽ mẽ kãm:

Nà kot paj axte nhỹrmã mẽ apê Ijaew mã axtem tanhmã ixkapêr to.

⁹ Amnepê m mẽ anhĩgêjtê mã na pa pre ixkapêr.

Na pa pre Ejit pê mẽ kator nẽ mẽ kot tanhmã amnhĩ nhĩpêx to ho pa kaxyw tanhmã hã mẽ kãm karõ hto.

Nom na prem ixkapêr ma nẽ ãm kuma nẽ ixkôt amnhĩ nhĩpêx kêt nẽ. Pa tee ri ja hã mẽ omu hãmri nẽ mẽ hkaga.

¹⁰ Tã kot paj mẽ apê mẽ hkanrêhã mẽ htãmnhwỳ nywjê mã axtem ixkapêr ka mẽ ixkapêr nywja ma.

Kot paj nhỹrmã tanhmã mẽ akrã hto ka mẽ ixkapêr nyw mar tỳx nẽ hã ano htỳx nẽ ho apa.

Nẽ akĩnh nẽ apa.

Nẽ ixkôt ri amnhĩ nhĩpêx mex o apa.

Nẽ axpên mã ijarênh o: “Nà ãm hãmri Tĩrtũm kêp mẽ panhõ Tĩrtũm na.” Anhỹr o ri axpên mã ijarênh o apa.

Pa amnhĩ tã mẽ ama nẽ mẽ apumu nẽ amnhĩ xwar mẽ apê ixkra hã amnhĩm mẽ ajarê.

¹¹ Kot kaj mẽ apiitã ixte amnhĩ nhĩpêx kôt ixpumunh mex o ri apa. Mẽ akàxpore rũnh xwỳnhjaja nẽ mẽ akàxpore hkryre xwỳnhjaja mẽ apiitã ixpumunh mex jakamã kot kaj mẽ ri axte ixtã tanhmã axpên kukjêr to ho ri apa hkêt nẽ.

¹² Nẽ kot paj mẽ ato mex rax o ixpa.

Nẽ axte tanhmã mẽ ate amnhĩ tomnu hto ho apaja mã ijamaxpêr kêt nẽ. Anẽ.

¹³ Nẽ koja mẽmoj ra htũm hãmri nẽ hapêx tokyx anẽ. Ja pyrã nẽ na pre Tĩrtũm mẽ pamã kapêr tũmta jarênh o:

—E kêr ka mẽ axte ixkapêr tũm mar kêt nẽ. Pãnhã ixkapêr nyw pix mãn mar o apa nẽ ãm kôt pix mã mãn amnhĩ nhĩpêx rãhã ho ri apa. Anẽ.

9

Tĩrtũm nhõrkwỹ kaàkre jarênh

¹ Nẽ amnepê m na pre finat Mojesja mẽ panhĩgê m mẽ pahpãmjê mã tanhmã Tĩrtũm nhõrkwỹ kaàkre jarênh to. Tanhmã mẽ kot hipêx to nẽ kamã tanhmã amnhĩ nhĩpêx to hã mẽ kãm karõ. Nẽ kamã tanhmã mẽ kot amnhĩ to Tĩrtũm wỳr to hã mẽ kãm karõ. Nẽ tanhmã mẽ hkwỳjê ho hwỳr toja nhũm pre mããnên mẽ kãm hã karõ. No Tĩrtũm nhõrkwỹ kaàkreja kêp õrkwỹ kumrêx kêt. ãm mẽ kot omunh nẽ kaxkwa kamã õrkwỹ kumrêx mã hamaxpêr kaxyw na pre. ² Jakamã nhũm prem Mojes kapêr ma nẽ hipêx. Kamã hitom hamêxkrut. Wam hitom kamã na pre kanê hprêeti xãm nẽ kutã mêsti xãm. Nẽ mêsti nhĩmõk ã Tĩrtũm mã õ pãwti jaxwỳ. Mẽ panhõ patre na pre htem Tĩrtũm mã kugõ nẽ mêsti ã kãm haxwỳ hãmri nẽ hkwỳjê ho kuwỳ. Tã hitom ja na prem kêp Tĩrtũm nhõ hitom mex ã harê.

³⁻⁴ Nẽ hitom wa hkaêx kãm na pre kupêxê ho hakwakre kahê xàja ajê. Haturxà kamã hitomja na prem Tĩrtũm nhõ hitom maati hã harê. Tĩrtũm na pre te hirã htỳx kãm hwỳr wrỳ nẽ te kamã hkrĩ pyrãk. Nẽ kamã na pre Tĩrtũm mã mẽhkuxwa xà ho xêt xà hã mês kunĩhtija kuhê. Na prem ôr o hipêx nẽ kamã ãm nhũm kuhê. Nhũm pre hte mẽõ patre hwỳr agjê nẽ kutã kuhê nẽ mẽ ho Tĩrtũm wỳ. Nẽ mês kunĩhti haxwỳja hitom maati kamã kuhê. Na prem pĩ ho hipêx nẽ ôr o hpro nẽ kamã ãm. Mêstija kaxwỳnh kãm na pre htem mẽmoj jagjê.

Tĩrtũm kot Ijaew mã tanhmã mẽ kot amnhĩ nhĩpêx to ho pa hã karõ nẽ kên po hã mẽ kãm hã kagàja nhũm prem kamã kuxà nhũm hikwỹ.

Nẽ mããnên ôr o xijereja xà nhũm hikwỹ. Nẽ xijere kamã amnepê mã Tĩrtũm kot kaxkwa rũm mẽ hwỳr mẽõ rênh kwỳ

hikwÿ. Mëôja më kot kãm: “Manã” anhÿr xwÿnhja na prem hkwy hkawrà nê xijere kamã kugjê hãmri nê mēsti kamã kuxà.

Nê finat Arãw nhõ kô kot ho amnhÿ kaxpar xà htũmta nhũm prem kamã kuxà. Tirtũm kot tanhmã ho nhũm kurũm pixôrã muxre hapôx xwÿnhja nhũm prem mãânēn mēs kunĩhti kamã kuxà nhũm hikwÿ.

⁵ Nê himõk ã Tirtũm kapêr o wrÿk xwÿnh wa hkarõ nhÿpêxja wa hamēxkrut nê axpēn kutã wa hkõn krã ho hkrÿ. Axpēn wÿr hara koror nê wa hkrÿ. Patre maati kot omunh nê Tirtũm kot më hkõt pa ho paja mã hamaxpêr kaxyw. Nê wa hkaēx kãm ahkaprÿja Tirtũm kot më nê më kot amnhÿ tomnuj rēnh mã hamaxpêr xà na pre.

Ã Tirtũm nhõrkwÿ kaàkre kot anhÿr. No kot paj ixprÿ hã më amã piitã harēnh par kêt nê. ⁶ Na pre hte mëõ patre apkati më wam hitom wÿr agjê nê kamã Ijaew ho Tirtũm wÿr o pa. ⁷ No hitom maatija ãm më õ patre maati pix na pre hwÿr agjê. Nom apkati më hwÿr pa nê gjêx kêt ãm amgrã pÿnh kãm hwÿr gjêx pÿnh nê. Nê hwÿr gjêx kaxyw nê mëmo mry pa nê hkamrõ ru nê o pa nê hitom maati hwÿr ho agjê. Hãmri nê ho mēs kunĩhti nhÿmõk kamã nê Tirtũm mã kãm:

—Pa Tirtũm. E ota mry kamrõta. Më ixpê akwÿjaja më ixte amnhÿ tomnuj jakamã na pa më amnhÿ pãnhã mëmo mry nhõkre jakã nê kupÿ nê hkamrõ ru nê man awÿr o mra. Te kot më ixte amnhÿ tomnuj mÿrapê htyk pyrãk. Jakamã kwa ã më ixte amnhÿ nhÿpêx anhÿrja ã më ixpumunh hkõt më inhnê më ixte amnhÿ tomnuj rê.

Anhÿr o më amnhÿ to kuwÿ. ⁸ Nê patre maati pix na pre hitom maatija wÿr agjê nê më ho Tirtũm wÿ. Ijaew na prem ixkre kapem hamãr o kuhê nê hwÿr gjêx kêt nê. Tirtũm Karõ kot hã më kãm karõ xà hkõt. Te Tirtũm pé amÿm kuhê pyrãk. Tã na htem jarãhã arÿ Ijaew kanrēhã më hkra nê më htãmnhwÿjaja ã amnhÿ nhÿpêx anhÿr o pa. Jao më higêtjê pyrã nê Tirtũm pé amÿm kuhê.

⁹ Më kot arÿ Tirtũm mã mry hpar nê hkamrõ ho mëmoj kamãr nê amnhÿ to hwÿr o pa htã na htem arÿ hamaxpêr punuj pix o pa.

¹⁰ Tirtũm kapêr tũm kot tanhmã mëmoj tã më kãm karõ hto.

Na pre tanhmã më apkur xà hã më kãm karõ hto nhũm htem pix kur o pa.

Nê tanhmã më hkõm xà hã më kãm karõ hto nhũm htem pix o hkõm o pa.

Nê tanhmã amnhÿmnuj to hã tanhmã më kot amnhÿ kuhõnh to hã karõja nhũm htem hkõt pix mã tanhmã amnhÿ kuhõnh to ho pa.

Nê tanhmã më kot ri më hikukrêx kuhõnh to hã më kãm karõja nhũm htem kõt pix mã tanhmã kuhõnh to ho pa.

Ã na pre Tirtũm Kris kukamã më kãm mëmoj tã karõ rax anê. Kris kutêp pix mã ã më kot amnhÿ nhÿpêx anhÿr kaxyw. No më pahte arÿ ã amnhÿ nhÿpêx anhÿr kaxyw kêt. Na pre ra Kris më pahwÿr wrÿ nê Tirtũm kapêr tũm o hapêx nê hpãnhã më pamã kapêr nyw jarê pu më hpãnhã nywta kõt pix mã amnhÿ nhÿpêx o papa. Kapêr nywja mex o mex. Nê mex o wamta jakrenh.

Kris htyk o më pahte amnhÿ tomnuj pãnhã amnhÿrer ã harēnh

¹¹ Tã na pre Krisja tãm më pahwÿr wrÿ nê kêp më pahto Tirtũm wÿr xwÿnh maati nê patre hpãnhã më pahto hwÿr o pa. Nom jar pika ja kamã më kot më ïhkra ho Tirtũm nhõrkwÿ kaàkre nhÿpêxta wÿr àr nê kamã më pahto hwÿr kaxyw na pre wrÿk kêt nê. Na pre ra akupÿm kaxkwa hwÿr api nê kamã õrkwÿ mex wÿr axà nê kamã tanhmã më pahto mex to nê tanhmã më pahto Tirtũm wÿr to rãhã ho hkrÿ. ¹² ã kaxkwa kamã Tirtũm nhõ hitom maatija wÿr àr tipxi htã më pahpiitã më pahte amnhÿ tomnuj pãnhã amnhÿrer pa. Nom mëmo mry kamrõ ho më pahpãnhã amnhÿrer kêt nê. Mõx kamrõ rÿ motre kamrõ ho më pahpãnhã amnhÿrer kêt nê. Amnhÿ kamrõ ho na pre më pahpãnhã amnhÿre. Tyk nê hkamrõ pikapÿrta o më pahpiitã më pahpãnhã amnhÿrer pa.

¹³ Nê amnepê m Ijaew kot Tirtũm kapêr tũm kõt amnhÿ nhÿpêx mex o pa hkêt jakamã nhũm tee ri më omu nê më kot amnhÿ tomnuj o më pa xwÿnh ã më harê. Jakamã na pre mëõ patre xatã mry kamrõ ho më hkamã. Mõx kamrõ nê motre kamrõ ho më hkamã. Na pre mõx krare hkwy hpa

nê ho hxê t nê hprà ho hkwýjê kamî. Æ na prem xatã mē hipêx anhÿr o pa. Tÿrtÿm kot ja hã mē omunh nê mē mex ã mē harênh kaxyw. Nom te mē krãhkã pix mex pyrã nê mē hkrã kaxwÿnh kãm arÿ hamaxpêr punuj o pa. ¹⁴ Æ na prem amnhÿ nhÿpêx anhÿr o pa. Nom Krisja mē kurom aa tanhmã amnhÿ tomnuj to hkê t jakamã na pre mē pahte amnhÿ tomnuj xwÿnhjê nê ty. Te mē kot amnhÿ nê môx rÿ motre hpar nê hkamrô runhta pyrãk o amnhÿ nhÿpêx nê mē panê Tÿrtÿm mã amnhÿ gô nhÿm pre mē kãm hkurê xwÿnhjaja kupÿ. Na pre Tÿrtÿm Karôja Æ kot mē panê htyk anhÿr kaxyw tanhmã ho hihtÿx to. Karôja aa hapêx kêt kumrêx rãhã nê pa ho pa xwÿnh jakamã na pre Kris tykja kukamã tanhmã ho hihtÿx to nhÿm mē panê ty. Tapxipix na mē pahte tãm amnhÿ nhÿpêx o papa kaxyw kêp tanhmã mē pahkrã hto xwÿnh. Jakamã na pu htem ra pajamxpêr nyw o pajamxpêr o papa nê pajamxpêr o:

—Na pa pre tee ri inhmã amnhÿ krã hkôt tãm amnhÿ nhÿpêx o ixpa hprãm kaprÿ nê ãm amnhÿ tomnuj pix o ri ixpa. Tã Kris kot inhnê htyk o hkamrô pikapÿr Æ harênh ma nê amnhÿ kaxyw hkôt ijamaxpêr tÿx nê nhÿm amnhÿ tã ixpumu nê ixte tãm amnhÿ nhÿpêx o ixpa kaxyw ixãm. Jakamã kot paj ãm Tÿrtÿm pix mã kãm tanhmã amnhÿ nhÿpêx to ho ri ixpa. Tÿr rãhã nê pa ho pa xwÿnh jakamã kot paj nhÿrmã kuri urãk nê ixtÿr tÿm nê ixpa ho ixpa. Anê.

¹⁵ Nê amnepê mã na prem piitã Tÿrtÿm kapêr tÿm kôt amnhÿ nhÿpêx mex o pa hkê t nê. Mē kot xatã hkôt amnhÿ nhÿpêx o pa hã amnhÿ jarênh tã hkôt amnhÿ nhÿpêx kêt nê. Jakamã na pre Kris wrÿ nê mē pahte hkôt amnhÿ xunhwÿr mã xwÿnhjê mã Tÿrtÿm kapêr nyw jarê nê mē pamã:

—Kot paj mē anê ty nhÿm Tÿrtÿm Æ ixte amnhÿ nhÿpêx anhÿrja kukwak ri mē ato mex rãhã ho pa. Anê.

Hãmri nê amnhÿ jarênh xà hkôt mē pahte amnhÿ tomnuj piitã hpãnhã amnhÿrer kaxyw mē panê ty. ¹⁶⁻¹⁷ Te jar pika ja kamã mēhõ htyk kukamã hkrajê mã tanhmã amnhÿ jarênh to pyrãk. Na htem htyk kaxyw nê hkrajê mã:

—Nà kot paj mēmo arÿgro hã ty ka mē inhmÿr pê ixpê ixkukrêx kwÿ o arÿk.

Anhÿr o na htem amnhÿ jarê. Hãmri nê ty nhÿm hkrajaja amnhÿm õ mēmoj to arÿk pa. Mē hipêxã kukwak ri mē hikukrêx mex nê mÿr pê o pa. No kormã htÿr ri nhÿm mē kormã kêp hamÿnh kêt nê. Ja pyrã nê na pre Tÿrtÿmja Jejus htyk kukwak ri tanhmã mē pahto mex to pu mē kukwak ri mē pamex nê pahkÿnh nê ri papa.

¹⁸ Nê Tÿrtÿm kapêr tÿm kôt na pre hte mē õ patre mry pa nê ãm hkamrô runh kôt pix mã mē ho Tÿrtÿm wÿr o pa nhÿm amnhÿ tã mē omunh xà hkôt mē kuma nê tanhmã mē ho mex to.

¹⁹ Na pre finat Mojesja Ijaew mã Tÿrtÿm kapêr tÿm piitã harê nê harênh pa hãmri nê môx õxpÿ nê kaxyw motre hõxpÿ. Hãmri nê xijere kamã hamê wa hkamrô runh pa nê kamã gô hkwÿ ru. Hãmri nê kaxyw mēmo pi hpa hkryre pê “isop” jarênhja kwÿ kukê. Nê kaxyw ôwêhti hkÿ kamrêkre hkwÿ hpy nê isop mē ho pihkàr pa nê mry kamrô o go. Hãmri nê ho hkwÿjê kamî. Nê ho Tÿrtÿm kapêr Æ kagã tÿmta kamî. ²⁰⁻²² Hãmri nê ho anhÿr pa nê mē kãm:

—Nà na Tÿrtÿmja ixte mry kamrô ho mē akamÿr pumunh kôt mē pamã kapêr o: “E kot kaj mē ixkapêr kôt amnhÿ nhÿpêx o ri apa hã kot paj tanhmã mē ato mex to rãhã ho ri ixpa ka mē amex nê akÿnh nê ajamakêtkati nê ri apa. Jakamã kêt ka mē mry kamrô ho mēmoj piitã hkamÿr pa. Nê ho amnhÿ kamî. Kêr pa ja hã mē apumu hãmri nê axte tanhmã mē ate amnhÿ tomnuj tota mã ijamaxpêr kêt nê.” Anê. Æ na Tÿrtÿm mē pamã kapêr anê. Anê.

Hãmri nê hpãnhã mry kamrôta o õrkwÿ kaàkre kamî. Nê hkre kamã mēmoj kuhê xwÿnh piitã nhÿm ho hkamÿr pa. Æ na pre mē õ patre mē mex kaxyw mē hipêx anhÿr o pa. Mē kot tõhã mēmoj to hpÿnhre nê ho hkamÿr kêt jakamã kironhÿx pre mēmoj piitã Æ hipêx anhÿr o pa. Kop apu mē kot mry hpar nê hkamrô runh kêt ronhÿx pre Tÿrtÿm arÿ mē kot amnhÿ tomnuj mã hamaxpêr rãhã ho pa.

²³ Na prem Æ Tÿrtÿm nhõrkwÿ kaàkre kamã mēmoj kuhê xwÿnh piitã mex kaxyw hipêx anê. Te Tÿrtÿm kot mē pahto mex

nhũm mẽ pahte nhỹrmã ma kaxkwa hwỳr ò krĩ hwỳr paxàpirta pyrà nẽ. Nom mẽ kot mry hpar nẽ hkamrô runhta kukwak ri mẽ pamex nẽ papa hkêt. Âm mēhõ kamrô kukwak ri mẽ pamex xwỳnhhta pix kukwak ri na mẽ pahpê pahťir tũm nẽ papa mã xwỳnh. Ja na mex o mry kamrô piitã hakrenh pa. ²⁴ Jejus Krisja pix kukwak ri. Tãm na pre patre pyrà nẽ mẽ pahto Tĩrtũm wỳr kaxyw mẽ ìhkra ho Tĩrtũm nhõrkwỹ kaàkre nhĩpêxta wỳr gjêx kêt nẽ. Âm ixkre kaàkre pix na pre. Na pre kaxkwa kamã Tĩrtũm nhõ krĩ hwỳr axà. Tã arĩ kamã Tĩrtũm nhĩhkõ hã mẽ pahto hwỳr rãhã ho hkrĩ.

²⁵ Nẽ Ijaew nhõ patre maati na hte amgrà mẽ òrkwỹ kaàkre kamã hitom maati hwỳr gjêx tipxi. Nẽ amnhĩ kôt mry kamrô ru nẽ ho agjê. Tĩrtũm kot hã omunh nẽ axte mẽ kot amnhĩ tomnuj mã hamaxpêr hkêt kaxyw. Nom Kris na pre mẽ urak nẽ mẽmo mry pa nẽ Tĩrtũm mã hkamrô kapĩr kêt nẽ. Kamrô na pre mẽ panê axkapĩ. Nom patre pyrà nẽ amgrà mẽ ã amnhĩ nhĩpêx anhỹr kêt nẽ. Na pre htyk o Tĩrtũm mã amnhĩ nhõr tipxi. ²⁶ Kêp apu patre pyrà nẽ amgrà mẽ mẽ panê htyk o pa ronhỹx ra mẽ panê htyk xohtô rax kumrêx. Nhỹx pre amnepê mã Tĩrtũm kot mẽmoj piitã ho katorta rũm amgrà mẽ mẽ panê htyk o pa ho hkrax. Jao xatã htyk o amgrà xohtô rax kumrêx. Nom ja kot anhỹr kêt. Na pre mẽ pahwỳr wrỳ nẽ mẽ panê htyk tipxi htã htykja o mẽ pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ âm pahtyk tipxi htã koja Tĩrtũm nhỹrmã akupỹm mẽ pahpiitã mẽ pahto pahťir nẽ ahpỹnhã tanhmã mẽ pajarênh to nẽ ahpỹnhã tanhmã mẽ panhĩpêx to. Kormã mẽ pahťir ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. ²⁸ Ja pyrà nẽ na pre Krisja âm mẽ panê htyk tipxi htã mẽ pahto ohtô nẽ mẽ panê mẽ pahte amnhĩ tomnuj piitã rênh pa. Hãmri nhũm Tĩrtũm akupỹm ho htĩr nẽ akupỹm amnhĩ wỳr ho api. Tã koja nhỹrmã akupỹn mẽ pahwỳr wrỳ. Nom axte mẽ pahte amnhĩ tomnuj pãnhã amnhĩ rer kaxyw mẽ panê htyk kaxyw wrỳk kêt nẽ. Ra kot mẽ pahte amnhĩ tomnuj pãnhã

amnhĩrer kênã. Koja akupỹn wrỳ nẽ mẽ pahte amnhĩ wỳr kamã pajamak o papa xwỳnhjaja ma akupỹm amnhĩ kôt kaxkwa hwỳr mẽ pahto àpir pa. Ra mẽ pahtyk tã nhũm akupỹm mẽ pahto mẽ pahťir nẽ ma amnhĩ kôt mẽ pahto àpir pa pu mẽ kuri pamex nẽ pahťir tũm nẽ papa ho papa.

10

Kris kot mẽ panê htyk tipxi hã harênh

¹ Nẽ arĩ mẽ kot Tĩrtũm kapêr tũm kôt amnhĩ nhĩpêx o mẽ pa xwỳnhjaja kormã hprĩ hã Tĩrtũm kot tanhmã mẽ pahto mex to hã harênh mar tỳx kêt. Na prem kormã hkwỹ pix ma. Na hte mẽ ò patreja amgrà mẽ kãnhmã kaxkwa hwỳr mry kamrôta pẽ nẽ mẽ amnhĩ to Tĩrtũm wỳ. Kot ja hã mẽ omunh nẽ axte mẽ kot amnhĩ tomnuj mã hamaxpêr hkêt kaxyw. Tã ã mẽ kot amnhĩ nhĩpêx anhỹr tã arĩ Tĩrtũm kapêr kwỳm amnhĩ nhĩpêx rãhã ² jakamã na prem xatã kãm mẽmo mry kamrô runh o pa. Kêp apu tãm amnhĩ nhĩpêx nẽ tãm ri hamaxpêr ronhỹx arĩ ã amnhĩ nhĩpêx anhỹr o pa hkêt nẽ. Nẽ xatã amnhĩ pãnhã mry hpar nẽ hkamrô ho Tĩrtũm nhõrkwỹ kaàkre kamã mẽmoj kamĩr kêt nẽ. ³ Nom na prem tãm amnhĩ nhĩpêx o pa hkêt nẽ. Mẽ kot amgrà mẽ Tĩrtũm kot mẽ nẽ mẽ kot amnhĩ tomnuj rênh kaxyw mẽ kot kãm mẽmo mry hpar o pa htã no âm hkôt amnhĩ nhĩpêx xwỳnh ã amnhĩ jarênh kêt nẽ. Arĩ mẽ kot amnhĩ tomnuj o pa jakamã na prem mry hparta ã amnhĩ pumu nẽ tee ri amnhĩ kukamã hamaxpêr o hkaprĩ nẽ pa. ⁴ Nom na hte môx kamrô rỳ motre kamrôja mẽ panê mẽ pahte amnhĩ tomnuj rênh kêt nẽ. ⁵⁻⁸ Jakamã na pre Krisja mẽ pahwỳr nojarênt nẽ Tĩrtũm mã amnhĩ jarênh o:

Pa Tĩrtũm? E kot paj ma mẽ hwỳr wrỳ.

Mẽ kot amnhĩ pãnhã amã mry hparta apê hprãm nõkati nẽ amã hkĩnh kêt.

Ate mẽ nẽ mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt. Âm ixkukamã na ka pre ã mẽ kot amnhĩ nhĩpêx anhỹr kaxyw mẽ kãm ja hã karõ.

Mê kot mry nhîpêx o te pa ixte mê nê ixtyk nê ixkamrô pikapîr pyrâk o na prem ixkukamã ã amnhî nhîpêx anê.

Jakamã na ka ra mê kaxyw inhmã inhî gô pa mê urâk nê inhî ho inhî.

Tã kot paj ma mê hwÿr wrÿ. Ixte amã hprãm xà hkôt pix mã ixte tanhmã amã mnhî nhîpêx to ho ixpa kaxyw. Akapêr ã kagà htüm kot tanhmã ixkukamã ijarênh to xà hkôt kot wrÿ nê ã amã amnhî nhîpêx anê. Anê.

Hãmri nê man mê pahwÿr wrÿ. ⁹ Kot Tîrtüm kapêr tùm o hapêx par nê hpãnhã tãm mê panê htyk kaxyw wrÿ. Jakamã na pre nojarêr nê Tîrtüm mã amnhî jarênh o:

—E ixte amã hprãm xà hkôt amnhî nhîpêx kaxyw kot paj ma mê hwÿr wrÿ.

¹⁰ Anhÿr jakamã wrÿ nê Tîrtüm kãm hprãm xà hkôt mê panê ty. Na pre nhãm mēhō mê kãm hkurê xwÿnhjê mã ör nhüm mê kot hpîr nhüm amarî htyk kêt nê. Na pre amnhî grôn timer kôt mê kãm amnhî gô nhüm prem kupî. Hãmri nhüm htyk o mê pahte hkôt amnhî xunhwÿr xwÿnhjê o Tîrtüm kra. Mê kot xatã mry hparta rom htyk tipxi tã mê pahpiitã mê pahte amnhî tomnuj pãnhã amnhîrer pa.

¹¹ Nê mê õ patrejaja na htem apkati mê Tîrtüm nhörkwÿ kaàkre kamã kãm tanhmã amnhî nhîpêx to. Nê apkati mê hkwÿjê hpãnhã mry hkwÿ hpa nê hkamrô ru nê mê ho Tîrtüm wÿ. Tã nom ja hã mê omunh xà hkôt mê nê mê kot amnhî tomnuj rên timer kêt nê. ¹² No kêt Kris na pre mê kot xatã mry hpar xwÿnh timer rom ãm htyk tipxi htã mê pahte amnhî tomnuj piitã hpãnhã amnhîre. Hãmri nê ma akupÿm kaxkwa hwÿr api nê Tîrtüm nhîhkô hã Pahi Maati hkrî xà kamã upôk rüm hkrî ho hkrî. ¹³ Koja kuri hkrî rãhã nhüm Tîrtümja ïhkram mê kot kutã amnhî xunhwÿr xwÿnhjê jaxàr pa. Ja kaxyw na kormã kuri hamãr o hkrî. ¹⁴ ãm htyk tipxi htã htykja o mê pahte hkôt amnhî xunhwÿr xwÿnhjê ho Tîrtüm kra pu mê ra hpãnhã tãm amnhî nhîpêx rãhã ho papa. Nê pajamxpêr mex o ri papa. Tîrtüm kãm hprãm xà hkôt.

¹⁵ Amnepêr mê kot Tîrtüm nhÿ hã kapêr jarênh o mê pa xwÿnh timer na prem mê

panhîgêrjê mã kapêr o pa. Tîrtüm Karō nhÿ hã mê kãm kapêr nê mê kãm:

¹⁶ —E na Tîrtüm mê pamã amnhî jarê nê amnhî jarênh o:

Kot paj nhÿrmã axtem ixkapêr nyw o mê amã ixkapêr.

Nê mê akrãm hagjê ka mê mar tÿx pê hã ano htÿx nê ho apa.

Ixkapêr tùm na pa pre mê amã kên pota ã hã kagà.

Nom ixkapêr nyw kot paj axtem mê akrãm hagjê.

¹⁷ Nê kot paj axte mê ate amnhî tomnuj mã ijamxpêr kêt nê.

Anhÿr o mê pamã amnhî jarênh. Anê.

¹⁸ Tã ra axte mê pahte amnhî tomnuj mã hamxpêr kêt ã kot amnhî jarênh jakamã mo kaxyw kot pu mê arî amnhî pãnhã kãm mēmo mry hpar nê hkamrô runh o papa? Tã mê pahkwÿjaja na hte arî kãm ja ho anhÿr prãm o pa. E kwa mê axte ã amnhî nhîpêx anhÿr kêt nê ixkwÿjaja.

Akupÿm mê pahte amnhî nhîpêx tùm o paxujanãr kêt ã mê pamã karō

Matêwre 27.51; Rukre 23.45; Rômãn 5.1-2; Epes 3.12; Eprêw 4.14-16

¹⁹⁻²⁰ E ixkrãmnhwÿjaja. Ra Jejus kot mê panê htyk o hkamrô pikapîr jakamã na pu htem arî tee ri amnhî kukamã pajamxpêr hkêt nê. Tîrtüm axte kot mê pahte amnhî tomnuj mã hamxpêr kêt jakamã na pu htem paxãmnhîx amnhî to hwÿr o papa. Te paxãmnhîx örkwÿ kaàkre kamã hitom maati hwÿr pagjêx nê kamã amnhî to hwÿr timer pyrâk. Jao ra mê papamjaja amnhî to hwÿr o papa nhüm patre axte mê pahto hwÿr kêt nê. Jejus na pre htyk o mê pamã hitom maati wÿr hakwakre kahêxã hã kupêxêja kôt ã ho axkjê. Jao mê paxãmnhîx hwÿr mê pagjêx kaxyw mê pamã kahê xà mê.

²¹ Tã ra kêp Tîrtüm nhō krî kamã mê pahto hwÿr xwÿnh timer maati na. Nê mex kumrêx o jar pika ja kamã patre kot mê ho hwÿr o pa xwÿnh timer jakrenh. ²² Jakamã e kwa kêt pu mê mãmrî paxãmnhîx amnhî to Tîrtüm wÿr o papa. Ra Jejus kot mê panê htyk nhüm mê pahte amnhî kaxyw hkôt pajamxpêr rãhã ho papa jakamã kêt pu mê axte mê pahpê amnhî tomnuj xwÿnh ã amnhî jarênh kêt nê. Kêt pu mê nhÿrmã tanhmã pajamxpêr

punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ kamã amnhĩ to Tĩrtũm wÿr kurê kumrêx. Jejus ra kot mē pahte amnhĩ tomnuj pãnhã amnhĩrer par jakamã kot puj mē Tĩrtũm mã tanhmã mē pahte amnhĩ tomnuj to hã amnhĩ jarē nhũm mē pama nē axte kãm hamaxpēr kêt nē. Pu mē te paxwÿr nē pahte amnhĩ nē pagrã htyk kuhõnh par nē akupÿm pamex pyrãk. Nē axte paxãmnhĩx amnhĩ to Tĩrtũm wÿr o papa.

²³ Nē mē kot Kris ã tanhmã mē pahto htã kwa kêr pu mē tee ri amnhĩ kukamã pajamaxpēr kêt nē. Rÿ pajamaxpēr o:

–Konēn. Koja mē tanhmã hamaxpēr to nē Kris ã ixpĩ rÿ ko. Pa apu mē kot ixpĩr pymaj akupÿm ixte amnhĩ nhĩpêx tũm o awjanã nē akupÿm hkôt amnhĩ nhĩpêx japêr rÿ ko. Anē.

Kwa pu mē tee ri ã pajamaxpēr anhÿr hkêt nē. Pu kêt mē pajamaxpēr o:

–Nà mē kot Kris ã tanhmã ixto htã kot paj aa hkaga hkêt nē. Mē kot hã ixpĩr mã tã kot paj hkaga hkêt kumrêx.

Anhÿr ã amnhĩ jarē. ²⁴ Nē kêr ka mē akwÿjê mã anē kê mē mēmoj to axpēn kutã nojarêt rãhã ho ri axpēn kôt pa. Jao tanhmã axpēn to mex to o ri axpēn kôt pa.

²⁵ Na pre ra mē pahkwÿjaja tanhmã hamaxpēr to nē axte mē pahkôt pikuprõnh nē Tĩrtũm kapêr mar o hkrĩ hkêt nē. No kêr pu mē ho mē urãk kêt nē. Kêr pu mē arĩ xatã axpēn wÿr akuprõ nē mē pahte tee ri amnhĩ kukamã pajamaxpēr nē axpēn mã pakapêr o papa. Kêt mē panhõ Pahihtija ra akupÿn mē pahwÿr wrÿk kaxyw jakamã kwa kêr pu mē kutêp arĩ axpēn mã pajamaxpēr mex nhõr pē tãm axpēn nhĩpêx mex rãhã ho i papa.

²⁶ Mē pahkwÿjaja kot Tĩrtũm kapêr mar mex tã na htem kuma nē ãm kuma. Kwa kêr ka mē ho mē urãk kêt nē. Kris kot mē panê htyk ã harēnhja mē kot mar mex tã na htem kuma nē ãm kuma nē hkaga kumrêx. Jakamã mēhõ koja Kris pyrã nē htyk o mē kot amnhĩ tomnuj pãnhã amnhĩre? Nà amrakati kumrêx. ãm Jejus pix na pre Tĩrtũm ja kaxyw ãm. Tapxipix na pre ã mē panê amnhĩ nhĩpêx anē. Tã nhũm mē kot hka-gaja mÿrapê koja mē nhÿrmã mē tãmjaja mē kot amnhĩ tomnuj pãnhã amnhĩre. ²⁷ Mē

kot Tĩrtũm kutã amnhĩ xunhwÿr xwÿnh na mē. Amnepê mē na pre Tĩrtũm mē kot kutã amnhĩ xunhwÿr xwÿnhjê kaxyw mē kot amnhĩ xà htÿx kamã hamak tũm xàta nhĩpêx. Tã ra mē kot Jejus kaga jakamã koja nhÿrmã ma hwÿr mē rēnh pa nhũm mē tee ri kãm hwÿr pa hprãm kêt kaprÿ. ²⁸ Amnepê mē finat Mojesja kormã htĩr ri na pre hte mēhõ pixi nē kapêr kaga nē akupÿm kot amnhĩ nhĩpêx tũm o awjanã nē tanhmã amnhĩ tomnuj to nhũm hkwyjaja ja hã omu. Tanhmãan axkrut rÿ axkrunêpxi nē ja hã omu. Hãmri nē ma Mojes wÿr mra nē axpēn kôt kãm tanhmã kot amnhĩ tomnuj to hã harē. Hãmri nhũm harēnh ma nē mē kãm hã amÿné nhũm tee ri kãm htĩr prãm kaprÿ. Mē kot akupÿm amnhĩ nhĩpêx tũm o ujanãr nē amnhĩ tomnuj o paja mÿrapê na prem mē kupa. ã na pre htem mē hipêx anhÿr o pa.

²⁹ Nē koja mēhõ tanhmã Tĩrtũm Kra Jejus o kapêr punuj to. Tĩrtũm kapêr ã kagã htũm kot ra mē kot kêp Tĩrtũm Kra hã harēnh mar mex tã axtem nē tanhmã ho kapêr punuj to ho pa. Kot mē panê htyk nē hkamrõ pikapĩr kôt kot mē pahte amnhĩ tomnuj pãnhã amnhĩrer ã harēnh mar tã kuma nē ãm kuma nē harēnh o:

–Nà mē pahpyrà nē kot amnhĩ tomnuj xwÿnh nhũm mē kot hã hpĩr kēnã. Na pre mē panê htyk kêt nē.

Anhÿr ã harē. Nē Tĩrtũm Karõja nhũm mããnēn tanhmã ho kapêr punuj to. Kêp mē pakutã nojarêt xwÿnh tã nhũm axtem nē tanhmã ho kapêr punuj to. Mÿrapê koja nhÿrmã Tĩrtũm tanhmã homnuj tÿx to. Homnuj tÿx o mē kot Mojes kapêr kaga nhũm mÿrapê kot mē hparta jakre. Jakamã kwa kêr ka mē ã amnhĩ nhĩpêx anhÿr hkêt nē. ³⁰ Tĩrtũm kapêr ã kagã htũm kot ja jarēnh kot:

Ixpê Tĩrtũm kot paj mē kot amnhĩ tomnuj xwÿnhjê homnuj tÿx nē. Anē.

Nē mē kot tãm amnhĩ nhĩpêx xwÿnhjê jarēnh kot:

Mē kot amnhĩ to mex o mē pa xwÿnhjaja kot paj nhÿrmã mē ho mex rax nē. No mē kot amnhĩ tomnuj o mē pa xwÿnhjaja kot paj nhÿrmã mē homnuj tÿx nē. Anē.

Ra mē pahte ã kapēr anhÿr xwÿnhja kot amnhÿ nhÿpêx ã omunh mex. ³¹ Jakamã kwa mē okora. Kêr ka mē amnhÿ to mex rãhã ho ri apa. Tirtÿm rãhã ho rãhã nē hihtÿx o hihtÿx jakamã koja mēmoj tã akamã gryk ka amex kêt o amex kêt.

³² Nē amnepê mē ate Jejus kôt amnhÿ xunhwÿr krax kãm na prem Jejus ã mē atomnuj tÿx tã ka prem mē umaj hkaga hkêt nē. Tã kêr ka mē arÿ ã amnhÿ nhÿpêx anhÿrja kukamã mãn ajamaxpêr nē hã anohtÿx rãhã ho apa. Jao arÿ ã amnhÿ nhÿpêx anē nē mē umaj Jejus kaga hkêt nē. ³³ Na prem mē piitã mē noo mã tanhmã mē amã kapêr punuj to nē tanhmã mē anhÿpêx to. Nē tōhã tanhmã mē akwÿjê homnuj tÿx to ka mē tee ri ja hã mē omu nē mē kamã axukaprÿ nē. Nē mē hkôt axkamê nhÿm prem mã mē ato anē nē. ³⁴ Na prem mē akwÿjê jagjê ka prem ja hã mē omu nē ma mē hagjênh xà hã ixkre hwÿr mē hwÿr mra nē tanhmã mē ho mex to. Nhÿm prem mē apê mē akukrêx kwÿptã nē ma amnhÿm o pa ka mē ãm amnhÿ tã mē omu nē ajamaxpêr o:

—Kwãr mē mãmri ma amnhÿm hamÿn o pa. Koja nhÿrmã Tirtÿm inhmã ixkukrêx mex o kot ja jakrenhta kwÿ nhôr rax nē pa amnhÿm hamÿ nhÿm aa ixpê hapêx kêt nē. Hãmri nhÿm axte mēhō aa ixpê utar kêt nē. Jar mē ixkukrêxta mexti hã. Anē.

Jao mē kot mē apê utar tã ka mē akaprÿ nã apa hkêt nē. ã amnhÿ kukamã ajamaxpêr anhÿr pê akÿnh nē apa. ãm hãmri na ka prem ã amnhÿ kukamã ajamaxpêr anē. ³⁵ Na ka prem mē kutã amnhÿ to htÿx kãm ã apa anē. Tã kwa kêr ka mē arÿ ã amnhÿ nhÿpêx anhÿr o ri apa. Kêr kê nhÿrmã Tirtÿm ja hã mē ato mex rax nē.

³⁶ Nē kêr ka mē arÿ amnhÿ kaxyw Tirtÿm mã ajamaxpêr rãhã ho ri apa. Mē kot Jejus ã tanhmã mē ato htã ka mē hkaga hkêt nē. Kot kaj mē ã amnhÿ nhÿpêx anhÿr o apa nhÿm Tirtÿm ja hã mē apumu nhÿm ja kãm mex nē. Hãmri nhÿm ra kot amnhÿ jarênh xà hkôt nhÿrmã amã mēmoj mex nhôr rax nē. Jakamã kwa mē kot tanhmã mē anhÿpêx to hã amnhÿ pumu nē tee ri amnhÿ kukamã ajamaxpêr o ri akaprÿ hkêt nē. Kot kaj mē Kris ã apunuj rãhã apa hkêt

nē. ³⁷ Tirtÿm kapêr ã kaga htÿm kot Jejus jarênh kot:

Koja mē pahwÿr wrÿk mã xwÿnhhta tokyx wrÿ. Na ra wrÿk kaxyw nojarêt. Anē.

³⁸ Nē harênh kot:

Ixxôt mē kot amnhÿ nhÿpêx mex o mē pa xwÿnhjaja koja mē amnhÿ kaxyw ixkôt hamaxpêr tÿx rãhã nē. Jao nhÿrmã ixri htÿr tÿm nē mex rãhã nē pa ho pa.

Nē koja mēhō ixkaga pa tee ri kãm ixkÿnh kêt ã omu. Anē.

³⁹ No mē papajaja te mē pahte mē kot Jejus kaga nhÿm kot amnhÿ tã mē homnuj mã xwÿnhjê pyrãk kêt. Arÿ mē pahte amnhÿ kaxyw hkôt pajamaxpêr rãhã jakamã koja nhÿrmã amnhÿ wÿr mē pahto api.

11

Amnhÿ kaxyw Tirtÿm kôt mē hamaxpêr mex xwÿnhjê jarênh

Sikÿn Pêtre 3.5-7

¹ Nē na htem Kris ã mē panhÿpêx kati ho pa pu mē pahpunuj rãhã nē ri papa. Te Kris kot mē pahto mex kêt pyrãk pu htem mēmoj punuj pix kãm ri papa nē kormã Tirtÿm kot mē pahto mex ã amnhÿ tã omunh kêt nē. Tã ã mē pahte anhÿr tã kwa kêr pu mē arÿ kapêr kôt amnhÿ nhÿpêx rãhã ho papa. Mē pahte pano ho Tirtÿm pumunh kêt tã kot mē pahkôt pa ho pa hã amnhÿ kaxyw kãm pajamaxpêr tÿx rãhã ho papa. Jakamã na pu htem ãm kapêr kôt pix mã amnhÿ nhÿpêx o papa. ² Amnepê mã mē pakukamã mē panhÿgêjtaja na prem no ho Tirtÿm pumunh kêt tã amnhÿ kaxyw kãm hamaxpêr nē kapêr kôt amnhÿ nhÿpêx o pa nhÿm amnhÿ tã mē omu nhÿm ja kãm mex nē.

³ Nē mē papajaja na pu htem pajaxwÿja mē pano ho omunh kêt tã amnhÿm harênh o:

—Nã amnepê mē kormã mēmoj piitã amrakati ri nhÿm Tirtÿm ãm kapêr pix o mēmoj piitã ho kato. Ixte inhno ho ja hã omunh kêt tã kot ã amnhÿ nhÿpêx anhÿr ã amnhÿ jarênhja jakamã kot paj hkôt ijamaxpêr tÿx rãhã ho ri ixpa. Anē.

⁴ Na pre finat Atãw nhÿpêx nē kaxyw hprō Ewa nhÿpêx. Hãmri nhÿm wa hkra

Apewja htô Kaï rom amnhî kaxyw Tîrtûm kôt hamaxpêr tÿx o pa. Jakamã nhûm wa Tîrtûm mã mêmôj gô. Nhûm Apew kot Kaï rom Tîrtûm kãm hprãm xà hkôt kãm mêmôj nhôr jakamã nhûm amnhî tã omu nê kot amnhî to mex xwÿnh ã harê nê kot kãm ôr xwÿnhhta nhûm mex ã harê. Tã Apew amnepêm htyk tã pu htem arî harênh mar rãhã ho papa nê kãm pajamaxpêr o:

—Apew na pre hte amnhî kaxyw Tîrtûm kôt hamaxpêr tÿx rãhã ho pa.

Anhÿr ã kãm pajamaxpêr.

⁵ Nê Atãw kanrêhã htãmnhwÿ Enokja na pre haxwÿja amnhî kaxyw Tîrtûm mã hamaxpêr tÿx o pa. Jao hkamnâr rom kãm hprãm xà hkôt pix mã tanhmã kãm amnhî nhîpêx to ho pa nhûm amnhî tã omu nê amnhîm mex ã harê. Jakamã na pre htyk kêt nê. Na pre Tîrtûm htîr rãhã ma amnhî wÿr ho apî nhûm hkwÿjaja tee ri hapêr o pa. Jakamã na pu htem arî axpên mã Enok kot amnhî kaxyw Tîrtûm kôt hamaxpêr mex o pa hã harênh o papa. ⁶ Mê kot amnhî kaxyw Tîrtûm mã mẽ hamaxpêr kêt xwÿnhjaja na hte Tîrtûm mẽ mex ã mẽ harênh kêt nê. Tã mẽ papajaja kêr pu mẽ Enok pyrã nê amnhî kaxyw kãm pajamaxpêr tÿx rãhã ho papa. Nê pajamaxpêr o:

—Tîrtûmja htîr rãhã ho rãhã. Koja nhÿrmã mẽ ixte amnhî kaxyw hkôt ijamaxpêr xwÿnhjê ho mex rax nê. Nà koja mẽ ixto anê.

Anhÿr o mẽ pajamaxpêr nhûm Tîrtûm amnhî tã mẽ pajamaxpêr ã mẽ pahpumu nê mẽ pahte amnhî to mex ã mẽ pajarê. No mẽ kot amnhî kaxyw kãm hamaxpêr kêt xwÿnhjaja na hte ã mẽ harênh anhÿr kêt nê.

⁷ Nê Enok kanrêhã htãmnhwÿ Noehtija na pre haxwÿja amnhî kaxyw Tîrtûm mã hamaxpêr tÿx o pa. Jao hkamnâr rom amnhîm pâr raxja nhîpêx. Na pre ra Tîrtûm na rax kukamã tanhmã kãm ujarênh to. Kormã aa na wrÿk nhûm Noehti kot omunh kêt tã Tîrtûm kapêr ma nê mar xà hkôt amnhîm pâr rax kumrêxta nhîpêx. Ôrkwÿ kamã hkwÿjê mẽ mẽ amnhîm hipêx. No mẽ kot Tîrtûm kapêr mar nê ãm mar xwÿnhjaja na pre Tîrtûm gô tãm o mẽ hanhi nê mẽ himex pa. Nom Noehtija nhûm kot amnhî to mex xwÿnh ã harê. Kot amnhî kaxyw

hkôt hamaxpêr rãhã ho pa jakamã nhûm pre ã mex ã harênh anê.

⁸ Nê Noehti kanrêhã htãmnhwÿ Apraãwja na pre haxwÿja amnhî kaxyw Tîrtûm mã hamaxpêr tÿx o pa. Na pre Tîrtûm kot kãm pika nhôr ã kãm amnhî jarê nê ra kot ma hwÿr mênh kaxyw. Hãmri nhûm Apraãw kuma nê hkamnâr rom ô pika kaga nê ma pika hõja wÿr pa. Aa kot ma hwÿr môr nê omunh kêt tã Tîrtûm kapêr mar xà hkôt ô pika kaga nê ma hwÿr pa ho pa. ⁹ Hãmri nê hwÿr pøj nê omu nhûm Tîrtûm kãm:

—E pika ja kot paj nhÿrmã akanrêhã akra nê atãmnhwÿjê mã kugô. Anê.

Hãmri nhûm kuma nê pikaja kamã pa ho pa. Ra kamã axtem mẽ uro hkwÿjaja ri pa nhûm Tîrtûm kormã mẽ kator kêt ri nhûm mẽ ô pika hwÿr pøj nê mẽ kamã pa ho pa. Nom amnhîm ôrkwÿ mex nhîpêx kêt nê. Kormã kêp ô pika kumrêx kêt ã hkamnhîx jakamã ãm mry kà o ixkre nhîpêx nê kamã pa ho pa. Nê nhÿhÿm pa kaxyw nê kugrà nê ma amnhî kôt o pa. Amnhî kaxyw Tîrtûm mã hamaxpêr rãhã jakamã ã amnhî nhîpêx anhÿr o pa.

Nê Apraãw kra Ijak nê htãmnhwÿ Jakoja wa Apraãw pyrã nê mry kà ho ôrkwÿ nê ma amnhî kôt o pa. Nhûm Tîrtûm kot Apraãw mã kapêr pyrã nê wa kãm wa hkanrêhã wa hkra nê wa htãmnhwÿjê mã pika nhôr ã amnhî kukamã wa kãm amnhî jarê. ¹⁰ Jakamã nhûm Apraãw kormã Tîrtûm nhô krî hwÿr àpir xa hã amnhî tã hamãr pê kot ho ô pika mã xwÿnhjê kamã pa ho pa. Kaxkwa hwÿr àpir mã xwÿnhhta mex kumrêx. Tîrtûm kot hipêx jakamã koja mry kà ho ixkre nhîpêxta rom aa hapêx kêt nê. Jakamã nhûm Apraãw mẽ pahpyrà nê ma kot hwÿr àpir xa hã amnhî tã Tîrtûm jamãr rãhã ho pa. ¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhûm hprô Sara haxwÿja hpigêx tÿx nê. Kamrô hkêt ã amgrã xohtô rax kumrêx. Nhûm wa aa hkra hkêt nê pa htã nhûm Tîrtûm nhÿrmã wa hkra hã wa kãm awjarê nhûm wa kuma nê amnhî kaxyw hkôt hamaxpêr kurê kumrêx. Nom amnhî tã kuma nê tee ri amnhî kukamã hamaxpêr hkêt nê. Na pre wa kuma nê axpên mã:

—Nà kot puj xep hāmri tā pahkra. Tirtūm kot hā ã pajarēnh anhÿr kēnā. Anē.

Tā ã wa kot hkra kaxyw Tirtūm mā hamaxpēr anhÿr jakamā na pre Apraāwja hprō htu. Ra wa hamē hpigēt tÿx kumrēx tā nhūm htu. Nhūm wa hkra Ijakja gaa nē wa kām kato. Jakamā nhūm wa gaa nē rī wa hkanrēhā wa htāmnhwÿ xohtō rax o ohtō rax. Ohtō ho kaxkwa kamā kanhēti xohtō jakre. Nē ohtō ho gō xujanār mÿri pikahti grā hkryre jakre. Jakamā nhūm mē tee ri mē ho kōta hpar mā. Nhūm Apraāw kēp mē hpār krax. ¹³ Tā nhūm Apraāw nē Ijak nē Jakoja mē ri pa tāmtā nē htyk pa nē hapēx. Tirtūm kormā kot mē kām pika jarēnhta nhōr xwÿj ri ra htyk pa. Nom kormā mē htīr ri tanhmā kām hamaxpēr to nē hamaxpēr o:

—Nà kormā Tirtūm kot mē inhmā pika jarēnhja nhōr kēt tā koja nhÿrmā inhmÿr pē ixkanrēhā ixkra nē ixtāmnhwÿjē mā kugō. Nà koja mē kām kugō. Ra kot hā inhmā amnhī jarēnh kēnā kot kēt mē kām ōr kēt.

Anhÿr o kaxyw kām hamaxpēr rāhā ho pa. Jao hkīnh nē hamaxpēr o:

—Nà inhō krīja axtem na. Na pa hte jar pika ja kamā ri mē hkōt ri ixpa. Te ixpē mē uro pyrā nē ri mē hkōt ixpa nom jar inhō krī hkēt. Inhō krī na kēt axte mā. Anē.

¹⁴⁻¹⁵ Na prem ã ō krī hō hkukamā hamaxpēr anhÿr o pa. No ō krī htūmta mē kot hkaga nē pika hō hwÿr mōr xwÿnhta na prem ã harēnh anhÿr kēt nē. Kop apu mē kot amnhīm tām mǎn jarēnh ronhÿx prem awjanā nē ma akupÿm hwÿr pa. Na prem axtem krī hō jarē nē kormā hwÿr mōr kēt ã amnhī jarēnh o pa. ¹⁶ Tā nhÿ krī na prem ã harēnh anē? Nà kaxkwa kamā Tirtūm nhō krīja. Tām na mex kumrēx jakamā nhūm prem kormā hwÿr ma àpir xa hā mē pahpyrā nē amnhī tā Tirtūm jamār rāhā ho pa nhūm amnhī tā mē omu nē hkīnh nē. Nē mē kot tām amnhī nhīpēx ã mē omu nē mē kēp hkra hā mē harēnh ã hpijaàm kēt nē. Hāmri nē mē kutēp tanhmā ō krī ho mex to ho pa.

¹⁷⁻¹⁸ Na pre ra tanhmā Apraāw mā hkra Ijakja jarēnh to nē kām:

—Akra Ijak kanrēhā hkra nē htāmnhwÿjaja kot mē kēp ixkra. Anē.

Tā ra kot amnhī tā Apraāw kamā hamak kaxyw hkukamā hamaxpēr nē hamaxpēr o:

—Xà we Apraāw kām ixkīnh tÿx kumrēx nē kām ixkōt amnhī nhīpēx rāhā ho pa hprām nà? Xà we kām ixkīnh tÿx o hkrata jakrenh? E pa kop we ja hā amnhī tā kamā ama nē omu mǎn. Anē.

Hāmri nē kot hkra hpīr nē kām ōr ã kām karō. Hāmri nhūm kuma nē ra kot kām hpīr kaxyw. Kot Tirtūm kot amnhī nhīpēx ã omunh mex jakamā hkamnār rom kot kām hpīr kaxyw. ¹⁹ Nē hamaxpēr o:

—Nà Tirtūm akupÿm kot mē ho htīr xwÿnh kēnā.

Anhÿr jakamā kām hkra hpīr pyma hkēt nē ra kot kām hpīr mā tā nhūm Tirtūm amnhī tā omu nē nē kām kapēr nhūm kuma nē hpīr kēt nē wa ma akupÿm ōrkwÿ hwÿr mō. Tā ã kot hkra nhīpēx anhÿr jakamā Apraāw mā te Ijak htyk nē akupÿm htīr pyrāk.

²⁰ Nē Ijakja na pre haxwÿja amnhī kaxyw Tirtūm mā hamaxpēr tÿx o pa. Jao hkamnār rom amnhī kra wa kām Tirtūm kot wa ho mex kukamā wa kām harē. Kra Jako mē Ejauta wa kām harē nē wa kām:

—E koja nhÿrmā Tirtūm inhmÿr pē war ato mex rāhā ho pa. Anē.

²¹ Nē Jakoja na pre haxwÿja amnhī kaxyw Tirtūm mā hamaxpēr tÿx o pa. Jao hkamnār rom hkra Juje mā Tirtūm kot mē ho mex kukamā harē. Na pre Jakoja hkra nē htāmnhwÿ mē hpimràatā hprām xà ma Ejit wÿr pa nē kamā pa ho pa. Tā nhūm Jako hpigēt tÿx nē ra htyk kaxyw. Hāmri nē hkra Juje mē hkra wa mē kām kapēr nē mē kām:

—E na pa tee amnhī kamā ama. Na pa ra ixtyk kaxyw. Nom koja Tirtūm nhÿrmā inhmÿr pē mē ato mex rax nē. Anē.

Hāmri nē amnhī kaxpar xà hā pī hā amnhī kaxpa nē kànhmā xa nē Tirtūm mā mex o mex ã harē. Hāmri nē akupÿm nōr xà kamā nōn ty.

²² Nē Jujeja na pre haxwÿja amnhī kaxyw Tirtūm mā hamaxpēr tÿx o pa. Jao htyk kaxyw nē hkamnār rom hkwyjē mā tanhmā amnhī jarēnh to. Ra hpigēt nē htyk kaxyw nē hkwyjē mā tanhmā amnhī tā karō hto nē mē kām:

—E na pa ra ixtyk kaxyw. Tã koja Tĩrtũm inhmyr pê nhỹrmã Ejit rũm mẽ akator nẽ ma akupỹm mẽ panhõ pika hwỳr mẽ ato pa. Ra kot mẽ panhĩgêt Apraãw mã amnhĩ jarẽnh xà hkõt. Jakamã kwa mẽ inhma. Kêr ka mẽ akupỹm anojarêt nẽ ma amnhĩ kõt ixtã kasãwja my nẽ amnhĩ kõt ixto mõ. Hãmri nẽ mũtar mẽ panhõ pika kamã mẽ anhõ krĩ htã ijaxà pa jawỳ mẽ akuri ixtã pyka. Anẽ.

²³ Nẽ Mojes katorxà mẽ hipêêxàja na pre wa haxwỳja jajê pyrà nẽ amnhĩ kaxyw Tĩrtũm mã hamaxpêr tỳx o pa. Juje hkanrêhã htãmnhwỳ na pre wa. Jakamã nhũm Ejit nhõ pahija tee ri Ijaew xohtõ rax kumrêx ã mẽ omu nhũm ja kêp omnuj nẽ. Hãmri nhũm mẽ hkra myjaja mẽ hapõx kõt mẽ hamỳnh xwỳnhjaja kot mẽ hpar ã mẽ kãm karõ. Tã nhũm Mojes kato nhũm hipêêxà mẽ katorxàja wa omu nhũm muxre nhũm wa tee ri hkukamã hamaxpêr. Hãmri nẽ pahi Paraohti mã mẽ hkra jamỳnh xwỳnh kot wa kêp hpĩr pymaj ho pimxur o hã mytwrỳ axkrunêpxi. Tĩrtũm kamnàr rom wa amnhĩ tã kãm uma hkõt nẽ ã kêp hkra ho hpimxur anẽ.

²⁴ Nẽ Mojes na pre haxwỳja amnhĩ kaxyw Tĩrtũm mã hamaxpêr tỳx o pa. Kormã karàre ri na pre Paraohti hkra nija omu nẽ amnhĩm kumỳ nẽ ho hkra nẽ amnhĩ kõt o pa. Rãhã nhũm àptàr nhũm Ejit nhõ xwỳnhjaja kêp pahi Paraohti htãmnhwỳ hã axpên mã harê. Hãmri nhũm tee ri amnhĩ tã mẽ kuma nẽ amnhĩ tã mẽ kãm aprã nẽ mẽ kãm:

—Kwa mẽ ã ijarẽnh anhỹr kêt nẽ. Ixpê mẽ akwỳ hkõt. Anẽ.

²⁵ ãm kãm Tĩrtũm kwỳjê kõt pix mã ri pa ho pa hprãm. Nẽ kãm Ejit nhõ pahi hkõt amnhĩ tomnuj prãm kêt nẽ. ãm mẽ kot amnhĩ tomnuj pix o paja na mẽ kãm hprãm nhũm ja hã mẽ omu nẽ tee ri mẽ hkukamã hamaxpêr nẽ hamaxpêr o:

—Nà kot paj mẽ hkõt ri ixpa hkõt kumrêx. Mẽ hkĩnh nẽ pa htã koja mẽ gaa nẽ ty nhũm mẽ hkĩnhja mẽ kêp hapêx. Nà kot paj Tĩrtũm kwỳjê hkõt mãn ri ixpa ho ixpa. Mẽ kot Tĩrtũm ã mẽ inhĩpêx kati htã pa arĩ mẽ hkõt ixpa ho ixpa. ²⁶ Inhmã Ejit nhõ xwỳnhjê hkõt ixkukrêx rax nẽ ri ixpa hprãm kêt. Kwãr mẽ mãmri Tĩrtũm ã tanhmã inhĩpêx

to. Koja mẽ ã inhĩpêx anẽ pa ixpunuj nẽ ri ixpa htã koja Tĩrtũm nhỹrmã ixto mex rax nẽ. Nà kot paj Ejit nhõ pahihtĩ hkõt ri ixpa hkõt nẽ.

Anhỹr jao ra mẽ pahpyrà nẽ Kris gryk ã mẽ hkaga. ²⁷ Tã akupỹm mẽõ pika hwỳr Ijaewjê ho mõi kaxyw nhũm Ejit nhõ pahihtija tee ri ja hã omu nẽ kamã gryk tỳx nẽ. No nhũm Mojesja amnhĩ kaxyw Tĩrtũm kõt hamaxpêr tỳx o hkamnàr rom kãm mẽ uma hkõt nẽ. Nẽ mẽ kêp hkwỳjê kator pa nẽ ma akupỹm mẽõ pika hwỳr amnhĩ kõt mẽ o pa. Tĩrtũm kamnàr rom ã mẽ kêp mẽ ho kator anẽ. Aa kot no ho omunh kêt tã amnhĩ kaxyw kãm hamaxpêr tỳx nẽ hkamnàr rom mẽ kator nẽ hamakêtkati nẽ mẽ o pa. ²⁸ Nẽ hkamnàr rom mẽ hkĩnh ã arĩgro mẽ kot kãm “Pas” anhỹr xwỳnhhta ho hkra. Kormã Ejit rũm kator kêt ri. Nẽ kaxyw amnhĩ kwỳjê mã hã karõ nẽ mẽ kãm:

—E pa mẽ amã Tĩrtũm kapêr jarê ka mẽ inhma. Nà kot puj xep mẽ jarãhã ôwêhti hkwỳ pa nẽ hkamrõ ru. Nẽ hkamrõ ho panhõrkwy jakwakre hã pĩ kukõ. Hãmri nẽ ã kuxõt nẽ kuku. Koja kamàt nhũm mẽ kot amnhĩ tomnuj xwỳnhjê pê mẽ hkra my kot wa piitã mẽ hpar mã xwỳnhja mõ. Hãmri nẽ mẽ pamỳ ri mõ nẽ ã mẽ pahte mẽ panhõrkwy nhĩpêx anhỹrja ã omu nẽ tanhmã mẽ pahkrajê ho hkõt nẽ. Tĩrtũmja ã mẽ pahte amnhĩ nhĩpêx anhỹr kaxyw ã inhmã karõ anẽ. Jakamã e pu mẽ hkamnàr rom ã amnhĩ nhĩpêx anẽ kê mẽ pahkrajaja mẽ pahpê htyk kêt nẽ. Anẽ.

Hãmri nẽ ã mẽ kot Ejit rũm kator xà hã arĩgrota ã mẽ hkĩnh o kator kra. Mẽ hkĩnhja na htem kãm “Pas” anẽ.

²⁹ Nẽ Ijaewjaja na prem haxwỳja Ejit rũm kormã Mojes kõt mẽ pa ri uràk nẽ amnhĩ kaxyw Tĩrtũm mã hamaxpêr. Jakamã na prem ra gõ xujanàr pê “Gõ Kamrêk” anhỹr xwỳnhja my ri kuhê nhũm Tĩrtũm mẽ kãm ho axkjê. Nẽ mẽ kãm hkõt ã ho amgrà nhũm mẽ hã hkamnàr rom mex nẽ rêr pa. No nhũm mẽ hkõt mẽ kot mẽ himex kaxyw mẽ mrar xwỳnhjaja. Ejit nhõ põiistijaja nhũm gõja akupỹm mẽ hã axkamur nẽ mẽ himex pa.

³⁰⁻³¹ Nẽ Ijaew kot Mojes myr pê Jojue hkõt pa ri mẽ uràk nẽ amnhĩ kaxyw Tĩrtũm kõt hamaxpêr o pa. Na prem ra Tĩrtũm kot

mê kãm pika nhõr xwýnhhta wýr pøj nhũm Tirtũm krĩ pê Jeriko hwýr mê kurê. Mê kot kamã mê pa xwýnh pê utàr kaxyw mê hwýr mê kurê. Mêõ krĩ pu hã kahêja kên tỳx pix o na pre. Nê hprêk rax kumrêx. Nê krĩ nhõ xwýnhjaja kãm Tirtũm kapêr mar prãm kêt. Hãmri nhũm Tirtũm mê hã Ijaewjê mã amýnê nê mê kãm:

—E mêõ krĩja kot paj mê amã kugõ nom kêr ka mê inhmar kumrêx. Kêr ka mê apkati mê mê õ krĩ hwýr mra nê kupu hpýnh o atã apkati kêp 7 nê rĩ ma akupým mra. Anê.

Hãmri nhũm mê kuma nê mar xà hkôt ma Jeriko hwýr mra. Hãmri nê hwýr pøj nê Tirtũm kamnàr rom krĩ puhã kahêja kupu hpýnh o hã apkati kêp 7. Hãmri nhũm apkati pê 7ta ã nhũm kên tỳx o kahêja mê kêp amnhĩ krakra nê rôròk pa. Nhũm mê mra nê hkôt krĩ hwýr agjê nê krĩ nhõ xwýnhjê nhĩmex pa. Nom krĩ kamã kuprý pê Raapja Ijaew pyrã nê amnhĩ kaxyw Tirtũm mã hamaxpêr o pa jakamã nhũm mê kormã mê himex kaxyw mê hwýr mör kêt ri amnhĩ kukamã mê hkwýjaja kot mê hã ukapi ho pa kaxyw mê hwýr mê kurê. Hãmri nhũm Raapja mê kêp amnhĩ pyrã nê Tirtũm kôt hamaxpêr ã mê omu nê hkwý kot mê himex pymaj amnhĩ nhõrkwy kamã mê kêp mê ho amũxu nhũm mê hkà hkĩnh pê ma akupým hkwýjê wýr mō. Jakamã nhũm mê kot mê himex kaxyw mê hwýr mra hãmri nê amnhĩ pyrã nê tanhmã Raap mê õ fãmii ho hkêt nhũm mê arĩ htĩr nê pa. Mê uràk nê amnhĩ kaxyw Tirtũm kôt hamaxpêr o pa hã omunh xà hkôt tanhmã mê ho hkêt nê.

³² ã na pre mê kot amnhĩ kaxyw Tirtũm kôt mê hamaxpêr xwýnhjaja Tirtũm kamnàr rom amnhĩ nhĩpêx anhýr o pa. Nom jajê pixjaja na prem ã amnhĩ nhĩpêx anhýr hkêt nê. Mããñnê Giteãw nê Parak nê Sãsõ nê Jepte nê Tawi nê Sãmuew nê Tirtũm nhỹ hã mê kapêr o pa xwýnhjaja. Jajê piitã na prem wamtajê pyrã nê amnhĩ kaxyw Tirtũm kôt hamaxpêr tỳx rãhã ho pa. Nom kot paj ixprĩ hã tanhmã mê kot hkamnàr rom amnhĩ nhĩpêx to hã mê harênh kêt nê. Kot pa anê nê tokyx harênh par kêt nê. Mê ohtõ rax kumrêx jakamã na pa ãm hkwý pix jarê nê hã kagà.

³³ Na prem hkwýjaja Tirtũm kamnàr rom ma mê kot amnhĩ tomnuj xwýnhjê nhõ krĩ hwýr mra nê mê kêp mê õ pika pytã. Nê mê hkwýjaja Tirtũm kamnàr rom mê ho amnhĩptàr mex o pa. Nhũm prem kãm Tirtũm kurê xwýnhjaja mê hkwýjê pynê nê ahkrehti kamã mry xoprê hkwý nhĩpy mê kurê. Nhũm prem amnhĩ tã mê omu nê amnhĩ kaxyw Tirtũm mã hamaxpêr kurê kumrêx nhũm amnhĩ tã mê omu mê nê te mry jakwa ho pikamýr tỳx pyrãk o mê hipêx nhũm ãm mê omunh o kuhê nê tanhmã mê ho hkêt nê. ã na prem Tirtũm kamnàr rom amnhĩ nhĩpêx anhýr o pa.

³⁴ Nhũm mê kot kuwy rax kãm mê hkwýjê rênh tã nhũm mê kot amnhĩ kaxyw Tirtũm mã hamaxpêr tỳx nhũm amnhĩ tã mê omu nê mê nê tanhmã kuwy ho nhũm mê hxêt kêt nê. Nhũm pre mê hkwýjaja wapo ho mê hkamnawýr o mê hkwýjê hpar kaxyw nhũm mê amnhĩ kaxyw Tirtũm mã hamaxpêr nhũm amnhĩ tã mê omu nê mê nê tanhmã mê ho nhũm mê amnhĩ rê nê mê umaj hprõt nê ma mra. Mê hihtỳx kêt tã Tirtũm kamnàr rom ý hã hihtỳx nê mê kãm mê hkurê xwýnhjê ho krihkrit pa nhũm mê ma akupým hapêx.

³⁵ Nê mēni hkwýjaja na prem haxwýja amnhĩ kaxyw Tirtũm mã hamaxpêr tỳx o pa. Jao mê hkrajaja mê kêp htyk tã nhũm prem Tirtũm kamnàr rom mê ho kuwy nhũm mê kuma nê akupým mê kãm mê ho htĩr.

ã na prem amnhĩ kaxyw Tirtũm mã hamaxpêr pê mex nê pa anê. No na pre mê hkwýjaja mê uràk nê amnhĩ kaxyw kãm hamaxpêr tỳx tã nhũm Tirtũm tokyx mê ho mex kêt nê. Na pre mê kãm mê hkurê xwýnhjaja Tirtũm ã mê par kaxyw. Nê mê hkwýjaja Tirtũm ã mê hipêx kati ho pa nhũm mê amnhĩ xà htỳx kãm hamak kãm ty. Nhũm mê himex kaxyw nê mê kãm:

—Kwa mê Tirtũm kaga. Kot kaj mê hkaga pa mê amã inhũre nê mê anhĩmex kêt nê. Anê.

No nhũm mê kuma nê ãm mê kuma nê amnhĩ kaxyw kãm hamaxpêr tỳx pê mê kãm:

—Nã mê kam nê mãmrĩ ixpĩ. Inhmã ixtyk pyma hkêt. Kot paj ty nhũm Tirtũm akupým

ixto ixtîr pa kuri inhmex kumrêx nê ri ixtîr tûm nê ixpa ho ixpa.

Anhÿr o mē kām amnhî jarênh jakamā hāmri Tîrtûm kaga hkêt rāhā nhûm mē himex.

³⁶ Nê mē kām mē hkurê xwÿnhjaja na prem Kris ã mē hkwÿjê mā hpêr o pikênh pê mē htak xà ho mē htak rûnh o pa. Nê kàx o mē hkwÿjê hpa hpre nê mē hte hpre nhûm mē kêp prês nê hkrî ho hkrî.

³⁷⁻³⁸ Nhûm prem kên rûnh o mē hkwÿjê htak o mē kupa. Nê mē hayr o mē hkwÿjê pa. Nê mē hkamnhwÿr o mē hkwÿjê pa. ã na prem Kris kôt mē hamaxpêr ã mē omunh xà hkôt mē hipêx anhÿr o pa. Jakamā na pre mē hkwÿjaja mē umaj mēõ krî rûm hapôj nê ma hprôt nê mra. Nê te mē õ krî hkêt pyrâ nê kapôt ã kêp amrakati nê ri pa. Mē ê hkêt nê ôwêhti hkà ho ê nê ri hā pa. Nê motre kà ho amnhî pre nê ri hā pa. Nê kên prêk ã api nê kre kamā hpimxur o pa. Nê pika hkre kamā hpimxur o pa. Nhûm mē kām mē hkurê xwÿnhjaja te mē kêp ahponu nê mē kêp ahkro pyrâk o mē hipêx nê axpên mā mē harênh o:

—Nà mē mexti hā. Kwa pu mē piitā mē himex paa ri.

Anhÿr o mē harênh tā nhûm Tîrtûm mē urâk nê ã mē harênh anhÿr kêt nê. Na pre mē mex kumrêx ã mē harê. Nê nhÿrmā kuri mē mex nê pa ho pa hkukamā mē harê.

³⁹ ã na prem Tîrtûm kamnâr rom mē kām mē hkurê xwÿnhjê kutā amnhî to htÿx kām htyk o pa anê. Nhûm Tîrtûm ja hā mē omu nê hkînh nê kām mē hapê htÿx nê. No nhûm mē kormā htîr ri amnhîm Tîrtûm kot mē ho mex xà jamÿnh kêt rāhā ty. ⁴⁰ Tā mo na pre Tîrtûm kormā mē htîr ri hkwÿjê pyrâ nê mē ho mex kêt nê? Nà na pre kormā mē hkukamā hamaxpêr o:

—Nà kot paj kormā mē ho mex kêt nê. Kot pa mē mÿr pê mē kot ixkôt amnhî xunhwÿr mā xwÿnhjê jamâr grire măn. Kêr pa inhô krî kamā mē ho ixpimràâtā mē ho mex rax kumrêx. Nà kot paj ã mē ho mex anê. Ja na kêt inhmā mex o kormā mē htîr ri ixte mē ho mexta jakrenh. Anê.

Jao ra ã mē papajaja mē pakukamā hamaxpêr anê.

12

Mē pahte Jejus pyrâ nê mēmoj kutā amnhî to htÿx ã mē pamā karõ

Piripos 3.12-21

¹ Na pre mē pakukamā mē panhîgêt kwÿjaja amnhî kaxyw Tîrtûm mā hamaxpêr pê ã amnhî xà htÿx kamā hamak o pa anê. Tā te ra mē kot kÿj rûm kaxkwa rûm mē pahpumunh nê tanhmā mē pamā kapêr to pyrâ nê mē pamā kapêr o:

—E mē inhma mē ixkanrêhā mē ixtamnhwÿjaja. Na pa prem ã Tîrtûm kamnâr rom amnhî nhîpêx o ixpa anê. Mē kot ja hā mē inhîpêx kati htā pa prem Jejus kaga hkêt nê. Tā kêr ka mē ixpyrâ nê ã mē kām mē akurê xwÿnhjê kutā amnhî to htÿx anê. Nê mē ixpyrâ nê amnhî kaxyw Tîrtûm kôt pix mā ajamaxpêr tÿx rāhā ho ri apa. Anê.

Jakamā kwa kêr pu mē urâk nê ã amnhî nhîpêx anhÿr rāhā ho măn ri papa. Te mē hprôt xwÿnhjaja kot amnhî nhîpêx pyrâk o amnhî nhîpêx. Na htem hprôt tÿx kaxyw mēmoj pytî jamÿnh nê ho hprôt hkêt nê. Na htem ÿ kamā hprôt o hprôt tÿx nê wam hkwÿjê mā wa nê mra. Ja pyrâ nê kêr pu mē pahte Tîrtûm kapêr kôt amnhî nhîpêx mex o papa kaxyw tanhmā mē pahte amnhî tomnuj to hā amnhî pumu nê hkaga kurê kumrêx. Mē pahte amnhî tomnuj o papa xāja te mex pyrâk no ãm mex kêt. Te ho mē hprôt xwÿnh kot axtem nê mēmoj pytî mÿnh nê tee ri ho hprôt tÿxta pyrâk. Kot puj mē tanhmā amnhî tomnuj to ho papa nê Tîrtûm kapêr kôt amnhî nhîpêx mex kêt nê. Jakamā kwa kêr pu mē Tîrtûm kapêr gryk ã amnhî tomnuj nê amnhî to htÿx rāhā ho papa. Te ho mē hprôt nê nhÿri mē àhuk xà pix kukamā hamaxpêr rāhā hprôt tÿx xwÿnhhta pyrâ nê ãm Jejus mā pajamaxpêr tÿx rāhā ho papa.

² E kot paj mē amā Jejus kot tanhmā mē panê amnhî nhîpêx toja jarê ka mē inhma. Nà kot mē panê mē pahte amnhî tomnuj pānhā amnhîrer kaxyw htyk nhûm mē pahte hkôt amnhî xunhwÿr jakamā na hte mē pamā pajamaxpêr nyw gō pu mē amnhî kaxyw hkôt pajamaxpêr ho ri papa. Na pre mē kām hkurê xwÿnhjaja kot pî kahpa hā nhôr nê hpîr mā nhûm mē kutā

mê kãm amnhĩ to htỳx nẽ arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêt nẽ. Na pre hamaxpêr o:

—Nà kwãr mẽ mãmri xpi. Kot paj ty nhũm Inhĩpêxà akupỹm ixto ixtĩr pa kuri inhmex kumrêx nẽ ixtĩr tũm nẽ ixpa ho ixpa. Anẽ.

Tã na ra kaxkwa kamã Tĩrtũm xupôk rũm mex nẽ hkrĩ ho hkrĩ. ³ Jakamã kwa kêr pu mẽ kot ã mẽ panê amnhĩ nhĩpêx anhỹrja mã pajamxpêr rãhã ho ri papa. Mẽ kot hipêx kati htã nhũm mẽ kutã amnhĩ to htỳx nẽ xa. Tã kêr pu mẽ uràk nẽ mẽ kãm mẽ pahkurê xwỳnhjê kutã amnhĩ to htỳx rãhã ri papa. Jao tee ri amnhĩ kukamã pajamxpêr o mẽ umaj Tĩrtũm kaga hkêt nẽ.

⁴ Na ka htem ma mẽ kot amnhĩ tomnuj xwỳnhjê hwỳr mra nẽ mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwỳjê nhĩpêxta pyrã nẽ kormã mẽ atõxpĩr kêt nẽ.

Tĩrtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

⁵ Nẽ mãn ka mẽ arĩ Tĩrtũm kapêr ã kaga htũm kwỳ hã ano htỳx japêr. Mẽ pahpê Tĩrtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nẽ mẽ amã kapêr ka mẽ ama nẽ mar tỳx nẽ mẽmojta kaga kurê kumrêx. No mẽ ama nẽ tee ri kot nẽ akurê xwỳnhta kukamã ajamxpêr o ri akapri o axtem nẽ Tĩrtũm kaga hkêt nẽ. Ama nẽ kot amã mẽmoj nẽ kapêr xwỳnhta kaga kurê kumrêx.

⁶ Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nẽ hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anẽ. Anẽ.

⁷ Jakamã kot kaj mẽ tanhmã amnhĩ tomnuj toja mỳrapê tanhmã apunuj kute nẽ ri apa

htã no ãm tee ri amnhĩ kukamã ajamxpêr hkêt nẽ. Kêt mẽ ãm ajamxpêr o:

—Nà ixte tãm amnhĩ nhĩpêx kaxyw na Tĩrtũm ã inhĩpêx anẽ. Ixpê hkra hã ixte amnhĩ to mex o ixpa prãm xaj ã inhĩpêx anẽ.

Anhỹr o mãn kêt ajamxpêr. Na hte mẽ hipêxà mẽ hkra kot amnhĩ to mex kaxyw ã mẽ hipêx anẽ. Tã Tĩrtũm na hte mẽ uràk nẽ ã mẽ panhĩpêx anẽ. ⁸ No koja mēhō hkra kot tanhmã amnhĩ tomnuj to hã omu nẽ ãm omu nẽ hã tanhmã ho hkêt nẽ. Hã koja hkraja te hipêxà hkêt nẽ hã awrãre nẽ ri pa pyrãk. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nẽ hã tanhmã mẽ pahto. Nom mẽ kêp hkra hkêt xwỳnhjaja nhũm hte ja hã mẽ omu nẽ ãm hã mẽ omu nẽ hã kormã tanhmã mẽ hipêx to hkêt nẽ.

⁹ Nẽ na hte mẽ panhĩpêxà mẽmoj tã mẽ pamã karō pu htem kuma nẽ hkôt amnhĩ nhĩpêx. Ja mex. Nom kaxkwa kamã Mēpahpãm maatija mẽ pahte mar nẽ hkôt amnhĩ nhĩpêxja na kêt mex kumrêx. Kot puj mẽ ã amnhĩ nhĩpêx anẽ nẽ nhỹrmã kuri pamex nẽ pahĩr tũm nẽ papa ho papa.

¹⁰ Nẽ mẽhprĩre na htem hamaakro nhũm mẽ hipêxà tanhmã hã mẽ ho. Hã mẽ hkaprêprêk rỳ hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nẽ axte hkêt kaxyw. Ja mex. Tã mẽ papajaja. Mẽ pahpê Tĩrtũm kra na pu htem tōhã tanhmã amnhĩ tomnuj to nhũm mẽ pahpumu nẽ tanhmã hã mẽ pahto. Mẽ pahte amnhĩ pumunh nẽ axte hkêt kaxyw. Uràk nẽ amnhĩ to mex pix o papa kaxyw. ¹¹ Na hte mẽmoj tã tanhmã mẽ panhĩpêx to pu mẽ tee ri amnhĩ pumu nẽ pahkapri nẽ pahkĩnh kêt nẽ ri papa. Nom kot puj mẽ tokyx tanhmã amnhĩ tomnuj tota kaga nẽ akupỹm Tĩrtũm kôt tãm amnhĩ nhĩpêx o papa nẽ akupỹm pahkĩnh nẽ pajamakêtkati nẽ ri papa.

Mẽ pahte Tĩrtũm kaga hkêt ã mẽ pamã karō

¹² Jakamã e kwa kêr ka mẽ amnhĩ to htỳx nẽ apa. Mẽ kot Kris ã tanhmã mẽ anhĩpêx to htãã. ãm Tĩrtũm kôt pix mã amnhĩ nhĩpêx mex pê akĩnh nẽ apa. ¹³ Kêr kê Kris kôt atōjê hō tee ri mẽmoj tã amnhĩ

pumunh kôt ra Tîrtûm kaga kaxyw tâ ã mẽ ate amnhĩ nhĩpêx anhÿr ã mẽ apumu nẽ mẽ apyrà nẽ akupÿm hkôt amnhĩ xãm tÿx nẽ hkaga hkêt nẽ.

¹⁴ Nẽ kêr ka mẽ tãm ri axpên nhĩpêx o ri apa. Jao axpên kôt ajamakêtkati nẽ ri apa nẽ amnhĩ to mex pix kukamã ajamaxpêr. No kot kaj mẽ anhÿr kêt nẽ nhÿrmã mẽ panhõ Pahi Maati hwÿr axàpir nẽ kuri amex nẽ apa hkêt nẽ.

¹⁵ Na hte Tîrtûm mẽ pahto mex nẽ mẽmoj to mẽ pakutã nojarêt rãhã o pa. Jakamã kwa kêr ka mẽ hkaga hkêt nẽ. Nẽ tanhmã ri ajamaxpêr punuj to ho ri apa hkêt nẽ. Kot ka mẽ ã amnhĩ nhĩpêx anẽ nhũm Kris kôt mẽ pahkwÿjaja ja hã mẽ apumu nẽ mẽ apyrà nẽ tanhmã amnhĩ tomnuj.

¹⁶ Nẽ kêr ka mẽ axpên kãm apijaàm kêt o ri apa hkêt nẽ. Nẽ te finat Ejau kot amnhĩ nhĩpêx pyræk o ri apa hkêt nẽ. Na pre Tîrtûm ã hpijaàm kêt nẽ hkwyjê kamã hpijaàm kêt o pa. Nẽ Tîrtûm mã hamaxpêr kêt kumrêx. Kêp Ijak kra kot wa jakamã koja nhÿrmã hipêêxà mÿr pê kêp hikukrêx nẽ ò pika piitã ho àrĩk pa. Hãmri nhũm hipêêxà kot ho Tîrtûm wÿr nhũm kot ho mex kaxyw mã tâ nhũm axtem nẽ mẽmo arĩgro hã kãm prãm xàj kot kêp mẽmoj to àrĩk mã xwÿnhhta htõ Jako mã hkaga hpa. Mãnkwÿrtre gôj kãm ãm prãm xàj kãm hkaga hpa. Jakamã nhũm Jako hpãnhã te kêp Ijak kra kot wa pyrà nẽ mÿr pê ò mẽmoj piitã ho àrĩk mã.

¹⁷ Gaa nhũm Ejau tee ri ã amnhĩ nhĩpêx anhÿrja mã hamaxpêr o hkaprĩ nẽ. Nẽ tee ri kãm Jako kot akupÿm kãm mẽmojta nhõr prãm kaprÿ. Nẽ mur nẽ hã hipêêxà wÿ no nhũm axte kãm mẽmoj nhõr kêt nẽ. Nhũm kot ho Tîrtûm wÿr kaxyw tee ri amnhĩ to kuwÿ no nhũm kuma nẽ ãm kuma nẽ kãm ho anhÿr kêt nẽ.

¹⁸ Nẽ amnepê mã Tîrtûm kot mẽ panhĩgêxjê mã kapêr kaxyw na prem hixêt prêk pê Sinai jarênhja wÿr akuprõ nẽ hparpê kuhê. Hãmri nhũm hixêt nhĩmõk ã kuwy hpõk rax kumrêx. Nẽ kuwy mÿr ri kakrã htyk ajêt. Nẽ kôk àpêr tÿx nẽ. Nhũm Ijaewjaja hixêt krax ã omu nẽ kãm maa ho htertet o kuhê. ¹⁹⁻²¹ Hãmri nhũm mẽhõ pifti kakõ nhũm Tîrtûm hixêt nẽ mẽ kãm kapêr nẽ mẽ kãm:

—E mẽ inhma. Kêr ka mẽ hixêt ã axàpir kêt nẽ. Kot kaj mẽ atõ hã api rÿ mẽ akrit ò hã api ka mẽ ja hã omu nẽ kaxyw kên rũnh kwÿ jamÿ nẽ ho htak o apĩ. Anẽ.

Hãmri nhũm mẽ piitã tee ri kuma nẽ kãm ma htÿx kumrêx nẽ amnhĩ nẽ kãm:

—Kwa hãmri Tîrtûm. Axte mẽ inh mã mẽmoj jarênh kêt nẽ. Mojes pix mã mãn mẽ ixkaxyw tanhmã kãm akapêr to. Anẽ.

Jakamã nhũm Mojes Tîrtûm mã amnhĩ jarênh nẽ kapêr mar kaxyw hixêtja ã api. Kãm ma nẽ htertet rãhã mõ nẽ hã api. ²² Nom mẽ kãm ma ho Tîrtûm mã amnhĩ jarênh tâ mẽ papajaja na pu htem mẽ kurom paxãmnhĩx kãm amnhĩ jarênh o papa. Na pu htem kãm amnhĩ jarênh kaxyw nẽ hixêt prêk ã paxàpir kêt nẽ. Te ra mẽ pahte ma kaxkwa hwÿr ò krĩ hwÿr paxàpir nẽ pano ho omunh pê kãm amnhĩ jarênh pyræk. Ò krĩja mex o mex. Kamã kapêr o mẽ wrÿk xwÿnhjaja ohtõ o ohtõ. Na htem kamã hkĩnh rãhã ho pa ho pa.

²³ Nẽ ò krĩ hwÿr na hte hkra xàpir xwÿnhjaja ri pa. Nẽ mẽ papajaja na pu htem kãm amnhĩ jarênh kaxyw nẽ te kaxkwa kamã kuri pakuhê nẽ kãm amnhĩ jarênh pyræk o amnhĩ nhĩpêx. Te mẽ pahpê hkra kot wa pyræk jakamã mẽ pamã uma hkêt. Nhũm pre Tîrtûm ra ò kagã kamã mẽ pakutêp amnhĩm mẽ panhĩxi hã kagã hpa. Na hte mẽmoj piitã hamãr o hkrĩ. Nẽ krĩja kamã amnepêm kormã Kris kot mẽ pahwÿr wrÿk kêt ri nhũm ra amnhĩ kaxyw Tîrtûm kôt hamaxpêr mex xwÿnhjaja haxwÿja ra kamã ri pa. Ra Tîrtûm kot mẽ ho hkra jakamã nhũm mẽ kuri ri pa ho pa. ²⁴ Nẽ Jejus haxwÿja kamã pa ho pa. Na pre mẽ panê htyk nẽ hkamrõ pikapĩrja o mẽ pahte amnhĩ tomnuj pãnhã amnhĩre. Jakamã na pu htem hkôt amnhĩ xunhwÿ nhũm mẽ pahto hkra pu mẽ paxãmnhĩx ri Tîrtûm mã amnhĩ jarênh nẽ amnhĩ to hwÿr o papa.

Amnepêm na pre Tîrtûm tee ri Kaĩ kot htõ Apew pĩr nẽ hkamrõ pikapĩrja ã omu nẽ hamaxpêr o:

—Nã ã kot amnhĩ nhĩpêx anhÿr jakamã kot paj hã homnuj tÿx nẽ. Anẽ.

Tã ra hpãnhã Jejus kot mẽ panê htyk nẽ hkamrõ pikapĩrja ã omu nẽ ra axtem hamaxpêr o:

—Nà ãm hãmri na Ixkraja mẽ nê ty. Jakamã mẽ kot hkôt amnhĩ xunhwÿr xwÿnhjaja kot pa Ixkra kukwak ri mẽ kot amnhĩ tomnuj mÿrapê tanhmã mẽ ho hkêt nê.

Anhÿr o mẽ pakukamã hamaxpêr. Æ hamaxpêr anhÿrja mex o mex.

²⁵ Na pre Mojes Tĩrtũm nhÿ hã mẽ panhĩgêxjê mã xatã mẽ kãm Tĩrtũm kapêr jarênh o ri pa nhũm mẽ kuma nê hkôt amnhĩ nhĩpêx o pa. Tã gaa nê ra hã nohkêt pa nê akupÿm mẽ kot amnhĩ nhĩpêx tũm o awjanã nhũm Tĩrtũm tee ri ja hã mẽ omu nê mÿrapê tanhmã mẽ hipêx to. Tã nhũm Kraja kaxkwa rũm mẽ pahwÿr wrÿ nê mẽ pamã kapêr. Jakamã kwa mẽ okora kêr pu mẽ panhĩgêjtjê pyrã nê mẽ pahte amnhĩ nhĩpêx tũm o paxujanãr kêt nê. Kot puj mẽ anê nhũm Tĩrtũm ja hã mẽ pahpumu nê mẽ urak nê ja hã tanhmã mẽ panhĩpêx to.

²⁶ Amnepêm Tĩrtũm kot hixêt prêk pê Sinai kamã mẽ kãm kapêrja. Na pre kapêr tÿx o pika ho àk nhũm htertet tÿx nê. Tã koja nhÿrmã axte pika ho àk nê kaxkwa ho àk nhũm wa hamê htertet tÿx kumrêx. Koja axte ho anhÿr ho pixi nê axte ho anhÿr kêt nê. ²⁷ Tã nhÿrmã axte mẽmoj to àk ã amnhĩ jarênh jakamã koja mẽmoj to kator xwÿnhhta piitã ho àk. Nê mẽ pahte panhĩkra ho mẽmoj nhĩpêx xwÿnhja nhũm ho àk nhũm htertet tÿx kãm hpigrãnh pa nê hapêx. Nhũm mẽmoj htertet nê hpi-grãnh kêt xwÿnh pixjaja arĩ rãhã ho rãhã. ²⁸ No Tĩrtũm nhõ krĩ koja htertet nê hapêx kêt nê. Nê mẽ papajaja mẽ pahpê hkra jakamã te ra kuri ô krĩ kamã ri mẽ papa pyrãk. Jakamã kot puj mẽ mẽ urak nê pajapêx kêt nê. Jakamã e kwa kêr pu mẽ amnhĩ tã Tĩrtũm mã mex o mex ã harênh nê hã pahpijaãm rãhã ho papa. Nê tanhmã amnhĩ tomnuj to hã amnhĩ pumu nê Tĩrtũm pumaj mẽmojta kaga kurê kumrêx. Æ mẽ pahte amnhĩ nhĩpêx anhÿr o papaja na Tĩrtũm kãm hprãm. ²⁹ Hihtÿx o hihtÿx jakamã koja mẽmoj tã akamã gryk kot kaj amex kêt o amex kêt.

13

Mẽ pahte Tĩrtũm kãm hprãm xà hkôt

amnhĩ nhĩpêx ã mẽ pamã karõ

Rõmãn 12.1-2; Epes 4.1-3; Korosê 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtõ nê ixtõxjaja. Kêr pu mẽ arĩ Kris kôt pahkwÿjê ho mex o mãn axpên kôt ri papa. Nê kêr pu mẽ tanhmã pahpunuj to hã amnhĩ pumunh tã axpên to mex mã panhÿrer kêt nê. Æ axpên nhĩpêx anhÿr rãhã ho papa.

² Nê amnepê mã na pre mẽmojaja nhÿhÿnh mra nê mẽ panhĩgêjtjê hõ hwÿr pøj. Hãmri nhũm mẽ omu nê htÿx axtem krĩ hõ nhõ xwÿnh ã mẽ hkamnhĩx tã no nhũm mẽ kêp Tĩrtũm kapêr o mẽ wrÿk xwÿnh kwÿ na prem. Hãmri nhũm amnhĩ nhõrkwÿ hwÿr mẽ kuwÿ nhũm mẽ ma hkôt mra nê kuri pøj nê kutã apku. Jakamã kwa koja nhÿhÿnh krĩ hõ rũm mẽmojaja ma mẽ awÿr mõ ka mẽ omu nê axãmnhĩx amnhĩ nhõrkwÿ hwÿr mẽ hwÿr kurê kumrêx kê mẽ ari pøj. Æ mẽ hipêx anhÿr o apa hãmri nê nhÿrmã mẽ panhĩgêjtja pyrã nê amnhĩ wÿr Tĩrtũm kapêr o mẽ wrÿk xwÿnhjê hõ hwÿr japêr. Mẽ urak nê ja hã mẽ omunh kêt tã atÿx amnhĩ wÿr mẽ awÿ nhũm ja mẽ amã mex o mex.

³ Nê kêr ka mẽ ra mẽ kot Jejus ã mẽ akwÿjê pynênh nê mẽ hagjênh xwÿnhjê mã ajamaxpêr rãhã ho ri apa nê mẽ ho aja-makêtkati hkêt nê. Te mẽ kajaja mẽ ãhkõ hã mẽ hagjênh xà kamã apunuj nê akrĩ pyrãk o mẽ kãm ajamaxpêr o ri apa. Jao mẽ kamã axukapri ho mẽ hwÿr mra nê mẽ kãm mẽmoj nhõr o ri apa.

⁴ Nê mẽ kot axpên to hprõja na mex. Nom kêr ka mẽ amyjaja ãm aprõ pix tãnopxar o ri apa. Nê mẽ anijaja mẽ ajaxwÿja amjên pix tãnopxar o ri apa. No mẽ hkuprÿjê hwÿr mẽ mrar xwÿnhjaja nê nhãm mẽ kêp mẽ hprõ ho amnhĩkati xwÿnhjaja nê nhãm mẽ kêp mẽ mjên o amnhĩkati xwÿnhjaja koja Tĩrtũm ja hã mẽ omu nê mẽ homnuj tÿx kumrêx.

⁵⁻⁶ Nê kêr ka mẽ akãxpore rũnh kêt ã amnhĩ pumu nê tee ri amnhĩ kukamã ajamaxpêr o akapri hkêt nê. Na pre Tĩrtũm mẽ pamã kapêr o:

Kot paj akôt ri ixpa rãhã ho ixpa nê aa arer rÿ akaga hkêt kumrêx.

Anhÿr jakamã kot kaj mẽ akàxpore grire htã akaprĩ nẽ apa hkêt nẽ. Aa Tirtũm kot mẽ pahkaga hkêt ã amnhĩ jarẽnh jakamã mẽmoj kot pu wem omu nẽ pamã nhãm ri mẽ uma ho papa? Tirtũm kot mẽ pahkõt pa ho pa kênã. Jakamã na pu htem pajamaxpẽr o:

Nà Pahi Maatiya ra kot ixkõt pa ho pa xwÿnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kęp ixto?

Anhÿr o pajamaxpẽr o papa. ⁷ Nẽ mẽ kot Kris mã mẽ ajamãr o mẽ pa xwÿnh ra mẽ htyk xwÿnhjaja ka mẽ arĩ mẽ kot tanhmã amnhĩ nhĩpêx to ho paja mã ajamaxpẽr rãhã ho ri apa. Na prem Tirtũm kapẽr o mẽ ajahkre mex nẽ. Nẽ tãm ri amnhĩ nhĩpêx o ri mẽ akõt pa. Nẽ amnhĩ kaxyw Tirtũm kõt pix mã hamaxpẽr rãhã ty. Tã kër ka mẽ urak nẽ ã amnhĩ nhĩpêx anhÿr o ri apa rãhã ty.

⁸ Nẽ Jejus Krisja arĩ rãhãã. Nẽ amnepê mã kot amnhĩ nhĩpêxja mããnẽn arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nẽ kwa kër ka mẽ Tirtũm kõt amnhĩ nhĩpêx rãhã ho ri apa. Na hte kapẽr o hẽx xwÿnhjaja mẽ awÿr mra nẽ mẽ amã:

—Amnepêm mẽ ate Tirtũm kot mẽ amex ã mẽ ajarẽnh kaxyw mẽ ate kãm mẽmo mry nhõr nẽ akupÿm hamÿnh nẽ hkur o apa htã ra ja ho anhÿr kaga. Kwa mẽ ja ho awjanã nẽ axte ã amnhĩ nhĩpêx anhÿr o ri apa. Kê Tirtũm ja hã mẽ apumunh kõt mẽ amex ã mẽ ajarẽ.

Anhÿr o mẽ amã kapẽr. Nom xà na hte Tirtũm ã mẽ pahte amnhĩ nhĩpêx anhÿr ã mẽ pahpumunh kõt mẽ pamex ã mẽ pajarẽ? Xà na htem mẽmo mẽ apkur xà hkur pẽ amnhĩ kaxyw Jejus kõt hamaxpẽr tÿx o pa? Nà na htem anhÿr kêt nẽ. Na pu htem mẽmoj kur kõt pamã Tirtũm kĩnh kêt nẽ. Kêt mẽ paxàpkur xàja mẽ panhĩ pix o hihtÿx kaxyw na. Na hte Jejus kõt mẽ pahto paxihtÿx kêt nẽ. Æm Tirtũm kot amarĩ kãm mẽ pajapê nẽ mẽmoj to mẽ pakutã nojarêt jakamã na pu htem ja hã amnhĩ pumu nẽ amnhĩ kaxyw hkõt pajamaxpẽr tÿx o papa.

¹⁰ Tirtũmja Jejus kot mẽ panê htyk ã omunh xà hkõt ra kot mẽ pamex ã mẽ

pajarẽnh jakamã mo kaxyw kot pu mẽ axte kot mẽ pamex ã mẽ pajarẽnh kaxyw kãm mẽmo mry gõ nẽ hkwy hku? Koja mẽhõ akupÿm Tirtũm kapẽr tũm o ujanãr jao Jejus kot nẽ htyk nẽ hkamrõ pikapĩrja kaga.

¹¹ Amnepêm na pre patre maatiyaja tõhã mẽ kãm mẽmo mry hpar xwÿnh hkamrõ ru nẽ guhkrax kãm kuru nẽ hamÿ nẽ ma o mra nẽ Tirtũm nhõrkwÿ kaàkre hwÿr hitom maati hwÿr ho agjê. Tirtũm kot mẽ omunh nẽ axte mẽ kot amnhĩ tomnuj mã hamaxpẽr kêt kaxyw. Hãmri nhũm hpãnhã ï mÿ nẽ krĩ pẽ ho kato nẽ ma o mra nẽ nhÿri amÿm hkwyjê hkàx ã ho hxêt pa. Tirtũm kapẽr tũm kõt na prem ã amnhĩ nhĩpêx anhÿr o pa. ¹² Tã ja pyrã nẽ na prem ma krĩ pẽ amÿm Jejus o tẽ nẽ kupĩ nhũm hkamrõ axkapĩ. Kot mẽ pahte amnhĩ tomnuj pãnhã amnhĩrer nẽ mẽ pahto mẽ pahpê Tirtũm kra kaxyw ã htyk nẽ hkamrõ pikapĩr anẽ.

¹³ Na prem Tirtũm kapẽr tũm gryk ã Jejus kaga nẽ pòristijê mã anẽ nhũm mẽ ma krĩ pẽ ho kato nẽ o tẽ nẽ kupĩ. Tã kër pu mẽ jajê rom Jejus gryk ã mãn Tirtũm kapẽr tũm kaga. Kwãr mẽ mãmrĩ Jejus pyrã nẽ Tirtũm ã tanhmã mẽ pahto nẽ amnhĩ nẽ nhÿhÿm mẽ pajano. ¹⁴ Kêt jar mẽ papapxàja kęp mẽ papapxà kumrẽx kêt. Nẽ jar mẽ panhõ krĩja kęp mẽ panhõ krĩ kumrẽx kêt. Mẽ pamã te kot pô nhĩrõnh o ixkre pix pyrãk. No kêt mẽ panhõ krĩ kumrẽx koja jar mẽ panhõ krĩ rom aa hapêx kêt nẽ. Tã tãm na pu mẽ kormã ma hwÿr papa kaxyw arĩ amnhĩ tã Tirtũm jamãr o papa.

¹⁵ Nẽ na htem Ijaew arĩ ohtõ nẽ amnhĩ pãnhã Tirtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhÿr hkêt nẽ. Kot puj mẽ ãm Jejus kukwak ri Tirtũm mã mex o mex ã harẽnh rãhã ho mãn papa. Jao te mẽ pahte kãm hkĩnh xà nhõr pyrãk o amnhĩ nhĩpêx.

¹⁶ Nẽ kër pu mẽ arĩ axpẽn to mex o ri axpẽn kõt papa. Nẽ kê mẽhõ kęp amrakati japêr ka ja hã omu nẽ amnhĩ kutã kãm anhõ mẽmoj kwÿ. Æ kot puj mẽ axpẽn nhĩpêx anhÿr rãhã ho ri axpẽn kõt papa. Kot puj mẽ anẽ nẽ te mẽ pahte Tirtũm mã hkĩnh xà nhõr pyrãk o amnhĩ nhĩpêx. Æ mẽ pahte amnhĩ nhĩpêx anhÿrja na mex o mex.

¹⁷ Nẽ kër ka mẽ Kris kõt mẽ akrãhtũmjê

kapêr ma nê mẽ hkôt amnhĩ nhĩpêx mex nê. Na htem Tĩrtũm mã mẽ ajamãr o ri mẽ akôt pa. Koja mẽ nhỹrmã mẽ kot tanhmã mẽ anhĩpêx to hã Tĩrtũm mã amnhĩ jarê. Jakamã mẽ kãm mẽ ato ajuta prãm. Tã kêr ka mẽ kapêr ma nê mẽ hkôt ri amnhĩ nhĩpêx mex o ri apa. Kêr kê mẽ amnhĩ tã mẽ apumu nê hkĩnh nê. No kot kaj mẽ ama nê ãm mẽ ama nhũm mẽ tee ri amnhĩ tã mẽ apumu nê hkaprĩ nê. Jao tee ri kot tanhmã mẽ ato ajuta mex to hkukamã hamaxpêr.

¹⁸ Nê kwa kêr ka mẽ ixto Tĩrtũm wỳr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêr. ãm inhmã amnhĩ to mex pix o ri ixpa hprãm.

¹⁹ Nê kêr ka mẽ ixto awỳ kê tokyx akupỹm mẽ awỳr inhmẽ. Na pa ra inhmã mẽ apumunh prãm tỳx nê.

Kagà nhĩpêx xwỳnh kot tanhmã mẽ ho Tĩrtũm wỳr to hã harênh

Epes 3.14-19; Piripos 1.0-11; Wam Tesarõn 3.9-13, 5.23; Sikũn Tesarõn 1.11-12, 2.16-17

²⁰ Nê mẽ panhõ Pahihti Jejus Krisja na hte mẽ panhĩpêx o te ôwêhti jamãr xwỳnh kot hkrit jamãr pyrak o pa. Jakamã kêp mẽ pajamãr xwỳnh maati mex na. Na pre mẽ panê ty nhũm Tĩrtũm akupỹm mẽ pamã ho htĩr nê mẽ pamã harênh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê nhỹrmã ty pa akupỹm mẽ ato mẽ atĩr ka mẽ ixri atĩr tũm nê apa ho apa. Anê.

Tĩrtũm kêp mẽ pahto mẽ pajamakêtkati nê ri mẽ papa xwỳnh na. ²¹ Tã na pa hte tanhmã mẽ ato hwỳr to ho ixpa nê mẽ ato hwỳr o:

—Pa Tĩrtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kê Jejus haxwỳja tanhmã mẽ ho mex to kê mẽ war amã hprãm xã hkôt pix mã war amã tanhmã ri amnhĩ nhĩpêx to ho pa. Anê.

E kêr pu mẽ arĩ Jejus Kris mã mex o mex ã harênh rãhã ho papa.

Kagà jatur xã kamã mẽmoj jarênh

²² E Kris kôt ixkrãmnhwỳjaja. Nà na pa ã mẽ amã kagà nhĩpêx anê. Jejus kôt mẽ ato mẽ axihtỳx kaxyw. No na pa ho ry nê hipêx kêr nê. Ixte ho grire nê hipêx jakamã kwa kêr ka mẽ kamã harê nê mar tỳx nê hkôt amnhĩ nhĩpêx mex o ri apa.

²³ Nê mãn ka mẽ ra Ximotre jarênh mar japêr. Na pre Kris ã mẽ hagjênh xã kamã hkrĩ hã apkati xohtô nê. Tã nhũm xep mẽ ra kator. Tã koja kormã mẽ awỳr inhmõr xwỳj ri man ixwỳr mõi nê hpõx japêr kot paj ma amnhĩ kôt mẽ awỳr o mõi ka mẽ omu.

²⁴ Nê kêr ka mẽ kot Kris mã mẽ ajamãr xwỳnhjê mã ijarê. Nê atar Tĩrtũm krajê piitã mẽ kãm ijarê.

Nê ota jar Tĩrtũm kra hkwỳja piitã mẽ awỳr hpêr mẽ.

²⁵ E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.

Xiakre Xiakre kot Jejus kôt hkwýjê piitã hwýr kagà nê mēnh

Xiakre na pre kagàja nhîpêx. Kêp Jejus tō nê kêp Jerujarê kamã mē kot Jejus kôt amnhî xunhwýr xwýnhjê nhō pastô na pre. Nê kêp Ijaew. Jakamã na pre hkwýjê mã kagàja nhîpêx nê krî piitã hkôt urak nê Jejus kôt mē kot amnhî xunhwýr xwýnhjê hwýr kurê. Jejus ã mē kãm mē hkurê xwýnhjaja na prem mē hipêx kati nhūm mē amnhî xà htýx kamã hamak o pa. Jakamã nhūm Xiakre kot mē hamaxpêr o mē hihtýx kaxyw kagàja nhîpêx nê mē hwýr kurê nê mē kãm:

¹ Pa ixkwýjaja. Xà mē amex? E ixpê Xiakre na pa. Ixte Tirtūm mē Pahihti Jejus Kris wa kãm tanhmã amnhî nhîpêx to xwýnh na pa. Jakamã kot paj kagàja nhîpêx nê pika piitã hkôt mē apiitã mē awýr kurê. Mē apê Tirtūm krajê hwýr.

Mē pahpunuj tã mē pahte amnhî kaxyw Tirtūm kôt pajamaxpêr

Rukre 6.20-23; Römãn 5.3-5; Korosê 1.11; Wam Pêtre 4.12-19

²⁻³ E ixkwýjaja. Kêr ka mē atō tanhmã amnhî to rý tanhmã apunuj to. Rý mēhō tanhmã Jejus ã mē anhîpêx to. Tã kêr ka mē ja hã amnhî pumu nê tee ri amnhî kukamã ajamaxpêr o ri akaprî hkêt nê. Arî akînh kãm amnhî kaxyw Tirtūm kôt ajamaxpêr týx rãhã ho ri apa. Kot kaj mē ã amnhî nhîpêx anê nê gaa nê rî mēmoj punuj pē Jejus kôt amnhî xunhwýr týx nê. Jakamã kwa kêr ka mē tanhmã apunuj to hã amnhî pumu nê ã mē ate amnhî nhîpêx anhýrja kukamã ajamaxpêr pē akînh nê ri apa. ⁴ Nom kêr ka mē tee ri tanhmã apunuj to hã amnhî pumu nê akaprî xàj Tirtūm kaga hkêt nê. ãm amnhî kaxyw hkôt ajamaxpêr týx rãhã ho ri apa. Kot kaj mē ã amnhî nhîpêx anê nê gaa nê Tirtūm noo mã tãm amnhî nhîpêx mex o ri apa. Nê kãm hprãm xà hkôt pix mã amnhî nhîpêx o apa.

Mē pahte tanhmã amnhî kute hã amnhî pumunh kôt amnhî to Tirtūm wýr ã mē pamã karō

Matêwre 21.18-22

⁵ Nê kêr ka mē mēmoj mýrapê tanhmã apunuj to hãmri nê tee ri ja hã amã Tirtūm mã ajamaxpêr týx prãm nhūm apê ja hihtýx japêr. Rý mēmoj tanhmã apê amnhî nhîpêx to ka tee ri hkukamã ajamaxpêr japêr. Kêr ka mē ã ajamaxpêr anhýr japêr hãmri nê amnhî to Tirtūm wýr kurê kumrêx. Kot amã ajamaxpêr mex nhōr nhūm ate ý hã tãm ajamaxpêr kaxyw amnhî to awý. Kot kaj mē ã amnhî to hwýr anê nhūm amnhî tã mē ama nê mēmojta kutã tanhmã ato axihtýx to kurê kumrêx ka ý hã hkôt ajamaxpêr týx mex o ri apa. Jao tanhmã akute htã akînh nê ajamakêtkati nê ri apa. Koja Tirtūm tee ri amã mēmoj kôt ajamaxpêr týx prãm kaprý hã apumu nê hã amã àkjêr kêt nê. Koja ate amnhî to hwýrta ma nê tanhmã ato mex to. ⁶ Nom kêr ka mē amnhî to hwýr kãm tee ri amnhî kukamã ajamaxpêr kati hkêt nê. Rý ajamaxpêr o:

–Koonên. Koja apu Tirtūm inhmã ja ho anhýr japêr.

Anhýr o tee ri amnhî kukamã ajamaxpêr kati hkêt nê. ãm akînh kãm tanhmã ate amnhî to hwýr toja kukamã ajamaxpêr o:

–Nã koja inhmã ho anê. Ixte amnhî kaxyw kãm ijamaxpêr nê amnhî to hwýr xà hkôt koja inhmã tanhmã amnhî nhîpêx to.

Anhýr o hkamnàr rom ã amnhî kukamã ajamaxpêr anê.

Nom kot kaj mē tanhmã amnhî to hwýr to nê tee ri amnhî kukamã ajamaxpêr kati nê hkôt ajamaxpêr týx kêt nê. Nê te kôk nhãm àpêr nê nhãm àpêrta pyrã nê nhãm ri ajamaxpêr nê nhãm ri ajamaxpêrja o hkôt ajamaxpêr kêt nê. Kot kaj mē ã amnhî nhîpêx anê nhūm Tirtūm tee ri ja hã mē apumu nhūm ja kãm mex kêt nê. ⁷⁻⁸ ã mē hamaxpêr anhýr xwýnhjaja na htem nhãm hamaxpêr nê nhãm hamaxpêr jao hamaxpêr mex kêt nê. Jakamã kot kaj mē ã ajamaxpêr anhýr o amnhî to Tirtūm wý hãmri nê ãm amnhî to hwýr kaprý. Koja ama nê ãm ama. Nom kot kaj mē tanhmã akute hã amnhî kaxyw hkôt ajamaxpêr týx pē amnhî to awý. Nê tee ri amnhî kukamã ajamaxpêr kati hkêt kãm tanhmã amnhî to hwýr to nhūm amnhî tã ama nê hkînh nê tanhmã amã mēmoj nhîpêx to. Mē ate hã

axàhwÿr xà hkôt tanhmã mẽ amã mẽmoj nhĩpêx to.

Mẽ kêp amrakati xwÿnhjê mẽ mẽ kot amnhĩ to rÿnh xwÿnhjê jarênh

Eprêw 13.5-6; Wam Pêtre 1.24-25

⁹ Nê kwa mẽ akàxpore hkêt xwÿnhjaja. Jar mẽ apê amrakati htã mẽ apê Tirtùm kra na ka mẽ. Jakamã kêr ka mẽ akàxpore rÿnh kêt tã mẽ apê Tirtùm kra hã amnhĩ pumunh kôt ajamakêtkati nê nê akĩnh nê apa.

¹⁰⁻¹¹ Nê mẽ akàxpore rÿnh xwÿnhjaja. Mẽ akàxpore rÿnh nê mẽ akukrêx rÿnh tã kot kaj mẽ nhÿrmã ty nê piitã rer pa nê mẽ kêp amrakati xwÿnhjê pyrã nê anhÿ kamã Tirtùm kuri akrĩ nhÿm tanhmã mẽ ajarênh to. Te mẽ apê mẽmo pixôrà kot amnhĩ nhĩpêx pyrãk. Na hte kwÿhtã axpên pê axpôt nê muxre nê mex nê harir. Tã gaa nê rĩ hã myt xàhpanh mẽ nhÿm ra nhôôre. Nê gaa nê ra grã pa nê rôrôk nê hapêx. Tã kot kaj mẽ nhÿrmã urãk nê ty nê akukrêx rer pa. Jakamã kwa kêr ka mẽ akàxpore rÿnh pumunh kôt akĩnh nê ri apa hkêt nê. Kêt ãm mẽ apê Tirtùm kra hã mãn amnhĩ pumunh kôt akĩnh nê apa.

Mẽ pahpunuj kôt pagryk nê mẽ pahkurê

¹² Nê kot kaj mẽ atô tanhmã apunuj to htã arĩ amnhĩ kaxyw Tirtùm mã ajamaxpêr tÿx rãhã ho ri apa. No tanhmã apunuj to hã amnhĩ pumu nê hkaga hkêt nê. Rÿ kot tanhmã ato xwÿnhta kêr ka mẽ amnhĩ tã kamã agryk nê tanhmã ho hkêt nê. ãm Jejus kôt pix mã amnhĩ nhĩpêx rãhã ho ri apa. Kêr kê Tirtùm amã hkĩnh ã amnhĩ tã apumu nê amex ã ajarê. Ka nhÿrmã kuri amex kumrêx nê atĩr tùm nê apa ho apa. Ra kot mẽ pakukamã mẽ pahã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhÿr pê akĩnh nê apa.

¹³ Nê Tirtùm aa kãm tanhmã amnhĩ tomnuj to hprãm kêt. Nê mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rÿ mẽ pamã mẽ pajamaxpêr punuj jagjênh kêt nê. Jakamã kot ka mẽ atô amã tanhmã amnhĩ tomnuj to hprãm tã kwa kêr ka Tirtùm tãm kot ja kaxyw mẽ akrãm mẽ ajamaxpêr punuj jagjênh to hã hkamnhĩ

kêt nê. ¹⁴⁻¹⁵ Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tirtùm Karô na hte mẽ pamã mẽ pajamaxpêr punuj jagjênh kêt nê. Mẽ papamjaja na pu htem pajamaxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhĩpêx anhÿr rãhã ho ri papa. Mẽ kot amnhĩ tomnuj o mẽ pa xwÿnhjaja koja mẽ nhÿrmã ty hãmri nê Tirtùm mẽ Kra wa kuri htĩr tùm nê pa ho pa hkêt nê.

Tirtùm kot tanhmã mẽ pahto mex to hã harênh

Xiakre 3.17-18; Sikÿn Pêtre 1.3-4

¹⁶ Nê e ixkwÿjaja. Tirtùm kot mẽ pahte amnhĩ tomnuj prãm xà mẽ pamã mẽ pajamaxpêr punuj jagjênh kêt jakamã kwa kêr ka mẽ ã ajamaxpêr anhÿr kêt nê. ¹⁷ Na hte mẽ pahto mex pix o pa. Na pre myyti ho katô. Kapêr pix o ho kato. Nê mytwrÿre ho kato. Nê kanhêti ho kato. Ja piitã ho kato nhÿm mẽ pamã hirã mex o harir. Na hte mytwrÿre tôhã hirã mex o pa. Nê gaa nê nyw kaxyw nê kamãt kô. Nê gaa nê nyw mẽ nhÿm akupÿm hirã. ã na hte amnhĩ nhĩpêx anhÿr o pa. No Tirtùmja ã kot anhÿr kêt. Kot amnhĩ nhĩpêxja ãm rãhã ho rãhã. Na hte mẽ pahto mex pix o pa. No tôhã tanhmã mẽ pahto mex to nhÿm jãã nhÿm tanhmã mẽ pahptomnuj to hkêt nê. ¹⁸ Tã kapêr pix o kot ã mẽmoj to kator kot anhÿr. Nê mẽ pamã kapêr o amnhĩrĩt. Kãm mẽ pahto hkra hprãm xà mẽ pamã Jejus kot tanhmã mẽ panê amnhĩ nhĩpêx toja nhÿm pre mẽ pamã ho amnhĩrĩt. Na pu prem kuma nê hkôt amnhĩ xunhwÿ nhÿm amnhĩ tã mẽ pahpumu nê mẽ pahto hkra. Mẽ pahpê Ijaew kumrêxjaja na pre mẽ pahto hkra.

Mẽ pagryk o papa nê mẽ pahkurê

Rômãn 12.17-21; Epes 4.25-5.2

¹⁹ E ixkwÿjaja. Kwa mẽ ixkapêr ma nê hã anohtÿx nê ho apa. Koja mẽhõ Tirtùm kapêr o mẽ ajahkre kaxyw mẽ awÿr mõi nê mẽ amã kapêr jarê ka mẽ mar tÿx nê. Koja mẽ ate tanhmã amnhĩ tomnuj to nê mẽ amã kapêr ka mẽ amnhĩ tã ama nê kamã agryk kêt nê. ²⁰ Mẽ gryk o mẽ pa xwÿnhjaja na htem Tirtùm kapêr kôt ri amnhĩ nhĩpêx kêt nê. ²¹ Jakamã kwa kêr ka mẽ axte

amnhĩ tomnuj rỳ ajamaxpěr punuj o ri apa hkêt nê. Na htem ohtô nê ã amnhĩ nhĩpêx anhÿr o pa nom kêr ka mẽ kurom Tĩrtũm kapěr mãn amnhĩ krã him haxàr tỳx nê. Kapěr o mẽ ajahkre xwỳnhjaja na htem ho mẽ ajahkre mex o pa. Tã kêr ka mẽ ama nê amã hkôt amnhĩ nhĩpêx prãm rãhã ho ri apa. Na pu htem Tĩrtũm kapěr ma nê hkôt amnhĩ nhĩpêx o papa hãmri nê nhÿrmã Tĩrtũm mẽ Kra wa kuri pahĩr tũm nê pa mex nê papa ho papa.

Mẽ pahte Tĩrtũm kapěr kôt amnhĩ nhĩpêx ã mẽ pamã karõ

Matêwre 7.24-27; Wam Juãw 2.3-6

²² Nê kwa mẽ okora. Kêr ka mẽ ãm Tĩrtũm kapěr ma nê ãm mar kêt nê. Mãânên hkôt amnhĩ nhĩpêx rãhã ho ri apa. Kot kaj mẽ ama nê ãm ama nê hkôt amnhĩ nhĩpêx kêt nê hãmri nê apê Tĩrtũm kra hã amnhĩ jarênh kaprỳ. Jao nhÿrmã Tĩrtũm mẽ Kra wa kuri atĩr tũm nê apa hkêt nê. ²³⁻²⁴ Te ho mēhõ kot amnhĩ pumunh xà hpyr nê kamã amnhĩ pumunh nê amnhĩ krã hkĩ jaê rỳ amnhĩ kuk tyk pumunh pyrãk. Tã te kot ãm ja hã amnhĩ pumunh nê kot amnhĩ to mex kêt rãhã akupỳm amnhĩ pumunh xà xir nê ma htēm nê axte amnhĩ kuk tyk rỳ amnhĩ krã kĩ jaërta mã hamaxpěr kêt pyrãk. Mẽ kot Tĩrtũm kapěr mar nê ãm mar nê hkôt amnhĩ nhĩpêx kêt xwỳnhjaja te kot ja jarênh pyrãk. ²⁵ Tã kêr ka mẽ ã amnhĩ nhĩpêx anhÿr kêt nê. Mẽ ate Tĩrtũm kapěr kôt amnhĩ nhĩpêx o apa kaxyw xatã kamã harê nê mar tỳx o apa. Jao hkôt amnhĩ nhĩpêx mex o apa. Tĩrtũm kot mẽ pahte tanhmã amnhĩ nhĩpêx to ho papa hã mẽ pamã karõ xàja ãm hãmri na. Na htem hkôt amnhĩ nhĩpêx nhũm Tĩrtũm ja hã mẽ omu nê mẽ ho mex nê nhũm mẽ ãmnhĩx hamakêtkati nê hkôt amnhĩ nhĩpêx o pa. ²⁶ Nom koja mēhõ kệp Tĩrtũm kra hã amnhĩ jarênh tã htỳx ri kapěr punuj o ri pa hãmri nê ãm kệp hkra hã amnhĩ jarênh kaprỳ. Mẽ pahpê Tĩrtũm krajaja na pu htem ã pakapěr anhÿr kêt nê. ²⁷ Axtem mẽ pahte amnhĩ nhĩpêx. Na pu htem mẽ hã awrã rỳ mẽ kệp mẽ mjên tyk xwỳnhjê ho mex nê mẽ hã pahpêr o pahpikênh o papa hkêt nê. Nê tanhmã mẽ kute hã mẽ omu nê mẽ ho ajuta ho papa. ã na pu htem pahpê Tĩrtũm krajaja amnhĩ

nhĩpêx anhÿr o papa nhũm Mẽpanhĩpêxà Maati Tĩrtũm ja hã mẽ pahpumu nê hkĩnh nê. No na pu htem mẽ kot amnhĩ tomnuj o mẽ pa xwỳnhjê hkôt ri amnhĩ nhĩpêx kêt nê ãm Tĩrtũm kapěr xà kôt pix mã amnhĩ nhĩpêx nhũm amnhĩ tã mẽ pahpumu nê hkĩnh nê.

2

Mẽ pahte mẽ piitã mẽ hipêx o axpên pyrãk ã mẽ pamã karõ

Rômãn 2.11; Korosê 3.25

¹ E ixkwỳjaja. Pahihti Jejus Krisja mex o mex. Tã ra mẽ ate hkôt amnhĩ xunhwÿr jakamã kwa kêr ka mẽ apê hkwy hã mẽ piitã tãm mẽ hipêx o apa. Nê mẽ hipêx o axpên pyrãk. ² Jakamã kot kaj mẽ nhÿrmã Tĩrtũm kapěr mar kaxyw axpên wÿr akuprõ nhũm hikàxpore rax xwỳnhta mẽ akôt axà. ê mex nê ôr o ãhkra kamã kax hãmri nê mẽ akôt axà. Nhũm hkôt mēhõ pê amrakati xwỳnhja tē nê axà. Nom wamta kĩnhã kệp amrakati nê ê omnajti nê pikaxônhti. Hãmri nê hikàxpore rax xwỳnhta hkôt mẽ awÿr tēn axà. ³ Tã tanhmã kot kaj wem ri wa hipêx to? Xà kot kaj mẽ wa hipêx o axpên pyrãk nà? Nà xà kot kaj mẽ ã wa hipêx anê nê wam àr xwỳnhta ê mex ã omunh xà hkôt kãm kadêre hõ gõ nê kãm:

—E ota kadêre. Mãmri hã nhÿ. Anê.

Hãmri nê ê pynajti xwỳnhta pumu nê axtem nê kãm:

—E atar pikap nhÿ.

Anhÿr o ahpÿnhã wa kãm akapêr? ⁴ Kot kaj mẽ ahpÿnhã ã wa hipêx anê nê amnhĩ tomnuj nê. Wam àr xwỳnhta ka kãm akapêr mex nê tanhmã ho mex to. No hkôt hõta omnajti hã omunh xà hkôt te kamã anhõkre kahak pyrãk o hipêx. Kot kaj mẽ ã ahpÿnhã wa hipêx anê nhũm Tĩrtũm tee ri ja hã mẽ apumu nhũm ja kệp omnuj nê. ⁵ Kwa mẽ inhma ixkwỳjaja. Mẽ kệp amrakati xwỳnhjaja mẽ hikàxpore hkêt tã na hte mẽ hkwyjaja amnhĩ kaxyw Tĩrtũm kôt hamaxpěr nê hkôt amnhĩ xunhwÿr nhũm amnhĩ tã mẽ omu nê kot mẽ panhĩpêx pyrã nê mẽ ho hkra. Jakamã jar mẽ kệp amrakati htã na htem amnhĩ kaxyw Tĩrtũm kôt hamaxpěr tỳx rãhã ho pa. Jakamã koja mẽ nhÿrmã kuri hĩr tũm nê mex kumrêx

ně pa ho pa. Mě kām Tirtūm kīnh o mẽ pa xwýnh piitā koja mẽ nhýrmā ã mex ně ri pa aně. ⁶ Nom kot kaj mẽ ahpýnhã mẽ hipêx ně amnhĩ tomnuj ně. E pa mẽmoj tã mẽ akukja. Měmojaja na htem tanhmã mẽ ato hêx to? Ně mẽmojaja na htem juisti mã tanhmã mẽ ato kapêr punuj to? Xà mẽ kêp amrakati xwýnhjaja? Nà mẽ tãm kêt. Mě hikàxpore rŭnh xwýnhjaja na htem ã mẽ anhîpêx anhýr o pa. ⁷ Ně ra mẽ ate hkôt amnhĩ xunhwýr xwýnhja nhŭm mẽ axtem ně tanhmã mẽ apê ho kapêr to ho pa. Tã ka htem mẽ kêp amrakati xwýnhjê rom mẽ kãm akapêr mex ně mẽ kãm kadêre mex gŏ nhŭm mẽ hã hkrĩ. ⁸ Tirtūm kapêr ã kagã htŭm kot ja jarênh kot:

Kêr ka mẽ piitã mẽ hipêx o te ka amã amnhĩ tã ma pyrãk. Aně.

Ã kot mẽ pamã karŏ kot anhýr. Kapêrja mex kumrêx. Kot puj mẽ ã axpên nhîpêx anhýr jao Tirtūm kãm hprãm xà hkôt amnhĩ nhîpêx mex ně. ⁹ Nom kot puj mẽ ã amnhĩ nhîpêx anhýr kêt ně ahpýnhã tanhmã mẽ hikàxpore rŭnh xwýnhjê ho mex to ně ahpýnhã tanhmã mẽ kêp amrakati xwýnhjê nhîpêx to japêr. Hã kot puj mẽ Tirtūm kapêr htŭmta nhîrŏp pakuhê ně amnhĩ tomnuj ně. ¹⁰ Kot pu mẽ kapêr tŭm piitã hkôt ri amnhĩ nhîpêx mex o ri papa htã ãm pixire ně hirŏp pakuhê. Jao te pahte kapêr piitã hirŏp pakuhê pyrãk. ¹¹ Na pre Tirtūm mẽ pahte mẽ pahprŏ pix tãnopxar o papa hã mẽ pamã karŏ. Ně mẽ pamjên pix tãnopxar o papa hã mẽ pamã karŏ. Ně mẽ pahte axpên par ně mẽ pahkurê. Jakamã kot puj mẽ pahprŏ pix tãnopxar mex o ri papa japêr. Ně mẽ pamjên pix tãnopxar mex o ri papa japêr tã tanhmã pajamaxpêr to ně pahkwýjê hŏxpĩ. Jao te Tirtūm kapêr tŭm piitã hirŏp pakuhê hpar pyrãk o amnhĩ nhîpêx.

¹²⁻¹³ Koja nhýrmã Tirtūm mẽ pahtír ri tanhmã axpên nhîpêx to ho papa hã mẽ pahpumunh kôt tanhmã mẽ pajarênh to. Mě pamã axpên kīnh ã axpên to mex o papa hã mẽ pahpumunh kôt mẽ pajarê rý mẽ pamã axpên kīnh kêt ã axpên nhîpêx o papa hã mẽ pahpumunh kôt mẽ pajarê. Jakamã mẽ kamã mẽ ukaprĩ kêt xwýnhjaja koja nhýrmã ja hã mẽ omu ně mẽ urãk ně

mě kamã ukaprĩ hkêt ně. Nom mẽ kamã mẽ ukaprĩ ho mẽ pa xwýnhjaja koja ja hã mẽ omu ně mẽ urãk ně mẽ kamã ukaprĩ ně mẽ ně mẽ kot amnhĩ tomnuj piitã rênh pa. Jakamã kwa kêr ka mẽ amnhĩ to mex ně tãm axpên nhîpêx o ri axpên kôt apa. Ně axpên mã akapêr mex ně axpên kamã axukaprĩ pix kukamã ajamaxpêr o apa.

Amnhĩ kaxyw Tirtūm kôt mẽ hamaxpêr xwýnhjê jarênh

Rukre 3.8-14

¹⁴ Ně kwa ixkwýjaja. Koja mẽhŏ kot amnhĩ kaxyw Jejus kôt hamaxpêr ně hkôt amnhĩ xãm ã amnhĩ jarênh tã hkôt ri amnhĩ nhîpêx kêt ně. Hã koja nhýrmã ty hãmri ně tanhmã kot we amnhĩ to ně Tirtūm mẽ Jejus wa kuri htír tŭm ně pa ho pa? Nà koja anhýr kêt ně. Kêp hkra hã amnhĩ jarênh tã hkôt amnhĩ nhîpêx kêt jakamã koja nhýrmã wa hwýr àpir kêt ně.

¹⁵ Ně xà koja mẽhŏ kêp amrakati ně ri pa. Ně ê pynajre pix jagjê ně ri hã pa. Ně ō hkêt ně ri kãm prãm ně pa. ¹⁶ Ka mẽ ja hã omu ně tanhmã kãm akapêr to ně kãm:

—Kwa ã amnhĩ nhîpêx anhýr kêt ně. Anhŏrkwý hwýr tēn axê mex japêr ně axà ně amnhĩm mẽmoj japêr ně aku. Koja Tirtūm ato mex rax ně.

Anhýr o kãm akapêr tã kãm mẽmoj nhŏr kêt ně. Tã xà koja we ama ně amar xà hkôt ê mex jagjê ně apkur mex o ri pa? Nà kot ka mẽ ã kãm akapêr aně ně ho ajuta hkêt ně nhŭm arĩ kãm prãm ně ê hkêt ně omnuj ně ri pa. Na htem mẽ kapêr pix o mẽ ho mex kêt ně. Kot kaj mẽ ã kãm akapêr aně ně ãm kãm mẽmoj tã karŏ kaprý. ¹⁷ Ja pyrã ně koja mẽhŏ ra amnhĩ kaxyw Jejus kôt hamaxpêr ně hkôt amnhĩ xãm ã amnhĩ jarênh tã kapêr kôt ri amnhĩ nhîpêx kêt japêr. Hã koja ãm kêp hkra hã amnhĩ jarênh kaprý.

¹⁸ Ně kot kaj mẽ atŏ ã ajamaxpêr aně ně ajamaxpêr o:

—Nà Jejus kwýjaja na htem ahpýnhã tanhmã amnhĩ nhîpêx to ho pa. Na hte mẽ hkwyjaja amnhĩ kaxyw Jejus kôt hamaxpêr tŷx pix o ri pa. Ně mẽ hkwyjaja tanhmã hkwyjê ho mex to ho ri pa. Æ na htem ahpýnhã tanhmã amnhĩ nhîpêx anhýr to ho pa. Aně.

Kwa mẽ ri ã ajamaxpër anhÿr kêt nê. Mẽ hkwÿjê ho mex o mẽ pa xwÿnhjaja na htem Tÿrtÿm hkôt hamaxpër pẽ mãânên hkôt amnhĩ nhĩpêx nê hkwÿjê ho mex o pa. Koja mẽhõ amnhĩ kaxyw Jejus kôt hamaxpër hã koja mãânên hkôt amnhĩ nhĩpêx pẽ tanhmã hkwÿjê ho mex to ho pa. Na htem amnhĩ kaxyw hkôt hamaxpër pix o pa hkêt nê. Na htem mãânên hkôt mẽ piitã mẽ ho mex o ri pa.

¹⁹ Na ka hte mẽ akwÿjaja ã ajamaxpër anê nê ajamaxpër o:

—Nà Tÿrtÿmja pyxi mex o pyxi mex. Tã kot paj jam ijamaxpër rãhã ho ri ixpa nê ra ixpê hkra hã ri ixpa. Nom kot paj kapër kôt amnhĩ nhĩpêx o ri ixpa hkêt nê.

Anhÿr o ajamaxpër nê ã ajamaxpër anhÿr kaprÿ.

Nê ãm hãmri na ka htem Tÿrtÿm pyxi mex o pyxi mex ã harê. Nom na htem jam hamaxpër kôt pix mã kêp hkra hkêt nê. Mẽkarõmnutijaja na htem haxwÿja Tÿrtÿm pyxi mex o pyxi mex kôt hamaxpër tã mẽ kêp hkra hkêt. Na htem ã hamaxpër anhÿr pẽ kãm uma ho pa. ²⁰ ã mẽ ajamaxpër anhÿrja mex kêt. Koja mẽhõ amnhĩ kaxyw Tÿrtÿm kôt hamaxpër ã amnhĩ jarênh tã hkôt amnhĩ nhĩpêx o pa hkêt japêr. Hãmri nê ãm amnhĩ kaxyw hkôt hamaxpër ã amnhĩ jarênh hkaprÿ. E kot paj ixprĩ hã mẽ amã ja jarê ka mẽ inhma. ²¹ Mẽ panhigêt finat Apraãw na pre amnhĩ kaxyw Tÿrtÿm mã hamaxpër nê hkôt ri amnhĩ nhĩpêx mex o pa. Tã nhũm amnhĩ tã kamã hamak kaxyw hkra Ijak ã kuwÿ nhũm kuma nê ra kot kãm hpÿr nê õr kaxyw nhũm Tÿrtÿm amnhĩ tã omu nê amnhĩm mex ã harê. Hãmri nê kot hkra hpÿr nê kãm kapër. ²² Ra kot amnhĩ kaxyw hkôt hamaxpër nê hkôt amnhĩ xãm jakamã mãânên hkôt amnhĩ nhĩpêx nê ra kot kãm hkra nhõr kaxyw Tÿrtÿm amnhĩ tã omu nê amnhĩm mex ã harê. Na pre ã finat Apraãw Tÿrtÿm kapër kôt amnhĩ nhĩpêx mex anhÿr o pa. Jao amnhĩ kaxyw hkôt hamaxpër mex ã amnhĩ to amnhĩrĩt.

²³ Nê kormã Apraãw wa hkra hkêt ri nhũm Tÿrtÿm wa kãm hkra jarê nhũm kuma nê hkra hkukamã amnhĩ kaxyw Tÿrtÿm kôt hamaxpër tÿx o pa nhũm amnhĩ tã omu nê

mex ã harê. Nê kêp hkrãmnhwÿ hã harê. Kapër ã kagã htũm kot ja jarênh kot:

Na pre Apraãw hkra hkukamã amnhĩ kaxyw Tÿrtÿm kôt hamaxpër tÿx nhũm amnhĩ tã omu nê amnhĩm mex ã harê. Anê.

²⁴ ã na pre finat Apraãwja hkra kaxyw Tÿrtÿm kôt hamaxpër anhÿrja o ra hkôt amnhĩ nhĩpêx nê ra kot kãm hpÿr kaxyw. Nom kop apu amnhĩ kaxyw hkôt hamaxpër pix nê hkôt amnhĩ nhĩpêx kêt ronhÿx pre Tÿrtÿm tee ri amnhĩ tã omu nê amnhĩm mex ã harênh kêt nê. Na htem amnhĩ kaxyw Tÿrtÿm mã hamaxpër nê mãânên hkôt ri amnhĩ nhĩpêx mex o pa nhũm amnhĩ tã mẽ omu nê amnhĩm mẽ mex ã mẽ harê. ²⁵ Mẽhõ ni kuprÿ finat Raapja na pre ã amnhĩ nhĩpêx anê nê amnhĩ kaxyw Tÿrtÿm kôt hamaxpër pẽ tanhmã hkôt amnhĩ nhĩpêx to ho pa. Na pre Ijaew myja wa hamêxkrut nê ma Raap nhõ krĩ hwÿr wa tẽ. Mẽ hã ukapi nê kot mẽ hkurê kaxàr kaxyw mẽ hwÿr wa tẽ. Hãmri nhũm Raap Tÿrtÿm kot wa mênh ã wa omunh kurê kumrêx nê pôristi kot tanhmã wa ho pymaj amnhĩ nhõrkwÿ kamã mẽ kêp wa ho amũxu nê wa nê mẽ kãm tanhmã hêx to. Nê hpãnhã nhãm pry hõ hkôt akupÿm wa kumẽ nhũm wa hkà hkĩnh pẽ ma akupÿm mex nê tẽ. Hãmri nhũm Tÿrtÿm wa hã Raap pumu nê amnhĩm mex ã harê.

²⁶ Tã kot kaj mẽ atõ amnhĩ kaxyw Tÿrtÿm kôt ajamaxpër ã amnhĩ jarênh tã hkôt amnhĩ nhĩpêx kêt japêr. Hãmri nê apê hkra hã amnhĩ jarênh kaprÿ. Te ra mẽhõ htyk nê nõr tã nhũm mẽ kot arĩ htÿr ã harênh kaprÿta pyrãk.

3

Mẽ kot Tÿrtÿm kapër o mẽ ahkre xwÿnhjê jarênh

¹ Nê kwa Kris kôt ixkwÿjaja. Mẽ axohtõ nê mẽ amã Tÿrtÿm kapër o mẽ ahkre hprãm tã kormã ja kaxyw mẽ apiitã mẽ amex kêt. Mẽ ixte Tÿrtÿm kapër o mẽ ajahkre xwÿnhjaja kot paj mẽ tanhmã amnhĩ tomnuj to japêr nhũm Tÿrtÿm ja hã mẽ ixpumu nhũm ja kêp omnuj nê. Mẽ ixte kapër o mẽ ajahkre ho mẽ ixpa kênã kot pa hkêt mẽ ri tanhmã amnhĩ tomnuj to ho ri

ixpa. Jakamã kot kaj mẽ Tĩrtũm kapẽr piitã hkõt ri amnhĩ nhĩpêx mex mẽ rĩ kormã ho akwỳjê jahkre ho ri apa.

² Nẽ mẽ pahpiitã na pu htem tõhã mẽ pajakwa ho tanhmã amnhĩ tomnuj to. Mẽmoj tã axpẽn kãm pagryk mẽ tanhmã mẽ kãm pakapẽr punuj to. Nom koja mẽhõ tanhmã kapẽr punuj toja nẽ amnhĩ to htỳx mẽ hãmri mẽ tãm amnhĩ nhĩpêx o pa.

Mẽ pajakwa jarẽnh
Epes 4.29

³ Na htem nhỹhỹm kawar o juk kaxyw hakwam kàx jagjê mẽ kãm nhỹhỹm o htẽm prãm xà hkõt ma nhỹhỹm ho juk o tẽ. Kàxja hkryre nhũm kawar rũnh tã no nhũm kãm ma nhỹhỹm ho mrrar prãm xà hkõt ho juk o mra.

⁴ Nẽ gô xujanãr kãm pàr rũnhhta rũnh tã na hte kòk àpêr tỳx mẽ ma nhỹhỹm o pa. Nẽ pĩ ho pàr o juk xàta hkryre htã ma nhỹhỹm ho juk o mỗ. Nhỹhỹm pàr o mrrar xwỳnh kãm o mỗr prãm xà hkõt o mỗ.

⁵ Ja pyrã mẽ mẽ pajakwaja hkryre htã na htem ho kapẽr o tanhmã mẽ hipêx to ho pa. Tõhã ho kapẽr mex mẽ nhũm mẽ kuma mẽ hkĩnh mẽ. Nẽ tõhã ho kapẽr punuj mẽ nhũm mẽ tee ri mẽ kapẽr ã mẽ kuma mẽ hkaprĩ mẽ rỳ kapẽr xwỳnhhta kamã gryk mẽ. Mẽ pajakwa hkryreja te kot kuwy jakrax kryre pyrãk. Kot ka kuwy jakrax grire ho tẽ mẽ nhỹri põtĩ kamã amẽ nhũm kòk ho apê nhũm hpòk rax tokyx anẽ. Hãmri mẽ ma pà ho hkaxàr par o mỗ mẽ ho hkaxàr pa. ⁶ Mẽ pajakwaja mã kot anhỹr. Kot kaj atỳx ri tanhmã ho akapẽr punuj to nhũm mẽ ama mẽ axpẽn mã anhĩxi ho krĩ nhĩpêx ka amex kêt mẽ apa. Rỳ ka atỳx ri ajakwa ho tanhmã akwỳjê ho akapẽr to nhũm mẽ tee ri amnhĩ tã ama mẽ hkaprĩ mẽ rỳ akamã gryk mẽ. Satanasti nhỹ hã na htem ã mẽ hakwa ho kapẽr punuj anẽ.

⁷ Na htem tõhã mẽmo mry xoprê pynẽ mẽ tanhmã ho mẽ ra ho kãm ma hkêt. Kagã rỳ hagrõre rỳ àatĩ rỳ gòx kãm mẽmo mryja nhũm htem unẽ mẽ tanhmã ho nhũm kãm ma hkêt mẽ mẽ hkõt pa ho pa. Nom na htem mry piitã ã hipêx anhỹr kêt mẽ. ⁸ Tã mẽ pajakwa te mẽ kot tee ri mẽmo mry ho kãm ma hkêt kaprỳ xwỳnhhta pyrãk. Na pu htem amnhĩ krã hkõt pajakwa ho

pakapẽr mex pix kêt mẽ. Tanhmã kot puj mẽ pakapẽr punuj kêt kaxyw amnhĩ jakwa hto? Mẽ pakapẽr punuj te kot kagã xoprê kot mẽ hkamnhar mẽ õ wenẽn o mẽ hparta pyrãk. ⁹⁻¹⁰ Na pu htem tõhã pajakwa ho tãm pakapẽr mẽ tõhã pakapẽr punuj mẽ. Nẽ tõhã Pahi Maati Tĩrtũm mã mex o mex ã harẽn h tã ra axtem mẽ tanhmã mẽhõ japrỳ hto. Tĩrtũm kot mẽ pahto amnhĩ pyrã mẽ mẽ panhĩpêx tã pu htem axtem mẽ tanhmã axpẽn japrỳ hto ho ri papa. Jao te pahte Tĩrtũm japrỳ pyrãk. Kwa ixkwỳjaja. Kêr pu mẽ pahpê Tĩrtũm krajaja ã pakapẽr punuj anhỹr hkêt mẽ. ãm mẽ pajakwa ho mẽmoj mex pix jarẽnh o ri papa.

¹¹⁻¹² Xà koja pà kamã hinore pyxi htã kamã gô xành mẽ mããnẽn kamã gô xenh nõkati? Nà koja anhỹr kêt mẽ. Na hte kamã gô mex pix mẽ rỳ kamã gô xenh nõkati pix mẽ.

Nẽ xà koja jàaxõ hpàr ã rãrãj harir? Rỳ ahkrõ xõ hã mánkwrýtire harir? Nà na hte ahpỹnhã hpàr ã harir. Ja pyrã mẽ kêr pu mẽ pahpê Tĩrtũm krajaja pajakwa ho pakapẽr punuj pẽ ho papikamỳr tỳx mẽ. Nẽ te hinore kamã gô mex pixta pyrã mẽ ãmoj mex pix jarẽnh o ri papa. No mẽ pajakwa nhĩkjê ho tãm pakapẽr mẽ hikjê ho pakapẽr punuj kêt mẽ. ãm pakapẽr mex pix o pakapẽr o ri papa. Kwa kêr pu mẽ ã amnhĩ nhĩpêx anhỹr rãhã ho papa.

Tĩrtũm kòt mẽ àhpumunh xwỳnhjê jarẽnh
Wam Korĩt 2.6-16

¹³ Nẽ kwa mẽ axàhpumunh tỳx xwỳnhjaja kêr ka mẽ amnhĩ to mex o ri apa. Nẽ mẽ piitã tãm mẽ hipêx mex mẽ mẽ amã axpẽn japê hã axpẽn to ajuta mex o ri apa. Tĩrtũm kapẽr xà hkõt. Kot kaj mẽ ã amnhĩ nhĩpêx anẽ mẽ axàhpumunh mex ã amnhĩ to amnhĩrĩt. ¹⁴ Nom kot ka mẽ mẽmoj tã axpẽn kamã agryk o ri apa. Rỳ amnhĩ pix kukamã ajamxpêr o ri apa hãmri mẽ ãm ate Tĩrtũm kapẽr kòt amnhĩ nhĩpêx ã amnhĩ jarẽnh kaprỳ. ¹⁵ ã mẽ kot amnhĩ nhĩpêx anhỹr xwỳnhjaja na htem Tĩrtũm kòt amnhĩ nhĩpêx kêt mẽ. Mẽ kêp Tĩrtũm kra hkêt xwỳnh pixjaja na htem ã amnhĩ nhĩpêx anhỹr o pa. Jao mẽkarõmnuti kot amnhĩ nhĩpêx kòt pix mã amnhĩ nhĩpêx o pa. ¹⁶ Axpẽn kamã mẽ gryk o mẽ pa xwỳnhjaja

na htem amnhĩ pix kukamã hamaxpër jao tanhmã amnhĩ tomnuj to ho pa. Nẽ amnhĩ tã mẽ kamã mẽ gryk xwýnhjê homnuj o pa. Tã ã mẽ pahte amnhĩ nhĩpêx anhÿr pumaj kwa kêr pu mẽ mẽmoj tã axpên kamã pagryk o ri papa hkêt nẽ. ¹⁷ Mẽ kot Tĩrtũm kôt amnhĩ nhĩpêx xwýnhjaja na htem jajê rom tãm axpên nhĩpêx rãhã o pa.

Nẽ axpên kamã ukaprí pix o ri axpên kôt pa.

Nẽ tãm hamaxpër o pa.

Nẽ mẽ piitã mẽ hipêx o axpên pyræk.

Nẽ axpên tã hpijaãm o ri pa.

Nẽ tanhmã ri axpên no kupyry to hkêt nẽ.

Nẽ ri oprê ho pa hkêt nẽ.

Nẽ mẽ axpên kamã ôkre kahak kêt nẽ.

Nẽ mẽ piitã mẽ ho mex o axpên pyræk.

Nẽ tãm mẽ piitã mẽ hipêx rãhã nẽ.

Ã na htem Tĩrtũm kôt mẽ kot amnhĩ nhĩpêx xwýnhjaja amnhĩ nhĩpêx anhÿr o pa. ¹⁸ Kot puj mẽ ã amnhĩ nhĩpêx anẽ nẽ pajamakêtkati nẽ paxãmnhĩx pahkĩnh nẽ ri papa. Nhũm nhÿri mẽhõ wa axpên kãm gryk pu mẽ wa omu rÿ wa harênh ma hãmri nẽ mẽ pahtõ ma wa hwÿr tẽ nẽ wa kãm pakapër nẽ tãm akupÿm wa ãm. Hãmri nhũm wa ra mẽ pahpyrà nẽ tãm amnhĩ nhĩpêx pẽ hamakêtkati nẽ wa ri pa. ãmnhĩx ri hkĩnh nẽ wa ri pa.

4

Mẽ kot amnhĩ pix kukamã mẽ hamaxpër xwýnhjê jarênh

Matêwre 20.20-28; Juãw 16.24

¹ Nẽ kwa mon ka hte mẽ akwÿjaja axpên mã akapër mã agêt o axpên kãm agryk pix o apa? Na ka htem ã amnhĩ nhĩpêx anhÿr o amnhĩ pix kukamã ajamaxpër. Nẽ mẽ amã amnhĩ jamaxpër kôt pix mã ri amnhĩ nhĩpêx prãm. No Tĩrtũm kãm hprãm xà hkôt amnhĩ nhĩpêx prãm kêt nẽ. ² Na ka htem nhÿri mẽmoj pumu nẽ tee ri ho amã anhõ hprãm kaprÿ. Nẽ amã ho anhõ hprãm xàj õ xwýnhta pĩr nẽ kêp utàr mã.

Nẽ na ka htem tanhmã axpên kukrêx kute hã omu nẽ amã ho anhõ hprãm nẽ hã õ xwýnhta mẽ wa axpu. No mẽ amã hprãm xwýnhta mẽ ate hõ hã Tĩrtũm wÿr ronhÿx ra mẽ ama nẽ mẽ amã hõ gõ. Tã mẽ ate hã

axàhwÿr kêt jakamã nhũm mẽ amã õr kêt nẽ.

³ Rÿ ka mẽ tõiã mẽmoj tã awÿ nhũm kot mẽ amar tã mẽ amã õr kêt nẽ. Kot mẽ amã õr nhũm mẽ ate ho anhõxÿ ho apa pymaj na hte tõiã mẽ amã mẽ ate hã axàhwÿr xwýnhta nhõr kêt nẽ.

⁴ Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyræk o na ka htem amnhĩ nhĩpêx o apa. Jao mẽ amã mẽ apê Tĩrtũm kra hprãm tã axtem nẽ mẽ kãm hprãm kêt xwýnhjê hkôt amnhĩ nhĩpêx o ri apa nẽ mẽ uræk nẽ tanhmã amnhĩ tomnuj to ho ri apa. Nẽ mẽ ate amnhĩ tomnuj gryk ã mẽ amã Tĩrtũm prãm kêt ã amnhĩ to amnhĩrít.

⁵ Tĩrtũm kapër ã kagà htũm kot tanhmã Karõ jarênh to nẽ harênh kot:

Na pre Tĩrtũm mẽ pahwÿr amnhĩ Karõ rẽ nhũm mẽ pahwÿr wrÿ nẽ mẽ pakamã agiê nẽ mẽ pahkôt pa ho pa. Mẽ pahte hkôt pix mã amnhĩ nhĩpêx o papaja na kãm hprãm. Anẽ.

Ãm hãmri ã harênh kot anhÿr jakamã kwa kêr ka mẽ harênh ma nẽ kãm ajamaxpër tÿx rãhã ho ri apa.

⁶ Na hte Tĩrtũm mẽmoj to mẽ pakutã no-jarêt rãhã pu mẽ ÿ hã tãm amnhĩ nhĩpêx o ri papa. Kapër ã kagà kot ja jarênh kot:

Mẽ kãm Tĩrtũm kôt amnhĩ nhĩpêx prãm kêt xwýnhjaja na hte Tĩrtũm amnhĩ tã mẽ omu nẽ mẽ kutã amnhĩ xunhwÿ.

No mẽ kãm hkôt ri amnhĩ nhĩpêx prãm xwýnhjaja na hte amnhĩ tã mẽ omu nẽ mẽ ho mex o pa nhũm htem hihtÿx xà nhÿ hã mẽ kãm hprãm kêt xwýnhjê hkôt ri amnhĩ nhĩpêx kêt nẽ. Anẽ.

⁷ Jakamã kwa kêr ka mẽ Tĩrtũm kapër kôt pix mã mãn ri amnhĩ nhĩpêx o ri apa. Kêr kê Satanasti tanhmã mẽ ate amnhĩ tomnuj to hprãm xàj tanhmã mẽ ato ka mẽ Tĩrtũm Karõ nhÿ hã ãm ama nẽ hkôt amnhĩ nhĩpêx kêt nẽ. Nhũm tee ri amã àhkrox kaprÿ nẽ akaga nẽ ma tẽ.

⁸ Nẽ kot kaj mẽ Tĩrtũm kapër kôt pix mã ri amnhĩ nhĩpêx o apa nhũm amnhĩ tã mẽ apumu nẽ te kot mẽ apa hã mẽ ajamÿnh nẽ mẽ ato pa pyræk o mẽ anhĩpêx. Jao mẽ ato mex o ri mẽ akôt pa ho pa. Nẽ mẽ atãnopxar rãhã ka mẽ ajamakêtkati nẽ akĩnh nẽ ri apa.

Ně kêr ka mẽ tanhmã amnhĩ tomnuj to hãmri nẽ tee ri ja hã amnhĩ pumu nẽ hkaga kurê kumrêx nẽ axte ã amnhĩ nhĩpêx anhÿr kêt nẽ. Rÿ ka mẽ tanhmã ajamaxpêr punuj to hãmri nẽ ja hã amnhĩ pumu nẽ hkaga nẽ hpãnhã tãm ajamaxpêr pix o ri apa. Mẽ apê Tĩrtũm kra hã kêr ka mẽ ãm hkôt pix mã ri tãm amnhĩ nhĩpêx o ri apa.

Mẽ pahte amnhĩ tomnuj ã tanhmã amnhĩ nhĩpêx to hã mẽ pamã karõ

Wam Juãw 1.5-10

⁹ Nẽ kêr ka mẽ tee ri ate tanhmã amnhĩ tomnuj to hã amnhĩ pumu nẽ akapri xaj mur nẽ akĩnh kêt nẽ. Nẽ akapri xaj amÿr rax nẽ. ¹⁰ Hãmri nẽ Tĩrtũm mã amnhĩ jarênh o:

—Pa Tĩrtũm. Na pa ã amnhĩ tomnuj anẽ. Nom kot paj axte hkêt nẽ. ãm inhmã akapêr kôt pix mã ri amnhĩ nhĩpêx prãm.

Anhÿr o kãm akapêr kê mẽ ama nẽ mẽ ate amnhĩ tomnujta ã tanhmã mẽ ato hkêt nẽ. ãm mẽ ato mex nẽ ka mẽ akupÿm ajamakêtkati nẽ axãmnhĩx akĩnh nẽ ri apa.

Mẽ pahte axpên to pakapêr nê mẽ pahkurê

Matêwre 7.1-5; Rõmãn 2.1-3, 14.10-13; Wam Korit 4.5

¹¹ E ixkwÿjaja. Kwa kêr ka mẽ anhĩõ kot tanhmã amnhĩ tomnuj to hã omu nẽ tanhmã ho akapêr punuj to hkêt nẽ. Tĩrtũm kapêr ã kagã htũm kot ja nẽ mẽ pahkurê kamã hihtÿx jakamã kot ka mẽ ri ã amnhĩ nhĩpêx anẽ nẽ te ate Tĩrtũm kapêr tũm kwÿ omnuj ã harênh pyrãk. Rÿ te axãhpumunh tÿx o ate Tĩrtũm jakrenh ã amnhĩ to jarkrar pyrãk. Jao kapêr kôt amnhĩ nhĩpêx kêt nẽ. Na htem Tĩrtũm kapêr ã kagã htũm kwÿ mex ã harê nẽ hkwy omnuj ã harênh kêt nẽ. Piitã mex kênã.

¹² Nẽ Tĩrtũmjaja tapxipix na kêp mẽ pahto amnhĩptar xwÿnh maati. Nẽ tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwÿnh ã mẽ pajarê rÿ mẽ pahte amnhĩ tomnuj xwÿnh ã mẽ pajarê. ãm tapxipix kot ã mẽ pajarênh kot anhÿr xwÿnh. Tã ka mẽ axtem nẽ kapêr kwÿm ri tanhmã akwÿjê ho akapêr punuj to ho ri apa.

Mẽ pahte Tĩrtũm mã pajamaxpêr pẽ kãm amnhĩ jarênh ã mẽ pamã karõ

Rukre 12.13-21

¹³ E kwa mẽ inhma ixkwÿjaja. Na ka hte mẽ akwÿjaja tanhmã amnhĩ kukamã ajamaxpêr to nẽ akwÿjê mã amnhĩ jarênh o:

—Koja apkati pa ma krĩ hõ hwÿr mõi nẽ kamã mẽ kãm ixãpênh o ixpa hã ixtã amgrã pyxi nẽ hpãnhã kãxpore jamÿnh rax nẽ man akupÿn mõi.

Anhÿr o amnhĩ jarê. ¹⁴ Kwa mẽ ã amnhĩ kukamã amnhĩ jarênh anhÿr kêt nẽ. Mẽ pahtõ mẽ pahte amnhĩ kukamã paxãhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhÿr tã kormã ã amnhĩ nhĩpêx anhÿr kêt ri tanhmã amnhĩ to nẽ ty. Rÿ tanhmã amnhĩ to nẽ axã hãmri nẽ nhÿhÿm amõr kêt nẽ. Te mẽ pahpê namê pyrãk na pu htem ri papa nẽ tanhmã amnhĩ to nẽ ty nẽ pajapêx tokyx anẽ. ¹⁵ Jakamã mẽ ã amnhĩ kukamã amnhĩ jarênh anhÿr kêt nẽ. Kêt amnhĩ jarênh o:

—Koja Tĩrtũm kãm ja prãm koja apkati pa ã amnhĩ nhĩpêx anẽ nẽ ã amnhĩ nhĩpêx anẽ.

Anhÿr o Tĩrtũm kamnar o tanhmã amnhĩ kukamã amnhĩ jarênh to. ¹⁶ No mẽ ate amnhĩ krã hkôt amnhĩ kukamã amnhĩ jarênhata Tĩrtũm jamaxpêr xã hkôt kêt. ãm amnhĩ krã hkôt mẽ ate amnhĩ kukamã amnhĩ jarênh kênã. ã mẽ ate amnhĩ jarênh anhÿrja mex kêt.

¹⁷ Nẽ mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri nẽ amnhĩ tomnuj o apa.

5

Mẽ hikãxpore rũnh xwÿnhjê jarênh

Rukre 12.13-21; Wam Ximotre 6.9-10; Apokarip 18.14

¹ Nẽ kwa mẽ akãxpore rũnh xwÿnhjaja. Mẽ inhma nẽ inhmar tÿx nẽ. Nhÿrmã mẽ amex kêt jakamã kwa mẽ tee ri amnhĩ kukamã ajamaxpêr o ra akapri nẽ amÿr o apa kurê kumrêx. ² Tĩrtũm noo mã mẽ akãxpore te ra mẽ apê hapêx par pyrãk. Te ra mẽ anhÿ kamã mẽ ate amnhĩ tomnuj xwÿnh ã kutã akrĩ pyrãk. ³ Mẽ ate mẽ akukrêx nẽ mẽ akãxpore ho apikuprõnh rũnh tã ka htem mẽ akwÿjê pẽ ho anhõxÿ ho ri apa. Mÿrapê koja nhÿrmã tanhmã mẽ apê amnhĩ to nẽ

omnu pa ka mẽ ho apikuprõnh rax kaprý. Hãmri nẽ mẽ ate amnhĩ tomnuj mýrapê Tirtũm mẽ Kra wa kuri atĩr tũm nẽ apa ho apa hkêt nẽ. Âm kuwy kamã mẽ amnhĩ xà htýx kamã ajamak rãhã ho ri apa. ⁴ Na ka htem apur kãm mẽ àpênh xwýnhjê mã amnhĩrer kêt nẽ. Nhũm mẽ tee ri amnhĩ tã mẽ ajamã hãmri nẽ mẽ atã amnhĩ to Pahi Maati Tirtũm xihtýx xwýnhhta wýr o pa nhũm mẽ atã mẽ kuma. ⁵ Mẽ akĩnhã mẽ kêp amrakati htã ka htem âm ja hã mẽ omu nẽ mẽ àpênh pãnhã mẽ kãm amnhĩrer kêt nẽ amnhĩ pix kukamã ajamxpêr. Nẽ amã prãm xà hpix kukamã amnhĩm mẽmoj japrõr pê akĩnh o ri apa. Jao te mẽ apê môx htwým nhũm mẽ kot hpĩr nẽ hkrêr mã mex ã harênh xwýnhhta pyræk. Mýrapê kot kaj mẽ môxta pyrã nẽ nhýrmã ty hãmri nẽ Tirtũm mẽ Kra wa kuri atĩr tũm nẽ apa ho apa hkêt nẽ. ⁶ Nom ja pix kêt. Na ka htem mẽ anhõ krĩ kamã mẽ anhõ pahi mã tanhmã akwýjê ho axêx to ho ri apa. Mẽ kot tanhmã atomnuj to hkêt tã ka mẽ kãm mẽ ho axêx rũnh nẽ. Tã koja nhýrmã Tirtũm mẽ hã tanhmã mẽ ato rax kumrêx ka mẽ rĩ amnhĩ pumu.

Mẽ pahte Jejus kutêp amnhĩ kaxyw kãm pajamxpêr o papa hã mẽ pamã karõ

Sikũn Pêtre 3.1-13

⁷ E ixkwýjaja. Koja mẽhõ tanhmã mẽ atomnuj to htã ka mẽ arĩ amnhĩ kaxyw Jejus mã ajamxpêr rãhã ho ri apa. Pê akupýn hpõx xà hã arĩgro jamãr rãhã nẽ. Te pur nhõ dõn kot amnhĩ nhĩpêx pyræk. Koja hpur kãm ahkre nẽ ahkre hpa hãmri nẽ arĩ hamãr o pa nẽ kãm nojarêr kêt nẽ hã na wrýk jamãr o pa. Jao hamakêtkati nẽ ô jamãr rãhã ho pa. ⁸ Tã kêr ka mẽ uræk nẽ arĩ Pahihti akupýn hpõx xà hã arĩgro jamãr rãhã ho ri apa. Koja tokyx akupýn mẽ pahwýr wrý. Jakamã kêr ka mẽ kutêp mẽ kot mẽ atomnuj xwýnhjê kutã amnhĩ to htýx nẽ ri apa. Nom tee ri amnhĩ kukamã ajamxpêr o Jejus kaga hkêt nẽ. Arĩ hamãr pê akĩnh nẽ ajamakêtkati nẽ ri apa. Koja akupýn mẽ pahwýr wrý nẽ mẽ pahto mex rax kumrêx.

⁹ Nẽ kêr ka mẽ axpên to akapêr o ri apa hkêt nẽ. Kot ka mẽ ã amnhĩ nhĩpêx anê nhũm Tirtũm mẽ ama nẽ tanhmã mẽ ajarênh to. Kot mẽ pahpumunh xà hkôt

tanhmã mẽ pajarênh to xwýnh na. Tã ra tanhmã kot mẽ pahpiitã mẽ pajarênh to xà hã arĩgroja ra ahtêp o mõ.

¹⁰ E ixkwýjaja. Kêr ka mẽ wam mẽ kot Tirtũm nhỹ hã kapêr jarênh xwýnhjaja kot amnhĩ nhĩpêx mã ajamxpêr rãhã nẽ. Na prem Tirtũm nhỹ hã mẽ kãm kapêr o ri mẽ hkôt pa nhũm mẽ hkwýjaja ja hã tanhmã mẽ hipêx to nhũm mẽ amnhĩ xà htýx kamã hamak rãhã ho pa. Tã tee ri amnhĩ kukamã hamxpêr pê Tirtũm kaga hkêt nẽ. Na prem arĩ ý hã kapêr jarênh rãhã ho ri mẽ hkôt pa. Tã kêr ka mẽ kot amnhĩ nhĩpêx pyræk o amnhĩ nhĩpêx nẽ Tirtũm kaga hkêt nẽ. ¹¹ Na prem amnhĩ xà htýx kamã hamak o pa rãhã ty hãmri nẽ Tirtũm kuri mex nẽ hkĩnh nẽ pa ho pa. Ra mẽ ate finat Johti jarênh mar mex. Na pre omnuj týx nẽ pa htã amnhĩ tã Pahi Maati Tirtũm kamã gryk nẽ hkaga hkêt nẽ. Hãmri nhũm amnhĩ tã omu nẽ gaa nẽ ho mex rax nẽ nhũm akupým mex kumrêx nẽ pa. Pahi Maati ja ukapri ho ukapri nẽ mex o mex jakamã na pre ã Johti ho mex anê. Tã koja ho mexta pyrã nẽ ã mẽ pahto mex anê.

Mẽ pahte tanhmã amnhĩ nhĩpêx to hã mẽ pamã karõ

Matêwre 5.33-37, 18.15; Rõmãn 12.15; Karatas 6.1-2; Jutre 22-23

¹² E ixkwýjaja. Pa mẽ amã mẽmoj jarê ka mẽ inhma nẽ inhmar týx nẽ. Kêr ka mẽ mẽmoj tã amnhĩ jarênh kaxyw hãmri nẽ akatàt kôt amnhĩ jarênh kurê kumrêx. Nẽ amnhĩ jarênh o: “Nà kot paj ja ho anê.” Anê. Rý amnhĩ jarênh o: “Nà kwarĩ pa ja ho anhýr kêt nẽ.” Anhýr o amnhĩ jarênh kurê kumrêx. Kê mẽ akwýjaja âm hãmri mẽ ate amnhĩ jarênh ã mẽ apumunh kurê kumrêx nẽ axêx ã mẽ akamnhix kêt nẽ. Mẽ apê Tirtũm kra kênã kot ka kêt mẽ ri axtem nẽ amnhĩ jarênh o axêx.

¹³ Nẽ koja mẽ anhõ mẽmoj tã tanhmã amnhĩ to nẽ omnuj nẽ. Ka mẽ ja hã omu nẽ kãm anê kê amnhĩ kaxyw Tirtũm mã hamxpêr pê amnhĩ to hwýr rãhã ho pa. Rý koja hkĩnh nẽ ri pa ka mẽ ja hã omu nẽ kãm anê kê hkĩnh kãm mex o mex ã grer o pa. ¹⁴ Rý koja à nẽ nõ ka mẽ ja hã omu nẽ kãm anê kê amnhĩ wýr pastõ nhỹ hã mẽ kapêr xwýnh kwýjê hã karõ. Kê mẽ hwýr

mra nê Jejus nhỹ hã mêmō twým kwý ho hkukō nê ho Tirtũm wý. ¹⁵ Kê mē ã mē à xwýnhjê hwýr mrrar nê mē ho Tirtũm wýr o pa anê. Kojã mē ho kuwý nhũm mē kuma nê akupým mē ho mex. Nhũm mē tanhmã amnhĩ tomnuj to japêr kê mē ja hã amnhĩ jarê kê Tirtũm mē kuma nê ja hã tanhmã mē ho hkêt nê. ¹⁶ Jakamã kêr ka mē atō tanhmã amnhĩ tomnuj to nê tee ri ja hã amnhĩ pumu hãmri nê tokyx akwýjê mã amnhĩ jarê kê mē tokyx ato Tirtũm wý. Kê atã mē kuma nê tanhmã akrã hto ka axte ã amnhĩ nhĩpêx anhýr kêt nê. Nê ra amex nê apa.

Nê kojã mēhō Tirtũm kôt pix mã amnhĩ nhĩpêx mex rãhã ho pa. Hãmri nê mēmoj tã kuwý nhũm kuma nê kãm tanhmã mēmoj to. ¹⁷ Te finat Eris kot mēmoj tã hwýr nhũm kot mar nê kãm ho anhýrta pyrãk. Erisja kêp mē panhĩō na pre. Tã na pre hkwyjaja amnhĩ tomnuj pix o pa nhũm tee ri mē omu nê mē hã na wrýk kêt kaxyw ho Tirtũm wýr kãm hihtýx nê. Hãmri nhũm kuma nê kãm ho anê nhũm na wrýk kêt ry rax kumrêx. Hã amgrã axkrunêpxi nê hkôt mytwrý kêp 6. Mē kot amnhĩ tomnuj týx o paja mýrapê. ¹⁸ Tã nhũm Eris axte mē ho kuwý nhũm axte mē hwýr na rē nhũm akupým katãt kôt wrýk mex nê. Nhũm akupým mē hpur kãm mē ōja mē kãm mex nê akupým mē kãm ô rũnh nê. Tã ã Tirtũm kot Eris mar nê kãm mēmoj nhĩpêx anhýrja pyrã nê kojã mē pama nê mē pamã mēmoj tanhmã ho.

¹⁹ Nê e mē inhma ixkwýjaja. Kojã mēhō Tirtũm kapêr mar týx nê te kêp hkra pyrãk o amnhĩ nhĩpêx. Tã tanhmã hamaxpêr to nê kapêr kaga nê htýx ri amnhĩ tomnuj pix o pa. Ka mē ja hã omu nê hwýr mra nê kot amnhĩ tomnuj nê kãm akapêr kãm axihtýx kê tokyx hkaga nê akupým Tirtũm kôt amnhĩ xãm týx nê ãm hkôt pix mã amnhĩ nhĩpêx. ²⁰ Kojã amnhĩ tã mē ama nê Tirtũm kôt amnhĩ xãm týx nhũm amnhĩ tã omu nê kot tanhmã amnhĩ tomnuj tota ho hamakêtkati nê amnhĩ katut kôt kurê nhũm nhýrmã kuri hũr tũm nê mex nê pa ho pa. Kojã amnhĩ tomnuj týx o pa htã hkaga hpa nhũm Tirtũm ja hã omu nê hã tanhmã ho hkêt nê axte tanhmã kot amnhĩ tomnuj tota mã hamaxpêr kêt nê.

Tã ãm ja pix. Ixpê Xiakre na pa ã mē awýr

kagã nhĩpêx nê mēnh anê.

Wam Pêtre Simãw Pêtre kot Jejus kôt hkwýjê hwýr kagà nê mênh

Simãw Pêtre na pre kagàja nhîpêx. Kêp tep pynênh o pa xwýnh tâ hpânã kêp Jejus nhý hã hkrajê jahkre ho pa xwýnh. Nê krî pê Jerujarê kamã kêp Jejus krajê nhô pastô. Na pre krî piitã hkôt Jejus ã mē kãm mē hkurê xwýnhjaja tanhmã hã mē hipêx to nhũm Pêtre mē harênh ma nê mē hamaxpêr o hihtýx kaxyw mē kãm kagàja nhîpêx nê krî piitã hkôt mē hwýr kurê. Mē kot kamã harênh nê mar nê amnhî kamã kahak kêt nê arî Tirtũm kôt amnhî nhîpêx mex o pa kaxyw. Nê Jejus ã mē kot amnhî xà htýx kamã hamak tâ nhýrmã kaxkwa kamã mex nê pa ho pa hã mē kãm awjarê. Æ mē kãm mēmoj jarê nê hã kagà anê. Nê mē kãm:

¹ Pa mē ate Jejus kôt amnhî xunhwýr nhũm Tirtũm kot mē ato hkra xwýnhjaja. Xà mē amex? Ot pa mē awýr kagà nhîpêx nê kumê. Ixpê Simãw Pêtre na pa. Ixte Jejus nhý hã hkrajê jahkre ho mē ixpa xwýnhjê hõ na pa mē awýr kagà nê kumê.

Na xep pre Kris ã mē kãm mē pahkurê xwýnhjaja tanhmã mē anhîpêx to ka mē panhõ pika rũm mē umaj anhrã nê ma ahpýnhã krî hkôt ri apa.

Jao mē akwýjaja ma pika pê Põt kamã krî hkwý hkôt apa.

Nê mē akwýjaja pika pê Karatas wýr apa.

Nê mē akwýjaja pika pê Kapatos wýr apa.

Nê mē akwýjaja pika pê As wýr apa.

Nê mē akwýjaja Pitin wýr apa.

Æ ahpýnhã pika hkôt mē apigrãnh par anê. Tã ot pa mē awýr kagà nhîpêx nê mē apiitã mē awýr kurê. Mē apýnh nê mē ate kamã harênh nê ixkapêr mar kaxyw. ² Na pre Mēpahpãm Tirtũmja amnhim mē pahte amnhî kaxyw kãm pajamaxpêr xwýnhjê rê nê mē pahtã amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mē nê ty nê htyk o hkamrô axkapî nhũm mē harênh ma nê hkôt amnhî xunhwý. Tã nhũm Ixkarô mē hkarô mã agjê nhũm mē ra inhmã hprãm xà kôt pix

mã ri inhmã tanhmã amnhî nhîpêx to ho pa.

Anhýr o mē pahtã amnhî jarênh. Tã kê mē akutã nojarêr rãhã ho ri mē akôt pa ka mē ý hã axãmnhix ajamakêtkati nê akinh nê ri apa.

Mē pahte amnhî kukamã pajamaxpêr pê pahkính o papa hã mē pamã karô

Rukre 12.32-34; Rõmãn 8.18-25; Sikũn Korit 4.16-18

³ Nê na pre mē panhõ Pahihti Jejus Krisja ty nhũm Hipêêxà Tirtũm akupým ho htír. Tã kot mē pakutã nojarêr rãhã ho pa jakamã na pre mē pahpê hkrajê mã mē pajamaxpêr nyw jagjê pu mē ý hã pahte amnhî nhîpêx nyw o amnhî nhîpêx o papa. Hãmri nê Jejus akupým htírja mã pajamaxpêr nê amnhî kukamã pajamaxpêr o:

—Kot paj nhýrmã ty nhũm Tirtũm kot Jejus nhîpêx pyrã nê akupým ixto ixtír pa wa kuri ixtír tũm nê inhmex kumrêx rãhã ixpa ho ixpa. Nà koja ã inhîpêx anê.

Anhýr o pajamaxpêr jakamã kwa kêr pu mē Tirtũm mã mex o mex ã mãn harênh rãhã ho papa. ⁴ Na ra mē pakutêp ô krî kamã mēmoj piitã ho mex nê. Ô krî kamã mēmoj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mē kot Kris ã mē atomnuj mýrapê na ka mē amnhî xà htýx kamã ajamak o ri apa nom arî amnhî kaxyw Tirtũm mã ajamaxpêr rãhã ho ri apa. Hihtýx o hihtýx jakamã koja mē pahkôt pa ho pa nê mē pamã pajamaxpêr o hihtýx rãhã nhũm nhýrmã Jejus akupým mē pahwýr wrý. Hãmri pu mē hkôt ri amnhî nhîpêx mex rãhã ho ri papa. Ra Tirtũm kot mē pakukamã mē pajarênh xà hkôt. ⁶ Jar mē pahte arî amnhî xà htýx kãm pajamak o papa htã na pu htem Tirtũm nhýrmã kot mē pahto mexta kukamã pajamaxpêr hãmri nê tee ri amnhî kukamã pajamaxpêr kêt nê. Mē pahpê mē pahpunuj tũm nê ri papa ho papa mã xwýnh kêt. ⁷ Na hte Tirtũm mē panhîpêx o te mē kot ôr nhîpêx pyrãk. Na htem hprî hã tanhmã ôr kute hã omu. Kêp ôr kumrêx ã omu rý mēmoj mē ho pihkãr ã omunh kaxyw kuwy kamã kurê. Nhũm piitã ôr nê pigãnh pa japêr nhũm mē omu nê harênh o:

—Nà ãm hãmri. Kêp ôr kumrêx nê mẽmoj mẽ ho pihkàr kêt. Anê.

Na hte Tirtùm ã mẽ panhîpêx anê. Jakamã mẽ pahpê Jejus kôt amnhî nhîpêx o mẽ papa xwýnhjaja mẽ pahte tôhã tanhmã pahpunuj to htã no nhùm mẽ panê ja rênh kêt nê. Na hte amnhî tã mẽ pahpumu nê hamaxpêr o:

—Kot paj kormã ja hã mẽ hamã nê tokyx akupým mẽ ho mex kêt nê. Koja mẽ omnuj nê pa htã tee ri amnhî kukamã hamaxpêr nê ixkaga hkêt nê arî amnhî kaxyw ixkôt hamaxpêr rãhã ho pa. Hãmri nhùm mẽ hkwyjaja ja hã mẽ omu nê mẽ kêp ixkra hã mẽ omunh kurê kumrêx. Te mẽ kot hprî hã ôr pumunh nê kêp ôr kumrêx ã omunhta pyrãk. Anê.

Jakamã kêr pu mẽ arî amnhî kaxyw hkôt pajamaxpêr rãhã ho papa. Mẽmo mýrapê mẽ pahpunuj nê ri papa htã arî hkôt pajamaxpêr rãhã nhùm Jejus nhýrmã akupým mẽ pahwýr wrý. Hãmri nhùm Tirtùm mẽ pahpumu nê mẽ pamã:

—Nà ãm hãmri na ka prem amnhî kaxyw ixpix mã ajamaxpêr rãhã ho ri apa. Mẽ kot ixtã tanhmã mẽ atomnuj to nhùm mẽ ate amnhî xà htýx kamã ajamak o apa htã aa ixkaga hkêt nê arî amnhî kaxyw inhmã ajamaxpêr rãhã ho ri apa. Nà ãm hãmri mẽ ate amnhî to mex kumrêx xwýnh na ka mẽ. Kot paj mẽ piitã mẽ kãm ja hã mẽ ajarê.

Anhýr o mẽ pamã kapêr.

Nê ôr o mẽ hikukrêxja mex tã koja arî mex rãhã hkêt nê. Koja mẽhõ kãm tanhmã homnu hto hprãm nê homnu hpa. No mẽ papajaja kot puj mẽ arî amnhî kaxyw Tirtùm mã pajamaxpêr rãhã ho papa hãmri nê ôrta pyrã nê pajapêx kêt nê. Kurom mẽ pamex tùm nê aa pajapêx kêt nê papa ho papa.

⁸⁻⁹ Nê Jejusja aa mẽ ate ano ho omunh kêt tã na ka htem kãm mẽ ajapê htýx nê kot mẽ panê tanhmã amnhî nhîpêx to hã harênh ma nê mẽ amã hkînh nê. Nê amnhî kaxyw hkôt ajamaxpêr mex rãhã ho ri apa. Jakamã na pre Tirtùm ja hã mẽ apumu nê mẽ ato hkra nê mẽ apê õ krî kamã wa kuri amex nê apa mã xwýnh ã mẽ ajarê. Ja kaxyw na pu prem amnhî kaxyw hkôt pajamaxpêr rãhã jao pahkînh nê ri papa. Nê tee ri tanhmã amnhî kînh týx ã amnhî

jarênh to hkukamã pajamaxpêr. Kormã aa ã mẽ pahkînh anhýr kêt tã mẽ pahkînh týx nê ri papa.

¹⁰ Nê Tirtùm kot mẽ pahto mex pê mẽ panê mẽ pahte amnhî tomnuj rênh par nhùm kuri mẽ pahtîr tùm nê mẽ papa hã mẽ pajarênhja. Amnepê mã Tirtùm nhý hã kapêr jarênh o ri mẽ pa xwýnhjaja na pre mẽ pakukamã ã mẽ pajarênh anhýrja ma nê tee ri hamaxpêr nê tee ri hã axpên kukjêr o ri axpên kôt pa. Nom hprî hã mar mex kêt nê. Tã arî ri mẽ pakukamã hkwyjê mã ja hã mẽ pajarênh o ri pa.

¹¹ Na pre Tirtùm Karôja Kris tyk kukamã mẽ kãm ã mẽ pajarênh anhýr o amnhîrît. Kormã Kris kaxkwa kamã pa ri. Kormã wrýk nê katorxà nhõxãhkre rùm kator kêt ri nhùm pre hkukamã mẽ kãm tanhmã ho amnhîrît to. Mẽ kot hpîr nhùm kot amnhî xà htýx kãm hamak kãm mẽ panê htykja ã hkukamã mẽ kãm harênh o amnhîrît. Nhùm Tirtùm kot akupým ho htîr nê kãm mex o mex ã harênhja nhùm hkukamã mẽ kãm harênh o amnhîrît. No ãm hprî hã mẽ kãm mẽhõ nhîxi hkôt harênh kêt jakamã nhùm prem harênh ma nê tee ri hkukamã ri hamaxpêr nê tee ri hã axpên kukjêr o ri axpên kôt pa. Nê hã axpên kukjêr o:

—Kwa mẽhõ koja we ã amnhî nhîpêx anê? Xà koja tokyx ã amnhî nhîpêx anê nà kormã?

Anhýr o hã axpên kukjêr o ri pa. ¹² Hãmri nhùm Tirtùm axte mẽ kãm Jejus jarênh kwý ho amnhîrît nê mẽ kãm:

—Nà mẽ anoo mã koja ã amnhî nhîpêx anhýr hkêt nê. Mẽ amýr pê mẽ akanrêhã mẽ akra nê mẽ atãmnhwýjê noo mã koja kato nê mẽ hkôt ã amnhî nhîpêx anhýr o pa. Anê.

Mẽ papamjaja mẽ panoo mã kator nê ã kot amnhî nhîpêx anhýr o paja o ã mẽ kãm ho amnhîrît anê.

Amnepêr Tirtùm nhý hã kapêr o ri mẽ pa xwýnhjaja nê jarãhã mẽ ixte Jejus nhý hã mẽ ahkre ho ri ixpa xwýnhjaja mẽ ixkapêr ãm pixii. Na pa htem wamtajê pyrã nê Tirtùm Karô nhý hã ãhpumunh týx xà ho mẽ amã tanhmã Jejus jarênh to ho ri mẽ akôt ixpa. Nhùm hte Tirtùm kapêr o mẽ wrýk xwýnhjaja mẽ ixkapêr ma nê tee ri

hamaxpêr o mē pahpyrà nē kām hprī hā harēnh mar par prām nē.

Mē pahte Tirtūm pyrà nē tām amnhī nhīpêx ā mē pamā karō

Epes 4.1-3; Korosē 1.10-12; Sikūn Pêtre 3.10-13; Wam Juāw 3.1-6

¹³ E kwa Kris kôt ixtō nē ixtōxjaja. Kêr ka mē Jesus kutêp mēmoj punuj kutā amnhī to htÿx rāhā ho ri apa. Nē Tirtūm mā amnhī nhīpêx mex rāhā nē. Pê tām ajamaxpêr nē tām amnhī nhīpêx o apa. Nē mē ā ajamaxpêr anhÿr o:

—Nà koja nhÿrmā Jesus akupÿn mē ixwÿr wrÿ hāmri nhūm Tirtūm ixtō mex rax nē. Nà koja ā inhīpêx anē. Anē.

¹⁴ Nē kêr ka mē Tirtūm kapêr kôt pix mā mǎn ri amnhī nhīpêx mex rāhā ho ri apa. Te mēhprīre kot mē hipêêxà kapêr mar nē hkôt amnhī nhīpêx pyrāk. Kormā mē ate Kris kôt amnhī xunhwÿr kêt ri na ka prem ate amnhī nhīpêx tūm kôt ri tanhmā amnhī tomnuj to ho ri apa. ¹⁵ Tā kêr ka mē hpānhā amnhī to mex o mǎn ajamaxpêr o apa nē Tirtūm pyrà nē amnhī tomnuj o apa hkêt nē. Tirtūmja kot amnhī to mex pix o pa xwÿnh na. ¹⁶ Kapêr ā kagà htūm kot ja jarēnh kot:

Kêr ka mē ixpyrà nē amnhī to mex pix o ri apa. Anē.

¹⁷ Tā koja nhÿrmā kêp Mēpahpām maati hā hprī hā mē pahte amnhī nhīpêx ā mē pahpumunh hkôt tanhmā mē pajarēnh to. Tām mē pahte amnhī nhīpêx kôt mē pajarē rÿ mē pahte amnhī tomnuj kôt mē pajarē. Hāmri nē ahpÿnhā mē panhīpêx. Mē pahto mex nē rÿ mē pahtomnuj nē. Jakamā kwa pu mē nhÿrmā kot tanhmā mē pahtomnuj to pymaj hkôt pix mā amnhī nhīpêx o ri papa rāhā nē.

¹⁸ Nē kormā mē pahte Jesus kôt amnhī xunhwÿr kêt ri na pu prem mē panhīgêr pyrà nē pahtÿx ri amnhī tomnuj o ri papa. Tā nhūm Krisja te amnhīm mē pajaprôr pyrāk o mē panhīpêx. Mē pahte hpānhā kapêr kôt pix mā amnhī nhīpêx o papa kaxyw. No mēmoj to na pre mē pahpānhā amnhīre? Nà ra mē pahte ja jarēnh mar tÿx. Na pre kàxpore ho mē pahpānhā amnhīrer kêt nē. Rÿ ôr o mē hikukrêx ā ohtô ho mē pahpānhā amnhīrer kêt nē. Rÿ prat o mē

hikukrêx ā ohtô ho mē pahpānhā amnhīrer kêt nē. Jajaja hapêx tokyx anhÿr mā xwÿnh na. ¹⁹ Na pre ā mē hpānhā amnhīrer anē nē tām mē panê ty nē htyk o amnhī nhī ho mē pahpānhā amnhīrer pa. Nhūm hkamrô axkapī. Te amnepê mā mē panhīgêr kot amnhī pānhā Tirtūm mā ôwêhti hkrare hpar nhūm hkamrô pikapīrta pyrāk. Ôwêhti krare mexre pix na prem kām kupa. Mex nē tanhmā kute hkêt xwÿnh pix. Tā Krisja aa tanhmā amnhī tomnuj to hkêt kumrêx nē mē panê ty nē htyk o Tirtūm mā mē pahte amnhī tomnuj piitā hpānhā amnhīrer pa. ²⁰ Amnepê mā kormā mēmoj kêt ri na pre Tirtūm kot ā mē pahpānhā amnhīrer anhÿr kaxyw mē pakukamā kuta nē ām. Tā nhūm amgrà ohtô nē hapêx nhūm mē pahwÿr kumê nhūm man mē pahwÿr wrÿ. Kot ā mē pahpānhā amnhī nhīpêx anhÿr kaxyw. ²¹ Tā nhūm prem kupī nhūm Tirtūm akupÿm ho htīr nē mex o mex ā harē. Mē pahte ja hā harēnh mar kôt amnhī kaxyw Tirtūm pix mā pajamaxpêr o ri papa kaxyw. Nē mē pahte amnhī wÿr Jesus jamār rāhā ho ri papa kaxyw.

²² Tā pu prem ra kot ā mē panê amnhī nhīpêx anhÿr ā harēnh ma nē mē pahte amnhī tomnuj kaga nē hkôt amnhī xunhwÿ. Jao amnhī to mex pix o ri papa. Nē mē pamā Kris kôt mē pahkwÿjê hkīnh o papa. Tā kwa kêr pu mē arī pamā axpēn kīnh tÿx rāhā ho papa.

Te mē pakatorxà rūm mē pajapôx pyrāk o axte mē pajapôx ā mē pajarēnh Juāw 3.1-21

²³ Nē na pu prem mē pakatorxà nhōxàhkre rūm mē pajapôx pyrà nē axte mē pajapôx pyrāk o amnhī nhīpêx. Jao ra mē pahpê Tirtūm kra nē ri papa. Na hte mē pakatorxà nē mē panhīpêêxàja wa ri pa nē gaa nē mē pahpê ty. No kêt Mēpanhīpêêxà maati Tirtūmja wa kurom rāhā ho rāhā. Tā ra mē pahte amnhī kaxyw kapêr kôt pajamaxpêr o pahpê hkra jakamā kot puj mē urāk nē nhÿrmā pahtīr tūm nē papa rāhā ho papa.

Nē Tirtūm kapêrja Tirtūm pyrà nē rāhāā. Koja aa hapêx kêt nē. ²⁴ Kapêr ā kagà htūm kot ja jarēnh kot:

Pika piitã hkôt mẽ pa xwýnhjaja te mẽ kot pōti grã pyrãk.

Nẽ mẽ kot amnhĩ to mex xàja te kot kapôt ã pixôrà pyrãk.

Na hte pōti tokyx grã nõ hapêx.

Nẽ pixôràja haxwýja arĩgro htýx mẽ nhũm grã tokyx anẽ nõ rarak pa nõ hapêx.

²⁵ No Tĩrtũm kapêr koja pōti mẽ pixôràta wa kurom aa hapêx kêt nõ. Koja arĩ rãhã ho rãhã. Anẽ.

Tã kapêrja tãm na htem mẽ pamã kamã harẽ pu mẽ pahpiitã mar o papa.

2

Mẽ pahte Tĩrtũm kot amnhĩ nhĩpêx kôt amnhĩ nhĩpêx ã mẽ pamã karõ

Rõmãn 12.2; Wam Korõt 3.16-17; Epes 2.19-22

¹ Nẽ kwa kêr pu mẽ axte tanhmã amnhĩ tomnuj to ho ri papa hkêt nõ.

Rý tanhmã axpên mã paxêx to hkêt nõ.

Nẽ paxêx rom tanhmã ri axpên nokupyr to hkêt nõ.

Nẽ mêmoj tã axpên kãm pagryk kêt nõ.

Nẽ tanhmã axpên japry hto hkêt nõ.

Kêr pu mẽ ã amnhĩ nhĩpêx anhýr o papa hkêt kumrêx.

² Mẽ hkarãre na htem ãm kãm pijaôr pix prãm. Nẽ gaa nõ htýxre nõ ra hprêk o mõ. Tã kêr ka mẽ pijaôr pix prãm xwýnhjê pyrã nõ amã Tĩrtũm kapêr mar nõ hkôt pix mã amnhĩ nhĩpêx o apa hprãm. Jao mar týx pê ra hkôt amnhĩ nhĩpêx mex o mõ nõ gaa nõ hkôt amnhĩ nhĩpêx mex o apa. Te mẽ karãre pijaôr nõ gaa nõ ra hprêk o mórta pyrãk. ³ Ra mẽ ate Jejus kot mẽ pahto mex ã omunh mex kênã.

⁴ Nẽ na htem kên o ixkre nhĩpêx kaxyw hãmri nõ hkwý kawrà nõ ri hkapi. Nhũm hõ mex kêt nhũm mẽ tee ri omu nõ nhãm kumẽ. Tã ja pyrã nõ na pre mẽ pahkwýjaja tee ri Kris pumu nõ htýx mex kêt ã hkamnhĩx nõ te mẽ kot kên mênhta pyrãk o hipêx nõ hkaga. No nhũm Tĩrtũmja amnhĩm Kris mex o mex ã harẽ. Te ho mêmõ kot kên mex kêt ã hkamnhĩx nõ mênh nhũm mêmõ kot mex ã omunh nõ amnhĩm mýnhta pyrãk. Nom Krisja kên rom kêp htĩrtũm nõ pa xwýnh jakamã nhũm pre Tĩrtũm mẽ pakaxyw ãm pu prem hkôt amnhĩ xunhwý.

⁵ Nẽ Tĩrtũm na hte nhýrmã mẽ pahĩrtũm nõ wa kuri mẽ papa mã xwýnh ã mẽ pajarẽ. Te mẽ pahpê kên nhũm Tĩrtũm te kot amnhĩ Karõ mã mẽ pahto ixkre nhĩpêx pyrãk. Jakamã na hte Jejus Kris tanhmã mẽ pahkrã hto pu mẽ Tĩrtũm kôt amnhĩ nhĩpêx mex rãhã ho ri papa. Nẽ tanhmã kãm amnhĩ nhĩpêx mex to nhũm ja hã mẽ pahpumu nõ hkĩnh nõ.

⁶ Tĩrtũm kapêr ã kagã htũm kot tanhmã Kris jarênh to. Nẽ hã kuxi nõ tanhmã harênh to. Te kêp kên pyrãk ã harẽ nõ harênh kot:

Kot paj nhýrmã Ijaew wýr mêmõ mẽ nhũm mẽ hkôt pa ho pa.

Koja te kêp kên o inhõrkwý nhĩpêx kaxyw kên maati mex kumrêxta pyrãk.

Koja amnhĩ kaxyw hkôt mẽ hamaxpêr xwýnhjaja nhýrmã ma inhõ krĩ hwýr api nõ hkĩnh nõ mex rãhã nõ pa ho pa. Anẽ.

⁷ Tã ra amnhĩ kaxyw hkôt mẽ pajamaxpêr xwýnhjaja. Kên pyrãk xwýnh pê Jejusja na mẽ pamã mex o mex. No mẽ kot hkaga xwýnhjaja na htem hamaxpêr punuj xwýnh ã hkamnhĩx nõ hkaga nõ kãm hkĩnh kêt nõ. Tĩrtũm kapêr ã kagã htũm kot mẽ harênh kot:

Na prem kên o amnhĩm õrkwý nhĩpêx kaxyw hkawrà ho pa nõ kên maati ja pumu nõ htýx omnuj ã hkamnhĩx nõ hkaga.

Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx. Anẽ.

⁸ Nẽ mãânên harênh kot:

Koja mẽ kapêr mar kêt kumrêx.

Te pry kamã kên nõr nhũm mẽ kot nhãm pry nõ mênh kaxyw hkamnãr o amnhĩ par krã hi kukênh pyrãk o koja mẽ amnhĩ nhĩpêx. Anẽ.

Mẽ kot Kris kapêr mar tã hkôt amnhĩ xunhwýr kêt jakamã te ho mẽ kot amnhĩ nõ kên kamnãr o amnhĩ par krã hi kukênh pyrãk o koja mẽ amnhĩ nhĩpêx. Jakamã koja nhýrmã Tĩrtũmja ja hã tanhmã mẽ ho htýx kumrêx. Ra kot amnhĩ kukamã mẽ kãm amnhĩ jarênh xà hkôt. ⁹ No mẽ papajaja na pre Tĩrtũm jajê rom amnhĩ kôt mẽ paxunhwý. Nhýrmã õ krĩ kamã mẽ papa ho papa kaxyw. Nẽ mẽ pahte mex o

mex ã harênh kaxyw. Na pu htem Ijaew nhõ patre pyrã nê Pahi Maati Tirtûm mã tanhmã amnhĩ nhĩpêx to ho papa. Nom kormã mẽ pahpê Kris kôt amnhĩ xunhwÿr kêt ri te mẽ pahpê kamãt kô kamã mẽ pahtÿx ri mẽ papa xwÿnh pyrãk. Tã Jejus kôt amnhĩ xunhwÿ nê hpãnhã te mẽ pahpê hirã mex kãm ri mẽ papa xwÿnh pyrã nê tãm amnhĩ nhĩpêx rãhã ho papa. Ra mẽ pahpê Tirtûm kra jakamã na pu htem amnhĩ to mex rãhã ho ri papa. Nê Mẽpahpãm maati Tirtûm mã tanhmã amnhĩ nhĩpêx to ho ri papa. Te mẽ kot mẽ ho àhwÿr xwÿnhjaja kot kãm amnhĩ nhĩpêx o pata pyrãk. ã na pre Tirtûm mẽ pahpê amnhĩ nhĩpêx anhÿr o papa kaxyw mẽ panhĩpêx.

¹⁰ Amnepêm kormã mẽ pahpê hkra hkêt ri na pre mēhõ mẽ pakamã ukaprĩ hkêt kumrêx pu htem pahpunuj nê ri papa. Tã Jejus kôt amnhĩ xunhwÿ nhũm Tirtûm mẽ pahpê hkra pu mẽ pahpê hkra hã ri papa nhũm mẽ pakamã ukaprĩ rãhã ho mẽ pahkôt pa.

Mẽ pahpê Tirtûm mã tanhmã amnhĩ nhĩpêx to xwÿnh ã mẽ pajarênh Rômãn 13.1-7; Xitre 3.1

¹¹ E ixkrãmnhwÿjaja. Ra mẽ pahpê Tirtûm kra jakamã mẽ pahpê õ krĩ nhõ xwÿnh. Te mẽ pahpê jar pika nhõ xwÿnh kêt pyrãk jakamã kwa kêt pu mẽ arĩ mẽ pahpê amnhĩ nhĩpêx tũm o amnhĩ nhĩpêx kêt nê. Nê mẽ pajamãxpêr tũm o pajamãxpêr kêt nê. Ra axtem mẽ pajamãxpêr nyw nê axtem mẽ pahpê amnhĩ nhĩpêx nyw kênã. Mẽ pahpê amnhĩ nhĩpêx tũmja te kãm akupÿm mẽ pahpê hkôt amnhĩ to paxujanãr prãm pyrãk. Mẽ pahpê axte hkôt amnhĩ nhĩpêx o ri papa kaxyw. Tã nom kêt pu mẽ anhÿr kêt nê. ¹² E kwa kêt ka mẽ anhõ krĩ kamã akwÿ kot Kris kôt amnhĩ xunhwÿr kêt xwÿnhjê noo mã tãm ri amnhĩ nhĩpêx o ri apa. Mẽ kot Kris ã tanhmã mẽ anhĩpêx to rÿ tanhmã hã mẽ ato kapêr punuj to htãã. Kot kaj mẽ ã mẽ hkôt amnhĩ nhĩpêx anhÿr o ri apa hãmri nhũm mẽ tee ri mẽ apumu nê hamãxpêr o:

—Kwa mẽ ixte mẽ kot amnhĩ tomnuj xwÿnh ã mẽ harênh tã mẽ kot amnhĩ to mex pix xwÿnh na mẽ. Anê.

Hãmri nê nhÿrmã mẽ pahpyrã nê Tirtûm kôt amnhĩ xunhwÿ nê kãm mex o mex ã harê nê kãm:

—Kwa Tirtûm. Na pre hte akrajaja anhÿ hã amnhĩ to mex rãhã nê pa ho pa pa ja hã mẽ omu. Nã xep amex o amex Tirtûm. Anê.

¹³ Nê mẽ apê Pahihti Jejus Kris kôt amnhĩ nhĩpêx xwÿnh jakamã kêt ka mẽ anhõ krĩ kamã mẽ anhõ pahihiti kapêr ma nê kapêr kôt mãn amnhĩ nhĩpêx mex o ri apa. Nê mẽ anhõ pika kamã mẽ anhõ prêjitênja ka mẽ kapêr ma nê hkôt amnhĩ nhĩpêx. Mẽ kot mẽ ato amnhĩptãr xwÿnhjaja ka mẽ piitã mẽ kapêr ma nê mẽ kapêr kôt pix mã amnhĩ nhĩpêx rãhã ho ri apa. ¹⁴ Nê mẽ anhõ pahihiti nhÿ hã mẽ kapêr o mẽ pa xwÿnhjaja na htem mẽ akaxyw mẽ unhwÿ. Mẽ kot amnhĩ tomnuj xwÿnhjaja nhũm tanhmã mẽ kot mẽ ho kaxyw. Nê tãm mẽ kot amnhĩ nhĩpêx o ri mẽ pa xwÿnhjaja nhũm mẽ kot mẽ õ pahihiti mã mex ã mẽ harênh kaxyw. ¹⁵ Tã kêt ka mẽ kapêr ma nê mẽ hkôt tãm amnhĩ nhĩpêx rãhã ho ri apa. Hãmri nhũm mẽ ato kapêr punuj xwÿnhjaja ja hã mẽ apumu nê axte tanhmã mẽ ato kapêr to hkêt nê. ã mẽ ate amnhĩ nhĩpêx anhÿr o apaja na Tirtûm kãm hprãm.

¹⁶ Nê mẽ pahpê Tirtûm kra jakamã na pu htem paxãmnhix kãm tanhmã amnhĩ nhĩpêx to ho ri papa. Nom kêt pu mẽ pahpê hkra hã pahtÿx ri amnhĩ nhĩpêx kêt nê.

¹⁷ Nê kêt ka mẽ piitã mẽ ho mex o ri apa. Nê mẽ ato amnhĩptãr xwÿnhjê ho mex nê mẽ hã apijaãm rãhã ho ri apa.

Nê mẽ apê Kris kôt mẽ ate axpên to mẽ atõ nê mẽ atõxjê hã amã axpên kÿnh pè axpên to mex nê.

Nê Tirtûm ã apijaãm rãhã nê.

Mẽ kãm mẽ apênh xwÿnhjaja kot tanhmã amnhĩ nhĩpêx to hã mẽ kãm karõ

Epes 6.5-8; Korosê 3.22-25; Wam Ximotre 6.1-2; Xitre 2.9-10

¹⁸ Nê mẽ apê mẽ kãm mẽ axapênh xwÿnhjaja kêt ka mẽ anhõ patrãw kapêr ma nê hkôt ri amnhĩ nhĩpêx. Kot mẽ ato mex o pa rÿ mẽ atomnuj o pa htã ka mẽ arĩ mẽ hã apijaãm pè hkôt ri amnhĩ nhĩpêx.

¹⁹ Tanhmã kot mẽ anhĩpêx punuj to htã ka mẽ arĩ kãm axapênh mex rãhã nê. Kêt kêt Tirtûm ja hã mẽ apumu nê mẽ ato mex

nê ka mẽ ajamakêtkati nê axàmnhĩx ri kãm axàpênh o apa. ²⁰ Nom kot kaj tanhmã amnhĩ tomnuj to nhũm anhõ patrãw ja hã apumu nê hã atak ka amnhĩ xà htỳx kamã ama nê rĩ amnhĩ pumu. No kot kaj akatàt kôt kãm axàpênh mex tã nhũm amarĩ atak japêr tã kêr ka amnhĩ tã kamã agryk kêt nê. Arĩ kãm amnhĩ to htỳx kamã kãm xa nê amnhĩ tã tanhmã ho hkêt nê. Hãmri nhũm Tĩrtũm ja hã apumu nê ato mex nê. ²¹ Amnepê m na pre mẽ pahte hkôt amnhĩ xunhwỳr xwỳnhjaja Kris pyrã nê mẽ paxã htỳx kamã pajamak o papa hkukamã ja hã mẽ pahpumunh mex. Na pre Kris mẽ pakaxyw amnhĩ xà htỳx kãm hamak tỳx tã amnhĩ to htỳx nê mẽ kãm xa. Tã kêr pu amnhĩ xà htỳx kamã pajamak tã ỹ hã uràk nê amnhĩ to htỳx nê papa. ²² Krisja aa tanhmã amnhĩ tomnuj to hkêt nê pa ho pa. Nê aa mẽmoj tã amnhĩ to hêx o pa hkêt. ²³ Mẽ kot kãm kapêr punuj tã nhũm amnhĩ tã tanhmã mẽ kãm nê hkêt nê. Nê mẽ kãm kapêr punuj kêt nê. Nhũm prem homnuj tỳx kumrêx nhũm amnhĩ xà htỳx kamã hamak tã amnhĩ tã mẽ kãm àkjêr nê tanhmã mẽ haprỳ hto hkêt nê. Na pre ãm hamaxpêr o: “Nà Tĩrtũm kot ixtã mẽ omunh mex kênã. Kojã nhỹrmã mẽ piitã tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to. Tãm kojã àhpumunh tỳx xà hkôt tanhmã ixtã mẽ harênh to. Mẽ kurom àhpumunh tỳx o àhpumunh tỳx xwỳnh kênã.” Anê.

²⁴ Kris na pre te kawà kamã mẽ pahte amnhĩ tomnuj piitã gjênh nê ho nỳt nê htur rãhã pĩ kahpa hã mẽ panê htyk pyrãk o amnhĩ nhĩpêx. Mẽ pahte axte tanhmã amnhĩ tomnuj to hkêt prãm xàj. Pãnhã mẽ pahte amnhĩ to mex pix o ri papa kaxyw. Tã ã kot amnhĩ xà htỳx kãm hamak anhỹr o jêt jakamã kot puj mẽ pahte hkôt amnhĩ xunhwỳr xwỳnhjaja aa mẽ pahte amnhĩ tomnuj pãnhã amnhĩrer kêt nê. Ra Jejus htyk o kot mẽ panê amnhĩrer par kênã.

²⁵ Na pu pre te mẽ pahpê ôwêhti pikunor pyrã nê pahtỳx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwỳnh kot ôwêhti pikunor mã katorta pyrãk o mẽ panhĩpêx. Pu mẽ hkôt amnhĩ xunhwỳr nê hkôt amnhĩ nhĩpêx

mex o ri papa. Jao hkôt papa ho papa.

3

Mẽ mjên mẽ mẽ hprõ kot tanhmã axpên nhĩpêx to hã mẽ kãm karõ

Wam Korĩt 7; Epes 5.22-25; Korosê 3.18-19; Wam Ximotre 2.9-15

¹ Nê kêr ka mẽ anijaja mẽ amjên kapêr ma nê hkôt amnhĩ nhĩpêx. Akĩnhã kormã kot Tĩrtũm kôt amnhĩ nhĩpêx kêt japêr tã arĩ kapêr ma nê hkôt amnhĩ nhĩpêx mex o ri apa. Kê mẽ ate amnhĩ nhĩpêx ã mẽ apumu nê mẽ apyrã nê Kris kôt amnhĩ xunhwỳr japêr. Mẽ kãm Tĩrtũm kapêr mar prãm kêt tã kojã mẽ ã mẽ ate amnhĩ nhĩpêx anhỹr ã mẽ apumunh kôt mẽ apyrã nê amnhĩ kaxyw hkôt hamaxpêr japêr. ² Na htem mẽ ate Tĩrtũm kapêr kôt tãm ri amnhĩ nhĩpêx o apa hã mẽ apumunh o ri mẽ akôt pa.

³ Jakamã kêr ka mẽ anijaja amnhĩ mex pix kukamã ajamaxpêr o ri apa hkêt nê. Rỳ ajamaxpêr o:

–Ma kot paj mẽ hkuxwaxà ho amnhĩ krã hkĩ kuxwa mex nê inhõkrexê mex jagjê nê ri hã mra. Nê kupêxê mex kwỳ japrõ nê ho amnhĩm ixê mex nhĩpêx hãmri nê hagjê nê ri hã mra. Kot paj ã amnhĩ nhĩpêx anê nhũm mẽ piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê.

Anhỹr o ri amnhĩ kukamã ajamaxpêr kêt nê. ⁴ Tĩrtũm na hte ã mẽ pahte amnhĩ nhĩpêx anhỹr ã mẽ pahpumu nê ãm hã mẽ pahpumu. Mẽ ôkrexê nê mẽ ê mex na hte hapêx tokyx anê. No mẽ panhõpinhxà kaxwỳnh kãm tãm ri mẽ pajamaxpêr nê pakamã amnhĩkrit nê papaja. Kot kaj mẽ ã amnhĩ nhĩpêx anhỹr o ri apa hãmri nhũm Tĩrtũm ja hã mẽ apumu nhũm ja kãm mex nê. ⁵ Amnepê mã mẽ pakukamã mẽ panhõ wôwô nê mẽ panãjaja. Mẽ hkwy kot Tĩrtũm kôt amnhĩ nhĩpêx xwỳnhjaja na prem ã amnhĩ nhĩpêx anhỹr o pa. Mẽ kot mjên kôt amnhĩ nhĩpêx o pa jakamã na prem amnhĩ tã mẽ omu nê mẽ ho mex nê kãm mẽ hapê nê. ⁶ Mẽ panhõ wôwô finat Saraja na pre ã amnhĩ nhĩpêx anhỹr o pa. Jao mjên Apraãw kapêr ma nê hkôt amnhĩ nhĩpêx. Nê kêp õ pahĩ hã harê nê hkôt pix mã amnhĩ nhĩpêx o ri pa. Tã kot kaj mẽ uràk nê amnhĩ to htỳx

nê ã amnhĩ nhĩpêx anhÿr o apa. Hãmri nê amnhĩ tã amã amjên puma hkêt nê apa nê te apê Sara hkra pyræk.

⁷ Nê mē amyjaja kēr ka mē tām mē aprō nhĩpêx o ri mē hkôt apa. Mē akĩnhã mē hihtÿx kêt jakamã mē kamã axukaprĩ rãhã ho ri mē hkôt apa. War ajamē war apê Jejus kukwak ri war atĩr tũm nê apa mã xwÿnh jakamã kēr ka mē ho mex rãhã ho ri mē hkôt apa. Tĩrtũm kãm war ajamē war ajapê jakamã kot kaj mē ã mē hipêx anhÿr o ri apa hãmri nê ra axãmnhĩx mẽmoj tã amnhĩ to Tĩrtũm wÿ nhũm mē amar kurê kumrêx.

Tĩrtũm krajaja kot amnhĩ xà htÿx kamã hamak ã mē harênh

Rômãn 12.9-21; Korosê 1.10; Wam Tesarôn 5.14-15

⁸ E Kris kôt ixkràmnhwÿjaja. Nà ixkapêr jatur xà na ja. Kēr ka mē ri axpên kôt ajamexpêr mex pē axpên to mex rãhã ho ri apa. Nê mē ate Kris kôt axpên to atō nê atōx ã amã axpên kĩnh o ri apa. Jao axpên kamã axukaprĩ nê mẽmoj to axpên kutã anojarêt rãhã nê. ⁹ Na pu prem Jejus kôt amnhĩ xunhwÿ nhũm Tĩrtũm mē pahto hkra nê mē pahto mex ã amnhĩ jarê. Tã koja mēhō tanhmã mē anhĩpêx to rÿ tanhmã mē ato kapêr punuj to. Nom kēr ka mē ama nê amnhĩ tã tanhmã ho rÿ tanhmã ho akapêr punuj to hkêt nê. ãm te Tĩrtũm kot mē panhĩpêx pyræk o mē hipêx nê mē ho mex pix o ri mē hkôt apa. Ja na Tĩrtũm kãm hprãm. ¹⁰ Kapêr ã kagà htũm kot ja jarênh kot:

Kot kaj mē amã amex nê akĩnh nê ri apa hprãm hã kot kaj mē ã amnhĩ nhĩpêx anê:

Kot kaj mē ri akapêr punuj o ri apa hkêt nê. Nê mẽmoj tã amnhĩ to axêx o ri apa hkêt nê.

¹¹ Nê te mē ate amnhĩ katut kôt ate amnhĩ tomnuj rênh o apa pyrã nê hpãnhã amnhĩ to mex pix o ri apa.

Nê mē amã tãm axpên nhĩpêx pix prãm o ri axpên kôt apa.

Nê mē amã ajamakêtkati nê axpên kôt apa hprãm rãhã ho ri apa.

¹² Na hte Tĩrtũmja ã mē kot amnhĩ nhĩpêx anhÿr o pa xwÿnhjê jamãr mex rãhã ho pa.

Nhũm mē tanhmã amnhĩ to hwÿr to nhũm mē mar kurê kumrêx.

No mē kot amnhĩ tomnuj o mē pa xwÿnhjaja na hte mē kutã amnhĩ xãm nê ãm mē omu nê mē ho mex kêt nê. Anê.

Tĩrtũm kapêr ã kagà htũm kot ã mē harênh kot anhÿr.

¹³ Nê kot kaj mē amã amnhĩ to mex pix o apa hprãm nhũm mēhō ja hã tanhmã mē atomnuj to hkêt nê. ¹⁴ No kot kaj mē amnhĩ to mex pix o apa htã nhũm mēhō ja hã apumu nê tanhmã hamaxpêr to nê atomnuj ka amnhĩ xà htÿx kamã ajamak japêr. Tã koja Tĩrtũm nhÿrmã ja hã tanhmã mē ato mex to. Jakamã kwa kēr ka mē tee ri mēhō kot tanhmã mē atomnuj to hkukamã ajamexpêr pē amã mē uma ho ri apa hkêt nê. Nê tee ri amnhĩ kukamã ajamexpêr o akaprĩ nê ri apa hkêt nê. ¹⁵ ãm amnhĩ kaxyw Kris mã mãn ajamexpêr tÿx rãhã nê mē panhō Pahihti hã apijaàm rãhã ho ri apa. Nhũm mēhō ja hã mē apumu nê tanhmã hã mē akukjêr to nê mē amã:

—Kwa mẽmo kaxyw na ka pre Kris kôt amnhĩ xãm nê hkôt ri amnhĩ nhĩpêx o apa? Anê.

Ka mē ama hãmri nê aprĩ hã kãm amnhĩ jarênh kurê kumrêx. ¹⁶ Nom kēr ka mē akapêr mã aprĩ kamã kãm amnhĩ jarê. Tĩrtũm kapêr kôt amnhĩ nhĩpêx o apa hã mē kãm amnhĩ jarê. Koja mē Kris ã mē ato kapêr punuj rÿ hã mē atã hpêr o axkê nê pikunhar japêr ka mē ãm amnhĩ tã mē ama nê ãm mē ama. Kwãr mē mãmri ã mē anhĩpêx anê. Kēr ka mē amnhĩ tã mē omu nê arĩ amnhĩ to mex rãhã ho ri apa. Kēr kē mē tee ri amnhĩ tã mē apumu nê hpijaàm nê.

¹⁷ Nê koja mē akwÿjaja mē ate Tĩrtũm kapêr kôt amnhĩ nhĩpêx mex o apa hã mē apumu nê hã tanhmã mē anhĩpêx to htã kēr ka mē arĩ Tĩrtũm kôt amnhĩ nhĩpêx o ri apa. Ja na kãm hprãm. Nom kot kaj mē tanhmã amnhĩ tomnuj to nhũm mē ja hã mē apumu nê pahihti mã mē ajarê nhũm kuma nê ja hã tanhmã mē amã ãkjêr to ka mē ra apijaàm nê.

¹⁸ Nê Krisja na pre mē panê ty. ãm htyk tipxi tã mē pahpiitã mē pahpãnhã amnhĩre. Mē pakurom aa kot tanhmã amnhĩ tomnuj to hkêt tã mē pahte amnhĩ tomnuj piitã hpãnhã amnhĩrer pa. Mē pahte hkôt amnhĩ xunhwÿr nê nhÿrmã ma Tĩrtũm nhō krĩ

hwÿr paxàpir nê kamã pahtîr tûm nê papa ho papa kaxyw. Mê kot hpîr tã nhûm Tîrtûm akupÿm ho htîr nhûm htîr o htîr. 19-20 Nom kormã akupÿm htîr kêt ri na pre hkarõ pix o mê htyk xwÿnhjê hwÿr mō. Ahpunu kamã mê hkarõ kêp prês nê hkrî xwÿnhjê hwÿr mō nê mê kot Noehti kapêr mar nê hkôt amnhî nhîpêx kêt nhûm gô htàm kot mê hanhir par xwÿnhjê mã kapêr. Tîrtûm kot nhÿrmã mê kot amnhî tomnuj mÿrapê kuwy maati wÿr mê rênh ã mê hkukamã mê kãm awjarê. Amnepêm kormã Noehti kot pâr raxta nhîpêx o kuhê ri na prem kãm Tîrtûm kapêr mar prãm kêt nê. Nhûm amnhî tã mê omu nê mê kamã gryk tokyx anhÿr kêt nê. Arî amnhî tã mê hamâr o pa. Mê kot hkôt amnhî xunhwÿr nê hkôt amnhî nhîpêx prãm xaj arî mê hamâr ry ho pa. No ãm tee ri mê hamâr kaprÿ nhûm mê amnhî kaxyw hkôt hamaxpêr kêt nê htÿx ri amnhî tomnuj o pa. Mê ãm grêre nê Noehti kapêr ma nê gô htàm pymaj hkôt pâr raxta wÿr agjê. Æm mê kêp 8 pix nê hwÿr agjê nhûm gô htàm mê hanhir kêt nê. Tîrtûm na pre mê nê omunh mex nê. No mê kot amnhî tomnuj xwÿnhjaja nhûm gô htàmja mê hanhir o mê himex pa. Nhûm mê kêp 8ja pix arî htîr nê mex nê pâr raxta kamã gô krâhkã hã mex rãhã pa.

21 Gô tàmja kêp hprî hã mê pahte Jejus kôt amnhî xunhwÿr ã mê pahto amnhîrît xà na. Mê pahte amnhî nhîpêx tûm kaga nê hpãnhã amnhî nhîpêx nyw o amnhî nhîpêx o papa hã mê pahto amnhîrît xà. Jakamã na htem mê pahkrã kumrã. Nom mê kot mê panê mê pagrã kugràn h kaxyw kêt ra mê pahte Jejus kôt amnhî xunhwÿr ã amnhî to amnhîrît kaxyw na htem mê pahkrã kumrã. Ra mê pahte Tîrtûm kapêr kôt amnhî nhîpêx o papa hã amnhî to amnhîrît kaxyw. Pu mê ra mê pahte amnhî nhîpêx nyw o amnhî nhîpêx ã amnhî to amnhîrît. Te mê pahte gôx kãm mê pahte amnhî tomnuj rer par pyrã nê hpãnhã amnhî nhîpêx nyw o amnhî nhîpêx o papa.

22 Nê na pre Jejus akupÿm htîr nê ma akupÿm Tîrtûm nhõ krî hwÿr api nê Tîrtûm nhîhkô hã pahihtî hã mê hkrî xà kamã hkrî ho hkrî. Hãmri nê ra Tîrtûm kapêr o mê

wrÿk xwÿnh nê pahi piitã mê ho amnhîptâr o hkrî.

4

Mê pahte amnhî nhîpêx nyw o amnhî nhîpêx ã mê pamã karõ

Epes 4.17-24; Korosê 3.1-11

1 Nê na prem Kris pî nhûm amnhî xà htÿx kãm hamak kãm htyk kaxyw tã arî mê kãm xa. Ra kot amnhî xà hkukamã amnhî tã mê omunh tã tee ri amnhî kukamã hamaxpêr o amnhî tã tanhmã ri mê kot hpîr mã xwÿnhjê homnuj to hkêt nê. Arî mê kãm xa nhûm prem kupî. Tã kêr pu mê urak nê ã amnhî nhîpêx anhÿr o ri papa. Mê kot hã tanhmã mê panhîpêx to htã pu mê urak nê amnhî xà htÿx kãm pajamak tã tanhmã amnhî tã mê ho hkêt nê. Na hte ra mê htyk nê mê hikwÿ xwÿnhjaja axte amnhî tomnuj kêt nê. Tã kêr pu mê urak nê axte tanhmã amnhî tomnuj to ho ri papa hkêt nê. 2 Jakamã kêr pu mê axte mê pahte amnhî nhîpêx tûm kôt amnhî nhîpêx o papa hkêt nê. Nê mê pajamaxpêr tûm kôt axte pajamaxpêr o papa hkêt nê. Æm Tîrtûm kãm hprãm xà hkôt pix mã tanhmã amnhî nhîpêx to ho papa rãhã ty.

3 Amnepêm kormã mê pahte Jejus kôt amnhî xunhwÿr kêt ri na pu prem mê kêp Tîrtûm kra hkêt xwÿnhjê hkôt amnhî nhîpêx.

Jao nhãm mênijê pumu nê mê kamã pah-pijaàm kêt hprãm.

Nê pahpipãnh o ri papa.

Nê mê pahpipãnh kaxyw axpên wÿr akuprõ nê mênijê kamã pahpijaàm kêt.

Nê sãnti hwÿr pahkõnkrã ho pahkrî nê kãm amnhî jagrer.

4 Tã Kris kôt amnhî xunhwÿ hãmri nê mê pahte amnhî nhîpêx nyw o amnhî nhîpêx o papa. Hãmri nhûm arî mê kot amnhî nhîpêx tûm o amnhî nhîpêx xwÿnhjaja tee ri ja hã mê pahpumu nê hêx rom amnhî kôt mê pamã tanhmã ri àhkrox to ho pa. Pu mê axte mê hkôt amnhî nhîpêx kêt nhûm mê tee ri ja hã mê pahpumu nê mê pakamã gryk kato nê tanhmã mê pahto kapêr punuj to. 5 Tã koja Tîrtûm nhÿrmã amnhî wÿr mê hã karõ nhûm mê ma hwÿr mra nê kutã hkrî. Nê kormã mê htîr ri tanhmã mê kot amnhî nhîpêx to ho pa hã

kãm amnhĩ jarēnh pa. Hãmri nhũm mẽ kot amnhĩ nhĩpêx ã tanhmã mẽ hipêx to. Koja mẽ pahpiitã tanhmã mẽ pajarēnh to. Mẽ htyk xwýnhjaja nê kormã mẽ pahtĩr nê mẽ papa xwýnhjaja nhũm mẽ pahpiitã tanhmã mẽ pajarēnh to.

⁶ Na pre Jejus ty hãmri nê kormã akupým htĩr kêt rãhã hkarõ pix o ma amex wýr tẽ nê kamã mẽ htĩr ri amnhĩ kaxyw Tĩrtũm mã hamaxpêr xwýnhjê mã awjarê. Na prem mẽ kot amnhĩ tomnuj mýrapê ra wej nê ty nê arĩ amex kãm ri pa. Jakamã nhũm Jejusja hkarõ ho ma mẽ hwýr tẽ nê mẽ kãm:

—E na pa ra mẽ ate amnhĩ tomnuj pãnhã amnhĩrer pa. Tã kormã mẽ atĩr ri mẽ ate amnhĩ kaxyw Tĩrtũm kêt ajamaxpêr jakamã kot kaj mẽ ma hwýr api nê wa ixkuri wa ixpyrà nê atĩr tũm nê amex nê apa ho apa. Anê.

Mẽ pahpê Kris kwý hã tanhmã mẽ pahte axpên nhĩpêx to hã mẽ pamã karõ

Rõmãn 12.6-8; Wam Korĩt 12.1-11

⁷ Nê koja tokyx mẽ panhõ pikaja mẽ pahpê hapêx nê kamã mẽmoj piitã hapêx pa. Jakamã kwa kêt ka mẽ ate amnhĩ nhĩpêx ã amnhĩ pumunh mex o apa.

Nê mẽ atýx ri ajamaxpêr ri apa hkêt nê.

Nê mẽmoj punuj nê amnhĩ to htýx o ri apa ho ajamaxpêr nyw pix o amnhĩ to Tĩrtũm wýr rãhã ho ri apa.

⁸ Nê kwa kêt ka mẽ amã axpên kĩnh o ri axpên kêt apa. Ja na mex o mex. Kot kaj mẽ ã axpên nhĩpêx anê nhũm Kris kêt atõ rý atõxjê hõ tanhmã atomnuj to japêr ka amnhĩ tã omu nê ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpêr kêt nê.

⁹ Nê kêt ka mẽ axãmnhĩx ajamakêtkati nê amnhĩ nhõrkwy hwýr axpên wý nê axpên to mex o ri apa. Nom kêt ka mẽ agryk kãm amnhĩ wýr mẽ hwýr kêt nê. ¹⁰ Na pre ra Tĩrtũm mẽ pahpê hkra hã ahpýnhã tanhmã mẽ pamã mẽmoj tã karõ hto nê ã mẽ pahte amnhĩ nhĩpêx anhýr o papa kaxyw mẽ pahto mẽ paxihtýx. Mẽ pahte ahpýnhã tanhmã axpên to mex to ho ri axpên kêt papa kaxyw. Tã kêt ka mẽ ra kot mẽmoj tã mẽ amã karõ hkêt axpên nhĩpêx o ri axpên kêt apa. ¹¹ Koja ma mẽ ate akwýjê mã kapêr jarēnh o ri apa kaxyw mẽ amã

karõ ka mẽ ama nê akatàt kôt ý hã mẽ kãm harēnh mex o ri mẽ hkôt apa. Rý tanhmã axpên to ajuta hto ho ri apa kaxyw mẽ axunhwýr japêr ka mẽ amnhĩ tã omu nê hkamnàr rom mẽ ho ajuta mex rãhã ho ri apa. Mẽ apiitã Jejus nhý hã ã amnhĩ nhĩpêx anhýr o ri apa. Kêt kêt Jejus kêt mẽ akwýjaja amnhĩ tã mẽ apumu nê mẽ anhý hã Tĩrtũm mã mex o mex ã harê.

Jejus kwýjaja kot amnhĩ xà htýx kamã hamak o pa hã mẽ harēnh

Rukre 6.20-23; Juãw 16.1-4; Sikũn Tesarõn 1.3-12; Sikũn Ximotre 3.13; Eprêw 12.3; Xiakre 1.2-4

¹² E Kris kêt ixkrãmnhwýjaja. Koja Kris kwý kêt xwýnhjaja Kris ã tanhmã mẽ anhĩpêx to nom kwa kêt ka mẽ tee ri amnhĩ kukamã ajamaxpêr o akaprĩ nê apa hkêt nê. Kêt mẽ akĩnh rãhã axpên kêt ri apa. Na htem ã mẽ pahpê Kris kwýjê nhĩpêx anhýr o pa. Jakamã kwa mẽ amnhĩ tã mẽ omu nê tee ri amnhĩ kukamã ajamaxpêr kêt nê.

¹³ Mẽ arĩ akĩnh nê ri apa. Mẽ kot Kris pyrà nê mẽ panhĩpêx punuj tãã. Kêt kêt Jejus nhýrmã akupýn mẽ pahwýr wrý pu mẽ omu nê pahkĩnh týx o pahkĩnh týx. ¹⁴ Kwãr mẽ mãmrĩ mẽ pahpê Kris kwý hã tanhmã mẽ panhĩpêx to. Na htem ã Tĩrtũm Karõ kot mẽ pahkarõ mã gjêx xwýnhjê nhĩpêx o pa anê.

¹⁵ Nê mẽ apê Kris kwý jakamã kwa kêt ka mẽ amnhĩ to mex rãhã o ri apa.

Jao mẽ hpar o ri apa hkêt nê.

Nê ri axàhkĩnh o ri apa hkêt nê.

Nê nhãm mẽ hkaêx mã agjêx o ri apa hkêt nê.

Nê tanhmã mẽ homnuj to ho ri apa hkêt nê.

Kot kaj mẽ ã amnhĩ nhĩpêx anhýr o ri apa nhũm mẽ anhõ pahihtĩ ja hã tanhmã mẽ ato ka mẽ amnhĩ kamã apijaàm týx nê.

¹⁶ Nom koja mẽ apê Kris kwý hã tanhmã mẽ anhĩpêx to ka mẽ ja hã amnhĩ tã mẽ omu nê amnhĩ kamã apijaàm kêt nê. ãm Tĩrtũm pix mã amnhĩ jarê nê kãm:

—Pa Tĩrtũm. Ixpê akra Kris kwý hã na mẽ ã ixtomnuj anê. Nom ixpê akra jakamã kwãr mẽ mãmrĩ tanhmã inhĩpêx to. Amex o amex o ate ixto akra jakamã kwãr mẽ mãmrĩ ã inhĩpêx anhýr o pa. Anê.

17 Nê koja Tirtûm tokyx mẽ pahpiitã tanhmã mẽ pahte amnhĩ nhĩpêx to hã mẽ pahpumu nê tanhmã mẽ panhĩpêx to. Mẽ pahpê hkrajaja koja tanhmã mẽ pahte amnhĩ nhĩpêx to hã tanhmã mẽ pahto mex to. Hãmri nê hpãnhã mẽ kêp hkra hkêt xwýnhjê ho hapu nê tanhmã mẽ hipêx to. Mẽ kot amnhĩ kaxyw hkôt hamaxpêr kêt jakamã nhũm mẽ pahkĩnhã tanhmã mẽ homnuj týx to. 18 Kapêr ã kagã htũm kot ja hã mẽ pajarênh kot:

Mẽ kot Tirtûm kapêr kôt amnhĩ to mex xwýnhjaja na htem àmnhĩx amnhĩ xà htýx kamã hamak o pa kamã ty nhũm Tirtûm ma õ krĩ hwýr amnhĩ wýr mẽ ho àpir kurê kumrêx.

Nom mẽ kot amnhĩ tomnuj xwýnhjaja koja mẽ hkĩnhã amnhĩ xà htýx kamã hamak rãhã nê pa ho pa nê aa mex kêt nê. Anê.

19 Tã koja Tirtûm kãm ja prãm japêr kwãr mẽ mãmri Kris ã tanhmã mẽ pahtomnuj to. Nom kêt pu mẽ Tirtûm kamnãrom amnhĩ to mex pix o ri papa. Kêp mẽ panhĩpêx xwýnh maati jakamã ra kot amnhĩ jarênh xà hkôt koja tanhmã ri mẽ pamã amnhĩ nhĩpêx to ho pa.

5

Tirtûm krajaja kot tanhmã amnhĩ nhĩpêx to hã mẽ kãm karõ
Atre 20.28-31

1 E kot paj hpãnhã mẽ apê Kris kwý hkrãhtũmjê mã ixkapêr ka mẽ inhma. Ijaxwýja ixpê mẽ akrãhtũmjê hõ na pa. Na pa pre mẽ akurom Kris htykãm omu. Nom kot puj mẽ nhỹrmã pahpimràatã mex o mex ã omu nê urak nê mẽ pamex nê ri papa ho papa. 2-3 Jakamã e Kris kôt mẽ hkrãhtũmjaja kêt ka mẽ atar Kris kôt pahkwýjê jamãr mex nê. Ra Tirtûm kot mẽ ate kãm hkwyjê jamãr kaxyw mẽ axunhwýr jakamã kêt ka mẽ omunh mex rãhã ho mẽ hkôt ri apa. Te ho ôwêhti jamãr xwýnh kot ôwêhti jamãr mexta pyrãk. Te mẽ kêp Tirtûm krit ôwêhti nhũm mẽ ate kãm mẽ hamãr o apa xwýnh pyrã nê kãm mẽ omunh mex rãhã ho ri mẽ hkôt apa. Nê akĩnh pê tanhmã ri mẽ ho ajuta hto ho ri mẽ hkôt apa. Ja na Tirtûm kãm hprãm. Nom kêt ka mẽ ano hkã karôt kãm mẽ

ho ajuta hkêt nê. Rý kãxpore hprãm xaj mẽ kãm tanhmã amnhĩ nhĩpêx to hkêt nê. ãm amarĩ tanhmã mẽ kutã anojarêt to pix kukamã ajamaxpêr o ri mẽ hkôt apa.

Nê kêt ka mẽ kãm mẽmoj tã karõ kamã axihtýx kêt nê. Mẽ akapêr mã aprĩ kamã mẽ kãm mẽmoj jarê kê mẽ amnhĩ tã mẽ apumu nê mẽ apyrã nê ã axpên nhĩpêx anhýr o pa.

4 E kêt ka mẽ ã Kris kôt mẽ akwýjê jamãr mex pê mẽ hipêx o apa anê. Hãmri nhũm mẽ pajamãr xwýnh maati ja hã mẽ apumu nê nhỹrmã akupýn mẽ pahwýr wrý nê mẽ ato mex rax nê.

5 Nê e mẽ amy xaptãr nywjaja. Kêt ka mẽ Kris kôt mẽ akrãhtũmjê kapêr ma nê mẽ hkôt ri amnhĩ nhĩpêx mex o ri apa.

Nê kwa kêt ka mẽ apiitã axpên nhĩpêx o te anhĩõ kot amnhĩ to rax o ajakrenh pyrãk. Tirtûm kapêr ã kagã htũm kot ja jarênh kot: Mẽ kot amnhĩ to jarkrar o ri mẽ pa xwýnhjaja na hte Tirtûm mẽ kutã amnhĩ xunhwý.

No mẽ kot amnhĩ to hkryre nê axpên tã hpijaãm o mẽ pa xwýnhjaja na hte mẽ ho mex o pa.

6 Anhýr ã mẽ harênh jakamã kwa kêt ka mẽ Tirtûm ã apijaãm rãhã ho ri apa ixkwýjaja. Nê axpên mã ri amnhĩ to jarkrar o ri apa hkêt nê. Kêt kê Tirtûm xihkýx xwýnhja ja hã mẽ apumu hãmri nê nhỹrmã kot mẽ pahto mex xà hã arĩgroja kato nhũm mẽ ate amnhĩ to mex xwýnh ã mẽ ajarê nê mẽ ato mex rax nê.

7 Nê kêt ka mẽ tee ri amnhĩ kukamã ajamaxpêr pê akaprĩ ho ri apa hkêt nê. ãm te mẽ ate Tirtûm mã akaprĩ nhõr pyrãk o amnhĩ nhĩpêx nê axãmnhĩx akĩnh nê akaprĩ hkêt nê apa. Tirtûm kêp mẽ pajamãr xwýnh maati kênã kot ka kêt mẽ ri akaprĩ nê ri apa.

8 Nê kwa mẽ okora. Kêt ka mẽ amnhĩ nê kot mẽ pakutã amnhĩ xunhwýr xwýnh maati Satanastija pumunh mex rãhã ho ri apa. Na hte mẽ panhĩpêx o te ropkror kot akunĩ kamã mry ho krihkrit o ri mrar pyrãk o mẽ panhĩpêx. Jao mẽ pahte Kris kaga hprãm xaj apkati mẽ tanhmã nê mẽ pahto ho ri mẽ pahkôt pa. 9 Na hte ã pika piitã hkôt Kris kôt mẽ pahtõ nê mẽ pahtõxjê nhĩpêx anhýr o pa nhũm mẽ pahpyrã nê amnhĩ xà htýx kamã hamak o pa pê omnuj

nê pa. Jakamã kwa kêr ka mẽ Kris kôt amnhĩ xunhwỳr tỳx nê kutã amnhĩ to htỳx rãhã ho ri apa. ¹⁰ Tĩrtũm kãm mẽ pajapê jakamã na hte mẽmoj to mẽ pakutã nojarêr rãhã ho ri pa. Na pre mẽ pamex nê nhỹrmã mẽ pahte kuri tãm amnhĩ nhĩpêx o papa mã xwỳnh ã mẽ pajarê. Kris kukwak ri ã mẽ pajarênh anhỹr jakamã mẽ ate jar Kris ã apunuj nê ri apa htã kot kaj mẽ kritpêm ã amnhĩ nhĩpêx anhỹr ry hkêr nê. Koja Tĩrtũm mẽ akrã kamã mẽ ajamexpêr xihtỳx jagjê ka mẽ akupỹm amex nê axihtỳx pê ate amnhĩ nhĩpêx nyw o amnhĩ nhĩpêx rãhã ho ri apa.

¹¹ Tĩrtũmja hihtỳx o hihtỳx nê àhpumunh o àhpumunh. Nê hihtỳx xà nê àhpumunh xà koja aa kêp hirerek nê hapêx kêt kumrêx. ãm hãmri na mẽ kot harênh kot anhỹrja.

Pêtre kapêr jatur xà

¹² Nê ota Kris kôt mẽ pahtõ Sirastija na inhmã mẽ akaxyw kagàja nhĩpêx pa mẽ awỳr mẽnh kaxyw. Na pa hte kãm ixkapêr nhũm inhma nê inhmã hã kagà. Na hte Kris kapêr kôt amnhĩ nhĩpêx rãhã ho ri pa. Tã inhmã kagàja nhĩpêx. Mẽ ate kamã harênh nê mar nê tãm ajamexpêr kaxyw. Nê Tĩrtũm kãm mẽ ajapê nê kot mẽmoj to mẽ akutã nojarêr ã mẽ ate kamã harênh kaxyw. Tã kêr ka mẽ kãm mẽ ajapê hã amnhĩ tã harênh ma nê kapêr kôt pix mã amnhĩ nhĩpêx mex rãhã ho ri apa. Mẽ akwỳjaja kot tanhmã hã mẽ ato htãã.

¹³ Nê ota jar Papirõn kamã Kris kôt mẽ pahtõ nê mẽ pahtõxjaja mẽ awỳr hpêr mẽ. Tĩrtũm kot mẽ pahpyrà nê mẽ ho hkra jakamã mẽ kêp mẽ atõ nê mẽ atõx ã mẽ awỳr hpêr mẽ. Nê Xiakre mãânên mẽ awỳr hpêr mẽ. Te kêp ixkra pyræk.

¹⁴ Nê kêr ka mẽ nhỹri apê Kris kwỳ hã xpên pumu nê mẽ xpên to atõ nê atõx ã xpên mã akapêr mex kurê kumrêx.

E kê Tĩrtũm mẽ apê Kris kwỳ hã mẽ amã mẽ ajamakêtkati nê mẽ apa xà gõ ka mẽ axãmnhĩx ajamakêtkati nê amex nê ri apa ho apa.

Tã ãm ja pix. Ixpê Simãw Pêtre na pa ã mẽ awỳr kagà nê mẽnh anê.

Sikūn Pêtre
Simāw Pêtre kot Jejus kôt
hkwỳjê hwỳr wam kagà nē
mēnh kôt hō mēnh

Simāw Pêtre na pre kagàja nhīpêx. Jejus nhỹ hā hkrajê jahkre ho mē pa xwỳnhjê hō na pre. Mē kēp Jejus kra hkēt xwỳnhjaja ra kot Jejus ā hpīr kaxyw nhūm pre kagàja nhīpêx nē krī piitā hkôt Jejus kwỳjê hwỳr kurē nē kamā hprī hā mē kām mēmoj tã karō. Mē kot arī Tirtūm kot amnhī nhīpêx kôt amnhī nhīpêx rāhā ho pa hā mē kām karō. Nē hamaxpēr o mē hamaxpēr rāhā ho pa hā mē kām karō.

Nē mē hkwỳ kot Tirtūm kôt amnhī nhīpêx ā amnhī jarēnh tã hkôt amnhī nhīpêx kēt xwỳnhjaja nhūm pre tanhmā mē harēnh to. Ā na pre mē kām mēmoj jarēnh nē hā kagà nē krī piitā hkôt mē hwỳr rēnh anē. Nē mē kām:

¹ Pa Kris kôt ixtō nē ixtōxjaja. Xà mē amex? Ot pa mē awỳr kagà nhīpêx nē krī piitā hkôt mē awỳr kurē. Ixpē Simāw Pêtre na pa wam ixte kagà nhīpêx nē mē awỳr mēnh tã axte hō nhīpêx. Ixte Jejus Kris nhỹ hā mē ajahkre ho ixpa xwỳnhjê ā mē amā hipêx nē kumē. Na pa hte Jejus mā amnhī nhīpêx mex o ri ixpa.

Nē mē papytār xwỳnh Jejus Krisja Tirtūm pyrā nē mex o mex. Nē wa kot amnhī nhīpêxja mex o mex. Jakamā na pre wa tanhmā mē pahkrā hto pu mē amnhī kaxyw wa hkôt pajamaxpēr tỳx rāhā ho ri papa. Na ka htem ixpyrà nē ā amnhī nhīpêx anē. Tã pa mē amā kagàja nhīpêx.

² Nà Tirtūm mē mē panhō Pahihti Jejus wa kot amnhī nhīpêxja na ka mē ra harēnh mar tỳx nē. Wa kot tanhmā amnhī nhīpêx to nē tanhmā wa hamaxpēr toja ka mē mar tỳx nē wa hkôt pix mā amnhī nhīpêx. Tã kēr ka mē arī ā amnhī nhīpêx anhỹr rāhā ho ri apa. Jao axāmnhīx ajamakêtkati nē akīnh nē apa ho apa. Na pa hte ā mē ato Tirtūm mē Pahihti Jejus Kris wa hwỳr o ri ixpa anē. Na hte Tirtūm mē ato mex nē mē akutā nojarēt rāhā ho pa.

Tirtūm kot mē pahto mex o pa hā harēnh
Epes 2.12-13; Wam Tesarōn 1.2-4; Sikūn
Pêtre 3.18

³ Nē Tirtūmja àhpumunh tỳx o àhpumunh tỳx jakamā na pu htem hkôt amnhī xunhwỳ nhūm amnhī tã mē pahpumu nē mē pamā àhpumunh tỳx xà hkwỳ gō. Hāmri pu mē ra urāk nē amnhī to mex nē tām amnhī nhīpêx o ri papa. Tã kot puj mē nhỹrmā ma ō krī hwỳr api. ⁴ Na pre mē pakukamā amnhī jarēnh o:

–Kot paj nhỹrmā ixkrajê mā ixte amnhī nhīpêx mex kwỳ gō nhūm mē inhỹ hā ho tām ri amnhī nhīpêx mex o pa. Nē ixpyrà nē hamaxpēr mex o pa.

Anhỹr jao te ra mē pamā hkīnh xà mex kwỳ nhōr pyrāk o mē panhīpêx. Nē te ra kot mē pahkrām hamaxpēr mex jagjēnh nē mē pamā kot amnhī nhīpêx mex jagjēnh pyrāk. Mēmo kaxyw na pre ā mē panhīpêx mex anē? Nà urāk nē tām mē pahte amnhī nhīpêx mex rāhā o ri papa kaxyw. Jao mē pahte mē kēp hkwỳ hkēt xwỳnhjê hkôt amnhī nhīpêx kēt nē. Nē mē hamaxpēr punuj o pajamaxpēr kēt nē. Nē hpānhā mē pahte Tirtūm kôt pix mā amnhī nhīpêx rāhā ho papa. Ā mē pahte amnhī nhīpêx anhỹrja na mex o mex. ⁵ Tã ā Tirtūm kot mē panhīpêx mex anhỹr jakamā kwa kēr ka mē kapēr mar tỳx nē hkôt pix mā amnhī nhīpêx mex o ri apa. Jao amnhī kaxyw hkôt ajamaxpēr rāhā nē. Kot kaj mē ā amā amnhī nhīpêx anhỹr o apa hprām hā kot kaj mē määnēn amā tām amnhī nhīpêx o apa hprām. Nē mē amā Tirtūm kapēr piitā mar prām o ri apa. ⁶ Hāmri nē piitā mar pa nē mēmoj punuj piitā nē amnhī to htỳx nē. Nhūm mē kēp Kris kwỳ hkēt xwỳnhjaja Kris ā tanhmā mē anhīpêx to htã ka mē am amnhī tã mē omu nē mē umaj mē amā Kris kaga hprām kēt nē.

Nē mē amā Tirtūm mā amnhī jarēnh rāhā ho apa hprām.

Nē mē amā kapēr mar rāhā ho apa hprām.

⁷ Nē mē amā Kris kôt mē atō nē mē atōxjê ho mex pix o ri apa hprām. Jao te mē amā amnhī tã ma pyrāk o mē piitā mē hipêx o ri mē hkôt apa.

⁸ E kēr ka mē ā amnhī nhīpêx anhỹr o ri apa. Kot ka mē ā amnhī nhīpêx anē nē mē

panhō Pahihti Jejus Kris kôt amnhĩ nhĩpêx mex o mō. Hāmri nhūm mẽ akwỳjaja mẽ apumu nē mẽ apê Kris kwỳ hã mẽ ajarēnh kurê kumrêx. ⁹ No kot ka mẽ atō ixkapêr mar tã hkôt amnhĩ nhĩpêx kêt nē hāmri te Tĩrtūm kot anê ate amnhĩ tomnuj rēnh par mã ajamxpêr kêt pyrāk. ¹⁰⁻¹¹ No na ka htem ã amnhĩ nhĩpêx anhỹr kêt nē. Ra mẽ ate Pahihti Jejus Kris kôt amnhĩ nhĩpêx mex jakamã na htem ja hã mẽ apumu nē Tĩrtūm kot mẽ ato hkra hã mẽ ajarēnh kurê kumrêx. Kot kaj mẽ ã hkôt amnhĩ nhĩpêx anhỹr o apa nē mẽmo arĩgro hã apunuj nē apa htã Jejus kaga hkêt nē. Hāmri nē nhỹrmã ma Tĩrtūm nhō krĩ hwỳr api nhūm mẽ apumu nē mẽ ato mex rax nē. Hāmri ka mẽ ò krĩ kamã mẽ panhō Pahihti Jejus Kris wa kuri atĩr tūm nē amex nē apa ho apa.

¹² Nē na ka mẽ ra Tĩrtūm kot amnhĩ nhĩpêx mar tỳx nē amnhĩ krã kamã kot amnhĩ nhĩpêx mã ajamxpêr tỳx o ri apa. Tã nom kot paj arĩ mẽ amã ja jarēnh rãhã ho ri ixpa. ¹³ Kormã ixtĩr ri kot paj xatã mẽ amã harēnh o amnhĩrĩt. Ja na kêt inhmã hprãm. Mẽ ate nhỹrmã tanhmã ri ajamxpêr to nē hkaga pumaj. ¹⁴ Na pre mẽ panhō Pahihti Jejus Krisja inhmã tokyx ixtyk ã ijarē. Kot paj xep kritpēm ri ixtĩr nē ixpa hkêt nē. ¹⁵ Jakamã na pa kormã ixtĩr ri ã mẽ amã kagã nhĩpêx anē. Mẽ ate inhmỳr pē arĩ omunh nē kamã harēnh nē Tĩrtūm kot amnhĩ nhĩpêx mã ajamxpêr tỳx rãhã ho ri apa kaxyw.

Pêtre kot no ho Jejus pumunh ã amnhĩ jarēnh

Matêwre 17.1-5; Makre 9.1-8; Sikūn Ximotre 3.16-17

¹⁶ Nē na pa pre ra tanhmã mẽ amã mẽ panhō Pahihti Jejus Krisja jarēnh to. Hihtỳx o hihtỳx ã harē nē àhpumunh tỳx o àhpumunh tỳx ã harē. Nē nhỹrmã akupỳn mẽ pahwỳr wrỳk ã harē. No na pa pre amnhĩ krã hkôt ã harēnh anhỹr kêt nē. Na pa pre inhno ho Jejus hihtỳx o hihtỳx ã omunh o hkôt ixpa nē ixte omunh xà hkôt ã mẽ amã harēnh anē. ¹⁷⁻¹⁸ Amnepê mã kormã ixkwỳjê mẽ mẽ ixte arĩ hkôt ixpa ri pa prem hkôt hixêt prêk nhĩmōk wỳr api. Pa nē kaxyw Xiakre nē Juãw mẽ pa mẽ hkôt ixpimràatã hixêt ã api nē himōk ã ixkuhê.

Hāmri nhūm Tĩrtūm tanhmã Jejus to nhūm hirã htỳx kãm xa. Hāmri nhūm Měpahpãm Tĩrtūmja mẽ inhmã kapêr. Kaxkwa kamã hirã htỳx rax rūm mẽ inhmã kapêr o:

—E ota Ixkrata xa. Inhmã hapê ho inhmã hapê. Anē.

Tã ra ixte mar xà hkôt pa amnhĩ xō ri mẽ amã harē nē hã kagã. ¹⁹ Na pa prem ã hixêt prêk nhĩmōk ã Jejus pumunh nē Tĩrtūm kot tanhmã harēnh to hã mar anē. Hāmri nē ijamxpêr o:

—Nã ãm hāmri na pre amnepēm Tĩrtūm nhỹ hã kapêr jarēnh o mẽ pa xwỳnhjaja Jejus kukamã ã harēnh anhỹr o pa. Anē.

Mẽ kot tanhmã Jejus kukamã harēnh toja te kot kamàt kô kamã kanê hpòk nhĩrã hkryre pyrāk. Tã koja nhỹrmã akupỳn wrỳ hāmri nē te myt kator nē hirã mex nhūm mẽ pahte mẽmoj pumunh mex pyrāk. Jakamã kwa kêt pu mẽ kot tanhmã Jejus kukamã harēnh toja mar tỳx rãhã nhūm nhỹrmã te myt kator pyrã nē akupỳn mẽ pahwỳr wrỳ. ²⁰ Tĩrtūm kapêr ã kagã htūm kot tanhmã ÿ hã kapêr jarēnh xwỳnhjê jarēnh to. Mẽ kot mẽmoj kukamã ujarēnh ã mẽ harē. Nē Jejus kukamã tanhmã ujarēnh to hã mẽ harē. Æ mẽ kot mẽmoj kukamã harēnh kot anhỹr. Nom na pu htem amnhĩ krã hkôt ã mẽ ujarēnh anhỹrja mar tỳx kêt nē. Koja Tĩrtūm Karō hprĩ hã mẽ pamã ho amnhĩrĩt pu mẽ rĩ kormã pahprĩ hã mar tỳx nē. ²¹ Na pre ÿ hã kapêr jarēnh o mẽ pa xwỳnhjaja amnhĩ krã hkôt hkwyjê mã ujarēnh o pa hkêt nē. Tĩrtūm Karō na pre tanhmã mẽ hkrã hto nhūm mẽ ÿ hã hkwyjê mã tanhmã harēnh to ho pa nē ÿ hã mẽ pamã hã kagã.

2

Tĩrtūm kapêr jarēnh o hêx xwỳnhjê jarēnh Korosê 2.16-17; Wam Ximotre 4.1-5; Sikūn Ximotre 3.1-9; Jutre 3-16

¹ Nē amnepēm na pre Ijaew kwỳjaja te mẽ kêt Tĩrtūm nhỹ hã kapêr jarēnh xwỳnh pyrāk. Nom Tĩrtūm kapêr kwỳm ri hkwyjê mã tanhmã ho hêx to ho pa. Tã koja nhỹrmã mẽmojaja mẽ urāk nē mẽ awỳr mra nē ã mẽ amã Tĩrtūm kapêr o hêx o pa anē. Nē kapêr kwỳm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nē amnhĩ nhĩpêx nyw kaga nē hpãnhã mẽ

kot amnhî tomnuj kôt apa hprãm xàj nhũm mẽ hêx rom tanhmã mẽ ajahkre hto ho pa. Pahiht Jejus kot mẽ nê htyk tâ nhũm mẽ hkôt amnhî nhîpêx kêt nê axtem nê ri kapêr o hêx o pa. Mýrapê koja Tirtũm tokyx mẽ kot amnhî xà htýx kamã hamak tũm xà hwýr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhî nhîpêx o pa. Jao ra hpijaàm kêt nê mẽ hkôt htýx ri tanhmã amnhî tomnuj to ho ri pa. Tã ã mẽ kot Tirtũm kapêr o mẽ hêx xwýnhjê mar nê mẽ hkôt amnhî nhîpêx anhýr jakamã koja mẽ kãm Tirtũm kapêr mar prãm xwýnhjaja mẽ kot amnhî nhîpêx ã mẽ omu nê Tirtũm kapêrja mex kêt ã harênh japêr. ³ Tirtũm kapêr o mẽ hêx o mẽ pa xwýnhjaja na htem kãxpore pix prãm xàj mẽ awýr mra nê tanhmã mẽ amã kapêr jarênh o hêx to ho pa nhũm Tirtũm ja hã mẽ omunh rãhã ho hkrĩ. Na hte nhýhým mrar kêt nê rý htýx ôt o hikwý hkêt nê. Na hte arĩ mẽ kot amnhî nhîpêx ã mẽ omunh rãhã ho hkrĩ. Tã koja nhýrmã ma mẽ kot amnhî xà htýx kamã hamak tũm xàta hwýr mẽ kurê nhũm mẽ ma hwýr hapêx pa.

⁴ Nê amnepê mã kaxkwa kamã Tirtũm kapêr o mẽ wrýk xwýnh kwýjaja na prem axtem nê Tirtũm kapêr nhîrôp kuhê nhũm tee ri amnhî tã mẽ omu hãmri nê amnhî nê mẽ kator pa. Mẽ kamã ukaprĩ hkêt nê amnhî nê mẽ kator pa hãmri nê mẽ kot amnhî xà htýx kamã hamak tũm xàta wýr mẽ hano. Nhũm prem ma hwýr pa nê ahkre xupým kãm kamãt kô kamã arĩ hkrĩ ho hkrĩ. Tirtũm kot mẽ piitã tanhmã mẽ harênh to xà hã arĩgroja jamãr o hkrĩ. Nê tee ri kãm hapôx prãm kaprý ho hkrĩ.

⁵ Nê amnepêm pika kamã ri mẽ pa xwýnhjaja na prem haxwýja piitã amnhî tomnuj pix o ri pa. Jakamã nhũm Tirtũm ja hã mẽ omu nê mẽ kamã ukaprĩ hkêt nê. Nê mẽ hwýr na rax mẽ. Mẽ kãm kapêr mar prãm kêt jakamã nhũm mẽ hwýr kumê nhũm wrýk rax kumrêx nê mẽ hanhir pa nê mẽ himex. ãm Noehti mẽ hkwý pê 7 pixjaja nhũm mẽ kurom htír nê hkà hkĩnh nê mex nê pa. Noehti kormã na xwýj ri kot mẽ kãm Tirtũm kapêr jarênh o ri mẽ hkôt pa

htã nhũm mẽ kuma nê ãm kuma. Mýrapê na prem piitã pikaprãr pa.

⁶ Nê Sotô mẽ Gomo wa kamã mẽ pa xwýnhjaja haxwýja na prem amnhî tomnuj týx kumrêx o pa nhũm Tirtũm wantajê pyrã nê mẽ kamã ukaprĩ hkêt nê. Na pre kaxkwa rũm mẽ hipy mẽmo hpôk kwý rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nà mẽ piitã mẽ kot mẽ harênh mar nê hamaxpêr o:

—Na hte ã Tirtũm mẽ kot amnhî tomnuj xwýnhjê nhîpêx anê.

Anhýr o hamaxpêr kaxyw na pre ã mẽ hipêx anê. ⁷⁻⁸ Nom Rohtija na pre Tirtũm Sotô nê kator jakamã nhũm htyk kêt nê. Na pre hkwýjê rom tãm amnhî nhîpêx tã mẽ kot amnhî tomnuj týx xwýnhjê nhô krĩ kamã ôrkwý nê ri pa. Nê apkati mẽ tee ri mẽ kot amnhî nhîpêx ã mẽ omu nê mẽ ý hã hkaprĩ nê tee ri mẽ hkukamã hamaxpêr o pa. No nhũm mẽ amnhî tomnuj ã amnhî pumunh nê tokyx tãm amnhî nhîpêx kêt nê. Nê apkati mẽ tanhmã amnhî tomnuj to nê kapêr punuj o pa nhũm Rohti tee ri mẽ omu nê hkaprĩ htýx nê pa. ⁹ Tã nhũm Tirtũm mẽ himex kaxyw nê mẽ nê kator nê mẽ himex pa. Na hte ã Tirtũm mẽmoj punuj pê mẽ kot amnhî kaxyw kãm hamaxpêr nê hkôt amnhî nhîpêx xwýnhjê pytãr anê. No mẽ kot amnhî tomnuj xwýnhjaja na hte axtem mẽ hipêx. Tã koja nhýrmã mẽ pahpiitã tanhmã mẽ pajarênh to xà hã arĩgro kato nhũm ma mẽ kot amnhî xà htýx kamã hamak tũm xà wýr mẽ rênh pa. ãm tapxipix kot ã mẽ hipêx anhýr kaxyw àhpumunh týx. ¹⁰ Tã mẽ hpijaàm kêt kãm amnhî tomnuj o mẽ pa xwýnhjaja nê mẽ kot Tirtũm kapêr mar nê ãm mar xwýnhjaja koja nhýrmã mẽ homnuj týx nê.

Nê Tirtũm kapêr o hêx o ri mẽ pa xwýnhjaja na htem amnhî to jarkrar pix o pa. Nê Tirtũm kapêr o mẽ wrýk xwýnhjê hã hpijaàm kêt nê. Nê axtem nê mẽ ho kapêr punuj pê tanhmã mẽ haprý hto ho pa. ¹¹ Tã nhũm htem amnhî tã mẽ kuma nê ãm mẽ kuma. Mẽ kurom mẽ hihtýx kumrêx tã no ãm amnhî tã Tirtũm mã tanhmã mẽ ho kapêr to hkêt nê.

¹² Nê mry xoprê na hte htýx ri pa ho pa. Tã Tirtũm kapêr o mẽ hêx o mẽ pa

xwýnhjaja htem mry xoprêta pyrà nê htýx ri hamaxpêr mex kêt o pa. Jao hprī hã mēmoj mar kêt tā htýx ri hijuk ri tanhmã mēmoj jarēnh to.

Nê mry xoprêja htýx pa nhūm mē kot hparja pyrà nê mē kot Tirtūm kapêr o hêx o mē pa xwýnhjaja koja Tirtūm nhýrmã kuwy hwýr mē ho hapêx nê kamã mē rēnh pa.

¹³ Nê koja nhýrmã Tirtūm mē kot tanhmã mē ama hêx to ho pa hã mē omunh xà hkôt mē homnuj týx nê. Na htem hpijaàm kêt nê mē piitã mē noo mã tanhmã amnhī tomnuj to ho pa. Kamàt kãm nê arīgro hã. Nê mē kãm tanhmã amnhī nhīpêx to hprãm xà hkôt pix mã amnhī tomnuj o pa.

Na htem te mē kêp Kris kôt mē atôjê pyrà nê mē akôt Tirtūm kapêr mar xà hã ixkre hwýr agjê nê mē anhīhkô hã mē kot Jesus tyk mã hamaxpêr kaxyw pãwti hkwy hku. Nom htýx hkur o hkrī nê htyk mã hamaxpêr kêt nê. Kãm Jesus kīnh kêt tā hêx rom hpijaàm kêt kãm mē anhīhkô hã htýx ri hkur o hkrī.

¹⁴ Nê nhýri krī hwýr pôj nê mēnijê pumu nê kãm mē hkīnh nê. Ra mē mjên ri pa htã nhūm mē kãm mē ho amnhīkati hprãm nê mē kamã hpijaàm kêt o ri pa.

Nê kormã mē kot Kris kôt amnhī xunhwýr tohtuj anhýr xwýnhjê hwýr mra nê hêx rom tanhmã mē kãm kapêr to pē mē no kupyri o ri mē hkôt pa. Mē kot mē mar nê Kris kaga nê mē hkôt ri amnhī nhīpêx prãm xàj ã mē hipêx anhýr o pa.

Na htem hikàxpore rūnh o pikuprōnh pix kukamã hamaxpêr o ra ho ôxý nê.

Ã na htem amnhī nhīpêx anhýr o pa. Tã ra Tirtūm kot mē homnuj týx kaxyw mē hã amnhī jarê. ¹⁵⁻¹⁶ Te mē kot kamàt kô kamã pryjuk ã hpikunor nê htýx ri pa pyræk o na htem amnhī nhīpêx nê kãm Tirtūm kapêr mar prãm kêt nê amnhī tomnuj pix o pa.

Amnepêm Peo hkra Paraãwta kêp Tirtūm nhý hã kapêr jarēnh o pa xwýnh tã axtem nê kàxpore rax prãm xàj tanhmã amnhī tomnuj to kaxyw. Nhūm Tirtūm tee ri ja hã omu nê Paraãw krit jumēnreja tanhmã hakwa hto nhūm kãm kapêr. Jumēnre kapêr kêt tā nhūm Tirtūm tanhmã hakwa hto nhūm kãm kapêr nê tanhmã kot amnhī tomnuj to kaxywta ã kãm akir nhūm amnhī tã kuma hãmri nê ã amnhī nhīpêx anhýr

kêt nê. Tã mē kot Tirtūm kapêr o mē hêx ho mē pa xwýnhjaja na htem Paraãw pyrà nê kàxpore rax prãm xàj tanhmã amnhī tomnuj to pix prãm. ¹⁷ Te hino ra grã nhūm mē tee ri kamã gô japêr pyræk o na htem amnhī nhīpêx. Rý te kakrã hapôx nhūm mē kot omunh nê na wrýk ã hkamnhīx kaprý pyræk. Tã ra Tirtūm mē kaxyw kamàt kô htýx pē mē kot amnhī xà htýx kamã hamak tūm xàta o mē nê. ¹⁸ Na htem htýx ri amnhī tomnuj o pa hã mē amã amnhī to jarkrar o ri pa. Jakamã nhūm mēhõ ra amnhī tomnuj kaga kaxyw nhūm mē tee ri ja hã omu nê kot ã amnhī nhīpêx anhýr pymaj tanhmã nê kãm kapêr to nê mē kãm:

—Kwa ixte amnhī tomnuj o ixpa htã nhūm Tirtūm ja hã ixpumu nê ãm ixpumu nê arī inhmex ã ijarê. Na pa hte mē hkuprýjê hwýr mra nhūm ja hã ixpumu nê ãm ixpumu nê hã tanhmã ixto hkêt nê. Jakamã kwa mē ixpyrà nê arī ã amnhī nhīpêx anhýr o ri apa. Koja Tirtūm tanhmã hã ato hkêt nê. Anê.

Hãmri nhūm mē tee ri kuma nê ra hamaxpêr kati nê. ¹⁹ Na htem mē kãm kapêr o:

—Kwa mē ixpyrà nê mãmrī amã tanhmã amnhī tomnuj to hprãm xà hkôt amnhī nhīpêx o ri apa. Mēhõ kot kêt ja nê tanhmã amã kapêr to? Anê.

Mē kot amnhī tomnuj xàja te kêp mē õ patrãw pyræk jakamã na htem ãm kôt pix mã amnhī nhīpêx o pa. Jakamã kot pu mē tanhmã amnhī tomnuj to. Nê gaa nê axte. Nê gaa nê ra ho amnhī pyræk. Hãmri nê tee ri pamã hkaga hprãm kaprý nhūm te kêp mē panhõ patrãw pyræk o mē panhīpêx pu mē ãm kôt pix mã ri amnhī nhīpêx o ri papa.

²⁰ Nê koja mēhõ ra Tirtūm kapêr ma. Nê mē panhõ Pahihti Jesus Kris jarēnhja nhūm hprī hã kuma. Kêp mē pahte amnhī tomnuj pē mē papytãr xwýnh ã harēnh ma. Tã nhūm mē kot Tirtūm kapêr o mē hêx xwýnhjaja hwýr mra nê tanhmã kãm ho hêx to nhūm mē kuma nê kot amnhī nhīpêx tūm o awjanã. Jao amnhī tomnuj týx o kormã kot Tirtūm kapêr mar kêt ri kot amnhī tomnujta jakre. ²¹ Kêp ãm aa kot Tirtūm kapêr mar kêt rãhã htyk ronhýx ja kãm mex nê. Nom ra kot mar mex tã ãm kuma nê hkaga jakamã koja mex kêt kumrêx. ²² Mē kot ã

mê kot amnhĩ nhĩpêx anhÿr ã mê harênh kot:

Rop na hte ôjaĩr nê akupÿm ôjaĩrta ku.

Nê hagrô na htem unê nê hkumrã nhũm muxre. Tã nhũm mê kãm ure nhũm akupÿm hprôt nê mra nê akupÿm gyw o amnhĩ tomnu pa. Anê.

Tã mê kot Tĩrtũm kapêr o mê hêx xwÿnhjê mar nê mê hkôt amnhĩ nhĩpêx xwÿnhjaja te mê kot rop mê hagrô wa kot amnhĩ nhĩpêxta pyrã nê Tĩrtũm kapêr kaga nê akupÿm mê kot amnhĩ nhĩpêx tũm o awjanã nê htÿx ri amnhĩ nhĩpêx o pa.

3

Tĩrtũm kot pika ho hapêx kaxyw kormã amnhĩ tã mê pajamãr ã harênh

Matêwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkrãmnhwÿjaja. Na pa pre ra wam kagãta nhĩpêx nê mê awÿr kurê. Tã ra axte hkôt ja nhĩpêx. Hamê wa kamã na pa mê amã Tĩrtũm kot tanhmã amnhĩ nhĩpêx to hã harê. Nê Jejus Kris nhÿrmã akupÿn mê pahwÿr wrÿk ã harê. Mê ate mar nê tãm amnhĩ nhĩpêx nê tãm ajamãxpêr o kutêp mê apa kaxyw.

² Amnepê mã Tĩrtũm nhÿ hã kapêr jarênh o ri mê pa xwÿnhjaja na prem Tĩrtũm kot nhÿrmã mê pahwÿr mēhō mēnh mã xwÿnhhta jarênh o pa. Kot nhÿrmã mê pahwÿr wrÿk nê mê pahto amnhĩptãr o pa hã harênh o pa. Tã kêr ka mê kapêr ma nê hã ano htÿx nê hkôt ajamãxpêr tÿx rãhã ho ri apa. Nê Jejus kot mê awÿr mê rēnh xwÿnhjaja ka mê kapêr ma. Mê kot mê amã mēmoj jarênh o mê pa xwÿnhjaja na htem tanhmã mê amã Pahĩhti Kris jarênh to ho ri mê akôt pa. Nê tanhmã kot mê panê amnhĩ nhĩpêx to hã harê. Tã kêr ka mê kapêr ma nê hã ano htÿx nê kãm ajamãxpêr tÿx rãhã ho ri apa.

³ Nê kwa mê inhma. Nhÿrmã Kris akupÿn mê pahwÿr wrÿk xwÿj ri koja mê kot amnhĩ tomnuj tÿx xwÿnhjaja mê awÿr mra. Mê hpijaãm kêr o pa xwÿnh jakamã koja mê tanhmã mê akamã amnhĩ tomnuj to ho pa. Nê mê apê Kris kwÿ hã mê apumu nê mê atã hpêr o pikēnh o pa. ⁴ Nê htÿx ri Kris ã mê akukja nê mê amã:

—Kwa no Krisja? Amnepêm akupÿn wrÿk nê mēmoj piitã tanhmã hipêx to hã amnhĩ jarênh tã arĩ Tĩrtũm kot mēmoj to kator krax rũm mēmoj amarĩ rãhãã. Ra mê panhĩgêjtaja pikaprãr par tã nhũm kormã akupÿn wrÿk kêr nê. Kot mê pamã amnhĩ to hêx kēnã. Mo kaxyw koja kêr akupÿn mê pahwÿr wrÿ? Kot mê pamã amnhĩ to hêx kēnã. Anê.

⁵⁻⁶ Nom ã mê kot harênh anhÿrja kot anhÿr kêr. Tĩrtũm kot mēmoj to kator krax rũm mēmoj amarĩ rãhã hã mê kot harênhja kot anhÿr kêr. Na pre Tĩrtũm kapêr pix o kaxkwa nê pika ho kato. Nhũm gô hkwyja kapêr mar xã hkôt pika hã amnhĩ jahkre. Nhũm hpãnhã panhĩ nhĩpêx. Tã no nhũm mê kapêr mar kêr kumrêx. Nê mê kot amnhĩ tomnuj tÿx mÿrapê na pre Tĩrtũm gô ho mê himex pa. Jao mê hwÿr na rax mê nhũm mê hanhir o mê ho hapêx. No nhũm mê kot Jejus wrÿk ã hpêr o pikēnh xwÿnhhtaja kãm ã mê harênh anhÿrja mar prãm kêr. Ra mê kot mar tã kãm mar prãm kêr nê arĩ mēmoj piitã rãhã hã ri harênh o pa. ⁷ Pika nê kaxkwaja arĩ rãhã htã koja Tĩrtũm nhÿrmã mê pahpiitã mê pahte tanhmã amnhĩ nhĩpêx to hã mê pahpumunh kôt tanhmã mê pajarênh to. Nê mê kot amnhĩ xã htÿx kamã hamak tũm xã hwÿr mê kot amnhĩ tomnuj xwÿnhjê rēnh pa. Hãmri nhũm rĩ kormã kaxkwa nê pikaja wa pôr nhũm himōk ã mēmoj piitã hkaxãr pa nê hapêx.

⁸ Nê amgrã pē 1.000ja mê pamã amgrã xohtô rax kumrêx no Tĩrtũm mã te arĩgro pixire pyrãk. ⁹ Tã ra kot mê pamã tokyx Jejus akupÿn wrÿk ã harênh tã nhũm kormã wrÿk kêr jakamã nhũm htem tōhã tee ri hamãr o pa nê hamãxpêr o:

—Hêxta waa nê. Tĩrtũm kot tokyx akupÿn mê pahwÿr Jejus mēnh ã amnhĩ jarênh tã tokyx mēnh kêr nê.

Anhÿr o harênh tã no ãm kot anhÿr kêr. Na kormã amnhĩ tã mê kot amnhĩ tomnuj xwÿnhjê jamãr o pa. Mê kot amnhĩ tomnuj kaga nê hkôt amnhĩ xunhwÿr prãm xãj kormã amnhĩ tã mê hamã. Kãm mê kot amnhĩ xã htÿx kamã hamak tũm xãta wÿr mēhō ho pixire nê mōr prãm kêr jakamã na kormã amnhĩ tã mê hamã. ¹⁰ Tã koja nhÿrmã

mê panhō Pahihtija akupÿn mê pahwÿr wrÿ. Te mê àhkīnh xwÿnh kot amnhī nhīpêx pyrāk o mê pajaêr pê akupÿn wrÿ. Pu mê pahtÿx ri tanhmā paxâpênh to ho ri papa nê akupÿn wrÿk ā hkamnhīx kêt rāhā nhūm mê pajaêr pê akupÿn wrÿ. Hāmri nê ma akupÿm amnhī kôt mê pahte hkôt amnhī xunhwÿr xwÿnhjê ho àpir par kurê kumrêx. Hāmri nhūm rī kormā kaxkwa kaxār o hkrihkrit tÿx kām hapêx pa. Nê kanhêti mê myt nê mytwrÿre kaxār pa. Nê pikaja nê määnên kamā mēmoj piitā kaxār pa. ¹¹⁻¹² Koja nhÿrmā ā mēmoj hapêx par anê. Jakamā kwa kêr pu mê Jejus kutêp tām ri amnhī nhīpêx rāhā ho ri papa. Nê Tirtūm kapêr kôt pix mā amnhī nhīpêx rāhā nê. Nê kām hprām xā hkôt tanhmā kām amnhī nhīpêx to ho ri papa. Kêr kê Jejus akupÿn wrÿ nê ā mê pahte amnhī nhīpêx anhÿr ā mê pahpumu. Koja wrÿ nhūm rī kormā kaxkwa nê pikaja wa kaxār pa. Nhūm kuwy mÿri kaxkwa kamā mēmoj harir xwÿnhja xêr nê ôr pa nê hapêx. ¹³ Tā kwār māmri mēmoj ā amnhī nhīpêx anê. Koja Tirtūm axte mēmoj mex nhīpêx. Na pre amnhī kukamā ja jarênh o:

Kot paj axte pika nê kaxkwa hō nhīpêx nhūm mex o mex. Nhūm mê kot amnhī kaxyw Jejus mā hamaxpêr nê hkôt amnhī xunhwÿr nhūm ixte mê mex ā mê harênh xwÿnh pixjaja koja mê pika nywja kamā mex nê pa ho pa. Anê.

¹⁴ Jakamā kwa ixkràmnhwÿjaja. Kêr ka mê Kris kutêp kapêr kôt amnhī nhīpêx mex rāhā ho ri apa. Jao kutêp ajamakêtkati nê axàmnhīx axpên kôt apa. Kêr ka mê nhÿrmā amnhī wÿr omu nê tee ri amnhī kukamā ajamaxpêr kêt nê. Ate tām amnhī nhīpêx o apa hā amnhī pumu nê akīnh nê amnhī wÿr omunh o akuhê.

¹⁵ Nom arī Jejus kām mê pahkwÿjê ho hkra hprām jakamā na kormā amnhī tā mê hamā nê tokyx akupÿn wrÿk kêt nê. Na pre Jejus kôt mê pahtō Pawre Tirtūm nhÿ hā ā mê pamā ja hā kagà anê. Pawreja ixkràmnhwÿ mex na. ¹⁶ Na hte mê pakaxyw kagà nhīpêx nê kamā mê pahte Jejus kutêp tām amnhī nhīpêx o papa hā mê pamā karō. Na hte tōhā mēmoj tā kagà pu mê kamā harê nê tee ri pahprī hā mar mā no

ām mar mex kêt nê. Hāmri nhūm Tirtūm kapêr o mê hêx o mê pa xwÿnhhtaja haxwÿja kuma hāmri nê amnhī krā hkôt hijuk ri tanhmā ho hêx to. Te mê kot hprī hā mar nê harênh pyrāk nom hprī hā mar kêt nê. Á na htem Tirtūm kapêr ā kagà piitā ho hêx o pa anê. Mÿrapê koja mê nhÿrmā amnhī xā kamā hamak tÿx kumrêx.

¹⁷ Tā e Kris kôt ixkràmnhwÿjaja. Ra mê ate mê harênh mar jakamā kwa mê okora. Mê amnhī nê mê omunh mex nê mê hkôt amnhī nhīpêx kêt nê. Kot kaj mê anê nê Tirtūm kôt amnhī nhīpêx mex kêt nê. ¹⁸ Na ka htem mê papytār xwÿnh Pahihtī Jejus Kris kôt ri amnhī nhīpêx o apa. Tā kêr ka mê arī hkôt amnhī nhīpêx mex rāhā ho ri apa. Nê hkôt amnhī xunhwÿr tÿx nê. Kêr kê amnhī tā mê apumu nê mēmoj to mê akutā nojarêt nê. Krisja mex o mex nê hihtÿx o hihtÿx. Tā kêr pu mê kām mex o mex ā mǎn harênh rāhā ho ri papa.

Tā ām ja pix. Ixpê Simāw Pêtre na pa ā mê amā ja hā kagà nê mê awÿr mēnh anê.

Wam Juāw Juāw kot Jejus kôt hkwỳjê hwỳr kagà nê mēnh

Juāw na pre kagàja nhîpêx. Na pre kagà hkwỳ nhîpêx rax nê. Na pre mǎānēn Juāw kot tanhmā Jejus kot amnhî nhîpêx to ho pa ā kagà nê Apokarip nê Sikūn Juāw nê Hapuhā Juāw nhūm pre ja piitā Tirtūm nhỹ hā hā kagà.

Juāwja Jejus nhỹ hā hkrajê jahkre ho mē pa xwỳnhjê hō na pre. Nê kēp Xiakre htō na pre. Tā ra hpigêt tỳx nê kagàja nhîpêx. Urāk nê mē kot Tirtūm kôt amnhî xunhwỳr xwỳnhjê mǎ hipêx. Mē kot kamā harēnh nê mar nê kām axpēn kīnh o pa kaxyw. Nê mē kot amnhî tomnuj ā amnhî pumunh kôt tanhmā amnhî nhîpêx to hā mē kām karō nê hā kagà. Ā na pre Juāw mē kām mēmoj jarēnh nê hā kagà anē nê mē hwỳr kumē. Nê mē kām:

Jejus kēp Tirtūm kapēr o amnhîrīt xwỳnh ā harēnh

Juāw 1.1-4; Eprêw 1.1-4

¹ Pa ixpyrà nê mē ate Jejus kôt amnhî xunhwỳr xwỳnhjaja? Xà mē amex? E ot pa mē amā kagàja nhîpêx nê mē awỳr kumē. Ixte mē amā Tirtūm kapēr o amnhîrīt xwỳnh jarēnh kaxyw. Amnepê mǎ kormā mēmoj amrakati ri nhūm pre ra rāhā ri pa ho pa. Ām kukwak ri pix mǎ na pu htem Tirtūm mē wa kuri pahťir tūm nê papa ho papa mǎ xwỳnh. Tā ŷ hā mē ixte kapēr o mē ajahkre ho ri mē ixpa xwỳnhjaja na pa prem ixpiitā kormā akupỹm kaxkwa hwỳr àpir kêt ri inhno ho omunh o ri hkôt ixpa. Nê mē ijamak o kapēr mar o ri hkôt ixpa. Nê mē inhīhkra ho hkupēnh o ri hkôt ixpa. ² Na pre kaxkwa kamā Hipêêxà hkôt ri pa ho pa htā amnē pika hwỳr mē pahwỳr wrỳ. Hāmri nê jar mē pakamā kato pa pre mē ixkwỳjaja omu. Tā mē ixte omunh xà hkôt na pa htem amnhî xō ri tanhmā mē amā harēnh to. Koja nhỹrmā akupỹm mē pahto mē pahťir pu mē kuri pahťir tūm nê pamex nê papa ho papa. ³ Na pa prem tanhmā kapēr to hā mar o ri

hkôt ixpa. Nê kot tanhmā mē kām amnhî nhîpêx to hā omunh o ri hkôt ixpa. Ta kagàja kamā amnhî xō ri ixprī hā mē amā harē nê hā kagà. Mē ate ixpyrà nê aprī hā kot tanhmā amnhî nhîpêx to ho pa hā harēnh mar kaxyw. Jao mē pahpiitā te ixkre tipxi kamā mē papa pyrāk o amnhî nhîpêx o papa nê axpēn kôt pajamaxpēr o ri papa. Jao Mēpanhîpêêxà Maati mē Kra Jejus Kris wa hkôt amnhî nhîpêx mex o ri papa. ⁴ Tā pa mē amā kagàja nhîpêx nê mē awỳr kumē. Mē ate kamā harēnh nê mar hāmri nê mē ixpyrà nê ajamakêtkati nê akīnh nê ri apa kaxyw.

*Tirtūm mex o mex ā harēnh
Juāw 8.12; Epes 5.3-21; Wam Tesarōn 5.5;
Eprêw 4.14-16, 9.11-14*

⁵ Nê Jejus kot tanhmā mē inhmā Tirtūm jarēnh toja kot paj amnhî xō ri mē amā hā kagà. Nā Tirtūm kot amnhî nhîpêxja mex o mex. Aa kot tanhmā amnhî tomnuj to hkêt. Mex o mex jakamā na hte tanhmā mē kot amnhî tomnuj to mǎ amnhî jagjēnh kêt. Ām kot amnhî to mex o kot amnhî to mex rāhā nê pa ho pa xwỳnh na. ⁶ Kot mē pahte amnhî tomnuj kêt ā mē pamā karō jakamā kot puj mē pahpê hkra hā amnhî jarēnh tā amnhî tomnuj pix o ri papa nê ām pahpê hkra hā amnhî jarēnh kaprỳ nê amnhî to paxêx. Tirtūm krajaja na htem amnhî tomnuj o pa hkêt nê. ⁷ Nom kot puj mē hkôt amnhî nhîpêx nê urāk nê tām ri amnhî nhîpêx o papa. Nê kapēr kôt ri amnhî nhîpêx. Hāmri nê te ixkre tipxi kamā ri Tirtūm mē Kra Jejus Kris wa hkôt axpēn to papa pyrāk o amnhî nhîpêx. Na pre Jejus mē panē ty nê hkamrō axkapī. Jao mē pahte hkôt amnhî xunhwỳr xwỳnhjaja mē panē mē pahte amnhî tomnuj piitā hpānhā amnhîrer pa. Jakamā ām kukwak ri pix mǎ na pu htem tām amnhî nhîpêx o ri papa.

*Mē pahpiitā mē pahte amnhî tomnuj
xwỳnh ā mē pajarēnh*

⁸ Nê mē pahte tōhā tanhmā amnhî tomnuj to jakamā kot puj mē aa pahte amnhî tomnuj kêt ā amnhî jarē hāmri nê ā amnhî jarēnh anhỹr o paxêx. Tirtūm kot mē pahpiitā mē pahte amnhî tomnuj ā mē pahpumunh xwỳnh kēnā.

Mē pahte amnhĩ tomnuj nē tanhmā amnhĩ nhĩpêx to hã mē pamā karō

Xiakre 4.9-10

⁹ Nē mē pahpê Tĩrtũm krajaja na pu htem tanhmā amnhĩ tomnuj to hãmri nē tee ri ja hã amnhĩ pumu nē pahkaprĩ nē. Nē tokyx amnhĩ to Tĩrtũm wỳ. Hãmri nhũm mē pama nē Jejus kukwak ri tanhmā hã mē pahto hkêt nē. Ām amnhĩ katut kôt tanhmā mē pahte amnhĩ tomnuj tota rē nē axte kām hamaxpêr kêt nē. Ra kot mē pahtā amnhĩ jarēnh xà hkôt. Na hte Tĩrtũm amnhĩ jarēnh xà hkôt tanhmā amnhĩ nhĩpêx to. Tã ra kot mē pahpê hkrajaja mē pahte amnhĩ tomnuj piitā amnhĩ katut kôt rēnh par ā amnhĩ jarēnh jakamā na pre ā mē panhĩpêx anē. Na hte mēmoj tã tanhmā amnhĩ jarēnh to hãmri nhũm apkati nhũm ihkjê ho kumē nē axtem tanhmā mēmoj jarēnh to hkêt nē. ¹⁰ Ra kot mē pahpiitā mē pahte amnhĩ tomnuj xwỳnh ā mē pajarēnh jakamā kot puj mē pahtō ā mē pajarēnh anhỹrja ma nē hkôt pajamaxpêr kêt japêr. Rỳ kuma nē ām kuma nē pajamaxpêr o:

–Nà ixte tanhmā amnhĩ tomnuj tore hã.

Anhỹr o amnhĩ jarē. Hãmri nē te ate Tĩrtũm hêx xwỳnh ā harēnh pyrāk. Jao amā kapêr mar prām kêt ā amnhĩ to amnhĩrīt.

2

Jejus kêp mē paxyr pê Tĩrtũm mǎ kapêr xwỳnh ā harēnh

Wam Ximotre 2.5; Eprêw 9.11-14

¹⁻² E mē ate amnhĩ tomnuj o apa hkêt kaxyw na pa ā mē amā ixkapêr nē hã kagà anē. Mē ate kamā harēnh nē mar hãmri nē tanhmā amnhĩ tomnuj to hkêt kaxyw. Jejus Kris na pre mē pahpiitā mē pahte amnhĩ tomnuj pãnhã amnhĩrer kaxyw mē panê ty. Jakamā kot puj mē pahpê hkrajaja tanhmā amnhĩ tomnuj to nhũm ja hã mē pahpumu nē te kêp mē paxyr pê Tĩrtũm mǎ kapêr xwỳnh pyrāk o amnhĩ nhĩpêx. Mē pakurom aa kot amnhĩ tomnuj kêt jakamā na hte mē paxyr pê Tĩrtũm mǎ kapêr nhũm kuma. Hãmri nē kukwak ri pix mǎ mē pahte tanhmā amnhĩ tomnuj to piitā amnhĩ katut kôt rēnh pa nē axte kām hamaxpêr kêt nē.

Tĩrtũm krajaja kot Tĩrtũm kôt amnhĩ nhĩpêx ā mē kām karō

³ Nē na pu htem Tĩrtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nē. ⁴ Nom koja mēhō kêp hkra hã amnhĩ jarēnh tã hkôt amnhĩ nhĩpêx kêt nē ām kêp hkra hã amnhĩ to hêx. ⁵ Na htem Tĩrtũm kapêr kôt amnhĩ nhĩpêx o pa pê kām hkĩnh tỳx ā amnhĩ to amnhĩrīt. Nē kêp hkra hã amnhĩ to amnhĩrīt mex o pa. ⁶ Jakamā kêr ka mē apê Jejus Kris kwỳ hã amnhĩ jarēnh xwỳnhjaja hkôt pix mǎ amnhĩ nhĩpêx mex o ri apa.

Mē pamā axpên kĩnh ā mē pamā karō Juāw 13.34-35; Wam Juāw 3.14-18

⁷ E Kris kôt ixkràmnhwỳjaja. Inhmā mē akĩnh jakamā na pa ā mē amā mēmoj jarēnh nē hã kagà anē. Kot paj mē amā mēmoj nyw jarēnh kêt nē. Ra mē ate mēmoj mar xwỳnhhta kot paj axte mē amā harê. Mē pamā axpên kĩnh nē tām axpên nhĩpêx o papa hã Tĩrtũm kot mē pamā karōta. Ra mē ate mar tã kot paj axte mē amā harê nē hã kagà. ⁸ Wam Tĩrtũm kot mē pamā axpên kĩnh ā mē pamā karōja kormā Jejus kot mē panê htyk hkêt ri kot mē pamā hã karōta na. Tã ra Jejus kām mē pajapê xàj mē panê htyk jakamā na pa axte ā mē ate axpên nhĩpêx anhỹr o apa hã mē amā karō nē hã kagà. Mē ate Kris pyrā nē amā axpên kĩnh xàj tanhmā axpên kutā anojarêt to ho ri apa kaxyw. Nom kormā mē pahte Jejus kôt amnhĩ xunhwỳr kêt ri na pu prem ā axpên nhĩpêx anhỹr kêt nē. Tã hkôt amnhĩ xunhwỳ hãmri nē ā axpên to mex o papa anē. ⁹⁻¹¹ Tã koja mēhō kot Jejus kôt amnhĩ nhĩpêx ā amnhĩ jarēnh tã kām hkwỳjê hkĩnh kām àmnhĩx ri mē kutā nojarêt o pa hkêt nē. Hãmri nē kot Jejus kôt amnhĩ nhĩpêx ā amnhĩ jarēnh ā amnhĩ to hêx. Jao te htỳx ri kamàt kô kamā pa pyrāk. No koja mēhō kām hkwỳjê hkĩnh kām mē kutā nojarêt o pa nē mǎānēn Jejus kôt amnhĩ nhĩpêx mex o pa. Jao te hirā kamā ri pa pyrāk. Jakamā tanhmā hkwỳjê homnuj to ho pa hkêt nē mē piitā mē ho mex o axpên pyrāk o pa.

Juāw kot mē piitā ahpỳnhã tanhmā mē kām kapêr to

12-14 E kot pa ahpÿnhã tanhmã mẽ amã ixkapër to nẽ hã kagà. Mẽ apiitã te mẽ apê ixkra pyræk. Na ka prem Jejus kôt amnhĩ xunhwÿ nhũm Tirtũm ja hã mẽ apumu nẽ Kra kukwak ri mẽ ate amnhĩ tomnuj pitã amnhĩ katut kôt rẽnh pa nẽ axte kãm hamaxpër kêt nẽ. Jakamã ra mẽ ate Tirtũm kęp Mẽpanhĩpêêxà Maati hã omunh mex.

Nẽ mẽ ate Jejus kôt amnhĩ xunhwÿr ã amgrà xohtô xwÿnhjaja. Amnepêm amrakati ri Jejus ra rãhã ri pa ho pa xwÿnhja kôt mẽ ate amnhĩ xunhwÿr xwÿnhjaja kot paj mẽ amã tanhmã ixkapër to nẽ hã kagà.

Nẽ mẽ akwÿjaja ham Jejus kôt mẽ ate amnhĩ xunhwÿr xwÿnhjaja ra mẽ ate Tirtũm kapër mã ajamxpër rãhã ho ri apa. Jakamã na hte Satanasti mẽ ate amnhĩ tomnuj prãm xaj tee ri tanhmã mẽ akrã hto ka mẽ Jejus nhÿ hã kutã amnhĩ to htÿx pẽ hkôt amnhĩ nhĩpêx kêt nẽ.

Mẽ kot amnhĩ tomnuj xwÿnhjaja tanhmã kot amnhĩ nhĩpêx to

Matêwre 6.24; Eprêw 11.24-26; Xiakre 4.4

15 Nẽ kêr ka mẽ amã Tirtũm kôt amnhĩ nhĩpêx prãm xaj mẽ kot amnhĩ tomnuj xwÿnhjê hkôt amnhĩ nhĩpêx kêt nẽ. Nẽ mẽ hamaxpër punuj xwÿnhjê hkôt ri amnhĩ nhĩpêx kêt nẽ. Kot kaj mẽ hkôt amnhĩ nhĩpêx hãmri nẽ amã Tirtũm kĩnh kêt ã amnhĩ to amnhĩrít. 16 Mẽ kot amnhĩ tomnuj xwÿnhjaja na htem mẽmoj punuj mã hamaxpër nẽ hkôt tanhmã amnhĩ tomnuj to. Nẽ mẽmoj pumu nẽ ra kãm ho õ hprãm nom Tirtũm pẽ ja omnuj ã hkamnhĩx kêt nẽ. Rÿ tanhmã mẽhõ kot amnhĩ tomnuj to hã omu nẽ hkôt kãm amnhĩ nhĩpêx prãm. Nẽ tanhmã amnhĩ to jarkrar to ho ri pa. ã na hte mẽ kot amnhĩ tomnuj xwÿnhjaja amnhĩ nhĩpêx anhÿr o pa. Mẽ kot amnhĩ nhĩpêxja Mẽpanhĩpêêxà Tirtũm kãm hprãm kêt. 17 Koja nhÿrmã mẽ kot tanhmã amnhĩ tomnuj toja piitã hapêx pa. Nẽ mẽ hamaxpër punujja mãânên nhÿrmã hapêx pa. Nẽ mẽ kot amnhĩ tomnuj o mẽ pa xwÿnhjaja koja mẽ amnhĩ xà htÿx kamã hamak rãhã ho pa ho pa. No Tirtũm kôt mẽ kot amnhĩ nhĩpêx o mẽ pa xwÿnhjaja koja mẽ kurom kuri htĩr tũm nẽ mex nẽ hkĩnh nẽ pa ho pa.

Kãm Kris kurê xwÿnh maati jarẽnh Wam Juãw 4.1-6; Sikũn Juãw 7-11

18 E Kris kôt ixkwÿjaja. Kris akupÿn mẽ pahwÿr wrÿk kukamã koja mẽmoj tanhmã amnhĩ nhĩpêx to. Na pre ra Kris kôt mẽ panhĩõja mẽ pamã ã harẽnh anẽ nẽ harẽnh o:

–Koja mẽ panhõ Pahihti Kris akupÿn mẽ pahwÿr wrÿk kaxyw hãmri nhũm kęp Kris ã amnhĩ to hêx xwÿnh maati kumrêx nhÿhÿnh kato. Hãmri nẽ hêx rom te Kris pyrã nẽ tanhmã mẽ kãm kapër to nẽ tanhmã mẽ hipêx to ho pa nhũm rĩ kormã Kris akupÿn mẽ pahwÿr wrÿ. Anẽ.

Na pre hkukamã ã harẽnh anẽ ka mẽ harẽnh ma. Tã ra mẽ kęp Kris ã amnhĩ to hêx xwÿnhjaja ohtô nẽ mra nẽ kãm hkurê xwÿnh maatita kukamã tanhmã amnhĩ nhĩpêx to pẽ mẽ kãm amnhĩ to hêx o pa. Jakamã na pa ixprĩ hã mẽ amã tanhmã mẽ harẽnh to. Koja tokyx kęp Kris ã amnhĩ to hêx xwÿnh maatita nhÿhÿnh mẽ pahwÿr kato. 19 Na pre hkwÿjaja mẽ pahpê Kris kwÿjê hkôt ri pa htã mẽ pahkĩnhã kęp Kris kwÿ hkêt. Kęp hkwy ronhÿx arĩ mẽ pahkôt Kris kôt amnhĩ nhĩpêx o pa. Nom axtem nẽ àhpumunh tÿx pyrã nẽ mẽ pahkaga nẽ htÿx tanhmã amnhĩ tomnuj to ho pa. Jao kęp Jejus kwÿ hkêt ã amnhĩ to amnhĩrít.

20 No kêt mẽ pahpê Tirtũm krajaja na pre Jejus mẽ pahwÿr Karõ rẽ nhũm mẽ pahkarõ mã agjê nẽ mẽ pahkrãm kapër mex jagjê. Jakamã na pu mẽ mẽ kęp Kris kwÿ hkêt xwÿnhjê rom Tirtũm kapër mar mex nẽ.

21 Xà mẽ ate Tirtũm kapër ã kagà pumunh kêt kôt na pa ã mẽ amã ixkapër nẽ hã kagà anẽ? Nà ra mẽ ate omunh nẽ mar mex kênã. Tã mẽ ate mẽ kot tanhmã Jejus o hêx to xwÿnhjê pumunh mex nẽ mẽ harẽnh mar mex kaxyw na pa ã mẽ awÿr kagà nhĩpêx nẽ mẽn anẽ. Kêr kê mẽ mẽmo arĩgro hã mẽ awÿr agjê nẽ tanhmã mẽ amã Jejus o hêx to ka mẽ aprĩ hã mẽ omunh mex kurê kumrêx. 22 Tanhmã na htem Jejus o hêx to? E kot paj ixprĩ hã mẽ amã tanhmã mẽ harẽnh to ka mẽ inhma. Nà koja mẽhõ mẽ amã tanhmã harẽnh to nẽ harẽnh o:

–Nà Jejus kęp Tirtũm Kra hkêt. Tirtũm kot mẽ pahwÿr mẽn kêt tã ka htem atÿx kapër kôt ri amnhĩ nhĩpêx o ri apa. Kwa

kêt mē ixkapēr kôt mǎn ri amnhĩ nhĩpêx o ri apa.

Anh̄yr o mē amǎ kapēr ka mē ama nē kām Kris mē Tirtūm wa hkĩnh kêt xw̄ynh ā omunh kurê kumrêx. ²³ Kojā mēhō Tirtūm Kra Jejus kaga nē mǎānēn Hipêêxà kaga. No kojā mēhō Tirtūm Kra hkôt amnhĩ xām nē mǎānēn Hipêêxà hkôt amnhĩ xām.

Mē pahte Kris kaga pymaj tanhmǎ amnhĩ nhĩpêx to hǎ mē pamǎ karō

²⁴ Amnepēm mē ate Jejus kôt amnhĩ xunhw̄yrta ā na ka prem kēp Tirtūm Kra hǎ Tirtūm kot mē pahw̄yr mēnh xw̄ynh ā harēnh ma. Tǎ kēr ka mē arĩ amnhĩ kaxyw hkôt ajamaxpēr nē hkôt pix mǎ amnhĩ nhĩpêx o ri apa. Kot kaj mē anē nē Mēpanhĩpêêxà Maati mē Kra wa hkôt amnhĩ nhĩpêx mex o apa rǎhǎ ty. ²⁵ Hāmri nē wa kuri atĩr tūm nē amex kumrêx nē apa ho apa. Ra Jejus kot ja jarēnh xà hkôt.

²⁶ Na pa ā mē amǎ ixkapēr nē hǎ kagǎ anē. Mē aprĩ hǎ mē amǎ Jejus o hêx xw̄ynhjê kapēr mar nē mē kot mē amǎ hêx kôt mē omunh mex kaxyw. ²⁷ Tirtūm Karō na pre mē akarō mǎ gjêx pa nē mē amǎ Tirtūm kapēr piitǎ o amnhĩrīt mex o mē akôt pa. Jakamǎ mēmo kaxyw kot kaj mē Tirtūm kapēr o hêx xw̄ynhjaja kot tanhmǎ harēnh toja ma? Ra Tirtūm Karō kot mē amǎ ho amnhĩrīt o mē ajahkre mex o pa kēnǎ kot ka kêt mē nhām mē kapēr ma. Na hte Tirtūm Karōja mē urǎ nē Tirtūm kapēr ho hêx kêt nē. Ām katàt kôt kot ho amnhĩrīt mex jakamǎ kwa kēr ka mē mar t̄yx nē hkôt ri amnhĩ nhĩpêx mex rǎhǎ ho ri apa.

Mē pahte tām ri amnhĩ nhĩpêx ā mē pamǎ karō

Juāw 14.25-26, 15.1-8

²⁸ E Jejus kôt ixkrajaja. Kēr ka mē arĩ Kris kôt amnhĩ nhĩpêx mex rǎhǎ ho ri apa. Kê nh̄ymǎ akup̄yn mē pahw̄yr wr̄yk o tē ka mē amnhĩ w̄yr omu nē akĩnh nē. Nē akĩnh kām axāmnhĩx kutǎ mra nē hkaxpa nē amnhĩ kamǎ amǎ uma hkêt nē. R̄y mēmoj tǎ amnhĩ tǎ apijaàm kêt nē. Ām axāmnhĩx akĩnh nē ma kutǎ mra. ²⁹ Krisja mex o mex jakamǎ na pu htem urǎk nē amnhĩ to mex o ri papa. Mē pahte amnhĩ to mex o papa xw̄ynhjaja urǎk nē mē pahpê Tirtūm kra na pu mē.

3

Tirtūm krajê hkukamǎ tanhmǎ mē harēnh to
Rōmǎn 8.18; Sikūn Korīt 3.18; Sikūn Pêtre 3.11-14

¹ Nē Mēpanhĩpêêxà Maati kām mē pajapê ht̄yx kumrêx jakamǎ na pre mē pahte hkôt amnhĩ xunhw̄yr ā mē pahpumunh kôt mē pahpê hkra hǎ mē pajarê pu mē pahpê hkra nē ri papa. Ja na mē pamǎ mex o mex. Nom mē kot hkôt amnhĩ xunhw̄yr kêt xw̄ynhjaja kot hprĩ hǎ ja hǎ mē pahpumunh kêt jakamǎ na htem mē pahte tām amnhĩ nhĩpêx ā mē pahpumu nē tee ri hamaxpēr.

² E Kris kôt ixkw̄yjaja. Ra mē pahpê Tirtūm kra htǎ kormǎ mē pahte amnhĩ kukamǎ mē pahprĩ hǎ ja hǎ amnhĩ pumunh mex kêt. Kojā nh̄ymǎ Jejus akup̄yn mē pahw̄yr wr̄y pu mē pano ho tanhmǎ kute hǎ omunh mex nē. Hāmri nē tǎ te kot amnhĩ nhĩpêx pyrǎk o amnhĩ nhĩpêx mex o papa. Ra mē pahte ja mar mex. ³ Ā mē pahte amnhĩ kukamǎ pajamaxpēr anh̄yr o papa xw̄ynhjaja na pu htem kormǎ amnhĩ w̄yr Jejus kamǎ pajamak o papa. Pê urǎk nē mēmoj punuj mǎ pajamaxpēr kêt o papa. Nē urǎk nē tanhmǎ amnhĩ tomnuj to hkêt nē.

Tirtūm krajaja kot amnhĩ tomnuj o pa hkêt ā mē kām karō

⁴ Nē mē kot amnhĩ tomnuj o mē pa xw̄ynhjaja na htem Tirtūm kapēr kw̄ym ri amnhĩ nhĩpêx o pa. Tǎ kot puj mē tanhmǎ amnhĩ tomnuj to hāmri nē mē urǎk nē kapēr kw̄ym ri amnhĩ nhĩpêx. ⁵ No Jejus na pre mē pahte amnhĩ tomnuj pǎnhǎ amnhĩrer kaxyw mē pahw̄yr wr̄y. Aa kot amnhĩ tomnuj kêt jakamǎ tapxipix kot mē pahpānhǎ amnhĩrer mǎ tām. Ra mē pahte ja jarēnh mar mex. ⁶ Jakamǎ mē pahpê hkwȳjaja na pu htem ri paht̄yx tanhmǎ amnhĩ tomnuj to ho papa hkêt nē. Ā mē kot amnhĩ nhĩpêx anh̄yr xw̄ynhjaja kēp hkwȳ hkêt. ⁷ Nom kojā mēhō Kris pyrǎ nē tām amnhĩ nhĩpêx o pa hāmri nē kēp Tirtūm kraa. Jakamǎ kwa kojā mēhō Tirtūm kapēr kw̄ym ri tanhmǎ mē amǎ kapēr to ka mē ama nē ām ama. ⁸ Mē kot amnhĩ tomnuj o mē pa xw̄ynhjaja na htem Satanasti hkôt ā amnhĩ nhĩpêx anh̄yr o pa. Satanastija

Tīrtūm kot mẽmoj to kator krax rūm nhūm ã kot amnhĩ tomnuj anhỹr o pa xwýnh na. Tã ã kot amnhĩ nhĩpêx anhỹr o paja o hapêx par kaxyw na pre Tīrtūm Kra Jejusja amnê pika hwýr wrý.

⁹ Nom mẽ papajaja mẽ pahpê Tīrtūm kra na pu mẽ. Na pre mẽ pahwýr amnhĩ Karō rē nhūm mẽ pahkarō mã gjêx pa nē mẽ pahkôt pa ho pa. Jakamã tanhmã kot puj wem amnhĩ to nē Satanasti pyrã nē pahtýx ri amnhĩ tomnuj o papa? Nà kot puj mẽ ã amnhĩ nhĩpêx anhỹr kêt nē. ¹⁰ Koja mẽhō tãm amnhĩ nhĩpêx kêt nē hãmri nē mãânēn hkwýjê kamã ukaprĩ hkêt nē. Hãmri nē ã amnhĩ nhĩpêx anhỹr o kêp Tīrtūm kra hkêt ã amnhĩ to amnhĩrīt. ãm kêp Satanasti hkra hã amnhĩ to amnhĩrīt kurê kumrêx.

Mẽ pamã axpên kĩnh o te Jejus kãm mẽ pahkĩnh pyrãk ã mẽ pamã karō

Matêwre 22.39; Rukre 10.25-37; Juāw 13.31-35

¹¹ Nē kêt ka mẽ arĩ amã axpên kĩnh pē tãm axpên nhĩpêx o ri apa rãhã nē. Te amnepê mã mẽ ate Jejus kôt amnhĩ xunhwýr ã arĩgrota ã mẽ kot mẽ amã ja hã karō pyrã nē. ¹² No mẽ ri finat Kaĩ kot amnhĩ nhĩpêx pyrãk o amnhĩ nhĩpêx kêt nē. Kêp Satanasti hkra jakamã na pre htōja pĩ. Kurom kot tãm amnhĩ nhĩpêx ã omu nē kamã gryk nē kupĩ. ¹³ Tã koja mẽ kêp Tīrtūm kra hkêt xwýnhjaja Kaĩ pyrã nē kêp mẽ aprãm nõkati nom kêt ka mẽ amnhĩ tã mẽ omu nē tee ri amnhĩ kukamã ajamaxpêr kêt nē. ¹⁴ Kormã mẽ pahte Jejus kôt amnhĩ xunhwýr kêt ri na pu prem mẽ urãk nē amnhĩ tomnuj o papa. Jao mẽ pahpê kuwy hwýr papa mã xwýnh. Tã mẽ pahte Jejus kôt amnhĩ xunhwýr jakamã ra pahpê Tīrtūm mẽ Kra wa kuri pahtĩr tũm nē papa mã xwýnh. Jakamã na pu htem mẽ kêp hkra hkêt xwýnhjê kurom pamã mẽ piitã mẽ hkĩnh o tanhmã mẽ ho mex to ho papa. Mẽ kãm amnhĩ kwýjê hkĩnh kêt xwýnhjaja arĩ mẽ kêp kuwy hwýr mẽ pa mã xwýnh na mẽ. Ra mẽ pahte ja jarēnh mar mex. ¹⁵ Mẽ kãm mẽ hpar prãm o mẽ pa xwýnhjaja koja nhỹrmã Tīrtūm mẽ Kra wa kuri htĩr tũm nē pa ho pa hkêt nē. Ra mẽ pahte mãânēn ja mar mex. Jakamã kwa mẽ amã akwýjê hprãm nõkati ho ri mẽ apa xwýnhjaja. Tīrtūm noo mã te ra mẽ

ate mẽ hpar pyrãk jakamã kot kaj mẽ arĩ ã amnhĩ nhĩpêx anhỹr o ri apa hãmri nē nhỹrmã Tīrtūm nhō krĩ hwýr axãpir kêt nē.

¹⁶⁻¹⁸ E ixkwýjaja. Kwa kêt pu mẽ pajakwa pix o pamã axpên kĩnh ã amnhĩ jarēnh kêt nē. Mãânēn axpên kutã panojarêt o ri papa. Nē tanhmã axpên to mex to. Tanhmã na pre Jejus kãm mẽ pajapê hã amnhĩ nhĩpêx to? Nà na pre kãm mẽ pamex prãm xàj mẽ panê ty. Kãm amnhĩ tã ma hkêt kãm mẽ pakamã ukaprĩ xàj mẽ panê ty. Tã kêt pu mẽ urãk nē pahkwýjê kamã paxukaprĩ ho mẽ kutã panojarêt rãhã ho papa. Jao mẽ paxãpkur xà hã panhō pumu nē nhỹri pahkwýjê hō pumu nhūm kêp amrakati. Pu mẽ tee ri ja hã omu hãmri nē kãm mẽ panhōta kwý gō. Kot pu mẽ ã amnhĩ nhĩpêx anhỹr kêt nē hãmri nē pamã Tīrtūm kĩnh ã amnhĩ jarēnh kaprý. ¹⁹ Nē kot puj mẽ ã axpên to mex o papa anē nē ra pahte Tīrtūm kôt amnhĩ nhĩpêx mex ã amnhĩ to amnhĩrīt. Hãmri nē ra paxãmnhĩx kãm tanhmã amnhĩ jarēnh to ho papa. Amnhĩ kamã pamã uma hkêt nē paxãmnhĩx pajamakêtkati nē kãm tanhmã amnhĩ jarēnh to.

Mẽ paxãmnhĩx amnhĩ to Tīrtūm wýr ã mẽ pamã karō

²⁰ Nē kot puj mẽ mẽmo arĩgro hã tanhmã amnhĩ tomnuj to hãmri nē tee ri ja hã amnhĩ pumu nē amnhĩ kamã pagryk nē. Na hte Tīrtūm tanhmã mẽ pahte amnhĩ tomnuj to hã mẽ pahpumu nom arĩ kãm mẽ pajapêê. Mẽ parom àhpumunh o àhpumunh jakamã kot mẽ pahte amnhĩ tomnuj prãm kêt ã mẽ pahpumunh mex. ²¹ Jakamã puj mẽ ã kãm pajamaxpêr anē nē amnhĩ kamã pamã uma hkêt kãm paxãmnhĩx tanhmã ri amnhĩ to hwýr to ho ri papa. ²² Kot puj mẽ hkôt amnhĩ nhĩpêx o papa rãhã nē mẽmoj tã kuwý. Nē kãm hprãm xà hkôt amnhĩ nhĩpêx o papa hã amnhĩ pumunh kôt mẽmoj tã kuwý. Hãmri nhūm mẽ pama nē tanhmã mẽ pamã mẽmoj to rý mẽ pamã mẽmoj gō.

Te ixkre pixi kamã mẽ pahtipxi pyrãk ã mẽ pamã karō

²³ Nē tanhmã mẽ pahte amnhĩ nhĩpêx to ho papa hã na hte Tīrtūm mẽ pamã karō? Nà mẽ pahte amnhĩ kaxyw Kra Jejus Kris

kôt pajamexpēr nē hkôt amnhĩ nhĩpêx o papa hã na hte mẽ pamã karõ. Nē kapēr xà hkôt pamã axpên kĩnh o mẽmoj to axpên kutã panojarêť o papa hã na hte mẽ pamã karõ. Na hte ã mẽ pahte amnhĩ nhĩpêx anhỹr ã mẽ pamã karõ anē. ²⁴ Jakamã kot puj mẽ kapēr xà hkôt axpên nhĩpêx o papa nē te ixkre tipxi kamã mẽ pahte axpên kôt Tĩrtũm kôt ri papa pyrãk. Ra kot mẽ pahwỹr Karõ rēnh nhũm kot mẽ pahkarõ mã gjêx jakamã na hte mẽ pahkôt pa ho pa hã amnhĩ to amnhĩrĩť.

4

Mẽ kot Kris kapēr jarēnh ã amnhĩ to hêx xwỹnhjê jarēnh

Wam Korĩť 12.1-3; Wam Juāw 2.18-26; Sikũn Juāw 7-11

¹⁻³ Nē koja mẽhõ Tĩrtũm kapēr o mẽ ajahkre kaxyw mẽ amã tanhmã Jejus Kris jarēnh to nē ãm hãmri harē nē harēnh o:

–Na pre Tĩrtũm Kra Jejus mẽ pahwỹr wrỹ nē ĩ ho ĩ ho mẽ pakamã kato. Tĩrtũm tãm na pre mẽ pahwỹr kumē nhũm wrỹ.

Anhỹr o mẽ amã harē ka mẽ ama nē kapēr kôt ajamexpēr kurē kumrêx. ãm hãmri na hte Tĩrtũm Karõ nhỹ ã harēnh anē. No koja Jejus kêp Tĩrtũm Kra hkêt ã harē ka mẽ ama nē ãm ama nē hkôt ajamexpēr kêt nē. Kãm Kris kurē xwỹnh maati nhỹ hã kapēr xwỹnhjaja na hte ã harēnh anhỹr o pa. Na ka prem ra kãm Kris kurē xwỹnh maati ja tokyx hpõx ã harēnh ma. Tã na ra ĩ hã kapēr xwỹnhjaja ohtõ nē pika piitã hkôt mẽ hkôt pa nē te Tĩrtũm Karõ nhỹ hã mẽ kãm kapēr pyrãk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwỹjaja. Koja mẽhõ mẽ awỹr mra nē tanhmã mẽ amã Tĩrtũm kapēr jarēnh to ka mẽ aprĩ hã ama nē rĩ kormã kêp Tĩrtũm nhỹ hã kapēr jarēnh xwỹnh ã harē rỹ kot amnhĩ to hêx xwỹnh ã harē.

⁴ Kêt mẽ papajaja jajê rom mẽ pahpê Tĩrtũm kra na pu mẽ. Nē Tĩrtũm Karõ kot ra mẽ pahkarõ mã gjêx xwỹnhhta hihtỹx o jajê piitã mẽ hakrenh. Jakamã na pu htem ĩ hã mẽ kutã amnhĩ to htỹx o papa nhũm mẽ tee ri tanhmã mẽ pamã Jejus o hêx to kaprỹ. Pu mẽ kuma nē ãm mẽ kuma. ⁵ Mẽ kêp Tĩrtũm kra hkêt jakamã

na htem hkôt amnhĩ nhĩpêx kêt nē. Mẽ kot amnhĩ nhĩpêxja axtem na. Jakamã na htem Tĩrtũm kapēr kwỹm ri tanhmã hkra hkêt xwỹnhjê mã kapēr to ho pa nhũm mẽ kuma nē kãm mẽ mar prãm nē. ⁶ Nom mẽ ixte Tĩrtũm kapēr o mẽ ajahkre xwỹnhjaja na pu htem mẽ kurom Tĩrtũm nhỹ hã ixkatat kôt ãm hãmri mẽ amã kapēr jarēnh o ri ixpa. Jakamã ka mẽ apê hkra hã mẽ amã mẽ inhmar prãm nē. No mẽ kêp hkra hkêt xwỹnhjaja kãm mẽ inhmar prãm kêt.

Na pu htem pahprĩ hã mẽ kapēr ã mẽ kuma nē rĩ kormã tanhmã mẽ harēnh to. Tĩrtũm nhỹ hã kapēr ã mẽ harē rỹ kãm hkurê xwỹnh maati nhỹ hã kapēr ã mẽ harē.

Tĩrtũm kãm mẽ pajapê hã tanhmã amnhĩ nhĩpêx to hã harēnh

Juāw 3.16-21; Rõmãn 5.5-9, 8.35-37

⁷ E ixkwỹjaja. Na hte Tĩrtũm tanhmã mẽ pahpê hkrajê ho pu mẽ pamã axpên kĩnh nē. Jakamã kêp pu mẽ ã axpên nhĩpêx anhỹr jao axpên to mex pix nē. ã Tĩrtũm kot mẽ panhĩpêx anhỹr jakamã kêp pu mẽ pahpê hkrajaja ĩ hã ã axpên nhĩpêx anhỹr o ri papa.

⁸ Koja mẽhõ Tĩrtũm kĩnhã kãm mẽ hkwỹjê hkĩnh kêt hãmri nē mẽ kamã ukaprĩ hkêt o pa. Hãmri nē kêp Tĩrtũm kra hkêt ã amnhĩ to amnhĩrĩť mex nē.

⁹⁻¹⁰ Tĩrtũm kãm mẽ pajapê htỹx kumrêx. Kormã mẽ pamã hkĩnh kêt ri nhũm kumrêx amnhĩ rom kãm mẽ pajapê ho pa. Nē kãm mẽ pajapê xaj mẽ pahwỹr Kra pyxita mẽ. Mẽ pahte amnhĩ tomnuj pãnhã kot mẽ panê htyk kaxyw. Mẽ pahte kukwak ri amnhĩ nhĩpêx nyw o amnhĩ nhĩpêx nē nhỹrmã wa kuri pahtĩr tũm nē pamex nē papa ho papa kaxyw. ã na pre Tĩrtũm mẽ pahwỹr Kra mẽnh anhỹr o kãm mẽ pajapê hã amnhĩ to amnhĩrĩť.

¹¹ E ixkwỹjaja. Tĩrtũm kãm mẽ pajapê htỹx jakamã kwa kêp pu mẽ urãk nē pamã axpên kĩnh o papa. Nē axpên kamã paxukaprĩ nē. ¹² Aa mẽ pahtõ pahte pano ho Tĩrtũm pumunh kêt tã na hte mẽ pakamã pa ho pa. Pu mẽ kãm mẽ pajapêta pyrã nē ĩ hã pamã axpên kĩnh o papa. ¹³ Na pre mẽ pahwỹr Karõ rē nhũm mẽ pahkarõ

mã agjê pu mẽ ý hã kot amnhĩ nhĩpêx o amnhĩ nhĩpêx o papa.

¹⁴ Nê mẽ ixpê Jejus nhỹ hã mẽ ajahkre xwỳnhjaja. Mẽ ixte kot amnhĩ nhĩpêx nê kot mẽmoj tanhmã ho hã omunh o ri hkôt ixpa jakamã na pa htem ma mẽ piitã mẽ kãm harênh o ri mẽ hkôt ixpa. Nê mẽ kãm harênh o:

—Tĩrtũm na pre mẽ pahwỳr Kraja mẽ. Kot mẽ pahpiitã mẽ panê htyk kaxyw mẽ pahwỳr kumê. Anê.

¹⁵ Mẽ kot Jejus kêp Tĩrtũm Kra hã harênh o pa xwỳnhjaja na hte Tĩrtũm mẽ kamã pa ho pa nhũm htem ý hã ã Kra jarênh anhỹr o pa.

¹⁶ Na pu mẽ ra pahprĩ hã Tĩrtũm kãm mẽ pajapê hã amnhĩ tã omu. Kãm mẽ pajapê htỳx kumrêx ã amnhĩ tã omu. Jakamã kot puj mẽ urak nê ý hã pamã mẽ piitã mẽ hkĩnh o papa. Tĩrtũm mẽ mẽ pahtĩpxi nê ri papa kênã.

Mẽ kãm axpên kĩnh xwỳnhjaja kãm Tĩrtũm puma hkêt ã mẽ harênh

¹⁷ Nê kot puj mẽ pamã axpên kĩnh o papa nê mãânên Kris kôt amnhĩ nhĩpêx ho papa. Hãmri nhũm nhỹrmã Tĩrtũm kot Kra mẽ wa kuri mẽ htĩr tũm nê mẽ pa ho mẽ pa mã xwỳnhjê nhĩxi jarênh kaxyw pu mẽ tee ri amnhĩ kukamã pajamaxpêr kêt nê. Ra amnhĩ nhĩxi jarênh ma nê pahkĩnh nê.

¹⁸ Nê koja mẽhõ kãm hkwyjê hkĩnh kêt nê tanhmã hõ homnuj to. Hãmri nê kot amnhĩ tã tanhmã ho pymaj kãm uma ho hwỳr mrrar kêt nê. No koja kãm hkwyjê hkĩnh nê tanhmã mẽ ho mex to ho pa nê kãm mẽ uma hkêt nê. ¹⁹ Tĩrtũm kumrêx na pre kãm mẽ pajapê nê mẽ pakukamã tanhmã mẽ pahto mex to. Tã pu mẽ ra amnhĩ pyrã nê pamã hkĩnh o papa. Nê pamã mẽ piitã mẽ hkĩnh o papa.

²⁰ Nê koja mẽhõ kãm Tĩrtũm kĩnh ã amnhĩ jarênh tã kãm hkwyjê hõ hprãm nõkati hãmri nê ra kãm Tĩrtũm prãm kêt ã amnhĩ to amnhĩrĩt. Kot kaj mẽ ano ho akwyjê pumunh o apa xwỳnhta amã hkĩnh kêt tã tanhmã kot ka we amnhĩ to nê ate ano ho Tĩrtũm pumunh kêeta amã hkĩnh ã amnhĩ jarê? Nã ka ã amnhĩ jarênh anhỹr o amnhĩ to axêx. ²¹ Na pre Tĩrtũm mẽ pamã kapêr o amnhĩrĩt o:

Kot kaj mẽ amã ixkĩnh hã kot kaj mẽ mãânên amã akwyjê hkĩnh o mẽ ho mex o ri apa. Anê.

5

Tĩrtũm nhỹ hã mẽ pamã axpên kĩnh ã mẽ pamã karõ

¹ Nê Tĩrtũm kot mẽ pahwỳr Jejus mẽnh ã harênhja. Koja mẽhõ kuma nê amnhĩ kaxyw hkôt hamaxpêr nê Jejus kôt amnhĩ xãm hã koja Tĩrtũm ja hã omu nê ho hkra.

Nê koja mẽhõ kãm Tĩrtũm kĩnh hã koja mãânên kãm hkwyjê hkĩnh o pa. ² Ja pyrã nê kot puj mẽ pamã Tĩrtũm kĩnh nê kapêr kôt amnhĩ nhĩpêx. Hãmri nê mãânên pamã krajê piitã mẽ hkĩnh ho papa.

³ Nê kot puj mẽ pamã Tĩrtũm kĩnh nê nhũm kapêrja mẽ pahpê hihtỳx kêt nê. Pu mẽ pamã Tĩrtũm kĩnh ã kapêr kôt amnhĩ nhĩpêx mex o ri papa.

⁴⁻⁵ Na pu prem amnhĩ kaxyw Tĩrtũm Kra Jejus kôt pajamaxpêr nê hkôt amnhĩ xunhwỳ nhũm Tĩrtũm ja hã mẽ pahpumu nê mẽ pahto hkra pu mẽ ý hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêt nê.

Mẽmoj axkrunêpxi nê kot Jejus kêp Tĩrtũm Kra hã ho amnhĩrĩt
Juāw 1.32-34, 3.36, 5.31, 15.26

⁶ Nê Jejus pix na pre Tĩrtũm mẽ pakaxyw ãm nhũm kêp Kra hã mẽ pahwỳr wrỳ. Hãmri nhũm Juāw Paxisja pyhti kamã hkrã kumrã. Kêp Tĩrtũm Kra hã hkrã kumrã. Tã nhũm Tĩrtũm kapêr kôt ma tanhmã amnhĩ nhĩpêx to ho pa. Nê ri hkwyjê mã kapêr jarênh o ri mẽ hkôt pa. Tã nhũm mẽ kupĩ nhũm kêp Tĩrtũm Kra hã pĩ kahpa hã ajêt nê ty nê hkamrõ axkapĩ. ã mẽ panê amnhĩ nhĩpêx anê nhũm Tĩrtũm Karõja kêp Kra hã mẽ pamã ho amnhĩrĩt. ãm hãmri na hte ã tanhmã mẽmoj to amnhĩrĩt to anê. Mẽmoj to hêx kêt jakamã na pre Jejus kêp Tĩrtũm Kra hã mẽ pamã ho amnhĩrĩt.

⁷ Nê kêp Tĩrtũm Kra hã mẽ pamã mẽmoj to axkrunêpxi nê ho amnhĩrĩt. ⁸ Tĩrtũm Karõ na pre kêp Kra hã mẽ pamã ho amnhĩrĩt pu prem kêp Kra hã omu. Nê Juāw Paxis kot hkrã kumrãrta ã pu mẽ mãânên kêp Tĩrtũm Kra hã kot ho amnhĩrĩtja ã omu. Nê

mãänēn kēp Tirtūm Kra hã pĩ kahpa hã jēt nē htyk nē hkamrô pikapĩrta ã mē pamã ho amnhĩrīt pu mē kēp Kra hã omu. E mē pamã mēmoj to axkrunēpxi nē Jejus kēp Tirtūm Kra hã kot ho amnhĩrīt xwýnh na jajaja.

⁹Nē na pu htem jar pahkwýjaja kot axpēn mar xà hã ixkre kamã mē kapēr ma nē mē hkôt pajamaxpēr. Tã koja Tirtūm tanhmã mē pamã mēmoj to amnhĩrīt to pu mē hkôt pajamaxpēr kurē kumrēx. Kēp Tirtūm kēnã kot pu kēt mē kapēr prã nē hkôt pajamaxpēr kēt. Tãm na pre mē pamã Jejus kēp Kra hã ã ho amnhĩrīt anē. ¹⁰Jakamã mē pahte Tirtūm Kra hkôt amnhĩ xunhwýr xwýnhjaja na pu prem Jejus kēp Kra hã harēnh ma nē hkôt pajamaxpēr kurē kumrēx. No mē kēp hkra hkēt xwýnhjaja na htem Tirtūm kot kēp Kra hã harēnh ma nē ãm kuma nē amnhĩ kaxyw hkôt hamaxpēr kēt nē. Jao te Tirtūm kēp Hipēêxà hã amnhĩ to hēx pyrãk ã harē.

¹¹E kot paj ixprĩ hã mē amã tanhmã ja jarēnh to ka mē inhma. Nà na pre Tirtūm Krata mē pahpiitã panē ty. Jakamã kot puj mē pahte hkôt amnhĩ xunhwýr xwýnhjaja nhýrmã ty nhũm Tirtūm akupým mē pahto mē pahtĩr. Pu mē wa kuri pamex nē pahtĩr tũm nē papa ho papa. ¹²Mē pahpê Jejus kwýjaja kot puj mē ã pahtĩr tũm nē papa anē. No mē kēp hkwý hkēt xwýnhjaja koja mē nhýrmã ty nē mē pahpyrà nē wa hwýr àpir kēt nē.

¹³Na ka prem ixpyrà nē amnhĩ kaxyw Tirtūm Kra hkôt ajamaxpēr nē hkôt amnhĩ xunhwý. Tã pa ã mē amã kagàja nhĩpêx anē. Mē ate kamã harēnh nē mē pahte nhýrmã Tirtūm mē Kra wa hwýr mē paxàpir ã mē pajarēnhja mar nē amnhĩ kaxyw hkôt ajamaxpēr o ri apa kaxyw nē kapēr prãr o ri apa hkēt nē.

Mē pahte paxàmnhĩx mēmoj tã Tirtūm wýr ã mē pajarēnh

Juāw 14.13-14

¹⁴Nē mē pahpê Tirtūm krajaja na pu htem paxàmnhĩx pajamakêtkati nē mēmoj tã tanhmã hwýr to ho papa. Kot puj mē kãm hprãm xà hkôt mēmoj tã kuwý nhũm mē pama. ¹⁵Na pu htem mēmoj tã kuwý nhũm mē pamar mex nē mē pahte mēmoj

tã hwýr xà hkôt tanhmã mē pamã mēmoj nhõr to rý tanhmã mēmoj to. Ra mē pahte ja mar mex.

Tirtūm kot tanhmã hkra hkēt xwýnhjê nhĩpêx to hã harēnh

Rukre 22.31-32

¹⁶⁻¹⁷Nē koja Kris kôt mē anhĩõ tanhmã amnhĩ tomnuj to ka mē atõ tee ri ja hã omu nē ho Tirtūm wý. Ho awý kē nē tanhmã kot amnhĩ tomnuj tota o hapêx nē ja nē ho htýx kē axte ã amnhĩ nhĩpêx anhýr kēt nē. Kot puj mē pahtõ tanhmã amnhĩ tomnuj to nhũm Tirtūm tee ri ja hã mē pahpumu nhũm ja kēp omnuj nē. Tã kot puj mē amnhĩ tomnujta kaga nhũm ja hã mē pahpumunh kôt tanhmã hã mē pahto hkēt nē. ãm mē kot amnhĩ nhĩpêx pixi koja ho hamakêtkati hkēt nē. Koja mēhõ Tirtūm kaga ho hkaga nē aa hkôt amnhĩ xãm kēt nē. Hãmri nhũm tee ri amnhĩ tã omu nhũm ja kēp omnuj týx kumrēx. Jakamã koja aa ho hkra hkēt nē. Nē aa kot hkaga ho hamakêtkati hkēt nē pa ho pa. Jakamã koja hkaga xwýnhnta nhýrmã ty nē kuri htĩr tũm nē pa ho pa hkēt nē.

¹⁸Nē mē pahpê Tirtūm krajaja na pu htem amnhĩ tomnuj o papa hkēt nē. Tirtūm Kra Jejus kot ja pymaj mē panē Satanasti pumunh mex jakamã nhũm tee ri mē pahte tanhmã amnhĩ tomnuj to hprãm xaj mē pano kupyrr kaprý ho ri pa. Ra mē pahte ja mar mex. ¹⁹Mē pahpê Tirtūm kra na pu mē. No mē kēp hkra hkēt xwýnhjaja Satanasti kot amnhĩ tã mē ho htýx pyrãk o mē hipêx jakamã nhũm htem tanhmã amnhĩ tomnuj to ho pa. Mē pahte ja mar mex.

²⁰Nē mãänēn ja mē pahte mar mex. Na pre Tirtūm Kra mē pahwýr wrý nē mē pamã tanhmã Tirtūm o amnhĩrīt to ho pa. Tapxipix kēp Mēpahpãm ã mē pamã ho amnhĩrīt. Tã Jejus kukwak ri mē pahpê Tirtūm kra jakamã kot puj mē nhýrmã wa kuri pahtĩr tũm nē pa mex nē papa ho papa.

²¹E Kris kôt ixkwýjaja. Kēr ka mē Tirtūm kapēr kôt pix mã mãn ri amnhĩ nhĩpêx o ri apa rãhã nē. No nhãm mē kot Tirtūm kapēr kwým ri mē amã kapēr o hēx xwýnhjê kapēr ma nē ãm mē ama nē mē hkôt amnhĩ nhĩpêx hkēt nē.

Tã ãm ja pix. Ixpê Juãw na pa krĩ piitã
hkôt mẽ amã kagà nhĩpêx nẽ kurẽ.

Sikūn Juāw

Juāw kot Jejus kôt hkwýjê hwýr wam kagà nê mēnh kôt hō mēnh

Juāw na pre kagàja nhīpêx. Jejus nhý hã hkrajê jahkre ho ri pa xwýnhjê hō na pre. Jakamã na pre hkrī hō kamã Kris kôt htōx mē õ fãmii mã kagàja nhīpêx nê mē hwýr kumê. Na pre hte Tirtūm kapêr o mē hêx o pa xwýnhjê hō mē õ krī hwýr mra nhūm Juāw kràmnhwý nita omu nê htýx kot mē ahkre mex ã hkamnhīx. Hāmri nê kot Tirtūm kapêr o hkwýjê jahkre kaxyw amnhī nhōrkwy hwýr kuwý. Hāmri nhūm Juāw tee ri harēnh ma nê kãm kagàja nhīpêx nê kamã kot amnhī wýr hwýr nê kãm kapêr nê hprī hã kãm tanhmã mē kot Tirtūm o hêx to ho pa hã tanhmã mē harēnh to. Kot kamã harēnh nê mē harēnh mar hāmri nê mē axkãm hamak rom nê ri pa kaxyw. ã na pre Juāwja hkràmnhwý ni mē hkwýjê mã mēmoj jarēnh nê hã kagà nê mē hwýr mēnh anê. Nê mē kãm:

¹ Pa Jejus kôt ixtōx. Xà mē amex? E ot pa mē amã kagà nhīpêx nê mē awýr kumê. Akrajaja nê apê mē hkatorxà mē mē ato ixpimraatã mē awýr kumê. Ixpê Juāw pigêtre na pa. Inhmã mē akīnh nom papxipix inhmã mē akīnh kêt. Mē pahpyrà nê mē kot Tirtūm kôt amnhī xunhwýr xwýnhjaja haxwýja kãm mē akīnh. ² Mē pahte Tirtūm kapêr kôt ri amnhī nhīpêx rãhã ho ri papa jakamã na pu htem pamã axpên kīnh o ri papa.

³ Na pa hte mē pahto Mēpanhīpêêxã maati Tirtūm wýr o ixpa nê kãm:

—Pa Tirtūm. Ot pa mē amnhī to awý. Akra Jejus Kris mē mē amnhī to war awý. Kêr ka wa mē ixkamã axukaprī nê mē ixkutã war anojarêr rãhã ho ri apa. Nê tanhmã mē ixkrã hto pa mē ixãmnhīx ijamakêtkati nê ixkīnh nê mē inhmã axpên kīnh nê axpên to mex o ri axpên kôt ixpa. Nê tãm ri amnhī nhīpêx. Anê.

*Mē pamã axpên kīnh kãm axpên to mex ã
mē pamã karõ*
Juāw 13.34-35; Wam Juāw 2.7-9, 3.14-18

⁴ Nê na pa pre akra hkwýjê pumu nhūm mē inhmã amnhī jarê pa mē kuma nê mē ý hã ixkīnh nê. Na xep prem Tirtūm kôt amnhī xunhwý nê hkôt ri amnhī nhīpêx mex o pa. Mē kot Mēpanhīpêêxã Maati Tirtūm kapêr ã kagà hkôt amnhī nhīpêx ã inhmã amnhī jarê pa mē kuma nê ixkīnh nê. ⁵⁻⁶ Jakamã na pa ã amã ixkapêr nê hã kagà anê. E kwa Kris kôt ixtōx. Kêr pu mē pamã axpên kīnh o ri papa hã mēmoj to axpên kutã panojarêr rãhã ho ri papa. ã ixujarēnh anhýrja nyw kêt. Amnepê mã mē ate Jejus kôt amnhī xunhwýr ã arīgrota ã na prem ã mē amã karõ anê. Tã kêr pu mē arī pamã axpên kīnh pè Tirtūm kapêr piitã hkôt amnhī nhīpêx mex o ri papa. Kapêr ã kagà kot ã mē pahte amnhī nhīpêx anhýr ã mē pamã karõ.

Tirtūm kapêr o mē hêx xwýnhjê jarēnh
Rômãn 16.17-18; Wam Ximotre 5.22;
Wam Juāw 2.18-26, 4.1

⁷ Nê mē kot Tirtūm kapêr o hêx o ri mē pa xwýnhjaja na mē ra ma krī piitã hkôt mē kãm tanhmã ho hêx to ho pa nê mē kãm:

—Jesús kêp Tirtūm Kra hkêt ãm mē panhīõ na pre. Na pre Tirtūm mē pahwýr mēnh kêt nê. ãm mē panhīõ rūm na pre kato.

Anhýr o mē kãm ho hêx o pa. Kãm Kris kurê xwýnh maati ja nhý hã na htem ã ri ho hêx o pa anê. ⁸ Jakamã kwa mē amnhī nê mē omunh mex nê mē ama nê ãm mē ama. Kot kaj mē kapêr ma nê mē hkôt ajamaxpêr hāmri nê mē ixte Tirtūm kapêr o mē ajahkreta kaga. Kwa mē arī mē ate amnhī nhīpêx nyw pix o mãn amnhī nhīpêx rãhã o ri apa. Nê arī mē amã axpên kīnh kãm tanhmã axpên to ajuta hto rãhã ho ri apa. Kêr kê Tirtūm ja hã mē apumu nê nhýrmã mē ato mex nê. ⁹ Nom kot kaj mē nhãm mē kapêr punujja kôt amnhī nhīpêx nê Kris kôt amnhī nhīpêx kêt nê nhūm Tirtūm mē akôt pa hkêt nê. Nom kot ka mē arī Kris kôt amnhī nhīpêx mex nê hāmri nhūm Tirtūm mē Kra Jejusja wa mē akôt ri pa ho pa rãhã nê. ¹⁰ Jakamã koja ã Tirtūm kapêr ã kagà kuhpa hã Jejus o hêx xwýnhjaja mēmo arīgro hã mē anhõ krī hwýr pøj ka mē omu nê amnhī nhōrkwy hwýr mē hwýr kêt nê. Nê tanhmã mē kãm akapêr to hkêt nê. ãm ri mē hkàx ã ri mra. ¹¹ No kot kaj mē ã mē

hipêx anhÿr kêt nê mē hwÿr mra nê mē
mar o akuhê hāmri nê te mē ate mē hkôt
amnhÿ nhÿpêx o amnhÿ nhÿpêx pyrāk. Ja
pumaj kêr ka mē nhÿri mē omu nê mē htêp
kêt kumrêx.

Kagà jatur xà

Hapuhã Juāw 13-15

¹² E Kris kôt ixtōx. Ixkapêr jatur xà na
ja. Ixkapêr ã kagàja ãm hakotre nom inhmã
mē amã ixkapêr ry hprãm. Jakamã kot paj
mêmo arÿgro hã ma mē awÿr mō pu mē
axpên pumu nê pahkÿnh nê. Pa rÿ kormã
mē amã ixkapêr jatur xàm kumê ka mē
aprÿ hã inhma.

¹³ Nê ota jar Kris kôt atōx krajaja awÿr
hpêr mē.

E ixpê Juāw pigêtre na pa ã awÿr kagàja
nhÿpêx nê mēnh anê.

Hapuhã Juãw Juãw kot Jejus kôt hkwýjê hwýr kagà nê mēnh o axkrut kôt hō mēnh

Juãw na pre mãânēn kagàja nhîpêx. Jejus nhỹ hã hkrajê jahkre ho mē pa xwýnhjê hō na pre. Tã hkràmnhwý Gajore mã kagàja nhîpêx nê hwýr kumê. Na pre Jejus kwýjaja ma krî piitã hkôt mē kãm Jejus kapêr jarênh o ri mē hkôt pa. Jao Gajore nhõ krî hwýr pøj nhũm Gajore mē hpôx ã mē harênh ma nê amnhĩ nhõrkwý hwýr mē kuwý. Jakamã nhũm pre htem ma õ krî hwýr pa hãmri nê kuri pøj. Nhũm Juãw ã Gajore kot amnhĩ nhîpêx anhýr ã harênh ma nê hkĩnh nê hwýr kagàja nhîpêx nê kumê. Nê kamã kãm mēhõ pē Xotre kot tanhmã amnhĩ tomnuj to ho pa hã harê. ã na pre Juãwja Gajore mã mēmoj jarênh nê hã kagà nê hwýr mēnh anê. Nê kãm:

¹ Pa ixkràmnhwý Gajore? Xà amex? E ot pa awýr kagàja nhîpêx nê kumê. Apê ixkràmnhwý mex na ka. Inhmã akĩnh.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tirtũm kôt amnhĩ nhîpêx mex rãhã ho ri apa. Pa ajarênh ma nê anhỹ hã ixkĩnh nê. Nê ato Tirtũm wýr o ixpa. Kot ato mex nhũm amex nê ajamakêtkati nê apa ho apa kaxyw. Nê axà hkêt nê amex nê ri apa kaxyw.

⁴ Ixte Tirtũm kapêr o mē ajahkre o ri ixpa jakamã te mē apê ixkra pyrãk. Tã pa tanhmã ate mē pahkwýjê nhîpêx to ho apa hã ajarênh ma nê ixkĩnh nê.

Gajore kot tanhmã Jejus kôt hkwýjê ho mex to hã harênh

Wam Korît 16.10-11

⁵ E ixkràmnhwý. Na ka xep hte Jejus kôt pahtõjê ho mex o ri apa. Aa ate mē omunh kêt tã nhũm htem ma anhõ krî hwýr pa ka mē omu nê apê Jejus kôt mē htõ hã mē ho mex nê. ãm hãmri na ka hte ã mē hipêx anhýr o ri apa Gajore. ⁶ Na pre ra mē hkwýjaja akupýn ixwýr pøj nê mē ixpê Kris kwýjê mã amnhĩ tã ajarê. Amã mē hkĩnh nê ate tanhmã mē ho mex to hã ajarê. Nhũm

prem nojarêt ka xep pre mē kãm pry hã mē apkur xà hã mēmoj gõ nhũm mē inhmã ajarê. Nã ãm hãmri na ka hte ã mē ho mex o apa anê. ã ate mē hipêx anhýr o apata ã na hte Tirtũm apumu nê hkĩnh nê. ⁷ Na htem krî piitã hkôt mē kãm Kris kot tanhmã mē panê amnhĩ nhîpêx to hã harênh kaxyw ma mē hwýr pa. Nom mē apkur xà hprãm xàj mē kot Kris kôt amnhĩ xunhwýr kêt xwýnhjê hwýr pa hkêt nê. ⁸ Jakamã kwa kêr pu mē papajaja mē pahpê Jejus kôt mē htõ hã mē kãm mēhõ hkwý nhõr o papa. Kot puj mē ã mē ho ajuta anê nê te mē pajaxwýja mē ìhkô hã ri mē kãm Kris jarênh o ri papa pyrãk.

Xotre kãm Juãw kapêr mar prãm kêt ã harênh

Matêwre 20.25-28, 23.1-12

⁹ Nê ra ixte anhõ krî kamã mē apê Kris kwýjê mã kagà nê mēnh nhũm mē ate kamã harênhhta. Na xep pre Xotreja kuma nê ãm kuma. Kêp mē akrãhtũm prãm xàj kãm ixkapêr mar prãm kêt nê. ¹⁰ Na xep hte tanhmã ixto hêx to ho pa. Nom papxipix ixto hêx kêt nê. Mãânēn Kris kôt mē pahtõjaja nhỹhýnh krî hõ rũm mē awýr pan pøj nhũm xep tanhmã mē amã mē ho hêx to. Nê mē hpôx ã mē omu nom amnhĩ nhõrkwý hwýr mē hwýr kêt nê. Tã ka mē kurom amnhĩ nhõrkwý hwýr mē awý nhũm xep tee ri ja hã mē apumu nê mē akamã gryk nê mē hã mē amã akir nê Tirtũm mã amnhĩ jarênh xà hã ixkre nê mē ajano. Na xep hte ã amnhĩ nhîpêx anhýr o pa. Jakamã kot paj nhýrmã ma mē awýr mō hãmri nê mē apiitã mē anoo mã hã kãm akir. Tanhmã kot mē ixto hêx to nê tanhmã kot amnhĩ tomnuj to hã kãm akir ka mē apiitã hã inhma.

Mê pahte mē kot amnhĩ tomnuj xwýnhjê hkôt amnhĩ nhîpêx kêt ã mē pamã karõ

Rukre 6.45; Rõmãn 12.9

¹¹ E kwa ixkràmnhwý. Kêr ka ã Xotre kot amnhĩ tomnuj o pa anhýrja kôt amnhĩ nhîpêx kêt nê. Mē kot amnhĩ tomnuj o mē pa xwýnhjaja na htem Tirtũm kôt amnhĩ nhîpêx kêt nê. No kêt mē kot amnhĩ to mex o ri mē pa xwýnhjaja na mē kêp Tirtũm kra jakamã kêr ka mē ã mē kot amnhĩ nhîpêx anhýr xwýnhjê kôt pix mã amnhĩ nhîpêx.

Temẽtre jarẽnh

¹² Nẽ Temẽtre na hte tãm ri amnhĩ nhĩpêx nẽ ãm hãmri Tĩrtũm kapêr o mẽ ahkre mex nẽ nhũm mẽ piitã axpẽn mã mex ã harẽ. Pa hte ijaxwýja mẽ kãm mex ã harẽnh o ri mẽ hkôt ixpa ka htem inhma. ãm hãmri na pa hte tanhmã harẽnh to ho ri ixpa.

*Kagà jatur xà**Sikũn Juãw 12-13*

¹³ E kagàja kamã na pa ãm ja pix jarẽ nẽ hã kagà nẽ awýr kumẽ Gajore. Na pa kormã harẽnh jatur xà mẽnh kêt nẽ. ¹⁴ Nom kot paj tokyx ma awýr mõi hãmri nẽ rĩ kormã amã hatur xãm kumẽ.

E kê Tĩrtũm akutã nojarêt rãhã ho pa.

Nẽ ota jar Kris kôt akrãmnhwýjaja awýr hpêr mẽ. Nẽ kêr ka atar Kris kôt ixkrãmnhwýjê mã ijarẽ.

Tã ãm ja pix. Ixpê Juãw pigêtre na pa ã awýr kagà nhĩpêx nẽ mẽnh anẽ.

Jutre

Jutre kot Jejus kôt hkwỳjê piitã hwỳr kagà nẽ mẽn

Jutre na pre kagàja nhĩpêx. Xiakre pyrà nẽ kêp Jejus tō na pre. Tã kagàja nhĩpêx nẽ krĩ piitã hkôt Jejus kôt hkwỳjê hwỳr kurê. Na pre mẽ hkwỳjaja kêp Jejus kwỳ hã amnhĩ jarênh tã axtem nẽ tanhmã amnhĩ tomnuj to ho pa. Jakamã nhũm Jutre kagàja kamã Jejus kwỳjê mã hprĩ hã tanhmã mẽ harênh to nẽ mẽ kot mẽ hkôt amnhĩ nhĩpêx nẽ mẽ kãm kapêr kãm hihtỳx nẽ. Nẽ mẽ kãm:

¹ Pa Jejus kôt ixtō nẽ ixtōxjaja. Xà mẽ amex? E ot pa mẽ amã kagà nhĩpêx nẽ mẽ awỳr kurê. Tĩrtũm kot ixpyrà nẽ amnhĩ kaxyw mẽ axunhwỳr xwỳnhjê hwỳr. Mẽpanhĩpêxà Maati Tĩrtũm kãm mẽ pahpiitã mẽ pajapê jakamã na hte Kra Jejus Kris mẽ wa mẽ pahtãnopxar mex rãhã ho pa.

Ixpê Jutre na pa hte Jejus Kris mã tanhmã amnhĩ nhĩpêx to ho ri ixpa. Nẽ ixpê Xiakre htō na pa.

² Na pa hte mẽ ato Tĩrtũm wỳr ho ixpa nẽ kãm:

—Pa Tĩrtũm. Kwa mẽ kot Akra Jejus kôt amnhĩ xunhwỳr xwỳnhjê pumu nẽ amã mẽ hapê hã mẽ kamã axukapĩ rãhã ho apa. Kê mẽ kamã amnhĩ krit nẽ àmnhĩx hamakêtkati nẽ ri tanhmã amnhĩ nhĩpêx to ho pa. Nẽ mẽ kãm axpên kĩnh o ri axpên kôt pa. Anẽ.

*Mẽ kot Tĩrtũm kapêr o hêx xwỳnhjê jarênh
Wam Ximotre 1.18-20, 6.12*

³ E ixkrãmnhwỳjaja. Nà inhmã mẽ akĩnh. Na pa pre jãã mẽ amã kagà hkwỳ nhĩpêx kaxyw. Mẽ pahte Jejus Kris kukwak ri amnhĩ nhĩpêx nyw ã tanhmã mẽ pajarênh to nẽ hã kagà kaxyw tã kormã harênh kêt nẽ. Kot paj axtem mẽmoj jarê. Na pre Tĩrtũm mẽ pamã kot amnhĩ nhĩpêx o amnhĩrit pa. Nẽ kapêr o amnhĩrit pa. Mẽ pahte mar nẽ hkôt amnhĩ nhĩpêx kaxyw. Jakamã kê pu mẽ kapêr mar tỳx nẽ amnhĩ krã hi kamã haxàr tỳx nẽ hã papa. Nom

koja mẽhõ kapêr kuhpa hã tanhmã mẽ amã kapêr o hêx to ka mẽ ama nẽ ãm ama.

⁴ Na xep ra kapêr o mẽ hêx xwỳnhjaja mẽ akôt pa nẽ mẽ apyrà nẽ Jejus kôt amnhĩ xunhwỳr ã amnhĩ jarê nom amnhĩ to hêx. Ka xep mẽ aprĩ hã mẽ hêx ã mẽ omunh kêt nẽ mẽ kêp Jejus kôt mẽ atō hã mẽ hkamnhĩx nẽ atỳx amnhĩ nhõrkwỳ hwỳr mẽ awỳ. Nom mẽ kot Tĩrtũm kapêr o hêx pix kaxyw na htem mẽ akôt pa nẽ mẽ amã kapêr o:

—Tĩrtũm kãm mẽ pajapê htỳx kumrêx nẽ mẽ pakutã nojarêt ho pa jakamã kwa kêr pu mẽ mãmri nhãm mênijê ho amnhĩkati ho papa. Koja ja hã mẽ pahpumu nẽ tanhmã hã mẽ pahto hkêt nẽ. Kãm mẽ pajapê kênã kot kêt hã tanhmã mẽ pahto. No kêt Jejus Krisja mẽ ate kêp mẽ panhõ Pahihti hã harê nom kêp mẽ panhõ patrãw rỳ kêp mẽ panhõ Pahihti hkêt. Anẽ.

Ã Tĩrtũm kapêr kuhpa hã mẽ amã harênh anhỳr o pa. Tĩrtũm kapêr ã kagà htũm kot amnepê mẽ hkukamã tanhmã mẽ harênh to nẽ mẽ harênh kot:

Ã mẽ kapêr anhỳr o paja mỳrapê koja mẽ mex kêt nẽ pa. Koja Tĩrtũm mẽ homnuj tỳx kumrêx.

Anhỳr o kot mẽ harênh. Tã pa mẽ amã ixprĩ hã mẽ harê nẽ hã kagà. Mẽ ate inhmar nẽ amnhĩ nẽ mẽ omunh mex kaxyw.

*Tĩrtũm kot tanhmã mẽ kot amnhĩ tomnuj
xwỳnhjê nhĩpêx to hã harênh*

Sikũn Pêtre 2.1-17; Sikũn Ximotre 3.1-9

⁵ Nẽ amnepê mã mẽ panhĩgêjtaja kormã Ejit kamã mẽ pa ri nhũm Tĩrtũm Ejit nhõ xwỳnhjê rũm mẽ kator pa. Hãmri nhũm mẽ hkwỳjaja tanhmã hamaxpêr to nẽ axtem nẽ amnhĩ kaxyw hkôt hamaxpêr kêt nẽ. Nhũm tee ri amnhĩ tã mẽ omu nẽ ã mẽ kot amnhĩ nhĩpêx anhỳr xwỳnhjê nhĩmex pa. Ra mẽ ate mẽ harênh mar mex tã pa axte mẽ amã mẽ harê.

⁶ Nẽ Tĩrtũm kapêr o mẽ wrỳk xwỳnh kwỳjaja. Na prem Tĩrtũm nhỹ hã kapêr o pa htã tanhmã hamaxpêr punuj to nẽ ra kãm ja ho anhỳr prãm nõkati nẽ Tĩrtũm kaga. Jakamã nhũm mẽ hã amỳnê nhũm mẽ unê nẽ kàx o mẽ hkaxpre pa. Nẽ nhỹri pika kaxwỳnh kãm kamãt kô htyk kãm mẽ kurê nhũm mẽ arĩ kamã hkrĩ ho hkrĩ. Nom koja

nhÿrmã Tÿrtÿm kot tanhmã mẽ pahpiitã mẽ pajarënh to xà hã arÿgro kato nhÿm mẽ rÿ kormã hapôx pa. Hãmri nẽ kot amnhÿ tomnuj mÿrapê ma mẽ kot amnhÿ xà htÿx kamã hamak tÿm xàta wÿr ma hapêx.

⁷ Nẽ krÿ pẽ Sotõ nẽ Komo nhõ xwÿnhjaja na prem haxwÿja kãm Tÿrtÿm kapêr kôt amnhÿ nhÿpêx prãm kêt nẽ. Nẽ krÿja wa hpuhã krÿ hkwÿ kamã ri mẽ pa xwÿnhjaja haxwÿja mẽ urak nẽ nẽ kãm kapêr mar prãm kêt nẽ. Na prem amnhÿ tomnuj tÿx rãhã ho pa. Nẽ axtem nẽ axpën pẽ ri mẽ hprõ ho amnhÿkati ho pa. Nẽ mẽmy hkwÿjaja ri axtem nẽ axpën to amnhÿkati ho pa. Hãmri nhÿm Tÿrtÿm tee ri mẽ kot amnhÿ nhÿpêxja ã omu nẽ mẽ hipy kuwy hpôk kwÿ rẽ nhÿm mẽ amnhÿ wÿr omu nẽ kãm ma xàj tee ri hprõt kaprÿ. Nẽ hprõt kaxyw ôrkwÿ rÿm hapôj nẽ hxêt pa nẽ hapêx. Na hte ã Tÿrtÿm mẽ kot amnhÿ tomnuj o mẽ pa xwÿnhjê nhÿpêx anẽ. Jakamã koja nhÿrmã kuwy hpôk rãhã xwÿnhhta wÿr mẽ piitã mẽ rënh pa nhÿm mẽ kamã amnhÿ xà htÿx kamã hamak rãhã ho pa ho pa nẽ aa ã hapêx kêt nẽ. Nẽ à htÿx rãhã papa ho pa. Tã mẽ pahte Sotõ mẽ Komo nhõ xwÿnhjê jarënh mar nẽ mẽ pahte amnhÿ tomnuj kaga kurê kumrëx kaxyw na pre Tÿrtÿm ã mẽ pamã mẽ harënh o amnhÿrÿt anẽ.

*Mẽ hpijaàm kêt xwÿnhjê jarënh
Sikÿn Pêtre 2.10*

⁸ Nẽ mẽ kot Tÿrtÿm kapêr o pihkàr xwÿnhjaja na htem ã mẽ kot amnhÿ nhÿpêx anhÿr xwÿnhjê pyrã nẽ amnhÿ tomnuj tÿx pix o ri pa. Jakamã na htem tanhmã hpimtir punuj to hãmri nẽ hkrã hapôj nẽ hpimtir xà hkôt tanhmã amnhÿ tomnuj to. Jao hkwÿjê kamã hpijaàm kêt o pa. Rÿ mënijê hõ rÿ mẽmyjê hõ nhÿm mẽ axpën kãm hpijaàm kêt o pa. Rÿ Tÿrtÿm kapêr o mẽ wrÿk xwÿnhjê ho kapêr punuj nẽ. Kapêr mã gêt o tanhmã mẽ ho kapêr punuj to. ã na htem hpimtir punuj xà hkôt amnhÿ tomnuj o pa anẽ. ⁹ Tÿrtÿm kapêr o mẽ wrÿk xwÿnh krãhtÿm Mikewja. Kêp mẽ hkrãhtÿm tã aa mẽ kãm kapêr mã gêt kêt nẽ. Na pre Mojes ty nhÿm Mikew ra ma hwÿr tẽn wrÿ. Nẽ kuri Satanasti pumu hãmri nẽ Mojes nhÿ nẽ tanhmã kãm kapêr to. Nom

kapêr mã gêt o kãm kapêr kêt nẽ. ãm kapêr mã hprÿ ho kãm kapêr nẽ kãm:

—Kwa ãm omu kê nõ. Kot kaj tanhmã ho nhÿm Tÿrtÿm apumu nẽ hã tanhmã hã ato. Anẽ.

¹⁰⁻¹¹ Nom ixte mẽ amã mẽ hpimtir punuj jarënh xwÿnhjaja. Mẽ kot Tÿrtÿm kapêr o pihkàr xwÿnhjaja kot hprÿ hã Tÿrtÿm kot amnhÿ nhÿpêx ã harënh mar kêt jakamã na htem htÿx ri ho kapêr o haprÿ ho pa. Te ho mry xoprêja hamaxpêr kêt nẽ htÿx ri amnhÿ nhÿpêx o pa pyrãk. Nom koja nhÿrmã Tÿrtÿm mẽ homnuj tÿx nẽ.

Te mẽ kot finat Kaÿ kot amnhÿ tõ hpÿr xwÿnh kot amnhÿ nhÿpêxta pyrãk. Nẽ te mẽ kot finat Paraãw kot amnhÿ nhÿpêx pyrã nẽ kàxpore rÿnh prãm xàj Tÿrtÿm kapêr kuhpa hã tanhmã amnhÿ nhÿpêx to ho pa. Nẽ te mẽ kot finat Kore kot amnhÿ nhÿpêx pyrã nẽ Tÿrtÿm kot mẽ kaxyw mẽ õ pahi xãm xwÿnhhta kutã amnhÿ xunhwÿ. Mÿrapê koja mẽ jajê pyrã nẽ kuwy hpôk rãhã xwÿnhhta wÿr ma hapêx pa.

¹² Na ka htem apê Jejus kwÿ hã axpën wÿr akuprõ. Nẽ tõiã mẽ apê hkwÿ hã amã axpën kÿnh ã axàpkur kaxyw axpën wÿr akuprõ. Nhÿm ixte mẽ amã mẽ harënh xwÿnhjaja mẽ akôt agjê nẽ mẽ akutã apku. Jakamã kwa mẽ o kora mẽ amnhÿ nẽ mẽ omunh mex nẽ. Mẽ hipêx o te mẽ ate mẽ axàpkur xà hã mẽ anhõ kamã kënre pumunh nẽ hanhir nẽ rënh pyrã nẽ amnhÿ nhÿkhô hã mẽ pumu nẽ amnhÿ nẽ hanor kurê kumrëx. Na htem hpijaàm kêt kãm amnhÿ pix kukamã hamaxpêr pẽ apkur rÿnh o pa.

Te na wrÿk kaxyw htyk rax nẽ mõi nhÿm mẽ kot omunh nẽ wrÿk ã hkamnhÿx tã nhÿm kôk kot nhãm mën nhÿm wrÿk kêêta pyrãk o na htem amnhÿ nhÿpêx. Jao te mẽ kot ãm hãmri mẽ amã Tÿrtÿm kapêr jarënh mex pyrãk tã mẽ amã ho hêx.

Nẽ te mẽ kêp mẽmo pÿ hpàr ra ô mã tãm tã ãm htÿx rã nẽ aa ô hkêt nhÿm mẽ kot krãhyr nẽ mën nhÿm grã parta pyrãk.

¹³ Nẽ te mẽ kêp gô xujanãr kot amnhÿ nhÿpêx pyrãk. Na hte gô xujanãrja hakàx wÿr kapê nẽ mra nhÿm hamrõ kÿxpê amgrã kamã arÿk nhÿm gô awjanã nẽ ma akupÿm hipôk wÿr mra. Ja pyrãk na htem

ma nhÿhÿm mra nÿ mÿ kãm mÿmoj jarÿ nÿ nhãm mra nÿ mÿ kãm mÿmoj jarÿ nÿ ma akupÿm mÿ kurÿm mra. Nhÿm mÿ mar xà hkôt amnhÿ tomnuj rãhã ho pa.

Nÿ te mÿ kot kaxkwa hã kanhêre nhÿhÿm htÿm nhÿm mÿ kot nhÿhÿm htÿm xà hkôt omunh kêeta pyrãk. Jakamã koja Tÿrtÿm nhÿrmã kamàt kô kamã mÿ rÿnh pa nhÿm mÿ aa hapôx kÿt nÿ.

Mÿ kot amnhÿ tomnuj xwÿnhjê hkukamã mÿ harÿnh

Apokarip 20.11-15

¹⁴ Nÿ na pre finat Enokja amnepê mã ã mÿ kot amnhÿ tomnuj anhÿr xwÿnhjê hkukamã tanhmã mÿ harÿnh to. Mÿ kot Tÿrtÿm kapÿr o pihkãr o ri mÿ pa xwÿnhjaja nhÿm mÿ hkukamã mÿ harÿ. Enokja finat Atãw kanrêhã htãmnhwÿ na pre. Tã ã mÿ kot amnhÿ tomnuj anhÿr xwÿnhjê hkukamã mÿ harÿnh o:

Koja nhÿrmã Pahihtija man pika hwÿr akupÿn wrÿ. Kapÿr o mÿ wrÿk xwÿnh xohtô rax mÿ mÿ hpimràatã akupÿn wrÿ.

¹⁵ Hãmri nÿ mÿ pahpiitã kormã mÿ pahtÿr ri mÿ pahte tanhmã amnhÿ nhÿpêx to ho papa hã mÿ pahpumunh xà hkôt tanhmã mÿ pajarÿnh to. Hãmri nÿ mÿ kot Tÿrtÿm kapÿr o hêx o pa xwÿnhjê pumu nÿ tanhmã mÿ harÿnh to nÿ mÿ harÿnh o: “Jajaja na pre mÿ kãm Inhÿpêxã Tÿrtÿm prãm kÿt nÿ ri kapÿr kwÿm pix mã amnhÿ nhÿpêx o pa. Nÿ kapÿr punuj o pa. ã na prem amnhÿ nhÿpêx anhÿr rãhã ho pa.” Anhÿr o mÿ harÿ nÿ amnhÿ nÿ kuwy hwÿr mÿ kurÿ nhÿm mÿ amnhÿ xà htÿx kãm hamak o pa rãhã nÿ pa ho pa. Anÿ.

ã na pre finat Enokja mÿ hkukamã mÿ harÿnh anÿ. ¹⁶ ãm hãmri na mÿ harÿ. Tã na hte arÿ mÿ hkwyjaja ã amnhÿ nhÿpêx anÿ. Nÿ hamaxpÿr mex kÿt nÿ. Na htem nhãm tanhmã mÿ ho kapÿr punuj to pix kukamã hamaxpÿr. Nÿ amnhÿ krã hkôt htÿx ri tanhmã amnhÿ tomnuj to ho pa. Nÿ amnhÿ to jarkrar rãhã nÿ. Nÿ hêx rom mÿ kêp mÿmoj jamÿnh kaxyw tanhmã mÿ kãm hêx to.

¹⁷ E Kris kôt ixkrãmnhwÿjaja. Koja mÿ ã mÿ amã Tÿrtÿm kapÿr o hêx anhÿr o mÿ akôt pa ka mÿ ama nÿ ãm mÿ ama nÿ mÿ kapÿr

mar kÿt nÿ. ãm mÿ panhõ Pahihtijes Kris nhÿ hã mÿ ajahkre o mÿ pa xwÿnhjaja kot tanhmã mÿ amã mÿ harÿnh toja mã mãn kÿt ajamxpÿr tÿx rãhã o ri apa. ¹⁸ Na prem mÿ amã mÿ harÿnh o:

–Jejus akupÿn wrÿk xwÿj ri koja mÿmojaja mÿ awÿr mran pøj. Nom mÿ kot Jejus kapÿr kwÿm amnhÿ krã hkôt tanhmã amnhÿ nhÿpêx to xwÿnhjaja koja mÿ. Hãmri nÿ mÿ apê Jejus kwÿ hã mÿ apumu nÿ mÿ atã akunha nÿ mÿ atã hpÿr o axkÿ nÿ Tÿrtÿm ã hpÿr o axkÿ nÿ kapÿr ã kagã hã hpÿr o axkÿ. Anÿ.

¹⁹ ã mÿ kot amnhÿ nhÿpêx anhÿr xwÿnhjaja mÿ pahpê Jejus kwÿjaja mÿ pahte axpÿn kutã amnhÿ xunhwÿrja na mÿ kãm hprãm. Mÿ kamã Tÿrtÿm Karõ gjêx kÿt jakamã mÿ kãm amnhÿ krã hkôt pix mã tanhmã amnhÿ tomnuj to ho pa hprãm.

Mÿ pahte Kris akupÿn wrÿk jamãr pÿ tanhmã amnhÿ nhÿpêx to hã mÿ pamã karõ

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikÿn Pêtre 3.12-15

²⁰ Kwa mÿ apê Jejus kôt ixtõ nÿ ixtõxjaja kêr ka mÿ ã mÿ kot amnhÿ nhÿpêx anhÿr o mÿ pa xwÿnhjê rom apkati mÿ amnhÿ kaxyw Jejus pix mã mãn ajamxpÿr rãhã ho ri apa. Te mÿ kot mÿ hakre hã ra àptãr nÿ amnhÿ krãm mÿ hakre xà jagjênh tÿxta pyrãk.

Jao Tÿrtÿm kapÿr mar tÿx nÿ hkôt amnhÿ nhÿpêx mex o ri apa.

Nÿ Karõ nhÿ hã amnhÿ to hwÿr rãhã nÿ.

²¹ Nÿ Tÿrtÿm kãm mÿ pajapê hã kãm ajamaxpÿr rãhã ho ri apa.

Nÿ Pahihtijes Kris kãm mÿ pajapê hã kãm ajamaxpÿr tÿx rãhã ho apa.

Koja nhÿrmã kãm mÿ pajapê hã akupÿn mÿ pahwÿr wrÿ nÿ tanhmã mÿ pahto mex to pu mÿ kuri pahtÿr tÿm nÿ pahkÿnh nÿ papa ho papa. Tã kêr pu mÿ arÿ akupÿn mÿ pahwÿr wrÿk xà hã arÿgro jamãr rãhã ho papa.

²² Nÿ mÿ pahkwÿjaja kormã mÿ kot Jejus kôt amnhÿ xunhwÿr tÿx kÿt xwÿnhjaja kêr ka mÿ kamã axukaprÿ nÿ aprÿ hã mÿ kãm Tÿrtÿm kapÿr jarÿnh o ri mÿ hkôt apa. ²³ Na pre ra mÿ hkwyjaja mÿ kot Tÿrtÿm kapÿr o pihkãr xwÿnhjê kapÿr ma nÿ mÿ hkôt

amnhĩ nhĩpêx. Jakamã kêr ka mẽ ja hã mẽ omu nê te mẽ ate kuwy hpôk rũnh nê mẽ hpa hã mẽ hamỳnh nê nhãm mẽ rēnh pyrək o mẽ hipêx. Jao mẽ kot nhỹrmã Tĩrtũm kapēr o pihkār xwỳnhjê hkôt kuwy hpôk rũnhta wỳr pa pymaj mẽ nê mẽ kãm akapēr kãm axihtỳx o ri mẽ hkôt apa. Kê mẽ ama nê mẽ hkaga nê mẽ hkôt ri amnhĩ nhĩpêx kêt nê.

Nê htỳx ri mẽ kot amnhĩ tomnuj o mẽ pa xwỳnhjaja kêr ka mẽ kamã axukaprĩ ho ri apa nê mẽ kamã agryk tokyx anhỹr kêt nê. Xatã mẽ kãm Tĩrtũm kapēr jarēnh rãhã ho ri mẽ hkôt apa. Nom kwa mẽ okora kêr ka mẽ kot amnhĩ nhĩpêx o amnhĩ nhĩpêx o ri apa hkêt nê. Kwarĩ ho kwarĩ.

Jutre kot Tĩrtũm mã mex o mex ã harēnh

Wam Pêtre 1.5-7

²⁴ Nê kêr pu mẽ Tĩrtũm mã amnhĩ jarēnh kaxyw nê ã kãm amnhĩ jarēnh anê nê kãm:

—Pa Tĩrtũm. Nà ãm hãmri na ka hte amnhĩ kôt mẽ ixunhwỳr tỳx nê pa mẽ akaga hkêt nê akôt amnhĩ nhĩpêx rãhã ho ri ixpa. Kot kaj nhỹrmã amnhĩ wỳr mẽ ixto apĩ pa mẽ Akra mẽ war akuri axte tanhmã amnhĩ tomnuj to hkêt nê. Nê amnhĩ to mex pê anhĩrã htỳx rax kãm ixpa. Jao ixkĩnh tỳx nê ixpa ho ixpa.

²⁵ —Apê mẽ inhõ Tĩrtũm ã apyxi mex kumrêx na ka. Na ka pre Pahihti Jejus Kris kukwak ri mẽ ixpiitã mẽ ixte amnhĩ tomnuj pê mẽ ixpytã. Nê na ka hte anhĩrã htỳx rax rãhã ri apa. Nê amex o amex nê axihtỳx o axihtỳx nê axàhpumunh o axàhpumunh. Nê apê mẽ inhõ Pahi Maati hã apyxi mex na ka. Amnepê mã kormã mẽmoj kêt ri ka pre ã amnhĩ nhĩpêx anhỹr o apa rãhã nê. Tã arĩ ã ate amnhĩ nhĩpêx anhỹr ho apa ho rãhãã. Nê kot kaj apkati mẽ ã ate amnhĩ nhĩpêx anhỹr ho rãhãã. ã ate amnhĩ nhĩpêx anhỹr o apa ho rãhã ho rãhã. Tã ãm ja pix na hapêx. Anê.

E kêr pu mẽ ã Tĩrtũm mã mex o mex ã harēnh anhỹr o papa.

Ãm ja pix. Ixpê Jutre na pa mẽ awỳr kagàja nhĩpêx nê kumê.

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwýnhjê hõ pê Juãw na pre hipêx. Na pre Jejus ã mẽ kãm hkurê xwýnhjaja unê nê ma gô hipôk pê Patos wýr kumê nhũm kêp prês nê gô hipôk kãm pa ho pa nê aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrýk xwýnhjê hõ gô hipôkja wýr wrý nê kãm mẽmoj kukamã awjarê nhũm kuma nê hkôt mẽmoj pumu. Te hpimtir kãm mẽmoj pumunh pyrãk. Hãmri nê omu nê kuma nê amnhĩ xô ri mẽ pamã hã kagà. Na pre mẽmoj to axkrunêpxi nê hã kagà. Mẽ kot Jejus kutã amnhĩ xunhwýr xwýnhjaja kot Jejus ã tanhmã kêp hkwyjê to ho pa nhũm mẽ hkwyjaja pikaprãr ã kagà. Nê Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwýr xwýnh piitã ma mẽ kot amnhĩ xà htýx kamã hamak tũm xà hwýr mẽ rẽnh par ã kagà. Nê Tĩrtũm kot nhỹrmã hkrajê ho mex kumrêx ã nhũm mããnẽn hã kagà. Hãmri nê mẽ pamã hã kagà o:

1-2 E kot paj mẽ amã awjarê nê hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwýnh kot paj mẽmoj jarê nê hã kagà. Na pre Tĩrtũmja Jejus mã mẽmoj kukamã tanhmã ujarẽnh to ho ra kãm ho amnhĩrit pa. Kot amnhĩ xô ri mẽ pahte hkôt amnhĩ xunhwýr xwýnhjê mã harẽnh kaxyw. Hãmri nhũm kuma nê kot amnhĩ xô ri inhmã ujarẽnh kaxyw man ixwýr kapêr o wrýk xwýnh mẽ nhũm man ixwýr wrý nê ô ri inhmã mẽmoj to amnhĩrit pa. ãm hãmri ã inhmã mẽmoj to amnhĩrit anê. Tã kot paj amnhĩ xwar mẽ apê Jejus kôt ri mẽ apa xwýnhjê mã harẽ nê hã kagà. Mẽ ate mar nê axkãm ajamak rom nê ri apa kaxyw. Nà ixte hã kagà mã xwýnhja koja tanhmã amnhĩ to nê tokyx mẽ pahwýr wrý. ³ Jakamã kwa kêt ka mẽ aprĩ hã kagàja kamã harẽ nê ama nê hkôt pix mã amnhĩ nhĩpêx nê mẽ piitã mẽ kãm kamã harẽnh

o ri mẽ hkôt apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ ato mex ka mẽ akĩnh nê apa ho apa. Nê mẽ kot mẽ axujarẽnh mar nê hkôt amnhĩ nhĩpêx xwýnhjaja koja Tĩrtũm ja hã mẽ omu nê mẽ ho mex nê nhũm mẽ apyrã nê hkĩnh nê pa ho pa.

Juãw kot krĩ pê 7 kôt Jejus kwýjê hwýr kagà rẽnh

⁴ E ixpê Juãw kot paj atar pika pê As kamã krĩ pê 7 piitã hkôt mẽ apê Jejus kwý hã axpẽn wýr mẽ apikuprõnh xwýnhjê hwýr kagà nê kurê ka mẽ kamã harẽ nê ama.

Na pa hte mẽ ato Tĩrtũm wýr rãhã ho ri ixpa. Nê mẽ ato hwýr o:

—Pa Tĩrtũm. Kwa kêt ka pika pê As kamã akrajê ho mex nê mẽmoj to mẽ kutã anojarêt rãhã ho apa. Kê mẽ hamakêtkati nê àmnhĩx ri pa ho pa. Ja na inhmã hprãm. Anê.

Tĩrtũmja rãhã ho rãhã. Amnepêm kormã mẽmoj kêt ri nhũm pre ra rãhã ho rãhã. Nê koja nhỹrmã mẽmoj akupým hapêx par tã nhũm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptar ã hkrĩ xà kamã mẽ papytar rãhã ho hkrĩ.

Nê Tĩrtũm Karõ te kot Tĩrtũm kot mẽ pahto amnhĩptar xà hã hkrĩ xà kapem kanê maati pixi kamã kwýr pê 7 xãm xwýnhhta pyrãk. Na hte Tĩrtũm nhĩhkô hã hkrĩ ho hkrĩ. Tã kê mẽ ato mex rãhã ho pa.

⁵ Nê Jejusja na pre hte Tĩrtũm kapêr o mẽ ahkre mex o pa nê aa hkaga hkêt nê. Tã nhũm prem axtem nê kupĩ. Hãmri nhũm Tĩrtũm akupým ho htĩr. Jejus kumrêx ho htĩr nhũm htĩr o htĩr. Nê kêp pika piitã hkôt pahi piitã nhõ Pahihti. Kãm mẽ pajapê htýx jakamã na pre mẽ panê ty nê hkamrôja te mẽ panê hpikapĩr pyrãk o amnhĩ nhĩpêx. Nê htyk o mẽ pahte amnhĩ tomnuj pãnhã amnhĩre. Jao te mẽ pahte amnhĩ tomnuj pê mẽ papytar par pyrãk o mẽ panhĩpêx.

⁶ Nê na pre mẽ pahpê patre nê mẽ piitã mẽ ho Hipêêxà Tĩrtũm wýr o papa kaxyw mẽ paxunhwý. Nê kêp mẽ panhõ Pahi Maati hã kãm hprãm xà hkôt mẽ pahte kãm tanhmã amnhĩ nhĩpêx to ho papa kaxyw mẽ paxunhwý. Jakamã kwa kêt pu mẽ kãm

mex o mex nê hihtýx o hihtýx ã mǎn harênh rǎhǎ ho papa.

⁷ Nê koja tokyx akupýn mē pahwýr kakrǎ kamǎ wrý pu mē pahpiitǎ wrýk kǎm omu. Nhũm mē kot hpír xwýnhjaja tee ri amnhĩ wýr omu. Nê pika piitǎ hkôt ri mē pa xwýnhjaja omu nê mē kot amnhĩ tomnuj jakamǎ tee ri amnhĩ kukamǎ hamaxpēr o kǎm ma htýx kumrêx. Hāmri nê kǎm ma xàj mur nê htertet o kuhê. Koja nhýrmǎ Jejus akupýn wrý nhũm mē amnhĩ wýr omu nê ã amnhĩ nhĩpêx anê.

⁸ Nê Tirtũm na hihtýx o hihtýx nê àhpumunh o àhpumunh. Nê aa kot mēhō ni rũm kator kêt. Na hte amnhĩ jarênh o:

—Ixrǎhǎ ixpa xwýnh na pa. Amnepê mǎ kormǎ mēmoj piitǎ hkêt ri pa pre ra ixrǎhǎ ri ixpa ho ixpa. Nê koja nhýrmǎ mēmoj akupým hapêx tǎ pa arĩ ixrǎhǎã. Anê.

Juǎw kot Jejus akupým htír ã omunh

⁹ Nê ixpê Jejus kôt mē atō Juǎw na pa hte mē apyrǎ nê Jejus kôt amnhĩ nhĩpêx nhũm hte mē kǎm Jejus kurê xwýnhjaja mē apyrǎ nê hǎ inhĩpêx kati ho pa. Mē pahte hkôt ri amnhĩ nhĩpêx o papa jakamǎ na htem hǎ mē pahomnuj týx rǎhǎ ho pa. Tǎ pu htem ý hǎ mē kutǎ amnhĩ to htýx nê arĩ hkôt amnhĩ nhĩpêx. Jakamǎ na pa pre Tirtũm kapēr o mē ajahkre rǎhǎ ho ri mē akôt ixpa. Nê Jejus kêp mē panhō Pahihti hǎ mē amǎ harê. Mýrapê na prem hǎ ixpynê nê man amnê ixto tē nê jar gō hipôk pê Patos kǎm inhmē pa kamǎ ixpê prês nê ixpa ho ixpa.

¹⁰ Tǎ nhũm tōmĩk pa Tirtũm mǎ amnhĩ jarênh o nhý. Hāmri nhũm Karō tanhmǎ ixkrǎ hto pa te xipimtir kǎm mēmoj pumunh pyrǎ nê amnhĩ katut kôt mēhō kapēr ma. Te kot pifti kakôr týx pyrǎk pa kuma. ¹¹ Hāmri nhũm inhmǎ kapēr nê inhmǎ:

—Pa Juǎw? E kot paj amǎ mēmoj to amnhĩrit ka omu nê akwýjê mǎ hǎ kagà. Nê hǎ kagà hpa hāmri nê ahpýnhǎ krĩ hkwý hkôt mē kêp ixkwý hǎ axpên wýr mē pikuprōnh xwýnhjê hwýr arê. Mē kot kamǎ harênh nê mar nê axkǎm hamak rom nê ri pa kaxyw. Epes wýr nê Emĩnǎ hwýr nê Pekamō hwýr nê Xijaxir wýr nê Satre hwýr nê Pirate hwýr nê Raxisej wýr. Krĩ pê 7ja

piitǎ hwýr ixkapēr ã kagà nê mē hwýr arê kê mē apyrǎ nê mēmoj jarênhja ma. Anê.

¹² Hāmri pa ixte mēhōja pumunh kaxyw ho ijakêx nê kanê hkwý pumu. Kanê kêp 7 nê piitǎ ôr o.

¹³ Nê kanê nhĩpôk ri mēhōja te panhĩ pyrǎ nê pahi hǎ ê mex kǎm xa. Éja hpar kōn kôt hitep nhũm xa. Nê pahi hǎ mē hinô hpre xà ho amnhĩ nhĩnô hpre nê xa. Hinô pre xàja ôr pix o. ¹⁴ Nê hkrǎ hkĩ te kaxàt nhĩ jaka pyrǎ nê hakaajre. Nê no te kuwy hpôk pyrǎ nê hkarýr týx nê. ¹⁵ Nê hpar te mēmo kǎx karýr týx pyrǎk. Nê kapēr te gō hprôt týx koko pyrǎk. ¹⁶ Na pre upôk rũm kanhêti ho 7 nê hamý nê o xa. Nê hakwa rũm wapo pōm kato nê akutǎ wa gixre nê ajêt. Nê hkuk kamǎ hirǎ htýx kumrêx. Te myt kot mē pano hǎ harir nhũm gêk týx pyrǎk. ã mēhōja kot anhýr.

¹⁷ Pa tee ri tanhmǎ kute hǎ omu nê inhmǎ ma htýx kumrêx nê umaj tēm nê hpar pê te ixtyk pyrǎ nê nō. Hāmri nhũm ixtǎ upôk rũm ãhkraja xi nê inhmǎ kapēr nê inhmǎ:

—Kwa amǎ ixpuma hkêt nê. Pa na pa. Amnepê mǎ kormǎ mēmoj kator kêt ri pa pre raa. Nê ixrǎhǎã. Koja nhýrmǎ mēmoj akupým hapêx pa arĩ ixrǎhǎ ixpa ho ixpa.

¹⁸ —Na pa pre ty tǎ akupým ixtír. Nê ixtír o ixtír. Kam ixpumu. Kot paj axte ixtyk kêt nê. Ixpê mēhtykjê hpǎm jakamǎ papxpix na pa hte mē htyk ã arĩgro jarê nhũm mē hǎ ty nê ma mēhtykjê papxǎ hwýr ma pa.

¹⁹ —E kêt ka ate mēmoj pumunh xwýnhhta pumunh týx nê akwýjê mǎ hǎ kagà. Nê mēmoj kormǎ kot amnhĩ nhĩpêx kêt nhũm ate omunh mǎ xwýnhhta ka inhý hǎ mē kǎm hǎ kagà. Mē kot kamǎ harênh nê mar týx kaxyw.

²⁰ —Nê kot paj axte ixprĩ hǎ ate mēmoj pumunh xwýnhhta jarê ka inhma. Nà kanê pê 7ta te mē kot krĩ hkwý pê 7 kamǎ mē kêp ixkwý hǎ axpên wýr mē pikuprōnh xwýnhjê pyrǎk. Nê inhĩhkra kamǎ kanhêti pê 7ta te kêp inhmǎ mē kot mē hamǎr xwýnhjê pyrǎk. Anê.

2

Epes kamǎ Jejus kwýjê hwýr kagà

¹ Nhũm Jejus arĩ inhmǎ kapēr nê inhmǎ:

—E kêr ka krī pê Epes kamã ixkwỳjê jamãr xwỳnh wỳr kagà nê amê. Nê kagãja kamã mẽ kãm ixkapêr jarê nê mẽ kãm:

Pa Epes kamã ixkapêr mar kaxyw axpên wỳr apikuprôn timer xwỳnhjaja. Ot pa mẽ awỳr ixpêr mẽ. Ixpê ixupôk o kanhêti ho 7 nê hamỳnh nê ho ixãm xwỳnhhta na pa. Nê ixpê ôr o kanê pê 7 nhĩpôk ri ixpa xwỳnhhta na pa ã mẽ awỳr ixpêr mên timer anê.

² Na pa hte tanhmã mẽ ate amnhĩ nhĩpêx to ho apa hã mẽ apumun timer mex o ixpa. Na ka htem inhmã amnhĩ nhĩpêx timer mex nê pa ja hã mẽ apumu. Mẽ kot ixtã mẽ anhiĩpêx kati htã ka mẽ kutã amnhĩ to htỳx nê ixkaga hkê timer nê. Nê mẽ kot amnhĩ tomnuj xwỳnhjê hkôt amnhĩ nhĩpêx o ri apa hkê timer nê. Nhũm ixte mẽ awỳr mẽ rên timer ã amnhĩ to hêx xwỳnhjaja mẽ awỳr pan pôj ka mẽ aprĩ hã mẽ kot amnhĩ to hêx ã mẽ omu. Hãmri nê tee ri mẽ kot amnhĩ nhĩpêx ã mẽ omu nê amnhĩ nê mẽ hanor kurê kumrêx. ãm hãmri na ka htem ã mẽ hipêx anê.

³ Nê mẽ kãm ixkurê xwỳnhjaja kot tanhmã ixtã mẽ atomnuj tỳx to htã ka mẽ kutã amnhĩ to htỳx nê aa ixkaga hkê timer nê. Nê ixkôt amnhĩ nhĩpêx timer mex rãhã ho ri apa. ãm hãmri na ka htem ã amnhĩ nhĩpêx anhyr o ri apa.

⁴ ãm mẽmoj pixi na ixpê omnuj. Amnepê mã kormã mẽ ate ixkôt amnhĩ xunhwỳr nyw ri na ka prem amã axpên kĩnh nê axpên to mex o ri apa. Nê mẽ amã axpên tã ma ho te mẽ amã amnhĩ tã ma pyrãk o axpên nhĩpêx. Tã tanhmã ajamaxpêr to nê axte ã axpên nhĩpêx anhyr kêt nê. Jao te mẽ amã ixkĩnh kêt pyrãk o amnhĩ nhĩpêx. Pa tee ri ja hã mẽ apumu nhũm ja inhmã timer mex kêt nê.

⁵ Kwa mẽ tokyx ja hã amnhĩ pumu nê akupỳm mẽ ate ixkôt amnhĩ xunhwỳr nyw ri mẽ ate axpên nhĩpêxta o akupỳm axpên nhĩpêx o apa. Kot kaj mẽ anhyr kêt kot paj te mẽ apê mẽ anhô kanê hpyr nê kapôt ã mên timer pyrãk o mẽ anhiĩpêx ka mẽ ri apa nê gaa nê apikaprãr pa. Tã mên timer koja mẽ amỳr pê mẽ anhô krĩ kamã mẽ kãm ijarên timer o pa?

⁶ Nê mẽ kêp Nikoraw nhô xwỳnhjaja na ka htem mẽ kot tanhmã amnhĩ tomnuj

to hã mẽ omu nê ixpyrã nê apê ja hprãm nõkati nê mẽ hkôt ri amnhĩ nhĩpêx kêt nê. Pa ja hã mẽ apumu nê ixkĩnh nê.

⁷ Tã ixte mẽ amã ixkapêr jatur xà na ja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarô nhỹ hã ixte mẽ amã ixkapêr anhyrja ma nê kãm ajamaxpêr tỳx rãhã ho ri apa.

Tĩrtũm nhô krĩ kamã mẽmo pĩ hpãr kuhê xwỳnh. Mẽ kot ô hkur nê axte htyk kêt nê pa ho pa mã xwỳnhhta. Kot kaj mẽ ate amnhĩ tomnuj nê amnhĩ to htỳx nê arĩ inhmã hprãm xà hkôt amnhĩ nhĩpêx rãhã ty pa akupỳm mẽ ato mẽ atĩr nê ma pĩ hpãrta wỳr mẽ arê. Ka mẽ ma hwỳr mra nê ô hõ hta nê akrê nê axte atyk kêt kumrêx nê apa ho apa.

E ãm ja pix na hapêx. Anê.

—E Juãw. Kêr ka Epes kamã ixkwỳjê jamãr o pa xwỳnhhta wỳr ã ixkapêr ã kagà anê nê mẽ hwỳr amê. Anê.

Hãmri pa kuma nê ô ri mẽ kãm hã kagà hpa.

Emĩnã kamã Jejus kwỳjê hwỳr kagà

⁸ Hãmri nhũm hpãnhã Emĩnã nhô xwỳnhjê kaxyw inhmã kapêr nê inhmã:

—Nê hpãnhã Emĩnã kamã ixkwỳjê jamãr xwỳnh wỳr kagà nê mẽ hwỳr amê. Nê mẽ kãm ixkapêr jarê nê mẽ mẽ kãm:

Pa Emĩnã kamã ixkapêr mar kaxyw axpên wỳr mẽ apikuprôn timer xwỳnhjaja. Ot pa mẽ awỳr ixpêr mẽ. Ixrãhã ho ixrãhã ixpa xwỳnhhta na pa. Amnepêm kormã mẽmoj piitã hkê timer ri na pa pre ixrãhã nê ri ixpa. Koja nhỹrmã mẽmoj akupỳm hapêx pa arĩ ixrãhã ho ixrãhã nê ri ixpa. Na pa pre ty no ãm akupỳm ixtĩr o ixtĩr. Tã pa ã mẽ awỳr ixpêr mên timer anê.

⁹ Nã na pa hte mẽ ate tanhmã amnhĩ nhĩpêx to ho apa hã mẽ apumun timer rãhã ho ixpa. Na hte mẽ kãm ixkurê xwỳnhjaja ixtã mẽ atomnuj to ka mẽ apê amrakati nê ri apa. Nom mẽ ate tãm amnhĩ nhĩpêx jakamã te mẽ apê mẽ hikukrêx rũnh kumrêx xwỳnhjê kot amnhĩ nhĩpêx pyrã nê ixkukwak ri akĩnh rãhã ri apa. Na hte mẽ kêp Ijaew ã amnhĩ to hêx xwỳnhjaja mẽ ato kapêr punuj rũnh o pa. Mẽ kot Tĩrtũm kôt amnhĩ nhĩpêx ã amnhĩ jarên timer tã no ãm hkôt amnhĩ nhĩpêx kêt nê. ãm

Satanasti kôt pix mã na htem amnhĩ nhĩpêx o pa.

¹⁰ Tã mẽ kãm ixkurê xwýnhjaja kot ixtã mẽ atomnuj tỳx o pa htã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Nê arĩ mẽ kutã amnhĩ to htỳx nê. Kojã Satanasti mẽ akwỳjê pynê nê mẽ ajagjê. Hãmri nê mẽ ate ixkaga hprãm xàj tanhmã mẽ anhĩpêx kati hto ka mẽ hagjênh xà kamã amnhĩ xà htỳx kamã ajamak o atã arĩgro pê 10. Nom kêr ka mẽ kutã amnhĩ to htỳx nê ixkaga hkêt nê. Mẽ kot mẽ apar mã tã ka mẽ kutã amnhĩ to htỳx nê. Kot kaj mẽ aa ixkaga hkêt nê ixkôt ri amnhĩ nhĩpêx rãhã ty pa akupỳm mẽ ato mẽ atĩr nê ma amnhĩ wỳr mẽ ato api. Hãmri ka mẽ Tĩrtũm mẽ wa ixri amex nê atĩr tũm nê apa ho apa nê axte atyk kêt nê apa.

¹¹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêrja anhỹr ma nê kãm ajamaxpêr tỳx rãhã ho ri apa. Kot kaj mẽ ate amnhĩ tomnuj nê amnhĩ to htỳx nê inhmã hprãm xà hkôt pix mã amnhĩ nhĩpêx rãhã ty. Hã kot paj akupỳm mẽ ato mẽ atĩr ka mẽ ma kuwyta wỳr apa hkêt nê.

E. ãm ja pix. Na hapêx. Anê.

—E Juãw. Kêr ka Emĩnã kamã ã ixkrajê mã ixkapêr ã kagã anê. Anê.

Hãmri pa kuma nê ô ri mẽ kãm hã kagã.

*Pekamõ kamã Jejus kwỳjê hwỳr kagã
Sikũn Korĩt 6.14-7.1*

¹² Nhũm Jejus arĩ inhmã kapêr nê hpãnhã inhmã:

—E hpãnhã Pekamõ kamã ixkrajê jamãr o pa xwýnhja wỳr kagã nê mẽ hwỳr amê. Nê mẽ kãm ixkapêr jarê nê mẽ kãm:

Pa Pekamõ kamã ixkapêr mar kaxyw axpên wỳr mẽ apikuprõnh xwýnhjaja. Ot pa mẽ awỳr ixpêr mẽ. Ixpê ijakwa rũm pôm wapo akutã wa gix nê kator nê ãm xwýnhta na pa mẽ awỳr ixpêr mẽ.

¹³ Na pa hte mẽ anhõ krĩ nhõ xwýnhjaja kot tanhmã amnhĩ tomnuj to ho pa hã mẽ omunh mex nê. Mẽ kot Satanasti kôt pix mã ri amnhĩ nhĩpêx o pa jakamã mẽ anhõ krĩ te kêp Satanasti nhõ krĩ pyrãk. ãxipas kot mẽ hkôt mẽ kãm ixkapêr o mẽ

ahkre ho pa nê aa hkaga hkêt tã nhũm prem axtem nê ixtã kupĩ. Ka mẽ ja hã mẽ omunh tã mẽ umaj ixkaga hkêt nê arĩ ixkôt amnhĩ nhĩpêx rãhã ho ri apa. ãm hãmri na ka htem ã amnhĩ nhĩpêx anê.

¹⁴ Mẽmoj pixi na ixpê omnuj. Na hte mẽ akwỳjaja axtem nê Paraãw kapêr kôt amnhĩ nhĩpêx o pa. Na pre Paraãwja Parak mã tanhmã kapêr to nhũm kuma nê amnhĩ xõ ri tanhmã mẽ anhĩgêt mã kapêr to ho pa. Nom ixkapêr kôt kêt ixkapêr kuhpa hã tanhmã mẽ kãm kapêr to nê mẽ kãm: “Mẽ mãmrĩ ma sãnti hã mẽ hkĩnh mã xwýnhjê hkôt mra nê sãnti hã apku nê hã akĩnh. Nê mẽ urãk nê axpên pê axpên prõ ho amnhĩkati nê axpên pê ri axpên mjên o amnhĩkati nê mẽ ã ri amnhĩ nhĩpêx anhỹr o ri apa. Ja mex kênã.” Anhỹr o mẽ anhĩgêt mã kapêr o pa nhũm mẽ kuma nê mẽ hkôt amnhĩ nhĩpêx. Tã ka mẽ akwỳjaja mẽ urãk nê ã amnhĩ nhĩpêx anhỹr o apa. Kwa ja mex kêt.

¹⁵ Na hte mẽ akwỳjaja Nikorawjê kapêr kôt ixkapêr kuhpa hã tanhmã amnhĩ nhĩpêx to ho pa. Ja mããnên mex kêt. ¹⁶ Tã ra mẽ akwỳjaja ã amnhĩ tomnuj anhỹr o pa ka mẽ ja hã mẽ omu nê ãm mẽ omu nê nê tanhmã mẽ kãm akapêr to hkêt nê. Kwa mẽ ate ã amnhĩ nhĩpêx anhỹr xwýnhjaja. Kêr ka mẽ tokyx ja kaga nê akupỳm ixkôt ri amnhĩ nhĩpêx mex nê. Kot kaj mẽ anhỹr kêt kot paj tokyx mẽ awỳr wrỳ nê te ijakwa rũm pôm wapo kator xwýnhta o mẽ hkanhwỳr pyrãk o mẽ anhĩpêx. Nom ixkapêr xihtỳx pix o tanhmã mẽ anhĩpêx to.

¹⁷ E kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nê kãm ajamaxpêr tỳx rãhã ho ri apa.

Nê kot kaj mẽ ate amnhĩ tomnuj nê amnhĩ to htỳx nê inhmã hprãm xà hkôt amnhĩ nhĩpêx rãhã ty. Hã kot paj akupỳm mẽ ato mẽ atĩr hãmri nê ra pam mẽ amã mẽ anhõ ka mẽ hkur o apa. Te amnepêm Ijaew kapôt ã pa nhũm ixte mẽ hwỳr “manã” anhỹr xwýnhta rênh nhũm mẽ kot hkur o pata pyrãk. Nom ixte mẽ amã mẽ anhõja na hpimxur. ãm papxipix na

pa hte mẽ kãm òr o ixpa.

Ně kot paj mẽ atã mẽ anhĩxi nyw rě. Jao kěn jakare hkwy hã ahpÿnhã mẽ anhĩxi nyw jaxwy nẽ mẽ amã kugõ. Ka mẽ hamỳ nẽ kapxipix amnhĩ nhĩxi nyw pumunh o apa.

E ãm ja pix. Na hapêx. Aně.

—E Juãw. Kěr ka Pekamõ kamã ixkrajê hwÿr ã ixkapěr anhÿr ã kagà nẽ mẽ hwÿr amě. Aně.

Hãmri pa kuma nẽ ô ri mẽ kãm hã kagà.

*Xijaxir kamã Jejus kwÿjê hwÿr kagà
Jutre 3-23*

¹⁸ Nhũm Jejus arĩ inhmã kapěr nẽ inhmã:

—E hpãnhã Xijaxir kamã ixkwÿjê jamãr xwÿnh wÿr kagà nẽ amě nẽ mẽ kãm ixkapěr jarẽ nẽ mẽ kãm:

Pa Xijaxir kamã ixkapěr mar kaxyw mẽ apikuprõnh xwÿnhjaja. E ot pa mẽ awÿr ixpěr mẽ. Ixpê Tĩrtũm Kra na pa. Ixpê inhno te kot kuwy hpõk karÿr tÿx pyrãk xwÿnhhta na pa. Nẽ ixpê ixpar te kot kãx karÿr tÿx pyrãk xwÿnhhta na pa mẽ awÿr ixpěr mẽ.

¹⁹ Na pa hte mẽ ate amnhĩ nhĩpêx kõt mẽ apumunh mex o ri ixpa. Na ka htem amnhĩ kaxyw inhmã ajamaxpěr pẽ inhmã amnhĩ to mex o ri apa. Mẽ akwy kot ixtã tanhmã mẽ anhĩpêx to htã ka mẽ umaj aa ixkaga hkêt nẽ. Nẽ arĩ amã ixkĩnh tÿx kãm tanhmã amnhĩ nhĩpêx to ho ri apa. Nẽ axpẽn to mex nẽ ixkõt pix mã amnhĩ nhĩpêx o ri apa. Jao ra ixkõt amnhĩ nhĩpêx mex o wam mẽ ate ixkõt amnhĩ nhĩpêxta jakre. Nã ja inhmã mex kumrêx.

²⁰ ãm mẽmoj pixi na ixpê omnuj. Mẽ akõt niti ri pa xwÿnh Jejapewtita. Kêp Tĩrtũm nhÿ hã kapěr jarẽnh o pa xwÿnh ã amnhĩ to hêx xwÿnhhta. Na hte ixkapěr kupa hã tanhmã mẽ ajahkre hto ka htem ama nẽ nẽ tanhmã kãm nẽ hkêt nẽ. Na hte mẽ amã: “Xê mẽ mãmri ri mẽ hkuprÿjê hwÿr mra nẽ mẽ ho amnhĩkati. Nẽ axpẽn pẽ mẽ aprõ nẽ mẽ amjẽn o amnhĩkati. Nẽ mẽ kot sãnti hã mẽ hkĩnh nẽ hã apkur xwÿnhjê hkõt mra nẽ mẽ hkõt amnhĩ nhĩpêx. Tĩrtũm kãm ja mex kẽnã.” Anhÿr o mẽ amã kapěr o pa. Nẽ inhmã ja mex ã ijarẽ nom inhmã ja mex kêt. Tã ra mẽ akwÿjaja kapěr ma nẽ hkõt

amnhĩ nhĩpêx ka mẽ ja hã mẽ omunh tã amnhĩ nẽ nitita janor kêt nẽ nhũm arĩ ri mẽ amã hêx o ri mẽ akõt pa. ²¹ Ra kot ã amnhĩ nhĩpêx anhÿr o mẽ akõt pa ry rax kumrêx tã pa kormã ja hã tanhmã ho hkêt nẽ kormã amnhĩ tã hamã. Kot ã amnhĩ nhĩpêx anhÿr kaga kaxyw na pa kormã hamãr o ri ixpa. No nhũm aa hkaga hkêt nẽ.

²² Mÿrapê kot paj tokyx tanhmã ho nhũm amnhĩ xã htÿx kamã hamak o hikwÿ. Tã mẽ kot kapěr mar nẽ hkõt amnhĩ nhĩpêx xwÿnhjaja kot amnhĩ tomnuj ã amnhĩ pumu nẽ hkaga hkêt hã kot paj mã mẽ ho aně nẽ. Mããnen tanhmã mẽ homnuj to nhũm mẽ nitita pyrã nẽ amnhĩ xã htÿx kamã hamak o hikwÿ.

²³ Nẽ nitita kot paj kêp hkrajê nhĩmex pa. Ka mẽ apê ixkrajaja ja hã ixpumu nẽ ixte mẽ apiitã ahpÿnhã tanhmã mẽ ajamaxpěr to hkõt mẽ apumunh ã ixpumu. Nẽ ixte ahpÿnhã mẽ apiitã tanhmã mẽ ate amnhĩ nhĩpêx to ho apa hã mẽ apumunh xã hkõt tanhmã mẽ anhĩpêx to hã ixpumu.

²⁴ Na hte mẽ akwÿjaja akwÿjê rom nita kapěr ma nẽ ãm kuma nẽ hkõt amnhĩ nhĩpêx kêt nẽ. Nẽ mẽ kapěrja mẽ kot kãm: “Satanasti kapěr pimxur” anhÿr xwÿnhhta kõt nhũm mẽ amnhĩ nhĩpêx kêt nẽ. Na htem ixkõt pix mã amnhĩ nhĩpêx mex o ri pa. Tã ã mẽ ate ixkõt amnhĩ nhĩpêx anhÿr o apa xwÿnhjaja kot paj mẽ amã ja pix ã karõ ka mẽ inhma. ²⁵ Kěr ka mẽ arĩ ixkõt pix mã amnhĩ nhĩpêx o ri apa rãhã pa akupÿn mẽ awÿr wrÿ. ãm ja pix ã kot paj mẽ amã karõ.

²⁶ Nẽ kot kaj mẽ ate amnhĩ tomnuj nẽ amnhĩ to htÿx nẽ arĩ inhmã hprãm xã hkõt amnhĩ nhĩpêx rãhã ty. Hãmri pa ja hã mẽ apumu nẽ nhÿrmã mẽ ate krĩ hkwy hkõt mẽ pa xwÿnhjê ho amnhĩptàr o apa kaxyw mẽ axunhwÿ. Ka mẽ apê mẽ õ pahiti nẽ inhmã mẽ ho amnhĩptàr o ri apa.

²⁷ Na pre Inhĩpêxã ixte pika piitã hkõt ri mẽ pa xwÿnhjê ho amnhĩptàr kaxyw ixãm.

Tã kot paj nhÿrmã amnhĩ pyrã nẽ mẽ kaxyw mẽ axunhwÿ ka mẽ inhmã mẽ

hamār o apa.

Nhūm mēhō ixkapēr kwým ri tanhmā amnhī nhīpêx to ka mē ja hā omu nē hā tanhmā ho. Te mē kot poti punuj mýnh nē mēnh nē hkrakrak pyrāk.

²⁸ Kot paj ā mē ate mē hipêx anhýr o apa kaxyw mē axunhwý. No ām ja pix kêt. Kot paj te ixte mē amā kanhêti hō nhôr pyrāk o mē anhīpêx. Arīgro hkôt kanhêti no hpôk rax japôx xwýnhhta kot paj te ixte mē amā ôr pyrāk ka mē ixri atír tūm nē apa ho apa.

²⁹ E ixkrajaja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhý hā ixte mē amā ixkapēr anhýrja ma nē kām ajamxpêr týx rāhā ho ri apa. Anē.

—E Juāw. Kêr ka ā Xijaxir kamā ixkrajê kaxyw ixkapêr ā kagà nē mē hwýr mēnh anē. Anē.

Hāmri pa kuma nē ô ri mē kām hipêx nē mē hwýr kumē.

3

Satre kamā Jejus kwýjê hwýr kagà

Rukre 12.35-40

¹ Nhūm Jejus arī inhmā kapêr nē inhmā:
—E hpānhā Satre kamā ixkwýjê jamār xwýnh wýr kagà nē mē kām ixkapêr jarê nē mē kām:

Pa Satre kamā ixkrajaja. E ot pa mē awýr ixpêr mē. Ixpê inhīkra ho kanhêti pē 7 jamýnh nē xām xwýnhhta na pa. Nē ixpê inhīkra ho Tirtūm Karō ām pyxi htā te kamā kēp 7 jamýnh nē ho ixām xwýnhhta na pa mē amā ixkapêr.

Na pa hte mē ate tanhmā ri amnhī nhīpêx to hā mē apumunh rāhā ho ixpa. Mē piitā kot xpēn mā mē ate ixkôt amnhī nhīpêx ā mē ajarēnh tā ā mē ate amnhī nhīpêx anhýr kêt. Na ka htem ixkuhpa hā pix mā amnhī nhīpêx o apa. Jakamā te inhmā ra mē atyk nē mē anhīkwý pyrāk.

² Na ka htem ām akrānh mā ixkôt ri amnhī nhīpêx nom Tirtūm mē wa ixkôt amnhī nhīpêx mex kêt nē. Ra Tirtūm mē wa ixte ja hā mē apumunh mex. Mē ate kormā wa inhnoo mā tām ri amnhī nhīpêx kêt jakamā kwa mē tokyx ja hā amnhī pumu nē ate amnhī tomnuj mā

anhūre nē wa ixkôt amnhī xunhwýr týx nē.

³ Kêr ka mē amnepê mā kormā mē ate ixkôt amnhī nhīpêx nyw ri mē kot ixkapêr o tanhmā mē ajahkre htoja mā ajamxpêr nē amnhī tomnuj mā anhūre. Nē ixkapêr kôt pix mā mān amnhī nhīpêx o ri apa. Kot kaj mē anhýr kêt kot paj nhýrmā mē ajaêr pē akupýn mē awýr wry nē ja hā tanhmā mē ato.

⁴ ām mē agrêre nē amā ixkôt amnhī nhīpêx prām. Jao tām ri amnhī nhīpêx nē mē kot amnhī tomnuj xwýnhjê hkôt amnhī nhīpêx kêt nē. Te mē axê jakare kamā apa nē tanhmā amnhī pē htyk to hkêt pyrāk. Tā kot kaj mē nhýrmā ixri mē axê jakare kamā apa ho apa. Ra mē ate ja ho anhýr mā tām kēnā. Ja na Tirtūm kām hprām.

⁵ Nē krī piitā hkôt mē ate amnhī tomnuj nē amnhī to htýx nē inhmā hprām xā hkôt amnhī nhīpêx rāhā atyk xwýnh piitā kot ka mē nhýrmā Tirtūm mē wa ixri amex nē atír tūm nē apa ho apa. Ra mē hixija Mēpahpām Maati nhō kagàja kamā na. Kamā mē atír o mē atír mā xwýnhjê nhīxi piitā hā kagà. Kot paj kagàta kamā aa mē anhīxi grānh kêt nē. Hāmri nē Inhīpêêxā mē kapêr o mē wryk xwýnhjê mā mē ajarēnh o: “E mē jajê pumu. Ixkwý na mē.” Anhýr o mē kām mē ajarê.

⁶ E ixkwýjaja. Kot kaj mē amā ixkapêr mar prām hā kot kaj mē ā Tirtūm mē wa Ixkarō nhý hā ixte mē amā ixkapêr anhýrja ma nē kām ajamxpêr týx rāhā ho ri apa.

Tā ām ja pix. Na hapêx. Anē.

—E Juāw. Kêr ka ā Satrejê mā ixkapêr ā kagà nē mē hwýr mēnh anē. Anē.

Hāmri pa kuma nē ô ri mē kām hā kagà.

Pirate kamā Jejus kwýjê hwýr kagà

Wam Tesarôn 2.13-16

⁷ Nhūm Jejus arī inhmā kapêr nē inhmā:
—E hpānhā Pirate kamā ixkwýjê jamār xwýnh hwýr kagà nhīpêx nē amē nē mē kām ixkapêr jarê nē mē kām kām:

Pa Pirate kamā mē ate ixkapêr mar kaxyw mē apikuprôn xwýnhjaja. E ot pa mē awýr ixpêr mē. Inhmex o inhmex

xwýnh na pa. Aa ixêx kêt nê ixpa xwýnh. Amnepê mã na pre mēhōja pahi Tawi mã ōrkwý mex ã saf jamār o pa. Tã pa hte urāk nê Inhīpêêxà Tirtūm nhō krī hwýr mē gjêx xà hã saf jamý nê ho ixpa. Ām papxipix inhō saf jakamã papxipix na pa hte mē ate ixkôt amnhī xunhwýr xwýnhjaja mē agjêx kaxyw mē amã kahê xà rē nê ixkra hkêt xwýnhjê pê kahê. Kot paj mē apê ixkrajê mã kahê xà rē ka mē hwýr agjê. Hãmri pa mē atã kahê nhūm ixkra hkêt xwýnhjaja tee ri kãm mē akôt gjêx prãm kaprý.

⁸ Na pa hte tanhmã mē ate amnhī nhīpêx to ho apa hã mē apumunh mex o ri ixpa. Mē agrêre htã na ka htem ixkapêr kôt amnhī nhīpêx mex nê aa ixkaga hkêt nê. Jakamã kot paj te ixte mē amã Tirtūm nhō hakwakre kahê xà mēnh pyrāk o mē anhīpêx ka mē axãmnhīx ajamakêtkati nê ma mē kãm Tirtūm kapêr o mē ahkre ho ri mē hkôt apa. Nhūm mē hkwýjaja tee ri ã mē ate amnhī nhīpêx anhýrja nê mē amã kapêr kaprý ka mē arī ho mē ahkre ho ri mē hkôt apa.

⁹ Nê mē anhō krī kamã mē akwýjaja na prem ra Satanasti hkôt amnhī xunhwý nê hêx rom mē amã amnhī to hêx nê mē amã: “E mē ixpê Ijaew mex jakamã kwa mē ixkapêr ma nê mē ixkôt amnhī nhīpêx.” Anhýr o mē amã karō htã no ãm mē kot Satanasti hkôt amnhī nhīpêx xwýnh na mē. Tã kot paj nhýrmã tanhmã mē homnuj to nhūm mē tee ri amnhī pumu nê akupým mē awýr mra nê mē akutã hkōnkrã ho rôrōk nê hkrī nê mē amã: “Nà mē kajaja na ka pēr mē ixrom Jesus kôt amnhī nhīpêx. Mãn kãm mē ajapêê.” Anê.

¹⁰ Mē kot ixtã mē atomnuj tỳx nhūm mē ate amnhī xà htỳx kamã ajamak tã aa mē umaj ixkaga hkêt nê. Nê arī ixte mē amã mēmoj tã karō xà hkôt mē kutã amnhī to htỳx rãhã arī ixkôt ri amnhī nhīpêx o apa. Jakamã mē kot nhýrmã mē kãm ixkurê xwýnhjaja pika piitã hkôt tanhmã mē homnuj tỳx to nhūm mē amnhī xà htỳx kamã ama. Tã kot paj mē anê mē omunh mex nê nhūm mē tanhmã mē ato hkêt nê ka mē amex nê ri apa ho apa.

¹¹ E kot paj tokyx akupým mē awýr wrý nê mē ate ixkôt pix mã amnhī nhīpêx ã mē ato mex rax kumrêx. Jakamã kwa mē mãmrī ã amnhī nhīpêx anhýr o inhmã hprãm xà hkôt pix mã amnhī nhīpêx rãhã ty. Kot ka mē anhýr kêt kot pa mē amã mēmoj mex nhōr kêt nê.

¹² Nê kot kaj mē kot amnhī tomnuj xwýnhjê kutã amnhī to htỳx nê inhmã hprãm xà hkôt pix mã amnhī nhīpêx rãhã ty. Hã kot paj amnhī kôt mē ato mē axihtỳx nê ka mē aa ixkaga hkêt nê. Nê kot paj nhýhýnh mē atã mē inhīxi ho axkrunêpxi nê haxwý. Inhīpêêxà nhīxi nê inhīxi nyw nê Inhīpêêxà nhō krī nhīxija kot paj nhýhýnh mē atã haxwý. Tirtūm nhō krī mē kot kãm: “Jeru-jarê nyw” anhýr xwýnhhta koja nhýrmã tanhmã amnhī to nê ra kaxkwa rùm pika wýr wrý.

¹³ E ixkwýjaja. Kot kaj mē amã ixkapêr mar prãm hã kot kaj mē ã Tirtūm mē wa Ixkarō nhý hã ixte mē amã ixkapêr anhýrja ma nê kãm ajamaxpêr tỳx rãhã ho ri apa.

Tã ãm ja pix. Na ra hapêx. Anê.

–E Juãw. Kêr ka ã Pirate kamã ixkrajê mã ixkapêr ã kagà anê. Anê.

Hãmri pa kuma nê ô ri mē kãm hã kagà.

Raxisej kamã Jesus kwýjê hwýr kagà

¹⁴ Nhūm pre Jesus arī inhmã kapêr nê inhmã:

–E hpãnhã krī pê Raxisej kamã ixkrajê jamār xwýnh wýr kagà nhīpêx nê amê. Nê mē kãm ixkapêr jarênh o:

Pa Raxisej kamã ixkrajaja. Ot pa mē awýr ixpêr mē. Ām hãmri ixkapêr o ixpa nê aa ixêx kêt xwýnhhta na pa. Jakamã ãm hãmri na pa hte Tirtūm kapêr o mē ajahkre o ixpa nê aa ja kaga hkêt nê. Pa na ixpê mēmoj piitã hpār krax.

¹⁵⁻¹⁶ Na pa hte mē ate tanhmã amnhī nhīpêx to ho apa hã mē apumunh rãhã ho ixpa. Kop apu mē ate ixkôt amnhī nhīpêx mex ronhýx pa ja hã mē apumu nê ixkĩnh nê. Nom mē ate ã amnhī nhīpêx anhýr kêt. No mãânên aa ixkaga hkêt nê. Na ka htem ri atỳx amnhī krã hkôt pix mã tanhmã amnhī nhīpêx to ho apa nhūm ja ixpê omnuj nê. Kot kaj mē arī

ã amnhĩ nhĩpêx anhÿr o apa pa hpãnhã amnhĩ nê mẽ akurê. Te mẽ kot gô xenh nõkati janhir nê tee hkakin h nê akupÿm hkapĩr pyræk.

¹⁷ Mẽ ate inhmã hprãm xà hkôt amnhĩ nhĩpêx ã amnhĩ jarênh tã ã amnhĩ nhĩpêx anhÿr kêt nê. Nê ixkapêr mar tÿx nê amnhĩ kaxyw inhmã ajamaxpêr mex kêt nê.

¹⁸ Kwa mẽ tokyx ja hã amnhĩ pumu nê akupÿm ixkôt amnhĩ xunhwÿr tÿx nê. Kêr pa ja hã mẽ apumu nê amnhĩ katut kôt mẽ ate amnhĩ tomnuj rê nê tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrit to ka mẽ aprĩ hã ixte amnhĩ nhĩpêx ã ixpumunh mex nê ixkôt amnhĩ nhĩpêx mex rãhã o ri apa.

¹⁹ Xà inhmã mẽ ajapê hkêt ã na pa ã mẽ amã ixkapêr anê? Nà inhmã mẽ apiitã mẽ ajapê htÿx kênã. Nom inhmã mẽ ajapê htã ka htem ixkôt amnhĩ nhĩpêx kêt nê. Na pa tee ri amnhĩ tã mẽ apumu nê ja hã tanhmã mẽ atomnuj tÿx to. Tokyx mẽ ate amnhĩ tomnuj mã anhÿrer nê hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga nê akupÿm amnhĩ kaxyw inhmã ajamaxpêr ho ri apa.

²⁰ Na htem hkwÿjê nhõrkwÿ hwÿr gjêx kaxyw hakwa krem kãm àkjêr o kuhê nhũm mẽ kuma nê mẽ kãm anê nhũm mẽ hwÿr agjê. Nê mẽ ixkre hkre kamã axpên mã kapêr o hkrĩ rÿ axpên mã kapêr pê mẽmoj to hkõm o hkrĩ. Ja pyrã nê ot pa mẽ ajamãr o ixpa. Mẽ ate inhmã anhÿr nhũm ixte mẽ akôt ixpa ho ixpa nhũm mẽ pahte axpên to mex o papa kaxyw.

²¹ Kormã mẽ kot ixpĩr kêt ri na pa pre mẽ kot amnhĩ tomnuj xwÿnhjê kutã amnhĩ to htÿx o ixpa. Amnhĩ to htÿx nê ri ixpa kamã ixtyk jakamã nhũm Inhĩpêxã akupÿm ixto ixtĩr nê akupÿm amnhĩ wÿr ixto api. Hãmri nê amnhĩ nhĩhkô hã mẽ ho amnhĩptàr ã hkrĩ xà kamã inhÿr pa ixkrĩ ho ixkrĩ nê ìhkô hã mẽ piitã mẽ ho amnhĩptàr o ixkrĩ. Tã kot kaj mẽ atõ ixpyrà nê ate amnhĩ tomnuj nê amnhĩ to htÿx nê. Nê inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ pyrã nê wa ixte mẽ ato amnhĩptàr

ã ixkrĩ xàja kamã amnhĩ nhĩhkô hã mẽ akrĩ ka mẽ wa inhĩhkô hã wa inhmã mẽ ho amnhĩptàr o akrĩ.

²² E ixkwÿjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Tã ãm ja pix. Na hapêx. Anê.

—E Juãw. Kêr ka Raxisej kamã ixkrajê mã ixkapêr ã kagã nê mẽ hwÿr amê. Nê kagãja piitã krĩ hkwÿ kamã ahpÿnhã ixkwÿjê hwÿr arê kê mẽ kamã harê nê ixkapêr ma. Anê.

Nhũm pre ã Jejus inhmã kapêr anê. Pa kuma nê ô ri mẽ piitã mẽ kãm hã kagã hpa.

4

Tĩrtũm kot mẽ ho amnhĩptàr ã hkrĩ xà jarênh

¹ Tã pa axte mẽmoj pumu nhũm kaxkwa hwÿr mẽ gjêx xà hã hakwakreja amnhĩ kahê xà mẽ pa omu. Hãmri nhũm axte mēhõ kapêr tÿx xwÿnhhta. Te kot pifti kakôr tÿx pyræk xwÿnhhta axte inhmã kapêr nê inhmã:

—E amnê ixwÿr api pa mẽmoj nhÿrmã kot tanhmã amnhĩ nhĩpêx to hkukamã amã ho amnhĩrit ka omu. Anê.

² Hãmri nhũm Tĩrtũm Karõ tanhmã ixto nê ixto api pa kaxkwa kamã mẽmoj pumunh o xa. Tĩrtũm kot mẽ ho amnhĩptàr ã hkrĩ xà maatita pa pre omu. Nhũm kamã mēhõja nhÿ. ³ Kuk kamã hirã htÿx kumrêx. Te mẽmo kên kamrêk karÿr jaxênh tÿx pyræk. Nê kot mẽ ho amnhĩptàr ã hkrĩ xà puhã màxwÿxti grãgrãreja kãm hipòk nê harir pa omunh o xa.

⁴ Nhũm hkrĩ xà maati puhã mẽ ho amnhĩptàr o hkrĩ xà kêp 24. Kamã mẽ àptàr tũmjaja hkrĩ. Mẽ piitã ôr o mẽ ahkã htu nê ê jakare nê hkrĩ.

⁵ Nê Tĩrtũm hkrĩ xà maatiija rũm na katõtòk nê hkrakrak nê haxênh japà nê hikwÿ. Nê hkrĩ xà kapem kanê maati pixi kamã kwryt pê 7ja pòk rãhã ho kuhê. Kanêja te Tĩrtũm Karõ pyræk.

⁶ Nê hkrĩ xà kapem mẽmo te gô rax pyrækja hkarÿr jaxênh tÿx kumrêx nê nõ. Te ho kax karÿr jaxênh tÿx pyrã nê hkarÿyre. Nê hkrĩ xà puhã mẽmoj tĩr nê kuhê pê kwat

kuhê. Nê ôkwa nê katut piitã hkôt no. ãm no xohtô rax kumrêx. Na pre ã mëmoj kêp kwatja no xohtô anê pa omu.

⁷ Wamta te kot mry pê rêãwti pyrãk. Nê hkôt ja te kot môx myti pyrãk. Nê hapu hã hkuk te panhĩ hkuk pyrãk. No hapu hã ja te kot àanhãhti htor kaxyw hara koror pyrãk.

⁸ Nê piitã hara kêp 6. Nê ã piitã kamã no. Nhũm prem Tirtũm mã mex o mex ã grer rãhã ho kuhê nê aa pinhkrênh kêt nê. Nê kãm grer o:

Amex o amex Tirtũm.
Nê axihtỳx o axihtỳx.

Nê aa ate amnhĩ tomnuj kêt kumrêx.
Amnepê mã kormã mëmoj kêt ri ka ra arãhã ri apa. Tã arĩ arãhã ri apa xwỳnh na ka. Kot kaj aa ajapêx kêt nê.
ãm hãmri na ka hte mẽ ixto mex rãhã ho apa.

Nê amex o amex Tirtũm. Anê.

⁹⁻¹⁰ Nhũm prem xatã mẽ ho amnhĩptãr hkrĩ xà kamã hkrĩ xwỳnhja mẽ kot kãm “Rãhã pa xwỳnh” anhỳr xwỳnhja mã ã grer anhỳr o kuhê. Kãm mex o mex ã grer pê tanhmã kot mẽ ho mex to hã harê. Hãmri nhũm mẽ àptãr tũm pê 24jaja mããnên kutã hkõn krã ho rôrôk nê hipô hpa nê hkrĩ. Nê amnhĩ krã rũm ôr o mẽ ahkãja kwry nê hpar pê haxwỳ. Kêp mẽ ô Pahi Maati hã hã hpijaãm kaxyw wamtajê pyrã nê mex o mex ã harênh o hkrĩ nê kãm:

¹¹ ãm hãmri na pa htem amex o amex ã ajarê Tirtũm

Apê mẽ inhõ Pahi Maati na ka.

Nê apê mẽ inhõ Tirtũm na ka.

Na ka pre mëmoj piitã ho akato.
Axãhpumunh tỳx nê ajamaxpêr tỳx o mëmoj piitã amã hprãm xà hkôt ho akator pa.

Jakamã na pa htem ã amex o amex ã ajarênh anê. Mẽ ixrom axihtỳx mex kumrêx na ka hte apa Tirtũm. Anê.

5

Mẽ pahte amnhĩ tomnuj pãnhã amnhĩrer xwỳnh jarênh

Juãw 1.29; Piripos 2.5-11

¹ Tã pa pre arĩ te kaxkwa kamã mëmoj pumu. Mẽ ho amnhĩptãr ã hkrĩ xà maatita kamã hkrĩ xwỳnh nhĩhkra kamã kagã pa omunh o xa. Upôk rũm omu. No ãm axtem

kagã kaxkep na pre. Nê akutã hã kagã nê menh ê ho ho htỳx xàja kêp 7.

² Hãmri nhũm Tirtũm kapêr o wryk xwỳnh xihtỳx xwỳnhja kapêr tỳx kãm kapêr o:

—E mẽ atõ na ate kagã mũj pyr nê ho htỳx xà hpôt mã tãm? Anê.

³ Hãmri nê tee ri mẽ piitã mẽ hkapi nom nhũm ja kaxyw mẽhõ amrakati kumrêx. Kaxkwa kamã amrakati nê pika kamã mããnên amrakati nê pika hkrak ri amrakati. Nhỹri mẽhõ kot kagã kaxkepta pyr nê hpôt nê omunh mã tãm xwỳnhja amrakati ho amrakati.

⁴ Nhũm tee ri mẽhõ japêr nom mẽhõ pumunh kêt nê. Pa tee ri ja hã omu nê ixkaprĩ htỳx nê inhmỳr o xa.

⁵ Hãmri nhũm pahi hõja ixpumu nê inhmã:

—Kwa amỳr kêt nê. E mẽhõ mũj pumu.

Juta kanrêhã htãmnhwỳ xihtỳx xwỳnhja. Pahi Tawi kanrêhã htãmnhwỳ te kêp mry pê rêãw xihtỳx pyrãk o hihtỳx xwỳnh mũj pumu. Kot mẽ kãm hkurê xwỳnhjê kutã amnhĩ to htỳx nê mëmoj punuj piitã ho hapêx kaxyw mã xwỳnh jakamã tapxipix na kot kagãta hpyr nê ho htỳx xà hpôt par mã tãm. E ka omu. Anê.

⁶ Hãmri pa kuma nê hwỳr rĩt nê Jejusja pumu. Kot mẽ pahte amnhĩ tomnuj pãnhã amnhĩrer xwỳnhja mẽ ho amnhĩptãr o hkrĩ xà maati kapem xa. Mẽmoj htĩr pê kwat mẽ àptãr tũm pê 24jê nhĩpôk ri xa. Mẽ kãm hkurê xwỳnhjaja kot hpĩr nhũm ra akupỳm htĩr nê xa. Nom ra axtem nê xa. àhpumunh tỳxja te kot pahi xãhpumunh pyrãk. Nê hpãr kêp 7. Nê no mããnên kêp 7. Noja te Tirtũm Karõ pyrã nê kêp pika piitã hkôt pa xwỳnh. ã Jejusja axtem nê ãm anê pa omu.

⁷ Hãmri nhũm mẽ pahto amnhĩptãr o hkrĩ xwỳnhja wỳr tẽ nê ãhkra kamã kêp kagã kaxkepta py.

⁸ Hãmri nhũm mẽ htĩr pê kwat mẽ mẽ àptãr tũmjaja hpar pê hkõn krã ho rôrôk nê hkrĩ hpa nê hipô nê hkrĩ. Piitã wiorãwti jamỳ nê ôr o xijere kamã mẽhkuxwa xà jamỳ nê o hkrĩ. Nhũm Tirtũm krajaja Tirtũm mã tanhmã amnhĩ jarênh to nhũm mẽ mar o hkrĩ. Te xijere kamã mẽhkuxwa xà hpãr o hkrĩ pyrã nê mẽ kuma.

⁹⁻¹⁰ Jakamã nhũm mẽ hkõn krã ho hkrĩ xwỳnhja mẽ pahte amnhĩ tomnuj pãnhã

amnhīrer xwýnhhta kutã kãm grer o hkrī. Mē grer nyw o kãm gre nē kãm:

Na prem apī ka atyk o mē piitã mē kot amnhī tomnuj pãnhã amnhīrer pa.

Ahpýnhã pika piitã hkôt mē urojê piitã hpãnhã amnhīrer pa.

Nē ahpýnhã ri mē kapēr xwýnh kwýjê piitã mē hpãnhã amnhīrer pa. Atyk o mē kot amnhī tomnuj piitã hpãnhã amnhīrer pa.

Jakamã nhũm mē kot akôt amnhī xunhwýr xwýnhhaja kēp Tirtũm kra nē ri pa.

Ka ra mē panhõ Tirtũm mã mē kēp patre kaxyw mē unhwý nhũm htem pika piitã hkôt mē ho amnhīptar o pa.

Tã atyk o ate pika piitã hkôt mē hpãnhã amnhīrer jakamã kapxipix na ate kagãta pyr nē ho htýx xã hpôt mã tãm. Anē.

11 Hãmri nhũm Tirtũm kapēr o mē wryk xwýnhhaja nhýhýnh hapôj nē kuhê. Mē ohtô rax o ohtô rax. Ohtô rax o mē pajamaxpēr jakrenh. Hãmri nē Tirtũm kot mē ho amnhīptar ã hkrī xã maatija wýr mra nē kãm hipôk pa. Nē mēmoj tīr nē kuhê xwýnhjê mē mē aptar tũmjê mã hipôk pa nē mē pahte amnhī tomnuj pãnhã amnhīrer xwýnhhta mã kapēr.

12 Kãx pē kãm kapēr nē kãm:

ãm hãmri na pa htem amex o amex ã ingrer o ixkuhê.

Mē ixrom axihtýx o axihtýx.

Nē mēmoj piitã anhõõ.

Nē ate mēmoj piitã hkukamã axãhpumunh par.

Nē amex o amex jakamã na pa htem amã amex pix ã ingrer o ri ixpa. Anē.

13 Tã nhũm mēmoj piitã Tirtũm mē Jesus wa kãm wa mex o wa mex ã harê. Pika hkôt panhī nē mry nē àk nē mēmoj piitãã. Nē pika hkrak ri nē gô hkrak ri mēmoj piitãã. Nē mē htykjaja. Nhũm mē piitã wa kãm wa mex o wa mex ã wa harê nē wa kãm:

E ate mē ixto amnhīptar ã akrī xã kamã akrī xwýnh mē kot mē ixte amnhī tomnuj pãnhã amnhīrer xwýnh mē war amex o wa amex.

Nē war axihtýx o war axihtýx.

Nē war axãhpumunh o war axãhpumunh.

Na pa htem ã war ajarēnh anhýr rãhã ixpa ho ixpa. Anē.

14 Hãmri nhũm mēmoj tīr pē kwatjaja mē kuma nē mē kãm:

—Nã ãm hãmri na ka mē ã wa harēnh anē. Wa mex o wa mex kumrêx. Anē.

Hãmri nhũm mē aptar tũmjaja Tirtũm mē Jesus wa hpar pē hkôn krã ho rôrôk nē hkrī hpa nē haxwýja wa kãm wa mex o wa mex ã wa harê.

6

Kagã ho htýx xã pē 7 jarēnh

Matêwre 24.3-14; Sikũn Tesarõn 2.3; Wam Juãw 2.18

1 Tã pa arī kaxkwa kamã mē pahte amnhī tomnuj pãnhã amnhīrer xwýnh kot tanhmã amnhī nhīpêx to hã omunh o xa. Nhũm kagã kaxkepta py nē wam ho htýx xã pôt. Hãmri nhũm mēmo tīr pē kwatjê hõja kapēr týx kumrêx. Te na katôtök týx pyrãk o mēhõj mã kapēr nē kãm:

—E amnē mē ixwýr tē. Anē.

2 Hãmri nhũm kawar jakajre nhýhýnh hwýr hpôx o tē. Nhũm mēhõja õ kuxê mý nē hã nhý nē tē. Hãmri nhũm nhãm mēhõja hwýr tē nē kãm pahi hã mē ahkã htu. Hãmri nē kãm tanhmã kapēr to nhũm kuma nē mē kot kãm Tirtũm mē Jesus wa kurê xwýnhjê nhīmex par kaxyw hakêx nē ma pika hwýr tēn wry.

3 Hãmri nhũm mē pahte amnhī tomnuj pãnhã amnhīrer xwýnhja wam kagã ho htýx xãta kôt axte ja pôt. Hãmri nhũm mēmoj tīr pē kwatjê hõja axtem mēhõj mã kapēr nē kãm:

—E amnē mē ixwýr tē. Anē.

4 Hãmri nhũm kawar kamrêk mē hwýr hpôx o tē. Nhũm mēhõ hã nhý nē tē. Nhũm nhãm mēhõja kãm wapo gõ nē ma pika hwýr htēm nē wryk kaxyw hano. Kot hwýr wryk nē pikap mē pa xwýnhjê kurê huk kaxyw. Mē kot axpên par kaxyw ma mē hwýr kumê. Hãmri nhũm kuma nē wapota py nē hakêx nē ma mē hwýr tēn wry.

5 Hãmri nhũm mē pahte amnhī tomnuj pãnhã amnhīrer xwýnhja kagã ho htýx xã hõ pôt. Na pre ra ho axkrut nē hpôt tã hpãnhã axte hkôt ja pôt. Hãmri nhũm mēmoj tīr pē 4jê hõta mēhõj mã kapēr nē kãm:

—E amnē mē ixwýr tē. Anē

Hāmri nhũm kawar tykre mẽ hwỳr hpôx o tẽ. Nhũm hã ỹr xwỳnhja mẽmoj to peja xà hã parās mỳ nẽ o tẽ.

⁶ Hāmri nhũm mẽ htĩr pẽ kwatjẽ rũm mẽhõja kãm kapẽr nẽ kãm:

—E kêt ka ma pika hwỳr mẽ hwỳr tẽn wrỳ nẽ mẽ kãm myt pyxi kamã mẽ àpênh pãnhã mẽ kãm mẽmoj to hkryre nẽ anhõ parãsta kamã ho peja nẽ mẽ kãm õr o apa. Nom mẽ apkur xà hã orti nẽ wĩhti ka mẽ kêp tanhmã ho hkêt nẽ. Anẽ.

Hāmri nhũm kuma nẽ hakêx nẽ ma tẽn mẽ hwỳr wrỳ.

⁷ Tã nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho axkrunẽpxi nẽ hpôt tã hpãnhã axte hkôt ja pôt. Hāmri nhũm mẽmoj tĩr pẽ kwat kot hitep xwỳnhja mẽhõj mã kãm:

—E amnẽ mẽ ixwỳr tẽ. Anẽ.

⁸ Hāmri nhũm kawar rãrãare mẽ hwỳr hpôx o tẽ. Nhũm mẽhõ hã nhỹ nẽ tẽ. Hã ỹr xwỳnh nhĩxi na pre kêp “Mẽhtyk” anẽ. Hāmri nhũm mẽhõja kãm kapẽr nẽ kãm:

—E ma pika hwỳr wrỳ nẽ tanhmã mẽ ho kê mẽ ohtõ nẽ tanhmã amnhĩ to nẽ axkaprã. Kê mẽ hkwyjaja pijapu kamã axpẽn pa nẽ mẽ hkwyjaja prãm xaj ty nẽ mẽ hkwyjaja tanhmã à htỳx kute kamã ty. Nẽ mẽmo mry xoprẽja mẽ hkwyjẽ pa. E ma mẽ hwỳr wrỳ nẽ tanhmã mẽ ho ho apa. Anẽ.

Hāmri nhũm kuma nẽ hakêx nẽ ma pika hwỳr tẽn wrỳ. Hāmri nhũm mẽ htykjẽ papxaja tanhmã amnhĩ to nẽ te kot hã jêt nẽ ma hkôt mõi nẽ pika hwỳr wrỳk pyrãk pa pre arĩ omunh o xa.

⁹ Hāmri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho kwat nẽ hpôt tã hpãnhã axte ja pôt. Hāmri nẽ hpôtja kôt pa ra mẽ kot Tĩrtũm mã mẽmoj nhõr xà hã mẽsti pumu. Nẽ hkrak ri mẽ hkarõjẽ pumu. Mẽ kot hkwyjẽ hkôt ri mẽ kãm Tĩrtũm kapẽr jarênh nẽ Jejus kêp mẽ õ Pahihti hã harênh o pa nhũm mẽ kot hã mẽ hpar xwỳnhjẽ karõja pa pre mẽ omu. Nhũm mẽ mẽsti hkrak ri amnhĩ to Tĩrtũm wỳr o hkrĩ. ¹⁰ Kỳx pẽ kãm kapẽr nẽ kãm:

—Ãm hāmri amex o amex Pahi Maati. Aa ate mẽmoj tã tanhmã amnhĩ to axêx to hkêt kumrêx. Kwa xà kot kaj tokyx pika hkôt mẽ

kot mẽ inhĩmex xwỳnhjaja tanhmã mẽ ixtã mẽ ho nà? Anẽ.

¹¹ Hāmri nhũm mẽhõja mẽ hwỳr tẽn nẽ mẽ kãm mẽ ê jakajre gõ nhũm mẽ hagjẽ. Hāmri nhũm mẽ kãm:

—E mẽ mamrĩ atar akôkôt o akrĩ. Koja Tĩrtũm kormã tanhmã mẽ kot mẽ atomnuj xwỳnhjẽ ho hkêt nẽ. Kê mẽ axte mẽ apyrã nẽ mẽ akwyjẽ nhĩmex mãn. Koja mẽ Tĩrtũm jamaxpêr xà hkôt axte mẽ akwyjẽ pa nhũm rĩ kormã mẽ ato hpimrãatã tanhmã mẽ atã mẽ hipêx to. Jakamã e mẽ atar kutêp mãmrĩ akôkôt o akrĩ. Anẽ.

¹² Hāmri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt pa omu. Na pre ra ho 5 nẽ hpôt tã hpãnhã hkôt axte ja pôt. Hāmri nhũm pika htertet tỳx kumrêx. Nẽ myyti ahtyk nẽ mytwrỳre te kêp mẽ hkamrõ kamrêk tỳx pyrã nẽ ajêt.

¹³ Nẽ kanhêti tanhmã amnhĩ to nẽ axrê nẽ pikap rôrõk pa. Te kôk xapêr tỳx nẽ kot pãrerekre kormã rãx tã kot kãm hikranh par pyrã nẽ piitã rênh pa nhũm rôrõk.

¹⁴ Hāmri nhũm kaxkwaja te kagà kaxkep pyrã nẽ amnhĩ to kaxkep o tẽ. Nẽ pika piitã hkôt kên prêk nẽ hixêt prêk maati piitã te hkrĩ xà rũm hapõx nẽ mrar nẽ nhãm hkrĩ pyrãk. Nhũm gõ hipõk piitã haxwỳja te hikwỹ xà rũm hapõx nẽ mrar nẽ nhãm hikwỹ pyrãk. Pika htertet tỳx nhỹ hã ã mẽmoj amnhĩ nhĩpêx anẽ. ¹⁵ Hāmri nhũm pika hkôt mẽ piitã tee ri mẽmoj ã amnhĩ nhĩpêx anhỹr ã omu nẽ kãm ma nẽ htertet tỳx kumrêx. Mẽ ho amnhĩptãr xwỳnhjaja nẽ põiisti krãhtũmjaja nẽ mẽ kot amnhĩ to rũnh xwỳnhjaja nẽ mẽ hihtỳx xwỳnhjaja nẽ mẽ kãm mẽ àpênh xwỳnhjaja nẽ amnhĩ mã mẽ àpênh xwỳnhjaja. Ãm piitã mẽmoj ã kot amnhĩ nhĩpêx anhỹr ã omu nẽ tee ri amnhĩ kukamã hamaxpêr nẽ kãm ma ho kãm ma. Hāmri nẽ hpimxur kaxyw ma kên prêk kre japêr o hprõt nẽ mra. ¹⁶⁻¹⁷ Hāmri nẽ amnhĩ to kên prêk wỳ nẽ kãm:

—Kwa na ra mẽ ixto amnhĩptãr ã hkrĩ xà maati kamã hkrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnhja wa mẽ ixkamã gryk tỳx kumrêx. Ra wa kot tanhmã mẽ ixtomnuj to xà hã arĩgrota kato. Koja wa mẽ ixtomnuj tỳx nẽ pa mẽ kutã

hkêt nê. Kwa tokyx mẽ inhĩpy arôrok nê wa kêp mẽ ixto amũxu. Anê.

7

Mẽ kot Tirtũm mã hkrajê kagà Apokarip 9.4

¹ Tã pa arĩ kaxkwa kamã mẽmoj pumu. Nhũm Tirtũm kapêr o mẽ wrỳk xwỳnh pê kwatja piitã ahpỳnhã pika nhĩtep xà hkôt kôk jatur xà hã hamỳ nê ho kuhê. Pika piitã hkôt kôk hpinhkrênh par nê àpêr kêt nê gô xujanãr kôt àpêr kêt kaxyw hatur xà hã hamỳ nê ho kuhê. Nê pã piitã hkôt àpêr nê tanhmã pĩ hkwỳ ho pymaj nhũm mẽ ã amnhĩ nhĩpêx anê nê hatur xà hã hamỳ nê ho kuhê. ² Na pre ra Tirtũm ja hã mẽ kãm karõ nê mẽ kãm:

—E kêr ka mẽ ma pika hwỳr wrỳ nê pika nê gô xujanãrja tanhmã wa homnu hto. Anê.

Hãmri nhũm mẽ kuma nê hwỳr wrỳ nê kormã nê kôk ho htỳx. Hãmri nhũm Tirtũm kapêr o wrỳk xwỳnhjê hõja myt japôx xà rũm mẽ hwỳr hpôx o tẽ. Nê ìhkra kamã mẽ kot Tirtũm kra hã mẽ hixi jarênh xà hã kagàta py nê o tẽ. Hãmri nê kax pê mẽ kot pika mẽ gô xujanãr homnu mã xwỳnhjê mã kapêr nê mẽ kãm:

³—Kwa taxy pa Tirtũm krajê nhõkrã kagà hpa mãn. Kêr ka mẽ omu nê mẽ tapxipixjaja tanhmã mẽ ho hkêt nê. Anê.

⁴⁻⁸ Hãmri nê mẽ hkagà pa. Ahpỳnhã Ijaew pigranh xwỳnhjaja mẽ ho ohtô rax kumrêx nê tanhmã mẽ hkagà hto. Pa tanhmã mẽ kute hã mẽ harênh ma nhũm xep mẽ ohtô rax kumrêx.

Juta kamã mẽ kêp 12.000.

Nê Rupê kamã mẽ kêp 12.000.

Nê Gax kamã mẽ kêp 12.000.

Nê As kamã mẽ kêp 12.000.

Nê Natari kamã mẽ kêp 12.000.

Nê Manase kamã mẽ kêp 12.000.

Nê Simeãw kamã mẽ kêp 12.000.

Nê Rewi kamã mẽ kêp 12.000.

Nê Isaka kamã mẽ kêp 12.000.

Nê Jepurõ kamã mẽ kêp 12.000.

Nê Juje kamã mẽ kêp 12.000.

Nê Pêjamĩ kamã mẽ kêp 12.000.

Ã mẽ ohtô rax kot anhỳr. Hãmri nê mẽ piitã mẽ pikamỳr par kãm mẽ kêp 144.000. Piitã

kêp Apraãw kanrêhã htãmnhwỳ na pre mẽ. Tã ã axpên kaxyw mẽ ohtô rax kumrêx kot anhỳr tã nhũm mẽ hkagà pa.

Tirtũm kra hkwỳjê jarênh Apokarip 14.1-5

⁹ Tã pa axtem mẽmoj pumu. Nhũm mẽ ohtô rax nê Tirtũm nhõ krĩ kamã kuhê. Ahpỳnhã ri pika piitã hkôt mẽ urojaja. Nê ahpỳnhã ri mẽ kapêr xwỳnhjaja nhũm prem pika piitã kurũm kot mẽ ho amnhĩptar ã hkrĩ xà maatija kamã hkrĩ xwỳnh pê Tirtũm mẽ mẽ pahte amnhĩ tomnuj pãnhã amnhĩrer xwỳnhja wa kutã kuhê. Mẽ ohtô rax kumrêx jakamã pa tee ri mẽ piitã mẽ ho kôta hpar prãm kaprỳ. Nê piitã ê jakare kamã kuhê. Nê hkĩnh nê hkĩnh xaj pô hkwỳ jamỳ nê ho àpêr o kuhê. ¹⁰ Hãmri nê kỳx pêe Tirtũm mẽ Jesus wa kãm kapêr nê wa kãm: Hêxta waa nê. War amex o war amex Pahi Maati.

Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nê.

War ajamê mẽ ixkamã axukaprĩ rãhã ho apa xwỳnh na ka wa.

Jakamã pa mẽ inhmex nê war awỳr api nê war akuri inhmex nê ijamakêtkati nê ixpa ho ixpa.

Ãm hãmri na ka hte wa mẽ ixto mex rax kumrêx o apa. War amex o war amex. Anê.

¹¹ Hãmri nhũm Tirtũm kapêr o mẽ wrỳk xwỳnhjaja Tirtũm krĩ xà mã hipôk nê hkôn krã ho rôrok nê hkrĩ hpa. Nê mẽ àptar tũmjê mẽ mẽ htĩr nê kuhê xwỳnhjaja mẽ ìhkô hã kãm hipôk nê wam tajê pyrãk nê hkôn krã ho rôrok nê hkrĩ. Hãmri nê mẽ ohtô kot Tirtũm mẽ Jesus wa kãm kapêr ã mẽ kuma hãmri nê Tirtũm ã hpijaàm kaxyw hpar pê htu mỳr pê hikwỳ hpa nê kãm mex o mex ã harê nê kãm:

¹² “Ãm hãmri na mẽ ã ajarênh anê Tirtũm.

Amex o amex.

Na ka hte mẽ ixto mex o apa.

Mẽ ixrom axàhpumunh o axàhpumunh.

Nê mẽ ixrom axihtỳx o axihtỳx.

Jakamã na ka hte mẽ ixpiitã mẽ ixto mex kumrêx rãhã ho apa.

Ã ate anhỳr rãhã o rãhã jakamã na pa htem amã amex o amex ã ajarênh rãhã ho ixpa.” Anê.

13 Hāmri pa mẽ omunh o ixām rôm nhũm mẽ àptàr tũmjê hõja ixwỳr tẽ nẽ mẽ ê jaka kamã mẽ hkĩnh xàj pô jamỳnh nẽ ho kuhê xwỳnhjê hã ixkukja nẽ inhmã:

—E mǎn ate mẽ ê jakare kamã mẽ kuhê xwỳnh mũjjê pumunh nà? Tanhmã na prem amnhĩ nhĩpêx to nẽ amnẽ api? Xà ate mẽ omunh? Anẽ.

14 Hāmri pa kuma nẽ kãm:

—Nà ixte mẽ omunh kêt. Kêt ka na ixrom ate mẽ omunh. Anẽ.

Hāmri nhũm inhmã mẽ harênh o:

—Nà na pre mẽ hkwỳjaja Jejus ã mẽ homnuj tỳx kumrêx nẽ mẽ kupa. Tã mẽ kêp Jejus kwỳ jakamã na pre mẽ nẽ mẽ kot amnhĩ tomnuj o hapêx nẽ te amnhĩ kamrô ho mẽ nẽ mẽ kot amnhĩ tomnuj piitã kuhõnh par pyràk o mẽ hipêx. Jakamã nhũm mẽ ê jaka kamã mex nẽ hkĩnh tỳx nẽ pa.

15 Nẽ Tĩrtũm kot mẽ pahto amnhĩptàr ã hkrĩ xà maati kutã kãm mex o mex ã harênh rãhã ho kuhê.

Na hte mẽ ho mex rãhã ho pa. Mẽ hkôt pa ho pa jakamã koja mẽmoj tanhmã kêp mẽ ho hkêt nẽ.

16-17 Nẽ mẽ pahte amnhĩ tomnuj pãnhã amnhĩrer xwỳnh kot Tĩrtũm krĩ xà maati kamã ãm xwỳnhhta na hte mẽ hamãr mex rãhã ho mẽ hkôt pa.

Te mẽ kot mẽ hkrit jamãr mex pyràk.

Nẽ te mẽ kot mẽ hkrit kôm o pa nhũm htĩr nẽ pa pyràk.

Koja mẽ kuri htĩr tũm nẽ hkôt pa ho pa.

Nẽ axte kãm prãm kêt nẽ.

Nẽ axte kãm kôr kêt nẽ.

Nhũm arĩgro htỳxja axte mẽ hkà ho hxêt kêt nẽ.

Koja Tĩrtũm te mẽ kot mẽ hkra no kagô nhĩnhĩnh par pyràk o mẽ hipêx nhũm mẽ axte hkaprĩ nẽ mỳr o pa hkêt nẽ.

Pãnhã hkĩnh nẽ mex rãhã kuri pa ho pa. Anẽ.

8

Kagà kaxkep o htỳx xà kot hitep jarênh

1 Tã pa arĩ kaxkwa kamã mẽmoj pumu nhũm mẽ pahte amnhĩ tomnuj pãnhã amnhĩrer xwỳnhja kagà kaxkep o htỳx xà kot hitepta pôt. Hāmri nhũm kaxkwa kamã mẽmoj piitã hpinhkrênh pa nhũm mẽhõ kapêr kêt kumrêx. Nẽ hpinhkrênh par o ra hã ahtũm ry mex nẽ.

2 Hāmri nhũm Tĩrtũm kutã kapêr o wryk xwỳnh pê 7 nẽ mẽ kuhê xwỳnhjaja. Nhũm kapêr o wryk xwỳnhjê hõja mẽ hwỳr tẽ nẽ mẽ piitã mẽ kãm pifti gô.

3-4 Hāmri nhũm kapêr o wryk xwỳnhjê hõja ôr o xijere py nẽ Tĩrtũm mã mẽhkuxwa xà ho xêt xà hã mês kunĩhti hwỳr o tẽ. Mẽ ho amnhĩptàr ã hkrĩ xà maati kutã ôr o mêtija wỳr o tẽ nẽ kuri o xa. Hāmri nhũm mẽ kãm kamã mẽhkuxwa xà hkwỳ runh rax nẽ nhũm mêtia hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarênh to. Jakamã nhũm mẽhkuxwa xà xêt kũm mẽ mẽ kot Tĩrtũm mã amnhĩ jarênh xàja mẽ nhũm ahkà nẽ Tĩrtũm kapêr o wryk xwỳnh nhĩhkra kamã xijere rũm Tĩrtũm kutã kàx mã àpir o pa.

5 Hāmri nhũm kapêr o wryk xwỳnhja xijere kamã kuwy hpôk kwỳ ho nỳt nẽ ahpar mã pika hwỳr kumẽ nhũm ma tẽ nẽ pikap tẽm nhũm pika httertet tỳx nẽ kamã na katôtôk nẽ haxênh nẽ hkrakrak.

Mẽ kot pifti kakôr ã mẽ harênh

6 Hāmri nhũm Tĩrtũm kapêr o wryk xwỳnh pê 7 kot pifti jamỳnh xwỳnhjaja ra kot pafiti kakôr mã.

7 Jakamã nhũm wanta ô pifti kakô nhũm na mê te kot jêr krã jakot pyràk xwỳnh mẽ kuwy te kot mẽmo kamrô kamrêk pyràk xwỳnhhta pikap rôrôk pa. Nẽ nhỹhỹnh pika hkwỳ ho rax nẽ ho kaxàr pa. Nẽ pôtĩ nẽ akunĩ hkwỳ ho rax kumrêx nẽ ho kaxàr pa. 8 Hāmri nhũm wam ãm xwỳnh nhĩjuk ri ãm xwỳnhja ô pifti kakô nhũm mẽmoj te kên krã hprêk pôk pyrã nẽ kaxkwa rũm ahpar mã tẽ nẽ gô xujanãr nhĩkjê kamã hpôk rãhã tẽn mrô. Hāmri nhũm gô nhĩkjê kamã gôja mẽmo hkamrô hã amnhĩ jahkre hpa. 9 Jakamã nhũm gôx kãm mẽmoj htĩr nẽ ri mrar xwỳnhjaja pikaprãr pa. Nẽ gôx kãm pàr gô krãhkà hã pa xwỳnhja haxwỳja gjêx pa. Nẽ pàr kãm mẽ pa xwỳnhjaja haxwỳja hagjê nẽ pikaprãr pa. No nhũm gô mex kãm pàr kãm mẽ pa xwỳnhjaja mẽ kurom arĩ htĩr nẽ.

10 Tã nhũm wam ãm xwỳnhhta wa hijuk ri ãm xwỳnhja ô pifti kakô. Hāmri nhũm kanhêti rax kumrêxja axta nẽ hpôk o ma ahpar mã tẽn pikap tẽm nẽ pyhti nẽ hino hkwỳ ho ohtô nẽ homnu hpa. 11 Kanhêti nhĩxi pê na pre “mẽmoj xỳ xà”

anhÿr jakamã nhũm tẽm nẽ pyhti nẽ hino hkwÿ ho ohtô nẽ homnu pa. Nhũm prem hwÿr mra nẽ hkwÿ janhi nẽ ho ixkô nhũm ÿ nẽ nhũm mẽ ohtô nẽ ho ixkô nẽ axkaprã.

¹² Hãmri nhũm hpãnhã Tirtũm kapër o wrÿk xwÿnhjê hõja õ pifti kakô. Na pre ra ho axkrunẽpxi nẽ hkakôr tâ hpãnhã ra axte hõja kakô. Hãmri nhũm mẽhõja tẽ nẽ myyti kura nhũm hkwÿ ahtyk nẽ hirã hkêt nẽ. Nhũm mytwrÿre nẽ kanhêti mã ho anẽ nẽ myyti pyrã nẽ hkwÿ ahtyk nẽ hirã hkêt nẽ harir. Jakamã nhũm kamãt kãm hirã mex kêt nẽ. Nẽ arÿgro hã myytija haxwÿja hirã mex kêt nẽ.

¹³ Hãmri pa kaxkwa kamã àanhãhti pumu nhũm kÿx pẽ ri htor o pa pẽ tanhmã kapër to nẽ kapër o:

—Hêxta waa nẽ. Kormã kot pifti kakôr xwÿnhjaja axkrunẽpxi nẽ kormã hkakôr kêt nẽ. Koja mẽ tokyx hkakô nhũm pika hkôt ri mẽ pa xwÿnhjaja amnhÿ xã htÿx kamã hamak tÿx o pa. Na pa tee ri mẽ hkukamã ijamaxpër nẽ inhmã mẽ hkaprÿ htÿx nẽ. Hêxta waa nẽ. Koja mẽ omnuj tÿx kumrẽx. Anẽ.

9

¹ Tã pa axte mẽmoj pumu. Nhũm Tirtũm kapër o wrÿk xwÿnhjê hõ õ pifti kakô. Na prem ra ho kwat nẽ hkakôr tâ hpãnhã axte hõja ja kakô. Hãmri nhũm kanhêti hõ axta nẽ pikap tẽm kurê kumrẽx nhũm mẽhõja omu nẽ hwÿr tẽ nẽ kãm mẽmoj tã saf gõ. Satanasti jagjênh xã hã ahkre xupÿm o htÿx xã hã safja nhũm kanhêti mã kugõ.

² Hãmri nhũm kupy nẽ ahkrehtita wÿr o tẽ nẽ kahê xã mẽ nhũm kurũm kuwy hkũm hapôx rax nẽ. Nẽ ma kàx mã àpir o pa nẽ myyti hpro hpa nhũm kamãt kô rax kumrẽx.

³⁻¹¹ Nẽ kuwy hkũmja rũm mẽmoj te krit pyrãk xwÿnh kwÿjaja pikap rôrôk nẽ kuhê. Te kot krit pyrãk tã mẽ hkuk te panhÿ hkuk pyrãk. Nẽ mẽ hkrã hkÿ te mënijê hkrã hkÿ japjê pyrãk. Nẽ ôr o mẽ ahkã jagjê. Nẽ mẽ wa japjê htÿx kumrẽx. Te rêãwti xwa japjê pyrãk. Nẽ kàx o mẽ hinô hkã. Nhũm mẽ htor o hara hkoko htÿx o mra. Te ho kawar xohtô pijapu kaxyw kot mẽ hkjênh xã kamã mẽ htur nẽ mẽ hkjênh o hprôt nhũm hkoko htÿx pyrãk. Nẽ mẽ

hkamnhwÿr o pa kaxyw mẽ hanhyja te kot makre janhy pyrãk. ã kriitija kot anhÿr. Nẽ te nhÿhÿm oprê kaxyw nojarêt nẽ mẽ hkrit kawar hã hikukrêx mex rênh pyrãk. Mẽõ pahija ahkre xupÿmta kamã kêp mẽ hkrãhtũm. Ijaew kapër kãm hixi pẽ “Ap-atõ.” No Gres kapër kãm kêp “Aporiãw.” No mẽ pakapër kãm kêp “mẽ hpar o pa xwÿnh.” Hãmri nhũm Tirtũm kriiti mã kapër nẽ mẽ kãm:

—E kêr ka mẽ ma pika piitã hkôt te makre kot amnhÿ nhÿpêx pyrã nẽ ri mẽ hkôt mẽ hkamnhwÿr o apa. ã amnhÿ nhÿpêx anhÿr o mẽ atã mytwrÿ pẽ sÿk. No ãm kêr ka mẽ hpar kumrẽx kêt nẽ. ãm mẽ kot amnhÿ xã htÿx kãm hamak pix kaxyw tanhmã mẽ ho ho apa. Te makre kot mẽ hkamnhwÿr nhũm à htÿx kumrẽxta pyrãk. No mẽ ate mẽ hkamnhwÿr nhũm mẽ hkamnhwÿr xãja koja à htÿx o makre kot mẽ hkamnhwÿr jakre. Nom ra mẽ kot Tirtũm kra hã mẽ hkagã xwÿnhjaja kêr ka mẽ omu nẽ ãm mẽ omu nẽ tanhmã mẽ ho hkêt nẽ. Mẽ kêp ixkwÿ na mẽ. Nẽ põ nẽ prãt ka mẽ ãm omu nẽ tanhmã ho hkêt nẽ. ãm mẽ kot panhÿ nhõkrã kagã hkêt xwÿnh pixjaja ka ã mẽ hipêx anhÿr o ri mẽ hkôt apa. Nom kêr ka mẽ hpar kêt nẽ. Kê mẽ tee ri amnhÿ xã hã maj kãm tokyx htyk nẽ hapêx prãm hkaprÿ ho pa. E ma mẽ hwÿr mra nẽ ã mẽ hipêx anhÿr o ri apa. Anẽ.

Hãmri nhũm mẽ kuma nẽ ma mẽ hwÿr mra.

¹² Na ra pika hkôt wam mẽ homnu xã pyxi nẽ hapêx. No ãm arÿ hamẽxkrut.

¹³ Jakamã nhũm Tirtũm kapër o wrÿk xwÿnhjê hõja axte õ pifti kakô. Na prem ra ho sÿk nẽ hkakôr tâ axte hkôt hõja hkakô. Nhũm Tirtũm kutã ôr o mẽsti rũm mẽhõja tanhmã kapër to. Mẽsti janhã rũm kapër.

¹⁴ Pifti kakôr xwÿnhnta mã kapër nẽ kãm:

—E na ra mẽ kot mẽ hkwÿjê nhÿmex ã arÿgrota kato. Jakamã kêr ka ma pyhti pẽ Erax wÿr wrÿ nẽ gô mÿ ri Satanasti mã mẽ àpênh xwÿnh pẽ kwatja pumu. Na prem ra mẽ hpa hpre nhũm mẽ gô mÿr ri arÿ hkrÿ ho hkrÿ. Ka mẽ omu nẽ mẽ kãm mẽ hpa hpre xã hpôt pa kê mẽ ma mẽ hkôt ri mẽ hpar o pa. Anẽ.

15 Na pre ra Tirtũm mẽ kot mẽ hkwỳjê nhĩmex o pa kaxyw mẽ kurê nẽ gô mỳ ri mẽ unhwỳ nhũm mẽ kormã mẽ hpar xà hã arĩgro jamãr o hkrĩ. Jakamã nhũm ã pifti kakôr xwỳnhhta mã mẽ harẽnh anẽ nhũm kuma nẽ ma tẽ nẽ mẽ hwỳr wrỳ nẽ mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nẽ mẽ ho ohtô rax kumrẽx nẽ mẽ himex. 16 Nẽ ma amnhĩ kôt pòristi ho ohtô rax nẽ o pa. Piitã kawar ã hkrĩ nẽ mẽ hkôt hprôt nẽ hkoko ho mra. Mẽ kệp 200.000.000 hã mẽ harẽ pa mẽ harẽnh ma. Mẽ ohtô rax o mẽ ohtô rax.

17 Na pa pre arĩ te ixpimtir kãm mẽ omunh pyrãk. Nhũm kawar ã mẽ hkrĩ xwỳnhjaja. Mẽ hinô kàja axtem kàx o. Nẽ hkamrẽkja te kuwy hpòk kamrẽk pyrãk. Nẽ rãrãrja te mẽ hkurôt kane xà pẽ ẽsòf rãrãr pyrãk. Nẽ kakrã htyk. ã kàx o mẽ hinô hkà kot anhỹr. Nẽ mẽ hkrit kawarti hkrãja te rãawti krã pyrãk. Nẽ mẽ hakwa rũm kuwy hpòk mẽ ẽsòfti mẽ kuwy hkũm axpẽn kôt hapòx o pa. 18-19 Nẽ kawarti jamy axtem te kệp kagã xoprẽ hkrã pyrãk nhũm mẽ hamy ho mẽ hkamnhar o mẽ kupa. Nẽ mẽ hakwa rũm kuwy hkũm mẽ kuwy hpòk mẽ ẽsòfti hapòx xwỳnhhta mã mẽ ho anẽ nẽ. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nẽ mẽ ohtô rax kumrẽx nẽ mẽ himex.

20-21 Tã nom nhũm arĩ mẽ htĩr nẽ ri mẽ pa xwỳnhjaja. Mẽ kot mẽ hkwỳjê hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pẽ hprô nẽ mjẽn o amnhĩkati nẽ axpẽn pẽ ahkĩ. Nẽ axpẽn par o ri pa nẽ tanhmã axpẽn xy hto ho pa. ã htyx ri amnhĩ nhĩpêx anhỹr o pa nẽ kãm urer kêt nẽ. ãm Satanasti hkôt pix mã ri amnhĩ nhĩpêx o pa. Nẽ amnhĩm sãnti hkwỳ nhĩpêx. Pĩ ho hipêx nẽ kàx o hipêx nẽ kẽn o hipêx. Nẽ hipêx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrar nẽ mẽ ho utar kaxyw mo hte? Na htem arĩ ã amnhĩ to hwỳr kaprỹ anhỹr o pa.

10

Kagã kaxkep grire jarẽnh

1 Tã pa arĩ mẽmoj pumu. Nhũm axte Tirtũm kapẽr o wrỳk xwỳnh xihtỳxjê hõja pika hwỳr wrỳk o tẽ. Nẽ ẽja kakrã ho na pre. Nẽ hkrã mỳ ri màxwỳxti ajêt. Nẽ hkuk te myt no kamã hirã htyx pyrãk. Nẽ akutã hte kamã te kuwy hpòk pyrãk. 2 Nẽ ìhkra kamã kagã kaxkep grire ra pipôt nhũm ma o tẽ nẽ o wrỳ nẽ o xa. Nẽ gô xujanãr kãm upòk rũm hte xãm nẽ kỳx pẽ amgrã kamã apke rũm hte xãm nẽ o xa pa ixprĩ hã omu.

3 Hãmri nhũm kàx pẽ amỹra. Te rãaw hkàr tỳx pyrãk. Nhũm hpãnhã kaxkwa kamã mẽhõja kãm kapẽr. Te na katõtòk o 7 wês pyrãk pa ixprĩ hã tanhmã kapẽr to hã kuma. 4 Hãmri nẽ ra mẽ amã ã kagã kaxyw nhũm mẽ ja nẽ inhmã kapẽr nẽ inhmã:

—Kwa nã kwarĩ ja kot kaj hã kagã hkêt nẽ. ãm ja pix kot kaj akwỳjê mã hã kagã hkêt nẽ. ãm kapxipix mãn ama nẽ ri hã apa.

Anhỹr jakamã pa mẽ amã hã kagã hkêt nẽ. ãm papxipix kuma nẽ ri hã ixpa.

5 Tã nhũm Tirtũm kapẽr o wrỳk xwỳnh kot gô xujanãr kãm upòk rũm hte xãm nẽ apke amgrã kamã ãm xwỳnhhta hãmri Tirtũm nhỹ hã kapẽr kaxyw nẽ kànhmã ìhkra pẽ. 6-7 Tirtũm pẽ kaxkwa nẽ pika nẽ gô xujanãr o kator nẽ kamã kot mẽmoj piitã ho kator xwỳnhja. Nẽ htĩr rãhã nẽ pa ho pa xwỳnhja. Nhũm ÿ hã kapẽr nẽ kapẽr o:

—E hãmri. Amnepê mã na pre Tirtũm ÿ hã mẽ kãm kapẽr o ri mẽ pa xwỳnhjê mã tanhmã amnhĩ kukamã amnhĩ jarẽnh to. Tanhmã kot pika piitã hkôt mẽ pa xwỳnhjê nhĩpêx to hã amnhĩ jarẽ. Nẽ mẽmo arĩgro hã mẽ kot amnhĩ tomnuj mỳrapê tanhmã kot mẽ hipêx to hã mẽ hkukamã mẽ hã amnhĩ jarẽ. Tã ra ã mẽ hipêx anhỹr xà hã arĩgro kato. Jakamã koja kapẽr o wrỳk xwỳnh kot hitepta ò pifti kakô hãmri nhũm mẽmojja ã amnhĩ nhĩpêx anhỹr kurê kumrẽx. ãm hãmri na pa mẽ amã ja jarẽ. Anẽ.

8 Pa mar o ixãm rôm nhũm wam inhmã kapẽr xwỳnhhta axte inhmã kapẽr nẽ inhmã:

—E ma pika hwỳr wrỳ nẽ gô xujanãr kãm upòk rũm hte xãm nẽ amgrã kamã apke rũm hte xãm xwỳnhhta wỳr tẽ nẽ kệp kagã kaxkep grire pipôt xwỳnhhta py. Anẽ.

⁹ Hāmri pa kuma nē ma hwÿr wrÿ nē hā kuwÿ nhÿm inhmā kugō nē inhmā:

—E mī. Apy nē akrē. ànhre. Te kot menh xành pyrāk. Nom kot kaj akrē nē anhōhy xà. Nom māmri apy nē akrē. E mī. Anē.

¹⁰ Hāmri pa kēp kupy nē hkaki nhÿm ànhre. Pa hkrēr pa hāmri nē inhōhy xà kurē kumrēx.

¹¹ Hāmri nhÿm kot inhmā òr xwÿnhhta inhmā:

—Nà àm hāmri na ka apy nē akrē. Jakamā kēr ka ano ho ate mēmoj piitā omunh xwÿnhja nē ajamak o ate mēmoj mar xwÿnhja nē ate tanhmā Tirtūm kapēr mar toja ka piitā hā kagà hpa. Hāmri nē ate omunh xà hkôt akwÿjē mā piitā harēnh o apa. Mē kot nhÿrmā Tirtūm kot tanhmā mē piitā mē hipēx to hā harēnh mar kaxyw. Ahpÿnhā ri pika piitā hkôt mē urojē piitā koja nhÿrmā ā mē hipēx anē. Ahpÿnhā ri mē kapēr xwÿnh piitā. Nē mē ò pahijaja. Àm mē piitā koja nhÿrmā ā mē hipēx anē. Anē.

11

Tirtūm nhÿ hā kapēr xwÿnh pijakrut wa harēnh

¹ Tā nhÿm mēhōj inhmā mēmoj to mīdi xà hā pī ryre gō nē inhmā:

—E ja py nē Jerujarē hwÿr wrÿ nē kamā Tirtūm mā amnhī jarēnh xà hā ixkreja o mīdi. Nē ixkre kamā amnepēm mē kot amnhī tomnuj pānhā Tirtūm mā ôwēhti nhōr xà hā mēstita mā ho anē nē ho mīdi. Nē ixkre kamā mē kot Tirtūm mā amnhī jarēnh o mē hkrī xwÿnhjaja ka aprī hā mē ho kōta.

²—No ixkre kapem pikaja ka ho mīdi hkôt nē. Ra Tirtūm kot mē kot amnhī tomnuj xwÿnhjē mā hkaga jakamā koja mē htÿx ri kām hprām xà hkôt tanhmā homnu hto ho pa. Nē Jerujarē piitā hkôt ri homnu ho paja ā hā amgrà axkrunēpxi nē hkôt mytwrÿ kēp 6.

³—Koja Tirtūm ma ÿ hā kapēr xwÿnh ho hamēxkrut nē mē hwÿr wa kumē nhÿm wa ma mē hwÿr wrÿ nē mē kām Tirtūm kapēr jarēnh o ri mē hkôt pa. Hāmri nē tee ri mē kot tanhmā amnhī tomnuj to hā mē omu nē hkaprī nē. Hāmri nē wa hkaprī xàj xak punure kaxô nē haxà nē mē kām

Tirtūm kapēr jarēnh o ri wa pa hā amgrà axkrunēpxi nē hkôt mytwrÿ kēp 6. Jakamā e. Pīja py nē ma mē hwÿr wrÿ nē ixkreta o mīdi. Anē.

⁴ Wa pijakrut wa kot Tirtūm nhÿ hā kapēr jarēnh o wa pa xwÿnhhta wa. Na htem wa kot amnhī nhīpēx ā wa harēnh ma nē mēmo pī hpār pē oriwēhti kot tanhmā amnhī nhīpēx toja mā hamaxpēr kurē kumrēx. Nē amnepēm Tirtūm nhÿ hā kapēr o pa xwÿnh pē Jakaris kot kanē hpôk xāmta mā määnēn hamaxpēr. Oriwēhti xōja htwÿm rax kumrēx nhÿm htem htwÿm opōj nē ho kanē ho nÿt nē hpôk nē kÿx pē unhwÿ nhÿm mē piitā hirā kamā rīt mex o ri mra. Nē kanē hpôk mexja te kot Tirtūm kapēr pyrāk. Nē kanē xām xāja te kot Tirtūm nhÿ hā kapēr jarēnh o wa pa xwÿnhhta wa urāk. Nē oriwēhtija haxwÿja te kot wa urāk. Ra Tirtūm Karō kot wa hkarō mā àr jakamā na hte wa hprī hā mē kām Tirtūm kapēr jarēnh o pa nhÿm mē kot mar xwÿnhjaja te kanē nhīrā kamā ri rīt mex nē ri pa pyrā nē hprī hā mar tÿx nē.

⁵ Tā koja mēhō tanhmā wa hipēx to kaxyw wa hwÿr tē nhÿm wa hakwa rÿm kuwy hpôk kato nē kot tanhmā wa ho mā xwÿnhhta o hxēt o kupī.

⁶ Nē koja wa Tirtūm xàhpumunh tÿx xà ho tanhmā ri mē hā mēmoj nhīpēx to pē mē kām kapēr jarēnh o ri mē hkôt pa. Jao tanhmā na hto nhÿm mē hā wrÿk kēt ry nē. Rÿ tanhmā mē kēp gō hto nhÿm mē hkamrō hā mē kēp amnhī jahkre. Kojaja wa ā Tirtūm nhÿ hā mē kēp mēmoj nhīpēx anhÿr ho wa pa. Nē xatā wa kām hprām xà hkôt tanhmā mēmoj tomnu hto. ⁷ Nē mē kām kapēr o pa pē ā mē hipēx anhÿr o wa hā amgrà axkrunēpxi nē hkôt mytwrÿ kēp 6 nē rī kormā ho hapēx. Hāmri nhÿm ahkre xupÿm rÿm Satanasti nhō kōwenatōja kato nē ma wa hwÿr tē nē nhÿri pry kahti ri wa unē nē wa kupī nhÿm wa pry kamā ty nē nō. ⁸ Hāmri nhÿm mē wa haxàr kēt nē nhÿm wa arī pry kamā nō. Krī kapem na prem pī kahpa hā Jejus nhō nē kupī. Krī nhō xwÿnhjaja mē kot amnhī tomnuj tÿx xwÿnh na mē. Te ho amnepēm krī pē Sotō mē pika pē Ejit kamā mē kot amnhī tomnuj xwÿnhjē kot amnhī nhīpēx pyrāk. ⁹ Jakamā nhÿm

mê kot wa haxàr nê axpên kurê nhùm wa pry kamã arĩ ty nê nõ nhùm mê piitã wa hwÿr mra nê wa omu. Nê ahpÿnhã krĩ piitã hkôt mê pa xwÿnhjaja tanhmã amnhĩ to nê ja hã wa omu. Ahpÿnhã ri pika piitã hkôt mê urojaja. Nê ahpÿnhã ri mê kapêr xwÿnh piitã. Hãmri arĩ ahpÿnhã mê õ krĩ kamã pa htã tanhmã amnhĩ to nê wa htyk ã wa omunh ã hã apkati axkrunêpxi nê hkôt hã myt apha. ¹⁰ Koja mê wa htyk ã wa omu hãmri nê hkĩnh nê. Nê hkĩnh xàj axpên mã hkĩnh xà nhõr o pa. Wa kot kormã htĩr ri tanhmã mê homnuj to ho ri mê hkôt paja mã hamaxpêr nê wa htyk ã wa omu nê hkĩnh tÿx nê.

¹¹ Tã koja wa htyk ã apkati axkrunêpxi nê hkôt hã myt apha hãmri nhùm Tĩrtũm wa kamã htyxà rê nê akupÿm wa ho wa htĩr nhùm wa kãnhmã xa nê ri mra. Hãmri nhùm mê kot wa omunh xwÿnhjaja tee ri hã wa omu nê kãm wa uma htÿx kumrêx. ãm kãm wa uma ho kãm wa uma.

¹² Hãmri nhùm kaxkwa kamã mēhõja wa kãm kapêr nê wa kãm:

—E war amnê mê ixwÿr war api. Anê.

Hãmri nhùm wa kuma nê ma kakrã kamã àpir o mō. Nhùm mê kãm wa hkurê xwÿnhjaja tee ri wa àpir ã wa omu.

¹³ Hãmri nhùm pika htertet tÿx nê. Nê krĩ kamã ixkre ohtô nê grành pa nê mê hkwy nhĩmex rax nê nhùm mê ohtô rax kumrêx nê axkaprã. Mê kêp 7.000 nê pikaprãr pa. Hãmri nhùm arĩ mê htĩr nê ri mê pa xwÿnhjaja tee ri mê omu nê kãm ma xàj htertet tÿx nê axpên mã:

—Kwa Tĩrtũm mãn ã mê panhĩpêx anê. Hihtÿx o hihtÿx jakamã kaxkwa rùm ã mê panhĩpêx anê pu mê pahpiitã pano ho ixkre pigrành ã omu. Anê.

¹⁴ E na ra amnhĩ xà htÿx kamã hamak xàja hamêxkrut nê hapêx. Tã no ãm arĩ mê kaxyw pyxi nê arĩk.

*Mê kot pifti kot hitep kakô ã harênh
Apokarip 4.8, 5.9-14, 7.9-12, 14.2-5, 15.3-4, 19.1-2*

¹⁵ Tã nhùm Tĩrtũm kapêr o wrÿk xwÿnh kot hitepja õ pifti kakô nhùm kaxkwa kamã mê pa xwÿnhjaja kàx pê kapêr o:

E ãm hãmri. Na ra Mēpahpãm Maati mê Jejus Krisja wa kêp krĩ piitã hkôt mê piitã mê õ Pahшти na wa.

Koja Mēpahpãm Maati kêp Pahi Maati rãhã nê pa ho pa xwÿnh. Anê.

¹⁶ Hãmri nhùm mê àptàr tũm pê 24jaja. Tĩrtũm kot mê pahto amnhĩptàr o hkrĩ xà mã hipòk nê mê hkrĩ xwÿnhjaja. Hãmri ã mê kapêr anhÿrja ma nê Tĩrtũm ã hpijaàm kaxyw hpar pê rôròk pa nê htũ mÿr pê hikwÿ. Hãmri nê kãm mex o mex ã harê nê kãm:

¹⁷ Pa Pahi Maati Tĩrtũm. Nà ãm hãmri mê ixrom axàhpumunh o axàhpumunh nê axihtÿx o axihtÿx.

Amnepê mã kormã mēmoj kêt ri na ka pre arãhã apa ho apa.

Tã arĩ arãhã apa ho apa.

ãm hãmri apê mê ixpiitã mê ixto amnhĩptàr xwÿnh. Nà ãm hãmri amex o amex.

¹⁸ Kot kaj tokyx mê piitã tanhmã mê kot amnhĩ nhĩpêx to ho pa hã mê omunh xà hkôt tanhmã mê harênh to.

Nê ra mê htyk xwÿnhjaja kot kaj mê piitã akupÿm mê ho mê htĩr pa nhùm mê pika rùm hapôx pa nê ma mra nê arĩ mê htĩr xwÿnhjê nhĩhkô hã akutã hkrĩ pa.

Ka mê piitã mê omu nê tanhmã mê kot amnhĩ nhĩpêx to ho pa hã mê omunh hkôt tanhmã mê harênh to.

Mê kot amnhĩ tomnuj xwÿnhjaja kot kaj ma mê kot amnhĩ xà htÿx kamã hamak o pa htũm xà hwÿr amnhĩ nê mê arê nhùm mê ma hwÿr hapêx. Hãmri nê tee ri amnhĩ kukamã hamaxpêr nê gryk tÿx kumrêx.

Ka hpãnhã mê kot akôt amnhĩ xunhwÿr nê akapêr kôt amnhĩ nhĩpêx o mê pa xwÿnh piitã mê omu nê tanhmã mê ho mex to.

Mê kot amnhĩ to rũnh xwÿnhjaja nê mê kot amnhĩ to hkryre xwÿnhjaja.

Nê amnepêm mê kot anhÿ hã mê kapêr o mê pa xwÿnhjaja.

Akrajê piitã kot atã hpijaàm xwÿnhjaja kot kaj kormã mê htĩr ri tanhmã amnhĩ to mex hã mê omunh xà hkôt tanhmã mê ho mex to.

ã kot kaj tokyx mê piitã ahpÿnhã mê omunh xà hkôt mê hipêx anê. Anê.

19 Hāmri nhūm kaxkwa kamā Tīrtūm nhōrkwȳ hā hakwakre kahê xà amnhī mẽ pa kamā ôr o mēs kunīhtita pumu. Pu nhūm na hkatōtōk nē haxênh nē hkrakrak nē na mê te kot jêr krā hakotre pyrāk xwýnhja pikap rôrōk rax nē. Nē pika htertēt tỳx o htertēt tỳx pa arī omunh o xa.

12

Mēhō ni mẽ kagāmnuti wa harēnh

1 Tā pa axte mẽmoj pumu. Kaxkwa kamā aa mẽ pahte mẽmoj pumunh kêt xwýnhja pa omu. Nhūm mēhō nija xê te myt no mā hirā htỳx pyrāk. Nē hpar nhōkwa kamā mytwrýre ajêt. Nē kanhêti ho 12 o mẽ ahkà tu nē o xa. 2 Na ra htujarô nē hpijagri kaxyw ôhy xà nē amnhī kamnhêr o xa.

3 Tā pa axte mẽmoj pumu. Aa mẽ pahte mẽmoj ã kot anhỳr pumunh kêt xwýnh ôja pa omu. Kagāmnuti nom ãm axtem hkà kamrêk tỳx kumrêx. Nē rax kumrêx. Nē hkrā kêp 7. Nē hkrā piitā kamā ôr o pahi hā mẽ ahkà htu nē o nō. Nē hkrā kamā pàr kêp 10.

4 Tā nhūm hamy ho apêr o kaxkwa kamā kanhêti ho ohtô nē pikap kurê. Hāmri nē ôhy xà nē amnhī kamnhêr o ãm xwýnhja wỳr tē nē hkra kator nhūm kot kêp krêr kaxyw kutā hamār o nō.

5 Hāmri nhūm hkra kato nē myre. Hihtỳx o hihtỳx ã kot pika piitā hkôt mẽ piitā mẽ ho amnhiptār mā xwýnh na pre. Nhūm kagāmnutija kot kêp utār nē hkrêr mā tā nhūm Tīrtūm kapêr o wrỳk xwýnhjê hōja hwỳr wrỳ nē kêp kumỳ nē ma Tīrtūm wỳr kaxkwa kamā kot mẽ pahto amnhiptār ã hkrī xà maatija wỳr ho api.

6 Hāmri nhūm kagāmnuti tee ri ma kot kêp o mōr ã omu nē hpānhā nita o apkjê nē kot tanhmā ho kaxyw nhūm amnhī tã omu nē umaj hprôt nē ma tē nē nhỳri kapôt ã amũxu. Ra Tīrtūm kot hkukamā kām hpimxur xà nhīpêx xà hwỳr hprôt nē ma tē nē kamā kêp amũxu. Nhūm Tīrtūmja nē kagā pumunh mex nhūm kêp hpimxur mex ã amgrà axkrunêpxi nē hkôt hā mytwrý kêp 6.

Mē kot kaxkwa kamā mẽkarōmnuti kurê kaxàr ã mẽ harēnh

7 Tā nhūm mẽ ra kaxkwa kamā kurê kaxàr kaxyw. Kagāmnuti mẽ hkwȳjaja nhūm mẽ ra Tīrtūm kurê kaxàr kaxyw kutā amnhī xunhwỳ. Jakamā nhūm Tīrtūm kapêr o mẽ wrỳk xwýnhjê hkrāhtūm Mikewja ma mẽ hwỳr amnhī kôt hkwȳjê o mra nē mẽ pijapu ho kuhê.

8 Hāmri nhūm kagāmnuti tee mẽ kutā amnhī to htỳx kaprỳ nhūm Tīrtūm kapêr o mẽ wrỳk xwýnhjaja amnhī nē mẽ ho axtem nē kaxkwa rūm mẽ kator o mẽ kator.

9 Satanasti pē kagāmnutita kagā kot ni kator ewa mā hêx xwýnh na pre. Nē hêx rom tanhmā hêx to ho pa xwýnh. Jakamā nhūm Mikew mẽ hkwȳjaja hkwȳjê mẽ mẽ ho hpimràatā amnhī nē pikap mẽ rēnh pa.

10 Hāmri nhūm kaxkwa kamā mẽhōja axte kàxpê kapêr nē kapêr o:

E ãm hāmri. Na ra Tīrtūm hihtỳx o hihtỳx o mẽ panê mẽmoj punuj piitā ho hapêx par kumrêx.

Na pre hte Satanasti pē mẽkarōmnutija xatā hwỳr mra nē kām tanhmā Jejus kwỳjê ho kapêr punuj to ho pa.

Tā koja axte mẽ ho kapêr kêt kumrêx. Ra Tīrtūm kot amnhī nē kator o kator nhūm ra ma mōr o mōr kēnā.

Koja Tīrtūm pika piitā hkôt mẽ ho amnhiptār xwýnhjê japôx pa nē hpānhā mẽ kaxyw Kra Krisja xām nhūm pika piitā hkôt mẽ ho amnhiptār rāhā ho pa.

Nà ãm hāmri. Ja mex o mex.

11 Na pre Jejus kôt mẽ pahtō nē mẽ pahtōxjaja mẽkarōmnuti kutā amnhī to htỳx nē pa. No ãm amnhī nhỳ hā ã kutā amnhī nhīpêx anhỳr kêt.

Mē pahte amnhī tomnuj pānhā amnhīrer xwýnhja na pre ty nē hkamrô ho mẽ kuhō nē mẽ nē mẽ kot amnhī tomnuj o hapêx.

Jakamā nhūm prem kukwak ri Satanasti kutā amnhī to htỳx rāhā pa.

Nhūm mẽ kot Jejus ã mẽ himex par kaxyw tã nhūm mẽ kām htyk pyma hkêt nē. ãm Jejus kôt arī amnhī to htỳx nē mẽ hkôt pa rāhā nē.

Jao arī mẽ kām Jejus kot mẽ panê tanhmā amnhī nhīpêx to hā harēnh o ri mẽ hkôt pa.

12 Tã Tĩrtũm ra kot mẽ panê mẽmoj punuj o hapêx par jakamã kwa kaxkwa kamã mẽ apa xwýnhjaja kêr ka mẽ akĩnh nê apa.

Nom gô xujanãr kãm nê pika kamã mẽ pa xwýnhjaja hêxta waa nê. Kojã mẽ mex kêt nê.

Nê ra Mikew mẽ hkwýjaja kot amnhĩ nê kaxkwa rũm mẽkarõmnuti mẽ hkwýjê kator nê pikap mẽ rênh par jakamã nhũm Satanastija gryk tỳx kumrêx.

Tĩrtũm kot ma mẽ kot amnhĩ xà htỳx kamã hamak o pa tũm xàta wỳr mênh xà hã arĩgro hwỳr amgrà grêre nhũm tee ri amnhĩ kukamã hamaxpêr nê gryk tỳx o gryk tỳx. Anê.

13 Hãmri nhũm kagãmnutija mẽ kot amnhĩ nê kaxkwa rũm kator ã amnhĩ pumu nê gryk tỳx nê. Nê gryk xàj ma akupỳm ni kot hkra myre ho pijagri xwýnhta wỳr tẽ nê tanhmã ho kaxyw hkôt ho krihkrit.

14-16 Hãmri nhũm Tĩrtũm kapêr o mẽ wrỳk xwýnhjê hõja omu nê nija mã àanhàhti jara gõ. Kot kagãmnuti pẽ ho htor nê ma nhỹri hpimxur xà wỳr htẽm kaxyw. Nê kormã htor kaxyw nhũm kagãmnuti omu nê kot gô ho hanhir kaxyw hkôt hakwa rũm gô kapĩ nhũm hpikapĩr rax kumrêx. Te pyhti hprõt tỳx pyrãk. Hãmri nhũm Tĩrtũm omu nê nija nê tanhmã pika hto nhũm kãm axkjê nhũm gô hprõt nê kamã pikapĩr pa. Jakamã nhũm mex pẽ àanhàhti jara ho to nê ma kapôt ã pimxur xà hwỳr ma tẽ. Nê kamã pa hã amgrà axkrunêpxi nê hkôt mytwrỳ kêp 6 nhũm prem hamãr mex rãhã ho pa.

17 Hãmri nhũm kagãmnuti tee ri kãm hpĩr prãm kaprỳ nê gryk tỳx kumrêx. Hãmri nê ma ni hkwýjê hwỳr mõi. Mẽ kot Tĩrtũm mẽ Jesus wa hkôt amnhĩ nhĩpêx o mẽ pa xwýnhjê hwỳr tanhmã mẽ homnuj to kaxyw ma mẽ hwỳr mõi. Hãmri nê tanhmã kot mẽ ho kaxyw gô xujanãr mỳ ri nõ.

13

Satanasti nhõ kôwenatô wa kot gô xujanãr rũm kator ã wa harênh

Sikũn Tesarõn 2.3-5

1 Tã pa axte mẽmoj pumu. Nhũm gô xujanãr rũm Satanasti nhõ kôwenatõjê hõja te mrymnuti pyrã nê àpir o mõi. Kagãmnuti

pyrã nê hkrã kêp 7. Nê urak nê hpàr kêp 10. Nê hpàr piitã kamã pahi hã mẽ ahkã. Nê ahkã piitã hã axtem tanhmã Tĩrtũm o kapêr punuj to nê tanhmã haprỳ hto hã kagãja hikwỳ.

2 Nê hkà te kêp ropkrorti kà pyrãk. Nê hakwa te kot rêãwti jakwa pyrãk. Nê ìhkra te kot pàati nhĩhkra pyrãk. Jakamã na pre kagãmnuti nhỹ hã hihtỳx o kêp pahi hã pika nhõ xwýnhjê ho amnhĩptar o pa.

3 Nê hkrã hõ te mẽ kot hayr o hpĩr nhũm ra akupỳm htĩr nê arĩ hayr xà wakre rã nyw pyrãk. Jakamã nhũm pika kamã mẽ pa xwýnhjaja amnhĩ jaer pẽ omu nê kamã no pyma nê. Hãmri nê hkôt amnhĩ nhĩpêx o pa.

4 Hãmri nê kagãmnuti kot tanhmã mrymnuti ho nhũm ÿ hã mẽ ho amnhĩptar jakamã nhũm mẽ piitã hamẽ wa hã hpijaam kaxyw wa kãm wa mex o wa mex ã wa harênh o pa. Nê mrymnuti hã axpẽn mã:

—Hêxta waa nê. Mẽ pahtõ na mẽ pahte mrymnutita pyrã nê ã mẽ pahte amnhĩ nhĩpêx kot anhỹr? Mẽ pahtõ kot pu kutã xa nê paxihtỳx o hkurê kapa? Nà amrakati kumrêx. Anê.

5-6 Hãmri nhũm Satanasti tanhmã mrymnuti ho nhũm kapêr o ri mẽ hkôt pa nê mẽ ho amnhĩptar o hã amgrà axkrunêpxi nê hkôt mytwrỳ kêp 6. No ãm axtem nê Tĩrtũm o kapêr punuj o ri mẽ hkôt pa. Nê ri tanhmã haprỳ hto nê õ krĩa mex kêt ã harênh o ri mẽ hkôt pa.

7 Hãmri nhũm Satanasti ra kot mẽ hkurê kaxar kaxyw kãm anê nhũm axtem nê Tĩrtũm pẽ hkrajê kutã amnhĩ xãm nê mẽ hwỳr hprõt nê tanhmã hpijapu hto ho pa nê mẽ ho axtem nê mẽ ho krihkrit pa nê ahpỹnhã ri pika piitã hkôt mẽ uro hkwýjê ho amnhĩptar o pa. Nê ahpỹnhã mẽ kapêr xwýnh piitã mẽ ho amnhĩptã.

8 Jakamã nhũm mẽ ohtõ rax kumrêx nê mrymnuti hkôt amnhĩ nhĩpêx. Nê kutã hkõn krã ho rôrõk nê hkrĩ nê kãm mex o mex ã harê. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwýnh kôt ra mẽ kot amnhĩ xunhwỳr xwýnhjaja tapxipixjaja na prem hkôt amnhĩ xunhwỳr kêt nê. Amnepê mã kormã amrakati ri Tĩrtũm mẽ Jesus wa õ kagã kamã mẽ htĩr tũm nê mẽ pa mã xwýnh nhĩxi

xwýnh pixjaja na prem mrymnuti pumu nê hkwýjê rom hprî hã kot amnhî nhîpêx ã omunh kurê kumrêx nê hkôt amnhî nhîpêx kêt nê.

⁹ E ka mẽ atõ axumar kaxyw ajamak kre hã kot kaj ixujarênh piitã ama nê kãm ajamaxpêr tỳx rãhã ho apa.

¹⁰ Jakamã kwa Tirtũm kôt ixkwýjaja. Kwãr mẽ mãmrî mẽ apynê nê mẽ ajagjê. Nê kwãr mẽ mãmrî wapo ho mẽ ajayr o mẽ apa.

Nom kêr ka mẽ umaj ixkaga hkêt nê. Ixkaga hkêt o ixkaga hkêt.

Mẽ ãm ixkôt pix mã amnhî nhîpêx o ri apa rãhã ty.

Pika rũm mrymnuti hõ kator ã harênh Makre 13.22

¹¹ Tã pa mrymnuti hõ pumu. Nom wamta pyrã nê gô xujanãr rũm kator kêt axtem pika rũm kato. Nê ôwêhti hkrare pyrã nê hpãr pijakrutre. Nê te ho kagãmnuti kapêr tỳx pyrã nê kapêr tỳx kumrêx o pa.

¹² Gô xujanãr rũm mrymnuti xàpir xwýnhhta nhỹ hã pika nhõ xwýnhjê mã kapêr tỳx nê mẽ kãm:

—E pika piitã hkôt mẽ apa xwýnhjaja mẽ inhma. Kêr ka mẽ kot hkrã hõ jayr o hpîr nhũm akupỹm htîr xwýnhhta kôt pix mã amnhî nhîpêx rãhã ho ri apa. Nê kãm mex o mex ã harênh rãhã nê.

Anhỹr o mẽ kãm kapêr. ¹³ Hãmri nê Satanasti nhỹ hã mẽ kãm aa mẽ kot mẽmoj pumunh kêt kwý ho anhỹr o pa. Jao kaxkwa rũm tanhmã mẽ kãm kuwy ho wrýk to nhũm pikap rôrôk nhũm mẽ amnhî jaêr pê omu nê kamã no pyma nê. ¹⁴ ã ri mẽ noo mã mẽ kãm amnhî nhîpêx anhỹr o ri mẽ hkôt pa. Gô xujanãr rũm mrymnutija noo mã ã hêx rom amnhî nhîpêx anhỹr o mẽ no kupyw o pa nhũm mẽ omu nê hkôt amnhî nhîpêx. Hãmri nhũm mẽ kãm mẽmoj tã karõ nê mẽ kãm:

—E wam mrymnutita. Mẽ kot hkrã hõ jayr o hpîr nhũm akupỹm htîr xwýnhhta kêr ka mẽ kãm hkarõ nhîpêx nê ho mẽ anhõ sãnti. Kê mẽ piitã hwýr mra nê kutã hkõn krã ho rôrôk nê hkrî nê amnhî to kuwy nê kãm mex o mex ã harê.

Anhỹr o mẽ kãm hã karõ. ¹⁵ Hãmri nhũm mẽ kuma nê mar xà hkôt hipêx nê ãm nhũm

xa. Hãmri nhũm mrymnuti kot hitepta omu nê hwýr tẽ nê tanhmã ho nhũm ra kapêr nê mẽ kãm:

—E kêr ka mẽ kot inhmex ã ijarênh kêt xwýnhjê pynê nê mẽ himex pa. Anê.

¹⁶ Hãmri nhũm pika rũm mrymnuti kator xwýnhhta haxwýja mẽ kãm kapêr nê mẽ kãm:

—E koja ixkwýjaja inhỹ hã mẽ apiitã mẽ apê ixkwý hã mẽ akagã. Mẽ ate amnhî to rũnh xwýnhjaja nê mẽ ate amnhî to hkryre xwýnhjaja. Nê amarî mẽ kãm mẽ axàpênh xwýnhjaja nê amnhî mã mẽ axàpênh xwýnhjaja. Nê mẽ akàxpore rũnh xwýnhjaja nê mẽ apê amrakati xwýnhjaja. Koja mẽ apiitã mẽ akagã hpa. Mẽ akwý nhõkrã kagã nê mẽ akwý xupôk rũm mẽ anhîhkra katut kagã.

¹⁷ —Gô xujanãr rũm mrymnutita nhîxi kot paj mẽ atã hipêx. Rý hixi hã nũm nhîpêx. Hãmri ka mẽ axàpkur xà japrôr kaxyw nhỹhỹm mra nhũm mẽ atã hixita pumu nê rî kormã mẽ amã mẽmoj kwý ho wênê ka mẽ amnhîm haprô nê ho axàpkur o ri apa. Nê mẽ ate mẽmoj to wênê xwýnhjaja koja mẽ apê mẽmoj japrôr kaxyw mẽ awýr mra ka mẽ tee ri nhỹhỹnh mẽ hã hixi japêr hãmri nê mẽ kãm mẽmoj to wênê hkêt nê. ãm nhỹhỹnh mẽ atã hixi hã kagãta pumunh pix kukwak ri kot kaj mẽ awjaprô rý mẽmoj to wênê. Anê.

¹⁸ E kwa kêr ka mẽ ixte mẽmoj pumunh nê mẽ amã hã kagãta pumu nê ama nê kãm ajamaxpêr tỳx o apa. Mrymnutita nhîxi na kêp nũm. Nũmja kêp 666. E kaj mẽ akrã hi mex xwýnhjaja kot kaj mẽ aprî hã ja mar tỳx kurê kumrêx.

14

Tirtũm mex ã mẽ grer Apokarip 7.1-8

¹ Tã pa axte mẽmoj pumu. Nhũm mẽ pahte amnhî tomnuj pãnhã amnhîrer xwýnhja hixêt pê Siãwja nhîmõk ã xa. Nê puhã mẽ ohtô rax kumrêx nê kuhê. Mẽ ohtô ho mẽ ohtô. Piitã kamã mẽ kêp 144.000. Nê piitã õkrã hã mẽ pahte amnhî tomnuj pãnhã amnhîrer xwýnh mẽ Hipêxã wa hixi jaxwýr pa mẽ omu.

² Nhũm mẽ kaxkwa kamã grer o kuhê. Mẽ grerja mex o mex. Te kot gô hprõt

tỳx hkoko htỳx pyrək. Nē te na katōtōk tỳx pyrək. Nē te wiorāw mōr xwỳnhjaja kot hkakrēnh mex pyrək pa mẽ mar o xa.

³ Nē mẽ grer xwỳnhjaja. Jejus puhā mẽ ohtō rax kumrēx nē mẽ kuhē xwỳnhjaja na prem Tirtūm kot mẽ ho amnhĩptār ā hkrĩ xàta kuri grer o kuhē. Nē mẽmoj tĩr pē kwat xwỳnhjē mẽ mẽ àptār tūm pē 24jē kuri grer o kuhē. Mẽ grer nyw o gre. Ām mẽ tapxipixjaja mẽ kot mẽ grer nywja mar. Ra mẽ kēp Tirtūm kra hā mẽ kot mẽ ōkrā hā Tirtūm mẽ Kra Jejus wa hixi ā kagà nhūm Tirtūm kot ra mrymnuti mẽ hōta wa kēp mẽ utār nē amnhĩ wỳr mẽ ho àpir xwỳnh na pre mẽ. Ām mẽ tapxipixjaja mẽ grer nywja ma nē wa kām ho grer o kuhē.

⁴⁻⁵ Na prem tām amnhĩ nhĩpēx nē Tirtūm kōt amnhĩ nhĩpēx rāhā ho pa. Te mẽ kot amnhĩ prō pix tānopxar rāhā ho pata pyrək. Nē ri tanhmā hēx to rỳ tanhmā ri amnhĩ tomnuj to ho pa hkēt nē. Ām tām ri amnhĩ nhĩpēx mex o pa. Mẽ kēp Tirtūm mẽ mẽ pahte amnhĩ tomnuj pānhā amnhĩrer xwỳnh kwỳ jakamā na prem mẽ pahte amnhĩ tomnuj pānhā amnhĩrer xwỳnhhta kōt pix mã amnhĩ nhĩpēx o pa. Jakamā na prem mrymnuti kutā rōrōk nē kām mex o mex ā harēnh kēt nē. Tā mẽ kumrēxjaja Tirtūm mẽ Kra wa kuri wa kām grer o kuhē.

Tirtūm kapēr o wrỳk xwỳnh pijakrunēpxi jarēnh

⁶ Tā pa axte Tirtūm kapēr o wrỳk xwỳnhjē hō pumu nhūm kỳx pē ri htor o pa. Ahpỳnhā ri pika piitā hkōt mẽ uro hkwỳjē hkōt. Na ahpỳnhā ri mẽ kapēr xwỳnhjē piitā mẽ hkōt mẽ kām Tirtūm kot tanhmā mẽ hipēx to hā harēnh kaxyw. Ahpỳnhā mẽ kapēr xwỳnh piitā mẽ kām harēnh o pa. Nē htor o pa pē kỳx pē mẽ kām kapēr nē mẽ kām:

⁷ “E na ra Tirtūm mẽ ate amnhĩ tomnuj mỳrapē tanhmā mẽ ato kaxyw. Jakamā kwa mẽ tokyx hā apijaàm kaxyw akōn krā ho arōrōk nē akrĩ nē kām mex o mex ā harē. Kēp mẽmoj piitā ho kator xwỳnh na. Na pre kaxkwa ho kato nē pika ho kato nē gō xujanār o kato nē hino ho kato nē mẽmoj piitā ho kator pa. Jakamā kwa kēp ka mẽ tapxipix ā mǎn apijaàm nē kām mex o mex hā harēnh rāhā ho apa.”

Anhỳr o mẽ kām kapēr. ⁸ Hāmri nhūm hōja wamta kōt tē nē urək nē kỳx pē mẽ kām kapēr o:

—Koja Tirtūm tokyx Papirōn grānh pa. Na hte krĩ nhō xwỳnhjaja amnhĩ tomnuj pix rāhā ho pa. Mẽ kot amnhĩ nhĩpēx te mẽ kot kagōxyhti ho hkōm nē amnhĩ mẽ mẽ piitā mẽ kām ōr nē ho mẽ ho pipānh pyrək. Na htem mēnijē piitā ho amnhĩkati o pa. Nē amnhĩ kwỳjē pē mẽ hprō ho amnhĩkati. Nē amnhĩ mẽ pika piitā hkōt mẽ pa xwỳnhjē mã anhỳr o pa. Mẽ kot mẽ urək nē ā amnhĩ nhĩpēx anhỳr o pa kaxyw mẽ kām anhỳr o pa. Ja mỳrapē na ra Tirtūm kot tanhmā mẽ ho kaxyw mẽ hā amnhĩ jarē. Anē.

⁹ Tā nhūm wa hkōt hōja tē nē wa urək nē kàx pē pika nhō xwỳnhjē mã kapēr nē mẽ kām:

—E mẽ ate mrymnuti kutā akōn krā ho arōrōk nē akrĩ nē kām mex ā harēnh xwỳnhjaja. Nē mẽ ate karō nhĩpēx nē kutā akōn krā ho akrĩ nē kām mex ā harēnh xwỳnhjaja. Nē mẽ anhōkrā nē mẽ anhĩkra hā hixi hā kagà xwỳnhjaja.

¹⁰⁻¹¹ —Tirtūm na tee ja hā mẽ apumu nē mẽ akamā gryk tỳx kumrēx. Mẽ ate kapēr kuhpa hā mrymnuti hkōt amnhĩ xunhwỳr jakamā nhūm mẽ akamā gryk tỳx o mẽ akamā gryk tỳx. Jakamā koja kuwy hpōk rāhā ho rāhā xwỳnhhta kamā mẽ arēnh pa ka mẽ amnhĩ xà htỳx kamā ajamak rāhā apa ho apa. Koja kuwy hpōkja aa hapēx kēt nē kurūm kàx mã hkūm àpir o pa rāhā nē. Koja ā mẽ ate amnhĩ tomnuj o mẽ apa xwỳnhjē nhĩpēx anē ka mẽ kamā apa ho apa nē aa kurūm ajapōx kēt nē kamā amnhĩ xà htỳx kām ajamak rāhā apa ho apa. Arĩgro hān kamāt kām arĩ ā amnhĩ nhĩpēx anhỳr rāhā apa ho apa. Mẽ ate gōj rūm mrymnuti mẽ hkarō ho sānti wa kutā akōn krā ho arōrōk nē akrĩ nē wa kām wa mex ā wa harēnhja mỳrapē kot kaj mẽ ā amnhĩ nhĩpēx anē. Kot mẽ pahte amnhĩ tomnuj pānhā amnhĩrer xwỳnh mẽ Tirtūm kapēr o mẽ wrỳk xwỳnhjē noo mã kot kaj mẽ ā amnhĩ nhĩpēx anhỳr o apa.

¹² Anhỳr o mẽ kām kapēr jakamā kwa kēp pu mẽ pahte Tirtūm kōt amnhĩ xunhwỳr xwỳnhjaja mẽ hkukamā mẽ harēnhja ma nē Tirtūm kapēr kōt pix mã amnhĩ nhĩpēx rāhā ho ri papa. Mẽ kot tanhmā hā mẽ pahto

htã pu mẽ hkaga hkêt nẽ amnhĩ kaxyw Jejus kôt pajamaxpêr tỳx rãhã nẽ. Hãmri nẽ nhỹrmã mẽ kurom ma õ krĩ hwỳr api nẽ kamã pamex kumrêx nẽ papa ho papa.

Mẽ kêp Jejus kwỳ hã mẽ htyk xwỳnhjê jarênh

Wam Tesarõn 4.16

¹³ Tã nhũm kaxkwa kamã mẽhõja axte inhmã kapêr nẽ inhmã:

E Juãw. Kêr ka ã akwỳjê mã mẽmoj tã kagã anẽ nẽ mẽ kãm hã kagã ho: “E mẽ ate Tĩrtũm kôt ri amnhĩ nhĩpêx xwỳnhjaja. Mẽ kot Tĩrtũm ã mẽ apar nhũm mẽ atyk tã koja amnhĩ tã mẽ ato mex rax kumrêx.” Anhỹr o mẽ kãm hã kagã.

Anhỹr o inhmã kapêr. Hãmri nhũm Tĩrtũm Karõja kuma nẽ kãm:

—Nã ãm hãmri na ka ã mẽ harênh anẽ. Ra Tĩrtũm kot amnhĩ tã mẽ omunh rãhã ho pa. Mẽ kot kôt pix mã amnhĩ nhĩpêx o pa pê mẽ kãm mẽ hkurê xwỳnhjê kutã amnhĩ to htỳx rãhã htykja nhũm Tĩrtũm kot amnhĩ tã mẽ omunh mex. Koja mẽ ho mex kumrêx. Mẽ kot Jejus ã mẽ hpar tã koja mẽ ho mex rax nẽ nhũm mẽ kuri mex rãhã nẽ pa ho pa nhũm mẽhõ axte tanhmã mẽ ho hkêt nẽ. Anẽ.

Tĩrtũm kot tanhmã mẽ kãm hkĩnh xwỳnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jakajre pumu. Nẽ kamã mẽhõj te panhĩ pyrã nẽ nhỹ. Nhũm õr o pahi hã mẽ ahkã htu nẽ kuteere xwagixre py nẽ o nhỹ.

¹⁵ Hãmri nhũm kaxkwa kamã Tĩrtũm kapêr o mẽ wrỳk xwỳnhjê hõja Tĩrtũm mã amnhĩ jarênh xã hã ixkre rũm kato nẽ kakrã jaka kamã ỹr xwỳnhhta mã kapêr. Kãx pê kãm kapêr nẽ kãm:

—E pika nhõ xwỳnhjaja te mẽ hpur kãm mẽmo hy ra hkamrêk nẽ hikênh mã mex pyrãk. Jakamã anhõ kuteere ata py nẽ ma mẽ hkôt tanhmã ri mẽ ho ho ri mẽ hkôt apa. Te mẽ kot mẽmo hy nhĩkênh o ri pa pyrãk o mẽ hipêx nẽ ma ho mẽ himex o ri apa. Anẽ.

¹⁶ Hãmri nhũm kuma nẽ pika piitã mỳri õ kuteere ho apê nẽ te mẽmo hy jakar pyrãk o mẽ hipêx.

¹⁷ Hãmri nhũm axte Tĩrtũm mã amnhĩ jarênh xã hã ixkre rũm kapêr o mẽ wrỳkjê hõja kato. ĩhkra kamã kuteere xwa gixre py nẽ o xa. ¹⁸ Hãmri nhũm axte hõja ixkre rũm kê hkôt kato nẽ hkukamã kator xwỳnhhta mã kapêr. Kãx pê kãm kapêr nẽ kãm:

—E na ra Tĩrtũm tanhmã mẽ kot amnhĩ tomnuj to hã tanhmã mẽ hipêx to kaxyw. Te mẽ kêp mẽ hpur kãm mẽmo xõ pê uwa ra hkamrêk nẽ rênh mã tãm pyrãk. Jakamã ma pika hwỳr mẽ hwỳr wrỳ nẽ mẽ hkôt ri anhõ kuteere ho mẽ himex o ri apa. Anẽ.

¹⁹ Hãmri nhũm kuma nẽ ma pika hwỳr wrỳ nẽ mẽ hipêx o te mẽ kot uwa xõ rênh nẽ prês kãm hkapĩr nẽ kagõ janênh pyrã nẽ mẽ hkôt ri kuteere ho mẽ hpar o pa. Tĩrtũm ra mẽ kamã gryk tỳx o mẽ kamã gryk tỳx jakamã nhũm ã mẽ hkôt mẽ hipêx anhỹr o ri pa.

²⁰ Jakamã nhũm mẽ hkamrõ hpikapĩr rax kumrêx o uwa kagõ jakre. Te ho pyhti hprõt o nõr pyrãk. Jao upỳm o 2 met nẽ hkôt ho mēj met. Nom hprõt xã hkôt ry rax o ry rax. Ho 300 kirõm. Nhũm ã mẽ kamrõ hprõt rax anẽ.

15

Tĩrtũm mex ã mẽ grer

¹ Tã pa axte kaxkwa kamã mẽmoj pumu. Hãmri nẽ amnhĩ jaêr pê omu nẽ tee ri hkukamã ijamaxpêr. Aa mẽ pahte mẽmoj ã kot anhỹr pumunh kêt xwỳnh pa pre omu. Nhũm Tĩrtũm kapêr o mẽ wrỳk xwỳnh pê 7jaja ahpỳnhã pika hkôt mẽ kot amnhĩ tomnuj xwỳnhjê homnuj kaxyw akuprõ nẽ kuhê. ãm jajê pixjaja koja Tĩrtũm nhỹ hã axte tanhmã mẽ homnuj to nẽ ho anhỹr pa hãmri nhũm ra ja hapêx o hapêx.

² Jakamã pa axte Tĩrtũm kapem gõ rax pumu. Te kot kãx karỳr jaxênh mẽ kuwy hpõk o pihkãr pyrãk xwỳnhja hprõt o nõ. Nhũm Tĩrtũm kra hkwyjaja gõ mỳ ri ohtõ rax kumrêx nẽ kuhê. Na pre ra mrymnu-tija tee ri amnhĩ kôt mẽ rênh mã nẽ tee ri mẽ hã amnhĩ nhĩxi hã kagã hprãm kaprỳ nom nhũm mẽ hkaga nẽ Jejus kôt amnhĩ nhĩpêx rãhã ho pa. Nẽ mrymnuti karõ ho sãnti mã mex ã harênh kêt rãhã ty nẽ kaxkwa hwỳr api. Jakamã nhũm Tĩrtũm amnhĩ tã mẽ omu nẽ mẽ kãm wiorãwti

hkwy gõ nhũm mẽ piitã hamý nẽ gõ rax mý ri ho kuhê.

³ Hãmri nẽ Tĩrtũm mã tanhmã amnhĩ to ho pa xwýnh pê Mojes mẽ mẽ pahte amnhĩ tomnuj pãnhã amnhĩrer xwýnhhta wa kot Tĩrtũm mã greta nhũm mẽ Tĩrtũm mã ho grer o kuhê nẽ grer o:

E Pahi Maati Tĩrtũm. Na pa mẽ ra inhmex pê awýr ixàpir pa.

ãm hãmri na ka hte tanhmã amnhĩ nhĩpêx to ho ri apa.

Aa tanhmã axêx to hkêt.

Nẽ mẽ ixrom axihtýx o axihtýx.

Nẽ mẽ ixrom axàhpumunh o axàhpumunh.

Jakamã na ka hte mẽ inhmã aa mẽ ixte mẽmoj pumunh kêt kwý ho anhýr o apa.

Pika piitã hkôt ahpýnhã mẽ ho amnhĩptàr xwýnhjê nhõ Pahi Maati na ka.

Nẽ ate tãm amnhĩ nhĩpêx xwýnh na ka.

⁴ Jakamã na htem piitã atã hpijaàm o pa.

Nẽ amã mẽ kapêr xàptàr pix o amã kapêr.

Nẽ amã amex o amex ã ajarênh rãhã nẽ.

ãm hãmri mẽ ixrom kapxipix amex o amex.

Jakamã koja ahpýnhã pika piitã hkôt akrajê piitã ate tãm amnhĩ nhĩpêx nẽ tãm mẽ piitã tanhmã mẽ harênh to hã ajarênh ma nẽ awýr mra nẽ akutã hkõn krã ho rôrôk nẽ hkrĩ nẽ amã amex o amex ã ajarê. Anẽ.

Mẽ homnu xà hã xijere jamýnh xwýnh jarênh

⁵ Tã na pa axte mẽmoj pumu. Kaxkwa kamã Tĩrtũm nhõrkwy hã hitom xà piitã amnhĩ kahê xà rẽ nẽ kuhê pa omu. Nẽ ixkre kamã õ hitom mex maati haxwýja amnhĩ kahê xà mẽ nẽ xa.

⁶ Hãmri nhũm ixkreja rũm Tĩrtũm kapêr o mẽ wrýk xwýnh pê 7jaja hapôj nẽ kuhê. Mẽ ê hakajre nẽ hirã htýx kumrêx. Nẽ mẽ hinô pre xàja ôr pix o. Nẽ piitã Tĩrtũm mã tanhmã kot mẽ homnuj to xà hã xijere pê 7ta jamýnh kaxyw kuhê.

⁷ Hãmri nhũm mẽmoj tĩr pê kwatjê ôja mẽ kãm xijere hkwy jamý nẽ mẽ hwýr o tẽ. Xijere kêp 7 nẽ piitã ôr o. Nhũm hamý nẽ Tĩrtũm kapêr o mẽ wrýk xwýnhhtajê hwýr o tẽ nẽ ho mẽ hipêx nhũm mẽ ahpýnhã hamý. Xijere kamã Tĩrtũm gryk xà jamý nẽ o kuhê.

⁸ Pu nhũm Tĩrtũm rũm kuwy hkũm hapôj. Tĩrtũm mex nẽ hihtýx xwýnhhta rũm hapôx rax o ixkreta kunor pa nhũm mẽ tee ri hwýr gjêx prãm kaprý.

16

Xijere kamã mẽ homnu xà pê 7 jarênh

¹ Tã pa arĩ mẽmoj pumu nhũm Tĩrtũm nhõrkwy kamã mẽhõja kapêr o wrýk xwýnh pê 7jê mã kàx pê kapêr nẽ mẽ kãm:

—E na pa ra mẽ kot ixkapêr kwým ri amnhĩ nhĩpêx xwýnhjê pumu nhũm ixpê ja omnuj týx o ixpê omnuj týx. Jakamã e mẽ anhõ xijereta jamý nẽ ma pika hwýr mẽ hwýr wrý nẽ axpên pãnhã mẽ hã xijere kamã mẽ homnu xà kapĩ. E mẽ tokyx ma mẽ hwýr wrý. Anẽ.

² Hãmri nhũm mẽ kuma nẽ axpên pãnhã mẽ hwýr wrý. Nhũm wamta kumrêx pika piitã hkôt mẽ homnu xàta kapĩ. Pu nhũm mẽ kot mrymnuti mẽ õ sãnti wa kãm mex ã harênh nẽ amnhĩ tã wa hixi jaxwýr xwýnh piitã hkànhy hpa nẽ à htýx kumrêx nẽ ri pa.

³ Hãmri nhũm wamta kôt hõja õ xijere py nẽ gõ xujanãr kãm hkapĩr pa nhũm gõ te mẽ htykjê kamrô pyrã nẽ kamã mẽmo mry htyyxã rênh xwýnh piitã pikaprãr pa.

⁴ Tã ra xijere kapĩr xwýnh o axkrut nẽ õ xijere kapĩ hãmri nhũm hkôt hõta õ xijere py nẽ hpãnhã gõ hkryre piitã hkôt hkapĩr pa. Pyhti nẽ ri hino piitã hkôt hkapĩr pa nhũm piitã gõ xujanãr pyrã nẽ mẽ hkamrô hã amnhĩ jahkre hpa.

⁵ Hãmri nhũm axtem Tĩrtũm kapêr o mẽ wrýk xwýnhjê hõ kot kãm gõ piitã hamãr xwýnhhta ja hã omu nẽ Tĩrtũm mã kãm: Pa amex rãhã apa ho apa xwýnh. Nẽ arãhã apa ho apa xwýnh.

Nà ãm hãmri na ka ã mẽ kêp gõta nhĩpêx anẽ.

⁶ Na prem mẽ kot akôt amnhĩ nhĩpêx xwýnhjê mẽ mẽ kãm ri akapêr jarênh xwýnhjê hpar o pa nhũm mẽ hkamrô hpikapĩr rax nẽ.

Tã ka ra mẽ hã mẽ kêp mẽ hkõm xà homnu hpa nhũm mẽ kêp mẽ hkamrô ã amnhĩ jahkre nhũm mẽ tee ri ho hkõm mã. Nà ãm hãmri na ka ã mẽ kêp gõ nhĩpêx anẽ Tĩrtũm. Anẽ.

⁷ Hāmri nhūm mẽ kot Tirtūm mã mẽmoj nhõr xà hã mẽsti hpar pẽ hkrĩ xwýnhjẽ hõja kuma nẽ kãm:

Nà ãm hāmri na ã ajarẽnh anẽ Tirtūm.

Ãm hāmri na ka ã akrajẽ hã mẽ hipêx anẽ.

Ra ate mẽ hã amnhĩ jarẽnh xà hkõt na ka hte tanhmã mẽ hipêx to.

Nà apê mẽ inhõ Tirtūm Maati na ka.

Mẽ ixrom axihtýx o axihtýx nẽ axàhpumunh o axàhpumunh. Anẽ.

⁸ Tã ra axkrunẽpxi nẽ õ xijere kapĩ. Jakamã nhūm mẽ hpãnhã hõja õ xijere o tẽ nẽ myyti hã hkapĩr pa nhūm hkagro htýx nẽ pika hkõt mẽ pa xwýnhjẽ hkà ho hxêt o pa.

⁹ Kagro htýx o hkagro htýx jakamã mẽ hkà ho hxêt nhūm mẽ kamã hkà kajẽ hpa. Hāmri nẽ tee ri amnhĩ pumu nẽ hamaxpẽr o:

—Nà Tirtūmtija na ã mẽ pahomnuj týx anẽ. Anẽ.

Hāmri nẽ kamã gryk týx nẽ haprý nẽ tanhmã ho kapẽr punuj to ho pa. Nom mẽ kot amnhĩ tomnuj kaga nẽ kãm mex o mex ã harẽnh kêt nẽ arĩ tanhmã amnhĩ tomnuj to ho pa.

¹⁰ Nhūm ra kęp kwat nẽ õ xijere kamã mẽmojja kapĩ. Jakamã nhūm ra hpãnhã hõja õ xijere o tẽ nẽ gõj rùm mrymnuti kot mẽ ho amnhĩptàr xà hã hkrĩ xà hã hkapĩr pa. Jakamã nhūm ra kot mẽ ho amnhĩptàr xà hã pikaja kamã kamàt kô htyk par kumrẽx. Hāmri nhūm mrymnuti mẽ hkõt mẽ kot amnhĩ nhĩpêx xwýnhjẽ hã kamàt kô hpa nhūm mẽ amnhĩ xà htýx ã maj amnhĩ nham o axpẽn kamnhar týx kumrẽx. ¹¹ Nẽ ã Tirtūm kot mẽ hipêx anhỹr ã amnhĩ tã omu nẽ kamã gryk týx nẽ tanhmã ho kapẽr punuj to ho pa. No ãm kot amnhĩ tomnuj xwýnh ã amnhĩ pumunh nẽ kot amnhĩ tomnuj kaga hkõt nẽ.

¹² Nhūm prem ra kęp sĩk nẽ õ xijere kamã mẽmoj kapĩ. Jakamã nhūm hpãnhã hõja õ xijere kamã mẽmojta o tẽ nẽ pyhti pẽ Erax kamã hkapĩr pa nhūm gõja grà pa nẽ te kęp pry pyrã nẽ nõ. Jakamã nhūm myt japõx xà rùm mẽ ho amnhĩptàr xwýnhjaja nẽ pôristijaja hāmri pijapu kaxyw Jerujarẽ hwýr nojarêt nẽ hã hwýr pa.

¹³ Tã nhūm kagãmnuti mẽ ý hã mẽ kãm hẽx o pa xwýnh mẽ mrymnutita wa mẽ hakwa rùm mẽmoj te priti pyrã nẽ hapõx o

pa. No ãm priti hkõt mẽ kęp Satanasti mã mẽ àpẽn xwýnh kwýy.

¹⁴ Jakamã na prem pika piitã hkõt mẽ kot aa mẽmoj pumunh kêt kwý ho anhỹr o hẽx rom mẽ no kupyr o mẽ hkõt pa. Tã pika piitã hkõt mẽ ho amnhĩptàr xwýnhjẽ mẽ ho pikuprõnh kaxyw mẽ hapêr o pa. Mẽ kot Tirtūm xihtýx o hihtýx kurê kaxàr kaxyw mẽ pijapu xà hã arĩgro kukamã mẽ ho pikuprõnh o pa.

Jejus kot amnhĩ kwýjẽ mã kapẽr ã harẽnh

¹⁵ Tã nhūm Jejus pika hkõt hkrajaja arĩ mẽ htĩr nẽ pa xwýnhjẽ mã kapẽr nẽ mẽ kãm: E mẽ inhma ixkwýjaja. Akupým ixte mẽ awýr ixwrýk xà hã arĩgroja ã kot paj te mẽ àhkĩnh xwýnh kot amnhĩ nhĩpêx pyrã nẽ mẽ ajaêr pẽ mẽ awýr wrý. Jakamã kër ka mẽ amnhĩ wýr ijamãr rãhã ho apa. Kër pa akupýn wrý ka mẽ amnhĩ wýr ixpumu nẽ akĩnh nẽ amnhĩ kamã amã ixpuma hkõt nẽ. Anẽ.

Mẽ kot axpẽn kurê kaxàr kaxyw mẽ pikuprõnh ã mẽ harẽnh

¹⁶ Tã nhūm Satanasti hkwyjaja pika piitã hkõt mẽ ho amnhĩptàr xwýnhjẽ ho pikuprõnh pa nẽ mẽ hkurê kaxàr kaxyw ma Ijaew kot kãm “Amaketõ” jarẽnhja wýr mra.

¹⁷ Hāmri nhūm Tirtūm kapẽr o mẽ wrýk xwýnh pẽ 7 kot hitepta õ xijere py nẽ kàx mã kamã mẽmoj kapĩr pa. Jakamã nhūm Tirtūm nhõrkwý kamã mẽ ho amnhĩptàr ã hkrĩ xà rùm Tirtūm kàx pẽ kapẽr o:

—E hāmri. Na pa ra mẽ kot amnhĩ tomnuj mýrapê tanhmã mẽ ho jatur xàm mẽn kaxyw. Anẽ.

¹⁸ Pu nhūm na hkatõtõk nẽ hkrakrak nẽ haxẽn nhūm pika htertet týx nẽ. Aa mẽ kot pika htertet týx kot anhỹr ã omunh kêt kumrẽx.

¹⁹ Jakamã nhūm Papirõnja kajẽ axkrunẽpxi. Papirõn nhõ xwýnhjaja kot amnhĩ tomnuj týx o paja mýrapê nhūm Tirtūm ã mẽ hipêx anẽ. Nẽ pika htertet o pika piitã hkõt krĩ grành pa. ²⁰ Nhūm gõ hipõk piitã gõja hã axkamur nhūm hapêx pa. Nẽ kẽn præk nẽ hkrã hixêt rôrõk nẽ hpigrành pa. Pika htertet týx kumrẽx jakamã ã mẽmoj amnhĩ nhĩpêx anẽ. ²¹ Nẽ

na mê pê jêr krâ jakootija mê piitã mê hipy rôrôk. No ãm hkrã hkryre hkêt hkrã rûnh kumrêx. ãm hpÿnh nê kamã kêp 40 kir nê mê hã rôrôk nhÿm mê tee ri amnhÿ tã ã omu nê Tirtÿm kamã gryk týx nê haprÿ nê ho kapêr punuj nê.

17

Tirtÿm kra hkêt xwÿnhjê jarênh

¹ Tã pa pre kê axte mêmoj pumu. Nhÿm kot xijere jamÿnh xwÿnhjê hõja ixwÿr tẽ nê inhmã:

—E ma ixkôt tẽ nê mêmoj pumu. Anê.

Hãmri pa kuma nê ma hkôt tẽ nhÿm inhmã:

—Nã ahpÿnhã gô rax mÿri krÿ nhõ xwÿnhjaja te ho ni hkuprÿ gô mÿ ri ÿr nê kãm mêmyjê piitã hkÿnh o ÿr xwÿnhhta pyrãk. Na htem urãk nê Tirtÿm kapêr kôt ri amnhÿ nhÿpêx kêt nê. ãm htÿx ri tanhmã amnhÿ tomnuj to ho pa. Jakamã koja Tirtÿm tanhmã mê homnuj týx to nê mê ho hapêx.

² Krÿ piitã hkôt mê ho amnhÿptãr xwÿnhjaja na hte ma mê õ krÿ hwÿr mra nê te mê kot mê hkuprÿjê ho amnhÿkati pyrãk o amnhÿ nhÿpêx. Nê te pipãnh nê htÿx ri amnhÿ nhÿpêx pyrãk o amnhÿ nhÿpêx o pa. Nhÿm krÿ nhõ xwÿnhjaja mê urãk nê amnhÿ krã hkôt pix mã tanhmã amnhÿ tomnuj to ho ri pa. E ma ixkôt tẽ nê ja hã mê omu. Anê.

³⁻⁴ Hãmri nhÿm Tirtÿm Karõ tanhmã ixto nhÿm kapêr o wrÿk xwÿnhja ma kapôt wÿr ixto mõ pa kapôt ã mrymnuti hkrã kêp 7 nê kamã hpãr kêp 10 xwÿnhhta pumu nhÿm hkamrêeti nê xa. Nê ï piitã hã tanhmã Tirtÿm o kapêr punuj to hã kagã. Nhÿm katut ã mēhõ ni kuprÿta nhÿ. Mê ho amnhÿptãr xwÿnh ã mê ê kakrã htyk nê hkamrêk o hkukàr jaxà nê hã nhÿ. Nê ôr o ôkrexê. Nê ôr o hinwÿyêxê nê ïhkra kamã kàx. ãm ôr pix o hikukrêx. Nê kēn mex karÿr pix o amnhÿ jamrêx. Nê ôr o kopti hõ py nê hã nhÿ. Kopti kamã ni kuprÿ kot amnhÿ tomnuj xà. ãm kot mê kêp mê mjên o amnhÿkati ho pa xà pix nhÿm kupy nê o nhÿ.

⁵ Nê ôkrã hã amnhÿ nhÿxi hã kagã kot:

Inhÿxi pimxur pê PAPIRÕN RAXTI.

Nê ixpê mê kêp mê mjênjê ho amnhÿkati ho mê pa xwÿnhjê nã na pa.

Nê ixpê mê kot axpên prõ ho amnhÿkati o mê pa xwÿnhjê nã na pa.

Nê ixpê mê kot Tirtÿm nê mê kãm hêx o ri mê pa xwÿnhjê nã na pa.

Nê ixpê mê kot Tirtÿm kapêr kôt amnhÿ nhÿpêx o pa hkêt xwÿnhjê nã na pa.

Anhÿr o ôkrã hã amnhÿ nhÿxi hã kagã kot anhÿr. ⁶ Nhÿm axpã nê nhÿ pa omu. No ãm kagôxyhti ho hpiãnh kêt. Mê kot Jejus kôt amnhÿ xunhwÿr nê ri mê kãm Jejus kêp mê õ pahÿhti hã harênh xwÿnhjê kamnhwÿr o mê hpar nhÿm mê hkamrô pikapÿr xwÿnhjê kamrô ho na pre axpã nê nhÿ. Pa ã kot amnhÿ nhÿpêx anhÿr ã omu nê tee ri ijamaxpêr.

⁷ Hãmri nhÿm Tirtÿm kapêr o wrÿk xwÿnhja inhmã:

—Kwa mon ka ri ja pumu nê tee ri ajamaxpêr? E kot paj ixprÿ hã amã harê ka inhma. Niti mê hã ÿr xwÿnh pê mrymnutita. Krã pê 7 nê kamã hpãr pê 10 xwÿnhhta kot paj ixprÿ hã amã hamê wa harê ka wa harênh ma.

⁸ —Nã mrymnutija na pre htÿr nê ri pa tã ty nê ahkre xupÿmti kamã hikwÿ. Nom koja akupÿm htÿr nê kurÿm kato nhÿm mê piitã omu nê ahpÿnhã tanhmã hamaxpêr to. Amnepêm kormã amrakati ri Tirtÿm kot õ kagã kamã mê htÿr tÿm nê mê pa mã xwÿnhjê nhÿxi jaxwÿr xwÿnhjaja koja kator ã omu nê ãm omu nê tanhmã hamaxpêr to hkêt nê. No mê kot Jejus kôt amnhÿ xunhwÿr kêt xwÿnhjaja koja mê amnhÿ jaêr pê akupÿm kator ã omu nê tee ri hkukamã hamaxpêr. Hãmri nê axpên mã: “Kwa amnepêm htyk tã ra tanhmã amnhÿ to nê akupÿm htÿr nê api nê mõ.” Anhÿr o axpên mã harê. Hãmri nhÿm kato nê ma tẽ nhÿm Tirtÿm tã ho hapêx kumrêx nhÿm hapêx o hapêx.

⁹ —Kwa inhma nê jam ajamaxpêr týx nê. Mrymnuti krã pê 7ta te kêp hixêt prêk pê 7 pyrã nê hã ÿr xwÿnh ni kuprÿta te hixêt prêk pê 7ta ã ÿr pyrãk.

¹⁰ —Nê mrymnuti hkrã pê 7ja te kêp mê ho amnhÿptãr xwÿnh pê 7 pyrãk. Nhÿm mê ho amnhÿptãr xwÿnhjaja te mê kêp 5 nê ra htyk pyrãk nhÿm hkôt hõja arÿ mê ho amnhÿptãr o pa. No kot hitepta kormã. Nom koja mê ho amnhÿptãr ry hkêt nê.

11 —Mrymnuti ht̄ir nē pa ht̄a htyk nē ra akup̄ym ht̄ir nē àpir xw̄ynhta koja hkr̄a hitepta p̄anhã mē ho amnh̄ipt̄ar o pa. Jakamã te mē ho amnh̄ipt̄ar xw̄ynh pē 7jē hō pyrāk. Koja hkr̄a pē 7ja mē ho amnh̄ipt̄a nē gaa nē htyk mē nh̄um hp̄anhã mrymnutita hp̄anhã mē ho amnh̄ipt̄a. Hāmri nh̄um rī kormã Tirt̄um tã mē ho hapêx par kumrêx.

12 —Nē ate mrymnuti hkr̄a kamã p̄ar pē 10 pumunh xw̄ynhta te mē kēp mē ho amnh̄ipt̄ar xw̄ynh pē 10 pyrāk. No ãm jaja na kormã mē ho amnh̄ipt̄ar kêt nē. Koja mē nh̄ymã anh̄ipē mrymnuti nh̄y hã ahp̄ynhã ri mē ho amnh̄ipt̄ar o pa nom mē ho amnh̄ipt̄ar japijē hkêt nē. 13 Koja mē tanhmã ja hã axp̄en mar to hāmri nē mrymnuti mã anē nh̄um mē hp̄anhã mē piitã mē ho amnh̄ipt̄a.

14 —Nē mē ho amnh̄ipt̄ar xw̄ynh pē 10jaja koja mē pahte amnh̄i tomnuj p̄anhã amnh̄irer xw̄ynh kurê kax̄ar kaxyw hw̄yr mra nē kutã pijapu ho kuhê. No ãm tee ri kãm tanhmã ho hpr̄am hkapr̄y nh̄um mē ho axtem nē amnh̄i tã mē himex pa. Hiht̄yx o hiht̄yx o kot mē ho hpimràatã mē hakrenh par. Nē kēp pika piitã hkôt mē ho amnh̄ipt̄ar xw̄ynhjē nhō Pahihti. Tãm na pre amnh̄i w̄yr mē kot hkôt amnh̄i nh̄ipêx o mē pa xw̄ynhjē w̄y nh̄um htem amnh̄i kaxyw hkôt hamaxp̄er mex rãhã ho pa. 15 — Nē kr̄i pē Papirōn kapem gō xohtō m̄y ri ni kupr̄y hkr̄i xw̄ynhta. Gō xohtōja te kēp ahp̄ynhã ri pika piitã hkôt mē uro hkw̄y pyrāk. Nē te ahp̄ynhã ri mē kap̄er xw̄ynh kw̄y pyrāk.

16 —Nē mrymnuti hp̄ar pē 10ta kēp mē ho amnh̄ipt̄ar xw̄ynh pē 10 pyrāk. Jakamã koja mē kãm ni kupr̄yta pr̄am nōkati nē kamã gryk t̄yx kumrêx. Hāmri nē hw̄yr mra nē kēp hikukrêx piitã utã nē kēp ê hkw̄ryn̄h pa nh̄um hkên̄h mex nē xa. Hāmri nh̄um mē kupi nē i hkr̄er pa nē kuwy kamã hi rē nh̄um kax̄ar pa nē hapêx.

17 —Na pre pahi pē 10jaja mrymnuti hkôt amnh̄i xunhw̄y nh̄um Tirt̄um ãm ja hã mē omu nē tanhmã nē mē kãm nē hkêt nē. Jakamã koja mē ãm hkôt pix mã amnh̄i nh̄ipêx o pa rãhã nh̄um Tirt̄um mē ho hapêx. Nē mē õ kr̄i mē mē ho hpimràatã mē ho

hapêx pa. Hāmri nē mē ho hapêx o mē ho hapêx.

18 —Nē ate mēhō ni kupr̄y pumunh xw̄ynhta te kēp kr̄i rax pē Papirōn nhō xw̄ynhjē pyrāk. Nē mē ho amnh̄ipt̄ar xw̄ynhja pika piitã hkôt mē ho amnh̄ipt̄ar xw̄ynhjē hkr̄aht̄um na. Anē.

Ã Tirt̄um kap̄er o mē wr̄yk xw̄ynhja inhmã mē harēnh anē. Pa kuma nē ô ri mē amã hã kagã. Mē ate kamã harēnh nē apr̄i hã mar t̄yx kaxyw.

18

Tirt̄um kot Papirōn gr̄anh par ã harēnh

1 Tã pa kē axte mēmoj pumu. Nh̄um axte Tirt̄um kap̄er o mē wr̄yk xw̄ynhjē hōja kaxkwa r̄um ahp̄ar mã wr̄yk o tē. Tirt̄um nh̄y hã hiht̄yx nē kamã hirã rax kumrêx o pika piitã hkôt mē kãm hirã pa. 2 Nē ahp̄ar mã tēn wr̄y nē kax̄ pē kap̄er o:

E koja Papirōnja pigr̄anh pa nē hp̄anhã kēp Satanasti mã mē àpēnh xw̄ynhjē papxã nē kēp nhōnhti papxã. Hāmri nē aa kamã mēmoj mex kêt kumrêx.

3 Kr̄i nhō xw̄ynhjaja na htem Tirt̄um kap̄er kôt amnh̄i nh̄ipêx kêt nē amnh̄i kr̄a hkôt kãm pr̄am xã hkôt pix mã tanhmã amnh̄i tomnuj to ho pa. Te mēhō pip̄anh nē ht̄yx ri amnh̄i nh̄ipêx o pa pyrāk.

Nh̄um kr̄i piitã hkôt mē ho amnh̄ipt̄ar xw̄ynhjaja mē hw̄yr mra nē mēnijē ho amnh̄ikati ho pa.

Nē kr̄i nhō xw̄ynhjaja mēmoj pumu nē kãm hk̄inh nē hapr̄ôr kurê kumrêx o pa nē aa uapr̄ôr o hapêx kêt nē.

Jakamã na hte kr̄i hkw̄y nhō xw̄ynhjaja mē hw̄yr mēmoj to pa nē xatã mē kãm ho wēnē nē mē kukwak ri mē hik̄axpore r̄unh nē pa.

Anh̄yr o kap̄er. 4 Hāmri nh̄um Tirt̄um Papirōn kamã hkrajē mã kap̄er nē mē kãm: E mē tokyx mē kot ri ht̄yx amnh̄i nh̄ipêx xw̄ynhjē nhō kr̄ita r̄um ajapôj ixkrajaja.

Kot kaj mē anh̄yr kêt nē ra mē hkôt amnh̄i nh̄ipêx pa mē ato apimràatã mē ate amnh̄i tomnuj ã mē atomnuj t̄yx nē.

5 Kr̄i nhō xw̄ynhjaja na htem amnh̄i tomnuj r̄unh o pa.

Mē kot amnhĩ tomnuj xà te mē kot kēn katutxô nhũm hprêk rax o kot kaxkwa kanhwÿr kaxyw pyrək.

Na pa hte ã mē kot amnhĩ nhĩpêx anhÿr ã mē omunh rāhā ho ri ixpa. Jakamā kwa ixkrajaja mē tokyx mē kurũm ajapôj.

Anhÿr o hkrajê mā kapêr. Hāmri nē kapêr o mē wrÿk xwÿnhjê mā kām:

⁶ E kwa mē ma mē hwÿr wrÿ nē tanhmā ixkrajê hā mē ho.

No ãm kêr ka mē tanhmā mē ho htÿx o mē kot ra tanhmā ixpê ixkrajê nhĩpêx tota jakre.

Kê mē tanhmā ixpê mē ho grire htā ka mē hā tanhmā mē ho htÿx kumrêx o mē kot mē hipêxta jakre.

⁷ Krĩ nhõ xwÿnhjaja na prem mex nē pa.

Nē mē hikukrêx rũnh nē hkĩnh nē pa.

Nē tanhmā amnhĩ to jarkrar to ho ri pa nē amnhĩ jarēnh o:

“Ot pa mē te pahi ni kot amnhĩ nhĩpêxta pyrà nē ixkrĩ xà mex pix kām ixkrĩ pyrək.

Nē te Tĩrtũm kot amnhĩ nhĩpêx pyrək o na pa htem amnhĩ nhĩpêx o ri ixpa.

Nē mē ixkĩnh nē mē inhmex rāhā ri ixpa.

Ā mē ixte amnhĩ nhĩpêx anhÿr xwÿnh na pa mē.”

Anhÿr ã amnhĩ to jarkrar o pa.

Tā kêr ka mē tanhmā mē homnuj to kê mē mexta pānhā omnuj tÿx nē pa.

Nē kê mē hkaprĩ nē amnhĩ xà htÿx kām hamak rāhā nē pa ho pa.

⁸ E kê mē ã amnhĩ nhĩpêx anhÿr o pa.

Jakamā koja mē arĩgro hpÿnh kām mē hkwÿjaja hpikaprār rũnh nē nhũm arĩ mē htĩr xwÿnhjaja omnuj nē pa.

Nē tee ri amnhĩ pumu nē hkaprĩ xàj mÿr o pa.

Nē amnhĩ xà htÿx kām hamak o pa.

Nē tee ri amnhĩ nhĩpêx o pa.

Nē kām prām nē pa rāhā ty nhũm kuwy mē ho hkaxàr pa.

Ixpê Pahi Maati Tĩrtũm kot paj ixihtÿx kām ã mē hipêx anē. Anē.

⁹ Hāmri nhũm krĩ piitā kurũm mē ho amnhĩptār xwÿnhjaja. Mē kot mē hwÿr mrrar nē mē hkuprÿjê ho amnhĩkati nē mē urək nē mēmoj pumunh nē haprôr rāhā ho

pa xwÿnhjaja tee ri krĩ kaxàr nē kàx mā kuwy hkũm àpir o paja pumu nē hkaprĩ nē mÿr o kuhê.

¹⁰ Nē Tĩrtũm kot mē ho hapêx par ã mē omu nē kām ma htÿx kumrêx. Amÿm mē omunh o kuhê nē tee ri amnhĩ kukamā hamaxpêr nē htertet tÿx nē. Nē mÿr kām kapêr o:

Hêxta waa nē Papirôn nhõ xwÿnhjaja.

Mē amex nē axihtÿx mex nē apa htā nhũm Tĩrtũm mē anhĩmex pa. Hêxta waa nē. Anē.

¹¹ Nē mē hwÿr mrrar nē mē kām mēmoj to wēnê ho mē pa xwÿnhjaja haxwÿja krĩ pumu nē tee ri amnhĩ kukamā hamaxpêr nē hkaprĩ nē mÿr o kuhê. Nhÿri koja mē tokyx axte mēmoj to wēnê? Mē kêp mēmoj japrôr rũnh xwÿnhjaja hkaxàr par kumrêx kēnā.

¹² Na prem mēmoj piitā ho pa nē mē kām ho wēnê. Mēmoj mex piitā. ôr o mē hkukrêx nē prat o mē hkukrêx nē kēn jaxēnh ã kàxpore xohtô. Nē kupêxê mex. Kakrā htyk nē hkamrêk nē hkroore nē hā hapjê. Nē mēmo pĩ kuxware nē pĩ htÿx nē kēn jakàr nē kàx o ri mēmo nhĩpêxja nhũm prem mē kām ho wēnê ho pa. ¹³ Nē mēmo htwÿm nē mē hkuxwa xà. Nē mē ô ho ành xà nē mē ô kuxwa xà nē xwÿgrà nē harôj. Nē môx nē ôwēhti nē kawar nē kaxyw kawarti hkjēnh xà hā karrotre. Nē nhÿhÿnh krĩ hõ kamā panhĩ hkwÿ pynê nē mē hwÿr mē o pa nē mē kām mē ho wēnê nhũm mē amarĩ mē hkôt ri àpēnh rũnh o pa. Na prem ã mē kām mēmoj to wēnê anhÿr o pa. Tā ra mē kot mē haprôr xwÿnh mē mē pimràatā hapêx pa.

¹⁴ Jakamā nhũm mē tee ri mē hkukamā hamaxpêr nē te kot mē kām kapêr pyrà nē mē kām:

Hêxta waa nē. Mē amā mēmoj prām nē amnhĩm haprôr xwÿnhhta na mē apê hapêx par kumrêx.

Nē mē akàxpore rũnh nē mē akukrêx rũnhhta mē mē apimràatā ajapêx pa. Kot kaj mē axte tanhmā amnhĩ nhĩpêx to ho apa hkêt nē. Anē.

¹⁵ Hāmri nē amÿm ri Tĩrtũm kot tanhmā mē hipêx to hā mē omu nē kām ma xàj mur nē htertet o kuhê.

¹⁶ Nē mÿr kām kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nê mē hikukrêx mex o amnhĩ jamrêx nê ri hã mra.

Nê ôr nê kên mex ã ohtô xwýnh o amnhĩ jamrêx nê ri hã mra.

¹⁷ Tã ra hapêx par kumrêx. Anê.

Hãmri nhũm gô xujanãr kãm pãr nhõ dõn nê mē kot mē kãm pãr o ri mrrar xwýnhjaja nê mē kot kamã tep pynênh xà ho tep pynênh o ri mē pa xwýnhjaja nê pãr kãm amarĩ mē pa xwýnhjaja hãmri mē hwýr mra nê wamtajê pyrã nê tee ri amým ri mē õ krĩ pumu nê mýr o kuhê. ¹⁸ Nê kurũm kuwy hkũm xàpir o pa hã omu nê tee ri mē hkukamã hamaxpêr nê axpên mã:

Hêxta waa nê. Krĩ mũj na pre mex o mex. Mex o krĩ piitã hakrenh par htã hapêx pa. Anê.

¹⁹ Hãmri nê mur nê hkaprĩ xaj pika hkwy jamý nê ho amnhĩ kamĩ nê mýr kãm kapêr o:

Hêxta waa nê. Krĩ mũj na pre rax o rax.

Nhũm pre nhýhýnh pãr kãm mēmoj to wênê ho pa xwýnhjaja mē hwýr mēmoj to pa nê mē kãm ho wênê nê mē hkukwak ri hikãxpore rũnh nê ri pa.

Tã hãmri mē hapêx pa. Anê.

²⁰ Hãmri nhũm Tĩrtũmja krajê piitã mē kãm kapêr nê mē kãm:

E ixpê Tĩrtũm na pa ã mē hipêx anê.

Mē kot mē apê ixkrajaja tanhmã mē atomnuj to ho paja mýrapê na pa mē atã ã mē hipêx anê.

Jakamã e kaxkwa kamã mē apê ixri mē apa xwýnhjaja.

Nê mē ate inhý hã ri mē kãm ixkapêr jarênh o mē apa xwýnhjaja.

Nê Jesus nhý hã mē akapêr o ri mē apa xwýnhjaja. Mē apiitã mē apê ixkra na ka mē.

E mē amnhĩ tã ja pumu nê akĩnh nê axpên mã apikunhar o akuhê. Pa na pa mē atã ã mē ho ijapêx anê. Anê.

²¹ Tã nhũm kapêr o mē wrýk xwýnhjê hõja hihtýx o kên rax kumrêxja mý nê o tẽ nê gô xujanãr kamã kãm gêt nê kumê nhũm mrõ nê akunok. Hãmri nhũm kapêr o:

E krĩta koja Tĩrtũm te ho ixte gôx kãm kên mênh nhũm mrõr nê hpikunor pyrãk o hipêx nhũm hapêx par kumrêx.

²²⁻²⁴ Na pre hte krĩja kamã mē kot ri mē kãm mēmoj to wênê xwýnhjaja amnhĩ to rũnh o krĩ piitã hkôt mē hakrenh pa. Nê krĩ nhõ xwýnhjaja na prem pika piitã hkôt hêx rom tanhmã mē no kupyr to ho ri pa. Jakamã ra mēmoj to wênê xwýnhjê pyrã nê mē hikukrêx rũnh gryk ã Tĩrtũm kaga.

No ãm ja pix kêt. Tĩrtũm krajê mē Tĩrtũm nhý hã kapêr o mē pa xwýnhjaja na prem mē himex rax nê. Hãmri nhũm krĩ piitã kamã mē pa xwýnhjaja mē kot mē hipêx ã mē omu nê mē urak nê ã mē hipêx anhýr o pa.

Tã Papirõn nhõ xwýnhjaja kot mē hipêx anhýrja mýrapê koja Tĩrtũm mē himex par kumrêx.

Jakamã koja mē axte hkĩnh nê hkĩnh xaj ri grer kêt nê.

Nê axte hkĩnh nê grer kãm hakwa kôr o ri pa kêt nê.

Nê axte ri wiorãw kakrênh hkêt nê.

Nê axte ri amnhĩm kawà hyr o hkrĩ hkêt nê.

Nê axte harôj kahuk o kuhê hkêt nê.

Nê axte mē ôrkwý kamã kanê hpok kêt nê.

Nê axte axpên mã ri hkrajê rer o ri pa hkêt nê. Koja ã mēmoj kot anhýr piitã hapêx pa. Anê.

19

Mē kot Tĩrtũm mex ã mē harênh

¹ Tã pa kê axte mēmoj pumu. Nê kaxkwa kamã mē kapêr ma nhũm mē ohtô rax kumrêx nê tanhmã axpên mã kapêr to. Nê anhĩpê kax pê kapêr týt nê kapêr o:

E pu mē pahpiitã Tĩrtũm mã mex o mex ã harê.

Tapxipix na hihtýt o hihtýt.

Nê tapxipix na àhpumunh o àhpumunh.

Nê tapxipix na mex o mex.

Tapxipix na mex o kot mēmoj piitã hakrenh par.

Ra kot mēmoj punuj pê mē papytãr par jakamã kêp mē papytãr xwýnh ã pixi mex na.

² Na hte amnhĩ jarênh xà hkôt tanhmã mēmoj to ho pa.

Nê amnhĩ to hêx kêt nê.

Tã ãm hãmri na ã Papirõn nhõ xwýnhjê nhĩpêx anê.

Na prem mẽ kãm Tĩrtũm kapêr jarênh o mẽ pa xwýnhjê nhĩmex rax kumrêx.

Nê krĩ piitã hkõt ri pa nê amnhĩ kõt mẽ kurê nhũm mẽ kuma nê mẽ hkõt amnhĩ tomnuj o pa.

Nhũm Tĩrtũm tee ri hã mẽ omu nê ã hkrajê hã mẽ hipêx kati anê. ãm hãmri na ã mẽ hipêx anê.

Anhỹr o axpên mã harê. ³ Hãmri nê xatã axpên mã:

Nã ãm hãmri na ã mẽ panhõ Tĩrtũmjã mẽ hipêx anê nhũm mẽ kurũm kuwy hkũm kax mã àpir o pa.

Koja krĩ nhõ xwýnhjaja amnhĩ xà htỳx kamã hamak rãhã ho pa nê aa à htỳx hapêx kêt.

E pu mẽ hã Tĩrtũm mã mex o mex ã harê. Anê.

⁴ Hãmri nhũm mẽ àptàr tũm pê 24 mẽ mẽmoj tĩr pê kwatjaja hãmri Tĩrtũm kot mẽ ho amnhĩptàr ã hkrĩ xà maati kutã rôrôk nê kãm hipô hpa. Hãmri nê ã mẽ kapêr anhỹr xwýnhjê mã kapêr nê kãm:

Nã ãm hãmri na ka mẽ ã Tĩrtũm mex ã harênh anê. E pu mẽ pahpiitã kãm mex o mex ã harê. Anê.

⁵ Hãmri nhũm mẽhõja Tĩrtũm krĩ xà maati kamã kapêr o:

E mẽ axte Tĩrtũm mã mex o mex ã harê. Mẽ ate Mẽpahpãm kõt amnhĩ nhĩpêx o mẽ apa xwýnhjaja.

Nê mẽ apê mẽ ho amnhĩptàr xwýnhjaja nê amarĩ ri mẽ apa xwýnhjaja nê mẽ apiitã mẽ ate Tĩrtũm ã apijaàm o mẽ apa xwýnhjaja kãm mex o mex ã harê. Anê.

Kot mẽ pahpãnhã amnhĩrer xwýnh mẽ hkwỳjê jarênh

⁶ Tã pa tanhmã mẽ kapêr to hã mẽ kuma nhũm mẽ kax pê kapêr tỳx nê. Te mẽ ohtõ rax kumrêx kapêr pyræk. Nê te gõ koko htỳx rỳ na katõtõk tỳx pyræk. Hãmri nê mẽ kapêr o:

E na ra Tĩrtũm kêp mẽmoj piitã ho amnhĩptàr xwýnh.

Nê kêp mẽ panhõ Pahi Maati.

Nê hihtỳx o hihtỳx nê àhpumunh o àhpumunh.

E pu mẽ kãm mex o mex ã mãn harê.

⁷⁻⁸ Nê hã pahkĩnh nê.

Nê kãm hihtỳx o hihtỳx ã harê.

Te mẽ kot axpên mã mẽ rer xwýnh kot amnhĩ nhĩpêx pyræk.

Ja o mẽ pahte amnhĩ tomnuj pãnhã amnhĩrer xwýnhhta te kêp myja pyræk.

Nê mẽ kot hkõt amnhĩ nhĩpêx xwýnh piitã te mẽ kêp nija pyræk.

Nê te mẽ kot axpên mã wa rer nhũm wa kot axpên kõt pa ho pa pyræk o koja mẽ amnhĩ nhĩpêx.

Nê te mẽ kot mjên mã xwýnh mã ê mex jakare nhõr nhũm kot hagjênh pyræk. Nê ê mexja te mẽ kot tãm amnhĩ nhĩpêx xà pyræk. Anê.

⁹ Hãmri nhũm Tĩrtũm kapêr o wrỳk xwýnhja inhmã:

–E Juãw. Pa amã mẽmoj jarê ka mar tỳx nê akwỳjê mã hã kagà. Tĩrtũm kapêr kwỳ kot paj amã harê. Kêp Tĩrtũm kapêr jakamã ãm hãmri na. Na hte mẽmoj jarênh o hêx kêt nê. E kapêr ã kagà ho:

Na htem axpên mã mẽ rer kaxyw nê amnhĩ wỳr hkwỳjê wỳ nhũm mẽ hwỳr mra nê wa hã hkĩnh nê apkur mex nê.

Ja pyrã nê Tĩrtũm kot amnhĩ wỳr mẽ hwỳr xwýnhjaja koja mẽ nhỹrmã mẽ pahte amnhĩ tomnuj pãnhã amnhĩrer xwýnhhta wỳr api nê ã amnhĩ nhĩpêx anê nê hkĩnh nê apkur mex nê.

Hãmri nhũm Tĩrtũm mẽ ho mex rax kumrêx. Anê.

–E kêt ka ã akwỳjê mã ja hã kagà anê Juãw. Anê.

Hãmri pa kuma nê kagà ja kamã mẽ amã hã kagà. ¹⁰ Hãmri nê hã kagà hpa nê ra ixte kãm mex o mex ã harênh kaxyw kutã ixkõn krã ho tẽm nê nhỹ nhũm tee ri amnhĩ tã ixpumu nê inhmã:

–Kwa ã ri inhĩpêx anhỹr kêt nê. Apyrà nê ixte Jesus mã tanhmã amnhĩ nhĩpêx to xwýnh kênã. Jesusja apyrã nê kêp inhõ pahihtĩ na. Jesus kapêr na prem hkukamã mẽ kot Tĩrtũm nhỹ hã kapêr o mẽ pa xwýnhjaja hã kagà nê mẽ kãm harênh o pa. Jakamã kwa pu mẽ Tĩrtũm pix kutã mãn pahkõn krã ho parôrôk nê pahkrĩ nê kãm mex o mex ã harê. Anê.

Kawar jaka hã ýr xwýnh jarênh

¹¹⁻¹⁶ Tã pa kê axte mẽmoj pumu. Nhũm kaxkwa axkjet nhũm kamã kawar jakajre

xa nhũm mēhōja hã nhỹ. Hixi na pre kēp “Aa kot Tirtũm kaga hkēt xwỳnh.” Anē nē hixi hō na pre kēp: “Tirtũm kōt pix mã amnhĩ nhĩpêx o pa xwỳnh.” Anē. Ā hixi kot anhỹr jakamã na hte katàt kōt ahpỹnhã mē kot amnhĩ nhĩpêx ã mē omunh xà hkōt tanhmã mē harēnh to. Mē kot amnhĩ to mex ã mē omunh xà hkōt tanhmã mē hkwỳjê jarēnh to nē mē kot amnhĩ tomnuj ã mē omunh xà hkōt ahpỹnhã tanhmã hkwỳjê jarēnh to. Na pre mē kot tanhmã hkwỳjê nhĩpêx to ho pa xwỳnhjê kutã amnhĩ xunhwỳ nē mē hã tanhmã mē ho. Ā na pre kawar ã ỹr xwỳnhja amnhĩ nhĩpêx anhỹr o pa.

Nē no te kot kuwy hpōk pyrāk jakamã hprĩ hã mēmoj piitã omu nhũm mēmoj kēp hpimxur kēt nē. Nē kēp pahi hã mē ahkà ho ohtō nē kutu. Nē nhỹhỹnh ĩ hã hixi hō hã kagà nom ãm tapxipix kot amnhĩ tã amnhĩ nhĩxija pumunh. Na pre ra amnhĩ kamrō ho ê xy hpa nē xa. Nē hixi hō pē:

TIRTŪM KAPĒR O AMNHĨRĪT XWỠNH
Nē ê ryti hã hixi hō hã kagà. Nē ihkjê hã ãm tãm. Hã kagà jarēnh kot:

Ixpê mē ho amnhĩptàr xwỳnh piitã mē ò
Pahi Maati na pa.

Nē hakwa rũm wapo xwa gixre pōm katon ajēt. Kot ho tanhmã mē kot Tirtũm mē wa kutã amnhĩ xunhwỳr xwỳnhjê nhĩpêx to kaxyw. Jakamã ra mē piitã mē ho pikuprōnh pa nē mē hipêx o te mē kot prēs kãm uwa xō kagō janēnh pyrāk nhũm mē hkamrō hpikapĩr rax kumrēx. Tirtũm xihtỳx xwỳnh kot mē kamã gryk tỳx jakamã nhũm ã kãm mē hipêx anē. Mē kot amnhĩ tomnuj o paja mỳrapê.

Nhũm ò pōristi piitã uràk nē kawar jakare hã hkrĩ nē hkōt ri pa. Mē ê jaka muxre jagjê nē hã ma hkōt ri pa.

17-18 Tã pa axte Tirtũm kapēr o mē wrỳk xwỳnh òja pumu nhũm myyti kutã xa nē kàx pē nhōnhti mã kapēr nē mē kãm:

—E mē amnē mē ixwỳr wrỳ nē Tirtũm ã akĩnh nē mē htyk nē mē hikwỳ xwỳnhjê hã atu nē aku. Mē ho amnhĩptàr xwỳnhjaja nē pōristijaja nē mē hkrãhtũm nē kawar nē kawar ã mē hkrĩ nē ri mrar xwỳnhjaja nē mē kot amnhĩ to rũnh xwỳnhjaja nē mē kot amnhĩ to hkryre xwỳnhjaja. Nē mē kãm mē

àpēnh xwỳnhjaja nē amnhĩ mã ri mē àpēnh xwỳnhjaja. Ām mē htyk nē mē hikwỳ xwỳnh mũj piitã mãmrĩ mē hwỳr wrỳ nē mē hã atu nē mē aku. E mē tokyx nhōnhti. Anē.

19 Tã nhũm mrymnuti nē krĩ piitã hkōt mē ò pahi nē mē ò pōristijaja piitã axpēn wỳr akuprō. Wam kawar jakare hã ỹr nē htēm xwỳnh mē ò pōristijê hwỳr hprōt nē mē hkurê kaxàr kaxyw axpēn mar kaxyw akuprō.

20-21 Hãmri nē mē hwỳr mra nē mē hkurê kapa. No ãm tee ri amnhĩ nhĩpêx nē tee ri kãm tanhmã mē ho hprãm hkapyrỹ nhũm wam kawar jakare hã ỹr nē htēm xwỳnhhta hakwa rũm wapo xwagixre kator o mē himex pa. Hãmri nhũm mē hkwỳjê pyràn htyk pa nē hikwỳ. Nhũm nhōnhti mē omu nē mē hwỳr wrỳk o mra nē mē kuku hãmri nē kãm mē hkur kaga nē mē hkaga. No nhũm mrymnuti nē ỹ hã mē kãm hēx o pa xwỳnhhta wa nhũm mē axtem nē htĩr rãhã wa unē nē ma wa o tē nē êsôf o kuwy maati kamã wa kumē. Hãmri nhũm wa kamã htĩr tũm nē hxēt rãhã nē pa ho pa nē aa htyk kēt nē.

20

*Mē kot Satanasti hpa hpre hã mē harēnh
Wam Korĩt 15.20-28*

1 Tã pa kē axte mēmoj pumu. Nhũm Tirtũm kapēr o mē wrỳk xwỳnhjê hōja kaxkwa rũm wrỳ nē ahkre xupỳmti hpro xà ho htỳx xà hã safja py nē kàx pytĩhti ho mē hpre xàja ò py. 2-3 Hãmri nē kagãmnuti pē hēx xwỳnh maati Satanastija pynē. Amnepēm Atãw mē Ewa wa kãm hēx xwỳnhhta pynē nē kàx pytĩ o hpa hpre nē hte hpre hãmri nē ahkre xupỳmti nhĩtom xà mē nē kamã kumē. Hãmri nē akupỳm hpro xà ho hpro nē saf o hã ho htỳx. Kot pika piitã hkōt mē kãm hēx o pa pymaj ã hipêx anē. Koja tokyx kator kēt ry rax kumrēx. Koja kamã arĩ hkrĩ hã amgrà xohtō nē. Hã amgrà pē 1.000 nhũm rĩ kormã Tirtũm akupỳm kator nhũm kato nē ri pa. Nom pa hkrãnre.

4 Tã pa mē htyk nē akupỳm mē htĩr xwỳnh kwỳjê pumu. Kormã mē htĩr ri na prem Tirtũm kapēr kōt pix mã amnhĩ nhĩpêx o pa. Nē Jejus kēp mē ò pahiti hã harēnh rãhã ho pa. Aa mē kot mrymnuti kutã hkōnkrã

ho rôrôk nê kãm mex ã harênh kêt. Nhũm prem tee mē ôkrã hã nê mē ïhkra katut ã mrymnuti nhĩxi nhĩpêx kaxyw nom nhũm prem hkaga kamã hihtyx nhũm prem kãm mē hkurê xwýnhjaja tee ri ja hã mē omu nê mē mut jakàr o mē kupa. Hãmri nhũm Tĩrtũm akupỹm mē ho mē htĩr nê mē kot mē ho amnhĩptàr ã hkrĩ xà kamã mē hkrĩ. Jejus nhĩhkô hã mē hkrĩ hã amgrà pē 1.000 kaxyw. ⁵ Mē kumrêx na pre Tĩrtũm akupỹm mē ho mē htĩr nhũm mē hkwýjaja mē hkĩnh ã arĩ ty nê hikwỹ hã amgrà pē 1.000 jakre nhũm rĩ kormã akupỹm mē ho mē htĩr.

⁶ Wam akupỹm mē htĩr xwýnhjaja kêp Tĩrtũm kra jakamã koja mē Tĩrtũm kra hkêt xwýnhjê kurom hkĩnh nê pa ho pa. Nê mē kurom mē kot amnhĩ xà htýx kamã hamak o pa htũm xà wýr pa hkêt nê. Nê mē kurom Tĩrtũm mē Kra Jejus Kris wa kuri mex kumrêx nê wa kãm tanhmã ri amnhĩ nhĩpêx to ho pa. Nê Jejus nhĩhkô hã mē ho amnhĩptàr o pa hã amgrà pē 1.000.

Tĩrtũm kot kuwy hwýr Satanasti mēnh ã harênh

⁷ Tã koja amgrà pē 1.000 hapêx nhũm rĩ kormã Tĩrtũm kapêr o wrýk xwýnhja akupỹm ahkre xupỹm wýr tē nê Satanasti mã kahê xà mē nhũm kato. ⁸ Hãmri nê kê axte pika piitã hkôt tanhmã mē kãm hêx to ho ri pa. Gorti nhõ xwýnhjê mã nê Makok nhõ xwýnhjê mã nê krĩ piitã hkôt Tĩrtũm nê tanhmã mē kãm hêx to ho mē hkôt pa. Hãmri nê mē kot Tĩrtũm krajê kutã amnhĩ xunhwýr nê mē hkurê kaxàr kaxyw amnhĩ kwýjê ho akuprô nhũm mē ohtô rax kumrêx nê axpên wýr akuprô. Te pikahti grã xohtô pyrãk.

⁹ Hãmri nê ma Tĩrtũm krajê nhĩmex par kaxyw mē hwýr mra nê mē ô krĩ mã hipôk pa nê kuhê. Mē ô krĩja Tĩrtũm mã mex tã nhũm mē kot kêp grãnh par kaxyw ma hwýr mra. Hãmri nhũm kaxkwa rũm kuwy hpókja mē haêr pē mē hã rôrôk nê mē ho hxê pa.

¹⁰ No mē kãm hêx xwýnh maati Satanastita nhũm Tĩrtũm kapêr o wrýk xwýnhja axte unê nê ma êsôf o kuwy maatita wýr o tē nê kamã kumê. Ra mē kot kamã mrymnuti wa kot Tĩrtũm nê mē nokupyr o pa xwýnh wa mēnh tã wa hkôt Satanasti mã ho anê nê kamã kumê nhũm kamã pa ho

pa. Koja mē aa kator kêt kumrêx. Nê arĩ kamã amnhĩ xà htýx kamã hamak rãhã nê pa ho pa.

Tĩrtũm kot ahpýnhã tanhmã mē piitã mē harênh to kaxyw

Matêwre 25.31-46; Juãw 5.25-29

¹¹ Tã pa axte mēmoj pumu nhũm kaxkwa mē pikaja wa ra hapêx pa. Pa Tĩrtũm kot tanhmã mē piitã mē harênh to hã hkrĩ xà raxja pumu. Nhũm hakajre nhũm Tĩrtũm kamã nhỹ.

¹²⁻¹³ Hãmri nhũm ra mē htyk nê mē hikwỹ xwýnh piitã akupỹm hapôx pa nê Tĩrtũm kot tanhmã mē harênh to hã hkrĩ xàta kutã hkrĩ pa. Mē piitãã. Mē kot amnhĩ to rũnh xwýnhjaja nê mē kot amnhĩ to hkryre xwýnhjaja nê mē ho amnhĩptàr xwýnhjaja nê gô xujanãr kãm mē mrôr nê mē htyk xwýnhjaja. Ra mē htyk nhũm mē kot mē hagjênh xwýnhjaja piitã mē htykjê papxà rũm hapôx pa nê Tĩrtũm kutã ohtô ho ohtô nê hkrĩ. Hãmri nhũm Tĩrtũm ô kagà py nê kamã mē piitã mē hixi japêr. Kagà kamã ra mē hkukamã mē htĩr tũm nê mē pa ho mē pa mã xwýnhjê nhĩxi japêr. Nê kagà hõ kamã mē htĩr ri tanhmã mē kot amnhĩ nhĩpêx to ho pa hã mē piitã mē hã kagàja. Nhũm kupy nê kamã tanhmã mē harênh to nê hkôt hprĩ hã mē piitã mē omunh pa nê rĩ kormã ahpýnhã tanhmã mē harênh to.

¹⁴⁻¹⁵ Hãmri nê mē htĩr tũm nê mē pa mã xwýnhjê nhĩxi hã kagàja kamã tee ri mē hkwýjê nhĩxi japêr nhũm kamã amrakati. Jakamã nhũm mē ma kuwy maatita wýr mē o mra nê kamã mē rênh pa. Te axte mē htyk nhũm mē kot kuwy kamã mē hagjênh pyrãk nhũm mē kamã rôrôk nê tee ri amnhĩ xà htýx kamã hamak rãhã nê pa ho pa nê aa kator kêt kumrêx.

21

Pika mē kaxkwa wa nyw jarênh

Sikũn Pêtre 3.8-13

¹ Tã pa axte mēmoj pumu. Nhũm Tĩrtũm ra pika mē kaxkwa nyw wa ho kato. Ra pika nê kaxkwa nê gô xujanãr tũmja hapêx pa nhũm kaxkwa mē pika nyw wa ho kato. Nom axte gô xujanãr o kator kêt nê.

² Hãmri nhũm Tĩrtũm nhõ krĩ mex pē Jerujarê nywja tanhmã amnhĩ to nê pika

nyw wÿr wrÿk o mō. Krīja mex kumrēx. Mex o mex. Te mjên mā xwÿnh ê mex jaxâr nê amnhĩ to muxre nê mjên wÿr htēm pyrâ nê pika nyw wÿr mex kumrēx nê wrÿk o mō.

³ Hāmri nhūm Tirtūm kot mē ho amnhĩptâr ā hkrī xâ maati ja kamā mēhōja kapēr o:

—Nà ām hāmri. Na ra Tirtūm hkrajê hkôt pa ho pa. Pika nyw kamā mē hkôt pa ho pa nhūm mē tā no ho omu nê hkôt pa ho pa rāhā nê. Nà ām hāmri. Ja mex o mex.

⁴ —Koja hkrajaja hkôt pa ho pa nê axte htyk kêt kumrēx. Nhūm Tirtūm mē nê mē no kagô nhĩnhĩn pa nhūm mē axte hkaprĩ nê mÿr kêt nê. Nê ri axte amnhĩ xâ kamā hamak kêt nê. Nê axte ri tanhmā omnu hto hkêt nê. Ra mē hkaprĩ nê à nê mÿr o pata hapêx par kumrēx nhūm hpānhā mēmoj nyw pix. Anê.

⁵ Hāmri nhūm Tirtūm tām tanhmā inhmā kapēr to. Krī xâ maati kamā ŷr xwÿnhhta tām inhmā kapēr o:

—E na pa ra akupÿm mēmoj piitā ho nyw pa. Jakamā e Juāw. Ām hāmri na pa ā amnhĩ kukamā amā mēmoj jarēnh anê. Ixêx kêt. Jakamā kēr ka akwÿjê mā piitā hā kagà hpa. Kê mē kamā harē nê tokyx kuma nê hkôt hamaxpēr rāhā ho pa.

⁶ —Ra ixte amnhĩ kukamā mēmoj mā ijamaxpēr xwÿnhja na pa ra ho anhÿr pa. Ixpê mēmoj piitā ho anhÿr o hkra xwÿnh nê māānēn ixpê mēmoj piitā ho ijapêx par xwÿnh. Nê ixrāhā ixpa xwÿnh. Amnepēm kormā mēmoj kator kêt ri na pa pre ixrāhā ixpa. Nê ot pa arĩ ixrāhā ixpa. Tā mē kām kōr nê kām gō hkwÿ ho hkōm hprām xwÿnhjê pyrâ nê mē kām ixpix prām xwÿnhjaja kot paj te mē kām inhō hino rūm gō hkwÿ nhōr nhūm mē kot ho hkōm pyrāk o mē hipêx. Hāmri nhūm mē htīr tūm nê ixri pa ho pa nê axte htyk kêt nê. Kot paj ā mē hipêx mex anê.

⁷ —Mē ate tanhmā amnhĩ tomnuj to nê amnhĩ to htÿx nê ixkôt pix mā amnhĩ nhĩpêx o mē apa rāhā mē atyk xwÿnhjaja kot paj ā mē anhĩpêx mex anê. Ka mē apê ixkra hā amex nê ixkôt ri apa rāhā ho apa. Pa ixpê mē anhō Tirtūm ā tanhmā mē ato mex to rāhā ho ixpa.

⁸ —No mē kot amnhĩ kaxyw ixkôt hamaxpēr kêt xwÿnhjaja. Nê mē kot amnhĩ tomnuj xwÿnhjaja nê mē kot ri mē hpar prām xwÿnhjaja. Nê mē kot nhām ri mēnijê ho amnhĩkati xwÿnhjaja. Nê wajagajaja. Nê mē kot amnhĩ to sânti hwÿr o pa xwÿnhjaja. Nê ri mē hêx nhi xwÿnhjaja. Ā mē kot amnhĩ nhĩpêx anhÿr xwÿnh piitā koja mē apê ixkrajê hkīnhā ma kuwy maati wÿr hapêx par kumrēx. Te axte mē htyk pyrāk nom koja mē axte htyk kêt nê. Anê.

Jerujarē nyw jarēnh

Sikūn Korīt 6.16; Karatas 4.26; Eprêw 12.22-24

⁹ Tā nhūm mē kot xijere pē 7 kamā Tirtūm gryk xâ jamÿnh xwÿnhjê hōja hāmri ixwÿr tē nê inhmā:

—E ma ixkôt tē nê mēmoj pumu. Na ra krī nywja pika nyw wÿr wrÿk o mō. Te mjên mā xwÿnh ê mex jaxâr nê amnhĩ to muxre nê mjên wÿr htēm pyrâ nê mex kumrēx nê kaxkwa rūm pika nyw wÿr wrÿk o mō. Nê kot ho mjên mā xwÿnhhta te mē pahte amnhĩ tomnuj pānhā amnhīrer xwÿnhhta pyrāk. E tokyx tē nê omu. Anê.

¹⁰ Hāmri nhūm Tirtūm Karō tanhmā ixto pa ma kot inhmā kapēr xwÿnhhta kôt tē nhūm ma ixto mō nê kēn krā hprêeti hwÿr ixto api nê himōk ā ixām. Pa Tirtūm nhō krī mex pē Jerujarē nywja pumunh o xa. Nhūm mex o mex. Ām hāmri te mjên mā xwÿnh kot ê mex jaxâr nê amnhĩ to muxre nê mjên wÿr htēm pyrâ nê ahpar mā wrÿk o mō pa ixprĩ hā omu.

¹¹ Na pre rax o rax nê mex o mex. Tirtūm kamā pa ho pa jakamā nhūm kamā hirā htÿx kumrēx. Te kēn mex ā kàxpore xohtō jaxēnh mex tÿx pyrāk.

¹²⁻¹³ Nê krī puhā kahêja hprêk rax nê. Nê hwÿr mē gjêx xâ kēp 12. Na pre myt japôx xâ rūm axkrunēpxi. Nê myt gjêx xâ rūm haxwÿja axkrunēpxi. Nê akutā kahpa hkôt haxwÿja axkrunēpxi. Nê ahpÿnhā hakwakre hā Tirtūm kapēr o wrÿk xwÿnhjaja hamār o kuhê. Nê hakwa kre piitā hā Ijaew pē ahpÿnhā mē pikjêr kām mē kēp 12jaja mē hixi hā kagà.

¹⁴ Nê kahê xunhwÿr xâ hkukamā kēn pytyrja ahpÿnhā kēp 12. Kēn pytyrta ā na

mê kot Jejus nhÿ hã mê ahkre o mê pa xwÿnh maati pê 12jê nhÿxi hikwÿ.

15 Tã nhÿm kot ixto mör nê inhmã mëmoj jahkre xwÿnhhta ôr o mëmo pÿ py nê kot ho krÿ ho mÿdi kaxyw xa. Nê ho kahê piitã ho mÿdi kaxyw. Nê mê gjêx xàja ho mÿdi kaxyw.

16-17 Hãmri nê ho mÿdi hpa. Krÿja ry nê kahpa piitã axpên pyrãk. Nê hprêk piitã mãânên axpên pyrãk. Kamã mëmoj piitã ahpÿnhã kêp 2.200 kirôm. No puhã kahêja hprêk o 64 met pix nê.

18 Nê kahêja kên jaxênh pix o kot amnhÿ nhÿpêx jakamã mex o mex. Nê hkarÿr tÿx kumrêx. Nê kahê hkre kamã krÿ kamã ahpÿnhã ri ixkreja ôr pix o kot amnhÿ nhÿpêx. Nê piitã hkarÿr tÿx.

19-20 Nê kahê xunhwÿr xà hkukamã kên pytyrta ahpÿnhã ri kên mex pix o kot amnhÿ nhÿpêx. Piitã mex kumrêx nê hkarÿrti.

Wamta kawax pê grãgrãre.

Nê hkôt ja kawax pê grãgrã kakrã htyk.

Nê hkôt ja kakrã htyk.

Nê hkôt hõja grãgrã karÿr.

Nê hkôt ja hkamrêk pihkãrti.

Nê hkôt ja grãgrã kakrã htyk.

Nê hkôt ja hkamrêk tÿx kumrêx.

Nê hkôt ja rãràare.

Nê hkôt ja grãgrã më pihkàr.

Nê hkôt ja rãràr më pihkàr.

Nê hkôt ja grãgrã karÿÿre.

Nê hkôt ja kakrã htyk pihkàr.

Ã kên pytyr mex kot anhÿr.

21 Nê mê gjêx xà hã hakwakre kahê xà pê 12ja mëmo kên jakooti rÿnh kumrêx pix o. Nê krÿ kahti hkôt pry nhÿkwÿ xwÿnhja ãm ôr pix o. Nê hkarÿÿre.

22 Pa pre tee ri krÿ kamã Tÿrtÿm mã amnhÿ jarênh xà hã ixkre japêr nhÿm am-rakati. Mo kaxyw koja mê axte ixkreja hwÿr mra? Ra Pahi Maati Tÿrtÿm xihtÿx xwÿnh mê mê pahte amnhÿ tomnuj pãnhã amnhÿrer xwÿnhhta ra hkrajê kamã pa ho pa kênã kot kêt mê axte ri ixkreta o presija. Koja mê kãm wa mex ã wa kãm harênh prãm nê nhÿri tãm wa hwÿr mra nê ã wa kãm kapêr anê. Te mê pahte pahi hwÿr pamrar nê kãm pakapêrta pyrã nê wa hwÿr mra nê wa kãm kapêr.

23 Nê koja krÿja kamã myyti nê mytwrÿre hkêt. Mo kaxyw kot kêt myyti nê mytwrÿreja arÿ ri hirã ho pa? Krÿ kamã Tÿrtÿm pa ho pa jakamã kamã hirã mex kumrêx. Nê mê pahte amnhÿ tomnuj pãnhã amnhÿrer xwÿnhhta haxwÿja kamã pa ho pa. Te kêp kanê hpôk rax kumrêx pyrã nê hirã mex o pa. Kot hirã mex o kot myyti jakrenh. Ã Tÿrtÿm mê Kra wa krÿja kamã pa ho pa jakamã nhÿm mê axte myyti ho presija hkêt nê.

24 Koja krÿ nhõ xwÿnhjaja hirã mex pix kãm ri pa ho pa nê tãm ri amnhÿ nhÿpêx o ri pa. Tã koja mê ho amnhÿptãr xwÿnhjaja Tÿrtÿm wÿr mra nê amnhÿ rom kãm mex o mex ã harê nê kãm:

—Na pre mê ixkwÿjaja mê ixpê mê ho amnhÿptãr xwÿnh ã axpên mã mê inhmex nê mê ixãhpumunh ã ri axpên mã mê ijarê. Nom mê ixrom amex o amex nê axãhpumunh o axãhpumunh. Jakamã ãm hãmri na htem amã amex o amex ã ajarê Tÿrtÿm. Anê.

25 Nê krÿ hwÿr hakwakre koja amnhÿ kahê xà rênh rãhã kuhê nê aa amnhÿ kahê hkêt nê. Jar mê panhõ pika kamã na hte kamãt kaxyw nhÿm htem amnhÿ tã hakwakre kahê hpa. No mo kaxyw koja mê axte pika nywja kamã ã amnhÿ nhÿpêx anê? Koja kamãt kêt nê hirã rãhã ho rãhã jakamã nhÿm mê amnhÿ tã kahê hkêt rãhã nê pa ho pa.

26 Nê koja mê piitã Tÿrtÿm wÿr mra nê kãm mex o mex ã harê nê kãm:

—Pa Tÿrtÿm. Hêxta waa nê. Anhõ krÿja mex kumrêx. Mex o mex. Nê mê ixrom amex o amex nê axihtÿx o axihtÿx. Nê mê ixrom axãhpumunh o axãhpumunh. ãm hãmri na ka ra mê ixpê akrajê kamã apa ho apa Tÿrtÿm. Anê.

27 Nê koja mëmoj punuj krÿja wÿr gjêx kêt kumrêx. Mê hpijaãm kêt xwÿnhjaja nê ri mê hêx xwÿnhjaja hwÿr gjêx kêt nê. ãm mê pahte amnhÿ tomnuj pãnhã amnhÿrer xwÿnhhta nhõ kagã kamã Tÿrtÿm ri mê htÿr tÿm nê mê pa mã xwÿnhjê nhÿxi nhÿpêx xwÿnh pixjaja koja mê hwÿr agjê nê kamã pa ho pa.

22

1-2 Tã pa pre axte mẽmoj pumu. Nhũm Tĩrtũm kapēr o wrỳk xwỳnhja axte inhmã mẽmoj jahkre. Nhũm Tĩrtũm mẽ kot mẽ pahpãnhã amnhĩrer xwỳnhja wa kot mẽ ho amnhĩptàr ã hkrĩ xà maati rũm pyhti hprõt. Krĩ kahti hkõt pry pohti nõr xwỳnhja kahti hkõt hprõt o nõ. Pyhti kamã gõja na htem ho ixkõ nẽ htĩr tũm nẽ pa ho pa. Gõ karỳỹre. Nhũm mẽmo pĩ hpàr muxre xwỳnhja akutã hijẽ nẽ xa. Pĩ xõja na htem kuwõ nẽ htĩr tũm nẽ pa ho pa. Na hte apkati mẽ ô rãhã nẽ kuhẽ. Nẽ axtem hõja mẽ piitã mẽ mex nẽ à hkõt kaxyw na hõja.

³ Amnepẽm na pre Tĩrtũm Atãw mã kapēr nẽ kãm:

—Ate amnhĩ tomnuj mỳrapẽ kot paj tanhmã pika homnu hto nhũm apẽ mex kêt nẽ. Ka kamã apur nẽ kamã axapẽnh rũnh o apa rãhã nẽ rĩ kormã kamã axàpkur o ri apa. Apẽ jamnuj tã kot kaj mẽ ã amnhĩ nhĩpẽx anhỹr o apa rãhã ty. Anẽ.

Tã ra Tĩrtũm nhõ krĩ nyw kamã mẽ omnuj xàja amrakati kumrẽx. Nẽ Tĩrtũm mẽ kot mẽ pahpãnhã amnhĩrer xwỳnhja wa õ krĩ kamã pa ho pa jakamã mẽ pahte kamã mẽ papa xwỳnhjaja kot puj mẽ wa kãm tanhmã amnhĩ nhĩpẽx to ho ri papa.

⁴ Kot puj mẽ tã pano ho Tĩrtũm pumunh o papa. Hãmri nhũm te mẽ pahpiitã mẽ panhõkrã hã amnhĩ nhĩxi nhĩpẽx pyrãk o mẽ panhĩpẽx.

⁵ Nẽ kot puj mẽ Pahi Maati Tĩrtũm nhĩrã kamã ri papa nẽ axte myyti nhĩrã ho presija hkõt nẽ. Kõja kamãt hapẽx pa pu mẽ axte kanẽ ho presija hkõt nẽ. Nẽ Jejus nhĩhkõ hã hirã kamã mẽmoj to amnhĩptàr rãhã ho papa.

Jejus tokyx akupỹn wrỳk ã harẽnh Apokarip 1.1-3

⁶ Tã nhũm Tĩrtũm kapēr o mẽ wrỳk xwỳnh kot ixto mõr xwỳnhja axte inhmã kapēr nẽ inhmã:

—E nã ãm hãmri na ixte amã mẽmoj piitã harẽnh xwỳnhja. ãm hãmri na. Jakamã kwa kêt ka arĩ hã ano htỳx rãhã ho apa. Amnepẽm Tĩrtũmja ỹ hã mẽ kapēr o pa xwỳnhjẽ mã tanhmã kapēr o amnhĩrĩt to. Kot tanhmã amnhĩ nhĩpẽx to hkukamã mẽ kãm ho amnhĩrĩt nhũm prem kuma nẽ õ

ri ma hkwỳjẽ mã harẽnh o ri mẽ hkõt pa. Tã ra mẽ hpãnhã pa mẽ awỳr inhmẽ. Mẽ ate Tĩrtũm mã tanhmã amnhĩ to ho apa xwỳnhjẽ mã ixte ja jarẽnh kaxyw Pahihti Tĩrtũmja mẽ awỳr inhmẽ pa wrỳ. Nã kõja mẽmoj tokyx ã amnhĩ nhĩpẽx anẽ. ⁷ Na pre Jejus mẽ amã amnhĩ jarẽnh o: “Kot paj tokyx akupỹm mẽ awỳr wrỳ. Tã mẽ ate ijarẽnh ã kagã kamã harẽnh nẽ mar nẽ amnhĩ kaxyw hkõt ajamãxpẽr nẽ hkõt amnhĩ nhĩpẽx xwỳnhjaja kot kaj mẽ akĩnh nẽ ri apa.” Anhỹr o amnhĩ jarẽ. Anẽ.

⁸ Nã ixpẽ Juãw na pa pre ã inhno ho mẽmoj pumunh anẽ. Hãmri nẽ omunh pa nẽ Tĩrtũm kapēr o wrỳk xwỳnh kot inhmã harẽnh xwỳnhja kutã ixkõn krã ho ixtẽm nẽ inhỹr kaxyw. Nom nhũm amnhĩ nẽ inhmã kapēr kãm hihtỳx nẽ inhmã:

⁹ —Kwa nã ri ã inhĩpẽx anhỹr kêt nẽ. ãm Tĩrtũm pix kutã na pu htem ã amnhĩ nhĩpẽx anẽ. Apyrã nẽ ixpẽ Jejus kwỳ kẽnã. Na pa hte apyrã nẽ ỹ hã tanhmã amnhĩ nhĩpẽx to ho ixpa. Nẽ mẽ apyrã nẽ kapēr ã kagã hkõt pix mã amnhĩ nhĩpẽx. Na pu htem axpẽn kutã pahkõn krã ho parõrõk kêt nẽ. ãm Tĩrtũm pix kutã na pu htem ã amnhĩ nhĩpẽx anẽ.

¹⁰ —E ã ate mẽmoj pumunh nẽ mar anhỹr xwỳnhja kõja tokyx ã amnhĩ nhĩpẽx anẽ. Jakamã kwa kêt ka akwỳjẽ pẽ ho apimxur kêt nẽ. Piitã hã kagã hpa kêt mẽ kamã harẽ nẽ kuma nẽ mẽmoj kot ã amnhĩ nhĩpẽx anhỹr mã xwỳnhja piitã hkukamã harẽnh ma. Kõja tokyx mẽmoj ã amnhĩ nhĩpẽx anẽ.

¹¹ —Jakamã kwãr mẽ mãmrĩ piitã tanhmã kãm amnhĩ nhĩpẽx to ho pa hprãm xà hkõt amnhĩ nhĩpẽx o pa. Kwãr mẽ mẽ kot amnhĩ tomnuj xwỳnhjaja ã amnhĩ anhĩpẽx anhỹr o pa. Nẽ kwãr mẽ kot tanhmã kapēr punuj to xwỳnhjaja mãmrĩ ã amnhĩ nhĩpẽx anhỹr o pa. Nẽ kwãr mẽ kot tãm amnhĩ nhĩpẽx o ri mẽ pa xwỳnhjaja mãmrĩ Tĩrtũm kõt pix mã ri tãm amnhĩ nhĩpẽx o pa. Anẽ.

Nhũm pre ã kaxkwa hwỳr ixto àpir xwỳnhja inhmã kapēr anẽ.

¹² Hãmri nhũm hpãnhã Jejus tãm inhmã kapēr nẽ inhmã:

—E kot paj tokyx akupỹm mẽ awỳr wrỳ. Nẽ akupỹm põj hãmri nẽ mẽ kot amnhĩ tomnuj o mẽ pa xwỳnhjaja pa ja mỳrapẽ ma mẽ

kot amnhĩ xà htỳx kamã hamak tũm xàta wỳr mẽ rēnh pa. No mẽ kot ixkôt amnhĩ nhĩpêx xwỳnhjaja kot paj akupỳn inhõ krĩ hwỳr amnhĩ kôt mẽ ho api.

¹³—Ně ixrãhãã xwỳnh na pa. Amnepê mã kormã mẽmoj kêt ri na pa pre ra ixrãhãã. Ně koja nhỹrmã mẽmoj piitã akupỳm hapêx pa arĩ ixrãhã mẽ ixpa ho ixpa.

¹⁴—Ně Tĩrtũm kot mẽ anê mẽ ate amnhĩ tomnuj kuhõnh par xwỳnhjaja kot kaj mẽ amex kumrêx mẽ apa ho apa. Ně akĩnh mẽ ajamakêtkati mẽ ri atỳx apa ho apa. Te ho mẽ kot amnhĩ xê kahõnh mẽ mex jagiênh mẽ ri hã pata pyrãk. Koja Tĩrtũm mẽ amã anê ka mẽ ajamakêtkati mẽ õ krĩ hwỳr agjê mẽ kamã ri amex kumrêx mẽ ri apa ho apa. Ně kamã mẽmo pĩ xõ mẽ kot kur mẽ htĩr tũm mẽ pa mã xwỳnhhta wỳr mra mẽ amnhĩm ô rê mẽ hkur o ri apa. Ra mẽ ate Jejus kôt amnhĩ xunhwỳr jakamã kot kaj mẽ axãmnhĩx hwỳr mra mẽ amnhĩm hkwỳr rê mẽ hkur o ri apa. Kot kaj mẽ ã amnhĩ nhĩpêx anê.

¹⁵—Nom mẽ kot amnhĩ tomnuj o mẽ pa xwỳnhjaja koja mẽ akĩnhã inhõ krĩ hwỳr gjêx kêt mẽ. Mẽ kot ri mẽ y ho mẽ pa xwỳnhjaja. Ně mẽ kot nhãm ri mēnijê ho amnhĩkati ho mẽ pa xwỳnhjaja. Ně mẽ kot ri mẽ hpar o mẽ pa xwỳnhjaja. Ně mẽ kot ri sãnti nhĩpêx o te Tĩrtũm nhĩpêx pyrãk o mẽ pa xwỳnhjaja. Ně mẽ kãm ri hêx prãm o ri mẽ pa xwỳnhjaja. Koja mẽ akĩnhã inhõ krĩ hwỳr pa hkêt mẽ.

¹⁶—E Juãw. Nà ixpê Jejus na pa awỳr ixkapêr o mẽ wrỳk xwỳnhhta mẽ. Kot ixkwỳjê kaxyw amã ixkapêr jarênh kaxyw. Ixpê Tawi pãr krax na pa. Te ixpê arĩgro hkôt kanhêti hpôk rax kot arĩgro ho mõi ã ho amnhĩrit xwỳnhhta pyrãk. Anê.

Nhũm pre ã Jejus inhmã kapêr anê. ¹⁷Tĩrtũm Karõ mẽ Jejus kwỳjaja na htem ã Jejus kot amnhĩ jarênh anhỹrja ma mẽ hkĩnh mẽ. Ně kãm kapêr o:

—Hêxta waa mẽ. Kwa amnhĩm anojarêt mẽ tokyx akupỳn mẽ ixwỳr wrỳ Pahihti. Pa mẽ tokyx ã amnhĩ nhĩpêx anhỹr o ri war akôt ixpa. Anê.

Ně mẽ ate ja mar xwỳnhjaja kêt ka mẽ urãk mẽ ã kãm akapêr anê.

Ně te mẽ amã kôr mẽ ri mẽ apa pyrãk xwỳnhjaja kêt ka mẽ te Jejus wỳr amrar

ně õ gô ho akôm pyrã mẽ hkôt amnhĩ xunhwỳ. Te Jejus amarĩ mẽ pamã õ gô nhõi pyrãk o mẽ panhĩpêx pu mẽ hkôt amnhĩ xunhwỳ mẽ ra pahpê pahĩr tũm mẽ papa mã xwỳnh. Hãmri mẽ amnhĩ pãnhã tanhmã kãm amnhĩrer to hkêt mẽ.

Nhỹrmã mẽmoj nyw par ã harênh jatur xà

¹⁸ E ixpê Juãw na pa Jejus nhỹ hã mẽ amã mẽmoj tanhmã kot amnhĩ nhĩpêx to hkukamã ã mẽ amã hã kagà anê. Tã kwa mẽ o kora. Kêr ka mẽ atõ amnhĩ krã hkôt ri ajamxpêr o te ho ja pyrã mẽ hijuk ri axte mẽmoj nhĩpêx kêt mẽ. ãm kwarĩ ho kwarĩ. Kot ka mẽ atõ anê nhũm Tĩrtũm ja hã apumu mẽ kagàja kamã tanhmã mẽ hipêx kati hto xàta o tanhmã anhĩpêx to ka arĩ amnhĩ pumu.

¹⁹ Rỳ ka mẽ atõ kagà kamã harê mẽ ama mẽ tanhmã ajamxpêr to mẽ ajamxpêr o:

—Nà ja kot anhỹr kêt. Na mẽ ãm harênh o hêx. Kot paj kuma mẽ ãm kuma.

Anhỹr o ajamxpêr japêr. Hãmri nhũm Tĩrtũm amnhĩ tã ama mẽ kagà mexta kamã kot tanhmã mẽ ho mex toja o ato mex kêt mẽ. Ka õ krĩ hwỳr axãpir mẽ mẽmo pĩ xõ mẽ kot hkur mẽ htĩr tũm mẽ pa kaxyw mã xwỳnhhta ka amnhĩm hõ hyr mẽ hkrêr kêt mẽ. Jakamã e kwa mẽ o kora. Kêr ka mẽ kagàta kamã ã mẽmoj kot amnhĩ nhĩpêx anhỹr mã xwỳnhhta jarênh ma mẽ aprĩ hã piitã hkôt ajamxpêr tỳx rãhã ho ri apa.

²⁰ E Jejus kot inhmã mẽmoj kukamã tanhmã ujarênh to xwỳnhhta na pre inhmã amnhĩ jarênh o: “Kot paj tokyx akupỳn mẽ awỳr wrỳ.” Anê. ãm hãmri na pre ã amnhĩ jarênh anê. Koja tokyx akupỳn mẽ pahwỳr wrỳ hãmri nhũm mẽmoj piitã mex o mex.

Jakamã kwa kêt ka amnhĩm anojarêt mẽ tokyx akupỳn mẽ ixwỳr wrỳ Pahihti Jejus.

²¹ Ně ixpyrã mẽ mẽ apê Tĩrtũm krajaja na pa hte mẽ ato Pahihti Jejus wỳr rãhã ho ri ixpa mẽ kãm:

—Kwa akwỳjê pumu mẽ mẽ kutã anojarêt rãhã ho ri apa Pahihti. Anê.

E mẽ ujarênhja na hapêx. Ixpê Juãw na pa Jejus kot inhmã tanhmã ujarênh toja pa amnhĩ xõ ri mẽ amã hã kagà hpa. E na hapêx.